

nibak awaiphon, watee po teu allah geucebta alam seumeusta, nibak awaiphon, watee po teu allah ... alam seumeusta, atawa watee po teu allah phon that geucebta alam seumeusta, atawa nibak awaiphon po teu allah geucebta alam seumeusta. bumoe nyoe gohlom meurupa, dan mantong keng keueg hana meuteuntee. laot luwah nyang meualon, habeh teutob peue-peue nyang na, dan saboh nyan seupot hana deuh sapeue, teuma kuasa po teu allah meugrak-grak atueh ie. po teu allah meufeureuman, "beujeuet kheueh trang!" laju na trang. po teu allah galak that watee geukalon nyan. laju geupeu aseng trang nyan nibak seupot, dan laju geuboh nan trang nyan "uroe" dan seupot nyan "malam". oh habeh malam, jiteuka kheueh beungoh. nyan kheueh uroe nyang keuphon. oh lheueh nyan po teu allah meufeureuman, "beujeuet kheueh saboh kubah mangat jeuet teuweuek ie nyan dua bagian, dan teuteun ie nyan lam dua boh tempat nyang aseng-aseng," laju hainyan pih teujadi. meunan kheueh po teu allah geupeu jeuet kubah nyang teupeu aseng ie nyang na dimiyueb kubah nyan nibak ie nyang na di atueh nyan. kubah nyan geuboh nan "langet". malam habeh jiteuka kheueh beungoh, nyan kheueh uroe nyang keudua. oh lheueh nyan po teu allah meufeureuman lom, "bah kheueh ie nyang na dimiyueb langet ji ile ubak saboe tempat, sampoe tanoh deuh teukalon." teuma hainyan pih teujadi. po teu allah geuboh tanoh nyan "darat", dan ie nyang meugumpoi nyan geuboh nan "laot". dan po teu allah galak that watee geukalon hai nyan. po teu allah meufeureuman lom, "bah kheueh tanoh jipeuteubiet meubagoe rupa seunaman, na kheueh jeuneuh nyang jipeuhase aneuk dan jeuneuh nyang jipeuhase boh-boh kayee." teuma hainyan pih teujadi. meunan kheueh jeuet jih, tanoh laju jipeuteubiet meubagoe rupa seunaman. dan po teu allah galak geukalon hai nyan. malam habeh jiteuka kheueh beungoh. nyan kheueh uroe nyang keuhe. oh lheueh nyan po teu allah meufeureuman lom, "beuna kheueh meubagoe rupa beunda trang di langet keu jipeutrang bumoe, keu jipeuaseng uroe ngon malam, dan keu teutunyok saat pon uroe, thon, dan uroe raya agama." teuma hainyan pih teujadi. meunan kheueh po teu allah geupeujeuet bandua boh beunda trang nyang rayeuk, atranyan na kheueh mata uroe nyang jikuasa uroe, dan buleuen keu jikuasa malam; seulaen nibak nyan geupeujeuet teuma meubagoe rupa bintang. po teu allah laju geukeubah beunda-beunda trang nyan atueh langet keu jipeutrang bumoe, keu jikuasa uroe ngon malam, dan keuteupeu aseng uroe trang nibak seupot. dan po teu allah galak that watee geukalon hainyan. malam habeh, jiteuka kheueh beungoh. nyan kheueh uroe nyang keupeuet. oh lheueh nyan po teu allah meufeureuman, "bah kheueh lam ie beuna meubagoe rupa makhluk udeb, dan di udara meubagoe rupa cicem po." teuma po teu allah laju geucebta beulatang-beulatang rayeuk nyang udeb di laot, dan mubagoe jeuneuh makhluk nyang udeb lam ie, meunan cit meubagoe jeuneuh cicem. dan po teu allah galak that watee geukalon hainyan. po teu allah geubri beureukat ubak mandum nyan deungon cara geubri peurintah ubak makhluk nyang

udeb lam ie mangat meu aneuek cucoe dan peunoh lam ie laot, dan ubak meubagoe cicem mangat meutamah le. habeh malam teuka kheueh beungoh. nyan kheueh uroe nyang keulimong. oh lheueh nyan allah meufeureuman lom, "bah kheueh bumoe jipeuna mubagoe jeuneuh beulatang darat, nyang seu-tet dan nyang kleut, nyang rayeuk dan nyang ubit." dan hainyan pih teujadi. meunan kheueh po teu allah geukalon mandum nyan dan gobnyan galak geukalon nyan. oh lheueh nyan po teu allah meufeureuman lom, "jinoenyoe tanyoe tapeujeut manusia nyang teuma jeuet lagee geutanyoe dan saban lagee geutanyoe. jihnyan teuma jikuasa atueh mandum eungkot, mandum cicem, dan banmandum beulatang nyang laen, bah kheueh nyang seu-tet meunan cit nyang kleut, bah kheueh nyang rayeuk meunan cit nyang ubit." meunan kheueh po teu allah geucebta manusia, dan geupeujeuet manusia nyan lagee gobnyan keudroe. geucebta awaknyan agam ngon inong. oh lheueh nyan geubri beureukat ubak awaknyan deungon geupeugah lagee nyoe "meu aneuek cucoe kheueh nyang le, mangat aneuek cucoe gata jipeupeunoh atueh bumoe nyoe dan jikuasa bumoe nyoe. gata ulon bri tugaih gata useuha banmandum eungkot, mandum cicem, dan banmandum beulatang laen nyang kleut. keupeunajoh gata ulon bri keu gata meubagoe jeuneuh seunaman nyang jipeuhase mubagoe jeuneuh pade dan boh-boh kayee. teuma ubak mandum cicem dan beulatang kleut nyang laen, ulon bri naleung dan sinaman nyang meunon geupeugah peunajoh jih." teuma hainyan pih teujadi. po teu allah geukalon peue-peue mantong nyang ka geupeujeuet nyan, dan gobnyan galak lumpah na. malam habeh dan teuka kheueh beungoh. nyan kheueh uroe nyang keunam. teuma seulesoe kheueh geucebta banmandum alam seumeusta. bak uroe nyang keutujoh po teu allah ka geupeuseulesoe banmandum buet geuh nyan, oh lheueh nyan laju gobnyan geupioh. teuma geubri kheueh beureukat keu uroe nyang keutujoh nyan dan geupeujeuet uroe nyan sibagoe uroe nyang khusus, sabab bak uroe nyan allah geupioh oh ka lheueh geupeuseulesoe mandum buet gobnyan. nyan kheueh riwayat teucebta alam seumeusta. watee tuhan allah geupeujeuet alam seumeusta, gohlom na bijeh nyang ka meutarok dan gohlom na seunaman atueh rhueng bumoe, sabab allah gohlom geupeutreun ujeuen dan gohlom na ureung nyang pubuet tanoh nyan. teuma ie ka jipeuphon teubiet nibak miyueb dan laju ji-ile atueh bumoe. oh lheueh nyan tuhan allah laju geucok bacut tanoh, tanoh nyan laju geupeuget lagee sidroe manusia, oh lheueh nyan laju geuyueb nafah jih lam ruhueng idong mangat udeb; oh lheueh nyan udeb kheueh manusia nyan. oh ka lheueh nyan tuhan allah geupeuget teuma taman di eden, disiblahi utimu, lam taman nyan laju geukeubah manusia nyang ka lheueh geupeujeuet nyan. tuhan allah laju geupeutimoh meubagoe rupa bak kayee nyang get-get, nyang jipeuhase boh kayee nyang get. bak teungoh taman timoh kheueh bak kayee nyang teuhari udeb, dan bak kayee nyang jibri peungeutuhan keuhai nyang brok ngon nyang jeuhet. na saboh krueng ie ji-ile nibak eden,

jipeubasah taman nyan; dan diluwa eden krueng nyan meucabeueng peuet boh cabeueng. nyang phon nan jih pison; krueng nyan ji-ile jikeulileng tanoh hawila. nibak teupat nyan na meuteume meuh aseuli meunan cit deungon reumpah-reumpah nyang mangat bee nyang payah that meuteume, meunan cit deungon batee-batee peumata. krueng nyang keudua nan jih gihon; ie jih ji-ile jikeulileng tanoh kus. krueng nyang keulhee nan jih tigris ji-ile siblahi utimu asyur. dan krueng nyang keu peuet nan jih effrat. oh ltheuh nyan tuhan allah laju geukeubah manusia nyan di taman eden mangat jipeubuet dan jipeulara taman nyan. allah meufeureuman ubak manusia nyan, "gata jeuet gata pajoh peue-peue mantong boh kayee nyang na lam taman nyoe, nyang han jeuet gata pajoh na kheueh nibak kayee nyang jibri peungeutahuan keuhai nyang get dan nyang jeuhet. boh kayee nyan hana jeuet gata pajoh; meunyoee gata pajoh cit, gata pasti mate bak uroe nyan cit teuma." oh ltheuh nyan tuhan allah meufeureuman lom, "hana get manusia udeb keudroe. ulon teuma lon peujeuet rakan keujih nyang sisuai mangat jeuet keupeubantu jihnyan." teuma gobnyan laju geucok tanoh bacut dan geupeuget laju mubagoe jeuneuh beulatang darat dan beulatang nyang po di manyang. banmandum nyan geuba le po teu allah ubak manusia nyan mangat geukalon peue nan jih nyang get teuboh keu nan beulatang-beulatang nyan. nyan kheueh asaiphon beulatang di darat dan di manyang ka meuteume nan jih maseng-maseng. meunan kheueh manusia nyan geubri nan ubak beulatang bah kheueh nyang na udeb di darat meunan cit nyang udeb di manyang. teuma lamkawan beulatang nyan hana meusaboh pih nyang jeuet geucok keurakan dan nyang jeuet keu peubantu gobnyan. dan tuhan allah laju geupeueh manusia nyan sampoe teunget lagee ureueng pangsan, teungoh mangat that teunget manusia nyan, tuhan allah laju geupeuteubiet sikrek tuleueng rusok manusia nyan, inciek luka nyan laju geutob ngon asoe. nibak tuleueng rusok nyan le tuhan allah laju geupeujeuet sidroe ureueng inong, oh ltheuh nyan laju geuba le allah ubak manusia nyan. dan jipeugah kheueh le manusia nyan, "nyoe pat jih, ureueng nyang saban lagee ulon – tuleueng nibak tuleueng lon, dan asoe nibak asoe lon. ulon boh nan jihnyoe inong, sabab jihnyan teucok nibak ureueng agam." nyang kheueh sabab jih ureueng agam jitinggai ma ngon yah jih, dan meusaboh ngon peurumoh jih, laju bandua jihnyan ka jeuet keusaboh. ureueng agam ngon ureueng inong nyan teulon, teuma nibak awaknyan hana meurasaa malee. uleue na kheueh beulatang nyang paleng lisek meunyoee teubandeng ngon beulatang-beulatang laen nyang geucebta le tuhan allah. uleue nyan jitanyong bak ureueng inong nyan, "peu kheueh biet-biet allah geutam gatanyoe mangat bek awaknyoe pajoh mubagoe rupa boh kayee nyang na lam taman nyoe?" "kamoe jeuet kamoe pajoh banmandum boh kayee nyang na lam taman nyoe," jaweueb ureueng inong nyan, "nyang han jeuet kamoe pajoh na kheueh boh bak kayee nyang na bak teungoh-teungoh taman nyoe. allah geutam bak kamoe mangat bek kamoe pajoh boh kayee nyan, bek teuk an kamoe pajoh

boh kayee nyan kamoe mat mantong pih han jeuet; meunyoee hainyan teutab kamoe peubuet, kamoe teuma mate." jijaweueb le uleue nyan, "nyan hana beutoi; gatanyoe hana mate. allah geupeugah lagee nyang sabab gobnyan geuteupeue meunyoee gata pajoh cit boh kayee nyan, pikeran gata laju teuhah; gata teuma jeuet lagee po teu allah dan gata tateupeue peue nyang get dan peue nyang jeuhet." ureueng inong nyan laju jikalon bahwa bak kayee nyan lagak that, dan boh kayee nyan leumah jih mangat that meunyoee teupajoh. dan laju teupike lam ate jih pakriban get jih meunyoee jeuet keu ureueng arif. ngon sabab nyan laju jipot boh kayee nyan, laju jipajoh, jibri cit ubak lakoe jih, dan di po lakoe pih laju jipajoh. hana treb oh ka ltheuh jipajoh boh kayee nyan, pikeran awaknyan teubuka dan awaknyan baro kheueh jitee droe bahwa awaknyan teulon hana meupeukayan. sabab nyan kheueh awaknyan laju jitob tuboh droe jih maseng-maseng ngon on ara nyang ka awaknyan manyuem. oh ka seupot uroe teudeungoe bak awaknyan tuhan allah teungoh geujak-jak lam taman, dan awaknyan pih laju jimusom dilikot-likot bak kayee mangat bek geungieng le tuhan. dan tuhan allah laju geutawok ubak ureueng agam nyan, "dipat kheueh gata?" jijaweueb le ureueng agam nyan lagee nyoe, "na ulon deungoe droeneuh na lam taman; ulon teumakot, nyang kheueh sabab jih ulon musom sabab ulon teulon hana meupeukayan." soe nyang peugah bak gata bahwa gata teulon?" allah geutanyong lom, "peu kheueh ka gata pajoh boh kayee nyang ulon tam bak gata nyan?" jijaweueb le ureueng agam nyan, "ureueng inong nyang droeneuh bri keu ureueng nyang peungon ulon, jih kheueh nyang bri boh kayee nyan keu ulon, dan laju lon pajoh boh kayee nyan." tuhan po teu allah laju geutanyong bak ureueng inong nyan, "keupeue gata peubuet lagee nyan?" jaweueb ureueng inong nyan, "ulon ka jipeungeut le uleue, sampoe ulon pajoh boh kayee nyan." oh ltheuh nyan tuhan allah geupeugah ubak uleue nyan, "gata teuma teuhukom sabab buet gata nyan; nibak beulatang peue mantong nyang laen, nyang keunong kutok na kheueh gata nyang haroh gata tanggong kutokan nyoe: phon saat nyoe gata teuma gata meu-eue ngon pruet gata, dan gata pajoh abee siumu udeb gata. gata ngon ureueng inong nyan sabe meumusoh, keuturonan inong nyan dan keuturonan gata sabe jimeumusoh. keuturonan inong nyan teuma jipeurumok ulee gata, dan gata teuma gata kab tumet awaknyan." dan tuhan laju meufeureuman bak ureueng inong nyan, "ulon teuma lon tamah saket ubak gata watee gata mume dan sampoe bak watee gata peulahe aneuek. teuma bahpi lagee nyan, gata teutab mantong beureuhi keu lakoe gata, dan gata teutab gata tundok ubak lakoe." dan ubak ureueng agam nyan tuhan meufeureuman lagee nyoe, "sabab gata tadeungoe peue nyang jipeugah le peurumoh gata boh kayee nyang ka ulon tam bek gata pajoh ka gata pajoh. sabab buet gata nyan, teukutok kheueh tanoh. gata haroh meukeureuja brat siumu udeb gata mangat tanoh nyoe na hase keu peunajoh gata. tamah meuduro teuma jipeuhase le tanoh nyoe keu gata, dan seunaman nyang timoh keudroe teuma

jeuet keupeunajoh gata. gata teuma tamubuet ngon reuoh reuah sampoe meureuoh keu gata peusaneut tanoh nyoe sampoe na hase, sampoe gata gisa ubak tanoh, sabab nibak tanoh gata teupeujeuet. gata teupeujeuet nibak tanoh dan teuma tawoe ubak tanoh." nabi adam geuboh nan peurumoh geuh nyan siti hawa, kareuna ureueng inong nyan jeuet keu ma banmandum umat manusia. dan tuhan allah laju geupeuget peukayan nibak kulet beulatang keu nabi adam dan siti hawa, oh lheueh geupeuget peukayan nyan laju geupeusok bak awaknyan. tuhan allah meufeureuman, "jinoenyoe manusia ka jeuet lagee geutanyoe dan kana ieuleume peungeutahuan keuhai nyang get dan nyang jeuhet. ngon lagee nyan peureulea that teutam bek jipajoh boh kayee nyang teubri udeb, mangat jihnyan hana udeb siumu masa." dan tuhan allah laju geu use manusia nyan nibak lam taman eden dan geuyue laju ubak awaknyan mangat jimubuet bak tanoh teupat asai jih nyan. oh lheueh nyan, disiblahi utimu taman nyan nibak keue pintoe rot tamong, tuhan allah laju geukeubah kerub-kerub, dan sikrek peudeueng meu apui nyang meuputa jeub-jeub sagoe, keu jijaga rot jak ubak bak kayee nyang jibri udeb nyan. deungon lagee nyan, hana meusidroe pih jeuet jitamong dan jipeurab bakbinea bak kayee nyan. nabi adam laju geumeusituboh ngon siti hawa, peurumoh geuh nyan, dan inong nyan pih mume. oh trok bak uroe laju lahe sidroe aneuek agam dan laju geupeugah le nabi adam, "ngon tulung tuhan ulon ka meuteume sidroe aneuek agam." dan laju geuboh nan aneuek geuh nyan kain. oh lheueh nyan siti hawa geupeulahe lom sidroe teuk aneuek agam, geuboh nan aneuek nyan habel. habel jeuet keutukang rabe bubiri, seudangkan kain jeuet keusidroe peutani. na meupadub watee teuma oh lheueh nyan kain laju jicok siladum nibak hase seunaman jih jijak peuseumah laju ubak tuhan. dan habel jicok teuma aneuek bubiri nyan tuha nyang na lam kawan bubiri jih nyan, laju jisie, laju jipeuseumah jeumba nyang paleng get ubak tuhan. tuhan galak that ubak habel dan peue nyang ka jipeuseumah nyan, teuma nyang jipeuseumah le kain geutulak. kain beungeh lagoena, ie muka jih seudhok that. dan meufeureuman kheueh tuhan ubak kain, "pakon gata beungeh? dan pakon ie muka gata seudhok? meunyo gata tapeubuet nyang jroh, pasti gata teuseungeh; teuma meunyo gata tapeubuet jeuhet, desya ka jipreh-preh jikeuneuk tamong lam ate gata. desya jikeuneuk kuasa droe gata, teuma gata haroh gata peutaloe jihnyan." dan kain laju jipeugah ubak habel, adoe jihnyan, "jak geutanyoe tajak u lampoh." watee awaknyan ka trok keunan, kain laju jiseurang dan jipoh mate habel adoe jih nyan. tuhan meufeureuman ubak kain sira geutanyong, "hei kain, dipat habel adoe gata nyan?" jijaweeb le kain, "hana lon tuho. peu kheueh haroh lon jaga adoe lon nyan?" dan tuhan meufeureuman lom, "keupeue gata peubuet hai nyang lumpah laknat nyan? darah adoe gata jimeuhoi ulon nibak tanoh, lagee su ureueng nyang klik jilakee balaih. gata ka teukutok sampoe hana jeuet le gata mubuet bak tanoh. tanohnyan ka jiuet darah adoe gata, siulah-ulah jipeuhah babah jih keu jiteurimong darah adoe gata watee gata poh mate

adoe gata nyan. meunyo gata tapula seunaman, bak tanoh nyang gata pula nyan hana jibri hase sapeue; gata teuma jeuet keu ureueng peungeumbara dan hana teupat tinggai ateuh rhueng bumoe nyoe." teuma jipeugah le kain ubak tuhan "hukoman nyang droeneueh peurhot ateuh lon nyan brat lumpah na, ulon hana ek lon tanggung hukoman nyang brat nyan. droeneueh ka neu-use ulon nibak tanoh nyoe, jioh nibak droeneueh. ulon teuma jeuet keu ureueng peungeumbara nyang hana teupat tinggai ateuh rhueng bumoe, dan ulon teuma jipoh mate le soe mantong nyang meurumpok ngon ulon." teuma tuhan meufeureuman lagee nyoe, "hana. meunyo gata jipoh mate, sibagoe tungbila jih, tujoh droe ureueng jitamong cit keunan dan ureueng nyang poh mate gata nyan teupoh mate cit teuma." oh lheueh nyan tuhan geuboh tanda ubak kain mangat soe mantong nyang meurumpok ngon kain nyan bek jipoh mate si kain nyan. oh lheueh nyan jijak kheueh kain dikeue tuhan laju jitinggai bak tanoh nyang nan jih, "tanoh peungeumbara" siblahi utimu taman eden. kain dan peurumoh jih laju meu aneuek sidroe aneuek agam nyang jiboh nan henokh. oh lheueh nyan kain laju jipeudong saboh banda dan jiboh nan banda nyan meunurot nan aneuek jih. henokh jimeu aneuek teuma nan jih irad. irad ji meu aneuek mehuyael. mehuyael jimeu aneuek metusael, dan metusael na kheueh ayah si lamekh. lamekh peurumoh jih dua droe, ada dan zila. ada jipeulahe aneuek yabal, dan keuturonan yabal nyan kheueh bansa nyang peulara beulatang peulara dan teupat tinggai jih lam khimah. adoe jih nan jih yubal, dan keuturonan yubal na kheueh peumeun musik keucapi ngon suleng. zila jipeulahe teuma aneuek tubal-kain, dan keuturonan jihnyoe nyang peuet mubagoe rupa peukakaih nibak teumaga dan beuso. adoe nyang inong tubal-kain nan jih naama. jipeugah kheueh le lamekh ubak bandua droe peurumoh jih, "ada dan zila, deungoe kheueh nyoe! sidroe ureueng muda ka lon poh mate sabab ka jiheuntam ulon. meunyo tujoh droe teupoh mate sibagoe tungbila ka jipoh mate kain, teuma tujoh ploh tujoh droe teupoh mate meunyo ulon jipoh mate." nabi adam dan peurumoh gobnyan na lom geumeu aneuek sidroe teuk aneuek agam. geupeugah le siti hawa, "allah ka geubri ubak ulon aneuek agam sibagoe geunantoe habel, nyang ka jipoh mate le kain." sabab nyan siti hawa geuboh nan aneuek geuh nyan set. set na teuma aneuek agam nyang jiboh nan enos. bak jamen nyan kheueh le manusia jipeuphon kheun tuhan nibak watee jiseumah. nyoe kheueh dafetuar keuturonan nabi adam. bak watee allah geucebta manusia, geupeujeuet awaknyan lagee allah keudroe. geucebta awaknyan agam ngon inong. geubri beureukat ubak awaknyan dan geuboh nan awaknyan "manusia". watee nabi adam na meu-umu 130 thon, gobnyan na lom geumeu aneuek nyang agam nyang ruman jih saban that lagee gobnyan, dan aneuek nyan geuboh nan set. oh lheueh nyan nabi adam mantong udeb 800 thon teuk dan na lom geumeu aneuek nyang laen-laen. gobnyan meuninggai donya oh ka meu-umu 930 thon. watee set ka na umu 105 thon, gobnyan na geumeu aneuek nyang agam, geuboh

nan aneuk nyan enos. oh ltheuh nyan set mantong na udeb 807 thon teuk dan na geumeu aneuk lom aneuk-aneuk nyang laen. gobnyan meuninggai donya oh ka meu-umu 912 thon. watee enos ka meu-umu 90 thon, gobnyan na geumeu aneuk nyang agam, geuboh nan aneuk nyan kenan. oh ka ltheuh nyan enos mantong udeb 815 thon teuk dan na geumeu aneuk lom aneuk-aneuk nyang laen. gobnyan meuninggai donya watee ka na umu 905 thon. watee kenan ka meu-umu 70 thon, gobnyan na geumeu aneuk nyang agam, geuboh nan aneuk geuh nyan mahalaleel. kenan mantong udeb 840 thon teuk dan lom geumeu aneuk nyang laen-laen. gobnyan meuninggai donya oh ka meu-umu 910 thon. watee mahalaleel ka meu-umu 65 thon, gobnyan na geumeu aneuk nyang agam, geuboh nan aneuk nyan yared. oh ka ltheuh mahalaleel mantong na udeb 830 thon teuk dan na geumeu aneuk lom nyang laen-laen. gobnyan meuninggai donya oh meu-umu 895 thon. watee yared ka na meu-umu 162 thon, gobnyan na geumeu aneuk nyang agam, geuboh nan aneuk nyan henokh. oh ltheuh nyan yared mantong na udeb 800 thon teuk dan na geumeu aneuk lom nyang laen. gobnyan meuninggai watee ka meu-umu 962 thon. watee henokh ka na umu 65 thon, gobnyan na geumeu aneuk nyang agam geuboh nan metusalah. oh ltheuh nyan henokh na udeb lam peutobatan gobnyan ngon po teu allah 300 thon treub jih. gobnyan na geumeu aneuk lom nyang laen dan gobnyan trok umu sampoe 365 thon. sabab henokh sabe udeb rab that ngon po teu allah, gobnyan gadoh-gadoh sabab geucok le po teu allah. watee metusalah ka meu-umu 187 thon, gobnyan na geumeu aneuk nyang agam geuboh nan lamekh. oh ltheuh nyan metusalah mantong udeb 782 thon teuk dan na lom geumeu aneuk nyang laen. gobnyan meuninggai donya watee ka meu-umu 969 thon. bak watee lamekh ka meu-umu 182 thon, gobnyan na geumeu aneuk nyang agam. geupeugah le lamekh, "aneuk nyoe teuma jipeuphui geutanyoe watee takeureuja brat ta catok tanoh nyang ka geukutok le tuhan." sabab nyan lamekh geuboh nan aneuk geuh nyan nuh. oh ka ltheuh nyan lamekh mantong na udeb 595 thon teuk. gobnyan na geumeu aneuk lom nyang laen, dan gobnyan meuninggai donya watee ka meu-umu 777 thon. oh ka na umu nuh 500 thon, gobnyan na geumeu aneuk lthee droe aneuk agam, nan-nan aneuk nyan na ktheueh sem, yafet, dan ham. watee manusia ka meutamah le dan ka meutabu bansigom donya, dan aneuk-aneuk inong ka na teupeulahe, 2 mahluk-mahluk ilahi geukalon bahwa aneuk-aneuk dara nyan lagak-lagak. laju jimeukawen ngon dara-dara nyang awaknyan galak. teuma meufeureuman ktheueh tuhan "ulon hana lon bri manusia udeb siumu masa; awaknyan mahluk fana, nyang haroh mate. phon saat nyoe umu awaknyan hana leubeh nibak 120 thon." bak jamen nyan, dan meunan cit oh ka ltheuh nyan, na ureueng-ureueng rayeuk badan lagee gogasi ateuhe rhueng bumoe. awaknyan keuturonan aneuk-aneuk dara manusia nyang meukawan ngon mahluk-mahluk ilahi. ureueng-ureueng rayeuk badan lagee gogasi

nyan na ktheueh pahlawan-pahlawan rayeuk dan ureueng-ureueng nyang paleng meusyeehu bak watee jameuen purbakala. tuhan geukalon padub na jeuhet-jeuhet jih ureueng-ureueng nyang na ateuhe rhueng bumoe nyoe; nyang jipike le pikeran awaknyan mandum na ktheueh nyang jeuhet-jeuhet. gobnyan pih ka teulah sabab ka geukeubab awaknyan ateuhe rhueng bumoe. gobnyan that-that keucewa, sampoe geupeugah lagee nyoe, "teuma ulon peupalo manusia nyang ka ulon cebta nyan, dan mandum cicem-cicem meunan cit beulatang nyang laen, sabab ulon teulah that ka ulon cebta awaknyan." teuma nabi nuh galak that bak ate tuhan. nyoe ktheueh riwayat nabi nuh. gobnyan na aneuk lthee droe dan ban lthee nyan aneuk agam, geuboh nan jih maseng-maseng sem, yafet dan ham. nabi nuh hana geupeubuet salah, dan gobnyan ktheueh sidroe ureueng nyang jroh nibak jamen nyan. gobnyan udeb saleh dan krab that ngon po teu allah. teuma meunye nyang laen banmandum jeuhet nibak mata po teu allah, dan buet-buet nyang keujam dipat mantong na. allah geukalon donya nyan dan nyang geukalon na ktheueh buet nyang jeuhet mantong, sabab mandum manusia jeuhet udeb jih. dan meufeureuman ktheueh po teu allah ubak nabi nuh, "ulon ka ltheuh lon cok keuputusan banmandum mahluk lon peubinasa. ulon teuma lon peuranab awaknyan meusajan ngon bumoe, sabab bumoe ka peunoh ngon buet nyang keujam nyang jipeubuet le awaknyan. peuet ktheueh saboh kapai kayee keu gata nyang kong ngon teuga; lam kapai nyan gata peuet meukama-kama, gata lapek laju ngon ter bah ktheueh nyang na didalam meunan cit dibagian luwa. kapai nyan haroh 133 metee panyang jih dan 22 metee luwah jih, 13 metee manyang jih. dan kapai nyan haroh gata boh bubong, dan rayeuk leung bubong ngon binteh 44 sentimete. kapai nyan gata peuet lthee boh tingkat, bak bineh jih gata peuet saboh pintoe. ulon teuma lon peutron ie raya keu lon peubinasa peue mantong mahluk nyang na udeb ateuhe bumoe. peue mantong nyang na ateuhe bumoe teuma mate, teuma meunye ngon gata ulon keuneuk peuna peujanjian. tamong ktheueh lam kapai nyan meusajan-sajan ngon peurumoh gata, dan aneuk gata meunan cit ngon peurumoh-peurumoh awaknyan. peutamong ktheueh lam kapai nyan saboh agam dan saboh inong nibak tieb-tieb jeuneh cicem dan beulatang nyang laen, mangat awaknyan hana rhot ubak binasa. meunan cit gata ba meubagoe rupa peunajoh keu gata dan keu beulatang nyang gata ba nyan." nabi nuh laju geupeubuet peue-peue nyang ka geupeurintah le allah ubak gobnyan. dan meufeureuman tuhan ubak nabi nuh, "ulon ka kungsieng keudroe bahwa gata ktheueh sidroe-droe nyang gata peubuet keuheundak ulon. dan gata tamong laju lam kapai nyan meusajan-sajan ngon banmandum keuluwarga gata. gata ba ktheueh tujoh boh judo tieb-tieb jeuneh cicem dan beulatang laen nyang haleu, meunye nyang hareuem seb sijudo mantong tieb-tieb jeuneh beulatang nyan. gata peubuet ktheueh banmandum nyan mangat tieb-tieb jeuneh beulatang nyan na nyang teupeusilishe nibak bala dan jeuet meunye cucoe lom ateuhe rhueng bumoe. tujoh uroe teuk ulon teuma lon peutron

ujeuen nyang hana pirang-pirang nyang treb jih sampoe peuet ploh uroe peuet ploh malam, mangat makhluk udeb nyang ka ulon cebta nyan habeh binasa." dan nabi nuh laju geupeubuet peue-peue nyang ka geupeurintah le tuhan ubak gobnyan. nabi nuh meu-umu 600 thon watee teujadi ie raya ateuh muka bumoe. nabi nuh ngon peurumoh gobnyan, meunan cit ngon aneuek-aneuek gobnyan dan peurumoh jih maseng-maseng, laju geutamong lam kapai nyan keu jipeuseulamat droe nibak ie raya. saboh agama dan saboh inong nibak tieb-tieb cicem dan beulatang laen – bah kheueh nyan nyang haleue meunan cit nyang hareuem – peutamong laju lam kapai nyan meusajan-sajan ngon nabi nuh, nyang sisuaih ngon peurintah allah. tujuh uroe oh lheueh nyan ie raya pih jiteuka habeh meurata bansaboh bumoe. bak watee nabi nuh meu-umu 600 thon, bak tanggai tujuh blaih buleuen dua, beukah kheueh bubena mata ie nyang na dimiyueb bumoe. banmandum pintoe ie nyang na dilanget habeh teubuka, dan ujeuen jitron treb jih peuet ploh uroe peuet ploh malam. bak uroe nyan cit teuma, nabi nuh dan peurumoh gobnyan laju geutamong lam kapai nyan meusajan ngon ban lhee droe aneuek gobnyan, sem, yafet dan ham meusajan ngon peurumoh-peurumoh awaknyan maseng-maseng. meusigoe ngon awaknyan teupeutamong teuma mubagoe jeuneh cicem dan beulatang laen, bah kheueh nyan seuiet meunan cit nyang kleut, nyang rayeuk meunan cit nyang ubit. saboh agama dan saboh inong nibak tieb-tieb jeuneh makhluk udeb jitamong lam kapai nyan meusigoe-sigoe ngon nabi nuh, lagee nyang ka geupeurintah le po teu allah ubak gobnyan. oh ka lھےueh banmandum nyan jitamong, tuhan laju geutob pintoe kapai. ie raya nyan hana putoh-putoh ji-ile bansaboh nyan nyang treb jih peuet ploh uroe, dan ie pih kamanyang that sampoe kapai ka meuapong. ie maken treb maken manyang sampoe kapai laju meuapong ateuh ie raya nyan. dan ie nyan hana putoh-putoh laju meutamah manyang, akhe jih bubena gunung nyang paleng manyang ka habeh lham. ie laju jiek akhe jih ka sampoe tujuh metee manyang jih diateuh pucak-pucak gunung. tuhan ka geupeubinasa bubena makhluk nyang udeb ateuh bumoe nyoe: manusia, cicem dan beulatang darat bah kheueh nyang ubit meunan cit nyang rayeuk. nyang hana binasa na kheueh nabi nuh dan banmandum nyang na meusajan ngon gobnyan lam kapai nyan. ie nyan hana surot-surot nyang treb jih sampoe 150 uroe. allah hana geutuwoe ubak nabi nuh meunan cit banmandum beulatang nyang na meusajan gobnyan lam kapai nyan. allah laju geupeulheueh angen sampoe angen nyan ka jipot dan ie pih ka jipeuphon surot. banmandum mata ie nyang dimiyueb bumoe dan banmandum pintoe ie nyang na dilanget laju geutob. ujeuen jipioh, dan ie raya pih maken jisurot. oh ka lھےueh na 150 uroe ie pih hana padubna manyang le. bak tanggai tujuh blaih buleuen tujuh, kapai nyan laju sok dan meusadeue bak saboh pucak gunung ararat. ie laju jisurot dan bak tanggai sa buleuen siploh, pucak-pucak gunung ka jipeuphon leumah teukalon. oh ka lھےueh peuet ploh uroe, nabi nuh laju geupeuhah

saboh tingkab bak kapai nyan, laju geupeulheueh saboh cicem gagak. cicem nyan hana jiwoe bak kapai teuma laju jipo keudeh keunoe sampoe ie raya ka habeh jisurot banmandum. oh lھےueh nyan nabi nuh geupeulheueh teuma saboh cicem mirah pati keu geuteupeueu peu kheueh beutoi ie nyan ka surot. teuma sabab ie nyan keubiet mantong teutob bansigom muka bumoe, cicem mirah pati nyan hana jiteume teumpat keu jidong. dan jigisa kheueh teuma ubak kapai; nabi nuh laju geusunyueng jaroe geuh dan geucok laju cicem nyan geupeutamong lom teuma. nabi nuh mantong geupreh tujuh uroe teuk, dan oh lھےueh nyan geupeulheueh lom cicem mirah pati nyan. oh watee ka seupot uroe cicem nyan baro kheueh jiwoe laju jipuwoe keu nabi nuh sion-on zaiton nyang mantong udeb bak cutok jih. jinoenyoe nabi nuh ka geuteupeueu bahwa ie nyan ka jisurot. oh ka lھےueh geupreh tujuh uroe teuk, laju geupeulheueh lom cicem mirah pati nyan sigoe teuk; dan phon saat nyan cicem nyan hana jigisa le ubak gobnyan. bak watee nabi nuh ka meu-umu 601 thon, bak tanggai sa buleuen sa, ie raya nyan ka habeh jisurot mubacut hana tanggai le. nabi nuh laju geupeuhah bubong kapai nyan, geungieng laju bansikeulileng nyan. deuh laju geukalon bahwa ateuh muka tanoh ka tho kreg. bak tanggai dua ploh tujuh buleuen dua, bumoe ka biet-biet tho kreg. dan meufeuereuman kheueh allah ubak nabi nuh, "gata teubiet kheueh laju lam kapai nyan meusigoe ngon peurumoh gata, aneuek-aneuek gata dan peurumoh-peurumoh awaknyan. gata peuteubiet kheueh meusigoe ngon gata mandum cicem dan beulatang laen, nyang rayeuk meunan cit nyang ubit, mangat beulatang nyan jeuet meu-aneuek cucoe dan meutabu bansigom bumoe." dan geuteubiet kheueh laju le nabi nuh lam kapai nyan meusajan ngon peurumoh gobnyan, meunan cit ngon aneuek-aneuek gobnyan meusajan ngon peurumoh jih maseng-maseng. banmandum cicem dan beulatang darat jiteubiet lam kapai nyan, maseng-maseng meusigoe ngon nyang sijeuneh ngon jih. nabi nuh laju geupeudong saboh miseubah keu tuhan. laju geucok saboh tieb-tieb cicem dan beulatang laen nyang haleue, geupeuseumah laju atra nyan sibagoe keureubeuen nyang teutot ateuh miseubah nyan. bee keureubeuen nyang mangat nyan lumpah that galak ate tuhan, dan gobnyan jikheun lam ate geuh, "donya nyoe hana le lon kutok sabab buet manusia; ulon kuteupeueu bahwa yoh masa muda kon, pikeran manusia nyan jeuhet. ulon hana teuma lon peuhanco le peue-peue mantong makhluk nyang udeb lagee nyang ban lھےueh ulon peubuet nyoe. simantong na donya nyoe, sabe na watee seumula dan watee keumeukoh, musem sijuek dan musem seu-ume, musem khueng dan musem ujeuen, uroe dan malam." allah laju geubri beureukat ubak nabi nuh meunan cit ngon aneuek-aneuek gobnyan sira geupeugah lagee nyoe, "meu aneuek cucoe kheueh nyang le, mangat keuturonan gata jeuet jitinggai bansigom bumoe. banmandum cicem dan eungkot meunan cit ngon beulatang-beulatang laen teuma jitakot ubak gata. beulatang nyan banmandum na lam keukuasaan gata. banmandum nyan jeuet gata cok

keupeunajoh gata, meunan cit ngon seunaman nyang ijo jitimoh; banmandum nyan ulon bri ubak gata mangat jeuet keupeunajoh gata. sapewe nyang han jeuet sagai-sagai gata pajoh na kheueh eungkot sie nyang mantong meudarah, sabab nyawong nyan na lam darah. soe mantong ureueng dan beulatang nyang jipoh mate manusia teuma lon hukom mate. manusia teucebta saban lagee ulon; sabab nyan, soemantong nyang poh mate manusia, ureueng nyan keudroe teuma jipoh mate cit le manusia. nyoe, gata haroh meu-aneuek cucoe nyang le, mangat keuturonan gata jeuet jitinggai bansigom bumoe." allah meufeureuman ubak nabi nuh dan aneuek-aneuek gobnyan lagee nyoe, "jinoenyo ulon peuget janji ngon gata dan mandum keuturonan gata, dan deungon banmandum makhluk nyang udeb, na kheueh cicem-cicem dan beulatang darat, mandum nyang teubiet lam kapai nyan meusajan-sajan ngon gata. nyoe kheueh janji ulon ngon gata: ulon peujanji bahwa banmandum makhluk nyang udeb hana le jipeubinasa le ie raya. hana le ie raya nyang jipeubinasa bumoe nyoe. sibagoe tanda nyang keukai, nyang ulon peuget ngon gata dan ngon banmandum makhluk nyang udeb, teuma ulon keubah peulangi lon lam awan sibagoe tanda janji ulon ngon donya nyoe. tieb-tieb watee, meunyo ulon tob langet ngon awan, peulangi nyan laju deuh teukalon, ulon teuma lon ingat janji lon ubak gata dan ubak mandum makhluk nyang udeb, bahwa ie raya hana le jipeubinasa makhluk nyang udeb. meunyo ka deuh teukalon peulangi lam awan, ulon teuma lon ngieng nyan dan lon ingat janji nyang keukai ulon ngon mandum makhluk nyang udeb ateuh rhueng bumoe. nyan kheueh tanda janji lon nyang ulon bri ubak banmandum makhluk nyang udeb ateuh bumoe nyoe." aneuek-aneuek nabi nuh nyang teubiet lam kapai nyan na kheueh sem, yafet dan ham. (ham na kheueh ayah kanaan.) ban lhee droe aneuek nabi nuh nyan kheueh indatu banmandum manusia nyang na ateuh rhueng donya. nabi nuh buet geuh tieb-tieb uroe na kheueh meulampoh, dan gobnyan kheueh nyang phon-phon that peuget lampoh anggo. oh lhee geujieb ie anggo le nabi nuh, gobnyan pih mabok. geusuet banmandum peukany nyang na bak tuboh geuh dan lam keuadaan teulon lagee nyan laju geuh lam khimah geuh. watee ham, ayah kanaan nyan, jingieng ayah jih lam keuadaan teulon, laju jiteubiet dan jijak peugah laju hainyan ubak bandua droe syedara jih nyang laen. oh lhee nyan sem ngon yafet laju geucok sion bajee jubah laju jileueng bak baho awaknyan. sira jijak ngon jisurot awaknyan jitamong laju lam khimah ngon jubah nyan laju jipeulimbót ayah jih. muka awaknyan jipaleng holaen mangat bek jikalon ayah jih teulon lagee nyan bagoe. oh ka nabi nuh geutée droe hana le mabok dan geuteupeue peue nyang ka jipeubuet ateuh geuh le aneuek tulot geuhnyan teuhadab droe gobnyan, laju geupeugah, "teukutok kheueh kanaan! jihnyan teuma jeuet keu namiet nyang hina keu syedara-syedara jih. pujoe kheueh tuhan, allah sem! kanaan teuma jeuet keu namiet sem. seumoga po teu allah teuma geutamah geubeureukat keu yafet deungon geupeuluwah teupat jih tinggai. seumoga

keuturonan jih tinggai meusajan-sajan ngon keuturonan sem. kanaan teuma jeuet keu namiet yafet." oh ka lhee ie raya nyan, nabi nuh mantong na udeb 350 thon teuk. gobnyan meuninggai donya lam umu 950 thon. nyoe kheueh keuturonan aneuek-aneuek nabi nuh nyang lhee droe nyan, sem, yafet dan ham. oh lhee teuka ie raya, awaknyan ban lhee droe laju meuteume aneuek-aneuek agam. aneuek-aneuek yafet na kheueh gomer, magog, madai, yawan, tubal, mesekh dan tiras. keuturonan gomer na kheueh nyang jeuet keupeunduduek askemas, rifat dan togarma. keuturonan yawan na kheueh peunduduek elisa, spanyol, siprus dan rode. awaknyan na kheueh indatu bansa-bansa nyang tinggai nibak bansipanyang pante dan bak pulo-pulo. nyan kheueh banmandum keuturonan yafet. tieb-tieb bansa dan sukee tinggai di nanggroe jih maseng-maseng, na jipeuguna basa jih keudroe. aneuek-aneuek ham na kheueh kus, meuse, libia dan kanaan. keuturonan kus na kheueh peunduduek seba, hawila, sabta, raema dan sabtekha. keuturonan raema na kheueh nyang tinggai di syeba dan dedan. kus na jimeu aneuek agam nyang nan jih nimrod, nimrod nyan kheueh nyang phon that jeuet keu ureueng nyang paleng peukasa ateuh rhueng donya. deungon geutulong le tuhan gobnyan jeuet keu ureueng peuleut beulatang buih nyang paleng beuhe. sabab nyan ureueng biasa jipeugah lagee nyoe, "seumoga tuhan geupeujeuet gata sidroe ureueng leut beulatang juah nyang paleng beuhe lagee nimrod." phon-phon that keurajeuen gobnyan bansaboh babel, erekh, dan akad, ban lhee boh nyan di babilonia. nibak sinan laju geujak u asyur, laju geupeudong banda niniwe, rehobot-ir, kalah, dan resen nyang teupat jih bak teunghon niniwe ngon kalah. banmandum nyan na kheueh banda-banda raya. keuturonan meuse na kheueh peunduduek lidia, anamim, lehabim, naftuhim, patrusim, kaslulim, dan kaftorim, bansa kaslulim nyan na kheueh indatu bansa filistin. aneuek-aneuek kanaan na kheueh nyang paleng tuha sidon, dan het. dan kanaan nyan na kheueh indatu bansa yebusi, amori, girgasi, ureueng hewi, arki, sini, arwadi, semari dan hamati. sukee-sukee bansa kanaan nyan meusiseu sampoe an jioh, sampoe bataih-bataih nanggroe awaknyan luwah nibak sidon u seulatan teutuju u gerar, sampoe rab troh to gaza, dan siblahi utimu teutuju u sodom, gomora, adma, dan zeboim, hingga rab trok to lasa. nyan kheueh banmandum keuturonan ham. tieb-tieb bansa dan sukee tinggai bak nanggroe jih maseng-maseng dan jipeuguna basa droe jih keudroe. sem, aduen yafet, na kheueh indatu banmandum bansa ibrani. aneuek-aneuek sem na kheueh elam, asyur, arpakhsad, lud dan aram. keuturonan aram na kheueh peunduduek us, hul, geter dan mas. arpakhsad ayah nibak selah. dan selah ayah eber. eber na teuma dua droe aneuek agam; nyang tuha nan jih peleg, sabab bak jamen geuh nyan bansa-bansa nyang na ateuh rhueng donya teubagi-bagi; nyang keudua nan jih yoktan. keuturonan yoktan na kheueh peunduduek almodad, selef, hazar-mawet dan yerah, hadoram, uzal, dikla, obal, abimael, syeba, ofir, hawila dan yobab. banmandum nyan keuturonan yoktan. daerah teupat tinggai

awaknyan meuluah nibak mesa u sefar, na kheueh daerah gunung-gunong siblahi utimu. nyan kheueh banmandum keuturonan sem. tieb-tieb bansa dan sukee tinggai lam nanggroe jih maseng-maseng dan jipeuguna basa droe jih keudroe. banmandum nyan keuturonan nabi nuh, bansa nibak bansa, meunurot gareh keuturonan awaknyan maseng-maseng. awaknyan kheueh nyang peutron bansa-bansa lam donya nyoe oh ka ltheueh seulesoe ie raya nyan. yoh awaiphon, bansa-bansa nyang na ateuhe rhueg donya nyoe na kheueh saboh bansa dan tutoe basa jipi saboh teuma. watee awaknyan jijkameuranto siblahi utimu, trok kheueh laju bak saboh darat nyang na di babilonia, dan awaknyan pi laju tinggai teutab nibak teumpat nyan. awaknyan laju jimariet sabe keudroe-droe, "jak tapeuget batee bata dan tatot sampoe kreueh." meunan kheueh awaknyan jipeuna batee bata keubatee rumah dan ter keungon peuleukek jih. jipeugah le awaknyan lagee nyoe, "jak tapeudong saboh banda nyang meunara jih manyang meulambong sampoe u langet, mangat tanyoe meusyuehu dan hana meucubre bansigom donya." dan watee nyan geutron kheueh tuhan keu geujak kalon banda dan meunara nyang jipeuget le manusia. laju geupeugah le gobnyan, "awaknyoe saboh bansa ngon saboh basa, dan nyoe baro nyang phon nibak reuncana-reuncana awaknyan. hana treb le awaknyan teuma hase jipeubuet peue mantong nyang jigalak. nyang get jih bah kheueh tajak treun ubumoe tajak peukaru basa awaknyan mangat awaknyan hana jimuphom le sidroe ureueng ngon nyang laen." meunan kheueh cara jih tuhan geupeu crebre manusia nyoe bansigom bumoe. dan watee teuka bala nyan awaknyan pih jipiyoh jipeuget banda nyan. sabab nyan kheueh banda nyan geuboh nan babel, sabab disinan tuhan geupeukaru ngon geupeucawo basa banmandum bansa, dan nibak sinan le tuhan laju geupeu crebre awaknyan bansaboh bumoe. nyoe kheueh keuturonan sem. dua thon oh ka ltheueh teujadi ie raya, watee sem ka meu-umu 100 thon, geuh nyan meuteume sidroe aneuk agam nyang geuboh nan arpakhsad. oh ka ltheueh nyan gobnyan mantong na udeb 500 thon teuk, dan na meuteume aneuk-aneuk nyang laen. watee arpakhsad ka meu-umu 35 thon, gobnyan meuteume sidroe aneuk agam, nyang geuboh nan salah. oh ltheueh nyan arpakhsad mantong na udeb 403 thon teuk, dan na geumeu aneuk nyang laen-laen. watee salah meu-umu 30 thon, gobnyan meuteume sidroe aneuk agam, geuboh nan eber. oh ltheueh nyan salah mantong udeb 403 thon teuk, dan mantong geumeu aneuk nyang laen-laen. watee eber meu-umu 34 thon, gobnyan na meuteume aneuk agam, geuboh nan peleg. oh ltheueh nyan eber mantong udeb 430 thon teuk, dan na geumeu aneuk nyang laen-laen. watee peleg meu-umu 30 thon, gobnyan na meuteume aneuk agam, geuboh nan aneuk nyan rehu. oh ltheueh nyan peleg mantong na udeb 209 thon teuk, dan na meuteume aneuk-aneuk nyang laen. watee rehu ka meu-umu 32 thon, gobnyan na geumeu aneuk sidroe aneuk agam, geuboh nan serug. oh ltheueh nyan rehu mantong udeb 207 thon teuk dan na

meuteume aneuk-aneuk nyang laen. watee serug meu-umu 30 thon, gobnyan na geumeu aneuk sidroe aneuk agam, geuboh nan aneuk nyan nahor. oh ltheueh nyan serug mantong udeb 200 thon teuk, dan geumeu aneuk lom nyang laen-laen. watee nahor meu- 29 thon, gobnyan na meuteume sidroe aneuk agam, geuboh nan aneuk nyan terah. oh ka ltheueh nyan nahor mantong na udeb 119 thon teuk, dan na meuteume aneuk-aneuk nyang laen. oh ka terah meu-umu 70 thon, gobnyan na meuteume lhee droe aneuk agam, geuboh nan aneuk-aneuk geuh nyan na kheueh, brahim, nahor dan haran. nyoe kheueh keuturonan terah: terah ayah brahim, nahor dan haran. haran na aneuk agam, nan aneuk nyan lot. haran meuninggai di gampong droe geuh, nyang nan gampong nyan ur di babilonia, watee ayah gobnyan mantong udeb. brahim laju meukawen ngon sarai, dan nahor meukawen ngon milka aneuk inong haran. haran mantong na aneuk agam nyang laen nyang nan jih yiska. sarai nyan balui hana jitem meu-aneuk. terah laju jitinggai banda ur di babilonia meusajan-sajan ngon brahim aneuk gobnyan, lot cucoe gobnyan, dan sarai meulintee gobnyan, peurumoh brahim. gobnyan kana niet keuneuk jak u nanggroe kanaan. teuma watee gobnyan ka trok u haran, awaknyan laju tinggai teutab disinan. dan bak teumpat nyan cit teuma terah meuninggai donya lam umu 205 thon. tuhan meufureuman ubak brahim, "gata tinggai kheueh nanggroe gata, wareh kawom gata dan rumah ayah gata, dan gata jak kheueh laju u nanggroe nyang teuma ulon tunyok ubak gata. ulon teuma lon bri ubak gata keuturonan nyang le dan lon peujeuet keuturonan gata nyan keu bansa-bansa nyang rayeuk. ulon teuma lon bri beureukat ubak gata dan lon peumeusyuehu nan gata bansigom donya, akhe jih gata teuma jeuet keubeureukat. ulon teuma lon bri beureukat keu ureueng-ureueng nyang bri beureukat ubak gata dan lon kutok ureueng-ureueng nyang kutok gata. dan sabab gata ulon teuma lon bri beureukat ubak banmandum bansa nyang na di ateuhe bumoe." brahim ka meu-umu thon watee geutinggai haran, lagee nyang ka geupeurintah le tuhan ubak gobnyan. brahim geujak u tanoh kanaan meusajan-sajan ngon sarai peurumoh gobnyan, dan lot aneuk kumuen gobnyan, meunan cit banmandum hareuta beunda gobnyan dan namiet-namiet nyang geuteume watee di haran. oh watee awaknyan ka troh u kanaan, brahim laju geujak-jak bansaboh tanoh nyan sampoe gobnyan trok nibak-bak kayee keuramat di more, na kheueh teumpat iebadat di sikhem. (bak wateanyan ureueng kanaan mantong geutinggai nibak tanoh nyan.) tuhan geupeuleumah droe ubak brahim dan laju geumeufureuman ubak gobnyan, "nyoe kheueh nanggroe nyang teuma ulon bri keu keuturonan gata." dan brahim laju geupeudong saboh miseubah nibak teumpat nyan keu tuhan nyang ka geupeuleumah droe ubak gobnyan. oh ltheueh nyan gobnyan laju geujak lom u bagian seulitan, u daerah meubuket dibagian timu banda betel, dan laju geupeudong kimiah lamkawan betel ngon banda ai: betel siblahi ubarat dan ai siblahi utimu, meunan cit bak teumpat nyan gobnyan geupeudong miseubah

dan geuseumah tuhan. oh lheueh nyan gobnyan geujak lom nibak teupnat nyang saboh uteupnat nyang laen, teupeukeu ubagian seultatan tanoh kanaan. teuma watee nyan di kanaan teungoh teuka musem deuk nyang lumpah gawat, sampoe brahim geujak leubeh jioh lom ubagian seultatan, u nanggroo meuse mangat jeuet geutinggai disinan sampoe beuncana nyan habeh. watee gobnyan keuneuk geuliengkeu bataih nanggroo dan geutamong u nanggroo meuse, geupeugah kheueh le gobnyan ubak sarai meurumoh geuh nyan, "gata lagak that, wahei peurumoh lon. meunyoe gata jingiang le ureueng meuse, awaknyan laju jipike bahwa gata na kheueh peurumoh ulon dan ulon laju jipoh mate dan gata jipeubiyeu udeb. teuma nyang get gata peugah mantong bahwa gata na kheueh adoe ulon mangat ulon jipeubiyeu udeb dan jipeusaneut ulon seucara get sabab na gata." dan beutoi that, watee brahim ka geuliengkeu bataih nanggroo dan laju trok u nanggroo meuse, le ureueng meuse laju jikalon bahwa sarai nyan gagah lumpah na. na padub droe peugawee meuligoe jingiang inong nyan dan laju jikak peugah ubak raja pakriban gagah jih ureueng inong nyan; sabab nyan sarai nyan laju jiba ubak meuligoe raja. deumi sarai, raja geupeutimang brahim seucara get dan geubri ubak gobnyan namiet-namiet, kawan bubiri dan kawan kameng, leumo, keuleudee dan unta. teuma sabab raja geucok sarai, tuhan laju geupeutreun peunyaket nyang lupah parah ateuh raja nyan meunan cit ubak ureueng-ureueng nyang na lam meuligoe raja. laju raja geucok brahim dan geutanyong ubak gobnyan, "peue nyang ka tapebuet ateuh ulon nyoe? pakon hana gata peugah bahwa inong nyan peurumoh gata? pakon gata peugah jihnyan adoe gata dan gata peubiyeu inong nyan ulon cok keupeurumoh lon? nyoe pat jih, peurumoh gata, cok laju dan gata jak laju keudeh!" raja laju geupeutreun titah ubak siladum peugawee gobnyan, dan awaknyan laju jipeuteubiet brahim nibak nanggroo nyan meusajan-sajan ngon peurumoh gobnyan dan banmandum atra milek gobnyan. brahim laju geutinggai nanggroo meuse dan geujak laju u arah utara, geupeukeu u bagian seultatan kanaan meusajan ngon peurumoh gobnyan meunan cit banmandum atra milek gobnyan, meunan cit deungon lot geuba sajan. brahim biet-biet ka jeuet keu ureueng kaya; bak gobnyan na bubiri, kameng, leumo, pirak dan meuh. teuma geujak kheueh laju gobnyan nibak saboh teupnat u teupnat nyang laen, geutuju u betel. laju trok u daerah lamkawan betel ngon ai, bak teupnat keuramat teupnat yoh masa ilee gobnyan geupeudong khimah dan geupeudong miseubah. bak teupnat nyan gobnyan geuseumah tuhan. lot na cit keuluwarga meunan cit deungon namiet dan bubiri, kameng dan leumo na bak gobnyan. sabab nyan tanoh nyang na disinan hana seb blang naleueng keu eumpeuen beulatang peulara awaknyan mandua, sabab beulatang peulara awaknyan jai lumpah na. lam keuladaan nyang lagee nyan, ditukang rabe beulatang peulara brahim ngon tukang rabe beulatang peulara lot sabe lam karu dan meudakwa. (bak wateenyan ureueng kanaan dan ureueng feris mantong tinggai bak tanoh nyan.) geupeugah le brahim ubak lot, "tanyoe nyoe

meusyedara, hana get meunyoe ureueng gata ngon ureueng ulon jimeudakwa. sabab nyan, nyang get jih tameuaseng. gata pileh kheueh bagian toh tanoh nyoe nyang gata galak. meunyoe gata cok nyang blah nyoe, ulon cok nyang blah laen." lot laju jingiang bansikeulileng nyan, dan deuh laju jingiang bahwa bansaboh panton yordan, sampoe trok u banda zoar jai that ie jih, lagee taman tuhan atawa saban lagee tanoh nanggroo meuse. (meunan kheueh keuladaan jih sigohlom tuhan geupeuhanco banda-banda sodom dan gomora.) akhe jih lot geupileh banmandum panton yordan nyan, dan geujak laju u bagian timu. meunan kheueh akhe jih awaknyan bandua meuaseng. brahim teutab tinggai di tanoh kanaan, seudangkan nabi lot geupeudong khimah nibak banda-banda panton sampoe trok bak bineh sodom. banda sodom nyan jiduek le ureueng-ureueng nyang lumpah jeuhet dan meudesya ubak tuhan. oh ka leupah nabi lot geujak, tuhan meufeureuman ubak brahim, "nibak teupnat gata dong nyan, gata ngiang kheueh beujroh-jroh ujeub-jeub arah; ulon teuma lon bri ubak gata dan bak keuturonan gata banmandum tanoh nyang gata ngiang nyan mangat jeuet keu atra gata siumu masa. ulon teuma lon bri ubak gata keuturonan nyang lumpah le, sampoe hana meusidroepi nyang hase jikira keuturonan gata nyan. pakriban ureueng hana hase jikira abee bak tanoh, meunan kheueh keuturonan gata hana hase jikira. jinoenye, gata tamong dan gata bloh kheueh bansaboh tanoh nyoe, sabab ulon teuma lon bri mandum nyan keugata." oh lheueh nyan brahim laju geupinah khimah-khimah gobnyan dan laju geutinggai teutab ubak bineh dumna bak kayee keuramat teupnat iebadat di mamre toh ngon hebron, dan bak teupnat nyan gobnyan laju geupeudong miseubah keu tuhan. na peuet droe raja, raja-raja nyan na kheueh: amrafel nibak babilonia, ariokh nibak elasar, kedorlaomer nibak elam, dan tideal nibak goyim ban peuet droe raja nyoe jimuprang jilawan limong droe raja nyang laen, raja-raja nyang jilawan nyan na kheueh: bera nibak sodom, birsya nibak gomora, syinab nibak adma, semeber nibak zeboim, dan raja nibak zela nyang jihoi zoar. ban limong droe rajanyan laju sapeupakat dan jipeusapat sidadu jih di panton sidim, nyang jinoenye nan jih laot mate. dua blaih thon treb jih awaknyan jikuasa le raja kedorlaomer, teuma bak thon nyang keu lhee blaih, awaknyan jibrontak jilawan gobnyan. bak thon nyang keu peuet blaih, kedorlaomer dan sikutu-sikutu jih teuka ngon sidadu awaknyan laju jimuprang akhe jih talo ureueng refaim di asyterot-karnaim, ureueng zuzim di ham, ureueng emim di syawe-kiryataim, dan ureueng hori di gunong-gunong edom, laju jipeulet awaknyan sampoe u el-paran bak bineh padang pasi. oh lheueh nyan le ureueng-ureueng nyang peulet bunoe jigisa dan jiriwang u en-mispat nyang jinoenye nan jih kades. awaknyan jipeutaklok banmandum tanoh amalek dasar jipeutaloe ureueng amori nyang na tinggai di hazezon-tamar. oh lheueh nyan raja-raja nibak sodom, gomora, adma, zeboim dan bela laju jiatoe barasan sidadu awaknyan di panton sidim dan oh lheueh nyan laju jimuprang jilawan raja-raja

nibak elam, goyim, babilonia, dan elasar; jadi, limong droe raja jilawan peuet droe raja. pantonnyan peunoh ngon mon aspal, dan watee raja-raja nibak sodom dan gomora jiuseuha keuneuk jiplueng nibak mideuen prang, awaknyan laju rhot lam mon-mon aspal nyan. seudangkan ban lhee droe raja laen hase jipeulheuh droe dan laju jiplueng ugunong-gunong, ban peuet droe raja nyan meunang, laju jirampah peue-peue nyang na di sodom ngon gomora, meunan cit ngon peue-peue nyang na bahan peunajoh habeh jirampah le raja peuet droe nyan, oh ltheueh nyan laju jijak. nabi lot aneuek keumuen brahim tinggai jih di sodom, sabab nyan gobnyan pi jiba le musoh meusigo ngon banmandum hareuta beunda. teuma na sidroe ureueng nyang hase jipeulheuh droe laju jijak peugah hainyan ubak brahim, ureueng ibrani nyan. brahim tinggai bak bineh bak kayee-kayee keuramat teupat ibadat atra mamre ureueng amori. mamre dan syedara-syedara gobnyan, na ktheueh eskol dan aner na ktheueh rakan-rakan sikutu brahim. watee brahim geudeungoe bahwa aneuek keumeum geuh ka jidrob, laju geupeusapat banmandum ureueng nyang na lam khimah-khimah geuh, na ktheueh ureueng-ureueng nyang carong muprang, nyang jeumeulah jih 318 droe, dan laju jipeucrok ban peuet droe raja nyan sampoe trok u banda dan. disinan brahim laju geuatoe ureueng-ureueng gobnyan jeuet jih na padub boh keulompok, oh watee malam ka teuka laju geuprang musoh nyan dan dimusoh pih talo. gobnyan laju geupeucrok awaknyan sampoe trok u hoba siblahi utara banda damsyik. brahim hase geucok lom teuma barang-barang nyang ka jirampah, meunan cit ngon nabi lot ngon banmandum atra gobnyan hase geupeuseulamat, ureueng-ureueng inong dan ureueng-ureueng teutawan nyang laen banmandum hase geupeubeubaih lom teuma. oh ka ltheueh geupeutaloe raja kedorlaomer ngon raja-raja sikutu jihnyan, brahim laju geuwoe teuma. dan raja sodom pih laju jisambot gobnyan di panton syawe nyang nan laen tempat nyan panton raja. melkisedek, raja salem, jabatan gobnyan nyang laen jeuet keu imeum allah nyang mahamanyang, laju geuba ruti dan anggo keu brahim, oh ltheueh nyan laju geubri beureukat ubak brahim sira geupeugah lagee nyoe, "seumoga allah nyang mahamanyang, nyang ka geucebta langet ngon bumoe, geubri beureukat ubak brahim! teupujoe ktheueh allah nyang mahamanyang, nyang ka geupeumeunang gata ateueh musoh gata." oh ltheueh nyan brahim laju geujok keu melkisedek siper siploh nibak banmandum barang rampasan nyang ka geucok lom nyan. dan geupeugah ktheueh le raja sodom ubak brahim, "cok ktheueh barang nyang ka gata reupah nyan, nyang ulon lakee bak gata ureueng-ureueng ulon nyang ka gata cok neupulang lom ubak ulon." geujawewe le brahim, "ulon meusumpah dikeue tuhan, allah nyang mahamanyang, nyang cebta langet ngon bumoe, bahwa ulon hana lon cok sapewe atra gata, bahpi sikrek beuneueng atawa sikhant taloe silob pih hana lon cok. deungon lagee nyang gata hana jeuet gata peugah, 'ulon ktheueh nyang peujeuet brahim nyan kaya raya.' ulon hana lontem cok sapewe meunyo

nyan keulon keudroe. nyang ulon tem teurimong peue-peue nyang ka jingui le ureueng lon keudroe. teuma bah ktheueh rakan-rakan sikutu lon, aner, eskol dan mamre, jicok jeumba awaknyan." oh ltheueh nyan brahim geuteurimong nyang deuh teukalon dan geudeungoe laju tuhan meufeureuman ubak gobnyan, "bek gata takot, hei brahim, ulon teuma lon lindong gata nibak sigala bahaya, dan ulon jok keu gata upah nyang paleng raya." teuma le brahim geupeugah lagee nyoe, "tuhan nyang mahamanyang, tuhan hana geubri aneuek ubak ulon. ureueng nyang jeuet keu ahli wareh hareuta lon na ktheueh eliezer, namiet ulon nibak damsyik. teuma, keupeugana jih tuhan geubri upah keu ulon?" oh ltheueh nyan brahim geudeungoe tuhan meufeureuman ubak gobnyan, "bukon namiet gata nyang teuma jeuet keu ahli wareh hareuta gata nyan, nyang jeuet ahli wareh atra gata nyan na ktheueh aneuek agam gata keudroe." tuhan geuba brahim uluwa dan laju geupeugah ubak gobnyan, "tengah ktheueh ulanget, dan gata kalon ktheueh bintang-bintang nyang na disinan, cuba ktheueh gata itong padub na jeumeulah jih bintang nyan banmandum; dan lagee bintang nyang le nyan ktheueh teuma na keuturonan gata." brahim meuman ubak tuhan, dan sabab nyan ktheueh tuhan geuteurimong gobnyan sibagoe ureueng nyang peugalak ate gobnyan. oh ltheueh nyan tuhan meufeureuman lom ubak gobnyan, "ulon ktheueh tuhan, nyang ka lon pimpen gata mangat gata teubiet nibak nanggroe ur di babilonia, keu teubri tanoh nyoe ubak gata jeuet keu hak milek gata." teuma geutanyong le brahim, "ya, tuhan nyang mahamanyang, pakriban jeuet lon teupeu bahwa tanoh nyan jeuet keumilek ulon?" geujawewe le tuhan, "cok ktheueh keu ulon saboh leumo inong, saboh kameng inong dan saboh teuk kameng agam, maseng-maseng atra nyan meu-umu lhee thon, meunan cit gata cok saboh cicem teukukur dan saboh teuk cicem mirah pati." laju brahim geucok banmandum beulatang nyan keu po teu allah. leumo, kameng dan bubiri nyan maseng-maseng atra nyan geuplah dua, dan sie-sie nyang teuplah nyan laju geukeubah meutaoe dua boh bareh lam keadaan meuhadab keu. teuma meunyo cicem-cicem nyan hana geuplah. ateueh eungkot sia nyan laju jidong le cicem-cicem nyang pajoh bangek, teuma brahim laju geuparoh cicem-cicem nyan. watee mata uroe ka jipeuphon llob lam tanoh, brahim laju teueh sampoe teunget hana geutee droe. ngon hana geusangka-sangka brahim nyan ka jiteuka rasa teumakot nyang luwa biasa. tuhan meufeureuman ubak gobnyan, "ingat ktheueh, keuturonan gata teuma jeuet ureueng aseng di nanggroe laen; awaknyan teuma jeuet keunamiet di nanggroe nyan dan jipeunamiet peuet reuthon thon treb jih. teuma bansa nyang peunamiet keuturonan gata nyan teuma lon hukum dan bak watee keuturonan gata jitinggai nanggroe nyan, awaknyan teuma jiba hareuta nyang jai lumpah na. gata keudroe teuma meuteume umu nyang panyang; gata mate deungon teunang, dan laju jipeutamong lam jrat. oh ka ltheueh trok bak peuet boh keuturonan, aneuek cucoe gata teuma jiriwang keunoe, sabab ulon hana lon use ureueng amori sigohlom awaknyan biet-biet that ka jeuet keu

ureueng jeuhet sampoe peureulee teuhukom." watee uroe ka malam, hana teusangka-sangka teuka saboh anglo nyang meuasab dan suwa nyang hu meuchaya, dan atranyan laju jikak bak eungkot-eungkot sie nyan. bak watee nyan tuhan allah laju geupeuget peujanjian ngon brahim. feureuman tuhan, "ulon meujanji teuma lon bri ubak keuturonan gata banmandum tanoh nyoe, phon nibak bataih nanggroe meuse sampoe troh u krueng efrat, jitamong cit keunan tanoh ureueng-ureueng keni, kenas, kadmon, het, feris, refaim, amori, kanaan, girsagi dan yebus." sarai, peurumoh brahim, gohlom cit meu-aneuek. teuma gobnyan na sidroe namiet ureueng meuse, sidroe aneuek dara nyang nan jih hagar. sarai geupeugah ubak brahim, "tuhan hana geubri keumungkenan ulon nyoe meuteume lon peulahe aneuek. sabab nyan, nyang get jih droeneueh eh ngon namiet ulon nyoe. mungkin jihnyoe jeuet jipeulahe aneuek keu ulon." brahim situju lagee nyang guyue le sarai. meunan kheueh hagai geubri sarai ubak brahim mangat jeuet geucok keu selir. bak watee nyan brahim kana siploh thon di kanaan. brahim laju geueh ngon hagar, dan inong nyan pih mume. teuma watee hagar jiteupeue bahwa gobnyan ka mume, gobnyan ka jeuet keu ureueng sombong dan geuanggab enteng ubak sarai. dan sarai geupeugah ubak brahim, "ulon ka lon jok hagar namiet ulon keu droeneueh, dan yoh ka jiteupeue bahwa jih nyan ka mume, laju jianggab enteng ateuheh lon. nyan salah droeneueh. bah kheueh tuhan nyang peupoth peukara nyoe ulon ngon droeneueh." jaweueb brahim, "ka jeuet meunyo meunan, jihnyan namiet gata dan gata jeuet gata peubuet peue mantong ateuheh jihnyan." dan sarai pi laju ji-ielanya hagar nyan, sampoe hagar laju jipeuplueng droe. malaikat tuhan laju geujak meurumpok ngon hagai bak binah mata ie dipadang pasi sur. geupeugah le malaikat nyan, "hagar, namiet sarai, gata rot pane dan ho gata keuneuk jak?" jaweueb hagar, "ulon plueng nibak sarai, pocut lon." jaweueb malaikat nyan, "woe kheueh ubak pocut gata dan peutimang kheueh jihnyan." dan geupeugah lom le malaikat nyan, "ulon teuma lon bri keu gata aneuek cucoe nyang le, sampoe hana meusidroe ureueng pih nyang hase jikira awaknyan. hana treb le gata teuma tapeulahe sidroe aneuek agam; gata boh kheueh nan aneuek nyoe ismail, sabab tuhan ka geudeungoe su gata mo. teuma aneuek gata nyan udeb lagee keuleudee kleut; jihnyan teuma jilawan ureueng toh mantong, dan soe mantong ureueng jilawan. jihnyan teuma udeb keudroe dan jioh teuaseng nibak banmandum wareh kawom jih." hagar laju jikheun lam ate geuh, "peu kheueh beutoi ka ulon ngiang allah nyang geupakoe lon?" teuma oh ltheueh nyan laju geupeugah nan tuhan, nyang ka geumeututoe ngon gobnyan, "allah geupakoe." nyang kheueh sabab jih ureueng jipeugah mon lamkawan kades ngon bered nyan, "mon gobnyan nyang udeb nyang pakoe ulon." oh ltheueh nyan hagar laju geupeulahe sidroe aneuek agam, dan brahim, ayah gobnyan, geuboh nan aneuek nyan ismail. bak masanyan brahim ka meu-umu lapen ploh nam thon. watee brahim ka meu-umu sikureueng ploh sikureueng thon, tuhan geupeuleumah droe

ubak gobnyan sira meufeureuman lagee nyoe, "ulon kheueh allah nyang mahakuasa. taat kheueh bak ulon dan peubuet kheueh lagee nyang ulon lakee. ulon teuma lon ikat janji ngon gata dan ulon bri ubak gata keuturonan nyang le." dan geusujut kheueh brahim, oh ltheueh nyan allah meufeureuman lom, "nyoe kheueh janji ulon nyang ulon peuet ngon gata: ulon meujanji bahwa gata teuma jeuet keu bapak indatu bansa-bansa. ngon sabab nyan nan gata bukan le brahim, teuma lon gantoe jeuet keu ibrahim. ulon teuma kubri ubak gata aneuek cucoe nyang le, dan lamkawan awaknyan teuma na nyang jeuet keu raja-raja. keuturonan gata jai lumpah na, sampoe awaknyan jeuet keu bansa-bansa. ulon teuma lon peupeunoh janji lon ubak gata dan ubak keuturonan gata, tronmuron, dan janji lon nyan keukai. ulon teuma jeuet keu allah gata dan allah keuturonan gata. ulon teuma lon bri ubak gata dan ubak keuturonan gata, tanoh nyoe, nyang saat nyoe gata duek sibagoe ureueng aseng. banmandum tanoh kanaan teuma jeuet keumilek aneuek cucoe gata siumu masa dan ulon jeuet keu allah awaknyan." allah meufeureuman lom ubak nabi ibrahim, "gata pih haroh seutia ubak peujanjian nyoe, bah kheueh gata meunan cit ngon keuturonan gata tronmuron. gata dan banmandum keuturonan gata nyang agam haroh meukatan. phon saat nyoe gata haroh gata peukatan aneuek manyak gata nyang agam nyang meu-umu lapen uroe, meunan cit namiet nyang lahe dirumoh gata atawa namiet nyang gata bloe. katan nyan sibagoe tanda ulon ngon gata. soe mantong ureueng haroh meukatan, dan nyan sibagoe tanda laheriyah keu teutunyok bahwa peujanjian ulon ngon gata na kheueh keukai. soe mantong ureueng agam nyang hana meukatan hana le teu anggota umat ulon sabab jihnyan hana jimumat ubak peue nyang ka ulon peujanji." oh ltheueh nyan allah meufeureuman ubak nabi ibrahim, "gata hana jeuet le gata hoi peurumoh gata sarai; pon saat nyoe nan inong gata nyan sara. ulon teuma lon bri beureukat ubak jih nyan dan jihnyan teuma jipeulahe sidroe aneuek agam nyang teuma ulon bri ubak gata. biet, ulon teuma lon bri beureukat ubak sara, dan jihnyan jeuet keu ma indatu bansa-bansa. lamkawan keuturonan jihnyan teuma na raja-raja." dan geusujut kheueh laju nabi ibrahim, teuma gobnyan teukem watee geupike, "panena mungkin sidroe ureueng agam nyang ka meu-umu sireutuh thon nyoe meuteume aneuek? dan panena mungkin sara jipeulahe aneuek bak umu sikureueng ploh thon?" dan geupeugah kheueh le gobnyan ubak allah, "bah kheueh nabi ismail mantong nyang jeuet keu ahli wareh lon." jaweueb allah, "han jeuet. sara peurumoh gata teuma jipeulahe sidroe aneuek agam dan gata boh nan jih ishaq. ulon teuma seutia ubak peujanjian lon ngon aneuek nyan dan ngon keuturonan gata siumu masa. peujanjian nyan keukai. dan teuma ulon peukabul peue nyang gata lakee keuhai nabi ismail. sabab nyan jihnyan teuma lon bri beureukat dan lon bri keuturonan nyang le. jihnyan teuma jeuet keu indatu dua blaih boh ulee sukee, dan keuturonan jih lon peujeut saboh bansa nyang rayeuk. teuma peujanjian ulon teuma lon ikat ngon nabi ishaq,

aneuek gata nyang teuma jipeulahe le sara peurumoh gata, thon ukeu kira-kira watee jih lagee nyoe." oh ka ltheueh geupeugah lagee nyan, allah laju geutinggai nabi ibrahim disinan. bak uroe nyan cit teuma, nabi ibrahim geutaat ubak po teu allah laju geujak peukatan aneuek gobnyan nabi ismail, dan banmandum ureueng agam nyan na lam rumah gobnyan, meunan cit namiet-namiet nyang lahe dirumoh gobnyan atawa nyang geubloe banmandum nyan geupeukatan. nabi ibrahim ka meu-umu sikureueng ploh sikureueng thon watee gobnyan teupeukatan dan nabi ismail aneuek gobnyan ka meu-umu lhee blaih thon. awaknyan teupeukatan bak uroe nyang saban, meusajan-sajan ngon banmandum namiet nabi ibrahim. tuhan geupeuleumah droe ubak nabi ibrahim bak bineh bak-bak kayee keuramat teupat iebadat di mamre. bak watee nyan uroe tutong lumpah na, dan nabi ibrahim teungoh geuduek-duek bak babah pintoe khimah gobnyan. watee gobnyan geubeuot ulee geuh, leumah laju geukalon na lhee droe ureueng ka teudong dikeue gobnyan. nabi ibrahim lagee geuplueng geujak sambot awaknyan. sira geusujut laju geupeugah, "teungku, teungku, bek neuliengkeu khimah ulon sigohlom droeneueh pioh bak teupat lon; neupeu idhin kheueh ulon mangat jeuet lon peutimang teungku. bah kheueh lon jakok ie mangat jeuet lon rrah gaki teungku. deungon galak ate lon peusila teungku neupioh hek yueb bak kayee nyoe. ulon teuma lon peuhidang peunajoh meusikada, mangat teungku-teungku meuteume teunaga baro keuneujak lom teuma. teungku-teungku ka neuhoreumat ulon, deungon neupioh bak rumah ulon nyoe." jaweueb awaknyan, "teurimong gaseh ateuheh keugat ate gata. kamoe teuma kamoe pioh." reujang that-that nabi ibrahim geutamong lam khimah sira geupeugah ubak sarai peurumoh geuh nyan, "bubagaih, gata cok laju saboh eumpang teupong nyang paleng get, dan gata peugot laju ruti bulat." oh ltheueh nyan laju geuplueng ubak beulatang peulara gobnyan, deungon sigab laju geucok saboh aneuek leumo nyang teumbon dan nyang leumpok asoe jih, oh ka ltheueh geucok atranyan banmandum laju geujok ubak namiet geuh, le namiet geuhnyan laju jipeusaneut deungon bagaih that. oh ka ltheueh nyan nabi ibrahim laju geucok mom jih, ulee mom, dan eungkot sie nyang ka ltheueh teutaguen nyan, mandum nyan laju geuhidang ubak jame-jame geuh nyang kana jiduek yueb bak kayee nyan. teungoh awaknyan makheun, nabi ibrahim keudroe nyang peutimang awaknyan yueb bak kayee nyan. oh ltheueh nyan awaknyan geutanyong, "pat peurumoh gata, sara nyan?" "na lam khimah," jaweueb nabi ibrahim. sidroe nibak awaknyan laju geupeugah, "sikureueng buleuen teuk ulon teuma lon gisa. dan bak watee nyan sara peurumoh gata teuma jipeulahe sidroe aneuek agam." bak watee nyan sara teungoh geudeungoe peue nyang jipeugah le ureueng nyan, sara na dikeue pintoe khimah dilikot jame, watee ureueng nyang peugah haba. nabi ibrahim dan sara ka tuha that, dan sara ka hana le jiteuka he. sabab nyan kheueh sara teukem lam ate geuh sira geupeugah, "ulon nyang ka tuha dan layee lagee nyoe, panena mungken lon meujimak lom ngon lakoe lon?

– dan dilakoe lon pih ka tuha saban lagee lon." dan tuhan laju geutanyong ubak nabi ibrahim, "pakon sara jikem dan jiragu peu kheueh jihnyan mantong hase jipeulahe aneuek bak masa tuha jih? hana sapeue pih nyang mustahe nibak tuhan, lagee nyang ka ltheueh ulon peugah bunoe, sikureueng buleuen teuk ulon teuma kuriwang keunoe. dan bak watee nyan sara teuma jipeulahe sidroe aneuek agam." sabab sara teumakot, laju geubantah, geupeugah le sara, "ulon hana lon kem." geujaweueb le tuhan, "beutoi, bunoe gata kem." oh ltheueh nyan ban lhee droe jame bunoe laju geujak sira geu intat le nabi ibrahim. dan trok kheueh laju awaknyan bak saboh teupat nibak teupat nyan awaknyan hase geukalon sodom. tuhan geupeugah lam ate geuh, "ulon hana lon som ubak nabi ibrahim peue nyang haroh ulon peubuet. seudangkan keuturonan jih teuma jeuet keu bansa nyang meukuasa dan bansa nyang paleng rayeuk? bukan kheueh sabab na jih nyan, banmandum bansa nyang na ateuheh ruheng bumoe nyoe ka ulon bri beureukat? jihnyan ka ulon pileh mangat jipeurintah ubak aneuek-anuek jih dan ubak keuturonan jih mangat jitaat ubak ulon dan jipeubuet peue-peue nyang get dan ade. meunyo hainyan awaknyan peubuet, peue-peue nyang ka ulon meujanji ngon nabi ibrahim teuma lon peusampoe." dan meufeureuman lom tuhan keu nabi ibrahim, "na tudohan nyang paleng brat ateuheh sodom dan gomora, dan keubit desya awaknyan raya lumpah na. sabab nyan kheueh ulon keuneuk tron keudeh keuneuk jak pareksa peu kheueh banmandum tudohan nyang ulon deungoe nyan beutoi atawa hana?" dan oh ltheueh nyan dua droe nibak jame-jame nyan laju geujak u sodom, teuma tuhan mantong tinggai meusajan ngon nabi ibrahim. nabi ibrahim laju geupeurab ubak tuhan sira geutanyong lagee nyoe, "peu kheueh beutoi tuhan keuneuk peubinasa ureueng nyang hana meusalah meusajan-sajan ngon ureueng nyang meusalah? seukira jih na limong ploh droe nyang hana meusalah lam banda nyan, peu kheueh bansaboh bansa nyan tuhan peubinasa cit teuma? peu kheueh hana tuhan peumaphon mangat nyang limong ploh droe nyan seulam? bek kheueh ureueng-ureueng nyang hana meusalah nyan teupoh mate meusajan ngon ureueng nyang salah. bek tuhan! sabab meunyo hainyan tuhan peubuet, ureueng nyang hana meusalah pasti jihukom meusajan-sajan ngon ureueng nyang meusalah. panena mungken hakem seumeusta alam nyoe geupeubuet nyang hana ade!" tuhan meufeureuman, "seukira jih na lom teume limong ploh droe ureueng nyang hana meusalah di sodom, teuma lom peumaphon bansaboh banda nyan deumi awaknyan." geutanyong lom le nabi ibrahim, "peumaphon kheueh ateuheh keubeuranian lon-ulon sambong haba geutanyoe nyoe, tuhan. ulon nyoe na kheueh manusia, dan hana hak keu lon peugah sapeue-sapeue. teuma mungken na peuet ploh limong droe nyang droe meusalah, bukan limong ploh droe. peu kheueh deungon lagee nyan tuhan teutab neupeuhanco bansaboh banda nyan sabab seuliseh jih cit limong droe sagai?" tuhan meufeureuman, "banda nyoe hana ulon peuhanco meunyo lon teume disinan peuet ploh limong droe

nyang hana meusalah." nabi ibrahim geupeugah lom, "pakriban meunyo peuet ploh droe nyang na ureueng nyang hana meusalah?" feureuman tuhan ubak nabi ibrahim, "deumi nyang peuet ploh droe nyang hana meusalah nyan, banda nyan ulon peuseulamat." nabi ibrahim geupeugah lom, "bek neubeungeh beuh, tuhan, meunyo ulon meututoe lom. pakriban meunyo nyang hana meusalah nyan cit lhee ploh droe sagai?" feureuman tuhan ubak nabi ibrahim, "meunyo na ulon teume lhee ploh droe nyang hana meusalah lam banda nyan, niet ulon keuneuk peuhanco banda nyan ulon peubateu." geupeugah lom le nabi ibrahim, "neupeu amphon kheueh ulon ateuhe kroejaman babah lon nyoe lon meututoe lom ngon droeneueh. ya tuhan, pakriban meunyo nyang hana meusalah nyan cit dua ploh droe sagai?" feureuman tuhan ubak nabi ibrahim, "meunyo na ulon teume dua ploh droe lam banda nyan nyang hana meusalah, teuma banda nyan hana lon peuhanco." akhe jih nabi ibrahim geupeugah lom, "bek beungeh ya tuhan, sigoe teuk lon peugah haba ngon droeneueh. pakriban meunyo na ureueng nyang meusalah cit siploh droe sagai?" feureuman tuhan ubak nabi ibrahim, "meunyo na siploh droe nyang hana meusalah, banda nyan hana ulon peuhanco." oh ka ltheueh seulesoe tuhan geumeufureuman ubak nabi ibrahim, tuhan laju geujak dan nabi ibrahim pih laju geuwoe u rumoh gobnyan. oh ltheueh geumeujame bak nabi ibrahim, bandua droe malaikat nyan laju geujak u sodom dan trok keunan watee ka malam. nabi lot teungoh geudeuk-duek bak babah pintoe geureubang banda, dan watee geukalon mandua droe malaikat nyan, laju geubeudoh keugeujak sambot awaknyan, oh ban trok keunan laju geupeugah, "teungku-teungku, neutamong laju lam rumoh lon. teungku bandua droe jeuet neurhah gaki dan neumudom bak rumoh lon. singoh beungoh, beunyo neutem, teungku-teungku jeuet neubeudoh banbeungoh that keu neujak lom teuma." teuma geujawueb le malaikat dua droe nyan, "teurimong gaseh, bah kheueh kamoe mudom disinoye, bak blang banda." nabi lot laju geulakee ngon meuharab that-that, dan akhe jih mandua droe malaikat nyan laju geutamong lam rumoh nabi lot nyan. nabi lot laju geuhidang peunajoh nyang mangat that-that sira geutot rutiube nyang seb, dan oh ltheueh nyan awaknyan pi laju geumakheun. teuma sigohlom mandua droe jame nyan geujak eh, ureueng-ureueng sodom laju jikeupong rumoh nabi lot nyan. banmandum ureueng agam nyang na lam banda nyan, bah kheueh nyan nyang tuha meunan cit nyang muda, na disinan. awaknyan jitawok ubak nabi lot sira jityanyong, "dipat ureueng-ureueng nyang banteuka dan jimudom di rumoh gata? peujok laju awaknyan ubak kamoe, mangat jeuet kamoe meugumpoi ngon awaknyan!" nabi lot laju geuteubiet nibak rumoh geuh, dan oh ka ltheueh geutob pintoe, laju geupeugah ubak ureueng-ureueng sodom nyang ka jikeulileng rumoh geuh nyan, "syedara-syedara lon banmandum, ulon lakee ngon peunoh harab, bek kheueh gata peubuet hai-hai nyang jeuhet lagee nyan! deungoe kheueh ulon peugah, ulon na aneuek dara dua droe dan mantong peurawan. bah kheueh

ulon jok aneuek nyan ubak gata dan gatanyoe banmandum jeuet gata peubuet ban galak droe ateuhe aneuek ulon mandua nyan. asai bek sagai-sagai gata peukaru jame ulon nyoe; sabab ulon wajib lon jaga awaknyan." teuma laju jipeugah le ureueng-ureueng sodom nyan ubak nabi lot, "jak weeh keudeh! gata ureueng aseng keuneuk atoe kamoe? bagaih, jak laju! meunyo han, gata teuma teupoh leubeh brat nibak mandua ureueng nyan." oh ltheueh jikheun lagee nyan awaknyan laju jitulak nabi lot oh ltheueh nyan meusajan-sajan jicuba keuneuk dubrak pintoe rumoh nabi lot nyan. teuma le jame nyang na lam rumoh nyan laju geusunyueng jaroe geuh uluwa dan geutarek nabi lot nyan lam rumoh lon dan oh ltheueh nyan pintoe pih laju geutob. le malaikat nyang dua droe nyan laju geupeubuta mata ureueng-ureueng nyang na bansikeulileng rumoh nyan, sampoe awaknyan hana deuh jikalon pat pintoe rumoh nabi lot. ban dua droe jame nyan geupeugah ubak nabi lot, "meunyo gata na aneuek agam, aneuek inong, meulintee atawa wareh kawom nyang laen nyang na tinggai lam banda nyoe, gata ba kheueh awaknyan mangat jiteubiet nibak teumpat nyoe, sabab banda nyoe keuneuk kamoe peuhanco. tuhan ka geudeungoe tudohan-tudohan nyang lumpah brat ateuhe ureueng-ureueng duek lam banda nyoe, dan kamoe ka geukirem le gobnyan keukamoe peuhanco banda sodom nyoe." dan nabi lot pih laju geujak meurumpok ngon bandua droe tunangan aneuek gobnyan, oh trok keunan laju geupeugah, "bubagaih gata teubiet lam banda nyoe, sabab tuhan keuneuk peuhanco banda sodom nyoe." teuma le awaknyan jipike haba nabi lot nyan geumeukra. oh watee uroe ka suboh, mandum droe malaikat nyan geupaksa ubak nabi lot mangat bubagaih geujak geutinggai teumpat nyan. "bagaih," kheun malaikat nyan. "gata jak kheueh laju ngon peurumoh gata dan bandua droe aneuek dara gata nibak teumpat nyoe, mangat gata hana mate watee banda nyoe teupeuhanco." nabi lot bingong. teuma tuhan weueh watee geungieng ateuhe nabi lot nyan; sabab nyan kheueh mandua droe jame geuhnyan laju geutunton nabi lot, peurumoh gobnyan dan mandua droe aneuek gobnyan geupeuteubiet uluwa banda. oh ka ltheueh nyan, sidroe lamkawan malaikat nyan laju geupeugah ubak nabi lot lagee nyoe, "plueng kheueh, jak peuseulamat nyawong gata! bek gata ngieng ulikot dan bek teuma gata piyoh lam panton. gata plueng kheueh u gunong-gunong, mangat gata hana mate!" teuma nabi lot laju geujawueb, "hei, teungku bek neuyee plueng kamoe u gunong-gunong. beutoi, teungku ka neutulong ulon dan ka neupeuseulamat nyawong ulon. teuma gunong-gunong nyan jioh lumpah na; pat tateupeue ulon meuteume jilet le bala nyang raya nyan dan ulon pih laju mate sigohlom trok ubak gunong nyan. ngieng kheueh, dikeue nyan na banda ubit nyang hana that jioh. neupeu idhin kheueh ulon plueng keunan mangat ulon seulamat." geujawueb le malaikat nyan, "get, meunyo meunan banda ubit nyan hana ulon peuhanco. bagaih, plueng kheueh laju! sabab ulon hana hase lon peubuet sapeue sigohlom gata trok ubak teumpat nyan." sabab nabi lot geupeugah banda nyan ubit, laju teuboh nan

banda nyan zoar. mata uroe teungoh jiteubiet watee nabi lot trok u zoar. dan tuhan laju geupeutreun ujeuen beulerang nyang meu apui ateuh banda sodom dan gomora. mandua boh banda nyan habeh geupeuhanco, meunan cit banmandum panton dan seunaman dan mandum peunduduek nyang na lam banda nyan habeh hanco sampan sapa. teuma peurumoh nabi lot geungieng ulikot, dan bak watee nyan cit teuma gobnyan meu-ubah jeuet keu tameh sira. oh singoh beungoh, banseuboh that, nabi ibrahim bagaih-bagaih geujak u tempat gobnyan dong dikeue tuhan siuroe sigohlom teujadi nyan. gobnyan laju geupandang u ateuh sodom dan gomora meunan cit ubak mandum panton, dan deuh geukalon asab meukeupong nibak tanoh nyan, lagee asab nyang na bak tungkee apui raya. meunan kheueh, watee po teu allah geupeubinasa banda-banda nyan bak panton tempat nabi lot tinggai, allah ingat ubak nabi ibrahim dan geutulong nabi lot keu jeuet geuplueng droe. sabab nabi lot teumakot tinggai bak banda zoar, teuma geujak kheueh laju ubak gunong-gunong meusajan-sajan ngon mandua aneuek inong gobnyan, dan geutinggai laju lam guha nyang na bak gunong nyan. aneuek inong nyang tuha jipeugah ubak adoe jih, "ayah ka tuha, dan bansaboh nanggroe nyoe hana ureueng agam nyang jitem meukawen ngon tanyoe mangat tanyoe meuteume aneuek. jak, tapeujeuet ayah geutanyoe mabok, laju taeh ngon gobnyan mangat tanyoe hase tameu aneuek." bak malam nyan awaknyan mandua adoe ngon po laju jipeujeub ayah jih ngon ie anggo, oh ltheueh nyan aneuek nyang tuha laju jieh ngon ayah jih nyan; dan ayah jihnyan sabab brat that mabok sampoe hana geuteupeue peue nyang ka teujadi. oh singoh beungoh aneuek nyang tuha nyan jipeugah ubak adoe jih, "beuklam ulon ka ulon eh ngon ayah! euntreuk malam tapeumabok gobnyan lom, dan laju gata teuma nyang eh ngon gobnyan. singoh tanyoe maseng-maseng na aneuek." dan meunan kheueh bak malam nyan aneuek dara nabi lot nyan jipeumabok lom ayah jih nyan, dan aneuek gobnyan nyang keudua laju jieh ngon nabi lot, dan nabi lot sabab ka mabok nyang lumpah brat sampoe hana geuteupeue peue nyang ka teujadi. dan mume kheueh mandua aneuek nabi lot sabab buet ayah jih keudroe. aneuek nyang tuha jipeulahe sidroe aneuek agam nyang jiboh nan moab. dan moab nyan kheueh nyang jeuet keu indatu bansa moab nyang na bak saat nyoe. aneuek nyang keudua jipeulahe aneuek agam nyang jiboh nan ben-ami. dan jihnyan jeuet keu indatu bansa amon nyang na bak saat nyoe. nabi ibrahim laju geuminah nibak mamre u bagian seultan tanoh kanaan, dan laju geutinggai teutab lamkawan kades ngon syur. na padub treb teuma oh ltheueh nyan, watee gobnyan tinggai di gerar, laju geupeugah bahwa sara peurumoh geuhnyan na kheueh adoe gobnyan. sabab nyan kheueh raja abimelekh nibak gerar jikirem utosan gobnyan mangat sara jiba ubak raja nyan. bak simalam allah geupeuleumah droe ubak raja nyan lam lumpo, dan laju geupeugah, "gata teuma mate, sabab ka gatacok ureueng inong nyan; sabab inong nyan ka meulakoe." teuma di abimelekh gohlohm geuteumemat sara nyan, teuma

geupeugah le raja nyan, "tuhan, ulon nyoe hana salah! peu kheueh tuhan neupeubinasa ulon dan bansa lon? nabi ibrahim keudroe geupeugah bahwa inong nyan adoe gobnyan, dan inong nyan pih jipeugah bahwa jihnyan na kheueh adoe nabi ibrahim. ulon ka lon peubuet hainyan ngon ate nyang gleh, dan ulon hana salah." allah laju geujaweub lam lumpo nyan, "nyan bit beutoi, ulon teupeu gata peubuet nyan ngon ate nurani nyang gleh. sabab nyan kheueh ulon seugah bek gata peubuet desya ateueh ulon, dan hana lon peubieu gata mat inong nyan. teuma jinoenyoe, jakpulang kheueh inong nyan bak lakoe jih. lakoe jihnyan sidroe nabi, dan jihnyan jimeudoa keu gata, mangat gata bek mate. teuma meunyeoe gata hana tajokpulang peurumoh jihnyan, ingat, gata dan banmandum rakyat gata teuma mate!" oh singoh beungoh, banbeungoh that, abimelekh laju geutawok banmandum peugawee gobnyan dan oh ka meusapat laju geupeugah peue nyang ka leumah lam lumpo geuh beuklam. dan awaknyan pi teumakot ngon yo lumpah na. oh ltheueh nyan abimelekh laju geutawok nabi ibrahim laju geutanyong, "peue nyang ka gata peulaku ateuh kamoe? peue salah ulon ateueh gata, sampoe gata peuteuka bala nyoe ateueh droe ulon dan keurajeuen lon? biet hana patot gata peubuet lagee nyan ateueh ulon. pakon tapeubuet lagee nyan?" geujaweub le nabi ibrahim, "ulon pike, disinoe hana ureueng nyang jitakot ubak po teu allah, sampoe ulon keuneuk jipoh mate le ureueng nyang keuneuk cok peurumoh lon. lom teuma jihnyan beutoi adoe ulon. kamoe saboh yah, laen ma, dan oh ltheueh nyan kamoe meukawen. dan watee allah geuyue tinggai rumoh ayah dan geuyue jak meuranto u nanggroe aseng, laju lon peugah ubak peurumoh lon, 'peuleumah kheueh keuseutiaan gata ubak ulon deungon gata peugah bahwa ulon nyoe na kheueh aduen gata.' " oh ltheueh nyan abimelekh laju geupulang sara ubak nabi ibrahim, bak wateenyan na cit geubri namiet, bubiri dan leumo. geupeugah le raja nyan ubak nabi ibrahim, "nyoe kheueh banmandum nanggroe lon; gata duek kheueh pat nyang galak gata." dan geupeugah laju ubak sara, "ubak aduen gata ka ulon bri siribee peng pirak sibagoe bukeuti ubak mandum ureueng bahwa gata beutoi-beutoi hana meusalah." banmandum ureueng inong nyang na lam meuligoe abimelekh ka habeh geupeu balui le tuhan sabab keujadian ateueh sara peurumoh nabi ibrahim nyan. dan nabi ibrahim pih laju meudoa ubak po teu allah, dan allah laju geupeupuleh abimelekh, peurumoh gobnyan dan namiet-namiet gobnyan nyang inong, akhe jih banmandum ureueng inong nyang na lam meuligoe nyan ka jeuet jipeulahe aneuek lom teuma. tuhan geubri beureukat ateueh sara, lagee nyang ka peujanji. bak watee nyang ka geupeuteuntee le po teu allah, watee nabi ibrahim ka tuha, mume kheueh sara dan oh trok bak watee geupeulahe kheueh sidroe aneuek agam, nabi ibrahim laju geuboh nan aneuek geuh nyan nabi ishaq; dan watee nabi ishaq ka na umu lapan uroe, le nabi ibrahim laju geupeukatan aneuek geuhnyan, lagee nyang ka geupeurintah le allah ubak gobnyan. nabi ibrahim ka meu-umu sireutoh thon watee nabi ishaq lahe. geupeugah

le sara, "allah ka geupeujeuet ulon teukem sabab harok ate. soe mantong nyang deungoe hainyoe teuma teukem ngon galak meusajan ulon." oh ltheueh nyan geupeugah lom, "soe bunoe nyang peugah bak lakoe lon bahwa ulon teuma lon peumom aneuek manyak? teuma hainyan ka teujadi ulon ka lon peulahe aneuek bahpi lakoe ulon ka tuha lumpah na." aneuek nyan meutamah rayeuk, dan bak uroe pon that aneuek nyan teulah mom, nabi ibrahim laju geupeuna khanuri nyang lumpah rayeuk. bak siuroe, nabi ismail, aneuek nabi ibrahim dan hagar ureueng inong nanggroe meuse nyan teungoh jimeuen-meuen ngon nabi ishaq, aneuek sara. sara jikalon hainyan dan laju jipeugah ubak nabi ibrahim, "use laju namiet inong nyan meusajan ngon aneuek jih, hana jeuet aneuek inong nyan jiteurimong atra waresan droeneueh nibak keukayaan droeneueh nyang teuma jiteurimong le aneuek ulon nabi ishaq." nabi ibrahim mubacut pih hana galak peue nyang ka jiyue le inong geuh nyan, sabab nabi ismail aneuek gobnyan cit. teuma po teu allah meufeureuman ubak nabi ibrahim, "bek kheueh gundah ate gata keuhai namiet gata hagar dan aneuek jih nyan nabi ismail, turot kheueh peue nyang jipeugah le sara nyan, sabab rot nabi ishaq kheueh gata teuma meuteume keuturonan nyang le lagee nyang ka ulon peugah ubak gata nyan. meunan cit keu aneuek hagar teuma ulon bri aneuek cucoe nyang le mangat awaknyan jeuet keu saboh bansa. sabab nyan aneuek gata cit teuma." oh singoh beungoh mantong seuboh that, nabi ibrahim laju geujok ubak hagar peunajoh dan saboh baluem kulet nyang meuasoe ie keubeukai bak rot ueh. aneuek nyan laju geukeubah bak rhueng hagar, oh ltheueh nyan laju geuyue ureueng inong nyan. dan geujak kheueh hagar ngon aneuek geuh meugeumbara lam padang pasi bersyeba. watee ie beukai bak rot ueh nyan ka habeh, hagar laju geukeubah aneuek geuhnyan bak bineh gire, oh ltheueh nyan laju geudeuk na kira-kira sireutoh metee nibak teupat nyan. kheun gobnyan lam ate geuh, "ulon hana ek lon teun watee lon kalon aneuek lon mate." dan laju geumo ngon ate peudeh. po teu allah geudeungoe su nabi ismail, dan dilanget malaikat allah geumeututoe ubak hagar, kheun gobnyan, "peue nyang gata susah, hei hagar? bek teumakot, allah ka geudeungoe su aneuek gata. jak kheueh laju bak aneuek gata, gata tiengkue dan gata peuseungab kheueh jihnyan. ulon teuma lon peujeuet keuturonan gata saboh bansa nyang raya." dan bak saat nyan cit teuma allah geupeudeuh bak hagar ngon nyata, sampoe deuh geukalon le hagar nyan saboh mon. dan geujak kheueh laju keunan geupasoe lah baluem kulet nyan ngon ie sampoe peunoh, oh ltheueh nyan laju geubri ubak aneuek gobnyan dan nabi ismail pih laju geujieb ie nyan. po teu allah teutab geujaga nabi ismail, treb bak treb aneuek nyan pih meutamah rayeuk; gobnyan tinggai teutab nibak padang pasi nyang nan jih paran, dan jeuet keu sidroe ureueng peulet beulatang buih nyang paleng carong. ma gobnyan laju geupeukawen nabi ismail nyan ngon sidroe inong ureueng nanggroe meuse. bak watee nyan raja abimelekh dan pikhol, panglima sidadu gobnyan, geujak ubak nabi

ibrahim sira jipeugah lagee nyoe, "allah geutulong droeneueh peue-peue mantong nyang droeneueh peubuet. sabab nyan, neumeusumpah kheueh disinoe, dikeue po teu allah, bahwa droeneueh hana neupeubuet nyang jeuhet ateuhe ulon, meunan cit ateuhe aneuek-aneuek lon, atawa keuturonan lon. lagee ulon ka lon peudeuh bahwa ulon jroh ate teuhadab droeneueh, dan neupeubuet kheueh lagee nyan teuma ateuhe ulon dan ubak nanggroe nyang droeneueh duek nyoe." kheun nabi ibrahim, "ulon meusumpah." oh ltheueh nyan nabi ibrahim geungeuen that geuh ubak abimelekh keuhai saboh mon nyang ka jireupah le namiet-namiet raja nyan. jipeugah le abimelekh, "ulon hana lon tusoe soe nyang ka reupah mon nyan. gohlohm na droeneueh peugah hainyan ubak ulon, dan nyoe kheueh baro lon deungoe hainyan nibak droeneueh." dan oh ltheueh nyan nabi ibrahim laju geubri na meupadub boh bubiri, leumo ubak abimelekh, dan bandua droe ureueng nyan laju geupeuet peujanjian. nabi ibrahim geupeuweuk laju tujoh boh aneuk bubiri nyang na lamkawan bubiri geuh, dan abimelekh laju geutanyong ubak gobnyan, "keupeue droeneueh peubuet hai nyoe?" geujaweueb le nabi ibrahim, "teurimong kheueh bantujoh boh aneuek bubiri nyoe sibagoe tanda droeneueh neuaku bahwa ulon kheueh nyang kueh mon nyoe." nyang kheueh jeuet teupat nyan teuboh nan bersyeba, sabab bak teupat nyan kheueh awaknyan bandua geumeusumpah. oh ka ltheueh awaknyan geupeuna janji di bersyeba nyan, abimelekh dan pikhol laju jigisa u nanggroe ureueng filistin. dan nabi ibrahim laju geupula sibak bak kayee tamariska di bersyeba dan phon saat nyan teupat nyan jipeuguna keu teupat seumah tuhan, allah nyang keukai. oh ka ltheueh nyan nabi ibrahim treb lom gobnyan tinggai di nanggroe ureueng filistin. na meupadub treb teuma oh ltheueh nyan allah geu-ujoe keuseutiaan nabi ibrahim, allah geutawok, "hei ibrahim!" laju nabi ibrahim geuseuot, "nyoeat lon, tuhan." feureuman allah, "gata jak kheueh u gunong moria ngon aneuek gata nyan nabi ishaq, aneuek gata nyang tinggai, nyang paleng gata galak. bak teupat nyan, bak saboh gunong nyang teuma ulon tunyok ubak gata, gata peuseumah kheueh aneuek gata sibagoe keureubeuen nyang teutot keu ulon." oh singoh beungoh, banseuboh that, nabi ibrahim laju geuplah-plah kayee keukayee keureubeuen nyang teutot, oh ltheueh nyan kayee nyan laju geuik ateuhe keuleudee gobnyan. oh ltheueh nyan laju geujak ngon nabi ishaq dan dua droe peulayan gobnyan ubak gunong nyang ka geupeugah le allah ubak gobnyan. bak uroe nyang keulhee deuh kheueh geukalon le nabi ibrahim teupat nyang geupeugah le allah nyan rot jioh. dan geupeugah laju ubak bandua droe peulayan gobnyan, "bah kheueh kamoe mantong tinggai disinoe ngon keuleudee nyoe. ulon dan aneuek ulon keuneuk jak bak teupat jeh keukamoe seumah tuhan, entreuk teuma kamoe riwang ubak gata." nabi ibrahim laju geukeubah kayee keukeureubeuen nyan ateuhe baho nabi ishaq, seudangan gobnyan keudroe geuba sikan dan ngeue apui keungon tot kayee. watee awaknyan teungoh geujak meusajan, nabi ishaq geutanyong

bak ayah gobnyan, "ayah!" jaweueb nabi ibrahim, "nyoe lon neuk, peue na peureulee?" geutanyong le nabi ishaq, "tanyoe kataba ngeue apui ngon kayee, teuma nyang lon tanyong pat kheueh aneuek bubiri nyang tanyoe keureubeuen nyan?" geujaweueb le nabi ibrahim, "allah keudroe nyang jok aneuek bubiri nyan keugeutanyoe." dan mandua aneuek ngon yah nyan pih geujak laju. watee awaknyan ka trok ubak teumpat nyang ka ltheueh geupeugah le allah ubak nabi ibrahim nyan, le nabi ibrahim laju geupeudong saboh miseubah dan geusoson teuma kayee apui keu ngon keureubeuen ateueh miseubah nyan. oh ltheueh nyan geuik laju aneuek geuhnyan dan geupeueh laju ateueh kayee apui nyang kana diateueh miseubah nyan. oh ltheueh nyan geucok laju sakin geukeuneuk sie aneuek geuhnyan. teuma malaikat tuhan geupeugah ubak gobnyan di langet, "nabi ibrahim, nabi ibrahim!" jaweueb nabi ibrahim, "nyoe pat lon tuhan!" bek gata peusaket aneuek nyan atawa gata peubuet peue mantong ateueh aneuek nyan." kheuen tuhan meulala malaikat geuh nyan. "jinoenyoe ka ulon teupeu bahwa gata taat dan horeumat ubak ulon, sabab gata hana tatulak keu gata seurah aneuek gata nyang tunggai nyan ubak ulon." dan nabi ibrahim laju geukalon bansikeulileng nyan dan deuh laju geungieng na saboh bubiri agam nyang lungkee jih meusangkot lam seumak-seumak nyang na disinan. nabi ibrahim laju geucok bubiri nyan dan geusie laju sibagoe keureubeuen nyang teutot ubak tuhan keugeunantoe aneuek gobnyan. nabi ibrahim geuboh nan teumpat nyan, "tuhan geukeubah nyang teupeureulee." dan sampoe saat nyoe jipeugah le gob "di ateueh gunong geuhnyan tuhan geukeubah nyang teupeureulee". sigoe teuk di langet nyang manyang malaikat tuhan geupeugah ubak nabi ibrahim, "tuhan meufeureuman: ulon meusumpah deumi nan ulon keudroe, sabab gata ka gata peubuet hainyoe dan hana gata tulak keu gata jok aneuek gata nyan yang tunggai ubak ulon, ulon teuma lon bri beureukat ubak gata nyang meulimpah ruwah dan lon peujeuet keuturonan gata sidub le bintang di langet dan lagee anoe bak bineh laot. aneuek cucoe gata teuma jipeutaloe bubena musoh-musoh nyang jeuet keusiteuru jih. banmandum bansa nyang na ateueh rhueng bumoe teuma jilakee ubak ulon mangat lon bri beureukat ubak jihnyan lagee nyang ka lon bri beureukat ubak keuturonan gata – sabab gata ka gata taat ubak peue nyang ulon peurintah." oh ka ltheueh nyan geuriwang kheueh nabi ibrahim ubak bandua droe peulayan gobnyan, dan ngon awaknyan meusajan-sajan geujak u bersyeba, dan nabi ibrahim laju geutinggai teutab disinan. nabi ibrahim na aduen geuh nan jih nahor. oh ka ltheueh keujadian bak gunong moria nyan, nabi ibrahim na geudeungoe bahwa milka, peurmoh nahor kana geumeu aneuek lapan droe aneuek agam, nan-nan aneuek nyan na kheueh: us, nyang paleng tuha; bus, adoe gobnyan; kemuel, nyang oh dudoe jeuet keu ayah aram; kesed, hazo, pildas, yidlaf, dan betuel, nyang oh dudoe jeuet keu ayah ribka. nyan kheueh banlapan droe aneuek nyang geupeulahe le milka keu nahor, syedara nabi ibrahim. nahor na gundek geuh nan jih reuma dan nibak gundek

nyan na jipeulahe tebah, gaham, tahas dan maakha. watee sara kana umu gobnyan 127 thon, gobnyan meuninggai donya di hebron bak tanoh kanaan. nabi ibrahim seudeh that dan laju geupeumo ba-e watee meuninggai peurmoh geuh nyan. oh ltheueh nyan nabi ibrahim geutinggai manyet peurmoh gobnyan disinan dan geujak laju ubak ureueng-ureueng het, nyang duek lam nanggroe nyan. oh trok keunan laju geupeugah, "ulon nyoe ureueng aseng nyang na tinggai lamkawan syedara; neupeu idhin kheueh bak ulon mangat jeuet ulon bloe saboh keubeung tanoh mangat jeuet lon jakpeukubu lam jrat peurmoh ulon nyang ka meuninggai donya." jijaweueb le awaknyan, "kamoe horeumat ubak amphon sibagoe peumipeng nyang teuga lamkawan kamoe, dan neujak peukubu kheueh peurmoh amphon bak tanoh jrat nyang paleng get nyang na nibak kamoe. kamoe banmandum galak kamoe peuna kubu keupeurmoh amphon." oh ltheueh nyan nabi ibrahim pih laju geusujut dikeue awaknyan, dan laju geupeugah, "meunye syedara banmandum rela lon peukubu peurmoh lon disinoe, tulong kheueh neulakee ubak efron, aneuek agam zohar, mangat gobnyan geupeubloe keu ulon guha makhpela nyang na bak bineh ladang geuhnyan. bah kheueh gobnyan geupeubloe tanoh nyan disinoe, syedara-syedara nyang na disinoe jeuet neukalon keudroe. yuem jih teuma lon bayeue peunoh, mangat tanoh nyan jeuet keuhak milek lon." bak watee nyan efron teungoh jiduek-duek ngon ureueng het nibak teumpat meurumpok nyang nan jih pintoe geureubang banda. dan deungon jikalon le ureueng nyang na disinan, laju jijaweueb, "bansa ulon keudroe jeuet keusaksi bahwa ladang nyan meunan cit ngon guha nyang na disinan ulon bri ubak amphon mangat bak teumpat nyan jeuet amphon kubu peurmoh droeneueh." teuma nabi ibrahim laju geusujut dikeue ureueng-ureueng het nyan, dan deungon jideungoe le banmandum ureueng nyang na disinan, laju geupeugah ubak efron, "deungoe kheueh ulon peugah. ulon meukeusut keuneuk bloe banmandum ladang nyan. teurimong kheueh peng jih, mangat jeuet ulon kubu peurmoh lon bak teumpat nyan." jijaweueb le efron, "saboh keubeung tanoh nyang yuem jih cit peuet reutoh peng pirak keupeue kheueh guna nyan keutanyoe bandua? jak kubu kheueh peurmoh amphon bak teumpat nyan." nabi ibrahim situju ngon yuem sidueb nyan. gobnyan laju geuitong peng pirak sidub nyang ka jipeugah le efron nyan, na kheueh peuet reutoh peng pirak, meunurot timbangan nyang jipeuguna le saudaga. dan geubayeue laju ubak efron, deungon jikalon le banmandum ureueng het nyang na disinan. meunan kheueh jeuet jih, ladang efron nyang na di makhpela disiblahi utimu mamre, ka jeuet keu hakmilek nabi ibrahim. lam tanoh nyan nyang na ladang ngon guha meunan cit banmandum bak-bak kayee nyang na disinan dan bak kayee nyang na bak bataih-bataih nyan. tanoh nyan jiaku sibagoe tanoh nabi ibrahim le banmandum ureueng het nyang na teuka bak teumpat meurumpok di babah pintoe geureubang banda. oh ka ltheueh nyan nabi ibrahim laju geupeukubu sara peurmoh geuhnyan lam guha makhpela di tanoh kanaan.

meunan kheueh ladang meusajan ngon guha nyang na disinan nyang yoh awei atra ureueng het, ka jeuet keu hakmilek nabi ibrahim keugeupeuguna sibagoe lampoh jrat. nabi ibrahim ka tuha lumpah na, dan gobnyan geubri beureukat le tuhan lam hai peue mantong. bak siuroe geupeugah kheueh le nabi ibrahim ubak namiet gobnyan nyang paleng tuha, nyang peutimang hareuta beunda gobnyan, "gata peudeuk kheueh jaroe gata ateuheh pha ulon. gata meusumpah kheueh deumi tuhan, allah nyang kuasa langet bumoe, bahwa gata hana gata mita peurumoh keu nabi ishaq aneuk lamkawan ureueng-ureueng nyang na di tanoh kanaan nyoe. gata haroh gata gisa u nanggroe teupat ulon lahe keu gata mita inong lamkawan syedara lon keupeurumoh nabi ishaq," dan jitanyong kheueh le namiet nyan ubak nabi ibrahim, "pakriban meunyo aneuk inong nyan hana jitem tinggai rumoh jih hana teuma jitem seutot ulon u nanggroe nyoe? peu kheueh haroh ulon ba aneuk amphon nyan u nanggroe asai amphon?" geujaweueb le nabi ibrahim, "awaih! bek sagai-sagai aneuk ulon nyan gata ba keudeh! tuhan, allah nyang kuasa langet, ka geuba ulon nibak rumoh ayah lon dan nibak nanggroe wareh kawom lon, dan gobnyan ka geumeusumpah ubak ulon bahwa gobnyan teuma geubri nanggroe nyoe ubak keuturonan lon. meunan cit gobnyan teuma geukirem malaikat geuh keu jitulong gata, mangat gata hase gata teume sidroe peurumoh nibak teupat nyan keu aneuk ulon. teuma meunyo aneuk dara nyan hana jitem jak ngon gata, gata beubaih nibak sumpah nyoe. pakriban cit teuma, bek gata ba aneuk ulon nyan keudeh." oh ltheueh nyan dinamiet nyan pi laju jikeubah jaroe jih ateuheh lhak pha nabi ibrahim amphon jih nyan, dan laju jimeusumpah keu jipeubuet peue nyang ka geupeugah le nabi ibrahim nyan. namiet nyan laju jicok siploh boh unta meunan cit mubagoe rupa barang-barang nyang meuhai yuem jih atra amphon jih dan jijak laju ubanda teupat tinggai nahor yohmantong udeb gobnyan; teupat jih siblahi utara mesopotamia. oh ka trok namiet nyan keudeh, jipeupioh laju banmandum unta-unta nyan bak bineh mon di luwa banda. uroe ka seupot, dan watee uroe seupot nyan kheueh ureueng-ureueng inong jijak bakmon keu jijakcok ie. dan namiet nyan pih laju jimeudoa, "tuhan, allah amphon lon nabi ibrahim, tulong kheueh, mangat tugaih lon hase nibak uroe nyoe; beuget kheueh ate droeneueh keu amphon lon nabi ibrahim. ngieng kheueh, ulon dong bak bineh mon nyoe. sikeujab teuk aneuk-aneuk dara nibak banda teuma jijak cok ie bak mon nyoe. ulon teuma lon peugah ubak sidroe ureueng lamkawan aneuk dara nyan, 'tulong, peutreun kheueh pacok ie gata ulon keuneuk jieb ie bacut.' meunyo geujaweueb, 'bapak jieb kheueh, dan meunan cit ngon unta-unta bapak teuma lon bri cit ie jieb!' nyan kheueh ureueng nyang tuhan pileh keu peurumoh hamba droeneueh nabi ishaq. meunyo hainyan teujadi, ulon teuma lon teupeu bahwa tuhan ka jroh ate ubak amphon lon nabi ibrahim." teungoh gobnyan meudoa nyan, na sidroe aneuk dara nyang nan jih ribka, ureueng jih lagak lagoena dan mantong peurawan, laju trok bak mon nyan sira jigulam

pacok ie nibak baho. sidara nyan aneuk betuel, dan ureueng syiek betuel na kheueh nahor dan milka; nahor nyan na kheueh aduen nabi ibrahim. ribka laju jijak bak mon nyan oh trok keunan laju jipaso pacok ie jihnyan, oh ltheueh nyan laju jiwoe. namiet nabi ibrahim nyan laju jiplueng sira jipeurab ubak aneuk dara nyan dan jipeugah laju, "tulong neuk, gata bri kheueh ulon jieb ie nyang na lam pacok gata nyan." jijaweueb le aneuk dara nyan, "neujieb kheueh pak," dan bagaih-bagaih pacok nyan jipeutreun nibak baho jih, dan sira jimat pacok nyan laju jibri ie jieb ubak namiet nyan. oh ka ltheueh seulesoe namiet nyan jijieb ie; jipeugah kheueh le aneuk dara nyan, "ulon keuneuk jak timok ie lom keu unta-unta bapak, mangat banmandum beulatang nyan jeuet jijieb ie sipuih-puih jih." oh ltheueh nyan bagaih-bagaih ie nyang na lam pacok nyan jiro lam teupat ie unta, dan oh ltheueh nyan jiplueng lom bak mon jijak cok ie leubeh le lom sampoe banmandum unta nyan habeh jiteume jieb ie. namiet nabi ibrahim teutab geungieng mantong hainyan dan hana geumeututote meusikrak haba. gobnyan geukeuneuk kalon peu kheueh tuhan geubri hase useuha geuh nyan atawa hana. oh ka ltheueh jijieb ie unta nyan banmandum samoe puih sipuih-puih jih, namiet nabi ibrahim laju geucok pianan meuh nyang paleng meuyuem, dan laju geupeungui bak idong aneuk dara nyan. bak jaroe aneuk nyan geupeungui teuma sipasang gleueng meuh. dan geupeugah laju le namiet nyan, "ci gata peugah soe ayah gata. peu kheueh na teupat eh dirumoh gobnyan keu ulon dan rakan-rakan lon?" "ayah ulon betuel bin nahor dan milka," jaweueb sidara nyan. "dirumoh kamoe na teupat eh keu bapak dan dirumoh pi jai that jerami keu eumpeuen beulatang," dan jisujut kheueh namiet nyan jiseumah tuhan. sira jipeugah, "pujoe kheueh tuhan, allah amphon ulon nabi ibrahim. tuhan rupari seutia dan get ate ubak amphon ulon nabi ibrahim. gobnyan ka geupimpen ulon langsung ubak wareh kawom geuh." oh ltheueh nyan aneuk dara nyan laju jiplueng urumoh mak jih dan jipeugah laju banmandum peue nyang ban ltheueh jialmai. ribka na sidroe aduen nyang nan jih laban. jihnyan jideungoe mandum peue nyang ka jicalitra le adoe jih keuhai peue nyang jipeugah le namiet nyan. dan jikalon teuma na pianan bak idong ngon gleueng meuh bak jaroe adoe jih nyan. dan jiplueng kheueh laban uluwa rumoh jijak meurumpok ngon namiet nabi ibrahim nyan nyang mantong teudong ngon unta-unta jih bak bineh mon nyan. laju jipeugah le laban, "bapak ureueng nyang geubri beureukat le tuhan! bek bapak tinggai diluwa lagee nyoe. jak urumoh kamoe. kamoe ka peusiab kama keu bapak dan meunan cit keuteupat unta-unta bapak," dan jijak kheueh namiet nyan sira jitamong lam rumoh. laban laju jipeutreun banmandum barang-barang nyang na ateuheh unta-unta nyan, oh ltheueh nyan laju jibri jerami dan eumpeuen-eumpeuen keu mandum unta nyan. oh ltheueh nyan laju jijakcok ie rhah gaki namiet nyan dan keu ureueng-ureueng laen rakan-rakan namiet nyan. watee peunajoh ka jihidang, namiet nyan laju jipeugah haba, "ulon hana lon pajoh bu sigihlom lon peusampoe peusan nyang ulon ba." jijaweueb

laban, "hana peue, ci gata peugah." dan jipeuphon kheueh peugah haba le namiet nabi ibrahim nyan, kheun gobnyan, "ulon nyoe namiet nabi ibrahim. tuhan geugaseh that-that keu amphon lon nyan dan geupeujeuet gobnyan sidroe ureueng nyang kaya lumpah na. tuhan ka geubri ubak gobnyan saboh kawan bubiri, kameng, leumo, unta, keledae, pirak, meuh, dan namiet agam ngon namiet inong. watee umu ka tuha that, sara, peurumoh amphon lon nyan ka geupeulahe sidroe aneuek agam, dan amphon ulon nyan ka geupeutreun hak wareh banmandum hareuta beunda ateuh aneuek geuh nyan. gobnyan ka geuyue ubak ulon mangat lon meujanji ngon meusumpah beulon taat peue nyang geupeurintah, meunoe kheun gobnyan ubak ulon, 'bek kheueh gata pileh peurumoh keu aneuek ulon dara-dara nyang na di nanggroe kanaan nyoe, keucuali gata mita aneuek dara nibak wareh kawom ayah ulon. dan gata jak kheueh keudeh deungoe sigra.' laju ulon tanyong ubak gobnyan, 'pakriban meunyo aneuek dara nyan hana jitem seutot ngon ulon?' laju geujaweueb le gobnyan, 'tuhan yang sabe ulon taat, teuma geukirem malaikat gobnyan keu geujak tulong mangat tugaih gata na hase. gata teuma meuteume gata mita peurumoh keu aneuek ulon nyang na lam kawom lon keudroe, jihnyan na kheueh nibak wareh kawom ayah lon. teuma meunyo awaknyan jitulak gata, gata pih leupaih nibak sumpah.' dan watee ulon katrok bak mon bunoe, laju lon meudoa lam ate, 'tuhan, allah amphon lon nabi ibrahim, bah kheueh tuhan neupeujeuet tugaih ulon nyoe na hase. ulon teuma teutab lon dong bak binch mon nyoe. meunyo na sidroe dara jijak cok ie, teuma lon lakee bak jihnyan mangat keu ulon jitem bri ie jieb. meunyo aneuek dara nyan jitem bri ie nyang ulon lakee nyan, dan jilakee cit mangat jibri ie jieb keu unta-unta lon, lon yaken nyan kheueh ureueng nyang ka tuhan pileh jeuet keupeurumoh aneuek amphon lon nyan.' gohlom seulesoe ulon kheun doa nyan lam ate, teuka kheueh ribka jiba pacok ie ateuh baho jih dan laju jicok ie lam mon nyan. oh ltheueh nyan ulon peugah ubak jihnyan, 'tulong kheueh ulon jieb ie, ulon grah that.' bagai that aneuek dara nyan jipeutreun pacok nyan nibak baho jih sira jipeugah, 'jieb kheueh, dan unta-unta bapak teuma lon bri cit jijieb ie.' oh ltheueh nyan laju lon tanyong, 'soe kheueh ayah gata hai aneuek meutuah?' dan laju jijaweueb, 'ayah ulon nan geuh betuel, meh nador dan milka.' laju ulon peungui piasan meuh nibak idong meunan cit gleung meuh nibak jaroe jih. laju ulon sujut lon seumah dan lon pujoe tuhan, allah amphon ulon nabi ibrahim. gobnyan ka geupimpen ulon langsung bak teumpat nyoe, ubak wareh kawom amphon ulon, sampoe ulon hase meurumpok ngon aneuek dara nyoe keu aneuek amphon lon. jinoenyo, meunyo awaknyoe neutem peusan neut amphon ulon deungon jroh dan neupeupeunoh tanggung jaweueb droeneuh sibagoe syedara gobnyan, beuneutem kheueh peugah ubak ulon, teuma meunyo han neutem, neupeugah cit teuma, mangat jeuet lon teupeu peue nyang haroh ulon peubuet." laban dan betuel laju geujaweueb, 'sabab peue nyang tejadi nyoe asai jih nibak tuhan, kamoe hana patot kamoe

bri keuputosan. nyoe ribka; bah kheueh jihnyoe jijak ngon bapak dan beujeuet keupeurumoh aneuek amphon bapak, lagee nyang ka geupeugah le tuhan keudroe." watee namiet nabi ibrahim nyan jideungoe haba awaknyan, laju jisujut jiseumah tuhan. oh ltheueh nyan jipeuteubiet laju peukayan, piasan pirak dan meuh, banmandum nyan laju geubri ubak ribka. meunan cit ubak aduen gobnyan ngon ma geuh jibri hadiah nyang meuhai-meuhai. oh ltheueh nyan namiet nabi ibrahim meunan cit ngon rakan-rakan gobnyan nyang laen laju geumakheun meusajan teuma, dan bak malam nyan awaknyan geumudom disinan. oh ka ltheueh awaknyan jibeudoh oh singoh beungoh, namiet nyan laju jipeugah, "neupeu idhin kheueh ulon keuneuk jakwoe ubak amphon lon" teuma aduen dan mak ribka geutanyong, "bah kheueh ribka tinggai ngon kamoe tujoh atawa siploh uroe teuk, oh ltheueh nyan baro kheueh jeuet jijak." teuma namiet nyan jijaweueb, 'bek neupeuteun ulon. tuhan ka geupeujeuet ulon jak keunoe na hase; neupeu idhin kheueh ulon woe ubak amphon lon." jaweueb awaknyan, 'jak tajak hoi ribka sira tatanyong pakriban kheun jih.' laju awaknyan geutawok ribka dan laju geutanyong, 'peu kheueh gatatem seutot ureueng nyoe?' jaweueb aneuek dara nyan, 'nyoe, ulon tem.' teuma awaknyan laju geubri idhin ubak ribka ngon dendayang jiseutot namiet nabi ibrahim dan rakan-rakan gobnyan. laju awaknyan geubri beureukat ubak ribka ngon tutoe haba lagee nyoe, 'seumoga gata ribka, jeuet keu mak meujuta-juta manusia! seumoga keuturonan gata jipeutaklok bubena banda musoh-musoh jih!" oh ltheueh nyan meukeumah-keumah kheueh ribka meusajan ngon inong-inong muda nyang jeuet keu dendayang gobnyan, oh seulesoe nyang laju geuek unta dan geujak kheueh laju meusajan ngon namiet nabi ibrahim nyan. watee nyan nabi ishaq ka trok geuteuka nibak padang pasi, trok laju bak mon nyang teupeunan "gobnyan nyang kalon ulon" dan tinggai bak bagian seulatan nanggroe kanaan. bak siuroe watee oh seupot, gobnyan laju geuteubiet nibak lam khimah keuneuk jak-jak lam ladang geuh, dan deuh laju geukalon unta-unta teungoh jijak. watee ribka geukalon nabi ishaq, laju geutreun ateuh unta, dan geutanyong laju ubak namiet nabi ibrahim nyan, "soe ureueng agam nyang na lam ladang nyan teungoh jijak ubak geutanyoe?" "gobnyan amphon ulon," jaweueb namiet nyan. ban geudeungoe lagee nyan ribka laju geucok ija seulandang geutob laju muka gobnyan. oh ltheueh nyan namiet nyan laju jicalitra ubak nabi ishaq peue-peue nyang ka geupeubuet. oh ltheueh nyan nabi ishaq laju geucok ribka geupeutamong lam khimah ma gobnyan, sara, dan nabi ishaq laju geumeukawen ngon ribka. nabi ishaq geucinta that-that ubak ribka; dan teuhibur kheueh ate nabi ishaq nyang seudeh sabab ka hana le ma geuh. nabi ibrahim geumeukawen lom ngon sidroe inong nyang nan jih ketura. peurumoh geuhnyan jipeulahe teuma aneuek-aneuek nyang laen nyan nan jih na kheueh: zimran, yoksan, medan, midian, isybak, dan suah. yoksan ayah syeba dan dedan, dan keuturonan dedan na kheueh ureueng asyur, ureueng letus, dan ureueng leum. aneuek-aneuek midian na kheueh:

efa, efer, henokh, abida, dan eldaa. awaknyan banmandum keuturonan ketura. bahpi nabi ibrahim geupeutleun banmandum hareuta geuh ubak nabi ishaq, yoh gobnyan mantong udeb le that-that geubri hadiah keu aneuek-aneuek geuh nyang laen nyang lahe nibak peurumoh-peurumoh gobnyan nyang laen. oh ltheuh nyan geuyute aneuek-aneuek geuhnyan u daerah bagian timu kanaan, mangat jeuet jih nibak nabi ishaq, aneuek gobnyan. nabi ibrahim meuninggai watee umu geuh ka tuha that, na kheueh 175 thon. gobnyan laju geupeukubu le aneuek-aneuek gobnyan, na kheueh nabi ishaq dan nabi ismail, lam guha makhpela nyang na bak ladang siblah utimu mamre. yoh masa dilee ladang nyan atra efron bin zohar, ureueng het, teuma ka geubloe le nabi ibrahim bak ureueng het nyan. sara, peurumoh nabi ibrahim, nyang teukubu bak teupat nyan. oh ka ltheuh nabi ibrahim meuninggai donya, allah laju geubri beureukat ubak nabi ishaq, aneuek nabi ibrahim. nibak masanyan nabi ishaq tinggai bak bineh mon nyang teuboh nan "gobnyan nyang kalon ulon." nabi ismail na kheueh aneuek nabi ibrahim dan hagar, inong nibak nanggro meuse, namiet sara nyan. nabi ismail na geumeu aneuek dua blaih droe nyang teupeugah disinoe meunurot urotan lahe jih: nebayot, kedar, adbeel, mibsam, misyama, duma, masa, hadad, tema, yetur, nafis dan kedma. banmandum aneuek-aneuek nyan jeuet keu indatu dua blaih boh sukee bansa, dan gampong meunan cit nan khimah-khimah awaknyan teuboh nan meunurot nan-nan awaknyan. nabi ismail na meu-umu 137 thon bak watee gobnyan meuninggai donya. keuturonan gobnyan tinggai bak daerah lamkawan hawila dan syur disiblahi utimu nanggro meuse rot jak u asyur. awaknyan udeb teuaseng nibak keuturonan nabi ibrahim nyang laen. nyoe kheueh riwayat nabi ishaq aneuek nabi ibrahim. nabi ishaq ka meu-umu peuet ploh thon watee gobnyan meukawen ngon ribka, adoe laban, aneuek betuel, sidroe ureueng aram nibak mesopotamia. sabab ribka hana meuteume aneuek, nabi ishaq laju geumeu doa ubak tuhan keupeurumoh gobnyan. dan tuhan geudeungoe doa nabi ishaq, akhe jih ribka mume. gobnyan mume aneuek meukeumbeue, dan sigohlom aneuek-aneuek nyan lahe, aneuek manyak nyan jimeuglueng-glueng lam pruet ma jih. geupeugah le ribka lagee nyoe, "pakon hainyoe haroh teujadi atueh ulon?" laju geulakee peutunyok ubak tuhan. tuhan meufeureuman ubak gobnyan, "dua boh bansa na lam pruet gata; gata teuma tapeulahe dua boh bansa nyang saleng jimeumusoh; adoe jih leubeh teuga nibak aduen jih nyang tuha jipeutimang nyang tulot." trok kheueh watee jih nibak ribka keu geupeulahe aneuek, dan laju geupeulahe dua droe aneuek agam meukeumbeue. nyang tuha hi jih mubayang-bayang mirah, dan kulet jih lagee bajee jubah nyang mubulee. sabab nyan kheueh teuboh nan jih esau. watee aneuek nyang lumboi dua lahe, jaroe jih jimat tumet esau. sabab nyan kheueh jihnyan teuboh nan yakub. nabi ishaq ka meu-umu nam ploh thon watee awaknyan lahe. bandua droe aneuek nyan meutamah rayeuk. esau jeuet keusidroe ureueng nyang peulet beulatang juah

nyang gagah dan beuhe dan galak that tinggai di padang, teuma nabi yakub ureueng jih seungab dan galak tinggai di rumoh. nabi ishaq leubeh geugalak ubak esau, sabab nabi ishaq galak geupajoh eungkot sie beulatang kleut. teuma ribka leubeh geugalak ubak nabi yakub. bak siuroe watee nabi yakub teungoh geutaguen gulee kacang mirah, geuwoe kheueh esau nibak teupat geupeulet beulatang kleut. gobnyan deuk lumpah na. laju geupeugah ubak nabi yakub, "ulon deuk that, bie bacut kacang mirah nyan." (nyang kheueh sabab jih gobnyan teupeugah edom. geujawueub le nabi yakub, "get, asai neubri keulon leubeh ilee hak droeneueh sibagoe aneuek tuha." kheun esau, "hana kupako haknyan keu ulon. ulon deuk lumpah na!" geupeugah lom le nabi yakub, "meusumpah kheueh ilee bahwa hak droeneueh nyan neubri ubak ulon." esau laju meusumpah dan geubri hak geuhnyan ubak nabi yakub. oh ltheuh nyan le nabi yakub laju geubri ubak awaknyan ruti dan siladum nibak gulee kacang mirah nyan. esau laju geupajoh dan geujieb ie oh ltheuh nyan laju geujak. meunan kheueh esau geupeubeuah hak gobnyan sibagoe aneuek tuha. lam nanggro nyan teuka lom musem deuk lagee nyang ka ltheuh teujadi bak jamen nabi ibrahim. nabi ishaq laju geujak meuhadab ubak abimelekh, raja ureueng filistin di gerar dan geulakee idhin mangat geubri tinggai gobnyan disinan. hai nyan geupeubuet sabab tuhan ka geupeuleumah droe ubak gobnyan ngon feureuman tuhan lagee nyoe, "bek gata jak u nanggro meuse; tinggai mantong di nanggro nyoe, lagee nyang ka ulon peurintah ubak gata. ulon teuma lon lindong dan lon bri beureukat ubak gata. banmandum wilayah nyoe teuma ulon bri keue gata dan ubak keuturonan gata. ulon teuma lon peutrok janji lagee nyang ka ltheuh ulon meujanji bak ayah gata nabi ibrahim. ulon teuma lon bri keugata aneuek cucoe nyang le jih lagee bintang di langet, dan banmandum wilayah nyoe ulon bri ubak awaknyan. banmandum bansa nyang na atueh bumoe nyoe jilakee ubak ulon mangat ulon bri beureukat ubak awaknyan lagee nyang ka ulon bri beureukat ubak keuturonan gata. ulon teuma lon bri beureukat ubak gata, sabab nabi ibrahim ka jitaat ubak ulon dan jipeulara banmandum hukum dan peurintah ulon." dan phon saat nyan tinggai kheueh nabi ishaq di gerar. watee ureueng-ureueng nyang na disinan jitanyong keuhai ribka, nabi ishaq laju geujawueub bahwa ribka nyan na kheueh adoe gobnyan, dan bukon peurumoh gobnyan. nabi ishaq teumakot ureueng-ureueng nyang na disinan teuma jipoh mate gobnyan keu jicok ribka nyang lumpah ceudah nyan. oh ka ltheuh nabi ishaq tinggai disinan na padub na treb teuma, dan bukon raja abimelekh geukalon gobnyan nibak peuradeun rumoh geuh, deuh laju jingiang bahwa nabi ishaq teungoh meuyang dan meuseudak ngon peurumoh gobnyan ribka. dan laju geutawok nabi ishaq sira geupeugah lagee nyoe, "inong nyan peurumoh gata? keupeue gata peugah jihnyan adoe gata?" geujawueub le nabi ishaq, "ulon pike ulon nyoe jipoh mate meunyo ulon peugah ribka nyan peurumoh ulon." "peue nyang ka gata peubuet atueh kamoe nyoe?" tanyong

abimelekh. "sidroe lamkawan rakyat lon jeuet mantong jieuh ngon peurumoh gata, dan meunyoe hainyan teujadi, gata kheueh nyang meutanggong jaweueb ateuheh keusalahan kamoe nyan." oh lheuëh nyan raja abimelekh laju geupeuingat banmandum rakyat geuh lagee nyoe, "soe mantong nyang peukaru ureueng nyoe atawa peurumoh jih, ureueng nyan teuhukom mate." nabi ishaq laju geutabu bijeh keu teupula seunaman di nanggroë nyan, dan bak thon nyan meuteume hase sireutoh goe lipat nibak nyang geutabu nyan, sabab tuhan geubri beureukat ubak gobnyan. hareuta gobnyan laju meutamah-tamah dan gobnyan ka jeuet keu ureueng nyang kaya lumpah na. ureueng filistin bingik ate ubak nabi ishaq nyan sabab gobnyan jai that geupeulara namiet, kawan bubiri dan kawan leumo. dan awaknyan laju jidho ngon tanoh banmandum mon nyang ka jikhueh le namiet-namiet nabi ibrahim yoh gobnyan mantong udeb. oh lheuëh nyan abimelekh geupeugah ubak nabi ishaq, "gata tinggai kheueh nanggroë kamoe nyoe. sabab gata ka leubeh meukuasa nibak kamoe." dan geujak kheueh laju nabi ishaq geujak peudong khimah gobnyan bak panton gerar. bak teupat nyan gobnyan tinggai na meupadub treb teuma. gobnyan laju geukueh lom banmandum mon nyang ka lheuëh geukueh bak jamen nabi ibrahim dan nyang ka jiseubeë ngon tanoh le ureueng filistin oh lheuëh geutinggai le nabi ibrahim. mon-mon nyan laju geuboh nan nyang saban lagee nyang ka lheuëh geuboh nan le ureueng syiek gobnyan. namiet-namiet nabi ishaq geukhueh mon di panton gerar nyan dan laju jiteubiet ie nibak mata ie nyang meulimpah ruwah. teuma di ureueng meurabe nyang na di gerar jimeudakwa ngon ureueng meurabe atra nabi ishaq. jipeugah le awaknyan, "ie nyoe atra kamoe." sabab nyan kheueh nabi ishaq geuboh nan mon nyan "mon meudakwa". namiet-namiet nabi ishaq geukhueh teuma mon nyang laen, teuma jiteuka lom dakwa ngon dakwi keuhai mon nyan cit teuma. sabab nyan, nabi ishaq geuboh nan mon nyan "mon meumusoh". oh lheuëh nyan gobnyan laju geuminah nibak teupatnyan laju geukhueh teuma mon nyang keu lhee. goenyoe hana jiteuka dakwa ngon dakwi. sabab nyan nabi ishaq geuboh nan mon nyan, "mon beubaih". kheun gobnyan, "jinoenyoe tuhan ka geubri ubak geutanyoe beubaih keu jeuet tatinggai di nanggroë nyoe, dan tanyoe teuma jeuet keu ureueng nyang makmu nibak teupat nyoe." oh lheuëh nyan nabi ishaq geujak lom dan trok laju u bersyeba. bak malam nyan tuhan geupeuleumah droë ubak gobnyan sira geu peutreun feureuman le tuhan ubak gobnyan lagee nyoe, "ulon kheueh allah ayah gata nabi ibrahim. bek teumakot; ulon teutab lom lindong gata. ulon teutab lom bri beureukat ubak gata dan ulon bri ubak gata keuturonan nyang le sabab janji ulon ubak hamba lon nabi ibrahim." dan nabi ishaq pi laju geupeudong miseubah dan geuseumah tuhan nibak teupat nyan. gobnyan geupeudong khimah disinan dan namiet-namiet gobnyan laju jikhueh mon nyang laen. bak siroe teuka kheueh abimelekh nibak gerar, ngon ahuzat, nyang bri naseuhat ubak gobnyan, dan pikhol, panglima sidadu geuh, keugeujak meurumpok ngon nabi

ishaq. dan geutanyong kheueh le nabi ishaq ubak awaknyan, "pakon gatanyoe tajak meurumpok ngon lon saat nyoe, padahal yohmasa ileë gata meumusoh ngon lon di nanggroë gata?" dan laju jijaweueb le awaknyan, "jinoenyoe baro kheueh kamoe teupeu bahwa droëneueh geulindong le tuhan, teuma ngon sabab nyan nyang get jih tanyoe peu ikat janji. meusumpah bahwa droëneueh hana neupeubuet jeuhet ateuheh kamoe, lagee kamoe pih hantom na kamoe peubuet jeuhet ateuheh droëneueh. kamoe ka kamoe meusiukeub nyang get ubak droëneueh dan kamoe peubiyeu droëneueh jak deungon aman. ka jeulaih nibak kamoe bahwa droëneueh geubri beureukat le tuhan." oh lheuëh nyan nabi ishaq laju geupeujame awaknyan, dan awaknyan pih laju makheun meusajan teuma. oh singoh beungoh awaknyan maseng-maseng laju geuikat janji nyang teupeusah ngon sumpah. dan nabi ishaq pih laju geupeugah seulamit jijak ubak awaknyan sibago sahabat. bak uroenyang cit teuma namiet-namiet nabi ishaq jijak meulapor ubak gobnyan keuhai mon-mon nyang ka lheuëh awaknyan khueh. kheun awaknyan, "kamoe ka meuteume ie." laju nabi ishaq geuboh nan mon nyan, "mon sumpah". nyang kheueh asaiphon banda nyan nan jih bersyeba. watee esau ka meu-umu peuet ploh thon, gobnyan laju geumeukawen ngon dua droë aneuek dara nibak sukee bansa het, na kheueh yudit binti beeri, dan basmat binti elon. mandua droë inong nyan jipeususah udeb nabi ishaq dan ribka. bak siroe, watee nabi ishaq ka tuha dan mata geuh pih ka buta, laju geutawok esau, aneuek gobnyan nyang paleng tuha, dan geupeugah laju ubak aneuek geuh nyan lagee nyoe, "pat gata hei aneuek lon!" "nyoeapat ulon, ayah," jaweueb esau aneuek geuhnyan. geupeugah le nabi ishaq, "gata ka tateupeue bahwa ulon nyoe ka tuha that dan bak dali adat hana treb le udeb lon ateuheh ruheng donya. dan gata cok kheueh laju bede ngon panah-panah gata, tajak laju upadang dan gata peulet kheueh keu ayah saboh beulatang kleut. oh lheuëh nyan gata taguen kheueh bumangat lagee nyang ayah galak, lheuëhnyan gata ba laju keunoe ubak ayah. oh ka lheuëh atranyan ayah pajoh, teuma ayah bri beureukat ayah ubak gata sigohlom ayah mate." peue nyang geupeugah le nabi ishaq ngon esau nyan geudeungoe le ribka peurumoh gobnyan. dan oh ka leupah esau geujak let beulatang buih keu ayah gobnyan nabi ishaq nyan, geupeugah laju le ribka ubak aneuek geuh nabi yakub, "ban that ulon deungoe ayah gata geupeugah ubak esau lagee nyoe, 'jak let laju saboh beulatang dan taguen laju nyang mangat keu ulon. oh ka lheuëh atranyan ulon pajoh, teuma ulon bri beureukat keu gata dikeue tuhan, sigohlom ulon mate.' nyan, aneuek lon," geupeugah lom le ribka ubak aneuek geuh nabi yakub nyan, "deungoe kheueh dan gata peubuet kheueh peue nyang ulon peugah nyoe. gata jak kheueh ubak teupat bubiri geutanyoe, dan gata pileh laju dua boh aneuek kameng nyang teumbon-teumbon, mangat jeuet ulon taguen lagee nyang geulakee le ayah gata. oh lheuëh nyan gata ba laju ubak ayah gata mangat geupajoh, dan oh lheuëh nyan gobnyan laju geubri beureukat ubak gata sigohlom gobnyan meuninggai

donya." teuma nabi yakub laju geupeugah ubak ma geuh, "mak, tuboh esau mubulee seudangkan tuboh ulon hana? pat tateupeue ayah geuraba tuboh lon dan laju geuteupeue bahwa tanyoe ka tapeungeut gobnyan; tatakot bukan beureukat nyang geubri, nyang geubri na kheueh kutokan." geujawueub le ma geuh, "bek picék ate gata, hai aneuek. bah kheueh ulon nyang tanggong meunyoe gata geukutok le yah gata. jak peubuet kheueh peue nyang ulon yue, dan jakok laju kameng-kameng nyang ulon peugah nyan." dan nabi yakub pih laju geujakok kameng-kameng lagee nyang ka geupeugah le ma geuhnyan dan oh ka ltheueh atranyan geucok laju geuba ubak ma geuh, dan ribka pih laju geutaguen gulee sie lagee nyang geuhawa le nabi ishaq. oh ltheuehnyan ribka laju geucok peukayan esau nyang paleng get, nyang na geukeubah dirumoh, peukayan nyan laju geupeungui ubak nabi yakub. kulet aneuek kameng nyang laju geubalot bak taukeu dan jaroe nabi yakub nyang hana mubulee nyan. dan gulee nyang ka geutaguen mangat nyan laju geujok ubak nabi yakub meunan cit ngon ruti nyang ka ltheueh geupeuget nyang rasa jih lumpah mangat. oh ltheuehnyan geujak kheueh nabi yakub ubak ayah geuh sira geupeugah, "ayah!" "nyoeat lon neuek" seuat ayah geuh, "soe gatanyan esau atawa nabi yakub?" geujawueub nabi yakub, "esau yah, aneuek ayah nyang tuha; peue nyang ayah peusan ka ulon peubuet. ayah duek kheueh dan ayah pajoh kheueh eungkot sie hase lon peulet nyoe nyang ka ulon mita keu ayah, mangat ayah jeuet neubri beureukat ateuh ulon." geupeugah le nabi ishaq, "bagaih that gata teume hei aneuek ayah." geujawueub nabi yakub, "sabab tuhan allah nyang ayah seumah ka geutulong ulon." laju geupeugah le nabi ishaq ubak nabi yakub, "gata peurab kheueh keunoe mangat jeuet lon geue gata. peu kheueh beutoi gata esau?" nabi yakub laju geupeurab ubak ayah geuh sira geuraba oh ltheueh nyan laju geupeugah, "su gata lagee su nabi yakub, teuma jaroe gata lagee jaroe esau." nabi ishaq hana geuturi keu nabi yakub sabab jaroe geuhnyan mubulee lagee jaroe esau. teuma bak watee nabi yakub keuneuk geubri beureukat, gobnyan mantong geutanyong sigo teuk, "peu kheueh beutoi gata esau?" "beutoi, ayah," jaweub nabi yakub. laju geupeugah le nabi ishaq, "ba keunoe eungkot sie nyan. oh ka ltheueh ulon makheun baro kheueh ulon bri beureukat ubak gata." nabi yakub laju geubri eungkot sie nyan keu ayah geuh meunan cit ie anggo geubri bacut mangat geujeb. dan geupeugah kheueh laju le ayah geuhnyan ubak gobnyan, "peurab kheueh keunoe leubeh to lom, neuek, dan gata com kheueh ulon." watee nabi yakub geupeurab keuneuk geukeucob ayah geuh nyan, nabi ishaq laju mubeu peukayan esau, dan laju geubri beureukat ubak gobnyan. geupeugah le nabi ishaq, "bee nyang mangat nibak aneuek lon lagee bee padang nyang ka geubri beureukat le tuhan. seumoga allah geubri keu gata iembon di langet, dan geupeujeuet lampoh-lampoh ngon ladang gata subo! seumoga gobnyan geubri keu gata gandom dan anggo nyang meulimpah-limpah! seumoga banmandum bansa jeuet keunamiet gata, dan sukee-sukee bansa taklok ubak gata. seumoga

gata takuasa banmandum wareh kawom gata, dan keuturonan ma gata jisujut dikeue gata. dan teukutok kheueh mandum ureueng nyang kutok gata dan geubri beureukat kheueh banmandum ureueng nyang geubri beureukat ubak gata." bansagai ltheueh nabi ishaq geubri beureukat ubak nabi yakub, nabi yakub pih laju geujak, esau, aduen gobnyan ka geuwoe nibak ceumeucrok beulatang kleut. meunan cit gobnyan laju geutaguen gulee nyang mangat dan geuba laju ubak ayah geuhnyan, sira geupeugah lagee nyoe, "neudeuk kheueh ayah, dan neupajoh kheueh eungkot sie nyang ka ulon ba keu ayah, mangat ayah jeuet neubri beureukat keu ulon." "soe kah nyoe?" geutanyong le nabi ishaq. "esau aneuek ayah nyang tuha," jaweub esau. nabi ishaq ka teuka yo bansaboh tuboh geuh, dan gobnyan laju geutanyong, "meunyoe meunan, soe nyang ka jimita beulatang dan jibri keu ulon bunoe? atranyan ka ltheueh ulon pajoh sigohlom gata teuka. dan beureukat ulon nyang paleng akhe ka ulon bri keu jihnyan, dan jinyoe beureukat nyan ka jeuet keumilek jih siumu masa." watee geudeungoe hainyan le esau, gobnyan laju geumo ngon su meule-ungkeng dan ate geuh that peudeh, sira geupeugah lom, "neubri cit ulon beureukat, hei ayah!" nabi ishaq geupeugah lom, "adoe gata ka jikak keunoe dan jipeungeut ulon. jihnyan ka jicok beureukat nyang sibeutoi jih atranyan ulon bri keugata." geupeugah le esau, "nyoe kali keudua jipeungeut ulon. pantaih nan jih yakub. jihnyan ka jicok hak ulon sibagoe aneuek tuha, dan jinoenyoe ka jicok teuma beureukat nyang sibeutoi jih atra ulon. peu kheueh ayah hana le beureukat nyang laen keu ulon?" geujawueub le nabi ishaq, "ulon ka lon peujeuet jih nyan amphon gata, dan banmandum wareh kawom jih ka ulon peujeuet keu namiet jih. ulon ka ltheueh ulon bri bak jihnyan gandom dan anggo. jinoenyoe hana sapeuena le nyang ulon bri keu gata, neuek!" esau teutab hana geutem piyoh geulakee sabe ubak ayah gobnyan, "peu kheueh bak ayah nyang na cit saboh sagai beureukat? neubri kheueh teuma beureukat nyan ubak ulon, ayah!" dan esau pih laju geumo lom teuma. oh ltheuehnyan nabi ishaq geupeugah ubak esau, "hana le ie mbon nyang jitreun nibak langet keu gata hei aneuek lon, hana teuma lampoh nyang subo keu gata. gata teuma udeb bak mata peudeueng gata, teuma jeuet keu namiet adoe gata, teuma meunyoe gata tabrontak, gata teuma beubaih nibak kuasa jih." teuma esau laju geubanci ubak nabi yakub sabab ayah gobnyan ka geubri beureukat nyan ubak adoe geuh. laju teuka pikanan geuh, "hana treb le ayah ka meuninggai donya dan oh ka ltheueh ulon meukabong, nabi yakub teuma ulon poh mate!" watee geudeungoe le ribka reuncana esau nyan, laju geuyue tawok nabi yakub sira geupeugah lagee nyoe, "deungoe mak peugah, aduen gata esau na niet keuneuk balaih dam ateuh gata dan ka jireuncana jikeuneuk poh mate gata. jinoenyoe peubuet kheueh peue nyang ulon peugah nyoe. gata jak laju bubagaih keudeuh ubak laban aduen ulon di haran, dan gata tinggai kheueh ngon gobnyan keu meupadub watee treb jih, sampoe beungeh aduen gata nyan seungeb dan laju jipeutuwoe peue nyang ka gata peubuet ateuh jihnyan. oh ltheuehnyan ulon teuma lon yue

ureueng laen mangat jipuwoe gata urumoh nyoe lom. ulon han lontem aneuek ulon gadoh bak uroe nyang sa." dan geupeugah kheueh le ribka ubak nabi ishaq, "ulon geungeuen dan gundah that watee ulon ngieng akai peurumoh-peurumoh esau nibak sukee bansa laen nyan. meunyo nabi yakub jimeukawen cit ngon aneuek dara het, leubeu get ulon mate." oh ltheuehnyan nabi ishaq laju geuhoi nabi yakub dan geubri laju beureukat sira geupeugah lagee nyoe, "bek kheueh gata meukawen ngon ureueng kanaan. gata jak kheueh u mesopotamia, ubak keuluwarga betuel, abusiyik gata, dan gata meukawen kheueh ngon sidroe aneuek dara apha gata si laban. seumoga allah nyang mahakuasa geubri beureukat ubak keuluwarga gata dan geubri ubak gata aneuek cucoe nyang le, sampoe gata jeuet keu indatu bansa-bansa! seumoga tuhan geubri beureukat ubak gata dan keuturonan gata lagee nyang ka geubri beureukat ubak nabi ibrahim, dan seumoga gata meuteume keuhak milek tanoh nyang gata duek bak saat nyoe, nyang ka geubri le allah ubak nabi ibrahim!" meunan kheueh nabi ishaq geupeulheueh nabi yakub mangat geujak u mesopotamia, ubak laban bin betuel ureueng aram nyan. laban na kheueh aduen ribka mak nabi yakub dan esau. esau geudeungeoe bahwa nabi ishaq ka geubri beureukat ubak nabi yakub dan ka geupeulheueh gobnyan mangat jeuet nabi yakub geujak u mesopotamia keu geujak mita peurumoh di mesopotamia nyan. meunan cit bak watee nabi ishaq geubri beureukat ubak nabi yakub, gobnyan geutam nabi yakub mangat bek geumeukawen ngon aneuek dara kanaan. dan esau geuteupeue bahwa nabi yakub taat that ubak peue-peue nyang geupeugah le ayah ngon mak gobnyan dan ka geujak u mesopotamia. baro kheueh geuteupeue le esau bahwa ayah gobnyan, nabi ishaq hana galak ubak inong kanaan, sabab nyan geujak kheueh esau ubak nabi ismail, aneuek nabi ibrahim, dan laju geumeukawen ngon aneuek nabi ismail nyang nan jih mahalat, adoe nebayot. nabi yakub laju geutinggai bersyeba dan geujak u haran. watee mata uroe lhob gobnyan ka trok bak saboh teupat, laju geumudom disinan. watee ka geupeureubah badan keuneuk geu-eh; geucok laju sineuk batee geunantoe bantai dan batee nyan laju geukaleueng bak ulee geuh. lam seuneungeut geuh nyan teuka kheueh lumpo, lam lumpo nyan deuh geukalon saboh reunyeyen nyang teudong atueuh bumoe dan ujung reunyeyen nyan manyang jih sampoe ulanget dan malaikat-malaikat geu-ek-ek treun nibak reunyeyen nyan. dan bak bineh gobnyan ka teudong tuhan deungon feureuman geuh lagee nyoe, "ulon kheueh tuhan, allah nyang jipujoe le nabi ibrahim dan nabi ishaq. ulon teuma ulon bri ubak gata dan keuturonan gata tanoh teupat gata eh nyoe. keuturonan gata jai lumpah na lagee abee nyang na bak bumoe. awaknyan teuma jipeuluwah wilayah jih sampoe u jeub-jeub arah, dan meulau gata dan keuturonan gata, ulon teuma lon bri beureukat ubak mandum bansa nyang na atueuh rhueng bumoe. ingat kheueh, ulon kutulong dan lon jaga gata, homantong nyang gata jak, dan ulon teuma kupuwoe lom gata u nanggroe nyoe. ulon hana lon tinggai

gata sampoe ulon peubuet banmandum peue-peue nyang ka ltheueh ulon meujanji ubak gata." dan nabi yakub laju teubeudoh nibak teupat eh geuh dan laju geupeugah, "tuhan na disinoe, bak teupat nyoe, teuma baro kheueh jinoo ulon teupeu!" gobnyan teumakot that laju geupeugah, "biet-biet yo dan teumakot that bak teupatnyoe!" ka pasti nyoe baet allah, babah pintoe geureubang syeuruga." oh singoh beungoh banseuboh buta, nabi yakub geubeudoh, laju geucok batee nyang geupeugana sibagoe bantai dan geupeudong laju batee nyan sibagoe batee peuingat. oh ltheuehnyan laju geuro minyeuk zaiton atueuh batee nyan keu geupeukhusos keu po teu allah. teupat nyan geuboh nan betel. (yoh ilee nan jih lus). dan geumeusumpah kheueh nabi yakub bak teupat nyan, "meunyo tuhan geutulong dan geulindong ulon bak lon jak nyoe dan geubri keu ulon peunajoh ngon peukayan sampoe ulon woe u rumoh ayah lon deungon seulammat, tuhan teuma jeuet keu allah ulon. dan ulon teuma ulon bri ubak tuhan siper siploh nibak peue-peue mantong nyang ka tuhan bri keulon. batee peuingat nyang ulon peudong nyoe teuma beujeuet keu teupat seumujoe ubak tuhan." nabi yakub geujak laju sampoe trok u nanggroe siblah utimu kanaan. hana geusangka-sangka deuh laju geukalon saboh mon nyang na bak teungoh padang, bak bineh mon nyan leumah geukalon na lhee boh kawan kameng ngon bubiri teungoh teu eh-eh nyang lazemjih jibri iejib bak mon nyan. mon nyan teutob ngon batee raya. meunyo banmandum kawan kameng ngon bubiri nyan ka meusapat bak teupat nyan, le ureueng nyang rabe beulatang nyan laju geugule batee nyan bak bineh, dan kameng ngon bubiri nyan laju jipeujieb ie. oh ltheuehnyan le ureueng-ureueng meurabe nyan laju jitob lom babah mon nyan ngon batee lom. dan geutanyong kheueh le nabi yakub ubak ureueng-ureueng meurabe nyang na disinan, "hei rakan, pane gata jak?" "nibak haran," jaweueb awak meurabe nyan. geutanyong lom le nabi yakub, "peu kheueh gata turi laban bin nahor?" "kamoe turi," jaweueb awaknyan. "pakriban keuadaan gobnyan?" tanyong nabi yakub lom. "lam keuadaan get," jaweueb awaknyan. "ngieng kheueh, nyoeapat na aneuek inong gobnyan nyang nan jih rahel. jihnyoe jijak keunoe jiba kawan kameng ngon bubiri ayah jih." geupeugah le nabi yakub, "uroe mantong peungeuh dan gohlom watee jih kameng ngon bubiri teupeutamong lam weue. pakon mandum beulatang nyan hana gata peujieb ie, dan gata peubiyeu jimurot naleueng lom teuma?" jaweueb awaknyan, "baro kheueh jeuet kamoe peujieb ie mandum beulatang nyoe meunyo banmandum kameng ngon bubiri ka habeh meusapat bak teupat nyoe dan baro kheueh batee nyan teugule." teungoh nabi yakub geupeugah haba ngon awaknyan, rahel teuka laju keunan ngon kawan beulatang kameng dan bubiri geuh. watee geukalon le nabi yakub rahel ngon kawan kameng dan bubiri jihnyan, geujak laju nabi yakub bakmon nyan dan batee nyang teutob babah mon nyan laju geugule bakbineh dan oh ltheuehnyan geupeujieb laju ie ubak kawan beulatang rahel. oh ltheueh nyan laju geucom rahel dan geumo sabab ate gobnyan

teuharu lagoena. geupeugah le nabi yakub ubak rahel, "ulon aneuk ribka, syedara ayah gata." dan rahel pih laju jiplueng jiwoe urumoh dan jipeugah laju bak ayah jih peue nyang ban ltheueh jialami. watee laban geudeungoe haba keuhai nabi yakub, aneuk keumuen geuhnyan, laju geuplueng keuneuk jak meurumpok ngon gobnyan. oh banmurumpok laju geuwa le laban nabi yakub sira geucom, dan geupeuwoe laju urumoh. oh ka ltheueh geupeugah banmandum peue-peue mantong le nabi yakub ubak laban, laju geupeugah le laban bak aneuk keumuen geuh nyan, "keubiet beutoi, gata syedara krab that ngon ulon." nabi yakub tinggai dirumoh nyan sibuleun peunoh. bak siuroe geupeugah kheueh le laban bak nabi yakub, "hana patot gata meubuet bak ulon ngon hana teubri upah, sabab gata wareh kawom lon. padup ubah nyang gata lakee?" laban na dua droe aneuk inong; nyang tuha nan jih lea, dan adoe geuh nan jih rahel. lea mata jih lagak that, seudangkan rahel tuboh jih gagah dan rupa jih lagak lumpah na. nabi yakub ka rhot cinta ubak rahel, sabab nyan laju geujaweub ubak laban, "ulon keuneuk mubuet bak droeneueh tujoh thon treb jih meunyoeh apha bie lon meukawen ngon rahel." geupeugah le laban, "leubeh get ulon bri si rahel nyan ubak gata nibak ureueng laen; dan tinggai kheueh gata dirumoh nyoe." dan geumubuet kheueh nabi yakub di rumoh laban tujoh thon treb jih mangat meuteume geumeukawen ngon rahel, dan nibak gobnyan thon-thon nyan hana teurasa sang-sang ban baro sa, sabab cinta gobnyan bak aneuk dara nyan. oh ltheueh nyan nabi yakub geupeugah ubak laban apha geuhnyan, "tujoh thon ka trok, neubri kheueh lon meukawen ngon aneuk droeneueh, apha." dan laban pih laju geupeuna khanuri meukawen dan geu-undang mandum ureueng nyang na lam banda nyan. teuma bak malam nyan, bukan rahel, nyang geu intat le laban bak nabi yakub, nyang geuba bak gobnyan na kheueh lea, dan nabi yakub laju geumeujampu ngon lea. (laban laju geubri namiet gobnyan nyang inong nyang nan jih zilpa ubak lea, keu jeuet keu namiet lea.) oh singoh nyan baro kheueh geuteupeue le nabi yakub bahwa nyang meukawen ngon gobnyan na kheueh lea. dan geujak meurumpok kheueh nabi yakub bak laban sira geupeugah lagee nyoe, "pakon apha peubuet ateuheh lon lagee nyoe? ulon mubuet ngon apha mangat jeuet lon meukawen ngon rahel? pakon apha neupeungeut lon?" geujaweub le laban, "meunurot adat lam nang-groe nyoe, adoe hana jeuet jimeukawen leubeh awai nibak aduen. gata preh kheueh sampoe trok tujoh uroe masa gata meukawen, rahel pih ulon bri ubak gata, asai gata tem mubuet tujoh thon teuk." nabi yakub siju, dan oh ka ltheueh khanuri meukawen nyan ka trok tujoh uroe, laban laju geubri teuma rahel ubak nabi yakub keupeurumoh gobnyan. (laban geubri teuma namiet gobnyan nyang inong nyang nan jih bilha ubak rahel mangat jeuet geucok keu namiet geuh.) dan nabi yakub geumeujampu ngon rahel, dan gobnyan leubeh geucinta bak rahel nibak lea. oh ltheueh nabi yakub geumubuet tujoh thon teuk bak laban. watee geukalon le tuhan bahwa nabi yakub hana that geucinta ubak lea kon lagee

rahel nyang geusayang that le gobnyan, tuhan laju geubri idhin ubak lea mangat jipeulahe aneuk, teuma rahel teutab hana jitem meu aneuk. lea mume dan laju jipeulahe sidroe aneuk agam. laju jipeugah, "tuhan ka geukalon ulon ureueng susah, dan jinoenyoe lakoe lon teuma geucinta bak ulon." dan laju geuboh nan keu aneuk geuhnyan ruben. lea mume lom dan laju geupeulahe aneuk agam. kheun lea, "tuhan ka geubri lom ubak ulon aneuk nyoe sabab geudeungoe bahwa ulon hana geucinta le lakoe." dan laju geuboh nan aneuk geuhnyan simeon. lea mume lom dan geupeulahe laju aneuk agam. laju geupeugah, "jinoenyoe lakoe lon leubeh teuikak bak ulon sabab ulon ka lon peulahe lthee droe aneuk agam." dan geuboh nan aneuk geuhnyan lewi. oh ltheueh nyan lea mume lom dan jipeulahe laju sidroe teuk aneuk agam. kheun jihnyan, "goenyoe ulon lon pujoe tuhan." dan laju jiboh nan aneuk nyan yehuda. oh ltheueh nyan lea hana le jimeu aneuk. teuma rahel teutab gohlom meuteume aneuk, sabab nyan kheueh gobnyan teuka ceumuru ubak cutpo geuh, dan laju geupeugah ubak nabi yakub, "neubri kheueh aneuk keu ulon, meunyoeh han, ulon teuma mate." nabi yakub beungeh that ubak rahel sira geupeugah, "ulon nyoe bukan Allah. gobnyan kheueh nyang peujeuet gata sampoe gata hana meuteume aneuk." dan laju geupeugah le rahel, "nyoe namiet ulon bilha; droeneueh eh kheueh ngon jihnyoe mangat namiet nyoe jeuet jipeulahe aneuk. ngon lagee nyan ulon nyoe ka jeuet keu ma meulalu jihnyan." dan bilha nyan laju jijok bak lakoe geuh, dan nabi yakub pih geumeusituboh ngon namiet nyan. bilha laju mume dan jipeulahe sidroe aneuk agam. dan rahel laju geupeugah, "Allah ka geupeuade deumi keu keupeuntengan ulon. geudeungoe doa ulon dan geubri keu ulon sidroe aneuk agam." oh ltheuehnyan laju geuboh nan aneuk nyan dan. bilha mume lom dan jipeulahe teuma sidroe aneuk agam. geupeugah le rahel, "ulon ka lon useuha siteungoh mate lon lawan cutpo lon, dan ulon meunang," sabab nyan laju geuboh nan aneuk nyan naftali. watee lea ka jitee droe bahwa jihnyan hana hase le jipeulahe aneuk, laju jijok namiet jihnyan, zilpa, keu nabi yakub mangat jeuet geucok keupeurumoh gobnyan. zilpa laju jipeulahe sidroe aneuk agam. lea laju jipeugah lagee nyoe, "ulon meu-untong," laju jiboh nan aneuk nyan gad. zilpa jipeulahe lom sidroe teuk aneuk agam, dan lea jipeugah lagee nyoe, "mubahgia that ulon nyoe! jinoenyoe banmandum ureueng inong teuma jipeugah keu ulon bahwa ulon nyoe mubahgia." sabab nyan laju jiboh nan aneuk nyan asyer. watee musem pot boh gandom, ruben laju jijak u padang dan jiteume laju disinan sijeuneh seunaman ubat, dan atra nyan laju jiba ubak lea, ma jihnyan. rahel geupeugah ubak lea, "neubri kheueh keu ulon bacut mantong nibak jeuneh seunaman ubat nyang jiteume le aneuk droeneueh nyan." jijaweub le lea, "peu kheueh gohlom seb gata cok lakoe ulon? jinoenyoe keuneuk gata cok teuma sijeuneh seunaman ubat nyang ka jiteume le aneuk ulon." kheun rahel, "meunyoeh droeneueh neutem bri ubat nyang jiteume le aneuk droeneueh nyan ubak ulon, droeneueh jeuet neuh ngon nabi yakub

malam nyoe." watee nabi yakub geuwoe u rumoh nibak padang seupot uroe nyan, lea laju lajujisambot gobnyan sira jipeugah lagee nyoe, "neu-eh kheueh ngon ulon malam nyoe sabab ulon ka ulon bayeue keunyan ngon sinaman ubat nyang jiteume le aneuek ulon." dan nabi yakub laju meusibadan ngon lea bak malam nyan. allah laju geuteurimong doa lea, dan geuhnyan laju mume dan geupeulahe aneuek nyang keulimong. jipeugah le lea, "allah kheueh nyang bri keu ulon upah sabab ulon ka ulon jok zilpa keu lakoe lon," sabab nyan laju jiboh nan aneuek nyan isakhar. lea mume lom dan laju jipeulahe aneuek nyang keunam. jipeugah le lea, "allah ka geubri keu ulon hadiah nyang paleng lagak. jinoenyoe lakoe lon teuma geuhoreumat keu ulon, sabab ulon ka lon peulahe nam droe aneuek agam," sabab nyan laju jiboh nan aneuek nyan zebulon. oh ka ltheueh nyan lea jipeulahe teuma sidroe aneuek inong nyang jiboh nan dina. dan teungat kheueh allah keu rahel; allah laju geuteurimong doa rahel dan geubri keumungkénan rahel nyan jipeulahe aneuek. dan rahel laju mume dan jipeulahe laju sidroe aneuek agam. jipeugah le rahel, "allah ka geusampoh banmandum keuhinaan ulon. seumoga tuhan geubri keu ulon sidroe teuk aneuek agam." sabab nyan jiboh nan aneuek nyan yusuf. oh ka ltheueh rahel geupeulahe nabi yusuf, nabi yakub laju geupeugah ubak laban, "neupeu idhin kheueh ulon woe u neugahra lon. bah kheueh ulon ba mandua droe peurmoh dan aneuek-aneuek ulon. awaknyan ka ulon teume ngon cara ulon mubuet keu apha. apha neuteupeue, ulon ka lon mubuet bak droeneuh brat lumpah na." laban laju geupeugah ubak nabi yakub, "gata deungoe kheueh ulon: ulon meuteume ramalan bahwa tuhan ka geubri beureukat keu ulon sabab na gata. gata peugah laju padub nyang gata lakee." geujawueub le nabi yakub, "apha keudroe neuteupeue bahwa ulon ka lon mubuet brat lumpah na bak droeneuh, dan beulatang peulara apha meutamah jai le sabab ulon peulara. sigohlom ulon teuka keunoe, atra milek apha hana padub na, teuma bak saat nyoe apha ka kaya. tuhan ka geubri beureukat apha sabab na ulon. jinoenyoe ka watee jih ulon mubuet keu keuluwarga droe lon keudroe." geupeugah le laban, "dan peue nyang haroh ulon bri keu gata?" geujawueub le nabi yakub, "hana peue apha bri hareuta. ulon teutab lon peulara beulatang peulara apha, asai apha situju ngon peue nyang ulon usui nyoe: neupeu idhin kheueh keu ulon bak uroe nyoe ulon jak-jak lamkawan kameng ngon bubiri apha, dan ulon cok tieb-tieb aneuek bubiri nyang itam, meunan cit tieb-tieb aneuek kameng nyang muda nyang meubalang dan burek-burek. nyang kheueh mantong upah nyang ulon lakee. saboh bak watee singoh deungon mudah jeuet apha teupeu peu kheueh ulon ka lon peubuet nyang juoe. watee apha neuteuuka neujak ngieng upah ulon, dan neungieng na kameng nyang hana mubalang dan burek-burek, atawa bubiri nyang hana itam, apha teuma neuteupeue bahwa beulatang nyan ka ulon cue." geujawueub le laban, "ulon situju lagee usui gata nyan! geutanyoe teuma tapeubuet peue nyang gata peugah nyan!" teuma bak uroenyan laban laju jipeuaseng banmandum kameng agam

nyang mubalang dan mandum kameng inong nyang mubalang, nyang burek-burek, atawa nyang na tanda puteh jih; meunan cit geupeuaseng banmandum bubiri nyang itam. oh ltheueh nyan laju geuyue bak aneuek-aneuek mangat jiseuha beulatang nyan, dan jijak kheueh awaknyan sira jiba beulatang-beulatang nyan jipeujioh nibak nabi yakub, jioh jih na lthee uroe jak. nyang tinggai nibak kameng ngon bubiri atra laban nyan laju geupeulara le nabi yakub. oh ltheueh nyan nabi yakub geucok laju cabeueng-cabeueng bak kayee hawar nyang ijo-ijo, bak badam dan bak berangan, laju geupuliek siladum kulet bak kayee nyan sampoe ka jeuet mubalang-balang. laju geukeubah cabeueng kayee nyan dikeue kawan kameng nyan, lam teupat jieb ie jih, sabab beulatang nyan galak that jimeukawen watee keuneuk jijieb ie. dan kameng-kameng nyan laju jimeukawen dikeue cabeueng-cabeueng kayee nyan, aneuek beulatang nyan kureng atawa mubalang atawa burek-burek. oh ltheuehnyan nabi yakub laju geucok bubiri-bubiri laju geupeuhadab ukeue kameng-kameng nyang mubalang dan nyang itam. deungon cara lagee nyan gobnyan ka meuteume kawan beulatang geuh keudroe dan geupeuaseng laju nibak kawan beulatang laban. meunyo beulatang-beulatang nyang teuga teungoh jimeukawen, nabi yakub laju geukeubah cabeueng-cabeueng kayee nyang ka ltheueh geupuliek nyan dikeue beulatang nyan, lam teupat jieb ie. teuma cabeueng-cabeueng kayee nyan hana geukeubah dikeue beulatang nyang leumoh. dan banmandum beulatang nyang puteh nyan leumoh, dan nyan kheueh atra laban, seudangkan banmandum beulatang nyang itam, mubalang, burek-burek teuga nyan, dan nyan kheueh atra nabi yakub. deungon lagee nyan nabi yakub ka jeuet keu ureueng kaya raya. bak gobnyan ka jai that kawan kameng ngon bubiri, unta, keuleudee dan namiet-namiet. nabi yakub geudeungoe aneuek-aneuek laban geupeugah lagee nyoe, "nabi yakub ka geucok banmandum hareuta ayah geutanyoe. mandum atra keukayaan geuhnyan asai jih nibak atra ayah tanyoe." dan nabi yakub geukalon laban tuwan geuhnyan hana ramah le lagee yoh ilee ubak gobnyan. laju tuhan meufeuruman ubak nabi yakub, "jakwoe kheueh u nanggroe ayah gata dan ubak wareh kawom gata. ulon teuma lon jaga gata." oh ltheuehnyan nabi yakub geuyue bak sidroe ureueng mangat jijak peugah ubak rahel dan lea mangat meurumpok ngon gobnyan di padang, bak teupat kawan kameng ngon bubiri gobnyan. dan geupeugah laju le nabi yakub ubak awaknyan, "ulon kalon ayah gata hana ramah le lagee nyangka-ka ubak ulon; teuma allah nyang geupujoe le ayah ulon geupeulara ulon. dan gata bandua kon ka gata teupeu bahwa sikeubiet-keubiet jih ulon mubuet bak ayah gata. bahpi meunan ulon ka geutipee dan geu-ubah-ubah upah ulon sampoe siploh goe. teuma po teu allah hana geupeubiyeu gobnyan geupeubuet jeuhet ateuah ulon. watee ayah gata geupeugah, 'kameng nyang meureunek-reunek jeuet keu upah gata,' dan mandum kawan beulatang nyan jipeulahe aneuek meureunek-reunek. watee geupeugah, 'kameng nyang meubalang jeuet keu upah gata,' dan banmandum kawan kameng nyang

jipeulahe aneuek jih mubalang. meunan kheueh po teu allah ka geucok kawan beulatang atra ayah gata laju geubri ubak ulon. dan watee musem meuagam banmandum beulatang nyan, ulon meulumpo lon ngieng kameng agam nyang teungoh meukawen, kureng, meubalang, dan meureunek-reunek. dan allah ngon rupa lagee malaikat laju meufeuereuman ubak ulon lam lumpo nyan, 'nabi yakub!' laju lon jawueub, 'nyoe'. malaikat nyan geupeugah lom, 'ngieng kheueh, banmandum kameng agam nyang teungoh meukawen nyan kureng, dan meureunek-reunek dan meubalang. hai nyan lon saja atoe keugata sabab ka lheureh lon kalon banmandum nyang jipeubuet le laban ateuah gata. ulon kheueh nyang ka lheureh lon peuleumah droe ubak gata di betel. disinan gata ka lheureh tapeuseumah sineuk batee peuingat, deungon gata ro minyeuk zaiton ateuah batee nyan. dan bak teumpat nyan teuma gata meusmpang ubak ulon. jinoenye meusiab-siab kheueh dan jakwoe kheueh u nanggroe teumpat gata lahe.' "lea dan rahel laju geujawueub, "hana le jeumba ayah kamoe nyang jeuet geupeuwareh ubak kamoe. kamoenye geuanggab ureueng aseng. gobnyan ka geupeubloe kamoe dan peue nyang ka geuteurimong keu nyan, nyan pih ka geupeuhabeh tan sapeue na le. banmandum keukayaan nyang ka geucok le allah bak ayah kamoe nyang sibeuna jih na kheueh atra kamoe dan milek aneuek-aneuek kamoe. dan neupeubuet kheueh peue nyang ka geupeurintah le po teu allah ubak droeneueh." dan nabi yakub laju meusiab-siab keuneuk woe ubak ayah gobnyan di nanggroe kanaan. laju geupeuek bandua droe peurumoh geuh dan aneuek-aneuek gobnyan ateuah unta, dan laju geuireng banmandum kawan kameng ngon bubiri dan peue-peue mantong atra nyang laen nyang na geuteume di mesopotamia. bak watee nyan laban na di padang teungoh geugantung bulee bubiri, dan watee nyan kheueh teuma rahel geucue patong peulindong keuluwarga atra ayah gobnyan. nabi yakub hana geupeugah ubak laban keuhai gobnyan ka geubeurangkat. gobnyan geujakkok banmandum atra beunda milek gobnyan ngon cara meudab-dab. laju geujeumeurang krueng efrat dan geutuju laju u daerah gunong-gunong gilead. lhee uroe oh lheurehnyan baro kheueh jibri thee ubak laban bahwa nabi yakub ka geuplueng. dan laban laju geupeusapat ureueng-ureueng gobnyan oh lheureh nyan geujak peulet laju nabi yakub tujoh uroe treb jih baro kheueh meurumpok di daerah gunong-gunong gilead. watee ka malam allah teuka ubak laban lam lumpo gobnyan, dan geupeugah, "awaih, bek sagai-sagai gata ancang nabi yakub nyan bahpi ngon sikrek hana." bak watee nyan nabi yakub ka geupeudong khimah gobnyan bak saboh buket. oh lheureh nyan bak buket nyang laen laban ngon ureueng-ureueng gobnyan pih ka geupeudong khimah. oh lheurehnyan laban geupeugah ubak nabi yakub, "keupeue gata peungeut ulon dan gata baplueng bandua aneuek-aneuek lon, siulah-ulah aneuek lon nyan tawanan prang? pakon gata peungeut ulon dan gata jak seungab-seungab, hana gata lakee idhin? seukira jih na gata lakee idhin, pasti gata ulon peuleuh ngon galak ate dan teupeuleupah

gatajak sira teuireng ngon su rapa-i musik keucapi dan surune kale! dan gata sagai-sagai hana gata bri keuseumpatan ulon com aneuek cucoe lon sibago kamoe ka meupisah. bangai lumpah na buet gata nyan! ulon mantong teuga meunyeo lon peubuet jeuhet ateuah gata, teuma beuklam allah nyang geupujoe le ayah gata geupeuingat ubak ulon mangat bek sagai-sagai ulon peuyo gata. ulon kuteupeue bahwa gata jaknyan sabab ka meuheuet that keuneuk woe u nanggroe gata. teuma keupeue gata cue patong peulindong keuluwarga ulon?" dan laju geujawueub le nabi yakub, "ulon jak ngon seungab-seungab sabab ulon takot apha neupeuteun aneuek droeneueh hana jeuet ulon ba. keuhai patong nyan, meunyeo apha na neuteme disinoe sidroe-droe ureueng ka jicue patong apha nyan, ureueng nyan teuma teuhukom mate. peureksa kheueh, peu kheueh na barang-barang atra apha disinoe. meunyeo na, ngon galak ate neucok laju. dan ureueng-ureueng geutanyoe jeuet jikalon." nabi yakub hana geuteupeue bahwa rahel nyang cue patong nyan. dan laban laju geujak ubak khimah nabi yakub oh trok keunan laju geu-uengkie ngon geuteumeuweueh bansaboh nyan; oh lheurehnyan geujak teuma ubak khimah lea dan ubak khimah mandua droe namiet inong aneuek geuhnyan, patong nyan teutab hana geuteume. dan akhe jih laju geutamong lam khimah rahel. rupari rahel ka geucok patong nyan geukeubah lam baluem peulana unta, dan gobnyan keudroe geuduek ateuah peulana nyan. bansaboh khimah rahel habeh geuteuweueh le laban, patong nyang geumita nyan teutab hana meuteume. dan rahel laju geupeugah ubak ayah geuh, "bek kheueh ayah neubeungeh keu ulon, ulon hana hase lon dong lon sambot ayah, sabab ulon teungoh teuka he." laban teutab geumita keudeh keunoe, patong nyan teutab hana geuteume. dan bak saat nyan cit teuma jiteuka kheueh beungeh nabi yakub, "peue buet nyang jeuhet nyang ka ulon peubuet ateuah droeneueh hei apha?" kheun nabi yakub sira beungeh ngon geungeuen lumpah na. "peue salah lon sampoe apha neulet-let ulon? jinoe, oh ka lheureh neu-uengkie ngon neuteweueh banmandum barang-barang lon, peue na apha teume barang apha nyan? peuteubiet kheueh barang nyan dan keubah laju keunoe, mangat jeuet bubena ureueng lon dan ureueng-ureueng apha jeuet keusaksi keu jicok keuputosan soe nyang beutoi dan soe nyang hana beutoi tanyoe bandua. dua ploh thon ulon ka lheureh lon duek dirumoh apha. kawan bubiri ngon kameng apha ka meuhase meu aneuek cucoe, dan gohlom na ulon pajoh meusaboh kameng pih nyang atra apha nyan. nyang mate jiteugom le beulatang juah hantom na ulon ba ubak apha, teuma ulon keudroe nyang gantoe beulatang peulana apha nyan. nyang jicue le gob bah kheueh nyan watee uroe meunan cit watee malam sabe apha lakee mangat ulon nyang bayeue atra apha nyan. kayem that lon rasa seu-uem watee uroe dan leupie oh watee malam. dan kayem that mata lon han teupet watee ulon eh. meunan kheueh keuadaan ulon watee lon tinggai dan lon mubuet ngon apha nyang treb jih dua ploh thon peunoh. peuet blaih thon treb jih ulon mubuet bak apha mangat jeuet

lon meukawen ngon aneuek apha bandua droe – dan nam thon teuk teuma beu meuteume kawan kameng dan bubiri nyan. dan sidubnyan treb pih apha ka neu-ubah-ubah upah lon sampoe siploh goe. seukira jih ulon hana geulindong le allah indatu lon, na kheueh allah nyang geupujoe le nabi ibrahim dan nabi ishaq, teuma le apha ka pasti neubeujak ulon ngon jaroe soh. teuma po teu allah ka geukalon keuadaan ulon nyang apoh apah dan buet-buet nyang ka ulon peubuet, dan beuklam gobnyan ka geubri keuputusan nyan." dan laban laju geujaweub ubak nabi yakub lagee nyoe, "bandua droe inong nyan aneuek ulon; aneuek jih na kheueh atra ulon, dan kawan bubiri nyan pih atra ulon. nyang sibeuna jih, peue-peue mantong nyang gata ngieng disinoe na kheueh atra ulon. teuma diulon hana hase lon peubuet sapeue keu lon peuteun aneuek cucoe lon nyan. kareuna nyan jak kheueh geutanyoe tapeuget peujanjian dan tasuson batee-batee sibagoe tanda bahwa geutanyoe ka meujanji." oh lheureh nyan nabi yakub laju geucok saboh batee dan geupeudong laju sampoe jeuet keu batee peuingat. dan oh lheureh nyan laju geuyue bak ureueng-ureueng gobnyan mangat jipeusapat batee keu jitamon. oh lheureh batee-batee nyan ka habeh jitamon disinan. baro kheueh awaknyan jimakheun meusajan bak bineh sinamon batee nyan. lahan geuboh nan sinamon batee nyan yegar-sahaduta, seudangkan le nabi yakub geunoh nan galed. geupeugah le laban ubak nabi yakub, "sinamon batee nyoe teuma jeuet keupeuingat keu geutanyoe bandua." nyang kheueh sabab jih teumpat nyoe teuboh nan galed. geupeugah teuma le laban, "seumoga tuhan geukawai geutanyoe simantong tanyoe udeb jioh lagee nyoe bagoe." nyang kheueh sabab jih teumpat nyan geuboh nan nyang laen mizpa. geupeugah lom le laban, "meunyoee gata tapeubuet jeuhet ateueh aneuek-aneuek ulon, atawa gata meukawan ngon inong laen, bah kheueh hana nyang teupeu, ingat kheueh, allah teutab geukawai geutanyoe. nyoe kheueh batee-batee nyang ka ulon seubee, dan nyoe batee peuingat. bah kheueh sinamon nyoe, meunan cit ngon batee peuingat nyan sibagoe peuingat keu geutanyoe bahwa ulon hana jeuet lon leewat sinamon nyoe keu lon jakprang gata, dan gata pih hana jeuet gata leewat sinamon nyoe dan batee peuingat nyoe keu takjak prang lon. allah nyang geupujoe le nabi ibrahim dan nyang geupujoe le ayah ulon nahor teuma jeuet keuhakem keu geutanyoe bandua." dan oh lheureh nyan nabi yakub laju geumeusumpah deumi allah nyang geuseumah le nabi ishaq, ayah gobnyan keu geupeuteupat janji nyan. gobnyan laju geusie saboh beulatang dan geupeuseumah laju ateueh buket nyan. dan geu-undang laju ureueng-ureueng gobnyan mangat jimakheun meusajan. oh ka lheureh jimakheun, awaknyan laju geumudom ateueh buket nyan. oh singoh beungoh ban seuboh tanda, laban laju geucom tanda meupisah keu aneuek-aneuek ngon cucoe gobnyan, geubri beureukat ubak awaknyan, dan oh lheureh nyan laju geuwoe urumoh gobnyan. geubeudoh nibak teumpat nyan nabi yakub laju geujak lom. dan malaikat-malaikat geujak meurumpok ngon gobnyan. watee geukalon le nabi

yakub malaikat-malaikat nyan, laju geupeugah, "nyoe khimah allah," ngon sabab nyan geuboh nan teumpat nyan mahana'im. oh lheureh nyan nabi yakub laju geuyue jak leubeh awai nibak gobnyan na padub droe utosan u nanggroee edom keugeujak meurumpok ngon esau, aduen gobnyan. nabi yakub geupeugah ubak awaknyan, "gata peugah nyak aduen ulon esau lagee nyoe, 'ulon nabi yakub, hamba droeneueh. nyang ka nyoe ulon na tinggai bak laban. jinoenyoe bak ulon na leumo, keuleudee, bubiri, kameng dan namiet-namiet. ulon kirem haba ubak amphon lon, deungon harapan amphon lon teuma galak.' " watee mandum utosan nyan geuriwang lom bak nabi yakub, laju jipeugah le awaknyan lagee nyoe, "kamoe ka lheureh kamoe jak ubak aduen amphon, esau, dan jinoenyoe gobnyan teungoh geujak keunoe keu geujak meurumpok ngon amphon. gobnyan geujak na geuba ureueng peuet reutho droe." ban geudeungeo habanyan nabi yakub teumakot lumpah na dan khawate. dan ureueng-ureueng nyang na meusajan gobnyan laju geubagi jeuet dua boh keulompok, meunan cit deungon bubiri gobnyan, kameng geuh, leumo dan unta gobnyan. geupike le gobnyan lagee nyoe, "meunyoee esau geuprang keulompok nyang phon, dan keulompok nyang keudua mungken hase jipeuseulamat droe." oh lheureh nyan geupeugah le nabi yakub, "ya allah, allah nyang geupujoe le abusyiek lon nabi ibrahim, dan ayah ulon nabi ishaq, deungoe kheueh doa ulon nyoe! tuhan ka geuyue ulon mangat lon woe lom u nanggroee lon dan ubak wareh kawom lon. dan tuhan ka geumeujanji bahwa gobnyan nyang atoe peue-peue nyang jroh keu ulon. ulon hana patot lon teurimong banmandum gaseh dan keuseutiaan nyang ka tuhan tunyok ubak ulon. watee ulon beurangkat lon jeumeurang krueng yordan, watee nyan hana lon ba sapeue nyang na cit tungkat. jinoenyoe ulon teuka lom deungon dua boh keulompok nyoe. ulon lakee deungon meuharab, neupeuseulamat kheueh ulon nibak aduen lon esau. ulon teumakot pat tateupeue gobnyan geujak prang dan geupeumate kamoe banmandum, meunan cit ureueng inong ngon aneuek-aneuek manyak. ingat kheueh bahwa tuhan ka geumeujanji teuma geuatoe peue-peue mantong nyang jroh keu ulon dan geubri ubak ulon keuturonan nyang le. hana meusidroe pi nyang hase ji-itong nyan sabab jai jih lagee anoe bak bineh pasi." oh ka lheureh geumudom disinan, nabi yakub laju geucok siteungoh nibak beulatang-beulatang geuhnyan keu geuhadiah ubak esau. hadiah nyan na kheueh: dua reutho boh kameng inong, dua ploh boh kameng agam, dua reutho boh bubiri inong, dua ploh boh bubiri agam, lhee ploh boh unta inong nyang mantong jipeumom aneuek, meusisiggeu aneuek jih, peuet ploh boh leumo inong, siploh boh leumo agam, dua ploh boh keuleudee inong dan siploh boh keuleudee agam. laju geuweuk-weuk beulatang nyan lam meupadub boh keulompok dan maseng-maseng laju geuseurah ubak sidroe namiet gobnyan. geupeugah le nabi yakub ubak awaknyan, "gata jak kheueh beuawai nibak ulon, dan gata jaga kheueh mangat na jarak lamkawan keulompok nyang phon ngon keulompok nyang

laen." nabi yakub geueurintah ubak namiet gobnyan nyang phon, "meunyo aduen ulon esau meurumpok ngon gata, dan geutanyong, 'soe amphon gata? ho keuneuk jak? atra soe kheueh beulatang-beulatang nyang gata ireng nyan?' dan gata jaweueb kheueh lagee nyoe, 'atra namiet droeneueh nabi yakub. gobnyan geukirem nyoe sibagoe peuseumahan ubak esau, amphon gobnyan. namiet droeneueh keudroe nabi yakub teungoh geujak keunoe.'" ubak namiet gobnyan nyang keudua, nyang keu lhee dan banmandum nyang geubri tugaih yue uroh kawan beulatang-beulatang nyan, geubri peurintah nyang saban lagee nyang ka ltheueh geupeugah bak keulompok nyang phon. sabab nabi yakub geupike gobnyan hase geubujuk esau deungon peue-peue nyang geupeuseumah nyan, seuhingga meunyo meurumpok eunteuk, esau geutem peumeuah gobnyan. jadi gobnyan geukirem leubeu awai peuseumahan nyan, sedangkan gobnyan keudroe geumudom lam khimah-khimah. bak malam nyan cit teuma nabi yakub geubeudoh dan laju geuba bandua droe peurumoh gobnyan, bandua droe namiet gobnyan dan ban siblahi droe aneuek-aneuek gobnyan, laju geujeumeurang krueng yarbok. oh ka ltheueh geupeuleupah meurandeh krueng awaknyan, gobnyan laju geugisa dan geukirem banmandum atra milek gobnyan u meurandeh. teuma gobnyan tinggai sidroe khong. dan watee nyan teuka kheueh sidroe ureueng agam jing meulo ngon nabi yakub hingga sampoe rab beungoh uroe. watee ureueng nyan ka teurasa bahwa jihnyan hana hase meunang bak meulo nyan, laju jiseupot nabi yakub bak boh punggong gobnyan, sampoe seundi punggong gobnyan meukilah. laju jipeugah le ureueng nyan, "peulheuh ulon; sikeujab teuk mata uroe jiteubiet." geujaweueb le nabi yakub, "droeneueh hana lon peulheuh, keucuali droeneueh neubri beureukat ubak ulon." "soe nan gata?" geutanyong le ureueng nyan. "nabi yakub," jaweueb gobnyan. geupeugah lom le ureueng nyan, "nan gata bukan le nabi yakub. gata ka gatameulo ngon allah dan ngon manusia, dan gata meunang; sabab nyan nan gata israel." geupeugah lom le nabi yakub, "neupeugah kheueh nan droeneueh." teuma di ureueng nyan geujaweueb, "hana peureulee gata tanyong soe nan ulon!" dan laju geubri beureukat ubak nabi yakub. oh ltheueh nyan nabi yakub geupeugah lom, "ulon ka meuhadab keu ngon po teu allah, dan ulon mantong udeb." sabab nyan kheueh geuboh nan tempat nyan pniel. bak watee mata uroe ka jiteubiet, nabi yakub laju geutinggai pniel, dan gobnyan capiek sabab boh punggong gobnyan meukilah. sampoe saat nyoe keuturonan israel hana jipajoh eungkot sie nyang teutob boh punggong beulatang nyan, sabab nabi yakub ka keunong seupot bak boh punggong gobnyan. nabi yakub geukalon esau geujak sira geuba na peuet reutoh droe ureueng gobnyan. sabab nyan laju geubagi-bagi aneuek-aneuek gobnyan nyang na bak lea, rahel dan bandua droe gundek gobnyan. gobnyan geukeubah mandua droe gundek geueh meusapat ngon aneuek-aneuek awaknyan dikeue, oh ltheueh nyan lea meusapat teuma ngon aneuek-aneuek gobnyan, dilikot that rahel ngon

yusuf. nyang paleng dikeue na kheueh nabi yakub, dan sira geupeurab ubak aduen geuh, laju geusujut sampoe tujoh goe. teuma esau laju geuplueng ubak nabi yakub, laju geuwa sira geucom adoe geuhnyan. dan bandua droe adoe aduen nyan laju geumo musok-musok sabab meucen lumpah na. watee geukalon le esau mandum ureueng inong dan aneuek-aneuek manyak nyan, laju geutanyong, "soe awaknyoe banmandum nyang na meusajan gata nyoe?" "awaknyoe aneuek-aneuek ulon," kheun nabi yakub, "allah ka geubri aneuek-aneuek nyoe ubak ulon." oh ltheueh nyan manduadroe gundek laju geupeurab ngon aneuek-aneuek jih, dan laju jisujut. oh ltheuehnyan teuka kheueh lea meusajan ngon aneuek-aneuek gobnyan, dan nyang paleng akhe Yusuf ngon rahel geupeurab dan laju geusujut. geutanyong le esau, "peue meukeusut gata ngon keulompok-keulompok ureueng nyang meurumpok ngon lon bunoe?" geujaweueb nabi yakub, "keu lon peugalak ate aduen." teuma le esau geupeugah, "ka seb atra ulon, hana peureulee le gata bri hadiah-hadiah nyan keu ulon." kheun nabi yakub, "bek meunan hei aduen meutuwa! meunyo ulon ka lon peugalak ate aduen, teurimong kheueh meuneubri ulon nyoe. nibak ulon, watee lon ngieng rupa aduen saban lagee lon ngieng rupa allah, sabab aduen ramah that that ubak ulon. ulon lakee, aduen teurimong kheueh peuseumahan nyang ka ulon ba nyoe. allah get that ate ubak ulon dan ka geubri peue-peue mantong nyang ulon peureulee." nabi yakub laju geupaksa dan akhe jih esau geuteurimong cit meuneubri adoe geuh nyan. dan esau laju geupeugah ubak nabi yakub, "jak kheueh geutanyoe meusiab-siab keu tabeurangkat, ulon jak dikeue gata." geujaweueb le nabi yakub, "aduen kon neutepueue bahwa aneuek-aneuek manyak nyoe leumoh, dan ulon haroh beuet-get lon peutimang ngon beulatang nyang mantong jimiek. meunyo teuparoh bagai-bagaih, bah kheueh nyan siuroe sagai, dan banmandum kawan beulatang nyan teuma mate. aduen jak kheueh leubeu llee, ulon seutot bacut-bacut. ulon kujak reujang-reujang ngon beulatang peulara dan aneuek-aneuek ulon nyoe sampoe meurumpok ngon aduen di edom." geupeugah le esau, "meunyo meunan, bah kheueh ulon tinggai bak gata meupadub droe ureueng-ureueng lon." geujaweueb le nabi yakub, "bek aduen meususah payah, ulon teuka keuneuk peugalak ate aduen." meunan kheueh jeuet jih, bak uroe nyan esau geuwoe lom u edom. teuma nabi yakub geujak u sukot, disinan laju geupeudong rumoh gobnyan keudroe dan tempat meuceue keu beulatang peulara gobnyan. nyang kheueh sabab jih tempat nyan teupeunan sukot. teungoh geujak nibak mesopotamia, trok kheueh laju nabi yakub deungon seulamata u banda sikhem di nanggroe kanaan, dan laju geupeudong khimah gobnyan bak saboh padang bak bineh banda. padang nyang na bak tempat khimah-khimah nyan geubloe bak ureueng keuturonan hemor, ayah sikhem, deungon yuem sireutoh peng pirak. oh ltheueh nyan gobnyan laju geupeudong miseubah nibak tempat nyan, dan geuboh nan "el, allah israel." nibak siuroe, dina aneuek inong nabi yakub ngon lea, jijak saweue na

meupadub droe ureueng inong kanaan. bak watee sikhem, aneuek hemor ureueng hewi jeuet keuraja lam wilayah nyan, meunan jikalon dina, jicok laju jipeuplueng aneuek dara nyan dan jipeukosa. rupari jihnyan galak that keu dina, sampoe jihnyan rhot cinta keu aneuek dara nyan dan jiuiseuha mangat aneuek dara nyan pi jicinta cit ubak jih. jikheun le sikhem ubak ureueng syiek jih, "ulon meuharab that ayah beumeuteume keulon aneuek dara nyan. ulon meuharab that beumeuteume lon meukawen ngon jihnyan." nabi yakub geudeungoe bahwa aneuek dara gobnyan ka jipeukosa, teuma le sabab aneuek-aneuek gobnyan teungoh jirabe beulatang peulara geuh ideh lam padang, gobnyan hana hase geucok tindakan sapewe pih sigohlom awaknyan jiwoe. hemor, ayah sikhem, jijak ubak nabi yakub keuneuk meurok pakat ngon gobnyan. teuma nibak wateenyan aneuek-aneuek nabi yakub ka habeh jiwoe nibak lam padang. watee jideungoe peue nyang ka teu-jadi nyan, awaknyan teukeujot that dan beungeh lagoena. sabab, deungan jipeukosa aneuek nabi yakub nyan, sikhem ka jihina banmandum ureueng israel. geukheun le hemor ubak nabi yakub, "aneuek ulon sikhem ka rhot cinta ubak aneuek droeneueh; ulon meuharab beujeuet aneuek lon jimeukawen ngon jihnyan. jak kheueh geutanyoe tapeuget peujanjian bahwa bansa droeneueh dan bansa ulon jeuet meukawen meujampu. deungan nyan teuma droeneueh banmandum jeuet tinggai meusajan ngon kamoe lam nanggroe nyoe; dipat mantong nyang droeneueh galak. syedara banmandum beubaih neumeukat dan neupeusapat dumna hareuta." oh ltheueh nyan sikhem jikheun ubak ayah dina meunan cit ubak aduen-aduen jih, "neupeupunoh kheueh peue nyang lon lakeenyan, teuma droeneueh ulon bri peue mantong nyang droeneueh lakee. kheun kheueh laju hadiah peue nyang keuneuk droeneueh lakee, meunan cit peuteunttee kheueh laju meuh meukawen nyan. ulon teuma lon bri peue mantong nyang droeneueh lakee, asai droeneueh mandum neupeu idhin ulon meukawen ngon sidara nyan." sabab sikhem ka jipeukosa adoe awaknyan dina, aneuek-aneuek nabi yakub jimeusulet ubak sikhem dan hemor ayah jihnyan. kheun awaknyan ubak bandua droe ureueng nyan, "kamoe malee kamoe peuidhin adoe kamoe jimeukawen ngon ureueng nyang hana meukatan. teuma kamoe hase kamoe peupeunoh nyang droeneueh lakee nyan ngon saboh syarat: syarat nyan na kheueh gata meuseuti beujeuet lagee kamoe, meukeusut jih na kheueh banmandum ureueng agam nyang na lamkawan gata haroh teupeukatan. oh ltheuehnyan baro kheueh jeuet kamoe situju ateuoh usui droeneueh nyan meukawen meujampu. kamoe tinggai teutab lamkawan gata dan jeuet keusaboh bansa ngon gata. teuma meunyoe gata hana neutem teurimong banmandum syarat-syarat kamoe nyan, dan hana neutem teupeukatan, kamoe teuma kamoe cok lom teuma aneuek daranyan dan laju kamoe jak." hermon ngon sikhem teurasa banmandum syarat-syarat nyan ka pantaih, dan sikhem ka siabseudia jipeupunoh banmandum syarat-syarat nyan sabab jihnyan cinta that ubak dina. lam banmandum wareh kawom

sikhem nyan, sikhem nyan kheueh nyang paleng rayeuk peungaroh. oh ltheuehnyan hermon ngon sikhem laju jijak ubak teupat meurok pakat nibak babah pintoe geureubang banda, dan laju jipeugah ubak wareuga banda awaknyan lagee nyoe, "ureueng-ureueng israel nyan sabat tanyoe. ngon lageenyan bah kheueh awaknyan tinggai lam nanggroe nyoe meusajan tanyoe dan bah kheueh jijak lam nanggroe nyoe ho-ho nyang jigalak. nanggroe nyoe keubiet that luwah keu awaknyan mandum, tanyoe jeuet tameukawen ngon aneuek-aneuek dara awaknyan, dan awaknyan pi jeuet jimeukawen ngon aneuek-aneuek dara geutanyoe. teuma ureueng-ureueng nyan teuma jitem tinggai ngon geutanyoe dan jeuet keusaboh bansa ngon geutanyoe deungan saboh syarat, na kheueh: banmandum ureueng agam nyang na lamkawan geutanyoe meuseuti teupeukatan. teuma banmandum kawan beulatang awaknyan meunan cit hareuta beunda awaknyan jeuet keu atra geutanyoe teuma. ngon lageenyan jak kheueh geutanyoe tasituju mandum nyang jilakee le awaknyan mangat awaknyan jeuet tinggai meusajan ngon geutanyoe." banmandum peunduduek banda nyang meusapat inan situju peue nyang geupeugah le hermor dan sikhem, ngon lageenyan teuma banmandum ureueng agam nyang na lam banda nyan teupeukatan. lthee uroe teuma oh ltheuehnyan, watee ureueng-ureueng agam nyan mantong lam keuadaan saket sabab meukatan nyan, dua droe aneuek nabi yakub na kheueh aduen-aduen dina nyang nan jih simeon dan lewi, jijakcok peudeung droejih, ngon lageenyan seucara seungab-seungab jitamong laju u dalam banda. oh ltheuehnyan laju jipoh mate banmandum ureueng agam nyang na disinan, meunan cit hermor ngon sikhem mate meusajan ngon wareuga banda nyan. laju awaknyan jijakcok dina di rumoh sikhem ltheuehnyan laju jijak. oh ka ltheueh ceumeucang nyan, aneuek-aneuek nabi yakub nyang laen laju jijak rampok bubena asoe bandanyoe sibagoe balaih dam sabab adoe awaknyan ka jipeukosa le awaknyan. laju awaknyan jicok bubena kawan kameng, bubiri, leumo, keuleudee, dan banmandum nyang na lam banda meunan cit lam padang. awaknyan laju jicok banmandum barang-barang nyang meuyuem, jiteun banmandum ureueng inong dan aneuek-aneuek banyak, dan jireupah bunena asoe rumoh nyang na lam banda nyan. nabi yakub geupeugah ubak simeon dan lewi, "gatanyoe bit tapeususah ulon, jinoenyoe bunena ureueng kanaan meunan cit ngon ureueng feris lam nanggroe nyoe jibanci keulon. ureueng-ureueng geutanyoe hana le; meunyoe peunduduek nyan mandum meusaboh jilawan ngon jiseurang ulon, banmandum keuluwarga geutanyoe teuma binasa." teuma awaknyan jijaweeb, "kamoe hana mungken kamoe teurimong adoe kamoe jipeusa ngon inong lunte." bak siuroe allah meufeureuman ubak nabi yakub, "ulon kheueh allah nyang peuleumah droe ubak gata watee gata taplueng nibak aduen gata esau. gata jak kheueh bubagaih u betel. tinggai kheueh disinan dan gata peudong kheueh saboh miseubah keu ulon." dan nabi yakub laju geupeugah ubak keuluwarga gobnyan dan ubak banmandum ureueng

nyang na meusajan ngon gobnyan, "geutanyoe teuma tatinggai teupnat nyoe dan tajak u betel. disinan ulon teuma lon peudong saboh miseubah keu allah nyang ka geutulong ulon watee ulon meuteume keusuasan dan nyang ka lindong ulon ho-homantong nyang ulon jak. dan gata tiek kheueh banmandum patong-patong dewa aseng nyang na nibak gata; dan peubuet kheueh upacara teupeugleh droe dan gata sok kheueh peukayan nyang gleh." dan awaknyan laju jijok ubak nabi yakub banmandum patong-patong dewa aseng nyang na bak awaknyan meunan cit deungon talo takue jih. banmandum atranyan laju geuseubee lam tanoh le nabi yakub dimiyueb bak kayee raya to ngon banda sikhem. watee nabi yakub ngon rombongan keuluwarga gobnyan geubeurangkat, allah laju geupeupunoh peunduduk banda-banda nyang na sikeuileng nyan deungon rasa teumakot nyang luwabiasa, sampoe awaknyan hana jitiyueb nabi yakub dan rombongan gobnyan. dan trok kheueh laju awaknyan bak tanoh kanaan lam banda betel nyang yoh awai ilee nan jih lus. nibak teupnat nyan nabi yakub laju geupeudong miseubah dan geuboh nan teupnat nyan "el-betel", sabab po teu allah ka geupeuleumah droe ubak gobnyan nibak teupnat nyan watee gobnyan geupeuplueng droe nibak aduen geuh. dan disinan cit teuma debora, deundayang nyang useuha ribka, meuninggai dan laju teupeukubu dimiyueb bak kayee raya siblahi seultan banda nyan. nyang kheueh sabab jih bak kayee nyan teuboh nan "bak kayee moe". watee nabi yakub ka geugisa nibak mesopotamia, allah geupeuleumah droe lom teuma ubak gobnyan sira geubri beureukat ubak gobnyan. feureuman allah ubak gobnyan, "gata hanale teupengah yakub, teuma ka jeuet keu israel." meunan kheueh po teu allah geuboh nan gobnyan israel. dan feureuman allah ubak gobnyan, "ulon kheueh allah nyang mahakuasa. bah kheueh gata meu aneuk cucoe nyang le! gata teuma gata peutreu mubagoe bansa dan teuma jeuet keu bapak indatu raja-raja. nanggroe nyang ka ulon bri keu nabi ibrahim dan nabi ishaq, teuma ulon bri keu gata dan keuturonan gata." oh ka lheureh geubri feureuman nyan allah laju geutinggai nabi yakub nibak teupnat nyan. bak teupnat allah geumeututoe bak nabi yakub, gobnyan laju geupeudong saboh batee peuingat. dan batee nyan laju jipeuseumah ubak allah ngon cara geuro ie anggo dan minyeuk zaiton ateuhe nyan. teupnat nyan geuboh nan "betel". oh lheurehnyan nabi yakub dan rombongan gobnyan laju geutinggai betel. watee awaknyan mantong agak jioh nibak efraim, rahel pi ka trok watee keugeupeulahe aneuk. teuma aneuk lam pruet geuh nyan payah that lahe. watee sakot pruet geuhnyan meutamah brat, jipeugah kheueh le ma bidan ubak gobnyan, "beurayek kheueh ate droeneuh rahel, aneuk droeneuh nyoe agam." teuma rahel ka to that ajai geuh, dan watee gobnyan keuneuk meuninggai, laju geuboh nan aneuk geuh nyan bin oni teuma le ayah aneuk nyan geuboh nan benyamin. oh ka lheureh rahel meuninggai donya, manyet gobnyan laju teupeukubu bak bineh rot jak u efraim, nyang jinoenyoe nan teupnat nyan betlehem. nabi yakub laju geupeudong saboh batee

peuingat nibak teupnat nyan, dan sampo uroenyoe kubu rahel nyan mantong teutanda ngon batee nyan. oh ka lheurehnyan nabi yakub laju geujak lom, dan geupeudong laju khimah bak saboh teupnat liwat meunara eder. teungoh awaknyan mantong na bak teupnat nyan, ruben laju jieh ngon bilha, gundek ayah jih. hai nyan geudeungoe le nabi yakub, dan gobnyan beungeh lumpah na. nabi yakub na geumeu aneuk dua blaih droe aneuk agam. aneuk-aneuk lea na kheueh ruben (aneuk tuha nabi yakub), simeon, lewi, yehuda, isakhar dan zebulon. aneuk-aneuk rahel na kheueh nabi yusuf dan benyamin. aneuk-aneuk bilha namiet rahel na kheueh dan ngon naftali. aneuk-aneuk zilpa, namiet lea na kheueh gad dan asyer. aneuk-aneuk nyan lahe di mesopotamia. dan trok kheueh laju nabi yakub ubak nabi ishaq ayah gobnyan, bak teupnat tinggai gobnyan di mamre to ngon hebron. (ilee nabi ibrahim, indatu gobnyan, disinan cit tinggai gobnyan.) watee umu ka tuha that, sireutoh lapan ploth thon, nabi ishaq meuninggai donya dan laju teukubu le esau dan nabi yakub, aneuk-aneuk gobnyan. nyoe kheueh keuturonan esau nyang teuhoi edom. esau geumeukawen ngon lhee droe ureueng inong kanaan, awaknyan na kheueh: ada, binti elon ureueng het; oholibama binti ana dan cucoe zibeon ureueng hewi; basmat aneuk ismail dan adoe nebayot. ada jipeulahe elifas, basmat jipeulahe rehuel, dan oholibama jipeulahe yeus, yaelam dan korah. banmandum aneuk nyan lahe di kanaan. oh lheureh nyan esau laju geutinggai nabi yakub dan geujak u nanggroe laen sira geuba mandum peurumoh geuh, aneuk gobnyan dan banmandum ureueng nyang na tinggai lam rumoh geuh, meusajan ngon banmandum beulatang peulara dan hareuta beunda nyang na geuteume di nanggroe kanaan. esau geupeuaseng droe nibak nabi yakub sabab hareuta awaknyan jai lumpah na sampoe awaknyan hana hase udeb ngon gobnyan. lom teuma lam nanggroe nyang awaknyan tinggai nyan hana seb peunajoh keu beulatang peulara awaknyan nyang le nyan. dan esau nyang teuhoi nan edom, laju geutinggai teutab dibagian gunong-gunong seir. nyoe kheueh keuturonan esau, indatu ureueng edom. peurumoh esau nyang nan jih ada jipeulahe sidroe aneuk agam, jiboh nan aneuk agam nyan elifas. dan elifas na teuma jimeu aneuk limong droe aneuk agam, nan aneuk-aneuk nyan na kheueh: teman, omar, zefo, gaetam dan kenas. elifas na gundek, nan gundek nyan timna. timna nyan na teuma jipeulahe sidroe aneuk agam nyang jiboh nan amalek. peurumoh esau nyang nan jih basmat jipeulahe sidroe aneuk agam nyang jiboh nan rehuel. dan rehuel na teuma jimeu aneuk peuet droe aneuk agam, aneuk-aneuk nyan na kheueh: nahat, zerah, syama dan miza. peurumoh esau nyang nan jih oholibama, na kheueh aneuk ana dan cucoe zibeon, na jipeulahe lhee droe aneuk agam, aneuk-aneuk nyan na kheueh: yeus, yaelam dan korah. nyoe ulee sukee-sukee keuturonan esau: elifas, aneuk tuha esau, na kheueh indatu sukee-sukee nyang teupeugah dimiyueb nyoe: teman, omar, zefo, kenas, korah, gaetam dan amalek. awaknyan banmandum keuturonan ada,

peurumoh esau. rehuel, bin esau, na kheueh indatu sukee-sukee nyang teupeugah dimiyueb nyoe: nahat, zerah, syama dan miza. awaknyan banmandum keuturonan basmat, peurumoh esau. sukee-sukee nyang seulanjut jih nyoe na kheueh keuturonan esau nibak peurumoh nyang nan jih oholibama bin ana, awaknyan na kheueh: yeus, yaelam dan korah. banmandum sukee nyan keuturonan esau. peunduduek aseuli tanoh edom teubagi ateueh sukee-sukee keuturonan seir, ureueng hori. sukee-sukee nyan na kheueh: lotan, syobal, zibeon, ana, disyon, ezer dan disyan. lotan na kheueh indatu margah hori dan heman. (lotan na syedara nyang inong, nan jih timna.) syobal na kheueh indatu margah: alwan, manahat, ebal, syefo dan onam. zibeon na dua droe aneuek agam, aya dan ana. (ana nyoe kheueh nyang teume teumpat-teumpat mata ie seu-eum di padang pasi, watee gobnyan teungoh geurabe keuleudee ayah jih.) ana na kheueh ayah disyan, dan disyan indatu margah: hemdan, esyban, yitran dan keran. ana na teuma sidroe aneuek inong, nan jih oholibama. ezer indatu margah: bilhan, zaawan, dan akan. disyan indatu margah us dan aran. nyoe kheueh sukee-sukee hori di nanggroe edom: lotan, syobal, zibeon, ana, disyan, ezer dan disyan. sigohlom na raja nyang mat peurintah di nanggroe israel, raja-raja nyang teupeugah dimiyueb nyoe jimat peurintah di tanoh edom seucara meuturot-turot: bela bin beor nibak dinhaba. yobab bin zera nibak bozra. husyam nibak daerah teman. hadad bin bedad nibak awit (jihnyan kheueh nyang peutaloe ureueng midian lam mideuen prang didaerah moab). samla nibak masreka. saul nibak rehobot bak bineh krueng. baal-hanan bin akhbor. hadar nibak pahu (peurumoh jih nan geuh mehetabeel, bin matred dan cucoe mezahab). esau na kheueh indatu sukee-sukee edom nyang teupeugah dimiyueb nyoe: timna, alwa, yetet, oholibama, ela, pinon, kena, teman, mibzar, magdiel, dan iram. tieb-tieb sukee jiboh nan geuh bak daerah teumpat tinggai jih maseng-maseng. nabi yakub tinggai teutab di nanggroe kanaan, teumpat tinggai ayah gobnyan, dan nyoe kheueh riwayat keuluwarga nabi yakub: watee nabi yusuf, aneuek nabi yakub meu-umu tujuh blah thon, gobnyan geu-useuha saboh kawan kameng ngon bubiri meusajan-sajan ngon aduen-aduen gobnyan, na kheueh aneuek-aneuek bilha dan zilpa, mandua droe gundek ayah gobnyan. nabi yusuf sabe geulapor bak ayah geuh nabi yakub buet-buet nyang jeuhet nyang jipeubuet le aduen-aduen geuh. nabi yakub leubeh geugaseh keu nabi yusuf nibak aneuek-aneuek geuh nyang laen, sabab nabi yusuf lahe watee ayah gobnyan ka tuha. bak siuroe nabi yakub geupeuget keu nabi yusuf bajee jubah nyang paleng lagak. watee jingieing le aduen-aduen nabi yusuf bahwa ayah geuh nyan leubeh geugaseh ubak nabi yusuf nibak keu awaknyan, teuka kheueh banci awaknyan keu nabi yusuf, sampoe hana jitem peugah haba le nyang get-get ngon gobnyan. bak simalam nabi yusuf meulumpo, dan watee geupeugah lumpo geuh nyan ubak aduen-aduen geuh, awaknyan meutamah banci keu adoe jih nyan. nyoe kheueh nyang geupeugah le nabi yusuf ubak aduen-aduen geuh nyan, "cuba

deungoe nyang ulon peugah nyoe! ulon meulumpo geutanyoe banmandum na di blang teungoh ta ikat gandom, dan gandom ulon laju teudong oh cot. dan gandom-gandom droeneueh banmandum jikeulileng gandom ulon dan jisujut ubak gandom ulon nyan." "gata pike gata jeuet keuraja dan gata kuasa ateueh kamoe?" kheun aduen-aduen gobnyan. dan deungon na lagee nyan meutamah-tamah banci awaknyan keu nabi yusuf sabab lumpo-lumpo gobnyan dan peue nyang ka geupeugah ubak awaknyan. oh lheureh nyan nabi yusuf meulumpo lom, dan laju geupeugah ubak aduen-aduen geuh nyan, "ulon meulumpo lom, hei aduen meutuwah, ulon ngieing mata uroe, buleuen dan siblah boh bintang jisujut ubak ulon." lumpo nyan geucalitra teuma ubak ayah geuh, dan le ayah geuh laju geudhot gobnyan sira geupeugah lageenyo, "peue lumpo nyan? gata pike ulon nyoe, meunan cit ngon ma gata dan syedara-syedara gata jiteuka sujut dan jiseumah gata?" aduen-aduen nabi yusuf bingiek ate ubak gobnyan, teuma ayah gobnyan teutab geupike ubak lumpo nyan. nibak siuroe bak watee aduen-aduen nabi yusuf jijak u sikhem keujjak rabe kawan kameng ngon bubiri ayah jih, geupeugah kheueh le nabi yakub ubak nabi yusuf, "gata jak kheueh laju u sikhem, nibak teumpat aduen-aduen gata teungoh jimeurabe kameng ngon bubiri tanyoe." seutot nabi yusuf, "get, ayah." kheun ayah geuh, "ngieing kheueh, pakriban keuadaan aduen-aduen gata, meunan cit keuadaan kameng ngon bubiri tanyoe, lheurehnyan woe kheueh laju keugata peugah ubak ulon." ngon lageenyan geupeulheureh kheueh nabi yusuf geujak geutinggai panton hebron. hana treb teuma oh lheurehnyan trok kheueh laju nabi yusuf u sikhem. teungoh gobnyan geujak keudeh keunoe lam padang nyan, laju meurumpok gobnyan ngon sidroe ureueng agam nyang laju jitanyong ubak gobnyan, "peue nyang gata mita?" "aduen-aduen ulon, awaknyan teungoh meurabe kameng ngon bubiri," jaweub nabi yusuf, "peu kheueh bapak neuteupeue dipat awaknyan?" seutot ureueng nyan, "awaknyan ka jibeurangkat nibak teumpat nyoe. ulon deungoe awaknyan na jipeugah bahwa awaknyan keuneukjak u dotan." ban geufeuengoe haba nyan nabi yusuf pi laju geuseutot aduen-aduen geuhnyan dan meurumpok laju awaknyan di dotan. phon nibak jioh awaknyan ka jikalon nabi yusuf, dan sigohlom gobnyan trok ubak awaknyan, awaknyan ka sipakat jikeuneuk poh mate nabi yusuf nyan. kheun awaknyan sidroe ubak nyang laen, "ngieing, tukang meulumpo nyan ka jijak keunoe. jak tapoh mate jihnyan dan tatiek manyet jihnyan lam mon nyang tho. takheun ubak ayah bahwa jihnyan ka jiteugom le beulatang juah. dan ngon nyan teuma jeuet takalon teuma pakriban jeuet jih ngon lumpo-lumpo jihnyan." ruben jideungoe reuncana brok awaknyan, laju ji-useuha keuneuk peuseumat nabi yusuf. "bek tapoh mate jihnyan," kheun geuhnyan. "tatiek mantong lam mon nyang na lam padang pasi nyoe, teuma bek tapoh atawa tapeuluka jih nyan." hainyan geupeugah sabab geuhnyan keuneuk peuseumat nabi yusuf dan geuyue woe gobnyan u rumah. watee nabi yusuf ka trok ubak aduen-aduen geuh, ngon buet nyang gasa that

awaknyan laju jisuet bajee jubah nabi yusuf nyang lagak nyan. laju awaknyan jihila gobnyan dan jirhom laju nabi yusuf nyan lam mon nyang tho. bak watee awaknyan teungoh jimakheun, laju deuh jikalon le awaknyan saboh kafipilah ureueng ismail nyang teungoh geujak nibak gilead u nanggroe meuse. ateuhe unta-unta awaknyan peunoh ngon meubagoe reumpah dan kismis. laju jikheun le yehuda ubak banmandum syedara-syedara geuh nyan, "keupeue guna jih tapoh mate adoe geutanyoe dan tasom rahsia nyan? jak tapeubloe jih nyan ubak ureueng ismail nyan. bek tapeusaket jihnyan. pakriban kheueh mantong jihnyan na kheueh adoe geutanyoe keudroe," banmandum syedara jihnyan laen situju, dan bak watee na meupadub droe saudaga midian teuka, nabi yusuf laju jipeuteubiet le aduen geuh lam mon nyan dan laju jipeubloe ubak ureueng-ureueng ismail nyan ngon yuem dua ploh leumpang peng pirak. oh lheurehnyan gobnyan laju jiba le saudaga-saudaga nyan u nanggroe meuse. watee ruben geugisa ubak mon nyan dan geukalon ka hana le nabi yusuf lam mon nyan, laju jipriek-priek peukayan nyang na bak tuboh jih sabab seudeh that. gobnyan laju geugisa ubak syedara-syedara geuh sira geupeugah lagee nyoe, "aneuk nyan ka hana le lam mon nyan, peue nyang haroh lon pubuet jinoenyoe?" laju awaknyan jisic saboh kameng dan laju jiceulob bajee jubah nabi yusuf lam darah kameng nyan. oh lheurehnyan bajee jubah nyan jiyue le awaknyan mangat ji-intat ubak ayah jih ngon peusan lagee nyoe, "bajee jubah nyoe kamoe teume, peue kheueh nyoe atra aneuk ayah?" nabi yakub geuturi keu jubah nyan, laju geupeugah, "beutoi, nyoe jubah aneuk ulon! ka pasti aneuk nyoe ka jiteugom le beulatang juah. keubiet seudeh aneuk ulon ka mate jipriek-priek le beulatang juah nyan!" nabi yakub geupriek peukayan geuh sabab seudeh that laju geungui peukayan meukabong meu-uroe-uroe treb jih gobnyan geupeuratok keu aneuk geuh nyang geusayang nyan. banmandum aneuk-aneuk gobnyan, bah nyang agam meunan cit nyang inong jiteuka jikak peumangat ate gobnyan, teuma gobnyan teutab hana jitem mangat ate. kheun gobnyan, "sampoer an mate ulon teutab lon peuba-e aneuk ulon nyan." meunan kheueh jeuet jih gobnyan sabe lam keuadaan meukabong sabab nabi yusuf aneuk geuhnyan. nibak wateanyan, di nanggroe meuse, le ureueng-ureueng midian laju jipeubloe nabi yusuf ubak potifar, sidroe panglima nyang jabatan geuh sibagoe keumandan peungawai meuligoe. kira-kira bakwatee nyan yehuda jitinggai syedara jih dan jiduek ngon hira, sidroe ureueng agam nyang asaijih nibak banda adulam. disinan yehuda jimeuturi ngon sidroe aneuk dara kanaan, aneuk sua, nibak meuturinyan laju awaknyan jimeukawen. aneuk awaknyan nyang phon lahe agam cit, jiboh nan le ayah jih er. aneuk nyang keudua agam cit, jiboh nan onan. aneuk nyang keu lhee agam cit, jiboh nan syela. watee syela lahe yehuda mantong na di kezib. yahuda laju jipeukawen er, aneuk jih nyang tuha ngon tamar. peurangoe er jeuhet lumpah na, sampoer tuhan beungeh keu jihnyan dan laju geupoh mate. dan yehuda laju jipeugah ubak onan, adoe er, "gata jak kheueh laju

ubak inong balee aduen gata, dan gata eh kheueh ngon jih nyan. peupeunoh kheueh keuwajeaban gata ateuhe jih nyan, sabab gata adoe lakoe jih; deungon lagee nyan aduen gata jeuet jiteume keuturonan." teuma onan jiteupeue aneuk-aneuk jihnyan singoh hana jeuet jikuasa. le sababnyan, tieb-tieb jimeusibadan ngon balee aduen jih nyan, jipeubiyeu mantong ie mani jih rho uluwa mangat aduen jih hana jiteume keuturonan. sabab buet nyang lagee nyan, tuhan beungeh lumpah na, dan tuhan laju geupoh mate onan nyan. oh lheureh nyan jipeugah kheueh le yehuda ubak tamar meulintee geuh nyan, "jakwoe kheueh u rumoh ureueng tuha gata dan tinggai kheueh disinan sibagoe inong balee sampoer aneuk ulon syela rayeuk." yehuda geupeugah lagee nyan sabab geutakot tuhan teuma geupoh mate syela, lagee nyang ka jirasa le aduen-aduen jih. dan jiwoe kheueh tamar u rumoh ureueng tuha jih. hana padub treb teuma oh lheureh nyan peurumoh yehuda meuninggai donya. oh ka seulesoe masa meukabong, yehuda laju geupakat hira, rakan geuh nibak adulam nyan, jikak ubak timna, bak teumpat bubiri-bubiri jih teuguteng bulee. tamar meuteume haba bahwa tuwan jih yehuda geujak u timna keu geujak gunteng bulee-bulee bubiri geuh. teuma le tamar nyan laju jigantoe peukayan inong balee nyang jingui nyang ka nyoe jigantoe ngon peukayan laen. muka jih jitob ngon silubong, dan jiduek kheueh laju bak babah pintoe banda enaim, nyang na bak rot jak u timna. tamar jiteupeue that bahwa syela, aneuk yehuda nyang tulot, ka rayeuk, teuma jihnyan gohlom cit jipeukawen ngon aneuk muda nyan. watee yehuda geungeng ateuhe tamar, jipike inong nyan inong jeuhet, sabab muka jih teuseulubong. dan yehuda laju jipeurab bak inong nyang na bak bineh rot nyan dan laju jipeugah, "padub nyang gata lakee?" yehuda nyan hana jiteupeue bahwa inong nyan na kheueh meulintee geuh keudroe. jaweueb le tamar, "teuseurah bak droeneueh." yehuda jipeugah lom, "ulon teuma lon bri ubak gata saboh kameng muda." jaweueb tamar, "jeuet, asai na jaminan, sampoer droeneueh neukirem kameng nyan keu ulon." jaminan peue?" seutot yehuda. jaweueb tamar, "neujok bak ulon cab droeneueh ngon taloe jih meunan cit tungkat nyang na bak droeneueh nyan." yehuda laju jikok barang-barang nyang jilakee nyan ubak inong nyan, dan laju awaknyan meusibadan, dan tamar laju mume. tamar laju jiwoe urumoh dan jipeuhah laju ija ngon tob muka jih, dan laju jingui peukayan inong balee lagee nyang ka-ka. hana padub treb teuma oh lheureh nyan yehuda laju geuyuejak hira, rakan jihnyan keu jikak intat kameng nyan dan jilakee lom barang-barang nyang ka jikeubah sibagoe jaminan, teuma hira hana meurumpok ngon inong nyan. hira laju jiteumanyong ubak ureueng-ureueng nyang na di enaim, "hoka jikak inong jeuhet nyang kanyoe jih na jiduek bak bineh rot nyoe?" hantom na inong jeuhet disinoe, "jaweueb awaknyan." dan jiwoe kheueh hira ubak yehuda sira jipeugah, "ulon hana meurumpok ngon inong jeuhet nyan. meunurot nyang jipeugah le ureueng-ureueng nyang na disinan hantom na inong jeuhet disinan." jipeugah le yehuda, "bah kheueh barang-barang ulon nyan bak jih, asai

geutanyoe hana meuteume malee. ulon ka lon useuha keuneuk bayeue jih nyan, teuma gata hana meuteume gata mita pat inong nyan." kira-kira na lhee buleuen teuma oh lھےh nyan, yehuda meuteume haba bahwa meulintee jih tamar ka jeuet keu inong jeuhet dan ka mume. laju yehuda jipeurintah, "cok inong nyan dan jaktot laju lam apui sampoe mate!" teungoh tamar jiba uluwa, laju jikirem haba keu yah tuwan jih, "ulon ka jipeuraya pruet le ureueng nyang po barang-barang nyoe. peureksa kھےuh atra soe cab taloe dan tungkat nyoe." yehuda jituri barang-barang nyan dan laju jipeugah, "inong nyan hana meusalah. ulon hana lon peupeunoh keuwajeban ulon ubak jih nyan; sibeuna jih ulon peukawen aneuek ulon syela ngon jih nyan." dan phon saat nyan yehuda hantom na le jimeusibadan ngon tamar. oh ka trok watee jih tamar jimeu aneuek, teunyata jihnyan jipeulahe aneuek keumbeue. teungoh aneuek nyan jipeuteubiet lam pruet jih, sidroe aneuek jih nyan laju jisunyueng jaroe jih uluwa, dan le ma bidan laju jimat jaroe nyan dan ji-ikat ngon beuneueng mirah. laju jikھےun, "aneuek nyoe lahe leubeh awai." rupa jih aneuek banyak nyan jitarek jaroe jih keula-i, dan aneuek banyak nyang sidroe teuk lahe leubeh ilee. oh lھےh nyan laju jipeugah le bidan nyan, "meunan kھےuh cara gata tapeusak uluwa!" dan aneuek nyang lahe leubeh awainyan laju jiboh nan peres. oh lھےh nyan baro kھےuh lahe adoe jih nyang jaroe jih ka teuitak ngon beuneueng mirah bunoe. dan aneuek nyang keudua nyan jiboh nan zerah. nabi yusuf laju jiba u nanggroe meuse le ureueng-ureueng nabi ismail nyan, oh trok keudeh laju jipeubloe nabi yusuf nyan ubak potifar, sidroe panglima raja nyang jeuet keu ulee peungawai meuligoe. tuhan geutulong nabi yusuf sampoe peue-peue nyang geupeubuet sabe na hase. nabi yusuf nyan tinggai di rumoh po geuh, ureueng meuse nyan. po geuhnyan deuh jikalon bahwa tuhan geutulong nabi yusuf ngon sabab nyan nabi yusuf hase banmandum peue-peue mantong nyang geupeubuet. potifar galak that keu nabi yusuf akhe jih laju jiangkat gobnyan jeuet keupeugawee pribadi jih; dan laju jibri tugaih ubak nabi yusuf mangat geu-uroh banmandum nyang teupeureulee lam rumoh tangga dan peue-peue mantong atra milek potifar nyan. phon saat nyan, deumi nabi yusuf, tuhan laju geubri beureukat keu rumoh tangga ureueng meuse nyan dan peue-peue mantong nyang na bak jih, bah kھےuh nyang na dirumoh meunan cit nyang na di blang. peue-peue mantong atra potifar jipeucaya ubak nabi yusuf. deungon lagee nyan potifar mubacut pih hana jipike keuhai rumoh tangga, nyang jipike na kھےuh keuhai peunajoh jih mantong. nabi yusuf ureueng jih ceudah dan lagak lumpah na. na meupadub treb teuma, peurumoh potifar ka jiteuka beureuhi ubak nabi yusuf, dan laju jipakat eh nabi yusuf nyan le peurumoh potifar nyan. nabi yusuf hana geutem dan laju geupeugah bak ureueng inong nyan, "meuah, hai ma, ulon ka geupeucaya le po potifar peue-peue mantong atra milek gobnyan keu lon jaga ngon lon peulara. gobnyan hana peureulee le geupike sapoeu lam rumoh nyoe. lam rumoh nyoe kuasa ulon sabe rayeuk ngon kuasa gobnyan. hana

meusapeue pih nyang hana geupeucaya ubak ulon keucuali droeneueh ma. pakriban mungken ulon peulaku buet nyang jeuhet nyan dan ulon meudesya ubak po teu allah?" bahpi peurumoh potifar geurayu nabi yusuf tieb-tieb uroe, peumuda nyan teutab hana geutem eh ngon ureueng inong nyan. bak siuroe watee nabi yusuf geutamong lam rumoh keu geujak keureuja buet-buet gobnyan, hana meusidroe ureueng pih nyang na disinan. peurumoh potifar laju jitarek nabi yusuf bak bajee jubah geuh sira jipeugah, "jak keunoe tajak eh meusajan." nabi yusuf geumeulawan-lawan dan laju lھےh, dan geuplueng laju uluwa, teuma bajee jubah gobnyan teutab tinggai bak jaroe ureueng inong nyan. watee jingiegi le peurumoh potifar nabi yusuf ka geuplueng dan bajee jubah mantong tinggai bak jaroe jih, laju jitawok bubena peulayan jih dan jipeugah, "cuba gata ngiegi! ureueng ibrani nyang geuba le lakoe lon u rumoh nyoe, jihina tanyoe. jihnyan jitamong lam kama lon dan jikeuneuk peukosa ulon, teuma di ulon laju lon kliek-kliek ngon su nyang teuga. watee teudeungoe su nyan kliek, laju jiplueng uluwa dan bajee jubah jih tinggai." dan peurumoh potifar laju jikeubah bajee jubah nyan sampoe lakoe jih jiwoe. oh watee lakoe jih katrok jiwoe u rumoh, calitra nyan laju jipeugah ubak lakoe jih, "ureueng ibrani nyang droeneueh ba keunoe nyoe, jitamong lam kama lon keu jikeuneuk hina lon. teuma watee ulon kliek nyan, laju jiplueng uluwa dan bajee jubah jih tinggai lam kama." potifar beungeh lumpah na. dan le potifar laju jipeurintah mangat nabi yusuf teudrob dan jak peutamong lam glab, lam teupat tahanan raja-raja teukurong. teuma tuhan geutulong nabi yusuf dan sabe geugaseh keu gobnyan, sampoe keumeundan rumoh glab pih lumpah jisayang keu gobnyan. dan di keumeundan rumoh glab nyan laju jipeucaya bak nabi yusuf mangat ureueng-ureueng nyang na lam glab nyan geu-uroh le gobnyan, dan ubak nabi yusuf kھےuh jibri tanggong jaweueb ateueh peue-peue mantong buet nyang teupeubuet lam rumoh glab nyan. ulee rumoh glab nyan hana jikawai peue-peue mantong nyang geupeubuet le nabi yusuf, sabab tuhan geutulong gobnyan sampoe gobnyan meuhase peue-peue mantong nyang geupeubuet. na meupadub treb teuma oh lھےh nyan dua droe peulayan raja nanggroe meuse, bandua droe awaknyan na kھےuh nyang uroh ie jieb dan nyang uroh ruti raja, ka jipeubuet buet nyang salah ateueh po raja. dan beungeh that raja ubak mandua droe peulayan nyan, dan laju awaknyan jipeutamong lam glab di rumoh keumeundan nyang kawai meuligoe, bak teupat nabi yusuf keunong teun. treb cit awaknyan lam glab nyan, dan keumeundan kawai meuligoe jibri tugaih ubak nabi yusuf mangat geupeutimang awaknyan. bak simalam ureueng uroh ie jieb dan ureueng nyang uroh ruti raja nyan maseng-maseng laju meulumpo. makna lumpo awaknyan hana saban. watee nabi yusuf geujak bak awaknyan oh singoh beungoh, awaknyan deuh jih seudeh lumpah na. laju geutanyong le nabi yusuf bak awaknyan, "pakon gatanyoe mandua deuh jih seudeh that-that nibak uroe nyoe?" jaweueb awaknyan, "beuklam kamoe meulumpo, dan hana nyang teupeu peue makna lumpo kamoe nyan."

geujaweueb le nabi yusuf, "po teu allah nyang geubri keumungkenan ubak manusia keu jipeutrang makna lumpo. cuba gata peugah peue lumpo gata nyan." nyang uroh ie jieb jara nyan jipeugah, "lam lumpo nyan na deuh ulon ngieng bak anggo dikeue ulon. bak anggo nyan meucabeueng lhee. banmantong cabeueng-cabeueng nyan jipeuphon meunon, bagai that bungong-bungong jih keumang, dan boh jih pi laju masak. bak watee nyan ulon teungoh lon mat glaih teupat jieb ie raja, jadi laju ulon cok boh anggo nyan dan ulon praih laju ie jih lam glaih raja, dan ulon peuhidang laju ubak gobnyan." geujaweueb nabi yusuf, "nyoe kheueh makna lumpo gata nyan: lhee boh cabeueng nyan muphom jih lhee uroe. lam lhee uroenyoe raja teuma geupeubeubaih gata, gobnyan geupeuamphon gata dan geubri ubak gata jabatan nyang gata mat yoh masa ilee. dan gata teuma gata peuhidang glaih teupat jieb ie raja keu raja lagee nyang gata peubuet yoh masa ilee. teuma ingat kheueh ubak ulon meunyoee keuadaan gata ka get. tulong gata peusampoe soai ulon nyoe ubak raja, mangat ulon geupeubeubaih nibak lam glab nyoe. sabab, nyang sibeuna jih ulon nyoe jibaplueng nibak nanggroee ureueng ibrani dan disinoe pih, di nanggroee meuse nyoe, hantom na ulon peubuet peue-peue mantong buet nyang jeuhet sampoe ulon jipeutamong lam glab nyoe." oh ka lھےh tukang uroh ruti nyan jiteupeue makna lumpojih, rakan jih sidroe teuknyan galak that, sabab makna lumpo nyan get, dan jihnyan pih jipeugah ubak nabi yusuf, "ulon pih na meulumpo, rasa jih na ulon seunon lھےh boh raga ruti ateueh ulee lon. lam raga nyang paleng ateueh na meubagoe rupa kue peunajoh raja, teuma cicem-cicem laju jiteuka jajak pajoh kue-kue nyan." geujaweueb le nabi yusuf, "nyoe kheueh muphom jih lumpo gata nyan: lھےh boh raga nyan muphom jih lھےh uroe. lam lھےh uroenyoe raja teuma geuyue bakgob keujajak koh takue gata dan laju jigantung manyet gata bak saboh tameh, dan cicem-cicem laju jiteuka jajak pajoh asoe gata." lھےh uroe oh lھےh nyan na kheueh uroe ulang thon raja, gobnyan geupeuna khanuri rayeuk keu banmandum peugawai geuh. gobnyan laju geubri peurintah mangat nyang uroh ie jieb dan nyang uroh ruti teupeuteubiet lam glab dan jiba laju ukeue banmandum peugawee meuligoe. tukang uroh ie jieb raja laju teupugisa ubak buet jih yoh awai. teuma nyang uroh ruti raja teuhukom mate. banmandum nyan teujadi paih lagee nyang ka lھےh geupeugah le nabi yusuf. dan tukang uroh jieb ie raja hana le teuingat ubak nabi yusuf. dan biet-biet that jihnyan ka tuwoe keu gobnyan. oh ka liwat dua thon, raja nanggroee meuse meulumpo, bahwa raja nyan teungoh jidong bak bineh krueng nil. hana jisangka-sangka na tujoh boh leumo nyang teumbon-teumbon dan kulet leumo nyan meukilat-kilat, jiteubiet lam krueng nyan dan laju jiroi naleueng nyang na bak bineh krueng nyan. oh lھےh nyan na teuma tujoh boh teuk leumo nyang laen jiteuka cit keunan; beulatang nyang pijuet-pijuet nyan nyang na tinggai cit kulet ngon balot tuleueng. leumo-leumo nyang pijuet nyan jidong bak bineh leumo nyang teumbon-teumbon, dan nibak bineh krueng nil nyan. oh lھےhnyan

leumo-leumo nyang pijuet laju jipajoh leumo-leumo nyang teumbon. oh ka lھےh nyan raja laju teubeudoh nibak geueh. oh lھےhnyan raja nyan pi teugantuek dan laju teungeut lam teungeut nyan jiteuka lom lumpo. lam lumpo jihnyan laju jingieug tujoh neuk aneuek gandom nyang meuasoe ngon masak-masak meugantueng dan jitimoh bak saboh tangke. oh lھےh nyan timoh teuma tujoh neuk aneuek gandom nyang laen, nyang pijuet-pijuet dan krot ngon tho kreng sabab jipot le angen guro. dan aneuek gandom nyang pijuet nyan laju juet bantujoh neuk aneuek gandom nyang meuasoe bunoe. oh lھےhnyan raja laju jaga bak teungeut dan baro kheueh geusadar bahwa droe geuh nyan bunoe lam tenguat ka meulumpo. beungoh nyan raja deuh jih apoh apah ate geuh hana meuteuntee, ngon sabab nyan laju geupeurintah mangat banmandum tukang sihe dan nyang na ieuleume di nanggroee meuse mangat meugumpoi ubak gobnyan, oh trok keunan laju geucalitra banmandum peue-peue nyang ka geulumpo lam teungeut geuh beuklam ubak awaknyan, teuma hana meusidroe pi lamkawan ureueng nyang meuhase jiboh makna lumpo raja nyan. oh lھےh nyan tukang uroh ie jieb raja laju jipeurab dan jipeugah ubak raja, "nibak uroenyoe ulon haroh lon aku keusalahan ulon. yoh masa ilee po raja neubeungeh ubak tukang uroh ruti dan keu ulon, dan laju kamoe po raja peutamong lam glab, nibak rumoh ulee kawai meuligoe. bak simalam kamoe mandua na meulumpo, dan lumpo kamoe nyan hana saban makna jih. sidroe ureueng muda bansa ibrani na disinan meusajan ngon kamoe. gobnyan jeuet keu ulee kawan peulayan meuligoe di meuligoe nyan. laju kamoe peugah lumpo kamoe bak ureueng nyan, dan laju jipeutrang bak kamoe makna lumpo nyan. banmandum nyang jipeugah makna lumpo kamoe nyan paih that lagee nyang geupeugah, po raja neupeugisa ulon bak jabatan ulon yoh awai, dan neuhukom mate tukang uroh ruti nyan." ban geudeungoe haba nyan raja laju geupeutreurin peurintah geuyuejak cok nabi yusuf didalam glab, dan deungan pantaih that nabi yusuf laju jipeuteubiet lam glab nyan. oh ka lھےh nabi yusuf geumeucuko dan geugantoe peukayan geuh, laju geujak meuhadab ubak raja. geupeugah le raja ubak nabi yusuf, "ulon ka meulumpo, dan hana meusidroe pih nyang hase jipeutrang peue makna lumpo ulon nyan. na nyang peugah ubak ulon bahwa droeneueh jeuet neutafeuse makna lumpo." geujaweueb le nabi yusuf, "bukon, ya po raja, teuma po teu allah nyang bri tafeuse lumpo nyang paih." dan geupeugah kheueh le raja, "ulon meulumpo bahwa ulon teungoh lon dong bak bineh krueng nil. dan laju jiteungoh nibak lam krueng nyan tujoh boh leumo nyang teumbon-teumbon dan kulet meukilat-kilat, dan laju jiroi naleueng nyang na bak bineh krueng nyan. oh lھےh nyan jiteuka teuma tujoh boh leumo nyang laen, pijuet-pijuet tinggai kulet ngon balot tuleueng. gohlom na ulon kalon leumo nyang meunan brok bansaboh nanggroee meuse. leumo-leumo nyang pijuet nyan laju jipajoh habeh banmandum leumo-leumo nyang teumbon bunoe. oh lھےhnyan leumo nyang pijuet nyan

teutab pijuet, oh ltheuehnyan teujaga kheueh ulon nibak teungeut nyan. oh ltheuehnyan ulon teungeut lom dan meulumpo lom, bahwa na deuh ulon kalon tujoh neuk aneuek gandom nyang meuasoe dan masak-masak, jitimoh bak saboh tangke. dan timoh teuma tujoh neuk aneuek gandom nyang pijuet ngon tho krenge sabab jipupot le angen guuron. aneuek gandom nyang pijuet nyan laju jiuuet aneuek gandom nyang meuasoe bunoe. dan ka ltheueh ulon peugah bandua boh lumpo nyan ubak tukang sihe, teuma hana meusidroe pih nyang hase jipeutrang peue makna lumpo ulon nyan." dan laju geupeugah le nabi yusuf ubak raja nyan, "mandua boh lumpo nyan saban makna jih; po teu allah ka geubri tee ubak po raja peue nyang teuma geupeubuet. tujoh boh leumo nyang teumbon-teumbon nyan na kheueh tujoh thon, dan tujoh neuk aneuek gandom nyang meuasoe nyan saban cit tujoh thon; mandua nyan saban makna jih. tujoh boh leumo nyang pijuet, nyang teuka oh ltheueh nyan, meunan cit tujoh neuk gandom nyang pijuet nyang tho krenge sabab jipupot le angen guuron nyan na kheueh masa musem deuk nyang treb jih tujoh thon teuma. lagee toh nyang ka ltheueh ulon peugah ubak po raja, po teu allah ka geupeuleumah ubak po raja peue nyang teuma geupeubuet. singoh teuma teuka tujoh thon masa nyang makmu bansaboh nanggroe meuse nyoe. oh ltheuehnyan teuka tujoh thon masa musem deuk, dan watee nyang peunoh ngon makmu nyan ka jipeutuwoe mandum, sabab watee museum deuk nyan keubit parah lumpah na sampoe bansaboh nanggroe nyoe ka habeh tho. lumpo po raja nyan teuka jih dua goe, nyan sibagoe tanda bahwa hainyan ka geupeuteutab le po teu allah dan bahwa allah teuma geupeubuet deungon sigr. ngon sabab nyan, po raja neupileh sidroe ureueng nyang ceureudek ngon bijaksana dan neubri kuasa ubak ureueng nyan keu jeuet jiatoe nanggroe nyoe. po raja haroh teuma neuangkat peugawee-peugawee nyang laen, dan neubri bak peugaweenyan kuasa keu jikuteb siper limong nibak banmandum wase teupot aneuek gandom lam watee tujoh thon nyang peunoh ngon makmu nyan, laju jitamon di banda-banda dan jijaga teuma. gandom nyan jeuet keu keuneubah sibagoe cadangan oh trok watee musem deuk nyang teuma teuka di nanggroe meuse. deungon lagee nyan rakyat hana mate ngon sabab le deuk." raja dan banmandum peugawee situju reuncana nabi yusuf nyan. dan laju geupeugah le raja ubak awaknyan, "hana mungken tanyoe teume ureueng laen nyang sisuai nibak nabi yusuf, sabab gobnyan geupimpen le roh allah." dan raja laju geupeugah ubak nabi yusuf, "allah ka geubri tee banmandum nyoe ubak gata, dan ka jeulaih bahwa gata leubeh carong dan bijaksana nibak soemantong nyan. gata teuma lon angkat jeuet keu gubunur, dan banmandum rakyat ulon jitaat peue-peue nyang gata peurintah. teuma ulon kheueh mantong nyang leubeh meukuasa nibak gata." oh ltheuehnyan raja laju geusuet nibak jaroe geuh euncien nyang na cab keurajeuen, dan laju geupeusok bak jaroe nabi yusuf sira geupeugah, "deungon nyoe gata ulon angkat jeuet keu gubunur bansaboh nanggroe meuse." oh ltheueh nyan laju

geusok bak nabi yusuf bajee jubah nyang teupeuget nibak ija lineun nyang haloh, dan geupeungui bak takue nabi yusuf saboh rante meuh. dan laju geubri ubak nabi yusuf geuritan keurajeuen nyang keudua keu geuritan gobnyan, dan peungawai keuhormatan raja jijak dikeue geuritan nyan sira jitawok-tawok, "awas! jok rot! jok rot!" meunan kheueh jeuet jih nabi yusuf jiangkat jeuet keu gubunur bansaboh nanggroe meuse. geupeugah le raja ubak nabi yusuf, "ulon kheueh raja – dan ulon peumaklum bahwa meunyoeh hana idhin gata han jeuet meusidroe ureueng pih bansaboh nanggroe meuse jipeubuet sapeue." dan raja laju geubri saboh nan meuse keu nabi yusuf, nan nyan na kheueh, zafnat-paaneah. dan geubri teuma sidroe peurumoh keu nabi yusuf nyang nan jih asnat binti potifera nyang jeuet keu imeum nibak banda heliopolis. nabi yusuf meu-umu lhee ploh thon watee gobnyan jeuet keu gubunur raja nanggroe meuse. dan geubeudoh kheueh nabi yusuf nibak meuligoe raja geujak keulileng bansaboh nanggroe meuse. lam masa tujoh thon nyang peunoh ngon makmu nyan, tanoh di nanggroe meuse nyan jipeuteubiet hase meukuyan-kuyan. gandom nyang jipeuhase le tanoh nyan laju geupeusapat le nabi yusuf dan geukeubah laju di banda-banda bansaboh nanggroe. nibak tieb-tieb banda geucok hase gandom nyang na di blang-blang disinan laju geukeubah lam banda nyang na tho disinan. gandom nyang geupeusapat nyan lumpah that jai sampoe le nabi yusuf hana le geusukat gandom-gandom nyan, sabab jai jih lagee anoe bak bineh laot. sigohlom trok musem deuk nyan teuka, asnat peurumoh nabi yusuf laju geupeulahe dua droe aneuek agam. geupeugah le nabi yusuf, "allah ka geupeujeuet ulon tuwoe ubak banmandum nyang ulon deurit dan ubak wareh kawom ayah ulon." sabab nyan kheueh geuboh nan aneuek geuh nyang tuha "manasye". geupeugah lom le gobnyan, "allah ka geubri aneuek-aneuek ubak ulon bak watee ulon susah," dan laju geuboh nan aneuek nyang keudua "efraim". tujoh thon masa nyang peunoh ngon makmu nyang ka jirasa le bansa meuse nyan pih habeh. dan teuka kheueh masa tujoh thon musem deuk nyang cukob brat, paih lagee nyang ka geupeugah le nabi yusuf. bansigom donya ka habeh deuk, teuma di nanggroe meuse na teukeubah meunajoh. watee rakyat nanggroe meuse jirasa bahwa jihnyan ka deuk, awaknyan laju jijak lakee peunajoh ubak po raja. dan raja laju geuyuejak awaknyan ubak nabi yusuf dan laju jitaat peue-peue mantong nyang geupeurintah le nabi yusuf ubak awaknyan. watee musem deuk nyan meutamah-tamah hebat dan ka trok bansaboh nanggroe, nabi yusuf laju geubuka banmandum beurangand dan laju geupeubloe gandom ubak ureueng meuse. bansaboh donya manusia jijak ubak nabi yusuf keu jijak bloe gandom, sabab musem deuk nyan biet-biet parah bansaboh donya. watee nabi yakub geudeungoe bahwa na gandom di nanggroe meuse, laju geupeugah ubak aneuek-aneuek gobnyan, "pakon gatanyoe teunang-teunang mantong? ka ulon deungoe bahwa na gandom di nanggroe meuse; jak kheueh keudeh dan gata bloe laju gandom nyang na disinan mangat geutanyoe

mandom bek mate deuk." dan jikak kheueh bansiploh droe aduen nabi yusuf nyan u nanggroe meuse keu jikak bloe gandom. teuma nabi yakub hana geubri jak benyamin, adoe droe nabi yusuf, sabab gobnyan geutakot meuteume ceulaka ateueh aneuek geuh nyan. sabab musem deuk ka trok u nanggroe kanaan, teuma aneuek-aneuek nabi yakub ngon ureueng laen laju jikak u nanggroe meuse keujikak bloe gandom. nyang publoe gandom keu ureueng-ureueng nyang teuka bansaboh donya na kheueh nabi yusuf, sibagoe gubunur nanggroe meuse. sabab nyan kheueh aduen-aduen nabi yusuf teuka laju jisujut ukeue gobnyan. watee nabi yusuf geukalon aduen-aduen geuh nyang teuka, gobnyan geuturi keu awaknyan banmandum, teuma gobnyan pura-pura hana geuturi. ngon haba nyang gasa laju geutanyong bak awaknyan, "gatanyoe ureueng pane?" "kamoe ureueng kanaan. kamoe meuteuka keunoe keukamoe jakbloe peunajoh," jaweueb awaknyan. bahpi nabi yusuf geuturi keu aduen-aduen geuhnyan, teuma awaknyan meusidroe hana jituri keu nabi yusuf. dan laju teuingat keuhai lumpo gobnyan keuhai awaknyan. dan laju geupeugah ubak awaknyan, "kah nyoe banmandum mata-mata; kah nyoe kakak keunoe keukah seulidek pat keuleumahan nanggroe kamoe." "bukon, hai amphon," jaweueb awaknyan. "kamoe, namiet-namiet po meujak keunoe hana laen tujuan na kheueh keu kamoe jak bloe peunajoh. kamoe nyoe meusyedara, hai amphon. kamoe nyoe ureueng get-get, bukan mata-mata." laju geujaweueb le nabi yusuf, "sulet! kahnyoe kakak keunoe keukah seulidek pat keuleumahan nanggroe nyoe." jaweueb awaknyan, "kamoe nyoe dua blaih droe meusyedara, hai amphon, kamoe nyoe aneuek nibak sidroe ayah di nanggroe kanaan. sidroe lamkawan kamoe ka meuninggai donya dan adoe kamoe nyang tulot na meusajan ayah kamoe." "biet-biet beutoi lagee ulon peugah," jaweueb nabi yusuf, "kah-kah nyoe mata-mata. ulon keuneuk ujoie kah nyoe banmandum: ulon meusumpah deumi nan raja bahwa kah-kah nyoe hana kah tinggai nanggroe nyoe meunyoie adoe gata nyang tulot nyan hana kahba keunoe. sidroe lamkawan kah nyoe haroh jiwoe jikakcok adoe kah nyan. nyang laen teuteuen disinoe sampoe tutoe haba kah nyoe na bukeuti. meunyoie han, deumi nan raja, kahnyoe banmandum mata-mata musoh!" oh ltheuehnyan awaknyan laju jipeutamong lam glab lhee uroe treb jih. bak uroe nyang keu lhee nabi yusuf laju geupeugah ubak awaknyan, "ulon ureueng nyang teumakot dan taat ubak po teu allah. kahnyoe teuma lon peuseulamat ngon saboh syarat. keu teubukeuti bahwa kah-kahnyoe juoe, sidroe lamkawan kahnyoe teutab teuteun dalam glab; nyang laen jeuet jiwoe sira jiba gandom nyang gata bloe keu keuluwarga gata nyang teungoh meudeurita deuk. oh ka ltheueh nyan kahnyoe haroh kahba adoe kah nyang tulot ubak ulon. nyan kheueh bukeuti jih singoh bahwa tutoe haba kah nyan beutoi, dan kahnyoe hana lon hukom mate." awaknyan situju lagee keuputosan gubunur nyan. dan laju jimariet awaknyan sabe keudroe-droe, "nyan, geutanyoe jinoenyoie jihukom sabab buet tanyoe nyang salah teuhadab adoe tanyoe yoh masa ilee; adoe geutanyoe nyan jilakee tulong

teuma le geutanyoe hana tapako, bahpi takalon adoe tanyoe nyan lumpah that meudeurita. nyang kheueh sabab jih geutanyoe kata rasa deurita nyang lagee nyoe bagoe." jipeugah le ruben, "kon ka ulon peugah bak gatanyoe yoh masa ilee mangat adoe geutanyoe nyan bek tapako-pako. teuma gatanyoe banmandum hana tatem deungoe nyang ulon peugah nyan. dan jinoenyoie adoe geutanyoe nyang mate nyan teubalaih ateueh geutanyoe." nabi yusuf muphom basa awaknyan, teuma awaknyan hana jiteupeue hainyan, sabab awaknyan jimariet ngon nabi yusuf jipeuguna jurubasa. nabi yusuf geutinggai awaknyan disinan, dan laju geujak moe. oh ka jeuet geumeututloe lom teuma, gobnyan laju geuriwang ubak awaknyan, laju geucok simeon, dan laju geuyue ikat simeon nyan dikeue banmandum syedara jihnyan. nabi yusuf laju geupeurintah mangat eumpang-eumpang nyang na jiba le aduen geuhnyan teupasoe laju beupunoh ngon gandom, dan peng awaknyan maseng-maseng jipeutamong lom lam eumpang-eumpang nyan. meunan cit mangat ubak awaknyan jibri peunajoh keubeukai bak rot ueh. banmandum peurintah geuh nyan laju jipeubuet. oh ltheueh nyan le aduen-aduen nabi yusuf laju jipeudieng ateueh rhueng keuleudee jih maseng-maseng ngon eumpang gandom nyang ka awaknyan bloe nyan, laju jikak kheueh awaknyan nibak teumpat nyan. bak teumpat awaknyan mudom, sidroe lamkawan awaknyan laju jipeulah eumpang gandom jih keujibri makheun ubak keuleudee jih. dan laju jiteume peng lam eumpang gandom nyan. "peng ulon jikok pulang," kheun ureueng nyan ubak syedara-syedara jih. "ngieng, na lam eumpang ulon!" ate awaknyan meutamah teumakot, dan deungon rasa teumakot nyang luwabiasa awaknyan laju jiteumanyong sabe keudroe-droe, "peue nyang geupeubuet le allah ateueh geutanyoe?" oh ka trok u kanaan, awaknyan laju jimeucalitra ubak ayah jih peue-peue mantong nyang ka awaknyan rasa. jipeugah le awaknyan, "gubunur nanggroe meuse nyan jimeututloe gasa that ubak kamoe dan jitudoh kamoenyoie mata-mata nanggroe jih. laju kamoe jaweueb, 'kamoenyoie ureueng get-get, bukan mata-mata, kamoenyoie ureueng juoe. kamoe banmandum na dua blaih droe meusyedara, aneuek nibak saboh ayah, dan sidroe ka meuninggai donya, seudangkan nyang tulot na meusajan ayah kamoe di nanggroe kanaan.' laju jipeugah le gubunur nyan, 'ulon keuneuk ujoie kah-kahnyoe peu kheueh kah-kahnyoe biet-biet ureueng juoe: sidroe lamkawan kahnyoe haroh tinggai disinoe; nyang laen jeuet jiwoe sira jipuwoe gandom keu keuluwarga kah nyang teungoh deuk. oh ka ltheueh kah gisa sira kahba adoe kah nyang tulot, baro kheueh lon teupeu bahwa kahnyoe bukan mata-mata, teuma na kheueh ureueng juoe. dan syedara kah nyang ulon teuen nyan ulon jok lom ubak kah dan kah jeuet tinggai di nanggroe nyoe dan beubaih kah meuniaga." "oh ltheuehnyan, bak watee awaknyan jipeusoh banmandum eumpang-eumpang jih, awaknyan laju jiteume dumpet jih maseng-maseng nyang meuasoe peng; ngon nyan awaknyan pi laju jiteuka teumakot, meunan cit ayah awaknyan. laju geupeugah le ayah awaknyan, 'le sabab gatanyoe

ka jeuet keusabab ateuah ulon sampoe gadoh banmandum aneuek-aneuek lon. nabi yusuf ka hana le; simeon ka hana le; dan jinoenyoe gata keuneukcok teuma benyamin. hana wayang deurita ulon nyoe!" laju geupeugah le ruben ubak ayah geuh, "neujok kheueh benyamin nyan ubak ulon, ayah; teuma ulon puwoe lom, meunyoeh hana, ayah jeuet neupoh mate bandua droe aneuek agam ulon." teuma nabi yakub geupeugah, "han jeuet, benyamin hana jeuet gata ba; aduen jih ka meuninggai dan jinoenyoe nyan kheueh jih nyang na tinggai. pat tateupeue jihnyoe meuteume bala nibak rot euh raya. ulon nyoe ka tuha, dan seudeh nyang gata peuteuka ubak ulon nyan jeuet keuakibat ulon nyoe mate." musem deuk di nanggroeh kanaan meutamah-tamah hebat, dan oh ka lheureh keuluwarga nabi yakub ka habeh geupajoh banmandum gandom nyang teupuwoe nibak nanggroeh meuse, geupeugah kheueh le nabi yakub ubak aneuek-aneuek geuh, "gatajak kheueh lom u nanggroeh meuse dan gata bloe kheueh gandom keu geutanyoe." dan yehuda laju jipeugah ubak ayah jih nyan, "gubunur nanggroeh meuse nyan ka geupeuingat ngon haba nyan biet-biet brat kamoenyoe hana jeuet kamoe gisa u nanggroeh meuse meunyoeh adoe kamoe benyamin hana kamoe ba sajan. meunyoeh ayah neubri idhin adoe kamoe nyan jeuet jijak ngon kamoe, baro kamoe tem jak keudeh keu kamoe jakbloeh peunajoh. teuma meunyoeh ayah hana neubri benyamin jijak ngon kamoe, kamoe han kamoetem jak, sabab gubunur nyan ka geupeugah hana jeuet kamoe meuhadab gobnyan meunyoeh adoe kamoe benyamin hana kamoe ba." geupeugah le nabi yakub, "keupeue gata nyoe tapeususah ulon ngon cara gata peugah bawha mantong na adoe gata di kanaan nyoe?" jaweueb awaknyan, "ureueng nyan hana putoh-putoh jitanyong keuhai kamoe dan keuhai keuluwarga tanyoe, jipeugah le gubunur nyan, 'peu kheueh mantong udeb ayah gata? peu kheueh gata mantong na adoe teuh nyan agam?' dan kamoe teupaksa kamoe jaweueb peue-peue nyang jitanyong nyan. pakriban jeuet kamoe sangka bawha le gubunur nyan geuyue jakcok adoe kamoe nyan?" dan laju geupeugah le yehuda ubak ayah jih nabi yakub nyan, "neupeu idhin kheueh hai ayah adoe kamoe nyan jiseutot kamoe, dan ulon nyang meutanggong jaweueb ateuah adoe kamoe nyan. kamoe teuma kamoe jak ngon reujang-reujang mangat hana meusidroeh pih nyang mate deuk lam keuluwarga geutanyoe. ulon kheueh jaminan jih, dan ayah jeuet neuntutot adoe lom nyan ateuah ulon. meunyoeh adoe kamoe nyan hana ulon puwoeh riwang deungon seulamat, ulon tanggong hukoman nyan siumu udeb. meunyoeh tanyoe hana tapreh ka meunoe treb, ka pasti kamoenyoe ka lheureh kamoe jak woe keu nyang keu dua." dan laju geupeugah le nabi yakub, "meunyoeh biet-biet haroh lagee gata peugah nyan, taba kheueh hase nyang paleng get nibak nanggroeh geutanyoe nyoe dan gata pasoe laju lam eumpang-eumpang gata sibagoe bungong jaroe geutanyoe keu gubunur nyan: kismis, meulisan, reumpah-reumpah, boh kreeh dan boh badam. meunan cit gata ba peng dua goe lipat, sabab peng nyang gata teume lam eumpang gata nyan haroh

teujok pulang ubak gobnyan. mungken awaknyan kasilab jipeutamong lam eumpang-eumpang gata. dan gata ba kheueh adoe teuh nyan, dan meunyoeh ka seuleusoe gatawoe kheueh bubagaih keunoe. seumoga allah nyang mahakuasa geupeujeuet ate gubunur nyan geugaseh ubak gata, sampoe gobnyan geutem jokpulang benyamin ngon simeon ubak gata. keuhai ulon nyoe, meunyoeh ulon biet-biet haroh gadoh banmandum aneuek-aneuek lon, ulon ka rila." oh lheurehnyan le syedara-syedara nabi yusuf nyan laju jijak gisa u nanggroeh meuse sira jiba bungong jaroe meunan cit peng dua goe lipat dan adoe jih benyamin. oh ka trok keudeh, awaknyan laju jijak meuhadab ubak nabi yusuf. watee nabi yusuf geukalon benyamin ngon aduen-aduen geuh ka trok jigisa, laju geupeugah ubak peulayan nyang jeuet keu ulee lam rumoh gobnyan, "jakba laju banmandum ureueng nyan u rumoh lon. awaknyan teuma jimakheun meusajan ngon ulon cot uroenyoe, ngon sabab nyan gata sie kheueh saboh beulatang peulara dan gata peusiab kheueh peunajoh kamoe." peulayan nyan laju jipeubuet peue-peue nyang ka geupeurintah le nabi yusuf nyan dan laju jiba syedara-syedara nabi yusuf nyan u rumoh gubunur. watee awaknyan jiba u rumoh nabi yusuf, awaknyan laju teuka teumakot sira jipike, "tanyoe ka jiba keunoe, sabab peng nyang tanyoe teume lam eumpang geutanyoe ilee. awaknyan jidrob geutanyoe lam sikeujab, laju jicok keuleudee tanyoe dan jipeujeuet geutanyoe keu namiet gobnyan." kareuna nyan, bak bineh pintoe rumoh nabi yusuf awaknyan laju jipeugah ubak ulee rumoh tangga, "meuah, teungku, kamoe ka lheureh kamoe jak keunoe keu kamoe jakbloeh peunajoh. watee kamoe woe, oh trok bak saboh teupat kamoe keuneuk mudom, laju kamoe peuhah eumpang gandom kamoe. hana kamoe sangka-sangka banmandum peng ngon bayeue yuem gandom kamoe mantong na lam eumpang ateuah aneuk gandom kamoe. kamoe tan kamoe teupeue soe nyang peutamong peng lam eumpang gandom kamoe nyan. jinoo peng nyan kamoe ba lom ubak teungku. seulaen nibak nyan mantong na kamoe ba peng laen keu kamoe bayeue yuem gandom nyang teuma kamoe bloe lom." peulayan nyan laju jipeugah "bek teumakot. bek picek ate. allah droeneueh, na kheueh allah nyang geupujoe le ayah droeneueh, gobnyan kheueh nyang peutamong peng nyan lam eumpang droeneueh. dan ulon ka lon teurimong yuem gandom droeneueh nyan." oh lheurehnyan laju jiba simeon ubak awaknyan, dan laju ji intat awaknyan u dalam rumoh. ubak awaknyan laju jijok ie ngon rrah gaki, dan eumpeuen keuleudee awaknyan pih jijok cit teuma. oh lheurehnyan awaknyan laju jipeusiab-siab bungong jaroe keu jijok ubak nabi yusuf watee gobnyan geuwoe jak pajoh bu cot uroe, sabab awaknyan ka jibri tee bawha awaknyan teuma jimakheun meusajan-sajan ngon nabi yusuf. watee nabi yusuf ka trok u rumoh, awaknyan laju jijok banmandum bungong jaroe nyan ubak nabi yusuf sira jisujut dikeue gobnyan. nabi yusuf laju geutanyong keuadaan awaknyan, "gatanoye ka lheureh tapeugah ubak ulon keuadaan ureueng syiek gata nyang ka tuha nyan. pakriban

keuadaan gobnyan? peu kheueh lam keuadaan seuhat-seuhat?" jaweueb awaknyan, "nyoepeat ulon hai teungku, ayah kamoe, get-get mantong keuadaan gobnyan." dan laju awaknyan jisujut ubak gobnyan. watee nabi yusuf geungieng benyamin, adoe gobnyan, laju geupeugah lagee nyoe, "nyoe kheueh adoe droeneueh nyang tulot nyan, nyang ka ltheueh gata peugah-peugah ubak ulon? seumoga po teu allah geubri beureukat ubak gata, aneuek ulon." ate nabi yusuf meuto-to sabab rasa rindu dan gaseh gobnyan ubak adoe geuh. gobnyan rab han hase geukuasa droe, le sabab nyan geujak kheueh gobnyan nibak teumpat nyan laju geujak tamong lam kama dan laju geumo. oh ltheuehnyan gobnyan laju geurhah muka geuh dan laju geuteubiet lom teuma, dan deungon geupeuteun ate geuh, laju geuyue peuhidang peunajoh. nabi yusuf geumakheun bak meuja geuh keudroe, dan bandum syedara gobnyan bak meja nyang laen. ureueng-ureueng meuse nyang na nibak teumpat nyan jimakheun cit bak meuja nyang laen, sabab awaknyan meurasana hina meunyoe awaknyan jimakheun meusajan-sajan ngon ureueng ibrani. banmandum syedara nabi yusuf geupeudeuk nibak meuja nyang meuhadab ngon meuja nabi yusuf, meunurot urotan umu awaknyan maseng-maseng, phon nibak nyang tuha trok ubak nyang tulot. watee jikalon le awaknyan cara teuatoe nyan, awaknyan saleng jimeugieng ngon hireuen lagoe na. awaknyan jibri peunajoh nyang na nibak meuja nabi yusuf, dan benyamin geupeutimang limong goe luebeh le nibak aduen-aduen gobnyan nyang laen. laju awaknyan jimakheun ngon jijie ie sipuih-puih jih meusajan ngon nabi yusuf. oh ltheuehnyan nabi yusuf laju geupeurintah ubak ulee rumoh tangga geuh, "jak pasoe kheueh eumpang awaknyan banmandum ngon gandom, bube ek jiba le awaknyan, dan peng awaknyan peutamong lom lam eumpang jih maseng-maseng ateuheh gandom nyan. dan piala pirak ulon nyan gata peutamong lam eumpang adoe awaknyan nyang tulot, meusajan-sajan ngon peng yuem gandom jih nyan." peulayan nyan laju jipeubuet banmandum nyang geupeurintah le nabi yusuf nyan. oh singoh beungoh, banbeungoh that, nabi yusuf laju geumeuceur ngon aduen-aduen geuh, dan awaknyan pi laju jiwoe ngon keuleudee jih maseng-maseng. awaknyan gohlom jih nibak banda nyan, watee nabi yusuf geupeugah ubak peulayan rumoh gobnyan, "jak peulet bubagaih awaknyan. meunyoe ka meurumpok, peugah laju bak awaknyan, 'pakon gata balaih buet nyang get ngon buet nyang jeuhet? pakon gata cua piala pirak po ulon? piala nyan geupeuguna sibagoe teumpat jieb ie dan sibagoe alat nujum. gata ka tapeubuet buet nyang jeuhet nyang paleng rayeuk!' " watee peulayan nyan sampoe ubak syedara-syedara nabi yusuf, laju jipeugah peue nyang ka geupeurintah le nabi yusuf nyan. jaweueb awaknyan ubak peulayan nyan, "peue nyang droeneueh meukeusut? kamoe jeuet meusumpang bahwa kamoe hana kamoe peubuet nyang lagee nyan! droeneueh keudroe neuteupeue bahwa peng nyang kamoe teume lam eumpang-eumpang kamoe ateuheh gandom nyan, ka kamoe jok pulang ubak droeneueh. jadi, hana mungkin kamoe cua pirak atawa meuh

lam rumoh gubunur! deungon kamoe peugah hai teungku, meunyoe na meuteume lamkawan kamoe nyoe, bah kheueh ureueng nyan teuhukom mate, dan kamoe jeuet keu namiet droeneueh." peulayan nyan jipeugah, "meunyoe meunan bah kheueh; teuma jihnyan, baksoe mantong piala nyan meuteume, jihnyan kheueh jeuet keu namiet ulon; nyang laen jeuet jijak." dan deungon bagaih that awaknyan maseng-maseng laju jipeutreu eumpang-eumpang gandom jih. peulayan nabi yusuf nyan laju jipareksa banmandum eumpang-eumpang nyan deungon teuliti, phon eumpang nyang tuha sampoe ubak eumpang nyang tulot, dan pialanyan laju meuteume lam eumpang benyamin. aduen-aduen benyamin nyan lumpah that seudeh, sampoe peukayan nyang na jingui nyan laju jipriek-priek. awaknyan laju jipeudieng keuleudee droejih dan jigisa laju u banda. watee yehuda dan syedara-syedara geuhnyan katrok u rumoh nabi yusuf, nabi yusuf mantong na disinan, dan awaknyan laju jisujut dikeue nabi yusuf nyan. dan geupeugah kheueh le nabi yusuf ubak awaknyan, "peue nyang ka gata peubuet nyan? peu kheueh hana gata teupeu bahwa ureueng nyang lagee lonnyoe hase lon ngieng ureueng nyang jipeubuet jeuhet ngon ieuleume gaeb?" "peue nyang jeuet kamoe kheun, teungku?" jaweueb yehuda. "pakriban kamoe jeuet kamoe bantah atawa kamoe peubeuna droe kamoe nyoe? po teu allah ka geupeudeuh buet kamoe nyang salah, jinoenyoe bah kheueh kamoe banmandum jeuet keu namiet teungku, kon mantong jihnyan nibak soe piala nyan meuteume." seutot nabi yusuf, "han jeuet! ulon hankutem pubeuet lagee nyan bagoe! teuma ureueng nyan nibak soe pialanyan meuteume, jihnyan kheueh nyang jeuet keu namiet lom. nyang laen jeuet jiwoe ngon beubaih ubak ureueng syiek droeneueh." yehuda geumaju geupeurab ubak nabi yusuf dan laju geupeugah, "meuah, teungku po, idhin kheueh ulon meututoe ngon teungku po. bek neubeungeh ubak ulon; teungku po lagee raja nanggroe meuse keudroe. teungku po ka neutanyong ubak kamoe nyoe 'peu kheueh droeneueh mantong na ureueng syiek atawa syedara-syedara nyang laen?' kamoe jaweueb, 'ayah kamoe ka tuha dan adoe kamoe lahe bak watee ayah kamoe ka tuha that. aduen saboh na nibak adoe kamoe nyan ka meuninggai donya, teuma jinoenyoe jihnyan keudroe kheueh nyang mantong udeb nibak awaknyan bandua, dan ayah lumpah that geugaseh ubak jihnyoe.' teungku po neuyue kamoe mangat jeuet kamoe ba jihnyan keunoe, mangat teungku po jeuet neukalon jihnyan, laju kamoe jaweueb bahwa aneuek nyan hana jeuet meuceur nibak ayah jih; meunyoe jihnyoe meuceur nibak ayah jih, ayah kamoe teuma meuninggai donya. oh ltheuehnyan teungku po neupeugah, 'gata hana jeuet meuhadab le ngon ulon meunyoe adoe gatanyan hana gata ba sajan.' bak watee kamoe woe ubak ayah kamoe, laju kamoe peutrok ubak gobnyan peue nyang ka teungku po peugah nyan. oh ltheuehnyan ayah kamoe geuyue lom ubak kamoe mangat kamoejak lom keunoe keukamoe jak bloe peunajoh. laju kamoe jaweueb, 'kamoe hana jeuet le kamoe jak keudeh, sabab kamoe hana jeuet meuhadab gubunur meunyoe adoe

kamoe nyang tulot hana jijkaj sajan. baro kheueh jeuet keumoejak keudeh meunyoie adoe kamoe nyan jeuet kamoe ba sajan.' oh ltheuehnyan ayah kamoe geukheun, 'gatanyoe tateupeue bahwa rahel, peurumoh ulon teuma na dua droe aneuek. nyang tuha ka jitinggai ulon. jihnyan pasti ka jiteugom le beulatang juah, sabab sampoe an jinoe jihnyan hana ulon kalon le. meunyoie gata tacok aneuek nyang tulot nyoe nibak ulon, dan keunong sapeue-sapeue ateuah jihnyoe, seudeh nyang gata peuteuka ateuah ulon nyoe jeuet keuakibat ulon nyoe meuninggai donya, sabab ulon nyoe ka tuha.' " sababnyan kheueh, teungku po," kheun yehuda ubak nabi yusuf, "meunyoie kamoe meuwoe ubak ayah kamoe ngon hana kamoe ba sajan adoe kamoe nyan, ka pasti ayah kamoe meuninggai donya. nyawong gobnyan teugantueng nibak aneuek nyan, dan gobnyan ka tuha that dan seudeh nyang kamoe peuteuka nyan jeuet keusabab gobnyan meuninggai donya. lom teuma, ulon ka meujanji ubak ayah lon ulon kheueh nyang jeuet keujaminan keuhai adoe ulon nyan. ulon kheun ubak gobnyan bahwa meunyoie ulon hana lon puwoe aneuek nyan ubak gobnyan, ulon kheueh nyang tanggong hukoman siumu udeb. ngon lageenyan, ulon meuharab that, teungku po, idhin kheueh ulon nyoe tinggai disinoe jeuet keunamiet teungku po sibagoe geunantoe adoe kamoe nyoe; bah kheueh jihnyoe jiwoe meusajan-sajan ngon aduen-aduen jih. pakriban ulon hase lon woe ubak ayah kamoe meunyoie aneuek nyan hana jiwoe meusajan? ulon hana ek lon teun teuma watee lon ngieng bala nyang rhot ateuah ayah kamoe nyan." nabi yusuf ka hana ek geupeuteun peurasaan droe geuh dikeue peugawee-peugawee gobnyan. sabab nyan laju geuyue ubak peugawee-peugawee geuhnyan mangat jitinggai kama teupat geuhnyan deungon nyan mangat jeuet gobnyan geupeugah ubak syedara-syedara geuh soe gobnyan nyang sibeuna jih. oh habeh banmandum peugawee gobnyan jitinggai kama teupat geuhnyan, laju geumo nabi yusuf sikeubiet-keubiet jih, sampoe ureueng-ureueng meuse nyang na diluwa jideungoe su gobnyan mo, dan trok kheueh haba nyan ubak meuligoe raja. nabi yusuf laju geupeugah ubak banmandum syedara geuh nyan, "ulon nyoe nabi yusuf. peu kheueh ayah mantong udeb?" ban jideungoe hainyan banmandum syedara nabi yusuf nyan teumakot lumpah na seuhingga peuie nyang geutanyong le nabi yusuf nyan hana hase jijaweueb. laju geupeugah le nabi yusuf ubak awaknyan, "jak kheueh keunoe." awaknyan laju jipeurab, dan gobnyan geupeugah lom, "ulon nyoe nabi yusuf, nyang ka gata publoe u nanggroie meuse. bek teumakot atawa meunyeusai peuie nyang droeneueh peubuet sabab droeneueh ka neupeubloe ulon. nyang sibeuna jih allah keudroe nyang ba ulon keunoe leubeh awai nibak droeneueh keu lon jak peuseulamat dum na rakyat ba. jinoenyoie baro thon nyang keudua musem deuknyoe, dan limong thon teuk treb jih ureueng hana jimeu-ue atawa jipot wase peunula. po teu allah ka geuba ulon leubeh awai nibak droeneueh banmandum keujeuet lon peuseulamat droeneueh nyoe deungon cara nyang hireuen that nyoe, dan keuteujamin beuseulamat

droeneueh dan keuturonan droeneueh. jadi, nyang seubeuna jih bukan sabab le droeneueh ulonnyoe na disinoe, teuma ngon sabab po teu allah. gobnyan ka geupeujeuet ulon jeuet keupeugawee manyang nibak raja meuse nyoe. ubak ulon jibri kuasa keu lon uroh banmandum rumoh tangga jih dan bansiluroh nanggroie meuse. jinoenyoie, bubagaih kheueh droeneueh woe ubak ayah dan droeneueh peugah nabi yusuf, aneuek gobnyan, geupeugah lagee nyoe, 'po teu allah ka geupeujeuet ulon nyang mat kuasa ateuah bansaboh nanggroie meuse; neujak kheueh bubagaih keudeh. ayah jeuet geutinggai didaerah gosyen, to ngon ulon – ayah, ngon aneuek cucoe, bubiri, kameng, leumo dan banmandum atra ayah. meunyoie ayah kana di gosyen, ulon hase lon useuha ayah. musem deuk mantong na limong thon teuk dan teuma lon useuha mangat ayah, keuluwarga dan beulatang peulara ayah hana kureueng sapeue.' " geupeugah lom le nabi yusuf, "jinoenyoie droeneueh ngieng keudroe, meunan cit keu kah beunjamin, bahwa ulon nyoe biet-biet nabi yusuf. peugah kheueh ubak ayah geutanyoe padub na rayeuk kuasa ulon di nanggroie nyoe, di nanggroie meuse, dan calitra kheueh ubak gobnyan peupe-pue mantong nyang ka droeneueh kalon. dan bubagaih kheueh droeneueh ba gobnyan keunoe." oh ltheueh geukheun nyan laju geuwa benjamin, adoe geuhnyan, dan laju geumo; meunan cit deungon benjamin laju jimo sira jiwa aduen jih nabi yusuf. oh ltheuehnyan, deungon mantong geumo, nabi yusuf laju geuwa banmandum syedara geuh sira geucum awaknyan sidroe-droe. oh ltheuehnyan laju geupeuphon mariet-mariet ngon awaknyan. watee trok haba nyan ubak meuligoe raja bahwa syedara-syedara nabi yusuf ka trok jiteuka, raja dan peugawee-peugawee gobnyan galak lumpah na. dan geupeugah le raja ubak nabi yusuf, "neuyue kheueh ubak syedara droeneueh nyan jipeudieng keuleudee jih ngon gandom dan yue puwoe kheueh u kanaan keu jijaktueng ayah dan keuluwarga awaknyan laju minah keunoe. ulon teuma lon bri ubak awaknyan tanoh nyang paleng get di nanggroie meuse nyoe, dan awaknyan teuma jeuet geu-udeb ngon hase nyang cukob nibak hase tanoh nyan. neuyue teuma ubak awaknyan jiba nibak nanggroie nyoe meupadub boh geuritan keu peurumoh ngon aneuek-aneuek awaknyan nyang mantong ubit, dan keu teujaktueng ayah awaknyan. awaknyan hana peureulee geupike barang-barang teupaksa awaknyan tinggai, sabab nyang paleng get bansaboh nanggroie meuse nyoe teuma jeuet keu milek awaknyan." aneuek-aneuek nabi yakub laju jipeubuet peupe-pue nyang geupeurintah le raja nyan. nabi yusuf laju geubri ubak awaknyan na meupadubboh geuritan, sisuai lagee nyang geupeurintah le raja, meunan cit deungon beukai nibak rot euh raya. dan meunan cit geubri ubak awaknyan maseng-maseng sigoe salen peukayan baro, meunyoie keu benjamin geubri lhee reuth peng pirak dan limong salen peukayan baro. meunan cit geukirem keu ayah geuh siploh boh keuleudee nyang peunoh teupeudieng ngon barang-barang nyang paleng get nibak nanggroie meuse, dan siploh boh keuleudee teuk teupeudieng teuma ngon boh

gandom, ruti dan peunajoh nyang laen keu teupajoh watee teugisa u meuse. oh ltheuehnyan baro kheueh geu intat syedara-syedara geuhnyan, sira geupeugah ubak awaknyan, "bek meudakwa bak rot euh." awaknyan laju jitinggai nanggroe meuse dan jiwoe laju u nanggroe kanaan, ubak ayah gobnyan nabi yakub. "nabi yusuf mantong udeb!" kheun awaknyan ubak gobnyan. "gobnyan geumat kuasa bansaboh nanggroe meuse!" ban geudeungoe haba nyan nabi yakub teumanueng-manueng, dan gobnyan hana gepateh peue nyang ka jipeusampoe le aneuek-aneuek geuhnyan. teuma oh ka ltheueh jicalitra banmandum peue-peue nyang ka geupeugah le nabi yusuf ubak ayah geuh nyan, dan watee geukalon geuritan nyang geukirem le nabi yusuf keu teujaktueng gobnyan dan teuba gobnyan u nanggroe meuse, baro kheueh sada gobnyan nibak teumanueng nyan. "aneuek ulon nabi yusuf mantong udeb!" kheun gobnyan. "dan nyan kheueh nyang ulon lakee! ulon haroh lonjak dan lon teumeungieng jihnyan sigohlom ulon mate." nabi yakub laju geupeukeumah banmandum atra milek gobnyan dan laju geubeurangkat. oh trok u bersyeba laju geupeuseumah keureubeuen ubak po teu allah nyang geupujoe le nabi ishaq ayah gobnyan. lam keumalon gobnyan nyang deuh teukalon bak simalam, po teu allah meufureuman ubak gobnyan, "yakub, yakub!" "nyoeat lon, tuhan," jaweub gobnyan. "ulon nyoe allah, allah nyang jipujoe le ayah gata," kheun gobnyan. "bek teumakot keu gatajak u nanggroe meuse. ulon teuma lon peujeuet keuturonan gata bansa nyang rayeuk di nanggroe nyan. ulon teuma lon peungon gata u nanggroe meuse dan ulon ba keuturonan gata jigisa lom u nanggroe nyoe. nabi yusuf teuma na bak bineh gata watee ajai gata ka sampoe." oh ltheuehnyan geubeurangkat kheueh laju nabi yakub geutinggai bersyeba. aneuek-aneuek gobnyan laju jipeuk ayah jih dan peurumoh ngon aneuek jih atueh geuritan nyang geukirem le raja meuse. meunan cit awaknyan laju jiba beulatang peulara dan hareuta nyang laen nyang na awaknyan teume di nanggroe kanaan, dan jijak kheueh laju u nanggroe meuse. nabi yakub geuba banmandum keuturonan gobnyan, na kheueh banmandum aneuek cucoe gobnyan nyang agam dan nyang inong. anggota-anggota keuluwarga nabi yakub nyang geuba sajan u nanggroe meuse na kheueh: ruben, aneuek tuha; aneuek-aneuek gobnyan: henokh, palu, hezron dan karmi. simeon; aneuek-aneuek gobnyan na kheueh: yemuel, yamin, ohad, yakhin, zohar dan saul, aneuek nibak peurumoh gobnyan sidroe ureueng inong kanaan. lewi; aneuek-aneuek geuh: gerson, kehat dan merari. yehuda; aneuek-aneuek gobnyan na kheueh: syela, peres dan zerah, seudangan aneuek yehuda nyang laen na kheueh: er dan onan nyang meuninggai di nanggroe kanaan. aneuek-aneuek peres: hezron dan hamul. isakhar; aneuek-aneuek gobnyan na kheueh: tola, pua, ayub dan simron. zebulon; aneuek-aneuek gobnyan na kheueh: sered, elon dan yahleel. awaknyan banmandum na kheueh aneuek-aneuek nyang geupeulahe le lea keu nabi yakub di mesopotamia, seulaen nibak nyan na teuma aneuek geuh nyang inong nyang nan jih dina. jadi banmandum keuturonan nabi yakub

nibak peurumoh gobnyan lea jeumeulah jih lthee ploh lthee droe. gad; aneuek-aneuek gobnyan na kheueh: zifyon, hagi, syuni, ezbon, eri, arodi dan areli. asyer; aneuek-aneuek gobnyan na kheueh: yimna, yiswa, yiswi dan beria ngon serah, syedara awaknyan nyang inong. aneuek-aneuek beria na kheueh heber dan malkiel. ban nam blaih droe awaknyan na kheueh keuturonan nabi yakub nibak zilpa, na kheueh namiet inong nyang geubri le laban keu lea, aneuek inong gobnyan. rahel peurumoh nabi yakub na geumeu aneuek dua droe, awaknyan na kheueh nabi yusuf dan benyamin. di nanggroe meuse nabi yusuf na geumeu aneuek dua droe, aneuek-aneuek geuh nyan na kheueh manasya dan efraim nyang geupeulahe le peurumoh geuh asnat, binti potifera, nyang jeuet keu imeum di heliopolis. benyamin; aneuek-aneuek gobnyan na kheueh: bela, bekher, asybel, gera, naaman, ehi, ros, mumim, hupim dan ared. ban peuet blaih droe nyan na kheueh keuturonan nabi yakub nibak peurumoh gobnyan rahel. oh ltheueh nyan dan; aneuek gobnyan husim. naftali; aneuek-aneuek gobnyan na kheueh: yahzeel, guni, yezer dan syilem. bantujoh droe nyan na kheueh keuturonan nabi yakub nibak bilha, namiet inong nyang geubri le laban ubak rahel aneuek gobnyan. keuturonan nabi yakub nyang jak u nanggroe meuse jeumeulah jih banmandum na nam ploh nam droe, hana jitamong lam itongan nyan meulintee-meulintee gobnyan. aneuek-aneuek nabi yusuf nyang lahe di nanggroe meuse na dua droe, ngon nyan keuluwarga nabi yakub nyang trok u meuse banmandum na tujoh ploh droe. nabi yakub geuyue yehuda mangat geujak leubeh awai nibak gobnyan mangat jeuet jijak hoi nabi yusuf mangat jeuet meurumpok ngon ayah geuhnyan di gosyen. watee awaknyan trok u gosyen, nabi yusuf geu-ek geuritan droegeuh keu geujak meurumpok ngon ureueng syiek geuh nibak teupat nyan. watee awaknyan ka meurumpok, nabi yusuf laju geuwa ayah geuh dan treb lumpah na. geukheun le nabi yakub ubak nabi yusuf, "jinoenyoe ulon ka rila mate, sabab ka ltheueh lon ngieng gata dan lon teupeu bahwa gata mantong udeb." laju geupeugah le nabi yusuf ubak mandum syedara geuh dan meunan cit ubak kawom gobnyan nyang laen, "ulon haroh lon jak britee hainyoe ubak raja bahwa syedara-syedara lon dan banmandum wareh kawom lon nyang na tinggai di kanaan katrok geuteuka, ulon jak peugah bak geuhnyan bahwa droeneueh na kheueh tukang-tukang meurabe bubiri ngon leumo, dan ka neuba beulatang peulara gata dan banmandum hareuta gata. meunyoe raja geutawok gata dan geutanyong buet gata, peugah kheueh ubak gobnyan bahwa gatanoye na kheueh ureueng geulara beulatang phon yoh ubitkon, saban lagee indatu gata. deungon lageenyan gobnyan geuyue tinggai gata nibak daerah gosyen." nabi yusuf geupeugah meunan sabab ureueng meuse meurasu hina keujimeurakan ngon tukang-tukang meurabe. oh ltheuehnyan nabi yusuf laju geuba limong droe syedara gobnyan keu geujak meuhadab raja. oh trok bak raja laju geupeugah, "ayah dan syedara-syedara ulon ka trok keunoe nibak nanggroe kanaan meunan cit deungon kawan

kameng dan bubiri gobnyan, leumo dan banmandum atra milek gobnyan. jinoenyoe awaknyan na di daerah gosyen." dan oh lheureh nyan syedara-syedara gobnyan nyang geuba meusajan ngon gobnyan nyang limong droe nyan laju geupeuturi ubak raja. raja laju geutanyong ubak awaknyan, "peue buet gatanoyoe?" jijawueub le awaknyan, "kamoenyoe tukang meurabe lagee indatu kamoe. kamoenyoe meuteuka keunoe keuneuk tinggai di nanggroe nyoe, sabab di tanoh kanaan teungoh teuka museum deuk nyang paleng brat, sampoe ka hana le naleueng keu eumpeuen kameng ngon bubiri kamoe. idhin kheueh keukamoe beujeuet kamoe tinggai di daerah gosyen." dan geupeugah kheueh le raja ubak nabi yusuf, "jinoenyoe ayah ngon syedara-syedara droeneuh kana disinoe. anggab kheueh nanggroe meuse nyoe sibagoe nanggroe droeneuh keudroe. bah kheueh awaknyan tinggai teutab di daerah gosyen, daerah nyang paleng get lam nanggroe nyoe. dan droeneuh bri kheueh tugaih ubak ureueng nyang carong mangat jiuroh beulatang peulara lon." meunan cit nabi yusuf geupeuturi ayah gobnyan ubak raja. nabi yakub laju geubri beureukat ubak raja nyan, dan raja laju geutanyong ubak gobnyan, "padub na umu bapak saatnyoe?" geujawueub nabi yakub, "ulon ka udeb lam donya nyoe sireutoh lhee ploh thon sibagoe peungeumbara. udeb ulon nyan peunoh ngon nyang susah dan paneuk meunyo teubandeng ngon umu indatu ulon sibagoe peungeumbara." oh lheurehnyan nabi yakub laju geulakee droe dan geubri beureukat watee geulakee idhin keuneuk jak nyan. nabi yusuf laju geutulong ayah dan syedara-syedara gobnyan tinggai teutab di nanggroe meuse. laju geubri ubak awaknyan tanoh sibagoe hak milek bak bagian nyang paleng get nyang na lam nanggroe nyan, to ngon banda rameses, sisuai lagee nyang geupeurintah le raja. dan nabi yusuf laju geubri beukai peunajoh nyang seb keu ayah gobnyan, syedara-syedara gobnyan, sampoe ubak nyang paleng muda. museum deuk nyang teuka nyan meutamah hebat, akheji dipat mantong ka hana le peunajoh. rakyat nanggroe meuse dan rakyat nanggroe kanaan ka habeh leumoh dan hana meudaya sabab ka keunong deuk. tieb-tieb watee awaknyan jijak bloe gandom, nabi yusuf laju geupeusapat peng ngon bloe gandom nyan, dan peng nyang ka geupeusapat nyan geukeubah laju bak meuligoe raja. oh ka habeh peng lam nanggroe meuse dan kanaan, ureueng-ureueng meuse laju jijak ubak nabi yusuf sira jipeugah lagee nyoe, "neubri kheueh keu kamoe peunajoh! bek neupeubiyeu kamoenyoe mate. peng kamoe ka habeh." geujawueub le nabi yusuf, "meunyo peng gata ka habeh, neubri kheueh beulatang peulara gata; mangat lon bri peunajoh keu gata." dan awaknyan pih laju jibri beulatang peulara nyan ubak nabi yusuf, dan gobnyan laju geubri peunajoh ubak ureueng nyang ka jibri beulatang peulara nyan sibagoe geunantoe guda, bubiri, kameng, leumo dan keuleudee awaknyan. lam thon nyan nabi yusuf geubri peunajoh ubak awaknyan dan awaknyan jibayeue ngon peulara jih. bak thon seulanjut jih awaknyan jijak lom ubak gobnyan sira jipeugah lagee nyoe, "kamoe trok trang ubak po bahwa peng kamoe ka habeh dan beulatang

peulara kamoe pih ka jeuet keu atra milek po. dan bak kamoe ka hana sapeue na le nyang jeuet kamoe bri keu po, seulaen droe kamoe keudroe dan tanoh kamoe. bek neupeubiyeu kamoe nyoe mate! dan bek neupeubiyeu lampoh-lampoh kamoe to. neubloe kheueh kamoe dan neubloe kheueh blang kamoe dan gandom keu yuem jih. kamoe dan tanoh kamoe teuma jeuet keu hakmilek raja. neubri kheueh keu kamoe gandom keukamoe peupanyang udeb kamoe dan bijeh keu teutabu lam ladang kamoe!" dan nabi yusuf laju geubloe banmandum tanoh nyang na di nanggroe meuse keuraja. tieb-tieb ureueng meuse teupaksa jipeubloe tanoh jih, sabab museum deuk nyang teuka nyan lumpah that brat; dan banmandum tanoh nyang na di nanggroe meuse ka jeuet keu hakmilek raja. banmandum rakyat meuse jipeujeuet keu namiet le nabi yusuf. tanoh nyang hana geubloe sagai na kheueh tanoh imeum-imeum. awaknyan hana peureulee jipeubloe tanoh jih sabab geubri tunjangan nyang teutab le raja keu peubiaya udeb jih. nabi yusuf geupeugah ubak rakyat nyan, "ngieng kheueh, gata dan tanoh gata ka ulon bloe keu raja. nyoe kheueh bijeh nyang jeuet gata tabu lam ladang gata. bak watee gata pot boh gandom nyan singoh, gata haroh tabri siperlimong hase jih nyan ubak raja. nyang leubeh nyan jeuet gata peuguna keu bijeh dan keugata pajoh dan keu keuluwarga gata." jawueub awaknyan, "po ka neupeuseulamat kamoe dan kamoe lakee teurimong gaseh nyang paleng raya. kamoe ka rela jeuet keu namiet raja." oh lheurehnyan le nabi yusuf laju geupeujeuet keu undang-undang hai nyang lagee nyan di nanggroe meuse, bahwa siperlimong nibak hase tani jeuet keu hakmilek raja. sampoe uroenyoe undang-undang nyan mantong jipeujak. dan tanoh imeum-imeum kheueh nyang hana jeuet keu hakmilek raja. meunan kheueh ureueng-ureueng israel tinggai teutab di nanggroe meuse, di daerah gosyen. awaknyan ka jeuet keukaya dan meu aneuk cucoe nyang le nibak teumpat nyan. nabi yakub mantong na udeb tujuh blaih thon di nanggroe meuse sampoe umu gobnyan trok sireutoh peuet ploh tujuh thon. oh trok bak watee gobnyan keuneuk meuninggai donya, laju geuhoi nabi yusuf, aneuk geuh nyan, dan laju geupeugah ubak gobnyan, "gata peudeuk kheueh jaro gata bak lak pha ulon dan gata meusumpah kheueh laju bahwa gata hana tapeukubu ulon lam nanggroe meuse nyoe. ulon kutem jipeukubu nibak teumpat bubena indatu lon; gata ba kheueh manyet ulon nibak nanggroe nyoe dan gata kubu kheueh nibak lampoh jrat awaknyan." geujawueub le nabi yusuf, "ulon teuma lon peubuet peue nyang ayah peugah nyan." geupeugah le nabi yakub, "meusumpah kheueh bahwa gata tapeubuet lagee nyang ulon lakee nyan." nabi yusuf laju geumeusumpah, dan nabi yakub laju geu lakee syuko nibak ateuhe teumpat eh gobnyan. na meupadub treb teuma oh lheurehnyan trok haba ubak nabi yusuf bahwa ayah gobnyan nabi yakub brat that saket. ban geudeungoe haba nyan geujak kheueh laju ngon mandua aneuk geuh manasye dan efraim ubak ayah gobnyan nabi yakub. watee geudeungoe le nabi yakub aneuk gobnyan nabi yusuf ka trok geuteuka, laju geupaksadroe

geugumpoi bubena teunaga geuh, dan laju geudeuk bak teupat eh. geupeugah le nabi yakub ubak aneuek gobnyan nabi yusuf, "po teu allah nyang mahakusa ka geupeuleumah droe gobnyan ubak ulon di lus, nibak tanoh kanaan, dan ka geubri beureukat ubak ulon." gobnyan meufeuureuman ubak ulon, "ulon teuma lon bri ubak gata aneuek cucoe nyang le, mangat keuturonan gata jipeujeuet bansa nyang le; ulon teuma lon bri nanggroe nyoe ubak keuturonan gata sibagoe atra milek awaknyan keusiuman masa." geupeugah lom le nabi yakub, "hei yusuf, mandua droe aneuek gata nyan, manasye ngon efraim nyang lahe di nanggroe meuse nyoe sigihlom ulon trok keunoe, ulon anggab aneuek ulon, saban lagee ruben dan simeon. meunyoee gata na meuteume aneuek nyang laen, awaknyan hana ulon anggab sibagoe aneuek lon teuma jihnyan teutab aneuek gata; waresan keu awaknyan jiteurimong nibak efraim dan manasye. ulon peubuet nyan na kheueh keu ma gata rahel. watee ulon woe lom nibak mesopotamia, ma gata meuninggai di tanoh kanaan, hana padubna jioh nibak efrata, dan ate ulon hanco lumphah na. laju ulon kubu ma gata nyan disinan, bak bineh rot jak u efrata." (jinoenyoee efrata nyan meugantoe nan ngon betlehem.) watee nabi yakub geungieng ateuhe aneuek-aneuek nabi yusuf nyan, laju geutanyong, "soe aneuek miet nyoe?" geujawueub le nabi yusuf, "nyoe kheueh aneuek-aneuek ulon nyang ka geubri le po teu allah keu ulon di nanggroe meuse nyoe." laju geupeugah le nabi yakub, "peurab kheueh awaknyan ubak ulon mangat ulon bri beureukat." nabi yakub hana hase geukeumalon ngon trang sabab gobnyan ka tuha dan mata gobnyan ka sapu. nabi yusuf laju geupeurab mandua aneuek geuhnyan ubak nabi yakub, dan gobnyan laju geuwa sira geucom awaknyan. dan geupeugah kheueh le nabi yakub ubak nabi yusuf, "sagai-sagai hana lon sangka ulon hase meurmupok lom ngon gata, teuma jinoenyoee po teu allah ka geubri idhin ubak ulon keu jeuet ulon ngieng aneuek-aneuek gata." oh ltheuehnyan nabi yusuf laju geucok aneuek-aneuek geuhnyan lam pangkee nabi yakub, dan oh ltheuehnyan gobnyan keudroe laju geusujut ukeu ayah gobnyan. oh ltheueh nyan nabi yusuf laju geupeuduek mandua aneuek geuhnyan bak bineh nabi yakub, efraim nyang tulot nyan blaih wie dan manasye nyang tuha nyan blaih uneuen nabi yakub. teuma nabi yakub laju geupeusilang jaroe gobnyan geupeuduek jaroe uneuen geuh ateuhe ulee efraim dan jaroe wie geuh ateuhe ulee manasye. oh ltheuehnyan laju geubri beureukat ubak nabi yusuf sira geupeugah lagee nyoe, "allah, gobnyan kheueh tuhan, nyang geupujoe le nabi ibrahim ngon nabi ishaq, gobnyan kheueh nyang pimpin ulon sampoe saat nyoe; gobnyan kheueh malaikat nyang ka geupeulheueh ulon nibak mandum bahaya. seumoga allah nyan geubri beureukat ubak aneuek-aneuek nyoe. seumoga nan ulon teutab udeb nan nabi ibrahim dan nan nabi ishaq, ngon sabab aneuek-aneuek nyoe! seumoga awaknyan meu aneuek cucoe nyang le, dan keuturonan jih jai that ateuhe rhung bumoe." nabi yusuf hana galak watee geungieng jaroe ayah gobnyan geukeubah ateuhe ulee efraim; laju geumat jaroe ayah geuhnyan

keugeupinah nibak ulee efraim u ateuhe ulee manasye. laju geupeugah ubak ayah gobnyan, "bek lagee nyan ayah. nyoe kheueh aneuek nyang tuha; neukeubah kheueh jaroe uneuen ayah ateuhe ulee jih." teuma ayah gobnyan geutulak, kheun gobnyan, "ulon kuteupeue, hei aneuek lon, ulon kuteupeue. manasye teuma rayeuk kuasa jih dan keuturonan jih teuma jeuet keu bansa nyang rayeuk. teuma adoe jihnyoe leubeh rayeuk keukuasaan jih nyan nibak aduen jih nyoe, dan keuturonan adoe jihnyoe teuma jeuet keu bansa-bansa nyang rayeuk." laju geubri beureukat lom aneuek-aneuek nyan nibak uroenyang sira geukheun lagee nyoe, "ureueng israel teuma jiteuh nan gata watee awaknyan jibri beureukat keu gob. awaknyan teuma jipeugah, 'seumoga po teu allah geupeujeuet gata lagee efraim dan manasye.' " deungon nyan, nabi yakub ka geupeuawai efraim nibak manasye. dan geupeugah kheueh le nabi yakub ubak nabi yusuf, "lagee nyang gata kalon keudroe, ajai ulon ka to that, teuma po teu allah geutulong gata dan geupeuweo gata ubak tanoh indatu gata. ubak gata kheueh, dan bukan ubak syedara-syedara gata, ulon jok sikhem, daerah subo nyan nyang ka lon reubot nibak ureueng amori deungon peudeung dan panah ulon." oh ltheuehnyan nabi yakub laju geutawok banmandum aneuek-aneuek geuh watee awaknyan ka meusapat keunan laju geupeugah lagee nyoe, "meusapat kheueh gata mandum disinoe, bak bineh ulon. jinoe ulon peugah ubak gata peue nyang teuma gata rasa bak saboh watee singoh: meusapat kheueh hei aneuek-aneuek nabi yakub, deungoe kheueh israel, ayah gata. ruben aneuek lon nyang tuha, gata kheueh teunaga ulon, boh keuphon nyang peujeuet ulon peukasa. gata nyang gagah dan nyang teuga lamkawan mandum aneuek ulon. gata bagaih meunguncang saban lagee ie, sampoe bukan nyang paleng phon; sabab gata eh ngon gundek ulon, gata peukuto teupat eh ayah gata. simeon dan lewi nyang meusyedara; sinjata awaknyan alat keukerasan. ulon hana roh sajan bak buet meurok pakat awaknyan, meunan cit hana roh sajan lamkawan awaknyan. sabab awaknyan jiseumeupoh mate lam watee beungeh, jipeuhanco kuta deumi keumangat droe. teukutok kheueh ubak beungeh awaknyan, kareuna dahsyat jih. teukutok kheueh ubak keujam awaknyan, sabab keujam jih nyang luwa biasa. ulon teuma lon peu crebre awaknyan bansaboh nanggroe israel. ulon teuma lon peuhambo awaknyan lamkawan meubagoe bansa. yehuda, gata teuma tategom takue musoh gata; bubena syedara gata teuma jipujoe gata dan jisujut dikeue gata. yehuda lagee singa muda; jihnyan jipoh mate musoh jih, laju jiwoe lam eumpueng jih; jihnyan teubot laju teueh, dan hana meusidroe pi nyang jijeuet peukaru jihnyan. yehuda teuma geumat tungkat keurajeuen, keuturonan gobnyan geumat peurintah siumu masa. bansa-bansa jibayeue upeti, dan sujut ngon taklok dikeue gobnyan. aneuek keuleudee gobnyan ji-ikat nibak kayee, bak anggo nyang paleng get. gobnyan geurhah peukayan gobnyan ngon anggo, anggo mirah lagee darah. mirah mata geuh sabab geujieb ie anggo, puteh gigoe geuh sabab geujieb ie susu. zebulon teuma tinggai bak bineh laot; kapai-kapai

laju meusaoh bak pante geuhnyan; trok u sidon bataih wilayah geuhnyan. isakhar nyan na lagee keuleudee teuga nyang teu-eh lamkawan raga barang jih. jikalon padubna get jih teupnat nyan dan padub na ceudah jih nanggroo nyan, dan jitukui kheueh jihnyan dan rila droe jih teupeudieng beuban, dan jipaksa mubet sibagoe namiet. gata dan, teuma gata peusidang bansa gata, gata jeuet keusukee saban lagee sukee laen di israel. gata lagee uleue bakbinea rot ueh, uleue beubisa bak bineh jurong, nyang jikab bak tumet guda sampoe teugeutieb ureueng ateuah guda nyan. ya tuhan, seulamat nyang droeneueh bri nyan, nyan kheueh nyang ulon preh-preh, gata gad, gata teuma jiheuntam le peurampok, teuma gata tagisa jak rampok awaknyan. gata asyer, peunajoh gata meulimpah ngon meuwah, gata teuma takeubah peunajoh keuraja-raja. gata naftali, gata lagee rusa nyang ltheueh, lumpah that ceudah bubena aneuek-aneuek gata. nabi yusuf lagee keuleudee muda, keuleudee kleuet nyang rab ngon mata ie, jiplueng-plueng bak gaki gunong. musoh jiseurang deungon hebat that, jipeucrok gobnyan ngon ali-ali dan aneuk panah. teuma nabi yusuf teutab teuga kukoh jaroe gobnyan, teutab teuga aneuk panah gobnyan, sabab kuasa tukang rabe nyang maha teuga, po teu allah nabi yakub, nyang lindong israel. allah ayah gata geutulong gata; nyang mahakuasa geubri beureukat keu gata deungon ujeuen jitreun di langet dan ie dimiyueb tanoh. deungon aneuek dan leumo, gandom dan bungong. beureukat allah bapa gata leubeh jai nibak kaya gunong-gunong nyang leubeh tuha. seumoga jitreun kheueh banmandum beureukat nyan u ateuah ulee nabi yusuf, u ateuah keuneug gobnyan. jihnyan kheueh nyang paleng istimewa lamkawan syedara-syedara jihnyan. benyamin na kheueh srigala nyang juwah. watee beungoh uroe laju jiteugom mangsa. oh watee malam laju jibagi-bagi atra nyang jiteugom nyan." nyan kheueh ban dua blah sukee israel, dan tutoe haba nyang geupeugah le ayah awaknyan watee geubri saleuem seulamat meupisah ubak awaknyan maseng-maseng. oh ltheuehnyan nabi yakub geupeugah ubak aneuek-aneuek gobnyan, "sikeujab teuk ulon teuma meuninggai lagee mandum indatu lon. kubu kheueh ulon bak bineh awaknyan lam guha di makhpela, siblahi u timu mamre nibak tanoh kanaan, nabi ibrahim ka geubloe guha ngon ladang nyang na nibak teupnat nyan bak efron ureueng het keugeupeujeuet keu lampoh jrat. nibak teupnat nyan teukubu nabi ibrahim ngon sara, nabi ishaq ngon ribka; dan nibak teupnat nyan cit teuma ulon peukubu lea. ladang ngon guha nyang na nibak teupnat nyan ka geubloe nibak ureueng het. kubu kheueh ulon nibak teupnat nyan." oh ka ltheueh nabi yakub geupeusan banmandum nyan ubak aneuek-aneuek gobnyan, laju geu-eh dan meuninggai kheueh gobnyan. nabi yusuf laju geupeureubah droe ateuah ayah geuh sira geumo ngon geucum muka ureueng syiek geuh nyan. dan nabi yusuf laju geupeurintah ubak tukang peuwat manyet mangat jikakang laju reumpah-reumpah keungon peuwat manyet nabi yakub nyan. buet peuwat manyet nyan jipajoh watee peuet ploh uroe, na kheueh watee nyang

lazem jih teupeuguna keu teuboh reumpah ateuah manyet. ureueng nanggroo meuse laju meukabong ateuah meuninggai nabi yakub nyan, tujoh ploh uroe treb jih. oh ka seulesoe masa meukabong nyan, geupeugah kheueh le nabi yusuf ubak peugawee-peugawee raja, "jak peusampoe laju peue nyang ulon peugah nyoe ubak raja, 'watee ayah ulon kato that ajai gobnyan, geuyue ubak ulon mangat lon meujanji ubak gobnyan, bahwa ulon teuma lon kubu gobnyan lam kubu nyang ka geupeusiab di tanoh kanaan. sabab nyan, neupeu idhin kheueh ulon jak keudeh keulon peukubu ayah ulon. oh ltheuehnyan lon gisa teuma.' " dan geupeugah kheueh le raja, "jak kheueh kubu ayah gata lagee nyang ka gata meujanji ubak gobnyan." dan geujak kheueh nabi yusuf keugeujak kubu ayah gobnyan. banmandum peugawee raja, banmandum ureueng-ureueng patot nyang na lam meuligoe dan ureueng-ureueng rayeuk nyang na lam nanggroo meuse, geujak meusajan-sajan ngon nabi yusuf. keuluwarga gobnyan, banmandum syedara gobnyan, dan kawom syedara gobnyan, banmandum geujak sajan. nyang tinggai aneuek-aneuek miet dan beulatang peulara di daerah gosen. meunan cit deungon pasokan nyang ek geuritan ngon nyang meuguda jikak cit, sampoe ireng-irengan nyan panyang lumpah na. watee awaknyan ka trok ubak teupnat ureueng nyang koh dan jipeh boh gandom di goren-haataad, siblahi utimu krueng yordan, awaknyan laju jikliek ngon jimeumo meuba-e deungon seudeh dan su nyang meutaga. nabi yusuf laju geupeuna acara meukabong, tujoh uroe treb jih. watee peundudek kanaan jingiang na ureueng meukabong di daerah goren-haataad nyan, jipeugah kheueh le awaknyan, "lumpah that seudeh upacara meukabong ureueng meuse nyan!" nyang kheueh sabab jih teupnat nyan jiboh nan abel-mizraim. meunan kheueh cara jih aneuek-aneuek nabi yakub geupeubuet peue nyang ka geupeusan le nabi yakub ayah gobnyan ubak awaknyan. awaknyan laju jiba manyet ayah geuhnyan u nanggroo kanaan dan laju geupeukubu lam guha makhpela, siblahi utimu mamre, nibak ladang nyang ka geubloe le nabi ibrahim nibak efron ureueng het nyan, keu geupeujeuet keuteupnat teupeukubu ureueng meuninggai. oh ka seulesoe geupeukubu le nabi yusuf ureueng syiek geuhnyan, laju geugisa lom u nanggroo meuse meusajan-sajan ngon banmandum syedara gobnyan dan banmandum ureueng nyang na seutot gobnyan keu teujak peukubu ayah gobnyan. oh ka ltheueh meuninggai ayah awaknyan, aduen-aduen nabi yusuf laju geupeugah, "pakriban meunyoe nabi yusuf jibalahi dam ateuah geutanyoe sabab jihnyan ka tanyoe ienanya yoh masa dilee?" sabab nyan awaknyan laju jikirem peusan nyang lagee nyoe ubak nabi yusuf, "sigohlom ayah tanyoe meuninggai donya, gobnyan geuyue ubak kamoe mangat kamoe peugah ubak droeneueh lagee nyoe, 'peumaphon kheueh buet-buet nyang salah nyang yoh masa ilee jipeubuet le aduen-aduen gata ateuah gata.' jadi, sibagoe hamba-hamba allah nyang geupujoe le ureueng syiek geutanyoe, kamoe lakee, peumaphon kheueh buet-buet kamoe nyang salah." nabi yusuf laju geumo watee geuteurimong peusan nyan. dan le

syedara-syedara geuhnyan keudroe jijak ubak gobnyan dan laju jisujut dikeue gobnyan sira jipeugah, "kamoenyoe namiet droeneueh." teuma nabi yusuf geupeugah ubak mandum palem geuh nyan, "bek teumakot; sabab ulon hana jeuet lon meutindak sibagoe po teu allah. droeneueh ka meusipakat keu droeneueh peubuet jeuhet ateueh ulon, teuma le po teu allah geu-ubah buet nyang jeuhet nyan jeuet nyang keu jroh, mangat jeuet na lagee nyang teujadi yoh masa dilee rame ureueng nyang udeb bak saat nyoe hase teupeuseulamat. bek yo teu, ulon teuma lon peuseb peue-peue nyang droeneueh peureulee dan meunan cit peue-peue nyang jipeureulee le aneuek-aneuek awaknyoe." meunan kheueh cara jih gobnyan geupeuleupie ate banmandum palem geuh ngon tutoe haba nyang leumoh leumbot, sampoe awaknyan banmandum teuharu. nabi yusuf teutab di nanggroe meuse ngon wareh kawom geuh; gobnyan udeb sampoe meu-umu sireutoh siploh thon. gobnyan mantong hase geukalon aneuek cucoe efraim. gobnyan pih na meuteume geu-useuha aneuek-aneuek makhir, na kheueh cucoe manasye, sibagoe aneuek geuh keudroe. laju geupeugah ubak banmandum syedara geuh, "ajai ulon kato that, teuma po teu allah pasti geupeulara gata dan geupimpen gata mangat tateubiet nibak nanggroe nyoe, u nanggroe nyang ka geupeujanji ngon sumpah ubak nabi ibrahim, nabi ishaq dan nabi yakub." dan nabi yusuf laju geuyue ubak mandum kawom syedara geuh mangat jimusumpah, kheun gobnyan, "meujanji kheueh ubak ulon, bahwa meunyoe po teu allah ka geupimpen gatanyoe u nanggroe nyan, gata teuma taba sajan manyet ulon." oh lheueh geukheun nyan nabi yusuf laju meuninggai donya di nanggroe meuse watee ka meu-umu sireutoh siploh thon. awaknyan laju jipeuawet manyet gobnyan ngon reumpah-reumpah laju jikeubah lam peuto mate.

nabi yakub yang teuhoi nan israel, geujak u nanggroe meuse ngon aneuek-aneuek gobnyan dan keuluarga awaknyan maseng-maseng. aneuek-aneuek nabi yakub nyan na kheueh lagee nyang teupeugah di miyueb nyoe: ruben simeon lewi yehuda isakhar zebulon benyamin dan naftali gad asyer. keuturonan nabi yakub nyan jeumeulah jih na tujoh ploh droe. nabi yusuf ka leubeuh awei na di nanggroe meuse. na padub watee teuma oh lheurehnyan nabi yusuf dan syedara-syedara gobnyan meuninggai donya, meunan cit deungon ureueng-ureueng nyang saboh angkatan ngon gobnyan. teuma keuturonan awaknyan, na kheueh ureueng-ureueng israel, ka meuaneuek cucoe nyang lumpah le, dan jeumeulah awaknyan laju meutamah-tamah bagaih lagoena, sampoe nanggroe meuse ka peunoh ngon awaknyan. oh lheurehnyan na sidroe raja baro nyang hana jituri ubak nabi yusuf ka jipeuphon mat peurintah di nanggroe meuse. raja nyan jipeugah ubak rakyat jih, "ureueng-ureueng israel nyan paleng mubahya bak geutanyoe, sabab awaknyan ka rame that dan leubeuh teuga nibak geutanyoe. meunyoe beureutoh prang, na keumungkanaan awaknyan jimeusikutu ngon musoh keu jilawan geutanyoe, oh lheurehnyan laju jiplueng jitinggahi nanggroe nyoe. geutanyoe banmandum haroh tamita jalan mangat awaknyan bek meutamah jai le." ngon sabab nyan di ureueng-ureueng meuse laju jiangkat ureueng-ureueng nyang kawai ateuheh ureueng-ureueng israel keu jipeususah udeb jih ngon cara jibri keureuja paksa. ubak awaknyan jipaksa mangat jipeudong keu raja meuse banda-banda pitom dan raamses sibagoe pusat teupat teukeubah barang. teuma dilikot nibak nyan, awaknyan meutamah jipeusulet ngon jihina, teuma ureueng-ureueng israel nyan pi meutamah-tamah jai, dan di ureueng-ureueng israel nyan maken meutabu bansaboh nanggroe, sampoe bubena ureueng meuse meutamah-tamah teumakot ubak awaknyan. dan di ureueng-ureueng meuse pi deungon keujam laju jiseksa bubena ureueng israel nyan, laju jipeususah udeb ureueng-ureueng israel sampoe ureueng-ureueng israel habeh seungsara. hana rasa gaseh sayang awaknyan laju jipaksa meubuet bak proyek-proyek bangunan dan di ladang-ladang ngon di blang awaknyan. oh lheurehnyan raja meuse laju jibri peurintah ubak sifra dan pua, dua droe ma bidan nyang tulong ureueng-ureueng inong ibrani peulahe aneuek. jipeugah le raja meuse nyan, "watee gatanoye tatulong inong ibrani nyan jipeulahe aneuek, ingat kheueh lagee ulon peugah nyoe: meunyoe aneuek nyang lahe nyan agam, gata poh mate laju aneuek nyan! dan meunyoe nyang lahe nyan inong, bah kheueh aneuek nyan udeb." teuma rupari mandua droe ma bidan nyan ureueng nyang teumakot that ubak allah. awaknyan hana jitem seutot peurintah raja dan jipeubiyeu mantong tieb-tieb aneuek agam nyang lahe nyan udeb. dan le raja laju jitawok bandua droe ma bidan nyan dan jitanyong, "pakon gata peubiyeu aneuek agam nyang lahe nyan udeb?" jawueb awaknyan, "ureueng inong ibrani hana saban lagee ureueng inong meuse. awaknyan mudah that jipeulahe aneuek. sigihlom bidan trok keunan, aneuek

jihnyan ka lahe." dan po teu allah geubri beureukat ubak bidan-bidan nyan dan laju geubri keuturonan ubak awaknyan, sabab awaknyan jihoreumat po teu allah. dan di ureueng israel pih meutamah le dan teuga-teuga. dan raja laju jibri peurintah nyang lagee nyoe ubak rakyat meuse, "tieb-tieb aneuek agam nyang lahe nibak ureueng inong ibrani haroh jitiek lam krueng nil, dan banmandum aneuek inong nyang lahe jeuet teupeubiyeu aneuek nyan udeb." bak watee nyan na sidroe ureueng agam nibak sukee lewi, jimeukawen ngon ureueng inong lam sukee jih keudroe. dan laju ureueng inong nyan jipeulahe sidroe aneuek agam. watee jikalon bahwa aneuek agam nyang ban lahe nyan lagak lumpah na, aneuek agam nyan laju jisom nyang treb jih na lhee buleuen. rupari aneuek manyak nyan hana mungken jisom leubeuh treb. teuma le ma aneuek nyan laju jicok saboh raja nyang teupeugat nibak naleueng geulagah, laju jilapek ngon ter mangat bek jitamong ie. aneuek manyak nyan laju jikeubah lam raja nyan, dan laju jiba u krueng nil dan laju jipeuduek bak teungoh-teungoh naleueng geulagah bak bineh krueng nyan. poda aneuek manyak nyan jidong jioh bacut nibak teupat adoe jih teukeubah nyan sira jikalon peue nyang teuma teujadi ateuheh adoe jih nyan. watee nyan teuka kheueh putroe raja. putroe nyan jitreun u krueng keuneuk jak manoe, seudangkan deundayang putroe nyan jijak-jak bak bineh krueng. ngon hana jisangka-sangka putroe raja nyang teungoh manoe nyan laju jingieung saboh raga di teungoh-teungoh krueng lam naleueng geulagah, dan laju jiyue ubak sidroe namiet inong mangat jijakcok raga nyan. watee jipeuhah le putroe raja babah raga nyan, deuh laju jikalon na aneuek manyak lam raga nyan, dan aneuek manyak nyan teungoh jimo. putroe nyan teuka rasa weueh ubak aneuek nyan sira geupeugah lagee nyoe, "nyoe pasti aneuek ureueng ibrani." dan le poda aneuek manyak nyan laju jipeugah ubak putroe, "peu kheueh po cut putroe neutem ulon mita sidroe ma ureueng ibrani keu jipeumom aneuek manyak nyan?" "get that," jawueb putroe raja. dan jijak kheueh laju aneuek dara nyan jijak tawok ma jih keudroe. geupeugah le putroe raja ubak ma nyan, "neuba kheueh aneuek manyak nyoe, dan gata peumom kheueh jihnyan keu ulon; singoh keu droeneueh hai ma ulon jok upak." dan laju jiba aneuek manyak nyan sira jibri mom keu aneuek nyan. watee aneuek manyak nyan ka meutamah rayeuk, ma aneuek nyan laju geujok aneuek nyan ubak putroe raja. dan le putroe raja laju jicok aneuek manyak nyan sibagoe aneuek angkat jih. "aneuek nyoe ulon boh nan musa, sabab aneuek nyoe ulon cok lam ie," kheun putroe nyan. watee nabi musa ka meutamah rayeuk, laju geujak mita ureueng-ureueng nyang saboh bansa ngon gobnyan. gobnyan geukalon pakriban bansa gobnyan jiseksa ngon jiyue meubuet nyang brat-brat. dan na geukalon ureueng meuse jipoh mate sidroe ureueng ibrani. nabi musa laju geukalon bansikeulileng geuh, dan watee geukalon hana ureueng nyang ngieung ateuheh gobnyan, laju geupoh mate ureueng meuse nyan dan manyet ureueng nyan laju geusom sira geuseubee lam anoe. oh singoh beungoh nabi

musa geujak lom, deuh laju geukalon dua droe ureueng ibrani teungoh jimeulo meugasui-gasui. "pakon gata poh rakan gata?" geutanyong le nabi musa ubak ureueng nyang meusalah nyan. jaweueb ureueng nyan, "soe nyang peujeuet droeneuh jeuet keupeumimpin dan hakem kamoe? peu kheueh droeneuh keuneuk poh mate ulon, lagee ureueng meuse nyang ka droeneuh poh mate nyan?" dan laju nabi musa jiteuka teumakot sira geuseumike, "cilaka ulon! buet ulon ka jiteupeue." watee jideungoe le raja keujadian nyan, laju jimita akai keu jikeuneuk peumate nabi musa. teuma nabi musa geuteupeue laju geuplueng dan tinggai di nanggroe midian. imeum nanggroe midian, nyang nan geuh yitro, na tujoh droe aneuek geuh nyang inong. bak siuroe, watee nabi musa teungoh geudeuk bakbined saboh mon, teuka kheueh keunan bantujoh droe aneuek dara yitro keuneukjak crong ie dan jipasoe teumpat jieb ie kawan kameng dan bubiri ayah awaknyan. teuma le ureueng-ureueng meurabe nyang laen laju jiuise aneuek-aneuek dara nyan. dan nabi musa laju geutulong awaknyan dan geubri laju jijieb ie kawan kameng ngon bubiri awaknyan. watee awaknyan jiwoe u rumoh, ayah awaknyan laju geutanyong, "pakon bak uroenyoe gatanyoe bagaih that tawoe?" jaweueb awaknyan, "na sidroe ureueng meuse jitulong kamoe nibak jipeukaru le ureueng-ureueng meurabe nyang laen. gobnyan kheueh nyang crong ie keukamoe, dan geupeujieb ie ubak beulatang peulara tanyoe." "pat ureueng nyan jinoe?" geutanyong le yitro ubak aneuek-aneuek gobnyan. "pakon gatanyoe tatinggai ureueng nyan? jak kheueh hoi ureueng nyan mangat jimakheun meusajan ngon geutanyoe." nabi musa geutem tinggai disinan. oh lheurehnyan yitro laju geupeukawen aneuek gobnyan nyang nan jih zipora ngon nabi musa. zipora laju geupeulahe sidroe aneuek agam. aneuek nyan geuboh nan gersom, sabab nabi musa geupike lagee nyoe, "ulon sidroe ureueng aseng nibak teumpat nyoe." meuthon-thon teuma oh lheurehnyan raja nanggroe meuse laju meuninggai donya. teuma bansa israel teutab apoh apah sabab awaknyan jicok keunamiet, akhe jih awaknyan laju jikliek jilakee tulong. kliek ngon dumpek awaknyan trok ubak po teu allah. po teu allah geudeungoe awaknyan, dan gobnyan laju geuingat ubak janji gobnyan ngon nabi ibrahim, nabi ishaq dan nabi yakub. gobnyan geukalon ureueng-ureueng israel jipeubudak, dan laju geucok peunutoh bahwa ureueng-ureueng israel nyan haroh geutulong. bak masanyan nabi musa teungoh geurabe bubiri-bubiri ngon kameng-kameng yitro, atra yah tuwan gobnyan, nyang jeuet keu imeum di tanoh midian. watee gobnyan teungoh geuparoh beulatang nyang geurabe nyan u meurandeh padang guron, trok kheueh laju gobnyan u gunong sinai, gunong nyang suci. bak teumpat nyan malaikat tuhan laju geupeuleumah droe ubak nabi musa lam apui hu nyang jiteubiet di teungoh-teungoh uteun. nabi musa geukalon uteun nyan hu, teuma hana tutong. "luwa biasa," pike gobnyan. "uteun nyan hana tutong! meunyo meunan bah kheueh ulon ngieng lubeuh rab lom." tuhan geukalon nabi musa geupeurab ubak uteun nyang hu nyan, dan

gobnyan laju geutawok nibak teungoh-teungoh uteun nyan, "musa! musa!" "ulon na disinoe," jaweueb nabi musa. laju po teu allah meufeureuman, "bek to keunoe. suet seulo bak gaki gata nyan, sabab tanoh nyang gata giloe nyan na kheueh tanoh suci. ulon nyoe allah indatu gata, allah nabi ibrahim, allah nabi ishaq dan allah nabi yakub." dan nabi musa laju geutob muka gobnyan, sabab gobnyan teumakot geupandang po teu allah. dan laju tuhan meufeureuman, "ulon ka ulon ngieng seungsara nyang jirasa le umat ulon di nanggroe meuse, dan ka ulon deungoe awaknyan jikliek-kliek jilakee mangat bubagaih teupeubeubaih nibak ureueng-ureueng nyang seksa awaknyan. sikeubiet jih, ulon kuteupeue banmandum keuseungsaraan awaknyan. sababnyan kheueh ulon treun keu lon jak peubeubaih awaknyan nibak jaroe ureueng meuse dan ulon ba awaknyan mangat jiteubiet nibak nanggroe nyan jituju ubak saboh nanggroe nyang luwah. tanoh jih kaya ngon subo, dan jinoenyoe jiduek le bansa kanaan, bansa het, amori, feris, hewi dan yebus. jimo ngon jimeuba-e bansa israel ka ulon deungoe, dan ulon kalheueh cit ulon ngieng pakriban awaknyan jiseksa ngon jiteugom le bansa meuse. jinoenyoe gata ulon utus keu gata jak meuhadab ubak raja meuse mangat gata hase gata peuteubiet bansa ulon nibak nanggroe nyan." teuma nabi musa geupeugah ubak po teu allah, "soe ulon nyoe, sampoe hase ulon jak meuhadab raja dan ulon ba ureueng israel jiteubiet nibak nanggroe meuse?" feureuman allah, "ulon teuma lon tulung gata. dan meunyo bansa nyan ka gataba dan gata peuteubiet nibak nanggroe meuse, gata teuma meuebadat ubak ulon bak gunong nyoe. nyan kheueh bukeuti jih bahwa ulon kutulung gata." geujaweueb lom le nabi musa, "teuma meunyo ulon meurumpok ngon ureueng-ureueng israel dan ulon peugah ubak awaknyan: 'allah indatu gata ka geu-utus ulon ubak gata,' awaknyan pasti jitanyong, 'soe nan gobnyan?' dan peue nyang haroh ulon jaweueb ubak awaknyan?" feureuman allah, "ulon na kheueh ulon na. nyoe kheueh nyang haroh gata peugah ubak bansa israel, gobnyan nyang teupeugah ulon na, ka geu-utus ulon ubak gata. peusampoe cit teuma ubak awaknyan bahwa ulon, tuhan allah indatu awaknyan, allah nabi ibrahim, allah nabi ishaq, dan allah nabi yakub, geu-utus gata ubak awaknyan. ulon kheueh tuhan, nyan kheueh nan ulon keusiumu masa. nyan kheueh teuhoi keu ulon keu banmandum bansa treun meutleun. jak kheueh dan peusapat kheueh banmandum peumimpin israel. peumaklum kheueh ubak awaknyan bahwa ulon, tuhan allah indatu awaknyan, allah nabi ibrahim, allah nabi ishaq dan allah nabi yakub, ka geupeuleumah droe ubak gata. peugah kheueh ubak awaknyan bahwa ulon ka lheureh ulon jak ubak awaknyan dan ka ulon ngieng pakriban awaknyan jiseksa le bansa meuse. dan ka ulon cok keuputosan keu ulon ba awaknyan jiteubiet nibak nanggroe meuse, teumpat awaknyan jiseksa, dan ulon ba awaknyan bak saboh nanggroe nyang kaya ngon subo, nanggroe bansa kanaan, bansa het, amori, feris, hewi dan yebus. umat ulon teuma jideungoe tutoe haba gata. oh lheurehnyan gata meusajan-sajan ngon peumimpin-peumimpin

bansa israel haroh gata jak meuhadab ubak raja meuse sira gata peugah ubak raja nyan lagee nyoe, 'tuhau, allah ureueng ibrani ka teuka geujak peugah droe ubak kamoe. jinoenyo neubri kheueh idhin ubak kamoe keukamoe jak nyang jih jih lhee uroe meuneujak u padang pasi guna kamoe peuseumah keureubeuen ubak tuhan, allah kamoe.' oh ltheueh nyan po teu allah meufeureuman lom, "ulon kuteupeue bahwa raja nanggroe meuse nyan hana jipeubiyeu gata jak, keucuali meunyo raja nyan teupaksa. teuma ulon kupeuguna keukuasaan lon, dan ulon hukom meuse ngon bala dan beuncana nyang brat-brat nyang ulon puteuka keu nanggroe nyan. oh ka ltheuehnyan, baro kheueh jih nyan jibri idhin ubak gata keu gata beurangkat. ulon teuma lon peujeuet ureueng nanggroe meuse nyan jipeumurah ate ubak gata, teuma bak watee umat loh jieurangkat, gata hana tajak ngon jaroe soh. tieb-tieb ureueng inong bansa israel jilakee ubak wareh sileungka ureueng meuse dan nibak inong nanggroe meuse nyang tinggai saboh romoh, peukayan, meunan cit deungon piasan pirak dan meuh, banmandum nyan teuma gata peungui bak aneuek-aneuek gata. deungon cara lagee nyan gata ka gata reupah ureueng meuse." dan nabi musa laju geujaweueb ubak tuhan, "teuma pakriban miseuji ureueng-ureueng israel hana jipateh ubak ulon dan hana jipakoe peue-peue nyang ulon peugah? peue nyang haroh ulon peugah meunyo awaknyan jipeugah tuhan hana geupeuleumah droe ubak ulon?" feureuman tuhan ubak nabi musa, "peue nyan bak jaroe gata?" jaweueb nabi musa, "tungkat." feureuman tuhan, "cuba gata rhom tungkat nyan ateuh tanoh." nabi musa laju geu rhom tungkat bak jaroe geuhnyan ateuh tanoh, dan tungkat nyan laju meu-ubah jeuet keu uleue dan nabi musa laju geuplueng sabab geutakat keu uleue nyan. tuhan meufeureuman ubak nabi musa, "peurab kheueh bak uleue nyan, dan mat kheueh laju bak ikue jih." nabi musa laju geupeurab sira geudrob uleue nyan dan watee nyan cit uleue nyan meu-ubah jeuet keu tungkat lom teuma lam jaroe nabi musa. feureuman tuhan, "peubuet kheueh lagee nyan mangat ureueng-ureueng israel jipateh bahwa ulon kheueh tuhan, allah indatu awaknyan, allah nabi ibrahim, allah nabi ishaq, dan allah nabi yakub, ka ulon peuleumah droe ubak gata." tuhan meufeureuman lom ubak nabi musa, "peutamong kheueh jaroe gata lam bajee gata keudroe." nabi musa laju geupeubuet lagee nyang geuyue le tuhan nyan, dan watee jaroe geuh nyan geutarek lom uluwa, laju jaroe nyan ka meu-ubah jeuet keu puteh mu plak-plak sabab ka keunong peunyaket kulet nyang paleng parah. dan feureuman tuhan, "peutamong kheueh lom jaroe gata nyan lam bajee gata." nabi musa laju geupeubuet lagee nyang geuyue le tuhan nyan, dan watee jaroe geuhnyan geupeuteubiet, jaroe geuhnyan ka puleh sagee sot teuma. feureuman tuhan, "meunyo awaknyan hana jitem pateh ubak gata, atawa hana yaken oh ltheueh jingieng buet ajaeb nyang phon, dan buet ajaeb nyang nyoe teuma teupeujeuet awaknyan jipateh. meunyo awaknyan teutab cit hana jitem pateh ubak gata bahpi ka jingieng mandua boh buet nyang ajaeb nyoe, dan

awaknyan teutab hana jipakoe tutoe haba gata, gatacok kheueh bacut ie krueng nil dan ie nyan gata roe kheueh ateuh tanoh. ie nyan teuma meu-ubah jeuet keu darah." teuma nabi musa geupeugah, "ya, tuhan, ulon bukon ureueng nyang carong peugah haba, bah kheueh yoh masa ilee meunan cit bak masa jinoe, oh ka ltheueh tuhan neumeututoe ngon ulon. lidah ulon ka brat, lon meututoe ka meulet dan hana tajam le." tuhan meufeureuman ubak gobnyan, "soe nyang bri babah ubak manusia? soe nyang peujeuet manusia nyan kalu atawa punyueug jih klo? soe nyang peujeuet manusia nyan teubleuet mata atawa buta? bukon kheueh ulon, tuhan? jinoenyo jak kheueh, ulon teuma lon tulung gata tapeugah haba dan lon peurunoe gata peue nyang haroh gata peugah." dan nabi musa geujaweueb, "ulon lakee, bek kheueh ya, tuhan, neu-utus ulon, neuyue kheueh ureueng laen." dan tuhan meufeureuman ubak nabi musa deungon beungeh, "bukon kheueh na syedara nyang nan jih nabi harun? ulon kuteupeue jihnyan carong jipeugah haba. nyang siebuna jih, nabi harun nyan mantong bak rot euh teungoh jikkeneue, dan jihnyan teuma galak that meunyo ka meurumpok ngon gata. meututoe kheueh ngon jihnyan dan peugah kheueh ubak jihnyan peue nyang haroh jipeugah. ulon teuma lon tulung gata bandua dan teuma lon peurunoe gata bandua peue nyang haroh gata peugah dan gata peubuet. jihnyan haroh jimeututoe ateuh nan gata ngon rakyat. jihnyan teuma jeuet keu tukang peugah haba gata dan gata jianggab lagee po teu allah nyang geupeugah peue nyang haroh geupeugah. ba kheueh sajan tungkat nyan, gata teuma gata peubuet buet-buet nyang ajaeb ngon tungkat nyan." oh ka ltheueh nyan nabi musa laju geuwoe u rumoh yitro, yah tuwan gobnyan, dan laju geupeugah ubak ayah tuwan geuh nyan, "neubri kheueh idhin ubak ulon hei ayah keu lon gisa u nanggroe meuse lon keuneuk jakngieng banmandum syedara lon peu kheueh awaknyan mantong udeb." yitro laju geupeugah ubak nabi musa, "jak kheueh ngon seulam." yoh mantong nabi musa di tanoh midian, tuhan meufeureuman ubak gobnyan, "jakgisa kheueh u nanggroe meuse. banmandum ureueng nyang keuneuk poh mate gata ka habeh mate." dan nabi musa laju geupakat peurumoh geuh dan aneuek-aneuek gobnyan sira geupeu ek awaknyan ateuh keuleudee laju geujak meusajan awaknyan u nanggroe meuse. ateuh peurintah allah, nabi musa geuba sajan tungkat gobnyan. feureuman tuhan ubak nabi musa, "ulon ka lon bri kuasa ubak gata keu gata peuna buet-buet ajaeb. dan meunyo gata ka tagisa u nanggroe meuse singoh, gata keureuja kheueh banmandum buet nyang ajaeb nyan dikeue raja meuse. teuma di ulon teutab lon peujeuet jihnyan ureueng kreueh ulee, sampoe jihnyan teutab han jibri bansa ibrani nyan jitinggai nanggroe meuse. dan gata peugah kheueh ubak raja nyan bahwa ulon, tuhan, lon peugah lagee nyoe: 'israel na kheueh aneuek ulon nyang tuha, dan gata ka ulon peurintah keu lon bri idhin aneuek ulon nyan jikk mangat jihnyan hase jiseumah ngon jimeungabdi ubak ulon, teuma gata tatulak. jinoenyo ulon teuma lon poh mate aneuek gata nyang tuha.' " bak saboh

teupat jipeudong khimah dalam watee meuneujak nyan, tuhan laju geujak ubak nabi musa keuneuk geupeu mate nabi musa nyan. zipora, peurmoh gobnyan, laju geucok sineuk batee nyang tajam oh ltheuhnyan laju jisie kulet aneuek jih, oh ltheuhnyan laju jipeutupeh bak gaki nabi musa. geupeugah le zipora, "droeneueh lakoe darah keu ulon." hainyan geupeugah lagee nyan sabab na hubungan ngon upacara meusunat. deungon na lagee nyan tuhan ka hana jاده geupeumate nabi musa. feureuman tuhan ubak nabi harun, "gata jak kheueh laju u padang pasi keugata jak meurumpok ngon nabi musa." nabi harun laju geujak, dan laju meurumpok ngon adoe geuhnyan bak gunung suci, laju geucom adoe geuhnyan. nabi musa laju geupeugah ubak nabi harun banmandum nyang ka geufeuroman le tuhan ubak gobnyan watee gobnyan geuyeu gisa le tuhan u nanggro meuse, dan meunan cit keuhai banmandum buet nyang ajaeb nyang haroh geupeubuet. oh ltheuhnyan nabi musa ngon nabi harun laju geujak u nanggro meuse sira geupeusapat banmandum peumimpin-peumimpin israel. nabi harun laju geupeutrok ubak awaknyan peue-peue nyang ka geufeuroman le tuhan ubak nabi musa, dan nabi musa laju geupeubuet banmandum buet-buet nyang ajaeb dikeue awaknyan banmandum. ngon na lagee nyan, baro kheueh awaknyan jipateh ubak nabi musa, dan watee awaknyan jideungoe bahwa tuhan ka geupeurati bansa israel dan ka geukalon peue-peue nyang ka jirasa deurita atueh bansa nyan, awaknyan laju jisujut sira jiseumah. oh ltheuhnyan nabi musa ngon nabi harun laju geujak meuhadab ubak raja meuse sira geupeugah lagee nyoe, "meunoe kheueh feureuman tuhan, allah israel, 'peuidhin kheueh bansa ulon jijak mangat jeuet jimeu iebadat ubak ulon di padang pasi.' " "soe kheueh tuhan nyan?" jityanyong le raja. "keupeue ulon haroh lon pakoe keu jih nyan dan lon bri idhin ubak bansa israel jijak nibak nanggro nyoe? ulon hana lon turi soe tuhan nyan, dan ureueng israel hana ulon bri idhin jitinggai nanggro nyoe." nabi musa ngon harun geupeugah, "allah ureueng ibrani ka geupeuleumah droe ubak kamoe. idhin kheueh kamoe mangat jeuet kamoe jak u padang pasi nyang jioh jih na lhee uroe watee jak keu kamoe jak peuseumah keureubeuen mak tuhan, allah kamoe. meunye hainyan hana kamoe peubuet, kamoe geupoh mate ngon peunyaket atawa ngon prang." geupeugah le raja firauen nyan ubak nabi musa ngon nabi harun, "keupeue gata peujeuet banmandum ureueng nyan jipeulaloe bak buet jih? yue kheueh namiet-namiet nyan jimeukeureuja! ureueng-ureueng nyan ka lumpah that rame jeumeulah jih. dan jinoenyoe gata na meukeusut mangat awaknyan beupijoh meubuet!" uroenyany cit teuma banmandum ureueng nyang kawai bansa meuse dan mando-mando bansa israel meuteume peurintah nibak raja, "bek le gata bri jeurami ubak bansa nyan keu jipeuget batee bata. bah kheueh jijak mita keudroe. dan yue kheueh bak awaknyan mangat jipeuget batee bata hana kureueng nibak nyang ka-ka. awaknyan keuneuk peubeu oe beu oe droe; nyang kheueh sabab jih awaknyan jimeu krob-krob mangat jeuet teubri idhin jijak

peuseumah keureubeuen ubak allah jih. paksa laju awaknyan mangat jimeubuet leubeh brat nibak nyang ka-ka, mangat awaknyan laloe deungon buet dan hana watee keu jideungoe haba seumeungeut nyang jipeusampoe le rakan-rakan jih." bubena tukang kawai bansa meuse dan mando-mando israel nyan laju jiteubiet jijak peugah ubak bansa israel, "raja geupeutreun titah mangat keu gata banmandum hana geubri le jeurami. gata haroh tamita keudroe dipat mantong nyang gata teume mita, teuma ingat, batee bata nyang gata peugah hana jeuet kureueng nibak nyang ka-ka." ban jideungoe haba nyan jijak kheueh laju bansa israel nyan jijakbroh bansaboh nanggro meuse keu jipeusapat jeurami. le tukang kawai nyan hana putoh-putoh jipaksa mangat tieb-tieb uroe awaknyan beuna jipeuhase batee bata nyang sadub jai jih lagee yoh masa awaknyan teubri jeurami. le tukang kawai nyan laju jiseunuet mando-mando israel nyang jibri tugaih keu jikawai awaknyan meubuet. awaknyan laju jityanyong, "pakon jinoenyoe bansa gata hana jipeuhase batee bata nyang sadub jai jih lagee yoh masa ilee?" dan mando-mando israel nyan laju jijak meuhadab ubak raja sira jipeugah ubak raja nyan, "pakon po raja neupeubuet lagee nyoe atueh kamoe? kamoe hana jibri jeurami, teuma jipaksa mangat kamoe peuget batee bata! jinoenyoe kamoe jiseunuet padahai peugawee-peugawee po raja kheueh nyang salah!" jijaweueh le raja, "gata mandum meumang biet-biet that beu oe dan hana tatem meubuet. nyang kheueh sabab jih gata lakee idhin ubak ulon keugata jak peuseumah keureubeuen ubak tuhan gata. jak kheueh jakmeubuet lom. jeurami teutab hana teubri keu gata, teuma di gata haroh teutab tapeuget batee bata nyang sadub le jih." mando-mando nyan laju jiteuka sada bahwa awaknyan lam keuadaan sulet watee jibri tee bahwa ureueng-ureueng israel haroh jipeuna batee bata nyang teutab sadub le jih lagee nyang ka-ka. watee awaknyan jiteubiet nibak lam meuligoe raja, awaknyan laju meurumpok ngon nabi musa dan nabi harun nyang teungoh geupreh-preh awaknyan. jipeugah le mando nyan ubak nabi musa ngon nabi harun, "tuhan geuteupeue peue nyang droeneueh peubuet! gobnyan teuma geuhukom droeneueh! gata kheueh nyang jeuet keu sabab kamoe nyoe jibanci le raja dan banmandum peugawee gobnyan, sampoe awaknyan keuneuk poh mate banmandum kamoe." dan nabi musa geujak meuhadab lom ubak tuhan sira geupeugah lagee nyoe, "tuhan, pakon bansa israel droeneueh peulaku keuadaan jih nyang lumpah seudeh lagee nyoe bagoe? pakon droeneueh neu-utus ulon keunoe? seumeunjak ulon jak meuhadab raja dan lon meututoe atueh nan droeneueh, raja nyan laju jipeuphon inenyan bansa nyoe. dan droeneueh hana neupeubuet sapeu keu neutulong awaknyan." dan feureuman tuhan ubak nabi musa, "jinoenyoe gata teuma tangieng pakriban ulon meutindak atueh raja nyang zalem nyan. raja nyan teuma ulon paksa mangat jitinggai bansa ulon. nyang sibeuna jih, jihnyan teuma lon paksa mangat ji-use awaknyan nibak nanggro nyoe." po teu allah geumeututoe ubak nabi musa, "ulon kheueh tuhan. ulon ka ltheueh lon peuleumah

droe ubak nabi ibrahim, nabi ishaq dan nabi yakub sibagoe allah nyang mahakuasa, teuma ulon hana lon puturi droe ubak awaknyan deungon nan 'tuhan'. meunan cit ulon peuna peujanjian ngon awaknyan. ulon meujanji teuma ulon bri nanggroe kanaan keu awaknyan, nanggroe nyang yoh masa dilee awaknyan udeb sibagoe ureueng aseng. ulon ka lon deungon ureueng israel apoh apah sabab jipeubudak le bansa meuse, dan laju teuingat ubak janji lon. ngon sabab nyan, jak peumaklum kheueh ubak bansa israel bahwa ulon peugah ubak awaknyan: ulon kheueh tuhan; gata ulon peubeubaih nibak jipeubudak le bansa meuse. ulon teuma lon tunyok keukuasaan lon nyang luwa biasa guna keu lon peuseulamat gata dan lon peurhot hukoman nyang brat ateuh bansa meuse. gata lon peujeuet keu umat lon, dan ulon jeuet keu allah gata. deungon lagee nyan gata tateupeue bahwa ulon nyoe na kheueh tuhan, allah gata, nyang peubeubaih gata nibak jipeujeuet keubudak di nanggroe meuse. gata ulon ba u nanggroe nyang ka ulon peujanji deungon sumpah ubak nabi ibrahim, nabi ishaq dan nabi yakub; tanoh nyan ulon bri ubak gata jeuet keuhak milek gata keudroe. ulon kheueh tuhan." banmandum feureuman tuhan nyan geupeusampoe le nabi musa ubak bansa israel, teuma awaknyan teutab hana jipakoe peue-peue nyang geupeugah le nabi musa nyan, sabab jipeujeuet keunamiet nyang lumpah keujam nyan, ureueng-ureueng israel ka jeuet keuputoh asa. oh lheurehnyan tuhan meufureuman ubak nabi musa, "jak kheueh meuhadab ubak raja meuse dan peugah ubak jihnyan bahwa raja nyan haroh jibri idhin bansa israel jitinggai nanggroe jihnyan." teuma nabi musa geujaweueb, "ureueng israel keudroe hana jitem deungoe ulon. panena mungken raja meuse jideungoe ureueng nyang hana carong jimariet lagee ulon?" meunan kheueh cara jih tuhan geu-utus nabi musa dan nabi harun keugeujak peusampoe ubak bansa israel dan ubak raja nanggroe meuse bahwa awaknyan geubri tugaih le tuhan keu teujak pimpin bansa israel jiteubiet nibak nanggroe meuse. nyoe kheueh asai usui nabi musa ngon nabi harun: ruben, aneuk tuha nabi yakub, na peuet droe aneuk agam: henokh, palu, hezron, dan karmi. awaknyan na kheueh indatu nibak kawom-kawom nyang na lam sukee ruben. simeon dan peurumoh gobnyan sidroe ureueng inong nanggroe kanaan na teuma nam droe aneuk agam; aneuk-aneuk nyan na kheueh: yemuel, yamin, ohad, yakhin, zohar dan saul. awaknyan na kheueh indatu nyang na lam kawom-kawom simeon. lewi na lhee droe aneuk agam; aneuk-aneuk geuh nyan na kheueh: gerson, kehat dan merari; awaknyan indatu nibak banmandum kawom nyang na lam sukee lewi. lewi sampoe na umu 137 thon. gerson na teuma dua droe aneuk agam; aneuk-aneuk geuh nyan na kheueh: libni dan simei; bak awaknyan jai that-that jipeutreu keuturonan. kehat na teuma peuet droe aneuk agam: amram, yizhar, hebron dan uziel. kehat sampoe na umu gobnyan 133 thon. merari na teuma dua droe aneuk agam: mahli dan musu. nyan kheueh kawom-kawom nyang na lam sukee lewi deungon keuturonan awaknyan maseng-maseng.

amram geumeukawen ngon yokhebed, adoe nyang inong ayah gobnyan, dan aneuk-aneuk awaknyan na kheueh nabi harun ngon nabi musa. amram sampoe na meu-umu 137 thon. yizhar na teuma lhee droe aneuk agam; aneuk-aneuk geuhnyan na kheueh: korah, nefeg dan zikhri. uziel na teuma lhee droe aneuk agam: misael, elsafan dan sitri. nabi harun geumeukawen ngon eliseba, aneuk inong aminadab; dan eliseba meusyedara ngon nahason. eliseba jipeulahe nadab, abihu, eleazar dan itamar. korah na teuma lhee droe aneuk agam: asir, elkana dan abiasaf. awaknyan indatu nibak kawom keuluwarga korah. eleazar, aneuk agam nabi harun, jimeukawen ngon sidroe aneuk nibak putiel, dan aneuk awaknyan na kheueh pinehas. nyan kheueh banmandum ulee kawom dan ulee keuluwarga nyang na lam sukee lewi. nabi harun ngon nabi musa nyan kheueh nyang geupeurintah le tuhan keu geuba banmandum ureueng israel jiteubiet lam nanggroe meuse. awaknyan bandua geujak meuhadab ubak raja nanggroe meuse mangat gobnyan geupeubeubaih ureueng israel. watee tuhan meufureuman ubak nabi musa di meuse, feureuman tuhan, "ulon kheueh tuhan. jak peugah kheueh ubak raja meuse peue-peue mantong nyang ka ulon peugah ubak gata." teuma nabi musa geujaweueb, "tuhan, droeneueh neutepueue bahwa ulon hana carong lon peugah haba. panena mungken raja jitem deungoe peue nyang ulon peugah?" feureuman tuhan ubak nabi musa, "ulon teuma lon peujeuet gata lagee allah dikeue raja, dan syedara gata nabi harun teuma jimeututoe bak raja nyan sibagoe nabi gata. jak peusampoe laju bak nabi harun banmandum nyang ulon peurintah nyoe ubak gata. yue kheueh bak nabi harun mangat jipeugah ubak raja bahwa raja nyan haroh jipeu idhin keu ureueng israel jitinggai nanggroe meuse. teuma ulon keupeujeuet raja nyan teutab kreueh ulee. raja nyan teutab hana jipakoe ubak gata, bahpi ulon teutab lon peuteuka bala nyang le di nanggroe meuse. ngon sabab nyan ulon teuma lon hukom nanggroe meuse ngon hukoman nyang leubeuh brat, oh lheurehnyan ulon ba mandum bansa israel, umat ulon, jiteubiet lam nanggroe nyan. dan ureueng meuse teuma jiteupeue bahwa ulon nyoe na kheueh tuhan, bak watee ulon hukom awaknyan dan ulon ba israel jiteubiet nibak nanggroe awaknyan." nabi musa ngon nabi harun laju geupeubuet peue nyang ka geupeurintah le tuhan ubak gobnyan. nabi musa ka meu-umu 80 thon dan nabi harun 83 thon watee awaknyan geujak meuhadab ubak raja meuse. feureuman tuhan ubak nabi musa ngon nabi harun, "meunyo raja nyan jilakee ubak gata mangat gata peuguet buet nyang ajaeb sibagoe bukeuti, gata yue kheueh bak nabi harun mangat jicok tungkat jih keudroe dan jitiek laju ateuh tanoh dikeue raja. tungkat nyan laju meu-ubah jeuet keu uleue." oh lheurehnyan geujak kheueh laju nabi musa ngon nabi harun jak meuhadab raja dan awaknyan laju geupeubuet peue nyang ka geupeurintah le po teu allah. nabi harun laju geutiek tungkat gobnyan ateuh tanoh dikeue raja dan banmandum peugawee raja nyang na disinan, dan laju tungkat nyan meu-ubah jeuet keu uleue. ngon sabab nyan raja pih laju jihoi

ngon jipeusapat banmandum ureueng-ureueng jih nyang ahli sihe ngon nyang manyang ieleume, dan awaknyan pih laju jipeubuet ngon ieleume gaeb awaknyan lagee nyang ka geupeubuet le nabi harun nyan. awaknyan laju jitikiek tungkat droejih ateuheh jeuet keu uleue. teuma tungkat nabi harun laju jiuwet banmandum tungkat awaknyan. bah pi meunan, raja teutab jimeukreueh ulee dan hana jipakoe peue-peue nyang geupeugah le nabi musa ngon nabi harun, lagee nyang ka ltheueh geupeugah le tuhan. oh ltheuehnyan tuhan meufeureuman lom ubak nabi musa, "raja nyan lumpah that kreueh ulee jih; raja nyan hana jibri bansa israel jijak jitinggai nanggroe meuse nyan. ngon sabab nyan gatajak kheueh raja jak meurumpok ngon gobnyan ban beungoh that, bak watee nyan raja nyan jitreun u krueng nil. gata ba kheueh tungkat nyang hase meu-ubah jeuet keu uleue nyan dan gata preh kheueh raja nyan trok ubak bineh krueng. gata peugah kheueh ubak raja nyan lagee nyoe: tuhan, allah ureueng ibrani, ka geu-utus ulon keu lon jak peusampoe ubak po raja mangat umat gobnyan neubri jijak meueibadat ubak gobnyan di padang pasi. teuma sampoe bak saat nyoe le po raja teutab hana neutem deungoe. sabab nyan kheueh, tuhan meufeureuman lagee nyoe, 'nibak peue nyang ulon peubuet eunteuk, gata teuma tateupeue bahwa ulon kheueh tuhan. ngon tungkat nyoe ulon teuma lon seukok ateuheh muka ie krueng, dan ie krueng nyoe laju meu-ubah jeuet keu darah. eungkot-eungkot teuma mate, dan krueng nyoe meubee khieng, sampoe bansa meuse ka hana jeuet jijieb le ie krueng nyan.' " feureuman tuhan ubak nabi musa, "gata yue kheueh ubak nabi harun mangat jicok tungkat jihnyan laju jiseunuet ateuheh banmandum krueng, lueng-lueng dan bubena kulam ie nyang na lam nanggroe meuse. ie nyan teuma meu-ubah jeuet keu darah, dan bansaboh nanggroe habeh meudarah, meunan cit lam tong-tong kayee, dan guci-guci batee." nabi musa ngon nabi harun laju geupeubuet peue nyang geupeurintah le tuhan ubak gobnyan. dikeue raja dan peugawee-peugawee raja nyan. nabi harun laju geubeuot tungkat geuh dan geuseunuet laju ateuheh krueng nil, dan watee nyan cit teuma ie nyan ka meu-ubah jeuet keu darah. bubena eungkot lam krueng nyan ka habeh mate, dan bee eungkot nyan khieng lumpah na, sampoe ureueng meuse ka hana jeuet jijieb ie nyan. bansaboh nanggroe meuse kana darah. dan di ureueng-ureueng ahli ieleume sihe nanggroe meuse pih hanjitem taloe awaknyan pih laju jipeuget ngon ieleume gaeb jih lagee nyang ka geupeuget le nabi harun nyan. sampoe raja teutab kreueh ulee. lagee nyang ka ltheueh geupeugah le tuhan, raja teutab hana jitem deungoe peue-peue nyang geupeugah le nabi musa ngon nabi harun. teuma di raja nyan laju jiwoe lam meuligoe jih ngon hana jipakoe ubak peue-peue nyang ka geupeubuet le nabi harun nyan mubacut pih. banmandum ureueng meuse laju jikueh uruek bansipanyang bineh krueng keu jimita ie jieb, sabab ie krueng nyan ka hana jeuet jijieb. ka trok tujoh uroe tuhan geukutok krueng nil nyan. dan feureuman tuhan ubak nabi musa, "jak laju

meuhadah ubak raja dan gata peusampoe kheueh peusan ulon nyang lagee nyoe, 'peuidhin kheueh umat ulon jijak meueibadat ubak ulon. meunyoeh hainyan gata tulak, nanggroe nyoe ulon peupeunoh ngon cangguk sibago hukoman. lam krueng nil peunoh ngon cangguk, sampoe cangguk-cangguk nyan teuma jiteubiet lam ie nyan jitamong laju lam meuligoe gata, lam kama eh ngon teupat eh gata, lam rumoh-rumoh peujabat dan rumoh rakyat gata, meunan cit lam teupat tot ruti dan lam banmandum ayan. cangguk-cangguk nyan jigrob-grob na nyang ji-ek ateuheh gata, ateuheh banmandum peujabat dan rakyat gata.' " tuhan meufeureuman ubak nabi musa, "gata yue kheueh ubak nabi harun mangat tungkat jihnyan jireuntang u ateuheh bubena krueng, lueng-lueng ie dan banmandum kulam-kulam ie mangat cangguk-cangguk jiteubiet jipeupeunoh bansaboh tanoh meuse." dan nabi harun laju geuayon tungkat geuhnyan ateuheh bubena ie, dan laju jiteubiet bubena cangguk sampoe ka peunoh bansaboh nanggroe. teuma le tukang peuet ieleume sihe laju jipeuguna banmandum ieleume gaeb nyang na nibak jih, dan meunan cit jipeujeuet cangguk-cangguk akhe jih ka jiteuka bansaboh nanggroe nyan. raja nanggroe meuse nyan laju jihoi nabi musa ngon nabi harun, sira jipeugah lagee nyoe, "meudoa kheueh gata ubak tuhan mangat gobnyan geupeugadoh bubena cangguk-cangguk nyoe, oh ltheuehnyan baro kheueh ulon bri bansa gata keu jijak peuseumah keureubeun ubak tuhan." geujaweeb le nabi musa, "deungan ate nyang seunang ulon meudoa keu po raja. peuteutab kheueh watee jih, teuma di ulon laju lon meudoa keu po raja, keu banmandum peujabat dan rakyat. dan po raja teuma geupeubeubaih nibak banmandum cangguk-cangguk nyan, dan hana nyang tinggai bahpi meusaboh, teukeucuali nyang na tinggai nyang lam krueng nil." jaweeb raja, "meudoa kheueh keu ulon singoh." kheun nabi musa, "ulon teuma lon peubuet peue nyang po raja lakee. teuma po raja neutepeue bahwa hana allah nyang lagee tuhan, allah kamoe. gobnyan geupeubeubaih po raja, banmandum peujabat dan rakyat nyang ka jipeukaru le cangguk-cangguk nyan. hana le cangguk-cangguk nyan lam rumoh-rumoh, teukeucuali nyang tinggai lam krueng nil." oh ltheueh geukheun nyan nabi musa ngon nabi harun laju geutinggai raja. oh ltheuehnyan nabi musa laju geumeudoa ubak tuhan mangat bubena cangguk nyan geusampoh banmandum nyang ka teuka ateuheh po raja. tuhan laju geuteurimong ngon geukabui doa nabi musa, dan bubena cangguk nyang na di rumoh-rumoh, nibak leuen-leuen rumoh dan nyang na di ladang banmandum mate. ureueng meuse laju jipeusapat banmandum bangke-bangke cangguk nyan sampoe meutamom meukuyan-kuyan, bansaboh nanggroe habeh mubee khieng. watee jingieng le raja bahwa cangguk-cangguk nyan ka habeh mate, laju ji-iengkeue ubak hana jih le raja nyan dan ulee jih meutamah-tamah kreueh. dan lagee nyang ka ltheueh geupeugah le tuhan, raja teutab hana jipakoe peue-peue nyang geupeugah le nabi musa ngon nabi harun. feureuman tuhan ubak nabi musa, "gata yue kheueh ubak nabi harun mangat jiseukok tanoh

ngon tungkat jihnyan, dan laju bansaboh nanggroe meuse jibeudoh abee meu-ubah jeuet keu jamok." ban geudeungoe haba nyan nabi harun laju geuseukok tanoh ngon tungkat geuh, dan banmandum abee nyang na lam nanggroe meuse laju meu-ubah jeuet keu jamok dan di jamok nyan laju jiramien ateuheh manusia dan beulatang. le ureueng-ureueng ahli ieleume sihe di meuse ji-useuha ngon ieleume gaeb nyang na bak jih keu jipeujeuet jamok-jamok, goenyoe awaknyan hana meuhase. dipat mantong bansaboh nanggroe na jamok, akhe jih banmandum ureueng ahli ieleume sihe nyan laju jipeugah ubak raja, "nyoe kheueh buet po teu allah." teuma le raja nyan teutab kreueh ulee, dan saban lagee nyang ka geupeugah le tuhan, raja nyan teutab hana jipakoe ubak peue-peue nyang ka geupeugah le nabi musa ngon nabi harun. tuhan meufeureuman ubak nabi musa, "gata jak kheueh singoh beungoh ban seuboh that watee raja nyan jijak ukrung, dan gata peugah ubak raja nyan haba ulon nyoe, 'neupeuidhin kheueh umat ulon jijak meuebadat ubak ulon. meunyo gata tulak, ulon teuma lon peutreun lalat ubak gata, ubak banmandum peujabat dan ubak rakyat gata. rumoh-rumoh ureueng meuse, meunan cit bansaboh nanggroe peunoh ngon lalat. teuma keu daerah gosyen na keucuali, bak teupmat umat ulon tinggai. disinan hana lalat, mangat gata tateupeue bahwa ulon kheueh tuhan, nyang ka lon peubuet nyan. ulon teuma lon peubeda umat ulon ngon rakyat gata. buet nyang ajaeb nyan teuka singoh." " tuhan geupetreun lalat nyang lumpah jai ubak meuligoe raja dan ubak rumoh-rumoh peujabat. bansaboh nanggroe meuse lumpah that meudeurita sabab le lalat-lalat nyan. oh ltheuehnyan raja laju geuhoi nabi musa ngon harun dan laju geupeugah, "jak kheueh peuseumah keureubeuen ubak allah gata, teuma bak nanggroe nyoe mantong." "nyang get jih bek," jawueb nabi musa, "sabab ureueng nanggroe meuse meuras teusinggong watee jingiang nyang kamoe peuseumah nyoe, dan pasti kamoe nyoe jigelawa ngon batee sampoe mate. kamoe haroh kamoe jak u padang pasi nyang jioh jih lhee uroe meuneujak keu kamoejak peuseumah keureubeuen ubak tuhan allah kamoe, lagee nyang ka geupeurintah ubak kamoe." kheun raja, "get kheueh, meunyo meunan, ulon bri gata tajak u padang pasi mangat gata peuseumah keureubeuen keu tuhan, allah gata, asai gata hana tajak jioh. ingat, doa kheueh keu ulon!" jawueb nabi musa, "oh ka leupah ulon jak, kamoe laju kamoe jak meudoa ubak tuhan mangat singoh beungoh banmandum lalat nyan jitinggai po raja, banmandum peujabat dan rakyat. teuma nyang kamoe lakee bek le neutipee kamoe, dan bek neutam-tam bansa israel jijak peuseumah keureubeuen keu tuhan." nabi musa laju geutinggai raja, dan laju geumeudoa ubak tuhan, dan tuhan laju geukabui doa nabi musa. lalat-lalat nyan laju jipo jitinggai raja, banmandum peujabat dan rakyat ba. hana meusaboh lalat pih nyang na mantong tinggai. teuma goenyoe di raja teutab kreueh ulee dan teutab hana jibri idhin bansa israel nyan jijak nibak nanggroe meuse nyan. dan feureuman tuhan ubak nabi musa, "gata jak kheueh laju meuhadab raja, dan gata peugah

ubak raja nyan peusan tuhan, allah ureueng ibrani lagee nyoe: 'peubiyeu mantong umat ulon nyan jijak mangat jihnyan jeuet jimeubakti ubak ulon. meunyo gata hana tatem peulheueh awaknyan, ulon teuma lon peutreun bala peunyakat nyang paleng hebat ateuheh banmandum beulatang peulara gata, guda, keuleudee, unta, leumo, bubiri dan kameng gata. ulon kupileh beulatang nyang jipeulara le ureueng israel ngon beulatang nyang jipeulara le ureueng meuse, nibak beulatang atra ureueng israel hana meusaboh pih nyang mate. ulon, tuhan, ka lon peuteutab bahwa singoh beungoh laju lon peubuet hai nyan.' " oh singoh beungoh tuhan laju geupeubuet lagee nyang ka ltheueh geumeujanji nyan, bubena beulatang nyang jipeulara le bansa meuse habeh mate, dan beulatang peulara atra ureueng israel meusaboh pih hana nyang mate. raja laju jitanyong peue nyang ka teujadi, laju jipeugah ubak raja nyan bahwa meunyo beulatang atra ureueng israel hana meusaboh pih nyang mate. teuma di raja nyan teutab kreueh ulee dan teutab hana jitem peulheueh bansa israel nyan mangat jeuet jijak. tuhan meufeureuman ubak nabi musa ngon nabi harun lagee nyoe, "jakkok kheueh mupadub boh reugam abee nyang na lam dapu. gata ba laju ukeue raja, oh trok keunan, dikeue raja nyan nabi musa laju jisipreuk abee nyan u manyang. dan abee nyan laju jipo dan meutabu bansaboh nanggroe meuse. nibak manusia dan beulatang abee nyan laju jipeuteuka cumuet-cumuet nyang beureutoh jeuet keuluka dan jiteubiet danoh." dan nabi musa ngon nabi harun laju geucok abee lagee nyang ka geuyue le tuhan ubak gobnyan nyan, oh ltheuehnyan laju geujak meuhadab ubak raja. dan nabi musa laju geusipreuk abee nyan u manyang. ateuheh manusia dan beulatang laju jitimoh cumuet-cumuet nyang beureutoh dan laju luka jeuet keudano. bubena ureueng nyang ahli ieleume sihe hana hase jihadab nabi musa sabab bansaboh tuboh jih ka habeh peunoh jitimoh cumuet meudano saban cit lagee ureueng-ureueng meuse nyang laen. teuma tuhan teutab geupeujeuet raja nyan kreueh ulee, dan lagee nyang ka ltheueh geupeugah le tuhan, bahwa raja nyan teutab hana jipakoe peue-peue nyang geupeugah le nabi musa ngon nabi harun. tuhan meufeureuman ubak nabi musa, "singoh banbeungoh that gatajak kheueh laju meuhadab ubak raja, dan gata peusampoe laju ubak raja nyan bahwa tuhan, allah ureueng ibrani geupeugah lagee nyoe: 'peulheueh kheueh laju umat ulon mangat awaknyan jeuet jijak meuebadat ubak ulon. goenyoe ulon peutreun beuncana kon mantong ateuheh mandum peujabat dan rakyat gata, beuncananyan lon peutreun teuma ateuheh gata, mangat gata tateupeue bahwa hana nyang hase jilawan ulon bansigom donya. seukira jih ulon keuneuk meuhukum gata dan rakyat gata deungon peunyakat, pasti gata banmandum habeh binasa. teuma gata ulon peubiyeu udeb, mangat ulon jeuet lon peudeuh ubak gata kuasa ulon, sampoe nan ulon meutamah meusyeuhu bansigom bumoe. bahpi meunan, gata mantong teutab manyang ate dan hana gata peuidhin umat ulon jijak. singoh beungoh, bak watee nyang saban, ulon teuma ku

peutreu njeuen eeh nyang paleng hebat, lagee nyang gohlohm na teujadi di nanggroe meuse phon yoh dilee sampoe saat nyoe. dan peurintah kheueh laju mangat banmandum beulatang peulara dan atra milek gata nyang na diluwa jiba ubak tempat nyang aman. banmandum manusia dan beulatang peulara nyang na diluwa dan hana hase jimusom laju mate jitingkeh le ujeuen eeh." na meupadubdroe ureueng lamkawan peujabat jitakot ubak peue nyang geupeugah le tuhan. awaknyan jiba banmandum namiet dan beulatang nyang jipeulara le awaknyan laju jipeutamong lam rumoh mangat teupeusie nibak beuncana nyan. teuma nyang laen hana jipakoe peue nyang ka geupeuingat nyan dan jipeubiyeu mantong banmandum namiet ngon beulatang nyang jipeulara nyan di blang naleueng. dan tuhan laju meufeureuman ubak nabi musa, "beuot kheueh laju jaroe gata u ateuhe, dan ujeuen eeh laju jitreu bansaboh tanoh nanggroe meuse. ujeuen nyan jitingkeh ateuhe manusia, beulatang peulara dan banmandum sinaman nyang na di lampoh." nabi musa laju geubeutot tungkat gobnyan u ateuhe, dan tuhan laju geupeutreu gogo ngon ujeuen eeh, meunan cit deungon geulanteue jisama bumoe. tuhan laju geupeutreu ujeuen eeh nyang lumpah that brat dan dahsyat jisambong teuma ngon geulanteue nyang jisama keudeh keunoe. nyan kheueh ujeuen eeh nyang paleng hebat nyang ka jirasa lam seujarah nanggroe meuse. bansaboh nanggroe ujeuen eeh nyan laju jipeuranab peue-peue nyang na di blang, meunan cit ngon manusia dan beulatang peulara, habeh mandum binasa. banmandum sinaman nyang na di lampoh habeh rusak dan bubena bak kayee habeh jipeureubah sapan sapea. teuma daerah gosyen, tempat tinggai ureueng-ureueng israel, nyang hana keunong ngon ujeuen eeh. dan raja laju jitawok nabi musa ngon nabi harun sira jipeugah, "ulon nyoe ka meudesya. tuhan kheueh nyan beutoi, ulon ngon rakyat lon ka kamoe peubuet salah. meudoa kheueh ubak tuhan gata; kamoe kaseb meudeurita sabab gogo ngon ujeuen eeh nyoe. ulon teuma lon peulheueh ho nyang gatajak. gata bekle tinggai disinoe." geupeugah le nabi musa ubak raja, "meunan ulon trok u luwa banda, ulon teuma lon bot jaroe lon meudoa ubak tuhan. gogo jipioh dan ujeuen eeh teuma reuda, mangat po raja neuteupeue bahwa bumoe nyoe na kheueh atra tuhan. teuma ulon kuteupeue bahwa po raja dan banmandum peujabat gohlohm cit jitakot ubak tuhan allah." sinaman jeurami meunan cit sinaman jelai teuma ranab, sabab rami teungoh meubungong, dan jelai teungoh meuasoe. teuma gandom ngon mubagoe rupa kacang hana rusak sabab gohtrok bak musem. dan nabi musa laju geutinggai raja disinan dan geujak uluwa banda; disinan laju geubeuot jaroe geuh keu geumeudoa ubak tuhan. watee nyan cit teuma geulanteue jipioh, ujeuen eeh dan ujeuen biana. watee raja jikalon peue nyang teujadi, raja nyan laju ji-iengkeue ubak janji jih dan meudesya lom. raja dan peujabat jihnyan teutab jimeukreueh ulee. lagee nyang ka geufeureuman le tuhan meulala nabi musa, raja teutab hana jibri idhin ureueng israel nyan jitinggai nanggroe meuse. feureuman nyan ubak nabi

musa, "gata jak laju meuhadab ubak raja. ulon ka lon peujeuet jihnyan dan banmandum peujabat jih kreueh ulee, mangat ulon jeuet lon keureuja buet-buet nyang ajaeb lamkawan awaknyan, dan mangat gata jeuet tameuhaba ubak aneuek cucoe gata pakriban ulon peumeuen bansa meuse deungon buet-buet nyang ajaeb nyan. teuma banmandum gata tateupeue bahwa ulon kheueh tuhan." ban geudeungoe haba nyan nabi musa ngon nabi harun laju geujak meuhadab raja oh trok keunan laju geupeugah lagee nyoe, "tuhan, allah bansa ibrani, meufeureuman, 'trok an pajan gata hana tatem tundok ubak ulon? bah kheueh umat ulon jijak, mangat awaknyan jeuet jimeu iebadat ubak ulon. meunyoee gata teutab cit gata tulak, hana gata bri umat ulon nyan jijak meu iebadat ubak ulon, singoh beungoh teuma lon kirem daruet u nanggroe gata. bansaboh rhueng bumoe habeh teutob ngon daruet nyang lumpah that jai nyan. mandum sinaman nyang mantong na tinggai, meunan cit bak-bak kayee nyang hana habeh binasa le ujeuen eeh, teuma jipeuhabel le daruet-daruet nyan. meuligoe gata, rumoh-rumoh bubena peujabat meunan cit deungon rumoh rakyat peunoh ngon daruet. beuncana nyan teuma leubeh hebat nibak peue nyang ka ltheueh geurasa le indatu gata.' " oh ltheueh geupeugah nyan nabi musa geubalek laju geujak. jipeugah kheueh laju le mandum peujabat ubak raja, "trok anpajan ureueng nyan jipeususah geutanyoe, hai po? neupeubiyeu mantong ureueng israel nyan jijak meueibadat ubak tuhan, allah awaknyan. neungieng kheueh nanggroe tanyoe nyoe ka habeh hanco!" dan nabi musa ngon nabi harun jitawok lom le raja keu geujak meuhadab gobnyan, kheun raja ubak mandua droe nabi nyan, "gata jeuet gatajak keu meu iebadat ubak tuhan, allah gata. teuma jinoenyoe ulon tanyong soe-soe mantong nyang na lamkawan gata nyang jijak meusajan gata?" geujaweueb le nabi musa, "banmandum kamoe, bah kheueh nyan muda meunan cit nyang tuha. kamoe teuma kamoe ba mandum aneuek kamoe, banmandum leumo, bubiri, dan kameng kamoe, sabab kamoe haroh kamoe peuna saboh peurayaan nyang paleng rayeuk keu kamoe horeumat tuhan." kheun raja ubak nabi musa, "hana mungkin kamoe bri gata banmandum ureueng-ureueng inong dan aneuek-aneuek gata! nyang gata lakee nyan saban cit deungon meuharab ulon lakee ubak tuhan mangat geubri beureukat ubak gata. ka jeulaih nibak ulon bahwa gata kana niet nyang jeuhet. han jeuet! nyang jeuet na kheueh ureueng-ureueng agam mantong jijak meu iebadat ubak tuhan, meunyoee gata beutoi-beutoi keuneuk meu iebadat kong!" deungon haba nyan nabi musa ngon nabi harun laju jise nibak meuligoe, dan tuhan laju meufeureuman ubak nabi musa, "tunyok laju jaroe gata ateuhe tanoh meuse. bubena daruet teuma jiteuka dan jijak pajoh banmandum sinaman nyang na mantong tinggai oh ka ltheueh jitreu ujeuen eeh." nabi musa laju geubeuot jaroe geuh dan tuhan laju geupeutreu angen timu jipeupot lam nanggroe nyan siuroe-simalam. dan watee karab beungoh angen nyan laju jiba daruet-daruet nyang hana teukira jai jih, akhe jih bansaboh nanggroe ka habeh

peunoh ngon daruet. gohlom na ureueng kalon daruet-daruet biet-biet that jai lagee nyan bageo, dan oh ka ltheuh nyan pih hai nyang lagee nyan hana teu-ulang le. bansigom muka tanoh ka habeh jitob le daruet sampoe itam deuh jih. daruet-daruet nyan laju jiseuba peue-peue mantong nyang hana habeh keunong watee jitron ujeuen eeh, meunan cit deungon boh-boh kayee nyang na dicong bak. bansaboh tanoh meuse hana nyang ijo le deuh jih bah kheueh nyan bak-bak kayee meunan cit deungon sinaman-sinaman peunula. ban jingengi keuadaan nyang luwa biasa yo jihnyan, raja laju jitawok nabi musa ngon nabi harun sira jipeugah lagee nyoe, "ulon nyoe ka meudesya teuhadab tuhan, allah gata dan meunan cit teuhadab gata. peumalphon kheueh desya ulon keu goenyo, dan meudoa kheueh ubak tuhan, allah gata, mangat gobnyan geucok nibak ulon hukaman nyang jipeumate nyoe." nabi musa laju geutinggai raja disinan dan geujak meudoa ubak tuhan. dan tuhan laju geu-ubah ulee angen jeuet keu angen barat nyang lumpah kancang. bubena daruet nyan habeh jipot le angen dan laju rhot lam laot geulagah. meusaboh pih hana nyang tinggai bansaboh tanoh meuse, teuma tuhan teutab geupeujeuet raja nyan teutab kreueh ulee, dan le raja nyan teutab hana jipeubiyeu ureueng israel nyan jeuet jijak. feureuman tuhan ubak nabi musa, "beuot kheueh jaroe gata u ateueh, dan tanoh nanggroe meuse teuma jiteuka seupot glab bansalam le." nabi musa laju geubeuot jaroe gobnyan u ateueh, dan lhee uroe treb jih bansaboh nanggroe meuse jiteuka seupot glab bansalam le. ureueng meuse hana hase jikeumalon peue mantong dan watee nyan awaknyan hana meusidroe pih nyang na jijak ho-ho mantong. teuma meunyo lam rumah-rumah ureueng israel teutab trang. dan raja laju jitawok nabi musa sira jipeugah lagee nyoe, "gata jeuet gatajak meue iebadat ubak tuhan gata. ureueng-ureueng inong dan aneuek-anuek manyak jeuet jijak sajan. teuma meunyo leumo, bubiri dan kameng gata hana jeuet gata ba." geujaweeb le nabi musa, "meunyo meunan po raja neubri keu kamoe beulatang peulara keu kamoe peuseumah ngon kamoe keureubeuen nyang teutot ubak tuhan, allah kamoe. banmandum beulatang nyang kamoe peulara haroh kamoe ba sajan; meusaboh pi hana jeuet kamoe tinggai. nibak beulatang peularanyan kamoe pileh nyang toh nyang jeuet teupeuseumah ubak tuhan allah kamoe. disideh hai nyan kamoe teupeue beulatang peulara nyang toh nyang jeuet kamoe peuseumah." tuhan teutab geupeujeuet raja nyan teutab kreueh ulee dan hana jibri idhin bansa israel nyan jijak. kheun raja ubak nabi musa, "jak weh keudeh, bekna le dikeue ulon nyoe! bek sampoe ulon ngengi gata na disinoe le! meunyo sampoe na ulon ngengi lom muka gata, gata teuma mate!" lagee kheun po raja, "geupeugah le nabi musa, "po raja pasti hana neungieng le ulon nyoe." tuhan meufeureuman ubak nabi musa, "ulon teuma lon peuteuka saboh bala teuk ateueh raja nanggroe meuse dan rakyat jihnyan. oh ka ltheuhnyan baro kheueh jibri keugata banmandum gatajak tatinggai nanggroe jih nyan. dan gata banmandum ji-use nibak nanggroe jih nyan. sabab nyan jak peugah kheueh ubak bansa

droe gata israel; yue kheueh ubak awaknyan mangat jilakee piasan pirak ngon meuh nibak wareh silingka awaknyan." tuhan geupeujeuet ureueng meuse nyan hana kliet dan murah ate ateueh ureueng israel. dan nabi musa jeuet keu ureueng nyang paleng jihoreumat le banmandum peujabat dan siluroh rakyat nanggroe meuse. nabi musa laju geupeugah ubak raja, "nyoe kheueh feureuman tuhan, 'kira-kira watee jih teungoh malam ulon teuma lon jak-jak bansaboh tanoh meuse. tieb-tieb aneuek agam nyang tuha nyang lahe di tanoh meuse laju mate, phon nibak aneuek raja meuse sampoe ubak aneuek namiet inong nyang jigileng gandom. meunan cit aneuek phon nyang jipeulahe le banmandum beulatang nyan pih mate. bansigom nanggroe meuse teuma teudeungoe su ureueng meumo ba-e nyang meuweueh-weueh dan teuga-teuga, lagee nyang gohlom na teujadi dan hana teuma teujadi le. teuma nibak ureueng-ureueng israel, bah kheueh nyan ateueh manusia meunan cit ateueh beulatang peulara nyan hana teuma jipeukaru. ngon na lagee nyan gata tateupeue beuwa ulon kheueh tuhan, lon peujeuet meulaen ureueng meuse ngon ureueng israel." akhe jih geupeugah le nabi musa, "banmandum peujabat po raja teuma teuka dan jisujut dikeue ulon dan jilakee mangat ulon ngon bansa ulon kamoe tinggai nanggroe nyoe, oh ltheuhnyan baro kheueh kamoe jak." dan ngon beungeh raya nabi musa laju geutinggai raja. tuhan meufeureuman ubak nabi musa, "raja hana jipakoe peue-peue nyang gata peugah nyan, mangat ulon hase ulon peubuet nyang leubeh jai buet ajaeb bansaboh nanggroe meuse." nabi musa ngon nabi harun laju geukeureuja buet ajaeb nyan dikeue raja. teuma tuhan teutab geupeujeuet raja nyan kreueh ulee, sampoe raja nyan hana jibri idhin ubak ureueng israel jitinggai nanggroe meuse nyan. tuhan meufeureuman ubak nabi musa ngon nabi harun di nanggroe meuse, "buleuen nyoe ka jeuet keu buleuen nyang keu phon nibak thon keunira gata. jak peusampoe kheueh peurintah nyoe ubak banmandum umat israel: bak tanggai siploh buleuen nyoe, tieb-tieb ureueng agam haroh jisie saboh aneuek bubiri keu jimakheun meusajan ngon keuluwarga jih. meunyo anggota keuluwarga nyan cit bacut sampoe hana hase jipeuhabeh saboh aneuek bubiri nyang ka ltheueh teusie nyan jipajoh, dan keuluwarga nyan meunan cit deungon kawom nyang paleng toh jeuet jipajoh meusajan-sajan aneuek bubiri nyan. aneuek bubiri nyan haroh teubagi meunurot jeumeulah ureueng nyang pajoh atra nyan. gata jeuet gata pileh bubri atawa kameng, teuma haroh nyang agam, umu jih sithon dan hana nyang meucupa. gata haroh takeubah sampoe trok tanggai peuet blaih. bak uroe nyan, watee seupot uroe, banmandum ureueng israel haroh jisie aneuek bubiri nyan. cok darah beulatang nyan bacut siliek laju bak mandua tameh pintoe dan bak ambang bagian ateueh pintoe rumah tempat awaknyan makheun atranyan. malam nyan cit teuma sie beulatang nyan haroh teutot laju jipajoh ngon gulee phet dan ruti nyang hana meurago. aneuek bubiri nyan haroh teutot banmandum, leungkab deungon ulee jih, gaki jih dan asoe pruet jih. pajoh kheueh sie nyang ka

teutot nyan, bek na nyang pajoh meuntah-meuntah atawa jireuboh. bek na nyang tinggai bahpi mubacut sampoe an beungoh uroe; meunyo na seueh jih, atra nyan haroh teutot sampoe habeh. watee makheun atra nyan gata haroh ka tasok peukayan nyang leungkab keu gata jak, meunan cit seuloob bak gaki dan tungkat bak jaroe. gata haroh gata makheun nyang bagai-bagai, nyan kheueh peurayaan paskah keu teuhoreumat ulon, tuhan. bak malam nyan ulon teuma lon jak-jak bansaboh tanoh nanggroe meuse, dan ulon poh mate bubena aneuek agam nyang tuha, bah kheueh nyan manusia, meunan cit deungon beulatang. ulon teuma lon hukom banmandum ilah nyang na di nanggroe meuse, sabab ulon kheueh tuhan. darah nyang na bak pintoe rumoh gata teuma jeuet keu tanda nibak rumoh-rumoh teumpat tinggai gata. meunyo ulon ngieng darah nyan, gata ulon liengkeue dan hana ulon peubinasabak watee ulon hukom nanggroe meuse. uroe nyan haroh gata peuingat sibagoe uroe raya keu tuhan. dan keu seulanjut jih uroe nyan haroh gata peuraya tieb-tieb thon." feureuman tuhan, "tujoh uroe treb jih gata hana jeuet gata pajoh ruti nyan meurago. bak uroe nyang keu phon banmandum rago haroh teupeuteubiet lam rumoh gata, sabab meunyo nyang treb jih tujoh uroe nyan na ureueng nyang jipajoh ruti nyang meurago, ureueng nyan hana jeuet le teu anggab anggota umat ulon. bak uroe nyang phon, dan meunan cit bak uroe nyang keutujoh, gata haroh meusapat mangat gata meu iebadat. bak uroe nyan gata hana jeuet gata peubuet buet-buet peue mantong seulaen nyang peureulee keu gata peusiab peunajoh. bak uroe nyan banmandum bansa gata ulon peuteubiet nibak nanggroe meuse. sababnyan na kheueh keu siumu masa, tieb-tieb thon, uroe nyan haroh gata peuingat sibagoe uroe raya. bak buleuen nyang phon, nibak phon tanggai peuet blaih malam, sampoe ubak tanggai dua ploah sa malam, gata hana jeuet gata pajoh ruti nyang meurago. tujoh uroe treb jih nyan banmandum rago haroh gata peuteubiet lam rumoh gata. ureueng israel atawa ureueng aseng nibak watee peurayaan nyan laju jipajoh ruti nyang meurago, ureueng nyang lageuyan hana le teu anggab anggota umat ulon." nabi musa laju geutawok mandum peumimpin israel sira geupeugah ubak awaknyan, "jak kheueh dan gata cok kheueh keu keuluwarga gata saboh aneuek bubiri keu peurayaan paskah. gata cok kheueh saboh ikat on sob, ceulob laju lam baskom nyang measoe darah bubiri nyan, dan darah nyan gata siliek laju bak mandum dua boh tameh pintoe meunan cit bak ambang pintoe bagian ateuh rumoh gata. sampoe an beungoh bek na nyang tinggai rumoh. watee tuhan geujak jak-jak bansaboh nanggroe nyoe keu geujak poh mate ureueng-ureueng meuse, tuhan teuma geungieng darah nyang na meusilik bak bandua boh tameh dan ambang pintoe rumoh gata; dan gobnyan geujak laju holaen dan hana geubri malaikat mawot jitamong lam rumoh gata keu geujak poh mate gata. gata ngon aneuek-aneuek gata haroh gata taat ubak peurintah nyan keu siumu masa. meunyo gata ka tatamong lam nanggroe nyang ka geupeujanji le tuhan keu gata, gata haroh tapeuna upacara nyang lagee nyoe.

meunyo aneuek-aneuek gata jitanyong, 'peue makna jih upacara nyoe?' gata haroh tajawueb, 'nyoe keureubeuen paskah keu ta horeumat tuhan, sabab rumoh-rumoh ureueng israel di nanggroe meuse geuliengkeue le gobnyan, watee geujak poh mate bubena aneuek agam ureueng meuse nyang tuha, dan geutanyoe geupeubiyeue udeb!' " dan jimeuteutot kheueh ureueng-ureueng israel sira jiseumeumah. dan awaknyan pih laju jikak jipeubuet laju peue-peue nyang ka geupeurintah le tuhan ubak nabi musa ngon nabi harun. watee jih teungoh malam tuhan habeh banmandum geupoh mate aneuek agam nyang tuha nibak bansa meuse, phon nibak aneuek raja, sampoe ubak aneuek-aneuek ureueng nyang teuhukom dalam glab. meunan cit banmandum beulatang peulara nyang phon lahe pih geupoh mate. bak malam nyan, raja, banmandum peujabat dan siluroh ureueng nanggroe meuse teubeudoh nibak teumpat eh. bansaboh nanggroe meuse laju teudeungoe su ureueng moba-e ngon su nyang teuga sabab hana meusaboh rumoh pih nyang hana aneuek mate aneuek agam nyang phon lahe. malam nyan cit teuma, raja laju geutawok nabi musa ngon nabi harun sira jipeugah lagee nyoe, "jakweh laju nibak teumpat nyoe, gata banmandum! tinggai laju nanggroe ulon nyoe! jak kheueh laju gata pujo allah gata lagee nyang gata lakee. ba kheueh laju banmandum leumo, bubiri dan kameng gata, dan jak kheueh laju! dan gata lakee kheueh beureukat keu ulon teumal!" ureueng meuse laju jipaksa ubak ureueng israel mangat bubagaih jitinggai nanggroe jihnyan. kheun awaknyan, "kamoe banmandum teuma mate meunyo gatanyoe tajak nibak nanggroe kamoe!" dan ureueng-ureueng israel laju jicok talam nyang ka measoe ngon teupong teulawok ruti nyang hana meurago, jibalo laju ngon ija, oh lleueh nyan laju jigulam sira jiba. dan awaknyan pih ka jipeubuet peue nyang ka geupeugah le nabi musa, jilakee piasan meuh ngon pirak dan peukayan nibak ureueng meuse. tuhan ka geupeujeuet ureueng meuse murah ate ubak ureueng israel, akhe jih le ureueng-ureueng meuse nyan laju jibri peue-peue nyang jilakee le ureueng israel. deungon na lagee nyan le ureueng-ureueng israel ka jiba atra keukayaan ureueng meuse teupeuteubiet nibak lam nanggroe nyan. ureueng israel laju beurangkat sira jikak ngon gaki nibak banda raamses u banda sukot. jeumeulah awaknyan na 600.000 droe, nyan hana teuitong ureueng inong dan aneuek-aneuek miet. awaknyan jiba leumo nyang jai that, bubiri dan kameng. dan ureueng-ureueng aseng deungon jeumeulah nyang rame pih na jikak sajan. awaknyan laju jitot ruti nyang hana meurago nibak teupong nyang ka teulawok nyang awaknyan ba nibak nanggroe meuse. awaknyan jiuse nibak nanggroe meuse nyan ngon teugeusa-geusa, sampoe hana hase jipeusiab beukai nibak rot euh raya. bansa israel ka tinggai di nanggroe meuse 430 thon treb jih. bak uroe nyang akhe nibak thon nyang keu 430 thon nyan, banmandum saf-saf umat tuhan laju jitinggai nanggroe meuse. malam nyan tuhan teutab geujaga keu geuintat awaknyan jiteubiet nibak nanggroe meuse. dan nyan kheueh teuma malam nyang

keu siumu masa malam jipeuseumah ubak tuhan sibagoe malam peuingat. bak malam nyan umat israel haroh meujaga-jaga. tuhan meufeureuman ubak nabi musa ngon nabi harun, "nyoe kheueh atoran-atoran paskah nyang haroh gata peubuet. ureueng aseng hana jeuet jipajoh eungkot sie bubiri nyang teupeuseumah keu paskah. teuma meunyo namiet nyang gata bloe jeuet jipajoh sie paskah nyan, meunyo namiet nyang gata bloe nyang ka ltheueh teupeukatan. ureueng jame nyang teuka atawa ureueng tueng upah hana jeuet jipajoh eungkot sie paskah nyan. banmandum eungkot sie bubiri nyan haroh teupajoh lam rumoh, dan hana jeuet teupeuteubiet uluwa. bek teupeupatah meusikrek pih nibak tuleueng jih nyan. banmandum umat israel wajib jipeuna khanuri paskah nyan. ureueng nyang hana teupeusunat hana jeuet jipajoh peunajoh bak teupat khanuri nyan. meunyo sidroe ureueng aseng nyang ka treb tinggai teutab ngon gata keuneuk jipeuna khanuri paskah keu jihoreumat ulon, tuhan, banmandum ureueng agam nyang na lam keuluwarga ureueng nyan haroh teuleubeh ilee teupeukatan. oh ka ltheuehnyan ureueng nyan baro kheueh teuanggab lagee ureueng israel aseuli, dan jeuet jiseutot lam peurayaan paskah. peuraturan nyang lagee nyan keu ureueng israel aseuli pih saban dan ureueng-ureueng aseng nyang na tinggai teutab lamkawan gata." banmandum ureueng israel taat dan jipeubuet mandum lagee nyang ka geupeurintah le tuhan ubak nabi musa ngon nabi harun. bak uroenyang tuhan ka geuba banmandum ureueng israel jiteubiet nibak nanggro meuse. tuhan meufeureuman ubak nabi musa, "peuseumah kheueh banmandum aneuk agam nyang tuha keu ulon. tieb-tieb aneuk agam nyang tuha nibak ureueng israel, dan tieb-tieb beulatang peulara nyang agam nyang phon lahe, na kheueh atra ulon." nabi musa geupeugah ubak bansa israel, "nibak uroenyoe tuhan geupeubeubaih gata ngon kuasa gobnyan nyang raya, sampoe gata banmandum hase tateubiet nibak nanggro meuse, bak teupat gata jicok keubudak. sababnyan, peuingat kheueh uroe nyoe. bek gata pajoh ruti nyang hana meurago. bak uroenyoe, tangingai sa buleuen abib atawa buleuen sa, gata tatinggai nanggro meuse. deungon meusumpah tuhan ka geumeujanji ubak indatu gata keu geuseurah ubak gata nanggro bansa kanaan, het, amori, hewi dan yebus. oh ka ltheueh tuhan geuba gata u nanggro nyang kaya dan tanoh jih nyang subo nyan, tieb-tieb thon bak buleuen abib, gata haroh gata peuna upacara nyang lagee nyoe. tujuh uroe treb jih gata haroh tapajoh ruti nyang hana meurago, dan bak uroe nyang keutujuh haroh gata peuna peurayaan keu teuhoreumat ubak tuhan. treb jih tujuh uroe gata hana jeuet tapajoh ruti nyang meurago, dan bansaboh nanggro gata hana jeuet na rago atawa peue-peue mantong nyang meurago. watee uroe phon teupurna peurayaan nyan haroh gata peugah ubak aneuk gata nyang agam bahwa banmandum nyang gata peubuet nyan sabab mandum nyang ka ltheueh geupeubuet le tuhan keu gata bak watee gata tatinggai nanggro meuse. peurayaan nyoe sibagoe peuingat ubak gata lagee tanda nyang teukalon

nibak jaroe atawa bak keuneng gata. peurayaan nyoe sibagoe teupeuingat ubak gata keu sabe gata meututoe dan gata meurno hukum-hukum tuhan, sabab tuhan ka geupeuteubiet gata nibak nanggro meuse deungon kuasa gobnyan nyang raya. peuraya kheueh khanuri paskah nyoe tieb-tieb thon bak watee nyang ka teupeuteuntee keu nyan." nabi musa geupeugah ubak bansa israel, "tuhan teuma geu intat gata u nanggro kanaan nyang ka geupeujanji ngon sumpah ubak gata dan indatu gata. oh ka ltheueh tanoh nyan jeuet keu hak milek gata, gata haroh tapeuseumah tieb-tieb aneuk tuha gata nyang agam dan tieb-tieb aneuk beulatang nyang agam nyang phon that lahe. banmandum nyan na kheueh atra tuhan, teuma meunyo tieb-tieb aneuk keuleudee agam nyang phon lahe atra nyan haroh teutuboh nibak tuhan deungon cara teukeureubeuen saboh aneuk bubiri sibagoe geunantoe jih. meunyo keuleudee nyan hana gata tem tuboh, takue keuleudee nyan haroh gata wiet. tieb-tieb aneuk gata nyang agam nyang phon that lahe haroh teutuboh. meunyo bak saboh watee singoh aneuk gata jiteumanyong peue makna jih banmandum nyan, gata haroh tajawueb lagee nyoe, 'deungon kuasa nyang raya tuhan ka geuba geutanyoe tateubiet nibak nanggro meuse, bak teupat geutanyoe jiboh keunamiet. watee raja nanggro meuse jimeukreueh uleu dan hana jitem peulheueh geutanyoe mangat tajak, tuhan laju geupoh mate tieb-tieb aneuk nyang tuha di meuse, bah kheueh nyan aneuk manusia meunan cit ngon aneuk beulatang. nyang kheueh sabab jih geutanyoe takeureubeuen ubak tuhan tieb-tieb beulatang peulara nyang agam nyang phon that lahe, teuma tanyoe tateuboh aneuk-aneuk geutanyoe nyang tuha.' keubiasaan nyan ka jeuet keupeuingat nibak geutanyoe lagee tanda nyang na teuikat bak jaroe atawa nibak dho geutanyoe. deungon lagee nyan geutanyoe teuma teutab geupeuingat bahwa tuhan ka geupeuteubiet geutanyoe nibak nanggro meuse ngon kuasa gobnyan nyang raya." oh ka ltheueh raja meuse jipeulheueh bansa israel nyan jijak, po teu allah hana geuba awaknyan nibak rot nyang lazem jijak le filistin, bahpi nyan rot nyang paleng paneuk. po teu allah geupike lagee nyoe, "pat tateupeue awaknyan ka meunyeusai watee jikalon bahwa awaknyan haroh jimpurang, dan laju jigisa u nanggro meuse." ngon sabab nyan tuhan laju geuba awaknyan meulalu rot meuwet laju rhot lam padang pasi teutuju u laot geulagah. watee teutinggai nanggro meuse, ureueng-ureueng israel nyan na sinjata lagee keuneuk jakmuprang. nabi musa laju geuba tuleueng-tuleueng nabi yusuf, sabab yoh nabi yusuf mantong udeb gobnyan geuyue bak ureueng israel mangat jimeusumpah beujipeubiet lagee nyan. lagee geutinggai peusan le nabi yusuf bak watee nyan, "bak watee tuhan geupeubeubaih gata, manyet ulon haroh gata ba sajan nibak teupat nyoe." ureueng israel laju geutinggai sukot dan jipeudong khimah bak banda etam, bak bineh padang pasi. bak watee uroe tuhan geujak dikeue awaknyan lam tameh awan dan bak watee malam gobnyan geujak leubeh awai nibak awaknyan lam tameh apui keu geutunyok jalan. deungon lagee nyan awaknyan

jeuet jikak uroe ngon malam. siuroe suntok tameh awan na dikeue bansa nyan dan simalam suntok tameh apui na meusajan awaknyan. oh lheureh nyan tuhan meufeuroman ubak nabi musa, "gata yue kheueh ubak ureueng israel mangat jigisa dan jipeudong khimah dikeue banda pi-hahiroh, lamkawan banda migdol dan laot geulagah, toe ngon banda baal-zefon. raja nanggroe meuse jipike bahwa ureueng israel nyan teungoh meucawo-cawo lam nanggroe nyoe dan teungoh sisat lam padang pasi. ulon teuma lon peujeuet raja nyan teutab kreueh ulee akhejih raja nyan teutab jipeulet gata. teuma di ulon laju lon tunyok keukuasaan lon ateuah raja meuse dan sidadu jih nyan, dan awaknyan teuma jiteupeue bahwa ulon kheueh tuhan." dan di ureueng israel laju jipeubuet lagee nyang ka geupeurintah le tuhan ubak awaknyan. watee raja meuse jideungoe bahwa bansa israel ka jiplueng, raja nyan ngon peujabat-peujabat jih meunyeusai that laju jipeugah, "peue nyang haroh tapeubuet? keupeue tapeubiyeu ureueng israel nyan rajak sampoe geutanyoe ka hana le namiet?" dan raja pih laju jipeusiab geuritan prang dan sipa-i jih. raja nyan laju jibeurangkat ngon banmandum geuritan prang jih, jitamong keunan nam reutoh boh geuritan istimewa, nyang jigiduek le mandum peuwira raja. biet-biet that, tuhan geupeujeuet raja nyan teutab kreueh ulee, sampoe raja nyan laju jipeucrok ureueng israel nyang teungoh jikak jitinggai nanggroe nyan dimiyueb lindongan tuhan sidadu meuse deungon banmandum guda, geuritan dan nyang ba geuritan nyan laju jipeulet ureueng israel, akhe jih laju meurumpok awaknyan bak teumpat ureueng israel jipeudong khimah bak bineh pante laot to ngon pi-hahiroh. watee jingiegi le ureueng israel raja dan sidadu meuse teungoh jikak ubak jih, awaknyan teumakot lumpah na dan laju jikliek jimeuhoi tuhan jilakee tulong. jipeugah le awaknyan ubak nabi musa, "peu kheueh di nanggroe meuse hana lampoh jrat, sampoe droeneueh neuba kamoe mangat mate bak teumpat nyoe? ngiegi kheueh, akibat peue nyang ka droeneueh peubuet! yoh masa ilee di nanggroe meuse ka lheureh kamoe peugah bahwa hainyan teuma teujadi! kamoe ka kamoe paksa mangat droeneueh bek neupeukaru kamoe, teuma teutab neupeubiyeu kamoe jeuet keu namiet di nanggroe meuse. leubeh get jeuet keu namiet di nanggroe meuse nibak mate lam padang pasi nyoe!" geujaweub le nabi musa, "bek yo teuh! meuteuen kheueh! gata takalon keudroe peue nyang teuma geupeubuet le tuhan keu geupeuseulamat gata. ureueng meuse nyang na gata ngiegi nibak saat nyoe, hana teuma gata ngiegi le. tuhan teuma geumeujuang keu gata, dan gata hana peureulee gata peubuet sapeue." feureuman tuhan ubak nabi musa, "pakon gata kliek talakee tulong? neuyue kheueh laju ubak ureueng israel mangat jikak laju! beut tungkat gata dan seupot laju ateuah ie laot. dan ie laot nyan teuma teuplah meuweuk dua dan ureueng israel jeuet jikak jijeumeurang laot deungon cara jikak ateuah tanoh nyang tho. ureueng meuse teuma lon peujeuet teutab kreueh ulee sampoe hana jipioh jitiyeub ureueng israel, dan ulon teuma lon tunyok keukuasaan lon ateuah raja meuse, pasokan

jih, geuritan-geuritan meunan cit ngon supe nyang ba geuritan nyan. teuma ureueng meuse jiteupeue bahwa ulon kheueh tuhan." dan malaikat allah, nyang na dikeue ureueng israel, laju geuminah u bagian likot. deungon lagee nyan tameh awan pih laju jiminah sampoe u teungoh-teungoh lamkawan pasokan meuse ngon pasokan israel. awan nyan laju jipeuteuka seupot akhe jih simalam beungoh mandua pasokan nyan sabe-sabe hana jeuet jipeutoe. dan nabi musa laju geusunyueng jaroe geuh ateuah ie laot, dan tuhan laju geupeutreu anen timu jipoet nyang kancang lumpah na sampoe ie laot nyan laju jisurot. simalam beungoh anen nyan jipoet, akhe jih laot nyan laju meu-ubah jeuet keutanoh tho. ie laot nyan laju teuweuk dua, dan watee ureueng israel jijeumeurang laot, awaknyan jikak ateuah tanoh nyang tho, dan ie nyang na blaih wie ngon blaih uneuen awaknyan deuh jih lagee binteh beuton. di ureueng meuse deungon banmandum guda, geuritan dan supe nyang ba geuritan nyan laju jipeulet dan jiseutot ureueng israel sampoe trok u teungoh laot. watee karab beungoh tuhan laju geupandang ateuah tameh apui dan tameh awan ubak sidadu meuse dan laju geukaru kawak-kawok hana meuteuntee. ruda-ruda geuritan awaknyan laju geupeuteun sampoe hana jeuet le jikak, akhe jih ngon kaah keueuh jipaksa laju ukeue. jipeugah le ureueng meuse, "tuhan geumeujuang keu ureueng israel geulawan geutanyoe. jak geutanyoe taplueng nibak teumpat nyoe!" feureuman tuhan ubak nabi musa, "sunuet kheueh jaroe gata ateuah ie laot, dan ie laot nyan teuma jigisa lagee sot nyang ka, bubena ureueng meuse habeh lham lam laot raya, meunan cit deungon geuritan dan supe-supe geuritan nyan banmandum wapuk ana." dan nabi musa laju geusunyueng ngon geusunuet jaroe geuh ateuah ie laot nyan, watee nyan uroe pih ka jiteubiet paja, ie laot nyan laju jiwoe lagee sot teuma. ureueng meuse jiuiseuha keuneuk peuseulamat droe, teuma tuhan laju geupeukaram awaknyan habeh banmandum lam laot raya. ie laot laju jiriwang habeh jitob bubena geuritan-geuritan, ureueng-ureueng supe geuritan, dan banmandum tantra meuse nyang peulet ureueng israel u teungoh laot, akhe jih awaknyan banmandum mate. teuma watee ureueng israel jijeumeurang laot, awaknyan teutab jikak ateuah tanoh nyang tho, dan ie ka jeuet keu binteh blaih wie ngon blaih uneuen awaknyan. bak uroe nyan tuhan geupeuseulamat bansa israel watee jiseurang le bansa meuse, dan laju geukalon manyet-manyet ureueng meuse habeh teutiek-tiek bak bineh pante. watee ureueng israel jikalon pakriban tuhan deungon kuasa gobnyan nyang rayeuk geupeutaloe ureueng meuse, awaknyan hireuen lumpah na akhejih laju jimeuman ubak gobnyan dan ubak nabi musa, hamba gobnyan nyan. dan nabi musa ngon banmandum ureueng israel laju geumeulagu keu geupujoe tuhan, "ulon keuneuk meulagu keu tuhan, sabab gobnyan ka meunang hana ngon peusa. banmandum guda dan supe guda nyan habeh geu rhom lam laot raya. tuhan nyang bila ulon nyang paleng teuga; gobnyan kheueh nyang peuseulamat ulon. gobnyan allah ulon, ulon keuneuk pojoe gobnyan, allah nyang geupujoe le indatu lon,

ulon peugong gobnyan. tuhan na kheueh peujuang nyang peukasa, tuhan, nyan kheueh nan gobnyan. sipa-i meuse dan banmandum geuritan awaknyan habeh geutiek lam laot raya. beuntara-beuntara nyang beuhe ngon meugah nyan pih lham lam laot geulagah nyang raya. awaknyan ji ueut le laot nyang lhok, dan lagee batee nyang jitreun lam twie raya. teunaga droeneueh lupah that takjob, ya tuhan, droeneueh peujeuet meuseh hanco sapan sapa. deungon keuangongan droeneueh nyang raya, ya tuhan, banmandum neupeubinaas nyang lawan droeneueh. beungeh droeneueh hu mubura lagee apui, dan awaknyan teutot lagee jumpung jiliet le apui hu. laot droeneueh kipaih, ie meugulong manyang, ka teudong cot lagee beuton, sampoe tanoh lam laot ka jeuet teujak. jipeugah le musoh, 'awaknyan teuma tatiyueb dan ulon drob, ulon suet peudeueng lam sarong, laju lon heuntam awaknyan. dan banmandum atra milek awaknyan ulon reupah, ulon weuek-weuek meujeumba-jeumba dan ulon pajoh keudroe sampoe puih.' teuma di tuhan deungon sigoe geupeulheuh nafah laju teuka keu ureueng meuse uroe nyang meubala. awaknyan karam lagee timah nyang brat lam geulumbang ie nyang raya. ya po teu allah, hana nyang sa teubandeng ngon droeneueh, ya tuhan, nyang mahamulia dan suci? soe nyang hase jipeubuet buet-buet nyang ajaeb dan buet nyang rayeuk lagee buet tuhan? droeneueh reuntang jaroe uneuen neuh, dan sapsansapa dum musoh jiuet le bu-moe. droeneueh pimplen bansa nyang ka droeneueh peuseulamat nyoe, kareuna droeneueh seutia ubak janji geuh. ngon teunaga nyang raya awaknyan droeneueh lindong, dan droeneueh bimbeng ubak tanoh droeneueh nyang suci. bansa-bansa jideungoe nyan laju jiteuka yo; ureueng filistin dan bubena peumimpin edom habeh teukeujot. ureueng moab nyang beuhe peukasa yo meugum-gum, ureueng kanaan habeh cut ate. awaknyan lumpah teumakot watee jikalon teunaga tuhan. watee umat droeneueh jijak, bubena musoh hana kuasa jipeuteun; leupah kheueh bansa nyang ka droeneueh peubeubaih. dan israel laju droeneueh intat ubak teupat nyang droeneueh pileh keu teupat tinggai droeneueh. awaknyan tinggai teutab bak buket droeneueh nyang suci, bak rumoh nyang droeneueh peudong keudroe. droeneueh kheueh, tuhan, raja, nyang mat peurintah siumu masa." watee ureueng israel jijeumeurang laot, awaknyan jijak ateuh tanoh nyang ka tho kreng. dan watee geuritan-geuritan ureueng meuse ngon guda dan supe geuritan nyan jitamong lam laot, tuhan laju geupeujeuet ie laot ji-ile lom sampoe awaknyan habeh mandum mate sabab ka karam. teuka kheueh miryam, sidroe nabiah, cutpo nabi harun, laju geucok saboh rapa-i, dan banmandum ureueng inong jipeh rapa-i sira jimeunari ngon meulagu ria. miryam meulagu keu awaknyan, "meulagu kheueh keu tuhan, sabab gobnyan meunang ngon geumilang. banmandum guda ngon supe geuritan laju geu rhom lam laot raya." oh ltheuhnyan nabi musa laju geuba bansa israel nibak laot geulagah laju geutuju ubak padang pasi syur. lthee uroe treb jih awaknyan jijak rot padang pasi hana meuteume meusaboh pih na mata ie. dan

trok kheueh laju awaknyan ubak saboh teupat nyang nan jih mara, rupari ie nyang na bak teupat nyan phet lagoena, dan akhe jih ie nyan hana jeuet teu jieb. sabab nyan kheueh teupat nyan teuboh nan mara, nyang makna jih phet. deungon na lagee nyan banmandum awaknyan laju jimeu krob-krob bak nabi musa sira jitanyong, "peue nyang haroh tajieb nibak saat nyoe?" nabi musa laju geumeudoa sikeubiet-sikeubiet jih ubak tuhan, dan tuhan laju geutunyok ubak gobnyan sikrek kayee. kayee nyan laju geugeulawa le nabi musa u dalam ie, dan ie nyan laju meu-ubah jeuet keu tabeue, sampoe awaknyan ka jeuet jijieb ie. bak teupat nyan tuhan laju geubri peuratoran-peuratoran ubak awaknyan, dan disinan cit teuma gobnyan geucuba awaknyan. feureuman tuhan, "taat kheueh gata ubak ulon deungon biet-biet taat, dan gata keureuja kheueh peue nyang ulon ngieng get; seutot kheueh banmandum nyang ulon peurintah. meunyoe gata tapeubuet lagee nyan, gata hana teuma lon hukom ngon peue-peue mantong peunyaket nyang ka ulon peu rhot ateuh ureueng meuse. ulon kheueh tuhan nyang peupuleh gata." oh ka ltheuhnyan awaknyan trok laju ubak teupat nyang nan jih elim. bak teupat nyan na dua blaih boh mata ie dan tujoh ploh bak kuruma. awaknyan laju jipeudong khimah bak bineh mata ie nyan. oh ltheuhnyan banmandum umat israel jijak nibak elim, dan bak tanggai limong blaih buleuen nyang keudua oh ka ltheueh awaknyan jitinggai nanggroe meuse, trok kheueh laju awaknyan ubak padang guron nyang nan jih padang pasi sin, teupat nyan teuduek jih lamkawan elim ngon gunung sinai. lam padang pasi nyan awaknyan mandum meukrob-krob ubak nabi musa ngon nabi harun. kheun awaknyan, "leubeuh get meunyoe kamoe nyoe ka mate geupoh le tuhan di nanggroe meuse. disideh sihana-hana jih kamoe mantong jeuet kamoe duek sira kamoe pajoh eungkot ie ngon ruti sitroe-troe jih. teuma bak saat nyoe droeneueh ka neuba kamoe keunoe mangat kamoe banmandum mate sabab keunong deuk." feureuman tuhan ubak nabi musa, "jinoenyoe ulon peutrone peunajoh nyang meulimpah ruwah lagee jieuken keu gata banmandum. tieb-tieb uroe gata haroh tapeusapat peunajoh nyan siseb-seb jih keu siuroe pajoh. deungon cara lagee nyan ulon keuneuk ujoie umat ulon mangat jeuet lon teupeue peu kheueh awaknyan taat ubak peue-peue nyang ka ulon peurintah atawa hana? bak uroe nyang keunam awaknyan haroh ka jipeusapat peunajoh nyan dua goelipat le jih." dan geupeugah kheueh le nabi musa ngon nabi harun ubak mandum ureueng israel nyan, "seupot nyoe gata mandum ta teupeue bahwa tuhan kheueh nyang ba gata geupeuteubiet lam nanggroe meuse. singoh beungoh teuma gata ngieng cahya tuhan teuka. tuhan geudeungoe gata beungeh-beungeh ubak gobnyan; nyoe, ubak tuhan, sabab kamoenyoe nyang kamoe peubuet peue-peue nyang geupeurintah ubak kamoe. tuhan teuma geubri keu gata eungkot sie oh watee uroe seupot, dan geubri ruti oh watee beungoh sampoe gata banmandum troe, sabab tuhan ka geudeungoe gata beungeh-beungeh ubak gobnyan. nyang sikeubiet jih, meunyoe gata beungeh-beungeh ubak kamoe,

gata pih beungeh-beungeh ubak tuhan." oh ltheueh nyan nabi musa geupeugah ubak nabi harun, "neuyue ktheueh bak awaknyan mangat banmandum jijk meuhadab ubak tuhan, sabab tuhan ka geudeungoe awaknyan jimeuseurapa." teungoh nabi harun geumeututote ngon awaknyan mandum, awaknyan laju jingieang lam padang pasi hana jisangka-sangka cahya tuhan leumah lam awan miga. feureuman tuhan ubak nabi musa, "ulon ka lon deungoe ureueng israel jimeurapa. peugah ktheueh laju ubak awaknyan bahwa oh watee uroe ka seupot enteuk awaknyan ka jeuet jipajoh eungkot sie, dan oh watee beungoh awaknyan jeuet jipajoh ruti sampoe an troe. dan awaknyan teuma jiteupeue bahwa ulon ktheueh tuhan, allah awaknyan." oh watee uroe ka seupot, jiteuka ktheueh ubak khimah awaknyan cicem puyoh nyang lumpah that jai hana teukira, sampoe khimah awaknyan ka habeh seupot jibot le cicem-cicem puyoh nyan, dan oh watee beungoh jitreun teuma iembon bansikeulileng khimah awaknyan. watee iembon nyan meuasab, leumah ktheueh laju lam padang pasi sapeu-sapeu hi nyang lipeh lagee sisek dan haloh lagee iembon nyang ka kreueh. watee ureueng israel jingieang atra nyan, awaknyan hana jiteupeue peue atra nyan. teuma jiteumanyong ktheueh awaknyan sabe keudroe-droe, "peue atra nyan?" dan nabi musa laju geupeugah ubak awaknyan, "nyan ktheueh peunajoh nyang geubri le tuhan keu gata. tuhan geupeurintah maseng-maseng gata tapeusapat bubeseb nyang peureulee, na ktheueh dua aree keu tieb-tieb anggota keuluwarga." ureueng israel laju jipeubuet lagee nyang geuyue le nabi musa nyan, teuma na cit nyang peusapat leubeh nibak dua aree keu sidroe ureueng dan na teuma nyang kureueng. watee atra nyan jisukat le awaknyan, teunyata ureueng nyang jipeusapat leubeh le, hana nyang leubeh, dan ureueng nyang peusapat bacut, hana kureueng. maseng-maseng awaknyan jipeusapat sidub nyang jipeureulee. nabi musa geupeugah ubak awaknyan, "soemantong ureueng jih hana jeuet jikeubah peunajoh nyan keu meupoh bahpi atranyan bacut sagai" teuma na cit meupadubdroe ureueng lamkawan awaknyan hana jipakoe peue nyang geupeugah le nabi musa nyan. jikeubah cit siparo nibak peunajoh nyan. oh singoh beungoh teunyata peunajoh nyan ka meu-ulat dan mubeu khieng; deungon na lagee nyan nabi musa ka jeuet keubeungeh ubak awaknyan. tieb-tieb beungoh awaknyan jipeusapat peunajoh nyan sidub nyang awaknyan peureulee, dan meunyoe ka jipeuphon seu-uem, peunajoh nyang na tinggai bak tanoh nyan laju caye meulileh. bak uroe nyang keunam awaknyan peusapat peunajoh nyan dua goelipat le jih, na ktheueh peuet aree keu sidroe ureueng. banmandum peumimpen awaknyan jiteuka dan jijk bri tee hainyan ubak nabi musa. geupeugah le nabi musa ubak awaknyan, "nyoe ktheueh peurintah tuhan: singoh na ktheueh uroe khusus keu meureuhah, sabab nyan na ktheueh uroe sabat, uroe nyang teupeuseumah ubak tuhan. peue nyang keuneuk gata panggah nibak uroe nyoe, panggah ktheueh, dan peue nyang keuneuk gata reuboh nibak uroe nyoe, reuboh ktheueh. nyang leubeh nibak

nyang teupeureulee keu uroe nyoe, peungkreeh ktheueh keu singoh." dan peunajoh nyang leubeh nyan awaknyan keubah keu singoh lagee nyang geupeugah le nabi musa; peunajoh nyan hana jeuet keubasi dan hana teuma meu-ulat. nabi musa geupeugah, "nyoe ktheueh peunajoh keu uroe nyoe, sabab uroenyeo na ktheueh uroe sabat, uroe meureuhah keu teuhoreumat tuhan, dan gata hana teuma gata teume peunajoh nyan bah mubacut pi diluwa khimah nyoe. nam uroe treb jih gata haroh tapeusapat peunajoh, teuma bak uroe nyang keutujoh na ktheueh uroe meureuhah, dan hana peunajoh nyang jitreun nibak uroe nyan." bak uroe nyang keutujoh na padub droe ureueng israel keuneuk jijk peusapat peunajoh, teuma awaknyan hana jiteume sapeue. dan tuhan laju meufeuruman ubak nabi musa, "sampoe anpajan gatanyoe hana tatem taat ubak peue-peue nyang ka ulon peurintah? ingat ktheueh bahwa ulon ka lon bri ubak gata sidroe keu gata pioh meureuhah. nyang ktheueh sabab jih bak uroe nyang keunam ulon bri peunajoh nyang seb keu dua uroe. bak uroe nyang keutujoh soe mantong ureueng haroh tinggai lam rumah, dan hana jeuet jiteubiet." sabab nyan ktheueh bak uroe nyang keutujoh awaknyan hana jimeubuet. peunajoh nyan jiboh nan manna le ureueng israel. hijih lagee aneuk bijeh nyang ubit-ubit wareuna jih puteh dan rasa jih lagee juadah nyang teupeugat teuboh meunisan. nabi musa geupeugah, "tuhan geuyue ubak geutanyoe mangat tacok leubeh kureueng dua aree manna keu teukeubah tatinggai keu keuturonan geutanyoe, mangat awaknyan singoh jiteume kalon peunajoh nyang geubri le tuhan ubak geutanyoe di padang pasi, watee geutanyoe geupeuteubiet lam nanggroe meuse." nabi musa geupeugah ubak nabi harun, "neucok ktheueh saboh beulangong, neupeutamong laju leubeh kureueng dua aree manna lam beulangong nyan dan neukeubah laju dikeue tuhan keu geukeubah keu keuturonan geutanyoe." teuma le nabi harun laju geukeubah beulangong nyan dikeue peuto peujanjian keu teukeubah paih deungon janji tuhan ubak nabi musa. manna nyan ka jeuet keupeunajoh ureueng israel peuet ploh thon treb jih, sampoe awaknyan trok u kanaan, bak teumpat awaknyan tinggai teutab. (sinukat barang nyang padek nyang lazem jipeuguna le ureueng bak jamen nyan, asoe jih na dua ploh aree.) oh ltheuehnyan banmandum umat israel laju jitinggai padang pasi sin dan laju jiminah-minah nibak saboh teumpat u teumpat nyang laen lagee nyang ka geupeurintah le tuhan. bak saboh watee awaknyan jipeudong khimah di rafidim, teuma bak teumpat nyan hana ie jieb. dan awaknyan laju meukrob-krob ubak nabi musa sira jipeugah, "neubri ktheueh keu kamoe ie jieb." geujaweeub nabi musa, "pakon gata meukrob-krob dan gata ujoie tuhan?" teuma awaknyan ka lumpah that glaih rukueng jih, hana putoh teutab jimeurapa ubak nabi musa. kheun awaknyan, "keupeue droeneueh ba kamoe meuteubiet lam nanggroe meuse? mangat kamoe, aneuk-aneuk kamoe, dan beulatang peulara kamoe mate sabab glaih tho rukueng?" dan geumeudoa ktheueh nabi musa ubak tuhan, "ya tuhan, peue nyang haroh ulon peubuet ateueh ureueng-ureueng nyoe?

ngiang kheueh, awaknyan keumeung rhom ulon ngon aneuk batee." feureuman tuhan ubak nabi musa, "jak tawok kheueh mupadub droe peumimpén dan gatajak kheueh meusajan-sajan ngon awaknyan leubeuh awai nibak bansa nyan. dan bek tuwoe gata ba sajan tungkat nyang gata peuguna watee gata seukok krueng nil. ulon teuma lon dong dikeue gata ateuh saboh batee rayeuk nibak gunung sinai. seukok kheueh batee nyan, dan ie laju jiteubiet lam batee nyan sampoe banmandum awaknyan jeuet jijieb ie." nabi musa laju geupeubuet lagee nyan sira jikalón le peumimpén israel. teupat nyan geuboh nan masa sabab bak teupat nyan ureueng israel jiujoé tuhan watee awaknyan jiteumanyong, "peu kheueh tuhan na meusajan geutanyoe atawa hana?" dan teupat nyan jiboh cit nan laen meriba sabab bak teupat nyan ureueng israel jimeurapa. oh lheurehnyan ureueng amalek teuka laju jikak prang ureueng israel di rafidim. geupeugah le nabi musa ubak yosua, "pileh laju mupadub droe ureueng mangat teujak prang ureueng amalek. singoh ulon teuma lon dong bak pucak gunung sira ulon mat tungkat nyang tuhan yue ba." yosua laju jipeubuet peue nyang ka geupeurintah le nabi musa ubak gobnyan. gobnyan laju geujak prang ureueng amalek, seudangkan nabi musa, nabi harun dan hur laju geuteungoh gunung sampoe trok u pucak. simantong nabi musa geubeuot jaroe geuh, ureueng israel meunang. teuma watee nabi musa geupeutreu jaroe geuh, ureueng amalek kheueh nyang meunang. watee nabi musa ka jiteuka hek, nabi harun ngon hur laju geucok sianeuk batee mangat nabi musa jeuet geudiek; nabi harun ngon hur geudong blaih wie ngon blaih nueuen nabi musa keu geutumpang jaroe gobnyan mangat teutab teubeuot sampoe an mata uroe jilob. akhe jih ureueng amalek ji peutaloé le yosua. feureuman tuhan ubak nabi musa, "tuleh kheueh laju keuhai meunang nyoe mangat teutab ji-ingat. peugah laju ubak yosua bahwa ulon teuma lon peubinasa ureueng amalek" dan nabi musa laju geupeudong saboh miseubah geuboh nan miseubah nyan "tuhan na kheueh bupani ulon." geupeugah le nabi musa, "mat kheueh bumanyang-manyang bupani tuhan! tuhan geumuprang geulawan ureueng amalek keu siumu masa!" yitro, ayah tuwan nabi musa, imeum di midian, geudeungoe sapeu-sapeu nyang ka geupeubuet le po teu allah keu nabi musa dan bansa israel, bak watee gobnyan geupimpen awaknyan jiteubiet nibak nanggroé meuse. dan geujak kheueh laju yitro ubak nabi musa, sira geuba zipora, peurumoh nabi musa nyang mantong tinggai di midian, meusigoe ngon gersom dan eliezer, mandua droe aneuk gobnyan nyang agam. aneuk nyang tuha geuboh nan gersom sabab nabi musa geupeugah, "ulon sidroe ureueng jame di nanggroé aseng", aneuk nyang keudua geuboh nan eliezer sabab nabi musa geupeugah, "allah nyang geupujoe le indatu lon ka geutulóng dan geupeuseulamat ulon ngon nyan ulon hana jipeumate le raja meuse". yitro geujak meusajan ngon peurumoh nabi musa dan mandua droe aneuk gobnyan u padang pasi bak teupat nabi musa geupeudong khimah to ngon gunung suci. nabi musa meuteume haba

bahwa awaknyan ka trok jiteuka, dan geuteubiet kheueh gobnyan geujak sambot awaknyan. nabi musa laju geusujut dikeue yitro sira geucum yah tuwan geuh nyan. awaknyan saleng teumanyong keuseuhatan maseng-maseng, oh lheureh nyan laju geutamong lam khimah nabi musa. nabi musa laju geucalitra ubak yah tuwan geuh peue-peue nyang ka geupeubuet le tuhan ateuh raja dan bansa meuse keu geupeuseulamat ureueng israel. dan meunan cit gobnyan geucalitra ubak geuhnyan keuhai nyang sulet-sulet nyang jihadab le bansa israel bak rot euh raya, dan pakriban tuhan geupeuseulamat awaknyan. watee geudeungoe banmandum nyan, yitro galak lumpah na dan laju geupeugah, "teupujoe kheueh tuhan nyang ka geupeuseulamat gata nibak raja dan bansa meuse! teupujoe kheueh tuhan nyang ka geupeubeubaih bansa israel nibak jipeubudak le bansa meuse! jinoenyoe ka ulon teupeue bahwa tuhan leubeuh rayeuk nibak banmandum ilah-ilah, sabab banmandum nyan geupeubuet watee ureueng meuse jipeusanet ateuh ureueng israel ban galak droe dan jipeusombong droe ateuh ureueng israel." oh lheurehnyan yitro laju geuba keureubeuen nyang teutot dan keureubeuen nyang teusie sibagoe peuseumahan ubak po teu allah. nabi harun dan banmandum peumimpén bansa israel geujak keunan dan laju geumakheun meusajan-sajan ngon yitro nibak teupat teuka po teu allah. oh singoh beungoh nabi musa laju geuba lam sidang ureueng-ureueng israel nyang na meuseuliseh paham. buet geuhnyan jipajoh watee phon beungoh sampoe an malam. watee yitro geukalon banmandum nyang geupeubuet le nabi musa, laju geutanyong, "peue mantong nyang haroh gata peubuet keu bansa nyoe? peu kheueh banmandum nyoe gata peubuet keudroe, sampoe keu jilakee naseuhat gata mantong, ureueng-ureueng nyang haroh jidong disinoe phon beungoh sampoe an malam?" geujaweub le nabi musa, "awaknyan jikak ubak ulon keu jiteupeue peue keuheundak po teu allah. meunyoé awaknyan meuseuliseh paham, awaknyan laju jikak meuhadab ulon mangat peukara awaknyan ulon peuputoh, dan laju ulon peugah ubak awaknyan peue-peue nyang ka geupeurintah dan hukom-hukom po teu allah." kheun yitro, "hana get meunan. ngon cara lagee nyan gata ka tapeuhék droe teuh keudroe, meunan cit deungan awaknyan. buet teuh nyan lumpah that jai meunyoé tapeubuet keudroe. deungoe kheueh naseuhat ulon, dan po teu allah teuma geutulóng gata. keubiet jroh that gata jeuet keuwaki nibak bansa nyoe dikeue po teu allah dan gata ba masa-alah awaknyan ubak gobnyan. gata haroh gata peurunoe ubak awaknyan peue-peue peurintah allah dan gata peutrang cara udeb nyang get dan peue nyang haroh awaknyan peubuet. teuma dilikot nibak nyan gata haroh gata mita meupadub droe ureueng agam nyang bijaksana, dan gata tunyok ureueng nyang gata pileh nyan jeuet keupemimpén ateuh siribee droe ureueng, sireutoh droe, limong ploh droe, dan siploh droe. ureueng nyang gata pileh nyan nyang paleng jroh ureueng nyang jitakot ubak tuhan, dan jeuet teupeucaya lom hana jitem pajoh peng sogok. neuyue kheueh awaknyan jimeubuet sibagoe hakem bansa nyoe,

maseng-maseng lamkawan jih keudroe. tugaih nyan haroh awaknyan peubuet seucara teuatoe. meunyoe peukara-peukara nyang peunteng jeuet jipeutrok ubak gata, teuma meunyoe hai-hai nyang ubit peukara jih bah kheueh jipeuseuleusoe le awaknyan keudroe. hai nyang lagee nyan teuma teupeuphui gata sabab awaknyan meusajan meutanggong jaweueb. meunyoe gata peubuet nyang lagee nyan, dan hai nyan geupeurintah le po teu allah ubak gata, gata teuma hase gata peubuet tugaih-tugaih gata, dan banmandum ureueng teuma jiwoe ngon puih ate sabab masa-alah awaknyan bagaih teupeuseuleusoe." nabi musa geuseutot peue nyang ka geunaseuhat le yitro tuwan geuh nyan, dan laju geupileh ureueng-ureueng nyang bijaksana nyang na lamkawan bansa israel. gobnyan laju geutunyok awaknyan jeuet keupeumimpin ateuhe siribee droe, sireutoh droe, limong ploh droe, dan siploh droe. awaknyan jipeubuet tugaih-tugaih jih sibago hakem ateuhe bansa israel. meunyoe peukara-peukara nyang peunteng awaknyan peusampoe ubak nabi musa, meunyoe hai-hai nyang ubit awaknyan peubeereeh keudroe. oh lheurehnyan nabi musa laju geupeulheuh yitro geuwoe u nanggroe gobnyan. oh lheureh nyan bansa israel laju geutinggai rafidim, dan bak tanggai sa buleuen nyang keu lhee watee awaknyan ka lheureh jitinggai nanggroe meuse, trok kheueh laju awaknyan bak padang pasi sinai. awaknyan laju jipeudong khimah bak gaki gunung sinai, dan nabi musa laju geuteungoh gunung nyan keu geujak meurumpok ngon po teu allah. tuhan meufeureuman ubak nabi musa nibak ateuhe gunung nyan dan geuyue ubak nabi musa nyan mangat geupeumaklum ubak ureueng israel, keuturonan nabi yakub, "gata ka deuh takalon peue nyang ulon peubuet ateuhe ureueng meuse, dan pakriban ulon ba gata ubak ulon bak teumpat nyoe ngon kuasa nyang raya, lagee cicem rajawali jipeupo aneuek jih ateuhe sayeub jih. jinoenyoe meunyoe gata taat ubak ulon dan seutia ubak peujanjian lon. gata teuma lon peujeuet keu umat lon keudroe. bansigom bumoe na kheueh atra ulon, dan gata jeuet keumilek ulon nyang ulon gaseh, khusus keu lon keudroe, dan gata teuma tapeutimang ulon sibagoe imeum-imeum." dan geutreun kheueh laju nabi musa geujak peusapat bubena peumimpin mangat meusapat, oh lheurehnyan laju geucalitra ubak awaknyan peue-peue nyang ka tuhan peurintah ubak gobnyan. awaknyan banmandum jjaweueb ngon su nyang meusigoe, "kamoe teutab kamoe tem peubuet peue-peue nyang geuyue le tuhan," dan jeunaweueb awaknyan laju geupeusampoe le nabi musa ubak tuhan. dan tuhan laju meufeureuman ubak nabi musa, "ulon teuma lon jak ubak gata sira meukeurubong lam awan nyang teubai; ureueng laen teuma jideungoe ulon meututoe ngon gata, dan phon saat nyan awaknyan sabe jipeucaya ubak gata. jinoenyoe jak meurumpok kheueh ngon awaknyan, dan gata yue kheueh ubak awaknyan phon uroe nyoe dan singoh mangat jipeusiab droe keu jimeu iebadat. awaknyan haroh jijak rhae peukayan jih keudroe. lusa awaknyan haroh ka siab seudia. bak uroenyan ulon teuma lon treun ateuhe gunung sinai, bak teumpat mandum ureueng hase jikalon ulon.

peuget kheueh tanda bansikeulileng gunung nyoe sibagoe bataih nyang hana jeuet jijak le bansa nyan. gata tam kheueh awaknyan bek jiteungoh ateuhe gunung, peulom jipeutoe sagai-sagai hana jeuet. soemantong nyang liengkeue bataih nyan, ureueng nyan teuma teuhukom mate; ureueng nyan haroh teugeulawa ngon batee atawa teugando ngon aneuek panah, dan hana jeuet teucukeh. hainyan keunong banmandum bah kheueh nyan manusia meunan cit ateuhe beulatang; banmandum ureueng nyang jiliengkeue bataih nyan haroh teuhukom mate. watee teudeungoe su beureuguih nyang panyang, bubena awaknyan haroh jiteungoh gunung." oh lheurehnyan nabi musa laju geutreun nibak ateuhe gunung dan geuyue laju ubak awaknyan mangat meusiab-siab keu meu iebadat, geupeugah le nabi musa, "lusa gata haroh ka siab, dan siatnyoe gata hana jeuet tameusituboh." dan watee jideungoe haba nyan bansa nyan pih laju meusiab-siab jirrah peukayan jih. bak uroe nyang keu lhee, bak watee beungoh, dan su go-go ngon geulanteue. awan nyang teubai laju teuka ateuhe gunung dan laju teudeungoe su beureuguih nyang lumpah teuga. banmandum ureueng nyang lam khimah-khimah habeh teumakot. nabi musa laju geuba awaknyan keu jijak meurumpok ngon po teu allah, dan laju awaknyan jidong bak gaki gunung nyan. bansaboh gunung sinai ka habeh teutob ngon asab, kareuna tuhan geutreun ateuhe nyan lam apui hu. asabnyan meukeubok lagee asab bak teumpat ureueng teumeutot, dan bansaboh gunung meugok meutaga-tagat. su beureuguih meutamah-tamah teuga. laju geupeugah le nabi musa, dan po teu allah geujaweueb ngon su go-go. tuhan laju geutreun ateuhe pucak gunung sinai, dan geutawok nabi musa mangat geujak ubak pucak gunung nyan. dan nabi musa laju geuteungoh ateuhe gunung nyan, dan tuhan laju meufeureuman ubak gobnyan, "jak treun kheueh dan gata peugah laju ubak awaknyan bahwa awaknyan hana jeuet jiliengkeue bataih keu jijak ubak ulon. meunyoe hainyan awaknyan iengkeue, jai that-that lamkawan awaknyan teuma mate. meunan cit deungon imeum-imeum nyang keuneuk peurab ubak ulon, haroh jipeusuci droe; meunyoe han, awaknyan teuma lon hukom." geupeugah le nabi musa ubak tuhan, "awaknyan hana hase jiteungoh, ya tuhan, sabab droeneueh ka meupeurintah ubak kamoe mangat kamoe anggab gunung nyoe sibagoe teumpat nyang suci dan jipeurati bataih nyang na ban sikeulileng nyan." geujaweueb le tuhan, "jak treun kheueh, dan gisa kheueh u sinai meusajan ngon nabi harun. teuma imeum-imeum ngon rakyat ba hana jeuet jiliengkeue bataih keu jijak ubak ulon. meunyoe awaknyan teutab jilieng bataih nyan, awaknyan lon hukom." dan geutreun kheueh laju nabi musa geujak meurumpok ngon bansa nyan dan geupeusampoe laju peusan tuhan ubak awaknyan. dan po teu allah laju meufeureuman, dan nyoe kheueh feureuman gobnyan, "ulon kheueh tuhan allah gata nyang ba gata teupeuteubiet nibak nanggroe meuse bak teumpat gata jicok keunamiet. bek gata seumah ilah-ilah nyang laen, dan seumah kheueh ulon mantong. bek gata peuet keudroe gata patong nyang saban lagee peue mantong nyang na di langet, di bumoe atawa

lam ie dimiyueb bumoe. bek gata seumah patong nyang lagee nyan, sabab ulon kھےuh tuhan allah gata, dan ulon hana kutem gata peusa ngon peue mantong. ureueng-ureueng nyang banci keu ulon, ulon hukom sampoe ubak keuturonan jih nyang keu lhee dan nyang keu peuet. teuma di ulon kutunyok gaseh sayang lon ubak meuribee-ribee keuturonan ureueng-ureueng nyang jicinta keu ulon dan jitaat ubak peue-peue nyang ulon peurintah. bek gata hoi nan ulon ngon sia-sia, sabab ulon, tuhan allah gata, ulon hukom soemantong nyang jipeusalah guna nan ulon. peuraya kھےuh uroe sabat dan horeumat kھےuh uroe nyan sibagoe uroe nyang suci. keu gata ulon bri nam uroe keu gata meubuet, teuma bak uroe nyang keutujoh na kھےuh uroe meureuhah nyang khusus keu ulon. bak uroenyan hana meusidroes pih nyang jeuet jimeubuet, bah kھےuh nyan gata, meunan cit ngon aneuek-aneuek gata, namiet-namiet gata, beulatang peulara gata dan ureueng aseng nyang na tinggai lam nanggroe gata. lam watee nyang nam uroe nyan, ulon, tuhan, nyang peuget bumoe, langet, laot raya, dan peue-peue mantong nyang na lam nyan, teuma bak uroe nyang keutujoh ulon meureuhah. nyang kھےuh sabab jih, ulon, tuhan, ulon bri beureukat ubak uroe sabat dan ulon peukhusus uroe nyan keu ulon. horeumat kھےuh ubak ayah ngon ma gata, mangat gata seujahtra dan panyang umu lam nanggroe nyang teuma ulon bri keu gata. bek gata poh mate gob. bek gata peubuet mukah. bek gata ceumucue. bek jeuet keusaksi peuleusu keuhai ureueng laen. bek gata meuheut atra ureueng laen: rumoh jih, peurumoh jih, namiet-namiet jih, beulatang peulara jih, keuleudoe jih, atawa peue mantong atra ureueng nyan." watee ureueng-ureueng nyan jideungoe su go-go dan su beureuguih, dan jingiang kilat meunan cit gunung nyang jiteubiet asab, awaknyan laju jiteuka yo ngon teumakot dan jidong jioh-jioh. jipeugah le awaknyan ubak nabi musa, "droeneueh mantong meututoe ubak kamoe, kamoe teutab kamoe deungoe; teuma bek kھےuh po teu allah nyang meututoe ubak kamoe, eunteuk kamoe mate bubena." geujaweueb le nabi musa, "bek teumakot teuh, allah teuka teuma keu geujak cuba gata mangat le gata teutab gata taat, dan hana meudesya." teuma di ureueng-ureueng nyan teutab jidong rot jioh, teuma nabi musa nyang peuto awan seupot bak teupat po teu allah teuka. tuhan meufereuman ubak nabi musa sira geuyue peurintah ubak bansa israel, "gata ka gata kalon pakriban ulon, tuhan, geumeututoe ubak gata dilanget manyang. bek gata peuget keu gata seumah patong-patong pirak atawa patong meuh keu gata pujoe seulaen ulon. gata peuget kھےuh keu ulon saboh miseubah nyang teupeuget nibak tanoh, dan ateueh miseubah nyan gata peuseumah kھےuh laju bubiri ngon leumo gata keu keureubeuen nyang teutot ngon keureubeuen peudamean. bak tieb-tieb teupat nyang ka ulon peuteuntee keu gata sibagoe teupat keu gata meue iabadat keu ulon, ulon kuteuka dan lon bri beureukat ubak gata. meunyoe gata peuget keu ulon saboh miseubah nibak batee, atranyan bek gata peuget nibak batee nyang teupeuet, sabab meunyoe gata

peuguna peuet keu ngon plah batee, miseubah nyan hana jeuet le gata peuguna keu ulon. bek gata peudong miseubah nyang panyang sampoe haroh teuek ngon reunyeuen, mangat bek deuh teukalon bagian tuboh gata nyang hana patot teukalon." dan feureuman tuhan ubak nabi musa, "gata bri kھےuh ubak ureueng israel peuratoran-peuratoran lagee nyoe: meunyoe gata tabloe sidroe namiet nibak bansa gata keudroe, namiet nyan haroh jimeubuet bak gata nam thon treb jih. bak thon nyang keutujoh namiet nyan haroh gata peumeurdehka dan hana peureulee teubayue sapeue. seukira jih ureueng nyang mantong bujah watee jeuet keu namiet gata, dan peurumoh jih hana jiseutot watee namiet nyan jiteubiet. dan seubalek jih seukira jih ka jimeukawen watee gata bloe jeuet keu namiet gata, peurumoh jih nyan jeuet jikak seutot meusajan ngon namiet nyang ka gata peubeubaih nyan. meunyoe po jih jipeukawen namiet nyan ngon sidroe ureueng inong, dan laju namiet nyan jimeu aneuek, dan peurumoh ngon aneuek jih nyan na kھےuh atra milek po jih, dan hana jeuet jiseutot ngon namiet nyan watee namiet nyan teupeubeubaih. teuma seukira jih namiet nyan jipeugah jihnyan lumpah that gaseh ubak peurumoh jih, aneuek-aneuek jih, dan po jih, dan hana jitem teupeubeubaih, dan le po jih nyan haroh jiba namiet jihnyan ubak teupat iabadat. bak teupat iabadat nyan namiet nyan haroh jiyue dong sira jimeusadeue bak pintoe atawa tameh pintoe teupat iabadat, le po jih laju jitindek punyeung namiet jih nyan. teuma namiet nyan ka jeuet keu namiet siumu masa. meunyoe sidroe ureueng inong ibrani jipeubloe sibagoe namiet le ayah droe jih, ureueng inong nyan hana teupeubeubaih oh ka trok nam thon, nabida ngon namiet nyang agam. meunyoe jihnyan hana galak po jih nyan namiet keuneuk meukawen ngon jih, aneuek inong nyan haroh jipeubloe lom teuma ubak ayah aneuek inong nyan. ureueng inong nyan hana jeuet jipeubloe ubak ureueng aseng, sabab jihnyan ka jipeusaneuet ngon hana ade le po jih nyang hana tupat janji. meunyoe sidroe ureueng jibloe namiet nyan inong keu jipeujeuet keupeurumoh aneuek agam jih, namiet nyang inong nyan haroh jipeusaneuet lagee aneuek jih keudroe. meunyoe aneuek agam nyan jimeukawen lom, jihnyan teutab na keuwajeaban jibri makheun dan peukayan dan mandum hak lagee nyang lazem ubak peurumoh jih nyang phon. meunyoe ureueng agam nyan hana jipeupeunoh keuwajeaban jih nyan, ureueng agam nyan haroh jipeubeubaih peurumoh jih nyan ngon hana jiteurimong peng sineuboh bah mubacut pih." "soe mantong nyang jipoh ureueng laen sampoe mate, ureueng nyang poh nyan haroh teuhukom mate. teuma meunyoe ureueng nyan jipoh ngon hana jisaja dan hana niet keuneuk jipoh mate, ureueng nyan jeuet jipeuplueng droe ubak saboh teupat nyang teuma ulon tunyok ubak gata, dan bak teupat nyan ureueng nyan meuteume peulindungan. teuma meunyoe sidroe-droe ureueng bagaih that ji-ek darah ngon jisaja laju jipoh mate ureueng laen, oh lھےuhnyan jiplueng ubak khimah ulon keujilake peulindungan, ureueng nyan haroh teucok bak khimah nyan dan teuhukom mate.

soemantong nyang poh ayah atawa ma jih ureueng nyan haroh teuhukom mate. soemantong nyang jijakkok paksa sidroe-droe ureueng, ureueng nyang jakcok nyan haroh teuhukom mate, peu kheueh ureueng nyan ka jipeubloe atawa mantong na lam rumoh jih. soemantong nyang kutok ayah atawa ma jih, ureueng nyan haroh teuhukom mate. meunyo na teujadi ureueng jimeulo sidroe ureueng jipoh ureueng laen ngon batee atawa ngon boh shoh jaroe jih, teuma ureueng nyang jipoh nyan bukan jipoh mate, ureueng nyan hana teuhukom. meunyo ureueng nyang jipoh nyan sampoe haroh reubah bak teupat ngon sabab keunong poh nyan, teuma oh lheureh nyan jeuet jibeudoh dan jijak lom ngon tungkat, ureueng nyang poh ureueng nyan haroh jipeu-ubat sampoe puleh dan jibri geunantoe rugoe seumantong ureueng nyan lam saket. soemantong nyang poh mate namiet jih nyang agam atawa nyang inong meunan jipoh laju mate bak teupat, ureueng nyang poh nyan haroh teuhukom. teuma meunyo namiet nyan hana mate lam dua atawa lhee uroe, po jihnyan hana teuhukom. rugoe nyang jideurita sabab ka gadoh namiet jih nyan nyang ka jeuet sibagoe hukoman keu ureueng nyan. meunyo na meupadub droe ureueng agam teungoh jimeulo dan sidroe nyang teungoh meulo nyan jeuet keusabab cidra ateuheh sidroe ureueng inong nyang teungoh mume sampoe aneuek lampluet nyang teungoh jikandong nyan rhot, teuma hana meudeurita bak bagian nyang laen, dan ureueng nyan haroh jibayeue deunda nyang rayeuk jih sidub nyang jilakee le lakoe jih dan jisituju le hakem-hakem. teuma meunyo ureueng inong nyan cidra jih leubeh brat, dan hukoman keu keujeuhetan nyan na kheueh nyawong teugantoe ngon nyawong, mata teugantoe ngon mata, gigoe gantoe ngon gigoe, jaroe teugantoe ngon jaroe, gaki teugantoe ngon gaki, luka teugantoe ngon luka, luka tutong teugantoe ngon luka tutong, kumong teugantoe ngon kumong. soemantong nyang seukok mata namiet jih sampoe buta, namiet nyan haroh jipeubeubaih sibagoe meunayeue mata namiet nyan. meunyo sidroe-droe ureueng jipoh namiet jih sampoe patah gigo jih, namiet nyan haroh jipeubeubaih sibagoe sineuboh keu gigoe namiet nyan." "meunyo na saboh leumo agam jipok ureueng laen sampoe mate, leumo nyan haroh teupoh deungon cara teugeulawa ngon batee, dan asoe jih hana jeuet teupajoh, teuma ureueng po leumo nyan hana jeuet teuhukom. meunyo leumo agam nyan ka biasa buet jih galak jipok gob, dan ureueng po leumo nyan ka lheureh teupeuingat, teuma teutab hana jijaga beulatang jihnyan, dan leumo agam nyan jipok lom ureueng laen sampoe mate, beulatang nyan haroh teupoh mate ngon cara teugeulawa ngon batee meunan cit deungon ureueng po leumo nyan teuhukom mate. teuma meunyo ureueng po leumo nyan teupeuidhin jibayeue sineuboh, ureueng nyan haroh jibayeue sidub nyang jilakee keu teutuboh nyawong jih. meunyo nyang jipok le leumo nyan sidroe aneuek agam atawa aneuek inong, atoran nyan teutab keunong ateuheh jih. meunyo nyang jipok mate nyan sidroe namiet agam atawa namiet inong, ureueng po leumo nyan haroh jibayeue lhee

ploh peng pirak ubak ureueng po namiet nyan, dan leumo agam nyan haroh teugeulawa ngon batee sampoe mate. soe mantong ureueng nyang jicok sinutob bak saboh mon atawa jikueh mon laen hana jitob, teuka saboh leumo agam atawa keuleudee laju rhot lam mon nyan, ureueng po mon nyan haroh jibayeue gantoe rugoe ubak ureueng po beulatang peulara nyan, teuma beulatang nyang ka mate nyan jeuet jicok keudroe jih keudroe. meunyo leumo agam sidroe ureueng jipok leumo agam ureueng laen sampoe mate, mandua droe ureueng po leumo nyan haroh jipeubloe leumo nyang mantong udeb nyan dan peng hase jipeubloe leumo nyan haroh jiweuek dua. dan meunan cit eungkot sie beulatang nyang ka mate nyan haroh teuweuek dua. teuma meunyo ka jiteupeue bahwa leumo agam nyan keubiet keubiasaan jih tukang seumupok, dan ureueng po leumo nyan hana jijaga leumo jih nyan, leumo gob nyang ka mate nyan haroh jigantoe ngon leumo agam nyang mantong udeb, dan leumo nyang ka mate nyan jeuet jicok keudroe jih keudroe." "soemantong nyang cue saboh leumo atawa bubiri oh lheureh nyan laju jisie beulatang nyang ka lheureh jicue nyan atawa jipeubloe, atra gob nyang jicue nyan haroh jigantoe tieb saboh leumo nyang gadoh ngon limong boh leumo nyang laen dan tieb saboh bubiri ngon peuet boh bubiri nyang laen. ureueng nyan haroh jigantoe barang nyang jicue nyan. meunyo bak ureueng nyan hana sapeuen, ureueng nyang beudroe teuma teupeubloe sibagoe namiet sibagoe geunantoe barang nyang ka jicue nyan. meunyo nyang jicuenyan leumo, keuleudee atawa bubiri, dan meuteume bak ureueng nyan lam keuadaan udeb, ureueng nyan haroh jigantoe tieb saboh beulatang peulara ngon dua boh beulatang peulara. meunyo watee malam sidroe pancuri keudrob jaroe watee jiceumucue bak saboh rumoh, dan pancuri nyan teupoh mate, ureueng nyang poh pancuri nyan hana salah. teuma meunyo hainyan teujadi bak watee uroe, ureueng nyang poh mate pancuri nyan teuanggab salah. soe nyang peubiyeu beulatang peulara jih jimeurot lam ladang jih atawa lam lampoh anggo jih, dan beulatang nyan laju jimeurawoh keudeh keunoe sira jijakrot seunaman ureueng laen, teuma le ureueng po beulatang nyan haroh jibayeue geunantoe rugoe deungon hase nyang leubeh get nibak ladang atawa lampoh anggo ureueng nyan keudroe. soe nyang peukab apui lam ladang jih keudroe oh lheurehnyan apui nyan laju jimeu-eue lam ladang ureueng laen dan laju tutong sampoe habeh gandom nyang bantimoh atawa geuneude-geuneude gandom nyang ban lheureh teupot, dan ureueng nyan peukab apui nyan haroh jibri geunantoe rugoe. miseujih na ureueng nyang situju jikeubah peng atawa barang nyang meuhareuga. teuma oh dudoe teunyata barang keuneubah gobnyan jicue lam rumoh ureueng teupat jikeubah nyan. meunyo ureueng nyang cue barang nyan meuteume, ureueng nyang eue haroh jibayeue duagoe lipat. teuma meunyo pancuri nyan hana meuteume, ureueng teupat jikeubah barang nyan haroh teuba u rumoh iebadat, dan disinan ureueng nyan haroh jimeusumpah bahwa barang nyang jikeubah le gob

di rumoh jihnyan hana jicok. keuhai tieb-tieb na dakwa-dakwi keuhai hak milek, bah kheuehnyan keuhai leumo, keuleudee, bubiri, peukayan atawa peue mantong nyang gadoh oh lheuehnyan meurumpok lom teuma, ureueng nyang meungaku barang nyan atra jih ureueng nyan haroh teuba u rumoh iebadat. ureueng nyang geupeugah le po teu allah sibagoe ureueng nyang meusalah, ureueng nyan haroh jibayue dua goe lipat ubak ureueng po barang nyan. miseue jih sidroe ureueng jipeulara leumo, keuleudee, bubiri atawa beulatang laen atra rakan jih sabe keudroe-droe. oh lheuehnyan beulatang nyang jipeulara nyan mate, luka atawa jireupah le musoh, padahai hana saksi nyang kalon atra nyan. lam keuadaan lagee nyan ureueng nyan haroh jikak u rumoh iebadat disinan jimeusumpah deumi nan tuhan bahwa jihnyan hana jicue beulatang peulara nyang ka jipeucaya ubak jihnyan. meunyo ureueng nyan biet-biet hana jicue, ureueng po beulatang nyan haroh jitunggong keudroe ateuh rugoe beulatang jih nyan, dan di ureueng nyang peulara atra nyan hana peureulee jibayue. meunyo beulatang peulara nyan jicue le ureueng laen, dan ureueng nyang peulara atranyan haroh jibayue ateuh rugoe ureueng po atra nyan. meunyo beulatang peularanyan jiteugom le beulatang juwah, ureueng nyang peulara beulatang nyan haroh jitunyok seueh-seueh tuleung sibagoe barang bukeuti ubak ureueng po beulatang nyan. dan hana peue jibayue geunantoe rugoe ateuh beulatang nyang jiteugom le beulatang juwah nyan. meunyo sidroe-droe ureueng jipeupinjam saboh beulatang peulara dan beulatang nyan laju keunong luka atawa mate bak watee ureueng po atranyan hana bak teupat teujadi nyan, ureueng nyang ngui beulatang nyan haroh jibayue geunantoe rugoe. teuma meunyo hainyan teujadi watee ureueng po beulatang nyan na disinan, ureueng nyang ngui beulatang nyan hana peureulee jigantoe rugoe. meunyo beulatang peulara nyan beulatang teumat gala, ateuh rugoe beulatang nyan ka teutob ngon upah-upah mat gala." "soe nyang bujuk sidroe aneuk dara nyang gohlom meutunangan keu jie meusajan ngon jih, ureueng nyan haroh jibayue jeuname dan jimeukawen ngon aneuk dara nyan. teuma ayah inong nyan hana jibri aneuk agam jihnyan jimeukawen ngon si dara nyan, ureueng agam nyan haroh jibayue ubak ayah aneuk inong nyan peng nyang le jih sidub jeuname meukawen keu sidroe aneuk dara. soemantong ureueng inong nyang buet jih jipeuguna ieleume sihe ureueng inong nyan haroh teupoh mate. ureueng nyang buet jih jimeujeuhet ngon beulatang ureueng nyan haroh teupoh mate. soe mantong nyang jipeuseumah keureubeuen ubak ilah-ilah nyang laen seulaen nibak ulon, tuhan, ureueng nyang peubuet nyan haroh teuhukom mate. bek gata seksa atawa gata peubuet nyang hana ade ateuh ureueng aseng; ingat kheueh bahwa yohmasa ilee gata pih ureueng aseng di nangroe meuse. bek peusanaut inong balee atawa aneuk yatem ngon aneuk meuntui ban galak droe. meunyo gata tapeubuet nyang jeuhet ateuh awaknyan, ulon, tuhan teuma lon deungoe awaknyan meunyo jimeuhoi ngon jilakee tulong ubak ulon. ulon teuma

beungeh dan ulon poh mate gata lam mideuen prang, akhejih bubena peurumoh gata jeuet keu inong balee, dan aneuk-aneuk gata jeuet bak aneuk yatem. meunyo gata tapeu-utang peng keu ureueng gasien nyang na lam bansa ulon, bek kheueh gata meubuet lagee ureueng nyang tunggee utang deungan jilakee bungong. meunyo gata cok bajee jubah ureueng laen sibagoe jaminan ateuh utang ureueng nyan, bajee jubah nyan haroh gata jokpulang sigohlom mata uroe jillob, sabab ija nyan na kheueh atra ureueng dan hana nyang laen keu ija silimbob. meunyo ija nyan hana teujok pulang ubak ureueng nyan, peu kheueh lom nyang haroh jingui keu ija limbob watee jie? meunyo ureueng nyan jimeuhoi sira jilakee tulong ubak ulon, hainyan teuma ulon deungoe sabab bak ulon na gaseh sayang. bek gata peusumpah po teu allah dan bek teuma gata kutok peumimpin bansa gata. bak watee nyang ka teupeuteuntee, peuseumah kheueh keu ulon siladom nibak hase gandom gata, ie anggo gata dan minyeuk zaiton gata. jok kheueh bak ulon aneuk agam gata nyang tuha, meunan cit leumo dan bubiri agam nyang phon lahe. peubiyeu mantong mandum beulatang nyan tinggai bak nang jih treb jih tujoh uroe, oh lheueh nyan jok kheueh ubak ulon bak uroe nyang keulapan. gata umat ulon, sabab nyan kheueh beulatang peue mantong nyang jiteugom le beulatang juwah, hana jeuet gata pajoh sie beulatang nyan; dan gata jok laju banmandum nyan keu ase-ease." "bek gata peutabu haba sulet nyang hana beutoi, dan bek gata tulung ureueng nyang jeuhet nyang jibri keusaksian nyang hana beutoi. bek jeuet keu ureueng lagee ureueng rame meunyo awaknyan jipeubuet salah atawa jiseuleweng hukom deungan cara jibri keusaksian nyang hana beutoi. bek gata bida-bida manusia nibak peukara di kanto mahkamah, bah pih nyang teungoh jipeusidang nyan ureueng gasien. meunyo gata hana teusangka-sangka na gata ngieng leumo atawa keuleudee musoh gata ka sisat, gata ba kheueh lom ubak ureueng po jih. meunyo keuleudee musoh gata nyan rhot sabab brat beuban jih, gata tulung kheueh mangat keuleudee nyan jeuet jidong lom; bek gata tinggai meunan mantong. peusanaut kheueh ureueng gasien deungan ade meunyo ureueng nyan jikak peuget peukara u kanto mahkamah. beujoh kheueh nibak tuduhan nyang hana beutoi dan bek na jeuet keusabab ureueng nyang hana meusalah teuhukom mate, sabab ulon hana galak keu ureueng nyang jipeubuet buet nyang jeuhet lagee nyan. bek gata teurimong peng sogok, sabab ngon peng sogok nyan ka teupeujeuet ureueng laen buta ubak nyang beuna dan jeuet keurugoe ubak ureueng-ureueng nyang hana meusalah. bek gata peusanaut ateuh ureueng aseng ban galak droe; gata tateupeue pakriban rasa jih jeuet keu ureueng aseng, sabab yoh masa ilee pih gata jeuet keu ureueng aseng di nangroe meuse." "nam thon treb jih gata jeuet gata seumula lam ladang gata dan gata pajoh nibak hase ladang nyan. teuma bak thon nyang keutujoh tanoh nyan haroh gata peubiyeu meunan mantong. nyang treb jih tujoh thon gata hana jeuet gata peusapat sapeu nyang timoh deungan keudroe jih lam ladang gata. gata peubiyeu mantong atra nyan jicok le

ureueng gasien, dan seueh-seueh nyang na mantong tinggai keu beulatang kleut. dan hai nyang lagee nyang gata peubuet teuma atueh lampoh anggo dan bak-bak zaiton gata. nam uroe lam sigoe aleuhut gata jeuet gata meubuet, teuma bak uroe nyang keutujuh gata haroh tapioh, mangat beulatang peulara gata, namiet-namiet dan ureueng-ureueng aseng nyang jimeubuet keu gata jeuet cit jipioh teuma. ngieng kheueh banmandum nyang ka ltheueh ulon peugah ubak gata, bek gata seumah ilah-ilah nyang laen, meunan cit gata teuh nan mantong nyan pih hana jeuet." tieb-tieb thon haroh gata peuna lhee goe peurayaan keu gata horeumat ubak ulon. bak buleun abib, bak watee nyang ka teupeuteutab, gata haroh tapeuna peurayaan ruti hana meurago deungon cara nyang ka ltheueh ulon peurintah ubak gata, sabab lam buleun nyan gata ka gata tinggai nanggroe meuse. bek pajoh ruti nyang meurago treb jih tujuh uroe seumantong peurayaan nyan. pajan mantong gata jak meueibadat ubak ulon haroh gata ba peuseumahan. peuna kheueh khanuri keumeukoh bak watee gata jipeuphon pot hase nibak ladang gata. peuna kheueh khanuri jambo on bak akhe thon watee gata peusapat hase lampoh anggo dan lampoh boh-boh kayee. tieb-tieb thon watee teupeuna ban lhee boh khanuri nyan, banmandum ureueng agam haroh jijak meueibadat ubak ulon, tuhan allah gata. bek gata peuseumah ruti nyang meurago watee gata keureubeuen beulatang peulara keu ulon. gapah beulatang peulara nyang gata keureubeuen keu ulon watee peurayaan nyan hana jeuet teutinggai sampoe oh singoh beungoh nyan. tieb-tieb thon haroh gata ba u baet tuhan allah gata gandom nyang phon gata po. eungket sie aneuek bubiri atawa aneuek kameng hana jeuet teutaguen ngon iemom nang jih." ulon teuma lon kirem malaikat lon leubeh awai nibak gata keu jijak lindong gata watee gatajak dan jiba gata bek teumpat nyang ka ulon keubah. simak kheueh dan taat kheueh ubak gobnyan. bek brontak bak malaikat nyan sabab jihnyan na kheueh utosan lon, dan jihnyan hana teuma jipeumaphon tieb-tieb nyang salah nyang gata peubuet. meunyeo gata taat ubak jihnyan dan gata peubuet peue-peue mantong nyang ulon peurintah, ulon teuma lon muprang lon lawan banmandum musoh gata. malaikat ulon jijak leubeh awai nibak gata dan jiba gata u nanggroe bansa amori, het, feris, kanaan, hewi dan yebus, dan awaknyan ulon peubinasa. bek gata seumah patong-patong peulindong awaknyan dan bek gata iebadat lagee awaknyan peubuet. peuhanco kheueh bubena patong-patong peulindong awaknyan dan peupatah laju bubena tameh-tameh batee nyang awaknyan peuet keu teumpat jih iebadat. meunyeo gata taseumah ulon, tuhan allah gata, gata teuma ulon bri beureukat deungon peunajoh dan ie jieb, dan sigala peunyakat teuma lon peujioh nibak gata. lam nanggroe gata hana ureueng inong nyang rhot aneuek atawa inong balui. gata ulon bri umu nyang panyang. bansa-bansa nyang gata teuka nyan teuma ulon peujeuet jiteumakat ubak ulon; awaknyan teuma lon peujeuet keukaru krab krieb hana meuteuntee; banmandum musoh gata teuma jisurot sira jiplueng. bubena musoh gata teuma ulon

peucubre hana meuteuntee, dan bansa-bansa hewi, kanaan dan bansa het ulon use dikeue gata mangat gata jeuet tamaju. awaknyan hana ulon use sigoguih lam sithon, mangat tanoh nyan hana teulanta, dan beulatang juwah hana meuraja lela. awaknyan teuma lon use bacut-bacut, sampoe ureueng-ureueng gata ka seh jai jiduek nibak tanoh nyan. bataih-bataih nanggroe gata teuma lon peuteutab phon nibak lhok akaba sampoe ubak krueng efrat, dan nibak laot teungoh sampoe ubak padang pasi. keu gata teuma ulon bri kuasa atueh peunduduek nanggroe nyan, sampoe awaknyan hase gata use watee gata maju tareubot tanoh nyan. bek gata peuet janji ngon ureueng-ureueng nyan atawa ngon ilah-ilah awaknyan. bek gata peubiyeu ureueng-ureueng nyan jitinggai di nanggroe gata, mangat gata bek gata seumah ilah-ilah awaknyan dan meudesa teuhadat ulon. meunyeo gata taseumah ilah-ilah awaknyan, gata ka rhot lam peurangkab mawot." oh ltheueh nyan tuhan meufeuruman ubak nabi musa, "ek kheueh laju keu gata jak meuhadat ubak ulon, gata meussajan ngon nabi harun, nadab dan abihu, dan tujuh ploh droe peumipen bansa, dan sujut kheueh laju taseumah ulon rot jioh. dan gata keudroe nyang jeuet peurab ubak ulon. nyang laen hana jeuet jipeurab toe ngon ulon, dan rakyat sagai-sagai bek jipeuteo bek gunong nyoe." oh ltheuehnyan nabi musa laju geujak sira geupeumaklum habanyan ubak banmandum bansanyan banmandum peurintah dan atoran tuhan. awaknyan mandum jijawueb ngon haba nyang sipeue kheun, "kamoe kamoetem peubuet banmandum nyang geupeugah le tuhan." oh ltheueh nyan nabi musa laju geutuleh banmandum peurintah tuhan. oh singoh nyan banbeungoh that-that, laju geupeudong saboh miseubah deungon dua blaih boh tugu bak gaki gunong nyan; tieb-tieb saboh tugu sibagoe waki saboh sukee bansa israel. oh ltheuehnyan nabi musa laju geu-utus na meupadub-droe ureueng muda, dan awaknyan laju jipeuseumah keureubeuen nyang teutot keu tuhan dan jisie teuma na meupadub boh leumo keu keureubeuen peudame. siladum nibak darah leumo nyan laju geucok le nabi musa laju geuro lam ayan-ayan. siladum teuk laju geuro atueh miseubah. oh ltheuehnyan laju geucok kitab peujanjian nyang na teutuleh peurintah-peurintah tuhan, dan laju geubeuet ngon su nyang meuleungkeung keu bansa nyan. kheun awaknyan, "kamoe meutem kamoe taat ubak tuhan dan kamoe peubuet peue-peue mantong nyang geupeurintah le gobnyan." oh ltheuehnyan nabi musa laju geucok darah nyang na lam ayan-ayan nyan dan laju geureutek atueh rakyat. kheun gobnyan, "darah nyoe sibagoe teupeukong peujanjian nyang ka geu ikat le tuhan deungon gata ngon dasai peue-peue nyang geupeurintah le gobnyan." oh ltheuehnyan nabi musa, nabi harun, nadab dan abihu dan bantuoh ploh droe peumipen nyan laju geupeurab ubak gunong, dan awaknyan laju jingiang po teu allah israel teungoh geudong atueh sesuatu lagee aleue nyang teupeuet nibak batee nilam, dan ijo lagee langet nyang drang. banmandum peumipen israel nyan ka jikalon po teu allah; bahpi meunan awaknyan hana geupeubinasa. oh ltheuehnyan

awaknyan laju jimakheun ngon ji-jieb ie. feureuman tuhan ubak nabi musa, "gata jak kheueh ubak ulon di ateuh gunung. disinan teuma ulon bri ubak gata dua boh batee nyang ka lon tuleh ngon banmandum hukom lon. banmandum hukom nyan ulon bri sibagoe peungajaran keu bansa nyan." dan nabi musa dan yosua peumbantu gobnyan meusiab-siab dan nabi musa laju geuteungoh ateuh gunung teupmat tinggai tuhan nyan. nabi musa ka geupeusan ubak banmandum peumimpin israel, "gata preh kheueh bak teupmat khimah-khimah nyoe sampoe kamoe meugisa keunoe. nabi harun ngon hur na meusajan gata disinoe. soe mantong nyang na masa-alah, jeuet jak meuhadab ubak awaknyan keu teupeuseuleusoe." nabi musa laju geuteungoh ateuh gunung sinai, dan gobnyan laju jipeupayong le sigumpai awan. cahya tuhan teuka laju geutleun nibak ateuh gunung nyan dan le ureueng israel jingingi atranyan lagee apui nyang hu ateuh pucak gunung. nam uroe treb jih awan jipeupayong gunung nyan, dan bak uroe nyang keutujoh tuhan laju geuhoi nabi musa nibak lam awan nyan. dan nabi musa laju geuteungoh sampoe gobnyan ka geutamong lam awan nyan. peuet ploh uroe peuet ploh malam nabi musa tinggai disinan. feureuman tuhan ubak nabi musa, "gata yue kheueh ubak ureueng israel mangat jeuet jiba peuseumahan keu ulon. soemantong nyang meurak ate jih, haroh jiba peuseumahan nyang jiba nyan na kheueh: meuh, pirak dan peurunggu; ija lineun nyang haloh, ija wol ijo, ungu dan mirah, ija nyang teupeuget nibak bulee kameng, kulet bubiri agam nyang wareuna mirah, kulet haloh dan kayee akasia, minyeuk keu panyot, mubagoe jeuneh reumpah-reumpah keu minyeuk upacara dan keu dupa mangat bee, mubagoe rupa batee peumata keu teupeungui nibak efod dan sinutob dada imeum agong. gata yue kheueh ubak bansa nyan mangat jipeuget saboh khimah keu ulon, mangat ulon jeuet lon tinggai di lamkawan awaknyan. khimah-khimah ngon peuleungkab jih haroh awaknyan peuet seucara teureuncana nyang teuma ulon tunyok ubak gata." "gata peuet kheueh laju saboh peuto nibak bak kayee akasia nyang panyang jih 110 seuntimete, luwah dan manyang jih maseng-maseng 66 seuntimete. gata seupoh laju bagian dalam ngon bagian luwa jih ngon meuh aseuli dan gata peuet teuma bingkee jih nibak meuh. keu kayee ngon gulam peuto jih, gata peuet laju peuet boh gleueng meuh dan gata sangkot laju bak ban peuet boh gaki jih, dua boh gleueng nibak ban dua boh sagoe jih. meunan cit kayee ngon gulam atranyan gata peuet nibak kayee akasia dan gata seupoh cit deungan meuh, dan kayee geunulam nyan gata peutamong laju lam gleueng-gleueng nyan nibak tieb-tieb sagoe peuto nyan. kayee geunulam nyan bah teutab na lam gleueng-gleueng nyan, dan hana jeuet teusuet. dan lam peuto nyan gata keubah laju bandua neuk batee deungan peurintah-peurintah nyang teuma ulon peugah ubak gata. gata peuet kheueh laju sinutob peuto nyan nibak meuh aseuli, nyang panyang jih 110 seuntimete dan luwah jih 66 seuntimete. dan gata peuet teuma dua boh gamba kerub nyang teupeuget nibak meuh teuteumpeun, saboh nibak tieb-tieb ujung sinutob peuto nyan.

mandua boh gamba kerubim nyan haroh gata peujeuet saboh bagian ngon sinutob jih, dan teupeuduek saleng meuhadab keue deungan sayeub nyang na meureuntang ateuh peuto nyan. keubah kheueh laju bandua neuk batee lam peuto nyan dan gata pasang kheueh laju sinutob di ateuh nyan. nibak teupmat nyan ulon teuma meurumpok ngon gata, dan nibak ateuh sinutob nyan, lamkawan mandua kerubim nyan, keu gata ulon bri hukom-hukom lon keu bansa israel." "gata cok laju kayee akasia dan gata peuet saboh meuja nyang panyang jih 88 seuntimete, luwah jih 44 seuntimete, dan manyang jih 66 seuntimete. oh lheurehnyan gata seupoh laju ngon meuh aseuli dan gata pasang teuma saboh bingkee meuh bansikeulileng. gata peuet teuma bineh meuja nyang luwah jih 7,5 seuntimete, dan gata peuet bataih meuh bansikeulileng bineh nyan. gata peuet teuma peuet boh gleueng meuh oh lheurehnyan gata pasang laju bak ban peuet boh sagoe nibak gaki jih, rab ngon bineh jih. gleueng nyan ngon peuteun kayee geunulam mangat meuja nyan hasa teugulam. kayee ngon gulam nyan haroh teupeuget nibak kayee akasia dan teuseupoh teuma ngon meuh. peuet kheueh teuma pireng-pireng, cangkik-cangkik, keundi-keundi dan cambong-cambong keu ngon peuseumah ie anggo. banmandum peuleungkap meuja nyan haroh teupeuget nibak meuh aseuli. meuja nyan haroh teukeubah dikeue peuto peujan-jian, dan ateuh meuja nyan haroh na teukeubah ruti peuseumahan." "peuet kheueh gaki panyot nibak meuh aseuli. lapek ngon teupmat mat jih haroh teupeuget nibak meuh nyang teuteumpah; bungong-bungong hiasan, meunan cit deungan kuncob dan keulopak jih haroh meusaboh ngon lapek dan teupmat mat jih. nibak teupmat mat nyan haroh teupeuget nam boh cabeueng, lhee boh cabeueng nibak tieb-tieb bineh jih. bak tieb-tieb cabeueng haroh teupeuget hiasan lhee boh bungong badam deungan kuncob dan keulopak jih. nibak teupmat mat jih haroh teupeuget hiasan peuet boh bungong badam deungan kuncob dan keulopak jih. dimiyueb tieb-tieb pasang cabeueng nyan haroh teupeuget saboh kuncob. banmandum gaki panyot nyan deungan kuncob-kuncob dan cabeueng-cabeueng jih haroh teupeuget nibak sikrek meuh aseuli nyang teuteumpa. peuet kheueh tujoh boh panyot nibak gaki panyot nyan dan pasang kheueh beumeusigak sampoe cahya jih muble ukeue. peuet kheueh alat keu teupeugleh dah panyot dan talam jih jih haroh teupeuget nibak meuh aseuli. peugna kheueh lhee ploh limong kilogram meuh aseuli keu teupeuget gaki panyot nyan deungan banmandum peuleungkapan jih. jaga kheueh mangat gaki panyot teupeuget paih lagee cuntoh nyang ulon tunyok ubak gata di ateuh gunung nyoe." "peuet kheueh khimah keu ulon nibak siploh on ija lineun nyang haloh, teuteunun ngon ija wol ijo, ungu dan mirah. cob kheueh ija nyan ngon gamba kerub. tieb-tieb sion ija haroh saban ukoran jih, panyang jih dua blah metee dan luwah jih dua metee. limong on ija haroh teusambat jeuet jih keu saboh layeue, dan nyang limong on teuk lagee nyan cit teupeuget. peuet kheueh ceunawiet ija ijo nibak bineh bandua

boh layeue nyan, limong ploh boh ceunawiet nibak maseng-maseng layeue. peuket kheueh limong boh sinangkot meuh keu ngon sambat bandua boh layeue nyan mangat hase teupeusaboh. keu bubong khimah nyan peuket kheueh teuma siblahi on ija nibak bulee kameng. tieb-tieb sion museuti saban sinukoh jih, panyang jih lhee blaihi metee dan luwah jih dua metee. limong on haroh teusambat jeuet keu saboh layeue, dan nam on nyang laen nyan meunan cit teupeuget. sinambat nyang keunam haroh teulipat dua guna jih keungon tob bagian keue khimah. pasang kheueh limong ploh boh ceunawiet nibak bineh layeue nyang phon dan limong ploh boh ceunawiet nibak bineh layeue nyang keu dua. peuket kheueh teuma limong ploh boh ceunawiet nibak peurunggu dan lhat laju ubak layeue nyan mangat jeuet bandua boh layeue nyan hase teupeusaboh jeuet keu bubong khimah. siteungoh nibak sikhan ija nyang leubeh nyan na kheueh keu ngon tob bagian likot khimah. ija leubeh nyang luwah jih limong ploh seuntimetee nyang na bansipanyang khimah bah kheueh teupeubiyeu mantong teutob nibak bineh khimah nyan. peuket kheueh dua boh sinutob keu bagian keu luwa khimah, sion nibak kulet bubiri nyang teuboh wareuna mirah dan saboh teuk nibak kulet haloh. peuket kheueh runga-rungka khimah nyang teudong cot nibak kayee akasia. tieb-tieb runga manyang jih peuet metee dan luwah jih 66 seuntimetee. nibak tieb-tieb runga na dua boh patok nyang sipasang, ngon nyan runga-rungka nyan hase teusambat saboh ngon nyang laen. keu bagian seultan khimah, peuket kheueh dua ploh boh runga, deungon peuet ploh boh lapek jih nyang teupeuget nibak pirak, dua boh dimiyueb keu tieb-tieb runga keu bandua boh patok jih nyan. keu bagian utara khimah nyan, peuket kheueh dua ploh boh runga deungon peuet ploh boh lapek nyang teupeuget nibak pirak, dua boh dimiyueb tieb-tieb runga. keubagian likot khimah siblahi u barat, peuket kheueh nam boh runga dan dua boh runga keu ujong-ujong jih. runga-rungka ujong nyan haroh teupeu hubong nibak bagian gaki jih, laju trok ubak bagian ateueh jih. bandua boh runga nyang meubantuek sudut jihnyan bah kheueh teupeuget ngon cara nyan. ngon nyan banmandum nyan na lapan boh runga deungon nam blaihi boh lapek pirak, dua boh dimiyueb tieb-tieb runga. peuket kheueh limong blaihi boh kayee linteung nibak kayee akasia, limong boh keu runga-rungka nibak saboh bineh khimah, limong boh keu bineh nyang laen, dan limong boh teuk keu bagian bineh khimah siulikit siblahi ubarat. kayee lineung bagian teungoh haroh teupasang nyang manyang jih siteungoh runga, nibak ujong trok ubak ujong khimah nyan. runga khimah dan kayee-kayee linteung nyan haroh teuseupoh ngon meuh. gleung-gleung keu ngon peuteun kayee nyan haroh teupeuget nibak meuh. peudong kheueh khimah nyan meunurot reuncana nyang ulon tunyok ubak gata di ateueh gunung nyoe. peuket kheueh saboh ija pintoe nibak ija lineun haloh nyang teuteunon ngon ija wol ijo, ungu dan mirah. cob sulam kheueh ija nyan deungon gamba kerub. gantung laju ija pintoe nyan nibak peuet boh tameh

kayee akasia nyang teuseupoh ngon meuh deungon ceunawiet meuh dan teupasang ateueh peuet boh keunaleueng pirak. peuduek laju ija nyan dimiyueb deretan ceunawiet nibak bubong khimah. dilikot ija nyan haroh teukeubah peuto peujanjian nyang meuasoe bandua batee nyan. ija nyan teupeu jarak ruweueng suci ngon ruweueng mahasuci. peuduek kheueh laju sinutob peuto peujanjian diateueh peuto nyan. meuja teumpat teubiri peuseumahan haroh teukeubah diluwa ruweueng mahasuci nibak bagian utara, dan gaki panyot nibak bagian seultan lam khimah nyan. peuket kheueh tiree keu pintoe khimah nibak ija lineun haloh nyang teuteunon ngon ija wol ijo, ungu dan mirah, teuhias deungon cob sulam. keu tiree nyan haroh teupeuget limong boh tameh nibak kayee akasia nyang teuseupoh ngon meuh dan teupeukab ngon limong boh ceunawiet meuh. peuket kheueh limong boh keunaleueng nibak peurunggu keu tameh-tameh nyan." "peuket kheueh laju saboh miseubah nyang teupeuget nibak bak kayee akasia. hi jih peuet sagoe timang, panyang jih dan luwah jih maseng-maseng 2,2 metee dan manyang jih 1,3 metee. nibak tieb-tieb bagian ateueh jih haroh teupeuget lungkee-lungkee nyang meusaboh ngon miseubah. banmandum nyan haroh teulapek ngon peurunggu. peuket kheueh kualikual, sudok, cambong-cambong, geurupu-geurupu dan teumpat apui. banmandum peuleungkapan nyan haroh teupeuget nibak peurunggu. peuket kheueh teuma kawat teumanyuem nibak peurunggu dan pasang kheueh teuma peuet boh gleueng nibak kayee geunulam nibak ban peuet boh sagoe bagian miyueb. manyang jih kawat nyang teumanyuem nyan na kheueh siteungoh nibak manyang miseubah. kawat nyang teumanyuem nyan haroh teupalet nibak miseubah bagian miyueb. peuket kheueh dua boh kayee geunulam nibak kayee akasia nyang meulapek ngon peurunggu, dan peutamong laju u dalam gleueng-gleueng nibak mandua boh bineh miseubah watee teugulam miseubah nyan. peuket kheueh miseubah nyan nibak papeuen dan meururuhueng bagian dalam jih, meunurot reuncana nyang ulon tunyok ubak gata di ateueh gunung nyoe." "peuket kheueh peulataran ban sikeulileng khimah ulon nyang teupageue deungon layeue nibak ija lineun haloh. nibak bagian seultan, layeue nyan panyang jih 44 metee, teupeuteun bak dua ploh boh tameh peurunggu, maseng-maseng deungon lapek perunggu teuma, dan ceunawiet meunan cit deungon sinangkot jih teupeuget nibak pirak. meunan cit nibak bagian utara gata peuket lagee nyan teuma. bagian siubarat, layeue nyan panyang jih 22 metee, deungon siploh boh tameh dan siploh boh keunaleueng. 22 metee. siblahi wie ngon blah uneuen pintoe nyan haroh teupasang layeue, maseng-maseng panyang jih 6,6 metee deungon lhee boh tameh lam lhee boh keunaleueng. keu pintoe jih haroh teupeungui tiree nyan panyang jih 9 metee nibak lineun nyang haloh nyang teucob ngon ija wol ijo, ungu dan mirah, dan teuhias ngon cob sulam. keu ngon peuteuen ija pintoe nyan haroh teupeuget peuet boh tameh ngon peuet boh keunaleueng. banmandum tameh nyang na ban-

sikeulileng leuen nyan haroh teusambat saboh ngon nyang laen deungon ceunawiet pirak; ceunawiet jih haroh teupeuget nibak pirak dan keunaleueng jih nibak peurunggu. layeue nyang na bansikeulileng peulataran nyan panyang jih 44 metee, luwah jih 22 metee dan manyang jih 2,2 metee. layeue jih haroh teupeuget nibak ija lineun nyang haloh dan keunaleueng jih nibak peurunggu. banmandum peuleungkapan nyang teupeuguna lam khimah, banmandum pancang keu khimah dan keu layeue nyan haroh teupeuget nibak peurunggu."gata yue kheueh ureueng israel mangat jiba minyeuk zaiton nyang aseuli dan nyang paleng jroh keu panyot lam khimah ulon mangat jeuet teupeukab dan hu sabe. nabi harun dan aneuek-aneuek jihnyan haroh ji uroh panyot nyan phon seupot sampoe beungoh bak teupat ulon teuka, diluwa ija nyang teugantung di keue peuto peujanjian. peurintah nyan haroh jipeubuet keu siumu masa le ureueng israel dan keuturonan jih." "jakhoi kheueh laju nabi harun aduen gata meusajan ngon aneuek-aneuek jih nadab, abihu, eleazar dan itamar, dan peukhusos kheueh awaknyan mangat jeuet jilayani ulon sibagoe imeum. peuget kheueh peukayan imeum keu nabi harun, mangat jih nyan deuh leubeh teuhoreumat. jakhoi kheueh banmandum tukang ceumeucob nyang ka ulon bri keu-ahlian. gata yue kheueh ubak awaknyan mangat jicob peukayan nabi harun mangat jeuet jihnyan teupeukhusos keu jipeutimang ulon sibago imeum. gata yue teuma bak awaknyan mangat jipeuget tutob dada, efod, bajee jubah, bajee keumeja nyang teucob sulam, seureuban dan talo keuieng. peukayan imeum nyan haroh awaknyan peuget keu nabi harun aduen gata dan aneuek-aneuek jihnyan mangat hase jipeutimang ulon sibagoe imeum. peukayan nyan haroh awaknyan peuget nibak ija wol ijo, ungu dan mirah, beuneung meuh dan lineun haloh. seulaen nibak nyan efod haroh teuhias ngon cob sulam. dua krek talo baho ngon ikat efod nyan haroh teucob nibak bineh jih. saboh talo keuieng, ija teunon haloh nyang teupeuget nibak bahan nyang saban atranyan haroh teucob nibak efod nyan mangat jeuet saboh bagian. cok kheueh laju dua neuk batee deulima. mita kheueh sidroe pandee meuh nyang ahli ji uke nibak batee nyan nan-nan mandua blaih droh aneuek nabi yakub meunurot urotan umu jih, nam boh nan nibak tieb-tieb batee. dan oh lheurehnyan mandua neuk batee peumata nyan haroh teupasang lam bingkee meuh dan teukeubah bak taloe baho efod sibagoe tanda peuingat bak bandua blaih boh sukee israel. deungon cara lagee nyan nabi harun ka geuba nan awaknyan bak baho gobnyan, sampoe ulon, tuhan, sabe lon ingat keu awaknyan. seulaen bandua boh bingkee meuh nyan haroh teuma teupeuget dua krek rante nyang teupeuget nibak meuh aseuli nyang teuputa lagee talo, keu teupasang nibak bingkee meuh nyan." "peuget kheueh laju saboh sinutob dada keu imeum agong keu jingui bak watee jihnyan keuneuk jiteupeue peue keuheundak po teu allah. bahan dan sinulam sinutob dada nyan haroh saban ngon bahan dan sinulam efod. hi jih peuet sagoe dan teulipat dua, panyang ngon luwah jih maseng-maseng 22 seuntimete. pasang kheueh

peuet boh bareh batee peumata nibak sinutob dada nyan. bak bareh nyang phon batee deulima, topas dan baiduri sepah. nibak bareh nyang keudua batee zamrod, batee nilam dan intan. nibak bareh nyang keu lhee batee lazuardi, batee akik dan batee keucubong. nibak bareh nyang keupeuet batee pirus, batee yakut dan batee ratna ceumpaka. bandua blaih peumata nyan haroh teu ikat ngon meuh. nibak tieb-tieb peumata haroh teu-uke sidroe nan nyang na lamkawan aneuek nabi yakub sibagoe tanda peuingat keu sukee-israel. peuget kheueh teuma keu sinutob dada nyan dua krek rante nibak meuh aseuli nyang teuputa lagee taloe. peugot kheueh teuma dua boh gleueng meuh dan pasang kheueh laju bak mandua ujung ateueh sinutob dada nyan dan oh lheurehnyan peutamong laju bandua krek rante meuh nyan u dalam gleueng-gleueng nyan. bandua krek ujung laen nibak rante nyan haroh teuiikat nibak bandua boh bingkee, mangat sinutob dada nyan jeuet teusambat ngon bagian keue talo baho efod. oh lheurehnyan peugot kheueh teuma dua boh gleueng meuh nyang laen, dan peukab kheueh laju nibak sinutob dada nyan nibak ujung miyueb bagian dalam nyang keunong efod. oh ka lheurehnyan, peugot kheueh teuma dua boh gleueng meuh nyang laen dan pasang kheueh laju nibak bagian keue mandua boh talo baho efod nyang to ngon sinambat agak u miyueb, bak bagian ateueh talo keuieng nibak teunon haloh nyan. gleueng sinutob dada haroh teuhubong deungon talo ijo nyang na nibak gleueng efod mangat sinutob dada nyan teutab na di ateueh talo keuieng dan hana leukang. bak watee nabi harun geutamong ubak teupat nyang suci, gobnyan haroh geuba nan-nan nibak sukee-sukee israel nyang na teu-uke nibak sinutob dada jihnyan, mangat ulon, tuhan, sabe lon ingat keu umat lon. peudeuk kheueh urim dan tumim didalam sinutob dada nyan keu jingui le nabi harun meunoye jihnyan jijak meuhadab ubak ulon. bak saat-saat nyang lagee nyan jihnyan haroh jipeuguna sinutob dada, mangat jihnyan jeuet jiteupeue keuheundak ulon keu umat israel." "bajee jubah nyang teungui ateueh efod banmandum teupeugot nibak ija wol ijo. ruhueng takue jih teupeukong ngon pita teununan mangat hana bagai teupriek. bansikeulileng miyueb jih haroh teupeugot hiasan lagee boh deulima nibak wol ijo, ungu dan mirah, teupeuseulang seuleng ngon boh teng-tong nyang teupeugot nibak meuh. bajee jubah nyan haroh jingui le nabi harun bak watee jihnyan jimeutugaib sibagoe imeum. bak watee jihnyan haroh jijak ubak ulon lam kama suci atawa jittingai teupat nyan, teuma teudeungoe su boh teng-tong nyan, mangat jihnyan bek mate. peugot kheueh saboh hiasan nibak meuh aseuli dan uke laju ngon haba lagee nyoe 'teupeu khusus keu tuhan'. ikat laju nyan nibak seureuban ngon talo ijo. piasan meuh nyan haroh jipasang le nabi harun bak dho jih mangat jeuet ulon, tuhan, lontem teurimong banmandum nyang jipeuseumah nyang jiba le ureueng israel keu ulon, bah kheueh watee jiba nyang jipeuseumah nyan jihnyan ka jipeubuet salah. bajee keumeja nabi harun haroh teuteunon ngon ija lineun nyang haloh. meunan cit peugot

cit teuma saboh seureuban nibak ija lineun haloh dan talo keuieng nyang teusulam. peuget kheueh bajee keumeja, talo keuieng dan seureuban keu aneuek-aneuek nabi harun mangat awaknyan deuh teuhoreumat. peungui kheueh peukayan nyan bak nabi harun syedara gata dan aneuek-aneuek jihnyan. boh kheueh minyeuk awaknyan ngon minyeuk zaiton; deungon na lagee nyan awaknyan ka teubaiat dan ka teupeukhusos jihnyan keu jiseueha ulon sibagoe imeum. dan peuget kheueh teuma keu awaknyan sileuweue paneuk nyang teupeuget nibak ija lineun, panyang jih nibak keuieng sampoe trok ubak pha keu teutob bagian tuboh nyang hana patot teukalon. sileuweueng haroh sabe awaknyan ngui bak watee jitamong lam khimah ulon atawa watee jipeurab bak miseubah watee jipeubuet upacara iebadat sibagoe imeum di kama suci, mangat awaknyan hana mate sabab ka teungieng bagian tuboh awaknyan nyang hana patot teukalon. atoran nyang lagee nyan teutob meulaku atueh nabi harun dan keuturonan jih." "meunoe kheueh cara jih teubaiat nabi harun dan aneuek-aneuek jih mangat jihnyan jeuet jilayani ulon sibagoe imeum. cok kheueh laju saboh leumo agam nyang mantong muda dan dua boh bubiri agam nyang hana meucupa. nibak teupong teurigu nyang paleng get, peugot kheueh adonan hana meurago. siladum nibak teupong nyang ka teulawok nyan haroh teupeugot ruti deungon minyeuk zaiton, siladum teuk bek teuboh minyeuk, dan nyang leubeuh teupeugot kuwe nyang teusilik ngon minyeuk. pasoe kheueh lam raga dan peuseumah kheueh atranyan keu ulon meusigoe ngon keureubeuen leumo agam dan bandua boh bubiri agam. gata yue kheueh ubak nabi harun dan aneuek-aneuek jihnyan jijak ubak babah pintoe khimah ulon sira jipeumano droe. peungui kheueh peukayan imeum ubak nabi harun: bajee panyang jaroe, efod, bajee jubah nyang teutob atueh efod, sinutob dada dan talo keuieng. peuseuon kheueh seureuban atueh ulee jihnyan dan samek kheueh bak seureuban nyan piasan meuh deungon ukeran 'teupeukhusos keu tuhan'. oh ltheuhnyan cok teuma minyeuk upacara, ro kheueh laju atueh ulee jih dan boh kheueh minyeuk atueh jihnyan. oh ltheuhnyan, yue teuma aneuek-aneuek jihnyan jiteuka dan peungui bajee panyang jaroe ngon talo keuieng nibak jih nyan, oh ltheuhnyan peuseuon kheueh seureuban atueh ulee awaknyan. meunan kheueh cara jih teupeubaiat nabi harun dan aneuek-aneuek jih. awaknyan dan keuturonan jih haroh jilayani ulon sibagoe imeum keu siumu masa. oh ltheuhnyan leumo agam nyan haroh gata ba ukeue khimah ulon. nabi harun dan aneuek-aneuek jihnyan haroh jikeubah jaroe atueh ulee beulatang nyan. sie kheueh laju leumo agam nyan dikewe ulon, nibak babah pintoe khimah ulon. cok kheueh laju siladum nibak darah leumo nyan dan gata siliek laju ngon jaroe gata nibak lungkee-lungkee miseubah. darah nyang leubeuh nyan haroh gata ro ubak bagian miyueb miseubah. oh ltheuhnyan gata cok kheueh banmandum gapah nyang teutob atueh asoe pruet jih, bagian nyang paleng get nibak ate dan bandua boh kitong ngon gapah jih dan gata keubah banmandum nyan atueh miseubah

dan gata tot kheueh laju sibagoe peuseumahan keu ulon. asoe jih, kulet jih dan pruet nibak leumo agam nyan haroh teutot diluwa khimah-khimah. nyan kheueh peuseumahan keu teupeu amphon banmandum desya imeum-imeum. oh ltheuhnyan cok kheueh laju saboh nibak bubiri agam nyan. nabi harun dan aneuek-aneuek jihnyan haroh jipeuduek jaroe awaknyan atueh ulee beulatang nyan. dan sie kheueh laju beulatang nyan, cok laju darah jih dan reutek laju nibak ban peuet boh sagoe miseubah nyan. bubiri agam nyan haroh teusie-sie. asoe pruet dan pha jih haroh teu riah dan teupeuduek atueh ulee jih meunan cit atueh sie-sie nyang laen. peuseumah kheueh laju banmandum bubiri agam nyan atueh miseubah keu keureubeuen nyang teutot. bee keureubeuen nyang mangat nyan lumpah that galak ate ulon. cok teuma bubiri agam nyang saboh teuk, na kheueh bubiri agam keu upacara peubaiat. gata yue kheueh ubak nabi harun dan aneuek-aneuek jihnyan mangat jipeuduek jaroe jih atueh ulee beulatang nyan. oh ltheuh nyan sie laju bubiri agam nyan, gata cok bacut darah beulatang nyan dan siliek laju bak on geulinyueng nabi harun dan aneuek-aneuek jih, nibak nang jaroe uneuen dan nang gaki uneuen awaknyan. darah nyang na mantong leubeuh nyan haroh gata siram atueh ban peuet boh sagoe miseubah nyan. meunan cit gata cok laju bacut darah nyang na atueh miseubah dan bacut minyeuk upacara, dan reutek kheueh atueh nabi harun dan aneuek-aneuek jihnyan meunan cit atueh peukayan awaknyan. deungon cara lagee nyan nabi harun dan aneuek-aneuek jihnyan meunan cit deungon peukayan awaknyan ka teupeukhusos keu ulon. cok kheueh teuma gapah bubiri agam nyan, ikue jih nyang meugapah, lapeh gapah nibak asoe pruet jih, bagian nyang paleng get nibak ate jih, ban dua boh kitong deungon gapah jih, dan pha uneuen beulatang nyan. nibak raga ruti nyang ka teupeuseumah keu ulon, cok kheueh saboh ruti nibak tieb-tieb macan: saboh nyang na teuboh minyeuk zaiton dan saboh teuk nyang hana teuboh minyeuk, meunan cit saboh kuwe. peudeuk kheueh laju banmandum peunajoh nyan lam jaroe nabi harun dan jaroe aneuek-aneuek jihnyan dan gata yue kheueh bak awaknyan mangat jitunyok ubak ulon sibagoe peuseumahan nyang teubri. oh ltheuhnyan cok kheueh laju ruti nyan nibak awaknyan dan tot laju atueh miseubah, atueh keureubeuen nyang teutot nyan. bee keureubeuen nyang mangat nyan lumpah that galak ate ulon. cok kheueh teuma dada bubiri agam nyan dan peuseumah kheueh atranyan sibagoe peuseumahan nyang teubri keu ulon. dan nyan kheueh jeumba gata. bak upacara watee teubaiat imeum, dada dan pha bubiri agam nyang teupeuguna lam upacara nyan haroh teupeuseumah sibagoe peuseumahan nyang teubri keu ulon dan teupeu aseng keu imeum-imeum. nyoe kheueh keuputosan nyang hana jeuet teu-ubah: bak watee umat ulon jijak ba peuseumahan keu peudame, dada dan pha beulatang keureubeuen nyan na kheueh atra imeum-imeum. nyang kheueh peuseumahan nyang jibri le umat keu ulon. peukayan iebadat nabi harun haroh teupeutreu ubak aneuek-aneuek jih, mangat

jeuet jingui watee awaknyan teupeubaiat. aneuk nabi harun nyang jeuet keu imeum geunantoe ayah jih dan jitamong lam khimah ulon keu jipeubuet iebadat lam kama suci, haroh jingui peukayan nyan tujuh uroe treb jih. cok kheueh laju sie bubiri agam nyang jipeuguna watee upacara teupeubaiat nabi harun dan aneuk-aneuk jihnyan dan taguen kheueh eungkot sie nyan bak saboh teupat nyang suci. eungkot sie nyan haroh awaknyan pajoh bak babah pintoe khimah ulon deungan ruti nyang na leubeh lam raga. awaknyan haroh jipajoh peunajoh nyang ka teukeureubeuen lam upacara peumaphon desya bak watee teubaiat. imeum nyang jeuet pajoh peunajoh nyang ka teupeukhusos keu ulon nyan. meunyo sampoe singoh beungoh eungkot sie dan ruti nyan mantong na tinggai, dan nyang leubeh nyan haroh teutot sampoe habeh, dan hana jeuet teupajoh, sabab ka teupeukhusos. upacara teupeubaiat nabi harun dan aneuk-aneuk jihnyan haroh teupeuna tujuh uroe peunoh, lagee nyang ka ulon peurintah ubak gata. tieb-tieb uroe haroh teupeuseumah saboh leumo agam keu keureubeuen peumaphon desya. deungan keureubeuen nyang lagee nyan miseubah ka teupeusuci. oh lheurehnyan miseubah nyan haroh gata boh minyeuk ngon minyeuk zaiton mangat jeuet teupeukhusos keu ulon. peubuet kheueh lagee nyan tieb-tieb uroe nyang treb jih tujuh uroe. dan miseubah banmandum nyan ka jeuet keusuci; peue mantong nyang keunong ateuheh miseubah nyan atranyan haroh teujuk ubak tuhan, dan soemantong nyang cukeh atranyan, ureueng nyan teuma meuteuma bala sabab teunaga keusucian nyan." "tieb-tieb uroe keu siumu masa, ateuheh miseubah nyan haroh teukeureubeuen dua boh bubiri nyang meumu sithon. nyang saboh keu keureubeuen beungoh seudangkan nyang saboh teuk keu keureubeuen seupot. meusigoe ngon aneuk bubiri keu keureubeuen beungoh, haroh teukeureubeuen teuma sikilogram teupong gandom nyang paleng get teujampu teuma ngon siaree minyeuk zaiton aseuli. seulaen nibak nyan siaree ie anggo. aneuk bubiri keu keureubeuen seupot haroh teukeureubeuen ngon cara nyang saban, beuna cit teupong, minyeuk zaiton dan ie anggo. bee keureubeuen nyang teutot nyan lumpah that galak ate ulon. dan seulanjut jih keu sigala jamen, keureubeuen nyang teutot nyan haroh teupeuseumah dikeue ulon bak babah pintoe khimah ulon. disinan kheueh ulon meurumpok ngon umat lon dan lon peugah haba ubak gata. nibak teupat nyan ulon meurumpok ngon bansa israel, dan deungan cahya ulon teuka teuma teupeujeuet teupat nyan suci. ulon teuma lon peujeuet khimah dan miseubah nyan suci. nabi harun ngon aneuk-aneuk jihnyan teuma ulon peukhusos nibak nyang laen mangat awaknyan jilayani ulon sibagoe imeum. ulon teuma tinggai lamkawan bansa israel, dan jeuet keu allah awaknyan. awaknyan teuma jiteupeue bahwa ulon kheueh tuhan allah awaknyan nyang ba awaknyan lon peuteubiet nibak nanggroe meuse, mangat ulon jeuet lon tinggai lamkawan awaknyan. ulon kheueh tuhan allah awaknyan." tuhan meufeureuman lom ubak nabi musa, "gata peuet saboh miseubah nibak bak kayee akasia keu teupat tot dupa. hi miseubah

nyan haroh timang peuet sagoe, panyang dan luwah jih maseng-maseng 45 seuntimete, dan manyang jih 90 seuntimete. nibak ban peuet sagoe jih nyan peuet kheueh teuma lungkee-lungkee nyang jeuet meusaboh ngon miseubah nyan. siblah u ateuheh jih, dan meunan cit ban peuet boh sagoe dan lungkee-lungkee jih haroh teuseupoh ngon meuh aseuli dan meunan cit teuboh teuma bingkee ban sikeulileng nyan. dan peuet kheueh dua boh gleueng nibak bandua boh sagoe mangat jeuet ngon peuteuen kayee geunulam miseubah nyan. kayee geunulam nyan haroh teupeuet nibak kayee akasia dan teuseupoh teuma ngon meuh. dan keubah kheueh miseubah nyan nibak mandua kreek ija nyang na dikeue peuto peujanjian, bak teupat ulon teuma meurumpok ngon gata. tieb-tieb beungoh watee nabi harun jikak tot panyot, jihnyan haroh jitot dupa nyang mangat bee diateueh miseubah nyan. hai nyang lagee nyan haroh jipeubuet cit teuma bak watee jihnyan jikak tot panyot oh seupot uroe. peuseumahan ateuheh dupa nyan haroh jipeubuet hana putoh-putoh siumu masa. dan bek kheueh gata peuseumah ateuheh dupa nyan keureubeuen nyang teularang, keureubeuen beulang atawa keureubeuen teuhidang; bek teuma teuro keureubeuen ie anggo di ateuheh nyan. lam sithon sigoe nabi harun haroh jipeuna upacara teupeusuci miseubah deungan cara teupeugleh ban peuet boh lungkee jih ngon darah beulang peulara nyang teukeureubeuen keu peumaphon desya. hai nyang lagee nyan haroh teupeubuet tieb-tieb thon siumu masa. miseubah nyan haroh suci banmandum dan teupeukhusos keu ulon." tuhan meufeureuman ubak nabi musa, "bak watee teupeuna seunsos ateuheh bansa israel, tieb-tieb ureueng agam haroh jibayeue keu ulon peng sinuboh keu droe-droe jih mangat jih nyan hana keunong bala bak watee seunsos nyan teupeuna. banmandum ureueng nyang rhoh teuitong nibak seunsos nyan ureueng nyan haroh jibayeue ngon peng nyang ka teupeuteuntee meunurot yuem nyang kana atoran bak khimah ulon sibagoe deureuma khusus keu ulon. soemantong ureueng nyang na teuitong nyan seunsos nyan, na kheueh tieb-tieb ureueng agam nyang kana umu dua ploh thon atawa leubeh, ureueng nyan haroh jibri deureuma khusus nyan. ureueng kaya hana jeuet jibayeue leubeh, dan di ureueng gasien hana jeuet jibayeue kureueng bak watee awaknyan jibayeue peng sinuboh keudroe-droe jih. kuteb kheueh peng nyan nibak ureueng israel, dan peuguna kheueh peng nyan keu iebadat lam khimah ulon. banmandum nyan na kheueh peng sinuboh droe awaknyan keudroe, dan ulon teuma sabe lon ingat keu lon lindong awaknyan." tuhan meufeureuman ubak nabi musa, "peuet kheueh saboh kulah ie nibak peurunggu meunan cit deungan lapek teupeuet nibak peurunggu. keubah laju kulah ie nyan lamkawan khimah dan miseubah, oh lheurehnyan pasoe kheueh kulah nyan ngon ie. ie nyan keu nabi harun dan aneuk-aneuk jih mangat awaknyan jeuet ji rhah jaroe ngon gaki sigohlom jitamong lam khimah atawa jipeurab ubak miseubah keu jiba keureubeuen nyang teutot. awaknyan haroh jikeureuja nyang lagee nyan mangat bek teupoh mate. peuratoran nyan haroh jitaat le

awaknyan dan keuturonan awaknyan siumu masa." tuhan meufeureuman ubak nabi musa, "gata cok kheueh reumpah-reumpah nyang paleng get, nam kilo mur nyang caye, lhee kilo kayee mameh, lhee kilo teubee mangat bee, dan nam kilo kayee teja. banmandum nyan teutimang meunurot sinimang nyang na teupeuguna lam khimah lon. tamah kheueh teuma peuet aree minyeuk zaiton, dan peuget kheueh minyeuk upacara, nyang teujampu lagee minyeuk mangat bee. peuguna kheueh nyang ka teujampu nyan keu teuboh minyeuk khimah ulon, peuto peujanjian, meuja dan banmandum peuleungkapan jih, gaki panyot dan banmandum peuleungkapan jih, miseubah teupat tot dupa, miseubah keu keureubeuen teutot deungon sigala peuleungkapan jih, dan kulah ie deungon keunaleueng jih. deungon cara lagee nyan haroh gata peukhusus barang-barang nyan keu ulon, mangat banmandum nyan ka jeuet keusuci. peue mantong nyang keunong bak miseubah nyan atranyan haroh teujok ubak tuhan, dan soemantong nyang mat atranyan teuma meuteume bala sabab teunaga keusucian atranyan. meunan cit boh teuma minyeuk ateueh nabi harun dan aneuek-aneuek gobnyan mangat awaknyan teubaiat jeuet keu imeum keu jilayani ulon. peugah laju ubak bansa israel bahwa siumu masa minyeuk upacara nyan khusus keu ulon. minyeuk nyan hana jeuet teupree ateueh ureueng-ureueng bala. bek gata peuget minyeuk nyang lagee nyan deungon gata peuguna alat jampu jih nyang nyan cit teuma. minyeuk nyan suci, dan haroh teuaggab sibagoe barang suci. ureueng nyang peuget minyeuk nyang lagee nyan, atawa jipeuguna keu ureueng nyang bukan imeum, ureueng nyan hana le teuaggab anggota umat ulon." tuhan meufeureuman ubak nabi musa, "gata cok kheueh laju mupadub macan reumpah-reumpah nyang sadub le jih, atranyan na kheueh geutah dama, kulet kleueng, geutah rasamala dan dupa nyang tulen. peuguna kheueh banmandum nyan keu teupeuget dupa meujampu nyang mangat bee. tamah kheueh teuma sira mangat dupa nyan teutab aseuli dan jeuet teupeuguna keu ulon. siladam nyang na nibak dupa nyan haroh teugileng sampoe haloh. gata ba kheueh atranyan ubak khimah ulon dan sipreuk kheueh atranyan dikeue peuto peujanjian. dupa nyan haroh teuaggab barang suci nyan teupeukhusus keu ulon. bek peuget dupa teujampu deungon bahan jih saban lagee nyan cit teuma keudroe gata. soemantong nyang peuget nyang harom lagee nyan bagoe, ureueng nyan hana le teuaggab anggota umat ulon." tuhan meufeureuman ubak nabi musa, "ulon ka lon pileh bezaleel bin uri, cucoe hur nibak sukee yehuda, dan ulon anugeurah jihnyan ngon kuasa ulon. ubak jih ulon bri peungeurtian, malem dan carong bak buet seuni: keu jipeuget reuncana nyang that teupeureulee nibak buet nyang ahli ngon carong dan jipeuget nibak meuh, pirak dan peurunggu; keu teuasah batee peumata nyang teutatah; keu teu-uke kayee dan keumubagoe rupa karya seuni nyang laen. oholiab, bin ahisamakh nibak sukee dan, nyan pih ka ulon pileh keu jitulong jihnyan. meunan cit ulon bri keu-ahlian nyang luwa biasa ubak utoh-utoh nyang carong, mangat awaknyan

jeuet jipeuget peue mantong nyang ulon peurintah: khimah ulon, peuto peujanjian dan sinutob nyan, banmandum peurabot khimah, na kheueh meuja dan peuleungkapan jih, gaki panyot nibak meuh aseuli deungon peuleungkapan jih, miseubah teupat tot dupa, miseubah teupat tot keureubeuen nyang teutot dan banmandum peuleungkapan jih, kulah ie ngon keunaleueng jih, peukayan iebadat keu nabi harun dan aneuek-aneuek jih, nyang haroh jingui watee awaknyan meutugaih sibagoe imeum, minyeuk upacara, dan dupa mangat bee keu kama suci. banmandum nyan haroh awaknyan peuget paih lagee peutunok nyang ka ulon bri ubak gata." tuhan meufeureuman ubak nabi musa ngon peurintah gobnyan mangat geupeumaklum ubak bansa israel, "peuraya kheueh uroe sabat, uroe nyang ka ulon peuteutab sibagoe uroe meureuhah. keu siumu masa uroenyang ka jeuet keu uroe peuingat gata ngon ulon, mangat gata tateupeue bahwa ulon kheueh tuhan, dan bahwa ulon ka lon peujeuet gata bansa lon keudroe. uroe meureuhah nyan haroh gata horeumat sibagoe uroe nyang suci. keu gata ulon bri nam uroe keu gata meubuet, teuma bak uroe nyang keutujuh na kheueh uroe raya nyang teupeukhusus keu ulon. soemantong nyang hana jihoreumat uroe sabat nyan, teuma teutab jimeubuet bak uroe nyan, ureueng nyan haroh teuhukum mate. bansa israel haroh jipeuraya uroenyang treun meutreon sibagoe tanda uroe peujanjian. uroe nyan na kheueh uroe peuingat nyang teutab bansa israel dan ulon, sabab ulon, tuhan, ka ulon peujeuet langet ngon bumoe lam watee nam uroe, dan nibak uroe nyang keutujuh ulon pioh nibak buet dan ulon meureuhah." oh ka seulesoe geumeututoe ngon nabi musa di ateueh gunung Sinai nyan, po teu allah laju geubri ubak nabi musa dua boh keupeng batee nyang ka geutuleh le po teu allah deungon sigala peurintah-peurintah gobnyan. watee bansa israel jikalon bahwa nabi musa treb that-that hana geutreon-treun di ateueh gunung, dan mantong teutab na di ateueh gunung nyan, awaknyan laju jihudom bak nabi harun sira jipeugah ubak gobnyan, "geutanyoe hana tateupeue peue nyang teujadi ateueh nabi musa, ureueng nyang ba geutanyoe geupeuteubiet nibak nanggroe meuse; dan deungon lagee nyan neupeuget kheueh keu kamoe ilah nyang jeuet jipimpen kamoe." dan nabi harun laju geupeugah ubak awaknyan, "ploh kheueh laju bubena taloe takue meuh nyang na jingui le peurumoh-peurumoh dan aneuek-aneuek gata, dan gata ba kheueh nyan ubak ulon." dan awaknyan laju jiploh bubena taloe takue meuh nyang na bak ureueng inong jih maseng-maseng meunan cit nyang na nibak aneuek-aneuek jih oh ltheuhnyan laju jijakba atranyan ubak nabi harun. nabi harun geucok banmandum taloe takue nyan dan laju geupeucaye lam saboh teupat acuan dan geupeuget laju saboh patong leumo. bansa nyan jipeugah, "hei israel, nyoe kheueh ilah geutanyoe nyang ba geutanyoe jipeuteubiet nibak nanggroe meusel" oh ltheuhnyan nabi harun laju geupeudong saboh miseubah dikeue leumo meuh nyan dan laju geupeumaklum, "singoh beungoh na khanuri keu tahoreumat tuhan." oh singoh beungoh banseuboh

that, ureueng-ureueng israel laju jiba meupadub boh beulatang peulara keu keureubeuen nyang teutot, dan na padub boh teuk keu keureubeuen peudame. awaknyan jiduek sira jimakheun dan jijieb ie, dan laju jibeudoh keu meusukaria. ngon sabab nyan tuhan meufeureuman ubak nabi musa, "gata jaktreun kheueh laju beureujang-reujang, sabab bansa gata nyang gata pimpen jiteubiet nibak nanggroe meuse ka jipeubuet jeuhet. awaknyan ka jiseuleweng peue-peue nyang ulon peurintah. awaknyan jipeuget patong leumo nibak meuh nyang teuteumpah, laju jiseumah dan jipeuseumah keureubeuen ubak patong leumo nyan. kheun awaknyan, nyang kheueh ilah jih nyang ba awaknyan jiteubiet nibak nanggroe meuse. ulon kuteupeue bahwa bansa nyan kreueh that ulee. bek cuba-cuba jitam ulon. ulon beungeh keu awaknyan dan keuneuk lon peubinas awaknyan. teuma meunyoee gata dan keuturonan gata keu lon peujeuet saboh bansa nyang raya." nabi musa geulakee bak tuhan allah, sira geupeugah, "tuhan, pakon droeneueh haroh neupeubuet lagee nyan ateuhe awaknyan? bukan kheueh droeneueh ka neupeuseulamat awaknyan di nanggroe meuse deungon keukuasaan dan teunaga nyang raya? meunyoee droeneueh neupeubinas awaknyan, ureueng meuse teuma jipeugah bahwa droeneueh neupimpin bansa nyan jiteubiet nibak nanggroe meuse keu neujakpoh mate awaknyan nibak gunung-gunong dan neupeubinas awaknyan habeh banmandum. bek lagee nyan, ya tuhan, ubah kheueh niet droeneueh dan bek kheueh neupeuceulaka bansa nyan. ingat kheueh ubak hamba-hamba droeneueh nabi ibrahim, nabi ishaq, dan nabi yakub. ingat kheueh bahwa droeneueh ka neumeujanji ubak awaknyan deungon sumpah keu droeneueh bri keu awaknyan keuturonan nyang le lagee bintang dilanget, meunan cit banmandum tanoh nyang droeneueh meujanji nyan jeuet keumilek keuturonan awaknyan siumu masa." watee geudeungoe nariet nabi musa nyang lagee nyan tuhan laju geu-ubah niet gobnyan dan hana jadeh geupeubuet peue nyang ka geu ancang nyan keu geupeurhot ateuhe awaknyan deungon bala nyang raya. nabi musa laju geutreun lom nibak gunung nyan sira geuba mandua boh batee nyang ka teuteuleh peurintah-peurintah po teu allah nibak bandua bineh batee nyan. po teu allah keudroe nyang peuget batee nyan dan geu-uke peurintah-peurintah gobnyan ateuhe batee nyan. teungoh geujak sira geutreun nibak gunung nyan, yosua laju jideungoe ureueng-ureueng israel teungoh jikliek-kliek, dan jipeugah kheueh le yosua ubak nabi musa, "na su ureueng karu lagee ureueng muprang lam khimah-khimah." kheun nabi musa, "nyang teudeungoe kon su ureueng meusurak sabab ka meunang meunan cit kon su ureueng teuklik sabab ka taloe; nyan su ureueng meunyanoyee." watee nabi musa ka meutamah to ubak khimah-khimah nyan, deuh laju geukalon leumo meuh nyan dan ureueng rame teungoh meunari ngon meulikak, dan teuka kheueh beungeh gobnyan. bak teumpat nyan cit teuma, bak gaki gunung nyan, nabi musa geuseumpom batee nyang geuba nyan sampoe hanco meukeupeng-keupeng. oh ltheuehnyan laju

geucok patong leumo nyang teupeuget nibak meuh atra ureueng-ureueng israel nyan, geupeuhanco, geugileng sampoe haloh lagee abee, oh ltheuehnyan laju geujampu ngon ie. oh ltheuehnyan laju geuyue ubak ureueng israel mangat jijieb ie nyan. laju geupeugah ubak nabi harun, "peue nyang awaknyan peubuet ateuhe droeneueh sampoe awaknyan ka jipeubuet desya nyang paleng rayanyoe?" geujaweeb le nabi harun, "bek neubeungeh keu ulon; droeneueh neuteupeue keudroe pakriban neukat jih ureueng-ureueng nyoe keu jipeubuet jeuhet. awaknyan jipeugah ubak ulon, 'geutanyoe hana tateupeue peue nyang teujadi ateuhe nabi musa, ureueng nyang ka geuba geutanyoe geupeuteubiet nibak nanggroe meuse; sabab nyan neupeuget kheueh keu kamoe ilah nyang hase jipimpin kamoe.' ulon kuyue awaknyan mangat jibri bak ulon piasan meuh, dan atranyan laju jijok le awaknyan bak ulon. banmandum piasan nyan ulon peutamong lam apui, dan jeuet kheueh leumo nyoe!" nabi musa geusadar bahwa nabi harun ka geupaulheuh bansa israel lagee guda ltheueh lam weue, sampoe awaknyan ka jipeukem ngon jihina le musoh-musoh jih. dan geudong kheueh laju gobnyan dibabah pintoe geureubang khimah-khimah sira geudumpek, "soe nyang dong blaih tuhan jak keunoe!" dan teuka kheueh sukee lewi jidong bansilingka nabi musa, dan laju geupeugah le nabi musa ubak awaknyan, "tuhan allah israel geupeurintah ubak gata mangat jeuet maseng-maseng gata suet peudeueng gata laju gata jak bansikeulileng khimah-khimah nyoe, phon nibak pintoe geureubang nyoe sampoe ubak babah pintoe geureubang nyang laen sira gata poh mate syedara-syedara, rakan-rakan dan wareh silingka gata." sukee lewi laju jipeubuet peurintah nyan dan bak uroenyan na lhee ribee droe mate jipoh. geupeugah le nabi musa ubak sukee lewi, "uroenyoe gata ka tapeukhusos droe jeuet keu imeum nyang layani tuhan deungon cara gatapoh mate aneuek-anuek banyak dan syedara-syedara gata, dan tuhan geubri beureukat ubak gata." oh singoh beungoh nabi musa geupeugah ubak bansa nyan, "gata ka gata peubuet desya nyang paleng rayeuk. teuma bak uroenyoe ulon teuma lon teungoh gunung nyan lom keu lonjak meuhadab tuhan; mudah-mudahan ulon geutem peuamphon keu desya-desya gata." oh ltheuehnyan nabi musa geujaklom meuhadab ubak tuhan sira geupeugah, "bansa nyan ka jipeubuet desya nyang paleng rayeuk. awaknyan ka jipeuget ilah nibak meuh. ulon meulakee bak droeneueh neupeuamphon kheueh desya awaknyan; meunyoee han, neusampoh kheueh nan ulon nyang na lam kitab ureueng-ureueng udeb." geujaweeb le tuhan, "teuma ureueng-ureueng nyang meudesa nibak ulon nyang lon sampoh nan jih lam kitab nyan. gata jak kheueh laju jinoenyoe, dan gata ba kheueh awaknyan ubak teumpat nyang ka ulon peugah ubak gata. malaikat lon teuma jibimbeng gata teuma watee jih trok jiteuka ureueng-ureueng nyan ulon hukom sabab desya-desya nyang jipeubuet." oh ltheuehnyan tuhan laju geupeutreun bala ateuhe ureueng-ureueng nyan sabab awaknyan jipaksa nabi harun jipeuget patong leumo nibak meuh nyan.

feureuman tuhan ubak nabi musa, "tinggai kheueh tempat nyoe dan gata jak kheueh laju meusajan ngon bansa nyang gata ba nibak nanggroe meuse u nanggroe nyang ka ulon meujanji bak nabi ibrahim, nabi ishaq dan nabi yakub meunan cit keuturonan awaknyan. ulon teuma lon kirem sidroe malaikat nyang bimbeng gata. ulon ku use bansa kanaan, bansa amori, bansa het, bansa feris, bansa hewi dan bansa yebus. gata tajak ubak tanoh nyang kaya dan subo. teuma ulon keudroe hana ulon jak meusajan gata, mangat gata hana lon peubinas bak teungoh rot, sabab gata na kheueh bansa nyang kreueh ulee." oh lheuehnyan tuhan geuyue ubak nabi musa mangat jeuet geupeugah ubak bansa israel, "gata bansa nyan kreueh ulee. meunyo ulon jak meusigoe ngon gata bahpi sikeujab mantong, kapasti gata ulon peubinas banmandum. ploh kheueh laju bubena piasan nyang gata ngui nyan, teuma ulon laju lon peuteuntee peue nyang teuma ulon peubuet ateuah gata." oh ka lheueh geudeungoe tuhan geubeungeuh lagee nyan, awaknyan seudeh lumpah na lagee ureueng nyang meukabong. dan laju jiploh banmandum piasan nyang jingui le awaknyan. jadi, oh ka lheueh jitinggai gunong sinai, bansa israel ka hana le jingui piasan. pajan mantong, meunyo bansa israel jipeudong khimah, nabi musa laju geucok khimah dan geupeudong jioh bacut nibak khimah-khimah awaknyan. khimah nyan teuboh nan khimah tuhan, dan soemantong nyang keuneuk lakee naseuhat ubak tuhan, jak kheueh keunan. meunyo nabi musa geujak ubak khimah nyan, ureueng-ureueng israel laju jidong bak babah pintoe khimah droe jih dan jikalon nabi musa sampoe geutamong. oh ka lheueh nabi musa geutamong, jitreun kheueh tamah awan dan laju jiploh bak babah pintoe khimah. nibak lam awan nyan tuhan laju geumeututoe ngon nabi musa. watee ureueng israel jikalon tamah awan teudong bak babah pintoe khimah tuhan, awaknyan banmandum jibeudoh dan jisujut dikeue khimah droe jih maseng-maseng. tuhan meufeuroman bak nabi musa sira meuhadab-hadab keue, lagee ureueng meututoe ngon rakan jih. oh lheuehnyan nabi musa laju geugisa ubak khimah-khimah. teuma yosua bin nun, sidroe aneuk muda nyang bantu nabi musa, teutab tinggai lam khimah nyan. bak siuroe nabi musa geumeututoe ubak tuhan, "tuhan, droeneuh neupeurintah ubak ulon keu lon bimbeng bansa nyoe sampoe trok u nanggroe nyang droeneuh peujanji. teuma droeneuh hana neupeugah soe nyang teuma droeneuh utus keu jitulong ulon. tuhan, droeneuh neupeugah bahwa droeneuh neuturi keu ulon, dan neutem ngon ulon. meunyo meunan, neutulong kheueh peugah ubak ulon peue reuncana droeneuh, tuhan, mangat jeuet lon layani droeneuh dan teutab galak ate droeneuh. ingat kheueh teuma bahwa bansa nyoe ka droeneuh pileh jeuet keu milek droeneuh." geupeugah le tuhan, "gata ulon lindong mangat meuteume gata cok keuhak milek tanoh nyang ka ulon peujanji." geujawueh le nabi musa, "meunyo tuhan hana neujak meusajan ngon kamoe, bek neuyue kamoe tinggai tempat nyoe. pakriban ureueng laen jiteupeue bahwa droeneuh neutem tulong ulon dan keu bansa nyoe meunyo droeneuh

hana neutulong kamoe? tuhan na di lamkawan kamoe teuma jeuet keumeulaen kamoenyoe ngon bansa-bansa laen nyang na ateuah rhueng bumoe." feureuman tuhan ubak nabi musa, "nyang gata lakee nyan teuma ulon kabui, sabab ulon kuturi gata dan ulon kutem ngon gata." oh lheuehnyan nabi musa geulakee lom, "tuhan, peudeuh kheueh bak ulon cahya droeneuh teuka." jawueh tuhan, "teuma ulon teuka deungon sigala keuagongan ulon dikeue gata, sira gata peugah nan ulon nyang suci. ulon kheueh tuhan, dan ulon ku tunyok ate ulon nyang murah dan gaseh sayang keue ureueng-ureueng nyang ulon pileh. rupa ulon hana ulon peudeuh ubak gata, sabab hana mungken manusia jingiang ulon, dan ulon teutab udeb. blaih ulon nyoe na buket batee; gata jeuet gata dong disinan. watee cahya ulon teuka lewat disinan, gata ulon peutamong lam saboh luengkiek nyang na lam buket batee nyan dan ulon peupadok ngon jaroe ulon sampoe ulon ka jeuet lon jak. dan teuma ulon tarek jaroe ulon mangat gata jeuet gata ngiang ulon rot likot, teuma rupa ulon teutab hana gata kalon." feureuman tuhan ubak nabi musa, "gata peuet laju dua boh batee tuleh lagee atra awai. ateuah batee nyan teuma ulon tuleh tutoe haba nyang saban lagee haba bak batee nyang ka gata peubeukah nyan. beusiab-siab kheueh singoh beungoh gata jak teungoh gunong sinai dan gata meuhadab ulon bak pucak gunong nyan. hana meusidroe pih nyang jeuet jisutot ngon gata atawa jidong bak sagoe toh mantong ateuah gunong nyan. leumo-leumo dan bubiri-bubiri bek gata peubiyue jimeurot naleueng bak gaki gunong nyan." oh lheuehnyan nabi musa laju geujak peuet dua boh keupeng batee, dan oh singoh beungoh mantong seuboh that laju geuba batee nyan geupeuteungoh ateuah gunong sinai lagee nyang ka geupeurintah le tuhan ubak gobnyan. dan geutreun kheueh tuhan nibak saboh gumpai awan; tuhan laju geudong ngon nabi musa nibak tempat nyan, dan laju geupeugah nan gobnyan nyang suci, na kheueh tuhan. oh lheuehnyan tuhan laju geujak dikeue nabi musa sira geupeugah lagee nyoe, "ulon nyoe tuhan, na kheueh allah nyang peunoh ngon murah ate dan gaseh sayang. geunaseh ulon meulimpah-limpah, ulon nyoe seutia dan hana bagai beungoh. ulon teutab ulon gaseh meuribee-ribee keuturonan dan ulon peumaphon ureueng nyang salah dan desya-desya; teuma ureueng nyang meusalah sagai-sagai hana ulon peubeubaih nibak hukuman, dan ulon hukum teuma aneuk-aneuk jih meunan cit cucoe-cucoe jih sampoe trok ubak keuturonan nyang keu lhee dan nyang keupeuet sabab desya ureueng syiek awaknyan." bak watee nyan cit teuma nabi musa geusujat sira geuseumah. geupeugah le nabi musa, "tuhan, meunyo droeneuh beutoi-beutoi neugaseh ulon, ulon lakee, beuneutem kheueh tuhan neujak meusajan ngon kamoe. bansa nyan beutoi kreueh that ulee, teuma neupeumaphon kheueh buet nyang jeuhet dan desya kamoe dan neuteurimong kheueh kamoe sibagoe umat droeneuh keudroe." feureuman tuhan ubak nabi musa, "jinoenyoe ulon peuet peujanjian ngon bansa israel. dikeue mata awaknyan ulon teuma lon peutahe ngon buet-buet nyang ajaeb

nyang gohlom na peureunah jipeubuet le bansa yoh mantong na atueh rhueng bumoe. banmandum bansa teuma jikalon buet-buet nyang ajaeb nyang ulon peubuet, sabab ulon, tuhan teuma ulon peubuet sipoe-peue nyang paleng parah atueh gata. taat kheueh hukom-hukom nyang ulon peugah ubak gata nibak uroe nyoe. ulon teuma lon use bansa amori, bansa kanaan, bansa het, bansa feris, bansa hewi dan bansa yebus bak watee gata tamaju. bek kheueh gata peuet janji ubak ureueng-ureueng nyan nanggroe teupmat gata teuka, sabab nyan jeuet keupeurangkab nyang akibat jih mawot atueh gata. deungon lagee nyan, bek kheueh gata peubuet lagee nyan, teuma gata reuloh laju bubena mezbah-mezbah awaknyan, peuhanco bubena tugu-tugu keuramat awaknyan dan gata koh kheueh laju tameh-tameh asyera, beurala awaknyan. bek gata seumah ilah nyang laen, sabab ulon nyoe tuhan, na kheueh po teu allah nyang hana lontem jipeusa ngon peue mantong. bek gata peuna janji ngon bansa nanggroe nyan, sabab bak watee awaknyan jiseumeumah dan jipeuseumah keureubeuen keu ilah-ilah awaknyan, awaknyan teuma jipakat gata, dan gata teuma gata turot. meunyoe aneuek-aneuek gata jimeukawen ngon ureueng-ureueng inong bansa aseng, awaknyan teuma jirayu le ureueng-ureueng inong nyan keu jitinggai ulon dan jiseumah ilah-ilah awaknyan. bek gata peuet atawa gata seumah ilah-ilah nyang teupeuget nibak logam. peuraya kheueh khanuri ruti nyang hana meurago. lagee nyang ka ulon peurintah ubak gata, gata haroh gata pajoh ruti nyang hana meurago nyang treb jih tujoh uroe nibak buleuen abib, sabab lam buleuen nyan gata tinggai nanggroe meuse. tieb-tieb aneuek agam lahe nyang tuha dan beulatang agam nyang phon lahe nyan na kheueh atra ulon, teuma gata haroh gata teuboih aneuek keuleudee nyang phon lahe deungon cara gata peuseumah saboh aneuek bubiri keugeunantoe jih. meunyoe hainyan hana gatatem teuboih, takue keuleudee nyan haroh gata wiet. tieb-tieb aneuek agam gata nyang tuha haroh gata teuboih. hana meusidroe pih nyang jeuet jijak ubak ulon meunyoe hana jiba peuseumahan. na nam uroe watee teumeubuet; bek kheueh meubuet bak uroe nyang keutujoh, bah kheueh bak museum meu-ueue atawa museum mupot. peuna kheueh khanuri museum mupot nyang raya bak watee gata peuphon pot hase phon nibak boh gandom. dan meunan cit gata peuna kheueh khanuri jambo on nibak akhe thon, watee gata pot boh-boh kayee. lhee goe lam sithon banmandum ureueng agam haroh jiteuka jijak seumah ulon, tuhan, allah israel. oh ka ltheueh ulon use bansa-bansa dikeue gata dan ulon peuluwah daerah gata, hana meusidroe pih nyang jijeuet reupah nanggroe gata watee gata tajak peuna khanuri ruti hana meurago, khanuri mupot dan khanuri jambo on. bak watee gata tapeuseumah beulatang peulara nyang teusie, bek gata peuseumah peue mantong nyang teuboh rago. beulatang peulara nyang teusie keu keureubeuen peurayaan paskah haroh teupeuhabek bak malam nyan cit teuma; hana jeuet tinggai sampoe oh singoh beungoh. tieb-tieb thon gata haroh gata ba u rumoh tuhan allah gata

wase nyang phon nibak tanoh gata. sie aneuek bubiri atawa aneuek kameng hana jeuet teutaguen ngon ie mom nang jih." feureuman tuhan ubak nabi musa, "tuleh kheueh tutoe haba nyan, sabab ngon dasai haba nyan, ulon peuet janji ngon gata dan deungon bansa israel." peuet ploh uroe peuet ploh malam nabi musa tinggai disinan meusajan ngon tuhan, dan sidubnyan treb gobnyan hana geumakheun dan hana geujieb ie. tutoe haba peujanjian nyan, na kheueh siploh peurintah allah, nyang teuteuleh atueh keupeng batee. watee nabi musa geutreu di atueh gunong sinai sira geuba siploh peurintah tuhan nyan, muka gobnyan muble-ble cahya sabab gobnyan ka meuhadah keue deungon tuhan, teuma nabi musa keudroe hana geuteupeue bahwa muka gobnyan muble-ble cahya. nabi harun meunan cit banmandum rakyat deuh jikalon bahwa nabi musa muble-ble cahya muka gobnyan, dan awaknyan teumakot jipeurab ubak gobnyan. teuma nabi musa laju geuhoi awaknyan, dan nabi harun meunan cit banmandum peumimpin awaknyan jipeurab ubak gobnyan, dan oh ltheuehnyan nabi musa laju geumeututue ubak awaknyan. oh ltheuehnyan banmandum rakyat israel meusapat jikeulileng gobnyan, dan ubak awaknyan banmandum nabi musa laju geupeusampoe banmandum hukom nyang ka geubri le tuhan ubak gobnyan di atueh gunong sinai. oh ka ltheueh geumariet ngon awaknyan, nabi musa laju geutob muka geuh ngon ija. pajan mantong nabi musa geutamong lam khimah tuhan keu geujak meututue ngon tuhan, ijanyan laju geupeuhah sampoe gobnyan geuteubiet uluwa. oh ltheueh nyan laju geupeusampoe ubak bansa israel banmandum peusan tuhan, dan awaknyan laju jingiang muka nabi musa muble-ble cahya. dan geutob lom muka gobnyan sampoe ubak gileran seulanjut jih meunyoe gobnyan geujak meututue ngon tuhan. nabi musa laju geupeusapat banmandum bansa israel oh ltheueh nyan laju geupeugah, "nyoe kheueh peurintah tuhan keugatanoye banmandum: na nam uroe geubri le gobnyan keu gata meubuet, teuma bak uroe nyang keu tujoh na kheueh uroe keu gata meureuh, uroe raya nyang geupeukhusus keu tuhan. soe nyang meubuet bak uroe sabat ureueng nyan teuhukom mate. nibak uroenyan gata hana jeuet peuhu apui lam rumoh gata." nabi musa geupeugah ubak banmandum bansa israel, "meunoe kheueh peurintah tuhan: ba kheueh peuseumahan keu tuhan. soe nyang meurak ate jih, bah kheueh jipeuseumah meuh, pirak dan peurunggu; ija lineun haloh, ija wol ijo, ungu meunan cit nyang mirah; ija nyang teupeuet nibak bulee kameng; kulet bubiri agam nyang ka teuboh wareuna mirah; kulet haloh, kayee akasia, minyeuk keu panyot; meubagoe reumpah keu minyeuk upacara dan keu dupa nyang mangat bee; peumata deulima dan peumata nyang laen keuteuboh tатаh nibak bajee efod dan sinotob dada imeum agong." banmandum utoh-utuh nyang carong lamkawan gata haroh jiteuka keujijak peuet peue nyang geupeurintah le tuhan, atra nyan na kheueh lagee nyoe: khimah, bubong dan sinotob jih, ceunawiet dan runga jih, kayee-kayee meulinteung, tameh pintoe dan keunaleueng jih; peuto peujanjian

ngon kayee geunulam jih, sinutob jih dan ija ngon tob jih; meuja ngon kayee geunulam jih, banmandum peuleungkapan jih meunan cit ruti peuseumah gaki panyot keu ngon peutrang meunan cit deungon mandum peuleungkapan jih, panyot minyeuk jih; miseubah keu teupat tot dupa meunan cit ngon kayee geunulam jih, minyeuk upacara, dupa nyang mangat bee; tiree keu pintoe khimah, miseubah keu teupat keureubeuen nyang teutot meunan cit deungon kisi-kisi nibak peurunggu, kayee geunulam deungon banmandum peuleungkapan jih; bak ie keuteupat rhah keunaleueng jih, layeue-layeue keu peulataran, tameh-tameh deungon keunaleueng jih, tiree pintoe geureubang peulataran, patok-patok dan talo keu khimah dan keu peulataran jih; peukayan iebadat keu dumna imeum bak watee awak meutugaih nibak ruweueng suci dan peukayan khusus keu imeum nabi harun dan aneuek-aneuek gobnyan." laju bubena ureueng israel nyang na meugumpoi nibak teupat nyan bubar, dan soe mantong nyang na meurak ate jih, jikak ba peuseumahan keu tuhan keuteupeu leungkab khimah tuhan. meunan cit awaknyan jiba banmandum nyang teupeureulee keumeu iebadat dan bahan keu peukayan imeum. soe mantong nyang jitem, bahnyan ureueng agam meunan cit ureueng inong, jiteuka sira jiba peuto piasan, lagee keurabu, euncien, taloe takue, dan mubagoe rupa piasan meuh keu jipeuseumah ubak tuhan. tieb-tieb ureueng nyan na ija lineun haloh, ija wol ijo, ungu atawa mirah, ija nibak bulee kameng, kulet bubiri agam nyang ka teuboh wareuna mirah, atawa kulet haloh, jipeuseumah atra nyan. tieb-tieb ureueng nyang hase jipeuseumah pirak atawa peurunggu, jiba atranyan keu tuhan. meunan cit teuma nyang jipeubuet le ureueng-ureueng nyang na kayee akasia keu ngon keureuja nyan. bubena ureueng inong nyang carong ceumeucob jiba beuneueng lineun haloh ngon beuneueng wol ijo, ungu dan mirah nyang ka awaknyan peuet. meunan cit awaknyan jicob beuneueng nyang teupeuget nibak bulee kameng. bubena peumimpin jiba peumata deulima dan peumata laen keu teutatah dan nibak efod dan sinutob dada. meunan cit awaknyan jiba reumpah-reumpah dan minyeuk keu panyot, minyeuk upacara dan dupa nyang mangat bee. banmandum ureueng israel deungon galak ate jiba peuseumahan awaknyan keu tuhan dan buet nyang geupeurintah le tuhan rot nabi musa. tuhan oh ltheuhnyan nabi musa geupeugah ubak bansa israel, "tuhan ka geupileh bezaleel bin uri, cucoe hur, nibak sukee yehuda dan jianugeurah jihnyan deungon kuasa gobnyan. po teu allah geubri ubak jih ngon peungeurtian, carong meunan cit dan hase geupeubuet lam meubagoe jeuneh karya seuni, keuteupeuget reuncana nyang teupeureulee ubak buet nyang ahli, meunan cit teupeuget nibak meuh, pirak dan peurunggu; keu teuasah batee peumata nyang keuneuk teutatah; keu ngon uke kayee dan keumubagoe rupa karya seuni nyang laen. keu bezaleel dan aholiab, aneuek ahisamakh nibak sukee dan, tuhan geubri buet nyang carong mangat jipeurunoe keuahlian jihnyan ubak ureueng laen. awaknyan geubri buet nyang ahli nibak meubagoe

buet nyang jipeubuet le ahli meu-uke, peurancang, ahli ceumeucob ija lineun haloh, ija wol ijo, ungu dan mirah, dan ija nyang laen. awaknyan na kheueh peurancang nyang ahli dan hase jipeubuet meubagoe rupa buet. bazaleel, aholiab, dan banmandum utoh nyang ka meuteume ieleume sampoe carong dan ahli nibak tuhan, jituoh peubuet banmandum nyang teupeureulee keuteupeuget khimah tuhan. awaknyan haroh jipeuget banmandum nyang ka geupeuteuntee le tuhan." nabi musa laju geutawok bazaleel meunan cit deungon aholiab dan banmandum ureueng nyang meuteume keu ahlian nibak tuhan dan nyang jitem bantu, laju geuyue awaknyan jipeuphon keureuja. nabi musa geubri keu awaknyan banmandum nyang jisumbang le ureueng israel keu teupeuget khimah tuhan. teuma bansa israel teutab mantong jiba peuseumahan ubak nabi musa bak tieb-tieb beungh. dan le utoh-utuh nyang teungh jikeureuja buet nyan jikak lapor ubak nabi musa, "bahan-bahan nyang jibri le awaknyan ka leubeh nibak nyang seb keu buet nyang ka geubri tugaih le tuhan." deungon nyan nabi musa laju geupeumaklum ubak banmandum khimah-khimah bahwa kaseb sumbangan keu khimah tuhan; deungon nyan bubena ureueng ka hana jiba le. bahan-bahan nyang ka awaknyan bri nyan ka leubeh nibak nyang teupeureulee keuteupeuseuleusoe banmandum buet nyan. oh ltheuhnyan nyang paleng carong lamkawan utoh-utuh nyan laju jipeuget khimah tuhan. khimah nyan awaknyan peuet nibak siploh on ija lineun haloh teucob nibak ija wol ijo, ungu dan mirah, laju atranyan teusulam ngon gamba kerub. tieb-tieb lam sion sadub ukoran jih; panyang jih na dua blaih metee, dan luwah jih na dua metee. limong on ija teusambat jeuet saboh layeue, meunan cit limong on nyang laen teupeuget saban cit lagee nyan teuma. nibak bandua boh bineh layeue nyan teupeuget teuma ceunawiet nibak ija ijo, na limong ploh ceunawiet nibak maseng-maseng layeue, deungon nyan ka jeuet keusaboh pasang. oh ltheuhnyan laju teupeuget teuma limong ploh boh ceunawiet meuh keungon peusaboh bandua boh layeue nyan. oh ltheuhnyan awaknyan laju teuma jipeuget bubong khimah nibak siblahi on ija nibak bulee kameng. tieb-tieb lam sion sadub ukoran jih, panyang jih lhee blaih metee dan luwah jih dua metee. limong on teusambat jeuet keu saboh layeue, dan nyang nam on teuk nyang laen teupeuget lagee nyan cit teuma. limong ploh boh ceunawiet teupasang nibak bineh layeue nyang phon dan limong ploh boh ceunawiet teuk nyang laen nibak bineh layeue nyang keudua. oh ltheuhnyan laju teupeuget limong ploh ceunawiet nibak peurunggu keungon peusaboh bandua boh layeue nyan jeuet keusaboh bubong khimah. oh ltheuhnyan teupeuget teuma dua boh sinutob keu bagian khimah, saboh nibak kulet bubiri agam nyang teuboh wareuna mirah, dan nyang laen nibak kulet haloh. oh ltheuhnyan awaknyan laju jipeuget runga-runga khimah nyang teudong cot nibak kayee akasia. tieb-tieb runga manyang jih nam metee dan luwah jih nam ploh nam seunti metee. nibak tieb-tieb runga teupeuget teuma patok nyang sipasang, deungon nyan banmandum

rungka-rungka nyan hase teusambat nyang saboh ngon nyang laen. keubagian seulan khimah teupeuet teuma dua ploh boh rungka, deungon peuet boh keunaleueng jih nibak pirak, dua boh dimiyueb keu tieb-tieb rungka keubandua boh patok jih. keubagian utara khimah teupeuet teuma dua ploh boh rungka, deungon peuet ploh boh keunaleueng jih nibak pirak, dua boh dimiyueb keu tieb-tieb rungka. keu bagian likot khimah nibak bagian barat, teupeuet teuma nam boh rungka dan dua boh rungka keubagian sagoe jih. rungka-rungka sagoe nyan teuhubong teuma ubak bagian kaki laju trok ubak bagian atueh jih. bandua boh rungka nyang teubantuek sagoe jih teupeuet ngon cara lagee nyan cit teuma. deungon nyan banmandum nyan na lapan boh rungka deungon nam blaih boh keunaleueng pirak, dua boh dimiyueb keu tieb-tieb rungka. oh lheurehnyan laju awaknyan jipeuet limong blaih boh kayee meulinteung nibak kayee akasia, limong boh keurungka-rungka keu tieb-tieb saboh sagoe khimah, limong boh teuk keu sagoe nyang laen, dan limong boh teuk keulikit khimah siblahi ubarat. kayee linteung nyang bagian teungoh, teupasang manyang jih siteungoh rungka, phon nibak ujung trok ubak ujung khimah nyan. rungka khimah dan kayee-kayee linteung nyan teuseupoh ngon meuh, oh lheurehnyan teupasang laju gleung-gleung meuh keungon peuteun kayee-kayee nyan. meunan cit awaknyan jipeuet ija sinutob pintoe nibak ija lineun haloh nyang teucob ngon ija wol ijo, ungu dan mirah, lheureh nyan laju teusulam ngon gamba kerub. keu ngon gantung ija nyan teupeuet teuma peuet boh tameh nibak kayee akasia dan teuseupoh ngon meuh deungon ceunawiet meuh dan teupasang nibak peuet boh keunaleueng pirak. lheurehnyan laju teupeuet tree nibak keu pintoe khimah nibak lineun haloh nyang teucob ngon ija wol ijo, ungu dan mirah dan teuhias deungon cob sulam. keu ija pintoe nyan teupeuet teuma limong boh tameh nyang teupeuhubong deungon ceunawiet-ceunawiet. ujung-ujung dan sinambat-sinambat ban limong boh tameh nyan teuseupoh deungon meuh, dan ban limong boh keunaleueng jih teupeuet nibak peurunggu. bezaleel laju jipeuet peuto peujanjian nibak kayee akasia, panyang jih 110 seuntimete, luwah dan manyang jih maseng-maseng na 66 seuntimete. siblah udalam meunan cit ngon siblah u luwa teuseupoh ngon meuh aseuli, oh lheureh nyan laju jipeuet bingkee meuh bansilingka jih. oh lheurehnyan jipeuet teuma peuet boh gleung meuh keukayee ngon gulam jih dan laju jipasang nibak ban peuet boh kaki nyan, dua boh gleung nibak tieb-tieb sagoe. meunan cit jipeuet teuma ngon gulam jih nibak kayee akasia, dan atranyan pih teuseupoh ngon meuh, laju kayee geunulam nyan jipeutamong lam gleung nibak tieb-tieb sagoe nyan. oh lheurehnyan jipeuet teuma saboh sinutob nibak meuh aseuli, panyang jih na 110 seuntimete dan luwah jih 66 seuntimete. meunan cit jipeuet teuma dua boh kerub nibak meuh teuteumpah, saboh nibak tieb-tieb ujung sinutob nyan. bandua boh kerub nyan teupeujeuet saboh bagian ngon sinutob jih dan atranyan jipeuet meuhadab-hadab keue, deungon sayeub nyang

teupeunyue sampoe teutob peuto nyan. bezaleel jipeuet meuja nibak kayee akasia, nyang panyang jih na 88 seuntimete, luwah jih 44 seuntimete dan manyang jih 66 seuntimete. meuja nyan teuseupoh ngon meuh aseuli dan bansilingka nyan jipasang teuma ngon bingkee meuh. laju jipeuet teuma bineh meuja nyang luwah jih 7,5 seuntimete. bineh nyan teuboh teuma ngon bingkee meuh bansilingka. jipeuet teuma peuet boh gleung keu ngon geunulam atranyan dan laju jipasang nibak ban peuet boh kaki meuja. gleung keu ngon peuteun kayee geunulam nyan jipasang nibak thon ngon bineh meuja. geunulam nyan teupeuet nibak kayee akasia dan teuseupoh teuma ngon meuh. meunan cit jipeuet teuma cipe-cipe, cangkie-cangkie, keundi-keundi dan cambong-cambong keuteumpat teupeuseumah ie anggo. banmandum peuleungkapan meuja nyan jipeuet nibak meuh aseuli. bezaleel jipeuet teuma kaki panyot nibak meuh aseuli. keunaleueng dan tangke teumpat mat jih teupeuet teuma nibak meuh teuseupoh. bungong-bungong teuhias, meunan cit ngon kumbee dan keulopak jih teupeuet saboh ngon tangke teumpat mat jih. nibak tangke ngon teumpat nyan jipeuet teuma nam boh cabeueng nibak tieb-tieb sagoe jih. nibak tieb-tieb cabeueng jih teuhias teuma deungon lhee boh bungong badam deungon kumbee-kumbee dan keulopak jih. nibak tangke teumpat mat jih teuhias teuma deungon peuet boh bungong badam deungon kumbee dan keulopak jih. dimiyueb tieb-tieb cabeueng keulopak nyan teupeuet teuma saboh kumbee. bansaboh kaki panyot nyan deungon kumbee-kumbee dan cabeueng-cabeueng jih teupeuet nibak sikreek meuh teuseupoh aseuli. nibak kaki panyot nyan teupeuet teuma tujuh boh panyot meunan cit deungon alat keu ngon peugleh dah panyot dan talam jih nibak meuh aseuli. keuteupeuet kaki panyot meunan cit deungon peuleungkap jih teupeureulee 35 kilogram meuh aseuli. bezaleel jipeuet teuma nibak kayee akasia saboh miseubah keu teumpat tot dupa. miseubah nyan hi jih meusagoe; panyang dan luwah jih maseng-maseng 45 seuntimete dan manyang jih 90 seuntimete. nibak ban peuet boh sagoe blaih si u atueh jipeuet teuma lungkee nyang jeuet meusaboh ngon miseubah nyan. siblahi u atueh, ban peuet boh sagoe meunan cit ngon lungkee-lungkee jih teuseupoh teuma ngon meuh aseuli dan bansilingka jih teupeuet teuma ngon bingkee meuh. jipeuet cit teuma dua boh gleung dimiyueb bingkee meuh nibak bandua boh sagoe jih keungon peuteun kayee geunulam miseubah nyan. geunulam nyan teupeuet nibak kayee akasia dan teuseupoh deungon meuh. bezaleel jipeuet minyeuk upacara dan dupa aseuli nyang mangat bee, teujampu lagee minyeuk mangat bee. bezaleel laju jicok kayee akasia, oh lheurehnyan laju jipeuet miseubah keu keureubeuen nyang teutot. miseubah nyan hi jih peuet sagoe, panyang ngon luwah jih maseng-maseng na 2,2 metee, dan manyang jih 1,3 metee. nibak tieb-tieb sudut blaih u atueh jipeuet lungkee nyang jeuet meusaboh ngon miseubah nyan. bansabohnyan teuseupoh ngon peurunggu. meunan cit jipeuet kual-kual, sudok, cambong-cambong,

geureupu-geureupu meunan cit teupat apui. banmandum peuleungkapan nyan teupeuget nibak peurunggu. meunan cit jipeuget teuma kawat teumanyuem nibak peurunggu nyang teulilet nibak miseubah siblahi u miyueb, manyang jih siteungoh nibak manyang miseubah. oh ltheuehnyan laju jipeuget peuet boh gleung nibak kayee geunulam nibak ban peuet boh geunulam siblahi u miyueb jih. kayee geunulam nyan teupeuget nibak kayee akasia nyang teusepoh ngon peurunggu. laju bandua kayee geunulam nyan jipeutamong lam gleung-gleung nibak bandua sagoe miseubah nyan. miseubah nyan teupeuget nibak papeuan dan siblahi u dalam jih meurongga. bezaleel jipeuget bak peurunggu dan keunaleueng peurunggu. peurunggu nyan nibak ceureumen-ceureumen atra ureueng-ureueng inong nyang peutimang nibak babah pintoe khimah tuhan. bezaleel laju jipageue peulataran khimah tuhan ngon layeue nyang teupeuget nibak ija lineun haloh. nibak siblah u seultan, panyang jih na 44 metee, jipeuteun le dua ploh boh tamed peurunggu, maseng-maseng lam keunaleueng peurunggu, deungon ceunawiet dan sinangkot jih nyang teupeuget nibak pirak. meunan cit blaihi si utara lagee nyan teuma teupeuget. si blaihi u barat teupasang layeue nyang panyang jih na 22 metee, deungon siploh boh tamed dan siploh boh teuma keunaleueng; ceunawiet dan sinambat jih teupeuget nibak pirak. si blaihi u timu nyang na pintoe jih, luwah layeue jih na 22 metee. nibak wueh ngon ueneun pintoe nyan teupasang layeue, maseng-maseng panyang jih 6,6 metee, deungon lhee boh tamed dan lhee boh teuma keunaleueng. banmandum layeue nyang na bansilingka nyan teupeuget nibak ija lineun haloh. keunaleueng tamed-tamed jih teupeuget nibak peurunggu, meunyo ceunawiet, sinambat meunan cit ngon pucak tamed jih teupeuget nibak pirak. banmandum tamed nyang na bansilingka peulataran nyan teusangkot saboh ngon nyang laen deungon sinangkot pirak. ija tiree keu pintoe geureubang nyan teupeuget nibak ija lineun haloh nyang teucob ngon ija wol ijo, ungu dan mirah dan teuboh hias ngon cob sulam. panyang jih na sikureueng metee dan manyang jih dua metee, saban ngon layeue nibak peulataran. ija pintoe nyan jipeuteun le peuet boh tamed deungon peuet boh keunaleueng peurunggu. banmandum ceunawiet meunan cit sinutob pucak jih dan sinangkot jih teupeuget nibak pirak, teuma patok-patok keu khimah meunan cit keu pageue jih teupeuget nibak peurunggu. nyoe kheueh dafetar nyang teupeuguna lam khimah tuhan, teupat bandua neuk batee dan siploh peurintah allah nyan teukeubah. dafetar nyan teupeuget atueh peurintah nabi musa dan jissun le ureueng-ureueng lewi nyang meukeureuja dimiyueb pimpenan itamar, aneuek imeum nabi harun. bezaleel aneuek uri, cucoe hur nibak sukee yehuda, jipeuget banmandum nyang geupeurintah le tuhan. peumbantu gobnyan aholiab aneuek ahasamakh nibak sukee dan, na kheueh sidroe tukang meu-uke, peurancang dan tukang cob ija lineun nyang haloh, meunan cit ija wol ijo, ungu dan mirah. meuh nyang jipeuseumah ubak tuhan keu khimah suci banmandum nyan na

siribee kilogram, teutimang meunurot ceng nyang teupeuguna nibak khimah tuhan. pirak nyang jiteume nibak seunsus bansa israel le jih na 3.430 kilogram atranyan teutimang meunurot ceng nyang teupeuguna lam khimah tuhan. jeumeulah nyan sadub lagee peue nyang jibayeue le mandum ureueng nyang teudafetar lam seunsus nyan. tieb-tieb ureueng jibayeue yuem nyang ka teupeuteuntee, teutimang meunurot ceng nyang teupeuguna. nibak seunsus nyan na teudafetar 603.550 droe ureueng agam nyang meu-umu dua ploh thon u atueh. nibak pirak nyan, 3.400 kilogram teupeuguna keuteupeuget bansireutoh keunaleueng khimah tuhan dan ija pintoe jih. tieb-tieb keunaleueng na brat jih 34 kilogram. pirak nyang leubeu nyan, nyang le jih 30 kilogram. bezaleel laju jipeuget sinambat-sinambat dan ceunawiet-ceunawiet keu tamed-tamed nyan, meunan cit sinutob pucak nibak tamed-tamed nyan. peurunggu nyang jipeuseumah ubak tuhan banmandum nyan na jeumeulah jih 2.425 kilogram. peurunggu nyan teupeuguna keu ngon peuet keunaleueng pintoe khimah tuhan, miseubah deungon meunanyum kawat nibak peurunggu, banmandum peuleungkapan miseubah, keunaleueng layeue bansilingka peulataran dan babah pintoe geureubang jih, banmandum patok khimah dan peulataran bansilingka nyan. bezaleel dan aholiab jipeuget teuma peukayan iebadat nibak ija wol ijo, ungu dan mirah keu imeum-imeum bak watee awaknyan meutugaih nibak ruweueng suci. peukayan imeum keu nabi harun jipeuget lagee nyang geupeurintah le tuhan bak nabi musa. efod jipeuget nibak ija lineun haloh, ija wol ijo, ungu dan mirah, lom beuneueng meuh. awaknyan jiseupoh leumpeng-leumpeng meuh nyang oh ltheuehnyan jikoh-koh jeuet keu beuneueng lipeh, laju jicob ngon ija lineun haloh dan wol ijo, ungu dan mirah. oh ltheuehnyan jipeuget teuma dua boh taloe baho keungon ikat efod nyang teucob nibak bineh jih. talo keuieng teunon haloh teupeuget nibak bahan nyang saban dan teucob nibak efod nyan sampoe jeuet meusaboh bagian lagee nyang geupeurintah le tuhan ubak nabi musa. awaknyan laju jiasah batee deulima ltheuehnyan laju jipasang lam bingkee meuh. deungon peunoh keuahlian awaknyan uke nan-nan bandua blaihi droe aneuek nabi yakub atueh batee-batee nyan. ltheuehnyan batee-bateanyan jipasang nibak taloe baho efod sibagoe tanda peungat ubak bandua blaihi sukee israel, lagee nyang geupeurintah le tuhan ubak nabi musa. bezaleel dan aholiab jipeuget teuma sinutob dada nibak bahan nyang saban deungon efod, dan cob sulam jih pi saban. hijih masagoe nyang teulipat dua, luwah ngon panyang jih maseng-maseng 22 seuntimete. nibak sinutob dadanyan awaknyan pasang teuma peuet boh bareh batee peumata. nibak bareh nyang phon batee deulima, topas dan baiduri seupah. nibak bareh nyang keudua zamrod, batee nilam dan intan. nibak bareh nyang keu lhee batee lazuardi, batee akik dan batee keucubong. nibak bareh nyang keu peuet batee pirus, batee yakut dan batee ratna ceumpaka. ban dua blaihi peumata nyan teuikat teuma ngon meuh. nibak tieb-tieb peumata

nyan teu-uke teuma ngon nan sidroe lamkawan aneuek nabi yakub sibagoe tanda peungat ubak sukee-sukee israel. laju jipeuget teuma dua boh rante meuh aseuli nyang teuputa lagee talo. meunan cit jipeuget teuma dua boh gleung meuh nyang teupasang nibak bandua boh ujong siblah u ateuheh sinutob dada nyan. laju bandua boh rante meuh nyan jipeutamong lam gleung-gleung nyan, dan bandua ujong nyang laen ji-ikat teuma nibak bandua boh bingkee, sampoe sinutob dadanyan hase teuhubong ngon bagian keu talo baho nibak efod nyan. laju jipeuget teuma dua boh gleung meuh teuk nyang jipasang nibak sinutob dadanyan, nibak ujong miyueb siblahi u dalam nyang keunong efod. oh ltheuehnyan jipeuget teuma dua boh gleung meuh nyang jipasang nibak siblahi ukeue bandua talo baho efod, tho ngon sinambong meucob bacut siblahi u miyueb, di ateuheh talo keuieng nibak teunun haloh. paih lagee nyang geupeurintah le tuhan ubak nabi musa, gleung sinutob dada teupeuhubong teuma ngon talo ijo nibak gleung efod, sampoe sinutob dada nyan teutab na di ateuheh talo keuieng dan hana leukang. bajee jubah nyang teungui di ateuheh efod, banmandum nyan teupeuget nibak ija wol ijo. ruhueng takue jih teupeukong ngon pita teunun mangat bek bagaiha beukah. ban siseunlingka miyueb jih jipeuget hiasan boh deulima nibak ija lineun nyang haloh dan wol ijo, ungu dan mirah, nibak ltheung-ltheung deungon keulintengan nibak meuh, paih lagee peurintah tuhan ubak nabi musa. awaknyan jipeuget teuma bajee panyang jaroe keu nabi harun dan aneuek-aneuek gobnyan, meunan cit deungon seureuban, destar dan sileuweue paneuk nibak ija lineun, dan talo keuieng nibak ija lineun haloh, wol ijo, ungu dan mirah, teuhias teuma deungon cob sulam, lagee nyang geupeurintah le tuhan ubak nabi musa. meunan cit jipeuget teuma hiasan nibak meuh aseuli, sibagoe tanda bahwa awaknyan ka teupeukhusus keu tuhan. nibak hiasan nyan teu uke deungon tutoe haba lagee nyoe, "teupeukhusus keu tuhan". hiasan nyan teupasang nibak seureuban blaih si ukeue, paih lagee peurintah tuhan ubak nabi musa. akhe jih seuleusoe kheueh banmandum keureuja keu teupeuget khimah tuhan. ureueng israel ka jipeubuet banmandum lagee nyang geupeurintah le tuhan ubak nabi musa. awaknyan jiba ubak nabi musa khimah deungon banmandum peuleungkapan jih, ceunawiet-ceunawiet jih, kayee-kayee linteung jih, tameh-tameh dan keunaleueng jih, sinutob nibak kulet kameng agam nyang teuboh wareuna mirah, sinutob nibak kulet haloh, ija tudong. peuto peujanjian nyang meuasoe bandua neuk batee meunan cit deungon kayee-kayee geunulam dan sinutob jih, meuja deungon banmandum peuleungkapan jih dan ruti sajian, gaki panyot nibak meuh aseuli, panyot-panyot jih deungon banmandum peuleungkapan jih, minyeuk keu panyot, miseubah nibak meuh, minyeuk upacara, dupa mangat bee, tiree keu pintoe khimah, miseubah peurunggu deungon meunanyum kawat nibak peurunggu, kayee geunulam dan bandum peuleungkapan jih; bak ie teumpat seumeurhah deungon keunaleueng jih, layeue-layeue keu peulataran dan tameh-tameh

meunan cit deungon keunaleueng jih, tiree babah pintoe geureubang peulataran meunan cit deungon talo-talo jih, patok-patok khimah; banmandum peurabot nyang na teungui lam khimah, dan peukayan iebadat keu imeum-imeum bak watee awaknyan meutugaih nibak ruweueng suci dan peukayan khusus keu nabi harun dan aneuek-aneuek gobnyan. ureueng israel ka jipeubuet banmandum nyan paih lagee nyang geupeurintah le tuhan ubak nabi musa. nabi musa geupareksa mandum dan geukalon bahwa awaknyan ka jipeubuet paih lagee nyang geupeurintah le tuhan. laju nabi musa geubri beureukat keu awaknyan. tuhan meufeureuman ubak nabi musa, "peudong kheueh khimah lon bak tanggai sa buleuen sa. pasoe kheueh lam peuto peujanjian nyang meuasoe siploh peurintah dan pasang kheueh tudong ija dikeue jih nyan. keubah kheueh meuja deungon peuleungkapan jih. peutamong teuma gaki panyot dan tot kheueh panyot nyan. peuduek kheueh miseubah meuh teumpat tot dupa dikeue peuto peujanjian, dan gantung kheueh tabeng dikeue pintoe khimah. peuduek kheueh miseubah keu keureubeuen nyang teutot dikeue pintoe khimah. keubah kheueh bak ie lamkawan khimah ngon miseubah nyan, ltheueh nyan pasoe kheueh ngon ie. ltheueh nyan pasang kheueh layeue nibak silingka peulataran khimah, dan gantung teuma tiree pintoe geureubang peulataran. oh ltheuehnyan khimah dan banmandum peuleungkapan jih haroh gata peuseumah ubak ulon deungon cara teuboh minyeuk ngon minyeuk upacara, deungon nyan banmandum nyan teupeukhusus keu ulon. peuseumah kheueh miseubah dan banmandum peuleungkapan jih deungon cara nyan, mangat banmandum nyan teupeukhusus keu ulon. peubuet lageenyang cit teuma deungon bak ie dan keunaleueng jih. oh ltheuehnyan, yue kheueh ubak nabi harun dan aneuek-aneuek jih jikak ubak babah pintoe khimah ltheueh nyan laju jirrah droe. peungui kheueh peukayan imeum ateuheh nabi harun, dan boh kheueh minyeuk ateuheh jihnyan mangat jeuet jihnyan teupeukhusus jipeutimang ulon sibagoe imeum. ltheueh nyan yue kheueh aneuek-aneuek jih mangat jipeurab, dan peusok kheueh bajee panyang jaroe bak awaknyan. ltheueh nyan boh kheueh minyeuk ateuheh awaknyan lagee gata boh minyeuk ateuheh ureueng syiek jih, mangat awaknyan pi hase jipeutimang ulon sibagoe imeum. deungon na upacara teuboh minyeuk nyan, sukee awaknyan treun meutruum jeuet jimat jabatan sibagoe imeum." nabi musa geupeubuet banmandum nyan lagee nyang geupeurintah le tuhan. teuma nibak tanggai sa buleuen sa nibak thon nyang keudua oh ka ltheueh bansa israel jitinggai nanggroe meuse, khimah tuhan nyan teupasang. nabi musa geukeubah keunaleueng-keunaleueng jih, geupeudong rangka-rangka jih, geupeudab kayee-kayee linteung jih, dan geupeudong tameh-tameh jih. ltheuehnyan jileueng kheueh bubong khimah deungon sinutob siblahi u luwa di ateuheh nyan lagee nyang geupeurintah le tuhan. ltheueh nyan bandua batee nyan jipeutamong lam peuto peujanjian. laju le nabi musa geupasang sinutob peuto nyan dan geupeutamong kayee geunulam u dalam gleung

jihnyan. ltheuehnyan laju jipeutamong peuto nyan u dalam khimah dan geugantung ija silubong dikeue nyan, lagee nyang geupeurintah le tuhan ubak gobnyan. oh ltheuehnyan nabi musa geukeubah meuja lam khimah, siblah utara blaih luwa ija, ltheueh nyan ateueh meuja nyan geukeubah teuma ruti sajian. gaki panyot geukeubah lam khimah, blaih u seulitan, meuhadab keu ngon meuja nyan, ltheuehnyan, panyot-panyot nyan laju geutot dikeue tuhan. miseubah meuh geukeubah lam khimah, dikeue ija, ltheuehnyan geutot laju dupa mangat bee lagee nyang geupeurintah le tuhan ubak nabi musa. nabi musa geugantung tiree pintoe di khimah, dan dikeue pintoe nyan geukeubah teuma miseubah keu keureubeuen nyang teutot. di ateueh miseubah nyan geupeuseumah keureubeuen nyang teutot dan keureubeuen sajian. kulah peurunggu geukeubah teuma di lamkawan khimah ngon miseubah nyan, laju kulah nyan geupasoe ngon ie. nabi musa, nabi harun dan aneuek-aneuek gobnyan geurhah jaroe dan gaki gobnyan nibak teupat nyan, tieb-tieb watee awaknyan jitamong u dalam khimah tuhan atawa jipeurab bak miseubah. bansilingka khimah dan miseubah nyan nabi musa geupasang layeue, laju gobnyan geugantung tiree pintoe geureubang peulataran. deungon lagee nyan seuleusoe kheueh banmandum buet nyan. oh ltheuehnyan jitreun kheueh awan jitob khimah tuhan, dan khimah nyan peunoh ngon cahya tuhan teuka. le sababnyan nabi musa hana hase geutamong lam khimah nyan. tieb-tieb awannyan jiek nibak ateueh khimah tuhan, bansa israel laju jireuloih khimah-khimah jih keu jiminah u teupat laen. teuma, meunyo awannyan hana jiek, awaknyan hana jiminah nibak teupat nyan. simantong bansa israel jiminah-minah teupat, tuhan na nibak khimah nyan lam hi awan oh watee uroe dan lam ji apui oh watee malam.

nibak khimah gobnyan, tuhan geutawok nabi musa dan geubri ubak geuhnyan banmandum peurat-
 toran nyang haroh jitaat le ureueng israel. meunyo
 sidroe-droe ureueng jipeuseumah keureubeuen
 nyang teutot ubak tuhan, ureueng nyan jeuet jipeu-
 seumah leumo, bubiri atawa kameng jih. meunyo
 nyang jipeuseumah saboh leumo, beulatang nyan
 haroh nyang agam dan hana meucupa, leumo nyan
 haroh jiba ubak babah pintoe khimah tuhan, mangat
 tuhan geuteurimong atra ureueng nyan. dan jihnyan
 haroh jipeudeuk jaroe jih ateuh ulee beulatang
 nyan, deungon nyan peuseumahan ureueng nyan
 teuma geuteurimong le tuhan keuteupeu amphon
 desya. oh ltheuh nyan leumo nyan haroh teusie
 dikeue pintoe khimah. darah beulatang nyan haroh
 jipeuseumah le imeum-imeum keuturonan nabi
 harun ubak tuhan, laju jireutek ban peuet boh sagoe
 miseubah nyang na dikeue pintoe khimah. oh ltheuh
 nyan le ureueng nyan haroh jipuliek kulet jih dan
 jikoh-koh beulatang nyan. imeum-imeum haroh
 jipeukab apui u ateuh miseubah laju jiatoe kayee
 apui u ateuh nyan. sie-sie keureubeuen nyang
 ka ltheuh teukoh-koh nyan, meunan cit deungon
 ulee dan gapah jih, mandum nyan haroh awaknyan
 keubah u ateuh apui hu. oh ltheuh nyan le ureueng
 nyan haroh ji rhah asoe pruet dan pha leumo nyan,
 dan imeum nyang meutugaih disinan haroh geutot
 banmandum nyan. bee keureubeuen nyang teutot
 nyan keubit that galak ate tuhan. meunyo nyang
 jipeuseumah saboh bubiri atawa kameng, beulatang
 nyan haroh nyang agam dan hana meucupa. ureueng
 nyan haroh jisie beulatang nyan disiblahi utara
 miseubah, laju le imeum-imeum haroh jireutek
 darah beulatang nyan ateuh ban peuet boh sagoe
 miseubah. oh ka ltheuh beulatang nyan teusie-sie,
 mandum sie nyan, meunan cit deungon ulee dan
 gapah jih, haroh jikeubah le imeum u ateuh apui
 nibak miseubah nyan. le ureueng nyan laju jirhah
 asoe pruet dan pha beulatang nyan. oh ltheuh
 nyan le imeum haroh jipeuseumah mandum nyan
 ubak tuhan, dan laju jitot u ateuh miseubah. bee
 keureubeuen nyang teutot nyan lumpah that galak
 ate tuhan. meunyo nyang jipeuseumah saboh cicem,
 cicem nyan haroh leuk puteh atawa cicem mirah
 pati nyang mantong muda. imeum haroh geuba
 cicem nyan ubak miseubah, laju geuwiet takue jih
 dan geutot ulee jih u ateuh miseubah nyan. darah
 cicem nyan haroh jipicet uluwa nibak sampeng
 miseubah. beue jih meunan cit mandum asoe jih
 haroh teupeuteubit, laju teujak tiek siblah u timu
 miseubah bak teupnat abee. oh ltheuh nyan cicem
 nyan haroh teulheueb bak uram sayeueb jih, sayeueb
 nyan han jeuet putoh. dan cicem nyan haroh teutot
 ateuh miseubah. bee keureubeuen nyang teutot
 nyan lumpah that galak ate tuhan. meunyo sidroe-
 droe ureueng jipeuseumah keureubeuen teuhidang
 ubak tuhan, keureubeuen nyan haroh teupong nyang
 paleng jroh nyang ka teupree ngon minyeuk zaiton
 dan teuboh keumeunyan diateuh nyan. ureueng
 nyan haroh jiba ubak imeum-imeum keuturonan
 nabi harun. imeum nyang meutugaih disinan
 geucok laju sireugam teupong nyan meunan cit
 deungon minyeuk zaiton dan banmandum keume-

unyan, dan atranyan mandum geutot laju ateuh
 miseubah sibagoe tanda bahwa banmandum nyan
 ka geupeuseumah ubak tuhan. bee keureubeuen
 teuhidang nyang mangat nyan lumpah that galak
 ate tuhan. keureubeuen teuhidang nyang leubeh
 nyan na kheueh keu imeum-imeum. keureubeuen
 nyan suci that sabab teucok nibak peunajoh nyang
 ka teupeuseumah ubak tuhan. meunyo nyang
 jipeuseumah nyan ruti nyang teutot didalam acuan,
 ruti nyan haroh teupeuget hana meurago. ruti nyan
 jeuet teubai, teupeuget nibak teupong haloh nyang
 teuramah ngon minyeuk zaiton, jeuet cit juadah
 nyang teusilik ngon minyeuk zaiton. meunyo
 nyang jipeuseumah nyan ruti nyang teupanggang di
 ateuh panggang, ruti nyan haroh teupeuget nibak
 teupong haloh deungon minyeuk zaiton, teuma hana
 jeuet teuboh rago. ruti nyang teupeuseumah nyan
 haroh teupriek-priek, laju teuro minyeuk zaiton.
 meunyo nyang teupeuseumah nyan ruti nyang
 teutaguen lam kual, ruti nyan haroh teupeuget
 nibak teupong nyang haloh dan minyeuk zaiton.
 ruti nyang teupeuget deungon cara lagee nyan
 haroh teupeuseumah ubak tuhan dan teujok ubak
 imeum-imeum nyang ba atranyan ubak miseubah.
 imeum-imeum geucok siladam nibak rutinyan
 laju geutot ateuh miseubah sibagoe tanda bahwa
 banmandum nyan ka geupeuseumah ubak tuhan.
 bee jih nyang mangat nyan lumpah that galak ate
 tuhan. nyang leubeh nibak nyan na kheueh hak
 milek imeum. ruti nyan lumpah suci sabab teucok
 nibak peunajoh nyang ka teupeuseumah ubak
 tuhan. keureubeuen hidangan keu tuhan hana jeuet
 teujampu ngon meulisan atawa rago, sabab meulisan
 dan rago hana jeuet teutot keu teupeuseumah ubak
 tuhan. nibak wase tanoh nyang phon bak tieb-tieb
 thon, siladam haroh teupeuseumah ubak tuhan,
 teuma hana jeuet teutot ateuh miseubah. tieb-tieb
 keureubeuen teuhidang haroh teuboh sira, sabab
 sira sibagoe tanda janji po teu allah deungon gata.
 jadi mandum peuseumahan haroh teuboh sira.
 meunyo gata tapeuseumah ubak tuhan gandom
 nyang phon gata pot, taba kheueh gandom baro
 nyang ka teutob haloh atawa teupanggang. gandom
 nyan haroh teuboh minyeuk zaiton dan teuboh
 keumeunyan di ateuh nyan. imeum haroh geutot
 siladam nibak gandom dan minyeuk nyan meunan
 cit banmandum keumeunyan, sibagoe tanda bahwa
 banmandum nyan ka geupeuseumah ubak tuhan.
 meunyo sidroe-droe ureueng jipeuseumah saboh
 leumo keu keureubeuen peudame, leumo nyan
 jeuet nyang agam dan jeuet nyang inong, teuma
 hana jeuet meucupa. ureueng nyang peuseumah
 atra nyan haroh jikeubah jaroe jihnyan ateuh ulee
 beulatang nyan laju jisie bak babah pintoe khimah
 tuhan. imeum-imeum keuturonan nabi harun
 haroh geureutek darah leumo nyan ateuh ban
 peuet boh sagoe miseubah nyan. keu keureubeuen
 peudame ubak tuhan, imeum haroh geupeuseumah
 bagian-bagian nyoe, nibak beulatang nyan: gapah
 nyang meubalot asoe pruet jih, boh keuieng deun-
 gon gapah jih dan bagian nyang paleng get nibak
 ate jih. mandumnyan meusajan-sajan deungon
 keureubeuen-keureubeuen nyang laen, haroh teutot

u ateuh miseubah. bee keureubeuen nyang teutot nyan lumpah that galak ate tuhan. meunyo nyang jipeuseumah keu keureubeuen peudame nyan saboh bubiri atawa kameng, beulatang nyan jeuet agam dan jeuet inong, teuma hana jeuet meucupa. meunyo sidroe-droe ureueng jipeuseumah saboh bubiri, ureueng nyan haroh jiba atranyan ubak khimah tuhan. disinan ureueng nyan haroh jipeuduek jaroe jih ateuh ulee bubiri nyan oh ltheuh nyan laju jikak sie dikeue khimah. dan di imeum laju geureutek darah beulatang nyan ateuh ban peuet boh sagoe miseubah nyan. keu keureubeuen peudame ubak tuhan imeum haroh geupeuseumah bagian-bagian nyoe nibak bubiri nyan: gapah jih, mandum ikue nyang na gapah dan teukoh bak bineh tuleueng-tuleueng jih, gapah nyang meubalot asoe pruet jih, boh keuieng deungon gapah jih dan bagian nyang paleng get nibak ate jih. imeum nyang meutugaih disinan haroh geutot banmandum nyan di ateuh miseubah keu keureubeuen peunajoh keu tuhan. meunyo nyang jipeuseumah saboh kameng, ureueng nyang peuseumah atranyan haroh jiba ubak khimah tuhan. nibak tempat nyan haroh jipeuduek jaroe jihnyan ateuh ulee kameng nyan dan laju jisie dikeue khimah. imeum haroh geureutek darah beulatang nyan ateuh ban peuet boh sagoe miseubah. keu keureubeuen peunajoh keu tuhan, imeum haroh geupeuseumah bagian-bagian nyoe nibak kameng nyan: gapah nyang meubalot asoe pruet jih, boh keuieng ngon gapah jih dan bagian nyang paleng get nibak ate jih. imeum nyang meutugaih disinan haroh geutot mandum nyan u ateuh miseubah. bee keureubeuen peunajoh nyan lumpah that galak ate tuhan. mandum gapah beulatang nyan keu tuhan. ureueng israel sagai-sagai hana jeuet jipajoh gapah atawa darah. peuratoran nyan teutab na siumu masa dan haroh jitaat le tieb-tieb ureueng israel dipat mantong jihnyan tinggai. tuhan meufeureaman ubak nabi musa, geuyue peumaklum ubak bansa israel bahwa soemantong nyang deungon hana jisaja meudesya sabab jilangga salah saboh nibak peurintah tuhan, haroh jiseutot peuratoran nyoe. meunyo nyang meudesya imeum agong, sampoe bansa israel meusajan meusalah, ureuengnyan haroh jikeureubeuen saboh leumo agam muda nyang hana meucupa ubak tuhan mangat desya jihnyan geupeu amphon. leumo nyan haroh jiba ubak babah pintoe khimah tuhan. imeum agong haroh geupeuduek jaroe gobnyan ateuh ulee beulatang nyan, oh ltheuh nyan laju jisie dikeue khimah. siladum nibak darah nyan haroh jipeutamong lam khimah. laju jihnyan jicukol jaroe jih lam darah nyan dan jireutek tujoh goe dikeue tiree nyang peujareueng ruweueng suci. siladum nibak darah nyan haroh jisilik ubak lungkee-lungkee nibak sagoe miseubah dupa mangat bee didalam khimah, dan nyang leubeh nyan haroh jireutek nibak aleue miseubah keureubeuen teutot nyan na bak pintoe khimah. imeum haroh geucok banmandum gapah leumo agam nyan, na kheueh gapah nyang meubalot asoe pruet jih, boh keuieng ngon gapah jih dan bagian nyang paleng get nibak ate jih. banmandum nyan haroh teutot ateuh miseubah keureubeuen nyang teutot lagee bak keureubeuen

peudame. teuma asoe leumo nyan, kulet jih, ulee jih, gaki jih, asoe pruet nyang leubeh jitamong cit keunan usus jih, jadi banmandum keucuali jeumba nyang ka teupeu meungkreeh, haroh teupeuteubiet uluwa khimah. disinan leumo nyan haroh teutot ateuh kayee apui bak tempat teuboh abee, na kheueh tempat nyang khusus keu nyan. meunyo nyang meudesya mandum umat israel, sabab ngon hana jisaja ka ji-iengkeue salah saboh peurintah tuhan, teuma meunan desya nyan jiteupeue, umat haroh jiba saboh leumo agam nyang muda ukeue khimah tuhan. beulatang nyan haroh jipeuseumah sibagoe keureubeuen peumamphon desya. mandum peumimpin bansa haroh geupeuduek jaroe gobnyan ateuh ulee nyan, dan laju geusie bak tempat nyan. imeum agong haroh geuba siladum nibak darah nyan keu teupeutamong dalam khimah. disinan jihnyan haroh jicukol jaroe jih u dalam darah nyan dan laju jireutek tujoh goe dikeue tiree nyang jeuet keubataih ruweueng suci. siladum treuk haroh jisilik ateuh lungkee-lungkee nibak sagoe-sagoe miseubah dupa didalam khimah dan nyang leubeh nyan haroh treuteuk ateuh aleue miseubah tempat keureubeuen nyang teutot di babah pintoe khimah. banmandum gapah beulatang nyan haroh teucok dan laju teutot u ateuh miseubah. cara jih lagee teupeuseumah leumo agam keu keureubeuen peumamphon desya. meunan kheueh cara imeum agong geupeuseumah keureubeuen keu desya-desya umat, teuma mandum desya-desya nyan teuma geupeu amphon le tuhan. oh ltheuh nibaknyan di leumo agam nyan haroh jipeuteubiet uluwa, dan jitot laju diluwa khimah-khimah, lagee teupeu seumah leumo agam keu keureubeuen peumamphon desya imeum agong nyan keudroe. meunan kheueh cara jih teupeuseumah keureubeuen peumamphon desya umat. meunyo nyang meudesya sidroe ureueng nyang mat kuasa sabab deungon hana jisaja ka geuiengkeue salah saboh peurintah tuhan, teuma bagaih that watee ka jiteupeu, gobnyan haroh jikeureubeuen saboh kameng agam nyang hana meucupa keu peumamphon desya. jihnyan haroh jipeuduek jaroe jih ateuh ulee beulatang nyan, laju jisie u siblah utara miseubah, tempat teusie beulatang keu keureubeuen nyang teutot. imeum haroh geucukol jaroe gobnyan udalam darah beulatang nyan dan geusilik laju nibak lungkee-lungkee nibak sagoe miseubah dan geureutek laju ateuh aleue miseubah. oh ltheuh nyan banmandum gapah beulatang nyan haroh geutot u ateuh miseubah, lagee bak keureubeuen peudame. meunan kheueh cara imeum geupeuseumah keureubeuen keu desya ureueng nyan mat kuasa, deungon na lagee nyan ureueng nyan teuma geupeuamphon le tuhan. meunyo sidroe lamkawan rakyat ba jipeubuet desya sabab ngon hana jisaja ji-iengkeue salah saboh peurintah tuhan, teuma bubagaih that watee ka jiteupeu hainyan, jihnyan haroh jikeureubeuen saboh kameng inong nyang hana meucupa. ureueng nyan haroh jipeuduek jaroe jih nyan ateuh ulee beulatang nyan, laju jikak sie u siblah utara miseubah bak tempat teusie beulatang keu keureubeuen teutot. imeum haroh geucukol jaroe geuh lam darah nyan, dan

geusilik laju ubak lungkee-lungkee nyang na bak sagoe-sagoe miseubah dan darah nyang leubeh nyan laju geureutek ubak aleue miseubah nyan. banmandum gapah beulatang nyan haroh teucok lagee bak keureubeuen peudame. gapah nyan haroh geutot le imeum u ateuheh miseubah, bee jih nyang mangat nyan teupeugalak ate tuhan. meunan kheueh cara jih imeum geupeuseumah keureubeuen keu desya sidroe ureueng biasa, teuma ureueng nyan laju geupeu amphon le tuhan. meunyoe na sidroe ureueng jikeureubeuen saboh bubiri keu teupeuamphon desya jihnyan, bubiri nyan haroh nyang inong nyang hana meucupa. ureueng nyan haroh jipeuduek jaroe jih ateuheh ulee beulatang nyan, laju jikak sie u siblah utara miseubah, bak teumpat teusie beulatang keu keureubeuen nyang teutot. imeum haroh geuculok jaroe gobnyan lam darah nyan, dan laju geusilik ubak lungkee-lungkee nyang na bak sagoe-sagoe miseubah, dan darah nyang leubeh nyan laju geureutek bak aleue miseubah. oh lheueth nyan banmandum gapah beulatang nyan haroh geucok lagee bak keureubeuen peudame. gapah nyan haroh geutot ateuheh miseubah, meusajan-sajan ngon keureubeuen peunajoh nyang teupeuseumah ubak tuhan. meunan kheueh cara imeum geupeuseumah keureubeuen keu desya ureueng nyan, teuma ureueng nyan laju geupeuamphon le tuhan. keureubeuen peuamphon desya peureulee teupeuseumah: meunyoe sidroe ureueng seucara reseumi teulakee jeuet keusaksi ubak kanto peungadelan, teuma hana jitem peugah peue nyang ka jingeng atawa jideungoe sampoe ureueng nyan haroh jitanggong akibat jih. meunyoe sidroe ureueng meusalah sabab deungan hana jisaja ka jeuet keu kuto, sabab ka tupeeh ngon salah sapue nyang kuto, miseu jih, bangeke beulatang, dan oh lheueth nyan jisadar buet jih nyan. meunyoe sidroe ureueng meusalah sabab ngon hana jisaja ka tupeeh barang kuto nyang asai jih nibak manusia, dan oh lheueth nyan jisadar buet jih nyan. meunyoe na sidroe ureueng meusalah sabab jimeusumpah ban galak droe keu jipeubuet peue mantong, dan oh lheueth nyan ji insaf peue nyang ka jipeubuet. bak tieb-tieb buet jih nyan, ureueng nyang meusalah haroh ji aku buet jih nyang salah nyan. dan keu teutuboh desya jihnyan, ureueng nyan haroh jiba saboh bubiri atawa kameng inong keu tuhan. imeum haroh geupeuseumah keureubeuen nyan mangat jeuet desya ureueng nyan geupeu amphon. meunyoe ureueng nyang salah nyan hana hase jipeuna saboh bubiri atawa kameng keu teutuboh desya jih nyan, ureueng nyan haroh jiba dua boh cicem leuk puteh atawa cicem mirah pati nyang muda, saboh keu keureubeuen peuamphon desya, dan saboh treuk keu keureubeuen nyang teutot. cicem-cicem nyan haroh teuba ubak imeum. imeum haroh teuleubeh ilee geupeuseumah cicem nyang ka teupeu teuntée keu keureubeuen peu amphon desya. takue cicem nyan haroh jiputa, teuma hana jeuet sampoe putoh ulee jih. darah cicem nyan haroh geureutek ubak sagoe miseubah, dan nyang leubeh nibak nyan haroh geupiret uluwa ubak aleue miseubah sibagoe keureubeuen peu amphon desya. oh ka lheueth nyan imeum geupeuseumah cicem nyang keudua keu keureubeuen nyang teutot, saban

lagee peuratoran nyang na. meunan kheueh cara jih imeum geupeuseumah keureubeuen keu desya ureueng nyan, laju ureueng nyan geupeu amphon le tuhan. meunyoe ureueng nyang meusalah nyan hana hase jipeuna dua boh cicem leuk puteh atawa cicem mirah pati keu keureubeuen peu amphon desya, ureueng nyan haroh jiba sikilo teupong. teupong nyan hana jeuet teujampu ngon minyeuk zaiton atawa meusajan ngon keumeunyan, sabab keureubeuen nyan na kheueh keureubeuen peu amphon desya dan bukan keureubeuen teuhidang. teupong nyan haroh teuba ubak imeum. imeum haroh geucok saboh reugam nibak teupong nyan sibagoe tanda bahwa banmandum nyan ka lheueth geukeureubeuen ubak tuhan. teupong nyang sireugam nyan haroh geutot ateuheh miseubah sibagoe keureubeuen peunajoh. nyan kheueh keureubeuen gobnyan keu peu amphon desya. meunan kheueh cara jih imeum geupeuseumah keureubeuen keu ureueng nyan, teuma ureueng nyan geupeu amphon le tuhan. teupong nyang leubeh nyan keu imeum, lagee bak keureubeuen gandom. tuhan geubri ubak nabi musa peuratoran-peuratoran lagee nyoe. meunyoe sidroe-droe ureueng deungan hana jisaja ka jipeubuet desya sabab lalo bak jikok keureubeuen-keureubeuen droe jih nyang teupeu wajib ubak tuhan, teuma le ureueng nyan haroh jiba keureubeuen gantoe rugoe. keureubeuen nyan haroh saboh bubiri atawa kameng agam nyang hana meucupa, dan teutakse meunurot yuem nyang ka teuntée bak khimah tuhan. ureueng nyan haroh jibayeue peue nyang yoh watee ilee ka geupeulalo, teutamah dua ploh peureusen. oh lheueth nyan jihnyan haroh jikok beulatang nyan ubak imeum, dan imeum laju geukeureubeuen keu desya ureueng nyan, teuma di ureueng nyan laju geupeuamphon le tuhan. meunyoe sidroe-droe ureueng jipeubuet desya sabab ka ji-iengkeue ubak sapue-sapeue peurintah tuhan, ureueng nyan meusalah dan haroh jitanggong akibat jih. keu keureubeuen gantoe rugoe ureueng nyan haroh jiba saboh bubiri atawa kameng agam nyang hana meucupa dan teutakse meunurot yuem nyang saban lagee yuem bak khimah tuhan. imeum geukeureubeuen keu desya ureueng nyan, teuma gobnyan geupeu amphon le tuhan. nyan kheueh keureubeuen gantoe rugoe keu buet nyang salah nyang ka jipeubuet teuhadab tuhan. tuhan geubri ubak nabi musa peuratoran-peuratoran nyoe. sidroe-droe ureueng haroh jipeuseumah keureubeuen meunyoe ureueng nyan meudesa ubak tuhan sabab hana jitem jok pulang barang nyang jikeubah le ureueng laen nibak jihnyan, atawa jitipee gob, jicue atra gob, atawa ka meuteume barang nyang gadoh, le ureueng nyan ji-iengkeue ngon jimeubudok cula-calo. ureueng nyang meusalah nyan haroh jibayeue lom mandum nyang jiteume nyan ngon cara hana juojoe. watee jihnyan ka meuteume bahwa jihnyan salah, ureueng nyan haroh jibayeue peunoh keu ureueng po atra nyan, teutamah dua ploh peureusen. keu keureubeuen geunantoe rugoe ureueng nyan haroh jipeuseumah saboh bubiri atawa kameng agam nyang hana meucupa dan teutakse meunurot yuem nyang meuyuem bak

khimah tuhan. imeum geukeureubeuen keu desya ureueng nyan, teuma ureueng nyan laju geupeu amphon desya jih le tuhan. tuhan meufeuroman ubak nabi musa, mangat geujak peusampoe ubak nabi harun dan aneuek-aneuek gobnyan peuratoran-peuratoran lagee nyoe keuhai keureubeuen nyang teutot banmandum. imeum haroh geupeudeuk keureubeuen nyang teutot u ateuh miseubah dan geupeubiyeu disinan simalam beungoh, dan apui jih teutab hu sabe. oh ka ltheuh keureubeuen nyan jeuet ke abee, imeum geusok sileuwewe paneuek bajee jubah nibak ija lineun, haroh geubeu ot abee nyang meugapah nyan nibak ateuh miseubah laju geukeubah bak bineh miseubah. oh ka ltheuh nyan gobnyan haroh geugantoe peukayan dan geuba laju abee u luwa khimah-khimah, ubak teupat nyang ka teupeu khusus keu nyan. tieb-tieb beungoh imeum haroh geukeubah kayee apui u ateuh miseubah, geuatoe keureubeuen nyang teutot di ateuh nyan, dan geutot gapah nibak keureubeuen peudame. apui nyan na ateuh miseubah haroh hu sabe hana jeuet lon. nyoe ktheuh peuratoran-peuratoran keuhai keureubeuen teuhidang keu tuhan. keureubeuen nyan haroh teuba ukeue miseubah le sidroe nibak keuturonan nabi harun. gobnyan haroh geucok saboh reugam teupong haloh deungon minyeuk dan banmandum keumeunyan, laju geutot u ateuh miseubah sibagoe tanda bahwa banmandum keureubeuen nyan geupeuseumah ubak tuhan. bee keureubeuen nyang mangat nyan lumpah that galak ate tuhan. teupong nyan leubeh nyan haroh teupeuget keu ruti hana meurago dan geupajoh le imeum-imeum nibak teupat nyang khusus, na ktheuh nibak leuen khimah tuhan. nyan ktheuh jeumba imeum nyang geubri le tuhan keu awaknyan ateuh keureubeuen peunajoh. peunajoh nyan that suci, lagee keureubeuen peumphon desya dan keureubeuen geunantoe rugoe. keu siumu masa soe mantong ureueng agam nibak keuturonan nabi harun jeuet geumakheun ruti nyan; nyan ktheuh jeumba awaknyan nyang teutab nibak peunajoh nyang geupeuseumah ubak tuhan. ureueng laen nyang cukeh peunajoh nyang ka geukeureubeuen nyan, teuma meuteume bala ngon sabab teunaga suci nibak nyan. tuhan geubri ubak nabi musa peuratoran-peuratoran lagee nyoe, keuhai keureubeuen bak teubaiat sidroe imeum keuturonan nabi harun. bak uroe gobnyan teubaiat, ureueng nyan haroh geupeuseumah sikilogram teupong gandom ubak tuhan. siteungoh treuk haroh geupeuseumah watee beungoh uroe dan nyang leubeh nyan oh watee uroe ka seupot. teupong nyan haroh teujampu ngon minyeuk, laju teutot ateuh panggang apui, oh ltheuh nyan geupriek-priek dan geupeuseumah sibagoe keureubeuen teuhidang. bee keureubeuen nyang mangat nyan lumpah galak ate tuhan. keu siumu masa tieb-tieb keuturonan nabi harun nyang teubaiat jeuet keu imeum agong haroh geupeuseumah keureubeuen nyan. banmandum nyan haroh teutot sibagoe peuseumahan keu tuhan. tieb-tieb keureubeuen teuhidang nyang geupeuseumah le imeum haroh teutot banmandum, mubacutpi hana jeuet teupajoh. tuhan meufeuroman ubak nabi

musa, geuyue jak peusampoe ubak nabi harun ngon aneuek-aneuek gobnyan keuhai peuratoran-peuratoran lagee nyoe keuhai keureubeuen peu amphon desya. beulatang keu keureubeuen peu amphon desya teusie nibak teupat nyang lazem teusie beulatang keu keureubeuen nyang teutot. keureubeuen nyan lumpah that suci. imeum nyan peuseumah keureubeuen nyan haroh geumakheun atra nyan nibak teupat nyang khusus, na ktheuh nibak seuramo khimah tuhan. soe mantong atawa peue mantong nyang keunong nibak sie beulatang peulara nyan teuma keunong bala sabab sakeuti nyang ka keunong nibak sie nyan. meunye sion bajee nyang keunong meusipreuk darah beulatang nyan, bajee nyan haroh teu riah bak teupat nyang khusus. beulangong tanoh nyang teupeuguna keu teupat reuboh sie keureubeuen nyan haroh teupeubeukah. meunye nyang teupeuguna beulangong beuso, beulangong nyan haroh teu-uet dan teupeu gleh laju ngon ie. tieb-tieb ureueng agam lam keulwarga imeum-imeum nyan jeuet jipajoh keureubeuen nyang lumpah suci nyan. beulatang keu keureubeuen peu amphon desya nyang teucok bacut darah jih keu teuba ubak ruweueng suci, atranyan haroh teutot sampoe habeh dan hanjeuet teupajoh. nyoe ktheuh peuratoran-peuratoran keuhai keureubeuen geunantoe rugoe. keureubeuen nyan lumpah suci. beulatang nyang teu keureubeuen nyan haroh teusie nibak teupat lazem teuseumeusie keu keureubeuen nyang teutot, dan darah jih laju teureutek nibak ban peuet boh sagoe miseubah. imeum haroh geupeuseumah u ateuh miseubah banmandum gapah beulatang nyan, na ktheuh: ikue jih nyang meugapah, gapah nyang teutob nibak asoe pruet jih, boh keuieng ngon gapah jih, dan bagian nyang paleng get nibak ate jih. banmandum nyan haroh teutot ateuh miseubah sibagoe keureubeuen peunajoh keu tuhan. keureubeuen nyan na ktheuh keu keureubeuen geunantoe rugoe. tieb-tieb ureueng agam lam keulwarga imeum-imeum jeuet jipajoh sie keureubeuen nyan, teuma awaknyan haroh jipajoh atra nyan nibak teupat nyang khusus, sabab keureubeuen nyan lumpah that suci. keu keureubeuen peu amphon desya dan keureubeuen geunantoe rugoe keunong cit nibak peuratoran nyang saban, na ktheuh: asoe sie beulatang peulara nyang teukeureubeuen nyan na ktheuh keu imeum nyang geupeuseumah. meunan cit kulet beulatang nyan pih keu imeum. tieb-tieb keureubeuen teuhidang nyang teutot nibak teupat teutot atawa teutaguen lam kualiti atawa nyang teupanggang, atranyan jeuet keu jeumba imeum nyang geupeuseumah. teuma keureubeuen teuhidang nyang hana teupeumasak, bah ktheuh nyan nyang teujampu ngon minyeuk meunan cit nyang tho, banmandum nyan keu imeum-imeum keuturonan nabi harun, dan haroh teuweuk rata sabe keudroe-droe awaknyan. nyoe ktheuh atoran-atoran jih keuhai keureubeuen peudame nyang teupeuseumah ubak tuhan. meunye keureubeuen nyan jipeuseumah keu teulakee teurimong gaseh, deungon beulatang nyan haroh teupeuseumah teuma ruti nyang hana meurago. ruti nyan jeuet nyang teubai teupong teuwoi ngon

minyeuk zaiton, meunan cit jeuet ruti tho nyang lipeh nyang teusilik ngon minyeuk, atawa juadah tepung nyang teupeuget ngon minyeuk zaiton. seulaen nibak nyan haroh jipeuseumah cit nyang teupeuget teuboh rago. nibak tieb-tieb bagoe ruti nyan siladam haroh teupeuseumah ubak tuhan, dan nyan jeumba imeum nyang cok darah beulatang nyan laju teureutek nibak miseubah keu keureubeuen peudame. asoe sie nyan haroh teupajoh nibak uroe beulatang nyan teukeureubeuen, mubacutpi hana jeuet teutinggah sampoe oh singoh beungoh. meunyo na sidroe-droe ureueng jiba keureubeuen peudame keu jikak peulheueh kaol jihnyan, atawa keu keureubeuen keugalak droe, atranyan hana peureulee teupajoh sampoe habeh bak uroe nyan cit teuma. nyang leubeh nyan jeuet jipajoh oh singoh teuma. meunyo trok bak uroe nyang keu lhee mantong na cit tinggai, sie nyan haroh teutot sampoe habeh. teuma meunyo bak uroe nyang keu lhee eungkot sie nyan jipajoh cit, keureubeuen nyan hana geuteurimong dan hana teuba hasa sapeue keu ureueng nyan, teuma ka jeuet keu hareuem. ureueng nyang pajoh atra nyan ka salah dan haroh jitanggong akibat jih. sie nyang ka keunong salah sapeue najis atra nyan haroh teutot sampoe habeh dan hana jeuet teupajoh. sie keureubeuen peudame teuma jeuet jipajoh le ureueng nyang hana me najih. meunyo na ureueng jipajoh euengkot sie nyan bak watee jih nyan lam najis, ureueng nyan hana le teu anggab anggota umat po teu allah. meunyo na ureueng jipajoh sie keureubeuen nyan oh ka ltheueh tupeh ngon najis, bah ktheueh nyan nyang asai jih nibak manusia meunan cit nibak beulatang, ureueng nyan pih saban cit hana le teu anggab anggota umat po teu allah. tuhan geubri ubak nabi musa peuratoran-peuratoran lagee nyoe keu bansa israel. gapah leumo, gapah bubiri atawa gapah kameng hana jeuet teupajoh. gapah beulatang nyang mate keudroe atawa sabab jiteugom le beulatang juwah, atranyan hana jeuet teupajoh teuma jeuet teupeuguna keu keupeue laen. ureueng nyang pajoh gapah beulatang nyang jeuet teupeuseumah sibagoe keureubeuen peunajoh keu po teu allah, ureueng nyan hana le teu anggab sibagoe anggota umat po teu allah. ureueng israel, dipat mantong awaknyan tinggai, hana jeuet jipajoh darah cicem atawa darah beulatang nyang laen. soe mantong nyang iengkeue ubak atoran nyan ureueng nyan hana le teu anggab sibagoe anggota umat po teu allah. tuhan geubri lom ubak nabi musa peuratoran-peuratoran nyang lagee nyoe keu bansa israel. soe mantong nyang jiba keureubeuen peudame, haroh jiweuek siladam keu keureubeuen khusus ubak tuhan. gobnyan keudroe haroh jiba keureubeuen peunajoh nyan. gapah ngon dada beulatang nyan haroh jipeuseumah sibagoe keureubeuen nyang teujok ubak tuhan. imeum haroh geutot gapah beulatang nyan ateueh miseubah, teuma dada jih na ktheueh jeumba imeum-imeum. pha uneuen haroh jibri sibagoe keureubeuen khusus ubak imeum nyang jipeuseumah darah dan gapah keureubeuen peudame nyan. dada ngon pha uneuen na ktheueh teujok khusus nyang geucok le tuhan nibak keureubeuen nyang jijok le bansa

israel dan jibri ubak imeum-imeum. nyan ktheueh meuneubri bansa israel keu imeum-imeum siumu masa. nibak peunajoh nyang jipeuseumah ubak tuhan, jeumba nyan ktheueh nyang jijok ubak nabi harun ngon aneuek-aneuek gobnyan bak uroe awaknyan teubaiat jeuet keu imeum. bak uroe nyan tuhan geupeurintah ubak bansa israel mangat jeuet nibak keureubeuen awaknyan, jeumba nyan keu imeum-imeum. atoran nyang lagee nyan haroh jiseutot le bansa israel siumu masa. meunan ktheueh atoran-atoran keuhai keureubeuen nyang teutot, keureubeuen teuhidang, keureubeuen peu amphon desya, keureubeuen geunantoe rugoe, keureubeuen peubaiat dan keureubeuen peudame. tuhan geubri banmandum peurintah nyan ubak nabi musa di gunong sinai bak watee gobnyan geuyue bansa israel jipeuseumah keureubeuen bak padang guuron sinai. tuhan meufeureuman ubak nabi musa, "gata jak hoi laju nabi harun ngon aneuek-aneuek jihnyan dan gata ba laju peukayan imeum, minyeuk upacara, saboh leumo agam muda, keu keureubeuen peu amphon desya, dua boh bubiri agam dan saboh raga ruti nyang hana meurago. oh ltheueh nyan gata yue meusapat banmandum umat israel nibak leuen khimah ulon." nabi musa laju geupeubuet peue nyang ka geupeurintah le tuhan ubak gobnyan. bak watee banmandum umat ka meusapat nibak tempat nyan, nabi musa laju geupeugah ubak awaknyan, "nyang ulon peubuet bak saat nyoe na ktheueh peurintah tuhan." oh ltheueh nyan geuyue ubak nabi harun ngon aneuek-aneuek gobnyan mangat jipeurab ukeue sira geu rhah droe. oh ka ltheueh nyan le gobnyan laju geupeungui peukayan imeum ubak nabi harun: bajee panyang jaroe, talo keueing ngon bajee jubah. meunan cit ngon efod nyang geugantung bak keueing gobnyan deungon ikat ija nyang haloh. oh ltheueh nyan geupeungui laju tutob dada ubak nabi harun, dan udalam sinutob dada nyan geupeutamong laju urim ngon tumim. laju geupeuseuon seureuban ateueh ulee nabi harun, dan nibak seureuban nyan geupeungui ngon piasan meuh, nyan na ktheueh sibagoe tanda bahwa nabi harun ka jeuet keu hak milek tuhan. banmandum nyan geupeubuet le nabi musa lagee nyang ka geupeurintah le tuhan ubak gobnyan. laju le nabi musa geucok minyeuk upacara geusilik laju ubak khimah tuhan ngon banmandum peukakaih nyan. deungon lagee nyan banmandum ka geupeu khusus keu tuhan. bacut nibak minyeuk nyan laju geureutek tujuh goe u ateueh miseubah dan banmandum peukakaih nyang na disinan, meunan cit u ateueh bak ie ngon aleue jih. deungon lagee nyan banmandum ka geupeu khusus keu tuhan. oh ka ltheueh nyan le nabi musa laju geubaiat nabi harun deungon cara geuro bacut minyeuk ateueh ulee nabi harun nyan. oh ltheueh nyan geuyue laju ubak bandum aneuek-aneuek nabi harun mangat jikak ukeue. laju geupeungui ubak awaknyan bajee panyang jaroe ngon talo keueing. laju geupeuseuon seureuban ateueh ulee awaknyan lagee nyang ka geupeurintah le tuhan ubak gobnyan. oh ka ltheueh nyan nabi musa laju geucok saboh leumo agam muda keu keureubeuen peu amphon desya. nabi harun dan aneuek-aneuek gobnyan geupeuduek

laju jaroe gobnyan ateuh ulee beulatang nyan. le nabi musa laju geusie oh ltheueh nyan geucok teuma bacut darah beulatang nyang ka ltheueh geusie nyan. darah nyan laju geusilik ngon jaroe gobnyan ateuh lungkee-lungkee nyang na nibak sagoe-sagoe miseubah, mangat jeuet miseubah nyan teupeu khusus keu po teu allah. darah nyang leubeh nyan laju geu ro ateuh aleue miseubah. meunan ktheueh cara jih miseubah nyan teupeusuci dan teupeu khusus keu tuhan. nibak leumo nyang ban tesie nyan, le nabi musa laju geucok banmandum gapah nyang na meutamon nibak asoe pruet jih, boh keuieng ngon gapah jih ngon bagian nyang paleng get nibak ate jih. banmandum nyan laju geutot u ateuh miseubah. teuma asoe leumo nyan, kulet jih, asoe pruet nyang leubeh, meunan cit deungon pruet, jadi banmandum leumo nyan seulaen bagian-bagian nyang ka teupeueng kreeh teutot laju diluwa khimah-khimah lagee nyang ka geupeurintah le tuhan. oh ltheueh nyan nabi musa laju geucok bubiri agam sibagoe keureubeuen nyang teutot, le nabi harun ngon aneuek-aneuek gobnyan laju geupeuduek jaroe geuh ateuh ulee bubiri nyan. nabi musa laju geusie beulatang nyan darah jih laju geureutek ateuh ban peuet boh sagoe miseubah nyan. beulatang nyan laju geukoh-koh dan asoe pruet meunan cit deungon gaki jih laju geu rrah deungon ie. ulee, gapah, ngon nyang leubeh nyan nibak asoe bubiri agam geutot laju sibagoe keureubeuen nyang teutot u ateuh miseubah lagee nyang ka geupeurintah le tuhan ubak gobnyan. bee keureubeuen peunajoh nyang mangat nyan lumpah that galak ate tuhan. oh ltheueh nyan le nabi musa laju geucok bubiri agam nyang saboh treuk keu keureubeuen peubaiat imeum. nabi harun ngon aneuek-aneuek gobnyan laju geupeuduek jaroe gobnyan ateuh ulee beulatang nyan, oh ltheueh nyan nabi musa laju geusie bubiri nyan. oh ltheueh nibak nyan geucok darah bacut laju geusilik ubak punyueng uneuen nabi harun, ubak nang jaroe blah uneuen, ngon nang gaki uneuen gobnyan. oh ka ltheueh geupeubuet nyang lagee nyan bagoe laju geuyue banmandum aneuek-aneuek nabi harun mangat jipeurab, oh ban sare rab, laju geusilik maseng-maseng blah uneuen punyueng awaknyan darah beulatang nyan bacut sapoe, ubak nang jaroe blah uneuen, dan ubak nang gaki blah uneuen. darah nyang na mantong leubeh laju geuro ateuh ban peuet boh sagoe miseubah. nabi musa laju geucok gapah bubiri nyan, ikue jih nyang meugapah, mandum gapah nyang meulabak ba asoe pruet jih, bagian nyang paleng get nibak ate jih, boh keuieng deungon gapah jih meunan cit deungon gaki uneuen jih. lam raga nyang measoe ruti hana meurago nyang ka teupeuseumah keu tuhan, nabi musa laju geucok saboh ruti teubai nyang teupeuget deungon minyeuk dan saboh treuk ruti lipeh. ruti nyan laju geukeubah ateuh gapah ngon ateuh pha uneuen bubiri. banmandum nyan geupeuduek bak jaroe nabi harun ngon aneuek-aneuek gobnyan, laju awaknyan peuseumah sibagoe keureubeuen teujok ubak tuhan. oh ka ltheueh nyan nabi musa laju geucok peunajoh nibak awaknyan laju geutot u ateuh miseubah, meusigoe deungon keureubeuen nyang teutot keu

keureubeuen peubaiat. bee keureubeuen peunajoh nyan lumpah that galak ate tuhan. le nabi musa laju geucok dada bubiri nyan laju geupeuseumah sibagoe keureubeuen nyang teujok ubak tuhan. nyan ktheueh jeumba nabi musa nibak bubiri agam nyang teukeureubeuen keu upacara peubaiat imeum. banmandum nyan geupeubuet le nabi musa lagee nyang ka geupeurintah le tuhan ubak gobnyan. oh ltheueh nyan nabi musa geucok siladam minyeuk upacara dan siladam darah nyang mantong na ateuh miseubah, laju geureutek ateuh nabi harun dan aneuek-aneuek gobnyan meunan cit ateuh peukayan awaknyan. deungon cara lagee nyan nabi musa ka geupeu khusus awaknyan dan peukayan awaknyan keu tuhan. oh ltheueh nyan nabi musa geupeugah ubak nabi harun dan aneuek-aneuek gobnyan, "neutaguen ktheueh laju eungkot sie keureubeuen nyan bak babah pintoe khimah tuhan. meunurot peurintah tuhan, droeneueh nyoe haroh neupajoh nibak teumpat nyan ngon ruti keureubeuen peubaiat nyang na dalam raga. eungkot sie ngon ruti nyang na mantong leubeh nyan haroh droeneueh tot sampoe habeh. tujoh uroe treb jih droeneueh hana jeuet neutinggai khimah tuhan sampoe upacara peubaiat seulesue. tuhan geupeurintah peue nyang tapeubuet nibak uroe nyoe meunan cit teuma tapeubuet bak uroe laen. deungon upacara nyan mandum desya-desya droeneueh geupeu amphon. tujoh uroe treb jih, uroe ngon malam, droeneueh haroh tinggai dikeue pintoe khimah keu neupeubuet peue nyang geupeurintah le tuhan. meunyeue droeneueh hana neupeubuet lagee nyang geupeurintah nyan, droeneueh teuma mate. nyan ktheueh nyang geupeurintah le tuhan ubak ulon." dan nabi harun pi ngon banmandum aneuek-aneuek gobnyan laju geupeubuet banmandum nyang geupeurintah le tuhan meulalu nabi musa. siuroe oh ltheueh upacara peubaiat nyan seulesue, bak uroe nyang keulapan, nabi musa laju geuhoi nabi harun ngon aneuek-aneuek gobnyan meunan cit bubena peumimpin bansa israel. geupeugah le nabi musa ubak nabi harun, "neucok ktheueh laju saboh leumo agam nyang mantong muda dan saboh bubiri agam, mandum nyan hana meucupa. neupeuseumah ktheueh bandua boh beulatang nyan ubak tuhan, leumo agam keu keureubeuen peu amphon desya dan bubiri agam keu keureubeuen nyang teutot. dan neuyue ktheueh laju bansa israel mangat jipeuseumah saboh kameng agam sibagoe keureubeuen peu amphon desya saboh aneuek leumo dan saboh aneuek bubiri nyang maseng-maseng meu umu sithon nyang hana meucupa keu keureubeuen nyang teutot. neuyue cit ubak awaknyan mangat jikeureubeuen saboh leumo agam dan saboh kameng agam sibagoe keureubeuen peudame. mandum nyan haroh awaknyan peuseumah keu tuhan meusajan-sajan deungon keureubeuen teuhidang nyang ka teuboh minyeuk, sabab nibak uroe nyoe tuhan geuteuka ubak awaknyan." bandum nyang geupeugah le nabi musa awaknyan ba ukeue khimah, dan banmandum umat meugumpoi bak teumpat nyan keu meu iebadat ubak tuhan. laju geupeugah le nabi musa, "tuhan geuyue ubak droeneueh neupeubuet nyoe mangat

droeneuh deuh neukalon cahya tuhan teuka." oh ka ltheuh nyan gobnyan laju geupeugah ubak nabi harun, "neujak kheueh laju ubak miseubah oh trok keunan neupeusiab laju keureubeuen peu amphon desya ngon keureubeuen nyang teutot, mangat desya droeneuh ngon desya umat geupeu amphon le tuhan. neupeubuet kheueh nyan lagee nyang ka geupeurintah le tuhan." ban geudeungoe haba nyan geujak kheueh laju nabi harun ubak miseubah ban sare trok keunan geusie laju saboh leumo agam keu keureubeuen peu amphon desya geuh keudroe. aneuek-aneuek nabi harun jipeusampoe laju darah beulatang nyan ubak nabi harun, dan le gobnyan laju geuculok jaroe geuh lam darah nyan, dan geusieliek laju ubak lungkee-lungkee nyang na nibak peuet boh sagoe miseubah. oh ka ltheuh nyan darah nyang na mantong leubeu laju geuro ubak aleue miseubah. gapah, boh keuieng ngon bagian nyang paleng get nibak beulatang nyan geutot laju u ateuh miseubah, lagee nyang ka geupeurintah le tuhan ubak nabi musa. teuma asoe ngon kulet beulatang nyan geutot laju diluwa khimah-khimah. oh ltheuh nyan nabi harun laju geusie beulatang keureubeuen teutot keu droe geuh. aneuek-aneuek nabi harun laju geujakjok darah beulatang nyan ubak gobnyan, dan darah nyan laju geuro ubak ban peuet boh sagoe miseubah. oh ltheuh nyan awaknyan jijok laju ubak gobnyan ulee dan bagian-bagian nyang laen nibak beulatang nyan, dan atranyan laju geutot u ateuh miseubah. oh ltheuh nyan asoe pruet ngon pha beulatang nyan laju geu rhaah dan geutot laju ngon keureubeuen nyang teutot u ateuh miseubah. oh ka ltheuh nyan gobnyan laju geukeureubeuen kameng sibagoe keureubeuen peu amphon desya umat. kameng nyan geusie dan geupeuseumah lagee keureubeuen peu amphon desya geuh keudroe. ltheuh nyan geucok teuma beulatang keu keureubeuen teutot, laju geupeuseumah atranyan meunurrot atoran. oh ltheuh nyan geupeuseumah teuma keureubeuen teuhidang; geucok laju saboh reugam teupong, geutot laju ateuh miseubah. nyan kheueh sibagoe seunamah keu keureubeuen teutot tieb-tieb uroe. geusie teuma lom saboh leumo agam dan saboh bubiri agam keu keureubeuen peudame keu umat. aneuek-aneuek nabi harun laju geujakjok darah nyan ubak gobnyan, ngon darah nyan laju geuro ateuh ban peuet boh sagoe miseubah. bak teupat-teupat nyang na gapah nibak leumo dan kameng nyan awaknyan peuduek u ateuh dada mandua beulatang nyan, le nabi harun laju geutot u ateuh miseubah. dada ngon pha beulatang nyan geupeuseumah sibagoe keureubeuen nyang teujok keu tuhan. nyan na kheueh jeumba imeum-imeum, lagee nyang geupeurintah le nabi musa. oh ka seuleusoe geupeuseumah banmandum keureubeuen nyan, nabi harun laju geubot jaroe geuh u ateuh umat israel dan laju geubri beureukat ubak awaknyan, oh ltheuh nyan laju geutron. nabi musa ngon nabi harun laju geutamong lam khimah tuhan. oh ltheuh nyan awaknyan geuteubiet laju geubri beureukat ubak umat. dan banmandum umat israel deuh jikalon cahya tuhan teuka. ngon hana teusangka-sangka tuhan laju geupeutreu apui nyang jilahieb habeh banmandum keureubeuen

nyang teutot dan bagian-bagian nyang meugapah di ateuh miseubah. watee umat israel jikalon hai nyan, awaknyan meusurak-surak laju jisujut jiseumah gobnyan. bak siuroe, nadab dan abihu, aneuek-aneuek nabi harun, jicok laju teupat apui jih maseng-maseng jipasoe laju ngon ngeue apui. oh ltheuh nyan le awaknyan jipasoe teuma dupa lam teupat apui nyan dan jipeuseumah laju ubak tuhan. teuma apui nyan hana haleue sabab tuhan hana geuyue peuseumah atranyan keu gobnyan. le tuhan laju geupeutreu apui ateuh awaknyan dan awaknyan laju mate sabab jipajoh le apui bak khimah tuhan. laju geupeugah le nabi musa ubak nabi harun, "nyan kheueh nyang geumeukeusut le tuhan watee gobnyan geupeugah, 'mandum nyang peutimang ulon haroh jihoreumat keusucian ulon. ulon teuma lon peugah keu agungan lon ubak banmandum bansa lon.'" teuma nabi harun geuiemdroe. oh ltheuh nyan nabi musa laju geuhoi misael ngon elsafan, aneuek-aneuek uziel, apha nabi harun. geupeugah ubak awaknyan, "tajak kheueh keunoe dan tacok kheueh laju manyet syedara sipupu gata nibak khimah tuhan dan takeubah laju diluwa khimah-khimah." awaknyan laju jijakcok ngon jipeuteubiet mandua droe manyet nyan nyang mantong meupeukayan jiba laju uluwa khimah-khimah, lagee nyang ka geupeurintah le tuhan. nabi musa laju geupeugah ubak nabi harun meunan cit ubak aneuek-aneuek nyang laen, awaknyan na kheueh eleazar dan itamar, "bek tapeuleumah ok bak ulee gata sansui, dan bek tapriek peukayan gata keu gata tanyok bahwa gata seudeh ngon meukabong. meunyo gata tapeubuet lagee nyan, gata teuma mate, dan banmandum umat israel teuma geubeungeh le tuhan. teuma meunyo ureueng israel nyang laen jeuet meukabong keu bandua droe nyang mate sabab tutong ngon apui nyan teuka nibak tuhan. bek tatinggai khimah tuhan mangat gatanoye hana mate, sabab gata ka teubaat ngon minyeuk upacara keu tapeutimang tuhan." awaknyan laju jipeubuet lagee nyang ka geupeugah le nabi musa. tuhan meufeureuman ubak nabi harun, "oh ka ltheuh gata jieb ie anggo atawa ie kreuheh nyang laen, gata dan aneuek-aneuek gata hana jeuet tatamong lam khimah lon. meunyo gata iengkeue keu peuratoran ulon nyan, gata mate. peurintah nyan haroh jitaat le banmandum keuturonan gata. gata haroh hase tapeubeda lamkawan nyang geupeukhusos keu po teu allah ngon nyang hana, lamkawan nyang najih ngon nyang hana najih. banmandum hukum nyang ulon bri ubak gata meulalu nabi musa, haroh beuhase gata peurunoe keu bansa israel." nabi musa geupeugah ubak nabi harun dan ubak bandua droe aneuek geuhnyan, eleazar ngon itamar, "tacok kheueh laju gandom nyang leubeu nibak nyang teupeuseumah keu tuhan. nibak teupong nyan neupeugat kheueh ruti nyang hana meurago, dan jak pajoh kheueh nyan bak bineh miseubah, sabab keureubeuen nyan lumpah suci. ruti nyan haroh teupajoh bak teupat nyang suci, sabab nibak peunajoh nyang teupeuseumah ubak tuhan, ruti nyan ka jeuet keu jeumba gata dan aneuek-aneuek gata nyang agam. nyan kheueh peurintah tuhan ubak ulon. teuma gata ngon aneuek-aneuek gata

nyang agam ngon nyang inong jeuet gata pajoh dada keureubeuen nyang teubri dan pha keureubeuen khusus. nyan kheueh jeumba imeum-imeum nibak keureubeuen peudame bansa israel. atranyan jeuet gata jak pajoh patmantong asai bek bak teupnat nyang na najih. pha keureubeuen khusus ngon dada keureubeuen nyang teubri nyan haroh teuba meusajan-sajan ngon gapah keu keureubeuen nyang teutot sibagoe keureubeuen khusus keu tuhan. jeumba-jeumba nyan ka jeuet keu hak milek gata dan aneuek-aneuek gata siumu masa, lagee nyang geupeurintah le tuhan." oh lheureh nyan nabi musa geutanyong keuhai kameng keu keureubeuen peu amphon desya. gobnyan geubri tee bahwa kameng nyan ka teutot. ngon sabab nyan nabi musa beungeh that ubak eleazar dan itamar, dan gobnyan geupeugah ubak awaknyan, "pakon keureubeuen peu amphon desya nyan hana gata pajoh bak teupnat nyang suci? keureubeuen nyan that suci; tuhan geubri nyan ubak gata, mangat desya umat israel geupeu amphon. darah kameng nyan hana teuba ubak khimah tuhan, nyang sikeubit jih keureubeuen nyan gata makheun bak teupnat nyan lagee nyang ka ulon peurintah ubak gata." geujaweueb le nabi harun, "beutoi, nibak uroe nyoe umat israel ka jipeuseumah keureubeuen peu amphon desya ngon keureubeuen nyang teutot keu tuhan. bahpi lagee nyan, bala nyoe ka rhot u ateuhe lon. meunyo uroe nyoe ulon makheun cit keureubeuen peu amphon desya nyan, peu kheueh tuhan teuma harok?" nabi musa that-that puih watee geudeungoe nabi harun geujaweueb lagee nyan. tuhan geubri ubak nabi musa ngon nabi harun peuratoran-peuratoran lagee nyoe keu bansa israel. mandum beulatang nyang udeb ateuhe darat nyang mamah biak dan gukee jih teuprah na kheueh haleue dan jeuet teupajoh. bek tapajoh unta, peulandok atawa marmut. beulatang nyan hareuem sabab bahpi jimamah biak, gukee jih hana teuprah. bek gatapajoh bui. beulatang nyan hareuem, sabab bahpi gukee jih teuprah, beulatang nyan hana jimamah biak. asoe jih hana jeuet teupajoh dan bangke jih pi hana jeuet teukeuh sabab beulatang nyan hareuem. gata jeuet tapajoh meubago rupa eungkot nyang na sireb dan nyang na sisek. beulatang nyang udeb lam ie teuma hana meusireb dan hana meusisek nyan na kheueh hareuem. nyang lagee nyan hana jeuet teupajoh, meunan cit deungon bangke jih hana jeuet teukeuh. nyang rho lamkawan mubagoe cicem nyang hana jeuet gata pajoh sabab najih na kheueh: cicem siwah, cicem kutoktok, mubagoe jeuneh kleung, cicem nasar, cicem gagak, cicem unta, cicem cama, blekok, dan mubagoe jeuneh cangirikie, undan, cicem kasa dan simantong. banmandum jeuneh seurangga nyang meusayeub na kheueh hareuem, keucuali nyang jeuet ji grob. daruet, daruet kleng dan daruet ijo jeuet teupajoh. teuma banmandum seurangga laen nyang meusayeub meunan cit jimeue eue na kheueh hareuem. sidroe-droe ureueng ka keunong najih sampoe an mata uroe jilob na kheueh meunyo ureueng nyan ka tupeh ngon sabab lamkawan bangke nyoe: beulatang nyang meugukee, keucuali nyang gukee jih teuprah dan jimamah biak, dan beulatang nyang meugaki peuet

dan na gukee jih. barang sigasoe nyang ba bangke beulatang nyang seujeuneh nyan ureueng nyan haroh ji rlah peukayan jih, teuma ureueng nyan teutab mantong najih sampoe an mata uroe jilob. tikoiih tanoh, tikoiih rayeuek, tikoiih ubit, kadal, asai ateuhe nan cangguek peue mantong teutab hareuem, landak, muruwa, bengkarung, eungkot cue dan bunlon teutab hareuem. soemantong nyang mat beulatang nyan atawa bangke jih atranyan teutab najih sampoe mata uroe jilob. meunyoe bangke beulatang nyan rhot u ateuhe barang peue mantong, teuma barang nyan pi ka jeuet keu najih. hainyan keunong ateuhe barang bah kheueh nyan nyang teupeuget nibak kayee, ija, kulet, atawa ija krong, dan hana soai keupeue barang nyan teupeuguna. barang nyan haroh teureundam lam ie, teuma teutab najih sampoe mata uroe jilob. meunyoe bangke nyan rhot lam beulangong tanoh, peue mantong nyang na lam beulangong nyan ka jeuet keu najih, dan beulangong nyan haroh teupeubeukah. peunajoh nyang keunong ie nibak beulangong nyan ka jeuet keu najih, meunan cit ie jieb nyang na lam beulangong nyan ka jeuet keu najih. peue mantong nyang keunong ateuhe bangke nyang rhot nyan ka jeuet keu najih. dapu atawa teupnat tot nibak tanoh nyang keunong bangke nyan haroh teupeubeukah sabab ka keunong najih. laen hai meunyo mata ie atawa mon, mandum nyang laen ka jeuet keu najih meunyo keunong bangke. meunyo bangke nyan rhot ateuhe bijeh nyang keuneuk tabu, bijeh nyan teutab gleh. laen hai meunyo bijeh nyan teungoh teureundam lam ie laju rhot bangke nyan ateuhe bijeh nyang teureundam nyan, teuma bijeh nyan ka jeuet keu najih. barang gasoe nyang mat bangke beulatang haleue ka jeuet keunajih sampoe an mata uroe jilob. ureueng nyang ba atawa nyang pajoh bangke nyan ureueng nyan haroh jirrah peukayan droe jih, teuma ureueng nyan teutab najih sampoe mata uroe jilob. mandum beulatang nyang meulata ateuhe tanoh, bah kheueh nyang jimeu-eue, nyang meugaki peuet atawa nyang jai gaki, nyan na kheueh hareuem dan hana jeuet teupajoh. bek gata peunajih droe gata deungon teupajoh beulatang nyang lagee nyan. ulon kheueh tuhan allah gata, sabab nyan jaga kheueh mangat gata teutab suci, sabab ulon suci. ulon kheueh tuhan nyang peuteubiet dan ba gata nibak nanggroe meuse, mangat ulon nyoe jeuet keu po teu allah gata. bah kheueh gata suci, sabab ulon suci. nyan kheueh atoran keuhai beulatang, rhoi cit keunan cicem, beulatang nyang udeb lam ie dan nyang meulata ateuhe tanoh. gata haroh hase tapeubeda lamkawan nyang gleh ngon nyang najih, lamkawan beulatang nyang jeuet teupajoh ngon beulatang nyang hana jeuet teupajoh. tuhan geubri ubak nabi musa peuratoran-peuratoran lagee nyoe keu bansa israel. meunyo sidroe ureueng inong jipeulahe aneuek agam, tujoh uroe ureueng inong nyan lam keuadaan kuto, saban lagee yoh watee ureueng nyan teuka he. bak uroe nyang keulapan aneuek nyang lahe nyan haroh teupeusunat. oh ka lheureh lhee ploh lhee uroe treuk inong nyan mantong lam keuadaan kuto sabab jiteubiet darah. ureueng nyan hana jeuet jimat barang-barang nyang

teupeuguna keu iebadat dan hana jeuet jitamong lam khimah tuhan sampoe trok bak watee inong nyan suci teuma. meunyo ureueng inong jipeulahe aneuek inong, peuet blah uroe ureueng inong nyan lam keuadaan kuto, saban lagee yoh watee ureueng nyan teuka he. oh ltheuh nyan nam ploh nam uroe treuk ureueng nyan mantong lam kuto sabab jiteubiet darah. oh ka ltheueh seulesoe masa peusuci, bah ktheueh sabab ka ltheueh jipeulahe aneuek agam meunan cit ngon aneuek inong, ureueng inong nyan haroh jiba peuseumahan ubak imeum dikeue pintoe khimah tuhan. keureubeuen nyan na ktheueh saboh aneuek bubiri nyan meum umu sithon keu keureubeuen nyan teutot, dan saboh cicem mirah pati nyan muda atawa cicem leuk nyan muda keu keureubeuen peum amphon desya. imeum haroh geujok keureubeuen jih nyan ubak tuhan dan geupeuna upacara keu teusampoh najih ureueng inong nyan, sampoe ureueng inong nyan ka jeuet keu gleh. lagee nyan ktheueh nyan haroh jipeubuet le sidroe ureueng inong meunyo jihnyan jipeulahe aneuek. meunyo ureueng inong nyan hana hase jipeuna saboh aneuek bubiri, ureueng nyan haroh jiba dua aneuek cicem mirah pati muda atawa cicem leuk muda: saboh keu keureubeuen nyan teutot saboh treuk keu keureubeuen peum amphon desya. imeum haroh geupeubuet upacara keu teusampoh najih bak ureueng inong nyan, deungon lagee nyan ureueng nyan ka jeuet keu gleh lom teuma. tuhan geubri ubak nabi musa ngon nabi harun peuratoran-peuratoran nyan lagee nyoe: meunyo na sidroe-droe ureueng jibeudoh kru, atawa puree atawa jitimoh puteh meutumpok-tumpok nibak kulet ureueng nyan nyan akhe jih rhot keu peunyaket kulet nyan meubahya, ureueng nyan haroh teuba ubak imeum keuturonan nabi harun. imeum haroh geupareksa bak teumpat nyan saket nibak kulet ureueng nyan. meunyo bulee nyan na bak teumpat nyan ka jeuet keu puteh, dan bak teumpat nyan saket deuh jih leubeh lhok nibak kulet silingka nyan, ureueng nyan ka keunong peunyaket kulet nyan paleng mubahya. le imeum haroh geupeugah bahwa ureueng nyan najih. teuma meunyo bagian nyan saket wareuna jih puteh dan hana leubeh nibak kulet nyan na silingka nyan, meunan cit bulee nyan na nibak nyan hana cit puteh, ureueng nyan haroh teupeu aseng tujoh uroe treb jih. bak uroe nyan keutujoh, le imeum haroh geupareksa lom. dan meunrot geupike le gobnyan peunyaket nyan mantong sa keuadaan jih dan hana jimeu-eue ho laen, ureueng nyan haroh teupeu aseng tujoh uroe treuk. bak uroe nyan keutujoh le imeum haroh geupareksa lom, dan meunyo bagian nyan saket nyan ka leu-eueng dan jimeu-eue, le imeum haroh geupeugah bahwa ureueng nyan ka gleh. nyan peunyaket kulet nyan hana mubahya. dan ureueng nyan haroh jirrah peukayan jih dan gobnyan ka jeuet keu gleh. teuma oh ltheueh geupeugah le imeum peunyaket ureueng nyan gleh teuma peunyaket nyan ka jimeu-eue, ureueng nyan haroh meuhadab lom ubak imeum. le imeum haroh geupareksa lom, dan meunyo peunyaket nyan beutoi ka jimeu-eue, ureueng nyan haroh teupeugah ka najih; ureueng nyan keunong

peunyaket kulet nyan paleng mubahya. sidroe ureueng keunong peunyaket kulet nyan mubahya ureueng nyan haroh teuba ubak imeum. meunyo meunrot geukalon le imeum nibak kulet ureueng nyan na keumong puteh nyan ka luhok dan bulee jih pih nyan na silingka nyan ka puteh, ureueng nyan ka keunong peunyaket kulet nyan meubahya. le imeum haroh geupeugah bahwa ureueng nyan ka jeuet keu najih. hana peureulee le ureueng nyan teupeu aseng, sabab ka nyata bahwa ureueng nyan najih. meunyo geukalon le imeum meucak-cak puteh nyan ka jimeu-eue phon nibak ulee ka trok bak gaki, dan hase geupeureksa le gobnyan kulet nyan ka jimeu-eue bansaboh tuboh dan banmandum kulet ureueng nyan ka jeuet keu puteh, ureueng nyan ka jeuet teupeugah gleh. teuma meunyo jitimoh luhok, le imeum haroh geupareksa lom. meunyo nyan meumang luhok, ureueng nyan haroh geupeugah najih, sabab ureueng nyan ka keunong peunyaket kulet nyan mubahya. teuma meunyo luhok nyan puleh dan ka jeuet keu puteh lom, ureueng nyan haroh jijak meuhadab ubak imeum keu teupareksa lom. meunyo luhok nyan meumang ka jeuet keu puteh, le imeum haroh geupeugah bahwa ureueng nyan gleh. meunyo sidroe ureueng na keunong ceumuet nyan ka puleh, teuma nibak beukaih nyan na jibeudoh keumong puteh atawa meucak-cak puteh hi jih lagee mirah-mirah, ureueng nyan haroh jijak meuhadab ubak imeum keu teupeureksa. meunyo meucak-cak nyan leumah jih leubeh lhok nibak kulet sikeulileng nyan dan bulee nyan na sikeulileng nyan pih ka jeuet keu puteh, le imeum haroh geupeugah bahwa ureueng nyan ka jeuet keu najih. ceumuet nyan sibagoe awai keu keunong peunyaket kulet nyan meubahya. teuma meunyo meunrot geupeureksa le imeum bulee nyan na bak bagian nyan hana jeuet keu puteh, dan bagian nyan hana leubeh nibak kulet sikeulileng nyan, teuma leubeh muda wareuna jih, ureueng nyan haroh teupeu aseng nyan treb jih tujoh uroe. meunyo meucak-cak puteh nyan na jimeu-eue, le imeum haroh geupeugah bahwa ureueng nyan najih sabab ureueng nyan ka keunong peunyaket kulet nyan mubahya. teuma meunyo meucak-cak puteh nyan hana meubah dan hana teuma jimeu-eue, nyan na ktheueh beukaih ceumuet, jadi ureueng nyan na ktheueh gleh. meunyo na sidroe ureueng nyan luka sabab tutong ngon apui, laju kulet nibak teumpat luka nyan ka jeuet keu puteh atawa puteh meubayang-bayang mirah, le imeum haroh geupareksa. meunyo bulee nyan na silingka nyan ka jeuet keu puteh dan luka jih leubeh lhok nibak kulet silingka nyan, teuma peunyaket kulet nyan paleng mubahya dan jibeudoh nibak teumpat luka tutong nyan, dan le imeum haroh geupeugah bahwa ureueng nyan najih. teuma meunyo bulee nyan na bak teumpat nyan hana jeuet keu puteh dan bagian nyan hana leubeh lhok nibak kulet nyan na silingka nyan, teuma leubeh muda wareuna jih, teuma ureueng nyan haroh teupeu aseng nyan treb jih tujoh uroe. bak uroe nyan keutujoh imeum haroh geupareksa lom. meunyo meucak-cak puteh nyan ka jimeu-eue, teuma ureueng nyan ka keunong peunyaket kulet

nyang mubahya, dan haroh teupeugah najih. teuma meunyo meucak-cak puteh nyan hana meu-ubah dan hana teuma jimeu-eue, teuma leubeh puteh wareuna jih, nyan bukon peunyakot kulet nyang mubahya. imeum haroh geupeugah bahwa ureueng nyan gleh, sabab wareuna nyang puteh nyan beukaih tutong ngon apui. meunyo sidroe ureueng agam atawa ureueng inong ka keunong peunyakot kulet bak ulee jihnyan atawa bak keuang jih, ureueng nyan haroh geupeureksa le imeum. meunyo bagian nyang saket nyan leumah jih leubeh lhok nibak kulet nyan na silingka nyan, dan ok atawa janggot nyang na disinan ka lagee kuneng laju luroh, teuma ureueng nyan ka keunong peunyakot kulet nyan mubahya dan ureueng nyan haroh teupegah najih. meunyo meunurot geupeureksa le imeum bagian deuh jih hana leubeh lhok nibak kulet nyang na silingka nyan, teuma hana deuh ok atawa janggot nyang get nibak bagian nyan, teuma ureueng nyan haroh teupeu aseng nyang treb jih tujuh uroe. bak uroe nyang keutujuh, imeum haroh geupareksa lom bagian nyang saket nibak ureueng nyan, meunyo peunyakot nyan hana jimeu-eue dan hana meurumpok ok atawa janggot nyang rab-rab kuneng nibak bagian nyan, lom teuma deuh jih hana leubeh lhok nibak kulet di silingka nyan, ureueng nyan haroh teucuko ok atawa janggot disilingka tempat nyang saket. oh lueh nyan ureueng nyan haroh teupeu aseng lom nyang treb jih tujuh uroe. bak uroe nyang keu tujuh, le imeum haroh geupareksa lom. meunyo peunyakot ureueng nyan hana jimeu-eue dan bagian nyan leumah jih hana leubeh lhok nibak kulet nyang na silingka nyan, ureueng nyan ka jeuet teupeugah gleh dan peukayan ureueng nyan haroh teujak rhah. teuma meunyo ka lueh geupeugah peunyakot ureueng nyan ka gleh teuma ka jimeu-eue, le imeum haroh geupareksa lom. meunyo peunyakot nyan beutoi ka jimeu-eue, hana peureulee le geupareksa le imeum peu kueuh ok atawa janggot ureueng nyan ka kuneng, sabab ka nyata bahwa ureueng nyan ka najih. teuma meunyo meunurot kheun imeum peunyakot ureueng nyan hana jimeu-eue, dan ok atawa janggot get jitimoh nibak tempat nyan, teuma peunyakot nyan ka jeuet geupeugah puleh. dan imeum haroh geupeugah ureueng nyan ka gleh. meunyo sidroe-droe ureueng agam atawa ureueng inong na meucak-cak puteh nibak kulet jih, imeum haroh geupareksa ureueng nyan. meunyo meucak-cak puteh nyan deuh jih mubayang-bayang puteh, ureueng nyan teuma keunong peunyakot kurab, dan ureueng nyan jeuet teupeugah gleh. meunyo sidroe ureueng agam ulee siblah ulikot ka jeuet keu-ueh lagee teucuko, ueh nyan hana meusabab gobnyan ka jeuet keu najih. teuma meunyo jibeudoh keumong puteh mubayang-bayang mirah nibak tempat ulee nyang ueh nyan, ureueng nyan ka keunong peunyakot kulet nyang mubahya. imeum haroh geupareksa ureueng nyan, dan meunyo beutoi na keumong puteh mubayang-bayang mirah, le imeum haroh geupeugah bahwa ureueng nyan najih sabab ka keunong peunyakot kulet nyang lumpah mubahya bak ulee gobnyan. sidroe-droe ureueng nyang keunong peunyakot nyang mubahya, ureueng

nyan haroh jingui peukayan nyang beukah-beukah dan ok jih bak ulee jipeubiyeu mantong sansui ngon meugeureupe. gobnyan haroh jitob bagian miyueb muka jih sira ji klik-klik, "najih! najih!" simantong ureueng nyan keunong peunyakot nyan ureueng nyan teutab najih dan haroh tinggai diluwa khimah-khimah, jloh nibak ureueng nyang laen. meunyo meuteume lumpok nibak peukayan atawa ija wol atawa ija lineun, atawa nibak kulet atawa peue mantong nyang teupeugot nibak kulet, dan wareuna ija rapoh nyan mubayang-bayang ijo atawa mubayang-bayang mirah, teuma rapoh nyang lagee nyan jeuneh jimeu-eue laju atranyan haroh teupeuleumah ubak imeum. imeum haroh geupareksa barang nyan, laju geupeu aseng nyang treb jih tujuh uroe. bak uroe nyang keutujuh atranyan haroh geupareksa lom, dan meunyo rapoh nyan keubit ka jimeu-eue, teuma barang nyan na kueuh najih. imeum haroh geutot ija nyan, sabab rapoh nyan na nyan jeuneh nyang jimeu-eue, jadi haroh teupeu ranab lam apui hu. teuma meunyo meunurot nyang geupareksa le imeum nyan rapoh nyan hana jimeu-eue nibak barang nyan, gobnyan laju geuyue mangat barang nyan jirah dan jipeu aseng nyang treb jih tujuh uroe trek. oh lueh nyan le imeum haroh geupareksa lom. meunyo rapoh nyan hana jimeu-eue teuma hi jih teutab saban, barang nyan mantong najih dan haroh teutot lam apui hu, bahpi nyang rapoh nyan teuma na nibak bagian keue atawa nibak bagian likot. teuma meunyo nyang meunurot geupareksa le imeum rapoh nyan ka meukureueng hi jih, bak nyang keunong rapoh nibak ija atawa kulet nyan haroh teupriek. meunyo oh dudoe jiteubiet lom, dan rapoh nyan jimeu-eue, le ureueng po ija atawa kulet nyan haroh geutot lam apui barang nyan. meunyo oh ka lueh teu rhah hi nyang lumpok nibak ija nyan atawa kulet nyan ka gadoh, teuma atranyan haroh teu rhah lom, baro kueuh teuanggab gleh. meunan kueuh atoran-atoran keuhai nyang rapoh nyang meuteume nibak peukayan atawa ija nibak lineun atawa ija wol, atawa nibak peue mantong nyang teupeugot nibak kulet. tuhan geubri ubak nabi musa peuratoran-peuratoran lagee nyoe keuhai upacara teupeugleh oh ka lueh puleh nibak peunyakot kulet nyang mubahya. bak uroe ureueng nyang teupeugah gleh, ureueng nyan haroh teuba ubak imeum, le imeum laju geuba ureueng nyan uluwa khimah-khimah. meunyo meunurot teupareksa ureueng nyan ka puleh, le imeum laju geuyue ba ubak ureueng nyan dua boh cicem udeb nyang hana hareuem, sikrek kayee bak aron, sikrek talo mirah dan saboh tangke on hisop. cicem nyang saboh haroh teusie ateuhe beulangong tanoh nyang meuasoe le gleh nyang teucok nibak mata ie. cicem nyang saboh treuk nibak kayee bak aron, talo mirah ngon saboh tangke on hisop haroh teuculok lam darah cicem nyang ka teusie nyan. le imeum laju geureutek tujuh goe darah cicem nyan ubak ureueng nyang ka puleh nyan, dan laju geupeugah bahwa ureueng nyan ka gleh. dan cicem nyang mantong udeb geujak peuleuoh laju u blang. oh lueh nyan le ureueng nyan laju jajak rhah peukayan droe jih, jicuko mandum ok jih, dan jajak manoe. deungon

nyan gleh kheueh ureueng nyan, dan ka jeuet jitamong u dalam khimah-khimah, teuma tujoh uroe treuk ureueng nyan hana jeuet jitamong lam khimah jih keudroe. bak uroe nyan keutujoh ureueng nyan haroh jicuko mandum ok jih, meunan cit deungon janggot jih, calak mata ureueng nyan dan banmandum bulee nyan na nibak tuboh ureueng nyan. oh ltheueh nyan le ureueng nyan laju jijak rhah peukayan jih keudroe dan jimanoe. baro kheueh oh ltheueh nyan ureueng nyan ka gleh. bak uroe nyan keu lapan ureueng nyan haroh jiba dua boh aneuek bubiri agam dan saboh aneuek bubiri inong nyan meum umu sithon, nyan maseng-maseng hana meucupa. seulaen nibak nyan jiba teuma lhee kilo gram teupong nyan ka teujampu ngon minyeuk zaiton dan siper lhee aree minyeuk zaiton. le imeum laju jiba ureueng nyan meusigoe ngon peuseumahan jih nyan ubak babah pintoe khimah tuhan. imeum haroh geucok saboh aneuek bubiri agam dan siper lhee aree minyeuk zaiton keu keureubeuen geunantoe rugoe, dan laju geupeuseumah sibagoe keureubeuen teubri ubak tuhan. aneuek bubiri nyan haroh teusie bak teumpat nyan khusus na kheueh bak teumpat sie keureubeuen peum amphon desya dan keureubeuen teutot. bubiri nyan haroh teusie disinan sabab keureubeuen gantoe rugoe ngon keureubeuen peum amphon desya na kheueh lumpah that suci dan jeuet keu jeumba imeum. imeum haroh geucok bacut darah aneuek bubiri nyan laju geusilieuk ubak punyueng blah uneuen, bak nang jaroe uneuen dan bak nang gaki uneuen ureueng nyan teuma geupeugah ka gleh. oh ltheueh nyan le imeum geucok laju bacut minyeuk zaiton laju geuro lam paleuet jaroe geuh nyan blah wie. oh ka ltheueh gobnyan geuculok aneuek jaroe geuh nyan blah uneuen lam minyeuk, dan geu ceupet tujoh goe lam khimah tuhan. dan minyeuk nyan mantong na tinggai bacut bak jaroe gobnyan nyan laju geusilieuk ubak teumpat-teumpat nyan ka teusilieuk darah, na kheueh ubak on punyueng blah uneuen, bak nang jaroe blah uneuen, dan nang gaki blah uneuen ureueng nyan teuma geupeugah ka gleh. minyeuk nyan leubeh nyan haroh geuro ateueh ulee ureueng nyan. deungon lagee nyan imeum ka geupeuna upacara peusuci keu ureueng nyan dikeue tuhan. oh ltheueh nyan le imeum haroh geupeuseumah keureubeuen peum amphon desya mangat ureueng nyan najih nyan ka jeuet keu gleh. oh ltheueh nyan gobnyan haroh geusie beulatang keu keureubeuen nyan teutot dan geupeuseumah meusajan ngon keureubeuen teuhidang ateueh miseubah. deungon lagee nyan imeum ka geupeuna upacara teupeusuci keu ureueng nyan, dan ureueng nyan pih ka jeuet keu gleh. meunye ureueng nyan gasien dan hana mampu, teuma keu keureubeuen geunantoe rugoe jihnyan jeuet jiba saboh aneuek bubiri agam sibagoe keureubeuen nyan teujok ubak tuhan. seulaen nibak nyan sikilo gram teupong nyan teujampu ngon minyeuk zaiton sibagoe keureubeuen teuhidang, dan siper lhee minyeuk zaiton. meunan cit di ureueng nyan haroh teuma jiba dua boh cicem mirah pati nyan mantong muda atawa cicem leuk muda: saboh keu keureubeuen peum amphon desya dan

saboh treuk keu keureubeuen teutot. banmandum peuseumahan nyan haroh teuba ubak imeum dikeue babah pintoe khimah tuhan bak uroe nyan keu lapan upacara teupeu gleh droe gobnyan. le imeum laju geucok aneuek bubiri ngon minyeuk zaiton dan laju geupeuseumah sibagoe keureubeuen nyan teujok ubak tuhan, dan nyan keu jeumba imeum. laju le imeum haroh geusie aneuek bubiri nyan dan geusilieuk laju darah jih bacut ubak punyueng blah uneuen, nang jaroe blah uneuen dan nang jaroe gaki uneuen ureueng nyan ka geupeugah gleh. le imeum haroh geuro bacut minyeuk ubak tapak jaroe gobnyan blah wie dan deungon jaroe uneuen gobnyan laju gepicet minyeuk nyan tujoh goe u dalam khimah tuhan. dan minyeuk nyan na tinggai bacut treuk lam jaroe gobnyan haroh geusilieuk ubak teumpat-teumpat nyan ka teusilieuk darah, na kheueh ubak on punyueng nyan blah uneuen, nang jaroe uneuen dan nang gaki blah uneuen ureueng nyan teuma geupeugah gleh. minyeuk nyan leubeh nyan haroh geuro ateueh ulee ureueng nyan sibagoe upacara teupeu gleh droe gobnyan dikeue tuhan. oh ltheueh nyan le imeum haroh geupeuseumah saboh cicem mirah pati muda atawa cicem leuk muda keu keureubeuen peum amphon desya, dan saboh treuk keu keureubeuen nyan teutot meusigoe ngon keureubeuen teuhidang. deungon lagee nyan imeum geupeuna upacara teupeu gleh ateueh ureueng nyan dikeue tuhan. nyan kheueh peuratoran keuhai upacara teupeusuci oh ka ltheueh keunong peunyaket kulet nyan mubahya keu ureueng nyan hana meudaya. tuhan geubri ubak nabi musa ngon nabi harun peuratoran-peuratoran keuhai rumah nyan ka keunong peunyaket rapoh dan ka jimeu-eue. peuratoran-peuratoran nyoe teupeubuet oh ka ltheueh bansa israel jitamong u kanaan, nangroe nyan geubri le tuhan keu awaknyan. soemantong nyan meuteume rumah droe ka keunong rapoh, haroh jijak peugah hainyan ubak imeum. sigohlom imeum teuka geujak pareksa nyan keunong rapoh nyan, gobnyan haroh geupeurintah mangat peue-peue nyan na lam rumah nyan teupeuteubiet uluwa. meunye han, peue mantong nyan na lam rumah nyan ka jeuet keu najih, dan laju imeum teuka keu geupareksa nyan rapoh nyan. meunye na deuh meucak-cak rab lagee ijo-ijo atawa mubayang-bayang mirah nyan leumah jih lagee ka jitamong u dalam beuton nyan, imeum haroh geutinggai laju rumah nyan dan geupeubiyeu mantong rumah nyan teugunci nyan treb jih tujoh uroe. bak uroe nyan keutujoh imeum nyan haroh geuteuka dan geupareksa lom teuma. meunye nyan rapoh nyan ka jimeu-eue, gobnyan haroh geupeurintah mangat batee-batee beuton nyan ka keunong rapoh nyan teureuloh dan mandum beuton siblah udalam teu kreh. nyan teukreh nyan lagee peulaster ngon batee-batee nyan haroh teujak boih ubak saboh teumpat nyan najih nyan na diluwa banda. dan batee-batee nyan ka geupeuteubiet nyan haroh teugantoe deungon batee-batee nyan baro. banmandum beuton rumah nyan haroh teulapeh ngon peulaster baro. meunye rapoh nyan jiteuka lom, padahai batee-batee rumah nyan ka teugantoe

dan beuton-beuton rumoh nyan ka teu kreh dan teupeulaster lom, le imeum haroh geujak ngieng dan geupareksa rumoh nyan lom. meunyoe rapoh nyan keubiet ka ji-eue meuluwah teuma rumoh nyan ka jeuet keu najih dan haroh teureuloh. batee-batee, kayee-kayee dan banmandum peulaster jih haroh teuba u tempat nyang najih nyang na di luwa banda. sigohlom nyan soe mantong nyang tamong lam rumoh nyan ka jeuet keu najih sampoe mata uroe jilob. soe mantong nyang eh atawa jimakheun nibak rumoh nyan haroh ji rrah peukayan droe jih. teuma meunyoe imeum nyang teuka dan meunurot nyang geupareksa le gobnyan hana jiteuka le nyang rapoh oh ka ltheueh rumoh nyan teupeulaster lom, gobnyan haroh geupeugah bahwa rumoh nyan ka gleh, sabab nyang rapoh nyan ka gadoh banmandum. keu teupeu suci rumoh, imeum haroh geucok dua boh cicem, kayee bak sala, talo mirah dan saboh tangke hisop. cicem nyang saboh haroh teusie atueh beulangong nyang meuasoe ie get nibak mata ie. laju oh ltheueh nyan, kayee bak sala, talo mirah, hisop dan cicem nyang mantong udeb haroh teuculok lam darah cicem nyang ka ltheueh teusie dan u dalam ie nyang get. oh ltheueh nyan, rumoh nyan haroh geureutek tujuh goe. cicem nyang mantong udeb haroh geupeuleueh lam padang uluwa banda. deungon lagee nyan imeum ka geupeubuet upacara teupeusuci rumoh, dan rumoh nyan ka jeuet keu gleh. nyan ktheueh peuratoran-peuratoran keuhai peunyaket kulet nyang paleng mubahya, keuhai bucoh-bucoh, luhok atawa meucak-cak puteh atawa kumong nibak tuboh, dan keuhai rapoh nibak peukayan atawa rumoh. peuratoran-peuratoran nyan guna jih keu teupeu teuntée peu ktheueh sapeue-peue nyan gleh atawa najih. tuhan geubri ubak nabi musa dan nabi harun peuratoran-peuratoran nyang lagee nyoe keu bansa israel. meunyoe sidroe ureueng agam jiteubiet meulileh akibat keunong peunyaket nibak boh kreh, nyang jiteubiet meulileh nyan najih, bah ktheueh nyang teubiet meunan cit nyang meuteun. tempat duek atawa tempat eh ureueng nyan najih. soe mantong nyang cukeh ureueng nyang jiteubiet meulileh atawa tempat eh ureueng nyan, atawa jiduek nibak tempat beukaih ureueng nyan duek, atawa tempat jiludah le ureueng nyan, ureueng nyang keunong nyan haroh ji rrah peukayan dan jimanoe, dan ureueng nyan najih sampoe an mata uroe jilob. peulana atawa peue mantong nyang jiduek le ureueng nyang peuteubiet meulileh nyan ka jeuet keu najih. soe mantong nyang cukeh sapeue-sapeue nyang beukaih jiduek le ureueng nyan, nyan ka jeuet keu najih sampoe mata uroe jilob. soe mantong ureueng nyang beuot barang nyan haroh ji rrah peukayan ureueng nyan dan jimanoe, dan ureueng nyan najih sampoe mata uroe jilob. meunyoe ureueng nyang jiteubiet meulileh nyan gohlom ji rrah jaroe laju jicukeh ureueng laen, teuma ureueng nyang jicukeh nyan haroh ji rrah peukayan droe jih dan jimanoe, dan ureueng nyan najih sampoe mata uroe jilob. beulangong tanoh nyang jicukeh le ureueng nyan haroh jipeubeukah dan peukakaih nyang jimat nyan haroh teu rrah. meunyoe ureueng nyan ka puleh, ureueng nyan haroh jipreh tujuh

uroe treuk. oh ltheueh nyan gobnyan haroh ji rrah peukayan jih keudroe dan jijak manoe ubak mata ie, teuma gleh ktheueh ureueng nyan. bak uroe nyang keu lapan ureueng nyan haroh jiba dua boh cicem mirah pati nyang muda atawa cicem leuek muda ubak babah pintoe khimah tuhan laju jijok ubak imeum. imeum haroh geupeuseumah cicem nyang saboh sibagoe keureubeuen peu amphon desya, dan saboh treuk keu keureubeuen nyang teutot. deungon lagee nyan imeum ka geupeuna upacara peusuci ureueng nyan dikeue tuhan. meunyoe sidroe ureueng agam jipeuteubiet ie manikam, ureueng nyan haroh jimanoe teuma teutab najih sampoe an mata uroe jilob. barang peue mantong bah ktheueh nyan nyang nibak ija atawa kulet nyang keunong manikam nyan haroh teu rrah; barang nyan najih sampoe an mata uroe jilob. oh ka ltheueh meusituboh, bah ktheueh ureueng agam meunan cit ureueng inong haroh manoe, teuma awaknyan teutab najih sampoe an mata uroe jilob. ureueng inong nyang teungoh jiteuka he, ureueng inong nyan najih nyang treb jih tujuh uroe. soe mantong nyang cukeh ureueng nyan ka jeuet keu najih sampoe mata uroe jilob. peue mantong nyang jigiduek atawa ji eh le ureueng inong nyang mantong lam he nyan atranyan ka jeuet keu najih. soe mantong nyang cukeh tempat beukaih ji eh atawa jigiduek le ureueng inong nyang teungoh jiteuka he, ureueng nyan haroh ji rrah peukayan gobnyan dan jimanoe, dan ureueng nyan najih sampoe an mata uroe jilob. meunyoe sidroe ureueng agam jimeusituboh ngon ureueng inong nyang teungoh teuka he, ureueng agam nyan pih ka jeuet keu najih nyang treb jih tujuh uroe, dan tieb-tieb tempat eh nyang ji eh le ureueng nyan pih ka jeuet keu najih. meunyoe ureueng inong jiteubiet darah na meupadub uroe treb jih diluwa masa teuka he jih, atawa darah jih nyan jiteubiet hana jipioh sampoe ka habeh watee teuka he gobnyan, ureueng nyan najih seumantong meudarah nyan saban lagee gobnyan masa lam he. tempat eh atawa tempat duek gobnyan seumantong ureueng nyan jiteubiet darah na ktheueh najih. soe mantong nyang cukeh tempat nyan, jihnyan jeuet keu najih. gobnyan haroh ji rrah peukayan jih dan jimanoe, dan gobnyan najih sampoe an mata uroe jilob. oh ka ltheueh darah nyan jipioh, ureueng inong nyan haroh jipreh nyang treb jih tujuh uroe trek. baro ktheueh oh ltheueh nyan gobnyan ka gleh. bak uroe nyang keu lapan ureueng nyan haroh jiba dua boh cicem mirah pati muda atawa cicem leuek muda ubak imeum nibak babah pintoe khimah tuhan. cicem nyang saboh haroh jipeuseumah sibagoe keureubeuen peu amphon desya, dan nyang saboh trek sibagoe keureubeuen teutot. deungon cara nyan imeum ka geupeuna upacara peusuci ureueng inong dikeue tuhan. tuhan meufeuereuman ubak nabi musa mangat geujak peuingat ubak bansa israel mangat geupeurati pajan awaknyan jiteuka najih dan pajan teuma hana jiteuka, mangat awaknyan hana jipeunajih khimah tuhan nyang na lamkawan khimah-khimah awaknyan. meunyoe awaknyan jipeunajih khimah nyan, awaknyan teuma mate. meunan ktheueh peuratoran-peuratoran keuhai ureueng agam nyang

jipeuteubiet meulileh sabab saket eumpang krehh atawa jipeuteubiet manikam, keuhai ureueng inong nyang teungoh he, dan keuhai ureueng agam nyang meujimak ngon ureueng inong nyang teungoh teuka he. oh ka ltheueh meuninggai bandua droe aneuek nabi harun watee awaknyan jipeuseumah apui nyang hana geu rela le tuhan, tuhan meufeureuman ubak nabi musa, kheun tuhan, "tajak peusampoe ktheueh ubak syedara gata nabi harun, bahwa bak uroe nyang ka teupeuteuntee mantong jihnyan jeuet jitamong lam ruweueng nyang mahasuci nyang teupeuleung ngon tiree rawa, sabab disinan ktheueh ulon peuleumah droe lon lam awan di ateuh tutob peuto peujanji. meunyo nabi harun ji iengkeue ubak peurintah nyan, laju jihnyan teuma mate. teuma ngon cara jipeuseumah leumo agam nyang mantong muda keu keureubeuen peu amphon desya dan saboh bubiri agam keu keureubeuen nyang teutot, nabi harun jeuet jitamong lam ruweueng mahasuci." ltheueh nyan teuma nabi harun jipeurati ubak peuratoran-peuratoran nyoe. sigohlom jitamong lam ruweueng mahasuci leubeh dilee haroh jimanoe dan jingui peukayan imeum, na ktheueh bajee, sileuweue paneuk, talo keuieng dan seureuban, banmandum nyang teupeuget nibak lineun. le umat israel haroh jiseurah ubak nabi harun dua boh kameng agam keu keureubeuen peu amphon desya dan saboh bubiri agam keu keureubeuen nyang teutot. nabi harun haroh jipeuseumah saboh leumo agam keu keureubeuen peu amphon desya keu droe jihnyan dan keuluwarga jih. ban dua boh leumo agam nibak israel nyan haroh jiba ubak babah pintoe khimah tuhan. disinan jihnyan haroh ji rhom undi deungan cara jipeuguna dua neuk aneuek batee, nyang sineuk jiboh tanda "keu tuhan", dan nyang laen "keu azazel". kameng nyang teupileh keu tuhan haroh teupeuguna keu keureubeuen peu amphon desya. kameng nyang teupileh keu azazel haroh teuba udeb-udeb dikeue tuhan dan laju teuparoh u padang pasi keu azazel, deungan na lagee nyan mangat desya-desya bansa israel geu sampoh bube nyang na. oh ka ltheueh nabi harun geupeuseumah dan geusie leumo agam keu keureubeuen peu amphon desya keu droe gobnyan keudroe dan keu keuluwarga, gobnyan haroh geucok teupat apui nibak miseubah dan geupase laju peunoh deungan ngeue apui dan dua boh reugam dupa nyang haloh, atranyan laju geuba ubak ruweueng mahasuci. dupa nyan haroh teutot dikeue peuto peujanjian, sampoe asab meukeubok akhe jih teutob peuto nyan dan nabi harun hana deuh geukalon gobnyan, sabab meunyo gobnyan geukalon, gobnyan teuma mate. laju nabi harun geucok bacut darah leumo, ngon jaroe gobnyan geureutek darahnyan ubak bagian muka tutob peuto peujanjian dan tujuh goe ukeue peuto. oh ka ltheueh nyan nabi harun haroh geusie kameng keu keureubeuen peu amphon desya umat israel. darah kameng nyan haroh jiba ubak ruweueng mahasuci, laju geupicet ubak bagian keue situtob peuto peujanjian dan ukeue peuto, lagee nyang ka geupeubuet ngon darah leumo agam. deungan cara nyan gobnyan ka geupeu gleh ruweueng mahasuci nibak najih bansa israel dan nibak banmandum desya

awaknyan. khimah tuhan haroh teupeusuci sabab na jih di teungoh-teungoh khimah-khimah bansa israel dan keunong najih awaknyan. phon nibak saat nabi harun geutamong lam ruweueng mahasuci keu geupeubuet upacara teupeusuci sampoe an gobnyan geuteubiet, meusidroe pi hana jeuet na lam khimah nyan. oh ka ltheueh seuleusoe geupeubuet upacara keu gobnyan keudroe, keu keuluwarga gobnyan dan keu banmandum bansa israel, nabi harun haroh geuteubiet dan geujak laju ubak miseubah nyan. gobnyan haroh geucok bacut sapeue darah leumo ngon darah kameng, dan geusilik laju darah-darah nyan ubak lungkee-lungkee nibak sagoe-sagoe miseubah. ngon jaroe gobnyan le geuhnyan haroh geureutek bacut darah nyan tujuh goe u ateuh miseubah. deungan caranyan gobnyan ka geupeusuci miseubah nibak najih bansa israel, mangat jeuet keu suci. oh ka seuleusoe geupeuna upacara teupeusuci ruweueng mahasuci dan bagian-bagian nyang laen nibak khimah tuhan meunan cit ngon miseubah gobnyan, nabi harun haroh geupeuseumah ubak tuhan kameng nyang udeb nyang geupileh keu azazel. gobnyan haroh geupeudeuk bandua jaroe gobnyan ateuh ulee kameng nyan sira geu aku banmandum nyang salah, desya dan nyang ji iengkeue le bansa israel. ngon lagee nyan, banmandum salah bansa israel geupinang laju ateuh ulee kameng nyan. dan ureueng nyang ka geubri tugaih keu nyan laju jiparoh kameng nyan u padang pasi. le kameng nyan jiba banmandum desya bansa israel u daerah tandus nyang hana ureueng tinggai dan kameng nyan haroh jipeuleuh nibak padang pasi. oh ka ltheueh nyan nabi harun geutamong lam khimah, geusut peukayan imeum nyang geungui bak tuboh gobnyan watee geutamong lam ruweueng mahasuci, dan geutinggai laju peukayan nyan disinan. dan gobnyan haroh geujak manoe ubak saboh teupat nyang ka teupeu khusus laju geungui peukayan geuh keudroe. oh ka ltheueh nyan gobnyan haroh geuteubiet dan geupeuseumah keureubeuen nyang teutot keu teupeu amphon desya geuh keudroe dan desya bansa israel. gapah beulatang keu keureubeuen peu amphon desya nyan haroh teutot ateuh miseubah nyan. ureueng nyang peuleuh kameng keu azazel nibak padang pasi haroh ji rrah peukayan droe jih ngon jimanoe sigohlom ureueng nyan jiwoe ubak khimah-khimah. leumo agam dan kameng keu keureubeuen peu amphon desya, nyang darah jih teupeutamong lam ruweueng mahasuci keu peu amphon desya, haroh teuba uluwa khimah-khimah dan laju jitot. kulet, asoe ngon asoe pruet bandua beulatang nyan haroh teutot banmandum. ureueng nyang tot atranyan haroh ji rrah peukayan droe jih dan jimanoe sigohlom jiwoe ubak khimah-khimah. banmandum peuratoran nyoe haroh jitaat keu siumu masa. bak tanggai siploh buleuen tujuh, ureueng israel dan ureueng aseng nyang na tinggai teutab di teungoh-teungoh awaknyan haroh jipusa dan hana jeuet jimubuet, sabab uroe nyoe uroe nyang lumpah suci. bak uroe nyan haroh jipeuna upacara keu teupeusuci bansa israel nibak banmandum desya awaknyan mangat awaknyan gleh. imeum agong, nyang ka ltheueh teubaiat dan teupeu khusus keu

po teu allah keu geunantoe ayah gobnyan, haroh geupeubuet upacara peusuci nyan. gobnyan haroh geungui peukayan khusus, gobnyan geupeubuet upacara peusuci ruweueng mahasuci, bagian-bagian laen nibak khimah tuhan, miseubah, imeum-imeum dan banmandum bansa israel. upacara nyan haroh geupeubuet sigoe dalam sithon keu teupeusuci bansa israel nibak sigala desya awaknyan. nyan kheueh peuratoran-peuratoran nyang haroh jitaat keu siumu masa. nabi musa geupeubuet laju lagee nyang ka geupeurintah le tuhan ubak gobnyan. tuhan meufeureuman ubak nabi musa mangat geujak jok peuratoran-peuratoran nyoe ubak nabi harun, aneuk-aneuk gobnyan dan banmandum bansa israel. meunyoed sidroe ureueng israel jipeuseumah leumo, bubiri atawa kameng keu tuhan, beulatang nyan haroh jisie nibak babah pintoe khimah tuhan. meunyoed atranyan jisie bak teumpat laen, jihnyan ka ji iengkeue ubak hukom sabab jipeuro darah. jihnyan hana teu anggab sibagoe anggota umat po teu allah. peurintah nyan meukeusut jih mangat bansa israel jiba ubak khimah tuhan banmandum beulatang keureubeuen nyang lazem jih awaknyan sie di ladang-ladang. awaknyan wajib jiba keureubeuen nyan ubak imeum dikeue babah pintoe khimah tuhan dan jisie atranyan nibak teumpat nyan sibagoe keureubeuen pseudame. imeum haroh geureutek darah nyan ubak sagoe-sagoe miseubah dikeue babah pintoe khimah tuhan laju geutot gapah mangat jeuet bee jih nyang mangat nyan lumpah that galak ate tuhan. bansa israel haroh teutab seutia ubak tuhan dan sagai-sagai hana jeuet jisie beulatang nibak blang-blang sibagoe keureubeuen ubak jen-jen jeuhet. peuratoran nyan haroh jitaat keu siumu masa. meunyoed sidroe ureueng israel atawa sidroe ureueng aseng nyang na tinggai teutab lamkawan bansa israel jipeuseumah keureubeuen nyang teutot atawa keureubeuen laen ubak tuhan, ureueng nyan haroh jipeuseumah dikeue babah pintoe khimah tuhan. meunyoed jihnyan jipeuseumah atranyan bak teumpat laen, ureueng nyan hana jeuet teu anggab anggota umat po teu allah. meunyoed sidroe-droe ureueng israel atawa ureueng aseng nyang na tinggai teutab lamkawan bansa israel jipajoh darah, teuma ureueng nyan geuhukom le tuhan dan hana geu anggab anggota umat gobnyan. nyawong tieb-tieb makhluk na lam darah nyan. sabab nyan tuhan geupeurintah mangat bandum darah jireutek ateuhe miseubah mangat desya-desya umat geusampoh bubena. darah na kheueh nyawong, teusampoh desya. nyan kheueh sabab jih ureueng israel atawa ureueng aseng nyang na tinggai teutab di lamkawan awaknyan teutam bek jipajoh darah. meunyoed na sidroe-droe ureueng israel atawa ureueng aseng nyang na tinggai di lamkawan bansa israel jidrob cicem atawa beulatang laen nyang hana hareuem, jihnyan haroh jipeuteubiet darah beulatang nyan dan laju jiseubeueh ngon tanoh. nyawong tieb-tieb makhluk na lam darah nyan, sababnyan tuhan geutam bansa israel jipajoh darah. soe mantong ureueng nyang jipeubuet buet nyang teutam nyan ureueng nyan hana le teu anggab anggota umat po teu allah. soe mantong ureueng israel atawa ureueng

aseng nyang pajoh sie beulatang nyang ka mate keudroe atawa mate sabab jiteugom le beulatang juwah, haroh jikak rlah peukayan jih oh ltheueh nyan jimanoe dan jipreh sampoe an mata uroe jilob, baro kheueh ureueng nyan teupeugah ka gleh. meunyoed jihnyan hana jipeubuet lagee nyan, jihnyan haroh jitanggung akibat jih. tuhan meufeureuman ubak nabi musa mangat geujak peusampoe ubak bansa israel peurintah nyang lagee nyoe, "ulon kheueh tuhan allah gata. bek kheueh gata seutot lagee nyang jipeubuet le ureueng nyang na di nanggro meuse, teumpat gata phon-phon that tinggai, atawa lagee ureueng nyang na di kanaan, nibak teumpat nyang jinoo ulon ba gata. taat kheueh ubak hukom-hukum ulon dan gata peubuet kheueh laju peue nyang ulon peurintah. ulon kheueh tuhan allah gata. taat kheueh ubak peuratoran-peuratoran dan hukom-hukum nyang ulon bri ubak gata. meunyoed gata tapeubuet lagee nyan, udeb gata seulamta. ulon kheueh tuhan." tuhan geubri peuratoran-peuratoran lagee nyoe. bek meusituboh ngon sidroe lamkawan syedara gata. bek meusituboh ngon ma gata, peurmoh ayah gata, sabab jihnyan hak bapak gata. bek gata hina ayah gata ngon cara gata meusituboh ngon peurmoh ayah gata nyang laen. bek meusituboh ngon syedara gata nyang inong atawa syedara ui gata, bah kheueh nyang rayeuek saboh rumah ngon gata meunan cit nyang rayeuek di rumah laen. bek meusituboh ngon cucoe gata; nyang lagee nyan teuma teupeu malee droe gata keudroe. bek meusituboh ngon syedara gata nyang inong nyang saboh yah laen ma atawa nyang saboh ma laen yah, sabab jihnyan saboh darah cit deungon gata. bek meusituboh ngon ma cut gata, bah kheueh nyan syedara ayah gata meunan cit syedara ma gata. bek meusituboh ngon peurmoh apha gata, sabab jihnyan ma cut gata cit teuma. bek meusituboh ngon aneuk meulintee atawa ngon peurmoh aduen gata. bek meusituboh ngon aneuk atawa cucoe sidroe ureueng inong nyang ka ltheueh gata meusituboh ngon inong nyan. mungken awaknyan rakan krab gata, dan buet nyang lagee nyan hana jeuet na. bek gata meukawan ngon syedara peurmoh gata seumantong udeb peurmoh gata. bek meusituboh ngon ureueng inong nyang mantong lam he, sabab jih nyan mantong lam najih. bek meusituboh ngon peurmoh ureueng laen; buet nyang lageenyan ka rhoh gata jeuet keu najih. bek gata jok sidroe lamkawan aneuk gata keu jiseumuja ubak molokh, sabab buet nyang lagee nyan teuhina nan po teu allah, tuhan gata. ureueng agam hana jeuet jimeusituboh sabe ngon agam; po teu allah geubanci that bak buet lagee nyan. ureueng agam meunan cit di ureueng inong, sagai-sagai hana jeuet jimeusituboh ngon beulatang; buet nyang jeuhet nyan ka teupeu najih gata. bek gata peunajih droe gata deungon buet-buet nyang lagee nyan, sabab deungon cara lagee nyan bansa-bansa nyang tinggai di kanaan sigohlom gata ka jipeunajih droe jih keudroe. le sabab nyan awaknyan geu use le tuhan mangat gata jeuet ta tinggai di nanggro nyan. awaknyan ka jipeubuet banmandum buet nyang luwat that nyan, sampoe tanoh awaknyan ka jeuet keu najih. teuma tuhan geuhukom awaknyan

sampoe awaknyan han jeuet tinggai le nibak teumpat nyan. teuma digata bek sagai-sagai gata peubuet nyang lagee nyan. gata banmandum, ureueng israel dan ureueng aseng nyang tinggai lamkawan gata, haroh gata taat peuratoran dan peurintah tuhan, mangat gata bek geuhukom le gobnyan dan teu-use nibak tanoh nyan lagee ureueng-ureueng nyang hana jituri tuhan, nyang tinggai disinan sigohlom gata. gata tateupeue bahwa soe mantong nyang peubuet buet nyang kuto ngon luwat nyan ureueng nyan hana le teu anggab anggota umat po teu allah. laju tuhan meufeuroman, "taat kheueh ubak peuratoran-peuratoran nyang ka ulon bri dan bek gata seutot buet-buet ureueng nyang tinggai di tanoh kanaan sigohlom gata. bek gata peunajih droe gata keudroe ngon cara teupeubuet buet-buet nyang lagenyan bagee. ulon kheueh tuhan allah gata." tuhan meufeuroman ubak nabi musa mangat geujak peusampoe ubak bansa israel peurintah nyang lagee nyoe, "beusuci kheueh gata, sabab ulon tuhan po teu allah gata na kheueh suci. tieb-tieb ureueng haroh jihoreumat ubak ayah ngon ma jih dan jipeuraya uroe raya sabat lagee nyang ulon peurintah. ulon kheueh tuhan allah gata. bek gata seumah beurala. bek gata peugat patong nibak logam dan gata seumah. ulon kheueh tuhan allah gata. meunyo gata tapeuseumah beulatang keu keureubeuen peudame, seutot kheueh peuratoran-peuratoran nyang ulon bri, mangat keureubeuen nyan ulon teurimong. asoe sie jih haroh teupajoh bak uroe beulatang nyan teusie atawa oh singoh nyan teuma. asoe sie nyang mantong na tinggai bak uroe nyang keu lhee atranyan haroh teutot sampoe habeh, sabab sie nyan ka hareuem. meunyo sie nyan jipajoh cit teuma, keureubeuen nyan hana lon teurimong. soe mantong nyang pajoh sie nyan ureueng nyan ka salah sabab hana jihareuga peue nyang ulon peu khusus keu ulon. ureueng nyan hana le ulon anggab anggota umat ulon. meunyo gata tamupot, bek kheueh gata pot boh gandom nyang timoh bak bineh-bineh blang gata, dan bek gata riwang tajakkok boh gandom nyang na tinggai oh ltheuh gata pot. bek gata riwang ubak lampoh anggo keu gata jak peusapat boh anggo nyang mantong tinggai oh ka ltheuh gata pot nyang paleng pon. meunan cit ngon boh-boh jih nyang ka rhot bek gata cok. bah kheueh nyan keu ureueng gasien dan ureueng aseng. ulon kheueh tuhan allah gata. bek cumucue, seumeunget atawa meusulet. bek meujanji deumi nan ulon meunyo gata meukeusut keu tapeutrok janji nyan, sabab deungon lagee nyan gata ka tahina nan ulon. ulon kheueh tuhan allah gata. bek gata lakee paksa seusamoe gata atawa gata reupah barang jih. eungkoh sidroe-droe ureueng nyang jimubuet nibak gata bek gata teun-teun, bahpi nyan simalam mantong. bek gata seurapa ureueng tulo dan bek gata tiek batee dikeue ureueng bula. horeumat dan teumakot kheueh gata ubak ulon, sabab ulon nyoe na kheueh tuhan allah gata. gata haroh juJoe meunyo gata peusidang gob; bek gata dong blah ureueng gasien dan bek gata takot keu ureueng kaya. bek gata tabu fiteunah bak ureueng-ureueng nyang sibansa ngon gata, deungon na lagee nyan gata hana

teupeusabab manusia mate. ulon kheueh tuhan. bek na gata dam ateuh soe mantong. peubeereeh kheueh sileuseh gata deungon soe mantong, mangat gata hana meudesya ngon sabab ureueng laen. bek gata balaih dam dan bek gata banci ubak ureueng laen, teuma cinta kheueh seusamoe gata lagee gata cinta ubak droe gata keudroe. ulon kheueh tuhan. taat kheueh peue-peue nyang ulon peurintah. bek gata peukawen beulatang nyang laen jeuneh jih. bek gata pula dua macam bijeh bak saboh keubeueng tanoh. bek gata ngui peukayan nyang teucob ngon dua boh rupa. meunyo na sidroe-droe ureueng agam jimeujanji jipeubloe namiet jih nyang inong ubak ureueng agam laen keu jipeujeuet keu gundek jih, dan ureueng nyang tem bloe namiet nyan gohlom jibayeue, laju le ureueng po nyang phon jimeusi-tuboh ngon namiet nyan, awaknyan bandua haroh teuhukom, teuma hana jeuet teuhukom mate, sabab ureueng inong nyan mantong namiet jih. ureueng agam nyan haroh jiba saboh bubiri agam ubak babah pintoe khimah ulon keu keureubeuen geunantoe rugoe. le imeum haroh geukeureubeuen bubiri nyan nibak upacara teupeusuci, mangat desya ureueng nyan teupeu amphon. teuma ulon, allah teuma lon peu amphon jihnyan. meunyo gata ka tatamong u nanggroe kanaan dan gata pula na meupadub macam bak kayee nyang meuboh disinan, teuma lhee thon nyang keuphon boh kayee nyan haroh gata anggab hareuem dan hana jeuet gata pajoh. bak thon nyang keu peuet banmandum boh jih haroh teupeuseumah keu teupeugah teurimong gaseh ubak ulon, tuhan. bak thon nyang keu limong baro kheueh jeuet gata pajoh boh jih. meunyo banmandum gata peubuet peuratoran nyan, seunaman bak kayee gata teuma jimeuboh leubeh jai nibak nyan. ulon kheueh tuhan allah gata. bek pajoh darah. bek peuguna ieleume gaeb. bek gata gunteng ok bak bineh ulea gata atawa gata cuko janggot gata. bek gata tob-tob kulet gata keu gata peugat tanda-tanda atawa gata peuluka badan gata sibagee tanda meukabong ateuh ureueng mate. ulon kheueh tuhan. bek gata peuhina deurajat aneuek gata nyang inong deungon cara gata peujeuet aneuek nyan keu inong jeuhet bak kuil. deungon gata peubuet lagee nyan gata ka tapeukuto nanggroe droe gata, dan ureueng-ureueng nyang peubuet mukah ban galak droe meuraja lela. peuraya kheueh uroe sabat dan horeumat kheueh teumapat nyang ka teupeukhusus keu teuseumah lon. ulon kheueh tuhan. bek gata lakee naseuhat ubak dunyan nyang jimeuhubongan ngon areuwah-areuwah ureueng mate. meunyo nyan gata peubuet gata ka jeuet keu najih. ulon kheueh tuhan allah gata. seugan kheueh dan horeumat kheueh ubak ureueng tuha. horeumat dan teumakot kheueh gata ubak ulon, sabab ulon kheueh tuhan. bek gata peubuet nyang kon-kon ateuh ureueng aseng nyang na tinggai di nanggroe gata. peutimang kheueh awaknyan lagee gata peutimang ureueng-ureueng nyang saboh bansa ngon gata dan gata sayang kheueh keu awaknyan lagee gata sayang ubak droe gata keudroe. ingat kheueh bahwa gatapi ka ltheuh udeb lagee ureueng aseng di nanggroe meuse. ulon kheueh tuhan allah gata. bek gata tipe ureueng laen ngon cara gata

peuguna sinipat, sinimang atawa sinukat peuleusu. peuguna kheueh teuh, sinimang dan sinukat nyang beutoi. ulon kheueh tuhan allah gata, dan ulon ka lon ba gata peuteubiet nibak nanggroë meuse. taat kheueh ubak mandum hukom dan peurintah lon. ulon kheueh tuhan." tuhan meufeuroman ubak nabi musa mangat geujak peusampoe hainyoe ubak bansa israel, "soe mantong ureueng lamkawan gata atawa ureueng aseng nyang na tinggai lamkawan gata nyang jikeureubeuen aneuek jih ubak molokh, ureueng nyang peubuet nyan haroh teuhrom ngon batee sampoe mate le banmandum masyarakat. ureueng nyang keureubeuen aneuek jih ubak molokh, ka jipeunajih khimah lon dan jipeuhina nan ulon nyang suci. ureueng nyan teuma lon hukom dan hana le lon anggab sibagoe anggota umat lon. meunyoe masyarakat jikalon ban atueh buet nyang jipeubuet le ureueng nyan hana jipeu rhot hukuman mate atueh ureueng nyan, teuma ulon keudroe nyang hukom ureueng nyan, banmandum keuluwarga ureueng nyan, meunan cit banmandum ureueng nyang na meusajan ngon ureueng nyan jitinggai ulon dan jiseumah molokh. awaknyan hana le lon anggab anggota umat lon. ureueng nyang jak lakee naseuhat ubak dukun nyang dukun nyan jimeuhubongan ngon areuwah-areuwah ureueng mate teuma lon hukom dan ureueng nyan hana lon anggab le anggota umat lon. jaga kheueh droe gata mangat gata teutab suci, sabab ulon kheueh tuhan allah gata. taat kheueh bak hukom-hukom lon, sabab ulon kheueh tuhan nyang peukhusus gata keu ulon." tuhan geubri peuratoran-peuratoran nyoe, "ureueng nyang kutok ayah ngon ma jih ureueng nyan haroh teuhukom mate. ureueng nyan mate sabab salah jih keudroe. meunyoe na sidroe ureueng israel jimeumukah ngon peurumoh ureueng saboh bansa ngon jih, ureueng nyan ngon inong nyan haroh teuhukom mate. sidroe ureueng agam nyang jimeusituboh ngon peurumoh ayah jih nyang laen, ureueng nyan ka jipeukosa hak milek ayah jih. ureueng agam ngon ureueng inong nyan haroh teuhukom mate. awaknyan mate sabab salah jih keudroe. meunyoe na sidroe ureueng agam jimeusituboh ngon meulintee jih nyang inong, bandua droe ureueng nyan haroh teuhukom mate. awaknyan ka jimeumukah, dan mate sabab salah jih keudroe. meunyoe na sidroe ureueng agam jimeusituboh ngon ureueng agam nyang laen, awaknyan ka jipeubuet buet nyang luwat dan hina, dan bandua ureueng nyan haroh teuhukom mate. awaknyan mate sabab salah jih keudroe. meunyoe sidroe ureueng agam jimeukawen ngon sidroe ureueng inong dan ma ureueng inong nyan, ban lhee droe awaknyan haroh teutot lam apui sampoe an mate, sabab awaknyan ka jipeubuet buet nyang lumpah hina. dan buet nyang lagee nyan han jeuet na lamkawan gata. meunyoe sidroe ureueng agam jimeusituboh ngon beulatang, ureueng ngon beulatang nyan haroh teupoh mate. meunyoe sidroe ureueng inong jimeusituboh ngon beulatang, ureueng dan beulatang nyan haroh teupoh mate. jihnyan mate sabab buet jih keudroe. meunyoe sidroe ureueng agam jimeusituboh ngon syedara jih nyang inong atawa ngon syedara jih nyang

inong laen ma atawa saboh ma laen ayah, awaknyan hana le teu anggab anggota umat ulon. awaknyan ka jipeubuet buet nyang lumpah hina dan haroh jitanggong akibat jih. meunyoe sidroe ureueng agam jimeusituboh ngon sidroe ureueng inong nyang teungoh teuka he, awaknyan hana le teu anggab anggota umat ulon. meunyoe sidroe ureueng agam jimeusituboh ngon ma cut jih, bandua awaknyan haroh jitanggong akibat buet nyang jipeubuet nyan. meunyoe sidroe ureueng agam jimeusituboh ngon peurumoh apha jih, ureueng nyan ka jihina apha jih. agam ngon inong nyan haroh jitanggong hukoman jih. sampoe an mate awaknyan hana meuteume aneuek. meunyoe sidroe ureueng agam jireupah peurumoh syedara jih, jihnyan ka jihina syedara jih nyan dan ka jipeubuet buet nyang paleng hina. sampoe an mate awaknyan hana meuteume aneuek." tuhan meufeuroman, "taat kheueh ubak hukom dan peurintah lon, mangat gata hana teu use nibak nanggroë kanaan, bak ulon ba gata. bek gata seutot adat istiadat bansa nyang tinggai disinan. awaknyan jipeuluwat ulon ngon buet jih nyang jeuhet. nyang kheueh sabab jih awaknyan ulon use, mangat gata meuteume tatamong u nanggroë nyan. tanoh nyang kaya dan subo nyan ka ulon peujanji keu gata, dan ulon bri keu gata jeuet keu hak milek gata. ulon kheueh tuhan allah gata nyang peu aseng gata nibak bansa-bansa nyang laen. le sabab nyan gata haroh meuteume gata peubeda beulatang nyang hareuem ngon nyang hana hareuem. bek gata pajoh beulatang hareuem. beulatang nyan ulon peugah hareuem, jadi gata pajoh cit gata ka jeuet keu najih. gata ulon peu aseng nibak bansa-bansa laen mangat gata jeuet keu milek ulon. gata haroh suci sabab ulon kheueh tuhan, dan ulon suci. tieb-tieb ureueng agam atawa ureueng inong nyang jipeuna hubungan ngon areuwah-areuwah ureueng mate ureueng nyan haroh teu rhom ngon batee sampoe an mate. ureueng nyan mate sabab salah jih keudroe." tuhan meufeuroman ubak nabi musa mangat geujak peusampoe peurintah nyoe ubak imeum-imeum keuturonan nabi harun, "sidroe imeum hana jeuet jipeunajih droe jih keudroe sabab meusajan jijak bak upacara teupeukubu wareh kawom jih, laen hai meunyoe nyang mate nyan ma jih keudroe, ayah jih, aneuek jih, syedara jih nyang agam, atawa syedara jih nyang inong nyang gohlom meukawen, dan tinggai saboh rumah ngon jih. jih nyan hana jeuet jipeu najih droe deungon cara jiseutot upacara teupeukubu wareh kawom peurumoh jih. sidroe imeum hana jeuet jicuko siladum nibak ok jih bak ulee dan hana jeuet gunteng janggut jih atawa jipeuluka tuboh jih ngon barang tajam sibagoe tanda bahwa jihnyan teungoh meukabong. jihnyan milek ulon nyang khusus dan hana jeuet jipeukuto nan ulon. jihnyan jikeureubeuen peunajoh keu ulon, deungon nyan jihnyan haroh suci. sidroe imeum hana jeuet jimeukawen ngon beukaih inong jeuhet atawa sidroe inong nyang hana le peurawan atawa nyang ka meure, sabab imeum na kheueh milek ulon. bansa israel haroh jiwa imeum sibagoe ureueng nyang teupeu khusus keu ulon sabab jihnyan jipeuseumah keureubeuen peunajoh keu ulon. ulon kheueh tuhan;

ulon nyoe suci dan ulon haroh lon peusuci umat lon. meunyo aneuk imeum nyang inong ka jeuet keu inong jeuhet, aneuk nyan ka jihina ayah jih dan nyan haroh teutot lam apui sampoe mate. imeum agong ka ltheuh teubaiat deungon cara teupree minyeuk ateuhe ulee gobnyan dan deungon cara teupeungui peukayan imeum agong bak ureueng nyan. le sabab nyan gobnyan hana jeuet jipeubiyeu ok jih bak ulee sansui atawa jipriek peukayan jih sibagoe tanda meukabong. jihnyan ka jipeuseumah bak ulon beu jeuet keu milek ulon, teuma ngon na lagee nyan jih nyan hana jeuet jipeu najih droe. meunan cit jih nyan hana jeuet jipeunajih khimah ulon deungon cara jiteubiet nibak sinan keu jikak tamong lam rumah nyan na manyet, bahpi nyan manyet ayah jih atawa ma jih keudroe. jihnyan jeuet jimeukawen ngon sidroe inong nyang mantong peurawan nibak sukee jih keudroe. dan hana jeuet jimeukawen ngon sidroe inong balee atawa sidroe inong nyang ka meure, atawa beukaih inong jeuhet. meunyo je iengkeue peurintah nyan, teuma aneuk-aneuk jih nyang siharoh jih suci, teuma jeuet keu najih. ulon kheueh tuhan dan ulon ka lon peukhusos jihnyan jeuet keu imeum agong." tuhan meufeureuman ubak nabi musa mangat geujak peugah nyoe ubak nabi harun, "sidroe keuturonan gata nyang cidra tuboh jih hana jeuet jipeuseumah keureubeuen peunajoh keu ulon. hai nyang lagee nyan teutab na sabe siumu masa. ureueng nyang peuseumah keureubeuen hana cidra badan jih, na kheueh ureueng buta dan ureueng lapee, ureueng cacat muka jih atawa anggota tuboh jih, nyang lapee jaroe jih atawa nyang capiek gaki jih, nyang bungkok dan ureueng nyang paleng ubit nibak ureueng biasa, nyang keunong peunyaketa mata atawa nyang keunong peunyaketa kulet dan ureueng nyang teugasi. tieb-tieb keuturonan imeum harun nyang cidra badan jih hana jeuet jipeuseumah keureubeuen peunajoh keu ulon. teuma jih nyan jeuet jipajoh peunajoh nyang teupeuseumah nyan, bah kheueh nyan keureubeuen peunajoh nyang suci meunan cit keureubeuen peunajoh nyang lumpah suci. sabab ureueng nyan cidra badan jih, ureueng nyan hana jeuet jipeurab ubak tiree nyang teupisah ruweueng suci atawa miseubah. jihnyan hana jeuet jipeukuto barang-barang nyan ka teupeu khusus keu ulon, sabab ulon kheueh tuhan, dan ulon kheueh nyang peu khusus barang-barang nyan." nyan kheueh peuratoran-peuratoran nyang geupeusampoe le nabi musa ubak nabi harun dan aneuk-aneuk gobnyan, dan ubak banmandum bansa israel. tuhan meufeureuman ubak nabi musa beu geujak peusampoe peurintah nyoe ubak nabi harun dan aneuk-aneuk gobnyan, "peubuet kheueh beu jroh-jroh peue nyan jipeuseumah le aneuk khusus keu ulon, mangat gata hana tapeukuto nan ulon nyang suci. ulon kheueh tuhan. meunyo sidroe nibak keuturonan gata lam keuadaan najih jikak peurab ubak keureubeuen-keureubeuen suci nyang jipeukhusus le bansa israel keu ulon, jihnyan hana jeuet jilayani nibak miseubah. peuratoran nyan teutab na siumu masa. ulon kheueh tuhan. sidroe keuturonan nabi harun nyang keunong peunyaketa kulet nyang mubahya, atawa nyang keunong pe-

unyaketa nibak alat keulamin jih sampoe jiteubiet meulileh-lileh, teutam han jeuet jipajoh keureubeuen suci sigohlom jihnyan teupeugah ka gleh. sidroe imeum ka jeuet keu najih meunyo imeum nyan tupeh ngon barang nyang meunajih sabab keunong manyet. meunan cit di ureueng nyan najih meunyo ie manikam ureueng nyan jiteubiet, atawa tupeh ngon beulatang dan ureueng nyang najih. sidroe imeum nyang deungon cara peue mantong ka jeuet keu najih, teuma najih nyan sampoe mata uroe jilob. dan oh ka ltheuh mata uroe jilob jih nyan gohloom jeuet jipajoh peunajoh nyang teupeu seumah ubak tuhan meunyo jihnyan gohloom jimanoe. oh ka ltheuh mata uroe jilob ureueng nyan ka gleh dan ka jeuet jipajoh, sabab nyan kheueh peunajoh jih. ureueng nyan hana jeuet jipajoh sie beulatang nyang mate keudroe atawa beulatang nyang mate jiteugom le beulatang juwah. meunyo nyan lagee nyan jipajoh cit, ureueng nyan ka jeuet keu najih. ulon kheueh tuhan. banmandum imeum haroh jitaat ubak peuratoran nyang ulon bri. meunyo han, awaknyan salah dan teuma jih mate, sabab je iengkeue ubak peuratoran-peuratoran nyan suci nyan. ulon kheueh tuhan, dan ulon kheueh nyang peu khusus awaknyan keu ulon. keureubeuen nyang teupeu khusus keu ulon nyang jeuet pajoh na kheueh le keuluwarga imeum nyan keudroe; ureueng laen hana jeuet, bahpi ureueng nyan saboh rumah ngon imeum nyan atawa ureueng nyang tung upah ubak gobnyan. teuma namiet-namiet nyang jibloe le imeum nyan ngon peng jih keudroe atawa nyan lahe lam rumah jih nyan, jeuet je pajoh peunajoh jeumba imeum nyan. aneuk inong sidroe imeum nyang meukawen ngon kon imeum, hana jeuet jipajoh keureubeuen nyan. teuma aneuk inong imeum nyang ka jeuet keu inong balee atawa nyang jicre teuma hana me aneuk laju jiwoe u rumah ayah jih dan ka jeuet tanggung jawebe ureueng syiek jih nyan lom, jeuet jipajoh jeumba ureueng syiek jih nyan. teuma keuluwarga imeum mantong nyang jeuet pajoh keureubeuen nyan. meunyo sidroe nyang bukan anggota imeum nyang deungon hana jisaja ka jipajoh peunajoh nyang teupeuseumah ubak tuhan, ureueng nyan haroh jibri geunantoe ubak imeum jitamah lom dua ploheureusen. imeum-imeum hana jeuet jipeunajih keureubeuen nyang teupeu khusus keu ulon deungon jipeubiyeu jipajoh le ureueng nyang hana hak jih. hai nyan ka teupeu jeuet ureueng nyan salah dan teupeuteuka hukoman ateuhe ureueng nyan. ulon kheueh tuhan, dan ulon nyang peusuci peuseumahan nyan." tuhan meufeureuman ubak nabi musa geuyue jak peusampoe ubak nabi harun, aneuk-aneuk gobnyan dan banmandum bansa israel peuratoran-peuratoran nyang lagee nyoe. meunyo sidroe ureueng israel atawa ureueng aseng nyang tinggai teutab di israel jipeuseumah keureubeuen teutot keu jipeu ltheuh kaoui, atawa keu keureubeuen keugalak droe, beulatang nyan haroh nyan agam dan hana jeuet na meucupa mangat jeuet teuteurimong. bek peuseumah beulatang nyang na cupa, sabab nyang lagee nyan tuhan hana geuteurimong. meunyo sidroe ureueng jipeuseumah ubak tuhan keureubeuen peudame keu jibayeue kaoui jih atawa

keu keureubeuen keu galak droe, beulatang nyan han jeuet na meucupa, mangat jeuet geuteurimong. bek kheueh teupeuseumah ubak tuhan beulatang nyan buta, nyan patah tuleueng jih atawa nyan luka, nyan jitimoh barah ka meudano, nyan ka keunong peunyakot kulet atawa kude. beulatang nyan lagee nyan bek jipeuseumah keu keureubeuen peunajoh u ateuh miseubah. keu keureubeuen keu galak droe gata jeuet tapeuseumah beulatang nyan hana sampoeurena hi jih; teuma keu teupeu ltheueh kaoli, beulatang nyan lagee nyan hana jeuet teuteurimong. bek kheueh peuseumah keu tuhan beulatang nyan aneuek keumiro jih ka rusak sabab meuseupet, ka teukoh, luka leumbam-leumbam atawa teutiek. hai nyan lagee nyan hana jeuet na di nanggroe gata. beulatang peulara nyan meuteume nibak ureueng aseng hana jeuet teupeuseumah keu keureubeuen peunajoh. beulatang nyan teu anggab ka cupa dan hana jeuet teuteurimong. aneuek leumo, aneuek bubiri atawa aneuek kameng nyan ban lahe haroh tinggai nibak nang jih treb jih tujuh uroe. baro kheueh oh ltheueh nyan beulatang nyan jeuet teuteurimong keu keureubeuen peunajoh. bek kheueh gata keureubeuen nang leumo atawa bubiri atawa kameng meusiogoe ngon aneuek jih nibak uroe nyang saban. meunyo gata tapeuseumah keureubeuen teurimong gaseh ubak tuhan, gata peubuet kheueh nyan meunurot atoran nyan na, mangat keureubeuen gata geuteurimong. makheun kheueh keureubeuen nyan bak uroe nyan cit teuma, dan bek gata tinggai mubacut pi keu keusingoh beungoh. tuhan meufeuroman, "taat kheueh ubak peue-peue nyang ulon peurintah; ulon kheueh tuhan gata. bek gata peukot nan ulon nyang suci. banmandum bansa israel haroh jiseumah ulon sibagoe nyang mahasuci. ulon kheueh tuhan dan ulon nyang peujeuet gata suci. ulon ba gata teupeuteubiet nibak nanggroe meuse, mangat ulon jeuet keu po teu allah gata. ulon kheueh tuhan." tuhan geubri ubak nabi musa atoran-atoran keuhai peurayaan agama, nyan haroh geupeumaklum sibagoe uroe raya keu meue iebadat. na nam uroe watee jak mubuet, teuma bak uroe nyang keu tujuh, uroe sabat, na kheueh uroe meureuhah nyang teupeu khusus keu tuhan. nibak uroe nyan gata haroh gata meusapat keu gata meue iebadat dan hana jeuet nyang jak meubuet. nyoe kheueh uroe-uroe raya nyan ka geupeuteutab le tuhan dan nyang haroh teupeumaklum bak watee nyan ka teupeu teuntee. uroe raya paskah nyang teupeu raya keu teuhoreumat tuhan, teupeuphon watee mata uroe lhob bak tanggai peuet blaih buleuen sa. oh singoh nyan, tanggai limong blaih, phon peurayaan ruti hana meurago, dan tujuh uroe treb jih hana jeuet gata pajoh ruti nyang teupeuget teuboh rago. tujuh uroe treb jih nyan gata haroh tapeuseumah keureubeuen peunajoh ubak tuhan. bak uroe nyang phon dan nyang keu tujuh peurayaan nyan gata haroh tamesapat keu gata iebadat dan hana jeuet gata meubuet nyang brat-brat. meunyo gata ka trok u nanggroe nyang geubri le tuhan keu gata, dan gata peusapat wase tanoh, beureukah gandom nyang phon that gata pot haroh gata ba ubak imeum. bak uroe oh ka ltheueh uroe sabat,

imeum haroh jipeuseumah gandom nyan sibagoe keureubeuen nyang teubri ubak tuhan, mangat tuhan galak keu gata. bak uroe gata tapeuseumah gandom nyan, haroh cit gata peuseumah keu keureubeuen nyang teutot saboh aneuek bubiri agam nyang meumu sithon dan hana meucupa. keu keureubeuen peunajoh peuseumah kheueh teuma dua kilo gram teupong teujampu ngon minyeuk zaiton. bee keureubeuen nyang harom nyan lumpah that galak ate tuhan. meusiogoe ngon nyan peuseumah teuma si aree ie anggo. sigohlom teuba peuseumahan nyan ubak tuhan, hana jeuet gata pajoh mubacut pi nibak gandom nyang baro nyan, bah kheueh nyang mantong meuntah, teupanggang atawa teutot jeuet keu ruti. peuratoran nyan haroh jitaat le banmandum keuturonan gata keu siumu masa. phon nibak uroe oh ka ltheueh uroe sabat, watee gata peuseumah ubak tuhan beureukah gandom nyang phon, gata haroh ta itong tujuh goe aleuhah peunoh. bak uroe nyang keulimong plo, na kheueh uroe oh ka ltheueh uroe sabat nyang keutujuh, gata haroh taba keureubeuen teuhidang ubak tuhan. tieb-tieb keuluwarga haroh jiba dua boh ruti sibago peuseumahan teujok keu tuhan, tieb-tieb ruti haroh teupeuget nibak dua kilo gram teupong haloh nyang teuboh rago dan atra nyan haroh jipeuseumah ubak tuhan sibagoe keureubeuen wase tanoh nyang phon. meusajan ngon ruti nyan bansa israel haroh jipeuseumah teuma tujuh boh aneuek bubiri nyang meumu sithon, saboh leumo agam muda dan dua boh kameng. maseng-maseng beulatang nyan hana jeuet na meucupa dan haroh teupeuseumah sibagoe keureubeuen nyang teutot keu tuhan, deungon keureubeuen teuhidang dan keureubeuen ie anggo. bee keureubeuen nyang harom nyan lumpah that galak ate tuhan. dan peuseumah teuma saboh kameng agam keu keureubeuen peu amphon desya dan dua boh bubiri agam nyang meumu sithon keu keureubeuen peudame. ruti dan bandua boh aneuek bubiri nyan haroh jipeuseumah le imeum sibago keureubeuen nyang teubri ubak tuhan, dan nyan na kheueh keu imeum. banmandum peuseumahan nyan na kheueh suci. bak uroe nyan gata haroh meusapat keu meueibadat dan hana jeuet gata meubuet nyang brat-brat. peuratoran nyan haroh jitaat le keuturonan gata keu siumu masa, dan dipat mantong awaknyan tinggai. meunyo gata jakmupot, bek kheueh gata koh gandom nyang na timoh nibak bineh-bineh blang gata dan bek gata riwang keu gata jak peusapat boh-boh gandom nyang na tinggai oh ka ltheueh gata pot. bah kheueh atra nyan jicok le ureueng gasien dan ureueng aseng. tuhan na kheueh allah gata. tanggai sa buleuen tujuh haroh teupeuraya sibago uroe nyang khusus keu meureuhah. bak uroe nyan meutanda deungon su beureuguih, dan gata haroh meusapat keu gata jak meueibadat. peuseumah kheueh keureubeuen peunajoh keu tuhan dan bek gata peubuet buet-buet nyang brat nibak uroe nyan. tanggai siploh buleuen tujuh na kheueh uroe upacara sithon sigo keu peu amphon desya bansa israel. bak uroe nyan gata haroh tapuasa dan gata meusapat keu gata jak iebadat meunan cit meusiogoe ngon nyan gata peuseumah keureubeuen peunajoh keu tuhan. bek

gata jak bak buet, sabab uroe nyan na kheueh uroe peu amphon desya, mangat gata meuteume amphon dikeue tuhan po teu allah. soe mantong nyang pajoh peue mantong nibak uroe nyan, ureueng nyan hana teu anggab le anggota umat allah. dan soe mantong nyang jipeubuet buet nibak uroe nyan, ureueng nyan geuhukom le tuhan keudroe ngon hukoman mate. peuratoran nyan keunong atueh banmandum keuturonan gata dipat mantong awaknyan tinggai. phon bak saat mata uroe lob bak tanggai sikureueng buleuen nyan trok ubak watee mata uroe jilob bak tanggai siploh, haroh gata peuraya lagee uroe sabat, uroe nyang khusus keu meureuhat. siuroe peunoh nyan gata haroh puasa. khanuri jambo on phon bak tanggai limong blaih buleuen tujuh dan treb jih tujuh uroe. nyang tujuh uroe treb jih nyan, tieb-tieb uroe gata haroh gata peuseumah keureubeuen peunajoh. bak uroe nyang phon dan nyang keulapan gata haroh meusapat keu meuebadat dan gata peuseumah keureubeuen peunajoh ubak tuhan. bek kheueh gata peubuet buet-buet nyang brat nibak uroe nyan. nyan kheueh uroe raya agama nyang ka geuputeutab le tuhan dan nyang haroh gata peumaklum. nibak peurayaan-peurayaan nyan gata haroh gata horeumat tuhan deungon gata meusapat keu meuebadat dan gata peuna keureubeuen peunajoh, keureubeuen nyang teutot, keureubeuen teuhidang, keureubeuen beulatang dan keureubeuen ie anggo, le jih dub nyang teupeureulee tieb-tieb uroe. peurayaan-peurayaan nyan na kheueh sibagoe seunamah nibak uroe-uroe sabat biasa, meunan cit deungon banmandum peuseumahan nyan sibago seunamah nibak meuneubri gata nyang biasa, bak keureubeuen gata keu gata teuboh kanoi, atawa keureubeuen keugalak droe nyang gata bri ubak tuhan. oh ka lheueh musem mupot, phon tanggai limong blaih buleuen tujuh, gata haroh gata peuna peurayaan nyang treb jih tujuh uroe. uroe nyang phon dan nyang lapan na kheueh uroe nyang khusus keu meureuhat. bak uroe nyang phon gata haroh gata pot boh kayee nyang paleng jroh lam lampoh gata, meunan cit deungon on-on palma dan ranteng-ranteng nibak bak-bak kayee nyang luhu, dan gata peuphon kheueh peurayaan sukacita keu teuhoreumat tuhan po teu allah gata. peurayaan nyan haroh gata peuna nyang treb jih tujuh uroe. peuratoran nyan haroh jipeubuet le keuturonan gata keu siumu masa. tujuh uroe treb jih banmandum bansa israel haroh tinggai lam jambo-jambo on, mangat keuturonan gata jiteupeue bahwa tuhan geuyue bansa israel tinggai lam jambo-jambo nyang seuderhana, watee gobnyan geuba awaknyan peuteubiet lam nanggroe meuse. gobnya kheueh tuhan po teu allah gata. meunan kheueh cara jih nabi musa geupeusampoe ubak bansa israel peuratoran-peuratoran keuhai cara teupeuna peurayaan-peurayaan keu tehoreumat tuhan. tuhan meufeureuman ubak nabi musa geuyue jak peusampoe peurintah-peurintah nyoe ubak bansa israel: ba kheueh laju minyeuk zaiton nyang murni dan nyang paleng get keu panyot lam khimah tuhan, mangat jeuet teupeu udeb dan hu sabe. nabi harun haroh geu atoe banmandum panyot-panyot nyan pon

seupot sampoe troh beungoh nibak teupat tuhan teuka, diluwa teree nyang teutob peuto peujanjian nibak ruweueng mahasuci. peurintah nyan haroh jipeubuet keu siumu masa. nabi harun haroh geu uroh banmandum panyot-panyot bak kaki panyot nyang teupeuget nibak meuh murni mangat teutab hu lam khimah tuhan. cok kheueh laju dua blaih kilo gram teupong nyang paleng get dan peuget kheueh laju dua blaih boh ruti bulat, maseng-maseng sikilo gram teupong. keubah laju ruti nyan lam dua boh suson, tieb-tieb suson nam boh ruti, atueh meuja nyang meulapeh ngon meuh murni nyang na dalam khimah tuhan. pasoe laju keumeunyan nyang aseuli ubak tieb-tieb sinuson ruti sibago tanda bahwa ruti nyan keureubeuen peunajoh keu tuhan. tieb-tieb uroe sabat haroh na ruti nyang teuhidang lam khimah tuhan. nyan kheueh keuwajiban bansa israel keu siumu masa. ruti nyan na kheueh keu nabi harun dan keuturonan gobnyan. awaknyan haroh geupajoh atra nyan bak teupat nyang suci, sabab rutinyan sibagoe bagian nyang paleng suci nibak keureubeuen peunajoh nyang teupeuseumah ubak tuhan keu imeum-imeum. nibak khimah-khimah ureueng israel na sidroe ureueng agam. ayah jih ureueng meuse dan ma jih ureueng israel nyang nanjih selomit, aneuk dibri nibak sukee dan. bak siuroe ureueng nyan jimeudakwa ngon ureueng israel di khimah-khimah nyan. watee meudakwa nyan, ureueng nyan laju jikutok po teu allah. sabab nyan kheueh le ureueng israel jiba ureueng nyan meuhadab ubak nabi musa, dan jiteun ureueng nyan disinan sira jipreh keuputosan tuhan keuhai peue nyang haroh awaknyan peubuet atueh ureueng nyan. tuhan meufeureuman ubak nabi musa, "gata ba laju ureueng nyan uluwa khimah-khimah. soe mantong ureueng nyang ka jideungoe ureueng nyan jikutok ulon, haroh jipeudeuk jaroe atueh ulee ureueng nyan keu jibri keuskasian bahwa ureueng nyan salah. oh lheueh nyan banmandum umat haroh jirhom ureueng nyan ngon batee sampoe an mate. oh ka lheueh nyan jak peumaklum kheueh nyoe ubak bansa israel: soe mantong nyang kutok po teu allah ureueng nyan haroh jitanggung akibat jih dan teuhukom mate. soe mantong nyang kutok tuhan ureueng nyan haroh teugeulawa ngon batee sampoe mate le banmandum jeumamah. hukom nyan teutab berlaku keu ureueng israel dan ureueng aseng nyang ka tinggai teutab di israel. soe mantong nyang poh mate ureueng laen ureueng nyan haroh teuhukom mate. soe mantong nyang poh mate beulatang ureueng laen haroh jigantoe. dasai jih na kheueh 'nyawong geunantoe nyawong'. soe mantong ngon sabab jih ureueng laen cidra, peue mantong nyang ka jipeubuet, haroh teubalah teuma atueh ureueng nyan. meunyoeh jihnyan jipeupatah tuleueng, teuma tuleueng jih pih haroh teupeupatah teuma. meunyoeh jih nyan jipeubuta siblahi mata ureueng laen, teuma mata ureueng nyan haroh teupeubuta siblahi. meunyoeh jih jipoh ureueng laen sampoe patah gigo, teuma gigo ureueng nyan pih haroh teupeupatah teuma. peue mantong nyang jipeubuet seuhingga ureueng laen cidra, nyan pih haroh teubalahi atueh ureueng nyan sampoe cidra. soe mantong

nyang poh mate beulatang haroh jigantoe, teuma soe mantong nyang poh mate manusia ureueng nyang haroh teuhukom mate. hukom nyan teutab berlaku keu gata banmandum dan keu ureueng aseng nyang tinggai teutab meusajan gata, sabab ulon kheueh tuhan, allah gata." oh ka ltheueh nabi musa geupeusampoe hai nyan ubak bansa israel, awaknyan laju jiba ureueng nyang ka kutok po teu allah nyan uluwa khimah-khimah laju jigelawa ureueng nyan ngon batee sampoe mate. deungon cara lagee nyan bansa israel ka jipeubuet peue nyang ka geupeurintah le tuhan ubak nabi musa. nibak atueuh gunung sinai tuhan meufeuereuman ubak nabi musa dan geuyue laju ubak gobnyan jak peusampoe kheueh peuratoran-peuratoran nyoe ubak bansa israel. meunyoee gata tatamong lam nanggroee nyang teuma geubri le tuhan keu gata, gata haroh gata horeumat tuhan deungon cara lagee nyoe: tieb-tieb thon nyang keutujoh gata hana jeuet gata pula sapeue nibak tanoh. nam thon treb jih haroh gata pula banmandum lampoh atawa ladang gata, gata gunteng lampoh-lampoh anggo dan gata peusapat wase tanoh gata. teuma tieb-tieb thon nyang keutujoh teupeu khusus keu tuhan. sithon peunoh nyan tanoh gata peubiyeu mantong meunan hana jeuet gata keureuja. bek gata pula sapeue pi lam ladang dan bek gata gunteng lampoh anggo gata. meunan cit gandom nyang timoh keudroe atawa anggo bak anggo gata keudroe nyang hana teugunteng, hana jeuet gata peusapat dan gata keubah, sabab thon nyoe na kheueh thon tanoh meureuhah. bah kheueh meunan, tanoh nyan teuma jibri cit wase keu teupeujeuet peunajoh keu gata, namiet-namiet gata, ureueng-ureueng nyang tung upah nibak gata, dan ureueng aseng nyang na tinggai deungon gata. meunan cit keu beulatang-beulatang nyang gata peulara dan beulatang-beulatang kleuet lam nanggroee gata. peue mantong nyang jipeuhase le tanoh nyan jeuet teumakheue. itong kheueh tujuh go tujuh thon, deungon jeumeulah jih peuet ploh sikureueng thon. oh ltheueh nibak tanggai siploh buleen tujuh, bak uroe peu amphon desya, gata yue kheueh ureueng mangat jiyueb beureuguih jeub-jeub teupat bansaboh nanggroee. haroh gata peukhusus thon nyang keu limong ploh nyan, dan gata peumaklum keuhai beubaih ubak mandum ureueng lam nanggroee. lam thon nyan banmandum hareuta milek nyang ka teupeubloe haroh teujok pulang ubak ureueng po jih nyang phon atawa ubak keuturonan jih. soe nyang jipeubloe sibagoe namiet haroh jipeuriwang ubak keuluwarga jih. bek kheueh gata pula ladang gata. gandom nyang timoh keudroe jih atawa boh anggo lam lampoh anggo gata nyang hana teugunteng atra nyan hana jeuet peusapat dan gata keubah. thon nyan na kheueh thon nyang suci keu gata. gata teuma jeuet teupajoh peue nyang na timoh di ladang gata. bak thon nyan banmandum tanoh nyang ka teupeubloe haroh teujok pulang ubak ureueng nyang phon po tanoh nyan. teuma meunyoee gata tapeubloe tanoh bansa droe gata ureueng israel, atawa gata bloe tanoh nibak ureueng nyan, bek kheueh gata peubuet bloe peubloe nyan ngon hana juoe. yuem tanoh nyan haroh teupatok meunurot jeumeulah thon seumantong tanoh nyan mantong

jibri hase trok ubak thon teupulang lom teuma. meunyoee jeumeulah thon jih le, yuem tanoh nyan meuhai. teuma meunyoee jeumeulah thon jih bacut, yuem jih haroh murah, sabab nyang teupeubloe na kheueh jeumeulah wase mupot. bek teumipee sabe keudroe gata ureueng israel, teuma bah kheueh gata takot ubak tuhan, po teu allah gata. taat kheueh ubak mandum hukom dan peurintah tuhan, mangat gata udeb deungon aman nibak nanggroee nyan. tanoh nanggroee nyan teuma jibri wase sampoe gata na peunajoh nyang seb dan tinggai disinan deungon aman seujahtera. mungken na nyang teumanyong peue nyang teupajoh watee thon nyang keutujoh bak watee tanoh hana teupula sapeue dan hase jih hana teukuteb. bak thon nyang keunam tuhan teuma geubri beureukat ubak tanoh sampoe wase jih seb keu lhee thon. bak thon gata tapula ladang gata nyan lam thon nyang keulapan, hase nyang teupot bak thon nyang keunam mantong na keu gata pajoh. dan keuneubah peunajoh gata nyang mantong teukeubah seb sampoe bak watee gata tapeusapat hase nibak thon nyan. pajan mantong tanoh gata hana jeuet teupeubloe, sabab tanoh nyan bukan atra gata, teuma milek po teu allah. gata cit lagee ureueng aseng nyang meuteume idhin gata peuguna tanoh nyan. meunyoee saboh keubeueng tanoh teupeubloe, haroh jiaku hak milek ureueng po phon keu teutoboh tanoh nyan. meunyoee sidroe ureueng israel ka rhot ubak gasien sampoe jih nyan teupaksa jipeubloe tanoh jih, wareh kawom jih nyang paleng to wajeib jiteuboh tanoh nyan. meunyoee hana ureueng nyang teuboh tanoh nyan teuma di ureueng po tanoh nyan bak saboh saat hase dan na peng nyang seb keu jiteuboh tanoh nyan, teuma ureueng nyan haroh jibayee ubak ureueng nyang ka bloe tanoh jihnyan deungon yuem hase tanoh nyan sampoe bak thon-thon seulanjut jih sampoe trok ubak thon teupulang nyang teuma teuka. deungon lagee nyan jihnyan ka meuteume lom tanoh droe jih. teuma dilikot nibaknyan meunyoee ureueng nyan hana daya keu jiteuboh tanoh nyan, di ureueng nyang bloe tanoh nyan teutab na kuasa sampoe trok ubak thon teupulang teuma. bak thon nyan tanoh nyan haroh teupulang ubak ureueng po nyang phon. meunyoee sidroe ureueng jipeubloe saboh rumoh lam banda nyan hana jikeulileng le beuton, teuma ureueng nyan nahak jiteuboh rumoh jihnyan lam jangka watee sithon teuhitong phon tanggai teupeubloe atra nyan. teuma meunyoee rumoh nyan hana jiteuboh lam watee sithon teuma gadoh kheueh hak jih keu jiteuboh rumoh nyan. rumoh nyan teutab hak milek ureueng nyang bloe dan keuturonan ureueng bloe nyan. lam thon teupulang, rumoh nyan hana teujok pulang. keu rumoh di gampong nyang hana jikeulileng le beuton keunong ubak peuratoran nyang phon lagee nibak tanoh: ureueng nyang phon na hak jiteuboh dan rumoh nyan haroh jijk pulang nibak thon teupulang. teuma di ureueng lewi na hak keu pajan mantong jiteuboh atra milek awaknyan di banda-banda nyang ka teupeuteutab keu awaknyan. meunyoee ureueng lewi jipeubloe rumoh jih bak saboh banda nyan dan jihnyan hana niet jiteuboh atra nyan, rumoh nyan haroh jijk lom ubak jih nyan nibak thon teupulang lom teuma. sabab rumoh

ureueng lewi di banda-banda awaknyan na kheueh milek awaknyan nyang teutab lamkawan bansa israel. teuma blang naleueng nyang bansikeulileng banda-banda sukee lewi hana jeuet teupeubloe. nyan na kheueh atra ureueng lewi keu siumu masa. meunyoe na ureueng nyang saboh bansa ngon gata nyang tinggai lamkawan gata ka rhot ubak gasien dan hana hase le jimita hareutakat keu biaya udeb jih, gata haroh gata tulong jih nyan lagee ureueng aseng atawa jame teuka, mangat ureueng nyan hase udeb sabe lamkawan gata. bek kheueh gata lakee bungong nibak peng nyang gata peu-utang bak ureueng nyan, teuma bah kheueh gata tatakot ubak po teu allah, dan peubiyeu mantong ureueng nyan udeb lamkawan gata. meunan cit bek gata cok laba nibak peunajoh nyang gata peubloe keu ureueng nyan. nyang kheueh peurintah tuhan po teu allah gata nyang ka geupeuteubiet gata nibak nanggroe meuse keu geubri nanggroe kanaan ubak gata, mangat gobnyan jeuet keu po teu allah gata. meunyoe na ureueng nyang saboh bansa ngon gata nyang rhot ubak gasien sampoe ji peubloe droe jih sibagoe namiet ubak gata, ureueng nyan hana jeuet gata yue jimubuet lagee buet nyang jipeubuet le namiet. ureueng nyan haroh tinggai nibak gata sibagoe ureueng tung upah dan jimubuet bak gata sampoe ubak thon teupulang. bak watee nyan ureueng nyan ngon aneuek-aneuek jih jeuet jitinggai rumoh gata dan jigisa ubak keuluwarga jih dan ubak tanoh indatu jih. ureueng israel na kheueh hamba-hamba tuhan; gobnyan kheueh nyang ba awaknyan peuteubiet nibak nanggroe meuse, dan ngon sabab nyan awaknyan hana jeuet teupeubloe sibagoe namiet. jadi ureueng israel nyang jipeubloe droeji ubak gata han jeuet barang gaho gata peubuet ateuh jihnyan. bah kheueh gata teumakat ubak po teu allah gata. meunyoe gata na peureulee namiet, jeuet gata bloe bak bansa-bansa nyang na tinggai sikeulileng gata. meunan cit jeuet gata bloe aneuek-aneuek ureueng aseng nyang na tinggai teutab lamkawan gata. aneuek-aneuek ureueng aseng nyang lahe di nanggroe gata atra nyan jeuet keuhak milek gata dan jeuet cit gata peuwareh ubak aneuek-aneuek gata keu jeuet keu namiet awaknyan siumu masa. meunyoe seusabe gata ureueng israel hana jeuet gata peubuet ngon gata. meunyoe na ureueng aseng nyang tinggai lamkawan gata jeuet keu kaya, dan na teuma ureueng gata israel ka rhot gasien sampoe ureueng nyan jipeubloe droe jih sibagoe namiet ubak ureueng aseng nyan atawa ubak keuluwarga jih, ureueng israel nyan teutab na hak keu teutuboh. sidroe nibak syedara jih nyang agam, atawa apha jih, atawa syedara karong jih atawa sidroe nyang laen nibak rakan jih nyang paleng krab, jeuet jiteuboh nyan. atawa meunyoe jih keudroe keumungkenan mampu, ureueng nyan jeuet jiteuboh droe jih keudroe. namiet nyan haroh jimupakat ngon ureueng nyang ka bloe jih. awaknyan haroh ji itong jeumeulah thon nibak phon droe jih nyan teupeubloe sibagoe namiet sampoe ubak thon teupulang teuma, laju jipeuteuntee yuem sineuboh jihnyan. yuem nyan haroh teupeuteutab meunurot teu itong upah nyang teubri ubak ureueng tung upah. namiet nyan haroh jijok pulang yuem teubloe droe jih nyan nyang le jih

sidub upah ureueng tung upah nyang treb jih sithon nyang gohlom trok, siulah-ulah jihnyan ka jimubuet sibago ureueng tung upah nyang teugaji sithon sigoe. toke jih hana jeuet jipeubuet ateuh ureueng nyan deungon gasa. meunyoe jihnyan hana hase teutuboh ngon cara lagee nyan, ureueng nyan dan aneuek-aneuek jih haroh teupeubeubaih bak thon teupulang ukeue nyan teuma. sidroe ureueng israel hana jeuet jihnyan jeuet keu namiet siumu masa sabab bansa israel na kheueh hamba-hamba tuhan. tuhan kheueh nyang ba awaknyan teupeuteubiet nibak nanggroe meuse. gobnyan kheueh tuhan, allah awaknyan. tuhan meufeureuman, "bek kheueh gata peuet beurala atawa gata peudong patong atawa tameh batee nyang meu-uke keu gata seumah. ulon kheueh tuhan allah gata. peuraya kheueh uroe raya sabat dan uroe-uroe raya agama nyang laen dan horeumat kheueh ubak teupat nyang teupeu khusus keu teuseumah ulon. ulon kheueh tuhan. meunyoe gata udeb meunurot atoran-atoran nyang teuka nibak ulon dan gata taat peue-peue nyang ulon peurintah, ulon ku peutreun ujeuen oh trok bak watee, sampoe tanoh jibri wase dan dumna bak kayee jimeuboh. wase tanoh gata meulimpah ruwah, dan meunyoe ka trok watee jih keu teujak pot boh anggo, gata mantong gata koh gandom. dan meunyoe ka trok watee keu tapula gandom, gata mantong tapot boh anggo. bak gata teuma na peunajoh nyang seb dan udeb seujahtera di nanggroe gata. ulon teuma lon jaga keuamanan nanggroe gata sampoe gata jeuet gata eh deungon teunang dan hana teumakat keu soe mantong. beulatang-beulatang juah teuma lon peuranab nibak nanggroe gata, dan muprang pi teuma hana le di nanggroe gata. gata teuma hase tapeutaloe bubena na musoh gata; deungon limong droe gata hase tapeutaloe sireutoh droe musoh, dan deungon sireutoh droe hase tapeuloe siploh ribee droe musoh. ulon teuma lon bri beureukat ubak gata dan teuma lon bri aneuek-aneuek cucoe nyang jai keu gata. peue nyang ka ulon meujanji ngon gata, pasti ulon peutrok. wase tanoh gata teuma meulimpah ruwah, sampoe trok sithon. sikeubit jih gata teupaksa haroh gata peuteubiet hase meuneupot gata nyang ka treb mangat na teupat gata keubah hase meuneupot nyang baro. ulon teuma tinggai lamkawan gata lam khimah ulon, dan hana lon tulak gata. ulon teuma na meusajan gata; ulon jeuet keu po teu allah gata dan gata jeuet keu umat ulon. ulon, tuhan allah gata, nyang ba gata teupeuteubiet nibak nanggroe meuse mangat gata bek jeuet le keunamiet. keukuasaan nyang seupet gata ka ulon wiet, dan gata ulon peujeuet keu ureueng nyang meurdehka." tuhan meufeureuman, "meunyoe gata hana tadeungoe ulon dan hana gata peubuet lagee nyang ka ulon peurintah, meunyoe gata ta iengkeue ubak janji nyang ulon peuet ngon gata dan hana gata taat ubak peue-peue nyang ka ulon peuteutab dan peuratoran-peuratoran lon, gata teuma lon hukom. ulon teuma ku peuteuka bala u ateuh gata, peunyaket ngon deumam nyang hana hase teupeupuleh, sampoe mata gata jeuet keubuta dan gata udeb meurana. gata teuma gata pula seunaman dan hase jih hana gata teume pajoh, sabab musoh-musoh gata teuka jijak peutaloe gata

dan jipeuhabeh peue nyang gata pula. gata teuma lon hukom, sampoe gata jipeutaloe le musoh-musoh gata dan jikuasa le ureueng nyang banci keu gata. gata teuma jeuet keu ureueng nyang paleng geusun sampoe gata plueng, bahpi hana nyang peulet gata. meunyoek ka ltheueh gata rasa banmandum hukoman nyan dan gata gohlom taat ubak ulon, hukoman ateueh gata teuma lon tamah tujoh go ganda. gata sombong lumpah na, ulon teuma ulon peutundok gata. ujeuen hana teuma jitreun, sampoe tanoh gata ka habeh tho dan kreuh lagee beuso. banmandum jeureh payah gata hana meuguna. sabab tanoh gata hana jibri wase dan mandum seunaman gata hana teuma meuboh. meunyoek hana putoh cit gata lawan ulon dan hana gata tem taat ubak ulon, teuma hukoman gata lon tamah lom tujoh go ganda. ulon teuma lon peuteuka meubago rupa beulatang juwah lamkawan gata. beulatang-beulatang nyan jiteugom bubena aneuek-aneuek gata, jipoh mate beulatang peulara gata dan jipeuhabeh gata, sampoe jeumeulah jih tinggai bacut teuk, meunan cit rot-rot nyang na di nanggroek gata ka jeuet keu sungue. meunyoek ka ltheueh gata rasa banmandum hukoman nyan gohlom cit gata deungoe ulon, mantong cit hana gata ploh talawan ulon, deungon nyan laju lon heuntam gata dan lon hukom gata tujoh goe leubeh brat nibak nyang ka-ka. ulon teuma lon peuteuka prang lamkawan gata keu teuhukom gata sabab ka gata iengkeue peujanjian ulon deungon gata. dan meunyoek gata meusapat di banda gata keu gata jak mita teumpeat meusom, ulon laju lon peutreun peunyaket nyang hana hase teupeupuleh, sampoe gata teupaksa gata seurah droe ubak musoh gata. gata teuma habeh peunajoh, akheji lam siploh droe ureueng inong teuma cit saboh teumpeat tot ruti nyang na bak awaknyan. peunajoh nyan teuma teupulang ubak gata seucara teuransom, dan oh ka ltheueh gata pajoh ruti nyan, gata hana troe dan teutab mantong teurasa deuk. oh ka ltheueh gata rasa banmandum hukoman nyan gata teutab cit mantong talawan ulon dan hana gatatem taat ubak ulon, teuma deungon beungh gata laju lon heuntam, dan lon hukom gata tujoh goe leubeh brat nibak nyang ka-ka. gata teuma deuk, sampoe trok ubak aneuek-aneuek gata keudroe. ulon teuma lon peuhanco bubena teumpeat-teumpeat seumuja gata di ateueh buket-buket, lon reuloh bubena miseubah gata teumpeat gata tot dupa, dan ulon rhom manyet-manyet gata u ateueh beurala-beurala gata nyang ka reuloh nyan. deungon rasa luwat banda-banda gata ulon peuhanco sampoe jeuet keu runga-runga, teumpeat-teumpeat seumuja gata ulon peuhanco dan keureubeuen-keureubeuen gata hana lon teurimong. nanggroek gata teuma lon peuhanco sapan sapa, sampoe bubena musoh nyang duek lam nanggroek nyan teuma teukeujot oh jingiang pakriban hibat hanco nanggroek nyan. ulon teuma lon peuteuka prang di nanggroek gata dan ulon peucerebre gata di nanggroek-nanggroek aseng. blang-blang gata teulanta, dan banda-banda gata teupeubiyeu mantong jeuet keu runga. bak watee nyan teungh gata mantong na di teumpeat-teumpeat nyang teuboih lam nanggroek musoh-musoh gata, tanoh gata nyang

hana gata peubiyeu jipioh meusikeujab yoh watee mantong gata tinggai disinan, teuma teulanta dan na watee jimeureuh. ureueng-ureueng sang-sang nyang na di teumpeat nyang teuboih di nanggroek laen, teuma lon peujeuet keuteumakot nyang luwa biasa, sampoe sion-on kayee nyang jiyueb le angen pi awaknyan ka jiplueng. gata teuma taplueng sang-sang gata jilet lam mideuen prang, laju reubah bahpi hana musoh bak bineh gata. gata teuma gata plueng dan laju meugantoh sidroe ngon nyang laen, bahpi hana nyang peucrok gata. dan gata hana teuma hase gata lawan musoh-musoh gata. gata teuma mate nibak teumpeat nyang teuboih dan jipeubinasa le nanggroek musoh-musoh gata. bacut nyang tinggai ureueng gata nyang mantong udeb lam nanggroek musoh gata teuma meurana sabab desya gata keudroe dan desya indatu gata. teuma keuturonan gata jiaku keuhai desya jih dan desya indatu jih nyang ka jilawan ulon dan jibeurontak ubak ulon, sampoe ulon cok tindakan lon lawan awaknyan dan lon use awaknyan u teumpeat nyang teuboih nibak nanggroek musoh-musoh awaknyan. akhe jih, meunyoek keuturonan gata ka taklok dan jirasa hukoman sabab desya dan brontak awaknyan, ulon teuma lon ingat peue nyang ka ltheueh lon meujanji ngon nabi yakub, nabi ishaq dan nabi ibrahim. ulon teuma lon peubaro janji ulon keu lon jok tanoh nyan ubak bansa ulon. teuma tanoh nyan leubeh ilee haroh jitinggai le peunduduek disinan, mangat beutoi-beutoi meuteume ji meureuh. dan umat ulon haroh jirasa banmandum hukoman nyang ka lon peurhot ateueh droe jih sabab hana jitem taat ubak mandum peuratoran dan peue-peue nyang ka ulon peurintah. teuma meunyoek awaknyan mantong na di nanggroek musoh, awaknyan teutab hana lon tinggai atawa ulon peubinasa. sabab meunyoek awaknyan ulon peubinasa, saban cit ka ulon peuputuh peue nyang ka ltheueh lon meujanji ngon awaknyan, sabab ulon nyoe na kheueh tuhan, allah awaknyan. ulon teuma lon peubaro peujanjian nyang ka ltheueh lon peuget ngon indatu awaknyan, watee ulon tunyok keukuasaan lon ubak banmandum bansa deungon cara ulon ba umat lon nibak tanoh meuse, mangat ulon, tuhan, jeuet keu allah awaknyan." nyan kheueh hukom-hukom dan peurintah-peurintah nyang geubri le tuhan di ateueh gunung sinai ubak nabi musa keu bansa israel. tuhan meufeureuman ubak nabi musa keuhai peuratoran nyoe keu bansa israel. meunyoek sidroe-droe ureueng jipeuseumah ubak tuhan keu jiteuboh sapeue-sapeue kaoni nyang khusus, ureueng nyan jeuet jiteuboh ngon sijeumeulah peng meunurot yuem nyang ka teuntee bak khimah tuhan: - di ateueh 60 thon: - lamkawan 20-60 thon: - lamkawan 5-20 thon: - dimiyueb 5 thon: 8 meunyoek ureueng nyang meukaoni nyan gasien that keu jibayee yuem nyang ka teupeuteutab nyan, ureueng nyan haroh jiba ureueng nyang ka teupeuseumah ubak tuhan nyan ubak imeum. imeum haroh geupeuteutab yuem nyang leubeh miyueb nyang sisuai deungon keumampuan ureueng nyan. meunyoek kaoni nyan beulatang haleue nyang jeuet teupeuseumah ubak tuhan, ureueng nyang meukaoni nyan hana jeuet jituka ngon beulatang laen, sabab banmandum nyang ka jipeuseumah

ubak tuhan atra nyan ka jeuet keu milek tuhan. meunyoe atra nyan jituka cit, bandua boh beulatang nyan ka jeuet keu milek tuhan. teuma meunyoe kaoi nyan keuhai beulatang hareuem nyang hana jeuet jiteurimong sibagoe keureubeuen ubak tuhan, ureueng nyang meukaioi nyan haroh jiba beulatang nyan ubak imeum. imeum teuma geupeuteuntee yuem jih meunurot keuadaan beulatang nyan. dan yuem nyang ka teupeuteuntee nyan na kheueh yuem mate. meunyoe ureueng nyan keuneuk jiteuboh beulatang jih nyan, ureueng nyan haroh jibayeue yuem jih teutamah dua ploh peureusen. meunyoe sidroe ureueng jipeuseumah rumoh jih ubak tuhan, imeum geupeuteuntee yuem rumoh nyan meunurot keuadaan rumoh nyan. yuem nyang ka geupeuteuntee na kheueh yuem mate. meunyoe ureueng nyan keuneuk jituboh rumoh jih nyan, ureueng nyan haroh jibayeue yuem jih dan jitamah lom dua ploh peureusen. meunyoe sidroe ureueng keuneuk jipeuseumah siladum tanoh jih ubak tuhan, yuem tanoh nyan haroh teupeuteuntee jeumeulah bijeh nyang peureulee keu teupula lam tanoh nyan. keu tieb-tieb dua ploh kilo gram gandom yuem jih siploh peng pirak. meunyoe tanoh nyan jipeuseumah phon watee thon teupulang, yuem jih haroh teubayeue peunoh. meunyoe tanoh nyan teupeuseumah oh ka lheureh thon teupulang, imeum haroh geutakse yuem kontan jih meunurot jeumeulah thon nyang mantong na sampoe ubak thon teupulang nyang teuma teuka, dan geupeuteuntee laju yuem jih nyang leubeh murah. meunyoe ureueng nyang peuseumah ladang nyan keuneuk jiteuboh, ureueng nyan haroh jibayeue yuem jih jitamah teuma dua ploh peureusen. meunyoe jihnyan jipeubloe lampoh jih nyan deungon hana leubeh dilee jiteuboh ubak tuhan, ureueng nyan hana hak le jiteuboh lampoh jih nyan. bak thon teupulang teuma lom, lampoh nyan ka jeuet keumilek tuhan keu siumu masa, dan atranyan geubri ubak imeum-imeum. meunyoe sidroe ureueng jipeuseumah ubak tuhan saboh lampoh nyang ka jibloe, imeum haroh geutakse yuem meunurot jeumeulah thon nyang mantong na sampoe ubak thon teupulang lom teuma. dan di ureueng nyan laju jibayeue yuem jih bak uroe nyan cit. peng nyan ka jeuet keu hak milek tuhan. bak thon teupulang, lampoh nyan haroh teupulang ubak ureueng po nyang phon atawa ubak keuturonan jih. banmandum yuem haroh teupeuteuntee meunurot yuem nyang ka teuntee bak khimah tuhan. beulatang nyang phon lahe na kheueh milek tuhan, jadi atra nyan hana jeuet teukeureubeuen sibagoe keureubeuen keugalak droe. aneuek leumo, aneuek bubiri atawa aneuek kameng nyang phon that lahe na kheueh atra tuhan. teuma beulatang hareuem nyang phon lahe jeuet teutuboh meunurot yuem nyang ka teuntee bak khimah tuhan, teutamah teuma ngon dua ploh peureusen. meunyoe hana teutuboh, beulatang nyan jeuet teupeubloe ubak ureueng laen meunurot yuem nyang ka teuntee bak khimah tuhan. hana meusidroe pi jeuet jipeubloe atawa jituboh peue nyang ka teupeukhusos tanpa syarat ubak tuhan, bah kheueh nyan manusia, beulatang atawa tanoh. atranyan na kheueh milek tuhan siumu

masa. manusia keudroe nyang ka teupeukhusos keu tuhan keu geupeubinasa nyan hana jeuet teutuboh; ureueng nyan haroh teupoh mate. siper siploh nibak banmandum wase tanoh, bah kheueh nyan gandom meunan cit ngon boh-boh kayee, atranyan na kheueh milek tuhan. meunyoe sidroe-droe ureueng jikeuneuk teuboh siladum nibak hase nyan, ureueng nyan haroh jibayeue yuem nyang ka teupeuteuntee teutamah teuma dua ploh peureusen. saboh nibak tieb-tieb siploh boh beulatang peulara na kheueh atra tuhan. meunyoe beulatang nyan teu itong, tieb-tieb saboh beulatang peulara nyang keu siploh na kheueh atra tuhan. ureueng po beulatang nyan hana jeuet jipileh-pileh toh nyan get dan toh nyang hana get. meunan cit atra nyan hana jeuet jituka ngon nyang laen. meunyoe atra nyan jituka cit teuma, ban dua boh beulatang peulara nyan ka jeuet keuhak milek tuhan dan hana jeuet teutuboh. nyan kheueh peurintah-peurintah nyang geubri le tuhan di ateuh gunung Sinai ubak nabi Musa keu bansa Israel.

nibak tanggai sa buleuen dua nibak thon yang keudua oh kalheueh bansa israel jitinggai nanggro meuse, tuhan laju geupeugah ubak nabi musa didalam khimah tuhan di padang pasi sinai. kheun gobnyan, "gata dan nabi harun haroh kheueh gata peuna seunsus atueuh banmandum umat israel, meunurot kawom dan keuluwarga awaknyan maseng-maseng. gata peuget kheueh dafeutar nan banmandum ureueng agam yang meu-umu dua ploh thon u atueuh yang sanggob jeuet keu tantra. awaknyan haroh kheueh teudafeutar meunurot pasokan jih maseng-maseng. nibak tieb-tieb sukee, gata lakee kheueh sidroe ureueng peumimpin kawom mangat jitulung gata." nyoe kheueh nan-nan ureueng yang geupileh nibak umat keu jitulung nabi musa dan nabi harun dan yang jeuet keu peumimpin maseng-maseng sukee, na kheueh: sukee peumimpin deungon jitulung le bandua blaih droe ureueng nyan, nabi musa dan nabi harun geuyue banmandum awaknyan meusapat nibak tanggai sa buleuen dua, laju oh ltheuehnyan silsilah awaknyan geusoson meunurot kawom-kawom nyan na didalam tieb-tieb sukee awaknyan. nan-nan tieb ureueng agam yang meu-umu dua ploh thon u atueuh jicetet ngon ji itong, lagee yang geupeurintah le tuhan. banmandum nyan geupeubuet le nabi musa di padang pasi sinai. ureueng agam yang meu-umu dua ploh thon u atueuh yang kaek jeuet keu tantra, teudafeutar nan awaknyan meunurot kawom dan keuluwarga jih nyan, phon nibak ruben, aneuk tuha nabi yakub trok ubak naftali. jeumeulah awaknyan na kheueh: jeumeulah ureueng ureueng-ureueng lewi hana rhoh teu itong meusajan deungon sukee-sukee laen, sabab tuhan ka geupeugah ubak nabi musa, "bak watee gata tacetet agam nan-nan ureueng nyan ek jeuet keu tantra, sukee lewi nyan hana peu gata cetet. gayatue mantong awaknyan jijaga khimah ulon deungon banmandum peuleungkapan jih. tugaih awaknyan na kheueh jigulam khimah ulon deungon banmandum peuleungkapan jih meunan cit jiuuriih nyan sigoe guih teuma. awaknyan haroh kheueh jipeudong khimah droe jih ban seukeulileng khimah ulon nyan. teuma meunyoee gata taminah, ureueng-ureueng lewinyan haroh kheueh jireuloh khimah ulon, laju atranyan jipeudong lom teuma nibak teumpat teupeudong khimah yang baro. seulaen awaknyan, soe mantong nyan jipeutoe ubak khimah nyan ureuengnyan haroh teuhukom mate. ureueng-ureueng israel yang laen nyan haroh kheueh jipeudong khimah jihnyan meukeulompok-keulompok, tieb-tieb ureueng didalam keulompok jih nyan haroh kheueh jikeulileng le bupanji jih maseng-maseng. teuma ureueng-ureueng lewi haroh kheueh jipeudong khimah jih nyan di seukeulileng khimah ulon. awaknyan haroh kheueh jijaga mangat hana ureueng yang jicuba-cuba peuto keunan, sampoe jeuet teupeusabab ulon beungeh dan ulon hukom umat israel." teuma di ureueng israel nyan laju jipeubuet peue nyan ka geupeurintah le tuhan ubak nabi musa. tuhan meufeureuman ubak nabi musa dan nabi harun: "bak watee ureueng israel jipeudong khimah, tieb-tieb ureueng bah kheueh jipeudong khimah jih nibak ban silangka bupanji

keusatuan droe jih deungon lambang kawom jih keudroe teuma. banmandum khimah-khimah nyan bah kheueh jipeudong ban seukeulileng khimah ulon, teuma beujioh bacut nibak khimah ulon nyan." di siblaih u timu, tantra yang dimiyueb keusatuan yehuda haroh jimeukhkimah meunurot pasokan dan peumimpin jih maseng-maseng lam sinuson nyoe: sukee peumimpin jeumeulah ureueng disiblaih u seulant, tantra yang dimiyueb peumimpin bupanji ruben, awaknyan haroh kheueh jipeudong khimah meunurot pasokan ngon peumimpin jih maseng-maseng lam sinuson nyoe: sukee peumimpin jeumeulah ureueng ruben elizur bin syedeur keusatuan ruben haroh kheueh jibeurangkat sibagoe yang keudua. oh ka ltheueh nyan, lamkawan banmandum tantra israel, jijak sukee lewi sira jigulam khimah tuhan. lagee awaknyan meukhkimah, meunan cit teuma awaknyan jijak, maseng-maseng diteumpat jih keudroe meunurot bupanji awaknyan keudroe. disiblaih u barat, tantra yang dimiyueb bupanji tantra efraim haroh kheueh jimeukhkimah meunurot pasokan deungon peumimpin maseng-maseng lam sinuson yang lagee nyoe: sukee peumimpin jeumeulah ureueng keusatuan efraim nyan haroh kheueh jijak dilikot sukee lewi. disiblaih utara, tantra nyan dimiyueb bupanji keusatuan dan haroh meukhkimah pasokan deungon peumimpin jih maseng-maseng lam sinuson nyoe: sukee peumimpin jeumeulah ureueng jeumeulah ureueng israel yang teudafeutar meunurot pasokan maseng-maseng na kheueh 603.550 droe. lagee yang geupeurintah le tuhan ubak nabi musa, ureueng lewi hana teudafeutar meusajan ngon ureueng-ureueng israel nyan laen. ureueng israel jipeubuet banmandum peue-peue nyan geupeurintah le tuhan ubak nabi musa. maseng-maseng jipeudong khimah nibak seukeulileng bupanji jih nyan keudroe, dan jibeurangkat meunurot kawom dan keuluwarga jih nyan teuma. nyoe kheueh keuluwarga nabi harun dan nabi musa nibak watee tuhan geumeututote deungon nabi musa di atueuh gunung sinai. nabi harun na geumeu aneuk peuet droe aneuk agam. nyan tuha nan jih nadab, oh ltheuehnyan abihu, eleazar dan itamar. awaknyan ka geupeubaiat sibagoe imeum deungon cara upacara teupeuro minyeuk di atueuh ulee awaknyan. teuma nadab ngon abihu mate di atueuh padang pasi sinai, bak watee awaknyan jijak meuhadab tuhan deungon apui nyan hana haleue. awaknyan bandua hana jitem meu aneuk. jadi simantong nabi harun udeb, eleazar dan itamar jimeutugaih sibagoe imeum. tuhan geumeufeureuman lom ubak nabi musa, "gata yue kheueh sukee lewi nyan jijak meuhadab, dan tunyok kheueh awaknyan jeuet keupeulayan-peulayan nabi harun. awaknyan jimeutugaih di khimah ulon dan haroh jijak peutimang teungku imeum dan banmandum umat deungon meuneubuet awaknyan di khimah ulon. tugaih awaknyan na kheueh jiuuroh banmandum peuleungkapan jih didalam khimah ulon sibagoe geunantoe ureueng-ureueng israel. nibak bansa israel, teuma sukee lewi nyan ulon bri tugaih jeuet keupeulayan teutab keu nabi harun dan keuturonan jih nyan. teuma nabi harun dan aneuk-

aneuek jih bah ulon angkat mangat ulon bri tugaih sibagoe imeum; seulaen awaknyan, soe mantong nyang jicuba peukaru tugaih nyan ureueng nyan haroh teuhukom mate." tuhan geumeufureuman lom, "jinoenyoe ureueng-ureueng lewi ulon pileh jeuet keu milek ulon. bak watee ulon poh mate banmandum aneuek tuha bansa meuse, ulon peukhusos keu ulon banmandum aneuek agam nyang tuha nibak bansa israel dan meunan cit banmandum beulatang peulara awaknyan nyang phon-phon lahe. banmandum nyan na kheueh hak milek ulon. sibagoe keugantoe aneuek-aneuek tuha bansa israel, laju ulon cok ureueng lewi keu ulon; awaknyan teuma jeuet keuhak milek ulon. ulon kheueh tuhan." dipadang pasi gunung sinai tuhan geuyue ubak nabi musa geuyue peugot dafearat ureueng-ureueng lewi meunurot kawom dan keuluwarga jihnyan maseng-maseng; tieb-tieb aneuek agam nyang meumu sibuleuen u ateuhe haroh kheueh teucetet nan jih. laju nabi musa geupeubuet peue nyang ka geupeurintah le tuhan ubak gobnyan nyan. lewi na lhee droe aneuek agam: gerson, kehat dan merari. awaknyan na kheueh indatu kawom-kawom nyang teupeugah meunurot nan awaknyan. gerson na teuma dua droe aneuek agam: libni dan sime. bak si kehat na teuma peuet droe aneuek agam: amram, yizhar, hebron dan uziel. merari na teuma dua droe aneuek agam: mahli dan musi. awaknyan na kheueh indatu nibak keuluwarga-keuluwarga nyang teupeugah meunurot nan awaknyan. kawom gerson na kheueh nibak keuluwarga libni dan sime. jeumeulah ureueng agam nibak kawom gerson nyang meumu si buleuen u ateuhe nyang teucetet 7.500. elyasaf aneuek lael nyang jeuet keu ulee kawom nyan. dalam khimah-khimah bansa israel, kawomnyan jicok teupat disiblahi u barat dilikot khimah tuhan. dalam hai teu uroh khimah tuhan, awaknyan meutanggong jaweub ateuhe khimah dan sinutob jihnyan, ija nibak babah pintoe rot tamong nyan, layeue peulataran nyang jikeuileng khimah dan miseubah, dan ija tiree pintoe nibak peulataran nyan. awaknyan meutanggong jaweub ateuhe banmandum meuneubuet nyang na hubongan deungon barang-barang nyan. kawom kehat na kheueh nibak keuluwarga-keuluwarga amram, yizhar, hebron dan uziel. ureueng agam nyang meumu sibuleuen u ateuhe nibak kawom nyan banmandum nyan na sijeumeulah 8.600 droe. awaknyan tugaih jih jiuroh barang-barang nyang na di khimah tuhan. elisafan aneuek uziel nyang jeuet keu ulee kawom nyan. didalam khimah-khimah, kawom nyan jicok teupat di siblahi u seulan khimah tuhan. awaknyan meutanggong jaweub u ateuhe peuto peujanjian nyan, meja, gaki panyot, miseubah-miseubah, alat-alat nyang geungui le imeum di ruweueng suci dan tiree nyang jih bacut nibak ruweueng suci. awaknyan meutanggong jaweub u ateuhe banmandum meuneubuet nyang na hubongan deungon barang-barang nyan. ulee sukee lewi na kheueh eleazar, aneuek nabi harun. gobnyan geukawai ureueng-ureueng nyang meutugaih di dalam ruweueng suci. kawom merari na kheueh nibak keuluwarga mahli dan keuluwarga

musi. ureueng nyang meumu sibuleuen u ateuhe nibak kawom nyan banmandum na sijeumeulah 6.200 droe. zuriel aneuek abihail nyang jeuet keu ulee nibak kawom nyan. didalam khimah-khimah, kawom nyan jicok teupat di siblahi utara khimah tuhan. awaknyan meutanggong jaweub ateuhe runga khimah nyan, balok-balok jih, tameh-tameh jih, keunaleueng jih, dan banmandum peukakaih meunan cit sigala meuneubuet jihnyan nyang na hubongan deungon barang-barang nyan. meunan cit u ateuhe tameh-tameh, keunaleueng, bajo-bajo dan talo teumalo keu peulataran jihnyan. di dalam peukhimahan nyan, nabi musa ngon nabi harun dan meunan cit teuma deungon aneuek-aneuek geuhnyan haroh kheueh jicok teupat dikeue khimah tuhan, siblahi u timu nyan. awaknyan meutanggong jaweub ateuhe upacara ibadah keu bansa israel didalam ruweueng suci. seulaen awaknyan, soe mantong nyang jicuba-cuba jikeuneuk peubuet hai nyan ureueng nyan haroh teuhukom mate. banmandum ureueng agam lam sukee lewi nyang meumu sibuleuen u ateuhe geudafearat le nabi musa meunurot kawom awaknyan maseng-maseng ateuhe peurintah tuhan, jeumeulah jihnyan banmandum na 22.000 droe. tuhan geumeufureuman lom ubak nabi musa, "banmandum aneuek agam nyang tuha nibak ureueng israel na kheueh atra ulon. neucetet kheueh nan-nan awaknyan nyang meumu sibuleuen u ateuhe. teuma keu gantoe awaknyan, ulon peugah bahwa banmandum ureueng lewi na kheueh hak milek ulon. ulon kheueh tuhan! dan beulatang peulara ureueng lewi pih ulon peugah keugeunantoe banmandum nyang phon-phon lahe lamkawan beulatang peulara bansa israel." nabi musa laju geupeubuet peue nyang geupeurintah le tuhan ubak gobnyan; laju geucetet banmandum nan-nan aneuek agam nyang tuha nyang meumu sibuleuen u ateuhe. awaknyan banmandum na jeumeulah jih 22.273 droe. laju tuhan meufureuman lom ubak nabi musa, "gata peukhusos kheueh ureueng-ureueng lewi nyan keu ulon sibagoe keugantoe banmandum aneuek tuha nibak bansa israel; meunan cit beulatang peulara ureueng lewi sibagoe keugantoe beulatang ureueng israel. sabab aneuek-aneuek agam nyang tuha nibak ureueng israel 273 droe leube le nibak jeumeulah ureueng lewi, teuma nyang leube nyan haroh kheueh gata teuboih. keu tieb-tieb aneuek, gata haroh tabayee limong peng pirak meunurot yum nyang lazem nibak khimah ulon; gata bri kheueh laju peng nyan ubak nabi harun dan aneuek-aneuek jihnyan." nabi musa geupeubuet laju peue nyang ka geupeurintah le tuhan nyan. gobnyan laju geucok 1.365 peng pirak, dan geujok laju atranyan ubak nabi harun dan aneuek-aneuek geuhnyan. tuhan meufureuman ubak nabi musa dan nabi harun mangat geupeuna seunsus keu ureueng lewi nibak kawom kehat meunurot keuluwarga awaknyan maseng-maseng, laju geucetet nan banmandum ureueng agam nyang meumu lhee ploh sampoe ubak umu limong ploh thon, nyang hase jimeubuet nibak khimah tuhan. buet awaknyan na kheueh ji uroh barang-barang nyang mahasuci. tuhan geubri

lom ubak nabi musa peuratoran nyoe: meunyoek ka trok watee jih keu teureuloh khimah-khimah, nabi harun dan aneuek-aneuek geuhnyan haroh jitamong u dalam khimah tuhan, geupeutleun tiree dikeue peuto peujanjian, dan geutob lajunyan deungan ija. oh ka ltheuehnyan, awaknyan haroh kheueh jitob lom teuma deungan sion kulet nyang haloh, laju teuma jileueng sion ija ijo di ateuh nyan, dan jipasang laju kayee keu ngon gulam peuto nyan. awaknyan haroh teuma jileueng sion ija ijo di ateuh meja tempat teukeubah ruti sajian keu tuhan, dan di ateuh meja nyan haroh teuma awaknyan keubah pangan, baki tempat dupa, baki tempat peuseumahan, dan ciriek ie keu tempat peuseumahan ie anggo. ruti sajian bah kheueh deh jih sabe na di ateuh meja nyan. banmandum nyan bah kheueh sabe jitob le awaknyan deungan sion ija mirah, laju di ateuh nyan jileueng teuma sion kulet haloh, dan laju jipasang kayee geunulam nibak meja nyan. awaknyan bah kheueh jicok sion ija ijo jitob ateuh gaki panyot meunan cit ateuh panyot nyan, alat keu ngon sampoh dah panyot nyan meunan cit ngon peunadah jih, dan banmandum tempat minyeuk zaiton. gaki panyot dan banmandum peuleungkapan jihnyan haroh kheueh awaknyan bungkoh deungan sikrak kulet haloh laju atranyan jipeudeuk di ateuh tempat geunulam. oh ka ltheuehnyan le awaknyan jileueng teuma sion ija ijo di ateuh miseubah nyang nibak meuh nyan, dan atranyan laju jitob teuma deungan sion kulet haloh, laju jipasang kayee geunulam miseubah nyan. banmandum alat-alat nyang jingui didalam ruweueng suci nyan haroh kheueh awaknyan cok dan jibungkoh deungan sion ija ijo. laju atranyan jitob teuma deungan sion kulet haloh, dan atranyan laju jikeubah di ateuh geunulam. awaknyan haroh teuma jipeugleh miseubah nyan nibak abee, oh ltheueh nyan jileueng teuma laju sion ija ungu di ateuh nyan. dan di ateuh nyan teuma bah kheueh jikeubah le awaknyan banmandum peuralatan nyang teungui bak watee iebadat nibak miseubah nyan: tempat apui, geureupu, sudok, dan baskom. banmandum nyan haroh kheueh jitob deungan sion kulet haloh dan geupasang laju kayee geunulam nyan. tuhan meufeureuman ubak nabi musa dan nabi harun, "bak watee teureuloh khimah-khimah, nabi harun dan aneuek-aneuek jihnyan bah kheueh jitamong u dalam khimah ulon dan jitob banmandum barang dan peuleungkapan nyang na disinan. baro kheueh oh ltheueh nyan, ureueng kehat jeuet jiteuka keu jikak gulam atranyan. teuma hana jeuet jikalon le awaknyan, jipeuto atawa jicukeh barang-barang nyan, sabab barang nyan ka teupeukhusos keu ulon. meunyoek awaknyan jipeubuet cit nyang ka teutam nyan, awaknyan teuma mate. jadi, mangat ureueng-ureueng kehat nyan hana teusampoh nibak sukee lewi, nabi harun dan aneuek-aneuek jihnyan haroh kheueh jibri tugaih maseng-maseng lamkawan awaknyan peue nyang museuti awaknyan ba. nyan kheueh tugaih ureueng-ureueng kehat nibak watee khimah ulon teupinah. eleazar, aneuek nabi harun, meutanggong jaweub u ateuh banmandum khimah ulon, minyeuk panyot, dupa, keureubeuen gandom keu

sajian teutab, minyeuk upacara dan banmandum nyang na didalam khimah ulon." tuhan geuyue lom ubak nabi musa mangat geupeuna seusus ateuh ureueng lewi nibak kawom gerson meunurot keuluwarga maseng-maseng. nabi musa haroh geucetet nan banmandum ureueng nyang meu umu phon lhee ploh sampoe ubak umu limong ploh thon nyang sanggob jipeubuet buet wajib keureuja di khimah tuhan. awaknyan geubri tugaih keu ji angkot barang-barang nyoe: ija tenda khimah nyan deungan sinutob jih siblih didalam dan siblih diluwa nyang teupeugit nibak kulet nyang haloh, ija nibak babah pintoe khimah, layeue-layeue dan meubagoe talo keu peulataran nibak bineh khimah dan miseubah, ija nibak geureubang peulataran, dan banmandum peuleungkapan nyang geungui keu teupeungui banmandum barang nyan. awaknyan meutanggong jaweub ateuh banmandum buet-buet nyang na hubongan deungan barang-barang nyan. nabi musa dan nabi harun haroh geu jaga sabe mangat buet-buet nyang geuseurah le nabi harun dan aneuek-aneuek geuhnyan ubak ureueng-ureueng gerson nyan jikeureuja teuma, dan banmandum barang nyang haroh teuba, beuteuba. nyan kheueh tugaih ureueng-ureueng gerson di dalam khimah; tugaih-tugaih nyan haroh kheueh jipeubuet di miyueb pimpanan itamar, aneuek imeum nabi harun. tuhan meufeureuman lom ubak nabi musa mangat geujak peuna seusus ureueng lewi nibak kawom merari meunurot keuluwarga jihnyan maseng-maseng. nabi musa haroh geucetet nan banmandum ureueng agam nyang meu-umu lhee ploh sampoe limong ploh thon nyang sanggob jipeubuet wajib meukeureuja di khimah tuhan. awaknyan geubri tugaih keu jikakba runga-rungka khimah nyan, balok-balok jih, tamed-tamed jih dan meunan cit deungan keunaleueng jih. meunan cit deungan tamed-tamed peulataran diban silingka khimah nyan meunan cit deungan keunaleueng jih, patok-patok jih dan talo teumalo jih deungan banmandum peukakaih nyang teupeureulee keu ngon peudong jih. tieb-tieb ureueng geubri tugaih jiba barang-barang nyang ka teupeuteuntee. nyan kheueh tugaih-tugaih kawom merari; banmandum buet awaknyan di khimah tuhan haroh jipeubuet dimiyueb pimpanan itamar, aneuek imeum nabi harun. pailh lagee peurintah tuhan, nabi musa, nabi harun dan banmandum peumimpin umat geupeuna laju seusus ubak ban lhee boh kawom nibak sukee lewi, na kheueh kehat, gerson dan merari. cara awaknyan jipeubuet seusus nyan na kheueh nibak keuluwarga ubak keuluwarga. awaknyan jicetet banmandum phon nan ureueng agam nyang meu-umu lhee ploh sampoe limong ploh thon nyang sanggob jikeureuja tugaih wajib keureuja di khimah tuhan. nyoe kheueh hase jih: kawom jeumeulah ureueng ateuh peurintah tuhan rot nabi musa, tieb-tieb ureueng geudafeutar dan geubri tanggong jaweub maseng-maseng ateuh peue nyang haroh geupeutimang atawa peue nyang haroh geu seun. tuhan meufeureuman ubak nabi musa, "gata jak peurintah kheueh laju ubak ureueng israel haba lagee nyoe: banmandum ureueng nyang

keunong peunyaket kulet nyang bit-bit mubahya, atawa peunyaket keulamin, atawa nyang ka tupeeh deungon manyet, ureueng nyan haroh kheueh teupeubiet nibak khimah ureueng israel. awaknyan haroh kheueh teuyue jak, mangat khimah-khimah hana keunong kuto, nibak teupat ulon tinggai meusajan-sajan deungon umat ulon." ureueng israel laju jipeubuet banmandum peurintah nyan dan jipeuteubiet laju bubena ureueng-ureueng nyang meupeunyaket lagee nyan nibak khimah nyan. tuhan geubri ubak nabi musa peuratoran-peuratoran nyoe keu bansa israel: meunyo sidroe-droe ureueng nyang hana seutia ubak tuhan deungon jipeubuet salah ateuhe ureueng laen, ureueng nyan haroh kheueh jiaku desya jih dan jibayeue sineuboh jih nyan deungon peunoh, teutamah lom ngon dua ploh peureusen, keu ureueng nyang jipeurgoe nyan. teuma meunyo ureueng nyang jipeurgoe nyan ka meuninggai donya dan hana teuma jitinggai wareh syedara nyang toe, laju sineuboh nyan haroh kheueh jijok ubak tuhan, dan nyan jeuet keujeumba imeum. sineubohnyan hana jitamong keunan lagee leumo agam keu upacara peu amphon desya keu ureueng nyang ka meusalah nyan. atra peu mantong nyang jipeuseumah le ureueng israel ubak tuhan, peuseumahan khusus jihnyan ka jeuet keujeumba imeum nyang teurimong peuseumahan nyan. peu mantong nyang jipeuseumah le sidroe-droe ureueng ubak tuhan, nyan ka jeuet keujeumba ureueng nyan keudroe. teuma peu mantong nyang jipeuseumah ubak sidroe imeum, nyan ka jeuet keujeumba imeum. tuhan meufeureuman ubak nabi musa deungon peuratoran-peuratoran lagee nyoe ubak bansa israel. jeuet mantong sidroe ureueng agam jicuriga keu peurumoh jih. jihnyan jisangka bahwa ureueng binoe jih hana seutia ubak jihnyan dan ka teuma jipeukuto droe jih sabab ka jimeumukah deungon ureueng agam nyang laen. teuma ureueng lakoenyah hana jiteume keupastian, sabab hai nyang jipeubuet le peurumoh atawa binoe jihnyan ngon cara jimeusom-meusom; saksi keuhai nyan hana teuma, dan jihnyan hana teuma teudrob basah. atawa jeuet cit teuma di ureueng lakoe jicuriga, padahai peurumoh jihnyan hana teuma ji meumukah ngon ureueng agam nyang laen. dalam hai nyang dua masa alah nyan di ureueng lakoe haroh kheueh jiba peurumoh jih nyan ubak imeum. meunan cit jihnyan haroh kheueh jiba peuseumahan nyang teupeureulee, na kheueh sikilo gram teupong gandom. teupong nyan hana jeuet teuro ngon minyeuk zaiton atawa teuboh ngon dupa, sabab atranyan peuseumahan nyang teucuriga dan teumeukeusut sibagoe tanda na jih curiga si ureueng lakoe keu ureueng bino jih nyan. di imeum haroh kheueh geuyue ureueng inong nyan jidong di keue miseubah meuhadab tuhan. laju le imeum geucok laju saboh cangkik tanoh dan geuroe laju bacut ie suci u dalam cangkik tanoh nyan. oh lheuhy nyan gobnyan geucok laju abee nibak aleue khimah tuhan laju atranyan geupeutamong u dalam ie nyan. oh lheuhy nyan jiploih laju ok ureueng inong nyan, dan teupong keucurigaan nyan jikeubah laju teuma u dalam paleuet, seudangkan di teungku imeum keudroe geumat ie phet dan nyan

kheueh ie nyang teupeuteuka kutok. oh lheuhy nyan le imeum geupeugah laju sumpah dan sira geulakee ureueng inong nyan jisituju keuhainyan. imeum haroh geupeugah, "meunyo gata hana tameumukah, gata hana keunong kutok nyang jipeuteuka le ie nyoe. teuma meunyo gata ka meumeumukah, seumoga tuhan geupeujeuet nan gata jeuet keu sumpah ngon kutok lamkawan bansa gata. seumoga le gobnyan geupeujeuet lhak pha gata jeuet keu kroet dan pruet gata pi jiteuka gumbong. ie nyang jipeuteuka kutoknyoe teuma jitamong u dalam pruet gata deungon nyan teuma pruet gata jeuet keu gumbong meunan cit teupeukroet teuma lhak pha gata." ureueng inong nyan haroh jiwaweub, "ulon situju; seumoga tuhan geupeujeuet meunan." laju di imeum geutuleh laju kutoknyan u ateuhe keureutah meugulong dan geusampoh teuma deungon ie nyang phet nyan. di imeum geuyue lom ureueng inong nyan jijieb ie nyang phet nyang teupeuteuka kutok nyan. meunyo jijieb ie nyan jeuet keusabab rasa saket. meunan cit di imeum geucok laju peuseumahan teupong nyan, dan atranyan geutunok laju u keue tuhan, laju geuba teuma u keu miseubah. laju le gobnyan geucoklom saboh reugam teupong sibagoe tanda bahwa banmandum teupong nyan kalheuhy geupeuseumah, laju atra nyan geutot teuma di ateuhe miseubah. akhe jih ienyan geupeu jieb teuma ubak ureueng inong nyan. seukira jih ureueng inong nyan ka jimeumukah, deungon keunong ie nyan teupeusabab jihnyan saket lagoena; pruet jih laju gumbong meunan cit deungon lhak pha jih pi laju teuma teuka kroet. nan jihnyan jeuet keu sumpah ngon kutok lamkawan bansa jih keudroe. teuma seukira jih ureueng inong nyan hana meusalah, jihnyan hana teuma keunong kutok dan mantong hase ji me aneuek. meunan kheueh peuratoran jih meunyo sidroe ureueng lakoe ceumeuru dan curiga bahwa peurumoh jih nyan ka jipeubuet jeuet deungon ureueng agam laen dan jipeukuto droe jihnyan. ureueng agam nyan haroh jijak peuhadab binoe jihnyan ubak tuhan dan di imeum haroh teuma geupeubuet peuratoran nyan u ateuhe ureueng nyan. ureueng agam nyan beubaih nibak salah jihnyan, teuma binoe jihnyan, meunyo teunyata meusalah, haroh kheueh jitunggong bubena akibat jih. tuhan meufeureuman ubak nabi musa geuyue jak peusampoe peuratoran-peuratoran lagee nyoe keu ureueng israel. tieb-tieb ureueng agam atawa ureueng inong nyang meusapat mangat udeb khusus keu tuhan sibagoe sidroe nazir, hana jeuet teujieb ie anggo dan meunan cit ie kreueh. jihnyan hana jeuet jijieb ie kreueh peu mantong nyang teupeuet nibak boh anggo atawa nibak boh peu mantong. meunan cit jihnyan hana jeuet jipajoh boh anggo nyang mantong baro atawa nyang ka tho, atawa peu mantong nyang meuasai nibak bak anggo; aneuek jih atawa pucok jihpi hana jeuet jipajoh. meunyo mantong jihnyan lam meukaoh hana jeuet jigunteng atawa jicuko ok jihnyan. nibak wateenyan ok ngon janggot bah kheueh teupeubiyeu mantong jitimoh sampoe panyang. jihnyan teuitak ubak kaoi sampoe teuma ubak watee teupeukhusus droe jih ubak tuhan seulesoe. ok jihnyan na kheueh sibagoe

tanda bahwa jihnyan teupeukhusos mantong ubak po teu allah. simantong kaori jihnyan na ureueng nyan hana jeuet jipeukuto droe jih keudroe; jihnyan hana teuma jeuet jipeuto nibak manyet ureueng mate, bahpi kheueh nyan manyet bapak jih keudroe, ma jihnyan, atawa syedara jih nyan saban cit hana jeuet jipeuto ngon jimat. meunyoe mantong jihnyan sidroe ureueng nyang meujabat nazir, jihnyan na kheueh ureueng khusos keu tuhan. meunyoe ok sidroe nazir nyang teupeukhusos jeuet keu kuto atawa najih kareuna jihnyan na toe ngon ureueng mate deungon hana teusaja, teuma ureueng nyan bah jipreh tujuh uroe treb jih; oh ka ltheueh nyan haroh jicuko ok nibak ulee jih meunan cit ngon janggot jih, baro kheueh jihnyan teukheun ka gleh. nibak uroe nyang keulapan jihnyan haroh jiba dua boh cicem mirah pati atawa cicem teukukur ubak imeum di babah pintoe khimah tuhan. cicem nyang saboh haroh jipeuseumah le imeum sibagoe keureubeuen teupeu amphon desya, dan nyang saboh teuk keu keureubeuen nyang teutot gunaji keu teupeugadoh nyang kuto nibak jihnyan. bak uroe nyan cit teuma jihnyan bah jipeukhusos lom teuma ok jih nyan keu tuhan dan geupeubaro keuhai jipeujok droe jih sibagoe sidroe nazir. jangka watee nyang ka lewat hana teu itongle sabab ka jeuet keu kuto. sibagoe keureubeuen gantoe rugoe jihnyan haroh jipeuseumah saboh aneuek bubiri nyang mantong meu-umu sithon. meunyoe kaori sidroe nazir nyan ka seulesoe, nazir nyan haroh teuma jipeubuet upacaranyoe. ureueng nyan haroh teu intat u babah pintoe khimah tuhan deungon teuba sajan ubak tuhan lhee boh beulatang peulara nyang hana meucupa: saboh bubiri agam nyang meu-umu sithon keu keureubeuen nyang teutot, saboh aneuek bubiri nyang inong nyang mantong meu-umu sithon keu keureubeuen peu amphon desya, dan saboh bubiri agam keu keureubeuen peudame. ureueng nyan haroh jipeuseumah teuma saboh raga ruti nyang teupeuget hana meurago, na kheueh ruti bulat nyang teupeuget nibak teupong teujampu deungon minyeuk zaiton dan kue lipeh nyang teusilieik ngon minyeuk zaiton. seulaen nibak nyan ureueng nyan haroh teuma jipeuseumah keureubeuen sajan dan keureubeuen nyang teujieb. le imeum haroh geuba banmandum nyan ukeue tuhan, laju geupeuseumah keureubeuen peu amphon desya dan keureubeuen nyang teutot. meusigoe deungon ruti nyang saboh raga nyan, le geuh nyan haroh teuma geupeuseumah bubiri agam nyan ubak tuhan sibagoe keureubeuen peudame. meunan cit keureubeuen teuhidang dan keureubeuen nyang teujieb nyan haroh teupeuseumah ubak tuhan. le nazir nyan haroh kheueh teuma jicuko ok jihnyan di babah pintoe khimah tuhan, dan ltheueh nyan rhom laju atranyan u dalam apui diteupat keureubeuen peudame nyang teungoh teutot. oh kalheueh nyan, meunyoe pha keu bubiri agam nyan ka teupeumasak, le imeum haroh geucok atranyan dan geukeubah atranyan meusajan-sajan deungon saboh ruti nyang bulat dan saboh teuma keu lipeh nibak raga nyan u dalam paleuet jaroe ureueng nazir nyan. laju le imeum haroh kheueh geutunyok peunajoh nyan sibagoe meuneubri

khusos ubak tuhan; nyan na kheueh jeumba suci nyang ka jeuet keu jeumba imeum, seulaen dada dan pha bubiri agam nyang meunurot peuratoran ka jeuet keu jeumba imeum. baro kheueh oh ka ltheueh nyan le nazir nyan ka jeuet jijieb ie anggo. nyan kheueh peuratoran keu ureueng nazir; teuma meunyoe sidroe nazir geupeujanji keureubeuen nyang leubeh nibak syarat-syarat kaori jihnyan, gobnyan haroh geupeupeunoh deungon paih peue nyang ka geupeujanji nyan. tuhan meufeureuman lom ubak nabi musa mangat geujak peusampoe ubak nabi harun dan aneuek-aneuek geuhnyan bahwa awaknyan haroh jipeugah nariet nyoe bak watee awaknyan geubri beureukat keu bansa israel: seumoga tuhan geubri beureukat dan geupeulara gata. seumoga tuhan geumeuget ate dan murah ate keu gata. seumoga tuhan geubri beureukat keu gata dan geubri teuma keu gata dame. dan tuhan meufeureuman, "meunyoe awaknyan ji teuh nan ulon sibagoe beureukat ateueh bansa israel, ulon teuma lon bri beureukat keu awaknyan." bak watee ka seulesoe geupeudong khimah tuhan le nabi musa, laju khimah nyan deungon sigala peuleungkapan jih geubaiat laju meunan cit banmandum peuleungkapan jihnyan geusilieik deungon minyeuk upacara. meunan cit atranyan geupeusilieik ubak miseubah deungon sigala peuleungkapan jihnyan. laju le ureueng-ureueng patot israel, na kheueh ulee sukee nyang meutanggong jawueb ateueh teupeubuet keuhai seunsy nyan, geupeuseumah u keue tuhan nam boh geureubak leumo meusigoe deungon leumo jih na dua blaih boh: tieb-tieb dua droe peumimpen jideureuma saboh geureubak, dan maseng-maseng saboh teuma leumo. oh ka ltheueh seulesoe atranyan jipeuseumah le awaknyan, tuhan geupeugah ubak nabi musa, "teurimong kheueh meuneubri-meuneubri peuseumahan nyan keu teu angkat khimah ulon; gata seurah kheueh banmandum nyan ubak ureueng lewi suisuai deungon tugaih awaknyan." laju geureubak-geureubak leumo meunan cit deungon banmandum leumo nyan geujok laju ubak ureueng lewi le nabi musa. dua boh geureubak ngon peuet boh leumo geujok teuma keu ureueng-ureueng gerson, peuet boh geureubak ngon lapan boh leumo geujok teuma keu ureueng-ureueng merari, sisuai deungon buet nyang awaknyan peubuet dimiyueb pimpanen itamar, aneuek imeum nabi harun. teuma ureueng-ureueng kehat hana jiteurimong geureubak meunan cit deungon leumo nibak nabi musa, sabab barang-barang nyang suci nyang jeuet keu tanggong jawueb awaknyan, haroh awaknyan gulam di ateueh baho. le peumimpen nyang jiba barang peuseumahan keu teupeuna upacara teubaiat miseubah. bak watee awaknyan ka keumah keu jiba peuseumahan awaknyan u keue miseubah, tuhan meufeureuman lom ubak nabi musa, "gatajak peugah kheueh laju ubak awaknyan bahwa tieb-tieb uroe nyang treb jih dua blaih uroe sidroe lamkawan peumimpen nyan haroh kheueh jipeuseumah keureubeuen jihnyan keu upacara teubaiat miseubah." maseng-maseng jiba peuseumahan meunurot urutan nyoe: uroe sukee peumimpen peuseumahan awaknyan maseng-maseng na kheueh

saban: saboh pangan pirak nyang brat jih 1,5 kilogram dan saboh teuma baskom pirak nyang brat jih 800 gram, meunurot ceng nyang jipeuguna nibak khimah tuhan. ban dua boh teupat nyan peunoh teupaso deungon teupong teujampu ngon minyeuk keu peuseumahan sajian. seulaen nibak nyan saboh teuma pangan meuh nyang brat jih na 110 gram nyang meu asoe dupa; saboh leumo agam nyang mantong muda, saboh bubiri agam dan saboh teuma aneuek bubiri nyang meu-umu sithon keu keureubeuen nyang teutot, meunan cit saboh kameng agam keu keureubeuen teupeu amphon desya; dua boh leumo, limong boh bubiri agam, limong boh kameng agam, dan limong boh bubiri nyang meu-umu sithon keu keureubeuen peudame. peuseumahan nyang jiba le bandua blah droe peumimpin keu teubaiait miseubah nyan banmandum nyan na kheueh sidubnyoe: – dua blah boh pangan pirak dan dua blah boh teuma baskom pirak nyang brat jih banmandum nyan na kheueh 27,6 kilogram – dua blah boh pangan meuh nyang brat banmandum nyan na kheueh 1,32 kilogram, peunoh meuasoe ngon dupa – dua blah boh teuma leumo agam, dua blah boh bubiri agam, dua blah boh aneuek bubiri nyang mantong meu-umu sithon, meusajan deungon keureubeuen sajian sibagoe keuleungkapan jih keu keureubeuen nyang teutot – dua blah boh teuma kameng keu keureubeuen peu amphon desya – dua ploh peuet boh leumo agam, nam ploh boh bubiri agam, nam ploh boh kameng, dan nam ploh boh teuma aneuek bubiri nyang meu-umu sithon keu keureubeuen peudame. tieb-tieb geutamong le nabi musa u dalam khimah tuhan keu geujak peugah haba deungon tuhan, gobnyan geudeungoe su tuhan nyang geupeugah ubak gobnyan nibak ateuheh sinutob peuto peujanjian lamkawan bandua patong kerub. tuhan meufeureuman lom ubak nabi musa, "jak peugah kheueh laju ubak nabi harun bahwa bak watee jihnyan jipasang ban tujuh boh panyot nibak gaki panyot nyan, jihnyan haroh jipasang lagee nyan bagoe sampoe jipeupeungeueh bagian keue gaki panyot nyan." nabi harun geupeubuet laju peue nyang ka geupeurintah le tuhan ubak gobnyan nyan. gobnyan laju geupasang panyot nyan meuhadab u bagian keue nibak gaki panyot nyan. teupat panyotnyan, trok u ateuheh dan bungong-bungong piasan jihnyan teupeuget nibak meuh nyang teu seupoh, meunurot cuntoh nyang ka geupeuleumah le tuhan ubak nabi musa. tuhan meufeureuman lom ubak nabi musa, "gata peuaseng kheueh ureueng-ureueng lewi nibak ureueng-ureueng israel nyang laen dan gata peubuet kheueh laju upacara teupeusuci keu awaknyan deungon caranyoe: gata sitek kheueh u ateuheh awaknyan deungon ie keu upacara teupeusuci dan gata yue kheueh awaknyan jicuko bansaboh badan dan jirrah teuma peukayan jihnyan. deungon lagee nyan awaknyan ka suci. meunan cit gata yue kheueh ubak awaknyan jijak cok saboh leumo agam nyang mantong muda meunan cit deungon keureubeuen teuhidang nibak teupong meujampu minyeuk. meunan cit gata cok lom leumo agam nyang laen keu keureubeuen peu amphon desya. oh lheuhenyan gata peusapat kheueh banmandum

umat israel dan gatayue kheueh ubak ureueng lewi mangat jidong dikeue khimah ulon. umatnyan haroh jipeudeuk jaroe jihnyan u ateuheh ulee ureueng-ureueng lewi nyan, meunan cit nabi harun laju teuma geupeuseumah ureueng-ureueng lewi nyan sibagoe peuseumahan khusus nibak ureueng-ureueng israel keu ulon, mangat awaknyan hase jipeubuet iebadat ulon. meunan cit di ureueng lewi nyan haroh teuma jipeudeuk jaroe jihnyan u ateuheh ban dua boh leumo agam nyan; nyang saboh bah jipeuseumah sibagoe keureubeuen teupeu amphon desya, dan nyang saboh teuk keu keureubeuen nyang teutot. deungon upacaranyan ureueng lewi ka teupeu suci. gata peukhusus kheueh ureueng lewi nyan keu ulon dan tayue kheueh awaknyan jipeutimang nabi harun meunan cit deungon aneuek-aneuek jihnyan. deungon na upacaranyan gata ka tapeu siblahi ureueng lewi nibak ureueng israel nyang laen, mangat awaknyan ka jeuet keuhak milek ulon. oh ka lheuhen gata peubuet upacara teuseurah ureueng lewi nyan, awaknyan meuhak jimeubuet didalam khimah ulon. ulon ka ulon peujeuet awaknyan keugeunantoe aneuek tuha nyang agam nibak bansa israel; teuma awaknyan na kheueh khusus keu ulon. bak watee ulon poh mate banmandum aneuek tuha di nangroe muse, aneuek agam nyang tuha nibak tieb-tieb keuluwarga ureueng israel dan nibak tieb-tieb beulatang nyang lahe aneuek nyang keuphon nyan pi ka ulon peujeuet keu hak milek ulon nyang khusus. jinoe sibagoe keugantoe banmandum aneuek tuha israel, ulon cok ureueng-ureueng lewi, dan ureueng-ureueng lewi nyan ulon peujok laju ubak nabi harun meunan cit deungon aneuek-aneuek jih nyan, mangat awaknyan hase jimeutugaih keu ureueng israel di dalam khimah ulon. meunan cit mangat awaknyan jilakee mangat ulon peu amphon keu bansa israel beujeuet bansa nyan hana keunong le beuncana meunyeo awaknyan jijak to-to ubak teupat nyang paleng suci nyan." le sabab nyan, nabi musa, nabi harun dan banmandum umat israel jipeuseumah ureueng lewi nyan ubak tuhan, lagee nyang geupeurintah le tuhan ubak nabi musa. ureueng-ureueng lewi nyan jipeubuet upacara teupeu gleh droe dan meunan cit jirrah sampoe gleh teuma peukayan jihnyan, laju nabi harun geupeuseumah awaknyan sibagoe peuseumahan khusus ubak tuhan. gobnyan geupeubuet cit teuma upacara teupeu gleh keu awaknyan. ureueng israel banmandum jipeubuet peue mantong nyang geupeurintah le tuhan ubak nabi musa keuhai ureueng lewi nyan. deungon lageenyan ureueng lewi meuteume hak ji meukeureuja didalam khimah tuhan dimiyueb keumandoe nabi harun dan aneuek-aneuek geuhnyan. tuhan meufeureuman lom ubak nabi musa, "tieb-tieb ureueng lewi nyang meu-umu dua ploh limong thon u ateuheh, ureueng nyan haroh kheueh jipeubuet tugaih didalam khimah ulon, dan nibak umu limong ploh thon baro kheueh ureueng nyan teupeu beubaih nibak tugaih jih nyan. oh ka lheuhen nyan jihnyan jeuet jitulong ureueng lewi nyang laen nyang meutugaih didalam khimah ulon, teuma jihnyan kon ureueng meutugaih nyang teutab. meunan kheueh cara jih teu atoe buet-buet ureueng

lewi" nibak buleuen sa bak thon yang keudua oh ka ltheuh bansa israel jitinggai nanggroe meuse, tuhan meufeureuman ubak nabi musa di padang pasi sinai. kheun tuhan, "nibak tanggai peuet blah buleuen nyoe, phon nibak saat mata uroe jilhob, ureueng israel haroh jipeuraya uroe raya paskah meunurot peuratoran yang ka teupeuteutab." teuma nabi musa geuyue bansa israel mangat jipeuraya uroe raya paskah. awaknyan jipeuraya nyan di padang pasi sinai bak watee uroe seupot tanggai peuet blah buleuen sa. banmandum nyan awaknyan peubuet paih lagee yang geupeurintah le tuhan ubak nabi musa. teuma lamkawan awaknyan na meupadubdroe yang kuto sabab ka jimat manyet, deungon nyan awaknyan hana jeuet jipeuraya uroe raya paskah nibak uroe nyan. awaknyan laju jijak meuhadab nabi musa ngon nabi harun dan laju jipeugah, "kamoe ka kuto sabab ka kamoe mat manyet. teuma pakon kamoe geupeukeucuali sampoe hana jeuet kamoe peuseumah keureubeuen ubak tuhan meusigoe deungon syedara-syedara kamoe?" nabi musa geujaweueb, "neupreh dilee sampoe ulon meuteume peutunyok nibak po teu tuhan." tuhan geuyuelom ubak nabi musa mangat geujak peusampoe ubak bansa israel lagee nyoe, "meunyoe lamkawan gata atawa keuturonan gata na yang kuto atawa meunajih sabab ka jimat manyet atawa teungoh lam meuneujak yang jioh, ureueng nyan haroh kheueh jipeuraya paskah keu tuhan. teuma peurayaan nyan haroh teupeuna sibuleuen oh ltheuhnyan, na kheueh nibak malam tanggai peuet blah nibak buleuen yang keudua. tapeuraya kheueh uroenyan deungon gata makheun bubiri paskah meunan cit deungon ruti nyan hana meurago lom teuma deungon gulee phet. bek gata tinggai sapewe nibak peunajoh nyan sampoe an singoh beungoh, dan bek teuma gata peupatah meu sikrek pi nibak tuleung beulatang yang teupeuseumah ubak ulon. gata peuraya kheueh uroe raya paskah nyan yang sisuwai deungon sigala peuratoran jih. seubalek jih ureueng yang hana meunajih atawa hana kuto dan hana teuma mantong lam meuneujak, teuma nibak peurayaan uroe paskah, teuma ureueng yang laen jipeubuet keuwajeban paskah nyan, hana ulon anggab le sidroe ureueng nyan nibak umat ulon, sabab jihnyan hana jipeuseumah keureubeuen keu ulon bak watee yang ka teupeuteuntee. ureueng nyan haroh kheueh jitunggong banmandum akibat jih. meunyoe na lamkawan gata na ureueng aseng yang jikeuneuk peuraya uroe raya paskah, jihnyan haroh kheueh jipeuraya yang sesuai deungon banmandum peuratoran dan keuteutapan. hukom nyan keunong atueh banmandum ureueng, bah kheuehnyan ureueng israel meunan cit yang bukan." nibak uroe khimah tuhan teupeudong, teuka kheueh awan dan reudok yang teutob khimah nyan. oh watee malam sampoe an beungoh awan nyan deuhjih lagee apui. tieb watee awan nyan jiek, ureueng israel laju jireuloh khimah-khimah jih, laju teuma jibeurangkat. dan dipat awan nyan jitron, diteupatnyan teuma awaknyan jipeudong khimah. atueh peurintah tuhan bansa israel nyan jireuloh khimah dan atueh peurintah tuhan cit teuma

khimahnyan jipeudong lom teuma. seumantong awan nyan mantong na di atueh khimah tuhan, awaknyan teutab na tinggai di teupat nyan. meun-yoe awan nyan treb na di atueh khimah awaknyan, awaknyan keubit that taat ubak peuratoran tuhan dan hana teuma jibeurangkat nibak teupat nyan. teuma kadang-kadang na meupadub uroe mantong awan nyan na di atueh khimah awaknyan. pakriban kheueh mantong, peurintah tuhan kheueh yang peuteuntee awaknyan tinggai nibak saboh teupat atawa jijak lom teuma. kadang-kadang awan nyan teuma tinggai phon seupot trok beungoh uroe, dan bak watee awan nyan jiek nibak beungoh uroe, awaknyan pi laju beurangkat. pajan mantong awan nyan jiek, bah kheueh uroe meunan cit malam, awaknyan teutab cit jibeurangkat. simantong na awan nyan di atueh khimah tuhan, aleh nyan treb jih dua uroe, sibuleuen, sithon atawa leubeh, sitreb nyan teuma awaknyan tinggai di teupat nyan. meunyoe awan nyan jiek, baro kheueh awaknyan jibeurangkat hoe nyan jihak awannyan teuma. awaknyan tinggai nibak saboh teupat dan jibeurangkat u teupat nyan laen sesuai deungon peurintah tuhan yang geubri le tuhan ubak nabi musa. tuhan meufeureuman lom ubak nabi musa, "gata peuget kheueh dua boh beureuguih nibak pirak nyan teuseupoh keu teuhoi rakyat mangat jimeusapat atawa keu teuyue awaknyan mangat jijak. meunyoe ban dua boh beureuguih nyan jiyueb panyang su jih nyan muphom jih mandum umat haroh meusapat di seukeulileng gata dikeue pintoe khimah ulon. teuma meunyoe saboh mantong yang jiyueb, nyan saban cit muphom jih teuma keu ureueng patot-patot mantong yang haroh jimeusapat bansikeulileng gata. meunyoe beureuguih nyan teuyueb paneuk-paneuk su jih, nyan tanda jih sukee-sukee yang jipeudong khimah disiblah rot timu haroh ji beurangkat. meunyoe beureuguih nyan teuyueb paneuk-paneuk su jih keu yang keudua goe, teuma le sukee-sukee yang na disiblah seulatan haroh jibeurangkat. jadi su beureuguih yang paneuk-paneuk nyan tanda jih umat haroh jibeurangkat, seudangkan su beureuguih yang panyang nyan tanda jih umat haroh jimeusapat. beureuguih-beureuguih nyan haroh kheueh jiyueb le teungku-teungku imeum, aneuk-aneuk nabi harun. yang kheueh peuratoran yang haroh gata taat keu siumu masa. dan meunyoe gata tamuprang di nanggroe gata keu gata peuteuen droe atueh musoh nyan yang jiseurang, gatayueb kheueh laju beureuguih-beureuguih nyan. teuma ulon, tuhan allah gata, lon tulong dan lon peuseulamat gata nibak musoh-musoh gata nyan. meunan cit nibak uroe-uroe gata tameusuka ria, na kheueh nibak khanuri buleuen baro dan peurayaan-peurayaan yang laen teuma, beureuguih nyan haroh kheueh gatayueb bak watee gata peuseumah keureubeuen yang teutot dan keureubeuen peudame keu ulon. teuma ulon ku tulong gata. ulon kheueh tuhan allah gata." nibak thon yang keudua oh ka ltheuh bansa israel jitinggai nanggroe meuse, bak tanggai dua ploh buleuen dua, jiek kheueh awan nibak atueh khimah tuhan. laju ureueng israel meutalo-talo jijak

jitinggai padang pasi sinai, dan awan nyan laju jipioh bak watee awaknyan trok dipadang pasi paran. nyan kheueh phon-phon that awaknyan jibeurangkat ateueh peurintah tuhan meulalu nabi musa. dikeue that nyang beurangkat nyan na kheueh tantra nyang dimiyueb bupanji yehuda, pasokan deumi pasokan: nahason, aneuk aminadab peumimpin pasokan sukee yehuda, netaneel aneuk zuar peumimpin pasokan sukee isakhar, dan eliab aneuk helon nyang pimpin pasokan sukee zebulon. laju khimah tuhan nyan ji reuloh, dan jibeurangkat kheueh laju kawom gerson dan merari nyang gulam khimah tuhan nyan. oh ltheueh nyan beurangkat kheueh teuma tantra nyang dimiyueb bupanji keusatuan ruben, pasokan deumi pasokan: elizur aneuk syedeur nyang pimpin pasokan sukee ruben, selumiel aneuk zurisyadai geupimpin barasan sukee simeon, dan elyasaf aneuk rehuel geupimpin teuma barasan sukee gad. oh ltheuehnyan beurangkat kheueh ureueng-ureueng kehat nyang jiseuon barang-barang suci. meunyo awaknyan ka trok ubak tempat khimah-khimah nyang oh ltheuehnyan, khimah tuhan ka jipeudong lom teuma. oh ltheuehnyan jijak teuma tantra nyang dimiyueb bupanji sukee efraim, pasokan deumi pasokan: elisama aneuk amihud geupimpin pasokan sukee efraim, gamaliel aneuk pedazur jipimpin teuma pasokan sukee manasye, dan abidan aneuk gideon jipimpin teuma barasan sukee benyamin. akhe jih beurangkat kheueh teuma tantra nyang dimiyueb bupanji keusatuan sukee dan. awaknyan na kheueh peungawai dilikot banmandum keusatuan. awaknyan jijak pasokan deumi pasokan: ahiezer aneuk amisyadai nyang pimpin barasan sukee dan. pagiel aneuk okhran jipimpin teuma barasan sukee asyer, dan ahira aneuk enan jipimpin teuma barasan sukee naftali. nyan kheueh urutan barasan ureueng israel, pasokan deumi pasokan, tieb-tieb watee awaknyan jibeurangkat keu jiminah. nabi musa geupeugah ubak parui gobnyan, hobab aneuk rehuel ureueng midian, "kamoe teuma kamoejak u tempat nyang meunurot geukheun le tuhan teuma geubri keu kamoe. tuhan ka geubri jani nyang get keu ureueng israel. le sababnyan, gata seutot kheueh, kamoe teuma kamoe peuet nyang get keu gata." geujaweueb le hobab, "teurimong gaseh, teuma ulon meunyeut keuneuk woe u gampong droe ulon." "bek kheueh gata tinggai kamoe," geukheun le nabi musa, "gata hase jeuet keu ureueng peutunok rot ueh keu kamoe, sabab gata tateupeue dipat geutanyoe jeuet ta peudong khimah di padang pasi. meunyo gata taseutot, teuma banmandum nyang get nyang tuhan keureuja keu kamoe, teuma kamoe peubuet cit nyan keu gata." oh ka ltheueh bansa israel nyan jitinggai sinai, gunong tempat tinggai tuhan, awaknyan laju jijak lhee uroe treb jih. peuto peujanjian tuhan sabe jiba teupeu awai nibak awaknyan keu teujak mita tempat peudong khimah keu awaknyan. meunyo awaknyan jibeurangkat nibak tempat peukhimahan, awan tuhan sabe na di ateueh oh watee uroe. tieb-tieb watee peuto peujanjian nyang teuma jiba sajan, nabi musa geupeugah, "neubeudoh kheueh, ya tuhan, neupeu crebre kheueh musuh droe neueh sampoe ureueng nyang jibanci droeneueh

jiplung banmandum." dan tieb-tieb watee peuto peujanjian nyan trok ubak tempat peuniyoh, nabi musa geupeugah lom, "neugisa kheueh ya tuhan, ubak meuribee bansa israel." nibak siuroe bansa nyan jipeuphon aloh alah ubak tuhan keuhai keususahan awaknyan. watee geudeungoe awaknyan apoh apah, tuhan that-that beungeh dan laju geupeuteuka apui u ateueh awaknyan. apuinyan jimeu-eue laju lamkawan awaknyan dan laju tutong siladam nibak khimah-khimah awaknyan. ureueng-ureueng nyan laju jikliek-kliek jilakee tulung ubak nabi musa. laju nabi musa geumeudoa ubak tuhan, teuma lon kheueh laju apui nyan. sabab keujadian nyan, tempatnyan geuboh nan tabera, sabab nibak tempatnyan apui tuhan hu deungon raya that lamkawan awaknyan. nibak jijak ureueng-ureueng israel nyan na cit teuma lamkawan nyan ureueng aseng nyang seutot sajan. awaknyan meuheuet that keuneuk pajoh uengkot sie, dan meunan cit deungon ureueng israel ka teuma apoh apah. kheun awaknyan, "ah, cuba meunyo na uengkot sie keugeutanyoe! tanyoe teuingat that keu uengkot nyang tanyoe pajoh deungon pre mantong di nanggroo meuse, na boh timon, na boh timon bruek, pree, bawang mirah ngon bawang puteh! jinoenyoe geutanyoe ka habeh teunaga sabab hana peunajoh nyang laen seulaen manna mantong nyang deuh tanyoe kalon." rupa jih manna nyan lagee bijeh nyang ubit-ubit, hi jih puteh meujampu kuneng-kuneng. meunyo ka trok bak watee malam manna nyan rhot meusigoe-sigoe deungon ie mbon u ateueh khimah-khimah. oh ka beungoh uroe dumna ureueng laju jijak keudeh keunoe keu jijak peusapat boh manna nyan rhot nyan, atranyan jigileng sampoe jeuet keuteupong, dan jipeuget laju keu peunajoh kuwe nyang bulat teuma timpiek. rasajih lagee kuwe nyang teupanggang di ateueh apui nyang teujampu deungon minyeuk zaiton. nabi musa geudeungoe ureueng-ureueng israel nyan jimeu ok-ok, sira jidong meu hudom-udom dikeue khimah droe jih. teuma teuka kheueh beungeh tuhan nyang lumpah brat sampoe nabi musa meuras seudeh lagoena. dan geupeugah kheueh le gobnyan ubak tuhan, "pakon droeneueh ya tuhan neupeususah ulon lageenyoe? peu kheueh droeneueh ya allah hana neu galak keu ulon? pakon teuma droeneueh neupeujok tanggong jaweueb banmandum ureuengnyan u ateueh ulon? peu kheueh ulon nyang kandong atawa nyang peulahe awaknyan banmandum? pakon kheueh droeneueh neuyue ulon jeuet lagee sidroe ureueng dendayang nyang buet jih jiteumingkue aneuk manyak nyan ban lahe, sampoe ulon nyoe haroh lon useuha awaknyan sipanyang rot u nanggroo nyang droeneueh ka peujanji keu indatu awaknyan? neuengkeu kheueh nyan, awaknyan hana jipioh ji meurengkeu jilakee uengkot sie. dan dipat kheueh haroh lon mita uengkot sie nyan keu awaknyan? hana ek le ulon seuan tanggong jaweueb nyang raya ngon brat nyan; lumpah that brat tanggong jaweuebnyan ateueh ulon! meunyo droeneueh ya tuhan hana neuipoh neupeusanaut ulon lageenyoe sabe, neugaseh kheueh keu ulon; leueh get droeneueh poh mate mantong ulon nyoe jinoe cit teuma mangat ulon nyoe hana

le lon tanggong azeb deurita nyang lageenyoe." laju meufeuereuman kheueh tuhan ubak nabi musa sira geupeugah lageenyoe, "gata peusapat kheueh lamkawan bansa israel tujoh ploh droe ureueng patot-patot nyang jiaku sibagoe peumimpin bansa. gataba kheueh laju awaknyan ukeue ulon di dalam khimah ulon, laju gata yuedong awaknyan disinan bak bineh gata. ulon teuma lon treun lon jak peugah haba deungon gata nibak teupatnyan, dan siladum nibak kuasa nyang ka ulon bri keu gata, nyan teuma ulon bri keu awaknyan. dan deungon lagee nyan awaknyan ka hase jitulong gata jiseun tanggong jawueub ateuh bansa nyoe, dan bek gata seun tanggongnyan sidroe gata. jinoenyoe gata peugah kheuehnyoe ubak bansa nyan: peugleh kheueh droe gatanyan keu singoh beungoh; gata teuma tapajoh uengkot sie. tuhan ka geudeungoe gamato ngon apoh apah bahwa gata meuheuet that keuneuk pajoh uengkot sie, dan bahwa naseb gata leubeh jroh nibak watee di nanggroe meuse. jinoenyoe tuhan teuma geubri gata uengkot sie, dan gata ka hase gata makheun atranyan. gata teuma tapajoh uengkot sie nyan kon mantong treb jih si uroe atawa dua uroe, atawa limong uroe atawa lom siploh uroe, dan hana teuma treb jihnyan dua ploh uroe, teuma nyan sibeuleun peunoh gata pajoh atranyan, sampoe gata rhot bak saket dan muntah-muntah sabab tapajoh sie nyan. hainyan jeuet sabab gata ka tatulak tuhan nyang na lamkawan gata. dan lom teuma sabab le gata ka gamato dikeue geuhnyan dan meunyeusai bahwa gata ka gata tinggai tanoh meuse." laju nabi musa geupeugah lom ubak tuhan, "bansa nyang ulon pimpin nyoe meumeulemah na 600.000 droe. pakriban droeneuh peugah bahwa droeneuh teuma neubri uengkot sie siseb-seb jih nyang treb jih sibuleun peunoh? dipat kheueh na leumo ngon bubiri nyang meunanle nyang haroh teusie keu teupeutroe awaknyan? peu kheueh banmandum uengkot lam laot seb keu teubri makheun keu awaknyan?" geujawueub le tuhan, "peu kheueh keukuasaan ulon teubataih? gata hana treb le takalon peue nyang ulon peugah nyan bit-bit beutoi teujadi atawa hana!" teuma geuteubit kheueh laju nabi musa geujak peusampoe habanyan peue nyang ka geupeugah le tuhan ubak gobnyan. laju nabi musa geupeusapat tujoh ploh droe peumimpin laju geuyue dong awaknyan bansilingka khimah tuhan. laju tuhan geutreun di lam awan dan geupeugah laju ubak nabi musa. tuhan geucok laju siladum nibak kuasa nyang ka geubri ubak nabi musa dan laju geubri atranyan ubak bantujoh ploh droe peumimpin nyan. bak watee roh tuhan nyan geutreun u ateuh awaknyan, jipeuphon kheueh awaknyan jimeuhoi lagee nabi meuhoi teuma hana treb. dua lamkawan tujoh ploh droe peumimpin nyan, eldad dan medad, tinggai di dalam khimah dan hana jikak meusajan-sajan deungon nyang laen u dalam khimah tuhan. di khimah-khimah nyan roh laju jitreun u ateuh awaknyan, dan awaknyan bandua pi jipeuphon teumawok lagee su nabi. laju le sidroe ureueng jiplung u luwa keu jikak peugah ubak nabi musa peue nyang ka teujadi ateuh eldad dan medad. yosua bin nun, nyang ka jibantu nabi musa

yoh phon masa muda jihnyan, jipeugah ubak nabi musa, "neuyee kheueh awaknyan jipioh hai bapak!" nabi musa geujawueub, "keupeue gata tapike keu lon? ulon keubit meuharab seumoga tuhan geubri roh geuhnyan ubak banmandum bansa geuhnyan, dan geupeujeuet awaknyan banmandum hase jeuet ke-unabi!" laju nabi musa geujak woe lom ubak khimah meusigoe deungon ban tujoh ploh peumimpin bansa israel nyan. deungon hana teusangka-sangka tuhan geupeuteuka laju angen rot laot; di angen nyan laju jiba citem-citem puyoh nyang jipoe miyueb lagoena, teuma na simetee mantong di ateuh tanoh. citem nyan jipoe keudeh-keunoe di ateuh khimah-khimah nyan sampoe jioh na meupadub metee di bansikeulileng nyan. sipanyang ureueng, sipanyang malam dan sipanyang uroe oh lheureh nyan teuma, ureueng-ureueng laloe jidrob citem puyoh. tieb-tieb ureueng jidrob citem puyoh nyan na siribee kilo gram. citem-citem nyan awaknyan tabu bansikeulileng khimah-khimah mangat jeuet tho. seumantong jai uengkot sie nyang jipajoh, tuhan jeuet keu beungeh keu bansa nyan dan geupeutreu laju bala u ateuh awaknyan. laju teupat nyan geuboh nan, "jirat ureueng leuha", sabab disinan geupeukubu ureueng-ureueng nyang mate sabab le leuha jih. nibak teupat nyan bansanyan laju jiminah u daerah hazerot, laju jipeudong khimah nibak teupat nyan. nabi musa ka geucok sidroe ureueng inong kus geupeu jeuet keu peurumoh gobnyan, dan hainyan jipeujeuet keu alasan le miryam dan nabi harun keu jipeubrok nabi musa. ji kheun le awaknyan, "peu kheueh meulalu nabi musa mantong tuhan geupeugah haba? bukon kheueh meulalu geutanyoe tuhan geupeugah haba cit?" tuhan geudeungoe peue nyang awaknyan peugah. nabi musa na kheueh ureueng nyang get that lom miyueb ate, leubeh nibak banmandum ureueng nyang udeb ateuh bumoe nyoe. hana teusangka-sangka tuhan meufeuereuman ubak nabi musa, nabi harun dan miryam, "gata ban lhee droe tajak kheueh laju ubak khimah ulon." laju awaknyan geujak keunan dan tuhan laju geutreun didalam tameh awan. laju tuhan geudong dibabah pintoe khimah gobnyan dan geutawok nabi harun meunan cit deungon miryam. ban dua awaknyan laju geuseuk ngon geupeuto, dan tuhan geupeugah laju, "tadeungoe kheueh tuteo ulon nyoe! meunyo na lamkawan gata sidroe nabi, ulon peugah droe lon ubak jihnyan meulalu keumalon-keumalon, dan ulon meututeo deungon jihnyan didalam lumpo. teuma kon lageenyau deungon hamba ulon nabi musa. jihnyan ureueng nyang paleng seutia lamkawan umat ulon. dan ulon peugah haba deungon jihnyan meuhadab keue, seucara nyata dan hana teuma deungon teumeu hiem. bahpi ruman ulon pih ka jikalon! pakon gata tajeuet that talawan nabi musa, hamba ulon nyan?" tuhan get that beungeh keu awaknyan bandua, dan geubeudoh laju geujak. bak watee awan nyan jitinggai khimah tuhan, leumah kheueh miryam ka keunong peunyaket kulet nyang cukob mubahya; kulet jih puteh lagee gapeueh. bak watee nabi harun geupaleng ateuh miryam dan jingingi bahwa jihnyan ka keunong peunyaket, jipeugah laju ubak nabi

musa, "neutulung kheueh, hai teungku amphon, bek kheueh neupeubiyeu kamoe teuseksa kareuna desya nyang kamoe peubuet nibak bangai kamoenyoe. bek kheueh neupeubiyeu jihnyan lagee aneuek manyak lahe nyang ka mate, deungon asoe jih siladum ka brok." teuma geumeulakee kheueh le nabi musa ubak tuhan, "ya allah po, ulon lakee, neupeupuleh kheueh jihnyan!" tuhan geujawueub, "seukira jih muka jihnyan jiludah le bapak jih, bukan kheueh tujoh uroe treb jih haroh jitanggong malee? gata peuaseng kheueh jihnyan nibak khimah-khimah nyang treb jih tujoh uroe, dan oh ltheuhnyan jeuet jitamong lom teuma." ltheuhnyan laju geupeuteubiet miryam nibak khimah-khimah nyang treb jih tujoh uroe, dan bansa nyan hana jiminah nibak tempat nyan sampoe miryam jiwoe lom ubak khimah-khimah. oh ltheuhnyan awaknyan laju jittingai hazerot dan jipeudong khimah nibak padang guroon paran. tuhan meufeureuman lom ubak nabi musa, "nibak tieb-tieb sukee israel gata yue kheueh utosan sidroe nibak peumimpen-peumimpen jihnyan mangat jijak luem tanoh kanaan nyang teuma ulon bri keu bansa israel." banlagee peurintah po teu allah nyan, nabi musa geukirem awaknyan phon nibak padang pasi paran. banmandum ureueng nyan na kheueh peumimpen-peumimpen lamkawan ureueng israel: sukee peumimpen nyan kheueh ureueng nyang geukirem le nabi musa keu jijak meuluem u nanggroe nyan. hosea bin nun geugantoe nan jih le nabi musa jeuet keu yosua. bak watee nabi musa geuyue awaknyan mangat jibeurangkat, le gobnyan geupeuingat awaknyan, "gatajak kheueh rot blah utara, gata tuju ubagian seulatan tanoh kanaan, laju trok ubak daerah nyang meugunong. gata seulidek kheueh pakriban nanggroe nyan, peu kheueh peunduduek jih le atawa bacut, peu kheueh awaknyan teuga atawa leumoh. meunan cit gata peureksa peu kheueh nanggroe nyan get atawa hana, dan peu kheueh peunduduek jih tinggai di gampong-gampong nyang teubuka atawa didalam banda nyang meupageue ngon kuta. beutabah kheueh ate gata. gata kalon laju peu kheueh tanoh nyan suboe dan jai bak-bak kayee nyang udeb. bek tatuwoe gata peuwoe bacut boh-boh kayee nyang udeb disinan." bak watee nyan ka jipeuphon muboh bak anggo. teuma jijak kheueh laju awaknyan u arah utara dan jiseulidek nanggroe nyan phon nibak padang pasi zin disiblah seulatan u utara sampoe u banda rehob, rab ngon rot ueh u hamat. phon-phon that awaknyan jijak u bagian seulatan nanggroe nyan dan trok laju u banda hebron, teupat tinggai ureueng-ureueng ahiman, sesai dan talmi, keuturonan anak. hebron geupeuget bandanyan tujoh thon sigihlom banda zoan di nanggroe meuse. trok kheueh laju awaknyan di panton eskol. disinan awaknyan laju jikoh sikrek ranteng boh anggo nyang get that brat, seuhingga atranyan haroh teugalam deungon sikrek kayee le dua droe ureueng. meusigoe deungon nyan jiba cit teuma na meupadub boh boh geulima dan boh ara. teupatnyan jirasinan panton eskol sabab ranteng boh anggo nyang jikoh le ureueng israel disinan. oh kalheueh jiseulidek nanggroe nyan peuet ploh uroe treb jih, le awak

nyang jak meuluem jiwoe teuma dan awaknyan laju jibri laporan keuhai buet muluem nyang ka seulesoe jikeureuja nyan ubak nabi musa, nabi harun dan banmandum umat israel nyang teungoh meugumpoi di kades, diteungoh padang pasi paran. awaknyan jicalitra laju peue nyang ka awaknyan kalon dan jijok teuma laju boh-boh kayee nyang ka awaknyan pot atueh bak jih. kheun awaknyan ubak nabi musa, "kamoe ka kamoe seulidek nanggroenyang dan kamoe kalon teuma bahwa tanoh jih kaya ngon suboe, dan nyoe na bacut boh kayee nyang kamoe ba di sideh. banda awaknyan raya-raya lom teuma teupageue deungon kuta nyang kukoh, meunan cit kamoe kalon ureueng-ureueng nyang tinggai disinan badan jih raya-raya awaknyan na kheueh keuturonan gogasi disinan. ureueng amalek tinggai dibagian seulatan nanggroe nyan; ureueng het, yebus dan amori awaknyan tinggai di daerah nyang meugunong-gunong; seudangkan ureueng kanaan awaknyan tinggai di daerah di seupanyang laot dan di seutot talo krueng yordan." teuma kaleb jipeumangat ate ureueng-ureueng nyang meualoh alah ubak nabi musa. kheun kaleb, "nanggroe nyan haroh taprang dan tareubot saat nyoe cit teuma, kareuna geutanyoe seb that teuga keu ta peutaloe awaknyan." teuma ureueng-ureueng nyang jigisa deungon kaleb nyan jipeugah, "hana, geutanyoe hana hase taprang awaknyan. peunduduek nanggroe nyan leubeh teuga nibak geutanyoe." laju awaknyan jitabu haba seumeungeuet lamkawan ureueng israel keuhai nanggroe nyan awaknyan luem nyan. kheun awaknyan, "nanggroe nyan keubit mubahya, bahpi keu peunduduek jihnyan keudroe. ureueng nyang kamoe kalon disideh keubiet badan jih get that raya-raya. bit that kamoe kalon ureueng-ureueng nyan lagee gogasi, na kheueh keuturonan anak. teubandeng deungon awaknyan kamoe nyoe na kheueh bube darut, dan pasti lageenyah kheueh anggapan awaknyan keu kamoe." simalam suntok umat israel jikliek-kliek sira jimo. awaknyan jimeukrob-krob ubak nabi musa dan nabi harun sira jipeugah, "leubeh get geutanyoe mate di nanggroe meuse atawa di teungoh padang pasi nyoe! bah kheueh geutanyoe mate mantong! keupeue tuhan geuba geutanyoe u nanggroe nyan? euntrek geutanyoe mate bak tajak muprang dan ureueng-ureueng binoe meunan cit deungon aneuek-aneuek geutanyoe jidrob ngon jiteuen sibagoe ureueng nyang teutawan. bukan kheueh leubeh get geutanyoe tawoe mantong u nanggroe meuse!" laju awaknyan jimariet sabe keudroe-droe, "bah kheueh tapileh sidroe peumimpen dan tawoe lom u nanggroe meuse." nabi musa ngon nabi harun laju geusujut dikeue ureueng rame nyan. yosua aneuek nun dan kaleb aneuek yefune, dua droe lamkawan tukang meuluem nyan, laju jipriek peukayan jihnyan sibagoe meuduka cita. awaknyan jipeugah ubak banmandum rakyat nyan, "nanggroe nyang kamoe jak seulidek nyan luwa biasa get jih. meunyoe tuhan geubri ubak geutanyoe, gobnyan teuma geuba geutanyoe keunan dan geubri teuma ubak geutanyoe tanoh nyang kaya dan suboe nyan keu geutanyoe. bek kheueh gata lawan tuhan, dan bek kheueh teuma gata takot ubak ureueng-ureueng

nyang tinggai di nanggroë nyan, sabab deungon mudah geutanyoe ta peutaloe awaknyan. nyang lindong awaknyan ka jitinggai awaknyan, dan tuhan na deungon geutanyoe. le nyan, bek kheueh teumakot." banmandum rakyat ji ancam keuneuk rhom jihnyan deungon aneuk batee sampoe an mate. teuma siat nyan cit teuma awaknyan jikalon cahya tuhan nyang meuble-ble teuka di ateuh khimah geuhnyan. tuhan meufeureuman lom ubak nabi musa, "padub na treb teuk ureueng-ureuengnyoe jilawan ulon? trok an pajan awaknyan hana jitem meuman ubak ulon, bah kheueh ulon kale that ulon peubuet buet nyang ajaeb lamkawan awaknyan? ulon teuma kupeubinasa awaknyan deungon lon peutreun bala peunyaket nyang hase ji minah-minah. teuma gata ulon peujeuet keu sidroe ayah nibak saboh bansa leubeh rayeuk dan leubeh teuga nibak awaknyan!" laju nabi musa geupeugah lom ubak tuhan, "ya, tuhan, enteuk ureueng meuse jideungoe hai nyan! padahai deungon kuasa droeneueh tuhan ka neupeuteubiet kamoe lam nanggroë nyan, dan awaknyan teuma jipeugah ubak ureueng-ureueng di nanggroë nyoe, nyang ka jideungoe bahwa droeneueh ya, tuhan, nasabe neupeungon kamoe. meunan cit awaknyan ka jideungoe bahwa droeneueh neupeuleumah droe ubak kamoe bak watee droeneueh neujak dikeue kamoe lam taméh awan nibak watee uroe, dan lam taméh apui nibak watee malam. meunyoe droeneueh neupoh mate banmandum umat droeneueh nyoe, teuma bansa-bansa nyang ka ltheueh jideungoe keuhai nan droeneueh nyang meusyeyuh nyoe laju jipeugah bahwa droeneueh neupoh mate umat droeneueh dipadang pasi sabab droeneueh hana meuhase neuba awaknyan jijkaw u nanggroë nyang ka droeneueh peujanji nyan. sabab nyan, tuhan, ulon lakee, neutunok kheueh keukuasaan droeneueh ubak kamoe dan peubuet kheueh peue nyang ka tuhan peujanjinjan keu kamoe. droeneueh ka neupeugah, 'ulon, tuhan, hana bagaih beungeh. ulon kutunok geunaseh ulon dan seutia ulon deungon meulimpah-limpah. ulon kupeu amphon ureueng nyang meudesya dan jilawan ulon. bahpi meunan, keusalahan ureueng tuha teuma ulon balaih ubak aneuek-aneuek dan cucoe-cucoe jih, trok ubak keuturonan nyang keulhee dan nyang keu peuet.' jinoenyoe, ya, tuhan, sabab raya that geunaseh droeneueh dan droeneueh seutia ubak janji droeneueh, ulon meulakee deungon meuharab that-that, neupeu amphon kheueh desya ureueng-ureueng nyoe lagee droeneueh ka neupeu amphon awaknyan yoh phon awaknyan jitinggai tanoh meuse." geujaweueb le tuhan, "get kheueh, ulon teuma kupeu amphon awaknyan lagee nyang gata lakee nyan. teuma ulon meujanji deumi droe ulon dan deumi ulon nyang udeb dan meukuasa di ateuh bumoe nyoe, bahwa nibak ureueng-ureueng nyoe hana meusidroe pi nyang mantong udeb keu jitamong u dalam nanggroë nyang ka ulon peujanji ubak indatu awaknyan. sabab awaknyan hana jitem taat ubak ulon, dan hana putoh-putoh jicuba ulon. padahai awaknyan ka jikalon cahya nyang meuble-ble, dan buet-buet nyang ajaeb nyang ulon peubuet di tanoh meuse dan dipadang pasi. hanjeuet! awaknyan hana teuma jitamong u dalam nanggroë

nyan. lamkawan awaknyan nyang jilawan ulon, hana meusidroe pi nyang teuma jigilo nanggroë nyan. teuma hana lageenyan keu hamba ulon si kaleb. jihnyan teutab seutia ubak ulon. sabab nyan ulon teuma lon ba jihnyan u nanggroë nyang ka jitamong nyan. jinoenyoe ureueng amalek dan ureueng kanaan tinggai di ateuh dataran nyan. teuma daerahnyan jeuet keu daerah milek keuturonan si kaleb, hamba ulon nyan. singoh beungoh gata haroh tagisa dan gatajak laju u padang pasi u daerah lhok akaba." tuhan meufeureuman lom ubak nabi musa dan nabi harun, "sampoe an pajan ureueng-ureueng jeuhet nyan jimeu krob-krob ubak ulon? banmandum apoh apah awaknyan ka ulon deungoe. gata haroh tajaweueb awaknyan lageenyoe: tuhan geupeugah, 'ulon meusumpah bahwa deumi ulon nyang udeb bahwa gata teuma ulon peusanee lagee nyang gata peugah dikeue ulon. ulon tuhan, ka ulon peugah haba. gata ka meukrob-krob ateuh ulon. sabab nyan gata teuma mate, dan manyet-manyet gata teuma meusipreuk bansaboh padang pasi nyoe. seulaen kaleb dan yosua, hana meusidroe pi lamkawan gata nyang meu-umu dua ploh thon u ateuh nyang hase teuma jitamong u nanggroë nyang lon peujanji nyan. gata ka tapeugah bahwa aneuek-aneuek miet teuma jiteun. teuma awaknyan kheueh nyang teuma ulon ba u nanggroë nyang gata tulak nyan, dan nanggroë nyan teuma jeuet keu tanoh ie awaknyan. teuma di gata mate lam padang pasi nyoe. peuet ploh thon treb jih aneuek-aneuek gata jimeuwot-wot lam padang pasi. sabab le gata hana seutia, aneuek-aneuek gatanyan teuma meudeurita, sampoe ureueng nyang keuneulheuh lamkawan gata ka meuninggai donya. gata teuma tatanggong akibat-akibat le desya gata peuet ploh thon treb jih; sithon teutitong siuroe nibak tieb-tieb peuet ploh uroe nyang gata peuguna keu gata seulidek tanoh nyan. gata teuma tateupeue pakriban rasa jih meunyoe ulon kulawan gata! ulon meusumpah bahwa ulon teuma kupeubuet hainyan ateuh gata, ureueng-ureueng jeuhet nyang sipakat keujilawan ulon. lam padang pasi nyoe gata banmandum teuma mate. ulon, tuhan, ka lon peugah haba.' "ureueng-ureueng nyang ka geu-utus le nabi musa keujijkaw seulidek tanoh nyan, jiwoe lom sira jiba laporan nyang hana beutoi keuhai nanggroë nyan, dan le sababnyan ureueng israel meukrob-krob ubak tuhan. le sababnyan tuhan geuhukom awaknyan akhe jih awaknyan mate banmandum le sabab keunong peunyaket. nibak bandua blaih droe tukang muluem nyan teuma yosua ngon kaleb nyang mantong udeb. oh ka ltheueh nabi musa geupeusampoe feureuman tuhan ubak bansa israel, bansanyan laju meuduka cita deungon peudeh that. oh singoh nyan watee seuboh buta, meukeumah-keumah kheueh awaknyan keuneuk jijkaw ek ateuh pucak gunong. kheun awaknyan, "keubiet kamoe ka meudesya. teuma jinoenyoe kamoe ka siab keuneukjak ubak teumpat nyang geutunok le tuhan." teuma nabi musa geupeugah, "pakon gata jinoenyoe keuneuk taliengkeu peurintah tuhan? gata hana meuhase! bek gatajak, gata teuma jipeutaloe le musoh-musoh gata sabab tuhan hana meusajan gata. bak watee gata meuhadab ngon ureueng amalek dan ureueng

kanaan nyan, gata teuma mate lam prang nyan. tuhan hana meusajan gata sabab gata hana taat ubak gobnyan." teuma le ureueng-ureueng israel nyan teutab neukat cit jikeuneuk ek ateuh pucak gunung nyan, bahpi nabi musa dan peuto peujanjian hana jitinggai khimah-khimah nyan. teuma le ureueng amalek dan ureueng kanaan nyang na tinggai disinan laju jiprang dan jipeutaloe banmandum ureueng-ureueng israel dan jipeucrok awaknyan sampoe trok u horma. tuhan geubri lom ubak nabi musa peuratoran-peuratoran nyoe nyang haroh jipeubuet le bansa israel di nanggroe nyang teuma geubri le tuhan keu awaknyan. keu keureubeuen nyang teutot ngon keureubeuen teupeu ltheuh kaoi meunan cit keureubeuen keugalak droe atawa lom keureubeuen nibak peurayaan-peurayaan biasa, gata jeuet tapeuseumah ubak tuhan: leumo agam, bubiri agam, bubiri atawa kameng. bee keureubeuen nyang lumpah mangat nyan keubit get that galak ate tuhan. soe mantong nyang jipeuseumah domba atawa kameng keu keureubeuen nyang teutot keu tuhan, meunan cit jiba teuma meusigoe ngon tieb-tieb saboh beulatang peulara nyan, sikilo gram teupong teujampu deungon si aree minyeuk zaiton keu keureubeuen sajian, dan meunan cit teuma deungon si aree ie anggo. meunyo nyang jibri keu keureubeuen nyan na kheueh saboh bubiri agam, bah kheueh teuma jipeuseumah dua kilo gram teupong teujampu teuma deungon si aree si teungoh minyeuk zaiton keu keureubeuen sajian, dan siaree siteungoh teuma ie anggo. bee keureubeuen nyang lumpah mangat nyan keubit that-that galak ate tuhan. meunyo nyang jikeureubeuen na kheueh saboh leumo agam keu keureubeuen nyang teutot atawa keureubeuen teupeuleuh kaoi atawa keureubeuen peudame, meunan cit teuma jipeuseumah lhee kilo gram teupong nyang teujampu deungon dua aree minyeuk zaiton keu keureubeuen sajian, dan dua aree teuma ie anggo. bee keureubeuen nyang lumpah mangat nyan keubit that-that galak ate tuhan. nyan kheueh nyang haroh jipeuseumah meusigoe deungon tieb-tieb saboh leumo agam, bubiri agam, bubiri atawa kameng. meunyo nyang teukeureubeuen nyan leubeh nibak dua boh beulatang peulara, teuma peuseumahan teupong, minyeuk dan ie anggo nyan pi haroh teutamah meunurot peubandingan jih. hainyan haroh jipeubuet le tieb-tieb ureueng israel bak watee jihnyan jipeuseumah keureubeuen. bee keureubeuen nyang mangat nyan lumpah that galak ate tuhan. meunyo na ureueng aseng nyang tinggai lamkawan gata, bah kheuehnyan keu sikeujab mantong meunan cit keuneuk tinggai teutab, jihnyan haroh kheueh jitaat ubak banmandum meunyo jihnyan jipeuseumah keureubeuen peunajoh nyang teupeu mangat ate tuhan. banmandum hukom dan peuratoran na kheueh saban keu banmandum gata dan keu ureueng aseng nyang na tinggai lamkawan gata, sabab gata dan ureueng nyan na kheueh saban nibak mata tuhan. dan hainyan teutab na keu siumu masa. tuhan geubri lom ubak nabi musa peuratoran-peuratoran nyoe nyang haroh jipeubuet le bansa israel di nanggroe nyang teuma geubri le tuhan keu awaknyan. meunyo gata ka gata peuphon

pajoh peue nyang jipeuhase le nanggroe nyan, gata haroh pinah siladam keu teupeuseumah khusus keu tuhan. meunyo droe gata tatot ruti nyang teupeuet nibak teupong gandom nyang phon-phon that teukoh, rutinyan haroh teupeuseumah sibagoe keureubeuen khusus keu tuhan. cara teupeuseumah atranyan saban cit lagee cara teupeuseumah gandom nyang phon nyang ka gata gileng. keu siumu masa tieb-tieb ruti nibak gandom nyang phon teukoh nyan haroh kheueh gata bri sibagoe peuseumahan khusus keu tuhan. meunyo gata deungon hana teusaja ka teupeulalee sapeue-sapeue nibak peuratoran nyang ka geubri le tuhan ubak nabi musa, phon nibak uroe tuhan geubri peuratoran nyan dan seulanjut jih treun meutreu, dan buet nyang salah nyan jipeubuet sabab umat hana jiteupeu peuratoran, deungon nyan banmandum umat haroh kheueh jipeuseumah saboh leumo agam keu keureubeuen nyang teutot. meusigoe deungon nyan haroh teuma teupeuseumah keureubeuen sajian dan ie anggo lagee nyang ka teupeu teuntee. bee keureubeuen nyang mangat nyan keubit that-that galak ate tuhan. seulaen nibak nyan haroh teuma teukeureubeuen saboh bubiri agam keu keureubeuen teupeu amphon desya. laju le imeum haroh teuma jipeubuet upacara teupeu amphon desya keu umat. teuma awaknyan geupeu amphon sabab buet jih nyang salah nyan awaknyan peubuet deungon hana jisaja, dan sabab awaknyan ka jiba keureubeuen teupeu amphon desya meunan cit keureubeuen nyang teutot ubak tuhan. banmandum umat israel dan ureueng aseng nyang na tinggai di teupat awaknyan teuma geupeu amphon, sabab banmandum nyan karoh nibak buet nyang salah nyang hana teusaja nyan. meunyo na sidroe ureueng mantong meudesya deungon hana jisaja, teuma ureueng nyan bah kheueh jikeureubeuen saboh kameng inong nyang meu-umu sithon sibagoe keureubeuen peu amphon desya. di imeum haroh geupeuna upacara peu amphon desya dikeue tuhan, mangat ureueng nyan geupeu amphon teuma desya jihnyan. peuratoran nyan meulaku keu soe mantong nyang jipeubuet desya deungon hana jisaja, bah kheueh nyan ureueng israel meunan cit teuma deungon ureueng aseng nyang na tinggai teutab di lamkawan awaknyan. teuma meunyo sidroe ureueng israel atawa ureueng aseng deungon jisaja jipeubuet desya, jihnyan ka jipeujayah tuhan. ureueng nyan haroh teuhukom mate, sabab jihnyan ka jilawan tuhan dan deungon jisaja ka jilawan peurintah tuhan. ureueng nyan mate sabab le salah jih keudroe. bak watee ureueng israel ka na dipadang pasi, na sidroe ureueng agam teungoh ji koh kayee apui nibak uroe sabat. ureueng nyan laju jiba jak meuhadab ubak nabi musa, nabi harun dan banmandum umat, laju ureueng nyan jiteuen sabab gohlom jeulaih peue nyang teupeubuet u ateuh ureueng nyan. laju tuhan meufeureuman ubak nabi musa, "ureueng nyan haroh teuhukom mate. ureueng nyan haroh gataba u luwa khimah-khimah nibak teupat nyan banmandum umat haroh jirhom ureueng nyan deungon batee sampoe mate." teuma banmandum umat laju jiba ureueng nyan u luwa khimah-khimah dan laju jirhom ureueng nyan deungon batee sampoe mate,

lagee nyang ka geupeurintah le tuhan. tuhan geuyue lom ubak nabi musa geuyuejak peusampoe ubak bansa israel, "gata peuget kheueh rumbai-rumbai nibak ujong peukayan gata dan gata ikat kheueh talo ijo nibak tieb-tieb rumbai. nyan haroh gata peubuet treun meutleun. rumbai-rumbai na kheueh keu teu peungat: tieb-tieb watee gata kalon, gata ingat teuma sigala peurintah ulon dan gata taat teuma. dan sabab nyan gata hana teuma gata tuwae keu ulon keu gata seutot keuheundak dan hasrat droe gata nyan. rumbai-rumbai nyan teuma teupeu ingat gata mangat gata taat ubak banmandum peurintah ulon, sampoe gata beutoi-beutoi jeuet keu hak milek lon. ulon kheueh tuhan allah gata; ulon nyang ba gata teupeuteubit nibak nanggro meuse mangat ulon jeuet keu allah gata, ulon kheueh tuhan." korah aneuek yizhar nibak kawom kehat, sukee lewi, jimeubeurontak ubak nabi musa. jihnyan jisukong teuma le dua droe nibak sukee ruben, na kheueh datan dan abiram aneuek-aneuek eliab, dan on aneuek pelet, dan le 250 droe peumimpen meusyehul nyang jipileh le rakyat. awaknyan meusigoe jijak meuhadab ubak nabi musa dan nabi harun dan jipeugah, "kaseb nyan, hai nabi musa! banmandum umat israel ka teupeukhusus keu tuhan, dan tuhan na lamkawan geutanyoe banmandum. teuma pakon kheueh neu anggab droeneueh leubeh manyang nibak umat tuhan?" geudeungoe hai nyan, nabi musa laju geusujut ubak tanoh sira geumeudoa ubak tuhan. laju le gobnyan geupeugah ubak korah dan peungikot-peungikot jihnyan, "singoh beungoh tuhan teuma geutunyok ubak geutanyoe soe kheueh nyang po gobnyan, dan soe teuma nyang teupeukhusus keu geuhnyan. ureueng nyang geupileh le gobnyan teuma geubri jijak peurab ubak gobnyan. singoh beungoh gata dan bubena peungikot gata jijakcok laju teumpat-teumpat apui, laju atranyan jipasoe deungon ngeue apui dan dupa, laju atranyan jiba ubak miseubah. bah kheueh geutanyoe kalon singoh soe kheueh lamkawan geutanyoe nyang ka geupileh le tuhan. kaseb kheueh nyan, hai ureueng-ureueng lewi!" seulanjut jih nabi musa geupeugah ubak korah, "deungoe kheueh, hai ureueng-ureueng lewi! peu kheueh neupike nyoe soai ubit bahwa po teu allah ureueng israel geupileh gata lamkawan ureueng-ureueng israel mangat gata jeuet tapeurab ubak gobnyan, dan gata meutugaih nibak khimah gobnyan, lom gata meukeureuja keu umat israel dan gata peutimang awaknyan? gata, korah, dan banmandum ureueng lewi ka meuteume keuhoreumatan nyan nibak tuhan – dan jinoenyoe gata tatuntot keu beuhase teuma jeuet keu imeum! meunyeoe gata deungon peungikot-peungikot gata hana jipioh meu ok-ok ubak nabi harun, ngon lagee nyan gata talawan tuhan!" laju nabi musa geuyue jaktawok datan dan abiram, teuma awaknyan jipeugah, "kamoe han kamoe tem teuka! gohlom seb droeneueh neuba kamoe meuteubiet nibak tanoh meuse nyang suboe nyan keu neupoh mate kamoe di padang pasi nyoe? haroh kheueh droeneueh neupeurintah kamoe? nyang jikeubiet jih droeneueh hana neuba kamoe u tanoh nyan suboe, atawa neubri keu kamoe blang-blang dan lampoh-lampoh

anggo jeuet keuhak milek pusaka kamoe! jinoenyoe droeneueh neu keuneuk peungeuet kamoe! hana, kamoe hana kamoe tem teuka" nabi musa bit that beungeh dan geupeugah ubak tuhan, "tuhan, bek kheueh neuteurimong peuseumahan awaknyan. han tom na ulon peurugoe sidroe ureueng pih nibak awaknyan; bahpi saboh beulatang keuleudee hantom na ulon cok nibak awaknyan." laju geupeugah le nabi musa ubak korah, "gata teuka kheueh singoh uroe ubak khimah tuhan ngon gataba sajan ban 250 droe peungikot gata. meunan cit deungon nabi harun na disideh. gata haroh gataba teumpat apui gata maseng-maseng. gata pasoe kheueh dupa di dalam teumpat apui nyan, laju atranyan gata peuseumah kheueh ubak tuhan." teuma tieb-tieb ureueng nyang jijak cok teumpat apui jihnyan, laju jipasoe didalam nyan deungon ngeue apui meunan cit deungon dupa, laju gata dong dipintoe khimah tuhan meusajan ngon nabi musa dan nabi harun. oh kalheueh nyan korah laju jipeusapat banmandum umat, dan awaknyan laju jidong meubareh muhadab keue ngon nabi musa dan nabi harun di babah pintoe khimah tuhan. hana teusangka-sangka mantong banmandum umat deuh jikalon cahya hu tuhan nyang meuble-ble. laju tuhan meufeuruman ubak nabi musa dan nabi harun, "gata yue surot kheueh laju nibak ureueng-ureueng nyan; ulon keuneuk peubinasaa awaknyan jinoenyoe cit teuma." teuma nabi musa dan nabi harun laju geusujut ubak tuhan sira geupeugah, "ya allah po, droeneueh nyang bri udeb ubak mahluk nyang udeb. meunyeoe teuma na sidroe mantong nyang meudesya, peu kheueh droeneueh neubeungeh keu banmandum umat droeneueh?" tuhan meufeuruman ubak nabi musa, "gata yue kheueh laju bubena ureueng nyan ji minah nibak khimah-khimah korah, datan dan abiram." laju nabi musa deungon ji-ireng le peumimpen bansa israel, geujak u teumpat datan dan abiram. nabi musa geupeugah bak ureueng-ureueng israel, "gata weeh kheueh laju nibak khimah ureueng-ureueng jeuhet nyoe dan bek gatamat sapeue pi nibak hareuta milek awaknyan. meunyeoe gata hana tapateh, gata teuma geupeubinasaa meusigoe deungon awaknyan sabab le desya-desya nyang awaknyan peubuet." laju ureueng-ureueng israel nyan jiweeh nibak khimah-khimah korah, datan dan abiram. datan dan abiram ka jiteubiet dan ka jidong di babah pintoe khimah awaknyan maseng-maseng, meusajan deungon aneuek dan peurumoh jih nyan. laju nabi musa geupeugah, "deungon nyoe gata teuma neuteupeue bahwa tuhan ka geu utus ulon keu lon peubuet banmandum nyoe dan bahwa nyan bukan keuheundak ulon keudroe. meunyeoe ureueng nyan mate deungon cara biasa, deungon hana hukom sapeue pih nibak po teu allah, nyan kheueh tanda jih tuhan hana geu utus ulon. teuma meunyeoe tuhan geupeubuet sigala sesuatu nyang hantom gata deungoe nyang ka nyoe, dan meunyeoe tanoh beukah keu juet awaknyan meusigoe deungon hareuta milek awaknyan, sampoe awaknyan jitamong udeb-udeb u dalam donya ureueng mate, gata teupeu kheueh le gata bahwa ureueng-ureueng nyan na kheueh nyang lawan tuhan." hana treb teuma oh kheueh nabi musa nyan

geupeugah haba, laju tanoh dimiyueb gaki awaknyan beukah, dan laju jiuwet awaknyan deungon banmandum keuluwarga awaknyan meunan cit banmandum peungikot korah, dan banmandum hareuta beunda awaknyan. dan rhot kheueh awaknyan udeb-udeb u dalam donya ureueng mate deungon banmandum hareuta awaknyan. tanoh nyang beukah nyan laju teuma meucob lom dan awaknyan gadoh sapsansapa jiuwet le bumoe. banmandum ureueng israel nyang na disinan laju jipeuplueng droe bak watee jideungoe awaknyan jitawok, "jak plueng! enteuk geutanyoe jiuwet le bumoe!" laju tuhan geupeutreun teuma apui dan di apuinyan laju teuma jitot sampoe hangoh ban 250 droe nyang jipeuseumah dupa nyan. tuhan meufeureuman lom ubak nabi musa, "gata yue kheueh eleazar aneuek imeum harun jeuet jijak beutot teumpat-teumpat apui nibak runga-rungka nyang teutot dan meusipeureuk abee ngon adang nyan u teumpat nyang laen, sabab teumpat apui nyan na kheueh suci. barang-barang nyan na kheueh nyan jipeuseumah le ureueng nyang ka geuhukom mate sabab desya nyang jipeubuet. barang-barang nyan na kheueh suci ngon gleh sabab ka jipeuseumah dikeue tuhan, sabab nyan bah kheueh jeuet keu leumpeng-leumpeng lipeh keulapek blah luwa miseubah. hainyan teuma jeuet keu peuingat keu bansa israel." teuma di imeum eleazar laju geujak cok teumpat-teumpat apui nyan dan geuyue laju ureueng laen jijak teumpa mangat hase jeuet keu leumpeng-leumpeng nyang lipeh jeuet keu keulapek blah luwa miseubah. nyan na kheueh sibagoe peuingat keu bansa israel bahwa seulaen keuturonan nabi harun, hana meusidroe pi jeuet jijak ubak miseubah keu jijak tot dupa keu tuhan. ureueng nyang iengkeue peuratoran nyan teuma geupeubinasaa lagee korah dan peungikot-peungikot jihnyan. banmandum nyan geupeubuet lagee nyang geupeurintah le tuhan ubak eleazar rot nabi musa. oh singoh beungoh nyan banmandum umat israel jibeungeh ubak nabi musa ngon nabi harun. awaknyan jipeugah, "gata poh mate umat tuhan." teungoh awaknyan jimeusapat jilawan nabi musa ngon nabi harun, awaknyan jipaleng ubak khimah tuhan, dan deuh laju jikalon awan ka teutob u ateuhe khimah nyan, dan leumah kheueh cahya keuhai tuhan teuka. nabi musa dan nabi harun laju geujak ubak khimah tuhan nyan, laju tuhan meufeureuman ubak nabi musa, "gata surot kheueh nibak awaknyan. ulon keuneuk peubinasaa awaknyan nibak teumpat nyan cit teuma." ban dua awaknyan pi laju geusujut geuseumah, laju nabi musa geupeugah ubak nabi harun, "neucok kheueh laju teumpat apui droeneuh, neupasoo laju deungon ngeue apui nibak miseubah dan neupasoe teuma deungon dupa di ateuhe nyan. neuba kheueh laju deungon beubagaih ubak umat dan neupeugit kheueh laju upacara peu amphon desya keu awaknyan. bagaih! meureuka tuhan nyan ka lumpah that brat dan bala ka jipeuphon." nabi harun laju geupeubuet peue nyang geupeugah le nabi musa nyan. gobnyan laju geuplueng lamkawan umat nyang teungoh meusapat nyang ka jipeuphon keunong peunyakot bala nyan. teuma nabi harun laju geupeudeuk dupa nyan di ateuhe ngeue apui, dan geupeubuet laju upacara peu

amphon desya keu umat nyan. peunyakot bala nyan laju teudong, dan nabi harun na lamkawan ureueng nyang mantong udeb dan nyang ka mate. nyan mate bak watee nyan na 14.700 droe, hana jitamong keunan nyang mate nibak beurontak korah. oh kalheueh bala nyan jipioh, nabi harun laju geugisa ubak nabi musa nibak babah pintoe khimah tuhan. tuhan meufeureuman ubak nabi musa, "gata yue kheueh ureueng israel mangat jijok keu gata dua blah boh tungkat, tieb-tieb sukee saboh tungkat, nyang haroh jijok le peumimpin sukee. tuleh kheueh nan nibak tieb-tieb peumimpin nyan nibak tungkat jih, dan nan nabi harun nibak tungkat sukee lewi. keu tieb-tieb peumimpin sukee haroh na saboh tungkat. gata ba kheueh laju tungkat-tungkat nyan ukeue khimah ulon dan gata keubah laju dikeue peuto peujanjian, nibak teumpat ulon lazem meurumpok deungon gata. tungkat ureueng nyang ulon pileh laju meutarok. deungon cara nyan ulon teuma laju lon peupioh apoh apah keu ureueng-ureueng nyang hana pioh-pioh ji meu krob-krob ateuhe ulon." hainyan geupeusampoe le nabi musa ubak ureueng-ureueng israel. laju le peumimpin awaknyan jiseurah ubak gobnyan saboh tungkat keu tieb-tieb peumimpin sukee. banmandum nyan na dua blah boh, dan tungkat nabi harun na lamkawan nyan. laju nabi musa geukeubah tungkat-tungkat nyan di dalam khimah tuhan dikeue peuto peujanjian. oh beungoh singoh nyan, bak watee nabi musa geutamong udalam khimah tuhan, leumah geukalon bahwa tungkat nabi harun, na kheueh tungkat sukee lewi, ka jitimoh tarok. tungkat nyan meubungong, dan jipeuhase boh keutapang nyang ka tuha! nabi musa laju geucok banmandum tungkat nyan geutunyok laju ubak ureueng israel. awaknyan jikalon peue nyang ka teujadi, laju tieb-tieb peumimpin jijakcok teuma tungkat jih nyan lom. oh lueuh nyan tuhan meufeureuman lom ubak nabi musa, "gata keubah kheueh lom tungkat nabi harun nyan dikeue peuto peujanjian. tungkat nyan haroh teukeubah sibagoe peuingat keu bansa israel nyang galak beurontak nyan nyang toh jihnyan teuma mate meunyoe awaknyan hana jipioh ji meu-ok-ok." nabi musa laju geupeubuet peue nyang geupeurintah le tuhan ubak gobnyan. le ureueng israel laju jipeugah ubak nabi musa, "meunyoe meunan, cilaka kheueh kamoe! kamoe nyoe teuma binasa! meunyoe ureueng nyang jipeutoe ubak khimah tuhan haroh mate, deungon nyan ka hanale harapan keu kamoe!" tuhan meufeureuman ubak nabi harun, "gata, aneuek-aneuek gata dan ureueng-ureueng lewi haroh jitanggung akibat buet-buet salah nyang teujadi didalam khimah ulon, teuma gata dan aneuek-aneuek gata mantong nyang tanggung buet-buet nyan salah nyang jipeubuet le imeum. kawom syedara gata, sukee lewi, haroh gata peuroh sajan sibagoe peumbantu nibak peulaksanaan tugaih gata dan tugaih aneuek-aneuek gata. sukee lewi haroh kheueh jipeubuet keuwajiban droe jih ateuhe gata dan jipeubuet tugaih jih nyan di khimah ulon, teuma awaknyan hana jeuet jipeutoe ubak miseubah atawa jimat beunda-beunda suci di ruweung suci. meunyoe awaknyan ji iengkeue keu peuratoran nyan, bah kheueh awaknyan meunan cit gata, teuma mate.

awaknyan haroh jimeubuet meusapat deungon gata dan jipeubuet tugaih-tugaih nyang na hubongan deungon peulayanan di dalam khimah ulon, teuma nyang hana teubri hak keu nyan, teutam bek jijak buet meusajan deungon gata. teuma gata, nabi harun dan aneuk gata kheueh nyang jeuet meutugaih di ruweueng suci dan miseubah, mangat ulon bek le beungeh keu bansa israel. nyang sikeubiet jih, ulon ka lon pileh kawom syedara gata ureueng-ureueng lewi di lamkawan bansa israel sibagoe meuneubri keu gata. awaknyan ka teupeukhusus keu ulon, keu jijak peutimang di khimah ulon. teuma gata dan aneuk-aneuk gata mantong nyang jeuet jimeutugaih sibagoe imeum, nibak sigala meuneubiet nyang na hubongan deungon miseubah dan peue nyang na meuteume diteungoh-teungoh ruweueng mahasuci. nyang kheueh tanggong jawueb gata, sabab ulon ka lon bri keugata jabatan sibagoe imeum. tieb-tieb ureueng nyang hana jipoe hak nyan teuhukom mate meunyoe jipeutoe ubak barang-barang nyang suci nyan." tuhan meufeureuman lom ubak nabi harun, "ingat kheueh! banmandum peuseumahan khusus nyang jijok keu ulon nyang hana teutot nyan na kheueh jeumba gata. nyan kheueh jeumba gata nyang ka teupeuteuntee keu siumu masa. nyan ulon jok ubak gata dan keu banmandum keuturonan gata. nibak peuseumahan-peuseumahan nyang paleng gleh lom suci nyang hana teutot di ateuh miseubah, nyang seulanjut jih nyoe na kheueh keu gata: keureubeuen sajan, keureubeuen peu amphon desya dan keureubeuen geunantoe rugoe. banmandum nyan peuseumahan suci nyang ka jeuet jeumba gata dan jeumba aneuk-aneuk gata. nyan na kheueh suci keu gata, le nyan, atranyan bah kheueh gata pajoh nibak teupat nyang suci teuma. teuma ureueng agam mantong nyang jeuet jipajoh atra nyan. banmandum peuseumahan khusus nyang laen nyang jipeuseumah le ureueng israel, keu ulon, nyan na kheueh keu gata cit teuma. ulon kubri keu gata meunan cit keu aneuk-aneuk gata nyang agam dan nyang inong. peuratoran nyan teutab na keu siumu masa. soe mantong anggota keuluwarga gata nyang hana kuto jeuet ji pajoh atra nyan. ulon jok keu gata banmandum nyang paleng get nibak hase teupot nyang phon nyang jipeuseumah le ureueng israel keu ulon tieb-tieb thon, na kheueh minyeuk zaiton, ie anggo dan gandom. banmandum nyan na kheueh keu gata. tieb-tieb anggota keuluwarga gata nyang hana kuto jeuet jipajoh atra nyan. peue-peue mantong nyang na di tanoh israel nyang ka teupeukhusus keu ulon, nyan na kheueh keu gata. banmandum nyang phon-phon lahe lamkawan manusia meunan cit nibak beulatang peulara nyang jipeuseumah le ureueng israel keu ulon, na kheueh keu gata cit teuma. teuma gata haroh tateuboh aneuk-aneuk gata nyang tuha, meunan cit aneuk beulatang hareuem nyang phon lahe. aneuk-aneuk haroh teuteuboh bak watee jihnyan meu umu sibuleuen. yuem nyang ka teupeuteuntee keu yuem nyan na kheueh limong peng pirak, meunurot yuem nyang lazem nibak khimah ulon. teuma meunyoe leumo, bubiri dan kameng nyang phon-phon lahe, nyan hana jeuet teutuboh.

beulatang nyan meuteulak keu ulon dan nyan haroh teukeureubeuen. gata siram kheueh darah jihnyan nibak miseubah dan gatatot kheueh teuma gapah jihnyan sibagoe keureubeuen. bee jih nyang mangat nyan keubiet that-that galak ate ulon. asoe sie nyan na kheueh keu gata, saban cit lagee dada dan pha jih nyang siblahi uneuen nyang jipeuseumah lom nyang jijok keu ulon. banmandum peuseumahan khusus nyang jiba le ureueng israel ubak ulon, nyan ulon bri keu gata dan keu aneuk-aneuk gata agam ngon inong. peuratoran nyan teutab na keu siumu masa dan jeuet keu ngon ikat peujanjian nyang hana hase teupeubateue ulon deungon gata dan keuturonan gata." tuhan meufeureuman lom ubak nabi harun, "gata hana meuteume waresan meusapeue pi. dinanggroe nyang ulon peujanjinyan hana meusaboh keubeueng tanoh pi nyang jeuet keu hak milek gata. ulon, tuhan, na kheueh jeumba nibak waresan gata." geupeugah le tuhan ubak nabi harun, "banmandum peuseumahan siper siploh ureueng israel ulon jok keu ureueng-ureueng lewi. nyan kheueh hak wareh awaknyan keubuet awaknyan di khimah ulon. ureueng-ureueng israel nyang laen hana jeuet jipeutoe ubak khimah nyan mangat awaknyan bek jipeuteuka desya dan hukuman mate ateuh droe awaknyan phon saat nyoe teuma ureueng lewi mantong kheueh nyang jeuet ji uroh khimah ulon dan ateuh jih jitanggong banmandum tanggong jawueb ateuh buet jihnyan. peuratoran nyan teutab na cit teuma ubak keuturonan gata sampoe siumu masa. ureueng lewi hana jiteume waresan di israel, sabab keu hak wareh awaknyan ka ulon jok banmandum peuseumahan siper siploh nyang jipeuseumah le ureueng israel keu ulon na kheueh sibagoe meuneubri nyang khusus. nyang kheueh sabab jih keuhai ureueng lewi ulon peugah bahwa awaknyan hana meuteume jeumba hak wareh di israel." tuhan geuyue lom ubak nabi musa mangat jipeusampoe peurintah nyoe ubak ureueng lewi: meunyoe gata tateurimong nibak ureueng israel peuseumahan siper siploh nyang geuseurah le tuhan ubak gata keu jeumba gata, atra nyan haroh teuma gata jok siper siploh keu tuhan keu peuseumahan khusus gata. peuseumahan khusus nyan teuanggab saban deungon peuseumahan gandom baro dan ie anggo nyang baro teuma. deungon lageenyang gatapi haroh tapeuseumah keu peuseumahan khusus ubak tuhan siladom nibak peuseumahan siper siploh ureueng israel. peuseumahan khusus nyan haroh gata jok ubak imeum nabi harun. gata jok kheueh jeumba nyang paleng get nibak peue nyang gata teurimong. oh kalheueh gata jok jeumba nyan, gata jeuet tacok nyang leubeh nyan, lagee sidroe ureueng peutani meunan cit jicok peue nyang leubeh oh kalheueh jihnyan jiba peuseumahan. nyang leubeh nyan jeuet gata pajoh dipat mantong meusajan-sajan deungon keuluwarga gata, sibagoe upah nyang peubuet di dalam khimah tuhan. gata hana meusalah meunyoe nyan gata pajoh, asai mantong jeumba nyang paleng get ka tapeuseumah ubak tuhan. bek gata peukuto peuseumahan suci ureueng israel deungon cara tapajoh sapewe-sapeue nibak peuseumahan nyan sigohlom jeumba nyang

paleng get teupeu khusus ubak tuhan. meunyoé gata taiengkeue peurintan nyan, gata teuma mate. tuhan meufeureuman ubak nabi musa dan nabi harun mangat geujak jok peuratoran-peuratoran nyoe ubak bansa israel: gata cok kheueh saboh leumo inong nyang bulee jih jagat lom teuma hana meucupa dan leumo nyan hantom lom teupeguna keu ngon tarek beuban. tajok kheueh laju leumo nyan ubak imeum eleazar. beulatang nyan haroh teuba u luwa khimah-khimah laju teusie dikeue imeum. di imeum eleazar haroh teuma geucok bacut darah beulatang nyan dan geureutek laju tujoh goe u teuh khimah tuhan nyan. banmandum beulatang nyan, meunan cit deungon kulet jih, asoe jih, darah dan asoe pruet jih, nyan banmandum haroh teutot dikeue imeum. oh lheurehnyan le imeum geucok laju bacut kayee aras, saboh tangke hisop dan saboh untie teuma talo mirah, atra nyan geutie laju u dalam apui nyang teingoh jipajoh leumo jagat nyan. oh ka lheureh nyan le imeum geujak rlah laju peukayan gobnyan lom geumano teuma. oh ka seulesoe nyan baro kheueh jeuet geutamong u dalam khimah-khimah, teuma geuh nyan mantong kuto trok an mata uroe jillob. meunan cit deungon ureueng nyang tot leumo nyan jihnyan jijak rlah cit peukayan jih lom ngon jimano; ureueng nyampi mantong kuto sampoe an mata uroe jillob. meunan cit deungon sidroe ureueng nyang hana kuto jih nyan haroh jijak peusapat abee leumo nyan dan jijak keubah laju u teupat nyang gleh di luwa khimah-khimah. abee nyan jikeubah disinan mangat umat israel hase jingui nyan keu jijak peuget ie upacara teupeu gleh keu teupeu amphon desya. ureueng nyang peusapat abee leumo nyan haroh jijak rlah peukayan jih, teuma ureueng nyan mantong kuto sampoe an mata uroe jillob. peuratoran nyan teutabna sampoe an siumu masa, bah kheueh nyan keu ureueng israel meunan cit keu ureueng aseng nyang na tinggai lamkawan awaknyan. ureueng nyang teumat manyet ureueng nyan ka jeuet keu kuto nyang treb jih tujoh uroe. bak uroe nyang keu lhee dan nyang keu tujoh jihnyan haroh kheueh jipeuglegh droe deungon ie upacara; baro kheueh ureueng nyan teupeugah ka gleh. teuma meunyoé uroe nyang keu lhee dan nyang keu tujoh jihnyan gohlom jijak peu gleh droe, jihnyan teutab kheueh lam keuadaan kuto. ureueng nyang tupeeh deungon manyet dan hana teuma jijak peu gleh droe nyan na kheueh kuto, sabab jihnyan gohlom teusiram deungon ie upacara. jihnyan ka jipeukuto khimah tuhan dan le sababnyan jihnyan hanale teuaggab anggota umat po teu allah. meunyoé na sidroe ureueng mate didalam khimah, soe mantong nyang na didalam khimah nyan atawa jitamong u dalam nyan, ureuengnyan ka jeuet keu kuto nyang treb jih tujoh uroe. banmandum kendi dan kanot nyang hana meututob nyan pi ka jeuet keu kuto. tieb-tieb ureueng nyang tupeeh deungon manyet nyang mate le sabab keunong poh, atawa nyang mate keudroe jih di blang, ureueng nyan ka jeuet keu kuto nyang treb jih tujoh uroe. meunan cit deungon ureueng nyang tupeeh deungon jirat ureueng mate atawa ngon tuleueng ureueng mate. keu teupeuglegh ureueng nyang kuto nyan, haroh teucok bacut abee nibak leumo inong nyang jagat

nyang ka teutot keu teupeu amphon desya. abee nyan haroh teupeu tamong u dalam saboh kanot, laju teuboh ie nyang teucok nibak ie nyang ji ile. keuhai nyang phon, meunyoé na ureueng mate didalam khimah, ureueng nyang hana kuto haroh kheueh jicok saboh tangke hisop, laju jiceulob u dalam ie nyan, laju teuma jiseutek khimah nyan deungon banmandum nyang na didalam nyan, meunan cit deungon ureueng nyang na disinan. nibak hai nyang keu dua, na kheueh meunyoé sidroe-droe ureueng tupeeh ngon manyet, keunong jirat atawa tuleueng ureueng mate, ureueng nyang hana kuto haroh kheueh jireutek ubak ureueng nyang kuto nyan deungon cara nyang saban cit lageenyan teuma. jihnyan haroh kheueh teureutek nibak uroe nyang keu lhee dan uroe nyang keutujoh. bak uroe nyang keu tujoh nyan keumah kheueh upacara teupeu gleh ureueng nyang kuto nyan. ureueng nyan haroh jijak rlah keudroe peukayan jih sigoeuih jimano teuma. phon nibak mata uroe jillob ureueng nyan ka jeuet keu gleh. ureueng nyang jeuet keu kuto dan hana jipeuna upacara teu peu gleh droe, ureueng nyan teutab kuto sabab gohlom teu siram deungon ie upacara. jihnyan ka jipeukuto khimah tuhan, dan hanale teu aggab anggota umat po teu allah. peuratoran nyan teutab na keu siumu masa. di ureueng nyang reutek ie upacara nyan haroh kheueh teuma jirrah peukayan jih nyan, dan ureueng nyang keunong ie nyan ka jeuet keu kuto sampoe an mata uroe jillob. barang nyang jimat le ureueng kuto nyan ka jeuet keukuto, dan di ureueng laen nyang mat atranyan pi ka jeuet keukuto teuma trok an mata uroe jillob. nibak buleuen na banmandum umat israel ka trok u padang pasi zin dan laju jitinggai teutab di kades. miryam meuninggai dan laju jipeukubu disinan. bak saboh watee nibak teupat khimah-khimah awaknyan ka hanale meu ie. teuma jijak kheueh awaknyan ubak nabi musa dan nabi harun sira ji meu ok-ok, "leubeh get kamoe nyoe mate dikeue tuhan meusajan-sajan deungon syedara-syedara kamoe! keupeue droeneueh neuba kamoe u padang pasi nyoe? peu kheueh mangat jeuet kamoe nyoe mate disinoe meusigoe-sigoe deungon beulatang peulara kamoe? keupeue droeneueh ba kamoe meuteubiet nibak tanoh meuse u teupat nyang lumpah peudeh ngon seungsara nyoe sampoe kamoe hana hase kamoe pula sapeue nibak tanoh nyoe? disinoe hana gandom, hana bak ara, anggo dan geulima. meunan cit ie keu teujieb pi hana disinoe!" nabi musa dan nabi harun laju geujak geupeu jioh droe nibak awaknyan dan laju geujak dong di babah pintoe khimah tuhan. awaknyan laju geusujut, dan laju teuma deuh cahya tuhan nyang teuka u ateueh awaknyan. tuhan meufeureuman lom ubak nabi musa, "gata cok kheueh tungkat nyang na dikeue peuto peujanjian, laju le gata dan nabi harun gatajak peusapat banmandum umat. dikeue awaknyan banmandum, gata haroh tapeugah ubak gunung batee nyang na disinan mangat nibak gunung batee nyan ji peuteubiet ie. meunan kheueh gata ka tapeuteubiet ie nibak gunung batee nyan mangat rakyat dan beulatang peulara awaknyan hase jijieb ie." teuma geujak kheueh laju nabi musa geujak cok tungkat

nyan lagee nyan geupeurintah le tuhan. nabi musa dan nabi harun laju teuma geupeusapat banmandum umat dikeue gunong batee nyan. oh ltheueh nyan nabi musa geupeugah, "deungoe kheueh nyoe, hai kawom peumbeurontak! peu kheueh kamoe haroh kamoe peuteubiet ie lam gunong batee nyoe?" le nabi musa laju geubeuot tungkat geuh nyan dan tungkat nyan laju geu seukok u ateueh gunong batee nyan dua goe. teuma jiteubiet kheueh ie nibak batee nyan nyang lumpah teuga, sampoe banmandum ureueng dan beulatang peulara hase jijieb. teuma tuhan geusapa nabi musa dan nabi harun, kheun gobnyan, "sabab gata kureueng meuiman ubak ulon keu teupeugah kuasa ulon nyang suci dikeue bansa israel, gata hana teuma tapimpen awaknyan jitamong u nanggroe nyang ulon peujanji keu awaknyan." nyan kheueh mata ie meriba. di teupat nyan ureueng-ureueng israel ji meu ok-ok lom ubak tuhan, nibak teupat nyan cit tuhan geupeudeuh kuasa geuh nyan suci ubak bansa nyan. oh ltheueh nyan nibak kades, nabi musa laju geukirem utosan-utosan keujijak meuhadab ubak raja edom. kheun awaknyan, "kamoe nibak sukee-sukee israel nyan mantong na hubungan jih deungon syedara teungku po. di teungku po mungken neuteupeue keususahan nyang teuka ateueh kamoe. le indatu kamoe geujak u nanggroe meuse dan geutinggai teutab disinan meuthon-thon treb jih. indatu kamoe dan kamoe jipeusaneut hana get le bansa meuse, dan kamoe meulakee ubak tuhan kamoe meulakee tulong. tuhan geudeungeu teumawok kamoe laju geukirem sidroe malaikat. malaikat nyan kheueh nyang pimpin kamoe meuteubiet nibak tanoh meuse. jinoenyoe kamoe ka na di kades, saboh bandar nibak bataih wilayah teungku po. kamoe lakee ngon meuharab beu teungku peu idhin ubak kamoe mangat jeuet kamoejak rot nanggroe teungku nyoe. kamoe dan beulatang peulara kamoe hana meusimpang ho laen dan hana teuma kamoe tamong u lampoh-lampoh anggo. dan meunan cit hana teuma kamoe jieb ie nibak mon-mon nyang atra teungku. kamoe teuma kamoe jak mantong di ateueh rot ueh rayeuk sampoe an kamoe teubiet nibak daerah teungku po." teuma le ureueng edom nyan jijaweueh, "pakriban mantong gata-gata nyoe hana kamoe peu idhin gatajak rot wilayah kamoe. meunyo teuma tapeusak droe, kamoe teuma kamoe seurang gata!" ureueng israel nyan jipeugah, "kamoe teuma kamoe jak rot jalan rayeuk, dan meunyo kamoe atawa beulatang peulara kamoe nyoe jijieb ie droeneueh, nyan teuma kamoe bayeue. kamoe meuheuet keukamoe liwat mantong." ureueng-ureueng nyan jipeugah lom, "han jeuet!" laju awaknyan jiteubiet deungon tantra nyang jaj lumpah na lom teuga keu jijak prang bansa israel. teuma ureueng israel nyan laju jigisa dan jijak mita rot laen sabab ureueng edom nyan hana jibri idhin rot nanggroe jih. banmandum umat israel nyan laju jitinggai kades dan trok laju u gunong hor, nibak bataih ngon edom. disinan tuhan geupeugah ubak nabi musa dan nabi harun, "nabi harun hana geuta-mong u nanggroe nyang ka ulon peujanji ubak bansa israel; jihnyan teuma mate sabab gata ban dua ka talawan peurintah ulon to ngon mata ie meriba. gata

ba kheueh nabi harun dan eleazar, aneuek jih nyan jijak teungoh u ateueh gunong hor. gatasut kheueh peukayan nabi harun nyan dan tapeusok kheueh laju ubak eleazar. nabi harun teuma mate di teupat nyan." nabi musa laju geupeubuet peue nyang ka geupeurintah le tuhan ubak gobnyan. nabi musa, nabi harun dan eleazar laju geujak teungoh u ateueh gunong hor dan jikalon le banmandum umat. laju nabi musa geusut peukayan nabi harun geupeusok laju peukayan nyan ubak eleazar. di ateueh pucak gunong nyan nabi harun laju meuninggai donya, oh ltheueh nyan nabi musa ngon eleazar geutreun laju diateueh gunong nyan dan geujak gisa lom teuma. banmandum umat jideungoe bahwa nabi harun ka meuninggai donya, dan awaknyan banmandum jimeukabong keu lhee ploh uroe treb jih. arad na kheueh saboh banda di siblah seulatan nanggroe kanaan. bak watee raja banda nyan jideungoe bahwa ureueng-ureueng israel teuka jijak liwat rot atarim, jijak kheueh laju awaknyan jijakprang bansa nyan dan laju jiteumeteun napadub droe lamkawan awaknyan. le ureueng israel nyan jimeukaol lagee nyoe ubak tuhan, "meunyo droeneueh ya tuhan neubri beumeunang nyang muteulak keu kamoe ateueh bansa nyan, awaknyan dan banda-banda awaknyan teuma kamoe gulong sampoe an habeh." tuhan geuteurimong peue nyang jilakee le ureueng israel nyan dan geutulong awaknyan geupeutaloe ureueng kanaan. teuma ureueng israel laju jijak prang ureueng-ureueng kanaan nyan sampoe ureueng kanaan nyan taloe habeh binasa meunan cit deungon banda-banda awaknyan jipeu hanco banmandum, laju teupatnyan jiboh nan horma. oh ltheueh nyan ureueng israel laju jitinggai gunong hor nyan, dan jicok rot nyang beusot u lhok akaba, keu jikeulileng daerah edom. teuma di teungoh rot ueh, bansa nyan ka habeh saba jih, dan laju ji ok-ok lom ubak po teu allah dan nabi musa. awaknyan jipeugah, "keupeue droeneueh ba kamoe neupeuteubiet nibak nanggroe meuse? peu kheueh keu neujak poh mate kamoe di teungoh padang pasi nyoe? disinoe hana peunajoh, meunan cit ie jieb pi hana. kamoe luwat deungon peunajoh nyang tabeue nyoe!" teuma tuhan laju geupeutreun uleue nyang lumpah meubisa lamkawan bansa nyan. jai that-that ureueng israel nyang jikhah le uleue-uleue meubisa nyan. laju bansa nyan jijak meuhadab ubak nabi musa dan jipeugah, "kamoe ka meudesya sabab kamoe meu ok-ok ubak tuhan dan ubak droeneueh. neu meudoa kheueh ubak tuhan mangat jeuet uleue-uleue nyoe jiwee beujioh nibak kamoe." le nabi musa laju geumeudoa keu bansa-bansa nyan. laju tuhan meufeuruman ubak nabi musa geuyue peugot saboh uleue nibak logam dan atranyan geuyue keubah di ateueh saboh tameh. soe mantong ureueng nyang jikab le uleue, laju puleh meunyo jikalon uleue nyang teupeugot nibak logam nyan. le nabi musa laju geupeugot uleue nibak teumaga dan geukeubah laju di ateueh tameh lagee nyang geuyue le tuhan ubak gobnyan. tieb-tieb ureueng nyang jikab le uleue, hase puleh meunyo jikalon u ateueh uleue teumaga nyan. ureueng israel jibeurangkat lom, laju jipeudong khimah di banda obot. oh kalheueh jitinggai teupat nyan, awaknyan

laju teuma jipeudong khimah di teupnat beukaih bangunan reuloh abarim di padang pasi siblaih u timu daerah moab. oh ltheuehnyan awaknyan laju jipeudong khimah di panton zered. beudoh nibak teupnat nyan awaknyan jijak lom dan jipeudong teuma khimah di meurandeh krueng arnon, nibak padang pasi nyang meubinteung u wilayah ureueng amori. krueng arnon nyan na kheueh bataih daerah ureueng moab deungon daerah ureueng amori. nyang kheueh sabab jih dalam 'kitab muprang tuhan' teutuleh: "... gampong waheb, didaerah sufa dan panton-panton jihnyan; krueng arnon dan barieh nyang meulinteung trok u gampong ar dan beusot u bataih daerah ureueng moab." beudoh nibak teupnat nyan awaknyan laju jijak u teupnat nyang teupeunan beer, makna jih mon-mon. disinan tuhan na meufereuman ubak nabi musa, "gata yue kheueh umat jeuet jimeusapat; ulon keuneuk bri ie keu awaknyan." nibak watee nyan ureueng israel laju jimeu ca-e lageenyoe, "he, mon-mon, beumeue bok-bok kheueh ie gata, kamoe teuma meusambot gata deungon lagu. mon nyang geukueh le ureueng-ureueng patot dan le ureueng peumimpin bansa geukueh deungon tungkat keupeumimpinan geuh dan deungon tungkat tanda kuasa awaknyan." nibak padang pasi awaknyan jiminah u matana, dan beudoh nibak teupnat nyan u nahaliel, laju teuma u bamot, oh ltheueh nyan u panton didaerah ureueng moab, di miyueb pucak gunung pisa nyang meuhadab u padang pasi. laju bansa israel jikirem utosan-utosan ubak sihon, raja amori, keu jijak peusampoe peusan nyoe, "neu peuidhin kheueh kamoe beujeuet kamojak rot nanggroe teungku. kamoe dan beulatang kamoe hana meusimpang ho laen dan hana teuma kamoe tamong u dalam blang atawa lampoh-lampoh anggo atawa kamoe jieb ie nibak mon-mon. kamoe hana meu simpang nibak rot ueh raya trok an kamoe teubiet nibak nanggroe teungku." teuma raja sihon nyan hana jipeu idhin ureueng-ureueng israel nyan jijak rot nanggroe jih nyan. raja nyan jipeusapat laju tantra dan jibeudoh disinan laju jijak u yahas di padang pasi dan laju jiprang ureueng-ureueng israel nyang na disinan. teuma lam prang nyan jai that-that tantra amori nyang jipoh mate le bansa israel. laju ureueng-ureueng israel nyan jiduek di daerah awaknyan phon di krueng arnon trok u krueng yabok, nyan na kheueh bataih daerah ureueng amon, sabab nibak bataih nyan leumpang teuga peutahanan jih. deungon lageenyau ureueng israel jireubot banmandum banda ureueng amori, jitamong cit keunan hesybon dan banmandum banda ubit di bansilingka nyan, laju awaknyan pi tinggai teutab disinan. hesybon na kheueh ma banda raya sihon. jihnyan ka ltheueh na jimuprang jilawan raja moab dan jireubot daerah ureueng nyan sampoe sijioh krueng arnon. nyang kheueh sabab jih le pujangga geumeu ca-e lageenyoe, "teuka kheueh u hesybon, u banda raja sihon. kamoe meuheuet keuneuk kamoe kalon banda nyoe ji peugot dan peubaro lom teuma. na sigoe teujadi dibanda nyoe pasokan sihon jimaju lagee apui hu. nyang jipeuhanco banda ar di moab, dan jikuasa buket-buket disipanyang arnon. wahe bansa moab,

gata ceulaka! peumujoe kamos, gata binasa! gata geupeubiyue le allah keu gata meungungse, kawom ureueng inong gata jeuet keu tawanan ureueng amori. teuma jinoenyoe binasa kheueh keuturonan awaknyan, nibak ban sipanyang rot ueh phon di hesybon u dibon, nibak nasym u nofah rab ngon medeba." deungon lageenyau bansa israel ka tinggai teutab di daerah ureueng amori. oh ltheuehnyan nabi musa geuyue teuma ureueng-ureueng nyan jijak mita rot nyang paleng get keu jijak prang banda yaezer. di ureueng israel pih jireubot laju banda nyan meunan cit deungon banda-banda ubit nyang na dibansilingka nyan dan ji use laju ureueng amori nyang na tinggai disinan. oh ltheueh nyan ureueng israel laju jiwet dan jicok rot ueh nyang beusot u basan. raja og di basan jimaju laju deungon tantra keu jijak prang ureueng israel di banda edrei. tuhan meufereuman ubak nabi musa, "bek gata takot keu jihnyan. ulon teuma lon peumeunang gata. gata teuma tapeutaloe jihnyan, banmandum rakyat jih dan nanggroe jih. gata peusanaut kheueh jihnyan lagee gata peusanaut atueh raja sihon nyang jimat peurintah di hesybon." teuma ureueng israel jipeutaloe ngon jipoh mate raja og, aneuek-aneuek jih dan banmandum rakyat jih; hana nyang na teutinggai. oh ltheuehnyan awaknyan laju jitinggai ngon jiduek nibak nanggroe nyan. bansa israel nyan jibeurangkat lom dan laju jipeudong khimah atueh darat moab, di daerah meurandeh krueng yordan, toe ngon banda yerikho. bak watee raja moab nyang nan jih balak, aneuek zipor, jideungoe pakriban bansa israel nyan jipeusanaut atueh ureueng amori, dan bahwa bansa israel nyan get that jai jeumeulah jih, yoe that-that raja nyan dan meunan ngon banmandum rakyat jih nyan teumakot banmandum. le ureueng moab nyan laju jipeugah ubak peumimpin midian, "hana treb le geureumbolan nyan ji reupah ngon jiuwet peue nyang deuh nibak bineh geutanyoe lagee leumo jirotnaleueng di blang." teuma raja balak geu kirem laju utosan mangat jijak hoi bileam, aneuek beor, nyang tinggai di banda petor to ngon krueng efrat di daerah amau. awaknyan geuyue jak peusampoe ubak bileam peusannyoe nibak raja balak, "beuneu teupeu kheueh, na saboh bansa nyang teuka nibak nanggroe meuse; awaknyan ka meutaba bansaboh nyoe dan ka siab jikeuneuk prang daerah kamoe. awaknyan leubeh teuga nibak kamoe. le sababnyan, tateuka kheueh! neukutok kheueh awaknyan keu ulon. mungken kamoe hase kamoe peutaloe awaknyan dan kamoe use awaknyan nibak nanggroe nyoe. sabab ulon yaken that sabab ureueng nyang droeneueh bri beureukat teuma meuteume beureukat, dan ureueng nyang droeneueh kutok teuma meuteume bala." deungon nyan jijak kheueh laju peumimpin moab dan midian deungon jiba upah keu bileam mangat geuhnyan geutem kutok ureueng israel. oh ka trok awaknyan ubak bileam, awaknyan laju jipeusampoe ubak gobnyan peue nyang ka geupeusan le raja balak watee jikeuneuk jak meurumpok ngon bileam nyan. kheun bileam ubak awaknyan, "gata dom kheueh disinoe. singoh ulon peugah ubak gata peue nyang ka geupeugah le tuhan ubak ulon." teuma le peumimpin moab nyan laju jitinggai di teupnat

bileam. le po teu allah laju geujak ubak bileam dan geutanyong, "soe kheueh ureueng-ureueng nyang tinggai di tempat gata, bileam?" geu jaweueb le bileam, "awaknyan utosan raja balak nibak moab jijak keunoe jipeugah bahwa na saboh bansa nyang teuka nibak nangroe meuse ka meutabu bansaboh nyoe. raja balak geuyue ubak ulon mangat lon kutok bansa nyan keu jihnyan, mangat hase rajanyan jijak prang ngon ji use ureueng nyan." geupeugah lom le po teu allah ubak bileam, "bek kheueh gatajak ngon ureueng nyan, dan bek teuma gata kutok bansa nyan, sabab awaknyan ka ulon bri beureukat." oh singoh beungoh bileam laju geupeugah ubak ureueng nyang jikirem le raja balak nyan, "gata woe kheueh laju, tuhan hana geupeu idhin ulon jak deungon gata," teuma jigisa kheueh laju awaknyan ubak balak dan jipeusampoe ubak geuhnyan bahwa bileam hana geutem jak deungon droe jihnyan. le raja balak geukirem lom leubeh le utosan nyang leubeh manyang pangkat jih nibak nyang phon. awaknyan jipeusampoe laju ubak bileam peusan nyoe nibak raja balak, "ulon lakee deungon meuharab that: neuteka kheueh, dan bek kheueh neutulak. ulon kubri upah keu droeneueh nyang jai that, dan ulon peubuet peue mantong nyang droeneueh peugah. neuteka kheueh, dan neukutok kheueh bansa nyan keu ulon." teuma bileam geujaweueb, "bahpi nyan meuh dan pirak nyang na didalam meuligoe raja balak jijok banmandum nyan keu ulon, teuma ulon hana hase lon jengkeue peue nyang ka geupeurintah le tuhan ubak ulon, po teu allah nyang ulon seumah. bahpi nyan hai nyang paleng ubit ulon hana jeuet lon lawan hai nyan. teuma bahpi meunan bah kheueh nibak malam nyoe gata mudom disinoe, lagee nyang ka jipeubuet le utosan nyang ka awai dilee. ulon meuheuet lon keuneuk teupeu peu kheueh mantong na nyang teuma geupeugah le tuhan ubak ulon." malam nyan po teu allah teuka lom ubak bileam dan geupeugah, "ureueng-ureueng nyan jiteuka keu jilakee gata mangat gatajak deungon awaknyan. teuma meusiab-siab kheueh mangat gatajak. teuma gata peubuet kheueh peue nyang teupeurintah ubak gata." oh singoh beungoh bileam laju geupasang peulana atueh keuleudee geuh, laju geujak meusigoe deungon mandum peumimpin moab nyan. teuma bak watee bileam geujak, po teu allah get that beungeh. teungoh bileam geupasang atueh keuleudee geuhnyan, ji ireng le dua droe peulayan gobnyan, laju malaikat tuhan geudong di teungoh-teungoh rot ueh rayeuk keu geu pagab geuhnyan nyang teungoh geujak. jikalon malaikat tuhan ka teudong disinan deungon peudeueng bak jaroe nyang ka tetuset didalam sarong, laju keuleudee nyan jijak wet holaen nyang meusimpang nibak rot ueh nyang teungoh jijak nyan, dan jijak laju u dalam blang. bileam laju geuseunuet keuleudee nyan mangat jigisa lom ubak rot nyang phon. oh lheuhnyan malaikat tuhan geudong laju lom di teungoh rot ueh nyang leubeh sampiek, nibak dua boh lampoh anggo deungon binteh beuton nyang meupat siblah saho. bak watee keuleudee nyan deuh lom jikalon malaikat tuhan nyang ka na teudong disinan, laju keuleudee nyan ji seuek bak binteh

sampoe gaki bileam teuseupet bak binteh beuton nyan. bileam geu seunuet lom keuleudee nyan. le malaikat tuhan geuminah teuma, dan laju geudong bak binteh nyang leubeh sampiek, sampoe ka hanale rot ueh keu rot jijak bah kheueh nyan di blaih wie meunan cit di blaih uenueu. watee jikalon malaikat tuhan nyan, keuleudee nyan laju jpeureubah droe. bileam meutamah beungeh laju geuseunuet lom keuleudee geuh nyan deungon tungkat. le tuhan geupeujeuet keuleudee nyan hase jipeugah haba. jipeugah le beulatang nyan ubak bileam, "peu kheueh nyang ulon peubuet keu teungku sampoe teungku neu seunuet ulon nyoe trok an lhee goe?" jaweueb bileam, "gata tapeu meuen ulon! seukira jih na peudeueng nibak ulon, ka pasti gata ulon cang sampoe an matel!" ji jaweueb le keuleudee nyan, "bukon kheueh ulon nyoe keuleudee droeneueh hei teungku nyang yoh awaikon ilee ulon nyoe ka neupasang? peu kheueh kana ulon meubantah atueh teungku?" "hana," jaweueb bileam. le tuhan geupeuleumah ubak bileam malaikat tuhan nyang ka teudong disinan deungon peudeueng ka tetuset sarong ka siab nibak jaroe malaikat nyan. siat nyan cit bileam geusujut ubak tanoh sira geujok seumah. malaikat tuhan laju geutanyong, "pakon droeneueh seunuet keuleudee droeneueh trok an lhee goe? ulon nyoe teuka keu lon jak tam gata, sabab meunurot peundapat ulon hana get droeneueh neujak keudeh. bak watee keuleudee droeneueh nyan jikalon ulon, keuleudee droeneueh nyan jiseuek u bineh sampoe an lhee goe. meunyo han, pasti droeneueh ka ulon poh mate, teuma keuleudee nyan ulon peuseulamat." geujaweueb le bileam, "ulon ka meudesya. ulon hana lon teupeu bahwa droeneueh neudong di atueh rot ueh keu neu pagab-pagab ulon. teuma jinoenyoe, meunurot peundapat teungku hana get ulon jak laju ubak tempat nyang lon tuju, jinoenyoe bah ulon woe lom teuma." teuma malaikat tuhan geupeugah, "neu seutot kheueh meusajan deungon ureueng-ureuengnyan. teuma droeneueh jeuet neupeugah peue nyang ulon peugah." bileam laju geujak lom teuma deungon ureueng-ureueng nyang geu kirem le raja balak nyan. bak watee balak jideungoe bahwa bileam teuma geuteuka, gobnyan geujak tueng bileam di banda moab, nyang teuduek jih to ngon bineh krueng arnon, to teuma ngon bataih daerah moab. geupeugah le raja balak nyan ubak bileam, "pakon droeneueh hana neuteka bak watee ulon jaktueng phon-phon that? peu kheueh neupike ulon nyoe hana hase ulon bayeue droeneueh?" geu jaweueb le bileam, "ka jeuet, jinoenyoe ulon ka trok lon teuka. teuma ulon nyoe hana hak ulon peugah peue-peue mantong keucuali po teu allah nyang yue ubak ulon." teuma geujak kheueh laju bileam deungon raja balak nyan u banda huzot. nibak tempat nyan balak laju geukeureubeuen na meupadubboh leumo ngon bubiri. siladam nibak sie nyan jijok laju ubak bileam dan bubena peumimpin nyang na meusajan-sajan ngon gobnyan. oh singoh beungoh nyan balak geuba bileam jak teugoh buket bamot baal. nibak tempat nyan bileam hase geukalon siladam nibak bansa israel. kheun bileam ubak raja balak nyan, "gata peudong kheueh

laju di teupatnyoe tujoh boh miseubah keu ulon, dan gata peusiab teuma disinan tujoh boh leumo agam dan tujoh boh teuma bubiri agam." raja balak nyan geupeubuet laju lagee nyang geupeugah le bileam ubak gobnyan. di ateuheh tieb-tieb miseubah nyan awaknyan keubah laju saboh leumo agam dan saboh bubiri agam. laju bileam geupeugah ubak raja balak, "gata dong kheueh to ngon keureubeuen nyang teutot atra droeneueh nyan. siat nyoe ulon jak ngieng peue kheueh tuhan geutem meurumpok deungon ulon atawa hana. teuma ulon peugah banmandum peue-peue nyang geupeugah le tuhan ubak ulon." teuma bileam geujak laju sidroe gobnyan ubak pucak saboh buket, dan disinan po teu allah teuka laju ubak gobnyan. geupeugah le bileam ubak po teu allah, "ulon ka ulon peudong tujoh boh miseubah dan ulon peuseumah saboh leumo agam dan saboh teuma bubiri agam di ateuheh maseng-maseng miseubah nyan." laju tuhan geubri tee ubak bileam peue nyang haroh geupeugah, dan geuyue laju bileam nyan geugisa ubak raja balak mangat geujak peutrok peusan tuhan keu jih nyan. bileam laju geugisa dan geukalon balak mantong teudong to ngon keureubeuen nyang teutot atra geuh nyan, meusajan-sajan deungon banmandum peumimpin moab. laju bileam geumeu lagu deungon nubuut nyoe, "nibak aram, gunung-gunong di timu sideh, balak, raja moab jijak hoi ulon, geupeugah, 'neu-teuka kheueh, dan neumeututoe kheueh keu ulon. neukutok kheueh bansa israel nyan!' peue kheueh mungken ulon kutok nyan, geupeugah le po teu allah hana teukutok? mungken kheueh ulon keunong hukum, meunyoee tuhan hana geumeuhukom? nibak ateuheh pucak gunung-gunong ulon kalon awaknyan: nibak buket-buket ulon pandang awaknyan. ngieng kheueh, saboh bansa nyang teu aseng keudroe hana jitamong ubak kawom bansa-bansa laen. keuturan nabi yakub lagee ano di pante nyang hana hase teubileueng; bansa israel nyan rame jih hana ngon peusa. seumoga ulon mate lagee ureueng nyang juoe kira jih ajai ulon lagee ajai ureueng-ureueng nyan." laju raja balak geupeugah ubak bileam, "peue kheueh nyang teupeubuet ateuheh ulon? gata ulon ba keunoe mangat takutok musoh-musoh ulon. teuma meubalek gata bri beureukat ateuheh awaknyan." geujaweueb le bileam, "ulon teuma hase ulon peubuet peue nyang ka tuhan yue ubak ulon." laju raja balak geupeugah lom ubak bileam, "jak kheueh geutanyoe tajak meusajan-sajan u teupat nyang laen; phon sinan droeneueh jeuet neukalon teuma siladum mantong nibak bansa israel. neukutok kheueh laju awaknyan enteuk phon disinan." teuma raja balak geuba laju bileam u padang zofim, di pucak gunung pigsa. meunan cit disinan laju geupeudong tujoh boh miseubah dan geupeuseumah laju saboh leumo agam dan saboh teuma bubiri agam di ateuheh maseng-maseng miseubah nyan. geupeugah le bileam ubak balak, "tinggai kheueh droeneueh disinoe, to ngon keureubeuen nyang teutot atra teungku, jinoenyoe ulon jak meurumpok deungon tuhan disinan." tuhan geumeurumpok laju deungon bileam dan geubri tee laju ubak gobnyan peue nyang haroh geupeugah, laju gobnyan geugisa ubak balak

keu geujak peusampoe peusan tuhan nyan. teuma geugisa laju bileam geujak meurumpok ngon balak nyang mantong teudong to ngon keureubeuen nyang teutot atra geuhnyan, meunan cit na disinan dumna peumimpin ureueng moab. raja balak nyan laju geutanyong peue nyang ka geupeugah le tuhan ubak bileam nyan, laju bileam geumeu lagu lom lagee nyoe, "hai, balak, aneuek zipor, neujak kheueh keunoe, deungoe kheueh peue nyang ulon peugah nyoe. po teu allah kon lagee manusia nyang mudah meunyeusai dan galak teuma meubuhak bak peugah haba. meunyoee po teu allah meujanji, janji nyan pasti geupeutrok! meunyoee gobnyan geupeugah haba, nyan ka teuntee teupeubuet teuma! ulon geuyue bri beureukat; dan meunyoee po teu allah nyang bri beureukat, nyan hana hase ulon tarek lom teuma. bak nabi yakub hana leumah buet nyang jeuhet; bak ureueng israel hana teuma deuh nyang payah-payah. tuhan, po teu allah awaknyan, sabena deungon awaknyan. awaknyan jimeusurak: gobnyan kheueh raja! po teu allah nyang ba awaknyan geupeuteubiet nibak nangroe meuse; lagee banteng kleuet nyang jimeulo keu awaknyan. hana ieleume sihe nyang hase keunong ateuheh nabi yakub hana teuma ieleume tanueng nyang meudaya u ateuheh ureueng israel. keuhai bansa nyan gob laen teuma jipeugah, 'kalon, buet ajaeb nyang geupeuleumah le po teu allah!' bansa nyan jibeudoh lagee singa inong, dan jidong oh cot na lagee singa agam. singa nyan hana lom jieuh sigohlom ji teugom umpeuen jih dan jiejib darah musoh nyang jeuet keu umpeuen jihnyan." laju balak jipeugah ubak bileam, "ka kheueh nyan, meunyoee gata hana cit tatem kutok bansa israel; teuma bek kheueh cuba-cuba neubri beureukat keu awaknyan!" jaweueb bileam, "bukan kheueh ka lheureuh ulon peugah ubak teungku bahwa ulon teuma lon peubuet peue-peue mantong nyang geupeurintah le tuhan?" geupeugah lom le raja balak ubak bileam, "boh jak kheueh geutanyoe tajak u teupat nyang laen, pat tateupeue, mungken diteupat nyan teuma po teu allah geupeu biyeu gata kutok ureueng israel keu ulon." teuma raja balak nyan laju jiba bileam u ateuheh pucak gunung peor nyang meuhadab u padang pasi. geupeugah le bileam ubak raja balak nyan, "neu-peudong kheueh laju tujoh boh miseubah disinoe dan neupusiab kheueh teuma tujoh boh leumo agam dan tujoh boh teuma bubiri agam." raja balak nyan geupeubuet laju lagee nyang geupeurintah le bileam. gobnyan geukeureubeuen laju saboh leumo agam dan saboh teuma bubiri agam di ateuheh tieb-tieb miseubah nyan. jinoenyoe bileam ka geuteupeue keuheundak tuhan bahwa gobnyan geubri beureukat ubak bansa israel. sababnyan gobnyan hanale geujak mita tanda-tanda lagee nyang ka geupeubuet nyang ka nyoe. bileam geupandang u arah padang pasi, dan geungieng bansa israel teungoh jipeudong khimah seucara meukeulompok-keulompok meunurot sukee bansa awaknyan maseng-maseng. laju roh po teu allah geutreun geukuasa ateuheh bileam nyan, dan bileam nyan laju teuma geupeugah nubuut nyoe, "nyoe kheueh peusan bileam, aneuek beor, nyang tutoe haba sidroe ureueng keumalon nyang ka geudeungoe tutoe haba po teu allah dan geukalon

nyang teupeudeh nibak nyang mahakuasa, sira teu eh, teuma mata geuh teutab teubleuet. padubna get jih khimah-khimah droeneueh hai nabi yakub, dan teumpat-teumpat tinggai gata hai ureueng israel! lagee panton nyang luwah meureutang, atawa taman bungong nibak bineh krueing; lagee bak gaharu nyang geupula le tuhan, atawa bak aras nyang na nibak lueng. awaknyan meuteume ie ujeuen nyang meulimpah, bijeh sinemoh nyang meuteume ie le. raja jihnyan teuma jaya, leueh nibak agag, dan keurajeuen jih teupeu agong teuma. po teu allah nyang ba awaknyan teupeuteubiet nibak nanggroe meuse, lagee keubeue kleuet nyang meuloeu keu awaknyan. bubena bansa musoh ka habeh banmandum jiuat, tuleueng-tuleueng awaknyan jipeureumok banmandum, dan panah-panah seunjata awaknyan habeh geuwiet banmandum bansa-bansa nyan na lagee singa agam ngon singa inong, nyang jitiarab ngon sira jie. soe kheueh nyang beuhe ji peubeudoh jihnyan? seumoga ureueng nyang bri beureukat ubak gata geubri beureukat teuma ubak ureueng nyan, dan ureueng nyang kutok gata jikutok teuma." deungon beungeh nyang hana teukira raja balak sira geu reugam boh sininju geuh geupeugah ubak bileam, "gata ulon hoi keu gata kutok bubena musoh-musoh ulon, teuma pakon gata bri beureukat ubak awaknyan sampoe an lhee goe. jinoenyoe gata jeuet tajak keudeh, tajakwoe u rumoh gata! ulon meujanji upah ubak gata, teuma tuhan hana geupeu idhin gata keu tateurimong upah nyan." geujaweeb le bileam, "bukon kheueh kalheueh ulon peugah ubak utosan-utosan teungku bahwa bahpi teungku neubri keu ulon meuh dan pirak dan banmandum nyang na di dalam meuligoe teungku nyan, ulon hana hase ulon iengkeue peurintah tuhan dan lon peubuet sapeue-sapeue ban galak droe ulon? ulon teuma hase lon peugah peue nyang ka tuhan yue ubak ulon." geupeugah le bileam ubak raja balak, "jinoenyoe ulon keuneuk woe ubak bansa ulon. teuma sigohlom ulon jak, bah kheueh ulon bri tee ubak teungku keuhai peue nyang teuma jipeubuet le bansa israel atueuh bansa teungku oh laen uroe." laju bileam geupeugah teuma nubuat nyoe sira geu meulagu, "nyoe kheueh peusan bileam aneuk beor; tutoe haba sidroe ureueng nyang deuh keumalon nyang ka ji deungoe feureuman po teu allah, dan jeuet jituri nyang mahamanyang; nyang peuleumah nyang teukalon nibak nyang mahakuasa sira teu eh teuma mata teutab teubleuet. ulon kalon gobnyan, teuma bukan watee nyoe; ulon pandang gobnyan, teuma rot jioh. sidroe raja nyang meuasai nibak bansa israel, teuma teuka lagee bintang nyang hu meu ble-ble. bubena peumimpin moab geupeu reumok banmandum bansa set teuma geupeuhanco. tanah edom teuma jiduek le musoh jih nyan, teuma israel jipeubuet buet nyang lumpah peukasa. nibak nabi yakub teuma teuka sidroe nyang mat kuasa, nyang jipeuhanco bubena musoh-musoh jih." oh ka lheureh nibak geupeubuet nyan bileam geukalon ureueng-ureueng amalek. teuma le gobnyan laju geupeugah ngon geu meulagu nubuat nyoe, "nibak sigala bansa nyang na di donya nyoe, amalek na kheueh nyang paleng meukuasa. teuma bansa

nyan nibak akhe jih, teuma teusampoh cit teuma keu siumu masa." nibak meuneubuet nyan bileam geukalon teuma keuturonan kain, laju geupeugah ngon geu meulagu lagee nubuat nyoe, "teumpat tinggai gata keubit lumpah that kukoh, na lagee umpung cicem di atueuh gunung batee. teuma gata, hai ureueng keni, teuma geupeubinasa, hana treb le asyur ji angkot gata lagee ureueng nyang teuteun." oh lheurehnyan bileam geupeugah teuma nubuat nyang lagee nyoe, "cilaka! soe nyang udeb, meunyeo po teu allah geupeubuet hai nyan? teuma nibak siprus jiteuka saboh kawan kapai, awaknyan laju jipeutaklok asyur dan heber, oh lheurehnyan kawan kapai nyanpi teuma hanco binasa." laju bileam meukeumah-keumah geukeuneuk woe u teumpat tinggai gobnyan, dan meunan cit ngon raja balak geujak cit teuma. teungoh bansa israel nyan tinggai di panton sitim, ureueng agam awaknyan ka jipeuphon meumukah deungon ureueng-ureueng inong moab nyang na tinggai disinan. ureueng-ureueng inong nyan jipakat awaknyan ubak teumpat-teumpat khannuri keureubeuen keu jijak bri horeumat ubak ilah awaknyan. meunan cit di ureueng-ureueng israel nyan meusajan cit jimakheun keureubeuen nyan dan ji seumah ilah ureueng moab. le sabab ureueng israel nyan jiseumah baal di peor, tuhan beungeh ubak awaknyan dan geupeugah ubak nabi musa, "gatajak drob kheueh laju banmandum bansa nyan dan gata jakpoh bu mate awaknyan dikeue rakyat ba sibagoe teulaksana peurintah ulon, mangat ulon hanale lon beungeh keu bansa nyan." oh lheurehnyan nabi musa geupeugah laju ubak hakem-hakem bansa israel, "gatanyoe maseng-maseng haroh tajak poh mate banmandum ureueng didalam sukee gata nyang ka jiseumah baal di peor." bak watee nabi musa dan banmandum umat teungoh jimo ngon jimeuba-e dikeue khimah tuhan, awaknyan jingiang sidroe ureueng israel teungoh geuba sidroe ureueng inong midian jipeutamong u dalam khimah jihnyan. bak watee pinehas, aneuk eleazar, cucoe imeum harun geukalon hai nyan, laju geubeudoh dan geutinggai laju ureueng meu hudom nyan. laju geucok saboh kapak laju geujak tiyeub ureueng agam ngon ureueng inong nyan u dalam khimah. bandua droe ureueng nyan laju geutob deungon kapak nyan teuma jipioh kheueh bala nyang teungoh jiteuka deungon hebat that di israel nyan. teuma bak watee nyan nyang mate ka na 24.000 droe. tuhan meufeureuman lom ubak nabi musa, "pinehas aneuk eleazar, cucoe imeum harun, deungon bit-bit dan hana jipioh jibila keuhoreumatan ulon lamkawan ureueng israel, sampoe beungeh ulon nyan reuda dan ulon hana jadeh ulon peubinasana bansa nyan. le nyan, tajak peugah kheueh ubak pinehas bahwa ulon keuneuk peugot sapeue-sapeue ikat janji deungon jihnyan. jihnyan dan keuturonan jih ka ulon peuteutab sibagoe imeum keu siumu masa, sabab jihnyan deungon gigeuh that ka jibila ulon, po teu allah jih, dan ka teuma jipeuna dame keu desya ureueng israel." nan ureueng israel nyang geupoh mate meusigoe ngon ureueng inong nyan zimri, aneuk salu, ulee kawom saboh keuluwarga nibak sukee simeon. ureueng inong nyan nan jih kozbi; jihnyan aneuk zur, sidroe

ulee kawom midian. tuhan laju geubri peurintah nyoe ubak nabi musa, "gata jaklawan kheueh ureueng midian, dan gata peubinaa kheueh awaknyan sabab buet nyang jeuhet nyang ka awaknyan reunca keue gata di peor, dan kareuna kozbi aneuek sidroe ulee kawom di midian. kozbi nyan ureueng inong nyang mate keunong poh bak watee teujadi beuncana sabab peuristiwa di peor." oh ka ltheueh beuncana nyan seuleuseo, tuhan geupeugah ubak nabi musa dan eleazar aneuek imeum harun, "gata haroh tapeuna seunsus keu banmandum umat israel meunurot keuluwarga jihnyan maseng-maseng. banmandum ureueng agam nyang meum dua ploh thon u atueh nyang ka mampu jeuet keu tantra, ureueng nyan haroh teucetet." nabi musa dan eleazar laju geupeubuet peue nyang ka geupeurintah nyan. awaknyan laju geuhoi banmandum ureueng agam nyang meum dua ploh thon u atueh dan geupeusapat laju awaknyan di atueh darat moab, nibak siblahi krueng yordan, toe ngon banda yerikho. nyoe kheueh ureueng-ureueng israel nyang jiteubiet nibak nanggroe meuse: nibak sukee ruben, aneuek tuha nabi yakub: kawom henokh, palu, hezron dan karmi. ureueng agam dalam kawom nyan na jeumeulah jih 43.730 droe. aneuek palu na kheueh eliab, dan aneuek-aneuek eliab na kheueh nemuel, datan dan abiram. datan dan abiram nyan ka jipileh le umat, teuma awaknyan jipeusaho droe deungon murit-murit korah keu jilawan nabi musa dan nabi harun dan lom jilawan tuhan. laju bumoe pi beukah bubena awaknyan meunan cit deungon korah habeh banmandum jiuat le bumoe sampoe mate bak watee apui jitot sampoe binasa 250 droe ureueng agam. hainyan jeuet keu peuingat keu bansa israel. teuma aneuek-aneuek korah hana rhoh teupoh mate. nibak sukee simeon: kawom nemuel, yamin, dan yakhin, zerah dan saul. ureueng agam lam kawom nyan na jeumeulah jih 22.200 droe. nibak sukee gad: kawom zefon, hagi, syuni, ozni, eri, arod dan areli. ureueng agam lam kawom-kawom nyan na jeumeulah jih 40.500 droe. nibak sukee yehuda: kawom syela, peres, zerah, hezron dan hamul. dua droe aneuek yehuda, na kheueh er dan onan, ka meuninggai donya di tanoh kanaan. ureueng agam dalam kawom nyan na jeumeulah jih 76.500 droe. nibak sukee isakhar: kawom tola, pua, yasub dan simron. ureueng agam lam kawom nyan na jeumeulah jih 64.300 droe. nibak sukee zebulon: kawom sered, elon dan yahleel. ureueng agam lam kawom nyan na jeumeulah jih 60.500. nibak keuturonan nabi yusuf, nyang na jimeu aneuek dua droe aneuek agam: sukee manasye dan sukee efraim. nibak sukee manasye: makhir, aneuek manasye na kheueh bapak gilead; dan kawom-kawom nyang seulanjut jihnyoe na kheueh nibak kawom gilead: kawom lezer, helek, asriel, sekhem, semidan dan hefer. zelafehad aneuek hefer hana jimeu aneuek nyang agam, teuma aneuek-aneuek inong, nan-nan awaknyan na kheueh mahla, noa, hogla, milka dan tirza. ureueng agam lam kawom nyan na jeumeulah jih 52.700 droe. nibak sukee efraim: kawom sutelah, bekher, dan tahan. kawom eran na kheueh keuturonan sutelah. ureueng agam lam kawom nyan na jeumeulah jih 32.500

droe. nyan kheueh kawom-kawom keuturonan nabi yusuf. nibak sukee benyamin: kawom bela, asybel, ahiiram, sefufam dan hufam. kawom ared dan naaman na kheueh keuturonan bela. ureueng agam lam kawom-kawom nyan na jeumeulah jih 45.600 droe. nibak sukee dan: kawom suham. ureueng agam lam kawom nyan na jeumeulah jih 64.400 droe. nibak sukee asyer: kawom yimna, yiswi dan beria. kawom heber dan malkiel na kheueh keuturonan beria. asyer na jimeu aneuek sidroe aneuek inong nyang meunan serah. ureueng agam lam kawom-kawom nyan na jeumeulah jih 53.400 droe. nibak sukee naftali: kawom yahzeel, guni, yezer dan syilem. ureueng agam lam kawom nyan na jeumeulah jih 45.400 droe. banmandum ureueng agam israel na jeumeulah 601.730 droe. tuhan geupeugah ubak nabi musa, "tabagi kheueh tanoh-tanoh nyan keu sukee-sukee bansa israel meunurot rayeuk jih maseng-maseng sukee. gata peubuet kheueh nyan deungon cara teutiek undi. ubak sukee nyang rayeuk haroh neubri jeumba nyang rayeuk, dan meunan cit keu sukee nyang ubit gatabri teuma jeumba nyang ubit teuma." sukee lewi na kheueh nibak kawom-kawom gerson, kehat dan merari. lam keuturonan awaknyan jitamong cit keunan kawom libni, hebron, mahli, musi dan korah. kehat na kheueh bapak si amram. amram jimeukawen deungon yokhebed, aneuek lewi. yokhebed nyan lahe di nanggroe meuse. amram dan yokhebed nyan na teuma jimeu aneuek dua droe aneuek agam: nabi harun dan nabi musa, meunan cit teuma sidroe aneuek inong nyang nan jih miryam. nabi harun na teuma geumeu aneuek peuet droe aneuek agam: nadab, abihu, eleazar dan itamar. nadab dan abihu mate bak watee awaknyan jipeuseumah apui nyang hana geu galak le po teu allah. ureueng agam nibak sukee lewi nyan nyang meum sibuleuen u atueh na jeumeulah jih 23.000 droe. awaknyan teudafeutar aseng hana meusajan nibak syedara-syedara saboh bansa jihnyan, sabab awaknyan hana meuteume tanoh pusaka di israel. nyan kheueh dafearut nyang geupeubuet le nabi musa dan imeum eleazar keuhai kawom-kawom israel bak watee awaknyan teupeuna seunsus di darat moab di siblahi krueng yordan to ngon kota yerikho. nibak ureueng-ureueng nyang yoh watee ilee ka geudafeutar le nabi musa ngon nabi harun dipadang pasi sinai, hana meusidroe pi nibak awaknyan nyang mantong udeb. hainyan ka geupeugah le tuhan bahwa awaknyan banmandum mate di padang pasi. dan keubit awaknyan banmandum mate, teukeucuali kaleb aneuek yefuna dan yosua aneuek nun. zelafehad na teuma jimeu aneuek limong droe aneuek inong, awaknyan na kheueh mahla, noa, hogla, milka dan tirza. bapak zelafehad nyan nan jih hefer, dan bapak hefer nyan na kheueh gilead. bapak gilead nyan na kheueh makhir, bapak makhir nan jih manasye, dan bapak manasye na kheueh nabi yusuf. banlimong droe aneuek zelafehed nyan laju jijak meuhadab ubak nabi musa, dan imeum eleazar, meunan cit bubena peumimpin ngon banmandum umat nyang teungoh meusapat to ngon babah pintoe khimah tuhan. kheun awaknyan. "bapak kamoe meuninggai

donya di padang pasi dan lom gobnyan hana teuma meur aneuek agam. geuhnyan bukan peungikot korah nyang beuntentak ubak tuhan. bapak kamoe meuninggai sabab le desya geuh nyan keudroe. teuma pakon nan gobnyan haroh gadoh nibak bansa israel sabab gobnyan hana geumeu aneuek nyang agam? neubri kheueh ubak kamoe tanoh pusaka meusajan-sajan deungon kawom syedara bapak kamoe. laju nabi musa geupeusampoe hai awaknyan ubak tuhan, dan tuhan geupeugah ubak nabi musa, "peue nyang jipeugah le aneuek-aneuek zelafehad keubit beutoi. deungon nyan gata jok kheueh keu awaknyan tanoh pusaka meusajan deungon kawom syedara bapak awaknyan. waresan zelafehad nyan haroh kheueh jipeutreun keu aneuek-aneuek jihnyan nyang inong. gata peugah kheueh ubak bansa israel meunyo sidroe aneuek agam mate dan jihnyan hana jimeu aneuek nyang agam, teuma tanoh pusaka jihnyan haroh jipeuwareh ubak aneuek inong. meunyo ureueng nyan hana teuma aneuek inong, tanoh pusaka nyan jipeuwareh ubak syedara jih nyang agam. meunyo jihnyan hana teuma syedara nyang agam, tanoh jihnyan rhot ubak syedara nyang agam nibak bapak jihnyan. meunyo jihnyan hana teuma syedara nyang agam, dan hana teuma syedara agam siblah bapak jihnyan, tanoh nyan rhot ubak rakan nyang paleng krab atawa paleng to deungon kawom jihnyan." peuratoran nyan haroh jitaat ngon jituot le ureueng israel sibagoe peuratoran hukum nyang geupeurintah le tuhan meulalu nabi musa. tuhan meufeureuman lom ubak nabi musa, "gata jak ek kheueh u ateuh gunong abarim, dan nibak ateuh gunong nyan gata pandang kheueh nangroe nyang teuma ulon bri keu ureueng israel. oh ka ltheuh gata pandang nyan, gata teuma mate lagee aduen gata nabi harun, sabab dipadang pasi zin gata ban dua ka gata iengkeue ubak peurintah ulon. bak watee di meriba banmandum rakyat ji meukrob-krob ubak ulon, gata hana tatem peugah keuhai keukuasaan ulon dikeue awaknyan nyang na hubungan jih deungon ie nyan." (peuristiwanyan teujadi nibak mata ie meriba di kades, padang pasi zin). le nabi musa laju geumeu doa, "ya, tuhan po teu allah, nyang bri udeb keu mandum nyang udeb, ulon meulakee, neutunyok kheueh sidroe ureueng nyang hase jipimpin bansa nyoe; sidroe ureueng nyang hase jeuet keu panglima bak watee awaknyan jikak muprang. bek kheueh neupeubiyeu umat droeneuh nyoe lagee kawan domba nyang hana ureueng rabe." kheun tuhan ubak nabi musa, "gatajak hoi kheueh yosua aneuek nun. jihnyan sidroe ureueng nyang carong. gata peudeuk kheueh jaroe gata u ateuh ulee jihnyan. gata yue kheueh jihnyan jidong dikeue imeum eleazar dan banmandum umat. dikeue awaknyan banmandum gata haroh gata peumaklum bahwa yosua nyan na kheueh keu geunantoe gata. gata seurah kheueh ubak jihnyan siladam nibak keukuasaan gata, mangat umat israel jitaat keu jihnyan. yosua haroh jikak lakee naseuhat ngon peutunyok ubak imeum eleazar, dan eleazar haroh teuma jitanyong keuheundak ulon deungon jingui urim dan tumim. deungon caranyan eleazar jipimpin yosua dan banmandum bansa israel dalam

sigala peukara nyang awaknyan peukeue." nabi musa laju geupeubuet lagee nyang geupeurintah le tuhan nyan ubak geuhnyan. gobnyan geuyue dong laju yosua dikeue imeum eleazar dan dikeue banmandum umat. laju nabi musa geupeudeuk jaroe gobnyan di ateuh ulee yosua dan geupeumaklum laju bahwa yosua nyan na kheueh kegeunantoe gobnyan, lagee nyang geupeugah le tuhan ubak gobnyan. tuhan meufeureuman ubak nabi musa mangat gobnyan geujak peugah ubak bansa israel bahwa awaknyan haroh jisimak beuet-get bahwa bak watee-watee nyang ka teupeuteuntee, teupeuseumah keureubeuen-keureubeuen peunajoh nyang teupeugalak ate tuhan. nyoe kheueh keureubeuen nyang haroh jipeuseumah ubak tuhan: keu keureubeuen tieb-tieb uroe, dua boh aneuek bubiri agam nyang meu umu sithon, dan hana teuma meucupa mubacut pi nibak atra keureubeuen nyan, nyang saboh keu peuseumahan beungoh, dan nyang saboh teuk teuma keu peuseumahan seupot. meusigoe deungon aneuek bubiri nyan haroh teuma teupeuseumah sikilo gram teupong teupung deungon si aree minyeuk zaiton nyang paleng get. nyan kheueh keureubeuen nyang teutot nyan teutab dan nyang phon-phon that teupeuseumah di gunong sinai. bee keureubeuen nyan keubit that teupeugalak ate tuhan. meusigoe-sigoe deungon aneuek bubiri nyan beuna teuma si aree ie anggo nyang jisiram u ateuh miseubah. aneuek bubiri keu keureubeuen seupot uroe haroh kheueh jikeureubeuen deungon cara nyang saban lagee nyang jipeuseumah beungoh uroe, meusajan ngon ie anggo. bee keureubeuen nyang teutot nyan keubit that-that galak ate tuhan. nibak uroe sabat haroh kheueh teupeuseumah dua boh aneuek bubiri agam nyang mantong meu umu sithon nyang hana teuma meucupa mubacut pi nibak beulatang nyan, dua kilo gram teupung nyan ka teujampu deungon minyeuk zaiton keu keureubeuen sajan dan keureubeuen ie anggo. keureubeuen nyang teutot nyan haroh kheueh teupeuseumah tieb-tieb uroe sabat sibagoe seunamah ubak keureubeuen uroe-uroe meusigoe-sigoe deungon keureubeuen ie anggo. nibak phon tieb-tieb buleuen haroh teupeuseumah ubak tuhan keureubeuen nyang teutot lagee dua boh leumo agam nyang muda, saboh bubiri agam, tujuh boh aneuek bubiri agam nyang mantong meu umu sithon, maseng-maseng nyang hana keunong cupa meubacut pi. sibagoe keureubeuen sajan haroh kheueh jipeuseumah teupung nyang meujampu ngon minyeuk zaiton; lhee kilo gram teupung keu tieb-tieb saboh leumo agam; dan dua kilo gram teuma teupung keu bubiri agam, dan sikilo gram teupung keu tieb-tieb saboh aneuek bubiri agam. keureubeuen nyang teutot nyan na kheueh lagee keureubeuen peunajoh, dan bee keureubeuen nyang mangat nyan keubit that-that galak ate tuhan. meusigoe-sigoe deungon keureubeuen nyang teutot nyan haroh teuma jipeuseumah keureubeuen ie anggo, le jih dua aree keu tieb-tieb leumo agam, si aree siteungoh keu bubiri agam, dan si aree teuma keu tieb-tieb saboh aneuek bubiri. nyan kheueh peuratoran keuhai keureubeuen nyang teutot nyan haroh jipeuseumah nibak tieb-tieb tanggai

sa tieb-tieb buleuen lom tieb-tieb thon. sibagoe sinamah nibak keureubeuen nyang teutot uroe-uroe deungon keureubeuen ie anggo, meunan cit haroh teuma neupeuseumah saboh kameng agam keu keureubeuen peu amphon desya. nibak tanggai peuet blaih buleuen nyang keu sa, na kheueh uroe raya paskah keu tuhan. nibak uroe oh ltheueh nyan teuma, tanggai limong blaih, na kheueh phon-phon peurayaan ruti nyang hana meurago, dan treb jih tujuh uroe gata hana jeuet gata pajoh ruti nyang teupeuet na meurago. nibak uroe nyang keuphon bak uroe peurayaan nyan gata haroh kheueh gata meusapat mangat meusajan-sajan ta meueiebadat, dan hana jeuet gata peubuet buet-buet nyang brat. gata peuseumah kheueh ubak tuhan keureubeuen nyang teutot dua boh leumo agam nyang mantong muda, saboh bubiri agam, dan tujuh boh teuma aneuk bubiri agam nyang mantong meu-umu sithon, maseng-maseng nyang hana meucupa meubacut pi. gata peuseumah kheueh teuma keureubeuen sajian nyang teupeu wajebe, lagee teupong nyang meujampu deungon minyeuk zaiton: lhee kilo gram teuma teupong keu tieb-tieb saboh leumo agam, dua kilo gram keu bubiri agam, dan sikilo gram teuma keu tieb-tieb saboh aneuk bubiri agam. gata peuseumah cit teuma saboh kameng agam keu keureubeuen peu amphon desya. deungon caranyan gata ka gata peubuet upacara teupeu sampoh desya umat. banmandum keureubeuen nyan na kheueh sibagoe sinamah ubak keureubeuen nyang teutot beungoh nyang ka lazem. deungon cara nyan cit teuma haroh kheueh gata peuseumah ubak tuhan keureubeuen nyang teutot si treb jih tujuh uroe. keureubeuen nyan na kheueh lagee keureubeuen sinamah ubak keureubeuen nyang teutot uroe-uroe deungon keureubeuen ie anggo jihnyan teuma. bee keureubeuen nyang mangat nyan lumpah that galak ate tuhan. bak uroe nyang keutujuh gata haroh gata meusapat mangat gata meueiebadat dan hana jeuet gata peubuet buet nyang brat-brat. nibak uroe nyang keuphon khanuri musem keumeukoh, oh ltheueh uroe raya lewat tujuh goe aleuhad, bak watee gata tapeuseumah gandom baro ubak tuhan, gata haroh tameu iebadat seucara meujeumaah, dan hana jeuet gatapeubuet buet nyang brat-brat. gata peuseumah kheueh ubak tuhan keureubeuen teutot na kheueh dua boh leumo agam, saboh bubiri agam nyang mantong muda dan tujuh boh aneuk bubiri agam nyang meu-umu sithon, maseng-maseng nyang hana meucupa mubacut pi. bee keureubeuen nyang teutot nyan keubit that galak ate tuhan. gata peuseumah kheueh teuma keureubeuen uroe-uroe nyang teupeu wajebe, na kheueh teupong teujampu ngon minyeuk zaiton: lhee kilo gram keu tieb-tieb saboh leumo agam, dua kilo gram teuma keu bubiri agam, dan sikilo gram keu tieb-tieb saboh aneuk bubiri. gata peuseumah cit teuma saboh kameng agam keu keureubeuen peu amphon desya. deungon caranyan gata ka tapeubuet upacara teupeu sampoh desya umat. keureubeuen-keureubeuen nyan meunan cit deungon keureubeuen anggo na kheueh sibagoe keureubeuen sinamah ubak keureubeuen nyang teutot uroe-uroe dan keureubeuen sajian. nibak

tanggai sa buleuen tujuh gata haroh gata iebadat seucaya meujeumaah ngon meusapat, dan hana jeuet gata peubuet buet nyang brat-brat. nibak uroe nyan beureuguih-beureuguih haroh gata yueb. gata peuseumah kheueh ubak tuhan keureubeuen teutot na kheueh saboh leumo agam nyang mantong muda, saboh bubiri agam dan tujuh boh aneuk bubiri nyang mantong meu umu sithon, maseng-maseng atranyan nyang hana meubacut pi meucupa. bee keureubeuen nyang mangat nyan keubit that-that galak ate tuhan. gata peuseumah kheueh teuma keureubeuen sajian nyang geupeu wajebe, na kheueh teupong nyang teujampu deungon minyeuk zaiton: lhee kilo gram keu leumo agam, dua kilo gram teuma keu bubiri agam, dan sikilo gram teuma keu tieb-tieb saboh aneuk bubiri. gata peuseumah kheueh teuma saboh kameng agam, keu keureubeuen peu amphon desya. deungon caranyan gata ka gata peubuet upacara teupeu sampoh duma desya umat. keureubeuen-keureubeuen nyan na kheueh sibagoe sinamah ubak keureubeuen nyang teutot nyang teupeuseumah meusajan-sajan deungon keureubeuen sajian jihnyan, nibak tanggai sa di tieb-tieb buleuen. meunan cit sibagoe keureubeuen sinamah keu keureubeuen nyang teutot uroe-uroe nyang teupeuseumah meusigoe-sigoe deungon keureubeuen sajian dan keureubeuen ie anggo jihnyan. bee keureubeuen nyang mangat nyan keubit that-that galak ate tuhan. bak tanggai siploh buleuen tujuh gata haroh gata peuna iebadat seucara meujeumaah. bak uroeyan gata haroh gata puasa dan hana teuma jeuet gata meukeureuja. gata peuseumah kheueh ubak tuhan saboh leumo keu keureubeuen nyang teutot dan leumo nyang mantong muda lom teuma nyang agam, saboh bubiri agam dan tujuh boh aneuk bubiri agam nyang meu-umu sithon, maseng-maseng nyang hana keunong cupa mubacut pi. bee keureubeuen nyang mangat nyan keubit that galak ate tuhan. gata peuseumah cit teuma keureubeuen sajian nyang teupeuwajebe, na kheueh teupong meujampu deungon minyeuk zaiton: lhee kilo gram keu leumo agam, dua kilo gram keu bubiri agam, dan sikilo gram keu tieb-tieb saboh aneuk bubiri. meunan cit gata peuseumah teuma saboh kameng agam keu upacara teupeu amphon desya umat, seulaen keureubeuen teupeu amphon desya dan keureubeuen nyang teutot uroe-uroe meusajan ngon keureubeuen sajian dan keureubeuen ie anggo nyang teupeuseumah nibak uroe nyan. bak tanggai limong blaih buleuen tujuh gata haroh gata peuna iebadat seucara meujeumaah, dan hana jeuet gata peubuet buet nyang brat-brat. nyang treb jih tujuh uroe gata haroh tapeuna peurayaan keu teuhoreumat tuhan. bak uroe nyang keuphon gata peuseumah kheueh ubak tuhan keureubeuen teutot na kheueh lhee blaih boh leumo agam muda, dua boh bubiri agam nyang mantong muda, dan peuet blaih boh teuma aneuk bubiri agam nyang umu jih sithon, maseng-maseng beulatang nyan hana meucupa mubacut pi. bee keureubeuen nyang keubit mangat nyan biet-biet that galak ate tuhan. tapeuseumah kheueh teuma keureubeuen sajian nyang teupeuwajebe lagee teupong meujampu ngon minyeuk zaiton: lhee kilo

gram keu tieb-tieb saboh leumo agam, dua kilo gram keu tieb-tieb saboh bubiri agam, dan sikilo gram teuma keu tieb-tieb aneuek bubiri. meusigoe-sigoe deungon keureubeuen sajian nyan haroh kheueh teuma teupeuseumah keureubeuen ie anggo nyang teupeureulee. seulaen nibak nyan tapeuseumah kheueh teuma saboh kameng agam keu keureubeuen teupeu amphon desya. keureubeuen nyan na kheueh sibagoe keureubeuen seunamah ubak keureubeuen nyang teutot uroe-uroe meusigoe ngon keureubeuen sajian dan keureubeuen ie anggo. bak uroe nyang keu dua gata peuseumah kheueh teuma dua blaih boh leumo agam nyang mantong muda, dua boh bubiri agam, dan peuet blaih boh teuma aneuek bubiri agam nyang meu-umu sithon, maseng-maseng atra nyan nyang hana keunong mucupa mubacut pi. gata peuseumah kheueh teuma meusigoe-sigoe deungon nyan keureubeuen-keureubeuen nyang laen lahee nyang teupeureulee keu uroe nyang phon. bak uroe nyang keulhee gata peuseumah kheueh teuma siblah boh leumo agam nyang mantong muda, dua boh bubiri agam, dan peuet blaih boh aneuek bubiri agam nyang meu-umu sithon, maseng-maseng atra nyan nyang hana keunong cupa mubacut pi. gata peuseumah kheueh teuma meusigoe-sigoe deungon nyan banmandum keureubeuen nyang laen lahee nyang teupeureulee nibak uroe-uroe nyang phon. bak uroe nyang keu peuet gata peuseumah kheueh siploh boh leumo agam nyang mantong muda, dua boh bubiri agam, dan peuet blaih boh teuma aneuek bubiri agam nyang mantong meu-umu sithon, maseng-maseng nyang hana keunong cupa mubacut pi. meusigoe deungon nyan gata peuseumah kheueh teuma keureubeuen nyang laen lahee nyang teupeureulee keu uroe-uroe nyang phon. bak uroe nyang keulimong tapeuseumah kheueh teuma sikureueng boh leumo agam nyang muda-muda, dua boh teuma bubiri agam, dan peuet blaih boh aneuek bubiri nyang meu-umu sithon, maseng-maseng atranyan nyang hana meucupa mubacut pi. meusigoe deungon nyan gata peuseumah kheueh teuma keureubeuen nyang laen lahee nyang teupeureulee keu uroe nyang phon. bak uroe nyang keunam tapeuseumah teuma lapan boh leumo agam nyang muda, dua boh teuma bubiri agam, peuet blaih boh aneuek bubiri agam nyang meu-umu sithon, maseng-maseng nyang hana keunong cupa mubacut pi. meusigoe deungon nyan gata peuseumah kheueh teuma banmandum keureubeuen nyang laen lahee nyang teupeureulee keu uroe nyang phon. bak uroe nyang keutujuh tapeuseumah kheueh teuma tujuh boh leumo agam nyang mantong muda, dua boh bubiri agam, dan peuet blaih boh aneuek bubiri agam nyang mantong meu-umu sithon, maseng-maseng atra nyan nyang hana meucupa mubacutpi. meusigoe deungon nyan gata peuseumah kheueh teuma banmandum keureubeuen-keureubeuen nyang laen lahee nyang teupeureulee keu uroe nyang phon. bak uroe nyang keulapan haroh kheueh teuma gata meusapat keu gata iebadat dan meunan cit hana teuma jeuet gata keureuja buet-buet nyang brat. gata peuseumah kheueh teuma ubak tuhan keureubeuen nyang teutot sibagoe leumo agam nyang mantong muda, saboh

bubiri agam dan tujuh boh teuma aneuek bubiri agam nyang meu-umu sithon, maseng-maseng nyang hana meucupa mubacutpi. bee keureubeuen nyang mangat nyan keubit that-that galak ate tuhan. meusigoe deungon nyan tapeuseumah kheueh teuma keureubeuen nyang laen lahee nyang teupeureulee keu uroe nyang phon. nyan kheueh peuratoran-peuratoran keuhai keureubeuen nyang teutot, keureubeuen sajian, keureubeuen ie anggo, seureutoe keureubeuen peudame nyang haroh gata peuseumah ubak tuhan nibak peurayaan-peurayaan gata nyang ka geupeuteuntee nyan. keureubeuen-keureubeuen nyan na kheueh sibagoe sinamah keu keureubeuen-keureubeuen nyang gata peuseumah keu gata peuleuhe kaoidan keu keureubeuen keu galak droe. nabi musa laju geujak peusampoe ubak bansa israel peue-peue mantong nyang geupeurintah le tuhan ubak gobnyan. nabi musa geubri teuma peuratoran nyoe ubak peumimpin bansa israel. meunyo na sidroe ureueng agam jimeukaoidan ngon ji meujanji jimeusumpah ubak tuhan, sampoe ureueng nyan ka ji ikat droe jih deungon janji nyan, ureueng nyan haroh kheueh jipeu peunoh peue nyang ka jipeujanji nyan, dan hana jeuet ji iengkeue ubak peue nyang ji peugah nyan. meunyo na sidroe aneuek dara nyang tinggai di rumah ureueng syiek jih jimeukaoidan ubak tuhan, dan nibak kaoidan ji ikat droe jih deungon sapeue-sapeue janji, dan si ayah aneuek dara nyan hana teuma jeuet keu masa alah bak watee jideungoe hai nyan, teuma aneuek dara nyan haroh kheueh jipeulheueh banmandum kaoidan janji jihnyan. teuma, meunyo watee jideungoe hai nyan ureueng syiek aneuek dara nyan hana jiharok, teuma le aneuek dara nyan hana teu ikat ubak janji dan kaoidan jih nyan. tuhan teuma geupeu amphon si dara nyan, sabab jihnyan jitam le ureueng syiek jih. meunyo na sidroe ureueng inong nyang gohlohm jimeukawen jimeukaoidan ubak sapeue-sapeue janji, aleh na jipike-pike hai nyan leubeh ilee atawa bit meunan mantong, teuma ureueng inong nyan ka teu ikat ubak kaoidan dan janji jih nyan. meunyo oh trok watee ureueng inong nyan ji meukawen, jihnyan teutab teu ikat ubak kaoidan dan janji jihnyan, asai ureueng lakoe jihnyan hana meurasat brat ateuh janji dan kaoidan ureueng binoe jih nyan. teuma seubalek jih meunyo ureueng lakoe jih nyan jitam hai nyan, di ureueng inongnyan hana teu ikat ubak janji dan kaoidan jih nyan. tuhan teuma geupeu amphon ureueng inong nyan. meunyo na sidroe ureueng inong balee nyang ka jitalueuk le ureueng lakoe jih jimeukaoidan sampoe kaoidan jihnyan teu ikat droe jih, ureueng nyan teu ikat ubak kaoidan jih nyan dan nyan haroh jipeutrok dan jipeubuet teuma. meunyo na sidroe ureueng inong nyang ka jimeukawen jimeukaoidan jimeujanji nyang teu ikat droe jih nyan, ureueng nyan haroh kheueh jipeupeunoh banmandum nyang ka jipeujanji nyan, asai lakoe ureueng inong nyan hana jeuet keu masa alah bak watee jideungoe hai nyan. teuma meunyo watee jideungoe hai nyan lakoe ureueng inong nyan jitam peurumoh jih nyan, di ureueng inong nyan hanale teu ikat ubak kaoidan jih nyan. tuhan teuma geupeu amphon jih nyan, sabab lakoe jih hana jipeu idhin. ureueng lakoe na hak

keu situju atawa jipeubateue tieb-tieb kaoli nyang geupeuget le ureueng binoe jihnyan. teuma meunyoewatee jideungoe hai nyan ureueng lakoe jih nyan hana jeuet keu masa alah, ureueng inongnyan haroh kheueh jijak peulheueh banmandum kaoli nyang ka ji ikat nyan. ureueng lakoe jih nyan situju deungon kaoli ureueng binoe jih nyan sabab hainyan hana jeuet keu masa alah bak watee jideungoe hai nyan. meunyoewatee watee ureueng lakoe nyan jipeu bateue kaoli ureueng binoe jih nyan, teuma le ureueng lakoe nyan kheueh nyang haroh jitanggong akibat nyang teuka ateueh peue nyang ka jipeu bateue nyan. nyan kheueh peuratoran-peuratoran nyang geubri le tuhan ubak nabi musa keuhai kaoli dan janji nyang jipeuget le sidroe aneuek dara nyang tinggai di rumoh ureueng syiek jih nyan, atawa le sidroe ureueng inong nyang ka ji meukawen. tuhan meufeureuman lom ubak nabi musa, "gata jak tueng bila kheueh laju ubak ureueng midian sabab peue nyang ka awaknyan peubuet ateueh bansa israel. oh lheureu nyan gata teuma mate." teuma nabi musa geupeugah ubak bansa israel, "meusiab-siab kheueh keu tajak muprang: gata haroh tajak prang ureueng midian keu teujak peubuet hukoman tuhan ubak awaknyan. nibak tieb-tieb sukee bansa israel, gata haroh tapeusiab siribee droe tantra keu jimaju u mideuen prang." teuma jipileh kheueh siribee droe nibak tieb-tieb sukee bansa israel, banmandum jih nyan na jeumeulah dua blaih ribee droe nyang ka siab keu jijak maju u mideuen prang. nabi musa geuyue awaknyan jijak muprang meusajan-sajan deungon pinehas aneuek imeum eleazar. pinehas jiba sajan barang-barang suci dan beureuguih-beureuguih guna jih keu teutujuk sibagoe tanda-tanda. pailagee peurintah tuhan ubak nabi musa, ureueng israel laju jijak prang ureueng midian dan laju jijakpoh mate banmandum ureueng agam awaknyan, jitamong cit keunan limong droe raja midian, awaknyan na kheueh ewi, rekem, zur, hur, dan rebah. bileam, aneuek beor, meunan cit jipoh mate. ureueng israel laju jidrob ngon jiteuen ureueng inong dan aneuek-aneuek manyak ureueng midian, dan jireupah teuma bubena beulatang peulara, meunan cit bubena hareuta keukayaan awaknyan. banda-banda dan khimah-khimah awaknyan pi jitot banmandum. oh lheureu nyan ureueng-ureueng israel jijak cok laju bubena hareuta nyang jirampah nyan, jitamong cit keunan ureueng nyang teuteuen dan beulatang peulara, laju atranyan jijak ba ubak nabi musa dan imeum eleazar dan keu banmandum umat israel. nibak watee nyan awaknyan teungoh jipeudong khimah di ateueh darat moab, nibak bineh krueng yordan, toe ngon banda yerikho. teuma nabi musa, imeum eleazar dan banmandum peumimpin nyang laen nibak umat israel laju jiteubiet nibak lam khimah keu jijak sambot tantra israel nyang ka jiwoe nibak mideuen prang nyan. nabi musa geubeungeh keu panglima-panglima prang nyan, ubak ulee pasokan dan ubak ulee lasekar nyang ban mantong jiwoe nibak prang. geupeugah le gobnyan ubak awaknyan, "pakon gatanyoewapeubiyeu banmandum ureueng inong nyan udeb? bukon kheueh ureueng-ureueng nyan nyang ka jiseutot naseuhateu bileam,

sampoe jibujuk umat israel di peur mangat jitinggai tuhan?" dan nyan kheueh teuma nyang peuteuka beuncana u ateueh umat tuhan! nyan, jinoenyoe tajak poh mate kheueh laju bubena aneuek agam dan aneuek inong nyang hanale gadih. teuma banmandum aneuek inong nyang mantong peurawan jeuet gatacok keu gata. dan gata banmandum nyang ka gatamat manyet ureueng mate haroh gata tinggai diluwa khimah-khimah nyang treb jih tujoh uroe. nibak uroe nyang keu lhee dan nyang keu tujoh gata dan banmandum ureueng inong nyang ka gata teun nyan haroh gata peuna upacara teupeu gleh droe. tieb-tieb sion peukayan dan peue mantong nyang nibak kulet, bulee kameng atawa kayee, nyan pi haroh kheueh teupeu suci." oh lheureu nyan di imeum eleazar geupeugah laju ubak mandum tantra nyang ban jiwoe nibak mideuen prang nyan, "nyoe kheueh peuratoran-peuratoran nyang geubri le tuhan ubak nabi musa. peue-peue mantong nyang hana tutong meunyoewatee teutot ngon apui, lagee meuh, pirak, teumaga, beuso, timah puteh dan timah itam, haroh teupeu gleh atra nyan deungon cara teupeutamong u dalam apui. oh lheureu nyan barang-barang nyan haroh kheueh teuma teu rhah sampoe gleh deungon ie upacara nyang teupeu suci mangat atra nyan hana jeuet keu kuto le. dan banmandum beunda nyang laen nyang tutong keunong apui haroh kheueh teupeu suci atra nyan deungon ie upacara nyang teupeu gleh nyan. nibak uroe nyang keutujoh haroh teuma rhah peukayan gata, baro kheueh gata hanale teupeugah kuto, dan jeuet gata tamong u dalam khimah-khimah." tuhan meufeureuman ubak nabi musa, "gata dan imeum eleazar meunan cit deungon banmandum peumimpin nyang laen nibak umat israel, haroh kheueh gata itong banmandum hase hareuta nyang teureupah watee di mideuen prang, jitamong cit keunan ureueng nyang teuteuen dan beulatang nyang laen. hase nibak hareuta nyang teureupah dimideuen prang nyan haroh gata bagi dua nyang sadub le jih; saboh jeumba keu tantra nyang ka jijak muprang dan saboh jeumba teuk keu umat nyang tinggai. keu jeumba ulon nyang khusus, ulon, tuhan, nibak hak jeumba tantra nyan haroh kheueh gatacok saboh nibak tieb-tieb limong reuthoh – bah kheuehnyan nibak ureueng-ureueng nyang teuteuen, meunan cit nibak leumo, keuleudee, bubiri dan kameng. gata jok kheueh nyan ubak imeum eleazar sibagoe peuseumahan khusus keu ulon, tuhan. nibak jeumba nyang teubri keu umat israel nyan, haroh teuma teucok saboh nibak tieb-tieb limong ploeh, bah kheueh nyan nibak ureueng-ureueng nyang teuteuen, meunan cit nibak leumo, keuleudee, bubiri dan kameng. gata jok kheueh banmandum nyan ubak ureueng lewi nyang jiroh khimah ulon." nabi musa dan imeum eleazar laju geupeubuet lagee nyang ka geupeurintah le tuhan ubak gobnyan. seulaen nyang ka jicok le tantra keujeumba awaknyan, hase nyang teureupah nyan na jeumeulah jih: 675.000 boh bubiri dan kameng, 72.000 boh leumo, 61.000 boh keuleudee, dan 32.000 droe aneuek dara nyang mantong gadih. siteungoh nibak jeumeulah nyan haroh kheueh teubri keu tantra deungon reuncijih na kheueh lageenyoe: 337.500

boh bubiri dan kameng, dan nibak jeumeulah nyang 675 boh na kheueh keu meuneubri khusus ubak tuhan; 36.000 boh leumo, 72 boh keu meuneubri khusus ubak tuhan 30.500 boh keuleudee, 61 boh na kheueh keu meuneubri khusus ubak tuhan; 16.000 droe aneuk dara mantong gadih, 32 droe na kheueh keu meuneubri khusus ubak tuhan. le nabi musa geujok laju meuneubri khusus nyan ubak imeum eleazar keu geupeuseumah teuma ubak tuhan, lagee nyang ka geupeurintah le tuhan. jeumba keu rakyat sadub meuneuweuk jih deungon jeumba tantra: 337.500 boh bubiri dan kameng, 36.000 boh leumo, 30.500 boh keuleudee, dan 16.000 droe aneuk dara nyang mantong gadih. lagee nyang geupeurintah le tuhan, nabi musa laju geucok saboh nibak tieb-tieb limong ploh droe tawanan dan beulatang, laju atra nyan geujok ubak ureueng-ureueng lewi nyang meutugaih di khimah tuhan. oh ka seulesoe le panglima prang nyang ka jipimen tantra israel, laju jijak meuhadab ubak nabi musa dan laju jilapor, "teungku, kamoe ka kamoe itong bubena tantra dimiyueb kamoe. teunyata jeumeulah awaknyan geunab, hana meusidroe pi nyang gadoh. sabab nyan kamoe na kamoe ba piasan-piasan meuh, gleueng jaroe ngon gleueng gaki, iencien, keurabu dan talo takue nyang ka jicok maseng-maseng. banmandum nyoe kamoe seurah ubak tuhan sibagoe peuseumahan kamoe, mangat tuhan teutab geulindong kamoe." nabi musa dan imeum eleazar geuteurimong laju meuh nyan, banmandum nyan na kheueh teupeuget lam bantuek piasan. nyang jipeuseumah le panglima nyan na brat jih rab dua reutoh kilo gram. teuma di tantra nyan maseng-maseng ka jicok hase hareuta teureupah nibak mideuen prang nyan dan ka jingui keudroe jih maseng-maseng. teuma nabi musa dan imeum eleazar laju geuba meuh nyan ubak khimah tuhan keu geupeuseumah ubak tuhan mangat tuhan geulindong bansa israel. sukee-sukee ruben dan gad awaknyan jai lumpahna jipeulara beulatang peulara. bak watee awaknyan jikalon padubna get jih tanoh yaezer dan tanoh gilead keu teupat peulara beulatang, laju awaknyan jijak meuhadab ubak nabi musa, imeum eleazar, dan peumimpen-peumimpen nyang laen nibak sukee israel sira jipeugah, "tanoh banda atarot, dibon, yaezer, nimra, hesybon, eleale, sebam, nebo dan beon nyang ka jiduek le bansa israel deungon geutulong le tuhan, lumpah get keu teupat peulara beulatang. dan sabab beulatang peulara kamoe ka jai lumpah na, kamoe lakee mangat jeuet tanoh nyan neubri keukamoe mangat jeuet keu hak milek kamoe. bek kheueh neuyue kamoe minah u meurandeh krueng yordan." geujaweueb le nabi musa, "trok that ate gata tinggai disinoe, jeh ureueng-ureueng saboh bansa ngon gata ka jijak muwang? pakon gata peutakot bansa israel jjeumeurang krueng yordan dan jitamong u nanggroe nyang ka geubri le tuhan ubak awaknyan? meunan cit deungon ayah-ayah gata pi jipeugot lagee nyan, bak watee ulon yuejak awaknyan u kades-barnea mangat jijak meurawoh lam nanggroe nyan. awaknyan ka trok u panton eskol dan ka ltheueh teuma jingingi tanoh nyan. teuma watee awaknyan jigisa, awaknyan jipeujeuet

bansa israel teumakot keu jitamong lam tanoh nyang geubri le tuhan ubak awaknyan. teuma watee nyan tuhan beungeh lumpah na laju geupeugah le gobnyan, 'ureueng-ureueng nyan hana seutia ubak ulon. ngon sabab nyan ulon meusumpah bahwa nibak awaknyan nyang ka meu-umu dua ploh thon u atueh bak watee awaknyan ji tinggai nanggroe meuse, hana nyang jiteume tamong u nanggroe nyang ka ulon peujanji bak nabi ibrahim, nabi ishaq dan nabi yakub.' banmandum ureueng nyan keunong hukuman keucuali si kaleb aneuek yefune, ureueng kenas dan yosua aneuek nun, sabab awaknyan bandua teutab seutia ubak tuhan. tuhan beungeh that-that ubak bansa israel sampoe gobnyan geupeu biyeu mantong bansa israel nyan ji meuwot-wot di padang pasi peuet ploh thon treb jih sampoe an banmandum angkatan nyang ka jibeurontak ubak gobnyan mate banmandum. dan jinoentyok, gata teuma nyang beurontak lagee ayah-ayah gata! gata keubit saboh kawan ureueng-ureueng nyang meudesya nyang jeuet keu beungeh tuhan leubeuh-leubeuh lom ubak bansa israel! meunyoe gata gisa gata peulikit tuhan, teuma banmandum bansa nyoe geupeubiyeu leubeuh treb lom di padang pasi, dan gata kheueh nyang peusabab awaknyan binasal" ureueng-ureueng ruben dan ureueng-ureueng gad nyan laju jijak peurab ubak nabi musa sira jipeugah, "meunyoe meunan bah kheueh teuleubeuh ilee kamoe peugot weue nyang meu binteh batee keu bubiri-bubiri kamoe, dan banda-banda nyang binteh jih beuton teuma keu aneuek peurumoh kamoe. kamoe reujang meusiab-siab keu kamoe jak maju u mideuen prang meusajan-sajan deungon syedara-syedara kamoe nyang laen. kamoe teuma kamoe pimpen seurangan nyan dan kamoe ba awaknyan ji tamong u dalam nanggroe nyang ka jeuet keu hak milek awaknyan. siatnyoe aneuek dan peurumoh kamoe bah kheueh tinggai disinoe, di banda-banda nyang meu pageue ngon beuton nyang kukoh dan aneuek dan peurumoh kamoe nyan aman nibak ji peukaru le peunduduek nanggroe nyoe. kamoe hana teuma kamoe woe u rumoh kamoe sigohlom ureueng israel jiteume tanoh keu hak milek pusaka awaknyan. kamoe hana kamoe tem teurimong mubacut pi nibak tanoh nyang na di meurandeh krueng yordan nyan, sabab kamoe ka kamoe teurimong jeumba hak milek kamoe nyang disinoe, di siblah u timu krueng yordan." geujaweueb le nabi musa, "meunyoe gata bit-bit deungon sunggoh-sunggoh keu ka siab gata jak muwang keu tuhan, dan banmandum nyang na lamkawan gata nyang jeuet jimuprang jijak jeumeurang krueng yordan, dan dimiyueb pimpenan tuhan gata prang musoh-musoh sampoe tuhan geujak paroh awaknyan, akhe jih nanggroe nyan taklok ubak gobnyan, teuma gata jeuet tawoe, dan beubaih kheueh gata nibak keuwajeaban gata teuhadab tuhan dan teuhadab syedara-syedara gata, dan tuhan teuma geubri tanoh di siblah u timu nyan jeuet keu hak milek gata. teuma ingat, meunyoe gata hana tapeuteupat janji gata nyan, gata meudesya ubak tuhan dan teuma geuhukom sabab desya gata nyan. gata jak kheueh peudong banda-banda ngon weue beulatang gata nyan, bek

tuwoe gata peuteupat janji deungon janji nyang ka gata peugah nyan!" laju ureueng-ureueng gad ngon ureueng-ureug ruben jipeugah, "teungku, kamoe teuma kamoe peubuet peue nyang teungku peurintah. aneuek peurumoh kamoe meunan cit ngon beulatang peulara lagee leumo dan bubiri kamoe teuma tinggai disinoo, di banda-banda gilead. teuma kamoe nyoe ka siab keu kamoejak muprang dimiyueb pimpenan tuhan. kamoe teuma kamoe jimeumrang krueng yordan dan kamoe muprang lagee nyang ka teungku peugah." teuma nabi musa geubri peurintah nyoe ubak imeum eleazar, yosua dan peumimpin-peumimpin israel, "meunyo ureueng-ureueng gad dan ureueng-ureueng ruben jiseutot peurintah tuhan dan jimeumrang krueng yordan keu jijak muprang, dan meunyo ateuhe bantuan awaknyan gata meuhase gata reubot nanggroo nyan, teuma tanoh gilead haroh gata bri ubak awaknyan jeuet keu hak milek awaknyan. teuma meunyo awaknyan hana jimeumrang krueng yordan keu jijak muprang meusajan-sajan deungon gata, teuma awaknyan haroh jiteurimong jeumba tanoh pusaka di nanggroo kanaan, saban lagee gata." jawueb ureueng gad dan ureueng-ureueng ruben, "teungku, kamoe teuma kamoe peubuet peue nyang geupeurintah le tuhan. dimiyueb pimpenan tuhan kamoe teuma kamoe jeumeurang u nanggroo kanaan dan laju lam mideuen prang, teuma nyang kamoe harab bah kheueh tanoh nyang na disiblahi u timu krueng yordan nyoe teutab jeuet keu hak milek kamoe." le nabi musa laju geuseurah ubak sukee-sukee gad dan ruben dan ubak siladum sukee manasye banmandum daerah sihon, raja amori, dan daerah og, raja basan, jitamong cit keunan banda-banda dan tanoh nyang na di seukeulileng nyan. sukee gad jipeudong lom banda dibon, atarot, aroer, atarot-sofan, yaezer, yogbeha, bet-nimra, dan bet-haran sibagoe banda-banda nyang meu kuta dan sibagoe teupat weue-weue bubiri. sukee ruben jipeudong lom banda-banda hesybon, eleale, kiry-ataim, nebo, baal-meon, dan sebam. banda-banda nyang awaknyan peudong lom nyan awaknyan gantoe nan jih. gata makhir, aneuek manasye, jijak prang tanoh gilead laju jireubot dan jise ureueng-ureueng amori nyang na disinan. sabab nyan nabi musa laju geubri tanoh gilead nyan ubak kawom makhir, dan awaknyan tinggai teutab disinan. yair, nibak sukee manasye, jijak prang dan laju jireubot na meupadub boh gampong, laju gampong-gampong nyang jireubot nyan jiboh nan, "gampong-gampong yair". nobah jijak prang dan jireubot kenat meusajan ngon gampong-gampong nyang na seukeulileng nyan, laju jiboh nan nobah, meunurot nan jih keudroe. oh ka ltheueh nyan israel jitinggai tanoh meuse, dalam baresan meunurot sukee bansa maseng-maseng di miyueb pimpenan nabi musa ngon nabi harun, awaknyan jipioh disinan na meupadub boh teupat. tuhan geupeurintah ubak nabi musa mangat teucetet nan-nan nibak tieb-tieb teupat dipat mantong awaknyan jipioh. bansa israel jitinggai meuse bak tanggai limong blaih buleuen sa, si uroe oh ka ltheueh paskah nyang phon. deungon geulindong le tuhan awaknyan jitinggai laju banda rameses, jikalon

keudroe le bansa meuse, nyang teungoh jiseubee u dalam jirat aneuek-aneuek tuha awaknyan nyang mate geupoh le tuhan. deungon buet nyan, tuhan ka geubri bukeuti bahwa gobnyan leubeh teuga nibak ilah-ilah ureueng meuse. oh ka ltheueh bansa israel jitinggai rameses, awaknyan laju jipeudong khimah di sukot. laju awaknyan jibeurangkat lom dan jipeudong teuma khimah di etam, nibak bineh padang pasi. nibak teupat nyan awaknyan jigisa u pi-hahirot, disiblah u timu baal-zefon, laju jipeudong khimah to ngon migdol. oh ltheuehnyan awaknyan jitinggai teuma pi-hahirot, jimeumrang laot dan jitamong laju u dalam padang pasi etam; oh kaltheueh watee lthee uroe jijak, laju jipeudong teuma khimah di mara. beudoh inan awaknyan jijak laju dan jipeudong teuma khimah di elim; disinan na dua blaih boh mata ie dan tujoh ploh bak kuruma. oh ltheuehnyan awaknyan jitinggai teuma elim dan laju teuma geupudong khimah to ngon lhok suez. oh ltheueh nyan watee jijak lom awaknyan jipeudong teuma khimah di padang pasi sin, laju oh ltheueh nyan to ngon dofka, oh ltheueh nyan di alus, dan oh ltheuehnyan di rafidim, teuma disinan hana meuteume teupat cok ie jieb. nibak rafidim nyan awaknyan jijak laju trok u gunong hor dan jipeudong laju khimah di teupat-teupat nyoe: padang pasi sinai, kibro-taawa, "kubu nyang leuha", hazerot, ritma, rimon-peres, libna, risa, kehelata, gunong syafer, harada, makhelot, tahat, tarah, mitka, hasmona, moserot, bene-yaakan, hor-gidgad, yotbata, abrona, ezion-geber, padang pasi zin, dan gunong hor, nibak bataih tanoh edom. ateuhe peurintah tuhan, imeum harun laju geujak teungoh u ateuhe gunong hor. disinan gobnyan meuninggai bak tanggai sa buleuen limong nibak thon nyang keu peuet ploh oh ka ltheueh ureueng israel ji tinggai tanoh meuse. watee meuninggai, nabi harun meu umu 123 thon. oh ltheuehnyan teuma, na raja nibak nanggroo arad, nyang tinggai di tanoh neged, siblah u seulitan kanaan, meuteume haba bahwa umat israel teungoh ji tuju u nanggroo gobnyan. nibak teujak nibak gunong hor u darat moab, laju ureueng israel nyan jipeudong khimah di teupat-teupat nyang teupeugah di miyueb nyoe: zalmona, funon, obot, di teupat beukaih reuloh abarim di daerah moab, dibon-gad, almon-diblataim, gunong abarim to ngon gunong nebo, dan di darat moab nibak bineh krueng yordan, lom to teuma ngon banda yerikho, lamkawan bet-yesimot dan panton sitim. di ateuhe darat moab nyan, nibak bineh krueng yordan, to ngon banda yerikho, laju tuhan geubri ubak nabi musa peurintah-peurintah nyoe keu bansa israel, "meunyo gata jeumeurang krueng yordan keu tajak tamong u nanggroo kanaan, gata haroh ta use banmandum peunduduek nanggroo nyan. gata peubinasa banmandum bubena beurala awaknyan nyang teupeugat nibak batee logam dan meunan cit deungon teupat-teupat ibadat awaknyan gatapeu hanco banmandum. tanoh nyan haroh gata reubot ngon gataduek disinan sabab atra nyan ulon nyang bri keu gata. oh ltheuehnyan gata bagi-bagi laju keu kawom-kawom gata deungon cara jih gata tiek undi. ubak kawom nyang rayeuk haroh kheueh

gatabri nyang rayeuk, dan ubak kawom nyang ubit gatabri teuma jeumba jih nyang ubit. teuma meunyo peundudeuk nanggro nyan hana jitem teu use, ureueng-ureueng nyan teutab tinggai disinan teuma jipeu susah gata lagee ano di dalam mata atawa duro didalam aso gaki gata. teuma awaknyan kheueh nyang jijak prang gata. meunyo gata hana gata use awaknyan, ulon teuma nyang peubinasa gata lagee nyang ka ulon reuncana ateuah awaknyan." tuhan meufureuman ubak nabi musa keuhai peurintah gobnyan keu bansa israel lagee nyoe, "sikeujab teuk gata ka tatamong u dalam nanggro ureueng kanaan, nanggro nyang ulon bri ubak gata sibagoe tanoh pusaka. nyoe kheueh bataih-bataih nanggro gata nyan. di siblahi u seulan, bataih nyan phon nibak padang pasi zin meu isek laju u edom. di siblahi u timu bataih nyan phon nibak ujung seulan laot mate, wet laju u seulan trok ubak rot ueh akrabim dan laju u zin sampoe u kades-barnea di seulan. nibak teupat nyan wet lom teuma u barat laot trok u hazar-adar, dan laju trok u azmon. disinan wet u panton di bataih nanggro meuse dan akhe jih di laot teungoh. laot teungoh na kheueh bataih nanggro gata di siblahi u barat. di utara, phon nibak laot teungoh sampoe trok u gonong hor dan nibak teupat nyan teujak laju u rot hamat laju trok zedad dan u zifron dan akhe jih di hazar-enan. di siblahi u timu bataih nyan phon nibak hazar-enan u sefam. nibak teupat nyan treun laju u ribla di siblahi u timu ain, laju trok u buket-buket di pante timu danau galilea, laju u seulan bansipanyang krueng yordan sampoe ubak laot mate. nyang kheueh nanggro gata meunurrot bataih-bataih nyang na di seukeulileng jih nyan." nabi musa geupeugah laju ubak bansa israel, "nyang kheueh tanoh nyang teuma gata teurimong deungon cara tatiek undi, tanoh nyang meunurrot peurintah tuhan nyang haroh teubagi ubak sikureueng siteungoh sukee bansa israel. sukee-sukee ruben dan gad meunan cit siladam nibak sukee manasye ka jiteurimong jeumba awaknyan, dan tanoh nyan pi ka teubagi teuma keu keuluwarga-keuluwarga awaknyan. tanoh pusaka awaknyan teuduek di siblahi u timu krueng yordan, to ngon banda yerikho." tuhan meufureuman lom ubak nabi musa, "nyang wajeub ureueng bagi tanoh keu awaknyoe na kheueh le imeum eleazar, dan yosua aneuk nun. gata tunyok kheueh teuma sidroe ureueng peumimpin nibak tieb-tieb sukee mangat jijak tulong eleazar dan yosua jibagi tanoh nyan." nan ureueng-ureueng nyan na kheueh: sukee peumimpin nyang kheueh ureueng-ureueng nyang geupeurintah le tuhan mangat geujak bagi tanoh pusaka nyan keu bansa israel di nanggro kanaan. di ateuah darat moab, nibak bineh krueng yordan, to ngon banda yerikho, tuhan meufureuman ubak nabi musa, "gatajak peusampoe kheueh ubak bansa israel bahwa nibak tanoh pusaka nyang teuma awaknyan teurimong nyan, na teuma meupadub boh deungon blang naleueng nyang na disilingka nyan, atranyan haroh kheueh jijok keu ureueng lewi mangat awaknyan jeuet jitinggai disinan. banda-banda nyan ka jeuet keu hak milek ureueng lewi keu teupat tinggai awaknyan. naleueng lam blang nyang na

silingka nyan na kheueh keu beulatang peulara dan mubagoe beulatang awaknyan. blang naleueng nyan luwah jih na 450 metee u sigala jurusan, atra nyan teu uko nibak binteh beuton banda. teuma, daerah ureueng lewi nyan hijih timang peuet sagoe, nyang meu ukoran 900 metee di tieb-tieb bineh jih, deungon banda jihnyan na di teungoh-teungoh. keu ureueng lewi haroh kheueh gatajok nam boh banda teupat jimeulindong ureueng-ureueng nyang jipeuplueng droe sabab deungon hana jisaja ureueng nyan ka jipoh mate ureueng laen. seulaen nibak nyan keu ureueng lewi meunan cit haroh kheueh teujok peuet ploh dua boh banda nyang laen deungon blang naleueng jih teuma. jadi jeumeulah banmandum na peuet ploh lahan boh banda keu ureueng lewi. jeumeulah banda-banda lewi dalam wilayah maseng-maseng sukee israel haroh kheueh teupeu teuntee meunurrot lejih banda dan rayeuk jih wilayah nyan." tuhan geuyue ubak nabi musa mangat geupeusampoe keu bansa israel tutoe haba nyoe, "oh kalheueh gata tajeumeurang krueng yordan dan gata tamong u nanggro kanaan, gata haroh gata peuteuntee laju banda-banda teupat ureueng plueng jilakee meulindong, mangat ureueng-ureueng nyang jiplueng nyan deungon hana ji saja ka jipoh mate ureueng laen, teuma meuhase jiplueng u banda nyan. nibak bandanyan ureueng nyan teuma aman nibak wareh kawom ureueng nyang keunong poh nyang keuneuk jijak tungbila. sabab ureueng nyan jitudoh kajipoh mate ureueng laen, hana jeuet jipoh mate meunyo peukara jihnyan gohlom teupeureksa di kanto mahkamah. gata peuteuntee kheueh nam boh banda teupat ureueng plueng jijak lakee meulindong nyan, lhee boh di siblahi u timu krueng yordan dan lhee boh teuk teuma di tanoh kanaan. ban nam boh bandanyan jeuet keu banda teupat ureueng plueng nibak gata, ureueng israel, dan keu ureueng aseng aneuk rantoe atawa nyang tinggai teutab lamkawan gata. soe mantong nyang ka jipoh mate ureueng laen deungon hana jisaja, jeuet jipeuplueng droe u dalam saboh nibak banda-banda nyang ka teukheun nyan. teuma meunyo sidroe ureueng jipoh mate ureueng laen deungon beuso atawa batee dan atawa kayee, ureueng nyang peubuet lageenyan na kheueh ureueng tukang poh gob sampoe mate; ureueng nyan meusalah dan haroh teuhukom mate. wareh kawom nibak ureueng nyang keunong poh mate nyan jeuet jipeurhot hukoman mate nyan. meunyo jihnyan meuteume ngon ureueng nyang poh mate syedara jih nyan, jeuet le ureueng nyan jipoh mate ureueng nyang poh syedara jih nyan. meunyo na sidroe ureueng jibanci ureueng laen, laju ureueng nyang jibanci nyan jipoh mate ngon cara ji seumpom ureueng nyan dan jigeulawa teuma peupeue nyang na u ateuah ureueng nyan, atawa jishoh ureueng nyan deungon boh sineunju, ureueng nyan teupeunan tukang poh gob sampoe mate; ureueng nyan meusalah dan haroh teuhukom mate. wareh kawom nyang rab nibak ureueng nyang keunong poh nyan jeuet jipeubuet hukom mate u ateuah ureueng nyan ka jipoh mate syedara jih nyan. dan meunyo jihnyan jiteume ureueng nyang poh mate syedara jih nyan, jeuet le ureueng nyan jipoh mate

ureueng nyang poh syedara jih nyan. teuma, jeuet mantong sidroe-droe ureueng deungon hana jisaja jipoh mate ureueng laen nyang hana jibanci, aleh deungon jisumpom ureueng nyan atawa deungon jirhom deungon sapue-sapeue beunda u atueh ureueng nyan. atawa jeuet mantong sidroe-droe ureueng deungon hana leumah jikalon, jipeurhot si aneuek batee deungon nyan meukabat ureueng laen meuninggai donya, teuma di ureueng nyang mate nyan bukan teuma musoh jih, dan ureueng nyan hana teuma meukeusut keuneuk peuceulaka ureueng nyan. nibak hai-hai nyang lageenyan bagoe umat jimeurok pakat keu jipeutimang ngon jipeusidang ureueng nyang ka jipoh mate gob laen nyan, dan meunan cit ureueng nyang keuneuk balah keuhai mate syedara geuh nyan. meurok pakat umat nyan haroh kheueh teuma jilindong ureueng nyang ka jipoh mate ureueng laen deungon hana jisaja nyan le ancaman syedara ureueng nyang ka keunong poh mate nyan. ureuengnyan haroh jipeuriwang u banda teupat meulindong, di teupat jih puplueng droe nyan. ureueng nyan haroh tinggai disinan sampoe ureueng nibak watee nyan jeuet keu imeum agong ka meuninggai donya; baro kheueh teuma di ureueng nyan ka jeuet jiwoe u gampong leuen jih. teuma meunoye ureueng nyan jitinggai banda teupat jimeulindong nyan, laju meuteume dan ka jipoh mate le syedara ureueng nyang jipoh ngon hana ji saja nyan, teuma peue nyang ka jipeubuet ngon tungbila nyan bukan kheueh nyan teukheun saboh kasus teuseumeupoh mate. peuratoran-peuratoran nyan teutab na keu gata dan keu banmandum keuturonan gata, dipat mantong gatanoye tinggai. lamhai teupoh ureueng sampoe mate, ureueng nyan teutudoh sibagoe ureueng nyang poh, teuma jeuet teupeugah meusalah atawa teuhukom mate meunoye buet jihnyan hase teubukeuti le dua droe saksi atawa leube. meunoye sidroe ureueng saksi hana seb keubukeuti bahwa peue nyang jitudoh nyan beutoi. sidroe ureueng nyang jipoh mate ureueng laen ureueng nyan haroh teuhukom mate. ureueng nyan hana jeuet jiteuboh hukom jihnyan deungon peng. meunoye na ureueng jipeuplueng droe u salah saboh banda teupat meulindong, bek kheueh gata peuidhin ureueng nyan jijok peng mangat jih nyan hase lom jiwoe ubak khimah jih sigohlom imeum agong meuninggai donya. meunoye gata tapeubuet meunan, gata ka tapeu kuto tanoh nyang teupat gata duek nyan. ureueng poh mate gob laen nyan jipubrok nanggro; teuma hanale cara laen keu teupeugleh nanggro nyan seulaen deungon cara teusuit teuma nyawong ureueng nyang seumeupoh mate nyan. bek kheueh gata peukuto tanoh nyang teupat gata duek, sabab ulon kheueh tuhan, dan ulon tinggai lamkawan bansa israel." bubena ulee keuluwarga dalam kawom gilead, aneuek makhir, na kheueh cucoe manasye, aneuek nabi yusuf, jijak meuhadab ubak nabi musa dan peumimpen-peumimpen nyang laen. kheun awaknyan, "tuhan geuyue ubak droeneueh mangat neubagi tanoh nyan keu ureueng israel deungon cara teutiek undi. meunan cit gobnyan geuyue droeneueh mangat neubri tanoh pusaka syedara kamoe zelifahad ubak

aneuek-aneuek gobnyan nyang inong. teuma nyoe peureulee neuingat meunoye awaknyan jimeukawen deungon ureueng agam nibak sukee laen, tanoh awaknyan ka rhot ubak jaroe sukee nyan. deungon lageenyan tanoh nyang ka teupeuteuntee keu wilayah kamoe teuntee meukureung. nibak thon teupulang, bak watee banmandum hareuta milek nyang ka ji peubloe jijok pulang ubak ureueng po hak milek nyang phon, tanoh aneuek-aneuek inong zelifahad teuma teutab jeuet keu hak milek ureueng lakoe awaknyan, deungon nyan sukee kamoe ka teuntee gadoh tanoh nyan." le nabi musa laju geupeutrok ubak bansa israel peurintah nyoe nibak tuhan, "peue nyang jipeugah le ureueng keuturonan nabi yusuf nyan beutoi, dan le sababnyan tuhan geupeugah ubak aneuek inong zelifahad bahwa awaknyan beubaih ji meukawen deungon soe mantong nyang ji galak, asai nyang saban sukee jih deungon awaknyan. tanoh pusaka tieb-tieb ureueng israel teutab teu ikat nibak sukee jihnyan. tieb-tieb ureueng inong nyang jiteurimong wareh tanoh pusaka di dalam salah saboh sukee bansa israel, di ureueng inong nyang na jiteurimong waresan pusaka nyan haroh kheueh jimeukawen deungon sukee jih nyan cit teuma. deungon lageenyan tieb-tieb ureueng israel teuma jiteurimong hareuta pusaka tanoh indatu jih nyan, sampoe tanoh pusaka nyan hana meupinah-pinah nibak saboh sukee ubak sukee nyang laen. tieb-tieb sukee bansa israel teutab na hak milek tanoh pusaka jihnyan keudroe." jadi paih lagee peurintah tuhan ubak nabi musa, ban limong droe aneuek inong zelifahad nyan, na kheueh mahla, tirza, hogla, milka dan noa jimeukawen deungon ureueng-ureueng nyang mantong meusyedara rot siblahi bapak jih nyan. awaknyan jimeukawen ngon ureueng-ureueng nibak kawom-kawom dalam sukee bansa manasye, aneuek nabi yusuf. deungon lageenyan tanoh pusaka awaknyan teutab jeuet keu hak milek nibak sukee bansa bapak awaknyan. nyan kheueh peuratoran-peuratoran dan keuteutapan-keuteutapan nyang geubri le tuhan ubak bansa israel meulalu nabi musa, bak watee bansa israel nyan mantong na di atueh darat moab nibak binch krueng yordan, to ngon banda yerikho.

kitab nyoe meu asoe tutoe haba nyang geupeusampoe le nabi musa ubak bansa israel bak watee awaknyan mantong na di padang pasi nibak panton yordan. panton nyan na disiblahi u timu krueng yordan, to ngon banda suf, lamkawan banda paran di saboh pihak, dan banda-banda tofel, laban, hazerot dan di-zahab dipihak nyang laen. (phon di gunong sinai trok u kades-barnea liwat daerah gunong-gunong edom, treb jih siblahi uroe jak.) bak tanggai sa buleuen siblahi nibak thon nyang keu peuet ploh oh kalheueh awaknyan jitinggai nanggroe meuse, nabi musa geupeusampoe ubak bansa nyan banmandum nyang geupeurintah le tuhan keu teupeugah ubak awaknyan. nyan na jih bak watee nabi musa geupeutaloe sihon, raja ureueng amori, nyang jiba peurintah di banda hesybon, dan og, raja basan, nyang jimat peurintah di banda-banda asyatarot dan edrei. jadi, disiblahi u timu yordan di daerah moab, nabi musa phon-phon that geupeutrang hukom-hukom dan peurintah-peurintah tuhan. geupeugah le nabi musa, "bak watee geutanyoe mantong na di gunong sinai, tuhan po teu allah geutanyoe geupeugah, 'droeoneueh nyoe ka treb that tinggai di gunong nyoe. jinoenyoe gatareuloh kheueh laju khimah-khimah gata dan tajak laju u daerah gunong-gunong ureueng amori dan ubak mandum daerah nyang na to-to disinan, na kheueh panton yordan, daerah meu buket dan darat nyang miyueb, daerah di siblahi u seulan dan pante laot teungoh. tajak duek laju nibak tanoh kanaan dan gunong-gunong libanon trok u krueng raya efrat. ulon, tuhan, ka ulon peujanji tanoh nyan na kheueh keu hak milek indatu gata nabi ibrahim, nabi ishaq dan nabi yakub meunan cit ubak keuturonan awaknyan lhee. jadi tajak kheueh laju gataduek nibak tanoh nyan." nabi musa geupeugah ubak bansa nyan, "bak watee geutanyoe mantong na di gunong sinai, disinan na ulon peugah ubak gata: tanggong jaweueb keu ulon pimpen gata lumpah that brat nibak ulon. hai nyan hana hase ulon peubuet keudroe ulon, le sabab tuhan po teu allah gata ka geupeujeuet gata meutamahle siduble bintang-bintang nyang na di langet. seumoga tuhan, po teu allah indatu gata hana pioh geutamah sabe jeumeulah gata sampoe siribee goe lipat, dan geupeu jeuet gata bansa nyang makmu lagee nyang ka geupeujanji nyan! teuma panena mungken atranyan lon seun keudroe tanggong jaweueb nyang geuhon nyan keu ulon peuseuleusoe mandum hai gata? gata pileh kheueh nibak tieb-tieb sukee meupadub droe ureueng agam nyang patot-patot lom ngon bijaksana, meupeungalaman dan peunoh peungeurtian, mangat ulon angkat awaknyan jeuet keu peumimpen gata. usui nyan gata teurimong deungon get. sabab nyan lamkawan peumimpen-peumimpen nyang gata pileh, meupadub droe nyang patot-patot lom na ieleume ngon malem lom ngon bijaksana ulon cok dan ulon angkat mangat jeuet keu peumimpen gata. meupadub droe teupeu jeuet keu pimpen ateueh siribee droe, nyang laen ateueh sireutoh droe, ateueh limong ploh droe dan ateueh siploh droe. meunan cit ulon baiat teuma peumimpen-peumimpen nyang laen mangat teu uroh sukee-sukee gata. bak wateenyan ulon bri

tugaih awaknyan lageenyoe: gata ngieng kheueh ureueng meudakwa nyang teuka lamkawan bansa gata. gata jok kheueh keuputusan nyang ade keuhai nyan meuseuliseh waham nyan, bah kheueh nyan lam peukara nyang teusangkot deungon ureueng saboh bansa gata atawa meusangkot ureueng jame nyang na tinggai lamkawan gata. keuputusan nyang gata cok nyan haroh kheueh ade dan bek brat siblah; tieb-tieb ureueng nyang meusalah haroh kheueh gata peusidang deungon cara nyang saban, deungon hana gata peubeuda soe ureueng nyang teungoh gata peusidang nyan. bek teumakot ubak soe mantong, sabab keuputusan nyang gata cok nyan asai jih nibak po teu allah. meunyeo na saboh peukara nyang brat nibak gata, gataba kheueh nyan ubak ulon, mangat ulon nyang peuputoh atra nyan. bak watee nyan cit teuma ulon bri peutunyok-peutunyok ubak gata keuhai banmandum nyang laen nyang teuma ulon bri tee ubak gata nyang haroh teuma gata peubuet." "dan lom teuma paih lagee peurintah tuhan po teu allah geutanyoe, geutanyoe laju ta tinggai gunong sinai dan tajak laju rot padang pasi nyang luwah lom lumpah mubahaya tajak lalu u daerah gunong-gunong ureueng amori. bak watee geutanyoe ka trok u kades-barnea, ulon peugah: jinoenyoe gata ka trok u daerah gunong-gunong ureueng amori, tanoh nyang geubri keu geutanyoe le tuhan po teu allah geutanyoe dan po teu allah indatu geutanyoe. ngieng kheueh, dikeue gata ka meureuntang tanoh nyan. gatajak kheueh laju taduek disinan lagee nyang geupeurintah le tuhan. bek kheueh bimbang ngon ragu gata dan bek kheueh teuma teumakot teuh. teuma gatajak ubak ulon dan gata peugah, 'leubeh get geutanyoe tayue ureueng meupadub droe leubeh awai nibak geutanyoe keu mangat jijak seulidek nanggroe nyan dan jeuet awaknyan hase jipeugah ubak geutanyoe rot toh nyang museuti geutanyoejak dan pakriban teuma deungon banda-banda nyang tanyoe jak nyan.' usui nyan ulon siju tuhan, nyang kheueh jeuet laju ulon pileh dua blah droe, sidroe nibak tieb-tieb sukee. awaknyan jitamog u daerah gunong-gunong nyan nyang jioh sampoe trok u panton eskol, banmandum nyan jirawoh. oh ltheueh nyan awaknyan pi jiriwang laju ubak geutanyoe sira jiba boh-boh kayee nyang awaknyan teume disinan dan meunan cit jilapor lom teuma nanggroe nyang teuma geubri le tuhan allah nyan keubit get that meubaja. teuma gata talawan peurintah tuhan allah gata dan hana gatatem tamog u nanggroe nyan. gata tameu ok-ok ngon haba lageenyoe, 'tuhan geubanci keu geutanyoe. nyang kheueh sabab gobnyan geuba geutanyoe geupeuteubiet nibak nanggroe meuse keu geujak peujok geutanyoe u dalam jaroe ureueng amori mangat ureueng amori nyan jipoh mate mandum geutanyoe. deungon nyan, keupeue geutanyoe tajak keunan? ureueng-ureueng nyang tanyoe kirem keunan takot jimeulapor bahwa bansa nyan leubeh teuga ngon leubeh gagah nibak geutanyoe, dan lom awaknyan tinggai di banda-banda nyang meubinteh beuton meunan cit kong ngon kukoh lom ngon manyang rab trok u langet. awaknyan deuh jinging gogasi disinan!' teuma ulon peugah: bek teumakot ubak ureueng-ureueng nyan. tuhan allah teuma

geupimpin gata dan geumeujuang keu gata lagee nyang ka gata kalon keudroe di nanggroe meuse dan di padang pasi. gata deuh takalon pakriban tuhan po teu allah gata geuba gata deungon seulamats bansipanyang rot ueh nyan sampoe trok u tempat nyoe, hana meubeda lagee sidroe bapak ji tiengkue aneuek droe jih keudroe. teuma bahpi ulon ka lon kheun meunan, gata gohlom cit gata meuman ubak tuhan po teu allah gata, nyang geujak dikeue gata keu geujak mita tempat pseudong khimah keu gata. gobnyan geutunyok rot uh keu gata bak watee malam lam tameh apui, dan bak watee uroe lam tameh awan." "tuhan geudeungoe peue nyang gata jeuet keu apoh apah nyan laju gobnyan jiteuka beungeh. tuhan geumeuseumpah, 'hana meusidroe pi nibak angkatn jeuhet nyoe hase jitamong u dalam nanggroe nyang subo nyang ka ulon peujanji ubak indatu gata. na kheueh si kaleb, aneuek yefune nyang teuma jitamong keunan, sabab jih nyan teutab seutia ubak ulon. keu si kaleb dan keuturonan jihnyan teuma ulon bri nanggroe nyang ka jijak-jak bansaboh nyan.' meunan cit deungon gata nyang jeuet keusabab tuhan geubeungeh keu ulon dan geupeugah, 'hai nabi musa, gatapi hana cit tateume tamong u dalam nanggroe nyan. teuma gatayue kheueh beutabah ate peumbantu gata, yosua aneuek nun. jihnyan kheueh nyang pimpen bansa israel jijak reubot tanoh nyan.' laju tuhan geupeugah lom keugeutanyoe banmandum, 'aneuek-aneuek gata nyan mantong that ubit keu hase ji peubeuda nyang jroh deungon nyang jeuhet, aneuek-aneuek nyan meunurot kheun gata teuma jireupah le musoh-musoh gata, keu awaknyan kheueh teuma ulon jok tanoh nyan, dan awaknyan teuma jiduek nibak tanoh nyan. teuma gata, tajak woe kheueh u padang pasi meulalu rot nyang rhot u lhok akaba.' gata tajawueb, 'hai nabi musa, kamoe nyoe ka meudesya ubak tuhan. teuma jinoenyoe kamoe keuneuk maju u mideuen prang lagee nyang geupeurintah le tuhan, po teu allah geutanyoe.' teuma le maseng-maseng lamkawan gata ka meusiab-siab keu tajak muprang, deungon anggapan bahwa teuseureubu tanoh gunong-gunong nyan mudah that. teuma tuhan meufeureuman ubak ulon, 'bek tapeubiyeu awaknyan jimuprang, sabab ulon hana meusajan awaknyan, teuma awaknyan ji peutaloe banmandum le musoh awaknyan.' ulon peutrok ubak gatanyoe peue nyang ka geupeugah le tuhan, teuma gata hana tapakoe mubacutpi. gata tabantah peurintah tuhan, dan deungon sombong gata jak laju ubak gunong-gunong nyan. le ureueng amori nyang na tinggai nibak gunong-gunong nyan laju jiteubiet jijak prang gata banmandum. jeumeulah awaknyan jai lumpah na, lagee kawan uno. awaknyan ji peucrok gata sampoe trok u horma, laju jipeutaloe gata nibak daerah gunong-gunong edom. oh lheueh nyan gatawoe dan talakee tulong ubak tuhan, teuma gobnyan hana geutem deungoe ngon han teuma geukalon gata." "oh lheuehnyan geutanyoe tinggai di kades nyang treb lumpah na. akhe jih geutanyoe tawoe lom u padang pasi meulalu rot ueh nyang rhot u lhok akaba, lagee nyang geupeurintah le tuhan. treb that geutanyoe meuwot-wot nibak gunong-gunong edom. laju

tuhan meufeureuman ubak ulon bahwa ka lumpah that treb geutanyoe meuwot-wot di daerah nyan. deungon nyan geutanyoe jinoenyoe haroh tajak u siblah utara. oh lheueh nyan tuhan geuyue ubak ulon mangat lon bri peutunyok nyang lageenyoe ubak gata, 'hana treble teuma gata tatamong u daerah edom, daerah syedara-syedara gata, keuturonan esau. awaknyan jitakot keu gata, teuma gata hana jeuet taseurang awaknyan, sabab nibak tanoh awaknyan hana meubacutpi ulon bri keu gata, sabab daerah edom ka ulon bri keu keuturonan esau. gata jeuet tabloe peunajoh meunan cit deungon ie jieb nibak awaknyan.' gata ingat kheueh pakriban tuhan po teu allah gata ka geubri beureukat ubak gata lamhai peue mantong nyang gata peubuet. gobnyan geupeulara gata bak watee gata mantong na meuwot-wot di teungoh-teungoh padang pasi nyang luwah nyoe. gobnyan geulindong gata peuet ploh thon treb jih nyoe dan geubri teuma peue mantong nyang gata peureulee. oh lheuehnyan geutanyoe tajak laju, tatinggai teuma rot ueh nyang rhot u banda-banda elat dan ezion-geber rhot laju u laot mate, laju teuwet u timu laot rhot u gurun moab. tuhan meufeureuman ubak ulon, 'ureueng moab, keuturonan nabi lot, awaknyan hana jeuet gata peukaru. meunan cit bek teuma gata seurang awaknyan. nanggroe ar ka ulon bri keu awaknyan dan nibak tanoh awaknyan hana mubacutpi ulon bri keu gata.' " (yoh watee ilee ar nyan jiduek le bansa emim. awaknyan get that rayeuk-rayeuk hi badan jih, saban ngon ureueng enak, meunan cit bansa gogasi. lagee ureueng enak, meunan cit awaknyan teuhoi ngon nan ureueng refaim, teuma le ureueng moab jiboh nan awaknyan ureueng emim. ilee ureueng hori tinggai di edom, teuma ji use ngon jipeuranab le keuturonan esau, nyang kheueh oh dudoe teuma jiduek tanoh awaknyan; meunan cit teuma deungon bansa israel teuma oh dudoe singoh ji use musoh-musoh jihnyan nibak tanoh nyang teujok keu awaknyan.) "oh lheueh geutanyoe tajeumeurang krueng zered lagee nyang geupeurintah le tuhan ubak geutanyoe. nyan na jih lhee ploh lapan thon oh ka lheueh geutanyoe ta tinggai kades-barnea. banmandum tantra nibak angkatn nyan ka mate lagee nyang geupeugah le tuhan. tuhan hana putoh-putoh geulawan sabe awaknyan sampoe teuma awaknyan bak akhe jih banmandum sapsansa. oh habeh banmandum awaknyan mate, tuhan laju geupeugah ubak geutanyoe, 'uroenyoe gata tajak rot daerah moab, rhot rot nanggroe ar. teuma gata trok u tanoh ureueng amon, keuturonan nabi lot. bek kheueh gata peukaru ngon gata seurang awaknyan, sabab nibak tanoh nyang ka ulon jok keu awaknyan, meubacutpi hana nyang ulon jok keu gata.' " (daerah nyan meunan cit meusyehu sibagoe nanggroe refaim, nan bansa nyang watee ilee na tinggai disinan; le ureueng amon awaknyan jiboh nan ureueng zamzumim. lagee ureueng enak, awaknyan meunan cit badan jih rayeuk-rayeuk. awaknyan teuga-teuga that dan lom teuma jeumeulah jih le that. teuma tuhan geupeuhanco awaknyan, sampoe ureueng amon laju jireubot tanoh nyan, oh lheuehnyan awaknyan laju

tinggai disinan. meunan cit nyang geupeubuet le tuhan keu ureueng edom, keuturonan esau nyang tinggai di daerah gunong-gunong edom. tuhan geupeuranab banmandum ureueng hori, sampoe ureueng edom laju jireubot tanoh nyan dan jiduek di atueh tanoh nyan, laju jitinggai teutab disinan trok an jinoo. tanoh nyan meureuntang di seupanyang pante laot teungoh ji duek le ureueng-ureueng nibak pulo kreta. awaknyan ka jipeupoh habeh ureueng awi, peunduduek aseuli nibak tanoh nyan, le awaknyan jiduek laju nibak daerah nyan dan trok u seulitan jioh nibak banda gaza.) "oh ka seuleusoe tajak rot daerah moab, tuhan geupeugah ubak geutanyoe, 'gatajak kheueh laju dan jinoenyoe tajak jeumeurang krueng arnon. ulon teuma lon jok keu gata sihon, raja amori nyang mat peurintah di hesybon, meusigoe deungon nanggroo jihnyan. gata jakprang kheueh laju awaknyan, laju gataiduek atueh tanoh jihnyan. phon nibak uroenyoe ulon teuma lon peujeuet gata beujitakot le bansa-bansa dipat mantong. tieb-tieb watee teuma jiteuka yo nyang lumpah teumakot meunyoe jideungoe keuhai gata." "oh ka ltheueh ulon kirem na meupadub droe utosan nibak padang pasi kedemot ubak raja sihon nibak hesybon mangat jikak peutrok usui meudame nyoe: 'neupeu idhin kheueh kamoe mangat kamoejak rot nanggroo teungku po. kamoe teuma kamoe jak laju dan hana kamoe wet nibak rot ueh raya. kamoe teuma kamoe bayeue peunajoh nyang kamoe pajoh dan ie nyang kamoe jieb. kamoe peureulee kamoe jakmantong rot nanggroo nyoe, sampoe trok teuma kamoe jeumeurang krueng yordan keu kamoe tamong u nanggroo nyang geubri le tuhan po teu allah kamoe keu kamoe. keuturonan esau nyang na tinggai di edom dan ureueng moab nyang na tinggai di ar meunan cit awaknyan ka jipeu idhin ubak kamoe mangat kamoejak rot nanggroo awaknyan.' teuma le raja sihon hana jibri idhin keu geutanyoe tajak rot nanggroo jih nyan. tuhan po teu allah geutanyoe geu peujeuet jih nyan kreueh ulee dan neukat mangat geutanyoe hase tapeu taloe awaknyan. daerah jihnyan mantong tanyoe duek sampoe an jinoo. oh ltheueh nyan tuhan geupeugah ubak ulon, 'raja sihon dan nanggroo jih ulon jok keu gata; tacok kheueh dan taduek kheueh di nanggroo jih nyan.' teuma teuka kheueh sihon deungon banmandum sipa-i jih keu jikak prang geutanyoe rab ngon banda yahsa. teuma po teu allah tuhan geutanyoe geuseurah awaknyan ubak geutanyoe, le geutanyoe laju teupataloe awaknyan meunan cit banmandum deungon aneuk-aneuk jih dan lom mandum sipa-i jih. bak wateanyan cit geutanyoe peuhanco ngon tanyoe reubot tieb-tieb banda, dan tapoh mate banmandum peunduduek disinan, ureueng agam, ureueng inong, dan aneuk manyak. hana nyang tapeubiyeu awaknyan udeb. beulatang peulara awaknyan tacok habeh banmandum dan banda-banda jihnyan tanyoe reupah bubena. deungon tulong po teu allah tuhan geutanyoe, geutanyoe meuteume tareubot banmandum bandanyan, phon nibak aroer, di ujung panton arnon, dan banda di teungoh panton nyan, trok u daerah gilead. hana meusabohpi banda nyang kuta beuton jih nyang

keubiet that khong nibak geutanyoe, banmandum nyan taheuntam sapsansa. teuma geutanyoe hana ta peurab ubak daerah ureueng amon atawa bineh krueng yabok atawa banda-banda di daerah gunong-gunong atawa teumpat laen dipat mantong nyang geutam le tuhan po teu allah geutanyoe." "oh ltheuehnyan tanyoe tameugrak laju u arah utara tatuju u daerah basan, og, raja basan jingaza u mideuen prang meusajan ngon banmandum sipa-i jih keujikak prang geutanyoe to ngon banda edrei. teuma tuhan geupeugah ubak ulon, 'bek teumakot keu jihnyan, he nabi musa. ulon teuma lon peujok jihnyan, sipa-i jih dan banmandum daerah jih nyan keu gata. gata peusaneut kheueh jihnyan lagee nyang ka ulon peusaneut u atueh ureueng sihon, raja amori nyang jimat peurintah di nanggroo hesybon.' dan meunan cit tuhan po teu allah geutanyoe geujok raja og dan rakyat jihnyan keu geutanyoe, dan awaknyan banmandum tanyoe nyang peutaloe. bak watee nyan tanyoe reubot banmandum banda jihnyan, hana meusaboh banda jihpi nyang na tinggai. banmandum nyan na nam ploh boh banda nyang geutanyoe reubot bansaboh argob, nyang jipeurintah le raja og nibak basan. banmandum banda nyan jipeuet deungon pageue-pageue beuton nyang manyang-manyang, pintoe-pintoe geureubang dan palang-palang pintoe keu teutob pintoe geureubang nyan. seulaen nibaknyan mantong jai banda nyang laen nyang hana meupageue ngon beuton. banmandum banda nyan tanyoe peuhanco, dan banmandum teuma ureueng agam, ureueng inong dan aneuk-aneuk awaknyan tanyoe poh mate, lagee nyang geutanyoe peubuet atueh banda-banda raja sihon nibak hesybon. beulatang peulara awaknyan tanyoe cok dan banda-banda nyan tanyoe reubot teuma. bak wateanyan tanyoe cok nibak bandua raja amori daerah di siblahi u timu krueng yordan dan krueng arnon sampoe trok u gunong hermon. (gunong hermon nyan teukheun cit ngon nan siryon le ureueng sidon, dan senir le ureueng amori.) tanyoe cok banmandum wilayah raja og nibak basan: banda-banda nyan nyang na atueh darat manyang, lagee daerah gilead dan basan, laju trok u timu nibak banda basan dan edrei." (raja og na kheueh ureueng refaim nyang keuneulheuh. keureunda manyet jih teupeuget nibak batee, panyang jih peuet metee dan luwah jih rab dua metee meunurot ukoran nyang ka teupeuteuntee. trok nibak uroenyoe mantong deuh teukalon di raba, banda ureueng amori.) "oh ka ltheueh tanoh nyan jeuet keu atra geutanyoe, ulon jok keu sukee ruben dan gad daerah siblah utara banda aroer to ngon krueng arnon, dan siladam nibak daerah gunong-gunong gilead, dan banda-banda nyan. siladam nibak sukee manasye ulon jok teuma nyang leubeh nibak gilead, meunan cit daerah basan beukaiah jajahan og, na kheueh banmandum wilayah argob." (basan meusyehuh sibagoe nanggroo ureueng refaim. yair nibak sukee manasye jicok banmandum wilayah argob, na kheueh nibak basan trok ubak bataih gesur dan maakha. jihnyan jiboh nan gampong-gampong nyan meunurot nan jih keudroe, dan trok an jinoo mantong meugah ngon nan yair.) "daerah gilead ulon jok keu kawom makhir nibak

sukee manasye. dan keu sukee-sukee ruben dan gad ulon jok teuma daerah lamkawan gilead dan krueng arnon. nibak teungoh krueng nyan na kheueh sibagoe bataih awaknyan siblahi u seulan, siblahi utara meubataih teuma ngon krueng yabok, nyang silamod nyan na kheueh bataih nanggroe ureueng amon. siblahi ubarat, daerah awaknyan meureuntang trok u krueng yordan, nibak danau galilea di utara trok u laot mate siblahi u seulan, lheureh nyan trok laju ubak gaki gunung pisa disiblahi u timu. nibak wateenyan ulon jok keu awaknyan peurintah nyang lagee nyoe: tuhan po teu allah gata geubri keu gata daerah siblah u timu krueng yordan keu tempat tinggai gata. teuma tantra-tantra gata haroh leungkab ngon sinjata dan jijeumeurang krueng yordan leubeh awai nibak sukee-sukee israel nyang laen. teuma aneuek ngon peurumoh gata meunan cit deungon beulatang peulara gata nyang le nyang jeuet tinggai nibak banda-banda nyang ka ulon jok keu gata. tulong kheueh ureueng-ureueng saboh bansa ngon gata sampoe awaknyan hase jiduek nibak tanoh nyang geubri le tuhan po teu allah gata keu awaknyan nibak blah ubarat krueng yordan, dan sampoe trok tuhan geuteurimong awaknyan udeb deungon aman teuntram nibak tempat nyan, lagee nyang ka geupeujeuet ateuheh gata nibak tempat nyoe. baro kheueh oh ka lheurehnyan gata jeuet gata woe ubak tanoh atra gata nyang ka ulon bri keu gata. laju ulon peugah ubak yosua: gata ka gata ngieng banmandum nyang geupeubuet le tuhan po teu allah gata ateuheh sihon dan og, bandua rajanyan. meunan cit gobnyan teuma geupeubuet nyang saban ateuheh tieb-tieb raja nyang gata reupah tanoh jih. bek teumakot keu awaknyan, sabab tuhan po teu allah gata teutab geumeujuang keu gata." "nibak wateenyan ulon meulakee ubak tuhan: ya tuhan nyang mahamanyang, ulon kuteupeue bahwa nyang droeneueh tunyok ubak ulon na kheueh awai nibak buet-buet droeneueh nyang rayeuk dan ajaeb. hana ilah nyang laen bah kheueh nyang di langet meunan cit nyang na di bumoe nyang lagee droeneueh nyang hase neupeubuet hai-hai nyang paleng hebat. neupeu idhin kheueh ulon mangat lon jeumeurang krueng yordan, ya tuhan, mangat jeuet lon jak kalon nanggroe nyang subo di meurandeh jeh, daerah gunung-gunong nyang gagah dan gunung-gunong libanon. teuma le sabab gata ka jeuet keu beungeh tuhan ateuheh ulon sampoe gobnyan hana geutem teurimong peue-peue nyang ulon lakee. dilikot nibak nyan tuhan teuma geupeugah, 'kaseb nyan he nabi musa, bek gata teuoh le hainyan! gata jak kheueh u pucak gunung pisa dan gata pandang kheueh u arah utara ngon arah seulan, u timu dan u barat. ngieng kheueh beuget-get peue nyang gata kalon nyan, sabab gata hana teuma gata jeumeurang krueng yordan. gata bri kheueh peutunyok-peutunyok ubak yosua. peutabab kheueh ate jih, sabab jihnyan kheueh nyang teuma pimplen bansa nyan u meurandeh keu jijak duek nanggroe nyang gata kalon nyan.' deungon nyan tinggai kheueh geutanyoe nibak panton meurandeh banda bet-peor." le nabi musa geupeugah ubak bansa nyan, "gata taat kheueh ubak mandum hukum nyang ulon peurunoe ubak

gata, mangat gata hase udeb sampoe gata duek tanoh nyang teuma geubri le tuhan, po teu allah indatu gata, keu gata. peue nyang ulon peurintah, bek gata tamah dan gata peukureueng meubacutpi. gata taat kheueh ubak peurintah-peurintah po teu allah gata nyang ulon bri keu gata. gata ka takalon keudroe peue nyang geupeubuet le tuhan po teu allah gata di ateuheh gunung peor. soe mantong ureueng nyang jiseumah baal di tempat nyan geupeubinaas banmandum, teuma gata nyang teutab seutia ubak tuhan po teu allah gata teutab mantong udeb sampoe an jinoe. banmandum hukum nyan ulon peurunoe ubak gata lagee nyang geupeurintah le tuhan po teu allah ulon. gata taat kheueh banmandum nyan di nanggroe nyang teuma gata tamong dan tempat gata tinggai. gata peubuet kheueh nyan deungon seutia. meunyo gata tapeubuet lagee nyang ka ulon peugah nyan, teuma keubijaksanaan gata seumaken deuh nibak bansa-bansa laen. meunyo awaknyan jideungoe keuhai hukum-hukum nyan, awaknyan teuma jipeugah, 'keubit bijaksana that dan carong that bansa nyang raya nyan!' bansa nyang rayeuk toh kheueh nyang na ilah nyang lageenyan to meunyo tapeureulee lagee tuhan po teu allah geutanyoe nyang meunan to deungon geutanyoe? gobnyan geujaweub pajan mantong geutanyoe ta meuhoi talakee tulong ubak gobnyan. dan bansa nyang rayeuk toh teuma kheueh nyang na hukum-hukum nyang meunan ade lagee hukum-hukum nyang ulon peurunoe ubak gata nibak uroe nyoe? gata ngieng kheueh dan gata ingat kheueh beu jroh-jroh, mangat siumu udeb gata hana tatuwoe ubak peue nyang ka gata kalon keudroe. gata peugah kheueh hainyan ubak aneuek cucoe gata treun meutleun keuhai uroe nyan, bak watee gata tadong dikeue tuhan po teu allah gata di gunung sinai. bak watee nyan gobnyan geupeugah ubak ulon, 'gata peusapat kheueh bansa nyan. ulon meuharab awaknyan jideungoe peue nyang keuneuk ulon peusampoe, mangat awaknyan jimeurunoe taat ubak ulon siumu udeb, dan lom teuma mangat awaknyan jipeurunoe ubak aneuek cucoe jih keu jitaat ubak ulon.' gata peugah kheueh ubak aneuek-aneuek gata pakriban gata teuka dan gatadong nibak gaki gunung nyang mesagob ngon asab nyang seupot tulo lagee awan nyang teubai nyang apui jih hu meuhab-hab trok u langet. oh lheureh nyan tuhan geukheun lom ubak gata nibak lam apui dan gata tadeungoe teuma su gobnyan nyan, teuma hana deuh gata kalon gobnyan lam hi peue mantong. nibak tempatnyan gobnyan geupeumaklum ubak gata peue nyang haroh gata peubuet keu gata peutrok janji nyang ka geupeuget deungon gata. siploh boh peurintah nyang geutuleh nibak ban dua boh batee tuleh haroh gata peubuet. tuhan geuyue ubak ulon mangat lon peurunoe gata banmandum hukum nyang haroh gata taat di nanggroe nyang singoh gata tamong dan tempat gata tinggai nyan." "ingat kheueh beu get-get! bak watee tuhan geumeututoe ubak gata nibak lam apui di gunung sinai, gata hana deuh gata kalon sapeue. le nyan gata jaga kheueh mangat gata bek sampoe meudesa sabab gata peugat keudroe patong-patong keu gata seumah nibak hi peue mantong, agam atawa

inong, cicem atawa uengkot, beulatang meulata atawa beulatang nyang laen. bek meudesa sabab taseumah ateuhe peue nyang gata kalon di langet: mata uroe, buleuen dan bintang-bintang. tuhan po teu allah gata geupeubiyeu mantong bansa-bansa nyang laen jiseumah beunda-beunda nyan. teuma gata na kheuuh bansa nyang geupeuseulamat nibak nanggroe meuse, diteumpat gata meudeurita nyang keubit that brat dan seungsara. gata geuba dan geupeuteubiet nibak nanggroe nyan, mangat jeuet keu bansa geuh keudroe lagee keuadaan gata bak saat jinoenyoe. teuma tuhan po teu allah gata jeuet keu beungeh ubak ulon le sabab gata, dan gobnyan geumeusumpah bahwa ulon hana teuma lon jeumeurang krueng yordan dan lon tamong u dalam tanoh nyang subo nyang teuma geubri ubak gata. hana treble gata tajeumeurang dan gatadeuk nibak tanoh nyang subo nyan; teuma ulon hana lon seutot, sabab ulon teuma mate disinoe. ingat kheuuh beuget-get! bek gata tuwoe peujanjian nyang ka geupeuget le tuhan po teu allah gata deungan gata. gata taat kheuuh ubak banmandum nyang geupeurintah; bek sagai-sagai gata peuget patong keu gata seumah atawa peue mantong nyang saban ngon nyan keu gata seumah, sabab tuhan po teu allah gata lagee apui hu nyang jipeuhangoh peue-peue nyang na. gobnyan hana geutem teupesaban deungan peue mantong. meunan cit meunye gata singoh ka treb gata tinggai di nanggroe nyan dan ka gata meu aneuek cucoe, bek meudesa kareuna gata peuget keudroe patong nibak ruman peue mantong. buet nyang lagee nyan na kheuuh buet nyang jeuhet nibak mata tuhan po teu allah gata dan teuma geubeungeh le gobnyan deungan beungeh nyang keubit hana ngon peusa. bah kheuuh langet dan bumoe nibak uroenyoe jeuet keu saksi bahwa meunye gata hana tataat ubak ulon, gata ngon sikeujab teuma ranab nibak tanoh teumpat gata tinggai di meurandeh krueng yordan nyan. gata hana teuma treb tinggai disinan; gata teupeubinasa sampoe an habeh sapsansa. tuhan teuma geupeu crebre gata lamkawan bansa-bansa laen dan nabacut sagai lamkawan gata nyang mantong udeb. disinan gata teuma taseumayang ubak ilah-ilah nyang jipeuget le jaroe-jaroe manusia, ilah-ilah nyang teupeuget nibak kayee dan batee nyang hana hase jimeunggieng atawa jimeudeungoh, meunan cit hana teuma hase jimakheun atawa ji meucom. laju le gata teuma tamita tuhan po teu allah gata, dan meunye gata tamita nyan deungan sigeunab ate gata, gata teuma meurmupok deungan gobnyan. meunye gata kakeunong ngon banmandum beuncana nyan dan gata na teuma lam keuadaan sosah, laju gata teuma tagisa ubak tuhan po teu allah gata dan gata taat ubak gobnyan. tuhan po teu allah gata nyan na kheuuh allah nyang le that-that gaseh ngon sayang. gobnyan hana teuma geutinggai atawa geupeubinasa gata, atawa geupeutuwoe ubak janji nyang ka geupeugah nyan ubak indatu gata. gata seulidek kheuuh watee urojeh, jioh sigohlom gatanyoe lahe, phon nibak uroe bak watee po teu allah geucebta manusia di bumoe nyoe. gamamita kheuuh nibak bansaboh muka bumoe. peu kheuuh ka ltheuh hai nyang lageenyoe hebat jih na teujadi sigohlom nyoe? dan peu kheuuh

kana ureueng jideungoe keuhai keujadian nyang lageenyoe? peu kheuuh na bansa nyang teutab udeb oh kalheuh jideungoe sidroe ilah jipeugah haba ubak awaknyan nyang jiteubiet lam apui, lagee nyang gata rasa nyoe? peu kheuuh na sidroe ilah nyang jijeuet jakok saboh bansa nyang na laju jipeu jeuet keu umat jihnyan keudroe, lagee nyang geupeubuet le po teu allah gata ateuhe gata di nanggroe meuse? gata kalon keudroe pakriban po teu allah deungan teunaga nyang rayeuk geupeuteuka bala dan prang, geupeubuet buet-buet nyang laju geu meunan cit nyang hebat-hebat. banmandum nyan geutunyok le tuhan ubak gata mangat jeuet keubukeuti teuma tuhan nyan kheuuh po teu allah, dan hana nyang laen seulaen gobnyan. ideh dilanget gobnyan geupeudeungoe su gobnyan keu gata keu geupeurunoe gata; di ateuhe bumoe nyoe gobnyan ka teuma geupeuleumah ubak gata apui gobnyan nyang lumpah hebat, dan nibak lam apuinyan kheuuh tuhan geumeututoe ubak gata. sabab gobnyan that-that geucinta ubak indatu gata, teuma gata ka geupileh le gobnyan; deungan kuasa gobnyan nyang rayeuk gata ka geuba geupeuteubiet lam nanggroe meuse. bansa-bansa nyang leubeh rayeuk lom ngon leubeh teuga ka habeh geu-use dikeue gata, mangat geu intat gata u nanggroe awaknyan nyang ka geubri keu gata, nanggroe nyang jinoenyoe ka jeuet keu hak milek gata. sabab nyan gata ingat kheuuh uroe nyoe dan bek tatuwoe: tuhan po teu allah na kheuuh sidroe di langet dan di bumoe; hana nyang laen seulaen gobnyan. gata taat kheuuh ubak mandum hukum nyang ulon bri keu gata nibak uroe nyoe, deungan nyan gata dan keuturonan gata teuma seujahtra dan udeb sabe di nanggroe nyang geubri le tuhan po teu allah gata jeuet keuhak milek gata keu siumu masa." laju nabi musa geutunyok lhee boh banda di siblah u timu krueng yordan jeuet keu banda teumpat meulindong atawa banda suaka, di teumpat ureueng laen hase jipeuplueng droe deungan hana jisaja ka jipoh mate ureueng laen nyang bukan musoh jih. ureueng nyan hase jipeuplueng droe ubak saboh nibak banda-banda nyan mangat jihnyan hana jipoh le ureueng laen. keu sukee ruben geukeubah banda bezer di ateuhe darat nyang cot nibak padang pasi; keu sukee gad banda ramot di daerah gilead, dan keu sukee manasye banda golan di daerah basan. laju nabi musa geubri hukum-hukum dan peuratoran-peuratoran po teu allah keu bansa israel. hai nyan geupeubuet oh kalheuh awaknyan jiteubiet nibak nanggroe meuse dan ka trok ubak panton siblah u timu krueng yordan, meuhadab keue ngon banda bet-peor. wilayah nyan beukaiah daerah sihon, raja ureueng amori, nyang yoh watee ilee jimat peurintah nibak banda hesybon. nabi musa dan bansa israel jipeutaloe awaknyan bak watee awaknyan jitinggai nanggroe meuse. awaknyan laju jiduek nibak tanoh raja sihon nyan, meunan cit deungan tanoh raja og nibak basan, sidroe raja amori nyang laen nyang tinggai siblah u timu krueng yordan. tanoh nyan meureuntang phon nibak banda aroer nibak bineh krueng arnon, laju u utara sampoe trok ubak gunung siryon, na kheuuh gunung hermon, dan bansaboh daerah siblah utimu krueng yordan u seulatan trok ubak laot mate nibak

gaki gunong pisga. nabi musa laju geupeusapat banmandum bansa israel, le gobnyan laju geupeugah ubak awaknyan, "syedara ulon banmandum, neudeungoe kheueh hukom-hukom nyang teuma ulon bri keu gata nibak uroe nyoe. neumeurunoekheueh ubak hukom nyan, dan neutaat kheueh deungon seutia. di ateueh gunong sinai tuhan po teu allah geutanyoe ka geupeuget saboh peujanjian, bukan mantong deungon indatu geutanyoe, teuma deungon geutanyoe nyang na disinoe banmandum. nibak lam apui nyang na di ateueh gunong nyan tuhan geupeugah haba langsung deungon gata. teuma sabab le gata teumakot keu apui nyan dan hana teuma gata jeuet keu gata teunghu u ateueh gunong nyan, teuma ulon nibak wateanyan lon dong di teungoh-teungoh gata deungon tuhan mangat ulon peusampoe feureuman tuhan nyan keu gata. tuhan meufeureuman, 'ulon kheueh tuhan po teu allah gata nyang ka ulon ba gata teupeuteubiet nibak nanggroek meuse, di teupat gata jipeujeuet keu namiet. bek gata seumah ilah-ilah nyang laen, teuma gata seumah kheueh ulon mantong. bek teuma gata peuet keudroe patong nyang saban deungon peue mantong nyang na di langet, lom ngon nyang na di bumoe atawa nyang na di dalam ie di miyueb bumoe. bek kheueh gata seumah patong nyang lagee nyan sabab ulon kheueh tuhan po teu allah gata dan ulon hana lon tem gata peusaban deungon peue mantong. ureueng nyang jibanci keu ulon, ulon hukom jih nyan sampoe ubak keuturonan nyang keu lhee dan nyang keu peuet. teuma ulon kutunyok gaseh sayang ulon ubak meuribee-ribee keuturonan keu ureueng-ureueng nyang jicinta ubak ulon dan jitaat teuma peue-peue nyang ulon peurintah. bek kheueh gata kheun nan ulon ban galak droe gata, sabab ulon, tuhan po teu allah gata, ulon hukom soe mantong nyang jipeusalah guna nan ulon. gata peuraya kheueh uroe raya sabat, dan horeumat kheueh nyan sibagoe uroe nyang suci, sabab, ulon kheueh tuhan allah gata nyang bri peurintah ubak gata. keu gata ulon bri nam uroe jeuet gata mubuet, teuma uroe nyang keutujoh na kheueh uroe meureuhat, nyang khusus keu ulon, tuhan po teu allah gata. nibak uroenyang hana meusidroepi nyang jeuet meukeureuja, bah kheueh gata, aneuek-aneuek gata, namiet-namiet gata, beulatang peulara gata, atawa ureueng aseng nyang tinggai di nanggroek gata. namiet-namiet gata haroh jimeureuhat saban cit lagee gata. ingat kheueh, yoh watee illee gata pi jipeujeuet keu namiet di nanggroek meuse, laju geupeubeubaih le tuhan po teu allah gata deungon teunaga nyang rayeuk. sababnyan, gata ulon peurintah gata peuraya uroe raya sabat. horeumat kheueh dan peulara kheueh ayah ngon ma gata; nyan kheueh peurintah ulon, tuhan po teu allah gata, mangat jeuet gata seujahtra dan panyang teuma umu nibak nanggroek nyang teuma ulon bri keu gata. bek poh mate gob. bek meumukah. bek ceumeucue. bek jeuet keu saksi duseuta keuhai ureueng laen. bek gata galak atra gob laen: lagee rumoh jih, tanoh jih, peurumoh jih, namiet-namiet jih, beulatang peulara jih, keuleudee jih atawa peue mantong nyang na nibak ureueng nyan.' nyang kheueh peurintah-peurintah nyang

geubri le tuhan ubak gata bak watee gata meusapat di gunong. bak watee gobnyan geumeututoe ngon su nyang meugeunta nibak lam apui dan awan nyang teubai, gobnyan geubri peurintah-peurintah nyan, dan bukan nyang laen. ltheueh nyan laju geutuleh le gobnyan ateueh dua boh batee tuleh dan laju geubri atra nyan ubak ulon." "watee bansaboh gunong hu dan gata tadeungoe su nyang teuka nibak lam seupot, banmandum peumimpin suke gata dan ureueng-ureueng patot jikak ubak ulon. kheun awaknyan, 'tuhan po teu allah geutanyoe ka geupeuleumah keubeusaran dan keumuliaan gobnyan bak watee kamoe deungoe gobnyan geumeututoe nibak lam apui. uroenyoe ka kamoe kalon bahwa keubit mungkin nibak manusia keu teutab udeb. bahpi po teu allah ka geumeututoe bak awaknyan. teuma pakon kheueh kamoe haroh kamoe peusabong nyawong kamoe lom? apui nyang hu be raya nyoe teuma jipeubinasak kamoe! kamoe yaken that bahwa kamoe teuma mate meunyoe kamoe deungoe tuhan po teu allah geupeugah haba lom. peu kheueh ka ltheueh na manusia nyang teutab udeb watee ka ltheueh jideungoe po teu allah nyang udeb geumeututoe nibak lam apui? le sabab nyan, geujak kheueh nabi musa, deungoe kheueh mandum nyang geupeugah le tuhan po teu allah geutanyoe, ltheuehnyan peutrok kheueh laju ubak kamoe peue nyang geupeugah le gobnyan ubak droeneueh. kamoe teuma meudeungoe dan kamoe taat laju.' watee geudeungoe nyan, tuhan meufeureuman ubak ulon, 'ulon ka lon deungoe peue nyang jipeugah le bansa nyan, dan beutoi that nyang jikheun le awaknyan. cuba meunyoe awaknyan sabe na peurasan lagee nyan bagoe! cuba meunyoe awaknyan sabe jihoreumat ulon dan jitaat banmandum nyang ulon peurintah nyan, sampoe awaknyan dan keuturonan awaknyan seujahtra keu siumu masa! jak kheueh jinoenyoe dan yue kheueh bansa nyan jiwoe lom ubak khimah jih maseng-maseng. teuma gata, nabi musa, gisa dan tinggai kheueh disinoe meusajan ulon, keu gata teuma ulon bri banmandum hukom dan peurintah ulon. peurunoe kheueh ubak awaknyan, mangat awaknyan jitaat nibak nanggroek nyang ulon bri ubak awaknyan.' syedara-syedara, taat kheueh deungon seutia banmandum nyang geupeurintah le tuhan allah gata ubak gata. bek gata iengkeue meubacutpi nibak peurintah-peurintah nyan. peubuet kheueh banmandum nyang geupeurintah le tuhan allah gata ubak gata mangat gata meuteume seujahtra dan hase gata duek nibak nanggroek nyang teuma gata duek!" "tuhan po teu allah geuyue nibak ulon jeuet lon peurunoe banmandum hukom nyoe ubak gata mangat atranyan gata peubuet singoh di nanggroek nyang hana treble teuma gata duek. bah kheueh gata dan keuturonan gata siumu udeb jihoreumat tuhan po teu allah gata mantong, dan meunan cit gata taat ubak banmandum hukom nyang teuma ulon peusampoe ubak gata, mangat gata panyang umu di nanggroek nyan. sabab nyan deungoe kheueh hai syedara-syedara ulon, gata peubuet kheueh nyan deungon seutia, mangat gata seujahtra dan jeuet keu bansa nyang raya di nanggroek nyang kaya lom tanoh jih subo, lagee nyang ka geupeujanji le tuhan allah

indatu geutanyoe. syedara-syedara, ingat kheueh! teuma tuhan, dan tuhan mantong allah geutanyoe! cinta kheueh tuhan allah gata deungon sipeunoh ate gata: tunyok kheueh nyan lam cara udeb gata siuroe-uroe dan nibak buet gata. bek kheueh sagai-sagai gata peutuwoe peurintah-peurintah nyang ulon bri ubak gata nibak uroenyoe. gata peurunoe kheueh ubak aneuek-aneuek gata. bah kheueh hainyoe gata peugah sabe bah nyan di dalam rumoh meunan cit di luwa rumoh, watee gata meureuhah dan nibak watee gata meukeureuja. ikat kheueh nibak jaroe gata dan pasang kheueh teuma nibak keuneng gata mangat teu ingat-ingat. gata tuleh kheueh nibak tameh pintoe rumoh gata dan nibak babah pintoe geureubang gata." "tuhan po teu allah ka geumeujanji ubak indatu gata nabi ibrahim, nabi ishaq dan nabi yakub bahwa gobnyan teuma geubri nanggroe nyan keu gata. banda-banda jih raya-rama meunan cit makmu-makmu, dan bukan gata nyang peudongnyan. rumoh-rumoh peunoh deungon barang-barang nyang get-get, dan meunan cit atra nyan bukan gata nyang pasoe. gata teuma meurumpok deungon mon-mon, dan nyanpi kon gata nyang kueh mon nyan. gata teuma meumeurumpok deungon lampoh-lampoh anggo dan lampoh zaiton, dan meunan cit atra nyan bukan gata nyang pula. meunyeo tuhan geuba gata u nanggroe nyan, dan gata meuteume banmandum nyang gata galak keu gata pajoh, jaga kheueh beuget-get mangat gata hana gatautwoe ubak tuhan nyang ka geupeubeubaih gata di nanggroe meuse, di tempat gata jicok keunamiet. horeumat kheueh ubak tuhan, po teu allah gata, dan gata seumah kheueh gobnyan mantong, dan meunyeo gata ta meubudok, peubuet kheueh nyan deumi nan tuhan mantong. bek kheueh gata seumah ilah-ilah nyang laen nyang jiseumah le ureueng nyang na di seukeuileng gata. meunyeo gata taseumah cit ilah-ilah nyang laen, deungon nyan gata geupeutreu azeb deungon meureuka jih le tuhan po teu allah gata dan geupeusapansapa atranyan banmandum, sabab tuhan allah gata nyang na lamkawan gata hana geutem tapeusaban deungon peue mantong. bek kheueh gata cuba tuhan po teu allah gata lagee nyang ka gata peubuet di masa. taat kheueh ubak hukom nyang ka geubri le tuhan po teu allah gata keu gata. gata peubuet kheueh nyan meunurot tuhan nyan get dan ade, teuma gata meuteume seujahtra. tanoh nyang subo nyang ka geupeujanji le tuhan ubak indatu gata, teuma jeuet keu hak milek gata, dan gata teuma ta use bubena musoh-musoh gata lagee nyang ka geupeujanji le tuhan. oh singoh uroe aneuek-aneuek gata teuma jitanyong ubak gata, 'pakon tuhan po teu allah geutanyoe geuyue ubak geutanyoe ta-taat ubak banmandum peurintah nyan?' teuma hainyan gata haroh tajaweueb lagee nyoe, 'masa ilee geutanyoe jeuet keu namiet raja di nanggroe meuse, le tuhan laju geupeubeubaih geutanyoe deungon kuasa gobnyan nyang luwabiasa. kamoe keudroe jeuet keusaksi tuhan geupeubuet buet-buet nyang ajaeb dan hai-hai nyang lumpah teumakot keu ureueng meuse dan raja awaknyan meunan cit banmandum peujabat raja nyan. gobnyan ka geupeubeubaih geutanyoe lam nanggroe meuse

mangat geuba geutanyoe keunoe, dan tanohnyoe geubri keu geutanyoe lagee nyang ka geupeujanji ubak indatu geutanyoe. tuhan po teu allah geutanyoe geuyue ubak geutanyoe ta peubuet banmandum peurintah nyan dan tahoreumat gobnyan. meunyeo geutanyoe ta peubuet meunan, gobnyan teuma sabe geupeulara bansa geutanyoe mangat teutab udeb seujahtra. meunyeo geutanyoe nyang deungon seutia ta-taat ubak peue nyang ka geupeurintah le tuhan po teu allah geutanyoe ubak geutanyoe, teuma gobnyan sabe na deungon geutanyoe." "tuhan po teu allah gata teuma geuba gata u nanggroe nyang keuneuk gata duek nyan, dan jai that bansa nyan na disinan teuma geu use nibak tempat nyan. dikeue mata gata gobnyan laju geu use tujoh boh bansa nyang leubeh rayeuk dan leubeh teuga nibak gata, na kheueh ureueng-ureueng het, girgasi, amori, kanaan, feris, hewi dan yebus. meunyeo tuhan po teu allah gata geuseurah ureueng nyan u dalam kuasa gata dan gata tapeutaloe awaknyan, tapoh mate kheueh awaknyan banmandum. bek tagaseh keu awaknyan atawa gata peuget janji deungon awaknyan. gata hana jeuet tameukawen deungon awaknyan, dan meunan cit bek gata peuidhin aneuek-aneuek gata jimeukawen deungon awaknyan, mangat awaknyan hana jipeujioh aneuek-aneuek gata nibak tuhan keu jiseumah ilah-ilah nyang laen. meunyeo gata taseumah ilah-ilah nyang laen, tuhan beungeh that dan gata teuma deungon sikeujab laju geupeusapansapa. sabab nyan, gata reuloh dan gata peureubah kheueh banmandum miseubah-miseubah bansa-bansa nyan, gata peuhanco kheueh banmandum tameh-tameh batee nyang awaknyan anggab keuramat, gata reuloh kheueh teuma lambang-lambang asyera, dan tatot kheueh beu habeh patong beurala nyang awaknyan seumah. gata peubuet kheueh banmandum nyan sabab gata milek tuhan po teu allah gata. nibak banmandum bansa nyang na atueh rhueng bumoe, gata kheueh nyang geupileh le tuhan po teu allah gata mangat jeuet keu umat gobnyan nyang isteumewa. gata geucinta dan geupileh le tuhan, bukan kareuna gata nyang leubeh rayeuk nibak bansa-bansa laen; nyang sikeubit jih gata na kheueh bansa nyang paleng haloh atueh rhueng bumoe. teuma tuhan geupileh gata sabab gobnyan geugaseh keu gata dan meuheut keuneuk peuteupat janji gobnyan nyang ka geupeuget deungon indatu gata. nyang kheueh sabab jih gobnyan ka geupeuseulamat gata deungon kuasa nyang raya dan geupeubeubaih gata nibak keunamiet raja nanggroe meuse. ingat kheueh bahwa tuhan po teu allah gata na kheueh sidroe mantong allah, dan gobnyan allah nyang seutia. tuhan geupeu peunoh janji gobnyan dan geutunyok gaseh seutia geuh nyang teutab sampoe siribee keuturonan keu ureueng nyang jicinta ubak gobnyan dan taat ubak peue-peue nyang geupeurintah. teuma deungon hana seugan-seugan gobnyan geuhukom awaknyan nyang jibanci keu gobnyan. le nyan, gata taat kheueh ubak banmandum hukom nyang ulon peusampoe keu gata nibak uroenyoe." "meunyeo gata tasimak ubak peurintah-peurintah nyan, dan gata punuet nyan deungon seutia, teuma tuhan po teu allah gatapi teutab seutia ubak janji nyang geupeuget nyan

deungon gata. gobnyan geupeuleumah gaseh sayang geuhnyan yang teutab ubak gata, lagee nyang ka geupeujanji ubak indatu gata. gobnyan geugaseh ngon geubri beureukat ateuh gata, sampoe aneuek gata le lom meutamah-tamah teuma jeumeulah jih. meunan cit gobnyan geubri beureukat keu lampoh ngon blang gata, sampoe jipeuhase gandom, anggo dan minyeuk zaiton. gobnyan geubri beureukat keu gata sampoe leumo gata le meunan cit kameng ngon bubiri gata. banmandum beureukat nyan teuma gata teurimong di nanggroe nyang geubri le tuhan keu gata, paih deungon janji nyang ka geupeuget ubak indatu gata. nibak banmandum bansa nyang na di ateuh donya nyoe, hana meubacutpi beureukat nyan jiteurimong lagee nyang gata teurimong nyan sampoe meulimpah-limpah. nibak gata banmandum meunan cit banmandum beulatang peulara gata hana meusabohpi nyang eue. gata teuma geulindong le tuhan nibak meubagoe peunyaket dan geupeujoh nibak meubagoe bala nyang ka gata kalon di nanggroe meuse, teuma bala-bala nyan teuma geupeurhot ateuh musoh-musoh gata. tieb-tieb bansa nyang geuseurah le tuhan po teu allah gata u dalam kuasa gata haroh gata peubinasa; bek kheueh gata peudeuh gaseh sayang keu awaknyan. bek kheueh teuma gata seumah ilah-ilah awaknyan, sabab buet nyang lageenyan teuma jipeuteuka bala ateuh gata. mungken gata pike bansa nyan leubeh rayeuk jeumeulah jih sampoe gata hana hase gata use awaknyan. teuma bek kheueh teumakot keu awaknyan; ingat kheueh peue nyang ka geupeubuet le tuhan po teu allah gata ateuh raja di nanggroe meuse dan ateuh banmandum rakyat jihnyan. gata ingat kheueh teuma bala beuncana nyang lumpah that hebat nyang ka ltheueh gata kalon keudroe, keu ajaeban-keu ajaeban dan teunaga nyang lumpah rayeuk nyang ka geupeuguna le tuhan po teu allah gata nyang ka geupeubeubaih gata. meunan cit teuma deungon tuhan allah gata teuma geutindak ateuh banmandum bansa nyang gata takot. bit that tuhan po teu allah gata teuma geupeuteuka nyang leubeh payah ngon susah lamkawan awaknyan, sampoe ureuhng-ureuhng nyang hase jipeuplueng droe ngon jimusom hase geupeubinasa. le nyan, bek kheueh gata takot keu bansa-bansa nyan. tuhan po teu allah gata nyang lindong gata. gobnyan na kheueh po teu allah nyang paleng agong dan nyang paleng meukuasa. bansa-bansa nyan teuma geu-use bacut-bacut dikeue gata. gata jeuet gata peuranab awaknyan deungon sigr, mangat beulatang-beulatang buih hana meutamahle dan jeuet keu ancaman ateuh gata. meunan kheueh tuhan po teu allah gata teuma geuseurah musoh-musoh gata ateuh gata. gobnyan teuma geupeukar awaknyan sampoe awaknyan banmandum binasa. gobnyan teuma geuseurah raja-raja awaknyan keu gata. awaknyan gata poh mate, dan nan awaknyan gata peutuwoe teuma. hana meusidroepi hase jimeuteun jilawan gata; awaknyan banmandum teuma gana peuhabeh. gatatot kheueh patong-patong beurala nyang awaknyan seumah. bek kheueh teuma gata meuheut pirak atawa meuh nyang na meukeumat nibak atranyan dan bek gatacok atranyan keu gata

keudroe. meunyo gata iengkeue hai nyan gata mate, sabab tuhan po teu allah that-that geubanci keu ureuhng nyang seumah patong beurala. bek kheueh teuma gata keubah meusabohpi patong beurala di dalam rumoh gata, mangat kutok nyang rhot ateuh awaknyan bek keunong ateuh gata. hainyan haroh kheueh gata banci dan gata kalon ngon cara hina, sabab hainyan geukutok le tuhan." "banmandum hukom nyang ulon bri keugata bak uroe nyoe haroh kheueh gata peubuet deungon seutia, mangat gata teutab udeb, meutamahle dan tinggai teutab nibak tanoh nyang ka geupeujanji le tuhan ubak indatu gata. ingat kheueh! peuet ploh thon treb jih tuhan po teu allah gata geupimpin gata nibak gatajak nyang lumpah jioh lam padang pasi nyang luwah. lam jak gatanyan le tuhan geumeukeusut keu geucuba gata, mangat gobnyan hase geukalon peue nyang na di dalam ate gata dan peu kheueh gata taat ubak peurintah-peurintah gobnyan. gobnyan geupeubiyeu gata deuk ngon grah, laju keu gata geubri manna keu peunajoh. gata dan indatu gata hantom na geupajoh peunajoh nyang lageenyan bagoe. tuhan geupeubuet lageenyan keu geupurunoe gata bahwa manusia nyoe kon udeb nibak peunajoh mantong, teuma nibak meubagoe rupa nyang geupeugah le tuhan. sampoe peuet ploh thon treb jih peukayan gata hana jeuet keu useung dan gaki gata hana teuma jiteuka kumong. ingat kheueh bahwa tuhan allah gata geupeurunoe gata lagee sidroe bapak geupeurunoe aneuek gobnyan. le sababnyan, gata peubuet kheueh laju peue nyang geupeurintah le tuhan po teu allah gata. udeb kheueh meunurot hukom-hukom gobnyan dan horeumat kheueh ubak gobnyan. tuhan po teu allah gata geuba gata u nanggroe nyang leubeh subo; nanggroe nyang le krueng dan mata ie jih, deungon ie nyang ile tajem di miyueb tanoh nyang ji ile teuma u panton-panton dan buket-buket. nanggroe nyan jipeuhase meubagoe rupa gandom, anggo, boh ara, boh geulima, bak zaiton dan meunisan. disinan gata hana deuek atawa kureueng meusapeu pih. batee kareueng jih na meungandong beuso, dan nibak buket-buketnyan gata hase teuma gata kueh teumaga. nibak teumpatnyan gata tamakheun sipueh-pueh ate, dan gata meusyukoe ubak tuhan po teu allah gata keu tanoh nyang subo nyang geubri gobnyan keu gata." "gata jaga kheueh beuet-get mangat gata hana tatuwoe ubak tuhan allah gata; bek kheueh gata peujayah meubacutpi meusapeue pih nibak banmandum hukom gobnyan nyang teuma ulon bri keu gata nibak uroe nyoe. meunyo gata ka tamakheun sipueh-pueh ate gata dan ka teuma gata peuet rumoh-rumoh nyang get-get keu teumpat tinggai gata, dan meunyo ka meutamah leumo ngon kameng dan bubiri gata, pirak ngon meuh dan banmandum hareuta milek gata nyang laen, jaga kheueh beuet-get mangat gata hana jeuet keu sombong dan gata tuwoe ubak tuhan po teu allah gata nyang ka geupeubeubaih gata nibak nanggroe meuse, di teumpat gata jipeucok keunamiet. tuhan geupimpin gata rot padang pasi nyang luwah lom ngon dhasyat, nyang jaj that uleue meubisa meunan cit deungon kala-kala nyang lumpah meubisa teuma. nibak tanoh

nyang thoe hana meu ie meubacutpi gobnyan laju geupeuteubiet ie lam lungkiek-lungkiek aneuk batee mangat gata hase tajibie ie deungon sipueh-pueh jih. di padang pasi gobnyan geubri manna keu peunajoh gata, peunajoh nyang gohlom geuturi le indatu gata. tuhan geupeubuet nyan keu geucuba gata dan geupeumiyueb ate gata, mangat jeuet oh dudoe teuma gobnyan hase geupeuget nyang leubeh jroh keu gata. deungon nyan, bek kheueh sagai-sagai gata pike bahwa deungon useuha dan teunaga gata keudroe gata hase jeuet keukaya. ingat kheueh, bahwa tuhan po teu allah gata nyang bri keukayaan nyan keu gata. hainyan geupeubuet sabab sampoe an uroenyoe gobnyan mantong seutia deungon janji nyang kalheueh geupeuget ngon indatu gata. bek kheueh tuwoe ubak tuhan po teu allah gata dan bek teuma gata seutot ubak ilah-ilah nyang laen keu gata pujoe ngon gata meungabdi ubak awaknyan. uroenyoe ulon peuingat ubak gata bahwa meunyoe hainyan gata peubuet cit teuma, gata ka pasti geupeubinasa le tuhan. meunyoe gata hana tataat ubak tuhan po teu allah gata, gatapi teuma geupeubinasa, lagee bansa-bansa nyang geupeuranab dikeue mata gata." "deungoe kheueh nyoe hei syedara-syedara! nibak uroenyoe gata jeumeurang krueng yordan mangat gata duek nibak daerah bansa-bansa nyang leubeh rayeuk dan leubeh teuga nibak gata. banda-banda awaknyan rayeuk-rayeuk lom teubinteh ngon beuton nyang manyang-manyang meujulang u langet. ureueng jih badanni rayeuk-rayeuk dan teugab-teugab potongan tuboh jih; awaknyan lagee badan gogasi nyang juwah. dan gata ka tadeungoe bahwa hana meusidroepi nyang hase jilawan awaknyan. teuma jinoenyoe gata kalon keudroe pakirban tuhan allah gata geujak dikeue mata gata lagee apui nyang jitot peue-peue nyang na. jihnyan jipeutaloe awaknyan dikeue mata gata, akhe jih gata hase gata use dan gata peuhanco awaknyan deungon bagai that lagee nyang geupeujanji le tuhan. oh ka lheueh tuhan po teu allah gata geu use awaknyan keu gata, bek gata pike bahwa gata geuba keudeh mangat jeuet gata cok keumilek gata tanoh nyan sabab gata get dan gata peubuet keuheundak tuhan po teu allah gata deungon nyan gata pike hak gata teurimong. sagai-sagai hana! tuhan geu use bansa-bansa nyan keu gata sabab awaknyan jeuhet. tuhan geupeubiyeu gata mangat gatacok tanoh awaknyan, sabab gobnyan keuneuk geupeutrok janji gobnyan bak indatu gata nabi ibrahim, nabi ishaq dan nabi yakub. peucaya kheueh bahwa tuhan po teu allah hana geujok tanoh subo nyan keu gata le sabab hak gata teurimong. hana! gatanyoe bansa nyang kreueh ulee. ingat kheueh pakirban gata tapeujeuet tuhan po teu allah gata beungeh nibak padang pasi. phon gata tatinggai nanggroe meuse sampoe gata ka trok keunoe, gata talawan tuhan. meunan cit di gunung sinai gata peujeuet tuhan beungeh lumpah na, sampoe gobnyan keuneuk geupeubinasa gata. ulon kuteungoh gunung nyan keuneuk lon jak teurimong batee peujanjian nyang geupeuget le tuhan deungon gata. peuet ploh uroe dan peuet ploh malam treb jih ulon tinggai ateuh gunung nyan deungon hana lon makheun dan lon jieb ie. oh lheuehnyan tuhan geubri bak

lon bandua neuk batee nyang ka geutuleh le allah keudroe. nibak batee nyan teuteuleh deungon tutoe gobnyan nyang geupeugah nibak teungoh-teungoh apui hu keu gata, bak watee gata na meusapat nibak gaki gunung. biet, oh ka seuleusoe peuet ploh uroe dan peuet ploh malam, laju le tuhan geujok ubak ulon bandua boh batee peujanjian nyan. lheueh nyan laju tuhan meufeureuman ubak ulon, 'jak treun kheueh laju, sabab bansa gata nyang gata ba di nanggroe meuse ka jipeubuet jeuhet. awaknyan ka meusingang nibak peue-peue nyang ulon peurintah, dan jipeuget patong keu jiseumah.' meunan cit tuhan meufeureuman ubak ulon lagee nyoe, 'ulon kuteupeue bahwa bansanyan keubiet that kreueh ulee. bek cuba-cuba jihalang ulon. ulon keuneuk peubinasa awaknyan sampoe awaknyan hana ji-ingat le. teuma gata ulon peujeuet keu ayah nibak saboh bansa nyang leubeh rayeuk dan leubeh teuga nibak awaknyan.' lheuehnyan laju ulon paleng, dan sira ulon ba bandua boh batee peujanjian deungon bandua jaroe lon, laju ulon treun di ateuh gunung nyang teungoh hu meuhab-hab nyan. ulon kalon bahwa gata ka ta iengkeue peurintah tuhan po teu allah gata. gata ka meudesya ubak tuhan sabab gata peuet keudroe gata saboh patong leumo nibak logam. teuma dikeue mata gata keudroe bandua boh batee peujanjian nyan ulon seumpom sampoe hanco meukeupeng-keupeng. lheuehnyan ulon sujut lom dikeue tuhan di ateuh pucak gunung nyang treb jih peuet ploh uroe dan peuet ploh malam, hana lon makheun dan hana teuma lon jieb ie. nyan ulon peubuet sabab gata ka meudesya ubak tuhan deungon gata peubuet peue nyang geuanggah jeuhet, le sababnyan kheueh gobnyan beungeh. ulon teumakot ubak beungeh tuhan nyang luwabiasa ateuh gata sampoe gata keuneuk geupeubinasa, teuma goenyoe pi tuhan geutem deungoe ulon. meunan cit tuhan beungeh that-that keu nabi harun sampoe gobnyan keuneuk geupoh mate nabi harun nyan, laju ulon meudoa keu keu nabi harun nyan cit teuma. patong leumo logam nyang gata peuet nyan, laju ulon rhom lam apui. lheuehnyan laju lon peuhanco dan ulon tob sampoe haloh lagee abee, dan abeanyan ulon geulawa lam aneuk krueng nyang na ile nibak gunung nyan. meunan cit di tabera, masa dan kibrot-taawa, gata tapeujeuet tuhan beungeh. dan watee gata geuyue le tuhan mangat gata tinggai kades-barnea keugata maju dan gata tinggai ateuh tanoh nyang geubri keu gata, gata tabantah peurintah tuhan allah gata; gata hana tatem peucaya atawa gata taat ubak gobnyan. watee phon that ulon meuturi ngon gata, gata sabe talawan tuhan. ulon kuteupeue bahwa tuhan ka brat that ate keuneuk geupeubinasa gata. dan nyang kheueh jeuet peuet ploh uroe dan peuet ploh malam ulon sujut dikeue tuhan sira lon meudoa lagee nyoe: ya tuhan nyan mahamanyang, bek kheueh neupeubinasa umat atra droeneueh nyoe, bansa nyang droeneueh peubeubaih dan droeneueh intat jiteubiet lam nanggroe meuse deungon teunaga dan keukuasaan droeneueh nyang rayeuk. ingat keu hamba-hamba droeneueh nabi ibrahim, nabi ishaq dan nabi yakub, dan bek kheueh neukalon ateuh sikeueb kreueh ulee buet nyang jeuhet

dan desya bansa nyoe. meunyoemat droeneueh neupeubinasa cit teuma, deungon nyan ureueng meuse teuma jipeugah bahwa droeneueh hana hase neuba bansa droeneueh keudroe ubak nanggroe nyang droeneueh meujanjinan keu awaknyan, dan bahwa droeneueh ba awaknyan u padang pasi keu droeneueh jak poh mate awaknyan, sabab droeneueh banci keu awaknyan. teuma inget kheueh, tuhan, bahwa awaknyoe bansa nyang droeneueh pileh jeuet keu umat droeneueh, dan neuba nibak nanggroe meuse deungon teunaga dan kuasa droeneueh nyang rayeuk." "oh lheureh nyan tuhan meufureuman lom ubak ulon, 'hai, nabi musa, gata jakpeut kheueh laju dua boh leumpang batee lagee nyang phon-phon, dan gata peuget kheueh teuma saboh peuto kayee keu teumpat atranyan, lheureh nyan gatajak kheueh ubak ulon di pucak gunung. nibak batee-batee nyan teuma ulon tuleh deungon haba nyang saban lagee nibak batee nyang ka gata peubeukah nyan; oh lheureh nyan batee-batee nyan haroh kheueh gata peutamong u dalam peuto nyan.' laju ulon peuget peuto nibak kayee akasia dan lom peut laju dua boh batee lagee nyang ilee, lheurehnyan atranyan laju ulon ba u atueuh gunung. nibak bateenyan geutuleh laju le tuhan siploh boh peurintah saban ngon atra awai, na kheueh peurintah-peurintah nyang geubri keu gata, bak watee gobnyan geupeugah haba di teungoh-teungoh apui bak uroe gata meusapat di gaki gunung. oh lheureh nyan tuhan geubri laju batee tuleh nyan ubak ulon dan laju teuma lom gisa lom sira lon treun diateueh gunung nyan. laju oh lheurehnyan dan paih lagee peurintah tuhan, ban dua boh batee tuleh nyan ulon peutamong laju udalam peuto nyang ka ulon peugot – dan phon saat nyan sampoe an jinoo ban dua batee tuleh nyan mantong na disinan." (oh lheurehnyan ureueng israel nyan laju jibeurangkat nibak mon-mon ureueng yaakan, dan jikak u mosera. di teumpat nyan kheueh teuma nabi harun meuninggai donya ngon jikubu. eleazar geunantoe gobnyan sibagoe imeum. beudoh nibak teumpat nyan awaknyan jikak laju u gudgod, laju u yotbata, daerah nyang jai that ie jih. di gunungnyan tuhan geupeukhusus sukee lewi keu nyang uroh peuto peujanjian dan jipeutimang tuhan, meunan cit teu kheun beureukat atueuh nan gobnyan. nyang kheueh tugahi awaknyan sampoe an jinoo. le sababnyan sukee lewi hana jiteurimong tanoh pusaka lagee sukee-sukee nyang laen, sabab tuhan kheueh jeumba dan waresan awaknyan, lagee nyang geupeugah le tuhan po teu allah ubak awaknyan.) "peuet ploh uroe peuet ploh malam ulon tinggai di atueuh gunung lagee nyang ulon peubuet phon-phon that. sigoe teuk tuhan geudeungoe ulon, dan gobnyan situju hana geu peubinasa gata. le gobnyan geuyue ulon mangat lonjak pimpen gata mangat gata hase tateurimong sibagoe hak milek tanoh nyang ka geupeujanji ubak indatu gata." "jinoenyoe, syedara-syedara, ngieng kheueh peue nyang geulakee tuhan po teu allah gata nibak gata: horeumat kheueh tuhan po teu allah gata dan peubuet kheueh banmandum nyang geupeurintah le gobnyan. cinta kheueh gobnyan dan meuebadat kheueh ubak gobnyan deungon bansaboh jiwa raga gata. taat kheueh ubak peurintah

tuhan nyang nibak uroenyoe ulon peutrok ubak gata deumi keuget gata keudroe. tuhan po teu allah gata nyang po langet nyang manyang; bumoeopi atra gobnyan meunan cit banmandum nyang na di atueuh nyan. teuma geunaseh tuhan keu indatu gata rayeuk lumpah na, sampoe nibak meubagoe bansa gata kheueh nyang geupileh le gobnyan, dan trok an jinoopi gata umat gobnyan nyang teupileh. le sababnyan phon saatnyoe gata haroh taat ubak tuhan dan bek kheueh gata meukreueh ulee le. tuhan po teu allah gata na atueuh meubagoe ilah nyang laen dan leubeh nibak meubagoe kuasa. gobnyan po teu allah nyang agong dan meukuasa nyang haroh teutaat. gobnyan hana galak geudong siblahi meunan cit hana galak geuteurimong sugok. gobnyan geubila hak aneuek yatem ngon muntui dan inong balee mangat awaknyan jipeusanuet deungon ade; gobnyan geugaseh keu ureueng aseng nyang udeb meusapat deungon bansa geutanyoe dan geujok keu awaknyan peunajoh deungon peukayan. deungon nyan gatapi haroh gata tunyok gaseh sayang gata ubak ureueng aseng nyan. sabab yoh watee ilee gatapi ureueng aseng di nanggroe meuse. horeumat kheueh tuhan po teu allah gata dan meuebadat kheueh ubak gobnyan mantong. bah kheueh gata teutab seutia ubak gobnyan dan meunyoemat meubudok deumi nan gobnyan mantong. pujoe kheueh gobnyan sabab gobnyan tuhan po teu allah gata. ngon mata ulee gata keudroe gata ka lheureh takalon buet-buet nyang hebat luwabiasa nyang ka geupeubuet le gobnyan keu gata. watee indatu gata geujak u nanggroe meuse, jeumeulah awaknyan na kheueh tujuh ploh droe. teuma, tuhan po teu allah ka geupeujeuet gata le jih sidub bintang-bintang nyang na di langet." "cinta kheueh ubak tuhan allah gata, dan taat kheueh sabe ubak banmandum peurintah gobnyan. inget kheueh phon saat nyang peue nyang gata teupeue keuhai tuhan dan peungalaman gata. aneuek-aneuek gata hana jiteupeue peungalaman nyan. gata kheueh nyang ka gata peusaksi keu agongan tuhan po teu allah gata, teunaga gobnyan, keuhai keukuasaan gobnyan dan buet-buet nyang ajaeb nyang gobnyan peubuet. gata takalon keudroe peue nyang geupeubuet atueuh raja nanggroe meuse dan bansaboh nanggroe jihnyan. gata takalon pakriban tuhan geupeuhanco sipa-i nanggroe meuse meusajan deungon mandum guda jih meunan cit deungon geuritan prang jih. awaknyan banmandum geupeukaram lam laot geulagah watee awaknyan teungoh jipeulet gata. gata tateupeue peue nyang geupeubuet le tuhan keu gata dipadang pasi sigihlom gata trok keunoe. meunan cit gata teuingat peue nyang geupeubuet le tuhan atueuh datan dan abiram, aneuek-aneuek eliab nibak sukee ruben. nibak teumpat gata banmandum, bumoe teuprah dua laju jiuwet awaknyan meusigoe ngon keuluwarga jih, khimah dan banmandum beulatang peulara awaknyan. biet, gata kheueh nyang ngon mata ulee gata keudroe ka lheureh gata kalon banmandum buet nyang ajaeb nyang ka geupeubuet le tuhan." "taat kheueh ubak mandum hukum nyang ulon peutrok keu gata nibak uroenyoe, deungon nyan gata hase tajeumeurang krueng dan gata tamong lam nanggroe

nyang hana treb le gata duek teuma. dan gata teuma udeb nyang treb nibak nangroe nyang kaya ngon sobo, nyang ka geupeujanji le tuhan ubak indatu gata dan ubak keuturonan awaknyan. nangroe nyang gata duek teuma kon lagee tanoh meuse, nibak teupat tinggai gata yoh masa ilee. disideh gata haroh tameubuet nyang brat keu gata peuke ie lam ladang mangat jeuet gata tabu bijeh. teuma keu nangroe nyang teuma gata tamong nyan na kheueh tanoh meugunong-gunong dan panton-panton; tanoh jih ji-ile le ie ujeuen. tuhan po teu allah gata geupeulara nangroe nyan dan geujaga sipanyang thon. le sababnyan, taat kheueh ubak peue-peue mantong peurintah nyang ulon peusampoe ubak gata nibak uroenyoe; cinta kheueh ubak tuhan po teu allah gata dan meueibadat kheueh ubak gobnyan deungon banmandum jiwa raga gata. meunyoe gata tapeubuet lagee nyan, teuma le tuhan geupeutreu ujeuen ateuhe tanoh gata watee musem ka teuka, oh ka lheureh gata mupot, nibak watee gata tapeuphon seumula. teuma gata na gandom nyang seb, anggo dan minyeuk zaiton, meunan cit na leueng keu beulatang peulara gata. peue-peue mantong peunajoh nyang gata peureulee teuma teukeubah keu gata. bek gatatem jipeujiah gata nibak tuhan mangat jak seumah dan gata meungabdi ubak ilah-ilah nyang laen. meunyoe gata ta iengkeue ubak peurintah nyan, tuhan teuma beungeh keu gata. gobnyan hana teuma geupeutreu ujeuen; tanoh gata ka jeuet keu tho kreung deungan nyan seunaman nyang teupula hana jipeuna hase. deungan nyan teuma lam watee nyang paneuk gata mate nibak tanoh nyang subo nyang geubri le tuhan keu gata. ingat kheueh dan simak kheueh peurintah-peurintah nyan. ikat kheueh bak jaroe gata dan pasang kheueh teuma nibak dho gata mangat jeuet teuingat-ingat. peurunoe kheueh ubak aneuek-aneuek gata. peugah kheueh hainyan bahnyan lam rumah meunan cit diluwa rumah, bak watee meureuhat dan bak watee keureuja. tuleh kheueh atranyan nibak tameh rumah gata dan nibak babah pintoe geureubang gata. deungan nyan, gata ngon aneuek-aneuek gata teuma panyang umu nibak nangroe nyang geupeujanji le tuhan po teu allah gata ubak indatu gata. simantong na langet di ateuhe bumoe, sidub treb nyan kheueh teuma gata tinggai nibak tanoh nyan. taat kheueh deungan seutia banmandum hukum nyang ulon peusampoe ubak gata; cinta kheueh tuhan po teu allah gata, peubuet kheueh banmandum nyang geupeurintah ubak gata, dan bah kheueh gata teutab seutia ubak gobnyan. deungan nyan tuhan geu-use banmandum bansa nyan dikeue gata, dan gata tatinggai nibak tanoh atra bansa-bansa nyang leubeuh rayeuk dan leubeuh teuga nibak gata. tieb-tieb wilayah nyang gata tamong teuma jeuet keu hak milek gata. wilayah gata beureutang phon nibak padang pasi di seulatan sampoe trok u gunong-gunong libanon di siblaih utara, dan phon nibak krueng efrat di siblaih u timu sampoe trok u laot teungoh di siblaih u barat. bansaboh nanggroenyan tuhan po teu allah gata teuma geupeujeuet ureueng-ureueng habeh teumakot keu gata lagee nyang ka geupeujanjinyan, deungan nyan hana meusidroepi nyang hase jitam gata. uroenyoe

gata jeuet tapileh beureukat atawa kutok. gata teuma geubri beureukat meunyoe gata taat ubak peurintah-peurintah tuhan po teu allah gata, nyang nibak uroenyoe ulon peutrok keu gata. teuma gata geukutok meunyoe gata hana taat ubak peue-peue nyang geupeurintah le tuhan po teu allah gata, sabab ka gata paleng gata seumah ilah-ilah nyang hantom na gata seumah. oh ka lheureh tuhan po teu allah gata geuba gata geupeutamong lam nangroe nyang teuma gata tinggai nyan, beureukatnyan haroh gata kheun nibak gunong gerizim dan kutok nyan nibak gunong ebal. (bandua boh gunongnyan teuduek jih siblaih u barat krueng yordan nibak wilayah ureueng kanaan nyang tinggai di panton yordan, meuhadab keu u barat hana padubna jioh nibak bak-bak kayee teupat iebadat di more rab ngon banda gilgal.) hana treble gata tajeumeurang krueng yordan dan laju gata duek ateuhe tanoh nyang geubri le tuhan po teu allah gata keu gata. oh ka lheureh gata reupah tanoh nyan dan gata duek disinan, gata haroh tataat banmandum hukum nyang ulon peusampoe keu gata nibak uroenyoe." nyoe kheueh hukum-hukum nyang haroh gata taat si umu udeb gata di nangroe nyang geubri keu gata le tuhan, po teu allah indatu gata. oh ka lheureh gata tamong u dalam nangroe nyan gata haroh tahanco banmandum teupat-teupat seumujoe awaknyan nyang teukeubah di ateuhe-ateuh gunong nyang manyang, di buket-buket dan dimiyueb-miyueb kayee nyang rampak, nibak tempat bansa nyang tinggai bak teupat jiseumah ilah-ilah awaknyan. gata peuhanco kheueh laju miseubah-miseubah awaknyan meunan cit peureumok kheueh tameh-tameh batee nyang awaknyan anggab keuramat. gatatot kheueh teuma lambang-lambang asyera, dan gata peuhanco kheueh patong-patong beurala awaknyan, akhejih ilah-ilah nyan hanale jiseumah nibak teupat-teupat nyan. bak watee gata taseumah tuhan po teu allah gata, bek kheueh gata tiru nibak awaknyan deungan cara awaknyan jiseumah ilah-ilah awaknyan. nibak banmandum wilayah sukee-sukee israel, tuhan po teu allah gata teuma geupileh saboh teupat mangat jeuet bansa geutanyoe jiteume jak ukeue gobnyan dan jiseumah gobnyan. ubak teupat nyan kheueh haroh gataba keureubeuen-keureubeuen nyang teutot meunan cit keureubeuen-keureubeuen nyang laen, keureubeuen siper siploh gata meunan cit keureubeuen-keureubeuen nyang laen teuma, keureubeuen teupeuleuh kaoti gata, keureubeuen ban galak ate droe gata dan aneuek leumo meunan cit deungan kameng dan bubiri gata nyang phon that lahe. nibak teupat nyan cit teuma, dikeue tuhan po teu allah gata, gata meusajan-sajan deungan keuluwaga gata haroh gata makheun dan meugeumbira ateuhe useuha-useuha gata nyang meuhase sabab geubri beureukat le tuhan po teu allah gata. meunyoe wateenyan ka teuka, gata bekle tapeubuet lageenyan bago. trok bak wateenya gata meueibadat ban galak ate droe, sabab gata gohlom tatamong lam nangroe nyang geubri le tuhan po teu allah gata keu gata, teupat gata jeuet tatinggai teutab deungan aman. oh ka lheureh gata tajeumeurang krueng yordan, tuhan po teu allah teuma

geutulong gata mangat gata duek nibak teupnat dan tanoh nyang na di meurandeh krueng nyan. gobnyan teuma keulindong gata nibak meubagoe musoh, dan gata teuma udeb deungon aman dan teuntram. oh lheurehnyan tuhan po teu allah gata teuma geupileh saboh teupnat mangat jeuet gata taseumah gobnyan. keunan kheueh gata haroh tajak sira taba banmandum nyang ulon peurintah, na kheueh keureubeuen nyang teutot dan keureubeuen-keureubeuen nyang laen, lagee keureubeuen siper siploh dan keureubeuen khusus nyang gata peujanji ubak tuhan. meugeumbira kheueh dikeue tuhan allah gata, meusajan-sajan deungon aneuk-aneuk gata, namiet-namiet gata dan ureueng-ureueng lewi nyang na tinggai nibak banda gata, le sabab ureueng lewi hana meuteume tanoh nibak nanggroe gata. gata hana jeuet tapeuseumah keureubeuen gata nibak barang gapat teupnat nyang gata pileh keudroe, teuma nibak teupnat nyang geupileh le tuhan didaerah saboh lamkawan sukee gata. nibak teupnatnyan mantong nyang jeuet peuseumah keureubeuen nyang teutot dan gata peubuet hai nyang laen nyang ulon peurintah ubak gata. teuma gata beubah keu gata sie beulatang peulara gata dan gata pajoh asoe jih dipat mantong gata tinggai. gata jeuet tapajoh sidub toh nyang geubri le tuhan po teu allah gata keu gata. tieb-tieb ureueng, bah nyang nyang gleh meunan cit nyang kuto, jeuet jipajoh sie nyang, lagee gata jeuet tapajoh eungkot sie rusa. teuma darah jih nyang hana jeuet teupajoh, dan darah nyang haroh teuroe ateuhe tanoh lagee teuro ie. nibak teupnat tinggai gata hana jeuet gata pajoh keureubeuen siper siploh nibak hase gandom gata, anggo gata, minyeuk zaiton gata, leumo atawa kameng ngon bubiri gata nyang phon that lahe, keureubeuen teupeuleuh kaori gata, keureubeuen ban galak droe atawa keureubeuen nyang laen. gata meusajan ngon aneuk-aneuk gata, meunan cit namiet-namiet gata dan meusajan-sajan ngon ureueng-ureueng lewi nyang na tinggai lam banda gata, haroh tapajoh keureubeuen nyang dikeue tuhan allah gata, nibak teupnat nyang geupileh le tuhan po teu allah gata. dan nibak teupnat nyang gata haroh meugeumbira sabab le meubagoe useuha gata. jaga kheueh bek sampoe gata peubiyeu kawom lewi nyan teulanta simantong gata udeb lam nanggroe nyan. oh ka lheureh tuhan po teu allah gata geupeuluwah bataih-bataih nanggroe gata lagee nyang geupeujanji nyang, gata jeuet tapajoh asoe jih nyang ban galak droe gata. meunyeo teupnat nyang geupileh le tuhan po teu allah jioh that nibak teupnat tinggai gata, gata jeuet tasie saboh leumo, bubiri atawa kameng nyang geubri le tuhan keu gata, dan gata pajoh sie jih nibak teupnat gata ban galak ate gata, lagee nyang ka lheureh ulon peugah bak gata. tieb-tieb ureueng bah nyang nyang gleh meunan cit nyang kuto, jeuet jipajoh eungkot sie nyang, lagee gata jeuet tapajoh eungkot sie rusa. teuma sie nyang mantong na meudarah hana jeuet tapajoh, sabab nyawong na lam darah, dan gata hana jeuet tapajoh nyawong meusigoe ngon asoe jih. darah jih sagai-sagai hana jeuet gata pajoh, teuma haroh teuro ateuhe tanoh lagee teuro ie. meunyeo gata tataat ubak peurintah nyan,

tuhan galak that, dan gata meunan cit keuturonan gata teuma seujahtra. banmandum keureubeuen dan nyang gata peuseumah nyang ka gata peujanji ubak tuhan, haroh gata ba ubak teupnat nyang geupileh le tuhan. keureubeuen nyang teutot dan keureubeuen nyang teupajoh asoe jih haroh teupeuseumah ateuhe miseubah tuhan po teu allah gata dan darah gobnyan geuro ateuhe miseubah nyang. simak kheueh beujroh-jroh peue-peue nyang ka ulon peurintah ubak gata, deungon nyang gata ka tapeubuet nyang jroh dan geugalak le tuhan po teu allah gata, deungon nyang teuma gata dan keuturonan gata seulamata dan seujahtra keu siumu masa." tuhan po teu allah gata teuma geupeubina banya-banya nyang na tinggai nibak nanggroe nyan, deungon nyang gata hase gata duek dan gata tinggai disinan. oh ka lheureh banya-banya nyang teupeubina, ate-ate kheueh bek sampoe gata taseutot awaknyan teuseumah ilah-ilah laen, sabab ngon buet lageenyan jipeuteuka beuncana. cara banya-banya nyang jiseumah ilah-ilah jih, bek kheueh gata seutot keu gata peubuet taseumah tuhan po teu allah gata, sabab awaknyan jiseumah deungon cara jipeubuet buet-buet nyang jeuhet nyang geubanci le tuhan. dan aneuk-aneuk awaknyan keudroe awaknyan tot ateuhe miseubah sibagoe keureubeuen keu ilah-ilah awaknyan. peubuet kheueh banmandum nyang ulon peurintah ubak gata; bek gata tamah atawa gata peukureueng. meunyeo na sidroe nabi atawa tukang boh tapeuse lumpo jipeujanji sapeue-sapeue mujizat atawa buet nyang ajaeb deungon meukeusut mangat gata taseumah ubak ilah-ilah nyang hantom na gata turi, bah kheueh peue nyang awaknyan peujanji nyang biet-biet teujadi, bek tabri peuratitan keu hai nyan. tuhan po teu allah gata geupeuguna ureueng nyang keu geu ujoe gata, mangat geukalon peu kheueh gata biet-biet gata cinta ubak tuhan deungon sipeunoh ate atawa hana. ureueng nyang lageenyan haroh kheueh teuhukom mate, kareuna jikeuneuk peusisat gata nibak jalan nyang geupeurintah le tuhan po teu allah gata keu gata. jihnyan na kheueh ureueng jeuhet sabab jiyue gata mangat gata beurontak ubak tuhan po teu allah gata nyang ka geupeubeubai gata nibak nanggroe meuse, di teupnat gata jiboh keunamiet. jadi ureueng nyang lageenyan haroh teupoh mate, mangat buet nyang jeuhet teusampoh beu habeh. teuma gata haroh kheueh taseutot peurintah tuhan po teu allah gata dan gata horeumat gobnyan; gata taat kheueh ubak gobnyan dan gata peubuet kheueh peue mantong nyang geupeurintah keu gata. teutab kheueh seutia dan meungabdi ubak gobnyan. meunyeo syedara gata atawa aneuk agam meunan cit ngon aneuk inong, atawa peurumoh gata nyang gata gaseh atawa teuma rakan nyang that-that tho deungon gata deungon sengab-seungab jibujuk gata mangat gata tatem seumah ilah-ilah nyang laen nyang hana gata turi meunan cit hana geuturi le indatu gata, ilah-ilah nibak banya-banya nyang tinggai toh ngon jioh, bek gata deungoe jihnyan dan bek kheueh teuma gata peubiyeu droe gata jibujuk le ureueng nyang lageenyan. meunan cit bek teuma gata lindong ngon gata gaseh ureueng nyang lageenyan. ureueng nyang lageenyan haroh kheueh

teu rhom ngon aneuk batee sampoe an mate. nyang peuphon rhom haroh kheueh gata, oh lheurehnyan baro kheueh jiseutot le banmandum rakyat ba. ureueng nyang meusalah nyan haroh kheueh teupoh mate, sabab jihnyan jikeuneuk peujioh gata nibak tuhan po teu allah gata nyang ka geupeubeubaih gata nibak jiboh keunamiet di nanggroo meuse. teuma banmandum bansa israel jideungoe keuhai teupoh mate nyan dan sabab nyan awaknyan jeuet keu teumakot, sampoe hana meusidroepi nyang jipeubuet juhet lageenyan. meunyoee teuma gata tinggai di banda-banda nyang geubri le tuhan po teu allah gata keu gata, mungken na meutabu haba bahwa na meupadub droe ureueng juhet nibak bansa gata ka jipeuisat peunduduek banda mangat jiseumah ilah-ilah nyang hana gata turi. meunyoee na teudeungoe haba nyang meusah sah nyang lageenyan bagoe, gata seulidek kheueh deungon teuliti. meunyoee keujeuhtetan nyan biet-biet ka teujadi, teuma banmandum peunduduek banda nyan meunan cit deungon beulatang peulara jih haroh teupoh mate. meunan cit deungon banda nyan haroh kheueh teupeuhanco sampoe rata ngon tanoh. banmandum hareuta beunda peunduduek banda nyan haroh teupeusapat lam padang nyang luwah, laju banda dan bubena hareuta beunda jihnyan teutot sibagoe keureubeuen ubak tuhan po teu allah gata. oh ka lheureh banmandum nyan haroh teutinggai disinan jeuet keu runga-runga dan hana jeuet teupeuget lom teuma. barang-barang teukutok nyan hana jeuet teukeubah keu gata keudroe, teuma haroh kheueh teupeubinasa banmandum. teuma keuhai beungeh tuhan reuda dan gobnyan geutunyok gaseh sayang keu gata. gobnyan teuma geupumurah ate keu gata dan geupeu jeuet gata keu bansa nyang raya lagee nyang ka geupeujanji ubak indatu gata, asai gata ta-taat ubak mandum peurintah nyang ulon peusampoe keu gata nibak uroenyoee, dan gata peubuet banmandum nyang geulakee le gobnyan." "gata na kheueh umat tuhan po teu allah. teuma bak watee gata meukabong keu ureueng nyang meuninggai donya, bek kheueh gata peuluka droe gata atawa tacuko bagian keue ulee gata lagee nyang jipeubuet le bansa-bansa laen. gata na kheueh milek tuhan po teu allah gata; nibak banmandum bansa di atueuh bumoe, gata kheueh yang geupileh le po teu allah mangat jeuet keu umat gobnyan." "bek kheueh gata pajoh beulatang nyang geupeugah hareuem le tuhan. gata jeuet tapajoh beulatang-beulatang nyang nyoe: leumo, bubiri, kameng, rusa, kameng uteuen, bubiri uteuen, dan banmandum beulatang nyang gukeee jih teuplah dan nyang jimomoh biak. beulatang nyang gukeee jih hana teuplah nyan hana jeuet gata makheun meunan cit nyang hana jimomoh biak. bek gata pajoh beulatang unta, keulinci dan marmot. beulatang nyan na kheueh hareuem sabab bahpi na jimomoh biak teuma gukeee jih hana teuplah. meunan cit deungon bui, bek gatapajoh, beulatang nyan hareuem, sabab bah kheueh gukeee jih teuplah, beulatang nyan hana jimomoh biak. asoe sie jih hana jeuet teupajoh, meunan cit deungon bangke jih hana jeuet gata cukeh. gata jeuet tapajoh uengkot peue mantong nyang meusisek dan na sireb. beulatang

nyang udeb didalam ie teuma hana meusireb dan hana teuma meusisek nyan na kheueh hareuem, deungon nyan, atranyan hana jeuet gata pajoh. cicem peue mantong jeuet gata pajoh nyang hana hareuem. teuma na meupadub boh jeuneh cicem nyang hana jeuet gata pajoh, na kheueh: cicem siwah, cicem keutoktok, meubagoe jeuneh kleueng, cicem nasar, cicem gagak, cicem unta, cicem cama, blekok dan meubagoe jeuneh cicem cangriek, undan, cicem kasa dan simantong. banmandum beulatang seurangga nyang meusayeub na kheueh hareuem, deungon nyan hana jeuet teupajoh. beulatang nyang na sayeub teuma hana hareuem nyan jeuet teupajoh. beulatang nyang mate keudroe bangke beulatang nyan hana jeuet teupajoh, teuma jeuet jipajoh le ureueng aseng nyang na tinggai lamkawan gata, atawa bangke beulatang nyang mate nyan teupeubloe keu bansa aseng nyang lagee nyan jeuet. gata na kheueh umat nyang teupeukhusos keu tuhan po teu allah gata. uengkot sie aneuek bubiri atawa aneuek kameng hana jeuet teutaguen ngon ie miek nang jih." "tieb-tieb thon gata haroh kheueh gata weuek siper siploh nibak banmandum hase tanoh gata. dikeue tuhan po teu allah gata, di teumpat nyang geupileh nyan, gata haroh gatapajoh keureubeuen siper siploh nibak hase gandom, ie anggo, minyeuk zaiton meunan cit ngon aneuek leumo dan kameng bubiri gata nyang phon that lahe. gata peubuet kheueh hainyan mangat jeuet keu siumu masa gata tameurunoe keu tahoreumat tuhan po teu allah gata. meunyoee teumpat nyang geupileh le tuhan po teu allah gata jioh that nibak rumoh gata, sampoe siper siploh nibak hase tanoh gata nyang geubri le tuhan allah gata keu gata hana hase gata ba keunan, teuma gata peubloe kheueh jeumba nibak hase tanoh gata nyan, dan gataba kheueh peng yuem nyan u teumpat nyang ka geupileh le tuhan po teu allah gata. gata beulanja kheueh peng nyan keu peue mantong nyang gata keuneuk bloe - leumo atawa kameng bubiri, ie anggo atawa ie jieb nyang kreueh - laju nibak teumpatnyan, dikeue tuhan po teu allah gata, gata dan keuluwarga gata haroh kheueh tapajoh bu meusajan-sajan dan gata meuseunang-seunang. bek gata peubiyee ureueng lewi nyang tinggai di banda-banda gata; ingat kheueh bahwa awaknyan hana meutanoh atrajjih keudroe. bak tieb-tieb akhe thon nyang keu lhee, gata haroh taba siper siploh jeumba nibak hase tanoh gata dan gata peusapat laju atranyan nibak banda-banda gata. peunajohnyan keu ureueng lewi sabab awaknyan hana meutanoh atrajjih keudroe, dan keu ureueng aseng, aneuek yatem ngon aneuek meuntui dan ureueng inong balee nyang udeb di banda-banda gata. awaknyan jeuet jiteuka dan jijak cok banmandum peue nyang jipeureulee. meunyoee gata tapeubuet lageenyan, le tuhan allah gata teuma geubri beureukat banmandum hase useuha gata." "tieb-tieb akhe thon nyang keutujoh gata haroh tapeuna watee keuteupeusampoh utang. meunoe cara jih. tieb-tieb ureueng israel nyang ji peu utang peng ubak ureueng saboh bansa ngon jih, peng nyang jipeu utang nyan haroh jisampoh, sabab meunurot keuputusan tuhan keudroe utang nyan ka geusampoh, deungon nyan hana jeuet le

teujak tunggee. gata jeuet tatunggee peng nyang gata
peu utang ubak ureueng aseng, teuma hana jeuet le
gata tunggee peng nyang na nibak ureueng saboh
bansa deungon gata. tuhan po teu allah gata teuma
geubri beureukat keu gata di nanggroe nyang geubri
keugata. le sababnyan lamkawan bansa gata hana
ureueng nyang gasien, asai gata tataat ubak tuhan
po teu allah gata, dan deungon teuliti gatapeubuet
laju peue-peue mantong nyang ulon peurintah
ubak gata nibak uroenyoe. tuhan po teu allah gata
teuma geubri beureukat ubak gata lagee nyang ka
geupeujanji nyan. gata teuma tapeu utang peng ubak
bansa nyang le, teuma gata keudroe hana teuma
gata meu utang; gata teuma takuasa ateuheh bansa
nyang le, teuma awaknyan hana teuma jikuasa gata.
meunyoe gata teuma ka tinggai teutab di nanggroe
nyang geubri le tuhan allah gata keu gata, laju nibak
saboh lam banda gata na meurumpok ngon ureueng
saboh bansa gata nyang udeb jih lam keadaan hana
sapeuena, bek kheueh gata peupeunteng droe gata
keudroe ngon cara gata tulak keu jitulong syedara
saboh bansa ngon gata nyan. sikeubitji, gata haroh
beumurah ate dan gata peu utang ubak ureueng nyan
sidub le nyang jipeureulee. bek gata tulak keu gatabri
peu utang ubak ureueng nyan deungon alasan bahwa
thon teusampoh bubena utang karab that. bek gata
peubiyeu pikeran nyang jeuhetnyan jitamong lam
ate gata. meunyoe gata hana neutem peu utang ubak
jihnyan, ureueng nyan teuma jimeulakee ubak tuhan
keu jigadu gata, deungonnyan gata teuma geupeugah
ka meusalah. gatabri kheueh keu jihnyan deungon
mangat ate dan ikhlas, deungon nyan tuhan po
teu allah gata teuma geubri beureukat ateuheh peue
mantong nyang gata useuha. lamkawan ureueng gata
israel nyan sabe na meurumpok ureueng-ureueng
gasien hana sapeuena. sabab nyan kheueh ulon
peurintah ubak gata mangat gata peumurah ate keu
ureueng nyang gasien nyan." "meunyoe na sidroe
ureueng agam atawa ureueng inong nibak bansa
gata jipeubloe droe jih jeuet keu namiet gata, jihnyan
haroh jimeukeureuja ubak gata nyang treb jih nam
thon. nibak thon nyang keutujuh jihnyan haroh
kheueh neupeubeubaih. namiet nyang ka gata
peumeurdehka nyan hana jeuet jijak ngon jaroe
shoh. gata jok kheueh keu jihnyan deungon murah
ate nibak peue nyang ka geubri le tuhan po teu allah
gata keu gata na kheueh kameng bubiri, gandom
dan anggo. gata ingat kheueh yoh masa ilee bahwa
gata nyan na kheueh namiet di nanggroe meuse
laju geupeubeubaih ngon geupeumeurdehka gata
le tuhan po teu allah gata; nyang kheueh sabab jih
ulon bri peurintah nyoe ubak gata. teuma meunyoe
namietnyan hana jitem jak sabab jihnyan jicinta ubak
keuluwarga gata dan galak jitinggai meusapat ngon
gata, taba kheueh jihnyan ubak babah pintoe rumoh
gata dan gata tindek kheueh on punyueng jihnyan,
teuma jihnyan jeuet keu namiet gata siumu udeb
jih. meunan cit teuma nyang haroh gatapeubuet
ateuheh namiet gata nyang inong. meunyoe gata
tapeubeubaih sidroe ureueng namiet, bek kheueh
gata meurasu tunu, sabab nyang treb jih nam thon
namiet nyan ka jimeukeureuja keugata deungon
upah jih siteungoh nibak sidroe upah si peulayan.

gata peubuet kheueh laju peurintah nyan, teuma
tuhan po teu allah gata teuma geubri beureukat keu
banmandum useuha gata. aneuek leumo dan kameng
bubiri nyang phon-phon jitoh atranyan haroh gata
peuseumah ubak tuhan po teu allah gata. leumo nyan
hana jeuet gatakok keu teujak muue, dan bubiri nyan
hana jeuet teuma gata cukoe bulee jih. tieb-tieb thon
gata seukeuluwarga haroh gata pajoh sie jihnyan
dikeue tuhan po teu allah gata, teumpat jih nyang ka
geupileh le tuhan. teuma meunyoe beulatang peulara
nyan na meucupa, miseu jih capiek atawa buta mata
jih dan cacat nyang that brat, nyang lageenyan hana
jeuet gata peuseumah ubak tuhan po teu allah gata.
tieb-tieb ureueng, bah kheueh jihnyan nyang gleh
meunan cit ngon nyang kuto, atranyan jeuet jipajoh
meunyoe di rumoh, lagee teupajoh uengkot sie
rusa. darah jihnyan hana jeuet gata pajoh, teuma
haroh gataro u ateuheh tanoh lagee gataro ie." "gata
peuraya kheueh uroe raya paskah nibak buleuen
abib keu teuhoreumat tuhan po teu allah gata, sabab
dalam buleuen nyan, bak watee oh malam teuka,
gobnyan geupeubeubaih gata nibak tanoh meuse.
gatajak kheueh u teumpat nyang geupileh tuhan
keu gatajak sie saboh nibak kameng bubiri gata
atawa leumo gata sibagoe peuseumahan paskah
guna keu teuhoreumat tuhan po teu allah gata. atra
keureubeuen paskah nyan haroh kheueh gata pajoh
ngon ruti nyang hana meurago. tujuh uroe treb
jih gata haroh gatapajoh ruti nyang hana meurago,
lagee yoh masa gata tatinggai tanoh meuse deungon
meugageeh-gageeh. gata makheun kheueh ruti nyan,
ruti nyang geupeugah ruti peundeuritaan, mangat
jeuet siumu udeb gata atranyan gata ingat keu uroe
gata tinggai nanggroe meuse, nibak teumpat gata
meudeurita. treb jih tujuh uroe bansaboh nanggroe
gata hana meusidroepi jeuet jikeubah rago di dalam
rumoh jih. uengkot sie nyang teusie watee oh malam
nyang phon haroh kheueh teupajoh sampoe habeh
bak malam nyan cit teuma. beulatang peulara nyang
teusie nibak uroe raya paskah haroh kheueh teusie
nibak teumpat nyang ka geupileh le tuhan po teu
allah gata, dan hana jeuet bak teumpat nyang na
bansaboh nanggroe nyang geubri ubak gata. hainyan
haroh gata peubuet bak watee mata uroe ka jilhob,
lagee bak watee gata tinggai tanoh meuse. gata
reuboh kheueh uengkot sie nyan dan gata pajoh
kheueh laju nibak teumpat nyang ka geupileh le
tuhan po teu allah gata, oh singoh beungoh gata
jakwoe kheueh u rumoh gata. treb jih nam uroe
teuma oh lueheh nyan gata haroh tapajoh ruti nyang
hana meurago. bak uroe nyang keutujuh gata haroh
gata meusapat keu gatajak seumah tuhan po teu
allah gata. bak uroenyan bek kheueh sagai-sagai
gata jak lam buet." "gata itong kheueh tujuh seuen
aleuhad phon nibak uroe phon gata jakpot boh
gandom, laju gata peuna kheueh uroe raya khanuri
museum seumeupot keu gata horeumat ubak tuhan
po teu allah gata. nibak uroenyan taba kheueh
keureubeuen keugalak droe ubak gobnyan meunurot
jai jih raseuki nyang ka geubri nyan ubak gata.
dikeue tuhan po teu allah gata, nibak teumpat nyang
ka geupileh, gata haroh kheueh neumeusukaria
meusajan ngon aneuek-aneuek gata, namiet gata

dan ureueng lewi, ureueng aseng, aneuek yatem ngon aneuek muntui dan bubena ureueng inong balee nyang na tinggai banda-banda gata. gata taat kheueh ubak banmandum peurintah nyan deungon seutia, dan bek tatuwoe bahwa yohmasa ilee gatapi ka lheureu jeuet keu namiet di nanggroe muse." "oh ka seulesoe banmandum gandom gata keubah dan meunan cit bubena boh anggo gata ka seulesoe teuprah le jih, gata haroh tapeuna khanuri jambo on nyang treb jih tujoh uroe. museunang-seunang kheueh meusajan-sajan ngon aneuek-aneuek gata, namiet gata, ureueng lewi, ureueng aseng, aneuek yatem ngon aneuek muntui dan bubena inong balee nyang na tinggai lam banda-banda gata. tujoh uroe treb jih khanuri nyan gatapeuguna keu teuhoreumat ubak tuhan po teu allah gata di teumpat nyang geupileh le tuhan. meugeumbira kheueh, sabab tuhan po teu allah gata ka geubri beureukat hase tanoh nyang gata keureuja dan meunan cit ngon hase buet droe gata nyang laen. banmandum ureueng agam nibak bansa israel haroh jijak seumah tuhan po teu allah gata nibak teumpat nyang ka geupileh lhee goe dalam sithon, na kheueh nibak uroe raya paskah, nibak khanuri musem keumukoh dan bak musem khanuri jambo on. soe mantong ureueng nyang teuka nyan haroh jiba peuseumahan ubak tuhan hainyan meunurot keumampuan jih, sisuai deungon le jih rejeuki nyang geubri le tuhan po teu allah gata ubak gata." "di tieb-tieb banda nyang geubri le tuhan po teu allah gata keu gata, gata haroh ta-angkat hakem-hakem dan peutugaih-peutugaih nyang laen mangat jeuet jibri keuputosan nyang ade ubak rakyat. lam hai gatacok keuputosan, awaknyan hana jeuet jimeubuet bangalak droeji peue teuklom meunyoe brat siblah. meunan cit hana jeuet jiteurimong peng atawa ngon peue mantong nyang saban lagee buet teusogok, sabab deungon teusogoknyan ka teupeubuta ureueng laen, bahpi keunong cit keu ureueng nyang carong-carong ngon juoe, deungon lageenyan geucok keuputosan nyang geupeude ade nyan gon cara hana ade. gata haroh kheueh beuade sabe, mangat hase udeb seujahtra ngon hase gata tinggai nyang treb nibak tanoh nyang geubri le tuhan po teu allah gata keu gata. meunyoe gata tapeugot miseubah keu tuhan po teu allah gata, bek gata keubah patong beurala kayee lambang asyera di siblah jihnyan, dan meunan cit bek teuma gata peudong tameh keu gata seumah patong beurala, kareuna tuhan po teu allah that-that geubeungeh keuhai nyang lageenyan. bek gata peuseumah leumo atawa domba nyang meucupa ubak tuhan po teu allah gata, sabab nyang lageenyan gobnyan that-that geubanci. meunyoe gata na teudeungoe bahwa nibak saboh lam banda gata na ureueng nyang meudesya ubak tuhan po teu allah gata sabab ka ji-iengkeue peujanjian dan peurintah gobnyan deungon jiseumah dan meungabdi ubak ilah-ilah nyang laen atawa ubak mata uroe, buleuen atawa bintang, teuma gata haroh kheueh gata seulidek deungon teuliti. meunyoe bit buet nyang jeuhet nyan biet-biet ka teujadi di israel, ureueng-ureueng nyang meusalah haroh teuba u luwa banda dan laju teurajam ngon cara teurhom ngon aneuek batee

sampoe an mate. teuma jihnyan jeuet teuhukom mate meunyoe na dua droe saksi atawa leubeu; sidroe-droe ureueng hana jeuet teuhukom mate nyang dasaiji nibak keuteurangan nyang jipeugah le sidroe saksi mantong. disaksi nyan haroh jipeuphon rhom batee nyang phon ateueh ureueng nyan, oh lheurehnyan jiseutot teuma le ureueng rame nyang laen. deungon na lageenyan gata ka gata peuhanco buet nyang jeuhet. meunyoe peukara nyang hana hase teupeuputoh le hakem-hakem bak sabab teumpat sabab brat that, miseu jih peukaranyan keuhai jipoh ureueng sampoe mate nyang jisaja atawa hana jisaja, meuseuliseh keuhai hak milek atawa sabe-sabe jipeuluka badan maseng-maseng, gata haroh takjak ubak teumpat nyang ka geupileh le tuhan po teu allah gata. gata peusampoe kheueh laju peukara gata nyan ubak teungku-teungku imeum ureueng lewi dan ubak hakem nyang te-ungoh na mantong meutugaih, laju gata peubiyeu mantong awaknyan nyang peuputoh hukoman nyan. awaknyan kheueh nyang bri keuputosan, dan gata haroh gata peubuet nyan deungon teuliti peue nyang awaknyan peugah ubak gata. gata teurimong kheueh keuputosan awaknyan dan gata peubuet kheueh laju peue nyang ka awaknyan peuteutab sampoe ubak hai nyang siubiet-ubiet jih. soe mantong ureueng jih nyang jijeuet jilawan hakem atawa teungku imeum nyang teungoh meutugaih, ureuengnyan haroh teuhukom mate; deungon na lageenyan gata ka tapeuhanco buet nyang jeuhet nyan di israel. banmandum ureueng nyang jideungoe keuhai keujadian nyan dan ka jeuet keuteumakot, sampoe hanale nyang jijeuet jipeubuet nyang lageenyan." "meunyoe teuma tanoh nyang gebri le tuhan allah gata ka jeuet keu hak milek gata, dan gata ka teuma tatinggai di ateueh tanoh nyan, mungken gata tapeureulee teuma sidroe raja lagee bansa-bansa nyang na tinggai ban seukelileng gata. gata simak kheueh nyoe beueget-get mangat ureueng nyang gata angkat jeuet keuraja gata na kheueh ureueng nyang geupileh le tuhan po teu allah gata. jihnyan haroh kheueh sidroe lamkawan bansa gata keudroe; dan bek teuma gata angkat bansa laen nyan jeuet keu raja gata. raja hana jeuet jipeulara guda nyang le keu tantra geuhnyan dan hana teuma jeuet bansa nyoe geuyue woe u nanggroe muse keu jijak bloe guda, sabab tuhan ka geupeugah ubak umat gobnyan bahwa awaknyan hana jeuet jiwoe u nanggroe nyan. meunan cit di rajanyan hana teuma jeuet geumeukawen nyang le sampoe ureueng binoe geuh rame, mangat gobnyan hana geupeulikot tuhan. meunan cit diraja nyan hana jeuet geupeukaya droe deungon geupeusapat meuh dan pirak. meunyoe sidroe ureueng jiangkat jeuet keu raja, raja nyan haroh teubri saboh kitab nyang meuasoe keuhai hukom-hukom po teu allah nyang teusalen nibak kitab nyang aseuli nyang na geukeubah le teungku-teungku imeum lewi. kitab nyan haroh na sabe to ngon raja nyan, dan siumu udeb geuhnyan haroh geubeuet sabe kitab nyan mangat gobnyan geumeurunoe keuhai pakriban cara teuhoreumat tuhan allah gobnyan dan deungon seutia teuma taat sabe peurintah nyang na teutuleh didalam kitab nyan. meunyoe kitab nyan geubeuet le

raja deungon peunoh horeumat le droe geuhnyan, gobnyan geutee droe dan hana geu anggab droe geuh leubeh get nibak ureueng-ureueng nyang saboh bansa deungon gobnyan, dan hana teuma geuiengkeue peurintah tuhan bahpi pakriban mantong. laju gobnyan dan keuturonan gobnyan teuma geupeurintah u ateuh bansa geuhnyan sampoe ubak treun meutleun ubak aneuek cucoe gobnyan." "banmandum nibak sukee lewi ka geupeuteuntee bahwa awaknyan geubri tugaih le tuhan sibagoe imeum, sabab nyan di sukee lewinyan hana jeuet jiteurimong jeumba tanoh di israel. awaknyan haroh kheueh udeb nibak peuseumahan-peuseumahan atawa keureubeuen nyang laen nyang teubri ubak tuhan. awaknyan hana jeuet na tanoh lagee sukee-sukee nyang laen, sabab tuhan kheueh jeumba waresan awaknyan, lagee nyang ka geupeujanji le tuhan keu awaknyan. meunyoe na sidroe ureueng ji peuseumah keureubeuen leumo atawa bubiri, teuma pha keue, reuheueng dan pruet beulatang peulara nyan haroh jijok ubak imeum-imeum sibagoe jeumba awaknyan. hase nyang phon teupot nibak boh gandom, ie anggo, minyeuk zaiton dan bulee bubiri, atranyan na kheueh jeumba awaknyan. nibak banmandum sukee israel, tuhan po teu allah gata ka geupileh sukee lewi jeuet keu imeum keu siumu masa. meunyoe na ureueng lewi nyang meu asai nibak banda dipat mantong di israel jijak u teupat nyang ka geupileh le tuhan dan jitem tinggai disinan, gobnyan jeuet jipeutimang tuhan po teu allah sibagoe imeum lagee ureueng-ureueng lewi nyang laen nyang na meutugaih di teupat nyan. le jihnyan haroh jiteurimong peunajoh nyang sadub le jih lagee imeum-imeum nyang laen; peue nyang jiteurimong nibak keuluwarga jihnyan, meunan cit nyan keu gobnyan." "meunyoe singoh teuma ka gata tamong u dalam nanggroe nyang ka geubri le tuhan po teu allah gata nyan keu gata, bek kheueh gata seutot buet-buet nyang jeuhet nyang jipeubuet le bansa-bansa nyang na disinan. lamkawan gata bek kheueh na nyang jipeuseumah aneuek-aneuek jih sibagoe keureubeuen nyang teutot. dan meunan cit bek kheueh na meusidroepi nyang na jeuet keu tukang tanueng, jijak mita tanda-tanda, jingui ieleume meurajah meunan cit ngon ieleume sihe, atawa jipeuna hubongan ngon areuwah-areuwah ureueng mate. ureueng nyang jipeubuet buet nyang jeuhet nyan that-that geubanci le tuhan po teu allah gata, dan nyang kheueh sabab jih bansa-bansa nyang geukireueh dikeue gata. le sababnyan, bah kheueh gata tameungabdi ubak tuhan po teu allah gata mantong deungon sipeunoh ate gata." oh ltheuh nyan nabi musa geupeugah, "bansa-bansa di nanggroe nyang teuma gata tinggai teutab nyan awaknyan buet jih galak jipeucaya ubak tukang tanueng, dan jimita tanda-tanda. teuma tuhan po teu allah gata hana geugalak buet nyang lageenyan. sikeubiet jih lam bansa geutanyoe keudroe tuhan geu kirem keu gata sidroe nabi nyang lagee ulon nyoe, dan gata haroh kheueh gata taat ubak nabi nyang teuma geu kirem nyan. bak uroe gata tamesapat di gunung sinai, gata lakee laju mangat gata bek le tadeungoe tuhan po teu allah gata geumeu tutoe dan meunan

cit bek le teuma gata kalon gobnyan teuka didalam apui nyang hu meutaga, sabab gata takot keu mate. le sababnyan tuhan geupeugah ubak ulon, 'peue nyang jilakee le awaknyan na kheueh bijaksana. nibak bansa awaknyan keudroe ulon teuma lon kirem sidroe nabi nyang lagee gata. ulon teuma lon peugah bak jihnyan peue nyang haroh jipeugah, laju jihnyan jipeusampoe ubak bansa nyan ateuh peue mantong nyang ulon peurintah. nabi nyan teuma jimeututoe ateuh nan ulon, dan ulon teuma lon hukom soe mantong nyang hana jitem deungoe nabi nyan. teuma meunyoe sidroe nabi jijeuet jipeusampoe saboh peuneusan ateuh nan ulon padahal ulon hana lon yue jihnyan jipeubuet nyang lageenyan, jihnyan bah kheueh mate; meunan cit teuma tieb-tieb nabi nyang jipeugah haba ateuh nan ilah-ilah laen haroh mate.' mungken gata tateumanyong di dalam ate, 'pakriban kamoe teupeu peu kheueh peusan sidroe nabi nyan meu asai nibak tuhan atawa hana?' meunyoe sidroe nabi geupeugah haba ateuh nan tuhan, teuma peue nyang jipeugah nyan hantom na teujadi, teuma peue nyang jiramai nyan bukon asai jih nibak tuhan. nabi nyang lageenyan jipeugah haba ateuh nan jih keudroe dan gata hanapeu gata takot ubak nabi nyan." "oh ka seuleusoe bansa-bansa nyang geupeubinas le tuhan po teu allah gata dan nanggroe nyan geubri teuma keu gata, dan oh ka ltheuh gatacok banda-banda dan rumoh-rumoh awaknyan dan gata tinggai teutab disinan, wilayah nyan haroh gata bagi jeuet keu lhee boh bagi, maseng-maseng na kheueh saboh banda teupat ureueng jijak lakee suaka nyang bagaih ngon mudah trok keunan le ureueng nyang ka jipoh gob sampoe mate. meunyoe na sidroe ureueng nyang deungon hana jisaja ka jipoh mate ureueng laen nyang bukon musoh jih, ureueng nyan jeuet jipeuplueng droe ubak salah saboh nibak banda nyan dan jeuet awaknyan tinggai ngon udeb disinan. miseu jih na dua droe ureueng meusigo-sigo jijak tamong u dalam uteuen keu jijak teubang kayee. teuma sidroe nibak ureueng nyan jikoh laju bak kayee, hana teusaja ulee pato ureueng koh kayee nyan ltheuh nibak goejih dan pato nyang ltheuh nyan laju keunong ateuh rakan jih nyan dan ureueng nyang keunong nyan laju mate. teuma ureueng nyang ka jipoh deungon hana jisajanyan hana meusalah dan jeuet jiplueng ubak saboh nibak lhee boh bandanyan mangat jih nyan seulamata. teuma meunyoe na saboh banda teupat meulindong sagai, nyang mungken jioh jih ubak banda nyan jioh that, dan anggota keuluwarga nyang meu tanggung jaweueb keu jijak tuengbila keuhai mate syedara jih nyan hase jitiyueb ureueng nyan dan sabab beungeh jih nyan laju jipoh teuma ureueng nyang hana meusalah nyan. le sababnyan ulon peurintah ubak gata taseudia lhee boh banda teupat meulindong. meunyoe tuhan po teu allah gata ka geupeuluwah wilayah gata lagee nyang ka geupeujanji ubak indatu gata, dan banmandum nanggroe nyan ka geubri keu gata, gata haroh kheueh tapileh lhee boh teuk banda meulindong teupat ureueng nyang meuras meusalah jijak musom. (nanggroenyan teuma geubri keugata meunyoe gata tapeubuet banmandum nyang ulon peurintah ubak

gata nibak uroe nyoe, dan meunyoé gata tacinta ngon tagaseh ubak tuhan allah gata dan gata udeb laée nyang ka geupeurunoe nyan.) tapeubuet kheueh nyan mangat gata hana meudesya sabab gata peubiyeu ureueng nyang hana meusalah jijk poh di nanggroé nyang ka geubri le tuhan po teu allah gata keugata." "teuma laen haijih meunyoé sidroe ureueng jijk linteueng musoh gata dan ngon jisaja lom na rasa banci jih laju jijk poh mate ureueng nyan, oh lheureh nyan ureueng nyan laju jijk plueng ubak salah saboh nibak banda meulindong keu jijk mita peulindongan. lam hai nyang lageenyan di ureueng peumimpin bandanyan haroh jijk hoi ureueng nyan dan jijk laju ubak anggota keuluwarga nyang meutanggong jaweub mangat jijk balaih syedara jih nyang ka jipoh mate nyan, mangat jihnyanpi hase teupoh mate. bek kheueh na rasa weueh ngon teusayang keu ureueng nyang lageenyan. gata peubeubaih kheueh israel nibak hai nyang seumeupoh nyan, mangat gata mubahgia ngon seujahtra." "meunyoé gata katrok ubak nanggroé nyang geubri le tuhan po teu allah gata keu gata, bek kheueh gata geesee bataih tanoh wareh kawom gata nyang ka teupeuteuntee yoh jamen ilée." "meunyoé sidroe mantong nyang jeuet keusaksi hana seb keu teukheun sidroe ureueng nyang teutudohnyan meusalah; sikureueng-kureueng jih duh droe saksi teupeureulee keuhai nyang lageenyan bagoe. meunyoé na sidroe ureueng jikeuneuk peurhot ureueng nyang laen deungon jitudo nyang peuleusu nibak kanto mahkamah, teuma bandua ureueng nyan haroh jijk ubak teumpat iebadat nyang ka geupeuteuntee le tuhan mangat geupeu hukom le imeum-imeum dan hakem nyang teungoh meutugaih. di teungku hakem nyan haroh geuseulidek peukaranyan deungon teuliti, dan meunyoé teunyata ureueng nyan ka jipiteunah seusabe keudroe jih ureueng israel, ureueng nyan haroh jipeujak ile hukom nyang ka teupeu meukeusut keu lawan jih nyan. deungon na lageenyan gata ka gata beurantaih buet nyang jeuhet nyan. banmandum ureueng jideungoe keuhai nyan dan deungon lageenyan ka jeuet jitakot, dan sampoe hanale nyang jijeuet peubuet-buet nyang jeuhetnyan. bek kheueh na rasa gaseh lam ate gata keuhai buet-buet nyang lageenyan bagoe. hukom jih na kheueh lageenyoé: nyawong gantoe jih nyawong, mata gantoe jih mata, gigo gantoe jih gigo, jaroe gantoe jaroe dan gaki gantoe gaki." "meunyoé gata tajak muprang gata lawan bube na musoh-musoh gata, bek teumakot watee gata kalon geuritan prang meunan cit deungon guda-guda awaknyan nyang le dan tantra awaknyan nyang jai leubeh nibak jeumeulah gata. tuhan po teu allah gata nyang peubeubaih gata nibak nanggroé meuse, meunan cit gobnyan teuma geutulong gata. sigohlom gata peuphon muprang, sidroe nibak imeum haroh kheueh jimaju sira jipeugah haba ubak gata lageenyoé, 'syedara-syedara, gata deungoe kheueh nyoe! nibak uroenyoé gata tamaju u mideuen prang. bek kheueh gata takot atawa cut ate peuteuk lom gata bingong. tuhan po teu allah gata teuma geuseutot sira geujak tulong gata, dan gobnyan teuma geupeumeunang gata.' oh lheureh nyan

dipeurwira haroh kheueh jijk peugah tutoe haba nyoe ubak gata, 'peue na lamkawan gata ureueng nyang ban mantong jipeuet rumoh, teuma gohlom na jipeuet khanuri keuhai teureuseumi rumohnyan? meunyoé nyan na, jihnyan ka jeuet jijkawoe. sabab meunyoé jih nyan rhoh teupoh mate lam mideuen prang, ureueng laen nyang teuma jitinggai didalam rumoh nyan. peu kheueh na lamkawan gata ureueng nyang banmantong jijk pula bak anggo di dalam lampoh jih? meunyoé na, jih nyan ka jeuet jijkawoe. sabab meunyoé jihnyan sampoe mate didalam mideuen prang, ureueng laen nyang rasa ie anggo jih nyan. lom teuma peu kheueh na lamkawan gata ureueng nyang meutunangan laju na napeus jimeukawen? meunyoé na, jih nyan ka jeuet jijkawoe. sabab meunyoé jihnyan teupoh mate didalam prang, ureueng laen teuma jimeukawen ngon tunangan jih nyan.' meunan cit di le peurwira haroh kheueh jipeugah lageenyoé ubak gata, 'peu kheueh na lamkawan gata ureueng nyang gugob ngon teumakot? meunyoé nyan na, jih nyan jeuet jijkawoe, mangat jihnyan hana jipeurhot seumangat ureueng laen.' oh ka lheureh peurwiranyan jipeugah haba ubak tantra, haroh teuma jitunyok peumimpin-peumimpin keu tieb-tieb keusatuan. meunyoé gata tajak keu gatajak prang saboh-saboh banda, gatajak kheueh ilée watee nyang reunggang ubak banmandum peunduduek disinan mangat jiseurah droe. meunyoé awaknyan jijk buka pintoe-pintoe geureubang dan jiseurah droe, awaknyan banmandum haroh kheueh beujeuet keu namiet gata dan jijk peubuet keureuja paksa keu gata. teuma meunyoé peunduduek bandanyan hana jitem seurah droe jih dan leubeh galak jimuprang, dan gata haroh kheueh tajak keupong bandanyan. oh lheureh nyan, meunyoé tuhan po teu allah gata, geupeumungken gata tajak reubot bandanyan, gata haroh kheueh tapoh mate banmandum peunduduek nyang na disinan khusus jih nyang agam mantong. teuma gata jeuet tacok bubena kawom ureueng inong, aneuk-aneuk banyak, meunan cit ngon beulatang peulara dan peue mantong nyang na di bandanyan. banmandum hareuta beunda atra musoh-musoh gata nyan jeuet gata ngui. tuhan po teu allah gata teuma geujok nyan keu gata. meunan kheueh nyang haroh gata peubuet ateuah banda-banda nyang jioh nibak nanggroé teumpat tinggai gata. teuma meunyoé banda nyan na didalam wilayah nyang ka geubri le tuhan po teu allah gata keu gata, banmandum peunduduek nyang na disinan haroh kheueh teupoh mate. laée nyang ka geupeurintah le tuhan po teu allah, gata haroh kheueh gata peubinas bubena ureueng-ureueng het, amori, kanaan, feris, hewi, dan yebus. gatapoh mate kheueh awaknyan mangat awaknyan hana meudesya ubak tuhan po teu allah gata deungon cara jipeurunoe gata buet-buet nyang keubit luwat keu ilah-ilah awaknyan. meunyoé gata tajak muprang bak saboh banda dan banda nyan gata keupong lam watee nyang katreb that, bek kheueh gatakoh bak-bak kayee nyang muboh nyang na disinan. gata pajoh kheueh bubena boh-boh kayeenyan, teuma bek kheueh gata peurusak bak-bak kayee jihnyan sabab bak-bak kayeenyan bukan kheueh

musoh gata. bak-bak kayee nyang laen jeuet gata koh keu teupeuget keu pageue teukeupong sampoe banda-bandanyan rhot keu gata." meunyoee na di nanggroee nyang geubri le tuhan po teu allah gata keu gata na meurumpok ureueng mate keunong poh didalam lampoh dan hana teuma teutuso so ureueng nyang poh nyan, teuma peumipen dan hakem gata haroh jijak ukoe jarak nibak teupmat manyet nyang meuteumenyan u tieb-tieb banda nyang to-to deungan nyan. teuma le ureueng patot-patot nyang paleng to haroh geupileh saboh leumo nyang mantong muda nyang hantom lom teupeuguna nibak meukeureuja. leumo nyan haroh kheueh awaknyan ba ubak saboh teupmat to ngon krueng nyang hantom peureunah tho dan tanoh nyang hantom na teumeu-ue atawa teupula peue mantong di ateuh tanoh nyan. disinan awaknyan haroh jiwiet takue beulatang nyan. meunan cit deungan imeum ureueng lewi haroh kheueh geujak cit keunan, sabab awaknyan haroh jijak peuputoh nibak tieb-tieb peukara deungan buet keukeurasan. awaknyan geupileh le tuhan po teu allah gata keu jimeungabdi ubak gobnyan dan teupeugah sykoe ngon beureukat ateuh nan gobnyan. teuma le banmandum ureueng patot-patot nibak banda nyang paleng to haroh jirrah jaroe jih diateuh leumo nyan dan jipeugah teuma, 'bukon kamoe nyang poh mate ureueng nyan, dan kamoe hana kamoe teupeu so nyang poh sampoe mate ureueng nyan. tuhan, neupeu amphon kheueh ureueng israel umat droeneueh nyang ka neupeubeubaih nibak nanggroee meuse. neupeu amphon kheueh kamoe dan bek kheueh neu anggab kamoe meutanggong jaweueb ateuh teupoh mate ureueng nyang hana meusalah.' teuma deungan teupeubuet peue nyang geulakee le tuhan, gata hana geu anggab meutanggong jaweueb ateuh keu mate ureueng nyang keunong poh nyan." "meunyoee gata tajak muprang dan tuhan po teu allah gata geupeumeunang gata dimideuen prang nyan, laju gata tacok ureueng nyang jeuet keu tawanan prang, mungen lamkawan awaknyan na sidroe ureueng inong nyang lumpah lagak nyang gata galak dan na niet keuneuk cok keu peurumoh gata. gataba kheueh ureueng inongnyan u rumoh gata. di rumoh gata inong nyan haroh kheueh jigunteng ok jih nyang di ateuh ulee nyan, meunan cit jikoh teuma gukee droeji, dan jigantoe peukayan. dan ureueng nyan haroh kheueh tinggai di rumoh gata dan jimeuk-abong ateuh mate ureueng syiek jih nyan nyang trebji si buleuen peunoh. oh ka ltheueh nyan baro kheueh gata ka jeuet tameukawen ngon ureueng nyan. teuma oh watee katreb di gata hana tagalak le keu ureueng inong nyang ka jeuet keu binoe gata nyan, gata jeuet tayee ureueng inong nyan jijak deungan beubaih. jihnyan hana jeuet gata peubuet sibagoe namiet atawa gata peubloe, sabab jihnyan ka gata paksa jimeusituboh deungan gata." "miseu jih na sidroe ureueng jimeukawen dua droe, dan ban dua droe binoe jih nyan jipeulahe aneuek-aneuek agam, teuma aneuek nyang lahe leubeh ilee bukan kheueh aneuek nibak peurumoh nyang paleng jigaseh. meunyoee ureueng nyan jikeuneuk peuteuntee pakriban cara jih nyan jipeuweuk hareuta keukayaan jih nyan

keu aneuek-aneuek jih nyan, ureueng nyan hana jeuet jimeudong ubak aneuek nyang jipeulahe le inong nyang paleng jigaseh deungan cara jijak keu aneuek nyan jeuet keu hak aneuek tuha. le ureueng nyan haroh jibri jeumba duagoe lipat nibak hareuta beunda jihnyan keu aneuek agam jih nyang tuha, bahpi aneuek nyan bukan aneuek nibak peurumoh jih nyang paleng ji gaseh. hak aneuek tuha haroh kheueh jiaku le bakap jih nyan, dan keu aneuek nyan haroh kheueh teujok hareuta waresan nyang jeuet keu hak jih meunurot hukom." "miseu jih na sidroe aneuek agam nyang paleng kreueh ulee, galak that ubak buet beurontak dan hana jitem seutot peue nyang jikheun le ureueng tuha jih bahpi jihnyan ka teuhukom. le ureueng syiek jih haroh jiba aneuek nyan ubak teungku peumuka banda di teupmat awaknyan tinggai dan jilakee laju mangat aneuek jihnyan teupeusidang. le ureueng nyan haroh jipeugah ubak peumuka banda nyan, 'aneuek kamoe nyoe keubiet that kreueh ulee, galak that jibeurontak lom hana jitem taat ubak kamoe; aneueknyoe galak that jipeuhabeh peng dan galak that nibak buet nyang mabok-mabok. le ureueng agam nyang na di bandanyan jijak rhom aneueknyan ngon aneuk batee sampoe an mate. deungan na lageenyan gata ka gata beurantaih buet nyang jeuhet nyan. banmandum ureueng israel teuma jideungoe keuhai nyan dan deungan na nyang lageenyan ureueng israel nyan jeuet keuteumakot." "meunyoee sidroe ureueng ka teuhukom mate sabab sapeue-sapeue buet nyang jeuhet nyang ka jipeubuet, dan manyet ureueng nyan teugantung laju ubak tameh, manyet nyan hana jeuet teupeubiyeu disinan simalam suntok, teuma haroh teujak peukubo nibak uroenyan cit teuma. manyet nyang teugantung nibak tameh nyan teupeuteuka kutok po teu allah u ateuh nanggroee. le sababnyan, tajak kubu kheueh laju manyet nyan mangat digata hana tapeu kuto nanggroee nyang geubri le tuhan allah gata keu gata. meunyoee leumo atawa bubiri atra ureueng saboh bansa ngon gata ka sisat dan gata na deuh gata kalon beulatang nyan, bek kheueh gata pura-pura hana tateupeue, teuma taba kheueh beulatang nyan gatapeuwoe ubak ureueng po jih. meunyoee ureueng po beulatang nyan rumoh jih jioh, atawa gata hana tatuso sopo beulatang nyan, tapeuwoe kheueh beulatang nyan u rumoh gata. meunyoee ureueng po beulatang nyan jijak mita beulatang jih nyang gadoh nyan, gatajok kheueh laju ubak ureueng po beulatang nyan. meunan cit gata peubuet kheueh lageenyan cit teuma meunyoee gata neuteume ngon saboh keuleudee, sion peukayan, atawa peue mantong atra milek bansa gata nyan. meunyoee na saboh keuleudee atawa saboh leumo atra ureueng nyang saboh bansa deungan gata reubah di ateuh jalan, bek kheueh gata pura-pura hana tateupeue, teuma tatulong kheueh beulatangnyan gata peubeudoh lom teuma. di ureueng inong hana jeuet jisok peukayan lagee ureueng agam dan meunan cit teuma di ureueng agam hana teuma jeuet jisok peukayan lagee ureueng inong, sabab ureueng nyang peubuet nyang lageenyan that-that geubanci le tuhan po teu allah gata. meunyoee gata na leumah takalon saboh uempung cicem di ateuh

bak kayee atawa di atueh tanoh teuma nang cicem nyan teungoh jikarom boh jihnyan atawa meusajan ngon aneuek-aneuek jihnyan, bek kheueh gatacok nang cicem nyan. gata jeuet tacok aneuek-aneuek cicem nyan, teuma bah kheueh nang cicem nyan jipo ho nyang galak droe jih, mangat gata panyang umu dan udeb gatapi makmu. meunyoee gata tapeuget saboh rumoh, rumoh nyan haroh gata pageue bansilingka bineh bubong rumoh nyan. teuma gata hana meutanggong jaweueb meunyoee ureueng mate akibat rhot di atueh bubong rumoh nyan. bek kheueh gata pula seunaman nyang laen nibak ban sikeulileng lampoh anggo gata seulaen bak anggo mantong. meunyoee atranyan gata pula cit teuma, gata hana tacok hase nibak lampoh nyan, bah kheueh nyan nibak boh anggo, meunan cit nibak sinaman nyang laen teuma. bek kheueh gata pasang saboh leumo ngon saboh keuleudee nibak saboh langai. bek kheueh gatangui peukayan nyang teupeuget nibak wol dan lineun nibak saboh teumpat teumpeun ija. gata peuget kheueh rumbai-rumbai nibak ban peuet boh ujung peukayan gata." "miseu jih na sidroe ureueng agam jimeukawen deungon sidroe aneuek dara, dan watee hana jitemle ngon aneuek inong nyan. jihnyan ka jipeuget tudohan nyang peuleusu ngon jipeugah bahwa peurumoh jih nyan ka hanale peurawan bak watee jimeukawen ilee. lam hai nyan di ureueng syiek ureueng inong nyan haroh kheueh jijak cok ija dara baro nyang na mantong incik darah, nyang jeuet keubeuki bahwa aneuek jihnyan bak wateenyang mantong na peurawan jih. ija nyan haroh kheueh jitunyok ubak dumna teungku pemuka banda nibak kanto mahkamah. ureueng syiek di aneuek dara nyan haroh kheueh jipeugah ubak awaknyan, 'ulon ka lon seurah aneuek ulon keu ureueng nyoe jeuet keupeurumoh jih, teuma jinoenyoe jihnyan ka hana jitueng le. ka jitudoh nyang peuleusu deungon cara jipeugah bahwa peurumoh jihnyan ka hanale peurawan bak watee awaknyan jimeukawen. teuma nyoe bukeuti jih bahwa aneuek ulon nibak wateenyang mantong na peurawan jih. neupeurati kheueh incik darah nyang mantong meuleukek nibak ija peunganten jih nyoe!" teuma di ureueng peumuka banda haroh kheueh geuhoi ureueng agam nyan dan laju geuseupot ureueng nyan. meunan cit awaknyan haroh teuma geudeunda ngon sireutoh peng pirak dan geuseurah peng nyan ubak tuwan jih nyan, sabab jihnyan ka jipeurusak keuhoreumatan sidroe ureueng inong israel. meunan cit di ureueng inong nyan haroh kheueh teuma teutab jeuet keu peurumoh jih nyan, dan hana jeuet jitaleuek siumu udeb jih. teuma meunyoee peue nyang jitudohnyan beutoi dan hana teuma bukeuti bahwa peurumoh jihnyan mantong na peurawan bak watee awaknyan jimeukawen, teuma ureueng inong nyan haroh jijakba u babah pintoe rumoh ureueng syiek jih. di teumpatnyan bubena ureueng-ureueng agam nyang na di banda nyan haroh kheueh jijak rhom ngon aneuek batee ureueng inong nyan sampoe an mate. ureueng inong nyan ka jipeubuet sapeue-sapeue nyang keubit tak malee keu bansa geutanyoe sabab ka jimeumukah sigohlom jimeukawen dan yoh mantong jihnyan tinggai dirumoh ureueng syiek

jih. deungon ka teuhukom jihnyan sibagoe tanda gata ka gata beurantaih buet nyang jeuhet. meunyoee na sidroe ureueng agam teudrob basah teungoh jimeumukah ngon peurumoh gob, bandua ureueng nyan haroh teuhukom mate. deungon na gata peubuet nyang lageenyang gata ka tabeaurantaih buet nyang jeuhet nyan. miseu jih na didalam banda meuteume sidroe ureueng agam teungoh jimeumukah deungon sidroe aneuek dara teuma aneuek daranyan ka jimeutunangan ngon ureueng laen. lam hainyan awaknyan haroh kheueh teuba u luwa banda dan teurhom laju ngon aneuek batee sampoe an mate. aneuek dara nyan haroh kheueh teupoh mate sabab jihnyan hana ji useuha jiklik jilakee tulong, seudangkan hainyan najih didalam banda, nibak teumpat nyan meunyoee jiklik jilakee tulong pasti su jihnyan teudeungoe ubak ureueng laen. dan meunan cit di ureueng agam nyan haroh cit teupoh mate sabab jihnyan ka jimeumukah ngon ureueng nyang ka jimeutunangan. deungon teuhukom bandua awaknyan, gata ka tabeaurantaih buet nyang jeuhet. laen hajih meunyoee nyan najih dilampoh sidroe ureueng agam jipeukosa sidroe aneuek dara nyang ka jimeutunangan deungon ureueng laen. lam hainyan teuma ureueng agam nyang haroh teuhukom mate. aneuek dara nyan hana jeuet teupesaket sabab jihnyan hana jipeubuet sapeue nyang pantaih jihnyan teuhukom mate. peukaranyan lagee peukara sidroe ureueng nyang jiseurang ureueng laen dan jipoh mate teuma. teumpat peukosa nyan najih di lampoh, dan bahpi aneuek dara nyan jiklik jilakee tulong, teuma hana ureueng nyang teuka jijak tulong aneuek daranyan. miseu jih na sidroe ureueng agam teudrob basah teungoh jipeukosa sidroe aneuek dara nyang gohlom jimeutunangan. lam hai nyan ureueng agam nyan haroh jibayeue ubak ureueng syiek aneuek daranyan jeuname meukawen sidiubuey limong ploh peng pirak. aneuek daranyan haroh kheueh jeuet keu peurumoh jih sabab jihnyan ka jipaksa meumukah dan sipanyang udeb awaknyan hana jeuet ji meure. hana meusidroe pih jeuet jihina bapak jih ngon cara ji-eh meusajan atawa jipeubuet buet nyang teularang ngon sidroe nibak peurumoh bapak jih nyan." "ureueng nyang ka keunong gasi alat keulamin jih ureueng nyang lageenyang hana jeuetle teukheum sibagoe umat tuhan. ureueng nyang lahe hase buet mukah banmandum keuturonan jih troh ubak nyang keu siploh, ureueng nyang lageenyang hana jeuet keu umat tuhan. ureueng amon dan moab dan banmandum keuturonan awaknyan trok ubak nyang keu siploh hana jeuet keu umat tuhan, sabab awaknyan hana jitem bri keu gata peunajoh ngon ie jieb bak watee gata mantong tajak bak rot ueh watee gata teubiet nibak nangroe meuse. bahkan awaknyan jipeu-upah si bileam, aneuek beor nibak banda petor di mesopotamia, keu teukutok gata. teuma tuhan po teu allah gata hana geutem deungoe bileam nyan. sikeubiet jih teuma nyang teujadi gobnyan geu ubah kutok nyan jeuet keubeureukat, sabab gobnyan geugaseh keugata. seumantong gata udeb dan sampoe trok siumu masa, bek kheueh gata tulong bansa-bansa nyan atawa gata peujeuet awaknyan makmu. bek kheueh teuma gata pandang

hina keu ureueng edom sabab awaknyan na kheueh syedara gata. meunan cit bek kheueh teuma gata pandang miyueb ubak ureueng meuse, sabab gata treb tatinggai di nanggroë awaknyan. phon nibak keuturonan nyang keu lhee trok ubak nyang silanjut jih keuturonan awaknyan jeuet keu wareuga umat tuhan." "bak watee gata teungoh tamuprang, gata haroh tapeusie ubak peue mantong nyang teupeujeuet gata rhot bak kuto atawa najih. meunyoe sidroe ureueng ka jeuet keu kuto sabab jipeuteubiet iemani bak watee teunget ateuh teumpang eh, ureueng nyan haroh jitinggai khimah-khimah dan jitinggai laju di luwa. oh katrok bak watee seupot ureueng nyan haroh jijak manoe dan bak watee mata uroe jilhob ureueng nyan ka jeuet jigisa lom ubak khimah-khimah. gata haroh kheueh takeubah diluwa khimah teumpang boh ie cut atawa ie rayeuk. meunyoe keuneuk jak keunan gataba kheueh laju seulaen peuleungkapan gata meunan cit sikrak kayee keungon kueh uruek teumpang teu toh ek dan meunan cit keu ngon seubee jih. tuhan po teu allah na sajan gata didalam khimah gata keu geujak lindong gata dan geubri keu gata meunang ateuh musoh-musoh gata. teuma gatajaga kheueh mangat khimah-khimah gatanyan teutab gleh. bek sampoe meuteume sapeue-sapeue nyang hana beutoi lamkawan gata, mangat tuhan hana geutinggai gata." "meunyoe na sidroe namiet jipeuplueng droe nibak teungku droe di teumpang jih meukeureuja laju jijak lakee peulindongan, bek kheueh gayue woe jihnyan. jihnyan jeuet jitinggai saboh lam banda gata meunurot banda toh nyang jipileh ngon ji galak, dan gata hana jeuet tapeusanéut ateuh jihnyan deungan cara gasa. sidroe ureueng israel, bah kheueh jihnyan ureueng agam meunan cit ngon ureueng inong, ureueng nyan hana jeuet jipeujeuet droe jih keu ureueng lunte nibak kuil-kuil teumpang seumujoe. meunan cit ngon peng nyang jiteume nibak hase buet meulunte nyan hana jeuet jiba u baet tuhan po teu allah gata keu tajak peulheueh kaoh, sabab tuhan po teu allah that-that geubanci bak buet meulunte nyan nibak kuil-kuil teumpang seumujoe dan keu peng upah meulunte. meunyoe gata tapeu utang peng ubak ureueng laen, gata jeuet gata lakee bungong ateuh peng gata nyan. teuma meunyoe gata tangui peng atawa peunajoh atawa barang nyang laen nibak ureueng nyang saboh bansa deungan gata, nyang jingui nyan haroh kheueh teujok deungan hana talakee bungong. gata taat kheueh ubak peurintah nyan, teuma tuhan po teu allah gata geubri beureukat peue-peue mantong nyang gata peubuet di nanggroë nyang gata tinggai. meunyoe gata tameujanji peue-peue mantong ubak tuhan po teu allah gata, bek kheueh nyan gata preh-preh le keu gata peuteupat janjinyan, sabab tuhan po teu allah gata teutab geulakee atra nyan, dan gata ka meudesya meunyoe hana tapeupeunoh hai nyan. gata hana meudesya meunyoe hana tapeuget janji ubak tuhan. teuma meunyoe gata deungan ban galak droe tameujanji ubak tuhan po teu allah gata, janji nyan digata wajej gata peuteupat. meunyoe gata teungoh tajak-jak rot lampoh anggo ureueng laen, gata jeuet tapajoh boh anggo siduble nyang gata

meuheut, teuma hana jeuet gata peusapat lam raga. meunan cit meunyoe gata teungoh tajak-jak di dalam lampoh gandom ureueng laen, gata jeuet gatapajoh gandom nyang gata pot ngon jaroe gata, teuma hana jeuet atranyan takoh deungan sadeueb." "miseu jih na sidroe ureueng agam jimeukawen deungan sidroe aneuek dara, dan oh ltheuhnyan hana jigalakle sabab jihnyan jiteume sapeue-sapeue nyang jiba malee keudroe ureueng nyan. le ureueng agam nyan laju jijok surat taleuek keu ureueng inong nyan meunan cit juse teuma beukaih binoeji nibak rumoh jihnyan. oh ltheuh nyan di ureueng inong nyan jimeukawen teuma deungan ureueng agam nyang laen. teuma oh kalheueh na meupadub watee di ureueng agam nyan hana teuma jigalakle keu inong nyan, laju jijok surat taleuek ubak ureueng inongjih nyan dan juse teuma inong nyan. atawa mungkin cit lakoe jih nyang keudua nyanpi meuninggai. lam hai bandua ureueng lakoe nyang phon hana jeuet jimeukawen ngon ureueng inong nyan le; ureueng nyan haroh kheueh jipandang keu beukaih inong jih nyan sibagoe ureueng inong nyang ka jipeucupa. meunyoe ureueng agam nyan jimeukawen cit teuma, buet nyang lageenyan na kheueh jipeuhina keu tuhan po teu allah gata. gata hana jeuet tapeubuet desya nyang jeuhet nyan di nanggroë nyang geubri le tuhan keu gata." "sidroe ureueng agam nyang ban mantong jimeukawen hana jeuet teuyue tamong tantra dan jijak muprang atawa jipeubuet tugaih masyarakat nyang laen. ureueng nyan haroh teupeubaihi tugaih nyang treb jih sithon mangat ji uroh rumoh tanggaji dan meunan cit jipeugalak ate ureueng binoe jihnyan. meunyoe gata talakee ngui sapeue-sapeue bak ureueng laen, bek kheueh atranyan gatacok sibagoe jaminan batee nyang jingui le ureueng nyan keungon gileng gandom. deungan teucok batee nyan, gata ka tareupah alat nyang jingui le keuluwarga keu teusambong udeb. ureueng nyang jiculek ureueng nyang saboh bansa deungan jihnyan, laju jipeusanéut ureueng nyan sibagoe namiet atawa jipeubloe, nyang lageenyan haroh teuhukom mate. deungan lageenyan gata ka tabeurantaih buet nyang jeuhet. meunyoe na meuteume peunyaket kulet nyang keubiet mubahya, gata peubuet kheueh deungan teuliti peue nyang geupeurintah le imeum-imeum lewi ubak gata; gata seutot kheueh peutunyok-peutunyok nyang ulon bri nyoe keu awaknyan. gata ingat kheueh peue nyang geupeubuet le tuhan po teu allah gata ateuh miryam watee gatajak tateubiet nibak nanggroë meuse. meunyoe gata tapeungui sapeue-sapeue keu seusabe gata, bek kheueh gata tamong u dalam rumoh ureueng nyan keu gata jakcok bajeejih nyang jipeujeuet sibagoe jaminan. gatapreh kheueh diluwa mantong dan bah kheueh ureueng nyan keudroe jijakba nyan ukeue gata. meunyoe ureueng nyan gasien, bajee nyan hana jeuet gatateun simalam beungoh, teuma haroh gata peuriwang ubak ureueng nyan tieb-tieb malam, mangat ureueng nyan hase jisok bak watee jijak eh. teuma jihnyan jilakee teurimong gaseh dan tuhan allah gata teuma geugalak keu gata. bek gata prah ureueng nyan tung upah nyang gasien lom teuma hana sapeuena, bah kheuehnyan ureueng

nyang saboh bansa deungon gata, meunan cit keu ureueng aseng nyang na tinggai nibak saboh banda peulindong gata. tieb-tieb uroe sigohlom mata uroe jillob gata haroh tabayeue upah jih nyang jikeureuja nibak uroe nyan; jihnyan jimeuharab peng nyan sabab keubit that jimeuharab atranyan. meunyo gata hana tabayeue upah jihnyan, ureueng nyan teuma jimeudoa sira jimeulakee ubak tuhan mangat gobnyan geutulong gata, dan gata geupeugah ka meudesa. bek tahukom mate ureueng tuha sabab buet nyang jeuhet nyang jipeubuet le aneuek jihnyan, dan bek tahukom mate aneuekjih kareuna buet nyang jeuhet nyang jipeubuet le ureueng syiek jih. tieb-tieb ureueng teuma jeuet teuhukom mate sabab buet nyang jeuhet nyang jipeubuet keudroe. bek kheueh tareupah hak ureueng aseng dan aneuek yatem ngon meuntui, dan bek teuma gatacak peukayan ureueng inong balee sibagoe jaminan. gata ingat kheueh bahwa gata ka lheueh jeuet keu namiet watee di nanggro gata, bek kheueh gata gisa keu gata jakcok beureukah gandom nyang mantong na tinggai. gandom nyan bah kheueh teupeubiyeu keu ureueng aseng, aneuek yatem ngon meuntui dan inong balee, mangat gata geubri beureukat le tuhan po teu allah gata dan banmandum nyang gata useuha. oh ka seulesoe sigoe gata pot boh zaiton dan meunan cit ngon boh anggo gata, bek kheueh gata riwang lom keu gatajak peusapat boh-boh nyang mantong na tinggai. nyang tinggai nyan haroh gata peubiyeu mantong keu ureueng aseng, aneuek yatem ngon meuntui dan ureueng inong balee. gata ingat kheueh bahwa gata kalheueh jeuet keu namiet di nanggro meuse; nyang kheueh sabab jih ulon bri peuratoran nyoe keu gata. miseujih na dua droe ureueng israel jijak ubak kanto mahkamah keujjak gadu sapue peukara, le nyang sidroe jipeugah hana meusalah, dan nyang laen meusalah. meunyo nyang meusalah teupeurhot ubak hukom seunuet, di teungku hakem geuyue laju ureueng nyan meudugom. jeumeulah na padubgo teuseunuet teugantung nibak buet nyang jeuhet nyang ka jipeubuet, teuma hana jeuet leubeuh nibak peuet ploh goe. meunyo leubeuh, beaureuti ureueng nyan ka jihina dikeue ureueng rame. bek kheueh peugaceb babah leumo nyang teungoh jimo-moh gandom." "meunyo ureueng-ureueng nyang meusyedara tinggai jih meusapat, laju sidroe nibak ureueng nyan mate dan hana teuma jitinggai aneuek agam, teuma balee jihnyan hana jeuet jimeukawen ngon ureueng laen diluwa keuluwarga meureuhom lakoe jihnyan. syedara meureuhom nyan wajib jimeukawen ngon balee nyan. aneuek agam tuha awaknyan haroh kheueh teuanggab aneuek syedara nyang matenyman, mangat jihnyan na keuturonan lamkawan bansa israel. meunyo ureueng agam nyan hana jitem meukawen ngon peurmoh meureuhom syedara jihnyan, ureueng inong nyan haroh jijak meuhadab ubak peumuka banda sira jipeugah lageenyoe, 'parui ulon hana jitem peubuet keuwajeibanjih keu jibri keu syedara jih sidroe keuturonan lamkawan bansa israel.' laju le peumuka

banda haroh geuhoi ureueng nyan dan geupeugah bak ureueng nyan. meunyo ureueng nyan teutab cit jitulak, peurmoh meureuhom lakoe jih nyan haroh jijak peuto ubak jihnyan dikeue dumna peumuka banda, jisuet seulo ureueng nyan, jiludah laju muka jihnyan dan jipeugah teuma lageenyoe, 'lageenyoe kheueh nyang haroh teupeubuet ateuhe ureueng nyang hana jitem bri keuturonan keu syedara jih.' keuluwarga ureueng nyan teuma jituri di israel sibagoe 'keuluwarga ureueng nyan teusuet seulo jih.' " "meunyo na dua droe ureueng agam jimeulo, dan peurmoh nyang sidroe jiuseuha jitulong lakoe droe jih deungon cara jiramah ngon jipiret boh kreeh lawan lakoe jihnyan, gatakok kheueh jaroe ureueng inong nyan dan bek kheueh tagaseh keu ureueng nyang lageenyman. bek gata peungeut ureueng laen ngon cara gatangui ceng dan sinukat nyang hana beutoi. gatangui kheueh ceng dan sinukat nyang paih mangat gata panyang umu di nanggro nyang geubri le tuhan po teu allah keu gata. tuhan po teu allah gata that-that geubanci keu ureueng nyang galak jipeungeut ureueng laen." "gata ingat kheueh pakriban ureueng amalek jipeusanet gata bak watee gata mantong gatajak dan tateubiet nibak nanggro meuse. awaknyan hana jitakot ubak po teu allah dan jiseurang gata rot likot bak watee gata mantong that-that hek meunan cit ka habeh teunaga, laju jipoh mate banmandum ureueng-ureueng gata nyang deungon susah payah jijak nibak rot likot. le sabab nyan, meunyo tuhan po teu allah gata ka geubri nanggro nyan keugata dan gata aman nibak banmandum musoh nyang na tinggai bansikeulileng gata, banmandum ureueng amaleknyan haroh gata poh mate sampoe awaknyan hana ji ingatle. bek kheueh tuwoe!" "meunyo gata ka tatamong u nanggro nyang geubri le tuhan po teu allah gata keu gata dan ka teuma gata tinggai teutab disinan, teuma hase nyang phon tateume nibak nyang gata peusapat nibak tanoh gata haroh gata peutamong u dalam saboh eumpang, dan atranyan taba laju u teupat nyang geupileh le tuhan po teu allah gata. gatajak kheueh laju ubak imeum nyang meutugaih nibak wateenyman dan tapeugah laju ubak gobnyan, 'ulon peugah ubak tuhan po teu allah gata bahwa ulon ka lon tamong u nanggro nyang geupeujanji bak indatu geutanyoe mangat geubri atranyan keu geutanyoe.' le imeum teuma geuteurimong eumpang nyan nibak jaroe gata dan atranyan laju geupeudeuk dikeue miseubah tuhan allah gata. oh lheuehnyan dikeue tuhan allah gata, gata tapeugah laju haba lageenyoe: 'ya tuhan, indatu ulon na kheueh sidroe ureueng aram nyang meugeumbara. ureueng nyan jiba keuluwarga jih u nanggro meuse mangat jitinggai disinan sibagoe ureueng nyang meungunsi. bak watee jijak keudeh jeumeulah awaknyan cit bacut sagai, teuma awaknyan jeuet keu bansa nyang raya dan teuga. ureueng meuse jipeusanet kamoe deungon keubit keujam dan jipaksa kamoe meukeureuja sibagoe namiet. laju kamoe meuhoi sira kamoe lakee tulong ubak droeneuh, tuhan, allah indatu kamoe. droeneuh neudeungoe peue nyang kamoe lakeenyoe dan deuh neukalon deurit kamoe, apoh apah dan meunan cit deungon keuseungsaraan

kamoe. deungon kuasa dan teunaga nyang raya droeneuh ka neupeubeubaih kamoe lam nanggro meuse. droeneuh neupeuna mujizat-mujizat dan buet-buet nyang ajaeb meunan cit neupeutleun keujadian-keujadian nyang jiteuka teumakot bubena musoh. oh lleueh nyan droeneuh laju neuba kamoe keunoe dan laju neubri tanoh nyang kaya lom ngon subo nyoe keu kamoe. sabab nyan, ya tuhan, ulon peuseumah disinoe hase nyang phon ulon cok nibak tanoh nyang droeneuh bri keu ulon.' lleuehnyan takeubah laju eumpang nyan dikeue tuhan po teu allah gata, dan gata seumah kheueh gobnyan. gata meusyukoe kheueh keu banmandum rejeuki nyang ka geubri le tuhan po teu allah gata keu gata dan keuluwarga gata. gata padan kheueh ureueng lewi dan ureueng aseng nyang na tinggai lamkawan gata jiseutot meusajan lam peurayaan nyan. tieb-tieb thon nyang keulhee gata haroh tabri keureubeuen siper siploh, na kheueh siper siploh nibak hase tanoh gata keu imeum lewi, ureueng aseng, aneuek yatem ngon meuntui dan ureueng inong balee, akheji nibak tieb-tieb banda gata awaknyan na jiteume peunajoh nyang awaknyan peureulee. meunyo ka lleueh, gata kheun kheueh ubak tuhan po teu allah gata, 'lam siper siploh hase tanoh nyang haroh teupeuseumah keu droeneuh, tuhan, hana meubacutpi nyang tinggai dirumoh ulon; banmandum nyan ka ulon jok keu ureueng lewi, ureueng aseng, aneuek yatem ngon meuntui dan inong balee, lagee nyang geupeurintah le tuhan po teu allah gata ubak ulon. nibak peurintah tuhan keuhai keureubeuen siper siploh banmandum nyan hana nyang ulon lieungkeu. nibak peuseumahan nyan hana meubacutpi nyang ulon pajoh bak watee ulon mantong teungoh meukabong, atawa ulon ba u luwa rumah bak watee ulon teungoh kuto, atawa ulon bri sibagoe sajian keu ureueng mate. ulon ka taat ubak droeneuh, ya tuhan; peue mantong nyang droeneuh peurintah ka ulon peubuet. nibak tempat droeneuh nyang suci di dalam syeuruga kira jih neutem kheueh kalon dan neubri beureukat keu umat droeneuh israel; meunan cit neubri kheueh beureukat keu nanggro nyang kaya lom ngon subo nyang ka tuhan bri keu kamoe paih lagee janji droeneuh ubak indatu kamoe.' "nibak uroenyoe tuhan po teu allah gata geupeurintah ubak gata mangat jeuet gata peubuet banmandum peurintah nyan; tapeubuet kheueh nyan banmandum deungon seutia dan deungon bansaboh jiwa raga gata. nibak uroenyoe gata ka tameungaku tuhan sibagoe po teu allah gata. gata ka tameujanji mangat gata taat ubak gobnyan dan tapeubuet banmandum hukum meunan cit peurintah gobnyan. nibak uroenyoe tuhan ka geuteurimong gata sibagoe umat gobnyan keudroe, lagee nyang ka geupeujanji keu gata, dan geupeurintah gata mangat gata peubuet banmandum peue nyang ka geupeurintah bak gata. tuhan teuma geupeujeuet gata leubeh rayeuk nibak banmandum bansa laen nyang ka geucebtakan le gobnyan, dan gata teuma jipujoe dan jibri horeumat. gata jeuet keu umat tuhan po teu allah gata lagee nyang ka geupeujanji nyan." oh lleuehnyan meusajan deungon dumna peumimpin israel, nabi musa geupeutrok laju peusan nyang lageenyoe ubak bansa

nyan, "taat kheueh banmandum peurintah nyang ulon bri keu gata nibak uroenyoe. bak uroe gata tajeumeurang krueng yordan mangat tatamong u nanggro nyang geubri le tuhan po teu allah gata keu gata, gata haroh tapeudong meupadubboh batee raya laju bateenyan gata cet deungon gapu. tatuleh kheueh teuma nibak batee-batee nyan tieb-tieb tutoe haba nibak hukom-hukom nyan. meunyo gata ka tatamong u nanggro nyang kaya dan subo nyang geupeujanji le tuhan, allah indatu gata keu gata, dan gata ka na di meurandeh krueng yordan, gata haroh tajak laju u gunung ebal. meunan cit disinan gata haroh tapeudong lom batee dan gata cet teuma ngon gapu lagee nyang ka ulon peurintah ubak gata nibak uroenyoe. meunan cit di teumpat nyan gata haroh teuma tapeudong keu tuhan po teu allah gata saboh miseubah nibak batee-batee nyang hantom na teupeuget keu meubagoe alat lagee beuso, sabab tieb-tieb miseubah nyang teupeudong keu tuhan po teu allah gata haroh teupeuget nibak batee nyang kong. di ateuh miseubah nyan haroh gata peuseumah keureubeuen-keureubeuen nyang teutot. gata peuseumah kheueh teuma keureubeuen peudame dan gata pajoh kheueh disinan dan meusuka cita kheueh dikeue tuhan po teu allah gata. di ateuh batee-batee nyang teuboh gapu nyan haroh gata tuleh deungon jeulaih tieb-tieb tutoe haba nibak hukom-hukom po teu allah." oh lleuehnyan meusan ngon dumna imeum lewi, nabi musa geupeugah ubak banmandum bansa israel, "syedara-syedara, gata simak dan gata deungoe kheueh nyoe! nibak uroenyoe gata ka jeuet keu umat tuhan po teu allah gata. le sababnyan, gata taat kheueh ubak tuhan po teu allah gata dan gata peubuet kheueh laju peue mantong nyang geupeurintah le gobnyan nyang ulon bri keu gata nibak uroenyoe." lleuehnyan nabi musa geupeugah lom ubak bansa israel, "oh kalheueh gata tajeumeurang krueng yordan, sukee simeon, lewi, yehuda, isakhar, yusuf dan benyamin haroh jidong di ateuh gunung gerizim bak watee geupeugah beureukat ateuh bansa nyoe. bak watee geupeugah kutok nyan, sukee ruben, gad, asyer, zebulon, dan meunan cit ngon naftali haroh jidong di ateuh gunung ebal. ureueng-ureueng lewi haroh jipeugah tutoe haba nyang lageenyoe deungon su nyang nyareng dan ureueng israel haroh kheueh jijaweueb, 'amin', ureueng-ureueng lewi: 'teukutok kheueh keu ureueng nyang jipeuget patong nibak batee, kayee dan logam, dan jiseumah nyan deungon musom-musom; tuhan that-that geubanci ubak ureueng nyang jipujoe beurala! banmandum rakyat: 'amin!' teukutok kheueh nyang hana jihoreumat keu ureueng syiek jih dan jipeubiyeu awaknyan teulanta.' 'amin!' teukutok kheueh ureueng nyang jigeese bataih tanoh teutangga jih.' 'amin!' teukutok kheueh keu ureueng nyang jipeusisat ureueng buta.' 'amin!' teukutok kheueh keu ureueng nyang jireupah hak ureueng aseng, aneuek yatem ngon meuntui dan ureueng inong balee.' 'amin!' teukutok kheueh keu ureueng nyang jihina ayah jih sabab jimeumukah deungon sidroe lamkawan peurumoh ayah jih nyan.' 'amin!' teukutok kheueh keu ureueng nyang jimeuagam deungon beulatang.' 'amin!' teukutok kheueh

keu nyang jimeumukah deungon syedara droe jih ureueng inong, atawa syedara jih nyang saboh ayah atawa saboh mak.' 'amin!' 'teukutok kheueh keu ureueng nyang jimeumukah deungon mak tuwan jih.' 'amin!' 'teukutok kheueh keu ureueng nyang jipoh mate ureueng laen ngon cara jimusom-musom.' 'amin!' 'teukutok kheueh keu ureueng nyang jiteurimong upah keu jijak poh mate ureueng laen nyang hana meusalah.' 'amin!' 'teukutok kheueh keu ureueng nyang hana jipeuteupat ubak hukom dan peue nyang geupeurunoe le po teu allah deungon buet-buet jih.' 'amin!' "meunyoe gata tataat ubak tuhan po teu allah gata dan seutia keu gata peubuet banmandum nyang geupeurintah le gobnyan nyang ulon peugah ubak gata nibak uroenyoe, teuma gobnyan geupeujeuet gata keu bansa nyang paleng meusyehuh atueuh rhueng donya. gata taat kheueh ubak tuhan po teu allah gata, teuma banmandum beureukat nyoe geubri keu gata: beugeubri kheueh beureukat atueuh banda-banda dan lampoh-lampoh gata. meunan cit beugeubri kheueh teuma beureukat keu gata, sampoe gata tameu aneuek nyang le, hase tanoh gatapi meulimpah dan leumo meunan cit ngon kameng dan bubiri gata meutamah le jeumeulah jih. beugeubri kheueh beureukat ubak hase teupot boh gandom gata meunan cit ngon peunajoh nyang gata peuget nibak gandom nyan. beugeubri kheueh beureukat ubak banmandum hase useuha gata. meunyoe gata jiseurang, tuhan teuma geupeutaloe banmandum musoh gata. awaknyan ji atoe seurangan ngon cara teu atoe, teuma jiplueng ngon hana seumike. tuhan po teu allah gata teuma geubri beureukat atueuh peue-peue mantong hase useuha gata dan geupasoe bubena gupok-gupok gata deungon gandom, meunan cit gobnyan teuma geubri beureukat keu gata di nanggroe nyang teuma geubri keu gata. meunyoe gata tataat ubak tuhan po teu allah gata dan takeureuja teuma banmandum peurintah gobnyan, gata geupeujeuet keu umat gobnyan keudroe, lagee nyang ka geupeujanji nyan. teuma banmandum bansa di atueuh bumoe nyoe jikalon bahwa gata na kheueh bansa nyang geupileh le tuhan, dan awaknyan teuma ji seugan keu gata. gata teuma geubri aneuek nyang le. beulatang peulara gata teuma meutamoh le dan hase tanoh gatapi teuma meulimpah di nanggroe nyang ka geupeujanji keu indatu gata mangat jibri keu gata. tuhan teuma geupeutreun ujeuen oh trok bak museum nibak teumpat tekeubah ujeuen nyan di atueuh langet. gobnyan teuma geubri beureukat atueuh banmandum buet nyang gata useuha, sampoe gata hase gata peu utang keu bansa nyang le, teuma gata keudroe hana peu ta meu utang. tuhan po teu allah gata teuma geupeujeuet gata keupeumimpen lamkawan bansa-bansa, dan bukan sibagoe ureueng nyang seumitot. meunyoe gata seutia tataat ubak banmandum peurintah tuhan nyang ulon bri keu gata nibak uroe nyoe, gata teuma seumaken makmu dan hantom na le jisurot. teuma bek sagai-sagai gata peulalee peurintah-peurintah nyan deungon cara peue mantong. meunan cit bek kheueh teuma gata pujoe atawa gata meungabdi ubak ilah-ilah nyang laen." "teuma meunyoe gata hana taat ubak tuhan po

teu allah gata, dan hana teuma seutia tapeubuet peue nyang ka geupeurintah meunan cit ngon hukom gobnyan nyang ulon bri ubak gata nibak uroenyoe, teuma banmandum kutok nyoe rhot u atueuh gata: teukutok kheueh banda-banda dan lampoh-lampoh gata. teukutok kheueh gandom gata nyang ka teupot dan meunan cit ngon peunajoh nyang gata peuget nibak gandom nyan. teukutok kheueh gata, sampoe na bacut mantong aneuek gata, hase tanoh gata, meunan cit deungon leumo dan kameng meunan cit bubiri gata. teukutok kheueh banmandum hase useuha gata. meunyoe gata tapeubuet jeuhet dan gata tulak tuhan, gobnyan teuma geupeuteuka bala, karu ngon susah that lam hai peue mantong nyang gata peubuet, sampoe lam watee nyang paneuk mantong gata ka geupeusapansapa peue-peue nyang na. meubagoe peunyaket hana putoh-putoh geupeuteuka atueuh gata, sampoe bak akhe jih hana meusidroepi nibak gata mantong na tinggai di nang-groe nyang gata duek nyan. tuhan teuma geuhukom gata deungon peunyaket nyang hase jiminah bak gob, keumong-keumong dan deumam. gobnyan teuma geupeuteuka museum khueng nyang tho krenal dan angen seu-uem nyang hase jipeuhangoh sampoe hase mupot gata nyan jadeh rusak. beuncana-beuncana nyan haroh jitimok atueuh gata sampoe gata meupaloe. ujeuen hana teuma jitreun dan tanoh gata teuma jeuet keu kreueh sampoe gata ranab banmandum. tuhan hana teuma geupeutreun ie ujeuen, teuma ujeuen abee dan anoe sampoe gata keunong bala banmandum. meunyoe gata hana tataat ubak tuhan po teu allah gata, gobnyan teuma geupeujeuet gata hase jipeutaloe le musoh-musoh gata. gata teuma taprang musoh deungon teu atoe, teuma gata plueng meutabubeba. banmandum bansa dibumoe teuma jirasa gli jikalon gata nyang malang nyan. meunyoe gata mate, manyet gata teuma jeuet keu eumpeun cicem-cicem dan beulatang juah, dan hana ureueng nyang hase ji use beulatang-beulatang nyan. tuhan teuma geuhukom gata deungon peun-yaket cumuet lagee nyang ka geupeuteuka u atueuh ureueng meuse. ban saboh badan gata teuma peunoh jitimoh ngon peunyaket cabok dan kude nyang gatai-gatai teuma hana ubat keu peunyaket nyan. tuhan teuma geupeujeuet gata sampoe an pungoe, buta mata dan bingong. bak watee uroe trang gata meuraba-raba lagee ureueng buta, teuma hana hase gata teume rot nyang gata mita. banmandum useuha gata teuma gagai hana meuhase. gata hana pre-pre jireupah ngon jitindeeh, dan hana ureueng nyang tulong gata. meunyoe gata hana tataat ubak tuhan po teu allah gata, hai-hainyoe teuma jitimok u atueuh gata: gata teuma tameutunangan, teuma ureueng laen nyang jimeukawen deungon tunangan gatanyan. gata teuma tapeugot rumoh, teuma hana gata duek nibak rumoh nyan. gata teuma tapeugot lampoh anggo, teuma boh jih hana teuma gata pajoh. leumo gata teuma jisie dikeue mata gata, teuma digata hana teuma gatapajoh uengkot sie nyan. keuleudee-keuleudee gata teuma jiparoh jijak hoe laen teuma gata takalon mantong hana jipeuriwang lom teuma. meunan cit deungon bubiri-bubiri gata teuma jijok keu musoh-musoh gata dan hana nyang

tulong. dikeue mata gata aneuek-aneuek gata teuma jibri sibagoe namiet keu ureueng aseng. tieb-tieb uroe mata gata peudeh tajak mita aneuek-aneuek gata, teuma useuha gata nyan sia-sia mantong, sabab awaknyan hana jiriwang le. bansa aseng teuma jicok banmandum hase tanoh nyang gata teume deungon keureuja nyang brat. teuma gata keudroe hana teuma meuteume sapeue seulaen nyang gata rasa dan gata jitindeeh ngon hana putoh-putoh dan jiseksa deungon buet-buet nyang keubiet keujam. gata teuma jeuet keu ureueng pungoe sabab peue nyang gata rasa nyan. tuhan teuma geupeujeuet gaki gata nyan peunoh deungon peunyaket cabok nyang lumpah saket dan hana teuma jitem puleh-puleh; phon nibak gaki sampoe ubak bruek ulee gata peunoh jitimoh deungon peunyaket cumuet. gata dan raja gata teuma geuba le tuhan u nanggroe gob nyang hana gata turi dan meunan cit hana teuma jituri le indatu gata. disinan gata teuma tameungabdi ubak ilah-ilah nyang jipeugot nibak kayee dan batee. di nanggroe dipat gata geupeu crebre le tuhan, ureueng laen keubit that gli oh watee jikalon gata; gata teuma ji peuhina ngon jipeukem le awaknyan. jai that bijeh nyang gata tabu, teuma cit bacut hase jih nyang gata teume, sabab seunaman gata habeh banmandum jipajoh le daruet. gata teuma tapula bak-bak anggo di dalam lampoh dan gata peulara lom teuma, teuma hana gatapot boh anggo meunan cit ngon gatajieb teuma ie anggo nyan, sabab bubena bak anggo nyan ka habeh banmandum jipajoh le ulat. bansaboh nanggroe gata teuma jitimoh bak zaiton, teuma boh-boh jih nyan ka habeh rhot meutabu beba, akhejih gata hana meuteume meubacutpi minyeuk nibak hase jihnyan. gata teuma meuteume aneuek agam dan aneuek inong, teuma awaknyan jicok sibagoe tawanan prang, akhejih gata ka gadoh awaknyan. banmandum bak kayee dan seunaman habeh jipajoh le seurangga. ureueng aseng nyang na tinggai di nanggroe gata teuma seumaken meukuasa, seudangkan kuasa gata keudroe seumaken meukureueng. awaknyan na peng keu jipeu utang keu gata, teuma nibak gata hana sapeuena keu gata peu utang keu awaknyan. dan bak akhe jih gata ka jikuasa le awaknyan. banmandum balapeutaka nyan teuma jipeurhot u atueuh gata dan hana pioh jipeukaru gata sampoe gata binasa, sabab gata hana tataat ubak tuhan po teu allah gata dan hana teuma gata peubuet keu hukom-hukom nyang geubri keu gata. beuncana-beuncana nyan na kheueh sibagoe bukeuti nibak hukom tuhan atueuh gata dan keuturonan gata keu siumu masa. gata ka geubri beureukat le tuhan po teu allah gata nibak meubagoe hai, teuma hana tatem meungabdi ubak gobnyan deungon ate nyang rila galak ngon geumbira. le sababnyan gata haroh tameungabdi ubak musoh-musoh nyang geukirem le tuhan keujajak lawan gata. gata teuma jiteuka deuek, grah ngon teulon lom kureueng nibak meubagoe hai. tuhan teuma geutindeeh gata deungon keujam sampoe an gata mandum mupaloe. saboh bansa nyang hana gata muphom basa jih teuma geukirem le tuhan nibak ujung bumoe keu jajak lawan gata. lagee cicem siwah jisama gata. awaknyan keujam that dan hana nibak jihnyan rasa gaseh sayang keu ureueng

tuha meunan cit keu aneuek manyak. awaknyan jipeuhabeh banmandum beulating peulara meunan cit deungon banmandum hase seunaman gata, dan hana teuma jitinggai keu gata gandom, ie anggo, minyeuk zaiton atawa leumo dan kameng meunan cit bubiri sampoe gata banmandum mate deuek. awaknyan jiseurang tieb-tieb banda atueuh nanggroe nyang teuma geubri le tuhan po teu allah gata keu gata sampoe binte-binte beuton nyang manyang dan tapeukukoh nyang gata peubangga nyan akhe jihpi reuloh. teungoh musoh-musoh gata jajak keupong banda-banda gata, gata putoh asa dan deuek, sampoe gata tapajoh aneuek-aneuek gata keudroe, aneuek-aneuek nyang geu anugeurah le tuhan po teu allah gata ubak gata. bahpi nyan le ureueng bangsawan nyang paleng get budoe basaji pi teuma putoh asa bak watee bandanyan jikeupong, sampoe jihnyan jipajoh aneuek-aneuek jih keudroe sabab hanale peunajoh nyang laen. hana meubacutpi nyang jibri ubak syedara jih atawa peurumoh jihnyan nyang jicinta atawa aneuek-aneuek jihnyan nyang mantong udeb. bahpi di ureueng inong nyang paleng get budoe basa jihpi dan nyang paleng kaya dan meunyoe jajak hantom na jijak ngon gaki, teuma jipeubuet cit lageenyang. bak watee musoh jikeupong banda, ureueng inong nyan teuma putoh asa sabab deuek, akhejih inongnyan deungon cara jimusom-musom jipajoh aneuek jih keudroe nyang ban lahe dan mantong na ari-ari ngon talo pusat. hana meubacutpi atanyan jibri keu lakoe nyang jicinta atawa keu aneuek-aneuek jih. meunyoe gata hana seutia tataat ubak banmandum hukom po teu allah gata nyang na teutuleh didalam kitab nyoe dan hana teuma tahoreumat ubak tuhan po teu allah gata nyang agong dan luwabiasanyan, tuhan teuma geupeuteuka u atueuh gata dan keuturonan gata meubagoe peunyaket nyang hana hase teupeupuleh dan wabah-wabah nyang hana hase teupeu pioh. peunyaket-peunyaket nyang keubit parah nyang ka gata kalon di nanggroe meuse teuma rhot u atueuh gata, dan gata hana hase puleh. meunan cit tuhan geupeuteuka meubagoe macam peunyaket dan wabah nyang hana teupeugah didalam kitabnyoe, kitab hukom tuhan. ltheuhnyan gata banmandum geupeubinasa. bahpi jeumeulah gata leubeh sidub bintang nyang na di langet, teuma cit bacut that lamkawan gata nyan na tinggai udeb, sabab gata hana taat ubak tuhan po teu allah gata. lagee tuhan galak geubri makmu keu gata dan geutamah jeumeulah gata, meunan cit gobnyan galak teuma geupeubinasa dan geupeuhabeh gata. gata teuma geupeuteubiet nibak nanggroe nyang hana treble teuma gata tinggai disinan. tuhan teuma geupeu crebre gata lamkawan bansa-bansa di bansaboh muka bumoe. disinan gata teuma taseumah ilah-ilah nyang jipeuget nibak kayee dan batee, ilah-ilah nyang hana gata turi dan hana teuma jituri le indatu gata. lamkawan bansa-bansa nyan gata hana tateume keuteunangan, dan hana teumpat nyang hase gata peugah sibagoe atra gata; tuhan teuma geupeujeuet gata lumpah gundah ngon susah hana meuteuntee dan gata putoh asa hana harapan. udeb gata sabe teuancam lam bahya. uroe ngon malam gata

teuancam yo ngon teumakot mate. watee teukalon peue mantong jantong gata yo meugram-gram sabab teumakot. meunyo beungoh uroe gata lakee beubagaih malam, dan meunyo ka malam gata lakee teuma beubagaih beungoh. tuhan teuma geukirem dan geupeuriwang lom gata u nanggroe meuse deungon kapai, bahpi gobnyan ka geupeugah bahwa gata hana tariwang le keudeh. disinan gata teuma tauseuha tapeubloe droe gata sibagoe namiet ubak musoh gata, teuma hana meusidroepi nyang na niet jitem bloe gata." nyoe kheueh feureuman tuhan nyang geupeusampoe le nabi musa keu bansa israel bak watee awaknyan mantong na di tanoh moab. peujanjian nyan na kheueh sibagoe sinamah nibak janji nyang geupeuget le tuhan deungon awaknyan di gunong sinai. nabi musa laju geuyue banmandum ureueng israel jimeusapat, laju geupeugah ubak awaknyan, "gata nyoe ka takalon keudroe peue nyang geupeubuet le tuhan ateuh raja nibak nanggroe meuse, le peujabat jihnyan meunan cit bansaboh nanggroe meuse nyan. meunan cit gata ka takalon beuncana-beuncana nyang lumpah azeb dan lumpah that phet, mujizat-mujizat dan buet-buet nyang ajaeb nyang ka geupeubuet le tuhan. teuma sampoe an nibak uroenyoe gobnyan gohlo m jeuet keumungken gata muphom banmandum nyang gata rasanyan. peuet ploh thon treb jih tuhan geupimpen gata tajak rot padang pasi, teuma peukayan dan seulob gata hana cit jitem jeuet keu brok atawa useueng. gata hana tateume ruti keu peunajoh, ie anggo dan ie jieb nyang kreueh, teuma tuhan geujok banmandum peue nyang gata peureulee nyan mangat gata tateupeue bahwa gobnyan kheueh tuhan po teu allah gata. dan bak watee geutanyoe katrok ubak teupmat nyoe, raja sihon nibak hesybon dan raja og nibak basan teuka geujak prang geutanyoe. teuma geutanyoe hase ta peutaloe awaknyan. tanoh awaknyan tanyoe reubot dan laju tanoh nyan tanyoe bagi keu sukee ruben, gad dan siladum keu sukee manasye. deungon nyan bah kheueh gata banmandum seutia tapeubuet banmandum nyan deungon tataat ubak peujanjian nyoe, mangat gata meuhase nibak banmandum useuha gata. nibak uroe nyoe gata banmandum tadong dikeue tuhan po teu allah gata, banmandum ulee sukee, ureueng patot-patot, ulee balang, banmandum ureueng agam, ureueng inong, aneuek miet, dan banmandum ureueng aseng nyang na tinggai lamkawan gata dan jibantu gata jijak koh kayee ngon jigulam pacok ie. tuhan po teu allah gata geupeuget janji deungon gata, dan gata banmandum tameusapat disinoe mangat teuikat peujanjian nyan meunan cit mangat gata teurimong keuwajaban-keuwajaban nyan. deungon peujanjian nyan tuhan nibak uroenyoe ka geupeu kong gata jeuet keu bansa, dan gobnyan jeuet teuma keu po teu allah gata lagee nyang ka geupeujanji ubak gata dan ubak indatu gata nabi ibrahim, nabi ishaq dan nabi yakub. peujanjian nyan deungon banmandum keuwajaban jih geupeuget le tuhan kon kheueh deungon gata mantong, teuma deungon tieb-tieb ureueng nyang nibak uroe nyoe na jidong disinoe, dikeue tuhan po teu allah geutanyoe, dan meunan cit teuma deungon keuturonan geutanyoe keu masa

ukeue nyoe." gata mantong taingat pakriban naseb geutanyoe bak watee mantong na di nanggroe meuse dan pakriban teuma geutanyoe tajak rot nanggroe bansa-bansa laen. gata ka takalon patong-patong beurala awaknyan nyang lumpah luwat nyang teupeuget nibak kayee, batee, pirak dan meuh. le sababnyan tajaga kheueh bek na meusidroepi lamkawan gata, ureueng agam atawa ureueng inong, keuluwarga atawa sukee nyang na teudong disinoe, meubalek nibak tuhan po teu allah geutanyoe keu jijak seumah ilah-ilah bansa laen. buet nyang lageenyan na kheueh lagee ukeue nyang timoh jeuet keusinaman nyang phet meunan cit meuracon. lamkawan gata nyang jideungoe meulakee nyang kreueh nyan bek kheueh na nyang seumike bahwa naseb jih teutab get, bahpi deungon neukat that jijak nibak rot jih keudroe. hainyan teuma jeuet rhot ubak binasa gata banmandum, ureueng-ureueng nyang jeuhet meunan cit nyang get. tuhan hana teuma geupeu amphon ureueng nyang lageenyan. seubalek jih, ureueng nyan teuma keunong ubak meureuka tuhan nyang hana tanggong-tanggong, dan banmandum beuncana nyang teuteuleh didalam kitab nyoe rhot ateuh ureueng nyan, trok an bak watee ureueng nyan geupeubinasa le tuhan. tuhan teuma geupeu jeuet ureueng nyan saboh cuntoh keu saboh sukee israel, dan geuhukom jihnyan deungon kutok nyang geupeugah didalam peujanjian nyang teuteuleh didalam kitab nyoe, kitab hukom tuhan. oh singoh nyan teuma, keuturonan gata dan ureueng aseng nibak nanggroe jioh jingiang beuncana-beuncana dan peundeuritaan nyang geupeuteuka le tuhan ateuh nanggroe gata. lampoh-lampoh gata teuma jeuet keu padang pasi nyang teutob ngon tanoh beulerang dan sira. tanoh jihnyan hana hase teupula sapeue dan naleuengpi hana jitem le timoh ateuh tanoh nyan. nanggroe gata nyan teuma jeuet lagee banda-banda sodom dan gomora, adma dan zaboim nyang geupeuranab le tuhan bak watee gobnyan beungeh nyang hana ngon peusa. teuma banmandum donya jitanyong, 'pakon tuhan geupeujeuet meunan deungon nanggroe awaknyan? peue sabab gobnyan beungeh lageenyan bagoe?' dan jaweub jih na kheueh, 'sabab awaknyan ji iengkeu ubak janji tuhan, allah indatu awaknyan; janji nyang geupeuget deungon awaknyan nibak watee gobnyan geuba awaknyan geupeuteubiet nibak nanggroe meuse. awaknyan jiseumah ubak ilah-ilah nyang laen nyang hana awaknyan turi, padahai tuhan geutam awaknyan bek jiseumah ilah-ilah nyan. nyang kheueh sabab jih tuhan beungeh keu umat gobnyan dan geupeuteuka u ateuh nanggroe awaknyan banmandum beuncana nyang na teuteuleh didalam kitab nyoe. keuhai beungeh tuhan nyan teuka deungon hebat lumpah na, dan dalam beungeh gobnyan nyang lumpah hebat nyan, gobnyan laju geutarek bansa israel nibak tanoh awaknyan dan laju geurhom awaknyan u nanggroe aseng sampoe awaknyan ka na disinan.' na meupadub boh hai nyang geurahsia le tuhan po teu allah geutanyoe: teuma hukom gobnyan ka geupeusaheeh keuturonan geutanyoe, dan geutanyoe meunan cit deungon keuturonan geutanyoe haroh jitaat nyan keu siumu masa." jinoenyoe gata jeuet

tapileh beureukat atawa kutok lagee nyang ka ulon peugah ubak gata. meunyo gata ka tarasa banmandum peundeuritaan nyan dan gata udeb lamkawan bansa-bansa aseng di teumpat gata geupeu crebre le tuhan po teu allah gata, gata teuingat ubak peunileh nyang ulon bri keugata. meunyo gata dan keuturonan gata tawoe ubak tuhan po teu allah gata, dan deungon sipeunoh ate teuma gata taat ubak peurintah-peurintah nyang ulon bri ubak gata nibak uroenyoe, teuma tuhan allah geugaseh keu gata. gata teuma geupeuwoe lom nibak bansa-bansa di teumpat gata nyang ka geupeu crebre, dan geupeu makmu lom lagee nyang ka-ka. bahpi meutabu han meuhosaho bansaboh bumoe nyoe. tuhan po teu allah gata teuma geupeusapat gata dan geupeuwoe gata mangat tagisa lom teuma. teuma gata hase taduek lom nibak tanoh nyang yoh masa ilee hak milek indatu gata. dan gata geupeujeut leubeh makmu, dan jeumeulah gata jioh leubeh jai nibak indatu gata. gata dan keuturonan gata teuma geubri ate nyang leubeh patuh, sampoe gata tacinta ubak tuhan po teu allah gata deungon sipeunoh ate dan hase gata tinggai nibak nanggro nyan. banmandum sumpah ngon kutok teuma geupeurhot u ateuhe banmandum musoh-musoh gata nyang jibanci ji ielanya gata. gata teuma tariwang dan gata taat ubak tuhan dan tapeubuet banmandum peue-peue nyang geupeurintah le gobnyan nyang ulon bri keu gata nibak uroenyoe. tuhan po teu allah gata teuma geupeujeut banmandum useuha nyang gata peubuet jeuet keuhase; gata teuma tameu aneuek nyang le meunan cit beulatang peulara gata meutamah le; lampoh ngon blang gata teuma geubri hase nyang meulimpah ruwah. tuhan deungon mangat ate geuh geubri makmu keugata, lagee gobnyan ka ltheueh geujok keumakmuran nyan keu indatu gata. teuma gata haroh taat ubak tuhan po teu allah gata dan meunan cit gata taat ktheueh banmandum keu hukum gobnyan nyang na teutuleh lam kitab nyoe, kitab hukum tuhan. gata haroh gata woe ubak gobnyan deungon sipeunoh ate gata. peurintah nyang ulon bri nyoe keu gata hana that payah keugata dan meunan cit hana teuma jioh that. teumpat jih bukan dilanget, sampoe gata tatanyong, 'soe nyang ek keudeh mangat jijak cok nyan keu geutanyoe, mangat geutanyoe hase ta deungoe dan ta-taat teuma?' teumpat jihnyan bukan di meurandeh laot, sampoe gata tatanyong, 'soe nyang jak u meurandeh laot mangat jijak cok nyan keu geutanyoe, mangat jeuet geutanyoe hase ta deungoe ngon ta-taat teuma?' bek gata tanyong lageenyan, sabab peurintah nyan lumpah that rab ngon gata. gata ka tateupeue dan hase gata apai nyan diluwa ulee, le sababnyan, tinggai gata peubuet mantong. nibak uroenyoe gata jeuet tapileh nyang get ngon nyang jeuhet, nyang udeb dan mate. nibak uroenyoe ulon peurintah gata keu gata cinta ubak tuhan po teu allah gata dan taat ubak gobnyan meunan cit gata peubuet teuma banmandum hukum dan peurintah gobnyan mangat gata makmu dan jeuet keu bansa nyang raya. tuhan po teu allah gata teuma geubri beureukat keu gata di nanggro nyang hana treble gata duek teuma. teuma meunyo gata hana ta-taat dan hana teuma gatatem deungoe, dan

tapeubiyeu droe gata jipeusisat mangat gata seumah ilah-ilah laen, pasti gata geupeubinas, dan umu gatapi hana teuma panyang di nanggro nyang hana treble gata duek nyan. ingat ktheueh! hainyan ka ulon bri tee ubak gata nibak uroenyoe. jinoenyoe gata jeuet tapileh udeb atawa mate, beureukat tuhan ngon kutok gobyan. langet dan bumoe ulon hoi jeuet keusaksi ateuhe keuputusan gata nyan. pileh ktheueh udeb. cinta ktheueh tuhan po teu allah gata, taat ktheueh ubak gobnyan, dan seutia ktheueh gata ubak gobnyan. le sababnyan gata dan keuturonan gata teuma udeb dan panyang umu gata di nanggro nyang geupeujanji le tuhan keu indatu gata, nabi ibrahim, nabi ishaq dan nabi yakub." nabi musa geupeugah lom ubak bansa israel, ktheun gobnyan, "jinoenyoe umu ulon ka sireuth dua ploh thon dan ulon nyoe hana hase le jeuet keu peumimpin gata. seulaen nibak nyan tuhan ka geupeugah bahwa ulon hana jeuet lon jeumeurang u meurandeh krueng yordan. tuhan po teu allah keudroe nyang jak dikeue gata dan gobnyan teuma nyang peubinas bansa-bansa nyang na tinggai disinan, sampoe gata hase taduek nibak tanoh awaknyan. yosua teuma jeuet keu peumimpin gata, lagee nyang ka geupeugah le tuhan. tuhan teuma geupeubinas bansa-bansa nyan, lagee gobnyan ka geupeutaloeh sihon dan og, raja ureueng amori, meunan cit geupeuhanco teuma nanggro awaknyan. tuhan geupeu meunang gata ateuhe awaknyan, laju awaknyan haroh gata peusanaut pail lagee nyang ka ulon peugah ubak gata. bah ktheueh gata ngon ate nyang kong dan beuhe! bek gata takot keu awaknyan, sabab tuhan po teu allah gata keudroe nyang tulong gata. gobnyan hana geupeukeucewa gata atawa geutinggai meunan mantong gata." nabi musa geuhoi laju yosua, dan dikeue banmandum bansa israel nabi musa nyan laju geupeugah ubak jihnyan, "bah ktheueh gata beukong ate ngon beuhe, yosua! gata ktheueh nyang teuma pimpin bansa nyoe keu taduek nibak nanggro nyang ka geupeujanji le tuhan ubak indatu awaknyan. tuhan keudroe nyang bimbeng dan nyang tulong gata. gobnyan hana teuma geupeukeucewa dan geutinggai gata meunan mantong. sabab nyan bek ktheueh gata takot puteuk lom gundah ate." le nabi musa geutuleh teuma hukum-hukum tuhan po teu allah oh ltheuhnyan geubri laju atranyan ubak imeum-imeum lewi nyang geubri tugaih jijak jaga peuto peujanjian, dan keu peumimpin bansa israel. gobnyan laju geupeurintah ubak awaknyan, "nibak tieb-tieb akhe thon nyang keutujoh, nibak thon teusampoh utang khanuri jambo on, gata haroh tabeuet bubena hukum-hukum nyoe deungon su gata nyang teuga keu ureueng-ureueng israel nyang jiteuka jijak seumah tuhan po teu allah gata diteumpat nyang ka jipileh. gatayue ktheueh banmandum ureueng agam, ureueng inong dan aneuek miet meunan cit ngon ureueng aseng nyang na tinggai di banda-banda gata jijak meusapat mangat jijak deungoe peue nyang teubeuet nyan, mangat awaknyan jimeurunoe pakriban cara jibri horeumat ubak tuhan po teu allah gata meunan cit seutia dan jihoreumat ubak banmandum peurintah-peurintah gobnyan. deungon na cara nyang lageenyan bubena

aneuek-aneuek gata nyang hantom lom jideungoe keuhai hukom-hukom tuhan po teu allah gata ka hase jideungoe dan ka teuma hase jimeurunoe pakriban cara teuhoreumat tuhan meunyoe awaknyan mantong udeb nibak nanggroe nyang hana treble ka gata duek di meurandeh krueng yordan." tuhan ubak nabi musa oh lheureh nyan tuhan meufeuruman lom ubak nabi musa, "udeb gata hana treble. le sababnyan, tajak hoi kheueh yosua dan taba kheueh laju jihnyan ubak khimah ulon, mangat ulon hase lon bri peutunyok-peutunyok keu jihnyan." teuma geujak kheueh laju nabi musa dan yosua ubak khimah tuhan, dan tuhan laju teuma geupeudeuh droe ubak awaknyan didalam awan nyang meureuntang rab ngon pintoe khimah tuhan. feureuman tuhan ubak nabi musa, "ajai gata ka tho that. oh ka lheureh gatajak tapeulikot donya nyoe, bansa israel nyan hana seutia le ubak ulon dan laju ji-iengkeue ubak peujanjian nyang ka ulon peuget deungan awaknyan. awaknyan jitinggai ulon keujijak seumah ilah-ilah di nanggroe nyang hana treble awaknyan jitamong. meunyoe nyan ka teujadi, beungeh ulon teuma teuka ngon hana tanggung-tanggung ateuh awaknyan. awaknyan teuma ulon tinggai sidroe meunan cit ulon peubinasu teuma. jai that-that beuncana nyang paleng hebat teuma jiteuka ateuh awaknyan, laju awaknyan jiteuka sadar bahwa banmandum nyan na kheueh sabab le ulon, allah awaknyan, hanale geupeungan awaknyan. bak watee nyan ulon hana lontem le lon tulong awaknyan, sabab awaknyan ka jiseumah ila-ilah nyang laen dan meunan cit jipeubuet jeuhet. jinoenyoe gata tuleh kheueh lagunyoe dan gata peurunoe kheueh laju ubak bansa israel sibagoe keusaksian ateuh awaknyan. awaknyan teuma ulonba na nanggroe nyang kaya ngon subo, lagee nyang ka ulon peujanji ubak indatu awaknyan. disinan awaknyan udeb deungan makmu ngon seunang dan mudah teuma jiteuma meubagoe jeuneh peunajoh nyang awaknyan peureulee. teuma oh singoh dudoe awaknyan jibalek dan jiseumah laju ilah-ilah nyang laen. awaknyan jitulak ulon dan ji iengkeu teuma ubak janni nyang ulon peuget, dan keubit jai that beuncana nyang luwabiasa rhot ateuh awaknyan. teuma lagu nyoe teutab jipeunyanyoe dan jingui teuma sibagoe keusaksian ateuh awaknyan. bahpi jinoenyoe, sigholon awaknyan ulon ba u nanggroe nyang ka ulon peujanji nyan, ulon ka lon teupeue jalan pikeran awaknyan." bak uroenyang cit teuma nabi musa geutuleh lagu nyan, laju nyanyoe nyan geupurunoe bak bansa israel. oh lheureh nyan tuhan meufeuruman ubak yosua, aneuek nun, kheun gobnyan, "bah kheueh digata tapeukong ate dan beuhe, yosua! gata teuma tapimpen bansa israel mangat jitamong u nanggroe nyang ka ulon peujanji keu awaknyan, dan ulon teuma lon tulong awaknyan." le nabi musa geutuleh laju hukom po teu allah dalam saboh kitab. gobnyan geutuleh nyan deungan that-that ate-até dan that-that teuliti nibak phon sampoe an akhe. bak watee kitab nyan ka seulesue geutuleh, laju gobnyan geupeugah ubak banmandum imeum ureueng lewi nyang geubri tugaih keu jijak uruih peuto peujanjian, "gata cok kheueh kitab hukom po teu allah nyoe, dan takeubah

laju kitab nyan blaih peuto peujanjian tuhan po teu allah gata, mangat atranyan teutab na sabe disinan sibagoe saksi ateuh bansa nyan. ulon kuteupeue bahwa awaknyan keubit that kreueh ulee dan galak that jimeulawan ngon jibeurontak. seudangkan ulon mantong udebpi awaknyan teutab hana jipioh jimeubeurontak ubak tuhan; peue teuk lom singoh, watee ka mate ulon! jinoenyoe gatayue kheueh banmandum peumimpen bansa dan bubena ulee balang, peuwira mangat jijak meusapat dikeue ulon, mangat ulon hase lon peusampoe hai-hai nyoe keu awaknyan. langet ngon bumoe ulon tawok sibagoe saksi ateuh awaknyan. ulon kuteupeue bahwa oh kalheureh ulon mate, ureueng-ureueng nyan jeuet keu jeuhet dan jitulak peue nyang ka ulon peurunoe keu awaknyan. dan teuma awaknyan jitimpok le beuncana, sabab jihnyan ka jipeujeuet tuhan beungeh deungan jipeubuet peue nyang ka geutam nyan." oh lheureh nyan nabi musa laju geupeugah lagu nyoe sampoe an seulesue dan bansa israel jideungoe nyan banmandum. "deungoe kheueh, hai langet, ulon keuneuk peugah haba; hai bumoe, gata pasang kheueh punyung! seumoga peue nyang ulon purunonyoe beu jitreun lagee ujeuen, dan tutoe haba ulon nyoe rho meutreb-treb lagee ie mbon, lagee ujeuen reuntek-reuntek jitreun di ateuh on naleueng, dan ujeuen raya jitreun di ateuh peunula. ulon teuma lon pujoe nan tuhan. gatajak peutrok kheueh keubeusaran po teu allah geutanyoe! tuhan kheueh nyang bila gata nyang peukasa, nyang geupeuget le gobnyan sampoereuna, dan banmandum rot gobnyan ade lumpah na. po teu allah gata keubit that seutia, hana meubacutpi nyang kureueng nibak gobnyan, gobnyan geupeubuet nyang get ngon beutoi. teuma gata na kheueh bansa nyang hana seutia, dan hana patot le jeuet keu umat gobnyan, bansa nyang peunoh deungan jeuhet dan desya. meunan kheueh gata balaih lon buet nyang get nibak tuhan, hai ureueng-ureueng bangai nyang hana meu akai? bukon kheueh gobnyan bapak gata, nyang peujeuet gata, nyang ka geupeujeuet gata keu saboh bansa? gata ingat kheueh nibak jamen ilee, gata kalon kheueh ubak jamen angkatan-angkatan nyang ka awai ilee. gata tanyong kheueh nyan ubak ureueng syiek gata, mangat hainyan le awaknyan jibritee ubak gata. bak watee po teu allah nyang maha manyang geubagi tanoh, tieb-tieb bansa ka geupeuteuntee wilayah awaknyan deungan saboh ilah sibagoe nyangmat kuasa. teuma keuturonan nabi yakub nyoe ka geupileh le tuhan keu droe gobnyan. gobnyan geujak meurumpok ngon awaknyan nyang teungoh meungeumbara di tempat nyang sungue lam padang beulantara. le gobnyan laju geulindong awaknyan ngon geupeulara dan geujaga awaknyan lagee atra droe geuh teuma. lagee kleueng po teungoh jipurunoe aneuek jih seumama geudrob laju nibak sayeub nyang teuleueng meureuntang dan geutingkue teuma di ateuh sayeub nyang meukeupak, meunan kheueh tuhan keudroe geupimpen umat gobnyan, hana ilah nyang aseng nyang na meusajan ngon gobnyan. gobnyan geupeujeuet awaknyan jikuasa bubena gunung; nyang jipajoh le awaknyan na kheueh nibak hase blang ngon lampoh

dan jijieb ie meulisan nyang kleuet nyang na di buket-buket batee. awaknyan meuteume teuma minyeuk nibak bak zaiton nyang na timoh di ateuh tanoh nyang meubatee. leumo ngon kameng dan bubiri awaknyan jai that jipeuhase ie susu; beulatang peulara awaknyan na kheueh nyang paleng get mutu, gandom dan ie anggo awaknyan na kheueh nyang paleng get teuma. umat tuhan ka jeuet keu kaya, teuma paleng galak jipeubuet buet beurontak, awaknyan teumbon-teumbon, sabab troe le sabab jai that peunajoh. teuma awaknyan ka jipeulikot po teu allah, peuncebta droe jih, dan jitulak nyang peuseulamat jih nyang paleng peukasa. awaknyan jiseumah beurala, sampoe tuhan ceumuru lagoena, beungeh gobnyan jiteuka sabab buet jih nyang jeuhet nyan. awaknyan jipeuseumah keureubeuen keu areuwah-areuwah jeuhet nyang bukan po teu allah, keu ilah-ilah nyang hana awaknyan turi, ilah-ilah nyang baro nyang hana jitatok le indatu awaknyan. awaknyan jipeulalee nyang peuseulamat awaknyan nyang paleng peukasa, jipeutuwoe ubak po teu allah awaknyan nyang ka geubri udeb keu awaknyan. watee geukalon hai nyang lageenyan, tuhan keubit that beungeh, dan laju geutulak aneuek-aneuek gobnyan. kheun gobnyan, 'ulon hana lontem le kutulong awaknyan; bah ulon ngieni pakriban awaknyan apoh apah. sabab bansa nyan lumpah that kreueh ulee dan meubacutpi hana seutia. awaknyan jipeujeuet ulon ceumuru ubak nyang bukan allah, dan beungeh ubak patong beurala awaknyan. teuma ulon peujeuet umat ulon jiceumuru keu nyang bukan bansa, dan beungeh keu bansa nyang bangai. keuhai beungeh ulon nyan hu lagee apui nyang meuhab-hab nyang jitot hangoh sampoe trok ubak donya ureueng mate. apui nyan laju jitot hangoh bumoe nyoe meunan cit peue nyang na hase di ateuh bumoe nyan, dan meunan cit ngon gunung-gunong trok ubak ukeu-ukeu jih. hana putoh-putoh bala ulon peutreun dan ulon timbak banmandum panah ulon ateuh awaknyan. awaknyan teuma mate sabab deuman ngon deuke, dan sabab le peunyaket nyang lumpah parah. ulon peubiyeu awaknyan jiteugom le beulatang juah, dan ji kab le uleue nyang meubisa. muprang akibat jih mawot ngon mate nyang jai di ateuh rot-rot raya; teumakot ngon yo keu ureueng nyang na tinggai di rumah-rumoh. ureueng muda dan aneuek dara banmandum nyan geupeu sapansapa, meunan cit ngon aneuek manyak dan ureueng tuha banmandum geupeusaban rata. ulon keuneuk peusampoh awaknyan bube nyang na, mangat awaknyan hana teu ingat-ingat le. teuma ulon hana lon tem musoh israel jimeu bangsa; hana-hana awaknyan salah sangka dan jipeugah awaknyan jipeutalo umat ulon,' padahai ulon kheueh nyang peubuet lageenyan. israel nyan na kheueh saboh bansa nyang hana peutimbangan; meunan cit deungan peungeurtian hana nibak jihnyan. meunye nibak awaknyan na keubijak sanaan, awaknyan jituoh muphom, dan jipike teuma keuhai susah droe jih. pakriban sidroe ureueng hase jitiyeueb ureueng laen siribee droe, dan ngon dua droe ureueng hase siploh ribee droe ureueng jiplueng? tuhan, po teu allah awaknyan, ka geupeubloe awaknyan; awaknyan

ka geutinggai le po teu allah nyang peukasa. musoh israel jiteupeue bahwa peulindong awaknyan bukan lagee po teu allah peulindong ureueng israel. sabab awaknyan jeuhet lagee sodom dan gomora, lagee bak anggo nyang phet dan meuracon teuma boh jih. ie anggo awaknyan na kheueh racon uleue nyang that meubisa. tuhan geuingat buet musoh umat geuh dan geuhukom awaknyan oh trok bak watee jih. tuhan teuma geubalah dan geuhukom awaknyan, hana treb le awaknyan banmandum rhot ubak binasa; watee awaknyan hanco ngon sikeujab teuma teuka. tuhan teuma geupeuseulamat umat gobnyan dan geugaseh banmandum hamba-hamba gobnyan, meunye geukalon awaknyan hana meudaya dan ka habeh dumna teunaga. teuma tuhan geutanyong ubak umat gobnyan 'dipat ilah-ilah nyang teuga nyang gata peubangga nyan?' awaknyan teuma jipajoh gapah nyang gata peuseumah, dan jijieb ie anggo nyang gata keureubeuen nyan. tayue kheueh awaknyan jiteuka mangat jitulong gata, bah kheueh awaknyan jeuet keu peulindong gata. gata kalon kheueh, ulon kheueh po teu allah nyang esa, hana laen allah seulaen ulon. ulon teuma nyang peumate meunan cit nyang peu udeb, nyang peuluka meunan cit nyang peupuleh. meunye ulon teuma lon tindak, hana meusidroepi nyang hase jilawan. deumi keu ulon keudroe, allah nyang udeb nyoe, ulon beuot jaroe ulon dan lon meusumpah: ulon teuma lon asah peudeueng nyang meukilat, dan lon keureuja laju buet meuhukom nyan. ulon balaih banmandum lawan ulon dan ulon hukom banmandum nyang ji banci keu ulon. bubena aneuk panah ulon banmandum meulabo ngon darah awaknyan; banmandum ureueng nyang jilawan ulon kucang sampoe mate ngon peudeueng ulon. hana ulon peubiyeu meusidroepi jilawan ulon; meunan cit deungan ureueng nyang teuteun lam glab dan nyang luka-luka haroh mate banmandum. hai bansa-bansa, gatapujoe kheueh umat tuhan, sabab tuhan geuhukom banmandum nyang poh awaknyan. gobnyan geubalahi dam ateuh musoh geuhnyan teuma geupeu amphon desya umat gobnyan." nabi musa dan yosua aneuek nun jikheun nyanoye nyan, sampoe banmandum bansa israel hase jideungoe nyan. oh ka ltheueh geupeusampoe bubena ajaran-ajaran tuhan ubak bansa israel, nabi musa geupeugah, "gata seutot kheueh banmandum peurintah nyang ulon peusampoe ubak gata nibak uroe nyoe. gata peurunoe kheueh nyan ubak aneuek-aneuek gata, mangat awaknyan deungan seutia jipeubuet banmandum hukom tuhan. ajaran nyan jikheun nyang ulon kosong nyang hana meumakna, teuma na kheueh ajaran nyang udeb. taat kheueh ubak banmandum peurintah nyang na teuteuleh didalam nyan, mangat umu gata nyang di dalam nanggroe nyang hana treb le gata duek di meurandeh krueng yordan." bak uroe nyan cit teuma tuhan meufeureuman ubak nabi musa, "gatajak kheueh ubak gunung-gunong abarim di nanggroe moab dimeurandeh banda yerikho. gata ek kheueh laju u gunung nebo dan gata pandang kheueh u tanoh kanaan nyang hana treb le teujok keu bansa israel. gata teuma meuninggai di ateuh gunung nyan, lagee nabi harun syedara gata meuninggai di ateuh gunung hor. gata bandua

hana seutia ubak ulon dan hana gata horeumat ulon dikeue bansa israel bak watee gata mantong na nibak mata ie meriba, hana jioh ngon banda kades, di padang pasi zin. le sababnyan gata hana jeuet gata tamong u nanggroe nyang ulon bri keu bansa israel; teuma gata mantong jeuet tapandang nyan rot jioh." sigohlom meuninggai donya, nabi musa utosan po teu allah nyan, geubri beureukat ubak bansa israel deungon haba lageenyoe: "tuhan teuka nibak gunong sinai; gobnyan geuteubiet di ateueh edom lagee mata uroe dan di gunong paran gobnyan geubri cahya keu umat geuhnyan. gobnyan geupeungon sajan le siploh ribee droe malaikat; apui hu disiblah uneuen gobnyan. keubit, tuhan that-that geugaseh keu bansa gobnyan gobnyan geulindong mandum ureueng nyang ka jeuet keu hak milek geuhnyan. jak kheueh geutanyoe ta sujut dikeue gaki gobnyan dan tataat banmandum bubena peurintah gobnyan. hukum nyang geubri le nabi musa geutanyoe taat, sabab nyan na kheueh milek nyang paleng meuyuem keu bansa nyoe. bak watee israel geupeusapat deungon dumna peumimpin jih nyan, tuhan jeuet keu raja ateueh umat gobnyan." keuhai sukee ruben, nabi musa geupeugah teuma, "seumoga banmandum sukee ruben hana nyang binasa, bahpi ureueng ruben na bacut sagai." keuhai sukee yehuda gobnyan geupeugah teuma: "tuhan, neu deungoe kheueh yehuda ji meuhoi droeneueh; neupeusaboh kheueh lom awaknyan deungon bansa droe jih. neu muprang kheueh keu awaknyan, ya tuhan, neutulong kheueh awaknyan ateueh bubena lawan." keuhai sukee lewi gobnyan geupeugah teuma: "deungon urim dan tumim neupeugah banmandum keuhe-undak droeneueh, meulalu ureueng lewi, hamba droeneueh nyang seutia. droeneueh ka lheueh neu ujo awaknyan di masa, dan neu meudakwa ngon awaknyan nibak mata ie meriba. awaknyan seutia ubak gata leubeh nibak peue mantong, meunan cit leubeh nibak ureueng tuha dan kawom syedara. peurintah-peurintah droeneueh awaknyan taat, janji nyang droeneueh peuget awaknyan keureuja hana ploh dan teupat teuma. awaknyan ji peurunoe umat droeneueh mangat jitaat banmandum peurintah droeneueh dan jipeuseumah keureubeuen di ateueh miseubah droeneueh. tuhan, neutulong kheueh sukee nyoe mangat awaknyan teuga, seumoga droeneueh neuteurimong teuma ubak buet-buet nyang jikeureuja le awaknyan. neupeubinasa kheueh banmandum musoh awaknyan sampoe awaknyan hana hasele jibeudoh lom teuma." keuhai sukee benyamin gobnyan geupeugah: "nyoe kheueh sukee nyang geugaseh le tuhan. gobnyan geupeulindong awaknyan uroe ngon malam dan geutinggai teuma lamkawan awaknyan." keuhai keuturonan nabi yusuf gobnyan geupeugah: "seumoga tanoh awaknyan geubri beureukat le tuhan ngon geupeutreu ie ujeuen, dan meunan cit deungon ie nibak miyueb bumoe. seumoga tieb-tieb musem meuboh kayee meulimpah, boh kayee nyang get nyang masak di cong bak. seumoga buket nibak jamen ilee peunoh ngon hase seunaman nyang isteumewa. seumoga tanoh nyan geupeulimpah teuma deungon meubagoe jeuneh nyang paleng get, dan geubri beureukat le

keubaekan tuhan nyang geumeututoe lam seumak nyang hu. seumoga beureukat nyan jitreu n ateueh keuturonan nabi yusuf, sabab gobnyan kheueh peumimpin di lamkawan bubena syedara-syedara jih nyan. teunaga nabi yusuf nyan na dub teunaga saboh beulatang banteng, dan lungkee leumo agam uteuen nyang kheueh meuribee manasye dan meuploh ribee teuma efraim. bubena bansa banmandum jipok dan jipeusak laju sampoe trok u ujong bumoe." keuhai sukee-sukee zebulon dan isakhar gobnyan geupeugah: "seumoga zebulon makmu kareuna nibakjak-nibakjak jih nyan, dan isakhar seujahtra di dalam khimah-khimah jih nyan teuma. awaknyan ji undang bansa-bansa u gunong jih nyan dan jipeuseumah keureubeuen nyang beutoi teuma disinan. awaknyan meuteume keukayaan nibak lam laot, dan didalam anoe nibak seutot bineh pante." keuhai sukee gad gobnyan geupeugah teuma: "teupujoe kheueh po teu allah nyang ka geupeuluwah wilayah gad. gad jipreh-preh bak lagee saboh singa nyang keuneuk jipriek-priek kulet jaroe ngon kulet ulee. tanoh nyang paleng get laju jicok keu droe jih mantong jeumba pimpinan jijok teuma keu awaknyan. awaknyan jipeubuet mandum peurintah dan hukum tuhan bak watee banmandum peumimpin israel jimeusapat teuma." keuhai sukee dan gobnyan geupeugah: "dan nyan na kheueh lagee saboh singa nyang mantong muda nyang jigrob u luwa nibak basan." keuhai sukee naftali gobnyan geupeugah: "naftali geubri limpah ngon geunaseh tuhan; wilayah jih phon di danau galilea trok u seulatana." keuhai sukee asyer gobnyan geupeugah: "asyer geubri beureukat leubeh nibak sukee-sukee laen; seumoga gobnyan jeuet keu geunaseh dumna syedara-syedara geuh nyan, dan bak zaiton timoh ngon subo di ateueh tanoh jih nyan. seumoga banda-banda jihnyan geulindong deungon pintoe-pintoe geureubang teumaga dan beuso mangat udeb jih sabe lam aman dan teuntram." hai israel! hana ilah laen nyang lagee po teu allah gata; gobnyan geujak di ateueh langet deungon jaya dan geu lloh ngon geujak didalam awan keu geujak tulang gata. po teu allah kheueh siumu masa nyang jeuet keu peulindong gata, jaroe gobnyan nyang kong nyan jeuet keu sinumpang gata. gobnyan geu use musoh dikeue gata, dan geuyue teuma gata mangat tajak peubinasa awaknyan. teuma keuturonan nabi yakub udeb deungon aman dan teuntram di nanggroe nyang meulimpah gandom dan ie anggo, dan geupeutreu ngon iembon di langet. mubahgia kheueh gata, hai israel! hana bansa laen nyang lagee gata nyang ka geupeuseulamat le tuhan. tuhan na kheueh lagee peudeung dan peurisai keu gata; keu geubila gata dan geupeumeunang ateueh gata. bubena musoh-musoh gata jiteuka jijak lakee beugata weueh ngon tagaseh awaknyan, dan gata teutab tagiloe-giloe awaknyan ngon gaki droe gata." nabi musa geutinggai laju tanoh data moab nyan dan geujak teungoh laju u ateueh gunong nebo, di pucak pigsa di siblahi u timu yerikho. di sinan tuhan geutunyok ubak nabi musa banmandum nanggroe nyan, na kheueh: wilayah gilead u utara sijih banda dan; banmandum wilayah naftali; wilayah efraim

dan manasye, wilayah yehuda u barat sijioh laot teungoh; u bagian seulitan yehuda dan tanoh data nyang meureuntang phon di zoar u yerikho, banda nyang peunoh jitimoh le bak keuruma. laju tuhan meufeureuman ubak nabi musa, "nyang kheueh nanggroe nyang ka ulon peujanji bak nabi ibrahim, nabi ishaq dan nabi yakub mangat jiseurah ubak keuturonan awaknyan. ulon peuleumah nyan bak gata hai nabi musa, teuma hana lon bri idhin gata tajak keunan." laju meuninggai kheueh teuma nabi musa hamba tuhan nyan di tanoh moab, lagee nyang ka geupeugah le tuhan sigohlom nyan. tuhan laju geupeutamong nabi musa nyan u dalam jrat nibak saboh panton di moab di meurandeh banda bet-peor, teuma sampoe nibak uroenyoe hana meusidroepi jiteupeue deungon paih dipat makam nabi musa nyan. nabi musa meuninggai donya lam umu sireutoh dua ploh thon. teunaga gobnyan hana meukureueng dan meunan cit mata gobnyan mantong trang watee geukeumalon. di ateuh darat moab nyan bansa israel laju jipeuratok keu nabi musa nyang ka meuninggai nyan dan awaknyan jimeukabong nyang treb jih lhee ploh uroe. tuhan laju geubri keulimpahan keu yosua aneuk nun deungon keubijaksanaan sabab jih nyan ka geutunyok le nabi musa sibagoe geunantoe gobnyan. bansa israel jitaat ubak yosua dan jipatuh teuma ubak peurintah-peurintah nyang le tuhan geujok keu awaknyan meulalu nabi musa. di israel hana le nabi nyang lagee nabi musa nyan nyang geumeututoe meuhadab keue deungon tuhan. hana nyang peubuet mujizat-mujizat dan buet-buet ajaeb lagee nyang ka geupeubuet le nabi musa di nanggroe meuse, raja awaknyan dan bubena peujabat awaknyan sisuai deungon peurintah tuhan. hana ureueng nyang jipeubuet-buet nyang hebat dan dahsyat ngon takjob lagee nyang ka geupeubuet le nabi musa dikeue bansa israel.

oh ka lھےuh nabi musa wafeuet geutinggai donya nyoe, hamba tuhan nyan, tuhan geupeugah ubak waki nabi musa, nyan kھےuh yusoa aneuek nun. tuhan meufeureuman, "hamba ulon nabi musa ka wafeuet. teuma jinoenyoe bah kھےuh gata dan banmandum umat israel meusiab-siab keu tajak jeumeurang u meurandeh krueng yordan, dan gata tamong u nang-groe nyang ulon bri keu awaknyan. ulon ka lھےuh lon peugah ubak nabi musa bahwa tieb-tieb wilayah nyang gata gilo atrariany ka ulon bri keu gata, yosua dan meunan cit keu banmandum umat ulon. wilayah gata teuma meureuntang phon di padang pasi siblaih u seulatran trok u gunong-gunong libanon di utara dan phon krueng efrat nyang raya nyan di siblaih u timu trok laju u bansaboh nanggroe bansa het dan trok laju lom u laot teungoh di siblaih u barat. meusidroepi hana nyang hase jipeutaloe gata, yosua, siumu udeb gata. sabab ulon teuma na sabe meusajan gata lagee yoh masa ilee ulon meusajan deungon nabi musa. ulon hana teuma lon tinggai gata. bah kھےuh gata yaken dan tajeuet, sabab gata teuma tapim-pen bansa nyoe bak watee awaknyan jijak u nang-groe nyang ka ulon peujanji ubak indatu awaknyan. teuma, bah kھےuh gata biet-biet yaken dan gata jeuet. gata haroh tajaga mangat gata tataat ubak ban-mandum hukom nyang geupesampoe le nabi musa hamba ulon nyan keu gata dan bek tapeulalee hai nyan meubacutpi, teuma gata meuhase. kitab hukom nyan haroh kھےuh beusabe na gatabeuet keu umat ulon. gata meuruno kھےuh nibak kitab nyan uroe ngon malam, mangat peue nyang na teutuleh didalam nyan sabe gata peubuet. meunyo gata tapeubuet banmandum nyan, udeb gata teuma makmu dan meuhase. ingat, ulon ka lon bri peurintah ubak gata mangat gata biet-biet yaken dan beurani! bek kھےuh gata takot dan kureueng seumangat, sabab ulon tuhan po teu allah gata sabe na meusajan gata bahpi ho mantong nyang gata jak" teuma yosua laju geupeurin-tah ubak peumimpin-peumimpin umat israel man-gat jijak keuileng banmandum khimah umat israel dan laju teubri peurintah nyan lagee nyoe, "gata peu-siab kھےuh laju beukai, sabab lھےe uroe teuk gata ka tajeumeurang u meurandeh krueng yordan keu gata jak ubak nanggroe nyang ka geubri le tuhan po teu allah gata keu gata." keu sukee ruben, sukee gad, dan siteungoh nibak sukee manasye, yosua geupeu-gah, "ingat! nabi musa hamba tuhan nyan ka ge-upeugah ubak gata bahwa tanoh di siblaih u timu krueng yordan nyoe geubri le tuhan allah gata keu gata mangat jeuet keu nanggroe gata. banmandum aneuek peurumoh gata meunan cit deungon beula-tang peulara gata jeuet tinggai disinoe, teuma bubena ureueng peujuang gata haroh kھےuh siab jijak me-uprang leubeh awai nibak ureueng-ureueng israel nyang laen jijak jeumeurang krueng yordan. gata haroh tatulong awaknyan sampoe awaknyan jiteume duek nibak tanoh disiblaih u barat krueng yordan nyoe nyang geubri le tuhan po teu allah gata keu awaknyan. oh ka lھےuh tuhan geubri keuamanan keu banmandum bansa israel, baro kھےuh gata jeuet tagisa ubak tanoh gata keudroe disiblaih u timu yor-dan nyoe, nyang ka geubri le nabi musa hamba tuhan nyan keu gata." teuma le sukee ruben, gad dan siladum

nibak sukee manasye nyan laju jijaweueb, "peue man-tong nyang neupeurintah keu kamoe, hai nyan teuma kamoe peubuet, dan ho mantong nyang neuyue jak kamoe, meunan cit hai nyan teuma kamoe jak. kamoe teuma taat ubak droeneueh, saban cit lagee kamoe taat ubak nabi musa. seumoga tuhan po teu al-lah droeneueh sabe na mantong droeneueh saban cit lagee tuhan po teu allah na sabe meusajan nabi musa! soe mantong ureueng nyang hana jitem tun-dok ubak keukuasaan droeneueh, atawa hana jitem seutot peue nyan droeneueh peurintah, ureueng nyan teuma teuhukom mate. bah kھےuh droeneueh yaken dan beurani!" oh lھےuhnyan nibak khimah-khimah di sitim, yosua geuireum laju dua droe mata-mata u kanaan. bandua droe ureueng nyan geubri peurintah mangat jijak seulidek nanggroe kanaan de-ungon cara seungab-seungab, nyang paleng peun-teng na kھےuh banda yerikho. dan jijak kھےuh awaknyan ban dua droe u banda nyan, dan laju jimudom di rumoh sidroe ureueng inong jeuhet nyang nan jih rahab. raja banda yerikho geudeungoe bahwa nibak malam nyan na ureueng israel nyang teuka ji-jak luem ngon jijak mata-mata banda yerikho. teuma le raja nyan laju geuyue jak ureueng ubak rahab keu jijak peusampoe peurintah nyoe, "gata peuteubiet laju ureueng-ureueng nyang na jimudom didalam rumoh nyan. awaknyan na kھےuh mata-mata nyang teuka keuneuk jiseulidek bansaboh banda yerikho!" "keu-bit beutoi na ureueng jijak u rumoh ulon," jijaweueb le rahab, "teuma ulon hana lon teupeu awaknyan teuka rot pane. dan lom teuma awaknyan ka jijak bunoe bak watee uroe ka seupot sigohlom pintoe geureubang teutob. dan meunan cit teuma ulon hana teuma lon tanyong ho awaknyan jijak, teuma meun-yoe awaknyan bagaih-bagaih teujak tiyeub, mungken mantong hase meurumpok." (padahai si rahab nyan ka jisom bandua droe ureueng mata-mata nyan di miyueb sinumpok rami di bagian ateuheh rumoh jih-nyan.) dan jipeujak kھےuh laju banmandum utosan raja nyan sira jitinggai banda. oh ka trok awaknyan u luwa, laju pintoe geureubang banda jitob. dan awaknyan laju teuma jimita ban dua droe mata-mata nyan sampoe ubak tempat jeumeurang nibak bineh krueng yordan. malam nyan sigohlom bandua droe ureueng mata-mata israel nyan teungent nibak teupmat eh, le rahab laju jiek u bagian ateuheh rumoh jijak meurumpok deungon ban dua droe mata-mata ureueng israel nyan, dan laju jikheun bak awaknyan bandua, "dilon lon teupeu bahwa tuhan ka geubri nanggroe nyoe keu droeneueh. banmandum ureueng nyang na disinoe jitakot keu droeneueh nyoe. kamoe ka kamoe deungoe haba keuhai pakriban tuhan ge-upeutho laot geulagah dikeue droeneueh nyoe, bak watee awaknyoe ta tinggai nanggroe meuse. meun-an cit kamoe disinoe ka kamoe deungoe pakriban droeneueh nyoe neupoh mate sihon dan og, bandua droe raja bansa amori nyan di siblaih u timu krueng yordan. meunan kamoe deungoe mandum ceurita-ceurita nyan, kamoe nyoe banmandum jeuet keuteu-makot that. banmandum ureueng-ureueng kamoe ka gadoh ceubeueh ngon beuhe sabab le awaknyoe. tuhan po teu allah droeneueh keubiet allah nyang beutoi dan allah nyang mahakuasa di ateuheh langet

meunan cit di ateueh bumoe. ulon meuharab droeneueh nyoe neutem meusumpah deumi nan gobnyan bahwa droeneueh nyoe neupeusanaut ulon dan keuluwarga ulon deungon jroh lagee nyang ka ulon peubuetnyoe ateueh droeneueh. neumeujanji kheueh bahwa ayah ngon ma ulon, bubena syedara ulon, dan banmandum keuluwarga awaknyan hana teuma neupoh mate, teuma droeneueh bri peulindungan. dan keuhai nyan neubri kheueh saboh tanda sibago jaminan bahwa droeneueh nyoe jeuet ulon peucaya!" teuma jijaweueh le bandua droe awaknyan, "kamoe meujanji bahwa meunyo teuhan geubri nanggroe nyoe keu kamoe, kamoe teuma kamoe peusanaut gatanoye deungon jroh, asai gata hana tapeugah ubak so mantong keuhai kamoe. bah kheueh tuhan geuseurapa kamoe meunyo kamoe hana kamoe peuteupat janji nyan." sabab rumoh rahab nyan teupeugat nibak beuton banda, rahab jipeutreu laju bandua droe ureueng nyan deungon talo ret tingkab. "gata jak kheueh u daerah meugunong-gunong," jipeugah le rahab ubak awaknyan, "mangat ureueng-ureueng nyang geukirem le raja hana jiteume drob awaknyoe. droeneueh musom kheueh disinan nyang treb jih lhee uroe sampoe awaknyan jigisa lom teuma, baro kheueh awaknyoe jeuet neujak teuma lom." bandua droe ureueng mata-mata nyan jipeugah laju bak rahab, "get kheueh meunyo meunan, kamoe teuma kamoe peuteupat janji nyang ka gata lakee nibak kamoe. teuma nyoe kheueh nyang haroh gata peubuet. meunyo kamoe ka kamoe jak prang nanggroe gata nyoe teuma, bah kheueh talo mirah nyoe gata ikat laju nibak peuradeun teupat gata peutreu kamoe nyoe. ayah ngon ma gata, meunan cit deungon banmandum syedara-syedara gata, banmandum wareh kawom keuluwarga ayah gata bah kheueh gata peusapat di rumoh nyoe. meunyo na sidroe lamkawan awaknyoe nyang jiteubiet nibak rumoh nyoe dan mate keunong poh, mate ureueng nyan na kheueh akibat salah jih keudroe; kamoe hana meutanggong jaweueh ateueh hai nyan. teuma meunyo na nyang meuteume bala atawa ceulaka nibak lam rumoh nyoe, nyan na kheueh kamoe nyang meutanggong jaweueh. teuma sikeubiet jih, meunyo gata tabri tee keuhai kamoe nyoe ubak sidroe-droe ureueng, deungon nyan teuma kamoe hanale teu ikat deungon janji nyan ka gata lakee nibak kamoe." rahab laju situju keuhai nyan, jipeubiyeu mantong awaknyan jijak teuma. oh lheeuh nyan si rahab laju ji ikat talo mirah nyan ubak peuradeun jih lagee nyang ka jiyue le mata-mata nyang dua droe nyan. teuma jijak kheueh laju bandua droe mata-mata nyan u daerah nyang meugunong-gunong dan jimusom kheueh laju disinan. lhee uroe treb jih utosan raja nyan jijak mita-mita awaknyan ho-ho mantong bansaboh daerah nyan, teuma awaknyan teutab hana jiteume. akhe jih utosan-utosan nyan laju jiwoe lom u yerikho. dan oh lheeuh nyan bandua droe ureueng mata-mata israel nyan jitreun kheueh teuma laju nibak ateueh gunung teupat awaknyan musom laju jijak jeumeurang krueng, dan oh lheeuh nyan jijak gisa teuma ubak yosua. banmandum peungalaman awaknyan jilapor laju ubak yosua nyan. oh lheeuh nyan awaknyan jipeugah, "pasti tuhan geubri ban-

mandum nanggroe nyan keu geutanyoe; banmandum ureueng nyang na disinan jitakat keu geutanyoe." oh singoh beungoh nyan, yosua dan banmandum umat israel jibeudoh nibak eh wateenyan mantong seuboh buta, laju jijak dan jitinggai teupat khimah-khimah awaknyan di sitim, dan jijak laju u krueng yordan. disinan awaknyan jipeudong lom khimah sira jipreh-preh watee jih mangat jeuet jijeumeurang. oh ka liwat lhee uroe, bubena ureueng peumipen nyang geukeulueh laju banmandum khimah-khimah, dan laju geubri peurintah lageenyo keu umat israel, "meunyo na gata kalon imeum-imeum geuseuon peuto peujanjian tuhan po teu allah gata, bah kheueh gata jak laju gata tinggai teupat khimah-khimah nyoe. gata seutot kheueh peuto nyan, teuma bek gata peurab nyang to-to that nibak peuto nyan; gata seutot kheueh rot likot nyang jarak jih kira-kira sikilo metee. deungon na lagee nyan gata teuma tapeupeu rot nyang haroh gata jak, sabab gata gohlom na tajak u daerah nyoe." yosua geupeugah laju ubak umat israel, "bah kheueh gata nyoe tapeugleh droe, sabab singoh beungoh tuhan teuma geupeubuet-buet nyang ajaeb lamkawan gata." di yosua geupeurintah laju ubak dumna imeum-imeum mangat geubeuot peuto peujanjian nyan dan laju teuma geuyajak beu awai nibak umat israel. di imeum-imeum nyan jipeubuet laju peue nyang ka geupeurintah ubak awaknyan le yosua. tuhan geupeugah ubak yosua, "phon nibak uroenyo gata teuma ulon peujeuet keu ureueng rayeuk sampoe banmandum umat israel jibri horeumat keu gata dan jisada bahwa ulon na sabe bak bineh gata lagee ulon ka lheeuh ulon peubuet nyang lagee nyan ubak nabi musa. jinoenyo gata peurintah kheueh laju ubak imeum nyang teungoh jiseuon peuto peujanjian mangat watee ka trok awaknyan u krueng, gatayue bloih laju awaknyan u dalam krueng dan jidong laju nibak bineh krueng nyan." le yosua geutawok laju ureueng-ureueng israel, dan geupeugah, "gatajak kheueh keunoe dan tadeungoe kheueh laju peue nyang ka geupeurintah le tuhan allah gata ubak gata. meunyo gatanoye mandum tamaju eunteuk, tuhan pasti geu use ureueng kanaan, her, hewi, feris, girgasi, amori dan yebus. dan nibak watee peuto peujanjian tuhan seumeusta alam jijeumeurang krueng yordan leubeh awai nibak gata nyoe, gata teuma takalon bahwa po teu allah nyang udeb na lamkawan gata. jinoenyo tapileh kheueh laju ureueng dua blaih droe – dan sidroe nibak tieb-tieb sukee bansa israel. eunteuk meunyo imeum nyang seuon peuto peujanjian tuhan geubloih kaki gobnyan u dalam ie krueng yordan nyan, ie nyang teungoh ji-ile nyan teuma putoh; ie nyang ji-ile ditunong laju meugeunang nibak saboh teupat." bak watee nyan teungoh museum mupot, lagee ka lazem bak watee nyang lagee nyan ie krueng yordan teungoh jiek meuboh bah. bak watee ureueng israel jitinggai khimah-khimah droe jih keu jak jeumeurang krueng yordan, di imeum jijak leubeh awai dikeueh sira geuba peuto peujanjian. dan bak watee imeum nyan geugilo kaki gobnyan u dalam ie krueng, bak watee nyan cit teuma ie nyang teungoh ile lam krueng nyan teudong dan laju putoh. jioh ideh di pucok krueng, ie nyan laju meusaho di adam, saboh banda nyang teuduek di siblahi banda sartan.

ie nyang di baroh nyang ji-ile u laot mate wateuyan cit teuma ka putoh meubacutpi hana le ji-ile, sampoe umat israel deungon mudah jijeumeurang laju di ateuh tanoh nyang ka tho nyang meuhadab keu deungon banda yerikho. di imeum nyang geuseuon peuto peujanjian nyan teutab mantong geudong di teungoh krueng sampoe banmandum umat israel leupah jijeumeurang u meurandeh. oh ka ltheueh banmandum bansa nyan katinggai di meurandeh krueng yordan nyan, tuhan laju meufeureuman ubak yosua, "gata pileh kheueh laju dua blaih droe ureueng dan sidroe nibak tieb-tieb sukee. gata peurintah laju bak awaknyan mangat jijak cok dua blaih neuk batee nyang na di teungoh-teungoh krueng yordan, paih nibak teupat imeum nyan jidong. gata yue kheueh laju awaknyan mangat jiseuon batee-batee nyan sampoe u teupat gata peudong khimah bak watee malam eunteuk." dan le laju yosua geutawok laju ureueng nyang dua blaih droe nyang ka teupileh nyan, kheun gobnyan, "gatajak kheueh laju ubak teungoh krueng yordan, u keue peuto peujanjian tuhan po teu allah gata. maseng-maseng haroh gata beuot si aneuk batee nibak teupatnyan – jeumeulah jih dua blaih neuk batee sisuai deungon jeumeulah sukee-sukee nyang na didalam bansa israel. batee-batee nyan teuma teupeu ingat keu bansa nyoe keu peue nyang ka geupeubuet le tuhan. pajan-pajan teuma meunyoe aneuek-aneuek gata jiteumanyong peue maknajihe batee-batee nyoe keu gata, bah kheueh gata bri tee bahwa ie krueng yordan teudong ngon teuputoh bak watee peuto peujanjian tuhan teuba ngon teujeumeurang rot lam krueng yordan nyan. batee-batee nyan teuma sabe teupeu ingat keu bansa israel keuhai peue nyang ka teujadi disinoe." ban dua blaih droe ureueng nyanpi laju jipeubuet peue nyang ka geupeurintah le yosua nyan. paih lagee peutunyok tuhan ubak yosua, awaknyan jijakok laju dua blaih neuk batee nibak teungoh krueng yordan – jeumeulah jih sisuai deungon sukee-sukee dalam bansa israel – laju atranyan jiba u teupat khimah-khimah awaknyan. di teungoh-teungoh yordan nyan cit teuma, yosua laju geususan ban dua blaih neuk batee paih bak teupat geudong le imeum nyang geuseuon peuto peujanjian nyan. (batee-batee nyan mantong na disinan sampoe an saat nyoe.) di imeum-imeum nyan teutab geudong di teungoh-teungoh yordan sampoe ureueng nyan seulesoe jipeubuet banmandum nyang geupeurintah le tuhan ubak awaknyan meulaul yosua. nyan sisuai deungon peutunyok-peutunyok nabi musa ubak yosua. deungon bagaiht that umat israel nyan laju jijeumeurang krueng yordan. oh ka banmandum trok u meurandeh krueng, di imeum-imeum nyang geuseuon peuto peujanjian nyan laju geujak dikeue awaknyan. paih teuma lagee nyang ka geupeurintah le nabi musa, peujuang-peujuang nibak sukee ruben, gad dan siladam nibak sukee manasye, ka leubeh ilee awaknyan jijeumeurang krueng. banmandum nyan na 40.000 droe ureueng agam nyang meuseunjata siab keu jijak meuprang. dikeue tuhan, awaknyan jijeumeurang laju jituju ubak panton rab deungon yerikho. uroe nyan geupeubuet hai-hai nyan teupeujeuet bansa israel jibri horeumat ubak yosua sibagoe ureueng rayeuk.

siumu udeb awaknyan ji horeumat gobnyan lagee awaknyan jihoreumat ubak nabi musa. oh ltheueh nyan tuhan geuyue teuma lom yosua mangat geupeurintah banmandum imeum-imeum nyang seuon peuto peujanjian nyan mangat jiteubit nibak yordan. yosua geupeubuet laju peue nyang geuyue le tuhan ubak gobnyan. meunan di imeum-imeum nyan trok ubak bineh krueng, ie krueng nyan ka jipeuphon ile lom dan bohbab lagee nyang ka-ka. umat israel laju trok u meurandeh krueng yordan nibak tanggai siploh buleun nyang keu phon, dan laju geupeudong khimah di gilgal disiblah utimu yerikho. nibak teupatnyan yosua laju geususan bandua blaih neuk batee nyang teucok lam krueng yordan. le yosua geupeugah ubak umat israel, "singoh oh ka treb-treb meunyoe aneuek cucoe gata jityanyong keuhai makna nibak batee-batee nyoe, gata peugah kheueh laju ubak awaknyan bahwa umat israel jijeumeurang krueng yordan nyoe di ateuh tanoh nyang ka tho. gata meuhaba kheueh ubak awaknyan bahwa tuhan po teu allah gata geupeutoe ie krueng yordan nyan mangat jeuet gata banmandum trok u meurandeh, saban cit lagee gobnyan ka geupeutoe ie laot geulagah keu kamoe, mangat banmandum ureueng di ateuh donya nyoe jiteupeue padubna rayeuk jih kuasa tuhan. dan deungon na nyang lagee nyan gata teuma tahoreumat tuhan po teu allah gata keu siumu masa." banmandum raja amori disiblah u barat krueng yordan, dan banmandum teuma raja kanaan nyang na tinggai di sitot binedh pante laot teungoh jideungoe bahwa krueng yordan ka geupeutho le tuhan bak watee umat israel jijeumeurang dalam krueng nyan. le sababnyan teuma awaknyan jiteuka teumakot ngon yo sabab le ureueng israel nyan. bak watee nyan tuhan geupeugah ubak yosua, "gata peugot kheueh sikin nibak batee, ltheuehnyan gata peuna lom upacara meusunat keu ureueng-ureueng israel." teuma yosua laju geupeubuet peue nyang ka geupeurintah le tuhan, dan geupeusunat laju ureueng-ureueng israel nibak teupat nyang teuboh nan buket meukanan. bak watee ureueng-ureueng nyan jiteubit nibak nanggroe meuse, banmandum ureueng agam ka ltheueh teupeusunat. teuma bak watee awaknyan meugeumbara di padang pasi peuet ploh thon treb jih, aneuek-aneuek awaknyan nyang agam meusidroepi gohlom na nyang teupeusunat. dan nibak akhe masa peuet ploh thon nyan, di ureueng agam nyang bak watee jiteubit lam nanggroe meuse ka trok umu nyang ka pathot jeuet jitamong tantra, banmandum nyan ka habeh meuninggai donya, sabab hana jiseutot peue nyang ka geupeurintah le tuhan. teuma sisuai deungon sumpah tuhan, awaknyan hana geubri idhin jijak kalon nanggroe nyang makmu dan subo nyang ka geupeu janji keu indatu awaknyan. nyang kheueh sabab jih banmandum aneuek agam awaknyan gohlom na nyang teupeusunat. geuneurasi baro nyoe kheueh nyang geupeusunat le yosua. oh ka ltheueh awaknyan seulesoe banmandum teupeusunat, awaknyan tinggai laju di khimah-khimah sampoe luka nibak boh nyang keunong peusunat nyan puleh. tuhan geupeugah ubak yosua, "uroe nyoe keuhai hina gatanyoe banmandum yoh mantong na di nanggroe meuse ka ulon sampoh

sampoe an habeh." nyang kheueh sabab jih teumpat nyan geuboh nan gilgal trok an saat nyoe. teungoh awaknyan mantong meukhimah di gilgal di ateuah darat hana jioh ngon yerikho, umat israel laju jipeuna peurayaan paskah watee seupot uroe tanggai peuet blaih buleun nyan. oh singoh beungoh nyan, keu nyang keu phon that awaknyan jimakheun peunajoh hase nanggroe kanaan, na kheueh: ruti nyang hana meurago dan gandom nyang teupanggag. dan bak uroe nyan cit teuma manna hana le rhot nibak ateuah langet, dan ureueng israel jipioh teuma jipajoh manna. yoh phon watee nyan awaknyan jipajoh peunajoh hase tanoh kanaan. bak saboh watee yosua to that ngon yerikho. hana geusangka-sangka na sidroe ureueng agam ka jidong to that ngon gobnyan dan bak jaroe ureueng nyan na saboh peudeueng nyang ka teusut lam sarong. yosua geupeurab laju ubak ureueng nyan, dan geutanyong, "kah nyoe rakan peu kheueh lawan?" "bukon rakan dan bukon teuma lawan," jawueb ureueng nyan, "ulon teuka keunoe na kheueh sibagoe panglima tantra tuhan." oh ban geudeungoe haba nyan laju yosua geusjut dikeue ureueng nyan sira geuseumah. yosua geupeugah, "ulon nyoe namiet teungku. peue nyang jeuet ulon peubuet keu teungku?" panglima tantra tuhan nyan geujawueb, "gata suet laju sipatu gata nyan; tanoh teumpat gata dong nyan na kheueh tanoh suci." teuma yosua laju geusuet sipatu geuh nyan. di banda yerikho banmandum pintoe-pintoe geureubang rot tamong ka jijaga deungan kong that dan jitob deungan rapat mangat ureueng israel hana hase jitamong. hana meusidroepi nyang jeuet jitamong atawa jiteubiet lam banda nyan. tuhan geupeugah ubak yosua, "jinoenyoe ulon seurah ubak gata yerikho deungan raja jihnyan dan banmandum tantra jih nyang beuhe-beuhe nyan. gata dan tantra gata haroh gatadong meubareh takeulileng banda nyan sigoe siuroe nyang treb jih nam uroe. tujuh droe imeum, maseng-maseng imeum nyan jiba beureuguih, jihnyan haroh kheueh jijak dikeue peuto peujanjian. nibak uroe nyang keutujuh, gata dan tantra gata mandum haroh teuma jikeulileng banda nyan nyang le jih tujuh goe teuma di imeum laju jiyueb beureuguih nyan. oh lheu nyan di imeum-imeum nyan haroh kheueh teuma jiyueb beureuguih nyan deungan su nyang panyang. meunan gatanyoe tadeungoe su nyang panyang nyan, banmandum tantra haroh jisumurak ngon su nyang meugeunta meunan cit deungan rioh nyang meutaga su jih sampoe beuton binteh banda nyan reuloh sampoe hanco. laju oh lheu nyan gata banmandum tatamong laju u dalam banda nyan." teuma yosua laju geuhoi bubena imeum, dan geupeugah, "gata beut kheueh peuto peujanjian nyan; tujuh droe lamkawan gatanyoe haroh gatajak dikeue nyan sira gataba beureuguih keue awaknyan." le yosua geupeurintah laju ubak tantra geuh mangat jidong meubareh lheu nyan geuyue keulileng banda yerikho nyan, phon that that le baresan peungawai keue nyang jijak leubeh awai nibak peuto peujanjian tuhan. paih lagee peurintah nyang geubri le yosua, beurangkat kheueh baresan peungawai nyang dikeue leubeh awai nibak imeum-imeum nyang yueb sirune kale, laju di-

likot nyan jiseutot teuma le imeum-imeum nyang geuseuon peuto peujanjian, oh lheu nyan nyang paleng dilikot na kheueh baresan peungawai nyang dilikot. teungoh awaknyan jijak, sirune kale nyan hana putoh-putoh jipeumeusu sira jiyueb. banmandum tantra ka geupeurintah bek ji meusurak dan hana teuma jipeuteubiet tueo bahpi meusikrek haba meunyo yosua gohlom geubri peurintah atawa aba-aba. meunan kheueh yosua geubri peurintah ngon geuyue tantra geuh nyan keu jiba peuto peujanjian dan jikeulileng banda nyan sigoe kong teuma, oh lheu nyan jigisa lom ubak khimah-khimah, dan laju geumudom disinan. oh singoh nyan, banseuboh buta, yosua geubeudoh laju dan keu nyang keudua goe jih bubena imeum-imeum dan tantra geuyue mubareh dan geuyue keulileng bandanyan deungan urotan baresan jih lagee watee nyang ka lheu: phon-phon that baresan peungawai nyang dikeue, oh lheu nyan ban tujuh droe imeum nyang yueb sirune kale, lheu nyan lom imeum-imeum nyang seun peuto peujanjian, dan keuneulheuh jih baresan peungawai nyang paleng dilikot. dan di sirune kale laju jiyueb ngon hana pioh-pioh. nibak uroe nyang keudua nyan awaknyan jikeulileng banda sigoe sagai oh lheu nyan laju jigisa lom ubak khimah-khimah. meunan kheueh awaknyan jipeubiet tiebtieb uroe sampoe trok nam uroe. bak uroe nyang keutujuh awaknyan laju jibeudoh bak watee mata uroe ka jipeuphon teubiet, laju awaknyan jimeubareh tujuh goe geukeulileng banda yerikho nyan deungan cara nyang saban teuma. teuma bak uroe nyang keutujuh nyan mantong, awaknyan jikeulileng bandanyan tujuh goe. bak uroe nyang keu tujuh, meunan le imeum-imeum geuyueb sirune kale nyan, yosua laju geubri aba-aba geuyue sumurak ubak banmandum pasokan. kheun yosua, "tuhan ka geuseurah bandanyoe keu gata! bansigom banda meunan cit deungan peue nyang na asoe jih bah kheueh teupeuhanco banmandum nyan na kheueh sibagoe peuseumahan ubak tuhan. na kheueh rahab, ureueng inong jeuet nyang lunte nyan meunan cit deungan wareh kawom keuluwarga jih nyang jeuet teupeubiyue udeb, sabab jihnyan ka jitulong mata-mata geutanyoe. hana jeuet teucok peue mantong nibak atra nyang haroh teupeuhanco ngon teupeu ranab. meunyo keu gata tacok cit atra nyang teutam nyan, khimah-khimah ureueng israel teuma keunong bala dan beuncana. mandum barang lagee pirak, meuh, teumaga, dan beuso nyan haroh teupeu khusus keu tuhan, dan teukeubah didalam teumpat hareuta nyang khusus milek tuhan." le imeum-imeum laju geuyueb sirune kale geuh nyan. dan meunan ureueng-ureueng israel jideungoe su sirune kale nyan, laju awaknyan jisumurak meuhubo deungan su nyang lumpah teuga, dan bak watee nyan cit teuma beuton binteh banda yerikho nyan rhot reuloh meukeupeng-keupeng. dan banmandum tantra israel nyan jitamong laju u dalam banda nyang ka reuloh binteh nyan, deungan nyan teuma banda nyan laju geureubot nibak ureueng nyang na duek dan tinggai disinan. banmandum nyang na tinggai didalam banda nyan, tuha muda, ureueng agam ngon ureueng inong, laju jicang deungan peudeueng sampoe mate. meunan cit banmandum beulatang peu-

lara leumo ngon bubiri dan keuleudee banmandum nyan jipoh mate. keu ureueng nyang dua droe nyang ka jeuet keu mata-mata, yosua geupeugah, "gatajak kheueh laju u rumoh inong jeuhet nyang lunte nyan, dan gata puteubiet kheueh awaknyan meusigoe deungon banmandum keuluwarga jih nyan lagee nyang ka gata peujanji ubak jihnyan." teuma banda droe ureueng mata-mata nyan laju jijak, dan laju jipeuteubiet rahab meusajan deungon ban dua droe ureueng syiek jih, syedara-syedara jih, dan wareh kawom nyang laen. banmandum keuluwarga rahab nyan meunan cit deungon namiet-namiet jih laju jiba u luwa u tempat nyang aman hana that jioh deungon khimah-khimah israel. oh lheueh nyan tantra israel laju jitot sampoe habeh banmandum banda nyan deungon peue mantong nyang na didalam banda nyan, keucuali barang-barang meuh, pirak, teumaga dan beuso. barang-barang nyan awaknyan cok dan laju jiba ngon jikeubah nibak tempat keuneubah hareuta milek tuhan. teuma rahab ureueng inong jeuhet nyang lunte nyan deungon banmandum kawom keuluwarga jih geupeubiyeu udeb le yosua, sabab awaknyan ka jitulong banda droe mata-mata nyang geu kirem le yosua u yerikho. (sampoe nibak uroe nyoe keuturonan rahab mantong na di israel.) bak watee nyan yosua geupeuteubiet larangan nyang lagee nyoe, "soe mantong nyang ji useuha ji peugot lom banda yerikho nyoe, ureueng nyan teuma keunong kutok nibak tuhan. soe mantong nyang keubah keunaleueng jih ureueng nyan teuma gadoh aneuek tuha; dan soe nyang peudong pintoe-pintoe geureubang jih nyan ureueng nyan gadoh teuma aneuek tulot." tuhan na meusajan yosua, dan nan yosua jeuet keumeusyehu bansaboh nanggroe nyan. tuhan ka geupeurintah ubak umat israel bahwa nibak peue mantong nyang na di banda yerikho nyang haroh teupeuranab, sapeuepi hana jeuet teucok. teuma peurintah nyan hana jitirot. sidroe ureueng agam nyang nan jih a Khan ji iengkeue keu peurintah nyan, sampoe tuhan beungah that that keu umat israel. (ureueng syiek a Khan nyang nanjih karmi dan nek jih nyang meunan zabdi nibak kawom zerah dalam sukee yehuda.) bak watee nyan yosua geu kirem meupadub droe ureueng nyang na di yerikho u ai, na kheueh saboh banda di siblaih u timu betel, hana that jioh ngon betawen. ureueng-ureueng nyan geubri tugaih mangat jijak seulidek daerah nyan. oh ka lheueh seulesoe awaknyan jipeubuet tugaih nyan, awaknyan laju jiwoe teuma dan jijak lapor laju hai nyan ubak yosua. jipeugah le awaknyan, "hana peureulee geutanyoe banmandum tajak seurang ai. neukirem mantong kira-kira dua atawa lhee ribee droe. bek teukirem banmandum tantra keudeh keu jijak meuprang, sabab banda nyan banda ubit." jadi nyang jak seureubu banda nyan na kheueh lhee ribee droe tantra, teuma awaknyan jipeutaloe dan tantra yosua nyan laju jisurot. ureueng-ureueng ai laju jitiyeub awaknyan phon nibak pintoe geureubang ai sampoe u daerah tambangan, laju jipoh mate na kira-kira lhee ploh nam droe nibak tantra nyan dan hainyan teujadi to that ngon bineh barieh gunung. teuma di ureueng israel ka jeuet keu yo ngon teumakot. yosua

dan peumimpén umat israel that-that seudeh deungon keujadian nyan, akibat seudeh jih awaknyan laju jipriek-priek peukayan jih nyan maseng-maseng, dan sipanyang uroe sampoe an malam awaknyan jisujut dikeue peuto peujanjian tuhan deungon cara jiboh abee di ateuh ulee jih keudroe sibagoe tanda meuseudeh ate. yosua geupeugah ubak tuhan, "ya allah po tuhan ulon! keupeue droeneueh neuba kamoe sampoe u meuradeh krueng yordan nyoe? peu kheueh keuneuk neuseurah kamoe keu ureueng-ureueng amori? mangat jeuet kamoe banmandum mate? leubeh get kamoe tinggai disideh mantong, di meurandeh krueng yordan! ya tuhan lon! musoh ka jiheuntam ureueng-ureueng israel sampoe awak nyan ka jisurot. jinoenyo peue nyang haroh ulon peugah? ureueng kanaan dan mandum ureueng laen nyang na tinggai di daerah nyoe teuma jideungoe keuhai nyan. awaknyan teuma jikeupong dan jipoh mate kamoe banmandum! laju peu kheueh nyang droeneueh peubuet keu neupeuteun keuhoreumatan droeneueh?" tuhan laju geujaweeb ubak yosua, "beudoh! hana meuguna gata sujat lagee nyan u ateuh tanoh! ureueng israel ka jipeubuet desya. ulon ka lon peurintah mangat awaknyan jitaat ubak peujanjian le awaknyan deungon ulon, teuma awaknyan ji-iengkeue jani nyan! barang-barang nyang siharoh jih teupeu leunyah ka jicok le awaknyan. awaknyan jiceumucue dan laju jisom atranyan di teungoh barang-barang awaknyan keudroe mangat hana soe teupeue. nyang kheueh sabab jih awaknyan hana hase meuteun watee meuhadab keue ngon musoh. awaknyan jipeutaloe le musoh sabab awaknyan keudroepe ka jipeu rhot hukoman keu teupeuhanco sampoe habeh. ulon hana lon peungon le gatanyoe banmandum, meunyo barang-barang nyang hana jeuet teucok gohlom gata peuhanco. jinoenyo gata beudoh kheueh laju, hai yosua! gata peu suci laju umat israel nyan dan gatayue laju awaknyan siabsiab jijak meuhadab ulon. gata peurintah awaknyan mangat jimeusiabsiab keu singoh beungoh, sabab ulon tuhan po teu allah israel teuma ulon peugah nyoe ubak awaknyan: 'hai ureueng-ureueng israel! barang-barang nyang ka ulon peurintah ubak gata keu teupeu hanco nyan, teuma siladum mantong na nibak gata. sigohlom gata tatiek sampoe habeh barang-barang nyan, gata hana teuma meuhase gata meuteun talawan musoh!' sabab nyan, yosua, gatabri tee kheueh ubak awaknyan bahwa singoh beungoh awaknyan teupeureksa sukee deumi sukee. meunyo ulon lon tunyok saboh sukee, banmandum kawom dalam sukee nyan haroh jimaju ukeue kawom deumi kawom. dan meunyo ulon tunyok saboh kawom, banmandum keuluwarga dalam kawom nyan haroh jimaju ukeue keuluwarga deumi keuluwarga. oh lheueh nyan meunyo ulon tunyok saboh keuluwarga, tieb-tieb ureueng dalam keuluwarga nyan haroh kheueh teuma jimaju sidroe deumi sidroe. laju meunyo ureueng nyang teutunyok teunyata na jikeubah barang-barang nyang teularangnyan dan barang nyan haroh teutot sampoe habeh meusigoe deungon keuluwarga ureueng nyan dan banmandum peue-peue mantong nyang na atra hak milek jih meunan cit haroh teutot beuhabeh banmandum; sabab

jihnyan kheueh nyang ka ji-iengkeue peue nyang ka ulon peuget peujanjian dan ka teuma jipeubuet buet nyang jeuhet nyang paleng rayekul lamkawan umat israel." oh singoh nyan, ban seuboh buta, yosua laju geuyue umat israel mangat jimaju ukeue, sukee deumi sukee, teuma sukee yehuda kheueh nyang ke-unong. laju yosua geuyue sukee yehuda nyan jimaju ukeue, kawom deumi kawom, dan kawom zerah kheueh nyang keunong. oh lheuëh kawom zerah nyan geuyue maju teuma ukeue, keuluwarga deumi keuluwarga, dan keuluwarga zabdi kheueh nyang ke-unong. oh lheuëh nyan yosua geuyue teuma keuluwarga zabdi nyan ji maju ukeue, sidroe deumi sidroe; teuma akhan, aneuek karmi, cucoe nibak zabdi nyang keunong. yosua geupeugah laju ubak akhan, "aneuek ulon, gata meungaku kheueh dan tapeugah kheueh teuma trok trang disinoe dikeue tuhan po teu allah ureueng israel, peue nyang ka gata peubuet nyan. tapeugah kheueh nyan ubak ulon, bek tasom-som keu hainyan." "beutoi," kheun akhan, "ulon ka lon peubuet desya ubak tuhan, alah israel. nyoe kheueh nyang ulon peubuet: nibak lamkawan barang-barang nyan tanyoe reubot nyan, deh ulon kalon sion ija jubah nyang get that-that, atranyan meuneuget babilonia, meunan cit deungon pirak kira-kira dua kilogram, dan sibak meuh ngon brat siteungoh kilogram leubeh. ulon meuheuet that-that barang-barang nyan, teuma laju atranyan ulon cok dan ulon som laju didalam tanoh nibak khimah ulon; pirak teukeubah di miyueb that-that." laju yosua geu kirem ureueng laen bagaih-bagaih ubak khimah akhan nyan. teunyata barang-barang nyang teutam nyan banmandum na disinan, ka teusom didalam tanoh, dan pirak jih beutoi na di miyueb that-that. di ureueng utosan nyan laju jicok banmandum barang-barang nyan dan jiba laju ubak yosua dan banmandum ureueng israel. laju banmandum barang-barang nyan jikeubah dikeue tuhan. oh lheuëh nyan yosua dan banmandum umat israel laju geudrob akhan, dan laju jiba akhan nyan u panton keususahan meusigoe deungon banmandum aneuek jih, beulatang peulara jih lagee leumo, keuleudee, bubiri, khimah, dan banmandum peue-peue mantong nyang na atra akhan nyan, pirak, jubah dan meuh nyang jicue nyan. le yosua laju geupeugah ubak akhan, "keupeue gata peuteuka bala atueh geutanyoe? jinoenyoe tuhan teuma geupeuteuka bala u atueh gata!" teuma akhan meusigoe deungon keuluwarga jih nyan laju jirhom ngon aneuek batee sampoe mate le banmandum ureueng israel. banmandum hareuta milek jihnyan, dan meunan cit deungon hareuta nyang jicue nyan ka habeh teutot banmandum. oh ka lheuëh nyan teumpat nyan laju teuseubee deungon aneuek batee nyang lumpah le nyang sampoe nibak uroe nyoe teumpat nyan mantong na disinan. nyang kheueh sabab jih teumpat nyan teupeunan ngon nan panton keususahan. teuma reuda kheueh keuhai beunghet tuhan keu awaknyan. tuhan meufeuëuman lom ubak yosua, "gata peusapat kheueh banmandum tantra gata, dan tajak kheueh laju deungon awaknyan u ai. bek yo gata dan bek teumakot! ulon teuma lon peumeunang gata atueh raja ai. rakyat jih, banda jih, dan nanggroë jih teuma gata reubot. ai dan raja jihnyan haroh gata peusanëut

saban cit lagee gata peusanëut atueh yerikho dan raja jihnyan yoh masa ilee. teuma goenyoe barang-barang jih dan beulatang peulara jih jeuet gata cok keuhak milek gata. meukeumah-keumah kheueh laju mangat tajak prang bandanyan seucara meudadak rot likot." teuma yosua geumeusiab-siab laju keu geujak u ai meusajan-sajan deungon tantra geuh nyan. gobnyan geupileh 30.000 droe peujuang nyang get, laju keu kirem awaknyan bak watee malam, dan geupeurintah laju lagee nyoe bak awaknyan, "gatamu-som kheueh u meurandeh jih nibak banda nyan, teuma bek jioh that; dan gata meukeumah-keumah kheueh laju keu tajak prang. ulon dan aneuek buah ulon teuma lon peurab ubak banda nyan. meunyoe ureueng-ureueng ai jiteubiet keu jijak lawan kamoe. kamoe laju kamoe plueng meugisa lom lagee yoh masa ilee. awaknyan jitiyeub kamoe hana pioh sampoe an jioh nibak banda nyan, dan jisangka kamoe nyoe kamoe geuplueng droe lagee yoh masa ilee. bak watee nyan kheueh gata tateubiet nibak teumpat gata musom, dan gata reubot bandanyan. tuhan po teu allah gata teuma geuseurah keu gata banda nyan. oh lheuëh gata reubot, gatatot kheueh teuma bandanyan, paih lagee nyang ka geupeurintah le tuhan. nyan kheueh tugaih gata." oh lheuëh nyan yosua geu kirem laju awaknyan, dan awaknyan laju jijak musom di siblaih u barat ai lamkawan ai dan betel, laju geupreh disinan. teuma yosua geubeudoh nibak khimah-khimah umat israel. ban seuboh that-that yosua geubeudoh nibak teumpat eh dan geupeurintah laju ubak pasokan geuh mangat jimeusapat. oh lheuëh nyan gobnyan dan banmandum peumimpén umat israel laju geuba pasokan geuh nyan u ai. pasokan nyan meusajan-sajan deungon yosua jijak laju ubak pintoe geureubang phon banda ai, laju jipeudong khimah disiblaih utara, disinan na meuteume saboh panton lamkawan awaknyan dan banda nyan. leubeh kreuëng na 5.000 droe ka geuyue musom di siblaih u barat banda nyan, lamkawan ai dan betel. le sababnyan, sinuson pasokan prang nyan geu atoe na kheueh lagee nyoe: markas nyang phon geupeudeuk disiblaih utara banda nyan dan pasokan nyang laen siblaih u barat, seudangkan yosua geujak laju u panton nibak malam nyan. meunan raja ai jikalon aneuek buah yosua bagaih-bagaih jimeutindak. raja nyan dan meunan cit banmandum sipaiu jih laju jiteubiet jijak u panton yordan keu jijak prang ureueng israel nibak teumpat nyang masa ilee. raja nyan hana jiteupeue bahwa jih nyan teuma jiseurang rot likot. yosua dan tantra geuh geu surot silulah gobnyan teungoh geumundo, awaknyan laju jiplueng jituju u padang nyang geureusang. banmandum ureueng agam nyang na lam banda ai jikrah bube nyang na mangat jijak tiyeub yosua dan angkatan prang gobnyan. teuma seumaken awaknyan jitiyeub yosua seumaken jioh laju awaknyan nibak banda droe jih. banmandum ureueng ai jiteubiet jijak tiyeub ureueng israel, akhe jih bandanyan jipeubiyeu mantong teubuka hana le teujaga. oh lheuëh nyan tuhan meufeuëuman lom ubak yosua "beut kheueh laju kapak gata dan gata peukeu laju u arah ai; banda nyan jinoenyoe cit ulon seurah keu gata." yosua hana geupreh le laju geupeubuet peurintah tuhan nyan. me-

unan yosua geubeuot jaroe gobnyan, pasukan nyang teungoh jimusom nyan bagaih-bagaih jibeudoh nibak teupat jimusom dan laju jikak seureubu banda nyan, dan hana treb teuma oh lheureh nyan banda nyan meuteume jireubot nibak ai. dan le awaknyan jitol laju sampoe hangoh ban saboh banda nyan. ureueng-ureueng ai jipaleng u likot, dan jikalon asab ka meukeubok sampoe u langet. meunan cit deungon yosua dan pasokan geuh nyan geukalon cit asab nyan dan laju geusada bahwa pasokan gobnyan nyang laen ka jireubot banda nyan. jadi, geugisa kheureh laju yosua meusigoe ngon pasokan geuh nyan keu geujak prang dan geupoh mate banmandum ureueng ai. ureueng israel nyang na di banda ai nyan pi teuka jikak tulong yosua ngon awaknyan meusajan-sajan jikak prang, sampoe bubena ureueng ai ka teukeupong dan hana hase jipeuplueng droe jih le. hana meusidroe pi nibak ureueng ai nyan nyang hase jipeuseumat droe jih, banmandum awaknyan mate jihpoh le ureueng israel, teuma raja ai. jih nyan teudrob laju jiba meuhadab ubak yosua. oh ka lheureh pasokan israel jihpoh mate sampoe habeh pasokan musoh nyang jitiyeub awaknyan dipadang nyang geureusang, jigisa kheureh lom awaknyan u ai, dan laju jikak poh bubena ureueng disinan. yosua hana cit lom geupioh kapak geuh nyan mantong cit geubeuto-beuto u atueuh ai, dan hana lom geupeutreu sampoe bubena ureueng-ureueng ai nyan ka mate banmandum. bak uroe nyan cit teuma mate kheureh banmandum peunduduek ai – 12.000 droe, ureueng agam dan ureueng inong. beulatang peulara dan barang-barang nyang na jireubot nibak banda nyan, laju jicok le ureueng-ureueng israel jeuet keu hak milek awaknyan, sisuai lagee nyang ka geupeurintah le tuhan ubak yosua. yosua laju geutot ai nyan, dan geupeubieu mantong lagee nyan jeuet keu runga-runga sampoe an jinoe beukaih banda ai nyang teutot nyan na tinggai. raja banda nyan laju geugantung bak tameh, dan geupeubieu disinan sampoe an seupot uroe. bak watee mate uroe ka jihlob, yosua laju geuyue ureueng laen jikak cok manyet nyan dan geuyue boih to ngon pintoe geureubang banda. oh lheurehnyan teupat nyan laju teuseubeu ngon aneuk batee nyang lumpah le. meunan cit batee-batee nyan sampoe an jinoe mantong na disinan. oh lheureh nyan yosua geupeuget teuma saboh miseubah di gunong ebal keu tuhan, po teu allah israel. miseubah nyan geupeuget sisuai deungon peutunyok-peutunyok nyang na didalam kitab nabi musa, hamba tuhan nyan, ubak ureueng-ureueng israel: "saboh miseubah nyang teupeuget nibak batee nyang hantom lom teupeubuet deungon alat-alat beuso." di atueuh miseubah nyan ureueng israel jipeuseumah laju keu tuhan: keureubeuen nyang teutot dan meunan cit ngon keureubeuen peudame awaknyan. nibak teupat nyan, deungon jipeusaksi le ureueng-ureueng israel, yosua laju geutuleh nibak batee-batee miseubah nyan seunalen nibak hukum-hukum tuhan nyang na meuteume lam kitab nabi musa. ureueng-ureueng israel, meunan cit deungon peumimpen-peumimpen, peuwira-peuwira atawa ulee balang-ulee balang jih, hakem-hakem dan meunan cit deungon ureueng-ureueng aseng nyang na tinggai lamkawan awaknyan, laju jidong rot deh

ngon rot nyoe siblahi meusiblahi peuto peujanjian tuhan meuhadab ubak duma imeum-imeum lewi nyang geuseun peuto peujanjian nyan. siladum nibak ureueng nyan jimeuhadab laju ubak gunong gerizim, dan siladum teuk teuma geumeu hadab ubak gunong ebal. nabi musa, hamba tuhan nyan, ka geupeurintah mangat awaknyan jipeubuet laju hai nyan meunyo ke trok watee jih keu awaknyan jiteurimong beureukat nyang ka geupeujanji le tuhan. oh lheureh nibak nyan yosua laju geubeuet teuga-teuga banmandum hukum sisuai deungon nyang na teutuleh lam kitab hukom, meunan cit geubeuet deungon beureukat-beureukat dan kutukan-kutukan. tieb-tieb peurintah nabi musa geubaca le yosua ubak banmandum umat israel nyang meusapat disinan, jitamong cit ureueng inong, aneuk miet, dan ureueng aseng nyang na tinggai lamkawan awaknyan. haba keuhai israel ka meunang laju meutabu deungon bagai that trok laju ubak mandum raja di meurandeh krueng yordan – nibak gunong-gunong meunan cit nibak gaki gunong, dan di darat di ban sipanyang pante laot teungoh trok lom teuma sampoe jioh u gunong libanon di siblahi utara; na kheureh ubak rajaraja het, amori, kanaan, feris, hewi dan yebus. banmandum raja-raja nyan ka jimeupakat ngon jimeugabong keu jikak prang yosua dan umat israel. teuma ureueng-ureueng gibeon nibak bansa hewi ka jideungoe keuhai peue nyang ka geupeubuet le yosua atueuh yerikho dan ai. dan awaknyan jipeuputoh pakat keuneuk jikak peungeuet yosua deungon cara jipeudieng di atueuh keuleudee awaknyan: umpang-umpang tuha, dan baluem-baluem anggo nyang ka brok-brok nyang teupeuget nibak kulet. dan sibagoe beukai, awaknyan jipeusiab keu ruti nyang ka tho dan ka teuma meukulat. awaknyan jingui peukayan nyang ka brok lom ngon beukaih-beukaih meunan cit deungon sipatu nyang ka tuha lom ka teucob-cob. deungon keuadaan nyang lagee nyan bagoe awaknyan jikak laju meurumpok deungon yosua di khimah-khimah gilgal laju jipeugah ubak gobnyan dan ubak ureueng-ureueng israel, "kamoe nyoe teuka nibak nanggro nyang jioh deungon meukeusut keuneuk peuet peujanjian deungon teungku-teungku." teuma ureueng-ureueng israel geupeugah, "keupeue kamoe peuna janji deungon gata nyoe? mungkin teupat tinggai gata nyoe na di daerah nyoe mantong!" awaknyan jipeugah, "kamoe meutem kamoe peubuet peue mantong nyang teungku yue ubak kamoe." "gata nyoe soe? dan teuma nibak nanggroe pane?" geutanyong le yosua ubak awaknyan. awaknyan jijawueub, "kamoe nyoe teuka nibak nanggro nyang jioh lagoena, teungku, sabab kamoe deungoe keuhai tuhan po teu allah nyang neuseumah le teungku-teungku. meunan cit ka kamoe deungoe keuhai banmandum nyang ka teupeubuet di nanggro meuse, dan keuhai peue teuma nyang teupeubuet atueuh ban dua droe raja ureueng amori disiblahi u timu krueng yordan, na kheureh sionh raja hesybon meunan cit og raja basan nyang tinggai di asyatarot. peumimpen-peumimpen dan banmandum peunduduek nanggro kamoe jiyue kamoe mangat kamoe peuna beukai keu kamoe beurangkat keunoe jak meurumpok deungon teungku-teungku dan ngon nyoe teupeugah

bahwa kamoe taklok ubak teungku-teungku. sabab nyan, kamoe lakee beumurah ate teungku-teungku keu teupeuna janji deungan kamoe. cuba kheueh teungku kalon, ruti beukai nyang kamoe ba nyoe. bak watee kamoe jak keunoe, ruti nyoe mantong seu-uem. teuma jinoenyoe, kalon kheueh! ka tho lom ka teuma meukulat. dan meunan cit deungan baluem-baluem anggo nyoe mantong baro bak watee kamoe pasoe; teuma jinoenyoe, neukalon kheueh! ka beukaih ngon teupriek-priek teuma. meunan cit deungan peukayan kamoe dan sipatu kamoe pi ka teuma teupriek sabab watee kamoe jak nyang lumpah jioh nyoe." teuma le ureueng-ureueng israel jiteurimong bacut nibak peunajoh ureueng-ureueng gibeon nyan, dan hana jitanyong ubak tuhan keuhai nyan. laju yosua geupeuna janji deungan ureueng-ureueng gibeon nyan, dan lam janji nyan awaknyan hana teupoh. peumimpén-peumimpén umat israel meunan cit, geumeusumpah keu teupeupeunoh peue nyang ka teupeujanji nyan. teuma teunyata, bak uroe nyang keu lhee oh ka ltheueh peujanjian nyan teupeuet, ureueng israel ka trok jikak ubak banda gibeon, kefira, beerot dan kiryat-yearim di daerah awaknyan. dan baro kheueh jiteupeue bahwa tempat tinggai awaknyan hana jioh nibak gilgal. teuma ureueng israel hana jeuet jipoh mate awaknyan, sabab peumimpén-peumimpén israel ka jimeusumpah keu awaknyan ateuh nan tuhan po teu allah israel. banmandum umat israel that-that meunyeusi keuhai nyan keu peumimpén-peumimpén awaknyan. teuma peumimpén-peumimpén nyan jijaweueb, "peue ta keuneuk peugah! kamoe ka kamoe meujanji ubak awaknyan ateuh nan tuhan allah israel. jinoenyoe geutanyoe hana jeuet neupeubuet buet nyang jeuhet u ateuh awaknyan. geutanyoe hana jeuet tapoh awaknyan sabab geutanyoe ka ta meujanji; dan meunyeoe geutanyoe ta iengkeue ubak janji nyan po teu allah teuma geuhukom geutanyoe. le sababnyan, neupeubiyeu mantong kheueh awaknyan udeb, teuma geutanyoe banmandum ta peujeuet awaknyan keu tukang prah kayee dan tukang gulam ie keu geutanyoe banmandum." meunan kheueh nyang geuyue le peumimpén-peumimpén nyan. dan bubena ureueng-ureueng gibeon nyan geuhoi jak meuhadab ubak yosua. yosua laju geupeugah, "keupeue gatanoye ta peungeuet kamoe dan gata peugah bahwa nanggroe gata jioh lagoena, padahai tho disinoe? sabab gata tapeubuet meunan, allah geuhukom gata. bansa gata teuma sabe jeuet keu namiet, tukang prah kayee dan tukang gulam ie keu baet allah ulon." awaknyan jijaweueb, "kamoe peubuet meunan sabab kamoe deungoe bahwa tuhan allah nyang teungku seumah nyan ka geuyue ubak nabi musa, hamba geuhnyan, geubri keu teungku banmandum nanggroe nyoe dan neupoh mate bubena asoe nanggroe nyoe bak watee teungku neucok tanoh disinoe. kamoe teumakot that-that meunyeoe kamoe sampoe teupoh mate, nyang kheueh sabab jih hai nyan kamoe peubuet. jinoenyoe kamoe ka na di miyueb kuasa teungku. neupeusanéut kheueh kamoe meunurot bak teungku hainyan jroh." teuma nyoe kheueh nyang geupeubuet le yosua: gobnyan geulindong banmandum ureueng nyan dan hana geupeu id-

hin ubak ureueng israel jikak poh awaknyan. teuma awaknyan geupeujeuet keu namiet – na kheueh keu tukang prah kayee dan tukang gulam ie keu ureueng israel dan keu miseubah tuhan. trok an jinoe awaknyan mantong jipeubuet nyang lagee nyan di tempat nyang geupileh le tuhan jeuet keu tempat iebadat keu awaknyan. adoni-zedek, raja nyang mat peurintah di yerusaleum, geudeungoe bahwa yosua ka geureubot dan geupeuhanco banmandum banda ai, dan jipoh mate teuma raja jih lagee nyang ka geupeubuet ateuh yerikho dan raja jih nyan. meunan cit geudeungoe teuma bahwa ureueng gibeon ka jipeuna janji keu meusahabat deungan ureueng-ureueng israel dan tinggai lamkawan awaknyan. peunduduek yerusaleum lumpah teumakot, sabab gibeon na kheueh banda nyang raya; sabe raya jih deungan banda-banda nyang na raja, dan leubeuh rayeuk nibak ai. ureueng-ureueng jih pi na kheueh peujuang-peujuang nyang carong ngaza nibak mideuen prang. sabab nyan kheueh adoni-zedek ji kirem utosan ubak raja hoham di hebron, raja pirem di yarmut, raja yafia di lakhis, dan raja debir di eglon, sira jiba peusan nyoe, "jak kheueh neubantu ulon keu lon jak prang gibeon, sabab ureueng-ureueng disinan ka jipeuna janji meusahabat deungan yosua dan ureueng israel." teuma ban limong droe raja amori nyan, na kheueh raja yerusaleum, hebron, yarmut, lakhis dan eglon jimeusaho, laju deungan banmandum tantra awaknyan, awaknyan jikeupong dan jiprang gibeon. ureueng-ureueng gibeon jikirem laju haba nyoe ubak yosua nyang na nibak khimah-khimah di gilgal, "bek neupeubiyeu kamoe keudroe, teungku! neuteuuka kheueh deungan bubagaih neujak bantu kamoe, sabab tantra nibak banmandum raja amori di daerah gunung-gunung ka jimeugabong jikak lawan kamoe!" laju yosua dan banmandum tantra gobnyan, meunan cit deungan pasokan-pasokan gobnyan nyang get ngon beuhe, geubeurangkat laju nibak gilgal keu geujak meuprang. tuhan meufeureuman ubak yosua, "bek gata takot keu awaknyan. keuhai meunang ka ulon bri keu gata, le sababnyan hana meusidroe pi nibak awaknyan hase jimeuteun jilawan gata." sipanyang malam nyan yosua deungan banmandum tantra geuh jikak laju nibak gilgal u gibeon, laju geuprang ureueng-ureueng amori nyan ngon hana teusangka-sangka. tuhan ka geupeujeuet ureueng-ureueng amori nyan jeuet keu mumang ulee bak watee jikalon tantra israel. jai that-that ureueng amori nyan geupoh mate di gibeon, dan nyang mantong udeb laju geutiyeub sira jitreun ngon jilisi bineh gunung di bet-horon sampoe jioh u azeka dan makeda disiblahi u seulatan. bak watee ureueng-ureueng amori teungoh jitreun rot bineh gunung nyan sabab jipeuplueng droe nibak tantra israel, laju tuhan geupeutreu ujeuen es nyang raya-raye di langet u ateuh awaknyan ban sipanyang rot sampoe u azeka. nyang mate jitimpok le ujeuen es nyan jioh leubeuh le nibak nyang jipoh le ureueng israel. bak uroenyany watee tuhan geupeumeunang ureueng israel ateuh ureueng amori, yosua geumeututoe deungan tuhan. dan dikeue ureueng israel, yosua geupeugah, "hai mata uroe! neuipoh kheueh di ateuh gibeon. dan gata buleuen! bek kheueh gata minah ni-

bak panton ayalon." teuma di mata uroe pi laju jipioh dan bueleun hana teuma jiminah sampoe ureueng israel seuleusoe jipeutaloe bubena musoh-musoh jih nyan. peuristiwa nyoe na teutuleh lam kitab yasar. si uroe peunoh mata uroe jipioh nibak teungoh-teungoh langet, dan treb that teuma baro kheueh jilhob. hantom na teujadi dan meunan cit hana teuma teujadi meu siuroepi nyang lagee uroe nyan, bahwa tuhan geuseutot ban lagee nyang jimeuheut le manusia. tuhan geumuprang ngon geudong blaih ureueng israel! oh ka ltheueh teumuprang nyan, yosua meusajan-sajan deungon tantra gobnyan geuwoe laju lom ubak khimah-khimah awaknyan di gilgal. teuma banlimong droe raja amori nyan ltheueh dan jimusom didalam saboh guha di makeda. ureueng laen deuh jikalon awaknyan, dan jijak britee laju teumpeat awaknyan jimusom ubak yosua. "gata gule laju bateebatee nyang raya nyan u babah guha, dan peuduek teuma peungawai nyang jaga disinan," kheun yosua, "teuma gatanyoe bek tapioh disinan. gata peucrok laju, dan gata prang laju awaknyan rot likot; bek gata peubiyeu awaknyan jitamong u banda-banda jih! tuhan po teu allah gata ka geubri meunang keu gata ateueh awaknyan." yosua dan ureueng israel nyang laen laju geupoh mate bubena ureueng amori nyan, teuma na cit lamkawan awaknyan nyang jiplueng u banda droe jih jijak mita teumpeat meulindong, sampoe awaknyan hana keunong poh mate. oh ltheueh nyan banmandum tantra yosua jiwoe deungon sealamat ubak yosua di teumpeat khimah-khimah di makeda. hana meusidroe pi di nanggroe nyan nyang jijeuet peugah peue mantong keu jiteuntang ureueng-ureueng israel. oh ltheueh nyan yosua geupeugah, "jinoenyo tajak buka laju babah guha nyan dan taba laju ban limong droe raja nyan jijak meuhadab ubak ulon." guha nyan pi laju jibuka, le raja-raja nibak yerasalem, hebron, yarmut, lakhis dan eglon ji-ireng laju u luwa, dan laju jiba meuhadab ubak yosua. dan yosua pi geuhoi laju banmandum ureueng israel jajak meusapat, oh ltheueh nyan geubri peurintah ubak mandum peuwira nyang na rhoh jijak meuprang deungon gobnyan dan laju jijak gilo bak takue dumna raja nyang limong droe nyan. teuma di peuwiranyan pi laju jijak gilo takue raja-raja nyan. oh ka ltheueh nyan, yosua geupeugah laju ubak peuwira geuh nyan, "bek yo gata dan bek teumakot. bah kheueh gatanyoe yaken dan beuhe, sabab lagee nyoe kheueh cara jih tuhan teuma geupeusanaut banmandum musoh gata." laju le yosua geupoh mate ban limong droe raja-raja nyan dan geugantung teuma laju ubak limong boh tameh. manyet ureueng nyan geupeubiyeu mantong disinan sampoe an seupot uroe. bak watee mata uroe ka jilhob, ateueh peurintah yosua, manyet-manyet nyan jipeutreun laju jirhom u dalam guha nyang yoh masa bunoe jipeuguna le raja-raja nyan keu teumpeat musom. oh ltheueh nyan batee rayaraya jipeuduek laju bak babah guha nyan. sampoe an jinoo batee-batee nyan mantong na. uroenyan cit yosua geujak prang makeda, dan geupeutaloe laju banda nyan meunan cit ngon raja jih. banmandum peunduek banda nyan geupoh mate; hana meusidroe pi nyang na tinggai udeb. yosua geupeusanaut ateueh raja makeda saban lagee geupeusanaut

ateueh raja yerikho. oh ka ltheueh nyan, yosua deungon tantra gobnyan geumaju laju nibak makeda u libna dan geuprang teuma banda libna nyan. meunan cit tuhan geupeumeunang lom keu ureueng israel ateueh banda nyoe dan raja jih nyan. hana meusidroe pi nyang geupeubiyeu udeb; banmandum ureueng nyang na didalam banda nyan geupoh mate. yosua geupeusanaut raja banda nyan saban cit lagee ka geupeusanaut u ateueh raja yerikho. oh ltheueh nyan yosua dan tantra geuh nyan laju geu maju lom nibak libna u lakhis. awaknyan laju geukeupong banda nyan dan laju geuseureubu. tuhan geupeumeunang lom keu tantra israel ateueh lakhis lam meuprang nyan nibak uroe nyang kedua. peue nyang awaknyan peubuet di libna, meunan cit awaknyan peubuet teuma di lakhis; hana meusidroe pi nyang geupeubiyeu udeb, banmandum geupoh mate. horam, raja gezer teuka jijak bantu lakhis, teuma yosua pi geupeutaloe awaknyan dan tantra jih, hana meusidroe pi nyang na tinggai, banmandum mate. seulanjut jih, yosua ngon tantra gobnyan geutinggai lakhis dan geuheuntam teuma u eglon dan banda nyan pi geukeupong dan geuprang bandanyan. bak uroe nyan cit teuma awaknyan geureubot eglon, dan geupoh mate banmandum ureueng nyang na disinan lagee nyang ka geupeubuet di lakhis. beudoh di eglon, yosua dan tantra gobnyan laju geuteungoh gunong-gunong geujak laju u banda hebron, dan banda nyan pi laju geuheuntam teuma dan geureubot laju bandanyan. raja disinan dan soe mantong ureueng nyang na di banda nyan dan di banda-banda laen nyang na di silingka nyan, mandum geupoh mate. yosua geupeuhanco teung bayeueng banda nyan saban cit lagee nyang ka geupeubuet u ateueh banda eglon. hana meusidroe pi geupeubiyeu udeb disinan. oh ltheueh nyan yosua dan tantra gobnyan geugisa geujak prang debir. banda nyan dan raja jih dan banmandum banda nyang laen nyang na di silingka nyan geureubot mandum le yosua. meunan cit banmandum ureueng nyang na dalam banda nyan geupoh mate. yosua geupeusanaut debir saban cit lagee nyang ka geupeusanaut u ateueh banda hebron dan libna meunan cit raja jih. bansaboh nanggroe nyan ka geupeutaklok le yosua. gobnyan geupeutaloe teuma raja-raja nyang na tinggai di daerah gunong-gunong, di bineh-bineh buket disiblahi u timu, di gaki-gaki gunong siblahi u barat, dan di padang-padang siblahi u seulitan. hana meusidroe pi nyang geupeubiyeu udeb; banmandum geupoh mate. nyan paih deungon peue nyang ka geupeurintah le tuhan allah israel. meunan cit yosua geupeutaloe teuma daerah-daerah nibak kades-barnea di siblahi seulitan sampoe trok u gaza to ngon daerah pante, jitamong cit keunan banmandum daerah gosyen, laju sampoe u gibeon di siblahi utara. lam watee sigoe mantong geumeuprang, yosua ka geupeutaloe banmandum raja-raja nyan dan geureubot laju daerah keukuasaan awaknyan, sabab tuhan, po teu allah israel, geumeuprang keu ureueng israel. oh ka ltheueh nyan, yosua ngon tantra gobnyan laju geuwoe lom teuma ubak khimah geuh di gilgal. bak watee raja yabin nibak hazor jideungoe keuhai laju meunang sabe lam mideuen prang, le raja nyan laju jikirem utosan ubak

raja yobab nibak banda madon, meunan cit keu raja-raja banda simron dan akhsaf, meunan cit ubak raja-raja nyang na di gunong-gunong siblahi utara, di panton yordan siblahi u seulatan galilea, nibak daerah gaki gunong-gunong, dan didaerah pante nyang rab ngon dor. meunan cit jikirem lom teuma ureueng laen ubak ureueng kanaan di siblahi barat dan siblahi u timu krueng yordan, ubak ureueng amori, het, feris, dan ureueng yebus di daerah gunong-gunong, meunan cit ureueng hewi di gaki gunong hermon di daerah mizpa. teuma teuka kheueh raja-raja nyan deungon banmandum tantra awaknyan nyang lumpah that le na lagee anou di pasi. guda dan geuritan prang awaknyan pi lumpah le. banmandum raja-raja nyan jimeugabong dan jijak laju meusajan-sajan u markas nyang to ngon krueng merom keu jijak prang israel. tuhan meufeuereuman ubak yosua, "bek gata takot keu awaknyan. bak watee nyang lagee nyoe oh singoh beungoh, awaknyan mandum ka ulon poh mate deumi israel. guda awaknyan haroh gata peulapee, dan geuritan-geuritan prang awaknyan haroh teuma gata tot." teuma yosua deungon banmandum tantra geuh nyan laju geujak prang musoh nyan seucara meudadak to ngon aneuk krueng merom. dan tuhan geupeumeunang umat israel ateuah awaknyan. ureueng israel sira jimpuprang laju jititueub awaknyan sampoe u misrefot-maim dan sidon di siblahi utara, dan trok laju sampoe jioh jih u panton mizpa di siblahi utimu. meuprang nyang gura ngon hebat that nyan hana putoh-putoh sampoe musoh habeh dumna hana meusidroe pi nyang na tinggai – banmandum awaknyan mate. yosua geupeubuet nyan u ateuah awaknyan susiai deungon peue nyang ka geupeurintah le tuhan ubak gobnyan: meunan cit guda awaknyan geupeulapee, dan geuritan-geuritan prang awaknyan geutot banmandum. oh ka seulesoe nyan yosua laju geugisa, dan geureubot lom teuma hazor nyang nibak wateenyan na kheueh nyang paleng teuga lamkawan banmandum keurajeuen nyang na disinan. banda nyan geutot, meunan cit deungon raja dan mandum peunduduek jih geupoh mate; hana meusidroe pi nyang na geupeubiyeu udeb. bubena banda-banda nyan ka geureubot le yosua, dan raja-raja nyang na disinan geudrob dan geupoh mate paih lagee peurintah tuhan ubak nabi musa, hamba tuhan nyan. teuma banda-banda nyang jipeudong di ateuah buket-buket puing, nyan hana meusabohpi jitot le ureueng israel, keucuali hazor nyang geutot le yosua keudroe. banmandum peunduduek banda-banda nyan geupoh mate; hana meusidroe nyang na geupeubiyeu udeb. teuma banmandum barang-barang awaknyan nyang meuyuem lom meuhai meunan cit deungon beulatang peulara awaknyan jicok le ureueng israel jeuet keuhak milek awaknyan. banmandum nyang geupeurintah le tuhan ubak nabi musa, hamba geuhnyan, ka geupeusampoe le nabi musa ubak yosua, dan geupeubuet teuma le yosua; hana meusapeue pi nyang hana geupeubuet peurintah nabi musa nyan. yosua geureubot laju banmandum nanggroe nyan – daerah gunong-gunong, daerah gaki gunong, bah kheuehnyan nyang di utara meunan cit nyang di seulatan; meunan cit banmandum wilayah gosyen dan daerah padang tandus dis-

iblahi u seulatan gosyen, meunan cit deungon panton yordan. luwah daerah nyan phon nibak gunong-gunong ueh disiblahi u seulatan nyang to ngon edom, trok utara nyang jioh jih u baal-gad di panton libanon siblahi u seulatan gunong hermon. treb that-that yosua jimpuprang deungon raja-raja di daerah nyan, teuma akhe jih awaknyan jidrob dan jipoh mate awaknyan banmandum. nibak banmandum banda-banda nyang di dalam wilayah nyan, hana meusaboh bandapi nyang na jipeuget peujanjian deungon israel, keucuali gibeon, banda bansa hewi. mandum banda nyang laen ka geupeutaloe banmandum bak watee meuprang nyan. tuhan ka geupeu jeuet awaknyan keu ureueng kreueh ate mangat jimpuprang deungon israel, mangat jeuet awaknyan teupeu habeh banmandum ateuah rhueng bumoe nyoe, dan teupeu mate banmandum paih lagee peurintah tuhan ubak nabi musa. bak watee nyoe cit teuma yosua geujak peuhanco bansa anak, na kheueh bansa raksasa nyang raya badan lagee gogasi awaknyan tinggai di daerah gunong-gunong – di hebron, debir, anab, dan bansaboh daerah gunong-gunong yehuda dan israel. awaknyan banmandum geupoh mate le yosua, dan meunan cit deungon banda-banda awaknyan mandum geupeu hanco rata ngon tanoh. hana meusidroe pi nibak bansa anak nyan nyang na tinggai keubijeh di daerah israel, teuma di gaza, gat, dan asdod nyang mantong na. banmandum nanggroe nyan ka geureubot le yosua paih deungon nyang geupeurintah le tuhan ubak nabi musa, laju nanggroe nyang geureubot nyan geubri ubak bansa israel jeuet keu milek awaknyan. nanggroe nyan geupeuweuk-weuk keu tieb-tieb sukee nyan meuteume saboh jeumba. bansa israel pi jipioh laju jimpuprang dan nanggroe pi aman seuntosa. daerah di siblahi u timu yordan, phon nibak panton krueng arnon teungoh laju u panton yordan sampoe jioh jih u gunong hermon disiblahi utara, ka teureubot dan jiduek le ureueng israel. na dua droe raja nyang awaknyan peutaloe. nyang sidroe nan jih sihon, raja amori nyang teupat duek jih di hesybon. daerah keukuasaan jih nyan siladum daerah gilead: na kheueh phon di aror (nibak bineh panton arnon) dan banda nyang na bak teungoh-teungoh panton nyan trok laju u krueng yabok to ngon bataih daerah bansa amon; meunan cit jitamong daerah panton yordan di siblahi utimu, phon nibak danau galilea u arah seulatan trok laju u betyesimot (disiblahi u timu laot mate), trok laju u gaki gunong pisma. raja nyang laen nyang jipeutaloe le ureueng israel na kheueh laju og nibak nanggroe basan, nyang teupat tinggai di asyatarot dan edrei. jihnyan na kheueh sidroe lamkawan nyang na tinggai nibak bansa refaim. wilayah keukuasaan jihnyan na kheueh gunong hermon, salkha, dan banmandum basan sampoe laju u daerah gesur dan maakha; meunan cit jitamong keunan siparoe nibak daerah gilead sampoe ka trok u daerah nyang jimat kuasa le raja sihon di banda hesybon. nyan kheueh bandua droe raja nyang ka geupeutaloe le nabi musa meusajan-sajan deungon bansa israel. tanoh raja-raja nyan geubri le nabi musa, hamba tuhan nyan, keu sukee ruben, gad dan siteungoh nibak sukee manasye, mangat jeuet keu milek awaknyan. raja-raja nyang geupeu-

taloe le yosua meusajan-sajan deungon bansa israel na kheueh banmandum raja-raja di daerah siblahi ubarat krueng yordan, phon nibak baal-gad di panton libanon laju trok u gunung-gunong ueh nyang tho hana hase jitimoh sapue di siblahi u seulatan to ngon edom. daerah nyan geubagi-bagi le yosua keu sukee-sukee bansa israel mangat jeuet keutano hak milek awaknyan. wilayah nyan jitamong cit daerah gunung-gunong, daerah gaki buket di siblahi ubarat, panton yordan deungon daerah gaki buket jihnyan, daerah lereng-lereng di siblahi utimu, dan daerah padang pasi di siblahi u seulatan. daerah-daerah nyan na kheueh daerah beukaih tempat tinggai bansa het, amori, kanaan, feris, hewi dan yebus. raja-raja nyang geupeutaloe nyan, jeumeulah jih na lhee ploh sa droe; na kheueh raja-raja nibak banda nyang teupeugah nyoe: yerikho, ai (to ngon betel), yerusalem, hebron, yarmut, lakhis, eglon, gezer, debir, geder, horma, arad, libna, adulam, makeda, betel, tapuah, hefer, afek, lasaron, madon, hazor, simron-meron, akhsaf, taanakh, megido, kedese, yokneam (di karmel), dor (di pante), gozim (di galilea) dan tirza. jinoenye yosua ka tuha that-that. tuhan meufureuman ubak yosua, "gata ka tuha, yosua! teuma mantong jai that daerah nyang haroh teureubot: banmandum wilayah filistin dan gesur, dan banmandum wilayah awi u arah seulatan. (daerah nibak krueng sikhon nyang meubataih deungon nanggroe meuse trok u bataih ngon ekron di siblahi utara, mandum nyan teuhitong daerah bansa kanaan; dan raja-raja filistin tinggai di gaza, asdod, askelon, gat, dan ekron.) meunan cit atranyan haroh teureubot: banmandum daerah kanaan dan meara (atra bansa sidon), trok laju u afek to ngon bataih bansa amori; oh ltheuehnyan daerah bansa gebal, dan mandum daerah libanon u arah timu, phon di baal-gad disiblahi u seulatan gunung hermon, laju rhot u jalan nyang teutuju u hamat. meunan cit jitamong keunan banmandum wilayah ureueng sidon, nyang tinggai di daerah gunung-gunong lamkawan gunung-gunong libanon dan misrefot-maim." "banmandum bansa-bansa nyan teuma ulon use singoh, bak watee ureueng israel jikak prang awaknyan," kheun tuhan ubak yosua. "tano nyang haroh kheueh gata bagi-bagi keu umat israel mangat jeuet keu tano milek awaknyan, lagoon nyang ka ulon peurintah ubak gata. le sababnyan, jinoenye gata bagi-bagi kheueh laju tano nyang keu ban sikureueng boh sukee dalam bansa israel, dan keu siladum keu sukee manasye, mangat atranyan jeuet keu tano milek awaknyan." sukee ruben dan gad meunan cit deungon siladum sukee manasye ka jiteurimong jeumba jih tano nyang nibak nabi musa, hamba tuhan nyan; na kheueh tano di siblahi utimu krueng yordan. wilayah awaknyan jitamong keunan aroer (nibak bineh panton krueng arnon), dan banda nyang na di teungoh-teungoh pantonnyan. dan bagian darat nyang manyang nibak medeba sampoe trok u dibon. dan meunan cit trok u bataih daerah amon, jitamong cit keunan banmandum banda nyang ka ltheueh jikuasa le sihon, raja amori, nyang jiduek di hesybon. meunan cit jitamong keunan daerah gilead, daerah nyang rab that ngon gesur dan maakha, meunan cit banmandum gunung hermon, dan mandum

daerah basan trok u salkha. daerah awaknyan meunan cit jitamong daerah keukuasaan raja og, ureueng refaim nyang paleng duode nyang mat peurintah di asyatarot dan edrei. nabi musa ka geupeutaloe bansa-bansa nyan dan geu use awaknyan mangat jiteubiet nibak daerah droe jih nyan. teuma peunduduek gesur dan maakha hana ji use le ureueng israel; awaknyan mantong na tinggai di israel. sukee lewi awaknyan hana geuteurimong jeumba tano nibak nabi musa, sabab tuhan ka geupeugah ubak nabi musa bahwa jeumba sukee lewi na kheueh nibak keureubeuen-keureubeuen nyang teutot di ateuh miseubah keu tuhan po teu allah israel. siladum nibak tano nyang geupeujanji le tuhan keu umat israel nyan ka geubri le nabi musa keu keuluwarga-keuluwarga lam sukee ruben, mangat jeuet keu tano hak milek droe awaknyan. wilayah awaknyan jitamong mandum aroer (nibak bineh panton krueng arnon) dan banda nyang na di teungoh-teungoh panton nyan trok laju u bansaboh darat manyang nyang to ngon medeba; meunan cit deungon hesybon dan banmandum banda di darat nyang manyang nyan, na kheueh: dibon, bamot-baal, bet-baal-meon, yahas, kedemot, mefaat, kiryataim, sibma, zeret-hasahar nyang na teuduek di ateuh buket di panton nyan, bet-peor, lereng-lereng gunung pigsa, dan bet-yesimot. ltheueh nyan jitamong cit keunan banmandum banda nyang na di darat nyang manyang nyan, dan banmandum keukuasaan sihon, raja bansa amori, nyang yoh masa ilee tempat jihnyan na hesybon. gobnyan dan nyang mat kuasa midian pih, na kheueh: ewi, rekem, zur, hur, dan reba, mandum nyan ka geupeutaloe le nabi musa. dan mandum nyang mat kuasa nyan ka ltheueh jipeurintah nanggroe nyan keu raja sihon. lamkawan ureueng nyang geupoh mate le bansa israel na cit rhoh keunan bileam aneuk beor, tukang ramai naseb gob. krueng yordan na kheueh sibagoe bataih bagian barat sukee ruben. nyan kheueh banda-banda dan gampong-gampong nyang geubri keu keuluwarga-keuluwarga dalam sukee ruben mangat jeuet keu tano milek awaknyan. siladum nibak tano nyang ka geupeujanji le tuhan keu umat israel nyan meunan cit ka geubri keu nabi musa ubak keuluwarga-keuluwarga dalam sukee gad, mangat jeuet keuhak milek awaknyan. wilayah awaknyan jitamong cit yaezer dan banmandum banda di gilead meunan cit siladum nibak daerah bansa amon trok laju nyang jioh jih sampoe u aroer di siblahi u timu raba; daerah di hesybon sampoe u ramat-mizpa dan betonim, meunan cit deungon daerah nibak mahanaim trok laju ubak bataih lodebar, banmandum nyan jitamong teuma lam wilayah keu sukee gad. di panton yordan, wilayah sukee gad nyan jitamong cit keunan bet-haram, bet-nimra, sukot dan zafon, na kheueh seuh daerah keukuasaan raja sihon di hesybon. bataih siblahi u barat sukee gad nyan na kheueh krueng yordan sampoe laju jioh jih ubak danau galilea di siblahi utara. nyan kheueh banda-banda dan gampong-gampong nyang geubri keu keuluwarga-keuluwarga lam sukee gad mangat jeuet keu tano milek awaknyan. siladum nibak tano nyang ka geupeujanji le tuhan ubak umat israel meunan cit atranyan ka geubri le nabi musa ubak keuluwarga-

keuluwarga siladam nibak sukee manasye mangat jeuet keuhak milek awaknyan. bataih-bataih wilayah awaknyan trok u mahanaim, jitamong cit keunan banmandum basan – na kheueh mandum wilayah keukuasaan og, raja basan, dan meunan cit ban nam ploh gampong-gampong yair di basan. seulanjut jih jitamong cit keunan siteungoh nibak daerah gilead, meunan cit asytarot dan edrei, na kheueh bandua ma banda wilayah keukuasaan raja og di basan. banmandum wilayah nyan geubri siladam keu keuluwarga-keuluwarga keuturonan makahir, aneuek manasye. meunan kheueh nabi musa geubagi tanoh bagian u timu yerikho, di meurandeh krueng yordan, bak watee gobnyan na di daratan miyueh moab. teuma sukee lewi meubacut pi hana meuteume tanoh nibak nabi musa. nabi musa geupeugah ubak awaknyan bahwa jeumba nyang geubri keu awaknyan na kheueh nibak keureubeuen-keureubeuen nyang jipeuseumah ubak tuhan po teu allah israel. oh lheuehnyan nyoe na kheueh kisah keuhai pakriban nanggroe kanaan disiblahi u barat krueng yordan geubagi-bagi keu umat israel. nyang peuweuk tanoh nyan keu umat israel na kheueh teungku imeum eleazar, yosua aneuek nun, dan ulee-ulee keuluwarga nyang na didalam sukee-sukee bansa israel. lagee peue nyang ka geupeurintah le tuhan ubak nabi musa, daerah-daerah di siblahi ubarat krueng yordan nyang ka geupeuteuntee keu sikireueng si teungoh sukee bansa israel, haroh atranyan teubabi-bagi meunurot nyang teu undi. tanoh nyang di siblahi u timu krueng yordan nyan ka geubri le nabi musa ubak banda siteungoh sukee bansa nyang laen nyan teuma. (peureulee teucetet disinoe bahwa keuturonan nabi yusuf teubagi u dalam dua boh sukee: sukee manasye dan sukee efraim.) keuhai sukee lewi, awaknyan hana meuteume tanoh nyang geubri le nabi musa keu awaknyan. keu awaknyan teuma geubri banda-banda mantong keu tempat tinggal, meunan cit geubri padang naleueng keu tempat rabe leumo dan bubiri awaknyan. meunan kheueh cara jih umat israel geubagi-bagi tanoh nyan sisuai deungon nyang ka geupeurintah le tuhan ubak nabi musa. bak si uroe ureueng-ureueng nibak sukee yehuda jiteuka ubak yosua di gilgal. sidroe nibak awaknyan na kheueh kaleb aneuek yefune ureueng kenas, jipeugah, "yosua! droeneueh neuteupeue peue nyang geupeugah le tuhan ubak nabi musa, utosan po teu allah nyan, di kades-barnea keuhai droeneueh dan ulon. ulon meu umu peuet ploh thon bak watee nabi musa, hamba tuhan nyan, geu kirem ulon di kades-barnea sibagoe mata-mata mangat lon jak seulidek nanggroe nyoe. dan laju teuma ulon gisa ubak gobnyan sira ulon ba laporan nyang jujoe. ureueng-ureueng jijak deungon ulon, teupeujeuet umat israel keuteumakot. teuma ulon teutab seutia ulon taat ubak tuhan po teu allah ulon. dan le sabab nyan, nabi musa geupeujanji bahwa tanoh nyang ulon jeulajah nyan pasti teuma geubri keu ulon dan aneuek-anuek ulon jeuet keuhak milek kamoe keu siumu masa. jinoenyoe ka peuet ploh limong thon yoh tuhan geupeugah hai nyan ubak nabi musa. nyan teujadi bak watee bansa israel teungoh jijak meugeumbara di padang pasi. dan lagee nyang ka geupeujanji le

tuhan, tuhan pi ka geulindong ulon sampoe ulon teutab udeb sampoe an jinoe. neu eue kheueh, jinoenyoe ulon ka meu umu lapan ploh limong thon, teuma mantong teuga lagee yoh masa nabi musa geu utus ulon. ulon mantong na teunaga nyang seb keu lon meuprang atawa keu ulon peubuet peue mantong. le sabab nyan, neubri kheueh jinoenyoe daerah gunong-gunong nyang ka geupeujanji le tuhan keu ulon bak watee ulon dan ureueng-ureueng nyang na meusajan deungon ulon meugisa kamoe jakba laporan. bak watee nyan droeneueh keudroe ka neudeungoe, bahwa disinan na bansa nyang raya lagee gogasi nyang geupeunan bansa anak. awaknyan tinggal di dalam banda-banda rayeuk nyang meubinteh beuton. mungken tuhan teuma geutulong ulon, sampoe ulon hase lon use awaknyan, lagee nyang geupeugah le tuhan." teuma yosua laju geubri restu keu kaleb aneuek yefune, laju geubri keu jih nyan banda hebron jeuet keu tanoh hak milek jih. trok nibak uroenyoe banda nyan jeuet keuhak milek pusaka keuturonan kaleb aneuek yefune, ureueng kenas nyan, sabab gobnyan seutia dan taat ubak tuhan, allah ureueng israel. yoh watee ilee hebron geupeunan banda arba. (arba na kheueh ureueng nyang paleng rayeuk lamkawan bansa anak.) teuma nanggroe nyan aman seuntosa sabab hana jipeukaru le deungon meuprang. keuluwarga-keuluwarga nibak sukee yehuda jiteurimong teuma jeumba tanoh deungon bataih-bataih jih na kheueh lagee nyoe: di siblahi seulan, daerah nyan meureuntang trok bak ujung nyang paleng seulan daerah padang pasi zin atranyan ngon bataih edom; phon nibak ujung seulan laot mate, trok laju u seulan rot reuleung-reuleung gunong di akra-bim sampoe zin. lheueh nyan rot seulan kades-barnea, laju rot hebron, teungoh u adar, oh lheueh nyan teuwet laju u arah karka. beudoh inan trok laju u azmon, laju teujak rot sithot aneuk krueng nibak bataih ngon nanggroe meuse, oh lheueh nyan baro kheueh trok ubak tempat nyang keuneulheuh di laot teungoh. nyan kheueh gareh bataih siblahi u seulan daerah keu sukee yehuda. dan gareh bataih nyan sibagoe gareh bataih siblahi u seulan bansaboh nanggroe israel. disiblahi u timu, bataih jih na kheueh laot mate, laju u utara trok teuma ubak babah kuala krueng yordan. di siblahi utara, bataih jih phon nibak babah kuala krueng yordan, teungoh laju u bet-hogla, laju trok u bataih panton yordan. phon sinan bataih siblahi utara nyan teungoh laju lom u utara sampoe laju ubak batee bohan (bohan na kheueh aneuek ruben), oh lheueh nyan jak laju u panton keususahan sampoe trok u debir, laju wet teuma u utara nibak arah gilgal di tempat nyang meuhadab keu deungon reuleung-reuleung gunong di adumim di siblahi u seulan panton nyan. beudoh sinan jak laju teuma ubak mata ie en-semes, laju trok u en-rogel, oh ka lheueh eklom meulalu panton hinom u siblahi seulan buket, disinan teudeuk yerusalem, banda ureueng yebus. phon disinan gareh bataih nyan teutuju ubak pucak gunong nyan di siblahi u barat panton hinom, di ujung utara panton refaim, oh lheueh nyan trok laju ubak mata ie me-neftoah, trok u banda-banda nyang to ngon gunong efron. beudoh sinan gareh bataih daerah

nyan wet laju u arah baala (na kheueh kiryat-yearim), dan teukeulileng bagian barat baala u arah gunong-gunong edom, laju trok u bagian utara gunong yearim (na kheueh gunong kesalon), dan teutron laju u bet-
semes, oh lheureh nyan jak laju u timna. beudoh di timna, gareh bataih oh lheureh nyan teutuju u siblahi
utara gunong ekron, laju teuwet u arah sikron, li-
wat rot gunong baala, laju u yabneel, dan akhe jih
u laot teungoh, nyan na kheueh gareh bataih siblahi
ubarat wilayah sukee yehuda. didalam wilayah nyan
tinggai ureueng-ureueng nibak keuluwarga dalam
sukee yehuda. paih lagee peue nyan ka geupeur-
intah le tuhan ubak yosua, siladum nibak daerah
yehuda geubri keu kaleb aneuek yefune nibak sukee
yehuda. keu gobnyan teubri laju hebron, na kheueh
banda atra arba, aneuek enak. keuturonan enak na
kheueh ureueng sesai, ahiman dan talmai. kaleb ji
use laju awaknyan banmandum nibak hebron. beu-
doh sinan gobnyan jijak prang laju ureueng-ureueng
nyan na tinggai di debir. (banda nyan yoh masa
dilee meusyehu deungan nan kiryat-sefer.) geupeu-
gah le kaleb, "barang sigasoe nyang reubot kiryat-
sefer, ureuengnyan jeuet jimeukawen ngon aneuek
inong ulon nyan nan jih akhsa." otniel, aneuek ni-
bak syedara kaleb nyan nan jih kenas, jireubot ban-
danyan; le nyan teuma kaleb laju jibri akhsa, aneuek
jih nyan, jeuet keubinoe otniel. bak uroe meukawen
awaknyan, otniel jipaksa akhsa mangat jilakee saboh
keubeueng tanoh ubak ayah geuhnyan. teuma jitreun
kheueh laju akhsa di ateuhe keuleudee jihnyan, laju
kaleb geutanyong ubak jih nyan peue nyan jila-
kee. akhsa geujawueh, "ulon meulakee meupadub
boh mata ie, sabab tanoh nyang bapak brinyan keu
ulon na kheueh teumpat jih di ateuhe tanoh nyang
tho." teuma kaleb laju geujok keu jihnyan mata ie
nyang na dibagian pucok dan mata ie nyan na di
baroh. lheureh nyan teuma nyoe na kheueh tanoh
nyang geubri keu keuluwarga-keuluwarga nibak su-
kee yehuda mangat jeuet keuhak milek awaknyan.
banda-banda nyang paleng jioh dibagian seultan,
nyang ka jeuet keu jeumba yehuda, na kheueh nyang
teudek nibak bataih edom, banmandum nyan na
dua ploh sikureueng boh banda, ka jitamong keunan
gampong-gampong nyang na rab-rab deungan nyan.
banda-banda nyan na kheueh: kabzeel, eder, yagur,
kina, dimona, adada, kedes, hazor, yitnan, zif, telem,
bealot, hazor-hadata, keriot-hezron (na kheueh ha-
zor), amam, sema, molada, hazar-gada, hesmon, bet-
pelet, hazar-sual, bersyeba, baala, iyim, ezem, elto-
lad, khesil, horma, ziklag, madmana, sansana, lebaot,
silhim, ain, dan rimon. banda-banda, nyang jita-
mong cit keunan gampong-gampong nyang na sil-
ingka nyan, nyang na nibak gaki-gaki buket, banman-
dum nyan na peuet blaih boh banda, banda-banda
nyan na kheueh: esytaol, zora, asna, zanoah, en-
ganim, tapuah, enam, yarmut, adulam, sokho, azeka,
saaraim, aditaim, gedera dan gederotaim. meunan cit
nam blaih boh banda nyang teupeugah nyoe jitamong
teuma keunan gampong-gampong nyang na ban-
sikeulileng nyan: zenan, hadasa, migdal-gad, dilean,
mizpa, yokteel, lakhis, bozkat, eglon, khabon, lah-
mas, khitlis, gederot, bet-dagon, naama dan makeda.
meunan cit sikureueng boh banda nyang teupeu-

gah nyoe jitamong teuma keunan gampong-gampong
nyang na bansikeulileng nyan, banda-banda nyan na
kheueh: libna, eter, asan, yiftah, asna, nezib, ke-
hila, akhizib dan maresa. meunan cit ekron deungan
banda-banda ubit dan gampong-gampong nyang na
bansikeulileng nyan, meunan cit banmandum banda-
banda dan gampong-gampong nyang na dikeulileng
asdod, nibak ekron trok u laot teungoh. meun-
an cit teuma deungan asdod dan gaza deungan
banda-banda ubit dan gampong-gampong nyang na
meutabu sampoe karab ngon aneuk krueng nibak
bataih deungan nanggroe meuse dan pante laot te-
ungoh. di daerah gunong-gunong na teuma siblahi
boh banda meunan cit deungan gampong-gampong
nyang na bansilingka nyan: samir, yatir, sokho,
dana, kiryat-sana (na kheueh debir), anab, estemoa,
anim, gosyen, holon dan gilo. meunan cit deun-
gon sikureueng boh banda nyang teupeugah nyoe,
jitamong lom keunan gampong-gampong nyang na
bansilingka nyang rab-rab ngon nyan: arab, duma,
esan, yantum, bet-tapuah, afeka, humta, kiryat-arba
(na kheueh hebron) dan zior. meunan cit deun-
gon siploh boh banda nyang teupeugah nyoe jita-
mong cit keunan gampong-gampong nyang na nyang
rab-rab di bansikeulileng nyan: maon, karmel, zif,
yuta, yizreel, yokdeam, zanoah, kain, gibeal dan
timna. dan nam boh banda nyang teupeugah lom
nyoe, meusajan-sajan ngon gampong nyang na ban-
sikeulileng nyan: halhul, bet-zur, gedor, maarat, bet-
anot, eltekon. dan dua boh banda nyang teupeugah
nyoe jitamong cit keunan gampong-gampong nyang
na bansikeulileng: banda kiryat-baal (na kheueh
kiryat-yearim) dan banda raba. di daerah padang pasi
nyang meuguron, na teuma nam boh banda nyang
teupeugah nyoe jitamong cit deungan gampong-
gampong nyang na bansikeulileng nyan: bet-araba,
midin, sekhakha, nibsan, banda sira dan en-gedi.
banda yerasalem nyan jitamong cit keunan atra milek
yehuda, teuma di ureueng yehuda nyan hana hase
jiuse ureueng yebus nyang na tinggai disinan. sampoe
an saatnyoe ureueng yebus nyan mantong na tinggai
meusapat ngon ureueng yehuda nyang na tinggai
nibak bandanyan. gareh-gareh bataih tanoh nyang
ka geutunyok keu keuturonan nabi yusuf, phon ni-
bak krueng yordan nyang rab ngon yerikho, siblahi
utimu mata ie yerikho sampoe trok u padang pasi.
phon di yerikho gareh nyan ji ek laju trok u be-
tel di daerah meugunong-gunong. phon di betel,
gareh nyan jituju laju u arah lus, liwat atarot, na
kheueh teumpat tinggai ureueng arki. phon nibak
teumpatnyan gareh nyan teutuju teuma u barat u
daerah kawom yaflet, sampoe u bet-horon-baroh,
trok laju u gezer, laju akhe jih di laot teungoh. nyan
kheueh daerah nyang geubri keu sukee manase dan
efraim, keuturonan nabi yusuf, mangat jeuet keu
tanoh hak milek awaknyan. lheurehnyan teuma ji-
noenyoe na kheueh bataih-bataih tanoh nyang geubri
ubak keuluwarga-keuluwarga nibak sukee efraim.
disiblahi u timu, gareh bataih tanoh awaknyan phon
di atarot-adar trok laju u bet-horon-tunong, teutuju
laju u laot teungoh. mikhmetat na disiblahi utara
nyan. disiblahi u timu nyan, gareh bataih nyan teu
wet laju u arah taanat-silo, laju teuliwat nyan nibak

siblahi u timu teutuju u yanoah. dan phon disinan gareh nyan jitreun teuma u atarot dan naharat, laju trok rot bineh yerikho dan akhe jih di krueng yordan. di siblahi u barat, gareh bataih efraim nyan phon nibak tapuah sampoe ubak aneuk krueng kana, laju akhe jih di laot teungoh. nyang kheueh tanoh nyang geubri keu keuluwarga-keuluwarga nibak sukee efraim, mangat jeuet keu hak milek awaknyan, jitamong cit keunan na mupadub boh banda ubit-ubit dan gampong nyang na teuduek lam wilayah manasye. teuma le sukee efraim hana ji-use ureueng kanaan nibak daerah gezer. nyang kheueh sabab jih ureueng kanaan nyan sampoe an jinoo mantong na tinggai di gezer meusajan-sajan deungon ureueng efraim, teuma awaknyan jipaksa meubuet sibagoe namiet keu ureueng efraim. siladum daerah nyang na di bagian barat krueng yordan geubagi teuma keu keuluwarga-keuluwarga nibak keuturonan manasye, aneuek tuha nabi yusuf. makhir, bapak nibak gilead, na kheueh aneuek tuha nibak manasye. sabab gobnyan sidroe pejuang, teuma daerah gilead dan basan nyang teuduek di siblahi u timu krueng yordan teu-jok laju keu gobnyan. daerah disiblahi ubarat krueng yordan geubri teuma keu keuluwarga-keuluwarga nyang laen nyang rhoh jitamong u dalam keuturonan manasye, na kheueh keuluwarga: abiezer, helek, asriel, sekhem, hefer dan semida; banmandum nyan na kheueh keuturonan ureueng agam nibak manasye aneuek nabi yusuf. awaknyan na kheueh ulee-ulee keuluwarga. zelafehad aneuek hefer, cucoe gilead (gilead nyan na kheueh aneuek makhir, cucoe manasye), gobnyan hana meu aneuek nyang agam, nyang na aneuek inong, nan aneuek-aneuek nyan na kheueh: makhla, noa, hogla, milka, tirza. awaknyan laju jijak meuhadab ubak teungku imeum eleazar, yosua aneuek nun meunan cit deungon bubena peumimpin, dan geupeugah lagee nyoe, "tuhun meufeuruman ubak nabi musa bahwa kamoe nyoe haroh kheueh meusajan-sajan beumeuteume tanoh lagee syedara-syedara kamoe nyang agam." le sabab nyan, lagee nyang ka geupeurintah le tuhan, bahwa aneuek-aneuek inong zelafehad nyan teubri tanoh meusajan-sajan deungon syedara-syedara awaknyan nyang agam. deungon na lagee nyan, bukan teuma keuturonan agam nibak manasye nyang meuteume jeumba tanoh nyang teubagi, teuma keuturonan gobnyan nyang inong meuteume cit teuma. nyang kheueh sabab jih pakon sukee manasye geubri siploh boh jeumba, seulaen tanoh gilead dan basan di siblahi u timu krueng yordan. tanoh gilead geubri keu keuturonan manasye nyang laen. gareh-gareh bataih wilayah sukee manasye nyan phon nibak asyer u mikhmetat di siblahi u timu sikhem. nibak sinan gareh nyan jitreun u seulant trok laju u daerah kawom en-tapuah. daerah tapuah nyan na kheueh atra sukee manasye, teuma banda tapuah, nibak bataih, na kheueh milek keuturonan efraim. seulanjut jih gareh bataih wilayah manasye nyan jitreun laju sampoe trok u aneuk krueng kana. banda-banda nyang na di siblahi u seulant aneuk krueng nyan na kheueh atra efraim, bah kheueh nyan na didalam wilayah manasye. gareh bataih wilayah manasye nyan seulanjut jih jisithot laju rot siblahi

utara aneuk krueng nyan, laju akhe jih di laot teungoh. meunan kheueh efraim ka na disiblahi u seulant, dan manasye di siblahi utara, dan laot teungoh na kheueh bataih awaknyan di siblahi ubarat. di barat laot, wilayah sukee manasye nyan meubataih teuma deungon asyer, dan disiblahi timu laot, meubataih teuma deungon wilayah isakhar. di dalam wilayah isakhar dan asyer nyan na teuma tanoh-tanoh atra manasye, tanoh-tanoh nyan na kheueh: bet-sean dan yibleam jitamong teuma keunan deungon gampong-gampong nyang na di sikeulileng nyang to-to deungon nyan. meunan cit: dor (banda nyang teuduek nibak bineh laot), en-dor, taanakh, megido deungon gampong-gampong nyang na to-to bankeulileng nyan. teuma sukee manasye nyan hana hase ji-use peunduduek banda-banda nyan; nyang kheueh sabab jih di ureueng kanaan mantong teutab na tinggai disinan. bah kheueh singoh teuma bak watee ureueng israel ka leubeh teuga, awaknyan hana ji-use banmandum ureueng kanaan; teuma awaknyan jipaksa ureueng kanaan nyan jimeukeureuja keu awaknyan. keuturonan nabi yusuf jipeugah ubak yosua, "pakon keukamoe neubri tanohnyan cit saboh bagi mantong, padahai kamoe lumpah that jai, sabab tuhan ka geubri beureukat keu kamoe?" geujaweueh le yosua, "sabab awaknyoe jai that-that, dan daerah gunong-gunong efraim nyan lumpah that sampik keu gata, gatajak kheueh laju u daerah ureueng feris dan re-faim. jakkah ngon tajak teubang kheueh laju uteuen baro nyang na di daerah awaknyan." keuturonan nabi yusuf nyan jijaweueh, "daerah gunong-gunong nyan ubit meunan cit sampik that hana seb luwah keu kamoe nyoe, seudangkan bansa kanaan nyang na tinggai di darat nyang miyueb awaknyan seb na banmandum geuritan prang nyang teupeuget nibak beuso bah kheueh awaknyan nyang na tinggai di bet-sean dan gampong-gampong nyan na di sikeulileng nyan, meunan cit deungon awaknyan nyang tinggai di panton yizreel." teuma geupeugah le yosua ubak sukee efraim dan manasye barat nyan, "beutoi, gata rame that-that lom ngon teuga-teuga, dan patot teubri leubeh nibak saboh jeumba tanoh. gata cok kheueh laju di daerah meugunong-gunong, sabab bahpi daerah nyan mantong meu uteuen, gata hase tacah ngon gata teubang dan tabuka laju daerah nyan oh lheurehnyan jeuet teuma gata cok keuhak milek gata banmandum nyan. dan keuhai ureueng-ureueng kanaan nyan, gata jeuet ta use awaknyan, bahpi awaknyan teuga dan na teuma geuritan-geuritan prang nyang teupeuget nibak beuso." oh ka lheureh geupeutaklok nanggrooe nyang ka geupeujanji le tuhan, banmandum umat israel jimeusapat laju di silo, le awaknyan laju jipeudong khimah keuhai tuhan teuka. mantong na tujoh boh sukee bansa israel nyang gohlom jiteurimong jeumba tanoh jih. jadi, yosua laju geupeugah ubak umat israel, "gata preh trok an pajan lom, baro kheueh gata duek ubak nanggrooe nyang geubri le tuhan, po teu allah indatu gata, keu gata? gata pileh kheueh laju lhee droe nibak tieb-tieb sukee. ulon teuma lon yue awaknyan mangat jijak tilek bansaboh nanggrooe nyoe mangat jicetet bataih-bataih daerah nyan awaknyan keuneuk cok nyan. oh lheureh nyan, awaknyan haroh jigisa ubak

ulon. tanohnyan haroh kheueh teubagi jeuet keu tujoh boh bagi. yehuda teutab mantong di wilayah jih nyan di siblahi u seulitan, dan nabi yusuf teutab teuma di wilayah gobnyan di siblahi utara. gamba bataih-bataih ban tujoh bagian tanohnyan haroh teupeuet, dan laju jijok atranyan ubak ulon. teuma ulon rhom undi mangat lon teupeue peue nyang ka geupeuteuntee le po teu allah keu gatanyoe. teuma sukee lewi nyang hana jiteurimong hak jeumba jih ateuh tanoh nyang teubagi nyan meusajan-sajan deungan gata, sabab jeumba awaknyan na kheueh jeuet keu teungku-teungku imeum mangat geupeutimang tuhan. dan keuhai sukee gad, ruben dan siladam sukee manasye, beutoi awaknyan ka jiteurimong jeumba jihnyan di siblahi u timu krueng yordan. nabi musa, hamba tuhan, ka geubri tanoh nyan keu awaknyan." teuma yosua laju geubri peutunyok-peutunyok nyang seulanjut keu ureueng-ureuengnyan, "gata jak tilek kheueh laju bansaboh nanggroe nyoe dan gata peuet kheueh laju gamba bataih-bataih jihnyan; oh lheurehnyan tagisa kheueh lom teuma keunoe bak ulon. teuma ulon rhom undi disinoe di silo mangat ulon teupeue peue nyang ka geupeuteuntee le tuhan keu gata." oh ka lheureh geuteurimong banmandum peutunyok-peutunyok nyan nibak yosua, jijak kheueh laju awaknyan jijak tilek tanoh nyan. bansaboh nanggroenyan jijeulajah le awaknyan, laju jicetet bataih-bataih bantuujoh boh jeumba tanohnyan meunan cit jidafeutar cit teuma banda nyang na didalam nyan. oh ka lheureh seulesoe awaknyan laju jigisa ubak yosua di khimah-khimah di silo. laju le yosua geuboh thon mangat geuteupeue peue nyang geumeuheut le tuhan keu awaknyan. oh lheureh nyan yosua laju geubri jeumba tanoh keu tieb-tieb sukee bansa israel nyang gohlom meuteume jeumba tanoh. phon that teubagi na kheueh tanoh keu keuluwarga-keuluwarga sukee benyamin. jeumba awaknyan na jih lamkawan tanoh sukee yehuda dan tanoh sukee keuturonan nabi yusuf. di siblahi utara, bataih-bataih tanoh awaknyan phon nibak krueng yordan, teungoh laju ubak reuleung disiblahi utara yerikho, oh lheurehnyan ubarat rot daerah meugunong-gunong sampoe jih jih u daerah guiron bet-awen. gareh bataih nyan sampoe laju ubak reuleung di siblahi u seulitan lus (nyang meusyehu sibagoe betel), laju treun u atarot-adar di gunong siblahi u seulitan bet-horon-baroh. nibak siblahi ubarat gunong nyan, gareh bataih tanohnyan teuwet u seulitan teutuju u kiryat-baal (na kheueh kiryat-yearim). kiryat-baal na kheueh atra ureueng yehuda. nyang kheueh gareh bataih tanoh nyan di siblahi ubarat. bataih-bataih disiblahi u seulitan phon nibak bineh kiryat-yearim trok laju ubak mon-mon ie me-neftoah, phon disinan treun laju u gaki gunong nyang meuhadab keue deungan panton hinom nibak ujong utara panton refaim. oh lheureh nyan gareh bataih u seulitan meulalu panton hinom siblahi u seulitan lereng-lereng gunong di nanggroe yebus, laju teutuju u en-rogel, wet laju u utara u en-semes, laju u gelilot di meurandeh sineungoh adumim. oh ka lheurehnyan gareh bataihnyan jitreun laju ubak batee bohan (bohan na kheueh aneuek ruben), laju rot siblahi utara reuleung-reuleung nyang meuhadab

keue deungan panton yordan, oh lheurehnyan treun laju u panton nyan, meulalu utara lereng-lereng gunong bet-hogla, dan akhe jih disiblahi utara laot mate di teupat krueng yordan meukuala. nyan kheueh bataih bagian u seulitan. krueng yordan na kheueh bataih disiblahi utimu. lagee nyan kheueh bataih-bataih tanoh nyang geubri keu keuluwarga-keuluwarga dalam sukee benyamin mangat jeuet keuhak milek awaknyan. banda-banda nyang jipo jeuet keu hak milek le keuluwarga-keuluwarga sukee benyamin, banmandum nyan na dua blaih boh banda jitamong cit keunan deungan gampong-gampong nyang na rab-rab di sikeulileng nyan, atranyan na kheueh: yerikho, bet-hogla, emek-kezis, bet-araba, zemaraim, betel, haawim, para, ofra, kefar-haamonai, ofni dan geba. meunan cit peuet blaih banda nyang seulanjut jihnyoe jitamong cit keunan deungan gampong-gampong nyang na di sikeulileng nyan, atranyan na kheueh: gibeon, rama, beerot, mizpa, kefira, moza, rekem, yirpeel, tarala, zela, elef, yebus (na kheueh yerusalem), gibeon dan kiryat-yearim. nyan kheueh tanoh-tanoh nyang geubri keu keuluwarga-keuluwarga dalam sukee benyamin mangat jeuet keuhak milek awaknyan. peumbagian nyang keu dua na kheueh tanoh keu keuluwarga-keuluwarga simeon. bataih tanoh awaknyan jitamong lam bataih tanoh milek sukee yehuda. bak awaknyan geubri lhee blaih boh banda meunan cit deungan gampong-gampong nyang na bankeulileng nyan: bersyeba, syeba, molada, hazar-sual, bala, ezem, eltolad, betul, horma, ziklag, bet-hamarkabot, hazar-susa, bet-lebaot, dan saruhen. meunan cit peuet boh banda nyang seulanjut jihnyoe jitamong cit keunan deungan gampong-gampong nyang na ban sikeulileng nyan: ain, rimon, eter, dan asan. jitamong cit keunan banmandum gampong nyang na di sikeulileng bandanyan sampoe ka jih u baalat-beer (na kheueh rama) nibak tanoh siblahi u seulitan. nyan kheueh tanoh nyang geubri keu keuluwarga-keuluwarga sukee simeon mangat jeuet keuhak milek awaknyan. sabab tanoh keu sukee yehuda nyan lumpah that luwah, teuma siladam nibak tanoh nyan teujok laju keu sukee simeon. peumbagian nyang keu lhee na kheueh tanoh keu keuluwarga-keuluwarga dalam sukee zebulon. bataih tanoh nyang geubri keu awaknyan trok u sarid. phon di sarid, gareh bataih siblahi u barat teutuju laju u marala, tupeeh teuma dabeset dan aneuk krueng disiblahi u timu yokneam. gareh bataih siblahi u timu phon di sarid teutuju u bak bataih khislot-tabor, trok laju u dobrat, teungoh laju u yafia. phon disinan gareh bataih nyan trok laju u timu u gat-hefer dan et-kazin, laju teu wet u arah nea teutuju u rimon. di siblahi utara, bataih tanohnyan teuwet u arah hanaton dan akhe jih di panton yiftah-el. lam wilayah sukee zebulon nyan jitamong cit teuma na kheueh: katat, nahalal, simron, yidala dan betlehem. daerah awaknyan jitamong u dalam dua blaih boh banda deungan gampong-gampong nyang na bansilingka nyan. banda-banda dan gampong-gampong nyan na dalam daerah nyang geubri keu keuluwarga-keuluwarga didalam sukee zebulon mangat jeuet keu tanoh hak milek awaknyan. peubagian nyang

keu peuet na kheueh keu keuluwarga-keuluwarga dalam sukee isakhar. dalam daerah awaknyan jitamong teuma na kheueh lagee nyoe: yizreel, khesulot, sunem, hafaraim, sion, anaharat, rabit, kisyon, ebes remet, en-ganim, en-hada, dan bet-pazes. bataih tanoh awaknyan keunong keu tabor, sa hazima, bet-semes, laju akhe jih di krueng yordan. daerah awaknyan jitamong u dalam nam blaih boh banda jitamong cit keunan deungon gampong-gampong nyang na di bansikeulileng nyan. banda-banda deungon gampong-gampong nyan na di dalam daerah nyang geubri keu keuluwarga-keuluwarga sukee isakhar mangat jeuet keu tanoh milek awaknyan. peumbagian nyang keulimong na kheueh tanoh keu keuluwarga-keuluwarga di dalam sukee asyer. lam daerah awaknyan jitamong teuma na kheueh lagee nyoe: helkat, hali, beten, akhsaf, alamelekh, amad, dan misal. bataih tanoh awaknyan di siblahi ubarat tupeuh ubak gunong karmel dan krueng libnat. nibak teupatnyan gareh bataih awaknyan tuwet u timu u bet-dagon laju keunong teuma ubak bataih zebulon dan panton yiftah-el teutuju laju u utara u bet-emek dan neheli. laju gareh bataih nyan sampoe laju teutuju u utara u kabul, ebron, rehob, hamon, dan kana, sampoe laju sijioh sidon. nibak teupatnyan gareh bataihnyan tuwet teuma u rama trok laju sampoe u banda tirus, na kheueh saboh banda nyang meu pageue ngon kuta; oh lheurehnyan gareh bataih nyan tuwet teuma lom u hosa laju akhe jih di laot teungoh. dalam bataih-bataih nyan jitamong mahalab, akhzip, uma, afek, dan rehob. banmandum daerah awaknyan jitamong dua ploh dua boh banda ka jitamong keunan gampong-gampong nyang na bansilingka nyan. banda-banda deungon gampong-gampong nyan na didalam daerah nyang geubri keu keuluwarga-keuluwarga didalam sukee asyer mangat jeuet keutanoh hak milek awaknyan. peumbagian nyang keu nam na kheueh tanoh keu keuluwarga-keuluwarga dalam sukee naftali. bataih tanoh awaknyan phon di helef, trok ubak bak kayee ek di zaananim, trok laju u adami-nekeb, laju u yabneel, sampoe laju u lakum, oh lheurehnyan akhe jih di krueng yordan. nibak sinan gareh bataih tanohnyan tuwet laju ubarat u aznot-tabor, dan nibak teupat nyan u hukok. disiblahi u seulant, daerahnyoe jitamong cit deungon daerah zebulon, di siblahi ubarat deungon asyer, dan disiblahi utimu deungon krueng yordan. banda-banda nyang meubinteh ngon kuta na kheueh: zidim, zer, hamat, rakat, kineret, adama, rama, hazor, kedes, edrei, en-hazor, yiron, migdal-el, horem, bet-anat, dan bet-semes. banmandum daerah awaknyan jitamong cit sikureueng blaih boh banda jitamong cit keunan gampong-gampong nyang na bansilingka nyan. banda-banda deungon gampong-gampong jihnyan na didalam daerah nyang geubri keu keuluwarga-keuluwarga dalam sukee naftali mangat jeuet keutanoh hak milek awaknyan. peumbagian nyang keutujuh na kheueh tanoh keu keuluwarga-keuluwarga dalam sukea dan. daerah awaknyan na kheueh jitamong zora, esytaol, ir-semes, saalabin, ayalon, yitla, elon, timna, ekron, elteke, gibeton, baalat, yehud, beneberak, gat-rimon, me-yarkon, rakon, dan meu-

nan cit daerah di bansilingka yope. ureueng-ureueng sukea dan nyan ka gadoh siladam nibak wilayah awaknyan, jadi awaknyan jijak laju u lesem dan laju teuma jiprang bandanyan. lheureh nyan laju jireubot bandanyan, meunan cit deungon peunduduek nyang na didalam bandanyan jipoh mate bube nyang na. teuma tinggai kheueh awaknyan disinan dan geu ubah laju nan kota lesem nyan jeuet keu banda dan, meunurot nan indatu awaknyan. banda-banda meunan cit deungon gampong-gampong nyang na disinan ka rhoh udalam wilayah nyang geubri keu keuluwarga-keuluwarga dalam sukee dan dan mangat jeuet keu hak milek awaknyan keudroe. oh ka lheureh umat israel seulesoe jibagi-bagi tanoh di nanggroe nyan, laju teuma awaknyan geubri keu yosua aneuek nun sibagoe tanoh mangat jeuet keutanoh milek gobnyan. lagee nyang ka geupeurintah le tuhan, awaknyan geubri laju keu gobnyan banda nyang geulakee teuma, atranyan na kheueh: timna-serah di gunong-gunong efraim. yosua geupeudong lom bandanyan, laju geutinggai disinan. meunan kheueh cara jih teungku imeum eleazar, yosua aneuek nun dan bubena ulee keuluwarga dalam sukee-sukee bansa israel geubagi-bagi tanoh nanggroe nyan deungon cara geu rhom undi mangat geulakee peutunyok nibak tuhan. hainyan geupeubet banmandum di silo di babah pintoe khimah tuhan. deungon nyan seulesoe kheueh teubagi tanoh nyan. oh lheureh nyan tuhan meufeureuman ubak yosua mangat geupeugah lagee nyoe ubak ureueng israel, "ulon ka lon peurintah ubak nabi musa mangat gobnyan geupeugah ubak gata keuhai banda teupat meulindong, na kheueh banda-banda teupat ureueng jeuet jibaplueng droe keu jilakee meulindong. jinoenyoe pileh kheueh le gata banda-banda nyan. ureueng nyang poh mate ureueng laen ngon hana jisaja, jeuet jiplueng u banda nyan keu teuhinda nibak ureueng nyang naniet keuneuk balaih dam ateuhe jihnyan. jihnyan jeuet jiplueng ubak saboh lamkawan banda nyan, dan jak laju ubak teupat peungadelan di babah pintoe geureubang banda nyan, laju gata peugah ubak banmandum peumimpen nyang na lam banda nyan peue nyang ka teujadi. peumimpen-peumimpen nyan teuma jibri idhin ureueng nyan keu jitamong lam banda nyan, dan jibri laju keu ureueng nyan teupat tinggai. meunyoe ureueng nyang keuneuk balaih dam nyan jitiyeub awaknyan sampoe ubak banda nyan, peunduduek banda nyan hana jeuet jiseurah ureueng nyan ubak ureueng nyang peucrok nyan. awaknyan haroh jilindong ureueng nyang plueng nyan, sabab jihnyan jipoh mate ureueng laen ngon hana jisaja, dan bukan sabab jibanci. ureueng nyan jeuet tinggai di banda nyan sampoe jihnyan jipeusidang dikeue rakyat ba, dan sampoe ureueng nyang mat jabatan imeum agong bak masanyan meuninggai donya. oh lheureh nyan baro kheueh ureueng nyan jeuet jiwoe u gampong droe jih nibak pane jihnyan jipeuplueng droe." teuma di daerah barat krueng yordan umat israel laju jipeuteuntee banda-banda teupat meulindong: kedes di gunong-gunong naftali di galilea, sikhem di gunong-gunong efraim, dan hebron di gunong-gunong yehuda. nibak daerah siblahi u timu krueng yordan di darat

nyang manyang padang pasi siblahi u timu yerikho, awaknyan laju jipeuteuntee banda-banda nyang teupeugah nyoe sibagoe banda teupat meulindong: banda bezer di wilayah ruben, banda ramot di gilead di wilayah gad, dan banda golan basan, diwilayah manasye. nyan kheueh mandum banda-banda teupat meulindong nyang ka teupeuteuntee keu banmandum bansa israel dan keu banmandum ureueng aseng nyang na tinggai lamkawan awaknyan. soe mantong ureueng nyang jipoh mate ureueng laen ngon hana jisaja, jeuet jilakee meulindong di banda-banda nyan nibak jitiyeub le ureueng-ureueng nyang keuneuk balaah dam ateuheh jih nyan; ureueng nyan hana jeuet teupoh mate meunye gohlohm teusidang dikeue rakyat ba. bak siroe, bubena ulee keuluwarga dalam sukee lewi jijak u silo di nanggroe kana'an, dan oh trok keunan jimeuhadah lubak teungku imeum eleazar, yosua aneuk nun, dan dumna ulee-ulee keuluwarga dalam sukee bansa israel. awaknyan jipeugah, "meulalu nabi musa, tuhan ka geupeurintah ubak kamoe, keu ureueng-ureueng lewi, teubri banda-banda keu teupat tinggai kamoe dan tanoh-tanoh padang nyang na to-to deungon bandanyan keu teupat beulatang peulara kamoe." teuma di ureueng israel jiseutot laju peue nyang ka geupeurintah le tuhan. nibak tanoh atra droe awaknyan keudroe, awaknyan geubri keu ureueng lewi nyang ka teupeuteuntee meunan cit deungon tanoh padang teupat jimeurot beulatang peulara jih. nyang phonphon that jiteurimong banda-banda nyan na kheueh nibak keuluwarga kawom kehat dalam sukee lewi. keuluwarga-keuluwarga nibak keuturonan teungku imeum nabi harun geubri laju lhee blaih boh banda dalam wilayah sukee yehuda, simeon dan benyamin. keuluwarga-keuluwarga nyang laen nibak kawom kehat geubri teuma siploh boh banda nyang na didalam wilayah efraim, sukee dan dan meunan cit sukee manasye nyang na disiblahi ubarat krueng yordan. kawom gerson meuteume teuma lhee blaih boh banda nibak wilayah sukee isakhar, asyer, naf-tali dan sukee manasye nyang na disiblahi utimu krueng yordan. keuluwarga-keuluwarga nibak kawom merari meuteume teuma dua blaih boh banda nibak wilayah sukee ruben, gad dan zebulon. meunan kheueh carajih ureueng-ureueng israel geubagi-bagi banda nyan deungon tanoh-tanoh padang naleueng keu teupat jimeurot beulatang peulara deungon cara teu undi keu ureueng lewi, lagee nyang ka geupeurintah le tuhan meulalu nabi musa. nibak kawom kehat dalam sukee lewi, teungku-teungku imeum keuturonan nabi harun kheueh nyang phon-phon that jiteurimong banda-banda nyan; keu awaknyan geubri teuma lhee blaih boh banda sigoguih deungon tanoh padang naleueng teupat jimeurot beulatang peulara jih nyan. nibak sukee yehuda dan simeon, awaknyan jiteurimong teuma sikureueng boh banda, banda-banda nyan na kheueh: libna, yatir, estemoa, holon, debir, ain, yuta, bet-semes dan arba, nyang teuboh nan meunurot nan ayah enak. bandanyan, nyang jinoenyoe nan jih hebron, na kheueh saboh banda meulindong gunung-gunung yehuda. lampoh ngon blang dan gampong-gampong bandanyoe ka teubri keu kaleb aneuk yefene man-

gat jeuet keu tanoh milek gobnyan. nibak sukee benyamin awaknyan jiteurimong teuma peuet boh banda, banda-banda nyan na kheueh: gibeon, geba, anatot dan almon. keuluwarga-keuluwarga nyang laen nibak sukee kehat teubri teuma siploh boh banda meunan cit deungon tanoh padang naleueng jih. nibak sukee efraim awaknyan jiteurimong teuma peuet boh banda, banda-banda nyan na kheueh: bet-horon, kibzaim, gezer dan sikhem, saboh banda meulindong gunung-gunung efraim. nibak sukee dan awaknyan jiteurimong teuma peuet boh banda, banda-banda nyan na kheueh: elteke, gibeton, ayalon dan gat-rimon. nibak sukee manasye nyang na di siblahi ubarat awaknyan jiteurimong teuma dua boh banda, banda nyan na kheueh: taanakh dan gat-rimon. saboh kawom teuk nyang laen didalam sukee lewi na kheueh kawom gerson. keuluwarga-keuluwarga didalam kawom gerson nyan teubri lhee blaih boh banda meunan cit deungon tanoh blang naleueng teupat teupeurot beulatang peulara jih. nibak sukee manasye nyang na disiblahi u timu awaknyan jiteurimong teuma dua boh banda, banda nyan na kheueh: beestera dan golan, saboh banda meulindong di daerah basan. nibak sukee isakhar awaknyan jiteurimong teuma peuet boh banda, banda-banda nyan na kheueh: kisyon, dobrat, yarmut dan en-ganim. nibak sukee asyer meunan cit awaknyan jiteurimong teuma peuet boh banda, banda-banda nyan na kheueh: misal, abdon, helkat dan rehob. nibak sukee naf-tali awaknyan jiteurimong teuma lhee boh banda, banda-banda nyan na kheueh: hamat-dor, kartan dan kedese, saboh banda meulindong di galilea. kawom nyang na mantong leubeuh dalam sukee lewi, nyan kheueh kawom merari geubri cit teuma dua blaih boh banda sigoe guih deungon tanoh blang teupat teupeurot beulatang peulara. nibak sukee zebulon awaknyan jiteurimong lom peuet boh banda, banda-banda nyan na kheueh: yokneam, karta, dimna dan nahalal. nibak sukee ruben awaknyan jiteurimong lom peuet boh banda, banda-banda nyan na kheueh: bezer, yahas, kedemot dan mefa'at. nibak sukee gad awaknyan jiteurimong teuma peuet boh banda, banda-banda nyan na kheueh: mahana'im, hesybon, yaezer dan ramot, saboh banda meulindong di gilead. deungon nyan, nibak tanoh-tanoh nyang jimilek le sukee israel nyan na jeumeulah jih peuet ploh lapan boh banda deungon tanoh-tanoh blang nyang na ban sikeulileng nyan mangat teubri keu ureueng-ureueng lewi. meunan kheueh tuhan geubri keu umat israel banmandum tanoh nyang ka geupeujanji deungon meusumpah keu indatu awaknyan. oh ka lheeuh jiduek nibak nanggroe nyan, umat israel teutab tinggai disinan. teuma paih lagee peue nyang ka geupeujanji le tuhan keu indatu awaknyan, nanggroe nyan aman that-that sabab geulindong le tuhan. musoh-musoh awaknyan hana meusidroe pi nyang hase jilawan awaknyan, sabab tuhan geupeumeuang keu ureueng israel ateuheh banmandum musoh awaknyan. tuhan geupeutrok ubak tieb-tieb peue nyang ka geumeujanji keu umat israel; hana meusapeue janji pih nyang geumeu uengkie le gobnyan, banmandum janji nyan geupeutrok. oh lheeuh nyan yosua geuhoi laju ureueng nyang nibak sukee

ruben, gad dan siladum nibak sukee manasye nyang na tinggai di siblahi u timu krueng yordan, laju geupeugah ubak awaknyan, "gata ka tapeubuet peupeu mantong nyang ka geupeurintah ubak gata le nabi musa, hamba tuhan. dan meunan kheueh teuma banmandum peurintah ulon ka gata taat. nyang kaka le gata hantom tapeubiyeu syedara-syedara gata, ureueng israel nyang laen, jimeujuang keudroe. gata ka tataat ubak banmandum peurintah tuhan po teu allah gata deungon keubit-keubit. teuma paih lagee janji geuhnyan, tuhan po teu allah ka geubri keuteunangan keu syedara-syedara gata, ureueng israel nyang laen. le sabab nyan, jinoenyoe tagisa kheueh laju u wilayah gata keudroe di siblahi u timu krueng yordan nyang ka geubri le nabi musa keu gata yoh masa ilee. dan gata jaga kheueh mangat gata tataat ubak hukum nyang ka geu peurintah le nabi musa keu gata, hukum nyan na kheueh: gata gaséh kheueh ubak tuhan allah gata, taturot kheueh peue nyang geulakee, tataat kheueh teuma ubak peurintah-peurintah gobnyan, seutia kheueh ubak gobnyan, dan gata meungabdi kheueh ubak gobnyan deungon sipeunoh ate gata dan deungon banmandum jiwa raga gata." oh lueheh nibaknyan yosua laju geubri reuseutu keu awaknyan dan geupeuleupah kheueh awaknyan jiwoe lom u wilayah droe jihnyan deungon geupeusan lagee nyoe, "gata jinoenyoe ka kaya dan tawoe jinoenyoe deungon gataba sajan beulatang peulara nyang le, pirak, meuh, teumaga, beuso dan peukayan. gata bagi-bagi kheueh teuma hasejarah gata nyan keu syedara gata nyang saboh sukee." teuma sukee ruben, gad, dan sukee manasye nyang na disiblahi u timu krueng yordan nyan laju jitinggai ureueng israel nyang laen nyan, laju jibeurangkat nibak silo di nanggroé kanaan jijak laju ubak tanoh jih keudroe di daerah gilead. awaknyan ji tinggai nibak tanoh nyan ateueh peurintah tuhan meulalu nabi musa. (siladum nibak sukee manasye ka jiteurimong nibak nabi musa, tanoh di siblahi u timu krueng yordan, dan siladum teuma sukee manasye nyang laen jiteurimong teuma nibak yosua tanoh nyang di siblahi ubarat krueng yordan meusajansajan deungon sukee nyang laen.) bak watee sukee ruben, gad dan sukee manasye di siblahi u timu yordandan nyan trok u gelilot – mantong di siblahi ubarat krueng yordan – awaknyan laju jipeudong saboh miseubah nyang rayeuk dan meugah to that deungon krueng. di ureueng-ureueng israel nyang laen nyan jideungoe seusabe bansa awaknyan jipeugah lagee nyoe, "ureueng-ureueng sukee ruben, gad dan manasye di siblahi u timu yordan ka geupeudong saboh miseubah di gelilot to that deungon krueng yordan nibak bagian wilayah geutanyoe!" teuma awaknyan banmandum ka ji meusapat di silo keuneuk jijak prang sukee-sukee israel nyang na tinggai di bagian timu krueng yordan nyan. laju teuka teuma si pinehas, aneuek teungku imeum eleazer, gobnyan jikirem le umat israel keu sukee ruben, gad dan sukee manasye nyang na tinggai di daerah gilead di siblahi u timu yordan. meusigoe-sigoe deungon pinehas nyan jijak teuma siploh droe ureueng patot-patot peumuka bansa israel, – sidroe ureueng nibak tieb-tieb sukee di siblahi ubarat krueng yordan, maseng-maseng na

kheueh ulee keuluwarga didalam kawom awaknyan. teuma trok kheueh laju awaknyan ubak tempat sukee ruben, gad dan sukee manasye di daerah gilead. dan ateueh nan banmandum umat tuhan, awaknyan jipeugah laju ubak ureueng sukee ruben, gad dan manasye nyan, "pakon kheueh gata peubuet hai nyang jeuhet nyoe u ateueh po teu allah israel? deungon cara gata peuget miseubah droe gata nyan keudroe, saban cit deungon gata ka talawan tuhan! gata hana le ta seutot ubak peue-peue nyang geupeurintah le gobnyan! peu kheueh gata hana ta ingat keu desya geutanyoe watee di peor? bak watee nyan geutanyoe geuhukom le tuhan deungon sapeue-sapeue bala, bah kheueh nyan geutanyoe nyoe umat gobnyan keudroe! sampoe an jinoe hai nyan mantong ta tanggung akibat jih. peu kheueh nyan gohlom cit seb? dan jinoenyoe, peu kheueh gata takeuneuk peulikot lom tuhan? meunoyoe uroenyoe gata talawan tuhan, singoh beungoh gobnyan teuma geubeungeh keu banmandum umat israel. meunoyoe daerah gata nyan ka kuto dan hana patot teupeubuet eibadat ubak tuhan disinan, gata minah kheueh laju keunoe ubak daerah tuhan nyoe dipat na meuteume khimah tuhan. gata lakee kheueh laju siladum nibak daerah kamoe, teuma bek kheueh gata lawan tuhan atawa gata lawan kamoe deungon cara gata tamah miseubah nyang laen, sabab keuhai miseubahnyan ka na miseubah tuhan po teu allah geutanyoe. gata ingat kheueh, ubak akan aneuek zerah nyan hana jitem seutot peurintah tuhan keuhai barang-barang nyang museuti teupeuhanco nyan, dan peue akibat jih ateueh awaknyan? banmandum umat israel geuhukom! seudangkan nyang meudesya na kheueh akan, teuma nyang mate bukan jihnyan keudroe teuma banmandum umat israel!" laju ureueng-ureueng sukee ruben, gad dan manasye di siblahi u timu nyan jijaweueh, "nyang mahakuasa na kheueh tuhan! nyang mahakuasa na kheueh tuhan! tuhan geuteupeue pakon kamoe peubuet hainyoe, dan kamoe meuharab mangat gatanyoe tateupeue nyan! seukira jih kamoe peubuet hainyan deungon meukeusut teulawan tuhan atawa sabab le kamoenyoe hana kamoe meuiman le ubak gobnyan, bah kheueh kamoenyoe mate bak saat nyoe cit teuma! tuhan keudroe nyang hukom kamoe, meunoyoe kamoe na meukeusut keuneuk kamoe lawan tuhan dan kamoe peudong miseubah kamoenyoe deungon meukeusut kamoe peuseumah keureubeuen nyang teutot atawa keureubeuen gandom atawa keureubeuen meusahabat di ateueh nyan. kon nyan nyang kamoe meukeusut, hai syedara-syedara mandum! kamoe peudong miseubah nyan, sabab kamoe khawate oh ka treb-treb singoh keuturonan gata teuma jipeugah ubak keuturonan kamoe, 'gata hana hubungan sapeue deungon tuhan, po teu allah israel! gata kalon kheueh, gobnyan geukeubah krueng yordan nyoe di teungoh-teungoh geutanyoe mangat teupeujareueng kamoe deungon gata ureueng-ureueng ruben dan gad. keubit gata hana hubungan sapeue deungon tuhan.' teuma peue-peue nyang teujadi teuma? teuntee kheueh keuturonan gata jipeusaneyat u ateueh keuturonan kamoe jipioh meueibat ubak tuhan. le sababnyan, kamoe peudong miseubah nyoe, bukan keu keureubeuen nyang teu-

tot dan bukon teuma keu teupnat teu peuseumah keureubeun kamoe, teuma mangat jeuet keutanda keu tanyoe bandua blaih pihak, dan keu keuturonan geutanyoe oh singoh teuma, bahwa beutoi kamoe nyoe meui ebadat ubak tuhan di khimah teuka gobnyan deungon teuba sajan keureubeun yang teutot, peuseumahan-peuseumahan dan keureubeun meusahabat. deungon na lageenyan keuturonan gata hana teuma jipeugah bahwa keuturonan kamoe hana hubungan sapeue deungon tuhan. jadi, nyang kamoe meukeusut na kheueh: seukira jih keuturonan gata jipeugah lagee nyoe, teuma keuturonan kamoe hase jipeugah, 'gata kalon kheueh miseubah nyan! indatu kamoe geupeudong saboh miseubah nyang saban deungon miseubah tuhan, bukon keu keureubeun yang teutot atawa keu teupnat peuseumah, teuma mangat jeuet keu tanda keu geutanyoe bandua blaih pihak.' peucaya kheueh, kamoe hana kamoe tem lawan tuhan atawa kamoe pioh meungabdi ubak gobnyan deungon teutamah miseubah nyang laen keu keureubeun yang teutot atawa keureubeun gandom atawa teuma keu peuseumahan, seudangkan miseubah tuhan po teu allah geutanyoe nyan ka na dikeue khimah teuka tuhan." banmandum nyang geupeutrang le ureueng-ureueng sukee ruben, gad dan sukee manasye di siblahi utimu nyan jideungoe le teungku imeum pinehas meunan cit le ban siploh droe ureueng-ureueng patot peumuka ureueng israel nibak bagian barat krueng yordan. deungon nyan teuma awaknyan pi puih ate atueh peue nyang ka jipeutrang nyan. laju jipeugah le pinehas, aneuek teungku imeum eleazar nyan, keu ureueng-ureueng nibak sukee ruben, gad dan sukee manasye di siblahi u timu nyan, "jinoenyoe ka kamoe teupeu tuhan na meusajan ngon geutanyoe, sabab gata nyoe hana talawan gobnyan. gatanyoe ka tapeuseulamat umat israel nibak geuhukom le tuhan." oh ka lheureh nyan jijak kheueh laju pinehas deungon ureueng-ureueng patot peumuka israel nyan. awaknyan jitinggai laju ureueng ruben dan gad di gilead, laju jiwoe u kanaan, oh lheurehnyan jilapor laju hainyan ubak umat israel. teuma di umat israel pih puih ate jih bak watee jideungoe hai nyan, akhe jih awaknyan laju jipujo-pujo po teu allah. awaknyan hana le na niet lam ate jih keu jijak prang ureueng ruben dan gad, dan mangat jipeumuseunah nanggroe nyan. akhe jih, sukee ruben dan sukee gad nyan jipeugah, "miseubah nyoe jeuet keusaksi keu geutanyoe banmandum bahwa tuhan na kheueh po teu allah." le sababnyan awaknyan jiboh nan miseubah nyan "saksi". treb that oh ka lheureh tuhan geubri keuteutraman atueh bansa israel; awaknyan hana le jipeukaru meunan cit jiancam le musoh-musoh jih. bak watee nyan yosua ka tuha that-that. le sabab nyan gobnyan laju geutawok banmandum umat israel, meunan cit bubena ureueng-ureueng patot, bubena peumimpén, bubena hakem dan bubena peuwira tantra, lheureh nyan laju geupeugah, "ulon jinoenyoe ka tuha. gata banmandum ka lheureh takalon peue-peue mantong nyang geupeubuet le tuhan po teu allah gata atueh banmandum bansa nyang na disinoe deumi gata. nyang meujuang keu gata na kheueh tuhan po teu allah gata keudroe. tanoh bansa-bansa nyang mantong na tinggai,

meunan cit teuma tanoh mandum bansa nyang ka ulon peutaloe, na kheueh tanoh nyang meulienteung di siblahi u timu krueng yordan laju u barat sampoe trok u laot teungoh, banmandum nyan ka ulon bagi keu gata mangat jeuet keu hak milek gata. tuhan po teu allah gata geupeujeuet bansa-bansa nyan taloe dan jisurot, dan jiplueng dikeue gata meunyoe gata tajak prang awaknyan. gata teuma tacok nanggroe awaknyan, lagee nyang ka geupeujanji le tuhan po teu allah gata keu gata. le sababnyan, jaga kheueh mangat gata jeuet tataan dan gata peubuet banmandum nyang na teutuleh lam kitab hukum nabi musa. bek kheueh gata liengkeu meusaboh pi nyang na nibak hukum-hukum nyan. deungon na lagee nyan gata hana teuma meulawok deungon bansa-bansa nyang na mantong tinggai lamkawan gata. gata hana teuma tateuoh nannan dewa awaknyan dan meusumpah atueh nan nyan. meunan cit gata hana teuma gata meueibadat ngon gata sujut ubak dewa-dewa nyan. teuma gata haroh teutab seutia ubak tuhan, lagee nyang ka lheureh gata peubuet trok nibak uroenyoe. bansa-bansa nyang rayeuk dan teuga-teuga ka geu-use le tuhan deumi keu gata; hana meussidroe pih nibak awaknyan nyang hase jimeuteun jilawan gata. tieb-tieb ureueng lamkawan gata hase jipeutaloe meuribe ureueng nibak awaknyan, sabab tuhan po teu allah gata nyang meuprang keu gata, lagee nyang ka geupeujanji nyan. le sababnyan, ingat kheueh mangat tagaseh tuhan allah gata. meunyoe gata hana seutia dan gata meujampu ngon bansa-bansa nyang mantong tinggai lamkawan gata, dan gata meukawen ngon awaknyan, ingat, pasti tuhan po teu allah gata hana geu-use le bansa-bansa nyan keu gata. dan sikeubit jih awaknyan keubiet mubahya that keu gata, sabab awaknyan teuma jeuet keu taron atawa keu jeunieb keu gata. dan awaknyanpi jipeujeuet gata keubiet meudeurita that; sabab awaknyan teuma jeuet lagee peunyunuet atueh rhung gata atawa lagee duro lam mata gata. gata teutab sabe meudeurita sampoe hana meussidroe pih nyang na tinggai lam nanggroe nyang get nyoe, nanggroe nyang geubri le tuhan po teu allah gata keu gata. jinoenyoe ka watee jih ulon mate. gata banmandum, maseng-maseng tateupeue that bahwa tuhan po teu allah gata ka geubri keu gata banmandum nyang jroh nyang geupeujanji nyan. tieb-tieb janji gobnyan ka geupeupeunoh, hana meusapeue pih nyang hana geupeutrok. teuma, lagee toh gobnyan ka geupeupeunoh janji gobnyan keu gata, meunan cit gobnyan pasti geupeubuet teuma tieb-tieb na ancaman nyang teuka atueh gata. meunyoe gata taliengkeu janji nyang ka geupeurintah atueh gata le tuhan po teu allah mangat gata tataan, dan gata tameueibadat ubak ilah-ilah laen dan gata seumah teuma ilah-ilah nyan, deungon nyan tuhan teuma beungeh, dan geuhukom gata. lam watee nyang paneuk, gata banmandum teuma gadoh lam nanggroe nyang get nyoe, nyang ka geubri le tuhan po teu allah gata keu gata." yosua laju geupeusapat banmandum sukee bansa israel di sikhém, laju geuyue ubak mandum ureueng patot-patot, banmandum peumimpén, banmandum hakem-hakem dan mandum peuwira tantra nyang meuhadab gobnyan. teuma teuka

kheueh awaknyan meuhadab ubak po teu allah. oh ltheuehnyan yosua geupeugah ubak awaknyan, "deungoe kheueh peue nyang geupeugah le tuhan, po teu allah israel keu gata, 'yoh jamen ilee indatu gata tinggai di meurandeh krueng efrat, dan jiseumah dewa-dewa. sidroe lamkawan awaknyan na kheueh terah, ayah nabi ibrahim dan nahir. laju ulon cok nabi ibrahim, ayah indatu gata nyan, nibak nang-groe nyang na meurandeh krueng efrat nyan, dan lon yue jihnyan mangat jibloh bansaboh nang-groe kanaan. ulon jok keujih nyan keuturunan nyang le. phon-phon that ulon jok nabi ishaq keu jihnyan, ltheuehnyan keu nabi ishaq ulon bri teuma dua droe aneuek, awaknyan na kheueh nabi yakub dan esau. ulon jok keu esau gunong edom mangat jeuet keu tanoh hak milek jih, teuma nabi yakub, ayah indatu nyan, jiminah u nang-groe meuse meusajan-sajan ngon aneuek-aneuek jih. oh ltheuehnyan ulon kirem nabi musa ngon nabi harun, dan lon peuteuka bencana nyang paleng rayeuk ateueh nang-groe meuse, ltheuehnyan laju ulon peuteubiet gata nibak nang-groe nyan. ulon ba indatu gata nyan mangat jiteubiet lam nang-groe meuse, dan le ureueng meuse laju jipeucrok awaknyan ngon geuritan prang jih dan ngon tantra meugoda. dan bak watee indatu gatanyan trok ubak laot geulagah, awaknyan laju jimeuhoi ulon dan jilakee tulong. le sabab nyan teumpat lamkawan awaknyan ngon ureueng-ureueng meuse nyan ulon peuseupot, dan ulon tob ureueng-ureueng meuse nyan ngon le laot sampoe awaknyan lham banmandum. gata ka tateupeue peue nyang ulon peubuet ateueh nang-groe meuse. treb lumpah na gata tinggai lam padang pasi. laju ulon ba gata u nang-groe ureueng amori nyang tinggai nibak siblaih u timu krueng yordan. awaknyan jiprang gata, teuma ulon kupeujeuet gata meunang ateueh awaknyan. gata reubot nang-groe awaknyan, dan ulon peuhanco awaknyan. ltheueh nyan, le raja moab, na kheueh balak aneuek zipor, jilawan gata. jihnyan jikirem ureueng laen ubak bileam aneuek beor dan jilakee mangat jitem bileam jikutot jihnyan. teuma ulon hana lon seutot peue kheun bileam, le sababnyan gobnyan geubri beureukat keu gata. meunan kheueh cara jih ulon peuseulamat gata nibak balak. ltheueh nyan gata tajeumeurang krueng yordan, dan laju trok u yerikho. le ureueng-ureueng yerikho jikak prang gata, meunan cit teuma deungon ureueng amori, ureueng feris, ureueng kanaan, het, girgasi, hewi dan ureueng yebus. teuma ulon kupeumeunang gata ateueh awaknyan banmandum. bak watee gata tamaja tajak prang awaknyan, ulon peujeuet awaknyan jeuet keubingong dan teumakot that-that, le sabab nyan bandua droe raja ureueng amori nyan jiplueng dikeue gata. kon le sabab peudeueng jih dan kon teuma le sabab aneuk panah gata nyang teupeujeuet gata meunang. tanoh nyang ulon jok keu gata, gata teurimong ngon hana meususah payah. dan banda-banda nyang ulon jok keu gata kon teuma gata nyang peudong nyan. teuma jinoo gata kheueh nyang tinggai disinan, dan gata kheueh teuma nyang rasa boh anggo meunan cit ngon boh zaiton, padahai kon gata nyang pula." "le sabab nyan, jinoenyoe," geupeugah le yosua teuma oh ltheuehnyan, "horeumat

kheueh tuhan. meungabdi kheueh ubak gobnyan deungon ate nyang ikhlaih dan deungon seutia. peujioh kheueh ilah-ilah nyang laen nyang jiseumah le indatu gata yoh watee ilee di mesopotamia dan nang-groe meuse. meungabdi kheueh ubak tuhan mantong. meunyoe gata hana tatem, meungabdi ubak tuhan, gata cok kheueh keuputusan uroe nyoe cit teuma ubak soe nyang gata meungabdi: peu kheueh ubak ilah-ilah nyang laen nyang jiseumah le indatu gata di mesopotamia yoh watee ilee atawa ubak ilah-ilah ureueng amori nyang nang-groe jih gata duek nibak saat nyoe. teuma kamoe – ulon dan keuluwarga ulon – teutab meungabdi ubak tuhan mantong," teuma le umat israel laju jiwaweeub, "kamoe sagai-sagai hana kamoe tinggai tuhan dan hana kamoe meungabdi ubak ilah-ilah nyang laen! tuhan po teu allah geutanyoe nyang ka geupeubeubaih indatu geutanyoe dan tanyoe keudroe nibak jicok keunamiet di nang-groe meuse. tanyoe ka takalon buet-buet ajaeb nyang geupeubuet le po teu tuhan. sabe tuhan geulindong geutanyoe banmandum buet meuneujak geutanyoe, ta liwat rot nang-groe-nang-groe aseng. dan watee geutanyoe tatamong lam nang-groe nyoe, tuhan laju geu-use banmandum ureueng amori nyang na tinggai disinoo. le sababnyan kamoe keuneuk meungabdi ubak tuhan, sabab gobnyan kheueh po teu allah geutanyoe." teuma le yosua laju geupeugah, "mungken gata hana hase gata meungabdi ubak tuhan, sabab gobnyan allah nyang suci, nyang maha esa. gobnyan hana geutem na siteru. meunyoe gata tat-inggai gobnyan dan gata meungabdi ubak ilah-ilah nyang laen, gobnyan hana geupeu amphon desya desya gata. teuma nyang keubiet jih, gobnyan teuma geulawan dan geuhukom gata. gobnyan teuma geupeubinasa gata, bahpi yoh watee ilee gobnyan get keu gata." le sababnyan ureueng-ureueng israel nyan laju jiseuat, "hana! kamoe hana kamoe seumah ilah-ilah nyang laen. kamoe teutab meungabdi ubak tuhan!" le yosua geupeugah lom, "nyan, gata keudroe jeuet keusaksi bahwa gata ka tacok keuputusan bahwa gatanoyoe teutab meungabdi ubak tuhan," "beutoi," seuat awaknyan, "kamoe keudroe jeuet keusaksi jih." "meunyoe meunan, kireueh kheueh laju bubena ilah-ilah bansa laen nyang na nibak gata nyan," kheun yosua, "dan meujanji kheueh bahwa gata teuma seutia ubak tuhan, po teu allah israel." laju le ureueng-ureueng nyan jikheun ubak yosua, "kamoe teutab meungabdi ubak tuhan, po teu allah geutanyoe. kamoe teutab taat ubak peue-peue nyang geupeurintah le gobnyan." le sababnyan nibak uroe nyan di sikhem yosua laju geu ikat janji ngon umat israel; dan disinan gobnyan laju geubri keu awaknyan hukom-hukom dan atoran-atoran nyang haroh awaknyan taat. banmandum hukom dan atoran-atoran nyan teutuleh lam kitab hukom allah. oh ltheuehnyan gobnyan laju geucok sineuk batee nyang rayeuk, bateenyan laju geupeudong yueb bak kayee nyang rayeuk nibak teumpat nyang khusus keu tuhan. oh ltheuehnyan geupeugah kheueh laju le yosua ubak mandum ureueng nyan, "batee nyoe jeuet keusaksi geutanyoe. banmandum feureuman nyang geupeugah le tuhan keu geutanyoe, ka geupeugah dikeue batee nyoe. le sababnyan, batee nyoe kheueh nyang

teuma jeuet keu saksi keu gata, mangat jeuet keu peuingat keu gata mangat bek gata lawan po teu allah." akhe jih, yosua laju geuyuewoe awaknyan; laju awaknyan jigisa ubak tanoh droe jih maseng-maseng. oh lheuehnyan yosua aneuk nun hamba tuhan nyan, meuninggai donya nibak umu 110 thon. gobnyan teupeukubu bak tanoh atra gobnyan keudroe nibak timmat-serah nibak tanoh meugunong efraim siblah utara gunung gaas. simantong yosua udeb, umat israel sabe meungabdi ubak tuhan. dan watee ka meuninggai pi awaknyan teutab meuebadat ubak tuhan simantong lamkawan awaknyan na peumimpen-peumimpen nyang ka jikalon keudroe peue-peue mantong nyang geupeubuet le tuhan keu umat israel. manyet nabi yusuf nyang jiba le umat israel nibak nanggroe meuse, teupeukubu di sikhem ateuh tanoh nyang ka lheueh teubloe le nabi yakub deungon yuem sireutoh peng pirak nibak aneuk-aneuk hemor, ureueng syiek sikhem. tanoh nyan teupeuwareh keu keuturonan nabi yusuf. lheueh nyan eleazar aneuk nabi harun meuninggai cit, dan teupeukubu teuma di gibe, na kheueh banda nyang na teuduek nibak daerah tanoh meugunong efraim. banda nyan ka teujok keu pinehas, aneuk eleazar.

oh ka lھےueh yosua meuninggai donya, umat israel jitanyong laju ubak tuhan, "tuhan, sukee nyang toh nibak kamoe nyoe nyang phon-phon that kamoe jak prang ureueng kanaan?" geujaweueb le tuhan, "sukee yehuda. bak awaknyan ka ulon bri keukuasaan keu jijak reubot nanggroe nyan." laju jipeugah le sukee yehuda ubak sukee simeon, "gata tulong kھےueh kamoe mangat kamoe jak prang ureueng kanaan dan kamoe reubot wilayah nyang ka geupeuteuntee le tuhan keu kamoe. saboh watee teuma kamoe kameopi kamoe tulong gata keu gata reubot wilayah nyang ka geupeuteuntee le tuhan keu gata." le sababnyan sukee simeon dan yehuda jijak heungkoe laju meusajan-sajan. dan tuhan geupeumeunang laju awaknyan ateueh ureueng kanaan dan ureueng feris. siploh ribee droe tantra musoh mate di bezek. awaknyan jijak meurumpok laju ngon adoni-bezek, raja nanggroe nyan, dan laju jiseurang jih nyan. raja nyan laju jiplueng, teuma awaknyan jitiyeub laju dan jidrob laju raja nyan lھےuehnyan jikoh nang jaroe raja nyan meunan cit deungan nang gaki jih nyan. geupeugah le adoni-bezek, "yoh mase ilae ka tujoh ploh droe raja nyang ka ulon koh nang jaroe dan nang gaki jih, laju ulon peubiyeu teuma awaknyan jimakھےun seueh-seueh peunajoh nyang rhot nibak ateueh meja ulon. jinoenyoe po teu allah ka geupeu rhot u ateueh ulon saban lagee nyang ka ulon peubuet ateueh awaknyan." adoni-bezek nyan laju teuma jiba u yerusalem, dan disinan kھےueh raja nyan meuninggai donya. di ureueng yehuda nyan laju jijak prang yerusalem dan jireubot ngon jitot teuma laju banda nyan meunan cit deungan peunduduek banda nyan jipoh mate bube nyang na. oh ka seulesoe disinan awaknyan jijak lom teuma dan jiseurang kanaan nyang na tinggai di daerah gunong-gunong, dan nibak reuleung-reuleung buket; meunan cit nyang na tinggai di daerah nyang tho kreng di siblahi seulitan, dan di banda hebron, na kھےueh banda nyang yoh watee ilae teupeunan banda kiryat-arba. disinan ureueng yehuda jipeutaloe kawom sesai, ahiman dan talmai. beudoh di hebron, ureueng yehuda nyan laju jijak seureubu banda debir, nyang nibak watee nyan bandanyan nan jih kiryat-sefer. na sidroe nibak sukee yehuda nyan, nyang nan jih kaleb, ureueng nyan jipeugah lageenyoe, "barang sigasoe hase jireubot kiryat-sefer, ureueng nyan jeuet jimeukawen deungan aneuek ulon nyang nan jih akhsa." otniel, aneuek nibak adoe si kaleb nyang nan jih kenas, laju jijak reubot bandanyan. teuma kaleb jiji laju akhsa aneuek jihnyan jimeukawen deungan otniel. bak uroe keureuja teupeukawen awaknyan, otniel jipaksa akhsa mangat akhsa nyan jilakee saboh keubeueng tanoh nibak bapak jihnyan. teuma jitreun kھےueh laju akhsa di ateueh keuleudee nyang teungoh jigiduek nyan, laju kaleb jitanyong bak aneuek jih akhsa peue nyang jikeuneuk lakee. jijaweueb laju le akhsa, "ulon keuneuk lakee bak bapak meupaduboh mon ie, sabab tanoh nyang bapak bri keu ulon nyan teumpat jih na kھےueh di daerah nyang leupah that tho hana meu ie." teuma kaleb laju jijok keu aneuek jih nyan mata ie dibagian tunong dan mon mata ie di bagian baroh. keuturonan ayah tuwan nabi musa, na kھےueh

ureueng-ureueng keni, jiseutot laju ureueng yehuda jiteubiet nibak daerah yerikho, banda keuruma, dan jijak laju u daerah nyang tho hana meu ie meunan cit ngon geureusang di siblahi u seulitan arad di yehuda. disinan awaknyan tinggai teutab lamkawan bansa amalek. oh lھےueh nyan meusajan-sajan deungan sukee simeon, sukee yehuda nyan laju jijak prang dan jipeutaloe laju bube na nibak bansa kanaan nyang na tinggai di banda zefat. awaknyan laju jikutok banda nyan, oh lھےuehnyan jipeuhanco teuma dan laju jirasi nan banda nyan deungan nan horma. tuhan geutulong ureueng yehuda sampoe awaknyan hase jireubot daerah meugunong-gunong. teuma awaknyan hana hase jireubot gaze, askelon atawa ekron deungan daerah-daerah nyang na di sikeulileng nyan, sabab bansa-bansa nyang na tinggai di daerah sitot bineh pante na bak awaknyan geuritan-geuritan prang nyang teupeuget nibak beuso; le sabab nyan ureueng yehuda hana meuhase ji use awaknyan. lagee nyang ka geupeurintah le nabi musa, hebron geubri keu kaleb, sabab yoh watee ilae lھےe golongan nibak kawom keuturonan enak ka geu use le kaleb nibak bandanyan. sukee benyamin hana teuma hase ji use sukee yebus beujiteubiet nibak banda yerusalem. nyang kھےueh sabab jih di ureueng yebus nyan mantong na tinggai disinan meusapat deungan ureueng-ureueng benyamin. sukee efraim dan manasye keuturonan nabi yusuf, jijak prang teuma banda betel, nyang bak watee nyan nan jih banda lus. dan tuhan geutulong awaknyan. bak watee mata-mata geu kirem u banda nyan, awaknyan meurumpok deungan sidroe ureueng agam nyang teuka di banda. jipeugah le awaknyan ubak ureueng agam nyang meurumpok nyan, "meunyo gata tatem tulong kamoe mangat kamoe hase kamoe tamong u dalam banda nyoe, kamoe teuma kamoe peusaneut gata deungan get that-that." teuma di ureueng agam nyan laju jitungyok ubak awaknyan rot tamong u dalam banda nyan. le ureueng-ureueng efraim dan manasye jitamong laju u dalam bandanyan dan laju teuma jipoh mate bubena peunduduek nyang na tinggai di dalam banda nyan, keucuali ureueng agam nyan deungan banmandum wareh kawom jih. gobnyan akhe jih jiminah u daerah ureueng het, laju jipeudong teuma saboh banda disinan dan jiboh nan banda nyan lus. banda nyan teutab meunan nyang lagee nyan. sukee manasye hana ji use peunduduek banda bet-sean, taanakh, dor, yibleam dan megido deungan gampong-gampong nyang to-to disinan. le sababnyan ureueng kanaan teutab tinggai disinan. keubit oh lھےueh ureueng israel meutamah teuga, awaknyan jipaksa ureueng kanaan jimeukeureuja keu awaknyan, teuma awaknyan hana cit jiuse ureueng-ureueng kanaan nyan banmandum nibak teumpat nyan. di banda gezer, sukee efraim hana ji use ureueng kanaan, peunduduek banda nyan. jadi, ureueng kanaan teutab na tinggai disinan meusapat-sapat deungan awaknyan. peunduduek banda kitron dan nahalol hana cit jiuse le sukee ze-bulon. nyang kھےueh sabab jih bansa kanaan teutab mantong tinggai disinan meusapat-sapat deungan awaknyan, teuma ureueng-ureueng kanaan nyan jipaksa meukeureuja keu awaknyan. peunduduek

banda ako, sidon, ahlab, akhzip, helba, afek dan reboh meunan cit hana jiseu le sukee asyer. nyang kheueh sabab jih ureueng kanaan, peunduduek aseuli nanggroe nyan teutab mantong na tinggai disinan meusapat-sapat deungon ureueng asyer. peunduduek banda bet-semes dan bet-anat pi hana cit ji use le sukee naftali. nyang kheueh sabab jih di ureueng kanaan, peunduduek aseuli nanggroe nyan teutab mantong na tinggai disinan meusapat-sapat deungon ureueng naftali. teuma, awaknyan jipaksa meukeureuja keu ureueng naftali. bansa amori teutab mantong na tinggai di ayalon, saalbm dan gunung heres, sabab sukee dan jipeusak le awaknyan u daerah meugunong-gunong, dan hana jipeubiyeu jitreun u daerah panton. teuma bansa amori nyan sabe jiteugon le sukee efraim dan manasye lom teuma jipaksa meukeureuja keu bandua sukee nyan. di siblahi utara sela, bataih daerah ureueng-ureueng amori teujak laju ubak sineungoh akrabim. malaikat tuhan geujak nibak gilgal u bokhim dan geupeugah ubak ureueng-ureueng israel, "ulon ka lon puteubiet gata di nanggroe meuse, dan lon ba gata u nanggroe nyang ka ulon peujanji ubak indatu gata. dan ka cit ulon peugah, 'teu ikat janji ulon deungon gata dan hainyan hana ulon peuputoh. sabab nyan gata hana jeuet taikat janji peue mantong deungon peunduduek nanggroe nyoe. miseubah-miseubah awaknyan haroh kheueh gata reuloh.' teuma gata hana tapeubiet peue nyang ka ulon peurintah ubak gata nyan. teuma nyang gata peubiet nyang meulawan ngon nyang ulon peurintah nyan! le sabab nyan, jinoenyoe tadeungoe kheueh ulon! ulon hana teuma lon use ureueng-ureueng nanggroe nyoe meunyeoe gata tamuprang deungon awaknyan. awaknyan teuma jeuet keu musoh-musoh gata, dan gata rhoh lam taron, deungon nyan gata taturot teuma taseumah ubak dewa-dewa awaknyan." oh ka ltheueh malaikat nyan geupeusampoe haba nyan, banmandum bansa israel jimo ba-e sira jikliek ngon su nyang teuga. nyang kheueh sabab jih teumpat nyan teuboh nan bokhim. laju nibak teumpat nyan di ureueng-ureueng israel jipeuseumah keureubeuen keu tuhan. oh ka seuleusoe yosua geupeuleupah ureueng-ureueng israel nyan jijak, awaknyanpi jibeurangkat laju mangat jikakduek ateuh tanoh nyang ka jeuet keujeumba awaknyan maseng-maseng. simantong yosua udeb, ureueng israel mantong jimeungabdi ubak tuhan. oh ka ltheueh yosua meuninggai donya pi ureueng-ureueng israel nyan teutab mantong meungabdi ubak tuhan seumantong awaknyan jipimpen le ureueng-ureueng nyang ka jikalon ngon mata ulee jih banmandum buet nyang ajaeb nyang ka geupeubiet le tuhan keu ureueng israel. yosua aneuk nun - hamba tuhan nyan - meuninggai donya nibak umu sireutoh siploh thon. laju gobnyan teupeukubu nibak tanoh jrat gobnyan keudroe, na kheueh di timnat-serah di daerah meugunong-gunong efraim di siblahi utara gunong gaas. oh ltheueh banmandum angkatan nyan meuninggai cit teuma. dan angkatan nyang dilikot awaknyan ka hana jituri tuhan, sabab awaknyan hana jirasa peue nyang ka geupeubiet le tuhan keu bansa israel. oh ltheueh nyan ureueng

israel ka meudesya ubak tuhan. awaknyan hana le jiseumah tuhan po teu allah indatu awaknyan, nyan kheueh po teu allah nyang ka geuba awaknyan geuteubiet nibak nanggroe meuse. awaknyan ka jipeuphon seumah baal dan asyoret meunan cit deungon dewa-dewa nyang laen nyang jiseumah le bansa-bansa di sikeulileng awaknyan. teuma tuhan laju geubeungeh keu awaknyan dan geupeubiyeu mantong geurombolan laen jijak prang sira jireupah awaknyan. awaknyan hana meudaya jimeuhadab keu ngon musoh-musoh nyang na silangka awaknyan. tieb-tieb watee awaknyan jijak meuprang, tuhan geulawan awaknyan, lagee nyang ka geupeu ingat ubak awaknyan. teuma awaknyan jirasa sulet ngon sosah nyang lumpah meupalo. hana putoh-putoh tuhan geukirem keu awaknyan peumimpen nyang meujuang mangat jipeubeubaih awaknyan nibak geurombolan peurampok. teuma awaknyan hana jipeuhiro keu peumimpen nyan. awaknyan ji seumah ubak ilah-ilah laen, dan hana seutia le ubak tuhan. awaknyan hana jiseutot cuntoh teuladan nyang ka geupeubiet le indatu jih nyang that-that taat ubak mandum peurintah-peurintah tuhan. meunyeoe tuhan ka geubri sidroe peumimpen keu bansa israel, tuhan sabe geutulong peumimpen nyan. dan simantong peumimpen nyan mantong udeb, tuhan sabe geupeu ltheueh awaknyan nibak musoh-musoh jih. tuhan that-that geugaseh keu awaknyan meunyeoe tuhan geudeungoe awaknyan ji meun rang-rang sabab peudeh jiseksa, ji ienanya meunan cit jitindeeh. teuma meunyeoe peumimpen nyan ka meuninggai donya, bansa nyan meupi-e nyang leubeh brok nibak angkatan sigohlom nyan. awaknyan jimeungabdi ubak ilah-ilah laen dan jiseumah ilah-ilah nyan. awaknyan jigisa ubak buet nyang lazem nyang jeuhet dan hana teuma ji ubah buet nyang salah nyan. sabab nyan tuhan get that beungeh keu bansa israel, dan geupeugah, "ulon ka ulon peurintah ubak indatu bansa nyoe mangat jimumat ubak janji ulon deungon awaknyan. teuma bansa nyoe ka jipeuputoh talo ngon ikat janji nyan; awaknyan ka ji-iengkeue peue nyang ka ulon peurintah. jinoenyoe ulon hana lon tem le use bansa toh mantong meunan cit deungon nyang mantong na di nanggroe nyoe bak watee yosua meuninggai donya. ulon teuma ulon ngui bansa-bansa nyan mangat jijak ujoer bansa israel, deungon na lageenyan hase lon teupeue peu kheueh umat israel jitem seutot peue nyang ulon peurintah lagee indatu awaknyan, atawa hana." nyang kheueh sabab jih tuhan hana geubri meunang keu yosua ateuh bansa-bansa nyan. seubalek jih tuhan geupeubiyeu awaknyan tinggai dinanggroe nyan, dan deungon bagai that geu use awaknyan. mangat teu ujoer ureueng-ureueng israel nyang hantom na jirasa meuprang di nanggroe kanaan, tuhan geupeubiyeu mantong meupadub boh bansa tinggai di nanggroe nyan. tuhan geupeubiet lagee nyan na kheueh deungon meukeusot geu peuruno tieb-tieb geuneurasi israel jimuprang, khusus jih awaknyan nyang hana tom na ji maju ngaza dalam mideuen prang. bansa-bansa nyang na mantong tinggai di nanggroe nyan na kheueh: bansa nyang tinggai di dalam banlimong boh banda filistin,

banmandum bansa kanaan, bansa sidon, dan bansa hewi nyang tinggai nibak gunung-gunong libanon, phon nibak gunung baal-hermon trok u jalan nyang teutuju u hamat. awaknyan na nibak teupatnyan na kheueh sibagoe batee teu ujo keu bansa israel. deungon lagee nyan hase kheueh teuteupeue peu kheueh bansa israel nyan jiseutot peurintah nyang ka geubri le tuhan ubak indatu awaknyan meulalu nabi musa. nyang kheueh sabab jih ureueng-ureueng kanaan, het, amori, feris, hewi dan yebus teutab tinggai di nanggroe nyan meusapat-sapat deungon ureueng israel. laju di umat israel nyan jimeukawen meujampu deungon bansa-bansa nyang na tinggai disinan, dan meusajan teuma jiseumah dewa-dewa awaknyan. umat israel meudesya ubak tuhan, po teu allah droe jih nyan. awaknyan tuwoe ubak gobnyan sampoe awaknyan ji meuebadat ubak beurala-beurala baal dan asyera. teuma tuhan geubeungeh keu umat israel, dan geupeubiyeu mantong awaknyan jipeutaloe le raja kusyan-risyataim nibak mesopotamia. lapan thon treb jih raja nyan jikuasa awaknyan. oh ka ltheueh nyan umat israel jimeuhoi jilakee tulong ubak tuhan, laju tuhan geukirem otniel mangat jijak peubeubaih awaknyan. (otniel na kheueh aneuek nibak kenas, adoe kaleb.) tuhan ka geujok kuasa ubak otniel sampoe otniel nyan ka jeuet keupeumimpem umat israel. jihnyan jijak meuprang, laju tuhan geupeumeunang awaknyan u atueuh raja mesopotamia. teuma aman ngon teuntram kheueh nanggroenyan peuet ploh thon treb jih. oh ltheueh nyan otniel pih meuninggai donya. umat israel ka meudesya lom ubak tuhan, sampoe tuhan geupeujeuet eglon, raja nanggroe moab, jeuet keuleubeh teuga nibak israel. raja eglon nyan laju teuma jimeugabong deungon bansa amon dan amalek, dan laju jipeutaloe ureueng israel, oh ltheueh nyan jireubot teuma yerikho, banda boh kuruma nyan. lapan blaih thon treb jih israel jijajah le eglon. teuma bak watee umat israel jiteumawok jilakee tulong ubak tuhan, gobnyan laju geukirem ehud mangat jijak peubeubaih awaknyan. ehud nyan na kheueh sidroe ureueng nyang jawie; jih nyan aneuek gera nibak sukee benyamin, dan gobnyan kheueh nyang lazem jih ji-intat keu raja eglon upeti nyang haroh teubayeue keu umat israel. bak si uroe ehud jipeuget saboh peudeueng meumata dua nyang panyang jih rab siteungoh metee. laju peudeueng nyan jilat nibak keuieng jih nyang teusom didalam bajee, oh ltheueh nyan jijak laju sira jiba upeti keu jijak jok keu raja eglon. raja eglon nyan badan jih lumpah teumbon. oh ka ltheueh jipeuseumah upeti nyan, le ehud laju jiyue woe ureueng-ureueng nyang seumon peng meuh nyan. teuma ehud keudroe laju jipioh oh ka trok nibak batee-batee nyang me uke nyang to ngon gilgal, laju jijak gisa ubak eglon. bak watee nyan eglon mantong di dalam kama nyang leupie lom ngon sijuke di kama tingkat atueuh meuligoe jih nyan. jipeugah le ehud ubak eglon, "amphon deulat po nyang mulia! ulon na lon ba haba rahsia keu amphon teungku." teuma raja nyan geupeugah laju, "preh ilee," laju raja geupeurintah ubak banmandum hamba geuh nyang na didalam ruweueng nyan mangat jiteubiet laju dan ji tinggai

raja ngon ehud mantong didalam kama nyan. oh ltheueh nyan, ehud laju jipeurab ubak raja nyang teungoh geudeuk, laju jipeugah, "na haba nibak po teu allah keu teungku amphon!" ban geudeungoe nyan raja laju geubeudoh. bak watee nyan cit teuma ehud deungon bagaih ban lagee kilat jisuit peudeueng nibak lam sarong nyang meugantung nibak keuieng siblaih uneuen, laju peudeueng nyan jitob sampoe oh lhok ubak pruet si raja. banmandum mata peudeueng nyan trok an ubak go jih jitamong habeh u dalam pruet raja sampoe beusot trok nibak rhueng dan meunan cit deungon gapah-gapah raja nyan habeh mandum meuhambo uluwa. dan ehud oh ltheueh jipeubuet lageenyan jipeubiyeu mantong peudeueng nyan meukeumat nibak pruet raja nyan, oh ltheueh nyan jiteubiet laju uluwa sira jitob pintoe lom jigunci di luwa, oh ltheueh nyan jijak laju jitinggai teupat nyan. bak watee hamba raja nyan teuka dan jikalon banmandum pintoe kama teugunci, awaknyan jisangka raja mantong na didalam kama dan teungoh geujak u likot. oh ka ltheueh jipreh nyang lumpah treb dan raja gohlom cit geubuka pintoe, awaknyan jiteuka bingong laju jicok gunci dan jibuka laju pintoe nyan. rupari raja jih nyan ka mate teutiek di atueuh aleue. teungoh awaknyan mantong meupreh-preh, ehud ka jiteume peuplueng droe u seira meulalu batee-batee me uke. meunan trok u daerah meugunong efraim, laju jiyueb beureuguih mangat jitawob ureueng israel jeuet jijak meuprang. di ureueng israel nyan teuka laju dan le ehud jipimpin laju awaknyan sira jipeutreun nibak daerah meugunong-gunong nyan. "seutot ulon," kheun ehud ubak awaknyan, "tuhan ka geupeutaloe bubena ureueng moab, musoh gata nyan keu gata." teuma dimiyueb pimpanen ehud nyan, jitreun kheueh laju ureueng-ureueng israel nibak gunung-gunong nyan. awaknyan laju jireubot teupat jeumeurang ureueng moab di krueng yordan. hana meusidroe pi nibak musoh nyan jipeubiyeu jijeumeurang deungon seulamat. nibak meuheungkoe lam prang nyan awaknyan jipoh mate na kira-kira 10.000 tantra moab nyang paleng get; hana meusidroe pi nyang na seulamat. uroe nyan moab taloe atueuh ureueng israel, teuma teuntram kheueh nanggroe nyan lapan ploh thon treb jih. peumimpem nyang seulanjut jih nyoe na kheueh samgar aneuek anat. gobnyan pi jimeujuang dan geupeubeubaih ureueng israel. deungon tungkat meurabee leumo, gobnyan jipoh mate 600 droe filistin. oh ka ltheueh ehud meuninggai donya, bansa israel ka meudesya lom ubak tuhan. teuma tuhan geupeubiyeu mantong awaknyan ji peutaloe le yabin, raja nanggroe kanaan nyang teupat duek di banda hazor. panglima angkatan prang na kheueh sisera nyang tinggai di haroset-hagoyim. yabin na 900 boh geuritan prang nyang teupeuet nibak beuso. dua ploh thon treb jih jihnyan jijajah ureueng israel deungon keujam. oh ltheueh nyan baro kheueh awaknyan jiteumawok ngon jilakee tulong ubak tuhan. bak watee nyan nyang pimpan bansa israel na kheueh sidroe nabi inong nyang nan geuh debora, peurumoh lapidot. debora nyan ka jeuet keu lazem nibak gobnyan geudeuk-duek di miyueb bak kuruma, lamkawan

rama dan betel, di daerah meugunong-gunong di efrain. dan disinan kheueh ureueng-ureueng israel jiteuka keu jijak lakee naseuhat ubak gobnyan. bak siuroe gobnyan geuyue ureueng laen mangat jijak hoi barak, aneuek abinoam, nibak banda kedes di daerah naftali. laju gobnyan geupeugah ubak barak, "nyoe peurintah tuhan, allah israel, keu gata: 'gata peusapat laju 10.000 droe ureueng agam nibak sukee naftali dan sukee zebulon, dan taba kheueh laju awaknyan u gunong tabor. teuma ulon peujeuet sisera, panglima angkatan prang yabin, jijak ubak krueng kison deungon tantra jih dan geuritan prang jih keu jijak prang gata. teuma ulon kupeumeunang gata nibak prang nyan.' " barak geupeugah teuma ubak debora, "meunyo gata taseutot, ulon lon tem jak sajan. teuma meunyo hana, ulon pi hana teuma lon tem jak." geu seutot le debora, "get, ulon teuma lon seutot! teuma ingat, bukon gata eunteuk nyang meuteume horeumat. meulalu sidroe ureueng inong kheueh tuhan teuma geupeutaloe sisera." le sabab nyan geubeurangkat kheueh debora meusigoe-sigoe deungon barak u kedes. dan barak laju geukrah sukee zebulon ngon naftali u kedes. nyang seutot barak dan debora bak watee nyan na 10.000 droe ureueng. bak watee nyan na sidroe ureueng heber, jihnyan ureueng keni, ka jipeu aseng droe nibak bansa jih. (bansa keni na kheueh keuturonan hobab, parui nabi musa.) heber ka jijak peudong khimah-khimah gobnyan nyang to ngon bak kayee sala di zaanaim, hana padubna jih nibak kedes. meunan jideungoe le sisera bahwa barak ka geujak u gunong tabor, laju le gobnyan jipeusapat ban sikureueng reutoh boh geuritan prang nyang teupeuget nibak beuso nyan, meusigoe-sigoe deungon banmandum pasokan jihnyan laju jiba awaknyan nibak haroset-hagoyim u krueng kison. le debora laju geupeugah hai nyan ubak barak, "jak, maju! tuhan kheueh nyang pimpin gata. nibak uroe nyoe gobnyan geupeumeunang gata ateueh sisera." dan jitreun kheueh laju barak nibak ateueh gunong tabor meusigoe-sigoe deungon ban siploh ribee droe ureueng gobnyan, oh lheurehnyan geujak prang laju sisera. dan tuhan laju geupeukaru deungon geupeutabu beba banmandum pasokan sisera meunan cit deungon banmandum geuritan prang jihnyan, sampoe sisera jitreun di ateueh geuritan prang jih nyan, laju jiplueng deungon tapak. barak laju geupeucrok geuritan prang dan pasokan musoh nyan trok u heroset-hagoyim laju ban banmandum pasokan sisera nyan geupoh mate; hana meusidroepi nyang geupeubiyue udeb. bak wateenyan sisera ka jiplueng u khimah yael, peurumoh heber, ureueng keni nyan. sabab raja yabin nibak hazor meusahabat deungon kawom keuluwarga heber nyan. bak watee sisera teuka, yael jisambot laju gobnyan dan geupeugah, "keunoe teungku, neutamong laju u dalam khimah ulon; bek neutakot." dan sisera jitamong laju u dalam khimah yael dan yael pi jitob laju pintoe khimah nyan deungon ija sinutob tiengkab mangat hana leumah teungieng. geupeugah le sisera ubak yael, "gata tulong bri keu ulon bacut le jieb; ulon leupah that grah." teuma yael laju geubuka baluem kulet, tempat teukeubah susu, dan laju atranyan geubri ubak sisera, oh lheureh nyan

geutob lom teuma deungon ija sinutob tiengkab. laju sisera geupeugah ubak yael, "gatajak kheueh laju dan gataadong nibak babah pintoe khimah. meunyo na ureueng teuka dan jitanyong bak gata peu kheueh na ureueng disinoe, gata peugah laju hana." sisera rupa jih lumpah that hek akhe jih gobnyan teugantuek dan laju teungteut deungon teuhanta hana jitee droe. yael laju jicok saboh palee dan saboh pasak keu khimah, deungon seungab-seungab jipeurab laju ubak sisera nyang mantong teungteut nyan. oh lheurehnyan pasak nyang kana bak jaroe jih nyan jipeh laju u dalam on punyueng sisera nyan sampoe beusot trok ubak tanoh. meunan kheueh cara yael jipoh mata sisera. bak watee barak teuka geujak mita sisera, yael laju jisambot barak sirira jipeugah ubak gobnyan, "jak keunoe, jeuet lon tunyok ubak droeneueh ureueng nyang neujak mita nyan." barak laju geutamong meusigoe deungon yael, deuh laju geukalon bahwa sisera nyan ka mate, teutiek di ateueh tanoh deungon pasak khimah mantong na teulabang nibak punyueng jihnyan. uroe nyan tuhan geupeumeunang keu ureueng israel ateueh yabin, raja kanaan. raja nyan maken treb seumaken jiteugon le ureueng israel sampoe akhe jih gobnyan binasa. nibak uroenyan jimeu ca-e kheueh debora dan barak aneuek abinoam. meunoe kheueh jipeugah: pujoe kheueh tuhan, sabab pahlawan-pahlawan israel ka meuteukat keu jimeujuang, dan rakyat deungon rila jijak meuprang. deungoe kheueh hai bubena raja dan pangeran, ulon meuca-e keu po teu allah israel, nyan kheueh tuhan. bak watee droeneueh beurangkat nibak seir, ya tuhan ulon, dan wilayah edom droeneueh tinggai, bumoe meugeunta, luengkiek-luengkiek langetpi teubuka, dan awan dilangetpi jipeutreu ujeuen. gunong-gunongpi meuguncang di daerah peunguasa sinai, dikeue tuhan, allah israel. di masa samgar, aneuek anat, dan meunan cit bak masa yael, hana khalipah di nanggro, hana teuma keulana nibak rot ueh raya. banda-banda israel hana nyang keumiet, sungue ngon seungab sampoe watee droeneueh teuka, debora; droeneueh teuka na lagee sidroe ma nyang teusayang. bak watee israel phon jiseumah dewa, beukaih kheueh prang di nanggro awaknyan; lamkawan 40.000 ribee pahlawan bansa, hana meusidroepi nyang na ji beuot sinjata. keu mandum panglima israel nyang jipeutaba droe deungon sukarila, ulon peusampoe peunghargaan ulon nyang hana teuhingga. pujoe kheueh tuhan! hai gata nyang tapasang di ateueh keuleudee puteh, gata nyang duek di ateueh tika peureumadani, dan gata banmandum nyang jak deungon gaki, tapeugah kheueh laju kisah keuhai meunang nyoe! toe deungon mon-mon ie meumata na teudeungoe su ureueng-ureueng meuca-e, jiba kisah keumeunangan tuhan sampoe meu ulang-ulang, keuhai meunang israel, umat tuhan. teuma jimeubareh kheueh awaknyan jijak laju u pintoe geureubang banda. beudoh kheueh hai debora, dan gata peubeudoh kheueh ca-e ngon meunyanoye. beudoh kheueh teuma hai barak, gata ireng kheueh ureueng nyang teuhukom! keusaria nyang na tinggai leubeh jijak meurumpok ubak peumimpin jih, awaknyan teuka, dan ka siab keu

jimeujuang keu droe geuhnyan. awaknyan geujak nibak efrain u panton, jiseutot pasokan benyamin nyang meubareh dikeue awaknyan. nibak makahir teuka bubena panglima, dan nibak zebulon jibeudoh teuma dumna peuwira. bubena ureueng patot isakhar teuka meusajan ngon debora, nyoe, isakhar teuka, dan barak pi jiseutot sajan; awaknyan jiseutot awaknyan jijak treun u panton. teuma sukee ruben hana hase jipeu teuntée sikeub sabab lamkawan awaknyan hana meuteume haba sipakat. pakon awaknyan tinggai lamkawan bubiri-bubiri? peu kheueh mangat jideungoe ureueng meurabe jimehoi beulatang peulara jih? beutoi sukee ruben hana hase jipeuteuntée sikeub sabab lamkawan awaknyan hana meuteume haba sipakat. teungoh zebulon dan naftali geumeujuang udeb mate di mideuen prang, sukee dan ka teuduek di ateuh kapai, dan sukee gad teutab teuma di siblaih u timu yordan, teuma disukee asyer teunang-teunang mantong hana jiteum minah nibak teumpat awaknyan disitot bineh pante. di taanakh, teumpat nyang rab ngon krueng di megido, raja-raja jimuprang, raja-raja kanaan jimeujuang, teuma pirak hana nyang jiba sajan sibagoe atra rampasan. meunan cit bintang-bintang meusajan meujuang jilawan sisera, nibak teumpat bayeung nyang jijak-jak di angkasa. ie krueng kison rantek bohbah jipeuhanyot musoh. maju, maju kheueh deungon peukasa, hai jiwa ulon! deungon maju teudeungoe kheueh tapak-tapak langkah guda nyang jiparah le nyang giduek di ateuh rhueg jih nyan. "kutok kheueh meros, dan nyang keumiet nyan," geupeugah le malaikat tuhan "sabab awaknyan hana trok jibri bantuan sibagoe pahlawan nyang meujuang keu tuhan." meu untong kheueh yael, peurumoh heber ureueng keni; nibak banmandum nyang keumiet khimah, gobnyan kheueh nyang paleng teuhoreumat. sisera jilakee ie, teuma jihnyan teubri susu keu gobnyan, teupeu seumah ukeue ie susu nyang ka teuro di dalam cangkik nyang patot keu raja-raja. deungon pasak dan palee bak jaroe geuhnyan le yael geuseukok nibak ulee sisera sampoe meuhambo aso ulee. bak gaki yael jih nyan reubah hana le meunyawong teutiek bak tanoh sampoe trok ajai. nibak ruweueng-ruweueng teungkab mak sisera jingieug sira geupeugah, "pakon geuritan awaknyan hana trok jiwoe, pakon teuma hana teudeungoe su tapak guda?" nyang paleng areh dumna dendayang jih nyan jijawueb laju nyang ka jiteum keudroe didalam ate jih nyan: "awaknyan teungoh jipeuweuk ngon jibagi hareuta nyang jireupah, keu tieb-tieb tantra sidroe atawa dua droe aneuek inong dara. keu sisera, bahan bajee nyang paleng meuhai yuem, keu ratu, ija seuleundang nyang ka teusulam ngon beuneung meubagoe curak wareuna." seumoga dumna musoh-musoh droeneueh, ya tuhan, mate ngon tiwaih lagee sisera, teuma banmandum sahabat droeneueh mandum meujaya bak lagee surya di langet raya! oh lheureh nyan, teuntram ngon aman kheueh nanggroe nyan sampoe peuet ploh thon treb jih teuma. lom sigoe teuk ureueng israel meudesaya ubak tuhan, akhe jih gobnyan geupeubiyeu mantong bansa midian jikuasa awaknyan na tujoh thon treb jih. ureueng

israel lumpah that teumakot keu ureueng midian, sampoe awaknyan na nyang jijak musom u dalam guha-guha dan di teumpat-teumpat laen nyang awaknyan anggab aman nibak gunong-gunong. lom teuma tieb-tieb watee bak watee ureueng tani israel jijak pula sinaman, bak watee nyan kheueh teuma teuka ureueng midian meusajan-sajan ngon ureueng amalek dan ureueng-ureueng laen nibak padang pasi jijak prang israel. awaknyan jipeudong khimah didalam daerah ureueng israel dan bubena seunaman ureueng israel nyan sampoe u daerah sikeulileng gaza di siblaih u seulan. meunan cit deungon beulatang peulara lagee bubiri, leumo dan keuleudee umat israel nyan ka habeh jipeuplueng banmandum. hana meusapeue nyang na awaknyan tinggai sampoe keu umat israel hanale peunajoh meubacut pi teuma. ureueng-ureueng nyan jijak ngon cara meuroun-roun deungon beulatang peulara dan khimah awaknyan dalam jeumeulah nyang lumpah raya. awaknyan dan unta-unta lumpah that jai keu hase teu itong. awaknyan jiteuka keu jijak peurasak nanggroe nyan, dan umat israel nyan hana hase jipeubuet sapeue u ateuh awaknyan. oh lheureh nyan umat israel laju jitawok ngon sira jimeulakee ubak tuhan mangat tuhan geutulong awaknyan geujak lawan ureueng midian. le tuhan geu kirem teuma sidroe nabi keu awaknyan. nabi nyan geupeugah, "meunoe kheueh feureuman tuhan, po teu allah israel: 'gata ka ulon peubeubaih nibak jipeubudak di nanggroe meuse. gata ka ulon peuseulam nibak ureueng meuse dan nibak ureueng-ureueng nanggroe nyoe nyang jijak prang gata. awaknyan ka ulon use nibak nanggroe nyoe bak watee gata tajak prang awaknyan, laju ulon bri tanoh awaknyan keu gata. ka lheureh ulon peugah ubak gata bahwa ulon nyoe kheueh tuhan po teu allah gata, dan bahwa gata hana jeuet taseumah ubak dewa-dewa bansa amori nyang nibak nanggroe jih gata tinggai nibak saat nyoe. teuma gata hana taseutot ubak peue nyang ka ulon peurintah nyan.' " bak si uroe malaikat tuhan geujak ubak ofra, laju geuduek dimiyueb bak sala, atra yoas, yoas nyan na kheueh sidroe nibak golongan kawom abiezer. aneuek jih nyan nan jih gideon, sidroe ureueng tukang prah gandom nibak teumpat teuprah ie anggo. gobnyan geupeubuet nyan deungon teumusom-musom mangat hana jingieug le ureueng midian. malaikat tuhan laju geupeuleumah droe ubak gobnyan sira geupeugah, "hai, peumuda nyang peukasa! tuhan na meusajan deungon gata!" ji seutot le gideon, "meuah, teungku! meunyo beutoi tuhan na meusajan deungon kamoe, pakon banmandum hai nyoe jiteuka u ateuh kamoe? dipat kheueh banmandum buet nyang ajaeb nyang ka geupeubuet le tuhan yoh masa ilee nyang ka lheureh geupeugah le indatu kamoe keuhai pakriban tuhan geupeuteubiet awaknyan nibak nanggroe meuse? jinoenyo tuhan ka geutinggai kamoe dan geupeubiyeu kamoe jikuasa le ureueng-ureueng midian." oh ka lheureh nyan tuhan geubri teuma peurintah lageenyo ubak gideon, "deungon sigala teunaga gata tajak peuleuh kheueh ureueng israel nibak keukuasaan ureueng midian. ulon kheueh nyang kirem gata." geujawueb le gideon, "pakon

jeuet ulon, ya tuhan? panena mungken ulon peuleuh umat israel nibak keukuasaan ureueng midian. didalam sukee manasye, kawom ulon kheueh nyang paleng leumoh. dan didalam sukee ulon, ulon kheueh ureueng nyang paleng hana meuguna." "pasti gata hase!" kheun tuhan, "sabab ulon kheueh nyang tulong gata. ureueng-ureueng midian teuma hase gata peuhanco deungon mudah, siulah-ulah nyang gata peukeunyan sidroe ureueng mantong." geujaweub le gideon, "meunyo ulon nyoe beutoi-beutoi geugalak le tuhan, cuba kheueh neubri saboh tanda bahwa keubiet tuhan kheueh nyang bri peurintah nyan ateuuh ulon. ulon lakee beuneutem kheueh tuhan neupreh ilee disinoe sampoe ulon seulesoe ulon bri peunajoh keu tuhan." "get kheueh," jaweub tuhan, "ulon teuma lon preh sampoe gata tagisa." teuma jijak woe kheueh laju gideon u rumoh gobnyan, oh trok u rumoh giesie laju saboh kameng muda dan geutagen laju sampoe masak, oh ltheueh nyan geucok teuma siploh kilo gram teupong, teupong nyan geupeuget laju keuruti nyang hana meurago. oh ltheuehnyan uengkot sie nyan geukeubah laju dalam raga, dan kuwah jih dalam beulangong, banmandum nyan geuba dan geu peuseumah laju ubak malaikat tuhan nyang teungoh geu preh di miyueb bak sala nyan. malaikat tuhan nyan geupeugah, "gata keubah kheueh laju uengkot cit dan ruti nyan di ateuuh batee nyoe dan taro kheueh laju kuwah uengkot cit nyan u ateuuh nyan." gideon geupeubuet laju peue nyang ka geupeurintah nyan keu gobnyan. oh ltheuehnyan malaikat tuhan nyan geu sunyueng laju jaroe gobnyan laju deungon ujong kayee nyang teungoh geumat nyan geu cukeh laju uengkot sie dan ruti nyan. batee nyan hu laju habeh kheueh tutong jipajoh le apui uengkot sie dan ruti nyan. oh ltheueh nyan malaikat nyan pi gadoh. gideon sada bahwa nyang teuka ubak gobnyan na kheueh malaikat droeneueh!" teuma tuhan geupeugah ubak gobnyan, "teunang kheueh, bek teumakot. gata hana teuma mate." le gideon laju jipeuget saboh miseubah disinan, dan geuboh nan miseubah nyan "tuhan punca seujahtra". miseubah nyan sampoe an jinoe mantong na di ofra, nibak banda ureueng abiezer. bak malam nyan tuhan geubri peurintah lagee nyoe ubak gideon, "gatajak cok kheueh laju leumo agam atra bapak gata, leumo nyang gata coknyan nyang paleng jroh nyang mantong meu-umu tujoh thon. gata reuloh kheueh laju miseubah nyang jipeuget le bapak gata keu baal, gata peureubah laju tameh nyang meulambang dewi asyera nyang na disiblahi miseubah nyan. di ateuuh sinumpok miseubah nyang ka reuloh nyan tapeudong kheueh laju saboh miseubah nyang ka teureuncana deungon get lom teatoue. oh ltheuehnyan ban saboh leumo agam nyan, gatatot sibagoe keureubeuen keu tuhan. gata cok kheueh tameh lambang dewi asyera nyang ka gata peureubah nyan keu kayee apui jih." teuma gideon geupileh laju siploh droe namiet dan geujak laju geupeubuet peue nyang ka geupeurintah le tuhan

nyan ubak gobnyan. teuma le sabab geuhnyan teu-makot that-that ubak keuluwarga gobnyan dan keu ureueng-ureueng nyang na di gampang nyan, teuma geuhnyan hana geujeuet geupeubuet peurintah nyan meunyo mantong uroe. le sababnyan atra nyan geupeubuet oh watee malam teuka. oh beungoh singoh peunduduek banda nyan ka jibeudoh nibak teupat eh, laju awaknyan jikalon miseubah keu baal dan lambang keu dewi asyera ka reubah. meunan awaknyan jikalon bahwa nibak teupat nyan ka na teudong dan ka teuma ltheueh teutot saboh leumo agam sibagoe keureubeuen. teuma awaknyanpi teuhireuen-hireuen dan jiteumanyong teuma sabe keudroe-droe jih, "soe kheueh poe buet nyoe?" oh ka ltheueh jiseulidek, bahwa gideon aneuek yoas kheueh nyang peubuet nyan. laju jipeugah le awaknyan ubak yoas, "aneuek droeneueh ka jireuloh miseubah baal dan jipeureubah teuma tameh peulambang dewi asyera nyang na di siblahi miseubah nyan. gataba kheueh laju aneuek droeneueh nyan tapeuteubiet kheueh laju keunoe. jihnyan haroh mate!" yoas geujaweub laju ubak banmandum nyang lawan geuh nyan, "peu kheueh gata nyoe banmandum gata dong ubak baal dan ta keuneuk bila hai nyan? soe nyang dong blah jihnyan, ureueng nyan teuma teupoh mate nibak uroe nyoe cit! meunyo baal keubiet po teu allah, bah kheueh jih nyan keudroe nyang bila droe jih, sabab nyang jireuloh nyan na kheueh miseubah jih keudroe." sabab yoas geupeugah, "bah kheueh baal keudroe jilawan gideon, sabab jihnyan ka jireuloh keudroe miseubah jih nyan." dan phon saat nyan ureueng jiboh nan gideon deungon nan "yerubaa". bak watee nyan banmandum ureueng midian, amalek dan sukee-sukee bansa nyang laen di padang pasi siblahi u timu yordan ka meusapat. awaknyan laju jijeumeurang krueng yordan, dan jipeudong laju kimah di panton yizreel. teuma gideon ka geukuasa le roh tuhan, sampoe gobnyan laju geuyueb beureuguih keu geutawok bubena ureueng-ureueng kawom abiezer mangat teuka jijak meusaho deungon geuh nyan. gobnyan geukirem cit utosan ubak sukee asyer, zebulon, naftali dan sukee manasye – bah nyang na blaih u timu meunan cit nyang blaih u barat krueng yordan, keu teulakee mangat awaknyan jimeusaboh ngon gobnyan. dan awaknyan mandum keu jijak meusaboh ngon gideon. laju gideon geupeugah ubak po teu allah, "tuhan, droeneueh ka neupeugah bahwa droeneueh keuneuk neupeuguna ulon keu teupeubeubaih umat israel. meunyo biet lageenyang, teuma di ateuuh tanoh nyoe, bak teupat kamoe nyang ka lazem kamoe lo aneuk gandom nibak mu jih ka ulon keubah gunteng bulee bubiri. meunyo singoh nyang jipeubasah le ie mbon bulee bubiri nyoe mantong, dan tanoh jih hana basah, dan nyan kheueh sibagoe bukeuti droeneueh keuneuk peuguna ulon keu lon peubeubaih umat israel." dan jeuet kheueh lagee nyan: watee gideon geubeudoh oh singoh beungoh nyan dan laju geuceupat bulee bubiri nyan, laju geuteume ie mbon na saboh cangkik. laju gobnyan geupeugah ubak po teu allah, "tuhan, bek kheueh droeneueh beungeh meunyo ulon meututoe lom. neupeu idhin kheueh lon peuna lom saboh teuk nyang lon ujoeng gunteng bulee

bubiri nyoe. teuma goenyoeh bah kheueh bulee bubiri nyoe teutab tho, hana basah, dan tanoh jih nyang basah." malam nyan po teu allah geupeupeunoh peue nyang jilakee le gideon nyan, dan oh singoh beungoh nyan bulee bubiri nyan teutab tho, teuma tanoh jih ka basah le sabab keunong ie mbon. bak siuroe gideon deungon banmandum aneuek buah gobnyan geubeudoh nibak teumpat eh ban beungoh that. awaknyan jijak laju peudong khimah nibak mata ie harod. teumpat khimah-khimah ureueng midian nyang na disiblahi utara nibak awaknyan, nibak panton nyang to ngon buket more. tuhan meufeuroman ubak gideon, "aneuek buah gata lumpah that jai. ulon hana lon peumeunang u ateuah awaknyan ureueng midian, sabab singoh awaknyan jipike awaknyan meunang le sabab teunaga jih keudroe, nyang kheueh awaknyan hana jipujoe ulon. le sababnyan, gata peumaklum kheueh ubak aneuek buah gata, 'soe nyang meurasa teumakot, haroh bubagaih jitinggai gunong gilead nyoe dan jakwoe laju u rumoh droe maseng-maseng.'" teuma na 22.000 droe nyang jijak woe; dan nyang tinggai 10.000 droe mantong. laju tuhan meufeuroman lom ubak gideon, "aneuek buah gata nyan mantong rame that nyan. gata ba kheueh awaknyan u bineh krueng. nibak teumpat nyan eunteuk ulon sareng awaknyan keu gata. meunyoeh ulon peugah ubak gata, 'ureueng nyoe jeuet jijak deungon gata,' ureueng nyan bah jijak. teuma meunyoeh ulon peugah, 'ureueng nyoe hana jeuet jijak deungon gata,' meunan cit ureueng nyan hana jeuet jiseutot gata." teuma gideon laju geuba ureueng-ureueng nyan u bineh krueng, le tuhan geupeugah ubak gideon, "ureueng nyang jilieh ie lagee asae meulieh, nyang lagee nyan haroh gata peumeueng kreeh deungon ureueng nyang jijeb ie deungon ji meu teuot." teuma na 300 droe ureueng nyang jilieh ie dalam paleut jaroe jih; teuma banmandum nyang laen jimeu teuot watee jijeb ie. oh lheuhen nyan tuhan geupeugah lom ubak gideon, "ban lhee reutoh droe nyang jijeb ie sira jilieh bak paleut jaroe jih nyan, ulon teuma lon peubeubaih gata dan ulon peumeunang gata ateuah ureueng midian. gatayue kheueh nyang laen nyan jijak woe." sabab nyan gideon geuyue woe laju ureueng israel nyang laen nyan mangat jijak woe keucuali nyang lhee reutoh droe nyan nyang tinggai. banmandum beukai dan beureuguih jikok bak ureueng nyang geuyue woe nyan. ureueng midian na di panton di miyueb teumpat ureueng israel jipeudong khimah. malam nyan tuhan meufeuroman lom ubak gideon, "beudoh, gideon! gata jak prang laju khimah-khimah ureueng midian. ulon teuma lon peumeunang gata ateuah awaknyan. teuma meunyoeh gata teumakot, gata pakat kheueh si pura, namiet gata nyan jijak meusajan-sajan ubak khimah-khimah musoh nyan. nibak teumpat nyan eunteuk gata deungoe peue nyang teungoh jipeugah le musoh nyan, dan hainyan teuma teupeujeuet gata beurani gata seurang." le sababnyan geujak kheueh laju gideon deungon pura, ubak panggong khimah-khimah musoh. ureueng midian, amalek dan ureueng-ureueng nyang laen nibak padang pasi, na meutabu dipat-pat mantong nibak panton nyan. panton jih lagee daruet nyang

teungoh meukeurumon. meunan cit deungon unta-unta awaknyan lumpah that jai na lagee anou dibineh pante. bak watee gideon ka trok keunan, laju geudeungoe na sidroe ureueng teungoh jipeugah lumpo jih ubak rakan jih. ureueng nyan jipeugah lagee nyoe, "ulon meulumpo na saboh umpang ruti meugule-gule jitamong laju udalem khimah-khimah geutanyoe laju jipok ateuah saboh nibak khimah nyoe. khimah nyan pi reuloh sampoe rata deungon tanoh." rakan ureueng nyan jijaweueh, "wah, nyan pasti peudeueng gideon aneuek yoas, ureueng israel nyan! nyan meumakna bahwa po teu allah ka geupeumeunang awaknyan ateuah ureueng midian dan banmandum angkatan prang geutanyoe!" bak watee gideon geudeungoe keuhai lumpo ureueng nyan dan makna jih, gobnyanpi laju geusujut geuseumah po teu allah. oh lheuhenyan geugisa laju ubak khimah-khimah israel dan geupeugah, "meusiab-siab kheueh! tuhan geupeumeunang keu gata ateuah angkatan prang midian!" le gideon geubagi ban lhee reutoh droe aneuek buah geuhnyan jeuet keu lhee boh reugu. tieb-tieb sidroe ureueng geubri saboh beureuguih dan saboh kendi nyang meu aso culot. kheun gideon ubak awaknyan, "meunyoeh ulon ka trok ubak bataih khimah-khimah ureueng midian, gata ngieng kheueh ateuah ulon beuet-get, dan tapeubuet kheueh peue nyang ulon peubuet. meunyoeh ulon dan reugu ulon kamoe yueb beureuguih, meunan cit gata haroh neuyeb teuma beureuguih gata. laju gata haroh teuma gata dumperk deungon su nyang teuga ban sikeulileng khimah-khimah nyan, 'keu tuhan dan keu gideon!' karab trok teungoh malam, gideon dan ureueng-ureueng gobnyan sampoe laju ubak bataih khimah musoh. bak watee nyan ureueng nyang jaga khimah-khimah nyan ban mantong meugantoe ngon ureueng laen. le gideon dan reugu gobnyan geuyueb beureuguih dan geupeubeukah kendi-kendi awaknyan. ban dua boh reugu nyang laen pih jipeubuet cit nyang lagee nyang ka geupeubuet le gideon ngon reugu gobnyan nyan. laju awaknyan banmandum jibeut culot-culot awaknyan deungon jaroe wie, dan jiyueb beureuguih nyang na bak jaroe uneuen awaknyan. le awaknyan jidumperk sira jiklik deungon su nyang teuga, "peudeueng keu tuhan dan keu gideon!" awaknyan maseng-maseng teutab jidong nibak teumpat ban sikeulileng khimah nyan. teuma banmandum angkatan prang musoh nyan ngon hana jisangka-sangka laju jiplueng ban saleuem le sira jiklik ngon jiteumawok. bak watee gideon dan ureueng-ureueng gobnyan teungoh geupeumus beureuguih, tuhan laju geupeujeuet angkatan prang musoh saleng jiseurang sidroe ngon nyang laen deungon peudeueng. awaknyan laju jipeuplueng droe u arah zerera sampoe jioh jih u bet-sita dan banda abel-mehola nyang rab ngon tabat. teuma di sukee naftali, asyer, dan sukee manasye bah kheueh nyang di siblahi u timu meunan cit nyang siblahi u barat krueng yordan jitawok cit teuma. le awaknyan jijak tiyeub tantra midian. meunan cit u banmandum daerah efraim, gideon teukirem haba teumawok nyoe, "jak tatreun tajak prang ureueng midian. gata peuteun kheueh krueng yordan dan

banmandum aneuk krueng sampoe jioh u bet-bara. bek tapeubiyeu ureueng midian jijeumeurang nibak tempat nyan." teuma bubena ureueng-ureueng efrain pi jikraih banmandum, laju awaknyan jijak peuteuen krueng yordan dan banmandum aneuk krueng sampoe jioh jih u bet-bara. dua droe tukoh bansa midian, nyan kheueh oreb dan zeeb jidrob le awaknyan. oreb jipoh mate nibak batee oreb dan zeeb jipoh mate di tempat teupraih ie boh anggo zeeb. ureueng-ureueng efrain nyan hana jipioh jitiyeub laju ureueng midian, laju jiba ulee oreb dan zeeb ubak gideon di meurandeh krueng yordan siblih u timu. ureueng efrain jipeugah ubak gideon, "pakon kamoe nyoe hana neupakat bak watee droeneueh neubeurangkak neujak prang ureueng midian? peu kheueh sabab jih kamoe nyoe neupeusaneut lagee nyan bagoe?" meunan kheueh awaknyan jimeu kroeb-kroeb ubak gideon. teuma gideon geujaweueb, "peue nyang ulon peubuet hana kheueh meumakna meunyo ulon peubandeng deungon peue nyang ka awaknyoe peubuet. bahpi nyang gata peubuet nyan cit bacut sagai, teuma nyang bacut nyan jioh leubeu meuyuem nibak banmandum nyang ka jipeubuet le banmandum pasokan ulon. gata kheueh nyang ka meuteume kuasa nibak po teu allah sampoe meuhase teupoh mate oreb dan zeeb, ban dua tukoh midian nyan! teubandeng deungon nyan, peu kheueh jasa ulon?" oh ka ltheueh gideon geupeugah lagee nyan, awaknyan hana beungeh le. bak watee nyan gideon deungon ban lhee reutoh aneuk buah gobnyan trok laju u meurandeh krueng yordan. awaknyan ka hek that-that teuma mantong cit jitiyeub musoh. oh ltheueh nyan awaknyan trok laju u sukot. di sinan gideon geupeugah ubak peunduduek banda, "gata tulong kheueh tabri keu aneuk buah ulon biok peunajoh. awaknyan ka hek that-that seudangkan kamoe mantong kamoe tiyeub zebah dan salmuna, raja-raja midian nyan." teuma peumimpen-peumimpen di sukot nyan jijaweueb, "ah, gata nyoe gohlom tadrob zebah dan salmuna, gata ka talakee peunajoh! keupeue guna jih aneuk buah gata nyan teubri peunajoh?" teuma geupeugah le gideon, "meunyo meunan bah kheueh! eunteuk meunyo tuhan ka geubri meunang keu ulon ateuheh zebah dan salmuna, gata ulon sunuet deungon kayee meudoro nibak padang pasi!" oh ltheuehnyan gideon geujak lom meuneujak geuhnyan dan trok laju u pnuel. meunan cit disinan gobnyan geulakee peunajoh keu aneuk buah geuh. teuma geujaweueb le ureueng pnuel saban cit lagee nyang ka jijaweueb le ureueng di sukot. le sababnyan gideon geupeugah ubak awaknyan, "eunteuk ulon teuma lon gisa deungon sealamat. dan bak wateanyan ulon teuma lon peuhango meunara banda nyoe!" bak wateanyan zebah dan salmuna deungon banmandum pasokan awaknyan teungoh na di karkor. nibak banmandum pasokan ureueng-ureueng padang pasi, teuma na kira-kira 15.000 droe mantong nyang na tinggai; 120.000 droe tantra ka habeh tiwaih. gideon geujak laju sitot rot bak bataih padang pasi di siblih u timu nobah dan yogbeha laju geuseurang musoh ngon cara meudadak. zebah dan salmuna, ban dua droe raja midian nyan laju jiplueng, teuma

gideon jipeuleb awaknyan dan geudrob, sampoe banmandum angkutan prang awaknyan ka jeuet keukaru hana meuteuntee. oh ltheueh nyan nibak rot ueh teungoh geuwoe bak geujak meuprang nyan, gideon geucok laju rot nyang meusineungoh meulalu heres. di sinan jidrob teuma sidroe aneuk muda nibak sukot, laju gobnyan geutanyong bak ureueng nyan nan-nan ureueng malem agama nyang na di sukot. teuma ureuengnyan laju jitleh nan-nan nyan keu gideon – banmandum nan-nan nyan na droe. oh ka ltheueh nyan gideon laju geujak meurumpok deungon ureueng patot-patot di banda nyan sira geupeugah, "pasti gata mantong teuingat bahwa gata ka ltheueh tatulak keu gata tulong ulon, sabab ulon gohlom ulon droeb zebah dan salmuna, bukan? gata hana tatem bri peunajoh keu aneuk buah ulon; padahal awaknyan teungoh hek that-that nibak watee nyan. ngeng kheueh keunoe, nyoeapat zebah dan salmuna." oh ltheueh geupeugah lageenyan gideon laju geujakcok duro di padang pasi, laju ngon duronyan geuseunuet bansalam le ateuheh ureueng patot-patot di banda sukot nyan. di pnuel pi geureuloh dan geupeuhanco teuma meunara bandanyan meunan cit geupoh mate bubena ureueng agam didalam banda nyan. oh ltheuehnyan gideon laju geutanyong ubak zebah dan salmuna, "pakriban hi jih ureueng-ureueng nyang gata poh di tabor nyan?" zebah ngon salmuna nyan laju jijaweueb, "awaknyan banmandum lagee ruman gata, lagee keuturonan ureueng bansawan." "nyan syedara-syedara ulon – aneuk-aneuk mak ulon," geupeugah le gideon, "seukira jih gatanyoe hana tapoh mate awaknyan, nyang jikeubit jih ulon nyoe hana teuma ulon poh mate gata." laju geupeugah le gideon ubak yeter, aneuk tuha gobnyan, "gata poh mate banmandum awaknyan!" teuma yeter mantong muda. teuma, gobnyan jitakot sampoe jihnyan hana jijeuet suit peudeueng jih lam sarong keu jipoh mate. jipeugah le zebah dan salmuna bak gideon, "keunoe, meunyo gata ureueng agam, gatapoh mate kheueh kamoe ngon jaroe gata keudroe!" teuma gideon pih laju geupoh awaknyan geucok teuma banmandum piasan nyang na meugantung nibak takue unta zebah dan salmuna nyan. oh ltheueh nyan jipeugah kheueh le umat israel ubak gideon, "droeneueh ka neupeulheueh kamoe nibak keukuasaan ureueng midian. sabab nyan bah kheueh droeneueh jeuet keupeumimpen kamoe – droeneueh dan keuturonan droeneueh." geuseuot le gideon, "han jeuet, ulon hana hase jeuet keupeumimpen gata; meunan cit deungon aneuk ulon hana hase. tuhan kheueh peumimpen gata." teuma oh ltheueh nyan gideon geupeugah lom, "teuma saboh nyang ulon lakee; anteng-anteng nyang gata reubot nibak musoh, bah kheueh nyan banmandum gata jok ubak ulon." (ureueng midian lazem jih galak that jingui anteng-anteng nyang teupeuget nibak meuh; saban cit lagee ureueng laen nyang tinggai di padang pasi.) "get," jawueb awaknyan, "deungon sigala seunang ate teuma kamoe bri nyan keu droeneueh." laju awaknyan jileueng sion ija, oh ltheueh nyan tieb-tieb ureueng laju jiteuka jijak keubah anteng-anteng nyang jireupah nibak musoh u dalam ija nyang ka teuleung nyan. banmandum

anteng-anteng meuh nyang jijok ubak gideon bak watee nyan brat jih rab dua ploh kilogram, gohloim jitamong keunan pianan-piasan, taloe takue, ija ungu nyang jingui le raja-raja midian, dan taloe takue nyang na teupeungui nibak takue unta-unta awaknyan. nibak meuh nyan gideon laju geupeuget saboh patong beurala, patong nyan geukeubah di gampong gobnyan, na kheueh di gampong ofra. banmandum ureueng israel jijak keunan keu jijak seumah patong beurala nyan, sampoe awaknyan hanale jipakoe ubak po teu allah. dan hainyan ka jeuet keu taron nibak gideon dan keuluwarga gobnyan. ureueng midian hana hase le jipeugah sapeue; awaknyan ka jipeutaloe le ureueng israel. deungon nyan aman kheueh nangroe nyan puet ploh thon treb jih simantong gideon mantong udeb. oh ka ltheueh meuprang nyang meukeubok nyan, gideon geuwoe laju u gampong droe geuh dan laju tinggai disinan. gobnyan na meu aneuk tujuh ploh droe aneuk agam, sabab peurumoh gobnyan rame. na cit teuma gundek gobnyan di sikhem; nibak gundek geuh nyan na teuma geumeu aneuk sidroe aneuk agam nyang geuboh nan abimelekh. watee umu gobnyan ka tuha that baro kheueh gideon aneuk yoas nyan meuninggai donya. gobnyan teupeukubu nibak lampoh jrat yoas, ureueng syiek gobnyan. jrat nyan na jih di ofra, na kheueh banda kawom abiezor. oh ka ltheueh gideon meuninggai donya, ureueng israel ka hana seutia le ubak po teu allah. awaknyan jiseumah dewa-dewa baal dan jipeujeuet baal-berit keu dewa awaknyan. awaknyan hana meueibadat le ubak po teu allah, tuhan awaknyan, nyang ka peulheueh awaknyan nibak banmandum keukuasaan musoh bansikeulileng awaknyan. awaknyan pi hana jibalaiah budo ateuheh keuluwarga gideon ateuheh banmandum jasa gideon keu umat israel. bak si uroe abimelekh aneuk gideon nyan jijak-jak u banda sikhem di tempat kawom keuluwarga mak jih. di sinan jihnyan jipeugah haba deungon awaknyan, kheun jihnyan, "ci gata tanyong ubak banmandum peunduduek nyang na di sikhem, nyang toh nyang leubeuh get: geupeurintah le ban tujuh ploh droe aneuk gideon, atawa le sidroe ureueng mantong? gata peu ingat ubak awaknyan bahwa ulon mantong na hubungan darah deungon awaknyan." teuma jijak kheueh laju kawom keuluwarga nibak mak abimelekh nyan ubak ureueng-ureueng sikhem dan jipeusampoe laju peusan abimelekh ubak awaknyan dan di peunduduek sikhem nyan jicok keuputusan mangat jijak seutot abimelekh, sabab meunurot awaknyan jih nyan keubit mantong na hubungan darah deungon awaknyan. oh ltheueh nyan awaknyan laju jibri keu gobnyan tujuh ploh peng pirak nyang jicok nibak rumah teupat seumah baal-berit. deungon peng nyan abimelekh laju jipeu upah saboh kawan ureueng kureueng aja mangat jijak meugabong deungon gobnyan, dan oh ltheueh nyan jijak u gampong bapak jihnyan di ofra. oh trok keudeh laju jijak poh mate ban tujuh ploh droe syedara gobnyan di ateuheh saboh batee. teuma si yotam, aneuk tulot gideon, hana keunong poh sabab jihnyan jimusom. teuma meusapat kheueh banmandum peunduduek sikhem dan bet-milo, laju

awaknyan jijak ubak bak kayee sala nyang keuramat di sikhem. disinan awaknyan laju jiangkat abimelekh jeuet keu raja. oh ka ltheueh yotam jideungoe hai nyan, laju gobnyan geujak dong ubak pucak gunong gerizim, laju geu dumppek sira geutawok ubak awaknyan, "gata deungoe ulon, hai ureueng-ureueng sikhem, mangat po teu allah geudeungoe teuma gata! bak siwatee na peuristiwa jimeusapat kheueh bak-bak kayee keuneuk jipileh raja keu bak-bak kayee nyan. teuma jipeugah kheueh le jihnyan keu bak kayee zaiton, 'jeuet kheueh raja kamoe.' ji jaweueh le bak zaiton, 'ah, hana takjan ulon. sabab meunyoe ulon jeuet keu raja gata, ulon haroh lon ploh lon peuhase minyeuk zaiton nyang that-that teupeureulee keu jingui le dewa-dewa dan manusia.' laju jipeugah teuma le bak-bak kayee keu bak kayee ara, 'droeneueh mantong jeuet keu raja kamoe.' teuma di bak aranyan jijawueub teuma lagee nyoe, 'ulon han cit ulon tem, sabab keu jeuet keuraja gata ulon haroh lon ploh lon muboh boh ara nyang mameh-mameh.' oh ltheueh nyan, jipeugah teuma le bak-bak kayee nyang laen keu bak kayee anggo, 'nah, droeneueh kheueh mantong nyang jeuet keuraja kamoe.' teuma dibak anggo nyan pi jijawueub, 'euk kheueh nyoe ulon lon ploh lon peuteubiet boh anggo nyang teupeugalak ate dewa-dewa dan manusia, teuma keu jeuet keuraja gata!' sababnyan jipeugah kheueh teuma banmandum bak kayee ubak tamah nyang meuduro, 'droeneueh kheueh mantong hai tamah nyang meuduro jeuet keuraja kamoe.' teuma di tamah nyang meuduro nyanpi jijawueub, 'meunyoe gatanyoe biet-biet keuneuk peujeuet ulon nyoe keu raja gata, jak kheueh keuno tamusom dimiyueb ulon. meunyoe gata hana tatem, teuma nibak banmandum cabeueng-cabeueng ulon nyang meuduro nyoe teuma jiteubiet apui nyang jitot habeh bubena bak aras di libanon.' "nyan," geupeugah le yotam teuma lom, "peu kheueh deungon gata angkat abimelekh jeuet keuraja, gatanyoe ka gata meubuet deungon jujo dan ikhlaih? peu kheueh kalheueh tapeubuet nyang sipatot jih keu gideon, bapak ulon, dan kawom keuluwarga gobnyan? peu kheueh ka tabalaiah jasa-jasa bapak ulon nyang ka geumeujuang keu gatanyoe? ingat, gobnyan ka geupeusabong nyawong keu geupeuleupah gata nibak keukuasaan ureueng midian. teuma jinoenyoe gata ka takianat ubak keuluwarga bapak ulon. aneuk-aneuk gobnyan ka gata poh mate banmandum - tujuh ploh droe sigoguih di ateuheh saboh batee. abimelekh nyan na kheueh aneuk bapak ulon nibak gundek gobnyan. teuma gatanyoe ka ta angkat geuhnyan jeuet keuraja sikhem, le sabab gobnyan mantong na hubungan darah deungon gata. meunyoe buet gatanyan nibak uroenyoe ateuheh bapak ulon dan keuluwarga gobnyan ngon tuloih ate gata dan ikhlaih, silakan gata seunang-seunang deungon abimelekh, dan bah kheueh teuma jihnyan jimeu seunang-seunang deungon gatanyoe. teuma meunyoe kon lagee nyan hai jih, seumoga nibak abimelekh nyan jiteubiet kheueh apui nyang hu meukeubok-keubok sampoe tutong ngon hangoh banmandum peududuek sikhem meunan cit ngon bet-milo. dan seumoga nibak peunduduek sikhem dan bet-milo

pi jiteubiet teuma apui nyang tutong habeh tuboh si abimelekh." oh ltheuehnyan yotam laju jipeuplueng droe dan jiduke laju di beer, sabab jihnyan teumakot ubak abimelekh, syedara jihnyan. lhee thon treb jih abimelekh geumat peurintah u ateueh ureueng israel nyan. laju teuka meureuka tuhan sampoe tuhan ka geupemusoh abimelekh deungon peunduduek sikhem sampoe ureueng-ureueng sikhem nyan jijak lawan abimelekh. hainyoe teujadi mangat teubalahi buet nyang jeuhet nyang ka jipeubuet le abimelekh dan ureueng-ureueng sikhem nyan peusuna jihnyan keu jipoh mate bantujuh ploh droe aneuek-aneuek gideon. ureueng-ureueng sikhem nyan laju jipeuguet pageue peuhalang di ateueh pucak-pucak gunung mangat hasa teudrob abimelekh. soemantong ureueng nyang liwat rotnyan laju jireupah ngon jirampok le ureueng nyang preh nyan. teuma hainyoe laju jibri tee ubak abimelekh. bak watee nyan gaal aneuek ebed ka teuka meusigoe-sigoe deungon syedara-syedara jih keujikeuneuk tinggai di sikhem; dan di ureueng-ureueng pi jipateh keu jihnyan. awaknyan laju jijakpot boh anggo nyang na di lampoh-lampoh anggo, nibak boh anggo nyang ka jipot nyan le awaknyan laju jipeuguet ie anggo, dan jipeuna khanuri. awaknyan jimakheun sira jijieb ie anggo nibak teungpat jiseumah dewa-dewa droe jih sira jiseurapa ngon jimeu peb-peb u ateueh abimelekh. "soe geutanyoe nyang sibeuna jih nyoe, sampoe geutanyoe ta taklok ubak abimelekh?" geupeugah le gaal. "dan jihnyan soe teuma nyang seubeuna jih? bukon kheueh jih nyan aneuek gideon nyang deungon zebul waki jihnyan ka jeuet keunamiet hemor, bapak sikhem, indatu geutanyoe!" "meunyo ulon nyang pimper ureueng-ureueng sikhem nyoe, pasti ka habeh riwayat abimelekh nyan! ulon peugah ubak jihnyan, 'kah tajoe keunoe! gata krah beuhabeh tantra gata dan jak tateubiet tamuprang ngon ta adu ngaza!' " zebul, nyang mat kuasa ateueh banda sikhem, get that beungeh watee jideungoe peue nyang ka jipeugah le gaal nyan. le jihnyan laju jikirem utosan ubak abimelekh di aruma mangat jijak peusampoe peusan nyoe, "gaal aneuek ebed meusajan-sajan deungon syedara-syedara jih ka jiteuka u sikhem dan jipeusuna peunduduek mangat jilawan gata. le sababnyan, bah kheueh gata dan ureueng-ureueng gata takak musom u lampoh bak watee malam. singoh beungoh meunyo mata uroe ka jiteubiet, gata seureubu kheueh laju banda seucara meudadak. dan meunyo gaal dan ureueng-ureueng jih jiteubiet jijak lawan gata, nyang kheueh watee jih gata heuntam awaknyan!" teuma abimelekh ngon aneuek buah gobnyan laju meugeurak oh watee malam. awaknyan meutabu laju jeuet keu peuet boh pasokan dan jijak musom laju ban silingka banda sikhem. meunan jikalon le abimelekh dan ureueng-ureueng gobnyan gaal jiteubiet dan ka jidong di babah pintoe geureubang banda, deungon seureuntak abimelekh ngon ureueng gobnyan laju geuteubiet nibak teungpat geumusom. gaal leumah laju jikalon awaknyan, dan bak wateenyan cit jipeugah ubak zebul, "ngiang, na deh ureueng rame teungoh jitreun keunoe di ateueh pucak gunung!" "ah, nyan kon ureueng," jiseuot le zebul, "nyan

bubayang nyang leumah di ateueh gunung," laju jipeugah lom le gaal, "beutoi, na ureueng treun nibak lereng buket, dan na lom saboh kawan teuk teungoh jijak keunoe nibak arah bak sala nyang keuramat!" jipeugah kheueh le zebul ubak gaal, "nyan, toh babah gata nyang raya haba nyan? ilee gata peugah keupeue geutanyoe tatundok ubak abimelekh nyan? nyoe kheueh ureueng-ureueng nyang gata hina nyan. jak, gata maju laju bak saatnyoe tajak seurang awaknyan!" dan gaal nyan jipeuteubiet laju uluwa bubena ureueng sikhem dan jijak lawan laju abimelekh. teuma abimelekh geuseureubu laju awaknyan sampoe awaknyan habeh jipeuplueng droe. ureueng mate ka meulampa sampoe trok ubak babah pintoe geureubang banda. akhe jih abimelekh geuwoe laju u aruma, dan laju geutinggai teutab disinan, zebul geu use laju gaal meunan cit deungon syedara-syedara jihnyan jipeuteubiet nibak sikhem, akhe jih awaknyan ka hana jeuet le tinggai nibak teungpat nyan. oh singoh beungoh di ureueng-ureueng sikhem laju jitinggai banda, jikeuneuk jak u lampoh dan hainyan jilapor laju ubak abimelekh. di abimelekh pi laju geupeusapat dumna ureueng-ureueng gobnyan, dan geubagi teuma awaknyan jeuet keu lhee boh pasokan, dan awaknyan laju geujak musom u lampoh-lampoh. bak watee geukalon peunduduek bandanyan teungoh jajak u lampoh, gobnyan geuteubiet laju nibak teungpat musom dan laju geupoh mate bubena awaknyan. teungoh abimelekh ngon pasokan gobnyan geucang ngon geuseureubu pintoe geureubang banda, ban dua boh pasokan gobnyan nyan laju geutiyeueb ngon geujak seureubu ureueng-ureueng nyang teungoh jiplueng u lampoh-lampoh. di abimelekh geumeucang laju si uroe suntok dan laju geuteume duek nibak banda nyan; peunduduek bandanyan geupoh mate, laju bandanyan geupeuhanco ngon geutabu teuma deungon sira. bak watee ureueng-ureueng nyang mantong na di dalam kuta sikhem geudeungoe habanyan, awaknyan jitamong laju u dalam uruek di miyueb kuil el-berit keu jijak meulindong. teuma na ureueng jijak peugah ubak abimelekh bahwa bubena ureueng di kuta sikhem nyan ka jimeusapat disinan. le sabab nyan, abimelekh dan ureueng-ureueng gobnyan geujak laju u gunung zalmon. di gunung nyan gobnyan geukoh laju cabeueng-cabeueng kayee deungon kapak, laju geugulam cabeueng kayee nyan nibak baho, oh ltheueh nyan geupeurintah teuma ubak bubena ureueng gobnyan mangat jipeubuet lagee nyang ka geupeubuet nyan. teuma awaknyanpi maseng-maseng laju jijak koh cabeueng kayee, dan jijak laju dilikot sira jiseutot abimelekh. banmandum cabeueng kayee nyan ka jitamong nibak babah pintoe uruek kuil nyan, dan oh ltheuehnyan kayee-kayee nyan laju teutot, seudangkan ureueng-ureueng sikhem nyan mantong na didalam kuil nyan. le sabab nyan mate kheueh banmandum peunduduek sikhem nyan, na kira-kira siribee droe ureueng agam ngon ureueng inong. oh ltheuehnyan abimelekh geujak teuma u tebes. bandanyan geukeupong teuma dan bandanyan pi taklok dan laju geuduek disinan. nibak teungoh-teungoh bandanyan na saboh meunara nyang lumpah kukoh dan khong. dan

banmandum peunduduek bandanyan laju jiplueng keunan, awaknyan laju jitamong u dalam meunara nyan dan jigunci laju pintoe meunara nyan, dan awaknyan laju jiek u ateueh. oh ltheuehnyan teuka kheueh abimelekh deungon meukeusut jikak seurang meunara nyan. bak watee abimelekh nyan ka trok nibak babah pintoe meunara nyan dan geukeuneuk tot meunara nyan, na sidroe ureueng inong laju jipeurhot sineuk batee u ateueh ulee abimelekh sampoe bruek ulee abimelekh nyan reutak. bagai-bagaih abimelekh geutawok sidroe aneuek bujang nyang teungoh jigulam seunjata dan geupeugah, "gata suet kheueh peudeueng gatanyan dalam sarong dan gata tak kheueh ulon deungon peudeueng gatanyan sampoe an mate; ulon hana jipeugah le gob bahwa mate ulon nyoe jipoh le sidroe ureueng inong." teuma di ureueng muda nyang mantong bujang pi laju jisuet peudeueng dan deungon peudeueng nyan kheueh jitik u ateueh abimelekh akhejih abimelekh pi mate sikeujab nyan cit teuma. bak watee ureueng-ureueng israel jikalon bahwa abimelekh ka mate, dan awaknyan pi banmandum jikakwoe u rumoh jih maseng-maseng. meunan kheueh cara jih po teu allah geubalaih u ateueh abimelekh keuhai buet nyang jeuhet nyang ka jipeubuet ateueh bapak jih keudroe, bak watee jihnyan jipoh mate ban tujuh ploh droe syedara gobnyan. dan meunan cit tuhan geuhukom teuma u ateueh ureueng sikhem sabab keujeuhetan awaknyan. hainyan paih that lagee nyang ka geupeugah le yotam aneuek gideon keuhai awaknyan bak watee gobnyan geupeusumpah awaknyan. oh ka ltheueh abimelekh nyan meuninggai donya, tola aneuek pua ka jeuet keupeumimpen keu jikak peubeubaih ureueng israel. gobnyan na kheueh cucoe dodo nibak sukee isakhar. gobnyan tinggai di samir nibak daerah meugunong efraim. dua ploh lhee thon treb jih gobnyan jipimpen bansa israel, oh ltheuehnyan gobnyan meuninggai donya laju teupeukubu di samir. oh ka ltheueh tola, dua ploh dua thon treb jih israel jipimpen teuma le yair nyang asai jih nibak gilead. aneuek gobnyan nyang agam na lhee ploh droe. bak awaknyan na teuma lhee ploih boh keuleudee nyang ka jeuet teupasang ngon teupeudieng barang di ateueh rhueng jih, meunan cit na teuma lhee ploih boh gampong di daerah gilead. gampong-gampong nyan mantong teupeunan deungon nan gampong yair. yair pi meuninggai donya, dan laju teuma teupeukubu di kamon. umat israel meudesya lom ubak tuhan. awaknyan hana jipeuduli le keu tuhan dan hana teuma jiseumah le gobnyan. awaknyan ka jiseumah dewa-dewa baal dan asytoret, meunan cit deungon dewa-dewa bansa siria, sidon, moab, amon dan filistin. sabab buet nyang lagee nyan tuhan lumpah that beungeh keu bansa israel, sampoe gobnyan geupeubiyeu mantong bansa filistin dan bansa amon jikuasa awaknyan. lapan blah thon treb jih bandua bansa nyan jiteugon banmandum ureueng israel nyang na tinggai di gilead, na kheueh di daerah ureueng amori di siblah u timu krueng yordan. awaknyan jipeusaneut ateueh ureueng-ureueng israel deungon keujam that. ureueng amon laju jijeumeurang krueng jordan keu jikak meuprang ngon sukee yehuda, benyamin dan

efraim sampoe umat israel keubit that meudeurita. sabab ka hana ekle jiteuen azeb seungsara nyang lageenyah, akhe jih umat israel nyan laju jimeulakee ngon munajab ubak tuhan, jikheun, "tuhan, kamoe ka meudesya ubak droeneueh, sabab kamoenyoe hanale kamoe pako dan hana kamoe peuduli keu droeneueh, ya allah kamoe. kamoe ka kamoe seumah ubak dewa-dewa baal." tuhan laju geujaweueb, "yoh watee uroe jeh gata ka jijajah le bansa meuse, bansa amori, bansa amon, filistin, sidon, amalek dan bansa maon. laju nibak watee nyan gata tameulakee ngon meunajab ubak ulon, bukan? ci gata ingat nyan banmandum, peu kheueh ulon hana lom peuseulamat gata nibak keukuasaan awaknyan? bahpi lageenyah, teuma gatanyoe mantong cit tapeulikit ulon, laju tajak seumah ubak dewa-dewa. jinoenyoe ulon hana lontem le lon peubeubaih gata. tajak kheueh mantong ubak dewa-dewa nyang gata pileh nyan. gata meulakee kheueh ubak dewa-dewanyan! bah kheueh awaknyan nyang tulong bak watee gata meuteume susah nyang lagee teungoh gata rasa bak saatnyoe." teuma umat israel jipeugah ubak tuhan, "kamoe ka meudesya, tuhan. neupeubuet kheueh u ateueh kamoe peue nyang tuhan keuheundaki, asai tuhan neutulong kamoe nibak uroenyoe." oh ltheuehnyan awaknyan laju jitik bubena patong beurla, laju jikak seumah po teu allah. teuma po teu allah pi got that teuharu ate gobnyan watee geukalon awaknyan dalam apoh apah. bak wateenyan tantra amon ka siab-siab keuneuk jikak meuprang. awaknyan jipeudong khimah di gilead. meunan cit deungon umat israel ka jimeusapat dan jipeudong khimah di gilead. disinan rakyat dan bubena peumimpen nibak sukee-sukee israel nyan jiteumanyong sabe keudroe-keudroe peu kheueh na lamkawan awaknyan nyang jijeuet beut sinjata jikak lawan bansa amon. ureueng nyan teuma jiangkat jeuet keupeumimpen u ateueh banmandum peunduduek gilead. yefta na kheueh sidroe sipa-i nyang ceubeueh lom beuhe. jihnyan tinggai di gilead. bapak jihnyan nan jih gilead teuma mak jihnyan na kheueh sidroe inong jeuhet nyang buet jih meumukah. bapak jihnyan na cit aneuek agam nyang laen nibak peurumoh jih nyang sah. watee aneueknyan ka rayeuk-rayeuk, awaknyan laju jiuise yefta nibak rumoh. kheun awaknyan ubak jihnyan, "droeneueh hana meuteume sapeue waresan nibak bapak kamoe, sabab droeneueh aneuek ureueng inong nyang laen." le sababnyan yefta laju meuseuliseh ngon syedara-syedara jihnyan dan laju jikak dan tinggai di daerah tob. di teumatnyan na saboh kawan ureueng jeuhet nyang buet jih peurusak ureueng laen jimeugabong laju deungon ureueng nyan dan laju awaknyan jikak meurampok atra ureueng laen. hana padub na treb oh ltheueh nyan ureueng israel jiseurang le ureueng amon. bak watee hainyan teujadi, dumna ureueng patot-patot israel nyang na di gilead jikak pakat yefta jitinggai daerah tob. awaknyan jipeugah, "gata pimpen kheueh kamoenyoe, sabab kamoe keuneuk jak meuprang ngon ureueng amon." teuma yefta jijaweueb, "bukan kheueh awaknyoe keu ulon ka tabanci hanjeuet le ulon meugabong deungon gata? gatanyoe ka neu use ulon lam rumoh bapak ulon. pakon teuma

jinoenyoe bak watee gata lam keususahan, gata teuka ubak ulon?" awaknyan jijaweueb, "kamoenyoe meuteuka mangat gata tatem pimpem banmandum peunduduek gilead keu teujak prang bansa amon nibak uroenyoe cit teuma." jiseuot le yefta, "meunyoe gatanyoe tapakat lom ulon mangat lon woe u gilead keu lon jak meuprang ngon bansa amon, dan tuhan geubri meunang ateueh geutanyoe, ulon kheueh nyang teuma jeuet keupeunguasa u ateueh gata banmandum." awaknyan jijaweueb, "kamoe situju. tuhan kheueh saksu jih." le sababnyan jibeurangkat kheueh yefta meusigoe deungon peumimpem gilead. oh ltheuehnyan peunduduek gilead laju jiangkat gobnyan jeuet keu peunguasa dan peumimpem. dan dikeue tuhan di mizpa, yefta laju jipeusampoe peue nyang jilakee ubak peunduduek gilead. oh ltheuehnyan yefta laju jikirem ureueng jihnyan ubak raja amon mangat jipeugah lagee nyoe, "peue keusalahan kamoe sampoe awaknyan jijak prang nanggroe kamoe?" le raja bansa amon nyan laju geujaweueb ubak ureueng nyang teuka sibagoe utosan nyan, "bak watee umat israel teuka nibak nanggroe meuse, awaknyan ka jireupah tanoh kamoe, phon nibak krueng arnon trok u krueng yabok dan krueng yordan. jinoenyoe tapulang kheueh nyan banmandum keu kamoe seucara dame." laju yefta jikirem lom teuma ureueng-ureueng gobnyan keu raja amon mangat jijaweueb lageenyoe, "umat israel sagai-sagai hana jireupah tanoh ureueng moab atawa tanoh ureueng amon. bak watee ureueng israel jitinggai nanggroe meuse, awaknyan jituju ulhok akaba meulalu padang pasi laju trok u kades. oh ltheuehnyan awaknyan jikirem teuma ureueng laen ubak raja edom mangat jilakee idhin jijak rot nanggroe ureueng nyan. teuma awaknyan hana jibri idhin keuhai nyan. oh ltheuehnyan jilakee teuma hai nyang lageenyon ubak moab, meunan cit di moab nyan hana cit jibri keu awaknyan mangat jeuet jijak rot nanggroe jihnyan. le sababnyan kheueh umat israel tinggai di kades. oh ltheuehnyan awaknyan jijak laju lom jisitot langkah awaknyan nyan rot padang pasi, teuma hana teuliwat rot daerah edom dan moab, teuma jicok rot meuliengka sampoe trok laju u siblahi timu moab, di meurandeh krueng arnon. awaknyan laju jipeudong khimah disinan, teuma hana jipeumeurang krueng nyan, sabab daerah nyan jitamong u dalam wilayah moab. oh ltheuehnyan umat israel jikirem teuma ureueng laen ubak sihon, raja ureueng amori di hesybon mangat jilakee idhin jijak rot daerah amori, sabab awaknyan jikeuneuk jak u daerah droe jih keudroe. teuma sihon hana jipeuidhin ubak awaknyan sabab jihnyan hana jipateh bahwa awaknyan keuneuk jak mantong. teuma jihnyan laju jikrah bubena angkutan prang jih dan laju jipeudong markas di yahab oh ltheuehnyan jijak prang laju ureueng israel. teuma tuhan, po teu allah israel, geubri keu umat israel meunang ateueh sihon meunan cit ateueh angkutan prang jih. meunan kheueh cara jih umat israel jiteume tanoh-tanoh ureueng amori nyang na tinggai di nanggroe nyan. wilayah amori nyan teudeuk phon nibak daerah arnon di siblahi u seultan, trok u siblahi utara krueng yabok, dan nibak padang pasi

di siblahi u timu, trok u krueng yordan di siblahi ubarat. jadi tuhan po teu allah israel, nyan kheueh nyang ka geu use ureueng-ureueng amori deumi keu keupeuntengan umat tuhan. dan jinoenyoe atranyan peu kheueh keuneuk gata cok lom teuma? tanoh nyang jibri le kamos, dewa gata nyan, keu gata jeuet teutab keuhak milek gata. teuma peue nyang ka geubri le tuhan, po teu allah kamoe keu kamoe, nyan teutab kamoe peuteuen. gata pike gata leubeh get nibak balak aneuk zipor, raja moab? balak nyan hantom na geulawan atawa geumuprang deungon kamoe. lhee reutoh thon treb jih israel jiduk nibak hesybon dan aror meunan cit deungon gampong-gampong ban sikeulileng nyan, dan banmandum banda-banda nibak bineh krueng arnon. dan pakon sidubnyan treb atranyan hana gata cok pulang? hana, kamoe hana meusalah bak gata. gata kheueh nyang ka meusalah sabab gata prang kamoe. tuhan kheueh hakem nyang nibak uroe geupeuputoh peukaranyoe le bansa israel dan bansa amon." teuma di raja amon hana jipakoe meubacutpi peusan nyang ka geupeusampoe le yefta nyan. oh ltheuehnyan roh tuhan geutreun laju geukuasa u ateueh yefta. dan geujak kheueh laju yefta nyan geujak saweue daerah gilead dan manasye oh ltheueh geuwoe lom u mizpa di gilead. nibak teupatnyan gobnyan geupeujak lom meuneujak geuh u wilayah bansa amon. yefta geupeuget janjinyoe ubak tuhan, "meunyoe tuhan neupeu idhin ubak ulon lon peutaloe ureueng amon, dan ulon woe ngon sealamat, dan soemantong nyang phon-phon that jiteubiet nibak rumoh ulon jeuet jijak sambot ulon, jihnyan teuma ulon peuseumah sibagoe keureubeuen nyang teutot ubak tuhan." laju yefta geujeumeurang krueng yordan mangat geujak prang ureueng amon, dan tuhan pi laju geupeumeunang keu gobnyan. yefta geu heungkoe awaknyan meuhabeh-habeh phon di aror trok u daerah silingka minit – banmandumnyan na dua ploh boh banda – dan trok sampoe sijioh abel-keramim. jai that-that ureueng amon nyang mate dalam prang nyan, sampoe taloe kheueh awaknyan banmandum nibak ureueng israel. bak watee yefta geuriwang u mizpa, aneuk dara gobnyan laju jiteuka jijak sambot keuhai ureueng syiek geuh woe sira geumeunari geupeuh rapa-i. dan nyan kheueh aneuk gobnyan nyang tunggai. meunan geukalon le yefta aneuk gobnyan teuka jijak sambot gobnyan, yefta jeuet keuteuharu ngon seudeh sampoe gobnyan laju geupriek-priek bajee gobnyan, sira geupeugah, "aduhai, aneuk ulon, hanco that ate bapak! pakon kheueh jeuet keu gata nyang teupeu jeuet ate ulon peudeh? ulon ka lon meusumpah ubak tuhan, dan sumpahnyan hana hase le bapak tarek!" laju jipeugah le aneuk daranyan ubak ureueng syiek jih, "bapak ka neumeusumpah ubak tuhan, dan tuhan pi ka geubri ubak bapak beumeunang ateueh meunalah buet nyang jeuhet nyang ma jih peubuet le ureueng amon, musoh bapak nyan. jadi, peue nyang ka bapak peujanji ubak tuhan nyan, bah kheueh neupeutrok janjinyan." teuma, jipeugah le aneuk daranyan, "nyang ulon lakee sapeue mantong: neubri kheueh watee keu ulon meudua buleuen mangat lon jak-jak meuen-meuen ngon jak peulalo ate ubak gunung

deungon rakan-rakan ulon. disinan ulon teuma lon peuratong ngon lon peumo ba-e keuhai naseb ulon, sabab ulon nyoe teuma mate simantong ulon dalam keuadaan peurawan." bapak aneuek daranyan laju geupeu idhin peue nyang ka jilakee le aneuek dara jihnyan, dan jipeulheueh laju aneuek jihnyan mangat jeuet jijak. daranyan dan rakan-rakan jih laju jijak u gunong keu jijak meuseudeh ate disinan, sabab jihnyan teuma meuninggai sigholom jihnyan meukawen dan jimeu aneuek. oh ka liwat dua buleuen, jihnyan laju jiwoe ubak bapak jih, dan le bapak jih nyan geupeubuet laju peue nyang ka geumeujanji ubak tuhan. deungon lageenyan meuninggai kheueh aneuek daranyan simantong jihnyan dalam keuadaan peurawan. nyang kheueh asai phon jih, pakon lamkawan ureueng israel, lazem jih aneuek-aneuek dara jijak peu aseng droe nyang treb jih peuet uroe tieb-tieb thon keu jijak meuseudeh ate sabab ji-ingat aneuek yefta di gilead. bak wateenyan sukee efraim ka meusiab-siab keuneuk jijak meuprang, dan jijak laju jijeumeurang krueng yordan jituju u zafon. awaknyan jipeugah ubak yefta, "pakon droeneueh neujak meuprang ngon bansa amon dan hana neupakat teuma kamoe? jinoenye kamoe meuteuka keuneuk kamoe tot droeneueh meunan cit banmandum asoe rumoh droeneueh." geupeugah le yefta, "lamkawan ureueng amon dan kamoe nyoe nyang ureueng gilead na meuseuleuseh waham nyang lumpah hebat. gata ka deungoe ulon hoi keu takaj bantu tapeubeubaih ulon nibak ureueng-ureueng amon nyan, teuma gatanyoe hana tateuka. jadi, oh ka ltheueh ulon yaken that bahwa gatanyoe hana tabantu ulon, ulon neukad lon jakprang bubena ureueng-ureueng amon nyan, bahpi ulon haroh mate le sabab nyan. laju tuhan geubri geupeumeunang ulon atueuh awaknyan. pakon teuma jinoenye gata takaj prang ulon?" oh ltheuhnyan yefta geupeusapat banmandum ureueng gilead, laju awaknyan jijakprang ngon jipeutaloe ureueng efraim. (ureueng gilead nyang na tinggai di efraim dan manasye ka jitudoh le ureueng efraim bahwa awaknyan ka jipeu aseng droe nibak ureueng efraim, sukee jihnyan keudroe.) ureueng-ureueng gilead nyang teungoh jimuprang nyan, geureubot laju teupat-teupat jeumeurang nibak krueng yordan, mangat hase jipeuteuen ureueng-ureueng efraim nyang keuneuk plueng. bak watee na sidroe ureueng efraim, nyang keuneuk jipeuplueng droe, jilakee idhin mangat jeuet jijeumeurang krueng nyan, ureueng gilead laju jityanyong ubak ureueng nyan, "peu kheueh gata nyoe ureueng efraim?" meunye jihnyan jijawueb, "bukan," awaknyan jiyue laju ureueng nyan deungon tutoe haba lageenye "syibolet". ureueng teuma jipeugah cit "syibolet" sabab hana hase jikheun nyan deungon paseeh. le awaknyan teuma laju jidrob ureueng nyan dan laju jipoh mate nibak saboh teupat di teupat teujeumeurang nyan. teuma teupoh mate kheueh 42.000 droe ureueng efraim bak wateenyan. nam thon treb jih yefta jipimpen ureueng israel nyan. oh ltheuhnyan gobnyanpi meuninggai donya laju jipeukubu di gampang droe jih na kheueh di banda mizpa di gilead. oh ltheueh yefta, umat israel jipimpen

teuma le ebzan nibak betlehem. ebzan nyan jimeu aneuek lthee ploh droe aneuek agam dan lthee ploh droe teuma aneuek inong. aneuek-aneuek geuhnyan nyang inong jipeukawen deungon sukee laen, dan meunan cit gobnyan jicok teuma lthee ploh droe aneuek dara nibak sukee laen keu aneuek gobnyan nyang agam. tujoh thon treb jih ebzan jipimpen umat israel, oh ltheuhnyan gobnyan meuninggai dan teupeukubu laju di betlehem. oh ka ltheueh ebzan, umat israel jipimpen teuma le elon nibak sukee zebulon siploh thon teuma treb jih. oh ltheuhnyan gobnyan pih meuninggai donya laju teupeukubu di ayalon di wilayah zebulon. oh ka ltheueh elon, umat israel nyan jipimpen teuma le abdon aneuek hilel nibak piraton. aneuek gobnyan nyang agam na peuet ploh droe, dan cucoe-cucoe gobnyan nyang agam na teuma lthee ploh droe. awaknyan maseng-maseng na saboh keuleudee nyang jeuet pasang di atueuh rhueng. lapan thon treb jih umat israel geupimpen le abdon. oh ltheuhnyan gobnyanpi meuninggai donya laju teupeukubu di piraton dalam wilayah efraim di daerah meugunong ureueng amalek. ureueng israel meudesya lom ubak tuhan, laju le tuhan geupeubiyeu ureueng filistin jikuasa atueuh awaknyan nyang treb jih na peuet ploh thon. bak wateenyan na sidroe ureueng agam di banda zora. nan jih manoaah, nibak sukee dan. peurmoh ureueng nyoe malee. teuma nibak siuroe malaikat tuhan geupeuleumah droe ubak ureueng nyan dan geupeugah, "seulawetnyoe gata hana jitem meu aneuek, teuma hana treb le gata mume, dan gata peulahe sidroe aneuek agam. le sababnyan jaga kheueh droe gata beujroh-jroh. bek gata jieb ie anggo atawa ie kreueh, atawa gata pajoh sapeue-sapeue peunajoh nyang hareuem. oh ka ltheueh aneuek gatanyan lahe teuma, bek sagai-sagai gata koh ok jih, sabab phon lam pruet ma jihnyan ka teupeuteuntee sibagoe sidroe nazir. gobnyan kheueh nyang teuma meujang keu geupeubeubaih bansa israel nibak keukuasaan ureueng filistin." oh ltheuhnyan peurmoh manoaah geujak ubak teungku lakoe geuh dan laju geupeugah, "teungku lakoe lon, na utosan po teu allah geujak ubak lon; hi gobnyan lagee malaikat allah, sampoe ulon jiteuka teumakot. ulon hana lon tanyong pane gobnyan geujak, dan gobnyan pih hana geupeugah ubak lon soe nan gobnyan. teuma gobnyan geupeugah bahwa ulon keuneuk mume dan lon peulahe sidroe aneuek agam. gobnyan geupeugah lom bahwa ulon hana jeuet lon jieb ie anggo dan ie kreueh, atawa lon pajoh sapeue-sapeue peunajoh nyang hareuem, sabab aneuek nyan haroh teujok ubak po teu allah mangat jeuet keu sidroe nazir siumu udeb jih." watee geudeungoe nyan, geumeudoa kheueh manoaah ubak tuhan, lageenye su doa geuhnyan, "tuhan, neutem kheueh kirem lom hamba droeneueh nyan ubak kamoe mangat kamoe teupeue peue nyang haroh kamoe peubuet atueuh aneueknyan watee jih ka lahe." po teu allah geudeungoe doa manoaah. malaikat tuhan nyan geujak lom ubak peurmoh manoaah, wateenyan peurmoh manoaah teungoh geudeuk-deuk di ladang geuh. dan lakoe gobnyan hana disinan. le sabab nyan, gobnyan laju geuplueng geujak peugah hainyan ubak lakoe geuh, "teungku

lakoe, ngieng kheueh, ureueng yoh ilee geujak ubah lon, jinoe ka trok lom!" manoa reujang-reujang geusutot peurunoh geuh. gobnyan geu peurab ubak ureueng nyan dan laju geutanyong, "peu kheueh teungku nyang ba haba ubak peurumoh lon?" "beutoi," jaweueb ureueng nyan. le sababnyan manoa laju geutanyong, "meunyo peue nyang teungku kheun nyan ka jeuet keunyataan singoh, peue nyang haroh jipeubuet le aneuek nyan? pakriban udeb jih singoh?" geujaweueb le malaikat nyan, "peurunoh gata hana jeuet jijieb le anggo atawa le kreueh, dan hana jeuet jipajoh peue-peue mantong nyang asai jih nibak bak anggo, atawa sapeue-sapeue nyang hareuem. jihnyan haroh jipeubuet banmandum nyang ka ulon peugah ubak jihnyan, dan jijaga mangat bek na nyang hana jipeubuet." laju geupeugah le manoa ubak gobnyan, "ulon harab teungku preh kheueh sikeujab. kamoe jak taguen gulee kameng muda keu teungku." teuma malaikat tuhan nyan geupeugah, "bah pih ulon preh nibak teupmat nyoe, ulon hana lon pajoh peue nyang gata hidang nyan. teuma, meunyo gata keuneuk hidang cit atranyan, hidang kheueh atranyan sibagoe keureubeuen nyang teutot, dan peuseumah kheueh nyan ubak tuhan." manoa gohlom geusada bahwa nyang meututote ngon geuhnyan na kheueh malaikat tuhan. le sababnyan gobnyan geupeugah, "meunyo meunan, neutem kheueh peugah soe nan teungku, mangat meunyo peue nyang ka teungku peugah nyan ka jeuet teuma singoh, kamoe jeuet kamoe bri horeumat kamoe ubak teungku." malaikat tuhan nyan geutanyong, "peue sabab gata meuheuet that keuneuk taturi nan ulon? nan ulon nyan nan nyang ajaeb." teuma manoa laju jicok saboh kameng muda deungon bacut gandom, laju jikeubah ateuhe batee dan jipeuseumah bak tuhan, na kheueh tuhan nyang geupeubuet hai-hai nyang ajaeb. wateenyan teuka apui teungoh hu u ateuhe nibak miseubah nyan manoa dan peurumoh geuh geukalon malaikat tuhan nyan geu ek u ateuhe lam apui hu nyan, laju geujak u langet. baro kheueh manoa geusada bahwa nyan na kheueh malaikat tuhan; le sababnyan gobnyan ngon peurunoh geuh laju geusujut sira geuseumah. ltheuehnyan hantom le geukalon malaikat nyan oh dudoe teuma. laju geupeugah le manoa ubak peurumoh geuh, "tanyoe pasti mate sabab tanyoe ka takalon po teu allah!" peurumoh geuh geujaweueb, "meunyo tuhan biet-biet keuneuk geupoh mate geutanyoe, pasti gobnyan hana geutem teurimong keureubeuen nyang tajok keu gobnyan nyan; meunan cit gobnyan hana geutem tynok banmandum nyoe ubak geutanyoe atawa geubri tee hai-hai nyang ka geupeugah nyan ubak geutanyoe." na padub buleuen teuma oh ltheuehnyan peurunoh manoa nyan geupeulahe sidroe aneuek agam laju geuboh nan simson keu aneuek nyan. aneuek nyan meutamah rayeuk dan geubri beureukat le tuhan; dan watee jihnyan na nibak khimah-khimah sukee dan, nyang na lankawan zora dan esyaot, roh tuhan laju geupeuphon bri teunaga ubak aneuek nyan. nibak siuroe simson geujak u timna, dan geukalon sidroe aneuek dara filistin nibak teupmat nyan. laju geuwoe dan geupeugah ubak ureueng syiek geuh, "ulon galak that ate keu sidroe aneuek dara filistin

di timna. ulon lakee ayah ngon ma neujak seulangke aneuek dara nyan." teuma ureueng syiek geuh geupeugah, "pakon jeuet teujak ubak ureueng filistin mangat meuteume peurumoh teuh, seudangkan awaknyan kon umat tuhan? peu kheueh lam kawom geutanyoe keudroe atawa nibak banmandum bansa geutanyoe hana nyang paih?" jaweueb simson ubak ayah gobnyan, "teuma aneuek dara filistin nyan kheueh nyang ulon galak. ulon meuharab ayah ngon ma neutem jak seulangke aneuek nyan keu ulon tuan." ureueng syiek simson hana geuteupeue bahwa tuhan kheueh nyang peujeuet banmandum nyan sampoe simson geupeubuet nyan. sabab tuhan teungoh geumita watee nyang paih keu teuprang ureueng filistin. yoh watee nyan ureueng filistin jikuasa ureueng israel. dan geujak kheueh simson u timna meusajan-sajan ngon ureueng syiek gobnyan, teungoh awaknyan geujak rot saboh keubeueng lampoh anggo, simson laju meurumpok ngon saboh singa muda, singa nyan laju jitaum dan hana teusangka-sangka simson jiteuka teuga le kuasa tuhan. laju geupriek-priek singa nyan ngon jaroe gobnyan, sang-sang beulatang nyan lagee saboh kameng, hainyan hana geupeugah bak ureueng syiek geuh. oh ltheuehnyan simson geujak saweue aneuek dara nyan dan geumarit-marit ngon sidara nyan, dan simson galak keu aneuek dara nyan. oh ka ltheueh na padub watee teuma oh dudoe, simson geujak lom keu geujak meukawen ngon aneuek daranyan. nibak meuneujak gobnyan nyan, gobnyan geuwet lom keu geujak kalon bangke singa nyang ka geupoh mate nyan. watee trok geuh keunan laju geukalon jai that-that uno lam bangke beulatang nyan, dan na cit meulisan uno. gobnyan laju geucok sira geukrok mulisan uno nyan lam paleuet paroe gobnyan, dan laju geujak sira geupajoh meulisan nyan. oh ltheuehnyan gobnyan geujak meurumpok ngon ureueng syiek geuh dan geujok cit bacut meulisan nyan ubak awaknyan dan awaknyan laju jipajoh meulisan nyan meusajan-sajan. teuma simson hana geupeugah bahwa meulisan nyan geucok nibak bangke singa. oh ka ltheueh ayah simson geujak u rumoh aneuek dara nyan, simson laju geupeuna khanuri disinan, sabab lageenyan kheueh keubiasaan nyang lazem nibak awak muda-muda. watee ureueng filistin jikalon gobnyan, awaknyan laju jipileh lthee ploh droe awak muda keu ngon gobnyan. laju simson geupeugah bak awaknyan, "ulon na hieuem. meunyo gata nyoe hase gata jaweueb, keue gata maseng-maseng ulon jok sion ija lineun nyang haloh dan sipasang peukayan nyang lagak. ubak gata ulon jok watee tujuh uroe sidub treb khanuri meukawen nyoe, keu gata jaweueb hieuem nyoe. teuma meunyo gata hana hase gata jaweueb hieuem nyoe, gata kheueh maseng-maseng nyang jok keu ulon ija lineun nyang haloh dan saboh pasang peukayan nyang lagak." laju ureueng-ureueng filistin nyan jipeugah, "jeuet! jinoe peugah kheueh hiem nyan." teuma simson geupeugah, "nibak nyang makheun, jiteubiet nyang jimakheun; nibak nyang teuga, jiteubiet nyang mameh." oh ka ltheueh na lthee uroe, awaknyan gohlom cit meuhase jijaweueb hieuem nyan. le sababnyan, bak uroe nyang keu peuet, jipeugah

kheueh le awaknyan bak peurumoh simson, "gata haroh gata bujuk lakoe teu mangat gobnyan geutem peugah keu kamoe makna hieuem nyan. meunyoeh han, kamoe tot gata ngon banmandum asoe rumoh ureueng syiek gata. rupari gata tawok kamoe keunoe keu kamoe peuhabeu atra kamoe!" le sababnyan, peurumoh simson geujak bak lakoe geuh sira geumo, lheuehnyan geupeugah, "ulon kuteupeu droeneueh hana neucinta ulon. pakon neujok hieuem ubak rakan-rakan lon, teuma droeneueh hana neupeugah makna jih ubak ulon? teuntée droeneueh neubanci ulon!" seutot simson, "preh ilee! ubak ureueng syiek lon keudroe hana lon peugah, keupeue bak gata haroh ulon kheun?" tujoh uroe treb jih khanuri nyan peurumoh simson jimo sabe. dan le sabab inong nyan hana ploh jimeurengke sabe, bak uroe nyang keutujoh, simson laju geupeugah makna hieuem nyan ubak binoe geuh. laju peurumoh simson nyan jijak peugah makna hieuem nyan ubak ureueng-ureueng filistin. dan bak uroe nyang keutujoh sigohlom mata uroe jillob, ureueng-ureueng banda nyan jipeugah ubak simson, "peu kheueh nyang leubeh mameh nibak meulisan? dan peu kheueh teuma nyang leubeh teuga nibak singa?" simson geujaweueb, "meunyoeh gata hana tapeusuna peurumoh ulon, gata hana hase tatapeuse makna hieuem nyan!" deungan hana teusangka-sangka simson jiteuka teuga le kuasa tuhan, laju geujak u askelon. disinan laju geupoh mate lhee ploh droe ureueng agam nyang sok peukayan lagak-lagak. gobnyan laju geucok peukayan awaknyan dan geujok laju ubak awaknyan nyang ka jijaweueb hieuem geuh nyan. oh lheuehnyan, laju geuwoe u rumoh gobnyan ngon ate nyang tunu. laju le ayah tuan simson geujok peurumoh simson nyan ubak nyang ireng simson yoh watee awaknyan meukawen. na padubna treb teuma oh lheueh nyan, watee musem keumeukoh boh gandom, simson laju geujak saweue peurumoh gobnyan. gobnyan geuba saboh kameng muda keu peurumoh geuh nyan. geupeugah le simson ubak ayah tuan geuh, "ulon keuneuk tamong lam bilek keu lon jak meurumpok ngon peurumoh lon." teuma le ayah tuan geuh hana geubri idhin gobnyan geutamong lam bilek aneuek geuh. geupeugah le yah tuan nyan ubak simson, "ulon pike gata biet-biet tabanci jihnyan, le sababnyan, peurumoh gatanyan ka ulon jok ubak rakan gata nyang ireng gata ilee. teuma, gata jeuet tacok adoe jih, jihnyan leubeh lagak nibak cutpo jih." geupeugah kheueh le simson, "peue nyang haroh ulon peubuet ateuhe ureueng filistin goenyoe, kon kheueh salah ulon!" laju geujak drob lhee reutoh boh asee srigala. iku tieb-tieb asee srigala nyan geuikat dua-dua. nibak sinambat talo ikatnyan, laju geuikat maseng-maseng saboh suwa apui. oh lheuehnyan gobnyan laju geutot suwa-suwa nyan ngon apui dan laju geupeuleuh asee-asee srigala nyan lam blang gandom ureueng filistin, nyang toh gandom-gandom nyan karab jeuet teupot. le sababnyan, tutong kheueh bubena gandom nyang ka jeuet pot disinan. meunan cit kon nyan mantong, seunaman gandom dan lampoh anggo meusajan-sajan tutong mandum. ureueng-ureueng filistin laju jijak seulidek soe poe buet nyan. laju

na ureueng nyang peugah bak awaknyan bahwa simson kheueh nyang peubuet mandum nyan, sabab yah tuan gobnyan nyang na di timna ka geujok peurumoh geuh ubak sidroe rakan simson. le sababnyan ureueng filistin laju jitot inong nyan meunan cit banmandum asoe rumoh ureueng syiek geuh sampoe habeh. laju geupeugah le simson ubak ureueng filistin nyan, "o, meunan cara jih gata balaih dam? ulon kumeusumpah hana lon iem droe meunyoeh hainyoe gohlohm lon balaih ateuhe gata!" oh lheuehnyan gobnyan laju geuprang awaknyan ngon biet-biet keujam that dan geupoh mate awaknyan keubiet jai that-that. oh lheuehnyan gobnyan geujak dan geumusom lam saboh guha nibak saboh buket batee di etam. le sababnyan ureueng filistin jijak ubak daerah ureueng yehuda laju jipeusong khimah disinan, oh lheuehnyan awaknyan laju jiprang banda lehi. ureueng yehuda geutanyong ubak ureueng filistin, "pakon awaknyoe neujak prang kamoe?" awaknyan jijaweueb, "kamoe teuka keu kamoe jak drob simson mangat kamoe hase kamoe peusanaut ateuhe jihnyan lagee jihnyan jipeusanaut ateuhe kamoe." watee jideungoe hainyan, jijak kheueh na lhee ribee droe ureueng yehuda ubak guha di buket batee di etam. disinan awaknyan jipeugah, "simson, peu kheueh gata hana tateupeue bahwa ureueng filistin meukuasa ateuhe geutanyoe? peue nyoe nyang ka gata peubuet ateuhe kamoe!" geuseutot le simson, "ulon kubalah peue nyang ka awaknyan peubuet ateuhe ulon." kheun awaknyan, "kamoe teuka keu kamoe ikat dan kamoe jok gata ubak ureueng filistin." geupeugah le simson, "meujanji kheueh leubeh ilee bahwa awaknyoe hana neupoh mate ulon." "get," kheun awaknyan, "keubiet kamoe keuneuk kamoe ikat dam kamoe jok gata ubak ureueng filistin. kamoe hana kamoe poh mate gata." laju awaknyan iki ikat gobnyan ngon dua krak talo nyang mantong baro, dan jiba laju gobnyan nibak guha nyan. watee simson jiba trok u lehi, ureueng-ureueng filistin jiplueng-plueng jijak ubak gobnyan sira jisurak gobnyan. ngon hana teusangka-sangka gobnyan jiteuka teuga le kuasa nibak tuhan. talo-talo nyang teuikat nibak jaroe geuhnyan putoh meukan-kan sang-sang talo nyan talo nyang tutong le apui. oh lheuehnyan gobnyan laju geuteume sikrak tuleueng geuheuem keuleudee nyang mantong baro. laju geucok tuleueng nyan, ngon tuleueng nyan laju geulawan dan geuprang awaknyan, dan awaknyan mate na 1.000 droe. le sababnyan geupeugah kheueh le simson sira meunyanoyoe, "ngon tuleueng keuleudee, ulon poh mate siribee droe; ngon tuleueng keuleudee, ulon tumpok manyet-manyet awaknyan." oh lheuehnyan, gobnyan laju geutiek tuleueng geuheuem nyan. nyang kheueh sabab jih teupat nyan teuboh nan ramat-lehi. oh lheuehnyan simson jiteuka grah that, le sababnyan gobnyan geumeulakee ubak tuhan. gobnyan geupeugah, "tuhan, banmantong droeneueh neubri meunang nyang rayeuk keu ulon. jinoenyoe peu kheueh ulon haroh mate sabab le grah that nyoe, sampoe ulon jidrob le ureueng filistin nyang hana jituri droeneueh?" le sababnyan po teu allah laju geupeuhah ruhueng nyang na lam buket batee

di lehi nyan, laju jiteubiet ie nibak tempat nyan. simson laju geujieb ie nyan, ltheuehnyan gobnyan ka meuras puleh lom teuma. nyang ktheueh sabab jih mata ie nyan teuboh nan mata ie hakor. mata ie nyan sampoe an jinoo mantong na di lehi. dua ploh thon treb jih simson geupimpen umat israel watee awaknyan jikuasa le ureueng filistin. bak si uroe, watee simson na di gaza, deuh geukalon disinan na sidroe ureueng inong jeuhet, di ureueng inong lunte nyan laju jipeurab ubak gobnyan dan jieuh ngon gobnyan. bak watee teujuk dan teupeugah hai nyan ubak ureueng-ureueng gaza, "simson ka teuka keunoe." dan awaknyan laju jikeupong teumpatnyan dan ka siab jihadang gobnyan simalam suntuok di babah pintoe geureubang banda, teuma sipanyang malamnyan awaknyan hana jipeubuet sapeue, sabab jipike meunoe, "eunteuk oh watee ka reuneue nibak suboh butanyan, bak wateanyan ktheueh jihnyan tapoh mate." teuma simson teutab geueh sampoe teungeut disinan trok an teungoh malam. bak watee teungoh malamnyan teujaga dan geubeudoh ktheueh gobnyan nibak teumpat eh, geumat laju bandua boh on pintoe geureubang bandanyan dan meunan cit bandua tameh pintoenyanyan geumat cit teuma. ltheuehnyan laju geubot sampoe teulot banmandum meunan cit deungon palang jih, oh ltheueh geulot geucok geugulam laju ateueh bahoe gobnyan, dan banmandum nyan laju geu angkot ubak pucak gunung nyang meuhadab keue deungon hebron. oh ltheuehnyan simson ka rhot cinta ubak sidroe inong dara nibak panton sorek nyang nan jih delila. teuka ktheueh laju raja-raja ureueng filistin ubak inong nyan sira jipeugah, "ci ktheueh gata bujuk ureueng nyan mangat tateupeue dipat ktheueh teuduek teunaga jihnyan nyang meunan raya, dan deungon peu ktheueh kamoe hase kamoe peutaloe jihnyan dan teuikat jihnyan keu teupeutaklok jihnyan. teuma kamoe maseng-maseng kamoe jok siribee sireutoh peng pirak keu gata." le delila jipeugah ubak simson, "neu calitra ktheueh keu ulon tuan keuhai teungku lakoe, peu ktheueh sabab jih teunaga droeneueh meunan rayeuk, dan deungon peu ktheueh teuma droeneueh haroh teu ikat dan teupeutaklok teuma?" geujaweueb le simson ubak binoe geuhnyan, "meunoye ulon teu ikat deungon tujoh krek talo busur nyang baro nyang gohlom tho that, ulon leumoh dan jeuet keu ureueng biasa." le peunguasa filistin jijok laju ubak delila tujoh krek talo busur nyang baro nyang gohlom tho that. oh ltheuehnyan, teungoh ureueng filistin nyan jipreh di ruweung nyang laen, delila laju geuikat simson deungon talo nyang kana bak jaroe geuh sira geumeuhoi, "simson! ureueng filistin ka teuka!" dan di simson pi laju geureuteu ngon geupeuputoh talo-talo nyang ka meuikat bak badan geuhnyan. dan bubena talo nyang ka meuikat badan geuhnyan putoh lagee beuneueng nyang putoh keunong apui. rahsia teunaga simson nyan gohlom cit teubuka. geupeugah lom le delila ubak simson, "ah, droeneueh sulet! droeneueh neupeuseunda ulon nyang ureueng binoe neueh. neupeugah ktheueh hai lakoe meutuah, ngon peu ktheueh droeneueh hase teuikat!" geupeugah lom le simson, "meunoye ulon teuikat deungon talo baro nyang hantom lom

teungui, ulon laju leumoh dan jeuet keu ureueng biasa." teungoh ureueng filistin mantong jipreh-preh di dalam ruweung kama nyang laen, delila laju geujak cok meupadub krek talo nyang laen nyang mantong baro, ngon talonyan laju geuikat simson lakoe geuhnyan. oh ltheuehnyan awaknyan laju jimeuhoi ngon su nyang teuga, "simson! ureueng filistin ka teuka!" simson laju geupeuputoh talo-talo nyang meuikat nibak badan geuhnyan lagee ureueng jipeuputoh beuneueng. laju geupeugah lom le delila ubak lakoe geuhnyan, "ah, bit-bit droeneueh neupeumeuen ulon, hai teungku lakoe. droeneueh sulet, neupeugah ktheueh laju ngon peue droeneueh teuikat!" simson geujaweueb lom, "meunoye tujoh untie ok ulonoye teurajot ubak beuneueng nibak peukakaih teumpeun ija, oh ltheuehnyan teuikat teuma ubak kayee peukakaih teumpeun nyan, bak watee nyan ulon laju leumoh dan ka jeuet lagee ureueng biasa." le delila pi laju geujak puteungeuet simson, oh ltheuehnyan geupeubuet laju lagee nyang ka geupeugah le simson nyan ubak gobnyan, geu rajot laju tujoh boh untie ok simson ngon beuneueng beukaih teumpeun dan oh ltheuehnyan geuikat laju ubak kayee peukakaih teumpeun dan laju jimeuhoi simson lakoe geuhnyan ngon su nyang teuga, "simson! beudoh, ureueng filistin ka teuka!" bak siatnyan cit simson geubeudoh laju geutarek ok geuh nyang teuikat nibak kayee teumpeun ija nyan sampoe ltheueh teuploh banmandum. oh ltheuehnyan geupeugah lom le delila ubak gobnyan, "ah, neupeugah droeneueh neucinta ngon neu gaseh keu ulon, hai teungku lakoe, padahai ate droeneueh that-that jioh nibak ulon! ka lhee goe droeneueh neupeumeuen ulon, dan sampoe an saatnyaoe droeneueh han cit neupeugah pakon droeneueh keu-bit that teuga." tieb-tieb uroe delila teutab mantong jimeurengke-rengke lagee aneuek manyak ubak lakoe geuh nyan sira geupa sabe, sampoe simson pi ka tunu geudeungoe nyang lageenyanyan. akhe jih sabab han ek le geudeungoe ureueng binoe geuhnyan jimeu reengeuek sabe, teuma geucalitra ktheueh nyang seubeuna jih ubak peurumoh gobnyan rahsia nyang seubeuna jih. "ok ulon di ateueh uleenyoe hantom na keunong sakin cuko," geupeugah le simson. "ulon nyoe ka teujuk ubak po teu allah sibagoe milek gobnyan nyang khusus. yoh lahe ulonyoe ka jeuet keu sidroe nazir. meunoye ok nyang na di ateueh ulee ulonyoe teucuko, teunaga ulon laju gadoh; ulon leumoh dan jeuet keu ureueng biasa." delila ka teurasa bahwa simson biet-biet ka geubuka rahsia ate gobnyan. sabab nyan geukirem laju habanyan ubak peunguasa-peunguasa ureueng filistin, "neuteuka ktheueh goenyoe nyang keuneuleuh. sabab simson ka geupeugah ubak ulon asee ate gobnyan nyang sibeuna jih." teuma awaknyan pi jiteuka laju jijakba peng keu delila. oh ltheueh geupeugah nyan, le delila laju geugusuek-gusuek simson sampoe gobnyan teungeut di dalam pankee binoe geuhnyan, geuhoi laju ureueng laen geuyue jak cuko ok nyang tujoh boh untie nibak ulee lakoe geuhnyan. oh ltheuehnyan laju jiseksa simson, sabab simson ka gadoh teunaga gobnyan. laju geumeuhoi sira geudumpek ngon su nyang teuga, "simson! ureueng filistin ka trok!" sim-

son geubeudoh, dan geusangka gobnyan hase lheureu lagee watee nyang ka-ka. gobnyan hana geuteupeue bahwa tuhan ka geutinggi gobnyan. deungon nyan di ureueng-ureueng filistin jijkak drob laju gobnyan dan jicungkee bandua neuek mata geuh. awaknyan laju jiba gobnyan u gaza dan ji ikat gobnyan deungon dua krek rante teumaga, dan jipeutamong laju gobnyan u dalam rumoh glab. disinan gobnyan jiyue meukeureuja meugileng. teuma sidubnyan treb ok di ateuhe ulee gobnyan ka jipeuphon timoh lom teuma. bak si uroe ureueng nyang mat kuasa di filistin nyan jimeusapat keuneuk jipeuna khanuri raya sira jipeuseumah keureubeuen keu dewa awaknyan nyang nan jih dagon. awaknyan laju jimeunanyoe, "dewa geutanyoe ka geujok keu geutanyoe jeuet meunang ateuhe simson, musoh geutanyoe!" teun-geh awaknyan jimeusuka ria, awaknyan jipeugah, "gata ba kheueh laju simson nyan keunoe mangat jihnyan jeuet keu barang teupeukem dan barang peuhina keu geutanyoe!" teuma awaknyan laju jijkak cok simson nibak rumoh glab. dan gobnyan pi laju jeuet keu beunda nyang hina ngon jipeukem le awaknyan. awaknyan jiyue gobnyan mangat geudong di lamkawan bandua boh tameh nyang raya. bak watee ureueng rame nyan jikalon simson, awaknyan jipujoe laju dagon sira jimeunanyoe lageanyoe, "dewa geutanyoe ka geupeumeunang geutanyoe ateuhe musoh nyang ka jipeurasak nangroe geutanyoe dan jipoh mate nyang lumpah that jai ureueng geutanyoe." geupeugah le simson ubak aneuek agam nyang peujak gobnyan, "gata peulheueh kheueh jaroe ulon nyoe mangat jeuet ulon mumat ubak tameh-tameh nyang meutumpang nibak geudong nyoe, sabab ulon keuneuk meusadeue disinan." geudongnyan peunoh meusak-sak ngon ureueng rame. dan banlimong droe nyang mat kuasa ateuhe filistin nyan pi na didalam geudong nyan. dan nibak tingkat ateuhe nibak geudong nyan na ureueng kira-kira 3.000 droe. awaknyan banmandum jijkak meunonton sira ji peuhina ateuhe simson. bak watee nyan kheueh simson geumeu doa ubak tuhan po teu allah; doa geuhnyan na kheueh lageenyoe, "ya tuhan nyang mahamanyang, beuneutem kheueh neuingat keu ulon. neubri kheueh ya tuhan teunaga sigoe teuk nyoe keu ulon, ya po teu allah, mangat jeuet lon peubuet dan ulon ka hase ulon balaih ateuhe ureueng filistin nyang ka jicungkee ban dua aneuk mata ulon." oh lheureu geupeugah le simson nyang lageenyang geumat laju dua boh tameh teungoh nyang na teutumpang geudong nyan. dan sira geumeu tumpang deungon jaroe wie nibak tameh nyang saboh dan jaroe uneuen gobnyan ubak tameh nyang saboh teuk, gobnyan geumeuhoi lom, "bah kheueh ulon mate meusajan-sajan ngon ureueng filistin nyoe!" dan deungon habeh teunaga laju geuyok-yok dan geutulak tameh-tameh nyang teungoh geu mumat nyan, dan geudong nyan pi reubah laju sampoe jitimpok u ateuhe banlimong droe ureueng nyang mat kuasa ateuhe filistin nyan meunan cit meusajan-sajan ngon ureueng laen nyang na didalam geudong nyan banmandum mate jitimpok le geudong nyang geutulak le simson nyan. dan meunan kheueh simson pi wafuete cit meusigoe

ngon geudong nyan meusapat disinan deungon ureueng laen. teuma bak watee gobnyan mate le gobnyan ka geupoh mate ureueng laen leubeh jai nibak watee gobnyan mantong udeb. oh lheurehnyan teuka kheueh laju bubena kawom syedara gobnyan keu jijkakok manyet gobnyan. manyetnyan laju jipeuweu urumoh, dan jipeukubu laju u dalam kubu manoaah, bapak gobnyan. kubu nyan na jih di lamkawan zora dan esytaol. simson jeuet keupeumimpen ureueng israel dua ploh thon treb jih. na sidroe ureueng agam nyang nan jih mikha. gobnyan tinggai di daerah meugunong-gunong jitamong u dalam wilayah efraim. bak siuroe geupeugah le gobnyan ubak mak geuhnyan, "ma, bak watee droeneueh geumadok siribee sireutoh peng pirak, na ulon deungoe droeneueh neukutok si pancurinyan. nyoepat, mak, peng nyan! ulon kheueh nyang cue peng nyan." geujaweeb le mak geuhnyan, "seumoga droe kheueh geubri beureukat le tuhan, hai aneuek ulon!" mikha laju geupulang peng nyan ubak mak geuh, laju le mak geuhnyan geupeugah, "mangat gata, hai aneuek ulon, leupah nibak kutokan nyang ka ulon peugah nyan, ulon peuseumah piraknyoe ubak tuhan mangat jeuet teungui teupeuget patong kayee nyang teuseupoh deungon pirak. jadi peng nyan ulon peuriwang ubak gata." teuma oh kalheueh mikha jijkak pulang lom peng nyan ubak mak jihnyan, di mak nyan laju geucok dua reutoh keupeng nyan, dan atranyan laju geubri ubak tumpeun nyang peuget pirak. laju gobnyan jiyue ubak tumpeun nyan mangat jipeuget saboh patong kayee nyang teu seupoh deungon pirak nyan. oh lheurehnyan patong nyan laju jipeuduek dirumoh mikha. di mikha keudroe ka na nibak gobnyan saboh teupat teupat ibadah. le gobnyan geupeuget na meupadub boh patong beurala dan sion efod laju geuangkat sidroe lamkawan aneuek gobnyan nyang agam jeuet keu teungku imeum. nibak wateenyan bansa israel gohlom na raja; tieb-tieb ureueng beubaih jipeubuet peue nyang jianggab nyan beutoi. bak wateenyan cit teuma na sidroe ureueng muda nibak sukee lewi. dilee gobnyan tinggai di betlehem di dalam wilayah ureueng yehuda. teuma jinoenyoe ureueng nyan ka jitinggai di bandanyan dan teungoh jijkak mita teupat tinggai nyang laen. nibak meuneujak, gobnyan trok laju nibak rumoh mikha di daerah meugunong-gunong efraim. mikha geutanyong ubak ureuengnyan, "gata nyoe ureueng pane?" ureuengnyan jijaweeb, "ulon ureueng lewi nibak betlehem di yehuda. ulon nyoe teungoh lon mita teupat tinggai." geupeugah le mikha, "gata tinggai mantong deungon ulon disinoe, mangat gata jeuet keupeunasihat dan teungku imeum kamoe. singoh ulon bri keu gata siploh peng pirak tieb-tieb thon, meunan cit teuma deungon peukayan dan peunajoh." di aneuek muda ureueng lewi nyan laju situju, laju teuma gobnyan geuangkat le mikha jeuet keu teungku imeum jih. gobnyan tinggai di rumoh mikha dan geupeusanet jihnyan lagee aneuek droe gobnyan keudroe. teuma geupeugah le mikha, "nyan, jinoenyoe ulon yaken bahwa tuhan teuma geupeuget nyang get keu ulon sabab ka na sidroe ureueng lewi nyang jeuet keu teungku imeum nibak ulon." bak wateenyan di nangroe israel hana meuraja. sukee

dan mantong jimita-mita daerah mangat jeuet keu teupnat wilayah geuh, sabab awaknyan gohlom cit meuteume tanoh meusajan ngon sukee-sukee nyang laen didalam bansa israel. 2 le sababnyan awaknyan laju jipileh limong droe ureueng nyang gagah ngon beuhe lamkawan banmandum kawom didalam sukee awaknyan nyang na tinggai di zora dan esytaol, laju jibri tugaih keu banlimong droe nyan mangat jijak seulidek nanggroe nyan. dan beurangkat kheueh awaknyan, dan oh trok nibak wilayah meugunong-gunong di dalam wilayah efraim. disinan awaknyan jimudom di rumoh mikha. 3 bak watee jikeuneuk tamong u dalam rumoh nyan teudeungoe laju le awaknyan peumuda lewi nyan teungoh jipeugah haba. dan awaknyan pi ka jituri nibak loghat ureueng lewinyan. le sababnyan, awaknyan laju jipeurab ubak gobnyan sira jityanyong, "peue buet droeneueh disinoe? peue urosan droeneueh? soe nyang ba droeneueh keunoe?" 4 geujawueub le ureueng mudanyan, "ulon na disinoe sabab le mikha. gobnyan kheueh nyang ka geu angkat ulon jeuet keu teungku imeum geuh, dan geubri teuma gaji keu ulon." 5 jipeugah le awaknyan ubak gobnyan, "meunyoe meunan, tulong kheueh neutanyong ubak po teu allah peu kheueh meujak kamoenyoe meuhase atawa hana." 6 geujawueub le teungku imeum nyan, "bek khawate, meuneujak droeneueh nyan ka geureustu le tuhan." 7 oh lheurehnyan jijak kheueh laju ban limong droe ureueng nyan u lais. disinan awaknyan jingiang laju peunduduek nyang na disinan. nyata lheurehnyan nibak awaknyan, bahwa cara udeb peunduduek disinan saban that ngon cara udeb peunduduek sidon. bahpi awaknyan jioh tinggai teuaseng, dan jioh nibak bansa sidon, awaknyan udeb aman ngon teuntram, hana meumusoh, udeb makmu dan hana teuma kureuing meusapeue pi. 8 bak watee ban limong droe ureueng nyan jiriwang ubak mandum sukee gobnyan di zora dan esytaol, awaknyan laju jilakee le sukee droe jih mangat jipeugat laporan. 9 jipeugah le awaknyan, "jak geutanyoe tajak prang lais. kamoe ka kamoe jak keunan, dan kalheureh teuma kamoe kalon bahwa tanoh awaknyan diet that-that, luwah dan makmu, peue-peue mantong na disinan. bek teutab mantong disinoe sampoe tanyoe hana tapeubuet sapeue. beubagaih kheueh tajak keudeh dan jak reubot kheueh laju nanggroe nyan. gatanyoe teuma tateupeue bahwa peunduduek disinan hana jisangka-sangka mubacut pi bahwa gatanyoe teuma tajak prang awaknyan. kamoe yaken bahwa po teu allah ka geujok nanggroe nyan ubak gata." le sabab nyan, jak kheueh laju nibak zora dan esytaol 600 droe sukee dan. deungon sinjata nyang leungkab, awaknyan jijak u bagian barat kiryat-yearim di wilayah yehuda laju jipeudong khimah disinan. nyang kheueh sabab jih teupnat nyan sampoe an saatnyoe mantong teuboh nan teupnat meukhimah dan. phon nibak teupnatnyan awaknyan geujak laju u daerah meugunong-gunong efraim sampoe trok u rumoh mikha. ban limong droe ureueng tukang meuluem nyan jipeugah ubak rakan-rakan jihnyan, "peu kheueh gatanyoe tateupeue bahwa di dalam saboh-saboh rumoh nyang na disinoe na

jikeubah patong nyang meulapeh deungon pirak? na cit patong-patong nyang laen dan efod. ci tapike peue nyang haroh tanyoe peubuet." oh lheureh nibak nyan awaknyan jijak laju u rumoh mikha, di teupnat peumuda lewi nyan tinggai, dan jityanyong laju keuadaan gobnyan. bak wateenyan ban 600 droe tantra sukee dan, nyang meusinjata leungkab nyan, teungoh jidong dikeue pintoe geureubang. ban limong droe mata-matanyan jitamong laju u dalam rumoh, laju jijakkoc patong kayee nyang meulapeh deungon pirak meusigoe deungon patong-patong nyang laen, dan meunan cit efod. peumuda lewinyan teungoh geudong lamkawan ban nam reuth tantra nyan dibabah pintoe geureubang. bak watee banlimong droe ureueng nyan jitamong u dalam rumoh mikha dan jicok efod meunan cit deungon banmandum patong-patong beuralanyan, peumuda lewi nyan laju geutanyong, "peu kheueh nyoe nyang awaknyoe peubuet?" awaknyan jijawueub, "iem! hanjeuet teumanyong. seutot mantong ho nyang kamoe jak, eunteuk gata jeuet keupeunasihat dan teungku imeum kamoe. nibak jeuet keu teungku imeum keu saboh keuluwarga, leubeh get jeuet keu teungku imeum keu saboh sukee!" peumuda lewi nyan galak that geudeungoe saran nyang lagee nyan. le sababnyan, gobnyan laju geucok efod dan patong-patong beurala nyan laju geuseutot ngon awaknyan. oh lheurehnyan rombongan nyan laju jijak lom, dikeue that aneuek miet nyang jak, beulatang peulara dan barang-barang awaknyan. bak watee awaknyan ka jioh, mikha laju geuhoi mandum teutangga geuh dan geupakat laju awaknyan mangat jijak tiyeub ureueng-ureueng dan nyan. oh ka to ngon awaknyan, mikha dan ureueng-ureueng geuhnyan laju jiklik-klik geumeuhoi ngon su nyang rioh keu awaknyan. di ureueng-ureueng sukee dan nyan jipaleng laju u likot sira jityanyong ubak mikha, "peue hai? pakon tajak ngon ureueng nyang rame meunan bagoe?" geujawueub le mikha, "awaknyoe ka jipeuplueng patong-patong ulon meunan cit deungon teungku imeum ulon, sampoe ulonnyoe ka hana sapeue na le, oh lheurehnyan mangat mantong gata peugah, 'peue hai!' " jipeugah le ureueng-ureueng sukee dan nyan, "leubeh get tasumpai babah gatanyan; bek sampoe ureueng-ureueng nyoe beungeh dan jiseupot gata. eunteuk gata dan banmandum keuluwarga gata mate." oh lheureh jipeugah nyang lageenyan di ureueng sukee dan nyan laju jijak lom teuma. mikha jikalon bahwa awaknyan jioh leubeh teuga nibak jihnyan, le sababnyan geuhnyan jigisa laju jijakwoe. oh ka lheureh jipeuplueng teungku imeum nyan le ureueng sukee dan meunan cit deungon barang-barang ngon peubuet iebadat peuneugat mikha, awaknyan laju jijak prang lais, banda nyang peunduduek jih aman dan teuntram. (banda nyan na lam saboh panton ngon banda bet-rehob). ureueng-ureueng dan nyan laju jipoh mate banmandum peunduduek lais dan jitot laju banmandum bandanyan. hana nyang trok jijak tulong sukee-sukee lais nyan sabab teupnat awaknyan jioh teuaseng nibak sidon. oh lheurehnyan di ureueng-ureueng dan laju jipeudong lom bandanyan dan jitinggai teuma disinan. nan bandanyan

laju jigantoe deungon nan banda dan, meunurot nan bapak indatu awaknyan, nyan kheueh dan, aneuek nabi yakub. patong beurala nyang awaknyan ba nyan, jipeudong laju di bandanyan oh lheueh nyan jiangkat teuma yonatan, aneuek gersom, cucoe nabi musa, jeuet keu teungku imeum awaknyan. keuturonan gersom nyoe teutab jeuet keu teungku imeum sukee dan trok an masa umat israel teu angkot teujak tiek u nanggroe laen. patong beurala nyang jipeuget le mikha nyan teutab na di lais simantong khimah tuhan na mantong di silo. bak watee israel gohlom na raja, na sidroe ureueng lewi nyang tinggai di gampong, nibak daerah gunung efraim. gobnyan jicok sidroe inong di betlehem yehuda jeuet keu gundek jih. teuma oh dudoe ureueng inong nyan beungeh ubak gobnyan, le sababnyan inong nyan jiwoe lom u rumoh ureueng syiek jih di betlehem. oh ka lheueh ureueng inong nyan tinggai disideh na peuet buleuen treb jih, le ureueng lewi nyan jikak seutot inong nyan sira geubujuk mangat jitem gisa lom ubak gobnyan. gobnyan jikak sira jiba sidroe namiet meunan cit dua boh keuleudee. oh ka trok keudeh, le ureueng inong nyan laju jiba gobnyan ubak ayah jih. watee ayah inong nyan jikalon gobnyan, le ayah nyan laju jisambot gobnyan ngon ate nyang mangat, dan jipaksa mangat gobnyan bek geuwoe. le sababnyan, gobnyan tinggai na lhee uroe treb jih meunan cit geumakheun ngon geujeb ie dan geu-eh lom teuma ngon gundek jihnyan. bak uroe nyan keupeuet, awaknyan jibeudoh beungoh that-that dan laju meusiab-siab keuneuk beurangkat lom teuma. teuma ureueng syiek inong nyan jipeugah bak ureueng lewi nyan, "gata makheun ilee mangat jeuet teuga. lheueh nyan gata jeuet tajak lom teuma." le sababnyan jiduek kheueh ureueng lewi nyan dan jimakheun laju meusajan-sajan ngon ayah inong nyan. teuma watee gobnyan jidong keuneuk jikak, le ayah inong nyan jibujuk lewi nyan mangat bek jikak, "meuseunang-seunang kheueh ilee," kheun gobnyan, "dan ta mudom kheueh disinoe." le sababnyan tinggai kheueh ureueng lewi nyan disinan simalam teuk. bak uroe nyang keulimong, ban suboh that, watee gobnyan keuneuk beurangkat, le ureueng syiek inong nyan jikheun lom, "jak hai, tamakheun ilee, lheueh nyan baro kheueh jeuet gata woe." le sababnyan awaknyan bandua dan jipeutreb-treb sampoe mata uroe ka jipeuphon lhob. lheuehnyan, watee ureueng lewi nyan na meusajan ngon gundek jih dan namiet jih keuneuk jikak lom teuma, le ayah inong nyan jikheun lom, "uroe karab malam, hana treb le ka seupot, leubeuh get mudom mantong disinoe dan gata meuseunang-seunang. singoh gata beudoh banbeungoh that keu gata woe." teuma le ureueng lewi nyan hana jitem mudom le. gobnyan ngon gundek jih laju jikak, meusajan-sajan ngon namiet jih dan ban dua boh keuleudee nyang ka teuboh peulana. watee uroe karab malam, awaknyan laju karab to ngon yebus (na kheueh yerusalem). le namiet nyan laju jipeugah ubak teungku po jih, "teungku, jak kheueh geutanyoe tapioh dan tamudom nibak banda yebus nyoe mantong." teuma le teungku po jih nyan jiseuet, "han jeuet, tanyoe tajak laju dan geutanyoe hana jeuet tapioh nyang

peunduduek jih kon ureueng israel. jak geutanyoe tajak lom bacut keu eunteuk geutanyoe tamudom di gibeata atawa rama." le sababnyan awaknyan jikak laju hana jipioh di yebus. mata uroe ka jillob watee awaknyan trok u gibeata nibak wilayah sukee benyamin. awaknyan jipioh disinan keu jimudom, laju jitamong lam banda dan jikak duek laju ubak padang. teuma hana meusidroe pih nyang jitem undang awaknyan u rumoh jih mangat jimudom. teungoh awaknyan jiduek nibak padang banda, teuka kheueh sidroe ureueng tuha nyang ban jiwoe nibak buet di ladang. gobnyan nyang sikeubiet jih meusai nibak daerah meugunong-gunong efraim teuma jinoenyeo tinggai di gibeata. (peunduduek laen di gibeata na kheueh ureueng benyamin.) watee jingiang le ureueng tuha nyan ureueng lewi nyan na di padang, laju jitanjong, "gata nyoe dipat teuka, dan ho keuneuk jak?" ureueng lewi nyan geujaweeb, "kamoe ban teuka nibak betlehem di yehuda, dan teungoh kamoe woe u rumoh nyang na nibak gampong tunong di efraim. ulon asai jih disinan, hana meusidroe pih nibak peunduduek banda nyoe nyang jitem teurimong kamoe di rumoh jih keu kamoe mudom. kamoe hana peureulee sapeue nyang laen, beukai kamoe seb. na jeurami dan eumpeuen keu keuleudee kamoe; na ruti ngon anggo keu ulon meusajan ngon peurumoh ulon nyoe meunan cit keu namiet lon." laju geupeugah le ureueng tuha nyan, "be khawate, eunteuk ulon tulong. hana peue gata mudom lam padang nyoe." oh lheuehnyan le ureueng tuha nyan laju jiba awaknyan u rumoh jih dan jikak laju eumpeuen keu keuleudee-keuleudee jih. dan oh ka lheueh jame-jame nyan jirhah gaki, laju awaknyan jimakheun. teungoh awaknyan meuseunang-seunang, ngon hana teusangka-sangka rumoh nyan ka jikeupong le ureueng-ureueng jeuhet nyang teuka nibak banda nyan. awaknyan laju jikeutok-keutok pintoe sira jipeugah bak ureueng tuha nyan, "jok laju keu kamoe ureueng agam nyang gata ba u rumoh gatanyan, kamoe keuneuk peuguna jih nyan!" ureueng tuha nyan geuteubiet dan laju geupeugah bak awaknyan, "bek, syedara-syedara! ulon lakee, bek kheueh gata peubuet hai nyang jeuhet dan hana patot ateuh jame lon nyan, sabab jihnyan jame ulon. eunteuk ulon jok gundek jihnyan ngon aneuek dara lon keu gata. jeuet gata pupuih droe ngon awaknyan. teuma bek kheueh gata peubuet nyang jeuhet ateuh jame ulon nyan!" teuma le sabab ureueng jeuhet nyan jimeukreueh cit, le sababnyan ureueng lewi nyan laju jitulak gundek jih nyan u luwa keu awaknyan. laju le awaknyan jipeukosa ureueng inong nyan hana pioh-pioh sampoe an beungoh uroe. oh watee suboh ureueng inong nyan jigisa, meunan trok bak babah pintoe rumoh teumpat lakoe jih nyan ji-eh laju pansan, sampoe ka jiteubiet mata uroe jihnyan mantong disinan. beungoh nyan, watee lakoe jih jibeudoh dan jibuka pintoe keuneuk jak lom, laju deuh jikalon gundek jih nyan ka teutiek bak babah pintoe sira jaroe jih siblahi jimumat bak ban pintoe. "beudoh kheueh laju," kheun lewi nyan ubak gundek jih, "jak geutanyoe tajak lom." teuma ureueng inong nyan hana jijaweeb sabab ka meuninggai donya. le lewi nyan laju jicok ureueng inong nyan

jikeubah ateuh keuleudee, oh ltheuehnyan laju jijak sira jiwoe u rumah jih. oh trok u rumah, laju jicok sikan dan jikhoh-koh laju manyet peurumoh jihnyan jeuet keu dua blaih krek. oh ltheueh nyan, laju jikirem ban dua blaih krek bagian binoe jih nyan ka teukoh-koh nyan keu bandua blaih boh sukee bansa israel, maseng-maseng keu awaknyan saboh jeumba. banmandum ureueng nyang kalon nyan jipeugah laju, "gohlom na nyang ka-ka hai nyan na teujadi, yoh phon umat israel jiteubit lam nanggro meuse trok nibak uroenyoe. tanyoe hana jeuet ta seungab mantong. tanyoe haroh tameurok pakat keu tanyoe balaihl" dan teuka kheueh banmandum umat israel nibak daerah dan di utara sampoe u bersyeba di seulatan, dan gilead di timu, keu meurumpok ubak teupnat teumawok nyan. awaknyan meusapat dan meusaho di mizpa dikeue tuhan. banmandum nyan na 400.000 droe tantra nibak pasokan nyang jak ngon gaki. peumipen-peumipen nibak tieb-tieb sukee bansa israel teuka cit keunan. oh ltheueh nibaknyan di ureueng-ureueng nibak sukee benyamin ka jideungoe bahwa banmandum ureueng israel nyang laen ka geumeugumpoi di mizpa. dan jiteumanyong kheueh le ureueng-ureueng israel nyan ubak ureueng lewi nyang selir jih ka jipoh mate nyan, "ci gata peugah ubak kamoe pakriban buet nyang jeuhet nyan jeuet na!" geujaweueb le ureueng lewinyan, "ulon ngon gundek ulon nyan kamoe pioh sikeujab di gibe di dalam wilayah benyamin dan kamoe mudom disinan. oh ltheuehnyan teuka kheueh ureueng-ureueng gibe ubak kamoe bak watee malam uroe jijak mita ulon. awaknyan laju jikeupong rumah teupnat kamoe mudom nyan deungon meukeusut awaknyan jikeuneuk poh mate ulon, teuma oh ltheuehnyan awaknyan laju jipeukosa gundek ulon sampoe an mate. le ulon laju ulon cok manyet nyang ka mate nyan dan ulon koh-koh laju oh ltheueh nyan ulon kirem ubak ban dua blaih boh sukee bansa geutanyoe maseng-maseng sikrak. ulon peubuet hai nyang lageenyan sabab ureueng gibe nyan ka jipeubuet nyang jeuhet dan lumpah malee bala nyan keunong u ateuh bansa israel. gatanyoe banmandum nyang na disinoe na kheueh bansa israel. jadi jinoenyoe hainyan ulon lakee peudapat nibak gata banmandum!" deungon sireuntak ureueng-ureueng israel nyang na meugumpoi di teupnat nyan laju jidong dan jipeugah, "geutanyoe banmandum hana nyang jeuet nyang woe ubak khimah maseng-maseng atawa u rumah droe. nyoe kheueh nyang geutanyoe peubuet: geutanyoe tatiek undi mangat teupeute-untee ureueng-ureueng nyang haroh jijak prang gibe. siper siploh nibak banmandum ureueng agam bansa israel haroh jipeuna peunajoh keu awaknyan nyang jak meuprang. nyang laen laju jijak prang gibe mangat teuhukom awaknyan sabab buet nyang jeuhet nyang ka awaknyan peubuet lamkawan umat israel." meunan kheueh cara jih umat israel ka jimeusaboh keu jijak prang gibe. oh ltheueh nyan le ureueng israel laju jikirem bubena ureueng gobnyan u dalam wilayah sukee benyamin keu jijak peusampoe haba nyoe: "keujeuhetan peue nyang ka teujadi u ateuh gatanyoe? gata seurah

kheueh banmandum ureueng-ureueng jeuhet nyang beujat di gibe nyan ubak kamoe mangat awaknyan kamoe poh mate dan deungon na nyang lageenyan kamoe ka kamoe sampoh buet nyang jeuhet nyan lamkawan bansa israel." teuma ureueng benyamin hana jipako peue nyang ka jipeu ingat le ureueng israel nyang laen nyan. malah banmandum banda nyang na di dalam wilayah benyamin nyan dan ureueng-ureueng benyamin jijak u gibe keu jijak meuprang ngon ureueng-ureueng israel nyang laen nyan. bak uroenyany awaknyan laju meusapat nibak banda-banda jihnyan na 26.000 droe tantra. dan disampeng nyan teuma na cit peunduduek gibe ka teuma meusapat 700 droe ureueng nyang teupileh dan teulateh. banmandum ureueng jawie nyang get that campen jiseumeurhom ngon batee ngon cara jipeuguna lagee ali-ali. meunyeo awaknyan jigeulawa ngon ali-ali nyan, pasti keunong dan hana mieh meubacut pi. blaih ureueng israel nyang laen pi ka teuma meusapat 400.000 droe tantra nyang ka teulateh. tantra umat israel nyan jijak laju ubak teupnat iebadat di betel, dan jiteumanyong ubak po teu allah, "ya tuhan, sukee toh kheueh lamkawan kamoe nyang haroh kamoe jak prang ureueng benyamin nyan?" tuhan geujaweueb, "sukee yehuda." oh singoh beungoh nyan beurangkat kheueh laju awaknyan dan laju jipeudong khimah to ngon banda gibe. awaknyan laju jipeudong baresan angkatan prang jih meuhadab keue ngon banda nyan, dan laju jiprang. dan bubena angkatan prang benyamin nyan laju jiteubiet ngon jijak prang awaknyan oh ltheueh nyan tantra israel mate na 22.000 droe nibak uroenyany. sabab ka taloe nyan, jijak kheueh laju ureueng israel nyan ubak teupnat iebadat oh trok keunan laju jimo ba-e ubak tuhan disinan sampoe an malam. awaknyan jiteumanyong, "tuhan, peu kheueh kamoe haroh kamoe jak meuprang lom ngon syedara-syedara kamoe ureueng-ureueng benyamin nyan?" geujaweueb le tuhan, "nyoe, jak kheueh laju." le sababnyan angkatan prang israel kana seumangat lom, sampoe awaknyan jiatoe lhom pasokan jihnyan lagee bak uroe nyang phon. keu nyang keudua jih awaknyan jijak prang angkatan prang benyamin nyan. dan keu nyang keu dua teuma ureueng-ureueng benyamin nyan jiteubiet jijak seurang awaknyan. goenyan awaknyan jipoh mate teuma na 18.000 droe tantra nyang teulateh nibak angkatan prang israel. dan jijak kheueh lom ureueng israel nyan u betel laju jijakmoe ba-e ubak tuhan. disinan awaknyan jipusa sampoe an malam uroe dan jipeuseumah keureubeuen peudame dan keureubeuen nyang teutot keu tuhan. bak wateenyan peuto peujanjian po teu allah na di betel, dan pinehas aneuek eleazar, cucoe nabi harun, meutugaih sibagoe teungku imeum. dan jitanyong kheueh le umat israel ubak tuhan, "tuhan, peu kheueh kamoenyoe kamoe jak prang lom syedara-syedara kamoe ureueng-ureueng benyamin nyan, atawa peu kheueh haroh kamoe peupioh meuprang nyoe?" geujaweueb le tuhan, "seurang kheueh awaknyan! singoh beungoh ulon teuma lon peumeunang gata." watee jideungoe jaweueb tuhan nyan, di ureueng israel laju jikeubah tantra gobnyan nibak teupnat-teupnat

nyang teusom ban sikeulileng gibeaa. dan nibak uroe nyang keulhee awaknyan jijak maju ngon jijak eungkoee angkatan prang benyamin, deungon sinuson angkatan nyan teutab lagee nyang ka-ka meuhadab u gibeaa lagee nyang ka jipeubuet nibak uroe-uroe sigohlom nyan. meunan cit ngon ureueng-ureueng benyamin jijak seureubu cit u ateuh pasokan israel, dan awaknyan teupanceng keu jitem teubiet nibak banda. lagee nyang ka ltheueh-ltheueh, awaknyan ka jipoh dumna ureueng israel dalam padang raya diluwa banda nibak rot ueh nyang teutuju u betel dan meunan cit nibak rot ueh nyang teutuju u gibeaa. lhee plohh droe tantra israel bak wateenyan teupoh mate. le sababnyan le ureueng benyamin jisangka awaknyan ka geupeutaloe ureueng israel lagee nyang ka-ka. teuma tantra israel ka na reuncana awaknyan jikeuneuk surot mangat teupanceng lom tantra benyamin nyan u jalan-jalan raya, jioh nibak banda. bak watee pasokan inti israel nyan jisurot, dan jisuson baresan lom di baal-tamar, ureueng-ureueng awaknyan nyang jipeuteupat bansikeulileng gibeaa, deungon meugageeh dan bagaih-bagaih jiteubiet nibak teupat awaknyan jimusom di daerah luwa banda. awaknyan na ktheueh ureueng-ureueng peunileh nibak ban saboh nanggroee israel; jeumeulah jih na 10.000 droe. dan teujadi ktheueh prang nyang lumpah hibat bak watee tantra nyan 10.000 droe nyan jijak keupong gibeaa. ureueng-ureueng benyamin meubacut pi hana jisangka bahwa droe jihnyan hana treb le teuma taloe. tuhan geubri keu ureueng israel meunang ateuh ureueng benyamin, sampoe nibak uroenyan ureueng israel ka meuhase jipoh mate na 25.100 droe tantra benyamin. baro ktheueh le ureueng benyamin jisada bahwa jihnyan ka taloe. pasokan inti israel nyan deungon jisaja ka jipeuplueng droe nibak ureueng-ureueng benyamin sabab awaknyan jipeubangga aneuek buah jihnyan di teupat-teupat nyang teusom ban keulileng gibeaa. ureueng-ureueng nyang teungoh jimusom nyan bagaih-bagaih jitamong jijak seureubu gibeaa; awaknyan laju meutabu hoho mantong bansaboh bandanyan dan jipoh mate banmandum ureueng nyang na disinan. teuma awaknyan ka sipakat leubeh ilee meunyoe na asab teubai nyang teungoh meukeubok u ateuh bak teungoh-teungoh banda, pasokan inti nyang teungoh jisurot haroh jibalek jijak prang musoh. bak watee nyan ureueng-ureueng benyamin ka jipoh mate kira-kira na lhee plohh droe tantra israel dan jisangka le awaknyan jihnyan ka jipeutaloe ureueng-ureueng israelnyan lagee nyang ka jipeubuet yoh awaiphon. teuma na siatnyan mantong asab ka meukeubok u ateuh di teungoh-teungoh banda gibeaa nyan. ureueng-ureueng benyamin get that teukeujot watee awaknyan jipaleng ulikot dan jikalon laju banmandum banda awaknyan ka habeh tutong. dan bak watee nyan cit teuma pasokan inti israel jigisa laju jijak seurang, dan bubena tantra benyamin nyan ka habeh mumang sabab awaknyan ka sada bahwa awaknyan ka pasti taloe. le sababnyan, awaknyan laju jiplueng nibak ureueng-ureueng israel jituju u padang pasi, teuma bahpi keunan awaknyan jipeuplueng droe teuma teutab hana hase ltheueh. awaknyan ka teukeupong

lamkawan pasokan inti israel dan pasokan nyang teungoh teuka nibak jurusan banda. ureueng benyamin meudeurita taloe nyang lumpah hebat. ureueng-ureueng israel laju jipong dan jitiyeub awaknyan hana pioh-pioh sampoe trok ubak saboh teupat disiblahi utimu gibeaa. sira jitiyeub, awaknyan pi jipoh mate 18.000 droe tantra nyan teulateh nibak angkatan prang benyamin. tantra benyamin nyang laen nyan laju jigisa dan jiplueng bansalamle meulalu daerah padang pasi jituju ubak gunung-gunong batee di rimon. na 5.000 droe lamkawan awaknyan keunong poh mate diteungoh rot ueh raya. seudangkan nyang laen nyan jipeucrok laju sampoe u gideom. nibak ureueng nyan na teuma 2.000 droe nyang teupoh mate. deungon nyan, tantra benyamin nyang teupoh mate nibak uroenyan na 25.000 droe – banmandum nyan na ktheueh tantra nyang gagah beurni. teuma lamkawan awaknyan nyang jiplueng liwat rot padang-padang pasi jituju ubak gunung-gunong batee di rimon na teuma 600 droe nyang ltheueh. awaknyan tinggai di rimon na peuet beuleun treb jih. oh ltheuehnyan ureueng israel jigisa lom laju jijak prang dan jipoh mate mandum ureueng benyamin nyang na tinggai sidroe sapat – agam, inong, aneuek manyak meunan cit deungon beulatang peulara jih. banmandum banda nyang na didaerahnyan jitot ngon apui. bak watee ureueng israel jimeusapat di mizpa, awaknyan ka jimeujanji ubak tuhan bahwa hana meusidroe pi nibak awaknyan nyang jipeu idhin aneuek dara jih jimeukawen ngon sukee benyamin. jinoenyoe awaknyan jijak u betel dan jiduek ngon ate nyang seudeh trok an malam dikeue tuhan. awaknyan jimo dan jimeusapat, "ya tuhan, po teu allah israel, pakon ktheueh banmandum nyoe haroh teujadi? sukee benyamin, saboh nibak sukee bansa kamoe karab habeh!" oh singoh beungoh nyan, ban seuboh buta, umat israel laju jipeudong saboh miseubah disinan, dan laju jipeuseumah ubak tuhan keureubeuen nyang teutot dan keureubeuen peudame. oh ltheuehnyan awaknyan laju jiseulidek peu ktheueh na lamkawan sukee-sukee bansa israel nyang hana jijak u mizpa bak watee meusapat disinan yoh masa ilee keujak meuhadab tuhan. (bak wateenyan awaknyan ka jimeusumpah bahwa ureueng nyang hana jitemjak bak watee teupakat u mizpa ureueng nyan haroh teuhukom mate.) umat israel that-that jigaseh ubak mandum syedara-syedara gobnyan sukee benyamin; awaknyan jipeugah, "bak uroenyoe israel teuma gadoh saboh lam sukee jihnyan. peu nyang haroh tapeubuet le geutanyoe mangat ureueng benyamin nyang na mantong tinggai bacut teuk nyoe hase jimeukawen dan na peurumoh, sabab geutanyoe ka ta meusumpah ubak tuhan bahwa geutanyoe hana tapeu idhin aneuek-aneuek dara geutanyoe jeuet keupeurumoh ureueng benyamin?" teuma le awaknyan jiseulidek peu ktheueh na saboh golongan nibak sukee bansa israel nyang hana jijak meusapat di mizpa. dan awaknyan na meurumpok bahwa nibak ureueng-ureueng yabes di gilead, hana meusidroepi nibak awaknyan nyang na jijak u mizpa. sabab, bak watee teupeureksa dafeurat hade, teunyata hana meurumpok disinan ureueng-ureueng yabes. le

sabab nyan, ureueng-ureueng nyang meusapat di betel nyan jikirem 12.000 droe nyang paleng beuhe nibak awaknyan nyang laen mangat teujak poh tieb-tieb ureueng di yabes, jitamong cit keunan ureueng inong dan aneuk manyak. awaknyan jibri peurintah keu jiyue poh bubena ureueng agam, dan meunan cit bubena ureueng inong nyang hana le peurawan. teuma lamkawan ureueng nyang na tinggai di yabes nyan, awaknyan meurumpok 400 droe aneuk dara nyang na mantong peurawan. awaknyan laju jiba aneuk-aneuk daranyan ubak khimah-khimah di silo nyang na di nanggroe kanaan. oh lheuehnyan banmandum umat israel jikirem utosan ubak ureueng-ureueng benyamin nyang na tinggai di gunong-gunong batee di rimon keu pakat meudame. le sababnyan di ureueng-ureueng benyamin nyan laju geugisa, dan di umat israel pi laju jijok aneuk-aneuk dara nibak yabes nyang hana jipoh mate nyan. teuma jeumeulah aneuk dara nyan hana seb keu ureueng-ureueng benyamin nyan. umat israel get that weueh keu ureueng benyamin, sabab tuhan ka geupeureutak talo syedara sukee bansa israel. sabab nyan, ureueng-ureueng nyang patot nyang na meusapat di betel nyan jipeugah, "di dalam sukee benyamin hana le ureueng inong. teuma peue takeuneuk peugah; geutanyoe hana jeuet tabri idhin keu aneuk-aneuk dara geutanyoe jimeukawen deungon awaknyan, sabab geutanyoe ka ta peusumpah tieb-tieb ureueng so mantong nibak lamkawan geutanyoe nyang jipeu idhin aneuk dara jih jimeukawen ngon ureueng benyamin! jadi, peu kheueh nyang haroh tanyoe peubuet keu awaknyan nyang na mantong tinggai sidroe dua nyoe mangat awaknyan hase jimeukawen? bek sampoe israel gadoh saboh lamkawan sukee jih nibak dua blaih sukee bansa israel. geutanyoe haroh tamita jalan mangat sukee benyamin nyan jeuet jipeutreon keuturonan jih simantong na jih nyan dan jeuet teuma jipo hak milek tanoh jihnyan jeuet keu atra jih siumu masa." "meunoe," kheun awaknyan, "na saboh jalan keumasa alahnyan, na kheueh bak watee peurayaan siseun sithon keu tuhan di silo." (di siblahi seulitan silo nyoe na meuteume banda betel, dan siblahi ubarat nyan na teuma meurumpok jalan raya betel u sikhem, seudangkan disiblahi utara na teuma meurumpok banda lebona.) teuma di ureueng patot-patot nyang jipeuna meusapat di betel nyan jipeugah ubak ureueng-ureueng benyamin nyang na tinggai sidroe dua nyan, "gata jak laju tajak musom bak lampoh-lampoh anggo di silo, dan gata meujaga-jaga kheueh disinan. eunteuk meunyoe aneuk-aneuk dara silo jiteubiet keu jijak meunari bak watee peurayaan siseun sithon keu tuhan, gatanyoe banmandum haroh beubagaih tateubiet nibak dalam lampoh anggo nyan. le gatanyoe maseng-maseng gata drob laju sidroe aneuk dara lamkawan awaknyan dan gata peuplueng laju u dalam wilayah benyamin mangat tapeujeuet keu ureueng binoe gata. meunyoe na bapak atawa syedara inong nyan nyang agam jijak tuntot gata, gata mandum jeuet tapeugah nyang lageenyoe, 'kamoe meuharab ngon kamoe lakee, bah kheueh awaknyan tinggai nibak kamoe. kamoe hana kamoe

reupah awaknyan bak watee meuprang. dan le sabab gata hana tabri awaknyan keu kamoe, gata hana ta iengkeue janji, le sababnyan hana meusalah." "teuma ureueng-ureueng benyamin nyan laju jipeubuet peue nyang ka jipeugah ubak jihnyan. awaknyan maseng-maseng laju jibaplueng sidroe aneuk dara silo. oh lheuehnyan awaknyan jiwoe u wilayah jih keudroe dan laju jipeudong lom banda-banda gobnyan dan laju jitinggai teutab disinan. meunan cit deungon ureueng-ureueng israel nyang laen pi jibeurangkat cit teuma. awaknyan jiwoe ubak tanoh milek jih keudroe di dalam wilayah droe jihnyan maseng-maseng, meunurot kawom dan sukee-sukee jihnyan. bak watee jamen nyan gohlom na raja di nanggroe israel. tieb-tieb ureueng jipeubuet peue nyang jianggab beutoi.

na sidroe ureueng agam, nan gobnyan elkana, nibak sukee efraim. gobnyan tinggai di banda rama, nibak daerah gunong-gunong efraim. elkana na kheueh aneuk yeroham dan cucoe elihu. gobnyan jitamong n dalam keuluwarga tohu, cabeueng nibak marga zuf. elkana na teuma dua droe purumoh, nannan binoe geuhnyan hana dan penina. penina na teuma ji meu aneuek, teuma si hana tanna aneuek. tieb-tieb thon elkana jijak nibak rama keu geujak meueibadat di silo dan geupeuseumah keureubeuen keu tuhan nyang mahakuasa. nyang jeuet keu teungku imeum tuhan di silo na kheueh hofni dan pinehas, aneuek-aneuek eli. tieb-tieb watee meunyoel elkana geupeuseumah keureubeuen, penina dan banmandum aneuek gobnyan maseng-maseng geubri saboh jeumba nibak eungkot sie keureubeuen nyan. teuma hana geubri bacut mantong sabab tuhan hana geubri aneuek keu jih nyan. bahpi meunan elkana keubit that-that geucinta keu hana. hana sabe jipeusaket ate geuh dan jipeuhina le penina, madu geuhnyan, sabab tuhan hana geubri aneuek keu gobnyan. hainyan teujadi ka meu thon-thon; meunyoel awaknyan geujak u baet tuhan, sabe hana nyan jipeusaket ate le penina. kayem that hana geumo dan hana geutem makheun sabab jihina nyang lagee nyan bagoe. meunan kheueh tieb-tieb watee teuma elkana, lakoe gobnyan, geuteumanyong, "pakon gata tamo hana? pakon teuma gata han tatem makheun dan sabe dalam keuadaan seudeh? bukan kheueh ulon leubeuh meuyuem nibak gata nibak ban siploh droe neuek agam?" bak siuroe oh ka ltheueh awaknyan geumakheun di baet tuhan di silo, hana laju geubeudoh nibak meja makheuen. bak wateenyan teungku imeum eli nyang na cit di baet tuhan, teungoh geuduek-duek nibak kurusi geuh dibabah pinto. deungon ate nyang that peudeh hana geumeudoa ubak tuhan sira geumo musok-musok. oh ltheuehnyan hana geupeugah janji, "tuhan nyang mahakuasa, neungiang kheueh hamba droeneueh nyoe! neukalon kheueh seungsara hamba droeneueh nyoe. neu ingat kheueh keu ulon dan bek kheueh neutuwoe keu ulon! meunyoel droeneueh ya tuhan neubri keu ulon sidroe aneuek agam, ulon meujanji teuma ulon bri aneuek nyan keu droeneueh siumu udeb jih. meunan cit ulon meujanji bahwa ok jih ateueh ulee hantom na teuma teucuko." lumpah treb hana geumeu doa, dan eli geupeurati babah ureueng inong nyan. hana geumeu doa didalam ate, teuma bibi geuh mantong nyang na meu met-met, teuma su gobnyan hana teudeungoe. sabab nyan kheueh le eli geusangka hana nyan ka mabok. dan eli pi laju geupeugah ubak ureueng inong nyan, "keubiet hana patot gata mabok disinyoe! bek tajieb le ie anggo!" teuma hana geujaweueb, "ulon kon mabok, ulon meubacut pih hana ulon jieb ie anggo nyan! ulon putoh asa, dan teungoh lon meudoa ulon peugah hai banmandum nyang ulon deurita ubak tuhan. bek kheueh ulon teuanggab ureueng inong nyang jeuhet atawa inong jalang. ulon meudoa nyang lagee nyoe bagoe sabab ulon lumpah that seudeh." geupeugah lom le eli, "meunyoel meunan takawoe laju deungon seulamata, seumoga po teu allah ureueng israel geupeutrok doa gata nyan." geujaweueb le hana, "seumoga ulon meuteume reustu ba-

pak." oh ltheueh geupeugah nyan laju geujak, dan laju geu pajoh bu; dan gobnyan ka hana seudeh le. oh singoh beungoh nyan elkana dan keuluwarga gobnyan geubeudoh nibak teupat eh ban bungoh that-that, dan oh ka ltheueh geuseumayang ubak tuhan, geuwoe laju u rama. dan elkana laju geumeusituboh deungon peurumoh geuh hana, dan tuhan geupeutrok doa hana. inong nyan laju mume dan geupeulahe sidroe aneuek agam. aneuek nyan geuboh nan samuel, geupeugah, "ulon ka ulon lakee jihnyoe ubak tuhan." trok kheueh watee jih elkana dan keuluwarga gobnyan geujak u silo keu geujak peuseumah keureubeuen sithon sigoe keu tuhan. seulaen nibak nyan elkana ka geumeujanji keu geupeuseumah keureubeuen nyang khusus. teuma goenyoe hana han geuseutot. geupeugah ubak lakoe geuh, "teuma oh ka ltheueh teucree jimik, samuel ulon intat u baet tuhan, dan jihnyan teuma tinggai disinan siumu udeb jih." geujaweueb le elkana, "get kheueh, meunyoel nyang gata kalon nyan jroh; tatinggai kheueh mantong di rumoh sampoe trok watee jih gata peucree mik aneuek geutanyoe. dan seumoga tuhan geupeujeuet janji gata jeuet keunyata." le sabab nyan, hana tigga dirumoh sampoe an bak watee aneuek gobnyan teupeucree mik teuma. oh ka ltheueh samuel teupeucree mik, gobnyan laju geu intat le mak geuh u baet tuhan di silo. bak watee nyan gobnyan mantong ubiet that-that. hana geupuwoe nibak teupat nyan saboh leumo agam nyang meu-umu lhee thon, gandom siploh kilo gram, dan saboh balueum kulet nyang ka peunoh meu aso ngon ie anggo. leumo nyan laju geusie, dan samuel geu intat laju ubak eli. hana geupeugah ubak eli, "meuah, pak. peu kheueh mantong bapak ingat keu ulon? ulon nyoe ureueng inong nyang ka ltheueh bapak kalon ulon dong disinoe, watee nyan teungoh meudoa ubak tuhan. nyoe kheueh aneuek nyang ulon lakee ubak tuhan uroe jeh. doa ulon ka geupeutrok le gobnyan, dan le sabab nyan aneuek nyoe ulon seurah jeuet keuhak milek tuhan siumu udeb jih." oh ltheuehnyan awaknyan laju geuseumayang ubak tuhan. laju hana geumeudoa, geupeugah, "tuhan ka neupeu galak ate ulon; buet gobnyan lumpah that seunang jiwa ulon. deungon rasa bahgia ulon peu hina musoh ulon, sabab sikeubit jih po teu allah ka geutulong ulon. tanna le nyang suci nyang lagee tuhan! teuma gobnyan mantong nyang hase geubri peulindungan. gata peu-im kheueh haba gata nyang sulet! bek kheueh tapeugah haba nyang meuhina! sabab tuhan nyan na kheueh po teu allah nyang keubit areh; nyang geupeuhakem mandum buet manusia. peudeueng panglima ka geupeupatah, ureueng nyang leumoh ka teuga teuma. ureueng nyang dilee troe sabab makmu ngon pade, teuma jinoenyoel ka jeuet keu ureueng geumadee teuma keu meuteume peunajoh. ureueng nyang barokon jiteundeuek, jinoenyoel ka troe ngon puih, sabab ka seb peunajoh. peurumoh nyang malee, jinoe ka bangga, tujoh droe aneuek ka geupeulahe deungon seulamata! teuma na nyang le kajitoh aneuek, ka geutinggai udeb meurana. tuhan geupeumate, gobnyan cit teuma nyang peu udeb. lam donya ureueng mate geupeutreu teuma manusia. dan gobnyan teuma nyang beut nibak teupat nyan. na ureueng nyang geupeu gasien ngon

papa, dan na teuma yang keupeukaya. na ureueng yang geupeumiyueb deurajat jih, na teuma ureueng yang geupeu manyang deurajat jih. nibak deurita, geu beuot ureueng yang hana meuhareuta, nibak seungsara, geupeu beubaih ureueng yang hina. awaknyan geupeujeuet keu rakan le ureueng bansawan, dan geubri jabatan ngon keuhormatan. lapeh bumoenyoe na kheueh atra tuhan, di ateueh bumoenyan geupeuget laju donya. ureueng yang seutia bak gobnyan sabe lam aman dalam lindongan tuhan. teuma yang jeuhet pasti hanco binasa dalam seupot nyang glab gulita. teunaga keudroe hana hase teunguile, teunaga manusia han hase geubri meunang. dumna musoh tuhan ka habeh hanco, awaknyan teumakot; di langet gobnyan geumusu lagee geulanteue. tuhan teuma geupeuhakem bansigom asoe donya nyoe, dan geubri kuasa nyang mulia keu raja nyang geupileh." laju jijak kheueh elkana dan keuluwarga jihnyan u rama, teuma samuel, aneuek geuh nyan, tinggai di silo dan geupeutimang tuhan dimiyueb pegawasan imeum eli. aneuek-aneuek eli jeuhet-jeuhet that. awaknyan hana jipako ubak tuhan, sibago teungku imeum awaknyan jimeubuet ban galak droe ateueh bansa israel. miseujih na ureueng jikeuneuk peuseumah keureubeuen, le teungku sida nibak teungku imeum nyan laju jiba gareupu nyang meugigo lhee. teunghog uegkot sie nyan mantong teureuboh dalam panci, gareupu nyan laju jitob u dalam panci teupat uengkot sie nyang teureuboh, dan peue mantong nyang jitarek u luwa deungon gareupu nyan atranyan ka jeuet keu hak milek teungku imeum. banmandum ureueng israel nyang jijak u silo keu jijak peuseumah keureubeuen jipeubuet lageenyan. dan kadang-kadang teungku sida nyan teuka keunan sigohlom leumak uengkot sie nyan teupeungkreuh keu teutot, dan le gobnyan jipeugah ubak ureueng nyang peuseumah keureubeuen nyan, "gata bri kheueh laju uengkot sie nyang gohlom masaknyan ubak teungku imeum mangat geutot le gobnyan; gobnyan hana geutem teurimong uengkot sie nyang ka teureuboh." meunyoee ureueng nyan jijaweueh, "nyang siget jih geutanyoe tataat ubak peuratoran, bah kheueh tareuboh leumak nyan leubeh dilee; oh ltheuehnyan baro kheueh tacok ban galak droe gata," dan le teungku sida nyan jijaweueh, "han jeuet, jinoenyoe laju gata jok atra nyan, meunyoee han, nyan teuma ulon cok ngon cara lon reupah." meunan kheueh cara jih, sampoe ban dua droe aneuek eli nyan ka meudesya nyang lumpah rayeuk ubak tuhan, sabab awaknyan jihina ngon jipeubeuah keureubeuen nyang teupeureulee keu tuhan. oh ltheueh nyan, samuel nyang mantong aneuek manyak nyan hana geupioh geulayani tuhan. gobnyan geushok baje keu khusus nyang teucob nibak jia lineun, saban lagee baje iebadat dumna teungku imeum. tieb-tieb sithon ma laju jicob baje jubah nyang ubiet dan atra nyan jijakjok laju ubak samuel meunyoee na gobnyan sajan deungon lakoe ji jiteuka jijak peuseumah keureubeuen sithon sigoe. le sabab nyan eli laju geubri beureukat ubak elkana dan peurumoh gobnyan, dan teungku imeum eli nyan geupeugah ubak elkana, "seumoga tuhan geubri lom aneuek keu gata nibak purumoh gata nyoe, keu geunantoe

aneuek nyang ka gata jok ubak tuhan." oh ltheuehnyan awaknyan pi laju geuwoe u rama. hana laju geujok beureukat le po teu allah, sampoe geupeu lahe lom lhee droe aneuek agam dan dua droe aneuek inong. samuel pih meutamah rayeuk dan gobnyan teutab geulayani po teu allah. eli ka tuha that. gobnyan hana putoh-putoh geudeungoe ureueng jimeugadu ubak gobnyan keuhai pi-e ngon peurangoe aneuek-aneuek gobnyan ateueh ureueng israel. meunan cit eli geuteupeu bahwa aneuek-aneuek geuhnyan ji-eh deungon ureueng inong nyang jaga pintoe khimah tuhan teuka. le sabab nyan geupeugah kheueh le eli ubak aneuek-aneuek geuh, "ulon ka lon deungoe laporan nyang jimeungadu le banmandum umat keuhai pi-e peurangoe gata nyang jeuhet nyan. pakon gata peubuet nyan? bek gata peubuet nyang meunan le, hai aneuek meutuah. keubiet that ayeu peue nyang geukheun le umat tuhan keuhai gata! meunyoee na ureueng meusalah teuhadab manusia, po teu allah hase geubila ureueng nyang meusalah nyan; teuma meunyoee na ureueng jimeudesya ubak tuhan, soe kheueh nyang hase tulung ureueng nyan?" teuma aneuek-aneuek eli nyan meubacutpi hana jipakoe ubak naseuhateu ureueng syiek jih nyan, sabab tuhan ka geupeuputoh bahwa awaknyan geupoh mate. laen hai deungon samuel, aneuek nyan, seumakan rayeuk seumakan rame ureueng harok, bah kheueh le tuhan, meunan cit le manusia. bak si uroe teuka kheueh sidroe nabi ubak eli dan geujak peusampoe peusan nibak tuhan keu gobnyan, geupeugah, "bak watee indatu gata nabi harun dan keuluwarga jihnyan jeuet keu namiet di nanggroee meuse, ulon ka lon peugah soe droe ulon nyoe ubak nabi harun. nibak meubagoee sukee israel ka ulon pileh keuluwarga jih nyan jeuet keu teungku imeum ulon, mangat jeuet keu ureueng nyang meulayani nibak miseubah, jijak tot dupa, jishok bajeef efod meunyoee jihnyan jimeututote deungon ulon. dan meunan cit keu awaknyan dan keuturonan awaknyan ka ulon bri hak mangat jeuet jijak-cok siladam nibak keureubeuen peuseumahan nyang jitot di ateueh miseubah. nyang kheueh jeuet, pakon gata mantong cit leuha watee takalon keureubeuen-keureubeuen nyang paih lagee peurintah ulon, jipeuseumah le bansa ulon ubak ulon? pakon gata eli, leubeh gata horeumat keu aneuek-aneuek gata nibak gata horeumat ulon, dan tapeubiyee awaknyan jipeugah keudroe-droe jih deungon jeumba nyang paleng get nibak tieb-tieb keureubeuen bansa ulon keu ulon? ulon, tuhan po teu allah israel, nyang yoh watee ilee ka ulon meujanji, nyang bahwa keuluwarga gata dan marga gata teuma peutimang ulon sibago teungku imeum keu siumu masa. teuma jinoenyoe ulon hana lon galak le hainyan! sabab nyang horeumat ulon, teuma ulon horeumat, teuma nyang hina ulon, ureueng nyan teuma ulon hina teuma. gata deungoe kheueh nyoe, teuma teuka watee jih ulon teuma lon poh mate banmandum aneuek muda lam keuluwarga dan marga gata, sampoe hana meusidroepi ureueng agam lam keuluwarga gata trok ubak umu nyang panyang. gata teuma seudeh dan meurasu cumuru ngon bingiek ate watee gata kalon beureukat nyang teuma ulon bri keu ureueng laen di israel, teuma lam keuluwarga gata keudroe mate muda. teuma, sidroe ni-

bak keuturonan gata, ulon peubiyeu udeb dan jilayani ulon sibagoe teungku imeum. teuma jihnyan jeuet keu ureueng buta mata dan udeb jih lam keuadaan putoh asa. banmandum keuturonan gata nyang laen teuma teupoh mate. sibagoe bukeuti bahwa banmandum nyang ulon peugah nyan biet-biet teuma teujadi, dan ban dua droe aneuek gata nyan, hofni dan pinehas awaknyan teuma mate lam si uroe. oh ltheuhnyan ulon teuma lon pileh teungku imeum nyang seutia keu ulon dan jipeubuet peue nyang ulon peurintah ubak jih nyan. keu jihnyan ulon bri keuturonan nyang sabe buet jih jimeutugaih sibagoe teungku imeum dikeue raja-raja nyang ulon pileh. tieb-tieb keuturonan gata nyang mantong udeb, teuma jajak ubak teungku imeum nyan keu jijak lakee peng dan peunajoh. jihnyan teuma jipeugah, neupeu idhin kheueh ulon mangat jeuet lon tulong bubena teungku imeum, mangat ulon jeuet meuteume makheuen bahpi nyan cit saboh sueb mantong." nibak watee nyan, samuel nyang mantong aneuek miet nyan geulayani tuhan mantong ateueh peutun yok eli. bak watee nyan lumpah that jareueng na peusan tuhan. bak simalam, eli nyang ka that tuha lom ngon mata gobnyan pih karab buta sabab ka rabon, gobnyan teungoh geu-eh didalam bilek geuh, dan samuel geueh teuma to ngon peuto peujanjian tuhan, didalam khimah suci. bak watee mata uroe gohlom jiteubit dan mantong lam keuadaan reuneu-reuneu dan meunan cit panyot mantong na hu, tuhan geutawok samuel, laju samuel pi geujaweueb, "nyoe, bapak!" oh ltheuh nyan geubudoh dan laju geuplueng geujak meurumpok ngon eli dan geupeugah, "peue na? keupeue ulon neu tawok?" teuma eli geujaweueb, "ulon hana lon hoi gata, tajak -eh kheueh lom." laju samuel geujak ubak teumpat eh geuh lom. oh ltheuhnyan samuel geuhoi lom le tuhan, teuma samuel hana geuteupeue bahwa nyang hoi gobnyan na kheueh tuhan, sabab hantom na lom tuhan geupeugah haba ngon gobnyan. le sabab nyang gobnyan geubudoh lom, dan laju geujak meurumpok ngon eli dan geu tanyong, "peue na hai, bapak? pakon bapak hoi ulon?" geujaweueb le eli, "ulon hana lon hoi gata hai, aneuek meutuah; tajak eh kheueh lom keudeh." keu nyang keu lhee goe tuhan geuhoi samuel; lagee biasa geubudoh laju samuel geujak meurumpok deungon eli sira geupeugah, "peue na hai bapak? pakon ulon neuhoi?" teuma bak saat nyan kheueh eli baro geuteupeue bahwa nyang meuhoi aneuek nyan na kheueh tuhan. sabab nyan gobnyan geupeugah ubak samuel, "tajak eh kheueh lom, dan meunyoee gobnyan teuka lom geuhoi gata tapeugah kheueh laju, 'neumeututoe kheueh, tuhan, ulon na lon deungoe su droeneueh.' " laju geujak kheueh samuel ubak teumpat eh lom. oh ltheuh nyan teuka kheueh lom tuhan dan deungon laju diteumpat nyan oh ltheuhnyan geuhoi kheueh teuma samuel, "samuel, samuel!" dan samuel laju geujaweueb, "neumeututoe kheueh ya, tuhan, hamba droeneueh nyoe meudeungoe su droeneueh." laju geupeugah le tuhan ubak gobnyan, "ulon teuma lon pubuet nyang lumpah brat ateueh ureueng israel, dan soe mantong nyang deungoe nyan ureueng nyan jiteuka bingong. bak uroe nyan ulon teuma lon peubuet banmandum nyang ka ltheuhulon an-

cam ateueh keuluwarga eli nibak awai sampoe an akhe. ka ltheuhulon peugah ubak gobnyan bahwa keuluwarga jihnyan ulon hukum siumu masa sabab aneuek-aneuek jihnyan ka jihina ulon. eli jiteupeue mandum desya awaknyan, teuma awaknyan hana jibeungeh. le sabab nyan ulon meusumpah keuhai keuluwarga eli nyan, bahwa desya awaknyan nyang paleng rayeuk nyan hana hase teusampoh deungon keureubeuen atawa peuseumahan peue mantong keu siumu masa." oh ltheuhnyan samuel geueh lom, dan watee uroe ka bungoh gobnyan laju geubudoh geubuka dumna pintoe-pintoe baet tuhan. gobnyan geutakot geujak peugah peue nyang ka geukalon nyan ubak eli, teuma eli laju geuhoi samuel dan geupeugah, "samuel, aneuek ulon." geujaweueb le samuel, "nyoe pat ulon, hai bapak." eli geutanyong, "peue nyang ka geubri tee le tuhan ubak gata? gata carita kheueh nyan banmandum ubak ulon. meunyoee sipeu-peu nyang gata som ubak ulon, pasti gata geuhukom le po teu allah." dan samuel geupeugah banmandum nyan ubak eli. hana meubacut pi nyang na teusom. oh ltheuh nyan geupeugah kheueh le eli, "gobnyan tuhan, bah kheueh gobnyan geupeubuet peue nyang geu anggap nyan jroh." samuel ho siuroe meutamah rayeuk. tuhan sabe na ngon gobnyan dan peue nyang geupeugah le samuel keubiet teujadi. nyang kheueh sabab jih bubena ureueng israel bansaboh nanggroee nyan jimeungaku bahwa samuel nyan na kheueh nabi tuhan. tieb-tieb samuel geupeugah haba, banmandum bansa israel jideungoe. tuhan teutab mantong geupeugah droe gobnyan di silo, diteumpat gobnyan nyang keu phon-phon that geupeuleumah droe ubak samuel dan geupeugah haba deungon geuh nyan. bak masanyan ureueng filistin jikrah bubena sipa-i jih keu jijak prang ureueng israel; sababnyan di ureueng israel pih jikrah teuma bubena tantra jih keu jijak muprang ngon ureueng filistin; awaknyan jipeudong khimah to ngon eben-haezer, seudangkan tantra filistin jipeudong teuma khimah jih di afek. tantra filistin ka jipeuphon prang tantra israel, dan oh ka ltheuh jimeuheuntam udeb mate nyang lumpah hibat, tantra israel taloe dan na kira-kita peuet ribee droe nyang tiwaih di mideuen prang nyan. bak watee tantra nyang taloe nyan na kira-kira meupadub droe teuk nyang na tinggi dan laju jiwoe ubak khimah jih, bubena peumimpen israel jipeugah, "pakon kheueh tuhan geupeutaloe geutanyoe deungon tantra filistin nibak uroe nyoe? jak kheueh geutanyoe tajak cok peuto peujanjian tuhan nyang na di silo, dan atra nyan tanyoe ba keunoe, mangat tuhan geutem tulong geutanyoe dan geupeuseulamat geutanyoe nibak musoh." awaknyan jikirem laju ureueng laen u silo mangat jijak cok peuto peujanjian tuhan nyang lagee tahta tuhan nyang mahakuasa. bandua droe aneuek eli, hofni dan pinehas, ji-ireng peuto peujanjian tuhan nyan. watee peuto peujanjian tuhan nyan ka sampoe ubak khimah-khimah, jisumurak kheueh ureueng israel ngon su nyang meutaga, dan deungon su jih nyang meutaga nyan bumoe nyoe sampoe meugeumpa. le ureueng filistin jideungoe su ureueng sumurak nyan laju awaknyan jipeugah, "pakon ureueng-ureueng ibrani nyan jisumurak?" teuma bak watee awak nyan jiteu-

peue bahwa peuto peujanjian tuhan ka trok jiba keunan ubak khimah-khimah ureueng ibrani, awaknyan ka jeuet keuteumakot dan jipeugah, "na dewa teuka ubak khimah-khimah awaknyan! cilaka kheueh geutanyoe nyoe! gohlom na nyang ka-ka geutanyoe rasa hai nyang lageenyoe bagoe! cilaka kheueh nyang beuna! soe kheueh nyang hasa peuseulamat geutanyoe nibak dewa-dewa nyang teuga nyan? bukon kheueh dewa-dewa nyan cit teuma nyang ka jipoh mate dumna ureueng meuse dipadang pasi yoh masa ilee? peu ceubeueh kheueh ate gata, hai ureueng filistin! gata muprang kheueh lagee ureueng agam, meunyoe han, gata teuma jeuet keu namiet ureueng-ureueng ibrani nyan, lagee awaknyan yoh masa ilee jeuet keu namiet-namiet gata. sabab nyan muprang kheueh deungon gagah beurani!" oh lheuhenyan jimuprang kheueh ureueng filistin deungon hebat peukasa sampoe bubena tantra israel ka habeh taloe. di ureueng israel nyan laju jiplueng ubak khimah droe jih maseng-maseng. lumpah that rayeuk nyang taloe nyan: 30.000 droe tantra israel ka reubah hancoe meulampa. peuto peujanjian po teu allah nyan jipeugah ka jeuet keu musoh ureueng israel, dan bandua droe aneuek eli, hofni dan pinehas, nyan pih ka mate dalam prang nyan. sidroe lamkawan sukee benyamin jiplueng nibak mideuen prang u silo, dan trok keunan nibak uroe nyan cit teuma. sibagoie tanda meuduka cita, ka jipriek-priek bajee jih dan jicok tanoh laju jipeuduek u ateueh ulee jih. eli nyang lumpah khawate bak jipike keuhai peuto peujanjian tuhan, gobnyan teungoh geudeuk di ateueh keurusi nibak bineh rot, sira teumanueng. bak watee ureueng nyan jikak peugah keuhai taloe ureueng israel, banmandum peunduduek banda nyan jimobae sira meuratok ngon su nyang meutaga. eli geudeungoe su ureueng meuratok nyan, laju geutanyong, "su peue nyang subra that nyan?" bak watee nyan na ureueng teungoh jiplueng ubak eli; oh ka trok keunan, ureueng nyan laju jipeugah haba nyang hana mangat nyan. seudang kan eli nyan ka na umu geuh sikireueng ploh lapan thon dan mata gobnyan ka rabon ngon karab buta. ureueng nyan jipeugah ubak eli, "ulon kuplueng nibak uroenyoe di mideuen prang dan ban that trok keunoe." eli geutanyong ubak ureueng nyan, "pakriban haba jih, hai aneuek ulon?" ureueng nyang ba haba nyan laju jijaweueb, "israel ka jiplueng nibak ureueng filistin. geutanyoe meudeurita taloe nyang lumpah rayeuk. jai that ureueng nyang mate, meunan cit deungon bandua droe aneuek bapak, hofni dan pinehas. dan peuto peujanjian po teu allah nyan ka jireubot le musoh!" bak watee ureueng nyan jipeugah keuhai peuto peujanjian nyan, eli rhot laju dan reubah teulinteung di ateueh kurusi bak tempat geudeuk di sibalahi pintoe geureubang. gobnyan ka that-that tuha tuboh geuh teumbon that sampoe bak watee rhot nyan takue gobnyan patah, dan gobnyan pi meuninggai donya. gobnyan ka gepimpin bansa israel nyan peuet ploh thon treb jih. bak watee nyan, meulintee eli, na kheueh peurumoh pinehas, teungoh brat mume, dan watee keu jipeulahe aneuek nyan ka to that-that. bak watee jideungoe bahwa peuto peujanjian allah ka jureupah, dan jideungoe teuma ayah tuwan meunan cit lakoe

jih ka teuma meuninggai donya, hana teusangka-sangka jihnyan ka teuma teuras saket pluet tanda keuneuk toh aneuek, laju lahe kheueh teuma aneuek jih hana padubna treb teuma oh lheuhenyan. bak watee geuhnyan karab meuninggai donya, le ureueng inong nyang tulong jihnyan jikheun, "tabah kheueh ate gata! aneuek gata nyoe agam!" teuma jihnyan hana jijaweueb atawa jingieng awaknyan. aneuek nyan jiboh nan ikabod, kheun gobnyan, "keuhaderan po teu allah nyang mulia ka gadoh nibak israel." nyang geumeukeusutnyan na kheueh bahwa peuto peujanjian ka jireupah dan tuan jih meusajan ngon lakoe jih ka meuninggai donya. le sababnyan gobnyan geupeugah, "keuhaderan po teu allah nyang mulia ka gadoh di israel, sabab peuto peujanjian po teu allah ka jireupah." oh ka jireubot peuto peujanjian allah nyan le ureueng filistin, laju atra nyan jiba nibak eben-haezer u banda awaknyan, asdod. disinan peuto nyan jipeutamong u dalam kuil dewa awaknyan, patong dagon jikeubah teuma to ngon bineh patong dewa nyan. bak watee peunduduek asdod oh singoh nyan ban suboh buta jikak laju ubak kuil nyan, awaknyan jikalon bahwa patong dagon ka reubah teudugom u ateueh tanoh, dikeue peuto peujanjian tuhan! awaknyan laju geubeut patong nyan dan jikeubah lom nibak tempat sot. teuma oh singoh uroe nyan, ban beungoh that, awaknyan ka deuh lom jikalon bahwa patong nyan ka reubah lom to ngon peuto peujanjian tuhan. goenyoe ulee patong nyan dan bandua blah jaroe jih ka putoh meukhan dan atra nyan teukeubah nibak babah pintoe; teuma badan patong nyan nyang na mantong tinggai sampoeureuna. (nyang kheueh sabab jih, sampoe an uroe nyoe bubena teungku imeum dewa dagon dan banmandum nyang seumah nyan di asdod jilingkeu babah pintoe kuil dagon nyan dan hana jigilo.) oh lheuhenyan tuhan geuhukom peunduduek asdod dan daerah nyang na di silingga nyan deungon keumong-keumong nibak tuboh awaknyan. bak watee awaknyan jikalon peue nyang teungoh teuka u ateueh droe awaknyan nyan, awaknyan laju jipeugah, "allah ureueng israel ka geuhukom geutanyoe dan dewa geutanyoe dagon. geutanyoe hanjeuet tapeubiyeu peuto peujanjian nyan tinggai disinoe leubeh treb lom." sabab nyan awaknyan laju jiundang ban limbong droe raja filistin mangat raja-raja nyan jeuet jimeugumpoi, laju jityanyong, "peuto peujanjian israel nyan haroh tapeuguna keupeue?" jijaweueb le raja-raja nyan, "neupinah kheueh laju u banda gat." le sababnyan, peutonyan laju jipinah u banda gat, saboh lamkawan banda filistin nyang laen. teuma bak watee peuto nyan ka trok keunan, laju tuhan geuhukom teuma banda nyan dan teuka kheueh teumakot nyang lumpah rayeuk. peunduduek banda nyan bah kheueh nyan nyang muda meunan cit nyang tuha laju geuhukom dengan geupeutimoh keumong-keumong nyang lumpah brat dan keubiet meubaya ateueh tuboh awaknyan. laju peuto peujanjian nyan ji intat teuma u ekron, saboh banda lamkawan banda filistin nyang laen. oh ka trok peuto nyan keunan, peunduduek disinan laju jikliek ngon geumeuhoi, "peuto peujanjian allah israel nyan ka jiba keunoe mangat jikakpoh mate geutanyoe banmandum." sabab nyan awaknyan jikakhoi ban-

mandum raja filistin mangat jimeusapat dan jieugah, "neupeuriwang kheueh laju peuto peujanjian israel nyan ubak teupat jih mangat bek geupoh geutanyoe dan keuluwarga geutanyoe." bansaboh banda nyan ka jeuet keuteumakot ngon karu rioh hana meuteuntee sabab po teu allah ka geuhukom peunduduek banda nyan deungon keubiet that brat. ureueng-ureueng nyan hana mate, jitimoh le peunyaket-peunyaket keumong nyan, sampoe peunduduek bandanyan laju jitawok sira jikliek ubak dewa-dewa awaknyan, jilake tulong. oh lheureh peuto peujanjian tuhan nyan na di filistin tujoh buleuen treb jih, ureueng filistin laju jitawok bubena teungku imeum jih meunan cit deungon bubena tukang sihe lheurehnyan laju jitanyong, "keupeue keugeutanyoe peuto peujanjian tuhan nyan? meunyoe atranyan tanyoe peuriwang ubak teupat sot, pakriban cara jih?" laju jija-weueb le awaknyan, "peuto peujanjian allah israel nyan bek gata peuriwang meunan mantong, teuma haroh na ngon hadiah keungon teutuboh desya gata. deungon na nyang lagee nyan gata teuma geupeupuleh, dan gata tateupeue pakon po teu allah israel nyan hana pioh-pioh geuhukom gata." "peue sineuboh jih nyang haroh geutanyoe bri keu awaknyan?" jitanyong le awaknyan. geujaweueb le mandum teungku imeum nyan, "limong boh keumong meuh dan limong boh teuma tikoih meuh, paih sidub raja-raja filistin. bukan kheueh beuncana nyang ka keunong deungon keumong-keumong dan tikoiih nyang ka keunong ateuh gata banmandum, bah kheueh nyan ateuh rakyat meunan cit ateuh raja? le sababnyan, gata haroh tapeuget keumong-keumong nyang teucuntoh dan tikoiih nyang teungoh ganah di nanggroe gata. deungon lageenyan gata ka tabri horeumat ubak po teu allah israel. mungkin gobnyan teuma geupioh geuhukom gata, dan dewa-dewa meunan cit ngon tanoh gata. keupeue guna jih gata tameukreueh ulee lagee raja dan ureueng nanggroe meuse yoh watee ilee? bek tuwoe pakriban po teu allah geupeu meunen meunen awaknyan, sampoe awaknyan jira dan ureueng israel awaknyan peubiyeu mantong jitinggai nanggroe meuse. le sababnyan, tapeuna kheueh saboh geurubak nyang baro deungon dua boh leumo nyang mantong jimom, dan nyang hantom lom teungui keu teutarek geurubak. gata pasang kheueh laju ban dua boh leumo nyan nibak geurubak nyan, dan taparoh kheueh aneuek-aneuek leumo nyan u dalam weue droe jih. oh lheurehnyan, tacok kheueh laju peuto peujanjian tuhan, gata peuek laju atra nyan u ateuh geurubak, dan gata keubah atra nyan meusaho ngon kutak nyang meuso ngon meuh nyang meuseuti gata peuseumah sibagoe sineuboh desya gata. bah kheueh geurubak dan leumo nyan jijak keudroe jih. gata ngieung kheueh meuneujak jih nyan; meunyoe peuto peujanjian nyan jiba u arah nanggroe jih keudroe, na kheueh u banda bet-semes, nyang lageenyan muphom jih bahwa po teu allah ureueng israel kheueh nyang ka geupeutreuun bala nyang cukob hibat nyoe u ateuh geutanyoe. teuma meunyoe geurubak nyan hana jijak keudeh, geutanyoe teuma tateupeue bahwa bala nyan bukan teuka nibak alah ureueng israel, teuma keubeutolan mantong," ureueng nyan jiseutot laju lagee geupeugah le teungku

imeum nyan; awaknyan laju jijakcok dua boh leumo nyang teungoh jifiek mom, atranyan jipeukeumat ubak geurubak, seudangkan aneuek-aneuek leumo nyan jikurong didalam eumpung. laju peuto peujanjian tuhan nyan geupeuek u ateuh geurubak, meunan cit deungon kutak nyang meuso deungon tikoiih meuh dan keumong-keumong nyang teucuntuh nyan. leumo nyan jijak laju langsong u arah bet-semes; sira jijak beulatang nyan jimeusu lagee jimeudroi, hana meusingpang uwie atawa u neunen nibak rot ueh raya nyan teungoh jijak nyan. dan ban limong droe raja filistin nyan laju geuseutot di likot sampoe trok ubak bataih bet-semes. bak watee nyan peunduduek bet-semes teungoh jipot boh gandom di panton. bak watee jingieung peuto peujanjian nyan, deungon ate nyang that galak lom ngon harok laju jajak sambot peuto peujanjian tuhan nyan. peuto nyan jipioh to ngon batee raya nibak lampoh yosua, sidroe nibak peunduduek bet-semes. peunduduek bandanyan laju jiplaih-plaih kayee geurubak nyan meunan cit ban dua boh leumo nyan laju teuma jisie nibak takue keu keureubeuen nyang teutot teupeuseumah ubak tuhan. oh lheurehnyan le ureueng-ureueng lewi laju geupeutreuun peuto peujanjian tuhan dan kutak nyang na meuso deungon barang-barang meuh nyan, atranyan jikeubah di ateuh batee raya nyan. oh lheurehnyan peunduduek bet-semes jipeuseumah laju keureubeuen nyang teutot dan keureubeuen nyang laen nyan ubak tuhan. bak watee ban limong droe raja filistin nyan geukalon banmandum nyan laju awaknyan jijakwoe u ekron bak uroe nyan cit teuma. deungon na lagee nyan ureueng filistin ka jikirem keu tuhan keureubeuen teuteuboih desya keu peunduduek limong boh banda nyang jimat peurintah le limong droe raja filistin nyan. banda nyan na kheueh: asdod, gaza, askelon, gat dan ekron. lamkawan nyan na nyang meubinteuh ngon kuta, dan na teuma nyang hana. tieb-tieb banda nyan geukirem saboh keumong meuh dan saboh teuma tikoiih meuh. bukeuti nibak keujadian nyan batee raya teupat awaknyan jikeubah peuto peujanjian tuhan. sampoe nibak uroe nyoe batee nyan mantong na dilampoh yosua, ureueng bet-semes nyan. teuma sabab ureueng-ureueng bet-semes nyan jiglib u dalam peuto peujanjian tuhan, tujoh ploh droe lamkawan awaknyan geupoh mate le tuhan. laju rakyat meuduka cita sabab tuhan geupeurhot ateuh awaknyan deungon bala nyang meunan raya. laju peunduduek bet-semes jipeugah, "soe kheueh ureueng nyang hase jiteun dikeue tuhan, allah nyang suci nyan? ho kheueh peuto nyan geutanyoe intat mangat atra nyan jioh nibak geutanyoe?" laju awaknyan jikirem utosan ubak peunduduek kiriyat-yearim deungon peusan nyang lageenyo, "ureueng filistin ka jipeuriwang peuto peujanjian tuhan. gata teuka kheueh dan taba kheueh peuto nyan u teupat gata." dan jiteuka kheueh laju peunduduek kiriyat-yearim jijakcok peuto peujanjian tuhan nyan dan jiba ubak rumoh ureueng nyang nan jih abinadab; rumoh nyan na jih di ateuh gunung cut. oh lheurehnyan awaknyan laju jibaiait eleazar aneuek abinadab, mangat jeuet jijaga peuto peujanjian tuhan nyan. treb cit peuto peujanjian tuhan nyan tinggai di kiriyat-yearim, na kira-kira dua ploh thon. dub treb nyan teuma

umat israel jimeulakee sabe ubak tuhan mangat tuhan geutulong awaknyan. geupeugah kheueh le samuel ubak umat israel, "meunyoee gata keuneuk tawoe ubak tuhan dan gata seumah gobnyan deungon sipunoh ate gata, bah kheueh tatiek banmandum dewa aseng nyang na nibak gata meunan cit deungon patong dewi asytore. tapeujok kheueh droe gata bulat-bulat ubak tuhan sidroe dan gata meubakti ubak gobnyan mantong, deungon nyan teuma gata geupeubeubaih nibak ureueng filistin." le sababnyan di ureueng israel nyan laju jijak tiek bubena patong meunan cit deungon patong-patong dewa baal dan patong dewi asytore, laju awaknyan jimeungabdi ngon jipeujok droe bulat-bulat ubak tuhan nyang sidroe. oh ltheuhnyan geupeugah kheueh le samuel, "gata peusapat laju banmandum bansa israel di mizpa, teuma ulon meudoa ubak tuhan keu gata nyoe." dan meusapat kheueh awaknyan banmandum di mizpa. awaknyan jijak crong ie dan ie nyan laju jijak roe sibagoe peuseumahan ubak tuhan, ltheueh nyan nibak uroe nyan awaknyan jipusa siuroe punoh. kheun awaknyan, "kamoe ka meudesya ubak tuhan." (di mizpa nyan samuel geupeuphon peuseuleusoe peukara-peukara ureueng israel nyang meusiliseh faham.) bak watee ureueng filistin jideungoe bahwa ureueng israel ka meusapat di mizpa, ban limong droe raja filistin nyan laju jijak keunan deungon leumo awaknyan keu jijak prang ureueng israel. ban jideungoe le ureueng israel hainyan, awaknyan laju teumakot. jipeugah le awaknyan ubak samuel, "bek kheueh neupioh neumeudoa ubak tuhan po teu allah geutanyoe mangat geutanyoe sealamat nibak ureueng filistin." le sabab nyan samuel laju geusie saboh aneuek bubiri nyang mantong muda, atranyan geupeuseumah ubak tuhan sibagoe keureubeuen nyang teutot. oh ltheuhnyan gobnyan laju geumeudoa mangat tuhan geutulong ureueng israel, dan doa geuhnyan geukabui le tuhan. bak watee samuel teungoh geupeuseumah keureubeuen nyang teutot nyan, ureueng filistin laju jipeuphon prang; teuma paih bak saat nyan tuhan geupeutreun geulanteu di langet u ateuah awaknyan. awaknyan ka jeuet keukaru hana meuteuntee na nyang pluang keudeh keunoe han meuhoh saho. bak saat nyan teuma tantra israel jiteubiet di mizpa laju jijak peucrok ureueng filistin rab trok u bet-kar, dan geupeuhanco awaknyan. oh ltheuhnyan samuel laju geupeudong si aneuk batee, nibak bataih mizpa ngon sen. gobnyan geupeugah, "tuhan ka geutulong geutanyoe deungon sipeunoh jih." – laju batee nyan geuboh nan "batee peunulong." meunan kheueh cara jih ureueng filistin geupeutaloe. tuhan hana geupeu idhin awaknyan jitamong u dalam wilayah israel simantong samuel udeb. banmandum banda israel nyang ka jipeutaklok le ureueng filistin, phon di ekron sampoe u gat, geujok pulang keu ureueng israel. lenyan, israel nyan jiteume lom banmandum wilayah jihnyan. ureueng israel dan ureueng amori pi udeb ngon dame. samuel geumat peurintah ateuah israel siumu udeb gobnyan. tieb-tieb thon gobnyan geujak keulileng u betel, gilgal, dan mizpa. dan ditempat-tempat nyang geujak nyan gobnyan geupeuseuleusoe bubena peukara. sabe oh ka ltheuhnyan gobnyan geuwoe u rumoh

geuh di rama. disinan gobnyan jeuet keu hakem ureueng israel dan meunan cit geupeudong teuma saboh miseubah keu tuhan. bak watee samuel ka tuha, geuangkat teuma aneuek gobnyan jeuet keu hakem di nanggroee israel. aneuek gobnyan nyang tuha nan jih yeol dan nyang keudua nan jih abia. awaknyan jeuet keu hakem di barseyba. teuma awaknyan hana jiseutot peurangoe ureueng syiek jih, teuma nyang jipeubuet na kheueh jimita laba keudroe jih mantong. awaknyan jiteurimong peng sogok dan jihukom rakyat ngon cara hana ade. sabab nyan mandum peumimpin israel jimeurokpakat, laju jijak meuhadab ubak samuel di rama, dan jipeugah ubak gobnyan, "neudeungoe kheueh nyoe hai bapak, bapak ka tuha dan aneuek-anuek bapak hana jiseutot pi-e peurangoe bapak. le sababnyan bapak angkat sidroe raja mangat kamoe na raja lagee bansa-bansa laen." teuma samuel hana galak ngon usui awaknyan. laju gobnyan meudoa ubak tuhan, dan tuhan meufeureuman, "gata peupeunoh kheueh peue nyang jilakee le bansa nyan bak gata. sabab bukon gata nyang hana jigalak le awaknyan, teuma ulon. awaknyan hana ji galak le keu ulon sibagoe raja jih. phon awaknyan ulon ba dan ulon peuteubiet nibak nanggroee meuse, awaknyan ka jimeupaleng nibak ulon dan ka jiseumah dewa-dewa, dan peue nyang jinoenyoe awaknyan jipeusaneut ateuah gata, nyang kheueh teuma nyang ka jipeubuet u ateuah ulon. sabab nyan gata peutrok kheueh peue nyang jilakee le awaknyan; teuma gata peuingat kheueh awaknyan deungon biet-biet, dan tapeugah kheueh ubak awaknyan pakriban awaknyan singoh jipeusaneut ban galak droe le raja." peue nyang ka geupeugah le tuhan nyan geupeusampoe laju le samuel ubak awaknyan nyang jilakee sidroe raja ubak gobnyan, geupeugah, "meunoe kheueh singoh raja gata jipeusaneut gata," meunan kheueh samuel geupeutrang nyan. "raja nyan jipaksa aneuek-anuek gata jiyue tamong tantra; siladum nibak awaknyan jipeutugaih nibak pasokan geuritan guda, siladum teuk sibagoe pasokan meuguda, dan nyang laen teuma sibagoe pasokan nyang jak ngon gaki. siladum geu angkat le raja nyan sibagoe keumeundan ateuah siribee droe tantra, dan siladum nyang laen ateuah limong ploeh droe. raja nyan teuma geupaksa aneuek-anuek gata geuyue jak meu ue bak blang gobnyan, geuyue peusapat hase blang gobnyan nyang ka teupot, geuyue peuget sinjata-sinjata dan peukakaih prang gobnyan. aneuek-anuek gata nyang inong teuma geuyue peuget minyek mangat bee keu gobnyan dan geuyue teuma sibagoe tukang maguen dan tukang peuget ruti gobnyan. raja nyan geucok blang gata, lampoh anggo gata, dan lampoh zaiton gata nyang paleng get dan atranyan geubri laju ubak peugawee gobnyan. blang dan lampoh anggo gata teuma geupeukeunong cuke siper siploh nibak hase jihnyan, laju atranyan geubri ubak keumeundan dan peugawee gobnyan. raja nyan teuma geureupah namiet gata, beulatang peulara gata nyang paleng get dan keuleudee gata laju geungui nyang keu geuyue keureuja atra gobnyan. siper siploh nibak kawan kameng bubiri gata teuma geucok le gobnyan. dan gata keudroe jeuet keu namiet gobnyan. meunyoee

hainyan ka trok, gata apoh apah sabab buet raja nyang gata pileh nyan, teuma tuhan hana geutem deungoe apoh apah gata nyan." teuma bansa nyan teutab hana jipakoe peue nyang ka geupeugah le samuel nyan, dan awaknyan jipeugah, "bah keudeh! pakriban kheueh mantong kamoe teutab kamoe lakee raja. kamoe teutab kamoe lakee beusaban deungan bansa-bansa nyang laen, raja kamoe haroh geupeurintah kamoe dan geupimpen kamoe lam mideuen prang." oh ka ltheueh geudeungoe le samuel banmandum peue nyang jipeugah le awaknyan, hai nyan laju geupeusampoe ubak tuhan. tuhan geujaweueb, "gata turot kheueh mantong peue nyang jilakee le awaknyan dan gata angkat kheueh laju sidroe raja keu awaknyan." oh ltheuehnyan samuel laju geuyee woe u rumoh jih maseng-maseng banmandum ureueng israel nyan. na sidroe ureueng kaya dan meuwibawa lam sukee benyamin, na ureueng nyan kish. gobnyan anggota keuluwarga bekhorat, cabeung nibak marga afiah. bapak gobnyan abiel dan nek gobnyan zeror. kish nyan na teuma jimeu aneuek nyang agam, jiboh na saul, sidroe aneuek muda nyang tari dan teugab. hana meusidroe pih nyang na di bansaboh israel nyan nyang na leubeh tari nibak jihnyan. meunan cit badan jihnyan leubeh panyang; rata-rata panyang ureueng israel teuma trok eut baho ureueng nyan. bak siuroe na meupadum boh keuleudee atra kish gadoh. sabab nyan geupeugah ltheueh le kish ubak saul, "neuba kheueh sidroe lamkawan peulayan nyan, dan tajak mita kheueh keuleudee-keuleudee nyan." laju saul dan peulayan gobnyan geujak tamong u dalam daerah gunong efrain dan tanoh salisa, teuma beulatang nyang gadoh nyan hana cit meuteume. oh ltheuehnyan awaknyan geujak laju u tanoh sahalim, teuma keuleudee-keuleudee nyan hana cit disinan. meunan cit keuleudee nyan geujak mita u wilayah benyamin, teuma sia-sia mantong. bak watee awaknyan ka sampoe ubak tanoh zuf, saul geupeugah ubak peulayan geuhnyan, "boh jak geutanyoe tajak woe mantong, takot eunteuk bapak leubeh geugundah geupike geutanyoe nibak keu keuleudee nyang gadoh nyan." peulayan nyan jijaweueb, "preh ilee! di banda nyoe na sidroe hamba allah. ureueng nyan get that jihoreumat le gob kareuna peue nyang geupeugahnyan sabe beutoi dan teujadi. bohjak geutanyoe tajak ubak gobnyan, barang kali gobnyan hase geubri tee ubak geutanyoe dipat kheueh keuleudee geutanyoe nyan." geupeugah le saul, "meunyoe tanyoe tajak meurumpok ngon ureueng nyan, peue kheueh nyang teuma tabri keu ureueng nyan? beukai nyang geutanyoe ba ka habeh, dan nibak geutanyoe ka hana sapeu nale keu tajok ubak hamba allah nyan, pakriban, kon nyoe meunan?" jijaweueb le peulayan nyan, "keubeutulan bak ulon mantong na sikeupeng peng pirak. nyan ulon jok keu hamba po teu allah nyan mangat gobnyan geutem peugah ubak geutanyoe dipat kheueh keuleudee-keuleudee nyan." "get kheueh, meunyoe ka meunan!" geujaweueb le saul. "jak geutanyoe tajak." laju geujak kheueh awaknyan u banda, di teupat hamba po teu allah nyan. bak watee awaknyan geuteungoh gunong cut rot teujak ubak banda nyan, meurumpok kheueh awaknyan deungan na meupadub droe aneuek dara nyang keuneuk

jak crong ie nibak mon. laju awaknyan geutanyong ubak aneuek dara nyan, "peu kheueh ureueng tukang keumalon nyan na gobnyan di banda?" (bak jamen nyan sidroe nabi jipeugah tukang keumalon, jadi meunyoe na ureueng jikeuneuk teumanyong peuepeue mantong ubak po teu allah, gobnyan geupeugah lagee nyoe, "jak kheueh geutanyoe tajak ubak tukang keumalon.") "nyoe, beutoi na," jijaweueb le aneuek-aneuek daranyan, "ban sikeujab nyoe geujak awai nibak droeneueh nyoe. meunyoe droeneueh bagaih neujak, mungkin hase meurumpok ngon gobnyan. gobnyan ban geujak u banda sabab nibak uroenyoe di ateueh miseubah di ateueh gunong cut na peuseumahan keureubeuen keu rakyat. bubena ureueng nyang teu undang hana jimakheun meunyoe gobnyan gohlom trok keunan, kareuna gobnyan haroh geubri beureukat ubak atra nyang teukeureubeuen nyan leubeh ilee. meunyoe droeneueh neujak laju jinoo, droeneueh hase meurumpok sigohlom gobnyan geu teungoh u ateueh gunong cut keu geujak makheun." le sababnyan saul dan peulayan gobnyan laju geujak u banda, dan bak watee awaknyan geutamong nibak babah pintoe geureubang, awaknyan meuseuleuseh deungan samuel nyang teungoh geujak u teupat iebadat di ateueh buket. dan siuroe sigohlom nyan tuhan ka geubri peusan ubak samuel lagee nyoe, "singoh beungoh kira-kira bak watee lageenyoe, ulon teuma lon yue sidroe lamkawan sukee benyamin keu jijak meurumpok deungan gata. neu baiat kheueh jihnyan deungan cara neuboh minyeuk mangat jeuet keu raja ateueh umat ulon israel. ureueng nyan teuma jipeuseulamat umat ulon ateueh ureueng filistin. ulon ka ulon kalon deurita umat ulon nyang peudeh dan lon deungan awaknyan jimo jilakee tulong." bak watee samuel geukalon saul, tuhan laju geupeugah ubak gobnyan, "nyoe kheueh ureueng nyang ulon peugah bak gata nyan. jihnyoe jipeurintah umat ulon." watee nyan saul laju geupeuto ubak samuel bak babah pintoe geureubang, dan geutanyoeng, "meuah, bapak, dipat rumoh ureueng tukang keumalon nyan?" geujaweueb le samuel, "ulon kheueh tukang keumalon nyan. tajak laju gata ilee ubak teupat iebadat di ateueh gunong cut, sabab nibak uroe nyoe gata tamakheun deungan ulon. singoh beungoh banmandum peue nyang gata tanyoeng nyan ulon jaweueb, oh ltheuehnyan baro kheueh jeuet gata woe. keuhai keuleudee-keuleudee gata nyang gadoh ka na padub uroe nyang ka ltheueh nyan, bek khawate, sabab ka meuteume. lhom teuma, nyang paleng meuyem bansaboh israel teuma teubri keu gata dan keuluwarga ayah gata." geujaweueb le saul, "ulon nyoe nibak sukee benyamin, sukee nyang paleng ubit di israel, dan lom keuluwarga ulon nyang paleng hana meuguna dalam sukee nyan. jadi pakon bapak neupeugah meunan ubak ulon?" oh ltheueh nyan samuel geupakat saul dan peulayan geuh nyan geupeutamong u dalam saboh kama nyang lumpah luwah, laju gobnyan geubri teupat nyang paleng lumboi sa ubak awaknyan dikeue ureueng nyang teu undang nyang jeumeulah jih na kira-kira lhee ploh droe. ltheueh nyan samuel geupeugah laju ubak tukang taguen bu gobnyan, "tapeu idang kheueh laju uengkot sie nyang buno ka ltheueh ulon jok

ubak gata." oh ltheuehnyan di tukang maguen nyan laju geujakok uengkot sie teupileh asoe bagian pha jih keu awaknyan, atranyan jipeu idang ubak saul. samuel geupeugah, "nyoe jeumba nyan ka ulon peu aseng keu gata mangat hase tapajoh nibak saat nyoe meusigo deungon jame-jame nyan laen. tapajoh kheueh laju." di saul pi laju geupajoh atranyan. teuma nibak uroenyang saul geumakheun meusigo-sigo deungon samuel. oh ka ltheueh awaknyan geutreun nibak teupat ibadat nyan dan geujak tamong laju u dalam banda. saul geubri teupat eh di ateuh rumoh, laju gobnyan geueh. bak watee mata uroe beungoh ka jiteubiet, samuel laju geujak hoi saul nyan na di ateuh rumoh nyan, dan geupeugah, "beudoh kheueh laju, jak ulon intat gata mangat tajak." saul geubeudoh, laju geujak beurangkat meusigoe-sigoe deungon samuel. watee awaknyan ka trok u bineh banda, geupeugah kheueh laju le samuel ubak saul, "gata yue kheueh peulayan nyan jijak beu awai nibak geutanyoe." dan peulayan nyan pi jijak teuma, dan samuel geupeugah lom, "gata ploh kheueh disinoe sikeujab, ulon teuma lon britee peusan po teu allah ubak gata." oh ltheueh nyan samuel geucok laju kaca nyan meusas minyeuk zaiton, minyeuk nyan geuroe u ateuh ulee saul, dan geucum laju saul sira geupeugah, "tuhan ka geubaiait gata jeuet keu raja ateuh israel umat gobnyan. gata tapeurintah umat geuhnyan dan tabri peulindongan nibak banmandum musoh awaknyan. nyoe kheueh tanda keu gata bahwa tuhan ka geupileh gata jeuet keu raja ateuh umat gobnyan: oh ka ltheueh gata tatinggai ulon nibak uroenyoe, gata teuma meurumpok deungon dua droe ureueng agam nibak jirat rahel di zelah di wilayah benyamin. awaknyan jipeugah ubak gata lagee nyoe: keuleudee-keuleudee nyan gata mita nyan ka meuteume. jinoenyoe bapak gata hana khawate le keuhai beulatang-beulatang nyan, teuma hana ploh-ploh geutanyong peu kheueh nyan haroh geupeubuet mangat meurumpok teuma ngon droeneueh." samuel geupeugah lom, "beudoh disinan gata jak laju trok ubak-bak kayee teupat ibadat di tabor. disinan gata meurumpok teuma deungon lhee droe ureueng agam nyan teungoh jijak u betel keu jikak peuseumah keureubeuen ubak po teu allah. sidroe nibak ureueng nyan jitarek lhee boh aneuek kameng, sidroe teuk jiba teuma lhee boh ruti, dan sidroe teuk jiba baluem kulet nyan meusasoe ie anggo. awaknyan jibri saleuem ateuh gata dan awaknyan jibri teuma dua boh ruti keu gata nyan haroh gata teurimong. oh ltheuehnyan gata haroh teuma tajak ubak buket po teu allah di gibe, teupat meukhimah ureueng filistin. nibak babah pintoe tamong u dalam banda, gata laju meuseulheun teuma deungon kawan nabi nyan teungoh geutreun nibak buket keureubeuen. awaknyan jimeunari-nari sira jikliek-kliek, jipeu meuen canang, rapa-i, suleng dan keucapi. bak saat nyan cit teuma gata geukuasa le roh tuhan dan gata teuma taseutot meunari meukliek awaknyan, laju gata geubri sifeuet baro akhe jih jeuet keu manusia laen. meun-yoe banmandum nyan ka teujadi, tapeubuet kheueh laju peue nyan gata rasa nyan jroh, sabab po teu allah na meusang gata. oh ka ltheuehnyan gata haroh tajak u gilgal dan tapreh disinan tujoh uroe. eun-

teuk ulon teuka keu lon jak peuseumah keureubeuen nyan teutot dan keureubeuen peudame, meunan cit teubri tee ubak gata peue nyan haroh gata peubuet." hana treb teuma oh ltheueh saul geuting-gai samuel, laju gobnyan geuteurimong sifeuet baro nibak po teu allah. dan peue mantong hai nyan geubri tee le samuel ubak gobnyan pih teujadi nibak uroe nyan cit teuma. bak watee saul dan peulayan gobnyan trok u gibe, awaknyan laju meurumpok deungon saboh kawom nabi. bak watee nyan cit teuma saul geukuasa le roh po teu allah, dan gobnyan laju geuseutot meunari dan geu kliek lagee nabi nyan kliek. ureueng nyan laen nyan jitungi keu gobnyan yoh watee ilee, jingingi peurango geuh nyan, laju jitungong sabe keudroe-droe, "peu kheueh nyan ka teujadi ateuh aneuek kish nyan? peu kheueh saul nyan teuma jeuet keu nabi?" teuma sidroe lamkawan awaknyan nyan na tinggai disinan jiteumanyong, "pakriban deungon nabi-nabi nyan laen nyan – meunurot gatanyoe soe kheueh bapak awaknyan?" nyan kheueh asaiphon jih pribasa nyan nyoe, "peu kheueh saul nyan jeuet teuma keunabi?" oh ka seulesoe saul geumeunari ngon geukliek-kliek, geujak kheueh laju gobnyan u ateuh miseubah di ateuh buket. le apha saul deh geukalon gobnyan dan peulayan geuhnyan, laju geutanyong ubak aneuek keumeun dan peulayan geuh nyan, "pane gatanyoe tajak?" geujaweueb le saul, "kamoe jakmita keuleudee nyan gadoh nyan, dan bak watee atranyan hana kamoe teume, laju kamoe meurumpok ngon samuel." "dan peue nyan geupeugah le samuel nyan ubak gata?" geutanyong le apha geuhnyan. geujaweueb le saul, "gobnyan geubri tee bahwa bubena beulatang nyan ka meuteume." teuma saul hana geucalitra ubak apha geuh nyan bahwa gobnyan ka geubaiait le samuel sibago raja israel. teuma samuel laju geuhoi rakyat israel mangat jeuet jijak meusapat di mizpa, dan gobnyan geupeugah ubak awaknyan, "nyoe kheueh nyan ka geufeuroman le tuhan, po teu allah israel, 'ulon ka ltheueh lon ba gata teupeuteubiet lam nanggroe meuse dan ulon peubeubaih gata nibak kuasa ureueng meuse dan banmandum bansa nyan laen nyan jiteugon gata. ulon ka ulon peubeubaih gata nibak mubagoe seungsara dan deurita, teuma jinoenyoe gata ka tatulak ulon, allah gata, kareuna gata lakee mangat teutunyok sidroe raja keu gata. nyan kheueh, get that meunoyoe meunan, gata meusapat kheueh dikeue ulon, tuhan gata, meunurot sukee dan marga jih." "le samuel laju geuyue maju banmandum sukee ukeue gobnyan dan sukee benyamin nyan keunong pileh. bak watee keuluwarga-keuluwarga lam sukee benyamin nyan teuyue jak ukeue, teuma keuluwarga matri nyan keunong pileh. akhe jih maju kheueh bubena ureueng agam lam keuluwarga matri, dan saul aneuek kish nyan keunong pileh. laju awaknyan jijak mita saul, teuma hana meurumpok. sabab nyan bubena ureueng rame nyan laju jipeugah ubak tuhan, "ya, tuhan, peu kheueh ureueng nyan neupeugah nyan ka na gobnyan disinoe?" geujaweueb le tuhan, "saul na jimusom dilikot barang-barang peuleungkapan." bak watee nyan cit awaknyan jijak tueng saul nibak teupat nyan, dan jiba laju gobnyan lamkawan rakyat. dan geudong kheueh laju

saul lamkawan awaknyan dan gobnyan kheueh nyang paleng manyang; ureueng laen teuma cit eut baho gobnyan. oh lheuehnyan samuel geupeugah laju ubak rakyat, "nyoe kheueh ureueng nyang ka geupileh le tuhan, hana ngon peusa lamkawan geutanyoe banmandum." banmandum bansa nyan jisumurak, "udeb kheueh raja kamoe" oh lheuehnyan samuel geupeutrang laju ubak bansa nyan keuhai hak dan keuwaje-ban raja, laju geutuleh didalam kitab dan geukeubah laju di tempat nyang suci. oh lheuehnyan samuel geuyue laju banmandum bansa nyan mangat jijk woe u rumah jih maseng-maseng. meunan cit deungon saul laju geujakwoe u rumah gobnyan di gibe, meunan cit deungon na meupadubdroe ureueng nyang gagah beurani dan nyang ka geugrak ate jih le tuhan. teuma na meupadub droe ureueng jeuhet jipeugah, "pane na mungken ureueng nyoe meuguna keu geutanyoe?" awaknyan jipeuhina saul dan hana teuma jibri bungong jaroe keu gobnyan. teuma gobnyan pura-pura hana jiteupeue. oh lheuehnyan na teuma nahas, raja nanggroe amon, jikrah laju tantra jih jijk keupong banda yabesh di wilayah gilead. peunduduek yabesh laju jiusui lagee nyoe ubak nahas, "neupeuget kheueh peujanjian deungon kamoe, deungon nyan kamoe teuma taklok ubak droeneueh." geujaweueb le nahas, "deungon syarat nyoe kheueh ulon keuneuk peugot peujanjian deungon gata, 'mata blaih uneuen gata maseng-maseng teuma ulon cungek sibagoe peuhinaan keu banmandum ureueng israel'" "oh lheueh nyan banmandum peumimpin banda yabesh nyan jijaweueb, "kamoe lakee teumpo nyang treb jih tujuh uroe mangat kamoe hase kamoe kirem utosan ubak bansaboh tanoh israel. meunyeo hana nyang jitem tulong kamoe, kamoe teuma meunyeurah ubak droeneueh." meunan kheueh bubena utosan nyan trok laju u gibe, teumapat tinggai saul. bak watee awaknyan jipeusampoe haba nyan, jimoe kheueh bubena rakyat sabab putoh asa. bak watee nyan saul banmantong teuka nibak blang gobnyan sira geutarek leumo geuh. gobnyan pi geutanyong, "peue na? pakon banmandum ureueng jimo?" laju ubak gobnyan jipeugah keuhai haba nyang jiba nibak yabesh nyan. ban geudeungoe nyan laju saul jikuasa le roh allah. deungon beungeh that-that gobnyan laju geucok dua boh leumo atranyan geukoh-koh sampoe kajai that nyang teukoh meutumpok-tumpok. oh lheuehnyan sie nyang ka teukoh-koh nyan laju geukirem ubak banmandum tanoh israel deungon peurintah gobnyan lagee nyoe, "soe nyang hana jitem muprang jiseutot saul ngon samuel, banmandum leumo-leumo jihnyan teuma teukoh-koh cit lagee asoe sie nyang teukirem nyoe!" bansa israel jikatkeu that ubak peue nyang mungken geupeusaneut le tuhan, teuma banmandum ureueng, hana teukeucuali, ka siab jijk maju lam prang meusajan-sajan. awaknyan geugumpoi laju dan geu itong di bezek: na 300.000 droe ureueng israel, dan 30.000 droe ureueng yehuda. oh lheuehnyan ubak utosan yabesh geupeugah lageenyoe, "gata peugah laju ubak peunduduek yabesh, bahwa singoh beungoh sigohlom cot uroe, awaknyan jiteuka ureueng jijk bantu." bak watee peunduduek yabesh jiteurimong peusan

nyan, ate awaknyan lumpah galak dan seunang that. jipeugah le awaknyan ubak nahas, "singoh beungoh kamoe meunyeurah, dan jeuet neupeubuet ateuuh kamoe bangalak ate droeneueh." singoh nyan, ban-beungoh that, saul laju geubagi-bagi ureueng gobnyan jeuet keu lhee boh pasokan. dan bak watee mata uroe beungoh ka meuble-ble awaknyan laju jiseureubu u teungoh-teungoh khimah-khimah ureueng amon dan laju jiheuntam awaknyan bansalanle. sigohlom trok watee cot uroe, tantra saul ka jipeutaloe bubena musoh. ureueng-ureueng amon nyang meuhase jipeusiblahi droe, laju meucubre sampoe hana nyang dua droe saboh arah awaknyan jiplueng meusaho-saho. oh lheuehnyan jitanyong kheueh le bansa israel ubak samuel, "dipat kheueh ureueng nyang buno beuhe that jipeugah bahwa saul hana layak jeuet keu raja geutanyoe? heundak kheueh ureueng nyang peugah nyan neuseurah ubak kamoe, mangat jihnyan kamoe poh mate." teuma geupeugah le saul, "meusidro e ureueng pi hana jeuet teupoh nibak uroenyoe, sabab nibak uroenyoe tuhan ka geupeuseulamat bansa israel." laju geupeugah kheueh le samuel ubak awaknyan, "bohjak geutanyoe tajak banmandum u gilgal dan tajak reseumi saul sibagoe raja geutanyoe." meunan kheueh nibak uroenyanyan awaknyan jijk u gilgal, dan di rumah ibadat nyan saul teureuseumi laju sibagoe raja. awaknyan laju jipeuseumah keureubeuen peudame, dan saul dan banmandum bansa israel geupeuna peuristiwa nyan. dan geupeugah kheueh le samuel ubak banmandum bansa israel, "ulon ka lon peupeunoh peue nyang gata lakee dan ka teuma ulon baia sidroe raja keu gata. phon saat nyoe gobnyan kheueh nyang pimpeng gata. takalon kheueh, ulon nyoe ka tuha dan ok bak ulee pih ka puteh. ulon nyoe ka treb that-that ulon pimpeng gata – yoh watee muda ulon sampoe an saat nyoe. bukeuti jih na kheueh aneuek-aneuek ulon nyang ka rayeuk-rayeuk nyan. bak saatnyoe kheueh, ulon dong dikeue gata! meunyeo ulon ka ulon keureuja buet nyang salah, gata tudoh kheueh ulon dikeue tuhan dan dikeue raja nyang geupileh le gobnyan. peu kheueh na peureunah ulon cok leumo atawa keuleudee ureueng laen? peu kheueh na ulon peungeut atawa lon teugom atawa teurimong peng sogok? gata peugah kheueh laju, mangat jeuet peue nyang ka ulon cok hase ulon jok pulang." bubena ureueng disinan jijaweueb, "hana, hantom na bapak peungeut atawa neuteugom kamoe; hantom na teuma bapak cok peue mantong atra ureueng laen." dan geupeugah kheueh lom le samuel, "bak uronyoe tuhan dan raja nyang ka geupileh nyan jeuet keu saksi bahwa ulon nyoe teunyata hana meusalah meubacut pih." "nyoe, beutoi, tuhan jeuet keusaksi geutanyoe," jaweub awaknyan meusigoe. laju geupeugah lom le samuel, "tuhan kheueh nyang ka geupileh nabi musa dan nabi harun, dan nyang ba indatu gata geupeuteubit lam nanggroe meuse. jinoenyoe, bek tajak ilee. ulon teuma lon tudoh gata dikeue tuhan. gata ingat kheueh ubak keumurahan tuhan nyang ka geutunyak keu gata dan keu indatu gata. bak watee nabi yakub dan keuluwarga gobnyan geujak u nanggroe meuse, dan ureueng meuse jiteugom awaknyan, indatu gata laju geulakee tu-

long ubak tuhan, dan tuhan geu tunyok nabi musa ngon nabi harun. bandua droe awaknyan laju geupeuteubiet endatu gatanyan lam nanggroe meuse dan laju geutulong awaknyan tinggai teutab di nanggroe nyoe. teuma oh ltheuehnyan awaknyan laju tuwoe ubak tuhan, po teu allah awaknyan, sababnyan gobnyan geupeubiyeu mantong awaknyan jiprang le ureueng siseria dan jipeutaloe awaknyan, panglima tantra di hazor, dan le ureueng filistin meunan cit le raja moab. oh ltheuehnyan awaknyan jimeudoa ubak tuhan dan jimeungaku banmandum desya jih; kheun awaknyan, 'kamoe ka meudesya sabab ka kamoe meupaleng nibak droeneueh, ya tuhan, dan ka kamoe seumah patong-patong dewa baal dan asytoret. teuma, jinoenyoe, neupeuseulamat kheueh kamoe nibak musoh kamoe, teuma kamoe laju meungabdi ubak droeneueh!' oh ltheueh nyan tuhan laju geu tunyok gideon, oh ltheuehnyan barak, oh ltheuehnyan yefta, dan nyang paleng seuneuleueh ulon. kamoe maseng-maseng ka kamoe peultheueh gata nibak musoh gata, sampoe gata hase gata udeb deungon aman. teuma bak watee gata ngieng bahwa gata keuneuk jiprang le nahas raja amon, gata tatulak tuhan sibagoe raja gata dan tapeugah ubak ulon, 'kamoe meuheuet that jipeurintah le sidroe raja.' jinoenyoe, tangieng kheueh, nyoe kheueh gobnyan, raja nyang gata pileh nyan. gata ka tala-kee, dan tuhan ka teuma geubri keu gata. mubahgia kheueh gata meunyo gata tahoreumat tuhan, dan gata meungabdi ubak gobnyan, meunan cit gata deungoe dan gata horeumat peurintah gobnyan, peulom meunyo gata dan raja gata nyan teutab seutia ubak tuhan po teu allah gata. dilikot nibak nyan, meunyo gata hana taturot peurintah tuhan, teuma gata lawan ubak peue nyang geupeurintah le gobnyan, ka pasti gata dan raja gata gatanyan geulawan le tuhan. jinoenyoe, gata deungoe kheueh lom! gata simak kheueh buet ajaeb nyang rayeuk nyang gepubuet le tuhan dikeue mata gata. ulon teuma ulon lakee ubak tuhan, dan bah kheueh jinoenyoe musem khueng, tuhan teuma geupeutreun geulanteu dan ujeuen sibagoe jeunaweueh gobnyan ateuhe doa ulon. nibak watee nyan, gata tasada padub na rayeuk desya gata ubak tuhan sabab gata lakee sidroe raja." laju geumeudoa kheueh samuel, dan bak uroe nyan cit teuma nyan geupeutreun geulanteu ngon ujeuen. bansaboh bansa nyan jeuet keuteumakot ubak tuhan dan keu samuel. dan jipeugah kheueh le awaknyan ubak samuel, "neutulong kheueh kamoe, ya bapak, neumeudoa kheueh keu kamoe ubak tuhan po teu allah droeneueh, mangat kamoenyoe bek mate. jinoenyoe kamoe ka sadar bahwa seulaen desya kamoe nyang uroejeh, kamoe ka meudesya lom sabab kamoe ka kamoe lakee sidroe raja." samuel pi geujaweueh, "bek teumakot, bah kheueh gata ka tapubuet buet nyang jeuhet nyan, bek kheueh gata paleng nibak tuhan, teuma teutab kheueh meungabdi ubak gobnyan deungon sipeunoh ate gata. bek kheueh teuma gata seutot dewa-dewa nyang hana hase jitulong dan jipeuseulamat gata, sabab awaknyan nyang seubeuna jih hana. tuhan ka geumeusumpah, bahwa gobnyan hana geutinggai gata sabab gobnyan ka geupeuputoh keu geupeujeuet gata keu umat geuh keu-

droe. keuhai droe ulon, seumoga ulon bek sampoe meudesya ubak tuhan sabab hana lon meudoa keu gata. sikeubiet jih ulon teutab ulon peurunno keu gata hai-hai nyang get dan nyang beutoi. horeumat kheueh tuhan dan tameungabdi kheueh ubak gobnyan deungon seutia dan deungon sipeunoh ate gata. ingat kheueh keuhai buet-buet nyang rayeuk nyang ka geupeubuet keu gata. teuma meunyo gata teutab cit tapeubuet desya, gata dan raja gata teuma binasa." bak siuroe, bak watee saul ka jeuet keu raja, gobnyan laju geupileh 3.000 droe ureueng isreal; lamkawan ureueng nyan, na 2.000 droe tinggai deungon gobnyan di mikhas dan di daerah meugunong-gunong betel, dan nyang 1.000 droe teuk jijak deungon yonatan aneuek agam gobnyan u gibe di wilayah sukee benyamin. nyang leubeh jih lamkawan rakyat nyan geupeu idhin jijakwoe u rumoh jih maseng-maseng. oh ltheuehnyan le yonatan laju geupoh mate panglima filistin di geba, dan bansa filistin jideungoe hainyan. laju saul geuyeu peumeusu beureuguih keu ban saboh nanggroe guna keu teutawok ureueng ibrani mangat jijak jimuju u mideuen prang. keu bansaboh bansa isreal geupeugah bahwa saul ka geupoh mate panglima filistin nyan dan bahwa ureueng filistin get that jibanci keu ureueng isreal. sababnyan kheueh rakyat jipatuh ubak panggelan mangat jimeugabong deungon saul di gilgal. bak wateenyan ureueng filistin ka meusapat keuneuk jijak prang ureueng isreal; bak awaknyan na 30.000 boh geuritan prang, na teuma 6.000 droe pasokan anou jiek guda, dan tantra-tantra na teuma ban lagee anou dibineh pasi. awaknyan laju jipeudong khimay di mikhas siblahi u timu bet-awen. oh ltheuehnyan awaknyan laju jijak seureubu si habeh teunaga ateuhe ureueng isreal, sampoe ureueng isreal ka teuseupet. na siteungoh nibak ureueng-ureueng isreal nyan jajak musom u lam-lam guha dan dalam barieh-barieh gunung atawa didalam luengkiek-luengkiek batee kareueng, atawa didalam mon dan uruek nyang na nibak tanoh, na cit teuma nyang jijak jeumeurang u meurandeh krueng yordan dan jitamong laju u dalam wilayah gad dan gilead. saul mantong na di gilgal, dan rakyat nyang seutot gobnyan kayo ngon teumakot. saul geupreh samuel na tujoh uroe treb jih, paih lagee nyang ka geupeusan le samuel ubak gobnyan, teuma samuel goh cit trok u gilgal, seudangkan saul ka jipeuphon tinggai le rakyat droe geuh. sababnyan gobnyan laju geupeugah ubak awaknyan, "gataba kheueh keuno keureubeuen nyang teutot dan keureubeuen peudame nyan." laju gobnyan keudroe nyang peuseumah keureubeuen nyang teutot nyan. teuma banmantong gobnyan seuleusoe geupeubuet nyan, teuka kheueh ubak gobnyan samuel. saul laju geutiyeuh gobnyan keuneuk geumumat jaroe ngon geubri saleuem, geutanyong le samuel, "peue nyang ka geupeubuet le baginda?" geujaweueh le saul, "ka deuh ulon kalon bahwa rakyat ka jipuphon tinggai ulon, teuma di droeneueh hai bapak hana neuteuika bak watee nyang ka neupeteunteenyan, lom teuma, ureueng filistin ka jimeusapat di mikhas. teupike le ulon, pat tateupeue tantra filistin hana treble jijak prang ulon disinoe di gilgal, padahai ulon gohlom lon lakee beugeugaseh le tuhan.

sabab nyan kheueh ulon cok keuputosan keu lon peuseumah keureubeun nyan." ban geudeungoe nyan laju samuel geupeugah ubak saul, "buet droeneueh nyan hai daulat teungku po, lumpah bangai. meun-yoe daulat teuku po neutaat ubak peue nyang ka geupeurintah le tuhan allah ubak daulat teuku po, ka pasti tuhan geupeuteutab daulat teuku po dan keuturonan daulat teuku po jeuet keu raja ateueh ureueng israel siumu masa. teuma jinoenyoe keukuasaan droeneueh hai daulat teuku po hana treb meuteun. sabab daulat teuku po hana neuseutot peue nyang ka geupeurintah le tuhan, teuma tuhan ka geupileh ureueng laen nyang geugalak le gobnyan keu geu beutot jeuet keuraja ateueh umat gobnyan." oh geupeugah meunan samuel laju geu tinggai gilgal dan geujak laju u dalam wilayah benyamin di gibe. bak wateenyan raja saul geujak peureksa laju pasokan gobnyan, na jeumeulah jih kira-kira 600 droe. meunan kheueh saul dan yonatan aneuk agam gobnyan, dan aneuk buah gobnyan geupeudong khimah di geba di wilayah benyamin; seudangkan ureueng filistin jipeudong khimah di mikhmas. bak watee nyan cit teuma na lhee boh kawan tukang meurampok bansa filistin jijak nibak teupat khimah-khimah filistin keu jijak meurampok; saboh kawan jijak u arah ofra di wilayah syual, kawan nyang keudua jijak teuma u wilayah bet-horon, dan nibak kawan saboh teuk laju jijak ubak bataih nyang meuhadab u panton zeboim dan padang pasi. ban saboh nanggroe israel hana teumpeun beuso, kareuna ureueng filistin hana jibri idhin keu ureueng ibrani jipeuget peudeung dan kapak. lenyan teuma ureueng israel haroh jijak ubak ureueng filistin meunyeu jikeuneuk jak asah mata langai jih, mata cangkoi, mata pato dan arit jih; upah jih na kheueh saboh keupeng peng ubit keu teu asah mata pato dan teurawot peunyeunet keu alat seumaroih leumo, dan dua boh keupeng peng ubit keu upah teuasah mata langai dan mata cangkoi. nyang kheueh sabab jih, bak uroe teumuprang di mikhmas nyan, hana meusidro pi nibak rakyat israel nyang na peudeung atawa kapak, seulaen saul dan yonatan aneuk gobnyan nyang agam. ureueng filistin laju jiyue keubah saboh pos teupat jaga guna keuteu peuteuen saboh barieh gunong di mikhmas. bak siuroe yonatan geupeugah ubak aneuk muda nyang ba sinjata gobnyan, "boh jak tajak, geutanyoe tateuka ubak pos filistin di meurandeh jih!" teuma gobnyan hana geulakee idhin ubak bapak geuh. bak wateenyan raja saul teungoh geudong dimiyueb bak geulima di migran, hana padubna jih nibak gibe. rakyat nyang seutot gobnyan na kira-kira 600 droe le jih. (teungku imeum nyang ba efod na kheueh ahia aneuk ahitub, nyang kheueh syedara ikabod aneuk pinehas, dan pinehas nyan aneuk eli, teungku imeum tuhan di silo.) meunan cit dirakyat hana jiteupeue bahwa yonatan ka geujak nibak teupat nyan. keu beureujang trok ubak pos filistin nyan, yonatan haroh geujak meulala saboh barieh gunong nyang meupapet le dua boh batee kareueng nyang meugigoe, nyang maseng-maseng batee kareueng nyan nan jih bozes dan sene. batee kareueng nyang disiblahi utara meuhadab u mikhmas, dan nyang disiblahi u seultan meuhadab teuma u geba. dan geupeugah

kheueh le yonatan ubak aneuk muda nyan, "jak geutanyoe tajak ubak pos ureueng filistin nyang kaphe laknat nyan. mungken tuhan geutem tulong geutanyoe. sabab tuhan geutem bri keugeutanyoe meunang, bah kheueh deungon ureueng nyang jai meunan cit deungon ureueng nyang nit." aneuk muda nyan jijaweueb, "peue mantong nyang keuneuk teungku peubuet di ulon kutem mantong." "get kheueh, meunyeu meunan," geupeugah le yonatan. "bak watee tajeumeurang, geutanyoe teuma tapeuleumah droe ubak ureueng-ureueng filistin nyan. meunyeu awaknyan jiyue dong geutanyoe dan tapreh sampoe awaknyan jijak ubak geutanyoe, teuma geutanyoe teutab mantong tinggai disinan bek tajeumeurang. teuma meunyeu awaknyan jiyuejak tanyoe ubak jih, meunan cit geutanyoe teuma tajak ubak awaknyan, le sabab nyan kheueh tanda jih awaknyan ka geuseurah le tuhan ubak geutanyoe." bak watee gobnyan bandua jipeuleumah droe ubak ureueng filistin nyang na nibak pos rondo, jipeugah kheueh le ureueng-ureueng filistin nyan, "ngieng kheueh, na ureueng-ureueng ibrani nyang jiteubiet nibak uruek-uruek teupat jimusom!" oh luehnyan di ureueng filistin nyang teungoh meurondo nyan laju jitawok ubak yonatan dan namiet geuhnyan, "neu ek kheueh laju keuno mangat kamoe peuleumah sapeue-sapeue ubak gata!" laju geupeugah teuma le yonatan ubak aneuk muda nyan, "gata seutot kheueh laju ulon, sabab awaknyan ka geuseurah le tuhan ubak israel." sira jiseutot le aneuk muda nyan yonatan laju geumeueu u ateueh. bak watee yonatan ka trok u ateueh, reubah meugageueng kheueh bubena ureueng filistin nyan sabab geu hawien ngon geupoh le gobnyan, seudangkan dilikot gobnyan, aneuk muda nyan laju jipoh mate bubena awaknyan. bak seurangan nyang phon nyan, yonatan dan aneuk muda nyan ka geupoh mate na kira-kira dua ploh droe di daerah nyang luwah jih na siper peuet heta. keujadian nyan ka jeuet teukeujot ubak dumna ureueng filistin nyang na didalam khimah-khimah meunan cit nyang na di dalam blang. banmandum rakyat filistin meunan cit deungon pos-pos teupat meurundo jih jitamah lom deungon kawan ureueng meurampok ka jeuet keuteumakot; dan bumoe pi meuhayak, teuma teujadi kheueh karu ngon subra nyang hana meuteuntee le. bak watee nyan tantra saul nyang teungoh jikawai di gibe didalam wilayah benyamin, deuh jikalon ureueng-ureueng filistin nyan jiplueng keudeh keunoe han meuhu tujuan. dan geupeugah kheueh laju le saul ubak aneuk buah gobnyan, "gata itong kheueh laju banmandum tantra dan tapeureksa laju soe-soe nyang hana didalam kawan nyoe." awaknyan laju jipeubuet peurintah nyan dan baro kheueh jiteupeue bahwa yonatan dan aneuk muda nyan gum lam sinjata gobnyan nyang hanale didalam kawan nyan. "neuba laju keuno efod nyan," geupeugah le saul ubak teungku imeum ahia. (bak uroenyan ahia geuba efod nyan dikeue ureueng israel.) bak watee saul teungoh geupeugah haba deungon teungku imeum nyan, didalam khimah ureueng filistin ka meutamah karu nyang hana meuteuntee le, akhe jih saul geupeugah ubak teungku imeum nyan, "geutanyoe hana watee le talakee peutunyok ubak tuhan"

laju saul dan banmandum ureueng-ureueng gobnyan deungon seureuntak geumaju u mideun prang. disinan deuh geukalon na karu ban salame lamkawan ureueng-ureueng filistin; awaknyan saleng jiserang dan saleng jimupoh sabe keudroe-droe. ureueng-ureueng ibrani nyang na tinggai didalam daerah ureueng filistin, dan nyang ka jeuet keusipa-i awaknyan, laju meubalek haluan dan jimeusaho laju deungon saul dan yonatan. meunan cit deungon ureueng-ureueng israel nyang mantong jimusom di buket-buket efraim, ban jideungoe bahwa ureueng filistin ka jiplueng, awaknyan pi laju jipeusaho droe deungon jijak prang bubena ureueng filistin nyan. awaknyan jimuprang deungon lumpah gura bansipanyang rot sampoe trok u bet-awen. tuhan ka geupeuselamat israel nibak uroenyang. bak uroenyang bubena ureueng israel dalam keuadaan leumoh sabab kadeuk that, sabab saul ka geumeusumpah lageenyoe, "teukutok kheueh ureueng nyang jimakheun peue mantong nibak uroenyoe sigohlom ulon balaiah dam ateueh musoh ulon." le sababnyan kheueh hana meusidroe pih nyang na pajohbu nibak uroenyang. oh ltheuehnyan trok kheueh laju awaknyan mandum bak saboh uteuen dan disinan laju meuteume meulisan nyang lumpah that jai, teuma hana meusidroe pi nibak awaknyan nyang na jijie meulisan nyan, sabab awaknyan teumakot bak sumpah nyang ka geupeugah le saul. teuma yonatan hana geuteupeu bahwa bapak gobnyan ka geuancam rakyat deungon sumpah nyan; sababnyan laju geusunyueng tungkat nyang na nibak jaroe gobnyan, dan tungkatnyan laju geutob ateueh eumpung unoe nyan, ltheuehnyan geucok meulisan nyan dan geujieb teuma. oh ltheuehnyan gobnyan laju ka teurasa puleuh graih dan ka teuma meurasa mangat tuboh geuh lagee ban nyang ka. oh ltheuehnyan na sidroe lamkawan tantra nyan jipeugah ubak gobnyan, "kamoenyoe banmandum ka hana meudaya sabab ka graih ngon deuk. teuma bapak teungku ka geuancam kamoe deungon sumpah, geupeugah, 'teukutok kheueh ureueng nyang jimakheun nibak uroenyoe.' " geujaweueb le yonatan, "nyang lageenyang ka hana patot geupeubuet le bapak ulon keu bansa geutanyoe! ngieng kheueh, keuadaan ulon jinoenyoe jioh leubeuh get oh kalheueh ulon jieb bacut meulisan nyan. seukira jih rakyat geubri idhin nibak uroenyoe teupajoh peunajoh nyang ka teureupah bak watee teupeutaloe musoh, ka pasti leubeuh le lom ureueng filistin nyang bisa tanyoe poh mate!" bak uroenyang ureueng israel ka jipeutaloe ureueng filistin bak watee jimuprang bansipanyang rot ueh raya phon di mikhmas laju trok u ayalon. teuma oh ka ltheuehnyan awaknyan ka leumoh that-that, akhe jih awaknyan laju jimeureubot jicok hareuta nyang teureupah lam jaroe musoh; awaknyan laju jicok bubiri dan leumo laju jisie nibak teupat nyan cit teuma, dan lansong jipajoh uengkoet sie nyang mantong meudarah-darah nyan. hainyan laju teubri tee ubak saul lageenyoe, "amphon deulat po, rakyat ka meudesya ubak tuhan sabab ka jipajoh uengkoet sie nyang mantong meudarah." "gatanyoe banmandum peukhianat!" geupeugah le saul sira geukliek. "tagule laju sianeuk batee raya keunoe bak ulon." oh ltheuehnyan geupeu-

gah lom ubak ureueng nyang ba haba nyan, "gata jak kheueh beumeutabu lamkawan rakyat dan tayue kheueh awaknyan jiba leumo ngon bubiri jihnyan keunoe, mangat teusie di ateueh bateenyoe dan ta makheun teuma disinoe; deungon na lageenyang awaknyan hana jipajoh uengkoet sie deungon darah jih dan hana teuma meudesya le ubak tuhan." bak malam nyan cit teuma banmandum rakyat laju jiba beulatang nyang jireupah didalam prang nyan dan laju jisie disinan. le saul laju geupeudong miseubah keu tuhan; nyang kheueh miseubah nyang phon that geupeudong. oh ltheuehnyan geupeugah kheueh le saul ubak aneuk buah gobnyan, "jak kheueh geutanyoe tajak prang ureueng filistin bak malam nyoe cit teuma laju ta rampok awaknyan sampoe an bungoh uroe dan tapoh mate teuma awaknyan banmandum." awaknyan jijaweueb, "bah neupeubuet le teungku amphon peue nyang teungku amphon ngieng nyan get." teuma di teungku imeum geupeugah, "boh-jak kheueh geutanyoe talakee peutunyok leubeuh ilee ubak po teu allah." dan geutanyong kheueh le saul ubak po teu allah, "peu kheueh jeuet ulon prang ureueng filistin ya allah? peu kheueh awaknyan tuhan jok ubak jaroe ureueng israel?" teuma nibak uroenyang po teu allah hana geujaweueb. sababnyan geupeugah kheueh le saul ubak peumimpin rakyat, "tajak kheueh keunoe banmandum dan desya peu kheueh nyang ka gata peubuet nibak uroenyoe. ulon meujanji deumi tuhan nyang udeb, nyang ka geubri meunang keu ureueng israel, bahwa ureueng nyang meusalah teuma geuhukom mate, bahpi jihnyan aneuk agam ulon si yonatan." teuma hana meusidroe pih nyang jijeuet jijaweueb haba nyan. dan geupeugah kheueh le saul ubak banmandum rakyat israel, "gata banmandum tadong disiblah nyoe." jaweueb awaknyan, "peue nyang keuneuk neupeubuet hai teungku po nyang ka neukalon nyan get." oh ltheuehnyan geumeudoea kheueh saul ubak tuhan, "ya tuhan, allah ureueng israel, pakon nibak uroenyoe droeneueh hana neujaweueb ulon? tuhan, neujaweueb kheueh ulon meulalu batee-batee nyang suci nyoe. meunye salah nyan na nibak ulon atawa yonatan, neujaweueb kheueh deungon batee urim, teuma meunye salah nyan na nibak umat droeneueh israel, neujaweueb kheueh deungon batee tumim." dan geujaweueb kheueh le tuhan geutunyok ubak yonatan dan saul; deungon lageenyang rakyat ka teujaweueb hana meusalah. laju geupeugah kheueh lom le saul, "ya tuhan, teuntee kheueh ulon ngon yonatan." teuma yonatan kheueh nyang geupeugah meusalah. laju geupeugah kheueh le saul ubak aneuk geuh yonatan, "peue nyang ka gata peubuet hai aneuk meutuah?" geujaweueb le yonatan, "ulon ka ulon cok bacut meulisan deungon ujong tungkat ulon; kareuna nyan, ulon kasiab keu mate." geupeugah le saul ubak aneuk geuh yonatan, "seumoga ulon geuhukom le po teu allah meunye gata hana ulon hukom mate, yonatan!" teuma rakyat geupeugah bak saul, "peu kheueh haroh yonatan nyan teuhukom mate? hana! kamoe meujanji deumi tuhan nyang udeb, bahwa yonatan hana jeuet gadoh meu sion ok pih nibak ulee gobnyan. kareuna deungon tulong tuhan kheueh, gobnyan ka meuteume meunang ni-

bak uroe nyoe." meunan kheueh yonatan jipeuseulamat le rakyat nibak teuhukom mate. oh ka ltheueh nyan ureueng filistin laju geugisa ubak wilayah droe jih keudroe sabab saul hanale geutiyeub awaknyan. oh ka ltheueh saul jeuet keu raja di nanggroe israel, gobnyan laju geupeubeudoh prang dipat mantong geujak lawan bubena musuh israel, ngon ureueng moab geumuprang, ngon ureueng amon, dan meunan cit deungon ureueng edom banmandum ka geuprang, na teuma raja-raja di nanggroe zoba, dan ureueng filistin. dipat mantong gobnyan geupeubeudoh prang, sabe gobnyan meuteume meunang. gobnyan geumuprang deungon lumpah hibat beuhe gagah beurani dan ka teuma geupeutaloe ureueng amalek, meunan cit geupeubeubaih israel nibak keukuasaan ureueng peurampok. aneuek-aneuek agam saul na kheueh yonatan, yiswi dan malkisua. aneuek gobnyan nyang inong geuboh nan merab, dan nyang keudua geuboh nan mikhal. peurumoh gobnyan nan jih ahinoam, aneuek ahimaas; keu panglima tantra gobnyan na kheueh abner aneuek ner, na kheueh apha saul. kish bapak saul, dan ner bapak abner, na kheueh aneuek-aneuek abiel. siumu udeb gobnyan saul geumuprang sabe deungon keubiet hebat geulawan ureueng filistin. sabab nyan, meunyo saul geukalon ureueng nyang teuga atawa beuhe, gobnyan laju geucok jeuet keu anggota tantra geuh. bak siuroe samuel geupeugah ubak saul, "tuhan kheueh nyang yue ubak ulon mangat lon jak baia teungku po jeuet keu raja ateuah umat gobnyan israel. sababnyan, bah kheueh teungku po neudeungoe peurintah tuhan nyang mahakuasa. gobnyan teuma geuhukom ureueng amalek, kareuna indatu awaknyan jilawan ureueng israel bak watee ureueng israel teuka nibak nanggroe meuse. le sababnyan, tajak kheueh laju taprang ureueng amalek gata peuhanco peue mantong nyang na hareuta milek jihnyan. bek tatinggai meusapeue pih, tapoh mate banmandum ureueng agam, ureueng inong, aneuek miet dan aneuek manyak nyang ban lahe; meunan cit deungon leumo, bubiri, unta dan keuleudee jih." laju saul geupeusiab tantra gobnyan dan geuitong awaknyan di telaim; na 200.000 droe sidadu nibak israel dan 10.000 droe teuma teuka nibak nanggroe yehuda. oh ltheuehnyan laju geujak saul meusigoe-sigoe deungon aneuek buah gobnyan u banda amalek dan laju geu hampeueng musuh didalam krueng nyang teungoh tho. meunan cit gobnyan geukirem peusan ubak ureueng keni meunoe geupeugah, "gatajak kheueh laju dan tatinggai ureueng amalek, mangat gata bek rhoh ulon sampoh sampoe habeh lagee awaknyan, sabab yoh watee ilee indatu gata ka geupeuleumah sikeub meusabat ubak ureueng israel bak watee ureueng israel teuka nibak nanggroe meuse." dan jijak kheueh laju ureueng keni nibak tempat ureueng amalek nyan. oh ka ltheuehnyan saul laju geumeu heungko deungon ureueng amalek dan di ureueng amalek nyan taloe bansipanyang rot ueh raya phon di hawila trok u syur di siblahi u timu nanggroe meuse. banmandum rakyat dan sipa-i amalek nyan habeh geupoh mate le saul. teuma raja ureueng amalek nyang nan jih agag geudrob udeb-udeb dan geupeubiuy udeb le saul dan tantra gobnyan, me-

unan cit deungon bubiri dan leumo nyang paleng diet, aneuek leumo meunan cit ngon aneuek bubiri nyang teumbon-teumbon, dan mandum peue-peue mantong nyang paleng meuyuem; teuma beulatang peulara nyang hana meuguna dan hana meuyuem nyang hana geupoh mate. tuhan meufeureuman lom ubak samuel, "ulon meunyeusai ka ulon baia saul jeuet keu raja, sabab jihnyan ka jipaleng nibak ulon, dan hana jipeubuet peue nyang ka ulon peurintah." samuel lumpah that seudeh, simalam beungoh gobnyan meupoh apah ubak tuhan. oh singoh uroe, ban suboh that, samuel geubeudoh laju geujak keuneuk meurumpok deungon saul. teuma le ureueng nyang na disinan jibri tee bahwa saul ka geujak u banda karmel geujak peudong bateu peuingat keudroe gobnyan disinan, oh ltheuehnyan geujak laju u gilgal. bak watee samuel ka meurumpok deungon saul, geupeugah laju le saul ubak samuel, "seumoga tuhan geubri beureukat keu bapak! ulon ka ulon peubuet peurintah tuhan." teuma samuel geutanyong, "meunyo meunan, pakon ulon deungoe na su bubiri nyang meun mbek-mbek dan su leumo meuleunguih?" geujawueb le saul, "banmandum beulatang nyan na kheueh nyang teureupah nibak ureueng amalek. bubiri dan leumo nyang paleng get ka jicok le rakyat geutanyoe keu jipeuseumah sibagoe keureubeuen keu tuhan po teu allah bapak. teuma nyang laen nyan ka habeh kamoe peubinasa banmandum." ban geudeungoe nyang lageenyan samuel laju geupeugah, "neupreh sikeujah, ulon teuma lon bri tee peue nyang ka geupeugah le po teu allah ubak ulon malam beuklam." "neupeugah kheueh laju," kheun saul. geupeugah le samuel, "bukon kheueh teungku amphon ka jeuet keu peumimpin u ateuah sukee-sukee nyang na di israel, bahpih teungku amphon neu anggab droe awaknyan hana peunteng? teungku amphon ka geupileh le tuhan jeuet keu raja ateuah bansa israel, meunan cit teuma ubak teungku amphon le tuhan ka geuyue peubinasa bube na ureueng amalek nyang jeuhet nyan. teungku amphon geuyue muprang neulawan awaknyan sampoe awaknyan habeh banmandum binasa. pakon hai teungku po hana neu taat ubak peue nyang ka geupeurintah le tuhan nyan? pakon teungku po meuseunoh-seunoh neureubot hareuta nyang teurampah didalam prang nyan, dan deungon na neupubuet nyang lagee nyan teungku amphon ka neupeujeuet ate tuhan beungeuh keu amphon?" geujawueb le saul, "ulon ka ulon taat ubak peurintah tuhan, dan lon jak muprang sisuai lagee nyang ka geuyue le gobnyan ubak ulon; mangat jeuet raja amalek ulon drob dan banmandum ureueng amalek ka ltheueh ulon poh mate. teuma le aneuek buah ulon hana jipoh banmandum beulatang peulara; awaknyan ka jipileh bubiri dan leumo nyang paleng get nibak hase rampasan nyan keu jipeuseumah di gilgal sibagoe keureubeuen keu tuhan po teu allah bapa." teuma geupeugah le samuel, "nyang toh nyang paleng geugalak le tuhan, keutaatan atawa keureubeuen peuseumahan? taat ubak tuhan leubeh get nibak keureubeuen nyang teupeuseumah ubak gobnyan. patuh leubeh get nibak leumak bubiri. sabab ureueng nyang ji-iengkeue ubak tuhan sabab jeuhet jih lagee ureueng nyang jipeubuet sihe, dan ureueng nyang ate

jih sombong saban teuma lagee ureueng nyang jiseumah dewa. sabab teungku amphon ka neulawan peurintah tuhan, teuma tuhan pih hana geuaku le teungku amphon sibagoe raja." ban geudeungoe nyan saul laju geumeungaku ubak samuel, sira geupeugah, "beutoi ulon ka meudesa. ulon ka ulon ieu keue peurintah tuhan dan hana lon pakoe nyang bapak tunyok. ulon teumakot ubak aneuek buah ulon nyang kheueh jeuet ulon peutrok peue-peue nyang jilakee le awaknyan. teuma bak saat nyan, ulon lakee ubak bapak, neupeu amphon kheueh desya ulon dan neugisa kheueh meusigoe ngon ulon u gilgal, mangat ulon hase meu iebadat ubak tuhan." teuma geujawueb le samuel, "ulon han ulon tem meugisa meusigoe deungon teungku amphon. teungku amphon ka neulawan peurintah tuhan, dan jinoenyoe gobnyan hana geuaku le teungku amphon sibagoe raja ateuheh ureueng israel." laju samuel geumeu paleng keuneuk geujak, teuma saul laju geutam gobnyan sira geumat ubak bajee jubah gobnyan, sampoe bajee jubah samuel nyan teupriek. dan geupeugah kheueh lom le samuel ubak raja saul nyan, "bak uroenyoe tuhan ka geupriek keurajeuen israel nibak teungku amphon, dan geubrinyan keu ureueng laen nyang leubeh get nibak teungku amphon. nyang mulia po teu allah israel hana meusulet dan hana teuma geu ubah peundirian gobnyan, sabab gobnyan bukan manusia." geujawueb le saul, "ulon ka meudesa, teuma neu tulong kheueh ulon hai bapak, neuwoe kheueh meusigoe-sigoe deungon ulon mangat ulon hase meu iebadat ubak tuhan po teu allah bapak. deungon lageenyan bapak neuhoreumat ulon dikeue dumna peumimpin bansa ulon dan dikeue banmandum israel." dan geugisa kheueh samuel meusigoe-sigoe deungon gobnyan u gilgal, dan raja saul pih laju geumeu iebadat ubak tuhan. oh ltheuh nyan samuel laju geupeurintah, "neuba laju keunoe raja agag nyan," agag laju jijak ubak gobnyan, deungon peunoh peungharapan karena gobnyan jipike, "bahya mawot ka lewat." le samuel geupeugah, "lagee peudeueng gata sampoe le that mak-mak nyang ka gadoh aneuek gobnyan, meunan cit teuma mak gata teuma gadoh aneuek gobnyan." laju samuel geucang-cang agag dikeue miseubah di gilgal. oh ka ltheueh geupeubuet nyan samuel laju geujak u rama, dan raja saul laju geuwoe u rumoh gobnyan di gibea. sampoe gobnyan wafeuet, samuel hanale meurumpok deungon raja saul. teuma samuel that-that seudeh sabab tuhan ka meunyeusai ka geu baiat saul jeuet keu raja israel. hana padub na treb teuma oh ltheuehnyan tuhan meufeureuman ubak samuel, "padub na treb teuk gata meuseudeh ate sabab si saul nyan? bukan kheueh jihnyan ka hanale teu aku sibagoe raja israel? jinoenyoe tacok kheueh laju minyeuk zaiton dan tajak kheueh laju u betlehem, ubak sidroe ureueng nyang nan jih isai, kareuna sidroe nibak aneuek-aneuek gobnyan ka ulon pileh jeuet keu raja." teuma samuel geutanyong, "pakriban hainyan ulon peubuet? meunyoe hainyan jideungoe le saul, ka pasti ulon jipoh mate!" geujawueb le tuhan, "taba kheueh laju saboh leumo nyang mantong muda, dan tapeugah kheueh laju ubak rakyat bahwa gata tajak keudeh keu tajak peuseumah keureubeuen ubak tuhan. laju ta undang kheueh isai ubak up-

acara keureubeuen nyan. singoh ulon britee peue nyang haroh gata peubuet. ureueng nyang ulon tunyok ubak gata, haroh gata baiat jeuet keu raja." samuel laju geupeubuet lagee nyang ka geupeurintah le tuhan nyan. bak watee gobnyan ka trok u betlehem, bubena peumimpin banda laju jisambot gobnyan deungon rasa teukeujot dan jitananyong, "peu kheueh kunjongan bapak nyoe neuba seulamat?" geujawueb le samuel, "nyoe, beutoi that. ulon teuka keu lon jak peuseumah keureubeuen ubak tuhan. dan tapeu suci kheueh laju droe gata mangat gata pih hase gata seutot sajan bak upacara keureubeuen nyan." meunan cit deungon isai dan aneuek-aneuek gobnyan geuyue laju jak peusuci droe gobnyan maseng-maseng, dan laju geu undang ubak tempat upacara nyan. bak watee awaknyan ka meusapat dan samuel geukalon eliab aneuek isai, laju teupike dalam ate geuh, "pasti nyang nyoe nyang ka geupileh le tuhan." teuma tuhan geupeugah ubak samuel, "bek kheueh gata teupeungaroh ngon rupa jih nyang jroh dan panyang teuma badan jih; bukan jihnyan nyang ulon pileh. ulon hana ulon ponten lagee manusia boh ponten. manusia nyang jikalon hi, teuma ulon nyang ulon kalon na kheueh ate." oh ltheuehnyan isai laju geuhoi abinadab, aneuek gobnyan, laju geuyue jak meuhadab ubak samuel. teuma samuel geupeugah, "bukan jihnyoe nyang geupileh le tuhan." meunan cit geuyue maju teuma si syama le isai, teuma nyan pih geupeugah le samuel, "meunan cit jihnyoe bukan nyang geupileh le tuhan." meunan kheueh cara jih isai geuyuejak bantujoh aneuek gobnyan meuturot-turot meuhadab ubak samuel, teuma samuel geupeugah ubak gobnyan, "awaknyan hana geupileh le tuhan." laju geutanyong kheueh le samuel ubak geuh nyan, "peu kheueh nyoe mantong aneuek agam gata?" geujawueb le isai, "mantong na sidroe teuk nyang tulot, teuma aneuek nyan teungoh jijak meurabe bubiri." samuel geupeugah, "neuyue kheueh awaknyan jijak hoi aneuek nyan, sabab geutanyoe hana lom tamakheun sigohlom aneuek nyan teuka." laju isai geuyue hoi aneuek nyan. teunyata aneuek nyan sidroe peumuda nyang lumpah tari lom seuhat, dan mata jih pih lagak. laju meufeureuman kheueh tuhan ubak samuel, "nyoe kheueh jihnyan, gata baiat kheueh aneuek nyan!" deungon bagaihat that samuel geucok minyeuk zaiton dan laju geubaiat nabi daud deungon cara geuboh minyeuk dikeue banmandum aduen-aduen gobnyan. bak saat nyan cit teuma nabi daud ka geukuasa le roh tuhan. phon nibak uroenyang dan seulanjut jih roh tuhan na meusajan gobnyan. oh ltheuehnyan samuel laju geujakwoe u rumoh gobnyan di rama. saul ka geutinggai le roh tuhan, dan jinoenyoe ka jiseksa le roh jeuhet nyang geu kirem le tuhan. le sabab nyan bubena namiet saul laju jipeugah ubak gobnyan, "kamoe ka kamoe teupeue bahwa roh jeuhet nyang geu kirem le tuhan nyang jiseksa teungku raja. meunyoe teungku amphon situju, kamoe meuseudia kamoe jakmita sidroe ureueng nyang carong jipeu meuen kecap. pajan mantong teungku amphon jiseksa le roh jeuhet, ureueng nyan hase jipeumeuen keucapi jih, dan di teungku amphon pih teurasa teunang lom teuma." laju saul geupeutren peurintah ubak awaknyan, "tajak mita kheueh laju nyang carong jimeuen musik, dan taba kheueh

laju ureueng nyan keunoe." ban jideungoe haba nyan sidroe nibak namiet gobnyan jipeugah, "isai peunduduek banda betlehem na sidroe aneuek agam nyan that carong ji meuen musik. gobnyan ureueng beuhe dan sidroe tantra nyan paleng get. lom teuma gobnyan lagak ngon lumpah carong geu meututoe haba, dan tuhan sabe geu tulong gobnyan." teuma saul laju geukirem utosan ubak isai sira jiba haba nyan lagee nyoe, "gatayue kheueh aneuek gata nabi daud, nyan rabe bubiri-bubiri gata nyan jimeuhadab ubak ulon." oh ltheuhnyan isai geupeusiab laju saboh keuleudee, di ateuh keuleudeenyan geupeudieng teuma saboh aneuek kameng, ruti dan baluem kulet nyan peunoh meuso deungon ie anggo. banmandum nyan geubri ubak nabi daud mangat geupeuseumah ubak raja saul. meunan kheueh cara jih nabi daud geujak ubak raja saul dan jeuet keu peulayan gobnyan. gobnyan get that geugaseh le raja saul dan geuyue teuma nabi daud nyan ureueng ba sinjata gobnyan. oh ltheuhnyan raja saul geukirem haba ubak isai, "ulon galak keu nabi daud. tapeu idhin kheueh mangat jihnyoe teutab tinggai disinoe sira jipeusan-eut ulon." phon watee nyan, pajan mantong saul jitamong le roh jeuhet, nabi daud laju geucok keucapi gobnyan dan laju teuma geupeumeuen alat nyan. bak watee nyan cit teuma raja saul ka meurasa leuga lom ngon teunang lagee ban nyan, ka sabab roh jeuhet ka jiteubiet lam badan gobnyan. bak saboh watee ureueng filistin jikrah tantra jih keu jimaju lam mideuen prang. awaknyan jiato baresan di banda sokho, lam wilayah yehuda dan jipeudong khimah-khimah awaknyan lamkawan sokho dan azeka, rab ngon efes-damim. saul dan ureueng-ureueng israel na cit meusapat dan jipeudong khimah di panton ela; awaknyan meusiab-siab keu jihadang jiseurang le ureueng filistin. meunan kheueh, baresan ureueng filistin laju jidong bak saboh buket dan baresan ureueng israel jidong teuma bak buket nyan laen, dan nibak teungoh-teungoh awaknyan na saboh panton. dan na sidroe nyan carong that bak meulo nan jih goliat, asai jih nibak banda gat, laju jiteubiet nibak khimah-khimah ureueng filistin keu jikak lawan ureueng israel. manyang jihnyan na kira-kira lhee metee, dan jihnyan jingui tupi teumaga dan bajee prang jih teumaga cit nyan geuhon jih na kira-kira limong ploh tujuh kilo. gaki jih pih jitob ngon sinutob gako nyan teupeuget nibak teumaga, dan bak baho jih jigulam teuma leumbeng teumaga. go kapak jih na bube kayee ngon peuget teumpeuen ija, dan mata kapak jih na kira-kira tujuh kilo geuhon jih. na sidroe sidadu jikak dikeue jih sira jiba peurisee jih. goliat jiploh dan laju jitawok ubak tantra israel, "peue nyan teungoh gata peubuet disinan? peu kheueh keuneuk murpang? ulon sidroe filistin, he hamba-hamba saul! pileh kheueh sidroe lamkawan gata nyan jijeuet treun keujikak lawan ulon. meun-yoe nibak prang meutunang nyan, ulon nyan mate, kamoe rila jeuet keu namiet gata, teuma meunye ulon nyan meunang dan nyan poh mate jih nyan, gata kheueh nyan haroh jeuet keu namiet kamoe. jinoenyoe cit teuma, ulon lawan tantra israel; pileh kheueh sidroe mangat meutunang jilawan ulon!" watee saul dan ureueng-ureueng gobnyan jideungoe

hainyan, laju teukeujot awaknyan dan laju jiteuka teumakot. nabi daud na kheueh aneuek isai ureueng efrata, nibak betlehem di yehuda. isai na lapan droe aneuek agam, dan nibak jamen peumeurintahan saul, isai ka tuha that-that. ban lhee droe aneuek isai nyan paleng tuha ka jikak seutot saul keujikak murpang. nyan tuha nan jih eliab, lumboi dua abinadab, dan nyan keu lhee syama. nabi daud aneuek tulot. watee ban lhee droe aduen geuh nyan leubeh tuha nyan teungoh jimuprang jiseutot saul, nabi daud kayem that geutinggai saul dan geuwoe u betlehem keu geujak rabe bubiri ayah geuh. treb jih na peuet ploh uroe, tieb-tieb beungoh dan seupot, goliat sabe jipeurab ubak baresan ureueng israel dan jisangak ateuh awaknyan. bak siuroe isai geupeugah ubak nabi daud, "cok kheueh siploh kilo gram jagong teutot ngon siploh boh ruti nyoe, dan jak intat kheueh laju ubak aduen-aduen gata nyan na nibak khimah-khimah tantra. meunan cit ba kheueh teuma siploh boh keuju keu keumandan pasokan. tanyong kheueh pakriban keuadaan aduen-aduen gata, dan puwoe kheueh bukeuti keu ulon bahwa gata ka meurumpok ngon awaknyan dan awaknyan lam keuadaan seumat. awaknyan na di panton ela meusajan ngon raja saul, dan mandum ureueng israel teungoh meuheng-koe jilawan ureueng filistin." oh singoh beungoh nyan, bansuboh that-that, nabi daud geubedoh laju geumeukeumah. bubiri gobnyan geutinggai bak sidroe ureueng jaga, ltheuh nyan gobnyan laju geucok barang meuneuba geuh dan laju geujak, paih lagee nyan geupeurintah le ureueng syiek geuh. gobnyan trok bak khimah-khimah nyan watee ureueng israel teungoh jikak u mideuen ngaza sira jidumpek surak lam mideuen prang. tantra filistin dan tantra israel ka meuhadab-hadab keue dan ka siab-siab keuneuk meuhengko. nabi daud laju geukeubah barang-barang nyan geuba nyan ubak ureueng nyan keumiet khimah-khimah tantra, dan laju geuplueng u mideuen keu geujak meurumpok ngon aduen-aduen geuh. teuma teungoh gobnyan geupeugah haba ngon awaknyan, goliat jimaju ukeue laju jisangak ateuh ureueng israel, lagee nyan ka lazem jipeubuet. nabi daud pi geudeungoe haba jih nyan meulawan nyan. bagaih that watee ureueng israel jikalon goliat, awaknyan jiplueng sabab teumakot. "ngieng kheueh awaknyan!" jikheun le awaknyan seusabe keudroe jih. "deungoe kheueh haba jih nyan teumakot nyan! saul raja geutanyoe ka geumeujanji bahwa soe mantong nyan hase jipoh mata goliat, geujok hadiah nyan paleng rayeuk. meunan cit le raja geupeukawen ureueng nyan ngon putroe gobnyan. dan keuluwarga ureueng syiek ureueng nyan geupeubeubaih nibak cu-kee." laju geupeugah le nabi daud, "biet beuhe that ureueng filistin si kaphe nyan jilawan tantra allah nyan udebi!" oh ltheuh nyan gobnyan geutanyong ubak sidroe lamkawan tantra nyan, "peu kheueh nyan hase geubri keu ureueng nyan hase jipoh mate ureueng filistin nyan dan teusampoh jihina nibak israel?" rakyat laju jipeugah ubak gobnyan peue nyan ka geupeujanji le raja. eliab aduen nabi daud nyan tuha jideungoe nabi daud teungoh meututoe ngon tantra-tantra nyan. gobnyan jiteuka be-

ungeh ubak nabi daud dan laju geupeugah, "peubuet kah jak keunoe? soe nyang kah yue rabe bubiri-bubiri kah nyang na padub boh nyan dipadang pasi? ulon kuteupeu kahnyoe meulagak beuhe; kahjak keunoe keuneuk kah ngieng muprang, nyoe peue kon?" geujawueub nabi daud, "peue salah lon, ulon mantong teumanyong!" laju gobnyan geujak dan geutanyong hai nyan cit ubak tantra-tantra nyang laen; dan gobnyan meuteume jawueub lagee nyan cit teuma. teuma na meupadub droe nyang jideungoe haba nabi daud laju jikak peugah ubak raja saul, le sabab nyan, nabi daud geutawok keu geujak meuhadab. gaupeugah le nabi daud ubak saul, "amphon teungku po, tanyoe hana peureulee tatakot keu ureueng filistin nyan! ulon kuteum kulawan jihnyan." "bek," jawueub saul. "pakriban mungken gata meutunang talawan jihnyan? gata mantong putik that, seudangkan jihnyan ka lazem that jimuprang yoh muda kon." teuma nabi daud geupeugah, "teungku po, ulon hase lon rabe bubiri ureueng syiek lon. meunyoe singa atawa cagee nyang keuneuk teugom bubiri, beulatang juah nyan ulon tiyeueb dan ulon poh, dan bubiri nyan ulon peuseulamat. dan meunyoe singa atawa cagee nyan jilawan ulon, beulatang nyan ulon mat takue jih, laju ulon poh sampoe mate. ulon ka ltheueh lon poh mate singa meunan cit cagee, dan ureueng filistin nyan kaphe nyan teuma saban cit lagee beulatang-beulatang nyan, sabab jihnyan jijeuet hina tantra po teu allah nyang udeb. tuhan ka geupeuseulamat ulon nibak singa dan cagee, gobnyan pi geupeuseulamat ulon nibak ureueng filistin nyan." laju geupeugah le saul ubak gobnyan, "get kheueh, seumoga tuhan geutulong gata." saul laju geujok peukayan prang gobnyan, na kheueh sabab bajee beusoe ubak nabi daud dan nabi daud laju geungui peukayan nyan. ltheueh nyan raja saul geupeuseuon tauma tupi teumaga atueuh ulee nabi daud. ltheueh nyan nabi daud laju geuikak peudeueng saul bak bajee beusoe nyan ltheueh nyan laju geu ujo jak, teuma hana jeuet geujak, sabab nabi daud hantom lazem geungui peukayan prang. "ulon tuan hana hase lon jak ngon peukayan nyoe," kheun nabi daud ubak saul. "ulon hantom lon ngui nyang lageenyoe bagoe." ltheuehnyan banmandum peukayan prang nyan geusuet lom teuma. ltheuehnyan gobnyan laju geucok tungkat meurabe geuh, dan geupileh limong neuk bate nyang bulat lam krueng, batee nyan laju geupeutamong lam baluem geuh. deungon ali-ali ka siab bak jaroe geuh, ltheueh nyan laju geujak ubak goliat. hana padub na treb teuma oh ltheueh nyan goliat nyang jikak dikeue le ureueng nyang ba peurisee jihnyan laju jipeurab ubak nabi daud. teuma watee jihnyan jikalon nabi daud sira sira jiangeng atueuh gobnyan, goliat laju jikem sira jihina sabab jikalon nabi daud mantong putik that dan gagah lagoena. jipeugah le goliat ubak nabi daud, "keupeue tungkat nyan? peue kah anggap ulon nyoe ase?" laju nabi daud jikutok deumi dewa-dewa jih. lom teuma jihnyan jilawan nabi daud sira jipeugah, "keunoe, majo laju! jeuet lon jok tuboh gata keu cicem dan beulatang jeuet jipajoh." teuma nabi daud geujawueub, "gata tateuka keu talawan ulon ngon peudeueng, kapak dan leumbeng, teuma ulon teuka lon lawan gata ngon nan tuhan nyang mahakuasa, po

teu allah tantra israel nyang gata hina nyan. uroenyoe cit teuma, tuhan geujok gata ubak ulon; gata ulon peutalo dan ulee gata ulon koh dua. tuboh gata dan tuboh tantra-tantra filistin ulon jok ubak cicem dan beulatang jeuet jipajoh. deungon nyan, bansaboh donya teuma jiteupeue bahwa kamoe bansa israel na po teu allah nyang kamoe seumah, dan banmandum ureueng disinoe teuma jikalon bahwa tuhan hana peureulee keu peudeueng atawa kapak mangat teupeuseulamat umat gobnyan. gobnyan kheueh nyang peuteuntee rot teumeuprang nyoe dan gobnyan geuseurah gata lam jaroe kamoe." goliat laju jimaju jipeurab ubak nabi daud, deungon bagai that nabi daud geuplueng lam baresan ureueng filistin keu geuhadang awaknyan. nabi daud laju geugeue baluem geuh, geucok sineuek batee dan ltheuehnyan laju geurhom atueuh goliat. batee nyan laju keunong dho goliat le nyan teuma dho goliat nyan sampoe beukah bruek ulee jih, dan jihnyan rhot dan reubah deungon muka jih teudugom bak tanoh. nabi daud laju geuplueng geupeucrok goliat, dan laju geudong dikeue jihnyan; gobnyan laju geucok peudeueng goliat dan laju jisuet nibak lam sarong, dan ltheueh nyan laju jireupang ulee ureueng filistin nyan. meunan kheueh cara jih nabi daud geupeutalo dan geupoh mate goliat, na kheueh ngon ali-ali dan batee! watee ureueng filistin jikalon pahlawan awaknyan ka mate, awaknyan laju jipeuplueng droe. ureueng-ureueng israel dan yehuda meusurak meuhubo dan laju jipeucrok ureueng filistin sampoe trok u gat dan u babah pintoe geureubang ekron. ureueng-ureueng filistin nyang luka-luka teutiek-tiek bansipanyang rot u saaraim nyan! oh ltheueh nyan ureueng israel jiwoe nibak jipeulet ureueng filistin, laju jireupah bubena asoe khimah-khimah awaknyan. nabi daud laju geucok ulee goliat, dan geuba u yerusaleem, teuma seunjata-seunjata goliat jikeubah lam khimah geuh keudroe. watee saul geukalon nabi daud geujak lawan goliat, geutanyong kheueh le gobnyan ubak abner panglima tantra geuh, "abner, aneuek soe kheueh jihnyan?" "ulon hana lon turi, teungku amphon," jawueub abner. laju geupeurintah le saul, "jak kheueh dan tanyong laju hai nyan." dan watee nabi daud geugisa ubak khimah-khimah oh ka ltheueh geupoh mate goliat, gobnyan laju jiba le abner mangat geujak meuhadab saul. nabi daud mantong geutijiek ulee goliat. laju geutanyong le saul ubak gobnyan, "he aneuek muda! aneuek soe gata?" geujawueub le nabi daud, "lon tuan aneuek isai nibak betlehem." oh ka ltheueh saul dan nabi daud seuleusoe geupeugah haba, nabi daud laju geu angkat le raja saul jeuet keu peugawee gobnyan dan phon uroe nyan gobnyan hana geubri woele u rumoh ureueng syiek gobnyan. yonatan aneuek agam saul, ka geudeungoe awaknyan meututoe haba. gobnyan teurasa cit teutarek keu nabi daud nyan, dan geugaseh gobnyan lagee geugaseh droe geuh keudroe. sabab nyan yonatan geumeusumpah teutab geumeusabot deungon nabi daud siumu masa. yonatan laju geusuit jubah gobnyan geubri laju atranyan ubak nabi daud, meunan cit deungon peukayan prang gobnyan dan deungon peudeueng gobnyan geubri sajan, ali-ali gobnyan meunan cit deungon talo keuieng gobnyan.

nabi daud geupeubuet deungan get banmandum tugaih nyang ka geubri le raja saul abak gobnyan. sabab nyan kheueh gobnyan jiangkat le raja saul jeuet ulee balang didalam angkatan prang gobnyan, dan nabi daud nyan jiharoiik banmandum le tantra gobnyan meunan cit le namiet raja saul. bak watee nabi daud geugisa oh ka ltheueh geupeutaloe goliat ureueng filistin nyan, dan banmandum tantra laju jimeubareh jitamong u dalam banda, bubena ureueng inong ji-teubiet laju nibak jeueb-jeueb banda israel keu jajak sambot raja saul. awaknyan jimeunyanyi ngon geumeu ca-e deungan lagu-lagu nyang geumbira, dan jimeunari ngon jimeulikak sira jipeumeuen rapa-i dan kecapi. sira jimeunari bubena ureueng inong nyan laju jimeuca-e lageenyoe, "saul ka geupoh mate meuribee-ribee musoh, teuma nabi daud geupoh musoh meuploh-ploh ribee." ban geudeungoe nyan, raja saul get that beungeuh. sabab gepike, "nabi daud ka jianggab jipoh mate musoh meuploh-ploh ribee, seudangkan ulon teuma meuribee-ribee mantong. hana treb le teuntée kheueh jihnyan ji baiat keu raja le awaknyan!" phon uroe nyan, gobnyan ka bingiek ate keu nabi daud. oh singoh uroe saul na didalam rumoh gobnyan teungoh geumat kapak dan bak wateenyan cit teuma raja saul nyan ka jitamong le roh jeuhet nyang geu utoh le po teu allah, sampoe gobnyan ka jilab jen geuh lagee ureueng pungo. bak wateenyan nabi daud teungoh geumeuen keucapi lagee nyang ka-ka. "ulon labang ngon kapak nyoe ubak nabi daud sampoe an meukeumat bak binte!" gepike le saul, laju gobnyan geu rhom kapak nyan sampoe dua goe ateuheh nabi daud, teuma nabi daud meuhase geusilek. raja saul geusada bahwa nabi daud nyan geulindong le tuhan. sababnyan gobnyan ka jeuet teumakot keu nabi daud. teuma gobnyan laju geupinah nabi daud nibak lingkungan meuligoe geuh, dan geu angkat gobnyan jeuet keu keumeundan u ateuheh siribee droe tantra. deungan na lageenyan nabi daud ka geupimpen pasokan gobnyan bak tieb-tieb watee muprang. gobnyan meuhase geupubuet banmandum tugaih geuh, sabab tuhan nyang tulung gobnyan. bak watee raja saul geukalon bahwa nabi daud sabe meuhase, maken geutakot kheueh le gobnyan keu nabi daud nyan. teuma ban saboh nang-groe israel dan yehuda jigaseh keu nabi daud kareuna gobnyan nyang pimpen dan nyang paleng le jasa gobnyan. raja saul ka meureuncana mangat jeuet nabi daud nyan jipoh mate le ureueng filistin lam mideuen prang mangat bek deuh gobnyan keudroe nyang poh nabi daud nyan. le sababnyan nibak siuroe raja saul nyan geupeugah ubak nabi daud, "si merab putroe ulon nyang tuha teuma ulon peukawen deungan gata, asai mantong gata tapeuleumah keuhai gata ceubeueh lam mideuen prang keu tuhan." nabi daud geujaweueb, "soe kheueh namiet nyoe, peu kheueh makna jih keuluwarga bapak ulon di israel, sampoe ulon nyoe jeuet keumeulintee raja?" teuma bak watee katrok saat jih merab geukeuneuk peukawen deungan nabi daud, teuma deungan hana teusangka-sangka aneuek dara nyan jipeukawen deungan adriel nibak mehola. mikhal putroe raja saul nyang laen ka rhot cinta ubak nabi daud. bak watee raja saul geudeungoe hainyan gobnyan pi situju. gepike le

gobnyan, "bah kheueh ulon peutaba mikhal mantong keu nabi daud, mangat nabi daud teujeubak dan hase teupoh mate le ureueng filistin." le sababnyan, nyang keu dua goe jih raja saul geupeugah ubak nabi daud, "jinoenyoe gata ka hase jeuet keu meulintee ulon." laju gobnyan geuyue peugawee geuhnyan mangat jipeugah ubak nabi daud seucara seungab-seungab lageenyoe, "teungku amphon geugaseh ubak droeneueh dan meunan cit teuma keu banmandum peugawee gobnyan; jinoenyoe kheueh watee nyang paleng teupat keu droeneueh keu tajak seulangke putroe geuhnyan." teuma bak watee awaknyan jipeusampoe hainyan ubak nabi daud, gobnyan geujaweueb, "gata pike mudah that beujeuet keu meulintee raja? ulonnyoe ureueng gasien dan hana meuguna!" banmandum peugaweenyan jijak peugah laju haba nabi daud nyan ubak raja saul, le raja saul geuyue lom ubak awaknyan mangat jijak peugah ubak nabi daud lageenyoe, "nyang geulakee teungku amphon sibagoe jeunama na kheueh 100 boh kulet kulub ureueng filistin, sibagoe meunalaih keu musoh teungku raja." (nyoe kheueh nyang geureuncana le raja saul mangat na cara geupoh mate nabi daud deungan peurantaraan ureueng filistin.) bubena peugawee raja saul nyan jijak peusampoe laju peusan nyan ubak nabi daud, dan nabi daud geuteurimong carat raja nyan. kareuna nyan, sigihlom bataih wateh habeh, gobnyan laju geubeurangkat deungan aneuek buah gobnyan u daerah ureueng filistin. geupoh mate laju na 200 droe ureueng filistin, laju geucok kulet kulub awaknyan, dan atra nyan geuseurah laju ubak raja saul deungan hana meukureueng meusapeu pih. oh ka ltheuehnyan raja saul laju geupeukawen mikhal deungan nabi daud. baro kheueh raja saul geusada bahwa nabi daud nyan geulindong le tuhan dan meunan cit keubit that jigaseh le aneuek gobnyan si putroe mikhal. teuma meutamah geutakot kheueh gobnyan keu nabi daud dan gobnyan geubanci ubak nabi daud nyan siumu udeb geuh. tieb-tieb watee pajan mantong tantra filistin nyan jijak prang, nabi daud leubeh meuhase geupeuhanco awaknyan nibak peuriwa raja saul nyang laen. le sababnyan meutamah meusyeyuhu kheueh laju nan nabi daud. raja saul geupeugah ubak yonatan aneuek agam gobnyan, dan ubak mandum peugawee mangat jitem poh mate nabi daud. teuma yonatan get that geugaseh keu nabi daud, le sabab nyan gobnyan geupeugah ubak nabi daud, "bapak ulon geu-useuha keuneuk geupoh mate droeneueh; le sababnyan beu ate-ate kheueh! neujak musom kheueh singoh beungoh bak saboh teumpat nyang teusom, dan neutinggai kheueh laju disinan. ulon teuma lon jak u padang meusigoe deungan bapak ulon dan kamoe dong nibak teumpat droeneueh musom nyan. laju ulon peugah haba deungan bapak keuhai bapak keuneuk poh droeneueh nyan, dan hase nibak tutou haba nyan teuma ulon peugah ubak droeneueh." laju yonatan geupeugah nyang get keuhai nabi daud ubak bapak geuh nyang raja saul nyan, geupeugah, "bapak, bek kheueh bapak peuceulaka namiet droeneueh nyan nabi daud. sabab jihnyan hana jipeubuet sapeue pih buet nyang salah ateuheh bapak; teuma seubalek jih, jihnyan ka that-that meujasa keu bapak. gobnyan ka jipeusabong nyawong

jih bak watee jipoh mate goliat, dan tuhan ka geupeumeunang nyang rayeuk that keu israel meulalu nabi daud nyan. bapak keudroe ka ltheueh neukalon keujadian nyan, dan bapak that-that galak bak wateenyan. jadi, pakon jinoenyeo bapak keuneuk ien-anya ureueng nyang hana meusalah dan keuneuk poh nabi daud deungon hana alasan meubacut pih?" raja saul nyan insaf watee geudeungoe tutoe haba yonatan nyan, dan gobnyan geumeusumpah deumi nan tuhan bahwa nabi daud nyan hana geupeukaru dan hana gepoh mate. oh ka ltheuehnyan yonatan geuhoi laju nabi daud, dan geucalitra banmandum peue nyang ka geumeututoe bunoe. oh ltheuehnyan gobnyan laju geuba nabi daud nyan ubak raja saul, dan nabi daud laju geupeutimang gobnyan lagee yoh masa ilee. oh ltheuehnyan beureutoih prang lom deungon ureueng filistin. nabi daud laju geuprang dan watee nyan cit geupeutaloe awaknyan banmandum, akhe jih awaknyan jiplueng. bak siuroe raja saul teungoh geudeuk dirumoh deungon kapak nibak jaroe gobnyan dan saat nyan cit teuma raja saul nyan ka ji tamong lom le roh jeuhet nyang geu kirem le tuhan. bak wateenyan nabi daud teungoh geupeumeuen keucapi geuh. laju raja saul geu useuha lom geuthob kapak geuhnyan ubak nabi daud nyang na toe ngon binteh. teuma nabi daud geusilek, sampoe kapak nyan meulabang nibak binteh. nabi daud laju geuplueng keu geujak peuseulamat droe. bak malam nyan cit teuma raja saul geukirem utosan na meupadub droe u rumoh nabi daud keujajak luem nabi daud dan meusi-geoe teuma keu beuteupoh mate bak watee uroe be-ungoh. teuma mikhal ureueng binoe geuh geupeugah ubak lakoe droe geuh, "meunyeo droeneueh hai teungku lakoe hana neuplueng nibak malam nyoe, singoh beungoh droeneueh pasti jipoh mate le ureueng nyang geukirem le bapak ulon." laju mikhal geupeutreu nabi daud nyan rot peuradeun, dan nabi daud laju geupeulueng droe akhe jih gobnyan seulamat. oh ltheueh nyan mikhal laju geucok patong dewa di rumoh tangga geuh laju atranyan geukeubah nibak teumpat eh nabi daud. oh ltheuehnyan nibak bagian ulee jih jikeubah teuma bantai nyang teupeuget nibak bulee kameng. dan ltheueh nyan teuma patong nyan laju jipeukeulubong deungon ija seulimbot. bak watee mandum utosan raja saul teuka keu jijak droh nabi daud, mikhal geupeugah laju, "nabi daud teungoh saket." teuma raja saul geuyuejak lom awaknyan keunan geuyue kalon ngon mata ulee jih keudroe keuhai nabi daud nyan. geupeurintah lageenyoe, "gataba laju jihnyan keunoe, meusigoe deungon teumpat eh jih, mangat jihnyan ulon nyang poh." laju jitamong kheueh utosan nyan u dalam kama nabi daud dan teunyata nyang na teukeubah di ateueh teumpat eh nyan na kheueh patong deungon bantai bulee kameng di ateueh miyueb ulee jih. saul geupeugah ubak aneuek inong geuh si mikhal, "trok that ate droe kheueh tapeungeut ulon! musoh ulon ka droeneueh tulong jipeulueng droe!" jaweeb mikhal, "gobnyan geuancan keuneuk geupoh mate lon, meunyeo ulon hana lon tem tulong geuhnyan geubaplueng droe." oh ka ltheueh nabi daud meuhase geupeulueng droe geuh, gobnyan laju geujak u rumoh samuel di rama, laju geubri tee banmandum nyang jipubuet le raja

saul nyan ateueh gobnyan. oh ltheuehnyan nabi daud dan samuel laju geujak u nayot dan tinggai laju disinan. teuma ubak raja saul geubritee bahwa nabi daud na di nayot hana padub na jioh ngon rama. sabab nyan raja saul geukirem lom meupadub droe utosan keu teujak droeb nabi daud. teuma awaknyan meurumpok deungon saboh kawan nabi nyang teungoh geumeunari ngon geumeulikak sira geu dhike meusajan-sajan, nyang jeuet keu syeueh bak meu dhike nyan na kheueh samuel. laju bubena utosan raja saul nyan jitamong le roh po teu allah sampoe awaknyan pih ka jilikak ngon meunari sira geumeu dhike. bak watee habanyan trok ubak raja saul, gobnyan laju geukirem utosan nyang laen dan di ureueng nyang geukirem nyan pih ka jitamong deungon roh po teu allah dan ka geumeulikak ngon geumeu dhike. dan keu nyang keulhee goe jih raja saul geukirem utosan dan meunan cit teuma nyang teujadi ateueh awaknyan. le sabab nyan raja saul keudroe nyang beurangkat u rama. oh ka trok ubak mon raya di sekhu, gobnyan laju geuteumanyong dipat samuel dan nabi daud, dan ureueng nyang geutanyong nyan laju jiwaweeb bahwa awaknyan na di nayot. jadi gobnyan laju geujak keunan, teuma meunan cit deungon raja saul nyan gobnyan pih ka jikuasa le roh po teu allah, sampoe ka geumeulikak ngon geumeunari sira geumeu dhike di sipanyang rot ueh-uh raya u nayot. oh watee ka trok keunan, gobnyan laju jisuet peukayan jih dan laju teuma jimeunari ngon jimeulikak sira geumeu dhike dikeue samuel, laju oh ltheuehnyan raja saul teuba ubak tanoh deungon tuboh geuh teulon bulat sipanyang uroe dan simalam suntok. (nyoe kheueh awaiphon pribasa nyang teupeugah, "peu kheueh raja saul nyan meunan cit jeuet keu nabi?" teuma geuplueng kheueh laju nabi daud nibak nayot nyang rab rama dan geujak laju meurumpok ngon yonatan, oh ban trok keunan laju geutanyong, "peue salah ulon? peue buet nyang jeuhet nyang ka ulon peubuet dan peue teuma desya ulon ateueh bapak gata sampoe gobnyan keuneuk geupoh mate ulon?" geujaweeb le yonatan, "bek neupeugah meunan! deumi tuhan, droeneueh hana geupoh mate. bapak ulon sabe geubri tee reuncana gobnyan ubak ulon, bahpi nyang peunteng, meunan cit nyang hana peunteng. jadi hana mungkin gobnyan geusom rahsia niet geuh nyan ubak ulon. sabab nyan, peue nyang gata peugah nyan banmandum hana beutoi!" geujaweeb le nabi daud, "bapak gata geuteupeue that-that bahwa gata keubiet that tagaseh keu ulon. jadi ka pasti gobnyan hana geubri tee hai nyan ubak gata mangat gata bek seudeh. pakriban kheueh mantong, deumi tuhan nyang udeb, sikeubiet jih udeb ulon nyoe na lagee boh manok nibak ujung lungkee keubeul!" laju geupeugah le yonatan, "peue mantong nyang droeneueh lakee ulon peubuet." geujaweeb le nabi daud, "lageenyoe, singoh beungoh na kheueh khauri buleun baro, dan nyang seuharoh jih ulon makheun meusajan deungon teungku raja. teuma meunyeo gata tatem, ulon teuma lonjak dan lon musom dipadang sampoe an malam lusa. meunyeo bap-ak gata geutanyong pakon ulon hana teuka, tapeugah laju ubak gobnyan, bahwa ulon ka lon lakee idhin ubak gata bahwa ulon keuneuk jakwoe u betle-

hem, sabab disideh geupeuna upacara keureubeun siseun sithon keu banmandum keuluwarga ulon. meunye raja geupeugah, 'get kheueh,' teuma ulon aman, teuma meunye gobnyan beungeh, tateupeue kheueh bahwa gobnyan ka geucok keuputusan keuneuk geupeuceulaka ulon. ulon lakee tulung ubak gata, sabab geutanyoe ka ta ikat janji dikeue tuhan. teuma meunye ulon meusalah, tapoh kheueh laju ulon, teuma bek kheueh taseurah ulon ubak bapak gata." geujawueub le yonatan, "bek khawate! meunye ulon teupeue deungon pasti bahwa bapak ulon ka habeh geupike keuneuk peuceulaka droeneueh, teuntee kheueh hainyan ulon peugah bagaih-bagaih ubak droeneueh." oh lheurehnyan nabi daud geutanyong, "soe kheueh nyang teuma peugah ubak ulon seukira jih bapak gata geujawueub deungon beungeh?" "jak kheueh geutanyoe tajak u padang," kheun yonatan. teuma geujak kheueh laju awaknyan meusigoe-sigoe u padang. laju yonatan geupeugah ubak nabi daud, "seumoga tuhan, po teu alah israel jeuet keu saksi geutanyoe! singoh beungoh atawa lusa kira-kira bak watee lagee jinoenyoe, ulon teuma lon useuha beulon teupeue asoe ate bapak ulon. meunye gobnyan meusikey get atueh droeneueh, ulon teuma bagaih-bagaih lon kirem haba ubak droeneueh. meunye gobnyan na niet keuneuk geupeuceulaka droeneueh, pasti haba nyan pih lon peugah ubak droeneueh mangat droeneueh deungon bagaih-bagaih hase tapeuseulamat droe. bah kheueh tuhan geutarek nyawang ulon meunye hai nyan hana ulon peubuet. seumoga teuma tuhan geutulung droeneueh lagee gobnyan ka lheureh cit teuma geutulung! dan meunye ulon mantong udeb, neu ingat kheueh janji geutanyoe dikeue tuhan dan seutia kheueh ubak ulon; teuma meunye ulon ka hanale, neutunyok kheueh keuseutiaan droeneueh nyan ubak keuturonan ulon keu siumu masa. dan meunye tuhan geupeubina banmandum musoh droeneueh, bek kheueh neumeujanji keu geutanyoe bandua ka putoh. meunye sampoe putoh, tuhan kheueh nyang teuma hukom droeneueh." teuma keu nyang keudua goe jih yonatan geuyue nabi daud meujanji keuhai geugaseh gobnyan, sabab gobnyan geugaseh keu nabi daud lagee geugaseh droe geuh keudroe. oh lheurehnyan geupeugah kheueh le yonatan ubak gobnyan, "singoh beungoh khauri buleuen baro. pasti teuma geuteupeue bahwa droeneueh hana tateuka, sabab teumpat droeneueh soh nibak meja bu; peue lom lusa! sabab nyan, tajak musom kheueh laju u teumpat musom droeneueh nyang awai ilee, dan neupreh kheueh dilikot sinamon batee nyang na disinan. lusa ulon teuma lon peulheueh lhee neuk aneuk panah u arah batee nyan siulah-ulah teutimbak ubak sasaran. laju ulon yue namiet lon jikak pileh aneuk-anek panah nyan, dan meunye ulon peugah ubak jihnyan, 'ai, panah nyan leubeh to lom keuno; neucok kheueh,' nyang makna jih droeneueh aman dan jeuet neutebiet. ulon meusumpah deumi tuhan nyang udeb bahwa droeneueh hana meuteume bala peue mantong. teuma meunye ulon peugah ubak namiet ulon, 'ai, panah nyan leubeh jih lom keudeh,' nyan muphom jih tuhan geuyue droeneueh neujak beujioh; le sababnyan neujak kheueh laju. se-

umoga tuhan geujaga geutanyoe mangat geutanyoe keu siumu masa jih tamumat ubak janji nyang tapeuet le geutanyoe bandua." dan geujak kheueh laju nabi daud geujak musom u padang. bak khauri buleuen baro nyan, raja saul geuteuka ubak teumpat khauri. lagee lazem jih gobnyan geudeuk rab ngon binte; di yonatan aneuk geuhnyan teucok teumpat dikeue gobnyan, abner blaih bineh saul, teuma kurusi teumpat duek nabi daud teutab soh. teuma raja saul hana geumeuceukot keuhai nyan nibak uroenyang, sabab, geupike, "mungen jihnyan na meuhalangan sapeue-sapeue, sampoe jihnyan hana gleh meunurot agama." bak uroe laen lom, na kheueh uroe nyang keudua buleuen baro, kurusi teumpat duek nabi daud mantong cit soh, laju geutanyong kheueh le raja saul ubak aneuk geuh yonatan, "pakon baroe ngon uroenyoe nabi daud nyan hana cit jikak ubak teumpat khauri nyoe?" geujawueub le yonatan, "gobnyan ka geulakee idhin ubak ulon keu geujak u betlehem. geupeugah, 'neupeu idhin kheueh ulonjak u betlehem, sabab keuluwarga ulon teungoh geupeuna uroe raya keureubeuen di betlehem, dan ulon geuyue teuka le aduen ulon. sabab nyan, meunye neupeu idhin, bah kheueh ulonjak keudeh keu lon jak meurumpok deungon kawom syedara ulon.' nyang kheueh sabab jih gobnyan hana hade teuka teumpat khanuri tanyoe nyoe, hai teungoh bapak." ban geudeungoe lagoonan raja saul beungeh that-that ubak yonatan sira geupeugah ubak aneuk geuhnyan, "aneuk hareum jadahl! jinoenyoe ka ulon teupeu bahwa kah nyoe kah-dong blaih nabi daud dan katapeu malee atueh droe kah dan u atueh mak kah! peu kheueh kah hana sadar bahwa simantong nabi daud nyan udeb kah-nyoe hana mungen jeuet keuraja di atueh nanggro nyoe? jinoenyoe tayue laju ureung laen jikak mita si daud nyan dan jiba jihnyan keunoe, sabab jihnyan haroh mate!" dan geujawueub le yonatan, "pakon jihnyan haroh mate? peue desya jih?" ban geudeungoe nyan raja saul laju geugeulawa kapak gobnyan ubak yonatan keuneuk geupoh mate aneuk geuh nyan. dan geuteupeu kheueh le yonatan bahwa bapak geuhnyan ka keubiet-keubiet that keuneuk geupoh mate nabi daud. deungon that beungeh yonatan laju geutinggi meja khanuri dan geujak laju ho laen, dan gobnyan hana geupajoh sapeue bak uroe keudua bak peurayaan buleuen baro nyan. gobnyan get that gundah geupike keu nabi daud nyang ka geuhina le raja saul bapak geuh keudroe. oh singoh beungoh nyan yonatan laju geujak u padang keuneuk geujak meurumpok ngon nabi daud lagee nyang ka awaknyan reuncana bandua geuh. gobnyan geuba sajan sidroe aneuk agam namiet geuh, laju geupeugah bak jihnyan, "jak pileh laju aneuk panah nyang teuma ulon panah." teungoh aneuk nyan jiplueng, yonatan laju geutimbak saboh aneuk panah ukeu aneuk namiet nyan. bak watee namiet nyan trok u teumpat rhot aneuk panah nyan, yonatan geumeuhoi aneuk nyan, "ai, aneuk panah nyan leubeh jih lom keudeh! bagaih bacut, bek teumanueng!" si aneuk namiet nyan laju jicok aneuk panah nyan dan jigisa laju ubak teungku jih. jihnyan meubacut pih hana muphom tutoe haba yonatan nyan, teuma yonatan deungon nabi daud kheueh nyang muphom haba nyan. oh

lheuehnyan yonatan laju geubri alat peumanah geuhnyan ubak aneuk nyan dan geuyue namiet nyan jiwoe u banda. oh ka leupah aneuk nyan jijk, nabi daud laju geuteubiet di likot sinamon batee nyang meutamon nyan, laju geusujut lhee goe. bah kheueh gobnyan meunan cit yonatan sabe-sabe geumo bak watee awaknyan lam keuadaan meuwa-wa sira geumucom. keuseudehan nabi daud leubeh rayeuk nibak keuseudehan yonatan. oh lheuehnyan geupeugah kheueh le yonatan ubak nabi daud, "seumoga po teu allah geutulong droeneuh. tuhan teuma geujamin bahwa geutanyoe dan keuturonan geutanyoe sabe geumat ubak janji geutanyoe dikeue po teu allah." oh ka ltheueh nyan geujak kheueh laju nabi daud, dan yonatan pih geuwoe u banda. teuma geujak kheueh laju nabi daud ubak teungku imeum ahimelekh di nob. deungan rasa that teukeujot ahimelekh laju geuteubiet geujak meurumpok ngon nabi daud dan geutanyong laju ubak gobnyan, "peubuet tajak keunoe sidroe gata mantong?" geujawueh le nabi daud, "ulon ka geubri saboh tugaih le teungku raja dan geutam tugaih nyoe teupeugah ubak soe mantong. sabab nyan aneuk buah ulon ka ulon yue preh bak saboh teumpat. meuah, jinoenyoe ulon keuneuk teumanyong, peuna peunajoh nyang na nibak bapak? neubri kheueh laju ubak ulon ruti limong boh atawa peue mantong nyang na disinoe." laju geupeugah le teungku imeum nyan, "bak ulon hana ruti nyang biasa, nyang na hanya ruti keureubeuen; gata jeuet tacok rutinnyan, asai aneuk buah gata hana jipubuet buet meusituboh nyang ban baro-baro nyoe." geujawueh le nabi daud, "ka teuntée awaknyan hana jipeubuet hainyan, meunyoé awaknyan lam tugaih, aneuk buah lon sabe jijaga mangat awaknyan gleh meunurot ajaran agama, padahai nyan na kheueh keu tugaih-tugaih biasa; peuteuk lom tugaih nyang khusus lagee nyoe bagoe!" dan le imeum nyan laju geujok ubak nabi daud ruti keureubeuen nyan, sabab nyang na bak gobnyan na kheueh ruti nyang teupeukeureubeuen ubak po teu allah, dan ka teurueng nibak miseubah keuteugantoe ngon ruti baro. (keubetolan, doeg ureueng edom, ulee kawan nyang rabe beulatang peulara raja saul na disinan nibak uroe nyan, ureueng nyan jijk keunan keujijk peupunoh sapeue-sapeue keuwajaban agama jih.) oh lheuehnyan geutanyong kheueh le nabi daud ubak ahimelekh, "peu kheueh bak bapak na neukeubah kapak atawa peudeueng nyang jeuet ulon peuguna? peurintah po raja nyan keubiet meudab-dab that nyang kheueh jeuet ulon jak keunoe deungan teugeusa-geusa hana hasa le lon jakcok peudeueng atawa sinjata nyang laen." geujawueh le ahimelekh, "nibak ulon na lon keubah peudeueng goliat, ureueng filistin nyang gata poh mate nibak panton ela nyan; peudeueng nyan na di likot efod, balot lam ija. meunyoé gata peureulee, cok kheueh, sabab nyan kheueh nyang na sinjata disinoe." seout nabi daud, "peudeueng nyan peudeueng nyang paleng get bansaboh nanggro, neujok kheueh nyan ubak ulon!" bak uroenyang cit teuma nabi daud geupulkueng nibak raja saul, laju trok ubak akhis raja banda gat. ubak akhis jipeugah le peugaweé gobnyan lagee nyoe, "kon kheueh jihnyoe nabi daud, raja nibak nanggroé jih? dan kon kheueh keujih nyan

bubena ureueng inong jimeunari-nari sira jimeunyan yoe lagee nyoe, 'saul jipoh mate meuribee musoh, teuma nabi daud meuploh ribee musoh?' " tutoe haba nyan keubiet that jeuet keupikieran nabi daud, dan gobnyan ka jeuet teumakot that-that keu raja akhis. le sabab nyan, dikeue ureueng rame nabi daud pura-pura pungoe. watee awaknyan jicuba keuneuk jiteun gobnyan, nabi daud laju geupeudeuh droe lagee ureueng pungoe; gobnyan geugaro-garo pintoe banda dan nibak babah gobnyan geupeubiyeu mantong ie babah geuh meulileh bak janggut geuh. le akhis laju geupeugah ubak peugawee jih, "peu kheueh hana deuh gata ngieng bahwa ureueng nyan pungoe? keupeue gata ba keunoe? peu kheueh mantong kureueng ureueng nyang hana waraih bansikeulileng lon, sampoe gata ba lom sidroe teuk ureueng pungoe u rumoh lon nyoe?" oh lheuehnyan nabi daud laju geutinggi banda gat dan geujak musom u dalam guha to ngon banda adulam. bak watee aduen-aduen gobnyan dan banmandum keuluwarga gobnyan jideungoe gobnyan na disinan, jijk kheueh awaknyan ubak gobnyan. meunan cit deungan ureueng-ureueng nyang teutindeeh, nyang na utang bak gob, dan nyang meuras a hana puih, banmandum nyan meugabong deungan nabi daud, dan nabi daud jeuet keupeumimpenn awaknyan. jeumeulah peungikot nabi daud nyan na kira-kira 400 droe. nibak guhanyan nabi daud laju geujak u mizpa di moab dan geupeugah laju ubak raja nanggroé moab, "neupeu idhin kheueh bapak dan mak ulon tinggai nibak teungku po, sampoe ulon teupeue peue meukeusut po teu allah ateueh ulon." oh lheuehnyan ureueng syiek jihnyan jiba laju meuhadab ubak raja di nanggroé moab, dan awaknyan teutab na disinan simantong nabi daud geumusom didalam guha. bak siuroe na sidroe nabi nyang nan jih gad jijk ubak nabi daud dan geupeugah, "bek tatinggai di dalam guha nyoe, tajak kheueh laju deungan bubagaih u tanoh yehuda." dan geujak kheueh nabi daud dan geutamong teuma u dalam uteuen keret. bak siuroe raja saul teungoh geudeuk-duek di miyueb bak tamariska di ateueh buket di gibeá; bak jaroe gobnyan geureugam tumbak seudangan banmandum peuwira gobnyan jidong ngon jijaga ban seukeulileng geuh. bak watee geudeungoe teumpat nabi daud dan aneuk buah gobnyan ka jitupat, laju geupeugah ubak dumna ulee balang peuwira jih, "deungoe kheueh nyoe, hai ureueng-ureueng benyamin! peu kheueh si daud nyan teuma jibri ubak gata blang dan lampoh anggo? peu kheueh gata banmandum teuma jiangkat jeuet keu peuwira dalam tantra gobnyan? nyang kheueh sabab jih gata nyoe ka sipakat tajak lawan ulon dan hana meusidroe pi nyang tatem peugah ubak ulon bahwa aneuk ulon keudroe ka jidong blah si daud nyan? hana meusidroe pih nibak gatanyoe nyang tapike keu untong ulon atawa tapeugah ubak ulon bahwa nabi daud, aneuk buah ulon keudroe, bak saat nyoe teungoh jipreh watee keu ji peumate ulon, dan bahwa aneuk ulon si yonatan ka jibri lurong ubak si daud nyan!" doeg si ulee kawan tukang meurabe beulatang peulara raja saul, bak watee nyan na cit disinan meusajan deungan bubena ulee balang saul, laju geupeugah le doeg, "ulon ka ltheueh ulon kalon nabi daud geujak ubak ahimelekh aneuk ahi-

tub di nob. ahimelekh laju geulakee peutunyok ubak tuhan keuhai peue nyang haroh geupeubuet le nabi daud. seulaen nibak nyan nabi daud geubri teuma ngon beukai peunajoh nyang seb lom geubri teuma ubak gobnyan peudeueng goliat, ureueng filistin nyan." laju raja saul geuyue hoi teungku imeum ahimelekh dan banmandum wareh kawom gobnyan nyang jeuet keu imeum di nob; teuma le teungku-teungku imeum nyan laju jijak meuhadab ubak raja saul. geupeugah le raja saul ubak ahimelekh, "tadeungoe kheueh nyoe, hai aneuek ahitub!" geujaweueb le teungku imeum nyan, "get, teungku amphon." geutanyong le raja saul ubak gobnyan, "pakon gata sapeue that angkok deungon si daud talawan ulon? pakon gata jok beukai bak jih deungon ruti meunan cit gata jok peudeueng dan talakee peutunyok ubak po teu allah? jadi jimoenyoe jihnyan ka jilawan ulon dan teungoh jipreh watee keu jih keuneuk peumate ulon." laju ahimelekh geujaweueb, "teuma bukon kheueh nabi daud nyan panglima amphon raja nyang paleng seutia? dan gobnyan na kheueh meulintee teungku amphon, ulee peungawai droe keudroe teungku amphon, dan get that jihoreumat le mandum ureueng didalam meuligoe amphon. beutoi, ulon ka lon lakee peutunyok nibak po teu allah keu gobnyan, teuma bukon kheueh nyang phon-phon that hai nyan ulon peubuet. keuhai ka mupakat keuteulawan teungku amphon, bek kheueh neutudoh ulon atawa soe mantong dalam keuluwarga ulon. ulon hana lon teupeue sapeue keuhai nyan!" teuma geupeugah le raja, "ahimelekh! droeneueh dan banmandum wareh kawom droeneueh haroh mate." laju gobnyan geupeurintah ubak banmandum peungawai geuyue dong to ngon gobnyan, "ayo, gata poh mate banmandum imeum-imeum tuhan nyan! awaknyan ka jimeusikutu deungon nabi daud. awaknyoe jiteupeu bahwa si daud nyan ka jipeuplueng droe, teuma awaknyoe hana jitem peugah hainyan ubak ulon." teuma le ureueng peungawai nyan hana jitem poh teungku-teungku imeum nyan. sabab nyan geupeugah kheueh le raja saul ubak doeg, "ayo, bagaihi! gata mantong nyang poh awaknyan!" teuma laju jimaju doeg dan jipoh mate kheueh banmandum teungku imeum nyan. bak uroenyang doeg nyan ka jipoh mate lapan ploh limong droe teungku imeum nyan nahak jingui bajee efod. meunan cit saul geupeurintah laju mangat jipoh mate banmandum peunduduek nob, banda teupat tinggai teungku imeum nyan; ureueng agam, ureueng inong, aneuek-aneuek manyak, meunan cit deungon leumo, keuleudee dan bubiri, banmandum nyan jipeuhabeh nyawong jih. teuma abyatar, sidroe lamkawan aneuek-aneuek ahimelekh nyang meuhase leupah nibak bahaya mawot nyan. gobnyan laju jipeuplueng droe ubak nabi daud, laju jipeugah bahwa saul ka habeh geupoh mate bubena teungku imeum tuhan. dan geupeugah kheueh le nabi daud ubak gobnyan, "bak watee ulon kalon doeg disinan nibak uroe nyan, ka ulon duga bahwa jihnyan pasti jimeungadu ubak raja saul. le sababnyan, ulon kheueh nyang meutanggung jaweueb ateuah mate banmandum kawom syedara gata. tinggai kheueh gata sajan ulon dan bek teumakot. saul jikeuneuk poh mate gata, teuma meunan cit jihnyan

jikeuneuk poh mate ulon. le sababnyan, gata aman di teupat ulon." bak si uroe geupeugah ubak nabi daud bahwa ureueng filistin jijak prang banda kehila dan jirampok gandom nyang ban teukoh diblang. dan geuteumanyong kheueh gobnyan ubak tuhan, "peu kheueh ya tuhan jeuet ulon jak prang ureueng filistin nyan?" "nyoe, beutoi," geujaweueb le tuhan, "gata prang kheueh laju awaknyan dan tapeuseulamat kheueh peunduduek kehila." teuma aneuek buah nabi daud jipeugah ubak gobnyan, "nyang na disinoe, yehuda, geutanyoe ka lumpah that yo ngon teumakot; peu kheueh lom meunyo geutanyoe haroh tajak prang tantra fisitin di kehila." sabab nyan nabi daud sigoe teuk geulakee peutunyoe nibak tuhan, dan tuhan geujaweueb, "bek khawate teuh. prang kheueh laju banda kehila nyan, sabab tantra filistin nyan keuneuk lon seurah ubak gata." teuma geujak kheueh laju nabi daud dan aneuek buah gobnyan u kehila laju geuprang dan geupoh mate ureueng filistin nyang lumpah le, dan geureupah laju beulangang peulara awaknyan. meunan kheueh cara jih nabi daud geupeubeubaih peunduduek banda nyan. bak watee abyatar aneuek ahimelekh jipeuplueng droe ubak nabi daud, dan jijak meusajan nabi daud u kehila, gobnyan geuba sajan efod. watee teubritee ubak saul bahwa nabi daud na di kehila geupike le saul, "nabi daud nyan ka geuseurah le po teu allah ubak ulon. gobnyan ka teujeubak sabab ka geutamong u dalam banda nyang meupageue beuton dan meupintoe geureubang." laju raja saul geukrah bubena tantra gobnyan dan geutuju laju u kehila keuneuk geujak keupong nabi daud meusajan ngon aneuek buah gobnyan. teuma nabi daud ka geuteupeue bahwa ka na niet jeuhet keu gobnyan. sabab nyan gobnyan laju geupeugah ubak teungku imeum abyatar, "neuba kheueh laju efod nyan keunoe." laju geumeudoa kheueh nabi daud, "ya, tuhan, po teu allah israel, ulon deungoe bahwa saul ka na niet keuneuk jak u kehila dan geupeuhanco banda nyan sabab le ulon, hamba droeneueh. peu kheueh beutoi haba nyang ulon deungoe nyan? tuhan, po teu allah israel, neupeugah kheueh nyan ubak ulon." tuhan geujaweueb, "nyoe, saul keuneuk teuka." laju geutanyong le nabi daud, "peu kheueh wareuga kehila jikeuneuk seurah ulon deungon aneuek buah ulon ubak saul?" teuma tuhan geujaweueb, "nyoe." laju nabi daud deungon aneuek buah gobnyan na kira-kira 600 droe, geutinggi laju kehila dan meukeulana laju nibak saboh teupat u teupat nyang laen. bak watee saul geudeungoe bahwa nabi daud ka geujak nibak kehila, gobnyan geupeubateue laju reuncana geujak prang banda kehila nyan. oh ka lheurehnyan nabi daud geutinggai di dalam guha-guha nyang na di gunung-gunong di padang pasi zif. gobnyan sabe jilet-let le raja saul, teuma tuhan hana geuseurah nabi daud nyan ubak raja saul nyan. bahpih lagee nyan bak droe nabi daud teutab na rasa teumakot, sabab raja saul ka bulat teukat keuneuk geupoh mate gobnyan. bak saboh watee nabi daud na di hores, dipadang pasi zif. yonatan laju geujak keunan keu geujak meurumpok ngon gobnyan guna keuneuk geupeukong peucaya gobnyan bahwa geuhnyan na kheueh geulin-dong le po teu allah. geupeugah le yonatan ubak gob-

nyan, "bek teumakot, droeneuh hana rhot u dalam jaroe bapak ulon. gobnyan geuteupeue that-that bahwa droeneuh kheueh nyang teuma jeuet keuraja israel dan bahwa ulon teuma meuteume teupat duek di miyueb keududukan droeneuh." oh lheu-
nyan nabi daud dan yonatan geupeugot lom peujan-
jian meusahabat dikeue tuhan. oh ka lheu-nyan yonatan laju geujakwoe u rumoh droe geuh, dan nabi daud teutab tinggai di hores. oh lheu-nyan na meupadub droe nibak zif jijak meuhadab ubak raja saul di gibe-
a dan jipeugah, "nabi daud na geumusom di daerah kamoe di dalam guha-guha nyang na to deungon hores, di ateu-
eh buket hakhila di siblai-
h u seulan padang pasi yehuda. kamoe meuteupeue, bahwa teungku amphon ka treb that neumeuniet keuneuk drob gobnyan; sabab nyan, tateuka kheueh u daerah kamoe. kamoe jamin bahwa teungku amphon pasti hase neudrob gobnyan." geujaweeb le raja saul, "seumoga gata geubri beureukat le tuhan kareuna ka tapeubuet nyang jroh keu ulon! tajak kheueh laju, dan tapeu pasti nyang paih; tapeureksa kheueh deungon biet-biet dipat nabi daud nyan na dan soe nyang ka leumah jingeng gobnyan disinan. ulon deungoe bahwa jihnyan get that lisek. le sabab-
nyan tajak peureksa kheueh deungon teuliti guha-guha nyang ka lheu-
jeuet keu tempat jihnyan musom, oh lheu-nyan tagisa kheueh beureujeang keunoe mangat tajak lapor hai nyan ubak ulon. oh lheu-nyan ulon jak laju meusigoe-sigoe deungon gata, dan meunyo-
e jihnyan mantong na di wilayah nyan, pasti jihnyan ulon mita, bahpi haroh ulon peuteung bayeueng ban saboh yehuda!" dan jibeurangkat kheueh laju ureueng nyan jiwoe u zif leubeh awai nibak raja saul. bak wate-
nyan nabi daud dan aneuk buah gobnyan mantong na di padang pasi maon, di panton nyang sungue di daerah seulan padang pasi yehuda. tantra raja saul dan gobnyan keudroe laju geuteuka keu geujak mita nabi daud, teuma na ureueng jijak britee hainyan ubak nabi daud, akhe jih gobnyan laju geujak u gunong batee nyang na di padang pasi maon dan geutinggai laju disinan. oh ka geuteupeue le raja saul hainyan, gobnyan bagaih that geujak tiyeub nabi daud. raja saul dan tantra gobnyan geujak rot bineh gunong siblai-
h rot nyoe dan nabi daud dan aneuk buah gobnyan geujak teuma rot bineh siblai-
h jeh. nabi daud deungon bagaih-
bagaih geupeu lheu-
h droe nibak raja saul nyang ka geupeuphon keupong teupat nyan keuneuk geudrob awaknyan. teuma deungon hana teusangka-
sangka teuka kheueh sidroe ureueng utosan jijak meuhadab ubak raja saul dan laju jipeugah, "beubagaih laju teungku amphon neuwoe! ureueng filistin ka jiprang nanggro-
e geutanyoe!" raja saul pih laju geupioh geutiyeub nabi daud, dan geuwoe ngon geujak laju muprang deungon ureueng filistin. nyang kheueh sabab jih teupat nyan geuboh nan gunong peumisah. geubeudoh di sinan nabi daud laju geujak u daerah en-gedi, lagee lazem jih laju geumusom di dalam guha-guha. bak watee raja saul ban-
mantong geuwoe nibak muprang geujak lawan ureueng filistin, gobnyan geuteurimong laju hana bahwa nabi daud na di padang pasi to that deungon en-gedi. ban geudeungoe nyan raja saul deungon reu-

jang that geupileh lhee ribee droe tantra nibak bansaboh israel, oh lheu-nyan laju geubeurangkat geujak mita nabi daud dan aneuk buah gobnyan di siblai-
h u timu gunong batee kameng uteuen. dan watee teungoh geujak nyan raja saul laju trok ubak meupadubboh uempung bubiri nyang to ngon bineh rot. disinan na teuma saboh guha, dan raja saul geuta-
mong laju u dalam guha nyan keuneuk geujak u kru-
eng rayeuk. keubeutulan nabi daud dan aneuk buah gobnyan pih na disinan teungoh geumusom, teuma jioh bacut u dalam. dan jipeugah kheueh le aneuk buah nabi daud ubak gobnyan, "nyoe kheueh keuse-
umpatan nyang paleng get keu droeneuh hai bapak! bukan kheueh tuhan ka geupeugah ubak droeneuh nyang lagee nyoe, "musoh gata ulon intab ubak gata, tapeusan-
eut kheueh ban galak ate gata ateu-
eh jih-nyan!" oh lheu-nyan nabi daud sira geumeueue ngon teuot geupeurab laju ubak raja saul nyang teungoh geu toih ek nyan. deungon cara seungab-seungab laju geukoh bacut ija bajee jubah raja saul nyang meuhue-hue meureula ateu-
eh tanoh nyan. teuma oh lheu-nyan, nabi daud meuras-
a ka meusal-
ah sabab gobnyan ka geupeubuet hainyan. gobnyan geupeugah ubak aneuk buah geuh, "seumoga tuhan geujaga bek sampoe ulon peubuet jeuhet ateu-
eh raja ulon nyang ka geupileh le tuhan. mubacut pih hainyan hana jeuet ulon peusak-
et ate gobnyan, sabab gobnyan raja nyang geupileh le tuhan!" meunan kheueh carajih nabi daud geupeuteunang ate aneuk buah geuh, dan hana geupeu idhin aneuk buah geuh nyan jijak he-
untam raja saul. oh ka lheu-nyan geuboi-
h hajat rayeuk nyan raja saul laju geubeudoh dan geutinggai laju guha nyan, laju geujak lom teuma. nabi daud pih laju geuteubiet lam guha nyan dan geumeuhoi laju raja saul dari likot, "hoi, teungku amphon!" raja saul laju geupaleng u likot dan nabi daud pi laju geusujut ubak tanoh sira geubri horeumat sira geupeugah, "pakon teungku amphon neudeungoe haba gob nyang jipeu-
gah bahwa ulon keuneuk peuceulaka teungku amphon? jinoenyo-
e teungku amphon ka neurasa keudroe bahwa di dalam guha bunoe, tuhan ka geuseu-
rah teungku amphon ubak ulon. ulon ka jibujuk le sidroe-droe ureueng mangat ulon poh mate teungku amphon, teuma hainyan ulon tulak. ulon jaweeb ubak awaknyan bahwa ulon hana lontem peusak-
et raja ulon nyang ka geupileh le tuhan. neukalon kheueh nyoe, hai bapak ulon! neukalon kheueh ujong bajee jubah teungku amphon nyang ulon koi-
h nyoe! nyang seubeuna jih ulon hase ulon peumate teungku amphon bak wate-
nyan, teuma hainyan hana ulon peubuet cuma ulon koi-
h mantong bacut ujong bajee jubah teungku amphon. le sababnyan, deuh kheueh bahwa ulon hana mubacut pih na niet dalam ate ulon keu meukeusut doraka u ateu-
eh teungku amphon. teuma teungku amphon hana pioh neutiyeub-
tiyeub ulon keuneuk neupeu mate ulon, bahpi ulon nyoe hana meusal-
ah mubacut pih ubak teungku amphon. seumoga tuhan kheueh nyang puputoh soe kheueh nibak geutanyoe nyang meusal-
ah! tuhan kheueh kira jih nyang balai-
h buet teungku amphon ateu-
eh ulon, teuma di ulon hana mubacut pih na niet ulon peusak-
et teungku amphon. teungku kon neuteupeue pribasa kuno nyoe, "buet nyang jeuhet

teuma jipeubuet le ureueng nyang jeuhet.' sabab nyang kheueh ulon hana niet ulon peuceulaka teungku amphon. neukalon kheueh ulon ateueh ulon nyoe nyang jikeuneuk poh le raja israel! neungieng kheueh ulon nyoe nyang jilet-let sabe! ulon nyoe na kheueh lagee saboh asee mate, atawa lagee saboh gutee. tuhan jeuet keu hakem teungku amphon ngon ulon. seumoga gobnyan geupeureksa peukara nyoe, dan geubila ulon dan geupeuseulamat ulon nibak teungku amphon." oh ka seulousee nabi daud geupeugah haba nyan, geupeugah kheueh le raja saul, "droe kheueh nyan, hai daud, aneuek ulon?" dan geumo kheueh laju raja saul nyan. dan geupeugah lom ubak nabi daud, "droeneueh nyang beutoi hai, aneuek meutuawah, dan ulon kheueh nyang salah. jeuhet ulon ateueh droe kheueh ka tabalaih deungon buet nyang jroh. bak uroenyoe gata ka tatunyok bahwa gata meukeusut jroh that ateueh ulon, sabab gata hana tapoh ulon, bah kheueh tuhan ka geuseurah ulon ubak gata. jareueng meuteume ureueng nyang meurumpok deungon musoh jihnyan udeb! le sababnyan, seumoga tuhan geubri beureukat ubak gata le sabab buet gata nyang get ateueh ulon nibak uroe nyoe! jinoenyoe ulon ka yaken bahwa gata teuma jeuet keuraja ateueh israel dan bahwa keurajeuen israel teutab teuga dimiyueb peumeurintahan gata. jinoenyoe tameujanji kheueh ubak ulon deumi tuhan, bahwa gata hana tapeumate keuturonan ulon, dan meunan cit hana teuma tasampoh nan keuluwarga ulon!" dan geumeusumpah kheueh laju nabi daud keu geutaat ubak banmandum nyan. oh lheueh nyan geuwoe kheueh laju raja saul u rumoh gobnyan, dan nabi daud ngon aneuek buah geuhpi laju teuma geuriwang ubak teumpat gobnyan musom. hana padubna treb teuma oh lheuehnyan samuel meuninggai donya. bansaboh nanggroe israel meusapat keujijak seutot upacara meukabong, oh lheuehnyan gobnyan teupemiuyeb di rumoh geuh keudroe di rama. oh lheueh nyan nabi daud geujak u padang pasi paran nan jih. lam banda maon na sidroe ureueng agam nibak kawom kaleb, nan jih nabal. gobnyan na tanoh teumpat rabe beulatang peulara to ngon banda karmel. ureueng nyan kaya lumpah na dan na geupeulara 3.000 boh bubiri dan 1.000 boh kameng. abigail nyan peumumoh gobnyan carong dan lagak that rupa, teuma nabal pi-e jih gasa that dan peurangoe jih brok. baksiueroe nabal teungoh jigunteng bulee bubiri di karmel. watee nabi daud nyan mantong na lam padang pasi geudeungoe hai nyan, gobnyan geuyue laju ubak siploh droe peumuda mangat jijak u karmel, keujijak meurumpok ngon nabal mangat jijak peutrok saleuem nabi daud keu jih nyan. gobnyan geuyue awaknyan mangat jipeugah lagee nyoe ubak nabal, "saleuem seujahtra keu gata dan keuluwarga gata dan banmandum atra beunda gata. ulon kudeungoe bahwa gata teungoh tagunteng bulee bubiri gata keudroe. beutateupeue kheueh bahwa tukang-tukang meurabe nyang na lam daerah kamoe hantom na kamoe peukaru, dan meunan cit hantom na awaknyan geumadoh peupepe mantong yoh awaknyan mantong na di karmel. cuba gata tanyong bak awaknyan, ka pasti awaknyan jipeubeutoi keuhai nyan. le sababnyan, lon meuharab

adak jeuet aneuek buah ulon gata teurimong deungon get lam rumoh gata, sabab kamoe meuteuka nibak uroe nyang rayeuk nyoe. tajok kheueh teuma ubak namiet-namiet nyoe meunan cit keu lon cit teuma. nabi daud, rakan jroh gata, peue-peue mantong meunurot keurilaan ate gata." oh ka trok u karmel le aneuek buah nabi daud laju jipeutrok peue nyang ka geupeugah le nabi daud nyan ubak nabal ateueh nan nabi daud, lheuehnyan awaknyan laju jipreh. teuma nabal jijaweueb, "daud? soe jih nyan, soe nyan aneuek isai? hantom lom lon deungon nan nyan! silawet nyoe le that-that namiet nyang jiplueng droe nibak teungku po jih lam nanggroe nyoe! pane na jeuet ulon cok ruti ngon ie jieb lon, meunan cit eungkoet sie nyang ka lon keubah keu tukang gunteng bulee bubiri lon, dan atranyan laju ulon jok keu ureueng nyang hana jeulaih asai usui jih!" le sababnyan aneuek buah nabi daud nyan laju jigisa lom ubak nabi daud sira jijak peugah haba nabal nyan ubak gobnyan. "lat kheueh laju peudeueng gata bak keuieng teuh maseng-maseng!" peurintah nabi daud. dan bagai that aneuek buah gobnyan jitaat ubak peurintah nyan. meunan cit nabi daud geulat cit peudeung geuh bak keuieng gobnyan dan laju geubeurangkat leubeh kureueng na 400 droe aneuek buah geuh, nyang 200 droe tinggai keu nyang keumiet barang-barang. dan keu abigail purumoh nabal, ka jibritee le sidroe peulayan nabal lageenyoe, "peu kheueh po cut deungoe? nabi daud ka geukirem na padubdroe utosan nibak padang pasi keujijak bri saleuem keu teungku tanyoe, teuma le teungku po ka seub ngon geuteunak awaknyan. padahai awaknyan get that keu kamoe. hantom na kamoe jipeukaru, dan meunan cit hantom na kamoe geumadoh meusapeusapeue pih watee kamoe meurakan ngon awaknyan lam padang pasi. uroe malam awaknyan jijaga kamoe watee kamoe meurabe kameng ngon bubiri to-to ngon awaknyan. le sababnyan, peutimang kheueh hai nyoe, dan cok kheueh punutoh peue nyang hase pocut peubuet. sabab ka pasti na meunalah ateueh teungku po geutanyoe dan banmandum keuluwarga jih. teungku po tanyoe keubit kreueth that elee nyang kheueh sabab gobnyan hana hase tameututoe haba!" ban jideungoe meunan le abigail geucok dua reutoih boh ruti, dan baluem kulet peunoh meuasoe ngon ie anggo, limong boh bubiri teupanggang, tujoh blah kilo gram gandom goreng, 100 boh tangke boh anggo tho dan 200 boh juadah ara. banmandum nyan laju teupeudieng ateueh keuleudee-keuleudee awaknyan. dan jipeugah kheueh abigail nyan ubak peulayan-peulayan gobnyan, "gatajak kheueh beuawai nibak ulon; ulon kuseutot gata dilikot." teuma le ureueng inong nyan hana geupeugah sapeue ubak lakoe geuh. abigail laju jipasang ateueh keuleudee jih, dan watee gobnyan ka trok bak saboh rot nyang meukuwet nibak bineh gunong, laju meusiliseh gobnyan ngon nabi daud dan aneuek buah gobnyan nyang teungoh jitreun jijak ubak arah awaknyan. bak wateanyan nabi daud teungoh geupike, "hana guna ulon jaga atra awaknyan lam padang pasi! hana meubacut pih nyang gadah atra jihnyan; dan jinoenyoe jibalaih buat lon nyang jroh ngon nyang jeuhet! bah kheueh po teu allah geupoh mate ulon meunyoe hana ulon

mate banmandum ureueng agam nyang na disinan sigohlom mata uroe jiteubiet!" watee abigail geukalon nabi daud, gobnyan laju geutreun ateuhe keuleudee geuh dan laju jisujut bak gaki nabi daud, dan geupeugah ubak gobnyan, "teungku po, neutem kheueh deungoe ulon meututoe! bak kheueh buet nyang salah nyan ulon tanggung keudroe! bek kheueh teungku po pike keu nabal, ureueng nyang hana meuguna nyan! jihnyan ureueng bangai – saban deungon makna nan jih. ulon hana lon ngieng utosan-utosan nyang teungku kirem nyan. po teu allah ka geutam teungku po neujak tungbila dan neupoh mate banmandum musoh-musoh teungku po. dan jinoenyoe teungku po, deumi nan tuhan nyang udeb, ulon meusumpah, bah kheueh naseb banmandum musoh teungku po dan soe mantong ureueng nyang keuneuk peuceulaka teungku po saban lajee naseb nabal. teurimong kheueh bungong jaroe nyang kamoe ba nyoe keu teungku po, dan aneuk buah teungku po. peumeuah kheueh ateuhe buet kamoe nyang lalee. tuhan pasti geupeujeuet teungku po dan keuturonan teungku po jeuet keuraja ateuhe israel, sabab teungku po neumprang keu tuhan; dan teungku po hana neupubuet buet nyang jeuhet siumu udeb. meunyoey na sidroe ureueng jijak seurang teungku po dan jicuba keuneuk poh mate teungku po, teungku po pasti geulindong le tuhan po teu allah lajee atra nyang jijaga le ureueng po jih. teuma musoh teungku po teuma geurhom jioh-jioh le tuhan, jirhom le tukang geulawa. tuhan teuma geupubuet banmandum nyang jroh nyang ka geupeujanji ubak teungku po, dan hana treble teungku po teupeujeuet keu raja ateuhe israel. bak wateenyan teungku po teuma teuingat bahwa teungku po hana neupoh mate ureueng laen deungon hana meusabab atawa neumeuhakem keudroe deungon nyan teuma teungku po hana peureulee meurasa seudeh atawa meunyeusai. dan meunyoey tuhan ka geubri beureukat ateuhe teungku po, bek kheueh neutuwoe ubak namiet teungku po nyoe." dan geupeugah kheueh le nabi daud ubak inong nyan, "teupujoe kheueh tuhan, allah israel, nyang ka geukirem gata tajak meurrumpok ngon lon nibak uroenyoe! teupujoe kheueh ateuhe keubijaksanaan gata dan teupujoe kheueh teuma ateuhe gata keudroe sabab ka tapeuteng langkah ulon keu lon jak pumate ureueng laen dan lon meuhakem keudroe. tuhan ka geupeuteun ulon lon peubuet jeuhet ateuhe gata. deumi tuhan po teu allah israel nyang udeb, meunyoey gata hana reujang tajak meurrumpok ngon lon, ka pasti banmandum aneuk buah nabal ka mate bak watee mata uroe jiteubiet!" oh ltheuhnyan nabi daud laju geuteurimong peue nyang ka jiba le abigail keu gobnyan, dan laju geupeugah ubak jihnyan, "woe kheueh u rumoh gata dan bek khawate. nyang gata lakee ulon teurimong." watee abigail jigisa ubak nabal, rupari na khanuri rayeuk lam rumoh jihnyan, lajee khanuri lam rumoh raja. dan le sabab nabal ka mabok jimeusukaria, ubak jihnyan heuna jipeugah sapeue le peurumoh gobnyan sampoe oh singoh bungoh nyan. beungoh nyan, watee nabal ka hana mabok le, peurumoh jihnyan laju jipeugah ubak nabal nyan banmandum buet-buet nyang jeuhet nyan. le sabab nyan teuma nabal laju meuteume seurangan

jantong dan bansaboh tuboh jih ka jeuet keu lapee. na kira-kira siploh uroe teuma oh ltheuh nyan nabal jiteuka lom seurangan jantong nyang teuka nibak tuhan le sabab nyan gobnyan laju meuninggai donya. watee nabi daud geudeungoe bahwa nabal ka meuninggai donya, laju geupeugah lajee nyoe, "teupujoe kheueh tuhan! gobnyan ka geubalahi ateuhe nabal sabab jihina ulon, dan ka geupeuteun ulon nyoe bek sampoe ulon peubuet nyang jeuhet. tuhan ka geuhukom nabal sabab buet jih nyang jeuhet nyan." oh ltheuh nyan nabi daud geukirem utosan ubak abigail keuneuk geuseulangke gobnyan jeuet keupurumoh geuh. dan trok kheueh laju utosan nabi daud ubak ureueng inong nyan di karmel dan jipeugah ubak inong nyan, "kamoe geuyuejak le nabi daud meuhadab pocut, sabab gobnyan geuyue jak lakee pocut mangat jeuet keubinoe gobnyan." abigail laju geubeudoh dan geusujut sira geupeugah, "ulon nyoe namiet nabi daud, ulon kutem rhaq gaki namiet gobnyan." oh ltheuhnyan meukeumah kheueh laju abigail keuneuk geujak ngon awak seulangke nyan. gobnyan geu-ek ateuhe keuleudee geuh keudroe dan jireng teuma le timong droe dendayang inong, geujak kheueh gobnyan geuseutot utosan nyang geukirem le nabi daud, deungon nyan teuma inong nyan ka jeuet keupurumoh nabi daud. sigohlom nyan nabi daud ka geumeukawen ngon ahinoam di yizreel, dan jinoenyoe abigail pih ka jeuet keupeurumoh gobnyan. wateenyan cit teuma, saul ka geupeukawen mikhal, aneuk inong gobnyan, na kheueh peurumoh nabi daud, deungon palti bin lais nibak banda galim. bak siuroe ureueng-ureueng dari zif jijak ubak saul di gibeat dan jijak britee ubak raja saul nyan bahwa nabi daud teungoh geumusom di gunung hakhila nibak bineh padang pasi yehuda. teuma deungon reujang that raja saul laju geubeurangkat sira geuba sajan na lhee ribee tantra nyang ka teupileh di bansaboh nangroe israel, geujak laju u padang pasi zif keu geujak mita nabi daud. raja saul laju geupeudong khimah geuh nibak bineh jalan to that ngon gunung hakhila nyan. nabi daud nyang mantong na di padang pasi, geudeungoe bahwa raja saul teungoh geuseutot gobnyan dan ka sampoe u padang pasi. le gobnyan pih geukirem ureueng mangat jijak luem gobnyan, dan baro kheueh geuteupeue deungon pasti bahwa raja saul beutoi ka na disinan. deungon bagai that nabi daud geujak ubak khimah-khimah raja saul nyan dan oh ban trok keunan deuh laju geukalon khimah teupat raja saul teungoh geueh to deungon abner aneuk ner. khimah raja saul nyan na diteugoh-teugoh that, dan tantra gobnyan jipeudong khimah jih diban sikeulileng nyan. oh ltheuhnyan nabi daud geutanyong laju ubak ahimelekh nyang ureueng het nyan, dan ubak abisai syedara yoab (mak awaknyan na kheueh zeruya), "soe nyang beurani jikak tamong deungon ulon u dalam khimah raja saul?" ji jaweueb le abisai, "ulon!" teuma bak malam nyan cit teuma nabi daud dan abisai sira geumusom-musom ngon geuseuk-seuk bacut-bacut laju geupeurab ubak khimah raja saul, dan leumah laju geukalon raja saul nyan teungoh geu eh didalam khimah geuhnyan, seudangkan kapak gobnyan na teuglong meukeumat nibak tanoh to ngon bineh ulee gobnyan. seudangkan

abner dan pasokan geuhnyan ka habeh teungcut banmandum nibak sikeulileng raja saul. laju geupeugah le abisai ubak nabi daud, "po teu allah ka geuseurah musoh droeneuh ubak droeneuh nibak malam nyoe. neupeu idhin kheueh ulon mangat lon tob ngon kapak jih keudroe ubak gobnyan sampoe beusoit trok ubak tanoh, ulon poh gobnyan deungan sigoe tob, hana trok dua goe!" teuma nabi daud geupeugah, "bek gata peuteupeeh mubacut pih gobnyan! tuhan pasti geuhukom ureueng nyang jipeubuet jeuhet keu raja nyang geupileh le gobnyan. deumi tuhan nyang udeb, ulon ku teupeue bahwa singoh tuhan keudroe nyang poh mate raja saul nyan, meunyo ajai gobnyan ka trok, atawa pih meunyo gobnyan tiwaih didalam prang, kira jih tuhan geutham ulon – poh raja nyang ka geupileh le gobnyan! tacok kheueh mantong kapak gobnyan meunan cit deungan kendi geuhnyan oh lheureu nyang geutanyoe tajak laju nibak teumpat nyoe!" teuma nabi daud laju geucok kapak dan kendi raja saul nyan nyang na tou bineh ulee gobnyan, oh lheureu nyan laju geujak. hana meusidroe pih deuh jikalon hainyan atawa jiteupeue peue nyang ka teujadi, atawa pih teujaga nibak teungcut, sabab tuhan ka geupeuteungcut awaknyan banmandum teuh deungan meukanga. le nabi daud geujeumeurang u bineh panton nyang laen sampoe trok ubak pucak gunung, akhe jih gobnyan ka that jioh nibak khimah-khimah raja saul. oh lheureu nyan teuma geukuk kheueh laju le nabi daud ubak abner dan tantra saul, geupeugah, "abner! peu kheueh kah deungoe su ulon nyoe?" abner pih jikuk cit teuma, "soe kheueh ureueng nyang kuk-kuk nyan?" geujaweueb le nabi daud, "abner, bukan kheueh gata ureueng nyang paleng hibat di israel? pakon gata hana tajaga teungku amphon gata, baginda raja gata? banmantong na ureueng jitamong u dalam khimah gata keu jikajipoh mate teungku amphon gata. gata hana hase tapeujak tugaih gata, abner! deumi tuhan nyang udeb, gata banmandum patot mate, sabab hana tajaga teungku amphon gata, raja nyang ka geupileh le tuhan. cuba gata ngiang! dipat kheueh kapak raja gata? dipat teuma kendi nyang na teukeubah to ngon ulee raja?" raja saul geuturi keu su nabi daud, dan laju geutanyong, "peu kheueh gata nyan, hai aneuek ulon?" geujaweueb le nabi daud, "nyoe, beutoi, teungku raja." laju geupeugah lom, "pakon trok an uroenyoe teungku amphon mantong neutiyeub-tiyeub ulon? peu kheueh keusalahan ulon nyoe? teungku amphon, neudeungoe kheueh seumah sujut ulon nyoe. seandai jih tuhan nyang yue teungku amphon mangat ulon nyoe neulawan, tapeuna saboh peuseumahan keureubeuen mangat jeuet tapeu reuda beungeh gobnyan keu ulon. teuma meunyo nyang yue teungku amphon na kheueh manusia, seumoga ureueng nyang yue nyan geukutok le tuhan! sabab akibat nibak buet awaknyan, ulon ka teu use nibak tanoh atra tuhan dan teupaksa haroh teujak u nanggroe laen di teumpat nyan ulon haroh meueu ebadat ubak dewa-dewa aseng, bek kheueh neupeubiyeu ulon nyoe mate nibak tanoh gob, nyang that jioh nibak tuhan. keupeue guna jih raja israel geujak keu geujak tindeeh si aneuk gutee lagee ulon nyoe? keupeue guna jih gobnyan neutiyeub ulon bak lagee neulet manok uteuen?" geujaweueb le raja

saul, "ulon ka meusalah. gata woe kheueh hai daud, aneuek ulon! ulon hana teuma lon peubuet jeuhet le ateuh gata sabab gata ka tapeurela ulon udeb sampoe malam beuklam. pie ulon get that bangai. ulon biet-biet ka keulirul!" teuma nabi daud geujaweueb, "nyoe kheueh tungkat teungku amphon, neuyeu kheueh laju sidroe lamkawan tantra teungku amphon jeuet jikajicok keunoe. tuhan teuma geubri beureukat keu ureueng nyang seutia dan juoe. sabab bahpih nibak uroenyoe tuhan ka geuseurah teungku amphon keu ulon, teuma ulon hana meuniet meubacut pih ulon peubuet jeuhet ateuh teungku po, raja nyang ka geupileh le tuhan. le sababnyan, lagee teungku po ka ulon peubiyeu udeb nibak uroenyoe, meunan cit kira jih ulon geupelindong le tuhan dan geupeuleupah nibak sigala bahyal" dan geupeugah kheueh teuma le raja saul ubak nabi daud, "tuhan geubri beureukat keu gata, hai aneuek ulon! gata teuma meuhase nibak peue mantong nyang gata peubuet!" oh lheureu geupeugah nyan nabi daud laju geutinggai teumpat nyan dan laju geujak lom ho laen teuma, seudangkan raja saul geubeudoh disinan laju geuwoe u rumoh gobnyan. nabi daud geupike didalam ate gobnyan, "pakriban mantong bak si uroe dan watee nyang paih pasti raja saul jipoh mate ulon. jadi, hanale jalan nyang laen nibak ulon, seulaen ulon peuplueng droe u nanggroe filistin. deungan lagee nyan raja saul hana geumita le ulon di nanggroe israel nyoe, dan ulon pih aman." oh geupike nyang lageenyan nabi daud deungan ban nam reuthoe droe aneuek buah gobnyan laju geujak meurumpok deungan akhis aneuek moah, nyang mat keurajeuen di banda gat. teuma geutinggai kheueh teutab gobnyan deungan aneuek buah geuh nyang nam reuthoe droe nyan di banda gat, maseng-maseng awaknyan deungan keuluwarga droe geuh. nabi daud geuba sajan ban dua droe ureueng binoe geuh, ureueng inong nyan na kheueh ahinoam inong nibak yizreel, dan abigail, inong balee si nabal ureueng karmel. bak watee raja saul geudeungoe bahwa nabi daud ka geupeulueng droe u gat, gobnyan hana le geu useuha geujak drob gobnyan. laju nabi daud geu bri usui ubak akhis lagee nyoe, "meunyo teungku amphon meurasa seunang deungan ulon, neubri kheueh ubak ulon saboh banda nyang ubit di dalam gampong nyang sungue keu teumpat tinggai, sampoe namiet teungku amphon nyoe hana meunumpang di teumpat teungku amphon di ma banda nyoe." laju akhis geubri banda ziklag ubak nabi daud, dan nyang kheueh sabab jih ziklag jeuet keuhak milek raja-raja yehuda sampoe an jinoe. nabi daud tinggai di nanggroe filistin nyan nyang treb jih sithon peuet buleuen. sidub nyan treb nabi daud dan aneuek buah gobnyan ka kayem that geuprang ureueng gesur, ureueng girzi, dan ureueng amalek; bansa-bansa nyan ka treb that tinggai di wilayah nyan. awaknyan geuseureubu wilayah nyan sampoe trok u sur, dan laju sampoe u nanggroe meuse. bubena ureueng agam dan ureueng inong ka habeh geupoh mate, meunan cit geureupah laju bube nyang na beulatang peulara, bubiri, leumo, keuleudee, unta dan hana nyang tinggai trok ubak peukayan nyan pi geureupah bubena. oh lheureu nyan laju geugisa geujak meuhadab ubak akhis. me-

unyoe akhis jitanyong ubak gobnyan, "hoe neujak muprang bak uroe nyoe?" teuma nabi daud laju geupeugah ubak gobnyan bahwa geuhnyan ka geujak u bagian seulitan yehuda atawa u wilayah ureueng yerahmeel atawa u wilayah teumpat tinggai ureueng geni. hana meusidroe pih nibak daerah-daerah nyang geuprang nyan geupeubiyeu udeb, mangat bek nale ureueng di daerah nyan nyang hase jijak u gat jajak meulapor peue nyang sikeubiet jih ka geupubuet le nabi daud dan aneuek buah gobnyan. meunan kheueh buet nabi daud seumantong gobnyan tinggai di nanggroe ureueng filistin. teuma akhis geupeucaya ubak nabi daud dan geupike didalam ate gobnyan, "gobnyan keubiet that jibanci le bansa jih keudroe, sampoe jihnyan teupaksa jeuet keu namiet ulon siumu udeb." na meupadub treb teuma oh lheuehnyan di ureueng filistin jikrah lom pasokan jih keu jijak prang ureueng israel, dan akhis jipeugah ubak nabi daud, "teuntee droeneueh muphom droeneueh dan aneuek buah droeneueh haroh neumuprang neudong blaih ulon." geujaweueb le nabi daud, "nyan ka teuntee ya teungku amphon, eunteuk teungku amphon jeuet neukalon keudroe peue nyang hase jipeubuet le namiet teungku amphon nyan." laju geupeugah lom le akhis, "ka get meunyo meunan! droeneueh lom angkat jeuet keu peungawal ulon nyang teutab." samuel ka meuninggai donya, dan gobnyan jipeuratok ngon jipeuba-e le banmandum rakyat israel dan jipeukubu di rama, banda gobnyan keudroe. nepadub na treb nyang ulikot raja saul ka geu use di israel banmandum tukang tanueng nyang carong jingiang keutika meunan cit geu use teuma si tukang sihe nyang carong jihoi areuwah. teuma bak watee tantra filistin jimeusapat dan jipeudong khimah to ngon banda sunem, raja saul pih laju geupeusapat ureueng israel, dan awaknyan laju teuma jipeudong khimah nibak gunung gilboa. bak watee raja saul deuh geukalon tantra filistin nyan, gobnyan ka jeuet keu yo ngon teumakot that-that. laju gobnyan geulakee peutunyak ubak tuhan, teuma tuhan hana geujaweueb doa geuh nyan, bah kheueh nyan deungon meulumpo meunan cit deungon cara geungui urim dan tumim atawa pih meulalu nabi-nabi. sabab nyan raja saul laju geupeugah ubak dumna peungawai gobnyan, "tajak mita kheueh laju sidroe dukon nyang inong nyang carong jihoi areuwah, ulon teuma lonjak ubak jihnyan keu lonjak lakee peutunyak." awaknyan jijaweueb, "di en-dor na tabeb nyang lagee neupeugah nyan." le raja saul laju geumeunymar mangat bek jiteupeue le gob. deungon jiseutot le dua droe ureueng agam, geubeurangkut kheueh gobnyan dan trok kheueh teuma gobnyan u rumah nyang geumita nyan oh ka watee malam teuka. teuma geupeugah le saul, "gatahoh kheueh laju areuwah ureueng nyang teuma ulon teuh nan jih nyoe, dan tala-kee kheueh mangat jihnyan jitem ramai peue nyang teuma teujadi." ureueng tabeb nyan jijaweueb, "teuntee teungku pih neutepupeu bahwa raja saul ka geu use di israel banmandum dukon nyang carong meuramai dan nyang carong teuma jihoi areuwah. pakon teuma teungku neupeuceulaka ulon sampoe ulon neupoh mate?" le saul geumeusumpah. "deumi tuhan nyang udeb, ulon meujanji bahwa gata hana

teuhukom sabab tapeubuet hainyoe." ureueng nyan jitanyong, "areuwah soe kheueh nyang haroh ulon hoi keu teungku amphon?" geujaweueb le saul, "areuwah samuel." bak watee ureueng inong nyan geukalon samuel, gobnyan laju jita-uk dan jipeugah ubak raja saul, "keupeue teungku neu peungeuet ulon? teungku amphon kheueh rupari nyang raja saul nyan!" geujaweueb le raja saul, "bek ta-takot! tapeugah mantong peue nyang ka gata kalon!" ureueng inong nyan jipeugah, "deuh ulon ngieng roh na teuka nibak bumoe." geutanyong le raja saul, "pakriban hi jih?" geujaweueb le gobnyan, "na sidroe ureueng agam nyang ka tuha, gobnyan teuka deungon geungui bajee jubah." bak watee nyan geuteupeue le raja saul bahwa nyan na kheueh samuel, dan gobnyan laju geusujut geuhoreumat ubak geuhnyan. oh ka lheuehnyan samuel geupeugah ubak saul, "keupeue gata peukaru ulon? keupeue teuma neuhoi ulon nyoe lom?" geujaweueb le saul, "ulon lumpah that bingong sabab ka jiprang le ureueng filistin, seudangkan po teu allah ka geutinggai ulon. ulon hana geutem seut le le gobnyan, bah kheueh nyan meulalu nabi-nabi, meunan cit meulalu lumpo. sabab nyan ulon lakee ubak bapak, mangat bapak neupeugah peue nyang haroh ulon peubuet." geupeugah lom le samuel, "keupeue guna jih ulon neuhoi seudang kan tuhan ka geutinggai gata dan jeuet keu musoh gata? tuhan ka geupeubuet nyan u ateueh gata lagee nyang ka geupeugah nyan ubak ulon. tuhan ka geucok keurajeuen israel nibak jaroe gata dan geubri keurajeuen nyan ubak nabi daud. gata ka talawan peurintah tuhan dan hana tatem peubi-nasa ureueng amalek meunan cit ngon banmandum hareuta milek awaknyan. nyang kheueh sabab jih gata lagee tarasa nyan geupeusaneut le tuhan. gata dan ureueng-ureueng israel teuma geuseurah ubak ureueng filistin. singoh beungoh gata dan aneuek-aneuek agam gata teuma tameusapat deungon ulon; bahpi banmandum tantra israel pi geuseurah le tuhan keu ureueng filistin." bak watee nyan cit teuma, raja saul reubah teugageueng ateueh tanoh lagee ureueng jitak le geulanteue, sabab gobnyan leumpang that teukeujot geudeungoeu haba samuel nyan. dan lom teuma gobnyan ka leumoh that-that, sabab hana gepajoh sapeue ka siuroe simalam. tabeb nyan laju jipeurab ubak raja saul dan deuh geukalon raja saul nyan get that bingong: sababnyan tabeb inong nyan jipeugah ubak gobnyan, "teungku amphon, ulon ka ulon keureubeuen peue nyang teungku amphon lakee. le sababnyan, bah kheueh teungku amphon neupeukabui teuma peue nyang ulon lakee; neupajoh kheueh nyoe na bacut peunajoh nyang teuma ulon keubah keu teungku amphon mangat teungku amphon hase neujak lom meuneujak teungku amphon." raja saul geutalak dan geupeugah gobnyan hana geutem makheun. teuma oh ka lheueh banmandum peungawai gobnyan jipaksa gobnyan mangat jitem cit makheun, awaknyan laju jituot. geubeudoh laju nibak tanoh teumpat gobnyan reubah nyan dan geuduek laju di ateueh meulasah. deungon reu-jang that ureueng inong nyan laju jijak sie aneuek leumo jihnyan nyang teumbon dan jicok teupong laju jiramah-ramah, teupong nyan jipeuget laju jeuet keu ruti nyang hana meurago. oh ka lheuehnyan

laju jipeuhidang peunajoh nyan ubak raja saul dan peugawee-peugawee gobnyan, laju awaknyan geumakheun. oh ltheuhnyan jijak kheueh awaknyan nibak malam nyan cit teuma. ureueng filistin laju jipeusapat banmandum tantra jih di afek, seudangkan ureueng israel jipeudong kimah jih to ngon mata ie di panton yizreel. ban limong droe raja filistin laju geumaju dan geudong meuriti deungon keusatuan-keusatuan nyang maseng-maseng pasokan nyan na sireutoih dan siribee droe; seudangkan nabi daud dan aneuk buah gobnyan geumeubareh teuma dilikot to ngon raja akhis. bubena panglima ureueng filistin ban jikalon awaknyan laju jitungyong, "peubuet keunoe ureueng-ureueng ibrani nyoe?" geujaweeb le akhis, "nyoe nabi daud, beukaih peungawai raja saul di nanggroe israel. jihnyoe ka treb tinggai nibak ulon. watee phon jihnyan jijak ubak ulon sampoe an uroenyoe, gohlom na ulon teume jihnyan jipeubuet salah." teuma bubena panglima filistin nyan beungeh keu akhis sira jipeugah ubak gobnyan, "neuyue laju ureueng nyan jijak woe u banda nyang ka neubri ubak jih nyan. jihnyan hana jeuet jimumprang meusigoe deungon geutanyoe; pat tateupeue jihnyan jikianat keu geutanyoe watee geutanyoe teungoh tamuprang. peu kheueh nyoe bukan saboh keuseumpatan nyang paleng get bak jih keu jicok ate raja jih deungon jalan jipoh mate banmandum aneuk buah geutanyoe? gobnyan nabi daud, keu jihnyan kheueh bubena ureueng inong yoh watee ilee jimeuca-e ngon jimeun-nyano sira jimeulikat ngon jimeunari nyan jipeugah lagee nyoe, 'saul ka jipoh mate meuribee-ribee musoh, teuma nabi daud meuploh-ploh ribee.' " laju akhis jihoi nabi daud dan jipeugah ubak gobnyan, "ulon peucaya deumi tuhan nyang udeb, bahwa gata seutia ubak ulon. ulon galak meunye gata sabe na disampeng ulon bak watee ulon muprang nyoe. sabab yohphon gata tateuka ubak ulon sampoe an nibak uroenyoe, mubacut pih hana lon teume gata na meusalah. teuma raja-raja nyang laen nyan hana jigalak keu gata. sabab nyan tajakwoe kheueh deungon seulammat, dan bek kheueh tapeubuet sapeue nyang hase jipeuteuka beungeh le awaknyan." geujaweeb le nabi daud, "peu kheueh buet nyang salah nyang ka ulon peubuet hai teungku amphon? meunyeo lagee teungku amphon peugah nyan, teungku amphon hana neuteumeu meubacut pih buet nyang salah nibak ulon yohphon that ulon layani teungku amphon sampoe nibak uroe nyoe, pakon teuma ulon hana neubri lon jakmuprang mangat lonjak lawan musoh teungku amphon?" geujaweeb le akhis, "gata tateupeue bahwa gata ulon anggab seutia ban lagee malaikat po teu allah. teuma banmandum panglima nyan ka jipeuputoh bahwa gata hana jeuet tajak muprang meusajan-sajan deungon kamoe. le sabab nyan, hai nabi daud, singoh beungoh gata banmandum nyang ka tatinggai raja saul dan tajak ubak ulon, haroh gata beudoh ban suboh that dan tabeurangkat laju deungon sigr sigohlom mata uroe jiteubiet." le sababnyan, ban singoh beungoh mantong reuneureuneu, geubeurangkat kheueh nabi daud dan aneuk buah gobnyan geujakwoe u nanggroe filistin, seudangkan tantra filistin nyan jibeurangkat teuma u yizreel. dua uroe teuma oh ltheuh nyan, nabi daud

dan aneuk buah gobnyan geugisa lom teuma u banda ziklag. oh watee ka trok keunan, laju deuh geukalon bahwa ureueng amalek ka jiseureubu bagian seulitan nanggroe yehuda dan jiprang teuma ziklag. awaknyan hana geupoh ureueng meusidroe pi. teuma geutot sampoe habeh sapan sapa banda nyan dan oh ltheuhnyan geubeudoh disinan geujak laju gobnyan sira geuba sajan bubena ureueng inong, aneuk banyak dan peundudek nyang laen teuma. meunan cit awaknyan ka jiteun sidroe keuluwarga nabi daud dan keuluwarga aneuk buah gobnyan, meunan cit deungon bandua droe peurumoh nabi daud, ahinoam dan abigail. nabi daud dan aneuk buah gobnyan lumpah that seudeh, sampoe awaknyan laju geumo musok-musok hana ploh sampoe rab pansan. aneuk buah nabi daud keubit that aloh alah sabab ka gadoh aneuk peurumoh geuh. sabab nyan awaknyan jikeuneuk geulawa nabi daud deungon aneuk battee. jadi nabi daud na dalam keuadaan susah that-that, teuma ate gobnyan geupeuteuga lom le tuhan po teu allah. le nabi daud geupeugah ubak teungku imeum abiyatar aneuk ahimelekh, "taba kheueh laju efod nyan keunoe ubak ulon!" teuma le abiyatar laju geuba efod nyan ubak gobnyan. oh ltheuhnyan geuteumanyong kheueh le nabi daud ubak tuhan, "peu kheueh haroh ulon tiyeub ho nyang jijak kawan ureueng nyang seureubu nyan? peu kheueh hase ulon seutot awaknyan?" geujaweeb le tuhan, "nyoe, jak let kheueh laju; gata teuma meurmupok ngon awaknyan dan tapeubeubaih bubena tawanan." ban geudeungoe nyan laju geubeurangkat kheueh nabi daud meusigo-sigo deungon ban nam reutoih droe aneuk buah gobnyan. bak watee awaknyan sampoe nibak bineh krueng besor, nabi daud geupeujak laju meuneujak gobnyan deungon aneuk buah na 400 droe; seudangkan nyang 200 droe teuk nyan tinggai disinan. sabab ka hek that-that dan han hase jijeumeurang krueng besor. teungoh jijak nyan aneuk buah nabi daud meurmupok teuma deungon sidroe aneuk agam ureueng bansa meuse di padang, laju aneuk nyan geucok geuba jak peuhadab ubak nabi daud. aneuknyan laju geubri makheuen meunan cit deungon ie jieb, meunan cit deungon peunajoh kue boh ara, dan dua boh karang boh anggo nyang ka tho. oh ka ltheueh gobnyan jimakheun, teunaga aneuknyan ka puleh lagee bak nyang ka; rupari aneuk nyan ka lhee uroe jiteuen deuk hana jimakheuen meunan cit ngon jijie le! oh ltheuhnyan nabi daud geutanyong ubak aneuk nyan, "soe teungku gata, dan dipat asai gata?" jijaweeb le aneuk nyan, "ulon ureueng nanggroe meuse, namiet sidroe ureueng amalek. ulon jitinggai le teungku lon na lhee uroe nyang ka ltheueh sabab ulon deumam. kamoe ka ltheueh kamoe jak prang wilayah ureueng kreti di wilayah seulitan yehuda dan wilayah marga kaleb, dan kamoe ka kamoetot habeh banda ziklag." laju geutanyong le nabi daud ubak aneuk nyan, "peu kheueh tatem gata intat ulon ubak geurombolan nyan?" jaweeb le aneuk nyan, "ulon tem, asai teungku meujanji ubak ulon deumi nan po teu alah, bahwa ulon hana teungku peumate atawa teungku seurah ubak teungku amphon droe ulon." laju di aneuk nyan jijak intat awaknyan u tempat geu-

rombolan nyan. bak watee nyan anggota geurombolan nyan na disinan teuma meutabu saboh saho di daerah teupat nyan, sira jimakheun ngon jijieb ie lom ngon jimeu hura-hura sira jikem-kem ban galak droe jih sabab jai that-that barang nyan jireupah nibak nanggroe ureung filistin dan yehuda. bak watee mata uroe ka jiteubiet oh beungoh singoh nyan, awaknyan laju geuprang le nabi daud, dan muprang nyan meuseub-seub sampoe an malam uroe. seulaen peuet reutoih droe ureung muda nyan jipuplueng droe deungon jipasang unta, hana meusidroe pih nibak musoh nyan nyang hase jipeuseulamat droe. nabi daud ka meuhase geupeubeubaih peue mantong nyang ka ji reupah le ureung amalek, meunan cit ban dua droe ureung binoe geuh; hana meusapeue pih nyang gadoh. banmandum aneuek agam dan aneuek inong meunan cit deungon hareuta nyang jireupah le ureung amalek, geucok lom teuma le nabi daud. di sampeng nyan nabi daud geureupaih teuma banmandum bubiri dan beulatang peulara. beulatang-beulatang nyan laju geu paroih le aneuek buah nabi daud dikeue, teupeu meungkleeh nibak banmandum hareuta nyang teureupah nyang laen, dan awaknyan jipeugah, "nyoe jeumba keu nabi daud!" oh ka ltheuhnyan nabi daud laju teuma geugisa ubak ureung nyang dua reutoih droe nyang ka lumpah leumoh ngon hek keu jiseutot gobnyan, dan jitinggai nibak bineh krueng besor. awaknyan laju jijak sambot nabi daud meunan cit deungon aneuek buah gobnyan, dan nabi daud laju geupeuto sira geumumat jaroe ngon awaknyan. teuma lamkawan aneuek buah nabi daud nyang na meusajan-sajan jiseutot gobnyan, na teuma nyang jeuhet dan leuha ngon waba. awaknyan jipeugah, "banmandum ureung nyoe hana nyang jiseutot; le sababnyan awaknyan hana hak jiteuma sapeue nibak barang nyang teureupah nyan. awaknyan teuma jeuet jicok aneuek peurumoh jih oh ltheuhnyan jeuet jijak ho rot jih." teuma geujawueub le nabi daud, "syedara-syedara ulon, bek kheueh gata nyoe tapeubuet nyang lagee nyan deungon peue nyang ka geubri le tuhan ubak geutanyoe! bukan kheueh geutanyoe ka geulindong le gobnyan dan geupeumeunang tanyoe atueh kawan peurampok nyan? le sababnyan meusidroe pih hana jeuet situju keu usui nyan! banmandum ureung haroh meuteume jeumba nyang sadub le jih: ureung nyang tinggai nyang jaga barang-barang geutanyoe meunan cit haroh jiteurimong jeumba nyang sadub le jih lagee jeumba ureung nyang maju u dalam prang." oh ltheueh nyan hainyan geupeuget le nabi daud ka jeuet keu saboh peuratoran nyang ka jeuet undang-undang, jitaat banmandum le ureung israel sampoe nibak uroenyoe. bak watee nabi daud geugisa u ziklag gobnyan laju geukirem siladam nibak barang-barang nyang teureupah nyan keu mandum peumimpen nyang na di banda-banda yehuda nyang ka jidukong gobnyan, sira jipeugah, "nyoe kheueh hadiah keu gata nibak barang nyang teureupah dalam mideuen prang nibak musoh tuhan." banda nyan na kheueh: betel dan rama di bagian seulan yehuda, yatir, arero, sifmot, estemoa, rakhal, meunan cit deungon banda yerahmeel, banda-banda ureung keni, horma, bor-asan, atakh dan hebron. banmandum

banda nyan dipat nabi daud dan aneuek buah gobnyan ka ltheueh geu meugeumbara, geukirem banmandum hadiah nyan. bak watee nyan ureung filistin teungoh get that gura jimuprang ngon ureung israel di gunung-gunong gilboa. jai that ureung israel nyang mate didalam prang nyan, dan ureung nyang laen, jitamong cit keunan raja saul dan aneuek-aneuek agam pih ka geupeuplueng droe nibak mideuen prang nyan. teuma awaknyan laju jitiyeub le ureung filistin dan lhee droe lamkawan aneuek agam ngon aneuek inong raja saul nyan ka mate jipoh; awaknyan na kheueh yonatan, abinadab, dan malkisua. lam keuadaan prang nyan lumpah hebatnyan keubit to that bak bineh raja saul, dan gobnyan keudroe keunong aneuek panah musoh sampoe luka nyang lumpah parah. le raja saul laju geukheun ubak peumuda nyang ba sinjata gobnyan, "tasuet laju peudeueng gata dan tob laju u atueh ulon, mangkat ulon bek jipeumeun dan bek jipoh mate le ureung nyang hana jituri tuhan nyan." teuma le ureung muda nyan hana geutem tob gobnyan, sabab jihnyan get that seugan ngon jihoreumat that ubak raja droe jihnyan. sabab nyan kheueh raja saul geucok peudeueng geuh keudroe dan laju geupeureubah droe geuh u atueh mata peudeueng geuh nyan. watee jikalon le aneuek muda nyan bahwa raja saul ka wafeut, di gobnyan pih laju geupeureubah droe u atueh mata peudeueng droe jih sampoe jihpi ka mate disinan to ngon bineh manyet raja saul. meunan kheueh raja saul meusigoe deungon ban lhee droe aneuek geuh nyang agam, dan banmandum aneuek buah gobnyan meunan cit deungon aneuek muda nyang ireng gobnyan nyang seutia ka habeh mate bak uroe nyan cit teuma. bak watee jideungoe le ureung-ureung israel nyang na tinggai di panton yizreel dan nyang na di siblahi u timu krueng yordan tantra israel ka jipeuplueng droe nibak mideuen prang, dan meunan cit deungon raja saul dan aneuek-aneuek gobnyan nyang agam ka habeh mate, awaknyan laju jiplueng jitinggai banda-banda teupat gobnyan tinggai. oh ltheueh nyan teuka laju ureung filistin jijakdukek ubak banda nyang ka soh jitinggai nyan. oh singoh beungoh bak watee ureung filistin teuka keu jajak rampok bubena manyet-manyet nyang ka mate nyan, awaknyan laju meurupok ngon raja saul dan ngon ban lhee droe aneuek gobnyan nyang agam ka mate teueh di gunung-gunong gilboa. awaknyan laju jikoih takue raja saul laju jicok meunan cit deungon bajee prang gobnyan jiba meusajan, meunan cit di ureung filistin pih geukirem laju utosan ubak siluroih nanggroe filistin mangat teupeusampoe haba nyang get nyan ubak rakyat dan dewa awaknyan. oh ltheueh nyan bajee prang raja saul nyan jicok dan jikeubah laju di dalam kuil dewi asyoret, dan badan gobnyan laju teuma jilabang nibak binteh beuton banda bet-sean. teuma peunduduek yabes di gilead geudeungoe peue nyang ka jipeubuet le ureung filistin nyan ubak raja saul, laju le ureung-ureung nyang paleng ceubeueh ngon beuhe geubeudoh disinan laju geubeurangkat dan geujak simalam suntok u bet-sean. awaknyan laju jipeutron manyet raja saul dan manyet bubena aneuek gobnyan nyang lhee droe nyan nibak beuton banda nyan geuba laju

u yabesh, dan manyet nyan pih laju jitot. ban-
mandum tuleueng-tuleueng nyang na tinggai nyan
laju jitanom u dalam jeurat dimiyueb bak kayee
tamariska di banda nyan, oh lheueh nyan jipuasa
kheueh awaknyan na tujoh uroe treb jih.

oh ka ltheueh raja saul wafeuet, nabi daud laju geugisa nibak mideuen prang geujak peutalo ureueng amalek, laju geutinggai di ziklag nyang treb jih na dua uroe. oh singoh beungoh nyan, teuka kheueh sidroe aneuek muda nibak khimah-khimah raja saul. sibagoe tanda meukabong ureueng nyan ka jipriek peukayan jih keudroe dan jiboh tanoh di ateueh ulee droe jih. jihnyan jijak ubak nabi daud dan jisujut dikeue geuhnyan. nabi daud laju geutanyong ubak aneuek muda nyan, "pane gatajak?" jijawueub le aneuek muda nyan, "ulon ltheueh nibak khimah-khimah ureueng israel." geutanyong le nabi daud, "gata peugah kheueh laju, peue nyang ka teu-jadi!" jijawueub aneuek muda nyan, "tantra kamoe ka kamoe peuplueng droe di mideuen prang, dan jai that nyang tiwaih, lamkawan nyang tiwaih nyan raja saul dan aneuek geuh yonatan." "pakriban hai nyan gata teupeue?" geutanyong le nabi daud ubak aneuek muda nyan. jawueub aneuek muda nyan, "keubeutulan mantong ulon na disinan nibak gunong gilboa, laju deuh ulon kalon raja saul geumeusadeue nibak kapak geuh, seudangan geuritan-geuritan dan tantra meuguda atra musoh, ka to that keuneuk jike-upong. raja saul geupaleng u likot, dan geungieng ulon, laju ulon geuhoi, dan ulon jawueub, 'nyoe pat ulon, teungku amphon.' gobnyan geutanyong, soe ulon nyoe, dan ulon kheun ubak gobnyan bahwa ulon nyoe na kheueh ureueng amalek. laju geupeugah lom ubak ulon, 'gata peurab kheueh keunoe, dan tapoh mate kheueh ulon! ulon nyoe ka luka parah, dan karab mate.' le sababnyan laju ulon peurab ubak gobnyan dan laju ulon poh sampoe gobnyan meuninggai, sabab ulon kuteupeue meunyo gobnyan reubah sabab hana teuga le geudong, pasti gobnyan meuninggai cit teuma. oh ltheueh nyan laju uloncok mahkota ateueh ulee gobnyan dan gleueng nyang na nibak jaroe gobnyan, dan atranyan laju ulon ba keunoe ubak teungku amphon." ban geudeungoe nyang lageenyan nabi daud laju geupriek peukayan nyang na nibak badan geuh sabab seudeh lumpah na, meunan cit deungon banmandum aneuek buah gobnyan jipeubuet cit lagee nabi daud peubuet nyan. awaknyan geumo ngon geupeuba-e geumeukabong ngon geupuasa sampoe an malam uroe keu raja saul dan yonatan, dan lom keu rakyat israel, umat tuhan, sabab jai that-that nyang ka meuninggai di mideuen prang nyan. oh ltheuehnyan nabi daud geuteumanyong ubak peumuda nyang ka jipeusampoe haba nyan, "pat asai gata?" jawueub aneuek muda nyan, "ulon nyoe ureueng amalek, sidroe aneuek ranto nyang tinggai di nanggroe teungku amphon." geupeugah lom le nabi daud, "biet beuhe that teuh gata jeuet tapoh mate raja nyang ka geupileh le tuhan!" le gobnyan laju geuhoi sidroe lamkawan aneuek buah gobnyan sira geupeurintah, "gata poh mate ureueng nyoe!" di ureueng nyang geuyenyen laju jitak peumuda amalek nyan sampoe mate. geupeugah le nabi daud ubak peumuda amalek nyan, "gata keudroe nyang tapeurhot hukoman mate nyoe ateueh droe gata deungon gata meungaku bahwa gata ka tapoh mate raja nyang ka geupileh le tuhan!" oh ltheuehnyan nabi daud laju geumeu ca-e sira geumeuba-e keu saul dan yonatan, dan geupeurin-

tah mangat ca-e nyoe teupeurunoe teuma ubak sukee yehuda. (ca-e nyoe na teuteuleh didalam kitab yasar). "israel, di buket-buket droeneueh, jih disideh, gugur kheueh pahlawan, dumna aneuek agam neugahra, mate kheueh awaknyan sibagoe bungong bansa. seumoga le ureueng gat hana jideungoe haba nyan. seumuga jurong-jurong askelon hana teuma meuteume haba keuhai nyan. bek sampoe ureueng inong filistin jisumurak meuhubo bek teuma sampoe ureueng inong nyang kaphe jimeukuk geumbira. hai buket-buket gilboa, deungoe kheueh ulon meuhoi nyoe: bek sampoe iembon dan ujeuen jisiram bumoe! bah kheueh tho ngon kregng blang dan padang gata. sabab disinan kheueh meusaoh peudeueng beuso beurani. dan peudeueng saul pih ka meugeuratan, hantom na le teugeusok ngon minyeuk. panah yonatan nyang ampoh ngon meubisa nyan. peudeueng raja saul nyang hana jituri keu gaseh sayang bak teupoh musoh, teupeubinasa lawan. saul dan yonatan ureueng nyang that ramah lom rame gob gaseh; sabe meusaboh lamhai udeb ngon mate; awaknyan leubeh bagaih nibak cicem geuruda, dan leubeh teuga nibak singa muda. hai, ureueng inong israel, tameuba-e kheueh keu raja saul! nyang ka geupeungui gata deungon ija gawon mirah nyang meuwah, dan geupeuhias gata deungon meuh peumata nyang ceudah. ka habeh reubah dumna pahlawan, reubah nibak mideuen prang dan nibak buket ngon gunong nyang sungue yonatan ka teunyue teugang. yonatan, hai syedara ulon, ate lon hanco, sabab droeneueh get that muyem nibak ulon. geunaseh gata ubak ulon get that mulia, leubeh nibak geunaseh sidroe ureueng inong. ka gugur dumna pahlawan bansa. meusia-sia kheueh sinjata nyang na!" oh ltheuehnyan nabi daud laju geutanyong ubak tuhan, "peu kheueh droeneueh ya tuhan neubri kuasa keu ulon mangat jeuet lon kuasa saboh lamkawan laen banda di yehuda?" "nyoe," geujawueub le tuhan. "banda nyang toh?" geutanyong lom le nabi daud. "banda hebron," geujawueub tuhan. le sababnyan geujak kheueh laju nabi daud u hebron meusajan deungon ban dua droe peurumoh gobnyan: ahinoam inong nyang nibak yizreel, dan abigail beukaih inong si nabal di karmel. meunan cit teuma deungon aneuek buah gobnyan deungon keuluwarga awaknyan maseng-maseng jiseutot meusajan deungon nabi daud, dan awaknyan laju tinggai teutab di hebron dan silingka nyan. oh ltheuehnyan bubena ureueng yehuda jijak laju u hebron, dan jilantek laju nabi daud jeuet keu raja ateueh nanggroe yehuda. bak watee nabi daud geudeungoe bahwa ureueng-ureueng yabesh di gilead ka jipeukubu lam jrat manyet saul, ureueng nyan jipeutrok peusan lageenyoe, "seumoga tuhan geubri beureukat ubak gata, sabab gata ka tatunyok keuseutiaan gata keu raja gata deungon cara ka taseumuyueb gobnyan u dalam jrat. le sababnyan, tuhan ka geutunyok gaseh sayang gobnyan keu gata. ulon pih teuma lon peusaneut gata deungon get sabab le buet gata nyan. tabah kheueh ate gata dan jakbuet kheueh sibagoe pahlawan! saul, raja gata nyang keubiet ka wafeuet, teuma di ureueng-ureueng yehuda ka jibaiat ulon jeuet keu raja awaknyan." panglima tantra raja saul, na kheueh abner aneuek ner, ka jipeuplueng droe

meusajan deungon isyboset aneuk raja saul, u mahanaim di meurandeh krueg yordan. disinan abner laju geu angkat isyboset jeuet keu raja ateuh wilayah-wilayah gilead, asyuri, yizreel, efraim dan benyamin, dan ateuh bansaboh israel. isyboset ka meu umu peuet ploh thon bak watee teubaiat jeuet keuraja ateuh israel, dan gobnyan jimat peurintah dua thon treb jih. teuma di sukee yehuda teutab seutia ubak nabi daud sibagoe raja geuh, dan nabi daud geumat peurintah di hebron ateuh yehuda na tujoh siteungoh thon treb jih. bak siroe abner jikak nibak mahanaim u banda gibeon, meusajan deungon aneuk buah isyboset. meunan cit deungon yoab (mak jihnyan nan jih zeruya), meusajan deungon aneuk buah nabi daud jikak u banda nyan. ban dua boh reugu nyang meulaen meunan cit saleng meulawan nyan laju meuhadab-hadab keu di kulam gibeon; abner dan meunan cit deungon pihak awaknyan jiduek di meurandeh nyoe, yoab dan pihak droe jih teuma na dimeurandeh jih. geupeugah kheueh le abner ubak yoab, "jak, tayue aneuk buah geutanyoe mangat jimeutunang meulo!" "get kheueh, meunyo meunan," geujaweueb le yoab. laju jimaju na dua blaih droe nibak sukee benyamin nyang jiwaki le isyboset, dan dua blaih droe teuma nibak aneuk buah nabi daud. awaknyan maseng-maseng saleng jiteumarek ok nibak ulee dan saleng teuma jitoob pruet lawan jih maseng-maseng, le sabab nyan mate kheueh awaknyan meusigoe teuma. sabab nyan kheueh teupat di gibeon nyan geuboh nan "blang peudeung". oh ka ltheuh teujadi nyang lagee nyan teuka kheueh teuma prang nyang keubiet hebat, dan abner meunan cit deungon banmandum tantra israel ka habeh taloe buet aneuk buah nabi daud. ban lhee droe aneuk zeruya na disinan, awaknyan na kheueh yoab, abisai dan asael. asael nyan meunyo bak plueg bagaih jih ban lagee jiplueg rusa, dan jipeuleut kheueh abner nyan hana pioh-pioh. abner laju jingiang u likot sira jitanyong, "peu kheueh gata nyan asael?" "nyoe, beutoi," jaweueb asael. "bek tatiyeub ulon!" geupeugah le abner. "cuba kheueh gata drob sidroe lamkawan tantra nyan dan tacok kheueh laju sinjata jihnyan!" teuma asael hana geupeuduli nyan gobnyan hana geupioh geutiyeub laju ureueng nyan. sigoe teuk abner geupeugah ubak gobnyan, "bek tatiyeub ulon! eunteuk meunyo tatiyeub cit teupaksa gata ulon poh mate. meunyo meunan, pakriban ulon hase ulon pandang muka yoab adeun gata nyan?" bak watee nyan asael teutab cit hana jitem pioh jipeucrok nyan, abner laju jitoob ngon kapak jih u likot, dan laju keunong ubak pruet asael sampoe beusot kapak nyan dan peureulong ubak rhueng jih. asael reubah dan mate laju di teupat nyan. banmandum ureueng nyang trok jiteuka u teupat jih nyang ka teugageueng nyan, laju teudong disinan. teuma yoab dan abisai mantong cit jitiyeub ngon hana geupioh teuhadab abner. bak watee mata uroe ka jihlob, trok kheueh laju awaknyan u buket ama, nyang na di siblahi u timu giah, u arah padang pasi gibeon. disinan ureueng-ureueng nibak sukee benyamin jimeusaho lom deungon abner, laju jiatoe bareasan awaknyan nibak saboh pucak gunung. phon sinan abner jitawok ubak yoab, "peu kheueh geu-

tanyoe haroh ta muprang siumu masa? peu kheueh gata hana tasada bahwa prang nyoe lumpah that phet? kamoenyoe syedara gata saboh bansa. padubna treb teuk gata haroh tapreh sigohlom tapeurintah aneuk buah gata mangat jipioh jipeucrok kamo?" jiwaweueb le yoab, "deumi po teu allah nyang udeb, meunyo gata hana tapeuphon peugah haba, pasti aneuk buah ulon hana jipioh jipeu crok gata trok an singoh beungoh." le yoab laju geuyueb beureuguih sibagoe tanda keu aneuk buah jih mangat jipioh bek jilet le ureueng israel, dan deungon na nyang lageanyan reuda kheueh muprang nyang lumpah gura nyan. abner dan aneuk buah gobnyan simalam beungoh jimeubareh jikak rot panton yordan, laju jipeumeurang krueg yordan, dan oh ltheuh jikak siroe seupot nyan bak uroe ltheuh nyan teuma, trok kheueh awaknyan u mahanaim. oh ka ltheuh yoab geupioh geutiyeub abner, gobnyan laju geupeusapat banmandum aneuk buah. seulaen asael teunyata na sikureueng blaih droe aneuk buah gobnyan gadoh. aneuk buah nabi daud ka jipoh mate 360 droe pasokan abner nibak sukee benyamin. oh ltheuhnyan yoab dan aneuk buah gobnyan jibeut laju manyet asael dan jipeukubu laju didalam lampoh jrat keuluwarga gobnyan di betlehem. oh ltheuh nyan awaknyan jikak lom simalam suntok laju trok u hebron bak watee ka teungoh malam. prang nyang meutamah-tamah hibat le peureute keuluwarga saul deungon peureute nabi daud teutab hana lom reuda. nabi daud seumaken teuga, laen lah deungon lawan gobnyan seumaken leumoh. aneuk-aneuk agam nabi daud nyang lahe di hebron na kheueh lagee nyang teupeugah nyoe meunurot urotan lahe jih: ammon. mak jihnyan na kheueh ahinoam nibak yizreel. kileab. mak jihnyan na kheueh abigail, beukaih peurumoh nabal nibak karmel. absalom. mak jihnyan na kheueh maakha, putroe raja talmai nibak gesur. adonia. mak jihnyan na kheueh hagit. sefaca. mak jihnyan na kheueh abital. yitram. mak jihnyan na kheueh egla. ban nam droe aneuk agam geuhnyan lahe di hebron. bak watee prang mantong that hebat le peureute nabi daud deungon peureute keuluwarga saul, abner jiseuha laju mangat peungaroh gobnyan meutamah rayeuk nibak peureute saul. bak siroe isyboset, aneuk agam saul, jitudo abner ka geu-eh sajan deungon sidroe lamkawan gundek saul nyang nan jih rizpa aneuk aya. ban geudeungoe habanyan, abner beungeh geuh that-that dan gobnyan jipeugah, "peu kheueh teungku po neuanggak bahwa ulon nyoe ka lon kianat ubak saul dan lon dong blaih yehuda? phon awaikon ulon nyoe lon dong blaih saul bapak teungku po, dan keu kawom syedara gobnyan meunan cit keu rakan-rakan gobnyan. ulon ka ulon tulung teungku po sampoe hana hase le jipeutaloe le nabi daud. bahpih dubnyan ka ulon peubuet, teuma teungku amphon neuhina cit ulon teuma le soai ureueng inong! leubeh get ulon jak tulung nabi daud, peue lom tuhan ka geumeujanji bak gobnyan bak saboh watee geucok keurajeuen nyoe nibak saul dan nibak keuturo nan gobnyan, laju geubaiat nabi daud jeuet keuraja keu bansigom tanoh israel dan yehuda. seumoga po teu allah geupeumate ulon, meunyo hana ulon peutrok janji po teu allah ubak nabi daud nyan!" isy-

boset hana hase geujaweueb haba nyan bahpi meu sikrek haba pih, sabab gobnyan geutakot ubak abner. le abner geukirem tulosan ubak nabi daud nyang mangat nabi daud, "soe nyang mat kuasa ateueh tanoh nyoe? neupeuget kheueh peujanjian deungon ulon, teuma ulon tulong teungku amphon mangat jeuet banmandum bansa israel jidong blaih teungku amphon!" geujaweueb le nabi daud lagee nyoe, "get kheueh! tapeutrok kheueh peusan nyoe ubak abner: ulon lontem peuet peujanjian deungon gata, teuma deungon saboh carat: mikhal, aneuek inong saul, haroh taba ubak ulon meunyoee gata tajak meuhadab ubak ulon." oh ltheueh nyan nabi daud geukeurem utosan ubak isyboset, dan haba peuneusan geuh lagee nyoe, "bah kheueh teungku amphon neupeuriwang mikhal, peurumoh ulon, ubak ulon. jihnyan ka ulon bloe deungon yuem sireutoih boh kulet ujong boh ureueng filistin." le isyboset geuyuejak laju utosan geuhnyan mangat teujak tueng mikhal nibak lakoe jih, na kheueh partiel aneuek si lais. teuma partiel hana jipioh jiseutot laju mikhal sira jimo. bak watee awaknyan ka sampoe u banda bahurim, abner jipeugah ubak ureueng nyan, "ka kheueh, neujakwo mantong droeneueh!" dan partiel pih jikkawo teuma. teungoh abner geumupakat deungon mandum ureueng patot-patot di israel dan geupeugah, "ka treb that-that gata tameuheuet mangat jeuet nabi daud teupeujeuet keuraja gata. dan, nyoe kheueh keuseumapatan nyang paleng rayeuk nibak gata. ingat kheueh, tuhan ka geumeujanji ubak nabi daud, bahwa gobnyan teuma geupeuguna nabi daud nyan mangat teupeuseulamat umat israel nibak ureueng filistin dan nibak banmandum musoh nyang laen." meunan cit abner geumupakat deungon ureueng-ureueng nibak sukee benyamin, dan oh ltheuehnyan geujak teuma u hebron keu geujak peugah ubak nabi daud peue nyang ka jiseutuju le ureueng benyamin dan ureueng israel nyan. bak watee abner meusajan deungon dua ploh droe aneuek buah gobnyan geumeuhadab ubak nabi daud di hebron, nabi daud laju geupeuna kha-nuri keu awaknyan. oh ltheueh nyan abner laju geulakee droe sira geupeugah, "neupeu idhin kheueh keu ulon mangat lonjak peugrak ate bansaboh israel mangat awaknyan jimeugabong deungon teungku amphon." awaknyan teuma jiteurimong teungku amphon sibagoe raja, dan deungon na nyang lagee nyan, teungku amphon ka jeuet keu raja keu saboh nang-groe, pah lagee meukeusut teungku amphon." oh ltheuehnyan abner laju geupeu idhin le nabi daud dan geujamin keuseulamatan gobnyan. oh ka leupah abner geujak, yoab meusajan deungon aneuek buah nabi daud nyang laen geuwoe nibak mideuen prang dan jai that geupeuwoe barang rampasan. ubak yoab laju geubri tee bahwa abner banmantong geujak meuhadab ubak raja daud dan ka geupeu idhin j-jak dan geujamin teuma keuseulamatan gobnyan. dan geujak meuhadab kheueh yoab ubak raja sira geupeugah lagee nyoe, "pakriban buet droeneueh nyan ya teungku amphon? abner ka teuka j-jak meuhadab ubak teungku raja. pakon teungku raja neupeu idhin j-jak meunan mantong? pasti kheueh teungku amphon ka neuteupeue bahwa abner nyan teuka keu-

noe na kheueh keu j-jak peunget teungku amphon, dan keu jiteupeue keuadaan dan peue-peue nyang ka teungku amphon reuncana." oh ka ltheueh geutinggai nabi daud, yoab laju geukirem utosan mangat j-jak tueng abner. awaknyan laju j-jak seutot abner sampoe trok ubak mon sira, dan abnernyan awaknyan peuwu laju ubak nabi daud. banmandum nyan teujadi hana geuteupeue mubacut pih le nabi daud. meunan abner nyan ka trok u hebron, ureueng nyan laju j-jakat le yoab ubak bineh, to ngon babah pintoe geureubang, siulah-ulah jikeuneuk peugah saboh rahsia. teuma hana teusangka-sangka yoab laju geutob nibak pruet abner sampoe gobnyan mate bak watee nyan cit teuma. meunan kheueh abner ka mate jipoh le yoab keu jibalahi dam ateueh teupoh mate adoe gobnyan si asael. bak watee nabi daud geudeungoe hainyan, gobnyan geupeugah, "tuhan geuteupeue bahwa ulon dan rakyat ulon mubacut pih hana meusalah keuhai teupoh mate abner nyan. bah kheueh yoab dan ban-mandum keuluwarga jih nyan geuhukom le tuhan ateueh buet jih nyang ka salah nyan. seumoga dalam keuluwarga yoab treun meutreuon sabe na ureueng nyang meudeurita peunyakot kulet nyang parah that, atawa ureueng agam nyang leumoh hana meuteu-naga, atawa nyang mate nibak mideuen prang atawa nyang sabe kureueng peunajoh!" meunan kheueh yoab dan abisai adoe gobnyan, geubalahi dam ubak abner kareuna abner ka geupoh mate asael adoe gobnyan dalam prang di gibeon. oh ltheueh nyan nabi daud laju geubri peurintah ubak yoab dan aneuek buah gobnyan mangat geupriek peukayan droe geuh maseng-maseng, dan geungui ija meuduka cita meun-an cit teupeuba-e keu abner nyang ka mate keunong poh nyan. dan bak watee manyet teu intat u dalam kubu, nabi raja daud keudroe teuma nyang jak di-likot keureunda manyet nyang teungoh jiseuon jiba ubak jrat nyan. abner teupeukubu di hebron, raja dan banmandum rakyat geumo ba-e deungon meuratok ngon su nyang lumpah nyareng nibak bineh kubu nyan. oh ka ltheuehnyan nabi daud geupeura-tok keu abner, lagee nyoe, "peu kheueh abner haroh mate sibagoe ureueng bangai: jaroe gobnyan hana teu ikat, dan gaki gobnyan hana teubeuleunggu? gobnyan mate keunong tob le ureueng jeuhet nyang keu-jam." ban geudeungoe nyan banmandum rakyat jimo ba-e jipeumo abner nyang leubeu teuga lom. si uroe suntok ureueng laen ji useuha jibujuk nabi raja daud mangat geutem makheun bahpi meubacut, teuma gobnyan geumeusumpah, "kira jih po teu allah ge-upoh mate ulon, meunyoee ulon makheun sigihlom mata uroe jillob!" ban geudeungoe hainyan rakyat ka meurasas seunang ngon galak. beutoi, peue man-tong nyang geupeubuet le nabi raja daud nyan, ate awaknyan ka jeuet keu mangat. bak uroe nyan ban-mandum rakyat nabi daud dan banmandum israel ka muphom, bahwa raja hana geuharab abner teupoh mate. geupeugah le nabi raja daud ubak dumna ureueng nyang ireng gobnyan, "peu kheueh hana neu-teupeue bahwa nibak uroenyoe sidroe peumimpen rayeuk bansa israel ka mate syahid? bahpih ulon nyoe raja nyang geupileh le po teu allah, teuma ji-noenyoe ulon meurasas that-that leumoh. aneuek-anuek zeruya nyan lumpah that keujam. ulon hana

hase ulon kuasa ateuheh awaknyan. seumoga tuhan geuhukom bubena peunjahat-peunjahat nyan, nyang sisuai deungon peue nyang jipeubuet!" keuturonan saul nyang laen na kheueh mefiboset, aneuek agam nibak yonatan. aneuek nyan capiek watee umu jih limong thon, bak watee saul dan yonatan meuning-gai donya. sabab bak watee haba keuhai awaknyan meuninggai teuka nibak banda yizreel, deundayang nyang useuha mefiboset nyan laju jiplueng; teuma sabab inong nyan bak jiplueng lumpah meudab-dab, aneuek nyan rhot bak tanoh sampoe gaki jih capiek. bak watee isyboset aneuek agam saul nyan jideungoe bahwa abner ka teupoh mate di hebron, teuma rhot kheueh seumangat gobnyan, dan ban saboh bansa israel ka jeuet keu geumpa. isyboset nyan na dua droe peuwira nyang jeuet keu ulee pasokan seureubu; nyang sidroe nan jih baana, dan nyang sidroe teuk nan jih rekhab. awaknyan na kheueh aneuek rimon, nibak beerot dan asai nibak sukee benyamin. (beerot nyan rhoh lam daerah benyamin. peududuek aseuli nyang na disinan jipeuplueng droe u daerah gitaim dan laju tinggai disinan phon saat nyan.) ban dua droe si peuwiranyan, na kheueh si rekhab dan baana jijak laju u rumoh isyboset dan trok keunan bak watee cot uroe timang, bak watee isyboset teungoh jipioh hek watee uroe. ureueng inong nyang jaga rumoh nyan teugantuek that mata watee nyan teungoh jitampoe boh gandom, nibak teugantuek nyan laju gobnyan teugeut. sabab nyan rekhab dan baana hase deungon mudah jitamong u dalam. awaknyan laju jitamong ubak kama eh di teumpat isyboset teungoh teugeut meukanga, le awaknyan laju jitob isyboset nyan sampoe mate. oh lheurehnyan ulee ureueng nyang ka mate nyan laju jikoh meukhan dan jiba laju nibak teumpat-nyan. salamal beungoh awaknyan jijak ngon tapak meulalu panton yordan. oh lheurehnyan ulee isyboset nyan jijak laju ubak nabi daud di hebron sira jipeugah, "nyoe kheueh ulee isyboset aneuek agam si saul, musuh teungku amphon nyang teungoh ji useuha jikeuneuk poh mate teungku amphon. bak uroenyoe tuhan ka geubalahi buet si saul dan keuturonan gobnyan keu teungku amphon." teuma nabi daud geujaweueb, "tuhan nyang udeb, nyang ka geupeuseulamat ulon nibak sigala mara bahya, gobnyan geuteupeue bahwa nyang ulon peugah nyoe beutoi. bak watee di ziklag na ureueng nyang jijak britee ubak ulon keuhai saul ka wafeuet, jipike le jih bahwa gobnyan jiba haba nyang jroh. teuma jihnyan ka ulon drob dan ulon poh mate. nyang kheueh upah nyang ulon bri keu jihnyan sibagoe imbalan ateuheh haba nyang ka jipeugah ubak ulon nyan. padubna leubeh brat lom hukom nyang teuma ulon peurhot ateuheh ureueng jeuhet nyang ka jipoh mate ureueng nyang hana meusalah dan lom teungoh jiteungeut di rumoh jih keudroe! jinoenyoe ulon tueng bila ateuheh peue nyang ka gata peubuet nyan, dan ulon peurabab gata nibak ateuheh muka bumoenyoe!" oh lheureh geupeugah nyan nabi daud laju geupeurintah ubak aneuek buah gobnyan mangat jijak poh mate si rekhab dan baana. oh ka lheureh teupoh mate, jaroe dan gaki awaknyan laju jikoh ngon jigantung teuma nibak binah kulum. teuma ulee isyboset jicok dan laju jitanom di banda nyan cit teuma di-

dalam kubu abner. oh ka lheureh nyan teuka kheueh ubak nabi daud bubena peumimpem-peumimpem nibak sukee israel di hebron dan jipeugah ubak gobnyan, "kamoe nyoe na kheueh rakan teungku amphon. phon yoh masa ilee, dan yoh mantong saul geumat peurintah ateuheh kamoe, teungku amphon cit teuma nyang pimpem tantra israel tieb-tieb watee awaknyan jijak maju u mideuen prang, meunan cit teuma tuhan ka geumeujanji ubak teungku amphon bahwa teungku amphon kheueh nyang pimpem umat gobnyan dan jeuet keu raja awaknyan." nabi daud laju geupeuna peujanjian deungon bubena peumimpem-peumimpem nyan, laju awaknyan jibaaat gobnyan jeuet keu raja israel. nabi daud meumu-lhee ploh thon bak watee gobnyan teulantek jeuet keu raja, dan gobnyan geumat peurintah peuet ploh thon treb jih. di hebron gobnyan geumat peurintah ateuheh yehuda tujuh thon siteungoh treb jih, dan di yerusalem gobnyan geumat peurintah ateuheh banmandum israel dan yehuda nyang treb jih lhee ploh lhee thon. bak siuroe nabi raja daud dan aneuek buah gobnyan geubeudoh geubeurangkat keuneuk jak prang yerusalem. ureueng yebus peunduduek banda nyan, jipike bahwa nabi daud hana ek geupeutaloe yerusalem. sabab nyan awaknyan jipeugah ubak gobnyan, "gata nyoe hana teuma leupah tatomong keunoe; ureueng-ureueng buta ngon ureueng capiek pih hase ji-use gata." nabi daud geupeugah ubak aneuek buah gobnyan, "peu kheueh na disinoe ureueng nyang bancia ubak ureueng yebus lagee ulon nyoe lon bancia keu awaknyan? peu kheueh ka lumpah jibancia that awaknyan sampoe jihnyan jikeuneuk poh awaknyan? meunyo meunan, tatamong kheueh laju rot guha ie dan taprang kheueh bubena ureueng buta ngon ureueng capiek nyang that-that ulon bancia nyan." (nyang kheueh sabab jih ureueng laen jipeugah, "ureueng buta dan ureueng capiek hana jeuet jitamong u dalam baet tuhan.") nabi daud meuhase geureubot kuta sion dan geuduek laju disinan. laju geuboh nan nyan "banda nabi daud". banda nyan geupeudong nibak ban sikeulileng kuta nyan, phon nibak siblahi u timu buket nyang ka teupeu manyang deungon tanoh. nabi daud maken treb maken teuga, sabab tuhan, po teu allah nyang mahakuasa nyang tulong gobnyan. raja hiram di tirus geukirem wakiwaki gobnyan ubak nabi daud, meunan cit deungon kayee ceumara libanon meunan cit deungon tukang-kayee dan tukang batee keu jijak peudong meuligoe. kareuna nyan nabi daud meutamoh yaken bahwa tuhan ka geupeukong gobnyan sibagoe raja ateuheh israel, dan geupeukong keurajeuen gobnyan deumi keu keupeuntangan umat tuhan. oh ka lheureh nabi daud geuminah nibak hebron u yerusalem, gobnyan geumeukawen lom deungon na meupadub droe ureueng inong dan geucok teuma na padub droe ureueng inong keu gundek gobnyan; deungon na lageenyan meutamoh kheueh teuma aneuek agam ngon aneuek inong gobnyan. aneuek-aneuek agam gobnyan nyang jipeulahe di yerusalem na kheueh: syamua, sobab, natan, salomo, yibhar, elisua, nefeg, yafia, elisama, elyada dan elifelet. bak watee ureueng filistin jideungoe bahwa nabi daud ka teubaat jeuet keu raja ateuheh israel, awaknyan laju jijak jike-

uneuk jak drob gobnyan. teuma nabi daud geudeun-
goe hai nyan, geubeudoh geujak laju ubak tuha. ureu-
eng filistin ka trok u panton refaim dan jiduek laju
disinan. nabi daud laju geutanyong ubak tuhan, "peu
kheueh ulon nyoe haroh ulon jakprang ureueng fil-
istin nyan, ya tuhan? peu kheueh teuma tuhan neu-
peumeunang ateuah ulon?" "jak prang kheueh!" geu-
jaweueb le tuhan. "ulon teuma lon bri keu gata meu-
nang!" oh lheuueh nyan geujak kheueh laju nabi daud
u baal-perasim dan disinan kheueh pasokan filistin
nyan geupeu taloe. laju gobnyan geupeugah, "tuhan
ka geupeuhanco peutahanan musoh lon, lagee ie raya
nyang jipeu hanyot ngon jisampoh peue-peue nyang
na lam watee nyang sikeujab." sabab nyan kheueh,
teumpat nyan geuboh nan baal-perasim. pasokan fil-
istin nyan laju jiplueng dan hana jiteumeba patong-
patong beurala droe jih. banmandum patong-patong
nyan laju geucok le nabi daud dan aneuk buah gob-
nyan. hana padubna treb teuma oh lheuueh nyan
teuka lom ureueng filistin jikkaduek nibak panton
rafaim. sigoteuk nabi daud geulakee peutunok ubak
tuhan. tuhan geujaweueb, "bek gata prang jihnyan
phon disinoe, teuma tajak kheueh meuputa dan gata
prang kheueh awaknyan rot likot, to deungon bak
kayee murbei. meunyoa na gata deungoe su lagee su
langkah ureueng meubareh dipucok bak-bak kayee
nyan, dan gata maju kheueh laju, sabab ulon teuma
ulonjak dikeue gata keu lonjak peutaloe tantra fil-
istin." nabi daud laju geupeubuet peue nyang ka ge-
peuprintah le tuhan, dan gobnyan meuhase geuse-
upot sampoe tantra filistin nyan jisurot nibak geba
sampoe trok u gezer. oh lheuuehnyan nabi daud
geutawok dan geupeusapat lom tantra-tantra nyang
paleng get di israel mangat jimeugumpoi, jeumeulah
jih na 30.000 droe. awaknyan geupimpin dan teutuju
u baale-yehuda, mangat teujakkok nibak teumpat
nyan peuto peujanjian nyang teupeugah deungon nan
tuhan mahakuasa nyang duek meutahta di ateuah
kerub-kerub. peuto peujanjian nyan geucok di ru-
moh abinadab di ateuah buket dan atra nyan geu-
peu ek laju u ateuah geureubak peudati nyang baro.
dan le si uza dan ahio, aneuek-aneuek abinadab ji
ireng laju geureubak peudati nyan; si uza jijak bak
bineh geureubak peudati nyan, dan si ahio jijak teuma
dikeue geureubak peudati nyan. nabi daud dan ban-
mandum bansa israel geujak teuma dikeue geureubak
peudati nyan sira meunari ngon geumeulikak si-
habeh teunaga meunan cit teuireng deungon meuca-
e keu teuhoreumat tuhan. awaknyan sira geujak ge-
upeumeu en keucapi, gambus, rapa-i, keuleuntingan,
dan simbal. oh watee ka trok awaknyan bak saboh
teumpat nyang nan jih teumpat teupeluroih aneuk
gandom atra si nakhon, hana teusangka-sangka di
leumo-leumo nyang teungoh jitarek geureubak nyan
meugantoih, laju si uza jisunyueng jaroe jih dan jimat
laju peuto peujanjian nyan mangat bek rhot. bak wa-
tee nyan cit teuma tuhan po teu allah jeuet keu be-
ungeh ubak uza, sabab le buet jih nyan na kheueh
sibagoe teuhina ubak tuhan. dan uza nyan laju ge-
upoh mate di teumpat nyan, rab that ngon peuto
peujanjian. teuma phon wateanyan teumpat nyan
geuboh nan peres-uza. nabi daud beungeh sabab
tuhan ka geupoh mate si uza. teuma nabi daud geu-

takot cit ubak tuhan sira geupeugah lagee nyoe, "ji-
noenyoe pakriban peuto peujanjian nyan hase ulon
ba?" sababnyan kheueh gobnyan hana geutem ba
peuto peujanjian nyan u yerusalem, teuma geukeubah
di rumoh obed-edom ureueng gat. peuto peujan-
jian nyan laju tinggai disinan na lhee buleuen treb
jih, dan tuhan laju geubri beureukat ubak obet-
edom dan keuluwarga gobnyan. raja daud geudeun-
goe bahwa tuhan geubri beureukat ubak keuluwarga
obed-edom dan banmandum atra milek jih sabab
peuto peujanjian nyan. teuma geujak kheueh laju
gobnyan u rumoh obed-edom, geujak cok peuto
peujanjian nyan geupinah teuma u yerusalem deun-
gon geupeuna peurayaan nyang lumpah gura. bak
watee ureueng-ureueng nyang jibeuto peuto peu-
janjian nyan ka jijak nam boh langkah, nabi daud
laju geuyue dong awaknyan. dan gobnyan pih geu-
peuseumah laju keureubeuen keu tuhan, na kheueh
leumo agam dan aneuk leumo nyang ka geupeu
teumbon. oh lheuuehnyan nabi daud laju geumeu-
likak ngon geumeunari deungon peunoh seuman-
gat keu geuhoreumat ubak tuhan. bak watee nyan
gobnyan nyang na geungui cuma ija kroeng lineun
nyang paneuk nyang geu ikat ubak keuieng. meunan
kheueh cara jih nabi daud dan banmandum rakyat
israel geupinah peuto peujanjian nyan u yerusalem,
teupeu-ireng deungon sumurak nyang meuhubo dan
su beureuguih nyang hana putoh-putoh. bak wa-
tee peuto nyan teungoh geuba jipeutamong u dalam
banda, si mikhal putroe saul jicingeuek nibak peu-
radeuen teuma deuh laju geukalon raja nabi daud
mantong geumeulumpat-lumpat sira geumeulikak
keu geuhoreumat ubak tuhan, dan si mikhal nyan
get that geungeuen oh jikalon nabi daud nyang lagee
nyan. peuto peujanjian nyan geukeubah laju nibak
teumpat jih didalam khimah nyang ka geupasang le
nabi daud keu peuto nyan. oh lheuuehnyan nabi daud
laju teuma geupeuseumah keureubeuen nyang teu-
tot dan keureubeuen peudame ubak tuhan. laju gob-
nyan geubri beureukat ubak rakyat israel deungon
nan tuhan nyang mahakuasa. oh ka lheuuehnyan laju
teuma geubagi-bagi peunajoh keu awaknyan ban-
mandum. tieb-tieb ureueng nyang na tinggai disinan
bah kheueh jih nyan sidroe ureueng agam atawa ure-
ueng inong geubri laju sikrak eungkot sie nyang teu-
panggang, ruti dan kue kismis. oh ka lheuueh nyan
awaknyan laju jijakwoe u rumoh jih maseng-maseng.
bak watee nabi daud geuwoe ubak meuligoe geuh keu
geujak bri saleuem ubak banmandum keuluwarga
gobnyan, mikhal laju jiteubiet keu jijak meurmupok
ngon nabi daud dan jipeugah, "bak uroenyoe raja is-
rael bit-bit ka geupeu jeuet droe geuh teuhoreumat!
gobnyan ka geumeulon lagee ureueng bangai nyang
hana jiteupeu malee dikeue namiet ureueng inong
atra milek dumna peugawee meuligoe!" nabi daud
laju geujaweueb, "ulon meulikak nyan na kheueh keu
ulon bri horeumat ubak tuhan, nyang ka teutulak
bakap droeneueh meunan cit deungon keuluwarga
droeneueh, laju geupileh ulon mangat jeuet keu peu-
mimpin ateuah israel, umat gobnyan. sabab nyan
kheueh ulon hana lon pih meulikak ngon meunari
ulon horeumat tuhan. bahpi meunan ulon seudia
jihina leubeh nibak nyang bunoe. jeuet mantong

droeneueh neupandang miyueb ateueh ulon, teuma namiet-namiet nyang droeneueh peugah nyan bunoe, teuma jihareuga ulon!" mikhal, putroe saul nyan hana jimeu aneuek siumu udeb gobnyan. tuhan geupeulindong raja nabi daud nibak meubagoe jipeukaru le musoh-musoh gobnyan, akhe jih gobnyan hase teutab tinggai didalam meuligoe. teuma geupeugah kheueh le raja ubak nabi natan, "kalon, ulon nyoe tinggai didalam meuligoe nyang teupeuget nibak bahan kayee ceumara libanon, padahai peuto peujan-jian po teu allah teuma teukeubah didalam khimah!" geujaweueb le natan, "neupeubuet kheueh laju peue nyang ka neuniet le teungku amphon, sabab tuhan geutulung teungku amphon." teuma nibak malam nyan tuhan geupeugah ubak natan, "neujak kheueh laju dan neupeusampoe kheueh ubak hamba ulon nabi daud peusan ulon nyoe, 'ek kheueh gata nyang peudong rumoh keu ulon. yoh phon that bansa israel ulon peubeubaih di nanggroee meuse sampoe nibak uroenyoe, hantom na lom ulon tinggai lam saboh rumah, seulaen ulon meugeumbara dan tinggai didalam saboh khimah. yoh phon ulon meugeumbara meusajan deungan bansa israel, hantom lom ulon teumanyong ubak peumimpén-peumimpén nyang ka ulon pileh, peue sabab jih awaknyan hana jipeudong rumoh nibak kayee ceumara libanon keu ulon.' le sabab nyan, hai natan, tajak peugah kheueh ubak hamba ulon nabi daud, bahwa ulon, tuhan nyang mahakuasa, ulon peugah ubak gobnyan, 'gata ka ulon cok nibak buet gata meurabe didalam blang dan ulon baiat gata jeuet keu raja ateueh umat ulon israel. ulon ka ulon peungon gata ho mantong nyang gata jak, dan bubena musoh gata ka lheueh ulon sampoh banmandum bak watee gata teungoh lam prang. gata teuma ulon peujeuet keu meusyehu saban lagee peumimpén-peumimpén nyang paleng rayeuk di ateueh donya. lom teuma, keu umat israel ka ulon keubah teupat dan ulon yue awaknyan tinggai teutab disinan, mangat awaknyan hase jih udeb deungan teunang, dan hana ureueng laen nyang jijak peukaru. phon awaknyan teuka ubak tanoh nyoe, dan ulon baiat peumimpén-peumimpén keu awaknyan, awaknyan ka jiprang le ureueng-ureueng nyang galak ubak buet jeuhet lom kreueh. teuma hainyan hana teujadi le. ulon meujanji bahwa gata teuma aman nibak mubagoe musoh, dan ulon teuma lonbri keuturonan keu gata. teuma, meunyoe ajai gata ka sampoe, dan gata jitanom didalam jrat nibak teupat jrat indatu gata, sidroe lamkawan aneuek gata nyang agam ulon baiat jeuet keu raja. jihnyan kheueh nyang peudong rumoh keu ulon. keurajeuen jih teuma ulon peuteuga dan keu siumu masa sidroe nibak keuturonan jih teuma jimat peurintah sibagoe raja. ulon teuma jeuet keu bapak jih, dan jihnyan teuma jeuet keu aneuek ulon. meunyoe jihnyan jipeubuet buet nyang salah, jihnyan teuma ulon hukom lagee sidroe bapak geuhukom aneuek geuh. teuma ulon teutab ulon peubuet nyang jroh keu jihnyan sisuai deungan janji ulon. janji ulon keu jihnyan teuma teutab ulon mat, hana lagee nyang ka ulon peubuet ubak si saul nyang ka ulon geesee nibak teupat jih duek mangat gata hase jeuet keu raja. gata hana putoh sabe na keuturonan, dan ulon

teuma lon peujeuet keurajeuen gata nyan jimeuteun siumu masa. meunan cit keu siumu masa sidroe nibak keuturonan gata teuma jimat peurintah sibagoe raja." laju natan geubri tee ubak nabi daud peue mantong nyang ka geupeugah le po teu allah ubak gobnyan. geutamong kheueh laju raja nabi daud u dalam khimah tuhan. laju geudeuk dan geumeudoa, "ya tuhan nyang mahamanyang, ulon dan keuluwarga ulon hana patot ulon teurimong mandum keubaihan nyang ka tuhan tunyok ubak ulon seulaet nyoe. dan tuhan ka geupeubuet leubeh nibak nyan, ya tuhan nyang mahamanyang; droeneueh ka neupeuget janji keuhai keuturonan ulon keu watee nyang teuma teuka. dan droeneueh peuleumah hainyan ubak ulon, bahpih ulon nyoe teuma sidroe manusia, ya tuhan nyang mahamanyang! peue lom nyang jeuet ulon peugah ubak droeneueh? droeneueh ka neuteupeue banmandum keuhai ulon nyoe. deumi janji droeneueh dan ateueh keuheundak droeneueh keudroe droeneueh ka neupeubuet-buet nyang paleng rayeuk nyan guna jih keu neupeuruno hamba droeneueh nyoe. droeneueh keubiet akbar, ya tuhan allah! teuma droeneueh kheueh tuhan po teu allah, hana nyang saban deungan droeneueh. kamoe neuteupeue hainyan sabab ka neubritee yoh phon masa ilee. le bansigom bumoe nyoe hana bansa nyang saban deungan bansa israel. israel na kheueh saboh bansa nyang ka neupeubeubaih nibak jipeujeuet keu namiet mangat jeuet keu umat droeneueh keudroe. banmandum buet nyang rayeuk dan ajaeb nyang ka neupeubuet keu awaknyan, sampoe ka jeuet nan droeneueh meusyehu bansaboh donya. bansa-bansa nyang laen meunan cit deungan dewa-dewa awaknyan ka droeneueh use bak watee umat droeneueh jimaju u mideuen prang. bansa israel ka neupeujeuet keu umat droeneueh keudroe keu siumu masa, dan droeneueh, ya tuhan, ka jeuet keu po teu allah awaknyan. dan jinoenyoe, ya tuhan po teu allah, bah kheueh kira jih tuhan peukong keu siumu masa janji nyang ka droeneueh peugah keuhai droe ulon dan keuturonan ulon. soe kheueh kira jih tuhan peubuet peue nyang ka tuhan peujanji nyan. dipat mantong bubena ureueng sabe jipeu agong-agong nan droeneueh sira jipeugah, 'tuhan nyang mahakuasa na kheueh po teu allah ateueh israel.' teuma keu siumu masa sidroe nibak keuturonan ulon teuma jimat peurintah sibagoe raja ateueh bansa nyoe. tuhan nyang mahakuasa! ulon peubeurani droe ulon lakee doa nyoe ubak droeneueh, sabab droeneueh keudroe ka neubri tee ubak ulon bahwa aneuek cucoe ulon treun neutreun teuma neupeujeuet keu raja ateueh bansa nyoe. ya tuhan nyang mahamanyang, droeneueh kheueh po teu allah; banmandum janji droeneueh neupeuteupat, dan hai nyang get-get nyan ka neupeujanji ubak ulon. sabab nyan, ulon lakee, neutem kheueh kirajih neubri beureukat ateueh keuturonan ulon, mangat jeuet keu siumu masa awaknyan teutab jirasa gaseh nyang seutia nibak droeneueh. ya tuhan nyang mahamanyang, banmandum nyan ka lheueh tuhan peujanji, teuma keuturonan ulon teutab tuhan bri beureukat keu siumu masa." napadub na treb teuma oh lheuehnyan nabi raja daud geujak prang lom ureueng filistin.

ureueng filistin nyan laju geupeutaloe dan teureubot tanoh awaknyan pi laju geureubot. meunan cit di nabi daud geujak prang teuma ureueng moab dan awaknyan pih taloe. geuyue awaknyan mangat ji-eh di ateuhe tanoh, ureueng nyang ka ji-eh nyan laju geupoh mate dua droe tieb-tieb lhee droe nyang na eh disinan. deungan nyan, di ureueng moab ka jittaklok ubak nabi daud dan laju jibayeue upeti ubak gobnyan. oh ltheuhnyan nabi raja daud nyan geujak prang dan geupeutaloe teuma raja hadadezer aneuek rehob nyan mat peurintah di zoba, na ktheueh saboh keurajeuen nyang rab ngon damsyik. bak watee nyan hadadezer teungoh lamjak keuneuk jijak peupuleh kekuasaan jih di wilayah nyang rab ngon ulee kruneng efrat. nabi daud laju geudrob 1.700 droe tantra meuguda, dan 20.000 droe tantra nyang jijak ngon gaki. gobnyan geupeuhcon mandum guda, teuma na bacut sagai, seb keu sireutoih geuritan prang. di ureueng siria nyan na di damsyik laju teumajikirem sipai keu jijak tulong raja hadadezer. teuma nabi daud laju geupeutaloe awaknyan dan meuteume geupoh mate 22.000 droe nibak awaknyan. oh ltheuhnyan nabi daud laju geupeudong khimah-khimah tantra lam wilayah awaknyan, dan awaknyan taklok dan jibayeue upeti ubak gobnyan. tuhan geupeumeunang ubak nabi daud dipat mantong gobnyan geupeubeudoh prang. tameng-tameng meuh nyang jingui le tantra hadadezer laju geureupah le nabi daud dan geuba laju atranyan u yerusalem. seulaen nibaknyan nabi daud geucok teuma peurunggu nyang lumpah that le nibak betah dan berotai, banda-banda nyang yoh watee ilee jikuasa le raja hadadezer. raja tou di nanggroe hamat geudeungoe teuma bahwa nabi daud ka geupeutaloe banmandum tantra hadadezer. teuma le geuhnyan laju geu kirem yoram aneuek agam gobnyan mangat geujak peutrok saleuem ubak nabi raja daud dan geupeugah seulam ateuhe keumeunangan gobnyan, sabab hadadezer ka kayem that geumuprang deungan raja tou. yoram jijak ubak nabi daud sira jiba hadiah nyang lumpah le nyang teupeuguet nibak meuh, pirak dan peurunggu. nabi raja daud nyan laju geupeuseumah banmandum hareuta nyan ubak tuhan mangat teupeuguna didalam upacara iebadat. meunan cit teuma geupeubuet u ateuhe barang-barang meuh dan pirak nyang ka geureupah nibak raja hadadezer dan barang-barang bansa nyang ka geupeutaloe, bansa nyan na ktheueh, bansa edom, moab, amon, filistin dan amalek. nan nabi daud meutamah meusyehu lom bak watee gobnyan meuhase geupeutaloe ngon geupeumate na kira-kira 18.000 droe ureueng edom di panton asin. gobnyan laju geupeudong khimah-khimah tantra nibak saboh nanggroe edom, dan bubena ureueng edom nyan ka taklok ubak gobnyan. tuhan geujok meunang keu nabi daud dipat mantong gobnyan geupeubeudoh prang. meunan ktheueh cara jih nabi daud geumat peurintah nibak bansaboh nanggroe israel dan geujaga mangat rakyat gobnyan sabe teupeusanet ngon ade dan getget. nyoe ktheueh peujabat-peujabat rayeuk nyang geu angkat le nabi daud nyan: panglima angkatan prang: yoab aneuek zeruya; sekretaris meuligoe: yosafat aneuek ahilud; teungku-teungku imeum: zadok aneuek ahitub, dan ahimelekh aneuek aby-

atar; sekretaris nanggroe: seraya ulee kawan nyang kawai pribadi raja: benaya aneuek yoyada; teungku-teungku imeum di meuligoe: aneuek-aneuek agam nabi daud. bak siuroe nabi daud geuteumanyong, "peu ktheueh mantong na ureueng nyang udeb lam keuluwarga saul? meunoye mantong na, ulon keuneuk jak peubuet nyang get ubak keuluwarga nyan deumi si yonatan." keuluwarga saul na sidroe namiet nyang nan jih ziba, dan namiet nyan geuyue jak meuhadab ubak raja nabi daud. raja geuteumanyong, "peu ktheueh gata nyang nan ziba?" nyoe, beutoi that teungku amphon, "jijaweueb le ziba nyan. oh ltheuhnyan raja geutanyong lom, "peu ktheueh mantong na ureueng nyang udeb lam keuluwarga saul? ulon keuneuk jak peubuet nyang get keu ureueng nyan, lagee nyang ka ulon meujanji ubak po teu alah." geujaweueb le ziba, "mantong na sidroe aneuek agam si yonatan. jihnyan capiek." "dipat jihnyan?" geutanyoe le raja daud. "di lodebar, di rumah si makhir aneuek si amiel," jipeugah le ziba. le nabi raja daud laju geuyuejak hoi aneuek agam si yonatan nyan. aneuek agam yonatan nyan nan jih mefiboset. bak watee katrok jiteuka, laju jisujut jibri horeumat ubak nabi daud. nabi daud laju geusapa ureueng nyan, sira geupeugah, "mefiboset," dan aneuek nyan laju jijaweueb, "nyoe pat ulon, teungku amphon." nabi geupeugah, "bek teumakot teuh. ulon keuneuk peumurah ate keu gata deumi si yonatan bapak gata. banmandum tanoh atra abusyiek gata si saul, teuma ulon jok pulang ubak gata dan keu siumu masa gata jeuet tamakheun nibak meuligoe gobnyan." mefiboset jisujut lom sira jipeugah, "peu ktheueh makna jih ulon nyoe hai teungku amphon! pakon teungku amphon leupah jroh keu ulon?" laju le raja geutawok ziba namiet saul nyan, dan geupeugah laju, "peue mantong na hareuta nyang jitinggai le saul dan keuluwarga gobnyan sabab atra ulon keuneuk bri keu cucoe teungku gata nyoe. gata dan aneuek-aneuek meunan cit deungan peumbantu gata bahtajak meue tanoh nyan deumi keuluwarga teungku gata si saul, dan neubri ktheueh laju hase tanoh nyan ubak awaknyan mangat teupeuseb nyang jipeureulee le awaknyan. teuma mefiboset jeuet geumakheun nibak meuligoe siumu masa." (ziba na jimeu aneuek 15 droe aneuek agam dan 20 droe namiet). geujaweueb le ziba ubak raja, "banmandum titah teungku amphon teuma ulon peubuet." teuma le mefiboset laju jimakheun saboh talam deungan raja, lagee aneuek agam nabi raja daud keudroe. mefiboset na teuma jimeu aneuek agam nyang nan jih si mikha. banmandum anggota keuluwarga ziba nyan ka jeuet keu namiet mefiboset. meunan ktheueh si mefiboset nyang capiek nibak ban dua blaih gaki jih nyan tinggai di yerusalem dan sabe jipajoh bu di meuligoe. na meupadub treb teuma oh ltheueh nyan nahas raja amon meuninggai donya, dan aneuek gobnyan nyang agam nyang nan jih hanun duek keugeunantoe raja. dan geupeugah le nabi raja daud, "nahas na ktheueh rakan ulon nyang that seutia. jadi ulon haroh ktheueh ulon meusahabat deungan hanun aneuek geuh nyan." sabab nyan nabi daud laju geukirem utosan u nanggroe amon mangat teujak peuhibor ate hanun ateuhe kameuninggai bapak jihnyan. bak watee awaknyan ka trok u amon,

bubena peumimpin nanggroe nyan laju jijak peugah ubak hanun, "bek kheueh neupike hai teungku amphon nabi daud geukirem utosan geuh nyan sabab gobnyan geukeuneuk horeumat keu bapak teungku amphon! gobnyan geukirem ureueng geuh keunoe na kheueh sibagoe mata-mata jijak muluem u nanggroe geutanyoe nyo, jijak seulidek banda geutanyoe mangat hase jireubot le awaknyan." le hanun laju jidrob utosan nabi daud nyan, jicuko laju janggot awaknyan siblai, dan jiguteng teuma peukayan awaknyan sampoe oh punggong, dan laju jiyue jak awaknyan. teuma awaknyan that-that malee keuneuk jiwoe u nanggroe droe jih. oh watee hainyan jibritee ubak nabi daud, gobnyan laju geukirem lom utosan mangat awaknyan tinggai mantong di yerikho sampoe janggot awaknyan jitimoh lom teuma. oh lheureh nyan di ureueng amon jisada bahwa deungon buet awaknyan nyang lagee nyan bagoe nabi daud ka jeuet keumuso. sabab nyan di awaknyan laju jijak siwa 20.000 droe tantra ureueng siria nyang na tinggai di betrehob dan zoba, meunan cit deungon 12.000 droe tantra di nanggroe tob, meunan cit meusajan teuma deungon raja nibak nanggroe maakha deungon 1.000 droe tantra gobnyan. bak watee nabi daud geudeungoe hai nyan, gobnyan laju geuyue yoab deungon banmandum angkatan prang gobnyan geuyue maju jak lawan musuh. ureueng amon laju jiteubiet dan ji ato laju bareasan jih di keu pintoe geureubang raba ma banda awaknyan keudroe, seudangkan ureueng siria, ureueng tob dan maakha jiatoe teuma bareasan jih di dalam padang. yoab jikalon bahwa gobnyan ka teuseupet ngon ji apet le pasokan musuh dikeue dan dilikot droe geuh. sabab nyan gobnyan laju geupileh tantra israel nyang paleng get dan laju awaknyan geupeuduek meuhadab-hadab keue deungon tantra siria. nyang leubeh nibak tantra israel nyan jiseurah laju ubak abisai adoe gobnyan, nyang atoe bareasan awaknyan meuhadab keue teuma deungon tantra amon. yoab jipeugah ubak adoe jih nyan, "meunyoe ulon singoh ka hana ekle ulon meuteun teuhadab tantra siria, bugagaih kheueh neutulung ulon; meunan cit teuma, meunyoe droe kheueh hana ekle neupeuteun teuhadab tantra amon nyan, ulon teuma lon teuka jak tulong gata. saba kheueh! jak kheueh geutanyoe tajak muprang deungon ceubeueh dan beurani deumi keu bansa geutanyoe dan keu banda-banda po teu allah geutanyoe. seumoga tuhan geupeubuet peue nyang geukeuheundaki." yoab dan pasokan gobnyan laju jimaju u mideuen prang, akhe jih bube nyang na tantra siria ka habeh jiplueng, bak watee ureueng amon jikalon tantra siria ka jiplueng bansalamle, awaknyan pih jiplueng cit nibak abisai dan ji surot laju u dalam banda. oh ka lheureh jiprang ureueng amon, yoab laju geuwoe riwang u yerusalem. ureueng siria jitee droe bahwa jihnyan ka jipeutaloe le ureueng israel, sabab nyan laju jihoi banmandum anggota pasokan jih mangat jimeusapat lom. teuma le raja hadadezer geuyue jakhoi ureueng siria nyang na di siblai u timu krueng efraim, dan jiteuka kheueh awaknyan u helm dimiyueb pimpanan panglima sobakh, sobakh nyan na kheueh panglima tantra raja hadadezer di zoba. ban geudeungoe hai nyan, nabi daud deungon reujang that geupeusapat

banmandum pasokan israel, laju geujak jeumeurang u meurandeh krueng yordan, oh lheurehnyan jimaju laju u helm. disinan na teuma ureueng siria teungoh ji atoe bareasan jih dan laju teuma jimaju jijak prang pasokan nabi daud. teuma di ureueng israel laju jipoh sampoe jisurot u likot tantra siria. nabi daud dan pasokan gobnyan ka geupoh mate 700 droe nyang mat keumudoe geuritan prang, dan 40.000 droe teuma tantra meuguda; seulaen nibak nyan si sobakh nyang panglima prang nyan keunong teuma dan luka jih lumpah parah akhe jih sabab luka nyan jihnyan pih mate di mideuen prang. bak watee raja-raja nyang jimat kuasa le hadadezer jikalon bahwa awaknyan ka jipeutaloe le tantra israel, awaknyan laju jilakee meudame laju jitaiklok ubak ureueng israel. phon wateenyan di ureueng siria hana jijeuet le jibantu ureueng amon. raja-raja biasa jijakmaju u mideuen prang bak watee museum semi. dan bak watee museum semi thon nyan nabi daud geuyue ubak yoab mangat jijak maju umideuen prang meusajan deungon mandum peuwira gobnyan dan banmandum peuwira israel; laju awaknyan geupeutaloe ureueng amon dan geukeupong banda raba. teuma nabi daud teutab na tinggai di yerusalem. bak siuroe, watee ka seupot, oh ka lheureh nabi daud geubeudoh nibak teunguet, gobnyan laju geujak-jak di atueh bubong meuligoe nyang data nyan. nibak tempatnyan leumah geukalon sidroe ureueng inong teungoh jimano, dan ureueng inong nyan lumpah ceudah. le nabi daud laju geuyue tanyong soe ureueng inong nyan, dan laju jibri tee bahwa ureueng inong nyan nan jih batesyeba; bapak jih nan geuh eliam dan lakoe gobnyan na kheueh uria ureueng het. nabi daud laju geuyue jakhoi ureueng inong nyan, dan oh ka trok inong nyan ubak meuligoe, nabi daud laju geueh deungon ureueng inong nyan. (batesyeba ban mantong lheureh jipeubuet upacara meusuci oh ka habeh jiteuka he). dan jijakkwoe kheueh laju inong nyan u rumoh jih. hana padubna treb teuma oh lheurehnyan batesyeba laju mume, laju gobnyan jijak peugah ubak nabi daud keuhai nyan. bak watee nyan cit teuma nabi daud geubri peurintah ubak yoab, geupeugah, "gata yue laju ubak uria ureueng het nyan mangat jijak meurumpok deungon ulon." teuma yoab laju jiyue uria jajak meurumpok deungon nabi daud. bak watee uria jajak meurumpok deungon nabi daud, raja laju geutanyong ubak jihnyan keuadaan yoab dan pasokan israel, dan meunan cit geutanyong pakriban teuma jalan jih watee teumuprang. oh lheurehnyan nabi daud geupeugah lom ubak uria, "tajak woe kheueh u rumoh gata dan tajak pioh hek kheueh meusikeujab." oh ka lheureh uria jitinggai meuligoe nabi daud nyan, nabi daud laju geukirem hadiah u rumoh uria. teuma uria hana jiwoe teuma jijak eh sampoe teunguet dibabah pintoe meuligoe meusajan deungon banmandum peungawai raja. ubak nabi daud jijak peugah laju keuhai nyan. teuma gobnyan laju geutanyong ubak uria, "gata banmantong tawoe nibak meuneujak nyang lumpah jioh, pakon hana tajakwoe u rumoh gata?" jijaweueh le uria, "tantra israel dan yehuda teungoh jimeujuang udeb mate dan peuto peujanjian tuhan na nibak awaknyan; yoab panglima kamoe dan bubena peuwira awaknyan geupeudong khimah di teungoh

padang. ek kheueh ulon nyoe lon jakwoe u rumoh, dan makheun meusajan meunan cit lon eh meusajan deungon ureueng binoe? deumi nyawong teungku amphon dan nyawong ulon, ulon hana ulon peubuet hai nyan!" laju geupeugah le nabi daud, "ka kheueh meunyo meunan, gata meureuhat kheueh disinoe bak uroenyoe dan singoh beungoh teuma ulon peu idhin gata tajak." deungon nyan uria pih tinggai di yerusalem nibak uroenyah. bak uroe nyang seulan-jut jih gobnyan teu-undang jak makheun meusajan nabi daud. teuma jipajoh kheueh bu meusigoe ngon nabi daud nyan meunan cit deungon ie meuneujieb na kheueh ie kreueh nyang lumpah jai sampoe uria ka mabok. teuma nibak malam nyan uria nyan hana cit jiwoe u rumoh jih, teuma ji-eh di ateuh ija seulimbot jih di dalam kama peungawai meuligoe. oh singoh beungoh nyan nabi daud laju geutuleh surat bak yoab di mideuen prang, dan surat nyan geukirem laju deungon peurantaraan si uria. asoe surat nyan na kheueh lagee nyoe, "gata peuduek kheueh si uria nyoe nibak gareh nyang paleng dikeue bak watee tamaja u mideuen prang, oh ltheuehnyan gata tasurot kheueh ulikot mangat jihnyoe mate." teuma teungoh yoab jikeupong banda nyan, uria laju geuyue ubak saboh teupat nyang ka jiteupeue bahwa nibak teupat nyan lumpah teuga jijaga le musoh. bak watee tantra musoh jiteubiet nibak banda dan jajak prang tantra yoab, na meupadub droe peuwira nabi daud ka teupoh mate, meunan cit deungon uria mate disinan. oh ltheuehnyan yoab laju geukirem utosan ubak nabi daud keujajak peugah jalan teujadi muprang nyang paleng hebat nyan. haba peurintah yoab ubak utosan nyan lagee nyoe, "oh ka ltheueh teungku amphon geudeungoe laporan gata keuhai jalan jih muprang nyoe, mungken gobnyan jeuet keubeungeh dan geutanyong ubak gata, 'pakon gata rab that-that deungon banda nyan? bukon kheueh gata tateupeue bahwa musoh pasti ji timbak gata deungon panah-panah nyang jipeuleuh diateueh pageupeageue beuton rumoh awaknyan? peu kheueh gata ka tuwoe bahwa si abimelekh aneuek gideon nyan teupoh mate di tebes? bukon kheuehnyan mate le sabab na sidroe ureueng inong jigeulawa deungon aneuek batee ngon gileng teupong nibak ateueh beuton ubak gobnyan? nyang kheueh, pakon gata meunan that to deungon beuton nyan?' meunyo teungku amphon geutanyong lagee nyan, tapeugah kheueh laju ubak gobnyan, 'uria si peuwira teungku amphon, meunan cit ka mate meusajan!' " jajak kheueh laju utosan nyan jimeuhadab ubak nabi daud dan jipeugah peue nyang ka jipeugah le yoab ubak gobnyan. utosan nyan jikheun, "lawan kamoe leubeh teuga dan awaknyan jiteubiet dalam banda laju jajak prang kamoe nyang na didalam padang. teuma deungon sihabeh teunaga hana meurasas teumakot kamoe lawan laju awaknyan sampoe trok lom u babah pintoe geureubang banda. oh ltheueh nyan di ateueh bubong meunan cit deungon di ateueh pageue beuton awaknyan laju jipeutek kamoe deungon aneuek panah, dan napadub droe nibak peuwira teungku amphon meunan cit deungon si uria pih ka mate." nabi daud geupeugah ubak ureueng nyang ba habanyan, "gata peukhong kheueh ate yoab dan tapeu-

gah kheueh laju ubak droe jihnyan mangat bek cut ate, sabab hana hase jiramai soe nyang teuma mate lam prang nyan. peugah kheueh ubak geuhnyan mangat jajak prang musoh nyang leubeh hibat dan leubeh nibak nyang ka-ka ateueh banda nyan sampoe banda nyan meuteume teureubot dan meunyeurah." bak watee batsyeba geudeungoe bahwa lakoe geuh ka meuninggai, laju gobnyan meukabong ngon ate nyang peudeh. oh ltheuehnyan oh ka habeh watee meukabong, nabi daud laju geuyuejak tueng ureueng inong nyan mangat jiba u meuligoe gobnyan dan laju geucok keu ureueng binoe geuh. na padub beuleuen teuma oh ltheuehnyan ureueng binoe geuhnyan geupeulahe sidroe aneuek agam. teuma tuhan hana galak keubuet nabi daud nyang lagee nyan. oh ka ltheueh nyan tuhan laju geu kirem nabi natan geuyue jak meurumpok deungon nabi daud. nabi natan laju geujak ubak gobnyan dan geupeugah, "na dua droe ureueng nyang tinggai dalam saboh banda; nyang sidroe kaya dan nyang sidroe teuk gasien. sikaya bak jihnyan jai that jipeulara beulatang peulara dan bubiri, seudangkan ureueng gasien nyan bak jihnyan teuma na saboh aneuek bubiri, nyang jibloe. aneuek bubiri nyan jipeulara sampoe ka rayeuk di dalam rumoh jihnyan meusajan-sajan deungon aneuek-aneuek gobnyan. aneuek bubiri nyan jijok peunajoh nibak peunajoh ureueng nyan, sampoe ubak jipeujieb ie keu aneuek bubiri nyan dalam cangkik ureueng nyan keudroe, meunan cit deungon ji-eh aneuek bubiri nyan didalam pangkee ureuengnyan; paneuk haba, jipeusanaut aneuek bubirinyan saban lagee jipeusanaut keu aneuek inong jihnyan keudroe. bak siuroe ureueng kaya jiteuka jame dirumoh jih nyan. ureueng kaya nyan hana jitem sie bubiri atawa leumo jih nyan keudroe mangat jeuet teutagun keu jame jih nyan. teuma jajak cok aneuek bubiri ureueng gasien nyan, laju atra ureueng gasien nyan jisie dan jitagun laju keu jame jih nyan." ban geudeungoe nyang lagee nyan nabi daud get that beungeh sabab buet ureueng kaya nyang lagee nyan dan geupeugah, "keujam that ureueng kaya nyan! deumi tuhan nyang udeb, ureueng nyan haroh jigantoe aneuek bubiri nyan peuet goe lipat dan ureueng nyan haroh teuhukom mate!" geupeugah le nabi natan ubak nabi daud, "teungku amphon kheueh ureueng nyang teupeugah nyan! dan nyoe kheueh nyang geupeugah le tuhan, po teu allah israel, 'droeneueh ka ulon baiat jeuet keu raja ateueh israel dan ka ulon peuseulamat nibak si saul. keurajeuen saul dan bubena peurumoh jihnyan ka ulon bri keu gata, lom teuma gata ulon baiat jeuet keuraja ateueh israel dan yehuda. meunyo atra nyan gohlom seb, pasti teuma ulon jok lom keu gata nyang leubeh le nibak nyang na. pakon gata hana tapakoe peue nyang ka ulon peurintah? keupeue tajak peubuet nyang jeuhet nyan? uria gata yuepoh mate didalam prang; tapeubiyeu jihnyan mate jipoh le ureueng amon, dan gata cok teuma peurumoh jih! le sabab gata hana tataan ubak ulon dan tareupah teuma peurumoh uria, le sababnyan didalam tieb-tieb keuturonan gata treun meutreon na nyang mate teupoh. ulon meusumpah teuma ulon peurhot mala peutaka nyan u ateueh gata nyang teuka jih nibak keuluwarga gata keudroe. ulon teuma loncok

peurumoh-peurumoh gata dikeue mata gata keudroe dan teuma ulon jok keu ureueng laen nyang teuma jih-eh meusajan awaknyan bak watee uroe ka teungguh trang. gata ka tapeubuet desya seucara seungab-seungab, teuma saboh watee ulon kupeubukeuti an-caman ulon nyan deungon seucara trang-trang di bansaboh israel.' "laju geupeugah le nabi daud ubak nabi natan, "ulon ka meudesya ubak tuhan." geu-jawueb le nabi natan, "tuhan ka geupeu amphon teungku po; jadi teungku amphon hana teuma mate. teuma le sabab teungku amphon ka neuhina tuhan deungon buet droeneueh nyan, aneuek agam teungku amphon nyang ban lahe nyan teuma mate." oh ka ltheueh geupeugah nyan geuwoe ktheueh nabi natan u rumah gobnyan. aneuek agam nabi daud nyang geupeulahe le batsyeba balee uria ka rhot bak saket deungon keuheundak tuhan. laju nabi daud geumeudoa ubak tuhan mangat aneuek geuh nyan puleh. gobnyan geupuaa dan tieb-tieb malam geueh simalam beungoh ateueh aleue kama gobnyan. laju le ureueng-ureueng patot nyang teupeucaya di dalam meuligoe jijak ubak gobnyan dan jibujuk gobnyan mangat geubeudoh, teuma gobnyan geutulak dan hana geutem makheun meusigoe ngon awaknyan. na siseuen aleuhut teuma oh ltheuehnyan aneuek nyan pih meuninggai donya, dan bubena namiet nabi daud ban mandum jitakot keu jijak britee hai nyan. jipeugah le awaknyan, "yoh watee aneuek nyan mantong udeb, raja hana geutem deungoe meunyo tanyoe ta peugah haba deungon gobnyan. peue lom jinoenyo watee aneuek geuh nyan ka meuninggai donya! pat tateupeue gobnyan teuma geurajam droe gobnyan keudroe!" bak watee nabi daud geukalon namiet geuhnyan jimeusaiah-saih, sada ktheueh gobnyan bahwa aneuek geuh nyan ka meuninggai donya. laju geutanyong ubak awaknyan, "peu ktheueh aneuek nyan ka meuninggai?" "ka teungku amphon," jawueb awaknyan. dan geubeudoh ktheueh laju nabi daud nibak aleue teumpat geu-eh nyan, laju geujak bak-mon geumanoe oh ltheueh nyan geusugot ngon ok, dan geutuka peukayan. oh ltheuehnyan geubeudoh geujak laju meuebadat u baet tuhan. oh ltheueh nyan gobnyan geuwoe laju ubak meuligoe, dan geulakee laju hidangan bu keuneuk makheun le gobnyan, dan laju geu makheun. oh ban jingiang nyang lagee nyan bagoe, le namiet nabi daud laju jitanyong ubak gobnyan, "kamoe banmandum nyoe hana muphom, ya teungku amphon. bak watee aneuek nyan mantong udeb, teungku amphon neupuaa dan neupeuba-e aneuek nyan, teuma oh ka ltheueh aneuek nyan meuninggai, teungku amphon neubeudoh laju neu pajoh bu!" "nyoe, beutoi," geujawueb nabi daud, "keubiet ulon meupuaa dan ulon moe bak watee aneuek nyan mantong udeb dan teuma ulon pike-mungken tuhan geugaseh keu ulon dan geupeupuleh aneuek nyan nibak peunyaket jih dan hase udeb lagee bak nyang ka. teuma jinoenyo, oh ka saheeh jihnyan ka meuninggai, keupeue guna jih ulon nyoe sabe lon puasa? peu ktheueh aneuek nyan hase ulon peu udeb lom teuma? bak saboh watee teuma ulon pih lon jak cit ubak teumpat aneuek lon nyan jijak, teuma jinoenyo jihnyan hana jiwoe le ubak ulon." oh ltheuehnyan nabi daud geupeu mangat lom ate ure-

ueng inong gobnyan si batsyeba, oh ltheuehnyan laju geujak eh ngon binoe geuh nyan. batsyeba laju geupeulahe lom sidroe aneuek agam nyang geuboh nan sulaiman le nabi daud. tuhan that-that geugaseh keu aneuek nyan dan geuyue nabi natan mangat geuboh nan aneuek nyan ngon nan yedija, sabab tuhan geugaseh keu aneuek nyan. bak wateenyan yoab mantong hibat that teungoh geumeu heuengkoee dalam mideuen prang geulawan raba ma banda nanggroee amon, dan karab geureubot banda nyan. laju gobnyan geukirem utosan ubak nabi daud sira geupeugah, "ulon ka lon prang raba, dan ka ulon reubot peuseudiaan ie jih. jinoenyo, neutem ktheueh teungku amphon neupeusapat tantra geutanyoe nyang na mantong tinggai, laju neupimpen seurangan mangat tapeutaklok banda nyan. deungon na nyang lagee nyan teuma hana jikheun bahwa ulon nyang reubot banda nyan." laju nabi daud geupeusapat banmandum tantra gobnyan, oh ltheuehnyan laju geujak prang raba, geuseureubu dan laju teuma geupeutaklok. nabi daud laju geucok mahkota di ateueh ulee raja awaknyan dan atra nyan laju geungui keudroe di ateueh ulee gobnyan. mahkotanyan na brat jih kira-kira 35 kilogram dan meutahta deungon peumata nyang lumpah ceudah. meunan cit nabi daud geuba nibak teumpatnyan lumpah jai barang rampasan. seulaen nibaknyan peunduduek banda nyan laju geuparoih, dan geuyue bak awaknyan mangat jiba gogajo, cangkoi beuso, dan pato beuso dan awaknyan laju geuyue meukeureuja nibak teumpat peuget batee bata. meunan cit hainyan geupeubuet u ateueh peunduduek banda-banda amon nyang laen. oh ltheueh nyan nabi daud dan banmandum tantra gobnyan geuwoe lom u yerusalem. absalom aneuek agam nabi daud na sidroe adoe jih nyang inong, aneuek dara nyan cukob lagak, nan jih tamar. amon aneuek agam nabi daud nibak peurumoh nyang laen ka teuma rhot cinta keu si tamar nyan, dan ka meuheuet that jikeuneuk eh meusajan si dara nyan. teuma hainyan mustahe hase teujadi sabab si tamar nyan gohlom jimeukawen dan hana jeuet teuma jimeurakan deungon aneuek agam. amon hana pioh-pioh jipike keuhai nyan sampoe jihnyan rhot keu saket. amnon na teuma sidroe rakan nyang lumpah lisek, nan rakan jih nyan yonadab aneuek simea aduen nabi daud. yonadab jipeugah ubak amnon, "hai teungku pangeran, pakon tieb-tieb uroe ulon ngiang droeneueh seudeh that? peue nyang ka teujadi u ateueh droeneueh?" jijawueb le amnon, "ulon ka rhot cinta ubak tamar, adoe si absalom syedara ulon nyan." laju jipeugah le yonadab ubak gobnyan, "oh, meunyo hainyan mudah that hai teungku pangeran! neujak eh ktheueh laju u ateueh tika, dan neupeugit ktheueh droeneueh sang-sang teungoh saket. meunyo bapak droeneueh teuka dan geujak ngiang droeneueh, dan neupeugah laju ubak gobnyan, 'bapak, neupeu idhin ktheueh si tamar jikak kalon ulon sira ji peuhidang bu keu ulon. meunyo ulon hase ulon ngiang si tamar nyan teungoh jitaguen bu keu ulon disinoe, ulon ka hase lon pajoh bu.' " oh ltheueh nyan si amnon laju jijak eh di teumpat eh pura-pura gobnyan lam keuadaan saket. bak watee raja nabi daud bapak gobnyan teuka geu-

jak kalon, amnon laju jipeugah ubak bapak jih nyan, "bapak, neupeu idhin kheueh si tamar jijak keunoe mangat jipeuget juadah dikeue ulon disinoe; meun-yoe nyan ka lheueh jipeumasak mungken ulon ka ek ulon makheun." oh lheueh nyan nabi daud laju geukirem peusan ubak si tamar nyang na di dalam meuligoe, geupeugah lagee nyoe, "tajak kheueh laju u rumoh aduen gata si amnon, dan tapeuget kheueh laju peunajoh keu jihnyan." oh ban jideungoe nyang lagee nyan si tamar laju jijak u rumoh aduen jih nyan dan deuh laju jikalon aduen jih si amnon mantong teubalek nibak teupmat eh. tamar jicok laju bacut teupong dan dikeue aduen jih nyan jipeuget laju kue juadah dan laju jitot ngon jipanggang di ateuhe ngeue apui. oh ka lheueh nyan jipeuteubiet laju juadah nyan didalam panci dan jibri ngon geupeuhidang laju ukeue aduen jih si amnon nyan. teuma amnon hana jitem pajoh juadah nyan. gobnyan jipeugah, "tayue teubiet laju banmandum ureueng nyang na didalam kama nyoe!" oh ka lheueh banmandum ureueng jipeuteubiet nibak kama nyan, jipeugah kheueh le amnon ubak si tamar, "taba kheueh laju banmandum juadah nyan keunoe, ubak teupmat ulon eh nyoe, dan gata suleueng kheueh u dalam babah ulon!" tamar jiturot peue nyang jiyue nyan. teuma bak watee tamar jisunyueng juadah nyan u dalam babah amnon, amnon laju jimat aneuek dara nyan sira jipeugah, "adoe meutuah, keunoe gata eh meusapat ngon ulon!" "ah, bek hai aduen meutuah!" jaweueb aneuek dara nyan. "bek neupaksa ulon tapeubiet buet nyang hina nyan! hai nyang lagee nyan hantom na teupeubiet di israel. meunyo teujadi nyang lagee nyan, ho ulon nyoe haroh ulon som jumoh ulon? meunan cit deungon droeneueh hai aduen teuma jihina le gob di nanggroe israel nyoe. nyang seuget jih hainyan neujak mariet kheueh ubak raja, ka pasti raja teuma situju ulon nyoe jeuet keu ureueng bineo droeneueh." teuma amnon hana jitem deungoe peue nyang jipeugah le si tamar nyan, dan sabab amnon nyan leubeh teuga, jipaksa laju adoe jih nyan deungon cara gata, laju jipeukosa adoe jih si tamar nyan. teuma oh ka lheueh jipeukosa nyan deungon hana teusangka-sangka amnon ka teuka banci keu adoe jih nyan dan hana tanggong-tanggong, leubeh rayeuk banci jih nibak cinta jihnyan yoh awaiphon. le jihnyan laju jipeugah ubak adoe jih nyan, "jak teubiet keudeh!" tamar jipeugah, "ah, pakon jeuet keumeunan aduen? meunyo ulon neu-use, keujeuhtetan nyan leubeh rayeuk nibak hai nyang ka lheueh neupeubiet bunoe!" teuma si amnon hana jitem deungoe peue nyang jipeugah le tamar nyan. amnon laju geuhoi peulayan pribadi jih sira jipeugah, "gata peuteubiet laju ureueng inong nyoe uluwa, dan tagunci laju pinto!" le peulayan nyan laju jiturot peue nyang ka jiyue le amnon nyan. peukayan si tamar na kheueh bajee jubah panyang meujaroe panyang. nibak jamen nyan putroe-putroe nyang gohlom jimeukawen lazem jih jingui peukayan nyang lagee nyan. le tamar laju jisipreuk abee u ateuhe ulee droe jih, jipriek ba-jee jubah jih, dan jijak laju sira jitob muka jih deungon bandua blaih jaroe sira jimo musok-musok ngon ate nyang roga. bak watee absalom jikalon aduen jih nyan, teuma jitanyong kheueh le jihnyan ubak tamar

nyan, "peu kheueh si amnon bunoe ka ji-iengkeue keuhormatan gata? ka kheueh adoe meutuah, bek tapike le hainyan. bukon kheueh jihnyan aduen gata, dan bek kheueh hainyan gata peugah ubak soe mantong." bak watee nyan cit teuma tamar jipeuaseng droe jih di rumoh absalom, dan jih nyan get that seudeh lom ngon seungue hana meurakan. raja nabi daud laju geudeungoe hai nyang lagee nyan, dan gobnyan get that beungeh. absalom that-that jitroi dan keu amnon dan hana jitem le peugah haba deungon jihnyan sabab jihnyan ka jipeukosa adoe jih si tamar. dua thon teuma oh ka lheueh nyan absalom laju jipeuna khanuri teugunteng pita bulee bubiri di baal-hazor, tou ngon banda efrain, dan le gobnyan laju juandang banmandum aneuek raja nyang agam. gobnyan jijak laju meuhadab ubak bapak geuh raja nabi daud dan jipeugah, "bapak, ulon keuneuk peuna khanuri teugunteng bulee bubiri, ulon that-that meuharab bapak pi neutem teuka ubak khanuri ulon nyan meunan cit deungon ureueng-ureueng rayeuk nyang na di dalam meuligoe." teuma geujaweueb le raja, "bek, hai aneuek meutuah, sabab jih meuharab kamoe nyoe banmandum kamoe jak keunan beuare-uti kamoe nyoe ka kamoe peusosah gata." teuma di absalom hana geutem sabe jipaksa pakriban mantong bapak jih nyan geutem teuka ubak teupmat khanuri nyang jipeugot nyan, teuma bapak jih nyan teutab cit hana geutem. gobnyan teuma geubri idhin mantong ubak aneuek geuh nyan. laju jipeugah kheueh le absalom, "meunyo meunan, neupeu idhin kheueh syedara ulon si amnon jiseutot deungon kamoe." geupeugah le raja, "bek kheueh jihnyan gata peurhoh sajan gata." teuma sabab absalom hana jipioh jideusak ngon jipaksa ureueng syiek jih nyan, bak akhe jih nabi daud laju geubri idhin amnon dan banmandum aneuek agam geuh nyang laen jimeusajan jiseutot meusapat deungon absalom. laju absalom jipeuidang peunajoh nyang lumpah meuwah. gobnyan laju jibri peurintah ubak bubena namiet jih, "gata deungoe kheueh nyoe beuget-get, meunyo amnon ka mabok sabab jijieb ie anggo, ulon teuma lon bri aba-aba, laju gata poh mate jih nyan. bek gata takot. ulon nyang meutanggong jaweueb ateuhe hai nyan. gata meubuet kheueh deungon beuhe dan bek ragu-ragu!" bubena namiet nyan laju jipeubuet peue nyang ka jipeurintah le absalom, laju awaknyan jipoh mate amnon. ban jikalon peue nyang ka teujadi nyan bubena aneuek agam nabi daud nyang laen laju ji-ek u ateuhe bagal jihnyan maseng-maseng dan laju jipeuplueng droe. teungoh awaknyan mantong nibak rot ueh teungoh jiwoe, na ureueng laen laju jijak peugah ubak nabi daud, "absalom ka jipoh mate banmandum aneuek agam teungku raja - hana meusidroe pi nyang na udeb!" raja geubeudoh nibak teupmat duek, laju geupriek peukayan nyang meuleukek nibak tuboh geuh sabab that-that seudeh, dan geupeureubah laju droe gobnyan u ateuhe aleue. meunan cit banmandum peugawee gobnyan jipeureubah droe jih u ateuhe aleue. teuma yonadab aneuek simea aduen nabi daud jipeugah, "teungku amphon, bek neugundah dan bek teuma neupike bahwa banmandum aneuek agam teungku amphon ka mate. teuma na kheueh amnon mantong nyang mate, sabab ka jeulaih nyan kheueh

nyang jilakee le absalom yoh phon tamar adoe geuh-nyan jipeukosa le amnon. jadi bek kheueh neupateh bahwa banmandum aneuk teungku amphon ka meuninggai donya, lagee nyang ka ulon peugah bunoe nyang mate na kheueh amnon sidroe kong." dan bak watee nyan cit teuma absalom ka jipeuplueng droe geuh. ureueng jaga meuligoe nabi daud deuh jikalon bahwa rame that ureueng teungoh jitreun di ateueh gunung nibak horonaim. dan jiajak peugah kheueh hainyan ubak raja. dan yonadab pih laju geupeugah bak nabi daud, "yang kheueh bubena aneuk agam teungku raja! beutoi lagee nyang ka ulon peugah bunoe." banmantong gobnyan seulesoeoe geupeugah haba, jitamong kheueh laju bubena aneuk agam nabi daud nyan u dalam ruweueng meuligoe. awaknyan ka jipeuphon mo, dan nabi daud meunan cit deungan banmandum namiet gobnyan ka geumo ba-e sabab seudeh. absalom laju jiajak peuaseng droe ubak meuligoe raja gesur, na kheueh talmai aneuk amihur. gobnyan tinggai disinan treb jih lhee thon. treb that nabi daud geumeukabong keu amnon, teuma bak watee nabi daud hana meuseudeh ate le, gobnyan pih ka teuma teuingat that-that ngon meucen that-that keu absalom. yoab geuteupeue bahwa raja nabi daud get that geumeucen keu absalom, le sabab-nyan gobnyan geuyue jak tueng baksidroe ureueng inong nyang lisek nyang na tinggai di tekoa. bak watee ureueng inong nyan ka trok, yoab laju geupeugah ubak ureueng inong nyan, "droeneueh mak haroh kheueh pura-pura neumeukabong ngon ate nyang roga; neungui kheueh laju peukayan meukabong, dan bek neungui minyeuk mangat bee. neupeujeuet kheueh droeneueh lagee ureueng inong nyang ka lumpah treb jipeumo ngon jipeuba-e ureueng nyang ka mate nyan get that jicinta. oh ltheueh nyan tajak kheueh laju meuhadab ubak raja, tapeugah laju ubak gobnyan lagee nyoe," laju yoab geupeugah ubak inong nyan peue nyang haroh jipeugah. laju di ureueng inong nyan jimeuhadab ubak raja, sira jitungui ngon jiseumah jipeugah laju lagee nyoe, "teungku amphon nyang mulia, neutulong kheueh ulon nyoe!" "peue hai?" geutanyong le raja ubak ureueng inong nyan. ureueng inong nyan geujaweueb "ulon nyoe sidroe ureueng inong balee nyang lumpah gasien. lakoe ulon ka meuninggai donya. ulon na dua droe aneuk agam, dan bak sirooe awaknyan jimeudakwa di dalam blang. sabab hana ureueng nyang peugla, laju sidroe lamkawan aneuk ulon nyan ka mate teupoh. dan jinoenyoee, banmandum kawom keuluwarga ulon ka jipeumusoh ulon dan jitungot ubak ulon mangat ulon jok aneuk ulon nyang ka jipoh mate nyan keu awaknyan, mangat awaknyan jihukom teuma aneuk ulon nyan deungan hukoman mate, sabab jihnyan ka jipoh mate syedara jih. meunyoee ulon jok aneuk nyan, tinggai kheueh ulon sidroe mantong. awaknyan jipeuhanco harapan ulon nyang kheueh sidroe teuk dan hana jitinggai meusidroe pih aneuk agam keu lakoe ulon mangat jeuet jipeusambong keuturonan gobnyan." "neujak woe kheueh laju, geupeugah le raja, "teuma ulon uroih hai nyan." "teungku amphon nyang mulia," jipeugah lom le ureueng inong nyan, "peue mantong nyang teungku amphon peubuet, ulon dan keuluwarga ulon kheueh

nyang tanggung akibat jih; teungku amphon dan keuluwarga teungku amphon hana meusalah." geujaweueb le raja, "meunyoee na ureueng nyang jiancam gata, gataba kheueh ureueng nyan ubak ulon, teuma oh ltheueh nyan pasti kheueh ureueng nyan hana ji peukaru le gata." jipeugah le ureueng inong nyan, "neumeudoea kheueh teungku amphon ubak tuhan po teu allah teungku amphon, mangat ureueng nyang jikeuneuk balaih ateueh keuhai mate aneuk ulon nyan bek sampoe jipeubuet buet nyang leubeu rayeuk lom deungan jipoh mate aneuk ulon nyang sidroe teuk nyan." geujaweueb le nabi daud, "deumi tuhan nyang udeb, aneuk gata nyang na sidroe teuknyan hana jipakoe le le awaknyan." laju jipeugah kheueh le ureueng inong nyan lom, "teungku amphon nyang mulia, neupeu idhin kheueh ubak ulon nyoe ulon peugah haba bacut teuk mantong." "get kheueh," geujaweueb le raja. kheun ureueng inong nyan, "deungan tutoe haba amphon nyan, teungku amphon ka neumeungaku bahwa teungku keudroe meusalah sabab hana neupeu idhin aneuk agam teungku amphon jiwoe nibak teupat gobnyan jipeusom droe. pakon teungku amphon neupeubuet buet nyang salah nyang lagee nyan ateueh umat po teu allah? geutanyoe nyoe banmandum teuma mate; geutanyoe manusia nyoe na kheueh teuma lagee ie nyang roe ateueh tanoh dan hana meuteume le ie nyan tapeusapat lom teuma. dan meunan cit po teu allah pih hana teuma geupeu udeb ureueng nyang ka mate; le sabab nyan bah kheueh teungku amphon neu-euseuha ureueng nyang ka teuboih sampoe jioh nyan hase jiwoe lom teuma. ulon nyoe lonjak meuhadab ubak teungku amphon sabab ulon jiancam le gob. laju teupike le ulon nyang sigot jih hainyoee ulon jak meuhadab ubak teungku amphon sira ulon peugah haba deungan peunoh harab peue nyang ulon lakeenyoee teungku amphon peutrok. ulon pike teungku amphon teuma neudeungoe dan neupeuseulamat ulon nibak ureueng nyang jipseuha jikeuneuk poh ulon dan meunan cit aneuk ulon. awaknyan jimeuniet keuneuk jikireuh kamoe nibak tanoh nyang geubri le po teu allah keu umat gobnyan. ulon yaken bahwa janji teungku amphon nyan teuma teujamin teupeuseulamat ulon sabab teungku amphon na kheueh lagee malaikat allah, nyang hase teupeubeda peue nyang get dan peue teuma nyang jeuhet. seumoga tuhan po teu allah teungku amphon sabe na meusajan teungku amphon!" geujaweueb le raja nabi daud, "ulon teumanyong situatu ubak gata, tajaweueb kheueh deungan juJoe." silahkan teungku amphon neupeugah haba," jijaweueb le ureueng inong nyan. kheun raja, "peu kheueh yoab nyang yue gata?" jaweueb ureueng inong nyan, "deumi nyang ureueng teungku amphon, ulon hana munken ulon peu aseuk ulee nibak peue nyang ka teungku amphon tanyong. beutoi that teungku amphon, yoab ka geupeugah ubak ulon peue nyang haroh ulon peubuet dan ulon peugah. teuma gobnyan geupeugah meunan na kheueh keu keuneuk peuseuleusoe peukara nyan deungan jroh-jroh. teungku amphon na kheueh ureueng bijak sana lagee malaikat allah sampoe neu-teupeue banmandum peue nyang teuma teujadi." oh ltheueh nyan raja nabi daud nyan laju geuhoi yoab

dan geupeugah ubak gobnyan, "meukeusut ate gata nyan teuma ulon peupeunoh. tajak kheueh laju tajaktueng absalom dan taba kheueh laju jihnyan keunoe ubak ulon." yoaib laju geusujut dikeue nabi daud, dan geupeugah, "kira jih po teu allah geubri beureukat ubak teungku amphon! jinoenyoe ka ulon teupeue bahwa teungku amphon neuteurimong ulon kareuna teungku amphon ka neuteurimong peue nyang ulon lakee." laju geubeurangkat kheueh yoaib u gesur keu geujak tueng absalom geupeuwoe lom u yerusalem. teuma raja nabi daud nyan hana geupeu idhin aneuek geuh absalom nyan tinggai didalam meuligoe. "ulon hana lon tem ngieng jih nyan," geupeugah le raja nabi daud. le sababnyan absalom langsong jiwoe u rumoh droe geuhnyan, dan hana jimeuhadab ubak raja. absalom jipujo le gob sibagoe ureueng nyang paleng gagah bansaboh nanggroe israel. hanale ureueng nyang paleng ceudah seulaen nibak gobnyan. phon nibak tapak gaki trok ubak ujong ok hana mubacut pih na meucupa. ok gobnyan teubai ngon patah manyang, dan ok geuh nyan haroh geugtung seun sithon sigoe sabab han ek geupeuteun sabab brat. ok nyang ka geu gutung nyan na brat jih dua kilo gram leubeh nyan meunurot timbangan raja. absalom na geumeu aneuek lhee droe aneuek agam dan sidroe aneuek inong nyang lumpah that lagak dan jiboh nan tamar. ka na dua thon absalom tinggai di yerusalem, teuma gohlom cit gobnyan meurumpok deungan raja. le sababnyan bak siuroe gobnyan geuhoi yoaib, keu geuyue ureueng nyan jijak meuhadab ubak raja, teuma yoaib hana geutem teuka, absalom laju jihoi gobnyan sigoteuk, teuma meunan cit yoaib hana cit jitem teuka. oh lleueh nyan jipeugah kheueh le absalom ubak namiet gobnyan, "gata tateupeue lampoh si yoaib na di siblaih lampoh ulon nyang ka jipula deungan bak jelai? gata tot kheueh lampoh jih nyan." dan awaknyan pih laju jijak tot lampoh nyan. teuma yoaib laju geujak u rumoh absalom sira geutanyong, "pakon namiet-namiet droeneueh jijak tot lampoh ulon?" jijaweueb le absalom, "sabab gata hana tatem teuka bak ulon watee ulon hoi. ulon keuneuk yue gata jak meuhadab ubak raja dan gata peusampoe peue nyang ulon tanyong nyoe, 'keupeue guna jih ulon tinggai gesur dan ulon tinggai disinoe? leubeh get ulon tinggai mantong disideh.' dan jipeugah le absalom lom teuma, "gata useuha kheueh mangat ulon hase lon jak meuhadab ubak raja, dan meunyeue ulon mantong na geu anggab meusalah, ulon rila geu hukom mate." oh lleueh nyan geujak kheueh laju yoaib jak meuhadab ubak raja nabi daud dan geupeusampoe laju peumohonan absalom. laju raja geuhoi absalom, dan absalom pih teuka laju jisujut dikeue raja. dan raja pih geusambot gobnyan deungan cara geucom. oh ka lleueh nyan absalom jikeubah laju keu droe jih saboh geuritan prang meunan cit deungan guda dan na limong ploih droe peungireng gobnyan. tieb-tieb uroe absalom jibeudoh nibak teupat eh beungoh-beungoh that dan laju jikkadong nibak bineh jalan to ngon pintoe geureubang meuligoe. soe mantong ureueng nyang jikeuneuk meungadu keuhai peukara jih ubak raja, laju jihoi ngon jitanyong le absalom nyan, jipeugah lagee nyoe, "gata nyoe nibak sukee toih?" dan meunyeue ureueng nyang jitanyong nyan

jijaweueb, "nibak sukee nyoe atawa jeh," teuma absalom laju jipeugah, "meunurot hukom, gata beuna, teuma sayang hana waki raja nyang geutem deungoe peue nyang gata gadu nyan." laju jipeugah lom le ureueng nyan, "cuba, meunyeue ulon nyang jeuet keu hakem, soe mantong ureueng nyang na seungketa atawa tuntutan ureueng nyan jeuet jijak ubak ulon dan ulon peusanaut ureueng nyan deungan ade." meunyeue na ureueng nyang jipeutou ubak absalom keu jisujut jiseumah gobnyan, laju absalom jisinyueng jaroe geuhnyan, laju di ureueng nyan jipeusanaut ngon cara jicom. meunan kheueh sikeub absalom keu soe mantong ureueng israel nyang keuneuk jak peugah keuhai peukara jih ubak raja, dan deungan na lagee nyan absalom ka jicok ate ureueng israel. oh kana peuet thon teuma oh lleueh nyan, absalom jipeugah ubak raja nabi daud, "bakap, neupeu idhin kheueh ulon jak u hebron keu ulon jak peuteupat janji ulon ubak tuhan. sabab yoh ulon mantong tinggai di gesur nanggroe siria, ulon ka lleueh ulon meujanji teuma ulon jak meue ibadat ubak tuhan di hebron meunyeue gobnyan ka geupeu idhin ulon woe u yerusalem." geujaweueb le raja, "gata jak kheueh deungan seulamat." dan jibeurangkat kheueh absalom u hebron. teuma sigohlom nyan gobnyan ka geukirem utosan-utosan geuh ubak bubena sukee israel sira jiba peusan nyang lagee nyoe, "meunyeue gata ka tadeungoe su beureuguih, gata kuk kheueh laju, 'absalom ka jeuet keuraja di nanggroe hebron!' " nibak yerusalem na ureueng dua reutoih droe nyan jireng absalom jijak u hebron. awaknyan hana jiteupeu sapeue keuhai komplotan nyan dan awaknyan banmandum jijak deungan teunang deungan hana curiga meubacut pi. dan teungoh absalom jipeuseumah keureubeuen, gobnyan geukirem cit utosan u banda gilo mangat geujak hoi ahitofel, ureueng nyan na kheueh sidroe peunaseuhat nabi raja daud. meunan kheueh komplotan nyang keuneuk lawan raja nyan seumaken le ngon teuga, dan meutamah le kheueh peuikot-peuikot absalom. oh lleueh nyan na sidroe ureueng jijak ba haba ubak nabi daud, "ureueng-ureueng israel ka jidong blaih absalom." laju nabi daud geupeugah ubak banmandum peugawee gobnyan nyang na di yerusalem, "boh jak geutanyoe tajak meungunse, tajak musom u teupat nyang aman. nyoe na kheueh jalan nyang paleng get mangat geutanyoe teuhenda nibak absalom. hana treb le jih nyan jijak keunoe. bagaiih kheueh, bek sampoe geutanyoe jitiyeueh ngon jipeutaloe, akhejih banmandum peunduduek banda nyoe jipoh mate!" "get, teungku amphon," jaweueb awaknyan. "kamoe ka siab kamoe peubuet peue mantong nyang teungku amphon peugah." dan geujak kheueh raja jireng le banmandum keuluariga dan peugawee gobnyan, teuma na siploh droe gundek gobnyan nyang geutinggai keu jikeumiet meuligoe. bak watee raja dan banmandum peungireng gobnyan teungoh geujak geutinggai banda, awaknyan laju geupioh hek dan to that ngon rumoh nyang keuneuleueh. banmandum peugawee raja jidong blaih gobnyan bak watee pasokan peungawai raja meuriti jijak rot keu gobnyan. meunan cit deungan nam reutoih droe tantra nyang ka jiseutot gobnyan yoh phon di gat, awaknyan pih

meubareh dikeue gobnyan. ban geungieng nyang lagee nyan le raja laju geupeugah ubak itai nyang jeuet keu keumundan pasokan nyang nam reutoih droe nyan, "pakon gata nyoe banmandum taseutot cit meusajan deungon kamoe? leubeuh get gata tajak gisa dan tinggai meusajan deungon raja nyang baro. bukon kheueh gatanyoe ureueng aseng, peungungse nyang jioh that nibak nanggroe gata keudroe? gohlom treb gata tinggai disinoe, ek kheueh gata ulon yue jak seutot tameungeumbara deungon ulon? ulon keudroe hana lon teupeue ho nyang haroh ulon jak. tajakwoe kheueh, dan taba kheueh sajan rakan-rakan gata nyang saboh bansa, seumoga tuhan geugaseh keu gata dan seutia ubak gata." teuma le itai jijawueub, "amphon deulat tuanku nyang mulia, deumi tuhan nyang udeb dan deumi nyawong teungku amphon, ho mantong kheueh teungku amphon neujak, ulon teutab lon seutot, bahpi nyang teupeukeue nyan na kheueh mate." "get kheueh, meun-yoe meunan!" geujawueub le nabi daud, "tajak kheueh laju!" teuma jijak kheueh laju itai meusajan deungon banmandum pasokan jih meunan cit deungon keuluwarga awaknyan. banmandum rakyat jikliek ngon jimo ba-e bak watee pasokan nabi daud geut-inggai banda. oh ltheueh nyan raja laju geujeumeurang krueng kidron meunan cit jiseutot mandum le pasokan gobnyan, laju jijak kheueh awaknyan meulalu padang pasi. teungku imeum zadok dan teungku imeum abiyatar na lamkawan nyan meunan cit deungon banmandum ureueng lewi nyang ba peuto peujanjian tuhan. peuto peujanjian nyan laju jikeubah, dan hana jibeuet sigohlom banmandum rakyat jit-inggai banda nyan. dan geupeugah kheueh le raja ubak zadok, "gata peuriwang kheueh peuto peujanjian tuhan nyan u dalam banda. meun-yoe tuhan geutueng keu ulon, teunttee kheueh gobnyan geupeu idihin keu ulon mangat jeuet lom lon woe keunoe dan lon teupeungieng peuto peujanjian nyan meunan cit meuteume ulon kalon teupangat tinggai jih. teuma meun-yoe tuhan hana geutueng keu ulon, teuseurah kheueh mantong ubak tuhan peue nyang geukeuneuk peubuet ateuah ulon nyoe!" ltheueh nyan geupeugah lom le raja ubak zadok, "gata pakat kheueh ahimaas aneuek gata dan yonatan aneuek abiyatar; jakwoe kheueh u dalam banda deungon teungang, ulon preh gata nibak teupangat jeumeurang krueng na ngon padang pasi sampoe ulon teurimong haba nibak gata." laju zadok dan abiyatar jiba peuto peujanjian tuhan nyan jipeugisa u yerasalem dan awaknyan laju tinggai disinan. oh ltheueh nyan nabi daud laju geusut sipatu geuh. meunan cit deungon banmandum peungikot-peungikot gobnyan jiteungoh laju u ateuah buket zaiton sira geumo deungon ulee teuthob tanda ureueng teungoh meukabong. bak watee jibritee ubak nabi daud bahwa ahitofel na cit meusajan deungon geurombolan absalom, laju geumeudoa kheueh nabi daud lagee nyoe, "ya, tuhan, neupeubateue kheueh peue nyang jinaseuhat le ahitofel!" bak watee nabi daud ka trok ubak pucak gunong di teupangat nyang lazem ureueng jimeu iebadat ubak tuhan, gobnyan laju jisambot le rakan geuh nyang seutia, na kheueh husai ureueng arki. peukayang husai nyan teupriek dan nibak ulee jih nyan teutabu deun-

gon abee. nabi geupeugah ubak ureueng nyan, "meun-yoe gata taseutot meusajan deungon ulon, gata ka jeuet keu beuban nibak ulon. teuma gata hase tat-ulong ulon, meun-yoe gata tawoe u banda dan neu-peugah ubak absalom, bahwa jinoenyoe gata keuneuk peutimang jih nyan deungon peunoh seutia, lagee ka gata peutimang bapak jih yoh watee ilee. deungon cara nyang lagee nyan gata ka hase tapeubateue peue mantong nyang jibri naseuhat le ahitofel. teungku imeum zadok dan abiyatar meunan cit na disinan. tajak peugah kheueh ubak gobnyan peue-peue nyang gata deungoe di meuligoe. ahimaas aneuek zadok dan yonatan aneuek abiyatar meunan cit awaknyan jiseutot bapak droe jih, deungon nyan awaknyan kana cit disinan. aneuek-aneuek nyan kheueh gata yue teuka ubak ulon mangat jijak peusampoe peue mantong haba nyang gata deungoe." teuma jiwoe kheueh husai rakan nabi daud nyan u yerasalem, paih bak watee absalom trok keunan. bak watee nabi daud ban mantong geuliwat bak pucak buket, hana geusangka-sangka teuka kheueh si ziba namiet si mefiboset, namiet nyan laju jijak ubak gobnyan sira jiba sijod keuleudee nyang na teupeudieng di ateuah rhueng keuleudee nyan na dua reutoih boh ruti, sireutoih boh tangke boh anggo nyang ka tho, sireutoih boh karang boh kayee nyang mantong jroh dan saboh baluem teuma ie anggo. raja nabi daud nyan laju geutanyong ubak namiet nyan, "keupeue banmandum atranyoe?" jijawueub le ziba, "keuleudee-keuleudee nyoe teupeuguna keu beulatang keu ngon peudieng keuluwarga teungku amphon, ruti dan dumna boh kayee nyoe na kheueh keu peulayan-peulayan teungku amphon, dan nyang ie anggo nyoe na kheueh keu ureueng nyang graih nibakjak di padang pasi." laju geutanyong lom le raja nabi daud nyan ubak ureueng nyan, "dipat si mefiboset cucoe teungku gata si saul?" "gobnyan mantong na teutab di yerasalem," jawueub ziba, "sabab gobnyan yaken bahwa jinoenyoe ureueng israel teuma geujok pulang keurajeuen saul indatu gobnyan ubak gobnyan." laju geupeugah kheueh le raja ubak ziba, "jinoenyoe banmandum hareuta milek mefiboset ka jeuet keu hakmilek gata." "teurimong gaseh teungku amphon," jawueub ziba. "seumoga teungku amphon sabe neugaseh keu ulon!" watee nabi daud katrok u bahurim, teuka kheueh sidroe nibak teupangat nyan, dan sira jipeurab ubak kawan raja, gobnyan laju jikutok nabi daud. ureueng nyan nan jih simei bin gera, nibak kawom syedara saul. simei jigeulawa nabi daud dan peugawee-peugawee gobnyan deungon aneuk batee, bahpi nabi daud jipagab ngon jikeulileng le aneuek buah gobnyan meunan cit le dumna peuwira gobnyan. simei jikutok laju nabi daud deungon tutoe haba, "jak weeh laju keudeh, hai manusia tukang seumupoh mate! droeneueh pe-unjahat! droeneueh ka neureupah keurajeuen saul! jinoenyoe droeneueh geuhukom le tuhan sabab ka neupoh mate nyang lumpah thatle kawom syedara saul. tuhan ka geubir keurajeuen droeneueh nyoe ubak aneuek droeneueh si absalom. jinoenyoe bawa kireueh kheueh droeneueh, hai manusia tukang poh mate!" abisai adoe yoab aneuek zeruya, jipeugah ubak raja, "pakon teungku amphon neupeubiyeu ureueng peurusak nyan jikutok teungku amphon? neupeu

idhin kheueh ubak ulon mangat lonjak teumbang nibak takue jih nyan!" teuma raja geupeugah ubak abisai dan yoab aduen jih nyan, "bek tapeureumeun keu jih nyan, tapeubiyeu mantong jihnyan jikutok ulon. sabab meunyoé tuhan nyang yue jihnyan, soe kheueh ureueng nyang na hak jijak tanyong pakon jihnyan jipeubuet lagee nyan?" laju nabi daud geupeugah ubak abisai, dan meunan cit ubak banmandum namiet gobnyan, "aneuk ie tuleueng ulon keudroe jiseueha jikeuneuk poh mate ulon; pakon teuma gata hireuen takalon pi-e ureueng benyamin nyoe? tuhan kheueh nyang yue jihnyan jikutok ulon; le sababnyan bek tapeukarun jihnyan dan tapeubiyeu mantong ureueng nyan jikutok ulon. mungkin tuhan teuma geupeurati peundeuritaan nyoe dan geubri beureukat ubak ulon sibagoe geunantoe kutokan nyan." laju nabi daud dan dumna ureueng nyang ireng gobnyan geujak laju nibak tempatnyan sira geupeujak laju meuneujak gobnyan, seudangkan simee laju teuma jiseutot bagaih-bagaih nibak lereng gunung sira jimeurapa ngon jigeulawa gobnyan rotlikot ngon aneuk batee dan ngon tanoh. raja ngon aneuk buah gobnyan ka hek that-that dan laju geupioh nibak bineh krueng yordan. bak watee nyan absalom dan banmandum ureueng nyang jiseutot gobnyan teungoh geujak geutamong u dalam banda yerusalem, dan lamkawan nyan na cit jiseutot le ahitofel. yoh watee husai rakan nabi daud nyang seutia nyan meurumpok deungan absalom, husai laju jitawok ubak absalom nyan, "udeb raja! udeh raja!" teuma absalom jitanyong ubak jih nyan, "dipat kheueh takeubah keuseutiaan gata teuhadab rakan gata nabi daud? pakon gata hana taseutot deungan gobnyan?" jijaweueb le husai, "panena mungkin! ulon dong blaih ureueng nyang geupileh le tuhan, le ureueng-ureueng nyoe, dan le banmandum ureueng israel. ureueng nyan kheueh nyang teuma ulon seutot. lom teuma, soe kheueh lom nyang teuma ulon peutimang? bukan kheueh aneuk agam teungku amphon? lagee nyang ka ulon peutimang bapak teungku amphon, meunan cit teuma ulon peutimang u ateuhe teungku amphon nibak saat nyoe." oh lueuh nyan absalom jipeugah ubak ahitofel, "gata peugah kheueh laju peue nyang haroh tanyoe peubuet." jijaweueb le ahitofel, "neujak kheueh laju ubak gundek-gundek bapak teungku amphon nyang ka geutinggai keu jikeumiet meuligoe, dan neu-eh kheueh deungan gundek nyan. bansaboh israel teuma jiteupeu bahwa deungan na teungku amphon peubuet nyang lagee nyan, teungku amphon ka geu anggab musoh le bapak teungku amphon. deungan nyan banmandum peungikot teungku amphon meutamah-tamah jijeuet." le sababnyan, keu absalom geupeugat khimah di ateuhe bubong meuligoe nyang data nyan. laju oh jingiang le rakyatba absalom geutamong u dalam khimah nyan dan geu-eh laju deungan gundek-gundek bapak geuh nyan. bak wateanyan tieb-tieb naseuhah ahitofel geuteurimong sang-sang nyan na kheueh haba po teu allah keudroe; bah kheueh nabi daud meunan cit absalom geuturot sabe peue nyang geunaseuhah nyan. hana treb teuma oh lueuh nyan, ahitofel jipeugah lom ubak absalom, "neupeu idhin kheueh ubak ulon mangat lon pileh 12.000 droe. eunteuk malam ulon teuma lon-

jak tiyeub nabi daud. gobnyan ulon prang bak watee awaknyan teungoh hek dan ka rhot seumangant. ulon teuma lon peukeujot gobnyan, akhejih banmandum aneuk buah gobnyan jipeuplueng droe. dan raja nabi daud mantong nyang ulon poh mate. teuma banmandum aneuk buah gobnyan ulon jok pulang ubak teungku amphon lagee dara baro jiwoe ubak lakoe jih. bukan kheueh teungku amphon nyang lakee nyawong sidroe ureueng mantong? seudangkan nyang laen hana teupeukaru." naseuhah nyan jipandang get that le absalom dan le banmandum peumimpen israel. bahpi meunan absalom jipeugah, "takjak kheueh laju jinoenyoe hai husai; jak tadeungoe pakriban peudapat jih." bak watee husai jiteuka jak meuhadab, absalom jipeugah laju reuncana ahitofel sira jipeugah lagee nyoe, "peu kheueh taseutot peue nyang ka geunaseuhah nyan? meunyoé han, cuba neubri usui nyang laen." jijaweueb le husai, "naseuhah ahitofel goenoye hana get. teungku amphon pasti neuteupeue bahwa nabi daud dan aneuk buah gobnyan na kheueh peujuang nyang pantang meunyeurah lom gagah beurani. awaknyan beuhe lagee cagee inong nyang ka gadoh aneuk. lom teuma nabi daud nyan na kheueh sidroe tantra nyang ka jaitthat peungalaman nyang hantom geumeudom meusapat deungan aneuk buah gobnyan. mungkin nibak saat nyoe pih gobnyan teungoh geumusom didalam saboh guha atawa di tempat nyang laen. le sababnyan, meunyoé aneuk buah teungku amphon geuprang le nabi daud, dan na nyang mate, dan soeman-tong nyang jideungoe hainyan teuma jipeugah bahwa aneuk buah absalom ka teupeutaloe. dan ureueng-ureueng nyang paleng beurani dan gagah peukasa lagee singa pi pasti teumakot. sabab banmandum ureueng israel jiteupeue bahwa bapak teungku amphon na kheueh sidroe pahlawan, dan meunan cit deungan aneuk buah gobnyan na kheueh peujuang-peujuang nyang gagah beurani. le sabab nyan, naseuhah ulon lagee nyoe: neujak peusapat kheueh laju banmandum ureueng israel bansaboh nanggroé, sampoe le jih na sidub ano dibineh pasi. laju teungku amphon keudroe kheueh nyang maju ukeue dalam mideuen prang dan droeneueh kheueh nyang jeuet keu panglima prang nyan. geutanyoe teuma meurumpok ngon nabi daud dipat mantong gobnyan na, dan tanyoe prang gobnyan sigohlom gobnyan sada peue nyang ka teujadi. hana meusidroepi nyang hase jipeuleuh droe, bah kheueh gobnyan meunan cit deungan aneuk buah geuh. meunyoé gobnyan geuplueng u dalam saboh banda, banmandum rakyat geutanyoe jicok laju bubena talo teumalo teujak ikat laju banda nyan dan ta seumpom u dalam barieh nyang paleng to. meusineuk batee pih hana nyang teutinggai di ateuhe buket nyan." ban geudeungoe nyang lagee nyan le absalom dan banmandum ureueng israel jipeugah, "naseuhah husai leubeh get nibak naseuhah ahitofel." keubiet, tuhan ka geupeuteuntee keu geupeu bateu naseuhah ahitofel nyang jroh nyan, mangat absalom geuteurimong mala peutaka. oh ka lueuh nyan husai jilapor ubak teungku imeum zadok dan teungku imeum abyatar keuhai naseuhah ahitofel dan naseuhah gobnyan keudroe ubak absalom dan mandum peumimpen israel. kheun hu-

sai, "bagaih, neubri tee ubak nabi daud mangat bek geu mudom nibak teupat teujeumeurang krueng di padang pasi. gobnyan haroh deungon sigra geujeumeurang krueng yordan. meunyoe hana, gobnyan dan banmandum pasokan gobnyan jipeuhanco." bak wateuyan yonatan aneuek abyatar dan ahimaas aneuek zadok teungoh jipreh dan hana padubna jioh ngon mata ie en-rogel, nibak bineh banda yerusalem. awaknyan hana jijeuet jitamong u dalam banda sabab teumakot jingieung le gob. lagee nyang ka lazem, meunyoe na sidroe namiet ureueng inong jijak peugah ubak awaknyan haba nyang haroh jipeusampoe ubak raja nabi daud. teuma bak gobnyan na sidroe aneuek agam keubeutulan deuh jikalon awaknyan, dan hainyan jijak britee laju ubak absalom. le sababnyan awaknyan bagaih-bagaih jijak sira jimusom nibak rumoh sidroe peundudeuk nyang na di gampong bahurim. bineh rumoh nyan na saboh mon ie dan awaknyan laju jitamong u dalam mon nyan. peurmoh ureueng po rumoh nyan laju jileueng sion ija di atueuh babah mon nyan dan di atueuh ija nyang ka teuleueng nyan laju teuma jitabu aneuek gandom, akhejih mon ie nyan ka hana leumah le. ureueng nyang jiyue le absalom laju trok ubak rumoh nyan dan laju jityamong ubak ureueng inong nyan, "dipat deuh kah kalon ahimaas dan yonatan?" "awaknyan banmantong geujeumeurang krueng," jaweueb ureueng inong nyan. awaknyan jimita laju ban dua droe aneuek mudanyan, teuma hana meurumpok ngon awaknyan, laju jijakwoe kheueh awaknyan u yerusalem. ahimaas dan yonatan laju geuteubiet dalam mon nyan, laju reujang-reujang geujak meurumpok ubak raja nabi daud dan jilapor laju peue nyang ka geurasan nyan. kheun awaknyan, "ahitofel ka jibri naseuhat keu jijak prang teungku amphon. deungon nyan phon saatnyoe tabeurangkat kheueh laju neujeumeurang krueng nyoe." laju nabi daud dan aneuek buah gobnyan geujeumeurang krueng yordan, dan trok u meurandeh jeh ka beungoh uroe. bak watee ahitofel ka jiteupeue bahwa naseuhat gobnyan hana jiseutot le absalom, gobnyan laju jijak pasang peulana keuleudee jih dan jijakwoe laju u banda droe jih. oh ka ltheueh jipeubeureeh banmandum urosan droe jih laju gobnyan jigantung droe, dan oh ka jeulaih jihnyan ka mate jitanom laju u dalam jrat nibak jrat-jrat keuluwarga droe jih. nabi daud ka sampoe ubak banda mahanaim bak watee absalom jijeumeurang krueng yordan, ji ireng le dumna ureueng israel. (absalom ka geuangkat amasa jeuet keu ulee pasokan keugeunantoe yoab. amasa nyan na kheueh aneuek yitra ureueng ismail; mak jih nan geuh abigail aneuek nahas, na kheueh syedara inong mak yoab nyang nan ji zeruya.) absalom dan aneuek buah gobnyan jipeudong khimah di tanoh gilead. bak watee nabi daud trok u mahanaim, gobnyan laju jisambot le sobi aneuek si nahas nibak banda raba di amon, dan le makhir aneuek amiel nibak lodebar, dan le barzilai nibak rogelim di gilead. awaknyan laju jiba cambong, kualiti dan tilam keu nabi daud dan aneuek buah gobnyan, meunan cit jiba gandom, jeulai, teupong, gandom nyang ka ltheueh teu craih, kacang mirah, kacang mirah nyang rayeuk, meulis, keuju, ulee susu dan meupadub boh bubiri. awaknyan

jiteupeu bahwa nabi daud dan aneuek buah gobnyan teungoh deuk that, glaih ngon tou rukueng meutamah ngon hek sabab meuneujak nyang panyang di padang pasi. raja nabi daud laju geupeusapat banmandum aneuek buah gobnyan, oh ltheuehnyan pasokan nyang geupeusapat nyan geubagi teuma jeuet keu pasokan na nyang sireubees saboh pasokan dan na teuma nyang sireutoih droe. oh ltheuehnyan geu angkat teuma peuwira-peuwira nyang mat keumudo atueuh pasokan-pasokan nyan. oh ltheueh nyan geupeuleuh laju awaknyan u mideuen prang dalam lthee boh keulompok, maseng-maseng keulompok nyan geupimpen le yoab, abisai adoe yoab dan itai ureueng gat. geupeugah le raja ubak aneuek buah gobnyan, "ulon na cit meusajan gata." teuma bubena awaknyan jijawueub, "bek teungku amphon, meunyoe kamoe teupaksa haroh kamoe plueng, atawa bahpi siteungoh nibak kamoe nyoe mate, musoh gohlom meurasapuih ate jih, sabab teungku amphon kheueh nyang awaknyan mita. teungku amphon saban yuem jih deungon siploh ribee droe kamoe nyoe. lom teuma leubeh get teungku amphon neukirem bantuan mantong ubak kamoe didalam banda." laju geupeugah le raja, "get kheueh, teuseurah mantong ubak gata." oh ltheuehnyan gobnyan laju geudong dibineh pintoe geureubang banda, seudangkan banmandum pasokan ka teudong meuriti diluwa lam keusatuan-keusatuan nyang na nibak siribee droe dan sireutoih droe. laju raja nabi daud geubri peurintah ubak yoab, abisai dan itai, lagee nyoe geupeugah, "bek kheueh gata peuluka si absalom aneuek muda nyan deumi ulon." banmandum pasokan jideungoe peurintah nabi daud nyan. dan beurangkat kheueh pasokan nabi daud jijak prang pasokan israel, dan awaknyan jimeu heungko dalam uteuen efraim. pasokan israel laju jipeutaloe le aneuek buah nabi daud; keuhai taloe pasokan israel nyan lumpah rayeuk, na 20.000 droe mate nibak uroenyang. prang bak uroenyang ka meutamah gunjak dan hebat that, sampoe ka meuluwah ban saboh daerahnyan, dan leubeh jai ureueng nyang mate nyang teukurong didalam uteuen nibak nyang mate dalam mideuen prang. bak watee absalom teungoh ji-ek atueuh bagal droe jih, hana teusangka-sangka gobnyan laju meurumpok deungon aneuek buah nabi daud. bagal nyan teungoh jijak dimiyueb bak kayee raya nyang miyueb, dan meusangkot kheueh ulee absalom nibak cabeueng kayee nyan. bagal nyan laju jiplueng seudangkan absalom mantong meugantueng meu ayon-ayon nibak cabeueng kayee nyan. sidroe lamkawan aneuek buah nabi daud deuh jikalon hainyan dan laju jijak lapor ubak yoab, "teungku amphon, bunoe leumah ulon kalon absalom ka meugantueng nibak cabeueng kayee rayal?" geujawueub le yoab, "peue kah peugah? deuh kahkalon gobnyan? pakon hana kahpoh bumate? pasti ulon bri keu gata siploh peng pirak dan saboh talo keueng." teuma ureueng nyan jijawueub, "bahpi neubri 1.000 peng pirak keu ulon, ulon hana lontem peusaket aneuek agam raja. kamoe banmandum kamoe deungoe peue nyang ka geupeurintah le raja ubak teungku amphon dan ubak abisai meunan cit ubak itai, mangat bek teupeuluka absalom aneuek muda nyan deumi raja. dan meunyoe jih nyan

ulon poh mate si absalom nyan, ka pasti nyan geuteupeue le raja, sabab raja ka teunte geudeungoe keuhai peue-peue mantong – dan teungku amphon pih ka pasti hana neutem bila ulon." "boh ka kheueh nyan! habeh watee meuseu eue jaweueb keuhai nyan deungon gata," geupeugah le yoab. laju yoab geucok lhee boh kapak dan kapak nyan laju geutob ubak dada absalom nyang bak watee nyan mantong udeb dan teugantung bak cabeung kayee. oh lheeuh na teuma siploh droe aneuek buah yoab laju teuma jijak paran sira jicang-cang absalom nyan sampoe mate. yoab laju geuyob beureuguih akhejih aneuek buah gobnyan banmandum jipioh jipeucrok pasokan israel. oh lheeuh nyan manyet absalom laju jibeut dan ji seumpom u dalam mon nyang that lhok didalam uteuen nyan. mon nyan laju jiseubee le awaknyan deungon aneuek batee sampoe manyang. banmandum pasokan israel laju jipeuplueng droe maseng-maseng u rumah droe jih. yoh mantong udeb absalom ka geupeudong keudroe gobnyan saboh tugu di panton raja, sabab gobnyan hana geumeu aneuek nyang agam keu teusambong keuturonan gobnyan. tugu nyan geuboh nan paih lagee nan gobnyan keudroe, dan sampoe nibak uroe nyoe tugu nyan teuboh nan tugu absalom. oh lheeuhnyan jipeugah kheueh le ahimaas aneuek zadok ubak yoab, "neupeu idhin kheueh ubak ulon mangat ulon plueng lonjak britee ubak raja dan ulon ba haba mangat ate nyang toh tuhan ka geupeuseulamat teungku amphon nibak musoh gobnyan." "bek," kheun yoab, "na watee laen singoh. uroenyoe hanjeuet gata tajakba haba, sabab aneuek agam raja ka mate." oh lheeuh nyan yoab geupeugah ubak sidroe lamkawan namiet gobnyan nyang ureueng sudan, "tajak peugah kheueh haba nyoe ubak raja peue nyang ka gata kalon." namiet nyan laju jisujut jiseumah teungku droe jih dan jibeudoh sinan laju jijak sira jiplueng. teuma ahimaas laju jipaksa ubak yoab, "peue mantong nyang teuma teujadi, neupeu idhin kheueh ubak ulon nyoe mangat ulon jakba haba." "pakon gata get that meuhasrat takeuneuk jak meusajan, hai aneuek ulon?" geutanyong le yoab. "gata hana teuma neuterimong gaji keuhai nyan." "hana peue," jipeugah lom le ahimaas, "ulon teuma teutab lonjak." "meunyo meunan, tajak kheueh," kheun yoab. dan jiplueng kheueh laju ahimaas jiseutot bineh rot nyang teuliwat sipanyong panton yordan, dan hana treb teuma oh lheeuh nyan ka meuhase jitinggai namiet yoab nyang ka awai jijak bunoe. nabi daud bak saboh watee teungoh geudeuk-duek di ruweung pintoe lamkawan pintoe geureubang teungoh ngon pintoe geureubang luwa banda nyan. teuka si peunjaga laju jijak ek u atueh beuton dan jidong laju di atueh bubong pintoe geureubang nyan. bak watee ureueng nyan teungoh jingingi sira jipandang keudeh keunoe, leumah laju jikalon na sidroe ureueng jiteuka sira jiplueng-plueng. peunjaga nyan laju jitawok u miyueb sira jipeugah hainyan ubak raja, dan raja geupeugah, "meunyo jihnyan sidroe mantong, ka pasti nyang jiba nyan na kheueh haba nyang jroh." bak watee ureueng nyan ka rab sampoe, peunjaga nyan jikalon na teuma sidroe teuk teuka meunan cit sira jiplueng. le sababnyan ureueng nyan jitawok lom, "ngieng! na ureueng laen sidroe teuk teungoh jiplueng cit keunoe." raja

geujaweueb, "pasti ureueng nyan jiba haba nyang get cit teuma." peunjaga nyan jipeugah, "ureueng phon nyan ahimaas. ulon lon teupeu nibak cara jihnyan jiplueng." "gobnyan ureueng get," kheun raja, "ka teunte jihnyan jiba haba nyang jroh teuma." sira jiteumawok ahimaas laju jibri saleuem ubak raja, laju jisujut dan geupeugah, "teupujoe kheueh tuhan po teu allah teungku amphon, nyang ka geuseurah ubak teungku amphon ureueng-ureueng nyang beurontak keu teungku pol!" geutanyong le raja, "peu kheueh absalom ureueng muda nyan seulamati?" jijaweueb le ahimaas, "teungku amphon, bunoe bakwatee ulon geutoih jak keunoe le yoab, deueh ulon kalon karu ngon rioh nyang lumpah subra, teuma ulon hana lon teupeue peue nyang ka teujadi." "gata beudoh dan tajakdong kheueh blaih jih," geupeugah le raja; teuma ahimaas jijak laju keunan dan jidong nibak bineh lagee nyang ka geuyue le nabi daud nyan. oh lheeuhnyan trok teuma namiet yoab, dan jipeugah laju ubak raja, "ulonnyoe lonba haba nyang paleng get ubak teungku amphon! bak uroenyoe tuhan ka geubri keu teungku amphon keumeunangan atueh banmandum ureueng nyang ka jibeurontak ubak teungku amphon." raja laju geutanyong ubak budak nyan, "peu kheueh absalom aneuek muda nyan seulamati?" jijaweueb le namiet nyan, "kira jih banmandum musoh teungku amphon, meunan cit banmandum nyang ka beurontak teuhadab teungku amphon ka jirasa naseb nyang saban lagee aneuek muda nyan." ban geudeungoe nyang raja get that peudeh, laju geujak ek u atueh ruangan di atueh pintoe geureubang sira geumo ngon geumeu ba-e, "oh aneuek ulon! aneuek ulon absalom! absalom aneuek ulon! leubeh get ulon mantong nyang mate keugeunantoe gata, aneuek ulon! absalom, aneuek ulon!" ubak yoab teupeusampoe bahwa raja nabi daud geumo ba-e ngon geumeuk-abong keu absalom. dan keuhai meunang nibak uroenyang ka meu-ubah jeuet keu seudehan ubak banmandum tantra nabi daud kareuna awaknyan jideungoe bahwa raja teungoh keupeuratok aneuek agam gobnyan. deungon cara seungab-seungab awaknyan jigisa u banda, bak lagee tantra nyang meuras malee kareuna jipeuplueng droe nibak mideuen prang. raja geusom muka gobnyan sira geumeuba-e ngon su nyang meuleungkeng, "oh aneuek ulon! aneuek ulon absalom! absalom, aneuek ulon!" yoab laju geujak meuhadab ubak raja dan geupeugah, "bak uroenyoe teungku amphon ka neupeumalee aneuek buah teungku amphon, padahai awaknyan kheueh nyang ka peuseulamat nyawong teungku amphon, nyawong aneuek agam ngon aneuek inong teungku amphon, meunan cit deungon peurumoh dan gundek teungku amphon. teungku amphon ka neugaseh keu ureueng-ureueng nyang jibanci keu teungku amphon, teuma teungku amphon neubanci ubak ureueng nyang jigaseh keu teungku amphon! deungon jeulaih that teungku amphon ka neupeuleumah bahwa banmandum peuwira meunan cit deungon tantra teungku amphon nyan hana meu areuti nibak teungku amphon. teuma leumah jih teungku amphon leubeh that-that galak meunyo nibak uroenyoe absalom mantong na udeb dan kamoenyoe banmandum mate! nyang siget jih teungku amphon neubudoh dan neu-

jak uluwa keu teupeuteunang ate aneuek buah teungku amphon. ulon meusumpah deumi tuhan, meunyo teungku amphon hana neutebiet neujak meurumpok ngon awaknyan, teuma nibak malam nyoe cit teuma hanale na ureueng meusidro pih nyang jitem na deungan teungku amphon. nyan na kheueh sibagoe beuncana nyang paleng rayeuk nyang teuma teungku amphon rasa siumu udeb teungku amphon." oh ltheuhnyan geuboudoh kheueh raja dan geujak laju uluwa, dan geudeuk laju to ngon pin-toe geureubang. aneuek buah gobnyan jideungoe bahwa gobnyan ka na disinan, laju awaknyan banmandum teuka jijak meuhadab. bak watee nyan banmandum pasokan israel ka jipeuplueng droe, dan jikawoe u rumah jih maseng-maseng. lamkawan banmandum sukee israel teuka kheueh seulleuseh paham ka jimeudakwa ngon jimeudakwi sabe keudroe-droe. kheun awaknyan, "raja nabi daud ka geupeuseulamate geutanyoe nibak ureueng filistin dan meunan cit ka geupeu ltheueh geutanyoe nibak musoh-musoh nyang laen, teuma jinoenyoe gobnyan ka geupeuplueng droe nibak absalom dan geutinggai nang-groenyoe. absalom tanyoe baiat jeuet keu raja, teuma jinoenyoe ka mate didalam mideuen prang, pakon hana meusidro ureueng pih jiuseuha jiba peuwoe nabi daud mangat geuwoe keunoe?" tutoe haba nyan trok cit ubak raja nabi daud. sabab nyan gobnyan geuyue laju teungku imeum zadok dan teungku imeum abyatar geuyuejak tanyong ubak peumimpen yehuda lagee nyoe, "pakon gata ka jeuet keu nyang keuneuleueh keu teujak sambot ngon teujak ireng raja geuwoe lom teuma ubak meuligoe gobnyan? neupeugah kheueh laju gata wareh syedara ulon dan kawom keurabat ulon? pakon jeuet gata nyang keuneuleueh neulakee mangat ulon woe?" meunan cit teuma le nabi daud geupeugah geuyue peusampoe ubak awaknyan mangat jijak peugah ubak amasa lagee nyoe, "bukon kheueh gatanyoe sabat ulon? phon bak saatnyoe gata ulon angkat jeuet keu panglima tantra ulon keugeunantoe yoab. kira jih po teu allah geupoh mate ulon meunyoe hainyan hana ulon peubuet!" meunan kheueh cara jih nabi daud ka meuhase geucok ate banmandum kawom yehuda sampoe awaknyan jikirem peusan ubak raja mangat geuwoe ubak meuligoe meusajan banmandum deungan dumna pegawee gobnyan. oh ltheueh nyan raja pih geubeurangkat dan trok laju nibak krueng yordan, bak watee nyan di ureueng-ureueng yehuda ka teuma sampoe u gilgal keu jijak tueng raja dan jikawai gobnyan teujeumeurang krueng yordan. simeai aneuek si gera, ureueng benyamin nyan jiba teuma na siribee droe nibak sukee benyamin dan bagaih-bagaih jiteuka meusigoe deungan ureueng-ureueng yehuda nyan keu jijak sambot raja. meunan cit deungan ziba namiet keuluwarga saul, meunan cit deungan ban limong blaih droe aneuek gobnyan nyang agam dan dua ploh droe namiet gobnyan; awaknyan ka jijeumeurang krueng yordan sigohlom raja teuka keunan. awaknyan jibantu keuluwarga raja geujeumeurang krueng nyan dan jipeubuet laju peue mantong nyang geuyue le raja ubak gobnyan. bak watee raja geukeuneuk jeumeurang krueng, simeai laju jisujut dikeue gobnyan dan jipeugah, "ulon meula-

kee, bah kheueh teungku amphon hana neu anggap ulon teutab meusalah. bah kheueh teungku amphon neupeu tuwoe peue nyang ka ulon peubuet nibak uroe teungku amphon neutinggai yerusalem. ulon ka insaf, bahwa ulon ka lon peubuet desya, dan le sabab nyan, lamkawan sukee-sukee nyang na tinggai di daerah utara ulon kheueh nyang phonphon that teuka jak sambot teungku amphon nibak uroe nyoe." bak geudeungoe nyang lagee nyan di abisai aneuek zeruya jipeugah, "simeai ka patot teuhukom mate sabab jihnyan ka jikutot raja nyang ka geupileh le tuhan." teuma nabi daud geupeugah ubak abisai dan yoab aduen gobnyan, "bek taikot jampu urusan ulon. keupeue awaknyoe tapeususah ulon? bak uroenyoe ulon ka jeuet keuraja lon ateuheh israel, dan hana jeuet na ureueng israel nyang teuhukom mate." oh ltheueh nyan geumeusumpah kheueh raja ubak simeai, "ulon jamin bahwa gata hana teuhukom mate." meunan cit si mefiboset cucue saul, jiteuka keu jiseutot sajan jak sambot raja. gobnyan hana jihrah gaki geuh, hana teuma jigunteng janggut geuh, dan hana teuma jihrah peukayan jih yohphon nabi daud geutinggai yerusalem sampoe gobnyan deungan seulamata teuma geugisa. bak watee mefiboset teuka di yerusalem keu jijak sambot raja, geupeugah kheueh laju le raja ubak jihnyan, "hai mefiboset, pakon gata hana tajak deungan ulon nibak watee nyan?" jijawueub le mefiboset, "nyang ulon peumulia teungku amphon, teungku kon neuteupeue bahwa ulon nyoe capiek. ulon yue peulayan ulon sipeusiab keuleudee nyang hase ulon pasang di teueh rhueng jih mangat jeuet ulon seutot teungku amphon. teuma ulon ka jikianat le peulayan nyan. kon nyan mantong, ulon jifiteunah teuma teuhadab teungku amphon. teuma teungku amphon na kheueh ban lagee malaikat allah. sabab nyan neupeubuet kheueh laju peue nyang teungku amphon anggap get. banmandum kawom keuluwarga bapak ulon ka pathot neuhukom mate le teungku amphon, teuma ulon nyoe ka teungku bri idhin keu meusajan lon makheun ngon teungku amphon nibak meuligoe. jinoenyoe ulon hana beurani le lon lakee peue mantong nibak teungku amphon." geujawueub le raja, "hana peureulee le tapeugah peue mantong. ulon ka lon cok keusimpolan keu ulon bri peue mantong hareuta saul keu gata dan keu ziba." laju jijawueub le mefiboset, "bah kheueh atranyan jicok le ziba banmandum. ulon ka puiah sabab teungku amphon ka neuwo deungan seulamata." meunan cit si barzilai ureueng gilead nyan teuka di rogelim keu jijak ireng raja geujak jeumeurang krueng yordan. barzilai bak watee nyan ka tuha that, umu gobnyan ka na lapan ploh thon. gobnyan ureueng nyang kaya that yoh mantong raja tinggai di mahanaim yoh watee ilee, barzilai nyan kheueh nyang peuna peunajah keu raja. raja geupeugah ubak ureueng nyan, "gata seutot kheueh laju deungan ulon u yerusalem, teuma disideh ulon jok peue mantong nyang gata peureulee." teuma jijawueub le barzilai, "ulon nyoe hana panyang le umu, dan udeb ulon nyoe hana treb le. le sababnyan keupeue kheueh guna jih ulon nyoe lon seutot deungan teungku amphon u yerusalem? umu ulon nyoe ka lapan ploh thon, dan hana le peue nyang ulon harab nyang hase teubri keuteupeu mangat ate ulon. ulon nyoe hana le

nyang mangat peue nyang ulon makheun dan peue teuma nyang ulon jieb, dan punyung ulon hana hase le ulon deungoe su nyang meureudu ureung meuca-e. ulon teuma jeuet keubeuban u ateuh teungku amphon. ulon nyoe hana patot ulon teurimueng upah nyang rayeuk nyan. teuma ulon nyoe meuheut ulon keuneuk ireng teungku amphon meupadub langkah mantong di meurandeh krueng yordan. oh lheureh nyan, bah kheureh ulon nyoe lonwoe u rumah dan meuninggai disinan, oh lheureh nyan jipeukubu bak bineh jrat bapak ulon, teuma nyoe kheureh aneuek ulon nyang nan jih kimham. neupeu idhin kheureh jihnyan ji ireng teungku amphon dan neupeubuet kheureh ateuh jihnyan peue nyang teungku amphon ngieng nyan get." geujaweueb le raja, "kimham teuma ulon ba dan ulon uroi hagee nyang gata lakee, dan peue mantong nyang gata lakee ubak ulon teuma ulon peupeunoh." oh ka lheureh geupeugah nyan, nabi daud dan banmandum aneuek buah gobnyan laju geujeumeurang krueng yordan. sigohlom nyan nabi daud geucom leubeh ilee barzilai sira geulakee idhin. oh lheureh nyan geuwoe kheureh laju si barzilai u rumah gobnyan. banmandum pasokan yehuda dan siteungoh nibak pasokan israel ji-ireng raja jak jeumeurang krueng yordan nyan. oh ka lheureh nyan raja laju geujak u gilgal, dan kimham geuba sajan deungon gobnyan. oh ka lheureh nyan teuka kheureh banmandum ureung israel jak meuhadab ubak raja dan jipeugah ubak gobnyan, "teungku amphon, pakon kheureh syedara kamoe nyang ureung yehuda nyan jipike bahwa awaknyan kheureh nyang na hak jijak tueng ngon jikawai teungku amphon meunan cit deungon banmandum keuluwarga teungku amphon dan mandum aneuek buah teungku amphon nyang meusajan-sajan teujeumeurang krueng yordan" laju jijaweueb le ureung yehuda nyan, "nyan ka patot hak kamoe, sabab raja nyan na kheureh sabat kamoe. peue pasai jeuet keubeungh gata? peu kheureh keubutohan kamoe geutanggong le raja, atawa ka geubri sapeue-sapeue hadiah keu kamoe?" jijaweueb le ureung israel nyan, "hak kamoe u ateuh raja nyan na siploh goe lipat nibak hak gata, bapih raja nyan na kheureh rakan nyang krab deungon gata. pakon gata ngieng enteng teuhadab kamoe? bek tuwoe gata bahwa kamoe kheureh nyang phonphon that usui keu teuba raja mangat teupeuwo!" teuma di ureung yehuda leubeh kheureh nibak ureung israel dan han jitem taloe. di banda gilgal na sidroe ureung jeuhet nyang buet jih jipeurusak ngon jipeukaru keuteuntramam masyarakat, nan ureung nyan seba. seba nyan aneuek si bikri nibak sukee benyamin. bak watee ireng-irengan nabi daud teuka, seba laju jiyueb beureuguih dan jipeugah, "geutanyoe banmandum hana hubongan sapeuepi deungon nabi daud. jadi hana peureulee geutanyoe taseutot gobnyan? ho droeneuh mandum ureung israel, jak geutanyoe tajakwoe!" ban jideungoe nyang lagee nyan di ureung-ureung israel nyan pih laju jijakwo jiseutot seba hana jipako meubacut pi ubak nabi daud. teuma di ureung yehuda teutab seutia dan ji ireng laju nabi daud nibak krueng yordan sampoe u yerusalem. oh ka sampoe nabi daud ubak meuligoe gobnyan di yusalem, ban siploh droe gundek gob-

nyan nyang geutingggai disinan keu jikeumiet meuligoe, geupeudeuk didalam rumah nyang jijaga le peugawee. keubutohan awaknyan ka teukeubah sisebseb jih, teuma nabi daud hantom geu-eh le deungon awaknyan. jadi awaknyan hana geuteukeh le dan udeb awaknyan lagee inong balee sampoe an mate. raja laju geubri peurintah ubak amasa, "gata peusapah kheureh laju bubena ureung yehuda dan tayuejak kheureh keunoe deungon awaknyan lam tempo lhee uroe." oh lheureh nyan jijak kheureh laju amasa keu jijak gumpoi awaknyan lagee nyang ka geupeurintah ubak jihnyan, teuma ureung nyan hana jigisa le lagee nyang ka geupeuteuntee le raja. oh lheureh nyan geupeugah kheureh teuma le raja ubak abisai, "seba nyan leubeh jai ka jipeususah geutanyoe nibak absalom. sabab nyan taba kheureh aneuek buah ulon dan tapeulet kheureh awaknyan, mangat bek sampoe awaknyan jiduek nibak banda-banda nyang meukuta, dan jiteumeu pluing nibak geutanyoe." dan dimiyueb pimpanen abisai, pasokan yoab dan pasokan peungawai pribadi raja dan banmandum tantra nyang laen jibeurangkat u yerusalem deungon tujuan jijak tiyeub seba. bak watee awaknyan ka sampoe nibak batee raya di gibeon, amasa laju teuka jijak meurumpok ngon awaknyan. yoab nibak watee nyan geungui peukayan prang deungon peudeung dalam sarong nyan meugantueng nibak keuieng gobnyan. bak watee gobnyan teungoh geujak ngon geumaju, sarong peudeung nyan teuduit dan sampoe peudeung nyan teugeesee ubak jaroe wie gobnyan. yoab geupeugah ubak amasa, "peue haba, rakan?" sira geumat janggat amasa deungon jaroe uneuen geuh sang-sang geukeuneuk com jihnyan. amasa hana deuh jikalon na peudeung nibak jaroe wie yoab. deungon hana teusangka-sangka yoab laju geutob peudeung geuh nyan ubak pruet amasa, sampoe asoe pruet amasa nyan ro meuhambo ateuh tanoh. amasa nyan mate bak watee nyan cit teuma, sampoe le yoab hana peureulee le geutob jihnyan. dan oh lheureh nyan yoab dan abisai adoe gobnyan, jijak let laju seba. sidroe lamkawan tantra yoab jidong to ngon manyet amasa dan jimeuhoi, "sou nyang dong blaih yoab dan nabi daud, gata seutot kheureh yoab!" manyet si amasa nyang mantong meulabo ngon darah nyan mantong na teutiek di ateuh jalan raya. tantra yoab bunoe deuh jikalon bahwa banmandum ureung nyan teungoh jijak jipioh disinan. le sabab nyan kheureh gobnyan jitarek manyet nyan u dalam lampoh dan jithob laju ngon ija seulimbob. oh ka lheureh manyet nyan jigeesee di ateuh rot nyan, baro kheureh bubena ureung nyan teungoh jipioh bunoe ka hase jijak lom teuma, dan banmandum ureung nyan jiseutot yoab keuk jijak tiyeub seba. seba nyan ka lheureh jijak bansaboh daerah sukee israel, laju sampoe ubak banda abel-bet-maakha jiseutot banmandum le sukee nyang meumarga bikri. aneuek buah yoab jideungoe bahwa seba na disinan, dan awaknyan pih laju jikeupong banda nyan. awaknyan laju jitamon tanoh nibak seukeuileng beuton lua dan jipeuphon tema kueh tanoh nyang na dimiyueb beuton nyan mangat jeuet ji reuloih ngon geupeureubah binteh beuton nyan. di banda nyan na sidroe ureung inong nyang bijak sana, dan gobnyan jidong di ateuh binteh beuton laju jimeuhoi, "neude-

ungoe! neudeungoe! neulakee kheueh mangat yoab jiteuka keunoe; ulon keuneuk peugah haba ngon gobnyan." geuteuka laju yoab dan di ureueng inong nyan jitanyong, "droeneueh kheueh nyan yoab?" "nyoe, beutoi, ulon yoab," geujaweueb le yoab nyan. jipeugah le ureueng inong nyan, "neudeungoe kheueh peue nyang ulon peugah nyoe, hai teungku." "get kheueh, ulon deungoe," geujaweueb le yoab. jipeugah le ureueng inong nyan, "yoh watee ille ureueng rame jipeugah lagee nyoe, 'meunyoee droeneueh na peureulee peutunyoe, neujak kheueh laju ubak banda abel' – dan nyan kheueh nyang jipeubuet le awaknyan. banda kamoe nyang nan jih abel nyoe banda nyang raya, dan saboh banda nyang paleng aman ngon seutia di nanggroee israel. pakon di teungku neu-useuha neu keuneuk peuhanco? peu kheueh teungku kana niet neukeuneuk peurusak tanoh nyang atra tuhan?" "mubacut pih hana niet nibak ulon nyang lagee nyan!" geujaweueb le yoab, "ulon mubacutpi na na niet lon peurusak atawa lon peuhanco banda droeneueh! nyan bukan reuncana kamoe. teuma sidroe ureueng nyang nan jih seba aneuek si bikri, ureueng nyan meuasai nibak daerah meugunong-gunong efraim, jih nyan ka jibeurontak ubak nabi raja daud. gata jok kheueh jih nyan, oh ltheueh nyan ulon teuma lonjak nibak banda nyoe." jipeugah lom le ureueng inong nyan, "ulee ureueng nyan teuma kamoe rhom ubak teungku rot binteh beuton nyoe." jikak kheueh laju gobnyan dan deungon lisek jih jipeugah laju meukeusut jih nyan ubak peunduduek banda nyan. oh ltheueh nyan ulee seba laju jiteubang dan jigeulawa laju ubak yoab. oh ltheueh nyan yoab geuyueb laju beureuguih dan bubena aneuek buah gobnyan jitinggai laju banda nyan laju jikakwoe u rumoh droe-jih maseng-maseng. dan meunan cit deungon yoab laju geujakwoe u yerusaleem geujak meuhadab ubak raja. nyoe kheueh peujabat-peujabat nanggroee nyang meupangkat manyang nyang geu baiat le nabi daud: panglima keu banmandum tantra israel: geuangkat yoab. ulee pasokan peungawai pribadi nabi daud: geuangkat benaya aneuek yoyada. keu ulee ureueng keureuja paksa: geuangkat si adoram. keu beundahara nanggroee: geuangkat si yosafat aneuek si ahilud. keu sekretaris nanggroee: geuangkat seya. keu teungku imeum: geuangkat zadok dan abiyatar. teungku imeum dalam meuligoe: geuangkat ira nibak banda yair. bak masa nabi daud geumat peurintah, teuka kheueh bala musem deuk nyang lumpah hibat dan treb jih lhee thon peunoh. laju nabi daud geulakee peutunyok ubak tuhan keuhai deuk nyan, dan tuhan meufeureuman, "teuka bala musem deuk nyan na kheueh sabab salah si saul dan keuluwarga jih, jihnyan ka jipoh mate banmandum ureueng-ureueng gibeon." (ureueng-ureueng gibeon nyan bukan ureueng israel; awaknyan jitamong u dalam keulompok ubit nibak ureueng amori. dan di ureueng israel ka jimeujanji bahwa awaknyan teuma jilindong, teuma saul ka juseuha keu jipeuhabeh awaknyan sabab jihnyan nyang jipike na kheueh keu keupeuntengan ureueng israel dan yehuda,) dan nabi daud laju geutawok ureueng-ureueng gibeon nyan, dan geutanyong ubak awaknyan, "peu kheueh nyang jeuet ulon peubuet keu gata? ulon keuneuk teuboih buet nyang salah nyang

ka geupeubuet le saul u ateueh gata, mangat gata tabri beureukat keu umat tuhan." jaweueb awaknyan, "peukara kamoe deungon saul meunan cit deungon keuluwarga gobnyan hana hase teupeuseuleusoe ngon pirak atawa ngon meuh, teuma dikamoe pih hana meuheuet keuneuk poh mate bahpi meusidroe kong lamkawan bansa israel." laju geupeugah lom le nabi daud, "meunyoee meunan, peue nyang gata lakee jeuet ulon peubuet?" jaweueb awaknyan, "saul raja nyang ka geupileh le tuhan nyan geukeuneuk peubinas kamoe banmandum sampoe kamoenyoe ranab nibak bansaboh tanoh israel. le sabab nyan, neuseurah kheueh ubak kamoe tujoh droe keuturonan nyang agam, mangat awaknyan kamoe gantung dikeue tuhan di gibeaa, banda raja saul keudroe." geujaweueb le raja, "get kheueh, awaknyan teuma ulon jok ubak gata." teuma sabab nabi daud dan yonatan ka ltheueh geumeusumpah sabe keudroe-droe geuh, nabi daud hana geuseurah mefiboset aneuek yonatan. nyang geucok le nabi daud na kheueh armoni dan mefiboset, nyang na kheueh ban dua droe aneuek agam saul nyang jipeulahe le ma jih ureueng inong rizpa aneuek aya; meunan cit ban limong aneuek agam si merab aneuek inong saul, aneuek-aneuek nyan lahe nibak hase jimeukawen merab deungon adriel aneuek si barzilai, ureueng mehola nyan. awaknyan geujok laju ubak ureueng-ureueng gibeon, dan ban tujoh droe ureueng nyan meuninggai mate teugantueng di ateueh buket dikeue tuhan. hukoman mate nyan teulaksana nibak musem semi, bak watee bak jelai ka jipeuphon koh. dan si rizpa gundek saul, jileueng laju ija krong keudroe jih di ateueh batee ditempat manyet-manyet nyan teu-eh teulintente. rizpa hana jikak nibak tempat nyan phon awai musem keumeukoh sampoe nibak jitreun ujeuen bak musem luroih on kayee. gobnyan hana jipeubiyeu manyet-manyet nyan jicutok le cicem-cicem oh watee uroe dan le beulatang juah bak watee malam teuka. bak watee teujak peugah ubak nabi daud peue nyang ka geupeubuet le rizpa, gobnyan laju geujak-cok tuleueng-tuleueng saul dan yonatan nibak peunduduek banda yabes di gilead. (awaknyan ka jakak cua tuleueng-tuleueng nyan nibak tanoh luwah di banda bet-san, di tempat ureueng filistin jigan-tung manyet-manyet nyan oh ka ltheueh jipeutaloee saul di buket gilboa.) banmandum tuleueng saul dan tuleueng yonatan nyan geuba nibak tempat nyan, meunan cit geupeusapat teuma dumna tuleueng ban tujoh droe ureueng nyang ka teugantueng nyan. oh ltheueh nyan tuleueng-tuleueng saul dan yonatan dan tuleueng ban tujoh droe ureueng nyan geutanom laju u dalam jrat kish bapak saul di zela dalam wilayah benyamin. oh ka seulseuseo banmandum nyan geupeubuet nyang sisuai deungon peurintah raja, baro kheueh po teu allah geupeukabui doa awaknyan keu nanggroee nyan. lamkawan ureueng filistin dan ureueng israel beureutoih lom prang. nabi daud dan aneuek buah gobnyan geujak laju u mideuen prang keu teujak meuhengko deungon ureueng filistin. dalam prang nyan nabi daud jiteuka hek nyang bietbiuet mupalo. dan teuka kheueh ubak gobnyan sidroe ureueng rayetek lagee gogasi nyang nanjih yisibebenob. kapak jih teupeugat nibak peurunggu nyang

brat jih na kira-kira lhee siteungoh kilo gram. meunan cit le ureueng nyan jigulam peudeueng nyang baro, dan ureuengnyan yaken that deungon alat jih nyan nibak goenyan ka hase jipeutaloe nabi daud. teuma abisai bin zeruya bagaiih that teuka jijkak tulong nabi daud. laju jiheuntam gogasi nyan dan lam watee sikeujab nyan cit teuma manusia gogasi nyan mate. oh lheueh nyan aneuk buah nabi daud jimeulakee mangat nabi daud geumeujanji hana geuseutot le oh watee na prang dipat mantong. "teungku amphon na kheueh harapan israel, bek sampoe kamoe geumadoh teungku amphon," jipeugah le awaknyan. teuma jiteuka lom prang ngon ureueng filistin di gob. lam prang nyan sibkhai ureueng husa jipoh mate teuma sidroe ureueng gogasi nyan nanjih saf. nibak prang nyang laen deungon ureueng filistin di gob, elhanan aneuk si yair di betlehem ka jipoh mate goliat nibak gat. go kapak si goliat nyan na bube kayee alat teampeun yaj. na lom muwang teulawan ureueng filistin di gat. disinan na sidroe ureueng gogasi nyan lumpah galak jijkak muwang. manusia gogasi nyan aneuk jaroe jih nam neuk tieb-tieb jaroe siblah jaroe dan meunan cit deungon aneuk gaki jih nam neuk cit tieb-tieb siblah gaki. ureueng nyan jihina ngon jipeukem ureueng israel, dan sabab le nyan kheueh jihnyan jipoh mate le yonatan aneuk simea, aduen nabi daud. ban peuet droe nyang geupoh mate le nabi daud dan pasokan gobnyan, na kheueh keuturonan gogasi di gat. oh ka lheueh tuhan geupeuseulamat nabi daud nibak saul dan nibak meubagoe musoh gobnyan nyang laen, nabi daud laju geuca-e ngon lagu nyang ceudah ubak tuhan: ulon cinta ubak droeneueh ya, tuhan, droeneueh kheueh teunaga ulon. tuhan ban lagee kuta nyang kong teupat ulon meulindong. allah ulon ban lagee gunung batee, teupat ulon meureului. lagee peurisai gobnyan geutob ulon, dan geujaga ulon jeuet aman sabe. ulon meulakee ubak tuhan nyang patot teupujoe, gobnyan ka geupeu beubaih ulon nibak musoh-musoh ulon. ulon jikeulileng le bahya mawot dan teugeunang le ie raya keubinasaan. ulon jikeulileng le bahya mawot, jeunieb mawot meulinteung dikeue ulon. lam keuadaan ulon teukeupong ulon meulakee ubak tuhan, ulon kliek ubak allah ulon lon lakee tulong. di baet gobnyan tuhan geudeungoe su ulon dan geupeutrok nyang ulon lakee. laju bumoe meuhayak dan meuhayon, gaki-gaki gunong pih goyah dan meuhayak sabab allah ka mureuka! asab jiteubiet meukeubok lam ruhueng idong gobnyan, bara apui nyang hu jiteubiet nibak babah gobnyan. langet dimanyang geuplah dua, laju geutreun kheueh gobnyan, deungon awan nyang seupot na dimiyueb gaki gobnyan. gobnyan geupo sira geugiduek ateueh kerub; gobnyan meulayang di ateueh sayeub angen. geutob droe geuh deungon seupot; awan ngon reudok nyang teubai jikeulileng gobnyan. kilat nyang muble dikeue gobnyan, jiteubiet awan, ujeuen eh meunan cit ngon apui. teuka tuhan ngon su lagee lagee su geulanteue di langet, allah nyang mahamanyang geupeudeungoe su gobnyan. gobnyan laju geupeutek bubena aneuk panah geuh, dan sampoe teupeu crebre bubena musoh. gobnyan geuseumama ban lagee kilat meu-ulang-ulang dan sampoe awaknyan jiplu-

eng teung bayeueng ka hana meuteuntee le. tuwie ie laot nyang lhok sampoe teubeduh dan meunan cit ngon lapek bumoe sampoe teuhah bak watee tuhan geu dumpek musoh gobnyan deungon that mureuka. nibak di manyang tuhan geusunyueng jaroe gobnyan; geumat bak ulon dan laju geutarek dalam ie nyang lhok. gobnyan ka geupeuseulamat ulon nibak musoh nyang kha dan nibak ureueng nyang jibanci ulon sabab awaknyan lumpah that teuga meunyeu ngon ulon. awaknyan jiprang ulon bak watee ulon jitimpa le beuncana teuma tuhan kheueh nyang jeuet keu peunulong ulon. tuhan kheueh nyang peulheueh ulon nibak banmandum bala dan nyang peuseulamat ulon sabab gobnyan meukeunong keu ulon. tuhan geubalaih peue nyang ulon peubuet nyang beuna; gobnyan geubri beureukat keu ulon sabab ulon hana meusalah. ulon keubiet that taat ubak peurintah tuhan, dan hana lom meupaleng nibak po teu allah ulon. banmandum hukom gobnyan ulon peubuet, bubena peurintah gobnyan hana lon peulalee. gobnyan geuteupeue bahwa ulon hana meucupa dan lon peujioh droe nibak buet nyang salah. teuma tuhan geubalaih buet ulon nyang beutoi sabab gobnyan geuteupeue bahwa ulon hana meusalah. tuhan, droeneueh that seutia keu ureueng nyang seutia dan jroh ubak nyang jroh. ubak ureueng suci neupeugah droeneueh suci, dan keu ureueng nyang jeuhet jeuet keumusoh tuhan. ureueng nyang miyueb ate tuhan peuseulamat; teuma ureueng nyang congkak tuhan peuntundok. tuhan kheueh nyang puhu panyot ulon; dan tuhan allah ulon kheueh nyang peupeungeuh ulon didalam seupot. tuhan kheueh nyang peuteuga ulon mangat beuhase lon peuhanco bubena musoh; deungon geubantu le po teu allah hase ulon peuhanco kuta peutahanan awaknyan. peue nyang geupeubuet le po teu allah na kheueh samporeuna, dan janji nyang ka geupeugah le tuhan na kheueh jeuet teupeucaya! gobnyan saban lagee peurisai le banmandum nyang jijkak meulindong ubak gobnyan. sabab tuhan mantong kheueh nyang po teu allah; allah kheueh nyang jeuet keu nyang bila geutanyoe. gobnyan na kheueh po teu allah nyang peuteuga ulon dan gobnyan geupeubuet rotjak ulon nyoe aman. gobnyan nyang peukong gaki ulon ban lagee gaki rusa, dan gobnyan kheueh teuma nyang jaga keuseulamat ulon di ateueh gunung-gunong. tuhan geulatih ulon pakriban cara teujak muwang, akhejih ka hase ulon reuntang aneuk panah nyang paleng teuga. tuhan, droeneueh kheueh nyang peulindong dan nyang peuseulamat ulon, dan neutumpang ulon deungon kuasa droeneueh ulon jeuet keumeugah sabab le neutulong le droeneueh. droeneueh teuma nyang jaga ulon mangat ulon bek keunong teuen dan ulon hantom na reubah. ulon tiyeub musoh ulon dan ulon peutaloe awaknyan, dan pantang ulon surot sigohlom awaknyan binasa. ulon seumpom awaknyan sampoe han hase jibeudoh le, awaknyan reubah hana meudaya dimiyueb gaki ulon. droeneueh nyang bri teunaga keu ulon mangat jeuet lonjak muwang, dan keuhai meunang ateueh musoh-musoh ulon. droeneueh nyang peucrok sampoe musoh ulon jiplueng nibak ulon; dan ureueng nyang jibanci keu ulon ka habeh ulon peubinasaa. awaknyan jilakee tulong, teuma hana

nyang tem bantu, awaknyan jimeuhoi tuhan, teuma hana geujaweueb. awaknyan ulon peuhanco ngon ulon peureumok ban lagee abee nyang ro meutabu, dan ulon sampoh ban lagee luhob nibak rot raya. droeneueh nyang peubeubaih ulon nibak kawom nyang doraka, dan neupeujeuet ulon keupeunguasa ateuheh bansa-bansa; bansa nyang hana ulon turi ka jeuet keunamiet ulon. meunan cit deungon ureueng aseng jitundok ubak ulon, dan jitaat meunyo e jideungoe peurintah ulon. beuhe ngon ceubeueh awaknyan ka gadoh; awaknyan yo meugam-gam laju jiteubiet nibak kuta jih. tuhan udeb! teupujoe kheueh nyang bila ulon! teupeu agong kheueh keubeusaran allah, nyang peuseulamat ulon! gobnyan nyang peumeunang ulon ateuheh musuh ulon, meunan cit deungon bansa-bansa geupeutaklok dikeue ulon, meunan cit geupeuseulamat ulon ateuheh lawan-lawan ulon. tuhan, droeneueh nyang bri meunang ateuheh musuh ulon, droeneueh nyang lindong ulon nibak ureueng nyang keujam. teuma ulon peuagong droeneueh lamkawan bubena bansa, dan ulon meuca-e lagu semujoe ubak droeneueh. allah ka geubri meunang nyang lumpah raya keu raja nyang geubaiait le gobnyan, gobnyan teutab geugaseh ubak ureueng nyang ka geupileh, nyang kheueh nabi daud dan keuturonan gobnyan keu siumu masa. nabi daud aneuek isai teupileh jeuet keuraja dan geupeujeuet jeuet keu ureueng rayeuk le po teu allah nabi yakub. gobnyan teuma nyang karang bubena ca-e-ca-e keu bansa israel. nyoe kheueh nariet nabi daud nyang keuneuleueh: roh tuhan ka geupeugah meulalu ulon; peusan dan amanat gobnyan na nibak bibi ulon. po teu allah nabi yakub ka geupeugah haba; ubak ulon peulindong israel geupeugah meunoe: "raja geupeurintah rakyat deungon keuadaan nyang geupimpin deungon keutaatan ubak tuhan, gobnyan ban lagee cahya mata uroe nyang mantong meureukah bak watee teungoh malam deungon langet mantong gleh meucahya. gobnyan ban lagee cahya mata uroe beungoh nyang ban habeh jisiram le ujeuen treun sampoe naleueng jitimoh ijo lagak muble-ble." meunan cit deungon keuturonan ulon nyang geubri beureukat le po teu allah, janji gobnyan ubak ulon hana meubah, janji geuh nyan na kheueh keukai dan sampoeureuna, teu-ato didalam mubagoe hai. po teu allah geujamin meunang u ateuheh ulon, dan geujamin peue mantong nyang ulon meuheuet. teuma keu ureueng nyang hana jitaat ubak tuhan na kheueh saban lagee duro nyang teutiek. jaroe gob hana hase jimumat; hana meusidroepi nyang jitem cukeh meunyoetan na alat nyang teupeuget nibak kayee atawa beuso. bubena ureueng nyan ka hanco jiliet le apui. nyoe kheueh nan-nan bubena peuwira nabi daud nyang paleng meusyehu: nyang phon that na kheueh ishbaal, ureueng hakhmoni, peumimpin "keulompok lhee" (triwira). ka lheeuh teujadi nibak saboh prang gobnyan geumuprang ngon lawan na lapan reutoih droe teuma digobnyan geumuprang nyan na kheueh ngon kapak gobnyan. ureueng nyang keudua didalam triwira nyan na kheueh eleazar aneuek dodo nibak kawom ahohi. gobnyan geuireng nabi daud bak watee awaknyan geumuprang ngon ureueng filistin nyang meusapat keuneuk jikkamuprang. laju bak wa-

teenyan cit teuma pasokan israel jisurot, eleazar hana jipioh jimeujuang jiheungko ureueng filistin sampoe an awaknyan kaseh hek. jaroe gobnyan ka jeuet keukeuboh bak jimat peudeueng sampoe peudeueng nyang na nibak jaroe gobnyan hana hase jipeuleueh. bak uroenyuan tuhan geupeumeunang nyang lumpah rayeuk keu bansa israel. pasokan israel nyang teungoh jisurot bunoe jiriwang lom ubak teupat eleazar nyang teungoh muprang, laju awaknyan jisuit bajee-bajee nyang na nibak manyet-manyet nyang ka mate disinan. ureueng keu lhee didalam triwira nyan na kheueh sama aneuek age di harari. ka lheeuh teujadi bak watee ureueng filistin teungoh meusapat di lehi, nibak saboh lampoh nyang peunoh teupula ngon boh reuteuk mirah, pasokan israel jiplueng nibak ureueng filistin. teuma si sama teutab jimeuheungko, jipoh mate dan geupeutalo ureueng filistin, sampoe gobnyan meuhase jipeuteun lampoh jih nyan. meunan kheueh cara jih tuhan ka geubri meunang nyang lumpah rayeuk. bak uroe nyang laen karab to ngon musem keumeukoh, na lhee droe ureueng nibak droe peuwira nabi daud nyang paleng meusyehu geutren ubak guha adulang. bak wateenyan nabi daud na didalam kuta di dalam guha nyan. seudangkan ureueng filistin na teuma jipeudong khimah di panton refaim, dan na saboh pasokan nibak awaknyan ka jiduek di betlehem. nabi daud hana geusangka-sangka ka teuka rindu ngon meuceu u gampong halaman geuh nyan dan geupeugah laju, "ah, meunyo na nibak ulon jibri ie jieb nibak mon nyang tou ngon pintoe geureubang di betlehem!" ban jideungoe nyang lagee nyan teuka kheueh lhee droe peuwira gobnyan laju jiteurobos khimah-khimah ureueng filistin nyan, laju jikk crong ie lam mon nyan, oh lheeuh nyan ie nyang ka lheeuh teu crong nyan jiba laju ubak nabi daud. teuma nabi daud hana geutem jieb ie nyan, teuma laju geuro ie nyan sibagoe peuseumahan ubak tuhan. gobnyan geupeugah, "ya tuhan, ulon han hase ulon jieb ie nyoe! meunyo ulon jieb, siulah-ulah ka ulon jieb darah ureueng nyang ka jipeusabong nyawong jih!" jadi nabi daud mubacut pi hana geutem jieb ie mon nyan. nyan kheueh jasa-jasa peujuang nyang lhee droe lom peukasa nyan. ban lhee ploh droe peuwira nyan geuboh teuma nan jih deungon "tridasawira". awaknyan geupimpin le abisai adoe yoab, aneuek zeruya. ka lheeuh le gobnyan geupoh mate lhee reutoih droe deungon kapak gobnyan. sabab nyan kheueh gobnyan meutamah meugah ngon meusyehu. teuma gobnyan hana lagee hibat "triwira". na sidroe teuk peuwira nyang paleng meusyehu nan jih benaya aneuek yoyada ureueng kabzeel. ureueng nyan get that beurani lom ngon ceubeueh. na dua droe pahlawan rayeuk nibak moab ka geupoh mate. ka lheeuh na teujadi nibak siuroe nyang meusalju, gobnyan geutamong u dalam saboh guha, oh trok keunan laju geupoh mate saboh singa nyang na disinan. meunan cit gobnyan ka lheeuh teuma geupoh mate sidroe ureueng meuse, nyang keubiet beuhe ngon meusinjata kapak. teuma benaya geuhadab ureueng nyan teuma deungon tungkat. seudangkan kapak nyang na nibak jaroe ureueng meuse nyan geuteume reubot dan ngon kapak nyan cit teuma geupoh mate ureueng meuse

nyan. nyan kheueh jasa-jasa benaya, sidroe nibak "tridasawira". lamkawan nyan benaya kheueh nyang paleng meusyeyuhu, teuma gobnyan hana saban hebat jih lagee "triwira". nabi daud geuangkat gobnyan jeuet keu ulee peungawai pribadi gobnyan. anggota-anggota nyang laen nibak "tridasawira" na kheueh: asael adoe yoab elhanan aneuek dodo ureueng betlehem sama dan elika ureueng harod hele ureueng palti ira aneuek ikes ureueng tekoa abiezer ureueng anatot membunai ureueng hase zalmon ureueng ahohi maharai ureueng netofa heleb aneuek baana ureueng netofa itai aneuek ribai ureueng gibeia diwilayah sukee benyamin benaya ureueng piraton hidai ureueng di panton-panton gaas abialbon ureueng araba azmawet ureueng bahurim elyahba ureueng saalbon aneuek-aneuek yasyen yonatan sama ureueng harari ahiam aneuek sarar ureueng harari elifelet aneuek hasbai ureueng meakha eliam aneuek ahitofel ureueng gilo hezrai ureueng karmel paerai ureueng arbi yigal aneuek natan ureueng zoba bani ureueng gad zelek ureueng amon naharai ureueng beerot, nyang gulam sinjata yoab ira dan gareb ureueng yetri uria ureueng het. bandum nyan na lhee ploh tujoh droe tantra nyang paleng meusyeyuhu. tuhan geubeungeh lom ubak bansa israel, laju nabi daud geubujuk deungon meukeusut geupeuteuka keusosahan u ateuhe bansa nyan. feureuman tuhan ubak gobnyan, "tapeubuet kheueh laju peurintah ulon nyoe mangat tapeuna seunsus di nanggroe israel dan yehuda." geupeugah kheueh laju le nabi daud ubak yoab panglima tantra gobnyan, "tajak kheueh laju meusajan deungon peuwira-peuwira gata ubak banmandum sukee israel di bansaboh nanggroe keu tajak catat seunsus. ulon keuneuk teupeue padubna jeumeulah awaknyan." teuma yoab geupeugah laju ubak raja, "seumoga tuhan po teu allah teungku amphon geupulipat ganda rakyat israel trok ubak sireutoih lipat nibak nyang na jinoenyoe, dan meunan cit seumoga teungku amphon mantong udeb mangat jeuet neukalon hase jihnyan. teuma keupeue teungku amphon neukeuneuk teupeu seunsus nyan?" teuma le raja teutab geumumat ubak peurintah nyan. jadi yoab meunan cit deungon peuwira nyang laen laju jijak itong jeumeulah bansa israel. oh ka leupah jijeumeurang krueng yordan, yoab dan aneuek buah gobnyan geupeudong laju khimah disiblahi seulant arorer, arorer nyan na kheueh saboh banda di teungoh-teungoh panton wilayah gad. jibeudoh disinan awaknyan jijak laju u arah utara, yeazer nan jih, beudoh sinan laju jijak dan sampoe u gilead dan u kades didalam wilayah ureueng het. oh ka lھےuھ nyan jijak laju nibak dan wet u, arah barat, u sidon. geubeudoh sinan awaknyan jijak laju u arah seulant u tirus banda nyang na kuta nyan. lھےuھnyan awaknyan jijak laju ubak mandum banda ureueng hewi dan ureueng kanaan, dan akheji u bersyeba, dibagian seulant yehuda. awaknyan jibloh laju bansaboh nanggroe lam tempo sikireueng buleuen dua ploh uroe. oh lھےuھnyan jiwoe kheueh laju awaknyan u yerusalem dan jijak lapor ubak raja nabi daud hase nibak seunsusnyan. jeumeulah ureueng agam nyang ka peunoh syarat keu jeuet teutamong tantra na 800.000 droe di israel dan 500.000

droe na di yehuda. teuma oh ka lھےuھ nabi daud geu itong bansanyan, gobnyan ka meuras meusalah, laju geupeugah ubak tuhan, "ya tuhan, ulon that-that meudesya! neupeu amphon kheueh ulon nyoe, sabab peue nyang ka ulon peubuet nyan na kheueh keureuja nyang lupah bangai." laju tuhan meufeureuman ubak nabi gad nyang jeuet keupeurantara lamkawan nabi daud ngon tuhan, "tajak peugah kheueh laju ubak nabi daud bahwa ulon jok keu jihnyan na lھے boh pe-unileh. peue mantong nyang jipileh lamkawan lھے nyan teuma ulon peubuet." banbeungoh singoh, bak watee nabi daud banmantong jibeudoh eh, laju gad teuka jijak meuhadab dan geupeugah laju ubak gobnyan peurintah tuhan nyan, geupeugah, "nyang toh nyang teungku amphon pileh: nanggroe nyoe jiteuka le bala musem deuk nyang treb jih na lھے thon, atawa teungku amphon neuplueng jilet-let le musoh nyang treb jih na teuma lھے buleuen, atawa nanggroe nyoe jiprang le bala peunyaket nyang treb jih lھے uroe? neupeuputoh kheueh laju jinoenyoe peue nyang haroh ulon peugah ubak tuhan." geujaweweb le nabi daud, "aduh! mupalo ulon! teuma nibak ulon jihukom le manusia, leubeuh get geutanyoe banmandum geuhukom le tuhan, sabab gobnyan rayeuk that gaseh sayang geuh." teuma tuhan laju geupeutreu bal peunyaket u ateuhe bansa israel phon nibak beungoh nyan sampoe ubak watee nyang ka geuteutab nyan. bansaboh israel na 70.000 droe meuninggai donya. malaikat tuhan geupeutreu bala mawot nyan sampoe ubak ureueng nyang teungoh jiceumeulo boh gandom atra su araua, ureueng yebus. bak watee tuhan geukalon bahwa malaikat geuhnyan ka siab teuma keu jipeuhanco yerusalem, laju tuhan geu-ubah keuputusan gobnyan, dan gobnyan laju geupioh geuhukom bansa nyan. geupeugah ubak malaikat nyan, "kaseb nyan! neupioh!" nadi daud deuh geukalon malaikat teungoh geutarek nyawong bansa gobnyan, laju gobnyan geupeugah ubak tuhan, "ulon kheueh nyang meudesya, sabab ulon nyang peubuet salah nyan. teuma peu kheueh salah jih ateuhe bansa nyang malang nyan? neu hukom kheueh ulon dan keuluwarga ulon!" bak uroenyon cit teuma gad teuka geujak meuhadab ubak nabi daud dan geupeugah laju ubak gobnyan, "beubagaih kheueh laju teungku amphon neujak ek u ateuhe teumpat ureueng teungoh ceumeulo gandom atra araua nyan, dan neupeudong laju miseubah keu tuhan." dan geujak kheueh laju nabi daud pakriban nyang ka geu peurintah le tuhan nyang ka geupeusampoe ubak gobnyan meulalu nabi gad nyan. aih teuma araua bak watee nyan teungoh jiceungeuek u miyueb, dan deuh laju jikalon raja ji-ireng le bubena peuiok gobnyan teungoh geujak geutuju ubak araua. araua laju geusujut dikeue nabi daud, dan jitanyong, "peue meukeusut teungku amphon neuteuuka keunoe?" geujaweweb nabi daud, "ulon keuneuk bloe teumpat loe gandom nyoe, mangat di ateuhe nyoe ulon peudong miseubah ubak tuhan sampoe bubena peunyaket nyang teungoh jiteuka lam nanggroe geutanyoe nyoe hase teusampoh." geupeugah le araua, "neucok kheueh laju teungku amphon, dan neupeuseumah laju ubak tuhan peue nyang teungku amphon rasa get. nyoe leumo-leumo keu

keureubeuen nyang teutot dan keu kayee sinungo apui jih teungku amphon jeuet neucok tangke langai dan papeun-papeun ceumeulo nyan." banmandum nyan geubri le arauna ubak raja, sira geupeugah, "bah kheueh tuhan po teu allah teungku amphon geuteurimong peuseumahan teungku amphon nyan." teuma raja nabi daud geujaweueb, "bek! atra droeneueh nyan ulon bloe mantong. ulon han lontem keureubeuen keu tuhan allah deungon sapeue-sapeue nyang ulon teume deungon meunang mantong." laju nabi daud geubloe teupat ceumeulo gandom si arauna nyan meunan cit deungon leumo-leumo geuhnyan deungon yuem limong ploh pengpirak. laju nabi daud geupeudong miseubah disinan keu tuhan dan geupeuseumah laju keureubeuen nyang teutot dan keureubeuen peudame. tuhan geupeukabui laju doa nabi daud, dan deungon nyan teuhinda kheueh bala peunyaket nyang ka jiheuntam nanggroe israel nyan.

jinoenyoe raja nabi daud ka tuha that-that. bah kheueh gobnyan teupeuseulimboteungon ija nyang tubai, teuma gobnyan teutab sijuek. le sabab nyan le bubena peungawai gobnyan jipeugah, "nyang mulia teungku amphon, nyang get jih bah kheueh kamoe jakmita sidroe aneuek dara nyang jeuet jitinggai deungon teungku amphon dan jipeutimang teungku amphon. jihnyan teuma jieuh deungon teungku amphon mangat teungku amphon meuteume seueuem." dan jijak mita kheueh ban saboh nanggroe israel sidroe aneuek dara nyang ceudah rupa. teuma di sunem meuteume sidroe aneuek dara nyang lumpah ceudah nyang nan jih abisag. aneuek dara nyan laju jiba ubak nabi daud, dan aneuek dara nyan pi tinggai laju disinan sira jikeumiet nabi ngon jiseueha gobnyan. teuma nabi daud nyan hana geumeusituboh deungon aneuek daranyan. sabab absalom ka meuninggai donya, teuma adonia, aneuek agam nabi daud nyang lomboi dua jeuet keu nyang tuha. mak jihnyan nan jih hagit. adonia na kheueh ureueng nyang paleng lagak lom ngon tari. bapak jih hantom na peureunah jibeueh keu jihnyan meunyoee jihnyan jipeubuet buet nyang salah. adonia meuheuet that keuneuk jeuet keu raja, le sababnyan laju jipeuna keu droe jihnyan sijeumeulah geuritan prang dan tantra meuguda meunan cit deungon limong ploh droe peungawai pribadi. laju gobnyan jijak meurok pakat deungon yoab dan abyatar. mak yoab nan jih zeruya. yoab dan teungku imeum abyatar ka situju keu geudukong useuha adonia nyan. teuma teungku imeum zadok, benaya aneuek yoyada, nabi natan, simei, rei dan peungawai pribadi raja nabi daud hana geudong blaih adonia. bak siuroe ditempat nyang nan jih batee uleue to that ngon mata ie en-rogel, adonia laju geupeuseumah keureubeuen bubiri, leumo agam dan aneuek leumo nyang teumbon-teumbon. gobnyan laju geu undang bubena aneuek agam nabi daud nyang laen, dan peungawee-peugawee meuligoe nibak sukee yehuda ubak kharuri keureubeuen nyan. teuma nabi sulaiman adoe gobnyan, dan nabi natan meunan cit deungon benaya dan peungawai pribadi raja daud hana ji undang. teuma nabi natan geujak laju meurumpok deungon batsyeba, mak nabi sulaiman, oh ban trok keunan geupeugah laju ubak gobnyan, "peu kheueh pocut ratu gohlom neudeungoe bahwa si adonia, aneuek agam hagit, ka jibaiait droe jih jeuet keuraja, seudangkan raja nabi daud hana geuteupeue sapeue keuhainyan? meunyoee pocut ratu keudroe neu meulakee mangat nabi sulaiman nibak pocut ratu keudroe seulammat, ulon naseuhata ubak droeneueh bubagaih kheueh neujak meuhadab ubak raja nabi daud, dan neupeugah laju lageenyoe ubak gobnyan: 'bukon kheueh teungku amphon keudroe ka neumeusumpah ubak ulon bahwa aneuek agam ulon nyang nan jih nabi sulaiman teuma jeuet keuraja keugeunantoe teungku amphon? jinoenyoe, pakon adonia nyang jeuet keuraja?' " geupeugah lom le natan seulanjut jih, "preh ilee, teungoh pocut ratu nyan geupeugah haba deungon raja, ulon teuma lon tamong lon jak peukong peue nyang ka neupeugah le pocut ratu nyan." dan geujak kheueh laju batsyeba geujak meuhadab ubak raja u dalam kama gobnyan. raja nabi daud nyan

bak wateenyan ka tuha that-that, dan abisag, aneuek dara nibak sunem nyan, teungoh jipeutimang gobnyan. batsyeba laju geusujut ukeue raja, dan raja laju geutanyong, "peue nyang gata lakee?" geujaweeb le batsyeba, "paduka teungku amphon nyang mulia, teungku amphon ka neumeusumpah ubak ulon deumi nan tuhan, allah teungku amphon, bahwa aneuek agam ulon nabi sulaiman teuma jeuet keuraja keugeulantoe teungku amphon. teuma jinoenyoe deungon hana neuteupeue le teungku amphon, adonia ka jeuet keuraja. jihnyan ka jipeuseumah bubiri nyang le, leumo agam dan aneuek leumo nyang teumbon-teumbon. meunan cit jihnyan ka teuma jiuundang ubak kharuri nyan aneuek-aneuek teungku amphon nyang laen dan teungku imeum abyatar meunan cit teuma deungon yoab, panglima angkatan prang teungku amphon. teuma gobnyan hana geuundang nabi sulaiman. teungku amphon nyang mulia, banmandum rakyat israel nibak saatnyoe teungoh teupreh-preh keuputusan teungku amphon keuhai soe kheueh nyang teuma jeuet keugeunantoe teungku amphon keu teu baiait sibagoe raja. meunyoee teungku amphon hana neubri keuputusan nyan, ka pasti teuma meunyoee teungku amphon ka meuninggai donya, ulon dan aneuek agam ulon jipeusaneut sibagoe tukang khianat." teungoh batsyeba mantong geupeugah haba nyan, nabi natan pih trok teuma ubak meuligoe nyan. laju raja geubri tee keuhai natan teuka keunan. batsyeba laju geuteubiet, dan nabi natan geutamong, laju geusujut dikeue teungku amphon raja. nabi natan geupeugah, "teungku amphon nyang mulia, peu kheueh teungku amphon ka neu peumaklum ubak rakyat bahwa adonia teuma jimat geunantoe teungku amphon jeuet keuraja? uroenyoe cit teuma jihnyan ka jipeuseumah bubiri nyang cukob le, leumo agam dan aneuek leumo nyang teumbon-teumbon. banmandum aneuek agam teungku amphon ka jiuundang. meunan cit deungon duma panglima angkatan prang teungku amphon, dan teungku imeum abyatar. awaknyan jinoenyoe teungoh jipeugat kharuri deungon gobnyan sira jisimeurak nyang meuhubo-hubo, 'udeb raja adonia! teuma, gobnyan hana geu undang ulon. teungku imeum zadok dan benaya meunan cit deungon nabi sulaiman hana geu undang. peu kheueh teungku amphon nyang yue gobnyan sampoe geupeubuet banmandum nyang lageenyoe, deungon hana neubri tee ubak peugawee teungku amphon nyang laen soe nyang teuma jeuet keugeunantoe teungku amphon?" raja nabi daud geupeugah, "gata jakhoi keunoe si batsyeba bubagaih jijak meuhadab ulon." deungon nyan le nabi natan geuteubiet laju dan geutamong teuma lom batsyeba jak meuhadab raja. laju geupeugah le raja ubak gobnyan, "keubiet ulon ka ltheuh lon meujanji ubak droeneueh, deumi nan tuhan, po teu allah ureueng israel, bahwa nabi sulaiman aneuek agam gata nyan teuma jeuet keugeunantoe ulon teubaiat keu raja. nah, phon saatnyoe ulon meujanji ubak gata deumi nan tuhan nyang udeb, nyang ka geupeu leupah ulon nibak banmandum mara bahya, bahwa nibak uroenyoe cit teuma ulon peutrok janji ulon ubak gata." dan geusujut kheueh batsyeba sira geupeugah, "udeb kheueh paduka raja siumu masa!" laju raja nabi

daud geuyue jakhoi zadok, natan dan benaya yue meuhadab ubak gobnyan. oh ka ltheueh awaknyan jitamong u dalam, geupeugah kheueh laju le raja ubak awaknyan, "gatajak hoi kheueh laju bubena peuwira ulon dan tajak kheueh laju deungon awaknyan ubak nabi sulaiman aneuk agam ulon nyan. tapeuek kheueh jihnyan u atueh bagal ulon keudroe, dan taba laju jihnyan ubak mata ie di gihon. di teumpatnyan eunteuk natan dan zadok haroh jibaia! laju nabi sulaiman nyan jeuet keuraja israel. oh ka ltheueh nyan gatanyoe banmandum haroh tayueb beureuguih sira gata seumurak, 'udeb raja sulaiman!' oh ka ltheuehnyan taireng kheueh jihnyan lom mangat jiwoe keunoe dan jikkaduek ubak tahta ulon, sabab jihnyan kheueh nyang ka ulon pileh jeuet keuraja keugeunantoe ulon keu jipeurintah atueh israel dan yehuda." "get, teungku amphon," geusuot le benaya, "seumoga tuhan, allah teungku amphon, geupeukong peurintah teungku amphon nyan. laage nyang kaka tuhan na sabe meusajan teungku amphon, seumoga gobnyan pih na sabe deungon nabi sulaiman. seumoga tuhan geupeujeuet peumeurintah nabi sulaiman nyan leubeh jaya lom nibak peumeurintah teungku amphon." dan zadok, natan, benaya dan pengawai pribadi raja geupeusila nabi sulaiman geuek u atueh bagal raja, laju awaknyan geuireng gobnyan ubak mata ie di gihon. oh ka ltheuehnyan zadok laju geucok teumpat minyeuk zaiton nyang ka geuba atranyan nibak khimah tuhan, laju gobnyan geubaiat nabi sulaiman deungon cara geuboh minyeuk nyan. beureuguih pih laju teuyeb dan banmandum ureueng nyang na teuka keunan laju jisumeurak, "udeb raja sulaiman!" oh ka ltheuehnyan awaknyan banmandum ji-ireng gobnyan jikkawoe sira jikuk ngon jisumeurak nyang meuhubo, meunan cit hana keutinggalan sira teuyueb suleng, sampoe tanoh nibak teumpat geugidongnyan siulah-ulah laage ka beukah kareuna rame that-that ureueng nyang jaknyan. adonia dan banmandum jame gobnyan banmantong seulesoe geupeuna khanuri, watee teudeungoe buet rame nyan. bak watee yoab geudeungoe su beureuguih, laju gobnyan geuteumanyong. "peue nyang ka teujadi di banda sampoe su nyang rioh rame dan subra lagoena?" yoab gohlohm seulesoe geupeugah haba, teuka kheueh deungon hana sangka-sangka yonatan, aneuk teungku imeum abyatar, "jak tamong," kheun adonia. "gata ureueng get, pasti nyang gata ba haba nyang get teuma." "meuah, bukan haba nyang jroh," geujawueb le yonatan. "raja daud ka geuangkat nabi sulaiman jeuet keuraja! zadok, natan, dan benaya meunan cit deungon peungawai pribadi raja ka geuyue jak ireng nabi sulaiman. awaknyan ka geupeuek nabi sulaiman u atueh bagal raja, dan zadok deungon natan ka geulantek gobnyan nibak mata ie gihon. jinoenyoe awaknyan ka jigisa u banda sira jisumeurak ngon jimeulikak deungon hibat jih, dan banmandum banda ka meugah di ureueng rame ka habeh jiteupeu dan ka ka-ak ka-ok. nyang kheueh keurame nyang gatanyoe deungoe buno. nabi sulaiman bak saat nyoe ka jeuet keuraja. meunan cit banmandum peuwira raja ka geujak geubri haba seulam ubak raja daud. awaknyan geupeugah, 'seumoga

po teu allah teungku amphon geupeujeuet nabi sulaiman nyan leubeh meusyuehu nibak teungku amphon; seumoga peumeurintah nabi sulaiman nyan leubeh jaya nibak peumeurintah teungku amphon.' oh ltheueh nyan nibak teumpat eh gobnyan, nabi daud geusujut geuseumah po teu allah, dan geumeu doa, 'teupujoe kheueh droeneueh ya tuhan, allah nyang jiseumah le umat israel. nibak uroenyoe sidroe nibak keuturonan ulon ka droeneueh angkat jeuet keuraja keugeunantoe ulon. dan droeneueh ka neupeu idhin ubak ulon udeb beujeuet ulon kalon!' " bubena jame adonia ka jeuet keuteumakot ngon yo, sampoe awaknyan banmandum jidong dan laju jikkak, maseng-maseng jicok rot jih keudroe. dan bak wateanyan cit teuma adonia teumakot that-that ubak nabi sulaiman, akhejih gobnyan laju jiplueng ubak khimah tuhan dan laju geumat ujong-ujong miseubah nyang na disinan. di ureueng laen laju jikkak britee hainyan ubak nabi sulaiman. awaknyan jipeugah bahwa adonia get that teumakot ubak nabi sulaiman, teuma gobnyan ka jikkak ubak miseubah dan jimat laju ujong-ujong miseubah nyan sira jipeugah, "ulon hana lon seuk disinoe sigohlohm nabi sulaiman geumeusumpah ubak ulon bahwa gobnyan hana geupoh mate ulon." nabi sulaiman geujawueb, "meunyoe jihnyan meupie ngon nyang jroh, jihnyan hana teuhukom bah-pih meubacut pih; teuma meunyoe jihnyan jipeubuet buet nyang jeuhet, jihnyan haroh teupoh mate." laju raja geuyue ureueng laen geuyue jakcok adonia nibak miseubah nyan. dan teuka kheueh adonia jikkak meuhadab raja, dan laju jisujut dikeue gobnyan. laju raja geupeugah, "jinoenyoe kajeuet gata jakwoe!" bak watee ajai gobnyan ka to, nabi daud laju geuhoi nabi sulaiman, aneuk agam geuh nyan, dan laju geubri peusan-peusan gobnyan nyang keuneulheueh. nabi daud geupeugah, "ka trok saat jih ulon meuninggai donya nyoe. bah kheueh gata yaken dan beurani. tapeubuet kheueh peue nyang geupeurintah le tuhan po teu allah gata. tataat kheueh ubak banmandum hukom-hukom dan peurintah-peurintah nyang na teuteleh didalam kitab nabi musa, deungon nyan teuma homantong nyang gata jak gata meuhase nibak peue mantong useuha gata. meunyoe gata taat ubak tuhan, gobnyan teuma geupeuteupat peue mantong nyang geupeujanji bahwa keuturonan ulon nyang mat peurintah atueh israel, asai awaknyan deungon sipeunoh ate dan sigeunab jiwa sabe seutia jitaat ubak peurintah tuhan. na lom saboh hai teuk! gata pasti teuingat peue nyang ka geupeubuet le yoab u atueh ulon deungon cara jipoh mate bandua droe peuwira israel, awaknyan na kheueh abner aneuk ner dan amasa aneuk yeter. ureueng nyan jipoh mate awaknyoe bak watee dame, bukan lam keuadaan prang, keu jibalah seumupoh nyan nyang ka jipeubuet lam prang. jihnyan jipoh mate ureueng nyang hana meusalah teuma jinoenyoe ulon kheueh nyang haroh tanggong banmandum buet jih nyan dan ulon kheueh nyang meudeurita. le sababnyan hai, aneuk ulon, gata haroh tacok tendakan atueh jih nyan meunurot peue nyang gata anggab jroh; ulon lakee bek gata peubiyeu jihnyan meuninggai deungon cara biasa. teuma keu aneuk agam barzilai nibak gilead bah kheueh gata tapeusanaut jihnyan seu-

cara get-get. gata haroh tajamin awaknyan tieb-tieb uroe, sabab awaknyan ka jipeubuet nyang jroh keu ulon bak watee ulon peuplueng droe nibak aduen gata, absalom. keuhai simei aneuek gera di banda bahurim didalam wilayah benyamin, na cit peusan ulon keu gata. watee ulon jak di mahanaan, simei nyan uroe jeh jikutok ulon deungon keujam that. teuma oh dudoe bak watee jihnyan teuka jijak tueng ulon nibak krueng yordan, ulon meusumpah ubak jihnyan deumi tuhan bahwa ulon hana ulon peumate jihnyan. teuma nyoe kheueh amanat lon keu gata: bek tapeubiyeu jihnyan beubaih nibak mubagoe hukuman. ulon kuteupeue bahwa gata na kheueh ureueng bijak sana; jadi, bahpi jihnyan ka tuha, ta useuha kheueh mangat jihnyan teuhukom mate." oh ka ltheueh geupeugah nyan hana treb teuma oh ltheueh nyan nabi daud pih meuninggai donya dan laju teupeukub nibak banda daud. gobnyan jeuet keuraja israel treb jih na peuet ploh thon: tujoh thon gobnyan geuduek di hebron, dan lthee ploh lthee thon di yersusalem. oh ltheueh nabi daud nyan meuninggai donya, laju geu ek nabi sulaiman jeuet keuraja keugeunantoe bak geuh nabi daud. kekuasaan nabi sulaiman sibagoe raja keubiet that-that kong. bak siuroe, adonia geujak ubak batsyeba. geutanyong kheueh le batsyeba ubak gobnyan, "peu kheueh gata saweue nyoe na meukeusut nyang keu get?" "beutoi," jaweueb adonia. laju gobnyan geutamah lom, "na sapeue-peue nyang ulon keuneuk lakee nibak mak." "peue nyan?" geutanyong le batsyeba. jaweueb le adonia, "mangat mak teupeue bahwa ulon kheueh nyang seuharoh jih jeuet keuraja; nyang ka jiharab le bansaboh nanggroe israel. teuma nyang jeuet na kheueh nyang laen; adoe ulon nyang jeuet keu raja, kareuna tuhan nyang meuheuet nyang lagee nyan. jinoenyoe na sapeue-peue nyang ulon lakee, nyang ulon lakeenyoe deungon bit-bit that ulon meuharab le poma bek neutulak." "peue nyang gata lakee nyan?" geutanyong le batsyeba ubak aneuek geuhnyan. geujaweueb le adonia, "ulon meulakee mangat poma neutem lakee ubak raja nabi sulaiman mangat gobnyan geupeu idhin ubak ulon lon meukawen deungon si abisag, aneuek dara nibak sunem nyan. ulon yaken nabi sulaiman hana geutulak peue nyang poma lakee nyan." "nyoe, get kheueh," geujaweueb le batsyeba. "ulon teuma lon jak meututo hainyan deungon raja keu gata." dan geujak kheueh laju batsyeba ubak raja keu geujak peusampoe meukeusut ate adonia nyan. raja sulaiman laju geudong dan geuseumah laju ubak teutot sira gesujut dikeue poma geuhnyan, oh ltheuehnyan geujak duek lom u ateueh tahta keurajeuen geuh. oh ltheuehnyan geuyue laju ureueng laen jijak mita kursi mangat jipeuduek disiblahi u uneuen gobnyan mangat poma geuh nyan hase geuduek disinan. oh ka ltheueh geuduek, geupeugah kheueh le batsyeba ubak nabi sulaiman aneuek droe geuh nyan, "maknyoe keuneuk meulakee nyang ubit that ubak gata. poma meuharab dak jeuet bek kheueh gata tulak peue nyang mak lakee nyoe." "peue nyang mak lakee nyan?" geutanyong le nabi sulaiman. "ulon hana teuma lon tuan tulak." geujaweueb le batsyeba, "gata peuidhin kheueh keu adonia, aduen gata nyan jimeukawen deungon abisag." "pakon jeuet

nyang nyan poma lakee ubak ulon?" geutanyong le nabi sulaiman. "nyan saban cit deungon jilakee tahta keurajeuen nyoe ubak ulon. bukon kheueh gobnyan aduen ulon? dan lom teungku imeum abyatar dan yoab geudong blaih gobnyan!" oh ka ltheueh geupeugah meunan geumeusumpah kheueh laju nabi sulaiman ubak tuhan, "bah kheueh ulon nyoe keunong kutok nibak tuhan, meunoyoe ulon hana ulon hukom mate adonia kareuna peue nyang ka geulakee nyan! tuhan ka geupeukukoh teumpat duek ulon nibak tahta ureueng syiek ulon, nabi daud. tuhan ka geupeutrok janji gobnyan dan ka teuma geubri keurajeuen nyoe keu ulon dan keuturonan ulon. ulon meusumpah deumi tuhan nyang udeb bahwa adonia teuma meuninggai nibak uroenyoe cit teuma!" dan nabi raja sulaiman laju geupeurintah ubak benaya mangat jijak poh mate adonia. oh ltheueh nyan geupeugah kheueh le raja nabi sulaiman ubak teungku imeum abyatar, "tajak kheueh laju u gampong droe gata di anatot. gata ka patot teuhukom mate, teuma nibak uroenyoe ulon hana ulon poh gata, kareuna bak watee gata mantong meusajan deungon ayah ulon nabi daud, gata meusajan tarasa pakriban peudeh deurita nyan. dan gata cit teuma nyang uroihto peujanjian tuhan." dan nabi sulaiman pi geupeucat teuma abyatar sibagoe teungku imeum. deungon peue nyang ka geupeubuet le nabi sulaiman nyan peue nyang ka geupeugah le tuhan di silo keuhai keuturonan teungku imeum eli ka jeuet keunyataan. yoab geudeungoe keuhai peue nyang ka teujadi nyan. sampoe gobnyan ka jeuet keuteumakot sabab gobnyan geudong blaih adonia. teuma, yoh masa dilee gobnyan hana geudong blaih absalom. dan gobnyan laju geuplueng ubak khimah tuhan oh trok keunan laju geumat ujong-ujong miseubah. haba nyoe laju teupeusampoe ubak raja nabi sulaiman. dan nabi sulaiman laju geuyue benaya mangat jijak poh mate yoab. benaya jijak laju ubak khimah tuhan dan jipeugah ubak yoab, "raja geuyue gata tateubiet di sinan!" "han kutem," geupeugah le yoab, "ulon keuneuk meuninggai disinoe." benaya laju jigisa dan jipeugah laju meunyan ubak raja nabi sulaiman. ban geudeungoe lagee nyan laju raja geupeugah, "tajak kheueh dan tapeubuet kheueh peue nyang ka jipeugah nyan. tapoh mate laju jihnyan dan oh ltheueh nyan takubu laju u dalam jrat, mangat ulon dan banmandum keuturonan ureueng syiek ulon hana meutanggong jaweueb le keuhai jipoh mate nyang jipeubuet le yoab ateueh ureueng-ureueng nyang hana meusalih. tuhan teuma geuhukom gobnyan sabab le jipoh ureueng sampoe mate nyang hana geuteupeue mubacut pi le ureueng syiek ulon. abner peuwira israel, dan amasa peuwira yehuda, ban dua droe ureueng nyan hana meusalih. awaknyan leubeh get nibak yoab nyan keudroe, teuma le yoab ka jipoh mate awaknyan. hukom sabab dua droe peuwira nyang mate na kheueh tanggong jaweueb yoab dan keuturonan gobnyan keu siumu masa. teuma banmandum keuturonan bak ulon nyang jeuet keuraja, sabe geubri beureukat le tuhan - awaknyan meuntong." dan jijak kheueh laju benaya ubak khimah tuhan oh ban trok keunan laju jipoh mate yoab disinan. dan yoab nyang ka jeuet keu manyet nyan

geukubu laju di rumoh gobnyan di luwa banda. oh lheureh nyan le raja nabi sulaiman laju geu baiat benaya jeuet keu panglima prang keugeunantoe yoab, dan zadok geu baiat jeuet keu teungku imeum keugeunantoe abyatar. oh ka lheureh nyan raja nabi sulaiman laju geuhoi simei dan geupeugah ubak gobnyan, "tajak peugit kheueh laju rumoh keu droe gata di yerusalem nyoe. tatinggai kheueh di rumoh nyan dan bek gata teubiet nibak lam banda. meunyo gata tajeuet teubiet dan gata jeumeurang aneuk krueng kidron, gata haroh teupoh mate; dan gata keudroe kheueh nyang haroh ta-tanggong buet nyang salah nyan." get, deulat teungku amphon, jaweub simei. "ulon kuturot peue nyang teungku amphon peurintah." dan tinggai kheueh simei di yerusalem. oh ka lheureh na lhee thon jiteuka kheueh hai nyang lagee nyoe bagoe: na dua droe namiet simei jiplueng u gat, ubak raja akhis bin maakha. watee ubak simei teujak peusampoe keuhai nyan, gobnyan laju jipasang peulana ateuh keuluede dan laju jijak ubak raja akhis di gat dan oh trok keunan laju jimita namiet jihnyan. disinan laju meuteume awaknyan dan jipeuwoe laju awaknyan ban dua. bak watee nabi sulaiman geuteupeue peue nyang ka jipeubuet le simei nyan, gobnyan geuyue hoi laju simei mangat jijak meuhadab dan geupeugah, "ulon ka ulon peujeuet gata tameujanji deumi tuhan bahwa gata hana tat-inggai yerusalem. dan meunan cit di ulon ka lheureh ulon peu ingat ubak gata meunyo gata tateubiet nibak yerusalem, gata haroh mate. le sababnyan, gata ka tameujanji dan tatem taat ubak janji nyang ka ulon peurintah nyan, bukon? teuma jinoenyo pakon gata iengkeue janji gata nyan dan gata langgeh peurintah ulon? gata tateupeue that-that banmandum buet gata nyang jeuhet ateuh ayah ulon. le sababnyan tuhan geuhukom gata. teuma ulon teubri beureukat dan keurajeuen ureueng syiek ulon teuma geupeukhong sampoe siumu masa." oh ka lheureh geupeugah nyang lagee nyan, raja laju geubri peurintah ubak benaya dan jijak kheueh laju benaya jijak poh mate simei. jinoenyo nabi sulaiman ka geumat kuasa peunoh didalam keurajeuen gobnyan. raja nabi sulaiman geupeujeuet nanggroe meuse sibagoe rakan gobnyan deungan geumeukawen ngon sidroe putroe raja nanggroe meuse. putroe nyan geuba le raja nabi sulaiman u banda nabi daud keu tinggai disinan sampoe meuligoe raja dan baet tuhan meunan cit kuta-kuta nyang na bansilingka yerusalem seulesoe teupeudong lom teuma. sabab baet tuhan gohlm teupeudong bak watee nyan, rakyat mantong jipeuseumah keureubeuen nibak meubagoe teumpat. nabi sulaiman geugaseh tuhan dan geuseutot peutunyok-peutunyok nibak ayah geuh, teuma gobnyan mantong gesie dan geupeuseumah beulatang nibak meubagoe teumpat. teumpat iebadat nyang paleng meusyuehu na di gibeon. nabi sulaiman kayem that geupeuseumah keureubeuen nibak teumpat nyan. nibak siuroe, lagee nyang ka-ka, gobnyan geujak lom keudeh. malam nyan tuhan geupeuleumah droe ubak gobnyan lam lumpo dan geupeugah, "nabi sulaiman, lakee kheueh peue nyang gata lakee, nyang gata lakee nyan ulon jok keu gata!" nabi sulaiman geujaweub, "tuhan, droeneueh ka neutunyok bahwa droeneueh biet-

biet neugaseh that keu ayah lon nabi daud, hamba droeneueh nyan. gobnyan get, juoe lom seutia ubak droeneueh. dan sibagoe jaminan bahwa keusilanjat jih droeneueh teutab neugaseh gobnyan, droeneueh neujok ubak gobnyan sidroe aneuek agam nyang jinoenyo geumat keurajeuen geunantoe gobnyan. ya tuhan, po teu allah ulon, droeneueh ka neuangkat ulon jeuet keu raja keugeunantoe ureueng syiek ulon, bahpi ulon nyoe mantong that muda gohlm lon teupeue pakriban cara lon peubuet peurintah. ulon na lamkawan bansa nyang ka tuhan pileh jeuet keu umat droeneueh keudroe. awaknyan na kheueh saboh bansa nyang rayeuk nyang hana teukira le jih. sabab nyan, ya tuhan, neubri kheueh kira jih keu ulon keubijaksanaan nyang ulon peureulee mangat jeuet ulon peurintah umat droeneueh nyoe deungan ade dan mangat jeuet teupeubeda toh nyang jroh dan toh nyang jeuhet. meunyo hana lageenyan, panana mungken ulon hase lon peurintah umat droeneueh nyang raya nyoe?" tuhan galak deungan peue nyang ka geulakee le nabi sulaiman nyan, dan geupeugah ubak geuhnyan, "sabab gata talakee keubijaksanaan mangat tamat peurintah deungan ade, dan bukon umu nyang panyang dan keukayaan keu droe gata keudroe atawa keuhai mate ateuh musoh-musoh gata, maka peue nyang ka gata lakee nyan teuma ulon peupeunoh. ulon teuma ulon peujeuet gata leubeh bijaksana dan leubeh meuleume peungeutahuan nibak soe mantong, bahpi nyan yoh watee ilee meunan cit nibak masa nyang teuma teuka. dan meunan cit peue nyang hana gata lakee nyan teuma ulon bri cit keu gata: siumu udeb gata kaya dan jihoreumat leubeh nibak raja nyang laen dipat mantong di ateuh bumoenyo. dan meunyo gata, lagee bapak gata nabi daud, gata taat ubak ulon dan taseutot banmandum hukom-hukom ulon, ulon teuma ulon bri keu gata umu nyang panyang." oh ka jaga nibak teungent nyan, nabi sulaiman laju geuteupeue bahwa tuhan allah ka geupeugah haba ubak gobnyan didalam lumpo. dan geugisa kheueh laju gobnyan u yerusalem dan geudong laju dikeue peuto peujanjian tuhan dan disinan laju geupeuseumah keureubeuen nyang teutot dan keureubeuen peudame. oh lheurehnyan laju geupeuna khanuri keu peugawee gobnyan. bak siuroe, na dua droe ureueng inong jeuhet jijak meuhadab ubak nabi sulaiman. sidroe lamkawan ureueng inong nyan jipeugah, "amphon teungku po nyang mulia, ulon deungan ureueng inong nyoe tinggai saboh rumoh. hana ureueng laen nyang na tinggai meusajan kameo. na meupadub watee nyang ka u likot, ulon na lon peulahe sidroe aneuek agam. dua uroe teuma oh lheureh nyan ureueng inong nyoe pih jipeulahe teuma sidroe aneuek agam. bak salam teungoh kameo mangat that teungent, di ureueng inong nyoe hana jisaja teuginton aneuek jih nyan sampoe mate. teungoh malam di ulon pi teungoh mangat that teungent, ureueng inong nyan jibeudong laju jicok aneuek ulon nyang teungoh jiteungeuet nibak bineh geunireng ulon. dan aneuek ulon nyan laju jipeu-eh nibak teumpat eh jih, dan aneuek jih nyang ka mate nyan laju teuma jikeubah nibak geunireng ulon. oh singoh beungoh, bak watee ulon beudoh dan lon keuneuk suleueng mom keu aneuek ulon nyan, ulon ngieng

aneuk ulon nyan ka mate. oh ka ltheueh ulon peurati ngon lon seulidek, deuh ktheueh bahwa aneuek nyang ka mate nyan bukan aneuek ulon." "sulet!" jipeugah le ureueng inong nyang laen nyan. "nyang udeb-nyoe aneuek agam ulon seudangkan nyang mate nyan na ktheueh aneuek agam gata!" "han kutem!" jipeugah le ureueng inong nyang phon nyan. "nyang ka mate nyoe na ktheueh aneuek agam gata, dan nyang udeb nyan na ktheueh aneuek agam ulon!" meunan ktheueh awaknyan jimeudakwa dikeue raja nabi sulaiman nyan. laju geupeugah le raja nabi sulaiman, "gata nyoe bandua ta-eh maseng-maseng tameung-gaku bahwa aneuek agam nyang mantong udebnyoe na ktheueh aneuek gata dan bukan nyang ka mate nyan." oh ltheueh geupeugah lageenyan nabi sulaiman laju geuyue ureueng laen jijkacok peudeueng. oh ltheueh nyan nabi sulaiman laju geupeurintah, "gata koihi laju jeuet dua khan aneuek manyak nyan, oh ltheueh nyan gata bagi laju keu awaknyan maseng-maseng sikanh sapo." ban jideungoe peurintah nyan di poma nyang sibeuna jih nibak aneuek agam nyan laju geupeugah, "amphon, deulat teungku po, bek nepoh mate aneuek manyak nyan. neujok ktheueh mantong keu inong nyan." ureueng inong nyan jipeugah lagee nyan sabab jihnyan lumpah jigaseh keu aneuek jih nyan. teuma di ureueng inong nyang sidroe teuk nyan jipeugah, "nyoe, neukoihi mantong, bah ktheueh meusidroe hana meuteume nibak kamoel!" dan geupeugah ktheueh le nabi sulaiman, "bek tapoh aneuek manyak nyan! tajok laju ubak ureueng inong nyang phon nyan – jihnyan ktheueh mak nibak aneuek manyak nyan." bak watee bansa israel jideungoe keuhai keuputusan nabi sulaiman dalam peukara nyan, awaknyan meurasa that-that kagum ubak nabi sulaiman nyan. sabab nyata ktheueh teuma, bahwa po teu allah ka geubri keu gobnyan hikeumat mangat geupeubuet ade. nabi sulaiman ka jeuet keuraja atueh banmandum nang-groe israel. nyoe ktheueh peujabat-peujabat manyang nyang geuangkat le nabi sulaiman: teungku-teungku imeum: zadok, azarya aneuek zadok, abyatar keu seukeutareh nang-groe: elihoref dan ahia, awaknyan na ktheueh aneuek-aneuek sisia beundahara nang-groe: yosafat aneuek ahilud panglima prang: be-naya, aneuek yoyada kepeungawas dumna bupati: azarya, aneuek natan keupeunaseuhat raja: teungku imeum zabud, aneuek natan nyang jeuet keu ulee rumoh tangga meuligoe: ahisar nyang jeuet keu ulee keureuja rodi: adoniram, aneuek abda meunan cit di nabi sulaiman nyang geu angkat teuma dua blaih droe bupati nyang geupeutugaih bansaboh nang-groe israel. tugaih awaknyan na ktheueh geupeusapat dalam wilayah gobnyan dumna bahan peunajoh keu peunajoh raja dan banmandum asoe meuligoe. tieb-tieb bupati seucara meugantoe-gantoe meutanggong jawueh atueh hainyan nyang treb jih sibuleuen tieb-tieb thon. ban dua blaih droe bupati nyan jip-impén teuma le sidroe gubunur. nyoe ktheueh nan-nan bupati dalam wilayah keukuasaan awaknyan: ben-hur: di daerah gunung-gunong efraim ben-deker: banda makas, saalbim, bet-semes, elon, bet-hanan ben-hesed: banda arubot, sokho, dan banmandum daerah hefer ben-abinadab, lakoe si tafat aneuek in-

ong nabi sulaiman: ban siluroih daerah dor baana aneuek ahilud: banda taanakh, megido, dan banmandum daerah nyang to ngon bet-sean, to ngon banda sartan disiblahi u seulatan banda yizreel sampoe trok u banda abel-mehola dan banda yokmeam. ben-geber: banda ramot di gilead, gampong-gampong nyang na di gilead na ktheueh atra kawom yair keutur-onan manasye, daerah argob di basan; banmandum nyan na 60 boh banda nyang raya nyang teupeukong deungon kuta dan palang-palang peurunggu nibak tieb-tieb pintoe geureubang jih nyan ahinadab aneuek si ido: daerah mahanaim, ahimaas, lakoe basmat aneuek inong nabi sulaiman: daerah naftali baana aneuek husai: daerah asyer, banda alot yosafat aneuek paruah: daerah isakhar simei aneuek ela: daerah benyamin geber aneuek uri: daerah gilead, nyang yoh masa ilee jikuasa le sihon raja amori, dan og raja basan. ureueng yehuda dan ureueng israel le jih na lagee anou dibineh pasi. bak awaknyan na peunajoh nyang seb dan ie jieb nyang meulimpah keu teupeuguna dan udeb awaknyan pih keubiet that makmu. tieb-tieb keuluwarga na lampoh anggo ngon lampoh bak ara. siumu udeb nabi sulaiman rakyat bansaboh yehuda dan israel phon di dan trok u bersyeba udeb awaknyan keubiet that aman dan te-untram. sabab banmandum raja nyang na tinggai disiblahi u barat efrat jitakllok ubak gobnyan, dan banmandum bansa nyang na bansikeulileng keurajeuen gobnyan jimeusabat deungon gobnyan. tanoh nyang na disiblahi u barat krueng efrat phon di tifsah nibak bineh krueng efrat sampoe laju u barat nibak banda gaza di filistin sampoe trok ubak bataih nang-groe meuse, bansaboh nyan na ktheueh ka geukuasa le nabi sulaiman. bansa-bansa nyang na disinan ka jitakllok ubak gobnyan sira jibayue upeti. bahan peunajoh nyang geupeureulee le nabi sulaiman tieb-tieb uroe na ktheueh 5.000 aree teupung haloh, 10.000 aree teupung gasa, 10 boh leumo lam weue, 20 boh leumo di blang, dan 100 boh bubiri. seulaen nibaknyan na lom rusa, kijang, menjangan dan cicem. nabi sulaiman nyan na teuma 12.000 droe tantra meuguda dan 40.000 boh weue keu guda-guda nyang jitarek geuritan-geuritan gobnyan. seucara meugantoe-gantoe, nyang treb jih sibuleuen, tieb-tieb bupati geuseurah bahan peunajoh keu raja nabi sulaiman dan keu mandum ureueng nyang na meuteume peunajoh di meuligoe, sampoe awaknyan hana kureueng, meusapeue pih. meunan cit tieb-tieb bupati nyan geubri cit teuma gandom dan jeurami keu banmandum guda nabi sulaiman, bah ktheueh nyan guda geuniduek meunan cit deungon guda geuritan. peunajoh beulatang nyan geuba ubak tieb-tieb weue guda seuduble nyang teupeureulee. po teu allah geubri ubak nabi sulaiman hikeumat, dan peungeutuhan nyang luwa biasa, dan peungeurtian nyang cukob lhok. di nang-groe-nang-groe timu dan di nang-groe meuse hana ureueng nyang leubeh carong seulaen gobnyan. gobnyan bit-bit ureueng nyang paleng carong nibak banmandum ureueng. gobnyan leubeh nibak etan ureueng ezrahi, heman, kalkol dan darda aneuek-aneuek mahol. nan nabi sulaiman kameusyehu dipat mantong di nang-groe-nang-groe bansikeulileng nang-groe gobnyan. na 3.000 boh pe-

upatah dan leubeh nibak siribee boh lagu nyanyoe nyang ka geukarang. gobnyan hase geupeugah haba deungon bubena bak kayee dan teunaman nyang laen – nibak bak ceumara libanon sampoe ubak naleueng hisop nyang na jitimoh nibak beuton-beuton batee. meunan cit gobnyan hase geupeugah haba deungon dumna beulatang, lagee ngon miseu jih cicem, beulatang nyang jijak ngon pruet meunan cit deungon uengkot. dumna raja bansigom donya ka geudeungoe keuhai keubijaksanaan dan keuhebatan nabi sulaiman nyan sampoe ureueng laen jikirem waki jih keu jijak deungoe gobnyan peugah haba. hiram, raja di nanggroe tirus, sabena geumeusahabat deungon raja nabi daud. bak watee hiram geudeungoe bahwa nabi sulaiman ka jeuet keu raja keugeunantoe nabi daud, bapak gobnyan, hiram nyan laju geu toih ureueng droe geuh mangat jijak meurumpok deungon nabi sulaiman. meunan cit di nabi sulaiman pi laju geukirem peusan ubak hiram, "raja hiram nyang mulia! teuntée teungku neuteupeue bahwa ureueng syiek ulon nabi daud sabe geumuprang kareuna jiseurang le musoh di nanggroe-nanggroe nyang na di silangka kamoe. dan sabab tuhan gohlom geubri meunang ateuheh banmandum musoh gobnyan, gobnyan gohlom na watee geupeudong geudong teupmat iebadat ubak tuhan allah gobnyan. teuma jinoenyoe tuhan po teu allah ulon ka geubri keuteuntramam ateuheh banmandum daerah keukuasaan ulon. ulon ka hanale musoh, dan meunan cit hana teuma le musibah nyang keunong u ateuheh nanggroe ulon. tuhan ka geumeujanji nyang lageenyoe ubak ureueng syiek ulon nabi daud, 'aneuek agam gata nyang teuma ulon angkat jeuet keuraja keugeunantoe gata teuma ji peugot geudong teupmat ji iebadat ubak ulon.' kareuna nyan, teungku hiram nyang mulia, ulon nabi sulaiman, ka ulon cok keuputosan keuneuk lon peugot geudong nyan. tuhan ka geumaklum bahwa lamkawan rakyat ulon hana nyang carong jiteubang bak kayee lagee rakyat teungku. sababnyan, ulon meuharab beuneutem kheueh teungku neuyue ureueng-ureueng teungku mangat jijak koih bubena bak ceumara libanon keu ulon. rakyat ulon teuma ulon yue jak tulong awaknyan, dan padub mantong upah nyang teungku lakee keu ureueng-ureueng teungku nyan, nyan teuma ulon bayeue." hiram galak geuh that-that bak watee geuteurimong haba nyan. gobnyan geupeugah, "pujoe kheueh tuhan nibak uroenyoe, kareuna gobnyan geubri keu nabi daud sidroe aneuek agam nyang lumpah bijaksana keu jeuet keu raja ateuheh bansa nyang raya nyan." dan hiram pih geukirem laju jeunaweueh nyan ubak nabi sulaiman, "ulon ka ulon teurimong haba peue nyang teungku lakee nyan, dan ulon ka siab ulon peupeunoh peue nyang teungku lakee. ulon teuma lon keubah kayee ceumara libanon dan kayee ceumara biasa nyang sisuai deungon teungku lakee nyan. ureueng-ureueng ulon teuma jiba kayee nyan jipeutreu n nibak gunong libanon u dalam laot. disinan kayee nyan awaknyan ikat jeuet keu raket dan teuma jipeu hanyot le awaknyan seutot rot bineh pante pait deungon peue nyang teungku lakee. disinan raket-raket nyan laju ji reuloih oh lheurehnyan laju jijok ubak ureueng teungku mangat jiudeuha teuma

oh dudo. nibak pihak teungku amphon, ulon lakee mangat teungku amphon neukeubah peunajoh keu ureueng-ureueng nyang na didalam meuligoe ulon." teuma hiram laju jibri ubak nabi sulaiman banmandum kayee libanon dan kayee ceumara biasa nyang ka jipeureulee nyan. dan keu geubri makheun dumna asoe meuligoe hiram nyan, tieb-tieb thon nabi sulaiman geuseurah ubak hiram 322.500 kilogram gandum dan 4.400 aree minyeuk zaiton nyang aseuli. tuhan geupeutrok janji gobnyan dan geubri hikeumat ubak nabi sulaiman. hiram ngon nabi sulaiman na hubungan nyang paleng get, dan awaknyan ban dua ka geupeugot saboh ikatan janji. raja nabi sulaiman laju geukrah 30.000 droe ureueng agam nibak bansigom nanggroe israel mangat jijakkeureuja buet rodi, dan geu angkat adoniram jeuet keu peungawas awaknyan. nabi sulaiman geubagi awaknyan jeuet dalam lhee boh kawan, maseng-maseng kawan nyan na siploh ribee droe. ban lhee boh kawan seucara meugantoe-gantoe tinggai sibuleuen di libanon dan dua buleuen di rumah. dan nabi sulaiman geukrah teuma 80.000 droe mangat jijak peut batee di ateuheh gunung dan 70.000 droe nyang angkat batee-batee nyang ka lheureh teu peut nyan. gobnyan geu angkat teuma 3.300 droe mando keu jijaga buet-buet nyan. ateuheh peurintah gobnyan cit teuma awaknyan ji culek ngon jipeut batee raya dan nyang get-get keu keunaleueng baet tuhan. meunan kheueh cara jih ureueng keureuja nabi sulaiman dan ureueng keureuja raja hiram meunan cit deungon ureueng-ureueng nibak banda gebal jipeusiab batee dan kayee mangat teupeugot baet tuhan nyan. nabi sulaiman geupeuphon peugot baet tuhan nibak buleuen ziw, na kheueh buleuen nyang keudua, bak thon nyang keu peuet keurajeuen gobnyan, 480 thon oh ka lheureh bansa israel jitinggai nanggroe meuse. ukoran baet tuhan di bagian dalam jih na kheueh lageenyoe: panyang 27 metee, luwah 9 metee, dan manyang 13,5 metee. di bagian keue baet tuhan nyan na kheueh balee nyang panyang jih 4,5 metee dan luwah jih 9 metee, saban deungon luwah baet nyan. nibak binteh beuton baet nyan na meuteume ruhueng-ruhueng peuradeuen nyang luwah u dalam. ban sikeulileng bagian likot baet nyan, nibak binteh beuton bagian luwa jih teupeugot teuma deungon bilek-bilek nyang meutingkat. na lhee boh tingkat, nyang maseng-maseng manyang jih na 2,2 metee. bak tingkat nyang phon, luwah tieb-tieb kama jih 2,2 metee, bak tingkat nyang keu dua 2,7 metee dan nibak tingkat nyang keu lhee 3,1 metee. beuton tingkat si umiueb leubeh teubai nibak beuton nyang tingkat di ateuheh, sampoe balok-balok bilek nyang teutamah nyan hase teuhubong deungon beuton baet tuhan deungon hana teupeurueng binteh beuton nyan. keu balok-balok nyan teuboh kayee ceumara libanon. pin-toe kama-kama nyang teutamah di tingkat miyueb teuduek lhee jih blaih u seulitan, dan keu tingkat dua ngon tingkat lhee na teuma reunyeyen pilin. oh ka lheureh nyan nabi sulaiman laju geupasang langet-langet nibak baet nyan. keunyan teuma gobnyan geupeuguna lom keu gaseue-gaseue dan papeuen jih nibak kayee ceumara libanon. seumantong baet tuhan nyan teungoh geu peugot, mubacut pih hana teudeungoe

su palee nyang teuseukok keutak keutuk, meunan cit deungon su pato atawa peukakaih beuso nyang laen, sabab batee nyang teupeguna keu teupegut baet nyan ka teukeubah leubeh ilee bak watee mantong nibak tambang-tambang jih. meunan kheueh nabi sulaiman geupeugot baet tuhan nyan sampoe seuleusoe. dan feureuman tuhan ubak nabi sulaiman, "meunyo gata ta-taet banmandum hukum dan peurintah ulon, ulon teuma ulon peubuet keugata peue nyang ka ulon peujanji nibak ureueng syiek gata nabi daud. ulon teuma tinggai didalam baet nyang gata pegut nyoe di teungoh-teungoh umat ulon bansa israel. ulon hana teuma lon tinggai awaknyan." meunoe cara jih nabi sulaiman geupeuseuleusoe baet tuhan nyan: banmandum binte beuton dibagian dalam geulapek deungon kayee cemara libanon, phon nibak aleue sampoe ubak langet-langet. aleue jih teupegut nibak kayee cemara biasa. didalam baet nyan, bagian u likot geupeugot cit kama deungon binte peumisah jih nibak kayee cemara cit, phon nibak aleue sampoe ubak langet-langet. kama nyan geuboh nan ruweueng maha suci; panyang ruweueng nyan na sikureueng metee. ruweueng nyang na dikeue ruweueng maha suci nyan geupeunan teuma deungon ruweueng raya, dan panyang jih na 18 metee. binte beuton dibagian dalam bansaboh rumah nyan geulapek teuma deungon kayee cemara libanon, sampoe batee-batee nyang na nibak binte beuton nyan meubacut pih hana leumah le. lapan nyan geuhias teuma deungon piasan nyang teu uke nibak boh labu dan gamba bungong-bungong nyang teungoh keumang. ruweueng maha suci nyang geupeugot didalam baet tuhan nyan geupeukhusus keu tempat peuto peujanjian tuhan. ruweueng nyan panyang jih, luwah dan manyang jih santeuet, sikureueng metee. miseubah dikeue ruweueng maha suci nyan geupeugot nibak bahan kayee cemara libanon. nibak babah pintoe rot teutamong u dalam ruweueng nyan geubinteung teuma deungon rante meuh. banmandum bagian dalam baet tuhan nyan meunan cit deungon ruweueng maha suci dan miseubah jih geuseupoh teuma deungon meuh aseuli. didalam ruweueng maha suci nyan geukeubah teuma dua boh patong kerub nyang teupegut nibak kayee zaiton, ban dua boh patong nyan manyang jih maseng-maseng na 4,4 metee; ukoran dan bentuk jih saban. maseng-maseng na dua boh sayeueb, tieb-tieb sayeueb nyang na 2,2 metee teuma panyang jih. jioh lamkawan dua ujung sayeueb maseng-maseng patong na 4,4 metee. ban dua boh patong nyan geukeubah meujandreg didalam ruweueng maha suci sampoe siblah sayeueb nibak tieb-tieb patong nyan meureuntang tupeh ubak binte, dan sayeueb nyang laen sabesabe tupeh diteungoh-teungoh ruweueng nyan. ban dua boh patong kerub nyan geuseupoh cit deungon meuh. banmandum binte nyang na dibagian dalam baet tuhan geuhias deungon ukeran kerub-kerub, bak palem nyang teulukeh, dan bungong-bungong nyang teungoh keumang. aleue didalam ruweueng baet tuhan nyan banmandum geuseupoh deungon meuh. bak pintoe tamong u dalam ruweueng maha suci geupasang teuma dua boh on pintoe nyang teupegut nibak kayee zaiton. nibak ambang pintoe

di bagian atueh meubantuek lingkong nyang tam diteungoh-teungoh. ban dua boh on pintoenyang teuhiah teuma deungon ukeran kerub, bak palem dan bungong-bungong nyang teungoh keumang. on pintoe, patong kerub dan ukeran bak-bak kayee palem, banmandum nyan geuhias deungon meuh. bak pintoe tamong u dalam ruweueng keue, na kheueh ruweueng raya, teupasang bingkee pintoe nyang teupegut nibak kayee zaiton, hijih peuet sagoe panyang. meunan cit geupeugot dua boh on pintoe nibak kayee ceumara biasa, nyang maseng-maseng jeuet teulipat. nibak on-on pintoe nyang teuhias teuma deungon ukeran kerub, bak palem dan bungong keumang. banmandum nyang teu uke nyan teuseupoh deungon meuh. dikeue baet tuhan geupeugot teuma peulataran dalam. peulataran nyan jikeulileng teuma le binte beuton nyang meulapeh-lapeh: di atueh tieb-tieb lhee lapeh batee, na saboh lapeh kayee ceumara libanon. keunaleueng baet tuhan nyan geupasang nibak buleuen ziw, na kheueh buleuen nyang keudua, bak thon nyang keu peuet dalam peumeurintahan nabi sulaiman. dan bak buleuen bul, na kheueh buleuen nyang keu lapan, bak thon nyang keu siblah dalam peumeurintahan gobnyan, baro kheueh seuleusoe baet tuhan nyan geupeugot le nabi sulaiman, paih lagee nyang ka geureuncana. treb jih teupegot baet tuhan jipajoh watee na tujuh thon. nabi sulaiman geupeugot cit meuligoe keu tempat gobnyan. meuligoe nyang teupegot nyan jipajoh watee na lhee blaih thon. nibak meuligoe nyan nabi sulaiman geupeugot ruweueng nyang geuboh nan "balee uteuen libanon". ukoran jih: panyang 44 metee, luwah 22 metee, dan manyang 13,5 metee. balee nyan na teuma lhee boh bareh tameh nyang teupegot nibak kayee cemara libanon; tieb saboh bareh na limong blaih boh tameh dan di atueh jih geupasang gaseue-gaseue nibak kayee cemara libanon. seudangkan langet-langet jih meunan cit teupegot nibak kayee nyang saban dan sampoe teutob banmandum gaseue-gaseue nyan. bak binte wie dan uneuen balee nyan na teuma peuradeuen-peuradeuen: lhee boh bareh nibak binte nyang phon meuhadab keu deungon lhee boh bareh nibak binte nyang laen. bingkee-bingkee pintoe dan peuradeuen jihnyan hijih peuet sagoe panyang. meunan cit nabi sulaiman geupeugot "balee pilar". panyang balee nyan na 22 metee dan luwah jih 13,5 metee. dikeue balee nyan na seuramoe nyang meupilar dan meureunyeuen. balee nyang laen na kheueh "balee tahta" nyang geupeunan cit deungon balee peungadelan. baleenyoe phon nibak aleue sampoe gaseue-gaseue jih teupegot nibak kayee cemara libanon. nibak balee nyoe kheueh nabi sulaiman geupeuputoh dumna peukara nyang jitamong ubak kanto peungadelan. tempat tinggai nabi sulaiman geupeugot lagee geudong-geudong nyang laen dan meuteume di peulataran nyang laen dilikot balee peungadelan. keu peurumoh gobnyan, na kheueh putroe raja nibak nanggroe meuse, le nabi sulaiman geupeugot cit geudong nyang saban. banmandum bangunan nyan, jitamong cit peulataran nyang raya nyan, phon nibak sandi sampoe ubak bubong jih, geupeugot nibak bandi nyang lagak-lagak. batee-bateenyan geupeusiab nibak tambang-

tambang batee, dan geukoih meunurot ukoran jih; bagian dalam dan bagian luwa jih geupeurata deungon gogajo. sandi nibak geudung nyan geupeugot nibak batee nyang rayeuk nyang meuhai yuem jih. batee-batee nyan na nyang 3,5 metee panyang jih, dan na teuma nyang peuet metee. di ateuh jih nyan geupasang teuma batee-batee nyang laen meuhai yuem dan geukoih meunurot ukoran, laju geutob deungon kayee cemara libanon. binteh beuton peulataran meuligoe dan binteh beuton peulataran baet tuhan dan meunan cit deungon beuton balee nyang na dibagian keue baet tuhan, maseng-maseng atranyan teupeut nibak silapeh kayee cemara libanon di ateuh tieb-tieb lhee lapeh batee. di banda tirus na sidroe ureueng agam nyang nan jih haram. ureueng nyan bit-bit that ahli dan meupeungalaman that lam hai jipeugot mubagoe macam barang peurunggu. poe teumeureuhom ureueng syiek gobnyan na kheueh ureueng tirus dan meunan cit keubit that carong lam hai jipeugot peue mantong nibak barang-barang peurunggu. ma gobnyan nibak sukee naftali. raja nabi sulaiman ka geuyuejak ureueng laen jikkatueng huram mangat jitem teuka dan jeuet keu ulee banmandum buet-buet bak seumeugot barang peurunggu nyan. dan teuka kheueh haram dan jipeubuet laju peue nyang ka geupeusan le nabi sulaiman nyan. huram laju geupeugot dua boh tameh peurunggu nyang maseng-maseng manyang jih na 8 metee, keulileng jih na 5,3 metee, dan teubai peurunggu nyan na 7,4 senti metee. tameh-tameh nyan soh didalam jih. keu tameh-tameh nyan le gobnyan laju geupeugot dua boh ulee tameh nibak peurunggu, maseng-maseng manyang jih na 2,2 metee hijih meubungong bakong dan manyang jih 1,8 metee. tieb-tieb ulee tameh nyang geu hias teuma deungon dua boh bareh boh geulima nyang teupeuget nibak peurunggu. banmandum nyan na dua reutoih boh geulima nibak tieb-tieb ulee tameh. oh ltheuehnyan huram geupeugot teuma meunanyuem rante nibak peurunggu dan laju geupeudeuk atranyan di ateuh tameh-tameh nyan. na tujuh boh meunanyuem rante di ateuh tieb-tieb tameh, dan di ateuh meunanyuem rante nyan na teuma saboh alas bulat bunda. di ateuh alas bunda nyoe kheueh ulee tieb-tieb tameh nyang meubantuek lagee bungong bakong nyan geupasang nibak tameh-tameh nyan. tameh-tameh nyan geukeubah dikeue pintoe tamong u baet tuhan – saboh di siblahi u seulan, dan nyang laen nyan di siblahi utara. nyang di siblahi u seulan geuboh nan yakin, dan nyang disiblahi utara geuboh nan boas. meunan kheueh cara jih haram geupeuseuleusoe peugot tameh-tameh nyan. oh ka ltheueh nyan huram geupeugot lom saboh beujana peurunggu nyang bulat bunda, deungon ukoran jih na kheueh lageenyoe: lhok jih 2,2 metee, gareh teungoh jih 4,4 metee dan silangka jih 13,2 metee. ban sikeulileng bineh luwa jih geuhias deungon dua bareh boh labu, nyang geucor meusigoe-sigoe deungon beujana nyan. beujana nyan geukeubah di ateuh rhueng dua blaih boh leumo peurunggu – lhee boh meuhadab utara, lhee boh u seulan, lhee boh ubarat dan lhee teuk u timu. teubai bejana nyan na 75 milimetee. bineh jih lagee bineh cangkie nyang meulingkong uluwa nyang mireb lagee bun-

gong bakong nyang teungoh keumang. beujana nyan hase jiteuen aso jih kira-kira 400.000 aree. meunan cit huram geupeugot teuma siploh boh geuritan peurunggu, maseng-maseng panyang jih 1,8 metee, luwah jih 1,8 metee cit, dan manyang jih 1,3 metee. geuritan nyan teupeugot nibak papeuen-papeuen peuet sagoe nyang teupasang didalam bingkee. papeuen-papeuen nyan teuhias teuma deungon ukeran singa, leumo dan kerub. nibak bingkee-bingkee jih – di ateuh dan dimiyueb gamba-gamba singa dan leumo nyan – teugantung teuma kayee meu uke bungong meukarang. tieb-tieb geuritan nyan na teuma peuet boh ruda peurunggu deungon poros ruda jih nibak peurunggu cit. nibak ban peuet boh sagoe geuritan nyan na teuma tameh ngon peuteun baskom nyang teupeuget nibak peurunggu deungon hiasan keunarang bungong disiblahi u luwa jih. dibagian ateuh ban peuet boh tameh sinumpang nyan teuhubong teuma le saboh bingkee bulat keu ngon tumpang baskom jih. tameh-tameh ngon peuteun nyan meucula u ateuh nyang manyang jih na 44 seuntimetee di ateuh papeuen peuet sagoe nyan, dan seuntimetee dimiyueb jih. bak awai phon bingkee nyan na meu uke. manyang ruda-ruda jih na 66 seuntimetee; teuduek jih dimiyueb papeuen-papeuen poros ruda jih deungon geuritan jih na kheueh saboh bagian. ruda-ruda jih nyan saban deungon ruda geuritan prang; keulileng ruda, jari-jari jih, poros dan pusat jari-jari ruda jih nyan banmandum teupeuget nibak bahan peurunggu. na peuet boh tameh sinumpang nibak tieb-tieb sudut bagian miyueb geuritan nyan. tameh-tameh nyan na kheueh meusaboh deungon geuritan nyan. ban keulileng bagian ateuh geuritan nyan na meubineh nyang luwah jih 22 seuntimetee. tameh sinumpang jih dan papeuen-papeuen banmandum nyan na kheueh meusaboh deungon geuritan nyan. tameh-tameh sinumpang dan papeuen-papeuen nyan teuhias deungon gamba kerub, singa dan bak kayee palem dipat mantong na tempat nyang kosong keu nyan, meusajan deungon keunarang bungong di seukeulileng nyan. meunan kheueh cara jih geuritan-geuritan nyan teupeugot. banmandum saban rupa – bantuek dan ukoran jih. meunan cit huram geupeugot teuma siploh boh baskom raya, saboh baskom nyan keu saboh geuritan. tieb saboh baskom nyan na gareh teungoh 1,8 metee dan jiteuen meunyoe teupaso ie 800 aree. dan huram geukeubah teuma limong boh geuritan di seulan baet tuhan, limong boh di siblahi si utara. beujana peurunggu geukeubah teuma disudut siblahi teunggara. meunan cit di huram geupeuget teuma kualikualik, seukob-seukob dan mangkok-mangkok. oh ka ltheueh nyan seuleusoe kheueh banmandum buet gobnyan keu raja nabi sulaiman dan keu baet tuhan. nyoe kheueh peuleungkapan nyang ka geupeugot nyan: dua boh tameh raya dua boh ulee tameh nyang meubantuek mangkok teukeubah di ateuh bandua boh tameh nyan rante nyang teumanyuem nyang teukeubah nibak tieb-tieb ulee tameh peuet reutoih boh geulima peurunggu nyang teususon didalam dua boh banja disikeulileng rante nyang teumanyuem nibak tieb-tieb ulee tameh siploh boh geuritan siploh boh baskom raya beujana

peurunggu dua blaih boh leumo peurunggu keungan sinumpang beujana nyan kual-kuali, seukob-seukob dan mangkok-mangkok. banmandum peuleungkapan keu baet tuhan nyan, nyang geupeugot le haram keu raja nabi sulaiman, teupeugot nibak peurunggu dan teugeusok sampoe meukilat. raja laju geuyue peugot barang-barang nyan bak teumpat peungecoran logam lamkawan sukot dan sartin di panton yordan. nabi sulaiman hana geuyue timang barang peurunggu nyan, sabab jeumeulah jih lumpah that le. jadi padubna brat barang nyan hana teuteupeue. meunan cit raja nabi sulaiman nyan geuyue lom peugot peuleungkapan nyang laen nyang teupeugot nibak meuh keu baet tuhan. nyoe kheueh peuleungkapan-peuleungkapan nyang teupeugot nyan: miseubah meuja keu teumpat keubah ruti nyang teupeuseumbah ubak po teu allah siploh boh gaki panyot nyang teukeubah dikeue ruweueng maha suci, na kheueh limong boh di siblahi u seulitan dan limong boh disiblahi utara. bungong-bungong panyot-panyot seupet-seupet cangkie-cangkie sulie ngon peulon panyot mangkok-mangkok piring-piring keu dupa piring-piring keuteumpat ngeue pui engsel-engsel keu pintoe ruweueng maha suci dan pintoe-pintoe luwa baet tuhan. oh ka ltheueh seuleusoe geupeugot baet tuhan le raja nabi sulaiman nyan, laju geukeubah didalam baet tuhan nyan banmandum pirak, meuh, dan barang-barang nyang laen nyang ka geupeuseumah le nabi daud ureueng syiek gobyan ubak tuhan. oh ltheueh nibak nyan nabi sulaiman geuyue laju banmandum peumipen sukee dan kawom nibak bansa israel geuyue jak ubak gobnyan di yerusalem mangat jijak pinah peuto peujanjian tuhan di sion, banda nabi daud, u baet tuhan. dan jijak kheueh awaknyan banmandum bak uroe raya jambo on nibak buleuen etanim. oh ka trok banmandum peumipen nyan meusapat, le teungku-teungku imeum laju geubeuot peuto peujanjian nyan, dan laju geuba u baet tuhan. khimah tuhan meunan cit banmandum peuleungkapan jih nyan pih gepupinah laju u baet tuhan le teungku-teungku imeum dan ureueng lewi. raja nabi sulaiman dan siluroih rakyat israel laju meusapat dikeue peuto peujanjian tuhan nyan dan laju geupeuseumah ubak tuhan bu-biri dan leumo nyang hana hase teukira jai jih. oh ka ltheueh nyan le teungku imeum laju geuba peuto peujanjian nyan u dalam baet tuhan dan geukeubah laju di miyueb patong-patong kerub nyang na dalam ruweueng maha suci. sayeub patong-patong nyan meureuntang teutob peutonyan dan kayee geunulam jih nyan. kayee geunulam nyan panyang that, sampoe ujong-ujong jih leumah teukalon phon dikeue ruweueng maha suci. (trok an uroenyoe kayee-kayee nyan mantong na disinan.) didalam peuto peujanjian nyan hana meusapeuh pih seulaen batee. batee nyan ka geupeutamong u dalam peuto nyan le nabi musa nyang geucok di gunung sinai, bak watee tuhan geupeuna peujanjian deungan bansa israel bak watee awaknyan lam meuneujak nibak nanggroe meuse u nanggroe kanaan. bak watee dumna teungku imeum geuteubiet nibak baet tuhan nyan hana teusangka-sangka baet nyan ka peunoh teutob ngon awan. awan nyan muble-ble caya le keu agongan

keuhai teuka tuhan sampoe bubena teungku imeum nyan hana hase le geutamong u dalam nyan keu geujak peubuet tugaih droe gobnyan. dan geumeudoa kheueh nabi sulaiman, geupeugah dalam doa nyan, "droeneueh kheueh nyang puduek surya di ateuheh langet, ya tuhan. teuma droeneueh leubeh galak tinggai didalam awan nyang gulita. jinoenyoe ulon peugot keu droeneueh saboh geudong nyang meugah, keu teumpat tinggai droeneueh siumu masa. 'oh ka ltheueh geumeudoa, raja nabi sulaiman laju geupaleng ubak banmandum ba rakyat nyang teungoh teudong disinan, laju geulakee beureukat po teu allah keu awaknyan. geupeugah laju le nabi sulaiman, "masa ilee tuhan ka neumeujanji ubak ureueng syiek ulon nabi daud, lagee nyoe neupeugah, 'phon that ulon peuteubiet umat ulon israel nibak nanggroe meuse, bansaboh nanggroe israel hana meusaboh banda pih nyang ulon pileh jeuet keu teumpat dipat haroh teupeugot rumoh keu teumpat iebadat ubak ulon. teuma gata, hai daud, ulon pileh mangat tapim-pen umat ulon.' teupujo kheueh tuhan allah israel nyang ka geupeuteupat janji geuhnyan!" ltheueh nyan geupeugah lom le nabi sulaiman lageenyoe, "ureueng syiek ulon nabi daud ka gemeureuncana keu geupeudong baet teumpat iebadat ubak tuhan po teu allah israel. teuma tuhan geupeugah ubak gobnyan, 'meukeusut gata nyan jroh that. teuma, bukan gata, aneuek gata kheueh nyang teuma peugot baet nyan.' jinoenyoe tuhan ka geupeutrok janji geuhnyan. ulon ka jeuet keu raja israel keugeunantoe bakp ulon, dan ulon ka teuma ulon peugot baet keuteumpat iebadat ubak tuhan, allah israel. didalam baet tuhan nyan ka ulon keubah teumpat keu peuto peujanjian nyang meuasoo batee peujanjian tuhan deungan indatu geutanyoe bak watee gobnyan geuba awaknyan geupeuteubiet lam nanggroe meuse." oh ka ltheueh geupeugah nyan, dikeue rakyat nyang teuka keunan, nabi sulaiman laju geudong geumeuhadab ubak miseubah dan laju geubeuot u ateuheh bandua blaih jaroe gobnyan dan geumeudoa, "tuhan, po teu allah israel! dilanget atawa pih di ateuheh bumoe hana nyang saban deungan droeneueh ya tuhan! droeneueh neupeuteupat janji dan neutunyok gaseh seutia droeneueh ubak umat droeneueh nyang seutia dan taat deungan sipeunoh ate keu droeneueh. meunan cit droeneueh ya tuhan ka neupeutrok janji ubak ureueng syiek ulon nabi daud. peue nyang ka tuhan peujanji nyan nibak uroenyoe ka droeneueh peubuet. dan meunan cit droeneueh ka neumeujanji ubak bakp ulon bahwa meunyoe keuturonan gobnyan biet-biet jitaat ubak droeneueh lagee gobnyan, teuma sabe na nibak keuturonan gobnyan nyang jeuet keuraja ateuheh bansa israel. jinoenyoe, ya tuhan allah israel, neupeutrok kheueh teuma banmandum nyang ka tuhan peujanji ubak bakp ulon nabi daud hamba droeneueh nyan. teuma, ya allah, peu kheueh biet-biet droeneueh neutem tinggai di ateuheh bumoenyoe? langet nyang luwah nyan pi hana seb teumpat keu droeneueh, peu kheueh lom deungan rumoh iebadat nyang ulon peugot nyoe! ya tuhan, allah ulon, ulon nyoe na kheueh hamba droeneueh! teuma neudeungoe kheueh kira jih ya tuhan doa ulon, dan neuteurimong kheueh doa ulon nibak uroenyoe. seumoga uroe malam

tuhan peulara baet nyoe nyang ka tuhan pileh sibagoe tempat ibadah ubak droeneueh. meunan cit semogae nibak tempat tinggai droeneueh di syeuruga tuhan neudeungoe dan neupeu amphon ulon meunan cit deungon umat droeneueh pajan mantong kamoe jak meuhadab ubak baet nyoe dan kamoe meudob ubak droeneueh. meunyoe na sidroe-droe ureueng jitudoh meusalah ateueh ureueng laen dan laju jiba ubak miseubah droeneueh didalam rumah ibadah nyoe keu jikak meusumpah bahwa jihnyan hana meusalah, ya, tuhan, bah kheueh droeneueh neudeungoe di syeuruga dan neupeuputoh peukara hamba droeneueh nyan. neuhukom kheueh nyang meusalah nyang sadub deungon peue nyang jipeubuet dan neupelheueh kheueh nyang hana meusalah. meunyoe umat droeneueh israel jipeutaloe le musoh-musoh jih kareuna awaknyan meudesya, laju awaknyan jigisa ubak droeneueh dan jihoreumat droeneueh sibagoe tuhan, oh lheueh nyan jikak ubak rumah ibadah nyoe laju jisujut jilakee amphon ubak droeneueh, seumoga tuhan neudeungoe awaknyan di syeuruga. dan semogatuhan neupeu amphon desya umat droeneueh nyoe, dan neuba awaknyan neupeuwoe u nanggroe nyang ka tuhan bri ubak indatu awaknyan. meunyoe umat droeneueh meudesya ubak droeneueh dan droeneueh neuhukom awaknyan deungon hana neupeutreu ujeuen laju awaknyan jimeutobat keu mandum desya-desya droe jih dan jihoreumat droeneueh sibagoe tuhan, oh lheuehnyan jimeuhadab u rumah ibadah nyoe dan jimeudoa ubak droeneueh, bah kheueh nibak lam syeuruga tuhan neudeungoe doa awaknyan. dan neupeu amphon kheueh desya umat droeneueh israel dan raja awaknyan. neupeurunoeh kheueh awaknyan peue nyang beutoi. oh ka lheueh nyan, ya tuhan, neupeutreu kheueh ujeuen u nanggroe droeneueh nyoe, nanggroe nyang tuhan bri keu umat droeneueh mangat jeuet keu hak milek jih siumu masa. meunyoe nanggroe nyoe teuka museum deuk atawa teuka bala peunyaket wabah, dan dumna sinaman habeh jipeurusak le angen ngon keunong uroe nyang seu-uem, keunong hama atawa jipajoh le daruet, atawa meunyoe umat droeneueh nyoe jiprang le musoh, atawa keunong peunyaket, seumoga tuhan neudeungoe doa awaknyan. meunyoe na lamkawan umat droeneueh nibak bansa israel na nyang deungon seudeh ate jimeudoa ubak droeneueh sira jileueng paleuet ngon ulee jitangah sira jimeuhadab ubak rumah ibadah nyoe, bah kheueh tuhan nyang tinggai teutab didalam syeuruga neudeungoe lom neupeu amphon dan neutulong awaknyan. teuma droeneueh kheueh ya tuhan nyang neupasoe lam ate manusia. sabab nyan neupeusaneut kheueh soemantong ureueng nyan nyang sisuai deungon peue nyang ka jipeubuet nyan, mangat umat droeneueh jitaat ubak droeneueh sabe simantong awaknyan tinggai di nanggroe nyang ka tuhan bri keu indatu kamoe. meunyoe na ureueng aseng nibak nanggroe nyang jioh jideungoe keuhai keubeusaran droeneueh dan keuhai buet-buet nyang ajaeb nyang ka tuhan peubuet keu umat droeneueh, laju awaknyan jikak u rumah ibadah nyoe keu jikak bri horeumat ubak droeneueh dan jimeudoa ubak droeneueh, seumoga tuhan nyang na tinggai didalam syeuruga tuhan deungoe doa

awaknyan dan neupeutrok doa jihnyan. deungon na nyang lageenyan teuma banmandum bansa nyang na di ateueh rheung donya nyoe jituri tuhan dan jitaat ubak tuhan lagee umat israel. awaknyan teuma jiteupeue bahwa baet nyang ulon peugot nyoe na kheueh tempat keu meueibadat ubak droeneueh. meunyoe tuhan neupeurintah umat droeneueh nyoe keu jikak muprang jikak lawan musoh, dan dipat mantong kheueh awaknyan na tinggai, awaknyan jimeuhadab ubak banda nyang ka tuhan pileh nyoe dan jimeudoa sira jimeuhadab u arah rumah nyoe nyang ka ulon peugot keu tuhan, seumoga didalam syeuruga tuhan neudeungoe doa awaknyan, dan neupeumeunang keu awaknyan. meunyoe umat droeneueh ka meudesya ubak droeneueh – sikeubit jih hana meusidroe pih nyang hana meudesya – laju sabab le tuhan ka neubeungeh sampoe neupeubiyeu mantong awaknyan jipeutaloe le musoh jih, dan laju jiba sibagoe tawanan ubak saboh nanggroe nyang jioh atawa to, seumoga tuhan neudeungoe doa awaknyan. meunyoe nibak nanggroenyan awaknyan jitinggai desya-desya jih, dan jimeudoa ubak tuhan sira jipeugah bahwa droe jih ka meudesya dan jipeubuet jeuhet, neudeungoe kheueh doa awaknyan, ya tuhan. meunyoe di nanggroe nyan awaknyan deungon ikhlas dan biet-biet jitinggai desya-desya droe jih nyan, dan jimeudoa ubak tuhan sira keue jih jimeuhadab ubak nanggroe nyoe nyang ka tuhan bri ubak indatu kamoe, ukeue banda nyang ka tuhan pileh dan rumah ibadah nyang ka ulon peugot keu tuhan nyoe, teuma nibak tempat tinggai tuhan di dalam syeuruga bah kheueh tuhan neudeungoe doa awaknyan dan neugaseh keu awaknyan. neupeu amphon kheueh banmandum desya dan doraka awaknyan nyang ka jipeubuet teuhadab tuhan, dan neupeujeuet kheueh bubena musoh awaknyan jipeusaneut awaknyan deungon jroh. awaknyan na kheueh umat tuhan keudroe nyang ka tuhan peuteubiet nibak nanggroe meuse dinanggroe tempat awaknyan jiseksa deungon jipeuazeb. seumoga droeneueh, ya tuhan allah, sabe neungieng umat droeneueh israel meunan cit deungon raja jihnyan. dan bah kheueh tuhan neudeungoe doa awaknyan pajan mantong awaknyan jimeuhoi jimeulakee tulong ubak droeneueh. droeneueh, ya tuhan po teu allah, ka neupileh awaknyan nibak mubagoe bansa mangat jeuet keu umat tuhan keudroe, lagee nyang ka tuhan peugah keudroe ateueh hamba droeneueh nabi musa, bak watee tuhan neuba indatu kamoe tuhan peuteubiet lam nanggroe meuse." meunan kheueh cara jih nabi sulaiman geumeudoa sira geumeuteuot dikeue miseubah dan deungon paleuet jaroe geuleueng u ateueh. oh ka lheueh nyan gobnyan laju geudong dan deungon su nyang meuleungkeng sira geudumpek geulakee beureukat po teu allah keu banmandum ureueng nyang meusapat nyang na disinan, kheun gobnyan, "teupujo kheueh tuhan nyang ka geubri keuteuntram keu umat gobnyan lagee nyang ka geupeujanji meulalu nabi musa hamba gobnyan. banmandum nyang get-get nyang ka geupeujanji ka geupeupeunoh. seumoga tuhan po teu allah geutanyoe sabe na meusajan geutanyoe lagee gobnyan ka lheueh meusajan deungon indatu geutanyoe. se-

umoga gobnyan hana geutinggai tanyoe. seumoga gobnyan geupeujeut geutanyoe sibagoe ureueng-ureueng nyang seutia ubak gobnyan mangat geutanyoe sabe udeb meunurot nyang geukeuheundaki dan taat ubak banmandum hukom dan peurintah nyang ka geubri keu indatu geutanyoe. seumoga tuhan, po teu allah geutanyoe, sabe geuingat ubak doa dan peumohonan nyang ka ulon peusampoe nyoe ubak gobnyan. seumoga gobnyan sabe geutanyok keumurahan gobnyan ubak umat israel dan raja jihnyan deungan cara geubri ubak awaknyan peue nyang awaknyan peureulee tieb-tieb uroe. deungan lagee nyan banmandum bansa di ateuheu donya nyoe teuma jiteupeue bahwa tuhan kheueh poe teu allah, hana tuhan nyang laen. bah kheueh gatanyoe, umat gobnyan sabe seutia ubak tuhan, po teu allah geutanyoe dan taat ubak hukom-hukom dan peurintah-peurintah gobnyan lagee nyang ka gata peubet nibak uroenyoe." oh ka ltheueh nyan nabi sulaiman dan banmandum ureueng nyang na meugumpoi disinan laju geupeuseumah keureubeuen ubak tuhan. keu keureubeuen peundame nabi sulaiman keupeuseumah 22.000 boh leumo dan 120.000 boh bubiri. meunan kheueh raja dan banmandum rakyat geupeuna upacara teureuseumi baet tuhan. uroenyang cit teuma nabi sulaiman geureuseumi bagian teungoh peulataran nyang na dikeue baet tuhan nyan. oh ka ltheueh nyan dipeulataran nyan gobnyan laju geupeuseumah keureubeuen nyang teutot, keureubeuen gandom dan gapah beulatang keu keureubeuen peudame. banmandum nyan geupeuseumah disinan sabab miseubah peurunggu nyan ubiet that keu banmandum nyang teupeuseumah nyan. di baet tuhan nyan nabi sulaiman dan banmandum umat israel laju geupeuna peurayaan jambo on nyang treb jih tujuh uroe. lumpah that jai jeumeulah ureueng nyang meusapat disinan. awaknyan teuka di jioh na nibak jalan hamat di utara sampoe ubak bataih nanggrooe meuse di seulan. dan bak uroe nyang keulapan le nabi sulaiman laju geuyuewoe ureueng rame nyan. awaknyan banmandum jipuju gobnyan laju jiwoe u rumah droe maseng-maseng deungan ate nyang peunoh geumbira, kareuna banmandum beureukat nyang ka geubri le tuhan ubak hamba gobnyan nabi daud dan ubak bansa israel umat gobnyan. oh ka ltheueh seulesoe le nabi sulaiman geupeudong baet tuhan meunan cit deungan meuligoe dan banmandum nyang teupeureulee keunyan, tuhan geupeuleumah droe lom ubak gobnyan lagee nyang ka teujadi di gibeon. tuhan meufeureuman ubak gobnyan, "doa gata ka ulon deungoe, dan deungan nyan rumah nyang ka gata peudong nyan ulon kheun jinoenyoe ka jeuet keu tempat khusus meuebadat ubak ulon siumu masa. ulon sabe lon ngieng dan ulon jaga teupatnyoe. meunyoe gata tameungabdi ubak ulon, deungan ate nyang gleh dan jujoee lagee ureueng syiek gata nabi daud, dan tataat ubak hukom-hukom dan peurintah ulon, teuma ulon kupeutrok janji ulon ubak ureueng syiek gata nabi daud bahwa aneuek cucoe jihnyan treun meutreon sabe jimat peurintah ateuhe israel. teuma meunyoe gata atawa keuturonan gata jipeulikot ulon dan hana jitaat ubak hukom-hukom dan peurintah-peurintah

ulon dan taseumah ilah-ilah nyang laen, teuma ulon ku-use umat ulon israel nibak nanggrooe nyang ka ulon bri keu awaknyan. meunan cit deungan rumah nyoe teuma ulon tinggai nyang ka ulon peuteutab keu teupat iebadat ubak ulon. dipat nan-nan ureueng israel teuma jipeukem ngon jipeuhina. rumah iebadatnyoe teuma jeuet keu saboh teupat sinamon rumah reuloih akhejih soemantong ureueng nyang jikalon teukeujot dan teumakot. awaknyan teuma jipeugah, 'pakon tuhan geupeubuet lageenyan ateuhe rumah nyoe?' le ureueng laen teuma jijaweeb, 'kareuna awaknyan ka jitinggai tuhan, alah droe awaknyan, nyang geu intat indatu awaknyan jiteubiet nibak nanggrooe meuse. awaknyan ka jiseumah ubak ilah-ilah nyang laen. nyang kheueh jeuet tuhan geupeutreon bala u ateuhe droe awaknyan.' " nabi sulaiman geupeudong baet tuhan dan meuligoe raja nyan lam tempo dua ploh thon. banmandum teupeugot nibak kayee ceumara libanon dan kayee ceumara biasa meunan cit banmandum meuh nyang geupeureulee le nabi sulaiman keu teupeugot nyan ka geubri le raja hiram ubak gobnyan. oh ka seulesoe buet nyan geupeubuet, raja sulaiman laju geubri ubak hiram dua ploh boh banda diwilayah galilea. dan geujak kheueh hiram geujak ngieng atranyan, teuma gobnyan hana galak deungan peue nyang ka geubri le nabi sulaiman nyan. raja hiram nyan laju geupeugah ubak nabi sulaiman, "syedara ulon, lageenyoe kheueh banda-banda nyang neubri keu ulon?" nyang kheueh sabab jih daerah nyan sampoe an jinoo mantong geuhoi kabul. leubeuh nibak 4.000 kilo gram meuh nyang ka geukirem le hiram ubak nabi sulaiman. raja nabi sulaiman geupeuguna cara keureuja paksa keu teupeugot baet tuhan, meuligoe raja, binteh beuton yerusalem dan keu teuseubee tanoh diseulan baet tuhan. meunan cit gobnyan geupeuguna cara nyang saban keu geupeugot lom banda hazor, megido dan gezer (banda gezer na kheueh banda nyang yohmasa ilee jiprang dan jipeutaloe le raja meuse, dan banmandum peunduduek banda nyan jipoh mate meunan cit deungan banda nyan jitot ngon apui sampoe hangoh. oh ltheueh nyan banda nyan laju geubri le raja nanggrooe meuse keu putroe gobnyan sibagoe hadiah bak uroe meukawenan gobnyan deungan nabi sulaiman. dan nabi sulaiman kheueh nyang peugot lom banda nyan.) deungan keureuja paksa cit teuma, nabi sulaiman geupeudong lom bet-horon-hilir, baalat, tamar di padang pasi yehuda, banda-banda teupat cok beukai, meunan cit banda-banda keu pangalan geuritan prang dan guda gobnyan. banmandum reuncana peumbangunan di yerusalem, libanon dan siluroih wilayah keukuasaan gobnyan ka geulaksana. keu buet nyang teupaksa nyan nabi sulaiman laju geukrah ureueng-ureueng lam keuturonan amori, het, feris, hewi dan yebus. awaknyan na kheueh ureueng-ureueng keuturonan bansa kanaan nyang hana hase jipoh habeh le ureueng israel bak watee awaknyan jiduek bak nanggroenyan. sampoe an uroenyoe keuturonan awaknyan mantong na teuma teutab jeuet keu namiet. ureueng israel hana geupeujeut namiet le nabi sulaiman, awaknyan geubri tugaih sibagoe tantra, peuwira, panglima, keumando geuritan prang,

dan tantra pasokan meuguda. limong reutoih limong ploh droe peugawee geubri tugaih tanggong jaweeb ateuah ureueng-ureueng yang jipeubuet keureuja paksa dalam meubagoe proyek peumbangunan nabi sulaiman. tanoh nyang na disiblahi seulan baet tuhan laju geudo le nabi sulaiman oh ka ltheueh ureueng bino gobnyan, na ktheueh putroe raja nanggroe meuse, geuminah nibak banda nabi daud ubak meuligoe nyang ka geupeudong le nabi sulaiman keu gobnyan. lthee thon sigoe nabi sulaiman geupeuseumah keureubeuen nyang teutot dan keureubeuen peudame di ateuah miseubah nyang ka geupeudong nyan keu tuhan. meunan cit gobnyan geutot keumeunyan keu tuhan. meunan ktheueh cara jih nabi sulaiman geupeuseuleosoe geupeugot baet tuhan. keu armada angkatan laot gobnyan, nabi sulaiman laju geupeugot kapai-kapai di ezion-geber, to ngon elot dipante lhok akaba, lam wilayah edom. raja hiram laju geukirem bubena aneuk kapai gobnyan nyang ka na peungalaman keu jijak meulayeue meusajansan deungan awak kapai nabi sulaiman. ka ltheueh awaknyan geuyue jak u nanggroe ofir keu jijakcok 14.000 kilo gram meuh dan jiba atranyan ubak nabi sulaiman. ratu nanggroe syeba geudeungoe nabi sulaiman meusyehu lumpah na. teuma gobnyan laju geujak u yerusaleum keu geujak ujo nabi sulaiman deungan soai-soai nyang sulet. ratu geujak deungan geuba sajan peungireng nyang jai, dan unta nyang peunoh deungan wase reumpah-reumpah, batee peumata, meunan cit deungan meuh nyang lumpah jai. watee gobnyan ka meurumpok ngon nabi sulaiman, le ratu nyan laju geuteumanyong meubagoe hai nyang hase geupike. banmandum nyang jitanyong nyan hase geujaweeb le nabi sulaiman, hana sapeuepi nyang payah nibak gobnyan. ratu nyan geukalon keudroe padub na areh jih nabi sulaiman nyan. meunan cit geukalon meuligoe nyang geupeudong le nabi sulaiman, cara jimeubuet peugawee-peugawee meuligoe, dan peukayan dinah meunan cit deungan rumoh-rumoh awaknyan. meunan cit jikalon keudroe peunajoh dan ie jieib nyang teuhidang keu gobnyan, cara peulayan-peulayan nyan peutimang khanuri, dan keureubeuen-keureubeuen nyang geupeuseumah le nabi sulaiman di baet tuhan. banmandum nyang geukalon le ratu nanggroe syeba nyan teuhireuen-hireuen dan teuceungang luwa bisasa. teuma geupeugah ktheueh le ratu nyan ubak nabi sulaiman, "peue-peue nyang ka ulon deungoe di nanggroe lon keuhai amphon dan keubijaksanaan amphon beutoi banmandum! yoh masa ije hana lon pateh, teuma oh watee ka lon ngieng keudroe ngon mata ulee lon baro ktheueh ulon yaken ngon peucaya. nyang sikeubit jih banmandum nyang ulon deungan nyan nyan sibeuna jih hana meusiteungoh nyang ka ulon ngieng bak saat nyoe. deuh nyata bahwa bah ktheueh keukayaan amphon meunan cit deungan keubijaksanaan droeneueh leubeh le nibak nyang ulon deungoe. meu-untong that-that peurumoh-peurumoh amphon! dan lumpah that bahgia banmandum peugawee-peugawee nyang jimeubuet keu amphon sampoe mandum jeuet dideungoe nibak amphon keudroe peue-peue mantong haba nyang bijaksana! teupujo ktheueh tuhan, allah amphon! de-

ungon teubaiat amphon jeuet keu raja nanggroe israel, nyan tanda jih tuhan galak that keu amphon. hana habeh-habeh gobnyan geugaseh keu bansa israel; nyang ktheueh sabab jih gobnyan geubaiat amphon jeuet keuraja awaknyan, mangat amphon jeuet neupeudong hukom dan keuadalan." oh ltheueh nyan ratu nanggroe syeba nyan laju geuseurah ubak nabi sulaiman banmandum peue-peue nyang ka geuba, na ktheueh leubeh 4.000 kilogram meuh dan jeumeulah nyang jai lagee batee peumata, meunan cit deungan mandum reumpah-reumpah nyang geuba geujok banmandum. hantom nyang ka nabi sulaiman geuteurimong hadiah dubnyan jai lagee nyang ka geubri le ratu nanggroe syeba nyan. (kapai-kapai hiram nyang ba meuh keu nabi sulaiman nibak ofir meunan cit na jiba jeumeulah nyan jai batee peumata dan kayee ceundana. kayee nyan geupeuguna le nabi sulaiman keu geupeugot seuramoe-seuramoe nibak baet tuhan dan bak meuligoe raja; meunan cit keu geupeugot keucapi dan gambus keu ureueng meunyan. kayee nyan na ktheueh kayee ceundana nyang paleng get nyang teuba u nanggroe israel; hantom na le ureueng jikalon kayee get nyang lagee nyan.) seulaen hadiah-hadiah nyang ka geubri ubak nabi sulaiman nyan, geubri teuma le gobnyan ubak ratu nibak nanggroe syeba nyan peue nyang mantong geulakee. oh ltheueh nyan geuwoe ktheueh ratu nyan ngon banmandum peungireng gobnyan u nanggroe droe. tieb-tieb thon nabi sulaiman geuteurimong rab na 23.000 kilogram meuh, gohlom teu itong laba-laba nibak meuniaga, meunan cit cukee-cukee bak saudaga-saudaga, raja-raja arab dan gubunur-gubunur israel. nabi sulaiman geupeugot teuma na 200 boh peurisai rayeuk nyang teupeugot nibak meuh teumpeuen. meuh nyang teupeuguna keu peurisai nyan na leubeh kureueng tujoh kilogram. meunan cit na teuma geupeugot 300 boh peurisai meuh nyang leubeh ubit. meuh nyang teupeuguna keu tieb-tieb peurisai ubit nyan na leubeh kureueng dua kilogram, banmandum nyan meuh nyang teupeugot bak teumpeuen meuh. mandum peurisai nyan geukeubah bak saboh balee nyang geuboh nan batee uteuen libanon. dan na teuma geupeugot saboh kurusi keurajeuen nyang teulapeh ngon gadeng dan teuhias ngon meuh murni. kurusi nyan meujaroe, dan blaih wie ngon ueneu nyan na teuma patong nyang meuh ulee singa. siblahi ulikot kurusi nyan na patong meuh ulee leumo. kurusi nyan na teuma nam neuk reuneuen. bak ujung wie dan ujung ueneu tieb-tieb aneuk reuneuen nyan na teuma patong singa – banmandum nyan na dua blaih boh. hantom na kurusi keurajeuen nyang lagee nyan lam keurajeuen pat mantong. banmandum peukakaih tempat jieib le nabi sulaiman nyan teupeugot nibak meuh, dan banmandum peukakaih nyang teukeubah bak balee uteuen libanon pih teupeugot nibak meuh murni. hana nyang teupeugot nibak pirak, sabab bak jameuen nabi sulaiman pirak hana meuyemu. nabi sulaiman na teuma kapai nyang raya nyang meulayeue meusajan ngon kapai-kapai raja hiram. lthee thon sigoe kapai-kapai nyan jigisa jiba meuh, pirak, gadeng, bukreuh dan cicem merak. nabi sulaiman leubeh kaya dan leubeh bijaksana nibak raja

toh mantong nyang na lam donya nyoe. banmandum ureueng nyang na bansigom donya jiseuha beu meuteuma meurumpok ngon nabi sulaiman keu jijak deungoe peungajaran nyang bijaksana nyang geubri le po teu allah ubak gobnyan. awaknyan maseng-maseng teuka sira jiba hadiah keu nabi sulaiman. awaknyan jibri barang-barang pirak, meuh, peukayan, peudeueng, reumpah-reumpah, guda dan bagal. meunan kheueh tieb-tieb thon. meunan cit nabi sulaiman geupeudong angkatan prang atranyan na kheueh 1.400 geuritan prang dan 12.000 sidadu meuguda. siladam geubri tugaih di yerusalem dan siladam teuk geubri tugaih di meubagoe teumpat bak banda laen. bak jameuen keurajeuen nabi sulaiman, di yerusalem pirak na kheueh lahee barang biasa saban ngon batee, dan kayee ceumara libanon meulimpah ruwah saban cit lahee kayee ara biasa. meulalu raja-raja nyang mat kuasa, guda geupeuteuka nibak nanggroe meuse dan kilikia, dan geuritan-geuritan prang geupeuteuka nibak nanggroe meuse. yum saboh guda 150 peng pirak, dan yum saboh geuritan prang 600 peng pirak. oh ltheueh nyan meulalu peungusaha-peungusa nyan cit teuma guda-guda dan geuritan-geuritan nyan geupeubloe lom ubak raja-raja het dan raja-raja siria. nabi sulaiman le theu geucinta ureueng inong bansa aseng. seulaen putroe raja nanggroe meuse, nabi sulaiman geumeukawen cit deungon ureueng inong het, moab, amon, edom dan sidon. tuhan ka geupeurintah bahwa ureueng israel hana jeuet jimeukawen meujampu deungon bansa-bansa nyang laen, sabab le awaknyan di ureueng israel bak saboh watee jiseumah ubak ilah-ilah nyang laen. bahpi lageenyang, nabi sulaiman teutab cit geumeukawen deungon ureueng inong bansa laen. na 700 droe putroe ureueng bansawan nyang geumeukawen le nabi sulaiman, dan na teuma 300 droe gundek gobnyan. kareuna peurumoh-peurumoh geuh nyan kheueh nyang teupeusabab nabi sulaiman geutinggai po teu allah, akhe jih bak watee gobnyan ka tuha awaknyan meuhase jibujuk jiyue seumah ilah-ilah nyang laen. nabi daud, ureueng syiek nabi sulaiman, gobnyan seutia ubak tuhan po teu allah, teuma nabi sulaiman hana geuturot lahee ureueng syiek geuh nyan. nabi sulaiman geuseumah asyoret, dewi bansa sidon, dan meunan cit molokoh dewa nyang luat kat nyang jiseumah le bansa amon. inan kheueh nabi sulaiman ka meudesya ubak tuhan. nabi daud, bapak nabi sulaiman geuseutot tuhan deungon sipeunoh ate, teuma nabi sulaiman hana geupeubuet nyang lageenyang. di ateueh gunung siblaih u timu yerusalem, nabi sulaiman laju geupeudong saboh teumpat seumah keu kamos, dewa ureueng moab, dan keu molokoh, dewa ureueng amon – ban dua nyan na kheueh dewa nyang lumpah luwat. meunan cit di nabi sulaiman geupeudong teumpat-teumpat dipat peurumoh gobnyan nibak bansa aseng hase jitot keumeunyan, dan jipeuseumah keureubeuen keu dewa-dewa awaknyan keudroe. ka dua goe, tuhan allah israel geupeuleumah droe ubak nabi sulaiman dan geupeuingat gobnyan bahwa gobnyan hana jeuet geuseumah ilah nyang laen, teuma nabi sulaiman teutab hana geutaat ubak peue nyang ka geupeugah le tuhan nyan. gob-

nyan pi laju geutinggai tuhan, akhe jih tuhan beungeh keu gobnyan. feureuman tuhan, "kareuna deungon sadar gata taiengkeue janji gata deungon ulon dan hana tataat ubak peurintah-peurintah ulon, teuma ulon lon tarek keurajeuen nyan nibak jaroe gata, dan ulon bri keu sidroe lamkawan peugawee gata. bahpi meunan, deumi ureueng syiek gata nabi daud, hainyan hana ulon peubuet simantong gata udeb. bak watee keurajeuen jimat le aneuek gata singoh, baro kheueh hainyan ulon peubuet. teuma bukon banmandum keurajeuen nyan ulon cok nibak nyan. deumi hamba ulon nabi daud, dan deumi yerusalem nyang ka ulon peujeuet keu banda ulon nyan, ulon teuma lon tinggai saboh sukee keu aneuek gata." teuma tuhan laju geupeujeuet hadad, sidroe lamkawan keuturonan raja edom, geupeujeuet keumusoh deungon nabi sulaiman. treb sigohlom nyan, oh ka ltheueh nabi daud geupeutaklhok edom, yoab, panglima angkatan prang nabi daud, jijak u edom keu jijak peukubu ureueng-ureueng gobnyan nyang mate dimeudeun prang. nam buleuen treb jih gobnyan dan aneuek buah gobnyan tinggai di edom. dan lam watee nyang nam buleuen nyan gobnyan ka habeh geupoh dumna ureueng agam nyang na disinan. teuma, hadad nyang yohmasanyan mantong kat muda, ka jiplueng u nanggroe meuse meusigoe deungon napadub droe edom nyang laen, peulayan-peulayan bapak gobnyan. awaknyan beurangkat nibak midian, laju geujak u paran. disinan na meupadub droe nyang laen jipeusaho droe teuma deungon awaknyan, laju meusigoe sampoe u meuse jijak meurumpok ngon raja meuse. raja meuse nyan laju geubri rumoh meunan cit tanoh keuteumpat tinggai hadad meunan cit deungon jaminan udeb. dan hadad pih ka jeuet keurakan jroh raja, sampoe raja laju geujok paruih geuh keudroe, na kheueh adoe peureumaisuri tahpenes mangat jeuet keu ureueng binoe gobnyan. oh ltheuhnyan peurumoh hadad nyan laju jipeulahe sidroe aneuek agam nyang jiboh nan gembat. aneueknyoe jipeurayeuk le peureumaisuri keudroe dan tinggai dimeuligoe meusajan deungon aneuek-anuek agam raja nyang laen. bak watee hadad geuteurimong haba bahwa nabi daud ka meuninggai donya, dan yoab, panglima angkatan prang israel meunan cit ka teuma meuninggai donya, geupeugah kheueh le hadad ubak raja meuse, "neupeu idhin kheueh ulon keuneuk gisa u tanoh ie ulon." "pakon?" geutanyong le raja. "peu kheueh gata na kureueng sapeue-peue disinoe, sampoe gata ta keuneuk woe u nanggroe gata?" "ulon hana kureueng meusapeue pih," geuseuot le hadad, "teuma neupeubiyeu kheueh ulon meujakwoe." dan geuwoe kheueh hadad u tanoh ie gobnyan. po teu allah geupeugot teuma si rezon, aneuek elyada, geupemusoh deungon nabi sulaiman. rezon na kheueh namiet nyang jipeuplueng droe nibak teungku di teumpat jih meukeureuja, nan teungku jih nyan na kheueh raja hadadezer di nanggroe zoba. nabi daud ka ltheueh geupeutalo raja hadadezer nyoe dan geupoh mate bubena rakan-rakan hadadezer nibak siria. bak watee nyan rezon jipeuplueng droe nibak hadadezer dan laju jipeusapat bubena ureueng jeuhet nyang laen oh ltheueh nyan jihpi jeuet keu ulee geureumbolan.

jihnyan dan aneuk buah jih laju jijak u damsyik dan laju jitinggai di banda nyan. disinan le aneuk buah droe jih laju jiangkat jeuet keuraja siria. saban cit lagee hadad, raja rezon pih geumeumusoh deungon israel watee mantong udeb nabi sulaiman, dan laju jipeuna karu di nanggroe nyan. ureueng laen nyang meubeurontak jilawan nabi sulaiman na kheueh sidroe lamkawan peugawee gobnyan nyang nan jih yerobeam. ureueng nyan aneuk nebat nibak zereda di efrain. ma jihnyan ka balee, nyang nan jih zerua. nyang teukheun teuma nyoe na kheueh kisah keuhai yerobeam nyang meubeurontak. bak watee tanoh nyang disiblahi u seulan baet tuhan teungoh teuseube, dan binteh beuton banda teungoh teupeuet, dan si yerobeam na cit teungoh meukeureuja disinan. bak watee nabi sulaiman geukalon bahwa yerobeam carong ngon jumot, gobnyan laju geubri keu ureueng nyan tanggung jaweub mangat jiwaasi ureueng nyang meukeureuja paksa di wilayah sukee manasye dan efrain. bak siuroe yerobeam geuteubiet nibak yersusalem. nibak teungoh rot dipadang gobnyan geujak meurumpok le nabi ahia nibak silo nyang bak watee nyan nabi nyan geungui bajee jubah nyang baro. laju ahia geusuit bajee jubah geuh nyan, dan geupriek-priek sampoe jeuet dua blaih krak. oh ltheueh nyan geupeugah kheueh le gobnyan ubak yerobeam, "tacok kheueh laju siploh krak keu droe gata, sabab tuhan, po teu allah israel, geupeugah meunoe nibak gata, 'ulon teuma lon reubot keurajeuen nyoe nibak nabi sulaiman, dan ulon bri siploh boh sukee keu gata. saboh sukee teuma teutab nibak nabi sulaiman, deumi hamba ulon nabi daud, dan deumi yersusalem, nyang ka ulon pileh nibak banmandum nanggroe israel jeuet keu banda ulon. ulon teuma lon peubuet hainyan sabab nabi sulaiman ka jitinggai ulon dan jiseumah dewa-dewa, dewa nyang jiseumah nyan na kheueh: asyoret, dewi bansa sidon; kamos, dewa bansa moab; dan milkom, dewa bansa amon. nabi sulaiman hana jituot lagee ulon kheun. jihnyan bukan lagee ureueng syiek jih nabi daud nyang taat ubak ulon dan jipeubuet banmandum peurintah-peurintah ulon. bahpi meunan ulon hana teuma lon cok banmandum keurajeuen nyan nibak droe jih nyan. jihnyan teutab ulon bri kuasa simantong jih udeb. hainyan ulon peubuet deumi hamba ulon nabi daud, nyang ka ulon pileh dan jitaat ubak banmandum hukum-hukom ulon dan peurintah-peurintah ulon. keurajeuen nyoe teuma ulon cok nibak aneuk agam nabi sulaiman dan siploh boh sukee teuma ulon bri keu gata. teuma saboh sukee ulon peubiyeu nibak jihnyan, mangat jeuet sabena ureueng nibak hamba ulon nabi daud nyang mat peurintah keu ulon di yersusalem, banda nyang ka ulon pileh sibago teumpat ibadah ubak ulon. dan gata, yerobeam, teuma ulon peujeuet keuraja israel dan ulon bri idhin gata peurintah banmandum daerah nyang gata galak. meunyo gata, lagee hamba ulon nabi daud, taat sipeunoh ate ubak ulon dan udeb meunurot hukum-hukom ulon, dan gata peumangat ate ulon deungon cara tapeubuet banmandum nyang ulon peurintah bak gata, teuma ulon teutab na sabe meusajan gata. ulon teuma lon peujeuet gata raja di israel. ulon lon jamin bahwa keuturonan gata teuma jeuet

keuraja di israel keugeunantoe gata, saban cit lagee nyang ka ulon peubuet keu nabi daud. sabab nabi sulaiman ka meudesa, ulon teuma ulon hukom keuturonan nabi daud, teuma bukan siumu masa." bak watee habanyan sampoe ubak nabi sulaiman, gobnyan geu useuha geukeuneuk poh mate yerobeam. teuma yerobeam laju geuplueng ubak raja sisak di nanggroe meuse, dan laju geutinggai disinan sampoe nabi sulaiman meuninggai donya. kisah nyang laen keuhai nabi sulaiman, meunan cit keuhai banmandum nyang ka geupeubuet nyan dan keuhai ieleume peungeutahuan ka teutuleh lam kitab riwayat udeb nabi sulaiman. peuet ploh thon treb jih nabi sulaiman geumat peurintah di yersusalem atehueh banmandum nanggroe israel. oh ltheuehnyan gobnyan pih meuninggai donya dan laju geupeukubu di banda nabi daud. dan laju rehabeam aneuk agam gobnyan jeuet keuraja keugeunantoe gobnyan. rehabeam laju geujak u sikhem, sabab banmandum rakyat israel dibagian utara ka meugumpoi disinan jikeuneuk baiat gobnyan jeuet keuraja. bak watee nyan yerobeam aneuk nebat mantong na di nanggroe meuse sabab geupeuplueng droe nibak nabi sulaiman. bak watee gobnyan geudeungoe keuhai rehabeam, gobnyan laju geugisa u nanggroe israel. rakyat dibagian utara jiundang yerobeam, laju awaknyan meusigoesigoe jijak meuhadab ubak rehabeam. jipeugah le awaknyan, "nabi sulaiman ureueng syiek teungku amphon ka geubri beuban nyang paleng geuhon u atehueh kamoe, jinoenyo meunyo teungku amphon meuheuet keu beuban nyan dan neupeukureueng deurita kamoe, kamoe teuma meungabdi ubak teungku amphon." geuseuot le rehabeam, "ulon pikepike ilee. tajak kheueh keunoe lhee uroe teuk." teuma jijakwoe kheueh banmandum ureueng nyan. laju rehabeam geulakee naseuhat ubak ureueng-ureueng patot nyang ka tuha-tuha nyang ka ltheueh jeuet keu peunaseuhat nabi sulaiman, ureueng syiek rehabeam. "pakriban ulon haroh ulon jaweueb keu ureueng nyan?" geutanyong le rehabeam, "peu naseuhat droeneueh nyoe keu ulon?" awaknyan jijaweueb, "meunyo teungku amphon bit-bit na niet keuneuk meungabdi keu rakyat, neupeutrok kheueh peue nyang ka jilakee le awaknyan, teuma awaknyan jimeungabdi ubak teungku amphon siumu masa." teuma naseuhat ureueng-ureueng tuha nyan hana geupako le rehabeam. teuma di gobnyan laju geujak ubak ureueng-ureueng muda nyang santeuet umu deungon gobnyan dan nyang jinoenyo jai that nyang bantu gobnyan. bak awaknyan gobnyan geutanyong, "peu naseuhat gatanyoe keu ulon mangat lon jaweueb rakyat nyang jilakee ulon mangat hase ulon peuphui beuban awaknyan?" awaknyan jijaweueb, "meunoe kheueh nyang siget jih teungku amphon peugah ubak awaknyan, 'sileumoh-leumoh jih ulon, ulon mantong leubeu teuga nibak ayah lon!'" bapak ulon geupeuseun beuban nyang keubit geuhon u atehueh baho gata, teuma ulon nyang leubeu brat lom u atehueh gata. gobnyan geuseunuet gatanyoe deungon peunyunuet, teuma ulon lon seunuet gata deungon peunyunuet nyang meuduro beuso!" lhee uroe teuma oh ltheueh nyan yerobeam dan banmandum ureueng nyan jigisa lom jijak meuhadab ubak raja rehabeam,

lagee nyang ka geupeurintah nyan. jioh that meulawan deungon peue nyang ka geupeuruno le ureueng nyan, rakyat nyang teuka ubak gobnyan laju geusapa deungon gasa. lagee peue nyang ka jipeurunoe le ureueng-ureueng muda, gobnyan geupeugah, "bakap ulon geupeuseuhon beuban ateuah gata nyang lumpah geuhon, teuma diulon lon peugeuhon leubeh brat lom beuban nyan. meunan cit gobnyan geuseunuet gatanyoe deungon peunyunuet, teuma di ulon lon seunuet gatanyoe deungon peunyunuet nyang meuduro beuso!" peue nyang jilakee rakyat nyan hana geupako. teuma nyan kheueh nyang geulakee le tuhan. peue nyang ka geupeugah le tuhan meulalu nabi ahia di silo keuhai yerobeam aneuk nebat nyan haroh teujadi. bak watee rakyat jikalon bahwa raja hana geutem deungoe su rakyat geuh, awaknyan laju jitawok sira jikuk, "hana peu tapako keu nabi daud dan keuturonan gobnyan! awaknyan hantom na jipeubuet sapewe keu geutanyoe. rakyat israel, bohjak geutanyoe tawoe! bah disinan rehabeam nyan jiuroih droe jih keudroe!" dan jijakwoe kheueh laju bubena rakyat israel, dan rehabeam jeuet keuraja teuma ateuah wilayah yehuda mantong. bahpi meunan raja rehabeam mantong cit geuyue adoniram, sidroe lamkawan mando keureuja paksa, geuyue jak peuteunang rakyat. teuma dirakyat laju jirhom adonia nyan ngon aneuk batee sampoe mate. ban geukalon hainyan rehabeam bagaih-bagaih geujak ek u ateuah geuritan gobnyan, laju geupeuplueng droe u yerusaleum. phon saat nyan rakyat dibagian utara keurajeuen israel jibeurontak ubak raja keuturonan nabi daud. bak watee jideungoe le banmandum rakyat israel bahwa yerobeam ka geugisa nibak nanggroe meuse, di rakyatnyan laju jiundang gobnyan ubak saboh teumpat meurokpakat laju jibaiat gobnyan jeuet keuraja israel. teuma rakyat nibak sukee yehuda mantong nyang teutab seutia ubak keuturonan nabi daud. bak watee raja rehabeam ka sampoe u yerusaleum, laju gobnyan geupeusapat 180.000 droe tantra nyang teupileh nibak sukee yehuda dan benyamin mangat jijak prang ureueng israel dan geupeupuleh keukuasaan gobnyan ateuah sukee-sukee bagian utara israel. teuma po teu allah geuyue nabi semaya mangat geujak peusampoe habanyoe ubak rehabeam, dan ubak mandum sukee yehuda dan benyamin, "bek kheueh taprang syedara-syedara gata ureueng israel. tawoe kheueh! peue nyang ka teujadi nyan na kheueh meulakee ulon." teuma awaknyan banmandum jiturot peurintah tuhan, laju jijakwoe kheueh u rumah jih maseng-maseng. oh ka jeuet keuraja israel, yerobeam laju geupeukong banda sikhem didaerah meugunong-gunong efraim, laju gobnyan tinggai disinan sikeujab. oh lheurehnyan gobnyan geujaklom nibak teumpat nyan dan geupeukong teuma banda pnuel. gobnyan geupike meunoe didalam ate geuh, "meunyoeh rakyat teutab jijak u yerusaleum keu jijak peuseumah keureubeuen di baet tuhan lagee nyang ka jipeubuet le awaknyan nibak saatnyoe, awaknyan teuma jigisalom jidong blaih rehabeam, raja yehuda, laju jipoh mate ulon nyoe." oh ka lheureh geupeutimong hainyan, gobnyan laju geupeugot dua boh patong leumo nibak meuh, dan geupeugah laju ubak rakyat gobnyan, "hai bansa is-

rael! ka lumpah that treb gatanyoe tajak u yerusaleum keu tajak meueibadat. jinoenyoe, nyoe kheueh ilah-ilah gata nyang ka jipeuteubiet gata nibak nanggroe meuse!" laju yerobeam geukeubah saboh nibak leumo meuh nyan di betel dan nyang saboh teuk di dan. teuma phon saatnyan rakyat pih ka jipeubuet desya, sabab awaknyan jijak u betel dan dan keu jijak meueibadat. meunan cit di yerobeam geupeudong lom teumpat-teumpat iebadat nyang laen di pucak-pucak gunung, dan gobnyan geu angkat teuma teungku-teungku imeum nibak keuluwarga-keuluwarga nyang bukon sukee lewi. oh lheureh nyan yerobeam geukeubah teuma teungku-teungku imeum nyan di betel mangat jimeutugaih disinan dan gobnyan keudroe geupeuseumah keureubeuen keu leumo-leumo meuh nyang ka geupeugot nyan. laju gobnyan geupeuteuntee tanggai limong blaih buleuen nyang keulapan sibagoe uroe raya israel, saban cit lagee uroe raya di yehuda. bak uroenyang yerobeam geujak u betel dan disinan laju geupeuseumah keureubeuen keu teupeuraya uroe raya nyang ka geupeuteuntee nyan. bak wateenyan na sidroe nabi di yehuda. nabi nyan geuyue le tuhan mangat geujak u betel. nabi nyan trok keunan bak watee yerobeam teungoh geudong dikewe miseubah keu jipeuseumah keureubeuen. ateuah peurintah tuhan geupeugah kheueh le nabi nyan ubak miseubah nyan, "hai miseubah, hai miseubah! meunoe kheueh feureuman tuhan, 'sidroe aneuk nyang teuma geuboh nan yosia teuma lahe lam keuluwarga nabi daud. di ateuah gata, hai miseubah, gobnyan teuma geupoh mate bubena teungku-teungku imeum nyang meutugaih di teumpat-teumpat iebadat keu dewa, dan nyang ka teuma jipeuseumah keureubeuen keu gata. dan di ateuah gata cit teuma hai miseubah gobnyan teuma geutot bubena tuleueng-tuleueng manusia.'" geupeugah lom le nabi nyan, "miseubah nyoe teuma reuloih, dan abee nyang na di ateuah nyan teuma teupeuro meutabu. nyan kheueh bukeuti jih bahwa ulonnyoe geuyue le tuhan." bak watee yerobeam geudeungoe tutoe haba nyan, gobnyan laju geutunyok ateuah nabi nyan dan geupeugah sira geudumpek, "drob ureueng nyan!" teuma bak saat nyan cit teuma jaroe yerobeam ka jeuet keu keuboh ngon lapee sampoe jaroe geuhnyan hana hase le geutarek. miseubah nyan ngon hana teusangka-sangka reuloh meuhambo dan abee nyang na di ateuah nyan pi ka habeh ro meutabu uluwa, lagee nyang ka geupeugah le nabi nyan ateuah peurintah tuhan. dan geupeugah kheueh le raja yerobeam ubak nabi nyan, "neutulong kheueh meudoa ubak tuhan allah droeneueh keu ulon. neulakee kheueh geunaseh gobnyan mangat jaroe ulon nyoe hase geupeupuleh!" nabi nyan pi laju geumeudoa ubak tuhan, dan jaroe raja yerobeam nyang ka lapee nyan pih ka puleh teuma lagee nyang ka. oh lheureh nyan raja laju geupeugah ubak nabi nyan, "jak geutanyoe tajak makheun di rumah ulon, ulon keuneuk bri hadiah keu droeneueh." geujaweueh le nabi nyan, "bahpi teungku amphon neubri keu ulon siteungoh nibak keukayaan teungku amphon, ulon hana ulon seutot keu lon jak makheun atawa jak jieb ie di rumah teungku amphon. ulon meuteume peurintah nibak tuhan mangat bek lonjak makheun atawa jieb ie, dan

hana teuma ulon woe rot nyang ka ulon jak yoh awai bunoe." meunan kheueh cara jih nabi nyan geujak rot nyang laen. bak watee nyan na sidroe nabi nyang ka that tuha, gobnyan tinggai di betel. aneuek-aneuek gobnyan laju jikak bri tee ubak gobnyan keuhai nabi nibak yehuda nyan. awaknyan jicalitra keuhai peue nyang ka geupeubuet di betel nibak uroenyang, dan peue teuma nyang geupeugah ubak raja yerobeam. dan geutanyong kheueh le nabi tuha nyan, "nabi nyang teuka nibak yehuda nyan rot nyang toh geucok bak watee gobnyan geuwoe?" teuma awaknyan pih laju jipeugah rot toh geuwoe nabi nyan. laju gobnyan geuyue awaknyan jipasang peulana ateueh keuleudee gobnyan. oh ltheueh nyan gobnyan laju geu ek u ateueh keuleudee gobnyan dan laju geujak, geutiyeub nabi nyang teuka nibak yehuda nyan. dan laju meurumpok ngon gobnyan dan geukalon nabi nyan teungoh geudeuk dimiyueb bak kayee raya. "peu kheueh droeneueh nyang nabi nibak yehuda nyan?" geutanyong le nabi tuha nyan. "beutoi, geujaweeb le ureueng nyan. "bohjak tajak makheun di rumoh ulon," geupeugah le nabi tuha nyan. teuma geujaweeb le nabi nibak yehuda nyan, "meuah! ulon hana jeuet lon teurimong undangan bapak keu lon jak makheun di rumoh bapak. meunan cit ulon hana teuma ulon makheun atawa lon jieb ie disinoe deungon bapak. tuhan ka geubri peurintah bak ulon mangkat bek lon makheun atawa lon jieb ie dan meunan cit bek teuma ulon woe rot nyang ka ltheueh ulon jak." dan nabi tuha nibak betel nyan pih laju geumeusulet ubak gobnyan, deungon geupeugah lagee nyoe, "ulon nyoe nabi cit lagee droeneueh nyoe. meunan cit ateueh peurintah tuhan sidroe malaikat ka geujak ubak ulon geuyuejak tueng ngon geuyue peujame droeneueh di rumoh ulon." dan nabi nibak yehuda nyan pih geupateh laju geuseutot u rumoh nabi tuha nyan dan oh trok keunan laju geumakheun deungon gobnyan. teungoh awaknyan geudeuk sira geumakheun, tuhan laju meufeuruman ubak nabi tuha nyan, sampoe gobnyan geudot nabi nibak yehuda nyan sira geupeugah, "tuhan geupeugah bahwa gata hana taat ubak gobnyan. gata hana tapeubuet peue nyang ka geupeurintah ubak gata. gata ka tawoe dan ka tamakheun ngon tajieb ie, padahai gata ka geutam keu tapeubuet hai nyang lagee nyan. le sababnyan gata teuma teupoh mate, dan manyet gata hana teuma teupeukubu didalam jrat keuluwarga gata." oh ka seuleusoe awaknyan geumakheun, nabi tuha nyan laju geupasang peulana ateueh guda nabi nibak yehuda nyan, dan geujak kheueh laju nabi nyan. bak teungoh rot uh nabi nyan jiteugom le singa, dan nabi nyan pi laju mate buet singa nyan. manyet gobnyan ka teutiek di ateueh rot, dan keuleudee gobnyan mantong na teudong rab ngon manyet nyan. singa nyan pi jidong disinan. bubena ureueng nyang jikak rot nyan, leumah laju jikalon manyet dan singa nyan disinan. laju awaknyan jikak u betel dan jipeugah laju peue nyang ka awaknyan ngieng. bak watee nabi tuha nyan geudeungoe hai nyan, gobnyan laju geupeugah, "pasti nyan nabi nyang hana taat ubak peurintah tuhan! nyang kheueh sabab jih tuhan geukirem sanganyan keu jikak teugom ngon jipoh mate gobnyan lagee nyang ka geupeugah le tuhan

sigohlom nyan." dan geupeugah kheueh le nabi tuha nyan ubak aneuek-aneuek gobnyan, "tapasang laju peulana ateueh keuleudee ulon." oh ka ltheueh geupasang ateueh keuleudee gobnyan, teuma gobnyan pih geujak laju. dan geukalon manyet nabi nibak yehuda nyan mantong na teutiek disinan deungon keuleudee dan singa nyang mantong na teudong disinan. singa nyan hana jiteugom keuleudee nyan, dan meunan cit hana teuma jipajoh manyet nyan. gobnyan laju geubeuot manyet nyan dan geukeubah laju di ateueh keuleudee gobnyan, dan oh ltheuehnyan geupeuwoe laju u betel keu geujak peuba-e ngon geujak kubu. nabi tuha nyan keudroe nyang kubu manyet nyan nibak kubu keuluwarga gobnyan, laju gobnyan dan aneuek-aneuek geuh geupeuratok ngon geupeuba-e manyet nyan. awaknyan geupeugah, "keubiet that-inseuh keu gata hai syedara ulon, keubiet that-that kamoe inseuh!" oh ltheuehnyan geupeugah le nabi tuha nyan ubak aneuek-aneuek gobnyan, "meunyo singoh ulon peulikit donya nyoe, tatanom kheueh ulon nibak kubu dan bak bineh nabi nyan. peue nyang ka geupeugah ateueh peurintah tuhan keu miseubah di betel dan keu banmandum teupat iebadat dibanda-banda samaria pasti teuma teujadi." raja yerobeam teutab hana geutem tinggai atawa geuboh buet gobnyan nyang jeuhet. keu teu useuha teupat-teupat iebadat nyang ka geupeudong nyan, gobnyan teutab mantong geupileh teungku imeum nibak keuluwarga-keuluwarga biasa. soemantong nyang jitem, laju geuangkat jeuet keu teungku imeum. buet gobnyan nyang jeuhet nyan sampoe jeuet keusabab keuturonan gobnyan keunong bala dan hanco meuteung bayeung hanmeuho saho. bak wateanyan aneuek agam yerobeam rhot ubak saket. geupeugah kheueh le yerobeam ubak peurumoh geuh, "gata meukeumah-keumah kheueh laju mangat tajak u silo u rumoh nabi ahia nyang yoh watee ilee ka ltheueh geupeugah bahwa ulon teuma jeuet keuraja israel. teuma gata meunymar kheueh mangkat ureueng laen hana jiteupeue soe gatanyan. taba kheueh keu gobnyan siploh boh ruti, bacut juadah dan meulisan saboh kaca. gata tanyong kheueh ubak gobnyan peue nyang ka teujadi deungon abia, aneuek geutanyoe. nabi nyan teuma geupeugah hainyan ubak gata." dan geujak kheueh laju ureueng bino yerobeam u rumoh nabi ahia di silo. nabi nyan hana hase le geumeungieng sabab mata geuh ka rabon le sabab umu gobnyan tuha that. teuma tuhan geupeugah ubak gobnyan bahwa peurumoh yerobeam teungoh jikak ubak gobnyan keu jikak teumanyong keuhai aneuek jih nyang saket. dan meunan cit tuhan geupeugah ubak nabi ahia peue nyang haroh geupeugah teuma. bak watee peurumoh yerobeam trok keunan, gobnyan geupeujeuet droe siulah-ulah gobnyan ureueng laen. teuma meunan nabi ahia geudeungoe su langkah gobnyan dibabah pintoe, gobnyan laju geupeugah, "gata tamang laju keunoe u dalam, ulon ka lon teupeue bahwa gata na kheueh peurumoh yerobeam. bek meupura-pura, na haba nyang hana get keu gata. tajakwoe kheueh laju dan tapeugah ubak yerobeam bahwa nyoe kheueh nyang ka geupeugah le tuhan, allah israel, "gata ka ulon pileh lamkawan rakyat dan ulon peujeuet peunguasa ateueh umat

ulon israel. gata ka ulonbri keurajeuen nyang ulon reubot nibak keuturonan nabi daud. teuma gata hana lagee hamba ulon nabi daud. jihnyan seutia that-that ubak ulon dan jitaat peue nyang ulon peurintah. jihnyan jipeubuet peue nyang ka ulon ankee. teuma gata ka tapeubuet buet nyang leubeuh rayeuk nibak buet jeuhet nyang ka jipeubuet le awaknyan nyang ka jimat peurintah sigohlom gata. gata tating-gai ulon dan tapeuteuka beungeh ulon deungon cara tapeuget beurala dan patong-patong nibak logam mangat teuseumah. le sabab nyan ulon teuma lon peuteuka bala ateueh keuluwarga gata. banmandum keuturonan gata nyang agam, peue kheueh mantong jabatan jih, jihnyan teupoh mate. ulon teuma lon peuhanco keuluwarga gata, saban cit lagee ureueng nyang rhah najih atawa kutoran. anggota keuluwarga gata nyang mate didalam banda manyet jih jipajoh le ase, dan nyang mate diluwa banda teuma jipajoh le cicem. ingat, ulon kheueh nyoe tuhan nyang peugah haba!" "Iheueh nyan nabi ahia geupeugah ubak peurumoh yerobeam, "nyang kheueh, jinoo tabeuduh dan tajakwoe kheueh laju! bak watee gata tatamong u dalam banda, aneuek gatanyan laju meuninggai donya. banmandum rakyat israel teuma meukabong dan jijak kubu manyet nyan. jih nyan kheueh sidroe lamkawan anggota keuluwarga yerobeam nyang teukubu seucara teuhoreumat, sabab teuma jihnyan kheueh nyang meukeunong bak ate tuhan, allah israel. israel teuma geubri le tuhan sidroe raja nyang jeuet keugeunantoe nibak keuturonan yerobeam sibagoe raja. uroe jih ka sampoe! phon watee nyoe tuhan teuma geuhukom israel sampoe meuhayak hayon lagee geulagah didalam ie. tuhan teuma geuhila rakyat israel nibak nangroe nyang get nyoe nyang ka geubri ubak nek indatu awaknyan. gobnyan geupeu crebre awaknyan u meurandeh krueng efrat, sabab awaknyan ka jipeuteuka beungeh tuhan deungon jipeugot patong-patong dewi asyera. tuhan teuma geutinggai israel sabab yerobeam ka meudesya dan jeuet keu sabab ureueng israel ka meudesya cit teuma." oh ka ltheuehnyan geujak woe kheueh peurumoh yerobeam u tirza. bak watee gobnyan geutamong u rumoh geuhnyan, aneuek gobnyan ka meuninggai. rakyat israel pi laju meukabong dan laju jijak kubu lagee nyang ka geupeugah le tuhan meulalu nabi ahia, hamba geuhnyan. kisah nyang laen keuhai raja yerobeam, na kheueh keuhai peumeurintahan gobnyan dan muprang nyang gepimpin, ka geucetet didalam kitab seujarah raja-raja israel. dua ploh dua thon treb jih yerobeam geumat peurintah sibagoe raja, oh ltheueh nyan gobnyan meuninggai donya dan teukubu. aneuek gobnyan nyang nan jih nadab geunantoe gobnyan sibagoe raja. bak watee rehabeam, aneuek nabi sulaiman, jeuet keuraja yehuda, gobnyan ka meu umu peuet ploh sa thon. gobnyan geumat peurintah tujuh blaih thon treb ji di yerusalem. nibak bansaboh nangroe israel teuma banda nyan kheueh nyang ka geupeukhusos le tuhan sibagoe teupat iebadat ubak gobnyan. ma rehabeam nyang nan naama nibak bansa amon. bansa yehuda ka jipeubuet buet nyang jeuhet nibak mata tuhan. buet awaknyan meutamah-tamah beungeh tuhan nibak banmandum nyang ka geu-

peubuet le indatu awaknyan. di ateueh buket-buket dan dimiyueb bak kayee nyang raya-raya, awaknyan jipeugot teupat-teupat teuseumah beurala, dan jipeudong tugu-tugu meunan cit deungon patong-patong asyera mangat jiseumah. di teupat-teupat nyang lagee nyan le awaknyan laju jipeubuet buet meumukah sibagoe peuseumahan keu tuhan. dan di ureueng agam pih jimeutugaih sibagoe ureueng lunte. ureueng yehuda jipeubuet banmandum buet nyang kuto dan luwat, mandum buet-buet nyan ka ltheueh jipeubuet le bansa-bansa nyang ka geu use le tuhan watee ureueng israel jitamong u dalam nangroe nyan. bak thon nyang keulimong nibak peumeurintahan rehabeam, na kheueh sisak, raja nangroe meuse jijak prang yerusalem. raja nyan laju jireupah banmandum barang nyang meuhai-meuhai yuem nyang na di dalam baet tuhan dan didalam meuligoe raja, meunan cit deungon peurisai-peurisai meuh nyang ka geupeugot le nabi sulaiman. dan sibagoe geunantoe jih raja rehabeam laju geupeugot peurisai-peurisai peurunggu, dan geupeucaya peugot atra nyan ubak peuwira nyang jikawai pintoe geureubang meuligoe raja. pajan mantong raja geujak u baet tuhan, le mandum peungawai laju jiba peurisai-peurisai nyan, oh ltheuehnyan atranyan jipeuriwang laju ubak kama raja. kisah nyang laen keuhai raja rehabeam ka teucetet di dalam kitab seujarah raja-raja yehuda. bak watee peumeurintahan rehabeam, sabe na prang lamkawan rehabeam ngon yerobeam. oh ltheuehnyan rehabeam meuninggai donya dan teukubu laju nibak kubu raja-raja di banda nabi daud. abiam, aneuek gobnyan nyang agam, laju jiduek geunantoe sibagoe raja. bak thon nyang keulapan blaih watee peumeurintahan geumat le raja yerobeam ateueh bansa israel, abiam jeuet keuraja yehuda, dan geumat peurintah nyan treb jih lthee thon di yerusalem. ma gobnyan nyang nan jih maakha, aneuek abisalom. abiam geupeubuet desya lagee nyang ka geupeubuet le ureueng syiek gobnyan. gobnyan hana sipeunoh ate seutia ubak tuhan allah, meulaen that deungon nabi daud, nyang indatu geuh nyan. teuma, deumi raja nabi daud, le tuhan, po teu allah nyang geuseumah le nabi daud, ka geubri ubak abiam sidroe aneuek sibagoe geunantoe gobnyan mat peurintah di yerusalem dan geupeuteuen banda nyan. tuhan geupeubuet nyang lagee nyan le sabab nabi daud ka geupeu mangat ate gobnyan. nabi daud hantom na geupeubeu-ah peue mantong nyang geupeurintah le tuhan, seulaen lam hai uria ureueng het nyan. prang rehabeam ngon yerobeam nyang jipeuphon bak watee rehabeam sampoe trok bak watee peumeurintahan abiam. kisah nyang laen keuhai abiam ka teucetet di dalam kitab seujarah raja-raja yehuda. abiam pih hana treb teuma meuninggai donya dan laju teukubu nibak banda nabi daud. asa aneuek gobnyan jeuet keuraja keugeunantoe gobnyan. bak thon nyang keudua ploh nibak thon peumeurintahan raja yerobeam ateueh israel, asa jeuet keuraja yehuda. gobnyan geumat peurintah na peuet ploh sa thon treb jih di yerusalem. nek gobnyan na kheueh maakha, aneuek abisalom. saban cit lagee nabi daud, indatu gobnyan, asa get that carong geucok ate tuhan sampoe tuhan that-that galak keu

gobnyan. banmandum inong jeuhet nyang jimeut-
gaih nibak rumah-rumoh tempat teuseumah dewa
ka habeh geuparoh, dan banmandum beurala nyang
jikeubah le raja-raja nyang mat peurintah sigohlom
gobnyan ka geusampoh bansaboh nangroe. nek
gobnyan, si maakha, ka geupeucat nibak tugaih jih
sibagoe ma suri, sabab le jihnyan ka jipeugot pa-
tong beurala nyang cabui lom ngon kuto keu asy-
era, dewi keusuboran. asa laju geupeureubah beurala
nyan dan laju geutot di panton kidron. bahpi hana
banmandum tempat seumah beurala geupeuhanco
le asa, teuma gobnyan teutab seutia ubak tuhan sipa-
nyang udeb gobnyan. banmandum meuh dan pir-
rak nyang ka geupeuseumah le bapak gobnyan ubak
tuhan, laju geuba u baet tuhan, meunan cit teuma
deungon meuh dan pirak, nyang geupeuseumah le
gobnyan keudroe. bak watee peumeurintahan raja
asa di yehuda dan raja baesa di israel sabe na prang
bandua raja nyan. baesa jiprang yehuda dan geu-
peukong banda rama keugeujak tob rot teubiet ta-
mong u yehuda. le sababnyan raja asa geucok ban-
mandum meuh dan pirak nyang mantong na di baet
tuhan dan meunan cit nyang na didalam meuligoe
raja laju atra nyan geukirem u damsyik ubak ben-
hadad raja siria, aneuk tabrimon, ureueng nyan na
kheueh cucoe hezion. barang-barang nyan laju
geukirem deungan peurantaraan napadub droe peu-
jabat meuligoe, sira geupeusan nyang lagee nyoe, "jak
kheueh geutanyoe tapeuget ngon taikat meusahabat
lagee nyang ka geuikak le ureueng-ureueng tuha geu-
tanyoe. meusajan deungan nyoe ulon kirem meuh
dan pirak sibagoe hadiah, dan ulon meulakee ubak
teungku beuneu peuputoh hubungan deungan baesa
raja israel, mangat jihnyan jitarek lom pasokan jih di-
dalam wilayah ulon." benhadad laju situju deungan
pakat nyan dan laju geuyue banmandum peurwira-
peuwira gobnyan meusigoe deungan pasokan gob-
nyan jijak prang bubena banda-banda israel. laju
jipeutalee le awaknyan iyon, dan, abel-bet-maakha
dan kinerot nyang to ngon danau galilea meunan cit
banmandum wilayah naftali. bak watee baesa geude-
ungoe hainyan, gobnyan laju geupioh geupeukong
rama. gobnyan laju geujak u tirza dan keu sikeujab
watee hana geumuprang. oh ka ltheueh nyan, ban-
mandum ureueng di bansaboh yehuda hana keucuali
laju geupeurintah le raja asa keu jijak angkat batee
ngon kayee nyang geupeuguna le baesa di rama keu
teupeuteun ngon kong banda nyan. bahan-bahan
nyang geupeuguna le asa keu teupeukong banda mizpa
dan geba, saboh banda didalam wilayah benyamin.
kisah nyang laen keuhai raja asa nyan na kheueh, keu-
pahlawanan gobnyan dan banda-banda nyang geu-
peukong le gobnyan, nyan ka teucetet lam kitab
seujarah raja-raja yehuda. bak watee gobnyan ka
tuha asa keunong peunyaket nibak bandua blaih gaki
geuh. asa meuninggai dan teukubu laju nibak jeurat
raja-raja di banda nabi daud. yosafat, aneuk gob-
nyan nyang agam jeuet keuraja keugeunantoe gob-
nyan. bak thon nyang keudua yohmasa peumeur-
intahan raja asa ateueh yehuda, nadab aneuk ye-
robeam jeuet keuraja di israel dan geumat peurintah
dua thon treb jih. saban cit lagee ureueng syiek geuh
nyang ka geumat peurintah sigohlom nyan, gobnyan

geupeubuet buet nyang jeuhet bak mata tuhan le
sabab buet geuhnyan ureueng israel meudesya. baesa,
aneuk ahia, nibak sukee isakhar ka jimeukumplot
keuneuk jak lawan nadab, laju jipoh mate jihnyan.
bak watee nyan nadab deungan pasokan geuh nyan
teungh nyang jipeupong banda gibeton di dalam wilayah
filistin. nyan na jih nibak thon nyang keulhee bak
watee peumeurintahan raja asa ateueh yehuda. me-
unan kheueh baesa jeuet keuraja israel keugeun-
antoe nadab. banmantong oh ka ltheueh baesa jeuet
keuraja, gobnyan laju geupoh mate banmandum keu-
luwarga yerobeam. paih lagee peue nyang ka geu-
peugah le tuhan meulalu hamba gobnyan, nabi ahia
di silo, deungan nyan teuma banmandum keuluwarga
yerobeam ka habeh teupoh mate, hana meusidroe pih
nyang na tinggai. yerobeam meudesya dan le sabab-
nyan ureueng israel pi meudesya. deungan lagee
na yerobeam ka geupeujeuet tuhan meureuka nyang
hana ngon peusa, nyan kheueh allah nyang jiseumah
le ureueng israel. kisah nyang laen keuhai nadab nyan
ka teucetet didalam kitab seujarah raja-raja israel.
seudubna treb watee peumeurintahan raja baesa ni-
bak israel, prang sabe na hantom reuda baesa deun-
gon raja asa nibak yehuda. bak thon nyang keulhee
nibak thon peumeurintahan raja asa ateueh yehuda,
baesa aneuk ahia ka jeuet keuraja ateueh bansaboh
israel. gobnyan geumat peurintah di tirza dua plo-
h peuet thon treb jih. saban cit lagee raja yerobeam
nyang mat peurintah sigohlom nyan, raja baesa pih
meudesya ubak tuhan dan le sabab nyan ureueng is-
rael pih rhoh meudesya. dan feureuman tuhan ubak
nabi yehu aneuk hanani, "gata peutrok ubak baesa
haba ulon nyoe, 'yoh masa ilee gata sapeue hana jeuet,
teuma gata ka ulon peujeuet keupeumimpin ateueh
umat israel. jinoenyoe gata ka meudesya lagee ye-
robeam dan le nyan teuma jeuet keu sabab umat ulon
israel ka meudesya, le sababnyan teuka meureuka
ulon nyang hana teupeu amphon. le sababnyan ulon
teuma lon peuhabeh gata dan keuluwarga gata saban
cit lagee nyang ka ulon peubuet ateueh yerobeam.
anggota keuluwarga gata nyang mate di banda jipa-
joh le asee, dan awaknyan nyang mate dilwa banda
teuma jipajoh le cicem.' " peusan tuhan ubak baesa
dan keuluwarga gobnyan geupeutrok le nabi yehu
sabab baesa ka geupeubuet nyang jeuhet nibak mata
tuhan, baesa jipeuteuka meureuka tuhan nyang hana
meuamphon, kon le sabab jihnyan ka jipoh mate
banmandum keuluwarga yerobeam. kisah nyang
laen keuhai baesa meunan cit jitamong keunan keu-
pahlawanan gobnyan, atranyan ka teuteuleh didalam
kitab seujarah raja-raja israel. baesa meuninggai laju
teupeukubu nibak jrat di tirza. ela, aneuk agam gob-
nyan, baiat keugeunantoe gobnyan sibagoe raja. bak
thon nyang keu dua plo-
h nam peumeurintahan raja
asa ateueh yehuda, ela aneuk baesa ka jeuet keu-
raja ateueh israel. gobnyan geumat peurintah di tirza
dua thon treb jih. zimri, na kheueh sidroe lamkawan
peuwira nyang jimat siteungh nibak pasokan geu-
ritan, jihnyan ka jimeukumplot keuneuk jaklawan
ela. bak siuroe di tirza, ela jijieb ie kreueh nyang
lumpahle sampoe gobnyan mabok di rumoh arza,
ulee rumoh tangga di meuligoe raja. laju zimri jita-
mong dan jipoh mate si ela, oh ltheueh nyan gobnyan

laju jeuet keuraja keugeunantoe ela. nyan jeuet jih bak thon nyang keudua ploh tujuh peumeurintahan raja asa ateuh yehuda. hana treb oh ka ltheuh zimri jeuet keuraja, gobnyan laju geupoh mate banmandum keuluwarga raja baesa. meunan cit banmandum wareh kawom baesa nyang agam meunan cit rakan-rakan keuluwarga gobnyan pih hana nyang tinggai bahpi meusidro kong. paih lagee peue nyang ka geupeugah le tuhan keuhai baesa meulalu nabi yehu, banmandum keuluwarga baesa teupoh mate. baesa dan ela, aneuek gobnyan, jiseumah dewa-dewa dan le sababnyan nyan ureueng israel jipeubuet desya. le nyan teuma, awaknyan ka jipeuteuka meureuka tuhan, allah nyang haroh jiseumah le ureueng israel. kisah nyang laen keuhai ela nyoe ka teucetet didalam kitab seujarah raja-raja israel. bak thon nyang keudua ploh tujuh lam thon peumeurintahan raja asa ateuh yehuda, zimri nyang jeuet keuraja israel dan geumat peurintah di tirza nyang treb jih na tujuh uroe. bak wateenyan tantra israel teungoh jikeupong gibeton, banda ureueng filistin. bak watee jideungoe le awaknyan bahwa zimri ka jimeukemplot jilawan raja dan jipoh mate rajanyan, bak uroenyan cit teuma nibak khimah droe awaknyan, awaknyan banmandum jibaiat omri panglima awaknyan sibagoe raja israel. oh ltheueh nyan omri dan pasokan gobnyan laju geutinggai gibeton dan laju geujak keupong tirza. bak saat zimri geukalon bahwa banda nyan ka jireubot, gobnyan laju geutamong u dalam meuligoe dan laju geutot meuligoe nyan meusigoe deungon droe gobnyan, dan mate ktheueh si zimri nyan. nyan jeuet jih sabab geuh nyan ka geupeubuet buet nyang jeuhet nibak mata tuhan. saban cit lagee raja yerobeam, zimri pih ka meudesya ubak tuhan le sabab nyan ktheueh umat israel ka meudesya ubak tuhan. kisah nyang laen keuhai zimri nyoe, jitamong cit keunan kumplotan peukhianat jih, nyan ka teucetet didalam kitab seujarah raja-raja israel. le sababnyan teuka ktheueh karu ngon reutak lam bansa israel sabab na nyang meuheuet mangat tibni aneuek ginat nyang jeuet keuraja, teuma na cit nyang meuheuet omri nyang jeuet keuraja. akhe jih awaknyan nyang jidong blah omri nyang meunang. tibni mate dan omri jeuet keuraja. nyan na jih bak thon nyang keu lthee ploh sa bak watee peumeurintahan raja asa ateuh yehuda. omri geumat peurintah sibagoe raja ateuh israel dua blaih thon treb jih. dan nam thon bak awaiphon peumeurintahan gobnyan geumat peurintah di tirza. teuma oh dudo gobnyan geubloe saboh gunong nyang yuem jih 6.000 peng pirak nibak sidroe ureueng nyang nan jih semer. laju gobnyan geupeudong saboh banda di gunong nyan dan geuboh nan banda samaria, meunurot nan semer, atra hak milek nyang ka lumpah treb ateuh gunong nyan. omri geupeubuet desya-desya nyang leubeh rayeuk nibak nyang ka geupeubuet le raja-raja nyang ka geumat peurintah sigohlom gobnyan. saban cit lagee yerobeam, omri meudesya sira teusabab ureueng israel pi meudesya dan teuseumah dewa. le sabab nyan tuhan allah nyang haroh jiseumah le ureueng israel ka jeuet keumeureuka nyang hana peusa. kisah nyang laen keuhai raja omri dan peue mantong nyang ka geupeubuet nyan ka teucetet lam kitab seujarah

raja-raja israel. oh ka ltheueh omri nyan meuninggai dan teupeukubu di samaria, ahab aneuek gobnyan teubaiat jeuet keuraja keugeunantoe ureueng syiek geuh. bak thon nyang keu lthee ploh lapan bak watee peumeurintahan raja asa ateuh yehuda, ahab aneuek omri ka jeuet keuraja ateuh israel dan geumat peurintah di samaria na dua ploh dua thon treb jih. gobnyan pih ka geupeubuet desya-desya nyang lumpah rayeuk meunurot bak mata tuhan nibak raja-raja nyang laen sigohlom gobnyan. gohlom seb cit nibak gobnyan udeb nyang peunoh deungon desya lagee nyang ka geupeubuet le raja yerobeam, gobnyan pih geumeukawen deungon izebel aneuek raja etbaal di sidon, dan gobnyan geumeu iebadat ubak baal. gobnyan laju geupeudong rumoh iebadat di samaria keu baal, dan didalam rumoh iebadat nyan gobnyan laju geupeuget saboh miseubah keu dewa nyan. meunan cit gobnyan geupeuget patong dewi asyera. gobnyan pi geupeubuet leubeh le desya nibak nyang ka geupeubuet le raja israel nyang laen nyang ka geumat peurintah sigohlom gobnyan. le sabab nyan gobnyan ka geupeuteuka meureuka tuhan, allah nyang haroh jiseumah le ureueng israel. bak watee peumeurintahan geumat le ahab, banda yerikho geupeudong lom teuma le hiel ureueng betel. teuma lagee nyang ka teupeugah sigohlom nyan le tuhan meulalu yosua aneuek nun, hiel ka gadoh dua droe aneuek gobnyan: abiram nyang paleng tuha meuninggai donya bak watee hiel geupasang dasai banda, dan sebug nyang tulot meuninggai watee hiel jipeuget pintoe-pintoe geureubang banda nyan. na sidroe nabi nyang nan geuh elia. nabi nyan asai geuh nibak tisbe, saboh banda lam wilayah gilead. bak siuroe gobnyan geujak ubak raja ahab dan geupeugah, "deumi tuhan nyang udeb, po teu allah nyang jiseumah le ureueng israel dan nyang ulon peutimang, ulon peugah ubak teungku bahwa dua atawa lthee thon nyang ukeue nyoe hana jitreun iembon atawa ujeuen meubacut pi, laen hai meunyoel ulon nyang peugah nyan." oh ka ltheueh nyan tuhan geumeu feureuman ubak elia, "gata tinggai laju teumpat nyoe, tajak laju u timu di meurandeh krueng yordan dan tamusom laju disinan bak bineh aneuek krueng kerit. gata jeuet tajib ie nibak aneuek krueng nyan, dan citem gagak teuma ulon yue jijakka peunajoh keu gata." elia geuseutot banmandum peue nyang geupeurintah le tuhan nyan, dan geujak laju ubak bineh aneuek krueng kerit laju geutinggai disinan. gobnyan geujieb nibak ie aneuek krueng nyan, dan geupajoh ruti dan uengkot sie nyang jiba le citem gagak tieb-tieb beungoh meunan cit tieb-tieb seupot uroe. oh ka na meupadub na treb teuma, aneuek krueng nyan pi tho kreg sabab hanale ie. oh ltheuehnyan tuhan geupeugah ubak elia, "jinoenyoel gata haroh tajak u banda sarfat, banda nyan rab ngon sidon dan gata tatinggai laju disinan. ulon ka lon yue sidroe ureueng inong balee disinan mangat ureueng inong nyan jibri makheun keu gata." dan geujak ktheueh elia u sarfat. oh watee ka trok bak pintoe geureubang banda nyan, deuh laju geukalon sidroe inong balee teungoh geukoih kayee apui. laju geupeugah le elia ubak inong balee nyan, "umi, neutulong cok bacut ie jieb keu ulon." bak watee inong balee nyan teun-

goh geujak geujakcok ie jieb nyang geulakee nyan, elia geutawok lom, "umi, neuba sajan ngon ruti bacut." inong balee nyan geujawueub, "deumi tuhan nyang udeb, po teu allah nyang geuseumah le bapak, ulon meusumpah bahwa nibak ulon hana mubacut pi ruti. bak ulon nyang na saboh reugam teupong gandom didalam cipe, dan na bacut minyeuk zaiton didalam kaca. ulon teungoh lon peusapat kayee apui ngon meukeusut keuneuk jak taguen teupong nyang bacut nyan, mangat ulon dan aneuk ulon jeuet teupajoh nyan. nyang kheueh peunajoh kamoe nyang keuneul-heuh; oh lleueh nyan kamoe teuma kamoe preh pajan mawot teuka ateuheh kamoe." "bek khawate ngon picek ate neuh, hai umi meutuah!" kheun elia ubak inong balee nyan, "neujak laju umi neujak taguen peunajoh keu umi dan aneuk umi. teuma sigohlom nyan umi peuget ilee saboh ruti ubiet nibak teupong dan minyeuk nyan, dan neuba kheueh atranyan keunoe. sabab tuhan, po teu allah nyang jiseumah le ureueng israel, ka geupeugah bahwa pireng umi nyan teuma sabe peunoh dan measo deungon teupong, dan kaca minyeuk nyan sabe peunoh measoe minyeuk sampoe nibak watee jih tuhan geukirem ujeuen jitreun u ateuheh bumoe." dan geujak kheueh laju inong balee nyan geujak peubuet peue nyang ka geupeugah le elia. dan awaknyan ban llee droe kana teukeubah peunajoh nyang seb keu meu uroe-uroe treb jih. dan lagee nyang ka geupeugah le tuhan meulalu elia, cipe nyan hana putoh-putoh measo sabe deungon teupong, dan kaca minyeuk nyan pih hantom tho deungon minyeuk didalam nyan. na padub treb teuma oh lleueh nyan aneuk inong balee jiteuka deumam sampoe rhot ubak saket. maken treb saket aneuk nyan maken brat akhejih aneuk nyan pi meuninggai donya. laju geupeugah le inong balee ma aneuk nyang ka mate nyan ubak elia, "hamba alah, pakon bapak neupeubuet hainyoe ateuheh ulon? peu kheueh bapak neujak keunoe keu teujak teuping ingat po teu allah keuhai desya-desya ulon, sampoe aneuk ulon meuninggai donya?" geujawueub le elia, "neuba aneuk nyan keunoe bak ulon." laju elia geucok aneuk agam nyan nibak ma jih, geuba laju aneuk nyan u ruweueng ateuheh, lam kama teupat meunumpang elia. elia laju geupeueh aneuk nyan di ateuheh teupat eh, laju geumeudoa deungon sy nyang teuga, "ya, tuhan, allah ulon, pakon droeneuh ya tuhan neupeuteuka balanyoe u ateuheh inong balee nyoe? inong nyoe ka jibri meunumpang keu ulon dan jinoenyoe droeneueh cok teuma aneuk gobnyan!" oh lleueh nyan na llee goe elia geudugom badan gobnyan di ateuheh aneuk nyang ka mate nyan, sira geumeudoa, "ya, tuhan, allah ulon, neupeu udeb kheueh aneuk nyoe!" tuhan geudeungoe doa elia; aneuk nyan ka jipeuphon meunafah dan laju udeb lom teuma. laju elia geutreu nibak kama gobnyan sira geuba aneuk nyan ubak ma droe jih dan geupeugah, "umi, nyoe aneuk umi! jihnyoe ka udeb lom!" inong balee nyan geujawueub, "jinoenyoe ka ulon teupeue bahwa bapak na kheueh sidroe hamba po teu allah dan haba bapak keubiet beutoi teuka nibak tuhan!" na meupadub na treb teuma oh lleueh nyan, bak thon nyang keulhee teungoh musem khueng nyang tho kreng nyan, tuhan geupeugah ubak elia,

"tajak laju meuhadab ubak raja ahab, hana treble ulon teuma lon peutreu ujeuen." dan beurangkat kheueh elia. bak watee beuncana musem deuk ka biet-biet that parah di samaria. le sababnyan ahab laju geuhoi obaja keujijak meuhadab. (obaja nyan kheueh ulee rumoh tangga meuligoe. gobnyan sidroe ureueng nyang beutoi-beutoi meueibadat ubak tuhan. bak watee izebel jipoh mate bubena nabi-nabi tuhan, obaja nyoe geuteume tulong na 100 droe nabi deungon cara geusom awaknyan didalam guha – 50 droe dalam saboh guha – meunan cit geubri keu awaknyan peunajoh dan ie jieb.) ahab geupeugah ubak obaja, "jak tanyoe tajak jeulajah bansaboh nanggroe nyoe mangat tajak mita mata ie atawa krueng. mungen geutanyoe hase ta teume naleueng keu peunajoh guda dan bagal geutanyoe, dan mangat bek tapeumate meusaboh pih nibak beulatang peulara geutanyoe." oh ka lleueh teubagi daerah nyang teuma jitamong nyan, awaknyan pih laju jijak. ahab ubak saboh jurosan dan obaja u jurosan nyang laen. bak teungoh rot ueh obaja laju meurumpok deungon elia. oh ka geuturi bahwa nyang meurumpok nyan na kheueh elia, obaja laju geusujut keu geuhoreumat gobnyan dan sira geu tanyong, "peu kheueh beutoi bahwa bapak nyoe elia?" "beutoi, ulon nyoe na kheueh elia," geujawueub le elia. "jinoenyoe tajak peugah laju ubak raja gata bahwa ulon kana disinoe." geujawueub le obaja, "peue salah ulon sampoe bapak neukeuneuk jok ulon ubak ahab mangat jeuet ulon nyoe jipoh mate? deumi tuhan nyang udeb, po teu allah nyang bapak seumah, ulon peugah bak saatnyoe bahwa raja geuyue ulon jak mita bapak dipat mantong beumeurumpok. meunyoe bak saboh nanggroe nyang mat kuasa disinan geupeugah bahwa bapak hana disinan, ahab geulakee ubak peunguasa nanggroe nyan beujitem meusumpah bahwa bapak bit-bit hana deuh disinan. dan jinoenyoe bapak neuyue ulon mangat lontem jak ubak raja nyan dan lon peugah laju bahwa bapak na disinoe? meunyoe ulonjak nibak teupat nyoe, roh tuhan mungen geuba bapak u teupat nyang hana ulon teupeue! dan meunyoe hainyoe ulon peugah ubak ahab bahwa bapak na disinoe, oh lleueh nyan gobnyan hana meurumpok deungon bapak, ka teunte geuhnyan teuma geupoh mate ulon. neuteupeue kheueh hai bapak, bahwa ulon nyoe bit-bit ulon meueibadat ubak tuhan phon yoh ubit kon! peu kheueh gohlom bapak deungoe bahwa bak watee izebel geupoh mate banmandum nabi-nabi tuhan, ulon nyang som nibak awaknyan 100 droe didalam guha – 50 droe dalam saboh guha – dan ulon bri keu awaknyan peunajoh meunan cit deungon ie jieb? jinoenyoe, pakon bapak neuyue ulon mangat lonjak peugah ubak raja bahwa bapak kana disinoe? gobnyan ka pasti ulon nyoe geupoh mate!" geujawueub le elia, "deumi tuhan nyang mahakuasa nyang ulon peutimang, ulon meujanji teuma ulon jak keudroe keujak meuhadab raja bak uroenyoe cit teuma." dan geujak kheueh laju obaja geujak meulapor ubak raja, dan ahab pih geubeurangkat keu geujak meurumpok deungon elia. bak watee ahab geukalon elia, ahab geumeuhoi, "nyoe kheueh ureueng nyang peuna karu di israel!" "ulon bukan ureueng peuna karu," geuseuot elia, "teuma teungku amphon keudroe nyang peuna

karu. teungku amphon dan keuluwarga amphon nyang peuna karu pajan dan dipat mantong. deungon cara neuseumah beurala-beurala baal, teungku amphon ka iengkeue peue nyang ka geupeurintah le tuhan. jinoenyoe, neupeurintah kheueh ubak banmandum rakyat israel mangat jijak meurumpok ngon ulon di gunung karmel. neuba cit teuma ban peuet reutoih limong ploh nabi baal dan peuet reutoih nabi dewi asyera nyang jibiya le peureumaisuri izebel!" dan ahab laju geukrah banmandum rakyat dan nabi-nabi baal nyan u gunung karmel. le elia laju geupurab ubak rakyat nyan dan geupeugah, "trok an pajan gatanyoe banmandum teutab meudua ate? meunyoe tuhan nyan allah, seumah kheueh tuhan! meunan cit meunyoe baal nyan allah, seumah kheueh baal!" bubena rakyat nyang meusapat disinan sengubang banmandum. oh lheureh nyan elia geupeugah lom, "lamkawan nabi-nabi tuhan teuma ulon kheueh nyang na mantong tinggal, padahai disinoe na 450 nabi baal. jinoenyoe taba laju keunoe ubak ulon duaboh leumo agam. neuyee nabi-nabi baal nyan jijak-cok saboh dan yusie laju, oh lheureh nyan yue koh-koh laju dan keubah laju di ateuheh kayee apui. teuma awaknyan hana jeuet jipuhu apui disinan. leumo nyang saboh teuk teuma ulon peusiab nyang lagee nyan cit. ulon teuma lon sie keudroe dan lon koh-koh keudroe meunan cit ulon teuma nyang keubah di ateuheh kayee apui. meunan cit di ulon hana teuma ulon peukab apui disinan. bah kheueh nabi-nabi baal nyan jimeudoa ubak dewa-dewa droe jih, dan ulon pih teuma ulon meudoa ubak tuhan. nyang geujaweeb deungon geukirem apui, gobnyan kheueh po teu allah." banmandum rakyat jiseut deungon su nyang teuga, "sitiuju!" laju geupeugah le nabi elia ubak nabi-nabi baal nyan, "sabab gatanyoe rame that, cuba gata ilee nyang pileh leumo nyan dan gata peusiab laju. teuma bek gata pekab apui nibak kayee nyan. oh ka lheureh nyan gata meudoa kheueh ubak ilah gata." le awaknyan laju jipileh saboh leumo dan jipeusiab laju. oh ka lheurehnyan awaknyan jimeudoa ubak baal phon beungoh sampoe an cot uroe sira jiklik-klik ngon su nyang meutaga, "neujaweeb kheueh kamoe, baal!" awaknyan jipeubuet nyan sira hana piyoh-piyoh jimeulikang ngon jimeunari bansikeulileng miseubah droe jih nyan. teuma hana teujaweeb meubacut pih. paih bak watee cot uroe timang nabi elia geupeu phon hina ngon geu ejek awaknyan, "meudoa kheueh leubeh teuga lom! jihnyan ilah, kon? mungken jihnyan teungoh teumanueng, atawa jijak ukrung cut. atawa mungken jihnyan teungoh jijak-jak! atawa mungken jihnyan teungoh teungeut, dan gata haroh gata peugo jihnyan!" nabi-nabi nyan jimeudoa leubeh teuga lom. dan saban cit lagee nyang ka lazem jipeubuet le awaknyan, badan droe jih laju jicureh-cureh deungon mata peudeueng dan kapak sampoe darah jiteubiet meu cro-cro ro ateuheh tanoh. meunan kheueh cara awaknyan hana jipih sampoe ka seupot uroe lagee ureueng jitamong jen. teuma hana nyang jaweeb, dan hana nyang jitem pako. laju geupeugah le elia ubak banmandum rakyat nyan, "gata peurab keunoe!" awaknyan banmandum meungmpoi ban sikeulileng gobnyan, oh lheureh nyan gobnyan laju geupeuguet miseubah tuhan nyang ka reuloih.

gobnyan laju geucok dua blaih neuk aneuk batee, tieb-tieb batee nyan teuwiki saboh lam dua blaih boh sukee keuturonan nabi yakub, nyan kheueh ureueng nyang ka geuboh nan israel le tuhan. deungon batee-batee nyan elia laju geupeugot lom miseubah tempat iebadat ubak tuhan. bansikeulileng miseubah nyan gobnyan laju geukeuh lueng nyang lumpah rayeuk sampoe hase teupaso ie leubeh kureueng limong blaih aree ie. gobnyan laju geususon kayee apui di ateuheh miseubah, dan leumo nyang saboh geukoih-koih dan geupeuduek laju di ateuheh kayee nyan. oh lheurehnyan gobnyan geupeugah, "tapaso laju peuet boh guci ie beupeunoh, ienyan gata ro u ateuheh keureubeuen peuseumahan dan meunan cit u ateuheh kayee jih." oh ka lheureh geupeubuet le awaknyan hainyan, gobnyan laju geupeugah, "sigoe teuk," dan awaknyan laju jipeubuet nyang lagee nyan lom. "si-goe teuk," geupeugah le nabi elia, dan awaknyan laju jipeubuet. dan ie nyan pih laju ji-ile bansikeulileng miseubah sampoe lueng nyan pih ka peunoh. oh ka trok bak watee teupeuseumah keureubeuen seupot uroe, nabi elia geupeuto laju ubak miseubah dan geumeudoa, "ya tuhan, allah nyang geuseumah le nabi ibrahim, nabi ishaq dan nabi yakub, neupeunyata kheueh bak saatnyoe bahwa droeneueh kheueh po teu allah di israel, dan ulonnyoe na kheueh bahwa droeneueh. meunan cit neupeunyata kheueh jinoenyoe bahwa peue nyang ulon peubuet nyoe na kheueh ateuheh peurintah droeneueh. neujaweeb kheueh, ya tuhan, jaweeb kheueh, mangat rakyat nyoe jiteupeue bahwa droeneueh, ya tuhan, na kheueh po teu allah, dan bahwa droeneueh kheueh nyang peujeuet awaknyan jiwoe ubak droeneueh." laju tuhan geukirem apui di langet dan apui nyan laju jiliet sampoe hangoh keureubeuen nyan meunan cit deungon kayee apui nyan banmandum hangoh jitol le apui, batee-batee nyan, tanoh jihnyan dan ie nyang na disikeulileng lueng nyan pih habeh teusampho jipajoh le apui nyan. bak watee jikalon le rakyat hainyan, awaknyan banmandum reubah teudugom bak tanoh sira jipeugah, "tuhan nyan allah! keubiet tuhan nyan allah!" dan geupeugah kheueh le nabi elia, "drob laju nabi-nabi baal nyan! bek tapeubiyeu meusidroe pih jiteumeuplueng!" le ureueng rame nyan pih laju jidrob nabi-nabi baal nyan oh lheureh nyan jijok ubak nabi elia dan le nabi elia nabi-nabi baal nyan geuba laju ubak bineh krueng kison dan disinan laju geupoh mate banmandum awaknyan. oh lheureh nyan geupeugah kheueh le nabi elia ubak raja ahab, "jinoenyoe ka jeuet teungku amphon neujak makheun! sabab sikeujab teuk jitreun ujeuen, su gogo dilanget ka teudeungoe." ban geudeungoe nyan ahab laju geujak makheun, dan nabi elia pih geujak ek laju u ateuheh gunung karmel. disinan gobnyan laju geusujut deungon muka gobnyan jab bak tanoh nibak bandua blaih keurampang pha geuh. ubak peulayan gobnyan laju geupeugah, "tajak ek laju u ateuheh pucak gunung nyoe dan gata ngieng laju u laot." hamba nyan jijak ek laju, oh lheureh nyan jigisa sira jipeugah, "hana deuh ulon kalon sapewe ya teungku po." teuma le nabi elia sampoe tujohgoe geuyee namiet geuhnyan mangat jiteungon u pucak gunung geuyee jak ngieng peue nyang teuma leumah. teuma bak nyang keutujohgoe

jih namiet nyan jigisa laju geupeugah, "leumah ulon ngieng na awan bube tapak jaroe jiteuka nibak arah laot." teuma elia geupeugah lom ubak hamba geuh nyan, "tajak peugah laju ubak raja ahab, yue ek laju gobnyan u ateuh geuritan geuh dan yuewoe bubagaih sigohlom gobnyan teuhalang le ujeuen nyang raya jitreun sikeujab teuk." lam sikeujab mantong langet ka itam deungon reudok, dan angen badee pih teuka dan ujeuen teuga pih ka jitreun ban salamle. ahab geuek laju u ateuh geuritan dan laju geujakwoe u yizreel. bak watee nyan nabi elia meuteume teunaga nibak tuhan. geucok jubah geuh laju geulipat u ateuh dan geuik laju nibak keuieng laju geuplueng ukeue geutinggi ahab sipanyang jalan akhe jih trok kheueh gobnyan ubak babah pintoe geureubang banda yizreel. peue nyang ka geukalon nyan le raja ahab laju geupeugah ubak peurumoh gobnyan izebel, peue mantong nyang ka geupeubuet le nabi elia, meunan cit pakriban elia ka geupoh mate banmandum nabi-nabi baal. le izebel geukirem laju haba ubak nabi elia lageenyoe, "seumoga bubena dewa geuhukom ulon, dan beugeupoh mate ulon nyoe, meunyoeh singoh beungoh bak watee nyang lageenyoe ulon hana ulon hukom gata lagee gata nyang ka neuhukom banmandum nabi-nabi baal." ban geudeungoe haba nyan nabi elia teumakot that-that, dan gobnyan pih laju geuplueng mangat bek jipoh le izebel. geujak laju ngon peulayan geuh u bersyeba di yehuda. disinan gobnyan laju tinggai ngon peulayan geuh nyang seutia nyan, dan deungon gaki geujak laju u padang pasi siuroe peunoh oh lheurehnyan geupioh laju diyueb bak kayee rampak. dimiyueb bak kayee nyan laju geudeuk dan peurasan gobnyan keuneuk mate mantong. kheun gobnyan "ulon hana ek lon teunle, ya, tuhan. neucok mantong nyawong ulon nyoe. ulon hana leubeh jroh nibak indatu ulon!" oh ka lheureh geupeugah nyan nabi elia pi laju teueh dimiyueb bak kayee nyan sampoe teunguet. deungan hana teusangka-sangka teuka sidroe malaikat geujak mat gobnyan sira geupeugah, "beudoh kheueh, hai elia, dan jak makheun laju!" nabi elia geukalon bansikeulileng, dan leumah laju geukalon rab ngon ulee gobnyan saboh ruti nyang ka lheureh teutot dan saboh calueng nyang ka meuasongon ie. atranyan pih laju geumakheun meunan cit deungon ie laju geujieb, oh ka lheureh nyan jiehlom. dan keu nyang keuduagoe malaikat tuhan geuteuka ubak gobnyan sira geumat ngon geupeugah le malaikat nyan, "beudoh laju, hai nabi elia, jak laju makheun, mangat gata teuga dan hase tajaklom sabab langkah gata mantong that jioh." meunan cit, lagee nyang ka geupeubuet buno, nabi elia pih geubeudoh laju geumakheun ngon geujieb ie. dan oh lheurehnyan gobnyan pih ka teuga dan ka hase geujak peuet plohuore treb jih sampoe trok u gunong sinai, ditempat po teu allah geupeugah droe. disinan nabi elia geumudom didalam guha. le tuhan geupeugah ubak gobnyan, "hai elia, peue gata peubuet disinan?" geujawueh le nabi elia, "nyoepeat ulon, ya tuhan, allah nyang mahakuasa, ulon sabe meukeureuja teuma keu droeneueh keudroe. teuma umat israel ka ji iengkeue janji jih deungon droeneueh. awaknyan jikajareuloih bubena miseubah droeneueh dan jipoh mate bubena nabi droeneueh. teuma ulon kheueh

nyang mantong tinggai, dan jinoenyoe pih awaknyan jikeuneuk poh ulon!" "gata teupeubiet laju lam guha nyan," geupeugah le tuhan ubak gobnyan, "dan tadang kheueh jak meuhadab ulon di ateuh gunung." dan tuhan pih geujak rot nyan, jipeuphon le angen bade nyang jipot tajam sampoe buket-buket beukah dan gunung-gunong batee pih hanco. teuma tuhan hana geupeuleumah droe nibak lam angen nyan. oh ka lheureh angen nyan reuda, teuka teuma geumpa bumoe. teuma lam geumpa nyan pih tuhan hana cit geupeuleumah droe. oh ka lheureh nyan teuka teuma apui, meunan cit tuhan pih hana geupeuleumah droe lam apuinyan. oh ka lheureh nyan keuadaan kajeuet keuseungab, sungue hana teuleungoe sapeue, dan laju teudeungoe saboh su nyang ubit teuma leumoh leumbot. bak watee geudeungoe le nabi elia su nyan, ruman gobnyan laju geutob ngon bajee jubah geuh, dan oh lheureh nyan laju geuteubiet dan geudong bak babah pintoe guha. dan geudeungoe lom su nyang geupeugah, "elia, peubuet peue gata disinoe?" geujawueh le elia, "ya tuhan, allah nyang mahakuasa, ulon sabe meubiet teuma keu droeneueh keudroe. teuma umat israel ka ji iengkeue janji jih deungon droeneueh. awaknyan ka jireuloh bubena miseubah miseubah droeneueh dan ka jipoh mate dumna nabinabi droeneueh. teuma ulon kheueh nyang mantong tinggai, dan ulon pih le awaknyan jikeuneuk poh mate!" tuhan meufeureuman lom, "gata woe kheueh u padang pasi tou ngon damsyrak! oh lheurehnyan tajak kheueh laju u banda dan taro kheueh teuma minyeuk u ateuh ulee hazael sibagoe tanda teubaiat jihnyan jeuet keuraja di siria. dan tapeubuet cit lageenyang ateuh yehu aneuek nimsi, mangat jihnyan jeuet keuraja israel. dan ateuh elisa aneuek safat nibak abelmehola, mangat jihnyan jeuet keu nabi keugeunantoegata. soemantong nyang hana jipoh mate le hazael, ureueng nyan teuma jipoh le yehu, dan meunyoeh na awaknyan nyang jiteume peulheueh droe nibak yehu nyan ureueng nyan teuma jipoh mate le elisa. teuma na 7.000 droe di israel ulon peuseulamat, awaknyan na kheueh ureueng-ureueng nyang teutab seutia ubak ulon dan hantom na jisujut jiseumah patong baal atawa jicom patong nyan." dan geujak kheueh laju nabi elia geujak meurumpok ngon elisa nyang bak watee meurumpok nyan elisa teungoh geumeu ue diblang. na dua blaih boh pasang leumo dikeue gobnyan dan elisa keudroe geumeu ue deungon pasangan leumo nyang keuneulheuh. bak watee nabi elia geuja dikeue elisa, nabi elia laju geusuet bajee jubah geuh dan bajee nyan laju geuleueng nibak baho elisa. dan elisa geutinggi laju leumo-leumo gobnyan nyang mantong meukeumat nibak langai nyan laju geujak tiyeub nabi elia, oh ka tou deungon nabi elia geupeugah laju, "neupeu idhin kheueh ulon jak lakee droe ilee ubak ureueng syiek ulon, oh lheurehnyan ulon teuma lon seutot bapak." geusuet nabi elia, "jak kheueh. ulon hana lon tam gata." oh geudeungoe habanyan elisa geumisa laju ublang dan geujaksie laju banmandum leumo-leumo geuh nyan. kayee langai nyang geupeuguna ngon meue laju geukoh-koh geutot laju sibagoe kayee apui ngon taguen sie-sie leumo nyang ka lheureh geusie nyan. oh lheureh nyan uengkot sie nyang ka masak geu-

taguen nyan laju geubagi-bagi keu aneuek buah gobnyan dan le aneuek buah geuh engkot sie nyan laju jipajoh. oh ltheuh nyan elisa laju geujak seutot nabi elia dan jeuet laju keupeubantu gobnyan. bak siuroe, raja siria nyan nan geuh benhadad, laju geupeusapat banmandum tantra geuh meusajan deungon 32 droe raja nyan laen deungon geuritan prang nyang jitarek le guda, dan oh ltheuh nyan laju geukeupong banda samaria. oh ka ltheuh nyan geu kirem laju utosan geuh ubak raja ahab, raja ureueng israel di banda nyan deungon peusan geuh lageenyoe, "raja benhadad geulakee mangat gata tajok ubak gobnyan meuh, pirak, ureueng-ureueng binoe gata, dan aneuek-aneuek gata nyang teuga-teuga." geujaweeub le ahab, "tajak peugah laju ubak raja benhadad bahwa ulon ka lon tem. gobnyan jeuet geucok ulon meunan cit deungon banmandum atra ulon." oh ltheuh nyan di ureueng nyang ba haba nyan jigisa lom ubak ahab sira jiba gaba nyang laen nibak raja benhadad. meunoe geupeugah, "ilee raja kamoe geulakee mangat gata tajok keu gobnyan meuh ngon pirak meunan cit deungon ureueng binoe dan aneuek-aneuek gata. teuma jinoenyoe gobnyan geuyejak peuwira-peuwira geuh keu jijak geuladah meuligoe gata dan rumoh-rumoh peugawee gata, dan geucok laju peue nyang geuanggab meuyuem. awaknyan teuma geujak keunoe singoh beungoh kira-kira bak jeuem lagee nyoe." teuma raja ahab laju geuhoi banmandum peumimpin israel dan geupeugah, "neukalon keudroe bahwa ureueng nyoe jikeuneuk peuceulaka geutanyoe. jihnyan jitutot mangat ulon jok ureueng binoe ngon aneuek-aneuek ulon meunan cit deungon meuh dan pirak ulon, dan ulon hana lon tulak peue nyang jilakee nyan." bubena peumimpin rakyat nyan jipeugah, "bek neupakoe jih nyan, teungku amphon! bek neuseutot peue nyang jilakee nyan." le sababnyan raja ahab laju geujaweeub ubak utosan raja benhadad nyan lagee nyoe, "tajak peugah laju ubak teungku amphon raja gata nyan, bahwa ulon situju peue nyang ka geulakee nyang phon, teuma nyang geulakee nyang keudua nyoe hana hase ulon bri." dan jijak kheueh laju utosan-utosan nyan, oh ltheuh nyan jiriwang lom ubak raja ahab dan jipeugah, "raja kamoe teuma geukirem tantra nyan le that keu geujak peuhanco banda gata, sampoe abee nibak incik tutong banda gatanyan teuba geuba sampoe habeh deungon jaroe awaknyan. gobnyan geumeusumpah bahwa bubena dewa geuhukom, dan geupoh mate jihnyan, meunoye gobnyan hana geupeubuet peue nyang ka geuyue nyan!" geujaweeub le raja ahab, "tajak peugah laju ubak raja benhadad nyan: tantra nyang seujati lam tuboh jih ji ilee darah rasa bangga meunoye ka ltheuh jimuprang di mideuen juang, bukan sigohlom nyan." peue nyang ka geujaweeub le ahab nyan jijak peusampoe laju ubak raja benhadad bak watee gobnyan na meusajan deungon raja-raja nyang laen nyang jeuet keu sikutu gobnyan dan teungoh museunang peulalo ate sira geujiebb-jiebb ie lam khimah-khimah geuhnyan. ban geudeungoe habanyan benhadad laju geupeurintah ubak mandum peuwira gobnyan mangat meusiab-siab keujajak prang banda samaria. dan awaknyan pih meusiab-siab lagee peurintah sang raja. dan lam wateenyan, na sidroe nabi geujak ubak raja ahab oh trok

keunan laju geupeugah, "tuhan meufeureuman: 'na gata kalon tantra nyang dubnyan le? ulon teuma lon peumeunang gata ateuh awaknyan nibak ureueng. gata teuma tateupeue bahwa ulon kheueh tuhan.' " "soe nyang prang leubeh ilee?" geutanyong le raja ahab. nabi nyan geujaweeub, "tantra nyang muda-muda, nyang ireng bubena ulee daerah. meunan kheueh nyang ka geupeugah le tuhan." "dan soe teuma nyang jeuet keupeumimpin nibak prang nyan?" geutanyong le raja lom. "teungku amphon keudroe," geujaweeub le nabi nyan teuma. dan raja ahab pih geukrah laju bubena tantra-tantra muda nyang jeuet keu peuireng ulee-ulee daerah. banmandum nyan na 232 droe tantra. oh ltheuehnyan gobnyan geupeubuet teuma nyang lageenyon ateuh tantra israel. banmandum nyan na teuma 7.000 droe. seureubu nyan geupeuphon watee uroe paih watee raja benhadad dan ban lhee ploh dua raja-raja nyang laen nyang jeuet keusikutu gobnyan nyang mantong mabok sabab lumpah that jai geujiebb ie kreueh lam khimah gobnyan. nyang maju phon-phon that na kheueh tantra-tantra muda nyan. ureueng-ureueng nyang geuyue le benhadad keu jijakluem musoh laju jijak ba laporan ubak raja benhadad bah na saboh peureute tantra teungoh jijak jituju ubak khimah nibak arah samaria. laju benhadad geupeurintah mangat jeuet musoh nyan jidrob udeb-udeb, hana jipakoe peu kheueh awaknyan jiteuka keu jakmuprang atawa keu jijak meudame. tantra muda nyang geukrah le raja ahab nyan ka jipeuphon grak langkah di banda samaria dan meunan cit dilikot awaknyan ji ireng teuma le droe tantra israel. di tantra nyan maseng-maseng laju jipoh mate bubena musoh-musoh gobnyan. di ureueng siria laju jiplueng, teuma hana jipeuleuh le tantra israel laju jitiyeub ho nyang jiplueng. teuma raja benhadad jiteume peulheueh droe, laju jiplueng deungon guda geuh dan meunan cit jiseutot le name-upadub droe tantra meugda nyang laen. meunan cit di raja ahab geutajoe u mideuen prang laju geupeuhanco bube nyang na geuritan prang atra tantra raja benhadad dan meunan cit geupoh mate banmandum guda-guda jihnyan. bak uroenyon geueung siria jirasa taloe nyang lumpah rayeuk. oh ltheuehnyan nabi nyan geujak laju ubak raja ahab dan geupeugah, "jinoenyoe, nyang siget jih neujakwo laju dan neupeukong droe dan neupeuet reucana nyang matang, sabab raja siria teuma teuka lom jijak prang bak musem seumi nyang teuma teuka." peuwira-peuwira raja benhadad jipeugah ubak benhadad raja droe jih, "ilah-ilah nyang jiseumah le bansa israel jimat kuasa di ateuh gunong-gunong, nyang kheueh sabab jih tanyoe hase jipeutaloe le bansa nyan. teuma geutanyoe pasti hase tapeutaloe awaknyan meunoye geutanyoe tamuprang nibak darat nyan miyueb. nyang get jih phon uroe nyoe teungku amphon neujak gantoe laju raja nyang lhee ploh dua droe nyan deungon peuwira-peuwira teungku amphon keudroe. oh ltheuehnyan bahkheueh teungku amphon neukrah laju pasokan siduble pasokan nyang teungku amphon nyang ka jipeutaloe nyan, meunan cit beuna guda dan geuritan prang sidub nyang ka ltheueh uroe jeh. geutanyoe taprang bansa israel nyan di ateuh darat nyang miyueb, dan goenyoe geutanyoe

pasti meunang," raja benhadad situju, laju geuseut naseuhat peuwira-peuwira geuhnyan. bak musem seumi nyang teuka lom awaknyan laju geukrah tantra gobnyan laju geujak ubak banda afek keu geujak prang bansa israel. meunan cit di ureueng israel laju geupeuleungkap tantra gobnyan. dan tantra israel pi laju meugrak maju nyang teubagi lam duaboh pasokan dan jipeudong khimah meuhadab keue deungon ureueng-ureueng siria nyan. teubandeng ngon tantra siria nyang meutabu bansaboh sampoe peunoh daerah nyan, pasokan israel leumah jih lagee duaboh kawan kameng mantong. dan teuka kheueh sidroe nabi ubak raja ahab dan geupeugah, "nyoe kheueh feureuman le tuhan: 'sabab ureueng-ureueng siria jipike bahwa ulon meukuasa di ateuhe gunung-gunong dan bukan di ateuhe darat nyang dimiyueb, teuma ulon lonbri meunang ateuhe gata nibak prang ngon tantra awaknyan nyang bit-bit jai lumpah na nyan. gata dan rakyat gata teuma jiteupeue bahwa ulon nyoe kheueh tuhan.'" "tujoh uroe treb jih ureueng siria dan ureueng israel teutab meuteun didalam khimah jih maseng-maseng nyang meuhadab keue. bak uroe nyang keu tujoh baro kheueh jipeuphon maju dan jiprang ateuhe tantra musoh. nibak prang nyan le ureueng israel jiteume poh mate na 100.000 ureueng siria. ureueng nyang hana keunong poh jiteume plueng droe jih u banda afek, teuma pageue beuton banda nyan pih reuloih teupuro sampoe jitim-pok ateuhe tantra nyang teungoh plueng nyan akhe-jih mate na 27.000 droe. meunan cit deungon benhadad geupeuplueng droe u banda nyan dan laju geumusom nibak saboh rumoh dalam kama bagian dalam. dumna peuwira jijak laju ubak gobnyan dan jipeugah, "jipeugah le gob bahwa raja-raja israel nyan na kheueh raja nyang na bak gobnyan gaseh sayang. kareuna nyan, neupeu idhin kheueh ubak kamoe kamoe jak meuhadab ubak raja israel nyan deungon cara kamoe meungui deungon ija kroeng sibago rasa meunyeusai kamoe ateuhe peue nyang ka kamoe peubuet nyan dan meunan cit kamoe ikat taloe nibak takue sibago tanda geutanyoe ka tatal-hok. deungon na lagee nyan mudah-mudahan ranyan hana geupoh mate teungku amphon." dan awaknyan pi laju geungui ija kroeng dan meunan cit takue jih pih ji-ikat teuma, oh lheurehnyan jijak laju jak meuhadab ubak raja ahab dan jipeugah, "amphon ya delat po, raja kamoe benhadad na kheueh namiet teungku amphon. gobnyan geulakee adak jeuet teungku amphon bek kheueh neupeumate gobnyan." geujaweueh le raja ahab, "peu kheueh jihnyan mantong udeb, syedara ulon nyan?" keubiet bubena peuwira raja ahab nyan teungoh jipreh tanda nyang jroh nibak raja ahab. dan, bak watee ahab geupeugah "syedara", awaknyan langsong jijaweueh, "beutoi, benhadad na kheueh syedara teungku amphon." laju geupeugah lom le raja ahab, "gata intat seukeujab jih nyan keunoe bak ulon!" bak watee benhadad katrok keunan, le raja ahab laju geupakat gobnyan jak ek geuritan. geupeugah laju le benhadad ubak gobnyan, "ulon teuma ulon jokpulang keu teungku banmandum banda-banda nyang ka geureubot le bapak ulon nibak bapak teungku. meunan cit di teungku amphon jeuet teuma neupeudong pusat niaga di banda

damsyik lagee nyang ka geupeubuet le ureueng syiek ulon di samaria." geuseut le ahab, "ateuh dasai janji teungku nyan, ulon teuma lon peubeubaih teungku." oh lheurehnyan ahab laju geupeugot janji deungon benhadad dan oh ka seuleusoe nyan benhadad pih geupeuleueh teuma. ateuhe peurintah tuhan, sidroe lamkawan nabi nyan seukelompok nabi nyan laju geuyue poh gobnyan. teuma nabi nyang geuyue nyan hana geutem. laju nabinyan geupeugah, "sabab gata hana tataat ubak peurintah tuhan, gata teuma jiruengkom ngon jiteugom le singa bak watee gatawoe nibak teupmat." biet that, hana treb oh ka lheureh geutinggi teupmat nyan, gobnyan laju jiruengkom dan jiteugom le beulatang singa. oh lheurehnyan nabi nyan geujak teuma ubak ureueng laen dan geupeugah, "gata seupot kheueh ulon nyoe!" teuma di ureueng nyang geuyue seupotnyan laju jipoh gobnyan sibabhe seuneuga sampoe nabi nyan luka. oh ka lheurehnyan nabi nyan laju geubalot muka geuh deungon sion ija, mangat gobnyan bek jituri le gob, laju geujak dong nibak bineh rot raya geupreh raja israel liwat. bak watee raja nyan liwat, nabinyan laju geupeugah ubak gobnyan, "paduka nyang mulia, bak watee ulon teungoh muprang dimideuen prang, na sidroe tantra jiba ubak ulon sidroe musoh nyang ka teudrob. tantra nyan jipeugah, 'jaga kheueh ureueng nyoe beuget-get. meunyeue jihnyoe jiteume plueng, gata haroh teupoh mate keugeunantoe jihnyan atawa teubayeue deungon 3.000 peng pirak.' teuma oh lheurehnyan watee ulon teungoh that gabuek, ureueng nyan laju jiplueng." geujaweueh le raja, "gata ka taponih hukoman gata keudroe. le sabab nyan, gata haroh tatanggong atranyan." dan nabinyan laju geubuka ija nyang teubalot nibak muka geuh nyan, oh lheureh nyan di raja pih laju geuturi bahwa ureueng nyan na kheueh sidroe nabi. dan geupeugah kheueh le nabi nyan ubak raja, "nyoe kheueh nyang ka geupeugah le tuhan: 'ureueng nyang ulon peurintahkan mangat tapoh mate rupari gata peuleueh. le sabab nyan gata haroh mate sibago geunantoe jih. tantra gata teuma hanco sabab ka gata peubiyeu sipa-i musoh jipeuplueng droe.'" "ra geuwoe laju u samaria deungon ate nyang tunu dan beungeh. bak bineh meuligoe raja ahab di yizreel na saboh lampoh anggo atra ureueng laen nyang nan ureueng po lampoh nyan nabot. bak siuroe raja ahab geupeugah ubak nabot ureueng po lampoh nyan, "tabri mantong keu ulon lampoh anggo gatanyan, sabab lampoh nyan to that deungon meuligoe ulon. ulon meuheuet that keuneuk pula meubago-bago jeuneh gulee nibak lampoh nyan. keu gata ulon jok lampoh anggo nyang paleng get sibago geunantoe jih, atawa meunyeue gata tem, ulon bayeue peng deungon yuem nyang sisuai." jijaweueh le nabot, "lampoh anggo nyoe atra pusa indatu ulon. deumi allah, atranyoe hanjeuet ulon bri ubak teungku amphon!" deungon ate nyang seu-uem lom beungeh sabab geudeungoe peue nyang jipeugah le nabot ubak gobnyan nyan, raja geujakwoe laju u rumoh geuh laju geujak eh nibak peuratah geuh sira geupaleng muka geuh dan hana geutem pajoh bu. teuka laju izebel ureueng binoe gobnyan dan geutanyong laju ubak teungku lako peusabab gobnyan lam sikeujab mantong ka meu-buah, "pakon

gata tunu? dan pakon teuma han neutem pajoh bu?" geujaweueh le raja ahab, "ulon hana mangat ate deungon si nabot. ulon lakee jroh-jroh bak jih mangat lampoh anggo jih nibak bineh meuligoe geutanyoe nyoe jitem tuka ngon nyang laen nyang ulon jok atawa ulon bloe ngon yuem nyang meu-hai, teuma jih nyang hana jitem!" "droeneueh raja israel, hai teungku meutuah," geupeugah le izebel. "neubeudoh kheueh laju dan jak kheueh tapajoh bu. peuleupie kheueh ate droeneueh, ulon teuma lonbri lampoh anggo si nabot nyan keu teungku droe!" dan izebel laju geutuleh surat atueh nan raja meunan cit geucab laju deungon cab raja nibak surat nyan. suratnyan laju geukirem ubak bubena peumimpin dan ureueng-ureueng patot di yizreel. nyoe kheueh asoe surat nyan, "neu peumaklum laju mangat rakyat jipuasa dan tayue laju awaknyan jimeusapat! nibak rapatnyan tajok laju ubak nabot teumpat duek nyang mulia. tayue kheueh teuma dua droe ureueng jeuhet jikaduek meuhadab keue deungon nabot nyan dan yue tudoh jihnyan bahwa ureueng nyan ka jikutok po teu allah dan raja. dan oh luehnyan neuba laju jihnyan u luwa banda, dan neurhom laju jihnyan deungon batee sampoe mate!" peue nyang geupeurintah le izebel nyan laju jipeubuet le dumna peumimpin dan le tukoh masyarakat yizreel. laju jipeumaklum le awaknyan mangat rakyat jipuasa. oh luehnyan laju jiyue ureueng laen jimeugumpoi dan jiyue duek laju nabot nibak teumpat nyang teuhoreumat. seudangkan dua droe ureueng jeuhet nyan nyang ka jiduek meuhadab keue deungon nabot, dan dikeue rakyatba nyan le ureueng jeuhet nyan jipeugah laju bahwa nabot ka ji kutok po teu allah dan raja. le sabab nyan nabot nyan laju jiba uluwa banda dan oh ka trok u teumpat nyang teutuju nabot nyan laju ji rhom ngon aneuk batee sampoe meuninggai. haba keuhai peue nyang ka jipeubuet atueh nabot nyan jipeusampoe laju ubak izebel. ban geudeungoe le izebel habanyan laju gobnyan geupeugah ubak raja ahab, "nabot ka mate. jinoenyoe tajakkok laju lampoh anggo jihnyan nyang hana jitem peubloe keu droeneueh." raja ahab laju geujakkok lampoh anggo nyan jeuet keuhak milek gobnyan. feureuman tuhan ubak nabi elia, nabi nibak tisbe nyan, "ahab, raja samaria nyan bak saatnyoe jihnyan na di dalam lampoh anggo nabot jikeuneukok lampoh nyan jeuet keuhak milek jih. le sababnyan,ajak kheueh laju keudeh, dan tapeugah laju ubak jihnyan bahwa ulon, tuhan, ulon peugah lageenyoe, 'ka teupoh gob sampoe mate, teureupah teuma atra gobnyan! le sabab nyan darah gata teuma jilieh le aseue nibak teumpat aseue-aseue nyang ka jilieh darah si nabot! " bak watee raja ahab geukalon nabi elia, gobnyan laju geupeugah, "hai musoh, akhe jih gata meurumpok cit ngon ulon!" "beutoi," geuseuot nabi elia. "sabab teungku deungon paksa ka neupeubuet buet nyang lumpah jeuhet nibak mata tuhan, teuma nyoe kheueh nyang geuyue peusampoe le tuhan ubak teungku, 'ulon teuma lon peuteuka bala u atueh gata. gata ulon kireuh, dan soe mantong ureueng agam lam keuluwarga gata, tuha ngon muda, ulon sampoh di atueh bumoe. keuluwarga gata jeuet lagee keuluwarga raja yerobeam aneuk nebat dan lagee keuluwarga raja baesa bin

ahia, sabab le gata kheueh ka jeuet keu sabab ureueng israel jipeubuet desya sampoe jeuet keu sabab beungeh ulon nyang hana hase ulon peumeuah le." dan keuhai si izebel, tuhan geupeugah bahwa badan jihnyan jipajoh le aseue lam banda yizreel. soeman-tong nibak anggota keuluwarga gata nyang mate dibanda teuma jipajoh le aseue, dan nyang mate diluwa banda teuma jipajoh le cicem." hantom na ureueng nyang deungon neukat jipeubuet buet nyang jeuhet nibak mata tuhan lagee nyang ka geupeubuet le raja ahab nyan. banmandum buet nyang jeuhet nyan jiyue ngon jipeusuna le ureueng binoe jih si izebel. raja ahab ka geupeubuet desya-desya nyang lumpah hina: gobnyan ka geuseumah beurala lagee nyang ka jipeubuet le ureueng amori, na kheueh ureueng-ureueng nyang ka geu-use le tuhan geuyue teubiet nibak nanggroe kanaan bak watee ureueng israel jitamong u dalam nanggroenyman. oh ka seulesoe nabi elia geupeugah habanyan, ahab laju geuprik-prik peukayan gobnyan dan geungui laju ija kroeng sibagoe tanda meunyeusai, oh lueh nyan laju geupusa. meunan cit bak watee geujak eh pih gobnyan hana leukang ngon ija kroeng bak badan geuh, dan meunyeue geujak-jak ie muka gobnyan deuh that masam sabe. tuhan meufeureuman lom uban nabi elia, "peu kheueh ka gata ngieng pakriban jinoenyoe si ahab jipeumiyueb droe dikeue ulon? le sababnyan, ulon hana teuma ulon peuteuka bala meunyeue jihnyan mantong udeb. bak watee keurajeuen aneuk jih singoh baro kheueh balanyan ulon peuteuka u atueh keuluwarga jih." na dua thon leubeh hana prang le israel deungon siria. teuma nibak thon nyang keu lhee, yosafat raja nanggroe yehuda geujak saweue raja ahab di nanggroe israel. sigihlom nyan raja ahab ka lueh geu amanat ubak peuwira gobnyan, "gata nyoe tateupeue bahwa banda ramot di gilead nyan na kheueh atra geutanyoe! pakon geutanyoe hana tajeuet tareubot lom nibak raja siria!" dan bak watee yosafat teuka, geutanyong laju le raja ahab, "peu kheueh syedara neutem jak ngon kamoe keu tajak prang banda ramot?" geujaweueh le yosafat, "jroh that! geutanyoe ajak meusajan-sajan. tantra meuguda ulon teuma jimeusaho deungon tantra meuguda droeneueh. teuma nyang get jih tatanyong ilee ubak tuhan. dan raja ahab laju geupeusapat na kira-kira 400 droe nabi dan laju geutanyong ubak nabi-nabi nyan, "peu kheueh kamoe jeuet kamoe jak prang ramot atawa bek?" "jeue!" seut awaknyan. "tuhan geujok banda nyan keu teungku amphon." teuma yosafat geutanyong lom, "peu kheueh disinoe hana le nabi nyang laen nyang hase tateumanyong ubak tuhan keu geutanyoe?" geujaweueh le raja ahab, "mantong na sidroe teuk, gobnyan na kheueh nabi mikha aneuk yimla. teuma ulon banci keu gobnyan, sabab hantom na geuramai sapeue-sapeue nyang get keu ulon; sabe nyang hana get." "ah, han-jeuet neupeugah meunan!" geu seut le yosafat. le raja ahab laju geuhoi sidroe lamkawan peugawee meuligoe dan ubak ureueng nyan geuyue jaktueng laju nabi mikha. bak wateanyan raja ahab dan yosafat, nibak badan geuh mantong meukeumat peukayan keubeusaran, teungoh geuduek nibak kurusi keurajeuen rab ngon teumpat ceumeulo boh gandom bak

binéh babah pintoe geureubang samaria, dan dumna nabi pi ka teuka ubak gobnyan sira geupeugah ramarian gobnyan. na sidroe lamkawan nabinyan, nyang nan gobnyan nabi zedekia aneuek kenaana, sira geurawot lungke-lungke beuso dan geupeugah laju ubak raja ahab, "nyoe kheueh nyang geupeugah le tuhan, 'deungon lungke-lungke nyang lageenyoe teungku amphon teuma neuheuntam siria dan neupeuhanco awaknyan.' " banmandum nabi nyang laen situju lagee geupeugah le nabi zedekia nyan dan geutamah peugah lom, "jak seureusab laju ramot, teungku amphon nyang meunang. tuhan geupeumeunang ateuhe teungku amphon." lam wateenyan, utosan nyang jakhoi nabi mikha, ka trok dan laju jipeugah ubak nabi mikha nyan, "banmandum nabi nyang laen ka geuramai bahwa raja ahab teuma meunang lam prangnyoe. ulon meuharab adak jeuet bapak neuramai cit nyang get lagee nyang ka geuramai le nabi-nabi nyan." teuma geujawueub le nabi mikha, "deumi tuhan nyang udeb, ulon teuma ulon peugah peue nyang geupeugah le tuhan ubak ulon!" oh watee nabi mikha ka trok ukeue raja ahab, le raja laju geutanyong, "peu kheueh jeuet ulon dan raja yosafat kamoe jakprang ramot, atawa bek?" "jak prang kheueh," kheun nabi mikha. "teuntee teungku amphon teuma meuhase. tuhan teuma geubri meunang ateuhe teungku amphon." geuseuot raja ahab, "meunoye droeneueh peugahnyan deumi nan tuhan, neupeugah kheueh nyang bit. padubgoe droeneueh ulon peuingat keuhai nyan?" geubalaih le nabi mikha, "deuh ulon kalon tantra israel ka meutabu beuba di gunong-gunong. awaknyan lagee bubiri nyang hana ureueng rabe, dan tuhan geupeugah keuhai awaknyan, 'ureueng-ureueng nyoe hana nyang pimple. bah kheueh awaknyan jiwoe deungon seulamat." " dan geupeugah lom le raja ahab ubak yosafat, "beutoi lagee ulon peugah nyan bukan? hantom na jiramai nyang get-get keu ulon! sabe nyang broek-broek!" geupeugah lom le nabi mikha, "jinoenyoe neudeungoe laju peue nyang ka geupeugah le tuhan! deuh ulon kalon tuhan teungoh geuduek nibak tahta gobnyan di dalam syeuruga, dan banmandum malaikat gobnyan ka teudong bak binéh gobnyan. dan tuhan pih laju geutanyong, 'soe nyang ka trok ate jijak peusuna raja ahab nyan mangat jihnyan jitem jak muprang dan mate di ramot di gilead?' geujawueub le malaikat-malaikat nyan meulaen-laen. akhe jih teuka kheueh saboh roh. rohnyan geupeurab laju ubak tuhan dan geupeugah, 'ulon kheueh nyang jak ba peusuna keu gobnyan.' 'pakriban cara jih?' geutanyong le tuhan. rohnyan geujawueub, 'ulon teuma lonjak dan lon peujeuet banmandum nabi ahab nyan jimeusulet.' tuhan geupeugah lom, 'get, tapeubuet laju nyang lageenyan, gata teuma meuhase tapeusuna jih nyan.' " ltheueh nyan nabi mikha geupeugah lom, "nyan, nyan kheueh nyang jeuet! tuhan ka geupeujeuet nabi-nabi teungku amphon jimeusulet ubak teungku amphon sabab tuhan ka geipeuteuntee bahwa gobnyan teuma geupeutreu bala ateuhe teungku amphon!" dan geupeurab kheueh nabi zedekia ubak nabi mikha oh bantrok keunan laju geutampa nibak muka geuh dan geupeugah teuma, "panena mungken roh tuhan geutinggai ulon dan geumeututoe deungon gata?" geujawueub le

nabi mikha, "eunteuk gata ngieng bukeuti jih bak watee gata tajak musom nibak saboh kama." "droeb jihnyan!" geupeurintah le raja ahab, "dan taba laju jihnyan ubak amon, wali banda, dan ubak pangeran yoas. tayue peutamong ureueng nyoe u dalam glab, dan bek leu-leu tabri peunajoh dan ie jieb jih sampoe ulon woe deungon seulamat." geupeugah le nabi mikha, "meunoye teungku amphon neugisa deungon seulamat, saban cit tuhan hana geumeututoe meulalu ulon! banmandum nyang na teuka disinoe jeuet keusaksi." oh ltheuehnyan le raja ahab, raja ureueng israel nyan, dan yosafat raja yehuda geujak prang laju banda ramot di gilead. raja ahab geupeugah ubak yosafat, "ulon teuma meunymar bak watee geujak maju u mideuen prang. bak wateenyan bak lthee ploh dua panglima pasokan prang siria nyang meugeuritan prang ka jiteurimong peurintah mangat jijakprang na kheueh raja israel mantong bekle nyang laen. teuma, nibak watee awaknyan deuh jinging raja yosafat, awaknyan banmandum jisangka bahwa nyan na kheueh raja israel. le sabab nyan raja yosafat nyan laju jiseurang. teuma raja yosafat laju geukliek, dan le panglima nyang lthee ploh dua droe nyan laju jiteupeue bahwa nyang jiheuntam nyan bukan kheueh raja israel. dan bak watee nyan cit teuma raja yosafat nyan hana jiprang le. dan ngon hana jisangkangka sidroe lamkawan tantra siria jitimbak aneuk panah jih, aneuk panah nyang jitimbak nyan bukan jituju ubak sapeue-sapeue tujuan. dan keubeutolan aneuk panah nyan paih keunong ateuhe raja ahab dan beusot bajee prang gobnyan bak bagian sinambat. "ulon ka keunong timbak!" geupeugah le raja ahab ubak ureueng ba geuritan prang gobnyan. "taputa laju dan taba ulon uluwa daerah mideuen prang nyoe!" teuma sabab prang nyan mantong that-that hibat gohlom na tanda-tanda reuda. raja ahab teutab geudong sira geumeutumpang droe ubak geuritan ngon geumeuhadab ubak pasokan siria. darah gobnyan teutab ji ile nibak teumpat nyang luka sampoe ka meulangue ubak aleue geuritan prang geuh. dan oh watee uroe ka seupot baro kheueh raja ahab nyan meuninggai donya. bak watee mata uroe karab jil-hob banmandum pasokan israel jipeurintah geuyuewoe u banda dan u daerah maseng-maseng, sabab raja ka meuninggai donya. dan jijakwoe kheueh bubena tantra nyan dan jijak kubu kheueh teuma manyet raja ahab nyan di samaria. bak watee geuritan prang geuh nyan teungoh teurhah ngon teupeu gleh nibak kulam samaria, na ureueng-ureueng inong jeuet teungoh jimanoe disinan, dan di asee pih laju jijak lieh darah nyang mantong na meukeumat nibak geuritan prang nyan, paih that lagee nyang ka geupeugah le tuhan. kisah nyang laen keuhai raja ahab nyan, keuhai meuligoe gadeng dan banmandum banda nyang ka geupeudong, atra nyan ka teucetet didalam kitab seujarah raja-raja israel. oh ka ltheueh ahab meuninggai donya, aneuk gobnyan nyang nan jih ahazia teubaiat jeuet keuraja keugeunantoe gobnyan. bak thon nyang keu peuet peumeurintah ahab raja israel, yosafat aneuk asa jeuet keu raja

ateueh yehuda. bak wateenyan gobnyan kameu-umu lhee ploh limong thon. gobnyan geumat peurintah di yerusalem dua ploh limong thon treb jih. nan ma gobnyan azuba binti silhi. saban lagee asa, bapak gobnyan, yosafat geupeubuet buet peue nyang paleng jroh bak mata tuhan. bubena ureueng lunte bahnyan inong jeuhet meunan cit agam lunte banmandum nyan habeh geusampoh teuma nyang na mantong meutugaih di teumpat-teumpat ureueng semah beurala nyang mantong tinggai nibak jamen asa, bapak gobnyan. teuma teumpat-teumpat seumuja nyan keudroe nyang hana geupeu hanco. le sababnyan kheueh di rakyat ba teutab mantong na jipeuseumah keureubeuen ngon jitot keumeunyan disinan. yosafat laju geupeuget kapai-kapai tarsis keungon jakcok meuh di ofir, teuma banmandum kapai-kapai nyang teungoh meulayeue nyan hana jadeh jimeulayeue sabab ka rusak di ezion-geber. raja ahazia nibak israel laju geupeutaba mangat jeuet aneuk kapai gobnyan jimeulayeue meusigoe-sigoe deungon aneuk kapai yosafat, teuma le yosafat hana geutem dan geutulak peue nyang jilakee le awaknyan bahpi gobnyan na hubungan nyang get deungon raja israel. oh lheueh nyan yosafat laju meuninggai dan teukubu laju di lampoh jrat raja-raja banda nabi daud. yoram aneuek gobnyan teu baia jeuet keuraja keugeunantoe gobnyan. kisah nyang laen keuhai yosafat nyan, meunan cit keuhai keupahlawanan gobnyan dan bubena muwang nyang ka geupeubuet banmandum nyan na teucetet lam kitab seujarah raja-raja yehuda. bak jamen nyan di nanggroedom hana meuraja. nyang mat peurintah disinan na kheueh sidroe ulee daerah. bak thon nyang keu tujoh blaih nibak keurajeuen raja yosafat nibak yehuda, ahazia bin ahab ka jeuet keuraja di nanggroedom israel dan geumat peurintah ateueh israel na dua thon treb jih. gobnyan meudesya ubak tuhan sabab ka geuseutot langkah bapak droe geuh meunan cit deungon langkah ma droe geuh dan langkah-langkah raja yerobeam, le sabab buet awaknyan ureueng israel ka rhot u dalam jurang desya. gobnyan geuseumah baal dan meungabdi ubak jih nyan. dan saban cit lagee bapak gobnyan nyang ka geumat peurintah sigohlom nyan, gobnyan pih geupeuteuka meureuka tuhan, po teu allah nyang jiseumah le ureueng israel.

oh ka ltheueh meuninggai ahah raja israel, nang-groe moab laju jipeubendoh beurtontak ateueh israel. bak siuore raja ahazia di israel rhot nibak seuramoe tingkat ateueh meuligoe jih di samaria, le sababnyan gobnyan luka parah that. le sababnyan gobnyan laju geukirem sidroe keu jijak tanyong ubak baal-zebug, dewa banda ekron di filistin, peu ktheueh gobnyan hase puleh atawa hana. teuma malaikat tuhan geuyue ubak elia, nibak tische, mangat geujak meurumpok ngon utosan-utosan raja ahazia nyan mangat geupeugah lagee nyoe, "peu ktheueh di israel hana po teu allah sampoe gata keuneuk tajak ubak baal-zebug, dewa banda ekron nyan? jak peugah ktheueh ubak raja bahwa tuhan meufeureuman lagee nyoe, 'gata hana puleh, gata teuma mate!' " oh ka ltheueh elia seulesoe geupeubuet peurintah tuhan nyan, jiwoe ktheueh utosan-utosan nyan ubak raja, le raja laju geutanyong, "pakon gata woe?" awaknyan jijawueb, "na sidroe ureung geujak meurumpok ngon kamoe, dan geuyuewoe kamoe mangat kamoe peutrok ubak amphon bahwa tuhan meufeureuman lagee nyoe ubak amphon, 'peu ktheueh di israel hana po teu allah, sampoe gata jak lakee peutunyok ubak baal-zebug, dewa banda ekron? gata hana puleh, gata teuma mate!' " "pakriban hi ureung nyan?" geutanyong le raja. "bajee jubah dan talo keuing geuh kulet," jawueb awaknyan. "o, nyan elia!" jawueb raja nyan. ltheueh nyan le raja laju geuyue sidroe peuwira meusajan deungan na limong ploh droe aneuk buah geuhnyan geujak droeb si elia. peuwiranyan geujak dan laju meurumpok deungan elia teungoh geuduek ateueh saboh buket. "hei hamba allah," ktheun peuwira nyan, "raja geupeurintah gata treun!" "meunyo bit ulon nyoe hamba allah," jawueb elia, "bah ktheueh apui jitreun nibak langet dan jitot sampoe habeh gata meusajan deungan aneuk buah gata!" wateenyan cit teuma jitreun apui dan laju jitot peuwira nyan meusajan deungan banlimong ploh droe aneuk buah jih. dan raja geuyue teuma sidroe peuwira nyang laen meusajan deungan limong ploh droe aneuk buah jih. awaknyan jijak meurumpok dan jipeugah ubak elia, "hei, hamba allah, raja geuyue treun gata jinoenyo cit teuma!" "meunyo ulon nyoe keubit hamba allah," jawueb elia, "bah ktheueh apui jitreun dilanget dan jitot habeh gata meusajan deungan aneuk buah gata!" wateenyan cit teuma apui jitreun nyang teuka nibak po teu allah dan jitot habeh peuwira nyan meusajan deungan banlimong ploh droe aneuk buah jih. peuwira nyan ji-ek ateueh buket dan meunan ka trok dikeue elia laju jimeuteutot sira jikheun lagee nyoe, "peumphon ktheueh kamoe, ya hamba allah! neuweuh ktheueh keu ulon dan aneuk buah ulon-nyoe. bek ktheueh kamoe nyoe neupoh mate! dua droe peuwira laen meusajan deungan aneuk buah jih ka mate jipajoh le apui nyang teuka di langet, teuma ulon meulakee, neugaseh ktheueh ulon!" wateenyan cit teuma geupeugah ktheueh le malaikat tuhan ubak elia, "bek teumakot! seutot ktheueh jih-nyan tatreun di ateueh buket nyoe." le sababnyan geutreu ktheueh elia meusajan deungan peuwiranyan ubak raja. dan geupeugah le elia ubak raja, "tuhan

meufeureuman, 'gata tayue ureung laen tajak lakee peutunyok ubak baal-zebug dewa banda ekron sang-sang di israel hana po teu allah nyang jeuet teumpat teumanyong. le sababnyan gata hana puleh, gata teuma mate!' " dan mate ktheueh ahazia lagee nyang geufeureuman le tuhan meulalu nabi elia. sabab ahazia hana aneuk agam, le sababnyan yoram syedara jih jeuet keu raja keugeunantoe geuh. nyan na ktheueh nibak thon nyang keudua watee keuraujeun yehoram bin yosafat, raja yehuda. kisah laen keuhai peue nyang jipeubuet le raja ahazia na teucetet lam kitab seujarah raja-raja israel. teuka ktheueh watee-jih tuhan keuneuk beuot elia lam syeuruga deungan peurantaraan angen badee. wateenyan elia dan elisa ka geutinggi gilgal, bak teungoh rot euh elia geupeugah ubak elisa, "tinggai ktheueh droeneueh disinoe. ulon geuyuejak le tuhan u betel." teuma elisa geujawueb, "deumi tuhan nyang udeb dan deumi nyawong bapak, ulon hana lon tinggai bapak." le sababnyan awaknyan meusajan-sajan geujak trok u betel. na saboh kawan nabi nyang na tinggai disinan geujak meurumpok ngon elisa dan laju geutanyong, "peu ktheueh droeneueh teupeue bahwa uroenyo amphon droeneueh nyan jitinggai droeneueh sabab gobnyan geubeuot le tuhan?" "nyoe, lon teupeue," jawueb elisa. "teuma, ka ktheueh, bek teupeugah le keuhai nyan." oh ltheuehnyan geupeugah ktheueh le elia ubak elisa, "tinggai ktheueh gata disinoe, lon geuyue le tuhan mangat lon jak u yerikho." teuma elisa geujawueb, "deumi tuhan nyang udeb dan deumi nyawong bapak, ulon hana lon tinggai bapak." deungan nyan teuma awaknyan geujak lom trok u yerikho. na saboh kawan nabi nyang na tinggai nibak teumpat nyan geujak meurumpok ngon elisa dan geutanyong, "peu ktheueh droeneueh teupeue bahwa nibak uroenyo amphon gata geubeuot le po teu allah dan geutinggi gata?" "nyoe, lontuan teupeue," jawueb elisa. "teuma ka ktheueh bek tapeugah le keuhai nyan." oh ltheuehnyan geupeugah ktheueh le elia ubak elisa, "tinggai droeneueh disinoe, ulon geuyuejak le tuhan ubak krueng yordan." teuma elisa geujawueb, "deumi tuhan nyang udeb dan deumi nyawong bapak, ulon hana lon tinggai bapak." le sababnyan awaknyan geujak laju trok u krueng yordan, dan na 50 droe nabi geuseutot awaknyan. laju elia dan elisa geupioh bak bineh krueng, dan ban limong ploh droe nabi nyan geudong hana padubna jioh nibak teumpat nyan. elia laju geusuet bajee jubah gobnyan, ltheuehnyan geugulong dan ngon geunulong nyan laju geuseukok ateueh ie krueng nyan. laju ie krueng nyan beukah jeuet keu dua boh bagi, le sababnyan elia ngon elisa jeuet geujak ateueh teumpat nyang tho. watee ka trok u meurandeh, elia laju geupeugah ubak elia, "lakee ktheueh peue nyang gata lakee ubak ulon sigohlom lon geubeuot le tuhan dan lon tinggai gata!" geujawueb le elisa, "peuwareh ktheueh kuasa bapak nyan keu ulon, mangat jeuet ulon nyoe keugeunantoe bapak." "oh, nyan payah that," seutot elia. "teuma meunyo droeneueh deuh tangieng ulon watee ulon geubeuot le tuhan, peue nyang droeneueh lakee nyan geupeutrok. meunyo droeneueh hana takalon, nyang gata lakeenyan geutulak." sira jak, awaknyan bandua hana pioh-pioh geupeugah haba. deungan hana

teusangka-sangka na saboh geuritan meuapui nyang jitarek le guda meuapui trok keunan laju jipeuce awaknyan bandua dan elia laju jipeu-ek lam syeuruga le angen badee. elisa geukalon dan laju geutawok, "elia, bapak lon! bapak lon! nyang lindong israel nyang peukasa! bapak ka hanale!" dan gadoh kheueh elia nibak mata elisa. deungon peudeh that elisa laju geupriek bajee jubah geuh jeuet keudua boh bagi, dan laju geucok bajee jubah elia nyang rhot. oh ltheuehnyan gobnyan geugisa dan geudong nibak bineh krueug yordan, laju geuseupot bajee jubah elia nyan ateueh ie sira geupeugah, "dipat kheueh tuhan, po teu allah elia nyan?" oh ka ltheueh geuseukok bajee ateueh ie krueug nyan, krueug nyan laju beukah dua dan gobnyan pi laju geujak ateueh tanoh nyang ka tho nyan u meurandeh jeh. ban limong droe nabi nyang teuka di yerikho nyan deuh jikalon peue nyang ka teujadi, awaknyan laju jipeugah, "kuasa elia ka jiminah ubak elisa!" awaknyan jijak ubak gobnyan dan laju jisujut dikeue elisa dan geupeugah le awaknyan, "kamoe na 50 droe, banmandum teugateuga. le sababnyan, jak geutanyoe tajak mita elia guree droeneueh nyan. mungkin roh tuhan ka geuba awaknyan u ateuh gunong atawa lam barieh laju jittinggai disinan." "hana peue!" geujaweueb elisa. teuma awaknyan hana pih jipaksa sampoe gobnyan geutem teuma. dan geujak kheueh ban 50 droe nabinyan geujak mita elia nyang treb jih na lhee uroe, teuma awaknyan teutab hana meurumpok ngon gobnyan. laju awaknyan jigisa ubak elisa nyang geupreh di yerikho. "kon ka ltheueh lon peugah bahwa gata hana peu tajak seutot gobnyan?" kheun elisa ubak awaknyan. na padub droe ureueng nibak di yerikho jijak ubak elisa sira jipeugah, "pak, lagee nyang bapak kalon keudroe, banda nyoe jroh, teuma ie jih hana jroh sampoe jeuet keusabab ureueng inong nyang teungoh mume rhot aneuek jih." "cok kheueh laju cawan nyang mantong baro," kheun elisa, "dan boh kheueh sira lam cawan nyan." dan awaknyan laju jiba peue nyang geulakee elisa nyan ubak gobnyan. laju geujak elisa ubak mata ie dan sira nyang kana nyan laju geugeulawa lam mata ie nyan sira geupeugah, "nyoe kheueh feureuman tuhan: 'ulon peugleh ie nyoe mangat bek na le jeuet keusabab mate gob atawa rhot aneuek lam pruet!' " phon wateanyan gleh kheueh ienyan paih lagee peue nyang geupeugah le elisa. oh ltheuehnyan geujak kheueh elisa nibak yerikho u betel. bak teungoh rot euh na saboh kawan aneuek miet jiteubit nibak lam banda laju jihina ngon jipeukeum-peukem gobnyan. "hei ureueng lapeueng ulee, teubit nibak tempat nyoe!" kheun awaknyan sira jikuk-kuk. elisa geupaleng geukalon ateueh aneuek nyan ltheueh nyan laju geuseurapa jihnyan ateueh nan tuhan. wateanyan cit teuma dua boh cagee jiteubit lam tamah laju jirungkom dan jipriek-priek aneuek mit nyan na peuet ploh dua droe lamkawan aneuek mit nyan. elisa geubot lom langkah gobnyan dan geujak laju u gunong karmel, ltheueh nyan geuwoe lom u samaria. lam thon nyang keulapan blaih nibak keurajeuen yosafat raja yehuda, yoram bin abah jeuet keu raja israel dan geumat peurintah di samaria dua blaih thon treb jih. gobnyan geupeubuet nyang jeuhet nibak mata tuhan, teuma gob-

nyan hana saban jeuhet jih ngon abah dan izebel, ureueng syiek jih. patong nyang jipeuget le ayah jih keungon seumah baal ka jipeutreun le gobnyan. teuma, saban cit lagee raja yerobeam bin nebat nyang mat peurintah sigohlom geuh nyan, gobnyan pih jeuet keusabab ureueng israel meudesya dan hana pih jipeubuet haihnyan. raja mesa asai moab na geupeulara bubiri. sibagoe cukee ubak raja israel, tieb-tieb thon gobnyan geujok na 100.000 aneuek bubiri meunan cit bulee bubiri nibak 100.000 boh bubiri agam. teuma oh ka ltheueh raja abah meuninggai donya, mesa laju beurontak ateueh israel. le sababnyan raja yoram laju geuttinggai samaria geujak peusiab banmandum angkatan prang gobnyan. gobnyan geukireum peusan lageenyoe ubak raja yosafat di yehuda, "raja moab ka jibeurontak ateuh ulon; tatem kheueh droeneueh tamuprang meusajan lon talawan jihnyan?" "get," jaweueb raja yosafat. "ulon ngon aneuek buah lon meunan cit deungon pasokan meuguda kamoe jak meusajan droeneueh. rot toh kheueh tanyoe prang awaknyan?" "tacok rot nyang teujak u padang pasi edom," jaweueb yoram. dan geujak kheueh raja yoram meusajan deungon raja yehuda dan raja edom. oh ka ltheueh geujak nyang treb jih na tujuh uroe, awaknyan ka habeh ie jieb, le sababnyan pasokan awaknyan meunan cit deungon beulatang nyang ba barang awaknyan hana hase ji-jieb ie. "ka paloe geutanyoe!" kheun raja yoram. "tuhan ka geureuncana keuneuk seurah geutanyoe nyang lhee droe nyoe ubak raja moab!" seut raja yosafat, "peu kheueh disinoe hana nabi nyang hase geutanyong tanyoe keuhai tanyoe ubak tuhan?" sidroe lamkawan peuwira tantra raja yoram jiseut, "na elisa bin safat! gobnyan ilee peumbantu elia." "beutoi! tuhan meufeuroman meulalu gobnyan," kheun raja yosafat. dan geujak kheueh ban lhee droe raja nyan ubak elisa. "keupeue neulakee tulung ubak lon?" kheun elisa ubak raja israel nyan. "jakmantong ubak nabi-nabi ureueng syiek gata!" "hana jeuet!" seut yoram. "sabab tuhan kheueh nyang reuncana keugeujok kamoe ban lhee droenyoe ubak raja moab." geujaweueb le elisa, "deumi tuhan nyang udeb, nyang ulon peutimang, ulon peugah ngon trok trang meunyoe kon le sabab raja yosafat nyang ulon horeumat, ulon hana lon peugot urosan deungon teungku. jinoenyoe ba kheueh keunoe sidroe ureueng peumeu-en keucapi." teungoh ureueng nyan jipeumeu-en keucapi jih, elisa laju geukuasa le roh tuhan, le sababnyan gobnyan geupeugah, "nyoe kheueh nyang geukheun le tuhan: 'kueh kheueh lueng-lueng di wadi nyoe. bahpi gata hana takalon ujeuen treun atawa angen pot, teuma ie teutab na meulimpah-limpah lam wadi nyoe. gata meusajan deungon beulatang nyang peudieng barang gata meuteume ie nyang seb keu teuijeb sipuih-puih jih.' " ltheuehnyan geupeugah lom le elisa, "teuma nyoe na kheueh peukara ubit nibak tuhan. gobnyan pi geubtri teuma gata meunang ateueh ureueng-ureueng moab. banmandum banda awaknyan nyang meupageue ngon kuta nyang get-get hase gata reuloi; banmandum bak kayee nyang muboh gata koih, banmandum mata ie awaknyan gata sumpai, dan banmandum ladang awaknyan nyang subo-subo nyang geulawa ngon batee sampoe rusak banmandum." oh

singoh nyan, watee awaknyan teungoh jipeuna upacara keureubeuen beungoh, ji-ile kheueh ie nyang teuka di arah edom sampoe peunoh wadi nyan. watee raja moab jideungoe bahwa ban lhee raja nyan ka trok keuneuk jak prang jih, banmandum ureueng – bahnyan nyang tuha meunan cit nyang muda – nyang ka-ek jigulam beude, laju jikrah dan jipeuduek nibak bataih nanggro. oh singoh nyan, watee awaknyan jibeudoh beungoh, mata uroe laju meucahya ateueh ie teugeunang nyan sampoe deuh jih lagee darah. le sababnyan awaknyan laju jikuk-kuk, "darah! pasti sipa-i-sipa-i nibak ban lhee boh pasokan nyan ka jimeupoh-poh sabe keudroe-droe! jak geutanyoe tarampok khimah-khimah awaknyan!" teuma meunan ureueng-ureueng moab nyan trok ubak khimah awaknyan, awaknyan laju jipoh sampoe jisurot le pasokan israel nyang laju maju jipeulet sira jipoh mate awaknyan dan jireuloh bubena banda-banda awaknyan. tieb-tieb ladang nyang subo nyang awaknyan liwat, laju jirhom le awaknyan ngon batee. akhe jih, banmandum ladang ka teutob ngon batee. meunan cit le ureueng-ureueng israel laju jisumpai bubena mata ie dan jikoh banmandum bak kayee nyang muboh. nyang tinggai na kheueh banda kirhaeset, ma banda moab. akhejih banda nyan pih jikeupong dan jirhom ngon batee le peungumban-peungumban. watee ka sadar bahwa jihnyan hana mungken le meuteun, le raja moab laju jiba 700 droe tantra nyang ahli jipeuguna peudeueng, laju jiseuha jiheuntam peutahanan raja edom, teuma hana meuhase. le sababnyan laju jicok putra mahkota jih, laju jikeureubeuen ateueh binte beuton sibagoe keureubeuen keu dewa moab. le sababnyan takot kheueh teumakot ureueng-ureueng israel, awaknyan laju jisurot pasokan jih nibak banda nyan dan laju jiwoe u nanggro jih. nibak siuroe na sidroe inong balee nabi jijak ubak elisa dan jipeugah, "bakap, lakoe ulon na meuninggai donya! dan bakap neuteupeue bahwa gobnyan pi ureueng nyang paleng taat ubak po teu allah, teuma gobnyan na meu-utang bak sidroe-droe ureueng. jinoe ureueng nyan jiteuka keuneuk jijakokot bandua droe aneuek ulon dan jipeujeut aneuek ulon nyan keu namiet jih, nyan na kheueh sibagoe meunayeue utang meureuhom lakoe ulon." "pakriban ulon hase lon tulung droeneueh?" geutanyong le elisa. "nibak droeneueh peue nyang na dirumoh?" "hana sapeuena," jaweueb inong balee nyan, "teuma nyang na na kheueh saboh kaca ubit minyeuk zaiton." geupeugah le elisa, "neujak ngui sijai-jai jih kaca-kaca ubit nibak kawom lingka droeneueh. oh ltheuhnyan droeneueh meusajan deungon aneuek-anuek droeneueh neutamong lam rumoh dan neutob pintoe. ro kheueh minyeuk nyang na lam kaca nyan u dalam kaca-kaca nyan, dan pinah kheueh laju nyang ka peunoh." dan jiwoe kheueh inong balee nyan u rumoh jih. oh ka ltheueh gobnyan ngon aneuek-anuek jih jitamong dan jitob pintoe rumoh, gobnyan laju jicok kaca ubit nyang meuasoe minyeuk zaiton nyan, laju geuro lam kaca-kaca nyang ka jijok le aneuek-anuek jih. oh ka ltheueh kaca-kaca nyan meuasoe mandum, le gobnyan geulakee lom saboh kaca teuk. "ka habeh ma," jaweueb sidroe lamkawan aneuek geuhnyan. le nyan teuma minyeuk nyan ka

hana ji-ile le. oh ltheueh nyan ma nyan laju jijak ubak nabi elisa, dan elisa laju geupeugah, "peubloe kheueh banmandum minyeuk nyan keu ngon bayeue utang droeneueh, dan nyang leubeu nyan kaseb keu beulanja droeneueh dan aneuek-anuek droeneueh." di sunem na tinggai sidroe inong kaya. bak siuroe watee elisa geujak u sunem, le ureueng inong nyan laju jihoi gobnyan keugeujak makheun. phon wateanyan pajan mantong elisa na geujak u sunem gobnyan geumakheun nibak rumoh inong kaya nyan. ltheueh nyan jikheun kheueh le inong kaya nyan ubak lakoe jih, "ulon peucaya bahwa bapak nyang kayem that geujak keunoe na kheueh biet-biet sidroe hamba po teu allah. bah kheueh tapeuet saboh kama nyang ubit nibak tingkat ateuh rumoh geutanyoe, dan tapeuleungkab deungon saboh teupat eh, meuja dan kurusi, meunan cit panyot mangat jihnyan jeuet jieh nibak teupat nyan pajan mantong jihnyan jijak bak geutanyoe." nibak siuroe elisa geujak lom u sunem, watee gobnyan geu-ek u ateueh nibak kama gobnyan keuneuk meureuhut, gobnyan laju geuyee ubak peulayan gobnyan nyang nan jih gehazi, mangat jijak hoi ureueng inong nyan. watee inong nyan ka trok, laju geupeugah le elisa ubak gobnyan gehazi, "tanyong bak gobnyan pakriban ulon hase lon bayeue meunayah gobnyan keugeutanyoe. mungken gobnyan meuheuet mangat tanyoe tajak ubak raja atawa ubak panglima angkatan prang dan meututoe keuhai peureulee gobnyan." ureueng inong nyan geujaweueb, "ulon tinggai lamkawan wareh kawom lon dan le sababnyan hana kureueng meusapeue pih." le sababnyan geutanyong kheueh le elisa ubak gehazi, "meunyeue meunan, peu kheueh nyang jeuet lon peubuet keu gobnyan," gehazi jijaweueb, "gobnyan hana meu aneuek, pak, dan lakoe gobnyan ka tuha that." "hoi inong nyan keunoe," kheun elisa. ureueng inong nyan teuka dan jidong bak babah pintoe. laju geupeugah le elisa ubak inong nyan, "thon ukeue nyoe, bak watee nyang lageenyoe, droeneueh ka neutingkie sidroe aneuek manyak nyang agam." "teungku, bek sulet!" kheun inong nyan. "teungku nyan hamba po teu allah!" teuma beutoi kheueh peue nyang geupeugah le elisa. thon ltheueh nyan teuma, kira-kira bak watee nyang saban le ureueng inong nyan laju jipeulahe sidroe aneuek agam. oh ka ltheueh aneuek nyan rayeuk, bak siuroe watee musem keumeukoh, aneuek nyan meusajan ngon ureueng keumeukoh jijak laju ubak ayah jih nyang na di ladang. deungon hana teusangka-sangka aneuek nyan jiklik bak ayah jih, "adoh! ulee lon saket that!" jipeugah le ayah aneuek nyan ubak sidroe peulayan, "taba laju aneuek nyan ubak ma jih." le peulayan nyan laju jiba aneuek nyan ubak ma jih, dan le ma aneuek nyan laju jiwa aneuek jihnyan. teuma oh uroe ka seupot aneuek nyan pih meuninggai donya. le ma aneueknyan laju jiba aneuek jihnyan u ateueh, ubak kama elisa, laju jipeueh aneuek nyan ateueh teupat eh. oh ltheuehnyan ma aneuek nyan laju jiteubiet sira jitob pintoe, ureueng inong nyan jijak hoi lakoe jih. ureueng nyan jipeugah, "tayue kheueh sidroe peulayan mangat jijak keunoe deungon saboh keuleude. ulon keuneuk jak jinoe cit teuma ubak nabi elisa, dan hana treb teuma bagaih ulon gisa."

"pakon jeuet jinoe gata jak?" geutanyong le teungku lakoe jih. "uroenyoe kon uroe sabat dan kon teuma uroe raya buleuen baro." "hana peue," jaweub ureueng nyan. oh ka ltheueh gobnyan jipasang peulana ateueh keuleudee nyan, gobnyan laju jipeugah bak peulayan nyan, "paroih kheueh laju keuleudee nyoe mantang tajam jijak; bek gata peukureueng plueng jih meunyoe hana ulon yue." dan jijak kheueh ureueng inong nyan ubak gunong karmel nibak teumpat elisa. phon dijiuh le elisa ka geukalon ureueng inong nyan jijak bak gobnyan. elisa laju jipeugah ubak gehazi, "ngieng kheueh, ma nyang di sunem nyan jijak keunoe! bubagaih kheueh gatajak bak jihnyan dan gata tanyong laju pakriban keuadaan keuluwarga jih." "banmandum jroh-jroh mantong," kheun ureueng inong nyan ubak gehazi. teuma watee katrok dikeue elisa, gobnyan laju geusujut dan geuwa gaki elisa. gehazi keuneuk jikireuh inong nyan nibak gaki elisa nyan, teuma elisa laju jipeugah, "peubiyeu mantong! deuh jih inong nyoe seudeh lumpahna. teuma tuhan hana jipeugah sapewe ubak ulon!" ureueng inong nyan laju jipeugah, "bapak, ulon hana lon lakoe aneuk nibak droeneueh. ka ltheueh lon peugah ubak bapak mangat bek neubri harapan nyang shoh keu ulon nyoe." elisa geupaleng ubak gehazi dan laju jipeugah, "bubagaih, jakkok laju tungkat ulon ltheueh nyan tajak kheueh laju u rumah na nyoe. bek gata pioh keu gata bri saleuem keusoe mantong nyang meurumpok ngon gata bak rot ueh. meunyoe ureueng laen jibeutot saleuem ateueh gata, bek gata boih watee keugata jaweub saleuem jih nyan. meunan gata ka trok keunan, keubah kheueh laju tungkat ulon ateuh tuboh aneuk nyan." ureueng inong nyan jipeugah, "bapak elisa! deumi tuhan nyang udeb dan deumi nyawong bapak, ulon hana lon tinggai bapak!" le sababnyan geujak kheueh elisa meusajan deungon ma nyan u rumah jih. gehazi ka awai jajak nibak awaknyan keu jijak keubah tungkat elisa ateueh tuboh aneuk nyang ka meuninggai nyan, teuma hana meusu sibagoe tanda aneuk nyan udeb. dan le sababnyan jijak kheueh gehazi jijak meurumpok ngon elisa dan laju jipeugah, "aneuk nyan hana jibeudoh." meunan ka trok u rumah ureueng inong nyan, elisa geutamong keudroe lam kama nyan dan laju geukalon manyet aneuk nyan ka teu-eh ateueh teumpat eh. elisa geutob pintoe ltheuehnyan laju geumeudoa ubak tuhan. oh ltheuehnyan gobnyan laju geudugom ateueh tuboh aneuk nyan dan laju geupeurab babah, mata dan jaroe gobnyan ubak babah, mata ngon jaroe aneuk nyan. sabab gobnyan geupeubuet nyang lagee nyan bagoe, tuboh aneuk nyan ka jeuet keu su-uem. elisa laju geubeudoh ltheueh nyan geujak keudeh keunoe lam kama nyan, ltheueh nyan geudugom lom ateueh tuboh aneuk nyan. akhe jih aneuk nyan beureusen tujoh goe, dan laju jipeuhah mata jih. elisa geuyue laju ubak gehazi mangat jijak tawok ma aneuk nyan, dan watee ma aneuk nyan ka jitamong, laju jipeugah le elisa ubak ma aneuk nyan, "nyoe aneuk ma." ma nyan laju jisujut dikeue elisa dan ltheuehnyan laju jiba aneuk nyan peuteubiet u luwa. saboh watee jiteuka musem deuk nyang paleng hebat bansaboh nanggroe. le sababnyan elisa geuwoe u gilgal. watee

gobnyan teungoh geupeubeuet saboh kawom nabi-nabi, gobnyan laju geuyue peulayan geuh mangat jijak cok saboh beulangong nyang rayeuk ltheueh nyan laju geutaguen peunajoh keu awaknyan. na sidroe nibak nabi-nabi nyan geuteubiet geujak u ladang keu geujak mita on-on gulee, dan laju meuteuma ngon saboh seunaman bak labu nyang udeb keudroe. le nabi nyan laju geupot boh-boh labu nyan nyang keubiet le that-that, atranyan laju geupeuweu. deungon hana geuteupeue boh peue nyan, le nabi nyan laju geukoih-koih ltheueh nyan laju geupeutamong lam beulangong rayeuk nyan. oh ka masak, laju geujok-jok keu nabi-nabi nyang laen nyan. teuma banmantong awaknyan jirasa peunajoh nyan, awaknyan laju jikliklik jimeuhoi elisa, "bapak, nyoe tuba!" awaknyan hana jitem pajoh. le sababnyan elisa laju geuyue teupong bacut, atranyan laju geusipreuk lam beulangong nyan, ltheueh nyan gobnyan jipeugah, "jok-jok lom peunajoh nyan." biet that-that, peunajoh nyan ka hana le meubahya. bak saboh watee nyang laen, na sidroe ureueng agam jijak nibak teumpat jih di baal-salisa. ureueng nyan jiba keu elisa boh gandom nyang ban mantong teupot dan dua ploh boh ruti nibak gandom nyang phon-phon that jipot lam thon nyan. elisa laju geuyue peulayan gobnyan mangat jijok-jok ruti nyan keu nabi-nabi nyan, teuma le peulayan nyang jipeugah, "hana mungken seb keu sireutoih droe ureueng!" geujaweub le elisa, "tajok kheueh laju mangat awaknyan jeuet jipajoh, sabab tuhan meufeureuman bahwa awaknyan teuma jimakheun dan oh ltheueh jimakheun mantong na nyang leubeu." le peulayan nyan laju jiweuk-weuk peunajoh nyan keu awaknyan, dan awaknyan banmandum hase jimakheun. oh ltheueh jimakheun mantong na tinggai lagee nyang jipeugah le tuhan. naaman na kheueh panglima angkatan prang siria nyang paleng jicinta dan jihareuga le raja siria, sabab meulalu naaman, tuhan ka geupeumeunang ubak tantra siria. naaman na kheueh sidroe panglima nyang peukasa, teuma jihnyan na peunyaket kulet nyang lumpah parah. bak saboh watee siria jijak heuntam nanggroe israel. lam prang nyan sidroe aneuk dara israel jidrob dan laju jiba sibagoe tawanan, oh ltheuehnyan jeuet keupeulayan keupeurumoh naaman. nibak siuroe jipeugah le peulayan nyan ubak pocut po jih, "pocut, meunyoe teungku amphon geujak meurumpok ngon nabi nyang na tinggai di samaria, ka pasti nabi nyan geupeupuleh teungku po." watee naaman geudeungoe hainyan, le jihnyan laju jijak ubak raja dan jipeugah banmandum peue-peue nyang ka jipeugah le aneuk dara nyan. jipeugah le raja, "get, jak kheueh ubak raja israel, ulon teuma lon tuleh surat keu gobnyan." dan jijak kheueh naaman deungon jiba sajan 30.000 peng pirak, 6.000 peng meuh, dan 10 pasang peukayan nyang jroh-jroh. surat nyang geuba nyan asoe jih lagee nyoe: "meulalu surat nyoe ulon peuturi peuwira ulon, nan jih naaman ubak teungku mangat teungku neutem peupuleh peunyaket jih nyoe." watee raja israel geubaca surat nyan, le rajanyan laju jipriek-priek peukayan jih sabab teumakot, ltheueh nyan jipeugah, "mupalo, peue sabab raja israel nyan jiyue bak ulon mangat lon peupuleh ureueng nyoe? ulon bukon po teu allah nyang na kuasa keu lon peu-

udeb ngon lon peumate ureueng laen! pasti raja siria nyan jimita gara-gara ngon ulon!" nabi elisa geudeungoe keuhai nyan, dan laju geukirem peusan nyang lageenyoe ubak raja israel, "pakon jeuet yo? yue kheueh ureueng nyan mangat jijak ubak ulon mangat jihnyan jiteupeue bahwa di israel nyoe na sidroe nabi!" le sababnyan geujak kheueh naaman ngon geuritan guda jihnyan u rumoh elisa, meunan trok laju jipioh bak babah pintoe. elisa laju geukirem sidroe peulayan mangat jipeugah haba nyoe ubak naaman, "neujak kheueh teungku jak manoe tujoh goe lam krueng yordan, oh lheueh nyan teungku ka puleh lom teuma." banjideungoe meunan naaman beungeh that laju jipeugah, "ulon pike gobnyan keudroe nyang teubiet geujak meurumpok ngon ulon, dan geumeudoea ubak tuhan, allah geuh nyan, dan geugrak jaroe geuh nyan nibak tempat nyang saket bak tuboh lon nyoe lheuehnyan laju ulon nyoe ka puleh. krueng abana dan krueng parpar di damsyik leubeh get nibak krueng toh mantong di israel! ulon jeuet lon manoe inan dan hase puleh!" teuma le peulayan-peulayan nyan jipeurab bak ureueng nyan dan jipeugah, "teungku, meunyeo teungku geuyue peubuet sapeue-sapeue nyang payah, ka pasti teungku neupeubuet teuma. peue teuk lom gobnyan geuyue teungku neumanoe mangat jeuet puleh!" le sababnyan jijak kheueh naaman ubak krueng yordan, laju jitamong dan jipeuseunom droe lam krueng nyan na tujoh goe lagee nyang ka geuyue le elisa. lheueh nyan naaman pih ka puleh teuma. tuboh jih ka sihat lom saban lagee tuboh aneuk muda. lheueh nyan jihnyan meusajan ngon nyang ireng jih jijak laju ubak elisa. "jinoenyoe ka ulon teupeue," kheun naaman ubak elisa, "bahwa bansaboh donya nyoe teuma na sidroe allah, nyan kheueh po teu allah nyang jiseumah le ureueng israel. le sababnyan, beuneutem kheueh le teungku neuteurimong meuneubri ulon." geujaweueb le elisa, "deumi tuhan nyang udeb, nyang ulon peutimang, ulon hana lon teurimong meuneubri peue-peue mantong." naaman laju jipaksa mangat elisa geutem teurimong meuneubri jih nyan, teuma elisa teutab hana geutem teurimong, dan jipeugah le naaman, "meunyeo teungku hana cit neutem teurimong nyang ulon bri nyoe, neupeu idhin kheueh ulon lon peuwoe tanoh nyang le jih sidub ek nyang jiba le sipasang bagal. sabab, phon jinoenyoe ulon peuseumah keureubeuen na kheueh keu tuhan mantong, dan kon keu ilah-ilah nyang laen. meunyeo teuma ulon neujak meusigoe ngon raja keu teujak seumayang ubak kuil rimon dewa siria, seumoga tuhan geupeu amphon ulon." seut elisa, "tajak kheueh deungon seulam." dan naaman pih laju jijak. hana treb oh lheueh naaman jijak, gehazi peulayan elisa nyan, teupike keudroe jih, "ah, keupeue jihnyan teupeu biyue jijak deungon hana jibayeue sapeue? nyang sikeubit jih amphon ulon geuteurimong peue nyang jijok le ureueng siria nyan! deumi tuhan nyang udeb, ulon bah lon jak tiyueb jihnyan dan hase lon teume sapeue-peue nibak jihnyan!" le gehazi laju jijak peulet naaman. watee jingieng le naaman na ureueng teuka, jihnyan laju jitreun ateuhe geuritan jih dan laju jipeugah, "peue na peureulee?" jijaweueb le gehazi, "meuah teungku, ulon geuyue jak peutrok ubak teungku bahwa banmantong na dua

droe nabi teuka nibak gunung-gunong efraim. teungku lon geulakee beuneubri 3.000 peng pirak dan dua boh pasang peukayan nyang get keu bandua droe nabi nyan." "ka teuntée ulon bri!" seut naaman, dan jihnyan jipaksa mangat gehazi jitem ba 6.000 peng pirak. naaman laju jibungkoh peng nyan lam dua boh baluem, dan jicok dua boh pasang peukayan nyang get-get, banmandum nyan laju jijok ubak bandua droe peulayan jih, nyang jiyue jak leubeh awai nibak gehazi. watee ka trok ubak buket tempat tinggai elisa, gehazi laju jicok peng ngon peukayan nyan nibak peulayan-peulayan naaman, oh lheuehnyan laju jikeubah lam rumoh. lheueh nyan peulayan-peulayan nyan jiyue jak woe, lheueh nyan laju jitamong lom lam rumoh nyan. geutanyong le elisa, "pane kah jak?" "hana lon jak sahoe, teungku amphon!" jawueb gehazi. teuma elisa geupeugah, "ate ulon na disideh watee naaman jitreun ateuhe geuritan jih keujajak meurumpok ngon gata. nyoe kon watee jih keuteumita peng dan keu teubloe lampoh zaiton, meunan cit lampoh anggo, bubiri dan leumo meunan cit namiet-namiet! sabab gata tateurimong meuneubri nyan, gata pih tateurimong teuma peunyakat naaman. lom pih keu siumu masa keuturonan gata pih teutab na jiteurimong peunyakat nyan!" watee gehazi jiteubiet nibak tempat nyan, jihnyan laju keunpong peunyakat kulet – kulet jih ka jeuet keu puteh lagoena. nibak siuroe nabi-nabi nyang geuididek le elisa, apoh apah ubak gobnyan. nabi-nabi nyan geupeugah, "tempat tinggai geutanyoe ubit that-that! neupeu idhin kheueh keu kamoe meujakkoih bak kayee nyang to ngon krueng yordan, dan geupeudong tempat tinggai geutanyoe disinan." "get that," geujaweueb le elisa. sidroe lamkawan awaknyan jipaksa mangat elisa geujak meusajan ngon awaknyan. elisa geutem, dan awaknyan pih laju jijak meusajan-sajan. watee katrok bak bineh krueng yordan, jipeuphon kheueh awaknyan jijakkoh kayee. deungon hana jisaja mata pato sidroe lamkawan awaknyan rhot lam ie. "pakon meunan hai bapak!" jikuk le awaknyan, "nyan pato gob teungui sikeujab!" "dipat rhot jih?" geutanyong le elisa. ureueng nyan laju jitungok tempat jih, le elisa laju geureupang sikrak kayee lheueh nyan laju geurhon ubak tempat nyan. deungon nyan jitimue kheueh mata pato nyan ateuhe muka ie. geupeugah le elisa, "cok!" ureueng nyan laju jisunyueng jaroe jih dan laju jicok pato nyan. bak saboh watee siria jimuprang deungon israel. oh ka lheueh meurokpakat ngon mandum panglima jih, raja siria nyan laju jipeuteuntée bak tempat toh awaknyan jipeudong khimah. teuma elisa geukirem haba ubak raja israel keu geupeuingat raja nyan mangat bek jijak ubak tempat nyan, sabab le ureueng-ureueng siria ka lazem that jijak rok nyan. le sababnyan raja israel laju geupeuingat ubak ureueng-ureueng israel nyang na tinggai rab-rab ngon tempat nyan mangat awaknyan meujaga-jaga. meunan kheueh elisa meulang-ulang geupeuingat raja. sabab hainyan keubiet saket that ate raja siria, le sababnyan teuma laju jihoi bubena pewiraja jih lheuehnyan laju jitanjong, "pasti lamkawan geutanyoe na nyang meukianat. soe ureueng jih? peugah laju!" sidroe lamkawan pewiraja nyan laju jijaweueb, "hana meusidroe pih, wahe te-

ungku po. nabi elisa kheueh ulee peukuron jih! gobnyan kheueh nyang peugah ubak raja israel peue nyang teungku po peugah nyan, bahpi nyan neupeugah lam kama eh." "jak seulidek kheueh dipat jihnyan," peurintah raja, "mangat jeuet hase ulon drob jihnyan." le ureueng laju jijak peugah ubak raja bahwa elisa na di dotan. le raja siria laju jikirem ubak teupat nyan saboh kawan pasokan nyang rayeuk meunan cit deungon guda dan geuritan prang. oh watee malam awaknyan ka trok ubak banda nyan dan banda nyan laju jikeupong. oh singoh nyan, banbeungoh that-that watee peulayan elisa jibeudoh dan jiteubiet uluwa, laju deuh jikalon pasokan siria ka jikeupong banda nyan leungkab deungon guda dan geuritan prang awaknyan. le sababnyan laju jiwoe ubak elisa dan jipeugah, "mupalo tanyoe, teungku po! peue nyang haroh tapeubuet?" "bek takot," jaweueb elisa. "nyang dong blaih tanyoe leubeh le nibak nyang dong blaih awaknyan." ltheueh nyan elisa laju geumeudoa, "tuhan, bah kheueh droeneueh neubuka mata peulayan ulon mangat jih nyan jeuet jikeumalon!" tuhan geupeutrok doa elisa dan watee peulayan geuhnyan jikeumalon, deuh jingiang gunong nyan peunoh deungon guda dan geuritan meupai jikeulileng elisa. watee ureueng-ureueng siria nyan jijak prang gobnyan, elisa laju meudoa, "tuhan, peubuta kheueh mata bubena awaknyoe!" tuhan geudeungoe doa elisa, deungon nyan teuma awaknyan banmandum ka habeh buta. elisa geujak bak awaknyan sira geupeugah, "gatanyoe ka sisat, nyoe kon banda nyang gata mita. jak, seutot ulon, eunteuk ulon intat gata ubak ureueng nyang gata mita." laju elisa geuintat awaknyan u samaria. watee awaknyan geutamong lam banda nyan, elisa laju meudoa, "tuhan, neupeubleuet kheueh mata awaknyan mangat awaknyan jeuet jimeungieng." tuhan geudeungoe doa elisa; gobnyan geupeubleuet mata mandum awaknyan akhe jih awaknyan hase jimeungieng dan awaknyan banmandum hireuen watee jikalon bahwa awaknyan kana nibak banda samaria. watee raja israel geukalon ureueng-ureueng siria nyan, le raja nyan laju geutanyong, "hei elisa, peu kheueh awaknyan ulon poh mate banmandum?" "bek," jaweueb elisa, "tantra nyang amphon drob nibak mideuen prang pih hana amphon poh mate, peue tok lom nyang nyoe. amphon jok kheueh keu awaknyan peunajoh ngon ie jieb, ltheueh nyan bahkheueh awaknyan jiwoe lom ubak raja droe jih." le sababnyan raja israel laju geupeuna khanuri nyang paleng rayeuk keu awaknyan. oh ka ltheueh awaknyan jimakhad ngon jieb ie, gobnyan geuyue awaknyan jeuet jiwoe ubak raja siria. phon wateenyan ureueng-ureueng siria ka jipioh hana jiprang le nanggroe israel. na padub watee teuma oh ltheuehnyan le benhadad raja siria laju jiba banmandum tantra jih keuneuk jijak prang israel. awaknyan laju jikeupong banda samaria, le sabab prang nyan ka jiteuka deuk nyang paleng hebat lam banda, le sababnyan teuma saboh ulee keuleudee ka meuyuem lapan ploh peng pirak, dan dua on ek cecem mirah pati yuem jih limong peng pirak. bak saboh saat watee raja teungoh geujak-jak ateuhe beuton banda, na sidroe ureueng inong laju jitawok, "teungku amphon, neutulong!" geujaweueb le raja, "me-

unyoe tuhan hana geutulong gata, panena mungken ulon hase lon tulong gata? nibak ulon hana gandom atawa ie anggo! peue nyang gata peureulee?" le inong nyan jijaweueb, "rakan ulon nyoe ka jipadan ulon mangat jeuet kamoe pajoh aneuek ulon leubeh ilee, oh singoh kamoe pajoh teuma aneuek jihnyan. le sababnyan laju kamoe taguen aneuek ulon dan kamoe pajoh. teuma oh singoh nyan watee ulon lakee mangat teutaguen teuma aneuek jih, laju jijak som!" watee geudeungoe meunan, le raja laju geupriek peukayan gobnyan sabab seudeh that. ureueng-ureueng nyang na jidong nibak bineh beuton nyan deuh jikalon bahwa bajee dalam gobnyan na kheueh ija krong. raja geudumpek, "uroenyoe cit teuma elisa haroh mate. bah kheueh po teu allah geuhukom ulon sibrat-brat jih meunyoe elisa nyan hana lon poh mate!" le raja laju geukirem sidroe ureueng mangat jijak leubeh awai u rumah elisa. nibak wateenyan elisa na lam rumah, dan na teuma meupadub droe ureueng patot-patot teungoh meujame lam rumah nyan. sigohlom trok utosan raja nyan u rumah elisa, elisa laju geupeugah ubak ureueng patot-patot nyan, "ngieng kheueh! tukang poh mate nyan jikirem ureueng laen keuneuk jijak poh mate lon. meunyoe ureueng nyan trok keunoe eunteuk, gata tob laju pintoe dan bek gata peubiyeu jihnyan jitamong. dilikot jih teuma teuka raja keudroe." elisa gohlm habeh geumeututoe, raja katrok keunan dan laju geupeugah, "apoh apah nyoe na kheueh tuhan nyang peutreun ateuhe geutanyoe! le sababnyan keupeue guna jih ulon meuharab lom geutulong le gobnyan?" elisa laju geujaweueb, "deungoe kheueh feureuman tuhan! singoh beungoh, kira-kira watee jih lagee watee nyoe, deungon saboh peng pirak mantong ureueng hase jibloe lhee kilo gandom nyang paleng jroh atawa nam kilo gandom jeuneh nyang laen." le ajudan pribadi raja laju jijaweueb, "panena mungken! nyan mustahe, bahpi nibak wateenyeu tuhan geupeutreun ujeuen raya di langet!" "teuma gata ngieng hainyan teutab na, teuma gata hana tateume pajoh atranyan meubacut pih," jaweueb elisa. nibak ureu nyan na peuet droe ureueng nyang keunong peunyakot kulet nyang lumpah parah jidong nibak babah pintoe geureubang banda samaria. awaknyan jimarit sabe keudroe-droe, "keupeue guna jih tanyoe taduekduek disinoe, peu kheueh tapreh mate? meunyoe tanyoe tatamong lam banda, tanyoe teuma mate le sabab deuk; meunan cit meunyoe tanyoe tatinggai teutab disinoe, tanyoe mate cit. bah kheueh tanyoe tajak ubak khimah-khimah ureueng siria. sitan-tan jih tanyoe jipoh mate le awaknyan. teuma na cit keumungkenan tanyoe hana jipakoe sapeue." watee ka teuka seupot awaknyan laju jijak ubak khimah-khimah ureueng siria, teuma awaknyan hana jikalon meusidroe ureueng pih nibak teupat nyan. sabab tuhan ka geupeudeungoe ubak ureueng siria nyan su lagee su saboh pasokan musoh nyang meuguda dan meugeuritan keuneuk jijak prang awaknyan nyang lumpah rayeuk. le ureueng-ureueng siria nyan jipike bahwa le raja israel ka jiswi raja het ngon raja meuse meusajan ngon tantra awaknyan keuneuk jijak prang awaknyan. le sababnyan, malam nyan cit teuma awaknyan jiplueng jijak peuseulamat droe, laju jit-

inggai khimah, guda, meunan cit deungon keuleudee awaknyan hana jipako le nibak khimah jihnyan. ban peuet droe ureueng keunong peunyakot kulet nyan laju jidong bak bineh khimah-khimah nyan, dan laju jitamong lam saboh khimah. awaknyan laju jimakheun ngon jijieb ie disinan, ltheueh nyan jik-cok meuh, pirak meunan cit peukayan-peukayan atranyan laju jijak som. oh ltheueh nyan awaknyan jigisa lom jijak cok teuma atra nyang na lam khimah laen. awaknyan jipeugah sidroe ubak nyang laen, "buet tanyoe nyoe hana get. haba nyoe haba get, dan hainyoe bah kheueh tajak bri tee! meunyoe tapreh trok an singoh, pasti tanyoe geuhukom. bah kheueh tajak peugah hainyoe ubak meuligoe." le sababnyan jigisa kheueh awaknyan u samaria dan laju jitawok ubak ureueng nyang kawai pintoe geureubang bandanyan, "kamoe kalheueh kamoe jak ubak khimah-khimah ureueng siria, dan rupari hana ureueng disinan. guda ngon keuleudee awaknyan kamoe kalon mantong teuikat nibak teumpat jih, dan khimah-khimah jitinggai meunan mantong." le ureueng-ureueng nyang kawai pintoe geureubang nyan laju jitawok jipeugah keuhai haba nyan, le sababnyan teuma na ureueng jipeugah hainyan ubak meuligoe raja. bak watee nyan uroe mantong malam, teuma raja geuteubiet cit nibak kama teumpat eh geuh dan laju geupeugah ubak bubena peugawee gobnyan, "deungoe ulon peugah! ulon kuteupeue reuncana ureueng siria nyan, jihnyan jiteupeue tanyoe nyoe teungoh jiteuka bala deuk, le sababnyan awaknyan jitinggai khimah-khimah jih jijak musom lam padang, guna keu jipanceng geutanyoe mangat tateubiet tak jak mita peunajoh. ltheueh nyan awaknyan jikeupong tanyoe dan laju jiteume duek lam banda nyan." sidroe peugawee raja laju jipeugah, "teungku amphon, tanyoe nyang mantong na lam banda nyoe, naseb tanyoe saban cit lagee naseb ureueng nyang ka mate. le sababnyan bah kheueh tayue meupadub droe ureueng mangat jijak pasang meulimong boh guda lamkawan guda-guda nyang mantong na, dan jijak ubak teumpat nyan keujijak kalon peue nyang ka teujadi." le sababnyan awaknyan laju jipileh meupadub droe ureueng, le raja laju geuyue ubak ureueng-ureueng nyan mangat jiba dua boh geuritan prang keujijak seulidek peue nyang ka teujadi ateueh tantra siria nyan. awaknyan jijak trok laju ubak krueng yordan. banshipanyang rot euh awaknyan laju deuh jingiang peukayan-peukayan dan mubagoe jeuneh peukakaih nyang laen ka meutabu saboh saho. banmandum nyan jitiek meunan mantong le tantra siria watee awaknyan jipeuplueng droe. ltheueh nyan le utosan-utosan nyan laju jiwoe jijak peugah hainyan ubak po raja. ban jideungoe haba nyan bubena peunduek samaria laju jiplueng u luwa banda jijak repah mandum khimah-khimah ureueng siria. paih lagee peue nyang ka geupeugah le tuhan, jeuet kheueh lthee kilo gandom nyang jroh atawa nam kilo gandom jeuneh nyang laen, yuem jih na kheueh saboh peng pirak. keubeutolan nibak wateenyan ajudan pribadi raja meutugaih jikawai babah pintoe geureubang banda. ureueng nyan mate nibak teumpat nyan teugilo-gilo le rakyat ba. hainyan paih lagee nyang ka geupeugah le elisa ubak raja watee raja geujak

ubak gobnyan. elisa ka ltheueh geupeugah bahwa kira-kira bak watee lagee nyan oh singoh beungoh, lthee kilo gandom nyang paleng jroh atawa nam kilo gandom jeuneh nyang laen teuma jipeubloe di banda samaria deungon yuem saboh peng pirak. dan nibak wateenyan ajudan pribadi raja ka ltheueh jipeugah, "panena mungken! nyan mustahe, bahpih nibak wateenyoe tuhan geupeutreun ujeuen raya dilanget!" laju geujaweueb le elisa, "singoh teuma gata ngieng hainyan teujadi, teuma gata hana hase gata rasa peunajoh nyan mubacut pih." dan nyan kheueh nyang keunong ateueh ureueng nyan – jihnyan mate teugilo-gilo bak babah pintoe geureubang. bak saboh watee tuhan geupeutreun bala musem deuk lam nanggroe bansa israel nyang treb jih na tujoh thon. sigihlom bala nyan teuka le elisa ka geupeugah hainyan ubak sidroe inong nibak sunem nyang aneuek geuhnyan ka geupeu udeb lom teuma nibak mate. meunan cit le elisa ka geuyue ubak ureueng inong nyan mangat jiminah deungon keuluwarga gobnyan u nanggroe laen. le ureueng inong nyan laju geupeubuet peue nyang ka geupeugah le elisa nyan ubak gobnyan, le ureueng inong nyan laju jijak u nanggroe filistin keu jitinggai di nanggroe nyan. oh ka ltheueh leupah watee tujoh thon nyan laju jiwoe lom u nanggroe israel. laju jijak meuhadab ubak raja mangat jeuet rumoh ngon ladang gobnyan geujok lom pulang le raja. nibak watee nyan gehazi namiet elisa ka geulakee le raja mangat jitem calitra buet-buet ajaeb nyang ka geupeubuet le elisa. dan paih tate watee ureueng inong nyang teuka nibak sunem nyan jijak meuhadab ubak raja keu jijak peutrok nyang jilakee nyan, gehazi wateenyan teungoh jicalitra ubak po raja pakriban elisa geupeu udeb sidroe aneuek manyak nyang ka meuninggai donya. le sabab nyan laju jipeugah le gehazi, "amphon delat po nyang mulia, nyoe kheueh ureueng inong nyan, dan nyoe aneuek jihnyan nyang ka geupeu udeb lom teuma le elisa!" le raja laju geutanyong dan le inong nyan laju jipeugah keuhai aneuek jihnyan. oh ltheuehnyan le raja laju geutawok sidroe peugawee gobnyan dan laju geupeurintah mangat banmandum atra ureueng inong nyoe teupulang lom teuma, meunan cit banmandum yuem nibak hase ladang-ladang jih nyang tujoh thon nyan watee jihnyan mantong na diluwa nanggroe. nibak siwatee elisa geujak u damsyik. wateenyan raja benhadat teungoh saket, watee raja geudeungoe bahwa elisa na di damsyik, le raja nyan laju geupeugah ubak hazael, sidroe peugawee gobnyan, "gata jakba kheueh hadiah keu nabi nyan, lakee kheueh bak gobnyan mangat gobnyan geutanyong ubak tuhan peu kheueh ulon nyoe puleh atawa hana." hazael laju jijak cok 40 boh unta dan laju jipeudieng ateueh unta nyan meubagoe rupa hase banda damsyik, ltheueh nyan laju jijak ubak elisa. watee katrok ubak elisa nyan, hazael laju geupeugah, "hamba droeneueh raja benhadat geuyue jak meuhadab keue droeneueh keugeuyue tanyong peu kheueh gobnyan puleh nibak saket geuh atawa hana." geujaweueb le elisa, "tuhan meufeureuman ubak ulon bahwa raja nyan teuma meuninggai donya. teuma gata peugah mantong ubak raja nyan bahwa gobnyan teuma puleh." ltheueh nyan le elisa laju geupandang ateueh hazael deungon geutatab muka jihnyan

hana meukreb-kreb le sababnyan teuma hazael ka jeuet keugeulisah. deungan hana teusangka-sangka elisa laju geumo. "pakon teungku po neumo?" geutanyong le hazael. "sabab lontuan kuteupeue buet nyang jeuhet nyang tata peubuet ateuhe israel," kheun elisa. "gata teuma tatot banmandum banda-banda awaknyan nyang meupageue ngon kuta, gata poh mate ureueng-ureueng muda awaknyan nyang get-get, meunan cit gata ceukiek takue-takue aneuek manyak dan gata plah pruet inong-inong nyang teungoh mume." "ah, panena mungken nyan, ulon nyoe ureueng nyang hana meuguna," jaweueb hazael, "panena mungken nibak ulon na kuasa nyang rayeuk meunan bagoe!" "tuhan ka geutunyok ubak ulon bahwa gata teuma jeuet keu raja siria," jaweueb elisa. watee hazael jiwoe lom ubak meuligoe. laju jitanyong le raja benhadad, "peue geupeugah le elisa?" "gobnyan geupeugah bahwa teungku po pasti puleh," jaweueb hazael. teuma oh singoh nyan hazael laju geucok sion ija silimbot, ija nyan laju jiceulob lam ie ltheuehnyan laju jiteugon ateuhe muka raja akhe jih raja nyan mate leumoh. dan hazael jeuet keu raja siria keugeunantoe raja benhadad. yehoram bin yosafat jeuet keu raja yehuda bak watee raja yoram bin ahab ka jimat peurintah ateuhe israel limong thon treb jih. nibak watee nyan yehoram ka me-umu lhee ploh dua thon, dan gobnyan geumat peurintah di yerusalem na lapan thon treb jih. gobnyan geumeukawen ngon aneuek ahab, dan lagee nyang ka geupeubuet le keuluwarga ahab, gobnyan pi meudesya ubak tuhan lagee raja-raja israel nyang laen, teuma tuhan hana geutem peubinasas yehuda sabab gobnyan ka geumeujanji ubak nabi daud hamba gobnyan, bahwa keuturonan gobnyan teutab jeuet keu raja. nibak peumeurintahan yehoram, edom jibeurontak ateuhe yehuda dan laju jipeudong keurajeuen jih keudroe. le sababnyan, geuteubiet kheueh yehoram deungan banmandum geuritan prang gobnyan geujak u zair. oh trok keunan gobnyan laju jikeupong le pasokan edom, teuma oh watee malam teuka gobnyan meusajan deungan pang-pang gobnyan deungan pasokan meuguda gobnyan laju geuheuntam sampoe geuteume tamong lamkawan pasokan musoh, akhe jih awaknyan laju jipeuplueng droe jiwoe u rumah jih maseng-maseng. phon yoh wateenyan edom hana jitem taklok le ubak yehuda. bak wateenyan cit teuma banda libna pih jipeubeudoh beurontak. kisah nyang laen keuhai yehoram teucetet lam kitab seujarah raja-raja yehuda. gobnyan pih meuninggai donya dan laju teupeukubu lam lampoh jrat raja-raja lam banda nabi daud. ahazia aneuek gobnyan jeuet keu raja keugeunantoe gobnyan. ahazia bin yehoram jeuet keu raja yehuda bak watee raja yoram bin ahab ka jimat peurintah ateuhe israel dua blah thon treb jih. bak wateenyan ahazia na meumu dua ploh dua thon, dan gobnyan geumat peurintah di yerusalem sithon treb jih. ma gobnyan nan jih atalya, bin raja ahab dan cucoe omri raja israel. sabab le meukawen nyan, ahazia na hubongan keuluwarga deungan keuluwarga raja ahab. ahazia meudesya ubak tuhan saban lagee nyang ka jipeubuet le keuluwarga ahab. raja ahazia meusajas-sajan jimuprang meusajan ngon yoram raja israel jilawan hazael raja siria. awaknyan jimeuheuntam di ramot,

lam daerah gilead. yoram keunong dan luka nibak muprang nyan, laju jiwoe lom u banda yizreel mangat jeuet teupeu-ubat, dan ahazia geujak ngieng gobnyan disinan. nibak wateenyan nabi elisa geutawok sidroe lamkawan nabi-nabi nyang gobnyan didek dan geupeugah, "meukeumah-keumah kheueh mangat takjak u ramot di gilead, dan taba kheueh kaca nyang meuasoe minyeuk zaiton nyoe. watee gata katrok krudeh tamita kheueh yehu bin yosafat dan cucoe nimsi. pakat kheueh jihnyan ubak saboh bilek, dan ro kheueh minyeuk zaiton nyoe ateuhe ulee gobnyan, ltheueh nyan gata peugah lagee nyoe, 'tuhan meufeuruman bahwa gobnyan geubaiat gata jeuet keu raja israel.' oh ka ltheueh gata peubuet hainyan, gata tinggai kheueh laju teumpat nyan beureujang-reujang." nabi nyang muda nyan laju geujak u ramot, laju meurumpok ngon yehu meunan cit bubena pang-pang nyang laen nyang teungoh meurokpakat disinan. nabi nyan laju geupeugah, "teungku amphon, ulon tuan lon ba beurita keu teungku amphon." geujaweueb le yehu, "keu soe?" "keu teungku amphon keudroe," seut nabi nyan. oh ltheuehnyan awaknyan bandua laju geujak tamong lam rumah, dan nabi muda nyan laju geuroe minyeuk zaiton ateuhe ulee yehu ltheuehnyan laju geupeugah, "tuhan po teu allah israel meufeuruman, 'ulon baiat gata jeuet keu raja ateuhe umat ulon israel. gata teuma tapeubinasas keuluwarga amphon gata ahab. deungan lageenyan ulon hukum izebel nyang ka jipoh mate nabi-nabi lon dan hamba-hamba ulon nyang laen. banmandum keuluwarga dan aneuek cucoe ahab haroh mate. tieb-tieb na ureueng agam bahnyan nyang muda meunan cit nyang tuha teutab ulon peubinasas. keuluwarga jih teuma lon peusanaut lagee lon peusanaut keuluwarga yerobeam dan keuluwarga baesa, raja-raja israel. izebel hana teupeukubu. manyet jih teuma jipajoh le asee di daerah yizreel." "oh ka ltheueh geupeugah banmandum nyan, nabi muda nyan geuteubiet dan laju geuplueng. yehu geugisa ubak rakan-rakan gobnyan, dan awaknyan laju jitanyong, 'peue na haba? ureueng peungoe nyan peue nyang jitem ngon droeneueh?' " "ah, gatanoye ka tateupeue," jaweueb yehu. "hana, kamoe hana kamoe teupeue!" jaweueb awaknyan, "peugah kheueh laju mangat kamoe teupeu!" jaweueb yehu, "gobnyan geupeusampoe peusan tuhan bahwa ulon geubaiat le tuhan jeuet keu raja israel." wateenyan cit teuma rakan-rakan yehu jisuet bajee jubah jih laju jileueng ateuhe reunyeun dikeue yehu, laju awaknyan jiyueb beureuguih sira jidumpek, "yehu raja!" meunan kheueh yehu meukomplot jijak lawan raja yoram nyang yoh watee nyan na di yizreel. yoram jijak keudeh keujajak meu-ubat ateuhe luka-luka nyang keunong ateuhe jih watee teujadi muprang di ramot jilawan hazael raja siria. yehu laju jipeugah ubak rakan-rakan jih bubena panglima, "meunoye gatanoye situju ulon jeuet keu raja, jaga kheueh mangat bek na meusidroe pih nyang teubiet nibak ramot keu jijak peugah ubak ureueng-ureueng di yizreel." oh ltheuehnyan laju jiek ateuhe geuritan prang jih dan jijak laju u yizreel. bak wateenyan yoram gohlom tak puleh, dan ahazia raja yehuda na disinan jijak kalon gobnyan. watee tukang kawai meunara banda yizreel

jikalon yehu dan ureueng-ureueng jih teuka, laju jidumpek, "na saboh kawan ureueng teungoh jijak keunoe!" geujaweueb le yoram, "yue jak laju sidroe tantra meuguda mangat jiseulidek peu kheueh jihnyan rakan atawa lawan." deungan jipasang guda, jikak kheueh tantra nyan keujijak meurumpok ngon yehu oh trok keunan laju jipeugah, "raja kamoe keuneuk geuteupeue peu kheueh teungku nyoe neujak keunoe sibagoe rakan." nyan kon urosan gata!" jaweueb yehu. "jak keunoe meusahoe kheueh ngon ulon!" le tukang kawai meunara nyan jikalon tantra nyang jak meurumpok ngon kawan nyang teungoh jak nyan hana jigisa le. le tukang kawai meunara nyan laju jipeugah hainyan ubak raja, le raja laju jikirem lom tantra sidroe teuk tantra nyang laen. le tantranyoe pih jitanyong lagee nyang jitanyong bunoe ubak yehu, le yehu geujaweueb lom lagee jeunaweueb bunoe, "nyan kon urosan gata! jak keunoe meusahoe kheueh ngon ulon!" le tukang kawai meunaranyan jipeugah bahwa tantra nyang teukirem bunoe katrok ubak kawan ureueng jak nyan teuma hana cit jitem gisa. ltheueh nyan le tukang kawai meunara nyan jipeugah lom, "mungenk peumimpen kawan nyang jak nyan yehu, sabab watee jiba geuritan prang jih lagee ureueng peungoe." "peusiab laju geuritan lon," peurintah raja yoram. geuritan pih laju jipeusiab, yoram meusajan ngon raja ahazia jijak laju ubak yehu, awaknyan maseng-maseng na lam geuritan jih keudroe. awaknyan laju meurumpok ngon yehu nibak ladang beukaih atra nabot. "peu kheueh gata teuka keunoe sibagoe rakan?" tanyong yoram ubak yehu. yehu geujaweueb, "panena mungenk sibagoe rakan, meunyoe disinoe mantong jai that dukon, dan mantong na nyang seumah beurala nyang jipeuphon le izebel ma gata nyan?" "nyoe ka jikianat, ahazia!" kheun yoram ngon su nyang teuga sira jipeuwet geuritan jih keuneuk jiplueng droe. yehu laju geutarek aneuk panah sihabeh sineuga laju jitimbak ateuh yoram dan keunong laju bak rhueng beusot trok ubak jantong jih. yoram laju reubah dan meuninggai donya lam geuritan jih. laju jipeugah le yehu ubak bidkar ajudan jihnyan, "peu kheueh mantong gata ingat, watee geutanyoe taek ateuh guda taseutot ahab, ayah yoram? bak wateenyan tuhan meufeuereuman ubak ahab, 'ulon kuteupeue soe nyang poh mate nabot dan aneuek-aneuek jih nyan baroe, dan ulon meujanji ulon hukom gata lam lampoh nyoe cit teuma.'" "le sababnyan," kheun yehu lom ubak ajudan geuhnyan, "jak tiek laju manyet yoram nyan lam lampoh nabot, mangat teujadi hukoman po teu allah ateuh jihnyan." ahazia jikalon peue nyang ka teujadi, laju jipeuplueng geuritan jihnyan u banda bet-hagan. yehu geupeucrok jihnyan dan laju geukuk ubak aneuek buah gobnyan, "peumate laju jihnyan!" awaknyan laju jiparah jihnyan sampoe luka nibak rot ueh nyang teutuju u gur, bak bineh banda yibleam. teuma gobnyan meuhase jipeuplueng droe sampoe trok u megido, dan disinan jihnyan laju meuninggai donya. peugawee-peugawee jihnyan nyang jijak cok manyet jihnyan laju jiba deungan geuritan jipeuwote lom u yerusalem, laju jipeukubu lam lampoh jrat raja-raja nibak banda nabi daud. ahazia jeuet keu raja yehuda watee raja yoram bin ahab ka

jipeurintah israel nyang treb jih na siblahi thon. trok kheueh yehu u yizreel. watee jideungoe le izebel keuhai peue nyang ka teujadi, jihnyan laju jisugot ok jih dan jiboh cilak mata, ltheuehnyan laju jiceungeuk u miyueb rot tingkab meuligoe. watee yehu jitamong rot babah pintoe geureubang, izebel jita-wok, "hai zimri, tukang poh mate gob! peue buet gata keunoe?" yehu laju geutangah ubak tingkab nyan, ltheueh nyan geupeugah, "soe nyang dong blaih lon tuan?" banjideungoe hainyan, na dua lthee droe peugawee meuligoe jinging u miyueb. yehu geupeugah ubak awaknyan, "rhom keunoe u miyueb inong nyan!" laju le awaknyan jirhom izebel nyan u miyueb dan jigileng laju ngon ban geuritan laju darah ureueng nyan jipeupo ubak beuton dan guda-guda geuritan nyan. laju yehu geutamong lam meuligoe dan geumakheun. ltheuehnyan gobnyan geupeugah, "ureueng inong nyan keunong kutok. bah pih meunan, jak kubu kheueh manyet jih sabab jihnyan na kheueh putroe raja." teuma watee ureueng-ureueng jijak cok manyet inong nyan keuneuk jitanom lam jrat, nyang na jiteume le awaknyan na kheueh bruek ulee, dan tuleueng-tuleueng jaroe ngon tuleueng gaki jih. oh ltheueh hainyan jijak peugah ubak yehu, geupeugah kheueh le yehu, "nyoe ka ltheueh geuramai le tuhan, watee gobnyan geupeugah hainyan ubak nabi elia hamba gobnyan: 'manyet izebel teuma jipajoh le asee di daerah yizreel, dan seuh-seuh manyet nyan meutabu-tabu lagee ek beulatang sampoe hana meusidroe pih nyang hase jituri manyet soe nyan.'" raja ahab na keuturonan tujoh ploh droe aneuek cucoe di banda samaria. le sababnyan yehu geukirem surat u samaria, ubak bubena wali aneuek cucoe ahab dan keu nyang mat kuasa meunan cit keu ureueng-ureueng patot nibak banda nyan. asoe suratnyan lageenyoe, "aneuek cucoe ahab na lam kawai gata, dan nibak gata na geuritan prang, guda, beude dan banda meukuta. le sababnyan, meunan surat nyoe ka gata teurimong, pileh kheueh nyang paleng get lamkawan aneuek cucoe ahab nyan dan baiat kheueh jihnyan jeuet keu raja, ltheuehnyan meujuang kheueh tabila jih nyan." le nyang mat kuasa di samaria ka jiteuka teumakot. awaknyan jipeugah lageenyoe, "raja yoram dan raja ahazia pi hana hase jilawan yehu, peue teuk lom geutanyoe!" le sababnyan ulee meuligoe meunan cit walibanda meusajan deungan ureueng-ureueng patot lam masyarakat meunan cit le bubena wali aneuek cucoe ahab nyan laju jikirem habanyoe ubak yehu, "kamoe taklok ubak teungku amphon dan kamoe peubuet peue-peue mantong nyang teungku amphon peurintah ubak kamoe. kamoe hana kamoe baiat meusidroe pih jeuet keu raja. peubuet kheueh peue nyang jroh meunuront nyang amphon kalon." le yehu jikirem lom surat keu awaknyan, dan su suratnyan lageenyoe, "meunyoe gatanyoe tadong blaih ulon, dan tatem seutot peue-peue nyang ulon peugah, tapoh mate kheueh mandum aneuek cucoe ahab nyan, dan singohnyan, watee nyang lageenyoe, gataba kheueh ulee-ulee awaknyan ubak lon di yizreel." bantujoh ploh droe aneuek cucoe ahab nyan na tinggai di rumah-rumah ureueng patot lam banda samaria, dan jipeulara le awaknyan. watee ka jiteurimong surat yehu nyan, le ureueng-ureueng patot lam banda

samaria nyan, laju jipoh mate bantujuh ploh droe aneuk cucoe ahab dan ulee-ulee awaknyan laju jipaso lam raga ltheuehnyan laju jikirem ubak yehu di yizreel. watee hainyan jijak peugah ubak yehu, le yehu laju jipeurintah mangat mandum ulee-uleenyan jisuson jeuet keudua boh tumpok nibak babah pintoe geureubang banda, dan jipeubiyeu disinan trok an beungoh. banbeungoh that jiteubit kheueh yehu jijak ubak babah pintoe geureubang dan laju jipeugah ubak ureueng-ureueng nyang kana meusapat disinan, "ulon kheueh nyang meukomplot lon jak-lawan raja yoram dan teupoh mate jih nyan; gatanyoe hana meusalah lam hainyoe. teuma banmandum ureueng nyoe kon ulon nyang poh mate. nyoe kheueh bukeuti jih bahwa peue-peue nyang ka geupeugah le tuhan keuhai aneuk cucoe ahab ka ltheueh teujadi. tuhan ka geupeubuet peue nyang ka ltheueh geupeugah meulalu elia hamba gobnyan." oh ltheuehnyan yehu jipoh mate banmandum wareh kawom ahab nyang laen nyang na tinggai di yizreel, dan banmandum peugawee, rakan-rakan nyang to, dan teungku-teungku imeum jih, hana meusidroe pi nyang geupeubiyeu udeb. yehu geutinggai yizreel dan laju geujak u samaria. bak teungoh rot euh, nibak tempat nyang teupeunan "gampung-gampung tukang meurabe", gobnyan laju meurumpok deungon na padub droe syedara ahazia raja yehuda, le gobnyan laju geutanyong, "gatanyoe soe?" "kamoe wareh kawom ahazia", jaweueb awaknyan. "kamoe keuneuk jak u yizreel keuneuk kamoe jak saweue banmandum wareh kawom raja dan aneuk cucoe ratu izebel." "droeb laju awaknyan udeb-udebi!" peurintah yehu ubak aneuk buah gobnyan. dan wateenyan cit teuma banmandum awaknyan teudrob, ltheuehnyan laju jijak poh mate bak bineh mon tho, banmandum nyan na peuet ploh dua droe. hana meusidroe pih jipeubiyeu udeb. ltheuehnyan yehu geujak lom, bak teungoh rot gobnyan jisambot le keuluwarga yonadab bin rekhab. yehu laju geubri saleum ateueh ureueng nyang sira geupeugah, "peu kheueh geutanyoe sapueu kheun? peu kheueh gatatem tulung ulon?" "nyoe", jaweueb yonadab. "meunyo meunan, jak geutanyoe tamumat jaroe," kheun yehu. awaknyan laju jimumat jaroe, yehu geutulung yonadab jiek ateueh geuritan jih, sira geupeugah, "jak ngon lon dan takalon keudroe pakriban ulon bit-bit lon meubuet keu tuhan." dan awaknyan pi laju meusajan-sajan geu-ek geuritan geujak u samaria. meunan trok keudeh yehu laju jipoh mate banmandum syedara ahab, hana meusidroe pih nyang na tinggai. hainyan jeuet lagee peue nyang ka ltheueh geupeugah le tuhan ubak elia. yehu geuyue banmandum peunduduek samaria mangat jimeusapat ltheuehnyan laju geupeugah, "raja ahab kureueng that bit-bit geumeungabdi ubak baal; ulon leubeh bit-bit nibak jihnyan. le sababnyan peusapat kheueh banmandum nabi baal meunan cit nyang seumah baal nyan dan imeum-imeum jih; meusidroe pih hana keucuali. ulon keuneuk peuseumah keureubeuen nyang rayeuk keu baal. soe nyang hana teuka teuhukom mate." rupari nyan na kheueh saboh siasat nibak yehu mangat geupoh mate banmandum nyang seumah baal. ltheuehnyan yehu geubri lom peurintah lagee nyoe: "peuteuntee kheueh

siuroenyan khusus keuteuseumah baal!" le sababnyan mandum ureueng laju jipeuteuntee uroe keuteupeuna acaranyaan dan yehu laju geupeumaklum bansaboh nanggroe israel. nibak uroenyan teuka kheueh bubena nyang seumah baal, hana meusidroe pi nyang na tinggai. awaknyan jitamong lam kuil baal sampoe ka peunoh geudong nyan phon dikewe trok u likot. yehu laju geupeurintah lom mangat jeuet le nyang uroih peukayan-peukayan iejabat nibak kuil nyan jijok laju peukayan-peukayan nyan ubak ureueng-ureueng nyang keuneuk seumah baal. oh ka ltheueh peurintah nyan jipeubuet mandum, yehu laju geutamong lam kuil baal meusajan deungon yonadab bin rekhab, dan laju geupeugah ubak ureueng-ureueng nyang na disinan, "jak ngieng kheueh deungon ate-ate that peu kheueh mandum nyang teuka nyoe ureueng seumah baal. bek sampoe na disinoe ureueng nyang seumah tuhan." ltheuehnyan yehu ngon yonadab geupeuseumah keureubeuen keu baal. diluwa geudong, yehu ka geukeubah na 80 droe peungawai dan peuwira. dan gobnyan pi ka geubri peurintah nyang lageenyoe ubak awaknyan, "gata haroh tapoh mate mandum awaknyan, dan soe mantong lamkawan gata tapeubiyeu sidroe ureueng nyang hase jipeuplung droe, ureueng nyan pih teupoh mate!" meunan yehu seulseuse geupeuseumah keureubeuen, gobnyan geuteubiet dan geupeugah laju ubak peungawai dan peuwira-peuwira geuhnyan, "tamong laju dan poh mate awaknyan banmandum. bek tapeubiyeu meusidroe pih nyang hase jiteubiet!" dan jitamong kheueh awaknyan deungon peudeueng ka teusut lam sarong, dan laju jipoh mate mandum ureueng nyang na disinan, ltheuehnyan manyet-manyet nyang ka teutiek-tiek nyan jitarek uluwa. oh ltheuehnyan awaknyan jitamong teuma lam kuil, laju jipeuteubiet patong baal dan jitot lam apui. patong nyan jipeuhanco meusigoe ngon geudong jih ltheuehnyan teupatnyan teupeujeuet keu tempat toih ek sampoe nibak uroenyoe. meunan kheueh cara jih yehu geupeu habeh bubena nyang seumah baal di israel. le sababnyan tuhan meufeureuman lageenyoe ubak yehu, "banmandum nyang ulon peurintah ubak gata mangat gata peubuet ateueh keuturonan ahab ka gata peubuet. le sababnyan ulon meujanji ubak gata bahwa aneuk cucoe gata sampoe trok ubak keuturonan nyang keu peuet jeuet keu raja di nanggroe israel." teuma yehu hana sipeunoh ate geupeubuet hukum tuhan, po teu allah israel. gobnyan geuseutot peue nyang ka geupeubuet le yerobeam nyang rhot ureueng israel jipeubuet desya deungon cara jiseumah leumo meuh nyang jipeudong di betel dan di dan. bak wateenyan tuhan ka geupeuphon peu-ubit daerah israel. hazael raja siria jireubot banmandum daerah israel siblahi u timu krueng yordan sampoe u seultan trok u banda aroer nyang to ngon krueng arnon, jitamong cit daerah gilead dan basan, teupat tinggai sukeek gad, ruben dan manase timu. kisah laen keuhai yehu, jitamong cit keunan jasa-jasa keupahlawan gobnyan, ka teucetet lam kitab seujarah raja-raja israel. yehu geumat peurintah sibagoe raja na 28 thon treb jih. gobnyan meuninggai dan laju teupeukubu di samaria. dan yoa has aneuk gobnyan jeuet keuraja geunantoe gob-

nyan. watee atalya geuteupeue bahwa aneuk gobnyan raja ahazia, ka meuninggai donya, gobnyan laju geupeutreun peurintah mangat banmandum keuluwarga ahazia teupoh mate. yoas, aneuk ahazia nyan pih rab keunong poh cit meusajan-sajan deungon aneuk-aneuk raja nyang laen, teuma gobnyan seumat sabab jipeuseumat le yoseba ma cut gobnyan. yoas meusajan deungon ureueng nyang peulara gobnyan jiba dan teusom lam saboh kama teupat eh nibak baet tuhan. nam thon treb jih yoseba geupulara aneuk nyan lam baet tuhan watee atalya geumat peurintah sibagoe ratu. nibak thon nyang keutujoh, banmandum uleebalang nyang kawai ratu meunan cit banmandum peungawai meuligoe geuta-wok le teungku imeum yoyada mangat jikak meurumpok ngon gobnyan di baet tuhan. nibak teupatnyan awaknyan laju geuyue meusumpah mangat jipeubuet nyang ka geureuncana le gobnyan. gobnyan laju geupeudeuh yoas, aneuk agam raja ahazia, ubak awaknyan, dan ltheuhnyan laju geubri peurintah nyang lageenyoe, "meunyeoe gata tameutugaih nibak uroe sabat, siper lhee nibak gata bak ktheuh jimeutugaih nibak meuligoe, siper lhee teuk jimeutugaih teuma bak babah pintoe geureubang sur, dan nyang leubeh nyan nibak babah pintoe geureubang likot peungawai-peungawai nyang laen. bandua boh reugu nyang ltheuh meutugaih nibak uroe sabat, bah ktheuh jikawai nibak baet tuhan deungon peudeueng teusut lam sarong keuteulindong raja yoas. gata haroh gata kawai gobnyan ho mantong nyang geujak, dan soemantong ureueng nyang jicuba jikeuneuk peurab bak gata haroh gata poh mate." bubena uleebalang nyan jitaat banmandum peue-peue nyang ka geupeurintah le yoyada nyan dan laju jiba ubak gobnyan aneuk buah jih nyang meutugaih dan nyang ka ltheuh meutugaih nibak uroe sabat nyan. yoyada laju geujok ubak uleebalang nyan kapak-kapak dan peurisai raja nabi daud nyang teukeubah nibak baet tuhan. le mandum peungawai, maseng-maseng deungon peudeung teusut lam sarong, laju jicok teupat awaknyan bansikeulileng keu baet tuhan keu jikawai raja. oh ltheuh nyan le yoyada laju geuba yoas uluwa, laju geukeubah mahkota ateueh ulee gobnyan, dan geujok bak gobnyan kitab hukom allah. yoas geubaiait sibagoe raja dan hainyan laju geupeumaklum ubak mandum rakyatba. banmandum ureueng jipok-pok jaroe sira jisurak, "udeb raja!" ratu atalya geudeungoe su seumeurak peungawai-peungawai meunan cit su rakyatba nyang meuhubo that: teugeusa-geusa wateenyan cit jikak u baet tuhan, nibak teupatnyan ureueng rame cit ka meuhudom. laju geukalon raja nyang baro nyan teungoh geudong bak babah pintoe baet tuhan nibak teupat raja nyan teubaiait, jikeulileng le uleebalang-uleebalang dan nyang yueb beureuguih. banmandum rakyat semurak meuhubo sira beureuguih teuyueb. deungon bagaih that atalya laju geupriek-priek peukayan gobnyan, ltheuhnyan gobnyan sira geuplueng deungon geu klik-klik geupeugah lageenyoe, "khianat! khianat!" yoyada hana geubri atalya nyan teupoh mate meunyeoe to ngon baet tuhan, le sababnyan gobnyan geupeugah ubak mandum uleebalang, "jakba ktheuh laju jihnyoe rot likot meulalu baresan pe-

ungawai dan gata poh mate mandum soe-soe mantong nyang jiseuha jikeuneuk peuseumat jihnyan." awaknyan laju jidrob atalya, jiba laju ubak meuligoe. disinan gobnyan laju jipoh mate dikeue babah pintoe geureubang guda. le imeum yoyada geuyue laju ubak raja yoas dan rakyat mangat jipeuget peujanjian deungon tuhan bahwa awaknyan beujeuet keu umat tuhan. meunan cit gobnyan geuyue ubak raja mangat geupeuget peujanjian deungon rakyat. oh ltheuh rakyat jiseureubu dan jireuloh kuil baal. miseubah meunan cit deungon patong-patong jih teupeuhanco banmandum, dan matan, imeum baal jipoh mate laju dikeue miseubah-miseubah nyan. yoyada geupeu tugaih ubak peungawai mangat jikawai baet tuhan, dan laju gobnyan meusajan-sajan deungon banmandum uleebalang, meunan cit deungon banmandum peungawai droe raja dan peungawai meuligoe dan banmandum rakyat jikak peudengend raja yoas nibak baet tuhan ubak meuligoe. yoas geutamong rot pintoe geureubang peungawai, laju jiduek ateueh singgahsana. banmandum rakyat mangat that ate, banda pih ka aman dan atalya ka jipoh mate. yoas meu-umu tujuh thon watee gobnyan jeuet keuraja yehuda. nibak thon nyang keutujoh watee keurajeuen yehu ateueh israel, yoas jeuet keu raja yehuda. gobnyan geumat peurintah di yerasalem na peuet ploh thon treb jih. ma gobnyan nam jih zibya asai nibak banda bersyeba. beureukat geudidek le teungku imeum yoyada, yoas sipanyang udeb gobnyan geumeubuet nyang that-that mangat ate tuhan. teuma saying that, teupat teuseumah dewa hana geupeuhanco, le sababnyan teuma rakyat teutab mantong jipeuseumah keureubeuen dan jito keumeunyan nibak teupat nyan. bak siuroe yoas geutawok bubena teungku imeum dan geuyue ubak awaknyan mangat jikeubah peng nyang meuteume nibak gob-gob peuseumah bak baet tuhan, bahnyan peng nyang jibayue le gob watee teupeuna keureubeuen, meunan cit peng nyang jijok leb ngon sukarela. tieb-tieb teungku imeum haroh meutanggong jaweueb ateueh peng nyang jipeuseumah nyan le ureueng nyang geulayaninyan. peng nyan geupguna keungon peuet pat-pat nyang rusak nibak baet tuhan. trok ubak thon keu dua ploh lhee nibak peumeurintahan yoas, le teungku-teungku imeum gohlom cit geupeuget pat-pat nyang reuloh nibak baet tuhan. le sababnyan yoas laju geutawok teungku imeum yoyada meusajan deungon imeum-imeum nyang laen, ltheuhnyan geupeugah, "pakon gatanyeoe gohlom cit tapeuget baet tuhan? phon uroenyoe gata hana teubri le takeubah peng nyang gata teurimong. banmandum nyan haroh gata jok keu ngon peuet baet tuhan." teungku-teungku imeum situju keu hana geupeusapat le peng nibak rakyat, dan hana teuma meutanggong jaweueb ateueh teureuhab baet tuhan. yoyada laju geucok saboh kotak tutob kotaknyan laju geupeurruhueng, ltheuhnyan geukeubah laju to ngon miseubah blaih ueneun pintoe tamong baet tuhan. banmandum peng nyang teupeuseumah di baet tuhan laju geupeutamong lam kotaknyan le teungku-teungku imeum nyang meutugaih nibak babah pintoe tamong. tieb-tieb watee meunyeoe kotaknyan ka le meuasoe ngon peng, le seukeutareh raja

meusajan deungon teungku imeum agong geujak keun-
nan sira geuitong jeumeulah peng nyan, ltheuhnyan
baro kheueh geubungkoh. oh ltheueh jeumeulah
jih teucetet, peng nyan laju geujok ubak peungawas
nyang peuget baet tuhan. le peungawas nyan laju
jibayeue keu tukang kayee, tukang bangunan, tukang
baree dan tukang peut batee. peungawas nyan
cit teuma bloe kayee ngon batee, dan nyang atoe
banmandum peng-peng teubiet keu teureuhab baet
tuhan nyan. teuma peng nyan mubacut pih hana teu-
peugna keuteupeuget cangkie-cangkie pirak, cam-
bong, beureuguih, alat-alat panyot atawa peukakaih
nyang laen nibak meuh atawa pirak. banmandum
geubayeue keu tukang-tukang dan geulboe bahan-
bahan seumeungot nyang teupeureulee. bubena pe-
ungawas buet nyan juoe that-that, deungon nyan
hana peureulee teulakee laporan tanggung jaweueb
peng nyan nibak awaknyan. peng nibak keureubeuen
gantoe rugoe dan keureubeuen peumphon desya
hana teupeutamong lam kotaknyan. peng nyan geu-
jok keu teungku-teungku imeum. nibak wateenyan
hazael raja siria jijak prang dan laju jireubot banda
gat. dan kana niet keuneuk jijak prang yerusalem
teuma. le sababnyan yoas laju geukirem keu gobnyan
peng sineuboh. peng nyan geuteume nibak banman-
dum atra peuseumahan nyang yoh watee ilee ka teu-
jok keu tuhan le yoas keudroe, dan le yosafat, yoram
meunan cit ahazia, na kheueh raja-raja nyang mat
peurintah sigohlom gobnyan. meunan cit nibak man-
dum meuh lam kaih baet tuhan dan lam kaih meuli-
goe raja. deungon nyan teuma hazael hana jeuet jijak
prang yerusalem. ltheuhnyan le peugawee-peugawee
keurajeuen yehuda ka meukomplot jilawan raja yoas.
dua droe lamkawan awaknyan, na kheueh yozakar
bin simeat, dan yozabad bin somer, jipoh yoas bak
saboh rumoh nyang jipeudong ateuheh sinamon tanoh
sibraih utimu yerusalem, nibak troet run u sila. yoas
jikkubu nibak lampoh jrat raja-raja nibak banda nabi
daud. amazia aneuek gobnyan jeuet keuraja geu-
nantoe gobnyan. kisah nyang laen keuhai raja yoas
teucetet lam kitab seujarah raja-raja yehuda. nibak
thon nyang keudua ploh lhee watee peumeurintahan
yoas ateuheh yehuda, yoahas aneuek yehu jeuet keu-
raja israel, dan gobnyan geumat peurintah di samaria
tujoh blaih thon treb jih. lagee raja yerobeam nyang
mat peurintah sigohlom nyan, yoahas meudesya ubak
tuhan dan jeuet keusabab ureueng israel ka meudesya
cit teuma. gobnyan hantom na geutinggai buet-
buet geuh nyang jeuhet nyan. le sababnyan tuhan
meureuka ubak israel deungon nyan teuma gobnyan
geupeubiyeu mantong hazael raja siria dan benhadad
aneuek gobnyan, meu-ulang-ulang jipeutaloe israel.
le sababnyan yoahas meudoa ubak tuhan, dan tuhan
geudeungoe doa geuhnyan, sabab tuhan geukalon
padubna keujam jih raja siria jitindeeh ureueng is-
rael. tuhan laju geubri keu ureueng israel sidroe peu-
mimpin nyang peuleuh awaknyan nibak keukuasaan
siria deungon nyan teuma awaknyan udeb teun-
tram lom lagee nyang ka-ka. bahpi meunan ure-
ueng israel teutab hana jipioh-pioh jipeubuet desya
nyang geupeuphon le raja yerobeam. awaknyan
teutab jipeubuet desya-desya nyan, dan jipeubiyeu
mantong patong dewi asyera teutab na di samaria.

angkatan prang israel ka jipeuhanco le raja siria de-
ungon nyan teuma raja yoahas tinggai 50 boh pa-
sokan meuguda, 10 boh geuritan prang, dan 10.000
droe sipa-i. kisah laen keuhai raja yoahas dan ban-
mandum jasa keupahlawanan gobnyan ka teucetet
lam kitab seujarah raja-raja israel. 9 gobnyan me-
uninggai dan teupeukubu di samaria. yoas aneuek
gobnyan jeuet keuraja keugeunantoe gobnyan. nibak
thon nyang keu lhee ploh tujoh peumeurintahan raja
yoas ateuheh yehuda, yoas bin yoahas jeuet keuraja is-
rael dan geumat peumeurintah di samaria 16 thon
treb jih. gobnyan pi meudesya ubak tuhan sabab geu-
turot buet nyang jeuhet nibak raja yerobeam nyang
ka jeuet keusabab ureueng israel jipeubuet desya.
kisah nyang laen keuhai raja yoas, meunan cit keuhai
keupahlawanan gobnyan lam prang teulawan amazia
raja yehuda, ka teucetet lam kitab seujarah raja-
raja israel. yoas meuninggai dan teupeukubu ni-
bak lampoh jrat raja-raja di samaria. yerobeam ii
aneuek gobnyan jeuet keuraja keugeunantoe gob-
nyan. bak saboh watee nabi elisa saket brat, dan raja
yoas geuteuka geujak kalon gobnyan. watee geukalon
elisa karab meuninggai, rajanyan laju geumo sira
geupeugah, "bapak lon, bapak lon, nyang bila is-
rael nyang paleng rayeuk!" "cok kheueh busur ngon
aneuk panah!" peurintah elisa ubak gobnyan. yoas
laju geucok, ltheuhnyan le elisa geuyue meusiab-siab
mangat jitimbak ngon aneuk panah nyan. raja pih
meusiab-siab, dan elisa laju geukeubah jaroe gob-
nyan ateuheh jaroe raja. ltheuhnyan pakriban nyang
ka geupeurintah le nabi nyan, raja laju geupeuhah
teungkab nyang meuhadab u siria. "timbang kheueh
aneuk panah gata!" peurintah nabi elisa lom. dan me-
unan oh ltheueh raja geupeuleuh aneuk panah nyan,
nabinyan laju geupeugah, "gata kheueh panah tuhan.
deungon panah nyan tuhan teuma geupeutaloe siria.
gata teuma tamuprang talawan siria di afek sam-
poe gata hase tapeutaloe awaknyan." elisa laju geuyue
ubak raja yoas mangat geujakcok panah-panah gob-
nyan nyang laen dan laju geuseupot atranyan ateuheh
tanoh. raja geuseukok tanoh na lhee goe, ltheuhnyan
laju geupioh. elisa beungeh that, dan laju geupeu-
gah, "nyang sikeubit jih gata seukok limong atawa
nam goe, deungon nyan gata hase tapeuhanco bansa
siria. teuma jinoo gata hase tapeutaloe awaknyan cit
ltheegoe sagai." hana treb teuma oh ltheuhnyan elisa
meuninggai donya dan laju teupeukubu. nibak wa-
teenyan geurombolan-geurombolan moab lazem jih
jiprang israel sithon sigoe. nibak siuroe watee na
meupadub droe ureueng teungoh jipeukubu ureueng
mate, laju jikalon saboh kawan geurombolan moab
teungoh jijak. dan awaknyan pih hana jipike panyang
manyet ureueng mate nyan jitek meunan mantong
lam jrat. elisa laju geuplueng, meunan manyet nyan
tupeh ubak keuranga elisa, manyetnyan laju udeb
ltheuhnyan laju jidong. lam watee keurajeuen yoas
nyan, hazael raja siria teutab ji-ienanya bansa israel.
teuma tuhan geugaseh keu umat gobnyan dan geupeu
amphon awaknyan. gobnyan hana geutem awaknyan
jipeuranab ateuheh rhueng bumoe, teuma gobnyan
geutulog awaknyan, deumi janji gobnyan deungon
nabi ibrahim, nabi ishaq dan nabi yakub. trok anji-
noe gobnyan teutab hana geutuwoe keu umat gob-

nyan. oh lheurehnyan hazaël raja siria meuninggai donya, dan benhadad aneuek gobnyan jeuet keuraja. dan yoas raja israel hase geupeutaloë benhadad lhee goe dan teucok lom teuma banda-banda nyang ka jireubot le benhadad watee peumeurintah jimat le raja yoahas ayah yoas. bak thon nyang keudua keurajeuen yoas bin yoahas ateuh israel, amazia bin yoas jeuet keu raja yehuda. bak wateenyan gobnyan na umu dua ploh limong thon, dan gobnyan geumat peurintah di yerusalem dua ploh sikureueng thon treb jih. ma gobnyan nan geuh yoadan asai yerusalem. amazia geupeubuet buet nyang paleng galak ate tuhan, teuma gobnyan kon lagee nabi daud, indatu gobnyan. lagee ayah gobnyan, gobnyan pi hana geupeuhanco teupat-teupat gob seumah dewa, le sababnyan rakyat teutab mantong jipeuseumah keureubeuen sira jitor keumeunyan nibak teupat nyan. meunan ka kong keurajeuen gobnyan, amazia laju geuhukom mate bubena peugawee nyang poh mate ayah gobnyan. teuma aneuek-aneuek peugawee-peugawee nyan hana geupoh, sabab gobnyan jiseutot peurintah tuhan nyang na teuteuh lam kitab nabi musa, "bek gata hukom mate ureueng syiek jih le sabab buet-buet nyang jeuhet nyang jipeubuet le aneuek-aneuek jih, dan bek gata hukom mate aneuek-aneuek jih le sabab buet nyang jeuhet nyang jipeubuet le ureueng syiek jih. tieb-tieb ureueng jeuet teuhukom mate meunyoë buet nyang jeuhet nyan jipeubuet le jihnyan keudroe." nibak saboh prang nyang paleng hebat, amazia hase geupoh mate 10.000 droe sipa-i edom di panton asin, dan hase geureubot banda sela. bandanyan laju geuboh nan yokteel. sampoe an jinoo banda nyan mantong nan jih yokteel. oh lheurehnyan amazia geukirem utosan ubak yoas raja israel keugelakee mangat geutem lawan gobnyan di mideuen prang. teuma le raja yoas laju geukirem haba lageenyoe, "bak saboh watee tamah meuduro nyang na lam gle libanon jikirem haba lageenyoe su keu bak ceumara, 'he bak ceumara, gata jok kheureh aneuek dara gata keu aneuek ulon mangat jeuet keupeurumoh jih.' teuma disinan meulin-taih kheureh saboh beulatang uteuen nyang jiloblobloh lam uteuen meuduro nyan. gata, amazia, kajeuet keu cungkak, sabab gata ka tapeuloë ureueng edom. le sababnyan, kon kheureh meunang nyan kaseb keugata? nyang siget jih gata tinggal mantong lam rumoh! keupeue guna jih tamita-mita pasai nyang jeuet keusabab gata meupalo meunan cit deungon rakyat gata?" teuma amazia teutab hana jipako peue-peue nyang ka geupeugah le yoas raja israel nyan. le sababnyan teuma, raja yoas meusajan deungon aneuek buah gobnyan laju geujak u betsemes di yehuda laju geumprang ngon amazia nibak teupat nyan. tantra yehuda hase geupeutaloë dan banmandum tantra awaknyan jiplueng sira jiwoe u rumoh jih maseng-maseng. yoas laju geudroe amazia, lheurehnyan geujak laju u yerusalem geujak reuloih beuton banda nyan nyang panyang jih leubeuh kureueng na dua reutoih metee, phon nibak babah pintoe geureubang efraim sampoe trok ubak babah pintoe geureubang sagoe. banmandum meuh dan pikir meunan cit banmandum peukakaih nyang na lam baet tuhan, meunan cit banmandum atra be-

unda lam meuligoë, meusajan ngon na padubdroe sandra geuangkot le yoas u samaria. kisah nyang laen keuhai raja yoas, meunan cit keuhai pahlawan gobnyan teulawan amazia raja yehuda ka teucetet lam kitab seujarah raja-raja israel. yoas meuninggai donya dan teupeukubu nibak lampoh jrat raja-raja di samaria. yerobeam ii aneuek gobnyan jeuet keuraja keugeunantoe gobnyan. oh ka lheureh yoas raja israel meuninggai donya, amazia raja yehuda, mantong udeh thon teuk. di yerusalem na saboh komplot keuneuk poh mate amazia. le sababnyan gobnyan geuplueng u lakhis, teuma le musoh-musoh gobnyan laju jipeucrok trok keudeh meunan meuteume laju jipoh mate. manyet gobnyan jiba ngon guda u yerusalem, laju teupeukubu nibak lampoh jrat raja-raja di banda nabi daud. le sababnyan rakyat yehuda laju jibaiaat uzia, aneuek agam amazia jeuet keu raja awaknyan. nibak wateenyan uzia na umu 16 thon. kisah nyang laen keuhai raja amazia na teucetet lam kitab seujarah raja-raja yehuda. oh ka lheureh ayah gobnyan meuninggai donya, uzia geureubot lom banda elat dan geupeudong lom teuma. nibak thon nyang keulimong blaih watee peumeurintahan geumat le amazia bin yoas ateuh yehuda, yerobeam ii bin yoas jeuet keu raja israel, dan geumat peurintah di samaria 41 thon treb jih. gobnyan meudesya ubak tuhan, sabab geuseutot buet nyang jeuhet nyang geupeubuet le raja yerobeam i nyang ka geupeujeuet ureueng israel meudesya. yerobeam ii nyoe kheureh nyang reubot lom banmandum bandum daerah israel, phon nibak rot u hamat di utara trok u laot mate di seulitan. nyan paih lagee janji tuhan, po teu allah israel, meulalu hamba gobnyan nabi yunus bin amitai ureueng gat-hefer. tuhan geukalon padub na seungsara jih ureueng israel, dan hana meusidroe pi nyang tulong awaknyan. tuhan hana niet keuneuk geupeuhanco bansa israel keu siumu masa, le sababnyan gobnyan geutulung awaknyan meulalu raja yerobeam ii. kisah nyang laen keuhai raja yerobeam ii, keuhai keupahlawan gobnyan lam tieb-tieb mideuen prang dan pakriban gobnyan geureubot lom damsyik meunan cit hamat nibak yehuda keu israel, banmandum nyan na teucetet lam kitab seujarah raja-raja israel. yerobeam ii meuninggai donya dan laju teupeukubu nibak lampoh jrat raja-raja. zakharia aneuek agam gobnyan jeuet keuraja keugeunantoe gobnyan. nibak thon keu dua ploh tujuh geumat keurajeuen le raja yerobeam ii ateuh israel, uzia bin amazia jeuet keu raja yehuda. nibak wateenyan gobnyan meumumu 16 thon dan geumat peurintah di yerusalem 52 thon treb jih. ma gobnyan asai geuh di yerusalem nan geuh yekholya. saban cit lagee ureueng syiek gobnyan uzia pi geupeubuet buet nyang lumpah that galak ate tuhan. teuma, sayang that, gobnyan hana geupeuhanco bubena teupat gob seumah dewa, le sababnyan rakyat teutab jipeuseumah keureubeuen dan jitor keumeunyan nibak teupat nyan. tuhan geupeuteuka ateuh gobnyan peunyaket kulet nyang bit-bit parah, sampoe meuninggai donya peunyaket nyan teutab hana puleh. gobnyan teupeuaseng nibak saboh rumoh dan teupeubeubaih nibak buet-buet gobnyan. yotam aneuek agam gobnyan geupeurintah rakyat sibagoe waki geuh. kisah nyang

laen keuhai raja uzia ka teucetet lam kitab seujarah raja-raja yehuda. uzia meuninggai donya dan teupeukubu nibak lampoh jrat raja-raja di banda nabi daud. yotam aneuek agam gobnyan jeuet keu raja keugeunantoe gobnyan. nibak thon nyang keu lhee ploh lahan geumat keurajeuen le raja uzia ateueh yehuda, zakharia bin yerobeam ii jeuet keu raja israel nyang geumat peurintah di samaria nam buleuen treb jih. saban lagee raja-raja nyang mat peurintah sigihlom nyan, gobnyan pi meudesya ubak tuhan. gobnyan geuseutot buet nyang jeuhet nyang geupeubuet le raja yerobeam i, nyang ka geupeujeuet israel meudesya. salum bin yabes meukomplot keuneuk jilawan raja zakharia, dan jipoh mate gobnyan di yibleam, dan laju jeuet keuraja geunantoe gobnyan. deungon lageenyan teuka kheueh peue nyang ka geupeujanji le tuhan ubak raja yehu bahwa aneuek cucoe gobnyan sampoe ubak keuturonan nyang keupeuet teuma jeuet keu raja israel. kisah nyang laen keuhai raja zakharia, na teucetet lam kitab seujarah raja-raja israel. nibak thon nyang keu lhee ploh sikureueng geumat keurajeuen le raja uzia ateueh yehuda, salum bin yabes jeuet keu raja israel. gobnyan geumat peurintah di samaria cit sibuleuen sabab menahem bin gadi jijak nibak tirza u samaria, laju jipoh mate salum, dan jeuet keuraja geunantoe gobnyan. watee teun-goh jijak nibak tirza nyan, le menahem jipeuhanco sapsansapa banda tifsah meunan cit deungon daerah-daerah nyang na bansilingka nyan, meunan cit peunduduek nyang na disinan pi habeh geupoh hana nyang tinggai, sabab bandanyan hana jitem meunyeurah ubak geuhnyan, inong-inong mume nyang na lam bandanyan geuprah pruet. kisah nyang laen keuhai raja salum, meunan cit keuhai komplotan gobnyan, ka teucetet lam kitab seujarah raja-raja israel. nibak thon nyang keu lhee ploh sikureueng keurajeuen raja uzia ateueh yehuda, menahem bin gadi jeuet keu raja israel, dan geumat peurintah di samaria na siploh thon treb jih. siumu udeb gobnyan meudesya ubak tuhan sabab geuseutot buet raja yerobeam i, nyang teupeujeuet ureueng israel meudesya. watee pul raja asyur jijak prang israel, le menahem geujok keu gobnyan 34.000 kilogram pirak mangat gobnyan geutulong peukong keurajeuen menahem ateueh israel. cara menahem meuteume peng nyan na kheueh gobnyan geupaksa ureueng-ureueng kaya di israel mangat jijok limong ploh peng pirak tieb-tieb ureueng. le sababnyan pul geutinggai nanggroe nyan dan geuwoe nanggroe geuh keudroe. kisah laen keuhai raja menahem na teucetet lam kitab seujarah raja-raja israel. gobnyan meuninggai donya dan laju teukubu, dan pekahya aneuek gobnyan teubaiat jeuet keu raja geunantoe gobnyan. nibak thon keu limong ploh keurajeuen raja uzia ateueh yehuda, pekahya bin menahem jeuet keu raja israel dan geumat peurintah di samaria dua thon treb jih. gobnyan meudesya ubak tuhan sabab geuturot buet nyang jeuhet nyang geupeubuet le raja yerobeam i, nyang peujeuet ureueng israel meudesya. sidroe lamkawan uleebalang gobnyan, na kheueh pekah bin remalya, jimeukumplot deungon ureueng gilead nyang le jih na droe. dan lam saboh kuta nibak meuligoe di samaria awaknyan jipoh mate pekahya meusajan ngon dua teuk nyang

laen nyang nan jih argob dan arie. ltheuehnyan pekah jeuet keuraja geunantoe pekahya. kisah laen keuhai raja pekahya na teucetet lam kitab seujarah raja-raja israel. nibak thon nyang keu limong ploh dua keurajeuen raja uzia ateueh yehuda. pekah bin remalya jeuet keu raja israel. gobnyan geumat peurintah di samaria thon treb jih. gobnyan meudesya ubak tuhan sabab gobnyan geuseutot buet raja yerobeam i nyang geupeujeuet israel ka meudesya. watee peumeurintah pekah nyan, tiglat-pileser raja asyur geureubot banda iyon, abel-bet-maakha, yanoah, kedesh, hazor, daerah gilead, galilea dan naftali. peunduduek nyang na disinan teuangkot cit sibagoe ureueng keunong teuen u asyur. bak thon nyang keudua ploh watee keurajeuen raja yotam bin uzia ateueh yehuda, hosea bin sela ka meukomplot keuneuk jilawan raja pekah dan laju jipoh mate gobnyan, le sababnyan teuma geuhnyan laju jeuet keuraja keugeunantoe gobnyan. kisah nyang laen keuhai raja pekah ka teucetet lam kitab seujarah raja-raja israel. nibak thon nyang keudua watee keurajeuen raja pekah bin remalya ateueh israel, yotam bin uzia jeuet keuraja yehuda. nibak wateenyan gobnyan na umu 25 thon dan gobnyan geumat peurintah di yerusaleim 16 thon treb jih. ma gobnyan yersa binti zadok. yotam geumeubuet nyang paleng mangat ate tuhan, saban cit lagee ureueng syiek gobnyan raja uzia. teuma sayang that, teumpat-teumpat gob seumah dewa hana geupeuhanco, le sababnyan rakyat teutab jimeukeureubeuen dan jittot keumeunyan nibak teumpat nyan. yotam kheueh nyang peudong babah pintoe geureubang utara di baet tuhan. nibak peumeurintahan yotam, tuhan ka geupeuphon kirem rezin raja siria dan pekah raja israel keuteuijak prang yehuda. kisah nyang laen keuhai raja yotam na teucetet lam kitab seujarah raja-raja yehuda. gobnyan meuninggai donya dan teupeukubu nibak lampoh jrat raja-raja nibak banda nabi daud. ahas aneuek gobnyan jeuet keuraja keugeunantoe gobnyan. nibak thon nyang keu tujoh blaih keurajeuen raja pekah bin remalya ateueh israel, ahas bin yotam jeuet keuraja yehuda. wateenyan gobnyan na umu 20 thon dan gobnyan geumat peurintah di yerusaleim 16 thon treb jih. gobnyan hana geuseutot teuladan nyang get nibak nabi raja daud, indatu gobnyan, teuma nyang geupeubuet nyang hana galak ate tuhan, po teu allah gobnyan. gobnyan udeb lagee raja-raja israel, dan geupeuseumah aneuek gobnyan nyang agam sibagoe keureubeuen ubak dewa, meunurot keubiasaan brok ureueng-ureueng nyang ka geu-use le tuhan nibak nanggroe kanaan watee ureueng israel jitamong lam nanggroe nyan. ahas geupeuseumah keureubeuen dan geutot keumeunyan nibak teumpat-teumpat gob seumah dewa di gunung-gunong dan jimiyueb-miyueb bak kayee nyang luhu. nibak wateenyan raja edom jikuasa lom banda elat dan jiuse ureueng-ureueng yehuda nyang na tinggai disinan. ureueng-ureueng edom oh ltheuehnyan teuka dan tinggai teutab di banda nyan trok nibak uroenyoe. bak wateenyan cit teuma rezin raja siria dan pekah raja israel jijakprang dan jikeupong yerusaleim, teuma hana hase jipeutaloe ahas. ahas geukirem utosan ubak tiglat-pileser raja asyur deungon peusan lageenyoe, "ulon namiet droeneuh

nyang seutia; le sababnyan, ulon meulakee neuteuca dan neupeuseumat kheueh ulon nibak raja siria dan raja israel nyang teungoh jiprang ulon." ahas geucok laju meuh ngon pirak nyang na lam baet tuhan, meunan cit deungon atra nyang na lam meuligo geucok cit teuma, atranyan laju geukirem ubak raja asyur sibagoe hadiah gobnyan. raja tiglat-pileser geuteurimong peue nyang geulakee le raja ahas nyan, deungon nyan teuma laju geuprang dan geureubot damsyik. bubena peunduek banda nyan laju geudroe b dan geuba sibagoe ureueng nyang teuteuen dan geuba laju u kir, dan raja jih, na kheueh raja rezin, geupoh mate. watee raja ahas geujak u damsyik keugeujak meurumpok ngon raja tiglat-pileser, laju geukalon na miseubah lam banda nyan. laju geukirem ubak teungku imeum uria di yerusalem cuntoh miseubah nyan deungon ukoran nyang paih dan teupeureunci that. le sababnyan teuma uria laju geupeudong saboh miseubah saban that lagee cuntoh meunan cit ukoran jih nyang ka geuteurimong nyan, atranyan seuleuseo sigohlom ahas trok geugisa. watee ahas ka trok nibak damsyik, laju geukalon le ahas bahwa miseubah nyan ka seuleuseo. ateuheh miseubah nyan laju geupeuseumah keureubeuen beulatang meunan cit deungon keureubeuen gandom. meunan cit geuleng teuma keureubeuen ie anggo ngon keureubeuen darah nibak keureubeuen peudame ateuheh miseubah nyan. ahas geukalon bahwa miseubah peurunggu nyang teupeukhusus keu tuhan nyang na teuduek lamkawan baet tuhan deungon miseubah gobnyan nyang baro. le sababnyan miseubah peurunggu nyan laju geupinah nibak keue baet tuhan u blaih utara miseubah gobnyan nyang baro. ltheuh nyan laju geupeugah ubak uria, "peuguna kheueh miseubah ulon nyang rayeuk nyoe keuteupat keureubeuen beunghon ngon keureubeuen malam nyang geupeuseumah le raja ngon rakyatba, dan ro disinan keureubeuen anggo nibak rakyat. ro kheueh laju ateuheh miseubah nyan darah mandum beulatang nyang teupeuseumah. dan miseubah peurunggu nyang awai nyan bah kheueh ulon nyang peuguna keungan lon lakee peutunok ubak areuwah-areuwah." uria geupeubet banmandum peue-peue nyang geupeurintah le raja nyan. ltheuh nyan ahas laju geureuloih geuritan-geuritan peurunggu nyang teupeuguna lam baet tuhan, dan geuleukang laju guci-guci nyang na bak geuritan nyan. beujana peurunggu nyang rayeuk nyang na ateuheh rueng dua blaih boh leumo peurunggu nyan geucok cit dan geukeubah laju ateuheh keumaleueng batee. dan keu geupeumangat ate raja asyur, ahas geureuloih teuma balairung raja nyang na lam baet tuhan, dan geutob laju pintoe tamong nyang teupeukhusus keu raja. kisah laen keuhai raja ahas na teucetet lam kitab seujarah raja ahas ateuheh yehuda, hosea bin ela jeuet keuraja israel, dan gobnyan geumat peurintah di samaria sikureueng thon treb jih. gobnyan meudesya ubak tuhan, teuma desya gobnyan hana saban le jih ngon desya-desya raja-raja israel nyang ka geumat peurintah sigohlom gobnyan.

gobnyan jiprang dan jipeutaklok le salmaneser raja asyur, le sababnyan teuma gobnyan tieb-tieb thon haroh geubayeue upeti ubak raja asyur nyan. teuma nibak saboh watee, hosea geukirem utosan ubak so sidroe raja nanggroe meuse keugeulakee bantu. deungon nyan teuma hosea hana geubayeue le upeti tieb-tieb thon keu raja asyur. watee salmaneser jiteupeue buet hosea nyan, le gobnyan laju geudroe hosea dan geupeutamong lam glab. oh ltheuhnyan salmaneser raja asyur jikakprang israel laju jikeupong samaria. bak thon nyang keu lhee banda nyan jikeupong, – na kheueh thon nyang keusikureueng keurajeuen hosea – salmaneser jireubot samaria. bubena ureueng israel laju jiangkok u asyur sibagoe tawanan prang. siladum nibak awaknyan jikeubah di banda halah, siladum teuk bak bineh krueng habor nibak wilayah gozan, dan siladum teuk nibak banda-banda di nanggroe madai. samaria taklok sabab ureueng israel ka meudesya ubak tuhan, po teu allah awaknyan, nyang ka peuseumat awaknyan nibak raja meuse, dan geuba awaknyan peuteubiet nibak nanggroe nyan. awaknyan jiseumah ilah-ilah laen dan jiseutot keubiasaan nyang jipeubet le bansa-bansa nyang ka geu-use le tuhan watee bansa israel maju jikakprang bansa-bansa nyan. bansa israel jiseutot adat istiadat nyang ka jipeuteutab le raja-raja israel, dan jipeubet hai-hai nyang hana geugalak le tuhan, po teu allah awaknyan. awaknyan jipeudong teupat-teupat teuseumah dewa nibak banmandum banda awaknyan, bahnyan lam banda ubit meunan cit lam banda rayeuk. di ateuheh tieb-tieb buket, dan dimiyueb tieb-tieb bak kayee nyang luhu, awaknyan jipeudong tugu-tugu dan patong-patong dewi asyera. meunan cit awaknyan jitot keumeunyan nibak mandum miseubah keu dewa, lagee keubiasaan bansa-bansa nyang ka geu-use le tuhan nibak nanggroe kanaan. awaknyan jiseumah beurala, bahpi tuhan ka geutam awaknyan. banmandum buetbuet awaknyan nyang jeuhet ka jipeuteuka meureuka tuhan. tuhan laju geukirem utosan-utosan dan nabinabi gobnyan ubak umat israel dan yehuda keu geupeusampoe peuingat gobnyan lageunyo: "tapioh kheueh bak buet nyang jeuhet dan gata taat kheueh ubak peurintah dan hukom nyang ka ulon bri ubak indatu gata dan ubak gata meulalu nabi-nabi, hambahamba ulon nyan." teuma israel dan yehuda hana jitem deungoe. awaknyan kreueh ulee lagee indatu awaknyan nyang hana jipateh ubak kheun tuhan, po teu allah awaknyan. israel dan yehuda hana jitem taat ubak peue-peue nyang geupeurintah le tuhan dan hana seutia ubak janji-janji nyang ka geupeuget ngon indatu gobnyan. awaknyan hana jipako peue-peue nyang geuseugah le tuhan, teuma teutab jimeueibadat ubak beurala-beurala nyang hana meuguna, deungon nyan teuma awaknyan keudroe pih ka hana meuguna. awaknyan jiseutot teuladan ubak bansa-bansa nyang na bansikeulileng awaknyan, bahpi tuhan ka geutam. awaknyan ji-iengkeue ubak banmandum hukom tuhan, po teu allah awaknyan, dan jipeuget dua boh leumo logam keu jiseumah. awaknyan jipeuget patong dewi asyera, jiseumah bintang-bintang dan meueibadat ubak dewa baal. awaknyan jipeuseumah aneuk-aneuk droe jih sibagoe keureubeuen nyang

teutot keu dewa. awaknyan jipeuguna ieleume gaeb dan jilakee peuntuyok ubak tabib-tabib nyang hase meugubongan ngon areuwah-areuwah. awaknyan keubit jumot that bak jipeubuet hai-hai nyang hana meukeunong bak ate tuhan le sababnyan gobnyan beungeh that-that ubak awaknyan dan hana geupakoe le keu awaknyan. gobnyan ka geuboih awaknyan nibak tanoh nyang ka geubri keu awaknyan; nyang na tinggai na kheueh keurajeuen yehuda. ureueng-ureueng yehuda pih hana taat ubak hukum-hukum tuhan, po teu allah awaknyan. awaknyan jiseutot buet-buet nyang lazem jipeubuet le ureueng israel, le sababnyan teuma tuhan hana geuaku le banmandum umat israel. gobnyan geuhukum dan geujok awaknyan ubak musuh-musoh awaknyan nyang keujam. gobnyan hana le geupakoe awaknyan, teuma geuboih awaknyan nibak tanoh nyang ka geujok keu awaknyan. oh ka ltheuh tuhan geupeupisah ureueng israel nibak yehuda, ureueng israel laju geubaiat yerobeam bin nebat jeuet keuraja awaknyan. dan yerobeam geupeujeuet awaknyan jitinggai tuhan dan geupeubuet desya-desya nyang rayeuk. awaknyan jiseutot teuladan yerobeam dan teutab jipeubuet banmandum desya nyang jipeubuet nyan, akhe jih tuhan hana geupakoe le keu awaknyan, teuma geuboih awaknyan nibak tanoh nyang geujok keu awaknyan. hainyan teujadi paih lagee peungat tuhan nyang geubri keu awaknyan meulalu hamba-hamba gobnyan, nabi-nabi. meunan kheueh ureueng israel jiba ubak teupat boih di asyur, dan disinan kheueh awaknyan tinggai sampoe uroenyoe. sibagoe geunantoe ureueng israel nyang ka jiba ubak teupat boih nyan, raja asyur laju geukeubak nibak banda-banda samaria ureueng babel, kuta, awa, hamat, dan sefarwaim. ureueng-ureueng nyan jiduek nibak banda-banda nyan dan tinggai teutab disinan. watee phon-phon that awaknyan tinggai disinan awaknyan hana jihoreumat tuhan; nyang kheueh sababjih tuhan geupeutleun singa-singa juah keujijab siladam nibak awaknyan. na ureueng jijak peugah ubak raja asyur bahwa ureueng-ureueng nyang geukeubak di banda-banda di samaria hana jituri ubak hukum-hukum dewa nanggroe nyan. nyang kheueh sabab jih dewa jipeutleun singa keujijak kab awaknyan. nyang kheueh sabab jih raja asyur geupeurintah ubak sidroe teungku imeum lamkawan ureueng tawanan nyang ka teuboih u asyur, jikirem lom u samaria. "yue jihnyoe mangat jiwoe dan teutab tinggai di nanggroe nyan mangat jihnyan jeuet jipeurunoe ureueng-ureueng keuhai hukum-hukum dewa nanggroe nyan," kheun raja. dan sidroe teungku imeum israel nyang jiangkot nibak samaria u asyur, laju jiwoe dan tinggai di betel. disinan gobnyan geupeurunoe rakyat pakriban cara jih teuseumah tuhan. teuma ureueng-ureueng nyang tinggai di samaria nyan teutab jipeuget beurala-beurala jih keudroe dan jikeubah lam kuil-kuil nyang ka jipeudong le ureueng israel nyang yoh watee ilee tinggai di banda nyan. tieb-tieb saboh kawom jipeuget beurala keudroe nibak banda nyang awaknyan duek: ureueng babel jipeuget dewa sukot-benot, ureueng kuta jipeuget patong nergal, ureueng hamat patong asima, ureueng awa jipeuget patong nibas dan tar-

tak, dan ureueng sefarwaim jipeuseumah aneuek-anuek awaknyan sibagoe keureubeuen nyang teutot keu dewa adramelekh dan anamelekh. seulaen jiseumah dewa-dewa nyan, awaknyan jiseumah cit tuhan. awaknyan jipileh lamkawan droejih keudroe meubagoe ureueng keumeutugaih sibagoe teungku imeum dan mangat jipeuseumah keureubeuen bak kuil-kuil beurala. teuma, awaknyan jiseumah tuhan, dan jiseumah cit dewa-dewa awaknyan keudroe, lagee adat istiadat nyang na lam nanggroe awaknyan. trok nibak uroenyoe awaknyan mantong jipeubuet adat istiadat droe jih keudroe. awaknyan hana meuebadat ubak tuhan dan hana teuma ji-taat ubak hukum-hukum dan peurintah-peurintah nyang teubri ubak keuturonan nabi yakub, nyang teuboh deungon nan israel. tuhan ka geupeuget peujanjian lagee teupeugah nyoe ngon umat israel, "bek meuebadat ubak ilah-ilah nyang laen; bek sujut teuseumah awaknyan dan teupeutimang awaknyan, atawa teupeuseumah keureubeuen keu awaknyan. horeumat kheueh ulon, tuhan, nyang ka teuba gata teupeuteubiet nibak nanggroe meuse deungon kuasa nyang rayeuk; seumah kheueh ulon dan peuseumah kheueh keureubeuen keu ulon. taat kheueh ubak hukum-hukum dan peurintah-peurintah nyang ka ulon tuleh keu gata. bek meuebadat ubak ilah-ilah laen, dan bek tuwoe ubak janji ulon deungon gata. taat kheueh ubak ulon, tuhan po teu allah gata, deungon nyan ulon teuma lon peubeubaih gata nibak musuh-musoh gata." teuma peundunduek samaria nyan teutab hana jitem deungoe awaknyan; awaknyan teutab jimumat ubak adat istiadat jih keudroe. teuma, awaknyan jiseumah tuhan, teuma jiseumah cit beurala-beurala awaknyan. trok anjinioe pih keuturonan awaknyan mantong jipeubuet hainyan. nibak thon nyang keu lhee keurajeuen raja hosea bin ela ateuh israel, hizkia bin ahas jeuet keuraja yehuda. bak wateenyan gobnyan nan umu 25 thon dan gobnyan geumat peurintah di yerusalem 29 thon treb jih. ma gobnyan na geuh abia binti zakharia. hizkia geupeubuet buet nyang paleng mangat ate tuhan saban lagee raja nabi daud indatu gobnyan. gobnyan geupeuhanco bubena teupat seumah dewa, dan geureuloih banmandum tugu-tugu dan geupeurusak patong-patong dewi asyera. meunan cit geupeuhanco teuma uleue peurunggu nyang geupeuget le nabi musa nyang teuboh nan nehutan. sabab, trok bak uroenyan ureueng israel mantong jitot keumeunyan dan jihoreumat ubak uleue peurunggu nyan. lamkawan bandum raja yehuda, bah nyang yoh gohlom meunan cit oh ka ltheuh hizkia, hana nyang lagee gobnyan. gobnyan peucaya ubak tuhan, po teu allah israel, dan seutia ubak gobnyan. hantam na gobnyan geulawan tuhan. banmandum peurintah tuhan nyang geubri meulalu nabi musa, geutaat that le hizkia deungon bit-bit taat. nyang kheueh sabab jih tuhan teutab geutulong gobnyan sampoe gobnyan meuhase lam peue-peue mantong useuha geuh. gobnyan beurontak ateuh raja asyur, dan hana geutem taklok ubak gobnyan. gobnyan geupeutaloe ureueng filistin, dan geureubot teupat tinggai awaknyan, phon nibak gampong nyang paleng ubit sampoe ubak banda nyang paleng rayeuk, jitamong cit gaza dan

wilayah nyang na bansikeulileng nyan. nibak thon nyang keupeuet lam keurajeuen hizkia, na kheueh thon nyang keutujoh keurajeuen hosea ateuhe israel, salmaneser raja asyur jijak prang israel dan jikeupong samaria. oh ka ltheueh jikeupong na lhee thon treb jih, samaria rhot lam jaroe raja asyur. nyan na jih nibak thon nyang keunam keurajeuen hizkia, dan thon nyang keu sikureueng keurajeuen hosea. ltheueh nyan asyur laju jiba rakyat israel u asyur sibagoe ureueng nyang teuteuen; siladum nibak awaknyan jipeuduek di banda halah, siladum teuk to ngon krueng habor lam wilayah gozan, dan siladum teuk lam banda-banda di nanggroe madai. samaria rhot sabab ureueng israel hana jitaat ubak tuhan, po teu allah awaknyan. awaknyan ji-iengkeue ubak janji nyang ka geupeuget le tuhan ngon awaknyan, dan awaknyan banmandum ji-iengkeue ubak peurintah nabi musa, hamba gobnyan. awaknyan hana jitem deungoe dan hana jitem seutot. nibak thon nyang keu peuet blaih keurajeuen hizkia raja yehuda, banda-banda yehuda nyang meupageue ngon kuta jiprang dan jipeutaloe le sanherib, raja asyur. dan ubak sanherib nyang na di lakhis, le hizkia laju geukirem haba lagee nyoe, "ulon ka meusalah. le sababnyan, ulon lakee, amphon pioh kheueh bek amphon prang le kamoe. banmandum nyang amphon lakee teuma kamoe bri." sanherib jijaweueb bahwa hizkia haroh geukirem keu gobnyan 10.000 kilogram pirak, dan 1.000 kilo gram meuh. le sababnyan, banmandum meuh nyang na lam baet tuhan meunan cit nyang na lam kaih meuligoe geukirem le hizkia ubak sanherib. meuh nyang na nibak pintoe-pintoe baet tuhan meunan cit nyang ka geupasang le hizkia nibak ambang-ambang pintoe nyan pih geucok dan geukirem teuma saboh pasokan rayeuk that nyang na di lakhis nyang pimpenan lhee droe peuwira manyang, na kheueh sidroe panglima, sidroe tukang peujieb ie, dan sidroe teuk ulee kawai raja. oh ka trok lam banda nyan awaknyan laju jicok teupat lam ladang, nyang teuboh nan ladang peunatu nyang to that ngon lueng nyang ie ji-ile rot kulum nyang na di ateuhe. ltheuhnyan awaknyan jidumpek sira jita-wok raja hizkia. teuma lhee droe peugawee hizkia jiteubit geujak meurumpok ngon awaknyan. ban lhee droe peungawai nyan na kheueh elyakim bin hizkia ulee rumah tangga meuligoe, lakee, keurukon mulok neugahra, dan yoah bin asaf keurukon mulok meuligoe. sidroe lamkawan peuwira asyur nyan jipeugah ubak awaknyan, "jak peutrok kheueh laju ubak hizkia haba raja asyur lageenyoe: 'pakon gatanoye tarasa droe teuh teuga? gata pike deungon haba hase gata gantoe siasat dan teunaga tantra? soe kheueh nyang gata peubangga, sampoe gata tajeuet talawan asyur? beutoi gata meuharab bejutilong le meuse, teuma hainyan saban cit deungon gata peuguna naleueng lakoe sibagoe tungkat; teuma tungkat nyan patah dan jaroe gata teutob. meunan kheueh raja meuse keu soe mantong meuharab ubak jihnyan.' " ltheueh nyan jipeugah lom le peuwira asyur nyan, "atawa mungken gata tapeugah bahwa gata meuharab ubak tuhan, po teu allah gata? watee hizkia jipeurintah mangat jeuet ureueng yehuda dan yerusalem beujimeuiebadat dikeue miseubah di yerusalem, kon kheueh nyang

jipeuhanco nyan miseubah dan teupat-teupat teuseumah ubak tuhan keudroe? jinoe ateuhe nan raja asyur ulon kujeuet meutaroh meunoye keugata teujok 2.000 boh guda, pasti gata hana ureueng sidubnyan le keu jipasang ateuhe rhueng guda nyan! keu gata lawan peuwira kamoe nyang paleng ubit pih, gata kon imbang kamoe. teuma gata teutab cit tameuharab nanggroe meuse mangat jikirem bantuan geuritan prang dan pasokan meuguda! gata tapike kamoe prang dan kamoe peutaloe nanggroe deungon tan geutulong le tuhan? tuhan keudroe kheueh nyang yue kamoe mangat kamoe jak prang dan kamoe peuhanco teuma! ltheueh nyan geupeugah le elyakim, sebna, dan yoah ubak peuwira nyan, "teungku, neumeututoe mantong lam basa aram ngon kamoe, kamoe muphom. bek meututoe ngon basa ibrani, eunteuk jideungoe le rakyat nyang na ateuhe beuton banda nyan." geuseuot peuwira nyan, "peu kheueh ubak gata dan raja gata mantong ulon geukirem le asyur keuteupeu sampoe banmandum nyoe? kon! ulon meututoe cit ubak rakyat nyang teungoh duek ateuhe beuton nyan, nyang meusigoe deungon gata teuma tapajoh ek gata keudroe dan tajibiek gata keudroe." oh ltheuhnyan peuwira nyan jidong dan jidumpek lam basa ibrani, "deungoe kheueh nyoe peue nyang geupeugah le raja asyur: 'bek tatem jipeungeut le hizkia; jihnyan hana hase jipeuseulamat gata. bek tadeungoe watee jibujuk keuteumeuharab ubak tuhan. bek gata pike tuhan geupeuseulamat gata atawa geutam sipa-i asyur keu jireubot banda gata. bek tadeungoe hizkia. ulon raja asyur, ulon yue ubak gata mangat tateubiet nibak lam banda dan meunyeurah droe. singoh jeuet gata pajoh boh anggo nibak lampoh gata keudroe, dan tapajoh boh ara nyang na nibak bak gata keudroe, dan gata jieb ie nyang na nibak mon gata keudroe, sampoe ulon kupinah gata ubak saboh nanggroe nyang saban ngon nanggroe gata keudroe. disinan na lampoh anggo nyang jipeuhase anggo keu gata keudroe, dan na blang gandom nyang jipeuhase teupong gandom keu peunajoh gata. lam nanggroe nyan na bak zaiton nyang le, minyebut zaiton dan meulisan. meunoye gata taseutot peue nyang ulon yue ubak gata, gata teuma udeb, hana mate. bek gata deungoe hizkia! jihnyan jipeungeut gata deungon jipeugah bahwa tuhan teuma geupeuseulamat gata. peu kheueh ka ltheueh na dewa bansa laen jipeuseulamat nanggroe jih nibak keukuasaan ulon? dipat kheueh dewa-dewa nanggroe hamat dan arpad? dipat kheueh dewa-dewa sefarwaim, hena, dan iwa? peu kheueh na nyang teuka jijak peuseulamat samaria? dewa toh kheueh nyang ka ltheueh jipeuseulamat nanggroe jih nibak keukuasaan ulon? panena mungken tuhan hase geupeuseulamat yerusalem?' " watee jideungoe nyan, peunduduek yerusalem hana jijaweueb, sabab raja hizkia ka geupeurintah awaknyan seungah mantong. teuma, elyakim, sebna, dan yoah geupriek peukayan gobnyan tanda seudeh that ate, ltheueh nyan laju geuweh geujak peutrok ubak raja peue nyang ka jipeubuet le uleebalang asyur nyan. watee raja hizkia geudeungoe laporan nibak ban lhee droe ureueng nyan, gobnyan laju geupriek peukayan geuh dan geungui laju peukayan ija krong sibagoe tanda seudeh,

lheuehnyan laju geujak u baet tuhan. oh lheuehnyan gobnyan geukirem elyakim, ulee meuligoe, sebna, seukeutarah neugahra, dan teungku-teungku imeum nyang ka tuha-tuha, awaknyan geuyue jak meurumpok ngon nabi yesaya bin amos. awaknyan pih geungui ija krong. nyoe kheueh peusan raja hizkia nyan, nabi yesaya peugah ubak nabi yesaya, "uroenyoe uroe meudukacita, tanyoe jihukom dan jihina. tanyoe lagee inong nyang keuneuk peulahe aneuek teuma ka habeh teunaga. raja asyur ka jikirem sidroe peuwira manyang jih keujijak hina po teu allah nyang udeb. pat tateupeue tuhan alah ka geudeungoe peue nyang jihina le awaknyan, teuma geuhukom awaknyan nyang ka jipeugah haba nyan! le sababnyan meudoa kheueh ubak po teu allah keu ureueng-ureueng geutanyoe nyang mantong udeb." oh ka ltheueh geuteurimong peusan nibak raja hizkia nyan, nabi yesaya laju geuyue ubak utosan nyan mangat jipeutrok peusan gobnyan lageenyoe su jih, "tuhan meufeureuman, teungku amphon bek teumakot peue-peue nyang ka jipeugah le hamba-hamba raja asyur nyan bahwa tuhan hana geupeuleuh geutanyoe. tuhan teuma geupeujeuet raja asyur jideungoe haba angen sampoe akhe jih jihnyan jiwoe u nanggroe jih keudroe, dan di nanggroe jih raja nyan jipoh mate." peuwira asyur nyan meuteume haba bahwa raja jih ka jitinggai lakhis dan teungoh jimuprang jilawan banda libna, hana jioh nibak teupat nyan. dan jijak kheueh peuwira nyan keudeh keujijak meurumpok ngon raja jih nyan. raja asyur ka jiteuma haba bahwa pasokan meuse dimiyueb pimpenan tirhaka raja sudan teungoh jijak keuneuk jijak prang awaknyan. le sababnyan raja asyur laju jikirem surat ubak raja hizkia raja yehuda. lagee nyoe asoe surat nyan, "bek keunong peunget le janji po teu allah gata nyang gata peubangga nyan bahwa gata hana rhot lam jaroe ulon. gata katadeungoe bahwa toh mantong nanggroe nyang jiprang le asyur, jipeuhanco sapan sapa. bek tapike gata hana keunong! watee indatu lon geupeuhanco banda gozan, haran, dan rezef, dan geupoh mate ureueng eden nyang na tinggai di telasar, hana meusaboh pi nibak dewa-dewa awaknyan nyang meuhase jipeuseulamat awaknyan. dipat kheueh raja-raja banda hamat, arpad, sefarwaim, hena, dan iwa?" hizkia geuteurimong surat nyan nibak utosan, laju geubaca surat nyan. oh lheuehnyan gobnyan geujak u baet tuhan, dan geuleueng laju surat nyan dikeue tuhan, ltheueh nyan laju geumeudoa, "tuhan, po teu allah israel, nyang meuseumanyam di ateueh kerub, droeneuh sidroe-droe allah nyang meukuasa ateueh banmandum keurajeuen ateueh rhueng bumoe. droeneuh kheueh nyang cepta langet ngon bumoe. tuhan, neunggieng kheueh ateueh kamoe peue nyang teungoh kamoe rasa nyoe. deungoe kheueh banmandum nyang jihina le sanherib keu droeneuh, po teu allah nyang udeb! kamoe banmandum meuteupeue, ya tuhan, bahwa raja-raja asyur ka jai that-that jipeuhanco bansa-bansa dan jipeuhanco nanggroe awaknyan. dewa-dewa awaknyan jitot dan jipeuhanco, sabab dewa-dewanyan sagai-sagai hana meukuasa. awaknyan na kheueh nyang teupeuget nibak kayee dan batee nyang jipeuget le manu-

sia. ya tuhan, allah kamoe, peuleueh kheueh kamoe nibak ureueng-ureueng asyur nyan, mangat banmandum bansa ateueh rhueng donya nyoe jiteupeue bahwa droeneuh kheueh allah nyang esa." oh lheuehnyan nabi yesaya geukirem peusan ubak raja hizkia na kheueh teujaweueb ateueh doa raja. tuhan meufeureuman, "banda yerasalem jipeukem dan jihina gata, sanherib. na kah teupeue soe nyang gata teunak ngon gata hina nyan? ulon, allah israel, na kheueh allah nyang suci! sombong that-that sikeub gata ateueh ulon. gata takirem utosan keu gata meututoe nyang buhak bahwa deungon le jih geuritan prang gata bahwa gata ka tapeutaklhok gunong-gunong nyang manyang di libanon. gata tapeusombong droe bahwa gata katakoh bak-bak kayee ceumara jih nyang paleng manyang dan paleng ceudah meunan cit teubloih lam uteuen-uteuen nyang paleng le. meunan cit gata peubangga bahwa nyang kueh mon dan teujieb ie di nanggroe-nanggroe aseng, dan meunan cit takheun bahwa sipa-i gata jibloh-bloh lam krueng nil sampoe tho kregeng. peu kheueh gohlom na gata deungoe bahwa hainyan ka ulon reuncana yoh awai ilee? dan jinoe hainyan ulon peubuet. ulon kheueh nyang jok keu gata keu gata peuhanco banda-banda meukuta sampoe tinggai runga. ureueng-ureueng nyang tinggai disinan hana meudaya; awaknyan teukeujot dan teumakot raya. awaknyan lagee naleueng di blang atawa naleueng nyang timoh ateueh bubong rumoh, nyang tho meunyoe teuyueb le angen timu nyang seu-uem. teuma ulon kuteupeue peue-peue mantong keuhai droe gata. ulon kuteupeue peue nyang gata peubuet dan ho nyang gata jak. ulon kuteupeue bahwa gata beungeh that-that keu ulon, dan ulon ka lon deungoe keuhai sombong gata nyan. jinoe ulon lat ceunawiet bak idong gata meunan cit babah gata ulon beukab ngon keukang, mangat jeuet gata lon terek dan lon peuwoe lom rot jalan watee gata teuka." nabi yesaya geukirem teuma peusan nyang lagee nyoe ubak hizkia, "nyoe kheueh nyang jeuet keu tanda nibak gata. thon nyoe ngon thon ukeue manusia jipajoh wase gandom nyang timoh keudroe. teuma oh lheuehnyan awaknyan jeuet jipula gandom dan anggo dan jipajoh keudroe hase jih. ureueng yehuda nyang mantong udeb teuma makmu lagee seunaman nyang lhok that ukeue jih dan jimuboh teuma. di yerasalem dan di ateueh gunong sion na ureueng-ureueng nyang seu-lamat, sabab tuhan ka geupeuteuntee bahwa hainyan teutab na. nyan kheueh nyang geupeugah le tuhan keuhai raja asyur: "jihnyan hana jiteume tamong u yerasalem atawa jipeuleuh aneuk panah jih ubak banda nyan. sipa-i-sipa-i nyang leungkab deungon peurisai hana nyang hase jitamong lam banda nyan, dan bansikeulileng nyan hana teuma teupeuget sineulob mangat jeuet teukeupong. raja asyur teuma jiwoe rot jalan nyang jijak watee jiteuka, dan hana jiteume tamong lam banda nyan. ulon, tuhan, ka lon peugah haba. banda yerasalem teuma lon bila dan lon lindong deumi keuhoreumatan lon keudroe dan deumi janji ulon deungon hamba lon nabi daud." malam nyan cit teuma malaikat tuhan geujak ubak khimah-khimah ureueng asyur, dan laju geupoh mate na 185.000 droe tantra. oh singoh nyan banbeungoh

that deuh laju manyet-manyet awaknyan ka teutiek-tiek disinan. le sababnyan teuma jisurot kheueh sanherib raja asyur dan jiwoe u niniwe. bak siuroe, watee jihnyan teungoh jimeueibadat lam kuil dewa nisrokh, gobnyan laju jipoh mate ngon peudeueng le adramelekh dan sarezer, aneuek-aneuek agam gobnyan. oh ltheuhnyan awaknyan laju jiplueng u nanggroe ararat. teuma, esarhadon, aneuek agam gobnyan nyang laen, jeuet keuraja keugeunantoe gobnyan. lam wateenyan raja hizkia rhot bak saket jitimoh cumuet, saket geuhnyan bit-bit brat that rab meuninggai donya. nabi yesaya bin amos geujak saweue gobnyan dan geupeugah, "tuhan geupeusan mangat teungku po neupeubereeh banmandum urosan droeneueh, sabab teungku po hana jitem puleh. hana treb le teungku po meuninggai donya." hizkia geupaleng bak beuton dan laju geumeudoa, "tuhan, ingat kheueh bahwa ulon nyoe ka meungabdi ubak droeneueh deungon seutia dan juoe ate. ulon sabe lon useuha lon seutot peue kheun droeneueh." ltheuhnyan hizkia laju geumo meuweueh-weueh that. nabi yesaya laju geutinggai hizkia, teuma sigohlom gobnyan geuteubiet nibak leuen meuligoe, tuhan geuyue gobnyan woe ubak hizkia, raja umat tuhan, dan geupeutrok peusan nyoe, "ulon, tuhan, po teu allah nyang jiseumah le nabi daud indatu gata, ka lon deungoe doa gata dan lon kalon ie mata gata. ulon kupeupuleh gata, lusa gata tajak ubak baet ulon. ulon teuma lon tamah umu gata 15 thon teuk. gata dan banda yerusaleum ulon peubeubaih nibak raja asyur. bandanyoe ulon lindong deumi keuhoreumatan lon keudroe dan deumi janji ulon deungon hamba lon nabi daud." ltheueh nyan le nabi yesaya laju geuyue labo boh ara nibak cumuet raja hizkia mangat gobnyan puleh. raja hizkia geutanyong, "peu kheueh tanda jih bahwa tuhan geupeupuleh ulon dan lusa ulon jak u baet tuhan?" geujaweueb le nabi yesaya, "tuhan teuma geujok tanda ubak teungku po bahwa gobnyan geupeupunoh janji. jinoenyoe, nyang toh kheueh nyang teungku po lakee: bubayang nibak peutunyok jeuem mata uroe nyang jipeuget le raja ahas maju 10 gareh atawa jisurot 10 gareh?" geupeugah le hizkia, "keuteupeuget bubayang nyan maju 10 boh gareh, mudah mantong. le sababnyan peuget kheueh jihnyan jisurot 10 boh gareh." nabi yesaya laju geumeudoa ubak tuhan, laju tuhan geupeuget bubayang nyan jisurot 10 boh gareh nibak peutunyok jeuem mata uroe nyan. lam wateenyan raja babel, na kheueh merodakh-baladan bin baladan, jideungoe bahwa raja hizkia banpuleh nibak saket. le sabab nyan gobnyan laju geukirem ureueng geuh keujijak ba surat dan hadiah keu hizkia. hizkia geusambot awaknyan dan laju geupeuleumah ubak awaknyan atra keukayaan gobnyan, lagee meuh, pirak, reumpah-reumpah dan minyeuk mangat bee, meunan cit banmandum peuleungkapan tantra. hana meusapeue pih nyang teusom bahnyan nyang na lam meuligoe meunan cit nyang na bansigom keurajeuen gobnyan, banmandum nyan geupeuleumah. oh ltheuhnyan nabi yesaya meuhadab ubak raja hizkia laju geutanyong, "dipat teuka awaknyan? peue jikheun le awaknyan?" geujaweueb le hizkia, "awaknyan teuka nibak nanggroe babel, nanggroe nyang jioh that" "peue nyang

jikalon le awaknyan lam meuligoe?" geutanyong le nabi yesaya lom. "sigala-gala jih!" jaweueb hizkia. "hana meusapeue pih nyang na lam kaili beundahara meuligoe nyang hana ulon peuleumah ubak awaknyan." laju geupeugah le nabi yesaya ubak raja, "tuhan meufeureuman bahwa teuka watee jih banmandum keukayaan nyang na lam meuligoe gata meunan cit banmandum nyang ka jipeusapat le indatu gata sampoe uroenyoe, jiba u babel. hana nyang tinggai. nibak aneuek cucoe gata na nyang jicok dan jipeujeuet keu pegawee meuligoe keu jipeutimang raja babel." geujaweueb le raja hizkia, "get that cit peusan tuhan nyang droeneueh peutrok keu ulon." gobnyan geujaweueb lagee nyan sabab geupike: "asal keurajeuen ulon teutab aman dan dame simantong ulon udeb." kisah nyang laen keuhai raja hizkia, keuhai jasa-jasa keupahlawan gobnyan, dan pakriban gobnyan geupeuget kulam dan talo ie keuteupeuteuka ie lam banda, banmandum nyan na teucetet lam kitab seujarah raja-raja yehuda. raja hizkia meuninggai donya, ltheueh nyan manasye aneuek gobnyan teubaiait jeuet keuraja keugeunantoe gobnyan. manasye na umu 12 thon watee gobnyan teubaiait jeuet keu raja yehuda, dan gobnyan geumat keurajeuen di yerusaleum 55 thon treb jih. ma gobnyan nan geuh hefzibah. manasye ka meudesya ubak tuhan, sabab geuseutot buet-buet nyang jeuhet nyang jipeubuet le bansa-bansa nyang geu-use le tuhan nibak nanggroe kanaan watee ureueng israel jitamong lam nanggroe nyan. teumpat-teumpat gob seumah dewa nyang ka geupeuhanco le hizkia yah gobnyan geupeudong lom teuma. gobnyan geupeudong miseubah-miseubah keu teumpat iebadat baal, dan teupeuget patong dewi asyera, lagee nyang ka geupeubuet le ahab raja israel, meunan cit manasye geuseumah bintang-bintang. tuhan ka ltheueh meufeureuman bahwa yerusaleum na kheueh teumpat gobnyan teuka dan teumpat iebadat ubak gobnyan, teuma disideh, di baet tuhan, manasye ka geupeudong miseubah-miseubah keu dewa-dewa. nibak bandua boh leuen miseubah nyan geupeudong teuma miseubah-miseubah keu teumpat seumah ubak bintang-bintang. aneuek gobnyan geupeuseumah teuma sibagoe keureubeuen nyang teutot. manasye geupeubuet cit praktek-praktek meudukun, nujum tukang keumalon, ieleme gaeb, dan geulakee peutunyok ubak areuwah-areuwah. gobnyan bit-bit meudesya that ubak tuhan le sababnyan tuhan beungeh that-that ateueh geuh nyan. lambang dewi asyera geukeubah teuma didalam baet tuhan, padahai keuhai teumpat nyan tuhan ka geupeugah ubak nabi daud dan nabi sulaiman aneuek gobnyan, "baet ulon dan banda yerusaleum nyoe, nyang ka ulon pileh nibak ban dua blaih boh wilayah sukee israel, na kheueh teumpat nyang ka lon peuteuntee sibagoe teumpat iebadat ubak ulon. dan meunoyoe umat israel jitaat banmandum ubak peurintah ulon dan jiseutot banmandum hukum-hukum nyang ka jibri le nabi musa hamba ulon keu awaknyan, teuma ulon hana lon peubiyeu awaknyan ji-use nibak nanggroe nyang ka ulon jok ubak indatu awaknyan." teuma ureueng yehuda hana taat ubak tuhan, dan manasye ka jeuet keusabab awaknyan jipeubuet desya nyang leubeh jeuhet nibak desya-desya nyang ka

jipeubuet le bansa-bansa nyang geu-use le tuhan nibak kanaan watee umat israel jitamong lam nangroe nyan. le sababnyan, meulau nabi-nabi, hamba-hamba tuhan, tuhan meufeureuman, "raja manasye jeuhet lumpah na. buet jihnyan jioh leubeh jeuhet nibak buet ureueng kanaan. deungon beurala-beurala nyang jipeuget nyan, ka jeuet keusabab ureueng yehuda jipeubuet desya. le sababnyan, ulon, tuhan po teu allah nyang jiseumah le umat israel, ulon peuteuka bala nyang paleng rayeuk atueh yerusalem dan yehuda dan soe-soe mantong ureueng nyang jideungoe keuhai nyan teukeujot raya. yerusalem teuma lon hukom lagee lon hukom samaria dan ahab raja israel dan banmandum keuturonan jihnyan. yerusalem ulon sampoh gleh lagee pireng nyang teurhah dan teubalek. ureueng nyang mantong tinggai disinan ulon peujeuet keu peunajoh keu musoh-musoh jih, nyang cok banmandum atra awaknyan dan jisampoh mandum bubena lam nangroe awaknyan. banmandum nyan teuma ulon peubuet atueh umat lon sabab awaknyan meudesya ubak ulon dan jipeubeudoh beungeh ulon yoh phon indatu awaknyan jiteubiet lam nangroe meuse trok ubak uroenyoe." seulaen jipeujeuet ureueng yehuda meudesya ubak tuhan deungon cara jiseumah beurala, manasye pi ka jipoh mate jai that-that ureueng nyang hana meusalah le sababnyan darah kamirah ji-ile dipat mantong di yerusalem. kisah nyang laen keuhai raja manasye, dan desya-desya nyang geupeubuet nyan, ka teucetet lam kitab seujarah raja-raja yehuda. manasye meuninggai donya dan teupeukubu laju nibak lampoh jrat meuligoe, na kheueh taman uza. amon aneuk agam gobnyan teubaiat jeuet keu raja keugeunantoe gobnyan. amon na umu 22 thon watee gobnyan teubaiat jeuet keu raja yehuda dan gobnyan geumat peurintah dua thon treb jih. ma gobnyan nan geuh mesulemet binti harus, ureueng yotba. saban lagee ureueng syiek geuh, gobnyan pi meudesya ubak tuhan. gobnyan geuseutot peue-peue nyang geupeubuet le ureueng syiek geuh, dan geuseumah beurala-beurala nyang geuseumah le ureueng syiek geuh. gobnyan hana udeb meunurot nyang geulakee le tuhan, dan nyang paloe gobnyan geutinggai tuhan, po teu allah nyang jiseumah le indatu geuh. peugawee-peugawee raja amon ka sipakat keuneuk poh mate gobnyan nibak meuligoe. teuma le rakyat yehuda jipoh mate ureueng-ureueng poh mate raja amon nyan, laju jibiai yosia aneuk gobnyan jeuet keu raja. kisah laen keuhai raja amon na teucetet lam kitab seujarah raja-raja yehuda. amon teupeukubu nibak lampoh jrat di taman uza. yosia aneuk gobnyan teubaiat jeuet keu raja keugeunantoe gobnyan. yosia meu-umu lapan thon watee gobnyan teubaiat jeuet keu raja yehuda, dan gobnyan geumat peurintah di yerusalem 31 thon treb jih. ma gobnyan nan geuh yedida binti adaya, asai bozkat. yosia geupeubuet buet nyang keubiet galak ate tuhan. gobnyan geuseutot raja nabi daud indatu gobnyan, dan geutaat banmandum hukom po teu allah deungon sipeunoh ate. raja yosia na sidroe seukeutarah neugahra nyang nan jih safan bin azalya, cucoe mesulam. nibak thon nyang keulapan blaih keurajeuen raja yosia, le raja laju geupeutreu titah ubak seukeutarah geuh lageenyoe su jih, "gata jak

kheueh laju ubak teungku imeum agong hilkia nibak baet tuhan, dan gata lakee kheueh ubak gobnyan mangat jibri laporan keuhai jeumeulah peng nyang ka geupeusapat le imeum nyang meutugaih nibak babah pintoe tamong baet tuhan. yue gobnyan mangat geujok peng nyan ubak mando nyang kawai buet nibak baet tuhan. awaknyan haroh geupeuguna peng nyan keungon bayeue upah bubena utoh kayee, utoh bangunan, dan utoh batee sira teubloe kayee ngon batee nyang peureulee. mando-mando nyang kawai buet nyan juJoe-juJoe that, le sababnyan hana peureulee teulakee laporan tanggong jaweueb teupeuguna peng nibak awaknyan." safan laju geujak peusampoe peurintah raja nyan ubak hilkia, le hilkia laju geupeugah ubak safan bahwa gobnyan ka meuteume kitab hukom-hukom tuhan nibak baet tuhan. hilkia geujok laju kitab nyan ubak safan, le safan laju geubeuet kitab nyan. oh ltheueh nyan safan geugisa lom ubak raja sira geupeugah bahwa peng nyang teukeubah nibak baet tuhan ka teucok dan ka jijok le hamba raja ubak mandum peungawai nyang meutugaih nibak baet tuhan. oh ltheuehnyan safan geupeugah, "hilkia geujok kitab nyoe ubak ulon." dan le safan laju geubeuet kitab nyan dikeue raja. meunan geudeungoe asoe kitab nyan, le raja laju geupriek-priek peukayan gobnyan sabab seudeh that. dan raja laju geujok peurintah nyoe ubak imeum hilkia, ahikam bin safan, akhbor bin mikha, safan seukeutarah neugahra, dan asaya ajudan raja: "jak kheueh tanyong ubak tuhan keu ulon dan keu banmandum rakyat yehuda keuhai asoe kitab nyoe. tuhan beungeh keu geutanyoe sabab indatu tanyoe hana geupeubuet peurintah-peurintah peue-peue nyang na teuteuleh lam kitab nyoe." dan geujak kheueh hilkia, ahikam, akhbor, safan dan asaya geujak lakee peutunyok ubak sidroe inong nyang nan geuh hulda. gobnyan sidroe nabiah nyang tinggai nibak saboh sampong baro di yerusalem. lakoe gobnyan nan geuh salum bin tikwa, cucoe harhas; gobnyan tukang peusanaut peukayan iebadat di baet tuhan. oh ka ltheueh hulda geudeungoe peue nyang jipeugah le awaknyan, le gobnyan laju geuyue awaknyan mangat jigisa ubak po raja dan geupeusampoe peue nyang geupeugah le tuhan nyan: "ulon teuma lon hukom yerusalem dan banmandum peunduduek lagee nyang teuteuleh lam kitab lagee nyang ka geubeuet le raja. awaknyan ka jitinggai ulon dan jipeuseumah keureubeuen keu ilah-ilah nyang laen. banmandum nyang awaknyan peubuet ka jipeubeudoh meureuka ulon. ulon beungeh keu yerusalem, dan beungeh ulon nyan hana hase jipeuseungab. teuma keuhai raja yosia, nyoe kheueh peusan lon, tuhan allah israel, 'oh ka ltheueh gata deungoe peue nyang teuteuleh lam kitab nyan, gata meunyeusai dan tapeumiyueb droe dikeue ulon. ulon ka lon ancam keu lon hukom yerusalem dan peunduduek jih. ulon peujeuet banda nyan saboh peumandangan nyang keubit that teumakot, dan nan yerusalem teuma lon peujeuet keu nan kutokan. teuma watee gata deungoe keuhai ancaman lon nyan gata tamoe dan gata priek peukayan gata sibagoe tanda gata seudeh. ulon ka lon deungoe doa gata, le sababnyan hukuman atueh yerusalem hana ulon peurhot simantong gata na udeb. gata teuma me-

uninggai deungon dame.' " Lheueh nyan geuwoe kheueh utosan-utosan nyan ubak po raja dan laju geupeusampoe peusan nyan. raja yosia geuhoi mandum peumimpén yehuda dan yerusalem. laju gobnyan geujak ngon awaknyan u baet tuhan, jiseutot le teungku-teungku imeum, le nabi-nabi dan banmandum rakyat, bah nyang gasien meunan cit nyang kaya. dikeue awaknyan mandum, bak bineh pilar nyang khusus keu raja, lheueh nyan raja laju geudong dan geubaca banmandum asoe kitab peujanjian nyang ka meuteume nibak baet tuhan, lheueh nyan raja laju geupeuget peujanjian deungon tuhan keu taat ubak gobnyan, dan teupeubuet deungon sipeunoh ate dan sigeunon jiwa banmandum peurintah dan hukum-hukum gobnyan. raja pi geumeujanji keu geupepeunoh banmandum syarat-syarat peujanjian tuhan ngon umat gobnyan nyang na teuteuleh lam kitab nyan. banmandum rakyat meusajan-sajan jimeujanji keu jitaat ubak peujanjian nyan. oh lheueh nyan raja laju geubri peurintah ubak teungku imeum agong hilkia, keu teungku-teungku imeum peubantu dan keu peungawai-peungawai nyang meutugaih nibak babah pintoe baet tuhan, mangat teupeuteubit lam baet tuhan nyan mandum peukakah nyang teupeuguna keuteuseumah baal, dewi asyera, dan bintang-bintang. banmandum atranyan geutot le raja yosia diluwa banda nyang to ngon panton kidron, laju abee jih jiba u betel. gobnyan geupeucat teungku-teungku imeum nyang ka jibaati le raja-raja yehuda keu jimeutugaih nibak teupat teuseumah dewa nyang na lam banda-banda yehuda dan nyang na bansikeulileng yerusalem; meunan cit keu teungku-teungku imeum nyang meutugaih jipeuseumah keureubeuen keu baal, mata uroe, buleuen, planet dan bintang-bintang. patong dewi asyera laju teupeuteubiet lam baet tuhan, dan teuba laju u luwa banda nibak panton kidron. disinan patong nyan laju teutot, adang jih teutob sampoe haloh, dan abee jih laju teusipeuk atueh jrat-jrat ureueng mate. bilek-bilek nyang na lam baet tuhan nyang jipeuguna le lunte-lunte kuil keu jipeubuet lunte sibagoe peuseumahan keu dewa, nyan pih geupeuhanco. (lam bilek nyan ureueng-ureueng inong jicumucob ija keujingui watee jiseumah dewi asyera.) banmandum imeum nyang na tinggai lam banda-banda yehuda geuyue le yosia mangat jijak u yerusalem, dan meunan cit dipat mantong bansaboh yehuda geupeukuto laju miseubah-miseubah dewa nibak teupat imeum-imeum nyan ka jipeuseumah keureubeuen. teungku-teungku imeum nyan hana jipeu idhin jipeuna ebeadat di baet tuhan. teuma awaknyan jeuet jipajoh ruti nyang hana meuragoe nyang teukeubah keu rakan-rakan awaknyan. miseubah-miseubah nyang teupeukhusos keuteupat peubuet seumah ubak dewa-dewa nyang to ngon geureubang yosua, walibanda nang-groe nyan, laju teureuloih. geureubang nyan na jih nibak blaih wie geureubang phon nibak rot tamong u banda. tofet, na kheueh teupat teuseumah dewa di panton hinom, nyan pi teupeukuto. deungon nyan hana le nyang hase jipeuseumah aneuk-aneuk jih sibagoe keureubeuen nyang teutot keu dewa molokh. banmandum guda nyang jipeukhusos le raja-raja yehuda keungon seumah ubak dewa mata uroe, nyan

pi geuboih, dan geuritan-geuritan nyang teupeuguna watee teuseumah nyan laju geutot. (geuritan-geuritan nyan na dileuen baet tuhan – to ngon babah pintoe geureubang – hana jioh nibak bilek-bilek teupat tinggai natan melekh, sidroe ureueng peugawee manyang.) miseubah-miseubah nyang jipeudong le raja-raja yehuda atueh bubong nibak bilek-bilek raja ahas, nyan pi geupeuhanco. meunan cit deungon miseubah-miseubah nyang jipeudong le raja manasye nibak bandua boh leuen baet tuhan, geupeuhanco rata ngon tanoh le raja yosia, atranyan laju geuboih u panton kidron. meunan cit deungon miseubah-miseubah nyang na nibak bagian timu yerusalem, blaih u selultan buket keujeuhetan ka geupeunajih. miseubah-miseubah nyan geupeudong le raja nabi sulaiman keu ngon seumah dewa-dewa nyang paleng luwat – na kheueh asyoret dewi bansa sidon, kamos dewa bansa moab, dan milkom dewa bansa amon. tugu-tugu dewa dan patong dewi asyera laju geureuloih, dan tanoh teupat tugu-tugu ngon patong-patong nyan teudong, laju geuseube le yosia ngon tuleueng-tuleueng manasia. meunan cit gobnyan geupeurusk teupat seumeumah di betel nyang geupeudong le raja yerobeam bin nebat – raja nyang ka jeuet keusabab ureueng israel jipeubuet desya. le yosia laju geupeubeukah miseubah nibak teupat seumah dewa nyan, dan laju geutot meusigoe ngon patong dewi asyera nyang na inan. oh lheuehnyan yosia geupaleng, dan deuh laju geukalon na padum boh jrat di atueh gunung. le gobnyan laju geuyue gob mangat jikueh kubu nyan, dan geupeuteubiet tuleueng-tuleueng nyang na disinan dan laju geutot nibak miseubah nyang teung-goh tutong nyan. meunan kheueh cara jih gobnyan geupeukuto miseubah nyan. deungon nyan jeuet kheueh peue nyang ka geuramai le nabi tuhan yoh watee ilee, bak watee raja yerobeam geudong bak bineh miseubah nyan watee na saboh peurayaan. oh lheueh nyan le raja yosia geukalon lom na saboh teuk kubu nyang laen. laju gobnyan geutanyong, "jrat soe nyoe?" ureueng-ureueng betel jijawueb, "nyan jrat sidroe nabi tuhan nyang peureunah teuka keunoe nibak yehuda, dan gobnyan geuramai hai-hai nyang ban mantong teungku amphon peubuet atueh miseubah nyoe." "bek gata peukaru jrat nyan," peurintah raja. "bah kheueh tuleueng-tuleueng gobnyan teutab na disinan, bek gata pinah!" le sabab nyan teuma tuleueng-tuleueng nabi nibak yehuda nyan hana geupeukaru; meunan cit deungon tuleueng-tuleueng nabi nyang nibak samaria nyang na teupeukubu disinan. nibak tieb-tieb banda di israel, raja yosia geupeuhanco mandum teupat-teupat gobnyan seumah dewa nyang jipeudong le raja-raja israel, dan nyang ka jeuet keusabab tuhan teuka meureuka. peue nyang ka geupeubuet le raja yosia di betel, geupeubuet cit lagee nyan bagoe keu miseubah-miseubah laen nyang na bansaboh nanggroe israel. banmandum teungku imeum nyang meutugaih nibak teupat-teupat gob seumah dewa geupoh mate atueh miseubah teupat teungku-teungku imeum nyan meutugaih. dan nibak tieb-tieb miseubah nyan yosia laju geutot bubena tuleueng-tuleueng manasia. lheuehnyan baro kheueh geuwoe u yerusalem.

oh ltheueh nyan raja yosia geupeurintah ubak rakyat mangat jipeuna uroe raya paskah lagee nyang na teutuleh lam kitab peujanjian deungon tuhan, deungon lageenyan awaknyan jihoreumat tuhan, po teu alah awaknyan keudroe. yoh phon that bansa israel jipeurintah le pahlawan-pahlawan gohlohm na raja israel atawa raja yehuda nyang jipeuraya uroe raya paskah lageenyan bagoe. teuma nibak thon nyang keulapan blaih keurajeuen yosia nyan baro paskah geupeuna lom di yusaleum keu teuhoreumat tuhan. keuteupeubuet hukom-hukom nyang teutuleh lam kitab nyang geuteume le imeum agong hilkia nibak baet tuhan, banmandum tukang hoi areuwah dan tukang ramai geu-use le raja yosia nyang na di yusaleum dan nyang na bansaboh yehuda, dan laju geuboih mandum dewa rumoh tangga, beurala, dan barang-barang nyang jipeuguna keuseumah ubak dewa-dewa. gohlohm na raja lagee raja yosia nyang meungabdi ubak tuhan deungon sipeunoh ate geuh, dan hainyan geupeuleumah lam cara udeb dan buet-buet gobnyan, paih lagee banmandum hukom nyang na lam kitab nabi musa. oh ka ltheueh raja yosia, hana le raja nyang lagee gobnyan. teuma buet raja manasye ka teupeubeudoh meureuka tuhan ateueh yehuda, dan beungeh geuhnyan gohlohm lon. tuhan meufeureuman, "peue nyang ka ulon peubuet ateueh israel, teuma lon peubuet cit ateueh yehuda. ureueng yehuda teuma ulon boih nibak nanggroe nyang ka ulon jok keu awaknyan. ulon teuma lon tukang yusaleum, banda nyang ulon pileh, meunan cit baet ulon nyoe, nyang meunurot kheun ulon jeuet keu tempat iebadat ubak ulon." raja yosia meuninggai watee geumuprang di megido, gobnyan geujak prang nekho, raja meuse, nyang teungoh jimaju ngon pasokan jih keuneuk jijak tulong raja asyur nibak bineh krueng efraim. manyet raja yosia jicok le tukang peungawai gobnyan laju jipeuwoe ngon geuritan u yusaleum. disinan gobnyan laju jipeukubub nibak lampoh jrat raja-raja. le rakyat yehuda laju jipileh dan jibaiait yoahas aneuk agam gobnyan jeuet keuraja keugeunantoe gobnyan. kisah nyang laen keuhai raja yosia na teucetet lam kitab seujarah raja-raja yehuda. yoahas na umu 23 thon watee gobnyan teubaiat jeuet keuraja yehuda, dan gobnyan geumat keurajeuen di yusaleum lthee buleuen treb jih. ma gobnyan nan geuh hamutal bin yeremia asai nibak banda libna. yoahas meudesya ubak tuhan lagee indatu gobnyan. keurajeuen yoahas tamat watee nekho raja nanggroe meuse jilawan gobnyan di ribla, nibak daerah amat, dan jipaksa yehuda mangat jibayeue upeti keu gobnyan nyang le jih 3.400 kilogram pirak dan 34 kilogram meuh. oh ltheuehnyan raja nekho geubaiat aneuk agam yosia nyang nan jih elyakim jeuet keuraja yehuda, dan geu-ubah nan elyakim jeuet keu yoyakim. yoahas jiwa u meuse dan gobnyan meuninggai donya disinan. keu teubayeue upeti nyang jilakee le raja meuse, raja yoyakim gekuteb cukee nibak rakyat meunurot nyang ek jibayeue le maseng-maseng ureueng. yoyakim na umu 25 thon watee gobnyan jeuet keuraja yehuda, dan gobnyan geumat keurajeuen di yusaleum 11 thon treb jih. ma gobnyan nan geuh zebuda binti pedaya asai nibak banda ruma. yoyakim meudesya ubak tuhan saban

lagee indatu gobnyan. watee keurajeuen raja yoyakim, nebukadnezar raja babel jiprang dan jipeutaklok yehuda. na lthee thon treb jih yoyakim tundok ubak nebukadnezar, teuma oh ltheueh nyan gobnyan beurontak. tuhan laju geukirem geurombolan ureueng-ureueng meuseunjata nibak bansa babel, siria, moab dan amon keuteujak lawan yoyakim dan teupeubinasu yehuda, paih lagee peue nyang ka teupeugah meulalu nabi-nabi, hamba-hamba gobnyan. keubiet hainyan teuma teujadi, sabab tuhan ka geupeugah bahwa yehuda teuboih nibak nanggroe nyang geubri le tuhan keu awaknyan. awaknyan teuboih sabab banmandum desya nyang ka jipeubuet le raja manasye; nyang phon-phon that sabab gobnyan jipoh mate ateueh ureueng-ureueng nyang hana meusalah. tuhan hana geutem peuamphon manasye sabab buet-buet geuhnyan. bansaboh daerah, phon nibak krueng efraim sampoe trok ubak bataih nanggroe meuse di siblaih utara nyang jitamong lam wilayah keurajeuen raja meuse, jikuasa le raja babel. le sababnyan raja meuse hantom le geuteubiet nibak nanggroe geuh keugeujak muprang. kisah nyang laen keuhai raja yoyakim na teucetet lam kitab seujarah raja-raja yehuda. oh ka ltheueh yoyakim meuninggai donya, aneuk agam gobnyan nyang nan geuh yoyakhin teubaiat jeuet keuraja keugeunantoe gobnyan. yoyakhin na umu 18 thon watee gobnyan teubaiat jeuet keuraja yehuda, dan gobnyan geumat peurintah di yusaleum lthee buleuen treb jih. ma gobnyan nan geuh nehusta binti elhanan, asai yusaleum. saban lagee ureueng syiek gobnyan, yoyakhin pi meudesya ubak tuhan. nibak watee keurajeuen yoyakhin, pasokan babel nyang jipimpen le peuwirapeuwira nebukadnezar, jimaju jijak prang yusaleum, dan laju jikeupong banda nyan. teungoh banda nyan teukeupong, nebukadnezar keudroe geujak u yusaleum, dan le raja yoyakhin meusajan ngon ma gobnyan, aneuk-aneuk gobnyan, peuwira-peuwira gobnyan meunan cit deungon peugawee-peugawee meuligoe meunyeurah ubak nebukadnezar. ltheueh nyan yoyakhin geutawan. hai nyan teujadi nibak thon nyang keulapan keurajeuen nebukadnezar. banmandum peukakaih meuh nyang geupeuget le raja nabi sulaiman keu baet tuhan, jipeurasak le nebukadnezar. dan mandum barang-barang nyang meuyuem lam baet nyan dan nyang na lam meuligoe jiba laju u babel. hainyan na paih lagee nyang ka geupeugah le tuhan sigohlohm nyan. raja yoyakhin, ma gobnyan, peurumoh-peurumoh gobnyan, peugawee-peugawee gobnyan, dan peumimpen-peumimpen yehuda – banmandum na 7.000 droe ureueng nyang paleng meusyuhu – jiteun dan jiba u babel. meunan cit ureueng-ureueng nyang malem-malem bak buet dan teumpeun beuso na 1.000 droe, banmandum ureueng-ureueng teuga dan beuhe-beuhe keu jijak muprang. ureueng-ureueng keuturonan raja, dan ureueng-ureueng meusyuhu pih jiba cit teuma ubak tempat boih – mandum nyan na 10.000 droe. rab banmandum ureueng nyang na di yusaleum jiba sajan; nyang tinggai na kheueh rakyat nyang paleng gasien. oh ltheuehnyan nebukadnezar geubaiat matanya, alpa yoyakhin, jeuet keu raja yehuda, dan geugantoe nan geuh jeuet keu zedekia. zedekia na

umu 21 thon watee gobnyan teubaiat jeuet keu raja yehuda. gobnyan geumat keurajeuen di yerusalem 11 thon treb jih. ma gobnyan nan geuh hamutal, binti yeremia asai nibak banda libna. saban lagee raja yoyakim, raja zedekia meudesya cit ubak tuhan. tuhan meureuka that keu peunduduek yerusalem dan keu ureueng-ureueng yehuda le sababnyan gobnyan hana geupakoe le keu awaknyan. oh ltheuhnyan zedekia beurontak ateuh nebukadnezar raja babel. le sababnyan nebukadnezar deungan banmandum angkatan prang gobnyan teuka dan geujak prang yerusalem bak tanggai siploh buleuen siploh nibak thon nyang keusikureueng keurajeuen zedekia. awaknyan jipeudong kuta diluwa banda, dan geupeudong beuton keuteukeupong, dan hana ploh-ploh jikeupong banda nyan trok ubak thon nyang keu siblaih keurajeuen zedekia. nibak tanggai sikureueng buleuen peuet thon nyan cit teuma watee bala musem deuk ka mupalo that sampoe rakyat ka hana le peunajoh meubacut pi, kuta banda laju jidobrak le musoh. malam nyan, bahpi ureueng babel teungoh jikeupong banda nyan, banmandum sipa-i yehuda laju jipeuplueng droe jikarat ubak panton yordan. awaknyan jicok rot ueh meulalu taman meuligoe, laju jiteubiet rot babah pintoe geureubang nyang jipeuhubong nibak bandua boh beuton nibak teupat nyan. teuma tantra babel laju jipeucrok raja zedekia, dan laju jidrob nibak darat yerikho. banmandum aneuek buah gobnyan ka habeh jiplueng jitinggai gobnyan. oh ltheuhnyan raja zedekia jiba ubak raja nebukadnezar nibak banda ribla, oh trok keunan laju geupurhot hukoman. aneuek-aneuek gobnyan jipoh mate dikeue mata gobnyan keudroe. oh ltheuhnyan zedekia jicungke mata geuh, ltheuh nyan laju jigari dan jiba u babel. bak tanggai tujoh buleuen limong nibak thon nyang keu sikureueng blaih keurajeuen nebukadnezar raja babel, teuka kheueh u yerusalem sidroe ureueng nyang nan jih nebuzaradan. gobnyan na kheueh peunaseuhat dan panglima prang nebukadnezar. nebuzaradan laju jitot baet tuhan, meuligoe raja, dan rumoh-rumoh banmandum ureueng meusyehu nyang na di yerusalem. dan banmandum aneuek buah jih jireuloh ngon jipeuhanco beuton-beuton banda nyan. oh ltheuhnyan rakyat nyang na mantong na lam banda, na kheueh ureueng-ureueng meubuet nyang malem nyang mantong na tinggai, ureueng-ureueng gasien dan ureueng-ureueng nyang ka jiplueng u blaih babel, banmandum nyan jiba u babel le nebuzaradan. teuma siladam rakyat nyang paleng gasien dan nyang hana sapeuena jitinggai di yehuda dan jiyue meubuet bak lampoh-lampoh anggo dan blang-blang. tameh-tameh peurunggu dan geuritan-geuritan nyang na nibak baet tuhan meusajan-sajan deungan guci peurunggu laju jipeubeukah le ureueng babel, dan banmandum peurunggu nyan jiangkot u nanggroe awaknyan. awaknyan pih jiangkot barang-barang nyang teupeugah nyoe: seko-b-seko, teupat abee miseubah, peukakaih-peukakaih panyot, cambong-cambong keu teupat boh darah beulatang nyang teusie sibagoe keureubeuen, cambong-cambong keu ngon tot keumeunyan, dan banmandum barang peurunggu nyang laen nyang jipeuguna keu ngon up-

acara iebadat. barang-barang meuh dan pirak, jita-mong cit keunan cambong-cambong ubit dan cipe-cipe keu ngeue apui nyan jicok le nebuzaradan keudroe. barang-barang peurunggu nyang ka geupeuget le raja nabi sulaiman keu baet tuhan, na kheueh bandua boh tameh, geuritan-geuritan dan guci rayeuk, banmandum nyan keubit that geuhon akhejih hana hase teutimang. bandua boh tameh peurunggu nyan saban; maseng-maseng manyang jih 8 metee deungan saboh ulee tameh nibak peurunggu nyang manyang jih 1,3 metee. bansilingka tieb-tieb ulee tameh nyan na meunanyuem deungan teuhiah boh geulima nibak peurunggu. seulaen nibaknyan, nebuzaradan jidrob teuma teungku imeum agong seraya, meunan cit deungan sefanya, teungku imeum sida, lhee droe nyang keumiet babah pintoe baet tuhan, banlimong droe peunaseuhat pribadi raja nyang mantong na tinggai lam banda, panglima, waki panglima tukang uroih administrasi tantra, dan 60 droe ureueng rayeuk nyang laen. banmandum ureueng nyan jiba ubak raja nebukadnezar di banda ribla, nibak wilayah amat. disinan awaknyan jiseksa dan laju jipoh mate. meunan kheueh ureueng-ureueng yehuda jiangkot nibak nanggroe awaknyan keudroe dan jijkak tiek ubak teupat nyang teuboih. oh ltheuhnyan raja nebukadnezar laju jibaiait gedalya bin ahikam dan cucoe nibak safan, jeuet keu gubunur di yehuda keu jipeurintah ateuh banmandum ureueng nyang mantong tinggai disinan. watee peuwira dan tantra yehuda nyang hana meunyeurah ubak babel jideungoe keuhai teubaiat gubunur nyan, awaknyan banmandum jijkak ubak gedalya di mizpa. peuwira-peuwira nyan na kheueh ismail bin netanya, yohanan bin kareah, seraya bin tanhumet asai nibak banda netofa, dan yazanya asai nibak banda maakha. geupeugah kheueh le gedalya ubak awaknyan banmandum, "gata hana peureulee teumakot keu peujabat-peujabat babel. tinggai kheueh mantong di nanggroe tanyoe nyoe dan beujeuet kheueh keu hamba raja babel. ulon tanggong gata teuma seulamat." teuma nibak buleuen tujoh thon nyan ismail bin netanya dan cucoe elisama nyang mantong keuturonan raja, laju jijkak meusajan ngon na 10 droe ureueng u mizpa. awaknyan jiprang dan jipoh mate gedalya meusajan ngon ureueng yehuda dan ureueng babel nyang na meusajan gedalya nibak teupat nyan. le sababnyan, banmandum rakyat yehuda, kaya meunan cit nyang gasien, meusajan-sajan deungan peuwira jiplueng u nanggroe meuse sabab teumakot keu ureueng babel. nibak tanggai dua ploh tujoh buleuen dua blaih lam thon nyang keu lhee ploh tujoh oh ka ltheuh yoyakhin jiangkot u teupat nyang teuboih, ewil-merodakh jeuet keu raja babel. nibak thon nyan cit teuma gobnyan geupeuleumah gaseh sayang ubak yoyakhin, laju geupeubeubaih geuh nyan nibak rumoh glab, dan geupeusaneut gobnyan deungan get teuma. yoyakhin geubri teupat duek nyang leubeuh manyang nibak raja-raja laen nyang meusajan teuboih u babel. yoyakhin hana geusok peukayan rumoh glab dan ka لازم geumakheun lam meuligoe dan jibri peng keu udeb gobnyan siuroe-uroe.

kitab nyoe meuasoe peusan-peusan keuhai yehuda dan yerusalem nyang geupeugah le po teu allah ubak nabi yesaya, aneuek amos, bak watee uzia, yotam, ahas dan hizkia geumat peurintah di yehuda. deungoe kheueh hai langet, peurati kheueh hai bumoe! tuhan meufeuereuman, "aneuek-aneuek nyang ka ulon peulara jibeurontak teuhadab ulon. leumo jituri nibak ureueng po jih, keuleudee jituri ubak tempat peunajoh nyang ka geuseudia keujih le amphon droe jih. teuma umat ulon israel hana jituri; awaknyan hana jimuphom." cilaka kheueh gata bansa nyang meudesya, ureueng-ureueng nyang beujat dan jeuhet! gata ka meusireuk le desya-desya gata. gata ka tatulak tuhan dan tapeulikit po teu allah nyang mahasuci nyang haroh gata seumah. pakon gata hana tapioh bak neumeutuleh lageh? peu kheueh gatatem teuhukom leubeuh brat lom? ulee gata ka peunoh deungon cabok-cabok, ate dan pikeran gata saket. phon bak ulee sampoe trok ubak tapak kaki hana nyang seuhath nibak tuboh gata. gata ka peunoh deungon keumong-keumong, luhok nyang meujeuen-jeuen dan cabok-cabok nyang luka. luka-luka gatanyan gohlom teupeugleh atawa teubalot, meunan cit hana teuma teupeu ubat deungon minyeuk. nanggroe gata ka teupeubinasa; banda-banda nyang na di nanggroe gata ka habeh tutong kareuna teutot. dikeue mata gata ureueng aseng jicok tanoh gata dan jipeuhanco peue-peue nyang na. yerusalem mantong nyang tinggai, teuma seubagoe banda nyang ka teukeubok dan hana meudaya, lagee jambo di lampoh anggo atawa gubuk di lampoh timon. seuandai jih tuhan nyang mahakusa hana geupeukeunong meupadub droe nibak geutanyoe, geutanyoe banmandum ka habeh binasa, lagee sodom dan gomora. yerusalem bubena peumimpin dan bansa gata ka jeuet lagee ureueng sodom dan gomora. deungoe kheueh peue nyang geufeuereuman le tuhan ubak gata; peurati kheueh peue nyang geupeuruno le po teu allah geutanyoe. tuhan meufeuereuman, "neusangka ulon nyoe galak that ubak banmandum keureubeuen nyang hana putoh-putoh tapeuseumah kyu ulon? ulon bosan deungon bubiri-bubiri keureubeuen teutot gata dan gapah aneuek leumo gata. darah leumo agam, bubiri dan kameng hana lon galak. soe nyang yue gata taba banmandum peuseumahan nyan bak watee gata tateuka meuebadat ubak ulon? soe teuma nyang yue gata meuwot-wot di baet suci lon? peucuma mantong taba peuseumahan gata nyan. ulon muak deungon bhee jih. ulon banci dan han ek lontean lon kalon gata peuna uroe raya buleuen baro, uroe-uroe sabat dan uroe-uroe raya meunan cit nibak rapat-rapat keuagamaan. banmandum nyan gata noda deungon desya-desya gata dan ka jeuet keubeuban nibak ulon; ulon ka hek that ulon tanggung nyan. meunyo gata tabeutot jaroe gata keu gata meudoa, doa gata nyan hana lontem deungoe, sabab deungon jaroe gatanyan gata ka le that tapoh mate gob. tajak rhah kheueh droe gata nyan sampoe gleh. tapeupioh banmandum buet nyang jeuhet nyang gata peubuet nyan. dan bekle tapeubuet jeuhet, meurunoe kheueh tapeubuet nyang jroh. peudong kheueh keuadalan dan peugleh kheueh peunindasan; tabri kheueh ubak

aneuek yatem ngon meuntui hak droe jih dan tabila kheueh peukara inong balee." tuhan meufeuereuman, "jak tapeubeereeh peukara nyoe. bahpi gata mirah leumbayong sabab desya-desya gata, gata teuma ulon rhah puteh gleh lagee gapeueh. bahpi desya-desya gata le dan brat, gata teuma lon peu amphon deungon peunoh. meunyo gata tatem taat ubak ulon, gata teuma tarasa banmandum nyang jroh-jroh nyang na jipeuhase le nanggroe gata. teuma meunyo gata talawan ulon, gata mate dimideuen prang. ulon, tuhan, ka lon peugah haba." banda nyang yoh masa ilee seutia, bak saat nyoe ka lagee inong jeuhet! ilee banmandum peunduduek jih ade dan juoe, teuma bak saat nyoe ka jiduek le tukang-tukang peumate gob. yerusalem, masa ilee gata lagee pirak, teuma bak saat nyoe ka hana meuyuem le. masa ilee gata lagee anggo nyang lazat, teuma saat nyoe na kheueh ie nyang le. bubena peumimpin gata peubeurontak dan kaki jaroe pancuri; awaknyan galak jiteurimong hadiah dan peng sogok. awaknyan hanajitem bila yatem ngon meuntui di kanto peungadalan; hanjitem deungoe inong-inong balee nyang jak meungadu. sabab nyan tuhan nyang mahakusa, po teu allah israel meufeuereuman: "hai, musoh-musoh lon, ulon teuma lon balah dam ubak gata, sampoe hana tapeususah le ulon. ulon cok tindakan ateuah gata. lagee ureueng nyang asah logam, gata ulon asah; peue mantong nyang kuto teuma ulon tiek nyang na meuleukek nibak gata. keu gata ulon joklom hakem-hakem dan peunaseuhat lagee yoh masa ilee. dan yerusalem geuboh nan banda nyang ade dan seutia." tuhan ade, dan gobnyan geupeuseulamat yerusalem dan ureueng-ureueng nyang meunyeusai. teuma ureueng-ureueng nyang meudesya nyang jibeurontak teuhadab gobnyan geupeubinasa, dan banmandum nyang tinggai gobnyan geupemuseum-unah. awaknyan meuteume malee sabab jiseumah bak-bak kayee dan jipeukhusos lampoh-lampoh keu dewa-dewa. awaknyan teuma jeuet lagee bak kayee raya nyang layee on, dan lagee lampoh nyang hana ile ie. lagee jeurami tutong nyang keunong meuek bungong apui, meunan cit deungon ureueng-ureueng meukusa teuma geupeubinasa le buet-buet jeuhet awaknyan keudroe, dan hana nyang hase jipeupioh keuhancoran nyan. nyoe kheueh peusan po teu allah keuhai yehuda dan yerusalem nyang geuteurimong le nabi yesaya bin amos: bak uroe-uroe nyang teuma teuka buket tempat baet tuhan manyang meulam-bong dan teudong cot di ateuah gunong-gunong dan buket-buket. banmandum bansa meuron-ron jijak keunan, awaknyan banmandum jipeugah, "jak geutanyoe taek u buket tuhan, u baet allah israel. gobnyan teuma geupeurunoe keu geutanyoe peue nyang haroh geutanyoe peubuet. geutanyoe ta seutot jalan gobnyan, sabab ajaran tuhan teuka nibak yerusalem, gobnyan geumeututoe nibak sion." gobnyan geupeuhakem lamkawan bansa-bansa, dan geupeuputoh peukara lamkawan sukee-sukee bansa. langai, dan kapak geupeujeuet keu sikin meugunteng. bansa-bansa hana le saleng jipeu phon seurang, dan hana teuma meusiab-siab keuneuk jak murang, hai, keuturonan nabi yakub, jak geutanyoe tajak didalam trang tuhan! ya allah, droeneueh ka

neutinggi umat droeneuh, keuturonan nabi yakub! sabab dipat mantong di nanggroe nyoe ureueng laen jingui ieleume gaeb nyang meuasai di timu dan di filistin. bubena ureueng-ureueng ka jicuntah adat istiadat ureueng aseng. nanggroe jihnyan peunoh deungon pirak dan meuh, dan hareuta beunda gobnyan hana teukira. guda gobnyan lumpah that jai, dan geuritan gobnyan hana teu itong jeumeulah jih. jeueb-jeueb sago na patong beurala, dan awaknyan jiseumah patong-patong nyang jipeuget keudroe. soe mantong ureueng teuma geuhina dan geupeumiyueb yuem droe ureueng nyan. bek neupeu amphon awaknyan, ya tuhan! awaknyan teuma jitamong u dalam guha-guha di buket kareueng, atawa jikueh uruek didalam tanoh mangat teuhinda nibak meureuka tuhan dan nibak kuasa gobnyan nyang mulia. ureueng sombong geupeuhina dan ureueng angkoh geupeutundok. teuma tuhan keudroe nyang geupeu agong. nibak uroenyang tuhan nyang mahakuasa teuma geupeuhina banmandum ureueng nyang peumanyang droe dan geuhukom ureueng nyang sombong meunan cit deungon nyang angkuh. bak-bak kayee ceumara nyang manyang di libanon dan banmandum bak kayee raya di basan geupeubinasa. gunong-gunong dan buket-buket nyang meusyuehu geupeurata ngon tanoh. meunara-meunara nyang manyang dan binteh-binteh beuton kuta geureuloh rata. kapai-kapai nyang paleng raya dan paleng lagak geupeukaram. ureueng sombong teuma geupeuhina, dan ureueng angkoh geupeutundok teuma. teuma tuhan sidroe nyang teupeu mulia. beurala-beurala teuma gadoh sapan sapa. bak watee tuhan geubeudoh dan geuyok-yok bumoe, ureueng rame teuma jitamong u dalam guha-guha di buket-buket kareueng atawa jijak kueh uruek di dalam tanoh mangat teuhinda nibak meureuka tuhan dan nibak kuasa gobnyan nyang mulia. meunyoe uroe nyan ka trok jiteuka, beurala-beurala pirak dan meuh nyang awaknyan peugot dan seumah nyan laju jitinggai meunan mantong keu tikoih dan cicem simantong. nyang kheueh, bek kheueh meuharab ubak manusia nyang fana, sabab jihnyan hana hareuga. sikeubit jih, tuhan nyang mahakuasa geucok di yerusalem dan yehuda peue mantong peuseudiaan peunajah dan ie meuneujieb. meunan cit banmandum ureueng nyang awaknyan peubangga: dumna pahlawan dan peureute tantra, hakem, nabi, tukang ngieng kutika dan tukang bri naseuhah, peuwira, ureueng patot-patot dan ahli peutimang nanggroe, tukang sihe dan tukang ngieng kutika. tuhan teuma geu angkat aneuek-aneuek muda jeuet keu peumimpen rakyat, dan awaknyan jimat peurintah ban galak droe. ureueng-ureueng sabe keudroe-droe saleng jitindeeh. ureueng muda jianggab remeh ubak ureueng tuha, dan aneuek miet ji anggab remeh ubak ureueng rayeuk. bak masanyan di ureueng teuma jitunyok sidroe nibak kawom syedara jih dan jipeugah ubak ureueng nyan, "cuma gata nyang na peukayan nyang pantaih; sabab nyan jeuet kheueh keu peumimpen kamoe bak jamen nyang peunoh keususahan nyoe." teuma gobnyan teuma jijaweueb, "ulon kon tabih! meunan cit nibak ulon hana peunajah dan peukayan. bek neuyue ulon

jeuet keu peumimpen bansal!" beutoi, yerusalem ka rhot! yehuda ka reuloh! sabab banmandum tutoe haba dan buet awaknyan jilawan tuhan dan jilawan keukuasaan gobnyan. sikeueb awaknyan nyang sombong deuh teukalon keujeuhetan droe jih. trang-trang awaknyan meudesya lagee sodom yoh masa ilee. cilaka kheueh awaknyan! awaknyan jipeuteuka cilaka ateueh droe jih keudroe. tuhan meufeureuman, "tajak peusampoe kheueh ubak ureueng nyang taat ubak ulon bahwa awaknyan bahgia dan seulammat. awaknyan jiteume rasa hase jeureh payah droe jih keudroe. teuma cilaka kheueh ureueng jeueh! ateueh awaknyan teuma geupeusa-neut lagee awaknyan ka jipeulaku ateueh ureueng laen. umat ulon teuma jitindeeh le tukang pajoh riba dan ji prah le lintah darat. umat ulon jipeuisat le peumimpen-peumimpen droe jih sampoe hana jiteupeue le rot nyang haroh awaknyan jak." tuhan ka siab keu geugugat dan adili umat gobnyan. tuhan meutindak sibagoe hakem ateueh peumimpen umat gobnyan. nyoe kheueh tudohan tuhan keu awaknyan: "gata nyoe kheueh nyang reupah hase lampoh-lampoh anggo; rumah gata ka peunoh deungon barang nyang gata reupah nibak ureueng-ureueng gasien. pakon gata tindeeh umat ulon dan talake deungon paksa hareuta ureueng gasien? ulon tuhan nyang mahamanyang dan mahakuasa ka ulon peugah haba." tuhan meufeureuman, "sombong that inong-inong yerusalem! awaknyan geunit, galak meun mata dan watee jijak deungon angkoh. langkah jih jipeugot-peugot, dan meuklieng-klieng su gleueng-gleueng gaki jih. teuma ulon hukom awaknyan; ulee awaknyan lon peupeunoh deungon kude dan haroh teucuko." teuma teuka watee jih tuhan geucok nibak inong-inong yerusalem peue mantong piasan nyang awaknyan peubangga: ikat ulee, gleueng gaki, dan talo takue, gleueng jaroe, jilbab, tudong ulee, jimat-jimat nyang na bak jaroe dan bak keuieng, euncien dan keurabu idong, peukayan khanuri nyang lagak-lagak, gaon mantel, dompet, bajee lipheh, peukayan lineun, ikat tajue dan keurudong panyang. jinoenyoe awaknyan jingui wangi wangian, eunteuk awaknyan meubhee kheueh ngon khieng. talo keuieng awaknyan nyang haloh teuma teugantoe deungon talo tambang nyang gasa. ulee awaknyan nyang meuok gagah teuma teucuko habeh. peukayan awaknyan nyang gagah-gagah teuma teugantoe deungon nyang brok dan tuha-tuha. jinoenyoe awaknyan lagak ngon ceudah; eunteuk hi awaknyan ka brok sabab ka teuboh cab. ureueng agam, meunan cit nyang beuhe ngon teuga-teuga, teuma mate dimideuen prang. di babah-babah pintoe geureubang banda ureueng rame teuma meukabong sira meuratok ngon jimo ba-e, dan banda nyan keudroe jeuet lagee ureueng inong nyang ka teupeulon nyang teuduek nibak tanoh. bak watee nyan na tujoh droe ureueng inong teuma jimat sidroe ureueng agam sira jipeugah, "neupeu idhin kheueh keukamoe meungaku bahwa droeneuh nyoe sibagoe lakoe kamoe, mangat kamoe hana meutanggong ayeh ngon malee kareuna hana kamoe meukawen. peunajah dan peukayan jeuet kamoe tanggong keudroe." teuma trok watee

jih tuhan geupeujeuet tieb-tieb seunaman dan bak kayee jitimoh sampoe rayeuk dan indah di nanggroe nyoe. nibak uroenyan ureueng israel nyang seulamat meurasu geumbira dan bangga sabab le hase panen jihnyan. tieb-tieb ureueng nyang na teutinggai di yerusalem, ureueng-ureueng nyang geupileh le po teu allah keu teupeuseulamat, ureueng nyan teuma teupeugah suci. deungon kuasa gobnyan, tuhan geupeusidang dan geupeumurni umat gobnyan. gobnyan geupeugleh yerusalem nibak darah ureueng-ureueng nyang teupoh di banda nyan. laju di ateuh buket sion dan banmandum ureueng nyang meusapat disinan tuhan laju geupeujeuet awan yoh watee uroe, meunan cit deungon asab dan hu trang oh watee malam. po teu allah keudroe deungon kuasa gobnyan teuma geupeupayong bansaboh banda nyan. gobnyan teuma geupeupayong nibak mata uroe criet oh watee uroe, dan geupeujeuet nyan tempat meuceu watee ujeuen raya dan angen badee. deungoe kheueh ca-e ulon nyoe keuhai lampoh anggo rakan ulon. sahabat ulon na lampoh anggo nibak sineuron buket nyang subo. gobnyan keudroe nyang cangkoi tanoh jih dan nyang boh mandum batee-batee. laju geupula anggo pilehan geupeudong teuma meunara ronda. geukueh laju saboh uruek tempat prah ie anggo gobnyan, laju gobnyan geupreh boh anggo nyan masak, teuma hase jih boh anggo nyang masam. teuma jinoenyo rakan ulon nyan geupeugah, "gata banmandum, peududuek yerusalem dan yehuda, peusidang kheueh lampoh anggo lon ngon ulon. peue lom nyang haroh ulon peubuet teuma gohlom ulon peubuet keu lampoh anggo lon nyan? pakon boh masam nyang ji muboh, dan bukon boh nyang get lagee nyang ulon harabkan? meunoe lon peubuet ateuh lampoh anggo lon nyan: pageue nyang na sikeulileng lampoh nyan ulon lot, binteh beuton nyang peupayong nyan ulon reuloh, laju ulon peubiyeu beulatang bueh jikak peuhanco dan jigilo-gilo. ulon teuma lon peubiyeu jitimoh bak kayee kleut. bak anggo nyang na disinan hana ulon gunteng, dan hana teuma ulon boh naleueng. dan ulon kalon banmantong jiseube le seumak meuduro dan naleueng, meunan cit awan-awan ulon tam jipeutrone ujeuen u ateuh nyan." sabab lampoh anggo tuhan nyang mahakuasa na kheueh umat israel, dan ureueng-ureueng yehuda na kheueh bak anggo nyang geupula. nibak awaknyan gobnyan geumeuharab keuadalan, teuma nyang na na kheueh keulaleman. gobnyan meuharab awaknyan jipeudong keubeunaran, teuma nyang na na kheueh jikliek jilakee keuadalan. cilaka kheueh gata nyang bloe rumoh-rumoh dan nyang seurobot ladang-ladang keu tatamoh atra milek gata! hana treb le habeh kheueh tempat keu ureueng laen dan gata kheueh nyang na tinggai di nanggroe nyan. ulon deungoe tuhan nyang mahakuasa meusumpah, "rumoh-rumoh nyang raya dan lagak-lagak nyoe banmandum lon peusoh nibak nyang keumiet rumoh nyan. hase bumoe gata lon peugagal, lampoh anggo nyang luwah na siploh heta teuma jipeuhase siploh aree ie anggo. sireutoh aree bijeh teuma jipeuhase siploh aree gandom." cilaka kheueh gata! phon beungoh sampoe an malam buet gata hana

tapih tajieb ie kreueh dan sampoe mabok-mabok hana meuteuntee. nibak khanuri-khanuri nyang gata peuna na teudeungoe su keucapi, su gambus, rapa-i dan su suleng dan minuman anggo. teuma gata hana tapakoe ubak karya tuhan dan peue nyang geupeubuet le gobnyan. sabab nyan umat ulon nyang hana jiteupeue sapeue teuma teupeuron jikak lagee tawanan. bubena peumimpin dan rakyat teuma mate sabab deuk dan grah. guha mawot ka teuhah luwah-luwah keuneuk jiet ureueng-ureueng meugah di yerusalem meusajan deungon rakyat nyang rame-rame geupeuna khanuri. soe mantong ureueng nyan geubri malee, dan nyang sombong geupeuhina. teuma tuhan nyang mahakuasa geutunyok keubeusaran gobnyan deungon cara geupeubuet peue nyang beuna. gobnyan teuma geupeuleumah keusucian geuhnyan deungon cara geupeusidang bansa gobnyan. nibak banda nyang ka reuloh aneuk-aneuk kameng dan domba jimeurot deungon naleueng sibagoe peunajoh jih nyang hana putoh. cilaka kheueh gata nyang meudesa hana putoh-putoh! kheun gata, "bah kheueh tuhan allah kusus israel bagai meutindak! bah kheueh gobnyan geulaksana reencana geuhnyan, mangat geutanyoe deuh takalon dan ta teupeue." cilaka kheueh gata nyang taputa balek nyang jroh dan nyang jehet, nyang seupot dan nyang trang, nyang phet dan nyang mameh! cilaka kheueh nyang neuanggab droe bijaksana dan carong! cilaka kheueh gata nyang hebat jieb ie anggo! gata ceubeueh dan hebat meunyo haroh neujampeu ie kreueh! teuma mangat meuteume peng sugok, gata tapeubeubaih ureueng meusalah, dan gatatam ureueng nyang hana meusalah mangat meuteume keuadalan. gata ka tulak ajaran tuhan nyang mahakuasa, dan tahina peumeurintah po teu allah kusus israel. sabab nyan, lagee jumpung dan naleueng tho nyang habeh tutong jipajoh le apui, meunan cit deungon ukeu-ukeu gata habeh brok, bungong-bungong gata habeh tho dan habeh jitampo le angen. tuhan beungeh keu bansa gobnyan. gobnyan ka siab keuneuk geuhukom awaknyan. gunong-gunong teuma meuguncang; manyet-manyet meutabu beba lagee broh nibak rot raya. teuma tuhan mantong geubeungeh dan teutab geuhukom. tuhan geuhoi bansa nyang jioh dan awaknyan teuma teuka deungon bagai! awaknyan sabe siab jak lam prang dan hana jiteupeue keu hek. awaknyan hantom na ji-eh atawa teunguet mata. aneuk panah gobnyan tajam dan busur gobnyan ka siab keu geutimbak. gukeu guda gobnyan kreueh lagee kreueh batee meu apui, dan ruda geuritan gobnyan meuputa lagee angen badee puteng beuliong. bubena peureute tantra gobnyan jitaum lagee su singa nyang banmantong si ruengkom mangsa, laju jipeuplueng, dan hana soe nyang hase jipeuleuh nyan. bak uroe nyan bansaboh nanggroe israel teudeungoe su dumpek meuhadu ngaza di mideuen prang lagee su deru di laot raya. ngieng kheueh, bansaboh nanggroe nyan seupot dan peunoh keuseusakan. trang ka jiet keu seupot buta. bak thon raja uzia meuninggai donya, ulon deuh lon ngieng tuhan. gobnyan geudeuk di ateuh takhta geuh nyang manyang dan mulia. jubah gobnyan

teutob banmandum baet tuhan. ban sikeulileng gobnyan na teudong makhluk-makhluk nyang hu lagee apui, maseng-maseng na nam boh sayeub. dua boh sayeub teutob nibak muka, dan dua teutob teuma nibak badan jih, dan dua boh sayeub teuk geupeuguna keungan po. awaknyan jiteumawok sabe keudroe-droe: "kudus, kudus, kudus. kudus kheueh tuhan nyang mahakuasa. bumoe peunoh keuhaderan gobnyan nyang mulia." deungan su awaknyan nyang meugeunta sampoe sandi baet tuhan meusu meu kruk-kruk, dan baet tuhan nyan keudroe ka peunoh deungan asab. laju ulon peugah, "mupalo, hana harapan keu ulon, sabab babah ulon ka kuto ngon desya, dan ulon tinggai di lamkawan bansa nyang lagee nyan cit teuma. bahpi meunan, deungan mata ulee lon keudroe ulon ka lon ngieng raja, tuhan nyang mahakuasa!" oh ltheuehnyan saboh lamkawan makhluk nyan laju jipo ubak ulon sira jiba ngeue apui nyang geucok deungan sineupet nibak miseubah. laju geupeutupeh bibi ulon deungan ngeue apui nyan sira geupeugah, "ngeue apui nyoe ka tupeeh nibak bibi gata. jinoenyoe salah gata ka geusampoh dan desya ka geupeu amphon le tuhan." oh ltheueh nyan laju lon deungoe su tuhan nyang geupeugah, "soe nyang ulon utus? soe nyang jeuet keu ureueng ba haba geutanyoe?" laju ulon jaweueb, "nyoe kheueh ulon. utus kheueh ulon!" laju gobnyan geuyue ubak ulon beulon jakba peusan nyoe ubak umat: "gata teuma sabe tadeungoe, teuma hana muphom. gata sabe tasimak, teuma hana tateupeue peue nyang teuma teujadi." laju geupeugah kheueh le gobnyan ubak ulon, "peutumpoi kheueh pikeran ureueng-ureueng nyan, peutulo laju geulinyueng awaknyan dan peubuta laju mata jih nyan, mangat awaknyan bek deuh jikeumalon dan bek teuma jeuet jimeudeungoe atawa jimuphom, laju gisa ubak ulon dan puleh teuma lagee ban nyang ka." laju ulon tanyong, "padub na treb keuadaan nyoe teuma teujadi, tuhan?" jaweueb gobnyan, "sampoe banda-banda jeuet keu rangka deungan hana ureueng keumiet, rumah-rumah hana jiduek le, dan tanoh tinggai jeuet keukosong dan mate, peunduduek banda-banda nyan teuma ulon use u teupat nyang jioh, sampoe banmandum tanoh nyan ka jeuet keuseungue. anme-nyoe na mantong sidroe nyang tinggai lamkawan siploh droe di nanggroe nyan, ureueng nyan pih teupeubinasa. teuma lagee bak beuringen meunye teuteubang mantong na tinggai peureudee jih, meunan cit teuma mantong na tinggai sidroe-dua nibak bansa nyan nyang jeuet keu peumulaan umat nyang suci." raja ahas na kheueh aneuek agam yotam dan cucoe uzia. bak watee gobnyan geumat peurintah atueh yehuda, beureutoh kheueh prang. rezin raja siria, dan pekah aneuek agam remalya raja israel, teuka geujak seurang yerusalem. teuma awaknyan hana hase geureubot banda nyan. watee raja yehuda geudeungoe bahwa pasokan siria ka jitamong u dalam wilayah israel sibagoe sikutu, gobnyan dan bansa geuh lumpah teumakot, sampoe awaknyan yo bansalam le lagee bak kayee jipupot le angen. tuhan meufeureuman ubak nabi yesaya, "gata ba kheueh laju aneuek gata syear yasyub dan tajak kheueh laju meurumpok deungan raja ahas. gata teuma

meurumpok deungan gobnyan nibak ujong aneuek lhueng kulam di bagian atueh, di teupat ureueng peuet binatu meukeureuja. tapeugah laju ubak raja bahwa gobnyan haroh siab siaga dan sabe dalam teunang. gobnyan bek teumakot atawa bingong. keuhai beungeh raja pekah dan raja rezin deungan tantra gobnyan ureueng-ureueng siria hana leubeh meubahya nibak dua boh puntong tungo apui nyang meusasab. siria ka jimeukumplot deungan israel dan raja jih nyan. awaknyan jikeuneuk jak prang yehuda dan jipeutakot-takot peunduduek disinan mangat jidong ubak gobnyan, laju geuangkat aneuek agam tabel jeuet keuraja. teuma ulon, tuhan, nyang peugah bahwa hainyan hana teuma teujadi, sabab siria nyan hana leubeh teuga nibak damsyik ma banda jih, dan damsyik hana leubeh teuga nibak raja rezin. seudangkan dalam watee nam ploh limong thon, israel teuma beukah meukeupeng sampoe hana ek meuteun sibagoe bansa. israel hana leubeh teuga nibak samaria, ma banda jih, dan samaria hana leubeh teuga nibak raja pekah. meunye gata hana bit-bit peucaya ubak ulon, pasti gata hana hase tameuteun." tuhan geupeusampoe lom peusan nyang laen ubak ahas: "lakee kheueh mangat tuhan allah gata geubri saboh tanda keu gata, aleh nibak donya ureueng mate nyang na di miyueb atawa nibak langet nyang na di atueh." ahas geujaweueb, "ulon hana kutem lon lakee tanda. ulon hana kutem lon ujo tuhan." laju geupeugah le nabi yesaya, "meunye meunan, deungoe kheueh nyoe hai keuturonan nabi raja daud! peu kheueh hana seb ta ujo saba manusia, sampoe gata ta ujo saba po teu allah ulon nyan? jinoenyoe, tuhan keudroe teuma geubri tanda keu gata: sidroe aneuek dara nyang mume teuma jipeulahe sidroe aneuek agam nyang geuboh nan immanuel. bak watee gobnyan ka seb rayeuk ka hase geucok keuputusan keudroe, nanggroe nyan teuma makmu. sabab sigihlom saat nyan sampoe, bandua boh nanggroe nyang geumat peurintah le raja-raja nyang gata takot nyan teuma jitinggai dan soh. tuhan teuma geupeuteuka raja asyur, laju gata dan bandum keuluwarga gata meunan cit deungan rakyat gata teuma geuras uroe-uroe nyang peunoh deungan susah leubeh dahsyat deungan peue nyang ka ltheueh gata rasa phon yoh beukah keurajeuen israel dan yehuda. bak masanyan tuhan geutawok ureueng meuse dan ureueng asyur, laju bandua boh bansa nyan teuka lagee lalat dan uno nyang meukeureumon nibak leumbah-leumbah nyang lhok dan luengkiek-luengkiek batee kareueng. awaknyan teuma jitob banmandum tamah meuduro dan tieb-tieb teupat nyang meunaleueng. tuhan geusiwa raja asyur keu geupeubuet atueh israel lagee tukang mupo nyang jimupo habeh banmandum naleueng dan bulee nyang na nibak badan. bak masa nyan, meunye na sidroe ureueng jipeulara saboh leumo muda dan dua boh kameng mantong, ie mom nyang jipeuhase le beulatang peulara nyan leubeh nibak seb keu ureueng-ureueng nyang na mantong teusisa di nanggroe nyan. keubit, awaknyan teuma jijieb ie susu dan madu. bak watee nyan, lampoh-lampoh anggo nyang maseng-maseng teupula siribee bak anggo dan nyang meuyuem siribee peng pirak,

jitimoh le tamah meuduro. ureueng nyang jak keunan haroh jiba busur dan panah, sabab bansaboh nanggroe nyan ka peunoh deungon tamah meuduro. dan daerah gunong-gunong nyang kanyoe jiseuha dan jipula seunaman, nyan pi ka peunoh deungon tamah meuduro, sampoe soe mantong hana jijeuet jak u gunong nyan. tanoh nyan teuma meuguna teupat jimeurot leumo dan bubiri." tuhan meufeureuman ubak ulon, "tacok kheueh laju saboh batee tuleh nyang raya, tuleh laju deungon huruf-huruf nyang jeulaih: 'meureupah nyang tangkaih, peurampokan nyang bagaih'. tawok kheueh sibagoe saksi dua droe nyang jeuet teupeucaya, awaknyan na kheueh teungku imeum uria dan zakharia, aneuek yeberekhya." na padub watee oh ltheueh nyan peurumoh lon mume. bak watee aneuek kamoe lahe, tuhan geupeugah ubak ulon, "taboh laju nan aneuek nyan, 'peureupah nyang tangkaih, peurampokan nyang bagaih'. sabab, sigohlom aneuek nyan seb rayeuk keu jipeugah 'bapak' dan 'ma', banmandum keukayaan damsyik dan banmandum barang reupasan samaria teuma ji angkat ubak raja asyur." tuhan meufeureuman lom ubak ulon, kheun gobnyan, "bansa nyoe jitulak ie nyang lintong nibak aneuk krueng syiloah, dan galak deungon raja rezin dan raja pekah. sabab nyan ulon, tuhan, teuma lon peuteuka raja asyur dan banmandum tantra gobnyan keu jijak prang yehuda. awaknyan teuma maju lagee krueng efrat nyang meuluab-luab dan habeh jipeubanjie banmandum tabeng-tabeng jih nyan. awaknyan jilanda yehuda lagee ie raya nyang ngob trok et takue dan jipeungob peue-peue nyang na." po teu allah na meusajan ngon geutanyoe! sayeub gobnyan nyang meureutang geupeupayong nanggroe geutanyoe. meuhimpon kheueh deungon yo, hai banmandum bansa! deungoe kheueh hai ujung-ujung bumoe! meusiab-siab kheueh mangat tajak muprang, teuma deungon ate nyang yo! nyoe, meusiab-siab kheueh, teuma deungon rasa nyang yo! peugot kheueh reuncana, teuma banmandum hana meuhase. cok kheueh keuputosan, teuma hana meuguna, sabab po teu allah na meusajan deungon kamoe. ulon geukuasa le tuhan dan geubri peuingat mangat bek ulon seutot jalan nyang jilalu le bansa nyan. kheun gobnyan, "bek neu anggab kumplotan peue nyang ji anggab le awaknyan kumplotan, dan bek teumakot ubak hai-hai nyang teuma jitakat le awaknyan. ingat kheueh bahwa ulon tuhan nyang mahakuasa na kheueh suci. teuma keu ulon kheueh nyang haroh gata takot. le sabab ulon nyoe keubit that suci, ulon jeuet keu batee nyang meugantoh nibak rakyat yehuda dan israel, dan nyang jeuet keupeurangkab peunduduek yerusalem. jai lumpah na ureueng nyang reubah meugantoh dan teukeunong luka. awaknyan meusireuk u dalam peurangkab." gata nyoe, murit-murit ulon haroh teukeubah dan tapeulara peusan-peusan nyang ka geubri le po teu allah ubak ulon. tuhan ka geusom droe nibak keuturonan nabi yakub, umat gobnyan, teuma ulon peucaya dan meuharab ubak gobnyan. nyoe kheueh ulon dan aneuek-aneuek nyang geubri le tuhan ubak ulon. tuhan nyang mahakuasa nyang mat peurintah di buket sion, geu

kirem kamoe jeuet keutanda keu umat israel. teuma ureueng-ureueng laen geuyue lakee nibak gata peutunyok keu tabih nyang meusah-sah ngon babah jih nyang meumet-met. ureueng-ureueng nyan teuma jipeugah, "bukan kheueh geutanyoe patot talakee peutunyok ubak areuwah-areuwah deumi keupeuntangan ureueng udeb?" jaweub kheueh lagee nyoe, "deungoe kheueh ajaran tuhan! ureueng nyang hana meututoe deungon ajaran nyan, nibak ureueng nyan hana teukeubah harapan." ureueng-ureueng nyang malang dan deuk teuma meuwot-wot di nanggroe nyan. sabab jih nyan deuk, awaknyan beungeh-beungeh sampoe jiseurapa raja dan po teu allah droe jih. ho mantong awaknyan jipandang, u ateuhe, atawa u miyueb, awaknyan hana leumah sapeue keucuali keuseusakan dan seupot buta dan keusuraman nyang luwa biasa. awaknyan teuma jiboih ubak teupat seupot nyan. teuma kon siumu masa nanggroe gata jirasa keuseusakan. daerah nyang jirasa le sukee-sukee zebulon dan naftali ka ltheueh geuanggab miyueb le tuhan. teuma keu masa nyang teuma ukeue, gobnyan geubri horeumat nibak banmandum wilayah phon di laot teungoh u timu trok u meurandeh krueng yordan, dan trok u galilea nyang jiduek le ureueng aseng. bansa nyang udeb lam seupot jikaloh cahya nyang trang. nyang tinggal lam bubayang mate jipeupungeh le cahya trang. tuhan, neujok keu awaknyan sukacita nyang rayeuk, droeneueh peujeuet awaknyan jikem ngon seumurak nyang meuhubo. awaknyan galak that ate sabab droeneueh jroh, lagee ureueng nyang meusukaria watee jipeusapat hase panen, atawa jibagi-bagi hase teucue. droeneueh ka tacok beuban jih nyang geuhon dan kayee geunulam bak baho gobnyan. droeneueh ka neupeutaloe bansa nyang jieuhet nyan nyang tindeeh umat droeneueh. saban lagee jamen nyang kalheueh watee droeneueh peutaloe tantra midian. sipatu tantra nyang su jih grab grub dan bajee jih nyang meulabo ngon darah, teuma habeh jipajoh le apui. sidroe aneuek ka lahe keugeutanyoe; keugeutanyoe ka geujok sidroe aneuek agam. gobnyan teuma jeuet keupeumimpin geutanyoe. gobnyan teuboh nan: "peunaseuhat bijaksana", "allah peukasa", "bapak keukai", "raja dame". gobnyan geumat peurintah sibagoe raja keuturonan nabi daud, keurajeuen gobnyan rayeuk lumpah na. nanggroe gobnyan sabe dame sejahteura; peumeurintah gobnyan dasai jih nibak hukom dan keuadalan jinoe sampoe siumu masa. tuhan nyang mahakuasa pasti geulaksana. tuhan ka geupeurhot hukuman ateuhe israel. banmandum bansa israel dan peunduduek samaria teuma jiteupeue bahwa tuhan kheueh nyang peubut banmandum nyan. jinoenyoe awaknyan sombong dan manyang ate. kheun awaknyan, "geudong-geudong nyang teupeuget nibak batee bata ka reuloh, teuma kamoe keuneuk peuget geudong-geudong baro nyang teupeuget nibak batee. bak-bak ara ka teukoih, teuma kamoe gantoe ngon kayee ceumara libanon nyang paleng get." tuhan ka geupeugrak musoh awaknyan keu jilawan awaknyan. bansa siria siblaih u timu dan bansa filistin di barat jireubot israel. teuma tuhan mantong beungeh dan teutab geuhukom. bansa israel gohlom

cit meunyeusai bahpih ka geuhukom le tuhan nyang mahakuasa; awaknyan gohlom cit meutobat ubak gobnyan. le sababnyan lam siuroe mantong tuhan geuhukom bubena peumimpin israel dan rakyat jih. gobnyan geukoih dan geuboih ulee ngon ikue jih. ulee jih na kheueh ureueng patot-patot dan ureueng nyang teuhoreumat, ikue jih na kheueh nabi-nabi nyang geupeurunoe gob deungon ajaran nyang sisat. bubena peumimpin rakyat nyan ka jipeusisat dan jipeucawoe rakyat. bansa nyan ka murtad dan beujat that dan mandum tutoe haba awaknyan jeuhet. le sababnyan lamkawan peumuda hana nyang geutuwoe le tuhan. gobnyan hana geugaseh keu inong balee dan yatem ngon meuntui. teuma tuhan mantong beungeh dan teutab geuhukom. jeuhet bansa nyan tutong lagee apui dan jihangoh bubena tamah nyang meuduro. hu jih lagee gle uteun nyang tutong nyang meuhub-hub dan meukeubok asab. tuhan nyang mahakuasa beungeh that-that, dan hukoman gobnyan lagee apui nyang hu meuhab-hab dan bana nyan na kheueh kayee jih nyang geutot sampoe habeh. hana meusidroe pih nyang jigaseh syedara jih. bansaboh nanggroen nyan manusia krot ie muka dan jipajoh peue-peue mantong nyang jeuet jipajoh, teuma teutab hana meurasa troe. dan jipajoh rakan-rakan jih keudroe! ureueng manasye dan ureueng efraim saleng jimuprang, dan laju meusajan-sajan jilawan yehuda. teuma tuhan mantong beungeh dan teutab geuhukom. ceulaka kheueh gata nyang tapeuet hukum-hukum nyang hana ade keu tatindeeh bansa ulon. deungon cara nyang lagee nyan gata ka tateun ureueng gasien mangat meuteume hak dan keuadalan, dan tareupah milek inong balee dan aneuek yatem ngon meuntui. peue nyang gata peubuet bak uroe po teu allah geuhukom gata? peue daya gata bak uroe gobnyan geupeuteuka beuncana nibak nanggroen nyang jioh? bak soe gata talakee tulong? dipat gata som keukayaan gata nyan? naseb gata teuma jipoh mate lam prang atawa ji ireng sibagoen tawanan. teuma tuhan mantong beungeh dan teutab geuhukom. tuhan meufeureuman, "ceulaka kheueh asyur! asyur ulon peuguna sibagoen peunyunuet dan puntong kayee sibagoen alat ngon poh keu ureueng-ureueng nyang keunong nibak beungeh lon. ulon kirem asyur keujiseurang bansa ulon nyang murtad dan nyang jipeujeuet ulon nyoe beungeh. ulon kukirem asyur keujijak reubot dan jiceumeucue dan jigilo-gilo bansa ulon lagee abee di atueh jalan." teuma raja asyur ka na reuncana geuh keudroe. gobnyan ka teukat keuneuk geupeuguna cara kreueh dan teupeubinasa bansa nyang le. jih nyan jipeusombong droe, sira jipeugah lagee nyoe, "pang-pang ulon banmandum raja-raja! ulon reupah banda-banda kalno dan karkemis, hamat dan arpad. meunan cit ulon reupah banda-banda samaria dan damsyik. ulon peutaloe banmandum banda-banda nyang jiseumah beurala nyang leubeh meukuasa nibak nyang na di yerasalem dan samaria. samaria dan bubena beurala nyang na disinan ka ulon peubinasa. nyang saban lagee nyan ulon peubuet di yerasalem deungon banmandum beurala nyang jiseumah disinan." teuma tuhan meufeureuman, "meunyo nyang keuneuk ulon peubuet di buket

sion dan di yerasalem nyan ka seuleusoe, ulon hukom raja asyur sabab keusombongan dan keu angkuhan jih nyan." raja leupah haba, jipeugah lagee nyoe, "banmandum nyan ulon peubuet deungon kuasa lon keudroe. ulon bijaksana dan carong. ulon sampoh bataih-bataih lamkawan bansa-bansa, dan ulon reupah peuseudiaan awaknyan. lagee banteng ulon bloh-bloh ngon lon gilo-gilo ureueng-ureueng nyang mat peurintah. bansa-bansa nyang na di atueh donya lagee uempueng cicem; deungon mudah hareuta awaknyan ulon cok, lagee ureueng jikuet boh cicem nyang tinggai didalam uempueng. hana sayeub nyang meukeupak-keupak, hana nyang peuhah babah jih atawa meucieb-cieb." teuma tuhan meufeureuman, "peu kheueh jeuet kapak jipeubangga droe keu ureueng nyang peuguna nyan? peu kheueh gogajo leubeh peunteng nibak ureueng nyang peuguna atra nyan? bukan kayee puntong nyang beut ureueng, teuma ureueng kheueh nyang beut puntong kayee." sabab ureueng asyur ka jipeusombong droe, tuhan nyang mahakuasa teuma geupeuteuka bala peunyaket keu geuhukom peuwira-peuwira nyang gagah-gagah. awaknyan keunong deumam nyang lumpah seu-uem lagee apui nyang tutong hana jipioh-pioh. po teu allah nyang mahasuci, cahya israel, jeuet lagee apui hu nyang lam siuroe habeh teutot peue-peue nyang na, meunan cit seumak-seumak meuduro. gle ijo nyang raya dan ladang-ladang nyang subo di nanggroen asyur teupeubinasa bube nyang na, lagee ureueng saket nyang meurana sampoe mate. bak-bak kayee tinggai bacut teuk, le sababnyan di aneuek miet pih ka hase ji itong bak kayee nyang tinggai nyan. watee jih teuma trok bansa israel hana le jigantung naseb droe ubak bansa peungusa nyang rak jipeubinasa awaknyan, teuma ubak tuhan, allah kudu israel. nyang mantong na tinggai cit bacut sagai nibak bansa israel nyan teuma jimeutobat ubak allah nyang peukasa. bahpi ureueng israel jinoenyoe sadub le jih deungon ano di bineh pasi, teuma napadub droe mantong nyang na jigisa. hukoman tuhan ka to that-that, dan meumang pantaiah dan ade bansa nyan teupeubinasa. nyoe, bansaboh nanggroen teuma geupeuhanco le tuhan nyang mahakuasa; nyan kheueh keuputusan tuhan, nyang hana jeuet teu ubah le. tuhan nyang mahakuasa meufeureuman ubak umat gobnyan di sion, "bek teumakot ubak ureueng asyur, bahpi awaknyan jitindeeh dan ji eulanya gata lagee nyang jipeubuet le ureueng meuse yoh masa ilee. lam watee nyang paneuk keuhai beungeh ulon ubak gata teupioh, laju awaknyan ulon peubinasa. ulon tuhan nyang mahakuasa, lon seunuet awaknyan deungon peunyunuet, lagee lon seunuet ureueng midian di gunung batee oreb. asyur lon hukom, saban lagee ulon hukom meuse. bak watee nyan ulon kupeubeubaih gata nibak jitindeeh le ureueng asyur, dan awaknyan hana meukuasa atueh gata." sipa-i asyur ka jireubot banda ayat. awaknyan ka jiliwati migran! peubeukalan awaknyan jitinggai di mikmas! awaknyan ka leupah jijeumeurang dan jimeudom di geba! peunduduek banda rama yo that-that, dan peunduduek gibe, banda raja saul, ka jipeuplueng droe. meudumpek kheueh, hai

peunduduek galim! deungoe kheueh peunduduek laisya! jaweub kheueh, peunduduek anatot! peunduduek madmena dan gebim habeh jiplueng jijak meungungsi. uroenyoe musoh na di banda nob, dan disinan awaknyan jireugam boh sininju u arah buket sion, u banda yerusalem. tuhan yang mahakuasa geupeuhanco awaknyan lagee cabeueng kayee nyang teukoh nibak bakjih. nyang paleng meugah dan nyang paleng manyang lamkawan nyan geukoh dan teupeureubah. tuhan geupeureubah awaknyan lagee bak kayee di teungoh gle nyang teuteubang deungon pato. bahpi awaknyan teuga lagee bak kayee nyang paleng hebat di libanon, awaknyan reubah cit sapan sapa! keuturonan raja nabi daud lagee bak kayee nyang ka teu teubang. teuma siladam nibak utom jih jitimoh tarok nyang baro, meunan cit teuma deungon keuturonan nabi daud teuka sidroe raja. kuasa tuhan geubimbeng gobnyan, geupeujeuet gobnyan meubudho dan bijaksana, aref bak geucok keuputosan dan geulaksana; geuteupeue ubak keuheundak po teu allah dan taqwa ubak gobnyan. keusakaan gobnyan na kheueh taat ubak tuhan. gobnyan hana geupeusidang gob lagee teungieng sikeujab atawa dasai nibak nariet gob peusampoe. ureueng gasien geupeuhakem deungon aje, ureueng nyang hana meudaya geubila deungon juoe; ureueng meusalah geuhukom meunurot peurintah gobnyan, ureueng jeuhet geusampoh habeh. gobnyan meutindak deungon aje dan seutia nibak peue mantong. srigala teuma tinggai meusajan deungon bubiri, rimueng tutul jieuh meusajan bak bineh kameng. aneuek leumo jimeurot naleueng meusajan deungon aneuek singa, dan aneuek miet nyang jeuet keu tukang rabe awaknyan. leumo jimeurot naleueng deungon cagee, aneuek-aneuek jih bandua jieuh meusapat meusaho teuma. singa jimakheun jimpueung saban lagee leumo. bahkan sidroe aneuek manyak hana teuma jikab meunoyoe jimeuen to bak bineh uleue meubisa. di sion, buket suci po teu allah, hana nyang jeuhet atawa nyang peurusak. nanggroee peunoh deungon ileume peungetahuan keuhai po teu allah, lagee ie nyang peunoh bansaboh laot. watee jih trok sidroe raja nibak keuturonan nabi daud jeuet keupusat peuratan bansa-bansa. awaknyan teuka ubak gobnyan, dan teumpat tinggai gobnyan jipuju-puju. bak uroe nyan tuhan sigoeteuk geupeuguna kuasa gobnyan dan geupuwoe lom umat nyang na mantong teusisa di asyur dan nanggroee meuse, di nanggroee-nanggroee patros, sudan dan elam, di babel, hamat dan pulo-pulo nyang jioh. tuhan geupeuek saboh bupanji keu bansa-bansa. nyan kheueh tanda jih gobnyan geupeusapat bansa israel dan yehuda nyang meutabu bansaboh peunjuru bumoe dan geuba awaknyan puwoe lom teuma. keurajeuen israel hana le picek ate keu yehuda, dan yehuda hana teuma jimeumusoh deungon israel. awaknyan meusajan-sajan teuma jijak seurang ureueng filistin di barat dan geureupah banmandum bansa-bansa di timu. awaknyan teuma jipeutaklok bansa edom dan moab, dan bansa amon teuma tundok ubak awaknyan. tuhan teuma geupeutho lhok suiez. gobnyan geupeuteuka angen su-uum sampoe krueng eftrat jeuet keu tujuh boh bak ie nyang deue, dan

soe mantong ureueng hase jijeumeurang deungon seulob bak gaki. keu umat nyang na mantong tinggai teusisa teuma na rot ueh raya keurot teubiet nibak asyur, lagee yoh masa israel jiteubiet lam nanggroee meuse. teuma teuka saat jih gata meuca-e: "tuhan, ulon meusyuko ubak droeneueh, kareuna droeneueh neuhibur ulon. yoh masa ilee droeneueh neubengeh keu ulon, teuma jinoo ka reuda beungeh droeneueh. keubit, po teu allah nyan geupeuseulamat ulon, ulon peucaya ubak gobnyan. ulon hana teumakot, sabab gobnyan nyang peuteuga ulon. nyang peuseulamat ulon na kheueh po teu allah, keu gobnyan ulon meuca-e. lagee ie leupie nyang teupeugeumbira ureueng nyang teungoh glah, meunan kheueh gata meusuka ria, sabab geupeuseulamat le po teu allah." teuma teuka watee jih gata tapeugah, "meusyuko kheueh ubak tuhan, dan seumah kheueh gobnyan. neubritee kheueh keu bansa-bansa keuangonan dan peue mantong buet geuhnyan. meuca-e kheueh keu tuhan, sabab gobnyan nyang ka geupeubuet buet ajaeb nyang lumpah le. bah kheueh bansaboh donya jideungoe keuhai buet gobnyan. meusarak geumbira kheueh hai peunduduek sion, meuca-e kheueh deungon geumbira. allah kudus israel keubit mulia, gobnyan na di teungoh-teungoh gata." nyoe kheueh feureuman allah, nyang geuteurimong le yesaya bin amos keuhai babel: peuek kheueh bupanji prang di ateueh cot buket nyang ueh! tawok kheueh ubak mandum tantra, dan apit laju jaroo gata u ateueh mangat awaknyan jiseureubu pintoe-pintoe geureubang nyang angkuh nyan. tuhan ka geutawok bubena peujuang nyang gepupileh. awaknyan peukasa, peucaya droe dan jeuet teupeubangga. tuhan geubtri tugaih ubak awaknyan keu geuhukom ureueng nyang keunong nibak beungeh gobnyan. deungoe kheueh su nyang rioh ngon karu nibak gunung-gunong, lagee su ureueng meugumpoi nyang rame that. deungoe kheueh karu keurajeuen-keurajeuen dan bansa-bansa nyang teungoh meugumpoi. tuhan nyang mahakuasa geujak peureksa pasokan prang. awaknyan teuka nibak nanggroee-nanggroee jioh nibak ujung u ujung bumoe. lam beungeh geuhnyan tuhan geungui awaknyan keu jipeubina bansiluroh bumoe. meuba-e kheueh, sabab uroe tuhan ka to lumpah na, nyan kheueh uroe keubinaan nyang geupeuteuka le tuhan nyang mahakuasa. tieb-tieb ureueng meurasa lapee jaroo dan gadoh keubeuranian jih. awaknyan banmandum jiteuka le rasa teumakot nyang hebat, dan meuleungiek sabab rasa sakot lagee ureueng inong teungoh toh aneuek. awaknyan saleng meumandang sabe keudroe-droe deungon rasa teumakot, ruman awaknyan mirah sabab malee. uroe tuhan teuma teuka, dan nibak uroe nyan tuhan geupeupueh rasa beungeh gobnyan dan meureuka gobnyan nyang cukob hebat. bumoe jeuet keu padang nyang ueh, dan tieb-tieb ureueng meudesya binasa. tieb-tieb bintang dan gugusan bintang teuma jipioh meucahya; mata uroe seupot watee jiteubiet, dan buleuen hana meucahya le. tuhan meufeureuman, "ulon kuhukom donya sabab keujeuhetan jih nyan, dan ureueng-ureueng jeuhet sabab desya-desya jihnyan. tieb-tieb ureueng sombong lon peuhina,

ureueng angkoh dan keujam lon hukom. ureueng nyang geupeuseulamat na bacut that, awaknyan leubeuh jareueng nibak meuh murni. ulon peujeuet langet yo meugam-gam dan bumoe geugok-gok nibak teupat jih watee uroe ulon, tuhan nyang mahakuasa, lon tuncok keubeungeh ulon. ureueng aseng nyang na tinggai di babel meucubre jiplueng u nanggroe jih maseng-maseng. awaknyan lagee rusa plueng nyang jitiyeub le peumburu, atawa lagee kawan bubiri nyang hana ureueng rabe. soe mantong nyang keunong drob teutob sampoe mate. awaknyan teuma jikalon aneuek-aneuek banyak droe jih dan teupeureumok, rumoh-rumoh awaknyan jireupah dan peurumoh-peurumoh awaknyan jipeukosa." tuhan meufeureuman, "ulon teuma lon krah bansa madai keu jijak seurang babel. awaknyan hana hase ji sugok deungon pirak dan meuh. deungon busur dan panah jih awaknyan jipoh mate dumna ureueng-ureueng muda. awaknyan hana jigaseh keu aneuek banyak dan hana jiweueh keu aneuek droe. nibak banmandum keurajeuen nanggroe, babel nyan nyang paleng lagak dan jeuet keubanggaaun peunduedeuk disinan. teuma ulon, tuhan, lon peuhanco atranyan, lagee nyang ka ulon peubuet ateuheh sodom dan gomora. hana meusidroe pih nyang na tinggai disinan. hana ureueng arab peugeumbara nyang jipasang khimah di teupat nyan, dan hana teuma ureueng meurabe nyang jiba kameng ngon bubiri jih mangat jimeurot disinan. teupat nyan jitinggai le beulatng-beulatng kleut. cicem hantu jipeugot uempueng nibak rumoh-rumoh awaknyan, dan cicem unta tinggai disinan. kameng-kameng uteuen teuma jimeulikak-likak di teungoh-teungoh bangunan nyang reuloh. su jimeudroh ase uteuen ngon su srigala meugeunta nibak puri-puri dan meuligoe-meuligoe babel. watee keuhancoran jih karab sampoe dan watee jih hana teutunda le." tuhan teuma geugaseh keu israel umat gobnyan, dan geupileh awaknyan lom jeuet keu milek gobnyan. gobnyan teuma geupeudeuk lom awaknyan di nanggroe-nanggroe droe jih. ureueng aseng teuma teuka laju jijak meugabong deungon awaknyan. jai that bansa jitulong bansa israel mangat jiwoe lom u nanggroe nyang ka geubri le tuhan keu awaknyan, dan disinan teuma bansa-bansa nyan jipeuhamba droe ubak bansa israel. israel teuma jiteuen ureueng-ureueng nyang ka ltheueh jiteuen awaknyan yoh masa ilee dan jipeurintah ateuheh ureueng-ureueng nyang ka ltheueh jipeurintah geuh nyan. tuhan teuma geupeubeubaih bansa israel nibak saket dan deurit, dan nibak buet nyang brat nyang jipaksa ateuheh awaknyan. meunyoe tuhan geupeubuet nyang lagee nyan, awaknyan jipeuhina raja babel lagee nyoe, "raja nyang keujam ka rhot! jih nyan hana hase le jiteugom gob. tuhan ka geupeu habeh masa peumeurintahan raja-raja nyang jeuet nyang deungon beungeh jiteugom bansa-bansa dan hana putoh-putoh ji ielanya awaknyan. akhe jih bansaboh donya aman dan teuntram, dan tieb-tieb ureueng geumeuca-e geumbira. bak aron dan bak ceumara libanon meugeumbira sabab raja nyang keujam nyan rhot, dan oh ka ltheueh jihnyan jijak, hana le nyang yue teubang awaknyan! donya ureueng mate

meuron-ron jijak sambot raja babel nyan. dan jaga ktheueh areuwah-areuwah ureueng nyang yoh watee ilee jimat kuasa di ateuheh bumoe, dan areuwah bubena raja geubeudoh nibak takhta awaknyan. awaknyan banmandum jimeuhoi ubak ureueng nyan, 'hei! jinoenyoe gata ka lagee kamoe, leumoh dan hana meudaya! yoh masa ilee gata jihoreumat lagee musik keucapi, teuma jinoenyoe ka na di teupat seungue lam donya ureueng mate. ulat-ulat jeuet keu peuratah gata dan glang-glang jeuet keu seulimbog gata.' hei raja babel, yoh masa ilee gata bintang beungoh nyang ceumeurlang, teuma jinoenyoe ka rhot nibak langet! yoh masa ilee gata peutaloe bubena bansa, teuma bak saat nyoe ka geurhom lam tanoh. gata tapeusak droe ta-ek u langet dan takeubah takhta gata di ateuheh bintang nyang paleng manyang! gata pike gata hase taduek sibagoe raja di ateuheh gunung siblahi utara, di teupat dewa-dewa meusapat. gata tapeugah, bahwa gata ta-ek ateuheh nyang paleng manyang di dalam awan dan jeuet lagee nyang mahamanyang. padahai gata taseumpom u dalam nyang paleng lhok nibak donya ureueng mate. awaknyan na disinan teuma jingiang dan jipandang gata. awaknyan jitanyong, 'peue beutoi nyoe ureueng jih nyang peuyok-yok bumoe dan jipeuyo mandum keurajeuen? peu ktheueh jihnyan nyang peuhanco bubena banda-banda dan nyang ubah donya jeuet keu padang pasi? gobnyan nyoe ktheueh nyang hantom jipeuleuh tawanan atawa jipeubiyeu awaknyan jiwoe?' banmandum beukaih raja-raja jitanom lam jrat deungon seumarak di teupat makam jihnyan maseng-maseng, teuma gata hana meukubu; manyet gata geutieuk lagee tarok nyang jitulak, jiseubee deungon manyet-manyet pejuang nyang mate di mideuen prang, dan jigeulawa meusahoe ngon awaknyan u dalam guha batee, lagee bangke nyang teugilo-gilo. gata ka tapeubinasa nanggroe gata dan tapoh mate bansa gata keudroe. le sababnyan gata hana teukubu lagee raja-raja nyang laen. hana meusidroe pih lam keuluwarga gata nyang hase jipeuseulamat. poh mupoh mate sagra jipeuphon! aneuek-aneuek agam gata teuma mate sabab desya indatu awaknyan. hana meusidroe pih lamkawan awaknyan jimat peurintah di ateuheh bumoe atawa jipeugot banda-banda." tuhan nyang mahakuasa meufeureuman, "ulon teuma lon seurang babel dan lon peuhanco banmandum. hana meusidroe pih nyang lon peuseulamat, bahkan aneuek-aneuek banyak pih hana lon peu udeb. ulon, tuhan, ka lon peugah haba. babel ulon peujeuet keu paya uyok teupat tinggai meubagoe cicem hantu. babel ulon sampoh sampoe gleh. ulon, tuhan nyang mahakuasa, ka lon peugah haba." tuhan nyang mahakuasa meuseupah: "nyang ka ulon reuncana nyan pasti teulaksana. ureueng asyur di israel nanggroe ulon, teuma ulon peubinasa, dan nyang na nibak gunung-gunong lon teuma lon gilo-gilo. ulon peubeubaih bansa ulon nibak jitindee dan beuban nyang jipaksa ateuheh awaknyan le ureueng asyur. nyoe ktheueh reuncana ulon keu donya; jaroe ulon meureuntang keu lon hukom bansa-bansa." tuhan nyang mahakuasa ka geupeupoth mangat jipeubuet lagee nyan. gobnyan geureuntang jaroe

geuh keu geuhukom, dan hana meusidroe pih hana
nyang hase jipeuteun gobnyan. nyoe kheueh peusan
nyang geu-umum nibak thon raja ahas meuninggai
donya. hei bansa filistin, kayee puntong nyang
teupeuguna keu teuseukok gata ka patah. teuma
bek kheueh gata geumbira, sabab meunyoee saboh
uleue nyang mate, uleue nyang leubeh jeuet lom
teuka keugeunantoe, dan boh uleue watee ceh lahe
aneuek naga meusayeub. gata keunong musem deuk
nyang parah that, dan banmandum ureueng nyang
mantong tinggai geupoh mate. dan teuma, ureueng
nyang paleng gasien lamkawan umat tuhan me-
teume peunajoh, dan ureueng-ureueng nyang hana
meudaya udeb deungon aman seuntosa. meuba-e
kheueh, dan meudumpek kheueh talakee tulong, hai
banda-banda filistin! bah kheueh gata banmandum
yo sabab teumakot! awan abee meukeubok di utara
sibagoe dalam musoh teuma teuka; hana nyang
gasuen lamkawan awaknyan. peue jaweueb jih
nyang tanyoe peusampoe ubak utosan-utosan nyang
teuka nibak bansa filistin? geutanyoe teuma ta
peugah ubak awaknyan bahwa tuhan ka geupeudong
sion, dan amat gobnyan nyang meudeurita teuma
meuteume peulindongan disinan. nyoe kheueh
peusan tuhan keuhai moab. banda ar dan kir geu-
peuhanco dalam watee salamlam, dan nanggroee moab
jeuet keu langang. peunduduek dibon jiteugoh
gunong jijakmo di teupat seumeumah dewa-dewa.
peunduduek moab deungon rasa seudeh geupeuba-e
banda nebo dan medeba. awaknyan jicuko ok dan
janggut sibagoe tanda meuduka. ureueng-ureueng
nibak jalan jingui ija krong tanda meukabong;
ureueng meuba-e ngon jimo di tanoh lapang dan di
ateuh bubong rumah. ureueng hesybon dan eleale
jimo meu ong-ong, dan su awaknyan teudeungoe
sampoie u yahas. dan bubena sipa-i yo meugam-gam;
awaknyan ka gadoh ceubeueh. ulon sayang that
keu moab! peunduduek disinan jimeungungsi
u banda zoar dan u eglat-selisia. na nyang teungoh
jalan u luhit sira jimo; na nyang plueng u horanaim
sira jikliek-kliek sabab kakeunong bala. ie krueng
nimrim dan naleung nyang timoh bak bineh
nyan ka tho kregng, hana le sinaman timoh nyang
ijo. ureueng-ureueng jijeumeurang aneuk krueng
haarabim dan jiuseuha jipeuseulamat peue mantong
hareuta beunda jih nyang na. dipat mantong nibak
bataih moab teudeungoe su ureueng kliek ngon
teumawok. moba-e nyan teudeungoe di eglaim
dan beer-elim. di dibon ie krueng ka jeuet keu-
mirah sabab meulawok deungon darah. dan po
teu allah teuma geupeuteuka lom hai-hai nyang
leubeh dahsyat ateuh ureueng-ureueng nyang na
disinan. algojo tukang koh takue nyang jikirem
teuma jipoh mate banmandum ureueng moab nyang
mantong udeb. di banda sela di padang pasi, bansa
moab jikirem aneuek bubiri sibagoe hadiah keu
peunguasa di yerusalem. ureueng-ureueng moab
jipreh bakhineh krueng arnon sira jijak-jak hana
meuteuntee sabab bingong lagee cicem-cicem nyang
teu paroh lam uempueng. awaknyan jipeugah
ubak bansa yehuda, "tapeugah kheueh laju peue
nyang haroh kamoe peubuet. tapeujeuet kheueh
keu kamoe teupat meuceu nyang teudoh watee

teuka mata uroe nibak uroe kha, dan bah kheueh
kamoe tinggai dimiyueb naungan gata. kamoe
nyoe peungungsi; tasom kheueh kamoe dan bek
kheueh neukhianat kamoe. idhin kheueh keukamoe
mangat kamoe meunumpang di nanggroee gata.
neulindong kheueh kamoe ateuh ureueng-ureueng
nyang keuneuk peubinasa kamoe." (peunindasan dan
peumbinasaan teuma na akhe, dan ureueng-ureueng
nyang peuhanco dan nyang teugom nanggroee israel
teuma leunyah. oh lheurehnyan sidroe lamkawan
keuturonan nabi daud teuma jeuet keu raja, dan
gobnyan geupeurintah bansa geuh nyan deungon
gaseh dan seutia. gobnyan geupeudong keuadalan
dan bagaii meutindak keu geupeubuet nyang
beutoi.) bansa yehuda jipeugah, "kamoe ka kamoe
deungoe keuhai keusombongan bansa moab. kamoe
meuteupeue bahwa awaknyan angkoh dan cungkak.
haba awaknyan na kheueh haba beurakah nyang
hana meumakna." sabab nyan bah kheueh bansa
moab saleng meuba-e. bah kheueh awaknyan jimo
meunyoee teuingat peunajoh mangat nyang kayem
awaknyan makheun di banda kir-hareset. bah
kheueh awaknyan putoh asa dan apoh apah. ladang-
ladang nyang tho di hesybon dan lampoh-lampoh
anggo sibma ka geupeubinasa, lampoh-lampoh
nyang lazem jih jipeuhase anggo nyang paleng
get keu nyang mat kuasa bansa dan teupeujeuet
awaknyan mabok. yoh ilee lampoh-lampoh anggo
nyan luwah sampoie u banda yaezer; dan u timu
sampoie u padang pasi, dan disiblahi u barat trok
u meurandeh laot mate. jinoenyoe ulon peuba-e
keubak anggo sibma lagee ulon peuba-e yaezer.
ulon peutijoh ie mata keu hesybon dan eleale, sabab
hase bumoe jih ranab jipeuhabe le musoh. hana
meusidroe pih nyang geumbira nibak ladang-ladang
nyang subo nyan. hana nyang meudumpek seumu-
rak atawa nyang meuca-e di lampoh anggo. hana
nyang prah ie anggo keu jipeugot ie anggo. ulon ka
lon peupioh surak geumbira awaknyan. ate ulon
teukliek dan hanco meukeupeng-keupeng watee
ulon ngieng keuadaan moab dan kir-heres. ureueng
moab meususah payah jijak teungoh u ateuh buket
keureubeuen nibak teupat iebadat awaknyan
keuji meudoa, teuma meusapeue hana meuhase.
nyan kheueh peusan yoh masa ilee geubri le tuhan
ubak moab. dan jinoenyoe ulon meufeureuman:
"paih lhee thon teuk, peue mantong keukayaan
nyang jipeubangga le moab teuma leunyah. rakyat
jih nyang le nyan tinggai bacut dan leumoh hana
meudaya." tuhan meufeureuman, "damsyik hana
le lagee banda, teuma na kheueh runga-runga
nyang meutumpok-tumpok. banda-banda di siria
jitinggai keu siumu masa dan jeuet keu teupat
kawan beulatang peulara; hana meusidroe pih nyang
jiteujeuet paroh. israel gadoh teupat meulindong
dan damsyik gadoh keumeurdehkaan jih. ureueng
siria nyang na mantong tinggai sidroe sapat udeb
lam keuhinaan saban that lagee ureueng israel. ulon,
tuhan nyang mahakuasa, ka lon peugah haba." tuhan
meufeureuman lom, "teuma trok watee jih keujayaan
israel habeh, dan keumakmuran jih leunyah. israel
jeuet lagee ladang di refaim nyang ka habeh teupot
boh gandom jih, dan teuma nyang na tinggai cit

bacut. lagee bak zaiton nyang ka habeh teupot boh jih, dan nyang na tinggai napadub boh sagai nibak ujong deuen, meunan cit di israel bacut sagai ureueng nyang na seulamat. ulon, tuhan, allah israel, ka lon peugah haba." nibak uroenyan ureueng rame jiplueng lom jak lakee tulung ubak peuncebta jihnyan, po teu allah kodus israel. awaknyan hana meuharab le ubak hase buet jaroe jih keudroe, na kheueh miseubah-miseubah teupat tot keumeunyan, dan patong-patong dewi asyera. nibak uroenyan, banda-banda israel nyang kong peutahanan jih jeuet keu runga nyang seungue ngon seungab, saban that lagee banda-banda nyang jitinggai le ureueng hewi dan amori bak watee awaknyan jiplueng nibak ureueng israel. israel, gata ka tatuwoe ubak po teu allah nyang peuseulamat dan peulindong gata lagee gunong batee nyang kukoh. seubalek jih, gata ka tapula lampoh-lampoh keu dewa-dewa. teuma bahpi sinaman nyan laju jitimoh tarok dan meubungong bak uroe gata pula nyan, teuma teutab hana meuhase sapeue. nyang na na kheueh keususahan dan rasa saket nyang hana jitem gadoh. bansa-bansa nyang teuga teungoh kiroh; su jih meugrum-grum lagee su umbak ie laot nyang meutaga-tagat. awaknyan maju lagee ie raya nyang tajam that. teuma po teu allah geu ancam awaknyan, laju awaknyan jipeuplueng droe sampoe an jioh. awaknyan geupeucrok lagee sikeum jiyueb le angen di lereng buket, atawa lagee abee jiyueb le angen badee. watee uroe ka meugleb laju teuga ubak awaknyan teumakot nyang paleng hebat, teuma oh karab trok watee beungoh awaknyan ka gadoh. nyan kheueh naseb tieb-tieb ureueng nyang reupah geutanyoe. nibak saboh nanggroe di meurandeh krueng sudan na teudeungoe su sidom mirah nyang me i-e. nibak nanggroe nyan teuka kheueh duta-duta jikak meulayue u dalam krueng nil deungon peuraho-peuraho sikee. hei, utosan-utosan nyang aref, tajak woe kheueh bubagaih u nanggroe gata nyang na bansipanyang krueng-krueng nyan. taba kheueh saboh peusan keu bansa gata nyang teuga ngon peukasa, ureueng-ureueng gata nyang panyang-panyang dan meukulet haloh dan jitakot le gob bansaboh donya. hei, gata banmandum nyang tinggai di ateuh bumoe! ngieng kheueh meunyo bupanji-bupanji ka teupeu-ek di pucak gunong-gunong! deungoe kheueh meunyo beureuguhi ka teupeumeusu! tuhan meufureuman ubak ulon, "di teupat tinggai ulon nyang na di ateuh, ulon kukalon u miyueb deungon teunang dan ceurah, lagee teunang iembon nyang hi lagee malam nyang seu-uem dan musem mupot, dan lagee peungeuh mata uroe oh watee uroe. sigohlom musem kayee jimuboh, watee bungong jih ka luroh dan boh anggo gohlom masak di ateuh bak, sudan jipeuhanco le musoh, mudah jih lagee sakin nyang teureulek ranteng-ranteng ateuh bak anggo. manyet-manyet tantra jih jitinggai mantong disinan dan jeuet keu peunajoh cicem-cicem watee musem khueng, dan beulatang juwah watee musem leupie." teuma trok saat jih bubena peuseumahan teupeusampoe ubak tuhan nyang mahakuasa nibak nanggroe nyan nyang na bansipanyang krueng-krueng ile nyan, nibak bansa jih nyang teuga ngon peukasa, nibak

ureueng-ureueng jihnyan nyang panyang-panyang dan meukulet haloh dan jitakot le gob bansaboh donya. awaknyan teuma teuka u buket sion, ubak teupat tuhan nyang mahakuasa teuseumah. nyoe kheueh peusan keuhai nanggroe meuse. tuhan geujak u meuse deungon keundeuraan awan nyang bagaih. dumna beurala-beurala di nanggroe meuse nyan ka habeh yo dikeue gobnyan dan di ureueng-ureueng meuse pih ka cut ate. tuhan meufureuman, "ulon kupeubeudoh prang syedara di nanggroe meuse: syedara jilawan syedara, teutangga lawan teutangga, banda lawan banda dan keurajeuen lawan keurajeuen. ulon kupeubateue peue mantong nyang jireuncana le meuse dan lon peupatah seumangat awaknyan. awaknyan jilakee tulung ubak beurala-beurala, jilakee naseuhat dan peutunyok ubak tabib-tabib dan ubak roh-roh. nanggroe meuse nyan ulon jok lam jaroe sidroe raja nyang zalem nyang peurintah awaknyan deungon keujam. ulon, tuhan nyang mahakuasa, ka lon peugah haba." ie krueng nil jisurot dan treb bak treb laju tho. lhueng-lhueng meubee khieng watee ie jih seumaken habeh. geulagah dan naleueng jeuet keu layee. banmandum seunaman nyang na di seutot bineh krueng nil teuma jeuet keu tho dan habeh jipeupo le angen. dumna neulayan nyang lazemjih jikeumawe ngon jimeujeue disinan apoh apah sira jimeuratok ngon jimo ba-e sabab kawé dan jeue awaknyan hana meuguna le. bubena ureueng ban teumpeuen putoh asa; awaknyan dan kuli nyang tung upah meuseudeh ate dan patah museumangat. bit-bit bangai that banmandum peumimpén-peumimpén banda zoan! ureueng meuse paleng bijaksana bak jijok naseuhat nyang bangai! jijeuet that le awaknyan jipeugah ubak raja bahwa droe jihnyan keuturonan ureueng-ureueng malem dan keuturonan raja-raja bak jamen purbakala! wahai, raja meuse, dipat kheueh peunaseuhat-peunaseuhat teungku amphon nyang carong-carong nyan? mungken awaknyan jiteupeue peue nyang geureuncana le tuhan nyang mahakuasa keu nanggroe meuse. bubena peumimpén zoan dan memfis na kheueh ureueng-ureueng bangai. awaknyan kon meupimpén, teuma jipeusisat bansa droe jih keudroe. tuhan kheueh nyang peujeuet awaknyan mangat jitembri naseuhat nyang bingong nyan. akibat jih, nanggroe meuse salah hankeunong, dan meuapit-apit lagee ureueng mabok nyang meusireuk dan reubah ateuh muntah droe jih keudroe. di nanggroe meuse hana le ureueng nyang mantong meudaya, bah kheueh nyan nyang mat kuasa meunan cit deungon rakyat biasa, bah kheueh nyan ureueng peunteng meunan cit ureueng awam. teuma teuka watejih bansa meuse nyan lagee ureueng inong nyang gusen dan teumakot. awaknyan yo meugam-gam meunyo jikalon tuhan nyang mahakuasa geureuntak jaroe gobnyan keu geuhukom awaknyan. tanoh yehuda ka jeuet keugeumpa nibak ureueng meuse pada mantong watee awaknyan teupeuingat ubak keuputosan tuhan nyang mahakuasa keuhai awaknyan keudroe. bak watee nyan basa ibrani jipeuguna di limong boh banda di nanggroe meuse. ureueng-ureueng disinan jibeuet sumpah deumi nan tuhan nyang

mahakuasa. saboh lamkawan banda nyan geuboh nan "banda mata uroe". bak watee nyan di pusat nanggroe meuse na saboh miseubah keu tuhan, dan nibak bataih nyan na teuma saboh tameh batee nyang teupeukhusus keu tuhan. miseubah dan tameh nyan na kheueh sibagoe lambang keuhai teuka tuhan nyang mahakuasa di nanggroe meuse. meunyoe bansa nyan jiteugom ngon jitindeeh, dan awaknyan jimeuhoi jilakee tulong ubak tuhan, gobnyan geukirem sidroe-droe ureueng keu teupeuseumat awaknyan. tuhan geupeugah droe ubak bansa meuse, dan awaknyan teuma jituri dan jiseumah gobnyan, sira jiba keureubeuen ngon peuseumahan ubak gobnyan. awaknyan jimeujanji ubak gobnyan deungon meusumpah dan jipeubuet teuma. tuhan geuheuntam bansa meuse, teuma oh lheuehnyan geupeupuleh teuma. awaknyan jiwoe ubak tuhan, dan gobnyan geudeungoe doa awaknyan dan geupeupuleh teuma. bak watee nyan na rot raya bataih nanggroe meuse deungon asyur. peunduduek nibak bandua boh nanggroe nyan jiwoe lom rot ueh nyan dan awaknyan meuebadat meosajan-sajan teuma. bak watee nyan israel saban keududukan jihnyan deungon meuse dan asyur, dan ban lhee boh bansa nyan jeuet keubeureukat keu bansaboh donya. tuhan nyang mahakuasa teuma geubri beureukat keu awaknyan deungon feureuman, "ulon bri beureukat keu gata, hai meuse umat ulon, asyur cebtaan ulon, dan israel umat nyang ulon pileh." atueh peurintah sargon, raja asyur, panglima sipa-i asyur laju jijak prang asdod, saboh banda atra ureueng filistin. lhee thon sigohlom nyan, tuhan geuyue yesaya bin amos geuyue ploih sipatu dan ija krong nyang teungoh jingui. gobnyan geuturot peue nyang teuyue nyan dan gobnyan geujak deungon teulon dan hana sok seulob. watee banda asdod jikeupong, tuhan meufeureuman, "hamba ulon yesaya ka lhee thon teulon dan hana meuseulob. nyoe kheueh tanda peue nyang teujadi deungon nanggroe meuse dan sudan. raja asyur teuma geuteun ureueng-ureueng nyang na nibak bandua boh nanggroe nyan dan awaknyan jigireng deungon teulon. tuha ngon muda, bandum jijak hana meubajee dan lapek gaki deungon punggong awaknyan deuh teulon, sibagoe peuhinaan keu nanggroe meuse. ureueng-ureueng nyang peubangga sudan dan meunan cit jimeubangga deungon meuse ureueng nyan meuteume keucewa dan harapan jih hanco. bak watee nyan, ureueng-ureueng nyang na tinggai di sipanyang pante jipeugah, 'ngieng kheueh peue nyang teungoh teujadi atueh bansa nyang teungoh gata peubangga keu jilindong geutanyoe nibak raja asyur. panena mungken geutanyoe seumat?' "

nyoe kheueh peusan keuhai babel: lagee su angen badee nyang meusie-sie jipupot di padang pasi, meunan kheueh watee teuka beuncana di nanggroe nyang dahsyat. ulon meuteume keumalon keuhai keujadian-keujadian nyang lumpah teumakot; keuhai peukhianatan dan peumbinasaan. maju kheueh, hei sipa-i elam, sureubu kheueh! hei sipa-i madai, keupong kheueh! po teu allah geupeuseulseue bandum peundeuritaan nyang jipeusabab le babel. deungon na keumalon nyan sampoe jeuet ulon bin-

gong ka hana deuh lon meungieng atawa teudeungoe sapeue. ulon teumakot that dan saket lumpah na, lagee sidroe ureueng inong nyang teungoh meulahe aneuek. ate ulon geulisah ngon apoh apah; deungon rasa hayut sampoe ulon yo meugam-gam. malam nyang ulon meucen teuma teuba ubak teumakot. meunan cit ulon kalon khannuri peujame nyang ka jipeusiab; teupat duek keumandum undangan pih ka teukeubah. awaknyan laju jimakheun deungon jijieb ie. hana teusangka-sangka teudeungoe peurintah: "hei bubena peuwira! peusiab laju peurisee gata!" laju tuhan meufeureuman ubak ulon, "tajak peuduek laju sidroe ureueng jaga dan tayue jihnyan meulapor peue nyang ka jikalon. meunyoe jihnyan na jikalon pasokan meuguda teuka meudua-dua, pasokan nyang duek atueh keuleudee dan unta, nyan haroh tangieng beuget-get." oh lheuehnyan ureueng jaga nyan jitawok, "teungku, ulon ka lon meujaga tieb-tieb uroe, uroe ngon malam." kalon, jehpat, nyan kheueh awaknyan! pasokan meuguda nyang teuka meudua-dua. oh lheueh nyan di ureueng jaga nyan laju jipeugah, "babel ka rhot! patong-patong nyang jipuja le awaknyan ka habeh hanco meutabu beba atueh tanoh." bansa ulon israel! gata ka jigilo-gilo dan jibloh-bloh lagee aneuk-aneuk gandom. jinoenyoe ulon peusampoe ubak gata haba jroh nyang ulon deungoe nibak tuhan nyang mahakuasa, allah israel. nyoe kheueh peusan keuhai edom. na ureueng teumawok ubak ulon di edom, "hei, ureueng meujaga, peu kheueh mantong treb malam nyoe? padub jeuem teuk sigohlom beungoh?" jaweub ulon, "beungoh jiteuka, teuma meunan cit deungon malam. meunyoe keuneuk teumanyong, teuka kheueh tatanyong lom." nyoe kheueh peusan keuhai arab: hei, ureueng dedan, kafilah-kafilah gata jipeudong khimah lam tamah meupaya tanoh arab. hei peunduduek tanoh tema, tabri kheueh ie jieb keu ureueng-ureueng nyang graih nyang jijak ubak gata, dan tabri kheueh peunajoh keu ureueng meungungsi. sabab awaknyan ka jipeuplueng droe nibak mata peudeueng nyang ka teusut lam sarong, nibak busur nyang ka teulentur, dan nibak prang nyang teungoh meuhubo. laju tuhan meufeureuman ubak ulon, "paih sithon teuk keujayaan sukee-sukee kedar teuma habeh. ureueng-ureueng kedar nyang mat aneuk panah na kheueh ureueng nyang paleng peukasa. teuma cibacut sagai nibak awaknyan nyang na seumat. ulon, tuhan allah israel ka lon peugah haba." nyoe kheueh peusan keuhai panton keumalon: hei, peunduduek yerusalem, pakon gata banmandum ta-ek u atueh bubong rumoh? hana patot banmandum banda meupesta dan meusurak geumbira. sabab peujuang-peujuang gata nyang mate lam prang nyoe kon mate sabab jimuprang. bandum panglima gata jipeuplueng droe dan jiteun sigohlom awaknyan hase jitimbak aneuk panah. meunan cit bandum ureueng gata nyang beuhe dan tungang meuteume cit jiteun bahpi ka jiplueng jioh. bek tapako keu ulon; bah kheueh ulon nyang peuba-e ureueng-ureueng nibak bansa lon nyang ka mate. bek cuba-cuba tapeuiam ngon tapeumangat ate lon. beutoi, tuhan nyang mahamanyang dan mahakuasa ka geupeuteutab uroe nyoe sibagoe uroe

karu, teukeujot dan huru hara di panton keumalan. binteh-binteh beuton banda ka habeh jipeuhanco. dumper su ureueng lakee tulung meudeungong di ateuh-ateuh buket. ureueng siria jiteuka deungon guda dan geuritan prang, ureueng elam meusinjata busur dan aneuk panah, sedangkan ureueng kir jipeusiab laju peurisee jihnyan. panton-panton nyang gumbo dan subo di yehuda ka peunoh deungon geuritan prang. pasokan meuguda ka siab di pintoe-pintoe geureubang yerusalem. mandum peutahanan yehuda reuloh. bak masanyan, gata tapeureksa alat-lat prang di gudang sinjata. gata le that tateume ngieng reutak-reutak di timbok banda yerusalem nyang peureulee teupeugot. gata tapeureksa mandum rumah-rumah nyang na di yerusalem, tareuloh napadub boh lamkawan nyan dan tacok batee jihnyan keu tapeugot keu binteh-binteh beuton banda. keu gata peusapat ie, gata laju tapeugot kulam lam banda dan tatampong ie nibak kulam awai. teuma gata hana tapeurati po teu allah nyang ka treb that geureuncana banmandum nyan, dan nyang teupeusabab nyan teujadi. bak watee nyan tuhan nyang mahamanyang dan mahakuasa geuyue ubak gata tamo ngon tameuba-e, tacuko ok ateuh ulee dan gata sok ija krong. teuma sikeubit jih, gata meuseunang-seunang dan meupesta. gata neusie leumo dan bubiri, gata makheun uengkot sie dan tajieb ie anggo sira gata tawok, "jak geutanyoe ta makheun dan ta jieb ie, sabab singoh geutanyoe ka mate!" tuhan nyang mahamanyang dan mahakuasa geupeugah droe ubak ulon sira geukheun, "keubit, keujeuhetan awaknyan hana teuma ulon peuamphon sampoe awaknyan mate. ulon, tuhan, ka lon peugah haba." tuhan nyang mahamanyang dan mahakuasa geuyue ubak ulon mangat lon jak meurumpok ngon sebna, nyang jeuet keu ulee rumah tangga meuligo, mangat lon peugah ubak gobnyan peusan tuhan nyoe, "gata pike gatanoyoe soe? peue hak gata sampoe gata jakpheuet keudroe jrat gata di buket batee? awaih, ulon kutiek gata sampoe jioh. gata lon teugom dan lon gulong-gulong laju lon guleng lagee boh ban u nanggro nyang raya. disideh gata mate bak bineh geuritan-geuritan keubanggaan gata. gata ka tapeukuto nan keuluwarga teungku amphon gata. sabab nyan gata lon peucat nibak jabatan gata dan lon peutron pangkat gata nyang manyang. bak watee nyan ulon tawok hamba ulon elyakim bin hilkia. peukayan meupangkat dan talo keuieng gata lon peungui keu gobnyan. peue mantong keukuasaan gata teuma ulon jok ubak gobnyan. gobnyan jeuet keu bapak keu peunduduek yerusalem dan yehuda. gobnyan meukuasa peunoh dimiyueb raja keuturonan nabi daud. gobnyan geumat gunci keurajeuen. meunyoe gobnyan nyang peuhah, hana ureueng nyang hase jitob, dan meunyoe gobnyan nyang tob, hana teuma ureueng nyang hase jipeuhah. gobnyan ulon bri keududuekan nyang kong lagee pasak nyang meukeumat kong that nibak binteh beuton. mandum keuluwarga gobnyan jihoreumat sabab le gobnyan. teuma kawom keurabat dan tanggongan jih nyan jeuet keubeuban bagi gobnyan. syedara jihnyan jipeusadeue droe ubak gobnyan, lagee kanot dan beulangong meugantung-gantung

nibak pasak. meunyoe nyan teujadi, laju pasak nyang teuglong deungon kong that teuma ltheuh dan rhot. dan nyan kheueh keuneulheuh kawom keuluwarga dan mandum ureueng nyang jipeusadeue droe ubak gobnyan. ulon, tuhan, ka lon peugah haba." nyoe kheueh peusan keuhai tirus. hai neulayan-neulayan tarsis nyang harong laot raya, meuba-e kheueh! watee meulayeue woe di siprus, ubak gata teubri tee bahwa banda tirus ka hanco. peulabohan dan rumah-rumah gata ka jeuet keu runga-rungka. aloh alah kheueh, hai peunduduek nyang tinggai di seutot bineh pasi, saudaga-saudaga sidon! sabab lazem jih gata neukirem ureueng u meurandeh laot keu jak bloe peubloe gandom meuse dan keu teujak meukat deungon meubagoe bansa. hei banda sion, keuhoreumat gata ka gadoh! laot raya nyang lhok hana jiaku gata le, jipeugah, "ulon hantom lom lon meue aneuek, hantom lom lon peurayeuk aneuek agam atawa aneuek inong." dan ureueng nanggro meuse pih teukeujot dan geumpa meunyoe jideungoe bahwa tirus ka teupeubinas. moba-e kheueh, dan meungungsi kheueh u tarsis, hai peunduduek bineh pasi! kalon kheueh banda gata tirus nyang ka na phon yoh ilee. nyoe kheueh banda nyang lazem jih meuseunang-seunang? nyoe kheueh banda nyang lazem jih geukirem ureueng u meurandeh laot keujijak meuranto disinan? bukon kheueh saudaga-saudaga jih kawom bansawan nyang paleng jihoreumat di ateuh bumoe? soe nyang cok peunutoh keu teupeurhot tirus, banda nyang paleng meukuasa nyoe? tuhan nyang mahakuasa, gobnyan kheueh nyang cok keuputosan nyan. gobnyan nyang peuputoh mangat geupeuhabeh keusombongan peunduduek geuh ateuh peue mantong hase nyang ka awaknyan teume, dan teupeumiyueb ureueng-ureueng nyang teuhoreumat di ateuh bumoe. tajak meubuet laju u ladang gata, hai peunduduek tarsis, sabab bngkee kapai ka hana le. tuhan ka geuleueng jaroe gobnyan di ateuh laot dan geuguleng bubena keurajeuen nanggro. gobnyan nyang bri peurintah mangat jeuet kuta-kuta funisia teupemuseum banmandum. feureuman tuhan, "hei banda sidon! gata hana meuseunang-seunang le. peunduduek gata teutegon ngon teutindeeh. bahpi awaknyan meungungsi u siprus, awaknyan teutab hana aman." (bukon bansa asyur, na kheueh bansa babel nyang peubiyeu banda tirus jikuasa le beulatang buih. awaknyan kheueh teuma nyang peudong meunara-meunara teukeupong, nyang peureuloh kuta-kuta jih dan jipeujeuet banda nyan meurunga-rungka.) meuba-e kheueh, hai peulaot-peulaot! banda nyang gata peubangga ka habeh hanco. teuma teuka watee jih tirus jipeutuwo nyang treb jih tujoh ploh thon, sadub deungon umu sidroe raja. meunyoe ka liwat watee nyan, tirus teuma jeuet lagee inong jeuhet lagee lam ca-e nyoe: jakkok kheueh keucapi, keuileng kheueh banda, hai inong jeuhet malang nyang teupeutuwo! peutek kheueh keucapi, meuca-e kheueh lom, mangat gata ji ingat lom teuma. oh ka habeh watee nyang tujoh ploh thon nyan, tuhan teuma geupeu ingat ubak tirus dan geupeu mungkin jihnyan jipeubuet buet nyang ka awai ilee. gobnyan meuniaga deungon mandum keurajeuen di ateuh

muka bumoe. laba dan upah nyang jiteurimong hana jikeubah, teuma jipeuseumah ubak tuhan. ureueng-ureueng nyang seumah tuhan jipeuguna peng nyan keu jibloe bahan peunajoh nyang jipeureulee. tuhan geupeubinasa bumoe, sampoe bumoe nyan ka jeuet keu tandus dan seungue. gobnyan geubalek muka bumoe nyan dan peunduduek disinan geupeu crebre. banmandum ureueng teuma jirasa naseb nyang saban: teungku-teungku imeum dan rakyat, namiet nyang teubloe dan amphon-amphon, nyang meubloe dan nyang peubloe, nyang pinjam dan nyang jok pinjam, nyang kaya dan nyang gasien. bumoe teung bayeung dan geupeuhanco. tuhan ka meufeuroman, dan hainyan pasti teujadi. bumoe nyoe jeuet keu to dan layee, bansaboh donya meurana. meunan cit langet dan bumoe pih meurana meusajan teuma. bumoe ka jeuet keu kuto sabab peunduduek disinan ka habeh ji iengkeue ubak mandum peurintah allah, ji ubah peue-peue nyang ka geupeuteutab dan ji iengkeue ubak janji nyang ka geupeuget deungon awaknyan keu siumu masa. sabab nyan kheueh tuhan ka geukotuk bumoe dan geuhukom peunduduek disinan sabab buet jih keudroe. awaknyan geutot sampoe hangoh dan bacut sagai nyang na seulam. bak anggo udeb meurana dan ie anggo payah that meuteume. ureueng nyang yoh masa ilee galak ate bak saat nyoe ka seudeh. su peutek keucapi nyang riang hana teudeungoe le, su peh rapa-i nyang geumbira pih ka hana le. dan su ureueng nyang subra meusukaria nyan pi ka seungab. hana le ureueng jieb anggo sira meuca-e, dan hana le nyang peuturot lazat deungon ie kreueh. bansaboh banda ka karu; mandum pintoe rumah teugunci sabab nyang duek dirumoh nyan teumakot raya. ureueng-ureueng rame ka jimeu kuk-kuk bak rot ueh raya sabab ie anggo ka hana le. hana le keugeumbiraan di nanggroe nyan keu siumu masa. banda ka hanco meukeupeng-keupeng, dan pintoe-pintoe geureubang pih ka teung bayeung hana le meuguna. nyan kheueh nyang teujadi bansaboh bumoe di tieb-tieb wansa. saban haijih lagee musem pot boh kayee, watee boh zaiton teupot sampoe habeh dan boh anggo nyang keu neulheuh teupot di ateuheh bak. ureueng-ureueng nyang seulam meuca-e geumbira. ureueng di barat jipeusampoe keuhai keu agongan tuhan dan ureueng di timu jipujoe gobnyan. peunduduek di bineh pasi jipeu agong tuhan, po teu allah israel. phon ujong bumoe teudeungoe su ca-e seumeujo keu israel, bansa nyan taat. teuma ceulaka kheueh ulon! ulon meurana! peungkhianat teutab mantong jikhianat, dan awaknyan seumaken meukianat. deungoe kheueh, hai banmandum peunduduek bumoe! keugeumparan, peurangkab dan taron jipreh-preh gata. ureueng nyang jipeuplueng droe nibak keugeumparan rhot lam peurangkab, dan ureueng nyang hana keunong lam peurangkab teuma keunong taron. ujeuen raya jitoh di langet, dan bumoe pih meuhayak. bumoe crah, reumok dan guyah. ban bumoe meupit-apit lagee ureueng mabok, dan meuhayak lagee jambo lam angen badee raya. bumoe teupeuro sabab desya nyang brat. jih nyan hanco dan hana meubudoh le. bak watee nyan tuhan geuhukom ureueng nyang mat kuasa angkasa

raya dan raja-raja di ateuheh bumoe. awaknyan jigumpoi meusajan-sajan lagee tahanan di dalam uruek, dan geurhom u dalam glab sampoe watee teuhukom. buleuen jeuet keuseupot dan mata uroe pih hana le meucahya, sabab tuhan nyang mahakuasa geumat peurintah sibagoe raja. gobnyan geumat peurintah di yerusalem, di ateuheh buket sion, dan geutunyok keu angongan gobnyan ubak banmandum peupimpin umat gobnyan. tuhan, droeneueh kheueh allah ulon, lon peugagong droeneueh dan lon pujoe nan droeneueh. sabab karya-karya droeneueh keubit that takjub; droeneueh nyang reuncana phon yoh ilee, dan neupeubuet deungon seutia. banda nyan ka neupeuhanco; banda meukuta nyan ka jeuet keu runga-runga. meuligoe nyang jipeudong le ureueng aseng ka habeh hanco, dan hana jipeudong le keu siumu masa. droeneueh jipujoe le bansa-bansa nyang teuga, dan jitakot di banda-banda bansa-bansa nyang keujam. sabab droeneueh jeuet keuteumpat meu-ungse keu ureueng nyang leumoh, teupat nyang aman nibak ureueng gasien watee meukarat. droeneueh kheueh peulindong nibak angen badee, teupat meupayong le uroe criet nyang meutala. beuliong watee ujeuen teuka, lagee angen seu-uem bak tanoh nyang tho kreg. teuma droeneueh neupeujeut musoh kamoe hana jeuet jipeuhah babah, neupeupioh su ureueng-ureueng keujam nyang meudumpek, lagee meupayong bak awan nyang teupeugadoh tutong uroe tarek. di buket sion, tuhan nyang mahakuasa geupeusiab peujamuan keu banmandum bansa di ateuheh donya. gobnyan geuhidang peunajoh nyang paleng lazat dan ie anggo nyang teupileh. di ateuheh buket nyan, gobnyan teusalob awan keuseudehan nyang teupeukeulubong bubena bansa. tuhan nyang mahakuasa geupeubinasa mawot keu siumu masa! gobnyan geusampoh ie mata di tieb-tieb muka, dan geupeujioh keuhinaan nyang jitanggong le umat gobnyan bansaboh bumoe. tuhan ka geumeufeuroman, dan hainyan pasti teujadi. bak watee nyan ureueng laen jipeugah, "sikeubit jih, gobnyan kheueh po teu allah geutanyoe; gobnyan kheueh nyang ta preh-preh, mangat geutanyoe geupeuseulamat. beutoi that, nyoe kheueh tuhan; gobnyan kheueh nyang ta preh-preh. jinoenyo tanyoe seumurak meuhubo, sabab gobnyan ka geupeuseulamat geutanyoe." tuhan geulindong buket sion, teuma moab geu gilo-gilo lagee jumpueng lam teupat broh. peunduduek disinan jisunyueng jaroe lagee ureueng keuneuk meulangue. teuma tuhan geupeuhina keu angkohan awaknyan sampoe awaknyan hana meudaya. kuta-kuta moab meunan cit deungon beuton-beuton jih nyang manyang-manyang geureuloh dan laju geutie u ateuheh tanoh sampoe hanco meubae. bak uroenyan ureueng laen jimeuca-e deungon ca-e nyoe di tanoh yehuda: "alangkah kong jih banda geutanyoe; po teu allah keudroe nyang peudong beuton jih, disinoe geutanyoe seulam. peulah kheueh laju bubena babah pintoe geureubang, mangat jitamong bansa nyang seutia, bansa nyang jitem peubuet keuheundak allah jih. tuhan, droeneueh nyang bri dame dan seujahteura keu ureueng nyang kong ate, sabab ureueng nyan peucaya ubak droeneueh.

peucaya kheueh ubak tuhan mantong, sabab tuhan allah sabe geulindong geutanyoe. tuhan geuhina ureueng nyang cungkak; gobnyan nyang peuhanco banda awaknyan nyang meukuta, dan geupeurata deungon tanoh. ureueng-ureueng gasien dan ureueng seungsara teuma jigilo-gilo ureueng nyan." ureueng juoe jijak ateuhe jalan nyang teupat, sabab droeneueh, tuhan, geurinteh jalan keu jihnyan. kamoe seutot keuputosan droeneueh, ya tuhan, dan kamoe meupreh-preh droeneueh; droeneueh kheueh nyang kamoe pujoe dan teupat kamoe peulaboh ate kamoe nyang rindu. jiwa ulon teutab rindu ubak droeneueh meunyoe malam ka teuka, ate ulon meuharab droeneueh oh watee beungoh. meunyoe droeneueh neupeu hakem bumoe nyoe bak saboh saat, peunduduek donya teuma jiteupeue peue nyang beuna. bahpi ureueng jeuhet jipeusaneut deungon jroh that, jihnyan teutab hana jimeurunoe peue nyang beuna. di nanggroe hukom pipi jihnyan jipeubuet jeuhet, dan hana jitem angkee kuasa tuhan. tuhan, droeneueh ka siab neuhukom musoh droeneueh, teuma awaknyan hana jiteupeue. bah kheueh awaknyan malee teusipu-spu jingiang geunaseh droeneueh keu umat droeneueh. bah kheueh awaknyan habeh hana tinggai meusidroe le hukuman nyang droeneueh keubah keu awaknyan. tuhan, droeneueh nyang peugot kamoe sejahteura; peue mantong nyang kamoe peubuet, droeneueh kheueh nyang peubuet nyan keu kamoe. kamoe ka ltheueh jikuasa le amphon-amphon nyang laen, teuma teutab droeneueh kheueh nyang kamoe aku, ya tuhan, allah kamoe! awaknyan ka meuninggai dan hana udeb le, areuwah jih hana jibeudoh le. sabab awaknyan ka habeh neupeubinasa dan neusampoh nibak ingatan. droeneueh ka neulipat kamoe nyoe, umat droeneueh, ya tuhan, dan neupeuluwah wilayah kamoe, le nyan kheueh droeneueh teupeu agong. droeneueh ka neuhukom kamoe; watee museupet kamoe meupaleng ubak droeneueh, dan meudoa ubak droeneueh, ya tuhan lagee ureueng inong keuneuk peulahe aneuek ah euh teubot-bot ngon teuleuntek-leuntek bak geupeuteun saket, meunan kheueh kamoe nyoe, dikeue droeneueh, ya tuhan. kamoe raya pruet dan teubot-bot sabab saket, teuma sapeue hana kamoe peulahe; hana kamoe bri keuseulamatan keu donya, dan hana teuma teutamah peunduduek jih. umat droeneueh nyang mate teuma udeb lom, manyet-manyet awaknyan teuma jibeudoh lom. ureueng nyang ka teukubu lam tanoh jibeudoh sira jiseumurak ngon meuhubo. lagee iembon nyang peuseugar bumoe, droeneueh neupeu udeb umat droeneueh nyang ka treb mate. tamong kheueh u dalam rumah gata, hai bansa ulon, dan gata tob kheueh pintoe gata. neumusom kheueh meu sikeujab sampoe meureuka tuhan ka reuda. tuhan teuma geutron nibak teupat gobnyan meutahta di dalam syeuruga keu geuhukom peunduduek bumoe kareuna desya awaknyan keudroe. poh gobnyan mate nyang awaknyan peubuet deungon musom-musom teuma geupeuleumah. tanoh hana le geuseubehe ubak ureueng-ureueng nyang mate keunong poh. bak masa nyan tuhan geupeuguna peudeueng gobnyan nyang khong dan tajam keu

geuhukom lewiatan, uleue nyang meuglong-glong dan meupalet-palet nyan, dan keu teupoh mate naga laot. bak watee nyan tuhan teuma meufeureuman, "meuca-e kheueh keuhai lampoh anggo lon nyang ceudah. ulon, tuhan, nyang jaga nyan; tieb-tieb watee ulon jak siram, uroe malam ulon jaga, mangat bek na ureueng peukaru. ulon hana meurasa beungeh le. seukira jih na naleueng atawa tamah nyang meuduro, ulon teuma basmi, dan lon tot sampoe habeh bube nyang na. teuma meunyoe musoh-musoh umat lon jimita peulindongan nibak ulon, bah kheueh awaknyan meudame deungon ulon, bit, meudame kheueh deungon ulon." nibak watee nyang teuma teuka, bansa israel teuma jeuet lagee bak kayee nyang meu ukeue dan meukeumang, dan peunoh di ateuhe muka bumoe deungon boh-boh nyang na nibak jih nyan. tuhan geuhukom umat gobnyan hana saban brat jih lagee gobnyan geuhukom bansa-bansa nyang jimeumusoh awaknyan. gobnyan hana geupoh mate umat geuh lagee gobnyan geupoh mate musoh geuh. tuhan geuhukom umat gobnyan deungon cara geuboih awaknyan u nanggroe laen. gobnyan geu use awaknyan deungon angen jeuhet nyang teuka di timu. teuma desya-desya bansa israel nyan baro kheueh hase geusampoh meunyoe miseubah dewa-dewa geugileng sampoe haloh lagee teugileng gapu. bubena dupa dan lambang dewi asyera geupeuhanco sampoe rata. banda nyang meukuta nyan ka jeuet keu seungue dan jitinggai lagee blang beulantara nyang kosong. kawan beulatang peulara jimeurot naleueng nyan na disinan sira jipioh dan bubena on-on nibak deun-deun kayee. meunyoe ranteng-ranteng jih singoh ka tho kreg dan patah, laju jijak bubena ureueng inong jicok ranteng kayee nyan jeuet keu kayee apui. bansa nyan hana mumphom sapeue, po teu allah geucebta nyan hana teuma geugaseh awaknyan. bak watee nyan tuhan laju geupeusapat bansa gobnyan phon sidroe ubak sidroe di krueng efrat sampoe trok u bataih nanggroe meuse. gobnyan geupeu aseng awaknyan lagee ureueng nyang ji peuaseng aneuk gandom lam sikeum jih. watee nyan geuyueb beureuguih raya keu teutawok mandum ureueng israel nyang geuboih di asyur dan di meuse. awaknyan jiteuka u yerasalem keujijak seumah tuhan nibak buket gobnyan nyang suci. ceulaka kheueh banda nyang ka jeuet keubanggaan bubena ureueng mabok israel! keu indahan jih ka jeuet keu layee lagee keumarang bungong nyang na lagee ateuhe ulee awaknyan. cilaka kheueh banda nyang teudong cot oh manyang bak teungoh panton nyang subo, keubanggaan ureueng-ureueng nyang mabok siteungoh mate. tuhan geu kirem sidroe ureueng nyang teuga dan peukasa. teuka lagee angen badee meusajan deungon ujeuen es, lagee ujeuen raya dan ie raya nyang jipeuhanyot peue-peue nyang na. deungon that beungeh gobnyan geusumpom awaknyan ateuhe tanoh. keubanggaan peumimpem-pemimpem nyang mabok nyan teuma geugilo-gilo. banda awaknyan nyang meugah ngon meusyehuh nyang ka phon layee nyan teuma leunyah. naseb jih lagee naseb boh ara nyang masak sigohlom trok bak musen; meunan jikalon, laju jipot dan jipajoh. tuhan nyang mahakuasa geupeujeuet keumarang

bungong nyang ceudah keu umat gobnyan nyang na mantong tinggai sidroe-droe teuk. tuhan geubri rasa seudeh keu mandum hakem, dan keubeuranian keu ureueng-ureueng nyang meutugaih jijaga banda nibak jiprang le musoh. meunan cit bubena nabi-nabi dan teungku-teungku imeum ka habeh mabok sabab lumpah that le jijieb ie anggo dan ie arak. awaknyan watee jijak badan jih ka me ayon-ayon dan gaki jih meugantoh-gantoh sabab pikeran awaknyan ka hana meuteunteu. nabi-nabi ka hana le hase geukeumalon peue nyang geubri hai-hai nyang jeuet geungieng le po teu allah ateueh awaknyan. meunan cit di teungku-teungku imeum ka hana le hase geupeuputoh peukara-peukara nyang jipeuhadab ubak awaknyan. ateueh meuja awaknyan ka peunoh deungon muntah, sa ka hana le teumpat nyang gleh. awaknyan meupeukeran ubak ulon, laju jipeugah, "geupike gobnyan soe nyang geupeurunoe? soe teuma nyang peureulee nyang peutrang hai nyan? geupike le gobnyan geutanyoe nyoe aneuek manyak nyang baro teusapih? ci neupike ek kheueh beutoi gobnyan geupeurunoe geutanyoe sira geu peuija hurof deumi hurof, haba deumi haba, kalimat deumi kalimat." meunyo gata hana tatem deungoe ulon, tuhan teuma geukirem ureueng aseng mangat jijak peurunoe gata keuhai logat ganje dan basa aseng. tuhan geupeutaba teumpat peuniyoh keu gata banmandum, teuma gata hantatem deungoe gobnyan. le sababnyan kheueh tuhan geupeurunoe gata hurof deumi hurof, haba deumi haba dan kalimat deumi kalimat. dan watee gatajak gata reubah meulinteung sampoe luhok, teucarueh dan keunong teun. deungoe kheueh peue nyang geufeuureman le tuhan, hai ureueng-ureueng peuhina nyang mat peurintah rakyat di yerasalem! gata tapeugah bahwa gata ka ltheueh tapeuget peujanjian deungon mawot dan tapeuget peusitujuan deungon donya ureueng mate. gata ka meuras pasti bahwa beuncana nyang teuka nyan hana keunong ateueh gata, sabab gata tapeuguna tipee muslihat mangat teulindong droe keudroe gata. le sabab nyan, tuhan nyang mahamanyang laju geumeu feureuman lagee nyoe, "ulon teuma kupeudeuk dasai nyang khong dan kukoh di sion; sineuk batee keunaleueng nyang meuyuem deungon tulesan: 'soe nyang peucaya teuguh, hana jimeunyeurah taloe.' keuadalan ulon peujeuet talo peu-uko, dan keujujoran ulon peujeuet keu talo sineupat." ujeuen batee jisampoh gleh banmandum sulet nyang gata peubangga. ie raya jipeuhanyot teumpat musom gata. peujanjian gata deungon mawot dan peuseutujuan gata deungon donya ureueng mate nyan geupeubateue, dan meunyo beuncana nyan teuka, gata hanco teugilo-gilo. gata jiteuka malang hana pioh-pioh nyang haroh tatanggong tieb-tieb uroe, beungoh, uroe dan malam. gata yo ngon teumakot meunyo gata muphom peusan po teu allah. gata lagee ureueng nyang keuneuk teungut ateueh peuratah nyang kureueng panyang keu teumpat peunyeu droe. dan ija seulimbot gata pih kureueng luwah keu keusilimbot gata. tuhan geubeudoh lagee gunong perazim. gobnyan meujuang lagee di panton gibeon mangat peubuet meukeusut gobnyan, meukeusut nyang ganje nibak manusia! gobnyan geulaksana

buet gobnyan nyang luwabiasa. ulon ka ltheueh lon deungoe keputosan po teu allah nyang mahamanyang dan mahakuasa keu peuhanco bansaboh nanggroe. bek tapeujayah tutoe haba peuingat nyang ulon peusampoe nyoe. eunteuk jeuet keu leubeu sulet nibak gata keutapeusie droe! deungoe kheueh tutoe haba lon, simak kheueh peue nyang ulon peusan. sidroe ureueng tani hana sabe-sabe jimeu ue, ceumangkoi dan jimeumpoe tanoh droe jih mangat jipula. meunyo tanoh jihnyan ka siab, ureuengnyan laju jitabu bijeh, miseue jih jintan itam dan jintan puteh. gobnyan jipula dua macam gandom meubareh meutaoe, dan nibak bineh nyan seunaman laen. ureueng nyan jiteupeue cara teupeubuet atranyan, sabab ka geupeurunoe le po teu allah jih. ureueng nyan hana jingui eretan ceumeulo keu teulo jintan itam dan ruda geurubak keu teuguleng jintan puteh. keu nyan jipeuguna reunong nyang ampong. watee teulo boh gandom, boh gandom nyang teulo nyan hana kayem that jiseupot sampoe an hanco. bukon lagee nyan! ureueng nyan jiteupeue cara ceumeulo nyang paih deungon cara jipeu ek geurubak u ateueh nyan deungon hana jipeuhanco aneuk-aneuk gandom nyan. keubijaksanaan nyan teuka jih nibak tuhan nyang mahakuasa. bandum reuncana tuhan bijaksanaan dan sabe meuhase. ceulaka kheueh banda yerasalem nyang jipeunon miseubah allah! ceulaka kheueh banda teumpat nabi daud peudong khimah! bah kheueh thon-thon gantoe meugantoe deungon peurayaan-peurayaan. teuma po teu allah geupeuteuka beuncana ateueh banda nyan, sampoe ureueng rame meurang-rang dan apoh-apah. bansaboh banda ka lagee miseubah nyang bulut meulabo deungon darah. po teu allah geuseurang banda nyan dan geukeupong rot meubago peunjuru. yerasalem ka lagee banda hantu nyang jiseuha keu jipeudeungoe su gobnyan rot lam tanoh, su nyang reudok teuka lam abee. teuma banda ureueng aseng nyang keujam gadoh lagee abee atawa lagee sikeum nyang jipot le angen. deungon sikreb-sikreb dan hana teusangka-sangka. tuhan nyang mahakuasa geupeubeubaih banda nyan deungon angen badee dan geumpa bumoe nyang lumpah dahsyat. gobnyan geupeutron angen puteng beuliong dan apui hu meuhab-hab sira jimeulieh keudeh keunoe. laju banmandum pasokan aseng nyang seurang banda yerasalem, teuma banda miseubah po teu allah nyan, banmandum nyang keupong dan nyang heuntam banda nyan, teuma gadoh lagee lumpo watee malam. bansa-bansa nyang meusapat keuneuk jiseurang yerasalem lagee ureueng deuk nyang meulumpo teungoh jimakheun, laju jibeudoh deungon pruet soh, atawa lagee ureueng nyang lumpah that glah nyang meulumpo teungoh jijieb ie, laju jibeudoh deungon rukueng jih nyang tho. hana putoh teuhireuen-hireuen dan jipet mata lagee ureueng buta! jeuet kheueh gobnyan keu ureueng mabok, teuma bukon le sabab jijieb ie anggo. jijak laju ngon badan meu apit-apit, teuma bukon le sabab jijieb ie arak. tuhan geupeujeuet gata teungut mata dan gata-eh deungon sineunya. gobnyan nyang tob mata bubena nabi dan geupeupayong mata ureueng nyang keumalon. makna tieb-tieb nyang teukalon teusom

keu gata, lagee kitab nyang teuseegee. meunyo kitab nyan teuba ubak sidroe-droe ureueng nyang jeuet geubeuet mangat gobnyan geubeuet keu gata, gobnyan teuma jipeugah bahwa geuhnyan hana carong, sabab kitab nyan ka teuseegee. meunyo jiba ubak ureueng nyang buta hurof, ureueng nyan teuma jijaweueb bahwa jihnyan hana jeuet meubaca. tuhan meufeureuman, "ureueng-ureueng nyan jiseumah ulon deungon tutoe haba, teuma ate awaknyan jioh nibak ulon. agama awaknyan teuma peurataran manusia nyang jiapai mantong. le sababnyan awaknyan ulon peukeujot deungon lon heuntam meu-ulang-ulang. ureueng nyang bijaksana teuma jeuet keubangai, dan banmandum ieleume nyang na nibak awaknyan hana meuguna." ceulaka kheueh ureueng nyang jiuseuha jipeusom-som reuncana jih nyan ubak tuhan! awaknyan jimeubuet deungon seungab-seungab, dan jipeugah hana meusidroe na kalon atawa nyang teupeu peue nyang awaknyan peubuet. peue mantong jiputa balek le awaknyan. toh kheueh nyang leubeh peunteng, tukang beulangong atawa tanoh kliet? peu kheueh mungkin nyang teupeuget jipeugah keu nyang peuket jihnyan, "bukan droeneueh nyang peuket ulon?" atawa peu kheueh carong jipeugah le beunda nyan ubak jihnyan, "gata hana jeuet sapeue"? na peupatah nyang su jih lagee nyoe, "hana treb le gle ka jeuet keu tanoh teumpat meulampoh, dan tanoh lampoh nyan jigisa lom jeuet keu tanoh gle." bak watee nyan di ureueng tulo hase jideungoe tutoe haba nibak saboh kitab nyan teubaca, dan ureueng buta nyang yoh awaikon bunoe ka udeb di dalam seupot teuma hase jikeumalon. ureueng-ureueng gasien dan hina geurasi lom keubahgian nyang ka geubri le po teu allah kusus israel. nyan kheueh keuneulheuh ureueng-ureueng nyang tindeeh ureueng laen dan jihina po teu allah. po teu allah teuma geupeubinasa mandum ureueng meudesya, ureueng nyang galak buet fiteunah, ureueng nyang tam mangat ureueng jeuhet bek teuhukom, dan ureueng nyang peutabu haba-haba sulet mangat ureueng juoe bek meuteume keuadalan. sabab nyan, tuhan, po teu allah israel nyang peubeubaih nabi ibrahim, jinoe geupeugah, "bansa ulon, gata hana jihina le dan wajah gata hana pucat le sabab malee. sabab watee gata ngieng aneuek-aneuek gata nyang ulon bri keu gata, teuma gata meungaku bahwa ulon kheueh po teu allah nyang kusus israel. gata tahoreumat ulon dan tatakot keu ulon. ureueng bangai jimeurunoe muphom dan ureueng nyang sabe tunu teuma galak teupeurunoe." tuhan meufeureuman, "ceulaka kheueh bubena peumimpin yehuda, sabab awaknyan jibeurontak keu ulon. awaknyan jiseutot reuncana nyang kon teuka nibak ulon. awaknyan jiteken peujanjian nyang hana sisuai deungon keuheundak ulon. dan meutumpok-tumpok kheueh desya awaknyan. awaknyan jijak u nanggroee meuse deungon hana jilakee keuputosan lon. awaknyan meulindong di nanggroee meuse dan meuharab geutulong le raja meuse. teuma raja nyan jibri keucewa keu awaknyan, dan peulindongan nyang jiharab di meuse nyan gagal. bahpi utosan-utosan yehuda ka trok u banda-banda zoan dan hanes di

nanggroee meuse, mandum ureueng teuma jiteuka malee sabab ka jimeuharab ubak bansa nyang hana meuguna nibak awaknyan. nyang awaknyan teume bukan kheueh laba atawa sinulong, teuma na kheueh peunghinaan." meunoe kheueh feureuman tuhan keuhai beulatang-beulatang nyang na tinggai nibak tanoh seulatun, "bubena utosan jipeudieng u ateuh keuleudee dan unta awaknyan deungon hadiah-hadiah, laju jijak rot daerah nyang peunoh deungon mara bahaya nyang jikeumiet le singa, uleue meubisa dan naga meusayeub. hadiah-hadiah nyan awaknyan peuseumah ubak saboh bansa nyang toh bansa nyan hana ek jitulung awaknyan. bantuan nanggroee meuse peucuma mantong. sabab nyan nanggroee meuse nyan ulon gala nan, 'naga nyang hana meubahaya.'" po teu allah geupeurintah ubak ulon mangat ulon cetet buet-buet nyang jeuhet nyang jipeubuet le umat gobnyan lam saboh kitab sibagoe peuingat keu siumu masa. sabab, awaknyan bansa nyang paleng galak beurontak ubak po teu allah, galak meusulet dan hana jitem deungoe ajaran tuhan. awaknyan jipeugah ubak dumna nabi, "neutob babah droeneueh! bek neupeugah ubak kamoe peue nyang beuna, teuma nyang jeuet neupeugah ubak kamoe na kheueh peue nyang kamoe tem deungoe. bah kheueh kamoe teutab udeb lam meukhayal. jak weh kheueh laju, dan neucok kheueh rot laen. bek neupeukaru kamoe deungon allah kusus israel." sababnyan po teu allah kusus israel laju geumeufeureuman lagee nyoe, "gata tatulak haba ulon dan tapeubangga deungon buet teumindeeh dan teumipee. sabab nyan gata meusalah. gata lagee binte beuton nyang manyang nyang ka reutak phon di ateuh sampoe u miyueb; deungon hana neusangka-sangka gata teuma teupuroe. gata reumok lagee beulangong tanoh nyang hanco meukeupeng-keupeng, sampoe lamkawan pempeng-pempeng nyan ka hana jeuet le keu ngon cok ngeue apui lam sinungkee atawa keu teutimok ie lam kulah." tuhan nyang mahamanyang, po teu allah kusus israel, meufeureuman keu umat gobnyan lagee nyoe, "tobat kheueh dan teutab kheueh lam keuadaan teunang, teuma gata lon peuseulamat. peucaya kheueh ubak ulon deungon ate nyang teuntram, teuma gata lon bri teunaga." teuma gata teutab hana tatem! malah gata tapeuget reuncana mangat tapeuplueng droe nibak musoh deungon keundeuraan guda nyang bagaih plueng. get that! keubit gata singoh haroh taplueng! gata pike guda gatanyan ka bagaih that jiplueng, padahai ureueng-ureueng tieyub gata jioh leubeh bagaih jiplueng. siribee droe teuma jiplueng watee jikalon ancaman sidroe kong musoh, dan ancaman na limong droe gata banmandum ka habeh taplueng. lam pasokan gata nyang na tinggai saboh tamah bandera di ateuh pucak buket. bahpih lagee nyan, tuhan geupreh-preh watejih keu geutunyok gaseh sayang gobnyan keu gata. gobnyan siab seudia keu geugaseh gata. sabab tuhan na kheueh po teu allah nyang peubuet peue nyang paih. mubahgia kheueh ureueng nyang meuharab ubak gobnyan. hai gata nyang tinggai di yerasalem, gata hana tamo sabe. tuhan na gaseh sayang, dan deungon bagaih geujaweueb gata meunyo gata lakee tulung ubak

gobnyan. tuhan geubri keu gata masa teu-ujoe nyang lumpah brat keugeupeurunoe gata. teuma jinoenyoe gobnyan keudroe nyang dampeng gata sampoe gata tarasa keuhaderan gobnyan. meunyoee gata meusing pang nibak rot, dilikot gata teuma teudeungoe su nyang jipeugah, "nyoe kheueh jalan gobnyan; seutot kheueh jalan nyoe." patong-patong beurala gata nyang meulapeh deungon pirak dan meuh teuma gata tiek lagee tatiek kotoran, sira tapeugah, "weuh keudeh bek to bineh ulon!" meunyoee gata tasipreuk bijeh, tuhan teuma geupeutron ujeuen mangat bijeh nyan timoh dan jipeuhase panen nyang meulimpah. dan keu beulatang peulara gata teuma geupeuna blang naleueung nyang luwah that. leumo agam dan keuleudee nyang meueu-eu blang gata teuma jipajoh peunajoh beulatang nyang paleng jroh nyang teupeuna seucara khusus. bak uroe kuta-kuta musoh gata nyan teukeupong dan ureueng-ureueng awaknyan teupoh mate, tieb-tieb gunong dan buket teuma ji ile ie nyang jiteubiet lam gunong dan buket nyan lagee aneuek-aneuek krueng. buleuen meucahya peungeh lagee mata uroe, dan mata uroe jeuet tujoh goe leubeh peungeh nibak buleuen nyan, lagee peungeh tujoh uroe teupeusapat jeuet keu siuroe. bandum nyan jeuet jih bak uroe tuhan geubalot dan geupeu ubat luka-luka umat gobnyan nyang ka geupeu jra. keukuasaan dan keuagongan tuhan leumah jih rot jioh. apui dan sab nyan tanda jih gobnyan ka meureuka. gobnyan geupeugah haba deungon awaknyan, dan tutoe haba gobnyan seu-uem ngon tutong lagee apui hu. geukirem angen leubeh awai nibak gobnyan lagee ie raya ngob eueteu takue nyang jipeuhanyot peue-peue nyang na. gobnyan geupeubinasa bansa-bansa, dan geupeugagal reuncana-reuncana awaknyan nyang jeuhet. teuma gata, hai umat po teu allah, meugeumbira dan meuca-e lagee watee malam peurayan agama. gata teuma meuduka cita lagee ireng-irengan suleng nyang jituju ubak baet tuhan, nyang bila israel. tuhan geupeudeungoe su gobnyan nyang agong, dan tieb-tieb ureueng teuma jirasa kuasa gobnyan nyang luwabiasa. meunyoee gobnyan beungeh jiteuka apui nyang jipeuhangoh peue-peue nyang na, ujeuen raya, ujeuen batee dan angen badee. ureueng asyur teukeujot ngon yo meugam-gam watee jideungoe su tuhan dan jirasa hukuman gobnyan keubit brat that. teungoh awaknyan jirasa saket badan sabab jisunuet ban galak droe, umat tuhan meuseunang-seunang sira jideungoe su musik geundrang dan keucapi. allah keudroe teuma geumuprang geulawan asyur. phon yoh awaikon ka geuseudia apui teumpat tot raja asyur. teumpat nyang lhok dan luwah, asoe jih na kheueh kayee apui nyang meutamom-tamon. tuhan teuma geupeukab apui nyan deungon cara geuyueb nafah gobnyan lagee krueng-krueng belerang. ceulaka kheueh ureueng nyang jak u nanggroee meuse keu jilakee tulong! awaknyan nyang jipeubangga na kheueh angkatan tantra meuse deungon pasokan meuguda dan guda jihnyan nyang teuga-teuga dan geuritan jih pih le that. teuma awaknyan hana peucaya ubak tuhan, po teu allah kudus israel dan hana jilakee tulong ubak gobnyan. tuhan bijaksana dan geuteupeue peue

geupeubuet. laju le gobnyan geupeutron beuncana dan geulaksana ancaman gobnyan keu geuhukom ureueng jeuhet dan ureueng nyang tulong awaknyan. ureueng meuse na kheueh manusia, bukan po teu allah. guda awaknyan makhluk biasa, hana meusifeuet ilahi. meunyoee tuhan nyang meutindak, bansa nyang tulong nyan meugantoh dan bansa nyang jitulong teuma reubah. dan bandua bansa nyan teuma binasa. tuhan meufeureuman ubak ulon, "lagee singa meungom-ngom keu jipeuteun mangsa jih dan hana hase jipeutakot deungon su meudumpek le kawananeu ureueng meurabe nyang jikrah jak lawan jihnyan, meunan cit teuma lon muprang ulon peuteun buket sion. lagee saboh cicem nyang meukeupak-keupak sayeuh jih di dalam uempueng keu jilindong mandum aneuek-aneuek jih, meunan cit ulon, tuhan nyang mahakuasa lon lindong, lon bila dan lon peuseulamat yerusalem." tuhan meufeureuman lom, "hai bansa israel, gata ka talawan ulon dan ka meudesya ubak ulon. teuma jinoenyoe, tagisa kheueh laju ubak ulon! teuma trok watee jih gata boih banmandum patong-patong beurala nyang teupeuget nibak pirak dan meuh nyang gata peuet keudroe deungon peunoh desya. asyur teupeubinasa bak watee prang teuka, teuma kon deungon teunaga manusia. ureueng asyur jiplueng nibak mideuen prang, dan aneuek-aneuek muda awaknyan jipeujeuet keunamiet. raja awaknyan geuplueng sabab teumakot, dan bubena peuwira teukeujot raya, sampoe awaknyan jitinggai bupanji-bupanji prang." tuhan ka geupeugah haba, tuhan nyang teuseumah dan teuhoreumat deungon keureubeuen nyang teutot di yerusalem. kalon kheueh, teuma trok watee jih sidroe raja geumat peurintah deungon ade dan peumimpin bansa jipeujak keuadalan. awaknyan maseng-maseng lagee teumpat meupayong nibak angen dan badee. awaknyan lagee ie krueng nyang ji ile di teungoh-teungoh padang pasi, lagee payong batee nyang raya di teungoh padang nyang geursang. ureueng nyang hase jimeungieng hana jipet mata, dan nyang hase meudeungoe teuma geusimak. ureueng nyang yoh masa ilee teuburu nafesu teuma meutindak deungon saba dan peunoh meungeureuti. ureueng nyang watee jimeututoteu gagab teuma glaih nariet jih watee jipeugah haba. ureueng bangai hana le teuanggab horeumat, dan ureueng teumipee hana teupeugah juoe. ureueng bangai jipeugah haba nyang bangai dan jipeuna reuncana nyang jeuhet. peue mantong nyang jipeubuet atawa geupeugah na kheueh meuhina keu po teu allah. hantom na jibri makheun keu ureueng deuk atawa jibri ie keu ureueng glah. dan sidroe ureueng teumipee nyang jipike buet-buet nyang jeuhet. pakriban cara jimita akai keu ji-ilanya ateuhe ureueng gasien deungon tutoe haba nyang sulet dan jitam awaknyan keu jicok hak jih keudroe. teuma ureueng nyang jroh akai budoe jih nyang jireuncana na kheueh hai-hai nyang jroh dan jimeubuet nyang jroh teuma. deungoe kheueh, hai ureueng-ureueng inong nyang udeb gata mangat, beubaih nibak hai-hai nyang susah! jinoenyoe gata jeuet meurasu aman, teuma kira-kira sithon teuk gata putoh asa, sabab hase panen boh anggo gagal, dan meunan cit deungon hase bumoe

nyang laen hana sapeue na. trok bak saat nyoe gata mangat udeb, beubaih nibak meubagoe nyang susah. teuma bak watee nyoe, teuka kheueh yo sabab teumakot! suet kheueh laju peukayan gata dan ikat laju ija krong nibak keuieng gata. peuba-e kheueh ladang-ladang gata nyang gumbo ngon subo dan lampoh-lampoh anggo gata nyang jimuboh le, sabab tanoh bansa ulon jitimoh le tamah meupaya dan tamah meuduro. nyoe, peumo ba-e kheueh rumoh-rumoh gata teumapat gob meuseunang-seunang ngon peulalee ate dan banda nyang peunoh deungon ureueng rame! meunan cit meuligoe teuma jitinggai ma banda nyang rame ka jeuet keuseungue ngon seungab. buket dan meunara-meunara teumapat ureueng meujaga ka teupeurata deungon tanoh keu siumu masa. keuleudee-keuleudee nyang kleut meunan cit deungon bubiri-bubiri beubaih jijak keudeh keunoe dan jimeurot naleueng nyang na jitimoh disinan. teuma sigoe teuk po teu allah teuka deungon kuasa gobnyan. dan padang pasie jeuet keu ladang-ladang nyang subo, dan ladang-ladang jeuet lagee uteuen. bansaboh nangroe na keujujoran dan keuadelan. tieb-tieb ureueng jipeubuet peue nyang beuna, sampoe na keuseujahteuraan dan keuteuntranman siumu masa. umat po teu allah beubaih nibak keususahan udeb di teumapat nyang aman dan teuntran. lumpah that bahgia gata banmandum sabab na ie nyang seb keu seunaman gata, dan beulatang peulara gata jeuet jimeurot dipat mantong deungon aman. teuma musoh gata jeuet lagee uteuen nyang jisiram le ujeuen batee dan banda awaknyan teupeuhanco. ceulaka kheueh musoh-musoh geutanyoe! awaknyan meurampok bahpi hana keunong reupah, dan meukhianat bahpi hana soe khianat, awaknyan keudroe jeuet keu ureueng keunong rampak dan peukhianatan. ya tuhan, geugaseh kheueh keu kamoe. droeneueh kheueh harapan kamoe. neulindong kheueh kamoe tieb-tieb uroe dan peuseulamat kheueh kamoe watee kamoe lam keuadaan meukarat. meunyoe droeneueh neubeudoh dan neupeudeungoe su droeneueh nyang meugrum-grum, bansa-bansa teuma jiplueng teung bateyeung meucubre hana meuh sahoe. lagee daruet nyang po meukawan jiseureubu dan jireupah hareuta awaknyan. tuhan lumpah that jujoe; gobnyan geukuasa peue-peue nyang na. gobnyan geupeudong hukum dan keuadelan di yerusalem dan geubri aman ubak umat gobnyan. hareuta nyang peuseulamat awaknyan na kheueh keubijaksanaan dan ileume dan horeumat ubak tuhan. ureueng-ureueng nyang beuhe ngon tunggang jikliek-kliek geulakee tulong; bubena utosan nyang jiseuha keuneuk peudame laju jimo deungon weueh ate. rot-rot ueh raya lumpah meubahya sampoe ka habeh seungue; hana ureueng nyang na jijak nibak rot-rot nyan. janji nyang ka teupeugot ji iengkeue dan mupakat nyang situju jitulak teuma. hana le nyang na jipakoe. nangroe jitinggai ka seungue seungab. gle-gle libanon ka layee, dan panton saron nyang gumbo ngon subo ka jeuet keupadang pasi. di basan dan di gunung karmel on-on kayee ka habeh luroh. tuhan meufeureuman bak bansa nyan, "jinoenye ulon beudoh dan lon peubuet mangat lon tunyok keukuasaan lon.

reuncana gata sia-sia, dan peue mantong nyang gata peubuet hana meuguna. beungeh gatanyan lagee apui nyang tatot droe gata keudroe. gata lagee batee kareueng nyang teutot keu teupeujeuet keu gapu; dan lagee tamah meuduro nyang teukoh dan teutot u lam apui. bah kheueh banmandum ureueng nyang to meunan cit nyang jioh jideungoe keuhai buet ulon dan jiaku keuhai keukuasaan lon." ureueng-ureueng meudesya di sion jiteuka yo sabab teumakot. kheun awaknyan, "keuputosan po teu allah lagee apui nyang hu meuheub-hueb siumu masa. peu kheueh mungken na nyang ek peuteun droe lam apui nyang jipeuhangoh peue-peue nyang na nyan?" gata ek tapeuteun droe meunyoe gata meututoe dan tapeubuet nyang beuna. bek tamita laba deungon cara tapaksa talakee atra ureueng gasien, bek tateurimong peng sugok. bek taseutot deungon ureueng nyang na lam ate jih jikeuneuk jakpoh mate ureueng laen atawa buet-buet nyang jeuhet nyang laen. dan gata teuma teulindong dan aman, siulah-ulah gata kana lam kuta nyang teuga. peunajoh dan ie jieb kana teukeubah keu gata. teuma teuka watee jih gata takalon sidroe raja nyang mat peurintah deungon seumarak ateuh nangroe nyang meulienteung u meubagoe arah. teumakot gata bube nyang ka ltheuh keu ureueng nyang kuteb cukee, nyang jeuhet dan mando ureueng aseng nyang ka tinggai keunangan mantong. gata hana le tangieng ureueng aseng nyang biadab nyang meututoe u dalam basa nyang hana gata teupeue. ngieng kheueh bansa sion, teumapat geutanyoe ta peuraya khanuri-khanuri agama. ngieng kheueh yerusalem! keubit aman that banda nyan keu teumapat tinggai, lagee khimah nyang hantom teupinah, patok jih nyang hantom teubot dan taloe jih hantom na putoh. tuhan teuma geupeukalon keuagongan gobnyan keu geutanyoe. geutanyoe udeb nibak bineh krueg nyang leubeh luwah, nyang hana hase jimeulayee le kapai musoh. peue mantong nyang na peuleungkapan nyang na nibak kapai awaknyan hana meuguna; layeue-layeue jihnyan hana hase teupeukeumang! banmandum keukayaan pasokan musoh tanyoe reupah, dan jeumeulah jih lumpah that le, sampoe ureueng laen pih meuteume jeumba. tuhan keudroe nyang jeuet keuraja geutanyoe; gobnyan teuma geumat peurintah, geupeudong hukum dan geupeuseulamat geutanyoe nibak musoh. hana meusidroe pih di nangroe geutanyoe apoh apah le sabab saket, dan banmandum desya geupeu amphon. jak kheueh meusapat, hai bansa-bansa, dan deungoe kheueh. bah kheueh bansaboh bumoe dan mandum nyang udeb teuka dan jideungoe. tuhan beungeh ubak mandum bansa dan banmandum pasokan awaknyan. gobnyan geuhukum dan geupeubinas awaknyan. manyet-manyet awaknyan nyang meutabu beuba hana ji kubu, teuma jipeubiyeu mantong disinan sampoe an brok dan mubee khieng. gunung-gunong mirah sabab keunong arah awaknyan. mata uroe, buleuen dan bintang-bintang teuma hanco. langet geugulong lagee geugulong keureutah. bintang-bintang rhot u bumoe lagee on kayee nyang luroh di cong bak. tuhan ka geupeusiab peudeung gobnyan lam syeuruga, dan jinoenye

peudeueng nyan keunong teuma ateuah bansa edom nyan ka geupeurhot hukuman dan geupeubinasa. peudeueng tuhan meulabo deungon darah dan habeh peusilik deungon gapah awaknyan, saban lagee darah dan gapah beulatang keureubeuen. sabab tuhan geupeuna keureubeuen di bozra, dan geupeuna seumeusie seucara rayeuk-rayeuk di tanoh edom. manusia-manusia teuma mate lagee leumo kleut dan leumo muda. nanggroe awaknyan mirah keunong darah dan meulabo deungon gapah. nyan kheueh saat jih tuhan geubila sion dan geubalah musoh-musoh gobnyan. krueng-krueng edom meub-ubah jeuet keu ter, dan tanoh disinan jeuet keu beulanger. akhe jih bansaboh nanggroe ka hu lagee ter. uroe malam hu nyan hana lon, dan asab meukeupong nyan jiteubiet disinan siumu masa. tanoh nyan teuma jitinggai mantong meunan deungon soh dan tho kreg sampoe tron meutron, dan hana meusidroe manusia pih nyan jak nibak tanoh nyan. cicem undan dan landak tinggai disinan, meunan cit deungon cicem hantu tok dan cicem gagak tinggai disinan. tuhan geupeujeuet tanoh nyan hana meuteuntee dan soh lagee yoh goholm geucebta. hana raja nyan peurintah nanggroe nyan, dan mandum peumimpin ka sapan sapa. puri-puri dan banda-banda nyan meukuta jitimoh le tamah meudro naleueng nyan panyang, dan jikeumiet le aseu uteuen dan cicem unta. beulatang juah meuwot-wot ban galak droe di dalam nyan; hantu-hantu jimeusu seot seumeuot, dan hantu malam jimita teupat keu jipioh. di teupat nyan uleue meubisa jimeu uempueng, jitoh boh, laju jikarom dan jipeulara bubena aneuek-aneuek jih nyan ka ceh. meunan cit deungon cicem ujeuen jipeugot uempueng jih disinan deungon judoe jih maseng-maseng. mita kheueh dan beuet kheueh lam kitab tuhan: hana meusidroe pih nibak banmandum makhluh nyan gadoh atawa meure deungon judo jih. sabab meunan kheueh peurintah tuhan, dan gobnyan keudroe nyan peusapat awaknyan. tuhan kheueh nyan weuk nanggroe nyan lamkawan awaknyan dan maseng-maseng jiteurimong jeumba jih. awaknyan tinggai disinan keu siumu masa, dan tanoh nyan jeuet keuhak milek awaknyan tron meutron. padang pasi dan tanoh tho teuma meugeumbira, bungong-bungong teuma keumang dipadang beulantara. padang pasi meukeumang deungon bagaihi that, dan meudeundang deungon ca-e ria. keugagahan jih lagee gunung libanon, seri jih lagee panton karmel dan saron. dan tieb-tieb ureueng jikalon kuasa tuhan, dan keuagongan allah geutanyoe. peuteuga kheueh jaroe nyan leumoh, peukong kheueh teut nyan guyah. peugah kheueh ubak nyan cut ate, "peukhong kheueh ate gata, bek teumakot, po teu allah gata teuka geuhukom musoh, gobnyan teuka geujak peuseulamat gata." watee nyan ureueng bula teuma jeuet jikeumalon, dan ureueng tulo hase jimeudeungoe. ureueng lapee jeuet jigrob-grob lagee rusa, ureueng kalu meusurak geumbira. sabab mata ie jiteubiet meubok-bok di padang pasi, krueng ji ile dipadang gle raya. pasi nyan seu-ueu jeuet keu kulam, tanoh nyan tho kreg jeuet keu teupat mata ie. teupat nyan yoh awaiphon ji

keumiet le aseu uteuen, teuma jitimoh le geulagah dan bak sikee. di sideh na rot ueh raya, "rot teujak ubak keuseulamatan" nan jih. ureueng meudesya hana jijak rot nyan, ureueng bangai hana jipeuseusat keu ureueng nyan jak rot nyan. nibak teupatnyan hana singa, atawa beulatang juah nyan laen. ureueng rame nyan geupeuseulamat le tuhan teuma jijak disinan. ureueng rame nyan ka geupeuleuh le tuhan teuma jijakwoe; awaknyan jitamong u dalam banda yerasalem sira meusurak geumbira, ruman awaknyan meucahya sabab galak that ngon harok nyan abadi. awaknyan meugeumbira dan meusuka ria; seudeh dan apoh apah habeh ka hana le. nibak thon nyan keu peuet blaih watee geumat peurintah le hizkia raja yehuda, banda-banda yehuda nyan meukuta laju jiprang dan jipeutaloe le sanherib, raja asyur. oh ltheuehnyan gobnyan geu kirem peuwira manyang di lakhis u yerasalem deungon tantra nyan raya keu jitungut mangat raja hizkia geutaklok. awaknyan laju trok ubak banda nyan dan geucok teupat nibak ladang nyan geuboh nan ladang peunatu, rab bak bineh ltheueh nyan ie jih ji ile nibak kulam bagian ateuah. oh ltheueh nyan teuma jiteuka laju lhee droe peugawee raja hizkia jijak meurumpok deungon peuwira asyur nyan. ban lhee droe peugawee nyan na kheueh elyakim bin hilikia ulee rumah tangga meuligoe, sebna seukeutareh nanggroe, dan yoah bin asaf, seukeutareh meuligoe. peuwira asyur geupeugah ubak awaknyan, "gata peusampoe laju ubak raja hizkia haba raja asyur nyoe, 'pakon gata meurasa droe gata teuga? gata pike deungon tutoe haba mantong meuhase teugantoe siasat dan teunaga tantra? soe kheueh ureueng nyan gata harab sampoe gata hana teumakot talawan asyur? gata keubit meuharab that beuji bantu le meuse, teuma nyan saban deungon tacok bak naleueng lakoe sibagoe tungkat; – teuna tungkat nyan patah dan jaroe gata teutob. meunan kheueh raja nanggroe meuse keu banmandum ureueng nyan meuharab ubak jihnyan." " ltheuehnyan geupeugah lom le peuwira asyur nyan, "atawa barang kali gata tapeugah bahwa gata meuharab ubak tuhan allah gata? bak watee hizkia geupeurintah ureueng yehuda dan yerasalem ji-iebadat dikeue miseubah di yerasalem, bukan kheueh nyan jipeuhanco nyan miseubah dan teupat-teupat teuseumah tuhan keudroe? jinoenyoe ulon ateuah nan raja asyur lon tem meutaroh bahwa meunyo gata geubri dua ribee boh guda, ka pasti nibak gata hana ureueng nyan sidubnyan le keu jigideuk ateuah guda nyan dua ribee boh nyan. keu teulawan peuwira asyur nyan paleng cut pih gata bukan kheueh lawan jih. teuma gata teutab cit tameuharab ubak bansa meuse mangat jikirem geuritan prang dan pasokan meuguda! gata pike kamoe jakprang dan kamoe peutaloe nanggroe gata meunyo hana geutulong le tuhan? tuhan keudroe kheueh nyan yue ubak kamoe mangat teuprang dan teupeuhanco banmandum nyan." laju geupeugah le elyakim, sebna dan yoah keu peuwira asyur nyan, "hai teungku, neumeututoe mantong lam basa aram deungon kamoe, kamoe muphom. bek neungui basa ibrani, eunteuk jiteupeue le rakyat di ateuah beuton banda nyan." geuseuot le

peuwira asyur nyan, "peu kheueh keu gata dan raja mantong ulon nyoe geukirem le raja asyur mangat teupeusampoe banmandum nyoe? ulon kumariet cit ubak rakyat nyang duek di ateuh binteh beuton nyoe, nyang meusigoe deungon gata teuma jipajoh ek jih keudroe dan ji-jieb iek jih keudroe." oh lheureh nyan peuwira manyan nyan jidong laju jimeututloe lam basa ibrani ngon su nyang meutaga, "deungoe nyoe peue nyang geupeugah le raja asyur, 'bek gata tem jipeunget le raja hizkia! jihnyan hana hase jipeuseulamat gata! bek gata deungoe peue-peue mantong nyang jirayu mangat jimeuharab ubak tuhan. bek gata pike tuhan geupeuseulamat gata atawa gata tam sidadu asyur jireupah banda gata. bek gata deungoe hizkia nyan! ulon, raja asyur lon lakee ubak gata mandum mangat gata tundok. meunyo gata ka tatundok, gata jeuet tapajoh boh anggo nyang na lam lampoh gata keudroe, dan gata pajoh boh ara nyang na lam bak gata keudroe, meunan cit gata jieb ie nyang na lam mon gata keudroe, sampoe trok ubak watee gata ulon pinah bak saboh nanggro nyang saban ngon nanggro gata keudroe. nibak teupat nyan na lampoh anggo nyang jipeuhase anggo keu gata, dan ladang gandom nyang jipeuhase teupong keu peunajoh gata. bek gata deungoe hizkia! jihnyan jipeunget gata deungon jipeugah tuhan geupeuseulamat gata. peu kheueh ka lheureh dewa bansa laen nyang peuseulamat nanggro jih nibak keukuasaan lon? dipat kheueh dewa-dewa nanggro hamat dan arpad? dipat kheueh dewa-dewa sefarwaim? peu kheueh na nyang teuka jipeuseulamat samaria? dewa toh nyang ka lheureh jipeulheueh nanggro jih nibak keukuasaan lon? panena hase tuhan geupeuseulamat yerusaleml' " peu nyang jideungoe nyan peunduduek yerusalem hana nyang jaweueb, sabab raja hizkia ka geupeurintah mangat awaknyan seungab mantong. teuma elyakim, sebna dan yoah laju geupriek peukayan awaknyan tanda seudeh, oh lheureh nyan geujak peugah laju ubak raja peue nyang ka jipeugah le peuwira asyur nyan. watee raja hizkia geudeungoe laporan nibak ban lhee droe awaknyan, gobnyan laju geupriek peukayan geuh dan geungui laju ija krong tanda seudeh, lheureh nyan laju geujak u baet tuhan. lheureh nyan gobnyan geukirem elyakim ulee meuligoe, sebna seukeutahre neugahra dan teungku-teungku imeum nyang na pangkat mangat geujak meurumpok ngon nabi yesaya, bin amos. awaknyan pih jingui ija krong. nyoe kheueh peusan hizkia nyang awaknyan peusampoe ubak nabi yesaya, "uroenyoe uroe dukacita; tanyoe jihukom dan jihina. tanyoe lagee inong nyang keuneuk peulahe aneuek, teuma ka habeh teunaga. raja asyur ka jikirem peuwira manyan jih keujajak hina po teu allah nyang udeb. pat tateupeue tuhan po teu allah ka geuteupeue nyang jihina nyan dan keuneuk geuhukom awaknyan nyang hina geuhnyan! le sababnyan meudoa kheueh ubak po teu allah keu ureueng-ureueng geutanyoe nyang mantong udeb." oh ka lheureh jiteurimong peusan nibak raja hizkia nyan, yesaya laju geuyue ubak ureueng nyang geukirem le hizkia nyan mangat jipeusampoe jaweueb nyan, "tuhan meufeureuman, teungku po bek teumakot peue nyang jipeugah le

namiet-namiet asyur nyan bahwa tuhan hana hase geupeulheuh geutanyoe. tuhan keuneuk geupeujeuet raja asyur mangat jikalon saboh haba angen sampoe jihnyan jiwoe u nanggro jih keudroe, dan jihnyan disideh jipoh mate." peuwira manyan asyur nyan meuteume haba bahwa raja jih ka jitinggai lakhis dan teungoh jimumprang jilawan libna, hana padubna jioh nibak teupat nyan. dan jijak kheueh keudeh keu jijak meurumpok ngon raja jih nyan. raja asyur ka jiteurimong haba bahwa pasokan meuse dimiyueb pimpelan tirhaka nibak sudan teungoh jijak keu jijak prang awaknyan. le sababnyan raja asyur laju jikirem surat ubak hizkia, raja yehuda. lageenyoe asoe surat nyan, "bek keunong peunget ubak janji allah nyang gata peubangga nyan bahwa gata hana rhot lam jaroe lon. gata ka tadeungoe bahwa tieb-tieb nanggro nyang jiprang le raja asyur habeh jipeuhanco banmandum. bek gata sangka gata hase teupeulheueh droe. watee indatu lon geupeuhanco banda gozan, haran dan rezef, dan geupoh mate bubena ureueng-ureueng eden nyang na tinggai di telasar, hana meusaboh pih nibak dewa-dewa awaknyan nyang hase jipeuseulamat awaknyan. dipat kheueh raja-raja banda hamat, arpad, sefarwaim, hena dan iwa?" hizkia geuteurimong suratnyan nibak ureueng-ureueng utosan dan geubaca teuma. lheurehnyan gobnyan geujak u baet tuhan dan geuleueng laju surat nyan dikeue tuhan, laju geumeudoa, kheun jihnyan, "tuhan nyang mahakuasa, allah israel, nyang na geudeuk di ateueh kerub, droeneueh kheueh sidroe sagai po teu allah nyang meukuasa ateueh banmandum keurajeuen nyang na ateueh bumoe nyoe. droeneueh kheueh nyang cepta langet ngon bumoe. tuhan, neungieng kheueh kira jih peue nyang teungoh teujadi ateueh kamoe. deungoe kheueh banmandum nyang jihina le sanherib keu droeneueh, allah nyang udeb. kamoe banmandum teupeue, tuhan, bahwa raja-raja asyur le that jipeubina bansa-bansa dan jipeuhanco nanggro awaknyan. meunan cit dewa-dewa awaknyan jitot dan jipeuhanco, sabab dewa-dewanyan meubacut pih hana meukuasa. jihnyan na kheueh patong nyang teupeuet nibak kayee dan batee nyang jipeuet le manusia. nyoe, tuhan allah kamoe, peulheuh kheueh kamoe nibak ureueng-ureueng asyur nyan, mangat le mandum bansa ateueh rheng donya nyoe jiteupeue bahwa droeneueh kheueh sagai-sagai tuhan." lheureh nyan yesaya geukirem peusan ubak raja hizkia bahwa nyan na kheueh sibagoe geujaweueb ateueh doa raja, tuhan meufeureuman, "banda yerusalem jipeukem dan jihina gata, sanherib! peu kheueh gata teupeue soe nyang gata teunak-teunak dan gata hina nyan? ulon, po teu allah israel, allah nyang suci. gata takirem utosan sira tapeugah haba nyang sulet bahwa deungon le geuritan prang gata, gata ka tapeutaklok gunong-gunong manyang di libanon. gata tapeusombong droe bahwa gata ka tateubang bak-bak kayee ceumara jihnyan nyang paleng manyang dan paleng ceudah, dan gata bloh-bloh lam uteuen-uteuen nyang paleng jai. meunan cit gata peubangga droe bahwa gata kueh mon dan gata jieb ie nyang na di nanggro-nanggro aseng, dan bubena tantra gata jigilo-gilo ie krueng nil sampoe

tho. peu kheueh gohlom na gata deungoe bahwa banmandum nyan ka lheureh lon reuncana yoh awaikon illee? dan jinoenyoe ulon peubuet hainyan. ulon kheueh nyang jok keugata kuasa mangat hase gata peutaklhok banda-banda meukuta mangat jeuet keu runga-rungka. ureueng-ureueng nyang tinggai disinan hana meudaya; awaknyan teukeujot dan teumakot that. awaknyan lagee naleueng lam padang atawa naleueng nyang timoh atueuh bubong rumah, nyang tho meunyeo jiyueb le angen timu nyang seu-eum. teuma ulon kuteupeue banmandum keuhai droe gata. ulon kuteupeue peue nyang gata peubuet dan ho nyang gata jak. ulon kuteupeue bahwa beungeh that-that keu ulon, dan ulon ka lon deungoe keuhai beungeh dan sombong gata nyan. jinoe ulon pasang cinawiet nibak idong gata dan keuang bak babah gata, mangat gata ulon tarek dan lon puwoe rot jalan nyang gata jak dan gata teuka." meunan cit yesaya geukirem peusan nyang lageenyoe bagoe ubak hizkia, "nyoe kheueh nyang teuma jeuet keu tando nibak gata. thon nyoe dan thon ukeue gob jipajoh gandom nyang timoh keudroe. teuma oh lheurehnyan awaknyan hase jipula gandom dan anggo dan jirasa hase jih. ureueng yehuda nyang mantong udeb jihnyan maknu lagee seunaman nyang lhok that ukeue jih dan jipeuhase boh. di yusalem dan di atueuh gunung sion teuma na ureueng-ureueng nyang seulam, sabab tuhan nyang mahakuasa ka geupeuteuntee bahwa hainyan teuma teujadi. nyoe kheueh feureuman tuhan keuhai raja asyur; jihnyan hana jiteume tamong lam banda yusalem atawa jitimbak aneuk panah lam banda nyan. tantra-tantra nyang peurisee hana nyang jipeurab ubak banda nyan, dan bansikeulileng hana teuma jipeuget ateueng-ateueng teumpat teukeupong. raja asyur teuma jiwoe rot euh watee jiteuka, deungon hana jitamong lam banda nyan. ulon, tuhan, ka lon peugah haba. banda yusalem teuma lon bila dan ulon lindong deumi keuhoreumatan lon keudroe dan deumi janji ulon deungon hamba lon nabi daud." malam nyan cit teuma malaikat tuhan teuka ubak khimah-khimah ureueng asyur dan laju geupoh mate na 185.000 droe tantra. oh singoh nyan banbungoh that-that manyet-manyet awaknyan ka meutabu beba. le sababnyan jisurot kheueh sanherib, raja asyur, dan jiwoe u niniwe. nibak siuroe, watee jihnyan teungoh iebadat lam kuil dewa nisrokh, jihnyan laju jipoh mate ngon peudeueng le adramelekh dan sarezer, aneuek-aneuek jih nyang agam. lheureh nyan awaknyan jiplueng u ararat. le sababnyan esarhadon, aneuek agam jihnyan nyang laen, jeuet keuraja keugeunantoe jihnyan. watee nyan hizkia teungoh keunong deumam laju rhot bak saket dan rab meuninggai donya. nabi yesaya bin amos, geujak meurumpok ngon gobnyan sira geupeugah, "tuhan meufeureuman teungku amphon geuyue peubeereeh banmandum urosan, sabab teungku amphon hana harapan puleh. hana treb le teungku amphon meuninggai donya." hizkia laju geupaleng ubak binteh beuton, laju geumeudoa, "tuhan, ingat kheueh bahwa ulon nyoe ka lon meungabdi ubak droeneueh deungon seutia dan ate nyang juoe. ulon sabe lon useuha lon seutot keuheundak droeneueh."

laju hizkia geumo meuweueh-weueh. oh ka leupah yesaya geujak, tuhan geuyue gobnyan mangat geugisa ubak hizkia dan peugah laju peusan nyoe, "ulon, tuhan, po teu allah nyang jiseumah le nabi daud indatu gata. ka ulon deungoe doa gata dan ka lon ngieng ie mata gata. ulon keuneuk tamah umu gata limong blaih thon teuk. gata dan banda yusalem ulon peuleuh nibak raja asyur. banda nyoe teutab ulon lindong." geujawueh le yesaya, "nyoe kheueh tanda nyang geubri le tuhan ubak teungku amphon nyang bahwa gobnyan geupeuteupat janji geuh. nibak sinunyok jarom jeuem mata uroe meuneuet raja ahas, tuhan geupeugot bubayang jih nyan teusurot siploh boh gareh." dan jisurot kheueh bubayang nyan siploh boh gareh. oh lheureh hizkia puleh, laju gobnyan geutuleh ca-e pujian nyang lagee nyoe: "ulon peugah, bansiteungoh umu ulon haroh lon jak, jak peuhabeh udeb lon nyang mantong tinggai ubak donya ureueng mate. ulon peugah, ulon hana le lon ngieng tuhan di atueuh bumoe, atawa lon kalon manusia atueuh donya nyoe. nyawong lon putoh, dan trok kheueh ajai ulon, lagee khimah ureueng meurabe nyan teureuloh; lagee ija nyang teukoh nibak alat teutenun; lon pike po teu allah geupeuhabeh masa udeb lon. simalam beungoh ulon kliek-kliek sabab saket, lagee jih tueleung ulon nyoe jipeureumok le saboh singa; lon pike po teu allah geupeuhabeh masa udeb lon. su ulon seumaken paro dan leumoh, lagee cicem leuek ulon nyoe apoh apah. mata ulon hek sabab hana lon ploh lon tangah u langet, tuhan, neupelheueh kheueh ulon nibak keususahan nyoe. peue nyang jeuet ulon peugah? nyoe na kheueh buet tuhan; ulon hana jeuet lon eh sabab lon seudeh. ya tuhan, neubri kheueh keu-ulon udeb deungon haba dan buet droeneueh, bah kheueh lon nyoe udeb keu droeneueh mantong. peudeh ulon nyoe beumeu ubah jeuet keu teuntranman, droeneueh peuseulam ulon nibak bahya; desya-desya ulon ka droeneueh peu amphon bube nyang na. di alam mawot hana nyang pujoe droeneueh, ureueng mate hana meuteume jiharab keuseutiaan droeneueh. teuma ureueng udeb nyang pujoe droeneueh, lagee nyang ulon peubuet nibak uroe nyoe. ureueng syiek-syiek geucalitra ubak aneuek geuh padub na seutia jih droeneueh, ya tuhan. tuhan, droeneueh ka neupeupuleh ulon, teuma kamoe meuca-e kamoe pujoe baet droeneueh deungon cara kamoe putek keucapi, sipanyang udeb kamoe." le yesaya laju geuyue ubak gob mangat jiramah boh ara laju geuyue siliek ubak cumuet hizkia mangat puleh. raja hizkia geutanyong, "peu kheueh tanda jih bahwa tuhan geupeupuleh ulon dan bahwa ulon jeuet lon jak u baet tuhan lom?" kira-kira bak watee nyan, raja nibak nanggroe babel, nyang nan geuh merodakh baladan bin baladan, jideungoe bahwa raja hizkia ban puleh saket. teuma le gobnyan laju geuyuejak ureueng droe geuh ubak raja hizkia keu jipeusampoe surat dan hadiah keu raja hizkia nyan. hizkia geusambot utosan nyan deungon seunang ate dan geutunyok laju ubak awaknyan peue-peue nyang na hareuta keukayaan gobnyan, na kheueh meuh dan pirak, reumpah-reumpah dan minyeuk mangat bee, dan banmandum peuleungkapan tantra

gobnyan. hana meusapeue pi di dalam meuligoe dan bansaboh keurajeuen gobnyan nyang hana geupeuleumah ubak awaknyan. oh ltheuhnyan nabi yesaya laju geumeuhadab ubak raja hizkia dan geutanyong, "pane teuka awaknyan banmandum? dan peue jipeugah le awaknyan?" geujaweueb le hizkia, "awaknyan teuka nibak babel, nanggroe nyang paleng jioh." "peue nyang jikalon le awaknyan didalam meuligoe?" geutanyong le yesaya lom. "peue-peue nyang na," geujaweueb le hizkia. "hana barang nyang na didalam beundahara meuligoe nyang hana ulon peuleumah ubak awaknyan." laju geupeugah le yesaya ubak raja, "tuhan nyang mahakuasa meufeureuman, 'teuma trok saat jih banmandum keukayaan nyang na dalam meuligoe droeneueh, dan nyang ka geugumpoi le indatu droeneueh trok nibak uroe nyoe, jiangkot u babel. hana nyang tinggai. nibak aneuek cucoe droeneueh na nyang jicok dan jipeujeuet keu peugawee didalam meuligoe keu jipeutimang raja babel." geujaweueb le raja hizkia, "jroh that peusan tuhan nyang droeneueh peusampoe ubak ulon." gobnyan geujaweueb lagee nyan sabab geupike: "asai keurajeuen ulon aman dan dame simantong ulon udeb." meunoe kheueh feureuman allah, "hibur kheueh, hibur kheueh bansa ulon! teunang kheueh ate hai ureueng yerasalem, tapeugah kheueh laju bahwa masa jipeujeuet keu namiet manusia ka trok bak akhe. keusalahan awaknyan ka ulon peu amphon, banmandum desya awaknyan ka ulon hukum sampoe dua goe lipat." na su nyang jimeuhoi, "peusiab kheueh rot di padang pasi keu tuhan. peuteupat kheueh jalan raya di padang beulantara keu po teu allah geutanyoe! tieb-tieb panton haroh kheueh teutob, gunung dan buket teupeusabe rata. tanoh meubuket jeuet keurata, dan nyang meuwet-wet teupeu licen. dan keugongan tuhan teuma teupeugah; banmandum umat manusia jikalon. keubit, tuhan keudroe ka geumeujanji!" na su nyang teupeugah, "jak peugah kheueh!" laju ulon tanyong, "peue nyang haroh ulon peugah?" "tapeugah kheueh bahwa manusia nyan lagee naleueng, lagee bungong nyang cit siat sagai keu indahan jih. naleueng ka jeuet keu tho dan bungong pih ka jeuet keu mala, meunyeu tuhan geupeuyueb angen nyang sue eum. keubit, bansa nyan lagee naleueng. neuleueng ka jeuet keu tho dan bungong ka jeuet keu mala, teuma sabda po teu allah geutanyoe keukai siumu masa." jak ek kheueh u ateuhe gunung nyang paleng manyang, dan peusampoe kheueh haba nyang get ubak yerasalem! meudumpek kheueh deungon su nyang nyareng, dan peusampoe kheueh haba get ubak sion! peugah kheueh ubak banda-banda yehuda bahwa po teu allah awaknyan teuma teuka! ngieng, tuhan allah teuka deungon kuasa keu meutindak deungon peukasa. ji-ireng le ureueng-ureueng nyang ka geupeubeubaih le gobnyan. lagee ureueng meurabe nyang peulara kawan beulatang geuh; gobnyan keudroe nyang peusapat awaknyan. aneuek-aneuek bubiri geutiengkue teuma, deungon leumoh leumbot gobnyan geu peutateeh nang-nang beulatang geuh. soe nyang ek ukoek laot raya deungon sineupa jaroe jih, dan nyang ukoek angkasa deungon jeungkai jih?

soe nyang sukat tanoh bumoe deungon sunukat atawa nyang timang gunung dan buket deungon ceng? soe nyang pimpin tuhan, atawa nyang peurunoe gobnyan sibagoe peunaseuh? ubak soe tuhan geuteumanyong mangat meuteume peungeutahuan dan peungeurtian? soe nyang bri peutunyok ubak gobnyan keu meutindak deungon teupat? meunyoe bak tuhan, bansa-bansa nyoe na kheueh lagee si titiek ie didalam tima, lagee sianeuk abee nibak neuraca; pulo-pulo saban phui jih deungon abee nyang ubit. banmandum beulatang nyang na didalam uteuen libanon hana seb mangat teupeu jeuet keu keureubeuen nyang teutot; bak-bak jih citbacut that keu teupeu jeuet keu kayee apui. banmandum bansa hana meumakna nibak gobnyan, sang-sang hana atra nyan dikeue gobnyan. le sababnyan deungon soe gata takeuneuk peusaban po teu allah? soe nyang ta-anggab saban deungon gobnyan? gobnyan buket lagee patong nyang jipeugot le manusia, patong nyang meulapeh deungon meuh dan meulapek pirak. ureueng nyang hana ek jibloe meuh atawa pirak, laju geupileh kayee nyang hana mudah rusak. gobnyan geumita utoh nyang ahli mangat jipeugot patong nyang hana bagaihi goyang. ek kheueh gata hana tateupeue dan hana tadeungoe, dan hana teubri tee ubak gata yoh awaikon ilae? ek kheueh gata hana tapeuphom phon yoh awai pakriban awai jih jeuet donya? nyang cepta nyan na geuduek meutahta di ateuhe bumoe nyang bulat, peunduduek jih leumah ubit that lagee daruet. gobnyan geuleueng langet lagee geuleueng ija, dan geupasang nyan lagee ureueng peudong khimah keu teupat tinggai. gobnyan geupeujeuet ureueng mat kuasa hana meudaya, dan ureueng-ureueng rayeuk ka gadoh keukuasaan jih. awaknyan lagee seunaman muda nyang ban jipeuphon timoh nibak ukeue jih. meunyoe tuhan geupeuteuka angen, awaknyan habeh tho dan jipupo lagee jumpueng. soe nyang gata anggab saban deungon po teu allah nyang mahakudus? deungon soe gata keuneuk peusaban gobnyan? pandang kheueh u langet, dan peurati kheueh! soe nyang cepta bintang-bintang nyan? gobnyan nyang atoe awaknyan lagee pasokan, gobnyan geuteupeue padubna jeumeulah awaknyan banmandum, dan geutawok maseng-maseng deungon nan geuh nyan. hana meusaboh pi nyang gadoh, sabab raya that kuasa tuhan! le sababnyan, hai israel, pakon gata apoh apah, sang-sang tuhan po teu allah gata hana geuteupeue gata lam susah? sang-sang gobnyan hana geupakoe ubak naseb gata, dan hana geungieng peue hak gata? ek kheueh mungken gata hana tateupeue dan hana tadeungoe? tuhan kheueh po teu allah nyang keukai, nyang cepta bansaboh bumoe. gobnyan hantom na geuras hek atawa leumoh; pikeran gobnyan hana ek soe uko. gobnyan nyang peuteuga ureueng nyang hek, geubri seumangat keu ureueng nyang hana meudaya. ureueng-ureueng muda ka jeuet keu hek dan leusu aneuek-aneuek remaja reubah meugantoh. teuma ureueng nyang meuharab ubak tuhan mantong, ureueng nyan teuma meuteume teunaga baro. awaknyan lagee cicem siwah nyang jipo manyang deungon teunaga sayeub jih. awaknyan jiplueng dan hana meunyuem hek,

awaknyan jijak dan hana jeuet keu leusu. feureuman allah, "seungab kheueh dan deungoe kheueh ulon, hai peunduduek nanggroe-nanggroe nyang jioh. meusiab-siab kheueh mangat teuka ubak kanto peungadalan, maju kheueh dan sunyueng kheueh peukara gata. jak geutanyoe ta meusidang meusajan, keu teupeuputoh soe nyang beuna dan soe teuma nyang salah. soe kheueh nyang peugrak peunguasa di timu, dan nyang bri bak jihnyan meunang hana putoh-putoh? soe nyang peujeuet gobnyan geupentaloe bubena bansa, dan geupeutaklok bubena raja keu gobnyan? deungon peudeueng gobnyan sampoe awaknyan meutabu lagee abee, deungon panah gobnyan awaknyan ka habeh meuhambo lajeu jeumpueng jiyueb le angen. gobnyan laju geutiyeub dan maju hana nyang lienteung; langkah gobnyan bagaih, watee geujak lagee rab-rab hana keunong bumoe. soe kheueh nyang peubuet banmandum nyan? soe kheueh nyang peuteuntee jalan jih seujarah? ulon, tuhan, ulon kheueh nyang phon that, dan teutab na sampoe an uroe pagee. peunduduek nanggroe-nanggroe nyang jioh deuh geukalon peue nyang ka ulon peubuet. awaknyan teukeujot dan yo meugam-gam ngon teumakot, laju meusapat meusajan dan jiteuka. banmandum ureueng jiteumanyong sabe keudroe-droe, dan saleng teupeukong ate. tukang kayee jipeukong ate si tukang meuh, ureueng nyang peulipeh logam deungon palee jipujoe ureueng nyang teungoh meunempa di atueuh landasan. geupeugah, 'get lagoena buet jaroe gata'; laju geupeukong deungon labang mangat bek guyang. teuma gata, israel, hamba ulon, umat nyang ulon pileh, gata keuturonan ibrahim, sahabat ulon. gata ka ulon cok nibak ujong-ujong bumoe, ulon tawok nibak teumpat-teumpat nyang jioh. kheun ulon, 'gata kheueh, hamba ulon; ulon hana lon tulak nyang ulon pileh.' bek teumakot, sabab ulon na meusajan gata, bek gundah, sabab ulon na kheueh po teu allah gata. gata ulon peukong dan ulon tulong, ulon peutakteh deungon jaroe ulon nyang jaya. ngieng kheueh, banmandum ureueng nyang beungeh ubak gata, teuma teupeutaloe dan teuseungeh-seungeh. ureueng-ureueng nyang lawan gata, teuma binasa dan habeh teusampoh. gata tamita ureueng-ureueng nyang teuntang droeneueh, teuma awaknyan hana meurumpok ngon droeneueh. ureueng-ureueng nyang muprang deungon gata jinoenyoe ka binasa dan ka habeh gadoh han meuhoe saho. sabab ulon, tuhan, allah gata, nyang mat jaroe ueneueng gata; ulon peugah, 'bek takot, ulon teuma lon tulong gata.' " feureuman tuhan, "bek takot, israel, bahpih gata ubit dan leumoh. ulon kheueh tuhan nyang tulong gata, nyang mahakudus, po teu allah israel na kheueh nyang peuseulamat gata. ngieng kheueh, gata ulon peujeuet lagee papeun peungirek, nyang baro, tajam dan meugigo dua banja. gata tan-girek gunong-gunong dan tapeuhanco; buket-buket gata peujeuet lagee sikeum. gata teuma tatampo awaknyan, laju awaknyan jipupo le angen dan geureutok le angen badee. gata teuma meugeumbira kareuna ulon, tuhan, dan meubangga kareuna ulon, allah israel. meunyoe bansa ulon nyang malang nyan jijak mita ie, dan takue awaknyan tho sabab

glaih, teuma ulon, tuhan, lon jaweueb doa awaknyan; po teu allah israel hana geutinggai umat gobnyan. ulon peujeuet krueng-krueng nyang ie jih jeuet ji ile bak buket-buket nyang ueh; mata ie jiteubiet di atueuh darat. padang pasi lon peujeuet keu mon nyang meue ie; mata ie jiteubiet nibak tanoh nyang tho kreg. padang pasi lon pula ngon bak ceumara, bak zaiton, bak murad dan bak akasia. padang beulantara lon peujeuet keu uteuen, uteuen eru, beurangan dan uteuen ceumara. dan mandum ureueng jikalon dan jiteupeue bahwa ulon, tuhan, nyang peubuet mandum nyan. awaknyan teuma jisimak dan muphom, po teu allah kudus israel nyang peujeuet nyan sampoe teujadi." tuhan, raja israel, geupeugah ubak dewa-dewa, "jak gadu laju peukara gata, dan peugah laju alasan-alasan jih! teuka kheueh, dan ramai kheueh peue nyang teuma teujadi, mangat singoh kamoe teupeue peue akhe jih. tapeugah kheueh keujadian-keujadian yoh masa ilee, tapeutrang laju makna jih mangat kamoe simak. tapeugah kheueh peue nyang teuma teujadi, mangat kamoe teupeue bahwa gata beutoi ilahi. peubuet kheueh laju nyang meuguna atawa nyang rugo, mangat kamoe tahe mante watee teungieng nyan. nyang sikeubit jih, gata dan buet-buet gata nyan hana, dan ureueng-ureueng nyang pujoe gata luwat lumpah na. ulon ka lon grak sidroe ureueng di timu: ulon tawok jihnyan mangat jijak prang rot utara. bubena nyang mat kuasa geugilo-gilo lagee geubloh lam leuhob, lagee ureueng peugot beulangong tanoh jibloh-bloh lam tanoh kliet. soe lamkawan gata nyang ka tapeubuet lagee nyan sampoe kamoe jeuet kamoe peubeuna? teuma lamkawan gata hana nyang tabri tee, hana ureueng nyang na deungoe gata tapeugah haba. ulon, tuhan, nyang paleng awai ulon peugah ubak sion; ulon nyang kirem ureueng ba haba get u yerusalem. watee lon mita lamkawan dewa-dewa, hana meusidroe pih nyang hase jibri peutunyok, dan hana nyang jeuet jijaweueb. beutoi, dewa-dewa nyan hana meuguna, awaknyan na kheueh patong tuangan nyang hana meudaya, dan hana hase jipeubuet sapeue." feureuman tuhan, "nyoe kheueh hamba ulon nyang ulon tulong ureueng nyang ulon pileh nyang peugalak ate ulon. ulon ka lon bri kuasa ubak jihnyan, mangat jiba keuadalan ubak meubagoe bansa. jihnyan hana jikkiek atawa jidumpek deungon su nyang meudeungkeng, su jihnyan hana teudeungoe nibak rot ueh raya. trieng nyang ka leunuet hana jigeuwiet, panyot nyang hu meukleb-kleb hana teuma jipeulon. deungon seutia jihnyan jipeugah nyang beuna, deungon hanaimbang atawa putoh asa, sampoe keuadalan jipeudong di atueuh bumoe. nanggroe-nanggroe nyang jioh jirindu keu ajaran jihnyan." tuhan po teu allah geucebta dan geuleueng langet; gobnyan nyang peugot bumoe deungon banmandum asoe nyang na didalam nyan. gobnyan nyang bri keu manusia nafah dan nyawong mangat manusia nyan jeuet jiudeb. dan gobnyan geupeusan haba nyoe ubak hamba geuh, "ulon, tuhan, nyang hoi dan nyang bri tugaih keu gata mangat gata peujak keuadalan. gata ulon bimbang dan lon peulara mangat jeuet keu peujanjian deungon umat manusia, dan trang

keu banmandum bansa. mangat teupeubleuet mata ureueng buta, dan peubeubaih manusia nibak glab nyang seupot. ulon kheueh tuhan, dan nyan kheueh nan ulon; keu agungan ulon hana lon bri ubak barang gasoe ureueng; dan meusyuehu ulon hana teuma ulon bri keu patong. jinoenoye nyang ulon ramai ka jeuet keu nyataan; ulon keuneuk lon bri tee hai-hai nyang baro; sigohlom nyan teujadi, ka ulon peugah ubak gata." meuca-e kheueh lagu nyan baro keu tuhan, pujoe kheueh gobnyan, hai banmandum bumoe! meugeumuroh kheueh, hei laot dan banmandum asoe jih, meunan cit nanggroe nyang jioh dan banmandum asoe jih nyang na disinan. bah kheueh padang pasi dan banda-banda jipujoe tuhan, bah kheueh peunduduek kedar jipujoe gobnyan! bah kheueh peunduduek banda meusurak meuhubo, dan jimeuhoi-meuhoi di pucak gunung! bah kheueh awaknyan jipeuagong tuhan, dan jipeumeusyuehu gobnyan di nanggroe-nanggroe nyang jioh. tuhan geumaju ngaza lagee sidroe pahlawan, lagee sidroe tantra peunoh seumangat meunyoe jimuprang. gobnyan nyang beutot duplek dalam prang, dan geupeuleumah keu-unggolan gobnyan ubak lawan. po teu allah meufeureuman, "ka treb that ulon iem droe; ulon seungab dan ulon teundroe. bak saat nyoe ka trok watee jih keu lon meubuet, ulon keuneuk kliek lagee inong nyang keuneuk peulahe aneuk. gunung dan buket lon peujeuet ueh dan tandus, banmandum seunaman lon peulayee. panton-panton krungul lon ubah jeuet keu padang pasi, banmandum danau lon peuto kreng. bansa ulon nyang buta lon bimbeng meulalu rot nyang hana awaknyan teupeue; awaknyan teuma lon tuntun bak jalan-jalan nyang hana awaknyan turi. seupot buta lon peujeuet trang keu awaknyan, dan jalan nyang keuwieng keuwot lon peurata. nyan kheueh nyang lon peubuet keu awaknyan, dan nyan pasti lon laksana. ureueng nyang peucaya keu patong beurala dan jiaku nyan sibagoe ilah awaknyan, nyan teuma teuhina dan teupeumalee." tuhan meufeureuman, "deungoe kheueh, he ureueng-ureueng klo! ngieng kheueh, he ureueng-ureueng buta! soe kheueh nyang leubeh buta nibak israel namiet ulon? soe kheueh nyang leubeh klo nibak utosan lon? israel, le nyang gata ngieng, teuma hana gata pako, geulinyueng gata teubuka, teuma hana gata deungoe." tuhan geutem peuseulamat nyan; gobnyan geutem mangat hukom geuh jihoreumat dan jipeu agong. teuma bansa nyan ka habeh jireupah; awaknyan jiteun di dalam-dalam kama di miyueb tanoh, dan jibeukab lam glab. awaknyan jeuet keu ureueng nyang keunong reupah, dan hana nyang teuka jikak tulong. soe lamkawan gata nyang tatem deungoe hai nyoe, dan tasimak keu silanjut jih? soe kheueh nyang jok israel mangat jireupah? bukan kheueh tuhan keudroe? ubak gobnyan kheueh tanyoe meudesya, geutanyoe hana udeb meunurot peurintah gobnyan dan hana ta turot peue nyang geupeurunoe. dan gobnyan geupeujeuet geutanyoe meureuka nyang lumpah hebat, dan meudeurita sabab muprang nyang luwabiasa. beungeh gobnyan sampoe seu-uem di israel lagee apui, teuma geutanyoe hana tasadar, dan hana meurunoe nibak nyang geutanyoe rasa.

israel, meunoe kheueh feureuman tuhan, "ulon kheueh nyang peujeuet dan nyang peuet gata, bek teumakot, gata pasti lon peuseulamat! ulon ka lon hoi gata deungon nan gata, gata na kheueh milek ulon. meunyoe gata neujeumeurang ie, ulon teuma na meusajan gata, gata hana teuma karam dipat mantong gata meuteume susah. meunyoe meulalu apui, gata hana teuma angoh, cubaan-cubaaan nyang brat hana teuma ceulaka gata. sabab ulon kheueh tuhan, po teu allah gata, allah kudus israel, nyang peuseulamat gata. meuse ulon bri sibagoe seuneuboh gata, sudan dan syeba sibagoe geunantoe gata. gata na meuyuem bak mata lon, ulon hareuga dan lon gaseh ubak gata; teuma ulon bri manusia sibagoe geunantoe gata, bansa-bansa sibagoe geunantoe nyawong gata. bek teumakot, sabab ulon lon lindong gata. ulon peurintah ubak utara dan seulitan, mangat awaknyan bubagaih jipeu lheureh laju. bah aneuk-aneuk gata nyang agam jiwoe nibak jioh, dan aneuk-aneuk gata nyang inong jiwoe nibak tieb-tieb ujong bumoe. sabab awaknyan banmandum ka teuhoi atehueh nan ulon, awaknyan ulon cepta keu ji peuangon ulon." po teu allah meufeureuman, "yue kheueh peuleumah droe ukeue bansa ulon nyang buta, bahpi na meumata; nyang klo, bahpi na on punyueg. yue kheueh banmandum bansa jimeugumpoi dan banmandum sukee jimeuhimpon. soe kheueh lamkawan dewa-dewa awaknyan ka jibri tee peue nyang teujadi nibak saat nyoe? soe teuma lamkawan nyan hase geuramai masa ukeue? bah kheueh saksi-saksi awaknyan jikak ukeue, dan jibri bukeuti bahwa awaknyan beuna, mangat mandum jideungoe awaknyan geupeugah haba, bahwa meumang lagee nyan! he umat ulon, gata kheueh saksi-saksi ulon, gata ulon pileh jeuet keu hamba-hamba lon, mangat neuturi ulon dan peucaya ubak ulon, dan neupeu phom bahwa ulon kheueh po teu allah. ulon po teu allah nyang mahasea, hana nyang laen sigohlom dan oh ka lheureh ulon. ulon keudroe tuhan, seulaen nibak lon hana nyang peuseulamat gata. ulon ka lheureh lon peugah ubak gata, ulon kheueh nyang peuseulamat gata, dan bukan ilah aseng nyang na di teungoh-teungoh gata; gata nyang jeuet keu saksi-saksi lon. dan ulon, ulon nyoe po teu allah, keu siumu masa ulon nyoe teutab po teu allah. hana nyang hase geupeuleuh droe nibak kuasa ulon, atawa jihalangai reuncana ulon." tuhan peuseulamat gata, nyang kudus israel geupeugah, "deumi gata, ulon kirem sipa-i u babel, dan ulon dobrak palang-palang pintoe peunjara; surak meuhubo di ureueng kasdim ulon ubah jeuet jimo bae. ulon kheueh tuhan, po teu allah gata nyang kudus, raja gata, nyang cepta gata, he israel!" tuhan ka geupeugot saboh jalan meulalu laot, meulalu ie nyang meubok-bok meubura. gobnyan nyang yue peuwira dan sipa-i-sipa-i gobnyan u mideuen prang, dan awaknyan maju deungon geuritan meuguda. teuma awaknyan reubah, han hase geubeudoh le, awaknyan matee lagee dah panyot nyang lon. tuhan meufeureuman, "hana guna neuingat masa nyang ka lheureh, peucuma neukeunang nyang ka-ka lewat. ngieng kheueh, ulon peubuet situatu nyang baro; jinoenoye ka teupeuphon, peu kheueh han

neukalon? ulon teuma lon peugot jalan dipadang pasi, dan krueng-krueng dalam gle beulantara. beulatang kleut teuma ji peuangong ulon; dan ase srigala dan cicem unta jipujoe ulon sabab ulon nyang peu ile ie di padang pasi, dan krueng-krueng di padang beulantara keu lon bri ie jieb ubak umat nyang ka lon pileh. awaknyan kheueh bansa nyang ulon beutuek keu droe lon keudroe, mangat jeuet geujak peusampoe puja ngon pujo keu ulon." tuhan meufeureuman, "teuma gata israel, hana neuseumah ulon, dan hana le meubakti ubak ulon. gata hana le neuba domba sibagoe keureubeuen nyang teutot, hana neuhoreumat ulon deungon peuseumahan gata. padahai ulon hana lon peubeuban gata deungon keureubeuen, atawa lon peususah gata deungon lon tuntut keumeunyan. gata han neubloe dupa mangat bhee keu ulon, hana neupeupueh ulon deungon gapah keureubeuen nyang gata sie. seubalek jih gata neupeubeuban ulon deungon desya-desya nyang gata peubuet, dan neupeususah ulon deungon buet-buet gata nyang salah. teuma ulon allah nyang sampoh desya gata, ulon peu amphon gata kareuna meunan kheueh sifeuet ulon; ulon hana lon ingat-ingat ubak desya gata. ingat kheueh ubak ulon, jak geutanyoe tajak ubak kanto peungadelen, peugah laju peukara gata mangat jeuet deuh bahwa gata na kheueh beuna. indatu gata nyang phon-phon that ka meudesya, dumna peumimpén ka meubeurontak teuhadab ulon, imeum-imeum gata ka jipeukuto rumah ulon. teuma israel ulon seurah keu jipeuhina, keuturonan nabi yakub ulon peubiyeu jipeubinasa." tuhan meufeureuman, "deungoe kheueh, he nabi yakub hamba ulon, he israel, umat nyang ulon pileh! ulon kheueh tuhan nyang peujeuet gata, nyang peujeuet gata phon lam rahim ma, dan nyang tulong gata. bek teumakot, gata kheueh hamba ulon, umat nyang ulon pileh lom nyang ulon gaseh. sabab ulon teuma lon peu tijoh ie bak tanoh nyang tho, dan nyang peu ile ie krueng-krueng bak tanoh nyang geursang. ulon kubri kuasa keu keuturonan gata, dan nyang bri beureukat keu aneuek cucoe gata. awaknyan teuma udeb sage lubee naleueng nibak bineh ie, lagee bak gandarusa nyang timoh nibak bineh krueng. sidroe deumi sidroe teuma meungaku droe jih sibagoe milek ulon, dan teuka meugabong deungon keuturonan nabi yakub. maseng-maseng jituleh bak paleuet jaroe jih: milek tuhan, dan jipeugah droe jihnyan anggota umat allah." nyoe kheueh feureuman tuhan nyang mahakuasa, raja dan peulindong israel, "ulon po teu allah nyang mahaesha, nyang awai dan nyang akhe. soe kheueh nyang na lagee lon? yue kheueh jih nyang jimeungaku! bah kheueh jihnyan jibri tee dan jibri bukeuti ubak ulon! soe nyang ka rama masa ukeue phon awai sampoe akhe jamen? bansa ulon, bek teumakot atawa teujeut; kon kheueh phon yoh ilee sampoe an jinoo ulon ka lheureu lon ramai peue nyang teuma teujadi? gata nyoe kheueh saksi-saksi lon. peulindong nyang laen hana dan hana lon turi." ureueng-ureueng nyang peugot patong beurala nyan hana meuguna, dan dewa-dewa nyang awaknyan pujoe nyan hana meufaedah. ureueng-ureueng nyang seumah patong nyan buta dan hana jiteupeue sapeue, sabab nyan awaknyan meuteume malee.

sia-sia kheueh teupeuget patong tuangan dan jiseumah nyan sibagoe dewa! beutoi, banmandum ureueng nyang seumah patong teuma meuteume malee. ureueng nyang peuget patong nyan manusia biasa. yue kheueh awaknyan teuka meusajan-sajan; pasti awaknyan teumakot dan malee. teumpeuen beuso laju jicok sikrek logam dan jipeugot laju atra nyan didalam apui dan jiseukok deungon palee. buet nyan jipeubuet deungon habeh teunaga nyang na nibak ureueng nyan. teungoh geumeubuet, gobnyan jiteuka deuk, glaih, dan hek. tukang kayee jiucoe kayee. tukang nyan jigamba pola deungon gapu, juke nyan deungon alat-alat dan jipeujeuet nyan keu patong manusia nyang gagah, laju atranyan jikeubah didalam rumah. barang kali kayee nyang jipeuguna nyan asai jih nibak bak ceumara, bak aron atawa bak kayee sala nyang jiteubang lam uteuen. mungkin cit jihnyan jipula bak salam laju jipreh ujeuen jitoh sampoe bak salam timoh. siladam nibak kayee nyan ji peujeuet keu kayee apui keu alat meu adeueng meunan cit teupat tot ruti dan teu panggang uengkot sie, dan puiah kheueh ate jihnyan. ureueng nyan meu adeueng dan jipeugah, "bit mangat that dan seu-ueu! bit galak that deungon apui nyoe!" leubeh kayee nyang jipeuguna keu teupeuget patong. laju jiteukui jiseumah nyan dan meudoa, "droeneueh kheueh ilah ulon, peuseulamat kheueh ulon!" bit bangai that ureueng-ureueng nyang lagee nyan! awaknyan ka jipet mata dan ate awaknyan sampoe hana muphom sapeue. utoh patong nyan hana sampoe jipike, "kayee nyan siladam ulon tot, dan adang jih ulon ngui keu lon tot ruti dan lon panggang uengkot sie keupeunajoh lon. laju kayee nyang leubeh nyan ulon peuet patong. jadi jinoenyoe ulon seumah sikrak kayee!" buet nyang lagee nyan saban cit deungon jipajoh abee. ureueng nyan ka jipeusisat le pikeran jih nyang bangai, sampoe jihnyan ka han hase le teutulung. jihnyan hana hase jiwa bahwa patong nyang mantong na nibak jaroe jih nyan na kheueh alat teumipee nyang hana meuguna, peucebta dan peuseulamat tuhan meufeureuman, "ingat kheueh banmandum nyoe, he israel, sabab gata kheueh hamba ulon. ulon nyang peujeuet gata, dan gata hamba ulon, israel, ulon hana tuwoe keugata! salah gata nyan ulon use lagee awan, desya gata ulon sampoh lagee sagob. woe kheueh ubak ulon, sabab ulon ka lon peubeubaih gata!" meusurak kheueh ngon geumbira, he langet, meusurak geumbira kheueh, he bagian nyang na dalam bumoe! meusurak kheueh deungon geumbira, he gunong-gunong! meunan cit deungon uteuen dan tieb-tieb bak kayee nyang na lam nyan! sabab tuhan ka geutunyok keuangongan gobnyan deungon cara geuteuboih israel umat gobnyan. meunoe kheueh feureuman tuhan nyang peuseulamat gata nyang peujeuet gata yohphon lam rahim ma, "ulon kheueh tuhan nyang peujeuet peue-peue nyang na, nyang sidroe mantong lon leueng langet, dan hana nyang tulong lon peujeuet bumoe. ulon kheueh nyang peubateue peue-peue nyang ji ramai le tukang ramai, dan nyang peubeuah bubena tukang-tukang tanueng. tutoe haba ureueng carong ulon sangga, keubijaksanaan awaknyan ulon peujeuet keubuet

nyang bangai. ulon kheueh nyang peukong tuteo haba hamba ulon, dan nyang peubuet reuncana nyang jipeugah le utosan lon, ulon peugah bahwa yerusalem teukeumiet lom, dan banda-banda yehuda lon peudong lom; runka-runka jih teupeupuleh teuma. ulon kheueh nyang peugah ubak twie ie laot: surot kheueh! ulon keuneuk peuto banmandum krueng gata. ulon kheueh nyang peugah ubak kores, 'gata kheueh nyang peurintah keu ulon, dan peubuet peue mantong nyang ulon meuheut. peurintah kheueh mangat yerusalem geupeudong lom, dan baet tuhan geupeuduek keunaleueng jih.' "

" tuhan ka geupileh kores jeuet keu raja; gobnyan geutunyak mangat hase jipeutaloe bansa-bansa dan keujiwiet keukuasaan raja-raja. tuhan geupeuhah pintoe-pintoe geureubang keu gobnyan, hana meusaboh pih nyang tinggai teutob. ubak gobnyan tuhan meufeureuman, "ulon kupeusiab rot keu gata; gunung dan buket lon peurata, pintoe-pintoe teumaga ulon peuhanco, dan palang-palang beuso ulon wiet. dan keu gata ulon bri hareuta keukayaan nyang mantong teusom, mangat gata tateupeue bahwa ulon kheueh, tuhan, allah israel, nyang ka tawok gata deungon nan gata. gata ulon tawok dan ulon boh nan gala, bahpi gata hana taturi ulon. lon bri tugaih keugata tatulong bansa israel hamba ulon, sabab awaknyan bansa nyang ulon pileh. ulon kheueh tuhan, hana nyang laen, ulon nyoe po teu allah nyang mahaesa. keu gata ka lon bri sinjata, bahpi gata hana taturi ulon. banmandum nyang ulon peubuet nyan mangat phon di timu sampoe u barat mandum ureueng jiteupeue bahwa ulon kheueh tuhan, hana ilah nyang laen seu laen ulon. ulon kheueh nyang peujeuet trang dan seupot, ulon nyang peuteuka beureukat dan bala. ulon kheueh tuhan nyang peubuet banmandum nyan. di atueh langet ulon peutron nyang meunang lagee ujeuen, bumoe jipeuhah droe keu jiteurimong ie ujeuen nyan, laju jipeutimoh keuseulamatan dan keubeubaihan; dan ulon tuhan nyang peujeuet nyan sampoe teujadi." ceulaka kheueh ureueng nyang jimeubantah deungon peucebta jihnyan; jihnyan lagee beulangong nyang lawan ureueng nyang peugot jihnyan. peu kheueh tanoh kliet nyan jitanyong ubak ureueng nyang peugot beulangong nyan, "peue nyang teungoh neupeubuet nyan?" peu kheueh beulangong nyan apoh apah bahwa nyang peugot jihnyan hana jeuet sapeue? ceulaka kheueh ureueng nyang jipeugah ubak ureueng syiek jih, "pakon ulon nyoe geupeulahe lagee nyoe bagoe?" tuhan, po teu allah kudas israel meufeureuman, "tanyong kheueh ubak ulon keuhai masa ukeue gata. teuma bek tatanyong keuhai aneuek-aneuek ulon, atawa tayue ubak ulon teupeugot sapeue-sapeue. ulon kheueh tuhan nyang peujeuet bumoe, dan nyang cebta manusia mangat jiduek di atueh bumoe nyan. deungon kuasa ulon laju lon leueng langet, dan lon peurintah bak mata uroe, bak buleuen dan bak mandum bintang-bintang. ulon kheueh nyang peugrak kores mangat jipeubuet meukeusut ulon dan jipeudong keuadalan. ulon kupeurata banmandum jalan nyang jijak. gobnyan geupeudong lom banda ulon yerusalem dan geupeuleuh umat ulon nyang

teutawan, hana teusuab dab hana teuma teubayeue." tuhan nyang mahakuasa ka geupeugah haba. tuhan meufeureuman ubak israel, "gatacok kheueh keudroe hase seunaman tanoh meuse dan laba nibak nang-groe sudan. ureueng-ureueng syeba nyang beuhe ngon gagah jeuet keu hakmilek gata; awaknyan jijak dilikot gata deungon jaroe teubeuleunggu. awaknyan jisujut dan meungkaku; 'po teu allah beutoi-beutoi na lamkawan gata; hana ilah laen seulaen gobnyan! po teu allah nyang peuseulamat israel na kheueh allah nyang geusom droe. banmandum ureueng nyang jipeugot patong beurala; teuma geupeumalee dan geuhina. teuma israel geupeuseulamat le tuhan; keuseulamatan awaknyan teutab meuteun. gata hana geupeumalee dan jihina sampoe siumu masa.' "

" tuhan kheueh nyang cebta langet, gobnyan kheueh po teu allah! gobnyan kheueh nyang peujeuet dan nyang bentuek bumoe, nyang peujeuet bumoe nyan khong ngon kukoih dan teutab teudong. gobnyan hana geupeujeuet teupat nyang seungue seunyah, teuma teupat keuteupat tinggai. gobnyan kheueh nyang peugah haba, "ulon kheueh tuhan, dan hana tuhan nyang laen seulaen ulon. ulon hana lon peugah haba deungon seungab-seungab, atawa seucara rahsia. ulon hana lon yue umat ulon israel jijak mita ulon deungon peucuma. ulon, tuhan, lon peugah haba nyang beuna, dan nyang bri tee peue-peue nyang beutoi." tuhan meufeureuman, "meugumpoi kheueh dan teuka kheueh meusajan-sajan, gata banmandum nyang hana keunong lamkawan bansa-bansa! bangai that ureueng nyang jiseuon-seuon patong kayee, dan meudoa ubak dewa-dewa nyang hana hase jipeuseulamat jihnyan. ba laju peukara gata, peugah laju bukeuti-bukeuti jih, dan, bah kheueh awaknyan jimeupakat meusajan-sajan. soe kheueh nyang peugah hai nyan dan nyang bri tee phon yoh masa ilee? peu kheueh kon ulon, tuhan? hana ilah nyang laen, seulaen ulon. ulon kheueh po teu allah nyang ade nyang bri seulamat, hana nyang laen seulaen ulon! he, banmandum ureueng nyang tinggai di atueh bumoe, meupaleng kheueh ubak ulon mangat gata lon peuseulamat, sabab ulon nyoe po teu allah, hana nyang laen! ulon ka lon meujanji, dan janji ulon nyan hana bateue; deumi ulon keudroe ulon meusumpah: tieb-tieb ureueng nyang jimeuteuot dikeue ulon, dan lam basa jih nyan keudroe meujanji seutia ubak ulon. ureueng rame teuma jipeugah, 'keuadalan dan teunaga na nibak tuhan!' banmandum ureueng banci keu ulon ureueng nyan jijak ubak ulon dan laju meuteume malee. teuma keuturonan nabi yakub teupeuseulamat, dan awaknyan jipujoe ulon, tuhan. nyoe akhe riwayat dewa-dewa babel; yoh watee ilee patong bel dan nevo jiseumah, teuma bak saat nyoe ka jiseumah di atueh beulatang, jeuet keu beuban keu beulatang nyang hek. patong-patong nyan hana hase jitulong nyang seun droe jih, awaknyan keudroe teuangkot sibagoe ureueng keunong teuen. nyan kheueh akhe riwayat awaknyan. deungoe kheueh ulon, he keuturonan nabi yakub, gata banmandum nyang na teutinggai nibak umat lon. ulon ka lon peulara gata yoh phon gata lahe u donya. ulon nyoe teutab po teu allah gata sampoe an tuha gata; dan teutab lon jaga gata sampoe gata puteh

ok nibak ulee. ulon nyang peujeuet gata dan teutab lon jaga gata, ulon kutulong dan lon peuseulamat gata. deungon soe gata keuneuk peusaban ulon? peu kheueh na nyang jeuet teupeusaban deungon lon? ureueng jipeulah dompet dan laju jiruwah meuh, dan jitimang pirak jihnyan deungon ceng. gobnyan jijok upah keu tukang meuh mangat jitem peuet patong beurala, laju jiseumah patong nyang jipeuet keudroe. patong nyan laju jilabang dan jikeubah bak tempat jih, ureueng nyan jidong disinan dan hana jeuet jiminah. meunyeu ureueng meudoa ubak jihnyan, le jihnyan hana jijaweueb, dan hana jipeuseulamat jihnyan nibak keususahan. ingat kheueh dan peutimang kheueh, le ureueng-ureueng doraka! ingat kheueh keujadian-keujadian yoh masa ilee; meungaku kheueh bahwa ulon nyoe po teu allah, dan hana nyang laen, ulon allah, dan hana nyang na lagee ulon. phon yoh awai ulon peugah hai-hai nyang dudoe, phon yoh ilee ka ulon ramai peue-peue nyang teujadi. kheun ulon: keuputosan ulon teuma teulaksana, keuheundak ulon pasti ulon peubuet! ulon tawok laju sidroe peunguasa di timu laju jiteuka lagee saboh cicem juwah keujajak peubuet keuputosan ulon. peue nyang ulon peugah pasti ulon peubuet, peue nyang ulon reuncana pasti ulon keureuja. deungoe kheueh ulon, le ureueng-ureueng cungkak, gata nyang sangka bahwa meunang nyan mantong jioh. ulon kupeuto uroe peubeubaihan, keuseulamatan nyang ulon jok hana teutunda le. ulon teuma lon peuseulamat yerusalem dan ulon bri horeumat keu israel." tuhan meufeureuman, "hei babel, tron kheueh nibak keurajeuen gata, dan gata duek kheueh ateuhe abee. muso ngon mameh lagee yoh ilee ka hana le nibak gata. gileng kheueh tepung deungon bate; peulah kheueh tob ulee gata, salob kheueh ija rok sampoe leumah beuteh gata, dan jeumeurang kheueh bubena krueng. ureueng laen jingiang gata nyang teulon, jihina ngon jipeumalee. ulon kublaihan dam ateuhe gata, dan hana meusidroe pi nyang na lon tinggai." po teu allah nyang suci bansa israel geupeubeubaih geutanoyoe, nan gobnyan tuhan nyang mahakuasa. tuhan meufeureuman ubak babel, "seungab kheueh, dan tamong kheueh laju lam seupot buta. gata hana le teupeugah 'ratu keurajeuen-keurajeuen.' yoh masa ilee ulon beungeh ubak umat lon, awaknyan hana le lon anggab atra milek ulon. laju awaknyan ulon seurah ubak gata, dan gata pi hana tagaseh keu awaknyan, sampoe nyang ka tuha-tuha gata teugon deungon keujam han peue takira. gata tapike jeuet keu ratu siumu masa, dan hana gata insaf atawa gata pike peukeuneu lheureh nyang teujadi. sabab nyan deungoe kheueh ulon, hei gata nyang galak tatiyeub keuseunangan! gata pike udeb gata aman, dan hana nyang lagee gata. gata pike gata hana jeuet keu inong balee, dan keuturonan gata hana binasa. teuma sikeubah mantong, lam siuroe, mandua hai nyan sigoe guih teujadi. bah kheueh tapeuguna sihe ngon nurajah mubisa, lakoe gata ngon aneuek gata teutab teucok cit teuma. gata tapike aman bak buet nyang jeuhet gata, gata pike buet nyang jeuhet gata hana geungieng nyata. gata ka jipeusisat le keubijaksanaan dan ieleume peungetahuan gata, gata

pike hana nyang lagee gata. teuma gata keunong bala, ieleume sihe gata hana kuasa jipeusie droe. ubak gata jiteuka le bala ngon haro hara, dan hana hase gata sangga. binasa nyan teuka ngon ban sikreb mata, dan hana gata sangka sigohlom nyan teuka. gata pike mantong bak nurajah dan ieleume sihe gata, nyang peususah gata yoh masa ubit sampoe ka rayeuk gata. pat tateupeue nyan meuguna nibak gata, keu teupeutakot banmandum musoh gata. gata payah that sabab jai lumpah na nariet peuingat. gata yue laju bubena tukang meuramai nyan teuka jijak peuseulamat gata; awaknyan nyang ka lheureh jiseulidek jeueb-jeueb sagoe langet, dan jimurunoe keuhai bintang-bintang, dan ubak tieb-tieb buleuen baro jiramaikan peue nyang ka jeuet keu naseb gata. kalon, awaknyan lagee jumpueng nyang teungoh jipajoh le apui; hana hase jipeuseulamat droe jih keudroe! apui hu nyan lumpah that seu-uem nibak awaknyan, kon apui seu-uem teupat meadeueng. nyan kheueh guna jih bandum tukang ramai nibak gata nyang peususah gata phon yoh masa ubit gata; maseng-maseng awaknyan jijak jitinggai gata; hana nyang teuka jijak tulong gata." deungoe kheueh nyoe, he keuturonan nabi yakub, keuturonan yehuda nyang teungui nan israel, gata peugah gata meungaku po teu allah israel, dan tameusumpah ateuhan nan tuhan. teuma peue nyang gata peugah nyan hana nyang juJoe. bahpi meunan, gata taaku deungon bangga bahwa gata peunduduek banda nyang suci; dan bahwa gata meusadeue ubak allah israel nyang teupeugah tuhan nyang mahakuasa. tuhan meufeureuman, "deungoe kheueh, he israel! peue nyang ka teujadi yoh masa ilee, hai nyan ka treb that ulon bri tee; peue nyang ulon peugah, bagaihan that lon peubuet dan ulon peujeuet bak keunyataan. ulon ku teupeue bahwa gata kreueh that ate, kreueh ulee dan meu-ulee batee. dan yoh ilee ka lheureh ulon ramai; sigohlom teujadi, ka lheureh ulon bri tee, mangat gata bek tapeugah, bahwa nyan na kheueh buet-buet nyang jipeubuet le patong beurala gata. banmandum nubuat ulon nyang gata deungoe ka teujadi; gata haroh taaku bahwa buet ulon nyan beuna. bak saat nyoe ulon bri tee hai-hai nyang baro, rahsia-rahsia nyang gohlom gata teupeue. baro jinoenyoe ulon peugah, dan bukan yoh masa ilee; gohlom na peureunah gata deungoe keuhai nyang nyan, mangat gata hana jeuet tapeugah, bahwa gata tateupeue banmandum nyan. ulon ku teupeue bahwa gata hana jeuet teupeucaya, yoh phon masa ilee gata ka meusyuehu sibagoe ureueng doraka. sabab nyan kheueh hana gata teupeue, hana meusikrak haba pih nyang na trok ubak punyueng gata. ulon kupeuteun-peuteun ubak beungeh lon mangat nan ulon jipeumeusyuehu. ulon peuteun nyan keudroe gata, mangat gata hana jipeubinasa. ulon kupujoe gata lam apui peundeuitaan, lagee pirak nyang teutot murni lam sinungkee apui. nyan ulon peubuet deumi keudroe-droe lon, sabab ulon hana lon peubiyue nan ulon jipeukuto; keumuliaan ulon hana lon bagi deungon soemantong." tuhan meufeureuman, "deungoe kheueh he israel, umat nyang ulon tawok, ulon nyoe teutab po teu allah gata. ulon kheueh nyang awai phon, dan ulon teuma nyang paleng

akhe. jaroe ulon nyang peuduek phon dasai bumoe dan nyang lheueng dumna cakrawala. meunyeo ulon tawok nan jihnyan, awaknyan bagai h tateu. meugumpoi kheueh gata banmandum dan deungoe kheueh nyoe! lamkawan dewa-dewa hana nyang ramai bawha ureueng nyang ulon pileh jigeuseurang babel; jihnyan jipeubuet peue nyang ulon lakee. ulon kheueh nyang peugah dan nyang tawok jihnyan, nyang bimbeng jihnyan, sampoe jih nyang meuhase. peurab kheueh beutoe bak ulon dan deungoe kheueh nyoe, phon yoh ilee ulon peugah haba troh trang; dan tutoe haba lon sabe ulon peujeuet bak keunyataan." jinoenyeo tuhan po teu allah geu kirem ulon dan geubri bak ulon kuasa keudroe. kheun allah kudus israel, peuseulamat gata, "ulon kheueh tuhan po teu allah gata, nyang peurunoe gata peue nyang meuguna keudroe gata, dan nyang bimbeng gata nibak jalan nyang haroh gata jak. seukira jih gata tapeurati bubena peurintah-peurintah ulon, dan keuseujahteuraan gata lagee krueng nyang hantom tho, dan keumujuran gata nyan lagee umbak di laot nyang hantom jipioh. keuturonan gata le jih lagee ano dipante; ulon kujamin awaknyan hana jipeubinasa." jak kheueh dan taplueng kheueh di babel, jak peumaklum kheueh haba nyoe hoho mantong. peusampoe kheueh deungon seumurak nyang geumbira; "tuhan ka geupeuseulamat israel, hamba gobnyan! watee gobnyan geubimbeng awaknyan meulalu padang nyang tho kreg, awaknyan hana teurasa grah. tuhan geuprah gunong batee dan dalam batee nyan laju jiteubiet ie, nibak batee nyan gobnyan geupeu ile laju ie keu awaknyan. hana keuseulamatan keu ureueng jeuhet," meunan kheueh geupeugah le tuhan. deungoe kheueh ulon, he nanggroe-nanggroe nyang jioh tasimak kheueh tutoe haba lon nyoe. tuhan geuhoi ulon sigohlom ulon geupeulahe le ma, gobnyan ka geupileh ulon yoh ulon mantong lam pruet ma. gobnyan geupeujeuet tutoe haba lon tajam lagee mata peudeueng, deungon jaroe gobnyan keudroe geulindong ulon. gobnyan nyang peujeuet ulon lagee aneuk panah nyang teuasah, dan geukeubah didalam sarong mangat jeuet teupeuguna. feureuman gobnyan ubak ulon, "gata kheueh hamba ulon; ulon teuma jipeumulia sabab le gata." teuma di ulon ku peugah, "hek ngon payah ulon peucuma mantong; lon peuhabeh teunaga ulon deungon sia-sia!" teuma dilon yaken tuhan teutab geubila hak ulon, po teu allah geubalaih keulon meunurot nyang ulon peubuet. sigohlom lahe, ulon ka geutawok le tuhan jeuet keuhamba gobnyan, mangat teupeusapat banmandum umat israel, mangat awaknyan jiwoe ubak gobnyan. tuhan geupeujeuet ulon teuhoreumat, po teu allah na kheueh teunaga ulon. tuhan meufeureuman ubak ulon, "tugaih nyang leubeuh raya ka teupreh gata, he hamba lon; gata kon mantong tapulang keuturonan nabi yakub nyang mantong na tinggai sidroe-dua, dan nyang peupuleh keubeusaran sukee-sukee israel, teuma ulon peujeuet trang keu bansa-bansa, mangat jeuet bansaboh donya teupeuseulamat." po teu allah nyang mahakudus nyang peuseulamat israel geupeugah ubak ureueng nyang lumpah teuhina, dan nyang jibanci le bansa-bansa dan nyang jeuet keunamiet le

nyang mat kuasa, "raja-raja teuma jikalon buet-buet ulon; awaknyan jibeudoh jihoreumat ulon. meunan cit le bubena peunguasa teuma jikalon, laju jisujut sira jiseumah." geupeujanji. tuhan meufeureuman ubak umat gobnyan, "watee ulon meukeuheundak, ulon jaweueh; bak uroe ulon peuseulamat, ulon ku tulung gata. gata ulon lindong dan ulon jaga, dan ulon peujeuet peujanjian keu bansa-bansa. ulon puleh nanggroe nyang seungue seungab jeuet keutanoh pusaka keu teupat tinggai. ureueng nyang jipeunjara ulon yue teubiet; nyang na lam seupot ulon ba u teupat trang. bahpi dibuket nyang lapeueng awaknyan hana kureueng sapeue, bansipa-nyang rot na teukeubah peunajoh. awaknyan hana grah atawa deuk, dan hana teuma keunong mata uroe criet dipadang pasi. sabab ulon, nyang sayang keu awaknyan, teuma bimbeng awaknyan dan nyang ba awaknyan ubak asai mata ie. ulon nyang peugot rot ueh meulalu gunong-gunong, banmandum rot ueh raya teuma lon peusabe rata. nibak teupat nyang jioh umat ulon ka habeh jiteuka, di utara, barat dan sinim di seulant." meuca-e kheueh he langet di manyang, meusurak kheueh he bumoe di miyueh, he banmandum gunong, meusurak kheueh geumbira! sabab tuhan geuteuka geujak hibur umat gobnyan, gobnyan geugaseh ubak umat geuh nyang keunong ienanya. teuma peunduduek yerusalem jipeugah, "tuhan ka geutinggai geutanyoe, tuhan geutanyoe ka geutuwoe keu geutanyoe." tuhan geujaweueh sira geupeugah, "peu kheueh mungen sidroe ma jituwoe keu aneuk jih, dan hana jigaseh keu aneuk droe jihnyan? bahpi aneuk nyan jituwoe keu ma jih, ulon teuma lon tuwoe keu gata! yerusalem, ulon sabe lam ingat ubak gata; nan gata lon uke lam paleuet jaroe lon. ureueng-ureueng nyang peudong gata deungon reujang jiteuka, dan nyang ka jipeuhanco gata deungon bagai jiwah laju. ngieng kheueh dan pandang kheueh ban sikeulileng gata, rakyat gata ka meugumpoi dan jijak ubak gata. deumi ulon, allah nyang udeb, ulon peugah, sunggoh, gata bangga deungon peunduduek gata, lagee dara baro inong nyang bangga deungon pisan nyang meuleukek nibak tuboh. nanggroe gata nyang tho kreg lom ngon seungue seungab, bak saatnyoe ka jeuet keusampiek nibak ureueng-ureueng nyang keuneuk tinggai disinan. dan ureueng-ureueng nyang keuneuk peubinasa gata, ka jijak jioh nibak gata. aneuk-aneuk nyang lahe di nanggroe aseng teuma jipeugah ubak gata, 'nanggroe nyoe lumpah that sampiek nibak ulon, neubri kheueh teupat mangat jeuet lon tinggai disinoe.' dan gata teuma tapeugah lam ate, 'soe kheueh nyang peulahe aneuk-aneuk nyan keu ulon? bukan kheueh ulon ka gadoh aneuk-aneuk ulon, dan hana hase le jipeulahe aneuk? ulon ka jiboih dan ka jikireueh dan laju jitinggai sidroe kong. jadi rot pane aneuk-aneuk nyan, dan soe nyang peurayeuk awaknyan?' " tuhan nyang mahamanyang geupeugah ubak umat gobnyan, "ulon kubri tanda keu bansa-bansa dan awaknyan jipulang aneuk-aneuk gata; aneuk-aneuk gata nyang agam jitingkue, dan aneuk-aneuk gata nyang inong jigulam ateh baho. raja-raja jeuet lagee bapak nibak gata, dan ratu-ratu sibagoe ma. awaknyan

jisujuat jihoreumat gata dan jipeumiyueb droe dikeue gata. dan gata tateupeue bahwa ulon nyoe na kheueh tuhan; ureueng nyang meuharab ubak ulon hana lon peukeucewa." gata tatanyong, "peu kheueh mungken jarahan jireupah bak jaroe pahlawan, atawa tawanan jireupah lam reugam ureueng keujam?" tuhan geujaweueb, "nyan kheueh nyang teuma teujadi. tawanan bubena pahlawan jireupah lom. jarahan ureueng keujam teureupah lom. sabab ulon keudroe nyang lawan musuh gata; ulon kupeuseulamat aneuek-aneuek gata. ulon kupeujeuet musuh gata mabok darah, sampoe awaknyan jimupoh sabe keudroe-droe. dan banmandum umat manusia jiteupeue, bahwa ulon, tuhan, peuseulamat gata; nyang mahateuga, po teu allah nabi yakub, nyang teuboh gata." tuhan meufeureuman ubak bani israel, "he umat ulon, gata pike ulon ku use gata lagee sidroe ureueng lako jiuise peurmoh jih? meunyoe meunan, dipat surat taleuek jih? gata pike ulon nyoe kupeubloe gata, lagee sidroe ayah jipeubloe aneuek jih ubak ureueng nyang tunggee utang? kon! gata jiteun dan jitiek, sabab desya dan buet nyang jeuhet gata keudroe! pakon nibak umat lon hana meusidroe pih nyang na jijaweueb, watee ulon teuka lon jakhoi awaknyan? peu kheueh awaknyan seungab mantong sabab jisangka ulon hana hase lon peulheueh dan lon peuseulamat awaknyan? nyang sikeubit jih, ateuh peurintah lon laot nyan hase tho kreg, krueng-krueng ulon peujeuet keupadang pasi, dan bubena uengkot habeh mate dan mubea banga. langet lon peujeuet itam seupot ngon glab, teuma ulon tob lagee ija kabong." tuhan nyang mahamanyang geupeurunoe ulon peugah haba, mangat tutoe ulon jeuet teupeukhong ureueng nyang laeueh. tieb-tieb beungoh gobnyan geupeubeudoh hasrat ulon mangat lon deungoe ajaran gobnyan keu ulon. tuhan geubri keu ulon peungeurtian; ulon hana beurontak atawa meupaleng nibak gobnyan. ulon jok rueng lon keu ureueng nyang seunuet ulon; dan mieng ulon keu ureueng nyang bot janggot lon. ulon hana lon peupaleng muka watee ulon jihina dan jiludah teuma. sabab tuhan po teu allah geutulong ulon, sabab nyan ulon hana geubri malee. ulon peukhong ate lon mangat tabah; ulon teupeue ulon hana geupeumalee. sabab po teu allah rab, gobnyan nyang peugah bahwa ulon hana meusalah. soe nyang keuneuk meubantah deungon lon? jak geutanyoe ta teubiet meusajan-sajan. soe nyang keuneuk lawan ulon? yue kheueh ureueng nyan jipeurab ubak ulon. keubit, tuhan nyang mahamanyang geubila lon, soe ureueng nyang jijeuet peugah ulon nyoe meusalah? banmandum nyang tudoh ulon nyan teuma leunyab lagee ija brok nyang jipajoh le keuralueb. he gata nyang horeumat tuhan, dan nyang deungoe tutoe haba hamba gobnyan, rot ueh nyang gata jak mungken seupot, dan hana cahya nyang jipeutrang keu gata; teuma percaya kheueh ubak tuhan; meusadeue kheueh ubak allah gata. he gata nyang keuneuk peuceulaka ureueng laen, gata teuma geupeuceulaka le reuncana gata keudroe. tuhan kheueh nyang peubuet nyan sampoe teujadi, gata geuseksa nyang paleng hebat. tuhan meufeureuman, "deungoe kheueh ulon, hei gata nyang keuneuk

teupeuseulamat dan gata jak ubak ulon jak lakee tulong. ingat kheueh gunong batee bak teupat gata teupeuet, dan bak ruheung batee di teupat gata teukueh. ingat kheueh ubak indatu gata nabi ibrahim dan sara nyang peulahe gata; watee ulon hoi nabi ibrahim, jihnyan hana meu-aneuek; laju lon bri beureukat dan lon keuturonan nyang le ubak jihnyan. hei yerusalem, ulon teuma kujok hiburan keu gata, dan mandum nyang tinggai nibak runγκα-runγκα gata. padang-padang gata nyang tho kreg lon peujeuet keu lampoh bungong, saban lagee eden keubon ulon nyang subo. bak teupat nyan ureueng meusurak meuhubo ngon meusukaria dan meunyanoye syuko ngon su nyang meutaga. simak kheueh su ulon nyoe hei bansa ulon, deungoe kheueh tutoe haba lon hei umat lon. ulon jok peungajaran lon keu bansa-bansa, hukom-hukom lon jeuet keutrang lam udeb awaknyan. seulamat nyang ulon bri ka rab that-that; watee meunang ulon karab teuka. ulon keudroe lon peurintah bansa-bansa. nanggroe-nanggroe nyang jioh teuma jipreh-preh ulon sira jiharab buet ulon nyang luwabiasa. tangah kheueh u langet dan ngieng kheueh u bumoe; langet teuma gadoh lagee asab dan bumoe teuma useueng lagee bajee tuha, mandum peunduduek jih mate lagee jamok nyang han meuguna. teuma seulamat nyang ulon bri teutab siumu masa, dan keuhai meunang ulon hana keuneulheuh. deungoe kheueh ulon, hei bansa lon, gata tateupeue peue nyang beuna; ajaran lon teukeubah lam ate gata. bek teumakot meunoye gata jihina le manusia, bek yo meunoye gata jiseurapa le awaknyan. awaknyan teuma binasa dan habeh, lagee peukayan jipajoh le keuralueb dan ija bulee bubiri meunan cit keuralueb seuba. teuma keuseulamatan nyang ulon bri teutab na siumu masa, keuhai ulon meunang teutab na tron meutron sipanyang masa." neujak kheueh keunoe ya tuhan, neutulung kamae, peuseulamat kheueh kamae ngon kuasa droeneueh. beudoh kheueh lagee yoh masa ilee watee droeneueh neupeuhanco rahab dan neutob naga laot sampoe mate. droeneueh kheueh nyang peutho laot, ie laot barollah nyang lhok lumpah na. droeneueh nyang peuket rot lam ie laot nyan, mangat ureueng-ureueng droeneueh peuseulamat jeuet jijeumeurang. teuma, ureueng-ureueng nyang geupeubeubaih le tuhan jiwoe awaknyan jitamong u yerusalem deungon surak meubura ruman awaknyan meucahya sabab galak ngon geumbira. awaknyan jiseumurak galak meuhubo, seudeh ngon apoh apah habeh teusampoh. tuhan meufeureuman, "ulon kheueh nyang bri hiburan ubak gata. pakon gata takot keu manusia nyang fana, ubak manusia nyang jitiek lagee naleueng? ek kheueh tuwoe gata keu tuhan nyang cehta gata nyang leueng langet dan nyang peuduek keunaleueng bumoe? pakon siuroe seupot gata yo keu ureueng beungeh tukang teumeugom nyang ka siab-siab jipeuhabeh gata? nyang sikeubit jih meungamok awaknyan hana lut ateuh gata bubena ureueng nyang teuteun reujang teupeu ltheuh; awaknyan hana kureueng peunajoh, dan hana teuma mate jipeutamong lam jrati. sabab ulon kheueh tuhan po teu allah gata, nyang peuteuka geulumbang raya lam laot sampoe umbak jih

meutaga-tagat. nyang mahakuasa na kheueh nan ulon. ulon kheueh nyang leueng langet dan nyang peudeuk keunaleueng bumoe. ulon peugah ubak sion: gata kheueh umat ulon; ulon nyang bri peungajaran lon ubak gata dan lon lindong gata ngon kuasa lon." beudoh kheueh hei yerusalem, beudoh kheueh! hukuman nyang geupeu rhot le tuhan ateuah gata sabab beungeh gobnyan keu gata, teuma nyan ka gata peujak sampoe seulesoe. nibak peunduduek gata hana nyang bimbeng gata, nibak nyang tinggai gata hana nyang tuntong gata. ateuah gata rhot dua boh beuncana; akibat prang nanggroe gata hanco binasa dan rakyat gata mate sabab le deuk. hana nyang gaseh atawa nyang bri hiburan. bak tieb-tieb ujung rot ureueng-ureueng gata reubah ka habeh teunaga lagee rusa nyang keunong taron. ateuah awaknyan rhot beungeh tuhan, dan keunong dhot bak allah gata. deungoe kheueh hei ureueng-ureueng nyang teuteugon, nyang meuputa-puta lagee ureueng mabok! meunoe kheueh feureuman tuhan, tuhan allah gata nyang bila gata, "azeb seungsara ulon bri teungoh teuka beungeh lon, teuma lon cok lom nibak gata. beungeh ulon teuma seungab, dan gata hana peureulee gata tanggong seungsara. azeb seungsara nyan ulon bri keu ureueng nyang ienanya gata, nyang ka lheuëh jiyue eh gata ateuah tanoh, dan jigilo-gilo gata, siulah-ulah gata rot raya gobnyan jak." beudoh kheueh, he yerusalem, beudoh kheueh! peukhong kheueh ate gata! dan tasok kheueh laju peukayan keubeusaran gata! he yerusalem, banda nyang suci, ureueng kuto hana jitamong le rot babah pintoe geureubang gata. beudoh kheueh nibak lam abee, he yerusalem, geureutok kheueh abee nyang na meuleukek nibak gata. peulheueh kheueh rante nyang na teuiikat bak takue gata, he peunduduek sion nyang keunong teun! tuhan meufeureuman ubak umat gobnyan, "gata jipeubloe deungon cuma-cuma, trok bak saat gatapi geupeuleuh deungon cuma-cuma. yoh masa ilee gata tajak u nanggroe meuse dan tinggai disinan sibagoe ureueng aseng. oh lheuëhnyan asyur laju ji prah gata aka alasan. jinoenyoe peue urosan ulon disinoe? ureueng babel jiteun gata meunan mantong, awaknyan nyang tindeeh gata deungon sombong dan hana putoh-putoh jihina ulon. sabab nyan gata teuma ta aku keudroe bahwa ulon nyoe na kheueh po teu allah, dan bak watee nyan gata tateupeue bahwa ulon kheueh nyang peugah haba ubak gata." keubit galak that oh lon ngieng ka teuka utosan; awaknyan jijak jilintaih gunong-gunong sira jiba haba get, haba seujahteura, bri tee keuseulamatan keu sion; kheun gobnyan, "allah gata na kheueh raja!" deungoe dumpék geumbira peungawai banda, awaknyan seumurak meuhubo meusabe rata! sabab deungon mata ulee keudroe awaknyan geukalon tuhan geuriwang u sion. meusurak meuhubo kheueh, he runga-runka yerusalem, sabab tuhan geuhibrat umat gobnyan dan geupeubeubaih yerusalem. tuhan geupeuleumah keukuasaan gobnyan dikeue meubagoe bansa. dan bansaboh bumoe teuma jikalon keudroe keuseulamatan nibak po teu allah geutanyoe. jak weeh laju keudeh! tinggai kheueh disinan banda babel, he gata nyang taba peukakaih baet allah! bek kheueh

tacukeh barang nyang kuto; tapeugleh kheueh droe gata sigohlom tajak. gata hana teugisa-gisa watee tabot langkah, dan hana lagee ureueng nyang jipeuplueng droe. sabab tuhan teuma geubimbeng gata; po teu allah israel geubimbeng gata nibak sigala peunjuru. tuhan meufeureuman, "sikeubit jih, hamba ulon teuma meuhase; jihnyan jisanjong dan teupeumanyang. yoh watee ilee jai that ureueng teukeujot oh watee jingieug jihnyan, ruman jihnyan jipeurusak sampoe hana deuh le lagee hi manusia. teuma bak wateunoe le that bansa nyang teuhireuen-hireuen, dan bubena raja-raja nanggroe ka kalu lidah sabab ka tahe. awaknyan jikalon dan jimuphom, nyang sigohlom nyan hana awaknyan teupeue." bansa nyan jijaweueh, "soe pateh ubak peue nyang ka kamoe deungoe? ubak soe nyang ka geupeugah kuasa tuhan? tuhan meuharab hamba gobnyan nyan lagee tarok kayee nyang timoh bak tanoh nyang tho kreng. hana nyan lagak nibak jih nyan oh ta eu rupa; dan hana nyang teutarek ate keutameuheuet atranyan. tanyoe tahina dan tapeujoh gobnyan, ureueng nyang kaseb seungsara dan kajra jitanggong deurita nyang phet. hana meusidroe pih nyang jitem kalon gobnyan, dan geutanyoe keudroe pih hana tatem pakoe ubak gobnyan. nyang sibeuna jih peunyaket geutanyoe kheueh nyang geutanggong le gobnyan, seungsara geutanyoe kheueh nyang geudeurita, padahai geutanyoe ta sangka peundeuritaan gobnyan kheueh hukuman po teu allah keu geuhnyan. teuma geuhnyan geupeuluka sabab desya-desya geutanyoe, geupeujra sabab buet jeuhet geutanyoe, gobnyan teuhukom mangat geutanyoe teupeuseulamat sabab le darah gobnyan geutanyoe geupeupuleh. geutanyoe banmandum ka sisat lagee bubiri nyang sisat, maseng-maseng teumita rot geuh keudroe. tuhan ka geupeurhot ateuah jihnyan buet jeuhet geutanyoe banmandum. gobnyan teuseksa deungon keujam, teuma geutanggong nyan deungon saba. babah gobnyan hana geupeugah sapeue lagee aneuek bubiri nyang teuba ubak teumpat si atawa lagee nang bubiri nyang teungoh teucuko bulee. gobnyan jiteun dan jiba u kanto peungadelan, laju ji ireng dan jihukom mate. hana ureueng nyang tem pako keu naseb geuhnyan; gobnyan mate sabab desya bansa geutanyoe. gobnyan jikubu meusajan deungon ureueng jeuhet; jrat gobnyan di teungoh-teungoh ureueng kaya, bahpi gobnyan hantom na geupeubuet buet nyang jeuhet, dan hantom na geuteumipee." tuhan meuheut bahwa gobnyan haroh meudeurita, dan geupeujok droe sibagoe keureubeuen peumaphon desya. le sababnyan gobnyan panyang umu dan geuteume ngieng keuturonan geuh meulalu gobnyan keuheundak tuhan teulaksana. le sababnyan tuhan meufeureuman, "oh ka seulesoe meudeurita seungsara, jihnyan teuma mubahgia dan pueh. hamba ulon nyan, nyang jipeumangat that ate ulon, ka jitanggong hukuman nyang lumpah that le; deumi jihnyan ulon kupeumaphon awaknyan. deungon rila jihnyan jiseurah udeb jih dan jitamong bak itongan ureueng jeuhet. jihnyan jiseun desya ureueng rame dan jimeudoa mangat awaknyan teupeumaphon. dan ulon bri keuihnyan ureueng rame sibagoe hadiah, dan jihnyan meuteume jeumba

meusajan deungon ureueng-ureueng nyang beuna." yerasalem, yoh watee ilee gata lagee inong malee, nyang hana hase teupeulahe aneuek. teuma bak saat nyoe meusurak kheueh, dan meuca-e kheueh deungon geumbira! sabab aneuek-aneuek gata jai lumpah na, leubeh le nibak aneuek ureueng inong nyang hantom jitinggai le lakoe. peuluwah kheueh laju khimah-khimah teupat tinggai gata; tasambat kheueh laju bubena talo teumalo dan peukong kheueh laju bubena bajo! gata teuma meutamah luwah wie ngon uneuen, peundudek gata teuma jitinggai nibak tanoh bansa-bansa dan jiduek laju bak banda-banda nyang bak wateunyeoe ka tinggai seungue. bek teumakot, gata hana teupeu malee; hana teuma teuhina dan teuseungeh-seungeh. gata teuma tatuwoe ubak hana seutia gata yoh watee muda; hana teuingat le ubak keuseupian gata sibagoe ureueng balee. nyang cebta gata lagee teungku lakoe nibak gata, po teu allah kudus israel na kheueh nyang bri seulamat keu gata. tuhan nyang mahakuasa, nyan kheueh nan gobnyan, gobnyan po teu allah nyang mat kuasa bansaboh donya. israel, gata lagee sidroe peurumoh muda nyang seudeh sabab jitinggai le teungku lakoe. teuma po teu allah keutawok gata lom dan geupeugah, "teuma sikeujab mantong ulon tinggai gata; deungon peunoh gaseh sayang gata ulon cok lom teuma. sikeujab sagai ulon meupaleng nibak gata sabab beungeh ulon nyan hana ngon peusa. teuma deungon geunaseh nyang abadi ulon gaseh keu gata." meunan kheueh geupeugah le po teu allah peuseulamat gata. "lagee masa nabi nuh ulon meujanji bahwa ie raya hana le meunganong di ateuhe bumoe, meunan cit bak saat nyoe ulon meujanji bahwa ulon hana beungeh atawa lon ancam gata lom. bahpi gunong-gunong dan bubena buket meuguncang, ulon hana lon pioh lon gaseh gata. peujanjian dame lon teutab ulon mat sabe." kheun tuhan nyang geugaseh gata. tuhan meufeureuman, "he yerasalem banda nyang malang, gata hana meudaya dan hana nyang hibur. dasai-dasai gata teumalon keubah lom, deungon batee-batee nyang meuhareuga. kuta-kuta lon peudong deungon binteh deulima, babah-babah pintoe geureubang deungon batee peumata, beuton-beuton gata nibak ratna mutu manikam. bandum peundudek gata jeuet keu murit lon, dan awaknyan teuma makmu seujahteura. gata teupeudong ateuhe dasai keuadelan, teupeujioh nibak meubagoe nyang teumakot dan peunindasan. meunyeoe gata jiseureubu, kon kheueh ulon nyang yue, dan soe mantong nyang seurang gata jihnyan rhot. ulon kheueh nyang cebta utoh beuso nyang kipah apui teumpeuen seunjata. ulon kheueh nyang peujeuet tantra nyang ngui sinjata nyan keu teupemate gob. teuma tieb-tieb seunjata nyang teu teumpeuen keujilawan gata, atranyan hana meuhase. dan tieb-tieb tudohan nibak kanto peungadalan teuma gata bukeuti bahwa nyan na kheueh salah. ulon jok hadiah nyan kheueh meunang keu hamba-hamba lon," meunan kheueh feureuman tuhan. tuhan meufeureuman, "jak kheueh keunoe gata bandum nyang glaih ngon tho rukueng, tajieb kheueh, ie ka teukeubah. teuka kheueh gata nyang hana meupeng, teurimong kheueh gandom nyang

hana peubayeue, dan pajoh kheueh! meunan cit ngon ie anggo dan ie susu ka teukeubah, teurimong kheueh deungon cuma-cuma. keupeue tabloe peue-peue mantong nyang hana puih, dan tajak buet keu peue nyang hana hase jipeutroe? seutot kheueh peurintah ulon, teuma gata tamakheun nyang jroh, dan tarasa kheueh hidangan nyang lazat. deungoe kheueh, he bansa lon, tajak kheueh ubak ulon, gata teuma lon bri udeb seujati. deumi geunaseh dan seutia nyang ulon jok keu nabi daud, ulon kuikat janji nyang keukai deungon gata. sikeubit jih, jihnyan ulon peujeuet keu peumimpin dan panglima, saksi nibak kuasa lon keu bansa-bansa. gata teuma ta tawok bansa-bansa aseng, dan awaknyan jijak laju ubak gata, deumi ulon, tuhan po teu allah gata, allah kudus israel, sabab ulon ka lon peu agong gata." tawoe kheueh ubak tuhan simantong na meuteume; tahoi kheueh gobnyan simantong gobnyan rab. bah kheueh ureueng jeuhet jipeujroh nibak udeb jih, dan jiubah jalan pikeran nyang na, bah kheueh jihwoe ubak tuhan, mangat meuteume gaseh sayang gobnyan. bah kheueh jihnyan jipaleng ubak geutanyoe, sabab tuhan geupeumphon deungon sigala murah ate. tuhan meufeureuman, "pikeran lon kon pikeran gata, dan rot ulon kon rot gata. sidubna manyang langet di ateuhe bumoe, euet nyan kheueh manyang jih pikeran ulon ateuhe pikeran gata, dan rot ulon di ateuhe rot gata. lagee ujeuen jitron di langet, dan hana jigisa, teuma habeh basah bumoe, tanoh gumbo dan seunaman pih timoh, jibri hase keu teutabu dan teupajoh, meunan cit deungon tutoe haba nyang ulon peugah hana jiriwang ubak ulon deungon sia-sia, teuma meuhase teupeubuet peue nyang ulon lakee, dan meuteume peue mantong nyang ulon lakee. gata tatinggai babel deungon sukacita, dan ji intat uluwa deungon seulamat. gunong dan buket meugeumbira dan meusurak ria, bak-bak kayee nyang na di blang jipok-pok jaroe. bak kayee ceumara jeuet keugantoe tamah meuduro, dan seunaman bungong jeuet geunantoe tamah meupaya. banmandum nyan na mangat ulon jipeumeusyehu; sibagoe tanda abadi nyang hana gadoh." tuhan meufeureuman ubak umat gobnyan, "peubuet kheueh peue nyang ade dan nyang paih deungon hukom lon. sabab hana treb le ulon teuka lon jak peuseulamat gata dan keuadelan lon kupeudeh teuma. ulon jok beureukat keu ureueng nyang peupeunoh keu uroe sabat dan hana jipeukutoe uroe sabat nyan. ureueng nyang hana peubuet buet nyang jeuhet ureueng nyan ulon peusaneut deungon jroh that." ureueng aseng nyang meusapat deungon umat tuhan hana jeuet jipeugah, "tuhan hana geu idhin ulon kuseumah gobnyan meusajan deungon umat geuh." ureueng nyang teugasi hana jeuet jiseumike "ulon hana hase jeuet keu wareuga umat tuhan, sabab ulon hana hase lon peutron keuturonan." tuhan meufeureuman ubak awaknyan, "meunyeoe gata tapateh keu uroe sabat, dan meunyeoe gata seutia ubak peujanjian lon dan tapeubuet peue nyang galak ate ulon, teuma nan gata teuingat lam baet lon dan lamkawan bansa ulon. nyang lagee nyan leubeh get nibak na aneuek-aneuek miet inong dan agam. keu gata ulon bri nan nyang abadi nyang hana jituwoe le gob."

tuhan meufeureuman ubak ureueng-ureueng aseng nyang ka jitamong lam itongan umat tuhan, nyang jicinta tuhan dan meubakti ubak gobnyan, nyang jihoreumat keu uroe sabat dan seutia ubak peujan-jian gobnyan, "gata lon ba u sion, nibak buket lon nyang suci, dan ulon bri keugeumbiraan di rumoh lebadat lon. keureubeuen-keureubeuen nyang gata peuseumah di miseubah lon teuma lon teurimong. baet lon teuma jipeugah rumoh doa keumeubagoe bansa." meunoe kheueh feureuman tuhan nyang mahamanyang nyang intat israel jiwoe nibak teumpat nyang teuboih, "ulon kuba ureueng-ureueng nyang laen keujimeusapat deungon awaknyan nyang ka meusahoe." tuhan geuyee ubak bansa-bansa jiteuka lagee beulatang buah keujikak teugom umat gobnyan. feureuman tuhan, "peumimpén-peumimpén bansa lon na kheueh ureueng-ureueng buta! awaknyan hana jiteupeue sapeue. awaknyan lagee asee kalu nyang hana jeuet jimeudroh, teuma jie mantong dan meulumpo. mangat that-that awaknyan jie! awaknyan lagee asee leuha nyang hana troe-troe. peumimpén-peumimpén nyan hantom na muphom. maseng-maseng jipeubuet ban galak droe dan jimita laba jih keudroe. ureueng-ureueng mabok nyan jipeugah, 'jak geutanyoe ta jiebing anggo dan tajibie sipuih-puih ate! singoh leubeih get nibak uroe nyoe!' " ureueng nyang get dan nyang saleh meuninggai donya, hana nyang muphom atawa jitem kalon jih nyan. oh ka mate, ureueng nyan geupeujioh nibak bala dan jimeureuhat deungon dame. teuma gata, he kawom nyang meudesa, teuka kheueh mangat teuadili! gata hana leubeih get nibak tukang sihe, ureueng nyang galak nibak buet mukah dan lunte! soe kheueh nyang gata peukem? soe kheueh teuma nyang gata hina? kon kheueh gatanyan keuturonan ureueng sulet dan peumbeurontak? gata taseumah dewa-dewa keusuboran deungon tapeubiyeu droe keudroe gata anyot lam nafeusu di miyueb bak-bak kayee keuramat gata. gata takubu aneuek-aneuek gata nibak panton krueng, lam luengkiek-luengkiek batee. le sababnyan ka pantaih gata peusapat batee-batee nyang lisen nibak teumpat nyan. nyan kheueh jeumba gata! ubak batee-batee nyan teuma gata leng ie anggo dan tapeuseumah gandom. gata pike ulon nyoe galak keubanmandum nyan? gata tajak u pucak-pucak gunong keutajak peuseumah keureubeuen dan tapeupih nafeusu beureuhi gata. gata keubah patong-patong gata nyang dajee bak babah-babah pintoe rumoh gata. gata ka tatinggai ulon. gata ka tasuet peukayan gata dan laju ta-ek ubak teumpat eh nyang luwah deungon geunaseh gata nyang gata jok upah mangat jitem eh deungon gata, laju gata peupih nafeusu gata. gata taboh minyeuk dan bee-bee harom nyang meuhalak, laju tajak seumah dewa molokh. gata kirem utosan u nanggroé-nanggroé nyang paleng jioh, trok ubak donya ureueng mate. hana tapike keu hek dan putoh asa gata hana tapioh tajak mita dewa-dewa. gata pike awaknyan hase jijok seumangat baro, sampoe gata hantom leumoh. tuhan meufeureuman, "soe kheueh dewa-dewa nyan nyang jipeujeuet gata teumakot, sampoe gata meusulet dan hana taingak keu ulon? peu kheueh gata hana taseumah le ulon kareuna

ulon ka treb that lon iem droe? teuma ulon bri tee ubak gata; keusalehan gata nyan na kheueh peuleusu, dan banmandum buet gatanyan hana meuguna keu droe gata. meunyoé gata takliké ngon teumawok, bah kheueh patong-patong nyan nyang peuseulamat gata! awaknyan teuma gadoh jipupo le angen dan leunyah deungon saboh nafah nyang teuproh! teuma ureueng nyang meulindong nibak ulon teuma jeuet keuwareh nanggroé nyan dan jiseumah ulon di baet lon." po teu allah meufeureuman, "peuget kheueh dan peusiab kheueh rot keu umat lon, kireueh kheueh keudeh peue-peue nyang na rintangan." sabab meunoe kheueh feureuman allah nyang mahamanyang dan kudus, nyang meukuasa keusiumu masa, "ulon tinggai di teumpat nyang manyang dan suci, teuma meunan cit lamkawan ureueng-ureueng nyang miyueb ate dan nyang meunyeusai ubak desya-desya jihnyan, keu teupeupuleh seumangat dan harapan awaknyan. kon keusiumu masa lon peusalah umat ulon; dan hana sabe-sabe ulon beungeh, mangat awaknyan bek patah seumangat, padahai ulon kheueh nyang peu udeb awaknyan. desya serakah awaknyan nyang peujeuet ulon nyoe beungeh, sababnyan awaknyan lon hukom dan ulon tinggai. teuma awaknyan kreueh that ulee dan teutab jipileh rot jih keudroe. ulon ka lheureueng pi-e awaknyan, teuma awaknyan teutab lon peupuleh cit teuma. ulon lon bimbeng dan lon tulung awaknyan dan peumangat ate ureueng nyang meuduka. ulon lon bri keuteuntram keu banmandum ureueng, bah kheueh nyang tho meunan cit nyang jioh-jioh. ulon kupeupuleh umat lon. teuma ureueng jeuhet na kheueh lagee laot nyang meugeulumbang hantom na reuda. ie laot nyang ile nyan laju jipeuron broh dan leuhob. hantom na teuntram nibak ureueng meudesa." tuhan meufeureuman, "neudumpek kheueh seuhabeh teunaga! jakbri tee kheueh ubak umat lon desya-desya awaknyan. awaknyan jiseumah ulon tieb-tieb uroe, dan meuheut jikeuneuk teupeue keuheundak lon, siulah-ulah awaknyan ka jipeubuet buet nyang get, dan seutia ubak hukom lon. awaknyan jipeugah bahwa awaknyan galak jiseumah ulon dan jimeuharab ubak hukom lon nyang ade." bansa nyan jitanyong, "keupeue guna jipuasa meunyoé tuhan hana geukalon? keupeue guna geutanyoe ta peumiyueb droe meunyoé gobnyan hana geungeng keu geutanyoe?" tuhan meufeureuman, "sikeubit jih, teungoh gata tapuasa, gata tamita laba keudroe dan tapeuras ureueng-ureueng nyang gata upah. teungoh puasa, gata meupake dan tameulo dan meutindak deungon keukeurasan. tapike deungon cara lagee gata puasanyan sampoe teugrak ate lon mangat lon deungoe doa-doa gata? meunyoé gata puasa, gata seksa droe gata keudroe; gata peutukui ulee gata lagee on naleueng. gata lheureng ija krong dan tasipreuk abee, dan ta-eh di ateuh nyan. peu kheueh nyan nyang gata peugah puasa? tapike ulon galak deungon buet gata nyang lagee nyan? nyoe kheueh puasa nyang ulon lakee: gata peulheueh kheueh laju beuleunggu peunindasan dan beuban keuadalan, dan tapeubeubaih kheueh ureueng-ureueng nyang teutindeeh. gata weuek kheueh meunajoh gata

deungon ureueng-ureueng nyang teungoh deuk, teurimong kheueh ureueng-ureueng geulandangan di rumah gata. tajok kheueh peukayan ubak ureueng teulon, dan bek tatulak syedara gata nyang peureulee teutulong. dan trang meucahya keugata lagee mata uroe beungoh, dan luka-luka gata teuma bagai puleh. ulon na meusajan gata keu lon peuseulamat gata. deungon na ulon teuka gata teulindong nibak rot toh mantong teuka bahya. watee tameudoa, ulon teuma lon kabui doa nyang gata lakee nyan. meunyo gata tameuhoi ulon, ulon teuma lon jaweub. bekle tatindeeh sabe keudroe-droe gata, ploh kheueh buet meumusoh dan meufeuteunah. tajok kheueh makheun keu ureueng-ureueng nyang deuk dan tatulong kheueh ureueng-ureueng nyang teutindeeh. meunyo gata tapeubuet nyang lagee nyan, dan seupot glab nyang na ban sikeulileng gata jeuet keu peungeuh lagee uroe. ulon sabe lon bimbeng gata dan lon peutroe gata bak tanoh nyang tho kreng; ulon teutab lon peulara gata mangat teutab seuhat dan teuga. gata teuma jeuet lagee seunaman nyang seb ie jih, lagee mata ie nyang hantom na tho-tho. banda nyang ka treb that reuloh nyang ka tinggai ruengka-ruengka teuma gata peudong lom di ateuh tapak nyang awai, gata teuboh nan 'bansa nyang peudong lom binteh-binteh meubeuton dan tapeusanaut rumah-rumah nyang ka hanco.' "tuhan meufeureuman, "horeumat kheueh keu uroe sabat sibagoe ureueng tuhan. bek tapakoe ubak keupeuntengon droe gata keudroe watee uroenyan. peuraya kheueh uroe nyan sibagoe uroe nyang bahgia; horeumat kheueh uroe tuhan deungon cara hana tajak keudeh keunoe; dan meunan cit bek sagai tajak buet atawa meututoe hana nyang hana meuguna. dan gata geumbira sabab meungabdi ubak ulon. ulon teuma lon peujeuet gata teuhoreumat bansaboh donya. gata teuma udeb seunang deungon tanoh pusa nibak nabi yakub, indatu gata. ulon, tuhan ka lon peugah haba." bek tapike tuhan leumoh that keu geupeuseulamat gata, atawa kroe that hana geudeungoe meulakee gata. sabab buet gata nyang jeuhet nyan kheueh le gobnyan hana geudeungoe watee gata meudoa ubak gobnyan. desya-desya gata kheueh nyang peujioh gata nibak po teu allah. gata salah sabab meusulet dan tapeubuet jeuhet, dan tapeubuet keukeurasan dan tapoh ureueng sampoe mate. gata tagadu peukara hana alasan dan tameuhakem deungon hana ade. gata meusulet dan tapeuandal nyang sia-sia; gata tapeuet reuncana keu tapeucalaka ureueng laen dan tapeubuet buet nyang jeuhet. reuncana-reuncana gata nyang jeuhet teuba mawot lagee boh uleue meubisa. meunyo boh uleue nyan teupeubeukah, jiteubiet kheueh uleue lam boh nyan. reuncana nyan meubacut pih hana meuguna nibak gata, lagee peukayan nyang teuteunun lam uempueng laba-laba! gata hana ploh-ploh tareuncana nyang jeuhet, dan meuheut deungon bagai teulaksana. hana ragu-ragu laju gata poh mate ureueng-ureueng nyang hana meusalah. ho mantong nyang gata jak, gata ka tatinggai nyang reuloh-reuloh dan keubinaan. gata hana tauseuha udeb nyang rukan, dan bandum buet gata hana nyang ade. rot gata meupalet-palet, dan ureueng nyang seutot rot

gata nyan hana mubahgia. bansa nyan jipeugah ubak po teu allah, "jinoenyo ka kamoe teupeue pakon droeneuh hana neupeuseulamat kamoe nibak ureueng-ureueng nyang tindeeh kamoe. kamoe mupreh-preh peungeuh, teuma nyang na seupot tulo. kamoe meuraba-raba lagee ureueng buta; cot uroe timang kamoe meugantoh lagee teungoh malam; lamkawan ureueng udeb kamoe lagee ureueng mate. kamoe teumakot that dan seudeh hana teukira; kamoe jak mita keuadalan; teuma teutab hana; kamoe meuharabkan keuseulamatan, teuma teutab sia-sia. lumpah that le keujeuhetan kamoe ubak droeneuh; desya-desya kamoe teupeusalah kamoe. kamoe bit-bit that kamoe sadar keujeuhetan nyang kamoe peubuet, dan kamoe teupeue desya-desya kamoe. kamoe kamungkie deurontak ubak tuhan, dan hana kamoetem seutot po teu allah kamoe. kamoe ka kamoe tindeeh ureueng laen dan ka meunyeuleweng; pikanan kamoe sisat, dan tutoe hana kamoe sulet. hukom nyang ade ka teukireueh, dan keuadalan ka teupeujioh. keujorjan ka jipeubeuah lamkawan rame, dan keutulosan ka jitiek bak bineh. hana le ureueng nyang juoe, dan soe nyang peujioh bak buet nyang jeuhet, jihnyan keudroe ka jeuet keu keureubeuen keujeuhetan." tuhan ka geukalon, dan gobnyan hana galak ubak keuadalan nyang ka hana le. gobnyan hireuen bahwa hana nyang teuka dan hana teuma nyang bila. dan gobnyan laju geupeuguna kuasa geuh keudroe keu geupeuseulamat dan geubri keu awaknyan keumeunangan. gobnyan geupeuguna keuadalan dan keuseulamatan sibagoe bajee beuso dan tupi waja. gobnyan hana teukat keu geupeupuleh keuadaan dan geubalaih keuhana adalan. gobnyan geubalaih musoh-musoh geuh nyang suisai deungon buet awaknyan keudroe. meunan cit bansa-bansa nyang na di pulo-pulo nyang jioh hana geutinggai nibak keunong hukom gobnyan. kuasa dan keuangongan gobnyan teuma jitakot le soemantong ureueng phon ditimu meunan cit di barat. gobnyan teuma teuka lagee ie krueng nyang tajam ji ile nyang jipeuteuka le angen badee raya. tuhan meufeureuman ubak umat gobnyan, "ulon teuma teuka u yerusalem ulon jak peuseulamat gata bandum nyang meutobat nibak desya-desya gata. ulon peuet peujanjian deungon gata: gata ulon bri kuasa lon dan ajaran ulon keu siumu masa. peurunoe kheueh ubak aneuek-aneuek gata mangat awaknyan pih jeuet jipeurunoe tron meutron phon saat nyoe trok siumu masa." beudoh kheueh dan beujeuet kheueh keu trang, he yerusalem, sabab trang keuseulamatan gata ka teuka; allah geupeu peungeuh gata deungon keumuliaan gobnyan. bumoe habeh teutob deungon seupot, bansa-bansa pi ka habeh keunong seupot buta; teuma trang tuhan geudong ateuh gata, cahya keuteuka gobnyan ka jeuet keunyata di ateuh gata. bansa-bansa nyang laen laju jijak meuron-ron ubak trang gata, raja-raja teutarek le cahya nyang teubiet keu gata. ngieng kheueh peue nyang ka teujadi ban seukeulileng gata; rakyat meuhimpon keujijakwoe ubak gata. aneuek-aneuek gata nyang agam teuka di jioh, aneuek-aneuek gata nyang inong teutiengkue. ban tangieng nyan gata hireuen dan ruman gata

meucahya; gata teuharu dan rayekut that ate. hareuta bansa-bansa laju jiba ubak gata, keukayaan di meurandeh laot teuka meulimpah ubak gata. nanggroe gata habeh jihudom le unta nyan le, awaknyan teuka di midian dan efa. di syba le jiba le ureueng meuh ngon keumeunyan, sira jipujoe buet tuhan. kameng bubiri kedar jiba keu gata bubiri agam nibak nebayot kateukeubah keu iebadat gata. keureubeuen nyan keubit that galak ate tuhan gobnyan jipeurame baet gobnyan nyang peunoh keagongan. peu kheueh nyan nyang meulayang lagee awan lagee cicem mirah pati nyang teungoh po jiwoe bak cintra? nyan kheueh kapai-kapai nyang teuka meusaoh meuasoe umat po teu allah teupeuwoe di nanggroe jioh. pirak dan meuh na jiba sajan keu teupujoe tuhan allah gata; keu po teu allah israel nyang mahasuci, nyang peujeuet umat gobnyan teuhoreumat. tuhan meufeureuman ubak yerusalem, "ureueng aseng jipeudong lom binteh beuton gata, dan bubena raja jipeutimang gata. yoh masa ille ulon hukom gata bak watee ulon teungoh teuka beungeh, teuma watee nyoe ulon ka teuka gaseh sayang. uroe malam babah pintoe geureubang gata teutab teuhah, mangat hareuta keukayaan bansa-bansa laen jijak intat ubak gata, meunan cit deungan raja-raja awaknyan sibagoe tawanan. bansa dan keurajeuen nanggroe nyang hanajitem tundok ubak gata, bansa dan keurajeuen nanggroe nyan binasa dan gadoh sapan sapa. keubanggaa uteuen libanon jiangkot ubak gata kayee bak beurangan, bak ceumara dan bak aron keuteupeudong baet lon meutamah seumarak, dan teupeulagak teupnat meugiloe lon. aneuek-aneuek miet nyang tindeeh gata jijak sujut, nyang ka ltheueh jihina gata jitundok, gata teuboh nan 'banda tuhan', 'sion, banda allah kudus israel'. gata hana jitinggai dan jibanci, dan hana jipeubiyeu seungue ngon seungab. gata ulon peujeuet keubanggaa nyang abadi, teupnat meugeumbira siumu masa. gata jipeulara le bansa-bansa dan le raja-raja, lagee sidroe ma geupeulara aneuek gobnyan. dan baro kheueh gata teupeue bahwa ulon nyoe na kheueh tuhan, peuseulamat gata, dan bahwa po teu allah israel nyang teuga nyang peuleueh gata. ulon ba meuh sibagoe geunantoe peurunggu, dan pirak sibagoe geunantoe beuso. ulon jok peurunggu sibagoe geunantoe kayee, dan beuso sibagoe geunantoe batee. nanggroe gata lon peujeuet aman dan teuntram, dan jipeurintah deungan cara ade. hana le haba keuhai keukeurasan di nanggroe gata, keuhai nyang hanco dan nyang reuloh di wilayah gata. lagee binteh beuton nyang kukoh ulon lindong gata, dan gata tapujoe ulon sibagoe nyang peuseulamat gata. gata hana peureulee jipeutrang le mata uroe oh watee uroe, dan hana peureulee jipeutrang le buleuen oh watee malam. sabab ulon tuhan nyang peu peungeuh abadi keu gata, ulon peutrang gata deungan keagongan lon. keu gata na mata uroe nyang hantom ji lob, dan buleuen nyang hantom ubit. sabab ulon tuhan nyang peutrang gata siumu masa masa meuseudeh gata teuma habeh. peunduduek gata jijak buet deungan beutoi, awaknyan meuteume nanggroe keu siumu masa. awaknyan lagee kayee teugasi nyang lon pula keudroe, keu ulon jiteupeue keagongan lon. me-

nan cit le keuluwarga nyang ubit ngon hina teuma jeuet keu bansa nyang raya dan teuga. ulon tuhan bagaih meutindak, bak saat nyang teupat." kuasa tuhan nyang mahamanyang na nibak ulon; gobnyan nyang pileh dan nyang kirem ulon keu lon jakba haba get ubak ureueng gasien dan peupuleh ureueng nyang ka hanco ate; keu lon jakpeugah ubak ureueng nyang teuteuen bahwa awaknyan deungan sigra teupeubeubaih, dan ubak ureueng-ureueng nyang na lam glab bahwa awaknyan laju teupeulheueh. gobnyan geuyue bak ulon mangat lon jak peusampoe haba bahwa ka trok watejih tuhan geupeuseulamat; keu geuhibur banmandum nyang meuduka cita, dan teubalah bandum musoh-musoh awaknyan; keu teubri keugeumbiraan dan suka cita keu ureueng nyang teungoh seudeh dan keunong musibah; keuteu ubah seudeh awaknyan jeuet keu ca-e puja ngon pujoe. awaknyan teuma jeuet lagee bak kayee nyang geupula le tuhan keudroe. awaknyan jipeubuet nyang jroh dan nyang beuna, dan tuhan jipeuagong teuma. awaknyan jipeudong banda-banda nyang ka treb that reuloh dan jipeudong teupnat-teupnat nyang ka treb that seungue. he, bansa lon, ureueng aseng teuma jipeutimang gata; awaknyan jirabe beulating nyang gata peulara dan jijak buet nibak blang ngon lampoh anggo gata. gata jiboh nan hamba po teu allah dan jiboh nan imeum tuhan geutanyoe. gata tarasa keukayaan bansa-bansa laen dan gata bangga sabab hareuta awaknyan. sabab gata ka meuteume malee dua goe lipat, meunan cit ngon noda dan hinaan ka jeuet keu bagian lam udeb gata, dan gata meuteume hareuta waresan dua goe lipat di nanggroe gata dan meuteume suka cita nyang abadi. tuhan meufeureuman, "ulon cinta that ubak keuadelan dan lon banci that ubak buet nyang jeuhet ngon peunindasan. ulon kujok upah gata deungan seutia, dan teuikat janji nyang abadi deungan gata. keuturonan gata meusyehu bansigom donya, jituri le meubagoe bansa. dan banmandum ureueng jingieung nyan jiangkee teuma, bahwa bansa nyoe ulon bri beureukat." jaweueb yerusalem, "ulon galak that ate sabab tuhan, ate lon meusukacita sabab po teu allah. lagee teungku linto agam dan dara baro inong nyang jingui piasan meubagoe rupa, meunan kheueh tuhan geupeungui keu ulon bajee seulamat dan meunang. lagee bijeh nyang ka teusipreuk, teuma timoh jeuet keusinaman, meunan kheueh tuhan po teu allah geupeutimoh seulamat dan banmandum bansa jipujoe gobnyan." deumi yerusalem ulon kupeugah haba, meunan cit deumi sion ulon hana lon iemdroe, sampoe jihnyan geupeuseulamat dan meunang meucahya lagee suwa oh malam teuka. he yerusalem, bansa-bansa jingieung gata meunang, raja-raja geukalon keubeusaran gata. gata geuboh nan deungan nan nyang baro, tuhan keudroe nyang boh nan gata nyan. gata jeuet lagee mahkota nyang gagah bak jaroe tuhan, mahkota keurajeuen bak jaroe allah gata. nan gata kon le 'nyang jitinggai', nanggroe gata kon le 'nyang keuseupian'. gata teupeugah, 'nyang geusayang le po teu allah', dan nanggroe gata geuboh nan, 'nyang ka meugatib', sabab tuhan galak that keu gata, gobnyan lagee teungku lakoe keu nanggroe gata. lagee sidroe

aneuk muda nyang meukawen ngon sidroe aneuk dara, meunan kheueh peuncebta gata meukawen deungon gata. lagee sidroe teungku linto galak that ate oh geukalon peurmoh droe, meunan kheueh po teu allah teuma geugalak keu gata. bak binteh beuton yerusalem ulon keubah ureueng tantra nyang jaga; uroe ngon malam awaknyan hana jeuet tinggal seungab, teuma haroh ji-ingat ubak po teu allah ubak janji nyang ka geupeubuet le gobnyan. awaknyan hana jeuet jipeubiyeu jihnyan seungab mantong sigohlom gobnyan geupeudong lom yerusalem, dan geupeujeuet nyan meusyuehu bansaboh bumoe. tuhan ka geumeujanji ngon geumeusumpah dan teuma geupeubuet deungon kuasa gobnyan; "ulon hana lonjok le gandom gata keu musoh ureueng aseng hana le jijieb ie anggo nyang ka gata useuha deungon susah payah. teuma gata nyang ka gata peusapat hase panen, teuma tamakheun hase nyan sira tapujoe tuhan; dan gata tapot boh anggo, tajieb ie jihnyan nibak seuramo baet ulon." he peunduduek yerusalem, teubiet kheueh rot pintoe geureubang, peusiab laju rot ueh keu ureueng-ureueng nyang woe. neupeugot laju rot ueh raya, takireueh laju bubena batee, tapeudong laju bupanji-bupanji keu bansa-bansa. tuhan geubri peusan nyang lagee nyoe ubak banmandum peunjuru bumoe, "tapeugah laju ubak peunduduek sion, 'ngieng, tuhan nyang bri seulamata ka trok geuteuka! gobnyan ji ireng le ureueng-ureueng nyang ka geupeubeubaih le gobnyan.'" awaknyan teuma geuboh nan: 'umat suci'; 'umat nyang geupeuseumat le tuhan'. yerusalem teuma geupeugah 'banda nyang geurayu le tuhan', 'banda nyang hanale geutinggai le tuhan'. "soe kheueh geuhnyan nyang teuka nibak bozra di edom? bajee gobnyan mirah, peukayan gobnyan seumarak; watee geujak gagah ngon peukasa." tuhan "ulon kheueh tuhan nyang hase lon peuseumat dan teuka deungon haba keumeunangan." tukang jaga "pakon peukayan droeneueh mirah that lagee nyan, lagee bajee ureueng prah ie boh anggo?" tuhan "sidroe lon mantong kutamong u teupat teu prah ie anggo lamkawan umat lon hana nyang tulong lon. bansa-bansa lon gilo-gilo watee ulon teungoh teuka beungeh, lagee lon gilo-gilo ateuh boh anggo. darah awaknyan meusiprek sampoe bulut keunong bajee lon, dan meulabo bansaboh peukayan lon. ulon ka lheueh lon reuncana uroe peue awaknyan lon balaih, dan watee lon peubeubaih umat lon. ulon jakmita, teuma hana nyang tulong, ulon hireuen pakon hana nyang tulong. laju teunaga lon keudroe nyang tulong ulon, deungon beungeh lon nyan nyang tulong lon. nibak beungeh ulon nyang meutaga nyan, laju lon gilo-gilo bubena bansa-bansa; lon peubinasa bubena awaknyan, dan darah awaknyan ulon ro meujeujeueh ateuh tanoh." ulon keuneuk jak peugah geunaseh tuhan dan lon pujoe gobnyan sabab nyang geupeubuet. deungon meulimpah gaseh gobnyan geubri beureukat keu umat, sabab gobnyan na gaseh sayang dan geunaseh gobnyan hana keuneulheueh. tuhan meufeureuman, "keubit, awaknyan na kheueh umat lon, aneuk-aneuk miet nyang hana keucewa." teuma geuhnyan jeuet keu nyang peuseumat awaknyan, geuhnyan keudroe keunong keususahan

awaknyan. tuhan hana geukirem utosan atawa duta; gobnyan keudroe kheueh nyang peubeubaih awaknyan sabab geunaseh dan balaih gaseh gobnyan. gobnyan sabe geupeulara awaknyan phon yoh ilee. teuma awaknyan beurontak keubit that peudeh ate tuhan. dan gobnyan laju geubalek jeuet keu musoh awaknyan gobnyan keudroe nyang jak lam prang geulawan awaknyan. dan awaknyan teuingat ubak jamen ilee, jamen nabi musa, hamba tuhan. awaknyan jitanyong, "dipat kheueh tuhan nyang ka geupeujak bubena peumimpin umat gobnyan rot laot? dipat kheueh tuhan nyang ka geubri kuasa gobnyan keu awaknyan? dipat kheueh tuhan nyang geudampeng nabi musa deungon jaroo gobnyan nyang teuga dan peukasa, nyang geuprah ie dikeue awaknyan mangat nan geuhnyan meusyuehu siumu masa? dipat kheueh tuhan nyang ka geupeujak awaknyan geuba rot lam laot nyang lhok? lagee guda rot padang pasi, awaknyan hantom meugantoh." tuhan geuba awaknyan bak teupat seumiyoh, lagee beulating peulara nyang ji-ireng jijak peumeurot ubak naleueng diblang. meunan kheueh cara jih gobnyan geubimbeng umat gobnyan, mangat nan gobnyan jipeumulia. ya tuhan, neungieng kheueh rot lam syeuruga, nibak teupat tinggai droeneueh nyang suci dan mulia. dipat kheueh gaseh dan peukasa droeneueh? dipat kheueh keurahaman dan gaseh sayang droeneueh? bek kheueh neupeuteun nyan nibak kamoe. kon kheueh droeneueh bapak kamoe? nabi ibrahim dan nabi yakub hana geuturi kamoe. teuma droeneueh, ya tuhan, na kheueh bapak kamoe, peuseumat kamoe phon yoh watee ilee. ya tuhan, pakon neupeubiyeu kamoe nyoe sisat? pakon droeneueh neupeukeueh ate kamoe sampoe kamoe hana teumakot ubak droeneueh? neugisa kheueh deumi hamba-hamba droeneueh, deumi umat droeneueh, milek pusaka droeneueh. pakon neupeubiyeu musoh jigilo-gilo lam baet droeneueh, dan ureueng laen jijak peukuto buket droeneueh nyang suci? droeneueh neupeubuet ateuh kamoe, siulah-ulah droeneueh hantom na meukuasa ateuh kamoe; dan siulah-ulah kamoe nyoe hantom na jeuet keu umat droeneueh. teukuwak kheueh langet dan neutron kheueh laju, ya tuhan, neupeujeuet kheueh bubena gunong-gunong meuhayak ngon meunguncang dikeue droeneueh, lagee apui hu bak kayee sampoe ie ateuh sinungkee pih hase ju. neupeuleumah kheueh kuasa droeneueh ubak musoh-musoh droen, sampoe bubena bansa yo meugam-gam dikeue droeneueh. ka lheueh neupeubuet buet-buet nyang luwa biasa, nyang hana kamoe sangka-sangka. droeneueh neutron, dikeue droeneueh bube na gunong ka meunguncang. hantom na lom nyang deungoe, dan gohlom na nyang kalon bahwa seulaen droeneueh, na ilah nyang meutindak, nibak ureueng nyang meuhak ubak jihnyan. droeneueh nyang sambot ureueng nyang jujeu dan nyang udeb meunurot keuheundak droeneueh. droeneueh beungeh keukamoe, teuma kamoe teutab meudesya beutoi yoh phon ilee kamoe meusalah. kamoe banmandum na kheueh ureueng nyang ka kuto, meunan cit buet kamoe nyang jroh pih ka ceumar ngon kuto. kamoe gadah sabab buet kamoe

nyang jeuhet lagee on nyang layee jipupot le angen. hana nyang meudoa keu kamoe, atawa nyang lakee tulong ubak droeneueh, sabab droeneueh neusom ruman droeneueh nibak kamoe, dan neupeubiyeu kamoe jipeubinasa le desya-desya kamoe. teuma droeneueh, ya tuhan, na kheueh bapa kamoe; kamoe nyoe tanoh kliet, dan droeneueh nyang peugot kamoe; kamoe banmandum na kheueh peuneuget jaroe droeneueh. le sababnyan bek kheueh kamoe nyoe neubungeh that, ya tuhan, bek le neuingat-ingat keudesya kamoe; ngiang kheueh, kamoe nyoe umat droeneueh. banda-banda droeneueh nyang suci ka lagee padang pasi, yerusalem ka jeuet lagee padang pasi nyang seungue. baet po teu allah nyang suci dan agong teumpat indatu kamoe geupujoe-pujoe droeneueh, nyan pih ka habeh tutong deungon apui; bandum teumpat nyang kamoe galak ka habeh reuloh jeuet keu runga-runga. droeneueh deuh neungieng banmandum nyan, ya tuhan, pakon kheueh droeneueh neuseungab mantong? peu kheueh droeneueh neupeubiyeu kamoe meudeurita nyang leubeh peudeh? tuhan meufeureuman, "ulon siab lon jaweub umat lon, teuma awaknyan hana meudoa ubak ulon. ulon ka siab meunyo awaknyan jijak meurumpok deungon ulon, teuma awaknyan hana jitem jak mita ulon. bansa nyan hana jitem tawok lon, bahpi ulon ka siab lon jaweub: nyoe kheueh ulon! ulon sabe lam siab lon sambot umat ulon, teuma awaknyan galak that bak buet nyang beurontak. bansa nyan jipeubuet buet nyang jeuhet dan jiseutot reuncana jih keudroe. awaknyan hana putoh-putoh jipeuteuka beungeh ulon sabab jipeuseumah keureubeuen bak lampoh-lampoh keu dewa-dewa dan jitot keumeunyan nibak miseubah-miseubah jihnyan. oh watee malam awaknyan jijak ubak guha-guha dan bak kubu-kubu ureueng mate keujjak lakee naseuhat ubak areuwah-areuwah. awaknyan jipajoh sie bui dan ji-jieb kuwah uengkot sie nyang hareuem. awaknyan jipeugah, 'jak kheueh beujloh keudeh, bek tupeeuh ngon kamoe, sabab kamoe nyoe suci dan teumeungkreeh nibak gata!' ulon hana ek lon teun oh lon ngiang pi-e awaknyan! beungeh ulon nyoe keu awaknyan lagee apui nyang hana jitem lon. hukoman keu awaknyan ka teutuleh dikeue ulon. keubit, ulon hana lon kalon ban. ulon kubalaiah buet nyang jeuhet awaknyan sabab desya awaknyan dan desya indatu awaknyan. awaknyan jihina ulon deungon cara jitot keumeunyan keu dewa-dewa di teumpat seumujoe di ateuheh buket. ulon kubalaiah awaknyan nyang suisai deungon buet awaknyan yoh watee ilee." tuhan meufeureuman, "boh anggo nyang mantong na ie jih hana teutiek, teuma teupeujeut keu ie anggo. meunan cit deungon bansa lon hana lon peubinasa banmandum, sabab lamkawan awaknyan mantong na meungabdi keu ulon. na siladum ureueng israel nibak sukee yehuda lon bri beureukat, dan keuturonan awaknyan meuteume tanoh gunong ulon. ureueng-ureueng nyang ka lon pileh nyang meungabdi ubak ulon nyan kheueh nyang tinggai disinan. umat lon jiseumah ulon; bubiri dan leumo awaknyan jirotn naleueng di tanoh data saron dan di panton akhor. teuma bukon meunan naseb ureueng-ureueng nyang jitinggai

ulon, nyang hana jipako ubak sion, buket lon nyang suci, nyang peuseumah sajian ubak gad dan meni, dewa-dewa keubeuruntongan dan naseb. gata bandum mate sibagoe keureubeuen keukeurasan. sabab, watee ulon hoi, gata hana tajaweueh, dan watee ulon marit, gata hana tadeungoe. gata leubeh talawan ulon dan tameubuet keubuet nyang jeuhet. nyang sikeubit jih, ureueng nyang seumah ulon jimakheun, teuma di gata deuk hana tateume pajoh sapeue. awaknyan ji-jieb ie, teuma di gata grah tho rukueng. awaknyan meugeumbira, teuma di gata meuteume malee. nyang sikeubit jih, awaknyan seumurak geumbira, di gata tamo deungon peudeh. ureueng-ureueng nyang ulon pileh jicok nan gata sibagoe teukutok: "seumoga tuhan nyang mahamanyang geupoh mate gata lagee awaknyan!" teuma ureueng nyang taat ubak ulon teuma ulon bri nan nyang baro. soe mantong ureueng nyang na di nanggro nyan nyang jilakee beureukat, teuma jilakee beureukat nibak po teu allah nyang seutia. soe mantong ureueng nyang keuneuk meubudok, jimeubudok deumi nan po teu allah nyang seutia. sabab peundeuritaan nyang watee ilee ka gadoh dan ka jipeutuwoe." tuhan meufeureuman, "ulon kupeuget langet nyang baro dan bumoe nyang baro. keujadian-keujadian nyang ka lheureu teujadi yoh masa ilee teupeutuwoe dan hana teuingat le. meugeumbira kheueh dan meusukaria kheueh keu siumu masa sabab peue nyang ulon cepta. ulon cepta yerusalem nyang baro nyang peunoh keugeumbiran, dan peunduduk disinan meusuka ria. ulon keudroe meugeumbira sabab yerusalem, dan gurangang sabab ureueng disinan. nibak banda nyan ka hana le ureueng mo ba-e, dan hana ureueng teumawok jilakee tulong. aneuk-aneuk banyak hana nyang mate yoh watee ubit, dan ureueng tuha trok ubak umu nyang leubeh syiek. ureueng nyang meum trok sireuthon thon teuanggal muda, dan nyang mate sigihlom trok dub umunyan teuanggal nyan na kheueh hukoman lon. ureueng teuma jipeudong rumah dan jiduek keudroe lam rumah nyan; di ureueng laen hana jiduek di rumah nyan. awaknyan jipula bak anggo lam lampoh dan jirasa keudroe ie anggo jih nyan; di ureueng laen hana ji-jieb ie anggo nyan. umat ulon panyang umu lagee bak kayee, dan jirasa keudroe hase reuoh jihnyan. bandum nyang awaknyan peubuet teuma na hase, dan aneuk-aneuk awaknyan hana mate meudab-dab. awaknyan dan keuturonan awaknyan lon bri beureukat keu siumu masa. sigihlom awaknyan jilakee, ka ulon jaweub; sigihlom lheureu awaknyan meudoa, doa awaknyan ka ulon peukabui. asee srigala dan aneuk bubiri meusajan-sajan jimeurot naleueng; singa jipajoh jeumpueng saban lagee leumo, dan ulueu ka hana meubahya le. bansaboh buket lon nyang suci, hana le nyang rugoe atawa jipeubuet jeuhet." tuhan meufeureuman, "langet na kheueh takhta lon, dan bumoe teumpat lon meugilo. dan rumah nyang lagee peu kheueh nyang keuneuk gata peudong keu ulon, dan teumpat peu kheueh nyang keuneuk gata peujeuet keu teumpat tinggai lon? alam raya nyoe na kheueh buet jaroe lon, dan banmandum nyan teupeujeuet. teuma nyang ulon galak na kheueh ubak ureueng

nyang miyueb ate, nyang meunyeusai keumandum desya-desya jih, nyang teumakot dan taat ubak ulon. teuma bansanyan jipeubuet ban galak droe jih; awaknyan galak meueu iebadat meunurot cara nyang luwat hana teukira. nibak awaknyan hana beuda jih; teukeureubeuen leumo agam dan teukeureubeuen manusia, teukeureubeuen aneuek bubiri dan teuwiet takue ase; teupeu seumah gandom dan teukeureubeuen darah bui, teutot keumeunyan dan teuseumah patong. sababnyan ulon pih lon peubuet ban galak droe dan lon peurhot atehueu awaknyan beuncana-beuncana nyang awaknyan takot. sabab bak watee ulon tawok, hana nyang seuto; watee ulon peugah haba, hana nyang deungoe. awaknyan leubeh galak jilawan ulon dan jipeubuet nyang jehet." deungoe kheueh peue nyang geufeuroman le tuhan, he gata nyang takot dan taat ubak gobnyan, "sabab gata seutia ubak ulon, na lamkawan bansa gata nyang jibanci keu gata, dan hana jitem meurakan deungon gata. awaknyan jihina ngon jipeuwayang gata sira jipeugah, 'bah kheueh tuhan geutunok keu agongan gobnyan, mangat jeuet kamoe ngieng gata geumbira.' teuma awaknyan keudroe kheueh nyang meuteume malee. deungoe! na su karu ngon subra di dalam banda; na su nibak baet lon; nyan kheueh su ulon nyang teungoh lon balaih musoh! banda suci lon lagee sidroe ma nyang jipeulahe aneuek sigohlom teuleunteuk teubot sabab saket; nyang jipeulahe aneuek agam sigohlom jirasa saket meueu aneuek. soe nyang ka na deungoe hai nyang lagee nyan? dan soe nyang ka lheureh kalon keujadian nyang lagee nyan? teuma bansa israel ka lahe bak watee sion ka teurasa saket meueu aneuek. bek tasangka ulon ba umat lon sampoe bak saat keulaheran dan hana teupeubiyeu awaknyan teupeu lahe." meunan kheueh geupeugah le tuhan. meusuka cita kheueh meusajan yerusalem, he banmandum ureueng nyang cinta jihnyan. gata nyang meuduka sabab gobnyan, jinoenyoe ka jeuet meugeumbira ria. gata teuma tarasa keumakmuran jihnyan, lagee sidroe aneuek banyak jijieb mom nibak ma jih. sabab tuhan meufeuroman, "gata ulon bri keuseujahteuraan lagee ie krueng nyang teungoh ile; keukayaan bansa-bansa laen teuma jiba ubak gata lagee ie krueng nyang teungoh boh bah. gata lagee aneuek banyak nyang teungoh geupeumom dan geutiengkue le ma jih, dan geugusuek-gusuek lam pangkee gobnyan. ulon kuhibur gata di yerusalem, lagee sidroe ma geu hibur aneuek gobnyan. watee tangieng nyan, gata meugeumbira, dan meutamah seuhah ngon teuga lagee naleueng nyang mantong muda. dan hamba-hamba lon jirasa keukuasaan lon dan musoh-musoh lon jirasa ubak beungeh lon." keubit, tuhan teuka meusigoe ngon apui; gobnyan nyang supee keudroe geuritan geuhnyan tajam jiplueng lagee angen badee, keu geupeusak beungeh geuhnyan, dan geudumpek deungon su nyang meutaga. sabab bandum ureueng nyang meuteume salah teuma geuhukom deungon apui dan peudeueng, dan jai that-that nyang geuhukom mate. tuhan meufeuroman, "soe mantong ureueng nyang jijak peugleh droe oh lheureh nyan jijak meukawan-kawan u lampoh-lampoh keu dewa-dewa dan jimeu iebadat keu dewa-dewa

nyan, ureueng nyan leunyab meusajan deungon ureueng nyang pajoh sie bui dan tikoih dan peunajoh nyang laen nyang kuto ngon luwat lumpah na. ulon kuteupeue pikeran dan buet-buet awaknyan. ulon teuka keu lon jak peusapat bubena ureueng nibak meubagoe bansa. bak watee awaknyan meugumoi, awaknyan jikalon kuasa lon. ulon teuma lon keubah saboh tanda lamkawan awaknyan. teuma citbacut sagai nibak awaknyan nyang ulon peuseulamat. awaknyan lon kirem ubak bansa-bansa di nanggroenanggroe jioh nyang gohlom na jideungoe keuhai ulon atawa jikalon keuagongan dan kuasa lon: u tarsis, libia dan lidia deungon ureueng-ureueng nyang ka carong dan lisek that bak jitimbak aneuk panah, u tubal dan yunani. awaknyan jidakwahkan keubeusaran lon di teungoh bansa-bansa nyan. nibak nanggroenanggroe nyan awaknyan teuma jiba lom syedara-syedara gata seubansa sibagoe hadiah keu ulon. awaknyan jiba bandum ureueng nyan ubak buket lon nyang suci di yerusalem deungon keundeuraan guda, keuleudee dan unta, dan deungon geuritan meunan cit geurubak peudati, lagee nyang ka lazem jipeubuet le ureueng israel jiba u baet tuhan peuseumahan gandom lam wadah nyang gleh. siladam lamkawan awaknyan ulon peujeuet keu teungku imeum dan ureueng lewi. lagee langet baro dan bumoe baro teuma meuteun sabab kuasa lon, meunan cit deungon keuturonan gata dan nan gata teutab tinggai. tieb-tieb buleuen baro dan tieb-tieb uroe sabat bansaboh umat manusia teuma teuka keu jiseumah ulon di yerusalem. watee beurangkat, awaknyan jikalon manyet ureueng-ureueng nyang ka beurontak keu ulon. ulat nyang pajoh bangke awaknyan hana mate-mate, dan apui nyang tot awaknyan hana teuma lon-lon; saboh pandangan nyang lum teumakot ngon yo keu banmandum manusia."

kitab nyoe meuasoe tutoe haba nabi yeremia bin hilkia, gobnyan na kheueh sidroe lamkawan teungku imeum di banda anatot di wilayah benyamin. tuhan meufeureuman ubak nabi yeremia bak thon nyang keu lhee blaih geumat keurajeuen le yosia bin amon raja di nanggroe yehuda. oh ka ltheueh nyan tuhan geupeugah lom ubak gobnyan meu ulang-ulang, phon bak jamen peumeurintahan yoyakim bin yosia sampoe ubak thon nyang keu siblahi keurajeuen zedekia bin yosia. bak buleunyeu keulimong nibak thon nyan cit teuma peunduduek yerusalem jiangkot ubak teumpat nyang teuboih. tuhan meufeureuman ubak ulon, "sigohlom lon cebta gata lam pluet ma gata, dan sigohlom gata lahe u ateuhe rhueng donya nyoe, ulon ka lon pileh dan lon baiat gata mangat jeuet keu nabi keu bansa-bansa." laju lon jaweueb, "ya tuhan nyang mahamanyang, ulon hana carong lon peugah haba sabab ulon nyoe mantong muda that." teuma tuhan geujaweueb, "bek tapeugah gata mantong muda that. meunyoe ulon nyang kirem gata ubak soe mantong, gata haroh tajak, dan banmandum nyang ulon yue gata peugah, nyan haroh gata peusampoe ubak awaknyan. bek teumakot keu awaknyan, sabab ulon na meusajan gata keu lon jak lindong gata. ulon, tuhan, ka lon peugah haba!" oh ltheueh nyan tuhan laju geusunyueng jaroe gobnyan, dan geumat laju babah ulon sira geupeugah, "deungoe kheueh dan jak peusampoe kheueh tutoe haba nyang ulon peugah nyoe. uroe nyoe ulon bri ubak gata kuasa ateuhe bansa-bansa dan keurajeuen-keurajeuen nanggroe – kuasa keu gata peureubah dan peuhanco, keu taguleng dan tapeubinasa, keu tapeudong dan tapula." tuhan meufeureuman lom ubak ulon, "peue nyang gata ngieng, he yeremia?" laju lon jaweueb, "cabeueng bak kayee badam, tuhan." "beutoi that," geupeugah le tuhan, "ulon jaga mangat banmandum nyang ulon peugah jeuet keunyataan." laju tuhan geutanyong lom ubak ulon, "peue lom nyang gata ngieng?" laju lon jaweueb, "di siblahi utara na lon kalon beulangong dan asoe jih nyang na lam nyan teungoh ju meubura dan rab reubah u arah keunoe." tuhan meufeureuman, "di utara malapeutaka teuma teuka dan banmandum asoe nanggroe nyoe habeh keunong. ulon teuma lon yue banmandum bansa nyang na di siblahi utara jiteuka keujajak kuasa yerusalem. binteh-binteh beuton nyang na bansiseun lingka banda nyoe meunan cit deungon pintoe-pintoe geureubang jih dan banmandum banda nyang na di yehuda teuma awaknyan reupah. ulon kuhukom umat lon, sabab awaknyan ka meudesya dan jipeulikot lon. awaknyan ka jipeuseumah keureubeuen ubak ilah-ilah nyang laen, dan jipeuget patong-patong beurala keu jiseumah. meusiab-siab kheueh, yeremia! tajak kheueh dan peusampoe kheueh ubak awaknyan, banmandum nyang ka ulon peurintah ubak gata. bek takot keu awaknyan, mangat gata bek ulon peujeuet leubeh teumakot lom meunyoe meuhadab keue deungon awaknyan. deungoe kheueh! gata teuma jilawan le peunduduek nanggroe nyoe, na kheueh le raja-raja yehuda, peujabat peumeurintah, teungku-teungku imeum, dan rakyat. teuma nibak uroe nyoe ulon bri keu gata teunaga mangat talawan awaknyan.

gata teuma jeuet lagee banda nyang meukuta nyang kukoh, lagee tameh beuso dan beuton teumaga. awaknyan hana meuhase jipeutaloe gata, sabab lon na meusajan gata dan lon lindong gata. ulon, tuhan, ka lon peugah haba." tuhan geuyue peumaklum haba nyoe ubak banmandum ureueng nyang na di yerusalem, "hei, israel, teutab lon ingat pakriban gata seutia yoh gata mantong muda; padub na rayeuk cinta gata watee geutanyoe meubuleuen madu. u padang pasi lon jak gata seutot meulalu daerah nyang hana teupula sapeue. israel, gata atra ulon keudroe, boh ate lon nyang ulon gaseh. ulon peutron bala nyang raya u ateuhe mandum ureueng nyang peusabab gata meupaloe seungsara, ulon tuhan, ka lon peugah haba." deungoe nyoe feureuman tuhan, hei gata keuturonan nabi yakub, sukee-sukee israel! tuhan meufeureuman, "peue nyang ka jipeubuet le sidroe lamkawan indatu gata ateuhe ulon, sampoe jih nyan jikianat lon? awaknyan jitiyeub beurala nyang hana meuhareuga dan akhe jih awaknyan keudroe nyang ka jeuet keuhina. ulon hana jipakoe; ulon, nyang ka lon tuntun gata bak rot ueh raya, dan nyang ba awaknyan jiteubiet nibak nanggroe meuse rot padang pasi, daerah tandus nyang lumpah le keuwieng keuwot jih, meunan cit tho dan mubahya – padang nyang hana ureueng duek dan hana teuma ureueng jak! u nanggroe subo ulon intat awaknyan mangat jirasa peue-peue mantong nyang get nibak teumpat nyan. teuma bak teumpat nyan tanoh ulon ka awaknyan peukoto dan atra ulon awaknyan peujeuet sapeue-sapeue nyang lumpah kuto. le imeum-imeum hana nyang teumanyong dipat ulon tuhan jihnyan. ureueng nyang mat hukom pih hana jitiri soe ulon nyoe, nyang mat kuasa beurontak ateuhe ulon. ateuhe nan baal nabi-nabi jipeugah haba, dan jiseumah beurala nyang hana meugana." tuhan meufeureuman, "jinoenye umat ulon lon ba lam peukara lom, dan keuturonan jih ulon peusidang. jak kheueh laju sipanyang pante siprus siblahi ubarat, kirem kheueh ureueng laen u timu nibak nanggroe kedar, peureksa kheueh disinan deungon teuliti, peu kheueh ka ltheueh taujadi hai nyang saban? gohlom na taujadi saboh bansa jituka ilah jih bah kheueh nyan bukan allah nyang sibeuna. teuma, umat ulon ka jituka lon, keubanggaan awaknyan deungon sapeue-sapeue nyang hana hase jipeuget sapeue. le sabab nyan, hei langet, meunguncang kheueh! tahe mante dan beuyo kheueh! umat ulon ka jipeubuet dua macam desya; awaknyan ka jipeulikot ulon, nyang bri mata ie, teunaga udeb manusia; awaknyan jipeuget keu droejih kulam beusot nyang han hase jipeuteun ie jih." "israel kon namiet, bukan teuma keuturonan namiet nyang teubloe. teuma pakon jihnyan ka jeuet keu mangsa lawan jih? musoh jih jitaum ateuhe jih lagee su singa, tanoh jih teupeujeuet keu tandus dan papa, banda-banda jih habeh hangoh jiliet le apui, teupeubiye teulanta hana ureueng duek. hei israel, ok bak ullee gata teugunteng le ureueng memfis dan ureueng talpanhes. buet gata keudroe nyang jeuet keusabab mandum nyang taujadi nibak droe gata, sabab bak watee gata ulon tuntun bak rot ueh raya, gata peulikot ulon tuhan po teu allah gata. peue laba

jih gata jak u meuse? keuneuk jak jieb ie krueng nil? peue laba jih gata jak u asyur? keuneuk jak jieb ie krueng eftrat? buet jeuhet gata keudroe nyang hukom droe gata, gata teuseksa sabab tatulak ulon, po teu allah gata. jinoenyoe rasa keudroe padubna phet dan peudeh meunyoe ulon gata peulikit dan hana gata horeumat, ulon, tuhan allah gata ka lon peugah haba; ulon tuhan po teu allah nyang mahamanyang dan mahakuasa." tuhan meufeureuman, "ka treb that gata hana tameungabdi ubak ulon; hana gata taat atawa taseumah ulon. di ateuh tieb-tieb buket nyang manyang meulambong, dan dimiyueb tieb-tieb bak kayee nyang luhu on gata seumah dewa-dewa keusuboran. gata lon pula lagee bak anggo nyang ulon pileh nibak bijeh nyang get. teuma jinoenyoe gata meu-ubah, ka jeuet keuseunaman kleut dan hana meuguna. bahpi gata manoe deungon gata boh sabon nyang le, nyang noda-noda salah gata nyan mantong deuh ulon kalon. gata jeuet tapeugah bahwa gata hana kuto, dan tapeugah lom bahwa baal hantom na gata seumah! ngieng kheueh pi-e gata di panton, ingat buet jeuhet gata dan aku kheueh nyan! gata lagee unta inong nyang teungoh teuka gurangsang. jiplueng keudeh keunoe hana teukeundali, laju jitamong lam padang pasi nyang sungue. jihnyan hana hase teupeuteun meunyoe teungoh teuka gurangsang. nyang meuheuet keujih nyan hana teumita-mita, sabab nibak museum meuagam jihnyan sabe jipeujok droe. israel, bek kheueh gata plueng tatiyeub-tiyeub dewa, dan bek kheueh gata plueng tatawok awaknyan, eunteuk gaki gata cidra dan rukueng gata tho sabab teuka glaihi. 'hana, ulon hana mungkin lon gisa,' kheun gata, 'sabab ulon cinta ubak dewa-dewa, dan lon tem seutot awaknyan.' " tuhan meufeureuman, "lagee pancuri meuras malee meunyoe keunong drob, meunan kheueh gata mandum teuras malee, he ureueng israel, raja-raja dan peujabat-peujabat gata, imum dan nabi-nabi gata! gata teuma jipeumalee, sabab ngon sikrak kayee gata tawok bapak dan ngon sineuk batee gata tawok ma. gata kon tajak ubak ulon, teuma gata tinggai ulon. teuma meunyoe ka teuka sosah, ulon kheueh nyang gata tawok mangat lon jak peuseulamat gata. dipat kheueh beurala-beurala nyang gata peuget nyan? meunyoe gata meuteume sosah, yue kheueh bak jihnyan mangat jipeuseulamat gata, meunyoe jihnyan hase! hei yehuda, dewa-dewa gata le jih sidub banda-banda gata! peu kheueh hana gata galak keuhai ulon sampoe gata talawan ulon? sia-sia mantong gata lon hukom, sabab gata hana tatem teurimong teuseugah. lagee singa nyang teungoh beungeh, meunan kheueh gata tapoh mate bubena nabi-nabi gata. hei umat israel, deungoe kheueh tutoe haba lon nyoe. peu kheueh ka ltheueh lon nyoe lagee padang pasi keu gata atawa lagee tanoh nyang seupot glab hana deuh sapue? teuma pakon gata peugah gata keuneuk beubaihi, dan hana tatem le gisa bak ulon? peu kheueh na aneuek dara nyang tuwoe ubak piasan jih, atawa dara baro inong nyang tuwoe keubajee peunganten jih? teuma gata katreb that tatuwoe keu ulon - yoh watee nyang hana teuitong treb jih. gata keubit that carong ta ato siasat keu gata peukeunong ate geunaseh-geunaseh ate

gata. inong jeuhet nyang paleng jeuhet pih mantong hase jimeurunoe bak gata! peukayan gata teunoda le darah ureueng gasien dan ureueng nyang hana meusalah, kon le darah pancuri nyang keunong drob. bahpi meunan, gata tapeugah bahwa gata hana salah, bahwa ulon hana beungeh le ubak gata. teuma, ulon tuhan, lon hukom gata sabab gata tapeugah bahwa gata hana salah. bagaihi that gatajak ubak dewa-dewa bansa laen keugata lakee tulong! gata pasti keucewa le nanggroe meuse, saban lagee gata keucewa ubak asyur. gata tatinggai nanggroe meuse sabab keucewa dan malee. ulon, tuhan, ka lon tulak awaknyan nyang gata peubangga; gata hana meuteume laba sapue nibak awaknyan." tuhan meufeureuman, "meunyoe sidroe ureueng inong nyang ka meulako jitaluik le teungku lakoe jih, laju ureueng inong nyan geumeukawan deungon ureueng agam laen, deungon nyan beukaih lakoe inong nyan hana jeuet le jicok ureueng inong nyan keu peurumoh jih, sabab hainyan jeuet keurusak nibak nanggroe nyoe. gata he israel, ka le that geunaseh ate gata, ek kheueh jeuet bak saat nyoe gata keuneuk riwang ubak ulon! cuba tangah u ateuh, u pucak-pucak buket! bak teumpat toh kheueh disinan nyang gohlom gata gilo tajak meumukah? lagee ureueng arab di padang pasi, meunan kheueh gata taduek bak bineh jalan tapreh-preh ureueng nyang jiting jakmeun cinta. gata ka tapeukuto nanggroe nyoe deungon buet meumukah dan buet gata nyang jeuhet nyang laen. nyang kheueh sabab jih ie ujeuen hana jitrin di langet, meunan cit ujeuen bak museum seumi hana-jitem teuka. gata saban that deungon simeumukah, dan hana meumalee meubacut pih. bak watee gata aloh-alah nyan gata peugah ulon sayong bahwa ulon ureueng syiek gata, bahwa ulon sayong keugata yoh gata mantong ubit. meunan cit gata peugah bahwa ulon hana mungkin lon beungeh keugata hana putoh-putoh. nyan kheueh nyang gata peugah, he israel, teuma gata teutab gata peubuet cit buet-buet nyang jeuhet nyang hase gata peubuet." bak masa keurajeuen raja yosia, tuhan meufeureuman lagee nyoe ubak ulon, "peu kheueh ka ltheueh gata ngieng peue nyang jipeubuet le israel, inong nyang hana seutia nyan? jihnyan ka jitinggai ulon dan jimeuagam ngon jimeumukah di ateuh tieb-tieb buket nyang manyang dan dimiyueb tieb-tieb bak kayee nyang rampak. ulon pike oh ltheueh jihnyan jipeubuet banmandum nyan, jihnyan jigisa ubak ulon. teuma jihnyan hana jigisa, teuma jijak meumukah. nyang kheueh sabab jih ulon taleuek dan lon use jihnyan. yehuda, syedara israel, nyang hana seutia nyan, jikalon banmandum nyan, teuma jihnyan teutab hana teumakot. dan jihnyan meusajan-sajan keunan jeuet keu lunte, dan meubacut pih hana meuras malee. jihnyan meumukah sabab nyang jiseumah batee dan bak kayee, sampoe nanggroe nyoe jeuet keu kuto. oh ka ltheueh jipeubuet banmandum nyan, yehuda nyang hana seutia nyan jiriwang ubak ulon teuma deungon pura-pura, sabab ate jihnyan hana juoe, ulon, po teu allah, tuhan, ka lon peugah haba." oh ltheueh nyan tuhan geubri tee ubak ulon bahwa bahpi israel ka jipeulikit gobnyan, teuma israel teunyata leubeh get nibak yehuda nyang hana seutia

nyan. tuhan geuyue ubak ulon keulon peusampoe hainyoe ubak israel, "he israel nyang hana seutia, tawoe kheueh ubak ulon! ulon peunoh deungon gaseh sayang dan hana siumu masa ulon beungeh gata. meungaku mantong bahwa gata ka meusalah dan beurontak teuhadab tuhan, allah gata. meungaku kheueh mantong bahwa di miyueb tieb-tieb bak kayee nyang luhu gata ka tapeusampoe cinta gata ubak ilah-ilah bansa laen, dan hana ta-taat ubak peue-peue nyang ulon peurintah. ulon, tuhan, ka lon peugah haba." tuhan meufeureuman, "he umat nyang hana seutia, tawoe kheueh ubak ulon! gata na kheueh milek ulon. ulon ku cok gata, sidroe nibak tieb-tieb banda, dua droe nibak tieb-tieb kawom, dan lon puwoe gata keudeuh u buket sion. ulon kujok ubak gata peumimpén-peumimpén nyang taat ubak ulon. awaknyan jipimpén gata deungon peunoh bijaksana dan peunoh peungeurtian. dan meunyoé gata ka meutamah le di nanggroé nyoe, ureueng laen hana jipeugah-peugah le keuhai peuto peujanjian lon. awaknyan hana teuma jipike atawa ji ingat le, dan awaknyan hana jipeureulee le keu peuto peujanjian nyan atawa jipeugét nyang laen sibagoe geunantoe. bak watee nyan banda yerusalem jiboh nan, 'takhta tuhan', dan meubagoe bansa teuma meusapat di banda nyan keu jiseumah ulon. awaknyan hana jiseutot le peue nyang jikheun le ate droe jih nyang jeuhet nyan. israel meugabong deungon yehuda, dan meusajan-sajan teuka di nanggroé nyang teuboih di siblahi utara. awaknyan teuma jiwoe u nanggroé nyang ka ulon bri sibagoe tanoh pusaka keu indatu gata." tuhan meufeureuman, "israel, ulon meuheut keuneuk teurimong gata sibagoe aneuek lon, dan lon bri ubak gata nanggroé nyang that-that mangat, nanggroé nyang paleng jroh bansigom donya. ulon meuheut gata hoi ulon nyoe bapak, dan hana taplueng nibak ulon. teuma lagee peurumoh nyang hana seutia, gata pih hana seutia ubak ulon. ulon, tuhan ka lon peugah haba." di ateuh pucak-pucak gunung na teudeungoe su nyang subra; nyan na kheueh su umat israel nyang teungoh mo dan jimeulakee, sabab awaknyan ka meudesya, dan tuwoe ubak tuhan po teu allah jih keudroe. he gata banmandum nyang ka tuwoe ubak tuhan, tawoe kheueh! gobnyan teuma geupeupuleh gata, dan geupeujeuet gata seutia. gata tapeugah, "nyoe, jinoenyoe kamoe keuneuk jak ubak tuhan, sabab gobnyan na kheueh po teu allah kamoe. sia-sia mantong kamoe meusajan-sajan kamoe jak seumah beurala di ateuh pucak-pucak gunung nyang lambong! peutulongan keu israel teuka nibak tuhan allah kamoe. teuseumah ubak baal, beurala nyang keubit that malee nyan sampoe kamoe kajeuet geumadob nibak aneuek-aneuek kamoe, meunan cit deungon beulatang peulara kamoe lagee leumo dan bubiri kamoe, na kheueh peue-peue mantong nyang ka geu-useuha le indatu kamoe yohphon jamen ilee. dan, bah kheueh kamoe nyang tanggong malee keuhai atranyoe, dan bah kheueh kamoe jeuet keu ureueng hina. sabab, kamoe dan indatu kamoe ka meudesya ubak tuhan po teu allah kamoe, dan hantom na taat ubak peue nyang ka geupeurintah le gobnyan." tuhan meufeureuman, "umat israel, meunyoé gata keuneuk tagisa, tawoe kheueh ubak

ulon. taboih kheueh leubeh ilee beurala-beurala nyang ulon banci nyan, dan seutia kheueh ubak ulon. meunyoé gata meusumpah deumi nan ulon dan gata udeb juoe ade dan beuna, dan bandum bansa jilakee ubak ulon mangat ubak awaknyan pih ulon bri beureukat, dan awaknyan teuma jipujo ulon." tuhan meufeureuman ubak peunduduek yehuda dan yerusalem, "tapeubuet kheueh laju tanoh gata nyang gohloom teupeubuet; bek kheueh tatabu bijeh bak teumpat seunaman nyang timoh meuduro. tamat kheueh janji gata deungon ulon, tuhan gata, dan peu khusus kheueh droe gata nyan keu ulon, he peunduduek yehuda dan yerusalem. meunyoé hana, beungeh ulon meutamah-tamah dan tutong lagee apui nyang hana hase teupeulon le soe mantong. banmandum nyan keunong u ateuh gata sabab buet-buet gata nyang jeuhet." yueb kheueh beureuguih bansaboh nanggroé! teumawok kheueh deungon su nyang glah dan nyareng. gatayue kheueh peunduduek yehuda dan yerusalem jiplueng ubak banda-banda nyang meukuta. tunyok kheueh rot u sion, buket tuhan, bubagaih kheueh meungungsé, bek seungab mantong. tuhan teungoh geupeutron mala peutaka dan keuhancoran nyang raya teuka di utara. lagee singa jiteubiet nibak teumpat jimusom meunan kheueh teuma ka jajak bandum nyang peupunah bansa-bansa nyang teuka keuneuk jak poh habeh bubena yehuda. banda-banda yehuda teuma jeuet keu runga-runga saboh teumpat nyang hana jikeumiet le manusia. sabab nyan, tamo dan meuba-e kheueh, tasok kheueh ija krong tanda meuduka. sabab beungeh tuhan nyang seu-uem lagee apui hu gohloom cit surot di yehuda. tuhan meufeureuman, "nibak uroenyang raja-raja dan peujabat-peujabat rhot seumangat; teungku-teungku imeum yo meugram-gram dan nabi-nabi teukeujot lumpah na." laju ulon peugah, "tuhan nyang mahamanyang, droeneueh ka neutipee ureueng yehuda dan peunduduek yerusalem! droeneueh neupeugah bahwa na dame, padahai bak saatnyoe nyawang kamoe teuancam ngon peudeueng." saat jih teuma trok ureueng yehuda dan peunduduek yerusalem meuteume haba bahwa angen seu-uem nyang teuka rot padang pasi teungoh jipot ubak awaknyan. angen nyan bukan angen biasa nyang jipupo sikhem, teuma na kheueh angen badee nyang teuka ateuh peurintah tuhan keudroe keu teupeu rhot hukoman u ateuh umat gobnyan. kalon musoh teuka lagee awan. geuritan-geuritan prang lagee angen badee, guda-guda jih nyan leubeh bagah nibak cicem rajawali. wah, tanyoe ceulaka! tanyoe binasa! yerusalem, taboih kheueh nyang jeuhet nyang na nibak ate gata mangat gata geupeuseulamat. trok an pajan pikeran-pikeran nyang jeuhet nyan keuneuk gata keubah lam ate gata? di banda dan, dan di gunung-gunong efraim ka teuka utosan-utosan nyang jiba haba brok. awaknyan jipeuingat bansa-banda dan jibri tee ubak peunduduek yerusalem bahwa musoh teungoh teuka di nanggroé nyang jioh. awaknyan jidumpek deungon prang teuhadab banda-banda yehuda dan jikeupong yerusalem lagee ureueng keumiet ladang. banmandum nyan tejadi sabab bansa yehuda ka beurontak ubak tuhan. tuhan

ka geupeugah haba. yehuda, gata keudroe kheueh nyang puteuka beuncana nyan u ateuhe droe gata. cara udeb gata dan buet-buet gata nyang peusabab banmandum peundeuritaan nyan teutob-tob ate gata. padub na ate lon seungsara, han ek le lon teuen meudeurita. ulon hana hase lon peuteunang droe jantong lon meudok-dok lam dada, sabab lon deungoe beureuguih jimeusu dan dumpek prang su meutaga. beuncana teuka hana putoh-putoh sampoe hanco bansigom nanggro. hana teusangka-sangka khimah lon jipeurusak, ija-ija jih habeh jipriek-priek. sampoe an pajan haroh lon kalon ureueng jimuprang udeb mate? sampoe an pajan haroh lon deungoe su beureuguih meutaga-tagat? tuhan meufeureuman, "bangai lumpah na umat ulon nyan, awaknyan hana jituri ulon. awaknyan lagee aneuek-aneuek banyak nyang beubal hana meuguna hana jipeuphom meubacut teuma; malem nibak buet jeuhet, gagal bak buet nyang jroh." u arah bumoe mata lon pandang, leumah jih soh dan geursang, u arah langet lon tengah, wahai, hana nyang meucahya. lon kalon gunung dan buket-buket nyang lambong meuguncang-guncang hebat lumpah na. lon kalon, hana manusia, cicem pih ka jipo banmandum. tanoh nyang subo ka jeuet keu guro nyan tho, banda-banda hanco ka jeuet keu runγκα-rungka, sabab tuhan beungeh raya ubak umat gobnyan. (tuhan geupeugah bahwa bansigom donya jeuet keu padang pasi, teuma gobnyan hana geupeuhanco banmandum nyan.) bumoe weueh ate, langet seupot buta. tuhan ka geupeugah haba dan hana geu ubah reuncana gobnyan. gobnyan ka geucok keuputosan dan hana geusurot bahpi silangkah. teudeungoe su rioh ngon subra pasokan meuguda dan pasokan peumanah, dan soe mantong ureueng laju jiplueng deungon nafah meuseungak-seungak. u dalam gle awaknyan jipeulueng droe, dan buket-buket batee laju jilisi. banmandum banda ka jeuet keuseungue, hana ureueng nyang jitem tinggai bak teumpat nyan le. he yerusalem, gata ka jitinggai dan hana hase tapeubuet sapeue! keupeue guna jih gata ngui bajee mirah dan tahias droe ngon meuh dan pirak, dan ta uke mata deungon cilak? hana guna gata peulagak droe, sabab mandum geunaseh gata ka hana jitueng le keu gata, malah awaknyan jimeuheuet keuneuk bot nyawong gata. na lon deungoe su ureueng apoh apah nyang lumpah weueh lagee su inong nyang keuneuk peulahe aneuek; lagee inong muda nyang jipeulahe aneuek phon, meunan kheueh su jimeo yerusalem nyang meusak nafah. jaroe jihnyan meugawang-gawang dan jihnyan apoh-apah, "ceulaka kheueh ulon – ulon keuneuk jipoh mate le musoh!" he peunduduek yerusalem, taja-jak kheueh nibak jalan-jalan nyang na di banda gata! mita kheueh dipat mantong, dan ngieng kheueh ngon mata ulee gata keudroe. peureksa kheueh nibak padang-padang banda peu kheueh na meusidroe ureueng nyang juoe nyang jiuseuha seutia ubak po teu allah. meunyo na, tuhan geupeu amphon keu yerusalem. gata tapeugah bahwa gata taseumah tuhan, padahai gata hana meuniet nyang lagee nyan. nyang sikeubit jih nyang geulakee le tuhan na kheueh keuseutiaan. tuhan geuseunuet gata,

teuma gata hana tapako. gobnyan geupeureumok gata, teuma gata hana tatem geupeuruno. gata kreueh that ulee, dan hana tatem meutobat ubak desya-desya gata. ulon kupike, "ah, awaknyan na kheueh rakyat jeulata nyang hana jiteupeue sapeue. awaknyan meutindak bangai, sabab hana jiteupeue peue nyang geulakee dan nyang geutuntot le tuhan po teu allah nibak awaknyan. bah kheueh ulon jak ubak ureueng-ureueng rayeuk, dan lon meututoe deungon awaknyan. pasti awaknyan jiteupeue peue nyang geulakee dan geu tuntot le tuhan allah nibak awaknyan." teuma, awaknyan banmandum hana cit jitem geupeurintah le tuhan; awaknyan han jitem taat ubak gobnyan. nyang kheueh sabab jih awaknyan jikeuneuk poh mate le singa-singa nyang na di dalam uteun, jipriek-priek le srigala nyang na di padang pasi. rimueng tutul meuwot-wot keudeh keunoe jijak mita uempeun rab bineh-bineh banda awaknyan, dan soe mantong ureueng nyang jiteubiet laju jiteugom. banmandum nyan teujadi sabab awaknyan ka le that meudesya, dan hana teukira le jipeulikot po teu allah. tuhan meufeureuman, "keupeue ulon haroh lon peumaphon banmandum desya-desya umat lon? awaknyan ka jitinggai ulon dan jiseumah nyang kon po teu allah. ulon nyang bri peunajoh ubak awaknyan sampoe awaknyan troe, teuma awaknyan teutab jipeubuet jinah, dan kayem that jijak saweue rumoh-rumoh inong lunte. awaknyan lagee guda agam nyang teumbon dan teuga nafesus beureuhi jih; maseng-maseng jimeuheuet ubak peurumoh rakan jih. peu kheueh hana pantaih ulon hukom bansa nyang lagee nyan dan lon balaih peue nyang ka jipeubuet le awaknyan? ulon lon kirem musoh keu jijak cacah lampoh anggo awaknyan, teuma kon keuteupeu habeh. ulon ku yue musoh-musoh nyan keujigunteng carang-carang anggo awaknyan, sabab carang-carang nyan kon atra lon. umat israel dan yehuda bit-bit that ka jikhianat ulon. ulon, tuhan, ka lon peugah haba." umat tuhan jipeugah nyang hana beutoi keuhai tuhan. awaknyan jipeugah, "ah, gobnyan hana geupeubuet sapeue ateuhe geutanyoe. geutanyoe hana keunong bala dan hana teuma ta rasa prang meunan cit hana tarasa deuk. anggab kheueh nabi-nabi nyan angen jak, sabab peusan tuhan hana bak awaknyan." laju tuhan nyang mahakuaa meufeureuman ubak ulon, "he yeremia, sabab awaknyan ka jipeugah haba nyang lagee nyan, awaknyan keunong bala nyang meunurot awaknyan hana teujadi. ulon kupeujeuet tutoe haba lon lagee apui hu lam babah gata. bansa nyoe jeuet lagee kayee nyang teutot, dan apui nyan jitot awaknyan sampoe habeh." he bansa israel, tuhan teungoh geupeuteuka saboh bansa di nanggro. nyang jioh keujajak prang gata. bansa nyan ka na yoh awai ilee, basa jih hana gata teupeue. awaknyan teuga lumpah na, dan ureueng-ureueng timbak aneuk panah awaknyan gagah dan beuhe; awaknyan jipoh mate ureueng laen hana gaseh sayang. awaknyan jipeuhabeh bubena hase tanoh dan peunajoh gata dan aneuek-aneuek gata jipoh mate. beulatang peulara lagee leumo ngon bubiri gata jisie le awaknyan, meunan cit deungon lampoh-lampoh anggo dan bak ara jikoh jipeuranab sampoe habeh. banda-banda

nyang meukuta nyang gata peubangga jipeuhanco sapan sapa. tuhan meufeuereuman, "bahpi lagee nyan, bak wateenyan umat ulon hana lon peubinasa. teuma meunyo awaknyan jityanyong pakon ulon peubuet banmandum nyan ateueh awaknyan, tapeugah kheueh he yeremia, bahwa lagee toh awaknyan jittingai ulon di nanggroe awaknyan keudroe keujijak meungabdi ubak dewa-dewa bansa laen, meunan cit awaknyan jeuet keu namiet ureueng-ureueng aseng di nanggroe laen." tuhan geuyeu bak ulon mangat lon peutrok haba nyoe ubak keuturonan nabi yakub nyang tinggai di yehuda, "deungoe kheueh nyoe, he gata ureueng bodoh dan bangai! nibak gata na mata teuma hana tameungieng, na geulinyueng teuma hana tadeungoe! ulon kheueh tuhan; pakon gata hana teumakot keu ulon? nyang sikeubitjih gata yo keu ulon! ulon kheueh nyang peujeuet pante sampoe jeuet keubataih laot nyang hana hase jilewat keu siumu masa. laot jeuet meugeulora dan geulumbang jeuet meungamuk, teuma hana jeuet jiliwat bak bataih nyang ka lon peuteuntee nyan. teuma gata teutab kreuheh ulee dan teutab talawan lon; gata ka meunyeuleweng dan tatinggai ulon. hantom na taingat keu tahoreumat ulon, padahai ulon kheueh nyang kirem ujeuen, bah kheueh bak awai meunan cit bak akhe museum ujeuen. dan ulon cit nyang bri keugata meumeu keumeukoh oh trok bak thon. teuma desya-desya gata nyan kheueh nyang peuhalang banmandum nyang get nyan sampoe hana tateume rasa. he umat lon, lamkawan gata na ureueng-ureueng nyang jeuhet. lagee ureueng nyang jipreh taron teungoh teupasang keu teujak drob cicem, meunan kheueh awaknyan jipasang taron keu jijak drob manusia. lagee ureueng jak jeue cicem sampoe cicem nyang jiteume nyan laju jipasoe lam cintra, meunan kheueh teuma awaknyan jipasoe lam rumah jih peunoh deungan barang-barang hase teumipee. meunan kheueh awaknyan jeuet keu ureueng meukuasa dan kaya-kaya, lom tumbon ngon makmu. keujeuhetan awaknyan ka hana le bataih. awaknyan hana le jimeubuet ade ubak peukara aneuk-aneuk yatem ngon meuntu, dan hana jibila hak ureueng-ureueng nyang keunong tindeeh. teuma, ulon, tuhan, lon hukom awaknyan deungan buet jih banmandum nyan; ulon kubalaih peue-peue nyang ka jipeubuet le bansa nyoe. sapeue-sapeue nyang luwabiasa dan teumakot that-that meunan cit gli that teujadi di nanggroe nyoe: nabi-nabi geuseumeungeut, sulet, teungku-teungku imeum jipeutimang umat meunurot keuheundak droe jih keudroe dan gata umat ulon galak ubak hai nyang lagee nyan. teuma peue nyang gata peubuet meunyo trok bak uroe akhe?" gata kheueh meungunse, he ureueng-ureueng benyamin! tinggai laju yerusalem! tayueb beureuguih di tekoa, dan gata peuhu apui sibagoe tanda isyarat di bet-kerem! beuncana dan peutaka nyang paleng raya teuka nibak utara. banda sion gagah lumpah na, teuma tuhan teutab geupeuhanco banda nyang ceudah nyan; ureueng-ureueng matkuasa meukhimah disinan deungan sipa-i jih. ban silingka banda awaknyan pasang khimah-khimah, maseng-maseng nibak teumpat nyang jigalak. awaknyan jipeugah, "jak

geutanyoe, meusiab kheueh tajak prang yerusalem! jak geutanyoe tajak seureubu teungoh mantong uroe nyoe!" teuma awaknyan jipeugah, "wah, ka teulat! uroe ka jipeuphon seupot, bubayang ka deuh panyang-panyang. bah kheueh geutanyoe prang bak watee malam, dan ta peuhanco bubena kuta-kuta banda nyan." tuhan nyang mahakuasa ka geupeurintah ubak peunguasa-peunguasa nyan mangat jijak koh bak-bak kayee dan jipeudong laju buket-buket peutahanan mangat jikeupong yerusalem. tuhan meufeuereuman, "banda nyoe lon hukom sabab lam banda nyan ka le that jipeubuet peunindasan. lagee mata ie teutab jipeuteubiet ie nyang jeureuneuh, meunan kheueh banda nyan teutab jipeuhase keujeuhetan. teuma haba keuhai keukeurasan dan peurampokan mantong nyang na ulon deungoe di banda nyan; luka-luka ngon peunyaket lon kalon dipat mantong. he peunduduek yerusalem, bah kheueh banmandum nyang phet-phet nyan jeuet keupeuingat nibak gata! bek sampoe ulon tinggai gata dan lon peujeuet banda gata nyan lagee padang pasi nyang hana jikeumiet le gob." tuhan nyang mahakuasa meufeuereuman ubak ulon, "israel teucukoe sampoe habeh lagee bak anggo nyang ka habeh teupot boh jih. le sababnyan, teungoh mantong na watee, peuseulamat kheueh nyang mantong na tinggai." ulon jaweueb, "tuhan, ubak soe nyang haroh lon peugah haba, dan soe nyang haroh ulon peuingat? awaknyan kreuheh that ulee dan hanjitem pakeu peue nyang ulon peugah. awaknyan jipeukem dan jibanci ubak peusan droeneuh nyang ulon peusampoe keu awaknyan. keuhai beungeh droeneuh keu awaknyan meunan cit lam ate lon ju lagee ngeue apui, tuhan! payah that keu teupeuteun nyan." laju tuhan meufeuereuman, "taba kheueh laju meuhob gata nyan ubak aneuk miet nyang na jimeu-eun bak rot-rot euh dan u ateueh awak-awak muda nyang teungoh meugumpoi-gumpoi, agam dan inong teuma teudrob, dan ureueng nyang syiek pih hana teutinggai. rumah awaknyan teujok keu ureueng laen, meunan cit deungan ladang-ladang dan peurmoh-peurmoh awaknyan. peunduduek nanggroe nyoe lon hukom. awaknyan banmandum, cut rayeuk jimita laba deungan cara nyang hana juoe. meunan cit nabi dan teungku imeum pi jipeunget gob. luhok ngon luka-luka umat ulon jinggal le awaknyan luka ubit nyang hana meubahya, 'ah, hana peue-peue nyan,' kheun awaknyan, 'banmandum get dan aman.' padahai meubacut pih hana. seuharoh jih awaknyan malee sabab ka jipeubuet banmandum nyang hina nyan. teuma awaknyan teubai muka dan hana jiteupeue keu malee. kareuna nyan awaknyan rhot lagee ureueng laen; habeh kheueh riwayat awaknyan meunyo lon hukom jihnyan. ulon tuhan, ka lon peugah haba." tuhan meufeuereuman ubak umat gobnyan, "gata dong kheueh nibak simpang-simpang rot, dan ngieng kheueh beujroh-jroh! gata tanyong kheueh rot-rot nyang awai phon, dan nyang toh nyang paleng jroh lamkawan nyan. taseutot kheueh jalan nyan, mangat gata udeb teunang." teuma awaknyan jipeugah, "hana kamoe tem, kamoe hana peureulee kamoe seutot rot ueh nyan!" laju tuhan meulag-ulag geubaiat ureueng-ureueng

jaga keuteupeu ingat ubak awaknyan beujideungoe su isyarat nyang teuyueb deungon beureuguih. teuma umat jipeugah, "kamoe hana watee keu kamoe deungoe nyan." sabab nyan tuhan meufeuroman, "deungoe nyoe, he bansa-bansa! gata haroh tateupeue peue nyang teuma teujadi ateuah umat lon. ngieng kheueh, he bumoe! umat lon han jitem deungoe ajaran ulon dan hana taat ubak ulon. sibagoe akibat nibak peue nyang ka jirancang le awaknyan ulon peutron mala peutaka u ateuah awaknyan. keupeue guna jih keumeunyan nyang jiba le awaknyan keu ulon nibak syeba, atawa reumpah-reumpah di nanggroe nyang jioh? hana lon galak kuteurimong peuseumahan awaknyan. dan hana galak ulon ubak peuseumahan keureubeuen-keureubeuen nyang teutot nibak awaknyan. ulon teuma lon peusabab mandum awaknyan meugantoh dan reubah. ayah dan aneuek, rakan dan teutangga banmandum binasa." tuhan meufeuroman, "saboh bansa nyang teuga teungoh jijak rot nanggroe nyang jioh di utara. awaknyan teuka keu jijak muprang. sinjata awaknyan panah ngon kapak; awaknyan keujam dan han jituri amphon. lagee su laot nyang meugeulora meunan kheueh su tapak-tapak guda awaknyan nyang teungoh jipeuplueng deungon kancang jitiyeub keujijak peuhanco yerasalem." ban jideungoe haba nyan, peunduduek yerasalem laju hana meudaya. awaknyan jiceukam le peurasaan teumakot hana teukira, dan meudeurita lagee ureueng inong nyang keuneuk peulahe aneuek. awaknyan hana jijeuet tron u jalan atawa jijak u blang, sabab dipat mantong na musoh nyang meusinjata jiteumimbak ban galak droe. tuhan meufeuroman ubak umat gobnyan, "tangui laju ija kreung oh ltheuhnyan balek-balek laju lam abee. meukabong kheueh dan meuba-e kheueh deungon peudeh lagee ureueng nyang teungoh jipeumo aneuek tunggai jih nyang mate, sabab ureueng nyang peubinasu gata teuma jiseurang gata meudab-dab." laju tuhan geupeugah ubak yeremia, "ujoe kheueh umat ulon, lagee gata ujoe logam. seulidiek kheueh tabaiat awaknyan! awaknyan banmandum beurontak nyang kreueh-kreueh ulee, lagee kreueh peurunggu dan beuso. awaknyan meupeurangoe brok dan jijak ho-ho mantong nyang jitabu na kheueh haba feusuna nyang jipeubrok-brok ureueng laen. beuso nyang teutot ka seu-uem that, teuma mek-mek logam han cit jitem meulileh dan gadoh. peucuma mantong umat ulon hana putoh-putoh teu ujoe keu teupeumurni, sabab ureueng-ureueng jihnyan nyang jeuhet hana ji use. awaknyan teuboh nan pirak nyang teuboih, sabab ulon, tuhan, ka lon boih awaknyan." tuhan geuyue jak ulon u baet gobnyan dan geuyuedong bak babah pintoe geureubang nyang jijak le ureueng yehuda nyang teuka jijak seumayang. gobnyan geuyue bak ulon mangat lon peumaklum peusan gobnyan lageenyoe keu awaknyan, "ubah kheueh laju pi-e ngon cara udeb gata, dan ulon, tuhan, nyang mahakuasa, allah israel lon idhin gata teutab tinggai disinoo. bek peucaya ubak ureueng teumipee nyang jipeugah, 'geutanyoe aman, sabab nyoe baet tuhan. keubit nyoe baet tuhan!' ubah kheueh cara udeb gata dan pi-e gata. peubuet kheueh nyang ade sidroe

ngon nyang laen. bek le gata tindeeh ureueng aseng, aneuek yatem ngon meuntui dan inong-inong balee. bek poh mate ureueng hana meusalah di nanggroe nyoe. bek seumah ilah-ilah laen, sabab hainyan teupeubinasu gata. meunyo gata ta-ubah cara udeb gata dan pi-e gata dan tapioh hana le tapeubuet banmandum nyang, ulon ku idhin gata teutab tinggai di nanggroe nyoe nyang ka ulon bri sibagoe tanoh pusaka ubak indatu gata. teuma, nyang sikeubitjih, sia-sia mantong gata peucaya ubak tutoe haba nyang sulet. gata taceumeucue, tapoh mate gob, meumukah, jeuet keusaksi nyang sulet, peuseumah keureubeuen keu baal, dan gata seumah dewa-dewa nyang hana gata turi. oh ltheueh banmandum nyan gata peubuet, gata tajak meuhadab ulon di sinoo, di baet ulon keudroe, dan tapeugah, 'kamoe aman!' oh ltheueh nyan gata peubuet lom buet gata nyang jeuhet nyan. peu kheueh gata anggab baet ulon nyoe uempueng peurampok? banmandum buet gata ka ulon kalon. tajak laju u silo, banda nyang ilee ulon pileh jeuet keu teupat ibadah ubak ulon. ngieng kheueh peue nyang ka ulon peujeuet keu teupat nyan sabab desya umat ulon israel. bahpi ka meu ulang-ulang lon peugah haba ubak gata, gata teutab cit han tatem deungoe. gata tapeubuet banmandum desya nyan, dan hana taseuot meunyo ulon hoi. nyang kheueh, baet ulon nyang gata peubangga nyan, dan teupat nyang ulon bri keu indatu gata dan ubak gata nyoe teuma ulon peujeuet lagee silo yoh masa ilee. gata lon use dikeue ulon lagee nyang ka ltheueh lon use kawom syedara gata, umat israel." tuhan meufeuroman, "he yeremia, bek kheueh neumeudoa keu ureueng-ureueng nyoe. bek neulakee tulang atawa neumeudoa keu awaknyan; bek neupaksa ulon, sabab ulon han kutem deungoe nyang teulakee nyan. gata ka neungieng keudroe peue nyang awaknyan peubuet di banda-banda yehuda dan rot-rot di yerasalem! aneuek-aneuek banyak jipeusapat kayee apui, di ureueng agam jipeuhu apui, dan di ureueng inong jilawok teupong keu teupeuget juadah keu dewi nyang awaknyan boh nan ratu syeuruga. dan keu teupeusaket ate ulon awaknyan jipeuseumah cit ie anggo keu ilah-ilah nyang laen. teuma nyang sikeubitjih, kon ulon nyang awaknyan peusaket, teuma droe jih keudroe sampoe awaknyan malee. ulon, tuhan nyang mahamanyang, lon peuteuka meureuka ulon nyang luwabiasa u ateuah rumoh ibadah nyoe, ateuah manusia dan beulatang, meunan cit ateuah bak-bak kayee dan hase bumoe. beungeh ulon meutamah-tamah ju lagee apui nyang han hase teupeulon." tuhan meufeuroman, "he umat lon, gata tateupeue bahwa keureubeuen nyang gata tot di ateuah miseubah haroh teutot sampoe habeh, dan keureubeuen nyang laen jeuet gata pajoh. teuma ulon, tuhan meufeuroman, hanapeue, jeuet tapajoh banmandum nyan! bak watee ulon ba indatu gata lon peuteubiet nibak nanggroe meuse, ulon hana lon bri keu awaknyan peuratoran keuhai keureubeuen nyang teutot atawa keureubeuen-keureubeuen nyang laen. teuma ulon peurintah ubak awaknyan mangat awaknyan jitaat ubak ulon mangat ulon beujeuet keu po teu allah awaknyan, dan awaknyan jeuet keu umat lon. ulon yue bak awaknyan mangat udeb

meunurot nyang ulon peurintah mangat awaknyan mubahgia. teuma awaknyan hanjitem deungoe dan hanjitem simak hainyan. awaknyan nyang jiseutot peue nyang jikheun le ate jih keudroe nyang kreueh dan jeuhet nyan. awaknyan kon meutamah jroh teuma meutamah jeuhet leubeh nibak nyang ka. yoh phon indatu gata jiteubiet lam nanggroe meuse sampoe nibak uroenyoe ulon sabe lon kirem hamba-hamba lon, nabi-nabi, keu gata. teuma hana nyang jitem deungoe atawa nyang tem simak. gata meutamah kreueh ulee dan jeuhet leubeh nibak indatu gata." oh ltheueh nyan tuhan meufeuereuman lom, "le sababnyan, he yeremia, bahpi gata bri tee banmandum nyan ubak umat lon, awaknyan hana jipako tutoe haba gata. bahpi gata tawok awaknyan, awaknyan teutab han jitem seutot. le sababnyan, peugah kheueh ubak awaknyan bahwa awaknyan na kheueh saboh bansa nyang hanjitem taat ubak ulon, tuhan, po teu allah awaknyan. awaknyan hanjitem meuruno ubak hukoman nyang ka jirasa keudroe. keuseutiaan ubak ulon ka habeh, dan hana teupeugah le." tuhan meufeuereuman, "wahe peunduduek yerusalem, meukabong kheueh! koh kheueh ok gata dan tiek kheueh keudeh! meuca-e kheueh deungon ca-e meuba-e diateuh gle-gle gunung-gunong, sabab ulon, tuhan, teungoh mureuka dan ka lon tulak gata banmandum nyan. ureueng yehuda ka jipeubuet buet nyang jeuhet. beurala-beurala awaknyan nyang that lon banci ka jikeubah lam baet lon, sampoe baet ulon nyan ka jeuet keukoto. saboh miseubah nyang nan jih tofet ka awaknyan peudong di panton hinom keu jipeuseumah aneuek-aneuek awaknyan sibagoe keureubeuen nyang teutot. padahai ulon hantom lon yue ubak awaknyan mangat jipeubuet hai nyang lagee nyan, hantom na hai nyang lageenyan teupike lam ate lon. sababnyan, trok saat jih teupat nyan hana le teuboh nan tofet atawa panton hinom, teuma panton teupat seumeusie. tanoh nyan teuma jeuet keu lampoh jrat sabab hana teupat nyang laen. manyet-manyet awaknyan jeuet keupeunajoh cicem atawa beulatang buih nyang laen, hana ureueng nyang jijeuet seugah. nanggroe nyoe jeuet keu padang tandus. su keugeumbiraan dan su ureueng meukeureuja meukawen lon peupioh di banda-banda yehuda atawa di jalan-jalan yerusalem. bak masanyan tuleueng-tuleueng raja dan peujabat-peujabat peumeurintahan di yehuda, meunan cit deungon tuleueng-tuleueng teungku-teungku imeum, nabi dan peunduduek yerusalem nyang laen teupeuteubiet lam jrat awaknyan, kon keu teupeusapat atawa teuseubee lom, teuma teupeubiyeu mantong teutiek-tiek ateuh tanoh sibagoe bloh nyang hana hareuga. tuleueng-tuleueng awaknyan meutabu dan meusiseue dikeue mata uroe, buleen dan bintang nyang awaknyan peudewa, awaknyan cinta, peutimang, seumah dan lakee peutunok. dan ureueng-ureueng nyang mantong udeb nibak bansa nyang jeuhet nyoe nyang ka ulon peucure bre ho-ho mantong leubeh galak mate nibak udeb. ulon, tuhan nyang mahakuasa, ka lon peugah haba." tuhan meufeuereuman ubak ulon geuyue peusampoe nyang lagee nyoe keu umat gobnyan, "meunyo na ureueng reubah, teunttee ureueng nyan jibeudoh lom, dan

meunyo na ureueng nyang sisat nibak rot ueh raya, teunttee ureueng nyan jiwoe lom. teuma pakon gata, hai umat lon, hana putoh-putoh meunyeuleweng dan tatinggai ulon? gata tamumat khong that nibak beurala gata, dan han tatem woe ubak ulon! ulon ka lon deungoe get-get, teuma gata hana tamariet lagee nyang sibeuna jih. hana meusidroe pih nibak gata teulah bak buet jih nyang jeuhet. hana nyang peugah, 'peue salah ulon?' gata banmandum taseutot rot droe gata keudroe lagee gata nyang teungoh maju dalam mideuen prang. cicem cang iriek pih jiteupeue watee jih keujiwoe; teukukur, cicem ujeuen dan cicem pala pih jiteupeue pajan masa jih jijak jiminah teupat. teuma gata, nyang umat lon, hana taturi hukum-hukum nyang ulon bri ubak gata. beuhe that gata peugah bahwa gata bijaksana, dan tateupeue hukum-hukum lon! cuba gata kalon pakriban hukum-hukum lon nyan jiubah le ureueng-ureueng nyang malem agama nyan curang! ureueng nyang malem-malem nyang na di lamkawan gata teuma teupeumalee. awaknyan gadoh akai dan teujeubak. awaknyan hanjitem teurimong peue nyang ulon naseuhat; jinoenyoe, keubijaksanaan peu kheueh nyang mantong na nibak awaknyan? sababnyan ulon kubri lampoh awaknyan keu toke tanoh nyang laen, dan peurumoh awaknyan keu ureueng laen. awaknyan banmandum, cut rayeuk, jimita laba deungon jalan nyang hana juoe. meunan cit nabi dan teungku imeum pih jipeunget gob. luka-luka nibak umat lon jianggab le awaknyan luka-luka bacut sagai. 'ah, hana peue-peue nyan,' jipeugah le awaknyan, 'banmandum get-get dan aman.' padahai meubacut pih kon lagee nyan. meunurot lon, sikeubit jih gata malee sabab tapeubuet bandum nyang hina nyan! teuma gata teubai muka dan hana tateupeue keu malee. sababnyan gata rhot lagee ureueng nyang ka rhot; habeh kheueh riwayat gata meunyo ulon hukum gata. meuharab that ulon keuneuk peusapat umat lon lagee ureueng jipeusapat hase tanoh jihnyan. teuma, umat lon lagee bak anggo dan bak ara nyang hana muboh, dan on-on jih pih habeh layee. nyang kheueh sabab jih lon bri keu ureueng aseng teuka dan jikuasa nanggroe awaknyan. ulon, tuhan, ka lon peugah haba." "pakon geutanyoe hana tapeugot sapeue?" jipeugah le umat po teu allah. "jak geutanyoe meusajan-sajan tajak meunungoe ubak banda-banda nyang na kuta, mangat tanyoe mate disinan. tuhan po teu allah geutanyoe ka geupeputoh bahwa geutanyoe haroh binasa. gobnyan ka geubri keu geutanyoe racon jeuet tajieb sabab geutanyoe meudesya ubak gobnyan. sia-sia mantong geutanyoe taharab dame dan masa teupeupuleh, sabab nyang na, na kheueh keukerasan. musoh ka trok u banda dan; su geunta guda awaknyan ka teudeungoe, dan bansaboh nanggroe ka teumakot. musoh teuka keu jijak peuhanco banmandum nanggroe geutanyoe, meunan cit deungon banda geutanyoe dan banmandum peunduduek geutanyoe." "ngieng kheueh!" kheun tuhan. "jinoenyoe ulon kirem uleue-uleue lamkawan gata mangat jijak kab gata, uleue meubisa nyang hana hase deungon teu-rajah." ate ulon lagee teu ireh-ireh dan lumpah that seudeh, nestapa lon hana teu-ubat. deungoe kheueh,

bansaboh nanggroe ka meudeungong geumeuciek bansa lon nyang teumanyong, "peu kheueh hana le tuhan di sion? dipat kheueh raja geuhnyan jinoo?" geujawueub le tuhan, raja awaknyan, "pakon gata sujut ubak dewa-dewa nyang meubacut pih hana meuguna? pakon gata peusaket ate ulon deungon cara taseumah beurala-beurala?" umat israel jimeuhoi, "museum keumeukoh dan museum jidong khueng jinoenyoe ka hana le, teuma geutanyoe gohlom cit seulammat." ate lon reumok sabab bansa lon brat that saket; ulon meukabong dan apoh apah. peu kheueh geurangan jih nyang jeuet keusabab sampoe bansa lon jinoenyoe gohlom cit puleh? peu kheueh bansaboh gilead, hana dokto atawa ubat? keubit get that meunyoe lam ulee lon peunoh deungon ie lagee lam mon, dan mata lon lagee mata ie nyang hana putoh-putoh ji teubiet ie! teuma ulon hase lon mo ba-e uroe ngon malam, lon peuba-e ureueng-ureueng nyang saboh bansa deungon lon nyang ka jipoh le lawan. meunyoe di padang pasi hase lon teuma teupmat meudom keu ureueng nyang teungoh jije jioh! teuma ulon kutinggai bansa lon, dan lon jak keudeh mangat jioh nibak awaknyan. awaknyan ka jikhianat banmandum nyan, saboh kawan ureueng nyang hana seutia, dan sabe lam siab keuji meusulet. bansaboh nanggroe, nyang beuna hana meukuasa, teuma nyang hana juoe nyang nyang meuraja lela. keu rakan, soe mantong ureueng haroh waspada dan syedara droepi hana jeuet teupeucaya. sabab, lagee nabi yakub meunan kheueh deungon awaknyan, maseng-maseng jipeunget syedara jih. soe mantong ureueng jikak ho nyang galak keujijakba fiteunah dan haba dusta. banmandum saleng teumipee, hana nyang juoe bak peugah haba. babah awaknyan ka lazem jipeugah nyang sulet, awaknyan hana hase jitinggai desya nyang ka na. keukeujaman deumi keukeujaman, teumipee deumi teumipee hana putoh-putoh jipeubuet le awaknyan, awaknyan meubacut pih hana jiteurimong tuhan. sabab nyan tuhan nyang mahakuasa geupeugah, "lagee beuso, umat lon ujoe mangat awaknyan jeuet keumurni. peue lom nyang jeuet ulon peubuet keu umat lon nyang ka jipeubuet buet nyang jeuhet? tutoe haba awaknyan lumpah that meubahya, hase jipeumate lagee aneuk panah nyang meubisa. tutoe-tutoe haba awaknyan sulet mandum. nariet awaknyan mameh ngon meunarek, teuma nyang sikeubit jih awaknyan jipasang taloe taron. ek kheueh nyoe atueh bansa nyang lagee nyoe hana lon peurhot hukuman nyang paih? ulon balaih buet-buet awaknyan; ulon, tuhan, ka lon peugah haba!" ulon, yeremia lon peugah, "ulon keuneuk mo meuba-e dan meukabong sabab blang naleueng di guron dan di gunong-gunong nyang ka tho kreng dan hana jikak le gob. su beulatang peulara hana teudeungoe le, cicem-cicem dan beulatang-beulatang nyang laen pih ka habeh jiplueng sapan sapa." tuhan ulon geupeugah, "yerasalem lon peujeuet keu rungka-rungka teupmat jimusom asee uteuen. banda-banda yehuda jeuet keuseungue, teupmat nyang hana le ureueng tinggai." laju ulon tanyong, "tuhan, pakon nanggroe nyoe neupeubiyeu tho kreng lagee padang pasi sampoe hana ureueng nyang na jak rot nyan? peu kheueh na nyang leubeu

carong keu jimuphom banmandum nyoe? ubak soe kheueh nyang jeuet ulon bri peunjeulasan mangat jihnyan hase jipeusampoe ubak ureueng laen?" geujawueub le tuhan, "nyan teujadi sabab umat lon hana le jipakoe keu ajaran-ajaran nyang ka ulon bri ubak jihnyan. awaknyan hana taat ubak ulon, dan han jitem turot ubak peue nyang ulon peurintah. awaknyan kreueh that ulee dan jiseumah beurala-beurala baal lagee nyang ka jipeurunoe le indatu awaknyan. sabab nyan, deungoe kheueh peue nyang ulon, tuhan nyang mahakuasa, allah israel, lon peubuet: keu umat lon lon bri seunaman nyang lumpah phet watee jipajoh dan racon mangat jijieb. awaknyan lon tabu lamkawan bansa-bansa nyang laen nyang hana jituri le awaknyan meunan cit le indatu awaknyan. hana putoh-putoh ulon kirem keu awaknyan sipa-i-sipa-i nyang jijak pang awaknyan dan ulon peubinsa awaknyan sampoe an habeh." tuhan nyang mahakuasa meufeureuman ubak umat gobnyan, "tangieng kheueh peue nyang teungoh teujadi di nanggroe nyoe, dan beubagaih kheueh tajak tawok ureueng meuba-e. tayue kheueh awaknyan beujikak keunoe dan tayue meuca-e laju lagu meudukacita." ureueng yehuda jipeugah, "neuyue laju awaknyan beubagaih jimeuca-e, lagu meukabong keu geutanyoe banmandum, mangat ie mata geutanyoe meuleng-leng ro nibak bibi." di sion na teudeungoe su ureueng mo ba-e, "geutanyoe binasa dan lumpah brat jipeumalee. nanggroe geutanyoe deungon brat ate tanyoe tinggai disinoe, dan rumoh-rumoh geutanyoe habeh hanco pangpo hanmeuho saho." ulon peugah, "deungoe kheueh tutoe haba tuhan, he ureueng inong banmandum! keu aneuek-aneuek dara gata tapeuruno laju ca-e mo ba-e, keu rakan-rakan gata ca-e dukacita. mawot ka jitamong rot peuradeuen, ka jitamong lam meuligoe; laju jiteugom aneuek-aneuek miet nyang na bak rot dan ureueng-ureueng muda nyang na lam blang raya. manyet-manyet ka reubah meulampa di jeueb-jeueb sagoe lagee broh-broh nyang meutabu di atueh tanoh; lagee gandom nyang ka teukoh laju jitinggai hana jihiro dan hana le jipeusapat lom teuma. nyan kheueh peusan tuhan nyang haroh ulon peusampoe." tuhan meufeureuman, "ureueng aref hana jeuet bangga sabab keubijaksanaan jihnyan, ureueng teuga sabab teunaga jihnyan, dan ureueng kaya sabab hareuta jihnyan. soe nyang keuneuk meubangga keuhai sapeue-peue, haroh kheueh jimeubangga bahwa jih jituri dan jimuphom ulon; bahwa jihnyan jiteupeue ulon na gaseh keu siumu masa, dan ulon peudong hukom dan keuadalan di atueh rhueng donya. banmandum nyan keubit that galak ate ulon. ulon, tuhan, nyang peugah hainyan." tuhan meufeureuman, "teuma trok wateejih ulon hukom ureueng nanggroe meuse, yehuda, edom, amon, moab, dan peunduduek padang pasi nyang jigunteng paneuk ok gobnyan. awaknyan banmandum teupeukatan saban lagee ureueng israel, teuma bah kheueh awaknyan meunan cit deungon bansa israel jipeusanaut saban cit lagee ureueng-ureueng nyang hana meukatan, sabab awaknyan hana jitaat ubak peujanjian nyang teupeulambang nibak meukatan nyan." he umat israel, deungoe kheueh peusan tuhan

ubak gata. gobnyan meufeureuman, "bek taseutot keubiasaan bansa-bansa laen, dan bek yu gata watee takalon tanda-tanda nyang na di langet nyang lumpah jiatkot le bansa-bansa nyan. adat istiadat bansa-bansa nyan meubacut pi hana meuguna. awaknyan jijk teubang bak-bak kayee di uteun, dan laju jiyue peubuet ubak utoh kayee deungon alat beujeuet keupatong beurala. oh ltheuehnyan patong beurala nyan laju jipeungui deungon meuh dan pirak, laju jipeukung deungon labang mangat bek reubah. patong-patong beurala nyan na kheueh lagee patong-patong ureueng pura-pura nyang na di lampoh-lampoh timon. awaknyan hana jeuet jipeugah haba, dan hana hase jibot langkah, dan haroh teubeut. bek teumakot keu awaknyan, sabab awaknyan hana hase jipeubuet jeuhet ateuh gata; meunan cit deungon jipeubuet nyang jroh nyan pi hana hase." tuhan nyang mulia, droeneueh hana ngon peusa, teutab agong dan peunoh kuasa. soe mantong nyang hanjitem taqwa ubak droeneueh, raja sigala bansa? keubit, droeneueh patot that teuhoreumat. nibak bandum nyang carong lamkawan bansa-bansa nibak bandum raja-raja awaknyan, hana meusidroe pih nyang jeuet teupeusaban deungon droeneueh, ya tuhan. awaknyan banmandum bangai sabab dewa awaknyan na kheueh kayee nyang hana meuguna, dan hana jeuet jipeuruno nyang meumanfaat. jihnyan teulapeh deungon meuh dan pirak nyang teuba di tarsis dan banda ufah, banmandum buet jaroe bubena seuniman dan pande meuh. peukayang awaknyan nibak ija ungu tuha dan ungu muda, nyang jipeubuet le ureueng ahli teumpeun deungon seusama. teuma, droeneueh, ya tuhan, po teu allah nyang beutoi, allah nyang bri udeb, raja keukai. meunyoed droeneueh beungeh, bumoe nyoe meuhayang, dan meunyoed droeneueh teuka geungeuen dumna bansa han ek jiteun. (gata he umat, haroh tabri tee ubak awaknyan bahwa dewa-dewa nyang hana jicebta langet dan bumoe nyan geupeubinasa. awaknyan leunyah nibak muka bumoe.) tuhan geucebta bumoe deungon kuasa gobnyan, geupeuet donya deungon hikeumat, dan geuleueng langet deungon akai budoe geuh. teuma deungon geubri peurintah, meudeungong kheueh ie di cakrawala. nibak meubagoe ujong bumoe geupeuteuka awan, dan geupeujeuet kilat meuble cahya didalam ujeuen, dan geukirem angen bak teumpat teukeubah. ban geukalon banmandum nyan, teuka kheueh sadar manusia, bahwa jihnyan bangai dan hana peungeurtian. bubena pande meuh lumpah that malee, sabab patong beurala nyang jipeuet nyan peuleusu dan hana teuma meunyawong. beurala-beurala nyan hana meuguna, patot that teu peukem dan jihina. oh ka trok bak watee jih awaknyan teuma binasa. po teu allah nabi yakub hana lagee beurala-beurala nyan; gobnyan nyang cebta peue-peue nyang na. nan gobnyan na kheueh tuhan nyang mahakuasa; gobnyan ka geupileh israel jeuet keu umat gobnyan. he peunduduek yerasalem, gata jikeupong! sabab nyan, meukeumah kheueh laju! goenyoed tuhan geu-geulawa banmandum bansa yehuda u teumpat nyang teuboih; gata banmandum geupeuhanco sapan sapa. nyan kheueh peusan tuhan. peunduduek yerasalem laju jiteumawok, "kamoe

ka habeh luka ngon luhok hana jitem puleh. yoh watee ilee kamoe pike bahwa deurita nyoe ek kamoe tanggong, rupari hana. khimah kamoe habeh rusak, dan talo-talo jih ka habeh putoh banmandum. hana le nyang hase jipeudong khimah dan jipasang ija-ija jih, sabab aneuek-anuek miet ka habeh jijk." laju lon jaweueb, "bangai that peumimpin-peumimpin geutanyoe nyan. awaknyan hana jilakee peutunyok ubak tuhan, nyan kheueh sabab jih awaknyan hana meuhase, dan geutanyoe ka meutabu keudeh keunoe. deungoe kheueh! na lon deungoe haba bahwa na saboh bansa di utara jipeuteuka keususahan ubak geutanyoe. buet sipa-i jih sampoe bubena banda-banda di yehuda ka habeh seungue dan hana le ureueng duek nibak banda-banda nyan. bubena asee-asee uteun ka habeh jimusom disinan." tuhan, lon kuteupeue hana meusidroe pih nyang meukuasa jipeuteuntee nasib jih atawa jikeundali jalan udeb jih. neuseunuet kheueh kamoe, ya tuhan, teuma bek deungon peunyeunuet nyang saket hana teukira. dan bek teuma neuhukom kamoe meunyoed droeneueh teungoh lam beungeh, sabab, meunyoed lagee nyan, ka pasti kamoe nyoe binasa banmandum. neuba kheueh meuhob droeneueh u ateuh bansa-bansa nyang hana jiaku droeneueh dan nyang hanjitem meubakti ubak droeneueh. sabab awaknyan ka jipeubinasa bubena umat droeneueh dan jipeuhanco nanggroe kamoe. tuhan meufeureuman ubak ulon, "gata simak kheueh syarat-syarat peujanjian nyang ulon peuet deungon umat lon. neubri tee kheueh ubak ureueng yehuda dan peunduduek yerasalem bahwa ulon, tuhan po teu allah israel, lon kutok soe mantong ureueng nyang hana jitem taat ubak syarat-syarat peujanjian lon nyan. janji nyan ka ulon peuna deungon indatu awaknyan bak watee awaknyan ulon ba peuteubiet di nanggroe meuse, nanggroe nyang lagee nuraka nibak awaknyan. ulon yue awaknyan mangat taat ubak ulon dan jipeubuet peue mantong nyang ka ulon peurintah. jinoenyoed ka cit ulon peugah ubak ureueng yehuda dan ubak peunduduek yerasalem bahwa meunyoed awaknyan taat ubak ulon, awaknyan jeuet keu umat lon dan ulon jeuet keu allah awaknyan. meunyoed awaknyan jipeubuet banmandum nyan, ulon lon peuteupat janji lon ubak indatu awaknyan bahwa nanggroe nyang subo dan makmu, nyang bak saat nyoe awaknyan duek nyan, ulon jok keu awaknyan." ulon jaweueb, "get, tuhan." laju tuhan meufeureuman ubak ulon, "tajak kheueh u banda-banda nyang na di yehuda, dan ubak rot-rot nyang na di yerasalem. peutrok kheueh peusan lon nyoe ubak ureueng-ureueng nyang na disinan. tayue bak awaknyan jipeurati dan jitaat ubak syarat-syarat peujanjian lon. bak watee ulon kuba indatu awaknyan peuteubiet lam nanggroe meuse, deungon teugaih ulon peuingat ubak awaknyan mangat jitaat ubak ulon. sampoe nibak uroenyoed pih ulon teutab lon peuingat umat lon keuhai nyang nyan, dan ulon yue awaknyan jitaat ubak peujanjian lon nyan, teuma awaknyan teutab hanjitem deungoe dan han jitem taat. dan awaknyan teutab kreueh ulee dan jeuhet lagee uroe jeh. sabab nyan peue mantong hukuman nyang na teuteuh lam peujanjian nyan ka ulon peu rhot u ateuh awaknyan." oh ltheueh

nyan tuhan meufeuereuman lom ubak ulon, "ureueng yehuda dan peunduduek yerusalem ka jimupakat keu jilawan ulon. awaknyan ka jipeubuet desya nyang ka jipeubuet le indatu awaknyan nyang hana jitem taat ubak ulon, awaknyan jiseumah ilah-ilah nyang laen dan han jitem turot peue nyang ulon peurintah. bah kheueh nyan israel meunan cit deungon yehuda ka ji iengkeue ubak peujanjian nyang ka lon peuget deungon indatu awaknyan. le sababnyan, ulon, tuhan, ulon peuingat bahwa lon peutron beuncana u ateuah awaknyan dan awaknyan hana hase jipeusiblah droe. meunyo awaknyan jiteumawok jilakee tulung ubak ulon, hainyan hana lon deunge. laju le ureueng yehuda dan peunduduek yerusalem jijak lakee tulung ubak ilah-ilah nyang laen nyang awaknyan pujoe deungon cara jipeuseumah keureubeuen. ilah-ilah nyan hana cit hase jipeuseulamat awaknyan bak watee beuncana nyan teuka. ilah-ilah ureueng yehuda rame that, le jih na sidub banda-banda awaknyan keudroe. peunduduek yerusalem jipeudong miseubah-miseubah jai jih na sidub le rot-rot nyang na di yerusalem keu jipeuseumah keureubeuen ubak dewa baal. sababnyan, yeremia, bek kheueh tameudoa keu awaknyan dan neulakee tulung ubak ulon keu awaknyan! meunyo awaknyan lam keuadaan susah dan jilakee tulung ubak ulon, ulon teutab hana lon tem deungon awaknyan." tuhan meufeuereuman, "umat ulon nyang ulon gaseh ka jipeubuet hai-hai nyang jeuhet. awaknyan hana meuhak na di baet ulon. awaknyan jisangka bahwa deungon na jipeuguet janji-janji, dan deungon jipeuseumah beulatang, awaknyan hase jipeuteun malapeutaka. peu kheueh deungon lagee nyan awaknyan hase seunang? ka lheureh lon boh nan awaknyan bak zaiton nyang rampak, jai that jimuboh deungon boh nyang jroh-jroh. teuma, bak saat nyoe, deungon geumuroh nyang hebat teuma ulon tot tube na on jih dan ulon wiet banmandum ranteng jih. ulon kheueh nyang peudong israel dan yehuda, ulon, tuhan nyang mahakuasa. teuma, jinoenyo ka ulon reuncana keu lon peuteuka beunca u ateuah awaknyan. sabab awaknyan keudroe kheueh nyang jeuet keusabab banmandum nyan, sabab awaknyan ka geupeubuet nyang jeuhet, na kheueh deungon cara jipeuseumah keureubeuen keu baal sampoe ulon beungeh." tuhan geubri tee ubak ulon keuhai reuncana jeuhet musoh-musoh lon ateuah ulon. ulon lagee bubiri nyang hana curiga jiba ubak teupat jisie takue. ulon hana lon teupeue bahwa ulon kheueh nyang jeuet keusasaran reuncana jeuhet awaknyan. awaknyan jipeugah, "jak takoh bak kayee nyoe simantong bak kayee nyan jitem muboh; ta teubang beubahab mangat nan jih jittuwoe le gob." laju lon meudoa, "ya tuhan nyang mahakuasa, droeneueh kheueh hakem nyang ade; droeneueh kheueh nyang ujo pikeran dan ate ureueng. hai ulon nyoe lon seurah ubak droeneueh. seumoga ulon meuteume lon kalon droeneueh balaih buet-buet awaknyan." ureueng-ureueng nyang na di banda anatot meuharab that mangat ulon mate. awaknyan jipeugah, "meunyo gata hana cit tapioh tapeugah sabe peusan-peusan tuhan ubak kamoe, gata kamoe poh mate." sababnyan, tuhan nyang

mahakuasa geupeugah, "ulon lon hukom awaknyan! ureueng-ureueng muda awaknyan mate dimideuen prang, aneuek-aneuek awaknyan mate sabab deuk. ulon ka lon peuteuntee watee jih keu lon peuteuka bala u ateuah ureueng-ureueng anatot, dan meunyo watee hukoman awaknyan ka teuka, hana meusidroe pih nyang tinggai." "meunyo ulon ba peukara lon ukeue droeneueh, ya tuhan, teuntee kheueh teubukeuti bahwa droeneueh kheueh nyang beutoi. teuma ulon meuheuet cit lon keuneuk tanyong ubak droeneueh keuhai keuadalan: pakon ureueng jeuhet makmu? pakon ureueng nyang hana juoe nyang meuhase? droeneueh pula awaknyan lagee seunaman, laju awaknyan meu ukeue, timoh, dan jimuboh. awaknyan sabe jimariet nyang jroh-jroh keuhai droeneueh, teuma lam ate, awaknyan nyang seubeuna jih hana jipako ubak droeneueh. teuma droeneueh, ya tuhan, neuturi ulon. droeneueh neukalon peue nyang ulon peubuet, dan droeneueh neuteupeue pakriban peurasan ate lon keu droeneueh. neuhila kheueh ureueng-ureueng jeuhet nyan mangat jiteubiet uluwa, neuba kheueh awaknyan lagee bubiri ubak teupat sie. jaga kheueh awaknyan sampoe trok bak watee awaknyan teusie. na padub treb teuk nanggroo nyoe tho kreg, dan naleueng jih layee nibak tieb-tieb ladang? citem dan beulatang nyang laen habeh mate sabab keujeuhetan bansa kamoe. awaknyan jipeugah, bahwa ulon hana lon kalon nasib awaknyan." tuhan meufeuereuman, "yeremia, meunyo gata jeuet keu hek neumeulet-let ngon manusia, panena mungken gata meulet-let deungon guda? meunyo bak tanoh nyang aman gata teumakot, peu kheueh nyang gata peubuet meunyo gata ka na di padang meupaya di bineh yordan? gata ka jikianat bahkan le kawom syedara gata keudroe; awaknyan meusajan-sajan jiseurang gata. bek kheueh tapateh ubak awaknyan, bahpi tutoe haba awaknyan mameh." tuhan meufeuereuman, "teupat tinggai lon hana le lon hiro pako, nanggroo nyang ka jeuet keu hak milek lon ka ulon tinggai, dan umat lon nyang ulon gaseh ka ulon seurah ubak musoh-musoh jih. umat nyang ka lon pileh jilawan ulon; lagee singa nyang na lam gle meunan kheueh awaknyan jiteuma-uem ateuah ulon. nyang kheueh sabab jih ulon banci keu awaknyan. awaknyan lagee citem nyang jipeucrok le kleung di jeueb-jeueb sagoe. tawok kheueh bubena beulatang uteun mangat meusajan jijak peu habeh awaknyan. le that peunguasa aseng nyang ka jipeurusak lampoh anggo lon dan jigilo-gilo ladang-ladang lon. nanggroo ulon nyang lagak ka jiubah jeuet keu padang pasi nyang seungue. bit, oh ulon ngieng awaknyan jipeujeuet nanggroo ulon teupat nyang seungue nyang lumpah seudeh. banmandum ka teulanta, hana ureueng nyang jitem pakoe. di siblai padang pasi di gunong-gunong, ureueng laen jijak keu meureupah. ulon laju lon peuteuka prang keu teupeurusak bangsigom nanggroo sampoe hana meusidroe pih nyang hase udeb lam dame. umat ulon jitabu gandom, teuma nyang jipot na kheueh duro. awaknyan meususah payah teuma useuha jihnyan sia-sia. ulon lumpah that beungeh sampoe hase panen awaknyan gagal." tuhan meufeuereuman, "nyoe kheueh peusan

ulon keuhai nanggroe-nanggroe teutangga israel
nyang ka jipeurusak nanggroe nyang ka ulon bri
keu umat lon israel. lagee seunaman nyang ji bot
bak tanoh, meunan kheueh ureueng jeuhet nyan
lon peuteubiet lam nanggroe awaknyan keudroe,
dan yehuda lon peulheuh lam reugam awaknyan.
teuma oh ka ltheueh awaknyan teupeuteubiet, ulon
lon sayang lom keu awaknyan; tieb-tieb bansa lon
ba lom u nanggroe jih keudroe. meunyo awaknyan
deungon sipeunoh ate jitem teurimong agama umat
ulon dan jitem meusumpah deungon jipeugah,
'deumi tuhan nyang udeb,' - lagee yoh ilee awaknyan
jipeurunoe umat ulon jimeusumpah deumi baal -
teuma awaknyan pih jitamong cit lam umat ulon
dan jeuet keu makmu. teuma bansa nyang hanjitem
turot peue nyang ulon peugah, bansa nyan lon lot
lagee seunaman dan lon peubanco sapan sapa. ulon,
tuhan, ka lon peugah haba." tuhan meufeureuman
ubak ulon geuyue jak bloe ija krong paneuk nibak
lineun dan geuyeuengi ija nyan ubak ulon, teuma ija
nyan hana jeuet ulon ceulob lam ie. dan laju ulon
jak bloe ija lineun paneuk nyan, oh ltheueh nyan laju
lon ngui. oh ltheueh nyan tuhan meufeureuman lom
ubak ulon lagee nyoe, "tajak kheueh laju ubak krueng
efrat, dan tasom laju ija krong paneuk nyan lam
luengkiek batee." dan lagee nyang ka geupeurintah ie
tuhan nyan laju ulon jak peubuet haiinyan deungon
ulon som ija krong paneuk nyan nibak krueng efra-
napadub treb teuma oh ltheuehnyan tuhan geuyue
lom ubak ulon mangat lonjak lom ubak krueng
efrat keu lon jakcok ija krong paneuk nyan. dan
laju lon jak keunan dan lon peuteubiet laju ija krong
paneuk nyang ka ulon som nyan. dan teunyata ija
nyan ka lumpok, dan meubacutpi hana jeuet ngui
ie. laju tuhan meufeureuman lom ubak ulon, kheun
gobnyan, "meunan kheueh cara jih ulon peubuet
ateuh ureueng yehuda dan peududuek yerusale-
m. ulon kupeuhanco sombong ngon angkoh awaknyan
nyang ka lewat bataih nyan. bansa nyang jeuhet nyoe
lumpah that kreueh ulee dan hanjitem taat ubak ulon.
awaknyan jimeuebadat dan meubakti ubak ilah-ilah
nyang laen. nyang kheueh sabab jih awaknyan
jeuet lagee ija krong paneuk nyang hana meuguna
nyan. lagee ija krong paneuk nyang teu ikat khong
that nibak keueing ureueng nyang ngui, meunan
kheueh ulon meuharab beujeuet ureueng israel dan
yehuda teu ikat krab that nibak ulon. deungon
lageenyan awaknyan jeuet keu umat lon nyang
teupeujeuet nan ulon teupujoe dan jihoreumat.
teuma, awaknyan hanjitem seutot ulon." tuhan
po teu allah meufeureuman ubak ulon, "yeremia,
neupeusampoe laju peusan ulon ubak ureueng israel
bawa tieb-tieb guci teupat anggo haroh jipasoe
peunoh deungon ie anggo. awaknyan jijawueub, 'ek
kheueh hana kamoe teupeue bahwa tieb-tieb guci
haroh peunoh teupaso ngon ie anggo?' dan tapeugah
kheueh ubak awaknyan bahwa ureueng-ureueng
di nanggroe nyoe, raja-raja keuturonan nabi daud,
dumna imeum, nabi, dan banmandum peunduduek
yerusalem lon pasoe peunoh deungon anggo sampoe
mabok. laju awaknyan lon antok sidroe ngon nyang
laen. tuha ngon muda lon peubuet bandum lagee
nyan hana lon bri amphon. awaknyan lon peubinasa

hana lon weueh. ulon, tuhan, ka lon peugah hana." he
umat israel, tuhan ka geupeugah haba! bek sombong,
deungoe peue nyang geupeugah! tuhan po teu
allah gata haroh gata peu agong sigohlom gobnyan
geupeuteuka seupot, dan gaki gata meugantoh nibak
gunong-gunong, sigohlom trang nyang gata harab
geubah nyan jeuet keu seupot. meunyo gata beu
oe tadeungoe nyan, ulon kumo deungon seungab-
seungab. deungon rasa seudeh ngon pilu lon peuba-e
keu angkohon gata. ie mata lon roe meulangue sabab
umat tuhan jiangkot sibagoe ureueng nyang teuteun.
tuhan meufeureuman ubak ulon, "yue laju raja dan
peureumaisuri jitron nibak takhta jih, sabab mahkota
gobnyan nyang tari ka rhot nibak ulee. banda-banda
yehuda di bagian seultan teungoh jikeupong, dan
hana ureueng nyang hase ji heuntam keupongan
nyan. banmandum ureueng yehuda ka geuangkot
u teupat nyang teuboih." tuhan meufeureuman
ubak peunduduek yerusale- m, "ngieng kheueh nyoe!
musoh-musoh gata teungoh jijak nibak utara! dipat
kheueh ureueng nyang haroh gata lindong dan
nyang that-that gata peubangga nyan. peue nyang
gata peugah meunyo ureueng-ureueng nyang
gata peubuet ateuh jih sibagoe ureueng tawanan
gata jipeutaloe dan jikuasa ateuh gata? pasti gata
meurasas saket lagee ureueng inong nyang teungoh
peulahe aneuek. mungkin gata teumanyong lam ate
pakon banmandum nyan rhot u ateuh gata, pakon
peukayan gata jipriek-priek dan gata jipeukosa.
tateupeue kheueh bahwa nyan teujadi sabab desya
gata ka lumpah that raya. peue kheueh hase ureueng
itam teu ubah hi kulet jih jeuet keu ureueng puteh,
atawa rimueng teupeugadoh kureng jih? teunttee
hana! meunan kheueh deungon gata nyang ka lazem
tapeubuet jeuhet hana mungkin tapeubuet nyang
jroh. ulon kupeurebre gata lagee sikeum nyang
jiyueb le angen di padang pasi. nyan kheueh naseb
gata nyang ka ulon peuteunttee sabab gata ka tatuuoe
keu ulon, dan ka tapeucaya ubak ilah-ilah nyang
peuleusu. ulon keudroe kupriek peukayan nyang na
nibak gata mangat gata teulon ngon malee. ulon ka
lon ngieng gata tapeubuet hai-hai nyang lon banci.
ulon ka lon ngieng gata tatiyeub ilah-ilah nyang
laen di buket dan di ladang, lagee sidroe ureueng
agam nyang pungoe ubak peurumoh ureueng laen
dan lagee guda agam meunafsu keu guda inong.
peunduduek yerusale- m, ceulaka kheueh gata! pajan
gata beubaih nibak banmandum keujeuhetan?"
tuhan meufeureuman ubak ulon keuhai museum
kheueh nyang lumpah brat, "yehuda museudeh ate
banda-banda jihnyan karab mate. ureueng-ureueng
jihnyan habeh teueh ateuh tanoh dan apoh apah.
yerusalem jikliek-kliek jilakee bantu. bubena peu-
layan di ureueng kaya jiyue jak mita ie pat-pat nyang
na; ubak mon jijak laju awaknyan teuma bubena
ie ka habeh tho hana sapat na. dan soh kheueh ie
lam calueng nyang awaknyan puwoe lom teuma.
deungonimbang dan putoh asa awaknyan malee
dan jitob muka. ujeuen hana jitron dan tanoh ka
tho ngon crah-crah; bubena na ureueng tani ka jitob
muka sabab jihnyan lumpah that keucewa. neleueng
ka hana le, sabab nyan nang rusa ka jiwieh. aneuek
nyang ban jipeulahe jitinggai disinan nibak padang

beulantara. bak pucak gunong keuleudee kleut ka teudong teupana, mata jih layoh sabab naleueng hana sapat na; beulatang nyan meuhak-meuhak lagee asee srigala. umat ulon jiteumawok, 'tuhan, bahpi desya kamoe jitudo kamoe teuma neutulong kheueh kamoe lagee janji droeneueh. droeneueh ka kamoe tinggai meu ulang-ulang; bit-bit, kamoe meudesya that ubak droeneueh. droeneueh sidroe harapan israel hana le nyang laen, nyang peuseulamat kamoe nibak bala. teuma pakon droeneueh lagee ureueng jame di nanggroe kamoe, lagee sidroe musafe nyang pioh simalam laju jajak lom teuma? pakon droeneueh lagee ureueng bingong; lagee pahlawan nyang hana hase teutulong? teuma, pasti droeneueh na diteung-goh kamoe, ya tuhan! kamoe nyoe umat droeneueh, bek kheueh kamoe nyoe droeneueh tinggai' " keuhai bansa nyan tuhan meufeureuman, "ulon hana harok ubak ureueng-ureueng nyan nyang galak that jipeuplueng droe nibak ulon, dan hanjitem jikuasa droe. ulon hana tuwoe ubak buet nyang salah nyang awaknyan peubuet, ulon kuhukom awaknyan sabab desya nyang jipeubuet." ulon meufeureuman ubak ulon, "bek talakee ulon mangat lon tulung awaknyan. bahpi awaknyan jipuasa, ulon teutab hana lon tem peue nyang jilakee tulung le awaknyan; dan bahpi awaknyan jipeuseumah ubak ulon keureubeuen nyang teutot dan keureubeuen gandom, ulon teutab hana galak deungon awaknyan. seubalek jih, ulon kupeuhabeh awaknyan deungon prang, deuk, dan bala peunyaket." laju ulon peugah, "ya tuhan nyang mahamanyang, droeneueh neutepue nabi-nabi ka geupeugah ubak rakyat bahwa hana prang atawa musem deuk, sabab droeneueh ka neumeujanji bahwa di nanggroe nyoe sabe lam keuadaan dame." teuma tuhan geujawueb, "nabi-nabi nyan ka jiba haba sulet atueh nan ulon; ulon hana lon yue awaknyan, dan hana teuma ulon bri peurintah atawa lon peugah haba ubak awaknyan. nyang deuh-deuh nyang ka lheueh awaknyan kalon nyang ji calitra le awaknyan atranyan bukan bak ulon; awaknyan jiramai hai-hai nyang hana meuguna dan haba nyan jikarang le awaknyan keudroe. awaknyan jipeugah atueh nan ulon bahwa nanggroe nyoe hana le prang atawa musem deuk, padahai ulon hana lon yue awaknyan mangat jipeugah lagee nyan. ulon, tuhan, lon peugah ubak gata, yeremia, peue nyang ulon peubuet atueh nabi-nabi nyang hana ulon kirem nyan. ulon kupeumate awaknyan deungon prang dan musem deuk nyang luwa biasa. ureueng-ureueng nyang ka jiteurimong ramaian-ramaian awaknyan, ureueng nyan pi ulon poh mate deungon cara nyang saban. manyet awaknyan jigelawa atueh rot-rot raya di yerasalem dan hana ureueng nyang kubu awaknyan. meunan kheueh naseb awaknyan dan aneuek bino awaknyan. teuma lon peujeuet awaknyan jirasa akibat buet nyang jeuhet nyang awaknyan peubuet keudroe." tuhan geuyue bak ulon mangat lon bri tee ubak umat gobnyan keuhai seudeh lon. ulon haroh lon peugah lagee nyoe, "bah kheueh ulon mo ba-e hana pioh-pioh, uroe ngon malam ile mata ile hana reuda. sabab bansa lon luka parah dan lumpah meudeurita. meunyoe ulon jak u padang, leumah lon kalon

manyet-manyet teutiek-tiek akibat prang. lam banda ulon kalon deurita, manusia-manusia karab mate akibat deuk nyang hana peunajoh. nabi dan teungku imeum jipeubuet keuwajaban hana muphom peue nyang awaknyan peubuet." tuhan, peue kheueh ka lheueh yehuda neutulak hana nyang tinggai dan peunduduek sion droeneueh banci? pakon kreueh that-that neuseupot kamoe sampoe kamoe hana puleh le? sia-sia mantong kamoe mita dame, hana meuguna kamoe meuharab bupuleh badan, sabab nyang na na kheueh keukerasan. tuhan, ubak droeneueh mantong kamoe ka meudesya. kamoe meungaku desya kamoe keudroe dan desya indatu kamoe. ingat kheueh ubak janji droeneueh, bek kheueh kamoe neupeuhina; janji droeneueh deungon kamoe bek kheueh neupeubateue. yerasalem teumpat takhta droeneueh nyang mulia, bek kheueh droeneueh hina. dewa-dewa bansa-bansa hana hase jipeutron ujeuen u atueh bumoe. meunan cit deungon langet hana meuhase jipeutron ujeuen ngon kuasa jih keudroe. droeneueh mantong kheueh harapan kamoe, ya tuhan. droeneueh nyang peubuet banmandum nyan sampoe teujadi. tuhan meufeureuman ubak ulon, "ulon hana lon gaseh keu bansa nyoe, bahpi nabi musa dan samuel jidong disinoe keu jilakee gaseh sayang lon keu awaknyan. yue weeh keudeh bansa nyoe, ulon hankutem lon kalon awaknyan! meunyoe awaknyan jitanjong ubak gata ho awaknyan haroh jajak, jawueb kheueh lagee nyoe, 'tuhan meufeureuman, nyang geupeuteuntee keumate sabab saket bah kheueh ureueng nyan mate sabab saket. nyang ka geupeuteuntee mangat mate di mideuen prang bah kheueh ureueng nyan mate di mideuen prang nyan. nyang ka teupeuteuntee mate sabab deuk bah kheueh ureueng nyan mate sabab deuk! nyang ka geupeuteuntee ureueng nyan haroh teudrob, bah kheueh ureueng nyang teu angkot sibagoe ureueng teuteun! ulon, tuhan, ka lon peuteuntee bahwa peuet boh hukoman nyang lumpah teumakot rhot atueh awaknyan: awaknyan mate dimideuen prang, manyet awaknyan jihua le asee, jipajoh le cicem, dan jipeuhabeh le beulatang juah. ulon kupeujeuet banmandum bansa di atueh donya teumakot ngon yo watee jingjibung awaknyan. banmandum nyan ulon peubuet sabab buet manasye bin hizkia di yerasalem watee jeuet keuraja yehuda." tuhan meufeureuman, "he peunduduek yerasalem, soe nyang gaseh keu gata? soe kheueh nyang jitem meuseudeh deungon gata? soe kheueh nyang jitem pioh jiteumanyong keuadaan gata? gata ka tatulak dan tatinggai ulon, sabab nyan ulon beutot jaroe lon keu lon peuhanco gata, sabab ulon ka hek that ulon peuteuen mangat ulon bek beungeh. bak tieb-tieb banda di nanggroe nyoe gata ulon boih lagee jeumpueng. bahpi gata na kheueh umat lon teuma ulon teutab lon peubinas gata dan aneuek-aneuek gata sabab gata hana tatem ubah cara udeb gata. nanggroe gata peunoh jikeumiet le inong balee, leubeu le nibak anoe di pante. manusia-manusia lon poh mate yoh jih mantong muda sampoe ma awaknyan udeb meudeurita. oh watee uroe ulon peuteuka atueh awaknyan sidroe ureueng nyang ba beuncana sampoe binasa sampoe awaknyan teu-

makot ngon apoh apah. sidroe ma nyang gadoh tujuh droe aneuek agam sampoe pansan ngon meusak nafah. uroe-uroe udeb gobnyan ka meutamah seupot, gobnyan meurasu jihina dan jipeumalee. musoh-musoh gata ulon yue jijak peumate nyang na mantong udeb lamkawan gata. ulon, tuhan, ka lon peugah haba." sial that ulon nyoe! keupeue guna jih ma ulon geupeulahe lon? ngon soe mantong ureueng nyang na di nanggroe nyoe ulon haroh meudakwa dan meutuleh lageh. bahpi ulon hantom lon ngui atra gob atawa lon peungui atra lon ubak gob, teuma ulon teutab jikutok le bandum ureueng. tuhan, meunyo ulon keubit hana lon peubuet tugaih ulon deungeon beutoi, dan hana lon bila musoh-musoh lon dikeue droeneueh bak watee awaknyan meuteume beuncana dan susah, bah kheueh kutokan awaknyan beutoi-beutoi teujadi. (hana meusidroe ureueng pi hase jiwiet beuso, leubeh lom beuso di utara nyang ka teuseupoh deungeon teumaga.) tuhan meufeureuman ubak ulon, "ulon kukirem musoh mangat jijak kuet keukayaan dan hareuta umat lon sibagoe hukoman ateh desya-desya nyang ka jipeubuet le awaknyan bansaboh nanggroe. di nanggroe aseng nyang hana awaknyan turi, ulon lon peujeuet awaknyan namiet musoh-musoh awaknyan, sabab beungeh ulon ka ju ngon hu lagee apui nyang meuhab-hab hanjitem lon." laju ulon peugah, "tuhan, droeneueh neuteupeue. ingat kheueh dan neutulong kheueh ulon. balaih kheueh awaknyan nyang jitiyeub dan jitindeeh ulon. bek kheueh saba that keu awaknyan sampoe awaknyan singoh meuteume jipoh mate lon. ingat kheueh, sabab droeneueh kheueh ulon nyoe jihina. droeneueh neupeugah haba ubak ulon, dan ulon deungoe peue-peue mantong nyang droeneueh peugah. ulon milek droeneueh, ya tuhan po teu allah nyang mahakuasa, sababnyan bandum tutoe haba droeneueh cukob mangat dan bahgia ate ulon. ulon hana rhoh lamkawan ureueng-ureueng nyang meuseunang-seunang sira meuwayang hana meuteuntee. sabab lon taat ubak droeneueh, teuma ulon jak peu aseng droe deungeon peurasana nyang beungeh. pakon ulon hana ploh meudeurita? pakon cabok ulon meutamah parah hana jitem puleh-puleh? peu kheueh na meukeusut nibak droeneueh neupeukeucawa ulon lagee ie krueng nyang tho watee museum khueng?" tuhan geujaweuh, "meunyo gata tagisa, ulon teurimong gata. gata jeuet keu hamba lon lom. meunyo gata tapeusampoe hai-hai meuguna dan kon haba beurakah, teuma gata jeuet keu nabi ulon lom. ureueng-ureueng laen jijak lom ubak gata, dan hana peureulee gata nyang jak ubak awaknyan. gata lon peujeuet kuta peurunggu keu awaknyan. awaknyan jiprang gata, teuma hana hase gata jipeutaloe. ulon teutab na meusajan gata keu lon lindong dan lon peuseulamat gata. ulon teuma lon peubeubaih gata nibak keukuasaan ureueng-ureueng jeuhet nyang keujam. ulon, tuhan, ka lon peugah haba." tuhan meufeureuman lom ubak ulon, geupeugah, "bek meukawen dan tameu aneuek di teupat nyoe. teuma ulon peugah ubak gata peue nyang teujadi deungeon aneuek-aneuek nyang lahe di sinoe dan deungeon ureueng syiek jih. awaknyan mate keunong peunyakot nyang jiba mawot, dan

awaknyan mate di mideuen prang atawa mate le sabab deuk. hana meusidroe ureueng pi nyang jipeuba-e atawa nyang tem peukubu awaknyan lam jrat. manyet awaknyan meutabu lagee pupuk tanoh, dan jipajoh le cicem meunan cit le beulatang juah. bek kheueh tajak u rumoh ureueng nyang teungoh meuduka, yeremia. bek meukabong keusoe mantong. ulon hana lon bri beureukat le keu umat ulon deungeon keuseujahteuraan, dan meunan cit hana teuma lon tunyok rasa weueh ngon sayang ubak awaknyan. ureueng kaya dan ureueng gasien di nanggroe nyoe mate hana ureueng nyang jak kubu awaknyan. hana meusidroe ureueng pih nyang jitem seksa droe atawa jicuko ok jih sibagoe tanda meukabong keu awaknyan. meunan cit hana ureueng nyang jitem bri khanuri keu teupeumangat ate ureueng nyang teungoh meukabong nyan. hana ureueng nyang jitem meuduka cita meunan cit deungeon ureueng nyang mate ayah ngon ma jihnyan. bek tatamong lam rumoh ureueng nyang teungoh khanuri. bek makheun atawa tajieb ie ngon ureueng nyan. deungoe kheueh peue nyang ulon, tuhan nyang mahakuasa, allah israel, keuneuk peugah ubak gata. su nyang geumbira dan suka cita dan meuriah jih bak khanuri ureueng meukawen lon peupioh deungeon sigra. hai nyan jikalon le ureueng-ureueng nyang udeb bak jamen gata nyoe. meunyo gata tapeutrok banmandum nyoe ubak awaknyan, mungen awaknyan jitanyong keupeue ulon keuneuk hukom awaknyan deungeon hukoman nyang kreueh. awaknyan jitanyong peue keusalahan dan desya awaknyan ateh lon, tuhan po teu allah awaknyan. tapeugah laju ubak awaknyan bahwa ulon meufeureuman lagee nyoe, "indatu gata ka jitinggai ulon keujijak seumah dan meue ibadat ubak ilah-ilah nyang laen. awaknyan jipeubeuah ulon dan hana jitem taat ubak peue-peue nyang ka lon boh peuratiran. teuma gata tapeubuet nyang leubeh jeuhet nibak nyang ka. gata kreueh ulee dan nyang taseutot kheun gata keudroe nyang jeuhet nyan. gata hana tatem taat ubak ulon. sabab nyan, gata lon use nibak nanggroe nyoe dan ulon boh bak saboh nanggroe nyang lumpah that aseng nibak gata dan nibak indatu gata. disinan gata meue ibadat uroe malam ubak ilah-ilah laen, dan ulon hana lon weueh meubacut pih keu gata." " tuhan meufeureuman, "teuma teuka watee jih manusia hana le jimeubudok deumi nan ulon, po teu allah nyang udeb, nyang ba umat israel jiteubiet lam nanggroe meuse, teuma deumi ulon, po teu allah nyang udeb, nyang ka lon ba umat israel lon peuteubiet lam saboh nanggroe di utara dan nibak banmandum nanggroe nyang laen di teupat awaknyan ka ltheueh ulon peucebre. awaknyan lon puwoe lom ubak tanoh ie jih keudroe, nanggroe nyang ka ulon bri keu indatu awaknyan." tuhan meufeureuman, "ulon keuneuk tawok neulayan nyang rame mangat jijak drob bubena ureueng nyoe. oh ltheueh nyan lon tawok ureueng teumieyub nyang le mangat jipeucrok awaknyan nyang na di tieb-tieb gunong dan buket, dan di guha-guha buket batee. ulon kalon banmandum nyang awaknyan peubuet. hana nyang teusom nibak ulon; meunan cit desya-desya awaknyan ka ltheueh ulon kalon.

desya dan keujeuhetan awaknyan lon balaih deungon hukoman dua goe lipat, sabab awaknyan ka jipeukuto nanggroe ulon deungon beurala nyang le. beurala-beurala nyan hana meunyawong saban cit lagee manyet." tuhan, droeneueh kheueh nyang lindong ulon dan nyang bri teunaga keu ulon; droeneueh nyang tulung ulon watee ulon lam susah. bansa-bansa di meubagoe ujong bumoe jijak ubak droeneueh sira jipeugah, "nibak indatu kamoe na ilah peuleusu nyang meubacut pih hana meuguna. peu kheueh hase manusia jipeugot ilah jih keudroe? teuntée hana! nyang jipeugot nyan pasti bukan po teu allah." "sabab nyan," kheun tuhan, "goe nyoe ulon ku peujeuet bansa-bansa mangat jirasa keukuasaan dan teunaga ulon mangat jeuet keu siumu masa awaknyan jiteupeue bahwa ulon kheueh tuhan." tuhan meufeureuman, "he bansa yehuda, desya gata ka teu uke bak ate gata dan bak bandum sagoe-sagoe miseubah gata deungon beuso meumata pensee nibak intan. ureueng-ureueng gata jimeu iebadat ubak miseubah-miseubah nyang tameh-tameh beurala nyang ka teupendong keu dewi asyera di tieb-tieb bak kayee nyang leuhu, di pucak-pucak buket, dan di gunong-gunong nyang na di luwa banda. sabab banmandum teupat seumah beurala nyang ka gata peudong bansaboh nanggroe dan sabab banmandum desya nyang ka gata peubuet, dan ulon lon peujeuet musoh-musoh gata jiangkot banmandum hareuta dan keukayaan gata. gata teupaksa tajok tanoh nyang ka ulon bri keu gata, dan ulon kupeujeuet gata tameungabdi ubak musoh gata bak nanggroe nyang banmandum aseng nibak gata. peu nyang ulon peubuet banmandum nyan sabab beungh ulon han ek lon teun le lagee apui nyang hu be raya dan hana hase teupeulon le." tuhan meufeureuman, "meunyo ureueng jitinggai ulon, tuhan jihnyan, dan jimeuharab ubak manusia dan jimeusadeu ubak teunaga manusia nyan, teuma ulon kuhukom ureueng nyan. ureueng nyan lagee seunaman nyang timoh lam padang, bak tanoh nyang tho, seungue seungab dan meusira teuma, hantom na jirasa get. teuma ureueng nyang meuharab ubak ulon, ureueng nyan lon bri beureukat hana reuda. ureueng nyan lagee bak kayee nyang timoh bineh krueng nyang ie krueng nyan sabe ji ilah; ukeue bak kayee nyan jimeu eue trok lam ie. hana jitakot museum keunong khueng, on-on kayee nyan sabe ijo. bahpi nanggroe habeh tho sabab museum khueng, bak kayee nyan hana yo sabab kayee nyan hantom putoh bak jimuboh. ate manusia hana nyang hase gob duga, paleng licek nibak peu nyang na dan lumpah that parah deungon peunyakot. ulon, tuhan, nyang seulidek ate, baten manusia ulon nyang ujo. tieb-tieb ureueng lon balaih sisuai deungon pi-e nyang ji peubuet, dan lon peusanaut sisuai deungon buet nyang jikeureuja." lagee cicem nyang keumarom teuma nyang jikarom nyan kon boh droe jih, meunan kheueh ureueng nyang hana juoe meuteume hareuta. bak umu nyang salah layeue ureueng nyan teuma gadoh banmandum hareuta. nibak akhe udeb ureueng nyan teubukeuti bahwa ureueng nyan ureueng nyang paleng bangai hana meu areuti. baet tuhan geutanyoe lagee takhta nyang

mulia, di gunung nyang manyang seujak seumula. tuhan, droeneueh kheueh harapan israel, umat droeneueh; bandum nyang tinggai droeneueh teuma jeuet keu malee. awaknyan teuma teusampoh di ateuh bumoe dan jijak ubak donya ureueng nyang mate. sabab, droeneueh mata ie udeb ka jitinggai le awaknyan, ya tuhan. tuhan, peupuleh kheueh ulon, teuma ulon jeuet keu seuhath. peuseulamat kheueh ulon, teuma ulon seulamat. droeneueh kheueh mantong nyang ulon peumulia! ureueng jipeugah ubak ulon, "dipat banmandum ancaman tuhan nyan? bah kheueh jinoo geulaksana!" teuma, ya tuhan, hantom na ulon peukarat ubak droeneueh mangat droeneueh neupeuteuka ceulaka ateuh awaknyan. meunan cit deungon ulon hana teuma lon meuharab mangat awaknyan jiteuka beuncana. droeneueh neuteupeue nyan, tuhan. droeneueh neuteupeue peu nyang ulon pengah. bek kheueh droeneueh jeuet keu sapeue-peue nyang teupeutakot ate ulon. droeneueh teupat lon meungungse pajan mantong ulon meuteume bala. seumoga nyang peucrok dan nyang teugom ulon, droeneueh peumalee dan droeneueh peupeunoh deungon teumakot. teuma bek kheueh lagee nyan neupeubuet u ateuh ulon, ya tuhan. peuteuka kheueh halanyan u ateuh awaknyan sampoe awaknyan bango binasa. tuhan meufeureuman ubak ulon, "yeremia, tajak kheueh laju ubak babah pintoe geureubang rakyat nyang jijak le raja-raja yehuda meunyo awaknyan jiteubiet tamong lam banda. meunan cit tajak kheueh laju ubak babah pintoe geureubang nyang laen nyang na di yerasalem. tapeusampoe kheueh peusan ulon ubak raja-raja dan ubak banmandum ureueng yehuda meunan cit ubak banmandum peunduduek yerasalem nyang na jijak rot babah-babah pintoe nyan. tapeugah kheueh laju lagee nyoe: 'meunyo gata hana tatem mate, bek kheueh ta-angkot barang bak uroe sabat, atawa tapeutamong rot pintoe-pintoe geureubang yerasalem. bek tameubuet atawa taba barang peu mantong nyang na lam rumoh gata nibak uroe sabat. peukhusos kheueh uroe nyan keu ulon lagee nyang ka ulon peurintah bak indatu gata. teuma indatu gata hanjitem deungoe atawa hanjitem pakoe peu nyang ulon peugah. awaknyan kreueh ulee han jitem taat atawa teuseugah. taat kheueh ubak bandum peurintah lon. bek taba barang peu mantong rot babah pintoe geureubang banda nyoe nibak uroe sabat. teupeukhusos kheueh, uroe sabat keu ulon, dan bek kheueh tapeubuet peu mantong nibak uroe nyan. meunyo gata bit-bit tapeujak peu mantong nyang ulon peurintah nyan, teuma raja-raja dan peujabat-peujabat nyang mat peurintah lagee nabi daud jitamong ubak babah pintoe geureubang banda yerasalem. awaknyan meusanjan deungon ureueng yehuda dan meunduduek yerasalem, teuma jipasan ateuh geuritan guda, sampoe banda yerasalem jeuet keurame nyang luwabiasa. ureueng-ureueng laen teuma teuka di meubagoe banda yehuda, dan di gampong-gampong nyang na nibak bineh-bineh banda yerasalem; awaknyan teuka di wilayah benyamin, di daerah kaki buket, dan daerah gunung-gunong, dan di yehuda bagian seulant. awaknyan jiba u baet lon beulatang-beulatang

keureubeuen, bah kheueh nyang teutot meunan cit nyang hana, meunan cit deungon peuseumahand gandom dan keumeunyan dan peuseumahan syukoe. banmandum nyan teujadi meunyoee gata taat ubak ulon dan tapeu khusus ureo sabat keu ulon. bek gataba barang peue mantong rot babah pintoe geureubang yerasalem nibak uroe nyan. meunyoee gata taiengkeue ubak peue-peue nyang ka ulon peur-intah nyan, pintoe-pintoe geureubang yerasalem meunan cit deungon meuligoe-meuligoe jihnyan teuma ulon tot sampoe habeh dan apui nyan hana meuhase teupeu mate.' " tuhan meufeureuman ubak ulon, "tajak kheueh laju u rumoh tukang beulangong; disinan lon peusampoe peusan lon ubak gata." dan laju ulon jak u rumoh tukang beulangong nyan dan lon ngieng tukang nyan teungoh geumeubuet ngon alat peugot beulangong. meunyoee beulangong nyang teungoh geupeugot nyan kureueng sampoeureuna, laju jipeugot lom jeuet keu beulangong nyang laen nyang sisuai deungon nyang jimeuheuet. le tuhan geuyee ubak ulon mangat lon jak peugah ubak umat israel, "he umat lon, hana mungen ulon hana hase lon peubuet ateueh gata lagee tukang beulangong nyan jipeubuet ngon tanoh kliet? lagee tanoh kliet nyang na lam jaroe tukang beulangong, meunan kheueh teuma gata lam jaroe lon. meunyoee bak saboh watee ulon peuputoh keu lon tarek, lon reuloh dan lon peuhanco saboh bansa atawa keurajeuen, laju bansa nyan meutobab ubak desya jih, teuma ulon peubateue niet ulon nyan. teuma, meunyoee ulon ka lon peuputoh keu lon peudong atawa lon peukong saboh bansa atawa keurajeuen, teuma oh dudoe bansa nyan hana taat ubak ulon laju geupeubuet nyang jeuhet, teuma niet ulon nyan lon peubateue." tuhan meufeureuman ubak ulon, "jinoenyoee, tapeugah kheueh ubak ureueng-ureueng yehuda dan peunduduek yerasalem bahwa ulon teungoh lon peugot reuncana keu lon lawan awaknyan, dan lon peusiab hukoman keu awaknyan. tayue kheueh ubak awaknyan mangat jipioh gara udeb awaknyan nyang meudesya dan jipeugot pi-e dan buet jihnyan. teuma awaknyan jijawueub, 'keupeue guna jih? kamoe teutab kamoe seutot keuheundak kamoe keudroe! kamoe maseng-maseng teutab kamoe peubuet peue nyang jikheun le ate kamoe nyang jeuhet!' " tuhan meufeureuman, "tanyong kheueh ubak tieb-tieb bansa peu kheueh ka lheureh na hai nyang lagee nyoe. umat israel ka jipeubuet sapeue-sapeue nyang lumpah meubahya! hantom na gadoh salju nibak gunong libanon. hantom na ie leupie nyang ile di gunong nyang jeuet keu tho. teuma umat lon ka jituwo ulon, dan jitot keumeunyan keu beurala. awaknyan meugantoh bak jalan yoh watee ilee nyang haroh awaknyan jak, laju meusimpang bak rot nyang gohlom rata. nanggroee nyoe ka jipeujeuet le awaknyan teupat nyang cukob gli, dan siumu masa jeuet keubahan ceulooh gob. banmandum ureueng nyang jak rot nyan jiassek ulee sabab meurasu gli. lagee abee nibak iembon angen timu, meunan kheueh umat lon kusipreuk dikeue musoh. meunyoee bala ka trok jiteuka, ulon kupeulikat awaknyan dan hana lon tulong awaknyan!" na ureueng jipeugah, "jak geutanyoe ta meukomplot tajak lawan yeremia.

kon jih mantong nyang jeuet jipeugah haba keu po teu allah. sabe na teungku imeum nyang hase geubri peulajaran, na ureueng bijaksana nyang hase geubri naseuhat; dan na nabi nyang hase geupeusampoe ubak geutanyoe peusan-peusan po teu allah. jak tagadu jihnyan ubak kanto peungadalan dan hana ta deungoe tutoe haba jihnyan." dan laju lon meudoa, "tuhan, deungoe kheueh doa ulon; neungieng kheueh peue nyang jipeugah le musoh keuhai ulon! peu kheueh patot buet nyang jroh jibalaih ngon buet nyang jeuhet? teuma awaknyan ka jikueh uruek mangat ulon rhot lam uruek nyan. ingat kheueh bahwa ulon ka lon bila awaknyan dikeue droeneueh, jeuet droeneueh bek neubeungeh keu awaknyan. teuma bak saat nyoe, tuhan, bah kheueh aneuek-aneuek awaknyan mate sabab deuk atawa mate di mideuen prang. bah kheueh ureueng-ureueng inong awaknyan jeuet keu inong balee sabab teungku lakoe jih ka gadoh meunan cit deungon aneuek nyang ka hana le; bah kheueh kawom agam mate sabab jiteuka bala peunyakot dan ureueng muda mate di mideuen prang. neuyee kheueh peurampok teuka deungon hana jisangka-sangka u rumoh awaknyan, sampoe awaknyan jikliek deungon teumakot. awaknyan ka jikueh uruek mangat ulon rhot lam uruek nyan, dan awaknyan ka jipasang taron keuneuk jidrob ulon. teuma droeneueh, tuhan, neuteupeue banmandum nyang awaknyan reuncana keuneuk jipeuhabeh nyawong ulon. sabab nyan, bek neupeu amphon awaknyan; bek neusampoh keusalahan awaknyan. seupot kheueh awaknyan sampoe reubah. meutindak kheueh keu awaknyan watee droeneueh beungeh." tuhan geuyee ubak ulon mangat lon jak bloe kendi, dan teupakat meupadub droe peumimpin bansa dan meupadub droe teungku-teungku imeum nyang ka tuha-tuha, mangat jijak meusajan-sajan deungon awaknyan u panton hinom rot babah pintoe geureubang beling. disinan haroh lon peumaklum peue nyang ka geupeusan ubak ulon. ulon haroh ku peugah lagee nyoe, "he raja-raja yehuda dan peunduduek yerasalem! deungoe kheueh nyoe, peue nyang ulon, tuhan nyang mahakuasa, allah israel, keuneuk peugah ubak gata. ulon keuneuk peuteuka bala nyang raya u ateueh teupat nyoe sampoe ureueng nyang deungoe nyan mandum teukeujot. hai nyan ulon peubuet sabab bansa nyan ka jitinggai ulon. awaknyan ka jipeukuto teupat nyoe deungon cara jipeuseumah keureubeuen keu dewa-dewa nyang aseng nibak awaknyan, nibak indatu awaknyan dan nibak raja-raja yehuda. meunan cit awaknyan ka jipaso teupat nyoe deungon darah ureueng-ureueng nyang hana meusalah. awaknyan jipeudong miseubah keu baal keu jipeuseumah aneuek-aneuek awaknyan sibagoe keureubeuen nyang teutot, padahai ulon hantom na lon yue bak awaknyan nyang lagee nyan, teuma hantom na hai lagee nyan nyang na teupike lam pikeran lon. sabab nyan, teuka watee jih teupat nyoe hana le teupeunan tofet atawa panton hinom, teuma na kheueh panton ceumeucang. di teupat nyoe ulon kupeubateue banmandum reuncana ureueng yehuda dan peunduduek yerasalem. awaknyan lon peubiyeu jipeutaloe le musoh-musoh awaknyan dan

jipoh mate di mideuen prang. manyet awaknyan lon peubiyeu jipajoh le cicem dan beulatang juah. ulon kupeuteuka mala peutaka nyang luwa biasa u ateuh banda nyoe sampoe soe mantong ureueng nyang liwat disinan teukeujot dan gli. musoh jikeupong banda nyoe, dan ji useuha jipoh mate peunduduek nyang na disinan. watee jikeupong nyan bit hebat that, sampoe ureueng-ureueng nyang na lam banda nyoe saleng jipajoh rakan-rakan jih, dan na nyang pajoh aneuek-aneuek awaknyan keudroe." oh ltheuh nyan tuhan geuyue bak ulon jeuet lon peubeukah kendi nyan dikeue ureueng-ureueng nyang seutot ulon. ulon haroh lon peugah ubak awaknyan bahwa tuhan nyang mahakuasa meufeureuman lagee nyoe, "bansa dan banda nyoe lon peuhanco lagee kendi nyang beukah nyan sampoe hana jeuet le teupeuguna. awaknyan jikubu manyet-manyet droe jih di tofet, sabab ka hana le tempat teukubu manyet-manyet nyan. banda nyoe deungon peunduduek jihnyan lon peujeuet lagee tofet. banmandum rumah di yusalem dan banmandum raja-raja yehuda jeuet keu kuto lagee tofet; sabab ateuh bubong rumah-rumah nyan manusia ka jitot keumeunyan keu dewa-dewa di langet, dan jipeuseumah anggo keu dewa-dewa nyang laen." laju ulon tinggai tofet, tempat ulon geuyue peusampoe peusan tuhan. laju ulon jak ubak seuramoe baet tuhan dan lon dong disinan, laju ulon peugah bak bandum ureueng, bahwa tuhan nyang mahakuasa, allah israel, meufeureuman lagee nyoe, "sabab gata kreueh ulee dan hantatem deungoe sapeue, teuma ulon kupeuteuka u ateuh banda nyoe dan u ateuh banmandum gampong nyang nibak bineh-bineh nyoe banmandum reuncana nyang ka ulon reuncana." teungku imeum pasyhur bin imer na kheueh mando nyang kawai baet tuhan. watee jideungoe ulon peumaklum banmandum nyan, laju jipeurintah mangat lon nyoe jiseupot ngon jipasong bak babah pintoe geureubang benyamin, geureubang blaih ateuh di baet tuhan. oh beungoh singoh watee pasyhur jipeulheueh ulon lam pasong, laju lon peugah ubak gobnyan, "nan nyang geubri le tuhan keu gata kon pasyhur, teuma 'timbang gob jeub-jeub sagoe'. tuhan keudroe geupeugah, 'gata lon peujeuet tukang teumimbak keu gata keudroe dan keu rakan-rakan gata. gata tangieng awaknyan jipoh mate le musoh-musoh awaknyan. banmandum ureueng yehuda lon peubiyeu jikuasa le raja babel; siladam nibak awaknyan jiba u babel sibagoe ureueng teutawan, nyang leubeh nibaknyan jipoh mate. meunan cit musoh awaknyan lon peubiyeu jibloh dan jiangkot u babel bandum keukayaan banda nyoe, meunan cit banmandum hareuta milek jih, dan barang-barang pusaka raja-raja yehuda. dan gata, pasyhur, meusajan deungon bandum keuluwarga gata teudrob dan teuangkot u babel. disideh gata mate dan jikubu; meunan cit deungon banmandum rakan gata nyang ka jideungoe haba-haba gata nyang sulet." "tuhan, droeneueh neubujuk ulon dan ulon ka keunong bujuk. droeneueh leubeh teuga nibak ulon dan ka neupeutundok ulon. ulon jipeuhina le tieb-tieb ureueng, jipeuhina phon beungoh trok seupot. tieb-tieb ulon peugah haba, haroh lon tawok

seuhabeh teunaga, "keukeujaman! beuncana!" tuhan, ulon jihina tieb-tieb watee, sabab lon peusampoe peusan droeneueh. teuma meunyeo jikkeun le ate lon, "bah kheueh tuhan nyan ulon peutuwoe, han kutem le lon peugah haba ateuh nan gobnyan," dan peusan droeneueh lagee apui nyang hu meuhab-hab lam ate sanubari. ka lon cuba peuteun, teuma teunyata hana kuasa nibak ulon. teudeungoe su ureueng meusah-sah jeub-jeub sagoe, "teumakot meuraja lela! jak talapor jihnyan ubak nyang meukuasa!" meunan cit banmandum rakan krab ulon ka jipreh-preh ulon rhot. jipeugah le awaknyan, "kadang deungon bujukan, jihnyan hase tapeutaloe, mangat jeuet hase ta balaih dam keu jihnyan." teuma, droeneueh, ya tuhan, neudong blah ulon; droeneueh lumpah teuga lom lumpah that kha. awaknyan nyang tiyeub dan nyang tindeuh ulon reubah dan hana meudaya. awaknyan meuteume malee siumu masa, dan bateuh kheueh bandum reuncana awaknyan. keuhai hina awaknyan teu ingat sabe. teuma, ya tuhan, nyang mahakuasa, deungon ade neu ujoe manusia; droeneueh neuteupeung ate dan pikeran awaknyan. sabab nyan neupeu idhin kheueh bak ulon lon ngieng droeneueh neubalah buet nyang jeuhet nibak musoh sabab ubak droeneueh lon seurah peukara ulon. meuca-e kheueh ubak tuhan dan pujoe kheueh gobnyan, sabab gobnyan nyang peulheueh ureueng nyang teuteugon nibak kuasa ureueng doraka. teutukot kheueh uroe ulon lahe! bah kheueh keunong hina saat ulon geupeulah le ma. meunan cit beuteutukot kheueh ureueng nyang ba beurita sampoe jeuet ureueng syiek lon lumpah geumbira, watee teubri tee ubak gobnyan, "droeneueh meuteume sidroe aneuek agam!" bah kheueh ureueng nyang ba haba nyan saban lagee banda-banda nyang geupeuhanco le tuhan deungon hana geuweueh. bah kheueh jideungoe su kliek nyang saket bak watee beungoh, dan dumpek su muprang watee cot uroe. sabab gobnyan hana geupoh mate lon watee ulon mantong lam pruet ma, mangat ulon teutab geukandong le ma dan lam rahim gobnyan jeuet keulon sibagoe kuburan. pakon ulon haroh lahe lam donya nyoe? peu kheueh keu deurita dan meususah payah? dan mangat udeb lon jijak laju teutab lam malee? zedekia raja di nang-groe yehuda geukirem ubak ulon teungku imeum pasyhur bin malkia, dan teungku imeum zefanya bin maaseya. gobnyan geuyue ubak awaknyan mangat jipeutrok ubak ulon nyang geulakee nyoe, "neulakee kheueh peutanyok ubak tuhan keu geutanyoe, sabab nebukadnezar raja babel deungon pasokan jihnyan teungoh geukeupong banda nyoe. mungkin tuhan geupeuna keu ajaeban keu geutanyoe, dan geupaksa nebukadnezar jitarek surot pasokan jih." laju tuhan meufeureuman ubak ulon, dan ulon laju lon yue ubak ureueng-ureueng nyang jikirem nyan mangat jijak peugah ubak zedekia bahwa tuhan, po teu allah israel, geupeugah lagee nyoe, "zedekia, ulon ku peutaloe pasokan gata nyang teungoh meu heungko jilawan raja babel dan pasokan jihnyan. sinjata-sinjata tantra gata lon tumpok di teungoh-teungoh banda. ulon keudroe nyang jak prang gata deungon habeh teunaga dan deungon beungeh nyang hana

amphon. peunduduek banda nyoe lon poh mate; bah kheueh nyan manusia meunan cit deungon beulatang teuma mate sabab bala peunyaket nyang luwabiasa. gata dan banmandum peugawee gata dan ureueng-ureueng nyang teuhinda di mideuen prang, deuk dan wabah peunyaket, banmandum lon peubiyeu jidrob le raja nebukadnezar dan le musoh-musoh nyang keuneuk drob gata. nebukadnezar jipeu mate gata banmandum deungon hana amphon dan hana gaseh sayang. ulon, tuhan, ka lon peugah haba." laju tuhan geuyue ubak ulon mangat lon peugah lagee nyoe ubak umat gobnyan, "deungoe kheueh nyoe! ulon, tuhan, lon yue pileh bak gata saboh pilehan: rot nyang teujak ubak udeb, atawa rot nyang teujak ubak mate. tieb-tieb ureueng nyang na tinggai lam banda ureueng nyan teuma mate le sabab prang, deuk atawa sabab wabah peunyaket. teuma awaknyan nyang jiteubiet keujjak seurah droe ubak ureueng babel nyang teungoh jiprang banda nyoe, teuhinda dan hana teupoh mate. ulon ka lon peuputoh keuteupeuhanco banda nyoe, dan hana lon weueh. banda nyoe teuseurah ubak raja babel; raja nyan yang tot banda nyoe sampoe habeh hana tinggai meusapeue pih. ulon, tuhan, ka lon peugah haba." tuhan meufeureuman ubak ulon geuyue peusampoe peusan nyoe ubak keuluwarga raja yehuda, keuturonan nabi daud: "deungoe kheueh peue nyang ulon, tuhan, peugah. gata useuha kheueh mangat keuadelen beuna tapeujak tieb-tieb uroe. tapeulheueh kheueh ureueng nyang jipraih ngon jitindeeh nibak keukuasaan ureueng nyang praih ngon nyang tindeeh nyan. meunyo hana, buet nyang jeuhet nyang gata peubuet nyan meutamah beungeh le ulon lagee apui hu nyang hana hase teupeulon." oh ltheueh nyan tuhan geupeugah ubak yerusalem, "he yerusalem! teuduek gata leubeh manyang nibak panton-panton nyang na ban sikeulileng gata. gata lagee buket batee nyang meucula bak padang nyang rata, teuma ulon kulawan gata. gata neupeugah bahwa hana meusidroe nyang hase jijak prang gata atawa nyang heuntam kuta-kuta gata, teuma ulon lon hukom gata sabab buet gata. meuligoe gata ulon tot, dan peue-peue mantong nyang na nibak bineh nyan tutong hana nyang tinggai. ulon, tuhan, ka lon peugah haba." tuhan geuyuejak ulon ubak meuligoe raja yehuda, keuturonan nabi daud, mangat lon jak peutrok feureuman tuhan keu raja, dan ubak banmandum peugawee raja nyan, meunan cit banmandum peunduduek yerusalem. nyoe kheueh haba tuhan keu awaknyan, "tapeubuet kheueh nyang ade dan juJoe. tapeu ltheueh kheueh ureueng nyang jipraih ngon jitindeeh nibak keukuasaan ureueng nyang praih ngon nyang tindeeh nyan. bek tapeubuet nyang jeuhet ateuh ureueng aseng, aneuek yatem ngon meuntui, atawa inong balee. bek kheueh tapoh mate ureueng nyang hana meusalah nibak tempat nyoe. meunyo gata bit-bit tapeujak banmandum peue-peue nyang ulon peurintah nyan, teuma raja-raja nyang mat peurintah lagee nabi daud geutamong bak pintoe-pintoe geureubang meuligoe nyoe. awaknyan meusajan deungon bubena peugawee dan rakyat jiduek ateuh geuritan dan ateuh guda. teuma meunyo gata hana tataat ubak

peue-peue nyang ulon peurintah, ulon meusumpah bahwa meuligoe nyoe jeuet keu runga. ulon, tuhan, ka lon peugah haba. nibak ulon meuligoe raja yehuda lagak that, saban lagak jih lagee tanoh gilead dan gunung-gunong libanon; teuma tempat nyan lon peujeuet lagee padang pasi nyang hana jiduek le manusia. teuma lon kirem ureueng laen jijak peuhanco banmandum nyan. awaknyan teuma jiba patee, dan jireuloh banmandum taméh-taméh jih nyang lagak nyang teupeugot nibak bak kayee ceumara libanon. laju atra nyan le awaknyan jirhom lam apui. oh ltheueh nyan jai that ureueng aseng jijak rot nyan dan geuteumanyong sabe keudroe-droe jih pakon, ulon, tuhan, ka meucok tendakan lagee nyan ateuh banda nyang lagak nyan. le ureueng laen bandum jiwawueb bahwa banmandum nyan teujadi sabab gata ka taiengkeue peujanjian gata deungon ulon, po teu allah gata, dan ka taseumah dan meue iebadat ubak ilah-ilah nyang laen." he ureueng yehuda, bek meuduka sabab raja yosia nyang mate. tapeuba-e kheueh keu yoahas aneuek jihnyan nyang agam sabab jihnyan ka jiba jioh dan hana jipeuwoe le. tanoh tumpah darah jihnyan hana jikalon le. keuhai yoahas, bin yosia nyan, nyang jeuet keu raja yehuda keugeunantoe ureueng syiek jih, tuhan meufeureuman lagee nyoe, "jihnyan ka jijak disinoe, dan hana geugisa le. jihnyan meuninggai di tempat nyang teuboih, dan hana jingiang le nanggroe nyoe." ceulaka kheueh nyang jipeudong rumah jihnyan deungon hana keuadelen, dan jipeuluwah rumah nyan deungon hana juJoe. ceulaka kheueh jihnyan nyang jiyue gob mubuet hana jijok upah. ceulaka cit teuma ureueng nyang peugah, "teuma lon peudong meuligoe nyang raya deungon bilek-bilek nyang luwah di tingkat ateuh," laju bak meuligoe nyan jipeugot peuradeuen deungon bingkee nibak kayee ceumara libanon, dan jicet mirah teuma. deungoe kheueh le raja yoyakim! meunyo gata tapeudong meuligoe ngon kayee ceumara libanon nyang paleng get, peu kheueh nyan sibagoe bukeuti bahwa gata raja nyang leubeh get nibak raja-raja laen? cuba ingat ubak ureueng syiek gata: gobnyan geurasa udeb nyang bagia dan meuhase lam peue mantong useuha jih, sabab jihnyan sabe teupat dan juJoe dan jipeusidang peukara nyang gasien deungon ade. lagee nyan kheueh seuharoh jih buet ureueng nyang jituri ubak tuhan. teuma gata, yoyakim, laen. gata nyang tamita keu untongan pribadi. gata tapoh mate ureueng nyang hana meusalah, dan tatindeeh rakyat gata deungon keujam. sabab nyan keuhai yoyakim raja yehuda, bin yosia, tuhan meufeureuman lagee nyoe, "mate jihnyan hana jipeumo ba-e; hana nyang peugah, 'aduh, rakan lon, aduh.' hana nyang meuduka atawa jitawok, 'weueh that teungku amphon!' yoyakim jihue dan jigelawa u luwa pintoe geureubang yerusalem, lagee nyang jipeubuet le ureueng laen keu bangek keuleudee." tuhan meufeureuman, "he peunduduek yerusalem, tajak kheueh laju u libanon dan u basan, dan meudumpek kheueh disinan. gata tawok kheueh bak gunung-gunong moab, sabab banmandum sikutu gata ka teupeutalo. ulon ka lon peugah haba ubak gata watee keuadaan gata get, teuma

gata hana tatem deungoe. keubit meunan kheueh peurangoe ngon pi-e gata phon yoh ilee sampoe an jinoo; hantom na tatem taat ubak ulon. le sabab nyan, bubena peumimpen gata gadoh lagee abee jiyueb le angen. sikutu-sikutu gata teuba lagee tawanan, dan banda gata jipeuhina ngon jipeumalee sabab buet gata nyang jeuhet. gata tinggai deungon aman sabab jikeulileng le taméh-taméh bak kayee ceumara libanon, teuma singoh, meunyoé gata rhot bak sakét, gata meudeutira lagee ureueng inong peulahe aneuek." tuhan meufeureuman ubak raja yoyakhin, bin yoyakim raja yehuda, "deumi ulon, allah nyang udeb, ulon peuteugaih bahpi gata nibak ulon lagee euncien meupatri nibak jaroe uneuen lon, teuma gata lon cabot dan ulon jok ubak ureueng-ureueng nyang gata takot dan nyang keuneuk poh mate gata. gata lon jok ubak nebukadnezar raja babel, meusajan deungon aneuek buah gobnyan. gata dan ma gata lon use dan ulon boih u nanggroé nyang kon tanoh ie gata, dan disinan gata mate. gata keubit that tarindu ubak nanggroé nyoe, teuma gata hana tagisa." ulon yeremia lon peugah, "peu kheueh raja yoyakhin ka jeuet lagee beulangong beukah nyang teuboih dan hana jigalak le? nyang kheueh sabab jih jihnyan dan aneuek-aneuek jihnyan geu use dan geuboih u nanggroé nyang aseng nibak awaknyan." wahe nanggroé lon, deungoe kheueh peue nyang geupeugah le tuhan, "ureueng nyang ka geupeuteuntée gadoh aneuek-aneuek jihnyan dan sabe gagal lam udeb jih. nibak keuturonan jihnyan hana nyang meuhase jimat peurintah di yehuda sabagoe raja keuturonan nabi daud. ulon, tuhan, ka lon peugah haba." tuhan po teu allah israel meufeureuman, "ceulaka kheueh gata he duma peumimpen nyang peu binasa dan nyang peu crebre umat ulon! gata sikeubit jih tapeulara umat ulon, teuma hainyan hana gata peubuet; gata peubiyeu awaknyan meutabu dan jipeuplueng droe. jinoenyoé ulon kuhukom gata sabab buet gata nyang jeuhet. teuma umat ulon nyang na mantong tinggai sidroe sapat lon peusapat nibak nanggroé-nanggroé teumpat awaknyan lon boih. awaknyan lon puwoe lom u tanoh ie droe jih dan keuturonan awaknyan meutamah le. ulon kuangkat peumimpen nyang peulara awaknyan. umat lon hana teuma teumakot le atawa yo; hana meusidroe pih nibak awaknyan gadoh. ulon, tuhan, ka lon peugah haba." tuhan meufeureuman, "teuma teuka watee jih, ulon lon baiat sidroe raja nyang ade nibak keuturonan nabi daud. raja nyan jimat peurintah deungon bijaksana, dan jipeubuet peue-peue nyang ade dan beuna bansaboh nanggroé. meunyoé jihnyan jipeurintah, ureueng yehuda seulamát, dan ureueng israel udeb deungon aman. raja nyan jihoi 'tuhan nyang peuseulamát geutanyoe.' teuma trok watee jih, manusia hana le jimeusumpah deumi ulon, allah nyang udeb, nyang ba umat israel jiteubiet lam nanggroé meuse, teuma deumi ulon, po teu allah nyang udeb, nyang ka lon ba umat israel jiteubiet lam saboh nanggroé di utara, dan nibak bandum nanggroé laen dipat awaknyan ka ulon peu crebre. awaknyan teuma tinggai di tanoh ie jih keudroe." nyoe kheueh peusan ulon keuhai nabi-nabi: ate lon hanco dan ulon yo. tuhan dan tutoe gobnyan nyang suci teupeujeuet

ulon nyoe lagee ureueng mabok nyang keubit that le lon jieb ie anggo. nanggroé tanyoe peunoh deungon ureueng-ureueng nyang hana seutia ubak tuhan. awaknyan udeb lam keuadaan jeuhet dan jipeusalah guna keukuasaan nyang na nibak awaknyan. sabab kutokan tuhan, naleueng di blang ka habéh tho dan bansaboh nanggroé meuduka cita. tuhan meufeureuman, "nabi dan teungku imeum hana jitem taat ubak ulon, meunan cit di baet lon ka meurmupok dan lon ngieng keudroe awaknyan jipeubuet jeuhet. sabab nyan, rot awaknyan glue dan seupot, sampoe meugantoh dan reubah. ulon kuppeuteuka ceulaka u atueh awaknyan, meunyoé ka trok watee jih lon hukom awaknyan. ulon, tuhan, ka lon peugah haba. desya nabi-nabi samaria ka lheureh ulon ngieng. awaknyan jipeugah haba atueh nan baal, dan jipeuseusat israel, umat ulon. teuma di yerusalem ulon kalon nabi-nabi jipeubuet buet nyang leubeh jeuhet nibak nyang ka. awaknyan meusulet dan meumukah, dan jisukong ureueng nyang jipeubuet jeuhet, dan hana meusidroe pi jitem meutobát. nibak ulon awaknyan banmandum jeuhet saban lagee peunduduek sodom dan gomora." tuhan nyang mahakuasa meufeureuman, "teuma ulon bri ubak nabi-nabi di yerusalem nyan seunaman nyang phet keujipajoh dan ie tuba keuji jieb, sabab buet awaknyan ka teupeusabab ureueng-ureueng laen bansaboh nanggroé hana jihoreumat keu ulon." keu peunduduek yerusalem, tuhan nyang mahakuasa geupeugah, "bek tadeungoe peue-peue nyang jipeugah le nabi-nabi nyang sabe geubri harapan nyang hampa. awaknyan jipeusampoe khayalan jih keudroe dan bukan peue nyang ulon peusan. ubak duma manusia nyang hanjitem deungoe tutoe haba lon, awaknyan sabe jipeugah, 'gata seulamát.' dan ubak tieb-tieb manusia nyang kreueh ulee, ureueng nyan jipeugah, 'gata hana meuteume ceulaka.' " jinoo ulon peugah, "hana meusidroe pih nibak nabi-nabi nyan jiteupeue peue nyang na lam pikeran tuhan. hana nibak awaknyan nyang ka lheureh jideungoe dan jimuphom reuncana-reuncana gobnyan; meunan cit hana nyang simak atawa nyang tem deungoe tutoe haba gobnyan. meunyoé tuhan geubeungeh lagee angen badee nyang meungamuk kancang habéh teusampoh bubena nyang na ureueng-ureueng nyang jeuhet. beungeh gobnyan hana reuda sigohlom banmandum nyang geureuncana teulaksana. oh singoh dudoe umat tuhan geumuphom hainyan deungon nyata." tuhan meufeureuman, "bit that nabi-nabi nyan, padahai awaknyan hana ulon yue. atueh nan ulon awaknyan jipeutrok haba, padahai hana peusan nyang ulon bri keu awaknyan. meunyoé awaknyan jiteupeue peue nyang na lam pikeran lon, teuntée kheueh awaknyan ka jipeutrok ubak umat lon peue mantong nyang ka ulon peugah. teuma umat ulon meutobat nibak desya-desya dan pi-e jih nyang jeuhet. ulon po teu allah nyang na dipat mantong, kon bak saboh teumpat mantong. hana meusidroe pih nyang hase jipeusom droe nibak pandangan lon, sabab ulon na dipat mantong: bah kheueh dalam syeuruga meunan cit di atueh bumoe. banmandum nyang jipeugah le nabi-nabi nyan ka ulon teupeue. atueh nan ulon awaknyan meusulet

bahwa peusan ulon ka geuteurimong meulalu lumpo. trok an pajan nabi-nabi nyan keuneuk jipeuseusat umat ulon deungon haba nyang jikarang keudroe? awaknyan pike deungon lumpo-lumpo nyang jipeugah nyan, umat ulon hase tuwo ubak ulon lagee indatu awaknyan jituwoe bak ulon dan jiseumah baal. nabi nyang meulumpoe seuharoh jih jipeugah, 'nyoe na kheueh lumpo.' teuma nabi nyang meuteume peusan nibak ulon haroh jipeusampoe peusan nyan deungon sibeuna. gandom hana jeuet teupeusabe deungon jeumpueng. tutoe lon lagee apui, dan lagee palee nyang hase teupeuhanco bateel ulon kulawan banmandum nabi nyang ka jipeutrok peusan nibak seusabe rakan jih, laju jikak peugah bahwa nyan peusan ulon. meunan cit ulon lawan nabi-nabi nyang jipeutrok tutoe jihnyan keudroe, laju jipeugah bahwa nyan teuka nibak ulon. ulon, tuhan, lon lawan nabi-nabi nyan nyang peutrok lumpo-lumpo jihnyan nyang peunoh deungon haba sulet. awaknyan jipeuseusat umat ulon deungon tutoe haba nyang beurakah. ulon hana lon yue ubak nabi-nabi nyan. awaknyan meubacut hana meuguna keu umat lon. ulon, tuhan, ka lon peugah haba." tuhan meufeureuman, "yeremia, meunyo sidroe nibak umat lon, atawa sidroe nabi atawa teungku imeum jiteumanyong bak gata, 'peue peusan tuhan?' gata haroh tajawueb, 'gata na kheueh beuban tuhan; sabab nyan gata haroh teuboih.' meunyo sidroe lamkawan umat lon atawa nabi atawa teungku imeum mantong jipeugah hai 'beuban tuhan, dan jihnyan dan keulwarga jihnyan lon hukum. sikeubit jih, soemantong ureueng nyang keubiet jiteumanyong ubak rakan jihnyan dan ubak keulwarga jihnyan, 'peu kheueh jawueb tuhan?' atawa 'peue nyang geupeugah le tuhan?' awaknyan hana jeuet le jipeugah 'beuban tuhan'. meunyo mantong na nyang peugah istilah nyan, ulon ku peujeuet peusan ulon bit-bit beuban atueh jihnyan. ureueng nyang peugah 'beuban tuhan' ureueng nyan na kheueh ka jiputa balek tutoe haba lon, po teu allah awaknyan, allah nyang udeb, tuhan nyang mahakuasa. awaknyan teuma habanyan jeuet jipeugah ubak nabi-nabi, 'peu kheueh jawueb tuhan keu gata? peu kheueh nyang geupeugah le tuhan?' meunyo na nyang hana taat ubak peurintah lon, dan mantong geungui istilah 'beuban tuhan', ulon kucok awaknyan, laju lon geulawa jioh-jioh, bah kheueh awaknyan meunan cit banda nyang nyang ka ulon jok keu awaknyan dan indatu awaknyan. ulon kupeujeuet awaknyan malee dan hina siumu masa dan naseb awaknyan hana jituwoe le gob." saboh watee oh ka lheureu yoyakhin bin yoyakim raja yehuda meusajan deungon peujabat peumeurintah yehuda, dumna ureueng tukang seumeuget dan banmandum ureueng nyang malem nibak buet jiba le nebukadnezar raja babel, dan jicok sibagoe tawanan di yusalem u babel, tuhan geujok saboh keumalon ubak ulon. ulon kalon na dua boh raga nyang meuasoe deungon boh ara teupeuduek dikeue baet tuhan. raga nyang phon measoe boh ara nyang get-get, lagee boh ara hase nyang phon, seudangkan raga nyang keu dua meuasoe boh ara nyang brok-brok, sampoe hana jeuet teupajoh. laju

tuhan meufeureuman ubak ulon, "yeremia, peue nyang gata kalon?" laju lon jawueb, "boh ara, tuhan. nyang get-get lumpah get, dan nyang brok-brok lumpah brok sampoe hana jeuet teupajoh." dan tuhan meufeureuman lom, "ureueng nyang ka lon peubiyeu jiba u babel nyan lon anggab lagee boh ara nyang get-get nyoe; sabab nyan, ulon, tuhan, po teu allah israel, lon peusaneut awaknyan deungon get. ulon kujaga awaknyan dan lon peuwoe lom awaknyan u nanggroe nyoe. ulon kupeudong, kon lon peureuloh awaknyan; ulon kupula, kon lon cabot awaknyan. ulon kubri ubak awaknyan hasrat mangat jipeuphom bahwa ulon kheueh tuhan. dan awaknyan jeuet keu umat lon, dan ulon jeuet keu allah awaknyan, sabab awaknyan jigisa ubak ulon deungon sipeunoh ate. teuma zedekia raja yehuda, meunan cit deungon bubena peujabat nyang rab deungon jihnyan, dan ureueng yusalem nyang na mantong tinggai sidroe-droe sapat nyang mantong tinggai di nanggroe nyoe dan nyang ka jiminah u nanggroe meuse, awaknyan banmandum lon peujeuet lagee boh ara nyang brok-brok nyoe, nyang hana jeuet teupajoh. ulon, tuhan, ka lon peugah haba. ulon kupeuceulaka awaknyan lageenyan bagoe sampoe banmandum bansa nyang na bansigom donya nyoe jeuet teumakot. dipat mantong awaknyan ulon tabu, awaknyan ji hina, jipeujeuet keu bahan jipeukem le gob dan jiceuleuoh. nan awaknyan jingui sibagoe kutokan. ulon kupeuteuka prang u atueh awaknyan, deuk, dan bala peunyangt sampoe awaknyan banmandum mate dan hana nyang tinggai di nanggroe nyoe nyang ka ulon jok keu awaknyan dan indatu awaknyan." bak thon nyang keu peuet oh ka lheureu yoyakim bin yosia jeuet keu raja yehuda, ulon meuteume peusan nibak tuhan keuhai banmandum bansa yehuda. bak watee nyan thon nyang keu phon oh ka lheureu nebukadnezar jeuet keu raja babel. ulon peugah ubak banmandum bansa yehuda dan peunduduek yusalem, "treb jih na dua ploh lhee thon, phon thon nyang keu lhee blaih peumeurintah yosia bin amon atueh yehuda, trok ubak uroe nyoe tuhan ka geupeugah haba ubak ulon dan hantom na ulon peulalee ubak gata peue nyang ka geupeugah. teuma le gata teutab hana tapako. meunan cit le tuhan hana putoh-putoh geukirem ubak gata nabi-nabi nyang hamba-hamba gobnyan, teuma gata teutab hana tatem deungoe dan tapako awaknyan. awaknyan geuyue ubak gata mangat gata tinggai cara udeb gata nyang jeuhet, dan buet-buet gata nyang meudesya, mangat gata teutab jeuet tatinggai di nanggroe nyoe nyang ka geubri le tuhan ubak gata dan ubak indatu gata seubagoe hak milek pusaka. nabi-nabi nyan jitam gata taseumah atawa tameu ebadat ubak ilah-ilah nyang laen. awaknyan jitam gata taseumah beurala-beurala nyang gata peuget keudroe, sabab nyang gata peubuet lagee nyan tuhan keubit that meureuka. meunyo gata taturot peue nyang ka geupeurintah le tuhan nyan, gobnyan hana geuhukom gata. teuma tuhan keudroe geupeugah bahwa gata hana tatem deungoe gobnyan. teuma seubalek jih gata tapeutamah beungeh tuhan sabab beurala-beurala gata nyan. gata keudroe kheueh nyang peuteuka hukoman gobnyan u atueh

droe gata keudroe. sabab gata hana tatem deungoe tutoe haba gobnyan, teuma tuhan nyang mahakuasa geupeugah, 'ulon kutawok banmandum bansa nyang na di utara, meunan cit deungon hamba lon, nebukadnezar raja di nanggroe babel. awaknyan ulon kraihe keujajak muprang deungon yehuda dan peunduduek jihnyan dan banmandum bansa nyang na tinggai rab-rab disinan. bansa yehuda meusajan deungon bansa-bansa teutangga jihnyan lon peubinasan dan lon peuhanco keu siumu masa. ureueng-ureueng nyang ngieng hainyan teukeujot dan meurasan gli. ulon, tuhan, ka lon peugah haba. su-su awaknyan nyang teukem-kem ria ngon rioh dan rame-rame di rumah ureueng khanuri lon peupioh. awaknyan hana minyeuk keu jiotot panyot, dan gandom awaknyan teuma habeh. bansaboh nanggroe nyoe lon peubiyeu hanco dan seungue. bansa-bansa nyang na bansikeulileng nyan jimeungabdi ubak raja babel tujoh ploh thon treb jih. oh ltheueh nyan ulon kuhukom bansa babel dan raja jihnyan sabab desya nyang jipeubuet le awaknyan. nanggroe babel lon reuloh dan lon peubiyeu hanco siumu masa. babel lon hukom deungon banmandum beuncana nyang ka ulon reuncana keu bansa-bansa nyang ka ulon bri tee meulalu yeremia – na kheueh banmandum reuncana nyang teucetet lam kitab nyoe. buet-buet ureueng babel lon balaih; awaknyan jipeubudak le raja-raja nyang raya dan le bansa-bansa nyang laen.' " tuhan, po teu allah israel, meufeureuman ubak ulon, "tacok kheueh saboh glah anggo nyoe nyang ka ltheueh lon paso ngon anggo beungeh lon. taba kheueh laju ubak meubagoe bansa ho-ho mantong gata ulon kirem, dan tayue ubak awaknyan mangat jijieb ie anggo nyoe. meunyo awaknyan ka jijieb ie anggo nyan, awaknyan laju mumang meuyon-ayon dan gadoh akai watee prang ulon peuteuka ubak awaknyan." dan laju lon teurimong glah anggo nyan nibak jaroe tuhan, dan laju ulon jak ubak meubagoe bansa bak teumpat tuhan ka geu kirem ulon, laju ulon peujeuet awaknyan beujijieb ie anggo nyan. yerusalem dan banmandum banda nyang na di yehuda, meusajan raja-raja dan peujabat-peujabat disinan, bandum ulon bri ie anggo nyan jijieb, sampoe awaknyan ka jeuet lagee padang nyang tandus dan lumpah meubahya. sampoe nibak uroe nyoe nan awaknyan teungui sibagoe nan teukutok. nyoe kheueh dafeutar nan-nan ureueng laen nyang haroh jijieb nibak glah anggo tuhan nyan: raja meuse deungon bandum peugawee dan peujabat-peujabat gobnyan; banmandum ureueng meuse dan ureueng aseng nyang na di nanggroe meuse; bandum raja di nanggroe us; banmandum raja banda-banda filistin di askelon, gaza, ekron; banmandum ureueng nyang mantong udeb di asdod; bandum ureueng edom, moab, dan amon; banmandum raja di tirus dan sidon; banmandum raja nyang na tinggai bak bineh laot teungoh; banda-banda dedan, tema, dan bus; banmandum ureueng nyang jiguteng paneuk ok gobnyan; banmandum raja arab; banmandum raja sukee-sukee meujampu nyang na tinggai di padang pasi; banmandum raja di zimri, elam, dan madai; banmandum raja di utara, jioh dan tho, sidroe deumi sidroe. banmandum bansa nyang na bansigom

donya haroh jijieb ie anggo nyan. dan ureueng nyang keuneulheueh nyang jieb ie anggo nyan na kheueh raja babel. tuhan meufeureuman lom ubak ulon, "tapeugah kheueh ubak bandum awaknyan, bahwa ulon, tuhan nyang mahakuasa, allah israel, nyang yue awaknyan jijieb ie nyan sampoe mabok dan muntah-muntah. ulon peujeuet awaknyan reubah dan hana jeuet jibeudoh le sabab muprang nyang ulon peuteuka ateueh awaknyan. dan meunyo awaknyan hanjitem teurimong glah nyan nibak jaroe gata keu jijieb ie anggo nyan, tapeugah kheueh laju bahwa tuhan nyang mahakuasa nyang peurintah hai lagee nyan. ulon kupeuphon peuhanco nyan bak banda lon keudroe. bek sampoe awaknyan jisangka bahwa awaknyan hana teuhukom. awaknyan pasti teuhukom sabab ulon lon peuteuka prang ateueh meubagoe bansa bansigom bumoe nyoe. ulon, tuhan nyang mahakuasa ka lon peugah haba. banmandum nyang ulon peugah bak gata, he yeremia, haroh kheueh gata peusampoe. tapeugah kheueh ubak awaknyan, 'su tuhan meudeungong lam syeuruga; nibak teumpat tinggai nyang suci gobnyan geumeusu meu grum-grum geulawan umat gobnyan. banmandum peunduduek bumoe teudeungoe su gobnyan geumeudumpek lagee su ureueng keureuja bak teumpat prah ie anggo. trok bak ujong bumoe su gobnyan meudeungong; tuhan geupeuget peukara keu bansa-bansa. banmandum ureueng jiba bak sidang dan nyang jeuhet geuhukom mate.' " tuhan nyang mahakuasa meufeureuman, "di ujong trok bak ujong bumoe teudeungoe su angen badee nyang nyang meugrum-grum; beuncana rhot ateueh bansa-bansa sidroe deumi sidroe." bak uroe nyan manyet-manyet nyang ka geupoh le tuhan habeh meugeageung ngon meusipreuk bansigom bumoe. awaknyan hana nyang peumo ba-e, hana teuma ureueng nyang jitem jakcok keu jijak kubu lam jrat, teuma jipeubiyeu mantong nibak tanoh lagee sinamon broh. ho gata banmandum peumimpén, ho gata dumna nyang rabe umat! gata mo ba-e kheueh beuhabeh seuneuga! meubalek-balek kheueh lam abee, sabab ka trok watee jih gata teupoh mate, dan nyang hankeunong geupeu crebre. gata lagee beujana nyang meuhai yuem nyang rhot dan beukah. gata pasti hana ltheueh. gata apoh apah dan tamo ba-e deungon peudeh sabab tuhan dalam keuadaan beungeh gobnyan nyang luwa biasa sampoe habeh binasa banmandum bansa gata dan geupeuhanco nanggroe gata nyan aman nyan. lagee singa nyang jiteubiet lam uruek, meunan kheueh tuhan geuteubiet geujak hukom umat. keukeujaman prang dan meureuka tuhan ka teu ubah nanggroe nyoe jeuet keu padang pasi. wateuyan cit teuma oh ka ltheueh yoyakim bin yosia jeuet keu raja yehuda, tuhan meufeureuman ubak ulon, "gata dong laju bak seuramoe baet ulon dan mariet kheueh ngon peunduduek yehuda nyang teuka jijak meueibadat keunan. tapeusampoe kheueh ubak awaknyan banmandum nyang ulon peurintah ubak gata mangat teujuk keu awaknyan. bek peukureung bahpi meubacut pi. mungkin bansa nyan jitem deungoe, laju jipioh jipeubuet jeuhet, sampoe ulon peubateue nit ulon keuneuk peuhanco awaknyan nyang saban ngon buet awaknyan nyang

jeuhet." tuhan meufeuereuman ubak ulon geuyue peusampoe haba nyang lagee nyoe ubak awaknyan, "ulon, tuhan, ka lon peurintah mangat gata taat ubak ulon dan tapeujak banmandum hukom-hukom nyang ka ulon bri keu gata. gata haroh tawoe tajak deungoe peue nyang ka geupeugah le hamba-hamba lon, bubena nabi hana putoh-putoh ulon kirem ubak gata. teuma gata teutab hana tatem deungoe peue nyang geupeugah le nabi-nabi nyan. meunyo gata teutab meubantah, rumoh iebadat nyoe lon peujeuet lagee silo, seuhingga bubena bansa ateuh rueng donya jipeuguna nan yerusalem nyoe sibagoe kutokan." banmandum nyang ulon peugah di baet tuhan nyan jideungoe le banmandum teungku imeum, bubena nabi dan rakyat. watee nyan cit oh ka ltheueh lon peusampoe banmandum peusan tuhan lagee nyang ka geupeurintah ubak ulon nyan, awaknyan laju jidrob ulon sira ji klik-klik "gata haroh mate! beuhe that gata peguah ateuh nan tuhan bahwa baet gobnyan nyoe jeuet lagee silo, dan bahwa banda nyoe geupeuhanco dan jeuet keu teumpat nyang hana ureueng duek le." laju ulon jihudom le ureueng rame. watee peujabat-peujabat peumeurintah yehuda jideungoe peue nyang ka teujadi, awaknyan bagaih-bagaih jiteubiet nibak meuligoe raja dan jijak u baet tuhan, dan jiduek bak babah pintoe geureubang baro. bubena teungku-teungku imeum dan nabi-nabi geupeugah ubak rakyat, "ureueng nyoe patot that teuhukom mate sabab gobnyan ka geupeuteubiet haba nyang jilawan banda geutanyoe nyoe. gata keudroe ka tadeungoe." laju ulon peugah lagee nyoe, "tuhan kheueh nyang yue ubak ulon mangat lon peusampoe peusan keuhai baet tuhan dan banda nyoe lagee nyang gata deungoe. sabab nyan ubah kheueh cara udeb gata dan buet-buet gata; taat kheueh ubak tuhan po teu allah gata, mangat gobnyan geupeubateue niet gobnyan keu geupeuceulaka gata. keuhai droe ulon, bit na lam kuasa gata keu tapeubuet peue mantong meunurot nyang gata galak. teuma ingat, meunyo gata tapoh mate lon, gata dan peunduduek banda nyoe tatanggong buet nyang salah ateuh tapeu mate ureueng nyang hana meusalah. sabab, tuhan kheueh nyang yue ulon keulon jakba peuingat keu gata." dan bubena peujabat peumeurintah jipeugah ubak teungku-teungku imeum dan nabi-nabi nyan, "ureueng nyoe jimeututoe ateuh nan tuhan po teu allah geutanyoe; hana patot ureueng nyoe tahukom mate." oh ka ltheueh nyan na meupadub droe lamkawan peumimpin bansa jimaju ukeue sira jipeugah ubak ureueng-ureueng nyang na meusapat disinan, "watee hizkia jeuet keu raja yehuda, nabi mikha nibak moresyet geupeutrok ubak rakyat haba nyoe nibak tuhan nyang mahakuasa, 'sion teumeu-ue lagee teumeu-ue blang, yerusalem jeuet lagee sinamon bangke rumoh nyang reuloh, dan buket baet tuhan jeuet lagee uteun.' teuma raja hizkia dan ureueng yehuda hana geupoh mate mikha. hizkia geutakot ubak tuhan dan geulakee geugaseh le gobnyan. dan tuhan geutarek lom peue nyang ka geupeugah keu geupeuceulaka awaknyan. dan bak saat nyoe, rab geutanyoe tapeuteuka ceulaka ateuh droe geutanyoe keudroe." na cit ureueng laen jimeututoe

jipeuceulaka banda dan bansa nyoe ateuh nan tuhan, lagee nyang ulon peubuet. ureueng nyan nan jih uria bin semaya asai di kiryat-yearim. bak watee raja yoyakim meusajan deungon peuwira-peuwira gobnyan dan banmandum peujabat peumeurintah jideungoe peue nyang jipeugah le uria nyan, raja meu-useuha keuneuk poh mate gobnyan. teuma uria jideungoe haba nyan laju teuka teumakot dan jiplueng u nanggroe meuse. teuma raja yoyakim jiyue ubak elnatan bin akhbor meusajan deungon napadub droe ureueng laen u nanggroe meuse dan jiyue cok uria. laju uria nyan jiba lom ubak raja yoyakim. oh ltheueh nyan raja geuyue poh mate jihnyan, dan manyet nyan geuyue boih bak lampoh jrat umum. teuma bak saat nyoe beureukat geutulong le ahikam bin safan, ulon, yeremia hana jiseurah ubak rakyat keu jipoh mate. hana treb oh ltheueh zedekia bin yosia jeuet keu raja yehuda, tuhan geuyue ubak ulon mangat lon peugot talo-talo nibak kulet dan krah takue nibak kayee, dan teupasang laju atranyan bak takue lon. meunan cit gobnyan geuyue ubak ulon jak peusampoe peusan gobnyan ubak raja edom, moab, amon, tirus dan sidon, deungon peurantara utosan-utosan awaknyan nyang ka teuka u yerusalem keu teujak sawewe raja zedekia. ulon haroh lon bri tee ubak awaknyan bahwa tuhan nyang mahakuasa, po teu allah israel, meufeuereuman, "deungon kuasa lon nyang raya dan deungon teunaga lon ulon ka lon cepta bumoe dan manusia meunan cit deungon banmandum beulatang, dan ulon jeuet ulon jok ubak soe mantong nyang ulon galak. ulon kheueh nyang jok banmandum bansa nyoe lam keukuasaan hamba lon, nebukadnezar, raja babel. dan beulatang pih ka lon jok ubak jihnyan mangat jeuet jikuasa. banmandum bansa jimeungabdi ubak jihnyan, ubak aneuek agam jih, dan ubak cucoe jih sampoe ubak saat jih nanggroe jihnyan rhut. bak masanyan bansa babel meungabdi ubak bansa-bansa nyang teuga dan raja-raja rayeuk. bansa atawa keurajeuen nyang hanjitem taklok ubak nebukadnezar lon hukom deungon prang, deuk, dan bala peunyakot, sampoe akhe jih bansa nyan taklok ubak gobnyan. bek kheueh tadeungoe nabi-nabi atawa somantong nyang hana gata taklok ubak raja babel, bahpi awaknyan meungaku ka jiteurimong peutunoyok lam lumpo, roh-roh haloh, atawa deungon jingui teunaga gaeb. awaknyan jipeungeut gata sampoe gata kajiba trok an jioh nibak nanggroe gata. ulon ku use gata nibak nanggroe gata dan gata binasa. teuma bansa nyang jitem taklok dan jitem meungabdi ubak raja babel lon peubiyue tinggai di tanoh ie jih keudroe, dan jiseumuga keudroe disinan, ulon, tuhan, ka lon peugah haba." ubak zedekia raja yehuda, ulon, yeremia, ulon peugah hai nyang saban. ulon peugah, "meunyeurah kheueh ubak raja babel. taat kheueh ubak raja nyan dan ubak bansa nyan, mangat teungku raja seulamat. tuhan ka meufeuereuman bahwa bansa nyang hana taklok ubak raja babel mate di mideuen prang, keunong deuk, atawa bala peunyakot. pakon teungku raja dan rakyat neutem mate seucara lagee nyan? bek neudeungoe nabi-nabi nyang geutam teungku raja taklok ubak raja babel, sabab awaknyan jipeungeut teungku raja. awaknyan

jipeugah bahwa jimeututoe nyan na kheueh ateuheh nan tuhan, teuma nyan bit awaknyan jimeusulet. tuhan keudroe geupeugah bahwa gobnyan hana geukirem awaknyan. sabab nyan gobnyan geupeu crebre dan geupeubinasa teungku raja meusigoe ngon nabi-nabi nyang meusulet bak teungku raja." oh ltheueh nyan ulon bri tee ubak teungku-teungku imeum dan ubak banmandum rakyat bahwa tuhan meufeureuman lagee nyoe, "bek tadeungoe nabi-nabi nyang jipeugah hana treb le barang-barang nyang na di baet ulon jiba lom nibak di babel. awaknyan sulet. bek tadeungoe peue nyang jikheun le awaknyan! meunyeurah kheueh ubak raja babel, mangat gata seulamta. keupeue banda nyoe jipeuhanco? meunyeo awaknyan keubit beutoi nabi, dan ka jiteurimong peusan nibak ulon, pasti awaknyan jinoo jilakee bak lon, tuhan nyang mahakuasa, mangat barang-barang nyang mantong na di baet lon dan bak meuligoe raja di yerusaleum hana teu angkat u babel. sabab ulon, tuhan nyang mahakuasa, po teu allah israel, ka lon peuputoh bahwa banmandum atra nyan teu angkat u babel, dan teutab tinggai disinan sampoe an ulon kalon lom teuma. bak watee nyan baro kheueh ulon ba lom u teumpat nyoe. ulon, tuhan, ka lon peugah haba." barang-barang nyang mantong na di baet tuhan nyan na kheueh: taméh-taméh, beujana peurunggu, geuritan-geuritan, dan napadub macam barang nyang laen atra baet tuhan. barang-barang nyan hana röhoe teuba u babel, bak watee yoyakhin bin yoyakim raja yehuda meunan cit deungon ureueng patot-patot masyarakat yehuda dan yerusaleum teuba u babel le raja nebukadnezar. thon nyan cit teuma bak buleuen limong thon nyang keu peuet geumat keurajeuen le raja zedekia, hananya bin azur, sidroe nabi di banda gibeon, geumarit ngon ulon bak baet tuhan. dikeue teungku-teungku imeum dan banmandum rakyat gobnyan geupeugah ubak ulon bahwa tuhan nyang mahakuasa, po teu allah israel, geupeugah lagee nyoe, "keukuatan raja babel ka lon peupatah. dalam watee dua thon nyoe ulon kupeuriwang barang-barang nibak baet lon, nyang ka ji angkat u babel le raja nebukadnezar. meunan cit ulon ba lom yoyakhin bin yoyakim raja yehuda, meusajan deungon banmandum rakyat yehuda nyang ka jiba u babel. ulon, tuhan, ka lon peugah haba." dan dikeue banmandum teungku-teungku imeum dan banmandum rakyat nyang jidong dikeue baet tuhan nyan, laju lon peugah ubak hananya, "get that! mudah-mudahan mantong ramaian gata nyan jeuet keunyataan, dan tuhan beutoi-beutoi geuba lom di babel barang-barang baet tuhan meusajan deungon banmandum ureueng nyang ka teuboih disideh. teuma gata, hananya, dan gata bandum, he rakyat, deungoe kheueh nyoe: nabi-nabi sigohlom masa geutanyoe ka geumai bahwa muprang, mala peutaka, dan bala peunyaket keunong ateuheh bansa-bansa dan keurajeuen nanggroe nyang teuga-teuga. teuma nabi nyang geumai keadaan dame, teuma jeuet teu aku sibagoe nabi nyang beutoi-beutoi geu kirem le tuhan, meunyeo ramaian-ramaian gobnyan jeuet keunyataan." le hananya laju geureubot gandoe nyang meugantung bak takue lon dan laju geuwiet gandoe nyan. dikeue banmandum rakyat nyang

teuka keunan bak watee nyan gobnyan geupeugah, "tuhan meufeureuman bahwa meunoe kheueh cara gobnyan geuwiet gandoe nyang jipasang le raja nebukadnezar nibak takue jeueb-jeueb bansa; tuhan teuma geupeubuet nyan lam watee dua thon nyoe." oh ltheueh nyan, ulon pih lon jak. hana padub treb teuma oh ltheueh keujadian nyan, tuhan geuyee bak ulon jak ubak hananya jeuet lon peugah lagee nyoe, "tuhan geupeugah bahwa gata jeuet mantong tawiet gandoe kayee, teuma gobnyan geugantoe deungon gandoe beuso. tuhan nyang mahakuasa, allah israel, meufeureuman bahwa gobnyan geupeungui gandoe beuso nibak takue banmandum bansa-bansa nyoe, dan awaknyan meungabdi ubak nebukadnezar, raja babel. tuhan meufeureuman cit bahwa beulatang juah pi jiseurah ubak keukuasaan nebukadnezar." banmandum nyan ulon peutrok ubak hananya, laju lon peugah lom, "deungoe kheueh nyoe, he hananya! tuhan hana geu kirem gata; gata ka tapeujeuet bansa nyoe jipeucaya ubak tutoe haba nyang dusta. sabab nyan kheueh tuhan geupeugah bahwa gata geusampoh di ateuheh bumoe. thon nyoe cit teuma gata mate, sabab gata ka tayee bansa nyoe jilawan tuhan." dan bak thon nyoe cit teuma nibak buleuen nyang keu tujoh, hananya meuninggai donya. ulon tuleh surat keu teungku-teungku imeum, nabi-nabi, peumimpin-peumimpin bansa nyang mantong udeb, dan keu banmandum ureueng laen nyang jiangkot di yerusaleum u babel le nebukadnezar. surat nyan ulon tuleh oh ka ltheueh raja yoyakhin, ma gobnyan, peugawee-peugawee meuligoe, peujabat-peujabat peumeurintahan yehuda dan yerusaleum, dumna peungrajin, dan bandum ureueng carong nibak buet ji angkat ubak teumpat nyang teuboih. ulon titeb surat nyoe ubak elasa bin safan, dan gemarya bin hilkia nyang geukirem le zedekia raja yehuda ubak nebukadnezar raja babel. asoe surat nyan su jih lagee nyoe, "meunoe kheueh feureuman tuhan nyang mahakuasa, po teu allah israel keu banmandum ureueng nyang ka geuboih nibak yerusaleum u babel: 'teutab kheueh tinggai disinan. peudong kheueh laju rumah-rumah gata. puga kheueh lampoh dan pajoh kheueh hase jih. meukawen kheueh mangat gata meuteume aneuek, dan bah kheueh teuma aneuek-aneuek gata jimeukawen mangat awaknyan pih meuteume aneuek. jeumeulah gata haroh meutamah le dan hana jeuet kureueng. meubuet kheueh keuseujahteuraan banda-banda teumpat gata ulon boih. meudooa kheueh ubak ulon keu keupeuntangan banda-banda nyan, sabab meunyeo banda-banda nyan makmu, gata pih makmu cit. ulon, tuhan, nyang mahakuasa, allah israel, lon peuingat gata mangat bek sampoe jipeungeut le nabi-nabi nyang na tinggai lamkawan gata atawa le soemantong nyang jipeugah bahwa awaknyan carong jiramai soai masa ukeue. bek tapeureumeun ubak peue-peue nyang awaknyan meulumpo. awaknyan jingui nan ulon keu jicalitra keugata keu hai-hai nyang hana beutoi. ulon hana lon yue awaknyan. ulon, tuhan, ka lon peugah haba.' tuhan meufeureuman, 'pajan watee jih ka geunab masa tujoh ploh thon keu babel, ulon kukanon gata lom teuma, dan lon peuteupat janji lon keu lon puwoe gata nibak teumpat nyoe. bukon kheueh ulon

nyang leubeuh teupeue reuncana-reuncana ulon keu gata? reuncana-reuncana nyan kon lon peuceulaka gata, teuma keuseujahteuraan gata dan keu lon bri ubak gata masa ukeue nyang peunoh harapan. teuma gata talakee tulang ubak ulon. gata teuka tajak meudoa ubak ulon, dan ulon kujaweueb doa gata. gata mita ulon dan meurumpok deungan lon, sabab gata mita deungan sipeunoh ate. beutoi, gata meurumpok deungan lon. gata lon peusapat lamkawan tieb-tieb bansa dan nibak tieb-tieb nanggroe tempat gata jipeu crebre dan jiboih. gata lon ba lom u nanggroe asai gata nyoe dan lon peupuleh keuadaan gata. ulon, tuhan, ka lon peugah haba.' meunurot gata, tuhan ka geubri keugata nabi-nabi di babel. deungoe kheueh peue nyang geufeuereuman le tuhan keuhai raja nyang mat peurintah nibak saat nyoe, na kheueh raja keuturonan nabi daud, dan keuhai peunduduekan banda nyoe, na kheueh wareh kawom gata nyang hana teuba nibak tempat boih meusajan ngon gata. tuhan nyang mahakuasa meufeuereuman, 'ulon ku peuteuka prang, museum deuk, dan bala peunyaket u atueuh awaknyan. awaknyan lon peusanuet lagee boh-boh ara nyang ka that brok sampoe hana jeuet le teupajoh. awaknyan lon peucrok sabe deungan muprang, museum deuk dan bala peunyaket sampoe banmandum bansa bansigom donya meurasu gli watee jikalon keuadaan awaknyan. dipat mantong awaknyan ulon peucubre, ureueng laen meurasu gli dan teumakot oh watee jikalon peue nyang ka teujadi atueuh awaknyan. awaknyan jihina, dan nan awaknyan sabe jingui sibagoe nan nyang geukutok le tuhan. banmandum nyan teujadi atueuh awaknyan, sabab awaknyan hana jiseutot peusan ulon nyang hana putoh-putoh ulon peusampoe ubak awaknyan meulalu nabi-nabi hamba ulon. awaknyan han jitem peureumeuen ubak peusan ulon nyan. dan gata banmandum nyang ka ulon boih u babel, deungoe kheueh peue nyang ulon, tuhan, peugah.' tuhan nyang mahakuasa, po teu allah israel, ka geumeututoe keuhai ahab bin kolaya, dan keuhai zedekia bin maaseya nyang ka jipeuguna nan tuhan keu jipeusampoe ubak gata hai-hai nyang hana beutoi. tuhan geupeugah bahwa gobnyan teuma geuseurah awaknyan ubak keukuasaan nebukadnezar raja babel, nyang poh mate awaknyan dikeue mata gata. dan meunyo ureueng-ureueng nyang ka geu angkot nibak yerusalem u babel keuneuk jikutok sidroe-droe ureueng, awaknyan jipeugah, 'seumoga tuhan geupeu jeuet gata lagee zedekia dan ahab, nyang ka jihat udeb-udeb le raja babel.' meunan kheueh naseb awaknyan sabab ka jipeubuet desya-desya raya di israel: awaknyan ji meumukah, dan jingui nan tuhan keuhai-hai nyang hana beutoi. nyan meulawan deungan keuheundak tuhan. gobnyan geuteupeue peue nyang awaknyan peubuet, dan gobnyan keudroe jeuet keusaksi geulawan awaknyan. tuhan ka geupeugah haba." tuhan nyang mahakuasa, po teu allah israel geubri peusan ubak ulon keu semaya ureueng nehelim, sabab semaya ka jikirem surat atueuh nan jih keudroe ubak banmandum peunduduek yerusalem, ubak teungku imeum zefanya bin maaseya, dan banmandum teungku imeum nyang laen. dalam surat nyan

semaya geutuleh lagee nyoe keu zefanya: "tuhan ka geu baiat gata jeuet keu teungku imeum geunantoe yoyada, dan jinoenyo gata peujabat manyang di baet tuhan. tugaih gata na kheueh mangat gata peurintah tieb-tieb ureueng pungoe, nyang meungaku droe jih nyan nabi, rante laju ngon rante beuso nibak takue jih. teuma pakon gata hana meutindak atueuh yeremia ureueng anatot nyan nyang ka jipeujeuet droe lagee nabi teuhadab bansa geutanyoe? ureueng nyang lagee nyan babah jih haroh teunguci, sabab jihnyan jipeugah ubak ureueng-ureueng geutanyoe nyang na di babel bahwa awaknyan mantong treb tinggai disideh. dan sabab nyan, kheun gobnyan, awaknyan haroh jipeudong rumoh dan jipuga blang dan jipajoh hase jih." surat nyan geubaca le teungku imeum zefanya keu ulon. sabab nyan kheueh tuhan geuyue ubak ulon lon kirem haba keuhai semaya keu bandum ureueng israel nyang ka teuboih di babel. nyoe su haba nyan, 'semaya ka jimariet deungan gata siulah-ulah jihnyan nabi; padahai, ulon, tuhan, hana ulon yue jih nyan. sabab jih nyan ka jipeujeuet gata tapeucaya keu haba nyang sulet, dan sabab jihnyan ka jiyue gata talawan ulon, teuma ulon kuhukom jih nyan dan keuturonan jih. hana meusidroe pi lamkawan awaknyan teutinggai di teungoh-teungoh kamoe keu jingiang hai-hai nyang jroh nyan ulon peubuet keu banmandum umat ulon. ulon, tuhan, ka lon peugah haba." tuhan, po teu allah israel meufeuereuman ubak ulon, "tatuleh kheueh dalam saboh kitab banmandum nyang ka ulon peugah ubak gata. sabab teuka watee jih ulon peupuleh keuadaan umat ulon israel dan yehuda. ulon kuba lom awaknyan u nanggroe nyang ka ulon jok keu indatu awaknyan. nanggroe nyan awaknyan jicok lom. ulon, tuhan, ka lon peugah haba." tuhan meufeuereuman keu umat israel dan yehuda, "ulon ka lon deungoe geumeuciek ureueng nyang yo meugum-gum geumeuciek ureueng nyang teumakot nyang hana nibak jihnyan keudamean. ci kheueh tapike dan taselidike! peu kheueh mungken ureueng agam jipeulahe aneuek? meunyo meunan, pakon na lon ngiesoe soe mantong ureueng agam ruman jihnyan masam ngon pucat dan jipicet pruet jihnyan deungan jaroe lagee ureueng inong keuneuk peulahe aneuek? uroe nyang luwa biasa ka trok jiteuka, uroe nyang hana bandeng jih. nibak umat lon, nyan kheueh uroe nyang paleng gundah; teuma awaknyan lon peuseulamat." tuhan nyang mahakuasa meufeuereuman lom ubak umat gobnyan, "meunyo ka trok nibak uroe nyan, gandoe nyang teupengui bak kudok gata ulon wiet, dan beuleunggu gata lon ploih. gata hana jeuet le keu namiet ureueng aseng. gata meungabdi ubak ulon, tuhan po teu allah gata, dan ubak sidroe keuturonan nabi daud nyang lon angkat sibagoe raja. umat ulon israel, bek kheueh teumakot! hamba ulon nabi yakub, bek kheueh yo! gata dan keuturonan gata lon peuseulamat di nanggroe jioh, di tempat gata keunong teu. gata teuma tawoe dan tinggai di nanggroe gata deungan aman. gata udeb deungan teuntram; hana nyang peureulee gata takot. ulon teuka dan gata lon peuseulamat. bansa-bansa, tempat gata ulon peucubre bandum nyan lon peubinasa, teuma gata

hana lon peubuet lagee nyan. bit gata hana tuwoe keu hukoman teuma hukoman nyang lon peu rhot ateuh gata na kheueh ade dan sisuai deungon nyang teupeuteuntee. ulon, tuhan, ka lon peugah haba." tuhan meufeureuman ubak umat gobnyan: "peun-yaket gata lumpah that parah, luka gata nyan hana ubat jih. hana meusidrooe pih nyang jitem peupuleh peunyaket gata, hana ubat keu cumuet-cumuet gata, hana harapan gata jeuet keupuleh. bandum geunaseh gata ka tuwoe ubak gata; awaknyan hana jitem le pike keuhai droe gata. lagee musoh ka jiseurang dan jihukom gata deungon keujam, sabab desya gata nyang ka le dan raya that salah gata. bek kheueh le apoh apah keuhai luka-luka gata, sabab nibak gata hana le harapan jeuet keu puleh. gata ulon hukom nyang lagee nyan sabab desya gata nyang ka lumpah le dan salah gata nyang lumpah raya. teuma jinoo banmandum nyang uet gata teumajuiet, dan bandum musoh gata teuma jiangkot u teumpat nyang teuboih. ulon nyang tindeeh keu ureueng nyang tindeeh gata, ulon kureubot bak ureueng nyang reupah gata. bahpi musoh gata jipeugah, 'sion ka jiboih, dan hana nyang tem kalon,' teuma gata lon peujeuet seuhah lom, dan luka-luka gata lon peu ubat teuma." tuhan meufeureuman lom: "gata, umat lon teuma lon gaseh dan lon peupuleh keuadaan gata di tanoh ie gata keudroe. yerusalem teupeudong keulai, dan meuligoe disinan teureuhah lom teuma. peunduduek disinan jipujo ulon deungon meuca-e, dan seumurak meuhubo deungon geumbira. ulon peujeuet awaknyan jihoreumat le ureueng laen dan hana jihina, dan jeumeulah awaknyan meutamah le. bansa gata lon peujeuet jaya lagee yoh masa dilee, dan jidong lom sibagoe umat lon. banmandum nyang teugom awaknyan lon hukom habeh. raja nyang peurintah gata asai gobnyan nibak bansa gata. deungon beubaih jihnyan jipeurab bak ulon meunyoeh jih nyan lon takow meuhadab bak ulon. sabab soe kheueh nyang jijeuet meuhadab ulon ateuh keuheundak jih keudroe? gata teuma jeuet keu umat lon dan ulon jeuet keu allah gata. ulon, tuhan, nyang peugah nyan." beungeh tuhan lagee angen badee, lagee angen puteung beuliyong nyang tajam meutaga sampoe habeh jisampoh bubena ureueng jeuhet, dan hana reuda sigohlom banmandum reuncana gobnyan teulaksana. oh uroe dudoe umat gobnyan baro sadar keuhai nyan. tuhan meufeureuman, "teuma trok watee jih ulon jeuet keu allah banmandum sukee israel, dan awaknyan jeuet keu umat lon. dipadang pasi ulon peuleumah gaseh sayang lon ubak awaknyan nyang ka teuhinda nibak mawot. watee umat israel jimita keuteunangan, phon rot jioh ka lon peuleumah droe ubak awaknyan. he umat israel, yoh dilee sabe lon peuleumah gaseh sayang lon bak gata, dan oh lheurehnyan teuma teutab lon tunyok gaseh sayang lon keu gata. bansa gata lon peujaya lagee yoh masa ilee. sigoe teuk gata tacok rapa-i, dan meunari ngon meulikak deungon geumbira. gata tapuga lampoh anggo di gunung-gunong samaria, dan ureueng nyang pula jipot hase. keubit, trok watee jih bubena peungawai banda jitamawok di gunung-gunong efrain, 'jak geutanyoe ta ek u sion, ubak tuhan allah geutanyoe.' " tuhan

meufeureuman, "meuca-e kheueh nyang geumbira keu israel, he umat lon – bansa nyang phon nibak meubagoe bansa. meuca-e kheueh kidung pujian, dan jak peugah kheueh: 'tuhan ka geupeuseulamat nyang mantong tinggai umat gobnyan.' di utara ulon ba awaknyan lom; lon peusapat awaknyan nyang na bansigom bumoe. ureueng buta dan ureueng lapee jijak deungon awaknyan, meunan cit deungon ureueng inong nyang ban lheureh peulahe aneuek dan inong nyang ka brat mume. awaknyan banmandum jiteuka lom lam jeumeulah nyang le u nanggroe nyoe. awaknyan jijak sira ie mata jiro nyang hana putoh-putoh, ulon hibor dan lon bimbeng awaknyan. ulon ba awaknyan meulalu rot nyang le ie ile, rot nyang rata mangat awaknyan hana meugantoh. bak ureueng israel, ulon nyoe lagee ureueng syiek jih; efrain na kheueh aneuek agam lon nyang tuha." tuhan meufeureuman, "deungoe kheueh he bansa-bansa! peutrok kheueh peusan ulon nyoe u meurandeh laot: umat ulon nyang ka lon peucubre lon peusapat dan lon peulara lagee ureueng meurabe bubiri nyang sabe jijaga. umat israel ka lon peuseulamat, dan lon peubeubaih nibak bansa nyang kha. u buket sion awaknyan jiteuka deungon ie muka nyang meucahya, sira meuca-e riang geumbira sabab bandum nyang ulon bri keu awaknyan, na kheueh gandom, minyeuk, anggo, leumo dan bubiri. awaknyan lagee keubon nyang seb meu ie, dan hana nyang kureueng bah meusikada. bak watee nyan aneuek-aneuek dara jimarani ngon meulikak deungon ate galak lumpah na. ureueng tuha ngon ureueng muda sabe-sabe lam bahgia, sabab ulon kuhibur awaknyan. duka awaknyan lon ubah jeuet keu galak, seudeh awaknyan lon ubah jeuet keu bahgia. bubena teungku imeum lon peupuih deungon peunajoh nyang meulimpah; dan peue mantong nyang jipeureulle le umat lon ulon bri. ulon, tuhan, nyang peugah haba." tuhan meufeureuman, "di rama na teudeungoe su ureueng mo ba-e, dan apoh apah nyang meujampu peudeh ngon pilu. rahel jipeuba-e aneuek-aneuek gobnyan, le geuhnyan hana geutem teupeuiem sabab awaknyan ka hana le. neuim laju nibak tamo dan sampoh laju ie mata gata! hana sia-sia jeureh payah gata keu aneuek-aneuek gata. keu gata na ganjaran, aneuek-aneuek gata jiwoe di nanggroe lawan. na harapan keu gata keu masa ukeue; aneuek-aneuek gata jiwoe u gampong droe. ulon deungoe umat israel jimeututoe peunoh keuseudehan, 'ya tuhan, kamoe nyoe lagee beulatang nyang gohlom teupeuseu iet teuma neulath kamoe mangat taat, dan jinoenyoe kamoe ka siab keu kamoe woe ubak droeneueh. jadi, neuba kheueh kamoe lom teuma, ya tuhan, po teu allah kamoe. droeneueh ka kamoe peulikot, teuma buet kamoe nyan ka meunyeusai nibak kamoe. oh ka lheureh droeneueh neuhukom kamoe, ulee kamoe meuteukui sabab lumpah that seudeh. kamoe malee dan ka jeuet keuhina sabab ka meudesya yoh mantong muda.' israel, gata aneuek nyang ulon sayang that, aneuek teucinta, boh ate lon. pajan mantong gata lon ancam sabe lon ingat ubak gata deungon rindu. gata lon peusanaut deungon peunoh gaseh sayang. tatanda kheueh rot-rot

ueh raya, taglong kheueh pancang-pancang atawa rambu-rambu tamita kheueh rot ueh nyang ka gata jak yoh masa dilee. he israel, tawoe kheueh! woe kheueh ubak banda-banda gata nyang phon. trok an pajan gata haroh ragu-ragu, he bansa nyang hana seutia ubak ulon? ulon ka lon cebta sapeue-peue nyang baro di atueh donya, sapeue lamkawan nyang ganje - lagee ganje ureueng inong nyang jilindong agam." tuhan nyang mahakuasa allah israel meufeureuman, "meunyoie umat lon ka lon peujaya lagee yoh masa dilee, teuma di nanggroe yehuda dan di gampong-gampong teudeungoe bak lon ureueng jipeugah, 'seumoga tuhan geubri beureukat keu buket suci di yerasalem teupat tinggai nyang khusus keu gobnyan.' ureueng tinggai di yehuda dan di gampong-gampong jihnyan. disinan na ureueng meutani ngon ureueng peulara leumo dan bubiri. ureueng nyang hek lon peupuleh, dan nyang leumoh sabab ka deuk lon peutro. bak masanyan ureueng-ureueng nyan jipeugah, 'oh ka ltheueh lon eh teunget deungon mangat that, tuboh lon meurasaleuga.' ulon, tuhan, lon peugah trok masa jih nanggroe israel dan yehuda ulon peupeunoh ngon manusia dan beulatang. lagee yoh masa ilee ulon ka lon jaga awaknyan mangat oh ltheueh nyan ulon tarek lom, lon reuloh dan lon peuhanco awaknyan, meunan cit ulon jaga awaknyan mangat ulon peukong dan lon peubeudoh awaknyan lom teuma. bak watee nyan ureueng hana jipeugah le, 'ureueng tuha jipajoh boh kayee nyang masam, gigo aneuek geuhnyan nyang teurasa seungke,' teuma soe nyang pajoh boh kayee masam, ureueng nyan keudroe kheueh nyang seungke gigo. tieb-tieb manusia mate kareuna desya jih keudroe." tuhan meufeureuman, "teuma teuka watee jih ulon peugot janji nyang baro ngon umat israel dan yehuda. teuma janji nyan kon lagee janji nyang ulon peugot ngon indatu awaknyan watee awaknyan ulon tuntun jiteubit di nanggroe meuse. bahpi ulon nyoe lagee sidroe ureueng lakoe nibak awaknyan, teuma awaknyan ji lengkeue janji ulon ngon awaknyan. nyoe kheueh peujanjian baro nyang ulon peugot ngon umat israel: hukom-hukom lon kukeubah didalam baten awaknyan, dan ulon tuleh bak ate awaknyan. ulon jeuet keu po teu allah awaknyan, dan awaknyan jeuet keu umat lon. hana peureulee meusidroe pih nibak awaknyan jipeurunno sabe keudroe-droe mangat jituri keu tuhan. sabab awaknyan banmandum, cut rayeuk, jituri lon. nyang salah-salah bak awaknyan atueh ulon lon peutuwoe, desya-desya awaknyan lon peumamphon. ulon, tuhan, ka lon peugah haba." mata uroe geupeujeuet le tuhan keuteupeu peungeuh uroe; buleun dan bintang-bintang keuteupeu peungeuh mulang. laot geugawoe sampoe jibeudoh gulumbang, tuhan nyang mahakuasa, nyan kheueh nan gobnyan. tuhan meujanji, "simantong hukom alam gohlom meu-ubah israel teutab na sibagoe bansa. seukira jih saboh saat langet hase teu ukoie, dan bak ate bumoe hase teutilek, bak watee nyan kheueh israel lon tulak sabab bandum buet awaknyan nyang jeuhet. ulon, tuhan, ka lon peugah haba." tuhan meufeureuman, "teuma trok masa jih bansaboh yerasalem teupeudong lom sibagoe banda lon, di

meunara hananeel trok bak babah pintoe geureubang sagoe. phon disinan gareh bataih jih teutuju u buket gareb, laju teuwet bak guha. bansigom panton nyan, nyang teupeuguna keu jratan tempat tiek bloh, dan banmandum ladang bak bineh krueng kidron sampoe trok bak babah pintoe geureubang guda u arah timu, teupeukhusus keu ulon. banda yerasalem hana geureuloh le atawa geupeuhanco." bak thon nyang keu siploh keurajeuen zedekia raja yehuda, na kheueh thon nyang keulapan blaih keurajeuen nebukadnezar raja babel, tuhan meufeureuman ubak ulon. bak wateenyan tantra raja babel teungoh jiprang yerasalem. ulon jiteun bak seuramoe meuligoe raja le raja zedekia sabab jitudoah ka lon peumaklum bahwa tuhan meufeureuman lageenyoie, "raja babel lon peubiyeu jipeutaklhok dan jiduek lam banda nyoe, dan raja zedekia hana teuhinda. gobnyan jijok ubak raja babel, dan meuhadab raja nyan jimeututoe keudroe ngon gobnyan. oh ltheuehnyan zedekia teuma jiba u babel dan tinggai disinan sampoe trok watee lon hukom jihnyan. bahpi jihnyan jiprang ureueng babel, jihnyan teutab hana hase. ulon, tuhan, ka lon peugah haba." tuhan meufeureuman ubak lon bahwa hanameel, aneuek agam apa lon salum, jiteuka keu jilakee mangat lon tem bloe tanoh jih di anatot lam wilayah benyamin. sabab, ulon kheueh syedara jih nyang rab nyang hak bloe tanoh nyan. dan paih lagee nyang ka geupeugah le tuhan, teuka kheueh hanameel bak ulon bak seuramoe meuligoe, dan jilakee mangat lon tem bloe tanoh jih. le sabab nyan ulon yaken that bahwa tuhan bit-bit ka meututoe ubak ulon. le sababnyan ulon bloe tanoh nyan bak hanameel deungon yuem tujoh blaih peng pirak. ulon hoi bubena saksi dan dikeue awaknyan laju lon teken surat bloe tanoh nyan, laju ulon tempee segee dan lon timang peng jih. ltheueh nyan ulon cok surat bloe tanoh nyan nyang ka teuboh segee dan meuasoe ngon syarat-syarat meunan cit deungon keuteuntuan-keuteuntuan nyang laen. dan lon cot teuma seunalen surat nyang hana meusegee, dan bandua surat nyan laju ulon jok ubak barukh bin neria cucoe mahseya. ulon jok atranyan dikeue hanameel dan saksi-saksi nyang ka jiteken surat-surat nyan, dan dikeue ureueng-ureueng nyang teungoh duek nibak seuramoe nyan. dikeue awaknyan banmandum ulon peugah ubak barukh, "tuhan nyang mahakuasa, po teu allah israel, geupeurintah mangat gata cok bandua surat nyoe, bah nyang aseuli meunan cit nyang seunalen jih, dan teupeutamong lam saboh beulangong teumbikar mangat treb jiteun. tuhan nyang mahakuasa, po teu allah israel, geupeubah bahwa rumah, tanoh, dan lampoh anggo teuma jibloe peubloe lom lam nanggroe nyoe." oh ka ltheueh surat-surat bloe peubloe nyan ulon jok ubak barukh, laju lon meudoa, "tuhan nyang mahamanyang, droeneueh kheueh nyang cebta langet ngon bumoe deungon kuasa dan kemampuan droeneueh nyang rayeuk. hana meusapeue pi nyang payah nibak droeneueh. droeneueh neutunyok gaseh abadi ubak meuribee-ribee ureueng, teuma droeneueh pih neuhukom ureueng laen sabab desya ureueng syiek jih. droeneueh allah nyang agong dan peukasa;

nan droeneueh tuhan nyang mahakuasa. reuncana-reuncana droeneueh hebat that, dan buet-buet droeneueh ajaeb; droeneueh neukalon banmandum nyang jipeubuet le manusia, dan neubalahi awaknyan nyang sipadan deungon buet awaknyan. yoh watee ilee droeneueh peubuet buet-buet nyang ajaeb dan luwabiasa di nanggroe meuse, dan trok an jinoe mantong teutab neupeubuet, bah lamkawan ureueng israel meunan cit lamkawan ureueng bansa laen. le sabab nyan jinoe droeneueh meugah dipat mantong. deungon kuasa dan teunaga droeneueh nyang rayeuk droeneueh neuba umat israel jiteubit lam nanggroe meuse. droeneueh neupeubuet buet-buet ajaeb dan mujizat-mujizat nyang luwabiasa dan keujadian-keujadian nyang teupeuyo musoh. nanggroe nyang jroh dan subo droeneueh jok keu awaknyan lagee nyang ka droeneueh peujanji ubak indatu awaknyan. teuma watee awaknyan teuka u nanggroe nyoe keuneuk jireubot atranyan, awaknyan hana taat ubak peue-peue nyang droeneueh peurintah, dan hana udeb meunurot peue-peue nyang ka droeneueh peurunoe. banmandum nyang droeneueh peurintah ubak awaknyan hana meusapeue pih nyang jipeubuet le awaknyan. le sababnyan droeneueh peutreun banmandum bencana nyoe ateuh awaknyan. ureueng-ureueng babel ka jipeudong beuton-beuton kuta ban sikeulileng banda keuneuk jireubot banda nyan, dan jinoenyo awaknyan laju jiprang. muprang, deuk, dan bala peunyakot nyang jeuet keusabab banda nyoe rhot lam jaroe awaknyan. droeneueh neukalon bahwa banmandum nyang neupeugah nyan ka jeuet keunyata. bahpi meunan, ya tuhan nyang mahamanyang, droeneueh kheueh nyang yue ulon mantong lon bloe tanoh nyoe dikeue saksi-saksi, bah pi sikeujab teuk banda teuma jireubot le bansa babel." oh lheureh nyan tuhan meufeureuman ubak ulon, "ulon kheueh tuhan, allah banmandum ureueng. hana nyan payah nibak ulon. banda nyoe lon peubiyeu jikuasa le nebukadnezar raja babel meusajan ngon pasokan jih. awaknyan teuma jireubot banda nyoe, dan jitot sampoe habeh meusajan deungon rumoh-rumoh nyang ka jipeuteuka beungeh ulon, sabab di ateuh bubong-bubong rumoh nyan awaknyan jitot keumunyan keu baal dan jileng le anggo keujipeuseumah ubak dewa-dewa. yoh awai that phon seujarah awaknyan, ureueng israel dan ureueng yehuda ka jipeujeuet ulon sampoe hana galak. awaknyan ka jipeuteuka beungeh ulon deungon buet-buet awaknyan nyang jeuhet. yoh phon banda nyoe jipeupeudong, peunduduek banda nyoe ka jipeujeuet ulon beungeh that-that, ulon ka lon cok keuputosan keu lon peubinasan awaknyan, sabab mandum buet nyang jeuhet nyang jipeubuet le ureueng yehuda dan yerusalem meusajan deungon raja-raja, peujabat peumeurintah, teungku-teungku imeum dan nabi-nabi awaknyan. awaknyan ka jitinggai ulon bahpi ulon ka lon sabe lon peurunoe awaknyan, awaknyan teutab hana jitem deungoe dan hana insaf. dan nyang jipeudong keu teumpat iebadat ubak ulon nyan pih ka jipeukuto le awaknyan dan jikeubah beurala-beurala nyang luwat that le awaknyan di teumpat nyan. awaknyan jipeudong miseubah-miseubah

keu dewa baal di panton hinom, dan jipeuseumah aneuek awaknyan keu dewa molokh. padahai, ulon hantom lom yue bak awaknyan mangat jipeubuet lagee nyan bagoe, dan hana teuka lam pikeran lon bahwa awaknyan jipeubuet hai nyang kuto lageenyan teuma dan jeuet keusabab ureueng yehuda meudesya." tuhan, po teu allah israel meufeureuman ubak lon, "yeremia, bansa israel jipeugah bahwa muprang, deuk dan wabah peunyakot teupeusabab banda nyoe rhot lam jaroe raja babel. jinoenyo, deungoe kheueh peue nyang ulon peugah. ulon teuma lon peusapat bansa nyoe nibak mandum nanggroe teumpat awaknyan ulon peucubre sabab beungeh ulon dan geungeuen ulon keu awaknyan. awaknyan teuma ulon ba lom u teumpat nyoe dan lon peumungken tinggai disinoe deungon aman. awaknyan jeuet keu umat lon, dan ulon jeuet keu allah awaknyan. ulon kujok keu awaknyan saboh tujuan udeb: na kheueh, jihoreumat ulon siumu masa; hainyan teuba nyang jroh keu awaknyan mandum, dan keu keuturonan awaknyan. ulon kupeugot janji nyang keukai ngon awaknyan. ulon hana lon pioh lon peubuet nyang jroh keu awaknyan. ulon kupeujeuet awaknyan takot dan jihoreumat ulon deungon sipeunoh ate mangat awaknyan hana jipeujioh ulon. ulon galak lon peubuet nyang jroh keu awaknyan, dan lon peujeuet awaknyan tinggai teutab di nanggroe nyoe keu siumu masa. lagee toh ulon ka lon peutreun bala ateuh bansa nyoe, meunan kheueh teuma ulon jok banmandum nyang jroh lagee nyang ka lon peujanji keu awaknyan. ureueng jipeugah bahwa nanggroe nyoe ka jeuet keu padang pasi nyang hana jitinggai le manusia dan beulatang, dan nanggroe nyoe ka rhot lam jaroe bansa babel. teuma ulon peugah saboh watee ladang-ladang jibloe peubloe lom lam nanggroe nyoe; surat bloe peubloe teuma jiteken, jisegee, dan jipeuget le saksi-saksi. nyan teuma teujidi lam wilayah benyamin, lam gampong-gampong lam wilayah yerusalem, lam banda-banda yehuda, lam banda-banda di daerah gunung-gunung, di daerah kaki gunung-gunung, dan di yehuda seulat. bansanyoe lon peupuleh keuadaan jih di nanggroe nyoe. ulon, tuhan, ka lon peugah haba." watee ulon mantong keunong teun nibak seuramoe, ulon meuteume peusan nibak tuhan nyang peujeuet bumoe dan nyang peugot dan nyang keubah bak teumpat jih. gobnyan geupeugah, "meulakee kheueh ubak ulon, teuma ulon lon seuto; lon bri tee ubak gata hai-hai nyang ceudah dan nyang kagum nyang gohlom gata teupeue. meuligoe raja yehuda dan rumoh-rumoh di banda yerusalem ka jireuloh keu jipeukong kuta dan ji prang le musoh. teuma, ulon, tuhan, allah israel, lon peugah bahwa, hana guna teulawan ureueng babel, deungon teupeubuet nyan banda nyoe ka peunoh deungon bangke ureueng-ureueng nyang lon poh mate watee lon beungeh dan geungeuen ulon ubak awaknyan. ulon hana meuhet le lon kalon banda nyoe, sabab ureueng-ureueng banda nyoe ka jipeubuet buet nyang jeuhet. teuma saboh saat singoh ulon lon peupuleh keuadaan banda nyoe dan peunduduek banda nyoe keudroe; awaknyan teuga lom teuma. ulon kubri ubak awaknyan keuseujahteuraan dan

keamanan yang meulimpah. yehuda dan israel lon peujaya lagee yoh masa dilee dan awaknyan teudong lom lagee umat lon. ulon lon peugleh awaknyan nibak sigala desya yang jipeubuet le awaknyan ateuh ulon; desya-desya dan doraka awaknyan lon peumaphon. yerusaleum jeuet keu geumbiraan dan keubanggaaan ulon. sigala bansa bansigoh donya teumakot dan yo lom teuma jihoreumat ulon, meunyoedeungeoe peue-peue mantong yang jroh yang ka lon peubuet ateuh peunduduek yerusaleum, dan keuhai keumakmuran yang ka ulon bri keu peunduduek banda nyan." tuhan meufeureuman, "manusia jipeugah bahwa teupat nyoe lagee padang pasi, hana ureueng atawa beulatang yang na tinggai disinan. peue yang jikheun le awaknyan meumang beutoi, sabab banda-banda di yehuda dan rot-rot di yerusaleum ka soh banmandum; hana manusia atawa beulatang yang na tinggai disinan. teuma di teupat-teupat nyan teudeungoe lom su keugeumbiraan, su ureueng kem jeub-jeub sagoe dan su ureueng rame bak teupat khanuri meukawen. teuma teudeungoe lom su ureueng meuca-e le ureueng-ureueng yang jiba keureubeuen syukoe u rumah lon. awaknyan jipeugah, 'meusyukoe kheueh ubak tuhan yang mahakuasa, sabab gobnyan jroh dan geunaseh gobnyan lom abadi.' nanggroede nyoe lon peumakmu lom lagee yang ka-ka. ulon, tuhan, ka lon peugah haba." tuhan yang mahakuasa meufeureuman, "nanggroede dan banda-banda yang lagee padang pasi nyoe hana jikeumiet le manusia dan beulatang. bahpi lagee nyan, oh singoh dudoe na lom padang-padang naleueng teupat ureueng meurabe bubiri. di banda-banda di daerah gunung-gunong, bak gaki-gaki gunung, daerah yehuda seultan, dan di wilayah benyamin meunan cit di gampong-gampong yang na bak-bak bineh yerusaleum, dan di gampong-gampong yehuda, le ureueng-ureueng meurabe nyan ji itong bubiri-bubiri jihnyan. ulon, tuhan, ka lon peugah haba." tuhan meufeureuman, "teuma trok saat jih ulon peuteupat janji yang ka lon peugot ngon israel dan yehuda. bak watee nyan na sidroe ureueng yang ade nibak keuturonan nabi daud lon pileh jeuet keu raja. raja nyan jipeubuet peue yang ade dan beutoi bansaboh nanggroede. ureueng yehuda dan peunduduek yerusaleum teupeuseumat dan udeb aman. banda yerusaleum teuboh nan, 'tuhan peuseumat geutanyoe'. ulon, tuhan, meujanji sabe na sidroe lamkawan keuturonan nabi daud yang jeuet keu raja israel; sabe na teungku-teungku imeum nibak keuturonan sukeu lewi yang jipeutimang ulon dan jipeuseumah keureubeuen beulatang, gandom dan keureubeuen yang teutot." tuhan meufeureuman ubak ulon, "ulon ka lon ikat janji deungon uroe dan malam, mangat uroe ngon malam sabe teuka bak watee jih; peujanjian nyan hana binasa meunyoede hana teupeuna. meunan cit ulon ka lon ikat janji ngon hamba ulon nabi daud, bahwa nibak keuturonan geuhnyan sabe na sidroe lamkawan yang jeuet keu raja; dan ulon ka cit lon ikat peujanjian ngon teungku-teungku imeum keuturonan lewi bahwa awaknyan sabe jipeutimang ulon. janji-janji yang ka teupeuna nyan hana jeuet teusampoh.

ulon lon tamah keuturonan hamba ulon nabi daud dan teungku-teungku imeum sukeu lewi, sampoe jeumeulah awaknyan ka sadub le lagee anoe bak bineh pasi dan sadub ngon bintang di langet nyan hana hase teu itong." tuhan meufeureuman ubak ulon, "peu kheueh ka takalon peue yang jipeugah le gob keuhai israel dan yehuda? awaknyan jipeugah bahwa ulon ka lon boih bandua boh bansa nyan. yang kheueh sabab jih awaknyan jikalon hina ateuh umat lon, dan hana le jianggal awaknyan sibagoe saboh bansa. teuma lagee ulon nyoe, tuhan, ka geupeugot saboh peungikat deungon uroe dan malam, dan geupeugot hukom yang atoe langet dan bumoe. meunan cit ulon teutab lon mat bak janji lon ngon keuturonan nabi yakub dan ngon hamba ulon nabi daud. sidroe lamkawan keuturonan nabi daud lon pileh keu jimat peurintah ateuh keuturonan nabi ibrahim, nabi ishaq, dan nabi yakub. ulon balaih gaseh ngon umat lon, dan lon peujeuet awaknyan makmu lom teuma." watee nebukadnezar raja babel deungon angkutan prang geuh yang jipeukong le pasokan-pasokan nibak meubagoe bansa dan nanggroede yang taklok ubak gobnyan teuka geujak seurang yerusaleum dan banda-banda yang na nibak bineh nyan, tuhan geupeugah ubak ulon. gobnyan geuyue mangat lon jak ubak zedekia raja yehuda, dan lon peugah lagee nyoe, "ulon, tuhan, po teu allah israel, lon seurah banda nyoe ubak raja babel dan raja babel nyan jitot banda nyoe. gata hana teupeusie, dan jidbro jiseurah ubak raja nyan. gata meurumpok dan tamariet keudroe deungon gobnyan, laju gata tajak u babel. teuma deungoe tutoe haba lon nyoe keuhai gata, zedekia! gata hana mate lam prang, teuma mate deungon teuntram. dan lagee yang ka jipeubuet le rakyat jitot keumeunyan watee jipeuteron lam jrat indatu gata yang mat peurintah sigohlom gata, meunan cit teuma rakyat jitot keumeunyan keu gata. awaknyan meukabong dan jipeugah, 'aduh! raja kamoe ka hana le!' ulon, tuhan, ka lon peugah haba." dan haba tuhan nyan ulon peusampoe ubak raja zedekia di yerusaleum, watee raja babel teungoh geuprang banda nyoe. awaknyan jiprang cit banda lakhis dan aseka, dua boh banda nyan meupageu ngon kuta yang mantong meuteun di yehuda, raja zedekia dan peunduduek yerusaleum jipeuna peujanjian keu jipeubeubaih namiet-namiet ibrani awaknyan, bah kheueh nyan yang agam meunan cit yang inong mangat hana jeuet meusidroe pi nibak bansa israel yang peunamiet ureueng seubansa jihnyan. banmandum rakyat dan bandum peubab peumeurintah yang ka jipeugot janji keuteupeu beubaih namiet-namiet awaknyan dan hana teuma jipeujeuet keu namiet le, beutoi-beutoi geupeul-heueh namiet-namiet awaknyan. teuma oh dudoe awaknyan ka meu-ubah pikeran, laju jicok lom namiet-namiet nyan, dan jipaksa jeuet keu namiet lom. dan tuhan, po teu allah israel, meufeureuman bak ulon kupeugah lagee nyoe, "bak watee lon ba indatu gata lon peuteubiet nibak nanggroede meuse dan lon peubeubaih awaknyan nibak peubudakan, ulon ka lon peugot peujanjian deungon awaknyan. ulon peugah bahwa banmandum namiet ibrani yang ka jipeutimang nam thon treb jih, haroh

teupeumeurdehka bak akhe thon nyang keutujoh. teuma indatu gata hangeutem kalon atawa geudeungoe peue nyang ulon peugah nyan. napadub uroe nyang ka ltheueh gata ta ubah pi-e gata dan tapeubuet nyang meukeunong bak ate lon. gata banmandum situju keu tapeubeubaih namiet-namiet seubansa gata, dan tapeugot peujanjian deungon ulon didalam baet lon. peujabat-peujabat peumeurintahan yehuda dan yerusalem meusajan deungon bubena peugawee meuligoe, teungku-teungku imeum dan banmandum nyang kawai tanoh gata ka jipeusah peujanjian nyan deungon jisie leumo, jikoh jeuet keu dua boh bagi, dan laju jijak di teungoh-teungoh bagian dua boh bagi nyan. teuma oh ltheueh nyan gata meu ubah pikeran dan tahina ulon. namiet-namiet nyang ka ltheueh gata peubeubaih nyang sisuai deungon keuheundak awaknyan, gata cok lom dan gata paksa mangat jeuet keu namiet lagee nyang ka-ka. sabab nyan, ulon, tuhan, lon peugah bahwa gata ka taiengkeue peurintah ulon, dan hana tataat syarat-syarat nyang ka ltheueh teupeugot, sabab gata hana tapeu beubaih seusamoe gata bansa israel. nah jinoenyoeh bah ktheueh ulon bri keubeubaihan keu gata: keubeubaihan keu mate di mideuen prang atawa le bala peunyakot atawa le keunong deuk. ulon lon peujeuet gata lagee gata tapeusaneut atueh leumo nyang gata sie nyan. ulon lon peujeuet meubagoe bansa atueh rueng donya jeuet keuteumakot dan gli peue nyang ka ulon peubuet u atueh gata. ulon lon seurah gata ubak musoh nyang keuneuk poh mate gata. manyet gata jipajoh le cicem dan beulatang juah. zedekia raja yehuda dan bandum peujabat peumeurintah ulon seurah ubak ureueng-ureueng nyang keuneuk poh mate awaknyan. ulon lon seurah awaknyan ubak sipa-i babel, nyang jinoenyoeh ka jitinggai gata. ulon lon bri aba-aba mangat awaknyan jigisa u banda nyoe, laju jiseurang, jireupah, dan jitot banda nyan. banda-banda yehuda lon peujeuet lagee padang pasi nyang hana jikeumiet le manusia. ulon, tuhan, ka lon peugah haba." bak watee yoyakim bin yosia jeuet keu raja yehuda, tuhan meufeureuman ubak ulon, "tajak peugah haba ktheueh ngon kawom rekhah. taba ktheueh awaknyan bak saboh bilek di baet lon, dan tabri ktheueh ie anggo keu awaknyan." dan dilon pih laju lon jak tawok bandum kawom rekhah, awaknyan na ktheueh yaazanya (aneuek sidroe ureueng nyang nan yeremia bin habazinya) meusajan bandum syedara jihnyan dan aneuek-aneuek jihnyan nyang agam. ulon laju lon ba awaknyan u baet tuhan u dalam bilek murit-murit nabi hanan bin yigdalya. bilek nyan teupeuduek di atueh ruweueng teungku imeum maaseya bin salum, rab bak bineh bilek peujabat-peujabat nyang laen. maaseya na ktheueh peugawee manyang nyang tugaih gobnyan geukawai pintoe-pintoe baet tuhan. oh ltheueh nyan laju ulon keubah dikeue ureueng-ureueng rekhah nyan piala-piala nyang peunoh meuasoe ngon ie anggo, dan glah-glah ie. laju ulon peugah ubak awaknyan, "silakan neujiieb." teuma awaknyan jiwaweub, "kamoe hana kamoe jieeb anggo. indatu kamoe yonadab bin rekhah geutam kamoe dan keuturonan kamoe bek teujieb ie anggo. nyang teutam nyan teutab na siumu masa. kamoe

hana jeuet kamoe meulampoh, dan meunan cit hana jeuet kamoe puga atawa kamoe milek lampoh anggo. siumu udeb, kamoe hana teuma jeuet kamoe peudong rumoh. kamoe haroh tinggai didalam khimah, mangat jeuet kamoe tinggai teutab bak tanoh nyoe sibagoe ureueng aseng. bandum nyang geupeurintah le yonadab ubak kamoe ka kamoe taat. siumu udeb, kamoe, aneuek dan peurumoh kamoe hana jeuet kamoe jieeb ie anggo. kamoe hana kamoe peudong rumoh keu teumpat tinggai kamoe, teuma kamoe tinggai lam rumoh khimah. meunan cit nibak kamoe hana lampoh anggo, ladang atawa bijeh gandom keu teupula. paneuk jih, banmandum nyang geupeurintah le indatu kamoe yonadab nyan, kamoe taat sipeunoh ate. teuma watee raja nebukadnezar geujak prang nanggroeh nyoe, kamoe cok keuputosan kamoe plueng nibak sipa-i babel dan sipa-i siria, dan kamoe meungungse u yerusalem. nyang ktheueh sabab jih bak saat nyoe kamoe tinggai disinoe." laju tuhan, nyang mahakuasa, po teu allah israel, geuyuejak ulon ubak ureueng yehuda dan yerusalem, dan geuyue peusampoe peusan tuhan nyoe ubak awaknyan, "ulon, tuhan, lon teumanyong pakon gata hana tatem deungoe ulon, dan hana neutem turot peue-peue nyang ulon peurintah ubak gata. yonadab geularang keuturonan gobnyan jijieb ie anggo, dan awaknyan taat ubak peue nyang teutam nyan. sampoe an uroenyoeh hana meusidroeh pih nibak awaknyan nyang na jijieb ie anggo. teuma ulon hana putoh-putoh lon mariet deungon gata, dan gata teutab hantatem deungoe. hana putoh-putoh ulon kirem keu gata hamba ulon nabi-nabi, dan awaknyan ka geunaseuhat gata jeuet tapioh tapeugot peurangoe gata dan tapioh tapeubuet jeuhet. awaknyan geupeuingat gata mangat bek taseumah ilah-ilah nyang laen dan hana meungabdi ubak awaknyan, mangat gata sabe jeuet tatinggai di nanggroeh nyoe nyang ka ulon jok ubak gata dan ubak indatu gata. teuma gata han tatem peureumeuen dan han tatem deungoe. keuturonan yonadab taat ubak peue-peue nyang geupeurintah le indatu gobnyan, teuma gata han tatem taat ubak ulon. sabab nyan, ulon, tuhan, nyang mahakuasa, po teu allah israel, lon peuteuka u atueh gata – ureueng yehuda dan yerusalem – meubagoe beuncana nyang ka lon peuteuntee keu gata, lagee nyang ka ulon peugah. hainyan ulon peubuet sabab gata hana tatem deungoe peue nyang ulon peugah meunyoeh ulon mariet deungon gata, dan gata hana tatem jaweueb watee ulon hoi gata." laju ulon peugah ubak ureueng-ureueng kawom rekhah bahwa tuhan nyang mahakuasa, po teu allah israel, meufeureuman lagee nyoe, "gata ka taat ubak indatu gata yonadab; bandum peurintah gobnyan ka gata turot dan gata peubuet. sabab nyan, ulon, tuhan, nyang mahakuasa, po teu allah israel, meujanji bahwa nibak keuturonan yonadab bin rekhah sabe na ureueng agam nyang peutimang ulon." bak thon nyang keupeuet oh ka ltheueh yoyakim bin yosia jeuet keuraja yehuda, tuhan meufeureuman ubak ulon, "tacok ktheueh laju saboh kitab meugulong, dan tuleh ktheueh disinan bandum nyang ka ulon peugah ubak gata keuhai israel dan yehuda, dan keuhai sigala bansa. tuleh ktheueh banmandum peue-peue

nyang ulon peugah yoh phon that ulon meututoe ubak gata bak masa keurajeun raja yosia sampoe nibak uroe nyoe. mungken ureueng yehuda jipioh jipeubuet jeuhet meunyo awaknyan jideungoe meubagoe bala nyang lon peuh rhot ateuh awaknyan. teuma ulon lon peuh amphon desya dan buet jeuhet awaknyan." sabab nyan ulon hoi barukh bin neria dan lon calitra ubak gobnyan peue-peue nyang ka geufeuereuman le tuhan ubak ulon. dan barukh laju geutuleh banmandum lam kitab meugulong nyan. oh lueheh nyan laju lon bri peurintah lagee nyoe ubak gobnyan, "bak ulon hana geubri tamong le lam baet tuhan. sabab nyan, meunyo ka trok uroe jih manusia jipuasa, gata haroh tajak keudeh, dan tabaca laju ngon su nyang teuga bandum nyang ka ulon calitra ubak gata, mangat awaknyan jideungoe banmandum peue-peue nyang ka geupeugah le tuhan ubak ulon. tapeubuet kheueh laju nyan bak teumpat nyang cocok dan meuteume jideungoe le ureueng nyang na di baet tuhan, jitamong cit keunan ureueng yehuda nyang teuka nibak banda-banda awaknyan keudroe. mungken sabab nyan awaknyan jimeudoa ubak tuhan, dan meutobat nibak banmandum desya awaknyan nyang jeuhet. tuhan beungeh lumpah na ubak awaknyan dan geuancam awaknyan." dan barukh laju geubaca banmandum tutoe haba tuhan di baet tuhan, lagee nyang ka lon bri tugaih ubak gobnyan. bak buleuen sikureueng bak thon keulimong geumat keurajeun le yoyakim raja yehuda, rakyat jipuasa mangat meuteume gaseh sayang nibak tuhan. peunduduek yerusalem dan ureueng-ureueng nyang teuka di banda-banda di yehuda, bandum jipuasa. laju le barukh geubeuet laju peue nyang teutuleh lam kitab meugulong peue-peue mantong nyang ka ulon peugah, dan banmandum manusia jideungoe. beuet nyan jibeuet dalam baet tuhan bak kanto gemarya, bin safan seukeutareh neugahra. kanto nyan teuduek jih bak peulataran siblah u ateuh, tho ngon rot teutamong bak babah pintoe geureubang baro di baet tuhan. mikhaya bin gemarya dan cucoe safan jideungoe barukh geubeuet tutoe tuhan nibak kitab meugulong nyan. laju gobnyan jikak ubak meuligoe, u kanto seukeutareh nanggro. disinan bandum peujabat teuhong geupeuna rapat. delaya bin semaya, elnatan bin akhbor, gemarya bin safan, zedekia bin hananya, elisama sidroe seukeutareh, dan peujabat-peujabat nyang laen na disinan. mikhaya geubri tee ubak awaknyan, banmandum nyang geubaca le barukh di baet tuhan. laju le bandum peujabat nyan jikirem yehudi (yehudi nyan na kheueh aneuek netanya, cucoe selemya, dan buyut kusyi) ubak barukh deungon peurintah mangat jikak sira jiba ubak awaknyan kitab meugulong nyang ka geubeuet nyan. dan barukh laju geuba kitab nyan. "silakan taduek," kheun awaknyan, "tabeuet kheueh laju kitab meugulong nyan dikeue kamoe." dan barukh pi laju jibeuet. oh ka seulesoe gobnyan geubaca kitab meugulong nyan, awaknyan saleng meungieng-ngieng sabe keudroe-droe deungon peurasaan nyang gundah dan laju awaknyan jipeugah ubak barukh, "kamoe haroh kamoe lapor hainyo ubak raja." oh lueheh nyan awaknyan jitanyong, "ci tapeugah ubak kamoe pakriban cara

droeneueh tuleh banmandum nyoe. peuh kheueh yeremia nyang calitra ubak gata?" beutoi, tieb-tieb haba nyang na teutuleh disinoe ka geubaca le yeremia ubak ulon, dan laju lon tuleh deungon daweut bak kitab meugulong nyoe," jaweueh barukh. "gata dan yeremia haroh tasom. bek sampoe na ureueng teupeu teumpat musom gata nyan," kheun awaknyan. le dumna peujabat nyan jikeubah kitab meugulong nyan lam bilek elisama, seukeutareh nyan, oh luehehnyan laju jikak meuhadab ubak raja dan geulapor laju banmandum nyang ka geudeungoe nyan. le raja geuyue ubak yehudi mangat geucok kitab meugulong nyan. oh ka lueheh geucok bak bilek elisama, yehudi laju geubaca dikeue raja dan ubak bandum peujabat nyang na bansikeulleng raja nyan. bak watee nyan buleuen sikureueng, dan raja teuhong geuduek sira meu adeueng bak bineh apui di meuligoe musem sijuek gobnyan. meunan yehuda seulesoe jibeuet lhee atawa peuet boh bareh, raja laju geukoh bagian nyan deungon sakin ubit dan laju jitiek u dalam apui. meunan kheueh jipeubuet hana pih sampoe habeh kitab meugulong nyan jipajoh le apui. bahpi elnatan, delaya, dan gemarya geulakee ngon meuharab that mangat raja bek geutot kitab meugulong nyan, teuma raja nyan teutab han geutem meulakee awaknyan. bah kheueh raja meunan cit peujabat nyang ka jideungoe asoe kitab nyan hana teumakot atawa na rasa meunyeusai. raja meunan cit geupeurintah aneuek agam gobnyan, nyang meunan yerahmeel, meusajan deungon seraya bin azriel dan selemya bin abdeel, mangat jidrob ulon dan barukh seukeutareh lon. teuma tuhan geusom kamoe. oh ka lueheh geutot le raja yoyakim kitab meugulong nyang ulon calitra ubak barukh nyan, laju tuhan geuyue bak ulon mangat lon jakcok kitab meugulong nyang laen, dan teutuleh bandum lagee nyang ka teutuleh lam kitab meugulong nyang phon. tuhan geuyue bak ulon jak peugah lagee nyoe ubak raja, "gata ka tatot kitab meugulong nyan, dan gata tatanyong ubak yeremia pakon gobnyan geutuleh bahwa raja babel teuka dan geupeuhanco nanggro nyoe dan geupoh mate bandum peunduduek disinan meusigoe ngon beulatang-beulatang nyang na di nanggroe nyan. sabab nyan, ulon, tuhan, lon peugah ubak gata, he raja yoyakim, bahwa hana meusidroe pih nibak keuturonan gata jimat keurajeun sibagoe raja keuturonan nabi daud. manyet gata jirhom uluwa, jipoh le kha bak watee uroe, dan iembon leupie oh watee malam. gata, keuturonan gata, dan bubena peujabat gata lon hukom sabab desya-desya nyang gata peubuet. ulon teuma lon peuteuka u ateuh gata bandum bala nyang ka lon ancam ubak gata, sabab bah kheueh gata meunan cit deungon peunduduek yerusalem dan yehuda hana jihroe bak ancaman-ancaman nyang ulon peugah." teuma laju ulon cok geunulong kitab nyang baro, dan ulon jok ubak barukh seukeutareh lon. laju le jihnyan jituleh banmandum nyang ka lon calitra ubak jihnyan, na kheueh asoe geunulong kitab nyang phon teutamah deungon napadubboh peusan nyang laen nyang na hubungan deungon nyan. bak watee nebukadnezar raja babel geupeucat yoyakhin aneuek yoyakim, le geuhnyan laju jibaia zedekia bin yosia jeuet keu

raja yehuda. teuma bah kheueh zedekia meunan cit deungon peujabat banmandum dan rakyat jih hana jiturut peurintah tuhan nyang geubri meulala ulon. raja zedekia geuyue jak yukhal bin selemya, dan tungku imeum zefanya bin maaseya mangat jilakee mangat lontem meudoa ubak tuhan po teu allah keu keupeutangan bansa. bak watee nyan ulon gohlom jipeutamong u dalam glab dan mantong beubaih lon meugrak lamkawan rakyat. sipa-i babel teungoh geukeupong yerusaleum, teuma watee awaknyan jideungoe bahwa sipa-i meuse ka jibeudoh di nanggroe meuse keuneuk jijak muprang, awaknyan laju jisurot. tuhan, po teu allah israel geuyue ubak ulon mangat lon peugah lagee nyoe ubak utosan raja zedekia: "tapeugah kheueh laju ubak zedekia, 'sipa-i meuse nyang teungoh jijak keunoe keuneuk tulung gata, teuma jigisa, dan jiwoe. laju le ureueng babel jiriwang dan jiprang banda nyoe, dan banda nyoe jipeutaloe dan laju jitot sampoe habeh. ulon, tuhan, lon peuingat gata, mangat bek tapeungeut droe gata sira tapike bahwa ureueng babel ka jijak hana jigisa le. sabab awaknyan pasti geugisa. seukira jih gata tapeutaloe banmandum sipa-i babel dan nyang tinggai na kheueh sipa-i nyang luka-luka parah didalam khimah-khimah awaknyan, teuma awaknyan jibeudoh dan jitot sampoe habeh banda nyoe." sipa-i babel jisurot di yerusaleum sabab sipa-i meuse ka meugrak jituju u banda nyan. dan ulon laju lon tinggai yerusaleum dan lonjak u wilayah benyamin keu lon teurimong jeumba waresan lon nibak tanoh milek keuluwarga. teuma watee ulon ka trok bak babah pintoe geureubang benyamin, keumandan sipa-i nyang meutugaih disinan jiteun ulon dan jipeugah, "gata keuneuk plueng blah ureueng babel!" (pewira nyan nan jih yeria; jihnyan aneuk selemya dan cucoe hananya.) laju lon jaweueb, "nyan hana beutoi! ulon hana niet lon plueng ubak musoh." teuma yeria hana jitem deungoe. ulon laju jidrob dan jiba ulon jak meuhadab ubak peujabat peumeurintah. awaknyan beungeh that keu ulon, dan jipeurintah ulon nyoe jiseunuet dan jikurong di rumah yonatan, seukeutareh neugahra. rumah nyan ka jipeujeuet keu peunjara. ulon jipeutamong lam saboh kulam dimiyueb tanoh, dan treb that jiteun disinan. oh ltheueh nyan le raja zedekia geuyue sidroe ureueng mangat jiba ulon meuhadab ubak gobnyan di meuligoe. disinan seucara rahsia gobnyan geuteumanyong ubak ulon peu kheueh na peusan nibak tuhan. "na," jaweueb ulon. laju lon tamah lom, "teungku raja teuma jiseurah bak raja babel." oh ka ltheueh nyan ulon teumanyong lagee nyoe, "peue buet ulon nyang jeuhet ateueh teungku amphon atawa ateueh peujabat teungku amphon meunan cit ateueh rakyat teungku amphon, sampoe teungku amphon neupeutamong ulon u dalam glab? dipat bandum nabi teungku amphon nyan nyang jipeugah bahwa raja babel hana jiprang teungku amphon dan nanggroe nyoe? jinoe, teungku amphon nyang mulia, neutem kheueh nyang ulon lakee nyoe. bek kheueh neukirem lom ulon dalam glab di rumah yonatan nyan, eunteuk ulon mate disinan." dan le raja zedekia geupeurintah mangat ulon jipeutamong lam glab nibak seuramoe meuligoe. dan ulon tinggai

disinan, dan tieb-tieb uroe jijok ruti nibak tempat ruti teuboih sampoe peuseudiaan ruti nibak banda nyan habeh banmandum. tuhan meufeureuman bak ulon jak peusampoe peusan nyoe ubak rakyat, "banda nyoe ulon jok keu sipa-i babel, dan awaknyan jipeutaloe. barang sigasoe nyang tinggai didalam banda ureueng nyan mate di mideuen prang, atawa rhot bak deuk dan wabah peunyaket. teuma barang sigasoe jiteubiet dan geuseurah droe ubak ureueng babel, ureueng nyan hana teupoh mate dan nyawong ureueng nyan seulam." sefaca bin matan, gedalya bin pasyhur, yukhal bin selemya, dan pasyhur bin malkia jideungoe banmandum nyang ulon peugah nyan. dan jijak kheueh bubena peujabat nyan ubak raja dan jipeugah, "ureueng nyoe haroh teuhukom mate. sabab, deungon geupeugah lagee nyan jihnyan ka jipeuleumoh seumangat sidadu dan ureueng laen nyang mantong tinggai di banda nyoe. ureueng nyan hana jitulung rakyat, teuma jipeuceulaka awaknyan." geujaweueb le raja zedekia, "get! tapeubiet kheueh ateueh gobnyan nyang sisuai deungon keuheundak gata, ulon hana hase lon tam gata." ban jideungoe haba nyan le awaknyan laju jicok ulon dan geupeutron deungon taloe u dalam mon tho atra malkia aneuk agam raja, mon nyan teuduek jih bak bineh seuramoe meuligoe. mon nyan hana meue, nyang na leuhob, dan ulon tamong dalam leuhob nyan. bak watee nyan na sidroe ureueng sudan jimeukeureuja bak meuligoe raja. nan ureueng nyan ebed-melekh. ureueng nyan jideungoe bahwa ulon ka jipeutamong lam mon nyan. bak watee raja teungoh geupimpin rapat bak babah pintoe geureubang benyamin, ebed-melekh jijak ubak raja dan laju geupeugah lagee nyoe, "amphon deulat teungku po, nyang jipeubuet le awaknyan hana get. awaknyan ka jipeutamong nabi yeremia u dalam mon; gobnyan pasti mate sabab deuk dalam mon nyan, sabab peunajoh ka habeh lam banda nyoe." laju le raja geupeurintah ubak ebed-melekh, "taba kheueh lhee droe ureueng dan tapeuteubiet laju nabi yeremia dalam mon nyan sigohlom gobnyan mate." dan jijak kheueh ebed-melekh deungon ban lhee ureueng nyan bak gudang meuligoe, dan jicok laju ija-ija tuha disinan, laju ija-ija nyan jipeutron deungon taloe ubak ulon didalam mon. ebed-melekh jiyue peutamong ija-ija nyan lam gitiek lon sibagoe ganja, mangat taloe nyan hana saket watee keunong lon. dan di ulon laju lon seutot peue-peue nyang ka jipeurintah le ebed-melekh. dan awaknyan laju jitarek ulon u ateueh, jipeuteubiet lam mon nyan. oh ka ltheueh nyan ulon laju jiteuen nibak seuramoe meuligoe raja nyan. bak watee nyang laen, raja zedekia geuyue ureueng jeuet jiba ulon meuhadab gobnyan di babah pintoe geureubang nyang keu lhee nibak baet tuhan. gobnyan geupeugah ubak ulon, "ulon keuneuk teumanyong bak gata, dan gata haroh tajaweueb troh prang. bek tasom-som." laju lon jaweueb, "meunyeo ulon peugah nyang beutoi, pasti teungku amphon neupeurhot hukoman mate ateueh ulon; dan meunyeo ulon bri naseuhah, teungku amphon hanneutem deungoe naseuhah nyan." raja zedekia deungon seungab-seungab geumeujanji ubak ulon, kheun gobnyan, "deumi allah nyang udeb,

po teu allah nyang bri udeb ubak geutanyoe, ulon meusumpah bahwa ulon hana lon peumate gata atawa lon jok gata ubak ureueng-ureueng nyang keuneuk poh mate gata." laju ulon peugah ubak zedekia bahwa tuhan nyang mahakuasa, allah nyang jiseumah le ureueng israel, meufeureuman lagee nyoe, "meunyo gata taseurah droe ubak peujabat-peujabat raja babel, gata hana jipoh mate, dan banda nyoe pih hana jitot, gata dan keuluwarga gata teuma seulamat. teuma meunyo gata hana tatem taklok, banda nyoe rhot lam jaroe ureueng babel. awaknyan jitot banda nyoe sampoe habeh, dan gata hana jituwoe." geujaweueb le raja, "ulon takot keu ureueng-ureueng bansa geutanyoe nyang ka jiplueng blah ureueng babel. pat tateupeue ulon jiseurah ubak awaknyan dan jiseksa." "nyan hana teujadi," jaweueb ulon, "teungku amphon hana jiseurah ubak awaknyan. ulon meulakee deungon meuharab that mangat teungku amphon neutuot peue nyang geupeugah le tuhan; eunteuk banmandum beereeh, dan teungku amphon hana jipoh mate. teuma meunyo teungku amphon han neutem seurah droe, tuhan ka geupeuleumah ubak ulon peue nyang teujadi. dalam keumalon ulon nyan deuh ulon ngieng banmandum ureueng inong nyang mantong na lam meuligoe yehuda jigireng uluwa ubak peujabat-peujabat raja babel. sira jijak, awaknyan geupeugah, 'raja ka jipeudaya, le rakan-rakan rab jihnyan, dan jikuasa le awaknyan. jinoo, oh ka lheureh gaki gobnyan mesu-ruek dalam leuhob, awaknyan bandum jisurot.' " ulon peugah lom, "bandum aneuk peurumoh teungku amphon jiba uluwa ubak ureueng babel. teungku amphon keudroe pih hana teupeusie nibak awaknyan. teungku amphon jidrob le raja babel, dan banda nyoe jitot sampoe habeh." laju geupeugah le zedekia, "bek neupeugah bak soe mantong keuhai geutanyoe meututoe nyoe, mangat nyawong gata hana teuancam. meunyo le peujabat-peujabat jideungoe bahwa ulon ka lon peugah haba deungon gata, awaknyan jiteuka dan jitanyong ubak gata keuhai nariet geutanyoe. awaknyan meujanji hana jipeu mate gata, meunyo gata calitra banmandum ubak awaknyan. tapeugah mantong bahwa gata tabujuk glab mantag ulon hana lon kirem le gata u dalam glab dan mate disinan." hana treb oh lheureh nyan bandum peujabat jiteuka dan jitanyong ubak ulon. ulon peugah ubak awaknyan pakriban nyang ka geupeugah le raja ubak ulon. deungon lagee nyan awaknyan hana jeuet jipeubuet sapeue ateuoh ulon sabab hana meusidroe pih nyan teupeue peue nyang ka ulon mariet deungon raja. ulon teutab geuteun bak seuramoe meuligoe sampoe trok bak uroe yerasalem jireupah le musoh. bak buleuen nyang keu siploh thon keu sikureueng geumat keurajeuen le zedekia di yehuda, nebukadnezar raja babel deungon banmandum angkatan prang jih jiteuka dan jijak prang yerasalem. bak tanggai sikureueng buleuen peuet thon nyang keu siblahi geumat keurajeuen le raja zedekia, binteh beuton banda gobnyan jiheuntam ngon jidobrak le musoh, dan yerasalem jireubot. dan banmandum peujabat-peujabat raja babel jiteuka dan jijak duek bak babah pintoe geureubang teungoh. lamkawan awaknyan

na sidroe ureueng nyang nan jih nergal sarezer, samgar nebo, sarsekim ulee rumoh tangga meuligoe, nergal sarezer rabmag dan peuwira-peuwira laen. bak watee raja zedekia dan bandum tantra gobnyan geukalon bandum nyang teungoh teujadi nyan, awaknyan meu useuha jipeuplueng droe rot panton yordan malam nyan cit teuma. awaknyan geucok rot taman meuligoe, laju geuteubiet meulalu pintoe geureubang nyang peuhubong bandua boh beuton di tempat nyan. teuma sipa-i babel laju jipeucrok awaknyan dan jidrob laju zedekia bak darat yerikho. oh lheureh nyan gobnyan laju jiba meuhadab raja nebukadnezar di banda ribla di daerah hamat, nibak teumpatnyan kheureh jihnyan jipeurhok hukoman mate. dan dibanda nyan cit teuma aneuk-aneuk gobnyan jipoh mate dikeue mata gobnyan, dan bandum peujabat peumeurintah yehuda pih jipoh mate. oh lheureh nyan zedekia laju jicungke mata geuh, dan laju jicarueh raja geuh dan laju jiba u babel. dan le ureueng-ureueng babel nyang laen laju jitot meuligoe raja dan rumoh-rumoh rakyat, dan jireuloh bubena beuton yerasalem. akhe jih rakyat nyang mantong na tinggai di banda, meusajan ngon ureueng-ureueng nyang plueng u pihak babel, laju jiangkot u babel le nebuzaradan, keumandan pasokan babel. siladum nibak rakyat nyang paleng gasien hana sapeue na, laju jitinggai di yehuda dan jijok lampoh anggo dan ladang. raja nebukadnezar ka jiyue bak nebuzaradan, keumandan pasokan gobnyan, jipeuteubiet peurintah nyang su jih lagee nyoe: "tajak mita laju dipat yeremia, dan tajaga kheureh gobnyan beu jroh-jroh. bek tapeubuet sapeue ateuoh gobnyan; dan tapeubuet kheureh peue nyang geulakee." dan le nebuzaradan meusajan deungon dua droe peuwira manyang gobnyan, nebusyazban dan nergal-sarezer dan banmandum peuwira babel nyang laen, laju jijak cok ulon nibak seuramoe meuligoe. laju ulon jijok ubak gedalya bin ahikam dan cucoe safan, nyang intat ulon woe deungon seulamat. dan tinggai kheureh ulon di teungoh-teungoh rakyat. watee ulon mantong dalam glab nibak seuramoe meuligoe, tuhan geuyue ubak ulon jak peugah ubak ebed-melehk ureueng sudan nyan bahwa tuhan nyang mahakuasa, po teu allah israel, geupeugah lagee nyoe, "lagee nyang ka ulon peugah yoh masa dilee, ulon lon peuteuka ateuoh banda nyoe beuncana, dan kon keumakmuran. gata takalon hainyan teujadi. teuma, ulon, tuhan, lon lindong gata. gata hana jiseurah ubak ureueng-ureueng nyang gata takot. gata hana jipoh mate, sabab ulon lon peuseulamat gata. nyawong gata seulamat sabab gata tameusadeue ubak ulon. ulon, tuhan, nyang peugah haba." tuhan meufeureuman ubak ulon oh ka lheureh nebuzaradan, keumandan pasokan nyan, jipeubeubaih ulon di rama. ulon ka jiba keudeuh lam keuadaan jaroe teugari meusajan deungon bandum ureueng laen nibak yerasalem dan yehuda nyang teungoh jiangkot sibagoe tawanan u babel. keumeundan nyan jitawok ulon keudroe dan jipeugah, "tuhan allah gata ka geuancam keuneuk geupeuhanco nanggroe nyoe. jinoenyoe hainyan ka geulaksana, sabab nyan bansa gata ka meudesya dan hana taat ubak gobnyan. jinoenyoe ulon peulheureh

gari nyoe nibak jaroe gata dan ulon peubeubaih gata. meunyoeng gata tatem, gata jeuet taseutot u babel, dan ulon lon peulara gata. teuma meunyoeng gata hana tatem, hana peue-peue. bansaboh nanggroeng gata beubaih tajak ho mantong nyang gata galak." sigohlom jijak, nebuzaradan jipeugah lagee nyoe, "meunyoeng tatem, gata jeuet tagisa ubak gedalya bin ahikam dan cucoe safan, nyang ka jiangkat le raja babel jeuet keu gubunur di banda-banda yehuda. gata jeuet tinggai deungon gobnyan di teungoh-teungoh rakyat, atawa tajak ho-ho mantong nyang galak ate gata." laju gobnyan geubri beukai peunajoh dan hadiah ubak ulon, dan laju jipeulheueh ulon. ulon jak laju ubak gedalya di mizpa, dan tinggai deungon gobnyan lamkawan rakyat nyang jitinggai di nanggroeng yehuda. raja babel ka geuangkat gedalya jeuet keu gubunur di yehuda keu geumat peurintah ateuhe bandum ureueng nyang mantong tinggai di yehuda, na kheueh ureueng-ureueng paleng gasien. siladam nibak peuwira dan sidadu yehuda nyang hana meunyeurah ubak babel, jideungoe keuhai teuangkat gedalya nyan. dan ismael bin netanya, yohanan bin kareah, seraya bin tanhumet, dan aneuek-aneuek efai nibak netofa, dan yezanya nibak maakha jijak deungon ureueng-ureueng awaknyan ubak gedalya di mizpa. gedalya geupeugah ubak awaknyan, "gata hana peureulee takot keu meunyeurah ubak ureueng babel. tinggai kheueh mantong di nanggroeng geutanyoe nyoe, dan jeuet kheueh keunamiet raja babel. ulon tanggong gata nyoe seulamet. tinggai kheueh bak banda-banda nyang gata harok, dan hana salah tapeusapat dan takeubah anggo, boh-boh kayee meunan cit ngon minyeuk zaiton. ulon keudroe tinggai di mizpa dan jeuet keuwaki rakyat meunyoeng ureueng-ureueng babel jijak keunoe." seulanjut jih bandum ureueng israel nyang tinggai di moab, amon, edom, dan nanggroeng-nanggroeng laen, jideungoe bahwa raja babel ka geubri idhin siladam ureueng israel tinggai di yehuda, dan bahwa gobnyan ka geuangkat gedalya jeuet keu gubunur. sabab nyan awaknyan jitinggai laju teumpat-teumpat dipat awaknyan ka jipeu crebre, laju jigisa u yehuda. awaknyan geujak ubak gedalya di mizpa, dan jigumpoi anggo nyang cukob le meunan cit deungon meubagoe rupa boh kayee. oh lheureh nyan, yohanan dan bandum peuwira nyang hana meunyeurah ubak musoh, jijak ubak gedalya di mizpa dan jipeugah, "peu kheueh tateupeue bahwa baalis raja amon ka jiyue bak ismael keuneuk jijak poh gata?" teuma gedalya hana geupateh keu haba nyan. dan deungon seungab-seungab jipeugah kheueh le yohanan ubak gedalya, "bah kheueh ulon jakpoh mate ismael; hana meusidroe pih nyang teupeue soe ureueng poh ismael nyan. pakon gobnyan teupeubiyeu jijakpoh gata? nyang lagee nyan rhot bak akibat bandum ureueng yehuda nyang ka meugumpoi disinoe deungon gata, meucubre lom, dan hainyan teupeuhanco banmandum rakyat nyang mantong na tinggai di yehuda." teuma geujaweueh le gedalya, "bek! nyang gata peugah keuhai ismael nyan hana beutoi!" bak buleuen tujoh thon nyan ismael bin netanya dan cucoe elisama jijak meusajan ngon siploh droe ureueng nyang laen u mizpa keuneuk meurumpok

ngon gedalya. (ismael na kheueh sidroe ureueng keuturonan raja, dan sidroe lamkawan peuwira manyang keurajeuen nanggroeng.) dan awaknyan banmandum jimakheun meusajan, ismael dan ban siploh droe rakan jihnyan laju jisuet peudeueng lam sarong dan laju jicang gedalya sampoe mate, gubunur nyang geuangkat le ureueng babel. meunan cit le ismael jipoh mate bandum ureueng yehuda nyang na meusajan ngon gedalya di mizpa, dan banmandum tantra babel nyang keubeutulan na disinan. uroe seulanjut jih, sigohlom gedalya nyang ka teupoh mate jiteupeue le gob, teuka kheueh lapan ploh droe ureueng di sikhem, silo, dan samaria. awaknyan ka jicuko janggot, jipriek peukayan, dan geucureh-cureh badan jih keudroe. awaknyan jiba gandom dan keumeunyan keuneuk jipeuseumah di baet tuhan. dan jiteubiet kheueh ismael di mizpa dan jijak meurumpok laju deungon awaknyan, sira jimoe, laju jipeugah, "jak geutanyoe tajak ngieng gedalya." sigra oh ka lheureh awaknyan trok di teungoh-teungoh banda, ismael dan rakan-rakan gobnyan ka jipeuphon poh awaknyan. teuma siploh droe lamkawan awaknyan jipeugah ubak ismael, "bek tapoh mate kamoe! bak kamoe mantong na dua macam gandom, meunan cit deungon minyeuk zaiton, dan meunisan. banmandum kamoe som di luwa banda." sabab nyan kheueh ismael hana jipoh awaknyan, teuma nyang laen teutab jipoh mate dan manyet-manyet awaknyan jiteuk lam mon. mon nyan na kheueh mon nyang raya nyang geukeuh le raja asa bak watee gobnyan jiprang le baesa raja israel. oh lheureh nyan ismael laju jidrob banmandum putroe raja nyang mantong tinggai di mizpa nyang ka jiseurah le nebuzaradan ubak peungawas gedalya. ismael jiteun awaknyan dan laju jijak ngon awaknyan u jurusan wilayah amon. yohanan bin kareah dan bandum peuwira nyang na meusajan ngon awaknyan jideungoe keuhai keujeuhetan ismael. dan awaknyan meusajan ngon aneuek buah awaknyan jitiyeub laju gobnyan, dan meurumpok ngon jihnyan bak bineh kulam raya gibeon. ban jingiang yohanan meusajan ngon peuwira-peuwira nyan teungoh teuka, bubena ureueng nyang jiteun le ismael galak that ate, laju geugisa dan geuplueng lamkawan yohanan. teuma ismael dan lapan droe aneuek buah jihnyan jiteume peulheueh droe, dan laju jiplueng u nanggroeng amon. oh lheureh nyan yohanan dan peuwira-peuwira gobnyan geugumpoi laju bubena sidadu, ureueng inong, aneuek-aneuek manyak, dan bandum peugawee meuligoe nyang jiteun le ismael oh ka lheureh jipoh mate gedalya. awaknyan bandum teumakot keu ureueng babel, sabab ismael ka jipoh mate gedalya nyang geuangkat le raja babel jeuet keu gubunur di nanggroeng nyan. jadi, awaknyan jipeuplueng droe u nanggroeng meuse. bak teungoh rot ueh, awaknyan laju jipioh di kimham karab ngon betlehem. oh lheureh nyan, bandum ureueng, ubit dan rayeuk, meusajan ngon peuwira-peuwira, jitamong cit keunan yohanan bin kareah dan azarya bin hosaya jijak ubak ulon dan jipeugah, "pak, lagee nyang bapak ngieng keudroe, kamoe nyoe dilee le, teuma saat nyoe tinggai bacut teuk. kamoe meuharab mangat bapak neutem meudoa keu kamoe ubak tuhan allah

nyang bapak seumah. meudoa kheueh keukamoe nyang mantong tinggai sidroe dua nyoe, mangat tuhan po teu allah geutanyok ubak kamoe ho nyang haroh kamoe jak dan peue nyang haroh kamoe peubuet." laju ulon jaweueb, "get kheueh, meunyo meunan. ulon teurimong peue nyang gata lakee nyan. ulon meudoa ubak tuhan po teu allah geutanyoe, dan peue mantong nyang gobnyan jaweueb, teuma lon peugah ubak gata; sapeue pih hana lon som keu gata." awaknyan geupeugah ubak ulon, "kamoe lakee bapak neumeudoa ubak tuhan allah tanyoe, sabab kamoe ka kamoetem taat ubak gobnyan, mangat keuadaan kamoe jeuet keu get. jadi, get atawa brok peusan tuhan nyan, kamoe teutab kamoe seutot. bah kheueh tuhan jeuet keusaksi nyang jufoe dan seutia teuhadab kamoe, meunyo kamoe hana kamoe turot banmandum peurintah nyang tuhan bri ubak kamoe meulala bapak." na siploh uroe teuma oh lleueh nyan tuhan meufeureuman ubak ulon. dan laju ulon hoi yohanan meunan cit deungon peuwira-peuwira gobnyan dan bandum ureueng laen nyang teuka meusajan deungon gobnyan. ulon peugah ubak awaknyan, "gata tayue ulon mangat lon peusampoe nyang gata lakee ubak tuhan, allah israel. nyoe, tuhan ka geupeugah, 'meunyo tatem teutab tinggai di nanggroe nyoe, ulon lon angkat gata, bukan ulon peu rhot; ulon lon peudong gata, kon ulon reuloh. ulon seudeh that-that sabab ka lon puteuka beuncana ateuh gata. bek le tatakot bak raja babel nyan. ulon na di teungoh-teungoh gata keu lon tulung dan lon peulheueh gata nibak keukuasaan jih nyan. sabab na gaseh sayang bak gata, ulon lon peujeuet raja babel jigaseh keu gata dan jibri idhin keu gata mangat jeuet gata woe. ulon, tuhan, ka lon peugah haba.' " teuma gata nyang mantong tinggai di yehuda bek kheueh meubangkang keu tuhan allah gata dan bek tapeugah, "kamoe hana kamoe tem tinggai di nanggroe nyoe. kamoe keuneuk jak u nanggroe meuse dan kamoe tinggai disinan. di nanggroe meuse nyan kamoe hana le kamoe rasa prang, hana le kamoe deungoe su beureuguih nyang teuhoi kamoe keuteujak ngaza, dan hana teuma kamoe deurita keunong deuk." meunyo gata tameukreueh ate keu tajak u nanggroe meuse dan tatinggai disinan, nyoe kheueh peusan tuhan nyang mahakuasa, allah israel, keu gata: "muprang dan deuk nyang gata takot nyan teuma jitiyeub gata sampoe u nanggroe meuse, dan gata mate di nanggroe nyan. bandum ureueng nyang jimeukreueh keujjak u nanggroe meuse dan tinggai disinan ureueng nyan mate di mideuen prang, atawa mate sabab keunong deuk dan keunong bala peunyaket. hana meusidroe pi nyang teupeusie nibak beuncana nyang ulon puteuka ateuh awaknyan; banmandum mate. lagee ulon, tuhan, po teu allah israel lon puteuka beungeh dan geungeuen ulon u ateuh peunduduek yerusaleum, meunan cit teuma lon puteuka geungeuen ulon ateuh gata nyang tajak u meuse. ureueng laen gli jikalon gata; gata jihina, dan nan gata jipeuguna sibagoe kutokan. gata hana takalon tanoh ie gata nyoe masa nyang teuma teuka." laju ulon peugah lom, "tuhan ka geupeurintah mangat gata nyang na mantong tinggai sidroe sapat di yehuda hana gata jak u nanggroe meuse. sabab

nyan ulon peuingat ubak gata saat nyoe bahwa gata ka tapeubuet keusalahan nyang paleng raya. gata lakee mangat ulon meudoa ubak tuhan po teu allah geutanyoe keu gata, dan gata meujanji mangat gata peubuet bandum nyang geupeugah le tuhan. jinoenyoe ulon ka lon peusampoe peusan tuhan allah geutanyoe ubak gata, teuma gata hana tatem seutot peusan nyan. sabab nyan, ingat kheueh: di nanggroe nyang meuheut gata keuneuk jak dan tinggai teutab disinan, gata mate dimideuen prang, atawa sabab keunong deuk atawa bala peunyaket." feureuman tuhan, allah israel, nyang haroh ulon peusampoe ubak rakyat ka ulon peutrok banmandum. le azarya bin hosaya dan yohanan bin kareah dan bandum ureueng laen nyang sombong nyan jipeugah ubak ulon, "gata sulet. tuhan allah kamoe hana geuyue bak gata keu gata tam kamoe mangat bek kamoe jak dan tinggai teutab di nanggroe meuse. barukh bin neria nyan kheueh nyang yue gata mangat ta lawan kamoe, mangat ureueng babel jikuasa kamoe dan jiteume pioh kamoe u babel." bah yohanan meunan cit deungon bandum peuwira dan rakyat hana jitem turot peurintah tuhan keu tinggai di yehuda. yohanan dan bandum peuwira nyan geuba u meuse soe mantong ureueng nyang mantong na tinggai di yehuda, dan meunan cit bandum ureueng nyang ka geuwoe nibak nanggroe laen teumpat awaknyan meusipreuk. agam, inong, aneuek-aneuek banyak, dan putroe-putroe raja nyang geuseurah le nebuzaradan ubak peungawasan gedalya, jitamong ulon dan barukh, bandum geuba u meuse. awaknyan jilawan peurintah tuhan, dan jijak u nanggroe meuse sampoe jioh trok u banda tahpanhes. disinan tuhan geupeugah ubak ulon, "tacok kheueh batee-batee dan seube bek kheueh lam tanoh dikeue pintoe tamong u geudong peumeurintah banda nyan. useuha kheueh mangat ureueng-ureueng yehuda jikalon peue nyang gata peubuet nyan. laju tapeugah ubak awaknyan bahwa ulon, tuhan nyang mahakuasa, allah israel, lon puteuka hamba ulon nebukadnezar raja babel, u teumpat nyan. dan di ateuh batee-batee nyang gata seube lam tanoh nyan, jihnyan jipeupondong takhta jih dan jipeudong khimah keurajeuen jihnyan. nebukadnezar teuma teuka dan jipeutaloe meuse. dan ureueng-ureueng nyang ka teupeuteuntee keu mate sabab bala peunyaket, ureueng nyan mate sabab peunyaket. awaknyan nyang ka geupeuteuntee teuangkot sibagoe ureueng keunong teun, teuangkot sibagoe ureueng keunong teun, nyang ka teupeuteuntee keu mate dimideuen prang, mate di mideuen prang. ulon lon peuhu apui di kuil-kuil dewa-dewa meuse, dan raja babel geutot banmandum patong beurala nyang na bak kuil-kuil nyan atawa jiangkot u nanggroe gobnyan. lagee sidroe ureueng meurabe nyang jipeugleh bajee gobnyan nibak gutee, meunan kheueh raja babel geusamph habeh nanggroe meuse laju geujak lom deungon hana ureueng nyang jijeuet peukaru. tugu-tugu beurala nyang na di heliopolis di nanggroe meuse, teuma geupeuhanco, dan kuil-kuil dewa-dewa meuse geutot habeh jeuet keu abee." tuhan meufeureuman ubak ulon keubandum ureueng israel nyang tinggai di meuse, nyang na di banda migdol, tahpanhes, memfis, dan

di daerah seulitan. nyoe kheueh feureuman tuhan yang mahakuasa, po teu allah israel, keu awaknyan, "gata keudroe ka gata kalon beuncana nyang ulon peu rhot ateuh yerusalem dan banmandum banda laen di yehuda. sampoe saat nyoe pih banda-banda nyan mantong dalam keadaan hanco dan hana ureueng tinggai. hai nyan teujadi sabab ureueng disinan meudesya, sampoe jipeuteuka beungeh ulon. awaknyan jipeuseumah keureubeuen dan meubakti ubak dewa-dewa yang gohlohm jiseumah le awaknyan keudroe, le gata dan indatu gata. ulon hana putoh-putoh lon kirem ubak gata hamba-hamba ulon nabi-nabi, nyang peusampoe ubak gata mangat bek jipeubuet buet nyang ulon banci. teuma gata hana tatem deungoe dan hana tatem simak. gata hana tatem pioh tapeubuet nyang jeuhet, deungon cara gata peuseumah keureubeuen ubak dewa-dewa. nyang kheueh sabab jih ulon peutron beungeh dan meureuka ulon ateuh banda-banda di yehuda dan rot-rot raya di yerusalem. banmandum ulon tot sampoe ka jeuet keu runga-runga dan tandus lagee nyang ka takalon bak saat nyoe. dan jinoe, ulon, tuhan yang mahakuasa, po teu allah israel, lon tanyong pakon gata peubuet hai nyang teupeu teuka bala nyang raya ateuh gata. peu kheueh gata keuneuk peubina banmandum ureueng – agam, ureueng inong, aneuk miet dan aneuk manyak – sampoe hana meusidroe pih nibak bansa gata nyang tinggai? keupeue gata peubuet hai-hai nyang teupeu teuka beungeh ulon? gata tateuka dan tatinggai di nanggroe meuse, nanggroe nyang aseng nibak gata, laju gata seumah beurala dan tapeuseumah keureubeuen keu dewa-dewa nanggroe nyan! peu kheueh gata takeuneuk peuhanco droe gata keudroe mangat gata jihina le sigala bansa di ateuh donya nyang nan gata jipeuguna sibagoe kutokan? peu kheueh gata ka tuwoe ubak sigala keujeuhetan nyang jipeubuet di tanoh yehuda dan nibak rot-rot raya di banda yerusalem le indatu gata, le raja-raja yehuda dan peurumoh-peurumoh awaknyan, meunan cit gata dan peurumoh gata? teuma trok bak uroe nyoe gata hana tapeumiyueb droe. gata hana tahoreumat ulon dan hana udeb meunurot hukom nyang ulon bri ubak gata dan ubak indatu gata. sabab nyan, ulon, tuhan yang mahakuasa, allah israel, lon lawan gata dan lon peuhanco bansaboh yehuda. dan meunyo na nibak ureueng yehuda nyang mantong na tinggai sidroe sapat nyang na meuheut keuneuk jak cit u nanggroe meuse keuji tinggai disinan, awaknyan binasa banmandum. awaknyan bandum, cut rayeuk, mate di meuse dimideuen prang atawa sabab keunong deuk. ureueng laen meuras a gli watee jikalon awaknyan dan jihina awaknyan. nan awaknyan jipeuguna sibagoe kutokan. lagee ulon hukom yerusalem, meunan cit teuma lon hukom awaknyan nyang tinggai di nanggroe meuse. awaknyan mate dimideuen prang, sabab keunong deuk atawa keunong bala peunyaket. di ureueng yehuda nyang na mantong tinggai sidroe sapat, nyang ka jikak u nanggroe meuse keu tinggai teutab disinan, hana meusidroe pi tinggai atawa udeb. hana meusidroe pih lamkawan awaknyan jiwoe u yehuda, bahpi hainyan jiharab that. bit, hana nyang woe

teukeucuali napadub droe ureueng peungungsi." laju jikak kheueh ureueng rame nyang jai that ubak ulon, awaknyan na kheueh bandum ureueng agam nyang ka jiteupeue bahwa ureueng binoe gobnyan jipeuseumah keureubeuen keu dewa-dewa, dan bandum ureueng inong nyang teungoh jidong disinan, jitamong cit keunan ureueng israel nyang tinggai di patros, blaih seulitan meuse. awaknyan jipeugah ubak ulon, "kamoe han kamoe tem deungoe peue-peue nyang droeneueh peugah ubak kamoe ateuh nan tuhan. mandum nyang ka kamoe meujanji, kamoe peubuet cit teuma. kamoe teutab kamoe peuseumah keureubeuen ubak ratu syeuruga, dan teuro ie anggo sibagoe peuseumahan keu geuhnyan lagee nyang teupeubuet di banda-banda yehuda dan di rot-rot raya di yerusalem le indatu kamoe, le raja-raja dan peujabat-peujabat peumeurintah kamoe dan kamoe keudroe. bak watee nyan nibak kamoe na peunajoh nyang seb, kamoe makmu, dan hana kureueng meusapeue pi. teuma watee kamoe pioh kamoe peuseumah keureubeuen ubak ratu syeuruga, dan hana le kamoe ro ie anggo sibagoe peuseumahan keu gobnyan, nibak kamoe ka kureueng meubagoe jeuneh; ureueng-ureueng kamoe mate di mideuen prang atawa keunong deuk." oh ltheuh nyan le ureueng-ureueng inong nyan jipeugah, "bak lakoe kamoe ka jeuet kamoe peugot ruti nyang hijih lagee ratu syeuruga dan kamoe tot keureubeuen meunan cit kamoe peuseumah ie anggo keu dewa kamoe nyan." keu bandum ureueng agam dan ureueng inong nyang jijaweeb lagee nyan, ulon peugah meunoe, "peu kheueh gata sangka tuhan hana geuteupeue atawa ka geutuwoe keu keureubeuen-keureubeuen nyang jipeuseumah di banda-banda yehuda dan nibak rot-rot raya di yerusalem le indatu gata, le raja-raja dan peujabat-peujabat gata, meunan cit le rakyat nanggroe nyoe dan le gata keudroe? tuhan han ek geuteuen le geukalon gata tapeuseumah keureubeuen-keureubeuen ubak ilah-ilah nyang laen. buet gata nyan jeuhet dan hina. gata ka meudesya ubak tuhan dan hana taat ubak peue-peue nyang gobnyan peurintah. sabab nyan saat nyoe cit teuma nanggroe gata ka hanco sampoe ka hana jeuet teupeguna le, dan nan jihnyan jipeuguna sibagoe kutokan. ureueng nyang kalon nyan meuras a gli." laju ulon bri tee ubak bandum ureueng nyan, nyang phon that ubak ureueng inong nyang na disinan, bahwa tuhan yang mahakuasa geupeugah lagee nyoe keu ureueng-ureueng yehuda nyang duek di nanggroe meuse, "gata dan peurumoh-peurumoh gata ka jimeusumpah keu ratu syeuruga bahwa gata tatot keureubeuen dan tapeuseumah ie anggo keujih nyan. janji gata nyan ka gata peutrok. jadi, get kheueh! tapeubuet kheueh laju peue nyang gata peujanji nyan! teuma bak saat nyoe deungoe kheueh peue nyang ulon peugah ubak gata, he ureueng israel di nanggroe meuse; ulon, tuhan, meusumpah deumi nan ulon nyang agong bahwa gata hana lon bri idhin tapeuguna nan ulon keu gata ikat sapeue-peue janji. gata hana jeuet tapeugah, 'ulon meusumpah deumi po teu allah nyang udeb!' ulon me useuha mangat gata keunong bala dan hana bahgia, sampoe gata mate banmandum, bah kheueh dimideuen

prang meunan cit le sabab keunong bala peunyaket. teuma napadub droe sagai nyang seulamant dan jiwoe u yehuda nibak meuse. dan bandum ureueng yehuda nyang na di meuse jikalon peu kheueh buet awaknyan atawa haba ulon nyang jeuet keunyataan. ulon lon peutron bala atueh gata nibak teupat nyoe keu lon buketali keugata bahwa hukom nyang ulon reuncana keu gata, beutoi-beutoi teujadi. hofra raja nanggroe meuse lon seurah ubak musoh-musoh nyang keuneuk peumate jihnyan, saban lagee ulon seurah zedekia raja yehuda ubak nebukadnezar raja babel, musoh jihnyan nyang keuneuk peumate jihnyan." bak thon nyang keupeuet geumat keurajeuen le yoyakim bin yosia atueh yehuda, barukh jitleuh peue nyang ulon calitra ubak jihnyan. laju ulon peusampoe ubak jih haba tuhan, allah israel. tuhan meufeureuman, "barukh, gata tunu ate lagee nyoe, 'ah, sial that ulon nyoe! susah gata jai that-that, dan tuhan geutamah lon deungan peindeuritan. ulon ka hek apoh apah, hana keuteunangan meubacut pih!' he barukh! ulon, tuhan, teungoh geureuloh nyang ka geupeuget, dan teungoh lon bot nyang ka lon pula. bansigom donya ulon peubuet lagee nyan. pakon gata tateupeu istimewa? bek meunan, barukh! banmandum umat manusia lon hukom deungan bala, teuma keuhai gata, sihana-hana jih gata seulamant. homantong gatajak, gata teutab udeb. ulon, tuhan ka lon peugah haba." tuhan meufeureuman ubak ulon keuhai bansa-bansa, teupuphon deungan meuse. gobnyan geubri tee ubak ulon keuhai sipa-i nekho raja meuse, nyang jipeutaloe di karkemis bak bineh krueng efrat le nebukadnezar raja babel bak thon nyang keupeuet keurajeuen yoyakim, raja yehuda. nyoe kheueh nyang geupeugah le tuhan keuhai nyan, "peuwira-peuwira meuse laju jidumpek siaga ubak pasokan jih, 'asah laju kapak! sok laju bajee beusong dan kupiah baja! peusiab laju peurisasi dan tatamond laju lam baresan! gata, pasokan meuguda, peungui laju peulana! pasang laju atueh rhueng guda gata, dan jak laju maju ngaza u mideuen prang!' teuma, ulon, tuhan, lon kalon awaknyan jisurot ngon teumakot. sipa-i-sipa-i awaknyan habeh teupeutaloe, dan laju jiplueng sira ngon teumakot hana jingiang meubacut pih ulikot. nyang lisek hana hase jipeuplueng droe, dan nyang peukasa hana tinggai nibak musoh. awaknyan meu antok dan reubah di utara, dan bak bineh krueng efrat nyan keudroe. soe kheueh ureueng nyan nyang ji ek lagee krueng nil, lagee krueng nyang ji ek ie beuna sampoe bak bineh? nyan kheueh nanggroe meuse. jipeugah le gobnyan, 'ulon lon beudoh dan lon kuasa bumoe. ulon peubinas banda-banda meunan cit ngon peunduduek disinan. kah plueng kheueh, he guda! meugrak kheueh, he geuritan! maju kheueh, he pahlawan nyang ba peurisasi di sudan dan libia. meunan cit deungan gata, he nyang akhli-akhli timbak aneuk panah nibak nanggroe lidia.' " teuma, ulon, yeremia lon peugah, nyoe kheueh uroe tuhan allah nyang mahamanyang dan mahakuasa; bak uroe nyan gobnyan geutueng bila atueh banmandum musoh-musoh gobnyan. peudeueng gobnyan geucang awaknyan sampoe oh troe, dan geujieb darah awaknyan sampoe an puih. nibak uroenyoe tuhan

nyang mahakuasa, geusie keureubeuen-keureubeuen gobnyan di utara, nibak bineh krueng efrat nyan. he peunduduek meuse, tajak kheueh u gilead keu tajak mita ubat! teuma, bahpi lagee nyan hana ubat nyang hase jipeupuleh gata. keuadaan gata nyang lumpah malee nyan ka jiteupeue le bansa-bansa. su dumpek gata teudeungoe bansigom donya. sidadu nyang sidroe meugantoh bak sidadu nyang laen; akhe jih bandum awaknyan reubah meujo-jo di atueh bumoe. watee nebukadnezar raja babel geujak prang nanggroe meuse, tuhan meufeureuman ubak ulon, kheun gobnyan, "he yeremia, peumaklum kheueh laju haba nyoe lom di banda-banda nanggroe meuse, na kheueh di memfis, migdol dan tahpanhes, 'meusiab kheueh keu teupeuteun droe sabab banmandum hareuta gata geupeu habeh lam prang raya! pakon apis, dewa gata nyang teuga nyan ka jipeu plaueng droe? sabab tuhan ka geupeutaloe awaknyan!' jai that sipa-i gata meugantoh dan reubah. awaknyan jimariet sabe keudroe-droe, 'jak geutanyoe tawoe ubak bansa droe mangat geutanyoe teuhinda nibak peudeueng musoh.' tagala nan baro keu raja meuse: 'si tukang peuriuh nyang jipeuliwat keuseumpatan.' ulon allah nyang udeb, ulon raja, tuhan nyang mahakuasa. lagee gunong tabor nyang leubeuh manyang lamkawan gunung-gunung nyang laen, dan gunung karmel nyang meucugok atueh ie laot, lagee nyan kheueh teunaga gobnyan nyang teuka geujak prang gata. meusiab-siab kheueh, he peunduduek meuse, keu geuteun dan geuba! memfis jeuet keu runga-runga – teupat nyang seungue sabab hana ureueng duek. nanggroe meuse lagee aneuek leumo nyang teumbon, teuma jipeukaru le lalat raya di utara. meunan cit sipa-i-sipa-i nyang jisiwa hana meudaya lagee aneuek leumo nyang teumbon that. awaknyan hana hase meuteun. bandum jigisa dan jiplueng jeuet seulamant. uroe hukuman keu awaknyan ka trok teuka; ka watee jih awaknyan keunong bala. sipa-i meuse laju jiplueng peusiblah droe deungan babah meuhah-meuhah lagee su uleue, sabab sipa-i musoh ka meutamah tho. awaknyan jijeuntam sipa-i meuse deungan pato lagee ureueng keuneuk teubang kayee dan teuah uteun nyang seumak nyang hana hase teutamond rot nyan. sipa-i musoh han ek teuitong jai jih, leubeuh le nibak daruet. ulon, tuhan, lon peugah. peunduduek meuse jipeumalee, sabab jipeutaloe le bansa siblah utara. ulon, tuhan, ka lon peugah haba." tuhan nyang mahakuasa, po teu allah israel, meufeureuman, "ulon lon hukom amon, dewa nibak tebe, meusioge deungan banmandum meuse deungan dewa-dewa dan raja-raja jih nyan. raja meuse dan bandum ureueng nyang jipeumeugah atueh gobnyan lon seurah ubak nebukadnezar raja babel deungan sipa-i jihnyan nyang keuneuk poh mate jihnyan. teuma oh lheureh nyan, meuse na ureueng duek lagee ban nyang ka. ulon, tuhan, ka lon peugah haba." "umat israel, bek kheueh teumakot! hamba lon, nabi yakub, bek kheueh yo! gata dan keuturonan gata lon peuseulamant di nanggroe jioh, di teupat gata jiteun. gata teuma tawoe dan tinggai di nanggroe gata deungan aman. gata udeb deungan teuntram; hana nyang peureulee gata takot. le sababnyan, bek

kheueh teumakot, he umat lon, ulon teuka lon jak peuseulamat gata. bansa-bansa, teupat gata ulon peu crebre, bandum lon peubinasa, teuma gata hana lon peubuet nyang lagee nyan. beutoi gata hana teupeusie nibak hukoman teuma hukoman ulon ateuh gata na kheueh ade nyang paih lagee reun-cana. ulon, tuhan, ka lon peugah haba."sigohlom raja meuse jiseurang gaza, tuhan meufeureuman ubak ulon keuhai nanggroe filistin. tuhan geupeugah, "kalon kheueh, ie ji ile di utara dan meulimpah lagee ie krueing nyang teungoh raya jilanda nanggroe meunan cit ngon asoe jih, banda-banda meusigoe ngon peunduduek jih. ureueng jikliek jilakee tulong dan bandum rakyat jimo ba-e. awaknyan jideungoe su deurab langkah gudo, su geuritan jak nyang krak kruk, dan keureutak keureutok su ruda jih. ureueng tuha jeuet keuleumoh dan hana le jipike keu aneuek droe. ka trok watee jih bansa filistin teupeubinasa bandum, sampoe sirus dan sidon hana meuteume le bantuan. ulon, tuhan, lon peubinasa bandum ureueng filistin nyang mantong tinggai nibak kreta. ureueng gaza rhot ubak seudeh nyang rayeuk; peunduduek askelon seungab meubisu. sampoe an pajan ureueng filistin nyang mantong tinggai hana putoh meuduka? gata tadumpek, 'sampoe an pajan gata meunyeurang, he peudeueng tuhan? tamong kheueh lom lam sarong gata dan tinggai kheueh disinan deungon teunang!' teuma peu kheueh jih nyan meuteume teunang, meunyeo ulon ka lon peurintah jih nyan keujjak prang askelon dan peunduduek bineh pante?' nyoe kheueh feureuman tuhan nyang mahakuasa, po teu allah israel keuhai moab, "ceulaka kheueh peunduduek nebo, banda jih ka reuloh! kiryataim ka jireubot, dan kuta jih nyang khong ka jipeuhanco, le sababnyan peunduduek inan ka jeuet keu malee; leunyab kheueh keubanggaan moab. musoh ka jireubot hesybon dan disinan awaknyan ka jireuncana keuneuk jipeuleunyab banmandum bansa moab. su-su nyang riyoh di banda madmen teupeupioh, sabab banda nyan keuneuk jiprang le sipa-i. deungoe kheueh! peunduduek horonaim jimeudumpek, 'keubinasaan! keuhancoran!' moab ka museunah! su jikliek aneuek-aneuek banyak awaknyan teudeungoe sampoe u zoar. deungoe kheueh su ureueng mo nibak jalan teu ek u luhit, dan su ureueng meuba-e nibak jalan teutrun u horonaim. kheun awaknyan, 'bagai! peuseulamat laju nyawong gata! pluang laju lagee keuleudee kleut di padang pasi!' moab! gata peusombong droe deungon keu tangkasan dan keukayaan gata. teuma jinoenyeo gata keudroe jipeutaloe. kamos, dewa gata, meusigoe ngon teungku imeum dan bubena peujabat ji angkat u teupat nyang teuboih. banmandum banda hanco, hana meusaboh pi nyang na tinggai. panton dan tanoh data nyang miyueb banmandum museunah. ulon, tuhan, ka lon peugah haba. peudong kheueh batee nisan keu moab, sabab hana treb le nanggroe nyang geupeuhanco sapan sapa. banda-banda nyang na disinan reuloh dan hana meusidroo pi nyang na tinggai disinan. teukutok kheueh ureueng nyang hana jipeubuet tugaih nyang geuyue le tuhan deungon biet-biet. teukutok kheueh nyang hana jisuet peudeueng jikak cang musoh sampoe mate. tuhan

meufeureuman, "phon yoh ilee moab udeb jih aman. hantom lom jihnyan teuba u teupat nyang teuboih. jihnyan lagee ie anggo nyang teupeubiyeu jidu dan hantom teuleng lam teupat anggo nyang laen. anggo jihnyan mantong mangat bee dan mangat. teuma, trok watee jih ulon yue mangat moab teu leng lagee ie anggo, dan teupat-teupat ie anggo nyan teupeusoh dan teupeu beukah. moab teuma keucewa ubak kamos, dewa awaknyan, saban lagee ureueng israel keucewa ubak betel nyang awaknyan peubangga nyan. pakriban ureueng agam moab jijeuet peugah, 'kamoe pahlawan, tantra peukasa nyang ka lheueh teu-ujo lam mideuen prang?' moab dan banda-banda gobnyan ka teupeuhanco, dan awak-awak muda awaknyan nyang jroh-jroh ka jipoh mate. ulon ka lon peugah haba. ulon raja, tuhan nyang mahakuasa. mala peutaka keu moab ka trok bak babah pintoe, hana treb le gobnyan hanco. he gata nanggroe-nanggroe teutanggaa moab nyang tateupeue keuhai meusyehu gobnyan, meukabong kheueh keu gobnyan! tapeugah laju, 'moab hana le meukuasa, keubeusaran dan teunaga gobnyan ka leunyab!' he peunduduek dibon, tatron kheueh nibak teupat gata nyang teuhoreumat; taduek kheueh bak tanoh dan ateuh abee. sabab nyang peurusak moab nanggroe gata ka trok jiteuka, dan geupeuhanco banmandum kuta gata. gata nyang tinggai di aroer, dong kheueh bak bineh rot dan kalon kheueh! tanyong kheueh ubak awaknyan nyang jipeu pluang droe, dan kalheueh, 'peu kheueh nyang ka teujadi?' awaknyan jijaweeb, 'moab ka rhot dan ka jeuet keuhina, kareuna nyan peumo ba-e kheueh geuhnyan. peumaklum laju ban sipanyang krueng arnon bahwa moab ka hanco'. " "hukoman ka geupeu rhot u ateuh banda-banda di daerah dataran manyang: ateuh holon, yahas, mefaat, dibon, nebo, bet-diblataim, kiryataim, bet-gamul, bet-meon, keriot dan bozra. bandum banda moab, jioh dan rab, ka geuhukom. teunaga moab ka geuwiet, dan keukuasaan jihnyan ka geupeuhanco. ulon, tuhan, ka lon peugah haba." tuhan meufeureuman, "jakpeumabok kheueh moab nyan, sabab jihnyan jipeusombong droe keu ulon. jihnyan meuguleng-guleng dalam muntah jih, dan jipeukeum le ureueng rame. bukan kheueh yoh masa ilee israel ka jipeukeum le si moab dan jipeugah keudeh keunoe siulah-ulah awaknyan ka teudrob basah meusigoe ngon pancuri-pancuri? gata peunduduek moab, tatinggai kheueh laju banda-banda gata dan tajak duek kheueh bak buket-buket batee lagee cicem mirah pati jipeugot uempueng bak bineh-bineh reuleueng. gata sombong that! ulon lon deungoe padub na sombong, manyang ate, cungkak, dan leuha that gata! ulon, tuhan, lon teupeue keu angkohan gata. tutoe gata kosong beulaka, dan buet gata hana areuti. sabab nyan ulon lon mo ngon su meutaga keu gata banmandum dan keu ureueng-ureueng nyang na di kir-heres, ma banda gata. ulon leubeh ulon peumo bak peunduduek sibma nibak peunduduek yaezer. banda sibma lagee seunaman anggo nyang pucok-pucok jih jimeu eue sampoe u meurandeh laot mate seujioh yaezer. teuma bak saat nyoe boh-boh musem khueng dan boh anggo jih ka geupeumusunah

bube nyang na. su seumurak nyang meuhubo sabab geumbira ka hana le teudeungoe di nanggroe moab nyang subo. ulon peujeuet ie anggo jipioh ji ile di teumpat ureueng prah anggo; hana le ureueng nyang peugot anggo dan meusurak geumbira. ureueng di hesybon dan eleale jimo meu ue-ue sampoe su mo jihnyan teudeungoe trok u yahas, dan teudeungoe cit teuma le ureueng-ureueng di zoar trok bak horonaim dan eglat-selisia. awaknyan jimo sabab ie bak aneuk krueng nimrim pi ka habeh tho. ulon lon peujeuet ureueng moab jipioh ji tot keureubeuen nibak teumpat-teumpat awaknyan seumeumah dan lon peupioh awaknyan jipeuseumah keureubeuen ubak dewa-dewa awaknyan. ulon, tuhan, ka lon peugah haba. bandum keukayaan kir-heres dan bansaboh moab ka leunyab. ulon seudeh that watee lon kalon keuadaan awaknyan; ulon lagee ureueng yueh suleng deungon lagu nyang duka. awaknyan banmandum ka jicuko ok bak ulee meunan cit deungon janggot jicuko teuma, jisie jaroe, dan jingui ija krong tanda seudeh. di ateuhe banmandum pagu rumoh dan tanoh lapang nyang na teudeungoe su ureueng mo ba-e. sabab moab ka ulon peubeukah lagee guci nyang hana teupeuguna le. moab ka teupeuhanco meukeupeng-keupeng! padubna malee jih moab! jihnyan jimo sabab ka teupeuhina dan ka jeuet keu peuneukem le bansa-bansa laen nyang na bansiseunlingka jih. ulon, tuhan ka lon peugah haba." tuhan meufeureuman, "lagee cicem kleung seumama sayeb meukeumang, lagee nyan kheueh na saboh bansa teuka jajak sama moab. banda-banda dan kuta jihnyan jireupah dan sipa-i jih jiteuka teumakot lagee ureueng inong keuneuk peulahe aneuek. moab hanco dan hana le lagee hi saboh bansa, sabab awaknyan jipeusombong droe ateuhe ulon. awaknyan jipeuhadab keu deungon teror, uruek dan taron. ureueng nyang peuplueng droe nibak ke-unong timbak rhot u dalam uruek, dan nyang teubiet lam uruek nyan keunong drob lam taron. bandum nyan teujadi bak saat nyang ka ulon peuteuntee keu teupeuhanco moab. kawom peungungsi nyang hana meudaya jajak mita peulindongan u hesybon, teuma banda nyan teungoh tutong dan meuligoe raja sihon pih teungoh jilabieb le apui. apui ka habeh jipajoh nibak bataih dan gunong-gunong moab, nanggroe ureueng-ureueng nyang galak bak muprang. ceulaka kheueh moab! peunduek jihnyan nyang jiseumah dewa kamos ka jipeubinasa, dan aneuek-aneuek awaknyan jiangkot sibagoe tawanan. teuma oh dudoe ulon keupeulah keuadaan nanggroe moab. ulon, tuhan, ka lon peugah haba!" nyan kheueh nyang geupeubuet le tuhan ateuhe moab. nyoe kheueh feureuman tuhan keuhai amon, "pakon tanoh suke gad jireupah jideuk le ureueng-ureueng nyang seumah dewa milkom? peu kheueh ka hana le ureueng israel nyang bila daerah nyan? teuma teuka saat jih ulon peujeuet peunduek raba, ma banda nanggroe amon nyan, jideungoe su-su dumpek lam mideuen prang. banda nyan jeuet keu runga-rungka dan gampong-gampong nyang na bak-bak bineh nyan tutong sampoe habeh. dan le israel laju jicok tanoh gobnyan nyang ka jireupah yoh masa dilee le awaknyan. hei ureueng hesybon,

gata mo kheueh sabab banda ai ka habeh hanco! hei ureueng-ureueng inong banda raba, moba-e kheueh! gata ngui kheueh ija krong sibagoe tanda gata seudeh. gata plueng kheueh keudeh keunoe lagee ureueng nyang ka peunoh deungon bingong. milkom dewa gata nyan teuangkot ubak teumpat nyang teuboih meusigoe ngon imeum-imeum dan peujabat peumeurintah jih nyan! hei gata nyang hana seutia! pakon gata peubangga droe deungon leumbah-leumbah gata nyang subo? peue sabab jih gata peubangga ngon hareuta keukayaan gata? pakriban mungken gata peugah bahwa hana meusidroe pi nyang jijeuet jak prang gata? ateuhe gata lon peutron nyang keujam-keujam nyang teuka tieb-tieb sagoe, gata taplueng, maseng-maseng gata useuha peuseulamat droe keudroe, dan hana le nyang peusapat gata. teuma oh watee laen, keuadaan amon lon peupuleh teuma. ulon, tuhan, ka lon peugah haba." nyoe kheueh nyang geufeureuman le tuhan nyang mahakuasa keuhai edom, "peu kheueh ureueng edom nyan hana jeuet jiseumike nyang bijaksana? peu kheueh ureueng-ureueng nyang bri naseuhat awaknyan hana jibri le naseuhat ubak awaknyan? peu kheueh ka hana habeh teusampoh banmandum keubijaksanaan awaknyan! hei peunduek dedan, gisa dan plueng kheueh laju! jak musom laju. ulon lon peuhanco keuturonan esau, sabab ka trok bak watee awaknyan ulon hukom. meunyoe ureueng jajak pot boh anggo, sabe na nyang jitinggai, dan meunyoe ureueng ceumucue jiteuka bak watee malam, jihnyan jicok peue nyang jigalak. teuma, ulon lon sampoh gleh banmandum nyang na nibak keuturonan esau dan ulon peugah rahsia teumpat awaknyan musom; awaknyan ka hana jeuet le jipusom droe. ureueng edom meusajan ngon mandum syedara dan wareh lingka jih, banmandum nyan ka teupeubinasa, hana meusidroe pi nyang na tinggai. hei edom! tinggai kheueh mandum aneuek yatem gata ubak ulon, ulon kupeulara awaknyan. bah kheueh mandum inong balee gata jipeucaya keu ulon. ureueng nyang sibeuna jih hana patot teuhukom pih, nyan pih keunong hukom, deungon na lagee nyan peu kheueh hana patot gata teuhukom? pasti gata teuhukom! ulon meusumpah deumi nan ulon keudroe bahwa banda bozra jeuet keuteumpat nyang lumpah teumakot dan hana le ureueng duek dan jitinggai le gob. teumpat nyan jipeukem le gob laju jiboh nan teumpat nyan deungon nan jih sibagoe nan teutukot. banmandum gampong nyang na sikeulileng nyan jeuet keu runga-rungka siumu masa. ulon, tuhan ka lon peugah haba." ulon, yermia lon peugah, "hei edom, ulon ka lon teurimong saboh haba nibak tuhan. gobnyan ka geukirem utosan ubak bansa-bansa keu geuyue ubak awaknyan mangat jipeusapat sidadu jeuet siab-siab keuneuk jak prang gata. tuhan geupeujeuet gata leumoh dan hina le gob. gata keunong peungeut le sombong gata. hana nyang teumakot keu gata lagee nyang gata sangka. gata tinggai lam luengkiek-luengkiek batee, jioh bak pucak gunong. teuma bah kheueh nyan gata peugot rumoh bak pucak nyang paleng manyang, saban manyang lagee eumpueng cicem siwah. tuhan geupeutron gata nibak teumpat nyan. tuhan

kheueh nyang peugah banmandum nyan." tuhan meufeureuman, "bala peutaka nyang rhot ateuh edom luwa biasa teumakot jih sampoe soe mantong ureueng nyang jak rot nyan teukeujot dan teumakot. lagee sodom dan gomora geupeumusnah meusajan ngon gampang-gampang nyang na sikeulileng nyan, meunan cit deungon edom. hana meusidroe manusia pih nyang na tinggai disinan. ulon, tuhan, ka lon peugah haba. lagee singa jiteubiet lam gle raya bak bineh krueng yordan dan jijak laju ubak padang naleueng tempat bubiri teungoh meurot, meunan kheueh ulon teuka dan lon peujeuet ureueng edom jiplueng nibak nanggroe awaknyan keudroe ngon hana teusangka-sangka. laju di ulon lon pileh sidroe peumimpin keu jimat keurajeuen ateuh bansa nyan. soe kheueh nyang jeuet teupeusaban ngon ulon? soe kheueh nyang jijeuet mupekara ngon ulon? peu kheueh na peumimpin nyang hase jilawan ulon? sabab nyan, deungoe kheueh peue nyang ka ulon reuncana teuhadab ureueng edom, dan peue nyang keuneuk ulon peubuet teuhadab peunduduek banda teman. aneuek-aneuek awaknyan pi jitarek jiba, dan banmandum ureueng teuka teumakot. meunyoe edom ka rhot, teudeungoe su kiroh nyang lumpah gli dan teumakot sampoe banskong donya teurasa meuguncang; su-su ureueng klik ngon ureueng teumawok nibak peunduduek nyang na disinan teudeungoe sampoe u laot gelagah. lagee cicem siwah nyang jiseumama ngon sayeub jih nyang keumang meukeupak-keupak, meunan kheueh musoh teuka dan laju jisama bozra. bak uroe nyan sidadu edom teuka teumakot lagee ureueng inong keuneuk peulahe aneuek." nyoe kheueh feureuman tuhan keuhai damsyik, "peunduduek banda hamat dan arpad khawate ngon apoh apah sabab jideungoe haba brok nyan. ate awaknyan susah that meutampo-tampo lagee gulumbang di laot raya. peunduduek damsyik ka jeuet keuleumoh, dan laju jiplueng sabab teumakot. awaknyan lumpah saket dan meudeurita lagee ureueng inong keuneuk peulahe aneuek. banda nyang meusyeyu dan sabe lam geumbira nyan saat nyoe ka jeuet keuseungue hana ureueng duek. bak uroe nyan bubena peumuda awaknyan teuma mate bak rot-rot ueh raya lam banda awaknyan, dan banmandum sidadu awaknyan jipeuhanco. beuton-beuton damsyik ulon tot, dan meuligoe-meuligoe raja benhadad ulon sampoh. ulon, tuhan nyang mahakuasa, ka lon peugah haba." nyoe kheueh feureuman tuhan keuhai sukee kedar dan daerah-daerah keukuasaan hazor, nyang ka jireubot le raja nebukadnezar raja nanggroe babel, "hei nebukadnezar, jak prang laju sukee kedar dan gata peubinasu mandum ureueng-ureueng nyang na siblahi utimu! gata reupah mandum beulatang peulara awaknyan lagee bubiri, unta dan khimah-khimah awaknyan deungon bandum asoe jih nyang na lam khimah nyan, dan dumpuk kheueh ateuh awaknyan, 'yo jiteuka ateuh gata di jeub-jeub sagoel' hei gata ureueng hazor! ulon, tuhan, meufeureuman: bubagaih kheueh tajak peu aseng droe, dan gata musom. nebukadnezar raja babel ka jireuncana keuneuk jijak prang gata. raja nyan jipeugah, 'jak maju! jak tajak prang ureueng-

ureueng nyang meurasa aman dan teuntram nyan. banda awaknyan hana teulindong sabab hana pintoe geureubang dan hana teuma meupalang." tuhan meufeureuman ubak nebukadnezar, "reupah laju mandum unta dan banmandum beulatang peulara awaknyan! ureueng-ureueng nyang ok jigunteng paneuk nyan lon peutabu beba saboh saho. ulon teuma lon peutron bala peutaka ateuh awaknyan nibak jeueb-jeueb sagoel. hazor teulanta siumu masa dan jeuet keuteumpang simusom ase uteun. hana meusidroe pih nyang na tinggai bak teupat nyan. ulon, tuhan, ka lon peugah haba." hana treb oh ka lheueh zedekia jeuet keu raja di nanggroe yehuda, tuhan nyang mahakuasa meufeureuman ubak ulon keuhai nanggroe elam. tuhan meufeureuman, "ulon lon peumate banmandum ureueng-ureueng nyang carong timbak aneuk panah nyang peujeuet elam teuga lumpah na. ulon lon yueb angen ubak elam nibak tieb-tieb jurusan, dan ulon peutabu beba peunduduek jih nyan ho-ho mantong sampoe hana meusaboh nanggroe pih nyang hana jiteuka le ureueng-ureueng meungungse di nanggroe elam nyan. ulon lon peujeuet ureueng elam jitakot ubak musoh nyang keuneuk poh mate awaknyan. ulon that-that beungeh ubak awaknyan dan lon peuhanco awaknyan. teuma lon kirem sidadu nyang peutaloel awaknyan dan awaknyan sampoe habeh hana tinggai. raja-raja dan peujabat-peujabat awaknyan lon peuhanco sapan sapa, dan bak nanggroe awaknyan lon peudong takhta lon. teuma oh dudoe, keuadaan elam lon peupuleh teuma. ulon, tuhan, ka lon peugah haba." nyoe kheueh peusan tuhan ubak ulon keuhai banda babel dan peunduduek disinan, "pasang kheueh tanda dan peumaklum kheueh ubak bansa-bansa bahwa babel ka rhot! bek tasom-som hai nyan! merodak dewa awaknyan ka teupeuhanco, dan patong-patong nyang cabul ka beukah meusipeuk han meuh saho, meunan cit deungon beurala-beurala awaknyan lumpah teuhina. na saboh bansa di utara teuka jijak prang babel dan geupeu got nanggroe nyan jeuet keupadang pasi. manusia dan beulatang jiplueng, dan hana le nyang jitem tinggai di teupat nyan." tuhan meufeureuman, "bak watee nyan ureueng israel dan yehuda teuka meusajan-sajan sira jimo, jimita ulon, allah awaknyan. awaknyan jitanjong rot jak u sion, dan jijak kheueh laju u jurusan nyan. awaknyan jipeugot peujanjian nyang abadi deungon ulon, dan teutab jimumat nibak janji nyan. umat ulon ibarat bubiri nyang ka jipeusisat le ureueng-ureueng nyang rabe bubiri nyan di gunong-gunong. awaknyan jimeurawoh di gunong nyang saboh ubak gunong nyang laen dan hana jituhu le dipat rumoh jih keudroe. awaknyan jiprang dan jiseksa le bandum nyang meurumpok deungon awaknyan. musoh-musoh umat lon jipeugah, 'peue nyang tanyoe peubuet, hana salah, sabab ureueng-ureueng nyang ka meudesya ubak tuhan. indatu awaknyan peucaya ubak tuhan, jadi nyang seuharoh jih awaknyan pih teutab seutia ubak gobnyan.' he umat israel, taplueng kheueh nibak babel! gata kheueh phon-phon that haroh tajak, mangat nyang laen jeuet jiseut di likot. ulon lon krah seujeumeulah bansa nyang teuga-teuga di

utara mangat awaknyan jiprang babel. awaknyan teuma jiatoe barasan keu jimeuheungko jilawan babel dan jipeutaloe awaknyan. awaknyan na kheueh peumanah-peumanah ahli nyang panah awaknyan hantom na meusie. babel jireupah, dan di ureueng reubot nyan jicok peue-peue nyang na ban galak ate. ulon, tuhan, ka lon peugah haba." tuhan meufeureuman, "he ureueng babel, gata tareupah umat ulon. gata taglob-glob geumbira lagee guda nyang meuringkik, dan lagee leumo nyang teungoh rhot naleung. teuma gata jeuet keu bansa nyang paleng hana meumakna di lamkawan bansa-bansa. banda gata keudroe nyang raya nyan jihina dan jipeumalee. nanggroe gata jeuet keu padang guro nyan yang tho kreng. sabab ulon beungeh, babel jeuet keu puyeng-puyeng dan hana ureueng nyang tinggai disinan. bandum nyang jak rot nyan teukeujot dan gli. he gata ureueng-ureueng peumanah! atoe kheueh laju barasan gata mangat takeupong dan taprang babel. timbak kheueh bandum aneuk panah gata u arah babel, sabab jihnyan ka meudesya ubak ulon. seumurak kheueh ngon dumpek prang ban sikeulileng banda nyan! jinoenyoe babel ka meunyeurah. binteh-binteh beuton banda nyan ka teudobrak dan teureuloh. ulon teungoh lon tueng balaih ateuhe babel. sabab nyan peusaneut kheueh awaknyan lagee jipeubuet ateuhe ureueng-ureueng laen. bek tapeubiyeu ureueng jiseumula atawa jimupot di nanggroe nyan. banmandum ureueng aseng nyang na tinggai di nanggroe nyan jiwoe u nanggroe jih, sabab awaknyan teumakot ubak tantra nyang jijak prang." tuhan meufeureuman, "ureueng israel lagee kawan bubiri nyang jitiyeub dan jipeu crebre le singa. phon-phon that jiseurang le raja asyur, laju le nebukadnezar raja babel nyang jikreh trok bak tuleueng-tuleueng jih. sabab nyan, ulon, tuhan nyang mahakuasa, po teu allah israel, lon hukom raja nebukadnezar dan nanggroe jihnyan saban lagee lon hukom raja asyur. ulon lon peuriwang ureueng israel u nanggroe awaknyan keudroe. awaknyan teuma jipajoh nibak hase tanoh gunong karmel dan daerah basan. awaknyan teupetro nibak hase tanoh di daerah efraim dan gilead. bak masanyan israel dan yehuda gleh nibak meubagoe desya, sabab ulon lon peumaphon ureueng-ureueng nyang ka lon peuseulamat. ulon, tuhan, ka lon peugah haba." tuhan meufeureuman ubak saboh bansa di utara, "prang kheueh laju peunduduek merataim dan pekod. peumate dan peubinasna laju awaknyan. peubuet kheueh laju peurintah ulon. ulon, tuhan, ka lon peugah haba." su ureueng muprang get that subra lam nanggroe, dan teujadi kheueh keuhancoran nyang paleng raya. bansigom donya jipeh ngon palee le babel sampoe hanco, teuma bak saat nyoe palee nyan keudroe ka patah dua! banmandum bansa teukeujot peue nyang ka jideungoe keuhai nanggroe nyan. tuhan meufeureuman, "he babel, gata talawan ulon, sabab nyan gata meucarueh lam taron nyang ulon teun keu gata, teuma gata hana tateupeue keuhai nyan. gudang sinjata lon ka lheuueh lon peuhah, dan deungon beungeh laju lon peuteubiet bubena sinjata nyang na didalam nyan, sabab ulon tuhan nyang mahamanyang dan mahakuasa haroh

lon peubuet tugaih di babel. prang kheueh babel rot jeueb-jeueb arah, dan dobrak kheueh bubena gudang-gudang gandom awaknyan! tamon kheueh barang-barang teureupah nyan lagee gata tamon gandom! dan museunah kheueh laju nanggroe nyan! bek na nyang tinggai! poh kheueh banmandum sipa-i awaknyan! peumate kheueh awaknyan! ceulaka kheueh bansa babel! ka trok watee jih awaknyan teuhukom!" (ureueng nyang plueng u yerusalem di babel laju geualitra pakriban tuhan po teu allah geutanyoe geubalah buet ureueng babel ateuhe baet tuhan.) tuhan meufeureuman, "tayue kheueh bak ureueng mat aneuk panah jak jeuet jijak prang babel. krah kheueh laju tieb-tieb ureueng nyang carong meumanah. keupong kheueh banda nyan dan bek tapeubiyeu meusidroe pih jipeulheueh droe. balah kheueh bandum nyang jipeubuet dan peusaneut kheueh ateuhe jih nyan nyang sisuai deungon buet jih, sabab jihnyan ka meutindak kureueng aja keu ulon, nyang mahasuci, po teu allah israel. bak uroenyon peumuda-peumuda awaknyan mate meugageueng bak rot-rot ueh lam banda droe jih, dan bandum sipa-i awaknyan teupeuhanco. ulon, tuhan, ka lon peugah haba. he babel, gata keubit that manyang ate! sabab nyan ulon, tuhan nyang mahamanyang, po teu allah nyang mahakuasa, lon lawan gata. ka watee jih gata ulon hukom. bansa gata nyang manyang ate nyan meugantoh dan reubah. hana meusidroe pi nyang tulong gata keu tabeudoh. banda-banda gata ulon tot, dan peue-peue mantong nyang na di sikeulileng nyan lon peuranab." tuhan nyang mahakuasa geupeugah, "israel dan ureueng yehuda teuteugon. bandum nyang teuen awaknyan jijaga rapat that dan han jitem peulheueh. teuma ulon nyang peuseulamat awaknyan teuga, nan ulon tuhan nyang mahakuasa. ulon keudroe kheueh nyang peujuang peukara awaknyan dan nyang ba dame u ateuhe bumoe. teuma ateuhe ureueng babel lon peuteuka harok hara dan teumakot nyang lumpah raya." tuhan meufeureuman, "binasa kheueh babel meusajan ngon rakyat dan peujabat peumeurintah meunan cit deungon kawom ceureudek carong awaknyan! binasa kheueh nabi-nabi babel! awaknyan meusulet dan bangai. binasa kheueh sipa-i babel nyang peurkasa! padubna teumakot jih awaknyan! hanco kheueh guda dan geuritan prang awaknyan! binasa kheueh sidadu-sidadu nyang jisiwa! padubna leumoh jih awaknyan! museunah kheueh keukayaan babel! jak geue laju bube na hareuta beunda awaknyan! peutho kheueh banmandum krueng dan blang awaknyan! sabab babel peunoh deungon beurala-beurala nyang lumpah teumakot, nyang peujeuet mandum nyang pujoe nyan sampoe pungoe. sabab nyan babel jeuet keu tempat jen-jen dan areuwah-areuwah jehuet meunan cit deungon cicem-cicem unta. keu siumu masa hana le ureueng nyang jitem tinggai disinan. lagee nyang ka ulon peuhanco sodom dan gomora meunan cit deungon gampong-gampong nyang na si keulileng nyan, meunan cit teuma ulon peuhanco babel. hana meusidroe pih na nyang tinggai disinan. ulon, tuhan, ka lon peugah haba. saboh bansa nyang teuga teungoh meugrak keunoe di nanggroe jioh di

utara. awaknyan jikak meusajan deungon raja nyang rame keu jikak muprang. awaknyan meusinjata panah dan kapak; awaknyan keujam hana rasa gasah sayang. lagee su ie laot meugrum-grum umbak meunan kheueh su langkah guda awaknyan nyang teungoh meugrak maju jikak prang babel. ban jideungoe haba nyan, raja bebel laju hana meudaya. jihnyan laju jiteugon le peurasaan teumakot, dan meudeurita lagee ureueng inong nyang keuneuk peulahe aneuk. lagee singa teuka lam tamah raya nibak bineh krueng yordan dan jikak laju ubak padang teumpat bubiri teungoh rot naleueng, meunan kheueh ulon, tuhan, teuka lon peujeuet ureueng babel jiplueng nibak banda awaknyan deungon hana teusangka-sangka. laju ulon pileh sidroe ureueng peumimpin nyang mat kuasa ateueh bansa nyan. soe kheueh nyang jeuet teupeusa deungon ulon? soe kheueh nyang jijeuet peugot peukara deungon ulon? peukeueh na peumimpin nyang hase jilawan ulon? sabab nyan, deungoe kheueh laju peue nyang ka ulon reuncana ateueh banda babel, dan peue nyang keuneuk ulon peubuet keu peunduduek disinan. aneuk-aneuk awaknyan pih jihila jiyue weeh, dan bandum ureueng teumakot luwa biasa. meunyoeh babel ka rhot, teudeungoe su nyang kiroh luwa biasa sampoe bansigom donya meuguncang; su-su ureueng kliek nibak peunduduek disinan jideungoe le bansa-bansa laen." tuhan meufeureuman, "ulon kukirem angen peureuloh nyang jiput u arah babel dan u arah peunduduek jihnyan. teuma lon kirem ureueng-ureueng aseng nyang peuhanco babel lagee angen jipupot kulet gandom. bak uroe malapeutaka nyan awaknyan jiprang nanggroh nyan roh meubagoe arah dan laju jisampoh sampoe gleh. bek kheueh tabri keuseumpatan ubak sipa-i jitimbak aneuk panah jihnyan atawa jipeubangga bak peukayan prang nyang geungui nyan. aneuk-aneuk muda awaknyan bek teupeubiyeu udeb. peuhanco bandum bubena sipa-i jihnyan! awaknyan luka parah dan mate teutiek-tiek bak rot-rot ueh raya lam banda awaknyan keudroe. ulon, tuhan, po teu allah nyang mahakuasa, allah kudus israel, hana lon tinggai israel dan yehuda, bahpi awaknyan ka meudesya ubak ulon. peuseulamat kheueh droe gata! taplueng kheueh laju nibak babel, bek sampoe gata roh teupeu mate le sabab desya awaknyan! sabab nyoe kheueh saat jih ulon balaih keujeuhetan babel, dan lon hukom jihnyan nyang sisuai deungon buet nyang jipeubuet. babel yoh masa bunoe lagee glah meuh nyang ulon mat dan nyang peujeuet bansigom donya mabok. bansa-bansa jijieb ie anggo lam glah nyan, sampoe awaknyan ka jeuet keupungoe. teuma ngon hana teusangka-sangka babel ka rhot dan beukah. peumo ba-e kheueh jih nyan, dan mita kheueh ubat keu luhok-luhok jih nyan! mungken jih nyan jitem puleh. ureueng aseng nyang na tinggai disinan jimariet sabe keudroe-droe, 'tanyoe ka ta useuha ta tulung babel, teuma teulat! leubeh get ta tinggai nanggroh nyoe dan tawoe u nanggroh geutanyoe maseng-maseng. tuhan ka geuhukom babel deungon kreueh that, dan geupeuhanco sapan sapa.' umat tuhan geupeugah, 'tuhan ka geutunyok bahwa geutanyoe na kheueh blah nyang beuna. jak kheueh tajak u yerusalem

dan ta calitra disideh peue nyang ka geupeubuet le tuhan po teu allah geutanyoe." tuhan ka geuhasut raja-raja media, sabab gobnyan keuneuk peuhanco babel. nyan kheueh cara jih gobnyan keuneuk geubalaih ureueng-ureueng nyang keuneuk reuloh rumoh gobnyan. le peuwira-peuwira pasokan ngaza geubri peurintah, "asah laju aneuk panah! dan peusiab laju peurisai! bri kheueh tanda keuteuprang binte-binte beuton babel. peukong kheueh peunjagaan. keubah laju peungawai. peusiab laju peunyeurgapan." tuhan ka geupeubuet peue nyang geureuncana keu ureueng babel. nanggroh nyan kaya lumpah na dan jai that krueng disinan, teuma masa udeb jih ka habeh; akhe udeb jih ka trok bak masa. tuhan nyang mahakuasa geumeusumpah deumi droe gobnyan keudroe bahwa gobnyan geukirem ureueng sadub le jih deungon daruet keu teuprang babel, dan awaknyan jiseumurak deungon surak keumeunangan. tuhan geucebta bumoe deungon kuasa gobnyan, geupeuet donya deungon hikeumat gobnyan, dan geubinteung langet deungon akai budho gobnyan. dan deungon geubri peurintah, dan ji ile kheueh ie nibak cakrawala. di ujong-ujong bumoe geupeuteuka awan, dan geupeuteubiet kilat meuble-ble cahya nibak lam ujeuen, dan geukirem angen di teumpat teukeubah. ban jinging nyang lagee nyan teuka kheueh sadar manusia, bahwa jihnyan ureueng bangai nyang hana peungeurtian. bube na ureueng teumpeun meuh ka gadoh muka, sabab patong beurala nyang jipeugot nyan peuleusu dan hana meunyawong. beurala-beurala nyan hana meuyuem, patot ji ejek dan jihina teuma. meunyoeh ka trok watee jih, awaknyan binasa. allah nabi yakub hana lagee beurala-beurala nyan; gobnyan nyang cebta peue-peue nyang na. nan gobnyan na kheueh tuhan nyang mahakuasa; gobnyan ka geupileh israel jeuet keu umat geuh. tuhan meufeureuman, "babel, gata lagee palee, sinjata ulon keu teujak lam prang. gata ulon peuguna keu teuhteumat bansa-bansa dan keurajeuen-keurajeuen nanggroh. gata lon peuguna keu peuhanco guda dan nyang pasang gata nyan, meunan cit deungon geuritan dan nyang jeuet keu supe geuritan nyan, gata lon peuguna keu tapeumate ureueng agam dan ureueng inong, meunan cit nyang tuha dan nyang muda, aneuk dara dan aneuk muda. gata lon peuguna keu tapoh mate ureueng meurabe dan beulatang nyang jirabe nyan, peutani dan leumo ngon meuh ue tanoh jih nyan, peunguasa dan peuwira-peuwira manyang." tuhan meufeureuman, "tangieng kheueh keudroe pakriban jinoenyoe ulon balaih ubak babel dan peunduduek jihnyan bandum keujeuhetan nyang awaknyan peubuet ateueh yerusalem. he babel, gata lagee gunong nyang teupeuhanco bansigom donya. teuma ulon, tuhan, lon lawan gata. gata lon tarek dan lon guleng dan lon peubiyeu tutong jeuet keu abee. hana meuh sineuk batee pi nibak rungra-rungka reuloh gata nyan nyang teupeuguna keujeuet teupeudong lom teuma. gata jeuet lagee padang pasi keu siumu masa. ulon, tuhan, ka lon peugah haba." he raja di utara! tabri kheueh tanda keu teujak prang! tayeub laju beureuguih mangat bubena bansa jideungoe! krah laju bubena bansa

mangat jijak prang babel! tayue kheueh keurajeuen ararat, mini dan askenas jijak prang. baiat kheueh sidroe panglima keu jipimpin sureubu nyan. krah kheueh laju guda nyang sadub le jih deungon kawan daruet. peusiab laju bubena bansa mangat jimaju u mideuan prang jak lawan babel. tawok laju raja-raja media meusajan deungon peunguasa-peunguasa dan peumuka-peumuka awaknyan meunan cit deungon tantra nibak bandum nanggroe nyang awaknyan kuasa. bumoe meuyok-yok dan meuguncang sabab ulon teungoh lon reucana keuneuk peujeuet babel keu padang nyang tandus nyang hana jikeumiet le manusia. sipa-i babel ka jipioh bak jimuprang dan tinggai bak kuta-kuta. awaknyan ka gadoh beuhe jiteuka gusuen nyang hana meudaya. bubena babah pintoe geureubang banda ka jipeujo, dan bubena rumoh ka habeh jitot. bubena utosan laju jiplueng meu ikot-ikot keu geujak peugah ubak raja babel bahwa banda gobnyan ka jiprang rot jeueb-jeueb arah. teupat jeumeurang ka jiduek le musoh, dan kuta-kuta peutahanan ka habeh jitot. sipa-i babel ka habeh bingung. hana treb le awaknyan ka teupeutaloe dan ji gilo-gilo le musoh lahee ji broh-broh ateuh gandom bak teupat ceumeulo. ulon, tuhan, nyang mahakuasa, po teu allah israel, ka lon peugah babel. yerusalem jipeuhanco dan jipajoh habeh le raja babel; gobnyan jipeusoh banda nyan lahee jipeusoh kaca hana meuasoe. lahee saboh beulatang raksasa, jihnyan jiuet yerusalem dan jipasoe lam pruet jih deungon peue mantong nyang jroh nibak banda nyan, laju seueh jih jiboih jioh. he peunduduek sion, peugah kheueh laju, "seumoga babel keunong keukeujaman lahee nyang ka jipeubuet ateuh geutanyoe!" peunduduek yerusalem, peugah kheueh laju, "seumoga babel jitimpa le peundeuritaan lahee nyang ka keunong ateuh geutanyoe!" sabab nyan tuhan geupeugah ubak peunduduek yerusalem, "ulon kupeujuang peukara gata dan lon balaih buet-buet nyang ka jipeubuet le musoh gata ateuh gata. bubena mata-mata ie dan krueng-krueng di babel lon peuto. nanggroe nyan jeuet keuteupat sinamon runka, teupat jimusmet aseue uteuen. manusia meurasua gli watee ji kalon hai nyang lahee nyan, dan hana meusidroe pi nyang jitem tinggai nibak nanggroe nyan. ureueng babel jiteuma uem lahee su singa, dan jikeumarom lahee aneuek singa. nafeusu makheun awaknyan meutamah teuga, ulon ku peusiab peunajoh keu awaknyan, dan lon peujeuet awaknyan mabok dan mumang sampoe teueh hana jibeudoh-beudoh le. awaknyan ulon ba keu teusie lahee aneuek bubiri, kameng dan bubiri agam. ulon, tuhan, ka lon peugah haba." tuhan meufeureuman, "babel nyang jipujoe bansigom donya ka teureubot dan ka jiduek! keubiet that gli nanggroe nyan nibak bansa-bansa laen. ie laot meulimbak ji-ek u babel; geulumbang raya meu deungong-deungong jiheuntam nanggroe nyan. banda-banda nyang na di nanggroe nyan ka jeuet keu teupat nyang leumpang gli ngon teumakot, lahee padang pasi nyang tho kreng han na sapeue. hana ureueng nyang jitem tinggai atawa jijak rot nyan. bel, dewa nanggroe babel, lon hukom. toman lon peujeuet jihnyan jijok pulang peue nyang ka

jicok. bubena bansa hana jiseumah le ubak jih nyan. binteh-binteh beuton babel ka habeh reuloh. sabab nyan plueg kheueh di sinan, he umat israel! peuseulamat kheueh droe gata nibak beungeh ulon nyang teungoh ju. bek kheueh teumakot atawa gundah sabab nariet meusah-sah nyang gata deungoe. tieb-tieb thon meutabu nariet nyang meubagoe rupa – haba keuhai keukeujaman di dalam nanggroe dan keuhai raja-raja nyang jimuprang sidroe deungon nyang laen. peucaya kheueh, saat jih teuma teuka dan lon hukom beurala-beurala babel. bansaboh nanggroe nyan jihina, dan bandum peunduduek disinan teupoh mate. peue-peue mantong nyang na di langet dan di bumoe jiseumurak geumbira meunyoe babel rhot lam jaroe bansa di utara nyang teuka keu jijak peuhanco jih nyan. lumpah that jai ureueng bansigom donya ka mate teupoh sabab babel, teuma jinoenyoe babel rhot deumi ureueng israel nyang mate teupoh. ulon, tuhan, ka lon peugah haba." tuhan meufeureuman ubak ureueng israel di babel, "gata ka teuhinda nibak keunong poh mate! le sababnyan, tajak kheueh jinoenyoe! bek tapreh le! bahpi gata jioh nibak rumoh, inget kheueh ubak ulon, tuhan gata, dan keu yerusalem. gata geupeugah, 'kamoe jihina dan jipeumalee; kamoe ka gadoh muka sabab ureueng-ureueng aseng ka jiduek di tieb-tieb ruweung suci dalam baet tuhan.' nyoe, simak kheueh peue-peue nyang ulon peugah nyoe. teuma teuka saat jih ulon hukom beurala-beurala babel. bansaboh nanggroe nyan teudeungoe su ureueng meuah meueuh sabab luhok ngon luka nyang lumpah parah. bahpi babel hase ji ek u langet dan jipeugot kuta nyang hantrok teujak, ulon teutab lon kirem ureueng jijak peurasak atranyan. ulon, tuhan, ka lon peugah haba." tuhan meufeureuman, "deungoe kheueh! di babel manusia jigeumeuciek dan jimoe seudeh sabab keuhancoran nyang teujadi di nanggroe nyan. ulon teungoh lon peuhanco babel dan lon peupioh su-su nyang subra di teupat ureueng rame awaknyan. musoh teuka lahee geulumbang nyang meu ue-ue, dan sipa-i awaknyan laju jiseureubu deungon dumpek prang nyang meutaga. awaknyan teuka keu jijak reuloh babel, jidrob bubena sipa-i dan jiwiet laju sinjata sipa-i nyang teudrob nyan. ulon kheueh tuhan nyang hukom keujeuhetan, dan babel lon balaih nyang siauai deungon buet jih. ulon kupeumabok bubena peujabat peumeurintah babel – bubena ureueng patot-patot, peumimpin dan sipa-i. awaknyan hana jibeudoh-beudoh le, teueh siumu masa. ulon ka lon peugah haba, ulon kheueh raja, ulon tuhan nyang mahakuasa. binteh beuton babel nyang kukoh-kukoh lon peuhanco sampoe ka jeuet rata deungon tanoh. pintoe geureubang jihnyan nyang manyang-manyang lon tot babeh. sia-sia mantong jeureh payah bansa-bansa, sabab bandum hase nyang jiseuha habeh tutong jipajoh le apui. ulon, tuhan, nyang mahakuasa, ka lon peugah haba." peungawai pribadi raja zedekia na kheueh seraya bin neria cucoe mahseya. bak thon nyang keupeuet geumat keurajeuen le zedekia raja yehuda, seraya geuseutot zedekia u babel. teuma laju ulon bri keu gobnyan saboh tugaih. bandum bala nyang rhot ateuh babel dan hai-hai nyang

laen nyang meukeunaan deungon nanggroe nyan ka ulon tuleh dalam saboh kitab meugulong. laju ulon peugah ubak seraya, "oh ka ltheueh gata trok u babel, tauseuha kheueh mangat bandum nyang na teutuleh dalam kitab nyoe hase tabeuet keu ureueng-ureueng nyang na disinan. oh ltheueh nyan meudoa kheueh lagee nyoe, 'tuhan, droeneueh ka neupeugah bahwa banda nyoe neupeuhanco sampoe habeh bah kheueh nyan manusia meunan cit deungon beulatang ranab sapan sapa, dan teupnat nyoe jeuet keu padang pasi siumu masa.' oh ka ltheueh gata beuet asoe kitab nyoe ubak ureueng-ureueng nyan, taikat kheueh laju batee nibak kitab nyoe, dan geulawa kheueh laju u teungoh-teungoh krueang efrat, sira tapeugah, 'meunoe kheueh teuma teujadi deungon babel. nanggroe nyoe karam dan hana meuampong le sabab bala nyan geupeu rhot le tuhan ateueh nanggroe nyan.' " tutoe haba yeremia nyan sampoe oh nyoe. zedekia na umu dua ploh sa thon watee gobnyan jeuet keu raja yehuda. gobnyan geumat peurintah di yerusaleum siblaiah thon treh jih. ma gobnyan nan geuh hamutal binti yeremia asai banda libna. saban cit lagee raja yoyakim, raja zedekia meudesya cit ubak tuhan. tuhan beungeh that ubak peunduduek yerusaleum dan ureueng yehuda sampoe geu-use bandum awaknyan dan hana geulindong le awaknyan. zedekia beurontak keu nebukadnezar, raja babel, le sabab nyan nebukadnezar deungon banmandum angkatan prang jih jijak prang yerusaleum bak tanggai siploh buleuen siploh bak thon nyang keusikureueng keurajeuen zedekia. awaknyan jipeudong kuta di luwa banda, jipeudong beuton teupnat keupong musoh dan laju geukeupong banda nyan sampoe trok bak thon nyang keusiblaiah keurajeuen zedekia. bak tanggai sikureueng buleuen peuet bak thon nyan cit teuma, watee musem deuk ka meunan hebat sampoe rakyat hana le peunajoh bah meupacut pi, beuton banda laju jiheutam le musoh. malam nyan, bahpi ureueng babel teungoh jikeupong banda nyan, bandum tantra yehuda ka habeh jiplueng jituubak panton yordan. awaknyan jicok rot taman meuligoe, laju jiteubiet rot pintoe geureubang nyang meusambong deungon bandua beuton nyang na di teupnat nyan. teuma tantra babel laju jicok raja zedekia, dan jiteume droe gobnyan nibak darat yerikho. bandum aneuek buah gobnyan laju jiplueng jitinggai gobnyan. oh ltheueh nyan raja zedekia laju jiba ubak raja nebukadnezar di banda ribla di daerah hamat, dan laju jipeurhot hukuman mate. meunan cit nibak banda nyan teuma aneuek-gobnyan jipeutamong u dalam glab, dan hantom na geuteubiet disinan sampoe gobnyan meuninggai donya. bak tanggai siploh buleuen limong thon nyang keu sikureueng blaih keurajeuen raja nebukadnezar raja babel, teuka kheueh u yerusaleum sidroe ureueng nyang nan geuh nebzaradan. ureueng nyan na kheueh peunaseuhat dan peungawai pribadi nebukadnezar. nebzaradan laju jitot baet tuhan, meuligoe raja, dan bandum rumoh ureueng-ureueng meusyehdu di yerusaleum.

dan banmandum aneuek buah jihnyan jijak reuloh bubena beuton-beuton banda nyan. oh ltheueh nyan rakyat nyang mantong na tinggai di banda nyan, na kheueh ureueng peukeurja akhli nyang mantong na sidroe-droe teuk, ureueng-ureueng gasien, dan ureueng-ureueng nyang ka jiplueng u blah babel, bandum nyan ji angkot u babel le nebzaradan. teuma siladum rakyat nyang paleng gasien nyang hana sapeue na, jitinggai di yehuda, dan jiyue meubuet lampoh anggo dan nibak ladang-ladang. tameh-tameh peurunggu dan geuritan-geuritan di baet tuhan meunan cit deungon beujana peurunggu laju jipeubeukah le ureueng babel, dan bandum peurunggu nyan jiangkot u nanggroe droe jih. meunan cit awaknyan jiangkot barang-barang nyoe: sudok-sudok, teupnat-teupnat abee miseubah, peukakaih-peukakaih panyot, cambong-cambong teupnat teun darah beulatang nyang teusie keu keureubeuen, cambong-cambong teupnat tot keumeunyan, dan bandum barang peurunggu nyang laen nyang teupeuguna keu upacara iejabat. barang-barang meuh dan pirak, meunan cit deungon cambong-cambong ubit dan teupnat ngeue apui, cambong-cambong teupnat darah beulatang nyang teusie keu keureubeuen, teupnat abee, gaki panyot, cambong-cambong keu teupnat keumeunyan, dan cambong-cambong teupnat leng ie anggo keu peuseumahan, bandum nyan jicok le nebzaradan keudroe. barang-barang peurunggu nyang jipeugot le raja nabi sulaiman keu baet tuhan, na kheueh bandua boh tameh, geuritan-geuritan, beujana dan bandua blaih boh leumo nyang meutumpang bak beujana nyan, bandum nyan brat-brat that, sampoe hana teutimang le. bandua boh tameh peurunggu nyan saban: maseng-maseng manyang jih 8 metee, lingka jih 5,3 metee, dan bak teungoh jihnyan kosong. teubai peurunggu nyan na 75 milimetee. di ateueh tieb-tieb tameh nyan na ulee tameh nyang manyang jih 2,2 metee. ban sikeulileng ulee-ulee tameh nyan na piasan boh geulima nyang teumanyum, bandum nyan teupeugot nibak peurunggu. boh geulima bak meunanyum di tieb-tieb ulee nyan na sireutoh boh, teuma nyang deuh di miyeub na kheueh sikureueng ploh nam boh. seulaen nibak nyan, nebzaradan jidrob teuma teungku imeum agong seraya, zefanya, wakie gobnyan, lhee droe nyang jaga babah pintoe baet tuhan, ban tujuh droe nyang bri naseuhat pribadi raja nyang mantong na dalam banda, panglima, wakie panglima nyang atoe administrasi sipa-i, dan nam ploh droe ureueng rayeuk nyang laen. banmandum ureueng nyan jiba ubak raja nebukadnezar di banda ribla, di wilayah hamat. di teupnat nyan awaknyan jiseksa dan laju jipoh mate. meunan kheueh ureueng-ureueng yehuda jiangkot nibak nanggroe awaknyan dan jiba u teupnat nyang teuboih; banmandum nyan na 4.600 droe. nebukadnezar jiangkot awaknyan lam ronde-ronde lagee teupeugah nyoe: 3.023 droe bak thon nyang keutujuh keurajeuen gobnyan, 832 droe di yerusaleum bak thon nyang keu lapan blaih keurajeuen gobnyan, dan 745 droe ji angkot le nebzaradan bak thon nyang keudua ploh lhee jimat keurajeuen le nebukadnezar. bak tanggai dua

ploh limong buleuen dua blaih bak thon nyang keu
lhee ploh tujuh oh ka lheueh yoyakhin teuangkot
u teupat nyang teuboih, ewil-merodakh jeuet
keu raja babel. bak thon nyan cit teuma gobnyan
jipeuleumah gaseh sayang jih ubak yoyakhin, dan
jipeulheueh gobnyan lam glab, meunan cit jipeu-
saneut gobnyan deungon get-get. yoyakhin jibri
keududukan nyang leubeh manyang nibak raja-raja
nyang laen nyang rhoh cit teuboih u babel. gobnyan
jibri idhin jigantoe peukayan nyang teusok lam
glab deungon peukayan biasa dan keu siumu masa
gobnyan jeuet geu makheun lam meuligoe, dan
tieb-tieb uroe jijok peng keu keupeuntengan udeb
gobnyan.

bak tanggai nyang keu limong buleuen nyang keu peuet bak thon nyang keu lhee ploh, bak thon nyang keulimong seumeunjak raja yoyakhin jiba u teupnat nyang teuboih, ulon, teungku imeum yehezkiel bin busi, na nibak bineh krueng kebar di babel meusajan deungon ureueng-ureueng nyang teuboih nibak ureueng yahudi laen. hana teusangka-sangka langet teuhah dan ulon meuteume lon kalon keuhai po teu allah. ulon deungoe tuhan meufeureuman ubak ulon dan laju lon rasa teuga that kuasa gobnyan. ulon tengah laju ulanget dan deuh ulon kalon angen badee teungoh jipot nibak utara. geulanteue jiseumama keudeuh keunoe nibak sinamon awan nyang paleng raya, dan langet nyang na nibak baneh nyan peungeuh meucahya. dalam kilat nyang meuble-ble nyan leumah sapeue-sapeue nyang meukilat lagee peurunggu. di teungoh-teungoh awan nyan, deuh lon kalon peuet boh kerub, na kheueh makhluk udeb nyang rab saban ngon manusia, teuma maseng-maseng na peuet boh rupa dan dua boh pasang sayeueb. gaki jih teupnat dan meukilat lagee peurunggu nyang teucane. jaroe gaki jih meugukee lagee gukee banteng. seulaen peuet boh rupa dan dua pasang sayeueb nyan, awaknyan na teuma jaroe manusia dimiyueb tieb-tieb sayeueb. sijudoe sayeueb nibak tieb-tieb makhluk nyan meukeumang dan phon di ujung trok bak ujung sayeueb nyan tupeh teuma deungon sayeueb makhluk nyang laen, sampoe ban peuet boh makhluk nyan ka teubina sagoe peuet. meunyo meugrak, maseng-maseng makhluk nyan meugrak teupat ukeue sira jibalek tuboh jih. tieb-tieb makhluk nyan rupa jih meulaen-laen; nyang rupa jih lagee ureueng na dikeue, rupa nyang lagee singa na blaih si uneuen, rupa lagee banteng blaih wie, dan waja raja wali si blaih u likot. sipasang sayeueb nibak tieb-tieb makhluk nyan teupeukeumang u ateueh sampoe tupeh ujung tieb-tieb sayeueb makhluk nyang laen nyang na disiblahi nyan, dan sipasang sayeueb teuk teulipat teutob tuboh jih. maseng-maseng makhluk nyan meuhadah ubak peuet boh jurosan sigoe guih, sampoe awaknyan jeuet jijak homantong nyang jigalak deungon tuboh hana teuputa. bak teungoh makhluknyan na sapeue-sapeue nyang leumah jih lagee ngeue apui atawa suwa apui nyang hu meugrak-grak hana pioh. apuinyan meu kleb-kleb dan jiteubiet meuek jeuet keu kilat geulanteue. makhluk-makhluk nyan keudroe meugrak-grak keudeh keunoe nyang bagaij jih lagee kilat. teungoh lon kalon bandum nyan, ulon ngieng teuma na peuet boh ruda di ateueh tanoh, saboh ruda nibak sampeng tieb-tieb makhluk nyan. ban peuet boh ruda nyan saban dan meukilat lagee batee peumata, dan maseng-maseng na saboh teuk ruda nyang laen nyang meulinteung di teungoh-teungoh nyan. deungon lagee nyan ruda-ruda nyan hase jituju bak peuet boh arah. keulileng-keulileng ruda nyan peunoh deungon mata. makhluk-makhluk nyan jijak homantong nyang jihawa, dan ruda-ruda nyan sabe jiseutot, sabab dikuasa le makhluk-makhluk nyan. pajan mantong makhluk-makhluk nyan meugrak jiek u ateueh atawa jipioh, ruda-ruda nyan sabe jiseutot meusajan awaknyan. di ateueh tieb-tieb

ulee makhluk nyan na teuma meubinteung sapeue-sapeue lagee kubah nyang teupeuget nibak kristal nyang hu meucahya. di miyueb kubah nyan tieb-tieb makhluknyan jireuntang teuma sipasang sayeueb jih u arah makhluk nyang na siblahi jih nyan, seudangkan sayeueb jih nyang sipasang teutob tuboh jih. meunyo makhluk nyan jipo, teudeungoe bak ulon su sayeueb jih nyang meukeupak-keupak; su jih lagee su ie rhot, lagee su deurab langkah pasokan sipa-i nyang raya, lagee su po teu allah nyang mahakuasa. meunyo makhluknyan jipioh bak jipo, laju jilipat sayeueb jih, teuma di ateueh kubah nyang di ateueh ulee awaknyan, mantong teudeungoe su makhluk nyan. di ateueh kubah nyan na sapeue-sapeue nyang saban lagee takhta nibak batee nilam, dan di ateueh nyan na jiduek sapeue-peue nyang leumah jih lagee manusia. bagian ateueh nyan leumah jih meucahya lagee peurunggu di teungoh-teungoh apui hu. bagian miyueb jih meucahya trang muble-ble, dan meuwareuna warni lagee peulangi. nyan kheueh trang meucahya nyang teutunyok ubak keuhaderan tuhan. ban lon kalon nyang lagee nyan, ulon laju reubah meudugom ateueh tanoh. laju lon deungoe su nyang geupeugah, "he manusia fana, beudoh kheueh. ulon keuneuk peugah haba deungon gata." watee su nyan ulon deungoe, jitamong kheueh roh po teu allah badan lon, dan geupeudong ulon. oh lheureh nyan lon deungoe lom su nyan geupeugah, "he manusia fana, gata lon kirem ubak ureueng-ureueng israel nyang beurontak jilawan ulon. awaknyan beurontak lagee indatu awaknyan keudroe. awaknyan kreueh ulee dan hana jihoreumat ulon. gata ulon kirem ubak awaknyan mangat tapeusampoe keu awaknyan peue-peue nyang ulon, tuhan allah nyang mahamanyang peugah keu awaknyan, peue jitem deungoe le awaknyan atawa hana; nyang peunteng, awaknyan haroh jiteupeue bahwa na nabi lamkawan awaknyan. teuma gata, he manusia fana, bek tatakot keu peumbeurontak nyan, atawa ubak peue mantong nyang jipeugah le awaknyan. awaknyan jilawan dan jihina gata, siulah-ulah gata udeb lamkawan kala meubisa. bahpi meunan, bek teumakot. peutrok kheueh bandum peusan ulon nyoe ubak awaknyan, boh jitem deungoe le awaknyan atawa hana. ingat kheueh bahwa awaknyan na kheueh peumbeurontak-peumbeurontak. he manusia fana, deungoe kheueh peue nyang ulon peugah ubak gata. bek kheueh taseutot peumbeurontak nyan. peuhah kheueh babah gata dan pajoh kheueh peue nyang ulon bri ubak gata." oh lheureh nyan ulon kalon jaroe nyang teusunyueng ubak ulon. dalam jaroe nyan na kitab meugulong, nyang teutuleh nibak bandua bineh jih. laju geupeuhah geunulong nyan dan disinan teutuleh ratapan, apoh apah dan rintihan. allah meufeureuman, "he manusia fana, pajoh kheueh kitab meugulong nyoe, oh lheureh nyan jak kheueh dan mariet kheueh ubak ureueng-ureueng israel." laju ulon peuhah babah lon po teu allah laju geusuleueng kitab meugulong nyan lam babah lon mangat lon pajoh. kheun gobnyan, "he manusia fana, pajoh kheueh! pasoe kheueh pruet gata ngon kitab meugulong nyoe." dan kitab nyan pi laju lon pajoh rasa jih mameh lagee meulisan. po teu allah

meufeuereuman lom, "he manusia fana, tajak kheueh laju ubak ureueng-ureueng israel dan peusampoe kheueh peue mantong peusan ulon keu awaknyan. keu awaknyan kheueh gata lon kirem, dan bukan keu bansa nyang basa jih sulet, aseng dan hana muphom. meunyeo kheueh gata ulon kirem ubak bansa nyang lagee nyan, awaknyan jideungoe tutoe haba gata. teuma bansa israel hana jitem deungoe gata, bahpi ulon keudroe pih hana jipako. awaknyan bandum kreuheh-kreuheh ulee dan galak bak meulawan. jinoenyeo gata lon peujeuet kreuheh ulee dan gigh lagee awaknyan cit teuma. gata ulon peujeuet kukoh lagee batee kareueng dan kreuheh lagee intan. bek kheueh tatakot ubak peumbeurontak nyan." ltheuehnyan po teu allah geupeugah, "he manusia fana, ngieng kheueh beu get-get dan ingat kheueh peue nyang ulon peugah nyoe ubak gata. tajak kheueh ubak bansa gata nyang na tinggai di tempat nyang teuboih nyan, dan peusampoe kheueh peue nyang ulon, tuhan nyang mahamanyang peugah ubak awaknyan, peu kheueh jitem deungoe le awaknyan atawa hana." laju roh allah geubeuot ulon dan dilikot ulon teudeungoe su geumuroh nyan jipeugah, "pujoe kheueh keumuliaan tuhan di syeuruga!" lon deungoe su sayeub makhluk nyan saleng meuantok, dan su meukrab-krab ruda-ruda nyan nyang nyareng lagee su geumpa bumoe. keukuasaan tuhan nyang peujeuet ulon lumpah that hebat, dan bak watee ulon geubeuot le roh gobnyan, ate ulon meuras a phet dan seu uem. dan trok kheueh ulon ubak tempat tinggai ureueng nyang teuboih di tel abib nibak bineh krueng kebar. na tujuh uroe treb jih ulon tinggai disinan; ulon teumanueng-manueng le bandum nyang banmantong lon deungoe dan lon kalon nyan. oh ka ltheueh tujuh uroe, tuhan geupeugah ubak ulon, "he manusia fana, gata ulon angkat jeuet keu ureueng kawai bansa israel. tapeusampoe kheueh ubak awaknyan haba peuingat nyang ulon bri nyoe. meunyeo ulon peugah bahwa sidroe peunjahat mate, teuma gata hana tapeuingat bak awaknyan mangat awaknyan jiubah pi-e jih sampoe jihnyan seulam, teuma jihnyan mate mantong lagee ureueng nyang meudesya, dan tanggong jaweueb ateuheh mate jih nyan jitunggee nibak gata. meunyeo gata tapeuingat ureueng jeuhet nyan dan ureueng nyan han jitem pioh jipeubuet jeuhet, jihnyan mate lagee ureueng meudesya, teuma gata keudroe seulam. meunyeo sidroe ureueng nyang jroh jipeuphon peubuet desya, dan jihnyan ulon peuhadab deungon bahaya, teuma jihnyan mate meunyeo gata hana tapeuingat jihnyan. jihnyan mate sabab desya-desya jihnyan keudroe, dan buet-buet jih nyang jroh nyang ka jipeubuet hana ulon ingat. teuma tanggong jaweueb ateuheh mate ureueng nyan lon tunggee nibak gata. meunyeo ureueng nyang jroh nyan gata peuingat mangat bek jipeubuet desya, dan jihnyan jituot naseuhat gata, teuma jihnyan hana lon hukom dan gata seulam." ulon rasa teuga that tuhan teuka dan ulon deungoe gobnyan geupeugah ubak ulon, "beudoh kheueh dan jak kheueh laju u panton. disinan ulon keuneuk peugah haba deungon gata." dan ulon jak kheueh u panton, dan disinan deuh lon kalon cahya meukilat tanda teuka tuhan lagee nyang ka ltheueh lon kalon

bak bineh krueng kebar. laju ulon reubah teudugom di ateuheh tanoh, teuma roh po teu allah geutamong dan geupeudong ulon. tuhan meufeuereuman ubak ulon, "tawoe kheueh dan takurong droe gata didalam rumoh. he manusia fana, gata ji-ikat ngon talo sampoe hana hase tateubiet dan hana jeuet meurmupok deungon gob. ulon lon peujeuet lidah gata kalu sampoe gata hana hase tapeuingat bansa peumbeurontak nyoe. teuma, meunyeo lon meututoe deungon gata lom dan lon peuwirang mangat gata hase meutoe lom, gata haroh tapeusampoe peue nyang ulon, tuhan nyang mahamanyang peugah ubak awaknyan. siladum nibak awaknyan jideungoe, teuma siladum teuk hana, sabab awaknyan keubit bansa nyang beurontak." po teu allah meufeuereuman, "he manusia fana, tacok kheueh laju sineuk batee bata, keubah laju dikeue gata dan gareh laju ateuheh batee nyan gamba banda yersalem. laju tagamba cara teukeupong banda nyan, deungon paret-paret, sinamon-sinamon tanoh, khimah-khimah dan alat-alat ngon pok bansikeulileng beuton nyan. tacok kheueh panci beuso dan anggab kheueh nyan sibagoe binte beuso; keubah kheueh panci nyan lamkawan gata dan banda yersalem. oh ltheueh nyan meuhadab kheueh ubak banda nyan siulah-ulah gata kheueh nyang keupong banda nyan. nyan jeuet keulambang keu bansa israel. oh ltheueh nyan ta-eh kheueh meugeunireueng blaih siwie, dan ulon kupeurhot salah bansa israel nyan ateuheh gata. na 390 uroe gata teueh lagee nyan dan meudeurita seungsara sabab salah awaknyan. siuroe gata teueh lagee nyan teupeulambang sithon hukoman bansa israel. oh ltheueh nyan, taeh kheueh meugeunireueng blaih uneuen dan tarasa kheueh hukoman ateuheh buet salah yehuda peuet ploh uroe treb jih, si uroe teupeulambang sithon hukoman awaknyan. pandang kheueh teukeupong yersalem. geupai kheueh boh sineunju gata ateuheh banda nyan dan peusampoe kheueh peusan ulon keuhai hukoman ateuheh awaknyan. gata lon ikat sampoe hana hase tabalek tuboh gata nibak wie u uneuen atawa seubalek jih sampoe teukeupong banda nyan seuleusoe. jinoenyeo, tacok kheueh gandom, jeulai, kacang mirah, kacang polong, sekoi dan gandom haloh. jampu kheueh banmandum nyan dan peuet kheueh ruti. nyan kheueh peunajoh gata nyang treb jih 390 uroe gata gata teueh siheuet u blaih wie nyan. ruti nyan haroh gata weuek beuade sampoe tieb-tieb uroe gata makheun 230 gram. leubeu nibaknyan hana jeuet. meunan cit deungon ie jieb gata teubataih, nyang jeuet dua cangkik siuroe. tapeuhu kheueh apui deungon ek manusia keu kayee jih. panggang kheueh ruti gata ateuheh apui nyan dan tapajoh kheueh ruti nyan dikeue ureueng rame." tuhan meufeuereuman, "meunan kheueh cara jih ureueng israel singoh jipajoh peunajoh nyang geutam le hukom nabi musa, bak watee awaknyan ulon boih u nanggroe-nanggroe aseng." teuma ulon jaweueb, "ya amphon, tuhan nyang mahamanyang! phon yoh ubit sampoe saat nyoe hantom lom lon peukutoe droe deungon peunajoh bangke beulatang atawa seueh nyang jipajoh le beulatang buih. hantom lon pajoh peunajoh nyang teuaggab hareuem." dan po teu allah meufeuereuman, "get kheueh, sibagoe geunantoe

ek manusia, gata jeuet tapajoh ek leumo keu ngon tot ruti gata." oh ltheuh nyan gobnyan meufeureuman lom, "he manusia fana, ulon kupeuhanco gudang teumplat keubah peunajoh di yerusalem. deungon gundah dan khawate manusia jibataih peunajoh nyang awaknyan pajoh dan ie nyang awaknyan jieb. awaknyan putoh asa sabab ka habeh peunajoh dan ie jieb, akhe jih awaknyan mate sabab desya-desya jih keudroe." tuhan meufeureuman, "he manusia fana, tacok kheueh peudeung nyang tajam dan cuko kheueh beuhabeh jaggot dan ok gata ngon peudeung nyan. oh ltheuh nyan jak timang kheueh ok nyan nibak ceng dan taweuk kheueh mangat jeuet lhee boh bagi. siper lhee haroh gata tot di teungoh-teungoh banda nyan oh ltheuh nyan akhejih banda nyan gata keupong. siper lhee teuk haroh gata tak ngon peudeung gata sirang takeuileng banda nyan. dan siper lhee nyang keuneulheueh haroh gata sipreuk u atueh, laju ulon kutiyeub ngon peudeung lon. tatinggai bacut ok nyan dan tabungkoh lam ija lipat jubah gata. oh ltheuh nyan tacok bacut nibak ok nyan, tageulawa laju u dalam apui dan tapeubiyeu mantong ok nyan hangoh. nibak teumplat nyan apui jimeueue bansaboh bansa israel." tuhan nyang mahamanyang meufeureuman, "kalon, nyoe kheueh yerusalem. banda nyoe ulon keubah bak pusat donya, deungon nanggroe-nanggroe laen ban sikeuileng nyan. teuma yerusalem ka jitulak peurintah ulon dan teunyata leubeh jeuhet nibak bansa-bansa laen, dan leubeh hana taat nibak nanggroe-nanggroe nyang na di sikeuileng nyan. yerusalem ka ji iengkeue peupeue nyang lon peurintah dan hanjitem taat ubak hukom-hukom lon." tuhan nyang mahamanyang meufeureuman, "he yerusalem, deungoe kheueh nyoe! gata hana tataat peue-peue nyang ulon peurintah meunan cit ubak hukom-hukom lon; gata leubeh meubantah nibak bansa-bansa nyang laen nyang na di seukeuileng gata, dan ka gata seutot adat istiadat bansa-bansa nyan. teuma ulon, tuhan nyang mahamanyang, bak saat nyoe ulon peugah bahwa ulon na kheueh musoh gata. gata lon hukom dikeue bansa-bansa laen. sabab bandum buet gata lon banci, peunduduek gata lon hukom nyang leubeh brat nyang gohlom na lon peubuet dan hana lon peubuet le. ureueng syiek teuma jipajoh aneuk jih keudroe dan si aneuk jipajoh ureueng syiek jihnyan. meunan kheueh awaknyan ulon hukom, dan nyang mantong udeb lon peucerebre ubak meubagoe jurosan. ulon na kheueh allah nyang udeb, tuhan nyang mahamanyang, dan nyoe kheueh tutoe haba lon: sabab gata ka tapeukutoe baet ulon deungon sigala buet gata nyang jeuhet dan luwat nyan, ulon lon peuhanco gata hana amphon. siper lhee nibak peunduduek gata mate keunong bala peunyakat dan beuncana musem deuk nyang meulanda banda. siper lhee teuk teuheutam deungon peudeung di luwa banda, dan siper lhee teuk lon sipreuk u jeueb-jeueb sago dan lon tyeueb-tyeueb deungon peudeung. gata tarasa pakriban hebat jih beungeh dan silab ulon sampoe ulon puih. oh ltheuh bandum nyan teujadi, gata yaken bahwa ulon, tuhan, ka lon peugah haba ubak gata sabab ulon meureuka atueh gata nyang hana seutia. gata jeuet keu runka-runka

nyang hana meuguna dan bansa-bansa nyang na bansikeuileng gata ji hina gata; tieb-tieb ureueng nyang jijak rot nyan jipeujioh droe nibak gata. meunyo ulon beungeh dan geungeuen keu gata dan lon hukom gata, bandum bansa nyang na di seukeuileng gata jirasa gli. awaknyan jihina gata dan luwat oh jingieg gata. ulon lon peuranab bubena peunajoh keuneubah nyang gata keubah dan lon peubiyeu peunduduek gata keunong deuk. awaknyan jirasa pakriban saket jih meunyo deuk, lagee aneuk panah tajam nyang peureulong beusot dan jipeubinas gata. seulaen beuncana deuk nyan lon peutron teuma bala peunyakat, keukeujaman dan prang keu jipeumate peunduduek gata, dan beulatang-beulatang juah mangat jipeumate aneuk-aneuk awaknyan. ulon, tuhan, ka lon peugah haba." tuhan meufeureuman ubak ulon, "he manusia fana, pandang kheueh gunong-gunong israel, dan peusampoe kheueh peusan ulon keuhai hukoman keu awaknyan. yue kheueh bak awaknyan beujideungoe dan jisimak peue nyang ulon, tuhan nyang mahamanyang peugah ubak gunong-gunong nyan, meunan cit ubak buket-buket, barieh-barieh dan panton-panton. beutoi, ulon kirem peudeung keu lon peuhanco teumplat-teumplat seumah beurala. miseubah-miseubah awaknyan teureuloh dan dupa-dupa awaknyan teupeubeukah. bandum ureueng nyang na disinan teupeumate dikeue beurala jihnyan. ulon kupeujeuet manyet-manyet ureueng israel meutabu beba; dan tuleueng-tuleueng awaknyan lon peuhambo dikeue miseubah nyan. bandum banda israel teupeuhanco, bandum miseubah dan beurala awaknyan hanco meutabu beba, dupa-dupa awaknyan meutabu teuing bayeueng han meuh sahoe dan peue-peue mantong nyang awaknyan peuget gadoh. dipat mantong na ureueng nyang teupoh mate, dan awaknyan nyang mantong udeb jiteupeue bahwa ulon kheueh tuhan. teuma bacut sagai lamkawan awaknyan nyang lon peuseuleuseh nibak mawot dan awaknyan lon peusiseu sidroe saho lamkawan bansa-bansa; disideh awaknyan udeb di teumplat nyang teuboih. laju awaknyan teuingat ubak ulon dan muphom bahwa ulon ku hukom meunan cit lon hina awaknyan sabab ate awaknyan hana seutia ubak ulon. awaknyan ka jittinggai ulon dan jipileh beurala sibagoe geunantoe ulon. laju awaknyan luwat deungon droe jih keudroe sabab bandum keujeuhetan dan keukeujian nyang ka awaknyan peubuet. dan awaknyan jiteupeue bahwa ulon kheueh tuhan dan bahwa bandum peuingat nyang ulon bri bukan ancaman-ancaman beulaka." tuhan nyang mahamanyang meufeureuman, "beuseudeh kheueh! meuba-e kheueh! tamo kheueh beu meuweueh-weueh sabab bandum keujeuhetan dan keukeujian nyang ka jipeubuet le bansa israel. awaknyan mate le sabab prang, deuk dan bala peunyakat. awaknyan bandum jirasa beungeh nyang raya that nibak ulon. ureueng-ureueng nyang jioh di teumplat nyang teuboih rhot keusakat dan laju mate; nyang to mate dimideuen prang, dan nyang tinggai mate sabab le deuk. manyet-manyet awaknyan meutabu beuba lamkawan beurala nyang na bansikeuileng miseubah, teugeugeung di tieb-tieb buket nyang manyang, dan nibak pucak tieb-tieb

gunong, di miyueb tieb-tieb bak kayee nyang rampak dan bak kayee nyang raya; euet haba, dipat mantong awaknyan jitot keureubeuen keu beurala awaknyan. dan somantong ureueng jiteupeue bahwa ulon kheueh tuhan. nyoe, ulon lon beuot jaroe ulon dan lon peuhanco nanggroe awaknyan, sampoe ka jeuet keusungue nyang hana ureueng, phon di guiron seulitan trok ubak banda ribla di utara. nibak teumpat-teumpat jiduek le ureueng israel, hana meusaboh pih nyang geupeuseulamat. dan jiteupeue kheueh bandum ureueng bahwa ulon kheueh tuhan." tuhan meufeureuman ubak ulon, "he manusia fana, ulon, tuhan nyang mahamanyang, keuneuk peugah haba nyoe keu tanoh israel: nyoe kheueh keuneulheuh riwayat keu nanggroe nyoe!" tuhan meufeureuman, "he israel, jinoenyoe ka trok watee gata habeh umu. gata tarasa meureuka ulon. gata ulon adili sipadan ngon buet gata nyang kutoe. ulon hana lon gaseh atawa lon bri amphon keu gata. ulon kuhukom gata sipadan deungon bandum buet nyang keuji nyang ka gata peubuet. dan tateupeue kheueh le gata bahwa ulon kheueh tuhan." nyoe kheueh nyang geupeugah le tuhan nyang mahamanyang ubak bansa israel, "bala deumi bala jiteuka atueh gata. jinoenyoe bandum ka keuneulheuh. nyoe kheueh keuneulheuh gata. hana harapan le nibak gata. bandum ka page keu gata, he bansa nyang tinggai nibak tanoh nyoe. jinoe hana le khanuri-khanuri bak miseubah-miseubah di gunong-gunong, nyang na na kheueh karu sabe nyang hana reuda. hana treb le gata tarasa meureuka ulon nyang paleng teumakot. gata ulon adili sipadan ngon buet nyang gata peubuet. teuma lon balaih atueh gata mandum buet nyang kuto. ulon hana lon gaseh atawa lon bri amphon ubak gata. ulon kuhukom gata sipadan deungon buet nyang kuto nyang ka gata peubuet. dan baro kheueh gata teupeue bahwa ulon kheueh tuhan dan ulon kheueh nyang hukom gata." uroe kiamat keu bansa israel ka trok jiteuka. keujeuhetan meuraja lela. keusombongan ka trok bak puncak jih. keukeujaman meuakibat jih leubeh le keujeuhetan. bandum keukayaan, keuangongan dan keujayaan awaknyan habeh hana meubeukaih. watee jih reujang teuka, uroe jih ka to lumpah na! ureueng nyang bloe dan ureueng peubloe hana meuteume laba le, sabab hukoman po teu allah rhot atueh bandum manusia. hana ureueng meukat nyang bagaih meurumpok lom peue nyang ka jipeubloe, sabab meureuka po teu allah rhot atueh soemantong. ureueng nyang jeuhet hana seulamat. beureuguih jimeusu dan bandum ureueng ka siab-siab. teuma hana meusidrooe pih nyang na jak u mideuen prang, sabab meureuka po teu allah rhot atueh bandum manusia. bak rot-rot ueh raya lam banda na muprang, di rumoh-rumoh na bala peunyakot dan musem deuk. soemantong nyang na di luwa banda mate di mideuen prang, dan nyang tinggai lam banda keunong peunyakot dan deuk. siladum teupeusie nibak mawot dan jipeuplueng droe u gunong-gunong. disinan awaknyan jeuet lagee cicem leuk nyang teuparoh di panton-panton; bandum meurang-rang sabab desya-desya awaknyan keudroe. somantong ureueng leumoh jaroe dan guyah teuot. awaknyan jingui ija

krong dan bansaboh tuboh jih yo meugam-gam. ulee awaknyan teucukoe ok dan awaknyan teupeumalee. meuh dan pirak awaknyan boih bak rot raya lagee geutiek broh, sabab bak uroe tuhan teuka beungeh nyang luwa biasa nyan, meuh dan pirak nyan hana hase jipeuseulamat awaknyan, teuma ka jijeurumus awaknyan u dalam desya. awaknyan hana hase jipeuguna nyan keu jipeupuih nafeusu atawa keu jipeutroe pruet awaknyan keudroe. yoh masa ilee awaknyan bangsa deungon peumata nyang ceudah, teuma sabab awaknyan jipeuguna keu jipeuget beurala-beurala nyang lumpah luwatnyan, laju tuhan geupeujeuet hareuta awaknyan keu sapeue-sapeue nyang lumah teumakot ngon gli. tuhan meufeureuman ubak bansa israel, "ulon lon peubiyeu ureueng-ureueng aseng jijak reupah hareuta gata. ureueng-ureueng jeuhet jireubot atra gata dan jipeukuto gata. ulon hana lon tulong meunye baet ulon jipeurusak dan jipeukuto le peurampok-peurampok. bansaboh nanggroe ka jeuet keukaru ka-ak ka-ok; dipat mantong na ureueng teupoh mate dan keukeujaman. bansa-bansa nyang paleng juah lon puteuka keu jijak duek bak rumoh-rumoh gata. ureueng-ureueng nyang gata anggab hebat nyang paleng peukasa yo watee bansa-bansa nyan ulon peubiyeu jipeuhanco teumpat-teumpat iebadat gata. awaknyan keunong le keuseudehan dan putoh asa, laju jimita keudamean, teuma hana jiteume. mala peutaka dan haba brok hana putoh-putoh teuka u atueh awaknyan. gata meudoa mangat bubena nabi geutem ngieng kutika, teuma awaknyan hana hase. meunan cit bubena teungku imeum hana kuasa peue nyang haroh geupeurunoe keu umat, dan dumna peumimpin ka habeh naseuhah. raja meuba-e, putra mahkota putoh asa dan rakyat yo sabab teumakot. ulon lon hukom gata nyang sesuai deungon peue nyang ka gata peubuet dan lon peusidang gata lagee gata nyang ka tateusidang ureueng laen. dan baro kheueh gata teupeue bahwa ulon nyoe na kheueh tuhan." bak tanggai limong buleuen nam bak thon nyang keunam kamoe jiboih u teumpat laen, peumimpin-peumimpin ureueng nyang teuboih yehuda nyan jijak u rumoh lon dan jiduek-duek meusajan ngon ulon. ngon hana teusangka-sangka keukuasaan tuhan nyang mahamanyang ka geukuasa bansaboh badan lon. laju ulon tengah dan deuh laju ulon ngieng na nyang saban lagee manusia. phon bak keuieng jih sampoe u miyueb deuh jih lagee apui, dan nibak keuieng u atueh deuh jih lagee meukiwieng-kwieng lagee peurunggu nyang teuasah. gobnyan laju geu sunyueng sapeue-peue nyang saban lagee jaroe, laju jihila ok ulon. oh lueheh nyan lam deuh lon kalon nyan, ulon laju jibeuet manyang-manyang u atueh manyang le roh allah dan laju jiba u baet tuhan di yerusaleem, bak babah pintoe tamong seuramoe dalam nyang na di siblah utara. nibak teumpat nyan na meuteume patong beurala nyang jipeuteuka meureuka po teu allah. dan leumah laju ulon ngieng trang bandrang nyang muble-ble cahya sibagoe tanda tuhan allah israel ka geuteuka, saban lagee nyang ulon ngieng watee ulon na bak bineh krung kebar. po teu allah meufeureuman ubak ulon, "hei manusia fana, pandang kheueh u

arah utara." ulon seutot, blaih miseubah bak bineh rot tamong, deuh laju ulon kalon beurala nyang teupeusabab po teu allah beungeh lagoe na. allah meufeureuman ubak ulon, "hei manusia fana, gata ngieng kheueh peue nyang teungoh teujadi? gata ngieng kheueh laju pakriban buet-buet nyang luwat nyang ka jipeubuet le ureueng israel, nyang peujioh ulon nibak baet lon! jak keunoe, ulon tunyok ubak gata hai-hai nyang leubeh kuto lom." oh lheueh nyan laju geuba ulon ubak babah pintoe tamong leuen bagian keue dan laju geupeuleumah saboh ruhueng bak beuton nyan. kheun gobnyan, "hei manusia fana, peurayeuk kheueh ruhueng nyoe," oh ka lheueh ulon peubuet, laju deuh lon ngieng saboh pintoe. kheun gobnyan ubak ulon, "tamong kheueh dan kalon kheueh buet-buet nyang kutoe dan luwat lumpah na nyang jipeubuet le awaknyan bak teupat nyan." ulon pih lon tamong dan laju lon ngieng. binteh-binteh kama nyan peunoh teu uke ngon mubagoe rupa ukeran uleue dan beulatang-beulatang hareuem nyang laen, meunan cit mubagoe ukeran beurala nyang jipujoe le ureueng-ureueng israel. na tujuh ploh droe peumimpén bansa israel nyang na disinan, jitamong cit keunan yaazanya bin safan. maseng-maseng awaknyan jimat saboh dupa keumeunyan nyang meuasab. allah meufeureuman ubak ulon, "hei manusia fana, gata kalon peue nyang jipeubuet le peumimpén-peumimpén israel deungon cara seungab-seungab? awaknyan jimeu iebadat lam kama nyang peunoh beurala deungon alasan bahwa ulon ka lon tinggai nanggroe nyoe dan hana lon kalon peue nyang jipeubuet nyan." laju tuhan geutanyong ubak ulon, "gata takalon buet nyang jipeubuet le awaknyan leubeh luwat nibak nyang ka." teuma laju geuba ulon ubak babah pintoe geureubang baet tuhan dan geupeuleumah laju ubak ulon ureueng-ureueng inong nyang teungoh jipeumo ba-e dewa tamus nyang ka mate. tuhan meufeureuman ubak ulon, "hei manusia fana, peu kheueh na gata ngieng hai nyan? mantong jai that-that hai-hai nyang luwat lumpah na." laju geuba ulon ubak seuramoe baet tuhan. bak bineh pintoe rot tamong lam ruweueng suci, lamkawan miseubah dan jurong, na dua ploh limong droe. awaknyan jipeulikot ruweueng suci, dan laju jisujut u arah timu jisumrah mata uroe teubiet. tuhan meufeureuman ubak ulon, "hei manusia fana, peu kheueh gata ngieng nyan? ureueng-ureueng yehuda nyoe hana puih meunyo jipeubuet hai-hai nyang luwat nyan dan jipeubuet lom hai-hai nyang hana meupriekumanusiaan bansaboh nanggroe. awaknyan pih hana yo sapeue jipeubuet hai nyang lagee nyan bak teupat nyoe, lam rumoh ulon nyang jipeujeuet ulon meutamah beungeh ubek jihnyan. ngieng kheueh pakriban awaknyan jihina ulon ngon cara nyang paleng jeuhet! awaknyan jiteumeurasa pakriban saket keunong meureuka ulon nyang brat! ulon hana kupeumeuah dan lon peu amphon awaknyan. bahpi awaknyan jimeudoa ngon cara jidumpek dan su nyang kreueh dan teuga ubak ulon, teuma di ulon teutab hana lon deungoe doa awaknyan!" oh lheueh nyan ulon deungoe teuma po teu allah geumeuhoi, "tajak kheueh keunoe he ureueng-ureueng nyang

peujak hukoman lon ateueh banda nyoe. taba kheueh sinjata-sinjata gata." deungon meusigoe that teuka keunan nam droe ureueng rot luwa geureubang utara baet tuhan, maseng-maseng awaknyan jiba sinjata. meusajan ngon awaknyan na ureueng nyang jisok peukayan ija lineun bak jaroe jih na jiba sajan alat teumuleh. awaknyan jitamong dan jidong bak bineh miseubah peurunggu. laju cahya muble-ble nyang meutanda keuhaderan allah israel, jiteubiet cahya lam kerub-kerub, laju jiminah nibak teupat jih nyang phon ubak babah pintoe tamong baet tuhan. dan tuhan laju geutawok ureueng nyang meupeukayan ija lineun nyan sira geupeugah, "tajak laju ubak jeueb-jeueb sagoe banda dan taboh kheueh tanda nibak keunong soe mantong ureueng nyang meurasa seudeh dan susah sabab bandum buet nyang lumpah luwat nyang jipeubuet nibak banda nyan." ulon deungoe po teu allah meufeureuman ubak ureueng-ureueng nyang laen, "seutot kheueh gobnyan ho-ho nyang geujak bansaboh sagoe banda dan peumate kheueh bubena ureueng ngon hana amphon. peumate kheueh bandum ureueng agam dan ureueng inong, tuha dan muda, ureueng tuha dan aneuek manyak. teuma bek tacukeh meusidroe pih nyang na tanda bak keuneng. phon disinoe, nibak baet ulon nyoe." dan awaknyan laju jipeuphon tugaih jih keudroe deungon cara jipoh mate bandum peumimpén israel nyang teungoh jidong di baet tuhan. po teu allah geupeugah ubak awaknyan, "peukuto kheueh baet ulon nyoe! peupeunoh kheueh bandum leuen baet nyan deungon manyet-manyet manusia. peuphon kheueh laju!" dan awaknyan laju jijak poh mate ureueng-ureueng nyang na didalam banda. watee teupoh mate ureueng-ureueng lam banda nyan teungoh teujadi, ulon na disinan sidroe mantong. laju lon sujut dan lon meulakee, "ya tuhan nyang mahamanyang, beungeh that droeneueh keu yerusalem sampoe neupoh mate bandum ureueng nyang mantong na di israel nyoe?" geujaweueb le po teu allah, "ureueng-ureueng israel dan yehuda ka jipeubuet desya nyang keubit rayeuk. awaknyan ka jipeumate manusia jeueb-jeueb sagoe, dan yerusalem jipeukutoe deungon keujeuhetan. awaknyan jipeugah bahwa ulon, tuhan, ka lon tinggai nanggroe nyoe sampoe hana hase teukalon buet-buet nyang jipeubuet. ulon hana lon gaseh awaknyan. teuma lon peubuet ateueh awaknyan peue-peue nyang ka jipeubuet ateueh ureueng laen." oh lheueh nyan ureueng nyang meupeukayan lineun nyan geugisa geujak meulapor ubak tuhan, kheun gobnyan, "bandum peurintah tuhan ka teukeureuja." laju ulon kalon ubak kubah nyang na di ateueh ulee kerub-kerub nyan, dan lon ngieng sapeue-peue nyang lagee takhta batee nilam. oh lheueh nyan po teu allah geupeugah ubak ureueng nyang sok peukayan lineun nyan, "lhob kheueh laju lam ruweueng ruda-ruda nyang na di miyueb kerub-kerub nyan, dan cok laju saboh reugam ngeue apui. dan sipreuk kheueh ngeue apui nyan u ateueh banda." gobnyan jiturot, dan di ulon ku ngieng hainyan. watee ureueng nyan jitamong, kerub-kerub nyan teungoh jidong di siblahi seulatan baet tuhan. na sigumpai awan ka peunoh lam seuramoe dalam dan bansaboh baet tuhan. cahya nyang

muble-ble sibagoe tanda tuhan ka teuka keunan leumah jiteubiet dalam kerub-kerub nyan dan laju jiminal ubak babah pintoe tamong lam baet tuhan, sampoe seuramoe nyan ka peungeuh ngon trang bandrang nyang meucahya. su sayeueb kerub-kerub nyan watee jikeupak teudeungoe ubak seuramoe luwa, lagee su po teu allah nyang mahakusa. oh ka ltheueh tuhan geuyue bak ureueng nyang sok peukayan lineun nyan saboh reugam ngeue apui lam ruweueng ruda dimiyueb kerub-kerub nyan, ureueng nyan tamong dan didong digeunireng saboh lamkawan ruda-ruda nyan. dan laju saboh lamkawan kerub nyan jipeutamong jaroe jih u dalam apui nyang na lamkawan awaknyan, dan jicok laju napadub krek ngeue apui nyan, dan ngeue apui nyang ka jicok nyan jijok laju ubak ureueng nyang sok peukayan lineun nyan. ureueng nyan laju jiteurimong oh ltheueh nyan jibeudoh di sinan laju jijak. deuh ulon kalon bahwa dimiyueb sayeueb tieb-tieb kerub nyan na sapeue-peue nyang hi jih saban ngon jaroe manusia. meunan cit deuh ulon kalon bahwa tieb-tieb kerub nyan maseng-maseng na saboh ruda disampeng. ban peuet boh ruda nyan saban, dan hu muble-ble lagee peumata indah. maseng-maseng na saboh teuk ruda laen nyang meulienteueng di teungoh-teungoh nyan. deungon lagee nyan kerub-kerub nyan jeuet jijak bak peuet jurusan. awaknyan jeuet jijak homantong nyang awaknyan galak, deungon hana jiputa tuboh jih nyan. bansaboh tuboh awaknyan, rhueng jihnyan, jaroe jih, sayeueb jih dan ruda-ruda pih peunoh deungoe mata. ulon deungon bahwa ruda-ruda nyan teuboh nan, "puteueng beuliong". tieb-tieb kerub nyan hi jih meulaen-laen. hi nyang phon na kheueh lagee banteng, nyang keudua hi manusia, nyang keu lhee hi singa, dan nyang keu peuet hi cicem siwah. kerub-kerub nyan kheueh nyang ulon ngieng ilee nibak bineh krueng kebar. pajan mantong keurub-kerub nyan jimeugrab atawa jipeukeumang sayeueb jihnyan, ji-ek u manyang atawa jipo maju atawa jipioh, ruda-ruda nyan sabe jiseutot, sabab jikuasa le kerub-kerub nyan. laju le cahya muble-ble nyang tanda jih keuteuka tuhan jitinggai laju babah pintoe tamong u baet tuhan dan jitinggai u atueuh keurub-kerub nyan. ulon ngieng kerub-kerub nyan jipeukeumang sayeueb jih laju jipo jitinggai tanoh, dan ruda-ruda jihnyan pih jijak sajan. laju awaknyan jipioh bak bineh pintoe geureubang baet tuhan nyang na di siblaih u timu, seudangkan cahya muble-ble teutab na atueuh awaknyan. ulon laju teuingat bahwa nyang kheueh keurub-kerub nyang yoh masa dilee ulon kalon na dimiyueb po teu allah israel, bak bineh krueng kebar. kerub-kerub nyan maseng-maseng na peuet macam hi, dua pasang sayeueb, dan meunan cit sapeue-peue lagee jaroe manusia dimiyueb sayeueb-sayeueb jihnyan. ruman awaknyan saban cit lagee nyang ka ulon ngieng nibak bineh krueng kebar. maseng-maseng jijak teupat ukeue. laju ulon geubeut le roh po teu allah dan geuba laju ubak babah pintoe geureubang siblaih timu baet tuhan. disinan na ulon kalon 25 droe, lamkawan awaknyan na meuteume peumimpin bansa, ureueng nyan na kheueh yaazanya bin azur dan pelaca bin benaya. po teu allah meufeuereuman ubak ulon,

"he manusia fana, nyoe kheueh ureueng-ureueng nyang jireuncana keuneuk peubuet nyang jeuhet di banda nyoe dan jijok naseuhat nyang sisat hana ngon peusa. le sabab nyan tapeusampoe kheueh peusan ulon keuhai hukoman keu awaknyan, he manusia fana. sabab awaknyan jipeugah, 'hana treb le rumah-rumah nyoe ta peudong lom. banda nyoe na kheueh beulangong dan geutanyoe bandum na kheueh uengkot sie didalam beulangong nyan. geutanyoe aman nibak apui hu nyang meuhab-hab sabab jilindong le beulangong nyoe.' " oh ltheuehnyan roh tuhan ka peunoh lam ulon, dan ulon geuyue le tuhan mangat lon peugah ubak umat israel, "he bansa israel, ulon kuteupeue peue nyang gata peugah dan nyang gata reuncana. keubiet that le manusia nyang ka gata peumate, sampoe rot-rot didalam banda ka peunoh ngon manyet manusia. sabab nyan, ulon, tuhan nyang mahamanyang, lon peugah ubak gata: beutoi, banda nyoe na kheueh beulangong, teuma uengkot sie nyang na didalam nyan bukan kheueh gata, teuma manyet ureueng-ureueng nyang ka teupoh mate! teuma di gata lon use neutuebiet nibak banda nyoe! peu kheueh gata teumakot keu peudeueng? teuma lon kirem ureueng nyang ba peudeueng keujijak prang gata. gata lon ba dan lon peuteubiet lam banda dan lon seurah ubak ureueng aseng. ulon ka lon peurhot hukoman mate atueuh gata. gata mate dimideuen di nanggroe gata keudroe, teuma neutupeue kheueh le gata bahwa ulon kheueh tuhan. le sababnyan, gata hana aman lam banda nyoe, hana lagee uengkot sie lam beulangong. ulon lon peucrok dan lon hukom gata dipat mantong gata na lam nanggroe israel. dan baro kheueh gata teupeue bahwa ulon kheueh tuhan dan gata ulon hukom sabab ka gata iengkeue bak peuratoran-peuratoran lon dan hana gata pakoe peurintah-peurintah lon deungon cara gata seutot hukom bansa-bansa nyang na di seukeuileng gata." teungoh lon peugah haba nyan, hana teusangka-sangka pelaca reubah laju mate. dan ulon pih laju lon sujut dan meulakee, "oh, tuhan nyang mahamanyang! peu kheueh banmandum nyang na tinggai sidroe sapat ureueng israel nyoe keuneuk neupeumate?" tuhan meufeuereuman lom ubak ulon, "he manusia fana, gata dan rakan-rakan gata nyang na di teupat nyang teuboih teungoh jeuet keuboh nariet le peunduduek yerasalem. kheun awaknyan, 'ureueng-ureueng nyang teuboih nyan lumpah that jioh nibak yerasalem keujijak iebadat ubak tuhan. tanoh israel ka geubri le tuhan keu geutanyoe.' sabab nyan, peusampoe kheueh peusan ulon nyoe ubak rakan-rakan gata nyang na di teupat nyang teuboih, bahwa ulon kheueh nyang ba awaknyan di jioh lamkawan bansa-bansa nyang lon peusipreuk awaknyan di nanggroe-nanggroe nyan. teuma teungoh awaknyan mantong na disinan, ulon kupeungon awaknyan. ulon, tuhan nyang mahamanyang, ulon peugah bahwa ulon lon gumpoi awaknyan nibak nanggroe-nanggroe di teupat awaknyan teusipreuk, laju lon jok pulang tanoh israel ubak awaknyan. meunyeo awaknyan jiwoe, awaknyan geuboih bandum beurala nyang kuto dan nyang luwat that nyang awaknyan teume. awaknyan lon bri ate nyang baro dan budho basa nyang baro

teuma. ate awaknyan nyang kreueh lagee batee ulon cok dan lon gantoe ngon ate nyang taat ubak ulon. dan awaknyan taat ubak peuratoran-peuratoran lon dan seutia jiseutot bandum peurintah ulon. awaknyan jeuet keu umat lon dan ulon jeuet keu allah awaknyan. teuma ureueng-ureueng nyang galak jiseumah beurala nyang kuto dan nyang luwat that nyan, lon hukom sabab pi-e awaknyan nyang jeuhet nyan." meunan kheueh feureuman tuhan nyang mahamanyang. kerub-kerub nyan ka jipeuphon po meunan cit deungon ruda-ruda nyan jiseutot sajan. cahya muble-ble nyang keutanda teuka allah israel na di ateueh awaknyan. oh lheureh nyan cahya nyang muble-ble nyan laju jitinggai yersusalem dan jiminah ubak gunung siblahi utima banda nyan. lam keumalon nyan, roh po teu allah geubeuot ulon dan geupeuriwang ulon ubak ureueng-ureueng nyang teuboih di babel. oh lheureh nyan gadoh kheueh nyang teukalon nyan. laju ulon calitra ubak ureueng-ureueng nyang teuboih peue-peue mantong nyang ka geupeuleumah le tuhan ubak ulon. tuhan meufeureuman lom ubak ulon, kheun gobnyan, "he manusia fana, gata tinggai lamkawan kawom peumbeurontak. bak awaknyan na mata, teuma hana jimeungieng; na geulinyueng, teuma hana jeuet meudeungoe, sabab awaknyan galak bak buet beurontak. sabab nyan, he manusia fana, teungoh uroe mantong peungeuh, peukemah laju barang-barang gata dan peutamong laju dalam bingkih ija lagee lazem nyang ka jipeubuet le ureueng nyang teuboih. sigohlom malam teuka, tinggai kheueh laju rumoh gata trang-trang lagee ureueng nyang teuba u teupat nyang teuboih. peuruhueg kheueh laju binteh rumoh gata deungon jikalon le kawom peumbeurontak nyan, dan taba laju bingkih barang gatanyan tapeutamong rot ruhueng nyang ka gata peubeusot bak binteh rumoh gata dan peuteubiet laju. gulam kheueh bingkih nyan ateueh baho gata. beurangkat kheueh lam seupot buta; tatob kheueh mata gata sampoe gata hana deuh rot nyang teungoh tajak nyan. bah kheueh siluroh bansa israel jikalon bandum peue nyang gata peubuet nyan, mangat jeuet keupeu ingat nibak awaknyan, barang kali awaknyan insaf bahwa droe awaknyan keudroe na kheueh peumbeurontak." laju ulon peubuet peurintah tuhan ubak ulon. bak uroe nyan cit teuma, watee mantong uroe, laju lon peukeumah barang-barang lon dalam saboh bingkih ija, lagee nyang ka lazem geupeubuet le ureueng meungungse. watee uroe ka jipeuphon malam, laju lon peugot ruhueng ngon jaroe lon bak binteh rumoh lon keudroe, oh lheurehnyan laju lon teubiet lam rumoh nyan. deungon jingieng le bandum ureueng nyang na disinan, bingkih ija nyan lon gulam bak baho lon, oh lheureh nyan laju ulon jak. oh singoh beungoh tuhan meufeureuman ubak ulon, meunoe geupeugah, "he manusia fana, bansa israel, bansa peumbeurontak nyan ka jitanyong ubak gata peue nyang teungoh gata peubuet. sabab nyan peusampoe kheueh bak awaknyan peue nyang ulon, tuhan nyang mahamanyang peugah ubak awaknyan. peusan lon nyan teutui ubak raja nyang na di yersusalem, dan mandum peunduduek banda nyan. peutrang kheueh bahwa peue nyang gata

peubuet nyan na kheueh lambang peue nyang teujadi ateueh awaknyan, na kheueh: awaknyan jeuet keu ureueng nyang teuboih dan ureueng teutawan. lam seupot butanyan raja awaknyan jigulam bingkih ija jih di ateueh baho jih dan laju jijak. ureueng-ureueng nyang laen jipeuget ruhueng nibak binteh mangat awaknyan hase jiteubiet. gobnyan jibot mata jih mangat nek leumah rot nyang teungoh jijak nyan. teuma ulon kutiek jeue mangat awaknyan hase ulon drob. laju awaknyan ulon ba u banda babel, dan disinan awaknyan mate hana jiteume kalon banda nyan. bandum nyang na tinggai lam meuligoe jitamong cit keunan bandum peunaseuhat dan peungawai pribadi raja nyan ulon peucubre u jeueb-jeueb jurosan. awaknyan lon tiyeub dan ulon poh mate. watee awaknyan ulon peucubre lamkawan bansa laen di nanggroe-nanggroe aseng, awaknyan jiteupeue bahwa ulon kheueh tuhan. na bacut nibak awaknyan lon peuseulamat nibak mideuen prang, nibak keunong deuk, dan nibak bala peunyaket, mangat lamkawan bansa-bansa aseng nyan awaknyan sadar bahwa awaknyan ka jipeubuet nibak buet nyang paleng kuto. dan awaknyan jimeungaku bahwa ulon kheueh tuhan." tuhan meufeureuman ubak ulon, "he manusia fana, beuyo kheueh gata bak watee gata pajoh bu, dan beumeutot-tot kheueh sabab gata teumakot bak watee gata tajieb ie. peusampoe kheueh ubak mandum bansa, peue nyang ulon, tuhan nyang mahamanyang peugah ubak peunduduek yersusalem nyang mantong tinggai ditanoah awaknyan. awaknyan yo watee jipajoh bu dan yo meukot-kot watee jijieb ie. tanoh awaknyan jeuet keu tandus, sabab bandum ureueng nyang na tinggai disinan hana putoh-putoh geuiengkeue hukom. banda-banda nyang jinoenyoe peunoh deungon peunduduek teupeuhanco dan ladang-ladang jeuet keu guron. dan jiteupeue kheueh le awaknyan bahwa ulon kheueh tuhan." tuhan meufeureuman ubak ulon, "he manusia fana, pakon ureueng israel galak jipeugah-peugah pribasa nyoe: 'masa meugantoe, teuma nubuat-nubuat hana antom teujadi?' nah, peutrok kheueh ubak awaknyan bahwa ulon, tuhan nyang mahamanyang, ulon jaweueb lagee nyoe: pribasa nyan lon peugadoh, sampoe hana le jipeugah-peugah di israel. sibagoe geunantoe peugah laju ubak awaknyan lagee nyoe, 'masa jih ka trok, dan tieb-tieb nubuat teuma teujadi.' di israel hana na le keumalon dan ramaian peuleusu, ulon, tuhan nyang mahamanyang lon mariet bak bansa israel, dan bandum nyang ulon peugah pasti teujadi, hana teupeue eunteuk singoh le. deungoe kheueh he kawom peumbeurontak! watee masa udeb gata lon peubuet bandum nyang ulon peurintah ubak gata. ulon, tuhan nyang mahamanyang ka lon peugah haba." feureuman tuhan ubak ulon, "he manusia fana, ureueng-ureueng israel jipeugah bahwa keumalon dan nubuat gata baro kheueh jeuet jioh bak uroe nyang teuma teuka. sabab nyan, peugah kheueh ubak awaknyan, bahwa ulon, tuhan nyang mahamanyang, lon peugah: bandum nyang ulon peugah pasti jadeh na, hana teupeu eunteuk singoh le. ulon, tuhan nyang mahamanyang ka lon peugah habal!" tuhan meufeureuman ubak ulon, "he manusia fana,

tateunak kheueh nabi-nabi israel nyang jipeugah ramai keunarang jih keudroe. yue kheueh awaknyan mangat jideungoe peue nyang ulon peugah." tuhan nyang mahamanyang meufeureuman, "ceulaka kheueh nabi-nabi nyang bangai nyan! ilham jihnyan meuteume nibak khayalan jih keudroe dan keumalon jihnyan peuleusu mandum. he israel, nabi-nabi gata nyan hana meuguna, saban cit lagee asee-asee srigala nyang udeb di teungoh-teungoh runga banda. awaknyan hana jikeumiet tempat-tempat binteh beuton nyang reuloh, dan meunan cit hana jipeuget binteh-binteh beuton nyang reuloh nyan. jadi, israel hana hase teupeuteun meunoye beureutoh prang bak uroe ulon, tuhan teuka geujak bri hukuman. nyang jikalon-kalon le awaknyan na kheueh peuleusu dan ramaian-ramaian awaknyan sulet. awaknyan meungaku jiba peusan nibak ulon, padahai ulon hantom na lon utos awaknyan. pakriban mungenk awaknyan jiharab bak ramaian jih nyang teuma teujadi? ulon, tuhan nyang mahamanyang lon peugah ubak awaknyan, 'keumalon-keumalon nyan peuleusu dan ramaian-ramaian nyan sulet mandum. gata tapeugah bahwa bandum nyan na kheueh peusan ulon, padahai ulon hantom na lon peugah haba ubak gata! sabab nyan ulon jeuet keu lawan gata. ulon lon hukom gata, he nabi-nabi nyang peugah ramaian sulet dan nyang meukhayal keumalon-keumalon nyang hana beutoi! gata hana jeuet le tabri keuputosan bak sidang-sidang umat ulon. nan-nan gata teuceue nibak dafetar marga israel, dan gata hana teutuwoe le u tanoh ie gata. teuma baro kheueh tateupeue bahwa ulon kheueh tuhan nyang mahamanyang. he nabi-nabi peuleusu! gata ka tapeusisat umat ulon deungon tapeugah bahwa banmandum aman dan beereeh. padahai mubacut pih hana! umat ulon ka jipeudong timbok-timbok batee bata nyang guruek watee jipasang, oh lheureunyan gata teuka tajak heuntam. he nabi-nabi peuleusu! beuton gata reuloh. ulon lon peutron ujeuen keuncang. binteh beuton nyan jiheuntam le angen badee dan jitingkeh le ujeuen es sampoe reuloh, dan somantong ureueng jityanyong keupeue guna jih binteh beuton nyan teucet ngon gapu.' " tuhan nyang mahamanyang meufeureuman, "watee beungeh lon nyan, ulon lon peutron angen badee, ujeuen keuncang dan ujeuen eh keu teupeuhanco binteh beuton nyan. ulon ka naniet keuneuk peureuloh binteh beuton nyang gata cet ngon gapu nyan, lon peuteung bayeueng sampoe nyang tinggai keunaleueng mantong. binteh beutonna jitimok dan jipeumate gata banmandum. dan baro kheueh gata teupeue bahwa ulon kheueh tuhan. binteh beutonna dan nyang ka tagapu nyan tarasa hebat jih beungeh ulon. oh lheureunyan lon peugah ubak gata bahwa binteh beuton nyan gadoh leunyah, saban lagee gata boh gapu, nabi-nabi peuleusu! gata taramai bahwa yersusalem aman dan beereeh, padahai mubacut pi hana!" meunan kheueh feureuman tuhan nyang mahamanyang. tuhan meufeureuman, "jinoenyoe, he manusia fana, tangieng kheueh ureueng-ureueng nyang meulagak lagee nabiah lamkawan bansa gata. teunak kheueh awaknyan, dan peusampoe kheueh peue nyang ulon, tuhan nyang mahamanyang peugah ubak awaknyan:

'ceulaka kheueh gata! gata peuget keu bandum ureueng gleueng meujimat dan tudong-tudong sakeuti mangat ureueng nyang ngui atranyan meuteume hase jikuasa udeb ureueng laen. gata keuneuk meukuasa ateueh udeb mate umat ulon, dan kuasa nyan gata ngui deumi keupeuntangan gata keudroe. gata ka gata hina ulon dikeue umat lon keudroe deungon harapan mangat meuteume napadub on jeulai dan padub boh ruti. ureueng-ureueng nyang hana meusalah, gata poh mate seudangkan ureueng nyang seuharoh jih mate gata peubiyeu udeb. laju gata peungeut umat ulon dan awaknyan peucaya ubak gata.' " tuhan nyang mahamanyang meufeureuman ubak ureueng-ureueng inong nyang meulagak lagee nabiah nyan, "ulon banci bak gleueng-gleueng jimat nyang gata ngui keu gata kuasa ateueh udeb mate umat ulon. gleueng-gleueng nyan lon seuntak bak jaroe gata, dan ureueng-ureueng nyang gata kuasa lon peubeubaih. tudong-tudong sakeuti gata ulon priek, dan umat ulon lon peujioh nibak peungaroh jeuhet gata siumu masa. dan baro kheueh gata teupeue bahwa ulon kheueh tuhan. ureueng-ureueng nyang jroh nyang hana jitem gata peubuet sapeue ateueh jih, gata peujeuet cut ate deungon sulet gata nyan. ureueng-ureueng jeuhet gata peujeuet raya ate mangat teutab meudesa dan hana teupeu udeb phon saat nyoe. jinoenyoe ka kheueh habeh keumalon-keumalon peuleusu dan ramaian-ramaian buhak. ulon peuseulamat umat lon nibak peungaroh jeuhet gata. dan baro kheueh gata teupeue bahwa ulon kheueh tuhan." na meupadub droe nibak peumimpin bansa israel jijak meuhadab ubak ulon keu jiteumanyong keuheundak tuhan. dan meufeureuman tuhan ubak ulon, "he manusia fana, ureueng-ureueng nyoe ka jipeucaya droe ubak beurala-beurala sampoe awaknyan ka rhot u dalam desya. ek kheueh ulon jityanyong le awaknyan? sabab nyan, tapeugah kheueh ubak awaknyan bahwa ulon, tuhan nyang mahamanyang lon peusan lagee nyoe, 'tieb-tieb ureueng israel nyang ka jipeucaya droe ubak beurala dan geupeubiyeu droe jihnyan rhot u dalam desya, oh lheureu nyan laju geujak lakee naseuhat ubak sidroe nabi, hainyan lon jaweueb keudroe deungon jeunaweub nyang patot keu beurala-beurala jih nyang le nyan! bandum beurala nyan ka jipeujioh umat ulon nibak ulon, teuma mudah-mudahan deungon na lon jaweueb nyang lagee nyan umat lon jiwoe ubak ulon.' neupeugah cit teuma ubak ureueng israel, bahwa ulon, tuhan nyang mahamanyang lon peugah ubak awaknyan, 'meutobat kheueh nibak banmandum desya gata, dan tatinggai kheueh beurala-beurala gata nyang luwat that nyan.' tieb-tieb ureueng israel atawa ureueng aseng nyang na tinggai lamkawan bansa israel, nyang jipeujioh ulon dan jipeucaya droe jih ubak beurala, laju jilakee naseuhat ubak sidroe nabi, nyan lon jaweueb keudroe. ulon kulawan jihnyan dan lon peujeuet jihnyan sibagoe cuntoh keu nyang laen. ulon lon peuaseng jihnyan nibak umat lon, dan baro kheueh jiteupeue le umat lon bahwa ulon kheueh tuhan. meunoye sidroe nabi ka jipeungeut sampoe jijaweueb nyang salah, ulon kheueh nyang peungeut gobnyan. ulon, tuhan allah nyang mahamanyang lon

peuaseng jihnyan nibak ureueng-ureueng israel. bah kheueh nabi nyan meunan cit deungon awaknyan nyang lakee naseuhat jihnyan, meuteume hukoman nyang saban. bandum nyan ulon peubuet mangat ureueng israel bek le jipeujioh ulon dan bek teuma jipeukutoe droe deungon desya. deungon lagee nyan awaknyan jeuet keu umat lon, dan ulon jeuet keu allah awaknyan." ulon, tuhan nyang mahamanyang ka lon peugah haba. tuhan meufeureuman ubak ulon, "he manusia fana, meunyeo saboh nanggroe meudesia dan hana seutia ubak ulon, ulon kuhukom nanggroe nyan. ulon peuhanco keuneubah peunajoh awaknyan, lon peutron bala dan musem deuk meunan cit ulon peumate bubena manusia dan beulatang. bahpi nabi nuh, nabi danel dan nabi ayub na tinggai di teupat nyan, dan keuet awaknyan ban lhee nyang hase jipeuseulamat na kheueh nyawong jih keudroe. ulon, tuhan nyang mahamanyang ka lon peugah haba. jeuet mantong ulon peuteuka beulatang-beulatang juah keu jiteugom peunduduek nanggroe nyan, sampoe daerah nyan ka jeuet keu teupat nyang paleng meubahya dan hana meusidroe manusia pih nyang ji jeuet jak keunan. bahpi nabi nuh, nabi danel, dan nabi ayub tinggai disinan, dan deumi ulon, allah nyang udeb, tuhan nyang mahamanyang, awaknyan hana meuhase jipeuseulamat soe mantong, bahpi aneuek awaknyan keudroe pih hana meuhase jipeuseulamat. teuma awaknyan keudroe mantong nyang seulamat, dan nanggroe nyan jeuet keu padang pasi. jeuet mantong lon peutron prang u nanggroe nyan, dan lon kirem sinjata-sinjata nyang ampuh keu teupeubinasa bah kheueh nyan manusia meunan cit beulatang. dan bahpi ban lhee droe awaknyan tinggai disinan, teuma deumi ulon, allah nyang udeb, tuhan nyang mahamanyang, awaknyan hana meuhase jipeuseulamat soe mantong, meunan cit aneuek awaknyan keudroe pih hana. teuma awaknyan keudroe mantong kheueh nyang seulamat. jeuet mantong ulon peutron bala peunyaket u nanggroe nyan, dan lon peuju beungeh ulon keu jihnyan sampoe manusia meunan cit beulatang teuma binasa. dan bahpi nabi nuh, nabi danel dan nabi ayub tinggai disinan, teuma deumi ulon, allah nyang udeb, tuhan nyang mahamanyang, awaknyan hana hase jipeuseulamat soe mantong, bahpi aneuek awaknyan keudroe. teuma awaknyan keudroe mantong nyang seulamat sabab keuet awaknyan." tuhan nyang mahamanyang meufeureuman, "ulon lon peu rhot ban peuet boh hukoman lon ateuheh yusalem keu teupeuranab bah kheueh nyan manusia meunan cit deungon beulatang. hukoman nyan na kheueh: prang, bala deuk, beulatang buih dan wabah peunyaket. meunyeo na nyang hase jipeulheueh droe dan hase jipeuseulamat aneuek-aneuek jih keudroe, tangiang kheueh awaknyan meunyeo awaknyan jijak ubak gata. kalon kheueh pakriban jeuhet jih awaknyan, dan gata sadar dan paih that peue nyang ka lon peubuet keu lon hukom yusalem. dan gatapih muphom bahwa bandum nyang ulon peubuet nyan na alasan. ulon, tuhan nyang mahamanyang ka lon peugah haba." tuhan meufeureuman ubak ulon, "he manusia fana, peue keuleubehan kayee anggo ngon

kayee laen dalam gle? peu kheueh keuleubehan bak anggo nibak bak kayee dalam gle? peu kheueh jeuet kayee nyan teupeuguna keu teupeuget sapeue-sapeue beunda? peu kheueh jeuet teupeuget ceunawiet keuteupat gantung peukakaih? hana meuguna seulaen keukayee apui. dan meunyeo bandua ujong jih habeh tutong, dan bagian teungoh jih pih jeuet keu arang, peu kheueh mantong meuguna? hana le! dan sigohlom teutot, ka hana jeuet ngui le. peue lom oh ka ltheueh tutong dan jipeuhangoh le apui!" sabab nyan tuhan nyang mahamanyang geupeugah, "lagee bak kayee anggo nyang teucok dalam gle laju teutot, meunan cit teuma lon peusanat ateuheh peunduduek yusalem! ulon lom hukom awaknyan. bahpi awaknyan ka teupeusie nibak apui, teuma apui cit teuma nyang tot awaknyan. dan baro kheueh gata teupeue bahwa ulon kheueh tuhan. awaknyan hana seutia ubak ulon, sabab nyan, tanoh nyan lon peujeuet keu padang pasi. ulon, tuhan nyang mahamanyang ka geupeugah haba." tuhan meufeureuman lom ubak ulon, "he manusia fana, tunyok kheueh bak yusalem buet-buet nyang kuto nyang ka jipeubuet." tuhan nyang mahamanyang geuyue ubak ulon mangat lon jak peusampoe peusan nyoe ubak yusalem, "he yusalem, gata lahe bak tanoh kanaan. ureueng syiek gata nyang agam ureueng amori dan ma gata ureueng het. bak watee gata lahe hana ureueng nyang koh talo pusat gata, atawa nyang pumano gata, atawa teuboreh gata ngon sira, atawa nyang peulimbog gata deungon ija. hana meusidroe pi nyang na gaseh keu gata sampoe jitem peubuet hai-hai nyang lagee nyan keu gata. watee gata lahe, hana nyang weueh keu gata, dan gata jitiek di lam ladang. oh ltheuehnyan lon jak rot nyan dan leumah laju lon kalon gata meulawan-lawan lam darah gata nyang roe meujeu-jeu, teuma ulon hana lon peubiyeu gata mate. ulon cok ie laju ulon rlah darah nyang meulabo bak tuboh gata. lon geusok kulet gata ngon minyeuk zaiton. lon peurayeuk gata lagee sinaman nyang subo. gata bagaih that raya, seuhat dan manyang seumampai, dan jeuet keusidroe inong muda. boh mom gata ka jipeuphon buntok dan ok gata panyang, teuma gata teulon hana sapeue na. watee lon jak rot nyan lom, deuh lon kalon bahwa ka trok watee gata keu meucinta. ulon leueng bajee jubah lon bak tuboh gata nyang teulon, dan lon meujanji cinta ulon ubak gata. nyoe, lon ikat janji meukawen deungon gata, dan gata jeuet keumilek ulon. ulon, tuhan nyang mahamanyang ka lon peugah haba. oh ltheuehnyan ulon peusampoe ubak gata ija gaon nyang meukasab, sipatu nibak kulet nyang paleng haloh, ikat ulee nibak ija lineun dan jubah sutra. ulon peungui gata deungon peumata, talo takue dan glueung-glueung nyang tari. ulon jok keugata euncien meu idong, keurabu dan mahkota nyang gagah. meunan kheueh gata teupeungui meuh dan pirak; peukayan gata teupeuget nibak ija lineun dan sutra meukasab. gata jeuet neupajoh ruti dan teurigu nyang get, deungon meulisan dan minyeuk zaiton. ceudah ngon gagah gatanyan hana ngon peusa dan gata jeuet keu ratu. sigala bansa jipujoe keu lagak gata nyang rupawan, dan ulon kheueh nyang ka peujeuet gata gagah hana

ngon peusa. ulon, tuhan nyang mahamanyang ka lon peugah haba. teuma gata salah peuguna keu ceudehan gata dan nan gata nyang meusyehu. gata eh ngon agam toh mantong nyang na jijak. siladum nibak peukayan gata tapeuguna keu teuhias tempat seumah beurala gata. gata jeuet keu inong jeuhet dan tabri tuboh gata keu tieb-tieb ureueng agam. nibak piasan meuh dan pirak nyang ulon bri ubak gata, atranyan gata peuet patong-patong ureueng agam, laju gata peubuet meumukah deungan patong nyan. gata peungui ubak patong-patong nyan peukayan meukasab nyang ka ulon bri ubak gata. gata peuseumah ubak awaknyan minyeuk zaiton dan dupa nyang ka gata teurimong nibak ulon. ulon bri keu gata peunajoh nibak teupong teurigu nyang paleng get, madu dan minyeuk zaiton nyang paleng aseuli. teuma bandum nyan gata peuseumah ubak beurala-beurala nyan keu gata peugalak ate awaknyan. ulon, tuhan nyang mahamanyang ka lon peugah haba. oh lheureh nyan gata peuseumah aneuek-aneuek geutanyoe, agam dan inong, jeuet keu keureubeuen keu beurala-beurala nyan. peu kheueh gohlom seb bahwa gata hana seutia ubak ulon? peu kheueh haroh tacok aneuek-aneuek ulon dan gata keureubeuen awaknyan keu beurala nyan? lam udeb gata nyang lumpah kuto sibagoe inong jeuhet nyan, mubacutpi hana gata ingat masa yoh ubit gata, watee teulon dan meugawang-gawang lam darah gata nyang meubayak nyan." tuhan nyang mahamanyang meufeureuman, "ceulaka kheueh gata! lumpah ceulaka! gata ka tapeubuet bandum keujeuhetan nyan. lom teuma, diteungoh-teungoh banda dan nibak tieb-tieb bineh rot raya gata peudong tempat-tempat seumah beurala dan meulunte. gata ka tapeukutoe keulagak gata. tuboh gata tapeutaba ubak soe mantong ureueng agam nyang na teuka, dan hana pioh-pioh tapeubuet mukah. nanggroe meuse, teutangga gata nyang raya nafeusu jihnyan, ka gata peungon bak tempat eh. gata tasaja meulunte mangat ulon bagaih beungeh. jinoenyeu ulon cok tendakan keu lon hukom gata dan ulon cok beureukat nyang ka ulon bri keu gata. lon jok gata ubak ureueng-ureueng filistin nyang banci keu gata dan nyang bosan jikalon pi-e gata nyang kuto nyan. teuma nibak gata gohlom cit meurasu puih; sabab nyan kheueh gata tiyeub-tiyeub ureueng asyur. gata jeuet keu mukah awaknyan, teuma hantom cit puih nibak awaknyan. oh lheurehnyan laju gata jeuet keu mukah ureueng babel, bansa meukat nyan. teuma awaknyan pi hana hase jipeupuih gata." tuhan nyang mahamanyang meufeureuman, "bandum nyan ka gata peubuet lagee inong lunte nyang hana meumalee. bak teungoh-teungoh banda dan di tieb-tieb rot raya gata peudong tempat-tempat seumah beurala dan tempat meulunte. teuma gata kon kheueh lagee lunte biasa nyang jimita peng. gata lagee sidroe peurumoh nyang jikhianat lakoe droe jih dan jipeubuet jeuhet ngon agam laen. sidroe inong lunte sabe meuteume meunayeue, teuma seubalek jih gata kheueh nyang bri hadiah keu geunaseh-geunaseh gata, dan gata rayu awaknyan deungan peng mangat awaknyan jitem teuka dipat mantong keu jijak eh

deungan gata. gata inong lunte nyang laen nibak inong-inong nyang laen. hana nyang paksa gata jeuet keu lunte. gata hana teubayeue. bit, gata laen nibak nyang laen." he yerusalem, inong lunte, deungoe kheueh peue nyang geufeureuman le tuhan nyang mahamanyang, "gata ka tasuet bajee gata, dan sibagoe lunte gata jok droe gata ubak geunaseh-geunaseh dan beurala-beurala gata nyang lumpah luwat nyan. aneuek-aneuek gata tapoh mate dan gata keureubeuen keu beurala-beurala nyan. sabab nyan, bandum mantan geunaseh gata lon peusapat, bah kheueh nyang gata galak meunan cit nyang gata banci. awaknyan jidong jihudom gata bansieseun lingka dan jisuet banmandum peukayan gata, sampoe awaknyan hase jingengi tuboh gata nyang ka teulon nyan. gata lon hukom sabab meumukah dan peumate gobnyan nyang ka peubuet nyan. nibak beungeh dan meureuka ulon nyan, gata lon hukom mate. gata ulon jok ubak geunaseh-geunaseh gata keudroe, dan awaknyan jireuloh bandum tempat gata meumukah dan seumah beurala. banmandum peukayan dan piasan gata awaknyan reupah, sampoe gata ka teulon lheureh. awaknyan jiyue geulawa gata bak ureueng rame ngon aneuk batee, dan jicang-cang tuboh gata deungan peudeueng. awaknyan jitot bubena rumoh gata dan jiyue bak ureueng inong jak peusaksi gata teuhukom. meunan kheueh cara jih lon peupioh gata meumukah. gata hana jibagi-bagi le hadiah keu geunaseh-geunaseh gata. baro kheueh oh lheureh bandum nyan teujadi beungeh ulon reuda, dan ulon jeuet teunang lom. ulon hana beungeh le atawa ceumuru. ulon ku hukom gata sabab gata hana taingat pakriban lon useuha gata bak watee gata mantong muda. gata tapeu jeuet ulon beungeh deungan bandum pi-e gata nyang jeuhet nyan. pakon bandum pi-e gata nyang kuto ngon luwat nyan mantong gata tamah lom ngon buet meumukah? ulon tuhan nyang mahamanyang ka lon peugah haba." tuhan meufeureuman, "he yerusalem, di ureueng rame jipeukeunong pribasa nyoe keu gata, 'lagee ma jih, meunan cit ngon aneuek inong jih.' beutoi, gata na kheueh aneuek inong ma gata. geuhnyan banci keu lakoe jih dan keu aneuek jih keudroe. gata saban that lagee syedara-syedara gata nyang inong nyang banci keu lakoe dan aneuek-aneuek jihnyan. gata dan syedara gata, dan banda-banda nyang na ban seukeulileng gata ma jih ureueng het dan ayah ureueng amori. cutda gata na kheueh samaria di utara deungan bandum gampong. dan adoe gata na kheueh sodom di seulatan deungan banmandum gampong nyang disinan. peu kheueh ka puih gata deungan cara taseutot langkah awaknyan dan taturot buet awaknyan nyang kuto nyan? gohlom! hana treb le gata leubeh jeuhet lom nibak awaknyan. deumi ulon, po teu allah nyang udeb, kheun tuhan nyang mahamanyang, syedara gata sodom deungan gampong-gampong na disinan gohlom na lom jipeubuet jeuhet lagee gata peubuet nyan ngon gampong-gampong gata. sodom dan gampong-gampong disinan sombong sabab makmu ngon peunajoh nyang le teukeubah lom teuma meuteume udeb ngon teunang dan dame. teuma awaknyan hana jitem ngieng ureueng gasien ngon

ureueng papa. awaknyan sombong dan kreueh ulee, dan jipeubuet hai-hai nyang ulon banci, sabab nyan awaknyan ulon peuhanco lagee nyang ka ltheueh gata kalon keudroe. bit samaria jeuhet, teuma desya jih hana siparoe nibak desya-desya gata. pi-e gata jioh leubeh jeuhet. syedara-syedara gata nyang inong siulah-ulah hana meusalah meunyo teubandeng deungon gata. gata haroh teurasa malee dan hina!" tuhan meufeureuman ubak yerusalem, "sodom dan samaria meunan cit deungon gampong-gampong awaknyan lon peumakmu lom. oh ka ltheuehnyan, baro kheueh gata lon peumakmu lom teuma. deungon lagee nyan gata malee ubak droe gata keudroe, dan keuhinaan gata teutunyok ubak bubena syedara gata padubna get naseb awaknyan. awaknyan dan gampong-gampong jeuet keumakmu lom, meunan cit deungon gata dan gampong-gampong gata. kon kheueh gata ka ltheueh tapeukem sodom watee gata mantong sombong dan buet jeuhet gata nyan gohlom leumah? bak saat nyoe gata saban cit lagee sodom; gata ka jeuet keubahan jipeukem le ureueng edom, ureueng filistin dan wareh lingka gata nyang laen nyang banci keu gata. gata haroh meudeurita sibagoe akibat buet gata nyang kuto dan luwat nyan. ulon, tuhan ka lon peugah haba." tuhan nyang mahamanyang meufeureuman, "gata lon peujeuet nyang sipadan deungon buet gata, sabab gata ka ta iengkeue bak sumpah gata dan taliuengkeu peujanjian ulon deungon gata. teuma ulon lon ikat peujanjian nyang ka ulon peugot deungon gata bak watee gata mantong muda dan lon peugot peujanjian deungon gata nyan na kheueh keu siumu masa. gata teuingat keu buet-buet gata dan meurasa malee watee mandum syedara-syedara gata ulon peuriwang ubak gata. awaknyan lon peujeuet lagee aneuek-aneuek gata, bahpi hainyan hana roh bak peujanjian ulon deungon gata. ulon lon peugot peujanjian nyang baro deungon gata. teuma baro kheueh tateupeue le gata bahwa ulon kheueh tuhan. ulon lon peumeuah banmandum salah gata, teuma gata hana tuwoe dan gata meurasa malee keu tapeugah peue mantong. ulon, tuhan nyang mahamanyang ka lon peugah haba." tuhan meufeureuman ubak ulon, "he manusia fana, calitra laju ubak ureueng-ureueng israel miseu umpama-miseu umpama nyoe, nyang ulon, tuhan nyang mahamanyang keuneuk peusampoe ubak awaknyan: na kheueh saboh cicem rajawali nyang paleng raya nyang meubulee lagak dan meusayeub luwah dan lon teuga. cicem nyan jipo u gunong libanon, laju jiwiet sibak pucok ceumara, laju atranyan jipeupo sira jiba jikeubah laju bak banda dagang nyang rame. oh ltheuehnyan laju jicok sibak seunaman nyang mantong muda nibak tanoh israel, dan laju jipula bak tanoh ladang nyang subo, nyang hantom kureueng ie. seunaman nyan jeuet keu bak anggo nyang jitimoh miyueb teuma jimeueue luwah. cabeueng-cabeueng jih jipeukeu ubak cicem rajawali nyan, dan ukeu-ukeu jih meusinom khong that dalam tanoh. bak anggo nyan rampak lumpah na. teungoh watee nyan na teuma saboh teuk cicem rajawali raksasa nyang laen; sayeueb jih luwah dan bulee jih teubai. laju diba anggo nyan jipeukeu ukeu-ukeu dan cabeueng-cabeueng jih ubak cicem rajawali nyan

deungon harapan mangat cicem rajawali nyan jitem jok keu jihnyan leubeh le lom ie nibak nyang ka na lam ladang nyan. padahai bak anggo nyan ka teupula bak tanoh nyang subo deungon ie nyang meulimpah, sampoe bak anggo nyan jiteubiet on nyang rampak, jimuboh nyang le, dan jeuet keu bak anggo nyang get. dan, ulon, tuhan nyang mahamanyang, lon teumanyong: peu kheueh hase bak anggo nyan udeb dan meukeumang? peu kheueh han jilot le cicem rajawali nyang phon habeh deungon ukeu-ukeu jih, jiluroh boh jih, jiwiet deuen-deuen jih dan jipeubiyeu jihnyan layee? hana peureulee teunaga atawa bansa nyang le nyang peukasa keu teulot bak kayee nyan sampoe habeh ngon ukeu-ukeu jih. beutoi jih nyan ka teupula kong that, teuma peu kheueh jih nyan meuhase jitimoh sabe dan meukeumang? peu kheueh jihnyan hana layee meunyoe jiyueb le angen timu? peu kheueh jihnyan hana to ditempat jihnyan teupula?" tuhan meufeureuman ubak ulon, "tanyong kheueh laju ubak ureueng-ureueng beurontak nyan, peu kheueh awaknyan jipeuphom makna miseu umpama nyan. jak peutrok laju ubak awaknyan bahwa raja babel ka jiteuka u yerusalem, dan jiangkot raja yehuda meunan cit deungon ureueng-ureueng rayeuk banda nyan u babel. laju gobnyan jipileh sidroe lamkawan keuluwarga raja yehuda nyan, jipeuget peujanjian deungon jih nyan, dan jiyue jihnyan meusumpah seutia ubak gobnyan. raja babel nyan jisandra ureueng-ureueng peunteng, mangat keurajeun yehuda nyan hana jibeudoh le, dan keu teujamen bahwa peujanjian nyan beutoi-beutoi teupeuna. teuma le raja yehuda jibeurontak sira jikirem utosan u nanggroe meuse mangat meuteume guda dan tantra nyang le. peu kheueh jihnyan meuhase? peu kheueh jihnyan teupeubiyeu seulamat? hana mungken jihnyan ji-iengkeue ubak peujanjian meunyoe hana teupeukeungh hukoman! deumi ulon, po teu allah nyang udeb, tuhan nyang mahamanyang, raja yehuda mate di babel, sabab jihnyan ka ji iengkeue bak sumpah jih keudroe dan ji-iengkeue peujanjian jihnyan deungon raja babel nyang ka jipeudeuk jihnyan u atueh takhta. dan bala tantra meuse nyang hebat nyan, hana hase jitulong jihnyan nibak jiseureubu ureueng-ureueng babel nyang jipeuget sinamon-sinamon tanoh dan jikueh got-got keu geupeumate ureueng nyang le. sabab jihnyan ka jilingkeue sumpah dan peujanjian jih nyan, dan jihnyan hana hase jipeuplueng droe. deumi ulon, allah nyang udeb, tuhan nyang mahamanyang, raja yehuda lon hukom sabab ka jilingkeue peujanjian jihnyan deungon raja babel, padahai jihnyan ka jimeusumpah atueh nan ulon keu jipeupeunoh janji. ulon lon tiek jeue mangat lon drob jihnyan. jihnyan ulon ba u babel dan lon hukom disinan, sabab jihnyan hana seutia ubak ulon. sipa-i jihnyan nyang paleng get mate dimideuen prang, dan nyang meuhase jipeuplueng droe ulon peu crebre u jeueb-jeueb ujong. dan baro kheueh jiteupeue le umat lon bahwa ulon, tuhan ka lon peugah haba." nyoe kheueh feureuman tuhan nyang mahamanyang, "nibak bak ceumara nyang manyang, ulon pot pucok jih laju ulon wiet sikrak cabeueng jih nyang muda; lon pula cabeueng nyan bak gunong

manjang meusampoh awan. bak gunung nyang paleng manjang di israel, cabeung kayee nyan ulon pateng. disinan kayee nyan meutarok, dan oh lheureh nyan jimuboh teuma, laju jeuet keubak ceumara nyang meusyehu meugah. meubagoe jeuneh cicem jimeu empuang didalam nyan dan jimeuceu dimiyueb lindongan nyan. bandum bak kayee lam nanggroe muphom bahwa ulon kheueh tuhan. kayee nyang manjang ulon koh; kayee nyang miyueb ulon peujeuet jitimoh manjang. kayee nyang luhu lon peutho krenge; dan bak kayee nyang tho ulon peutimoh tarok dan meukeumang. ulon, tuhan, ka lon peugah haba, bandum tutoe haba lon teuma teulaksana." tuhan meufereuman ubak ulon, "pakon pribasa nyoe sabe jipeugah-peugah di nanggroe israel? 'ureueng tuha jipajoh boh anggo nyang masam rasa jih, teuma aneuek-aneuek manyak kheueh nyang singke gigo.' deumi ulon, allah nyang udeb, tuhan nyang mahamanyang, pribasanyan hana teupeugah di nanggroe israel. nyawong tieb-tieb ureueng na kheueh atra ulon, bah kheueh nyan nyawong ureueng tuha meunan cit nyawong aneuek jihnyan. ureueng nyang meudesya, jihnyan kheueh nyang mate. miseu jih na ureueng nyang get, ade dan juoe. ureueng nyan hana jiseumah beurala ureueng israel atawa geupajoh keureubeuen nyang teupeuseumah ubak teumapat seumuja dewa-dewa. gobnyan hantom jirayu peurumoh ureueng laen atawa geueh sajan ngon ureueng inong nyang teungoh meuhe. jihnyan hantom jiteumipee atawa meureupah atra ureueng laen. barang-barang jaminan ureueng nyang meu utang keu gobnyan sabe jijok pulang oh ka trok bak watee. ureueng nyang deuk jibri peunajoh dan ureueng nyang hana meubajee, jijok peukayan. gobnyan hantom na jipeu utang ureueng laen deungon cara geucok bungong. gobnyan hanjitem peubuet buet nyang jeuhet dan bak tieb-tieb na meudakwa jihnyan jibri keuputosan nyang juoe. ureueng jipatuh peue nyang ulon peurintah dan jitaat banmandum ubak hukom-hukom lon. ureueng nyang lageenyan kheueh nyang juoe dan teutab udeb. ulon, tuhan nyang mahamanyang ka geupeugah haba. teuma miseu jih ureueng nyan na aneuek jih nyang tukang meurampok, peumate gob, dan jipeubuet buet nyang jeuhet nyang laen nyang hantom jipeubuet le ayah jihnyan simantong ayah geuh nyan udeb lam donya. jihnyan jipajoh keureubeuen peuseumahan di teumapat-teumapat teupujoe dewa-dewa. gobnyan jigoda dan geumeumukah ngon peurumoh ureueng laen. gobnyan galak jipeunget ureueng gasien, meurampok, dan jisita barang jaminan ureueng nyang meu utang ubak jihnyan. jihnyan jijkak bak kuil-kuil ureueng nyang hana jituri keu tuhan dan jiseumah beurala nyang kutoe luwabiasa. ureueng nyan jijok keu ureueng nyang meu utang bak jihnyan deungon meubungong. peu kheueh ureueng nyang lagee nyan udeb? hana! ureueng ka jipeubuet bandum buet-buet nyang lumpah kuto nyan, dan jihnyan teuma mate! mate ureueng nyan na kheueh akibat buet-buet nyang jipeubuet le ureueng nyan keudroe. miseu jih lom ureueng nyang peubuet buet nyang jeuhet nyan na jimeu aneuek, dan aneuek nyan jikalon bandum buet

nyang jipeubuet le ureueng syiek jih, teuma aneuek nyan hana jiseutot lagee nyang jipeubuet le ureueng syiek jih nyan. aneuek nyan hana jitem seumah beurala ureueng israel, atawa jipajoh keureubeuen peuseumahan di teumapat seumujoe dewa-dewa. jihnyan hantom na jirayu peurumoh ureueng laen, atawa jiteugon dan jireupah soe mantong. barang jaminan ureueng nyang meu utang bak jihnyan sabe jijok pulang lagee sot teuma. ureueng nyang deuk jijok peunajoh dan ureueng nyang hana peukayan jibri bajee. jihnyan hantom na jipeubuet jeuhet dan jipeu utang ureueng laen deungon meubungong. jihnyan taat ubak hukom-hukom lon dan patuh ubak peurintah ulon. aneuek nyan hana mate ngon sabab desya-desya ayah jihnyan. teuma teutab udeb. seubalek jih, ureueng syiek jihnyan nyang galak keu buet teumipee, meurampok dan jipeubuet buet nyang jeuhet nyang laen, teuma mate ngon sabab desya-desya jih nyan keudroe. teuma na ureueng nyang teumanyong pakon aneuek nyan hana meusan jitunggong akibat desya-desya ayah jihnyan. jaweueb jih na kheueh lagee nyoe, sabab aneuek nyan get dan juoe. jihnyan taat ubak hukom-hukom lon dan jipeubuet bandum nyan deungon seutia, dan jihnyan teutab udeb. ureueng nyang jipeubuet desya, ureueng nyan kheueh nyang mate. aneuek hana haroh jitunggong akibat desya nyang jipeubuet le ureueng syiek jih; seubalek jih, ayah pi hana haroh jitunggong akibat nibak desya-desya nyang jipeubuet le aneuek jihnyan. ureueng nyang jroh meuteume ganjaran nyang jroh sabab buet jihnyan nyang jroh. dan ureueng nyang jeuhet meudeurita akibat nibak buet jih nyang jeuhet nyan. meunyoe sidroe ureueng jeuhet hana le jipeubuet desya, dan ka jipeuphon taat ubak hukom-hukom lon, dan jipeubuet buet-buet nyang get dan beutoi, ureueng nyan hana mate. bandum desya ureueng nyan lon peumaphon; ureueng nyan udeb, sabab jipeubuet nyan beutoi. peu kheueh tapike ulon, tuhan nyang mahamanyang galak meunyoe ureueng nyang jeuhet mate? meubacut pih hana! ulon meuharab mangat ureueng nyan jitinggai bandum desya-desya jihnyan mangat jihnyan teutab udeb. teuma meunyoe sidroe ureueng nyang jroh hana jipeubuet le buet nyang jroh, teuma ka jipeuphon peubuet buet nyang jeuhet dan banmandum buet nyang luwat han ek teukira, nyang lazem jih jipeubuet le ureueng jeuhet, peu kheueh jih teutab udeb? hana! nibak buet-buet jih nyang get nyan, hana meusapeue pih teu ingat lom. gobnyan mate sabab buet jih nyang meudesya dan hana seutia ubak ulon. mungken na nyang peugah lagee nyoe, 'buet tuhan nyan keuliru.' deungoe kheueh, he ureueng israel! peu kheueh keuliru tindakan ulon? gata kheueh nyang keuliru. meunyoe ureueng nyang jroh hana jipeubuet le nyang get, teuma ka jipeuphon peubuet buet nyang jeuhet, gobnyan mate, sabab buet nyang jeuhet nyang ka jipeubuet le gobnyan. teuma meunyoe ureueng nyang jeuhet hana le jipeubuet desya teuma ka jipeuphon peubuet buet nyang beutoi dan get, jaweueb jih na kheueh seulamat. ureuengnyan ka sadar bandum salah jihnyan laju jipioh jipeubuet desya. deungon lagee nyan jihnyan hana mate, teuma teutab udeb. dan gata, he ureueng israel, gata

peugah bahwa tendakan tuhan nyan keuliru. peu kheueh keuliru tendakan ulon, he israel? hana! gata kheueh nyan keuliru!" tuhan nyan mahamanyang, meufeureuman, "he ureueng-ureueng israel, ulon kupeusidang somantong ureueng nyan paih deungon buet jih. meutobat kheueh nibak desya-desya gata. bek tapeubiyeu desya gata jipeuhanco droe gata keudroe. ploh laju bandum buet nyan jeuhet nyan gata peubuet dan bah kheueh ate dan pikeran gata jeuet keu baro. pakon gata haroh mate? ulon hana galak meunyeo sidroe ureueng mate. tinggai kheueh bandum desya-desya gata jeuet gata teutab udeb. ulon, tuhan nyan mahamanyang ka lon peugah haba." po teu allah geuyue bak ulon lon peuca-e ratok nyoe keu dua droe pangeran israel: ma gata lagee singa inong nyan hayeue dan luwa biasa. gobnyan nyan peurayeuk aneuk-aneuk jih keudroe lamkawan singa-singa nyan peukasa. saboh lamkawan aneuk jihnyan laju jipeurunoe pakriban cara jih teumita mangsa. dan jeuet kheueh jihnyan keu singa raya nyan teugom dan nyan pajoh manusia. bansa-bansa nyan deungoe keuhai jih nyan laju meugumpoi keu jijak drob singa raya nyan. singa nyan laju jipeubak lam uruek oh ltheuhnyan jidrob, laju jihue u nanggroe meuse deungon ceunawiet. sia-sia mantong nang singa nyan jipreh-preh aneuk; laju jiteupeue dan gadoh kheueh harapan keu aneuk teucinta. dan aneuk jihnyan nyan laen jilatah lom jeuet keu singa nyan buih dan peukasa. aneuk singa nyan ka jeuet keu rayeuk dan jimeurakan ngon singa-singa nyan laen. laju jimeurunoe jimita mangsa, dan jeuet keu singa nyan makheun manusia. kuta-kuta laju jiheuntam, banda-banda jipeuhanco. bandum peunduduek nanggroe yo meugam-gam jdeungoe taum singa nyan sampoe meugeunta. teuma bansa-bansa nyan lam wilayah keulileng nyan jiseureugab jihnyan rot meubagoe jurasan. jicok ngon jeue laju jitiek keuneuk drob singa buih nyan, dan singa nyan pih meucarueh lam peurangkab awaknyan. laju jipeutamong lam uempueng singa, jiba laju u nanggroe babel meuhadab raja. singa nyan jijaga kong that mangat taum jih bek teudeungoe le di ateuh buket-buket israel nyan manyang. ma gata lagee bak anggo nyan ceudah nyan timoh di lampoh bak bineh aneuk krueng. bak anggo nyan ka jeuet keu rampak dan jimuboh sabab ie disinan na meulimpah ruwah. cabeueng jih kong, hana mudah teuwiet gagah meunyeo teucok keu tungkat keurajeuen. pucak jih manyang meulambong rab sampoe u dalam awan. jihnyan jihoreumat le bandum ureueng sabab timoh jih manyang dan on jih rampak. teuma kayee nyan jibot le jaroe-jaroe nyan beungeh, oh ltheuhnyan jiseumpom ateuh tanoh. watee jipot angen timu, sampoe habeh tho boh jih nyan get. cabeueng jih patah, ka jeuet keu tho laju teutot. jinoenyeo jihnyan teupula di padang pasie, bak tanoh nyan tho lom hana meu ie. bak anggo nyan laju jilieh le apui hu nyan teungoh jimeu eue; cabeueng dan boh jih habeh tutong. cabeueng jih jinoe hana teunaga; hana mungkin teupeu jeuet keu tungkat keurajeuen. nyan kheueh ratok nyan meu ulang-ulang nyan jipeu ca-e le umat. bak tanggai siploh

buleuen limong, bak thon nyan keutujoh masa kameo teupeu aseng di tempat nyan teuboih, na papa dub droe peumimpin israel jijak meurumpok ubak ulon keu jilakee peutunyok tuhan. oh ka ltheueh awaknyan jiduek dikeue ulon, ulon deungoe tuhan meufeureuman ubak ulon, "he manusia fana, tapeugah kheueh ubak peumimpin-peumimpin nyan dan tapeugah laju bahwa ulon, tuhan nyan mahamanyang geupeugah lagee nyoe, 'tajeuet that gata lakee peutunyok ubak ulon! deumi ulon, allah nyan udeb, ulon hana kutem gata lakee peutunyok le gata! ulon, tuhan nyan mahamanyang ka lon peugah haba.'" "he manusia fana, peu kheueh ka siab gata peusidang awaknyan? dan, peubuet laju! peu ingat kheueh bak awaknyan peue-peue mantong keukeujian nyan ka jipeubuet le indatu awaknyan. peusampoe kheueh peue nyan ulon peugah nyoe. ulon ka lon pileh israel dan lon baiat sumpah keu awaknyan. di nanggroe meuse, ulon peugah droe ubak awaknyan sira lon kheun, 'ulon kheueh tuhan allah gata.' bak watee nyan ulon meusumpah lon ba awaknyan u luwa nanggroe nyan ulon pileh keu awaknyan. nanggroe nyan kaya dan subo, tanoh nyan paleng get bansigom donya. ulon yue awaknyan mangat jitiek banmandum patong-patong nyan lumpah luwat nyan awaknyan galak nyan, dan ulon tam awaknyan bek jijak peukuto droe deungon jiseumah beurala-beurala di meuse, sabab ulon kheueh tuhan po teu allah awaknyan. teuma awaknyan jilawan ulon dan hana jitem deungoe ulon. awaknyan hana jitem boih patong-patong beurala nyan kutoe ngon luwat nyan dan meunan cit hana jitem ploh jiseumah beurala-beurala meuse nyan. bak watee awaknyan mantong disideh, ulon ka siab keuneuk peusampoe beungeh ulon keu awaknyan. teuma ulon hana lon peubuet, mangat nan ulon hana jihina le bansa-bansa di tempat awaknyan tinggai. sabab dikeue bansa-bansa nyan, ka ltheueh ulon peumaklum bahwa bansa israel lon peuteubiet lam nanggroe meuse. laju ulon ba awaknyan peuteubiet nibak nanggroe meuse teujak u padang pasi. disinan ulon jok keu awaknyan peurintah-peurintah ulon dan lon peuruno bak awaknyan hukom-hukom lon nyan haroh awaknyan peubuet, sabab ureueng nyan taat ubak hukom nyan teutab udeb. ulon yue bak awaknyan mangat jihoreumat uroe sabat sibagoe tanda peujanjian ulon ngon awaknyan, keuteupeu ingat bak awaknyan bahwa ulon kheueh tuhan, ka lon peu khusus awaknyan keu ulon. teuma di padang pasi nyan cit teuma awaknyan jilawan ulon. awaknyan ji iengkeue peue-peue nyan ulon peurintah, dan jitulak hukom-hukom nyan ulon bri nyan teujamin bahwa ureueng nyan taat ubak hukom-hukom nyan teutab udeb. awaknyan ka jipeukutue that uroe sabat. sabab nyan, di padang pasi nyan ulon ka siab keuneuk lon peusampoe beungeh ulon nyan hana teukira brat jih keu awaknyan dan lon peurano awaknyan banmandum. teuma bandum nyan hana lon peubuet deumi keuhoreumatan nan ulon, mangat nan ulon hana jihina le bansa-bansa nyan ka jikalon lon peuteubiet bansa israel di nanggroe meuse. di padang pasi nyan cit ulon ancam bahwa bansa israel hana ulon

peutamong ubak tanoh nyang ka teukeubah keu awaknyan, tanoh nyang kaya dan subo dan nyang paleng get bansigom donya. ancaman nyan ulon peugah sabab awaknyan jianggab remeh peupeu nyang ulon peurintah, ji iengkeue hukom-hukom lon dan jipeukutoe uroe sabat. awaknyan leubeh galak jiseumah beurala-beurala jih keudroe. teuma oh lheureh nyan ulon weueh keu awaknyan, sampoe awaknyan hana jadeh ulon poh di padang pasi nyan. sikeubit jih ureueng-ureueng muda nyang na lamkawan awaknyan ulon naseuhat lagee nyoe, 'bek kheureh taseutot peue-peue mantong peuratoran nyang jipeuget le indatu gata. bek taseutot keubiasaan awaknyan dan bek teuma tapeukutoe droe gata keudroe deungon cara taseumah beurala-beurala awaknyan. ulon kheureh tuhan, allah gata, taat kheureh ubak hukom-hukom dan peurintah ulon. horeumat kheureh keu uroe sabat mangat jeuet keutanda peujanjian ulon deungon gata, mangat jeuet keu peuingat ubak gata bahwa ulon kheureh tuhan allah gata.' teuma angkatan muda nyan pih jipeu kreh jungka keu ulon. awaknyan ji iengkeue keu hukom-hukom lon dan jianggab kon bandum peue-peue nyang ka ulon peurintah keu jih nyan, ulon nyang jamin bahwa ureueng nyang taat ubak hukom lon teutab udeb. awaknyan jipeukutoe uroe sabat. sabab nyan kheureh ulon ka siab keuneuk peusak hoeb ngon beungeh nyang hana ngon peusa keu awaknyan nyang na di padang pasi nyan dan lon poh mate awaknyan banmandum. teuma bandum nyan hana lon peubuet mangat nan ulon bek jihina le bansa-bansa nyang ka jikalon lon peuteubiet bansa israel lam nanggroe meuse. dipadang pasi nyan cit teuma ulon meusumpah bahwa ulon lon peucubre awaknyan bansigom donya, sabab awaknyan ka jianggab hana peurintah-peurintah ulon, jilingkeue hukom-hukom lon, jipeukutoe uroe sabat, dan teutab jiseumah dewa-dewa nyang jipujoe le indatu awaknyan keudroe. oh lheureh nyan ulon jok ubak awaknyan hukom-hukom nyang hana get dan peurintah-peurintah nyang hana hase teubri udeb. ulon peubiyu awaknyan jipeukutoe droe deungon keureubeuen-keureubeuen nyang jipeubuet keudroe, dan aneuek-aneuek agam jih keudroe nyang tuha pi awaknyan keureubeuen. deungon cara nyan ulon hukom awaknyan mangat awaknyan jiteupeue bahwa ulon kheureh tuhan. meunan kheureh, he manusia fana, peutrok laju keu ureueng israel, peue nyang ulon, tuhan nyang mahamanyang peugah ubak awaknyan: nyoe cuntoh nyang laen nyang teutunyok pakriban indatu gata jihina ulon dan hana seutia ubak ulon. ulon ba awaknyan bak tanoh nyang ka lon meujanji ubak awaknyan. watee awaknyan jikalon buket-buket nyang manyang dan bak-bak kayee nyang rampak, awaknyan jipeuseumah keureubeuen bak teupat nyan. awaknyan jipeujeuet ulon beungeh sabab keureubeuen-keureubeuen nyang teutot dan peuseumahan anggo awaknyan. ulon peugah ubak awaknyan, 'teupat-teupat manyang peue nyang gata saweue nyan?' dan phon uroenyang teupat nyan geuboh nan 'teupat-teupat manyang.' dan peusampoe kheureh ubak ureueng israel peue nyang

ulon, tuhan po teu allah nyang mahamanyang peugah ubak awaknyan. 'pakon gata peubuet desya-desya lagee nyang ka jipeubuet le indatu gata? lagee awaknyan, gata taseutot cit beurala-beurala nyang kutoe ngon luwat nyan. dan sampoe an uroenyoe pih gata peukutoe droe gata deungon cara gata ba peuseumahan dan tatot aneuek-aneuek gata keudroe sibagoe keureubeuen keu beurala-beurala. dan mantong cit tajeuet lakee peutunyok nibak ulon? deumi ulon, po teu allah nyang udeb, tuhan nyang mahamanyang, gata hana lon idhin talakee peutunyok ubak ulon. gata keuneuk peusaban ngon bansa-bansa laen dan peunduduek nanggroe nyang jiseumah bak-bak kayee dan batee. teuma keuheundak gata nyan hana meuhase.' "deumi ulon, allah nyang udeb, tuhan nyang mahamanyang, gata ulon peuingat bahwa deungon beungeh ulon nyan, gata lon peurintah deungon kreh dan teugaih sampoe gata rasa keudroe kuasa ulon. gata lon peusapat dan lon ba lom u jeueb-jeueb nanggroe di teupat gata nyang ka ulon peucubre. laju gata ulon ba ubak 'guron bansa-bansa'. disinan gata ulon peusidang meuhadab muka, lagee nyan nyang ka ulon peubuet teuhadab indatu gata di guroen Sinai. ulon, tuhan nyang mahamanyang ka lon peugah haba. gata lon peusanuet deungon gasa dan kreh mangat gata taat ubak peujanjian ulon. bubena ureueng beurontak dan ureueng jeuhet lon peuaseng di teungoh-teungoh gata. awaknyan ulon ba nibak nanggroe-nanggroe nyang jinoenyoe na awaknyan tinggai dan hana lon idhin jigisa u tanoh israel. teuma baro kheureh gata teupeue bahwa ulon kheureh tuhan." tuhan nyang mahamanyang geupeugah, "he ureueng-ureueng israel, jinoenyoe teuseurah ubak gata. bek tapioh tapeubuet desya deungon beurala-beurala gata! teuma ingat kheureh bahwa oh ka lheureh nyan gata haroh tataat ulon dan hana le tapeukutoe nan ulon nyang suci deungon taba peuseumahan ubak beurala-beurala gata nyan. sabab di tanoh israel, bak pucak gunung ulon nyang suci, gata bandum, bansa israel taseumah ulon. disinan ulon teuma galak keu gata dan lon tem teurimong keureubeuen-keureubeuen nyang gata peuseumah, peue-peue nyang gata peuseumah nyang paleng get dan meuneubri-meuneubri gata nyang paleng khusus. oh ka lheureh gata ulon peuteubiet nibak nanggroe-nanggroe teupat gata teupeu crebre, ulon lon peusapat gata dan lon teurimong bandum keureubeuen gata nyang teutot. dan baro kheureh jiteupeue le bandum bansa bahwa ulon kheureh po teu allah nyang mahakudus. meunyoe gata ka ulon peuwoe lom u tanoh israel, tanoh nyang ulon peujanji keu indatu gata, baro kheureh gata teupeue bahwa ulon kheureh tuhan. disinan gata teuingat bandum buet-buet nyang lumpah luwat dan kutoe nyang ka jipeukutoe droe gata keudroe. dan gata bosan taingat bandum buet nyang jeuhet nyan. meunyoe gata ka lon peusanuet deungon lagee nyan deumi keuhoreumatan nan ulon, dan bukan sipadan deungon pi-e gata nyang brok meunan cit pi-e gata nyang jeuhet, tateupeue kheureh le gata ureueng israel bahwa ulon kheureh tuhan. ulon tuhan nyang mahamanyang ka lon peugah haba." tuhan

meufeuroman ubak ulon, lagee nyoe, "he manusia fana, takalon kheueh u siblahi seulan. teugaih kheueh tanoh seulan dan beungeh kheueh bak uteuen-uteuen disinan. tayue kheueh bak uteuen nyang disinan peue nyang ulon, tuhan nyang mahamanyang peugah keu awaknyan, 'deungoe kheueh! ulon lon peuhu apui nyang jipeututong bandum bak kayee nyang na nibak gata, bah kheueh nyan kayee tho meunan cit deungon kayee udeb. apui nyang hu meuhueb-huebnyan hana hase teupeulon. apui nyang jimeu eue nibak seulan u utara, dan bandum manusia jirasa keu seu uem apui nyan. awaknyan sadar bahwa ulon, tuhan ka lon peuhu apui nyan, dan hana meusidroe pi nyang hase peulon apui nyan.' " teuma ulon yehzekiel ulon peugah hainyan hana lon harok dan lon peugah, "tuhan nyang mahamanyang, bek tayue ulon peugah hainyan! bandum ureueng ka apoh apah sabab ulon galak lon peugah haba deungon miseu upama sampoe payah teupuphom." tuhan meufeuroman ubak ulon, kheun gobnyan, "he manusia fana, kutok kheueh yerasalem. kutok kheueh teupat-teupat ibadat nyang na disinan. peuingat kheueh tanoh israel, bahwa ulon, tuhan, lon peugah lagee nyoe, 'ulon nyoe musoh gata. ulon lon suet peudeueng lam sarong dan lon cang bumate gata bube nyang na, bah kheueh nyan nyang jeuhet meunan cit nyang jroh. deungon peudeueng lon kulawan bandum ureueng di utara sampoe seulan. dan bandum ureueng jiteupeue bahwa ulon, tuhan, lon suet peudeueng lon dan hana lon pasoe lam sarong le.' he manusia fana, meu oe-oe kheueh dan apoh apah kheueh dikeue ureueng israel, siulah-ulah gata patah ate dan putoh asa. meunyo awaknyan jityang pakon gata ah euh, peugah kheueh laju bahwa gata seudeh sabab haba nyang teuma teuka. deungon na haba nyan teuka yo lam ate awaknyan, jaroe awaknyan leumoh, dan teuat awaknyan yo meugam-gam, awaknyan patah seumangat. keubit that watee jih ka teuka, dan bandum nyan teujadi. ulon tuhan nyang mahamanyang ka lon peugah haba." tuhan meufeuroman ubak ulon, "he manusia fana, meuramai kheueh! jak bri tee kheueh ubak dumna ureueng bahwa ulon, tuhan, lon peugah lagee nyoe, 'na sikrak peudeueng, peudeueng nyang teugeusok dan teuasah. peudeueng nyan teuasah mangat jeuet teupumate peue nyang na, teu uet oh gleh mangat meukilat. nibak umat lon hana le keugeumbiraan sabab bandum peu ingatan dan hukuman awaknyan anggab hana. peudeueng nyan teuasah mangat siab oh watee teupuguna laju jijk bak sidroe-sidroe ureueng tukang seumeusie. he manusia fana, meuratok kheueh dan tameuhoi kheueh! sabab peudeueng nyan ka siab jilawan umat lon. bandum peumimpin israel meusajan siluroh bansa jitob le peudeueng nyan sampoe binasa. teuma tapeh kheueh dada gata ngon ate nyang gulana, sabab ulon teungoh lon ujo umat lon, meunyo awaknyan han jitem ubah peurango, bandum nyan teujadi ateuh awaknyan.' nyan, he manusia fana, meuramai kheueh. peh kheueh paleuet jaroe gata, sibagoe tanda keu peudeueng nyan keu teupeuphon seumeusie. peudeueng nyan lumpah teumakot. peudeueng nyan ka jipeujeuet bansa ulon gadoh ceubeueh jih dan

reubah meugantoh. di ulon ancam banda awaknyan ngon peudeueng nyan nyang meuble-ble lagee kilat, dan nyang ka siab keu peumate. he peudeueng nyang tajam, ceumeucang kheueh u uneuen dan ublah wie, dan ho homantong nyang gata galak. ulon lon peh cit paleuet jaroe, laju beungeh ulon seungab. ulon, tuhan, ka lon peugah haba." tuhan meufeuroman ubak ulon, kheun gobnyan, "he manusia fana, gamba kheueh dua boh rot nyang jeuet jijk le raja babel nyang teungah jiba peudeueng gobnyan. bandua boh rot nyan haroh meuuboe nibak nanggroe nyang saban; rot nyang saboh teutuju u raba, banda amon; nyang saboh teuk u yerasalem, banda meu kuta di yehuda. peugot kheueh papeuen peutunyok rot dipat rot nyan ka jipeuphon meucabeung. raja babel laju geudong bak papeuen peutunyok rot ueh nyan. mangat jiteupeue rot nyang toh nyang haroh jijk, laju le raja babel nyan jilakee peutunyok bak beurala-beurala jihnyan, jiguncang panah dan jipeureksa ate beulang nyang ban lueh jikeureubeuen. teunyata panah nyang teucok bak jaroe jihnyan teutunyok arah u yerasalem! nyan tanda jih raja haroh jiprang banda yerasalem, jidumpek prang meuhubo dan jiyue sipa-i jihnyan mangat jisuson alat-alat peundobrak, geuyue pasang bak pintoe-pintoe geureubang yerasalem, geuyue tamon tanoh jeuet keu kuta teukeupong dan geuyue khueh lhueng-lhueng. peunduduek yerasalem hana jipeucaya bahwa awaknyan keunong seurang, sabab awaknyan ka jipeugot janji deungon babel. teuma ramaian nyoe teupeu ingat ubak awaknyan bahwa awaknyan teudrob ngon sabab desya-desya awaknyan keudroe. ulon, tuhan nyang mahamanyang lon peugah ubak awaknyan, 'desya-desya gata ka teuteupeue dan bandum ureueng jiteupeue bahwa gata meusalah. keujeuhetan gata nyan leumah bak tieb-tieb buet gata. jinoenyo ka trok watee jih gata teuhukom dan gata lon seurah ubak musoh gata.' dan ubak raja israel ulon peugah, 'he raja nyang jeuhet dan doraka! watee keu teuhukom gata nyang keuneulheueh ka to that. ulon, tuhan nyang mahamanyang ka lon peugah haba. peuhah kheueh mahkota gata dan peulheueh kheueh seureuban gata. jinoenyo, keuadaan ka meu ubah. beuat kheueh keududuekan ureueng gasien dan bri kheueh bak awaknyan kuasa! peutron kheueh dumna peunguasa nibak martabat jih! banda nyoe lon peuhanco sapan sapa, sampoe dipat mantong na runga-runga. teuma hainyan baro kheueh teujadi meunyo ureueng nyang ulon pileh keu teuhukom banda nyoe ka teuka. keu ureueng nyan ulon jok banda nyoe.' " "he manusia fana, meuramai kheueh! jak peugah kheueh ubak ureueng amon nyang ka jihina israel, bahwa ulon, tuhan nyang mahamanyang lon peugah, 'sipucok peudeueng ka siab keu teumeucang; peudeueng nyan ka teuasah meuble-ble lagee kilat, mangat jeuet siab keu teupumate. nyang deuh gata ngieng nyan na kheueh peuleusu, dan ramaian nyang gata peugah nyan na kheueh buhak dan sulet. gata jeuhet dan doraka, dan saat keu teuhukom gata nyang keuneulheueh ka to that. peudeueng nyan jikoh takue gata. he ureueng amon, peutamong kheueh peudeueng gata nyan dalam sarong! gata lon peusi-

dang di teupat gata teucebta dan teupeulahe. ulon lon peulheueh u ateueh gata beungeh ulon nyang hana ngon peusa. dan gata ulon jok ubak ureueng-ureueng keujam nyang ka teulatah keu jipeubinas. gata habeh tutong jipajoh le apui. darah gata ro di nanggroe gata keudroe, dan hana meusidroe pih nyang na mantong teuingat keu gata. ulon, tuhan ka lon peugah haba." tuhan meufeureuman ubak ulon, kheun gobnyan, "he manusia fana, peu kheueh ka siab gata tapeusidang banda nyang peunoh deungon ureueng peumate jihnyan. tunyok kheueh ubak jihnyan bandum buet jihnyan nyang kutoe dan luwat nyan." tuhan nyang mahamanyang geuyue bak ulon jak peusampoe nyang lagee nyoe ubak yerusalem, "gata meusalah sabab ka ta poh mate jai that nibak peunduduek gata keudroe, dan ka teupeukutoe droe gata deungon cara teuseumah beurala-beurala nyang gata peuget keudroe, sabab nyan kheueh watee teuhakem gata ka to that dan riwayat gata sigra meu akhe. gata ulon peubiyeu jeuet keu bahan hinaan dan jipeukem le bansa-bansa dan bandum nanggroe. gata jipeukem-peukem dan jihina le nanggroe-nanggroe nyang jioh dan to sabab gata hana ploh-ploh taiengkeue ubak hukom dan peuratoran. banmandum peumimpin israel nyang jipeubangga na kheueh teunaga jih keudroe dan jipeubuet seumeupoh mate teuhadab ureueng laen. hana meusidroe pih nibak peunduduek gata geuhoreumat ureueng syiek jih. gata tatipee ureueng aseng dan tacok laba nibak keususahan inong balee dan aneuk yatim ngon muntui. teupat-teupat iebadat keu ulon gata peukutoe dan uroe sabat hana gata pakoe. lamkawan peunduduek gata na ureueng-ureueng ba peusuna nyang galak that bak buet peusuna keu ureueng laen mangat ureueng nyang keunong peusuna nyan teuhukom mate. na teuma nyang pajoh uengkot sie nyang ka teukeureubeuen keu beurala. na lom nyang galak jipeubuet mukah. na nyang jigoda dan jimeumukah ngon ma uei jih, na cit ngon ureueng inong nyang teungoh teuka he, peurumoh ureueng laen atawa ngon meulintee jih atawa adoe jihnyan nyang laen ma. na teuma nyang jeuet keu ureueng peumate gob cara teubayeue, lintah darat dan nyang pajoh ureueng-ureueng seubansa jih keudroe. awaknyan banmandum ka jittuwe keu ulon. ulon, tuhan nyang mahamanyang ka lon peugah haba. teuma bak saat nyoe ulon lon heuntam bube na peurampok dan tukang peumate gob. peu kheueh mantong tajeuet atawa mantong teuga gata keu tabeuet jaroe gata oh ka lheueh seulesoe lon hukom gata? ulon, tuhan nyang mahamanyang ka lon peugah haba dan ulon lon peubuet peue nyang ka ulon peugah. ulon lon peucerebre peunduduek gata u jeueb-jeueb nanggroe dan bansa, dan ulon lon peupioh buet gata nyang jeuhet nyan. gata jihina le bansa-bansa laen, dan baro kheueh gata teupeue bahwa ulon kheueh tuhan." tuhan meufeureuman ubak ulon, "he manusia fana, ureueng-ureueng israel nyan hana meuguna nibak ulon. awaknyan ibarat broh logam nyang meujampu, lagee teumaga, timah, beuso dan timah itam nyang na leubeh oh ka lheueh pirak teupeu gleh didalam apui. dan bak watee nyoe, ulon, tuhan nyang

mahamanyang, ulon peugah ubak awaknyan bahwa awaknyan saban lagee logam nyang hana meuguna nyan. lagee toh rabok pirak, peurunggu, beuso, timah itam dan timah puteh teupeutamong lam sinungkee apui keu teupeu gleh, meunan cit teuma awaknyan lon peusapat dan ulon ba u yerusalem. beungeh ulon nyang luwa biasa nyan lon peuhanco awaknyan lagee apui jipeuhanco rabok-rabok logam. nyoe, ulon lon peusapat awaknyan di yerusalem, lon peuhu apui beungeh ulon dimiyueb awaknyan, sampoe awaknyan hanco meudeudak. lagee pirak nyang teupeuhanco lam sinungkee apui, meunan kheueh awaknyan teupeuhanco di yerusalem. dan baro kheueh jiteupeue le awaknyan bahwa ulon, tuhan, ka lon peulheueh beungeh ulon ateueh awaknyan." tuhan meufeureuman lom ubak ulon, kheun gobnyan, "he manusia fana, jak peugah ubak ureueng israel bahwa tanoh droe jih nyan kutoe, dan sababnyan ulon beungeh dan lon hukom. bubena peumimpin awaknyan lagee singa nyang teuma uem oh ka lheueh jiteugom mangsa. awaknyan tukang peumate rakyat, jireupah bandum hareuta dan keukayaan nyang jiteume sabab nyan le lumpah na ureueng inong nyang jeuet keu balee. bandum teungku imeum israel jilingkeue ubak hukom-hukom lon dan jipeukutoe bandum beunda nyang teupeu khusus keu ulon. awaknyan hana jibeda nyang toh nyang haleue dan nyang toh teuma nyang hareuem. meunan cit awaknyan hana jipeurunoe rakyat mangat jipeubeda nyang toh nyang gleh dan nyang toh teuma nyang kutoe meunurot peuratoran agama. awaknyan hana jipeureumeun keu uroe sabat. deungon lagee nyan ulon ka jihina le bansa israel. peujabat-peujabat peumeurintah awaknyan lagee sigrala nyang jipriek priek mangsa jih. awaknyan jipeumate manusia simata-simata jimita untong. bandum nabi jisom-som bubena desya-desya nyan; awaknyan lagee ureueng cet binteh beuton nyang kuto. keumalon-keumalon awaknyan peuleusu, meunan cit deungon ramaian-ramaian awaknyan hana beutoi. awaknyan meungaku bahwa peusan nyang awaknyan peusampoe na kheueh meuasai nibak tuhan nyang mahamanyang, padahai ulon meubacut pih hana lon peugah haba bak awaknyan. ureueng-ureueng kaya jitipee gob meurampok. awaknyan jipeubuet ateueh ureueng gasien ban galak droe dan jicok laba bak ureueng aseng. lamkawan ureueng israel nyan, ulon mita ureueng nyang carong jipeudong binteh beuton, atawa jidong bak teupat-teupat nyang binteh beuton jih reuloh keu teupeuteun nanggroe nyan meunyoe ulon keuneuk peuhanco lam ju meudok-dok beungeh ulon; teuma hana meusidroe pih nyang meurupok ngon lon. sabab nyan bak saatnyoe ulon peulheueh beungeh ulon nyan ateueh awaknyan, dan lagee apui ulon peubinas awaknyan ngon bandum buet awaknyan. ulon tuhan nyang mahamanyang ka lon peugah haba." tuhan meufeureuman ubak ulon, kheun gobnyan, "he manusia fana, na dua droe ureueng inong, adoe aduen. yoh masa muda, awaknyan tinggai di nanggroe meuse. di nanggroe meuse nyan awaknyan bandua ka gadoh peurawan, laju awaknyan jeuet keu inong lunte. nyang tuha nan jih

ohola; jihnyan teupeulambang keu samaria. adoe jih teuhoi nan oholiba; jihnyan teupeulambang keu banda yerusalem. ulon meukawen ngon awaknyan laju meuteume aneuek bak bandua inong nyan. bahpi ohola ka jeuet keu peurumoh lon, jihnyan teutab meulunte, dan that-that gurangsang jipeutimang geunaseh-geunaseh jih di asyur. awaknyan na kheueh tantra nyan sok peukayan seuragam mirah ungu, ureueng bansawan dan peujabat-peujabat manyang; bandum nyan na kheueh peuwira-peuwira pasokan meuguda nyan ruman jih gagah-gagah. deungon ureueng-ureueng rayeuk nyan kheueh ohola meumukah. lom teuma that-that gurangsang beureuhi inong nyan, jipeukutoe teuma droe jih deungon jiseumah beurala-beurala nyan jiseumah le awaknyan. inong nyan teutab hana jipioh jipeubuet jeuhet lagee nyan ka jipeubuet di nang-groe meuse, diteupat inong nyan gadoh peurawan jih. yoh masa ubit jih, inong nyan ka jipeueh dan jipeusaneut lagee inong meumukah. sabab nyan kheueh ulon jok jihnyan ubak geunaseh-geunaseh jih, ureueng-ureueng asyur nyan lumpah jirindu nyan. jihnyan jipeulon le awaknyan deungon gasa, laju jipoh mate ngon peudeueng, dan aneuek-aneuek inong nyan jireupah. dipat mantong naseb inong nyan jeuet keu boh bibie kawom hawa. oholiba, adoe inong nyan jikalon keujadian nyan, teuma jihnyan leubeh meunafesusu jipeubuet mukah nyan nibak ohola. meunan cit di oholiba get that jimeuharab ubak ureueng-ureueng asyur nyan, na kheueh peumuda-peumuda gagah nibak pasokan meuguda, ureueng bansawan dan peujabat manyang, dan sipa-i nyan sok seuragam mirah ungu nyan. ulon ngieng keudroe bahwa oholiba paleng jeuhet, saban lagee poda jih. maken treb oholiba seumaken beujat. jihnyan lumpah teutarek ubak gamba-gamba nyan meu uke nibak binteh, dan nyan teuwareuna deungon cet lagee darah mirah. gamba-gambanyan teupeulambang peuwira-peuwira babel deungon talo keuieng nyan ceudah dan seureuban nyan meujuntee. watee oholiba jikalon gamba-gamba nyan, laju teuka beureuhi dan gurangsang jihnyan luwabiasa dan jihnyan laju jikirem undangan ubak peuwira-peuwira nyan di babel. dan teuka kheueh awaknyan dan jieuh ngon inong nyan. awaknyan jinoda inong nyan luwabiasa sampoe inong nyan teuka luwat keu awaknyan. oh lheureh nyan deungon trang-trang inong nyan jimeujinah dan jimeumukah sira jipeukalon droe dikeue ureueng rame. ulon luwat that lon kalon inong nyan, saban cit lagee ulon luwat keu poda jih. maken treb maken kayem jipeubuet mukah, hana beuda jih yoh jihnyan jimeumukah yoh inong nyan mantong di nang-groe meuse. inong nyan lumpah beureuhi keu ureueng agam nyan ju nafeusu gurangsang jih, dan nyan geujolak nafeusu beureuhi jih sabe rayeuk lagee nafeusu gata agam. (he oholiba, gata keuneuk ulang lom buet jeuhet nyan nyan gata peubuet yoh gata mantong muda, watee ureueng meuse meucumbu rayu deungon gata.)" tuhan nyan mahamanyang meufeureuman, "he oholiba, gata ka bosan deungon geunaseh-geunaseh gata, teuma ulon lon peusuna awaknyan jeuet awaknyan beungeh keu gata dan

jikeupong gata. ulon kugumpoi dan ulon ba bandum geunaseh gata nyan na di babel, pekod, soa, koa, asyur, meunan cit deungon ureueng-ureueng kaldea. ulon ba keu gata peumuda-peumuda gagah nyan meupangkat manyang, bansawan, peujabat peunteng dan peuwira-peuwira pasokan meuguda. awaknyan jikakprang gata rot utara deungon tantra nyan raya, deungon geuritan-geuritan prang dan geuritan nyan ba beukai. deungon teulindong ngon peurisasi dan tupi-tupi waja, awaknyan jikeupong gata. teuma lon peubiyueg awaknyan jihukom gata meunurot hukom-hukom nyan na bak awaknyan keudroe. sabab ulon beungeh keu gata, lon peubiyueg awaknyan jipeubuet atueh gata deungon keujam. idong dan on punyueg gata awaknyan koh dan aneuek-aneuek gata jicok dan jitot udeb-udeb. gata jipeulon dan piasan-piasan gata jireupah. meunan kheueh ulon kupeupioh nafeusu beureuhi gata dan bandum buet mukah nyan ka gata peubuet yoh phon gata mantong di nang-groe meuse. gata hana meuharab le ubak beurala toh mantong atawa teuingat ubak meuse." tuhan nyan mahamanyang meufeureuman, "ulon lon seurah gata ubak ureueng-ureueng nyan paleng gata luwat dan nyan gata banci. sabab awaknyan banci keu gata, bandum hase jeureh payah gata jireupah le awaknyan. gata jitinggai teulon bulat hana meuija meusiurat beuneueng lagee inong lunte nyan jitonton le ureueng rame. nafeusu beureuhi dan buet cabui gata nyan kheueh nyan peuteuka hase nyan brok nyoe keu gata. gata jeuet keulunte keu bansa-bansa, dan tapeukutoe droe gata deungon beurala-beurala awaknyan. gata taseutot pi-e poda gata, le sabab nyan gata ulon hukom deungon hukuman nyan saban." tuhan nyan mahamanyang meufeureuman, "asoe cangkik poda gata haroh gata jieb. cangkik nyan raya dan lhok. asoe cangkik nyan peunoh meu asoe ejekan dan hinaan, nyan haroh gata tanggong nibak tieb-tieb ureueng. cangkik poda gata samaria, asoe jih teumakot dan hanco nyan hana teukira. oh ka lheureh gata jieb bandum asoe jih gata mabok dan meudeurita. dan deungon peng-peng cangkik nyan beukah meurabok nyan gata tapriek-priek dada gata. ulon, tuhan nyan mahamanyang ka lon peugah haba." tuhan nyan mahamanyang meufeureuman, "sabab gata ka tuwroe bak ulon dan tapeulikit ulon, gata meudeurita akibat nafeusu beureuhi gata dan lunte gata." tuhan meufeureuman ubak ulon, "he manusia fana, peu kheueh ka siab teupeuhukom ohola dan oholiba? sapa kheueh awaknyan keuhai keujeuhetan nyan ka awaknyan peubuet. awaknyan ka jipeubuet meumukah dan jipeumate gob; awaknyan ka jimeumukah ngon beurala-beurala dan jipoh mate aneuek-aneuek ulon nyan awaknyan peulahe. aneuek-aneuek nyan ka awaknyan peuseumah ubak beurala-beurala awaknyan. dan bukan nyan mantong. awaknyan ka teuma jipeukutoe baet ulon dan uroe sabat nyan ka lon peuteutab nyan. bak uroe awaknyan jipeumate aneuek-aneuek ulon dan jipeuseumah keu beurala-beurala, bandua droe aduen adoe nyan geuteuka u baet lon dan laju jipeukutoe baet ulon nyan! dan awaknyan jikirem undangan keu ureueng-ureueng agam di nang-groe

nyang jioh, dan ureueng nyang teu undang nyan laju jiteuka. keu teusambot jame nyang teu undang nyan, bandua adoe aduen nyan laju jimanoe, jiboh cilak mata sira jingui piasan-piasan. laju awaknyan jiduek ateuhe tempat duek nyang ceudah. dikeue jihnyan na saboh meuja hidangan nyang peunoh deungon meubagoe rupa peunajoh, hana keuting-galan dupa dan minyeuk zaiton nyang ka ulon jok keu awaknyan. di luwa teudeungoe su ureueng rame nyang lumpah subra teungho jipeupueh ate ban galak droe. ureueng-ureueng nyan ka ji undang jeuet jiteuka nibak padang pasi. awaknyan jipeusok gleueng bak jaroe ureueng inong adoe aduen nyan, dan jipeuseuon mahkota-mahkota nyang lagak ateuhe ulee awaknyan. laju lon pike, 'peu kheueh mantong jitem awaknyan geumeuen cinta ngon inong jeuhet nyang ka layee sabab buet meumukah nyan?' ngon cara meugantoe-gantoe awaknyan jijak ubak ohola dan oholiba, bandua inong lunte nyang ka beujat nyan. teuma, ureueng-ureueng saleh geupeu hukom ureueng inong adoe aduen nyan ateuhe dasai buet meumukah dan seumpoh mate, sabab awaknyan biet-biet meusalah." tuhan nyang mahamanyang meufeureuman, "jak tawok kheueh laju saboh kawan ureueng mangat jijak reupah dan jiseksa bandua ureueng inong lunte nyan. bah kheueh awaknyan jigeulawa ngon batee dan jicang deungon peudeueng. bah kheueh aneuk-aneuk awaknyan jitak-tak dan rumoh-rumoh awaknyan jitot. bansaboh nanggroe lon peuhanco bandum buet-buet nyang jeuhet lagee nyan. tendakan ulon nyan jeuet keu peuingat keu bandum ureueng inong mangat bek jipeubuet jeuhet lagee dua droe inong adoe aduen nyan. he ohola dan oholiba, ulon kuhukom gata sabab gata meumukah dan taseumak beurala. dan baro kheueh gata teupeue bahwa ulon kheueh tuhan nyang mahamanyang." bak tanggai siploh, buleuen siploh, bak thon nyang kek sikureueng lam masa kamoe geuboih u teumpat aseng, tuhan meufeureuman ubak ulon, "he manusia fana, cetet kheueh tanggai uroe nyoe, sabab uroenyoe raja babel geupeuphon keupong yerasalem. ulon, tuhan, na saboh miseu keu tapeusampoe ubak umat lon nyang galak beurontak: leng laju ie u dalam ayan peuduek laju ateuhe apui. peutamong laju uengkot sie lam ayan nyan sie nyang paleng get mutu jih; asoe baho dan asoe pa meunan cit ngon tuleueng-tuleueng nyang le sumsum jih. peuguna kheueh uengkot sie bubiri nyang teumbon dan muda tamah kheueh peuseudiaan kayee apui. bah kheueh ju dan meubok-bok ie jih reuboh kheueh uengkot sie nyan meunan cit ngon tuleueng-tuleueng jih." tuhan nyang mahamanyang meufeureuman, "ceulaka kheueh banda nyang peunoh deungon ureueng poh peumate manusia! bandanyan lagee beulangong meugeuratan nyang hantom na teu uet. uengkot sie nyang ka na lam nyan teupeuteubiet sikrak-krak, sampoe hana meusikrak pi nyang na tinggai. di banda nyan teujadi ureueng poh gob sampoe mate, teuma darah ureueng nyang keunong poh nyan hana ro ateuhe bumoe, teuma ateuhe batee kreueh, sampoe hana hase teuseubebe. darah nyan ulon peubiyue disinan sampoe leumah teukalon dan teutueng bila." tuhan nyang mahamanyang meufeureuman,

"ceulaka kheueh banda nyang peunoh ngon tukang peumate manusia nyan! ulon keudroe nyang atoe kayee mangat lon tot. tamah kheueh kayee jih! kiphah kheueh apui jih! rebob kheueh asoe jih! jak tiek kheueh kuah jih. tot kheueh tuleueng-tuleueng jih! jinoenyoe keubah kheueh kanot peurunggu nyang soh nyan ateuhe apui dan bah kheueh disinan sampoe tutong dan hu mirah meubara. oh lheuueh geuratan jih tutong, beulangong nyan gleh lom meunurot peuraturan agama. teuma hana bandum geuratan jih habeh jipajoh le apui. he yerasalem, buet-buet gata nyang jeuhet dan beujat nyan ka tapeukutoe badan gata keudroe. ulon ka lon ujoel lon peugleh gata, teuma hana meuguna, sabab gata teutab kutoe. gata hana gleh le sampoe ulon peulheuh beungheng ulon u ateuhe gata. ulon, tuhan nyang mahamanyang ka lon peugah haba. ka trok saat jih nibak ulon keu meutindak. ulon hana lon tuwoe keu desya gata dan hana teuma lon peu amphon dan lon gaseh gata. gata lon hukom nyang sisuai deungon buet gata. ulon, tuhan nyang mahamanyang ka lon peugah haba." tuhan meufeureuman ubak ulon, "he manusia fana, deungon meudadak ulon cok ureueng nyang paleng gata cinta. teuma digata hana jeuet tameuratok tamo ba-e, atawa tapeubiyeu ie mata gata meuleng-leng. bek sampe mo gata nyang meusok-meusok nyan teudeungoe uluwa. bek kheueh watee tajak hana tatob ulee, atawa hana meulapek kaki, sibagoe ureueng nyang meukabong, bek teuma gata tob muka gata, dan bek tapajoh ruti meukabong." ban seuboh that ulon mariet ngon bansa nyan dan watee malam peurumoh ulon meuninggai donya. oh singoh beungheng laju ulon peubuet peue nyang ka geupeurintah ubak ulon. rakyat jiteumanyong, "pakon bapak peubuet lagee nyoe? peue guna jih keu kamoe?" laju ulon peugah ubak awaknyan, "tuhan geuyue bak ulon geuyue jak peugah peusan nyoe ubak gata: gata tapeubangga teunaga baet tuhan. gata galak tapandang dan tasaweue sabe, teuma tuhan geupeukutoe rumoh gobnyan. dan anggota-anggota keuluwarga gata nyang mantong muda, nyang na tanggai di yerasalem, teuma jipoh mate dimideuen prang. laju gata tapeubuet lagee nyang lon peubuet bak saat nyoe. gata hana tatob muka gata atawa tapajoh ruti meukabong. gata hana tajak ngon hana teutob ulee atawa meulapek kaki, hana meuratok atawa tamo ba-e. gata seumaken meurana sabab desya-desya gata; gata apoh apah keudroe keu ureueng laen. dan ulon, yehezkiel jeuet keucuntoh nibak gata; gata teuma tapeubuet lagee nyang ulon peubuet bak saat nyoe. tuhan geupeugah bahwa meunyoel hainyoel teujadi, gata tateupeue bahwa gobnyan kheueh tuhan nyang mahamanyang." tuhan meufeureuman ubak ulon, "nyan, he manusia fana, ulon cok nibak awaknyan baet ulon nyang kong nyan, nyang ka jeuet keubanggaan dan keuseunangan awaknyan, dan nyang awaknyan pandang dan jisaweue ngon galak ate. laju lon cok cit teuma aneuk-aneuk awaknyan. bak uroe ulon peubuet hai nyang lagee nyan, sidroe nyang hase teupeusie nibak keubinaan nyan teuma teuka, dan geupesampoe hana nyan ubak gata. bak uroenyang cit teuma gata jeuet tapeugah haba lom dan hana

kalu le. laju gata tamariet deungon ureueng nyan. meunan kheueh gata jeuet keutanda keu awaknyan; dan baro kheueh jiteupeue le awaknyan bahwa ulon kheueh tuhan." tuhan meufeuereuman ubak ulon, "he manusia fana, kutok kheueh nanggroe amon. yue kheueh bak bansa nyan peue nyang ulon, tuhan nyang mahamanyang peugah ubak awaknyan, 'gata galak takalon baet ulon jipeukutoe dan tanoh israel jipeurusak dan bansa yahudi jiboih u tempat aseng. le sabab nyan gata lon peubiyeu jipeutaloe le sukee-sukee bansa nibak guiron timu. awaknyan jipeudong khimah-khimah di nanggroe gata laju teutab tinggai disinan. awaknyan jipajoh boh-boh kayee dan jijieb ie susu beulatang peulara gata. banda raba lon ubah jeuet keu tempat rabe unta, dan bansaboh nanggroe amon lon peujeuet keu tempat rabe bubiri. dan baro kheueh gata teupeue bahwa ulon kheueh tuhan.' tuhan nyang mahamanyang meufeuereuman, 'gata tapeh peleut jaroe sira meulikak ria. gata anggab phui tanoh israel. le sabab nyan gata lon peujok ubak bansa-bansa nyang le nyang rampok dan reupah bandum atra milek gata. gata lon peubinasa lagee nyan bagoe, sampoe hana le jeuet keu saboh bansa dan hana teuma na nanggroe keudroe. dan neutepueu kheueh le gata bahwa ulon kheueh tuhan." tuhan nyang mahamanyang meufeuereuman, "moab jipeugah bahwa yehuda nyan saban cit lagee bansa-bansa laen. le sabab nyan banda-banda nyang jipeuteun bataih nanggroe moab lon peubiyeu jiprang le musoh meunan cit deungon banda-banda nyang paleng ceudah, banda-banda nyan na kheueh: bet-yesimot, baal-meon dan kiryataim. ulon kupeubiyeu sukee-sukee bansa di guiron timu jipeutaloe moab meusajan ngon nanggroe amon, sampoe moab ka hana le jeuet keu saboh bansa. ulon kuhukom moab, dan baro kheueh jiteupeue le awaknyan bahwa ulon kheueh tuhan." tuhan nyang mahamanyang meufeuereuman, "bansa edom ka jipeubuet salah nyang paleng raya sabab ka jipeubuet keujam ateueh bansa yehuda, sabab jibalah dam. sababnyan ulon peumaklum bahwa ulon kuhukom edom dan lon peumate tieb-tieb manusia dan bubena beulatang nyang na disinan. bansaboh nanggroe nyan, phon di banda teman sampoe trok u banda dedan, ulon peujeuet seungue seungab; rakyat nyang na disinan mate dimideun prang. bansa ulon israel ulon peuguna keu teubalah dam ateueh edom, dan edom teupeusanaut deungon dahsyat nyang sipadan ngon beungeh ulon. edom jiteupeue pakirban rasa jih jeuet keusasaran beungeh ulon. ulon, tuhan nyang mahamanyang ka lon peugah haba." tuhan nyang mahamanyang meufeuereuman, "ureueng-ureueng filistin ka jibalahi lam deungon keujam ateueh musoh treun meutreu awaknyan dan jipeubinasa awaknyan deungon peunoh banci. sababnyan ulon peumaklum lon prang ureueng-ureueng filistin dan lon peuranab awaknyan. tieb-tieb ureueng nyang na mantong tinggai di sitot bineh pante filistin lon poh mate. ulon kuhukom awaknyan deungon brat dan lon peulheuh dam lon sampoe puih. meunyeo awaknyan jirasa beungeh ulon, jiteupeue kheueh le awaknyan bahwa ulon kheueh tuhan." bak tanggai sa buleuen teuteuntee bak thon keu siblahi masa kamoe

teuboih, tuhan meufeuereuman ubak ulon, kheun gobnyan, "he manusia fana, peunduduek tirus ka meusurak-surak sira jipeugah, 'yerusalem ka hanco! meugah banda nyan lamhai meuniaga ka hana le! banda nyan ka hana jeuet le keusiteru tanyoe!' " tuhan nyang mahamanyang meufeuereuman, "ulon nyoe musoh gata, he tirus! ulon lon ba bansa nyang le mangat jijak prang gata, dan awaknyan teuka lagee umbak ie di laot. awaknyan jipeuhanco binteh-binteh beuton gata dan jipeureubah bubena meunara gata. bandum tanoh nyang na disinan lon sampoh akheji nyang tinggai na kheueh sianeuk batee tho di teungoh laot. bubena neulayan jiadee jeue ateueh batee nyan. ulon tuhan nyang mahamanyang ka lon peugah haba. tirus teuma jeuet keu uempoen le bansa-bansa nyang le. awaknyan jireupah dan jipoh mate bube nyang na peunduduek di banda-banda ateueh tanoh darat tirus. dan baro kheueh jiteupeue le peunduduek tirus bahwa ulon kheueh tuhan." tuhan nyang mahamanyang meufeuereuman, "ulon kuba raja nebukadnezar di nanggroe babel mangat jijak prang gata, he tirus. raja nyang paleng teuga nyan teuka rot utara deungon tantra nyang raya, deungon guda nyang le dan geuritan-geuritan prang meunan cit pasokan meuguda. bubena peunduduek di sigala banda nyang na ateueh tanoh darat teupoh mate watee muprang nyan. musoh jikueh lueng-lueng teupat meuteun, jiseubeu bubena beuton meugunong-gunong dan jisoon peurisai-peurisai raya nyang jipeuguna le awaknyan keu jilawan gata. awaknyan jitulak binteh-binteh timbok gata deungon alat tulak dan jipeuhanco bubena meunara gata deungon bak-bak beuso. guda-guda awaknyan jai that-that, sampoe oh jibot langkah jipeupo abee habeh teutob ateueh-ateueh gata. su meugrum-grum pasokan meuguda nyang jitarek geuritan jiba bahan beukai dan geuritan prang meugeunta bak binteh-binteh beuton gata watee awaknyan jiliwat rot babah-babah pintoe geureubang nyang jitamong lam banda nyang ka jeuet keu runga-runga nyan. pasokan meuguda nyan jiseureubu di jalan-jalan gata dan jipeumate peunduduek gata deungon peudeueng awaknyan keudroe. tugu-tugu gata nyang meugah dan kong nyan jireuloh. musoh-musoh gata nyan jireupah bandum keukayaan dan barang meukat gata. awaknyan jipeuhanco beuton-beuton gata dan jireuloh banmandum rumoh-rumoh gata nyang meuwah. oh lueh jireuloh awaknyan jicok batee-batee jih, papeuen-papeuen dan tanoh jih, laju jigeulawa lam laot. ulon kupeuseungab bandum ca-e-ca-e gata dan musik keucapi gata. nyang na ulon tinggai na kheueh si aneuk batee nyang tandus, teupat ureueng neulayan jiadee jeue-jeue jih. banda nyan hana teupeudong le. ulon, tuhan nyang mahamanyang ka lon peugah haba." tuhan nyang mahamanyang geupeugah ubak banda tirus, "peunduduek daerah pante yo ngon teumakat watee jideungeo su gata kiek nyang ka taloe dan su peudeh ngon saket ureueng-ureueng nyang teungoh jicang dan jikoh takue. teukalon naseb gata nyan, raja-raja nyang na bak bineh laot jibeudoh ateueh takhta, sira jisuet bajee keurajeuen dan bajee awaknyan nyang meukasab, laju jiduek ngon badan yo nibak

tanoh. awaknyan lumpah teumakot meubacutpih hana teunang. oh ltheuhnyan awaknyan jibaca ca-e peutron lam jrat lageunyo keu gata: ka kheueh habeh hanco banda nyang teupujoe! bandum kapai nyang na disinan habeh teusampoh lam laot raya. peunduduek disinan nyang awaiphon meukuasa lam laot habeh teumakot dumna ureueng pante. jinoo, bak uroe gata jipeutaloe, bubena peunduduek pulo habeh yo meugeunta. teukeujot kheueh awaknyan banmandum watee jingingi gata hanco nyang hana teukira." tuhan nyang mahamanyang meufeureuman, "ulon peujeuet gata seungue ngon seungab lagee banda nyang hana peunduduek. ulon kupeulam gata ngon ie nibak twie laot raya. laju gata lon kirem lam donya ureueng mate mangat meusaho ngon ureueng-ureueng jamen ilee. lon peubiyeu gata tinggai teutab lam donya ureueng mate nyan, di teungoh runγκα-runγκα abadi, meusapat-sapat ngon ureueng mate. dan tanoh gata hana le ureueng duek, dan gata hana teukira lamkawan ureueng udeb. gata lon peujeuet cuntoh nyang lumpah gli dan teumakot, dan nyan kheueh keuneulheuh riwayat gata. ureueng rame jimita gata, teuma gata hana meurumpok. ulon tuhan nyang mahamanyang ka lon peugah haba." tuhan nyang mahamanyang meufeureuman ubak ulon, "he manusia fana, meuca-e kheueh lagee peutron lam jrat nyoe keu tirus, banda bak bineh nyang meuniaga ngon bandum peunduduek bineh pante: he tirus, deungon sombong gata peugah, 'gagah ulon peusampoereuna!' nibak gata laot raya tapeuniet rumah. gata tapeudong lagee kapai nyan ceudah. binteh gata kayee aras gunong hermon tamah layeue gata kayee ceumara di libanon. keu keunayoh gata teupeuget nibak kayee raya di basan. geuladak gata teupeuget nibak kayee ceumara, nibak pulo-pulo siprus asai jih, piasan jihnyan takhta gadeng nyang meuhai hareuga. layeue dan tanda teuturi gata nibak lineun meuse? deungon meubagoe kasab teusulam. keubit haloh that keubahan-bahan khimah gata, ija asai nanggroe siprus nyang meuwareuna ungu. keunayoh gata nibak sidon dan arwad. aneuek buah gata keudroe ureueng-ureueng peulaot carong. utoih-utoih kayee nyang peuget kapai gata na kheueh ureueng-ureueng peungrajin asai gebal. nibak tieb-tieb nanggroe kapai-kapai jiteuka keuneuk jipeuna hubongan niaga. sipa-i sipa-i asai nanggroe persia, lidia dan libia jitamong tentra gata. awaknyan jigantung peurisasi dan tupi waja bak timbok-timbok banda gata. awaknyan ka jitulong jipeutaloe musoh-musoh dan jipeutamah meuseyuhu gata. sipa-i sipa-i asai arwad jijaga bak beuton-beuton gata; meunara-meunara jikawai le ureueng-ureueng asai gamad. peurisasi awaknyan meugantung meureuti bak binteh-binteh beuton gata. awaknyan kheueh nyang peuleungkab keu gagah gata. gata tapeubloe barang-barang niaga gata nyang meulimpah-limpah nyan u nanggroe spanyol, sibagoe meunayeu jih gata teurimong pirak, beuso, timah puteh dan timah itam. gata meuniaga di yunani, di tubal, dan di mesekh, dan sibagoe meunayeu jih gata teurimong bak awaknyan namiet-namiet dan barang-barang nibak peurunggu. gata tatuka barang-barang gata ngon guda geuritan, guda pasang dan bagal nibak

bet-togarma. meunan cit peunduduek rodus na cit meuniaga deungon gata dan peunduduek daerah bineh pasi jibloe cit barang niaga gata deungon gadeng dan kayee itam. bubena ureueng meukat asai siria jibloe barang-barang meuneukat gata dan hase-hase gata nyang jai meulimpah nyan. awaknyan jibayeu ngon peumata nibak batee zamrud, ija mirah ungu, ija meusulam, ija lineun haloh, peumata nyang teupeuget nibak batee koral dan batee mirah deulima. yehuda dan israel jituka barang niaga gata deungon gandom, meulisan, minyeuk zaiton dan reumpah-reumpah. peunduduek damsik jibloe barang niaga gata dan hase-hase gata dan jibayeu ngon anggo asai helbon, bulee bubiri asai sahar, beuso tempa dan reumpah-reumpah. peunduduek dedan jibayeu barang-barang gata deungon ija-ija peulana ureueng arab dan peunguasa tanoh kedar jibloe barang-barang gata ngon aneuek bubiri, bubiri agam dan kameng. keu teubloe barang-barang gata bubena ureueng meuniaga asai syeba dan raema jiba peumata-peumata, meuh dan reumpah-reumpah nyang paleng get. banda-banda haran, kane, eden, saudaga-saudaga asai syeba, banda-banda asyur dan kilmad, bandum nyan meuniaga deungon gata. awaknyan jipeubloe keu gata peukayan meuwah, ija mirah ungu, ija meukasab, peureumadani-peureumadani nyang meubagoe curak, dan talo teumalo nyang kong-kong. barang niaga gata nyan teu angkat deungon kapai-kapai raya nyang meulayeu meuireng-ireng. gata lagee kapai nyang geuhon teupeudieng barang, kapai nyang meulayeu lam laot raya. ureueng meudayong jiba gata u teungoh laot. gata jiheuntam angen timu nyang teuka deungon keujam. peue-peue mantong barang niaga gata nyang gata peudieng lam kapai nyan, bandum peulaot dan aneuek buah gata, bandum tukang kayee dan saudaga gata, bandum sipa-i nyang na lam kapai nyan, bandum awaknyan gadoh dan lam bak watee gata lam. peulaot-peulaot jikliek-kliek sira teumawok sabab teumakot su geumeuciek awaknyan meudeungong sampoe teudeungoe u pante-pante bak bineh pasie. jinoo kapainyan ka jitinggai, bandum peulaot gata jiteungoh u pante. awaknyan jipeuba-e naseb gata, apoh apah, ah euh jimeuratok deungon pilu. awaknyan jisipreuk abee ateuheh ulee dan jibalek-balek lam abee tande meuduka. deumi gata awaknyan rila jicuko ok bak ulee, jingui ija krong peunoh duka cita. awaknyan jimo seudeh ngon jimeuratok dan jipeuba-e naseb gata. laju awaknyan jimeuca-e saboh lagu teupeukubu lam jrat, 'he tirus, soe kheueh imbang gata? tirus, di laot jinoo gata ka kalu. watee laot raya gata arong deungon barang peunoh meuasoe, gata peupeunoh nyang jipeureulee le bansa-bansa; raja-raja jih gata peukaya. jinoo gata ka lam, hanco lam twie laot lhok. bandum aneuek buah gata dan barang-barang gadoh meusajan gata lam laot raya.' bandum ureueng nyang na tinggai bak bineh pante yo ngon teumakot watee jingnat keu naseb gata. meunan cit raja-raja awaknyan teumakot raya; teumakot ngon gli deuh teukalon bak muka awaknyan. gata ka gadoh seungab sapan sapa. bubena ureueng meuniaga bansigom donya ka jeuet keu yo sabab teumakot jirasa naseb nyang lagee

nyan teuma." tuhan meufeuereuman ubak ulon, "he manusia fana, jak peusampoe kheueh ubak raja tirus, peue nyang ulon, tuhan nyang mahamanyang peugah ubak gobnyan, 'deungon sombong gata anggab droe gata dewa nyang meutahta di teungoh-teungoh laot. jeuet mantong gata meulagag lagee dewa, teuma ingat kheueh, gata na kheueh manusia biasa. tapike gata leubeh carong nibak danel, sampoe hana rahsia nyang teusom nibak gata. gata peuguna hikeumat dan peungeurtian gata keu gata peusapat hareuta, meuh dan pirak. keubit beutoi, gata carong tameuniaga dan saatnyoe ka kaya ijo, dan deungon kaya gatanyan sampoe gata ka jeuet keu ureueng sombong!' " tuhan nyang mahamanyang meufeuereuman ubak tirus, "he tirus, sabab gata ta anggab droe saban lagee po teu allah, ulon kukirem tantra aseng nyang lumpah keujam jijak prang gata. awaknyan jipeuhanco bandum keumeugahan nyang ka gata teume beureukat hikeumat dan peungeurtian gata. gata jipeumate dan jikubu lam laot. deungon nyan, meunyoe trok saat jih, peu kheueh mantong gata peugah bahwa gata po teu allah? dikeue ureueng-ureueng tukang peumate gata, deuh kheueh disinan bahwa gata na kheueh manusia biasa. gata mate lagee ureueng hina sabab jipoh mate le ureueng aseng nyang hana jituri keu po teu allah. ulon, tuhan nyang mahamanyang ka lon peugah haba." tuhan meufeuereuman lom ubak ulon, kheun gobnyan, "he manusia fana, peuba-e dan meuratok kheueh keu raja tirus. peusampoe kheueh peue nyang ulon, tuhan nyang mahamanyang peugah keu jihnyan, 'gata ka ltheueh jeuet keu lambang keusampoereuna; yoh dilee gata keubit bijaksana dan gagah! teupnat tinggai gata di eden, taman po teu allah. peukayan gata teupeungui ngon meubagoe rupa peumata: batee deulima dan intan, topas, batee pirus, batee yakut, ratna, ceumpaka, batee nilam, zamrud dan batee alkali mirah. meunan cit deungon piasan meuh gata le. bandum atra nyan teupeuget keu gata bak uroe gata teucebta. malaikat nyang keujam dan teumakot lon peudeuk disinan keu jikeumiet gata. gata tinggai di atueh gunong lon nyang suci dan tajak-jak di teungoh-teungoh batee peumata nyang muble-ble cahya. peurangoe gata sampoeereuna yohphon gata teucebta sampoe gata tapeuphon peubuet jeuhet. gata laloe ngon bloe peubleo, dan nyan kheueh nyang ba gata ubak buet nyang jeuhet dan desya. teuma ulon use gata di gunong lon nyang suci, dan malaikat nyang keumiet gata jiparoh gata nibak teungoh-teungoh peumata nyang muble-ble cahya nyan. ruman gata nyang ceudah teupeujeuet gata sombong dan meusyehu gata nyang meugah nyan meakibat jih gata bangai. sababnyan gata ulon seumpom bak tanoh dan lon peujeuet keupeu ingat keu raja-raja nyang laen.' " tuhan meufeuereuman, "he tirus, gata ka tapeukutoe teupnat-teupnat iebadat gata sabab buet-buet nyang salah dan ilat nyang gata peubuet watee blo publo. sababnyan kheueh ulon tot gata sampoe habeh rata ngon tanoh. bandum ureueng nyang ngieng atueh gata nyang jikalon na kheueh abee. gata ka gadoh tandeuh le simu masa. bandum bansa nyang ka jituri gata ka jeuet keu yo sabab teumakot keujirasa nyang lagee

nyan." tuhan meufeuereuman ubak ulon, "he manusia fana, takutok kheueh banda sidon. jak peusampoe kheueh ubak peundudeuk disinan bahwa ulon tuhan nyang mahamanyang lon peugah ubak awaknyan, 'ulon nyoe musoh gata, he sidon. ureueng rame jipujoe ulon sabab buet ulon keu gata. bak watee lon hukom peundudeuk gata, awaknyan jiteupeue bahwa ulon kheueh tuhan nyang suci. ulon kupeuteuka bala peunyaket, dan lon peubiyeu darah ji ile bak rot-rot gata. gata jiprang le musoh rot jeueb-jeueb sagoe, dan peundudeuk gata teupoh mate. dan baro kheueh gata teupeue bahwa ulon kheueh tuhan.' " tuhan meufeuereuman, "nanggroe-nangroe nyang ka ltheueh jihina israel, hana le jeuet keu duro lam asou nyang peususah israel. awaknyan sadar bahwa ulon kheueh tuhan nyang mahamanyang," tuhan nyang mahamanyang meufeuereuman, "ulon ku peusapat ureueng-ureueng israel di nangroe nyang jioh di teupnat awaknyan ka lon peu crebre, dan bandum bansa jiteupeue bahwa ulon nyoe suci. bansa israel teuma jiduek lom bak tanoh awaknyan keudroe, tanoh nyang ka ulon jok bak hamba lon nabi yakub. awaknyan udeb deungon aman disinan dan jipeudong rumoh-rumoh meunan cit jipeuget lampoh anggo. ulon ku hukom bandum kawom sil-ingka awaknyan nyang ka jihina awaknyan, deungon nyan israel ka jeuet keu aman. dan baro kheueh jiteupeue le awaknyan bahwa ulon kheueh tuhan allah awaknyan." bak tanggai dua blaih buleuen siploh, bak thon nyang keusioploh kamoe teuboih, tuhan meufeuereuman ubak ulon, "hei manusia fana, gata dhot kheueh bansa meuse nyan. gata peugah kheueh ubak jihnyan bahwa nangroe nyan dan rakyat jih teuma teuhukom." tuhan nyang mahamanyang geuyue ubak ulon keu lonjak peusampoe peusan nyoe ubak raja nangroe meuse, "ulon nyoe musoh gata, hei buya gogasi nyang teu-eh bak teungoh krueng. haba gata beurakah gata peugah bahwa krueng nil na kheueh atra gata dan gata kheueh nyang peuet nyan. ulon kugantung ceunawiet bak geuheueng gata dan lon peuleukek eungkot-eungkot nibak sisek gata. teuma gata laju ulon tarek nibak krueng nil nyan deungon mandum eungkot nyang meuleukek bak sisek gata nyan. oh ltheueh nyan gata dan mandum eungkot gata nyan laju lon geulawa u padang pasi. tuboh gata meuseumpom bak tanoh dan teugageueng disinan. hana meusidroepi nyang jitem peukubu gata. tuboh gata ulon jok keu cicem-cicem dan beulatang-beulatang nyang laen jeuet jipajoh. teuma baro kheueh jiteupeue le banmandum rakyat meuse bahwa ulon kheueh tuhan." tuhan meufeuereuman, "hei bansa meuse! ureueng israel meuharab that-that beugata tulung, teuma nyang deuh gata na kheueh lagee tungkat nyang leumoh hana meudaya. watee awaknyan jimeusadeue ubak gata, gata patah dan gata culok gitiek awaknyan, laju rhung awaknyan meukilah. le sabab nyan, tuhan nyang mahamanyang, geupeugah ubak gata, bahwa ulon lon kirem tantra keu jijak prang gata deungon peudeueng, dan jipoh mate peundudeuk meunan cit beulatang nyang gata peulara. nangroe meuse jeuet keutanoh nyang sungue hana me ureueng, teuma beutateupeue kheueh bahwa ulon kheueh

tuhan." tuhan meufeureuman, "hei raja nanggroe meuse! sabab gata peugah bahwa krueng nil nyan na kheueh atra gata lom teuma gata kheueh nyang khueh krueng nyan, teuma ulon ka jeuet keu musoh gata, dan musoh krueng nil gata. bansaboh nanggroe meuse lon peujeuet keutanoh nyang sungue phon nibak banda migdol di utara sampoe u banda aswan siblahi seulitan, sampoe trok u bataih sudan. hana manusia atawa beulatang nyang na jak keunan. peuet ploh thon treb jih hana ureueng nyang tinggai disinan. ulon kupeujeuet nanggroe meuse nyang sungue that-that meunyoe tabandeng ngon nanggroe-nanggroe laen nyang sungue, nanggroe meuse kheueh nyang paleng sungue. peuet ploh thon treb jih banda-banda nyang na lam nanggroe meuse jeuet keu banda-banda nyang sungue nyang tinggai na kheueh runga-rungka dan jioh leubeuh parah nibak runga-rungka banda pat mantong. bansa nanggroe meuse lon peujeuet keu peungunge nyang minah nibak nanggroe jih. awaknyan meutabu jeub-jeub nanggroe dan tinggai lamkawan bansa laen." tuhan nyang mahamanyang meufeureuman, "hei bansa meuse, oh ka habeh peuet ploh thon nyan, gata ulon ba lom u nanggroe bak teupat gata nyang ka ltheueh meutabu. gata lon peupuleh dan lon yue tinggai di nanggroe meuse blah seulitan, tanoh asai gata. disinan gata tapeudong keurajeuen nyang leumoh, keurajeuen nyang paleng leumoh bansigom donya. ulon lon peujeuet gata leupah leumoh sampoe gata hana jeuet gata peurintah bansa-bansa nyang laen atawa gata peusombong droe keu awaknyan. israel hana jilakee tulung le ubak gata. naseb gata hei bansa meuse teuma teuingat bansa israel padubna silab jih jipeubangga bansa meuse nyan, lagee nyang ka ltheueh jipeubuet. teuma jiteupeue kheueh le israel bahwa ulon kheueh tuhan nyang mahamanyang." bak tanggai sa buleuen sa bak thon nyang keu dua ploh tujoh masa kamoe teuboih, tuhan meufeureuman ubak ulon, "he manusia fana, raja nebukadnezar di nanggroe babel jijak prang tirus. jihnyan jipeurintah ubak mandum tantra jih mangat jiseuon beuban nyang geuhon nyan, sampoe ulee awaknyan ka jeuet keu lapeueng dan baho awaknyan ka teupuliek, teuma bah kheueh raja meunan cit tantra jihnyan hana meuteume wase sapeue nibak nanggroe nyan. sabab nyan, ulon tuhan nyang mahamanyang ulon peugah: tanoh nanggroe meuse ulon jok keu raja nebukadnezar. jihnyan jireupah peue-peue nyang na di sinan dan laju jiba banmandum keukayaan nanggroe meuse nyan sibagoe upah keu sidadu jihnyan. tanoh nanggroe meuse ulon bri keujih nyan sibagoe tanda asa, sabab tantra jih ka jimeubuet keu ulon. ulon, tuhan nyang mahamanyang ka lon peugah haba. pakriban hai nyan teujadi, ulon kupeujeuet bansa israel keu bansa nyang teuga, dan jeuet keumungken gata, yehezkiel, gata peugah haba deungon beubaih sampoe soe mantong ureueng jeuet jideungoe gata. teuma baro kheueh jiteupeue le awaknyan bahwa ulon kheueh tuhan." tuhan meufeureuman lom, kheun gobnyan, "he manusia fana, meuramai kheueh dan peugah kheueh ubak bansa meuse peue nyang ulon tuhan nyang mahamanyang peugah ubak awaknyan.

meulakee kheueh dan meuratok kheueh lagee nyoe: adoh hai ma! uroe tuhan ka to that! gobnyan sigra geucok tendakan. uroenyang seupot dan meuawan, uroe bansa-bansa jiteurimong hukoman. bala nyang raya rhot ateueh nanggroe sudan. di nanggroe meuse na prang raya. manyet-manyet reubah meugageueng; bansaboh nanggroe geureupah dan geupeujeuet keu runga-rungka. lam prang nyan na cit nyang mate bubena sipa-i teusiwa di sudan, lidia, libia, arab, kub dan na bansa ulon keudroe." tuhan nyang mahamanyang meufeureuman, "nibak migdol di utara sampoe u aswan di seulitan, bandum meurakan ngon nanggroe meuse teuma mate di mideuen prang. dan sipa-i meuse nyang sombong nyan hanco han meuh sah. ulon tuhan nyang mahamanyang ka lon peugah haba. nanggroe nyan jeuet keu nanggroe seungue, seungue nibak nanggroe seungue nyang laen, dan banda-banda di nanggroe teuma jeuet keu runga-rungka. meunyoe ulon ka lon tot nanggroe meuse dan lon poh mate bandum rakan jihnyan, baro kheueh jiteupeue bahwa ulon kheueh tuhan. meunyoe uroe nyan ka trok, dan nanggroe meuse ka habeh hanco, ulon kukirem utosan-utosan deungon bubena kapai keu teupeukeujot ureueng sudan nyang hana curiga nyan, teuma awaknyan teumakot. beutoi, uroe nyan teuma teuka." tuhan nyang mahamanyang meufeureuman, "ulon lon peuguna raja nebukadnezar di nanggroe babel jeuet jipeuhanco banmandum keukayaan nanggroe meuse. nebukadnezar meusajan ngon sipa-i jihnyan nyang hana rasa gaseh sayang jiteuka dan jipeuhanco bandum tanoh nyan. awaknyan jiprang nanggroe meuse deungon peudeueng, dan manyet-manyet meuteung bayeueng bansaboh nanggroe nyan. ulon kukirem krueng nil dan lon jok bandum nanggroe meuse ubak ureueng-ureueng juhet. keu ureueng aseng teuma ulon yue peuhanco bandum nanggroe nyan. ulon, tuhan, ka lon peugah haba." tuhan nyang mahamanyang meufeureuman, "ulon ku peuhanco bandum beurala dan dewa-dewa nyang na di memfis. hana le raja di nanggroe meuse. banmandum peundudek disinan lon peujeuet keu teumakot. bansaboh nanggroe meuse blaih seulitan seungue seungab dan banda soan di utara ulon tot. tebe ma banda nyan lon hukom, dan keukayaan disinan lon peuranab. ulon ku peuleueh beungeh ulon keu pelusium, banda nyang jeuet keu kuta meuse, dan banda nyan meudeurita that. beutoi, ulon lon tot nanggroe meuse. binteh-binteh beuton banda tebe reuloh dan banda nyan jipeuron le ie raya. ureueng-ureueng muda nibak banda heliopolis dan banda bubastis mate dimideuen prang, dan ureueng-ureueng inong teuma teudrob. bak watee ulon peu habeh keudaulatan meuse dan ulon cok kuasa jihnyan nyang that jipeubangga nyan, taupan-hes peunoh deungon seupot dan ureueng-ureueng inong nyang na disinan teudrob. meunan kheueh ulon hukom nanggroe meuse, dan baro kheueh jiteupeue le awaknyan bahwa ulon kheueh tuhan." bak tanggai tujoh buleuen sa bak thon nyang keu siblahi masa kamoe teuboih, tuhan meufeureuman ubak ulon, "he manusia fana, ulon ka ulon wiet jaroe raja meuse, dan hana ureueng nyang balot

jaroe raja nyan atawa nyang urot jaroe nyan jeuet bagaiuh puleh dan teuga lom mangat hase jimat peudeueng lagee nyang ka ka. ulon tuhan nyang mahamanyang lon peugah: ulon nyoe musoh raja meuse, dan bandua blah jaroe jihnyan ulon wiet, bah kheueh nyang mantong teuga meunan cit nyang ka ltheueh patah. dan peudeueng nyan rhot nibak jaroe jihnyan. ulon kupeu crebre ureueng meuse bansigom donya. laju lon peuteuga jaroe raja babel, dan lon peureugam peudeueng lon lam jaroe raja nyan. teuma jaroe raja meuse ulon wiet sampoe rajanyan meurang-rang dan mate dikeue raja babel, musoh jihnyan. beutoi, raja meuse kupeuleumoh, dan raja babel lon peuteuga. meunyo peudeueng lon ka ulon bri keu jihnyan, dan laju jiaayon peudeueng nyan u nanggroe meuse, awaknyan teuma jiteupeue bahwa ulon kheueh tuhan. ulon kupeusiseue ureueng-ureueng meuse bansigom donya. dan baro kheueh jiteupeue ie awaknyan bahwa ulon kheueh tuhan." bak tanggai sa buleuen lhee thon nyang keu siblahi watee kamoe teuboih, tuhan meufeureuman ubak ulon, "he manusia fana, tapeusampoe kheueh peusan ulon nyoe ubak raja meuse dan bandum bansa jihnyan: keubit that hebat keubeusaran gata! hana nyang hase jibandeng deungon gata! gata lagee bak ceumara libanon nyang gagah peunoh cabeueng nyang rampak dan ceudah. bak jih tupat dan sulu pucok jih meusampoh awan. ceumara nyan timoh sabab ie jih seb. krueng nyang na dimiyueb tanoh jih peunajoh, jiseuram bandum ukeu jih, dan sampoe basah bak-bak kayee laen. sabab ie hantom na kureueng, timoh jih subo, cabeueng jih raya dan panyang. nibak bandumnyan na bak kayee didalam uteuen, kayee nyan kheueh nyang paleng lambong meusampoh awan. meubagoe cicem jimeu eumpung bak ranteng cabeueng. beulatang kleut jimeu aneuek dimiyueb kayee ceumaranyan. bandum bansa meugah di atueuh donya jiduek jimeureului diyueb kayee nyan. kayee ceudah keu teupandang; bak jih sulu cabeueng jih panyang. ukeue jih meuseubee jioh lam bumoe sampoe trok bak mata ie lam tanoh. bak bak kayee ceumara nyang na di eden, nyan na kheueh taman po teu allah hana jeuet teupesaban deungon geuhnyan. hana bak ceumara nyang hase teupesaban, hana bak kayee nyan paleng lagee nyan panyang cabeueng jih. beutoi that, di taman po teu allah hana bak kayee nyang saban lagee nyan. ulon kheueh nyang peujeuet kayee nyan ceudah rupawan deungon cabeueng-cabeueng jih nyang panyang rampak meusigak. bandum bak kayee di taman po teu allah meurasu ceumuru keu kayee nyan. sababnyan, ulon tuhan nyang mahamanyang, ulon peugah ubak gata peue nyang teuma teujadi atueuh bak kayee nyang pucok jih sampoe meusampoh awan nyan. sabab seumaken lambong, seumaken sombong teuma jih nyan. dan ulon tulak jihnyan dan ulon jok bak peunguasa aseng, nyang peujra jihnyan suisai deungon keujeuhetan nyang jipeubuet. sipa-i aseng nyang keujam dan hana amphon nyan jikoh dan jipeubiyeu disinan. ranteng jih nyang ka patah rhot meutabu atueuh bandum gunong dan panton di nanggroe nyan. bandum bansa nyang na tinggai dimiyueb nyan jijak jitinggai jihnyan.

cicem-cicem teuka dan laju jidong atueuh bak kayee nyang ka reubah nyan, dan bubena beulatang kleut laju jibloh-bloh atueuh deun kayee nyan. bandum nyan teujadi mangat phon saat nyoe, hana le bak kayee nyang timoh manyang lagee nyan; hana le pucok kayee nyang meusampoh awan bahpi meuteume ie nyang meulimpah ruwah. bandum haroh mate lagee manusia fana, dan meusapat ngon ureueng-ureueng nyang ka jitron lam donya ureueng mate." meunoe kheueh feureuman tuhan nyang mahamanyang, "meunyo bak kayee nyan ka jitron lam donya ureueng mate, ulon yue ubak ie nyang na dimiyueb tanoh mangat meuganong sibagoe tanda meukabong. ulon kupeuteun ie krueng nyang tajam ji ile dan ulon doe aneuk-aneuk krueng. le sabab bak kayee nyan ka mate, ulon kupeutron seupot glab atueuh gunong-gunong libanon dan lon peulayee bandum bak kayee lam gle. watee bak kayee nyan lon peutron lam donya ureueng mate, su rhot bak kayee nyan teukeujot bubena bansa-bansa. bandum bak kayee nyan di eden dan bak-bak kayee nyang teupileh di libanon nyang meuteume ie meulimpah ruwah, dan nyang ka jitron u bumoe nyang paleng miyueb galak lumpah na deungon reubah ka bak kayee nyan. awaknyan ji-ireng lam donya ureueng mate dan meusapat ngon awaknyan nyang ka rhot leubeh ilee. dan banmandum nyang ka jiduek dimiyueb bak kayee nyan yoh masa ilee geupeusiseu lamkawan bansa-bansa. bak kayee nyan teupeulambang keu raja nanggroe meuse dan bansa gobnyan. hana bak kayee di eden nyang meunan manyang dan mulia. teuma bak saat nyoe lagee bak-bak kayee di eden nyan cit teuma, bak kayee nyan teuma jitron lam donya ureueng mate dan meusapat ngon awaknyan nyang hana jituri keu po teu allah dan deungon awaknyan nyang mate di mideun prang. ulon, tuhan nyang mahamanyang ka lon peugah haba." bak tanggai sa buleuen dua blaih bak thon nyang keudua blaih masa kamoe teuboih, tuhan meufeureuman ubak ulon, "he manusia fana, tabri kheueh peuingat nyang paleng kreuheh keu raja nanggroe meuse. tapeusampoe kheueh peusan lon nyoe ubak jihnyan, 'gata meulagak lagee singa muda lamkawan bansa-bansa, teuma nyang sibeuna jih gata bacut saho lagee buya nyang meulangue didalam ie. gaki gata teupeuceuko dan teupeukuteo bubena krueng. bak watee bansa-bansa meusapat, lon drob gata deungon jeue ulon, dan lon peubiyeu bansa-bansa nyan jihila gata atueuh darat. gata lon seumpom atueuh tanoh meunan cit bandum cicem dan beulatang peulara gata ulon yue jijak pajoh gata. laju gunong-gunong dan panton-panton lon peupeunoh ngon gangke gata nyang ka brok nyan. darah gata lon peuro sampoe habeh basah gunong-gunong dan habeh peunoh bubena krueng. bak watee gata lon peubinasu, langet lon peukulubong dan bintang-bintang lon peumala. mata uroe ulon som dilikot awan dan buleuen hana meucahya. beutoi, bandum peungeuh nyang na di langet lon peulon, dan bumoe lon peujeuet keu seupot buta. ulon, tuhan nyang mahamanyang ka lon peugah haba. bak watee ulon peusampoe haba keuhai keuhancoran gata bak nanggroe-nanggroe nyang gohlom gata turi, jai that

bansa laen meukarat lagoena. beutoi, ulon ku hapiet peudeueng ulon dan lon peutalo gata. raja-raja laen dan bansa-bansa laen jikalon tindakan ulon nyan ateuh gata. bak watee nyan awaknyan yo ngon teumakot dan yo meugam-gam sabab jitakot mate.' " tuhan yang mahamanyang meufeureuman ubak raja meuse, "peudeueng raja babel jihapiet ateuh gata. sipa-i sipa-i nibak bansa-bansa nyang keujam ulon yue suet peudeueng awaknyan dan jiheuntam bandum rakyat gata. rakyat gata dan bandum peue-peue mantong nyang gata peubangga hanco meukeupeng-keupeng. beulatang peulara gata lon reupang ngon peudeueng bak bineh krueng teumpat jih jieb ie. bah kheueh nyan beulatang meunan cit manusia hana jipeuceukoe le ie krueng nyan. dan bubena krueng nyang na di nanggroe gata lon peujeureuneh dan lon peu ile ie jih deungon teunang. ulon, tuhan yang mahamanyang ka lon peugah haba. meunyoeng nanggroe meuse ka lon peujeuet keu saboh padang pasi nyang seungue, dan ulon peubinasa bandum nyang na tinggai disinan, awaknyan jiteupeue bahwa ulon kheueh tuhan. peuingat nyang kreuehnyoe jeuet keu ca-e meukabong. kawom inong nibak bansa-bansa laen meuca-e sibagoe tanda meukabong keu nanggroe meuse dan banmandum rakyat jihnyan. ulon, tuhan yang mahamanyang ka lon peugah haba." tanggai dua blaih buleuen keu sa bak thon nyang keu dua blaih masa kamoe teuhoi, tuhan meufeureuman lom ubak ulon, "he manusia fana, meukabong kheueh keu rakyat meuse. kirem kheueh awaknyan lam donya ureueng mate meusajan-sajan ngon nanggroe nyang teuga nyang laen. tapeugah kheueh ubak awaknyan, 'tapike le gata gata nyang paleng ceudah? gata teuma tatron lam donya ureueng mate, dan jipeu-eh lamkawan ureueng nyang hana jituri keu po teu allah.' bansa meuse mate meusajan ngon ureueng nyang mate dimideuen prang. saboh peudeueng ka siab keu teucang mate awaknyan banmandum. pahlawan-pahlawan nyang gagah beurani dan ureueng-ureueng nyang muprang blah bansa meuse jisambot deungon seunang ate ateuh jiteuka ureueng meuse u dalam donya ureueng mate. awaknyan jiseumurak lagee nyoe, 'ureueng-ureueng nyang hana jituri keu po teu allah nyan ka mate di mideuen prang. jinoenyo awaknyan jijak keunoe keu jijak eh disinoel' asyur ji-eh disideh, jikeulileng le jrati-jrati sipa-i jihnyan. awaknyan bandum ka mate dimideuen prang. jrati awaknyan na dibagian nyang paleng lhok lam donya ureueng mate. yoh watee mantong udeb, awaknyan jiteupeuteuka teumakot ateuh rhueng donya. elam na disideh deungon jrati sipa-i jih na bansikeulileng jih. hana teupeusunat, awaknyan bandum mate dimideuen prang, laju jitron lam donya ureueng mate dan haroh jitanggong malee meusajan ngon ureueng-ureueng nyang ka awai mate nibak muprang nyan. mesekh dan tuban na disinan, jikeulileng le jrati-jrati sipa-i jihnyan. hana teupeusunat, awaknyan bandum mate dimideuen prang. yoh watee mantong udeb, awaknyan jiteupeuteuka teumakot di ateuh donya. awaknyan hana meuteume teupeukubu seucara horeumat lagee pahlawan bak jamen dilee nyang

jitron lam donya ureueng mate deungon sinjata leungkab. pahlawan-pahlawan nyan teupeukubu deungon peudeueng dimiyueb ulee dan peurisasi di ateuh dada. watee jihnyan mantong udeb, pahlawan-pahlawan nyan keubit that peukasa sampoe habeh teumakot banmandum ureueng. meunan kheueh ureueng meuse teupeukubu dan teupeu eh lamkawan ureueng nyang hana jituri bak po teu allah dan mate dimideuen prang. edom na disideh deungon bandum raja dan peunguasa. yoh masa dilee awaknyan na tantra-tantra nyang teuga, teuma bak saat nyoe awaknyan teu-eh lam donya ureueng mate meusajan ngon ureueng mate nyang laen nyang hana jituri bak po teu allah. bandum pangeran nyang na di utara na disinan, meunan cit teuma ngon ureueng-ureueng sidon. yohmasa dilee keukuasaan awaknyan lumpah jitakot le gob, teuma bak saat nyoe awaknyan ka teupeumalee hana teupeusunat watee jitron lam donya ureueng mate meusajan-sajan ngon ureueng nyang mate dimideuen prang. disinan awaknyan teu eh dan jitanggong ayeub meusajan-sajan ngon ureueng nyang tron lam donya ureueng mate. meunyoeng raja meuse dan sipa-i jihnyan ka trok lam donya ureueng mate dan jikalon bandum ureueng nyang ka mate di mideuen prang nyan, awaknyan meurasas teuhibo. ulon, tuhan yang mahamanyang ka lon peugah haba. ulon kheueh nyang jeuet keusabab raja meuse teupeuteuka teumakot keu ureueng-ureueng nyang udeb, teuma lamkawan sipa-i jihnyan mate dan teupeueh meusajan-sajan ngon ureueng nyang hana jituri keu po teu allah dan dan mate dimideuen prang. ulon tuhan po teu allah nyan mahamanyang ka lon peugah haba." tuhan meufeureuman lom ubak ulon, kheun gobnyan, "he manusia fana, tapeugah kheueh ubak bansa gata bahwa meunyoeng ulon ka lon peuteuka prang ateuh saboh nanggroe, nyoe kheueh nyang teuma teujadi. peundudeuk nanggroe nyan geupileh lamkawan awaknyan keudroe sidroe ureueng jaga. meunyoeng ureueng jaga nyan jikalon na musoh teuka, le jihnyan laju jipeumusanda tanda bahaya jeuet bandum ureueng meujaga-jaga. barang sigasoe na jideungoe su tanda bahaya nyan teuma hana jipakoe, dan musoh teuka laju jipoh mate ureueng nyan, dan jihnyan laju mate, nyan sabab salah jih keudroe. meunyoeng ureueng nyan jipakoe bak su bahaya nyan, pasti ureueng nyan seulam. teuma meunyoeng ureueng jaga nyan na jikalon musoh ka jiteuka teuma hana jipeumusanda tanda bahaya, laju le musoh jipoh mate ureueng-ureueng nyang meudesya nyan, tanggong jaweueb ateuh mate awaknyan lon tuntot bak ureueng nyan. he manusia fana, gata lon baiait jeuet keu ureueng kawai bansa israel. tajak peusampok kheueh ubak awaknyan haba peuingat nyoe: meunyoeng ulon peugah bahwa sidroe ureueng jeuhet mate, teuma gata hana tapeuingat ureueng nyan jeuet jihnyan jibubah pi-e jih sampoe jihnyan seulam, dan jihnyan mate mantong lagee ureueng meudesya. teuma tanggong jaweueb ateuh mate jihnyan lon tunggee bak gata. meunyoeng gata tapeuingat ureueng jeuhet nyan dan jihnyan hana jitem pioh jipeubuet jeuhet, ureueng nyan mate sibagoe ureueng meudesya, teuma gata

keudroe sealamat." tuhan meufeuereuman ubak ulon, "he manusia fana, ta ulang kheueh ubak ureueng israel haba awaknyan nyoe, 'kamoe meurana sabab teupeubeuban deungon desya dan keujeuhetan kamoe, pakriban kamoe meuteume udeb?' peugah kheueh ubak awaknyan bahwa deumi ulon, po teu allah nyang udeb, tuhan nyang mahamanyang, ulon hana galak meunyo ureueng jeuhet mate; seubalek jih ulon harok jitinggai desya-desya jih mangat jihnyan teutab udeb. he bansa israel, tapioh kheueh tapeubuet jeuhet! pakon gata keunek mate? nah, he manusia fana, tapeugah kheueh ubak ureueng israel bahwa meunyo ureueng nyang jroh-jroh jipeubuet desya, dan buet jih nyang get nyang ka jipeubuet yoh masa ilee hana hase geutulong jihnyan. meunyo ureueng jeuhet jipioh jipeubuet desya, ureueng nyan hana teuhukom, dan meunyo ureueng nyang jroh jipeubuet desya, ureueng nyan hana teupeusealamat. jeuet mantong ulon ka lon meujanji keu lon peusealamat ureueng-ureueng nyang jroh, teuma meunyo ureueng nyan ka jipeuphon jipeubuet desya dan meuharab bahwa jihnyan teupeusealamat sabab buet jih nyang get yoh masa dilee nyan, ureueng nyan keuliru. ulon hana lon ingat le buet nyang get nyang ka jipeubuet nyan dan jihnyan mate sabab desya-desya jih keudroe. jeuet mantong ulon ka lon peuingat ureueng-ureueng jeuhet bahwa jihnyan mate. teuma meunyo jihnyan jipioh jipeubuet desya dan jipeuphon peubuet peue nyang jroh dan beuna, miseu jih ureueng nyan jijak pulang barang nyang jipeugadee le gob, atawa barang nyang ka jicue dan jitaat ubak hukom-hukom nyang teuba jihnyan ubak udeb, dan jihnyan hana mate. ulon hana lon ingat le desya-desya nyang ka jipeubuet, dan jihnyan udeb sabab jipeubuet peue nyang beuna dan get. teuma bansa nyan jipeugah bahwa tindakan ulonnyan hana ade. sigoe teuk ulon peugah bahwa meunyo ureueng nyang get ka jipeuphon jipeubuet nyang jeuhet, ureueng nyan mate sabab buet jihnyan. meunyo ureueng nyang jeuhet jipioh jipeubuet desya, dan ka jipeuphon peubuet peue nyang get dan beuna, ureueng nyan udeb ngon buet jihnyan. bahpi lagee nyan bansa israel jipeugah cit bahwa tindakan ulon nyan hana ade. bit, ulon lon peusidang awaknyan maseng-maseng meunurot buet nyang ka jipeubuet nyan." bak tanggai limong buleuen siploh, bak thon nyang keudua blaih masa kamoe teuboih, sidroe ureueng nyang hase ltheueh di yerasalem teuka dan jijak peugah ubak ulon bahwa banda nyan ka rhot. bak malam sigohlom awaknyan teuka, ulon ka lon rasa kuasa tuhan. jadi watee ureueng nyan jijak ubak ulon, ulon ka jeuet lon peugah haba dan babah lon hana le kalu. tuhan meufeuereuman ubak ulon, "he manusia fana, ureueng-ureueng nyang tinggai nibak runga-rungka banda nyang reuloh di tanoh israel nyan jipeugah, 'nabi ibrahim meuteume bandum tanoh nyoe, padahai gobnyan cit sidroe. geutanyoe nyoe jai that jeumeulah jih, jadi tanoh nyoe jeuet keu atra geutanyoe.' " sabab nyan tuhan nyang mahamanyang geuyue ubak ulon jak peusampoe peusan nyoe ubak awaknyan, "gata tapajoh uengkot sie nyang na mantong meudarah; gata taseumah beurla dan tapeubuet buet peue mate gob. ceubeueh

that gata peugah tanoh nyoe atra milek gata. gata meubangga ngon peudeueng gata. tindakan gata kuto lumpah na. gata banmandum tapeubuet buet meumukah. peue kheueh mantong cit gata aku bahwa tanoh nyoe atra milek gata? deumi ulon, po teu allah nyang udeb, tuhan nyang mahamanyang, ureueng-ureueng nyang tinggai di runga-rungka banda nyan mate keunong poh. awaknyan tinggai di padang-padang luwah dan jipajoh le beulatang buih. awaknyan jimusom bak gunong-gunong dan guha-guha awaknyan mate sabab keunong bala peunyaket. nanggroe nyan lon peujeuet padang pasi nyang sungue, dan keukuasaan nyang awaknyan peubangga nyan habeh. gunong-gunong nyang na di israel jeuet keusungue seunyah sampoe hana meusidroepi nyang na ureueng jijeuet jak rot nyan. bak watee ulon kuhukom bansa-bansa nyan sabab desya-desya awaknyan dan lon peujeuet nanggroe nyan sungue seunyah, baro kheueh jiteupeue le awaknyan bahwa ulon kheueh tuhan." tuhan meufeuereuman, "hei manusia fana, gata ka jeuet keu boh nariet ureueng nyang saboh bansa ngon gata watee awaknyan meurumpok bak beuton-beuton banda atawa bak bineh-bineh babah pintoe rumah. awaknyan jipeugah sabe keudroe-droe, 'jak tadeungoe peue nyang geupeugah le tuhan nibak ure nyoe.' awaknyan jijak meuron-ron dan sibagoe umat lon awaknyan jiduek jideungoe tutoe haba gata, teuma peue nyang gata peurintah nyan hana awaknyan peubuet. bak bibi awaknyan jipeugah tutoe haba cinta teuma lam ate awaknyan nyang jipike keuhai laba. gata jianggab sidroe ureueng meunyanyci ca-e-ca-e cinta nyang meusu meu-alon dan carong gata peumeu en keucapi. beutoi awaknyan jideungoe tutoe haba gata teuma hana jipeubuet lagee kheun gata. banmandum nyang gata peugah nyan teujadi, dan meunyo watee nyan ka teuka, awaknyan jiteupeue bahwa ka ltheueh na sidroe nabi lamkawan awaknyan." tuhan meufeuereuman ubak ulon, "he manusia fana, tadhoh kheueh raja-raja israel, dan tapeusampoe kheueh peue nyang ulon, tuhan nyang mahamanyang peugah ubak awaknyan, 'ceulaka kheueh gata, he tukang-tukang meurabe israel. gata nyang tapike keupeuntengon droe keudroe gata, bukan keupeuntengon bubiri-bubiri gata. ie mom jih gata jieb, bulee-bulee jih gata cok keupeukayan, dan bubiri-bubiri nyang paleng tumbon gata sie dan gata pajoh. gata hantom gata uroh bubiri-bubiri gata. bubiri-bubiri nyang leumoh hana gata peulara, nyang saket hana gata peue ubat, nyang luka hana gata balot, nyang sisat dan gadoh hana gata mita dan gata puwoe lom. teuma bandum bubiri gata nyan gata peusanaut deungon keujam. sabab hana tukang meurabe, bubiri-bubiri nyan ka meucerebre dan jeuet keupeunajoh beulatang buih. dan bubiri-bubiri lon jeuet jimeurawoh di buket-buket nyang lambong dan digunong-gunong. awaknyan meutabuh bansigom muka bumoe, hana meusidroepi nyang tem kalon atawa jijak mita bubiri nyan. nyan, tukang-tukang meurabe, deungoe kheueh peue nyang ulon, tuhan nyang mahamanyang peugah ubak gata: deumi ulon, po teu allah nyang udeb, tangiang kheueh! bubiri-bubiri ulon ka jiteugom dan jipajoh le beulatang

buih, sabab hana nyang tem rabe bubiri-bubiri nyan. gata tukang-tukang meurabe lon nyang hana gata pakoe bubiri-bubiri ulon nyan. nyang gata pike na kheueh droe gata keudroe mantong, kon keu keupeuntengan bubiri-bubiri gata. dan, deungoe kheueh nyoe, he tukang-tukang meurabe, ulon, tuhan nyang mahamanyang lon peugah ubak gata, bahwa ulon nyoe musoh gata. bubiri-bubiri ulon nyan ulon cok lom nibak gata dan hana le lon peucaya keu gata; gata hana le lon bri idhin nyang tapike keu keupeuntengan gata keudroe. bubiri-bubiri ulon kulakee peuseulamat ubak gata sampoe bubiri nyan hana le jeuet keu peunajoh gata.' " tuhan nyang mahamanyang meufeureuman, "ulon keudroe nyang jak mita bubiri ulon dan lon nyang peulara bubiri-bubiri nyan, lagee sidroe tukang meurabe jimita dan jipeusapat bubiri jihnyan nyang ka meubrebre laju jipeulara bubiri-bubiri nyan. awaknyan lon puwoe nibak jeub-jeub sagoe teumpat awaknyan meutabu bak uroe nyang seupot dan sial nyan. awaknyan lon peuteubiet nibak jeub-jeub bansa dan nanggroe-nanggroe aseng, laju lon peusapat dan lon puwoe u nanggroe jih keudroe. awaknyan lon rabe di gunong-gunong dan di panton-panton israel dan lon paroih awak u padang naleueng nyang mangat. keubit, ulon lon bri padang naleueng nyang subo di gunong-gunong dan di panton-panton tanoh israel. disinan jihnyan meureuhat dan jimeurot naleueng deungon puih ate dan aman. ulon keudroe jeuet keu tukang meurabe bubiri-bubiri lon dan lon keubah teumpat meureuhat keu jihnyan; ulon, tuhan nyang mahamanyang ka lon peugah haba. nyang gadoh lon mita, nyang sisat lon puwoe, nyang luka lon balot, nyang saket lon peu ubat; teuma nyang teumbon dan teuga lon peubinas, sabab ulon tukang meurabe nyang lon peubuet peue nyang get. deungoe kheueh, he bubiri-bubiri lon! ulon tuhan nyang mahamanyang lon peugah ubak gata bahwa ulon lon peusidang gata maseng-maseng dan lon peungkreheh nyang get nibak nyang jeuhet, bubiri-bubiri nibak kameng-kameng. lamkawan gata na nyang hana puih deungon tapeu habeh naleueng-naleueng nyang paleng get, teuma tagilo-gilo naleueng nyang hana jiro! jijieb ie nyang jeureuneh dan jipeucikoe ie nyang hana jijieb! bubiri-bubiri ulon nyang laen haroh jimeurot naleueng nyang ka jigilo-gilo dan ji jieb ie nyang ka jipeucikoe. sabab nyan, ulon, tuhan nyang mahamanyang ulon peugah ubak gata, he bubiri-bubiri nyang teumbon, bahwa ulon teuka jeuet keu hakem keu bubiri nyang teuga dan bubiri nyang leumoh. gata tapeusak droe dan tapok-pok bubiri nyang saket sampoe bubirinyan teuparoh lam kawan. teuma ulon keudroe lon peuseulamat bubiri-bubiri lon, mangat jihnyan hana le jipeusaneut ateueh bubiri nyan deungon keujam. ulon teuma lon peusidang bubiri-bubiri lon saboh deumi saboh dan lon peuaseng bubiri nyan nibak nyang get deungon nyang jeuhet. ulon ku baia sidroe raja nyang saban lagee hamba ulon nabi daud, mangat jeuet keu tukang rabe awaknyan sidroe mantong, dan gobnyan jipeulara awaknyan. ulon, tuhan, jeuet keu po teu allah awaknyan, dan raja nyang lagee hamba ulon nabi daud nyan jeuet keu peungusa

awaknyan. ulon, tuhan ka lon peugah haba. ulon kupeuet peujanjian deungon awaknyan, nyang jamin keumanaan awaknyan. ulon ku use bandum beulating buih nyang na bansaboh nanggroe, sampoe bubiri-bubiri ulon jeuet jitinggai deungon aman di padang-padang dan jieh di dalam gle. ulon lon bri beureukat ubak awaknyan dan lon bri idhin ubak awaknyan tinggai bak-bak bineh buket lon nyang suci. ubak awaknyan ulon peutron ujeun meunyeo awaknyan peureulee keu ujeun. bak-bak kayee jimuboh, ladang-ladang jipeuteubiet wase, dan bandum ureueng tinggai deungon aman bak tanoh jih keudroe. meunyeo rante nyang ikat umat lon ka lon peuputoh dan awaknyan ka lon peubeubaih nibak ureueng-ureueng nyang peunamiet awaknyan, dan jiteupeue kheueh le awaknyan bahwa ulon kheueh tuhan. awaknyan hana le jireupah le bansa-bansa nyang hana jituri ulon, atawa jiteugom le beulating buih. awaknyan udeb deungon sejahteura, dan hana meusidroe ureueng nyang peujeuet awaknyan teumakot lom. ulon kupeusubo mandum ladang awaknyan sampoe ka hana le musem keunong deuk di nanggroe nyan. awaknyan hana jihinale le bansa-bansa laen. dan baro kheueh jiteupeue le bandum ureueng bahwa israel nyan na kheueh umat ulon dan ulon nyang lindong awaknyan. ulon, tuhan nyang mahamanyang ka lon peugah haba. beutoi that, gata kheueh kawan bubiri lon nyang ulon bri makheun. gata na kheueh umat ulon, dan ulon kheueh po teu allah gata. ulon, tuhan nyang mahamanyang ka lon peugah haba." tuhan meufeureuman ubak ulon, "he manusia fana, kutok kheueh nanggroe edom. jak peusampoe kheueh ubak peunduduek disinan peue nyang ulon tuhan nyang mahamanyang peugah ubak awaknyan, 'ulon nyoe musoh gata, he peunduduek gunong-gunong edom! tanoh gata lon peujeuet seungue seungab hana ureueng keumiet, dan banda-banda gata jeuet keu runga-rungka. dan tateupeue kheueh le gata bahwa ulon kheueh tuhan. yoh dilee kon gata meumusoh ngon israel dan tapeubiyeu awaknyan jicang-cang yoh watee awaknyan keunong le beuncana sibagoe hukuman keuneulheuh ateueh desya awaknyan. le sabab nyan, deumi ulon, allah nyang udeb, tuhan nyang mahamanyang, mawot na kheueh naseb gata, dan gata hana hase kheueh nibak nyan. gata ka meusalah sabab ka tapeubuet dan tapoh mate gob, dan teupoh mate nyan pih jitiyeub gata. banda-banda nyang na di gunong-gunong edom teuma lon peuseungue dan soe mantong ureueng nyang jak di banda nyan ulon poh mate. gunong-gunong ulon peupeunoh ngon manyet-manyet gata, buket dan panton lon peupeunoh ngon bangke ureueng mate dimideuen prang. nanggroe gata lon peujeuet keupadang beulantara siumu masa, dan banda-banda hana jikeumiet le manusia. dan tateupeue kheueh le gata bahwa ulon kheueh tuhan. gata tapeugah yehuda dan israel deungon tanoh jihnyan maseng-maseng na kheueh atra gata, dan bahwa gata tacok keuhak milek atranyan bahpi ulon, tuhan, na kheueh po teu allah awaknyan. sababnyan, deumi ulon, po teu allah nyang udeb, tuhan nyang mahamanyang, ulon kubalaih dam ateueh gata, sabab gata beungeh,

bingiek dan banci keu umat lon. awaknyan jiteupeue bahwa gata lon hukom ngon sabab buet gata ateuheh awaknyan. dan tateupeue kheueh le gata bahwa ulon, tuhan, ka lon deungoe peunghinaan gata watee gata peugah: gunong-gunong israel ka jeuet keuseungue seungab dan jijok jeuet keu uempeun geutanyoe. he bansa edom, rata raya babah dan tameutotoe deungon sombong keu ulon. ulon ka lon deungoe banmandum nyan. ulon, tuhan yang mahamanyang lon peugah: bansaboh donya galak watee bansaboh nanggroe gata ulon peujeuet keupadang nyang seungue seungab, saban lagee gata galak watee takalon israel milek ulon, jeuet keu seungue seungab. gunong-gunong seir, dan bansaboh tanoh edom seungue seungab. dan bandum ureueng jiteupeue bahwa ulon kheueh tuhan.' " tuhan meufeuereuman, "he manusia fana, tajak mariat kheueh ubak gunong-gunong israel dan tayue awaknyan beujideungoe amanat tuhan nyang mahamanyang, 'watee bansa-bansa nyang na seukeulileng nyan jijak prang dan jireubot gata, awaknyan ka jihina bansaboh israel. deungon galak that awaknyan jipeugah bahwa saatnyoe buket-buket purbakala nyan ka jeuet keumilek awaknyan. sabab nyan, he gunong-gunong dan buket-buket, aneuk-aneuk krueng dan panton-panton, he banda-banda nyang ka jeuet keu runga dan nyang ka jitinggai le ureueng po jih lon jireupah dan jihina le bansa-bansa nyang na seukeulileng awaknyan, deungoe kheueh peue nyang geupeugah le tuhan yang mahamanyang ubak gata: deungon ju dan seu uem watee beungeh ulon laju ulon dhot dan ulon seugah bansa-bansa seukeulileng gata khusus jih bansa edom, sabab awaknyan deungon galak dan meusikeub meuhina, ka jireubot tanoh ulon dan jireupah bandum blang-blang naleueng lon. jinoenyoe ulon beungeh dan lon heuntam ban galak droe sabab bansa-bansa nyan ka lumpah that meuhina dan jipeujayah gata. ulon, tuhan yang mahamanyang lon meumupah bahwa bansa-bansa nyang di seukeulileng gata nyan keunong hina teuma. teuma keu gata ulon peugah he gunong-gunong israel, bak-bak kayee meutarok dan jimuboh keu umat lon israel nyang kato that watee jiwoe. ulon kudong blah gata he israel, dan ulon lon bri keupastian bahwa tanoh gata jicatok lom dan jitabu bijeh. ulon lon tamah jeumeulah umat lon israel. awaknyan tinggai di banda-banda dan jipeudong lo banmandum runga jih nyang ka reuloh. peunduduek dan beulatung peulara gata lon tamah, sampoe ka meutamah le, leubeh jai nibak yoh awai, dan awaknyan meu aneuk cucoe nyang le. awaknyan udeb disinan lagee yoh awai dan ulon peujeuet keumakmu, lagee gohlom na gata rasa. dan jiteupeue kheueh le awaknyan bahwa ulon kheueh tuhan. umat ulon israel, lon puwoe mangat jiduek bak nanggroe jih lom. tanoh nyan jeuet keu hak milek awaknyan keudroe dan sabe na teubri hase sampoe aneuk-aneuk awaknyan ka hana mate sabab keunong deuk. ulon, tuhan yang mahamanyang lon peugah: keubit beutoi tanoh nyoe teuboh nan gala tukang pajoh manusia dan tukang reupah aneuk-aneuk miet - bansa nyang tinggai bak tanoh nyan. teuma phon saat nyoe

tanoh nyoe hana le jipajoh manusia atawa teureupah aneuk-aneuk awaknyan. ulon tuhan nyang mahamanyang ka lon peugah haba. hana peureulee le tanoh nyoe jideungoe jihina le bansa-bansa atawa jitunggong hinaan gob. tanoh nyoe hana teupeumate le ureueng nyang tinggai disinan. ulon, tuhan yang mahamanyang kalon peugah haba.' " tuhan meufeuereuman ubak ulon, "he manusia fana, bak watee ureueng-ureueng israel tinggai di nanggroe jihnyan keudroe, awaknyan ka jipeukutoe deungon buet jih keudroe dan pi-e awaknyan. buet awaknyan nyang lagee nyan ka ulon anggab hareuem, lagee ureueng inong nyang teungoh teuka he. beungeh ulon nyang lumpah jai keu awaknyan sabab awaknyan ka jipoh mate manusia nyang le that-that bak tanoh nyan dan jipeukutoe teuma deungon beurala-beurala jih keudroe. awaknyan ulon hukom nyang sisuai deungon cara udeb dan pi-e awaknyan keudroe, laju awaknyan ulon peucebre u nanggroe-nanggroe aseng. ho mantong awaknyan jijak, sabe jipeukutoe nan ulon nyang suci. sabab le ureueng rame jipeugah lagee nyoe, 'bansa nyoe na kheueh umat po teu allah, teuma awaknyan haroh jitinggai tanoh nyang geubri le po teu allah keu awaknyan.' ulon inseueh that sabab nan ulon nyang suci ka jipeukutoe le ureueng-ureueng israel ho-ho mantong nyang awaknyan jak. le sabab nyan, jak peusampoe kheueh peue nyang ulon, tuhan yang mahamanyang peugah ubak bansa israel, 'peue nyang lon peubuet teuma na kheueh kon ngon sabab gata, he ureueng-ureueng israel, teuma le sabab nan ulon nyang suci, nyang ka gata peukutoe ho-ho mantong gata jak. ulon lon tunyok keusucian nan ulon nyang rayeuk nyan, nan nyang ka lueuh gata peukutoe lamkawan bansa, dan jiteupeue kheueh le awaknyan bahwa ulon kheueh tuhan. ulon, tuhan yang mahamanyang ka lon peugah haba. ulon lon peugana gata jeuet tapeuleumah ubak bansa-bansa bahwa ulon nyoe suci, tuhan yang mahasuci. nibak tieb-tieb bansa dan nanggroe, gata lon peusapat dan ulon puwoe ubak tanoh gata keudroe. oh ka lueuhnyan gata ulon reutek deungon ie jeureuneh, mangat gata gleh nibak bandum beurala gata dan nibak peue-peue mantong nyang ka jipeuayeb nan gata. teuma ubak gata ulon bri ate nyang baro dan pikeran nyang baro. ate gata nyang kreuheh lagee batee nyan lon gantoe ngon ate nyang taat. roh ulon lon peutreun lam ate gata dan gata lon jaga mangat gata udeb meunurot hukom-hukom lon dan tataat peue-peue nyang ulon peurintah. dan gata tatinggai bak tanoh nyan ka ulon bri keu indatu gata. gata teuma jeuet keu umat lon dan ulon pih jeuet keu allah gata. gata lon peuleupah nibak peue-peue mantong nan gata nyang ka meucupa. ulon lon bri peurintah ubak gandom mangat timoh deungon subo sampoe gata hanale keunong deuk. ulon lon tamah bubena bak kayee gata mangat udeb subo dan meunan cit hase blang gata lon tamah meulipat ganda, sampoe gata hanale keunong deuk nyang teupeubrok nan gata bak mata bansa-bansa. gata teuingat keu pi-e gata nyang jeuhet dan buet gata nyang hana pantaih nyan, laju gata bosan keudroe gata keudroe sabab desya-desya dan keukeujian gata nyan. ingat kheueh he israel,

bahwa bandum nyan ulon peubuet kon sabab gata. gata haroh meurasaa malee dan hina sabab pi-e gata. ulon tuhan nyang mahamanyang ka lon peugah haba.' " tuhan nyang mahamanyang meufeureuman, "oh ka ltheueh gata ulon peugleh bandum desya gata, gata lon peuidhin tinggai di banda-banda gata lom, dan tapeudong lom runga-runga nyang ka hanco nyan. yoh masa ilee ureueng-ureueng nyang jak rot ladang-ladang gatanyan jikalon padubna tandus jih tanoh nyan, teuma ulon lon peujamin mangat tapeubot lom tanoh nyang tho nyan. dan bandum ureueng jeuet keuhireuen, sabab tanoh nyang yoh awai tandus nyan jinoo ka jeuet keu taman eden, dan banda-banda nyang yoh awai seungue, hanco dan ka jeuet keu runga-runga, bak saatnyoe ka jeuet keu banda-banda nyang paleng khong kuta peutahanan jih dan peunduduek pi meutamah le. dan bansa-bansa silangka nyang mantong na disinan, jiteupeue bahwa ulon, tuhan ka geupeudong lom banda-banda nyang ka hanco, dan teupeubuet keulai blang-blang nyang ka jeuet tandus. ulon, tuhan, ka lon peugah haba dan pasti atranyan ulon keureuja." tuhan nyang mahamanyang meufeureuman, "he bansa israel, ubak gata ka ulon bri idhin lom talakee tulong ubak ulon; ulon kutamah jeumeulah gata lagee kawan bubiri. banda-banda nyang bak saatnyoe ka hanco, saboh saat peunoh ureueng duok disinan saban lagee yerusaleem watee uroe-uroe raya yoh masa ilee, peunoh deungon bubiri-bubiri nyang jipeuseumah. dan tapeupeue kheueh le gata bahwa ulon kheueh tuhan." ulon lumpah teurasa kuasa tuhan, dan roh gobnyan nyang ba ulon geupeutron u panton nyang peunoh deungon tuleueng-tuleueng. ulon geutuntun le tuhan meuwet-wet bak panton nyan, dan ulon kalon bahwa bansaboh panton nyan meusiseu bubena tuleueng nyang lumpah le dan ka tho-tho. tuhan geutanyong ubak ulon, "he manusia fana, peu kheueh mungkin tuleueng-tuleueng nyoe udeb lom?" ulon jawueb, "tuhan nyang mahamanyang, teuma droeneueh kheueh nyang teupeue." laju tuhan geuyue ubak ulon jak peusampoe peusan gobnyan ubak tuleueng-tuleueng nyang ka tho nyan, "ulon tuhan nyang mahamanyang ulon yueb nafah lam tuboh gata mangat gata udeb lom. ulon peuduek urat dan asoe ubak gata dan lon balot gata deungon kulet. gata ulon bri nafah mangat udeb. dan tapeupeue kheueh le gata bahwa ulon kheueh tuhan." laju ulon yehezkiel ulon mariet ubak tuleueng-tuleueng nyan sesuai ngon peurintah tuhan. dan teungoh ulon peugah haba, laju teudeungoe su meukrub-krub, sabab tuleueng-tuleueng nyan ka jipeuphon meusambat tuleueng nyang saboh deungon nyang laen. teungoh ulon kalon hai nyang teungoh teujadi nyan, tuleueng-tuleueng nyan ka jipeuphon meu urat dan meuasoe meunan cit deungon kulet ka meleukek teuma tuboh nyan gohlom na meunafah. po teu allah meufeureuman ubak ulon, "he manusia fana, mariet kheueh ubak angen. tapeugah kheueh bahwa ulon, tuhan nyang mahamanyang lon peurintah ubak angen nyan mangat teuka rot meubagoe arah, jeuet jiproh nafah ubak tuboh-tuboh nyang mate nyan sampoe tuboh-tuboh nyang teu-eh nyan udeb lom teuma." dan ulon

meututoe sisuai deungon peurintah tuhan dan angen pih laju teuka rot meubagoe arah dan laju teuyueb nafah u dalam tuboh-tuboh nyan dan tuboh nyang ka teuyueb nafah nyan laju udeb oh ltheuehnyan laju jidong. jeumeulah awaknyan lumpah that jai, seb keu teubina saboh pasokan tantra nyang raya. po teu allah meufeureuman ubak ulon, "he manusia fana, tuleueng-tuleueng nyoe teupeulambang ubak bansa israel. awaknyan apoh apah bahwa awaknyan tho kreg hana harapan dan uroe ukeue. sabab nyan meuramai kheueh ubak umat ulon israel nyan bahwa ulon, tuhan nyang mahamanyang lon peuhah pintoe jrat awaknyan. ulon lon peuteubiet awaknyan disinan dan lon peuwoe awaknyan u tanoh israel. oh ka ltheueh lon peubuet banmandum nyan, umat ulon jiteupeue bahwa ulon kheueh tuhan. ulon lon yueb nafah lam tuboh awaknyan keu teupeu udeb awaknyan, laju awaknyan lon bri idhin jitinggai di nangroe jih keudroe. dan jiteupeue kheueh le awaknyan bahwa ulon kheueh tuhan. ulon tuhan ka lon peugah haba dan pasti lon peubuet nyang ulon peugah nyan." tuhan meufeureuman lom ubak ulon, "he manusia fana, tacok kheueh laju saboh tungkat dan tatuleh kheueh laju haba nyang lagee nyoe nibak tungkat nyan, 'keurajeuen yehuda'. dan tacok kheueh teuma saboh tungkat nyang laen, dan tatuleh kheueh di ateueh jih: 'keurajeuen israel'. oh ltheuehnyan tamat kheueh bandua boh tungkat nyan sampoe ujung bandua tungkat nyan meusaho jeuet keusaboh tungkat. meunyoe bansa gata jitanhong makna jih, tapeugah kheueh ubak awaknyan bahwa ulon, tuhan nyang mahamanyang lon cok tungkat nyang teupeulambang israel dan lon peusaho ngon tungkat nyang teupeulambang yehuda. bandua boh tungkat lon peusaho sampoe meusaboh dan ulon reugam lam jaroe lon. tamat kheueh bandua boh tungkat nyan dan tapeuleumah kheueh ubak bansa nyan. laju tapeugah kheueh ubak awaknyan bahwa ulon, tuhan nyang mahamanyang lon cok banmandum bansa ulon nibak nangroe-nangroe ho mantong awaknyan nyang ka jijak. awaknyan lon peusapat dan ulon puwoe lom u nangroe awaknyan keudroe. awaknyan lon peujeuet keusaboh bansa di tanoh nyan, di gunung-gunong israel. awaknyan jipeurintah le sidroe raja, dan hana teubagi le jeuet dua bansa atawa dua keurajeuen. awaknyan hana le jipeukutoe droe deungon jipeubuet desya dan jiseumah ubak beurala-beurala nyang luwat dan najih nyan. ulon kupeubeubaih awaknyan nibak bandum buet nyang meunyeuleweng nyang meusabab awaknyan jikhianat ulon. ulon lon peusuci awaknyan; awaknyan jeuet keu umat lon, dan ulon jeuet keu allah awaknyan. awaknyan teupeusaboh dimiyueb sidroe raja lagee raja nabi daud nyang mat peurintah siumu masa. deungon seutia awaknyan jitaat ubak hukom-hukom lon. dan keu siumu masa awaknyan meunan cit deungon keuturonan awaknyan jitinggai nibak tanoh nyan, tanoh nyang ulon bri keu nabi yakub dan jiduek le indatu awaknyan. ulon lon peuet saboh peujanjian deungon awaknyan nyang teujamin keumanaan awaknyan sampoe keukai dan abadi. ulon lon bri beureukat dan lon tamah jeumeulah awaknyan. bak

tanoh awaknyan lon peudong rumah ulon nyang teutab disinan siumu masa. ulon tinggai meusajan awaknyan, dan ulon teuma jeuet keu po teu allah awaknyan dan awaknyan jeuet keu umat lon. meun-yoe rumah ulon ka na lamkawan awaknyan siumu masa, baro kheueh jiteupeue le bansa-bansa nyang laen bahwa ulon kheueh tuhan, ka lon pileh israel jeuet keu umat lon keudroe." tuhan meufeureuman ubak ulon, "he manusia fana, takutok kheueh gog raja agong di nangroe mesekh dan tubal di tanoh magog. tapeugah ubak jihnyan bahwa ulon, tuhan nyang mahamanyang, na kheueh musuh jih. ulon kupeuwet jihnyan, lon pasang ceunawiet nibak geuehum jih, dan lon peuteubiet jihnyan bandum deungon pasokan nyang meupeukayan seuragam nyan. tieb-tieb sidadu jiba peurisasi dan peudeueng. raja ji-ireng le sipa-i-sipa-i asai persia, sudan dan libia, maseng-maseng jiba peudeueng dan tupi waja. bandum peujiang nibak nangroe-nangroe gomer dan bet-togarma di utara, jimaju meusajan ngon jihnyan, dan le bansa nyang laen jiseutot sajan. tayue kheueh bak jihnyan mangat meusiab-siab dan tapeurintah kheueh ubak banmandum tantra nyang meugabong ngon jihnyan jeuet siab-siab jipreh peurintah nibak gobnyan. kira-kira padubthon teuk jihnyan lon peurintah mangat jikaprang saboh nangroe deungon peunduduek nyang ka meusapat jiwoe nibak bansa-bansa nyang le dan nyang oh lheureh nyan tinggai seungab di nangroe nyang aman. gog jiduek bak gunung-gunong israel nyang ka treb that seungue dan nyang ka jeuet keu runga-runga, teuma nyang saatnyoe jiduek le rakyat nyang udeb deungon dame. jihnyan dan sipa-i jihnyan meunan cit deungon sipa-i nyang le nyang jeuet ji-ireng jihnyan teuka jikak prang lagee angen badee dan teutob banmandum nangroe lagee awan." tuhan nyang mahamanyang meufeureuman ubak gog, "bak saatnyan gata tapeugt reuncana nyang jeuhet. gata tapeuputuh keu taseureubu nangroe nyang hana meukuta nyan, nyang toh peunduduek jih udeb deungon aman dan teuntram di banda-banda nyang hana meukuta dan hana alat-alat peutahanan. gata tarampok dan tareupah hareuta peunduduek di banda-banda nyang yoh dilee ka tinggai runga-runga. peunduduek disinan nyang teungumpoi nibak meubagoe bansa, bak saatnyoe ka le hareuta dan beulatang peulara dan awaknyan tinggai bak pusat donya. peunduduek syeba dan dedan meunan cit deungon ureueng meukat nyang na di banda-banda nangroe spanyol jitanjong ubak gata lageenyoe, 'peu kheueh gata takrah tantra teuma keu tareupah dan tarampok meuh, pirak, beulatang peulara, dan hareuta beunda, dan gata angkat banmandum nyan?' " sababnyan tuhan nyang mahamanyang geukirem ulon keu lon jak peusampoe ubak gog haba nyoe, "justu bak saat umat ulon israel udeb deungon aman dan teuntram, gata teuka tajak prang. gata tajak nibak teupat gata tinggai, jioh di utara, ji ireng le pasokan tantra nyang raya dan hebat, bandum nibak pasokan meuguda dan meubagoe macam bansa. laju gata prang umat ulon israel lagee angen badee jiheuntam bumoe. meunoye watee jih ka sampoe, gata lon kirem keu

gata duek bak tanoh lon. deungon lageenyon lon meulalu gata, he gog, bansa-bansa jiteupeue soe ulon nyoe, na kheueh po teu allah nyang suci. kon kheueh keuhai gata ulon yoh dilee lon peugah haba meulalu hamba-hamba lon nabi israel? awaknyan ka jiramai bahwa bak masa nyang teuma teuka ulon kuyue sidroe ureueng keu jiseurang israel. ulon, tuhan nyang mahamanyang ka lon peugah haba." tuhan nyang mahamanyang meufeureuman, "teuma hana treb oh lheureh gog jiseurang israel, ulon jilab beungeh. dan deungon beungeh that ulon peuteubiet ancaman, bahwa nibak uroenyon na geumpa bumoe nyang keubit hebat di nangroe israel. bandum uengkot dan cicem, bandum beulatang rayekut dan ubit, dan bandum ureueng di ateuh bumoe yo meugam-gam keu ulon. gunung-gunong reuloh, barieh-barieh gunung tepuro dan bandum binte beuton hanco. laju gog lon peukeujot deungon sigala macam beuncana. ulon, tuhan nyang mahamanyang ka lon peugah haba. aneuek buah jihnyan saleng meuheuntam deungon peudeueng. jihnyan lon hukum deungon bala peunyakot dan darah saleng jipeuroe. ujeuen raya dan ujeuen es, apui dan beulrang lon sintong ateuh jihnyan dan sipa-i jihnyan dan ateuh bansa nyang laen nyang ka meusaho deungon jihnyan. deungon na lagee nyan lon tunyok ubak sigala bansa bahwa ulon nyoe agong dan suci. dan jiteupeue kheueh le awaknyan bahwa ulon kheueh tuhan." tuhan nyang mahamanyang meufeureuman, "he manusia fana, taancam kheueh gog, raja agong di nangroe mesekh dan nangroe tubal, dan tapeugah ubak jihnyan bahwa ulon nyoe na kheueh musuh jih. ulon lon peuwet jihnyan, dan lon ba jihnyan lon peuteubiet nibak daerah jioh di utara, u gunung-gunong israel. disinan lon seukok busur jihnyan sampoe lheureh nibak jaroe wie jih, dan ulon peulheureh aneuek-anuek panah jihnyan nibak jaroe nueuen jihnyan. di ateuh gunung-gunong nyang na di israel, gog meusajan ngon bandum sidadu jihnyan dan sikutu jihnyan mate, dan manyet-manyet awaknyan ulon bri ubak bubena cicem dan meulatang buih jeuet jipajoh. sipa-i-sipa-i nyan reubah dan mate teugageueng di ladang-ladang. ulon, tuhan nyang mahamanyang ka lon peugah haba. ulon lon peuteuka apui sampoe habeh tutong di tanoh magog di bineh-bineh pante, di teupat peunduduek jihnyan udeb deungon aman. dan jiteupeue kheueh le awaknyan bandum bahwa ulon kheueh tuhan. teuma lamkawan ureueng israel, lon peumaklum nan ulon nyang suci, dan nan ulon nyan hana le jipeukutoe. dan jiteupeue kheueh le bansa-bansa bahwa ulon kheueh tuhan, po teu allah suci di israel." tuhan nyang mahamanyang meufeureuman, "uroe nyang ulon pegah nyan teuma teuka. peunduduek banda-banda di israel jiteubiet meuron-ron keu jikak peusapat bandum sinjata nyang ka jitinggai, atra nyan na kheueh, peurisasi dan peudeueng, panah dan aneuek panah teutamah lom ngon tungkat seumeupoh. bandum awaknyan peujeuet keu kayee apui, dan nyan seb keu tujoh thon. jadi, awaknyan hana peureulee jipeusapat kayee apui di ladang atawa jiteubang kayee lam gle, sabab sinjata-sinjata nyang jitinggai nyan lumpah

that jai teucok keukayee apui. awaknyan jirampok dan jireupah atra ureueng-ureueng nyang ka ltheueh meurampok dan jireupah atra awaknyan. ulon, tuhan nyang mahamanyang ka lon peugah haba." tuhan meufeureuman, "meunyoe bandumnyoe ka teujadi, ulon lon jok ubak gog tanoh keu lampoh jrat di israel, di panton rot jeumeurang nyang teupat jih siblahi utimu rot laot mate. disinan kheueh gog ngon bandum sipa-i jihnyan teukubu, dan panton nyan teupeunan, 'panton pasokan gog'. tujoh buleuen treb jih ureueng-ureueng israel mehmo jipasoe lam jrat manyet-manyet nyan mangat tanoh bek kutoe le. bandum peunduduek nanggroe jimeuseuraya jitanom lam jrat manyet-manyet nyan; dan keunyan awaknyan jiteurimong tanda peunghargaan bak uroe keumeunangan ulon. ulon, tuhan nyang mahamanyang ka lon peugah haba. oh ltheueh tujoh buleuen nyan ka habeh, napadubdroe ureueng jibri tugaih keujajak rawoh bansaboh nanggroe nyan jajak mita manyet-manyet nyang na mantong teutinggai teugageueng bak tanoh, dan meunyoe na, laju jipasoe lam jrat manyet nyan jeuet nanggroe nyan gleh nibak nyang kutoe. watee jimita manyet-manyet nyan, tieb-tieb na jiteume tuleueng manusia, awaknyan jijok tanoh bak bineh nyan, mangat le tukang-tukang kubu manyet jikalon nyan dan jipeukubu tuleueng nyan di panton pasokan gog. deungan caranyan, tanoh nyan ka teupeugleh nibak nyang kutoe. (oh uroe dudoe, nibak panton nyan teuma na banda nyang nan jih saban deungan pasokan gog.)" tuhan nyang mahamanyang meufeureuman ubak ulon, "he manusia fana, tatawok kheueh bandum cicem dan beulatang nyang laen, jeuet jiteuka rot patmantong jeuet jijak pajoh keureubeuen nyang ulon keubah keu awaknyan. ulon teuma lon peuna khanuri nyang paleng rayeuk bak gunong-gunong israel, disinan awaknyan meuteume jipajoh uengkot sie dan ji-jieb darah. awaknyan meuteume jipajoh manyet-manyet pahlawan, dan ji-jieb darah nyang mat-mat kuasa ateuheh rhueng donya. bubena pahlawan dan nyang mat kuasa nyan teupoh mate lagee teupoh mate kameng-kameng agam atawa aneuek-aneuek kameng, atawa banteng-banteng teumbon. oh ka ltheueh lon peumate ureueng-ureueng nyang lagee keureubeuen, cicem-cicem dan beulatang-beulatang nyang laen jijak pajoh bandum gapah nyan sampoe an troe meugeureu ob, dan ji-jieb darah sampoe mabok. nibak meuja lon awaknyan jeuet jipeutroe pruet deungan banmandum guda dan nyang duek ateuheh gudanyan dan deungan bandum peujuang. ulon, tuhan nyang mahamanyang ka lon peugah haba." tuhan meufeureuman, "ulon lon ngieng keumuliaan lon keu bansa-bansa. awaknyan bandum jikalon pakriban ulon peuguna keukuasaan lon keu lon peubuet keuputosan-keuputosan nyang ade. phon saatnyan ureueng israel jiteupeue bahwa ulon kheueh tuhan allah awaknyan. dan bandum bansa insaf bahwa ureueng israel teukirem u teupat nyang teuboihi sabab desya awaknyan ateuheh ulon. awaknyan ka ulon tinggai dan lon peubiyeu meunan mantong jipeutaloe le musoh dan jipeumate dimideuen prang. ulon peubuet ateuheh awaknyan nyang lagee nyan na kheueh sisuai deungan buet

nyang kutoe dan nyang jeuhet nyang ka jipeubuet le awaknyan, dan laju ulon tinggai awaknyan." tuhan nyang mahamanyang meufeureuman, "teuma bak saatnyoe ulon lon gaseh umat israel keuturonan nabi yakub, dan lon peujeuet awaknyan makmu lom. deungan lageenyan teutab lon jaga mangat nan ulon teutab jihoreumat. meunyoe awaknyan tinggai lom deungan teunang di nanggroe jih keudroe, dan hana meusidroe pih nyang peutakot awaknyan, teuma awaknyan tuwoe pakriban awaknyan ka jipeumalee ngon sabab ka jikhianat ulon. ulon lon peuwoe lom awaknyan nibak nanggroe-nanggroe musoh awaknyan keudroe, dan keusucian lon leumah ubak bandum bansa ngon sabab buet ulon nyan. dan jiteupeue kheueh le umat lon bahwa ulon kheueh tuhan po teu allah awaknyan. sabab ulon kheueh nyang ka kirem awaknyan u teupat nyang teuboihi, teuma ulon nyang ka puwoe awaknyan ubak nanggroe awaknyan keudroe, dan hana lon tinggai meusidroepih awaknyan disinan. ulon lon sintong roh ulon ateuheh bansa israel, dan hana lon tinggai awaknyan lagee nyang ka-ka. ulon, tuhan nyang mahamanyang ka lon peugah haba." wateuyan tanggai siploh buleuen sa, bak thon nyang keu dua ploh limong masa kamoe teuboihi, peuet blaih thon oh ka ltheueh yerusalem teupeutaloe, laju ulon rasa kuasa tuhan, dan laju ulon geuba. bak saboh keumalon, po teu allah geuba ulon ubak tanoh israel dan geupeuduek ulon bak gunong nyang manyang. dikeue ulon leumah lon kalon saboh keulompok bangunan nyang rab saban ngon saboh banda. ulon geuba keunan dan deuh ulon ngieng sidroe ureueng agam nyang meucahya lagee peurunggu geudong bak bineh pintoe geureubang. bak jaroe gobnyan geumat talo sineupat nibak lineum meunan cit ngon kayee sineupat. ureueng agam nyan geupeugah ubak ulon, "he manusia fana, deungoe kheueh buget-get dan simak kheueh peue-peue mantong nyang ulon peuleumah ubak gata, sabab keunyan kheueh gata teuba keunoe. tapeugah kheueh ubak bansa israel bandum nyang teuma gata kalon." laju ulon kalon baet tuhan nyang jikeulileng le bintehe beuton. ureueng agam nyan geupeuphon uko beuton nyan ngon kayee seunupat nyang panyang jih na lhee metee. teunyata teuma bahwa bintehe beuton nyan manyang jih lhee metee dan teubai jih pih lhee metee. oh ltheuehnyan gobnyan geujak ubak babah pintoe geureubang nyang meuhadab utimu, gobnyan laju geuek ateuheh reunyean dan oh ka trok u ateuheh, laju geu uko ambang pintoe nyan, luwah jih lhee metee. dilikot geureubang nyan na saboh jurong dan bak maseng-maseng bineh jih na meuteume lhee boh kama jaga. bandum kama saban rayeuk jih; bantuek jih peuet boh sagoe, dan panyang tieb-tieb bineh jih na lhee metee. bintehe-bintehe beuton bataih tieb-tieb kama saban teubai jih, na kheueh dua siteungoh metee. jurong nyan panyang jih na lhee metee teuk dan teutuju bak ruweueng raya meuhadab u baet tuhan. di ureueng agam nyan laju geu sipat ruweueng raya nyan dan teunyata luwah jih na peuet metee; teuduek jih bak ujung babah pintoe geureubang, siblahi udalam, na kheueh nyang paleng rab ngon baet tuhan. beuton-beuton

nyang meuhadab ubak bagian baet tuhan, teubai jih na simetee. oh lheurehnyan di ureueng agam nyan laju geu sipat luwah bagian jurong di babah pintoe geureubang; na nam siteungoh metee, dan meunan cit luwah babah pintoe geureubang nyan na limong metee. dikeue kama-kama jaga nyang ukoran jih lhee kali lhee metee nyan, na beuton miyueb nyang manyang jih siteungoh metee, dan teubai jih na teuma siteungoh metee. laju le ureueng agam nyan geu sipat teuma jioh nibak beuton likot saboh kama jaga sampoe trok bak beuton likot kama jaga di meurandeh, na kheueh 12,5 metee. meunan cit le ureueng agam nyan geu sipat ruweueng raya nyan: panyang jih siploh metee. pintoe ruweueng nyan teu-tuju ubak seuramoe baet tuhan jioh jih nibak pintoe geureubang blah luwa trok ubak beuton ruweueng rayeuk nyang meuhadab ubak u baet tuhan na kheueh 25 metee. bak beuton likot dan binteh bataih kama-kama nyan na peuradeun-peuradeun ubit. beuton bagian dalam nyang meuhadab ubak jurong, teuculek ngon meubagoe rupa ukeran bak palem. oh lheurehnyan le ureueng agam nyan geuba ulon meulalu babah pintoe geureubang ubak peulataran baet tuhan. bak binch beuton luwa ban seukeulileng baet tuhan nyan teupeuet 30 boh kama. dikeue kama-kama nyan na aleue batee nyang teukeulileng bandum peulataran nyan. peulataran luwa leubeh miyueb nibak peulataran dalam. disinan na babah pintoe geureubang nyang laen nyang teumpat jih leubeh manyang dan nyang teu-tuju ubak peulataran dalam. ureueng agam nyan geusipat jioh lamkawan bandua pintoe geureubang nyan: 50 metee. oh lheureh nyan di ureueng agam nyan geusipat teuma babah pintoe geureubang siblahi utara nyang teu-tuju ubak seuramoe dalam. di babah pintoe geureubang nyan, ban lhee boh kama jaga bak maseng-maseng binch jurong nyan, binteh-binteh beuton bataih nyan meunan cit deungon ruweueng raya nyan, bandum nyan saban ukoran jih deungon nyang na di siblahi utimu. bandum jurong geureubang nyan panyang jih 25 metee dan luwah jih 12,5 metee. meunan cit deungon ruweueng raya, peuradeun-peuradeun nyan, dan ukeran-ukeran bak palem jih saban deungon nyang na disiblahi utimu. tujuh beuk aneuk reuneun nyang teu-tuju ubak babah pintoe geureubang nyan, dan bak ujong nyan na ruweueng raya nyang meuhadab ubak seuramoe luwa baet tuhan. meuhadab keue deungon babah pintoe geureubang utara, na ruweueng laen nyang teu-tuju ubak peulataran dalam, saban lagee nyang na di siblahi geureubang timu. ureueng agam nyan geusipat jioh lamkawan bandua geureubang nyan: 50 metee. laju oh lheurehnyan, ureueng agam nyan geuba ulon ubak babah pintoe seulatan dan laju geu uko. teunyata pintoe geureubang nyan saban deungon geureubang-geureubang nyang laen. peuradeun-peuradeun nyang na disinan saban deungon nyang na bak babah babah pintoe geureubang nyang laen. panyang jurong geureubang nyan 25 metee, dan luwah jih 12,5 metee. tujuh neuk reuneun nyang teu-tuju ubak geureubang nyan dan ruweueng rayeuk jih pih na nibak ujong, meuhadab ubak peulataran baet tuhan. beuton-beuton nyang

na bagian dalam nyang meuhadab ubak jurong, teuhias deungon ukeran-ukeran bak palem. disinan na cit pintoe geureubang nyang teu-tuju ubak peulataran dalam. ureueng agam nyan geusipat jioh lamkawan bandua boh geureubang nyan na: 50 metee. lheureh nyan, ureueng agam nyan geuba ulon meulalu babah pintoe geureubang seulatan laju teutamong ubak peulataran dalam. gobnyan laju geusipat geureubang seulatan nyan, dan ukoran jih saban deungon ukoran-ukoran pintoe geureubang di luwa. kama-kama jaga gobnyan, ruweueng rayeuk geuhnyan, dan beuton-beuton nyang na didalam nyan saban rayeuk jih deungon nyang na nibak babah-babah pintoe geureubang nyang laen. kama-kama bak babah pintoe geureubang nyoe pih na meupeuradeun-peuradeun. jurong geureubang nyan panyang jih 25 metee dan luwah jih 12,5 metee. teuma ruweueng rayeuk jih meuhadab ubak peulataran luwa. beuton-beuton bagian dalam nyang meuhadab ubak jurong, meunan cit na teu uke deungon ukeran-ukeran bak palem. lapan neuk reuneun nyan teu-tuju ubak pintoe geureubang nyan. oh ka lheureh nyan ureueng agam nyan geuba ulon meulalu babah pintoe geureubang timu laju teutamong ubak leuen bagian dalam. ureueng agam nyan laju geusipat geureubang nyan deungon sineupat nyang saban deungon ukoran-ukoran babah pintoe geureubang nyang laen. kama-kama jaga, binteh-binteh beuton nyang na disinan dan ruweueng rayeuk ukoran jih lagee nyang na bak babah-babah pintoe geureubang nyang laen. nibak kama-kama nyan dan bak ruweueng rayeuk nyan na peuradeun-peuradeun. panyang jurong geureubang nyan na 25 metee dan luwah jih 12,5 metee. ruweueng rayeuknyan meuhadab ubak peulataran luwa. beuton-beuton bagian dalam nyang meuhadab ubak jurong, teu uke deungon ukeran-ukeran bak palem. lapan neuk reuneun teu-tuju ubak pintoe geureubang nyan. akhe jih ureueng agam nyan geuba ulon ubak geureubang utara. gobnyan laju geusipat babah pintoe geureubang nyan dan ukeran jih saban deungon babah-babah pintoe geureubang nyang laen. meunan cit deungon kama-kama jaga jih, binteh-binteh beuton dalam dan ruweueng rayeuk jih saban deungon nyang na nibak babah-babah pintoe geureubang nyang laen. nibak kama-kama jih dan nibak ruweueng-ruweueng rayeuk jih na peuradeun-peuradeun. panyang jurong geureubang nyan na 25 metee dan luwah jih 12,5 metee. meunan cit deungon ruweueng keue jih meuhadab ubak peulataran luwa. beuton-beuton bagian dalam nyang meuhadab ubak jurong, teu uke deungon ukeran-ukeran bak kayee palem. na lapan neuk reuneun nyang teu-tuju ubak babah pintoe geureubang nyan. di peulataran luwa na saboh kama seunamah nibak geureubang dalam siblahi utara. nibak kama seunamah nyan na saboh pintoe rot jak ubak ruweueng rayeuk. disinan kheueh teumpat riah beulatang-beulatang keu keureubeuen nyang teutot. di ruweueng raya nyan, na puet boh meuja, dua boh di tieb-tieb binteh jih. di ateuhe meujanyan kheueh teumpat sie beulatang keu keureubeuen nyang teutot atawa keureubeuen peumphon desya atawa lom

keureubeun gantoe rugoe. diluwa ruweueng rayeuk nyan na lom peuet boh meuja, dua boh di tieb-tieb bineh geureubang utara nyan. jadi, bandum nyan na lapan boh meuja teupat sie keureubeun: peuet boh didalam, dan peuet teuk diluwa peulataran. ban peuet boh meuja nibak kama seunamah nyang teupeuguna keu teupeusiab keureubeun nyang teutot teupeut nibak batee. meujanyan manyang jih siteungoh metee, sedangkan bagian ateuéh jih meusagoe peuet, panyang dan luwah jih maseng-maseng na lhee seuper peuet metee. di ateuéh meuja nyan teukeubah peukakaih keu sie beulatang keureubeun. teuma nibak meuja-meujanyan na meubineh nyang luwah jih 75 milimete. bandum uengkot sie nyang teuma teukeureubeun teukeubah ateuéh meuja-meuja nyan. oh lheurehnyan le ureueng agam nyan laju geuba ulon ubak peulataran dalam. disinan na dua boh bangsal, nyang saboh bak sampeng geureubang utara dan meuhadab u seulan, sedangkan nyang saboh teuk disampeng babah pintoe geureubang seulan dan meuhadab u utara. ureueng agam nyan geupeugah ubak ulon bahwa bangsal nyang meuhadab u seulan nyan teukeubah keu teungku-teungku imeum nyang meutugaih di baet tuhan, sedangkan bangsal nyang meuhadab u utara teukeubah keu teungku imeum nyang meutugaih nibak mezbah. bandum teungku imeum nyan haroh nibak keuturonan zadok. sabab nibak sukee lewi nyang na nibak keuturonan zadok nyang jeuet meuhadab tuhan keu teulayani gobnyan dalam iebadat. ureueng agam nyan laju geusipat bagian peulataran dalam. bentuek jih meusagoe peuet: panyang dan luwah maseng-maseng na 50 metee. baet tuhan nyan na di siblahi ubarat, dan dikeue nyan na saboh mezbah. oh lheureh nyan le ureueng agam nyan geuba ulon u ruweueng keu baet tuhan deungon teuke papadub neuk reunyeun. gobnyan laju geusipat ruweueng tamong; luwah jih na tujuh kali dua siteungoh metee, deungon binte-binte bandua bineh nyan teubai sa siteungoh metee. di wie uneuen jih na pilar. ruweueng keue nyan keudroe panyang jih na siploh metee dan luwah jih na nam metee. ureueng agam nyan laju geuba ulon bak kama teungoh, nyang teuboh nan teupat nyang suci. gobnyan laju geusipat jurong nyang teutuju keunan: panyang jih na lhee metee, dan luwah jih limong metee. binte bandua bineh jih teubai jih na dua siteungoh metee. oh lheurehnyan laju geu sipat teupat nyang suci nyan: panyang jih na 20 metee dan luwah jih 10 metee. oh lheurehnyan ureueng agam laju geutamong lam kama dalam. gobnyan laju geusipat jurong nyang teutuju keunan: panyang jih na simetee, luwah jih lhee metee, dan binte bandua boh bineh jih teubai jih lhee siteungoh metee. laju gobnyan keusipat teuma kama nyan: bantuek jih timang peuet sagoe, panyang dan luwah jih maseng-maseng siploh metee. oh lheureh nyan ureueng agam nyan geupeugah ubak ulon, "nyoe kheueh teupat nyang mahasuci." oh ka lheurehnyan di ureueng agam nyan laju geusipat beuton dalam baet tuhan: teubai jih lhee metee. bak binte beuton silingka baet tuhan nyan na kama-kama nyang luwah jih maseng-maseng dua metee. kama-kama nyan

meutingkat lhee dan bak tieb-tieb tingkat na boh kama. binte timbok luwa di tieb-tieb tingkat leueh lipéh nibak beuton nyang na di tingkat dimiyueh, seuingga kama-kama nyan jeuet teususun deungon hana teupeuruhung binte beuton baet tuhan nyan. rot luwa, binte beuton baet tuhan nyan deuh jih saban teubai jih nibak miyueh sampe trok u ateuéh. bak binte timbok luwa nibak baet tuhan, disiblahi uluwa kama-kama nyan, na dua boh reunyeun nyang raya, deungon nyan jeuet te eok phon tingkat sa trok abak tingkat dua dan lhee. binte luwa nibak kama-kama nyan teubai jih na dua siteungoh metee. bangunan nyan na pintoe nyang teutuju ubak kama-kama siblahi utara baet tuhan, dan pintoe laen nyang teutuju ubak kama-kama siblahi seulan. ban sikeulileng baet tuhan na seuramoe nyang luwah jih dua siteungoh metee; teuduek jih lhee metee ateuéh tanoh, dan teupeugat saban manyang jih deungon pondasi kama-kama nibak beuton baet tuhan. lamkawan seuramoe dan geudong-geudong nyang geupeuguna le teungku-teungku imeum, na manjue nyang luwah jih siploh metee, di wie uneuen baet tuhan. dimeurandeh peulataran siblahi ubarat, na bangunan rayeuk nyang panyang jih 45 metee dan luwah jih 35 metee, dan teubai binte-binte jih dua siteungoh metee. ureueng agam nyang geusipat panyang jih baet tuhan: 50 metee. rot siblah ulikot baet tuhan sampoe trok ubak beuton likot bangunan rayeuk disiblahi ubarat nyan jioh jih na cit 50 metee. bagian keue nibak baet tuhan nyang meuhadab utimu deungon peulataran di wie ngon uneuen jih, luwah jih na cit 50 metee. ureueng agam nyan keusipat cit bangunan nyang rayeuk nyang meuhadab peulataran siblahi ubarat: luwah jih 50 metee, meunan cit deungon binte-binte wie ngon uneuen jih. ruweueng-ruweueng di baet tuhan, ruweueng bagian keue, teupat nyang suci, dan teupat nyang mahasuci, teuhias deungon bingkee kayee, phon aleue sampoe ubak peuradeun-peuradeun jih. peuradeun-peuradeun nyan jeuet teutob deungon tiree. bandum binte bagian dalam teuhias deungon meubagoe rupa ukeran bak palem dan kerub, sibak bak palem lamkawan tieb-tieb dua kerub. kerubnyan na teuma dua boh rupa, saboh rupa manusia nyang meuhadab ubak bak palem siblahi si uwie, dan rupa singa nyang meuhadab ubak bak palem siblahi si uneuen. mubagoe rupa ukeran nyan na meuteume nibak baet tuhan, phon nibak aleue sampoe ubak bagian ateuéh pintoe. tameh-tameh pintoe nibak teupat nyang suci bantuek jih peuet sagoe timang. dikeue teupat nyang mahasuci na sesuatu nyang leumah jih lagee mezbah nyang teupeugat nibak kayee. manyang jih sa siteungoh metee dan luwah jih simetee. sudut-sudut jih, lapék jih dan binte jih teupeugat nibak kayee. ureueng agam nyan geupeugah ubak ulon, "nyoe kheueh meuja nyang na dikeue keuhaderan tuhan." bak ujong jurong nyang teutuju u teupat nyang suci na saboh pintoe, meunan cit bak ujong jurong nyang teutuju ubak teupat nyang mahasuci. pintoe-pintoe nyan na dua on pintoe nyang teuhah bak teungoh. pintoe-pintoe di teupat nyang suci teuhias deungon ukeran-ukeran bak palem dan kerub-kerub, lagee bak binte-binte

jih. bak muka ruweueng keue na kheueh siblahi siuluwa, na tiree nyang teupeuget nibak kayee. bak bandua bineh binte sampang nyan na peuradeun-peuradeun, dan binte jih teuhias deungon ukeran bak palem. oh lheuehnyan ureueng agam nyan laju geuba ulon ubak peulataran luwa dan geutunton ulon ubak bangunan nyang laen di siblahi utara baet tuhan, hana jioh nibak bangunan rayeuk di siblahi barat baet tuhan nyan. bangunan nyan panyang jih limong ploh metee, dan luwah jih dua ploh limong metee. saboh sagoe nibak bangunan nyan meuhadab ubak seuramoe nyang luwah jih siploh metee nyan, seudangkan sagoe nyang laen meuhadab ubak aleue batee bak peulataran luwa. bangunan nyan meutingkat lhee; tieb-tieb tingkat meujulue leubeh udalam nibak tingkat miyueb jih. dikeue kama-kama nyan, disiblahi udalam na jurong nyang luwah jih limong metee dan panyang jih limong ploh metee. pintoe-pintoe jih meuhadab u utara. kama-kama bak tingkat ateuhe leubeh sampiek nibak kama-kama nyang na di miyueb, sabab jurong-jurong nyang na dikeue kama-kama di ateuhe nyan leubeh luwah nibak nyang na dimiyueb jih. kama-kama nyan meutingkat lhee teuma hana jitumpang le tameh-tameh lagee bak geudong-geudong di teungoh leuen. siteungoh nibak tingkat miyueb, panyang jih dua ploh limong metee na kheueh beuton mantong, seudangkan nibak bagian nyang laen, meunan cit panyang jih na dua ploh limong metee, teupeuget kama-kama. bak tingkat nyang paleng ateuhe na kama-kama ban sipanyang geudong nyan. di miyueb kama-kama nibak ujung timu bangunan nyoe, dan nibak uram beuton, na saboh pintoe nyang teutuju ubak peulataran luwa. nibak bineh seulatan rot baet tuhan, na bangunan nyang saban, teuduek jih hana jioh nibak bangunan siblahi ubarat. dikeue kama-kama nyan na saboh jurong nyang saban lagee jurong siblahi utara. ukoran jih saban, mode jih pih saban, dan pintoe-pintoe jih pih saban. dimiyueb kama-kama siblahi seulatan, nibak ujung timu bak uram beuton, na cit saboh pintoe. ureueng agam nyan geupeugah ubak ulon, "bandua bangunan nyan suci. disinan, teungku-teungku imeum nyang jeuet meuhadab ubak keuhaderan tuhan, teupajoh keureubeuen-keureubeuen nyang paleng suci. meunan cit disinan awaknyan haroh geukeubah keureubeuen-keureubeuen nyang paleng suci, atra nyan na kheueh: keureubeuen gandom dan keureubeuen peumaphon desya atawa keureubeuen gantoe rugoe. meunyo teungku-teungku imeum nyan ka seulesoe meutugaih bak baet tuhan, dan geu keuneuk jak ubak peulataran luwa, peukayan khusus nyang awaknyan ngui watee geupeubuet iebadat haroh awaknyan tinggai nibak kama-kama nyan. awaknyan haroh geungui peukayan laen, oh ka lheuehnyan baro kheueh awaknyan jeuet geujak ubak tempat rakyat meugumpoi." oh ka seulesoe geu uko le ureueng agam nyan bangunan baet tuhan bagian si udalam, gobnyan laju geupeuteubiet uluwa ulon rot geureubang timu, laju geusipat bagian keulileng baet tuhan. deungon tungkat sineupat jih gobnyan laju geusipat bineh siblahi utimu: 250 metee. oh lheuehnyan gobnyan laju geusipat bineh

siblahi utara, bineh siblahi seulatan, dan bineh siblahi ubarat; tieb-tieb bineh panyang jih saban, na kheueh 250 metee. deungon nyan, daerah baet tuhan teuduek jih ateuhe saboh keubeueng tanoh peuet sagoe tamang, deungon ukoran 250 nibak tieb-tieb bineh. bideueng tanoh nyan jikeulileng le saboh binte beuton keu teupeung kreeh daerah nyang khusus keu tuhan nibak daerah nyang keu umum. oh lheuehnyan le ureueng agam nyan geuba ulon ubak pintoe geureubang nyang meuhadab utimu, dan disinan kheueh ulon kalon teuka rot arah timu cahya muble-ble sibagoe tanda keuhaderan po teu allah israel. su po teu allah teudeungoe lagee su ie laot raya nyang meutaga, dan bumoe hu meuble-ble sabab cahya keuhaderan allah. nyang deuh teuinggi nyang saban lagee nyang ka lheueh ulon kalon bak watee po teu allah teuka keu geujak peuhanon yerusalem, dan lagee nyang ka lheueh ulon kalon nibak krueng kebar. laju ulon peureubah droe dan ulon sujut. cahya muble-ble nyan meugrak-grak meulalu geureubang timu dan laju jitamong udalam baet tuhan. roh tuhan geuangkat ulon dan geuba ulon ubak peulataran dalam; disinan ulon kalon baet tuhan ka habeh peunoh jigom le cahya keuhaderan tuhan. watee ureueng agam nyan mantong geudong bak bineh ulon, laju lon deungoe tuhan meufereuman ubak ulon, "he manusia fana, nyoe kheueh takhta ulon. disinoe kheueh ulon tinggai di teungoh-teungoh umat israel dan lon mat peurintah ateuhe awaknyan siumu masa. bah kheueh awaknyan, meunan cit deungon raja-raja awaknyan, hana le jipeukutoe nan ulon nyang suci deungon jiseumah beurala atawa deungon cara teupeukubu manyet raja-raja awaknyan di tempat nyoe. yoh masa ilee raja-raja awaknyan jipeuget ambang-ambang pintoe meuligoe awaknyan disamping ambang-ambang dan tameh-tameh pintoe baet ulon, sampoe teuma na saboh binte mantong lamkawan nyan. awaknyan ka jipeukutoe nan ulon nyang suci deungon buet nyang jipeubuet le awaknyan nyang kutoe dan luwat nyan. sababnyan kheueh awaknyan ulon peubinas lam beungeh ulon nyang hana teukira. teuma phon saanyoe awaknyan haroh jipioh jiseumah beurala dan jipinah manyet-manyet raja jihnyan. oh ka lheuehnyan, ulon teuma tinggai lamkawan awaknyan keu siumu masa." laju tuhan meufereuman lom, "he manusia fana, tajak peugah kheueh ubak umat lon israel keuhai baet ulon nyoe, dan yue kheueh ubak awaknyan mangat jiseulidek rancangan jihnyoe. tapeujeuet kheueh awaknyan beu malee sabab banmandum desya nyang jipeubuet. dan oh ka lheueh awaknyan malee sabab buet-buet nyang ka jipeubuet nyan, tapeutrang kheueh rancangan baet lon nyoe ubak awaknyan: phon nibak mode jih, pintoe-pintoe tamong dan pintoe teubiet jih, susonan bangunan jih, bandum peuratoran dan hukom-hukom jih. tuleh kheueh bandum nyan keu awaknyan mangat awaknyan jeuet jikalon dan jipeurati dan hase jiatoe bandum nyan, dan jitaat bandum peuratoran nyan. nyoe kheueh sifeuet khas nibak baet tuhan: bandum daerah nyang na di seukeulileng bak pucak gunung na kheueh suci that." nyoe kheueh ukoran mezbah meunurot ukoran nyang teupeuguna keu taet uko

baet tuhan. bansikeulileng mezbah na saboh paret nyang lhok jih siteungoh metee dan luwah jih pih na siteungoh metee, deungon bibie bak bineh luwa jih na manyang siper peuet metee. nibak paret sampoe ubak rot miseubah nyang paleng miyueb, manyang jih simetee. bagian teungoh na manyang dua metee, dan siteungoh metee leubeh sampiek nibak keulileng gaki miseubah. bagian keu lhee, na kheueh pucak miseubah, meunan cit siteungoh metee leubeh sampiek nibak keulileng bagian teungoh nyan. bagian keu lhee nyoe na kheueh teupat tot keukeureubeuen; manyang jih dua metee. nibak banpeuet boh sudut jih na bagian nyang meujuluee lagee lungkee. pucak miseubah nyan hiji peuet sagoe timang; tieb-tieb bineh ukoran jih nam metee. bagian teungoh jih meusagoe peuet, tieb-tieb bineh ukoran jih tujoh metee, deungon saboh bineh bak bineh luwa nyang manyang jih siper peuet metee. (luwah paret jih siteungoh metee.) bak bineh siblahi utimu na reunyeun nyang teutuju u pucak mezbah. tuhan nyang mahamanyang meufureuman ubak ulon, "he manusia fana, deungoe kheueh peue nyang ulon peugah ubak gata. meunyeoe miseubah nyan ka ltheueh teupeudong, gata haroh tabaiat deungon cara tatot keureubeuen di atuehnyan dan tasipreuk darah keureubeuen u atueh miseubah nyan. teungku imeum keuturonan zadok nibak sukee lewi mantong nyang jeuet jak ubak hadirat lon keu jajak peubuet iebadat. ulon, tuhan nyang mahamanyang nyang peurintah hainyan. tajok kheueh ubak awaknyan saboh leumo agam nyang mantong muda sibagoe keureubeuen teusampoh desya. tacok kheueh bacut darah jih dan tasilik kheueh laju ubak lungkee-lungkee bak ban peuet boh sagoe pucak miseubah nyan, meunan cit ubak sagoe-sagoe bagian teungoh jih meunan cit ban seukeulileng bineh miseubah nyan. deungon caranyan kheueh gata peusuci miseubahnyan dan gata peukhusos atranyan keu ulon. oh ltheuehnyan, tacok kheueh laju leumo agam keu teusampoh desya nyan, dan tatot kheueh bak teupat nyang ka teupeuteuntee, na kheueh diluwa lingkungan suci baet tuhan. oh singoh nyan gata haroh takeureubeuen saboh kameng agam nyang hana meucacat keu keureubeuen peu amphon desya. neupeugleh kheueh miseubah nyan deungon darah kameng nyan, saban lagee nyang gata peusanet ngon leumo agam nyang muda nyan. meunyeoe ka seulesoe hai nyan gata peubuet, tacok kheueh saboh leumo agam muda dan saboh kameng agam muda, bandua boh beulatang nyang hana cacat cupa, oh ltheuehnyan taba kheueh laju ubak ulon. le teungku-teungku imeum haroh kheueh geusipreuk sira atueh beulatang nyan bandua dan tatot atranyan mangat jeuet keu keureubeuen keu ulon. tieb-tieb uroe nyang treb jih tujoh uroe, gata haroh neukeureubeuen saboh kameng, leumo agam muda, dan kameng agam keu keureubeuen peu amphon desya. beulatang-beulatang nyan hana jeuet cacat bahpi meubacut. tujoh uroe treb jih le teungku-teungku imeum haroh jipeuna upacara pentahbisian mezbahnyan dan jipeusiab nyan keu jeuet teupeuguna. oh ka seulesoe tujoh uroe nyan habeh, le teungku-teungku imeum haroh geupeuphon

peuseumah atueh miseubah nyan keureubeuen nyang teutot dan keureubeuen peudame keu umat. dan ulon galak deungon gata banmandum. ulon, tuhan nyang mahamanyang ka lon peugah haba." oh ltheuehnyan le ureueng agam nyang geuhue lom ulon ubak pintoe geureubang luwa di siblahi utimu lingkungan baet tuhan. pintoe geureubang nyan teutob, tuhan meufureuman ubak ulon, "pintoe geureubang nyoe haroh teutab teutob dan hana jeuet teupeuhah. hana meusidroepi nyang jeuet tamong keunan, sabab ulon, tuhan po teu allah israel, ka lon tamong u baet lon meulalu babah pintoe geureubang nyoe. jadi babah pintoe geureubang nyoe haroh teutab teutob. teuma le peunguasa nyang mat peurintah nanggroe jeuet jajak ubak teupat nyan keu jipajoh peunajoh suci dikeue ulon. gobnyan haroh jitamong rot ruweung rayeuk dan jigisa rot nyan cit lom." oh ltheuehnyan le ureueng agam nyang geuba ulon ubak pintoe geureubang utara nyang meuhadah ngon baet tuhan. ulon peurati, dan ulon kalon baet tuhan nyan ka peunoh deungon cahya muble-ble sibagoe tanda tuhan teuka. laju ulon peureubah droe dan lon sujut, dan tuhan meufureuman ubak ulon, "he manusia fana, tangiang kheueh beuget-get peue nyang gata kalon dan peue nyang gata deungoe. ulon kupeugah ubak gata banmandum peuratoran dan hukum keuhai baet ulon nyoe. tacetet kheueh beuget-get soe-soe nyang teubri idhin jitamong lam baet ulon nyoe dan soe-soe teuma nyang hana teubri tamong. tapeugah kheueh ubak umat israel nyang galak bak buet beurontak nyan bahwa ulon, tuhan nyang mahamanyang, han lon peubiyeu le awaknyan jipeubuet kutoe. awaknyan ka jipeukutoe baet ulon, sabab teungoh darah dan gapah keureubeuen jipeuseumah ubak ulon, awaknyan jipeu idhin jitamong udalam ureueng-ureueng aseng nyang hana meusunat, dan nyang hana taat ubak ulon. deungon buet-buet awaknyan nyang kutoe dan luwat nyan, awaknyan ka ji-iengkeue pujaanjan ulon deungon awaknyan. bukon jih awaknyan keudroe nyang peubuet upacara-upacara suci lam baet lon, teuma ureueng-ureueng aseng nyang awaknyan bri tugaih keu jipeubuet bandum nyan. ulon, tuhan nyang mahamanyang, ulon peumaklum bahwa ureueng aseng nyang hana meusunat dan ureueng nyang hana taat ubak ulon, ureueng nyang lagee nyan hana jeuet jitamong lam baet lon. hainyan keunong cit teuma ubak ureueng aseng nyang tinggai teutab lamkawan bansa israel." tuhan meufureuman ubak ulon, "ulon kuhukom bubena ureueng lewi nyang meusajan-sajan ngon ureueng-ureueng israel nyang laen, ka jitinggai ulon dan jiseumah beurala. di dalam baet lon, awaknyan teuma jeuet jipeutimang ulon sabagoe peugawee dan nyang jaga pintoe geureubang. awaknyan jeuet jisie bubena beulatang keu keureubeuen nyang teutot dan keureubeuen peuseumahan, dan awaknyan wajib jilayani umat. teuma sabab awaknyan ka jipeubuet upacara seumah beurala keu bansa israel, dan deungon caranyan ka jihila bansa nyan udalam desya, dan, ulon, tuhan nyang mahamanyang, meusumpah bahwa awaknyan haroh teuhukom. awaknyan hana jeuet le jipeutimang ulon sibagoe teungku imeum atawa

jicukeeh peue-peue nyang suci nibak ulon, atawa jitamong ubak tempat nyang mahasuci. nyan kheueh hukoman ateuh buet-buet nyang kutoe nyang ka awaknyan peubuet. jinoo awaknyan ulon bri tugaih keu jipeubuet buet-buet nyang geuhon dan gasa nyang peureulee jipeubuet di baet ulon." tuhan nyang mahamanyang meufeuruman, "bak watee bansa israel jitinggai ulon, teungku-teungku imeum lewi nibak keuturonan zadok teutab seutia jipeutimang ulon di baet ulon. sababnyan awaknyan kheueh nyang jinoo haroh jipeutimang ulon dan jimeuhadab ukeue ulon keu jipeuseumah gapah dan darah nibak keureubeuen nyang na. teuma awaknyan mantong nyang jeuet tamong u baet lon, jipeutimang ulon di miseubah lon, dan jipimpin seumayang di baet ulon. bak watee awaknyan jitamong bak pintoe geureubang teutuju ubak peulataran dalam, awaknyan haroh jisok peukayan lineun. hana jeuet awaknyan ngui peukayan nyang teupeuget nibak ija wol meunyoe teungoh meutugaih bak peulataran dalam, atawa didalam baet ulon. mangat hana seu uem dan meureuoh, awaknyan haroh jisok peukayan ija lineun ngon bek jingui talo keuieng, dan ikat ullee lineun. meunyoe awaknyan jijak ubak leuen bagian luwa, diteupat umat teungoh meugumpoi, teungku-teungku imeum nyan haroh jisuet peukayan dinaih droe jih didalam kama-kama suci baet ulon, laju jisok peukayan laen, mangat peukayan khusus nyan hana teupeuceulaka umat. di teungku-teungku imeum hana jeuet jicukoe habeh ok nibak ullee jihnyan, atawa jipeubiyeu ok jihnyan panyang. ok nyan haroh teukoh paneuk meunurot atoran nyang ka teupeuteutab. awaknyan hana jeuet ji-jieb ie anggo meunyoe keuneuk tamong u peulataran dalam. di teungku-teungku imeum jeuet jimeukawen ngon aneuek-aneuek dara israel nyang mantong peurawan atawa beukaih inong balee nibak teungku imeum. awaknyan hana jeuet jimeukawen ngon inong nyang jitaleuek le lakoe. le teungku-teungku imeum haroh jipeurunoe ubak umat lon mangat jeuet jipeubeda nyang toh nyang khusus keu ulon dan nyang toh nyang hana jeuet, nyang toh nyang gleh meunurot agama dan nyang toh teuma nyang kutoe. meunyoe teuka meulaen waham lam hai hukom, awaknyan haroh peuseuleusoe susuai deungon hukom-hukom lon. awaknyan haroh jipeuna khanuri-khanuri keu agama, meunurot atoran-atoran dan hukom-hukom lon, dan jihoreumat uroe sabbat sibagoe uroe nyang khusus keu ulon. sidroe teungku imeum hana jeuet jipeukutoe droe ngon cara jimat manyet, teukeucuali manyet ureueng syiek jihnyan, aneuek jihnyan, syedara jihnyan nyang agam atawa syedara jihnyan nyang inong nyang gohlohm meukawen. oh ka lھےh jihnyan gleh lom, jihnyan haroh jipreh tujuh uroe teuk, laju jijak ubak peulataran bagian dalam baet ulon, dan jipeuseumah keureubeuen keu jipeugleh droe jihnyan mangat jihnyan jeuet meutugaih lom di baet lon. ulon, tuhan nyang mahamanyang ka lon peugah haba. le teungku-teungku imeum jiteurimong jabatan imeum nyan sibagoe bagian nibak awaknyan nibak peue nyang ka ulon bri ubak israel salen meusalen. awaknyan hana jeuet jicok keumilek peue-peue mantong nyang na di israel: ulon kheueh

hareuta awaknyan. awaknyan haroh udeb nibak peuseumahan gandom, keureubeuen teusampoh desya, dan keureubeuen geunantoe rugoe; dan peue-peue mantong nyang ka jipeukhusus keu ulon, atranyan haroh teubri keu awaknyan. ubak teungku-teungku imeum haroh teubri bagian nyang paleng get nibak peue-peue mantong hase panen nyang phon-phon that teucok, dan nibak peue mantong nyang teupeuseumah ubak ulon. pajan mantong bansa israel jipeuget ruti, teuma ruti nyang phon that na kheueh keu teungku-teungku imeum. dan ulon lon bri beureukat keu rumoh-rumoh bansa israel. cicem dan beulatang-beulatang nyang laen nyang mate keudroe, atawa nyang jiteugom le beulatang buih, atranyan hana jipajoh le teungku-teungku imeum." siglohlohm tanoh nyan teuweuek-weuek jeuet keutanoh pusaka keu tieb-tieb sukee, haroh teuweuek saboh bulueng keu tuhan. tanoh nyan panyang jih haroh 12,5 kilometee, dan luwah jih 10 kilometee. bansaboh daerahnyan teupeumaklum suci. keu baet tuhan teupeuna nibak tanoh nyan siladum nyang measagoe peuet, ukoran jih 250 metee tieb-tieb bineh jih, dan jikeulileng le padang nyang luwah jih 25 metee dan disinan kheueh haroh teupeudong baet tuhan. siladum nibak tanoh nyan, nyang panyang jih 12,5 kilo metee, dan luwah jih kilometee haroh teukeubah keu teupeudong baet tuhan, na kheueh daerah nyang paleng suci. tanoh nyan suci, dan teukeubah keu teungku-teungku imeum nyang meutugaih jipeuna seumayang di baet tuhan. siladum nibak tanohnyan jeuet keu tempat rumoh awaknyan, dan siladum teuk keu baet tuhan. siteungoh teuk nibak tanoh nyan 12,5 kilometee kali kilometee haroh teukeubah keu ureueng-ureueng lewi nyang geumeubuet di baet tuhan. diteupat nyang teupeudong banda-banda dan awaknyan jeuet tinggai disinan. disampeng tanoh nyang suci nyan, haroh teupeung kreeh saboh keubeueng tanoh nyang panyang jih dua blaih siteungoh kilo metee dan luwah jih dua siteungoh kilometee, keu saboh banda nyang jeuet tinggai disinan soemantong nibak bansa israel. keu ureueng peunguasa nyang mat peurintah haroh cit teukeubah tanoh. tanoh nyan meureuntang nibak bataih barat daerah nyang teupeukhusus keu tuhan nyan, sampoe ubak laot teungoh, dan nibak bataih timu nyang teupeukhusus nyan, sampoe ubak bataih timu nanggroe nyan. jadi panyang jih saban deungon panyang saboh bulueng tanoh nyang teubri ubak sukee-sukee israel. tanoh nyan jeuet keumilek peunguasa nyang mat peurintah bak tanoh israel, mangat hana jitindeeh le ateueh umat lon, teuma teubri daerah nyang leubeu nyan jeuet keuhak meulek sukee-sukee israel. tuhan nyang mahamanyang meufeuruman, "ka seb kheueh nyan desya-desya gata, he peunguasa israel! tapeupioh kheueh buet gata nyang ban galak droe tatindeeh rakyat nyan. tapeubuet kheueh peue nyang beuna dan ade. bek sagai-sagai use umat ulon nibak tanoh awaknyan. ulon, tuhan nyang mahamanyang nyang peurintah nyan ubak gata. peuguna kheueh ceung dan sinukat nyang beuna: saboh efa keu teusukat bahan nyang toh haroh saban asoe jih deungon saboh bat keu teusukat bahan caye. patok haroh kheueh

saboh homer. deungon nyan, sinukat-sinukat nyan haroh lagee nyoe: 1 homer = 10 efa = 10 bat. boh ceng gata haroh lagee nyoe: 1 syikal = 20 gera 1 mina = 60 syikal nyoe kheueh dasai ukoran keu teupeuteutab peuseumahan-peuseumahan: gandom: 1/60 bagian nibak hase panen gata jawawut: 1/60 bagian nibak hase panen gata minyeuk zaiton: 1/100 bagian nibak hase bak-bak kayee. (sukat kheueh meunurot bat: 10 bat = 1 homer = 1 kor) bubiri: saboh bubiri nibak tieb-tieb 200 boh. gata haroh tapeuseumah keureubeuen gandom, keureubeuen nyang teutot, dan keureubeuen peudamean, mangat desya-desya gata teupeu amphon. ulon, tuhan nyang mahamanyang nyang bri peurintah keu nyan. bandum peunduduek nanggroo nyan haroh jiba peuseumahan-peuseumahan nyan ubak peunguasa nyang mat peurintah di israel. jihnyan kheueh nyang wajeib bloe beulatang peulara keu keureubeuen nyang teutot dan bahan-bahan keu keureubeuen gandom dan keureubeuen anggo keu banmandum bansa israel bak uroe-uroe raya, peurayaan buleuen baro, uroe-uroe sabat dan uroe-uroe raya laen. jihnyan haroh jipeuduek keureubeuen peu amphon desya, keureubeuen gandom, keureubeuen nyang teutot, dan keureubeuen peudamean keu teulakee amphon keu bansa israel." tuhan nyang mahamanyang meufeureuman ubak umat gobnyan, "bak tanggai sa buleuen sa, gata haroh tapeugleh baet ulon deungon cara tapeuseumah saboh leumo agam muda nyang hana cacat. teungku imeum haroh jicok darah nibak keureubeuen peu amphon desya nyan, laju jisampoh ubak taméh-taméh pintoe baet ulon, meunan cit ubak ban peuet sagoe miseubah, dan ubak taméh-taméh pintoe geureubang nyang teutuju ubak peulataran dalam. tapeubuet kheueh lagee nyan bak tanggai tujuh buleuen nyan, keu tieb-tieb ureueng nyang ka meudesya deungon hana jisaja atawa ngon sabab hana jiteupeue. deungon cara lagee nyan gata tajaga keusucian baet ulon. bak tanggai peuet blaih buleuen sa, gata haroh tapeuna khanuri paskah. tujuh uroe treb jih bandum ureueng haroh pipajoh ruti nyang hana meuragoe. bak uroe nyang keuphon, peunguasa nyang mat peurintah haroh jipeuseumah saboh leumo agam keu keureubeuen peu amphon desya keudroe jihnyan dan keu banmandum rakyat. teungoh peurayaan nyang treb jih tujuh uroe nyan, tieb-tieb uroe jihnyan haroh jipeuseumah ubak tuhan tujuh boh leumo agam dan tujuh boh bubiri agam nyang hana meucacat, laju teutot atranyan bulat-bulat. tieb-tieb uroe jihnyan haroh teuma jipeuseumah saboh kameng agam keu keureubeuen peu amphon desya. seulaen nyan, haroh teuma jipeuseumah gandom 17,5 aree keu tieb-tieb leumo agam meunan cit lhee aree minyeuk zaiton keu tieb-tieb bubiri agam. bak khanuri jambo on, nyang teupeuphon tanggai limong blaih buleuen tujuh, tieb-tieb uroe nyang treb jih tujuh uroe peunguasa haroh jipeuseumah keureubeuen-keureubeuen nyang saban, na kheueh keureubeuen peuamphon desya, keureubeuen nyang teutot, dan keureubeuen gandom ngon minyeuk zaiton." tuhan nyang mahamanyang meufeureuman, "pintoe geureubang timu nyang teutuju ubak

peulataran dalam haroh teutab teutob nyang treb jih nam uroe keureuja. pintoe geureubang nyan baro kheueh jeuet teupeuhah bak uroe sabat dan peurayaan buleuen baro. bak uroe-uroe nyan peunguasa haroh geutamong meulalu peulataran luwa dan meulalu ruweueng raya laju geudong bak bineh taméh geureubang, dan di teungku-teungku imeum geupeuseumah keureubeuen nyang teutot dan keureubeuen peudame nibak peunguasa. bak babah pintoe geureubang nyan gobnyan haroh geusujut dan geuseumah tuhan, oh luehnyan laju geujak. oh lueh nibaknyan sampoe an malam, geureubang nyan hana jeuet teutob. dikeue geureubang nyan cit teuma, banmandum rakyat haroh jisujut jiseumah tuhan tieb-tieb uroe sabat dan peurayaan buleuen baro. bak uroe sabat peunguasa haroh geupeuseumah ubak tuhan keureubeuen nyang teutot nyang maseng-maseng na kheueh: nam boh aneuk bubiri dan saboh bubiri agam, banmandum nyang hana cacat. meusigoe ngon bubiri agam nyan haroh teupeuseumah teuma keureubeuen gandom nyang le jih 17,5 aree, dan meusajang deungon tieb-tieb aneuk bubiri, haroh teupeuseumah keureubeuen gandom nyang le jih lagee nyang teulakee. tieb-tieb keureubeuen gandom haroh meusigoe deungon lhee aree minyeuk zaiton. bak peurayaan buleuen baro bahan nyan haroh kheueh saboh leumo agam, nam boh aneuk bubiri, dan saboh bubiri agam, banmandum nyan nyang hana meucupa bahpi meubacut. meusigoe deungon tieb-tieb leumo agam dan kameng agam, jihnyan haroh jipeuseumah gandom nyan le jih 17,5 aree, dan meusigoe deungon tieb-tieb aneuk bubiri, padub mantong meunurot nyang geulakee. tieb-tieb keureubeuen gandom meusigoe deungon peuseumahan lhee aree minyeuk zaiton. meunyo peunguasa keuneuk iebadat di baet ulon, jihnyan haroh jitamong meulalu ruweueng raya, dan watee jiwoe meulalu rot nyan cit lom. sikeubit jih, meunyo bak uroe-uroe rayeuk rakyat jiteuka jikak meueibat ubak tuhan, teuma awaknyan nyang jitamong meulalu pintoe geureubang utara, watee jiwoe haroh meulalu pintoe geureubang seultan oh ka lueh awaknyan seulesoe meueibat. dan awaknyan nyang tamong meulalu pintoe geureubang seultan, watee jiwoe haroh meulalu babah pintoe geureubang utara. ubak bandum ureueng nyan teutam hanjeuet jikak rot watee jitamong; awaknyan haroh jiwoe meulalu babah pintoe geureubang nyang na di meurandeh. peunguasa haroh jitamong u baet tuhan meusigoe-sigoe deungon rakyat dan jiwoe haroh meusigoe teuma. bak uroe-uroe khanuri dan peurayaan, meusigoe deungon leumo agam dan bubiri agam haroh teuma teupeuseumah gandom nyang le jih 17,5 aree, dan meusigoe deungon tieb-tieb aneuk bubiri, padub mantong meunurot nyang jikeuheundaki le ureueng nyang meueibat. tieb-tieb keureubeuen gandom haroh meusigoe deungon lhee aree minyeuk zaiton. meunyo peunguasa keuneuk jibri peuseumahan keugalak ate ubak tuhan, bah luehnyan keureubeuen nyang teutot meunan cit deungon keureubeuen peudame, babah pintoe geureubang timu nyang teutuju ubak leuen dalam haroh teupeuhah keu gobnyan. ureueng nyan haroh

jipeuseumah keureubeuen nyan deungan cara nyang saban lagee nyang jipeubet bak uroe sabat, teuma meunan jihnyan ka jiwoe, babah pintoe geureubang nyan haroh teutob lom." tuhan meufeuroman, "tieb-tieb uroe watee beungoh, saboh aneuek bubiri nyang meu umu sithon dan nyang hana meucacat meubacutpi haroh teupeuseumah keu keureubeuen nyang teutot ubak tuhan. seulaen nibaknyan, tieb-tieb beungoh haroh teupeuseumah teuma dua kilogram gandom dan si aree minyeuk zaiton mangat teulawok deungan gandom nyan. nyan kheueh keureubeuen gandom nyang tieb-tieb uroe haroh teupeuseumah ubak tuhan; atoran nyan teutab teupeubet keu siumu masa. tieb-tieb beungoh, haroh teupeuseumah sabe ubak tuhan; saboh aneuek bubiri, keureubeuen gandom dan minyeuk zaiton." tuhan nyang mahamanyang geupeurintah, kheun gobnyan, "meunyo peungasa nyang mat peurintah jibri siladam nibak tanoh pusaka nyan ubak sidroe lamkawan aneuek jihnyan nyang agam, tanoh nyan ka jeuet keuhak milek aneuek agam jihnyan dan ka jeuet keuhareuta keuluwarga. teuma meunyo peungasa nyan jibri siladam nibak tanoh jihnyan keu sidroe lamkawan namiet jihnyan, tanoh nyan jeuet lom hak milek peungasa nyan nibak thon teujok pulang. tanohnyan na kheueh atra milek jihnyan dan teuma jihnyan ngon aneuek-aneuek agam jih mantong nyang jeuet kuasa ateueh tanoh nyan keu siumu masa. peungasa nyan hana jeuet jicok mubacut pih nibak hareuta pusaka rakyat jih. teuma tanoh jihnyan keudroe nyang jeuet jijok ubak aneuek-aneuek agam jihnyan sampoe hana meusidroe pih nibak umat ulon hase jipeu crebre nibak hak milek jihnyan." oh lheurehnyan le ureueng agam nyan laju geuba ulon meulalu babah pintoe di sampeng pintoe geureubang, ubak kama-kama suci nyang meuhadab u utara. kama-kama nyan teukeubah keu teungku-teungku imeum. ureueng agam nyan geutunyo ubak ruweueng bak ujong siblahi ubarat, dan geupeugah, "nibak teupat nyoe le bandum teungku imeum haroh jireuboh keureubeuen peusampoh desya dan keureubeuen gantoe rugoe dan jitot keureubeuen gandom, mangat na bahpi bacut nibak keureubeuen-keureubeuen nyang suci nyan hana teuba ubak peulataran luwa sampoe akibat jih teupeuceulaka rakyat." oh lheureh nyan ulon geuba teuma ubak peulataran luwa dan geupeuleumah ubak ulon bahwa nibak ban peuet boh sagoe jih, maseng-maseng na peulataran nyang leubeh ubit, panyang jih 20 metee dan luwah jih 15 metee. tieb-tieb leuen nyan jikeulileng le beuton ba-tee, dan nibak beuton nyan na sinungkee-sinungkee. kheun ureueng agam nyan ubak ulon, "nyoe kheueh dapu-teupat teupat peulayan-peulayan baet tuhan jireuboh keureubeuen-keureubeuen nyang jipeuse-umah le rakyat." ureueng agam nyan geuba lom ulon ubak babah pintoe tamong u baet tuhan. leumah lon kalon ie teungoh ji ile rot miyueb pintoe nyan u arah timu, lagee baet tuhan pih meuhadab u timu. ie nyan ji ile rot miyueb ambang pintoe baet tuhan bagian seulan meulalu sisi seulan nibak mezbah. oh lheureh nyan le ureueng agam nyang geupeuteubiet ulon meulalu babah pintoe geureubang utara dan

geutunton ulon ubak geureubang timu. krueng ubit nyan ji ile nibak sisi seulan geureubang nyan. teungoh teupat ngon tungkat seuneupat gobnyan, ureueng agam nyan geuba laju ulon seutot talo krueng nyan arah utimu nyang jioh jih na 500 metee, laju geuyue ulon mangat lon jeumeurang. nibak teupatnyan ie cit euet mata gatok. oh lheurehnyan gobnyan geusipat 500 metee teuk, dan di teupat nyan ie jih na euet teuat. gobnyan geusipat 500 metee teuk, dan ie jih na euet keueing. geusipat lom sigoe teuk nyang jioh jih 500 metee, dan disinan ie jih lumpah that llok keu teubloh teujak ngon tapak. meunyo ureueng keuneuk jeumeurang haroh kheueh jimeulangue. laju geupeugah le ureueng nyan ubak ulon, "he manusia fana, takalon kheueh nyoe beujroh-jroh." oh lheurehnyan gobnyan geuba lom ulon teujak seutot talo krueng, dan ulon kalon bahwa bak bandua bineh krueng nyan jai that jitimoh bak kayee. ureueng nyan geupeugah ubak ulon, "krueng nyoe ji ile utimu meulalu nanggroe nyoe dan meulalu panton krueng yordan teutuju u laot mate. meunyo ie jih trok u dalam laot mate, ie laot nyang masen nyan geugantoe ngon ie tabeue. ho mantong ie krueng nyan ji ile, disinan cit teuma na meuteume meubagoe macam uengkot dan beulatang laen. ie laot mate geupeujeuet jeuet keu ie tabeue, dan homantong ie nyan ji ile, disinan na udeb. nibak mata-mata ie di en-gedi sampoe trok ubak mata-mata ie di en-englain, tieb-tieb bagian bineh jih rame that deungan ureueng-ureueng neulayan nyang geu ade jeue gobnyan nibak teupat nyan. beubagoe macam uengkot na didalam ie nyan, lagee nyan na lam laot teungoh. teuma ie nyang na lam-lam rawa dan paya-paya bansipanyang pante nyan hana jeuet keutabeue, teuma teutab jeuet keu sumber sira. ban sipanyang krueng nyan timoh meubagoe macam bak kayee muboh. on kayee nyan hantom na laye, dan boh-boh kayee nyan hantom na habeh. bak bak kayee nyan jimuboh boh kayee nyang baro tieb-tieb buleuen, sabab ie nyang ile disinan na kheueh ie nibak baet tuhan. boh-boh kayee nyan jeuet keupeunajoh dan on-on kayee nyan meuguna jeuet keu ubat." tuhan nyang mahamanyang meufeuroman, "nyoe kheueh bataih-bataih tanoh nyang teubagi-bagi ubak bandua blaih sukee israel. sukee yusuf jiteurimong dua bagian. ulon ka lon meusumpah bahwa tanoh nyan ulon bri ubak indatu gata. sabab nyan, tacok kheueh tanoh nyan dan neubagi kheueh deungan ade lamkawan gata. bataih rot utara teupeuphon di laot teungoh teutuju utimu sampoe u banda hetlon, u arah hamat, laju u banda zedad, u berota dan sibraim (banda-banda nyan teuduek jih lamkawan banda damsyik dan banda hamat), oh lheurehnyan u banda hazar-enan, dibataih banda hauran. jadi, bataih siblahi utara teupeuphon rot laot teungoh sampoe utimu, u banda hazar-enan; dan daerah damsyik dan hamat na di siblahi utara bataih nyan. bataih siblahi utimu teutuju u seulan, nibak saboh teupat lamkawan damsyik dan daerah hauran. jadi, krueng yordan na kheueh bataih lamkawan tanoh israel di siblahi ubarat dan gilead siblahi utimu, sampoe trok u tamar di pante laot mate. bataih disiblahi seulan teutuju ubarat daya,

nibak tamar ubak mata ie kades-meriba, laju ubarat laot sipanyang bataih nanggroe meuse sampoe u laot teungoh. bataih siblaih ubarat teupeuget le laot teungoh, laju teutuju u utara ubak saboh teupat di siblaih ubarat rot tamong u hamat. taweuëk kheueh tanoh nyan seusabe gata, meunurot sukee-sukee israel; dan tanoh nyan na kheueh atra gata keu siumu masa. ureueng-ureueng aseng nyang tinggai teutab lamkawan gata, dan na aneuek-aneuek nyang lahe disinan, haroh meuteume cit bulueng nibak atanyan. awaknyan haroh teuagabb sabagoe warga nyang peunoh nibak bansa israel, dan awaknyan haroh turot teu undi mangat jeuet meuteume tanoh watee teupeuna peumbagian di lamkawan sukee-sukee israel. tieb-tieb peunduduek aseng haroh teubri tanoh meusajan ngon sukee israel dipat mantong awaknyan tinggai. ulon, tuhan yang mahamanyang ka lon peugah.haba." bataih tanoh siblaih utara meubuju utimu, phon di laot teungoh u arah banda hetlon, rot tamong u hamat, banda hazar-enan, sampoe ubak bataih lamkawan banda damsyik dan banda hamat. sukee-sukee seulanjut jihnyoe maseng-maseng haroh meuteume saboh jeumba nibak tanoh nyang luwah bak bataih timu teutuju ubarat sampoe u laot teungoh, dalam urotan jih na kheueh lagee nyoe phon di barat trok u seulan: dan asyer naftali manasye efraim ruben yehuda bagian seulanjut jih nibak tanoh nyan haroh teupeung kreeh keu teupeuguna khusus. panyang jih haroh 12,5 kilometee nibak bataih utara sampoe u seulan. bataih-bataih timu dan barat haroh saban panyang jih deungon jeumba-jeumba nyang geubri ubak sukee-sukee israel. baet tuhan teupeudong nibak bagian nyan. siladum nibak daerah nyan teupeukhusus keu tuhan, na kheueh saboh keubeueng tanoh di bagian pusat, panyang jih 12,5 kilometee dan luwah jih 10 kilometee. bak bagian teungoh tanoh nyan teupeudong baet tuhan. keu teungku-teungku imeum haroh meuteume bagian nibak daerah nyang suci nyan. jeumba awaknyan na kheueh 12,5 kilometee phon nibak bineh timu sampoe u bagian barat, dan limong kilometee nibak bineh utara u seulan. daerah nyang khusus nyan teuma jeuet keu hakmilek teungku-teungku imeum keuturonan zadok. awaknyan ka jipeutimang tuhan deungon seutia dan bukan lagee ureueng lewi nyang saboh sukee deungon awaknyan, nyang sajan jipeubuet desya deungon ureueng-ureueng israel nyang laen. sabab nyan ubak keuturonan zadok haroh teubri tanoh khusus disampeng tanoh nyang teubri ubak ureueng lewi. dan tanoh khusus nyan keubit that suci. tanoh ureueng-ureueng lewi nyan panyang jih 12,5 kilometee rot timu ubarat, dan luwah jih 5 kilometee rot utara u seulan dan teuduek jih sare meuatoe deungon tanoh teungku-teungku imeum. sijingkai pih nibak tanoh nyan hana jeuet awaknyan peubloe atawa awaknyan tuka; bagian nyang paleng jroh nibak tanoh israel hana jeuet teupinah lam jaroe ureueng laen, sabab tanoh nyan ka teupeukhusus keu tuhan dan jeuet keuhak milek jihnyan. di siblaih seulan tanoh khusus nyan, mantong na tinggai nyang panyang jih 12,5 kilometee, dan luwah jih dua siteungoh kilometee.

bagian nyan hana suci dan jeuet geupeuguna le rakyat keu teupat tinggai dan keu blang naleueng, dibagian teungoh jih haroh teupeudong saboh banda. banda nyan haroh meubantuek peuet sagoe timang, tieb-tieb bineh jih haroh na ukoran dua siper peuet kilometee. bansikeulileng banda nyan haroh na tanoh luwah nyang luwah jih 125 metee. di siblaih utimu dan barat banda nyan na tanoh luwah nyang luwah jih maseng-maseng limong kali dua siteungoh kilometee. bandua boh teupat tanoh luwah nyan haroh teupeuguna keu teupat meutani le peunduduek banda. ureueng-ureueng di bandua sukee israel nyang tinggai nibak bandua banda nyan jeuet jimubuet nibak tanohnyan. le sabab nyan, bansaboh daerah nyan, meunan cit deungon tanoh nyang khusus dan tanoh keu banda, bantuek jih peuet sagoe timang deungon ukoran 12,5 kilometee tieb-tieb saboh sagoe. tanoh disiblaih ubarat dan siblaih utimu di daerah khusus nyang teukeubah keu baet tuhan, le teungku-teungku imeum, ureueng lewi dan banda nyan keudroe, na kheueh keu peunguasa nyang mat peurintah. di siblaih utimu tanoh nyan luwah jih meubataih sampoe utimu, dan siblaih ubarat sampoe u laot teungoh, dan teuduek jih lamkawan tanoh yehuda ngon tanoh benyamin. tanoh nyang na disiblaih seulan nibak daerah nyang khusus nyan, na kheueh keu sukee-sukee nyang laen. luwah tanoh nyan phon nibak bataih timu u arah barat trok laju u laot teungoh, dan teubagi meunurot susonan nyoe di utara sampoe u seulan na kheueh: benyamin simeon isakhar zebulon gad di siblaih seulan tanoh gad na meuteume peubatasan nyang phon di barat daya tamar liwat mata ie kades-meriba, laju u arah barat laot sibuju peubatasan nanggroe meuse sampoe u laot teungoh. tuhan yang mahamanyang meufeuëuman, "meunan kheueh tanoh nyan haroh teuweuek-weuek keu sukee-sukee israel." babah pintoe tamong u banda yerusalem banmandum na dua blaih boh. ban peuet boh bintang beuton jih maseng-maseng na ukoran dua siper peuet kilometee, dan na lhee boh pintoe geureubang. tieb-tieb saboh pintoe geureubang teuboh nan meunurot nan sidroe lamkawan sukee bansa israel. babah-babah pintoe geureubang nyang na siblaih utara geuboh nan ruben, yehuda dan lewi; babah-babah pintoe geureubang nibak bintang beuton siblaih utimu geuboh nan yusuf, benyamin, dan dan; nyang na nibak beuton seulan geuboh nan simeon, isakhar dan zebulon; sedangkan nyang na disiblaih ubarat geuboh nan gad, asyer, dan naftali. bandum bintang beuton nyan panyang jih sikureueng kilometee. dan phon saatnyoe geuboh nan banda nyan le ureueng: "tuhan na disinan!"

nyoe kheueh peusan nyang geubri le tuhan ubak hosea bin beeri bak masa keurajeuen yehuda meuturot-turot geupeurintah le raja uzia, yotam, ahas, dan hizkia, dan keurajeuen israel geupeurintah le yerobeam bin yoas. watee tuhan phonphon geumeufeuruman ubak bansa israel deungon peurantaraan ulon, tuhan geupeugah, "hosea, tameukawen kheueh deungon sidroe ureueng nyang galak bak buet meumukah, dan aneuek-aneuek gata jeuet cit lagee jih nyan. umat ulon saban lagee peurumoh gata nyan; awaknyan hana seutia ubak ulon, dan jitinggai ulon." dan laju ulon meukawen deungon sidroe inong nyang nan jih gomer bin diblaim. oh lheureh nyan lahe kheueh aneuek kamoe nyang phon, sidroe aneuek agam. tuhan meufeuruman ubak ulon, "taboh nan aneuek gata nyan yizreel sabab hana treb le ulon kuhukom raja israel sabab yehu indatu jihnyan ka jipoh mate ureueng laen, di yizreel ulon ku peutamat peumeurintahan keuturonan yehu. bak masa nyan di panton yizreel ulon kupeuhanco teunaga tantra israel." oh lheurehnyan peurumoh lon nyan jipeulahe aneuek kamoe nyang keudua, aneuek nyang lahe nyan na kheueh inong. tuhan meufeuruman ubak ulon, "he hosea, taboh nan aneuek gata nyan 'nyang hana geugaseh', sabab ulon hana le lon gaseh ubak bansa israel, dan meubacutpi hana lon peumaphon awaknyan. teuma bansa yehuda lon gaseh. ulon, tuhan, po teu alah awaknyan, lon peuseulamat awaknyan, teuma bukan deungon murpang, meunan cit bukan deungon peudeueng atawa aneuk panah atawa guda meusajan ngon nyang giduek ateueh guda nyan." oh ka lheureh aneuek kamoe nyang keudua nyan teupeucir jimom, peurumoh ulon nyan laju raya pluet lom dan jipeulahe aneuek agam. tuhan meufeuruman ubak ulon, "taboh nan aneuek gata nyan, 'bukan umat lon', sabab ureueng israel bukan umat lon, dan ulon bukan allah awaknyan." bansa israel le jih lagee anoe lam laot, sampoe hana sanggob teusukat atawa teu itong. jinoenyoe allah geupeugah ubak awaknyan, "gata bukan umat ulon," teuma trok saat jih gobnyan geupeugah ubak awaknyan, "ulon kheueh allah nyang udeb dan gata na kheueh aneuek-aneuek ulon!" bansa yehuda dan bansa israel geupeusaboh lom. awaknyan jiangkat sidroe peumimpin, dan awaknyan meukeumang dan makmu lom di nanggroe awaknyan keudroe. keubit, uroe yizreel jeuet keu uroe nyang raya! sabab nyan meuhoi kheueh seusabe gata deungon nan "umat allah" dan "geunaseh tuhan." tuhan meufeuruman, "he aneuek-aneuek ulon, ma gata bukan peurumoh lon le, dan ulon bukan lakoe gobnyan. sabab nyan, jak peukara kheueh jihnyan mangat jihnyan bek le jipeubuet mukah dan bek le jimeujeuet. meunyeo jihnyan teutab jimeulunte, ulon kusuet peukayan jih mangat jihnyan teulon lagee watee jihnyan lahe lam pluet ma. teuma lon peujeuet jihnyan lagee tanoh nyang tho krenge, dan jihnyan mate sabab grah ngon tho rukueng. gatanyoe, aneuek-aneuek jihnyan, hana lon gaseh; gatanyoe lahe nibak inong jeuhet. ma gata inong jeuhet nyang hana meumalee. jihnyan jipeugah, 'ulon teuma lon jak ubak geunaseh-geunaseh lon nyang bri keu ulon peunajoh dan ie meuneujieb, wol dan ija lineun,

minyek zaiton dan ie anggo.' sabab nyan, ulon lon kurong jihnyan deungon tamah meuduro, dan ulon tob rot jikak ngon pageue beuton. jihnyan teuma jitiyeub geunaseh-geunaseh jih, teuma hana trok ubak awaknyan. jihnyan jimita awaknyan, teuma hana meurumpok deungon awaknyan. sababnyan laju jipeugah, 'ulon ku woe ubak lakoe lon nyang phon; ilee keuadaan ulon leubeh get nibak saat nyoe.' ma gata hantom na jiaku bahwa ulon kheueh nyang bri gandom, anggo, minyek zaiton, dan bandum meuh pirak nyang geungui keu jiseumah baal nyan. sabab nyan, bak musem keumeukoh ulon tarek bandum nyang ka ulon bri, nyan kheueh gandom dan anggo, meunan cit deungon wol dan ija lineun nyang ulon bri keu peukayan jih. teuma lon peulon jihnyan dikeue banmandum geunaseh jih. hana meusidroe pih nibak awaknyan nyang hase jipeulheuh jihnyan nibak keukuasaan lon. bandum khanuri nyang jipeuna le jihnyan lon peupioh, bah kheueh nyang khanuri sithon sigoe meunan cit khanuri sibuleuen sigoe dan uroe-uroe sabat; paneuk haba, bandum peurayaan keuagamaan jihnyan. ulon lon peuhanco bubena bak anggo dan bak-bak ara nyang meunurot jihnyan na kheueh upah peulayanan jihnyan ubak geunaseh jih. teuma lon ubah lampoh-lampoh anggo dan lampoh-lampoh ara jihnyan jeuet keu uteuen; beulang-beulang buih jipeurusak. ulon lon hukom jihnyan sabab uroe-uroe nyang geupeuguna keu jitot keumeunyan keu baal, dan jimeusolek deungon pianan jih keu jitiyeub geunaseh-geunaseh jihnyan, laju jituwoe ubak ulon hana jiangat meubacut pih. ulon, tuhan, ka lon peugah haba." tuhan meufeuruman, "sabab nibak uroenyon ulonba jihnyan u padang pasi; disideh jihnyan lon bujuk deungon tutoe haba cinta. lampoh-lampoh anggo jihnyan lon pulang ubak jihnyan, dan panton keususahan lon peujeuet keu pintoe peungharapan. di teumpat nyang jihnyan jisambot ulon lagee yoh jihnyan mantong muda, watee jihnyan ban jiteubiet nibak nanggroe meuse. laju jihnyan jipeugah ulon lakoe droe, dan bukan le baal jih. ulon hana lon idhin le keujih jipeugah-peugah nan baal, sampoe le ureueng rame teuma jituwoe ubak nan nyan. bak watee nyan ulon kupeuna peujanjian deungon meubagoe jeuneh beulang jeuet le beulang-beulang nyan bek le jipeukaru umat ulon. ulon kupeupioh bubena prang dan ulon kireueh bube na alat-alat prang di nanggroe umat ulon nyan, dan lon peujeuet awaknyan udeb deungon aman dan teuntram. he israel, gata lon peujeuet keu peurumoh lon, peurumoh nyang sah keu siumu masa. gata lon gaseh dan lon cinta sabe; ulon kupeubuet juoe dan seutia. lagee nyang ka ulon peujanji, gata lon meukawen, gata ta aku ulon sibagoe tuhan gata keudroe. bak watee nyan, meunyeo umat ulon israel jimeu doa, doa nyan lon deungoe. di ateueh langet lon peutron ujeuen sampoe bumoe jipeuhase gandom, anggo dan minyek zaiton. teuma lon peujeuet umat ulon udeb seujahteura dan tinggai teutab di nanggroe jih keudroe. keu awaknyan nyang teuboh nan, 'nyang hana teugaseh' teuma lon tunyok bahwa awaknyan ulon gaseh, dan keu awaknyan nyang teuboh nan 'bukan umat ulon' teuma ulon peugah 'gata umat ulon'. awaknyan teuma jijaweueb lagee nyoe, 'droeneueh

kheueh allah kamoe.' " tuhan meufeureuman ubak ulon, "tajak kheueh lom dan tameucinta kheueh ngon sidroe ureueng inong nyang galak jipeubuet mukah. cinta kheueh inong nyan lagee ulon kucinta ureueng israel bahpi awaknyan jitinggai ulon dan jiseumah ilah-ilah laen dan galak jipeuseumah kue kismis keu beurala." dan ulon bayee limong blaih peng pirak dan 150 kilo gram gandom beu meuteume ureueng inong nyan. ulon peugah ubak jih bahwa jihnyan haroh jipreh ulon keu watee nyang treb. seudub nyan treb watee jih ureueng nyan hana jeuet jipeubuet mukah atawa jijak meulunte, dan ulon pih hana lon peurab ubak jihnyan. meunan kheueh hai jihnyan deungon bansa israel; treb that jihnyan haroh udeb hana meuraja atawa peumimpin, hana keureubeuen atawa tugu-tugu keuramat, hana beurala atawa jimat-jimat nyang jipeugah rahsia masa ukeue. teuma teuka masa jih bansa israel jiwoe ubak tuhan allah jih keudroe, dan ubak raja jih keudroe nibak keuturonan nabi daud. laju awaknyan teumakot dan horeumat ubak tuhan, dan jiteurimong beureukat-beureukat nyang geubri. tuhan na peukara deungon peunduduek nanggroe nyoe. he israel, tadeungoe peue nyang geupeugah le gobnyan, "di nanggroe nyoe hana keuseutiaan atawa gaseh sayang, dan peunduduek nanggroe nyoe hana jiwa ulon sibagoe alah. awaknyan meusumpah teuma hana jipeubuet lagee nyang jimeusumpah nyan; awaknyan meusulet, tukang poh mate gob, ceumucue, dan tukang meumukah. keujeuhetan meutamah-tamah, dan jipoh mate gob sabena hantom reuda. sabab nyan nanggroe nyoe jeuet keu nanggroe nyang tho, dan peue-peue mantong nyang udeb disinan mate. meubagoe je-uneh beulatang nyang na di manyang, darat, dan laot binasa." tuhan meufeureuman, "he teungku-teungku imeum, bek kheueh na nyang peusalah atawa be-ungeh keu umat lon, sabab gata kheueh nyang ulon peusalah! uroe malam gata peubuet buet nyang salah, meunan cit teuma deungon dumna nabi. sabab nyan ulon lon peubinasa israel, ma gata. gata, he teungku-teungku imeum, hana tapakoe keu ulon, dan umat lon pih hana jipakoe keu ulon sampoe awaknyan ceulaka. gata tatulak ajaran-ajaran ulon. le sababnyan, ulon pih lon tulak gata, dan aneuek-aneuek gata hana ulon angkee sibagoe teungku-teungku imeum lon. seumaken gata meutamah le, seumaken meutamah meudesya gata ubak ulon, he teungku-teungku imeum! sabab nyan keuadaan gata lon ubah; gata hana jihoreumat le gob, teuma jihina. gata ka jeuet keukaya sabab desya-desya umat ulon, sabab nyan kheueh gata meuharab mangat awaknyan teutab meudesya sabe. dan gata meudeurita saban lagee rakyat! ulon lon hukom gata nyang suisai deungon buet gata. gata tapajoh nibak keureubeuen-keureubeuen nyang jipeuseumah, teuma gata teutab deuk. gata taseumah dewa-dewa keusuboran, teuma peunduduek gata teutab hana meutamah, sabab gata ka tatinggai ulon keu taseumah ilah-ilah nyang laen." tuhan meufeureuman, "he umat lon, bah kheueh anggo nyang treb meunan cit anggo nyang baro ka teupeugadoh keumampuan gata keu gata seumike seucara seuhat. gata lakee naseuhat ubak sikrak kayee! sikrak tungkat jipeugah ubak gata peue nyang

gata keuneuk teupeue! gata lagee sidroe binoe nyang jeuet keu lunte; gata tatinggai ulon dan tapeujok droe ubak ilah-ilah laen. bak teumpat-teumpat se-umah beurala di pucak-pucak buket dan gunong, gata tapeuseumah keureubeuen, dan tatot keumeunyan dimiyueb bak-bak kayee raya nyang rampak disideh sabab teumpat nyan reului. teuma peu kheueh akibat jih? aneuek-aneuek dara gata ka jeuet keu inong lunte dan meulintee-meulintee gata nyang inong ka jimeum-mukah! teuma ulon hana lon hukom buet awaknyan, sabab gata keudroe pi tajak ubak inong-inong lunte nyang meubuet di kuil-kuil, dan meusajan deungon awaknyan gata tapeuseumah keureubeuen keu dewa, keubit beutoi that ungkapan nyoe: 'bansa nyang hana peungeurtian keuhai allah bansa nyan reuloh.' he gata ureueng israel, gata hana seutia ubak ulon! teuma, ulon harab yehuda hana jipeubuet buet nyang salah nyang sa! bek meueibadat di gilgal atawa di betel. bek taseumakong disinan deumi nan tuhan nyang udeb. gata, he ureueng israel, lumpah that kreueh ulee! pakriban ulon hase lon rabe gata lagee bubiri di blang naleueng?" umat israel ka teugoda deungon beurala. sabab nyan tapeubiyeu kheueh awaknyan. oh ka kheueh mabok sabab ka le that ji-jieb ie anggo, awaknyan meulunte ban galak droe. awaknyan leubeh galak teuhina nibak teuhoreumat. sabab nyan awaknyan gadoh lagee angen ploih. awaknyan meuteume malee sabab keureubeuen-keureubeuen nyang awaknyan peuseumah keu dewa-dewa. tuhan meufeureuman, "deungoe kheueh, he bandum teungku imeum! simak kheueh, he ureueng israel! de-ungoe kheueh, he ureueng-ureueng keuturonan raja! hukuman ka teupeurhot u ateuhe gata. sabab, nyang sibeuna jih gata taseuhakem deungon ade, teuma ka teubalek gata jeuet lagee peurangkab di mizpa, lagee taron di gunong tabor, dan lagee uruek nyang lhok di sitim. sabab nyan ulon ku hukom gata banmandum! ulon lon teupeue peue-peue mantong keuhai gata, he israel! hana mungken gata som sapeue-peue nibak ulon. gata taseumah beurala dan hanale seutia ubak ulon. sabab nyan, ureueng-ureueng gata hana patot le jiseumah ulon." keujeuhetan nyang jipeubuet le ureueng-ureueng israel meuakibat jih awaknyan hana hase jiwoe ubak allah jih keudroe. awaknyan ka jiteugom le jiseumah ubak beurala, sampoe awaknyan ka hanale jipakoe ubak tuhan. keusombongan bansa israel leumah deungon nyata, dan jeuet keubukeuti keusalahan awaknyan. sabab desya awaknyan meuakibat jih awaknyan meuan-tok dan reubah, dan bansa yehuda meusajan rhot deungon awaknyan. awaknyan jijak mita tuhan deungon jiba bubiri dan leumo keu keureubeuen, teuma bandum nyan hana meuguna. sabab tuhan ka geutinggai awaknyan, dan awaknyan hana hase meurumpok ngon gobnyan. awaknyan hana seutia ubak tuhan; aneuek-aneuek awaknyan bukan aneuek-aneuek gobnyan. sabab nyan, hana treb le awaknyan teupeubinasa meusajan deungon ladang-ladang jih keudroe. yueb kheueh beureuguih di gibea! tapeumeusu tanda teutawok jak muprang di rama! peumaklum tanda dumpek prang di betel! jak, he ureueng benyamin, maju kheueh u mideuen prang! israel binasa, sabab ka trok uroe jih keu teuhukom

awaknyan. deungoe kheueh, he rakyat israel, hainyan pasti teujadi. tuhan meufeureuman, "ulon beungeh sabab peumimpin-peumimpin yehuda ka jiheutam israel dan jireubot tanoh awaknyan. sabab nyan ulon lon peurhot hukoman u atueh awaknyan lagee ie raya. israel jiteugon; awaknyan ka gadoh hak atueh tanoh droe, sabab gobnyan jimeukreueh jilakee tulong ubak nyang sibeuna jih hana hase jitulung awaknyan. nyan kheueh jeuet ulon keuneuk peuhanco bansa israel, dan lon peubinsa ureueng yehuda. bansa israel dan bansa yehuda jisadar ubak keuadaan gobnyan nyang brok, teuma israel laju jijak u asyur keu jilakee tulong ubak raja agong. teuma rajanyan hana hase jitulung atawa jipeuget keuadaan awaknyan. lagee singa buih meurungkom, meunan kheueh ulon lon seurang ureueng israel dan yehuda. ulon keudroe nyang leumeueh dan priek-priek awaknyan, oh lheurehnyan laju ulon tinggai disinan. meunye ulon nyang bahue awaknyan mangat jijak, hana meusidroo nyang hase peulheueh awaknyan. umat ulon lon tinggai sampoe awaknyan kaseb meudeurita sabab desya-desya jih keudroe, laju jijak mita ulon. mungkin lam peundeuritan jihnyan, awaknyan ji-useuha jak meurumpok ngon ulon." ureueng-ureueng israel jipeugah, "jak geutanyoe tawoe ubak tuhan. gobnyan kheueh nyang peusaket geutanyoe, teuma gobnyan cit nyang peupuleh, gobnyan nyang peuluka, teuma gobnyan cit nyang balot luka-luka geutanyoe. lam dua atawa lhee uroe nyoe gobnyan geupeupuleh tanyoe, dan geutanyoe udeb didalam lindongan gobnyan. sabab nyan jak kheueh geutanyoe ta useuha beubeutoi-beutoi taturi ubak tuhan. gobnyan pasti teuka ubak geutanyoe lagee teuka mata uroe beungoh, dan lagee ujeuen tron nyang basah bumoe bak akhe musem ujeuen." teuma tuhan meufeureuman, "he israel dan yehuda! peue nyang haroh lon peuget keu gata? cinta gata ubak ulon bagai gadoh lagee sagob atawa iembon di beungoh uroe. nyang kheueh sabab jih ulon kirem nabi-nabi lon keu jipeusampoe ubak gata peue nyang ka ulon peuputoh bahwa gata haroh teuhukom dan teupeubinsa. nyang ulon lakee ubak gata nyata dan trang; ulon leubeh galak gata taturi ulon dan sabe tagaseh keu ulon, nibak gata tatot dan tapeuseumah keureubeuen ubak ulon. teuma lagee di adam, gata taieugkeue janji gata ubak ulon. gilead na kheueh banda nyang peunoh deungon peujahat dan tukang poh mate. teungku-teungku imeum di banda nyan lagee sabab kawan peurampok nyang jilinteueng ureueng nyang jak. nibak jalan nyan teutuju u tempat suci di sikhem pi jilinteueng dan jipoh gob sampoe mate! bandum buet nyang jeuhet nyan awaknyan peubuet deungon jisaja. di israel na ulon ngieng sapeue-peue nyang lumpah teumakot; umat ulon jipeukutoe droe jihnyan deungon jiseumah beurala. keuhai gata, he ureueng yehuda, ulon ka lon peuteutab watee jih keu lon hukom gata sabab buet nyang gata peubuet." tuhan meufeureuman, "tiebtieb na niet keuneuk lon peupuleh umat ulon israel dan lon peuget beujroh keuadaan awaknyan. teuma nyang ulon ngieng na kheueh keujeuhetan-keujeuhetan dan desya-desya awaknyan. awaknyan saleng teumipee, awaknyan jitamong lam rumoh gob

jijak ceumucue, dan awaknyan meurampok bak rot-rot ueh raya. hana teupike meubacut pih lam pikiran awaknyan bahwa ulon lon ingat bandum buet nyang jeuhet nyan. teuma desya-desya awaknyan ka peunoh dalam tuboh awaknyan deungon nyata deuh ulon kalon." tuhan meufeureuman, "deungon tipee daya dan buet-buet nyang jeuhet rakyat ji useuha jipeugalak ate raja dan peujabat-peujabat peumeurintah. awaknyan bandum peukhianat dan ureueng nyang hana seutia. banci awaknyan lagee apui lam sinungkee nyang hana jiproh le ureueng peuget ruti sigohlom teupong ruti nyang jilawok nyan siab keu teutot. bak uroe khanuri raja, awaknyan jipeujeuet raja dan peujabat-peujabat gobnyan ji-jieb ie anggo sampoe mabok dan jipeubuet hai-hai nyang banggai. akhe jih raja meuseunang-seunang deungon bandum ureueng peukhianat nyan. lagee apui lam sinungkee meunan kheueh niet jeuhet dan beungeh awaknyan lagee ngeue apui nyang hu simalam suntok, dan oh beungoh uroe hu apui nyan ka jeuet keu apui hu nyang keubit mubahya. watee nafeusu beungeh nyan, awaknyan laju jipeumate peumimpin-peumimpin droe jih. bandum raja awaknyan ka jipoh mate meuturot-turot. teuma bahpi lagee nyan keuadaan ka lumpah that brok, dan meusidroepi hana meudoa ubak ulon keu jilakee tulong." tuhan meufeureuman, "bansa israel meusikutu ngon bansa-bansa nyang na di sikeulileng jihnyan, deungon nyan awaknyan ka jeuet lagee ruti nyang masak siblaih. awaknyan hana sadar bahwa deungon meusikutu deungon bansa-bansa nyan kheueh, jiteuka gadoh teunaga awaknyan. akhe jih riwayat awaknyan ka rab that, teuma awaknyan teutab hana jiteupeue. keuangkohan ureueng israel leumah deungon nyata dan jeuet keubukeuti keusalahan bahwa awaknyan meusalah. bahpi bandum nyan ka teujadi, awaknyan hana cit jimita ulon atawa jiwoe ubak lon, tuhan allah awaknyan. israel keudeh keunoe lagee citem mirah pati nyang banggai. phon-phon ureueng-ureueng jih jilakee tulong ubak meuse, oh lheureh nyan awaknyan jiplueng ubak asyur! teuma tiebtieb watee awaknyan jijak, ulon kuteun jareng dan lon drob awaknyan lagee sidroe ureueng jidrob citem. ulon lon hukom awaknyan sabab buet-buet nyang jeuhet nyang awaknyan peubuet ka lon teupeue. cilaka awaknyan, sabab awaknyan ka jitinggai ulon. awaknyan hanco sabab ka jilawan ulon. ulon na niet keuneuk peuseulamat awaknyan, teuma iebadat awaknyan ubak ulon pura-pura nyang hana meuguna. awaknyan hana bit-bit meudoa ubak ulon. meunyeo awaknyan meudoa, awaknyan jiseumpom droe atueh teumpat eh, dan geumeuba-e lagee nyang jipeubuet le ureueng-ureueng nyang hana peucaya ubak ulon. meunyeo awaknyan jimeudoa keu jilakee gandom dan anggo, awaknyan jipeuluka droe lagee nyang jipeubuet le ureueng-ureueng nyang semah dewa. awaknyan bit-bit that jilawan ulon! bahpi ulon nyang peurayeuk dan nyang peuteuga awaknyan, teuma awaknyan meukomplot jilawan ulon. awaknyan teutab hana jipioh jiseutot dewa-dewa nyang meubacutpi hana meukuasa. awaknyan hana hase teundal lagee aneuek panah nyang kendur. peumimpin-peumimpin awaknyan jipeu-

gah haba deungon sombong, sabab nyan awaknyan mate diujong peudeueng, dan jipeukem le ureueng-ureueng meuse." tuhan meufeureuman, "peumeusu laju tanda bahaya! musoh jijak prang nanggroe ulon lagee kleueng jiseumama! umat ulon ka iengkeue peujanjian lon deungon awaknyan, dan jilawan ajaran-ajaran nyang lon peurunoe. bahpi awaknyan jipeugah ulon nyoe allah awaknyan, dan jipeugah bahwa awaknyan na kheueh umat lon nyang jituri keu ulon, teuma awaknyan hana jitem teurimong peue nyang get. le sabab nyan awaknyan jipeucrok le musoh-musoh jih keudroe. umat ulon jipileh raja hana jityangon ubak ulon leubeh dilee. awaknyan jibaiat peumimpin hana jilakee situju ulon leubeh dilee. awaknyan jicok meuh dan pirak atra jih keudroe laju jipeuget patong beurala nyang meuakibat jih keuhancoran nibak awaknyan keudroe. ulon banci keu leumo meuh nyang jiseumah le peunduedeuk samaria. ulon beungeh lumpah na keu awaknyan. sampoe anpajan awaknyan jipeukutoe droe keudroe deungon jiseumah beurala? leumo meuh nyang jiseumah di samaria nyan na kheueh peuneuget pande-pande meuh israel! nyan bukan allah, dan haroh teupeuhanco! umat ulon jitabu angen teuma jihnyan haroh jipot badee! ladang gandom awaknyan han jitem kuneng, teuma hana teupeuhase teupong keu peunajoh. teuma meunyeo ladang nyan jitem cit kuneng, teuma gandom jihnyan jipeuhabeh le bansa-bansa laen. lagee beulangong nyang beukah, meunan kheueh israel hana le meuguna, dan ka jeuet keu bansa nyang biasa lagee bansa-bansa laen. lagee keuleudee kleuet nyang meulawan, meunan kheueh ureueng-ureueng israel jiseut-kheun ate jih keudroe. awaknyan jilakee bantu ubak asyur, dan jibloe syedara ubak bansa-bansa laen. teuma lagee nyan ulon lon peusapat dan lon hukom awaknyan. hana treb le awaknyan apoh apah sabab saket hanapat peugah, meunyeo awaknyan jitindeeh le raja asyur. maken jai miseubah nyang jipeudong le ureueng israel keu teusampoh desya, maken le teuma teupat keu jipeubuet desya. ulon teumuleh peulajaran lumpah le keu awaknyan, teuma bandum nyan awaknyan tulak sabab jianggab hana sangkot paot deungon awaknyan. awaknyan galak jipeuseumah keureubeuen keu ulon, dan jipajoh sie keureubeuen nyan, teuma di ulon, tuhan, hana galak deungon keureubeuen-keureubeuen nyan. saat-nyoe lon peuingat desya awaknyan dan lon hukom awaknyan ngon sabab desya-desya nyan; ulon lon kirem lom awaknyan u nanggroe meuse! ureueng israel jipeudong meuligoe-meuligoe, teuma awaknyan tuwoe ubak peuncetba jih keudroe. ureueng yehuda jipeule banda-banda meukuta, teuma ulon lon peutron apui mangat teutot habeh bubena meuligoe dan banda-banda awaknyan." he bansa israel, bek kheueh tapeuraya le uroe-uroe raya gata lagee bansa-bansa laen. gata ka tatinggai allah gata dan hana seutia ubak gobnyan. di tieb-tieb teupat ceumeuloe aneuk gandom, gata tapeubloe droe sibagoe inong lunte ubak dewa baal, dan galak tateurimong gandom nyang gata anggab sibagoe upah dewa nyan keu gata! teuma hana treb le gata kureueng gandom dan minyeuk zaiton, dan anggo pi teuma habeh. gata,

he bansa israel, hana teutab tinggai bak tanoh nyang geubri le tuhan keu gata. gata haroh tagisa u nanggroe meuse, dan haroh tapajoh peunajoh hareuem di asyur. di nanggroe-nanggroe nyan gata hana meuteume tapeuseumah anggo dan keureubeuen beulatang keuteupeu galak ate tuhan. tieb-tieb ureueng nyang pajoh peunajoh gata jeuet keukutoe, lagee peunajoh nyang teupajoh watee upacara teupeutron bak jrat ureueng mate. peunajoh nyan meuguna keu teupeutroe pruet gata; meubacutpi hana nyang teuba u baet tuhan keu teupeuseumah disinan. bak uroe-uroe raya agama keu teuhoreumat tuhan, gata hana hase tapeubuet sapueu keu teupeuraya uroe nyan. meunyeo bala ka teuka, dan gata teuba u nanggroe laen, teuma nyang na tinggai di teungoh gata jigumpoi le ureueng-ureueng meuse keu jipoh mate dan jikubu di memfis! naleueng dan duroe jitimoh mangat jeuet teutob teupat-teupat eunciek rumah gata dan barang-barang pirak gata nyang meuhareuga. ka trok watee jih keu teuhukom, watee keu jiteurimong balasan ateuuh bandum nyang ka jipeubuet. israel teuma jirasa hai nyan! gata tapeugah, "nabi nyang jikuasa le roh nyoe na kheueh nabi bangai! pungoe gobnyan!" gata tapeugah lagee nyan sabab gata banci lumpah na ubak ulon dan desya gata lumpah raya. po teu allah geukirem ulon sibagoe nabi keu teupeungat gata umat gobnyan, teuma ho-ho nyang ulon jak, gata tauseuha keuneuk carueh ulon lagee cicem. bak nanggroe atra po teu allah keudroe, kamoe bubena nabi jicok keumusoh le rakyat ba. lumpah that jeuhet meuneubuet gata lagee nyang ka lueh jipeubuet le gob di gibe. po teu allah geupeuingat keusalahan gata, dan geuhukom gata sabab desya gata. tuhan meufeureuman, "watee ulon phon-phon that meurumpok ngon israel, ate ulon lumpah harok lagee ureueng meuteume boh anggo dipadang pasi. watee ulon phon-phon ulon ngieng indatu gata, ulon galak lagee ureueng meuteume hase phon that nibak boh ara. teuma, watee awaknyan jijak ubak gunong peor, awaknyan jipeuphon seumah baal, sampoe awaknyan ka jeuet keukutoe lagee dewa nyang awaknyan cinta nyan. keumeugahan israel jipupo gadoh lagee cicem; hana nyang raya pruet, dan hana aneuek-aneuek manyak nyang jipeulahe. teuma bahpi na aneuek-aneuek manyak nyang jipeulahe dan jipeurayek, awaknyan ulon cok; hana meusidroepi nyang lon peubiyau udeb. cilaka kheueh gata, he bansa israel, meunyeo ulon ka lon tinggai gata! tuhan, deuh ulon ngieng aneuek-aneuek manyak awaknyan jitiyeub-tiyeub dan jipoh mate. peu kheueh nyang haroh ulon lakee ubak gata keu ureueng-ureueng nyan? tapeujeuet kheueh ureueng-ureueng inong awaknyan keu inong balui! tapeujeuet kheueh awaknyan bubek jeuet jipeumom aneuek manyak jih keudroe! tuhan meufeureuman, "bandum keujeuhetan awaknyan phon di gilgal. disinan kheueh phon that ulon banci keu awaknyan. sabab buet awaknyan nyang jeuhet, ulon lon use awaknyan nibak nanggroe lon nyoe. ulon hana lon gaseh le keu awaknyan; bandum peumimpin awaknyan ka jilawan ulon. ureueng israel lon hukom. awaknyan jeuet lagee seunaman nyang hana muboh, dan nyang ukeue-ukeue jih ka habeh tho. awaknyan

hana meu aneuek; teuma bahpi awaknyan na aneuek, ulon poh mate aneuek-aneuek nyang jipeulahe le awaknyan." po teu allah nyang lon peutimang nyan teuma geutulak umat gobnyan, sabab awaknyan hana jitem deungoe gobnyan. awaknyan jijk meurawoh lamkawan bansa-bansa. israel lagee bak anggo nyang jimuboh le. seumaken meutamah keukayaan jih, seumaken le teuma miseubah nyang jipeudong. seumaken makmu, seumaken get teuma jipeugot tugu-tugu beurala nyang jiseumah. ureueng-ureueng nyang ate jih brok, bak saatnyoe haroh jitunggong akibat desya nyang ka jipeuna. po teu allah geupeuhanco miseubah awaknyan, dan geureuloh bandum tugu-tugu beurala awaknyan. hana treb le awaknyan jipeugah, "geutanyoe hana raja sabab geutanyoe hana tatakot ubak tuhan. keupeue guna jih sidroe raja keu geutanyoe?" awaknyan raya haba dan jipeugot janji peuleusu lom ji-ikat janji nyang hana meuguna. hukom jiputa balek deungan nyan keuhana adelan meuraja lela lagee jitimoh seunaman meuraco bak ladang nyang na teucatok. peundudek banda samaria teumakot; awaknyan dan teungku-teungku imeum nyang jilayan leumo meuh di betel nyan seudeh dan jimo ba-e sabab banmandum keumeguhan beurala awaknyan ka habeh hanco. beurala nyan teuangkot u asyur sibagoe hadiah ubak raja agong. israel jiseutot reencana nyang teupeujeuet awaknyan meuteume malee dan teuhina. samaria hanco dan raja jih jiba lagee sikrak kayee nyang jipeuhanyot le ie. kuil-kuil dibuket betel tempat ureueng israel jiseumah beurala, geupeuhanco. duro dan naleueng timoh bak miseubah awaknyan. laju awaknyan jidumpek ubak gunung-gunong, "tatob kheueh kamoel" dan ubak buket-buket, "timpok kheueh ateueh kamoel!" tuhan meufeureuman, "seumeunjak keujadian di gibea, ureueng israel gohlo cit jipioh jipeubuet desya jilawan ulon. sabab nyan di gibea awaknyan lon peurhot cit deungan prang. ulon lon prang ureueng-ureueng nyang meudesya nyan, dan lon hukom awaknyan. bansa-bansa laen meusikutu jilawan awaknyan, dan awaknyan geuhukom sabab desya awaknyan nyang le nyan. yoh masa ilee israel lagee leumo muda nyang teulatih deungan get, dan nyang galak jiloe boh gandom. ulon hana peureulee lon pasang gandar nibak bahoe jih nyang gagah nyan. teuma bak saat nyoe ulon ka lon peuputoh keu lon paksa awaknyan jikeureuja brat. yehuda ulon yue meu ue, dan israel ulon yue meugaree. ulon peugah, 'he israel! jak puga kheueh ladang baro keu droe gata, tabu kheueh bijeh keuadelan, dan tapot kheueh beureukat nyang jipeuhase le keusunggohan cinta gata ubak ulon. sabab, ka watee jih gata mita ulon, tuhan gata. ulon teuka dan lon peutron beureukat ubak gata lagee ie ujeuen.' teuma di gata tapeubuet nyang seubalek jih; nyang gata useuha na kheueh keujeuhetan, dan tapot nyang hana ade. gata ka tapajoh boh-boh nyang jipeuhase le sulet gata." tuhan meufeureuman lom, "he bansa israel, sabab gata tapeubangga ubak geuritan-geuritan prang nyang na nibak gata dan sidadusidadu gata nyang le, dan rakyat gata rhot le muprang, dan bandum kuta gata geupeuhanco. keuadana jih teujadi lagee bak uroe raja salman geupeubinasa

banda bet-arbel dimideuen prang, dan geugileng bubena ma dan aneuek-aneuek jihnyan. nyan kheueh nyang teujadi nibak gata, he peundudek betel, sabab gata ka tapeubuet keujeuhetan nyang raya. bak watee mata uroe beungoh teungoh jiteubiet, watee nyan cit oh muprang ka teupeuphon, raja gata mate." tuhan meufeureuman, "ulon kusayang israel yoh jih mantong ubit, lon tawok aneuek ulon nyan jeut jiteubiet lam nanggroe meuse. teuma seumaken lon hoi aneuek ulon nyan seumaken jipeujioh lon. jihnyan jiba keureubeuen dan jitot keumeunyan keu baal dan dewa-dewa nyang laen. padahai ulon kheueh nyang peurunoe israel beujeuet jijk, dan nyang wa jihnyan deungan gaseh sayang. ulon kheueh nyang rawat jihnyan teuma jihnyan hana jitem aku. deungan sigala gaseh sayang lon, ulon peurab jihnyan ubak ulon. banmandum peundeuritan jihnyan ulon peuphui, dan deungan murah ate ulon bri makheun. ureueng-ureueng israel nyan hana jitem woe ubak ulon, sabab nyan awaknyan haroh jigisa u nanggroe meuse, dan bansa asyur nyang peurintah ateueh jihnyan. muprang nyang gunjak teuka sampoe u dalam banda-banda awaknyan, babah-babah pintoe geureubang jipeurusak, dan umat ulon jipeubinasa. hai nyan teujadi sabab awaknyan ka jiseutot kheun ate jih keudroe, dan jimeukreueh jikeuneuk tinggai ulon. teuma awaknyan keunong teugom, teuma hana nyang peubeubaih awaknyan bahpi awaknyan jikliek jilakee tulong." tuhan meufeureuman, "he israel, hana mungkin gata lon peubiyeu atawa ulon tinggai. peu kheueh mungkin gata ulon peuhabeh lagee adma? atawa ulon peusaneut lagee zeboim? hana trok ate lon peubuet nyang lagee nyan, sabab cinta ulon lumpah tak raya keu gata! gata hana lon hukom watee ulon teungoh beungeh; gata hana lon peuhanco le. sabab ulon allah, kon manusia. ulon, nyang kudus, na meusajan gata, dan hana ulon beungeh le keu gata." tuhan meufeureuman, "umat ulon jiseutot ulon meunyoe ulon teumauem lagee su singa sampoe habeh yo musoh awaknyan. umat ulon bagaih-bagaih teuka nibak siblahi ubarat keu jiseumah ulon. nibak nanggroe meuse awaknyan bagaih tak teuka lagee cicep po, dan di asyur lagee kawan mirah pati. laju awaknyan ulon ba lom u rumoh jih keudroe. ulon, tuhan, nyang peugah haba." tuhan meufeureuman, "bansa israel jikeulileung ulon deungan meusulet dan tipee daya; bansa yehuda teutab jilawan ulon, allah nyang kudus dan seutia. peue mantong nyang jipeubuet le ureueng israel phon beungoh trok an malam hana meuguna dan sifeuet jih jipeuhanco lagee angen timu. keucurangan dan keukeujaman meutamah-tamah lamkawan awaknyan. awaknyan jipeugot janji deungan asyur dan jiba minyeuk u nanggroe meuse sibagoe tanda meusahabat." tuhan na peukara ngon bansa yehuda; gobnyan cit nyang hukom israel sabab peurangoe awaknyan keudroe. gobnyan geubalahi buet awaknyan. phon mantong lam pruet ma, nabi yakub indatu awaknyan ka jiseurobot esau syedara jih nyang meukeumbeue; dan oh ka rayeuk, nabi yakub meukulo-kulo ngon po teu allah. gobnyan meukulo meugasui deungan sidroe malaikat, dan gobnyan meunang. laju gobnyan geumo dan geulakee beureukat. oh lheurehnyan di be-

tel, po teu allah geujak ubak nabi yakub indatu geutanyoe nyan, dan geumariet deungon gobnyan. po teu allah nyan na kheueh tuhan nyang mahakuasa. nan gobnyan na kheueh tuhan. deungon nan nyan kheueh gobnyan lakee ureueng iebadat ubak gobnyan. sabab nyan, he gata keuturonan nabi yakub, peucaya kheueh ubak allah gata dan tawoe kheueh ubak gobnyan. udeb kheueh deungon peunoh gaseh dan keujujoran, dan tapreh kheueh deungon saba sampoe allah gata meutindak. tuhan meufeureuman ubak bansa israel, "gata ilat lagee ureueng kanaan; ureueng-ureueng meukat dan gata galak tapeunget langganan teuh keudroe deungon timbangan nyang hana beuna. 'geutanyoe bak saatnyoe ka kaya,' kheun awaknyan. 'geutanyoe meulaba! hana meusidroe pih jeuet jitudoh bahwa keukayaan nyang ta gumpoi nyoe seucara hana juJoe.' teuma ulon, tuhan allah gata, nyang ba gata teupeuteubiet lam nanggroe meuse, lon peujeuet gata tinggai lom bak khimah-khimah lagee yoh masa ilee watee ulon jak meurumpok deungon gata di padang-padang pasi. ulon ka lon peugah haba ubak nabi-nabi, dan ulon bri keumalon nyang le keu awaknyan. meulaul awaknyan ka ulon bri reuncana-reuncana ulon keu gata, umat ulon, bahpi lagee nyan mantong na cit nyang seumah beurala di gilead, dan jipeuseumah leumo ateuhe miseubah di gilgal. teuma awaknyan nyang seumah beurala nyan mate, dan miseubah-miseubah di gilgal nyan jeuet keuseunamon batee di ladang-ladang." nabi yakub indatu geutanyoe geuplueng u mesopotamia, dan jeuet meuteume geumeukawen disinan, laju gobnyan geupeuhamba droe ubak ureueng di nanggroe nyan dan sira geurabe bubiri-bubiri awaknyan. laju tuhan geukirem sidroe nabi mangat jiba ureueng israel jeuet jiteubiet nibak jiboh keunamiet di nanggroe meuse, dan geukawai awaknyan. ureueng nyan ka jipeujeuet tuhan beungeh raya; awaknyan patot teuhukom sabab buet awaknyan nyang jeuhet nyan. tuhan teuma geuhukom awaknyan le sabab awaknyan ureueng laen pih ka jihina gobnyan. yoh masa ilee sukee efraim teuhoreumat sampoe meunyoie na peurintah nibak sukee nyan, sukee-sukee laen nyang na di israel teumakot that. teuma sukee efraim raya that desya le sabab jiseumah dewa baal, sabab nyan awaknyan teuma teusampoh. sampoe an saatnyoe ureueng-ureueng nyan na di efraim nyan hana putoh jipeubuet desya; awaknyan jipeuget patong-patong pirak keu teuseumah - patong nyang jireuncana le akai manusia dan ji uke le jaroe manusia. awaknyan jipeugah, "peuseumah laju keureubeuen ubak patong-patong nyoe!" bit gura that, manusia jicom patong aneuek leumo! le sabab nyan ureueng-ureueng nyan teusampoh lagee sagob atawa iembon di beungoh uroe. awaknyan lagee abee jumpung nyang jiyueb le angen di teupat teloe aneuek gandom, dan lagee asab nyang teubiet nibak sulie. tuhan meufeureuman, "ulon kheueh tuhan allah gata, nyang ba gata peuteubiet nibak nanggroe meuse. gata hana le allah teuh nyang laen seulaen ulon. ulon kheueh sidroe kong nyang hase peuseulamat gata. bak tanoh nyang tho di padang pasi, ulon kheueh nyang jaga gata. teuma oh ka ltheueh gata kana di nanggroe nyang jroh, dan gata troe dan puhih ate, gata ka jeuet keu ureueng angkoh

dan ka tuwoe ubak ulon. le sabab nyan ulon ku rungkom gata lagee singa teumeugom. lagee rimueng tutul ulon kulinteueng gata bak rot ueh raya. ulon lon seurang gata lagee cagee nyang ka gadoh aneuek. ulon lon priek-priek gata. lagee singa ulon lon teugom gata bak teupat gata, dan lagee beulatang kleut ulon lon priek-priek gata. ulon kupeuhanco gata, he bansa israel! dan soe kheueh nyang hase tulong gata? gata talakee raja dan peumimpén, teuma dipat kheueh awaknyan bandum jinoenyo? peu kheueh hase awaknyan jipeuseulamat rakyat gata? deungon beungeh ulon jok raja keu gata, dan deungon geungeuen ulon tarek awaknyan lom teuma." tuhan meufeureuman, "desya dan keusalahan israel ka teucetet, dan catetan nyan ka lon keubah. israel na watee keu udeb, teuma awaknyan bangai lumpah na sampoe hana jicok keuseumpatan nyan. jihnyan lagee aneuek manyak nyang sikeujab teuk lahe teuma hanjitem teubiet lam pluet ma. bansa nyoe hana lon peuseulamat nibak kuasa donya ureueng mate. he mate, sipreuk kheueh laju bala gata! tapeubiet kheueh buet gata nyang hanco dan meubahya nyan! ulon hanale jimat gaseh keu bansa nyoe. bahpi israel makmu lagee naleueng nyang subo, teuma ulon kukirem angen timu nyang seu uem di padang pasi. angen nyan jipeutho bandum mata ie dan mon-mon meumata, sampoe teusampoh kheueh bandum nyang meuhareuga. samaria haroh teuhukom sabab jibeurontak jilawan ulon. rakyat jihnyan mate dimideuen prang; aneuek-aneuek manyak awaknyan teugileng, dan ureueng-ureueng inong nyang mume teuplah pruet jih." tawoe kheueh ubak tuhan allah gata, he bansa israel! le sabab desya gata ka meusabab gata meugantoh dan reubah. tawoe kheueh ubak tuhan dan teupesampoe kheueh doa nyoe sibagoe peuseumahan gata keu gobnyan, "tuhan, peumaphon bubena desya kamoe, dan teurimong kheueh doa kamoe nyoe, dan kamoe teuma kamoe pujoe droeneueh lagee nyang ka kamoe meujanji. asyur hana hase jipeuseulamat kamoe, dan guda prang hana sanggob jitulong kamoe. kamoe hana kamoe peugah le ubak patong-patong nyang kamoe peugot keudroe bahwa patong nyan allah kamoe. ya tuhan, droeneueh neugaseh ubak ureueng-ureueng nyang hana ubak soe nyang jeuet awaknyan meubangga." tuhan meufeureuman, "umat ulon nyang meunyeuleweng, ulon cok lom dan ulon gaseh sipeunoh ate; awaknyan hana ulon beungeh le. ubak ureueng israel ulon lagee ujeuen nyang peubasah tanoh nyang ka tho kreng. awaknyan teuma meukeumang lagee bungong keupula dan lagee bak ceumara nyang lhok ukeue. awaknyan udeb dan meutamah lagee seunaman nyang meutarok dumpat nyang na, lagee bak zaiton nyang ceudah rupa mangat bee lagee bak ceumara! awaknyan jiwoe ubak ulon dan tinggai lam lindongan lon. deungon bagaih awaknyan meutamah makmu, lagee gandom nyang timoh bak ladang nyang subo dan lagee bak anggo. lagee le anggo libanon nan awaknyan meutamah meusyuehu. ureueng israel geuboih bubena patong beurala jih keudroe; awaknyan ulon peulara dan ulon kabui banmandum doa. lagee bak kayee nyang sabab jimeuon rampak, ulon lon peupayong awaknyan. ulon kheueh

punca banmandum beureukat awaknyan. ulon, tuhan, ka lon peugah haba." seumoga bandum ureueng nyang bijaksana jipeuphom peue-peue mantong nyang teutuleh lam nyoe, dan jisimak beujroh-jroh. peutunyok-peutunyok nibak tuhan na kheueh beuna, dan ureueng nyang saleh udeb meunurot peutunyok nyan. teuma ureueng meudesya jipeujayah mantong peue-peue nyang na teutuleh nyan sampoe awaknyan meugantoh dan reubah.

nyoe kheueh peurintah tuhan ubak yoel, bin petuel. deungoe kheueh, he dumna tuha-tuha; simak kheueh, bandum ureueng di yehuda. peu kheueh ka lheueh hainyoe teujadi bak jamen gata, atawa bak jamen indatu gata? calitra kheueh hainyan ubak aneuek-aneuek gata; mangat awaknyan jipeusampoe ubak aneuek-aneuek jihnyan calitra nyan. keuturonan oh lheueh nyan haroh jideungoe teuma, dan jipeutrok ubak keuturonan seulanjir jih teuma. kawan daruet nyang hana teukira jeumeulah jih, jidong bak bubena ladang dan laju jipajoh bubena asoe ladang nyan. peue nyang na jitinggai le kawan daruet nyoe, laju jipeuhabeh le kawan daruet nyang laen. he bubena ureueng mabok, beudoh kheueh! he bubena tukang jieb ie kreueh, tamo kheueh! sabab anggo nyang baro ka geureupah lam babah gata. pasokan daruet jijak seurang nanggroge geutanyoe; awaknyan teuga dan hana teukira jai jih, gigoe jih tajam lagee tarieng singa inong. habeh jiheuntam bubena bak anggo geutanyoe, dan bak ara geutanyoe, nyang na tinggai cit ubo mantong. bak-bak kayee nyan habeh jipuliek kulet le kawan daruet nyan, sampoe deuden-deun jih ka habeh puteh. mo ba-e kheueh, he umat, lagee aneuek dara nyang seudeh nyang jipeuba-e tunungan geunaseh ate teucinta. gandom dan anggo ka habeh gadoh lam baet tuhan. dan meukabong kheueh bubena teungku imeum, nyang seutia geupeutimang tuhan. ladang-ladang ban saat nyoe ka habeh hanco. tanoh meukabong; sabab hanco kheueh bubena gandom, tho kheueh bubena boh anggo, dan habeh kheueh minyeuk zaiton. he peutani, mo ba-e kheueh! he ureueng meubuet bak lampoh anggo, tamo kheueh! sabab gandom, jeulai dan bandum hase panen habeh ranab. bak-bak kayee muboh nyang na di padang ka habeh tho: bak anggo, apel, ara, keuruma dan delima. dan rakyat pih hana le geumbira. he bubena teungku imeum nyang meubuet bak miseubah, tangui kheueh ija krong, dan mo ba-e kheueh. tamong kheueh lam baet tuhan jeuet takliek simalam beungoh, sabab hana keureubeuen anggo dan gandom nibak allah gata. peurintah laju umat gata mangat jipuas, peumaklum laju bahwa na rapat raya! jak undang kheueh bubena peumimpin dan nyang patot-patot dan bandum peunduduek yehuda, mangat jijak u baet allah, keu jijak teumawok jak lakee tulung ubak gobnyan. uroe tuhan ka to that, uroe nyang lumpah teumakot dan gli; saat nyang mahakuasa geupeuteuka keuhancoran. peunajoh ka habeh binasa nyang na dikuwe mata geutanyoe di baet allah geutanyoe ka hanale surak geumbira. bijeh mate bak tanoh nyang tho. hana gandom keu teukeubah, dan bubena gupok ka habeh soh dan habeh reuloh. beulatang peulara ka eh oh dan apoh apah; ka hana le blang naleueng teupat roet uempueun. meunan cit ngon kawan bubiri habeh meurana. ulon lakee tulung ubak droeneueh, ya tuhan sabab bubena blang naleueng ka habeh geursang bubena bak kayee pih ka habeh tho dan mate siulah-ulah ka apui seuba. meunan cit deungon bubena beulatang kleut nyang na uteun jita-wok droeneueh jilakee tulung. awaknyan hana hase jipeupuih rukueng, sabab bubena krung ka habeh tho. yueb kheueh beureuguih, peumusu tanda bahaya

bak buket sion nyang suci, teupat tinggai po teu allah. beu yo kheueh, he peunduduek yehuda! sabab uroe tuhan ka to dan bagaiha teuka. uroe nyan seupot tulo, peunoh ngon sagob nyang suram. sipa-i daruet ka habeh teuka lagee awan nyang meulin-teueng atueh gunung-gunong. hai nyang lagee nyan gohlom na nyang ka-ka, dan hana teu-ulang siumu masa. lagee apui hu meuhueb-hueb habeh tutong peue-peue nyang na awaknyan peuhanco bubena seunaman. sigohlom nyan, nanggroge nyang lagee eden, taman tuhan, oh ka lheuehnyan, lagee padang pasi nyang tho kreng. hana meusapeue pih nyang na tinggai, hana nyang tuwoe nibak jiseurang nyan. rumman awaknyan lagee guda; ah watee jiplueng lagee guda dimideuen prang. awaknyan jiglob-glob bak pucak gunung-gunong, su jih lagee su gram grum geuritan ngaza dan lagee krab krieb apui hu nyang teungoh teutot merang. awaknyan meubareh lagee pasokan peukasa, nyang siab maju u mideuen ngaza. watee awaknyan jiseureubu, bandum ureueng yo meugam-gam, bandum rumman ka jeuet keupucat hana meucahya. lagee pahlawan, awaknyan jiseurang, dan jiek bak beuton lagee peuijuang. awaknyan meubareh lapang trok ukeue, hana jiwet dan ji ubah ulee. awaknyan hana meusak-sak, watee jijak bak rot jih keudroe. meusajan-sajan watee jipeu jo ngon ji-heuntam peutahanan, hana hase baresan awaknyan jipeupioh. awaknyan jiseureubu u dalam banda, dan jiplueng-plueng atueh beuton jih. awaknyan jiek u rumoh-rumoh; lagee ureueng ceumucue, awaknyan tamong rot tingkab. teungoh awaknyan jimaju, bumoe meugeumpa, dan langet pih meugeunta. laju seupot kheueh mata uroe dan buleuen, dan cahya bintang-bintang ka gadoh teuma. su tuhan lagee su geulanteue, geubri aba-aba, ubak angkatan prang gobnyan. padubna rayeuk jeumeulah angkatan prang geuh! padubna teuga tantra nyang peubuet peurintah gobnyan! keubit luwa biasa dan hebat uroe tuhan! hana meusidroepi hase jipeuteuen droe. tuhan meufeureuman, "teuma bak saat nyoe, tawoe kheueh ubak ulon deungon sipeunoh ate, sira puasa, meuratak dan mo ba-e. priek kheueh ate gata dan bek peukayan gata." meupaleng kheueh ubak tuhan po teu allah gata. gobnyan panyang saba dan peunoh gaseh sayang murah ate dan peunoh rasa inseueh. galak geupeu amphon dan hana harok ubak geupeujak hukuman. mungken tuhan allah gata meu ubah pikeran, dan geubri beureukat keu gata deungon peunoh keulimpahan. sampoe gata hase tapeuseumah keureubeuen anggo dan gandom keu tuhan po teu allah gata. tayueb kheueh beureuguih di sion, gunung po teu allah, peumaklum kheueh uroe puasa, tapeuna kheueh rapat raya. tapeusapat kheueh bubena rakyat, takrah kheueh laju bubena umat. tayue kheueh teuka ureueng tuha-tuha, aneuek-aneuek miet meunan cit ngon banyak. dan bahpi linto baro nyang ban meukawan haroh tayue jak ngon dara baro. tayue kheueh bak awaknyan mangat jitinggai kama-kama jihnyan. tayue kheueh ubak teungku-teungku imeum nyang peutimang tuhan, jimo nibak lamkawan miseubah dan seuramo keue, sira jipeugah, "tasayang kheueh keu umat droeneueh, ya tuhan; bek tapeubiyeu atra droeneueh jeuet keucupa," sam-

poe bansa-bansa laen jipansi dan jipeugah, "dipat alah awaknyan?" laju tuhan geukalon tanoh gobnyan, dan geugaseh umat gobnyan. gobnyan geujaweueb awaknyan lagee nyoe, "bak saat nyoe keu gata banmandum ulon bri: gandom, anggo dan minyeuk zaiton keu peunajoh, mangat gata bandum teupeutroe. ulon hana lon peubiyeu gata jihina atawa jipeukem le bansa-bansa. pasokan daruet di utara lon use, ladum lon paroih u padang pasi. u laot mate ulon peusak baresan keue jih, lam laot teungoh lon tulak baresan likot jih. bubena bange awaknyan mubebe khieng. awaknyan lon peubinasa sabab ka jiseksa gata. bek teumakot, he ladang, peugalak kheueh ate gata; ingat hai nyang raya geupeubuet le tuhan keu gata! he bubena beulatan, bek kheueh picék ate. blang-blang naleueng bak saat nyoe ka jitimoh ijo. deungon jai that bak-bak kayee ka jimuboh, boh-boh anggo dan boh ara meuseue ruwah. he rakyat sion, meugeumbira kheueh! meusuka ria dan meusurak kheueh! sabab sigala banmandum nyang get nibak tuhan allah gata. bak musem luroh geubri ujeuen nyang seb keu gata. bak musem leupie ujeuen geupeutron, meunan cit bak musem seumi lagee nyang ka-ka. dan gandom teupasoe lom lam teupat teupeuhui; ie anggo dan minyeuk zaiton meulimpah nibak teupat peuneurah. ulon lon gantoe bandum atra gata nyang rugoe bak thon-thon watee kawan daruet jipajoh hase panen gata. sabab ulon kheueh nyang kirem pasokan daruet nyan keu gata. gata seb peunajoh dan meuras trou. tuhan po teu allah gata tapeumulia, sabab keu gata le geupeubuet keuajeban. umat ulon hana jeuet le keubahan ejekan! dan baro kheueh gata teupeue, israel, bahwa ulon na lamkawan gata, dan bahwa ulon, tuhan, na kheueh allah gata. hana allah nyang laen, seulaen ulon keudroe. umat ulon hana teupeumalee le!" "oh ka ltheueh nyan singoh bandum ureueng lon peulimpah deungon roh ulon. dan aneuek gata bah kheueh nyang agam meunan cit deungon nyang inong jipeusampoe peusan-peusan ulon; ureueng tuha-tuha nyang na lamkawan gata jimeulumpo nyang deuh teukalon teubri keu peumuda dan aneuek dara. bak watee nyan roh ulon lon bri teuma u ateueh peulayan-peulayan bah kheueh nyang agam meunan cit keu nyang inong." dilanget ngon bumoe lon peuna buet ajaeb nyang le. teuma na meutak ngon meucang sampoe darah ro meujeue-jeue hana teukira, apui hu dan asab nyang meukubet-kubok. mata uroe jeuet keuseupot dan buleuen jeuet keumirah lagee darah. bandum nyan teujadi sigohlom uroe tuhan teuka, uroe nyang dahsyat dan lumpah teumakot! teuma barang sigasoe nyang meulakee ubak peutulongan tuhan, ureueng nyan geubri seulamat. tuhan meufeureuman, "di yerasalem ureueng-ureueng nyang ulon pileh seulamat." tuhan meufeureuman, "bak watee nyan yerasalem dan yehuda lon pileh keuhai maknu jih. banmandum bansa lon peusapat dan ulon ba u panton mahkamah. laju ulon peusidang awaknyan disinan ateueh keujeuhetan nyang ka jipeubuet ateueh umat lon sabab awaknyan ka jiwueuk-wueuk tanoh israel dan umat lon awaknyan boih u jeueb-jeueb nangroe. awaknyan jitiek undi mangat jeuet jipeuteutab soe nyang meuteume ureueng nyang teuteuen.

awaknyan jipeubloe aneuek dara dan peumuda keu jipeujeuet keunamiet nyang hana meuguna. dan peng nyan awaknyan peuguna keu inong lunte dan ji-jieb ie anggo. pakriban keuneuk gata peusanaut ateueh ulon nyoe, he tirus, sidon dan bandum wilayah filistin? peu kheueh gata keuneuk balaih dan ateueh ulon? nah, teurimong kheueh balaih ulon nyang teuka lagee kilat. meuh dan pirak ulon ka gata repah, dan hareuta ulon nyang paleng meuyuem ka gata angkat bak kuil gata. peunduduek yehuda dan yerasalem gata ba jioh nibak nangroe jih keudroe; oh ltheuehnyan gata peubloe bak bansa yunani. jinoenye ulon peuteubiet awaknyan nibak teupat-teupat nyang ka gata peubloe, dan ulon lon balaih keujeuhetan gata ateueh awaknyan. aneuek gata nyang agam dan nyang inong lon peubloe ubak peunduduek yehuda, nyang kana jipeubloe lom ubak syeba, nangroe nyang lumpah jioh. ulon, tuhan, ka lon peugah haba. peumaklum kheueh maklumat nyoe ubak bansa-bansa: meusiab kheueh keu teujak murpang dan pupok teunaga! takrah kheueh bubena ahli silek dan pahlawan; peusapat laju bandum tantra, dan maju kheueh! mata langai gata jeuet keu peudeueng, dan sikin gunteng gata jeuet keu alat teumeutob. dan ureueng leumoh haroh jipeugah, 'ulon hase meujuang lagee tantra!' jak, tateuka kheueh deungon bagaihi, he bansa-bansa nibak meubagoe peunjuru! meusapat kheueh di panton nyan." ya, tuhan, neuyee kheueh tantra droeneueh jak seurang awaknyan! tuhan meufeureuman lom, "bubena bansa haroh meusiab-siab dan tajak u panton mahkamah. disinan ulon tuhan lon peusidang bansa-bansa teutangga umat lon. awaknyan jeuet that; tacah kheueh awaknyan lagee gandom masak di blang. gilo-gilo kheueh awaknyan lagee boh anggo lam peuneurah sampoe anggo nyan peunoh meulimpah uluwa. meuribee-ribee droe ureueng di panton mahkamah. sabab disinan uroe tuhan reujang teuka. mata uroe dan buleuen ka jeuet keuseupot, dan bintang-bintang ka hana le cahya." tuhan geuteumauem di sion, gunung gobnyan; nibak yerasalem lagee su geulanteu su gobnyan. langet dan bumoe meuguncang le sabab gobnyan. teuma tuhan teutab geubila dan geulindong israel umat gobnyan. "he israel, jinooe gata tateupeue, bahwa ulon kheueh tuhan allah gata. ulon tinggai di sion, gunung ulon nyang suci. dan yerasalem pih jeuet keu banda ulon nyang suci, ureueng aseng hana jitamong le. bak masanyan gunung-gunung ka peunoh ngon lampoh anggo. beulatang peulara jimeurot naleueng bak buket-buket nyang subo. krueng-krueng nyang na di yehuda hantom habeh ie ji ile. na saboh krueng ji ile rot baet tuhan, dan jipeubasah panton akasia deungon ie nyang nyaman. nangroe meuse jeuet keu guro nyan tho kreng, dan edom jeuet keu padang tandus, nyang hana jiduek le manusia. sabab awaknyan ka jiseurang ureueng yehuda, dan jipoh mate peunduduek nangroe nyang hana meusalah. keu darah awaknyan teuma lon tueng bila, nyang peumate awaknyan mate ulon cang. teuma yehuda dan yerasalem sabe na ureueng duek, dan bak gunung sion teutab ulon duek."

amos na kheueh sidroe ureueng tukang rabe buri asai di banda tekoa. gobnyan jeuet keu nabi watee nanggroe yehuda jipeurintah le raja uzia, dan israhel jipeurintah le raja yerobeam, bin yoahas. dua thon sigohlom teuka geumpa bumoe, po teu allah geupeugah ubak amos hai-hai keu israel. nyoe kheueh nyang meupeugah le amos, "tuhana geuta uem di buket sion, su gobnyan meugeumpa bansaboh yerusalem. blang-blang naleueng ka tho kreng, naleueng nyang na bak gunung karmel ka tho jeuet teucok keusuwa." tuhana meufeureuman, "peunduduek damsyik ka le that goe jipeubuet desya, ngon sababnyan ulon ka pasti lon hukom awaknyan. awaknyan jipeusaneut atueuh ureueng gilead keubit that keujam, sababnyan ulon kirem apui ubak meuligoe raja hazael, dan ulon tot habeh bubena kuta raja benhadad. bube na babah pintoe geureubang damsyik lon peurusak, dan peunduduek panton awen lon sampoh gleh di teupat tinggai awaknyan. peungasa bet-eden lon peutron nibak takhta, dan peunduduek siria teutawan dan teuangkot u nanggroe kir." tuhana meufeureuman, "peunduduek gaza ka meu ulang-ulang jipeubuet desya, sababnyan ulon pasti lon hukom awaknyan. awaknyan ka jirayueng saboh bansa banmandum, dan jipeubloe sibagoe namiet ubak edom. le sababnyan ulon kukirem apui ubak beuton-beuton gaza, dan ulon tot habeh bubena kuta. peunduduek meunan cit deungon peungasa banda asdod dan askelon lon kireuh. banda ekron lon hukom, dan bandum ureueng filistin nyang na tinggai lon peubinasa." tuhana meufeureuman, "peunduduek tirus ka le that goe jipeubuet desya, sabab nyan ulon pasti lon hukom awaknyan. awaknyan ka jiangkot saboh bansa banmandum ubak teupat nyang teuboih, dan jipeujaroe ubak edom; awaknyan ka ji-iengkeue peujanjian meurakan. le sababnyan ulon lon kirem apui ubak beuton-beuton tirus dan ulon tot habeh bandum kuta awaknyan." tuhana meufeureuman, "peunduduek edom ka le that goe geupeubuet desya, le sababnyan ulon pasti lon hukom awaknyan. deungon hana rasa gaseh sayang, awaknyan ka jiprang ureueng israel, syedara-syedara awaknyan. awaknyan laju beungeh, dan teutab jitroh dam. le sababnyan, ulon lon kirem apui u banda teman, dan ulon tot habeh bubena kuta bozra." tuhana meufeureuman, "bansa amon ka le that goe jipeubuet desya, le sababnyan ulon pasti lon hukom awaknyan. watee jimuprang keu jipeuluwah wilayah jih, awaknyan jiprah bubena pruet inong mume di gilead. sabab nyan, ulon lon kirem apui ubak beuton-beuton banda raba, dan ulon tot habeh bubena kuta nyan. bak watee nyan teuma teudeungoe su kiroih ureueng muprang, dan muprang nyan meuhubo lagee su angen badee. raja awaknyan dan peujabat-peujabat peumeurintah awaknyan teuangkot u teupat nyang teuboih. ulon, tuhan, ka lon peugah haba." tuhana meufeureuman, "peunduduek moab ka le that goe jipeubuet desya, sababnyan ulon pasti lon hukom awaknyan. awaknyan jihina raja edom nyang ka mate nyan, deungon jikueh jrat gobnyan dan jicok bubena tuleueng-tuleueng gobnyan laju jitot sampoe jeuet keu abee. sabab nyan, ulon lon kirem apui u nanggroe moab, dan ulon tot sampoe habeh bubena kuta keriot.

ureueng moab mate lamkawan ureueng muprang nyang teungoh meugasui, watee beureuguih teungoh teuyueb, dan dumpek prang teungoh subra. peunguasa moab dan bandum peujabat peumeurintah jihnyan lon poh mate." tuhana meufeureuman, "ureueng yehuda ka le that goe jipeubuet desya, le sabab nyan ulon pasti lon hukom awaknyan. awaknyan ji-iengkeue ubak peue-peue nyang ka lon peurintah dan hana jipakoe peue-peue nyang ka lon peurunoe. awaknyan ka jipeusisat le ilah-ilah nyang laen nyang jiseumah le indatu awaknyan. le sabab nyan, ulon lon kirem apui u yehuda dan ulon tot sampoe habeh bubena kuta di yerusalem." tuhana meufeureuman, "ureueng israel ka le that goe jipeubuet desya, le sabab nyan ulon pasti lon hukom awaknyan. ureueng juoe nyang hana hase jipulang nyang jimeutang bak awaknyan, ka awaknyan peubloe jeuet keu namiet. meunan cit ngon buet awaknyan atueuh ureueng gasien nyang hana hase geubayeue utang jihnyan, bahpi utang jihnyan na bacut sidub yuem sipasang seulob gaki. awaknyan jiteugom ureueng leumoh nyang hana meudaya, dan jikireuh ureueng gasien. ayah dan aneuk jimeumukah ngon inong nyang sa, sampoe ka jipeukuto nan ulon nyang suci. tieb-tieb na teupat lebadat, ureueng-ureueng jie deungon bajee nyang awaknyan cok sibagoe jaminan utang nibak ureueng gasien. di baet allah awaknyan, awaknyan jie ie anggo nyang awaknyan cok nibak ureueng nyang meu-utang bak awaknyan. bahpi lagee nyan, he umat lon, keu gata kheueh ulon peubinas ureueng amori nyang manyang lagee bak aron dan kong lagee bak sala. gata ka ulon peuteubiet lam nanggroe meuse, dan ulon ba sira lon peutateh rot padang pasi peuet ploh thon treb jih. tanoh ureueng amori ka ulon jok keu gata jeuet keu nanggroe gata keudroe. ulon ka lon pileh napadub droe lamkawan aneuk gata mangat jeuet keu nabi, dan napadub droe nibak ureueng muda gata jeuet keu nazir. peu kheueh nyan hana beutoi, he ureueng israel? ulon, tuhan, ka lon peugah haba. teuma gata jok keu ureueng nazir ji-jieb ie anggo, le sababnyan teupeujeut awaknyan ji-iengkeue ubak janji. dan gata tatam bak nabi-nabi tapeusampoe peusan ulon. bak saatnyoe gata ulon teugom trok bak tanoh, sampoe gata meurang-rang lagee geuritan nyang brat ngon aneuk gandom. ureueng nyang teuga plueng pih hana lheueh; ureueng teuga gadoh teunaga jih, dan ureueng peukasa hana hase jipeuseulamat droe jih keudroe. ureueng campen timbak aneuk panah hana meuteun, ureueng bagaih plueng hana hase jipeuplueng droe, dan ureueng pasang guda hana tinggai. nibak uroenyan tantra nyang paleng beuhe pih jittinggai sinjanta jihnyan, laju jiplueng. ulon, tuhan ka lon peugah haba." deungoe kheueh feureuman tuhan nyoe, he bansa israel nyang ka geupeuteubiet di nanggroe meuse le tuhan! tuhana meufeureuman, "nibak banmandum bansa nyang na dalam donya nyoe, bansa gata mantong nyan ulon turi dan ulon peurati. nyang kheueh sabab jih desya gata raya, dan ulon pasti lon hukom gata." peu kheueh mungken dua droe ureueng jikak meusaho hana mupakat leubeh ilee? peu kheueh singa nyang na lam uteuen jiteumauem, meunyo singa nyan gohlohm meuteume

uempueun? peu kheueh aneuek singa jiteumauem meunyoeh jih gohloom jiteume teugom meusapeue pi? peu kheueh cicem jitamong lam cintra, meun-yoe taron hana teuteuen? peu kheueh cintra teu-tob meunyoeh hana nyang teudrob? peu kheueh manusia hana yo meunyoeh jideungoe u beureuguih prang? mungkin kheueh saboh banda keuneung beuncana, meunyoeh tuhan hana geukeuheundak? tuhan nyang mahamanyang hantom na geupeubuet sapeue-peue meunyoeh hana geupeugah reuncana gobnyan ubak bandum nabi, hamba-hamba gobnyan. meunyoeh singa ka jiteumauem, soe kheueh ureueng nyang hana teumakot? meunyoeh tuhan allah ka geupeugah haba, soe kheueh nyang jeuet geuiem droe dan hana jipeumaklum peusan tuhan nyan? peumaklum kheueh nyoe ubak ureueng-ureueng nyang tinggai di meuligoe meuse dan asdod, "meusapat kheueh bak gunung-gunong nyang na bansikeulileng samaria, dan tangiang kheueh harok hara nyang raya dan ureueng paksa gob nyang jipeubuet disanan." tuhan meufeureuman, "ureueng-ureueng nyan jipasoe meuligoe-meuligoe jih nyang jiteume nibak buet paksa dan keukeujaman. lom teuma awaknyan meubacutpi hana jiteupeue jipeubuet jujo. deungon sabab nyan nangroe awaknyan jikeupong le musoh, kuta awaknyan jipeuhanco dan meuligoe-meuligoe awaknyan jireupah. lagee sidroe ureueng meurabe nyang jiteume lom sipasang gaki dan saboh cue on punyueng buburi jih nyan ka jiteugom le singa, meunan cit deungon peunduduek samaria na bacut sagai nyang na tinggai bak saatnyoe mangat geueh-eh ateueh kaso nyang leumiek." tuhan allah nyang mahakuasa dan nyang mahamanyang meufeureuman, "ngiang kheueh jinoo, dan peuingat kheueh ubak keuturonan nabi yakub. bak uroe ulon hukom ureueng israel sabab desya jihnyan, ulon kupeuhanco bubena miseubah-miseubah di betel. tiebtieb miseubah teupeupatah ujung-ujung jih sampoe rhot bak tanoh. rumoh-rumoh keu musem sijuek dan rumoh-rumoh meureuhat watee musem khueng lom peuhanco. rumoh-rumoh nyang teupeungui deungon gadeng reubah; bandum rumoh nyang rayeuk hanco. deungoe kheueh, he inong-inong samaria nyang meutamah teumbon lagee leumo-leumo teumbon di basan! gata tatindeeh ureueng leumoh, gata teugom ureueng gasien, dan tatuntut jeuet lakoe gata sabe jipeuna ie kreueh keu gata! ulon, tuhan nyang mahamanyang na kheueh tuhan nyang suci, dan ulon ka meujanji bahwa singoh teuhila deungon ceunawiet; gata bandum lagee eungkot bak mata kawe. gata teuhila u arah hermon dan teurhom uluwa, maseng-maseng rot lungkiek beuton nyang rab. ulon, tuhan ka lom peugah haba." tuhan nyang mahamanyang meufeureuman, "he umat israel! tajak kheueh laju ubak teupat iebadat di betel, dan tapeubuet kheueh desya di teupat nyan! tajak kheueh u gilgal, dan tapeubuet kheueh desya ban galak ate gata! silakan tapeuseumah keureubeuen tieb-tieb beungoh, dan taba siper siploh nibak mandum hase gata tieb-tieb lhee uroe! jeuet mantong tapeuseumah ruti sibagoe teurimong gaseh gata ubak ulon, dan jeuet mantong ta peugah haba nyang konkon bahwa gata ka taba sinamah peuseumahan! pasti

nyan kheueh nyang galak gata peubuet! ulon kheueh nyang peutron bala musem deuk u ateueh bandum banda gata, teuma gata hana tawoe ubak ulon. ulon kupeuteun bek jitron ujeuen watee seunaman gata lumpah that peureulee keu ie. ulon nyang peutron ujeuen ateueh banda nyang saboh dan hana bak banda nyang laen. blang nyang saboh meuteume ie ujeuen toih, teuma blang nyang laen tho kreng. nibak napadub boh banda, peunduduek disinan nyang ka leumoh sabab grah tho ngon rukueng, jimita ie bak banda nyang laen, teuma ie disinan hana seb. bahpi lagee nyan, gata hana cit tawoe ubak ulon. ulon nyang peutron angen seu uem dan nyang kirem peunyaket nyang peurusak seunaman dan lampoh-lampoh anggo gata. bak-bak ara, dan bak-bak zaiton gata ka habeh jiseuba le daruet. bahpi ka lagee nyan gata hana cit tawoe ubak ulon. ulon kirem bala peunyaket ubak gata lagee nyang ka lon kirem di nangroe meuse. ureueng-ureueng muda gata ulon peumate dimideuen prang, dan guda-guda gata jireupah. ulon nyang pasoe khimah-khimah gata deungon bangke-bangke nyang bee jih khieng lumpah na. bahpi ka lagee nyan, gata teutab hana tatem woe ubak ulon. siteungoh nibak gata ulon peubinasagee nyang ka lon peubinasagee sodom dan gomora. nyang mantong udeb lamkawan gata na kheueh lagee kayee pun-tong nyang teucok dalam apui. bahpi lagee nyan, gata hana cit tawoe ubak ulon. le sabab nyan, he umat israel, ulon lon hukom gata. dan meusiabiab kheueh tahadab hukoman nyang lon peurhot ateueh gata!" gunung dan angen, tuhan kheueh nyang cebta; reuncana gobnyan geupeugah ubak manusia. gobnyan nyang peujeuet uroe ngon malam; di ateueh pucak-pucak gunung bumoe gobnyan geujak. tuhan allah nyang mahakuasa, nyan kheueh nyan gobnyan. deungoe kheueh he umat israel! ulon keuneuk meuca-e keu gata saboh ca-e duka: ka rhot israel nyang mantong peurawan, jihnyan hana geubedoh le! di ateueh tanoh jih keudroe jihnyan teupeubiyeu, hana nyang tulung jihnyan keu jidong lom teuma. tuhan nyang mahamanyang meufeureuman, "na saboh banda di israel laju geukrah siribee droe tantra, teuma nyang na woe lom cit sireutoh droe; banda nyang laen jikrah teuma sireutoh droe, nyang na woe lom cit siploh droe." tuhan meufeureuman ubak umat israel, "tawoe kheueh ubak ulon, teuma gata meuteume udeb. bek tajak u bersyeba dan keu tajak seumayang. bek tamita ulon di betel, sabab betel hanco. meunan cit bek teuma tajak u gilgal, sabab peunduduek banda nyan teuangkot u teupat nyang teuboih." tawoe kheueh ubak tuhan, teuma gata meuteume udeb. meunyoeh gata hana tagisa ubak gobnyan, gobnyan teuka lagee apui jimeueue dan geutot habeh ureueng israel. di betel hana meusidroe pih nyang hase jipeulon apui nyan. meupaloe kheueh gata, gata nyang puta balek keuadelan dan nyang peukosa hak ureueng laen! tuhan nyang peujeuet bintang-bintang di langit - bintang belantik dan bintang kartika. gobnyan nyang ubah seupot jeuet keu peungeuh dan uroe jeuet keu malam; ie lam laot geuro ateueh darat. nyang peubuet bandum nyan nan gobnyan na kheueh tuhan. gobnyan nyang peubinasagee ureueng mat kuasa meusajan ngon peutahanan

awaknyan. gata tabanci keu ureueng nyang ade nyang jilawan keu hana adelan dan keu ureueng nyang peugah haba beuna di kanto mahkamah. gata tatindeeh ureueng gasien dan gandom gobnyan gata repupah. ngon sabab nyan gata hana tinggai didalam rumah-rumah gata nyang meuwah, nyang ka gata peudong nyan. gata hana tajieb ie anggo nibak lampoh anggo nyang gata pula. ulon kuteupeue padub na rayeuk keujeuhetan gata dan padub na le desya gata. gata tatindeeh ureueng nyang jroh; gata teurimong sogok dan tapeubiyeu ureueng gasien dipeusaneut hana ade di kanto peungadelan. le sabab buet gata nyan, teuma ureueng-ureueng nyang bijaksana leubeh get seungab mantong bak masa nyang jeuhet lagee nyan. useuha kheueh tapeubuet nyang jroh dan bek tapeubuet jeuhet, jeuet gata udeb. dan tuhan allah nyang mahakuasa bit-bit tinggai lamkawan gata lagee nyang gata peugah. banci kheueh keu nyang jeuhet, dan cinta kheueh ubak nyang get, dan tapeudong kheueh keuadelan. mungken tuhan geugaseh keu ureueng-ureueng nyang na tinggai nibak bansa israel. tuhan allah nyang mahakuasa meufeureuman, "nibak rot-rot banda, ureueng rame jimo ba-e dan apoh apah sabab seudeh. dan bube na peutani jitawok mangat jimo meusajan ureueng-ureueng nyang jibayewe keu jipeuratok ureueng mate. nibak bansaboh lampoh anggo, ureueng rame meuratok sabab ulon teuka dan lon hukom gata. ulon, tuhan, ka lon peugah haba." ceulaka that gata nyang meuharab uroe tuhan! keupeung guna jih uroe nyan nibak gata? uroe nyan na kheueh uroe nyang seupot, kon uroe nyang peungeuh keu gata. keuadaan jih lagee ureueng nyang peuplung droe nibak babah singa, teuma meurumpok deungon cagee. atawa lagee ureueng nyang woe u rumah dan meutumpang ngon jaroe bak beuton, laju jicatiek le uleue! uroe tuhan keubit geupeuteuka seupot, kon peungeuh – uroe reudok nyang keula-bee. tuhan meufeureuman, "ulon banci dan luwat lon kalon peurayaan-peurayaan agama gata! meunyo gata taba keureubeuen nyang teutot dan keureubeuen gandom, ulon hana lon teurimong. ulon hana lon teurimong beulatang-beulatang gata nyang teumbonteumbon nyan nyang gata peuseumah keu ulon sibago keureubeuen peudame. peupioh laju ca-e-ca-e gata nyang jipeukroe on punyueng nyan; ulon hana lon tem teurimong peumeuneung keucapi gata. leubeh get, meu useuha kheueh mangat keuadelan ji ile lagee ie, dan keujujoran lagee ie krueng nyang hantom tho. he umat israel, watee ulon tuntun gata rot padang pasi peuet ploh thon treb jih, ulon hana lon lakee peuseumahan dan keureubeuen nibak gata. teuma bak saat nyoe gata taseumah sakut nyang gata anggab raja gata nyan, dan kewan, bintang nyang gata peudewa nyan. le sabab nyan arca-arca nyang ka gata peuget nyan haroh gata angkot keudroe. meunyo ulon lon boih gata bak saboh nanggroe nyang leubeh jioh nibak dasyik. ulon, tuhan nyang nan allah nyang mahakuasa ka lon peugah haba." ceulaka kheueh gata nyang udeb meuwah di sion, dan gata nyang meurasas aman di samaria – gata he tokoh-tokoh masyarakat bansa israel nyang istimewa nyang, gata nyang lazem jih jikunjong le rakyat keu jilakee tulong! tajak kalon kheueh di

kalne, dan tajak kheueh laju u banda hamat nyang raya nyan, oh ltheuehnyan u banda gat di filistin. tapike le gata banda-banda nyan leubeh get nibak yehuda dan israel? peu kheueh wilayah awaknyan leubeh raya nibak wilayah gata? gata tameukreueh bahwa uroe kiamat mantong jioh, teuma buet-buet gata teuma tapeubagaih jiteuka uroe nyang lumpah keujam nyan. ceulaka kheueh gata nyang taeh ateueh peuratah nyang meuwah-meuwah dan takhanuri deungon sie leumo dan sie bubiri nyang muda! gata galak tacebta lagu atawa ca-e lagee nyang jipeubuet le nabi daud, dan gata tapeumeuen ca-e-ca-e nyan deungon keucapi. gata tajieb ie anggo lam glah nyang peunoh meuasoe, dan gata tapeuguna minyeuk mangat bee nyang paleng get, teuma gata hana meuseudeh ate ateueh keuhancoran israel. le sabab nyan gata kheueh nyang phon-phon that teuangkot u tempat nyang teuboih. khanuri-khanuri dan khanuri peujame gata teuma meu akhe. deungon teugaih tuhan allah nyang mahakuasa dan mahamanyang ka geupeu ingat lagee nyoe, "ulon banci ubak keu angkoh an umat israel; ulon hana galak deungon meuligoe-meuligoe awaknyan nyang meuwah. ma banda awaknyan meusajan deungon bandum nyang na didalam nyan lon jok keu musoh." meunyo mantong na siploh droe jimusom didalam rumah, awaknyan pih mate. sidroe anggota keuluwarga nyang meutugaih ji uroih jipeutamong lam jrat, teuma teuka dan jiba keuluwa manyet keurabat jihnyan. ureueng nyan jitawok ubak ureueng nyang na di likot rumah nyan, "peu kheueh mantong na nyang udeb seulaen gata?" dan laju teudeungoe jijaweub, "hana!" anggota keuluwarga nyang meutugaih jipeukubu manyet nyan teuma jipeugah, "bek peugah haba le! geutanyoe hana jeuet ta kheun nan tuhan." meunyo tuhan geubri peurintah, rumah-rumah raya dan ubit geupeuhanco. peu kheueh hase guda jiplueng bak buket batee? peu kheueh na ureueng jimeu ue laot deungon leumo? teuma gata ka taputa balek keuadelan jeuet keuracon meubisa, dan nyang beuna ka jeuet keusalah. gata raya haba tapeugah gata ka tapeutaloe lodebar. meunan cit gata peugah, "kamoe seb teuga keu kamoe reubot karnaim." tuhan po teu allah nyang mahamanyang dan mahakuasa keudroe geupeugah, "umat israel, ulon lon kirem tantra nibak saboh bansa aseng keu jijak prang nanggroe gata. awaknyan geuteugom gata rot u hamat di utara sampoe ubak panton araba di seulitan." ulon meuteume saboh keumalon nibak tuhan nyang mahamanyang. ulon kalon gobnyan geucebta saboh kawan daruet nyang lumpah le bak watee ureueng seulesoe jikoh naleueng keu raja, dan naleueng baro ka jitimoh lom. daruet-daruet nyan rab habeh bandum jipajoh bubena seunaman nyang timoh nibak tanoh. laju ulon peugah, "tuhan nyang mahamanyang, neupeu amphon kheueh umat droeneueh! awaknyan lumpah that ubit dan leumoh, pakriban mungken awaknyan jimeuteun?" tuhan laju geu ubah reun-cana gobnyan dan geupeugah, "nyang gata kalon nyan hana teuma teujadi." ulon meuteume lom saboh keumalon nibak tuhan nyang mahamanyang. deuh ulon kalon gobnyan ka geumeusiab-siab keu geuhukom umat gobnyan deungon apui. apui nyan habeh

jilieh laot raya dimiyueb bumoe dan ka jipeuphon peuhangoh ladang. laju ulon peugah, "ya tuhan po teu allah, neupeupioh kheueh kira jih apui hu nyan! umat droeneueh lumpah ubit dan leumoh, pakriban mungkin awaknyan jimeuteun?" laju tuhan geu ubah reuncana gobnyan lom dan geupeugah, "nyang nyoe pih hana teujadi." ulon meuteume lom saboh keumalon laen nibak tuhan. ulon ngieng gobnyan geudong bak bineh beuton nyang teupeudong deungon teupeuguna talo sineupat teudong cot. bak jaroe gobnyan geumat talo sineupat nyan keu geukalon peu kheueh beuton nyang teudong cot atawa hana. gobnyan geutanyong ubak ulon, "peue nyang na gata kalon, amos?" laju lon jaweueb, "talo sineupat teudong cot, ya tuhan." laju tuhan meufeureuman, "ulon peuguna talo sineupat nyoe na kheueh keu lon tunyok bahwa umat ulon lagee beuton nyang hana sulu. ulon hana lon ubah reuncana ulon, ulon pasti lon hukum awaknyan. teumpat-teumpat nyang teupeuguna le keuturonan nabi ishaq keu meueibat teupeuhanco. teumpat-teumpat suci ureueng israel teureuloh. ulon lon peuranab bubena keuturonan raja yerebeam." amazia, teungku imeum di betel, geukirem laporan nyang lagee nyoe ubak yerebeam raja israel, "amos teungoh meugumpoi ngon rakyat geulawan teungku amphon. tutoe hana gobnyan nyang geupeusuna rakyat jeuet keusabab nanggroe nyoe hanco. gobnyan geupeugah bahwa teungku amphon mate di mideuen prang, dan ureueng israel pasti teuangkot u teumpat nyang teuboih, jioh nibak nanggroe jih keudroe." dan amazia laju geupeugah ubak amos, "he nabi, neuwoe kheueh u yehuda! meukeutubah kheueh disideh. bah kheueh awaknyan nyang jok nafeukah keu droeneueh! bek le neukeutubah di betel. banda nyoe khusus keu raja, dan teumpat iebadat nasional." geujaweueb le amos, "ulon kon nabi sabab jabatan. nyang sibeuna jih ulon ureueng peulara beulatang dan tukang pot boh ara. teuma tuhan geucok ulon bak teumpat lon keureuja, dan geuyue bak ulon jak peusampoe peusan gobnyan ubak ureueng israel. teuma le sabab nyan deungoe kheueh peue nyang geupeugah le tuhan ubak gata. sabab gata tatam ulon meukeutubah lon keuhai bansa israel. tuhan meufeureuman bahwa peurumoh gata jeuet keu inong lunte bak rot-rot ueh raya di dalam banda, dan aneuek-aneuek gata geupoh mate di mideuen prang. tanoh gata teuweuek-weuek keu ureueng laen, dan gata keudroe mate bak nanggroe gob nyang hana jituri tuhan. peunduduek israel pasti teuangkot u teumpat nyang teuboih, jioh nibak nanggroe jih keudroe." ulon meuteume lom saboh keumalon nibak tuhan nyang mahamanyang. leumah ulon ngieng sabab raga nyang meuasoe meubagoe boh kayee nyang ka masak. tuhan geutanyong, "peue nyang gata kalon, amos?" ulon jaweueb, "saboh raga nyang meuasoe meubagoe rupa boh kayee nyang ka masak." geujaweueb le tuhan, "watee jih ka masak keu umat israel. ulon hana teuma lon ubah le reuncana ulon dan pasti ulon hukum awaknyan. bak uroenyan ca-e ngon nyanyi di meuligoe jeuet keu mo ba-e. jeueb-jeueb sagoe ka teugeugueg manyet-manyet nyang ka teuboih deungon seungab-seungab." deungoe kheueh, he gata nyang teugon ureueng gasien

di nanggroe nyoe sampoe awaknyan binasa! gata tamariet deungon droe keudroe gata, "ah, treb that mantong uroe-uroe peurayaan nyang teungoh na nyoe. geutanyoe ka meuhet that keuneuk tapeubloe lom gandom-gandom nyang na nibak geutanyoe, teuma peurayaan nyan hana pajan seulesoe. pajan kheueh uroe sabat habeh, mangat geutanyoe jeuet tapeuphon meukat lom? geutanyoe ka meuhet that keuneuk ceumatut, teumipee deungon sinukat, dan tapeubuet ilat ngon ceng timbangan. gandom nyang rusak hase tapeubloe ngon yuem nyang meuhai. geutanyoe tamita ureueng gasien nyang hana hase jibayeue utang keu geutanyoe, bahpi utang jihnyan cit dubyuem sipasang seulob, dan tanyoe bloe ureueng gasien nyang jeuet keu namiet geutanyoe." tuhan, allah bansa israel, ka geumeusumpah, "ulon meubacutpi hana lon tuwoe nibak buet awaknyan nyang jeuhet nyan. bumoe meugeunta, dan bandum ureueng susah ate. bansaboh nanggroe meuguncang dan meuhayak keudeh keunoe lagee krueng nil. teuma teuka watee jih ulon peujeuet mata uroe jilob teungoh cot uroe dan bumoe jeuet keuseupot bak watee uroe. ulon, tuhan nyang mahamanyang, ka lon peugah haba. peurayaan-peurayaan gata lon peujeuet keu uroe meukabong, dan ca-e ngon nyanyi gata jeuet keu mo ba-e. ulon lon peujeuet gata tacukoe ok gata dan tangui ija krong tanda meuduka cita. gata jeuet lagee ayah ngon ma nyang jipeumo ba-e sabab ka mate aneuek jih nyang tunggai. uroenyan keuneulheuh deungon seudeh nyang hana teukira." tuhan nyang mahamanyang meufeureuman, "teuma teuka watee jih ulon peutron bala musem deuk di nanggroe nyoe. manusia deuk, teuma kon deuk sabab peunajoh. manusia grah, teuma kon grah le sabab ie. awaknyan deuk ngon grah le peusan lon. manusia meurawoh di utara trok u seulan dan di timu u barat mangat jiteume peusan ulon, teuma awaknyan hana meurupok. bak uroenyan bahpi aneuek-aneuek muda nyang seuhateuh pih pansan sabab grah. ureueng-ureueng nyang meusumpah deumi beurala samaria deungon jipeugah, 'deumi dewa bansa dan', atawa 'deumi dewa bersyeba' – teuma reubah dan hana jibeudoh-beudoh le." deuh ulon ngieng tuhan geudong bak bineh miseubah. le gobnyan geubri peurintah lagee nyoe, "taseukoh kheueh beu haher teunaga ulee-ulee tameh di baet ulon mangat bansaboh seuramoe meuguncang. peureubah laju tameh-tameh nyan ateuh ulee manusia. awaknyan nyang hana mate lon poh di mideuen prang. hana meusidroe pi nyang hase jipeuplueng droe, hana meusidroe pi nyang na tinggai. bahpi awaknyan jisom droe bak donya ureueng mate, ulon nyang hila awaknyan. bahpi awaknyan jirak u langet, ulon peutron awaknyan di langet nyan. meunyo awaknyan jimusom bak puncak gunung karmel, ulon nyang mita dan nyang drob awaknyan. meunyo awaknyan jimusom lam twuie ie laot, ulon nyang peurintah bak naga laot mangat jipale awaknyan. meunyo awaknyan jidrob le musoh, ulon nyang peurintah mangat awaknyan jipoh mate. ulon meuteukat keu lon peubinasna awaknyan, dan hana lon tulong awaknyan." bumoe meuhayak dan peunduduek meuduka, sabab geucuk le tuhan

nyang mahamanyang dan mahakuasa. lagee kru-
eng nil paseueng ek dan paseueng tron meunan
kheueh awaknyan ji-ek dan laju rhot. tuhan geu-
peudong baet gobnyan jioh di angkasa, di ateueh bu-
moe geupasang langet sibagoe kubah, dan ie lam laot
laju geu ruwah ateueh darat, nyang peubuet ban-
dum nyan nan gobnyan na kheueh tuhan! tuhan
meufeureuman, "he umat israel, ulon kalon ureueng
sudan saban lagee ulon ngieng gata. ulon ka lon
ba ureueng filistin nibak kreta dan ureueng siria ni-
bak kir saban lagee ulon ba gata nibak meuse. ulon,
tuhan nyang mahamanyang, teungoh lon ngieng-
ngieng keurajeuen israel nyang meudesya nyoe, dan
lon sampoh ateueh muka bumoe. teuma keuturo-
nan nabi yakub hana bandum ulon peubinasa. ulon,
tuhan ka lon peugah haba. ulon bri peurintah dan
lon tampo bansa israel lagee ureueng tampo gandom
dalam jiee. keu teukireueh bandum nyang hana me-
guna lamkawan awaknyan, ulon lon kocok awaknyan
lamkawan bansa-bansa. ureueng-ureueng meudesya
lamkawan umat ulon jipeugah, 'allah hana geupeu-
biyeu tanyoe rhot le bala.' teuma, nyang sibeuna
jih awaknyan teupoh mate dimideuen prang." tuhan
meufeureuman, "teuma teuka saat jih ulon lon pe-
upuleh keurajeuen nabi daud. saat nyoe keurajeuen
nyang ka jeuet lagee rumoh nyang reuloh. teuma
binteh-binteh beuton jihnyan lon peuket dan lon
peudong lom sampoe jeuet lagee nyang ka-ka. ure-
ueng israel jikuasa nanggroe edom nyang mantong
tinggai dan bandum bansa yoh masa ilee atra ulon.
ulon, tuhan, ka lon peugah haba dan hai nyan lon
laksana." tuhan meufeureuman, "teuma teuka wa-
tee jih gandom jitimoh bagaih that sampoe musem
keumeukoh hantom reuda. bak anggo timoh lumpah
that jai sampoe manusia hana putoh-putoh jipeuket
ie anggo. ie anggo jilileeh di gunong-gunong dan
ji ile nibak buket-buket. ulon lon peujeuet umat
lon israel makmu lom teuma. awaknyan jipeudong
lom banda-banda jih keudroe nyang ka reuloh, laju
awaknyan tinggai disinan. awaknyan jipula lampoh-
lampoh anggo, dan ji-jieb ie anggo nyan. awaknyan
jimeulampoh sira jipula meubagoe seunaman, dan ji-
pajoh hase lampoh jihnyan. ulon lon keubah umat
ulon bak nanggroe nyang ka ulon bri keu awaknyan.
awaknyan hana teutarek le nibak teupat nyan. ulon,
tuhan allah awaknyan ka lon peugah haba."

nyoe kheueh ramaian obaja; gobnyan geupeusam-poe peusan tuhan nyang mahamanyang keuhai bansa edom: tuhan ka geukirem utosan gobnyan ubak bansa-bansa, dan geutanyoe ka tadeungoe peusan nyang geuba lagee nyoe, "meusiab kheueh keu tajak muprang! jak kheueh teabeurangkat tajak prang edom." dan ubak edom tuhan meufeuereuman, "gata lon peujeuet leumoh, sampoe jihina le bandum bansa. gata keunong peunget le ate gata nyang sombong. ma banda gata na kheueh gunong batee nyang kong; teupat tinggai gata bak pucak gunong nyang manyang. le sabab nyan gata tapike, soe nyang hase peurhot ulon? bahpi rumoh gata tapeuget manyang lagee uempueng cicem rajawali, dan santeut manyang ngon bintang-bintang dilanget, gata pasti lon peurhot. pancuri atawa peurampok nyang teuka bak watee malam, teuma jicok nyang jigalak. ureueng nyang pot boh anggo di lampoh, sabe jipeuleubeh meupadub boh. teuma gata geusam-poh gleh le musoh-musoh gata. he keuturonan esau, gata jigeuladah dan hareuta gata nyang teusom pi jireupah. gata jitipee le sikutu-sikutu gata, dan ji use nibak nanggroe gata. gata jipeutaloe le sahabat-sahabat gata, jijeubak le ureueng nyang makheun meusajan ngon gata. awaknyan jitanyong-tanyong keuhai droe gata, 'dipat jikeubah carong jih nyan?' bak uroe ulon hukom edom, ureueng-ureueng awaknyan nyang bijaksana habeh ulon peubinasa. dan bandum hikeumat awaknyan gadoh, hana meubeukaih. bubena peujuang di teman teumakot, dan bandum sipa-i edom mate." "gata ka tapeubuet keujam ateuh syedara-syedara gata keuturonan nabi yakub. sababnyan gata binasa, dan jikheun le gob siumu masa. gata tadong bak teupat nyang jioh, bak uroe musoh geupeujo pintoe yerusalem dan jipeutaloe banda nyan. gata seungab mantong watee awaknyan jiangkot bandum keukayaan yerusalem laju jiweuek-weuek sabe keudroe-droe. gata saban jeuhet jih deungon musoh nyan. hana patot gata galak ateuh naseb malang ureueng yehuda dan meugeumbira bak uroe syedara gatanyan binasa. hana pantaih gata raya haba watee awaknyan susah. hana patot gata tatamong lam banda umat lon, dan tasurak ureueng-ureueng nyang teungoh meudeurita, peulom tareupah hareuta beunda awaknyan bak uroe awaknyan keunong malang! hana patot gata tadong bak simpang rot, keu tahampeueng ureueng-ureueng nyang teungoh jipeuplueng droe nibak musoh, atawa jiseurah awaknyan ubak lawan bak uroe awaknyan keunong keususahan." "keubit, ka to that uroe jih, ulon, tuhan, lon peusidang bansa-bansa. peue nyang jipeubuet edom teuma teubalaih ateuh jihnyan. jihnyan jirasa peue nyang ka jipeubuet. di ateuh gunong lon nyang suci umat ulon ka jiejeb ie jieb nyang teupeulambang ubak hukoman. teuma ie jieb keu bansa-bansa di ateuh bumoe nyoe leubeh phet nibak nyan. hukoman nyan hana hase awaknyan peusie. ie nyan haroh jijieb le awaknyan sampoe habeh, oh lheuehnyan awaknyan leunyab hana beukaih." "teuma bak gunong sion, na nyang seulamat, dan gunong nyan jeuet keu teupat nyang khusus keu ulon. dan keuturonan nabi yakub jiteume lom tanoh pusaka awaknyan. umat ulon is-

rael jeuet lagee apui nyang jitot habeh keuturonan esau, lagee apui nyang jilahieb habeh jeumpung di blang. hana meusidrooe pi nibak keuturonan esau na tinggai. ulon, tuhan, ka lon peugah haba! ureueng-ureueng yehuda seultan jireupah edom. ureueng-ureueng nibak gunong-gunong siblaih u barat jipeutaloe wilayah filistin. sukee benyamin jireupah gilead, dan israel umat ulon jikuasa bandum efraim dan samaria. ureueng israel utara jiwoe nibak teupat nyang teuboih dan jiduek di fenisia sampoe u zarfat. ureueng-ureueng yerusalem nyang teuboih di sardis, jiwoe dan jicok laju banda-banda di bagian seultan yehuda. peunduduek yerusalem nyang jaya jiprang edom dan geupeutaklok banda nyan. dan ulon tuhan lon peurintah sibagoe raja."

bak siuroe, tuhan geumariet ngon nabi yunus, bin amitai. feureuman gobnyan, "tajak kheueh u niniwe, banda nyang raya nyan, keu teupeutakot banda nyan, sabab ulon teupeue bahwa peunduduek disinan jeuhet lumpah na." teuma nabi yunus geujak u arah laen guna geupeujioh tuhan gobnyan geujak u yopa, dan keubeutulan na geungieng kapai keuneuk meulayueu u spanyol. oh ka ltheueh geubayueu ungkoih kapai, laju geujak meusajan aneuk kapai nyan u spanyol, mangat gobnyan jioh nibak tuhan nabi yunus geutreun ubak teumpat nyang paleng miyueb dan laju geueh disinan sampoe teunget hana geutee droe. oh ltheuehnyan tuhan laju geupeuteuka angen raya u atueuh laot, laju jipot angen badee nyang lumpah teuga, dan angen raya nyan laju jiheuntam kapai nyan sampoe karab hanco. bubena aneuk kapai lumpah teumakot sira jiklik-klik jilakee tulong, maseng-maseng ubak deua jih keudroe. keu teupeukureung bahaya jeuet bek ngob kapai nyan, bubena asoe kapai nyan laju jitiek lam laot. watee nakhoda kapai nyan jitron u miyueb, laju jikalon nabi yunus mantong teungent disinan. dan laju jipeugah, "trok ate gata mantong teungent kapai dalam keuadaan lagee nyoe! beudoh! meudoa kheueh ubak dewa gata jeuet geutulong. pane tateupeue gobnyan geugaseh ubak geutanyoe sampoe geutanyoe hana binasa." oh ka ltheueh nabi yunus dan nakhoda nyan geuek u atueuh, le keulasi kapai nyan jimarriet sabe keudroe-droe, "jak, tatiek undi mangat tateupeue soe nyang salah sampoe geutanyoe keunong le bala nyoe!" awaknyan laju jitiek undi, dan nyang keunong na kheueh nan nabi yunus. laju jipeugah le awaknyan ubak nabi yunus, "peu kheueh beutoi sabab le gata teujadi bala nyoe? gata rot pane? bansa peue? dan pakon gata na disinoe?" geujawueb le nabi yunus, "ulon ureueng ibrani. nyang lon seumah tuhan, allah syeuruga, nyang cepta laot dan darat." oh ltheuehnyan laju geucalitra pakriban gobnyan geupeuplueng droe nibak tuhan. ban jideungoe lagee nyan bubena keulasi kapai meutamah teumakot, dan jipeugah ubak nabi yunus nyan, "bitnyoe lancang that buet gata nyan!" teungoh jipeugah nyan angen badee maken meutamah raya, laju le keulasi kapai jitanyong lom ubak gobnyan, "peue nyang haroh kamoe peubuet atueuh gata mangat angen badee nyoe jipioh?" geujawueb le nabi yunus, "neutiek kheueh ulon dalam laot, pasti angen badee nyoe jipioh. sabab bak saat nyoe ka ulon teupeue, bahwa sabab ulon kheueh angen badee nyang luwa biasa nyoe jitimpa atueuh droeneueh." teuma le awak kapai nyan mantong jiuiseuha seuhabeh teunaga keu jidayong kapai nyan atueuh darat. teuma angen badee teutab meutamah raya, seuhingga useuha nyang ka geupeubuet le awaknyan sia-sia beulaka. sabab nyan awaknyan geumeulakee ubak tuhan, "ya, tuhan, kamoe lakee, bek kheueh kamoe neupeubinasa ngon sabab kamoe cok nyawong ureueng nyang hana jipeubuet meusapeue pih nyang salah ubak kamoe. ya tuhan, droeneueh ka neupeubuet peue nyang droeneueh keuheundaki." laju awaknyan jirhom nabi yunus u dalam laot. dan bak saat nyan cit angen badee nyang jipioh hana le meubura. bubena keulasi kapai nyan ka teuka teumakot nyang luwa biasa ubak tuhan, dan

oh ka trok bak darat, awaknyan laju geupeuseumah keureubeuen ngon jimeujanji meubagoe-bagoe rupa ubak tuhan. dan bak watee nyan tuhan laju geukirem saboh eungkot yee nyang paleng raya jeuet yee nyan jikak uet nabi yunus. dan tinggai kheueh nabi yunus dalam pluet eungkot nyan lhee uroe lhee malam treb jih. lam pruet eungkot nyan, nabi yunus geumeudoa ubak tuhan allah gobnyan. lagee nyoe doa gobnyan, "ya tuhan, lam keususahan lon ulon meulakee ubak droeneueh dan droeneueh neujawueb ulon. nibak lam donya ureueng mate ulon lakee tulong ubak droeneueh, nyang ulon lakee droeneueh deungoe dan droeneueh peurati. u teumpat nyang lhok ulon droeneueh rhom, sampoe trok lam tuwie laot raya. disinan ie tajam jikeulileng lon, umbak dan geulumbang jiseumpom ulon. lam ate lon laju lon peugah: tuhan ka geu use ulon nyoe dikeue gobnyan. hana ulon ngieng le baet teumpat tinggai gobnyan nyang suci. ie laot jiek trok bak bibi lon, samudra raya ka habeh ngob bansaboh tuboh lon, ganggang laot habeh jibalot bansaboh ulee lon. ulon grob trok lam barieh gunong, lam alam nyang pintoe geureubang jih teungunci sampoe akhe jamen. nyawong ulon hek ngon leumoh lam tuboh, laju ulon ingat dan lon meulakee ubak droeneueh. dan trok kheueh doa ulon ubak droeneueh, udalam baet droeneueh nyang suci. laju neupeuteungoh ulon nibak lam laot, ya tuhan allah ulon! ureueng seumah beurala nyang sia-sia, jitinggai droeneueh dan hana le seutia. teuma ulon meuca-e lagu puja ngon pujoe keu droeneueh dan ulon peuseumah keureubeuen keu droeneueh. meubagoe janji lon peubuet. droeneueh kheueh tuhan nyang peuseumat." oh ltheueh nyan, atueuh peurintah tuhan, le uengkot yee raya nyan, laju jiulee nabi yunus bak bineh pante. keu nyang keu dua goe jih tuhan geumeututoe ubak nabi yunus. feureuman gobnyan, "tajak kheueh u niniwe, banda raya nyan, dan tapeusampoe kheueh ubak rakyat jihnyan, peusan nyang ulon bri ubak gata." teuma nabi yunus laju taat ubak tuhan dan geujak laju u niniwe, saboh banda nyang raya lumpah na; sampoe habeh watee lhee uroe keu teujak lam banda nyan. nabi yunus laju geutamong lam banda nyan dan oh ka ltheueh geujak siuroe suntok, gobnyan laju geupeuphon keutubah, kheun gobnyan, "peuet ploh uroe teuk, niniwe hanco!" peunduduek niniwe peucaya ubak peusan allah nyan. bandum rakyat ka jicok keuputosan keu jipuasa, dan bandum ureueng, bah kheueh nyan nyang rayeuk meunan cit deungan nyang ubit, jingui ija krong sibagoe tanda bahwa awaknyan ka meunyeusai ubak banmandum desya nyang ka jipeubuet. watee raja niniwe jideungoe haba nyan, deungan reujang that laju jitron nibak takhta gobnyan. laju gesueat baje jubah nyang teungoh geungui dan deungan pantaih laju geutuka deungan ija krong, dan geuduek laju atueuh abee. dan gobnyan laju geupeumaklum maklumat nyang lagee nyoe, "peurintah nyoe geupeuteubiet di niniwe atueuh keuputosan raja dan bandum meuntroe: bandum ureueng, leumo, bubiri dan bandum beulatang peulara nyang laen geutam bek jih makheun dan jieb ie. manusia dan beulatang haroh jingui ija krong. sibagoe tanda meunyeusai, dan bandum ureueng haroh meudoa deungan bit-

bit ubak po teu allah. awaknyan haroh jipeuget pi-e jih nyang jeuhet dan buet-buet jih nyang peunoh ngon desya. mungken po teu allah geu ubah niet gobnyan dan hana beungeh le sampoe geutanyoe hana jadeh binasa!" po teu allah geukalon bandum buet awaknyan; gobnyan geukalon bahwa awaknyan ka jittingai bandum pi-e droe jih nyang jeuhet. dan gobnyan laju geu ubah keuputosan geuh, dan hana jadeh geu hukom awaknyan. nabi yunus meubacut pih hana galak deungon hai nyan; bahkan gobnyan jeuet keubeungeh. laju gobnyan meudoa, "ya tuhan, kon ka lheueh lon peugah sigohlom ulon beurangkat nibak rumoh lon yoh masa dilee, bahwa droeneueh pasti nepeuget lagee nyoe? nyan kheueh sabab jih ulon langsung ulon peuplueng droe u Spanyol! ulon kuteupeue bahwa droeneueh allah nyang peunyayang dan peugaseh, panyang saba, leumoh leumbot, dan sabe siab keu neu ubah reuncana hukoman. jinoenyoe, ya tuhan, bah kheueh ulon mate mantong, sabab leubeh get ulon mate nibak padoe udeb." geujaweueb le tuhan, "gata hana alasan neubeungeh nyang lagee nyan." oh lheuehnyan nabi yunus laju geujak u bagian timu banda, dan geuduek laju disinan. gobnyan geupeudong saboh jambo dan laju geumeuceue lam jambo nyan, sira geupreh peue nyang teuma teujadi di banda niniwe. teuma tuhan allah laju geupeutimoh sibak seunaman nyang jimeueue seuhingga seunimoh nyan laju jipeupayong nabi yunus sampoe gobnyan harok that ate. meumang, nabi yunus harok lumpah na deungon seunaman nyan. teuma oh singoh nyan watee seuboh buta, po teu allah laju geupeujeuet saboh glang dan glang nyan laju jijak kab ukeu seunaman nyan, sampoe seunaman nyan laju layee. oh mata uroe ka jibleuet, po teu allah laju geupeutron angen nyang lumpah seu uem nyang teuka jih nibak arah timu. nabi yunus rab pansan sabab jipoh le uroe nyang seu uem lagee nuraka nyan, siulah-ulah ulee gobnyan lagee tutong keunong apui. gobnyan ka jeuet keu putoh asa dan meuharab bubagaih mate. kheun nabi yunus nyan, "leubeh get ulon mate mantong nibak padoe udeb!" teuma po teu allah geupeugah ubak gobnyan, "gata hana patot seudeh lagee nyan ngon sabab seunaman nyan!" jaweueb nabi yunus, "pakon hana? ka patot ulon beungeh sampoe an mate." laju geupeugah le tuhan ubak nabi yunus, "seunaman nyoe timoh simalam mantong, dan oh singoh beungoh seunaman nyan layee; gata meubacut pih hana neupula dan neupeulara. bahpih lagee nyan gata meurasa seudeh sabab ka layee. hana mungken ulon hana meurasa seudeh watee lon pike ubak niniwe, banda nyang raya nyan. sabab seulaen beulatang-beulatang nyang hana teuitong nyan, disinan na cit meuteume leubeh nibak 120.000 droe aneuek miet nyang gohlom hase geupeubeda peue nyang jroh dan peue nyang jeuhet."

mikha asai geuh di banda ubit nyang nan jih moresyet. bak masa nangroe yehuda geupeurintah meuturot-turot le raja yotam, ahas dan hizkia, mikha geuteurimong peusan tuhan keuhai samaria dan yerusalem. deungoe kheueh he bansa-bansa! simak kheueh, he peunduduek bansaboh donya! tuhan nyang mahamanyang teuka sibagoe saksi geulawan gata bube nyang na! deungoe kheueh gobnyan peugah haba di baet gobnyan nyang suci di syeuruga. gobnyan geutron nibak teumpat geuh nyang suci dan geujak-jak di ateuheh pucak-pucak gunung di bumoe. gunong-gunong hanco dimiyueb tapak kaki geuh lagee lilen lam apui nyang teungoh hu; tanoh nyan teupeuro jitamong lam barieh, lagee ie di ateuheh buket ji ile u miyueb. bandum nyan teujadi sabab ureueng israel meudesya dan beurontak ubak allah. soe kheueh nyang jeuet keu sabab israel meudesya? bukan kheueh samaria ma banda gobnyan keudroe? soe kheueh nyang peusabab yehuda geuseumah beurala? peu kheueh bukan yerusalem keudroe? nyang kheueh sabab jih tuhan meufeureuman, "ulon lon peujeuet samaria sinamon runka di padang, dan teumpat manusia pula bak anggo. runka-runka banda nyang reuloh nyan ulon tiek lam barieh panton, dan sandi-sandi runka nyan ulon kueh teuma. patong-patong jihnyan nyang meyuem lon peuhanco, dan tieb-tieb beunda nyang teujuk ubak ureueng-ureueng inong nyang meutugaih bak kuil ulon tot, dan bandum beurala nyang na disinan lon peubinasa. barang-barang nyan na kheueh hase iebadat ubak dewa keusuboran. jinoe bandum nyan jiangkot le musoh-musoh keu peuseumahan syukoe ubak dewa-dewa jihnyan." sabab nyan kheueh, ulon, si mikha, lumpah peudeuh ate dan apoh apah. ulon lon jak hana ngon peukayan badan teulon dan hana teuma meuseulob sibagoe tanda pakriban seudeh jih ate ulon nyoe. ulon meuranggong lagee su aseue uteuen dan meuong-ong lagee su cicem untu. sabab luka-luka samaria hana hase teupeu ubat, dan yehuda keunong naseb nyang saban. peutaka ka trok u yerusalem, pintoe geureubang tanoh ie bansa ulon. bek kheueh tapeugah ubak musoh-musoh geutanyoe di gat keuhai musibah geutanyoe; bek teuma tapeubiyeu awaknyan jikalon gata nyang teungoh mo. he peunduduek bet-le-afra, meugule-gule kheueh lam abee sibagoe tanda putoh asa! gata bandum peunduduek safir, tajak kheueh laju u teumpat nyang teuboih ngon hana tangui peukayan dan deungan peurasaa malee! ureueng-ureueng zaanan hana jijeuet teubiet nibak banda. su klik peunduduek bet-haezel sibagoe tanda keu gata bahwa disinan ka hana le peulindongan. peutaka nyang teuka nibak tuhan ka trok bak babah pintoe geureubang yerusalem! le sabab nyan, hana mungkin ureueng marot jimeuharab gata tulong. gata peunduduek lakhis, tapasang kheueh guda bak geuritan prang! gata tacuntoh desya-desya nyang jipeubuet di israel sampoe le sabab nyan yerusalem pih ka meudesya. jinoenyoe he ureueng yehuda gata gadoh banda moresyet-gat. raja-raja israel hana meuteume bantuan le nibak banda akhizib. he ureueng maresya, tuhan geuseurah gata ubak musoh nyang keuneuk peutundok banda gata. peumimpen-peumimpen is-

rael nyang meukuasa jimusom lam guha-guha di adu-lam. he ureueng yehuda, takoh kheueh ok gata sibagoe tanda meukabong keu aneuek-aneuek gata nyang gata gaseh. tacuko kheueh ok bak ulee gata sampoe nyang tinggai cit bruek ulee saban lagee cicem nyang pajoh bangek, sabab bandum aneuek-aneuek gata teuangkot u teumpat nyang teuboih. ceulaka kheueh ureueng-ureueng nyang reuncana bak buet nyang jeuhet teungoh jieh-eh bak teumpat eh oh watee malam, laju jilaksana oh watee beungoh sabab awaknyan na teunaga keu jipeubuet nyan. meunyoe awaknyan jikeuneuk beuna saboh lampoh, laju jireupah atra gob. meunyoe awaknyan keuneuk na saboh rumoh, atra gob geureupah mantong. bah kheueh atra meunan cit keuluwarga, hana nyang aman. sabab nyan tuhan meufeureuman, "ulon nyang reuncana bala ceulaka ateuheh gata, sampoe gata hana tinggai. bak watee nyang naas nyan gata hana carong le tajak-jak deungan sombong. naseb gata jipeuguna le gob sibagoe nariet teumimplak, dan awaknyan jipeugot ca-e meukabong nyang lagee nyoe, 'tuhan ka geucok lom nangroe kamoe nyoe dan laju geujok ubak ureueng nyang teuen kamoe. kamoe ka hanco hana le meuguna.' " le sabab nyan, meunyoe ka trok watee jih nangroe nyan geujok lom ubak umat tuhan, hana meusidroe pih nibak gata nyang teurimong bulueng gobnyan. ureueng-ureueng laen jikeutubah ubak ulon, kheun gobnyan, "bek takeutubah ubak kamoe. bek takeutubah keuhai banmandum nyan. kamoe hana meuteume malee. bek tapike umat israel ka geukutok le tuhan! tuhan hana geupeubuet hai-hai nyang lagee nyan. gobnyan hantom na gadoh saba. bukan kheueh gobnyan geumariet deungan ramah ubak ureueng-ureueng nyang jipeubuet nyang beuna" geujaweub le tuhan, "gata kheueh nyang prang umat ulon lagee musoh. ureueng nyang gisa di mideuen prang deungan harapan meuteume aman di rumoh jih keudroe, padahal disinan gata preh keuneuk gata reubot rumoh gobnyan. inong-inong lamkawan umat ulon gata use di rumoh nyang jicinta, dan gata reupah sabe beureukat nyang ulon bri keu aneuek-aneuek awaknyan. beudoh kheueh dan tajak laju keudeh; disinoe ka hana aman le. ngon sabab le desya-desya nyang rayeuk nyan ka jeuet keusabab geupeutron bala nyang lumpah gli u ateuheh teumpat nyoe. gata meuharab ubak nabi nyang galak meusulet dan teumipee dan ji-amai bahwa nibak gata teuma na ie anggo dan ie kreueh meulimpah ruwah." tuhan meufeureuman, "he umat israel nyang na mantong teutinggai! gata pasti lon peusapat dan ulon peusaho lagee bubiri nyang teungoh woe lam weue. lagee blang naleueng nyang peunoh deungan bubiri, meunan cit teuma nangroe gata peunoh lom ngon ureueng rame. ulon lon peuhah rot ueh dan ulon ba gata nibak teumpat nyang teuboih. gata tadabrak babah-babah pintoe geureubang dan tajak ho galak droe. ulon, tuhan keudroe, na kheueh raja gata. dan ulon lon pimpin gata mangat teupeuteubiet nibak peunjara." deungoe kheueh, he gata banmandum peunguasa-peunguasa israel! sibeuna jih gata tateupeue peue nyang ade, teuma gata tabanci ubak nyang jroh, dan galak ubak nyang jeuhet. bansa ulon gata puliek udeb-udeb, dan gata priek-priek

asoe nyang meuleukek nibak tuleueng-tulueueng awaknyan. gata pajoh bansa ulon. kulet jih gata priek-priek dan tuleueng jih gata peuhanco. gata koh-koh awaknyan lagee gata koh uengkot sie keu tapasoe lam beulangong. teuma teuka watee jih gata takliek talakee tulang ubak tuhan, teuma hana geutem jaweueb. gobnyan hana geudeungoe peue-peue nyang gata meudoa, sabab gata ka tapeubuet hai nyang jeuhet. bansa ulon geupeungeut le nabi-nabi nyang geuramai nyang get keu ureueng nyang tem bri peng, teuma geumeumusoh ngon ureueng nyang han jitem bri peng. keu nabi-nabi nyang lagee nyan, tuhan meufeureuman, "he nabi, watee gata ka rab habeh; mata uroe gata teungoh jilob. gata hana le tateume kalon nyang deuh-deuh teuingeng nyang teupeugah ubak reuncana-reuncana ulon. gata hana neuteume le taramai peue-peue mantong." ureueng-ureueng nyang ramai uroe ukeue meuteume malee sabab peue-peue nyang jiramai nyan hana trok ban jilakee. awaknyan bandum meuteume malee sabab po teu allah hana geujaweueb awaknyan. teuma keuhai droe ulon nyoe, tuhan ka geupasoe ulon deungon roh gobnyan dan kuasa gobnyan. ubak ulon geubri peungeurtian keuhai keuadelan, dan meunan cit keubeuranian keu lon peugah ubak ureueng israel desya-desya nyang ka jipeubuet. deungoe kheueh tutoe haba lon nyoe, he gata peunguasa israel nyang banci ubak keuadelan dan nyang puta balek keubeuranan. gata tapeudong yerasalem, banda po teu allah, nyang meudasai ubak poh meupoh mate dan keuhana adelan. peunguasa-peunguasa banda geumat peurintah mangat meuteume peng teusulueng, imeum-imeum geupeurunoe hukom tuhan mangat na gaji, dan nabi-nabi geulakee peutunok ubak po teu allah mangat meuteume peng – laju awaknyan banmandum geupike tuhan na blah awaknyan. awaknyan jipeugah, "tuhan na lamkawan geutanyoe; geutanyoe hana keunong bala bahaya." sabab keujeuhetan gata nyan, sion jimeu ue lagee blang, yerasalem jeuet keusinamon runka, dan buket baet tuhan jeuet keu uteuen beulantara. bak uroe-uroe nyang teuka buket, teumpat baet tuhan, teuma teudong cot dan manyang meulambong leubeh nibak gunung-gunong dan buket-buket. meubagoe bansa meuron-ron jijak keunan. awaknyan bandum jipeugah, "jak geutanyoe ta ek u buket tuhan ubak baet allah israel! gobnyan geupeurunoe geutanyoe peue nyang haroh tanyoe peubuet. geutanyoe ta seutot rot gobnyan sabab ajaran tuhan teuka nibak yerasalem; di sion gobnyan geumariet ubak umat geuh." tuhan geupeuputok peukara lamkawan bansa-bansa, lamkawan nanggroe-nanggroe nyang teuga, nyang jioh meunan cit nyang rab. awaknyan geuba bak teumpeuen peudeueng-peudeueng jih keudroe mangat jeuet keu mata langai dan kapak-kapak awaknyan beujeuet keu sikin meuguntung. bansa-bansa ka hana le jeuet keu bansa peunyeurang, hana cit meusiab-siab keu jijak muprang. tieb-tieb ureueng udeb aman dan seujahteura di teungoh lampoh anggo dan lampoh ara; hana ureueng nyang peutakot-takot gobnyan, nyan kheueh janji tuhan nyang mahakuasa. tieb-tieb bansa di ateuh bumoe jiseumah dan taat ubak dewa jih keudroe. teuma geutanyoe taat ubak tuhan al-

lah geutanyoe dan taseumah gobnyan siumu masa. tuhan meufeureuman, "teuma teuka watee jih ulon lon peusapat bubena ureueng nyang ulon hukom, awaknyan nyang meudeurita bak teumpat nyang teuboih. awaknyan ka lapee dan jioh di gampong droe. teuma, nibak ureueng-ureueng nyang na mantong teutinggai nyan ulon lon peuphon saboh keuturonan nyang baro. awaknyan jeuet keubansa nyang rayeuk dan teuga. ulon lon peurintah awaknyan di buket sion keu siumu masa." dan gata yerasalem, teumpat po teu allah geujaga umat gobnyan lagee ureueng meurabe jijaga kawan bubiri jih, gata jeuet lom sibagoe ma banda keurajeuen gata lagee yoh awai phon. pakon gata tamo ba-e teuga-teuga? pakon gata meudeurita lagee ureueng inong nyang keuneuk peulahe aneuek? peu kheueh sabab gata hana meuraja, dan peunaseuhat-peunaseuhat gata ka habeh mate? he peunduduek yerasalem, teubot-bot kheueh dan apoh apah kheueh lagee ureueng inong keuneuk peulahe aneuek! sabab, bak saat nyoe gata haroh tatinggai banda dan gata tinggai di padang. gata haroh tajak u babel, teuma disinan tuhan geupeul-heueh gata nibak musoh-musoh gata. jai lumpah na bansa ka meugumpoi keuneuk jak seurang gata, he yerasalem! awaknyan jipeugah, "yerusalem haroh teupeuhanco! kamoe ngieng banda nyan ka jeuet keu bangkel!" teuma bansa-bansa nyan hana jiteupeue peue nyang teungoh geureuncana le tuhan. awaknyan hana jisadar bahwa awaknyan teungoh jipeusapat keu teuhukom, saban lagee gandom nyang teugumpoi keu teujak lo. tuhan meufeureuman, "he peunduduek yerasalem, tajak kheueh dan tagilo-gilo kheueh bubena musoh-musoh gata! ulon lon peujeuet gata leubeh teuga lagee leumo nyang meulungkee beuso dan meugukee teumaga. gata tapeuhanco bansa nyang le, dan keukayaan nyang awaknyan teume nibak hase teureupah teuma gata peuseumah ubak ulon, tuhan seumeusta alam." he peunduduek yerasalem, talakee kheueh deungon meuharab that mangat tuhan geutulong gata! geutanyoe teungoh jikeupong! musoh teungoh jiprang bubena peumimpin israel! tuhan meufeureuman, "he betlehem efrata, gata saboh banda nyang paleng ubit di yehuda! teuma nibak gata lon peubeudoh sidroe peunguasa keu israel nyang asai asui jih phon jamen dilee." dan, tuhan geupeubiyeu umat gobnyan jikuasa le musoh-musoh awaknyan keudroe sampoe ubak ureueng inong nyang ka geupeunteuntee mangat jeuet keusidroe ma peunguasa nyang ka geupeulahe gobnyan. oh ka lheureh nyan ureueng-ureueng nyang saboh bansa ngon gobnyan nyang mantong na di teumpat nyang teuboih geupeusaho lom deungon bansa awaknyan. meunyeu peunguasa nyan ka teuka, gobnyan jipeurintah umat gobnyan deungon teunaga dan keukuasaan nibak po teu allah jih keudroe. umat geuh udeb deungon aman, sabab bandum ureueng bansigom donya jiaku keubeusaran gobnyan, dan gobnyan geubri keudamean. meunyeu tantra asyur jiseureubu nanggroe geutanyoe dan jiheuntam peutahanan geutanyoe, tanyoe ta krah bubena peumimpin-peumimpin geutanyoe nyang paleng khong keu geujak prang awaknyan. peumimpin-peumimpin geutanyoe nyan geupeutaloe asyur de-

ungon teunaga sinjata, dan geupeuseulamat geutanyoe nibak jaroe awaknyan. ureueng israel nyang mantong tinggai jeuet lagee iembon nyang leupie nibak tuhan keu bansa-bansa, dan lagee ujeuen tron ateuhe seunaman. awaknyan meusadeue ubak po teu allah, dan bukan ubak manusia. ureueng israel nyang mantong tinggai lamkawan bansa-bansa teuma jeuet lagee singa lamkawan beulatang-beulatang uteuen atawa lamkawan bubiri di blang naleueng. singa nyang jitamong u lamkawan bubiri sira jigilo-gilo dan jipriek-priek; hana ureueng nyang hase jipeulheueh bandum bubiri nyan. israel jipeutaloe bubena musoh dan bandum awaknyan jipeuhanco. tuhan meufeureuman, "bak watee nyan teupeuranab bandum guda gata, dan teupeubinasa bandum geuritan prang gata. banda-banda nyang meukuta di nanggroe gata lon peuhanco, dan bandum kuta gata lon peudata ngon tanoh. jimat-jimat gata lon peuranab dan bandum tukang ramai gata ulon kireuh uluwa. ulon lon peuhanco bubena patong gata meunan cit deungon tugu-tugu keuramat gata; gata hana le taseumah beunda-beunda nyang jipeugot le jaroe keu droe. tugu-tugu dewi asyera di nanggroe gata ulon peureubah, dan banda-banda gata nyang meukuta lon peuhanco. lam beungeh ulon nyang lagee ie ju nyan ulon lon balaih bandum keujeuhetan bandum bansa nyang hana taat ubak ulon." deungoe kheueh peue nyang geutudoh le tuhan keu israel. beudoh kheueh, ya tuhan, dan neujok kheueh peungaduan droeneueh! bah kheueh gunong dan buket jideungoe peue nyang keuneuk droeneueh peugah. he gunong-gunong, he dasar bumoe, deungoe kheueh peungaduan tuhan! gobnyan na peukara deungon israel umat gobnyan dan geutunton awaknyan. tuhan meufeureuman, "he umat ulon, peue nyang ka ulon peubuet ateuhe gata? lam hai peu kheueh ulon peususah gata? jaweub kheueh ulon! gata ka ulon ba lon peuteubiet nibak nanggroe meuse, dan ulon peubeubaih nibak jipeujeuet keu namiet; ulon ka lon kirem nabi musa, nabi harun, dan maryam keu jipimpen gata. umat ulon, ingat kheueh peue nyang jireuncana le balak raja moab ateuhe gata, dan peue nyang jijaweueb le bileam bin beor keu jihnyan. ingat kheueh peue nyang teujadi watee teujak lamkawan peukhimahan deungon sitim dan gilgal. meunyo gata neuingat keu bandum nyan, gata tateupeue peue nyang ka ulon peubuet keu lon peuseulamat gata." peu kheueh nyang haroh tapeuseumah ubak tuhan, po teu allah nyang na di syeuruga, meunyo geutanyoe takaj meueibadat ubak gobnyan? peu kheueh haroh taba leumo muda nyang paleng get keu tapeuseumah sibagoe keureubeuen nyang teutot ubak gobnyan? peu kheueh tuhan galak meunyo geutanyoe taba meuribee-ribee bubiri atawa minyeuk zaiton nyang meulimpah? dan peu kheueh haroh tapeuseumah ubak gobnyan aneuek geutanyoe nyang tuha sibagoe sineuboh ateuhe desya-desya nyang geutanyoe peubuet? hana! tuhan ka geupeugah ubak geutanyoe peue nyang paleng get. nyang geulakee ubak geutanyoe na kheueh mangat geutanyoe tapeubuet nyang ade, sabe geutanyoe amai cinta dan gaseh sayang, dan deungon miyueb ate udeb meusaboh ngon po teu allah. lumpah bijaksana keu tatakot ubak

tuhan. gobnyan geutawok ubak peunduduek banda, "deungoe kheueh, he gata nyang meusapat di banda! di rumah ureueng-ureueng jeuhet na hareuta nyang jiteume deungon cara teumipee. awaknyan jipeuguna sinukat nyang peuleusu, buet nyang paleng ulon banci. ureueng nyang peubuet lagee nyan lon hukum. hana mungkin ulon peumaphon ureueng nyang peuguna sinukat peuleusu? ureueng-ureueng kaya nyang na di banda gata jitindeeh ureueng gasien, dan gata banmandum ureueng buhak. bak saat nyoe ulon ka lon peuphon seukok dan lon peuhanco gata sabab desya-desya gata. gata teuma tamakheun, teuma hana jitem tro – teuma teutab deuk. gata ta angkat barang-barang, teuma hana hase tapeu aman. peue mantong nyang gata peu aman lon peuhanco dimideuen prang. gata tatabu gandom, teuma hana tapot hase jih. gata tapeugot minyeuk nibak boh zaiton, teuma hana tateum ngui minyeuk zaiton nyan. gata taprah ie boh anggo, teuma hana tajib. bandum nyan teujadi sabab gata taseutot buet-buet nyang jeuhet nibak raja omri dan aneuek jihnyan, nyan kheueh raja ahab. gata taseutot cara-cara awaknyan. sabab nyan ulon lon hanco gata, dan gata jipeubeb dan jihina le sigala bansa." cilaka ulon! ulon lagee ureueng deuk nyang lon jak pot boh kayee oh hana le musem jimuboh. ka hana le jimuboh kayee di ateuhe bak. boh anggo dan boh ara nyan pih ka habeh jipot. ureueng juioe ka hana le lam nanggroe, ureueng nyang seutia ubak po teu allah ka hana meurumpok le. tieb-tieb ureueng jipreh keuseumapatan keu geupeu mate ureueng laen. maseng-maseng jiteun jeunieb keusabe keudroe-droe. bandum ureueng malem that bak buet jeuhet. peujabat dan hakem geulakee peng sogok, dan ureueng patot-patot geupaksa keuheundak droe, meunan kheueh awaknyan ka sipakat bulat bak buet nyang hina. nyang paleng get dan paleng juioe lamkawan awaknyan pih lagee tamah meudroe nyang hana meuguna. ka watee jih po teu allah geuhukom umat gobnyan lagee nyang ka geupeuingat ubak awaknyan meulalu nabinabi. bak saatnyoe ka jipeubeudoh karu lamkawan awaknyan keudroe. bek tapateh ubak kawom lingka gata, dan bek teuma meusadeue ubak rakan. beu ate-ate kheueh ngon tutoe haba gata bahpi nyang deungoe nyan peurumoh gata keudroe. sabab, bak masa nyang lagee nyoe anggata keuluwarga saleng meumusoh: aneuek agam jihina ureueng syiek jih keudroe, aneuek inong jilawan ma jih, dan meulin-tee nyang inong jimeudakwa ngon tuwan jih keudroe. teuma geutanyoe meuharab ubak tuhan; deungon peunoh keuyakenan tanyoe preh po teu allah geutanyoe. gobnyan geudeungoe doa geutanyoe dan geupeuseulamat geutanyoe. hana alasan nibak musoh-musoh geutanyoe keu museunang-seunang ateuhe keuhancoran geutanyoe. sabab bahpi geutanyoe rhot, geutanyoe tabeudoh lom teuma. bak saatnyoe geutanyoe na lam seupot, teuma tuhan geupeutrang geutanyoe. geutanyoe ka meudesa ubak tuhan, sabab nyan bak saat nyoe geutanyoe haroh tarasa beungeh gobnyan. teuma hana treb le gobnyan geubila geutanyoe dan geubri keuadalan ubak geutanyoe. gobnyan geuba geupeuteubiet geutanyoe ubak nyang peungeueh; geutanyoe ta rasa keudroe

bahwa gobnyan geupeuseulamat geutanyoe. yoh masa ilee musoh jihina geutanyoe sira jipeugah, "dipat kheueh tuhan, allah gata nyan?" teuma bak saat nyoe awaknyan jikalon peue nyang geupeubuet le tuhan keu geutanyoe, dan awaknyan meuteume malee. geutanyoe takalon musoh-musoh geutanyoe nyan geupeutaloe dan geubloh-bloh lagee leuhob bak rot ueh raya. he yerusalem! ka trok watee jih gata peudong lom binteh-binteh beuton banda gata. bak uroe nyan wilayah gata teupeuluwah. ureueng-ureueng gata jigisa ubak gata dipat – di asyur di siblaih utimu, di nanggroe meuse di siblaih seu-latan, di daerah krueng efrat, di meurandeh laot dan nibak gunong-gunong nyang jioh. teuma bumoe jeuet keu tho kreng sabab buet nyang jeuhet nyang jipeubuet le peunduduek bumoe nyan. ya tuhan, neurabe kheueh umat droeneueh, umat nyang droeneueh pileh. awaknyan tinggai teu aseng di uteuen raya, bak teungoh tanoh nyang subo gumbo. bah kheueh awaknyan meuteume peunajoh bak blang naleueng basan dan gilead lagee yoh jamen dilee. neupeugot kheueh buet nyang ajaeb keu kamoe, ya tuhan, lagee nyang ka tuhan peugot yoh masa ilee bak watee droeneueh neupeuteubiet kamoe di nanggroe meuse. bansa-bansa jikalon hai nyan dan meuteume malee sabab jisada bandum teunaga awaknyan hana areuti meubacut pi. awaknyan gadoh akai sampoe hana jeuet jimariet atawa jimeudeungoe. awaknyan geumeu eue nibak tanoh lagee uleue. deungon teumakot dan yo meugam-gam awaknyan jiteubiet lam kuta teumpat jimeuteun, laju jijak ubak droeneueh, ya tuhan po teu allah kamoe. hana allah nyang lagee droeneueh, ya tuhan, nyang peuamphon desya umat pilehan droeneueh nyang mantong na tinggai. hana keu siumu masa droeneueh beungeh; sikeubit jih, droeneueh galak neubri cinta droeneueh nyang hana meubataih nyan. droeneueh neubalaih gaseh lom ubak kamoe dan neu peuamphon kamoe. desya-desya kamoe droeneueh gilo-gilo dan droeneueh geulawa lam laot raya! ubak umat droeneueh, keuturonan nabi ibrahim dan nabi yakub, droeneueh neutunyok keuseutiaan droeneueh dan cinta droeneueh nyang hana meubataih nyan lagee nyang droeneueh peujanji ubak indatu kamoe yoh masa ilee.

nyoe kheueh peusan po teu allah keuhai niniwe. peusan nyan geupeudeuh deungon keumalon nyang geubri ubak nahan, sidroe nabi nyang meuasai nibak elkos. tuhan allah hana ngon peusa, ureueng nyang lawan gobnyan pasti meuteume hukuman. deungon meureuka gobnyan nyang hana teukira, gobnyan geubalaih dam keu awaknyan. beutoi tuhan, hana bagai beungeh; teuma gobnyan lumpah that meukuasa dan barang sigasoe nyang peubuet salah hana geupeubeubai nibak hukuman. gobnyan geuancam laot dan geupeutho hana meui ie, bubena ie krueng ka habeh geupeutho. gunong karmel dan padang-padang di basan ka jeuet keu to kreg dan di libanon bubena bungong ka habeh layee. gunong-gunong ka habeh yo dikeue gobnyan; dan buket pih ka habeh caye bube nyang na. meunyo tuhan teuka, bumoe meuhayak, donya dan bandum peundudeuk disinan ka habeh yo. soe nyang ek peuteun meunyo tuhan meureuka? hana nyang hase tuwoe meunyo gobnyan nyang meureuka? gobnyan nyang peusak hob nyang hu meubura batee hanco dan jeuet keu abee dikeue gobnyan. tuhan nyan get, gobnyan geulindong umat geuh bak watee susah, gobnyan geujaga ureueng nyang meulindong ubak gobnyan. lagee ie raya teuka nyang jipeuron peue nyang na, geupeuhanco bandum musoh-musoh gobnyan. awaknyan nyang jijeuet jilawan gobnyan laju geuheuntam deungon mawot sampoe binasa. reuncana peue mantong nyang gata peugot talawan tuhan, pasti meuteume keugagalan. di gobnyan hana geubalaih dam sampoe dua goe ubak musoh-musoh gobnyan. gata geutot lagee jumpung nyang tho kreg lagee tamah meuduro nyang meucarueh hana meuteuntee. nibak gata, he niniwe, ka teuka sidroe ureueng nyang peunoh deungon reuncana jeuhet. ureueng nyan jipeugot reuncana keu jilawan tuhan. dan feureuman tuhan ubak israel, umat gobnyan, "bahpi ureueng-ureueng asyur nyan teuga dan jai jeumeulah jih, teuma awaknyan teupeuhanco laju gadoh. he bansa ulon, ulon ka lon peujeuet gata meudeurita, teuma hainyan hana lon peubuet le. jinoenyoe lon peuhabeh keukuasaan asyur ateuh gata, dan lon peuputuh rante nyang teukit bak gata." nyoe kheueh keuputosan tuhan keuhai bansa asyur, "awaknyan hana le keuturonan keu geunantoe bansa. patong-patong beurala nyang na didalam kuil-kuil dewa awaknyan, lon peuhanco. lampoh jrat keu bansa asyur teungoh lon peusiab, sabab awaknyan hana meuguna meunyo udeb!" kalon, sidroe utosan teungoh teuka nyang jijak rot ateuh gunong-gunong, jiba haba get, haba keumeunangan. he bansa yehuda, peuraya kheueh uroe roya gata dan tapeulheueh kheueh kaoi gata ubak po teu allah. nanggroe gata hana le jijajah le ureueng jeuhet. awaknyan ka geupeuhanco bube nyang na. he niniwe, deungoe kheueh nyoe! nyang keuneuk peurusak gata ka trok jiteuka! jaga kheueh kuta-kuta peutahanan! jaga kheueh teuma bubena rot! meusiab kheueh keu tajam murang. (keubit, tuhan geupeupuleh keumeugahan israel, mangat jeuet lagee yoh ilee, sigohlom jireubot le musoh-musoh jihnyan.) peurisai musoh wareuna jih mirah, dan seuragam awaknyan lagee darah. musoh ka siab keuneuk jirungkom. lagee apui, beuso geuritan jihnyan meuk-

ilat. bandum guda awaknyan jilumat-lumat. bak rot ueh, bubena geuritan jijak deungon beubaih. nibak padang, awaknyan jimeulet-let. deuh jih lagee suwa nyang hu meuble-ble, jimeulet tajam lagee geulanteue. bubena peuwira jimeuhoi maju; awaknyan meugantoh-gantoh watee jiseureubu. babah pintoe ie banmandum krueng ka habeh teuhah, dan subra kheueh bansaboh meuligoe! ratu ka hase jidrob, deundayang jihnyan ah euh dan jimo ba-e, awaknyan apoh apah lagee cicem leuek, dan jipeh-peh dada sabab meuduka. rakyat niniwe jiplung meuhambo, lagee ie jiteubiet bak seuneulob nyang hanco. na teudeungoe su meudumpek, "pioh, pioh!" teuma hana nyang jitem woe lom. reupah kheueh bandum meuh dan pirak awaknyan! hareuta nyang na bak banda nyoe keubit meulimpah ruwah! niniwe ka hanco, seungue dan tho kreg. ate ka jeuet keutabeue sabab teumakot. teut ka jeuet keuleumoh dan yo meukot-kot. muka bandum ureueng ka jeuet keupucat dan masam. dipat kheueh banda nyan bak saat nyoe? banda nyang lagee guha teupat singa meueumpung? teupat aneuek-aneuek singa teubri makheun, teupat tujuan singa agam dan singa inong, teupat nyang aman keu aneuek-aneuek jih. yoh masa ilee disinan singa jiteugom mangsa jih, dan jipriek-priek disinan keu inong dan aneuek-aneuek jih. lam uempueng singa nyan ka habeh peunoh deungon uengkot-uengkot sie hase jipeucrok le singa nyan. "ulon nyoe musoh gata," geupeugah le tuhan nyang mahakuasa. "geuritan-geuritan gata ulon tot habeh. sipa-i gata mate dimideun prang, dan ulon kucok peue-peue mantong nyang ka gata cok bak ureueng laen. peue-peue nyang jituntut le bandum utosan gata hana teudeungoe le." ceulaka kheueh banda nyoe nyang peunoh deungon sulet dan seumeupoh mate; peunoh ngon barang rampasan atawa barang jarahan. deungoe kheueh su peunyenuet dan grak-gruk su ruda, grak langkah guda plung dan geuritan meuguncang. pasokan meuguda jiseurang peunoh seumangat, peudeueng meuble-ble dan kapak meukilat. ureueng nyang mate manyet meugile han ek teukira, manyet awaknyan meugageueng dan meutamom sapan sapa, watee jijak ureueng meugantoh meuhila. niniwe lunte nyan teungoh geubri hukuman. ceudah jihnyan gagah lumpah na. jai that bansa nyang ka jisihe, dan jibujuk ngon rayuan. tuhan nyang mahakuasa meufeureuman, "he niniwe, gata lon seksa! ija nyang meulekek nibak gata ulon suet dikeue bansa nyang rame, deungon nyan ayeub gata jikaloe le awaknyan. ulon peujeuet gata lagee barang nyang kutoe dan luwat, dan lon geulawa gata deungon kutoran; lon peujeuet gata bahan tontonan. nyang kalon gata jipeujioh droe dan jipeugah, 'niniwe nyang na tinggal na kheueh runga-runga beulaka! soe nyang teutot meuseudeh deungon jihnyan? hana ureueng nyang jitem bri hiboran keu jihnyan.' " he niniwe, hana mungkin gata leubeh get nibak tebe, ma banda nanggroe meuse? tebe nyan teuduek jih bak bineh krueng nyang lindong jihnyan sibagoe binte beuton. nyoe, krueng nil nyan kuta peutahanan jih. tebe jimat peurintah ateuh sudan dan meuse, dan kuasa jihnyan hana meubataih; libia dan put na kheueh sahabat jih. bahpi lagee nyan,

peunduduek tebe jiteun dan ji angkot u teupat
nyang teuboih. di tieb-tieb simpang-simpang rot,
aneuk-aneuk jihnyan jipoh sampoe mate. bubena
ureueng rayeuk awaknyan jibeuleunggu deungon
rante dan jijok-jok keu ureueng-ureueng nyang teun
awaknyan. he niniwe, gata pih pansan sabab mabok.
gata pih ta useuha jeuet teuhinda nibak musoh-
musoh gata. bandum kuta gata jeuet lagee bak ara
nyang peunoh deungon boh nyang masak. meun-
yoe bak ara nyan teuguncang, bubena boh jih rhot
lam babah ureueng nyang keuneuk pajoh boh ara
nyan. tantra-tantra gata leumoh lagee ureueng in-
ong dan nanggroe gata meubacut pih hana meudaya
jihadab musoh. apui jipeuhangoh bubena palang pin-
toe geureubang gata. crong kheueh ie keu takeubah
simantong gata jikeubok, dan tapeukong kheueh
kuta-kuta gata! ta bloh-bloh kheueh lam leuhob keu
teupeuget batee bata, dan peusiab kheueh acuan-
acuwan keu teucetak batee bata nyan! peue mantong
nyang gata peubuet, sia-sia mantong, sabab gata pasti
habeh hangoh teutot atawa mate dimideuen prang.
gata teusampoh lagee hase ladang jipajoh le daruet.
gata meutamah jai lagee kawan daruet! ureueng-
ureueng meukat gata leubeh le nibak bintang di
langet! teuma bak saat nyoe awaknyan teusam-
poh hana meubeukaih, lagee daruet nyang jikeupak
sayeub dan laju jipo sampoe gadoh. bubena ure-
ueng rayeuk dan peujabat gata lagee kawan daruet
nyang meulindong ubak beuton-beuton oh teuka si-
juek. teuma oh ka lheueh mata uroe jiteubiet, ji-
hnyan laju jipo dan gadoh; hana meusidroeu nyang
teupeue ho awaknyan jijak. he raja nanggroeu asyur!
bubena gubunur gata ka mate, dan bubena bupati
gata ka teuh siumu masa. rakyat gata ka meu crebre
digunong-gunong, dan hana meusidroeu pih nyang
hase jiba awaknyan jipeuwoe lom teuma. cidra gata
hana hase teupeu ubat, dan luka-luka gata hana hase
teupeupuleh. bandum ureueng nyang deungoe haba
keuhai keuhancoran gata jipeh paleuet sabab harok
raya. sabab bandum ureueng ka meudeurita sabab
keujeuhetan gata nyang hana keuneulheuh nyan.

nyoe peusan nyang geupeusampoe le tuhan ubak nabi habakuk. ya tuhan, sampoe an pajan ulon harok meulakee tulong? pajan droeneueh neudeungoe dan neupeuseulamat kamoe nibak jitindeeh le gob? pakon droeneueh peubiyeu ulon ngieng keujeuhetan nyang meunan le? trok ate droeneueh neukalon peulangaran nyang meunan jai? dipat mantong na keuhancoran dan keukeurasan, dan ureueng meulo dan peuseuliseh paham. hukom jianggag hana dan keuadalan hantom na jipeudong. ureueng jeuhet leubeh teuga ateuhe ureueng nyang juJoe, dan keuadalan jiputa balek. oh lheureh nyan tuhan meufeuruman ubak umat gobnyan, "ngieng kheueh bansa-bansa bansilingka gata, teuma gata hireuen dan teuceungang. sabab bak jamen gata ulon lon peubuet peue-peue mantong, nyang hana gata peucaya meunyo teuma teucalitra ubak gata. bansa babel nyang beuhe dan ganah nyan lon peujeuet keu bansa nyang meukuasa. awaknyan meubareh keujiteubiet nibak nanggroe jihnyan dan jijeulajah bansigom donya keu teupeutaklok bansa-bansa laen. dipat mantong awaknyan jipeuteuka teumakot; deungon sombong awaknyan jitulak bandum hukom teukeucuali nyang sisuai deungon keuheundak awaknyan keudroe. guda awaknyan leubeh bagaih jiplueng nibak rimueng tutul, dan leubeh ganah nibak ase srigala nyang deuk. pasokan meuguda awaknyan jiteuka nibak nanggroe-nanggroe nyang leubeh jioh; awaknyan jiteuka lagee kleung seumama. sipa-i awaknyan jiseureubu keu jipeubuet buet nyang keujam, bandum ureueng yo watee jikalon awaknyan jiteuka. tawanan awaknyan hana ek teukira jeumeulah jih. awaknyan jihina raja-raja dan jipeukem bubena peugawee manyang. jianggag hana tieb-tieb kuta, dan jitamon tanoh laju geureupah kuta nyan. dan lagee angen plueng jibeurangkak kheueh ureueng-ureueng nyang peudewa teunaga jih keudroe." tuhan, yoh ilee droeneueh na kheueh po teu allah, droeneueh allah ulon nyang suci dan keukai. tuhan, allah ulon dan peulindong ulon, bansa babel nyan droeneueh pileh dan droeneueh peujeuet peukasa ji jihukom kamoe. teuma pakriban droeneueh ek neungieng ureueng-ureueng jeuhet nyang keujam nyan? kon kheueh droeneueh lumpah that suci keu neupandang keujeuhetan? bukan kheueh droeneueh meuras luwat watee neukalon keuhana adelan? jadi, pakon droeneueh seungab mantong watee ureueng saleh jipeuhanco le ureueng doraka? pakon manusia droeneueh anggab lagee engkot lam laot, dan lagee sidom mirah nyang hana peumimpen? bansa babel jidrob ureueng-ureueng deungon kawee, siulah-ulah awaknyan uengkot. ureueng-ureueng nyan jibahue u dalam jeue dan bansa babel mesukaria deungon hase awaknyan. oh lheurehnyan jeue nyan awaknyan seumah dan awaknyan bri peuseumahan keureubeuen, sabab, deungon jeue nyan awaknyan ka meuteume rezeki nyang meulimpah ruwah dan ka jeuet keu makmu. ek kheueh awaknyan hana pioh-pioh jisuet peudeueng lam sarong dan geupemate bansa-bansa ngon hana amphon? ulon keuneuk ek ubak meunara teumpat jaga lon, dan ulon preh peue nyang keuneuk geupeugah le tuhan ubak

ulon, dan pakriban jaweueb gobnyan ateuhe keuhan ulon. tuhan geujaweueb ulon lagee nyoe, "keuheueh deungon nyata ateuhe keupeng tanoh kliet, peue nyang ulon peugah ubak gata, mangat jeuet teubaca deungon mudah. cetet kheueh nyan, sabab bak saat nyoe gohlohm watee jih. teuma watee jih reujang teuka, dan peue nyang ulon tanyong ubak gata pasti teujadi. bahpi leumah jih mantong treb, teuma tapreh mantong! saat nyan pasti teuka dan hana teupeupreh le. dan ingat kheueh: ureueng nyang jeuhet hana seulamata, teuma ureueng nyang peubuet keuheundak po teu allah udeb sabab keuseutiaan jihnyan ubak allah." keukayaan nyan sabe teupeungeut jihnyan. ureueng nyang leuha nyan angkuh dan geulisah. lagee mawot, mawot nyan pih hantom na puih; bansa deumi bansa laju jireubot. teuma bandum nyang jipeutaklok nyan jipansi dan ji ejek-ejek jihnyan. awaknyan jipeugah, "teukutok kheueh gata sabab tatamon barang nyang bukan atra gata! padub na treb teuk gata peukaya droe deungon cara tapaksa ureueng-ureueng nyang meu utang ubak gata keu teubayeyeu utang awaknyan?" teuma deungon hana gata sadar, gata nyang ka tapeutaklok ureueng laen, jimeu utang cit teuma dan tapaksa mangat jibayeyeu bungong. musoh-musoh gata teuka sampoe gata teumakot luwa bisa. awaknyan jireupah hareuta gata! gata ka tareupah atra bansa-bansa nyang jai, teuma bansa-bansa nyang hana keunong gata reupah jireupah gata, sabab seumeupoh mate nyang ka gata peubuet, dan sabab keukeujaman ateuhe nanggroenanggroe, banda-banda dan peunduduek nyang na disinan. teukutok kheueh gata! gata tapeukaya keuluwarga gata deungon laba nyang gata teume seucara keujam, mangat rumoh gata keudroe aman dan teupeusie nibak keususahan dan beuncana. teuma reuncana gata nyan meuteume malee nibak keuluwarga gata. deungon tareupah bansa-bansa nyang le, gata ka tapeurgroe droe gata keudroe. dan bateebatee nyang na bak beuton jilakee jikutok gata, dan tameh-tameh rumoh jiseumurak jipeumaklum meulakee nyan. teukutok kheueh gata! gata tapeudong banda ateuhe dasai keujeuhetan dan tapeudong nyan deungon teupoh mate. bansa-bansa nyang gata peutaklok meususah payah hana meuguna, dan peuepeue nyang gata peudong habeh jiu et le apui. bandum nyan na kheueh keuheundak tuhan nyang mahakuasa. teuma lagee laot nyang peunoh deungon ie, meunan cit deungon bumoe peunoh deungon ieumeu peungeutahuan keuhai tuhan dan kuasa gobnyan. teukutok kheueh gata! gata tahina dan tapeumalee kawom teutangga gata; tapeusanetu ateuhe awaknyan teuhoyong-hoyong lagee ureueng mabok. bak saat nyoe ka kheueh trok watee jih gata teupeumalee, dan bukan keu teuhoreumat. keuhoreumat gata meu ubah jeuet keulaknat. tuhan geupaksa gata tajieb ie nibak lam cambong nyang meuasoe hukoman keu gata. gata tajieb dan meuhapit-hapit. gata takoh bak-bak kayee di uteuen libanon, dan bak saat nyoe gata keudroe nyang teukoh. gata tapoh mate bubena beulatang awaknyan, dan bak saat nyoe beulatang-beulatang nyan nyang peutakot gata. bandum nyan teujadi sabab seumeupoh mate dan keukeujaman nyang ka gata peubuet ateuhe

bandum nanggroe, banda-banda dan peunduduek-peunduduek jih. teukutok kheueh gata! gata tapeugah ubak kayee sikrak, "beudoh kheueh!" atawa ubak sineuk batee rayeuk, "beudoh kheueh!" peu kheueh hase saboh patong jipeugah sapeue-peue ubak gata? jeuet mantong patong nyan meulapeh ngon meuh dan pirak, teuma meunyoe nyawong teutab hana nibak patong nyan. keupeue guna jih patong beurala? nyan na kheueh buet manusia beulaka. dan nyang gata teume nibak patong nyan na kheueh dusta. sia-sia kheueh keupeucayaan ureueng peugot beurala ubak buet jaroe droe jih, nyang hana jeuet jipeugah haba nyan. tuhan na lam baet gobnyan nyang suci; bah kheueh bandum ureueng di muka bumoe ji-iem droe dikeue gobnyan. nyoe kheueh doa habakuk: ya tuhan, ulon deungoe keuhai buet-buet droeneueh, teuma rasa khitmat sampoe peunoh lam ate lon. kira jih buet nyang rayeuk nyan droeneueh ulang lom dan droeneueh peuleumah bak jamen kamoe nyoe. bah kheueh kamoe nyoe droeneueh gaseh bahpi droeneueh seu uem ate. droeneueh allah nyang mahasuci teuka di teman, droeneueh teuka di gunong-gunong paran. langet peunoh ngon keuangongan droeneueh; bumoe peunoh ngon puja dan pujoe ubak droeneueh. droeneueh teuka ngon cahya muble-ble, lam jaroe droeneueh jiteubiet cahya geumilang, disinan kheueh neusom kuasa droeneueh. neuyue peunyakot jikak dikeue droeneueh dan mawot jiseutot dilikot droeneueh. meunyoe droeneueh neupioh, bumoe meugeunta; meunyoe droeneueh neupandang, bansa-bansa teukeujot raya. gunong-gunong nyang abadi habeh teuprah-prah; buket-buket nyang keukai pih jipeumiyueb droe, bak buket-buket nyan kheueh droeneueh neujak yoh phon jamen purba. ulon ngieng rakyat kusyan ka teuka teumakot, dan ureueng midian yo ngon teutot. ya tuhan, sabab laot kheueh droeneueh jiek darah? atawa sabab kruengkrueng kheueh droeneueh reujang beungeh? neuek lam awan sibagoe guda dan geuritan prang, watee umat droeneueh neupeumeunang. aneuk beude droeneueh ka neukeubah, dan panah droeneueh ka siab keu neutimbak. laju bumoe droeneueh prah sampoe jeuet na padub boh krueng. teungieng ubak droeneueh, gunong-gunong meuguncang nibak langet jitron ujeuen lagee teuro. ie nyang na dimiyueb tanoh meugrum-grum jimeusu, geulumbang meugulong-gulong dan meubura-bura. cahya aneuk-aneuk panah droeneueh jiplueng ngon bagaih, kapak droeneueh muble-ble meukilat-kilat, dan jipioh kheueh mata uroe dan buleuen di teumpat droe. deungon beungeh that droeneueh laju neura-woh bansaboh bumoe; bansa-bansa neugilo-gilo deungon seu uem ate. droeneueh neulangkah maju keu neupeubeubaih umat droeneueh dan keu neupeuseulamat raja nyang droeneueh pileh. neuheuntam sampoe reubah peumimpen ureueng durjana, droeneueh sampoh habeh bubena murit jih awaknyan. panah-panah droeneueh teutimbak sampoe beusot peumimpen pasokan lawan watee sipa-i awaknyan teuka nyang teuga lagee angen badee, mangat kamoe jipeu crebre. awaknyan jikem-kem deungon galak lagee ureueng nyang deungon seungab-seungab jiteugom ureueng nyang hana sapeuena. deungon

guda droeneueh neubloh-bloh lam samudra raya dan laot yang puteh meukuboh busa. ban teudeungoe nyang, ate ulon meudok-dok dan bibi ulon yo meumet-met. ulon ka jeuet keuleumoh hana teunaga, kaki ulon meugantoh, dipat mantong ulon jak. ulon lon preh deungon teunang hukoman po teu allah ateueh ureueng nyang seurang. bahpi bak ara hana jimeuboh dan bak anggo hana anggo jih, bahpi musem pot boh zaiton hana meuhase dan hase gandum di ladang lumpah keucewa, bahpi bubiri-bubiri mate banmandum dan uempueng-uempueng beulatang peulara hana meuasoe, ulon geumbira sabe, sabab droeneueh tuhan po teu allah nyang peuseulamat lon. droeneueh neubri keu lon teunaga lagee kaki rusa, kaki ulon neupeuteuga. droeneueh neubimbeng ulon jeuet aman watee ulon jak bak gunong-gunong.

zefanya na kheueh aneuek kusyi. urotan sil-silah geuh rot miyueb u ateuah na kheueh kusyi, gedalya, amazia dan raja hizkia. nyoe kheueh feureuman tuhan ubak zefanya bak watee raja yosia bin amon geumat peurintah ateuah yehuda. tuhan meufeureuman, "ulon lon peuranab peue-peue nyang na di ateuah bumoe: bandum manusia dan beulatang, meunan cit deungon cicem dan uengkot. ureueng jeuhet lon peuhabeh. bandum umat manusia lon peubinasa, hana meusidroepi lon peubiyeu udeb. ulon, tuhan, ka lon pegah haba. ulon lon hukom peunduduek yerusalem dan bansaboh yehuda. seuh-seuh nyang seumah baal lon peuranab nibak teumpat-teumpat nyan. imeum-imeum nyang peutimang baal jipeutuwoe hana ji ingat le. ulon lon sampoh gleh soe-soe mantong nyang ek ateuah bubong keu jikak seumah mata uroe, buleuen dan bintang-bintang. meunan cit lon peuranab teuma awaknyan nyang seumah ulon dan meusumpah seutia ubak ulon, teuma jimeusumpah cit ateuah nan dewa milkom. ulon lon peubinasa awaknyan nyang hana jikak ubak ulon atawa jilakee bimbengan ulon dan nyang ka jitingga ulon dan hana jitem le jiseutot ulon." uroe tuhan ka rab that-that, bak uroe nyan po teu alah meutindak; sabab nyan, peuseungab droe kheueh dikeue gobnyan. tuhan teungoh meusiab-siab ke-neuek geujak cang umat gobnyan lagee keureubeuen peuseumahan dan gobnyan ka geu undang bubena musoh-musoh yehuda. "nibak uroe teucang-cang nyan," feureuman tuhan, "ulon lon hukom bubena ureueng rayeuk, bubena aneuek agam raja-raja, dan bandum ureueng nyang jiseutot tata cara ureueng aseng. ulon lon hukom bandum ureueng nyang meu iebadat lagee ureueng nyang hana jituri ubak ulon, dan nyang ceumucue dan nyang peumate gob keu teupeupeunoh rumoh majikan awaknyan deungon atra rampasan." "nibak uroe nyan," meunan kheueh feureuman tuhan, "teudeungoe su ureueng mo bak pintoe geureubang uengkot. su ureueng mo ba-e teudeungoe di gampong-gampong baro, dan su reuloh ngon reule nyang gram-grum teudeungoe di buket-buket. meuratok kheueh dan tamo kheueh watee gata deungoe nyan, he peunduduek banda nyang na di bagian miyueb, sabab bandum ureueng meukat dan ureueng-ureueng peu-utang peng ka mate keunong poh! bak watee nyan ulon lon cok suwa, dan lon peuteung bayeueng banda yerusalem. teuma lon hukom peunduduek nyang acuh mantong dan nyang puih deungon droe jih keudroe, dan nyang jimike bahwa ulon, tuhan nyang hantom na meutindak meunoe meudeh. atra awaknyan teureupah dan rumoh-rumoh awaknyan geupeuhanco. awaknyan jipeudong rumoh, teuma hana jiduek bak rumoh nyan. awaknyan ji-useuha jibuka lampoh anggo teuma hana ji-jieb ie anggo nyan." uroe peunghakeman tuhan ka to that-that, nyoe, ka to that, dan teuka deungon sagra. uroe nyan peunoh deungon keupeudehan, sampoe sipa-i-sipa-i nyang paleng hebat pih jikliek-kliek sabab putoh asa! uroe nyan uroe beungeh meubeungeh, keusuletan dan keusudahan, uroe keuhancoran dan peuhancoran, uroe seupot glab dan keusuraman, uroe nyang paleng seupot dan meusagob. siuroe suntok nyang teudeungoe su

beureuguih dan dumpek muprang nibak peujuang-peujuang nyang jiprang banda-banda meukuta dan meunara-meunara manyang. tuhan meufeureuman, "ulon lon peuteuka beuncana nyang le that ateuah umat manusia, sampoe awaknyan meuraba-raba lagee ureueng buta. awaknyan ka meudesya ubak ulon, dan bak saat nyoe darah awaknyan teusintong lagee ie, dan manyet-manyet awaknyan ka habeh brok di ateuah tanoh." bak uroe nyang lumpah gli nyan tuhan geupeuleumah beungeh gobnyan, dan bandum meuh dan pirak awaknyan hana hase jipeuseulamat awaknyan keudroe. bansaboh bumoe hanco meukeupeng-keupeng nyang jitot le apui beungeh gobnyan. deungon sikleb siklab laju geutarek peue-peue nyang meunyawong ateuah bumoe nyoe. he bansa-bansa nyang hana meumalee, sada kheueh sigohlom gata layee dan mala lagee bungong! insaf kheueh sigohlom trok uroe meureuka tuhan, dan u ateuah gata jitimpok le murka tuhan nyang hu lagee apui nyan. tagisa kheueh ubak tuhan, he bandum ureueng nyang miyueb ate di nanggroe nyoe, dan bandum ureueng nyang taat ubak peue-peue nyang geupeurintah. meutindak kheueh meunurot nyang geutem le tuhan, dan peumiyueb kheueh droe gata dikeue gobnyan. pat tateupeue gata teupeusie nibak hukoman bak uroe tuhan geupeuleumah beungeh gobnyan. di banda gaza hana meusidroepi pih nyang geupeuseulamat. askelon teuma seungue hana nyang keumiet. peunduduek asdod geu use nibak saboh seurangan nyang meudadak watee uroe peungeuh dan peunduduek ekron geuyue weeh nibak banda jih keudroe. teukutok kheueh gata, he ureueng filistin, bansa nyang tinggai bansipanyang pante. tuhan ka geupeuteutab hukoman keu gata. gobnyan geupeubinasa gata, hana meusidroepi nibak gata nyang na tinggai. daerah gata nyang rab ngon laot jeuet keu blang naleueng; jambo-jambo ureueng meurabee dan geurupoh-geurupoh bubiri jipeudong disinan. peunduduek yehuda nyang meuhase jipeulheuh droe, jiduek bak daerah gata nyan. awaknyan jirabee beulatang peulara nibak tanoh nyan, dan oh watee malam awaknyan jie di rumoh-rumoh ureueng askelon. sabab tuhan, po teu allah awaknyan teuma geulindong awaknyan lom dan geupeujeuet awaknyan udeb makmu lagee nyang ka-ka. tuhan nyang mahakuasa meufeureuman, "ka ulon deungoe bansa-bansa moab dan amon jihina dan jipeubeb umat ulon. awaknyan jipoh cakra ngon raya haba teuma jireupah tanoh umat lon. deumi ulon nyang udeb, alah bansa israel, ulon lon sampoh gleh moab dan amon lagee sodom dan gomora. nanggroe-nanggroe nyan peunoh deungon mon-mon sira dan rungarungka abadi nyang jitimoh le tamah meupaya. umat ulon nyang teupeusie teuma jireupah peunduduek awaknyan, dan jireupah tanoh awaknyan." meunan kheueh peunduduek moab dan amon geuhukom sabab awaknyan sombong dan angkuh, dan meunan cit sabab awaknyan ka jihina umat tuhan nyang mahakuasa. tuhan geupeujeuet awaknyan teumakot. gobnyan geupeuhanco bubena dewa-dewa nyang na di ateuah bumoe. laju banmandum bansa meueibadat ubak tuhan, maseng-maseng di nanggroe gobnyan keudroe. meunan cit deungon peunduduek sudan

geuhukom mate le tuhan. sabab nyan tuhan geupeu-
guna kuasa gobnyan keu geupeuhanco asyur. banda
niniwe teuma geupeujeuet seungue ngon seungab
dan guro nyan tho krenge. disinan kawan beula-
tang nyan meubagoe rupa ji eh-eh dan meureuhah.
kleng-kleng keutok-tok jipeugot uempueng nibak
teupat nyan dan jiklik-kliek ateueh peuradeuen. ci-
cem ak-ak jimeukrob-krob bak babah pintoe. kayee
ceumara nyan na nibak bangunan-bangunan nibak
banda nyan habeh teusuet. nyan kheueh nyan teu-
jadi nibak banda nyan ria geumbira nyan dan nyan
anggab droe jihnyan aman dan teuntram. peun-
duduek disinan jipike bahwa banda jihnyan nyan
paleng rayeuk di dalam donya. keubit that seungue
daerah nyan, hana nyan keumiet seulaen beulatang-
beulatang uteuen nyan meu uempueng disinan! soe
mantong ureueng nyan jijak rot banda nyan teukeu-
jot dan teumakot raya. teukutok kheueh yerasalem,
banda beujat nyan galak beurontak ubak tuhan dan
nyan teugom peunduduek jih keudroe! ceulaka
kheueh banda nyan han jitem teurimong peuin-
gat tuhan, dan hana teuma jitem deungoe peue-
peue nyan geuseugah, nyan hana jiseurah naseb
jih ubak tuhan, dan hana jilakee tulong ubak gob-
nyan! ureueng-ureueng rayeuk banda nyan lagee
singa nyan teumauem. hakem-hakem awaknyan
lagee ase seugala nyan deuk; awaknyan keubit that
leuha sampoe meusikrek tuleueng pi hana jitinggai
keusingoh beungoh. nabi-nabi awaknyan hana rasa
tanggong jaweueb dan hana jeuet teupeucaya; bubena
teungku imeum jipeukuto peue nyan teupeu khu-
sos keu tuhan dan jiputa balek hukom-hukom al-
lah deumi keu laba awaknyan keudroe. teuma tuhan
mantong na di banda nyan; gobnyan sabe geupeubuet
nyan beutoi dan hantom na nyan salah. tieb-tieb
beungoh gobnyan pasti geubri keuadelan ubak umat
geuh. teuma, ureueng nyan hana jituri ubak keua-
delan di banda nyan teutab jipeubuet jeuhet dan hana
meumalee. tuhan meufeureuman, "ulon ka jai that
lon peuhabeh bansa-bansa; banda-banda awaknyan
ulon peuhanco, meunan cit deungon beuton-beuton
dan meunara-meunara awaknyan ulon peujeuet keu
runka-runka. banda-banda awaknyan seungue
hana nyan keumiet dan rot-rot nyan na dalam
banda nyan seungue. ulon pike, 'jinoenyoe pasti umat
ulon jihoreumat ulon dan jipateh ubak peue-peue
nyan ulon peugah. teuntee kheueh awaknyan ji-
ingat ubak peulajaran nyan ka ulon peuruno keu
awaknyan.' teuma nyan deuh lon kalon, awaknyan
jipeubuet jeuhet leubeh bak nyan ka. teuma awaih!
preh mantong uroe jih ulon beudoh sibagoe nyan
meungadu. sabab ka lon peuputoh keu lon peusapat
bansa-bansa dan keurajeuen-keurajeuen guna keu
lon peurhot meureuka ulon ateueh awaknyan. bans-
aboh bumoe habeh tutong ngon apui beungeh ulon.
teuma oh kheueh nyan ulon ubah ate bansa-bansa
nyan, sampoe awaknyan jimeudoa ubak ulon man-
tong, dan hana ubak ilah-ilah nyan laen. bansa-
bansa nyan mandum jitaat ubak ulon. meunan cit
nibak sudan nyan jioh, umat ulon nyan meucree-
bre jijak dan jipeuseumah keureubeuen keu ulon.
bak watee nyan, he umat lon, gata hana peureulee
malee sabab ka tabeurontak ubak ulon. ulon lon

use soe-soe mantong ureueng nyan sombong dan
angkuh, dan gata hana ta beurontak le ateueh ulon
di buket ulon nyan suci. disinan teuma lon peu-
biyue tinggai teutab saboh bansa nyan miyueb ate,
nyan meuharab ubak lon tulong. awaknyan jeuet
tinggai disinan. ureueng israel nyan na mantong
tinggai, hana jipeubuet jeuhet le ateueh soe man-
tong; awaknyan hana meusulet le dan hana teuma ji-
teumipee. awaknyan makmu dan seujakteura, dan
hana meurasia teumakot keu soe mantong." he is-
rael, meusurak kheueh dan meuca-e! he yerasalem,
meugeumbira kheueh deungon sipeunoh ate! sabab
tuhan ka geupioh geuhukom gata; gobnyan ka geu
use bandum musoh gata. gata geulindong le raja
israel, tuhan gata keudroe. bak saat nyoe gata
hana peureulee le meurasia takot. teuma teuka wa-
tee ureueng-ureueng jipeugah, "he yerasalem, bek
kheueh teumakot dan tabeue ate. gata geulin-
dong le tuhan allah gata nyan peukasa. gata me-
unang sabab kuasa gobnyan. tuhan geumbira dan
meusuka cita sabab gata, dalam gaseh gobnyan geubri
ubak gata udeb baro. sabab gata, gobnyan meuc-
cae geumbira lagee ureueng nyan teungoh khanuri."
kheun tuhan, "malapeutaka nyan jiancam gata ka
ulon peugadoh. keuhinaan gata ka ulon sampoh. wa-
tee jih teuma teuka nyan teugom gata lon peuhanco,
dan ureueng lapee lon peuseulamat; bandum ureueng
nyan teuboih ulon peuwoe lom teuma. keuhinaan
awaknyan ulon ubah jeuet keuhoreumatan; dipat
mantong, bahpi bansigom bumoe, awaknyan jipeu-
mulia dan jipujoe. watee jih teuma teuka, peun-
duduek gata nyan meutabu beba lon peuwoe lom.
gata ulon peumeusyehu bansigom bumoe, dan keu-
makmuran gata lon peupuleh lom." tuhan ka geupeu-
gah haba.

bak thon nyang keudua geumat keurajeuen le raja darius atueh persia, bak tanggai sa buleuen nyang keu nam, tuhan meufeureuman deungon peurantara nabi hagai. peusan tuhan nyan geutuju ubak zerubabel bin sealtiel, gubunur yehuda, dan ubak imeum agong yosua bin yozadak. tuhan nyang mahakuasa meufeureuman ubak hagai, "bansa nyoe jipeugah bahwa gohlom watee jih keu teupeudong lom baet ulon." oh ltheuehnyan deungon peurantaraan nabi hagai, tuhan meufeureuman ubak umat gobnyan, "he umat ulon, peu kheueh ka watee jih nibak gata keu tinggai dalam rumoh nyang kong dan kukoh, seudangkan baet ulon mantong tinggai runga-rungka? cuba, tangieng kheueh keuadaan gata! gata ka tatabu bijeh jai lumpah na, teuma sayang that, nyang teupot cit bacut. bak gata na peunajoh, teuma hana seb keu teuputroe pruet gata. bak gata na anggo, teuma hana seb keu teupeupuih ate gata. bak gata na peukayan, teuma hana seb keu teupeu seu-uem tuboh gata. dan upah nyang jiteurimong le kawom buruh hana seb keu teusambong udeb awaknyan. peu kheueh hana sada gata, pakon hai nyan teujadi? jinoenyo, taek kheueh u buket-buket keu tajak cok kayee, laju peudong kheueh rumoh ulon; teuma ulon meurasal galak dan ulon jiseumah lom deungon cara nyang beuna. cuba, tangieng kheueh keuadaan gata! gata neuharab hase panen nyang meulimpah ruwah, teuma sayang that nyang gata teume cit bacut that; laju hase panen gata nyan tapeuweo, teuma bandum nyan ulon ploih, sampoe habeh jiba le angen. pakon ulon peubuet nyan? jaweueb jih na kheueh: sabab baet ulon mantong tinggai runga-rungka, seudang di gata bandum gigeeth that tapeudong rumoh gata maseng-maseng. nyan kheueh sabab jih ujeuen hana jitem tron sampoe hana seunaman nyang jitem timoh. ulon ka lon peuteuka musem khueng atueh tanoh dan buket-buket, atueh ladang-ladang gandom dan lampoh-lampoh anggo meunan cit atueh lampoh-lampoh zaiton, dan atueh banmandum seunimoh nibak tanoh nyoe, meunan cit atueh manusia dan beulatang dan peue-peue mantong nyang gata useuha." oh ltheueh nyan zerubabel dan yosua dan bandum umat israel nyang ka geuwoe lom nibak teumpat nyang teuboih di babel, jitaat bandum peue-peue nyang geupeugah le hagai, utosan tuhan nyan. awaknyan jipeubuet peue nyang geupeurintah le tuhan ubak awaknyan, sabab teumakot ubak tuhan. laju le hagai geupeusampoe ubak rakyat peusan tuhan bahwa tuhan ka geumeujanji teuma geulindong awaknyan. meunan kheueh tuhan geugrak ate gubunur zerubabel, teungku imeum agong yosua dan bandum ureueng nyang woe nibak teumpat nyang teuboih, mangat awaknyan bandum jigisa jak peudong baet tuhan nyang mahakuasa, po teu alah awaknyan. awaknyan jipeuphon meubuet tanggai dua ploeh peuet, buleuen nam nibak thon nyang keudua masa keurajeuen peumeurintah raja darius. bak tanggai dua ploeh sa, buleuen tujuh bak thon nyang cit teuma, tuhan meufeureuman lom meulalu nabi hagai. tuhan geuyue ubak hagai mangat geumariet ngon gubunur zerubabel, teungku imeum agong yosua, meunan cit ubak rakyat keu geupeusampoe peusan nyoe, "peu kheueh mantong lamkawan gata

nyang na taingat pakriban meugah jih baet ulon nyoe yoh masa illee? jinoenyo pakriban keuadaan jih. meunurot peundapat gata? bukon kheueh meubacut pih hana le meuguna? bahpi meunan, bek kheueh putoh asa, he gata bandum! bek kheueh tapioh tapeubuet nyan, sabab ulon teutab lon tulung gata. watee tateubiet lam nanggroe meuse, ulon ka lon meujanji sabe lon lindong gata. dan bak saat nyoe pih ulon mantong lon lindong gata. le sababnyan, bek yo gata. lam watee nyang to ulon lon gok-gok langet ngon bumoe, darat dan laot. bandum bansa lon peutakot dan hareuta beunda awaknyan jiba keunoe, sampoe baet ulon peunoh deungon hareuta keukayaan awaknyan. bandum meuh dan pirak nyang na lam donya nyoe na kheueh atra ulon. baet ulon nyang baro leubeh lagak nibak baet ulon nyang awai, dan disinoe ulon lon bri dame dan keumakmuram keu bansa lon." tuhan nyang mahakuasa ka geupeugah haba. bak tanggai dua ploeh peuet buleuen sikureueng bak thon nyang keudua geumat keurajeuen le raja darius, tuhan nyang mahakuasa meufeureuman lom ubak nabi hagai. kheun gobnyan, "lakee kheueh keuputosan ubak teungku-teungku imeum keuhai soai nyoe: meunyo na ureueng nyang jicok saboh cue uengkot sie nibak keureubeuen nyang jipeuseumah ubak tuhan, laju jipeuweo sira jipasoe lam lipat bajee jubah, dan oh ltheueh nyan deungon bajee jubah jih laju jicukeeh ruti atawa peue-peue nyang na peunajoh nyang teupeumasak, atawa anggo, atawa minyeuk zaiton, atawa peunajoh peue mantong, peu kheueh bandum nyan jeuet keusuci lom?" watee hagai geuseueue hai nyan, bubena teungku imeum geujaweueb, "hana." oh ltheueh nyan hagai geutanyong lom, "meunyo na ureueng nyang jeuet keukutoe sabab jicukeeh manyet, dan oh ltheueh nyan ureueng nyan laju jicukeeh ubak sapeue-sapeue peunajoh nyan, peu kheueh peunajoh nyan ka jeuet keukutoe teuma?" bandum teungku imeum geujaweueb, "nyoe, beutoi that!" oh ltheueh nyan hagai geupeugah lom, "tuhan meufeureuman bahwa peuratoran nyan keunong cit atueh umat israel di nanggroe nyoe dan atueh peue-peue mantong nyang awaknyan peuhase. le sababnyan, peue nyang awaknyan peuseumah atueh miseubah nyoe na kheueh kutoe." tuhan meufeureuman, "cuba, ngieng kheueh peue nyang ka teujadi sigihlom uroe nyoe, sigihlom baet ulon nyoe teupeugot! pakriban kheueh keuadaan gata bak watee nyan? gata ka ltheueh takalon sinamon gandom dan tasangka meuteume 200 kilogram gandom, teuma nyang na 100 kilogram mantong. gata tajak keu tatimok 100 aree anggo dalam tong anggo, teuma nyang na cit 40 aree. ulon ka lon peutreun angen seu-uem dan ujeuen batee keu teupeuhanco bubena seunaman gata, teuma gata teutab hana tatem woe ubak ulon. nibak uroe nyoe, tanggai dua ploeh peuet buleuen sikureueng, sandi baet ulon ka seulesoe teupeuduek! ngieng kheueh peue nyang teujadi phon saat nyoe. bahpi hana le gandom nyang tinggai, dan bak anggo, bak ara, bak deulima dan bak zaiton gohlom jimuboh, teuma phon saat nyoe ulon lon bri beureukat keu gata!" bak uroe nyan cit teuma, na kheueh tanggai dua ploeh peuet buleuen sikureueng, tuhan geubri peusan nyang keudua ubak

hagai, mangat geupeutrok ubak gubunur zerubabel. feureuman tuhan, "hana treb le langet dan bu-moe lon gok-gok, keurajeuen-keurajeuen nanggroe ulon peureubah dan kuasa awaknyan ulon peuhanco. geuritan-geuritan prang meunan cit deungon ureueng nyang jeuet keu supe geuritan prang nyan lon tunggeng sampoe meubalek-balek; bandum guda teuma mate ureueng-ureueng nyang pasang ateueh guda nyan saleng jipoh-mupoh. bak uroe nyan, gata zerubabel, hamba ulon, ulon baiat mangat tamat peurintah ateueh nan ulon. sabab gata kheueh nyang ka ulon pileh." tuhan nyang mahakuasa ka geupeugah haba.

bak buleuen keu lapan bak thon keu dua geumat keurajeuen le raja darius ateuhe persia, tuhan geupeusampoe peusan nyoe ubak ulon, nabi zakharia bin berekhyha dan cucoe ido. tuhan geupeurintah ulon mangat lon peugah lagee nyoe ubak umat gobnyan, "bak jamen dilee ulon, tuhan yang mahakuasa, lumpah beungeh keu indatu gata. teuma saat nyoe ulon peugah ubak gata: tawoe kheueh ubak ulon, dan ulon pi lon gisa ubak gata. bek lagee indatu gata. yoh masa ilee nabi geupeusampoe peusan ulon ubak awaknyan jeuet awaknyan bek nale jipeubuet jeuhet dan jipeubuet desya. teuma awaknyan hana jipeureumen dan hana jitem taat ubak ulon. dipat kheueh indatu gata dan nabi-nabi nyan bak saat nyoe? awaknyan ka hana le. meulalu nabi-nabi hamba-hamba ulon nyan, ulon peusampoe peurintah-peurintah dan peuingat-peuingat nibak lon keu indatu gata. teuma awaknyan teutab hana jipakoe sampoe awaknyan haroh jitanggonng akibat jih. laju awaknyan meunyeusai dan meungaku bahwa ulon, tuhan yang mahakuasa, ka lon hukom awaknyan yang sisuai deungan keusalahan awaknyan keudroe, dan sisuai teuma deungan yang ka ulon peuteuntee." bak tanggai dua ploh peuet buleuen syebat, nyan kheueh buleuen sibilaih, bak thon nyang keudua masa keurajeuen raja darius, tuhan geupeusampoe peusan gobnyan ubak ulon. bak saboh keumalon bak watee malam, deuh ulon kalon malaikat tuhan geugiduek ateuhe saboh guda mirah. gobnyan geupioh bak saboh panton di teungoh-teungoh bak kayee murad. dilikot gobnyan na teuma teudong padubboh guda nyang laen, na nyang mirah, nyang mirah jambee dan nyang puteh. laju ulon tanyong ubak gobnyan, "teungku po, peu kheueh makna jih banmandum nyoe?" gobnyan geujaweueb, "teuma ulon tunyok makna jih ubak gata. awaknyan geukirem le tuhan keu jipeureksa bumoe." bandum guda nyan jilapor ubak malaikat, "kamoe ka kamoe jeulajah bansaboh muka bumoe, teuny-ata donya nyoe teunang dan teuntram." laju malaikat nyan geupeugah, "tuhan yang mahakuasa, tujoh ploh thon treb jih droeneueh teumeureuka ubak yerusalem dan banda-banda nyang na di yehuda. trok an pajan droeneueh teutab beungeh dan hana neupeu amphon awaknyan?" tuhan geujaweueb ubak malaikat nyan deungan tutoe hana nyang teuhibo, dan malaikat nyan geuyue bak ulon keu lon peusampoe peue nyang ka geupeugah le tuhan yang mahakuasa, "ulon lumpah lon gaseh dan lumpah prihatin keu banda yerusalem, banda ulon nyang suci. teuma ulon lumpah beungeh keu bansa-bansa nyang meurasa aman dan teuntram. sabab watee ulon lon peuteun beungeh ulon nyan ateuhe umat lon, bansa-bansa nyan jitamah peundeuritan ateuhe umat ulon. bak saat nyoe ulon kugisa u yerusalem keu lon jak peu amphon banda nyan. baet ulon jipeudong lom dan banda yerusalem geupeupuleh lom teuma." malaikat nyan geuyue lom ubak ulon keu lon peusampoe peusan nyoe lagee nyoe, "tuhan yang mahakuasa meujanji bahwa banda gobnyan jeuet keumakmu lom dan bahwa sigoe teuk gobnyan geutulung yerusalem dan geuaku sibagoe atra milek gobnyan keudroe." nibak keumalon nyang laen, deuh ulon kalon peuet boh

lungkee leumo. laju ulon tanyong ubak malaikat nyang ka geumariet ubak ulon, "peu kheueh makna jih lungkee-lungkee nyan?" gobnyan geujaweueb, "lungkee-lungkee nyan na kheueh sibagoe lambang keurajeuen-keurajeuen nyang teuga nyang peucubre peunduduek yehuda, israel dan yerusalem." laju tuhan geupeuleumah ubak ulon peut droe utoh beuso nyang ba palee. laju lon tanyong, "peue meukeusut awaknyan jiteuka keunoe?" laju geujaweueb, "keuneuk teugok-gok dan keu teuguleng bansa-bansa nyang ka jipeuhanco meukeupeng-keupeng yehuda dan jipeu crebre peunduduek jihnyan." nibak keumalon nyang seulanjut jih leumah ulon ngieng sidroe ureueng agam bak jaroe jihnyan jimat talo sineupat. "ho keuneuk jak?" lon tanyong. "keuneuk jak uko yerusalem," jaweueb jih, "ulon keuneuk teupeue padub na panyang dan luwah banda nyan." oh lheueh nyan ulon ngieng malaikat nyang ka lheueh geu mariet deungan ulon nyan, geulangkah ukeue, dan sidroe lamkawan malaikat nyang laen laju geumeurumpok ngon gobnyan. malaikat nyang phon geupeugah ubak malaikat nyang keudua, "neujak kheueh bubagaih ubak peumuda nyan, dan neukheun laju bak jihnyan bahwa yerusalem peunoh ngon manusia dan beulatong peulara sampoe hana mungkin le teupeuget beuton ban silingka nyan. tuhan ka geumeujanji bahwa gobnyan keudroe nyang jeuet keu binteh beuton apui nyang jikeulileng banda nyan keu teulin-dong gobnyan tinggai disinan lam bandum kuasa dan keuagongan gobnyan." tuhan meufeureuman ubak umat gobnyan, "ulon ka lon peucubre gata u meubagoe peunjuru. teuma bak saat nyoe he ureueng-ureueng nyang teuboih, taplueng kheueh nibak babel dan tawoe kheueh u yerusalem. soe mantong nyang prang gata, saban cit ka jiprang boh ate lon." teuma tuhan yang mahakuasa geuyue bak ulon keu lon peusampoe peusan nyoe ubak bansa-bansa nyang ka jireubot umat gobnyan, "tuhan keudroe geulawan gata! dan gata jireupah le beukaih namiet-namiet gata keudroe. meunyoe hai nyan teujadi, gata tateupeue bahwa tuhan yang mahakuasa ka geuyue bak ulon." tuhan meufeureuman, "meuca-e kheueh deungan geumbira he peunduduek yerusalem! ulon tinggai lamkawan gata!" bak masanyan jai that-that bansa jimeuhadab ubak tuhan mangat jeuet keu umat gobnyan. gobnyan tinggai lamkawan gata, dan gata tateupeue bahwa tuhan geukirem ulon ubak gata. sigoe teuk bahwa yehuda jeuet keu milek khusus tuhan bak tanoh gobnyan nyang suci, dan yerusalem jeuet keu banda nyang paleng geusayang. tinggai kheueh gata banmandum dikeue tuhan! sabab gobnyan ka geubeurangkat nibak teupat geuh tinggai di syeuruga. nibak keumalon nyang laen, tuhan geupeuleumah ubak ulon teungku imeum agong yosua teungoh geudong dikeue malaikat tuhan. di sibilaih yosua, jidong kheueh jen nyang ka siab keuneuk jitudoh gobnyan. malaikat tuhan geupeugah ubak jen nyan, "seumoga tuhan geuhukom gata he jen! bah kheueh tuhan yang geusayang keu yerusalem geuhukom gata. ureueng nyoe lagee tungo kayee nyang teutarek lam apui hu." yosua geudong disinan sira geungui peukayan nyang lumpah kutoe. dan geupeugah kheueh le malaikat nyan ubak peubantu-

peubantu gobnyan nyang na di syeuruga, "neutiek kheueh peukayan kutoe nyang jingui le ureueng nyoe," dan ubak yosua gobnyan geupeugah, "desya gata ka ulon boih, keu gata lon jok peukayan nyang baro." laju gobnyan geupeurintah ubak peubantu-peubantu geuh keu geuyue peungui seureuban yang gleh bak ulee yosua. awaknyan jiturit mantong dan oh ka lheureh nyan awaknyan laju jipeungui peukayan nyang baro nyan ubak gobnyan deungon geukawai le malaikat tuhan. oh lheureh nyan malaikat nyan geupeusampoe haba tuhan ubak yosua, "meunyo gata tapatuh ubak hukom-hukom ulon dan tapeubuet tugaih-tugaih nyang ulon bri keu gata, teuma keu seulanjut jih gata jeuet keu peumimpin di dalam baet lon dan ta uroih peulataran disinan. ulon lon deungoe doa-doa gata, lagee ulon deungoe doa bandum malaikat nyang na bak bineh ulon. deungoe kheueh he imeum agong yosua, meunan cit gata teungku-teungku imeum nyang jeuet keu rakan gobnyan, gata bandum na kheueh lambang keu masa ukeue nyang get. bak masanyan ulon lon kirem hamba ulon nyang teuboh nan 'sang tunas'. ulon peuduek bak bineh yosua si aneuek batee nyang meusagoe tujuh nyang lon uke deungon tulesan-tulesan. dalam siuroe mantong ulon boih desya nibak nanggroe nyoe. meunyo uroe nyang ka teuka, tieb-tieb ureueng jita-wok kawom silingka gobnyan keu jiteuka dan jirasa dame dan seuntosa di teungoh-teungoh lampoh-lampoh anggo dan bak bak ara gata." malaikat nyang ka geuteuka ubak ulon nyan geujak lom laju geupeugoe ulon lagee geupeugoe ureueng teunget, "peue nyang gata kalon?" geutanyong le gobnyan. "saboh gaki panyot nyang teupeuget nibak meuh," jaweueb ulon. "bak ujong bagian atueh na teupat minyeuk, dan ban sikeulileng nyan na teuma tujuh boh panyot, nyang maseng-maseng na tujuh boh teupat dah. nibak blaih wie dan uneuen gaki panyot nyan na dua bak zaiton." oh lheureh nyan laju lon tanyong ubak malaikat nyan, "peue nyang teupeulambang le beunda-beunda nyan, teungku po?" "peu kheueh hana gata teupeue?" geutanyong le gobnyan ubak ulon. "hana teungku po," jaweueb ulon. malaikat nyan geuyue ulon jak peusampoe ubak zerubabel peusan tuhan nyoe, "bukon deungon teunaga tantra dan bukon teuma deungon teunaga gata keudroe gata meuhase, teuma na kheueh deungon roh ulon. bahpi nyang meulinteueng na bube gunung, nyan teukireuh dikeue gata. gata tapeudong lom baet ulon, dan bak saat gata tapeuduek batee nyang keuphon bak teupat nyan, di ureueng rame jipeugah, 'ah, lagak lagoena!' " laju teuka lom peusan nyang laen nibak tuhan. lagee nyoe geupeugah le gobnyan, "zerubabel ka jipeuduek sandi baet ulon, dan gobnyan geupeuseuleuso banmandum bangunan baet nyan. meunyo nyan teujadi, umat ulon jiteupeue bahwa ulon kheueh nyang ka kirem gata he zakharria ubak awaknyan. (10a)na nyang anggab remeh peuristiwa nyoe. teuma awaknyan jikalon zerubabel jipeuget peumbangunan baet ulon, dan awaknyan geumbira that." oh lheureh nyan ulon tanyong lom ubak gobnyan, "peue teuma makna jih bandua bak zaiton si blaih u wie dan uneuen gaki panyot nyan? peue teuma makna jih bandua cableueng zaiton bak sam-

peng bandua boh pipa meuh nyang jeuet keuteupat ji ile minyeuk zaiton nyan?" geuseuot le gobnyan ubak ulon, "peu kheueh hana gata teupeue?" "hana, teungku amphon," jaweueb ulon. gobnyan pi geupeugah, "nyan na kheueh dua droe ureueng nyang ka geupileh le tuhan po teu alam seumeusta dan geutun-yok mangat teulayani gobnyan." deuh ulon kalon lom, dan goe nyoe deuh ulon ngieng saboh kitab meugulong nyang jipo di manyang. malaikat nyan geutanyong peue nyang ulon kalon. jaweueb ulon, "na saboh kitab meugulong nyang jipo di manyang. panyang jih sikureueng metee dan luwah jih na peuet siteungoh metee." laju gobnyan geupeugah ubak ulon, "lam kitab meugulong nyan na teutuleh kutokan keu banmandum nanggroe nyoe. bak saboh halaman teutuleh tieb-tieb pancuri teupeuteubiet lam nanggroe nyoe. dan bak halaman nyang laen teutuleh teuma bahwa soe mantong ureueng nyang meusumpah peuleusu nyan pih teupeuteubiet. tuhan nyang mahakuaa meufureuman bahwa kutokan nyan rhot u atueh rumoh tieb-tieb pancuri dan rumoh tieb-tieb ureueng nyang meusumpah peuleusu. rumoh-rumoh nyan teutab keunong kutokan nyang na tinggai cit runka-runka." malaikat nyan teuka lom dan geupeugah, "ngieng! na lom nyang teuka!" "peue nyan?" ulon tanyong. geujaweueb le gobnyan, "saboh raga. nyan kheueh lambang desya keu banmandum nanggroe nyoe." raga nyan na tutob jih nyang teupeuget nibak timah. teungoh ulon ngieng-ngieng atra nyan, sinutob nyan teubeuot dan teunyata didalam raga nyan na sidroe ureueng inong nyan teungoh jiduek. malaikat nyan geupeugah, "ureueng inong nyoe sibago lambang keujeuhetan." laju geuteugon lom ureueng inong nyan udalam raga dan laju geutob babah raga nyan. ulon ngieng teuma u atueh dan deuh teuma ulon kalon dua droe ureueng inong teungoh jipo u atueh ulon. bak awaknyan na sayeueb nyang kukoh lagee sayeueb cicem cang iriek. raga bunoe awaknyan cok dan laju jibapo. laju ulon tanyong ubak malaikat nyan, "ho jiba le cicem cang iriek raga nyan?" geujaweueb le gobnyan, "u babel, disinan awaknyan jipeudong kuil keu jihnyan. meunyo kuil nyan ka seuleuso, keurajeuen nyan jipeuduek keu jiseumah." ulon meuteume lom keumalon nyang laen. goenyo deuh ulon ngieng peuet boh geuritan prang jiteubiet nibak dua boh gunung peurunggu. geuritan-geuritan nyan jitarek le guda nyang dua-dua boh saboh geuritan, nyang phon that guda mirah, nyang keudua guda itam, nyang keu lhee guda puteh dan nyang keu peuet gata meubalang. laju ulon tanyong ubak malaikat-malaikat nyan, "teungku amphon, peue makna jih bandum geuritan prang nyoe?" gobnyan geujaweueb, "awaknyan jijak ubak peuet jurusan oh ka lheureh meuhadab tuhan seumeusta alam. geuritan prang nyang jitarek le guda itam jijak u babel siblahi utara. guda puteh jituju ubarat dan guda balang u nanggroe seulan." watee gata nyang meubalang nyan jiteubiet, awaknyan leumah hana saba keu jijak peureksa bumoe. malaikat nyan geupeugah, "tajak kheueh laju tapeureksa bumoe!" laju jijak kheueh awaknyan. oh lheureh nyan malaikat nyan geumeuhoi ulon, "guda nyang jijak u babel nyan ka teupeureuda beungeh tuhan." tuhan geubri peusan nyoe ubak ulon. kheun

gobnyan,"cok kheueh laju peuseumahan nyang jipeuseumah le heldai, tobia dan yedaya, na kheueh ureueng-ureueng nyang ban jiwoe nibak teupnat nyang teuboih di babel. taba kheueh laju beubagaih peuseumahan awaknyan u rumoh yosia bin zefanya. nibak meuh dan pirak nyang jibri le awaknyan, peuet kheueh saboh mahkota dan keubah kheueh laju ateuh ulee teungku imeum agong yosua bin yozadak. jak peutrok ubak awaknyan bahwa ulon, tuhan nyang mahakuasa meufeureuman, 'ureueng nyang teupugah sang tunas, meuhase diteupnat jih tinggai dan jihnyan jipeudong lom baet tuhan. jihnyan kheueh nyang teuma peudong baet ulon dan jiteurimong keuhoreumatan lagee sidroe raja, dan jihnyan jimat peurintah ateuh rakyat jih. sidroe teungku imeum jidampeng jihnyan dan awaknyan meubuet meusajan deungon rukon.' mahkota nyan jikeubah di baet ulon keu teupeuingat heldai, tobia, yedaya, dan yosia. ureueng-ureueng rame teuka nibak teupnat nyang jioh dan jitulung peudong lom baet ulon. meunyo teupeudong baet ulon nyan ka seuleusoe, awaknyan jiteupeue bahwa ulon kheueh tuhan nyang mahakuasa ka ulon kirem gata ubak awaknyan. bandum nyan teujadi meunyo awaknyan bit-bit jiseutot ubak peue-peue nyang ulon peurintah, tuhan po teu allah awaknyan keudroe." bak tanggai peuet beleuen kislew, na kheueh buleuen sikureueng, bak thon nyang keu peuet geumat keurajeuen le raja darius, tuhan geupeusan lom ubak ulon. peunduek betel ka jikirem sarezer dan regem-melek meunan cit aneuk buah awaknyan u baet tuhan nyang mahakuasa keujjak lakee beureukat gobnyan. dan awaknyan jiyue cit tanyong ubak imeum-imeum dan bubena nabi, lagee nyoe, "peu kheueh mantong peureulee kamoe peuba-e ateuh keuhancoran baet tuhan deungon puasa tieb-tieb buleuen keulimong lagee nyang ka kamoe peubuet meuthon-thon treb jih?" nyoe kheueh peusan tuhan nyang teuka ubak ulon. feureuman gobnyan, "tapeusampoe kheueh ubak bandum peunduek nanggroe nyoe dan ubak teungku-teungku imeum, bahwa puasa dan meuba-e nyang awaknyan peubuet bak buleuen keulimong dan keutujuh nyang treb jih tujuh ploh thon nyoe kon kheueh peunghoreumatan bak ulon. meunan cit watee awaknyan teungoh jimakheun dan jijieb ie, awaknyan jikak peupueh ate jih keudroe." nyan kheueh nyang geupeugah le tuhan meulalu nabi-nabi bak jamen dilee bak watee yerasalem mantong geudeuk dan peunduek disinan makmu. bak watee nyan ureueng hana tinggai di gampong-gampang dan bak-bak bineh banda mantong teuma cit bagian seulan dan bak gaki-gaki buket di siblahi ubarat. tuhan nyang mahakuasa geubri peusan nyoe ubak ulon, "meuthon-thon nyang ka ltheueh ulon bri peurintah lagee nyoe ubak umat lon, 'gata haroh tapeubuet ade, beuna gaseh sayang dan jroh ate ateuh seusabe gata. bek kheueh tatindeh ureueng inong balee, aneuek-anuek yatem ngon muntui, ureueng-ureueng aseng nyang na tinggai teutab di teungoh-teungoh gata, atawa soe mantong nyang dalam keuadaan susah. dan bek teuma tareuncana nyang jeuhet ateuh sabe keudroe-droe gata.' teuma umat ulon kreueh that ulee mubacutpi hana jitem deungoe; awaknyan

jisumpai geulinyueng jih keudroe mangat bek teudeungoe sapeue. awaknyan jipeukreueh ate jih keudroe sampoe kreuheh lagee batee. ulon beungeh that sabab hana jiturot peue-peue nyang ka lon peurunoe ubak awaknyan deungon peurantaraan nabi-nabi nyang ka u likot. ulon hana lon jaweueb doa awaknyan, sabab awaknyan pih hana jitem deungoe watee ulon peugah haba. lagee angen badee, ka ulon sampoh awaknyan sampoe awaknyan teupaksa tinggai di nanggroe-nanggroe aseng. tanoh nyang gumbo dan subo nyan ka tinggai seungue dan ka jeuet keu tanoh nyang tandus." tuhan nyang mahakuasa geubri peusan nyoe ubak ulon, "ulon meuheut that keuneuk lon tulung yerasalem sabab ulon lumpah lon gaseh keu peunduek disinan, dan sabab geunaseh ulon nyan, ate lon seueum keu musoh-musoh banda nyan. ulon lon woe u yerasalem, banda ulon nyang suci nyan. yerasalem jituri le gob sibageo banda nyang seutia, dan buket tuhan nyang mahakuasa teuhoi nan buket suci. lam padang banda yerasalem, jiduek-duek lom abusyiek-abusyiek dan nek-nek inong nyang ka tuha that-that dan watee jikak-jak teupaksa jimeutungkat. rot-rot nyang na lam banda peunoh lom deungon aneuek-anuek manyak nyang teungoh ji meuen-meuen. hainyan mungenk mustahe nibak ureueng-ureueng nyang mantong udeb nibak bansa nyoe, teuma hana mustahe nibak ulon. ulon lon peuseulamat bansa ulon di nanggroe-nanggroe teupnat awaknyan ka teuangkot, dan ulon ba awaknyan lom di timu dan barat, akheji awaknyan tinggai lom di yerasalem. awaknyan teuma jeuet keu umat ulon dan ulon jeuet keu allah awaknyan. ulon lon peurintah awaknyan deungon seutia dan ade." tuhan meufeureuman ubak umat gobnyan, "peukong kheueh ate gata! bak saat nyoe tadeungoe tutoe haba nyang ka ltheueh geupeugah le nabi-nabi bak watee keunaleung teupeudeuk, keu teupeudong lom baet ulon. sigohlom masanya hana nyang hase jisiwa teunaga manusia atawa beulatang, dan hana nyang meurasa aman nibak jipeukaru le musoh. ulon ka lon pupok sidroe lamkawan ureueng deungon nyang laen. teuma bak saatnyoe ureueng-ureueng nyang mantong udeb nibak bansa nyoe lon peusanaut meubeda deungon nyang ilee. awaknyan jitabu bijeh deungon dame. bak-bak anggo awaknyan jimuboh, tanoh awaknyan jipeuteubit hase, dan ujeuen jitron deungon meulimpah ruwah. bandum beureukat nyan ulon bri keu ureueng-ureueng nyang mantong udeb nibak bansa nyoe. le peunduek yehuda dan israel! yoh masa dilee, meunyo na ureueng-ureueng aseng saleng jikutok, awaknyan jipeugah, 'seumoga bala nyang rhot ateuh yehuda dan israel nyan pih rhot u ateuh gata!' teuma ulon lon peuseulamat gata, dan bubena ureueng-ureueng aseng nyan jipeugah sabe keudroe-droe, 'seumoga beureukat nyang geuputeron ateuh yehuda dan israel, atrapi beujitron ateuh droe gata!' sababnyan peukong kheueh ate gata dan bek kheueh teumakot!" tuhan nyang mahakuasa meufeureuman, "watee indatu gata jipeujeuet ulon sampoe beungeh, laju ulon cok peunutoih bahwa awaknyan haroh ulon hukum deungon leubeuh brat. ulon hana lon ubah peue nyang ka ulon peuputoh nyan, dan teutab ulon laksana. teuma bak saat

nyoe ulon keuneuk bri beureukat keu peunduduek yerusalem meunan cit keu peunduduek yehuda. le sabab nyan, bek kheueh teumakot. nyoe kheueh peurintah-peurintah nyang haroh gata peubuet: meunyo tameututoe, peugah kheueh nyang beutoi ubak sabe keudroe-droe gata. tabri kheueh keuputosan nyang ade dan nyang teuba ubak dame. bek kheueh tareuncana nyang jeuhet ubak sabe keudroe-droe gata. bek kheueh meusumpah peuleusu. ulon banci keu nyang sulet dan keuhana adelan meunan cit ubak buet poh mupoh." tuhan nyang mahakuasa geubri peusan nyoe ubak ulon keu umat gobnyan, "puasa nyang jipeubuet bak buleuen nyang keu peuet, keu limong, keu tujoh, dan keu siploh nyan jeuet keu peurayaan-peurayaan nyang peunoh kegeumbiraan dan keuseunangan keu peunduduek yehuda. cinta kheueh ubak keubeunaran dan keudamean!" tuhan nyang mahakuasa meufeureuman, "masa jih teuma teuka peunduduek nyang na lam banda-banda nyang laen jijak u yerusalem. peunduduek di banda nyang saboh jipeugah ubak peunduduek banda nyang laen, 'jak geutanyoe tajak seumah tuhan nyang mahakuasa dan talakee beureukat gobnyan. seutot kheueh deungon kamoe!' dan jai that-that bansa nyang teuga-teuga dan kha-kha jiteuka u yerusalem keu jijak seumah ulon tuhan nyang mahakuasa dan jilakee beureukat ulon. bak uroe-uroe nyang lagee nyan na siploh droe ureueng aseng jijak ubak sidroe ureueng yahudi dan jipeugah lagee nyoe, 'kamoe meuheut that keuneuk na laba lagee gata; sabab na kamoe deungoe bahwa po teu allah geubri beureukat keu gata.' " tuhan nyang mahakuasa ka geupeugah haba. nyoe kheueh peusan tuhan. gobnyan ka geucok keuputosan keuneuk geuhukom nanggroe hadrakh dan banda damsyik. bukan sukee-sukee israel mantong, teuma ma kota siria na kheueh atra tuhan. hamat nyang meubataih deungon hadrakh nyan pih atra gobnyan, meunan cit deungon banda-banda tirus dan sidon deungon banmandum keuahlian peunduduek disinan. tirus ka jipeudong kuta-kuta keu droe jih dan jitamon meuh keubit that jai meunan cit ngon pirak nyang le jih hana teukira sampoe ka lagee barang biasa nyang meusipreuk bansaboh rot lagee anou dan leuhob bak rot ueh raya. teuma le tuhan geupeujeuet awaknyan gasien. bandum keukayaan nyang na dalam banda nyan geutie u dalam laot dan banda nyan keudroe habeh jipajoh le apui. banda askelon dan gaza jingiang atra nyan laju jiteuka teumakot. meunan cit deungon ekron jikalon keudroe dan ka gadoh bandum nyang jiharab. gaza gadoh raja jih, dan askelon jeuet keuseungue hana nyang keumiet. asdod jiduek le bansa-bansa nyang meujampu lawok. tuhan meufeureuman, "ureueng filistin nyang sombong nyan lon peuranab. awaknyan hana jipajoh le uengkot sie nyang mantong meudarah atawa peunajoh laen nyang teutam. bandum ureueng nyang mantong na tinggai jeuet keu umat lon dan jiang-gab sibagoe siladum nibak sukee yehuda. ekron jeuet keu anggota umat ulon, lagee ureueng yebus bak jamen ilee. ulon kujaga tanoh lon dan ulon linteueng bandum pasokan aseng nyang keuneuk jak rot nyan. ulon hana lon peu idhin le ubak ureueng-ureueng nyang teugom ureueng laen jijak jajah umat ulon.

sabab peundeuritaan awaknyan ka ltheueh lon kalon." he peunduduek sion, meugeumbira kheueh! he peunduduek yerusalem, meusurak kheueh! ngiang kheueh! raja gata teuka ngon peunoh keumeunangan! gobnyan raja nyang ade nyang ba seulamat. deungon ate nyang miyueb gobnyan geuteuka geupasang keuleudee, saboh keuleudee nyang muda. tuhan meufeureuman, "geuritan-geuritan prang di efraim ulon tiek, bandum guda nyang na di yerusalem lon peuranab dan bubena aneuk panah lon peuhanco. raja gata jipeumaklum dame keu bansa-bansa. nibak laot nyang saboh u laot nyang laen gobnyan geumat kuasa, phon di krueng efrat trok ubak ujung donya." tuhan meufeureuman ubak umat gobnyan, "deumi janji nyang ka lon peuna deungon gata, meujanji nyang ka teupeusah deungon darah keureubeuen peuseumahan, teuma lon peubeubaih rakyat gata nyang meudeurita bak teupat nyang teuboih lagee ureueng nyan teukurong dalam mon hana meue. tawoe kheueh he ureueng-ureueng nyang teuboih, bak saat nyoe gata kana harapan. tawoe kheueh ubak teupat gata meureului, ulon teutab lon bri beureukat keu gata. deungoe kheueh: dua goe lipat gata lon bri beureukat sabab banmandum deurita nyang ka gata rasa. yehuda lon peuguna sibagoe panah pahlawan, dan israel sibagoe aneuk panah nyang siab keu teutimbak. peunduduek sion ulon peuguna sibagoe peudeueng; deungon peudeueng nyan ureueng-ureueng yunani lon heungko." tuhan geupeuleumah droe ubak umat gobnyan, lagee kilat bubena aneuk panah gobnyan geutimbak laju. tuhan nyang mahamanyang geuyueb beureuguih tanda geujak prang laju jijak maju lam angen badee di seulatan. umat gobnyan pasti geubri peulindongan, sampoe banmandum musoh hase awaknyan peutaloe. lagee su ureueng kuk nyang mabok jijieb ie kreueh, meunan dumpek awaknyan di mideuen prang. lagee darah keureubeuen nyang teuro u ateuh miseubah, meunan kheueh darah musoh awaknyan ka habeh ro. meunyo uroe nyan ka teuka, tuhan geupeuseulamat umat gobnyan, lagee ureueng meurabe jijaga bubiri jih nibak baha. awaknyan meucahya nibak tanoh tuhan, lagee peumata mahkota nyang hu muble-ble. keubit that jroh tanoh tuhan singoh teuma, keubit that ceudah dan jroh lumpah na! bak teupat nyang anggo dan gandom jitimoh luhu, teupeujeuet peumuda ngon dara meutamah teuga. meunyo musem khueng teuka, lakee kheueh ujeuen ubak tuhan. dan tuhan geupeusapat awan nyang peuteuka reudok, dan geupeutron ujeuen raya sampoe bubena ladang ka jibeudoh ijo dan mangat badan keu bandum manusia. di ureueng-ureueng laen jikak mita peutunyok ubak beurala-beurala dan ubak tukang-tukang ramai nasib gob, teuma jaweueb-jaweueb nyang awaknyan teurimong na kheueh haba sulet dan buet seumeunget mandum. na nyang peutrang keuhai lumpo, teuma nyang jipeutrang le awaknyan na kheueh keuji peusisat gata, dan piasan nyang geubri le awaknyan hana meuguna. sabab nyan rakyat ka meurebre lagee bubiri hana ureueng rabe. awaknyan meurana sabab hana soe nyang pimpenn. tuhan meufeureuman, "ulon beungeh lumpah ubak ureueng mat kuasa nyang pimpleu umat

lon, dan awaknyan lon hukom. teuma peunduduek yehuda na kheueh atra ulon, dan ulon, tuhan nyang mahakuasa lon peulara awaknyan. awaknyan lon peujeuet keuguda prang nyang paleng peukasa keu ulon. lamkawan awaknyan lon pileh peunguasa, peumimpin, dan panglima nyang peurintah ateuh umat lon." peunduduek yehuda meunang lagee peujuang-peujuang nyang jigilo-gilo musuh lagee jibloh-bloh lam leuhob ateuh rot raya. awaknyan meujuang sabab ulon, tuhan geutulong awaknyan, dan pasokan musuh nyang giduek guda geupeutalo le awaknyan banmandum. "peunduduek yehuda lon peuteuga, umat israel lon peuseulamat. ulon peuwoe awaknyan lom u nanggroe jih keudroe sabab ulon sayang keu awaknyan. teuma lon peusaneut awaknyan lagee bansa nyang hantom na ulon iengkeue. ulon kheueh tuhan allah awaknyan, bandum doa awaknyan ulon deungoe lom. umat israel jeuet lagee pahlawan nyang teuga, lagee ureueng nyang jieb ie anggo, awaknyan geumbira. keuturonan awaknyan phon nibak jamen trok bak jamen hana jituwoe keu peumeunang nyang ulon bri nyoe. awaknyan meusuka cita sabab buet nyang lon peubuet keu awaknyan. umat ulon lon tawok dan ulon peusaho sampoe habeh meusapat. awaknyan lon peubeubaih dan lon peujeuet leubeh bak nyang ka. bahpi ulon sipreuk awaknyan lamkawan bansa-bansa, awaknyan teutab ji-ingat keu ulon nibak teumpat awaknyan tinggai. awaknyan seulamata, meunan cit deungan aneuek-aneuk jih dan jiwoe meusigo-sigo u nanggroe jih-nyan keudroe. di meuse dan asyur, awaknyan ulon peuwoe. bak nanggroe jih keudroe awaknyan ulon keubah. meunan cit ulon ba awaknyan u gilead dan u libanon, dan ban sibuju nanggroe ka peunoh deungan awaknyan. meunyeo awaknyan jijeumeurang laot nyang payah, ulon, tuhan nyang seupot ateuh ie nyang meugulong meugulumbang; teuma tuwie krueng nil nyan tho hana meu ie bahpi meusitijoh. bansa asyur nyang sombong geupeuhina, dan nanggroe meuse nyang peukasa ka gadoh keukuasaan. ulon lon peukong umat ulon, awaknyan taat dan meubakti ubak ulon. he libanon, tapeuhah kheueh bubena pin-toe gata, mangat jeuet apui jitot bubena bak aras gata! he bak kayee daru, meuba-e kheueh, sabab ka reubah bubena bak aron, bak kayee nyang ceudah-ceudah ka habeh reubah. he bak-bak kayee raya nyang na di basan, tamo kheueh. sabab bubena uteun-uteun nyang raya ka habeh teuteubang rata ngon tanoh. deungoe kheueh mo ba-e nyang mat kuasa ka habeh teusampoh keujayaan awaknyan! deungoe su teumaem singa-singa nyang na lam gle; sabab ka habeh rusak teumpat tinggai awaknyan ban sipanyang krueng yordan. tuhan po teu allah meufeureuman ubak ulon, "neupeugot kheueh siulah-ulah gata tukang meurabe nyang rabe bubiri nyang keuneuk teusie. le ureueng nyang bloe jipoh mate bubena bubiri nyan deungan hana meuteume hukoman. awaknyan nyang peubloe sie bubiri nyan jipeugah, 'teupujoe kheueh tuhan! jinoenyoe geutanyoe meutamah kaya!' tukang-tukang meurabe nyan hana meurasa inseuh keu bubiri-bubiri nyang jipeulara keudroe. ulon hana le lon weueh keu soe mantong di nanggroe nyoe. ulon keudroe lon seurah bandum peunduduek nyoe ubak

bandum peunguasa. awaknyan jipeuhanco nang-groe nyoe, dan ulon hana lon reubot keukuasaan awaknyan." ulon, nabi zakharia, laju geubri upah le toke-toke bubiri keu lon rabe bubiri-bubiri nyang keuneuk teusie. bak ulon na dua krek tungkat; nyang saboh ulon boh nan "keumurahan" dan nyang saboh teuk lon boh nan "ikatan". oh lueueh nyan baro kheueh lon peuphon jaga dan lon peulara bubiri-bubiri nyan. ban lhee droe ureueng meurabe nyang bancia keu ulon nyan geuhabeh saba ulon. awaknyan ulon use lam watee si buleuen. oh lueueh nyan laju lon peugah ubak bubiri nyang meukawan nyan, "ulon hana kutem le lon rabe gata. nyang keuneuk mate bah kheueh mate, dan nyang keuneuk binasa bah kheueh binasa. dan nyang mantong tinggai bah kheueh saleng tameukrok-krok sabe keudroe-droe gata sampoe mate." laju tungkat nyang lon boh nan, "kemurahan" nyan ulon cok laju ulon wiet sibagoe tanda ka bateue peujanjian nyang ka geupeugot le tuhan deungan bandum bansa. bak uroe nyan cit teuma peujanjian nyan teupeubateue. banmandum toke-toke bubiri nyan jikawai ulon, awaknyan sada bahwa tuhan teungho geumeututoe meulalu peupeue nyang ulon peubuet. laju ulon peugah ubak awaknyan, "meunyeo teungku-teungku situju, tabri kheueh upah keu ulon; meunyeo hana, hana peue." laju le awaknyan jijok keu ulon lhee ploeh peng-pirak sibagoe upah lon. tuhan meufeureuman ubak ulon, "peutamong laju peng nyan dalam kaih baet ulon." dan laju ulon peutamong ban lhee ploeh peng-pirak nyan u dalam kaih baet tuhan. teuma dub nyan kheueh peunghargaan awaknyan keu ulon! oh ka lueueh nyan laju ulon wiet tungkat ulon nyang keudua, tungkat nyang ulon boh nan "ikatan", teuma bicah kheueh peusatuan yehuda ngon israel. dan meufeureuman kheueh tuhan ubak ulon, "tapeubuet kheueh sigoe teuk siulah-ulah gata tukang meurabe, teuma goenyoe sibagoe tukang meurabe nyang hana get. sabab ulon lon bri tugaih sidroe tukang meurabe keu jirabe kawan bubiri lon, teuma jihnyan hana jipakoe keu bubiri nyang gadoh; jihnyan hana jimita bubiri nyang sisat, dan hana teuma jipeu-ubat bubiri nyang luka, meunan cit hana teuma jibri makheun keu bubiri nyang mantong udeb. teuma jihnyan keudroe jipajoh sie bubiri nyang paleng teumbon dan jilot gukee beulatang nyan. teukutok kheueh tukang meurabe nyang hana meuguna nyan! jihnyan ka jittinggai kawan bubiri jih keudroe. deungan prang teupeu habeh keukuasaan jihnyan. jaroe jihnyan jeuet keu leumoh dan mata blaih uneuen jihnyan jeuet keubuta." nyoe kheueh peusan tuhan keuhai israel. tuhan nyang leueng langet, nyang cepta bumoe dan nyang bri udeb keu manusia, feureuman tuhan, "ulon lon peujeuet yerasalem lagee piala nyang meuasoe ie anggo; nanggroe-nanggroe teutangga jihnyan teuma jijeb ie anggo nyan dan laju mumang meuhapit-hapit lagee ureueng mabok. dan meunyeo yerasalem jikeupong, banda-banda di nanggroe yehuda nyang na mantong tinggai, nyan pih jikeupong. teuma meunyeo uroe nyan ka teuka, ulon lon peujeuet yerasalem lagee batee nyang geuhon; bansa toh mantong nyang jicuba-cuba jibeuot batee nyan meuteume bala. bandum bansa di ateuh donya meusaho jijak prang

yerusalem. bak uroe nyan bandum guda lon peujeuet bingung dan ureueng-ureueng nyang giduek atueh gada nyan ulon peupungoe, peunduduek yehuda lon kawai, teuma bandum guda musoh ulon peubuta. laju le keuluwarga-keuluwarga yehuda jimariet lam ate, 'tuhan nyang mahakuasa kheueh nyang bri teunaga keu umat gobnyan nyang tinggai di yerusalem.' bak uroe nyan bubena keuluwarga yehuda lon peujeuet lagee apui lam sinamon kayee atawa suwa nyang hu dimiyueb beurekah-beurekah gandom; awaknyan jipeubinasa bansa-bansa nyan, tuhan, nyang phonphon that lon peumeunang keu sipa-i yehuda, mangat keuhoreumatan nyang jiteurimong le keuturonan nabi daud dan peunduduek yerusalem hana leubeh nibak keuhoreumatan nyang jiteurimong le peunduduek yehuda nyang laen. bak uroe nyan ulon lon lindong peunduduek yerusalem; dan nyang paleng leumoh pih lamkawan awaknyan teuga lagee nabi daud. awaknyan jibina le keuturonan nabi daud lagee le malaikat lon, dan lagee le ulon keudroe. bak uroe nyan ulon lon peubinasa tieb-tieb bansa nyang jicuba-cuba jijak prang yerusalem. oh lheueh nyan keuturonan nabi daud dan peunduduek yerusalem ulon jok ate nyang harok ubak jipeubuet gaseh sayang dan galak jimeudoa. awaknyan jipandang jihnyan nyang ka jitob dan jipeumo ba-e lagee ureueng peuba-e aneuek tunggai jih nyang ka mate. awaknyan jimeuratok meuweueh-weueh, lagee ureueng nyang ka gadoh aneuek tuha. bak uroenyan na meuratok nyang paleng hebat di yerusalem, lagee jipeuratok hadad-rimon di panton megido. dan tieb-tieb keuluwarga nyang na di nanggroe nyan jipeuratok maseng-maseng keudroe; keuluwarga keuturonan nabi daud, keuluwarga keuturonan natan, keuluwarga keuturonan lewi, keuluwarga keuturonan simei, dan bandum keuluwarga nyan laen. tieb-tieb keuluwarga jimo ba-e droe jih keudroe, di ureueng-ureueng agam nibak tieb keuluwarga jimeuratok teuaseng nibak ureueng inong." tuhan nyang mahakuasa meufeureuman, "bak uroe nyan jiteubiet saboh mata ie keu teupeusuci keuturonan nabi daud dan peunduduek yerusalem nibak desya dan jiseumah beurala nyang ka awaknyan peubuet. bak uroe nyan lon sampoh bubena nan-nan beurala nibak tanoh nyoe, sampoe hana meusidroe pih nyang na teu ingat. bandum ureueng nyang jiaku droe jih nabi lon use meusajan ngon awaknyan nyang na jitamong roh jeuhet. dan meunyo mantong na ureueng nyang jipeugah bahwa jihnyan jipeusampoe peusan, ayah ngon ma jih keudroe jipeugah ubak jihnyan bahwa jihnyan haroh teuhukom mate, sabab nyang jipeugah nyan na kheueh beurak. meunyo ureueng nyan teutab aku droe teutab sibagoe nabi, jihnyan jitob sampoe mate le yah ngon ma jih keudroe. nibak uroe nyan, bubena nabi meurasaa malee keu meutindak sibagoe nabi. awaknyan hana jingui peukayan nabi keu jimeusulet dan jipeubangga nyang deuh-deuh jikalon. sikeubit jih, awaknyan jipeugah, 'ulon bukan nabi. ulon sidroe peutani nyang meubuet bak ladang siumu udeb.' dan meunyo na ureueng teumanyong ubak gobnyan, 'peue

luka nyang na bak dada gata nyan?', jihnyan jijaweueb, 'ulon keunong luka nyoe di rumoh rakan lon.' tuhan nyang mahakuasa meufeureuman, "beudoh kheueh, hepeudeueng, dan jak prang kheueh tukang meurabe nyang meukeureuja keu ulon! peumate kheueh jihnyan, dan bubena bubiri meurebre. ulon teuma lon jakprang umat ulon, dan bansaboh nanggroe dua per lhee nibak peunduduek disinan mate. siper lhee nyang na seulamata. dan awaknyan lon peusuci lagee pirak nyang jipeu gleh le apui. awaknyan lon ujoe lagee ureueng ji ujoe meuh. laju awaknyan meudoa ubak ulon, dan ulon lon jaweueb awaknyan. ulon lon peugah ubak awaknyan bahwa awaknyan na kheueh umat lon, dan awaknyan pi meungka bahwa ulon kheueh tuhan allah awaknyan." uroe mahkamah tuhan ka to that. teuma yerusalem jireupah, dan hase rampokan nyan jibagi-bagi dikeue mata gata. tuhan geupeusapat banmandum bansa mangat jijak prang yerusalem. banda nyan jireubot, bubena rumoh disinan jitamong le pancuri, dan bubena ureueng inong lam rumoh nyan jipeukosa. siladum nibak peunduduek disinan jiangkot u teupnat nyang teuboih, teuma nyang leubeh nibak nyan teutab tinggai di teupnat nyan. laju tuhan geumaju dan geumuprang ngon bansa-bansa nyan, lagee nyang ka geupeubuet bak jamen dilee. bak uroe nyan gobnyan geudong bak buket zaiton, siblaih u timu yerusalem. teuma buket zaiton teuprah le panton nyang luwah, phon di timu sampoe ubarat. siladum nibak buket nyan jiseuk u utara, dan siladum teuk u seulant. gata taplueng meulalu panton nyang teubagi buket nyan dua bagian. gata taplueng lagee indatu gata watee teuka geumpa bumoe masa keurajeuen uzia, raja yehuda. laju teuka kheueh tuhan po teu allah lon, geukawai le bandum malaikat. meunyo uroe nyan ka teuka, hana le udara leupie atawa eeh. nibak uroe nyan ka hana le seupot seupeut. uroe trang, meunan cit meunyo watee malam. teuma tuhan kheueh nyang teupeue pajan uroe nyan teuka. nibak uroe nyan, ie sijuek ji-ile di yerusalem; siladum nibak ie nyan ji-ile u laot mate dan siladum teuk u laot teungoh. ie nyan ji-ile sipanyang thon, bah kheueh watee musem ujeuen meunan cit watee musem khueng. teuma tuhan geumat peurintah sibagoe raja atueh banmandum muka bumoe; soe mantong ureueng jiseumah gobnyan sibagoe po teu allah dan jituri gobnyan deungon nan nyang saban. bansaboh nanggroe phon di geba di utara sampoe u rimon di seulant, nyan jeuet keudarat. teuma yerusalem manyang meulabong, leubeh manyang nibak tanoh sikeulileng nyan; banda nyan meutamah luwah phon di babah pintoe geureubang benyamin trok ubak pintoe geureubang sagoe, nyan kheueh babah pintoe geureubang phon dan nibak meunara hananel sampoe trok ubak teupnat teuprah ie anggo atra raja. ureueng rame tinggai deungon aman di banda nyan, hana ancaman dan peukubinaan. tuhan geupeutron peunyaket nyang lumpah parah atueh bandum bansa nyang ka jimuprang jilawan yerusalem. mata dan lidah awaknyan, dan bansaboh tuboh awaknyan brok seudangkan awaknyan mantong udeb. bak uroe nyan tuhan geupeujeuet bansa-bansa nyan lumpah bingung dan teumakot sampoe soe mantong ure-

ueng jidrob rakan jihnyan nyang na siblahi jih dan jiprang gobnyan. ureueng-ureueng agam di yehuda jimuprang keu jibila yerusalem. sibagoe hareuta rampasan awaknyan jicok bandum hareuta bansa-bansa bansilingka jihnyan, miseu jih meuh, pirak dan peukayan nyang meutumpok-tumpok. saboh peunyaketaeuen nyang lumpah parah keunong ateueh guda, bagal, unta dan keuleudee, dan bandum beulatang nyang na bak khimah musoh. oh lheurehnyan bandum ureueng nyang na mantong udeb lamkawan bansa-bansa nyang prang yerusalem, jijak ubak banda nyan keu jijak seumah raja, tuhan nyang mahakuasa, dan keu geupeuraya khanuri jambo on. meunyo na bansa nyang hana jitem jak u yerusalem keu jiseumah raja, tuhan nyang mahakuasa, teuma di nanggroe ureueng nyan hana jitron ujeuen. dan meunyo ureueng meuse hana jitem peuna khanuri jambo on, teuma keu awaknyan pi geupeutron peunyaketaeuen nyang geupeuteuka le tuhan u ateueh tieb-tieb bansa nyang hana jitem jak iebadat. nyan kheueh hukom nyang geupeutreu ateueh meuse dan ateueh bandum bansa nyang hana jitem peuna khanuri jambo on. bak uroe nyan bubena lonceng nyang na meugantung sibagoe peukayan guda geuke deungon tutoe haba nyang lagee nyoe, "geupeukhusus keu tuhan". panci-panci nyang na bak baet tuhan jihareuga lagee cambong-cambong peuseumahan dikeue miseubah. bandum panci di yerusalem dan bansaboh yehuda geupeu khusus keu jeuet keu hak milek tuhan nyang mahakuasa. peunduduek nyang peuseumah keureubeuen jingui atranyan keu jireuboih sie peuseumahan. meunyo masa nyan ka teuka, hana le ureueng meukat bak baet tuhan nyang mahakuasa.

nyoe kheueh peusan tuhan ubak maleakhi keu umat israel. tuhan meufeuereuman ubak umat gobnyan, "ulon kugaseh keu gata." teuma awaknyan jijejaweueb, "pakriban tuhan neugaseh ubak kamoe?" geujaweueb le tuhan, "bukon kheueh esau aduen nabi yakub? teuma yakub ulon gaseh, seudangkan esau ulon banci. daerah nyang meubuket atra esau ka ulon peuhanco, dan tanoh disinan ka ulon jok keu bubena beulatang juah nyang na di padang pasi." seukiraji keuturonan esau, ureueng-ureueng edom nyan jipeugah, "banda-banda kamoe ka geupeuhanco, teuma kamoe peudong lom," dan tuhan geujaweueb, "awaknyan jeuet mantong banda nyan jipeudong keula-i, teuma atra nyan teutab ulon peuhanco. awaknyan teuma teupeugah, 'nanggroe doraka' dan 'bansa nyang keunong meureuka nibak tuhan siumu masa.' " bansa israel jikalon keudroe, sira jipeugah, "keubiet that rayekut tuhan; kuasa gobnyan sampoe uluwa tanoh israel!" tuhan nyang mahakuasa geupeugah ubak teungku-teungku imeum, "sidroe aneuek jihoreumat keu ayah jih, dan sidroe peulayan jibri horeumat keu amphon jih. ulon nyoe bapak gata; pakon gata hana tahoreumat ulon? ulon nyoe amphon gata; pakon gata hana teumakot keu ulon? gata tahina ulon, teuma gata tatanyong, 'pakriban cara jih kamoe hina droeneueh?' deungon cara takeureubeuen peunajoh nyan hana pantai takeureubeuen ateueh miseubah lon. laju gata tatanyong, 'pakriban cara jih kamoe anggab droeneueh engeng?' deungon cara tapeukuto miseubah ulon. meunyeoe gata tapeuseumah keu ulon beulatang nyang buta, nyang saket atawa lapee, peu kheueh nyan bukan buet nyang salah? cuba tajok beulatang nyang lafee nyan keu gubunur! peu kheueh jihnyan galak dan jipeusanet gata deungon jroh?" jinoenyeoe, he teungku-teungku imeum, ci kheueh talakee ubak po teu allah mangat gobnyan geugaseh keu geutanyoe. gobnyan hana geujaweueb doa gata, dan nyan salah gata keudroe. tuhan nyang mahakuasa meufeuereuman, "leubeu get pintoe rumoh ulon teutob, sabab sia-sia mantong gata peuhu apui ateueh miseubah ulon. ulon hana galak keu gata, dan hana lon teurimong nyang gata peuseumah. ulon jihoreumat le bansa-bansa bansigom donya. dipat mantong na teutot keumeunyan keu jihoreumat nan ulon dan jipeuseumah keureubeuen-keureubeuen nyang patot, sabab bandum bansa jihoreumat ulon! teuma gata tahina ulon ta anggab miseubah ulon hana meuyuem, dan tapeuseumah disinan peunajoh nyang gata tulak. kheun gata, 'geutanyoe ka glak deungon bandum nyan, dan gata ta anggab phui ulon. gata taba beulatang nyang gata cue, beulatang nyang lapee atawa nyang saket keu gata peuseumah ubak ulon. gata pike lon teurimong nyang gata peuseumah nyan? teukutok kheueh sipeunipee nyang peuseumah keu ulon beulatang nyan hana meuguna, meunyeoe lamkawan beulatang peulara jihnyan na beulatang nyang get nyang ka jipeujanji keu ulon! sabab ulon kheueh raja agong, dan jihoreumat le bandum bansa." tuhan nyang mahakuasa geupeugah ubak teungku-teungku imeum, "nyoe kheueh peurintah ulon keu gata: horeumat kheueh ulon deungon buet gata. meunyeoe gata hana

tatem deungoe peue nyang ulon peugah, gata lon kutok. peue-peue mantong nyang gata teurimong sibagoes rezeki meu-ubah jeuet keukutok. nyang sikeubiet jih, peue-peue mantong nyang get nyanpi ka ulon kutok, sabab gata hana tapakoe nyang ulon peurintah. aneuek-aneuek gata lon hukom, dan muka gata ulon labo ngon ek beulatang nyang gata keureubeuen, dan gata jibahue ubak sinamon ek. dan tateupeue kheueh le gata peurintah nyoe ka ulon bri, mangat peujanjian ulon deungon teungku-teungku imeum, keuturonan lewi, teutab na. dalam peujanjian nyan ulon meujanji ubak awaknyan udeb nyang aman dan keuseujahtaan, dan awaknyan ulon yue jihoreumat ulon. bak masanyan awaknyan keubit jihoreumat ulon dan jitakot keu ulon. awaknyan jipeurunoe nyang beuna, dan bukan nyang salah. awaknyan rab that deungon ulon, dan deungon juoe jiseutot peue nyang ulon lakee. awaknyan jitulon cit ureueng rame mangat bek jipeubuet le buet nyang jeuet. keubit ka wajib bak teungku-teungku imeum keu jipeurunoe nyang beuna keuhai ulon, tuhan nyang mahamanyang. keu awaknyan rakyat haroh jitanjong peue nyang ulon lakee, sabab awaknyan na kheueh utosan-utosan ulon. teuma nibak saat nyoe, gata teungku-teungku imeum, ka meusimpang nibak jalan nyang beuna. peue-peue nyang gata peurunjo di ureueng rame ka jai that nyang sisat sabab ajaran nyang gata peurunoe nyan bandum salah. gata ka tapeurusak janji nyang ka lon peuget deungon gata. dan ulon pi lon peujeuet gata jihina le umat israel sabab gata hana taat ubak meulakee ulon, dan sabab gata tapeubeda-beda ureueng watee gata peurunoe umat ulon." bukan kheueh bapak geutanyoe nyan saban? bukan kheueh geutanyoe geucebta le po teu allah nyang saban teuma? meunyeoe lafee nyan, pakon geutanyoe saleng meu-iengkeue ubak janji dan deungon lafee nyan ka takhianat peujanjian nyang ka geupeuget le po teu allah ngon indatu geutanyoe? umat yehuda ka ji-iengkeue peujanjian po teu allah deungon awaknyan dan jipeubuet haihai nyang keubit meupaloe di yerasalem dan bansaboh nanggroe. awaknyan ka jipeukuto baet tuhan nyang gobnyan cinta dan jimeucinta ngon ureueng-ureueng inong nyang seumah dewa-dewa bansa laen. seumoga ureueng-ureueng nyang peubuet lafee nyan geukireuh le tuhan nibak umat israel. seumoga awaknyan hana le jiseutot ngon bansa geutanyoe watee tajak peuseumah keureubeuen-keureubeuen ubak tuhan nyang mahakuasa. dan nyoe buet gata nyang laen. miseubah tuhan gata peubasah ngon ie mata; gata tamo dan tameuba-e sabab tuhan hana geutem teurimong le keureubeuen nyang gata peuseumah. gata tatanyong pakon gobnyan hana geutem teurimong le keureubeuen gata nyan. le sabab tuhan geuteupeue gata hana seutia keu inong nyang gata meukawen watee muda gata. ureueng inong nyan rakan udeb gata, teuma gata khianat peurumoh gata nyan, bahpi dikeue po teu allah gata ka meujanji mangat teutab seutia keu gobnyan. bukan kheueh alah nyang esa nyan ka geupeujeuet gata saboh tuboh dan saboh jiwa ngon ureueng inong? peu kheueh meukeusut tuhan ngon lafee nyan? hana laen mangat gata meuteume aneuek-aneuek nyang jeuet keu

umat po teu allah nyang sejati. le sababnyan, jaga kheueh droe gata, bek sampoe na lamkawan gata nyang hana seutia ubak peurmoh jih. "ulon banci keuhai meure," feureuman tuhan po teu allah israel. "ulon banci meunyoe na sidroe lamkawan gata tapeubuet keujam nyang lageenyan keu peurmoh gata. dan jaga kheueh droe gata dan bek sagai-sagai takhianat peurmoh gata." gata tapeujeuet po teu allah meudesya deungon mariet gata nyang lagee nyan. teuma gata tatanyong, "pakriban kamoe peubosan tuhan?" deungon teumariet, "bandum ureueng nyang jipeubuet jeuhet geuanggab get le tuhan, dan gobnyan geusayang keu ureueng nyan." atawa deungon cara tatanyong, "dipat po teu allah nyang teuanggab ade nyan?" geujaweueb le tuhan nyang mahakuasa, "ulon lon kirem utosan ulon mangat jipeusiab jalan keu ulon. dan deungon hana teusangka-sangka ulon, tuhan nyang gata mita, teuma teuka u baet ulon. utosan ulon nyang gata rindukan nyan jiteuka dan jipeumaklum peujanjian ulon." teuma soe nyang hase peuteuen bak uroe tuhan geuteuka dan geupeuleumah droe gobnyan? sabab gobnyan lagee apui teupeugleh logam, dan lagee sabon tukang dobi. gobnyan geuteuka keu geujak peusidang, lagee ureueng nyang peugleh dan peumurni pirak. lagee sidroe ureueng tukang logam nyang jipeugleh meuh dan pirak, meunan kheueh utosan tuhan geupeugleh bandum teungku imeum mangat awaknyan geupeuseumah keureubeuen-keureubeuen deungon cara nyang geulakee le tuhan. dan lagee jamen ilee, tuhan geunasa keu keureubeuen-keureubeuen nyang teupeuseumah keu gobnyan le umat yehuda dan yerusalem. feureuman tuhan nyang mahakuasa, "ulon teuka ubak gata keu lon jak peusidang. ulon sigra jeuet keusaksi keu tukang-tukang sihe, ureueng-ureueng nyang peubuet mukah, nyang jeuet keusaksi dusta, nyang jipeubuet jeuhet watee jijok upah keu ureueng tung upah, nyang teugon inong-inong balee, aneuek yatem ngon meuntui, dan ureueng aseng, dan keu banmandum nyang hana jihoreumat ulon." "ulon kheueh tuhan, dan ulon hana meu-ubah. sabab nyan gata, keuturonan nabi yakub, hana teupeubinasa. lagee indatu gata yoh masa ilee, gata bandum ka meunyeuleweng nibak hukum-hukum lon dan hana seutia tapeubuet bandum nyan. tagisa kheueh ubak ulon, teuma di ulon lon gisa ubak gata. teuma gata tatanyong, 'peue nyang haroh kamoe peubuet mangat kamoe woe ubak droeneueh?' jinoenyoe ulon teumanyong ubak gata: peu kheueh manusia jeuet jitipee allah? teuntée hana jeuet. teuma gata teutab tatipee ulon. gata tatanyong, 'pakriban?' jaweueb ulon: lam hai teubayeue peuseumahan siper siploh dan teubri seudekah. bandum bansa jipeungeut ulon, teuma gata bandum keunong kutok. taba kheueh siper siploh gata nyan banmandum u baet ulon mangat na peunajoh nyang meulimpah di teumpat nyan. ujoé kheueh ulon, teuma gata takalon bahwa ulon peuhah pintoe-pintoe syeuruga dan lon peulimpah gata deungon banmandum nyang get. ulon hana lon peubiyeu peunyakét jikak peurusak hase bumoe gata; bak-bak anggo gata peunoh deungon boh. dan gata jipeugah bahgia le bandum bansa, sabab nanggroé gata jeuet keuteumpat nyang jroh keu teumpat tinggai." tuhan

meufeureuman, "tutoe haba gata nyan keubit that teuhina ateuhe ulon." "teuma gata tatanyong, 'peue nyang kamoe peugah keuhai droeneueh?' gata tapeugah, 'sia-sia mantong meubakti ubak allah. keupeue guna jih tapeubuet keuwajiban tanyoe keu tuhan nyang mahakuasa, atawa tatanyok ubak gobnyan bahwa geutanoyoe ka meunyeusai buet geutanoyoe nyang salah? tangieng keudroe bahwa ureueng-ureueng nyang sombong teutab udeb jih bahgia. ureueng jeuhet bukan mantong meutamah makmu, teuma meunyoe awaknyan jiujoé keubeusaran allah deungon jipeubuet jeuhet, dan awaknyan teutab teupeusie.' " dan ureueng-ureueng nyang takot ubak tuhan laju jimariet sabe keudroe-droe. tuhan geudeungoe dan geusimak peue nyang awaknyan peugah. ureueng-ureueng nyang horeumat ubak gobnyan dan teumakot keu gobnyan, geutuleh nan jihnyan lam saboh kitab catetan nyang na dikeue gobnyan. tuhan nyang mahakuasa meufeureuman, "awaknyan jeuet keu umat lon. bak uroe lon cok tindakan, awaknyan jeuet atra milek keusayangan lon. ulon lon gaseh awaknyan, lagee sidroe ureueng syiek jigaseh keu aneuek nyang meungabdi ubak gobnyan. umat ulon jikalon lom naseb ureueng get dan naseb ureueng jeuhet, lamkawan ureueng nyang meubakti ubak ulon dan nyang hana." feureuman tuhan nyang mahakuasa, "teuma teuka uroe jih bandum ureueng jeuhet dan sombong teutot lagee teutot jumpung. bak uroe nyan awaknyan geutot sampoe habeh, dan hana nyang tinggai meusidroepi nibak awaknyan. teuma keu gata nyang taat ubak ulon, kuasa ulon nyang lon peuseulamat teubiet lagee mata uroe, dan cahya jih nyan jeuet keu-ubat peupuleh. gata beubaih dan geumbira lagee aneuek leumo nyang ban teupeuteubiet lam weue. bak uroe nyan ulon meutindak, dan gata tapeutaloe bubena ureueng jeuhet, sampoe awaknyan lagee abee nyang gata gilo-gilo. ingat kheueh ajaran-ajaran hamba ulon nabi musa, ingat teuma hukum-hukum dan peurintah-peurintah nyang ulon bri ubak jihnyan di gunung sinai mangat jitaat le banmandum umat israel. teuma siglohlo m uroe nyang hibat dan dahsyat nyang ka lon peuteuntee nyan teuka, lon kirem keu gata nabi elia. jihnyan geupeujeuet bubena bapak dan aneuek-aneuek meusaboh pakat dan meusaboh ate, mangat bek ulon teuka lon peubinasa nanggroé gata."

mubahgia kheueh ureueng nyang hana jiseutot naseuhat ureueng jeuhet, hana jicuntoh ureueng meudesya dan hana jimeungon ngon ureueng nyang jihina allah, teuma nyang galak jipeubuet peurintah tuhan dan jizike atranyan uroe ngon malam. ureueng nyang lagee nyan meuhase peue mantong nyang jipeubuet; ureueng nyan lagee bak kayee nyang timoh nibak bineh krueng nyang jimuboh oh trok bak museum dan hantom na layee bubena on jih. tema, laen hai ngon ureueng jeuhet: ureueng nyan lagee sikeum nyang jipupot le angen. ureueng jeuhet geuhukom le po teu allah, hakem jihnyan dan geupeu aseng nibak umat gobnyan. sabab ureueng nyang taat sabe geubimbeng dan geulindong le tuhan, teuma ureueng nyang jeuhet jikak ubak keubinasaan.

pakon bansa-bansa didonya nyoe jipeubuet huruhara dan sukee-sukee bansa jireuncana nyang hana meuguna? raja-raja donya beudoh sireuntak dan dumna ureueng mat kuasa jimufakat jilawan tuhan dan raja pilehan gobnyan. peunguasa-peunguasa nyan jipeugah, "jak tajak peupatah keukuasaan awaknyan dan ta reubot keumeurdehkaan geutanyoe!" nibak takhta tuhan di syeuruga tuhan geukem dan geu hina reuncana awaknyan. laju awaknyan geudhot deungon that beungeh, dan geupeukeujot teuma deungon meureuka gobnyan. kheun gobnyan, "di sion buket ulon nyang suci ka ulon lantek raja nyang ulon pileh." kheun raja, "ulon keuneuk peumaklum peue nyang ka geupeuteutab le tuhan. geupeugah le gobnyan ubak ulon, 'gata aneuk agam lon, nibak uroenyoee ulon jeuet keu bapak gata. lakee kheueh, teuma banmandum bansa ulon bri keu gata, dan bansaboh bumoe ulon peujeuet milek gata. awaknyan teuma gata wiet deungon tungkat beuso dan gata peubeukah lagee beulangong tanoh.'" le sababnyan gata ngiang kheueh hai raja-raja, tapike kheueh nyan, hai peunguasa-peunguasa donya! meubakti kheueh ubak tuhan deungon takeuwa, sujut kheueh dikeue gobnyan deungon yo nyang hana teukira, bek sampoe tuhan jeuet keu beungeh dan gata geupeubinasa lam sikreb mata, sabab beungeh gobnyan hu lagee apui deungon hana teusangka-sangka. mubahgia kheueh ureueng nyang jimeulindong ubak tuhan!

zabur nabi daud, bak watee gobnyan geuplueng nibak absalom, aneuk gobnyan. ya tuhan, keubit that le musoh ulon, lumpah that le nyang prang ulon! le that ureueng nyang peugah bahwa allah hana geutem tulong ulon. teuma droeneueh, ya tuhan, na kheueh peurisai nyang lindong ulon. droeneueh bri keu lon meunang, dan droeneueh peurayek ate ulon. ulon meulakee ubak tuhan; nibak buket gobnyan nyang suci gobnyan geujaweeb ulon. ulon teueh dan teungeut deungon teuntram, dan lon beudoh lom, sabab tuhan geutumpang ulon. ulon hana teumakot ubak meuribee droe lawan nyang jikeupong ulon nibak meubagoe jurusan. 8 neupeuseulamat kheueh ulon, ya tuhan allah ulon, neu hukom kheueh dan neupeulapee kheueh banmandum lawan ulon. nibak droeneueh teuka sinulong, ya tuhan, neutem kheueh bri beureukat u ateueh umat droeneueh.

keu teupimpin kor. deungon alat meu-en keucapi, zabur nabi daud. ya allah, droeneueh kheueh

nyang bila ulon; neu jaweeb kheueh meunyoee ulon meuhoi. bak watee ulon susah, droeneueh neutulong ulon; jinoenyoee neugaseh kheueh ulon dan deungoe kheueh doa ulon. hai bubena manusia, padubna treb teuk gata tahina allah ulon? trok an pajan gata tacinta nyang sia-sia dan tatiyeub nyang hana beuna? beuta-teupeue kheueh, tuhan ka geupileh keudroe gobnyan sidroe ureueng nyang geugaseh. tuhan geudeungoe meunyoee ulon meulakee ubak gobnyan. yo meutot-tot sabab teumakot dan bek kheueh meudesya le. gata pike-pike kheueh watee gata duek teumanung, dan watee ta-eh ateueh teupat eh gata. gata peuseumah kheueh keureubeuen nyang beutoi dan tapeucaya kheueh ubak tuhan. jai that-that ureueng jiteumanyong, "soe kheueh nyang bri beureukat keu geutanyoe?" seumoga droeneueh meukeunong nibak kamoe, ya tuhan. droeneueh neupeujeuet ate ulon leubeh geumbira nibak ureueng nyang meulimpah hase meugo jih. dan ulon pi teu-eh dan teungeut deungon teuntram, sabab droeneueh, ya tuhan, neupeujeuet udeb ulon nyoe aman!

keu teupimpin kor. deungon alat peumeuen suleng. zabur nabi daud. ya tuhan, neudeungoe kheueh tutoe haba ulon, neupeurati kheueh apoh apah ulon. neudeungoe kheueh meulakee ulon dan tulong kheueh ulon, ya raja ulon dan allah ulon. sabab ubak droeneueh kheueh ulon meudoa, ya tuhan, neudeungoe meulakee ulon watee beungoh uroe. ban beungoh ka ulon ba peuseumahan ulon dan ulon preh tuhan neu jaweeb ulon, ya tuhan lon. droeneueh kheueh ya allah nyang hana galak ubak keujeuhetan; ureueng jeuhet hana jeuet jimeurumpok ngon droeneueh. droeneueh hana galak neungieng ureueng nyang cungkak, droeneueh banci keu ureueng nyang peubuet jeuhet. tuhan peuhabeh dumna ureueng nyang galak jipeugah haba nyang sulet, ureueng nyang seumeungeut dan ureueng nyang buet jih tukang poh mate ureueng laen tuhan pandang miyueb. teuma sabab le gaseh tuhan nyang rayek, ulon hase lon tamong u dalam baet droeneueh. ulon sujut u arah baet droeneueh nyang suci, dan ulon seumah droeneueh deungon khidmat. ya tuhan, lumpah that le musoh ulon! neubimbeng kheueh ulon mangat jeuet lon peubuet keuheundak droeneueh, dan neutunyok kheueh rot droeneueh nyang haroh ulon jak. sabab tutoe haba musoh ulon hana jeuet teupeucaya; lam ate awaknyan ka peunoh deungon reuncana jeuhet. tutoe haba awaknyan mameh bantumpo lom lumpah mameh, teuma lam baten awaknyan ka peunoh deungon nyang brok. hukom kheueh awaknyan, ya allah, bah kheueh awaknyan binasa sabab reuncana droejih keudroe. neu use kheueh awaknyan sabab desya jih nyang ka lumpah le, sabab awaknyan ka jibeurontak ubak droeneueh. seumoga banmandum ureueng nyang jimeulindong ubak droeneueh meugeumbira dan meusuka ria siumu masa. neulindong kheueh ya tuhan ureueng-ureueng nyang jicinta droeneueh, mangat awaknyan meusuka cita sabab droeneueh. sabab tuhan neubri beureukat keu ureueng nyang seutia ubak droeneueh, droeneueh neulindong awaknyan deungon gaseh droeneueh.

keu peumimpin kor. deungon meuneuen keu-

capi. meunurot lagu nyang keulapan. zabur nabi daud. tuhan, bek kheueh neuheuntam ulon lam beungeh droeneueh. bek neu hukom ulon lam apoh apah droeneueh. neugaseh kheueh ulon ya tuhan, sabab ulon ka habeh teunaga, peukong kheueh ulon sabab ulon apoh apah. ate ulon bingong lumpah na; trok an pajan droeneueh tinggai ulon, ya tuhan? neuriwang kheueh, tuhan, dan peutuwoe kheueh ulon, peuseulamat kheueh ulon le sabab geunaseh droeneueh. sabab lam mawot droeneueh hana jingang le; hana nyang pujoe droeneueh lam donya ureueng mate. ulon hek ngon leumoh sabab aloh alah; tieb-tieb malam ie mata lon ji-ile sampoe basah sumpat eh lon. mata ulon rabon le sabab seudeh, dan suram le sabab musoh-musoh lon. weeh kheueh, he ureueng-ureueng jeuhet, sabab tuhan ka geudeungoe mo ba-e lon. tuhan geudeungoe meulakee ulon dan geuteurimong doa ulon. mandum musoh teuma teukeujot dan malee dan laju jisurot ngon teuseungeh-seungeh.

nabi daud geumoe ba-e, nyang geupeunyanoye keu tuhan sabab le kus, ureueng benyamin nyan. ya tuhan allah ulon, ulon meulindong ubak droeneueh; neupeuseulamat dan neupaulheueh kheueh ulon nibak banmandum ureueng nyang jitiyeub ulon. bek neupeubiyeu awaknyan lagee singa juah jiteugom ngon jitarek ulon dan hana nyang tulong ulon. tuhan, allah ulon, meunoye na lon peubuet ilat, lon peubuet nyang jeuhet ateuh rakan, atawa lon peurugoe lawan deungon hana alasan, meunoye na ulon peubuet nyang lagee nyan, bah kheueh lon jipeulet dan jidrob le musoh, laju jipoh mate dan manyet ulon jitinggai teutiek meunan mantong di ateuh tanoh. beudoh kheueh tuhan teungoh neubeungeh, ya tuhan, neulawan kheueh musoh ulon nyang teungoh jilab nyan. neubeudoh kheueh neujak tulong ulon, sabab droeneueh neulakee keuadelan. neupeusapat kheueh bansa-bansa nyang na sikeulileng droeneueh, dan meukuasa kheueh ateuh awaknyan nibak takhta droeneueh di syeuruga. droeneueh neu hakem umat manusia; neubri kheueh keu ulon keuadelan, ya tuhan, sabab ulon nyoe hana salah. neupeupioh kheueh buet nyang jeuhet nyang jipeubuet le ureueng doraka dan peuseulamat kheueh iman ureueng nyang jroh, sabab droeneueh allah nyang ade, nyang hase neuseunom u dalam ate dan pikeran manusia. nyang lindong ulon na kheueh allah nyang peuseulamat ureueng nyang juoe ate. allah na kheueh hakem nyang paleng ade, nyang tieb-tieb saat geuhukom ureueng jeuhet. meunoye pi-e awaknyan hana meu-ubah, geuhnyan ka siab deungon sinjata nyang hase jipeumate. laju gobnyan geuasah peudeung dan geureuntang laju deungon busur, laju geutimbak panahanah nyang meu apui. ngieng kheueh, ureueng jeuhet jireuncana keuneuk peubuet nyang jeuhet; jihnyan jiatoe reuncana nyang jeuhet dan buet teumipee. ureueng nyang kueh uruek keu ureueng laen, teuma akhe jih ureueng nyan keudroe nyang rhot u dalam uruek nyan. le sababnyan, ureueng nyan geuhukom deungon buet nyang jeuhet nyang jipeubuet keudroe jih, dan jiseksa le buet jeuhet droe jih keudroe. ulon meusyukoe ubak tuhan sabab gobnyan ade, ulon meuca-e ngon meunyanoye teupujo ubak tuhan, nyang mahamanyang.

keu teupimpen kor. meunurot lagu gitit. zabur nabi daud. ya tuhan, allah kamoe, kuasa droeneueh meusyuehu bansaboh bumoe! keuangon droeneueh trok u langet jipeuca-e le aneuek-aneuek miet dan aneuek manyak. peumeurintahan droeneueh teugoh hana ek so nyang yok-yok keu teupeuseungab musoh atawa lawan. watee lon pandang langet nyan droeneueh cepta, buleuen ngon bintang nyang droeneueh pasang, peu kheueh manusia nyan, sampoe droeneueh peuingat, soe jihnyan, sampoe droeneueh peulara? teuma, tuhan beut jihnyan rab santeut deungon allah, droeneueh bri mahkota nibak jihnyan peunoh deungon keuangon dan keuhoreumatan. droeneueh bri kuasa nibak jih nyan ateuh alam raya nyoe, banmandum nyang droeneueh cepta neupeutundok keu jih nyan: bubiri, leumo dan banmandum beulatang peulara nyang teupeulara, meunan cit deungon beulatang kleuet nyang lueueh di padang beulantara; cicem-cicem dan uengkot-uengkot, banmandum makhluk nyang na udeb di dalam laot. ya tuhan, tuhan kamoe, keuangon droeneueh meugah meusyuehu bansaboh bumoe!

keu teupimpen kor. meunurot lagu mut-laben. zabur nabi daud. deungon sipeunoh ate ulon keuneuk peugah ucapan syukoe ubak droeneueh, ya tuhan, dan ulon peusampoe karya droeneueh nyang lumpah meugah nyoe. ulon keuneuk museunang-seunang dan meusukaria kareuna droeneueh, dan teupujo nan droeneueh, tuhan nyang mahamanyang. dikeue droeneueh musoh ulon laju jiriwang dan jipeupluang droe; dan laju awaknyan reubah meugantoh dan mate laju diteumpat nyan. sabab droeneueh neupeurintah sibagoe hakem nyang ade; tuhan ka neubila peukara ulon. droeneueh ka neu hukom bansa-bansa dan neupeubinasa bubena ureueng jeuhet; awaknyan laju teupeutuwoe keu siumu masa. musoh kamoe ka habeh jipoh ngon jipeubinasa, banda-banda awaknyan tuhan peuhanco; hanale ureueng nyang ji ingat keu banda nyan. tuhan geupeurintah keu siumu masa; gobnyan geupeudong takhta geuh keu geuhakem donya. gobnyan geupeurintah ubak bansa-bansa deungon peunoh keuadelan, dan geupeuhakem awaknyan deungon cara juoe. tuhan nyan teumpat meupayong keu ureueng nyang keunong tindeeh, dan teupat meulindong oh trok watee keusosahan. ureueng nyang jituri droeneueh, jimeuharab ubak droeneueh ya, tuhan, ureueng nyang jiseumah droeneueh hana neupeubiyeu meunan mantong. pujoe kheueh tuhan nyang mat peurintah di sion! neucalitra kheueh buet-buet gobnyan ubak bansa-bansa! sabab gobnyan geu ingat keu ureueng nyang meudeurita dan hana geutuwoe keuhai jiklik awaknyan; ureueng nyang jipeubuet jeuhet laju geuhukom. ngieng kheueh, musoh jipeuseungsara ulon; neugaseh kheueh ulon, ya tuhan, neupeusie kheueh ulon nibak beuncana mawot, mangat ulon kupujo droeneueh dikeue peunduduek yerasalem. ulon teuma meusurak geumbira sabab droeneueh neupeuseulamat ulon. bansa-bansa nyang hana jituri droeneueh ureueng nyan rhot u dalam uruek nyang jikueh keudroe; awaknyan meucarueh nibak taron droejih keudroe. tuhan ka

geupeugah droe gobnyan sabab keuputusan gobnyan ade. ureueng jeuhet sisat le sabab buet nyang jipeubuet keudroe. mawot na kheueh keuneuleuh nibak udeb ureueng-ureueng jeuhet, bansa-bansa nyang hana jipakoe ubak po teu allah. hana siumu masa ureueng gasien geupeutuwo; kon teuma siumu masa ureueng seungsara hana harapan. beudoh kheueh, tuhan, neupeuhakem kheueh bansa-bansa, bek neupeubiyeu manusia jipeusombong droe jih keudroe. bah kheueh awaknyan jiteuka teumakot, ya tuhan, dan jisadar bahwa droe jih nyan na kheueh manusia.

pakon droeneuh jioh, ya tuhan dan neumusom watee kamoe ka teuseupet? deungon sombong ureueng jeuhet jitindeeh ureueng gasien; bah kheueh awaknyan meucarueh le taron jih keudroe. ureueng jeuhet jipeugot keuhai keuheundak jih nyang jeuhet, ureueng seurakah jikutot dan jitolak tuhan. ureueng meudesa hana jipakoe ubak tuhan, kareuna sombong jih laju jipike bahwa allah nyan hana. ureueng jeuhet meuhase peue-peue mantong nyang jiseuha; jihnyan hana jituri ubak hukum tuhan dan jipeureumeh banmandum lawan-lawan jih. jipeugah lam ate jih, "ulon hana gagal, dan tron neutron lagee ureueng nyang hana udeb lam jeuhet." jihnyan hana jipioh jimeurapa, jiancam dan jiteumipee, tutoe haba jih peunoh deungon banci dan keujahatan. jihnyan jimusom di gampong-gampong jikeuneuk jakpoh ureueng nyang hana meusalah. lagee singa jihnyan jimeuluem dilikot tamah jiluem jimata-mata ureueng nyang hana meudaya. jipagab ureueng gasien ditempat nyang seungue, laju jiruengkom dan jibahue sira jiba. laju jiteukui, ka siab keuneuk jiruengkom; laju jiseumpom ureueng deungon cara keukeurasan. jipike, "po teu allah ka tuwoe dan hana geupakoe le; keu seulanjut jih gobnyan hana geunging ulon!" beudoh kheueh, hai tuhan, neuhukom kheueh ureueng jeuhet! neu ingat kheueh ubak ureueng nyang teutin-deeh! pakon ureueng jeuhet hana jipioh jihina allah dan jipike bahwa allah hana teuma geuhukom gobnyan? teuma droeneuh nyata deuh neukalon; neunging keuseungsaraan dan keusosahan, dan sabe lam keuadaan siab keu neutulong. ureueng nyang hana meudaya jiseurrah droe jih ubak droeneuh, droeneuh sabe neutulong keu ureueng gasien. neu wiet bupatia kheueh keukuasaan ureueng jeuhet dan doraka; neuhukom kheueh awaknyan sabab buet nyang jipeubuet sampoe jihnyan jeura. tuhan geumat peurintah siumu masa; bansa-bansa nyang hana jituri ubak gobnyan teuma geusampoh di ateueh tanoh geuh. tuhan, droeneuh neudeungoe doa ureueng hina dan neupeukong ate ureueng nyan. aneuk yatem dan ureueng nyang teutin-deeh droeneuh bila peukara jih, mangat hana ureueng nyang jijeuet peutakat awaknyan.

keu teupimpen kor. zabur nabi daud. sabab ureueng jeuhet jireuntang busur laju jipasoe aneuk panah jih mangat jitimbak rot lam seupot ateueh ureueng nyang jujo. meunyoe tata teureuteb masyarakat nyang hana teu atoe, ureueng nyang jroh-jroh pih hana meudaya." tuhan na di baet gobnyan nyang suci, takhta gobnyan na di dalam syeuruga. gobnyan geunging umat manusia dan geuteupeue

mandum peue nyang jipeubuet le awaknyan. tuhan geu ujo ureueng nyang get dan ureueng jeuhet, dan gobnyan geubanci keu ureueng nyang galak keu buet nyang jeuhet. ureueng jeuhet geuhukom deungon mala peutaka, deungon apui, beulerang dan angen nyang hase jipeuhangoh peue nyang na. sabab tuhan nyan na kheueh jroh dan ade, gobnyan geugaseh keu ureueng nyang jipeubuet nyang get; ureueng jujo teuma jikalon dan jituri tuhan.

keu teupimpen kor. meunurot lagee nyang keu lapan. zabur nabi daud. tulong kheueh kamoe, ya tuhan, sabab ka hanale ureueng nyang jroh, ureueng nyang seutia ubak droneuh ka leunyab. awaknyan banmandum saleng jeuet keu ureueng beuhak, saleng jiteumipee deungon tutoe haba nyang mameh. neupeupioh kheueh tutoe haba nyang meurayu nyan, ya tuhan, neudo kheueh babah ureueng-ureueng nyang raya haba, nyang jipeugah, "kamoe meukuasa deungon lapan kamoe! peue mantong jeuet kamoe kheun, dan hana soe ureueng nyang bisa jitham kamoe!" geupeugah le tuhan, "ureueng gasien geutin-deeh dan ureueng seungsara apoh apah. maka bak saatnyoe cit teuma ulon teuka jakbri keuteuntaman nyang awaknyan rindu." janji tuhan nyan khong ngon kukon dan bisa teupeu tanggung jaweueh, lagee pirak nyang murni nyang bisa teu ujo didalam apui. ureueng jeuhet na ltheueh meuwot-wot keudeuh keunoe han meuh saho, keujahatan jipujoe le tieb-tieb ureueng. teutapi droeneuh neulindong kamoe, ya tuhan, neujaga kheueh kamoe nibak ureueng-ureueng jeuhet nyan.

keu teupimpem kor. zabur nabi daud. sampoe an pajan droeneuh tuwoe keu ulon, ya tuhan? dan sampoe an pajan teuma droneuh neusom droe nibak ulon? sampoe an pajan ulon ku tanggung susah, dan ate jih peudeh sipanyang uroe? sampoe an pajan teuma ulon nyoe jikuasa le musoh? neunging kheueh u ateueh ulon, ya tuhan allah ulon, neujaweueh kheueh doa ulon. neupeupuleh kheueh teunaga ulon, dan bek kheueh neupeubiyeu ulon nyoe mate. bek kheueh neupeubiyeu musoh ulon jipeugah bahwa awaknyan ka jipeutaloe ulon. bek neupeubiyeu awaknyan jisurak ulon. sabab ulon nyang lon peubangga na kheueh geunaseh droeneuh, le sabab nyan kheueh ulon meusukaria sabab droeneuh neupeuseulamat ulon. ulon keuneuk meuca-e keu tuhan, sabab gobnyan ka geupeubuet nyang jroh keu ulon!

keu teupimpen kor. zabur nabi daud. lam syeuruga tuhan geupandang umat manusia keu geumita ureueng malem nyang seumah gobnyan. teuma banmandum ureueng ka meunyeuleweng dan beujat, hana meusidroe pih nyang jipeubuet nyang get. feureuman tuhan, "peu kheueh hana sada di ureueng-ureueng jeuhet nyan? awaknyan udeb ngon cara jireubot umat ulon dan hantom na jimeudoa keu ulon." ureueng jeuhet teuma jiteuka yo ngon teumakot lagee that, sabab allah geulindong ureueng nyang taat ubak gobnyan. ureueng jeuhet jikeuneuk tam keu ureueng gasien, teuma tuhan jeuet keu peulindong awaknyan. seumoga di sion teuka keuseulamatan keu israel! dan keuturonan nabi yakub meusuka cita meunyoe tuhan ka geupeupuleh keuadaan umat gobnyan.

zabur nabi daud. ureueng nyang udeb nyang hana meucakat dan jipeubuet nyang jroh-jroh, dan deungon juoe jipeugah nyang beuna; nyang hana jitem fiteunah sabe keudroe-droe, hana jipeubuet jeuhet keurakan droe, dan hana jipeubrok-brok wareh lingka; nyang jianggab hina ureueng nyang geutulak le po teu allah, teuma geuhoreumat ubak ureueng nyang taqwa; nyang jipeuteupat janji, bahpi rugoe dan jipeu utang peng deungan hana meubungong; nyang hana jitem teurimong peng sogok keu teupeu-rugoe ureueng nyang hana salah.

zabur nabi daud. ulon peugah, "droeneueh kheueh tuhan ulon, keubahgiaan ulon, hana nyang laen nyang leubeh nibak droeneueh!" ulon horeumat ureueng-ureueng suci di nanggroe nyoe; nyang ulon harok na kheueh tinggai meusajan awaknyan. bah kheueh ureueng nyang jiseumah dewa-dewa meutamah-tamah seudeh jih. ulon hana lontem meukeureubeuen keu dewa-dewa, bahpi nan dewa nyan hana lontem kheun. tuhan, droeneueh mantong nyang atra ulon; droeneueh neubri mandum nyang ulon lakee, naseb ulon na lam jaroe droeneueh. lumpah that indah meuneubri droeneueh keu ulon, sampoe ate ulon harok lumpah na! ulon pujoe tuhan nyang bri naseuhat keu ulon; oh watee malam pi ate ulon jimeututoe ji peurunoe ulon. ulon sabe lam ingat ubak tuhan; gobnyan na sabe disampeng ulon, le sababnyan ulon hana gundah. sababnyan, ate ulon harok dan jiwa lon meusurak, dan tuboh ulon jimeureuhat deungan teuntram. sabab droeneueh hana neupeubiyeu ulon mate; ureueng nyang neugaseh hana neupeubiyeu binasa. neutunyak keu ulon rot nyang teujak ubak udeb; nibak droeneueh ulon meuteume keugeumbiraan nyang meulimpah dan keubahgiaan keu siumu masa.

doa nabi daud. neu bila kheueh peukara ulon sabab droeneueh neutupeue peue nyang beuna. meunyoedroeneueh neu ujoe ate ulon dan neuteuka neujak seulidek ulon oh watee malam, disan droeneueh meurumpok bahwa ulon na kheueh nyang juoe tulohi ikhlas; haba ulon sisuai deungan pikeran ulon. ulon peubuet peue nyang droeneueh peurintah ubak ulon dan hana lon jak rot kreueh nyang rugoe hana meulaba. ulon sabe udeb meunrot nyang droeneueh tunyok dan hana meusimpang nibak droeneueh. ulon meulakee ubak droeneueh, ya allah, sabab droeneueh neujaweub ulon; ngieng kheueh ulon dan neudeungoe kheueh tutoe haba ulon. neutunyak kheueh geunaseh droeneueh nyang luwa biasa nyan sabab droeneueh peuseulamat ureueng nyang meulindong nibak droeneueh, bak bineh droeneueh awaknyan aman nibak jiseurang le musoh. neupeulara kheueh ulon lagee aneuk mata droeneueh, neusom kheueh ulon di miyueb sayeub droeneueh nibak jiseurang le ureueng jeuhet. ulon jikeupong le musoh nyang jikeuneuk peumate ulon. nibak awaknyan hana jitungi peue nyan gaseh sayang dan meunyoedroeneueh haba deungan sombang dan cungkak. awaknyan jima juwilan ulon dan jijak paran ulon, jimita keuseumpatan keuneuk jiseumpom ulon. awaknyan lagee singa bueh nyang keuneuk ruengkom mangsa jih, lagee singa muda nyang jilinteung nibak teumpat

nyang teusom. beudoh kheueh, ya tuhan, neu-lawan kheueh musoh ulon dan neupeutaloedroeneueh awaknyan. neupeuseulamat kheueh ulon deungan peudeueng droeneueh nibak jiseurang le ureueng jeuhet. neupeubeubaih kheueh ulon nibak ureueng nyang leuha nyang buet jitamontamon hareuta donya nyoe. neuhekum kheueh awaknyan deungon azeub seungsara droeneueh nyang ka droeneueh keubah keu awaknyan. meunan cit aneuk cucoe awaknyan neuhekum cit teuma. teuma ulon-lon pandang droeneueh, sabab ulon hana salah. bak watee jaga nibak teungeut ulon, teuka droeneueh teupeujeuet ate ulon geumbira ria.

keu teupimpin kor. zabur nabi daud, hamba tuhan. geupeuca-e ubak tuhan watee nabi daud teupeuleuh nibak saul dan nibak musoh-musoh gobnyan. ulon cinta ubak droeneueh, ya tuhan, droeneueh kheueh teunaga ulon. tuhan lagee kuta nyang kukoh teumpat ulon meulindong. allah ulon lagee gunung batee teumpat ulon meupayang. lagee peurisai gobnyan geutob ulon, dan geujaga ulon mangat aman hana gob peukaru pajan mantong. ulon meulakee ubak tuhan nyang patot teupujoe, gobnyan geupeubeubaih ulon nibak mandum musoh ulon. ulon ka jikeulileng le bahya mawot dan jipeunom lam ie raya keubinaan. ulon jikeulileng le bahya mawot, jeunieb mawot kana dikeue ulon. lam keuadaan ulon nyang apoh apah ulon meulakee ubak tuhan, ulon meudumpek ngon su meutaga bak allah lon lakee tulong. nibak baet geuh gobnyan geudeungoe su ulon dan geudeungoe peue nyang ulon lakee. laju bumoe meuguncang meusu meukrabkrab, gaki-gaki gunung pih meuguncang ngon su nyang meukrabkrab teuma sabab allah ka beungeh. jiteubiet asab lam ruhueng idong gobnyan, ngeue apui dan apui jiteubiet teuma lam babah gobnyan. langet geuplah, laju geutron gobnyan nibak teumpat nyan deungan awan nyang seupot dimiyueb gaki gobnyan. gobnyan geupoe di ateueh kerub; gobnyan meulayang di ateueh sayeub angen. gobnyan geupeusom droe lam seupot that-that; awan ngon reudok nyang teubai jijak keulileng gobnyan. kilat dikeue gobnyan, jiteubiet kheueh awan, ujeuen eeh dan apui. laju tuhan lagee geulanteue di angkasa; nyang mahamanyang geupeudeungoe su droe gobnyan. gobnyan laju geutimbak dumna aneuk-aneuk panah geuh dan geupeu crebre musoh; geusama kilat meuulang-ulang, le sabab nyan sampoe awaknyan jipeuplueng droe. tanoh lam laot jibeudoh meubura dan gaki bumoe pih teubuka watee tuhan geudot musoh gobnyan deungan meureuka. di ateueh tuhan geu sunyueng jaroe geuh; laju geumat ulon dan geutarek lam twie ie nyang lhok. gobnyan geupeuseulamat ulon nibak musoh nyang peukasa dan nibak ureueng-ureueng nyang jibanci ulon, sabab awaknyan lumpah that teuga nibak ulon. awaknyan jiseurang ulon watee ulon jitungi le beuncana, teuma tuhan jeuet keu nyang tulong ulon. gobnyan geupeubeubaih ulon nibak bala bahya dan geupeuseulamat ulon sabab gobnyan geugaseh keu ulon. tuhan geubalaih buet ulon nyang beutoi; gobnyan geubri beureukat keu ulon sabab ulon hana salah. ulon taat ubak peurintah tuhan dan hana lon paleng ni-

bak allah ulon. banmandum hukum gobnyan ulon deungoe, peurintah-peurintah gobnyan hana ulon peulaloe. gobnyan geuteupeue bahwa ulon nyoe hana cacat ngon teucela dan geupeujioh droe nibak keusalahan. teuma tuhan geubalahi buet ulon nyang beuna sabab gobnyan geuteupeue ulon nyoe hana meusalah. tuhan, droeneueh seutia keu ureueng nyang seutia dan jroh keu ureueng nyang jroh. keu ureueng nyang suci droeneueh peugah droeneueh peujeut keumusoh. ureueng nyang miyueb ate tuhan peuseulamat, teuma ureueng nyang sombong ngon cangkak droeneueh peutundok. droeneueh puhu panyot ulon; tuhan allah ulon nyang peu peungeuh ulon nibak seupot. droeneueh neupeuteuga ulon mangat ulon heuntam musoh; deungon tulong allah ulon peuhanco peutahanan awaknyan. buet po teu allah sampoeureuna janji tuhan jeuet teupeucaya. gobnyan lagee peurisai keu mandum ureueng nyang meulindong nibak gobnyan. sabab tuhan kheueh po teu allah; allah mantong nyang jeuet keu nyang bila geutanyoe. gobnyan kheueh allah nyang ka geupeuteuga ulon dan nyang peusaneut rot ulon aman. gobnyan nyang peuteuga kaki ulon lagee kaki rusa, dan nyang jaga keuseulamatan ulon di atueuh gunung-gunong. gobnyan nyang latih ulon pakriban cara muprang, sampoe hase ulon reuntang busur nyang paleng teuga. tuhan, droeneueh kheueh nyang lindong dan peuseulamat ulon, dan nyang tumpang ulon deungon kuasa droeneueh; ulon hase meunang sabab tindakan droeneueh. droeneueh jaga ulon mangat ulon bek keunong teun, dan ulon hantom na reubah. laju ulon tiyeub musoh lon dan lon peutaloe awaknyan, dan pantang lon surot sampoe awaknyan banmandum binasa. ulon seumpom awaknyan sampoe hana hasele jibeudoh, awaknyan reubah hana meudaya dimiyueb kaki ulon. neubri ubak lon teunaga mangat hase lon muprang, dan beumeunang atueuh musoh-musoh lon. sampoe musoh lon neuyue pluing nibak ulon; dan soemantong ureueng nyang jibanci ubak ulon tuhan neupeubinasa. awaknyan jikliek ngon jiteumawok, teuma hana nyang hase tulong, awaknyan jimeulakee ubak tuhan, teuma gobnyan hana geutem jaweueb. awaknyan ulon peureumok lagee abee nyang jipot le angen, dan ulon sampoh lagee leuhob nibak bineh rot ueh raya. droeneueh neupeubeubaih ulon nibak kawom nyang doraka, dan neupeujeuet ulon keupeunguasa atueuh bansa-bansa; bansa-bansa nyang hana lon turi jeuet namiet lon. ureueng-ureueng aseng tundok ubak ulon dan jitaat watee jideungoe peue nyang lon peurintah. beuhe awaknyan ka gadoh; awaknyan yo dan jiteubiet lam kuta jih. tuhan udeb! teupujoe kheueh nyang bila lon! peu agong kheueh keubeusaran allah nyang peuseulamat lon! gobnyan geubri keulon meunang atueuh musoh lon; bansa-bansa geupeutaklok dikeue ulon, geupeuseulamat ulon nibak lawan-lawan lon. keujam. le sababnyan ulon peaugong droeneueh lamkawan bansa-bansa, dan ulon meunanyoe lagu puja ngon pujoe keu droeneueh. po teu allah geupeumeunang nyang paleng rayeuk atueuh raja gobnyan, gobnyan teutab geugasah keu ureueng nyang ka geupileh, na kheueh nabi daud deungon keuturonan

gobnyan keu siumu masa.

keu teupimpen kor. zabur nabi daud. langet dimanyang jipeugah keuangongan allah, dan cakrawala jijak peusampoe karya gobnyan. uroe nyang keu sa jijak peusampoe ubak uroe nyang seulanjut jih; malam nyang sa jijak peukisah ubak malam nyang singoh nyan teuma. hana nyang mariet atawa jimupoh cakra, hana sa nyang na teudeungoe. teuma seruan gobnyan meuguncang bansaboh donya, sampoe peusan nyan ubak tieb-tieb ujung bumoe. tuhan geupeugot rumoh di langet keu sang surya, bak watee beungoh sang surya nyan jiteubiet lagee teungku linto agam nyang geuteubiet lam kama gobnyan, lagee pahlawan nyang geumbira geupeuphon jak geubot langkah gobnyan. gobnyan geulisi langet phon nibak ujung u ujung; hana nyang hana keunong nibak seu-uem gobnyan. hukum tuhan nyan sampoeureuna, teupeuseugar jiwa. peurintah tuhan jeuet teupeucaya, teubri hikeumat keu ureueng nyang seudeurhana. peuratoran tuhan nyan teupat, keubit that teupeugalak ate. peue nyang geupeuteutab le tuhan nyan murni, sampoe ureueng laen hase jipuphom. meubakti ubak tuhan nyan get, hana ploh keu siumu masa. hukum tuhan nyan beutoi dan ade banmandum. hukum tuhan leubeh meuyuem nibak meuh murni, dan leubeh mameh nibak meulisan nyang aseuli. hamba droeneueh geupeu ingat le banmandum nyan; upah nyang paleng raya teupeuna keu ureueng nyang taat. hana nyang hase peusada keuhai sisat jihnyan; tuhan, neupeubeubaih kheueh ulon nibak buet salah nyang teusom. neupeujioh kheueh ulon nibak desaya nyang teusaja, bek neupeubiyue ulon jikuasa le awaknyan. teuma ulon jeuet keu ureueng hana meucupa, dan beubaih nibak peulanggaran ulon brat. seumoga tutoe haba dan pikieran ulon meukeunong nibak droeneueh, ya tuhan, nyang lindong dan nyang teuboh ulon!

keu teupimpen kor. zabur nabi daud. seumoga tuhan geujaweueb droeneueh bak watee meukarat, dan seumoga kuasa allah nabi yakub geulindong gata! seumoga gobnyan geukirem bantuan nibak baet gobnyan, dan geujak tulong gata nibak buket sion. seumoga gobnyan ingat keu banmandum nyang gata peuseumah, dan galak deungon banmandum keureubeuen nyang gata tot. seumoga gobnyan geubri peue mantong nyang gata meuheuet, dan geupeujeut banmandum reuncana gata meuhase. dan kamoe meusurak geumbira sabab gata meunang, dan teungkat bupanji keu teupujoe po teu allah geutanyoe. seumoga tuhan geupeukabui banmandum nyang gata lakee. jinoenyoe baro kheueh ulon teupeue bahwa tuhan geubri keumeunangan atueuh raja nyang geupileh. tuhan geujaweueb gobnyan di syeuruga nyang suci; le kuasa tuhan gobnyan meuteume meunang nyang paleng raya. na ureueng nyang jipeu deng-deng geuritan prang jih, dan na teuma nyang jipeu deng-deng guda jih. teuma geutanyoe nyang tapeu deng-deng ngon ta andalkan na kheueh tuhan, allah geutanyoe. awaknyan teuma meugantoh dan reubah, teuma geutanyoe ta beudoh teudong nyang kukoh. ya tuhan, neubri kheueh keumeunangan atueuh raja, jaweueb kheueh kamoe watee kamoe meuhoi droeneueh.

keu teupimpen kor. zabur nabi daud. ya tuhan,

raja harok that sabab droeneueh ka neupeukong gobnyan; gobnyan meusuka cita sabab meunang nyang droeneueh bri! droeneueh ka neupeupeunoh keuh-undak ate gobnyan, dan ka neubri peue nyang geulakee le gobnyan. droeneueh teuka ubak gobnyan deungan beureukat nyang meulimpah, dan neupeungui mahkota meuh ateuh ulee gobnyan. gobnyan geulakee udeb, laju neubri keu gobnyan, dan panyang umu keu siumu masa. sabab sinulong droeneueh gobnyan ka jeuet keu ureueng nyang lumpah teuhoreumat, neupeu jeuet gobnyan meusyeuhu dan meugah that. neubri beureukat keu gobnyan lam tieb-tieb watee; keuhai teuka droeneueh sampoe jeuet gobnyan peunoh deungan suka cita. raja geumeuharab ubak tuhan nyang mahamanyang, gobnyan sabe lam aman sabab gobnyan na kheueh geunaseh tuhan. gobnyan teuma geudrob banmandum musoh geuh, dan geuteun banmandum ureueng nyang banci gobnyan. gobnyan teuka lagee apui nyang hu meu bleble keu teupeuhanco awaknyan. nibak keuturonan awaknyan hana nyang tinggai bahpi meusaboh, raja teuma geupeutaloe awaknyan bube nyang na. meunyo awaknyan jipeuget reuncana jikak lawan raja, tipee muslihat awaknyan hana meuhase. gobnyan geutimbak aneuk panah geuh, sampoe awaknyan jigisa dan jiplueng laju. kamoe pujoe droeneueh ya tuhan, sabab rayeuk lumpah na kuasa droeneueh, kamoe meuca-e ngon meunyanoye sira kamoe pujoe keupeukasaan droeneueh.

keu teupimpin kor. meunurot lagu: rusa oh watee beungoh. zabur nabi daud. allah ulon, ya allah ulon, pakon droeneueh neutinggai ulon? ulon meuhoi, teuma droeneueh teutab jioh dan hana neutulong ulon. ya allah ulon, ulon meuhoi oh watee uroe, teuma droeneueh seungab mantong. oh watee malam ulon meudoa, ate ulon teutab meutampo-tampo. teuma droeneueh na kheueh raja nyang mahasuci, nyang jipujoe-pujoe le israel. indatu kamoe meuharab that ubak droeneueh, awaknyan meuharab, dan droeneueh neupeuseumat awaknyan. awaknyan jimeulakee ubak droeneueh dan peuseuliseh nibak meubagoe bala; awaknyan meuharab dan hana neupeukeucewa. teuma ulon nyoe na kheueh glang, bukan manusia, jiteuoh-teuoh ngon jihina le rakyatba. banmandum ureueng nyang kalon ulon jihina lon, jipeuhirot bibi dan jipeu aseu ulee. kheun awaknyan, "bah kheueh jihnyan jipeubangga tuhan, mangat tuhan geupeuseumat jihnyan, meunyo tuhan galak keu jihnyan!" droeneueh kheueh nyang peuteubiet ulon lam pruet ma, dan nyang peujeuet ulon aman lam pangkee po ma. yoh phon lahe u donya nyoe, naseb ulon na dalam jaroe droeneueh, dan yoh mantong ulon na lam pruet ma, droeneueh kheueh allah ulon. bek kheueh jioh, sabab bahaya ka to that-that, dan hana nyang tulong lon. lagee kawan banteng, musoh jikak udum ulon, lagee banteng klet di basan awaknyan jikeupong ulon. awaknyan jipeukeue ulon deungan babah jih teuhah, lagee singa nyang teumaem dan jiteumeugom. teunaga ulon habeh lagee ie nyang rho, banmandum tuleueng ulon leukang nibak sandi jih, ate ulon meulileh saban lagee lilen. rukueng ulon tho kregeng lagee pempeng kaca, lidah ulon meuleukek

nibak langet-langet babah lon. tuhan, neutinggai ulon di ateuh abee lagee ureueng nyang ka mate. ulon jikeupong le geurombolan ureueng jeuhet; lagee kawan aseu awaknyan jitudom ulon, sira teutob jaroe ngon gaki. banmandum tuleueng ulon hase lon itong, musoh jingiegi ateuh ulon sibagoe tuntuonan. awaknyan jibagi-bagi peukayan ulon, dan jirhom undi ateuh jubah lon. teutapi droeneueh, bek kheueh jioh, ya tuhan, neuteuka bubagah neutulong ulon, sabab droeneueh kheueh teunaga ulon. neupeusie kheueh nyawong ulon nibak mata peudeueng, dan neupeuseumat kheueh ulon nibak jiteugom le aseu. ulon hana meudaya, neupeulheueh kheueh ulon nibak luengkee banteng dan nibak babah singa. buet droeneueh nyan ulon calitra ubak bubena syedara ulon; nibak rapat umat droeneueh ulon puja-pujoe droeneueh. pujoe kheueh gobnyan, hai ureueng-ureueng taqwa! peu agong kheueh gobnyan, hai banmandum keuturonan nabi yakub! sujut kheueh ubak gobnyan, hai banmandum keuturonan israel! sabab gobnyan hana geupandang hina keu ureueng nyang teuseupet, dan hana geuanggab remeh keuseungsaraan jihnyan. gobnyan hana geupaleng nibak ureueng nyan, teuma geudeungoe meunyoe jilakee tulong ubak gobnyan. di teungoh ureueng rame nyang meusapat teutab ulon pujoe droeneueh, sabab banmandum nyang ka droeneueh peubuet. dikeue umat nyang taqwa ulon peuseumah keureubeuen nyang ka ulon peujanji. ureueng gasien teuma jimakheun sampoe troe; ureueng nyang teuka ubak tuhan teuma jipujoe geuhnyan. seumoga gata sejahteura siumu masa! banmandum bansa teuma jingat ubak tuhan dan teuma jiriwang ubak gobnyan, banmandum sukee bansa teuma jisujut jiseumah gobnyan. sabab tuhan kheueh nyang mat kuasa, gobnyan nyang mat peurintah ateuh bansa-bansa. banmandum ureueng rayeuk teuma jisujut dikeue gobnyan, dan banmandum manusia fana teuma jisujut jiseumah gobnyan. angkatan-angkatan nyang teuka dudoe meubakti ubak tuhan, ureueng nyan teuma jipeusampoe tron-neutron. ubak bansa nyang lahe dudoe teuma jipeusampoe bahwa tuhan ka geupeuseumat umat gobnyan.

zabur nabi daud. gobnyan geupeu eh ulon di ateuh blang naleueng nyang ijo. dan geubimbeng ulon ubak ie nyang teunang. geubri keulon teunaga nyang baro, dan geupapah ulon ubak rot nyang beuna, nyang suisai deungan janji gobnyan. bahpi ulon rhot lam barieh nyang seupot, teuma diulon hana lon takot keubahya, sabab droeneueh nyang jeuet keungon ulon. droeneueh neulindong ulon lagee ureueng meurabe jijaga bubiri jih deungan tungkat dan gada. droeneueh nyang keubah khanuri keu ulon dikeue mata lawan ulon. droeneueh neusambot ulon lagee jame nyang mulia. droeneueh nyang peuhidang keu ulon ie jieb nyang lazat meulimpah ruah. ulon teupeue droeneueh jroh keu ulon, dan sabe neugaseh keu ulon. teuma ulon jeuet tinggai di baet droeneueh, simantong ulon udeb.

zabur nabi daud. gobnyan nyang peuduek dasai jih di ateuh laot, dan nyang peudong di ateuh ie nyang lhok. soe kheueh nyang jeuet ek u ateuh buket tuhan, dan tamong u dalam baet gobnyan? ureueng nyang

hana meucupa pikeran dan buet jih, nyang hana jimeusumpah peuleusu dan hana jiseumah beurala. ureueng nyang kheueh nyang teuma geubri beureukat dan geupeuseulamat le tuhan, dan allah keudroe nyang peugah hana meusalah. meunan kheueh ureueng nyang teuka meuhadah allah, nyang teuka jijk seumah allah nabi yakub. neubuka kheueh rayeuk-rayeuk geureubang tuha, mangat geutamong raja nyang mulia. soe kheueh raja nyang mulia nyan? gobnyan kheueh tuhan nyang peukasa; tuhan nyang peunoh kuasa, tuhan meujaya dimideun prang ngaza. peuhah kheueh beurayeuk geureubang tuha, mangat geutamong raja nyang mulia. soe kheueh raja nyang mulia nyan? tuhan nyang mahakuasa, gobnyan kheueh raja nyang mulia!

zabur nabi daud. doa, ya allah lon, ulon peucaya ubak droeneueh! bek neupeubiyeu ulon nyoe jipeumalee, dan jisurak le musoh-musoh lon. ureueng nyang meukhianat ubak droeneueh teuma geupeumalee, teuma nyang peucaya ubak droeneueh hana teuma geupeukeucewa. neutunyok kheueh keuheundak droeneueh keu ulon, ya tuhan, neupeugah kheueh peue nyang haroh ulon peubuet. neupeurunoe kheueh dan neubimbeng kheueh ulon mangat udeb lon nyoe sesuai deungon keuheundak droeneueh, sabab droeneueh kheueh allah nyang peuseulamat ulon, nyang jeueb-jeueb watee ulon meuharab ubak droeneueh. ingat kheueh keubaiekan dan geunaseh droeneueh, ya tuhan, nyang tuhan tunyok yoh lon watee awaiphon. neupeu amphon kheueh desya dan keusalahan masa muda lon, ingat kheueh ulon nyang sesuai deungon gaseh dan keubaiekan droeneueh. sabab tuhan na kheueh get dan ade, gobnyan geutunyok rot keu ureueng nyang sisat. tuhan geubimbeng ureueng nyang miyueb ate, dan geupeurunoe awaknyan keuheundak gobnyan. ureueng nyang taat ubak peujanjian dan hukom gobnyan, geupeutimang deungon gaseh dan seutia. tuhan, neupeu amphon kheueh ulon nyang sesuai deungon janji droeneueh, sabab raya that keusalahan ulon. tuhan geupeurunoe keu ureueng nyang taqwa rot nyang haroh awaknyan jak. awaknyan teuma teutab udeb makmu, aneuk cucoe awaknyan teuma jiteurimong tanoh pusaka. tuhan na kheueh sahabat ureueng nyang taqwa gobnyan geupeugah meukeusut geuh keu awaknyan. mata ulon teutab teuarah ubak tuhan, sabab gobnyan nyang peuseulamat ulon nibak mara bahaya. neupandang kheueh ulon, dan gaseh kheueh keu ulon, sabab gobnyan geupeuseulamat ulon nibak bahaya. keusosahan ate ulon seumakan meutamah neupeubeubaih kheueh ulon nibak teuseupet nyoe. neungieng kheueh seungsara dan keusosahan lon, dan neupeu amphon kheueh banmandum desya-desya ulon. neungieng kheueh padubnale musoh-musoh lon; awaknyan that-that jibanci keu ulon. neujaga dan neupeuseulamat kheueh ulon, mangat ulon hana meuteume malee. sabab ulon meulindong ubak droeneueh. seumoga keubaiekan dan keujujoran nyang kawai ulon, sabab ulon meuharab ubak droeneueh. ya allah, neupeubeubaih kheueh umat droeneueh nibak banmandum keugundahan.

zabur nabi daud. neuseulidek kheueh ulon, ya

tuhan, dan neu ujoe kheueh ulon, neupeureksa kheueh nyang lon meuheuet dan pikeran lon. ulon sabe ingat keu geunaseh droeneueh, dan teutab seutia ubak droeneueh. ulon hana lontem meusapat ngon ureueng tukang teumipee, atawa lon meungon deungon ureueng munafek. ulon banci keu kawan ureueng nyang jipeubuet jeuhet, kawom nyang jeuhet ulon peusie. ulon rhah jaroe lon tanda hana meusalah, dan ulonjak keulileng miseubah droeneueh, ya tuhan, sira lon meuca-e ngon nyanyoe syuko, dan lon peusampoe buet-buet droeneueh nyang lumpah kagom. ulon cinta ubak baet droeneueh, ya tuhan, teumpat droeneueh tinggai deungon peunoh keuangongan. bek neuoph ulon meusajan ureueng nyang meudesya, atawa neutarek nyawong lon meusigoe ngon ureueng nyang galak jiroe darah gob. awaknyan hana jipioh jipeubuet jeuhet, dan sabe siab jiteurimong sugok. teuma ulon udeb deungon ate nyang jujo, neugaseh kheueh dan neupeubeubaih kheueh ulon. teuma aman kheueh ulon nibak mara bahaya, ulon teuma lon pujoe tuhan nibak teumpat umat gobnyan meusapat.

zabur nabi daud. meunyoie lon jiheuntam le ureueng jeuhet nyang keuneuk peumate lon, awaknyan kheueh nyang meugantoh dan reubah. bahpi ulon jikeupong le pasokan nyang raya, teuma ulon hana teumakot. bahpi beureutoh prang jilawan lon, ulon teutab meuharab. teuma sapueu nyang ulon lakee ubak tuhan, dan nyoe kheueh nyang ulon harab: tinggai teutab di baet tuhan simantong ulon udeb, mangat lon rasa pakriban get tuhan keu ulon dan lon lakee bimbengan gobnyan. tuhan geulindong ulon watee ulon ka meukarat; gobnyan geusom ulon didalam baet geuh, dan geu beuot ulon u atueh gunung batee. jinoenyoie ulon ka meunang atueh musoh nyang na bansilingka lon; teuma deungon surak nyang meuhubo ulon peuseumah keureubeuen syuko di baet droeneueh; ulon keuneuk meuca-e dan lon pujoe tuhan. ya tuhan, deungoe kheueh meunyoie ulon meulakee ubak droeneueh, neugaseh kheueh keu ulon dan neujawueb kheueh lon! droeneueh meufeuruman, "teuka kheueh jak seumah ulon." ulon jawueb, "ulon deungon reujang lon teuka, ya tuhan; bek kheueh neumusom nibak ulon." bahpi ayah ngon ma geutinggai ulon, teuma allah teutab neupeulara ulon. neutunyok kheueh bak ulon keuheundak droeneueh, ya tuhan, neubimbeng kheueh ulon bak jalan nyang beuna, sabab musoh ulon le lumpah na. bek neujok ulon ubak nafeusu lawan ulon, nyang seurang ulon deungon deuseuta dan jiancam teuma. ulon yaken teuma lon rasa keubaiekan tuhan lam udeb lon lam donya nyoe. meuharab kheueh ubak tuhan, peukong kheueh dan peuteutab kheueh ate droeneueh; nyoe, meuharab kheueh ubak tuhan.

zabur nabi daud. neudeungoe kheueh peue nyang ulon lakee meunyoie ulon ka lon kliek lon lakee tulong, dan lon beuot jaroe lon meuhadah u baet droeneueh nyang suci. bek neupeubinasa ulon meusajan deungon ureueng doraka, meusajan ureueng nyang jipeubuet jeuhet. meunyoie jipeugah haba awaknyan deungon ramah lom sopan, teuma ate awaknyan peunoh deungon nyang kuto dan nyang jeuhet. hukom kheueh awaknyan sabab buet droe

jih nyang lagee nyan, sabab buet nyang jeuhet nyang jipeubuet le awaknyan. neuhukom kheueh awaknyan nyang sesuai deungon buet nyang jipeubuet le droe jih nyan; bri kheueh awaknyan hukoman nyang sesuai. awaknyan hana jipeureumen peue nyang geupeubuet le tuhan, atawa peue nyang geupeubuet le gobnyan. teuma gobnyan geuhukom awaknyan, dan geupeubina awaknyan keu siumu masa. teupujoe kheueh tuhan, sabab gobnyan ka geudeungoe peue nyang ulon lakee. tuhan peulindong dan nyang bila ulon, ulon peucaya ubak gobnyan. gobnyan geutulong dan nyang peu mangat ate ulon, ulon pujoe gobnyan deungon ca-e dan nanyoe syuko. tuhan geubri teunaga keu umat gobnyan, gobnyan geubila dan geupeuseulamat raja nyang geupileh le gobnyan keudroe. peuseulamat kheueh umat droeneueh, ya tuhan, neubri beureukat kheueh keu ureueng-ureueng milek droeneueh. beujeuet kheueh lagee sidroe ureueng meurabe keu awaknyan, dan neujaga kheueh awaknyan keu siumu masa.

zabur nabi daud. pujoe kheueh nan tuhan nyang mulia neuseumah kheueh gobnyan deungon teungui peukayan iebadat. allah nyang agong meusu lagee geulanteue di ateueh laot, su gobnyan meugeunta di ateueh laot raya. su tuhan teudeungoe, peunoh kuasa dan keumeugahan. su tuhan sampoe reubah bubena bak kayee, dan patah bak kayee ceumara libanon. gunung libanon geupeujeuet sampoe meulumpat lagee aneuek leumo, dan gunung siryon jimeuglueng lagee aneuek banteng. su tuhan sampoe jiteubiet kilat muble ji seumama. su tuhan sampoe meuhayak padang pasie, dan tuhan geuguncang padang pasie kades. su tuhan sampoe meuyok-yok bak-bak kayee beurangan, dan luroh bubena onon kayee di gle; dan di baet tuhan umat gobnyan jimeuhoi, "pujoe kheueh tuhan!" tuhan meukuasa ateueh ie raya, gobnyan meukuasa sibagoe raja keu siumu masa. seumoga tuhan geubri teunaga keu umat gobnyan, dan geupeujeuet awaknyan sejahteura.

zabur nabi daud. ca-e keu teureuseumi baet alah. ulon pujoe droeneueh, ya tuhan, sabab droeneueh ka neupeuseulamat ulon dan hana neupeubiyeu musoh ulon jisurak lon. tuhan allah ulon, ulon meuhoi droeneueh lon lakee tulong, dan droeneueh neupeupuleh ulon. droeneueh nyang peuseuliseh ulon nibak alam mawot, dan peu udeb ulon nibak lamkawan ureueng-ureueng mate. meuca-e kheueh lagu puja ngon pujoe keu tuhan, hai umat gobnyan nyang seutia, dan meusyuko kheueh ubak nyang mahasuci. sabab tuhan geubeungeh na kheueh sikeujab, meunyoe nyang jroh-jroh sabe na siumu masa. bak watee malam sabe ulon mo, teuma beungoh uroe ulon meugeumbira. watee meuras aman ulon peugah, "ulon hana soe peutaloel!" sabab droeneueh get that ate keu ulon, ya tuhan, droeneueh peujeuet ulon lagee gunung nyang kukoh. teuma oh ltheueh nyan droeneueh neumusom nibak ulon, dan ulon jiteuka teumakot. ubak droeneueh, ya tuhan, ulon meulakee, ubak tuhan ulon meuharab, "keupeue guna jih nibak droeneueh meunyoe ulon mate dan jipeutron u dalam kubu? peu kheueh mungken ureueng mate jipujoe droeneueh dan jijak peusampoe keuhai seutia droeneueh? deungoe kheueh, ya tuhan, dan neu-

gaseh kheueh keu ulon. tuhan tulong kheueh ulon!" mo ulon nyang meuba-e ka neu-ubah jeuet keu meunari nyang geumbira, neucok keuseudehan ulon dan neupeupeunoh lon deungon suka cita. dan ulon hana kutem iem droe; ulon meuca-e lagu seumujoe keu droeneueh, ya tuhan allah lon, dan meusyuko ubak droeneueh keu siumu masa!

keu teupimpen kor. zabur nabi daud. ubak droeneueh ulon meulindong, ya tuhan, bek neupeubiyeu ulon nyoe jipeukeucewa. peuseulamat kheueh ulon deumi keuadelan droeneueh deungoe kheueh ulon dan peubeubaih kheueh ulon deungon sigra. neupeujeuet kheueh keu ulon lagee gunung batee teupat ulon meulindong, lagee kuta nyang khong, diteupat nyan ulon seulamat. nyoe, droeneueh lagee gunung batee dan kuta nyang khong keu ulon! neubimbeng kheueh ulon nyang sesuai deungon janji droeneueh. neupeulheueh kheueh ulon nibak taron nyang jipasang keu ulon, sabab droeneueh kheueh teupat ulon meulindong. u dalam jaroe droeneueh ulon seurah droe; droeneueh peubeubaih ulon, ya tuhan, allah nyang seutia. ureueng nyang seumah beurala droeneueh banci; teuma ulon teutab peucaya ubak tuhan. ulon geumbira dan meusukaria sabab droeneueh teutab neugaseh keu ulon. droeneueh neungiang deurita ulon dan neupakoe that keu apoh apah lon. droeneueh hana neupeubiyeu ulon jiteun le musoh, teuma neupeubiyeu ulon, lon jak deungon beubaih. neugaseh kheueh ulon, ya tuhan, sabab ulon lam keusosahan; mata ulon peudeh sabab laloe lon mo, jiwa raga lon meurana. udeb lon habeh lam peundeuritaan, dan thon-thon lon rasa lam apoh apah. teunaga lon meukureung sabab buet lon nyang jeuhet, dan tuleueng-tuleueng lon sampoe rapoh. ulon habeh jipeukem le banmandum musoh lon, meunan cit le duma kawom silingka. banmandum rakan lon teukeujot watee jingiang keuadaan lon, dan awaknyan jiplueng meunyoe meurumpok deungon lon nibak rot ueh raya. ulon jipeutuwoe lagee jituwoe keu ureueng mate, dan jipeujeuet lagee barang nyang jitiket hana meuguna. dipat mantong na keusosahan; ulon deungoe jimeusah-sah le musoh lon. awaknyan ka sipakat jilawan ulon, dan jipeugot reun-cana kek jijak poh ulon. teuma ulon meuharab ubak droeneueh, ya tuhan, sabab droeneueh kheueh allah ulon. droeneueh sabe neupeulara ulon; neupeuseulamat kheueh ulon nibak musoh-musoh lon, dan nibak ureueng-ureueng nyang jilet-let lon. seumoga droeneueh jeuet nibak hamba neuh; neupeuseulamat kheueh ulon sabab gaseh droeneueh. bek neupeubiyeu ulon meuteume malee, ya tuhan, sabab ulon meulakee ubak droeneueh. bah kheueh ureueng jeuhet neupeumalee, dan deungon seungab-seungab jitron u dalam donya ureueng mate. neusumpai kheueh babah bubena ureueng nyang sulet nyang deungon sombang jipeuhina ureueng juoe. padubna le meulimpah-limpah keubaiekan droeneueh nyang droeneueh keubah keu ureueng taqwa! soe mantong ureueng jingiang keubaiekan nyang droeneueh peubuet, keu ureueng nyang meulindong ubak droeneueh. droeneueh som awaknyan lam lindongan droeneueh le siasat ureueng jeuhet; neujaga awaknyan lam lindongan droeneueh ateueh peue

nyang jitudo le lawan. teupujoe kheueh tuhan! nyang lumpah that hebat geunaseh gobnyan keu ulon, watee ulon jikeupong dan jiseurang, teungoh lon bingong lon sangka tuhan geuboih ulon nibak hadirat gobnyan. teuma gobnyan ka geudeungoe peue nyang ulon lakee watee ulon meulakee ubak gobnyan. cinta kheueh tuhan, hai banmandum umat gobnyan, tuhan geulindong ureueng nyang seutia. teuma ureueng nyang cungkak ngon sombong geuhukom le gobnyan deungon azeub nyang hana teukira. peuteuga dan peukong kheueh ate gata, gata banmandum nyang meuharab ubak tuhan!

zabur nabi daud. ca-e peulajaran. mubahgia kheueh ureueng nyang buet jih jeuhet hana geu itong le tuhan, dan nyang hana galak teumipee. simantong ulon hana lon aku desya lon, ulon meurana sabab apoh apah tieb-tieb watee. uroe malam droeneueh neutegon ulon, ya tuhan, teunaga lon habeh lagee meuadee lam uroe kha. laju lon aku desya ulon ubak droeneueh, keusalahan lon hana nyang ulon som. ulon peuputoh ulon aku hainyan nibak droeneueh, dan droeneueh neupeu amphon banmandum desya ulon. sababnyan tieb-tieb ureueng nyang salah nyang sigetjih bek putoh-putoh jimeudoa oh watee jihnyan jirasa ka meukarat, dan meunyoe teuka ie beuna laju teuka keusosahan, ureueng nyan hana keunong ie raya. droeneueh kheueh tempat ulon musom, neupeubeubaih ulon nibak apoh apah. teuma lon meusurak kareuna geumbira, sabab droeneueh ka neupeuseulamat ulon. tuhan meufeuroman, "ulon teuma lon tunyok rot nyang haroh gata jak, gata lon bimbeng dan lon bri naseuhat. bek lagee guda nyang hana meuakai, nyang haroh teukeundali deungon keukang dan talo mangat jitem jak." ureueng meudesa meutumpok-tumpok jitimpok deungon seungsara; teuma ureueng nyang meuharab ubak tuhan teutab geupeulindong le geunaseh gobnyan. hai ureueng-ureueng saleeh, meugeumbira kheueh dan meusuka cita kheueh sabab peue nyang ka geupeubuet le tuhan. meusurak geumbira, hai banmandum ureueng nyang juJoe ate!

hai ureueng-ureueng saleeh, meusurak geumbira kheueh sabab peue nyang ka geupeubuet le tuhan; patot that le ureueng juJoe jipujoe-pujoe. meusyukoe kheueh ubak tuhan deungon keucapi, meuca-e kheueh keu gobnyan deungon ji-ireng le irama musik. neu ca-e kheueh lagu nyang baro keu tuhan, peumeun en kheueh keucapi deungon beujroh-jroh dan meusurak kheueh deungon geumbira! banmandum peue nyang geukheun le tuhan jeuet teupeucaya; gobnyan seutia ubak peue mantong nyang geupeubuet. gobnyan geucinta ubak keujujoran dan keuadelan; bansaboh bumoe peunoh deungon gaseh gobnyan. tuhan geubri peurintah, teuma langet pi teucebta; mata uroe, buleuen dan bintang geupeujeuet deungon sabda gobnyan. banmandum ie laot geugumpoi bak saboh tempat, samudra nyang raya laju geuteun bak saboh beudongan. bah kheueh bansaboh bumoe jitakat keu tuhan dan peunduduek donya jihoreumat gobnyan. sabab gobnyan meusabda, laju banmandum geupeujeuet; gobnyan geubri peurintah, teuma banmandum nyan hase na. tuhan geupeu bateue peue nyang jireun-

cana le bansa-bansa, niet awaknyan laju geusampoh rata. teuma reuncana tuhan teutab meuteun, reuncana gobnyan teutab na sipanyang jamen. mubahgia kheueh bansa nyang jiaku tuhan sibagoe allah jih, mubahgia kheueh umat nyang geupileh le gobnyan jeuet keuhak milek gobnyan! didalam seueuruga tuhan geukalon u miyueb, dan gobnyan geukalon banmandum umat manusia. nibak takhta gobnyan tuhan geupeurati banmandum makhluk nyang tinggai di ateuh bumoe. gobnyan kheueh nyang peusaneut ate awaknyan, dan geuteupeue peue mantong nyang jipeubuet le awaknyan. raja hana hase meunang deungon le tantra, sipa-i hana seulamang sabab le teunaga jih. guda hana hase teucok keubangga mangat jeuet keumeunang, teunaga jih nyang rayeuk hana hase teupeuseulamat droe jih. tuhan geujaga ureueng-ureueng nyang taqwa nyang meuharabkan geunaseh gobnyan. gobnyan geupeuseulamat awaknyan nibak mawot, dan geupeu udeb awaknyan bak watee musem deuk. teuma geutanyoe meuharab ubak tuhan, gobnyan kheueh nyang tulong dan nyang bila geutanyoe. geutanyoe meusukaria sabab gobnyan dan peucaya ubak nan gobnyan nyang suci. seumoga kamoe teutab droeneueh gaseh, ya tuhan, sabab kamoe meuharab ubak droeneueh mantong.

zabur nabi daud, bak watee gobnyan pura-pura hana waraih pikeran dikeue abimelek, sampoe gobnyan jiuse dan laju geujak. ulon keuneuk meusyukoe ubak tuhan tieb-tieb watee, dan hana pih-pih lon pujoe gobnyan. ulon keuneuk meubangga droe sabab buet tuhan; seumoga ureueng nyang teutindeeh ngon teuseupet jideungoe dan meugeumbira. agong kheueh tuhan meusajan deungon ulon, jak meusajan-sajan ta peumulia nan gobnyan. ulon meudoa ubak tuhan, dan gobnyan geujawueh, dan geupeuleuh ulon nibak banmandum teumakat. ureueng teuseupet ngon teutindeeh meuharab ubak gobnyan dan meugeumbira, awaknyan hana alasan keujeuet keumalee. ureueng manglang jimeuhoi dan tuhan geujawueh, geupeubeubaih awaknyan nibak banmandum nyang teuseupet. malaikat tuhan geukawai ureueng nyang taqwa, dan geupeubeubaih awaknyan nibak banmandum baha. rasa kheueh keudroe pakriban get jih tuhan, mubahgia kheueh ureueng nyang meulindong ubak gobnyan. horeumat kheueh tuhan, hai kawom umat gobnyan, sabab ureueng taqwa hana kureueng meusapeue pi. singa-singa pih deuk sabab kureueng peunajah; teuma ureueng nyang seumah tuhan hana kureueng sapeue pih. deungoe kheueh, hai aneuek-aneuek banmandum, ulon peurunoe gata pakriban cara teuhoreumat tuhan. peukheueh na meuheuet mangat panyang umu dan tanekmat nyang get-get? bek tapeuteubiet tutoe haba nyang jeuhet, dan bek tagalak keu tipee muslihat. peujioh kheueh nyang jeuhet, dan peubuet kheueh nyang jroh, useuha kheueh peudamean deungon habeh sineuga. tuhan teutab jingingi ateuh ureueng saleeh, gobnyan geudeungoe meunyoe awaknyan jik-liek jilakee tulong. teuma ureueng nyang jipeubuet jeuhet geulawan le gobnyan, meunyoe awaknyan mate, bagaiih that awaknyan geupeutuwoe. meunyoe ureueng saleeh nyang meuhoi, tuhan geudeungoe, dan geupeuseulamat awaknyan nibak ban-

mandum nyang salah. tuhan to that ubak ureueng nyang peu-ubit ate; gobnyan geupeuseumat ureueng nyang ka patah seumangat. le that peundeuritaan ureueng nyang jroh-jroh, teuma tuhan geupeubeubaih awaknyan nibak banmandum nyan. tuboh jih teutab geujaga le tuhan, nibak tuleueng jihnyan hana meusikrak pih nyang na geupeupatah. ureueng jeuhet teuma mate sabab buet jih nyang jeuhet, ureueng nyang jibanci keu ureueng saleeh teuma geuhukom. tuhan geupeuseumat hamba-hamba gobnyan; nyang meulindong nibak gobnyan hana teuma geuhukom.

zabur nabi daud. tuhan, neulawan kheueh ureueng nyang lawan ulon, neuprang kheueh ureueng nyang jiprang ulon. neucok kheueh utar-utar te peurisasi droeneueh, dan neubedoh kheueh jak tulong ulon. beuot kheueh leumbeng dan kapak droeneueh keu neulawan ureueng nyang tiyeub ulon. neupeugah kheueh ubak ulon bahwa droeneueh nyang peuseumat lon. bah kheueh ureueng nyang keuneuk poh mate lon neupetaloe dan neupemalee. bah kheueh ureueng nyang meusapat dan mupakat jikak lawan lon surot kheueh lam keuadaan bingong. bah kheueh awaknyan geupeulet le malaikat tuhan, lagee sikeum angen tampo. bah kheueh awaknyan jipeulet le malaikat tuhan nibak jalan nyang seupot dan glue. teusia payah mantong awaknyan jiteun taron keu ulon, atawa jikueh uruek keuneuk jikak droeh ulon. bah kheueh awaknyan keunong binasa deungon hana jisangka-sangka. bah kheueh awaknyan meucarueh lam taron jih keudroe laju reubah dan binasa. teuma ulon meusurak-surak sabab le tuhan, ate ulon galak ngon geumbira kareuna gobnyan geupeuseumat ulon. deungon sikeubit jih ulon peugah, "tuhan, droeneueh hana bandeng deungon peue mantong droeneueh teupeu sa! droeneueh neupeu lheueh nyang leumoh nibak nyang teuga, nyang gasien dan seungsara nibak keunong tindeeh." saksi-saksi nyang jeuhet jibeudoh jikak lawan ulon, dan jitudoh ulon lon peubuet hai-hai nyang hana lon teupeue. jroh nibak ulon awaknyan balaih ngon nyang jeuhet; ulon ngob lam putoh asa. watee awaknyan deumam, ulon lumpah seudeh dan hana hase ulon makheun; laju lon meudoa sira lon teukui ulee, lagee lon meudoa keu sidroe syedara atawa keu rakan lon nyang paleng krab. ulon teukui ulon mo keu awaknyan, siulah-ulah ulon meukabong keu ma lon keudroe. teuma bak watee ulon sosah, awaknyan galak, dan meukawan-kawan jiparan ulon. awaknyan jikak lagee ureueng capiek keu jihina lon. hana putoh-putoh awaknyan jihina sidroe ureueng lapee, dan jingieng atueh lon deungon pandangan banci. trok an pajan, ya tuhan, trok an pajan droeneueh teuma neukalon mantong? neupeuseumat kheueh ulon nibak jiseurang le awaknyan, neupiesie kheueh nyawukoe ulon nibak singa-singa nyan. teuma ulon meusyukoe ubak droeneueh diteungoh umat droeneueh, dan lon pujoe nan droeneueh di tempat awaknyan meugumpoi. bek neupeubiyeu ulon jipeumeu en le ureueng nyang musoh ngon lon deungon hana sabab. bek neupeubiyeu ulon jisurak le ureueng nyang banci keu ulon deungon hana sabab. haba awaknyan hana ramah; awaknyan

jipeugot reuncana keuneuk teumippee atueh ureueng nyang udeb rukon bahgia. awaknyan jikliek-kliek u atueh ulon sira jipeugah bahwa awaknyan ka lheueh jikalon peue nyang ulon peubuet. teuma droeneueh, ya tuhan, ka lheueh neukalon; bek kheueh neuem droe, ya tuhan, bek kheueh jioh nibak ulon. beudoh kheueh neubila peukara ulon, ya allah ulon dan tuhan lon, tulong kheueh ulon! neubila kheueh ulon, sabab droeneueh ade, ya tuhan allah lon, bek neupeubiyeu musoh jisurak ulon. bek neupeubiyeu awaknyan jimariet lam ate, "syuko, geutanyoe ka tapeu habeh nyawong jih. meukeusut ate geutanyoe ka geupeupeunoh!" bah kheueh ureueng nyang harok jikalon seungsara lon jeuet keu bingong dan meuteume malee. bah kheueh ureueng nyang jipeusombong droe keulon geuhina dan geupeumalee. seumoga ureueng nyang keuneuk ngieng atueh ulon geupeubeuna meusurak dan meugeumbira. seumoga awaknyan meu ulang-ulang jipeugah, "keubit lumpah that agong tuhan! gobnyan meuharab beuseumat hamba geuh!" dan ulon teuma lon jak peugah keuadaan droeneueh, dan lon pujoe droeneueh sipanyang uroe.

keu teupimpen kor. nibak nabi daud, hamba tuhan. desya jimariet lam reulong ate ureueng jeuhet, jihnyan meubacut pi hana jitakot ubak po teu allah. jihnyan jianggab droe jih nyan lumpah hebat, sampoe hana jitee droe bahwa droe jihnyan salah raya, dan hana teubanci. tutoe haba jih jeuhet dan peunoh tipee daya, jihnyan hanale jipeubuet nyang jroh-jroh dan bijaksana. sira ji-eh di atueh teumpat eh pi jipeugot reuncana keuhai buet nyang jeuhet nyang haroh jipeubuet; peue mantong buet jih hana nyang jroh, nyang jeuhet hana jitulak. tuhan, geunaseh droeneueh meulambong manyang sampoe u langet, dan keuseutiaan droeneueh sampoe trok bak awan. keubaiekan droeneueh meujulang manyang santeut etet gunung, dan keuadaan droeneueh lhok etet tuwi laot nyang raya; manusia dan beulatang droeneueh peulara, ya tuhan. hana ek teukira gaseh droeneueh, ya allah po manusia jimusom dimiyueb sayeub droeneueh. awaknyan puhi deungon peunajoh nyang na meulimpah di baet droeneueh, dan deungon ie jieb nibak krueng droeneueh sampoe puleh grah. droeneueh kheueh panghulee udeb mandum makhluk, lam trang droeneueh kamoe kalon trang. seumoga droeneueh teutab neugaseh keu ureueng nyang jituri droeneueh, dan neupeubuet nyang jroh ubak ureueng nyang jujo ate. bek neupeubiyeu ulon jiseurang le ureueng cungkak, ya tuhan, atawa jiuse le ureueng jeuhet. ngieng kheueh, ureueng nyang jipeubuet buet nyang jeuhet ka reubah, awaknyan reubah teugageueng sampoe hana hasela jibeudoh.

nibak nabi daud. salah. sabab awaknyan lagee naleueng nyang gadoh, dan layee lagee seunaman nyang ijo. peucaya kheueh ubak tuhan, dan peubuet kheueh nyang jroh, tinggai kheueh di nangroe nyan dan meupi-e kheueh nyang seutia. mita kheueh keubahgiaan ubak tuhan, gobnyan geupeupuih ate gata. peujok kheueh udeb gata ubak tuhan, meuharab kheueh ubak gobnyan, gobnyan pasti keutulong gata. gobnyan geupeugah keuseutiaan gata lagee trang, dan keujujoran gata lagee uroe peungeuh. preh kheueh

tuhan deungon ate nyang teunang, tapreh kheueh deungon saba sampoe gobnyan geucok tendakan. bek geulisah sabab ureueng laen nyang meuhase lam udeb, atawa nyang jipeubuet tipee muslihat. bek bagaih beungeh dan seu-uem ate, nyang lagee nyan bagaih that meuteuma bala. sabab ureueng nyang jipeubuet jeuhet geupeuhangan, teuma ureueng nyang meuharab ubak tuhan, nyan kheueh nyang jeuet keuwareh tanoh nyan. ureueng jeuhet reujang gadoh, meunyo teumita, ureueng nyan ka hanale. ureueng nyang miyueb ate nyan kheueh nyang jeuet keuwareh tanoh nyan, dan jirasa udeb makmu nyang meulimpah. ureueng jeuhet jireuncana nyang jeuhet ateuhe ureueng get, dan jingiang ateuhe ureueng nyan deungon rasa banci. teuma le tuhan geupeukem ureueng jeuhet nyang lagee nyan, sabab gobnyan geupeue bahwa ureueng nyang lagee nyan ajai jih ka to that-that. ureueng jeuhet jisuet peudeueng lam sarong dan aneuk panah pi laju jitimbak keu jipoh mate ureueng gasien dan ureueng seungsara, keu teusie ureueng nyang udeb jih jroh. teuma ureueng jeuhet nyan teutob deungon peudeueng jih keudroe, dan aneuk panah awaknyan laju geuwiet meukan. barang nyang na bacut atra ureueng nyang jroh leubeh meuyuem nibak barang atra ureueng jeuhet nyang meulimpah ruah. sabab kuasa ureueng jeuhet teuma geuwiet sampoe patah le tuhan, teuma ureueng nyang get teutab geulindong. tuhan geujaga udeb ureueng saleeh, atra pusaka awaknyan teutab keu siumu masa. bak watee meukarat awaknyan hana teuma meudeurita, bak watee musem deuk awaknyan geupeuseb deungon peunajoh. teuma, meunyo ureueng jeuhet teutab geupeubinasa, musoh tuhan teuma gadoh lagee bungong nyang na timoh di dalam blang, awaknyan teuma gadoh lam asab. ureueng jeuhet watee jingui atra gob hana jipulang, teuma ureueng get-get jijok deungon sigala mangat ate. ureueng nyang geubri beureukat le tuhan teuma jeuet keuwareh tanoh nyan, teuma ureueng nyang geukutok le gobnyan teuma geu use. tuhan geubimbeng ureueng nibak rot nyang haroh geulalu, gobnyan geupeukong ureueng nyang udeb jih teutab meukeunong bak ate gobnyan. meunyo rhot, ureueng nyan hana that meubahya, sabab tuhan geumat jaroe ureueng nyan. watee ulon muda sampoe ka tuha lagee nyoe, gohlom na ulon kalon ureueng nyang jroh geutinggai le tuhan, atawa aneuk cucoe ureueng nyan jeuet keu ureueng geumadee. gobnyan sabe geubri pinjam dan geujok mantong, dan aneuk-aneuk gobnyan jeuet keubeureukat keu geuhnyan. tinggai laju buet jeuhet, dan peubuet laju buet nyang jroh, dan keu siumu masa keuturonan gata jeuet keu ureueng nyang tinggai teutab nibak tanoh nyan. sabab tuhan geucinta ubak buet nyang ade dan get, ureueng nyang seutia ubak gobnyan hana geupeubiyeu jihnyan teulanta. gobnyan geulindong ureueng nyan sampoe siumu masa, dan keuturonan ureueng jeuhet teuma geupeuhanco. ureueng saleeh jeuet keu wareh nibak tanoh nyan, dan tinggai teutab disinan keu siumu masa. ureueng get meunyo jipeugahaba get that bijaksana, gobnyan sabe juoe nibak tutoe haba. hukum po teu allah na teukeubah lam ate gobnyan, gobnyan hana meusim-

pang nibak hukum nyan. ureueng jroh-jroh sabe jiluem le ureueng jeuhet nyang jimita keuseumpatan mangat jipoh mate. teuma tuhan hana geupeubiyeu ureueng nyan rhot lam jaroe musoh, atawa jihukom watee jipeusidang. meuharab kheueh ubak tuhan dan taat kheueh ubak peurintah gobnyan, teuma gobnyan geuangkat gata jeuet keu wareh nibak tanoh nyan; gata teuma tangiang ureueng jeuhet geupeubinas. ulon ka lueheh lon ngiang ureueng jeuhet nyang galak meusulet ngon raya haba; jihnyan lagee bak kayee nyang luhu ngon ukeue nyang lhok. watee ulon jak, jihnyan ka hanale, lon mita jihnyan, teuma hanmeuho saho dan hana meurumpok. neungiang kheueh ateuhe ureueng nyang jroh dan juoe ate; ureueng nyang galak keu dame, nibak ureueng nyan na masa ukeue nyang jroh. teuma ureueng nyang meudesya geupeubinasa; keuturonan awaknyan geupeuhanco. tuhan geupeuseulamat ureueng saleeh, dan geulindong awaknyan oh watee teuseupet. gobnyan geutulong dan geupeuseulamat awaknyan, dan geupeusie awaknyan nibak ureueng-ureueng jeuhet, sabab awaknyan jimeulindong ubak gobnyan.

zabur nabi daud watee geupeuseumah keureubeuen peuingat. tuhan, bek kheueh neuhukom ulon watee droeneueh beungeh, dan bek neuseksa ulon watee droeneueh mureuka. aneuk panah droeneueh nyang neu timbak ateuhe ulon sampoe beusot dan luka tuboh lon, dan jaroe droeneueh keubit that brat meuteugon bak tuboh ulon. ulon saket brat sabab droeneueh beungeh; hana nyang seuhat nibak tuboh lon sabab desya lon. ulon ngob lam ie raya keusalahan lon, beuban desya lon lumpah that geuhon meuginton u ateuhe ulon. luka meucabok nyang na nibak ulon ka meunanoh dan meubee kheub, sabab ulon ka lon peubuet nyang bangai. ulon meuteukui dan meubungkok, sipanyang uroe ulon ruman lon krot dan seudeh. deumam ngon seu-uem lagee apui keunong bak tuboh lon, hana nyang seuhat nibak tuboh lon. ulon ka reumok hanco meukeupeng dan teunaga lon pi habeh, ulon apoh apah sabab ate lon gundah. tuhan, droeneueh neuteupeue peue mantong nyang ulon meuheut, apoh apah ulon hana nyang teusom nibak droeneueh. jantong lon yo meugam-gam, teunaga lon gadoh, dan mata ulon ka jeuet keu rabin. kawom dan rakan ulon jiweeh sabab peunyakot nyang na nibak ulon, meunan cit kawom keurabat ulon jipeujioh lon. ureueng nyang keuneuk poh mate lon ka jijak teun taron; dan nyang keuneuk peucelaka lon laju jiancam keuneuk poh ulon. teuma ulon lagee ureueng tulo nyang hana teudeungoe sapeue, dan lagee ureueng kalu nyang hana hase peugah haba. keubit, ulon saban that lagee ureueng nyang hana hase teudeungoe sapeue, dan le sababnyan hana ulon bantah sapeue. teuma ulon meuharab ubak droeneueh, ya tuhan, dan droeneueh, tuhan allah lon, neujaweub ulon. bek neupeubiyeu musoh ulon galak jingiang ulon nyang susah lagee nyoe bago, dan bek neupeubiyeu awaknyan rayeuk haba meunyo ulon ka guyah. ulon rab reubah, hana pioh ulon saket sabe. ulon meungaku mandum desya lon; ate ulon gundah watee lon pike keusalahan lon. ureueng-ureueng nyang jimeumusoh ngon ulon

rame dan teuga-teuga, awaknyan jibanci that ubak cara udeb lon. ureueng nyang jibalah buet nyang jroh deungon nyang jeuhet jimeumusoh ngon lon sabab ulon lon peubuet nyang jroh. ya tuhan, bek neutinggai ulon, bek neujioh nibak ulon, ya allah lon. neuteuka kheueh bubagaih neutulong ulon, ya tuhan nyang peuseulamat ulon.

keu teupimpen kor. zabur nabi daud. keu yedutun. ulon pike, "ulon lontem jaga droe mangat bek meudesya deungon lidah lon. ulon han lontem peugah haba simantong ureueng jeuhet mantong to." ulon seungab siribee basa, sampo teupeurugo droe lon keudroe. dan deurita nyang ulon rasa teurasa meutamah brat; ulon teuginton deungon gundah nyang paleng hebat. maken lon pike, ate ulon seumaken susah; dan akhe jih ulon peugah kheueh lagee nyoe, "tuhan, neupeugah kheueh, pajan ajai ulon nyang mangat jeuet lon teupeue padub na paneuk jih umu ulon." padub na paneuk nyang ka teuntee umu lon! keu droeneueh jangka udeb lon nyang hana meumakna. keubit, manusia nyoe lagee jiproh le nafah, udeb jih meunan mantong lagee bubayang, banmandum buet gabuek jihnyan sia-sia hana meuguna; jihnyan jitamon hareuta, teuma hana jiteupeue soe nyang peuguna atranyan. jinoenyo, peue nyang haroh ulon preh, ya tuhan? ubak droeneueh kheueh peue nyang ulon harab. neupeulheueh kheueh ulon nibak banmandum desya-desya lon, bek neupeubiyu ulon jeuet barang hinaan le ureueng bangai. ulon seungab lon iemdroe babah lon gampet hana lontem peugah haba, sabab droeneueh kheueh nyang heungko ulon. neucok kheueh hukuman droeneueh nibak ulon nyoe, sabab ulon rab mate neuheuntam le droeneueh. manusia sabab le buet jih nyang salah; neuhukom dan neuheuntam lagee kamoe droeneueh peuhanco peue nyang meuyemu nibak jihnyan. keubit, manusia lagee jiproh le nafah mantong. deungoe kheueh doa ulon, ya tuhan, neungieng kheueh meulakee ulon; bek neuseungab mantong meunyo ulon mo. lagee banmandum indatu ulon, teuma sikeujab mantong ulon meunumpang ubak droeneueh. bek neupeukaru ulon, mangat ulon jeuet keumangat bahpi bacut kong, sigohlom ulonjak dan hana lon gisa le.

keu teupimpen kor. zabur nabi daud. deungon saba ulon preh-preh tuhan tulong; laju gobnyan geupakoe ulon dan geudeungoe peue nyang ulon lakee. gobnyan geutarek ulon nibak uruk nyang paleng meubahya, dan nibak luhob paya. gobnyan geukeubah ulon di ateueh buket batee, deungon nyan langkah ulon mantab. gobnyan geupeuruno ulon meuca-e ngon lagu baro, lagu sumujoe keu allah geutanyoe. jai that ureueng nyang ngieng gobnyan dan laju jiteuka teumakot, dan laju jipeucaya ubak tuhan. mubahgia kheueh ureueng nyang peucaya ubak tuhan, nyang hana jiseutot jiseumah dewa-dewa, atawa jilakee tulong ubak ureueng nyang sombong. tuhan, padubna le cebtaan droeneueh keu kamoe, ya tuhan allah ulon, droeneueh hana sa ngon peue mantong teupeu sa! jai lumpah na rencana droeneueh nyang keubit takjok keu kamoe, hana mungken teucalitra banmandum nyan. peuseumahan dan keureubeuen nyang teuhidang hana

droeneueh galak, meunan cit keureubeuen nyang teutot dan keureubeuen peusampoh desya nyan pih hana droeneueh tunggee. teuma droeneueh ka neubri keu ulon geulinyueng nyang hase ulon deungoe su droeneueh. laju ulon peugah, "nyoe kheueh ulon, didalam kitab meugulong na teutuleh keu ulon: ulon harok ulon peubuet keuheundak droeneueh, ya allah, hukom droeneueh ulon keubah didalam ate." lam rapat dipat mantong na meugumpoi umat droeneueh ulon peugah haba geumbira bahwa droeneueh ka neupeuseulamat kamoe. deungon hana lon pioh-pioh hainyan ulon peusampoe, droeneueh neuteupeue banmandum nyan, ya tuhan. haba keuhai seulam nyan hana ulon keubah lam ate, nyang neutulong dan keuseutiaan droeneueh sabe ulon peugah. didalam kawan umat droeneueh nyang meusapat hana ulon iemdroe, teuma ulon peusampoe geunaseh dan keuseutiaan droeneueh. tuhan, bek kheueh neupioh neugaseh keu ulon; neulindong kheueh ulon sabe deungon gash dan seutia droeneueh. ulon jike-upong le malapeutaka nyang le, jeumeulah jih hana ek teutitong. ulon jitiyeub le desya-desya lon sampoe ulon hana hase lon keumalon. jeumeulah jih leubeuh le nibak ok nyang na di ateueh ulee lon, sabab nyan ulon jeuet keu putoh asa. ya tuhan, neupeuseulamat kheueh ulon, beubagaih kheueh ya tuhan, neujak tulong ulon! bah kheueh ureueng nyang keuneuk peumate ulon teupeu taloe dan jiplueng lagee ureueng bingong. bah kheueh ureueng nyang jisurak keuhai ulon nyang malang teupoh lon sampoe jisurut dan teuhina. bah kheueh ureueng nyang peukem ulon teukeujot dan malee. seumoga banmandum ureueng nyang jiseumah droeneueh meusukacita dan meugeumbira, dan banmandum yang jicinta ubak seulam nyang teuka nibak droeneueh hana pioh jipeugah, "keubit agong that kheueh tuhan!" ulon nyoe gasien dan leumoh, teuma tuhan geupeurati ulon. droeneueh kheueh nyang tulong dan peuseulamat ulon, bek meulet, ya tuhan lon!

keu teupimpen kor. zabur nabi daud. mubahgia kheueh ureueng nyang na jipakoe keu ureueng nyang leumoh hana meudaya; tuhan teuma geutulung ureueng nyan watee jih lam keuadaan teuseupet. tuhan teuma geulindong dan geupeulara ureueng nyan, gobnyan geubri bahgia di ateueh bumoe, dan hana geuseurah ureueng nyan lam jaroe musoh jih. tuhan teuma geutulung ureueng nyan watee jihnyan saket, dan geupeupuleh lon ureueng nyang saket nyan. kheun ulon, "ulon ka meudesya ubak droeneueh, ya tuhan, neugaseh kheueh ulon dan neupeupuleh kheueh ulon." musoh ulon jipeugah nyang jeuhet keuhai ulon, meukeusut awaknyan mangat ulon nyoe mate dan jituwo le gob. ureueng nyang jak saweue ulon hana jujo, dan ikhlas ate jih. awaknyan jijak peusapat haba brok keuhai ulon, laju jijak peugah ho mantong ban siseun lingka. banmandum nyang jibanci keu lon jimeusah-sah; awaknyan jipeugah hai nyang paleng brok keuhai ulon. kheun awaknyan, "peunyakot ureueng nyan parah that, jihnyan hana mungken jibeudoh le." meunan cit rakan nyang paleng krah nyang ulon peucaya, ureueng nyang pajohbu meusajan ngon ulon, nyan pih ka jihina lon. neugaseh kheueh keulon, ya tuhan, neu-

peupuleh kheueh ulon, mangat ulon hase lon balaih buet nyang jeuhet nibak siteuru ulon. meunyeu ulon hana jipeutaloe le musoh lon, baro kheueh lon teu-peue bahwa droeneueh neubila ulon. droeneueh neutulung ulon sabab ulon juoe, dan neupeujeuet ulon udeb meusajan ngon droeneueh keu siumu masa. pujoe kheueh tuhan, allah israel! pujoe kheueh gobnyan phon saat nyoe dan siumu masa!

keu teupimpen kor. ca-e peulajaran kawom korah. lagee rusa jihawa keu ie krueung, meunan kheueh jiwa lon rindu ubak droeneueh, ya allah. ulon rindu ubak allah nyang udeb, pajan ulon jeuet lonjak meuebadat di baet gobnyan? uroe malam lalee ulon mo, na kheueh ie mata peunajoh ulon. sipanyang uroe musoh lon jitanyong, "dipat allah gata?" ate ulon peudeh meunyeu teuingat yohmasa ilee, watee ulon jak ubak baet tuhan meusajan ngon ureueng nyang jipeuna peurayaan. ulon lonjak dikeue arak-arakan deungon seumurak nyang meuhubo dan ca-e ngon lagu puja dan pujoe. pakon ate ulon seudeh ngon geulisah? ulon meuharab ubak po teu allah. teuma ulon meusyuko lom ubak gobnyan, ubak allah lon dan nyang peuseulamat ulon. nibak tanoh teumpat teuboih nyoe ate ulon ka hanco ngon reumok, sababnyan ulon ingat ubak tuhan. jiwa lon hanyot u dalam arus keuseudehan, ulon ka jiba le ie raya keukacauan; lagee su umbak ie grob nibak krueung yordan nibak gunung hermon dan gunung mizar. seumoga tuhan geutunyok geunaseh gobnyan oh watee uroe, mangat watee malam ulon hase meuca-e, dan meudoa ubak allah mata ie udeb lon. ulon peugah ubak allah, nyang bila ulon, "pakon droeneueh neutuwoe keu ulon? pakon ulon nyoe haroh meudeurita, sabab jiteugom le musoh-musoh lon?" ate lon hanco meukeupeng-keupeng sabab jipeuhina le musoh. awaknyan hana pioh jiteumanyong, "dipat allah gata?" pakon ate lon seudeh dan geulisah? ulon meuharab ubak po teu allah. teuma ulon meusyuko lom ubak gobnyan, ubak allah lon nyang ka geupeuseulamat ulon.

neubri kheueh keuadalan keu ulon, ya allah, neuprah kheueh hak ulon ateueh bansa nyang doraka. peubeubaih kheueh ulon nibak ureueng jeuhet dan nyang teumipee. droeneueh kheueh, allah peulindong ulon; pakon droeneueh neutinggai ulon? pakon ulon haroh meudeurita sabab jiteugom le musoh-musoh lon? neupeugah kheueh keuseutiaan droeneueh mangat teupeu peungeuh dan teubimbeng ulon, mangat jeuet ulon jakwoe u sion, buket droeneueh nyang suci dan u baet teumpat tinggai droeneueh. teuma ulon peukeue ubak miseubah allah, meuhadab allah pucak keubahgiaan lon. ulon teuma meuca-e dan lon peumeuen keucapi, keulon pujoe droeneueh, ya allah, allah ulon. pakon ate ulon seudeh dan geulisah? ulon meuharab ubak allah, dan ulon meusyukoe lom ubak gobnyan, ubak allah lon dan nyang ka peuseulamat ulon.

zabur kawom korah. ca-e peulajaran. keu teupimpen kor. ya allah, kamoe ka lheureh kamoe deungoe keudroe kisah nyang geucalitra le indatu kamoe keuhai karya nyang hebat nyang droeneueh peubuet bak jamen ilye. droeneueh keudroe nyang use bansa-bansa mangat jeuet umat droeneueh tinggai teutab di nanggroe awaknyan. bansa-bansa nyang laen

droeneueh peuceulaka, teuma umat droeneueh neupeubiyeu meukeumang meue aneuek cucoe. tanoh nyan kon jireubot le awaknyan deungon peudeueng; dan bukon deungon teunaga jih keudroe awaknyan meunang, teuma deungon kuasa dan cahya teuka droeneueh, sabab droeneueh neugaseh keu umat droeneueh. droeneueh kheueh raja ulon dan allah lon, nyang bri meunang keu umat droeneueh. deungon kuasa droeneueh kamoe peutaloe bubena musoh kamoe, dan kamoe peutaklok ureueng-ureueng nyang jiseurang kamoe. sabab ulon hana ulon peuguna aneuk panah lon, meunan cit ngon peudeueng hana hase jipeuseulamat ulon. teuma droeneueh kheueh nyang ka peuseulamat kamoe nibak mandum musoh kamoe, dan neupeutaloe mandum ureueng nyang jibanci kamoe. teuma kamoe sabe kamoe peumeugah droeneueh, dan hana putohputoh kamoe meusyuko ubak droeneueh. teuma jinonyoe droeneueh ka neutinggai kamoe dan neupeubiyeu kamoe jipeutaloe. droeneueh hanale neumaju lam baresan kamoe. neupeubiyeu kamoe meunan mantong kamoe peuplung droe nibak musoh kamoe, dan awaknyan ban galak droe habeh jireupah hareuta kamoe. neupeubiyeu kamoe jisie lagee jisie kameng, dan neupeu crebre kamoe lamkawan bansa-bansa. neupeubloe umat droeneueh deungon yuem nyang hana hareuga, dan hana meuteume laba bahpi sikada. neupeujeuet kamoe barang hinaan le ureueng lingka kamoe jipeukem jipeuayang sira jihina. neupeujeuet kamoe barang jipansi le bansa-bansa; sira jiassek ulee awaknyan jihina kamoe. siuroe seupot ulon jirapa, lon tanggong malee dan peuteubai muka, sabab lon deungon jiejek sira jihina nibak babah musoh nyang jitroh dam. banmandum nyan ka jipeurhot u ateueh kamoe bahpi kamoe hana meutuwoe ubak droeneueh atawa kamoe khianat janji kamoe deungon droeneueh. ate kamoe hana kamoe iengkeue ubak droeneueh; dan peurintah droeneueh hana teuma kamoe peujayah. teuma trok ate droeneueh neutinggai kamoe didalam seupot; kamoe hana meudaya lamkawan beulatang juah. meunyeu seukirajih kamoe hanale kamoe seumah po teu allah, teuma kamoe meudoa ubak ilah nyang laen, nyang kamoe peubuet nyan pasti geuteupeue le po teu allah, sabab gobnyan geuteupeue banmandum rahsia ate kamoe. deumi droeneueh kamoe hana putoh-putoh teuancam le mawot, dan jipeusaneut kamoe lagee bubiri nyang teusie. beudoh kheueh, ya tuhan! pakon droeneueh neutengeut? beudoh kheueh! bek neutulak kamoe lageenyoe siumu masa. pakon droeneueh neumusom, dan neutuwoe ubak seungsara dan keusosahan kamoe? kamoe reubah hanco meukeupeng di ateueh tanoh, teueh teunyue di dalam abee sabab kamoe taloe. beudoh kheueh dan neutuka kheueh neutulong kamoe, peuseulamat kheueh kamoe sabab gaseh droeneueh.

zabur kawom korah. ca-e gaseh. keu peumimpen kor. meunurot paduan nada: bungong bakong. tutoe haba nyang mameh jiteubiet lam babah ulon, ulon peuseumah ca-elon keu raja. lagee genssee sidroe pu-jangga nyang malem, lidah lon kasiab ulon meuca-e. droeneueh nyang paleng lagak lamkawan mandum manusia, tutoe haba droeneueh peunoh deun-

gon nyang jroh lom mubahgia, sababnyan droeneueh geubri beureukat le po teu allah keu siumu masa. neulat peudeueung droeneueh nibak keuieng, hai raja peukasa, droeneueh lumpah that agong dan seumarak! maju kheueh deungon gagah neutuju ubak keujayaan jak peujuang kubeunaran dan keuadelan nyang leumoh leumbot; deungon teunaga nyang na nibak gata reubot kheueh keumeunangan nyang raya! panah gata nyang tajam sampoe peureulong jantong ate musoh gata, bansa-bansa reubah meusumpom dikeue kaki gata. allah geubri kuasa keu gata mangat hase tamat peurintah, kuasa gata meuteun siumu masa; deungon ade rakyat gata tapeurintah. meunan cit gata tacinta ubak nyang beuna nyang tabanci keu nyang jeuhet; sabab nyan, allah, allah gata ka geupileh gata, dan geupeubahagia gata leubeh nibak raja-raja nyang laen. peukayan gata meubee meuhalak deungon bee mur, gaharu dan ceundana; ureueng nyang meu-en musik nyang na di meuligoe gadeng peubuet ate gata lumpah bahgia. lamkawan deundayang meuligoe disinan na putroe-putroe raja. blah nueuen takhta geudong pereumaistri deungon pisan meuh murni. hai putroe, deungoe kheueh ulon peugah nyoe, tapeutuwoe kheueh ubak bansa dan wareh kawom gata. deungon lagak dan ceudah nyang na nibak gatanyan ate raja sampoe teupikat, gobnyan teungku gata, tundok kheueh ubak geuhnyan. peunduduek tirus jiba peuseumahan keu gata; ureueng kaya jiuseuha jicok ate gata. putroe raja geutamong deungon peunoh seumarak, gawon nyang geungui meusulam deungon meuh. deungon peukayan nyang meubagoe wareuna gobnyan jikakba meuhadab raja, ji-ireng le bubena aneuek dara, dan rakan-rakan jih, meunan cit awaknyan keu raja. sira jiseumarak ngon subra dan geumbira bak watee teuintat dan peutamong u dalam meuligoe raja! droeneueh, raja ulon, teuma meuteume aneuek agam nyang le mangat jiduke nibak takhta indatu gata. awaknyan teuma tapeujeuet keu ureueng nyang mat kuasa ateuh bansigom bumoe. deungon ca-e nyoe ulon peumaklum gata tron neutron dan bansa-bansa teuma jipujoe gata siumu masa

zabur kawom korah. keu peumimpin kor. deungon ca-e alamot. allah na kheueh nyang lindong dan teunaga geutanyoe; gobnyan sabe lam siab dan mampu geutulong pajan mantong geutanyoe meukarat. teuma geutanyoe hana teumakot, bahpi bumoe nyoe meuhayak, dan gunong-gunong karam lam laot raya; bahpi laot jipot le geulumbang raya, dan buket ngon gunong geuhayon keunong heungko gobnyan. na alue ie krueng ji-ile nyang that galak banda allah, teupat tinggai allah nyang mahamanyang. alah tinggai teutab disinan, teuma bandanyan hana hanco; gobnyan teuma geutulong watee beungoh uroe nyang ceudah. su allah lagee geulanteue, dan bumoe teuma hanco meutab; bansa-bansa yo ngon teukeujot, keurajeuen-keurajeuen nangroe teuma reuloh. tuhan nyang mahakuasa na sajan geutanyoe, allah nabi yakub geulindong geutanyoe. jak keunoe, ngieng kheueh peue nyang teungoh geupeubuet le tuhan; padubna hireuen meuneubuet gobnyan di ateuh bumoe! gobnyan nyang peureuda prang bansigom donya, gando dan leumbeng habeh ge-

upeuhanco, meunan cit mandum peurisasi bulat ka habeh geutot. feureuman gobnyan, "peupioh prang nyan; beutateupeue kheueh, ulon nyoe allah, ulon-nyoe agong lamkawan bansa-bansa, dan agong bans-aboh bumoe." tuhan nyang mahakuasa na meusajan geutanyoe, allah nabi yakub nyang lindong geutanyoe.

zabur kawom korah. keu peumimpin kor. seumurak dan gata peeh paleuet kheueh deungon geumbira, hai banmandum bansa! pujoe kheueh allah deungon seumurak nyang meuhubo! sabab tuhan nyang mahamanyang na kheueh nyang paleng dahsyat, raja agong nyang mat kuasa bansigom bumoe. gobnyan nyang jok keugeutanyoe ateuh bubena bansa, dan nyang peujeuet geutanyoe hase takuasa ateuh mandum sukee-sukee bansa. gobnyan nyang pileh keugeutanyoe tanoh pusaka nyang tanyoe peureulee, keubanggaan bansa nyang geusayang. allah ka geuek ateuh takhta gobnyan, teu-ireng ngon su seumurak nyang meuhubo lom su sangka kala. meuseulaweuet seumujoe kheueh keu po teu allah, ca-e kheueh dan seulaweuet kheueh puja ngon pujoe keu raja geutanyoe! allah na kheueh raja ateuh banmandum bumoe, pujoe kheueh gobnyan deungon ca-e seulaweuet nyang peunoh deungon seuni! allah geuduek di ateuh takhta gobnyan nyang suci; gobnyan geupeurintah ateuh bansa-bansa. bubena peumimpin bansa habeh meusaho sibagoe umat po teu allah nyang geupujoe le nabi ibrahim. sabab allah na kheueh raja sigala raja, gobnyan lumpah that agong dan mulia.

zabur kawom korah. keubit that agong tuhan dan lumpah teupujoe di banda allah geutanyoe, di buket nyang suci. sion, buket allah meujulang peureumai banda raja agong nyang lumpah garangsang bans-aboh bumoe. allah tinggai didalam puri nyang indah, dan teunyata gobnyan sidroe kheueh peulindong gobnyan. ngieng kheueh, raja-raja geumeusapat; awaknyan teuka keuneuk jikak seureubu. teuma, ban-teukalon buketnyan, awaknyan teuceungang ka tahe mante; awaknyan teukeujot dan laju jiplueng deungon teubingong-bingong. disinan awaknyan yo meutot-tot teumakot dan saket, lagee ureueng inong nyang keuneuk peulahe aneuek, lagee kapai nyang hanco jipupo le angen badee raya. lagee nyang tanyoe deungoe, jinoo ka deuh takalon, di banda tuhan nyang mahakuasa. banda nyan na kheueh banda allah geutanyoe, gobnyan geubila bandanyan keu siumu masa. di dalam baet droeneueh kamoe manueg sira meurateb keu gaseh droeneueh, ya allah. nan droeneueh meusyuehu dan teupujoe bans-aboh bumoe, droeneueh neumat peurintah deungon ade. bah kheueh rakyat sion dan yehuda jimeusurak sabab geumbira, sabab droeneueh neuhukom lawan awaknyan. keuileng kheueh sion, wet-wet kheueh nibak banda nyan, dan neutitong kheueh padubna meunara nyang na disinan. peurati kheueh nibak binte beuton jih, dan peureksa kheueh kuta jih, mangat gata hase talacitra nibak keuturonan gata: "gobnyan kheueh allah, allah geutanyoe keu siumu masa, gobnyan teuma geupimpin geutanyoe sampoe keukai abadi."

zabur kawom korah. keu peumimpin kor. de-

ungoe kheueh, hai sigala bansa, pasang kheueh geulinyueng hai peunduduek donya, bah kheueh nyan ureueng seudeurhana, meunan cit ngon ureueng nyang meugah raya, bah kheueh nyan ureueng gasien, meunan cit keu ureueng kaya. ulon teuma lon meututoe ngon haba nyang bijaksana, pikeran ulon lhok lumpah na. ulon teuma lon simak pribasa, dan lon peutrang makna jih sira lon peumeuen keucapi. ulon hana teumakot watee ulon ka jiseupet, watee ulon jikeupong le musoh nyang jeuhet. awaknyan bandum jimeubangga ngon atra keukayaan, dan jipeusombong droe ngon atra jih nyang kaya. nyang sikeubiet jih hana meusidroepi nyang hase jipeuseulamat syedara jih, atawa jibayeue yuem teutuboh syedara jih nyan ubak po teu allah. peue mantong nyang jibri meuneujok jih nyan hana teuma seb; keubit that meuhai yuem teutuboh nyawong syedara jih nyan, mangat jihnyan teupeusie nibak mate dan jeuet udeb siumu masa. hana, jihnyan teuma jingiang keudroe bahwa ureueng bijaksana pih teuma binasa. ureueng bangai mandum binasa, dan jitinggai atra jih le keu ureueng laen. awaknyan teuma jitinggai lam jrat siumu masa; nyan kheueh teumapat tinggai awaknyan sampoe akhe masa, bah kheueh yoh watee ilee jihnyan luwah that tanoh. manusia hana hase udeb sabe lam makmu; saban lagee beulatang, ureueng nyan teuma binasa. meunan kheueh naseb ureueng nyang peubangga droe jih, dan watee ukeue ureueng nyang puih ngon tutoe haba. lagee bubiri, awaknyan ka teupeuteuntee keu mate; mawot teuma jeuet keu ureueng nyan rabe awaknyan. ban seuboh buta awaknyan ka jipeutaloe le ureueng juje; tuboh awaknyan nyang gagah ka jeuet keubrok lam donya ureueng mate, jioh that nibak teumapat tinggai nyang mewah. teuma po teu allah geupeu lheureh ulon, gobnyan teuma geupeuleukang ulon nibak keukuasaan mawot. bek teumakot meunye na sidroe ureueng ka jeuet keukaya, dan hareuta jih meutamah le. sabab watee ureueng nyan mate hana sapeue pih nyang jiba, atra jih nyan hana jiba lam kubu meusajan droe. meunan cit meunye na sidroe ureueng nyang meuntong lam udeb jih, dan ji pujoe-pujoe sabab ureueng nyan meuhase lam udeb nyoe, ureueng nyan pih jiseutot indatu jih nyang ka awai di alam baka ubak teumapat nyang seupot glab siumu masa. manusia hana hase udeb sabe lam keumewahan, saban lagee beulatang, jihnyan pih teuma mate.

zabur asaf. phon di sion, banda nyang paleng tari, allah teuka meucahya muble-ble. allah geutanyoe teuka dan hana geutinggai seungab, awai teuka apui nibak gobnyan nyang hu jimeueue lagee jilieh-lieh, dan jikeulileng le angen badee nyang lumpah teuga. gobnyan geutawok laju langet ngon bumoe mangat jipeusaksi le awaknyan bahwa gobnyan teungoh geupeuna sidang nibak teumapat teusidang umat gobnyan. feureuman gobnyan, "gata peusapat laju banmandum umat ulon nyang ka ji-ikat janji deungon ulon, dan teupeukong janjinyan deungon keureubeuen nyang teusie." langet laju jipeugah bahwa allah geupeusidang umat gobnyan, dan bahwa gobnyan keudroe nyang jeuet keuhakem jih. "deungoe kheueh, hai umat ulon, ulon keuneuk peugah haba, israel, ulon keuneuk meusaksi keugata;

ulon nyoe allah, po teu allah gata. bukan sabab le keureubeuen gata ulon tudoh gata; keureubeuen nyang gata teutot sabana dikeue ulon. ulon hana peureulee leumo nyang na didalam weue gata, atawa kameng nyang na didalam kawan beulatang peulara gata; sabab banmandum beulatang nyang na di dalam uteuen na kheueh atra ulon, dan beulatang peulara nyang na di ateuh gunong meureubeue le jih. banmandum cicem nyang na di ateuh gunong nyan pih atra ulon, dan banmandum makhluk nyang na udeb didalam blang beulantara. meunye ulon deuk, hana peureulee ulon peugah ubak gata, sabab bumoe banmandum asoe jihnyan na kheueh milek ulon. ulon hana lon makheun uengkot sie leumo agam, meunan cit hana teuma ulon jieb darah kameng agam. peuseumah kheueh keureubeuen ucapan syuko keu po teu allah, tapeutrok kheueh janji gata ubak nyang mahamanyang. meulakee kheueh ubak ulon bak watee gata meukarat, teuma ulon kupeuleuh gata, dan gata teuma tapujoe ulon." teuma ubak ureueng jeuhet tuhan geupeugah meunoe, "gata hana hak tapeugah keuhai hukom ulon, dan kheun-kheun keuhai peujanjian ulon. sabab gata hana tatem teurimong nyang ulon peugah, dan tatulak peue mantong nyang ulon peurintah. meunye deuh gata ngieng sidroe ureueng ceumucue, laju gata seutot deungon ureueng nyan, dan gata meurakan deungon ureueng-ureueng nyang galak jipeubuet zina. babah gata sabe tapeugah nyang jeuhet-jeuhet, dan sabe siab deungon tipee muslihat gata. hana ploh gata fiteunah syedara gata, dan tau-pat ngon tapeubrok-peubrok syedara kandong gata. nyan kheueh nyang gata peubuet, teuma ulon seungab mantong, teuma gata pike ulon nyoe lagee gata. dan bak saatnyoe ulon kurapa gata, dan banmandum nyan ulon peujeuet keunyata keugata. simak kheuehnyoe, hai gata nyang tuwoe ubak po teu allah; jaga kheueh bek sampoe ulon peubinas gata, dan hana ureueng nyang hase jipeuseulamat gata. ureueng nyang peuseumah syukoe sibagoe keureubeuen, ureueng nyan kheueh nyang jihoreumat ulon; dan keu ureueng nyan teupeusiab rot ueh keu ureueng nyan ulon tunyok keuhai seulamat nibak ulon."

keu teupimpen kor. zabur nyang geutuleh le nabi daud watee gobnyan ka lheureh geudot le nabi natan sabab geumeumukah deungon batsyeba. neugaseh kheueh keu ulon ya allah, sabab droeneueh teutab neugaseh, neusampoh kheueh desya ulon sabab gaseh sayang droeneueh nyang raya. neu rhah kheueh peue mantong buet ulon nyang jeuhet; neupeugleh kheueh ulon nibak banmandum desya-desya lon. sabab ulon meungaku ubak buet-buet ulon nyang salah, desya lon sabe lon ingat. ubak droeneueh, ubak droeneueh mantong ulon meudesya, dan ulon peubuet peue nyang droeneueh anggab jeuhet. dan kapatot droeneueh neuhukom ulon, ade that keuputotan droeneueh. nyang sikeubit jih, ulon nyoe jeuhet yoh phon ulon u na ateuh donya nyoe, dan na desya yoh phon na lam pruet ma. droeneueh neulakee ate nyang juje; peupeunoh kheueh baten ulon deungon hikeumat droeneueh. peugleh kheueh ulon, teuma ulon jiteuka suci; pumano kheueh ulon, teuma ulon leubeh puteh nibak gapeueh. bah kheueh ulon deungoe haba suka cita, mangat ate

nyang ka droeneuh peurumok nyoe geumbira lom teuma. paleng kheueh wajah droeneuh nibak desya ulon, dan neusampoh kheueh bubena salah lon. cepta kheueh ate nyang gleh lom murni keu ulon, ya allah, neupeubaroe kheueh ate ulon deungon seumangat nyang tabak. bek kheueh ulon nyoe neutiek dikeue droeneuh, dan bek kheueh neucok roh droeneuh nyang suci nyang na nibak ulon nyoe. neupeujeuet kheueh ulon nyoe mangat geumbira lom sabab keuhai seumangat nyang na nibak droeneuh, neubri kheueh keu ulon ate nyang reula mangat lon taat ubak droeneuh. dan ulon teuma lon peurunoe peurintah droeneuh ubak ureueng nyang meudesya, mangat awaknyan jiwoe lom ubak droeneuh. peuseuliseh kheueh ulon nibak mawot, ya allah nyang peuseumangat ulon, dan deungon ate nyang geumbira teuma ulon jak peugah ho-ho mantong keuhai keuadalan droeneuh. ya tuhan, neutulong kheueh ulon mangat jeuet lon peugah haba, dan ulon teuma lon pujo-pujo droeneuh. droeneuh hana neuharok keu keureubeuen nyang teusie; meunyo ulon peuseumah keureubeuen nyang teutot, droeneuh hana neugalak. keureubeuen keu po teu allah na kheueh ate nyang reumok reundam, ate nyang tundok dan meutobat hana droeneuh tulak. ya allah, neutunyok kheueh keubaiekan droeneuh ubak sion, neupeudong kheueh lom binteh-binteh beuton yerusalem. teuma droeneuh neutem teu-rimong keureubeuen nyang layak, keureubeuen nyang teutot dan keureubeuen nyang mantong get leumo agam teuma teukeureubeuen di ateuh meuja miseubah droeneuh.

keu teupimpen kor. ca-e-ca-e nyang geupeuruno le nabi daud, bak watee doe, ureueng edom, teuka jijak peugah ubak saul bahwa nabi daud ka trok u rumah abimelekh. hai ureueng teuga, pakon gata tapeusombong ateuh keujeuhetan gata ateuh ureueng nyang geugaseh le po teu allah? sipanyang uroe buet teupimpee dan tareuncana keuhai buet jeuhet; li-dah gata lagee sikin cuko nyang tajam. gata leubeuh tacinta keu nyang jeuhet nibak nyang jroh, dan leubeuh galak tameusulet nibak tapeugah haba nyang beuna. deungon tutoe haba gata, gata tapeungeut gob dan tapeusaket ate ureueng laen! teuma ingat kheueh gata geupeubinas le po teu allah keu siumu masa; gata geudrob dan geubahua nibak rumah gata, dan laju geupeumate lam donya ureueng udeb. ban jingieing nyan, ureueng saleeh laju teuka teumakot, dan laju jipeukem gata sira jipeugah, "nyan kheueh ureueng jih nyang han jitem meulindong ubak po teu al-lah, teuma jimeuharab keukayaan nyang meulimpah dan jimita keumanaan ubak barang rampasan." teuma ulon nyoe lagee bak zaiton nyang ijo didalam baet al-lah. ulon peucaya bahwa allah teutab geugaseh keu siumu masa. ulon sabe keunoe meusyuko ubak droeneuh dikeue umat droeneuh ulon peusampoe keubaiekan droeneuh.

keu teupimpen kor. meunurot ca-e: mahalat. ca-e-ca-e peungajaran nabi daud. ureueng bangai jikeheun lam ate jih. "allah nyan hana." buet awaknyan jeuhet dan kuto; hana nyang jipeubuet nyang jroh. lam syeuruga tuhan geupandang umat manusia, ureueng jimita ureueng carong nyang seumah gobnyan.

teuma banmandum ureueng ka meunyeuleweng dan beujat hana meusidroe pih nyang jipeubuet nyang jroh. geupeugah le tuhan, "peu kheueh hana sadar ureueng-ureueng jeuhet nyan? awaknyan udeb sira jireupah umat ulon, dan hantom na jimeudoea ubak ulon." ureueng jeuhet teumakot that-that, padahai hana ureueng nyang peutakot jihnyan, sabab allah geupeuhambo tuleueng ureueng nyang keupong gata; awaknyan ka geutulak le po teu allah, teuma gata tapeutalo awaknyan. 7 nibak buket sion teuka kheueh kira jih keuseumalatan keu israel. dan keuturonan nabi yakub meusukacita meunyo tuhan geupeupuleh keuadaan umat gobnyan.

keu teupimpen kor. deungon irengan keucapi. ca-e peungajaran nabi daud, bak watee ureueng zifi teuka jijak peugah ubak saul, "nabi daud geumusom di teupat kamoe." ya allah, peuseumangat kheueh ulon sabab kuasa droeneuh, neubri kheueh keuadalan keu ulon sabab teunaga droeneuh. deungoe kheueh nyang ulon lakee, ya allah, sudi kheueh neudeungoe tutoe haba lon. sabab ureueng aseng jibeudoh jijak prang ulon, ureueng sombong jikeuneuk po mate lon, awaknyan hana jipakoe ubak po teu allah. 6 teuma allah na kheueh nyang tulung lon; tuhan na kheueh nyang bila lon. gobnyan geuhukum musoh lon deungon keujeuhetan awaknyan keudroe, dan geupeubinas awaknyan sabab gobnyan seutia bak ulon. deungon rila ate ulon peuseumah keureubeuen keu droeneuh, dan meusyukoe ubak droeneuh sabab droeneuh get, ya tuhan. droneuh ka neupulheueh ulon nibak mandum nyang susah, dan lon ngieing musoh lon ka teupeutalo.

keu teupimpen kor. deungon peumeuen keucapi. ca-e peungajaran nabi daud. ya allah, neudeungoe kheueh doa ulon, bek neupaleng nibak peue nyang ulon lakee. neuengieing kheueh ulon dan neujaweub kheueh ulon, ulon hanco sabab keusosahan lon. ate ulon susah hana meuteuntee sabab jiancam le musoh dan jitindeeh le ureueng jeuhet. sabab awaknyan nyang peususah udeb ulon, dan deungon jibeueing jimeumusoh deungon ulon. ate ulon lumpah geulisah, mawot nyang lumpah teumakot nyan jeuet keuhantu lam tuboh lon. badan lon peunoh deungon yo dan teumakot nyang hana reuda, jiteugon teuma deungon peurasaan nyang gamang. ah, meunyo bak lon na sayeub lagee cicem mirah pati, ulon po jakmita teupat nyang teunang. nyoe, ulon teuma lon po sampoe oh jioh, laju lon tinggai diteungoh padang pasie. ulon bagah-bagah lonjak mita teupat meuceu teuhadab angen badee ngon puteng beuliong. ya tuhan, neupeubingong kheueh dumna musoh lon, neupeukiroh kheueh watee awaknyan jipeugah haba, sabab dibanda ulon ngieing gob meupake dan ureueng meulo. uroe malam awaknyan jikeulileng, jipeubuet nyang jeuhet dan jijak peukaru keudeh keunoe. dipat mantong na peunghancoran; seumeungeut teumeugom hana hase teupeugra di jeueb-jeueb keudee. meunyo musoh nyang teunak ulon, hainyan mantong ek ulon teun. meunyo lawan nyang hina ulon, mantong ek ulon musom nibak lawan nyan. teuma, na kheueh droeneuh, rakan ulon, sahabat lon, rakan lon nyang paleng krab nyang khianat lon. yoh masa ilee tanyoe meurakan

paleng that krab, dan tajak iebadat meusajan-sajan u baet tuhan. bah kheueh musoh lon mate meudab-dab dan udeb-udeb jitron u lam donya ureueng mate, sabab keujeuhetan na di rumoh awaknyan, lamkawan awaknyan. teuma ulon meulakee ubak po teu allah, tuhan geupeuseulamat ulon. uroe malam ulon apoh apah dan ulon mo, dan gobnyan geudeungoe su ulon. gobnyan nyang peuseulamat ulon nibak jiprang le musoh, nyang teuka meukawan-kawan jiparan ulon. allah nyang mat peurintah nibak keukai teuma geudeungoe ulon dan geupeutaloe awaknyan. sabab awaknyan hana jitem tobat, dan hana jitakot ubak po teu allah. beukaih rakan lon jikak prang rakan-rakan awaknyan, awaknyan ji iengkeue ubak janji jih. tutoe haba jih aloh meubujuk rayu, teuma lam ate jih na jikeubah banci. tutoe haba jih leumoh leumbot, teuma lagee teutob deungon peudeueng nyang tajam. jok kheueh khawate gatanyan ubak tuhan, dan gobnyan geutulog gata; sabab ureueng juoe hana geupeubiyeu taloe. teuma droeneueh, ya allah, neukurong awaknyan u dalam uruek nyang paleng lhok. ureueng seumeunget dan tukang ro darah ureueng nyan hana trok siteungoh pih nibak umu jihnyan. teuma ulon peucaya ubak droeneueh.

keu teupimpen kor. meunurot lagu: mirah pati nyang seungab kalu, di daerah nyang jioh. zabor nabi daud bak watee ureueng filistin jidrob gobnyan di gat. neugaseh kheueh bak ulon, ya allah, sabab ulon nyoe ka jiprang, hana putoh-putoh ulon nyoe jiteugom sabe le musoh-musoh lon. sipa-nyang uroe nyoe jigilo-gilo sabe le lawan-lawan lon; jai that-that nyang meumusoh keu ulon, ya allah nyang mahamanyang. bak watee ulon teumakot, ulon meuharab ubak droeneueh. ulon pujoe allah sabab peue nyang ka geupeujanji; ulon peucaya ubak gobnyan, teuma ulon hana teumakot, manusia hana meudaya keu ulon. siuroe suntok musoh jipeukaru peukara ulon, hana putoh-putoh jiseuha keuneuk peuceulaka ulon. awaknyan meusapat diteupat nyang teusom, jikalon peue mantong nyang ulon peubuet, dan jimita keuseumpatan keu jipeumate ulon. peu kheueh na keuseulamatan keu buet jeuhet awaknyan? neupeubinas kheueh awaknyan watee droeneueh teungoh beungeh, ya allah! droeneueh neu itong uroe-uroe peungeumbaraan lon, dan neuteupeue padubna jeumeulah ie mata lon; peu kheueh nyan hana neu itong? bak uroe ulon meulakee ubak droeneueh, musoh teuma teupoh sampoe jisurot, sabab ulon teupeue allah geudong blah ulon. ulon pujoe tuhan allah, sabab peue nyang gobnyan peujanji. ulon peucaya ubak gobnyan, teuma ulon hana teumakot, manusia hana meudaya teuhadab ulon. ulon kupeutrok janji ubak droeneueh, ya allah, dan lon peuseumah keureubeuen syukoe ubak droeneueh. sabab droeneueh neupeuseuliseh ulon nibak mawot, neujaga ulon jeuet bek reubah. nyang kheueh ulon hase udeb lam lindungan allah, dalam cahya nyang teupeutrang keu banmandum nyang udeb.

keu teupimpen kor. meunurot lagu: bek peumuseumah. zabor nabi daud, bak watee gobnyan geuplung u dalam guha keu geupeusie nibak saul. neugaseh kheueh keu ulon, ya allah, neugaseh kheueh bak ulon, sabab bak droeneueh kheueh ulon meulin-

dong. dimiyueb sayeub droeneueh ulon musom, sampoe angen badee nyang teungoh jipot meubura jipioh reuda. ulon meulakee ubak allah nyang mahamanyang, ubak allah nyang meubuet keu ulon. nibak lam syeuruga gobnyan geujawueub dan geupeuseulamat lon; gobnyan geupeutaloe bubena ureueng nyang teugom lon. allah geutunyok bahwa gobnyan seutia ubak ulon, dan hana geupioh geugaseh keu ulon. ulon jiparan ngon jikeupong le musoh, awaknyan lagee singa bueh nyang jiseuba manasia. gigo awaknyan lagee kapak dan aneuk panah, lidah awaknyan lagee peudeueng nyang tajam. ya allah, neutunyok kheueh keu agongan droeneueh di langet manyang, dan keumuliaan droeneueh di ateuh bumoe. musoh lon ka jipasang taron keu ulon, dan jipeupatah seumangat ulon. awaknyan jikueh uruek bak rot ueh lon, teuma awaknyan keudroe nyang rhot lam uruek nyan. ulon peucaya peunoh, ya allah, ulon peucaya peunoh, ulon kutem meuca-e dan lon pujoe droeneueh. hai beudoh kheueh, jiwa ulon! hai beudoh kheueh rapa-i dan keucapi! ulon keuneuk peubudoh fajar. tuhan, ulon keuneuk meusyuko ubak droeneueh lamkawan bansa-bansa ulon keuneuk meuca-e lagu seumujoe keu droeneueh lamkawan umat manusia. sabab gaseh droeneueh raya sampoe u langet manyang, dan gaseh seutia droeneueh sampoe ubak awan. ya allah, neutunyok kheueh keuagongan droeneueh di langet, dan keumuliaan droeneueh di ateuh bumoe.

keu teupimpen kor. meunurot ca-e: bek peumuseumah. zabor nabi daud. hai bubena peunguasa, peu kheueh ade keuputosan gata nyan? peu kheueh gata juoe bak watee gata peuhakem manusia? han-jeuet, gata reuncana nyang jeuhet, dan tapeubuet keukeurasan di nanggroe nyoe. ureueng jeuhet ka sisat yoh mantong lam pruet ma awaknyan ka jiteumipee watee jihnyan ka lahe. awaknyan meuracon lagee uleue meubisa, dan jisumpai punyung jih lagee uleue kobra nyang tulo nyang hana teudeungoe su pawang nyang carong, atawa su ureueng meurajah nyang malem. ya allah, neuwiet kheueh gigo-gigo awaknyan, neulot kheueh tarieng singa-singa muda nyan, ya tuhan. bah kheueh awaknyan gadoh lagee ie paseung nyang teungoh jiek, lagee aneuk panah nyang ka tumpoi mata. bah kheueh awaknyan lagee sipot nyang meulileh meujantang jeuet keu geuneuheut, lagee aneuk banyak mate sigohlom jingingi peungeuh. sigohlom teupesadar, awaknyan ka binasa, lagee tamah meupaya nyang mantong ijo dan gohlom raya habeh jipupo le angen, siulah-ulah nyan na kheueh sinaman tho. jikalon ureueng jeuhet teuhukom, ureueng juoe lumpah galak, dan teu rhah gaki jih lam darah nyang doraka. ureueng rame jipeugah, "biet ureueng nyang jroh meuteume pahala, keubit, na po teu allah nyang jeuet keuhakem di ateuh bumoe."

keu teupimpen kor. meunurot lagu: bek peumuseumah. zabor nabi daud, bak watee saul geuyue ureueng laen jak kawai rumoh gobnyan sabab jikeuneuk poh mate gobnyan. ya allah ulon, peuseulamat kheueh ulon nibak bandum musoh lon, neulindong kheueh ulon nibak ureueng nyang keuneuk jak seurang ulon. neupeulheuh kheueh ulon nibak

ureueng nyang keuneuk peubuet jeuhet, neupeusie kheueh ulon nibak ureueng-ureueng nyang keuneuk poh mate lon. ngieng kheueh, awaknyan ka jihampeueng keuneuk jipoh mate lon, ureueng-ureueng keujam meusaho keuneuk lawan lon; padahai kon sabab ulon ka lon peubuet desya atawa ulon peubuet peulanggaran, ya tuhan. meunan cit kon teuma sabab salah lon, awaknyan meudab-dab dan meusiab-siab. beudoh kheueh, allah nyang mahamanyang, tulong kheueh ulon. ya allah israel, neukalon keudroe. beudoh kheueh dan neuhukom kheueh bansa-bansa, bek neugaseh keu ureueng jeuhet nyang meukhianat. bak watee uroe ka sinja awaknyan jiwo lom teuma, meuo-e lagee ase sira jikeulileng banda. hana jipioh awaknyan nariet meupansi sira meuhina; tutoe haba awaknyan tajam lagee mata peudeueng, jipike le awaknyan hana nyang deungoe peue nyang jipeugah nyan. teuma droeneueh neupeukem awaknyan, ya tuhan, banmandum bansa nyan droeneueh peuhina. droeneueh kheueh teunaga ulon, ulon meuharab that ubak droeneueh, droeneueh teupat ulon meungunse, ya allah. sabab keubaiekan allah kheueh, gobnyan teuka ubak ulon, gobnyan geupeubiyeu mantong lon kalon bubena musoh lon teupeutaloe. bek kheueh neupoh mate awaknyan, ya tuhan, mangat bansa ulon hana jituwoe. peu crebre kheueh dan neupeutaloe kheueh awaknyan deungon kuasa droeneueh, ya tuhan peulindong ulon. sabab awaknyan meudesya deungon tutoe haba jih keudroe; bah kheueh awaknyan meucarueh deungon meubagoe keusombongan jih, sabab awaknyan galak that jiseurapa dan meusulet ngon haba nyang hana beuna. peubinasa kheueh awaknyan lam beungeh droeneueh, ya allah, peubinasa kheueh awaknyan sampoe an habeh. dan tieb-tieb ureueng jiteupeue bahwa allah geupeurintah israel, dan peumeurintah gobnyan luwah jimeu eue bansaboh bumoe. oh watee sinja awaknyan jigisa, meuo-e lagee su ase sira jikeulileng banda. awaknyan jimeurawoh keudeh keunoe sira jimita uempeuen, dan laju jimeurawong meunyo pruet jih hana troe. teuma di ulon meuca-e keuhai teunaga droeneueh; tieb-tieb beungoh ulon meuca-e deungon su nyang nyareng keuhai gaseh dan seutia droeneueh. sabab droeneueh kheueh teupat ulon peusiblah droe, teupat ulon meulindong bak watee susah. ya allah, teunaga lon, ulon meuca-e lagu puja ngon pujoe ubak droeneueh, sabab droeneueh kheueh teupat ulon meulindong. ya allah, geunaseh ulon.

keu teupimpin kor. meunurot lagu: bungong bakong keusaksian. zabor peungajaran nibak nabi daud, bak watee gobnyan geujak prang ureueng aram-mesopotamia dan ureueng aram-zoba, dan bak watee yoab geuwoe dan geupeutaloe 12.000 droe ureueng edom di panton asin. droeneueh neutalak kamoe, ya allah, dan neupeubiyeu kamoe jipeutaloe le awaknyan. droeneueh beungeh keu kamoe; jinoenyoe neupeupuleh kheueh kamoe. droeneueh neungancang bumoe sampoe crah; neupeuget kheueh nyang ka beukah-beukah, sabab bumoe guyah. neupeubiyeu umat droeneueh jirasa deurita nyang keubit that brat; kamoe mumang meuayon-ayon lagee ureueng mabok. neupeuingat ubak ureueng

nyang taqwa, jeuet awaknyan meusiliseh nibak mara bahaya. peuseulamat kheueh kamoe deungon kuasa droeneueh, neujawueb kheueh doa kamoe, mangat ureueng-ureueng nyang droeneueh gaseh teupeuseulamat. nibak teupat tinggai gobnyan nyang suci po teu allah geupeugah, "ulon keuneuk seumurak dan ulon weuek-weuek tanoh sikhem; panton sukot ulon undi. gilead dan manasye na kheueh atra ulon, efraim tupi waja lon, dan yehuda tungkat keurajeun lon. teuma moab na kheueh teupat ulon rrah gaki, ulon meusurak keumeunangan atueh filistea. ubak edom ulon rhom seulo lon sibagoe tanda bahwa jihnyan na kheueh atra ulon." soe nyang ba ulon u edom? soe nyang peu takteh ulon u banda nyang meukuta nyan? ya allah, peu kheueh droeneueh hana neuseutot meusajan kamoe? peu kheueh droeneueh hana neumaju meusajan tantra kamoe? tulong kheueh kamoe atueh musoh kamoe, sabab bantuan manusia hana meuguna. meusajan allah, geutanyoe gagah peukasa, gobnyan kheueh nyang peutaloe bubena musoh geutanyoe.

keu teupimpin kor. deungon peumeuen keucapi. nibak nabi daud. deungoe kheueh doa ulon, ya allah, deungoe kheueh nyang ulon lakee. jioh nibak rumoh ulon meulakee ubak droeneueh, sabab ulon putoh asa. aman, teupat nyang lumpah that manyang nibak ulon; sabab droeneueh kheueh teupat ulon meulindong, peutahanan nyang paleng kong atueh musoh lon. bah kheueh ulon siumu udeb lon meunumpang nibak khimah droeneueh, mangat lon aman dimiyeh sayeb droeneueh. sabab droeneueh ka neudeungoe janji ulon, ya allah, dan neubri bak lon milek pusaka ureueng nyang taqwa. seumoga raja panyang umu, jeuet gobnyan hase udeb tron meutron. seumoga gobnyan geumat peurintah keu siumu masa sibagoe raja nyang neupileh, ya allah, lindong kheueh geuhnyan deungon gaseh dan seutia droeneueh. dan ulon hana putoh lon meuca-e lagu puja dan pujoe keu droeneueh, sira lon peutrok janji lon nibak uroe ubak uroe.

keu teupimpin kor. meunurot: yedutun. zabor nabi daud. deungon teunang jiwa lon preh po teu allah, nibak gobnyan mantong nyang na keuseulamatan lon. dan gobnyan nyang lindong dan peuseulamat lon, gobnyan nyang bila ulon, sabab nyan ulon hana guyah. trok an pajan gata banmandum taprang gob nyang ka lagee binte singet dan binte beuton nyang karab reuloh? gata na niet keuneuk tapeureubah gobnyan nibak keududuekan gobnyan nyang manyang. gata galak that tapeugah haba beurakah; deungon babah gata, gata bri beureukat, teuma lam ate gata takutok. deungon teunang jiwa ulon preh po teu allah, nibak gobnyan mantong kheueh ulon na seulamat. dan gobnyan nyang lindong dan peuseulamat lon; gobnyan nyang bila lon, sabab nyan ulon hana guyah. gobnyan kheueh allah nyang bri keu ulon seulamat dan keuhoreumat, gobnyan kheueh peulindong lon nyang bila lon nyang teuga. he bansa lon, meuharab kheueh ubak allah tieb-tieb watee; sintong kheueh asoe ate gata ubak gobnyan, sabab gobnyan teupat geutanyoe meulindong. manusia nyoe na kheueh lagee nafah nyang teuproh, cut rayeuk saban mantong hana meuhareuga. meun-

yoe teutimang, awaknyan teunyata phui leubeh phui nibak nafah nyang teubiet rot idong atawa babah. bek taharab bak hase atra gob nyang teucok deungon cara teupeutakot, dan bek teuma tapeumeugah droe deungon hase atra teureupah. bahkan meunyeu keukayaan gata meutamah-tamah, bek teuma ate gata meuleukek nibak hareutanyan. na padubgoe ulon deungoe po teu allah geupeugah haba bahwa keukuasaan na kheueh meuasai nibak gobnyan, dan bahwa gobnyan teutab na geunaseh.

zabur nabi daud, bak watee gobnyan mantong di padang pasi guron yehuda. ya allah, droeneueh kheueh allah lon, ulon mita dan ulon rindu that ubak droeneueh. lagee tanoh nyang tho kreng nyang glah keuneuk jieb ie, meunan kheueh ulon nyang glah ubak droeneueh. bah kheueh ulon pandang droeneueh rot baet droeneueh, dan lon ngieng teunaga ngon keugongan droeneueh. geunaseh droeneueh leubeh meuyuem nibak udeb, sababnyan kheueh ulon pujoe droeneueh. siumu udeb ulon meusyukoe ubak droeneueh; ulon beut jaroe ubak droeneueh sira lon meudoa. ulon pujoe droeneueh sira lon seumurak ngon geumbira, sabab droeneueh neupeupueh jiwa ulon saban rasa jih lagee lon pajoh peunajoh nyang lazat. watee ulon eh nibak teupat eh; ulon ingat ubak droeneueh, si malam beungoh ulon meu dhike ubak droeneueh, sabab droeneueh ka neutulong ulon; dimiyeub sayeub droeneueh ulon meuca-e deungon geumbira. ulon mat droeneueh nyang lumpah that kong, jaroe droeneueh neutumpang ulon. teuma ureueng-ureueng nyang keuneuk peumate lon ureueng nyan jitron u lam donya ureueng mate. awaknyan mate dimideuen prang, dan bangke jih jeuet keupeunajoh beulatng bueh. raja geumbira sabab peutulongan le po teu allah; ureueng nyang meubudok deumi po teu allah jimeusukaria, teuma babah ureueng meusulet geusumpai.

keu teupimpen kor. zabur nabi daud. ya allah, neudeungoe kheueh doa ulon bak watee ulon jiteuka susah, peuseulamat kheueh nyawong lon nibak musoh nyang keujam. lindung kheueh ulon nibak kawan ureueng nyang doraka, dan nibak reuncana licek ureueng-ureueng jeuhet. awaknyan jipeujeuet lidah jih tajam lagee mata peudeueng, dan jipeulheueh haba nyang keujam saban sa ngon aneuk panah. nibak teupat jimeusom awaknyan laju jitabu calitra nyang hana beuna, hana jitakot-takot laju jipiteunah ureueng nyang hana meusalah. awaknyan jimumat kong that ubak niet nyang jeuhet, dan jimeurok pakat keuneuk jipasang peurangkab; jisangka le awaknyan hana ureueng nyang kalon. awaknyan jireuncana buet nyang jeuhet, dan jipeugah, "kamoe ka kamoe peugot reuncana nyang keubit ceureudek." ate dan budho manusia keubit that lhok, hana hase ureueng seunom lam ate nyan. teuma allah geutimbak aneuk panah gobnyan ateuh awaknyan, dan bak saat nyan cit awaknyan keunong dan luka. awaknyan binasa sabab tutoe jih keudroe; soemantong nyang kalon jihnyan meu aseu ulee. dan banmandum ureueng jiteuka teumakot; awaknyan laju jipike buet po teu allah dan jijak peusampoe peue nyang ka jipeubuet. dan banmandum ureueng jroh-jroh geumbira sabab peue nyang geupeubuet le tuhan. awaknyan meulin-

dong ubak gobnyan; banmandum ureueng juoe jipeumegah droe.

keu teupimpen kor. zabur nabi daud. lagu. patot kheueh kamoe pujoe droeneueh di sion, ya allah, dan kamoe peupeunoh janji kamoe ubak droeneueh. sabab droeneueh nyang peukabui doa; banmandum ureueng jijak ubak droeneueh sabab ka meudesya. desya-desya lon lumpah that geuhon nibak ulon, teuma droeneueh kheueh nyang peu amphon. mubahgia kheueh ureueng nyang droeneueh pileh, dan neutawok mangat jitinggai di baet droeneueh. kamoe neupeupueh deungon peue mantong nyang get di baet droeneueh, teupat tinggai droeneueh nyang suci. droeneueh neujaweueb kamoe deungon cara neubir bak kamoe keumeunangan, neupeubuet hai-hai nyang ajaeb guna keu neupeuseulamat kamoe! droeneueh kheueh harapan banmandum bansa sampoe u laot nyang jioh. deungon teunaga droeneueh neupeujeuet gunong-gunong, keu neuntuyok kuasa droeneueh nyang peukasa. droeneueh peureuda laot nyang meubura-bura dan umbak geulumbang nyang meualon-alon, dan droeneueh peuseungab bansa-bansa nyang teungoh karu. banmandum peundudek bumoe teumakot dan horeumat oh jikalon buet-buet droeneueh nyang hebat. banmandum bumoe phon di timu trok u barat meusurak geumbira sabab droeneueh nyang yue meunan. tanoh nyan droeneueh peulara dan neu peutron ujeuen, dan tanoh nyan neupeujeuet gumbo ngon subo jeuet na hase jih meulimpah ganda. meunan cit deungon bubena krueng-krueng neupasoe deungon ie nyang peunoh meuruwah, dan neupeuna teuma gandom keu peunajoh awaknyan, nyoe, meunan kheueh cara jih droeneueh keubah atra keu peunajoh awaknyan. meunan cit droeneueh peujeuet lueng-lueng ie nyang le dan neusiram tanoh-tanoh nyang meugicai-gicai sampoe an basah. tanohnyan droeneueh nyang peugumbo deungon ie ujeuen, dan neujamin tarok-tarok jih sampoe jitimoh subo. le sabab jroh droeneueh teuma, tieb-tieb thon neupeuna musem keumeukoh; bak watee droeneueh teuka, wateenyan kana keulimpahan. di dalam padang pasie ka peunoh deungon kameng bubiri, banmandum buket meusuka ria. dalam blang-blang naleueng nyang luwah ka peunoh meuasoe deungon bubiri nyang teungoh jimeurot, meunan cit deungon bubena panton ka peunoh deungon lampoh gandom. banmandum meusurak dan meuca-e deungon peunoh geumbira.

keu teupimpen kor. saboh lagu. bumoe! meuca-e kheueh dan peu agong kheueh nan gobnyan, peumulia kheueh gobnyan deungon lagu zike puja ngon pujoe. tapeugah kheueh ubak po teu allah, "keubit lumpah that kagom buet droeneueh! musoh jitundok ubak droeneueh peunoh deungon teumakot, sabab kuasa droeneueh nyang lumpah raya. bansaboh bumoe jisujut jiseumah droeneueh, awaknyan jimeuca-e ngon jimeunyanoye jipujoe nan droeneueh." teuka kheueh dan ngieng kheueh buet allah, keubit that hireuen karya-karya gobnyan di teungoh-teungoh manusia! laot hase geubah jeuet keu tanoh tho, indatu kamoe geujeumeurang laot nyan deungon tapak kaki. dan kamoe geumbira that sabab buet

droeneueh nyan. gobnyan geumat peurintah deungon peukasa keu siumu masa. bansa-bansa geukawai, mangat peumbeurontak hana hase jipeusombong droe ateueh gobnyan. pujoe kheueh allah kamoe, hai bansa-bansa, talakee kheueh pujoe gatanyan ubak gobnyan! gobnyan ka geujaga kamoe mangat teutab udeb, dan hana geupeubiyeu kamoe nyoe reubah. ya allah, droeneueh ka neu ujoe kamoe lagee ureueng jiseupoh pirak didalam apui. neupeubiyeu kamoe reubah u dalam jeunieb, dan neupeudieng beuban nyang lumpah geuhon. neupeubiyeu kamoe jigilogilo le musoh; kamoe laju ngob lam ie raya dan apui nyang hu meubara. teuma jinoenyeu kamoe ka ltheueh neuba u teupat nyang makmu. ulon lonba keureubeuen nyang teutot u baet droeneueh dan lon peuteupat janji lon ubak droeneueh, janji nyang ulon peugah bak watee ulon dalam keusosahan. ulon peuseumah ubak droeneueh keureubeuen nyang teutot nibak beulatang nyang teupileh, kameng bubiri dan leumo agam, asab jipo manyang u langet. teuka kheueh dan deungoe kheueh, hai ureueng nyang taqwa, ulon peugah peue nyang ka geupeubuet le allah keu ulon. ulon ka lon meuhoi lon lakee tulong ubak gobnyan; jinoenyeu ulon meuca-e lagu pujoe keu gobnyan. meunyeu ulon galak lon pike keu buet nyang jeuhet, pasti tuhan hana geutem deungon peue nyang ulon peugah. teuma po teu allah ka geudeungoe ulon, gobnyan that geupakoe peue nyang ulon lakee. ulon pujoe allah sabab gobnyan hana geutalak doa ulon, hana teuma geupioh geusayang keu ulon.

keu teupimpen kor. deungon peumeuen keucapi. zabur. seumoga po teu allah geugaseh dan geubri beureukat keu geutanyoe, seumoga gobnyan geupandang tanyoe deungon murah ate. ya allah, seumoga keuheundak droeneueh jituri le gob bansaboh bumoe, dan keuseulamatan droeneueh jipeusampoe ubak banmandum bansa. seumoga bansa-bansa jipujoe droeneueh, ya allah po, seumoga banmandum bansa meusyukoe ubak droeneueh. seumoga banmandum bansa meusurak geumbira, dan jimeuca-e deungon peunoh geumbira. sabab droeneueh neumat peurintah deungon ade dan neubimbeng tiebtieb bansa nyang na di ateueh bumoe. seumoga bansa-bansa jipujoe droeneueh, ya allah po, seumoga banmandum bansa jimeusyukoe ubak droeneueh. tanoh ka jibri hase, po teu allah, allah geutanyoe ka geubri beureukat keu geutanyoe. po teu allah ka geubri beureukat keu geutanyoe; seumoga gobnyan jihoreumat bansigom donya!

keu teupimpen kor. zabur nabi daud. allah geubeudoh geujak peu crebre bubena musoh gobnyan, ureueng nyang banci gobnyan laju jiplueng dikeue gobnyan. allah geu use mangat awaknyan jikak, lagee asab nyang teuploh laju gadoh. lagee lilen nyang meulileh lam apui, meunan kheueh ureueng jeuhet teusampoh dikeue po teu allah. teuma ureueng saleeh meusukacita dan meugeumbira, awaknyan jiseumurak geumbira dikeue po teu allah. meuca-e kheueh keu allah, dan pujoe kheueh nan gobnyan, peusiab laju jalan raya keu gobnyan nyang geudeuk lam keundeuraan awan. nan gobnyan tuhan – meuseunang-seunang kheueh dikeue gobnyan! po

teu allah nyang tinggai di baet gobnyan nyang suci na kheueh ureueng syiek aneuek yatem dan nyang bila inong balee. meunan cit allah geubri teupat tinggai keu ureueng-ureueng nyang udeb jih seudeh; gobnyan geupeubeubaih ureueng nyang teuteuen lam peunjara sampoe awaknyan bahgia. teuma keu ureueng nyang jilawan tuhan haroh jiduek nibak tanoh nyang hana hase udeb sapeue. ya allah, watee droeneueh neubimbeng umat droeneueh geujak geuliwat rot jalan nyang tho kreg, bumoe meuyon, ujeuen jitoh dikeue droeneueh, sabab teuka po teu allah sinai, allah israel. deungon meulimpah droeneueh peutron ujeuen, dan neupeupuleh tanoh droeneueh nyang tho kreg. dan umat droeneueh pih laju tinggai teutab disinan; lam keubaiekan droeneueh, ya allah, droeneueh neupeulara ureueng gasien. tuhan geubri peurintah, dan laju di ureueng inong jijakba haba: "raja-raja dan pasokan jihnyan ka habeh jiplueng!" awaknyan jiplueng lagee cicem mirah pati nyang jipo meutaga. di ureueng inong dirumoh laju geubagi-bagi, pirak deungon meuh nyang ka jitinggai. bahpi le that nyang hana jitamong lam prang, umat po teu allah ka meuteume meunang. watee nyang mahakuaa geunyerak raja-raja disinan, jitron kheueh salju di ateueh gunung salmon. gunung basan na kheueh gunung nyang hebat, gunung nyan pucak jih le that. pakon nibak pucak droeneueh nyang le nyan droeneueh neupandang deungon ceumburu ubak buket sion nyang ka geupileh le allah keu teupat tinggai gobnyan? tuhan tinggai disinan keu siumu masa. deungon geuritan nyang teuga-teuga nyang le jih meuploh-ploh ribee boh allah teuka di teungoh-teungoh awaknyan nyang peunoh deungon keuangongan. tuhan geuek u teupat nyang paleng manyang; jai that tawanan nyang geuba sajan. gobnyan geuteurimong peuseumahan lamkawan manusia dan lamkawan kawom nyang beurontak pih; mangat awaknyan tinggai meusajan deungon tuhan allah. pujoe kheueh tuhan, sabab gobnyan kheueh allah nyang peuseulamat geutanyoe; nibak uroe u uroe gobnyan geu seun beuban geutanyoe. allah geutanyoe na kheueh tuhan nyang peuseulamat geutanyoe, gobnyan nyang peubeubaih geutanyoe nibak mawot. allah pasti geupeureumok ulee musoh geuh, dan ureueng-ureueng nyang hana putoh udeb didalam desya. feureuman tuhan, "hai umat lon, ulonba musoh gata nibak basan ulon ba awaknyan lom lam laot raya, mangat gata tarhah gaki gata deungon darah awaknyan, dan asee-asee gata jijak lieh sipueh-pueh jih." banmandum ureueng jikalon pawai keumeunangan droeneueh, ya allah, allah ulon, raja lon, jiarak u teupat tinggai gobnyan. dikeue that jikak ureueng-ureueng meulagu, dilikotnyan teuma jikak ureueng peumeuen keucapi; diteungoh-teungoh jijak aneuek-aneuek dara nyang peh rapa-i; meunoe kheueh ca-e dan lagu awaknyan: "pujoe kheueh allah lamkawan himpanan umat gobnyan, pujoe kheueh tuhan, hai banmandum keuturonan nabi yakub!" benyamin, sukee nyang paleng ubit, jijak dikeue that, oh ltheuehnyan laju deuh meuron-ron bubena peumuka yehuda dilikot gobnyan deuh teuma bubena peumuka zebulon dan naftali. allah gata geuntot teunaga gata; ya allah, neupeukong kheueh peue

nyang ka droeneueh peubuet keu kamoe. raja-raja jiba peuseumahan ubak droeneueh di baet droeneueh di yerusalem. neudumpek kheueh nanggroe meuse, beulatang bueh nyan di teungoh geulagah. neuteu-gah kheueh bansa-bansa, kawan banteng nyan deungon aneuk-aneuk jih, nyang saleng jimeu bloh-bloh mangat meuteume pirak. allah geupeu crebre bansa-bansa nyang galak keu prang. ureueng-ureueng rayeuk nanggroe meuse jiteuka jijk ba teumaga; ureueng sudan meugaghe-gaghe jiba bungong jaroe ubak po teu allah. meuca-e kheueh ubak allah, hai banmandum keurajeuen nanggroe, meuca-e kheueh nyanyian puja-pujoe keu tuhan, keu gobnyan nyang geulinteh angkasa purbakala. deungoe! tuhan meufeureuman, su gobnyan meugeunta deungon dahsyat. aku kheueh kuasa allah nyang meudel-at ateuhe israel, kuasa gobnyan trok u langet. keubit that takjoh allah geutanyoe watee gobnyan geuteubiet di teupat tinggal geuh. allah israel geubri kuasa dan teunaga ubak umat gobnyan.

keu teupimpen kor. meunurot lagu: bungong bakong. nibak nabi daud. peuseulamat kheueh ulon, ya allah, sabab ie ka jiek trok bak takue lon. ulon meusuruek lam paya nyang lhok, hana teupat ulon meugilo. ulon ngob lam ie nyang lhok, jipeuhanyot le geulumbang paseueng nyang raya. ulon meuhoi-meuhoi sampoe an hek dan rukueng ulon sampoe tho kreng. mata lon peudeh lon preh bantuan allah. ureueng nyang banci ulon hana alasan, leubeu le nibak ok nyang na ateuhe ulee lon. di ureueng-ureueng teuga keuneuk peubinasa lon; awaknyan jiseurang ulon deungon fiteunah nyang keuji. bak ulon jipaksa ulon jokpulang hareuta nyang kon hareuta lon reupah. ya allah, droeneueh neuteupeue buet-buet ulon nyang salah desya ulon hana nyang teusom nibak droeneueh. bek neupeubiyu ulon teupeuteuka malee ya allah lon ateuhe ureueng-ureueng nyang meuharab ubak droeneueh, ya tuhan, allah nyang mahakuasa. bek neupeubiyu ulon teupeuteuka nista ateuhe ureueng-ureueng nyang jiseumah droeneueh, ya allah israel! sabab le droeneueh kheueh ulon jipeujayah ngon jihina, dan sabab droeneueh kheueh ulon jiseurapa. ulon jeuet lagee ureueng aseng nibak kawom syedara lon, lagee ureueng luwa nibak cutda adoe lon. seumangat lon hu meuhab-hab sabab cinta lon keu baet droeneueh, hinaan dan seurapa ureueng nyang jihina droeneueh ka keunong ateuhe ulon. ulon meuba-e ngon puasa, teuma awaknyan jihina lon. ulon ngui ija krong sibagoe tanda ulon meuduka cita, teuma awaknyan jipansi ulon. ulon jeuet keu boh bibi gob dipat mantong na ureueng meugumpoi ngon meuhudom, dan nyanyoe ureueng-ureueng mabok na kheueh keuhai ulon. teuma ulon meudoa ubak droeneueh, ya tuhan, ya allah, neujaweueb kheueh ulon bak watee nyang get. tulong kheueh ulon sabab geunaseh droeneueh nyang raya dan sabab keuseutian droeneueh. bek kheueh neupeubiyu ulon ngob buhuek di dalam paya, peuseulamat kheueh ulon nibak ureueng-ureueng nyang banci ulon dan nibak ie nyang lhok. bek neupeubiyu ulon jipeuhanyot le geulumbang paseueng, dan lam bak teungoh laot atawa jiseubee dalam uruek. jaweueb kheueh ulon, ya tuhan, sabab droeneueh get dan teutab neugaseh

keu ulon. neutem kheueh meupaleng ubak ulon sabab raya that geunaseh droeneueh ubak ulon. bek kheueh neumusom nibak hamba droeneueh nyoe, sabab ulon sosah, bubagaih kheueh neutulong lon. teuka kheueh neupeuseulamat ulon, neupeubeubaih kheueh ulon nibak banmandum musoh-musoh lon. droeneueh neuteupeue pakriban awaknyan jirapa ngon jihina ulon nyoe droeneueh neungieng banmandum musoh ulon. peunghinaan nyang jikheun le awaknyan jeuet keusabab ulon jeuet keu ureueng patah ate, dan le sabab nyan ulon putoh asa. ulon mita gaseh sayang, teuma sia-sia, ulon mita peunghibur, nyan pi hana lon teume. dan keu ulon jijk tuba jeuet teupajoh; watee ulon grah, keu ulon jibri ie cuka. bah kheueh peujame awaknyan jeuet keu bala, dan jeuet keupeurangkab keu jamejame awaknyan. bah kheueh mata awaknyan jeuet keubuta dan rueng likot awaknyan jeuet keuleumoh. neuro kheueh beuhabeh beungeh droeneueh nyan ateuhe awaknyan, bah kheueh awaknyan keunong le meureuka droeneueh nyang hu meutaga. bah kheueh peukhimahan awaknyan seungue ngon seungab, dan khimah-khimah awaknyan hana ureueng nyang keumiet. sabab awaknyan ji ienanya ureueng nyang droeneueh hukom, dan jipeugah-peugah keu ureueng-ureueng nyang droeneueh seksa. bah kheueh salah awaknyan meutamah le; bek neupeutoi awaknyan. bah kheueh nan awaknyan teusampoh lam kitab ureueng udeb; dan hana teucatel lam dafeteur ureueng juoe. teuma ulon teutindeeh dan saket that, beuot kheueh ulon, ya allah, dan peuseulamat kheueh ulon. dan ulon kupujoe allah deungon lagu dan nyanyoe, lon peugagong gobnyan deungon zike dan syukoe. nyan leubeu geugalak le tuhan nibak keureubeuen leumo, keureubeuen leumo agam nyang raya. ban jingieng nyang lagee nyan, ureueng nyang teutindeeh lumpah geumbira, ureueng nyang seumah allah rayeuk that ate. sabab tuhan geudeungoe su ureueng gasien; gobnyan hana geupeubiyu umat gobnyan nyang na didalam peunjara. pujoe kheueh allah, hai langet dan bumoe, laot dan banmandum makhluk nyang na didalam nyan. gobnyan geupeuseulamat yerusalem dan geupeudong lom banda-banda yehuda. umat tuhan tinggal teutab disinan; tanoh nyan jeuet keuhak milek awaknyan. aneuk cucoe awaknyan jeuet keuwareh; ureueng-ureueng nyang cinta ubak tuhan nyang tinggal disinan.

keu teupimpen kor. nibak nabi daud, bak watee teupeuseumah keureubeuen peuingat. ya allah, peuseulamat kheueh ulon, tuhan, bubagaih kheueh neujak tulong lon! bah kheueh ureueng nyang keuneuk poh mate lon nyan neupeutaloe dan jiplueng sabab ka bingung. bah kheueh ureueng nyang jisurak keuhai malang ulon nyan teupoh jisurot dan teuhina. bah kheueh ureueng nyang jipeukem ulon nyan jeuet keuteukeujot dan malee. seumoga banmandum ureueng nyang jiseumah droeneueh meusuka cita dan meugeumbira; dan banmandum ureueng nyang jicinta keuseulamatan nibak droeneueh hana putoh jipeugah, "keubit agat that tuhan!" ulon nyoe gasien dan leumo; teuka kheueh bubagaih, ya allah. droeneueh kheueh nyang peuseulamat dan nyang tu-

long lon, bek meulet, ya tuhan.

bak droeneueh ulon meulindong, ya tuhan, bek neupeubiyeu ya tuhan, ulon nyoe jipeumalee. peulheueh kheueh ulon, sabab droeneueh ade, deungoe kheueh dan peuseulamat kheueh ulon. neupeujeuet kheueh keu ulon lagee gunung batee teumplat ulon tinggai, nyang mudah ulon jak keunan tiebtieb watee. sabab droeneueh ka neupeuputoh keu neupeuseulamat ulon, droeneueh kheueh teumplat ulon meulindong dan teumplat lon meuceue. ya allah lon, neupeuseuliseh kheueh ulon nibak mara bahaya, nibak kuasa ureueng-ureueng jeuhet nyang lalem dan keujam. sabab droeneueh kheueh harapan ulon, ya tuhan, tuhan, ulon peucaya ubak droeneueh yoh phon umu lon mantong muda. simantong lon udeb ulon meusadeu ubak droeneueh; droeneueh kheueh nyang lindong ulon yoh phon ulon geupeulahe le ma le sababnyan ulon sabe lon pujoe droeneueh. udeb ulon jeuet keuteuladan keu ureueng le, sabab droeneueh kheueh peulindong ulon nyang paleng teuga. ulon sabe lon pujoe droeneueh, sipanyang uroe ulon jak peugah keuagongan droeneueh. bek kheueh neutiek ulon watee ulon ka tuha lagee nyoe bek teuma neutinggai ulon meunyoee teunaga ulon ka habeh, sabab musoh-musoh lon jipeugah sabe, ureueng-ureueng yang keuneukpoh mate lon jimeukumplot. kheun awaknyan, "jihnyan ka geutinggi le po teu allah; jak tatiyeub dan tadrob jihnyan, sabab hana soele nyang peuseulamat jih nyan." bek kheueh droeneueh jioh nibak ulon, ya allah, alah lon, neutulong kheueh ulon deungon sigra. bah kheueh ureueng nyang prang ulon neupeumalee dan neusampoh nibak muka bumoe. meunan cit bah kheueh ureueng nyang keuneuk peuceulaka ulon jiteuka bingong dan bansaboh tuboh jih keunong hina. teuma ulon sabe meuharab ubak droeneueh, dan semuken le lon pujoe droeneueh. tieb uroe sabe ulon calitra buet-buet droeneueh nyang ade, dan keuseulamatan nibak droeneueh nyang hana teukira. ulon pujoe buet-buet droeneueh nyang peukasa, ya tuhan allah, ulon peumeusyeuhu keuadalan droeneueh, keuadalan droeneueh mantong. ya allah, droeneueh kheueh nyang peurunoe ulon yoh phon ulon nyoe mantong muda, sampoe an jinoe ulon kisah buet droeneueh nyang takjoh luwa biasa nyan. ya allah, bek kheueh neutinggai ulon, sampoe ulon tuha dan puteh ok nibak ulee, mangat hase ulon peusampoe kuasa dan keupeukasaan droeneueh nyang luwa biasa ubak keuturonan kamoe nyang teuka. ya allah, keuadalan droeneueh manyang santeut eut langet; rayeuk that kheueh buet-buet droeneueh; hana nyang hase jipeusabe droe jih saban lagee ngon droeneueh? droeneueh neubri keu ulon peundeuritaan nyang lumpah brat, teuma droeneueh neupeupuleh teunaga ulon dan neupeubudoh ulon dalam jrat. droeneueh neupeujeuet ulon leubeh theuoreumat, dan neuhibo ulon lom. ulon keuneuk pujoe droeneueh deungon rapa-i gambus, sabab droeneueh seutia, ya allah. ulon keuneuk meuca-e lagu seumujoe keu droeneueh, ya allah, deungon alat meuneuen keucapi, ya allah suci israel. ulon seumurak deungon peunoh suka cita, sira ulon meuca-e lagu seumujoe keu droeneueh. jiwa raga lon jimeuca-e deungon geumbira, sabab

droeneueh ka neupeuseulamat ulon. siuroe suntok ulon peusampoe keuadalan droeneueh, sabab ureueng-ureueng nyang keuneuk peuceulaka ateuah droe ulon awaknyan ka geupeutaloe lom geupeumalee.

nibak nabi sulaiman. seumoga gobnyan geupeuhakem umat droeneueh meunurot hukom, dan geupeulaku ureueng nyang teuseup deungon ade. kira jih nanggroe kamoe makmu dan seujahteura, dan na keuadalan keu banmandum bansa. seumoga raja geubila hak kawom jeulata, geutulong ureueng gasien dan geupeuhabeh soe mantong nyang teugom awaknyan. seumoga gobnyan teutab meuteun tron meutron simantong na mata uroe dan buleuen. seumoga gobnyan lagee ujeuen nyang jitron di teungoh padang, dan lagee ujeuen teuga tron nyang jile u dalam blang. seumoga keuadalan meukeumang keu siumu masa, dan keumakmuran meulimpah simantong na buleuen. keurajeuen gobnyan meutamah luwah nibak laot saboh u laot nyang laen, meulinteuing nibak timu sampoe u barat. peunduduek nyang na tinggai di padang pasi tundok ubak gobnyan dan musoh jisujut dikeue gaki gobnyan. raja-raja tarris di pulo-pulo teuma jiba peuseumahan keu gobnyan. raja-raja arab dan etiopia meunan cit teuka jiba upeti. banmandum raja nyang laen sujut dikeue gobnyan, meubagoe bansa jeuet keu namiet gobnyan. sabab gobnyan geupeuleupah ureueng nyang leumoh teutindeeh hana meudaya, dan ureueng gasien nyang jimeuhoi ngon meulakee ubak gobnyan. gobnyan lumpah geugaseh keu ureueng gasien dan rakyat jeulata, dan geupeuseulamat udeb ureueng nyang meularat. gobnyan geupeubeubaih awaknyan nibak ureueng nyang seupet dan nyang peubuet gasa ateuah ureueng nyan, sabab udeb awaknyan keubit meuhareuga nibak gobnyan. udeb kheueh baginda raja! seumoga ubak gobnyan geupeuseumah meuh nibak nanggroe arab. seumoga gobnyan meudoa tieb-tieb watee dan sabe geureustu doa geuh nyan. seumoga gandom meulimpah ruwah bansaboh nanggroe dan buket ngon gunung gobnyan peunoh deungon hase bumoe. seumoga tanoh gobnyan gumbo lagee gunung-gunong libanon, dan peunduduek banda gobnyan meutamah-tamah lagee naleueng nyang timoh lam padang. seumoga nan raja ji ingat sabe siumu masa, dan meusyeuhu meutamah-tamah simantong na mata uroe. seumoga bansa-bansa nyang laen jilakee beureukat lagee gobnyan, dan banmandum ureueng jipeugah gobnyan mubahgia. teupujoe kheueh tuhan, allah israel! teuma gobnyan nyang peubuet hai-hai nyang meupeusona. teupujoe kheueh nan gobnyan nyang agong keu siumu masa; seumoga bansaboh bumoe peunoh deungon keumuliaan gobnyan! seukian kheueh doa-doa nabi daud, bin isai.

zabur asaf. teuma ulon ka bimbang, keupeucayaan lon rab gadoh meulayang, sabab ulon ceumburu keu ureueng cungkak, watee ulon ngieng untong nyang jroh bak ureueng jeuhet. sabab awaknyan hana keunong peunyaket nyang meudeurita, badan awaknyan teuga-teuga. bak awaknyan hana jidagong rasa susah, hana teuma keunong malang lagee ureueng laen. nyang kheueh sabab nyan awaknyan

meusikeub sombong, dan sabe jimeubuet deungon keujam. nibak ate awaknyan teupeupeunoh keujeuhetan, awaknyan gabuk deungon buet-buet nyang jireuncana jeuhet. buet awaknyan jipeuhina gob sira jupat, dan deungon sombong jiancam keu ji tindeeh. awaknyan ji-iengkeue sira jiseurapa alah nyang na didalam syeuruga, dan jimeusulet keu ureueng nyang na di ateuh bumoe, sampoe le that umat allah nyang jimeupaleng ubak awaknyan, dan jipeucaya ubak tutoe haba awaknyan. jipeugah le awaknyan, "allah hana geuteupeue, nyang mahamanyang hana muphom sapeue." meunan kheueh keuadaan ureueng jeuhet; udeb jih teunang, dan hareuta jih meutamah-tamah. sia-sia mantong ulon jaga ate gleh; hana meuguna ulon peujoh ngon desya. sabab siuroe suntok ulon keunong le malang; tieb-tieb beungoh ulon nyoe keunong seksa. meunyo ulon peugah meunan, ulon meukhianat bak angkatan aneuk-aneuk droeneueh. teuma watee ulon useuha mangat hase lon puphom, hainyan keubit that payah nibak ulon. akhe jih ulon tamong u dalam baet allah, disinan kheueh baro lon teupeue ngon muphom pakriban susah jih udeb ureueng-ureueng jeuhet nyan. droeneueh peuduek awaknyan ateuh rot nyang glue, dan neupeubiyeu awaknyan reubah binasa. lam sikleb mata awaknyan ka hanco, lumpah that azeub keusosahan awaknyan. lagee lumpo nyang gadoh oh beungoh uroe; bak watee droeneueh beudoh, ya tuhan, awaknyan pi gadoh. watee ulon meurasu tunu dan ate ulon lagee keunong tob, ulon bangai dan hana meuphom, ulon lagee beulatang dikeue droeneueh. teuma ulon teutab rab deungon droeneueh, droeneueh nyang mat jaroe nueuen lon. neubimbeng ulon deungon naseuhat, dan neuteurimong ulon deungon keuhoreumatan bak laen watee. peue nyang atra ulon lam syeuruga seulaen droeneueh? seulaen droeneueh hana nyang ulon harab di ateuh bumoe nyoe. bahpi jiwa raga lon meutamah leumoh, droeneueh kheueh teunaga ulon, ya allah; droeneueh kheueh banmandum atra ulon keu siumu masa. ureueng nyang jitinggai droeneueh jhinyan teuma meupalo, droeneueh peubinasa ureueng nyang hana seutia ubak droeneueh. teuma nibak ulon keubit that jroh jeueb-jeueb watee na bak bineh allah, tuhan allah ulon peujeuet keu teupat meulindong lon, mangat hase ulon peusampoe banmandum buet-buet gobnyan.

ca-e peulajaran asaf. keudroe? ingat kheueh umat droeneueh nyang ka neupileh phon yoh ilee, bansa nyang droeneueh peumeurdehka mangat jeuet keu milek droeneueh. ingat kheueh keu buket sion, nyang ka droeneueh peujeuet teupat tinggai droeneueh. neugiloe kheueh teupat nyang ka meujeuet keu runka-runka, banmandum nyang na di baet droeneueh ka habeh jipeuhanco le musoh durjana. musoh-musoh droeneueh jiklik-klik ngon jiseumurak di baet droeneueh, dan jipeudong bupanji keumeunangan di baet droeneueh. awaknyan lagee ureueng teubang kayee nyang teungoh ayon pato jih, keu jijak koh bak-bak kayee nyang na didalam gle. banmandum kayee nyang meu uke ka habeh jipeuhanco nyang jiseukok deungon pato dan palee. awaknyan jitot baet droeneueh sampoe habeh jab dan

rata ngon tanoh; dan jipeukuto teupat droeneueh teuseumah. awaknyan jikeuneuk peutaklok kamoe sampoe habeh, dan jitot habeh teupat iebadat nyang na di nanggroe nyoe. nabi-nabi dan tanda-tanda nyang ajaeb hana deuh le, dan hana meusidroe pi jiteupeue trok an pajan hainyoe sabe lagee nyoe. trok an pajan, ya allah, musoh jihina droeneueh? peu kheueh siumu masa awaknyan jihina nan droeneueh? pakon teuma droeneueh hana neutulong le kamoe? pakon neupeulheueh jaroe nibak kamoe? yoh awaiphon droeneueh kheueh raja lon, ya allah, droeneueh kheueh nyang peuseulamat kamoe? deungon teunaga nyang dahsyat laot hase neuplah, dan bubena ulee-ulee naga laot pi ka habeh neupeubeukah. meunan cit neupeureumok bubena ulee lewiatan dan neupeujeuet jihnyan peunajoh beulatang di padang pasi. droeneueh kheueh nyang peuteubiet mata ie dan peu ile ie krueng; dan krueng nyang raya droeneueh nyang peutho. droeneueh kheueh nyang peujeuet uroe ngon malam, dan nyang peuteuntee teupat mata uroe dan buleuen. droeneueh kheueh nyang peuteutab bataih-bataih bumoe, nyang peujeuet musem khung dan musem ujeuen. ingat kheueh pakriban musoh jihina droeneueh, ya tuhan, bansa nyang hana jituri droeneueh jihujat nan droeneueh. bek neuseurah umat droeneueh nyang hana meudaya ubak jaroe musoh nyang keujam. dan bek kheueh keu siumu masa neupeutuwoe naseb umat droeneueh nyang malang. ingat kheueh janji nyang ka neupeuet deungon kamoe, sabab ureueng jipeubuet buet keukeurasan di tieb-tieb teupat nyang seupot di nanggroe nyoe. bek neupeubiyeu ureueng nyang keunong teugom jipeumalee le awaknyan, seumoga ureueng nyang seungsara dan gasien jipujoe droeneueh. beudoh kheueh ya allah, neuplah kheueh peukara droeneueh! sabab siuroe suntok droeneueh jihina le ureueng-ureueng nyang hana peucaya ubak droeneueh. bek tuwoe ubak dumpek musoh-musoh droeneueh, kiroh ngon karu lawan-lawan droeneueh nyang seumaken teuga!

keu teupimpin kor. meunurot lagu: bek peumuseumah. makmur asaf. lagu. kamoe seumah droneueh, ya allah, kamoe meusyukoe ubak droeneueh dan kamoe peusampoe karya droeneueh nyang luwa biasa nyoe. allah geupeugah, "bak watee nyang ka ulon peuteuntee, ulon lon meuhakem deungon seuade-ade jih. meunyo bumoe meunguncang lagee geumpa deungon banmandum peunduduek nyang na di ateuh bumoe nyan ulon kheueh nyang peukong tametamet jih." keu ureueng nyang raya haba, ulon peugah, jeuet bek le jipeugah nyang lagee nyan. dan ubak ureueng jeuhet, mangat bekle meusikeub cungkak. bek peh-peh dada peubangga droe atawa peugah haba deungon sombong nyang hana meuguna. sabab peunghakeman hana teuka di timu atawa barat meunan cit bukon teuma di utara atawa seulan. teuma po teu allah keudroe kheueh nyang jeuet keuhakem, gobnyan nyang peumiyueb nyang sidroe dan gobnyan teuma nyang peumanyang nyang laen. beungeuh tuhan saban lagee piala nibak jaroe gobnyan, piala nyan meuasoe ie anggo nyang kreueh. allah nyang tunggeng asoe jih, banmandum ureueng jeuhet nyang na di ateuh bumoe haroh jijieb ie nyan sam-

poe habeh. teuma ulon teutab lon peusampoe al-lah nabi yakub, lon meuca-e lagu puja ngon pujoe keu gobnyan. gobnyan nyang wiet sampoe patah teunaga ureueng jeuhet, di ureueng nyang jroh meutamah teuga.

keu teupimpen kor. deungon irengan keucapi. zabur asaf. lagu. po teu allah meusyehu di yehuda; nan gobnyan meusyehu ngon meugah di israel. yerusalem na kheueh teupat tinggai gobnyan; buket sion teupat tinggai gobnyan. disinan gobnyan geupeuhanco banmandum alat prang, banmandum panah meukilat, peurisai dan peudeueng. keubit that agong droeneueh, dan ceumeurlang, leubeh nibak gunong-gunong purba kala. ureueng-ureueng nyang beuhe ngon ceubeuh ka habeh geureupah; awaknyan teueh dan hana jibeudoh le. sipa-i-sipa-i nyang gagah peukasa ka gadoh teunaga jih. banmandum guda dan ureueng pasang ateuh guda nyan habeh rhot dan mate, deungon dumpak droeneueh, ya allah nabi yakub! keubit luwa biasa droeneueh! meunyoe droeneueh beungeh, soe nyang hase meuteun? di langet neupeugah keuputusan droeneueh; bumoe teumakot dan seungab. watee droneueh beudoh keuneuk neuhakem keu neupeuseulamat ureueng nyang meudeurita di ateuh bumoe. ureueng-ureueng nyang paleng juah ngon jeuhet pih jipujoe droeneueh, dan nyang mantong beungeh laju jajak cok ija krong tanda meukabong. peutrok kheueh janji gata ubak tuhan allah gata, bah kheueh banmandum bansa nyang na tinggai rab jiba peuseumahan keu po teu allah nyang jitakot. gobnyan nyang peupatah seumangat ureueng mat kuasa; bubena raja jiteuka yo keu gobnyan.

keu teupimpen kor. meunurot: yedutun. zabur asaf. deungon su meuleungkeng ulon meuhoi ubak po teu allah; deungon meuleungkeng ulon meulakee, dan gobnyan geudeueng ulon. watee ulon meukarat ulon meudoa ubak tuhan; simalam suntok ulon leueng paleuet ngon meudoa hana reuda, teuma ate ulon hanjitem teuhibo. meunyoe ulon ingat po teu allah, ulon aloh alah, meunyoe ulon teumanung, ate lon seumaken leusu. tuhan geupeujeuet ulon hana hase teungeut meunyoe ka malam, ulon geulisah sampoe hana hase lon peugah haba. ulon pike uroe-uroe nyang ka ltheueh, ulon ingat-ingat dan lon manung thon-thon nyang u likot. watee malam sabe lon pike, dan jitanyong lam ate, "peu kheueh siumu masa tuhan geutulak dan hana geutem deungoe le? peu kheueh gobnyan ka geupioh geugaseh kamoe? dan peu kheueh gobnyan hana geutem le geupeupeunoh janji? peu kheueh ka tuwoe allah keu gaseh sayang? dan peu kheueh gobnyan ka beungeh sampoe ka hanale rasa weueh?" laju ulon peugah, "nyoe kheueh nyang jeuet keupeunyaket ate ulon, bahwa nyang mahamanyang hana meukuasa le." ulon keuneuk peuingat buet-buet droeneueh, ya tuhan, lon ingat keujajeaban-keujajeaban droeneueh yoh masa ilee. ulon keuneuk manung peue mantong nyang ka droeneueh peubuet, dan ulon pike karya-karya droeneueh nyang hebat. ya allah, peue mantong buet droeneueh na kheueh suci, soe kheueh nyang na rayeuk jih saban ngon allah kamoe? droeneueh kheueh nyang ka neupeubuet banmandum buet nyang ajaeb, kuasa

droeneueh ka neupeuleumah ubak bansa-bansa. deungon meubagoe teunaga droeneueh neupeubeubaih umat droeneueh, keuturonan nabi yakub dan nabi yusuf. meunyoe jingiang droeneueh, ya allah, ie pi jiteuka yo, meunan cit, deungon twie ie laot jiteuka yo nyang hana teukira. awan jipeutron ujeuen, geulanteu ngon gogo hana reuda; kilat muble-ble jiseumama keudeh keunoe. geulanteu jimeusu ban salamlé, dan kilat muble-ble jiseumama, bumoe meuguncang ngon meusu meukrab-krab. droeneueh neujak rot lam umbak, neujeumeurang laot, teuma bakat droeneueh hana teutinggai. lagee ureueng meurabe droeneueh tunton umat droeneueh, deungon peurantaraan nabi musa dan nabi harun.

lagu-lagu peulajaran asaf. ulon keuneuk peugah peupatah dan mise umpama, dan ulon peusahéh hiem yoh masa ilee, hai-hai nyang kamoe deungoe dan kamoe teurimong, nyang jikisah le indatu kamoe. kamoe hana kamoe som sibagoe rahsia keuhai nyan ubak aneuek-aneuek kamoe; kamoe keuneuk peugah hainyan ubak angkatan oh ltheueh kamoe keuhai kuasa tuhan dan karya-karya gobnyan nyang raya, dan buet-buet gobnyan nyang ajaeb. ubak bansa israel gobnyan geubri hukom geuh, dan ubak keuturonan nabi yakub peurintah gobnyan. gobnyan geuyue indatu geutanyoe mangat geupeurunoe hainyan keu aneuek-aneuek awaknyan, mangat angkatan nyang ltheueh nyan jituri gobnyan, dan geupeusampoe teuma ubak aneuek-aneuek awaknyan. deungon na lagee nyan awaknyan pih jitroh harapan ubak allah, dan hana jituwoe ubak buet gobnyan, dan sabe lam taat ubak peurintah gobnyan, mangat awaknyan hana lagee indatu awaknyan, nyang galak ubak beurontak dan bak buet doraka; angkatan nyang guyah iman jih, dan hana seutia ubak po teu allah. sukee efram nyang museunjata panah dan busur, laju jiplung bak watee teungoh muprang. awaknyan jiliengkeue peujanjian allah ngon awaknyan, dan hana jitem taat deungon hukom gobnyan. awaknyan tuwoe deungon buet-buet gobnyan, dan hai-hai nyang ajaeb nyang geupeuleumah ubak awaknyan. dikeue indatu awaknyan, allah geupeugot buet ajaeb di nanggro meuse, di ateuh darat zoan. gobnyan geuplah laot, laju geupeujeumeurang awaknyan; ie laot nyan geupeudong lagee ie lam kulam. gobnyan geupeuintat awaknyan deungon awan jeuet keupayong bak watee uroe dan deungon apui hu bak watee malam. gobnyan geuprah gunong batee di padang pasi, dan geubri ie jieb bak awaknyan nyang meulimpah ruwah. buket batee geupeurintah beu jiteubiet ie, dan laju ie ji ilee lagee ie krueng. teuma awaknyan sabe meudesya ubak allah, di padang guron nyan awaknyan beurontak ubak nyang mahamanyang. awaknyan jisaja ji ujoé allah, deungon cara jilakee peunajoh nyang jihawa. awaknyan jilawan po teu allah sira jipeugah, "peu kheueh hase allah geubri keu geutanyoe peunajoh di padang pasi? keubit beutoi gobnyan geuseukok gunong batee nyang kreuch, sampoe jiteubiet ie lam batee nyan deungon kangcah that. teuma peu kheueh gobnyan hase geukeubah ruti keu awaknyan dan geubri uengkot sie keu umat gobnyan?" ban geudeungoe nyang lagee nyan, allah beungeh lumpah na dan

laju geuseurang awaknyan deungan apui hu; beungeh gobnyan ateuah awaknyan meutamah-tamah, sabab awaknyan hana jipeucaya ubak allah, ubak kuasa gobnyan nyang hase geupeuseulamat awaknyan. bahpi meunan gobnyan geupeurintah ubak langet jeuet jibuka bubena babah pintoe langet nyan. laju gobnyan geupeutron gandom lam syeuruga, manna keu peunajoh awaknyan. gobnyan geubri keu awaknyan peunajoh nyang meulimpah; awaknyan jimakheun ruti malaikat. meunan cit gobnyan geuyue pot angen timu; meunan cit le kuasa gobnyan angen seulan pi laju jipot. gobnyan geupeutron laju cicem-cicem keu umat geuh, jeumeulah jih na lagee anou di pasi nyang hana teukira. geupeurhot laju cicem-cicem nyan nibak khimah-khimah di seukeulileng teupat awaknyan tinggai. dan jimakheun kheueh laju awaknyan sampoe an troe, sabab po teu allah ka geubri peue nyang jilakee le awaknyan. teuma bahpi ka na nyang lagee jilakee nyan, teuma nafeusu awaknyan gohlom cit meurasu pueh; jadi, teungoh awaknyan mantong jimakheun, po teu allah beungeh that-that dan geulawan awaknyan; laju geupoh mate bubena ureueng-ureueng israel nyang mantong muda-muda dan peukasa. bahpi meunan umat gobnyan teutab meudesya, buet-buet nyang ajaeb nyang ka geupeuleumah teutab hana jitem peucaya. dan allah laju geupeuhabeh udeb awaknyan lagee nafah, thon-thon awaknyan jipeuhabeh dalam keadaan teumakot. pajan mantong allah geupoh mate napadub droe lamkawan awaknyan, nyang laen meunyeusai dan laju jiwoe ubak gobnyan. awaknyan laju ji inget bahwa allah na kheueh nyang lindong gobnyan, dan bahwa nyang mahamanyang nyang peuseulamat awaknyan. teuma awaknyan jimeusulet bak gobnyan, peue-peue mantong nyang jipeugah le awaknyan na kheueh sulet bandum. awaknyan hana seutia ubak gobnyan dan hana jimumat ubak peujanjian gobnyan. teuma allah geugaseh dan geupeu amphon umat gobnyan, dan hana geupeubinasa awaknyan. ka kayem that gobnyan geupeuteun beungeh geuh, dan hana geupeutrok mureuka gobnyan. gobnyan geuingat bahwa awaknyan na kheueh makhluk nyang fana, lagee angen lalu dan hana jiriwang le. ka kayem that awaknyan jibeurontak keu gobnyan, dan jipeusaket ate gobnyan watee di padang pasi. meu ulang-ulang awaknyan jiu-joe po teu allah, jipeususah nyang kudus, allah israel. awaknyan hana ji inget ubak keukuasaan gobnyan, nibak uroe awaknyan geupeubeubaih nibak musoh, bak watee gobnyan geupeugot buet-buet nyang ajaeb di nanggroe meuse, dan mujizat-mujizat dipadang zoan. krueng-krueng awaknyan geu ubah jeuet keudarrah, sampoe awaknyan hana hase jijieb ie krueng nyan. gobnyan geuseksa awaknyan deungan lalat nyang jai, dan geupeubiyeu tanoh awaknyan jipeumuseunah le cangguk. gobnyan geupeutron ulat deungan daruet, nyang jipeuhabeh hase panan dan hase ladang. gobnyan geupeurusak bak anggo awaknyan deungan ujeuen bateu, dan bak-bak ara awaknyan deungan iembon beuku. gobnyan geupeubiyeu ujeuen es rhot jitimpok ateuah beulatang peulara awaknyan, dan geulanteue jisama bubena beulatang peulara awaknyan. gobnyan geupeulheuh

banmandum beungeh geuhnyan nyang hu meuhabhab deungan cara geuyuejak saboh pasokan malaikat mawot nyang peujeuet awaknyan putoh asa. gobnyan hana geupeuteun beungeh geuh nyan atawa geuweueh inseh ateuah udeb awaknyan, teuma geupeubinasa udeb awaknyan deungan peunyakot sam-par. gobnyan laju geupoh mate aneuek agam nyang tuha lam tieb-tieb keuluwarga ureueng meuse. gobnyan geupimpen umat geuh lagee kawan bubiri, dan geupeutakteh awaknyan meulalu padang pasi. dalam bimbangan gobnyan awaknyan aman dan hana teumakot, dan musoh awaknyan ka habeh ngob lam laot. laju umat gobnyan geuba ubak tanoh nyang suci, ubak gunung-gunong nyang geureubot keudroe. dikeue umat gobnyan laju geu use bubena peunduduek nyang na disinan laju geubagi-bagi nanggroe nyan keu mandum sukee bansa israel, umat gobnyan, sampoe awaknyan hase jitinggai nibak khimah-khimah musoh. teuma awaknyan beurontak dan jiu-joe po teu allah nyang mahamanyang, peurintah-peurintah gobnyan hana jitaat. awaknyan meukhi-anat lagee indatu droe jih, dan hana hase teupeucaya lagee aneuk panah nyang keuwieng. awaknyan jilawan allah deungan teupat seumah beurala, dan jipeujeuet gobnyan ceumeuru deungan patong-patong awaknyan. ban geuingeng nyan, po teu allah lumpah beungeh, dan geutalak awaknyan meuntah-meuntah. gobnyan geutinggai khimah geuh di silo, teupat tinggai gobnyan lamkawan manusia. gobnyan geupeubian peuto peujanjian geuh jiteun; lambang keumuliaan gobnyan jireubot le lawan. gobnyan beungeh ubak umat geuh, milek pusaka gobnyan, dan geupeubiyeu awaknyan jipoh ngon jicang mate deungan peudeueng. peumuda-peumuda awaknyan jipajoh le apui; hana nyang tem meukawen deungan aneuek-aneuek dara awaknyan. teungku-teungku imeum awaknyan jipoh mate deungan peudeueng, inong-inong balee awaknyan hana hase jimo bae. teuma tuhan geubeudoh lagee ureueng ban beudoh eh, lagee ureueng teuga nyang ban ltheueh jieb ie anggo. gobnyan laju geuseupot sampoe jisurut bubena lawan gobnyan, dan geupeutaloew awaknyan keu siumu masa. teuma gobnyan geutalak keuturonan nabi yusuf dan hana geupileh sukee efraim. nyang geupileh na kheueh sukee yehuda, dan buket sion nyang geucinta. gobnyan geupeudong baet geuh lagee baet geuh nyang na di dalam syeuruga, dan lagee bumoe, khong ngon kukoh keu siumu masa. gobnyan geupileh nabi daud hamba geuh nyan, dan geucok gobnyan nibak kawan beulatang peulara, nibak teupat gobnyan peulara nang bubiri, keu geurabe israel umat gobnyan. nabi daud geupeulara awaknyan deungan juoe dan ikhlas, dan geubimbeng awaknyan deungan aref dan bijak sana.

zabur asaf. manyet namiet-namiet droeneueh ka jitinggai le awaknyan jeuet keupeunajoh cicem-cicem nyang po di manyang. manyet-manyet geunaseh droeneueh jipeubiyeu mantong disinan jeuet keupeunajoh beulatang kleut. nibak mandum banda yerusalem darah awaknyan ro lagee ie ile; hana ureueng nyang jitem tanom awaknyan u dalam jrat. kamoe jeuet keubahan hinaan le bansa-bansa silingga, awaknyan jipeukem dan jicemoh kamoe.

ya tuhan, peu kheueh siumu masa droeneueh be-
ungeh keu kamoe, dan ceumburu droeneueh hu
seu-uem lagee apui raya? neupeurhot kheueh be-
ungeh droeneueh nyan u ateueh bansa-bansa nyang
hana jituri keu droeneueh, dan u ateueh keurajeuen-
keurajeuen nyang hana meubakti ubak droeneueh.
sabab awaknyan ka jipeubinaasa umat droeneueh,
dan jipeuhanco teumpat tinggai awaknyan. bek
neuhukom kamoe sabab desya nyang geupeubuet
le indatu kamoe. neugaseh kheueh keu kamoe
jinoenyoe cit teuma, sabab kamoe ka putoh asa.
tulong kheueh kamoe ya allah, nyang peuseula-
mat kamoe, neupeu amphon kheueh desya-desya
kamoe dan neupeubeubaih kheueh kamoe deumi
keuhoreumatan droeneueh keudroe. bek neupeu-
biyeu bansa laen jiteumanyong keuhai kamoe, "di-
pat allah awaknyan?" bah kheueh kamoe ngieng
peumbalasan ateueh bansa-bansa nyang jeuet keu
ureueng poh hamba-hamba droeneueh. neu deun-
goe kheueh apoh apah ureueng nyang na didalam
tahanan; seumoga ureueng-ureueng nyang teupeu-
teuntee keu mate teupeubiyeu udeb sabab kuasa
droeneueh. ya tuhan, neubalahi kheueh bansa-bansa
nyan tujuh go lipat sabab banmandum peuhinaan
awaknyan ateueh droeneueh. teuma kamoe siba-
goe umat droeneueh, bubiri nyang droeneueh rabe,
teuma meusyukoe ubak droeneueh siumu masa, dan
kamoe pujoe droeneueh tron meutron nibak keutur-
onan kamoe.

keu teupimpin kor. meunurot lagu: bungong
bakong. zabur keusaksian asaf. ya geumbala
nyang rabe israel, deungoe kheueh nyoe, droeneueh
nyang pimpan keuturonan nabi yusuf sibagoe kawan.
droeneueh nyang duek meutakhta di ateueh kerub,
teuka kheueh deungon geumilang dikeue efrain,
benyamin dan manasye. tunyok kheueh keukuasaan
droeneueh keu kamoe, dan teuka kheueh neujak
peuseulamat kamoe. ya allah, neupeupuleh kheueh
kamoe; pandang kheueh kamoe deungon ate nyang
murah, mangat kamoe seulamat. ya tuhan, allah
nyang mahakuasa, trok an pajan droeneueh neube-
ungeh kamoe, bahpi umat droeneueh meudesya?
neubri keu kamoe mo nyang hana reuda sibagoe
peunajoh, ie mata nyang ro meulimpah sibagoe ie
jieb kamoe. neupeubiyeu bansa-bansa teutangga
jimeudakwa keuhai tanoh kamoe dan bubena musoh-
musoh kamoe ka habeh jikem sabab galak. ya allah
nyang mahakuasa, neupeupuleh kheueh kamoe; ne-
ungieng kheueh kamoe deungon murah ate, mangat
kamoe seulamat. umat droeneueh lagee bak anggo
nyang droeneueh pinah di nanggroe meuse. bansa-
bansa nyang laen droeneueh use, laju neupula bak
kayee nyan di nanggroe awaknyan. droeneueh nyang
keubah tanoh keu awaknyan; teuma jihnyan meu-
keue lhok u dalam bumoe dan meulinteung bansa-
aboh nanggroe. gobnyan nyang peupayong bubena
buket-buket, dan deungon cabeueng-cabeueng jih
nyan hase teutob bak kayee aras nyang raya-raya.
ranteng jih meunyue ngon meujulue trok u laot
teungoh, dan pucok-pucok jih trok ubak krueng
efrat. ya allah, pakon neureuloh pageue jih, sam-
poe soe mantong ureueng nyang jijak disinan ka
hase jipot boh jih? bui uteuen jijak seuba sampoe

rusak, dan beulatang nyang didalam padang pih
jajak pajoh atra nyan. ya allah nyang mahakuasa, neu-
teuka kheueh lom, neungieng kheueh rot syeuruga
dan neukalon kheueh umat droeneueh. neupeuseu-
lamat kheueh umat nyang lagee bak anggo nyang ka
droeneueh pula keudroe, dan tarok bak anggo nyang
ka droeneueh peujeuet kukoh. musoh ka jiteubang
dan laju jitot ngon apui; bah kheueh awaknyan
neupeubinaasa le beungeh droeneueh. neulindong
kheueh ureueng nyang ka droeneueh pileh, aneuk
manusia nyang neupeukong keu droeneueh. teuma
kamoe hanale kamoe paleng nibak droeneueh; neu-
jaga kheueh udeb kamoe, teuma kamoe meupujoe
droeneueh. ya tuhan allah nyang mahakuasa, neu-
peupuleh kheueh kamoe, neupandang kheueh kamoe
deungon murah ate, mangat kamoe seulamat.

keu teupimpin kor. meunurot lagu: gitit. nibak
asaf. meuca-e kheueh nyanyoe puja ngon pujoe ubak
po teu allah, teunaga geutanyoe, meusurak kheueh
deungon geumbira keu allah nabi yakub. tapeh
kheueh rapa-i, dan peuphon kheueh musik, peutek
kheueh gamboh dan keucapi deungon su meualon-
alon. yeub kheueh beureuguih watee uroe raya geu-
tanyoe, bak watee khanuri buleuen baro dan buleuen
peunoh. sabab hai nyang lageenyan na kheueh saboh
lamkawan peuratoran di israel, dan saboh nibak
meubagoe peurintah allah nabi yakub. gobnyan geu-
peujeuet saboh peuratoran keu bansa israel, bak wa-
tee gobnyan geumaju jak lawan bansa meuse. "ulon
ka lon beutot beuban di ateueh ulee gata, dan lon peul-
heuh raga seumeuon nyang na bak jaroe gata. lam
aloh alah gata meulakee, dan ulon peuseulamat gata.
ulon jaweueb gata nibak geulanteue teumpat ulon
musom, ulon ujo gata nibak mata ie meriba. deun-
goe kheueh ulon peuingat nyoe, hai umat ulon, israel,
meunyoe gata tatem deungoe ulon! bek na lamkawan
gata jimeu ilah ubak ilah nyang laen, bek kheueh tase-
umah ubak ilah aseng. ulon kheueh tuhan allah gata,
nyang tuntan gata peuteubiet lam nanggroe meuse.
watee gata deuk ulon bri peunajoh. teuma umat ulon
hana jitem deungoe peue nyang ulon peugah, israel
hana jitem taat ubak ulon. sabab nyan ulon peu-
biyeu jihnyan jeuet keu ureueng kreueh ulee; bah
kheueh awaknyan jiseutot keuheundak jih keudroe.
ah, meunyoe umat ulon jitem deungoe peue nyang
ulon peugah, meunyoe awaknyan jitem taat ubak
ulon, teuma ulon deungon sigra lon peutaklok mu-
soh awaknyan, dan ulon peutaloe banmandum lawan
awaknyan. ureueng nyang banci teuma lon peutak-
lok, awaknyan teuhukom keu siumu masa. teuma
umat ulon kujok peunajoh gandom nyang teupileh,
dan ulon peutroe deungon meulisan rimba."

zabur asaf. "bek le peusidang gob ngon cara ilat,
dan bek dong blaih ureueng jeuhet. bila kheueh
aneuk yatem ngon ureueng hana meudaya, jok
kheueh keuadalan keu ureueng gasien dan seungsara.
peubeubaih kheueh ureueng nyang leumoh dan hana
meudaya, peuhinda kheueh awaknyan nibak jaroe
ureueng jeuhet. gata hana keunong sapeue, bangai
dan sisat, le sabag gata, tata teureutib masyarakat hana
meuteuntee le. ulon peugah bahwa gata ilahi dan
gata banmandum aneuek-aneuek allah nyang ma-
hamanyang. teuma gata teutab mate lagee manusia,

lagee tieb-tieb ureueng rayeuk, gata pih teutab mate." teuka kheueh ya po teu allah, peusidang kheueh donya, sabab banmandum bansa na kheueh atra droeneueh.

zabur asaf: saboh lagu. ya allah, bek kheueh neuem droe, bek neupangkee jaroe dan seungab mantong. kalon kheueh, musoh droeneueh ka jibeudoh, ureueng-ureueng yang jibanci bak droeneueh ka beurontak. awaknyan ka jimupakat ngon jipeuget reuncana yang licek keuneuk jilawan umat droeneueh; dan jimeurok pakat jijak lawan ureueng-ureueng yang droeneueh lindong. kheun awaknyan, "jak geutanyoe tajak peuhanco bansa israel, mangat nan awaknyan hana ji ingat le." bansa-bansa ka meusaho saboh pakat, dan meusikutu jilawan droeneueh: bansa edom dan ismail, ureueng-ureueng moab dan hagar; bansa gebal, amon dan amalek, bansa filisteu meunan cit deungon peunduduk tirus. meunan cit asyur ka jimeugabong deungon awaknyan, jeuet keu gaki jaroe keuturonan lot. neupeusanet kheueh awaknyan lagee ureueng midian, lagee sisera dan yabin di krueng kisyon, yang ka jipeubinasu di endor, dan jeuet keu baja ateuh tanoh. neupeusanet kheueh peumimpin awaknyan lagee oreb dan zeeb, peutundok kheueh peunguasa awaknyan lagee zebah dan salmuna, sabab awaknyan ka jipeugah, "jak geutanyoe tajakduek bak tanoh teupat tinggai allah." ya allah, neusipeuk kheueh awaknyan lagee abee meutabu ngon meuhambo, lagee jeumpung yang jiyueb le angen. lagee apui hu yang teungoh tutong uteuen, apui yang hu habeh hangoh gunong-gunong. neutiyeub kheueh awaknyan ngon angen badee droeneueh, dan neupeukeujot kheueh awaknyan deungon angen badee droeneueh. ya tuhan, bah kheueh awaknyan teuhina, mangat awaknyan jiaku keukuasaan droeneueh. bah kheueh awaknyan siumu masa sabe lam malee dan teumakot yang hana teukira, dan bah kheueh awaknyan mate lam keuhinaan. seumoga awaknyan jiteupeue bahwa droeneueh kheueh yang mahamanyang, tuhan, yang mat kuasa ateuh bansigom bumoe.

keu teupimpen kor. meunurot lagu: gitit. zabur kawom korah. keubit that mangat teupat tinggai droeneueh, ya allah yang mahakuasa! ate ulon lumpah that rindu ubak baet droeneueh, jiwa raga lon meusurak geumbira keu allah yang udeb. bahpih cicem tulo meuteume rumah dan cicem geulayang saboh uempueng, teupat cicem yang jikeubah aneuk jih bak bineh miseubah droeneueh, ya tuhan yang mahakuasa, raja lon dan allah lon. keubit that bahgia ureueng yang tinggai di baet droeneueh, dan jimeuca-e nyanyoe pujo keu droeneueh tieb-tieb watee. mubaghia kheueh ureueng yang meuteume teunaga nibak droeneueh, dan yang na niet jijak ziarah u gunong sion. teungoh awaknyan jijak rot panton baka, teupatnyan awaknyan ubah sampoe jeuet keu mata ie, ujeuen yang phon ie jih meulimpah deungon beureukat. teunaga awaknyan seumaken meutamah, watee teungoh jijak u sion, ubak teupat alah banmandum dewata jipeuleumah droe. deungoe kheueh doa ulon, ya tuhan allah yang mahakuasa, neudeungoe kheueh, ya allah nabi yakub. jok kheueh

beureukat ubak raja kamoe, ya allah, neulindong kheueh ureueng yang ka droeneueh pileh. leubeh get siuroe di baet droeneueh nibak siribee uroe di teupat laen. ulon kupileh jeuet keu ureueng jaga babah pintoe di baet allah ulon nibak tinggai di rumoh ureueng jeuhet. sabab tuhan allah peulindong geutanyoe dan raja yang agong, yang geuanugeurah keu geutanyoe geunaseh dan keuhoreumatan. gobnyan hantom geutulak peue mantong meunyoeng yang jroh ateuh ureueng yang udeb jih hana meunoda. ya tuhan yang mahakuasa, mubaghia kheueh ureueng yang peucaya ubak droeneueh.

keu teupimpen kor. zabur kawom korah. droeneueh meukeunong ubak tanoh droeneueh, ya tuhan, keuadaan israel ka neupeupuleh. droeneueh ka neupeu amphon bubena desya umat droeneueh; neupeumeuah banmandum keusalahan jih. awaknyan hanale neubeungeh; meureuka droeneueh yang luwa biasa nyan neutarek lom teuma. peupuleh kheueh kamoe, ya allah yang peuseulamat kamoe, bek neuseksa le lam udeb kamoe. peu kheueh keu siumu masa droeneueh neubeungeh kamoe, dan teutab neubeungeh tron neutron? neupeu kong kheueh kamoe lom jeuet kamoe umat droeneueh nyoe meugeumbira sabab lam tulungan droeneueh. neutunoyk kheueh bahwa droeneueh teutab neugaseh kamoe, ya tuhan, neubri kheueh keu kamoe keuseulamatan nibak droeneueh. ulon deungoe peue yang geupeugah le tuhan allah; gobnyan ka geupeujanji keuseulamatan keu tanyoe, umat gobnyan, asai geutanyoe hana taulang bak tapeubuet desya. keubit, gobnyan siab seudia geupeuseulamat ureueng yang taqwa, allah yang agong tinggai di nangroe geutanyoe. gaseh dan keuseutiaan meurumpok, keuadalan dan dame saleng meuwa-wa. keuseutiaan manusia jitimoh ateuh bumoe, dan keuadalan allah teuka di langet. tuhan geukaronya yang jroh-jroh, dan tanoh geutanyoe jiteubiet hase. keuadalan awei teuka nibak tuhan, dan jipeusiab jalan keu gobnyan.

doa nabi daud. ulon, sabab ulon gasien dan leumoh. jaga kheueh udeb lon, sabab droeneueh neugaseh ulon, neupeuseulamat kheueh hamba droeneueh yang peucaya ubak droeneueh. droeneueh kheueh allah lon, neugaseh kheueh ulon, ya tuhan, sabab siuroe seupot ulon meudoa bak droeneueh. tuhan, neupeumangat kheueh ate hamba droeneueh nyoe, sabab ubak droeneueh kheueh ulon sintong asoe ate lon. droeneueh jroh, ya tuhan, dan galak neupeu amphon ureueng yang lakee amphon ubak droeneueh, ureueng yang meudesya ubak droeneueh teutab neugaseh ngon neusayang deungon gaseh yang meulimpah. deungoe kheueh doa ulon, ya tuhan, deungoe kheueh meulakee lon yang ulon lakee tulung. bak watee ulon meukarat teutab lon meudoa ubak droeneueh, sabab droeneueh neujaweub ulon. ya tuhan, hana tuhan yang laen yang sa deungon droeneueh, hana yang hase jipeubuet lagee droeneueh peubuet. banmandum bansa yang droeneueh peujeuet teuma teuka, ya tuhan, keu jiseumah droeneueh dan jipujoe keuagongan droeneueh. sabab droeneueh peukasa dan neupeubuet buet-buet yang ajaeb,

teuma droeneueh kheueh allah. peurunoe kheueh keuheundak droeneueh ubak ulon, ya tuhan, mangat jeuet ulon seutot deungon seutia; neupeujeuet kheueh ulon keu ureueng taqwa deungon sipeunoh ate. ulon meusukoe ubak droeneueh deungon seupeunoh ate, ya tuhan, allah ulon; ulon keuneuk pujoe keubeusaran droeneueh sampoe siumu masa. sabab droeneueh teutab neugaseh ubak ulon deungon geunaseh nyang raya; droeneueh ka neupeulheueh nyawong ulon nibak mate. ya allah, ureueng sombong jibeudoh jikak prang ulon, saboh kawan ureueng keujam keuneuk peumate ulon; awaknyan hana jipakoe keu droeneueh. teuma droeneueh, ya tuhan, allah nyang peungaseh dan peunyang, saba, peunoh geunaseh dan seutia. neuengieng kheueh dan neugaseh kheueh ulon, neupeuteuga kheueh dan peuseulamat kheueh ulon, sabab lagee ma ulon, ulon meubakti ubak droeneueh. neubri kheueh ubak ulon tanda jroh droeneueh, ya tuhan, mangat ureueng nyang banci keu ulon neupeumalee, meunyo awaknyan ngieng droeneueh neutulong dan neuhibo ulon.

zabur kawom korah, saboh lagu. nibak banmandum banda israel, yerusalem nyang paleng geusayang. deungoe kheueh, hai banda allah, hai hai nyang paleng takjob nyang teupeugah keuhai gata: "meuse dan babel ulon peutamong lam dafeutar bansa-bansa nyang taat ubak ulon. meunan cit filistea, tirus dan sudan jitamong lam kiraan peunduek yerusalem." ubak sion ureueng laen jipeugah, bahwa banmandum bansa jitamong cit keunan warga jih, dan bahwa nyang mahamanyang geupeukong jihnyan. tuhan geupeutamong bansa-bansa dalam dafeutar peunduek yerusalem. awaknyan jilikak ngon jimeuca-e, "sion na kheueh teumpat asai lon!"

lagu. zabur kawom korah. keu teupimpen kor. meunurot lagu: mahalat leanot. ca-e peungajaran heman, ureueng ezrahi. ya tuhan, allah nyang peuseulamat ulon, oh watee uroe ulon meulakee ubak droeneueh, dan oh watee malam ulon meuhadab ubak droeneueh. seumoga doa ulon trok ubak droeneueh, neudeungoe kheueh nyang ulon lakee nyoe. ulon keunong le apoh apah nyang paleng le; mawot ka teupreh di babah pintoe. ulon lagee ureueng nyang jipeutron u babah pintoe jrat, ureueng nyang ka habeh teunaga. ulon jitinggai lamkawan ureueng mate, lagee ureueng keunong poh, teuh didalam jrat, lagee ureueng nyang ka neutuwoe hana neuingat mubacut pi, ureueng nyang hana droeneueh tulong le. droeneueh neugeulawa ulon u dalam uruek nyang paleng lhok, u dalam jrat nyang lhok dan seupot buta. beungeh droeneueh nyan teuteugon ulon deungon geuhon that, ulon hanco teuginton deungon meureuka droeneueh. neupeujioh rakan-rakan lon nibak ulon, dan neupeujeuet ulon ureueng nyang luwat nibak awaknyan. ulon meukurong dan hana hase lon teubiet, mata ulon jeuet keureudok sabab seungsara. tieb-tieb uroe ulon meulakee ubak droeneueh, ya tuhan, dan lon meudoa deungon jaroe teunyue ngon paleuet meulintueng. peu kheueh droneueh neupeugat keujaaban keu ureueng mate? peu kheueh awaknyan jibeudoh dan jipujoe droeneueh? peu kheueh geunaseh droeneueh nyan

jipeugah cit lam jrat, dan keuseutiaan droeneueh di teumpat keubinaan? peu kheueh na nyang teupeue keujaaban droeneueh didalam seupot, atawa keujroh droeneueh di nanggroe teumpat ureueng nyang geupeutuwo? teuma ulon lakee tulong droeneueh, ya tuhan, tieb-tieb beungoh ulon lakee doa ubak droeneueh. ya tuhan, pakon droeneueh neutulak ulon? pakon neupaleng wajah droeneueh nibak ulon? yoh ubit kon ulon seungsara dan sabe jileum le mawot, ulon lumpah that payah lon tanggong hukuman droeneueh. beungeh droeneueh nyan nyang luwa biasa teupeuhanco ulon; dan seurangan droeneueh nyang hebat teupeubinaan ulon. siuroe seupot beungeh droeneueh nyan lagee ie raya nyang jikeulileng di geunireng ulon, jikeupong ulon rot meubagoe arah. rakan-rakan lon nyang paleng rab nyan pih ka droeneueh peujioh nibak ulon, tinggai seupot buta nyang jeuet keu rakan ulon.

ca-e peulajaran etan, ureueng ezrahi. gaseh sayang droeneueh, ya tuhan, lon keuneuk zike siumu masa, keuseutiaan droeneueh lon peusampoe tron neutron. sabab ulon kuteupeue gaseh droeneueh nyan na kheueh keukai abadi, keuseutiaan droeneueh kukoh lagee langet. droeneueh ka neupeugah, "ulon ka ltheueh lon peugit janji deungon ureueng nyang ulon pileh; ulon ka ltheueh lon meusumpah yoh nabi daud, hamba ulon: 'takhta gata ulon peuteuen keu siumu masa, tron neutron aneuek cucoe gata teuma jidiek disinan.'" sidang nyang na lam syeuruga geupujoe buet-buet droeneueh nyang ajaeb, dan geupeutrok keuseutiaan droeneueh, tuhan. di langet hana nyang saban deungon droeneueh, ya tuhan, dan hana teuma mahluk lam syeuruga nyang sa deungon droeneueh. droeneueh jihoreumat le mandum nyang suci, dan that-that jitakat leubeh nibak banmandum nyang na disikeulileng droeneueh. tuhan, allah nyang mahakuasa, soe kheueh nyang na lagee teuga dan teunaga droeneueh nyan? droeneueh seutia lam hai peue mantong ya tuhan. droeneueh nyang kuasa laot nyang meugeulora raya, dan nyang peureuda umbak dan geulora samudra. rahab, naga laot, droeneueh peureumok dan droeneueh poh mate, deungon jaroe nyang teuga droeneueh peutaloe bubena musoh droeneueh. langet dan bumoe na kheueh atra droeneueh, donya dan peue mantong asoe jih na kheueh cebsaan droeneueh. droeneueh kheueh nyang peujeuet utara dan seulatan, gunong tabor dan hermon meusurak geumbira keu droeneueh. padubna raya kuasa droeneueh, ya tuhan, dan padub na hebat teunaga droeneueh! keuadalan dan hukom na kheueh dasai keurajeuen droeneueh, gaseh dan keuseutiaan na kheueh nyata lam peue mantong nyang droeneueh peubuet. mubaghia kheueh bansa nyang meuebadat deungon geumbira, nyang udeb lam cahya teuka droeneueh, ya tuhan. siuroe sabe awaknyan meusuka cita dan teutab teuga, le sabab keubaiekan droeneueh. droeneueh ka neubri keu kamoe meunang nyang gilang geumilang, sabab jroh droeneueh kamoe nyoe meunang. sabab nyang lindong kamoe na kheueh ureueng nyang droeneueh pileh, ya tuhan; raja kamoe na kheueh milek allah kudus israel. yoh watee ilee lam saboh keumalon, droeneueh neupeugah ubak hamba droeneueh nyang

seutia, "ulon kalheueh lon tulung sidroe pahlawan, sidroe ureueng nyang ka ulon pileh nibak rakyat nyang ka ulon beot deureujat jih. ulon ka lheueh meurumpok ngon nabi daud, hamba ulon nyan, dan ulon baiat jih nyan ngon minyeuk upacara. teu-naga ulon sabe teulindong jih, kuasa ulon teupeuteuga jih. jihnyan hana hase jipeutaloe le musoh, dan hana teuma jitindeeh le ureueng jeuhet. banmandum musoh jih ulon peubinas, ulon poh mate soemantong nyang banci keujih. ulon teutab ulon gaseh keujih dan teutab seutia keujihnyan, dan lon peujeuet jihnyan seumaken meukuasa. keurajeuen jih ulon peuluwah, phon di laot teungoh sampoe ubak krueng eprat. jihnyan teuma jipeugah ubak ulon, 'droeneueh kheueh ureueng syiek ulon, po teu allah ulon, peulindong dan nyang peuseulamat ulon.' ulon teuma lon peujeuet jihnyan putra ulon nyang tuha, nyang paleng agong lamkawan banmandum raja. jihnyan teutab ulon gaseh keukai ngon abadi, janji ulon deungan jihnyan teutab kong. takhta jihnyan teutab ulon peuteun simantong langet na di ateuheh bumoe, tron neutron aneuk cucoe jihnyan teutab jiduk disinan. teuma meunyeo keuturonan jih nyang iengkeue hukom, dan hana udeb meunurot peurintah ulon, meunyeo awaknyan hana jipakoe peue nyang ka ulon peuteutab dan jipeujayeh peuratonan ulon, awaknyan ulon hukom deungan peunyeunuet sabab nyang ji iengkeue nyan, dan ulon peurhot deungan beuncana sabab desya-desya jihnyan. teuma keu nabi daud teutab ulon gaseh, dan jihnyan hana ji iengkeue ubak keuseutiaan lon. peujanjian ulon deungan jihnyan hana ulon peubateue, nibak janji lon hana meusaboh pi nyang ulon tarek lom. teuma sigoe keu siumu masa ulon meusumpah deumi nan ulon nyang suci; ulon hana lon meusulet ubak nabi daud. takhta jihnyan teutab meuteun simantong mata uroe na di ateuheh langet, tron neutron sampoe ubak aneuk cucoe nyang duek dan nyang mat keureujeuen. keurajeuen jihnyan teutab na lagee buleuen, saksi seutia di awan-awan." teuma jinoenyoe droeneueh neubeungeh keu raja, droeneueh tiek dan neutulak ureueng nyang ka droeneueh pileh. neupeubateue peujanjian droeneueh deungan hamba droeneueh, mahkota gobnyan ka neugeulawa u dalam luhob. droeneueh peuhanco dumna binteh beuton banda gobnyan, kuta-kuta gobnyan neupeujeuet keu pyung-puyeng nyang meutabu keudeh keunoe. somantong ureueng nyang jijak rotnyan laju jireupah hareuta milek gobnyan, gobnyan jeuet keu ureueng teuhina nibak kawom silingka gobnyan. droeneueh neupeumeunang musoh-musoh gobnyan, dan neupeujeuet banmandum lawan gobnyan jimeusuka ria. meunan cit deungan sinjata gobnyan neupeujeuet hana meuguna, droeneueh hana neutulog gobnyan watee lam prang. neupeu akhe kuasa gobnyan nyang seumarak, dan takhta gobnyan neuereupah neutiek ateuheh tanoh. droeneueh neupeupaneuk masa muda gobnyan, dan teutob gobnyan deungan malee nyang hana teukira. trok an pajan droeneueh neumusom, ya tuhan? trok an pajan beungeh droeneueh nyan hu meuhab-hab lagee apui raya? neu ingat kheueh keu ulon padubna paneuk jih udeb nyoe, neucebta manusia sibagoe makhluk udeb nyang fana. soe kheueh

nyang hase udeb sabe dan hana mate? soe kheueh nyang hase teupeusie nibak azeub kubu? ya tuhan, dipat kheueh tanda gaseh droeneueh nyan nyang seumula, nyang ka droeneueh peujanji ubak nabi daud deumi keuseutiaan droeneueh? ingat kheueh ya tuhan, pakriban hamba droeneueh nyoe jihina ngon jiseurapa, ulon jai that-that lon tanggong hinaan nibak bansa-bansa. musoh-musoh droeneueh jihina raja nyang droeneueh pileh, ya tuhan, jihina gobnyan homantong gobnyan jak. pujoe kheueh tuhan keu siumu masa. beujeuet kheueh lageyan! amin!

doa nabi musa, hamba po teu allah. sigohlom gunong-gunong droeneueh cebta, dan sigohlom bumoe ngon donya nyoe droeneueh peugot, droeneueh kheueh allah nyang keukai, nyang hana awai dan hana akhe. droeneueh kheueh nyang yue manusia mangat geuriwang ubak sai geuh, jeuet keu abee lagee awai nyang ka. nibak droeneueh siribee thon nyan lagee siuroe, uroe baroe nyang ka liwat; lagee saboh gileran jaga bak watee malam. droeneueh peuhanyot kamoe; kamoe nyoe lagee meulumpo, lagee naleueng nyang teungoh timoh; oh watee beungeh jihnyan timoh dan meukeumang, teuma laju layeh oh watee seupot uroe. kamoe teukeujot deungan beungeh droeneueh nyan, dan habeh binasa le meureuka droeneueh. droeneueh keubah salah kamoe dikeue droeneueh, desya kamoe nyang musom ka leumah le droeneueh. udeb kamoe paneuk sabab droneueh beungeh, thon-thon kamoe meulalu lagee nafah nyang teuproh. masa udeb kamoe na kheueh tujuh ploh thon, dan meunyeo kamoe teuga, na lapan ploh thon. teuma na kheueh apoh apah dan deurita yang kamoe teume; oh ka lheueh udeb nyang paneuk, kamoe pih leunyah. soe kheueh nyang hase jiteupeue keuhai meureuka droeneueh nyan nyang meunan dahsyat, atawa sadar that keu akibat beungeh droeneueh nyan? peusadar kheueh kamoe keuhai paneuk jih dalam udeb nyoe mangat kamoe jeuet keu ureueng nyang meubudo basa. ya tuhan, sampoe an pajan droeneueh neubeungeh keu kamoe? neugisa kheueh dan neugaseh kheueh ubak hamba-hamba droeneueh nyoe. neupeulimpah kheueh geunaseh droeneueh ateuheh kamoe tieb-tieb beungoh, ya tuhan, jeuet kamoe geumbira dan sabe kamoe meuca-e ngon meulagu simantong kamoe udeb. neubri kheueh keu kamoe keubahgiaan nyang seimbang deungan peundeuritaan nyang kamoe tanggong nibak thon-thon nyang seungsara. neutunyok kheueh karya droeneueh keu kamoe namiet-namiet droeneueh, dan kuasa droeneueh nyang seumarak ubak keuturonan kamoe. ya tuhan allah kamoe, neubri kheueh beureukat keu kamoe, jeuet peue mantong buet nyang kamoe peubuet meuhase.

ureueng nyang meulindong nibak nyang mahamanyang, dan tinggai dalam naungan nyang mahakuasa, jeuet jipeugah ubak tuhan, "droeneueh kheueh nyang bila dan lindong ulon, allah lon, ubak droeneueh kheueh ulon peucaya." gobnyan geupeuleupah gata nibak bala nyang teusom, dan nibak peunyaket nyang jiba mawot. gobnyan geupeupayong gata deungan sayeub geuh, sampoe gata aman dalam naungan gobnyan; keuseutiaan gobnyan lagee peurisasi nyang teulindong gata. gata hanapeu tatakot

keuhai bahya bak watee malam, atawa jiseurang ngon hana teusangka-sangka bak watee uroe; meunan cit keuhai beuncana nyang teuka bak watee seupot, atawa keuhancoran nyang teuka watee teungoh uroe. bahpi na siribee droe nyang mate bak bineh gata, dan siploh ribee droe blaih uneuen gata, teuma gata keudroe hana cidra. meunyoe gata tapan-dang ban sikeulileng gata, disinan deuh takalon ureueng jeuhet keunong peumbalasan. sabab gata tapeujeuet tuhan nyang bila gata, nyang mahamanyang tapeujeuet nyang lindong gata. dan gata hana keunong beuncana, rumoh gata hana jiteuka bala. po teu allah geuyue jaga ubak malaikat gobnyan keuhai gata, geulindong gata homantong nyang gata jak. awaknyan geubeuot gata ateuh paleuet jaroe geuh, jeuet gaki gata hana meugantoh deungan batee. gata taliengkeue uleue dan singa, tagilo singa muda dan uleue meubisa. feureuman tuhan, "ureueng nyang jicinta ubak ulon lon peuseulamat, nyang jiaku ulon lon peulindong. meunyoe ureueng nyang jimeulakee ubak ulon, peue nyang jilakee nyan ulon bri. oh watee jihnyan meukarat ka meusak, ulon tulong jihnyan; jihnyan lon sangga nibak bahya dan ulon bri keuhoreumatan. jihnyan lon peupueh deungan umu nyang panyang, dan ulon peuseulamat."

ca-e ngon nyanyoe keu uroe sabat. keubit jroh that teupeugah syuko ubak droeneueh, ya tuhan, dan teupujoe droeneueh, allah nyang mahamanyang; teujak peugah gaseh droeneueh bak watee beungoh, dan keuseutiaan droeneueh bak watee malam, sira teutarek gitar nyang siploh krek taloe, teuireng teuma deungan gambus dan keucapi. sabab buet droeneueh keubit galak ate ulon, ulon meuca-e geumbira sabab karya droeneueh. padub na raya buet-buet droeneueh, ya tuhan, padub na lhok pikeran-pikeran droeneueh! ureueng bangai hana hase jipuphom, dan ureueng bingong hana hase muphom. jeuet mantong ureueng doraka timoh lagee naleueng nyang subo, dan ureueng jeuhet meutamah kaya dan makmu; teuma awaknyan teupeubinasa banmandum hana nyang tinggai bahpi meusidroe, sabab droeneueh, tuhan, meukuasa siumu masa. kamoe meuteupeue bahwa musoh droeneueh teupeuhabe banmandum, ya tuhan, banmandum ureueng jeuhet teupeu crebre. droeneueh nyang peujeuet teunaga lon lagee teunaga banteng kleuet, dan neubri beureukat ubak ulon deungan keubahagia. deuh ulon ngieng musoh-musoh ulon nyang taloe, ureueng-ureueng nyang ka jibeudoh jilawan ulon, reuncana-reuncana jeuhet awaknyan ka ltheueh ulon deungoe. ureueng juoe meutarok lagee bak kuruma, dan jitimoh rampak lagee bak ceumara di libanon. awaknyan lagee bak kayee nyang teupula di baet tuhan, dan meukeumang di baet allah geutanyoe, bak kayee nyang mantong jimuboh oh watee tuha, teutab ijo dan seugar. nyan kheueh bukeuti jih bahwa tuhan ade; gobnyan nyang bila ulon, hana nyang curang nibak gobnyan.

tuhan na kheueh raja; gobnyan geungui peukayan keuangongan dan teunaga. bumoe jidong nyang kong hana hase guyang. takhta droeneueh kukoh yoh awai mula, nibak nyang keukai, droeneueh na. dasai laot raya jipeuteuga su jih, ya tuhan, samudra jipeu-

teuga su umbak jih. teuma tuhan nyang meukuasa di dalam syeuruga, leubeh hebat nibak geulora samudra, dan leubeh teuga nibak umbak nyang meuguncang. tuhan, hukom droeneueh keukai dan abadi, baet droeneueh suci sipanyang masa.

ya allah, droeneueh kheueh allah nyang hase tueng bila, neutunyok kheueh balasan droeneueh, ya tuhan. beudoh kheueh, ya hakem bansaboh bumoe, neuhukom kheueh ureueng cungkak nyang sesuai deungan peue nyang ka jipeubuet. ya tuhan, sampoe an pajan ureueng jeuhet jimeugeumbira? trok an pajan, ya tuhan? awaknyan jipeugah haba nyang gasa, dan jipeusombong droe deungan buet nyang jeuhet nyang jikeureuja. awaknyan jiteugon umat droeneueh, ya tuhan, dan jipeureumok ureueng-ureueng yang neupileh. awaknyan jipoh mate inong balee ngon aneuek yatem ngon muntui dan ureueng aseng nyang na tinggai di nanggroe nyoe. kheun awaknyan, "tuhan hana geukalon, allah nabi yakub hana geungeng." hai bansa ulon, bek kheueh gata bangai that, meurunoe kheueh tangui akai gata! po teu allah nyang peugot geulinyueng, peu kheueh gobnyan hana geudeungoe? gobnyan nyang peugot mata, peu kheueh gobnyan hana geukalon? gobnyan nyang peurunoe bubena bansa-bansa, peu kheueh gobnyan hana geuhukom? gobnyan nyang peujeuet keuguree banmandum ureueng, peu kheueh hana ieleume peungeutahuan? tuhan geuleuk banmandum pikeran manusia, gobnyan geuteupeue banmandum sia-sia beulaka. mubahgia kheueh ureueng nyang droeneueh didek, ya tuhan, ureueng nyang droeneueh peurunoe banmandum hukom hukom droeneueh. droeneueh peuteunang jihnyan watee uroe-uroe jiteuka bala, sampoe jikeuh uruek keu jikak droe ureueng-ureueng jeuhet. sabab tuhan hana geutinggai umat gobnyan; gobnyan hana teupeubiyu ban atra milek pusaka gobnyan. dan hukom geupeudong lom dipeungadelan, banmandum ureueng juoe jidukong. soe nyang bila ulon ateuh ureueng doraka? soe nyang nyang dong blaih ulon keuteujak lawan ureueng nyang peubuet jeuhet? meunyoe tuhan hana geutulong ulon, ulon minah ubak donya ureueng mate. watee ulon pike bahwa ulon reubah, geunaseh droeneueh, tuhan, sampoe ulon hase teudong kukoh. meunyoe ate ulon gundah ngon apoh apah, droeneueh nyang hibo dan peugeumbira. droeneueh hana meurakan ngon hakem-hakem nyang jeuhet, nyang jirancang keujeuhetan meunurot hukom jih. awaknyan sipakat jikak lawan ureueng juoe, dan jihukom mate ureueng nyang hana salah. teuma tuhan na kheueh nyang bila lon, allah ulon nyang jeuet keupeulindong lon. gobnyan geuhukom ureueng jeuhet nyang sesuai deungan buet nyang jeuhet nyan, dan geupeuseungab awaknyan sabab desya jih. tuhan po teu allah geutanyoe geupeuseungab awaknyan.

jak kheueh geutanyoe ta meuca-e ngon meunyanyoe keu tuhan, meusurak geumbira kheueh keu nyang peuseulamat geutanyoe! jak geutanyoe tameuhadab ubak gobnyan deungan ca-e lagu syukoe, meusurak geumbira keu gobnyan deungan ca-e puja dan pujoe. sabab tuhan na kheueh allah nyang agong, raja peukasa nyang hase geuatasi

banmandum dewa. gobnyan hase geukuasa bagian nyang paleng lhoek nyang na didalam bumoe, dan pucak-pucak gunung pi atra gobnyan. gobnyan nyang kuasa laot, sabab gobnyan nyang peujeuet laot nyan, dan darat pi buet jaroe gobnyan. jak geutanyoe ta sujut ta seumah gobnyan, ta meuteutot dikeue tuhan, nyang cebta geutanyoe. sabab gobnyan allah geutanyoe, geutanyoe umat nyang geupeulara, lagee bubiri nyang geurabe. "bek kreueh ulee lagee indatu gata di meriba, lagee yoh masa awaknyan di masa, nibak padang pasi. di tempat nyan awaknyan ji ujoe ulon, bahpi ka lheureh jingiang buet nyang ulon keureuja. peuet ploh thon treb jih ulon luwat keu awaknyan; kheuren ulon: keubit, bansa nyan hana seutia! awaknyan hana jipakoe peue-peue mantong nyang ulon peurintah. dan ulon meusumpah teungoh ulon beungeh, awaknyan hana jiteumeu tamong u dalam nangroe nyan keu jiteume meureuhah meusajan ulon."

meuca-e kheueh ngon lagu baro keu tuhan! meuca-e kheueh keu tuhan, hai banmandum bumoe! meuca-e kheueh keu tuhan dan pujoe kheueh gobnyan; tieb-tieb uroe tajak peusampoe kheueh haba geumbira bahwa gobnyan ka geupeuseulamat geutanyoe. calitra kheueh keu agongan gobnyan ubak bansa-bansa, dan buet-buet gobnyan nyang peukasa keu umat manusia. sabab rayeuk kheueh tuhan, dan lumpah teupujoe gobnyan, haroh teutakat leubeh nibak meubagoe dewa. dewa-dewa bansa laen na kheueh patong beurala, teuma tuhan na kheueh nyang cebta angkasa raya. ateuheh gobnyan teutob bandum deungan keuagongan dan keumuliaan, baet gobnyan peunoh deungan kuasa dan keu indahan. pujoe kheueh tuhan, hai umat manusia, pujoe kheueh keuagongan dan teunaga gobnyan! pujoe kheueh nan gobnyan nyang mulia, dan ba kheueh keureubeuen u dalam baet gobnyan. seumah kheueh tuhan sira tangui peukayan iebadat! beuyo kheueh dikeue gobnyan, hai bansaboh donya! tabri tee kheueh keu bansa-bansa, "tuhan nyan raja! bumoe kukoh hana hase gob gogkok; gobnyan peusidang bansa-bansa deungan ade." meugeumbira kheueh, hai langet deungan bumoe! meugeumuroh kheueh, hai laot deungan banmandum asoe jih! meusuka cita kheueh, hai blang meunan cit banmandum sinaman! bak-bak kayee nyang na didalam uteun meusurak geumbira. sabab tuhan geutron geujak peurintah di ateuheh bumoe, gobnyan geupeusidang bansa-bansa deungan ade dan jujoe.

tuhan na kheueh raja! patot that bumoe meugeumbira, dan bubena pulo meusuka cita. gobnyan jikeulileng le awan dan seupot luwa biasa; keuadalan dan hukum na kheueh azas peumeurintah gobnyan. apui hu jimeu eue dikeue gobnyan, habeh hangoh bubena musoh nyang na banslingka gobnyan. kilat gobnyan trang bansaboh donya, bumoe yoe meugam-gam oh jikalon gobnyan. meunan gunung-gunong meulileh lagee lilen nyang tijoh dikeue tuhan, dikeue tuhan, nyang mat kuasa bansaboh bumoe. langet jijak peugah keuhai keuadalan, dan bandum bansa jikalon keuadalan gobnyan. soemantong ureueng nyang seumah beurala geupeumalee, nyang peubangga ubak barang-barang nyang

hana meuguna; banmandum dewa teuma jisujut dikeue tuhan. peunduduek sion dan banda-banda nyang na di yehuda galak lumpah na watee jideungoe keuputosan tuhan. sabab droeneueh, ya tuhan, nyang mat kuasa bansaboh bumoe; droeneueh agong leubeh nibak dewa toh mantong. hai gata nyang cinta ubak tuhan, banci kheueh keu nyang jeuhet! sabab tuhan geulindong banmandum umat gobnyan, gobnyan nyang peubeubaih ureueng laen nibak kuasa ureueng nyang doraka. trang ka jiteubiet ubak ureueng nyang jujoe ate, dan suka cita ubak ureueng nyang jujoe. meugeumbira kheueh, hai ureueng-ureueng nyang jujoe ate sabab peue nyang ka geupeubiet le tuhan, dan meusyukoe kheueh ubak po teu allah nyang suci.

zabur. meuca-e kheueh ngon lagu baro keu tuhan, sabab buet-buet gobnyan nyang keubit hireuen! deungan kuasa dan teunaga gobnyan keudroe gobnyan ka meunang. tuhan geupeumaklum keuhai gobnyan meunang; gobnyan geujak peugah keuadalan ubak bansa-bansa. gobnyan geuingat geunaseh dan keuseutiaan geuh ubak israel, umat gobnyan. banmandum bansa nyang na di ateuheh bumoe ka deuh jikalon allah geutanyoe meunang. meusurak geumbira kheueh keu tuhan, hai bansaboh bumoe! pujoe kheueh tuhan deungan nyanyoe dan ca-e sira meusurak geumbira. meuca-e kheueh lagu seumujoe keu tuhan, sira peutek keucapi. yeub kheueh beureuguih ngon sangka kala, meusurak kheueh keu tuhan, raja geutanyoe. meugeumuroh kheueh hai laot meunan cit deungan banmandum asoe jih bumoe dan banmandum nyang na didalam nyan. bah kheueh krueng-krueng jipeh paleuet, dan buket-buket meusurak geumbira dikeue tuhan. sabab gobnyan geuteuka keu geujak peuhakum bumoe; meunan cit bansa-bansa geupeusidang deungan ade dan beuna.

tuhan na kheueh raja; bansa-bansa nyang nyang jideungoe nyan yo meutot-tot. gobnyan geuduek meutakhta di ateuheh kerub, bumoe meuguncang lagee geumpa. tuhan meukuasa that-that di sion; gobnyan agong ek geupeutaloe banmandum bansa. bah awaknyan jipujoe nan gobnyan nyang agong ngon mulia. kodus kheueh gobnyan! keukuasaan keu droeneueh, raja nyang cinta ubak hukum; droeneueh ka neupeudong keubeunaran; droeneueh neupeujak hukum dan keuadalan di israel. peumanyang kheueh tuhan po teu allah geutanyoe, sujut kheueh dikeue takhta gobnyan. kodus kheueh gobnyan! nabi musa dan nabi harun jitamong cit keunan sibagoe teungku-teungku imeum, samuel salah sidroe nyang meudoa keu gobnyan. awaknyan jimeulakee ubak tuhan, dan gobnyan laju geujawueb. nibak tameh awan gobnyan geumeututoe ubak awaknyan, awaknyan taat bak mandum hukum dan peurintah gobnyan. ya tuhan allah kameo, droeneueh neujawueb peue nyang jilakee le umat droeneueh; ubak awaknyan droeneueh na kheueh allah nyang neutem peu amphon desya, bahpi awaknyan droeneueh hukum sabab buet nyang salah nyang jipeubuet. peuteupat kheueh tuhan po teu allah geutanyoe, dan seumah kheueh gobnyan di buket gobnyan nyang suci, sabab kodus kheueh tuhan allah geutanyoe.

zabur keu keureubeuen syukoe. bumoe! meu iebadat kheueh ubak tuhan deungon ate nyang peunoh geumbira, meuhadab kheueh ukeue gobnyan deungon ca-e dan lagu nyang ceuria! ingat kheueh bahwa tuhan nyan na kheueh allah. gobnyan nyang cebta geutanyoe dan geutanyoe nyoe na kheueh atra gobnyan; geutanyoe umat gobnyan, bansa nyang geupeulara. tamong kheueh rot pintoe geureubang deungon ca-e lagu syuko, udalam peulataran gobnyan deungon ca-e lagu puja ngon pujoe. meusyuko kheueh ubak gobnyan dan pujoe kheueh gobnyan! sabab tuhan jroh; geunaseh gobnyan keu siumu masa, dan keuseutiaan gobnyan tron meutron.

zabur nabi daud. ulon keuneuk kalon cara udeb nyang hana meucupa. pajan kheueh droeneueh neuteuka ubak ulon? keujeuhetan hana ulon peubiyeu. ulon banci nibak buet ureueng murtad, dan hana lontem meu urosan deungon awaknyan. ulon han lontem peubuet curang dan han lontem rhoh jampu bak buet nyang jeuhet. ureueng nyang galak ba peusuna deungon cara seungab-seungab ureueng nyan ulon peubinasa. ureueng nyang sombong dan manyang ate ureueng nyang lagee nyan hana ulon peubiyeu. ulon galak ubak ureueng nyang seutia ubak po teu allah; ureueng nyang lagee nyan jeuet jitinggai di baet ulon. ureueng nyang udeb lam keuadaan gleh hana meucupa ureueng nyang lageenyan jeuet jipeutimang ulon. ureueng teumipee hana jeuet jitinggai di baet ulon; ureueng nyang galak sulet jihnyan hana meuteun dikeue ulon. phon nibak uroe ubak uroe ulon peuhanco ureueng-ureueng jeuhet nyang na di nangroe nyoe. banmandum ureueng nyang jipeubuet buet nyang jeuhet ureueng nyan ulon sampoh gleh nibak banda tuhan.

doa ureueng seungsara nyang dalam keuadaan hek ngon leusu apoh apah ubak tuhan. ya tuhan, deungoe kheueh doa ulon, bah kheueh meuhoi ulon nyoe trok ubak droeneueh. bek neupaleng nibak ulon meunyoee ulon jiteuka susah. neudeungoe kheueh meunyoee ka ulon meuhoi, dan neujaweueb kheueh doa ulon. udeb ulon nyoe ya tuhan, deungon sikeujab gadoh lagee asab; dan tuleueng-tuleueng ulon seueuem tutong lagee apui. ulon hek ngon leusu lagee naleueng tho, dan hana nafeusu keu lon pajoh bu. ulon meurang-rang deungon su nyang nyareng; badan lon pijuet ka tinggai kulet ngon balot tuleueng. ulon lagee cicem undan nyang na dipadang pasi, dan lagee kleung keutok-tok nyang tinggai bak teumpat runγκα bangunan nyang seungue. ulon hana hase lon eh, ya tuhan, lagee cicem keuseupian di ateueh bubong rumoh. siuroe seupot musoh jihina ulon; nan ulon jipeujeuet keu kutok le ureueng nyang beungeh keu ulon. abee nyang ulon pajoh lagee lon makheun ruti, ie nyang ulon jieb meulawok deungon ie mata, sabab droeneueh ka neubeut dan neutiek ulon nibak beungeh droeneueh nyang luwa biasa. udeb ulon jijak lagee bubayang oh uroe seupot; dan ulon jeuet keulayee lagee on naleueng nyang keunong uroe. teuma droeneueh, ya tuhan, raja keu siumu masa, teutab ji ingat tron meutron. droeneueh neubeudoh dan neugaseh ubak sion, watee jih ka trok keu teubalahi gaseh ubak jihnyan. sabab hamba-hamba droeneueh jisayang keu jihnyan,

bahpi jihnyan ka jeuet keubarang runγκα-runγκα. awaknyan meuras gaseh keu jihnyan, bahpi jihnyan ka jeuet keu abee. kuasa tuhan teutab jitakot le bansa-bansa; dan keuagongan gobnyan teutab jigalak le bubena raja-raja, meunyoee tuhan ka geupeudong lom sion, dan geubeudoh dalam keuagongan gobnyan. gobnyan geudeungoe doa umat geuh nyang meularat, dan hana geutulak peue nyang jilakee le awaknyan. tuleh kheueh banmandum peue nyang geupeubuet le tuhan keu angkatn nyang teuma teuka, jeuet bansa nyang gohlom lahe hase jipujoe gobnyan. tuhan geupandang rot teumpat geuh nyang manyang, rot lam syeuruga gobnyan geukalon u bumoe mangat geudeungoe apoh apah ureueng lam peunjara dan geupeubeubaih ureueng nyang teuhukom mate. dan nan gobnyan jipeugah di sion, dan gobnyan jipujoe-pujoe di yerusalem, watee bansa-bansa dan keurajeuen nangroe jimeuhimpon keu meungabdi ubak tuhan. tuhan geupeupatah teunaga ulon watee ulon mantong muda, dan geupeupaneuk umu ulon. laju ulon peugah, "ya allah, bek kheueh neucok nyawong ulon nibak siteungoh udeb ulon." yoh masa ilee droeneueh neupeujeuet bumoe; meunan cit deungon langet na kheueh karya nyata droeneueh. banmandum nyan teuma habeh, teuma droeneueh teutab na; banmandum nyan jeuet keu useueng lagee peukayan. droeneueh neutiek atranyan lagee bajee tuha, dan banmandum oh ltheuhnyan sapan sapa. teuma droeneueh teutab saban, udeb droeneueh hana keuneulheueh. aneuek cucoe kamoe udeb deungon teuntram, dan sabe aman lam lindongan droeneueh.

nibak nabi daud pujoe kheueh tuhan, hai jiwa lon, bek tuwoe ubak bandum nyang jroh nibak gobnyan! gobnyan nyang peuamphon banmandum desya gata, nyang peupuleh banmandum peunyaket gata, gobnyan nyang peubeubaih nyawong gata lam jrat, nyang bri keu gata geunaseh nyang meulimpahlimpah. gobnyan nyang peupueh udeb gata deungon banmandum nyang jroh, sampoe gata awet mudok lagee cicem rajawali. tuhan nyang peujak hukom dan keuadalen keu mandum ureueng nyang keunong ienanya. gobnyan nyang peuna reuncana keu nabi musa dan buet-buet keu bansa israel. sabab tuhan na kheueh peungaseh dan peunyang, gobnyan panyang saba dan geunaseh gobnyan meulimpah. gobnyan hana geudot hana putoh-putoh, dab hana geubeungeh siumu masa. gobnyan hana geuhukom geutanyoe nyang sisuai deungon desya geutanyoe, atawa geubalahi geutanyoe nyang sipadan deungon salah tanyoe. teuma simanyang langet di ateueh bumoe, bubenyan kheueh geunaseh gobnyan keu ureueng nyang taqwa. sijihon timu nibak barat, sidubnyan kheueh geuboih dumna desya-desya geutanyoe. lagee sidroe ayah nyang geugaseh keu aneuek-aneuek gobnyan, meunan kheueh tuhan geugaseh keu ureueng nyang taqwa. sabab tuhan geuteupeue geutanyoe teupeuet nibak peue, dan gobnyan geuingat bahwa geutanyoe na kheueh nibak abee. manusia udeb jih paneuk na miseu naleueng; jihnyan meukeumang lagee bungong nyang timoh di ladang; meunyoee jiyueb le angen, leunyab kheueh sibungong nyan, dan teumpat jihpi hana teutuhoe le. teuma tuhan teutab geugaseh ubak ureueng nyang taqwa,

keuhai jroh gobnyan teutab hana putoh tron meutron keu ureueng nyang jimumat ubak janji gobnyan, dan deungon seutia jitem peubuet peurintah gobnyan. tuhan geumat peurintah di syeuruga, gobnyan raja nyang mat peurintah ateuh meubagoe rupa. pujoe kheueh tuhan, hai malaiikat-malaiikat nyang peukasa, nyang jideungoe jipeubuet peurintah gobnyan. pujoe kheueh tuhan, hai banmandum makhluk nyang na di syeuruga, banmandum hamba gobnyan nyang jipeubuet keuheundak gobnyan. pujoe kheueh tuhan, hai banmandum ceبتaan nibak mandum wilayah keukuasaan gobnyan. pujoe kheueh tuhan, hai jiwa lon!

pujoe kheueh tuhan, hai jiwa lon! padubna agong droeneueh, ya tuhan allah ulon! droeneueh nyang sok peukayan keumeugahan dan keumuliaan, dan museulimbót cahya. droeneueh nyang leung langet ban lagee khimah, dan neupeudong baet droeneueh di ateuh ie langet. awan-awan neupeujeuet keu geuritan droeneueh, droeneueh neuduek ateuh sayeub angen. angen neupeujeuet keu utosan droeneueh, dan kilat jeuet keupeulayan droeneueh. deungon kong that bumoe nyoe neupasang nibak tapak jih, sampoe hana guyah siumu masa. droeneueh nyang peulimbót nyan deungon laot samudra nyang raya, dan ie jih sampoe meugeunang trok ubak pucak-pucak gunung. watee neudumpek, ie nyan laju ji ile, ji ile deungon tajam sabab su droeneueh nyang geumuroh. ie ji ile meulalu gunung-gunung sampoe u panton, u teupat nyang droeneueh keubah keu ie nyan. droeneueh nyang peuteuntee bataih-bataih nyang hanjeuet jilalu le ie nyan, mangat ie nyan bek jigisa meugeunang di ateuh bumoe. droeneueh teuma nyang peuhah mata ie di panton-panton, aneuk-aneuk krueng laju ji ile lam luengkiek buket-buket, keu hase jijieb ie mandum beulatang nyang na di dalam blang, dan peu puleh glah bubena keuleudee didalam gle. bak bineh krueng nyan bubena cicem jijak peugot uempueng; dan cicem-cicem nyan laju jimeusu lamkawan on-on kayee nyan. nibak langet neupeutron ujeuen di ateuh gunung, dan bumoe peunoh deungon hase karya droeneueh. droeneueh nyang peutimoh naleueng keu peunajoh beulatang, dan keu manusia meubagoe rupa sanaman. dan awaknyan jeuet jiseumula, dan teupeuhase ie anggo nyang lazat rasa. meunan cit deungon minyeuk zaiton nyang teupeujeuet muka jih meucahya, dan peunajoh nyang hase teubri nibak jih teunaga. bak-bak kayee tuhan jitoh le ujeuen nyang meulimpah bak kayee ceumara libanon nyang jipula keudroe. di ateuh kayee nyan jimeu uempueng kheueh meubagoe cicem, cicem rang-gung jimeu uempueng di ateuh pucok jih. gunung-gunong nyang manyang jeuet keu teupat tinggai kameng uteuen; dan peulandok jimusom di miyueb batee kareueng. droeneueh nyang peujeuet buleuen sibagoe tanda watee, dan mata uroe jiteupeue pajan saat jihnyan jilob. meunyoed droeneueh neupeutron seupot, maka uroe laju jeuet keu malam, dan banmandum beulatang uteuen laju jijak meulata. singa-singa muda laju jitaum jijak mita uempeuen, jilakee peunajoh nyang geuseudia le po teu allah. meunyoed mata uroe ka jiteubiet, beulatang-beulatang nyan

laju jimusom dan teu-eh nibak teupat gobnyan musom. dan watee nyan kheueh jiteubiet manusia jijak meukeureuja, dan laju jimeubuet sampoe mata uroe seunja. padub na le karya droeneueh, ya tuhan, banmandum neupeujeuet deungon bijak sana; bumoe nyoe peunoh deungon ceبتaan droeneueh. kalon kheueh laot nyang luwah meureutang, deungon makhluk cut rayeuk han ek teukira. di sinan kapai-kapai jimeulaye, dan lewiatan, naga laot nyang droeneueh ceبتa jimeuen-meuen. awaknyan banmandum jimeuharab bak droeneueh, mangat meuteume peunajoh trok watee. droeneueh nyang bri, dan awaknyan nyang peusapat, droeneueh nyang keubah banmandum nyan, dan awaknyan nyang makheun sampoe an troe. meunyoed droeneueh neupaleng, awaknyan teumakot that-that; meunyoed droeneueh cok nafah awaknyan, awaknyan banmandum binasa, dan jiwoe lom jeuet keu abee lagee asai mula. teuma meunyoed awaknyan droeneueh bri nafah, awaknyan neupeujeuet; droeneueh neubri udeb baro keu bumoe. seumoga keu agongan tuhan teutab siumu masa! dan seumoga gobnyan geumbira deungon peu nyang ka geucebta! gobnyan geupandang bumoe dan dibumoe nyan laju jiteuka yo, dan gunung-gunong laju geumat, di gunung nyan pi jiteubiet asab. ulon keuneuk meuca-e keu tuhan simantong nyawang didalam badan, dan meunyanoe ngon meuca-e keu tuhan simantong ulon geubri udeb. seumoga nyanoe lon nyoe meukeunong nibak ate gobnyan, sabab gobnyan kheueh ate ulon nyoe hase geumbira. bah kheueh ureueng meudesya gadoh di ateuh bumoe, dan bah kheueh ureueng jeuhet habeh binasa.

meusyukoe kheueh ubak tuhan, jak peusampoe kheueh keubeusaran gobnyan, calitra kheueh buet gobnyan ubak bansa-bansa. meuca-e kheueh lagu pujoe keu tuhan, jak peusampoe kheueh bandum karya gobnyan nyang luwa bisa nyan. gobnyan kheueh tuhan nyang mahasuci; meusuka cita kheueh sabab geutanyoe atra gobnyan, banmandum nyang keuneuk seumah bah kheueh meugeumbira. lakee kheueh teunaga ubak gobnyan, dan seumah kheueh gobnyan mantong. hai keuturonan nabi ibrahim, hamba gobnyan, dan keuturonan nabi yakub, ureueng nyang geupileh, ingat kheueh banmandum buet ajaeb nyang ka geupeubuet, dan bek neutuwoe ubak peu nyang ka geupeuputoh le gobnyan. tuhan na kheueh allah geutanyoe, keuputosan gobnyan wajeub teutaat bansaboh donya. gobnyan sabe geuingat ubak janji nyang ka geupeugah, janji gobnyan teutab na keu siumu masa. peujanjian nyan geupeuet deungon nabi ibrahim, dan oh lheurehnyan deungon nabi ishaq; laju geupeukong deungon nabi yakub, sampoe jeuet keujanji nyang keukai keu umat israel. kheun gobnyan, "tanoh kanaan ulon bri keu gata, jeuet keuhak milek pusaka gata." yoh masa dilee umat po teu allah udeb sibagoe ureueng aseng disinan dan jeumeulah awaknyan pih na bacut. awaknyan meurawoh nibak saboh bansa ubak bansa nyang laen, dan geuminah nibak nanggroed nyang saboh ubak nanggroed nyang laen. teuma tuhan hana geupeubiyeu soemantong nyang teugom awaknyan; dan deumi awaknyan, raja-raja nanggroed geupeuingat le

gobnyan, "bek cuba-cuba peukaru ureueng-ureueng pilehan ulon nyan, dan bek peubuet nyang jeuhet ateuuh nabi-nabi ulon!" tuhan geupeutron bala deungon musem deuk di nanggroe nyan, dan bubena peuseudiaan peunajoh ka habeh geucok mandum. teuma gobnyan geuyue sidroe ureueng beuawai jikak nibak awaknyan, yusuf, nyang ka jipeubloe sibago hamba sahaya. gaki ureueng nyang ji ikat deungon beuleunggu, dan takue ureueng nyan jililet deungon rante beuso. akhe jih teujadi kheueh peue nyang ka ltheuh geuramai, jihnyan geupeubutoi le feureuman tuhan. dan raja nibak nanggroe meuse, nyang mat kuasa ateuuh bansa-bansa, geupeubeubaih ureueng nyan lam glab. keu gobnyan geubri tugaih yue uruih meuligoe, dan geubri kuasa ateuuh banmandum hareuta beunda gobnyan; meunan cit wewenang keu geu ato dumna peugawee raja, dan geupimpin kawom nyang tuha-tuha. oh ltheuh nibaknyan nabi yakub laju geujak u nanggroe meuse dan geutinggai teutab disinan sibago ureueng aseng. tuhan laju geutamah umat gobnyan meutamah le, sampoe awaknyan leubeh teuga nibak lawan jih. gobnyan laju geu ubah ate ureueng meuse mangat awaknyan jibanci keu umat tuhan, dan jipeusaneut hamba-hamba gobnyan deungon cara nyang curang hana teukira. oh ltheuehnyan laju geu peutron nabi musa hamba geuh dan nabi harun ureueng nyang ka geupileh. di nanggroe meuse awaknyan laju geupeubuet buet-buet nyang ajaeb, buet-buet nyang raya nibak tuhan, dan awaknyan taat ubak peurintah gobnyan. oh ltheueh nyan tuhan geupeujeuet laju nanggroe nyan seupot buta. krueng awaknyan ka geu ubah jeuet keu darah, sampoe banmandum uengkot nyang na disinan ka habeh mate. cangguk-cangguk meuraja lela di nanggroe awaknyan, dan le that-that nyang jitamong u dalam meuligoe raja. ateuuh peurintah allah jiteuka teuma lalat, dan jamok-jamok ka meuron-ron bansaboh nanggroe. gobnyan laju geupeutron ujeuen es keugeunantoe ujeuen ie, dan geupeutron kilat sambong meusambong nyang jiseumama keudeuh kenoe. meunan cit gobnyan laju geupeureubah bubena bak anggo deungon bak ara, dan banmandum bak kayee awaknyan habeh geupeureubah teung bayeueng sapan sapa. ateuuh peurintah gobnyan, teuka kheueh daruet, jeumeulah daruet nyan lumpah that jai hana teukira jeumeulah jih. daruet nyan habeh jiseuba mandum seunaman nyang na di ladang, dan jipajoh habeh banmandum hase bumoe. oh ltheueh nyan gobnyan laju jipoh mate tieb-tieb aneuk agam nyang tuha nyang na dalam keuluwarga ureueng meuse. oh ltheuehnyan bansa israel laju geu intat keudeh uluwa, nyang jiba sajan awaknyan na kheueh meluh deungon pirak; banmandum awaknyan lam keuadaan seuhat dan teuga-teuga. ureueng meuse ka jiteuka rasa teumakot ngon yo hana ngon peusa, awaknyan galak that watee ureueng israel jikak jitinggai nanggroe nyan. le allah laju geuleueng awan di ateuuh ulee umat gobnyan sibago payong, dan apui hu sibago suwa oh watee malam teuka. awaknyan jimeulakee, laju gobnyan geupeutron cicem puyoh, keu awaknyan geubri ruti nyang geupeutron lam syeuruga sampoe an troe. tuhan geuplah laju gunung batee, laju jiteubiet ie nyang ji ile

lagee aneuk krueng di teungoh-teungoh padang pasi. sabab tuhan geuingat that ubak janji gobnyan keu nabi ibrahim, hamba geuhnyan. dan laju geu umat gobnyan deungon geumbira, ureueng-ureueng nyang geupileh deungon seumurak ria. tanoh atra bansa-bansa laen laju geubri keu awaknyan, dan lampoh ngon ladang awaknyan laju geujok keu umat nyang ka geupeuleupah nyan, deungon harapan jeuet umat geuh jitaat ubak hukom-hukom gobnyan dan jiseutot peue nyang geupeurintah le gobnyan.

pujoe kheueh tuhan! soe nyang hase jipeugah keuhai keuhebatan tuhan, dan jipujoe nyang layak patot keu gobnyan? mubaghia kheueh ureueng nyang taat ubak peurintah-peurintah gobnyan, dan hantom na salah lam tindakan geuhnyan. ingat kheueh keu ulon, ya tuhan, deumi keujroh droeneueh nibak umat droeneueh keudroe, dan neutulong kheueh ulon meunoye droeneueh neupeuseulamat awaknyan. seumoga deuh ulon ngieng keumakmuran ureueng-ureueng nyang neupileh dan meusuka cita meusajan umat droeneueh. seumoga ulon meubangga dan meugeumbira meusajan ureueng nyang ka jeuet keuhak milek droeneueh. kamoe ka meudesya lagee indatu kamoe; kamoe ka kamoe peubuet jeuhet dan doraka ubak droeneueh. watee mantong di nanggroe meuse indatu kamoe hana geumuphom; karya droeneueh nyang lumpah hebat nyan hana geumeuphom. awaknyan ka tuwoe ubak geunaseh droeneueh nyang meulimpah ruwah, dan bak bineh laot geulagah awaknyan geumeubeurontak ubak nyang mahamanyang. teuma tuhan teutab geupeuseulamat awaknyan deumi keu droe geuh keudroe, mangat keupeukasaan gobnyan jeuet keunyata. ateuuh peurintah gobnyan laot geulagah tho kreng, laju gobnyan geuba umat geuh jikak rot laot nyang ka tho hana le meu ie, lagee geujak didalam padang pasi. deungon na lagee nyan awaknyan ka geupeuseulamat nibak musoh dan lawan, dan geupeubeubaih awaknyan nibak kuasa musoh. teuma ie laot nyang raya nyan laju meukab lom teuma, bubena lawan-lawan awaknyan ka habeh ngob lam laot nyan; hana meusidroe pih nibak lawan-lawan awaknyan nyang na tinggai. oh ltheuehnyan baro kheueh umat gobnyan jipeucaya ubak janji nyang ka geupeugah laju jimeu zike sira meuca-e lagu pujoe keu tuhan. teuma oh ltheuehnyan awaknyan laju tuwoe ubak buet tuhan, jimeubuet lom ban galak droe deungon hana jilakee naseuhat ubak gobnyan. di teungoh padang pasi awaknyan jiteuka nafesus, laju juijoe po teu allah. gobnyan laju geubri peue nyang jilakee le awaknyan, teuma meunan cit geupeutron bala peunyakot nyang jiseurang awaknyan. di padang pasi nyan awaknyan laju teuka iri ate ubak nabi musa meunan cit ubak nabi harun hamba gobnyan nyang suci. oh ltheueh nyan bumoe pih laju beukah dan laju teu uet datan, laju teutob abiram meusajan ngon keuluwarga gobnyan habeh mandum. oh ltheuehnyan apui nyang raya laju jitron jikak sama keulompok awaknyan, habeh tutong hangoh banmandum nyang doraka ubak gobnyan. di ateuuh gunung sinai awaknyan laju jipeugot aneuk bubiri nibak meuh, dan laju jiseumah patong tuangan nyang jipeugot keudroe. awaknyan laju jituka allah nyang

agong deungon patong leumo nyang jiroi naleueng. awaknyan ka tuwoe ubak allah nyang ka peuseulamat droe jih allah nyang ka geupeubuet hai-hai nyang raya di nanggroe meuse. keubit lumpah that dahsyat buet-buet nyang ka geupeubuet di nanggroe nyan, dan luwa biasa tindakan gobnyan di laot geulagah. dan allah jiteuka niet keuneuk geupeubina awaknyan, teuma bagaih-bagaih geutam le nabi musa, ureueng nyang ka geupileh le gobnyan. nabi musa jeuet keu ureueng nyang dong teungoh keu awaknyan, sampoe allah nyang ka that beungeh nyan hase reuda. oh lheurehnyan awaknyan laju jitulak nanggroe nyang ceudah nyan, sabab hana jipateh ubak janji po teu allah. awaknyan jimeudaleh dalam khimah droe jih dan hana jitem deungoe le su tuhan. teuma deungon geumeusumpah gobnyan geumeujanji geupeu habeh awaknyan di padang pasi nyang raya. keuturonan awaknyan geuboih lamkawan bansa-bansa dan geupeu crebre di nanggroe-nanggroe aseng. oh lheurehnyan di peor awaknyan jiseumah teuma baal, dan jipajoh keureubeuen nyang jipeuseumah keu dewa-dewa. buet nyang lagee nyan sampoe jiteuka beungeh tuhan nyang luwa biasa, sampoe awaknyan habeh jiseurang le bala peunyakot nyang hana teukira. teuma pinehas laju geubeudoh geujak hukom bubena nyang meusalah, deungon na nyang lagee nyan jipioh kheueh peunyakot nyang lumpah meupalo nyan. buet jih nyang lagee nyan geuang-gab sibagoe jasa nyang raya keu gobnyan, dan ji ingat siumu masa. meunan cit nibak mon-mon meriba tuhan geubeungeh keu awaknyan, dan nabi musa keudroe lumpah sosah sabab ulah buet awaknyan. sabab buet awaknyan ate gobnyan meutamah tunu, sampoe gobnyan geumeututoe deungon hana seumike. bansa-bansa nyang laen hana geupeuhanco, lagee nyang geupeurintah le tuhan. awaknyan meujampu deungon bansa-bansa nyan, dan jiseutot peue nyang jipeubuet le ureueng nyang hana jiturit allah. dan awaknyan laju jiseumah beurala-beurala, dan nyan kheueh jeuet keusabab keuhancoran awaknyan. awaknyan jikeureubeuen aneuek-aneuek droe jih keu beurala-beurala kanaan. meunan cit awaknyan jipeuro darah ureueng-ureueng nyang meusalah, darah aneuek-aneuek gobnyan keudroe, keu jikeureubeuen ubak beurala; sampoe nanggroenya ka jipeurusak. sabab buet-buet awaknyan nyang lageenyan awaknyan ka jeuet keu kuto, dan hana seutia ubak po teu allah. dan beungeh tuhan pi laju hu lagee apui keu awaknyan, gobnyan ka glak deungon atra geuh keudroe. dan geujok kheueh awaknyan keu bansa-bansa, geupeubiyeu mantong awaknyan jikuasa le musoh. laju awaknyan jitin-deeh le musoh-musoh jih keudroe, dan jipeutaklok dimiyueb kuasa awaknyan. meu ulang-ulang tuhan geupeubeubaih awaknyan, teuma awaknyan teutab galak bak buet beurontak, sampoe awaknyan habeh binasa nibak desya-desya jih keudroe. teuma tuhan geudeungoe cit apoh apah awaknyan, dan gobnyan teutab geukalon sosah awaknyan. deumi awaknyan gobnyan teuingat keu janji nyang ka geupeugah dan geugaseh keu awaknyan sabab geunaseh geuh nyang raya. gobnyan laju geupeujeuet awaknyan beujigaseh le mandum ureueng nyang jiteun awaknyan.

peuseulamat kheueh kamoe, ya tuhan kamoe, neupeusapat kheueh kamoe lamkawan bansa-bansa, mangat kamoe jeuet meusukoe dan kamoe pujoe nan droeneuh nyang suci. pujoe kheueh tuhan, allah israel, phon saatnyoe dan siumu masa. bah kheueh banmandum ureueng jipeugah, "amin!"

"meusukoe kheueh ubak tuhan sabab gobnyan get, geunaseh gobnyan keukai dan abadi." tapeugah kheueh nyan meu ulang-ulang, hai gata nyang ka geupeuseulamat nibak keusosahan. gata ka geupeusapat di nanggroe aseng, di timu dan barat, utara dan sealatan. na nyang meurawoh di padang beulantara, dan hana jiputat rot u teumpat tinggai di banda. awaknyan laju jiteuka deuk ngon glaih dan ka gadoh banmandum harapan. dalam keusosahan nyan awaknyan jimeulakee ubak tuhan, dan tuhan pi laju geupeubeubaih awaknyan lam keuadaan meurana. gobnyan geubimbeng awaknyan rot nyang teupat ubak teumpat tinggai nyang na di banda. ka pantaih kheueh awaknyan meusukoe ubak tuhan sabab geunaseh gobnyan, dan sabab karya-karya gobnyan nyang lumpah kagom keu manusia. sabab gobnyan geupeupuih glaih ureueng tho rukueng, dan geupeulimpah ureueng nyang deuk deungon peue mantong atra nyang get. na nyang teukurong didalam seupot, ureueng peunjara nyang meudeurita dalam beuleunggu beuso, sabab awaknyan ka jibeurontak ubak po teu allah dan hana jipakoe peurintah nyang mahamanyang. gobnyan geupeureumok ate awaknyan deungon cara jimeubuet nyang brat; awaknyan reubah dan hana nyang tulong. lam keuadaan sosah awaknyan jitawok ubak tuhan, dan gobnyan geupeubeubaih awaknyan nibak meukarat. gobnyan geuba awaknyan geupeuteubit nibak lam seupot, dan geupeupatah beuleunggu awaknyan. ka pantaih awaknyan jilakee syukoe ubak tuhan sabab gaseh gobnyan, sabab buet-buet gobnyan keubit that hireuen nibak manusia. sabab gobnyan geupeureubah bubena pintoe teumaga, dan geupeureumok bubena palang beuso. na nyang bangai dan meudeurita sabab desya-desya awaknyan, dan jiseksa sabab salah awaknyan keudroe. awaknyan luwat ubak meubagoe peunajoh, ajai awaknyan ka to that. lam keuadaan sosah awaknyan jimeuhoi ubak tuhan, dan gobnyan geupeubeubaih awaknyan nibak teuseupet nyan. gobnyan geupeupuleh awaknyan deungon peurintah gobnyan, dan geupeusie awaknyan nibak uruk jat. patot that awaknyan jilakee syukoe ubak tuhan sabab geunaseh gobnyan, sabab buet-buet gobnyan nyang jipeuteuka hireuen nibak manusia. bah kheueh awaknyan jilakee syukoe deungon jiba peuseumahan, dan jipeusampoe buet gobnyan deungon lagu-lagu geumbira. na lom nyang jiharong laot ngon kapai, keu jijak mita nafeukah lam laot nyang luwah. awaknyan jikalon buet-buet tuhan, karya nyang ajaeb lam laot raya. ateuheh peurintah gobnyan teuka kheueh angen badee dan jipeuteuka geulumbang-geulumbang raya. kapai-kapai teubeuot sampoe manyang, laju jiseumpom ateu laot raya. ureueng-ureueng ka gadoh beuheh jihadab baha nyang bubenyan raya. awaknyan mumang dan meuhapit-hapit lagee ureueng mabok nyang gadoh akai. meunyeo teungoh susah awaknyan

jimeulakee ubak tuhan, dan gobnyan laju geupeulheueh awaknyan nibak keuseudehan. angen puteng beuliong nyang teungoh jipot meunan hebat geuyue seungab, dan umbak ie laot nyang raya pi ka seungab ngon reuda. awaknyan galak that sabab angen raya ka hana le; dan geuba laju awaknyan ubak peulabohan nyang geutuju. patot that awaknyan meusyukoe ubak tuhan sabab geunaseh gobnyan, dan sabab buet-buet gobnyan nyang hireuen bak manusia. awaknyan laju jijak peugah keudeh keunoe keuhai keu agongan tuhan lamkawan umat gobnyan, dan jipujoe gobnyan lam majeulis kawom tuha. krueng-krueng nyang meu ie laju geu ubah jeuet keu padang pasi dan mata ie ka jeuet keutanoh nyang tho. tanoh nyang subo ngon gumbo geupeujeuet keu tanoh nyang masen, sabab buet nyang jeuhet nyang jipeubuet le ureueng-ureueng nyang tinggai disinan. padang pasi nyang tho kreg laju geu ubah jeuet keu kulum ie, dan tanoh tho jiteubiet mata ie. ureueng-ureueng deuk laju geupeuduek disinan; dan awaknyan laju jipeudong banda keu teumpat tinggai awaknyan. blang ngon ladang awaknyan laju geutabu bijeh dan meunan cit jipula deungan bak anggo, dan laju jipeusapat hase nyang meulimpah ruwah. tuhan geujok keu awaknyan aneuek nyang le, meunan cit deungan beulatang peulara awaknyan pi meukeumang biak lumpah bagaih le. teuma awaknyan jipeutaloeloe dan tinggai bacut sabab seungsara dan keunong ienanya nyang keujam. tuhan laju geupeuhina ngon cara geupemiyeub bubena ureueng mat kuasa awaknyan, dan geuyue awaknyan jimeurawoh dipadang luwah nyang hana rot. teuma ureueng gasien laju geupeulheueh nibak keusosahan awaknyan, dan keuluwarga awaknyan meutamah laju laage bubiri. ureueng juoe jingieni nyan dan galak that, teuma ureueng jeuhet laju geuyue iemdroe hana jeuet jipeugah haba. seumoga ureueng nyang bijaksana jipike hainyan banmandum dan jiaku bahwa tuhan teutab geugaseh.

ca-e. zabur nabi daud. ulon peucaya that, ya alah, ulon keuneuk meuca-e dan lon pujoe droeneueh. hai beudoh kheueh, jiwa ulon! hai beudoh kheueh gambus dan keucapi! ulon keuneuk peuteubit fajar. tuhan, ulon keuneuk peugah syukoe ubak droeneueh lamkawan bansa-bansa. ulon keuneuk meuca-e lagu pujoe keu droeneueh lamkawan umat manusia. sabab gaseh droeneueh rayeuk sampoe trok u langet manyang dan seutia droeneueh sampoe nibak awan di angkasa. ya allah, neutunyok kheueh keuagongan droeneueh di langet, dan keumuliaan droeneueh bansaboh bumoe. peuseulamat kheueh kamoe deungan kuasa droeneueh, dan neujaweueh kheueh doa kamoe, mangat ureueng-ureueng nyang neugaseh hase seulamat. nibak teumpat tinggai gobnyan nyang suci po teu allah geupeugah, "ulon keuneuk seumurak dan ulon bagi-bagi tanoh sikhem, panton sukot teuma ulon undi. gilead dan manasye na kheueh atra ulon, efraim tupi beuso lon, dan yehuda tungkat keurajeuen lon. teuma moab na kheueh teumpat ulon rhah gaki; ulon meusurak keumeunangan ateuh filistea. keu edom ulon geulawa seulo lon, siba-goe tanda bahwa jihnyan na kheueh atra ulon." soe nyang ba ulon u edom? soe teuma nyang peutakteh ulon ubak banda nyang meukuta nyan? ya allah,

peu kheueh droeneueh hana neujak meusajan deungon kamoe? dan peu kheueh droeneueh hana neumaju meusigoe deungan tantra kamoe? neutulong kheueh kamoe ateuh musoh, sabab bantuan manusia hana meuguna. meusapat deungan allah, geutanyoe gagah peukasa; gobnyan kheueh nyang peutaloeloe musoh geutanyoe.

keu teupimpen kor. zabur nabi daud. sabab ulon jiseurang le ureueng jeuhet dan tukang teumipee nyang jitabu haba-haba nyang hana beuna keuhai ulon. awaknyan jiseurang ulon deungan tutoe haba nyang peunoh deungan banci, dan jiseurang ulon deungan hana alasan. awaknyan jitudoh ulon, bahpi di ulon lon gaseh keu awaknyan, dan ka ltheueh ulon meudoa keu awaknyan. awaknyan jibalaih keubaiekan ulon deungan buet nyang jeuhet, dan geunaseh ulon deungan banci. baiat kheueh sidroe ureueng jeuhet mangat jisidang jihnyan, bah kheueh jihnyan jipeudakwa le lawan-lawan jih. bah kheueh jihnyan ji adili dan jipeugah meusalah, dan bah kheueh doa jihnyan jianggab desya. bah kheueh udeb jih bagaih akhe, dan jabatan jihnyan jicok le ureueng laen. bah kheueh aneuek-aneuek jihnyan jeuet keu aneuek yatem, dan perumoh jihnyan jeuet keu inong balee. bah kheueh aneuek-aneuek jihnyan jeuet keu aneuek jak geumadee keudeh keunoe, dan jise nibak inciek-inciek rumoh jih nyang reuloh. bah kheueh banmandum atra jih jisita le ureueng jak tunggee utang, dan hase jeureh payah jihnyan jireupah le ureueng laen. bek na ureueng nyang get ate deungan jihnyan, atawa jiweueh keu aneuek-aneuek nyang na jitinggai. bah kheueh banmandum keuturonan jihnyan habeh jipeubinasana, dan nan jih jipeutuwoe le ureueng teuka dudoe teuma. bah kheueh buet nyang jeuhet nyang ka jipeuget le indatu jihnyan teutab geuingat le tuhan, dan desya ma jihnyan hana geutem sampoh. bah kheueh desya jihnyan teutab geuingat le tuhan, dan hana ureueng nyang na ingat keu jihnyan ateuh bumoe nyoe. sabab ureueng nyan hantom na ji ingat keu jitunyok gaseh sayang. jihnyan ji ienanya ureueng gasien dan seungsara, dan jipoh ureueng yang hana meudaya. geuhnyan galak that jikutok; bah kheueh jihnyan keudroe nyang keunong kutok! jihnyan hana galak teubiri beureukat, bah kheueh hana beureukat keu jih nyan! nibak jih meunyoe kutok nyan na kheueh buet nyang ka lazem, saban lagee ureueng ngui peukayan. bah kheueh kutok nyan meulileh lagee ie nyang ro nibak badan jih, dan lagee minyeuk u dalam tuleueng-tuleueng jihnyan. bah kheueh deungan kutok nyan teupeukeulubong jihnyan lagee peukayan, dan sabe na meulileh bak gobnyan lagee talo keuieng. tuhan, neupeurhot kheueh hukom nyan ateuh ureueng nyang tudoh ulon, dan ateuh ureueng nyang jimariet jeuhet keuhai ulon. teuma neutulong kheueh ulon nyang sisuai deungan janji droeneueh, ya tuhan alah ulon, peuseulamat kheueh ulon sabab keubaiekan dan geunaseh droeneueh. sabab ulon gasien lom seungsara, dan ate ulon luka nyang cukob lhok. ulon rab gadoh lagee bubayang oh watee seupot, dan ulon jipot lagee jipeucrok daruet dalam blang raya. teuot ulon yo meugok-gok sabab puasa, dan badan ulon pijuet ngon tho nyang na tinggai tuleueng

ngon kulet. ureueng nyang kalon jihina lon sira ji asek-asek ulee. tulong kheueh ulon, ya tuhan allah lon, peuseulamat kheueh ulon, nyang sisuai deungon geunaseh droeneueh. teuma musoh lon jiteupeue bahwa nyan na kheueh buet droeneueh, bahwa droeneueh kheueh, tuhan nyang peubuet nyan. bahpi awaknyan jikutot ulon, seumoga droeneueh neubri beureukat keu ulon. bahpi awaknyan jibeudoh, teuma awaknyan teutab meuteume malee; teuma seumoga ulon, hamba droeneueh, droeneueh jok keugeumbiraan. bah kheueh ureueng-ureueng nyang tuduh ulon peunoh ngon seulimbot keuhinaan, dan rasa malee teutob awaknyan lagee teutob ngon bajee jubah. ulon keuneuk pujoe tuhan deungon su nyang nyareng, ulon peumeusyeuhu gobnyan lamkawan umat manusia. sabab gobnyan geubila dan geupeuseulamat ureueng gasien nibak awaknyan nyang peurhot hukuman mate u atueh jihnyan.

zabur nabi daud. nibak sion tuhan geupeulawah keurajeuen gata; dan meukuasa kheueh atueh musoh-musoh gata! bak watee uroe gata teuka deungon kuasa, nibak buket nyang suci, rakyat gata jimaju deungon suka rela. lagee iembon dibungeuh uroe, di ureueng-ureueng muda jijak ubak gata. deungon meusumpah tuhan ka geumeujanji, gobnyan hana geutarek le, "droeneueh kheueh imeum keu siumu masa, lagee melkisedek." tuhan na disilblai ueneu gata, meunyoie gobnyan ka teuka beungeh, bubena raja habeh geupeutaloe. gobnyan geuhukom bansa-bansa, sampoe manyet-manyet manusia meulampalampa. gobnyan geupeubinas banmandum ureueng nyang mat kuasa bansaboh muka bumoe. raja geujieb ie lam krueng nyang na bak binah jalan, oh lheueh nyan geupeuteuga lom, gobnyan meunang.

pujoe kheueh tuhan! keubit that ajaeb nubuatan-nubutan tuhan, patot jisulidek le ureueng-ureueng nyang galak ubak hainyan. buet tuhan agong dan teupujoe, dan keuadalan gobnyan keukai dan abadi. tuhan nyan peungaseh dan peunyang, gobnyan geupeubuet buet-buet nyang takjoh dan kagom luwa biasa, mangat geutanyoe teutab ta ingat ubak peue nyang ka geupeubuet nyan. gobnyan geubri rezeki keu ureueng nyang taqwa, dan sabe ji ingat ubak peujanjian gobnyan. gobnyan ka geutanyok kuasa geuh ubak umat gobnyan, deungon geubri keu awaknyan tanoh pusaka bansa-bansa. tuhan ade dan seutia lam banmandum tindakan gobnyan, peue mantong peurintah gobnyan jeuet teupeucaya. hukom gobnyan meuteun siumu masa, geubri lam keubeunaran dan keuadalan. gobnyan geupeubeubaih umat droe geuh, dan geupeuna peujanjian keukai deungon awaknyan. gobnyan kheueh tuhan nyang suci dan peukas! soe mantong nyang keuneuk jeuet keu ureueng bijak-sana ureueng nyan haroh jihoreumat tuhan, gobnyan geubri peungeurtian keu banmandum ureueng nyang taat. teupujoe kheueh tuhan siumu masa!

pujoe kheueh tuhan! aneuek-aneuek jihnyan jeuet keu ureueng nyang mat kuasa di nanggroie nyoe, keuturonan ureueng nyang get geubri beureukat. keuluwarga ureueng nyan teuma kaya dan makmu, dan ureueng nyan seujahteura siumu masa. trang teutab meucahya didalam seupot keu ureueng nyang juJoe, dan keu ureueng nyang ade, peungaseh dan peun-

yayang. mubahgia kheueh ureueng nyang murah ate dan jitem peu utang keu ureueng laen dan juJoe lam peue mantong urosan. ureueng nyang get hana gal; jihnyan ji ingat le gob siumu masa. gobnyan hana teumakot meunyoie na ureueng laen jijak peusampoe haba nyang brok, ate ureueng nyan teugoh dan teutab sabab ji meuman ubak tuhan. ureueng nyan hana gundah atawa teumakot, sabab jihnyan yaken musoh jihnyan geupeutaloe. ureueng nyan jibagi ngon geu weuek-weuek hareuta jih, dan jibri seudeukah keu ureueng gasien; jihnyan sabe jipeubuet nyang jroh, sabab nyan jihnyan meukuasa dan jihoreumat le gob. ureueng jeuhet nyang ngieng ureueng nyan jiteuka beungeh; awaknyan jikab-kab gigo sabab banci. dan awaknyan pi laju binasa; harapan awaknyan gadoh keu siumu masa.

pujoe kheueh tuhan! nan gobnyan jipeumeusyeuhu, bak saat nyoe dan siumu masa. phon di timu sampoe u barat nan tuhan haroh teupujoe. tuhan meukuasa atueh beubagoe bansa, keuagongan gobnyan hase teukawai langet, soe nyang sa lagee tuhan allah geutanyoe? gobnyan meutakhta di teumpat nyang manyang. teuma gobnyan geupeuteukui droe keu geupandang langet dan bumoe. ureueng gasien geuangkat lam abee, dan ureueng meularat nibak lam abee. awaknyan geupeudeuk sapat meusaho deungon peunguasa, meusajan deungon bansawan nibak umat gobnyan. gobnyan geubri aneuek-aneuek keu peurumoh nyang eue, geupeujeuet jihnyan ma nyang mubahgia dan teuhoreumat di rumoh droe jih keudroe.

bak watee bansa israel jiteubiet lam nanggroie meuse, watee keuturonan nabi yakub geutinggai nanggroie aseng, tuhan geupeujeuet yehuda teumpat suci gobnyan, israel geupeujeuet keuteumpat wilayah keukuasaan gobnyan. laot geulagah ban jikalon gobnyan laju jiplueng, krueng yordan jipioh ji ile. gunong-gunong meulumpat lagee kameng, dan buket-buket jigrob-grob lagee aneuek bubiri. pakon hai laot, sampoe gata plueng, dan pakon teuma krueng yordan jipioh ji ile? peue sabab jih gata lumpat-lumat hai gunong-gunong, dan gata grob-grob hai buket-buket? hai bumoe, beuyo kheueh gata dikeue tuhan, dikeue allah nabi yakub, nyang ubah batee kareueng jeuet keu kulam ie, dan gunung batee jeuet keu mata ie.

bukon kamoe, ya tuhan, bukan kamoe, teuma droeneueh mantong nyang haroh teupujoe, sabab droeneueh seutia dan teutab na gaseh sayang. pakon bansa-bansa haroh jipeugah, "dipat allah awaknyan?" allah geutanyoe na di syeuruga, gobnyan geupeubuet peue nyang geugalak. beurala awaknyan teupeuget nibak meuh dan pirak, nyang jipeugot deungon jaroe manusia. bak awaknyan na babah, teuma hana hase jimarit, dan na mata, teuma hana hase jimeungie. bak awaknyan na geulinyueng, teuma hana hase meudeungoe, dan meunan cit na idong, teuma hana hase jimeucom. bak awaknyan na jaroe, teuma hana hase meuraba, dan na kaki, teuma hana hase jijak, dan hana su nyang hase jiteubiet lam ruekueng jih. seumoga meunan kheueh naseb ureueng-ureueng nyang jipeubuet nyan, dan banmandum ureueng nyang peucaya ubak gobnyan.

hai israel, meuharab kheueh ubak tuhan, gobnyan kheueh nyang tulong dan nyang lindong gata. hai teungku-teungku imeum, meuharab kheueh ubak tuhan, gobnyan kheueh nyang tulong dan nyang lindong gata. hai banmandum ureueng nyang taqwa, meuharab kheueh ubak tuhan, gobnyan kheueh tulong dan nyang lindong gata. tuhan geu ingat ubak geutanyoe dan geubri beureukat ubak geutanyoe, gobnyan geubri beureukat umat israel dan banmandum teungku imeum keuturonan nabi harun. gobnyan geubri beureukat keu ureueng-ureueng nyang taqwa, bah kheueh nyan ubit meunan cit nyang raya. seumoga tuhan geubri anugeurah aneuek nyang le, keu gata dan keuturonan gata. seumoga gata geubri beureukat le tuhan, nyang cepta langet dan bumoe! langet na kheueh atra tuhan mantong, teuma bumoe geubri keu manusia. tuhan hana jipujoe le ureueng mate, dan le ureueng nyang ka jitron u teupat nyang seungue. teuma geutanyoe nyang mantong udeb meusykoe kheueh ubak gobnyan, phon saat nyoe sampoe siuma masa.

ulon ku cinta tuhan, sabab gobnyan geudeungoe ulon dan geupakoe peue nyang ulon lakee. gobnyan geudeungoe ulon, pajan mantong ulon meulakee ubak gobnyan. ulon teuancam bahaya mawot; mawot nyang lumpah bahaya nyan jiseureugab ulon, sampoe ulon that-that apoh apah dan teumakot nyang hana teukira. dan ulon laju meulakee ubak tuhan, "ya tuhan, ulon meulakee, peuseulamat kheueh ulon!" tuhan nyan peungaseh dan ade; po teu allah geutanyoe peunoh deungon gaseh sayang. tuhan geupeulara ureueng-ureueng udeb seudeurhana; watee ulon hana meudaya gobnyan geupeuseulamat ulon. ulon peuteunang ate lon, sabab tuhan get deungon ulon. tuhan ka geupeusie ulon nibak mate; geupeumangat ate lon dan hana geupeubiyue ulon reubah. dan ulon jeuet lon rasa udeb dalam donya nyoe, dalam lindong tuhan. ulon teutab peucaya, bahpi ulon peugah, "ulon lumpah that teuteugon ngon meudeurita." dalam keuadaan bingong ulon peugah, "hana meusidroe pi nyang jeuet teupeucaya." peue nyang ulon jok ubak tuhan keu lon balaih keujroh gobnyan ubak ulon? ulon lonba peuseumahan ie anggo ubak tuhan sibagoe rasa syukoe ateuh peutulongan gobnyan. ulon lon peupeunoh janji lon ubak gobnyan dikeue banmandum umat gobnyan. tuhan lumpah that geugaseh ngon geusayang keu mate sidroe-droe ureueng nyang geugaseh. ulon nyoe hamba droeneueh, ya tuhan, saban lagee ma ulon, dilon pi meubakti ubak droeneueh droeneueh ka neupelheueh ulon nibak lam glab. ulon kuba keureubeuen syukoe ukeue droeneueh, sira lon ba doa ubak droeneueh. ulon kupeupeunoh janji ulon ubak tuhan, dikeue banmandum umat gobnyan nyang na meuhimpon dikeue seuramoe baet tuhan, di teungoh banda yerusalem.

pujoe kheueh ubak tuhan, hai banmandum bansa, agong kheueh gobnyan, hai banmandum sukee bansa! sabab raya that geunaseh tuhan keu geutanyoe dan seutia gobnyan teutab siuma masa.

meusykoe kheueh ubak tuhan sabab gobnyan jroh, geunaseh gobnyan keukai dan abadi. bah kheueh ureueng israel jipeugah, "geunaseh gobnyan keukai abadi." bah kheueh di teungku-teungku

imeum geupeugah, "geunaseh gobnyan keukai abadi." bah kheueh banmandum ureueng nyang taqwa geupeugah, "geunaseh gobnyan keukai abadi." dalam keuadaan meukarat ulon meulakee ubak tuhan; laju gobnyan geujaweueb dan geubalah ulon. ulon hana yo sabab tuhan na meusajan ngon ulon, manusia hana meudaya dikeue ulon. tuhan na meusajan ulon keu geutulong lon, ulon ku ngieng musoh ulon nyang geupeutaloe. leubeh get meulindong ubak tuhan, nibak teupeu bangga keu manusia. leubeh get meulindong nibak tuhan, nibak meuharab ubak bansawan. jai that musoh di keulileng ulon; deungon kuasa tuhan, awaknyan habeh mandum ulon peutaloe. awaknyan jikeupong ulon rot jeueb-jeueb peunjuru; deungon kuasa tuhan, awaknyan habeh ulon peutaloe. lagee unou awaknyan jiparan sikeulileng ulon; deungon kuasa tuhan, awaknyan habeh ulon peutaloe. lam sikleb siklab awaknyan habeh teupeulon lagee apui hu nyang teungoh teutot tamah meuduro. ulon jiseurang luwa biasa dan sampoe rab reubah, teuma tuhan na nyang tulong ulon. tuhan na kheueh teunaga ulon dan pujaan ulon, gobnyan ka geupeuseulamat ulon. deungoe kheueh surak keumeunangan di teungoh khimah-khimah umat gobnyan, "tuhan ka geupeubuet buet nyang peukasa! kuasa tuhan geupeumeunang geutanyoe! tuhan geupeubuet buet nyang peukasa." ulon hana mate, teuma ulon teutab udeb, keu lon jak peusampoe karya tuhan. tuhan ka geuseksa ulon deungon brat dan kreueh, teuma gobnyan hana geuseurah ulon ubak mawot. buka kheueh ulon nyoe babah pintoe geureubang baet tuhan, jeuet hase lon tamong dan lon peugah syukoe ubak gobnyan. nyoe kheueh babah pintoe geureubang tuhan, teuma ureueng juoe nyang jeuet jak rot nyan. ulon kupujoe droeneueh, sabab droeneueh neukabui doa ulon; droeneueh ka neubri keu ulon keumeunangan. batee nyang jitiek le utoh-utoh bangunan, batee nyan ka jeuet keu batee peunjuru. nyan kheueh buet tuhan, keubit kagom luwa biasa nibak geutanyoe. nyoe kheueh uroe nyang geupeuteuntée le tuhan; jak geutanyoe ta peuraya deungon geumbira. kamoe lakee, ya tuhan, peuseulamat kheueh kamoe, ya tuhan, neubri kheueh keu kamoe keumeunangan! teubeureukati kheueh gobnyan nyang teuka ateuh nan tuhan, kamoe bri beureukat gata di baet tuhan. tuhan na kheueh allah, gobnyan peumurah ate keu geutanyoe. maju kheueh meurarak deungon ranteueng nibak jaroe, dan keulileng kheueh nibak miseubah tuhan. droeneueh allah ulon, ulon meusykoe ubak droeneueh, allah ulon, ulon keubit that kagom ubak droeneueh. meusykoe kheueh ubak tuhan sabab gobnyan get, geunaseh gobnyan keukai dan abadi.

mubahgia kheueh ureueng nyang udeb jih hana meucupa dan taat ubak hukum-hukum tuhan. mubahgia kheueh ureueng nyang jiseutot peurintah gobnyan, dan deungon sigeunab ate ji useuha jituri tuhan. mubahgia kheueh ureueng nyang udeb meunurot keuheundak tuhan, dan hana jipeubuet buet nyang jeuhet. droeneueh neubri keu kamoe hukum droeneueh, ya tuhan, mangat kamoe peubuet deungon seutia. seumoga ulon deungon ate nyang tegoh ulon seutot peuratoran-peuratoran droeneueh.

meunyo ulon peurati banmandum peurintah droeneueh, ulon hana neupeumalee. meunyo ulon meurunoe keuputusan droeneueh nyang ade, teuma ulon lon pujoe droeneueh deungon situloh ate. ulon lontem taat ubak hukum droeneueh, bek kheueh sagai-sagai neutinggai ulon. ureueng muda hase jipeuteun udeb jih hana meucupa meunyo jihnyan udeb nyang sisuai deungon peurintah droeneueh. deungon sipeunoh ate ulon me useuha lon turi droeneueh, dan bek neupeubiyu ulon nyoe meusimpang nibak peurintah droeneueh. ajaran droeneueh ulon keubah didalam ate, mangat ulon bek meudesya keu droeneueh. ulon pujoe droeneueh, ya tuhan, neupeurunoe kheueh ulon peue nyang droeneueh teutabkan. deungon su nyang nyareng ulon peumaklum banmandum hukum nyang droeneueh bri. ulon geumbira lon seutot banmandum peue nyang droeneueh peurintah, saban lagee ulon keubah meubagoe rupa hareuta. ulon kuteum meurunoe banmandum keuputusan droeneueh, dan ulon simak banmandum peue nyang droeneueh tunyok. peue nyang ka droeneueh peuteutab jeuet ate ulon lumpah galak; ajaran droeneueh keubit hana hase ulon peutuwoe. bah kheueh droeneueh meumurah ate keu hamba droeneueh nyoe, mangat ulon teutab udeb dan jeuet keu ureueng nyang taat ubak ajaran droeneueh. neupeubleut kheueh mata kamoe jeuet hase kamoe keumalon ajaran nyang lumpah hebat dalam hukum droeneueh. dan keu sikeujab ulon tinggai di ateuh donya nyoe, bek kheueh neusom hukum droeneueh nibak ulon. ate lon saket tanggung rindu, ya tuhan, ulon keuneuk teupeue hukum droeneueh jeueb-jeueb watee. droeneueh nyang sapa ureueng nyang sombong, dan nyang kutok ureueng nyang meusimpang nibak ajaran droeneueh. neupeulheueh kheueh ulon nibak peunghinaan dan seurapa awaknyan, sabab ulon kupeubet peuratoran droeneueh. bahpi le peunguasa ka jimeukumplot jilawan ulon, hamba droeneueh nyoe teutab meurateb dan teutanung nyang ka droeneueh teutabkan. peuratoran-peuratoran droeneueh jeuet keu naseuhat ulon nyang lumpah mangat dan galak ate ulon. ulon ka teuh didalam abee; neupeupuleh kheueh udeb lon nyang sisuai deungon janji droeneueh. ulon meungka nibak buet ulon, sababnyan droeneueh neujawueb ulon; neupeurunoe kheueh ulon peue nyang ka droeneueh teutabkan. neutulung kheueh ulon mangat jeuet lon puphom banmandum hukum-hukum droeneueh, ajaran droeneueh nyang lumpah kagom nyan teutab ulon tanueng. jiwa ulon ka hanco meukeupeng-keupeng keunong keusosahan, neupeukong kheueh ulon nyang sisuai deungon janji droeneueh. neupeujoh kheueh ulon nibak rot nyang sisat, ya tuhan lon, sabab keujroh droeneueh, neupeurunoe kheueh ulon deungon hukum droeneueh. ulon kalheueh lon pileh mangat jeuet keu ureueng taat, peurintah droeneueh sabe ulon ingat-ingat. ulon ka lon seutot peue mantong peuratoran-peuratoran droeneueh, ya tuhan, bek neupeubiyu ulon meuteume malee. deungon sigala seunang ate ulon lon turot ubak peurintah droeneueh, sabab droeneueh kheueh ulon nyoe meutamah meuphom. tuhan, neupeurunoe

kheueh ulon peue makna keuteutapan-keuteutapan droeneueh, mangat ulon jeuet lon seutot sampoe an akhe. neupeujeuet kheueh ulon mangat muphom ubak hukum droeneueh jeuet lon taat, dan ulon peubuet deungon sipeunoh ate. seumoga ulon lon mumat teugoh ubak peurintah droeneueh, sabab nyan kheueh nyang ulon harok. neubri kheueh keu ulon hasrat keu lon taat ubak peurintah droeneueh, leubeh nibak meuheuet beujeuet keu ureueng kaya. neujaga kheueh ulon mangat bek lon tiyueb nyang hana meugana, neubri kheueh keu ulon udeb nyang sisuai deungon keuheundak droeneueh. neupeukong kheueh hamba droeneueh nyoe janji droeneueh, nyang droeneueh bri keu ureueng nyang taat ubak droeneueh. neupeujoh kheueh peunghinaan nyang ulon takot, ya tuhan, sabab keubit that get banmandum hukum droeneueh. neubri kheueh keu ulon udeb baro, sabab droeneueh ade, ulon meuheuet that ulon taat ubak keuputusan-keuputusan droeneueh. ya tuhan, neutunyok kheueh padub na droeneueh neugaseh keu ulon, neupeuseulamat kheueh ulon nyang sisuai deungon janji droeneueh. dan ka hase ulon jaweueb ureueng nyang hina ulon, sabab ulon nyang ulon peubangga na kheueh tutoe haba droeneueh. neutulung kheueh ulon mangat hase ulon peugah nyang beuna, sabab ulon meuharab ubak keuputusan droeneueh. ulon keuneuk mumat ubak hukum droeneueh, keu siumu masa. teuma ulon udeb deungon beubaih, sabab lon useuha lon patuh ubak tutoe droeneueh. peuratoran droeneueh ulon peusampoe ubak raja-raja, deungon lagee nyan ulon hana meuteume malee. keuseunangan ulon na kheueh ulon peubuet peurintah droeneueh, sabab ulon cinta ubak peuratoran nyan. ulon horeumat dan lon cinta ubak peurintah droeneueh, nyang ka droeneueh teutabkan teuma ulon reunuengkan. ingat kheueh janji droeneueh ubak hamba droeneueh nyoe, janji nyang neubri harapan keu ulon. nyoe kheueh nyang peulalo ulon lam peundeuritaan, bahwa janji droeneueh nyan teuba ulon ubak udeb. ureueng sombong luwa biasa jihina ulon, teuma ulon teutab hana meusimpang nibak hukum droeneueh. ulon teuingat ubak hukum droeneueh yoh masa dilee, dan teuhibo kheueh ate ulon, ya tuhan. ulon beungeh that keu ureueng jeuhet, sabab awaknyan jitinggai hukum droeneueh. simantong udeb lon nyang paneuk di ateuh bumoe, nyang droeneueh teutabkan ulon peujeuet keu ca-e ngon lagu-lagu pujoe. oh watee malam ulon ingat ubak droeneueh, ya tuhan, hukum droeneueh teutab ulon mat. ulon meuteume bahgia sabab ulon taat ubak peurintah-peurintah droeneueh. droeneueh mantong nyang ulon harab, ya tuhan lon, ulon meujanji lon peubuet ajaran droeneueh. deungon sigeunab ate ulon meulakee gaseh sayang droeneueh, neugaseh kheueh lon nyang sisuai deungon janji droeneueh. ulon ka habeh pike keuhai pi-e lon, dan lon meujanji lon taat ubak peuratoran droeneueh. ulon meudab-dab dan hana ulon preh, keu ulon peujak peurintah droeneueh. ureueng jeuhet jipasang taron keu ulon, teuma ulon teutab hana lon tuwoe ubak hukum droeneueh. di teungoh malam ulon beudoh di teupmat eh keu lon jak pujoe droeneueh, sabab

keuputusan-keuputusan droeneuh nyang ade. ulon murakan deungon banmandum ureueng nyang taqwa, dan banmandum ureueng nyang jipeubuet peurintah droeneuh. bumoe peunoh deungon gaseh droeneuh, ya tuhan, neupeurunoe kheueh ulon keuhai nyang tuhan peuteutabkan. droeneuh ka neupeupeunoh janji droeneuh, ya tuhan, dan neupeubuet nyang jroh keu hamba droeneuh. neubri kheueh keu ulon hikeumat dan ieleume peungeutahuan, sabab ulon peucaya ubak peue mantong peurintah droeneuh. sigohlom teuhukom, ulon meunyimpang, jinoenyoe ulon mumat ubak peurintah droeneuh. sabab droeneuh jroh dan neupeubuet nyang get, neupeurunoe kheueh ulon keuhai keuputusan-keuputusan droeneuh. ureueng sombong jipeusuna ulon, teuma ulon deungon sipeunoh ate lon taat ubak keuputusan droeneuh. ureueng-ureueng nyan hana jimuphom, teuma nibak ulon hukom droeneuh na kheueh nyang peumangat ate. bit get that droeneuh neuhukom ulon, jeuet ulon turi ubak keuteutapan-keuteutapan droeneuh. nibak ulon hukom droeneuh leubeh meuyuem nibak banmandum meuh dan pirak nyang na di atueh donya. droeneuh kheueh nyang peujeuet dan nyang beuntuk ulon, neubri kheueh keu ulon peungeurtian jeuet hase ulon meurunoe peurintah-peurintah droeneuh. ureueng taqwa galak meunyoe jikalon ulon, sabab ulon meuharab ubak janji droeneuh. ulon kuteupeue bahwa keuputusan droeneuh na kheueh ade, ya tuhan, droeneuh ka neuhukom ulon sabab keuseutiaan droeneuh. seumoga geunaseh droeneuh jeuet teuhibo ulon, paih lagee janji droeneuh ubak hamba droeneuh. neugaseh kheueh ulon, teuma ulon teutab udeb, sabab hukom droeneuh teupeugalak ate ulon. bah kheueh ureueng sombong meuteume malee, sabab ka jipeusuna ulon, teuma ulon teutab lon ba dalam teunung keuhai peurintah-peurintah droeneuh. seumoga ureueng taqwa geujak ubak ulon, banmandum nyang jituri keu peuratoran-peuratoran droeneuh. seumoga ate ulon hana meusimpang nibak keuteutapan droeneuh, jeuet ulon bek meuteume malee. ate ulon lumpah that rindu ubak keuseulamatan nibak droeneuh; le sababnyan ulon meuharab ubak janji droeneuh. mata ulon peudeuh sabab teubleut sabe bak lon preh-preh neupeupeunoh janji droeneuh, ulon peugah, "pajan kheueh droeneuh neuhibo ulon?" kulet ulon ka krot-krot lagee uempang anggo nyang useuet, teuma keuteutapan droeneuh teutab hana ulon peutuwoe. sampoe an pajan hamba droeneuh nyoe jimeusaba? pajan droeneuh neuhukom ureueng-ureueng nyang jiteuyeub ulon? ureueng nyang hana jitaat ubak hukom droeneuh, ka jikueh uruek keuneuk jijeubak ulon. banmandum hukom droeneuh hase teupeutanggong jaweub, neutulong kheueh ulon, sabab ulon jitiyeub hana alasan. awaknyan rab jiteume jipoh ulon, teuma ulon teutab hana lon peutuwoe ubak peurintah droeneuh. peuseulamat kheueh ulon sabab droeneuh teutab neugaseh, mangat ulon hase lon taat ubak hukom droeneuh. tuhan, sabda droeneuh teutab kong siumu masa, dan keukai ngon abadi di syeuruga.

keuseutiaan droeneuh teutab meuteun nibak zamen u zamen, droeneuh nyang peudong bumoe sampoe teutab na. banmandum nyang na jinoo, na kheueh sabab peurintah droeneuh, sabab awaknyan banmandum na kheueh hamba-hamba droeneuh. meunyoe hukom droeneuh bukan pangkai keugeumbiraan ulon, ka pasti ulon ka mate lam seungsara lon. sipanyang masa ulon hana lon kalon ban nibak peurintah droeneuh, sabab deungon nyan droeneuh peu udeb ulon. peuseulamat kheueh ulon, sabab ulon nyoe na kheueh atra droeneuh, ulon ka meu useuha ulon taat ubak peurintah droeneuh. ureueng jeuhet ka jipreh-preh jikeuneuk poh mate lon, teuma ulon teutab lontem kalon ubak hukom droeneuh. ka leumah lon kalon bahwa nyang sampoereuna pi teubataih, teuma peurintah droeneuh kheueh nyang sampoereuna. padub na ulon cinta ubak hukom droeneuh; hainyan teutab ulon pike ngon lon zike sipanyang uroe. ulon sabe teuingat ubak peurintah droeneuh, nyang teupeujeuet ulon leubeh bijaksana nibak musoh-musoh lon. peungeurtian ulon leubeh nibak peungeurtian guree-guree lon, sabab ulon teutab lon reunueng ngon lon pike ubak peurintah-peurintah droeneuh. ulon leubeh muphom nibak ureueng-ureueng nyang ka syiek, sabab ulon teutab lon mumat ubak keuputusan-keuputusan droeneuh. ulon peusie peue mantong buet atawa pi-e nyang jeuhet, mangat ulon teutab taat ubak ajaran droeneuh. ulon teutab hana lon peujayah nibak hukom droeneuh, sabab droeneuh kheueh nyang peurunoe ulon. keubit that mameh jih tutoe haba droeneuh, rasa jih leubeh mameh nibak meulisan. hukom-hukom droeneuh teubri ulon ubak peungeurtian, le sababnyan ulon teutab lon banci ubak buet-buet nyang curang. sabda droeneuh na kheueh panyot tanglong keu tieb-tieb langkah lon, cahya nyang trang nibak jalan lon. nyang ulon peujanji deungon sumpah lon teupati, keu lon mumat nibak keuputusan droeneuh nyang ade. ulon lumpah seungsara, ya tuhan, neujaga kheueh udeb lon nyang sisuai deungon janji droeneuh. teurimong kheueh doa syukoe ulon, ya tuhan, dan neupeurunoe kheueh ulon deungon hukom-hukom droeneuh. ulon sabe lon peusabong nyawong, teuma ulon teutab hana lon tuwoe nibak hukom droeneuh. ureueng jeuhet jiteun taron keu ulon, teuma ulon teutab hana meusimpang nibak keuputusan droeneuh. peurintah droeneuh na kheueh pusaka ulon siumu masa, sababnyan ate ulon teutab geumbira. ulon meuheuet keu lon taat nibak keuteutapan droeneuh, sampoe akhe hayat lon. ulon teutab lon cinta nibak hukom-hukom droeneuh, ulon banci ubak ureueng nyang hana seutia deungon sipeunoh ate ubak droeneuh. droeneuh kheueh nyang bila dan peulindung lon, ulon meuharab ubak janji droeneuh, hai ureueng jeuhet, beujioh kheueh nibak ulon! ulon keuneuk taat ubak peurintah po teu allah. neupeukong kheueh ulon nyang sisuai deungon janji droeneuh mangat ulon teutab udeb, bek neupeubiyeu udeb ulon keucawa lam harapan. tumpang kheueh ulon mangat ulon seulamat, dan sabe ulon peurati nibak peurintah droeneuh. droeneuh neutulak ureueng nyang meunyimpang

nibak peue nyang ka droeneueh teutabkan, dan sia-sia mantong tipee muslihat awaknyan. banmandum ureueng jieuh neuanggab lagee bloh, le sababnyan ulon cinta ubak peuratoran-peuratoran droeneueh. ulon yo that-that sabab teumakot ubak droeneueh, ate ulon yo ubak keuputosan droeneueh. ulon ka lon peubuet nyang ade dan beuna, bek kheueh neuseurah ulon ubak jaroe musoh. meujanji kheueh bahwa droneueh teutab neutulong ulon, bek neupeubiyeu ulon jiteugom le ureueng-ureueng nyang angkoh dan sombong. mata ulon peudeh bak ulon preh bantuan droeneueh nyang peuseulamat lon, ulon preh peumbeubaihan nyang droneueh peujanji. peusanet kheueh ulon nyang sisuai deungon gaseh droneueh, dan neupeurunoe kheueh ulon nibak keuteutapan droeneueh. ulon hamba droeneueh, peujeuet kheueh ulon mangat meuphom, mangat ulon leubeh muphom peurintah droneueh. tuhan, ka trok saat jih droneueh meutindak, sabab le that ureueng nyang jiliengkeue keuhai hukom droneueh. peurintah-peurintah droneueh ulon cinta leubeh nibak meuh, dan leubeh nibak meuh nyang murni. sabab nyan ulon udeb sisuai deungon banmandum peutunyok droneueh; buet nyang sirong teutab ulon banci. banmandum peuratoran nyang droneueh peuna keubit lumpah that kagom, dan banmandum peuratoran nyan ulon taat sipeunoh ate. meunyoe teupeutrang, ajaran droneueh teubri trang nyang luwa biasa, dan teubri peungeurtian keu ureueng seudeurhana. nafah ulon meuhak-meuhak, sabab rindu ubak peurintah droneueh. neupaleng kheueh ubak ulon dan neugaseh kheueh keu ulon, saban lagee neugaseh ubak ureueng nyang cinta ubak droneueh. peuteugab kheueh langkah ulon nyang sisuai deungon janji droneueh, bek neupeubiyeu ulon jikuasa le keujeuhetan. peubeubaih kheueh ulon nibak ureueng-ureueng nyang tindeeh ulon, mangat ulon hase lon taat ubak peurintah droneueh. neubri kheueh beureukat ubak ulon deungon teuka droneueh, dan neupeurunoe kheueh ulon keuhai keuputosan droneueh. ie mata ulon ile lagee ie krueng, sabab hukom droneueh hana jitaati. droneueh ade, ya tuhan, banmandum hukom droneueh teupat. peurintah-peurintah nyang droneueh bri, ade dan jeuet teupeubangga. beungeh ulon hu lagee apui lam tuboh lon sabab musoh ulon ka jituwoe ubak ajaran droneueh. janji droneueh kong dan jeuet teupeucaya, ulon lumpah cinta ubak janji nyan. ulon nyoe ureueng ubit dan hina teuma, teuma ajaran droneueh teutab hana lon kalon ban. keuadelan droneueh meuteun keu siumu masa, dan hukom droneueh sabe beuna. ulon rhot bak meularat dan keusosahan, teuma keuputosan droneueh keubit mangat that ate lon. peuratoran droneueh sabe ade; neubri kheueh keu ulon peungeurtian mangat ulon jeuet udeb. deungon sigeunab ate ulon meulakee ubak droneueh; neujaweub kheueh ulon, ya tuhan, ulon keuneuk taat ubak peurintah droneueh. ulon meulakee ubak droneueh; peuseulamat kheueh ulon, ulon keuneuk mumat ubak peuratoran droneueh. banseuboh buta ka ulon beudoh dan laju lon lakee tulung; ulon meuharab ubak janji droneueh. simalam beungoh

ulon meujaga, keu lon pike sira lon tanung ajaran droneueh. deungoe kheueh ulon sabab geunaseh droneueh, ya tuhan, neujaga kheueh udeb lon sabab keuadelan droneueh. ureueng nyang tiyeub ulon ka to that, awaknyan deungon meukeusut jieuet dan hana jipakoe ubak hukom droneueh. teuma droneueh to, ya tuhan, peue mantong peurintah droneueh na kheueh beuna. phon yoh ilee ka ulon teupeue keuhai ajaran-ajaran droneueh, bahwa atranyan ka droneueh peuteutab keu siumu masa. neuengiug kheueh peundeuritan ulon dan neupeuseulamat kheueh ulon, sabab ulon hana lon kalon ban keuhai hukom droneueh. neubila kheueh peukara ulon dan neupeubeubaih kheueh ulon; peuseulamat kheueh ulon nyang sisuai deungon janji droneueh. ureueng jieuet hana teupeuseulamat, sabab hana jitaat ubak keuteutapan droneueh. keubit raya that gaseh sayang droneueh, ya tuhan, peuseulamat kheueh ulon nyang sisuai deungon keuadelan droneueh. jai that ureueng jimeumusoh dan jitiyeub ulon, ya tuhan, teuma ulon teutab hana lon kalon ban ubak peuratoran droneueh. ulon banci ubak peungkhianat-peungkhianat nyan, sabab awaknyan hana jiseutot ubak ajaran droneueh. neukalon kheueh pakriban ulon cinta ubak peurintah droneueh, ya tuhan, neupeuseulamat kheueh ulon sabab gaseh sayang droneueh. banmandum feureuman droneueh na kheueh beutoi, ya tuhan, peue mantong hukom droneueh nyang ade teutab keu siumu masa. ureueng-ureueng nyang meukuasa jipeu crok ulon hana alasan, teuma nyang ulon takot na kheueh ubak hukom droneueh. sabab janji droneueh ulon teutab dalam geumbira, lagee sidroe-droe ureueng nyang meuteume hareuta. banmandum ureueng sulet ulon banci, teuma meunyoe hukom droneueh teutab ulon cinta. hana putoh-putoh lon peugah syukoe ubak droneueh, ya tuhan, sabab hukom droneueh nyang ade dan beuna. ureueng nyang jicinta ubak hukom droneueh, ureueng nyan teutab aman dan teuntram, hana nyang hase linteung ureueng nyang cinta ubak hukom droneueh nyan. ulon kupreh keuseulamatan nibak droneueh, ya tuhan, peue mantong peurintah droneueh teutab ulon keureuja. ulon teutab taat ubak peue mantong peuratoran droneueh, dan lon cintanyan deungon sigeunab ate. ulon teutab patuh ubak peurintah dan nyang droneueh tunyok, ya tuhan, sabab droneueh nyang kalon peue mantong nyang ulon peubuet. seumoga nyang ulon lakee nyoe sampoe ubak droneueh, ya tuhan lon, neubri kheueh ubak ulon peungeurtian, nyang sisuai deungon keuheundak droneueh. bah kheueh peue nyang ulon lakee nyoe trok ubak droneueh, peuseulamat kheueh ulon nyang sisuai deungon janji droneueh. ulon keuneuk pujoe droneueh mantong, ya tuhan, sabab droneueh nyang peurunoe ulon keuhai keuteutapan droneueh. ulon keuneuk meuca-e keuhai janji droneueh, ya tuhan, sabab peue mantong nyang droneueh peurintah na kheueh ade. seumoga droneueh sabe rila neutulong ulon, sabab ulon ka lon pileh teutab lon seutot ubak peuratoran droneueh. ate ulon meuharabkan keuseulamatan nibak droneueh, ya tuhan, hukom droneueh

keubit that mangat ate ulon. bah kheueh ulon udeb, mangat ulon hase lon pujoe droeneueh, ya tuhan lon, seumoga deungon keuputusan-keuputusan droeneueh nyan hase teutulong ulon. ulon ka sisat lagee bubiri nyang gadoh, ya tuhan, dan neuteu ka kheueh, neumita kheueh hamba droeneueh nyoe, sabab ulon hana lon kalon ban peue mantong peurintah-peurintah droeneueh.

lagu ziarah. tuhan, dan gobnyan laju geujaweueb ulon. ya tuhan, neupeuseulamat kheueh ulon, nibak ureueng sulet dan teumipee. hai ureueng teumipee, peue nyang geupeubuet le po teu allah ateueh gata? deungon peue gobnyan geuhukom gata? deungon aneuk panah nyang tajam atra sidroe ureueng peujang, deungon ngeu apui nyang hu meubura! cilaka kheueh ulon sabab haroh ulon udeb meusajan gata; hana beda jih lagee tinggai di mesekh, atawa lamkawan ureueng kedar. ka treb that ulon tinggai lamkawan ureueng nyang hana galak keudame. meunyo ulon peugah haba keuhai dame, awaknyan jimeuheut keu muprang.

lagu ziarah. nyang tulong ulon teuka nibak tuhan nyang peujeuet langet ngon bumoe. gobnyan hana geupeubiyeu gata reubah, nyang lindong gata sabe geujaga. sikeubit jih, nyang lindong israel nyan hantom na teungeut mata. tuhan geujaga gata, gobnyan sabe na dibineh gata geukeumiet gata. gata hana saket sabab mata uroe oh watee uroe peungeuh, atawa sabab le buleuen oh watee malam. tuhan geulindong gata nibak mara bahya, gobnyan geukeumiet gata mangat udeb gata seulamat. gobnyan geulindong gata watee gata teuka dan tajak, phon saat nyoe dan siumu masa.

lagu ziarah nabi daud. ulon, "jak geutanyoe tajak u baet tuhan!" jinoenyo kamoe katrok bak babah pin-toe geureubang banda yerasalem. yerasalem nyang teupeudong sibagoe banda teususon rapi dan ceudah. nibak banda nyoe kheueh sukee-sukee bansa jiteuka, sukee-sukee bansa pilehan tuhan, keu meusyukoe ubak gobnyan nyang sesuai disuatu peurintah gobnyan. disinoe kheueh raja-raja keuturonan nabi daud geupeusidang rakyat gobnyan. meudoa kheueh keu keuseujahtraan yerasalem: "seumoga banmandum ureueng nyang cinta keu gata sejahteura. seumoga na dame didalam wilayah gata, dan teuntram didalam kuta-kuta gata." deumi kawom keurabat dan sahabat ulon ulon peugah, "seumoga gata sejahteura!" deumi baet tuhan, po teu allah geutanyoe, ulon meudoa mangat gata mubahgia.

lagu ziarah. lagee sidroe namiet jimeugantung ubak amphon jih, dan sidroe namiet ureueng in-ong ubak po cut jih, meunan kheueh kamoe preh droeneueh, ya tuhan allah kamoe, sampoe droeneueh neugaseh keu kamoe. neugaseh kheueh kamoe, ya tuhan, neugaseh kheueh keu kamoe, sabab kamoe ka lumpah that le keunong hina. kaseb kamoe nyoe ji peuhina ngon jipeujayah le ureueng-ureueng kaya, dan ji cemoh le ureueng-ureueng sombong.

lagu ziarah nabi daud. tuhan hana geudong blaih geutanyoe? hai israel, neujaweueb kheueh lagee nyoe: "meunyo tuhan hana geudong blaih geutanyoe bak watee geutanyoe jiprang le lawan, dan geutanyoe ka jiu et udeb-udeb, le beungeh awaknyan nyang hana

teukira. dan geutanyoe ka jipeuhanyot le ie raya, dan teugeunang didalam ie; dan geutanyoe ka habeh mate sabab ngob dalam geulumbang ie nyang raya meuputa-puta." jak geutanyoe ta peugah syukoe ubak tuhan, sabab gobnyan hana geupeubiyeu geutanyoe jipeuhabeh le lawan. geutanyoe lagee cicem nyang lheureh lam taron peumburu, taron nyan ka putoh, dan geutanyoe pi lheureh! nyang tulong geutanyoe teuka jih nibak tuhan nyang cepta langet ngon bumoe.

lagu ziarah. lagee gunung-gunong nyang jilindong yerasalem, meunan kheueh tuhan geulindong umat gobnyan phon saatnyoe sampoe siumu masa. ureueng jeuhet hana siumu masa jimat kuasa ditanoh pusaka ureueng juJoe, mangat ureueng nyang jroh hana jiseutot jipeubuet jeuhet. ya tuhan, neupeug et kheueh nyang jroh keu ureueng nyang jroh, keu ureueng nyang juJoe ate. teuma ureueng nyang jipeubuet jeuhet bah kheueh teutab geuhukom le tuhan meusan- jan ngon jeuhet jih.

lagu ziarah. yerasalem, geutanyoe lagee ureueng meulumpo! geutanyoe hana putoh-putoh takem sira meuca-e geumbira sampoe di bansa-bansa nyang laen jipeugah, "tuhan ka geupeubuet hai-hai nyang lumpah hebat keu awaknyan!" bit tuhan ka geupeubuet hai-hai nyang paleng hebat keu geutanyoe! sababnyan kheueh geutanyoe meusuka cita ngon meugeumbira! ya tuhan, neupeubeubaih kheueh keuadaan kamoe, lagee krueng nyang tho meu ie lom oh watee ujeuen teuka. seumoga ureueng teumabu sira jimo, jimpupot deungon surak geumbira. ureueng jikak tabu bijeh lam blang jih, sira jimo meutreb-treb roe ie mata. bak watee jiwoe jimeuca-e deungon nyanyoe geumbira sira jipuwoe hase blang nyang jipot teuma.

lagu nabi sulaiman. geutanyoe, sia-sia kheueh mandum peungawai jimeujaga. sia-sia mantong meubuet brat teujak mita nafekah, beudoh eh banseuboh buta dan watee jak eh ka malam jula; sabab tuhan geuseudia keu ureueng nyang geugaseh, seudang awaknyan mantong jie. aneuek-aneuek banyak na kheueh hareuta nyang geubri le po teu allah, nyang sikeubit jih, awaknyan na kheueh anugeurah gobnyan. aneuek-aneuek agam nyang meuteume yoh mantong muda saban lagee aneuk panah nyang na nibak jaroe keusatria. mubahgia kheueh ureueng nyang jikeubah peuseudiaan panah-panah nyang lagee nyan! jihnyan hana teupeutaloe, watee jihadab musoh di kanto peungadalan.

lagu ziarah. gata tamakheun nibak hase nyang gata keureuja, udeb makmu dan sejahteura. peurmoh gata lagee bak anggo nyang subo didalam rumoh gata. aneuek-aneuek gata lagee tarok bak zaiton di seukeulileng meuja gata. meunan kheueh tuhan geubri beureukat keu ureueng nyang taqwa. seumoga di sion tuhan geubri beureukat u ateueh gata. seumoga gata takalon yerasalem nyang makmu sipa-nyang udeb gata! seumoga gata panyang umu, dan neukalon aneuek cucoe gata!

lagu ziarah. musoh gata phon yoh masa muda gata. "ulon ji ienanya le musoh yoh phon muda lon, teuma awaknyan hana hase jipeutaloe ulon; awaknyan jipeuluka nyang lumpah lhok nibak ruang

ulon, lagee ureueng meu ue jipeuget alue-alue nyang panyang didalam blang. teuma tuhan nyang ade ka geubalah ulon nibak cok keunamiet." bah kheueh soemantong ureueng nyang banci ubak sion geupeutaloe dan geuheuntam sampoe jisurot. bah kheueh awaknyan lagee naleueng di ateuah bubong nyang bagai that tho sigohlom timoh; hana ureueng nyang jitem jak koh naleueng nyan, atawa ji ikat dalam beureukah. ureueng nyang liwat disinan hana jipeugah, "seumoga gata geubri beureukat le tuhan, kamoe peubeureukat gata dalam nan tuhan."

lagu ziarah. tuhan, neu deungoe kheueh seruan ulon, neupeurati kheueh nyang ulon lakee ubak droeneueh. meunyoedroeneueh hana neupioh teutab neu ingat desya kamoe, ya tuhan, soe kheueh nyang hase meuteun? teuma droeneueh neutem peumaphon, jeuet manusia jitem taqwa. di ulon kupreh tuhan tulong, janji gobnyan nyang ulon harabkan. ulon rindu ubak tuhan, leubeh nibak sidroe ureueng meurondo nyang rindu ubak mata uroe beungoh. meuharab kheueh ubak tuhan, hai umat gobnyan, sabab gobnyan teutab geugaseh ubak gata, dan sabe lam siab geupeuseulamat gata. gobnyan geupeubeubaih geutanyoe nibak peue mantong keusalahan geutanyoe.

lagu ziarah nabi daud. nyang sikeubit jih, ate ulon teunang dan teuntram; lagee aneuek manyak nyang ban habeh jiphiek mom, teunguet teunang dalam pangkee ma jih, lagee nyan kheueh teunang jih ate ulon. meuharab kheueh ubak tuhan, hai umat gobnyan, phon saat nyoe dan siumu masa.

lagu ziarah. bek tuwoe seumayang ubak droeneueh, ya tuhan, keu kaoy gobnyan ubak droeneueh nyang mahateuga, allah nabi yakub. kheun gobnyan, "ulon hana lon meureuhah di rumoh ulon atawa lon teunguet ateuah teupat eh ulon, sigohlom lon peuna baet keu po teu allah nabi yakub, teupat tinggai keu tuhan nyang mahateuga." di betlehem na ta deungoe keuhai peuto peujanjian, oh ltheuehnyan laju meurmupok di padang jaar. jak kheueh geutanyoe tajak u teupat tinggai tuhan, dan ta seumah gobnyan dikeue takhta geuh. teuka kheueh dan tinggai kheueh di baet droeneueh, ya tuhan, meusajan deungan peuto peujanjian, lambang kuasa droeneueh. seumoga umat droeneueh meusurak geumbira, dan banmandum teungku imeum droeneueh sabe udeb meunurot nyang droeneueh lakee. deumi nabi daud, hamba droeneueh, bek kheueh neutulak raja nyang droeneueh pileh. tuhan ka geumeusumpah ubak nabi daud; gobnyan hana geu iengkeue ubak janji gobnyan. feureuman gobnyan, "sidroe lamkawan aneuek gata ulon baiat jeuet keuraja mangat jimat peurintah geunantoe gata. meunyoedroeneueh aneuek gata seutia ubak peujanjian ulon, dan jitaat ubak peurintah-peurintah ulon, dan keu siumu masa keuturonan awaknyan jigantoe gata sibagoe raja." sabab tuhan ka geupileh sion; gobnyan geulakee nyan keu teupat tinggai gobnyan. geupeugah le gobnyan, "disinoe kheueh teupat tinggai ulon keu siumu masa, ulon keuneuk mat peurintah nibak teupat nyoe. peue mantong nyang jipeureulee ulon bri deungan meulimpah, ureueng-ureueng jihnyan

nyang gasien ulon bri makheun sampoe an troe. teungku-teungku imeum jih jipeuleumah keuseulamatan nibak ulon; umat jihnyan meuca-e dan meusurak geumbira. disinoe sidroe lam keuturonan nabi daud lon baiat jeuet keuraja; peumeurintah jihnyan ulon peukong. keurajeun jih sabe dalam sejahteura, teuma banmandum musoh-musoh jihnyan meuteume malee."

lagu ziarah nabi daud. nyan na kheueh lagee minyeuk mangat bee nyang meuhai yuem nyang teuro u ateuah ulee nabi harun, laju jitron ubak takue bajee gobnyan. atawa lagee iembon di gunong hermon, nyang jitron u buket-buket sion. disinan kheueh tuhan geupeutron beureukat gobnyan, keu udeb siumu masa.

lagu ziarah. tuhan, banmandum nyang meubakti di baet gobnyan watee malam. beuot jaroe gata u ateuah teupat suci, dan pujoe kheueh tuhan! seumoga nibak sion gata geubri beureukat le tuhan, allah nyang cepta langet dan bumoe!

pujoe kheueh tuhan! nyang meubakti di baet tuhan di teupat tinggai allah geutanyoe. pujoe kheueh tuhan, sabab gobnyan get, dan pujoe kheueh nan gobnyan, sabab gobnyan murah ate. gobnyan geupileh nabi yakub keu droe gobnyan, dan umat israel geupeujeuet keu hak milek gobnyan. sabab ulon teupeue bahwa tuhan nyan na kheueh keubit that raya, gobnyan agong leubeh nibak dewa peue nyang na. gobnyan hase geupeubuet peue mantong nyang geugalak, di langet dan di ateuah bumoe, di laot dan di samudra nyang lhok. nibak ujung bumoe gobnyan geupeutron awan, dan geupeujeuet laju kilat keu geupeutron ujeun. oh ltheuehnyan laju geupeurintah ubak angen mangat jiteubiet nibak teupat jih teugumpoi. di nanggroe meuse gobnyan geupoh mate banmandum aneuek nyang tuha bah kheueh nyan aneuek manusia meunan cit deungan aneuek beulatang. disinan le that geupeubuet buet nyang ajaeb dan tanda keu geuhukom raja meunan cit banmandum peugawee raja. gobnyan geupeubinas bansa nyang le, dan geupoh mate rajaraja peukasa: sihon raja amori dan og raja basan, dan banmandum raja di nanggroe kanaan. laju nanggroe awaknyan geujok jeuet keuhak milek israel, umat gobnyan. ya tuhan, droeneueh teutab jijiak peugah, dan nan droeneueh ji ingat le banmandum keuturonan, sabab droeneueh neubri keuadalan ubak umat droeneueh, dan neugaseh banmandum hamba droeneueh. beurala awaknyan teupeuget nibak meuh dan pirak, nyang jipeuget le jaroe manusia. bak awaknyan na babah, teuma babah jihnyan hana hase jipeugah haba, na mata, teuma matanyan hana hase jikeumalon. bak awaknyan na on punyueng, teuma geulinyueng jihnyan hana hase meudeungoe, dan nibak lam babah jihnyan hana hase jiteubiet nafah. seumoga meunan kheueh naseb ureueng-ureueng nyang jipeubuet nyan, dan nyang peucaya ubak jihnyan. pujoe kheueh tuhan, hai umat israel, pujoe kheueh gobnyan, hai teungku-teungku imeum allah! pujoe kheueh tuhan, hai ureueng-ureueng lewi, dan pujoe kheueh gobnyan, hai gata banmandum nyang taqwa. pujoe kheueh tuhan di sion, di yerasalem teupat tinggai gobnyan.

meusyukoe kheueh ubak tuhan, sabab gobnyan get; geunaseh gobnyan keukai dan abadi. meusyukoe kheueh ubak allah nyang mahamanyang; geunaseh gobnyan keukai dan abadi. meusyukoe kheueh ubak tuhan nyang maharayeuk; geunaseh gobnyan keukai dan abadi. teuma gobnyan nyang peuguet buet-buet nyang ajaeb nyang raya luwa biasa; geunaseh gobnyan keukai dan abadi. deungon keubijaksanaan gobnyan geupeujeuet langet; geunaseh gobnyan keukai dan abadi. gobnyan nyang leung bumoe di ateuh ie; geunaseh gobnyan keukai dan abadi. gobnyan nyang peujeuet beunda-beunda nyang peutrang langet; geunaseh gobnyan keukai dan abadi; mata uroe keu jikuasa uroe; geunaseh gobnyan keukai dan abadi; geupeujeuet buleuen ngon bintang keu jikuasa malam, geunaseh gobnyan keukai dan abadi. geupoh mate aneuek-aneuek tuha bansa meuse; geunaseh gobnyan keukai dan abadi. israel geupeuteubiet uluwa nibak nanggroe meuse; geunaseh gobnyan keukai dan abadi. deungon jaroe nyang teuga dan peukasa; geunaseh gobnyan keukai dan abadi. laot geulagah geuprah dua; geunaseh gobnyan keukai dan abadi; israel umat gobnyan geuba u meurandeh laot; geunaseh gobnyan keukai dan abadi. teuma raja nanggroe meuse dan sipa-i jih nyan habeh geupeukaram u dalam geunaseh gobnyan keukai dan abadi. geupimpin umat gobnyan geujak rot padang pasi; geunaseh gobnyan keukai dan abadi. geupeutaloe banmandum raja-raja nyang peukasa; geunaseh gobnyan keukai dan abadi; geupoh mate banmandum raja-raja nyang meusyehuh; geunaseh gobnyan keukai dan abadi; sihon, raja amori; geunaseh gobnyan keukai dan abadi; dan og, raja basan; geunaseh gobnyan keukai dan abadi. nanggroe awaknyan laju geucok geubri laju ubak umat gobnyan; geunaseh gobnyan keukai dan abadi; jeuet keuhak milek israel hamba gobnyan; geunaseh gobnyan keukai dan abadi. gobnyan hana geutuwoe ubak geutanyoe watee geutanyoe geupeutaloe; geunaseh gobnyan keukai dan abadi. geupeubeubaih geutanyoe nibak jaroe musoh; geunaseh gobnyan keukai dan abadi. tieb-tieb makhluk udeb geubri makheun; geunaseh gobnyan keukai dan abadi. meusyukoe kheueh ubak allah nyang mat kuasa ateuh langet; geunaseh gobnyan keukai dan abadi.

nibak bineh-bineh krueng babel kamoe duek-duek dan kamoe mo meuba-e watee teuingat keu sion. nibak bak-bak kayee gandarusa di nanggroe nyan kamoe gantung keucapi kamoe. ureueng-ureueng nyang teun kamoe jiyue kamoe meuca-e keu awaknyan. dan ureueng-ureueng nyang teugom dan seupet kamoe jiyue bak kamoe meuca-e lagu nyang geumbira, "meuca-e kheueh keu kamoe lagu-lagu nibak sion!" mungken di nanggroe aseng kamoe meuca-e keu tuhan? bah kheueh ulon hana hase le meuca-e meunyoe ulon tuwoe keu droeneueh, yerusalem! bah kheueh ulon hana hase le meuca-e meunyoe ulon tuwoe bak droeneueh dan hana lon peujeuet droeneueh keuharok ulon! ya tuhan, neuingat kheueh ubak peundeuritan ureueng edom watee yerusalem teupeuhanco. awaknyan jipeugah, "peuhanco laju, peuhanco laju sampoe habeh rata!" hai babel, gata teupeubinas! mubahgia kheueh ure-

ueng nyang jibalaih keu gata keujeuhetan nyang gata peubuet ateuh kamoe. mubahgia kheueh ureueng nyang jicok aneuek-aneuek banyak gata dan laju jietiek u buket bateel!

nibak nabi daud. droeneueh, deungon sipeunoh ate lon. dikeue banmandum dewata ulon meunyanoye puja ngon pujoe ubak droeneueh. ulon teukui ngon lon peukeu ubak baet droeneueh nyang suci sira lon pujoe nan droneueh, sabab droeneueh seutia dan sabe neugaseh kamoe. droeneueh leubeh peunteng ubak janji nyang ka droneueh peuguet nibak peundapat gob keuhai droeneueh. watee ulon teumawok droeneueh, laju neujaweueh, peukong kheueh ate lon mangat lon jeuet keu ureueng nyang beurani. banmandum raja nyang na ateuh bumoe nyoe jipujoe droeneueh, ya tuhan, sabab awaknyan ka jideungoe janji droeneueh. awaknyan meunyanoye keuhai buet droeneueh dan keuhai keuangongan droeneueh nyang raya. droeneueh lumpah mulia, ya tuhan lon, teuma nyang hina teutab droeneueh peulara, ureueng som-bong hana hase jipeusom droe nibak droeneueh. watee ulon rhot bak apoh apah, droeneueh nyang peuteun udeb ulon. droeneueh nyang lawan musoh lon nyang teungoh beungah dan droeneueh peuseulamat ulon ngon kuasa droeneueh. droeneueh neupeupeunoh janji ubak ulon; bek kheueh neupioh neukalon ateuh umat droeneueh.

keu teupimpin kor. zabur nabi daud. neuturi keu ulon. droeneueh neutupeue peue mantong nyang ulon peubuet; rot jioh droeneueh ka neutuoh pikeran ulon. droeneueh deuh neungieng ulon, bah kheueh watee ulon meukeureuja meunan cit watee ulon meureuhah, droeneueh neutupeue peue mantong nyang ulon peubuet. dan sigohlom ulon peugah haba, droeneueh neutupeue peue nyang keuneuk ulon peugah. droeneueh neukeulileng ulon rot meubagoe peunjuru, dan droeneueh lindong ulon deungon kuasa droeneueh. lumpah that lhok nibak ulon ieleume droeneueh nyan, hana hase jimat le pikeran ulon. hoe kheueh nyang hase ulon jak mangat hase teupeusi nibak kuasa droeneueh? dan hoe teuma hase ulon plueng mangat jioh nibak droeneueh? meunyoe ulangan nyang ulon ek, droeneueh pih ka na disinan, meunyoe ulon eh didalam mawot, disinan pih na droeneueh. meunyoe ulon po rot ufuk timu atawa lon tinggai seungab di ujung barat nyang paleng jioh, disinan pih droeneueh na neutulong ulon; disinan cit teuma jaroe droeneueh neubimbong ulon. meunyoe ulon lakee mangat seupot jitob jikeuleubong ulon, dan trang nyang na di seukeulileng ulon jeuet keu malam, teuma nyang seupot nyan hana seupot nibak droeneueh; malam nyan trang lagee uroe, dan seupot nyang lagee trang. droeneueh neucebta tieb-tieb bagian nibak tuboh ulon, dan neubantuek ulon didalam pruet ma lon. ulon lon pujoe droeneueh sabab ulon luwa biasa! peue mantong nyang droeneueh peubuet keubit ajaeb dan meungagomkan, ulon biet-biet insaf. watee tuleueng-tuleueng ulon teupeujeuet, deungon teutato teukarang oh get dalam pluet ma ulon, sedangkan ulon timoh disinan seucara rahsia, ulon hana teusom nibak droeneueh. droeneueh deuh neungieng ulon watee lon mantong na dalam pluet ma; ban-

mandum nyan ka teucatet didalam kitab droeneueh; uroe-uroe jihpi ka teupeuteuntée sigohlom sapeue pi teupeuphon. padub na sulet jih pikeran droeneueh nibak ulon, ya allah, dan padub na le jeumeulah jih! meunyoé lon itong, leubeh le nibak ano nyang na di pante; meunyoé ulon beudoh nibak teupmat eh, mantong na watee ulon pike keu droeneueh. bah kheueh ureueng jeuhet droeneueh peuhanco, ya po teu allah, neupeujioh kheueh ureueng peuro darah nyan nibak ulon! awaknyan jipeugah nyang jeuhet keuhai droeneueh, dan jimeusumpah peuleusu keuhai banda-banda droeneueh. ya tuhan, ulon banci keu ureueng nyang banci droeneueh, ate ulon tunu keu ureueng nyang lawan droeneueh! awaknyan lon banci luwa biasa, dan ulon anggab sibagoe musoh nyang paleng raya. neuseulidek kheueh ulon, ya allah, neuseumon kheueh lam ate lon, neu ujoé kheueh ulon dan neutupeue kheueh pikeran ulon. neungieng kheueh aleh na nyang jeuhet nibak tuboh lon, dan neubimbeng kheueh ulon bak jalan nyang keukai.

keu teupimpin kor. zabor nabi daud. neupeulheueh kheueh ulon nibak ureueng jeuhet, ya tuhan, neujaga kheueh ulon nibak ureueng nyang jipeubuet buet jeuhet ateuh ulon. awaknyan ka jireuncana buet nyang jeuhet didalam ate, dan tieb-tieb uroe sabe jipeuna dakwa ngon dakwe. lidah awaknyan lagee lidah uleue nyang meubisa, tutoe haba awaknyan lagee bisa uleue mate iku. ya tuhan, neulindong kheueh ulon nibak kuasa ureueng jeuhet, neujaga kheueh ulon nibak ureueng nyang jikeuneuk peubuet buet nyang jeuhet dan keuneuk jipeu rhot ulon. ureueng nyang cungkak deungon cara seungab-seungab ka jipasang taron jikeuneuk carueh ulon, dan jireuntang jarang keuneuk drob ulon. ban sipanyang jalan awaknyan ka jiteun jeunieb guna keuneuk jijeubak ulon. ya tuhan, ulon peugah: droeneueh kheueh alah ulon, neudeungoe kheueh doa dan nyang ulon lakee. tuhan, allah ulon, nyang peuseulamat ulon nyang paleng teuga, droeneueh ka neulindong ulon watee dimideuen prang. bek kheueh neupeukabui peue nyang jilakee le ureueng jeuhet, ya tuhan, dan bek kheueh neupeubiyeu reuncana awaknyan meuhase. bek neupeubiyeu musoh ulon hase meunang; bah kheueh tutoe haba nyang jeuhet nyang awaknyan peugah keunong ateuh awaknyan nyang ba fiteunah u ateuh ulon. bah kheueh awaknyan teugelawa deungon ngeue apui, dan teugeulawa u dalam uruek mawot, sampoe ka hana hase jiteubiet le. bah kheueh nyang jipeubuet keukeurasan rhot le mala peutaka, dan bek kheueh neupeubiyeu ureueng ba fiteunah jeuhet keu ureueng tinggai di ateuh bumoe. ulon lon teupeue droeneueh neubri keuadalan ubak ureueng nyang teuteugon, dan neubila peukara keu ureueng gasien. ureueng nyang juoe jipujoe droeneueh, ya tuhan, awaknyan tinggai teutab meusapat deungon droeneueh.

zabor nabi daud. droeneueh. neuteurimong kheueh doa ulon sibagoe peuseumahan dupa, dan jaroe ulon nyang meureuntang sibagoe keureubeuen malam. ya tuhan, neujaga kheueh babah ulon dan neuawasi kheueh bibi ulon. neupeujioh kheueh ulon nibak niet dalam ate keu teupeubuet jeuhet, bek neupeubiyeu ulon meugabong deungon ureueng nyang

doraka dan meusajan-sajan pajoh bu dalam khanuri awaknyan. meunyoé na sidroe ureueng jroh jisapa ulon, dan deungon juoe ji heuntam ulon, nyan na kheueh lagee minyeuk nyang paleng get nibak ulon. seumoga hainyan hana ulon tulak, sabab hana lon pioh ulon meudoa keu lon lawan awaknyan. meunyoé nyang mat kuasa nibak awaknyan teugeulawa u dalam reuleueng-reuleueng batee, awaknyan jiaku bahwa tutoe haba ulon na kheueh beuna. tuleueng-tuleueng geutanyoe geuhambo bak bineh jrát lagee sineuk batee nyang geupeuhanco ateuh tanoh. teuma ulon teutab meuharab ubak droeneueh, ya tuhan allah ulon, bek neupeubiyeu ulon nyoe mate, sabab ulon meulindong ubak droeneueh. lindong kheueh ulon nibak taron nyang ka meucarueh bak takue lon, dan nibak peurangkab banmandum ureueng jeuhet nyan. bah kheueh awaknyan reubah u dalam taron jih keudroe, dan seumoga ulon teutab seulamat.

lagu peungajaran nabi daud, bak watee gobnyan didalam guha. deungon su nyang nyareng ulon meuhoi ubak tuhan; deungon su nyang meulantak ulon meulakee bantuan gobnyan. dikeue gobnyan ulon apoh apah; ulon peugah laju peue mantong keusosahan lon ubak gobnyan. watee ulon karab putoh asa, droeneueh ya tuhan neutupeue peue nyang haroh ulon peubuet. bak rot nyang haroh ulon jak, musoh deungon seungab-seungab ka jiteun taron keu ulon. watee ulon paleng u sampeng, deuh lon kalon hana bantuan keu ulon. hana nyang lindong ulon, atawa nyang jitem pako ubak droe ulon. ulon meulakee ubak droeneueh, ya tuhan, droeneueh kheueh teupmat ulon meulindong, droeneueh mantong nyang ulon peureulee lam udeb nyoe. neudeungoe kheueh nyang ulon lakee nyoe, ya tuhan, sabab ulon lumpah that seungsara. neupeuseulamat kheueh ulon nibak musoh-musoh lon, sabab awaknyan lumpah that teuga nibak ulon. neupeulheueh kheueh ulon lam glab, ya tuhan, dan lamkawan umat droeneueh meusapat ulon lon pujoe nan droeneueh, sabab droeneueh ka peubuet nyang jroh keu ulon.

zabor nabi daud. ulon nyoe hamba droeneueh, bek kheueh neupeusidang ulon, sabab hana ureueng nyang hana meusalah ubak droeneueh. musoh ulon ka jipeulet dan jipeutaloe ulon, dan jipeutamong ulon u dalam glab nyang seupot buta; sampoe ulon nyoe ka jeuet lagee ureueng nyang ka treb that mate. ulon ka patah seumangat, ya tuhan, ate ulon ka bingung that. watee lon ingat uroe-uroe nyang ka leupah; watee lon pike banmandum buet droeneueh, ulon tanueng banmandum karya droeneueh. ulon meudoa ubak droeneueh deungon jaroe nyang teuleueng meureuntang; lagee tanoh nyang ka tho kreng, jiwa ulon rindu that ubak droeneueh. neujawueb kheueh ulon deungon sigra, ya tuhan, sabab ulon ka putoh asa. bek kheueh neumusom nibak ulon, mangat ulon hana lagee ureueng laen nyang ka jitron u alam mawot. tieb-tieb beungoh neupeu ingat kheueh ulon keu geunaseh droeneueh, sabab ubak droeneueh kheueh ulon meuharab. neuntunyo kheueh bak ulon rot nyang ulon jak, sabab ubak droeneueh kheueh ulon meudoa. ulon teuka keuneuk jak meulindong

ubak droeneueh, ya tuhan, neupeulheueh kheueh ulon nibak musoh-musoh lon. neupeurunoe kheueh ulon jeuet lon peubuet meulakee droeneueh, sabab droeneueh kheueh allah ulon. droeneueh get that ate, ya tuhan, dan neubimbeng ulon bak rot nyang rata. peuseulamat kheueh ulon nyang suisai deungon janji droeneueh, ya tuhan, deumi keuget droeneueh, neupeulheueh kheueh ulon nibak meularat. deumi geunaseh droeneueh neupeuhanco kheueh banmandum musoh ulon, dan neupeubinasa kheueh banmandum musoh ulon, sabab ulon nyoe na kheueh hamba droeneueh.

nibak nabi daud.- gobnyan kheueh nyang tulong dan nyang bila ulon, nyang peuseulamat ulon di tempat ulon meupayong. gobnyan peulindong ulon, dan tempat ulon peuaseng droe, bansa-bansa nyang laen geupeutaklok ubak ulon. tuhan, peu kheueh manusia, sampoe droeneueh kalon jihnyan? soe kheueh jihnyan sampoe droeneueh neupakoe jihnyan? manusia nyan lagee angen proh, dan lagee bubayang nyang liwat, meunan kheueh udeb jih. ya tuhan, neupeuhah kheueh langet droeneueh dan neutron kheueh, neukeukeh kheueh gunung-gunong jeuet meusasab. neupeulheueh kheueh kilat droeneueh jeuet musoh habeh crebre. dan neutimbak kheueh aneuk panah droeneueh mangat awaknyan yo meukot-kot. neu sunyueng kheueh jaroe droeneueh lam syeurga, dan neupeulheueh kheueh ulon nibak ie raya. neupeuseulamat kheueh ulon nibak kuasa ureueng aseng nyang harok bak haba sulet dan galak bak meusulet, dan ji meusumpah peuleusu. ulon lon meuca-e lagu nyang baro keu droeneueh, ya allah, dan lon peutek keucapi sira meuca-e. droeneueh nyang bri meunang keu raja-raja, dan neupeubeubaih nabi daud hamba droeneueh. neupeusie kheueh ulon nibak mata peudeueng ureueng zalem; dan neupeuseulamat kheueh ulon nibak kuasa ureueng aseng nyang galak meusulet dan teumipee, dan jimeusumpah peuleusu. seumoga aneuk-aneuk agam geutanyoe yoh masa muda jih lagee sinaman nyang teungoh rayeuk. seumoga aneuk-aneuk inong geutanyoe lagee tameh jeulita, nyang teuhias di jeueb-jeueb tameh meuligoe. seumoga gupok-gupok geutanyoe peunoh meuasoe deungon sigala bago hase bumoe. seumoga bubiri-bubiri nyang na di padang geutanyoe jitoh aneuk meuploh-ploh ribee. seumoga leumo-leumo geutanyoe meukeumang le dan hana nyang gadoh atawa mate. seumoga hana teudeungoe le su ureueng kliek nyang pilu ngon seungsara nibak jalan-jalan banda geutanyoe. mubahgia kheueh bansa nyang lagee nyan, dan mubahgia kheueh umat nyang allah jih tuhan!

pujoe nibak nabi daud. lon, dan lon pujoe droeneueh siumu masa. tieb-tieb uroe ulon keuneuk meusyukoe ubak droeneueh, dan lon peumulia droeneueh siumu masa. sabab tuhan agong dan lumpah teupujoe, keubeusaran droeneueh hana soe ek seunom. tron neutron ureueng laen teutab jipujoe peue nyang droeneueh peubuet dan jijak peusampoe keubeusaran droeneueh. awaknyan jijak pengah keuangongan dan keumuliaan droeneueh, karya droeneueh nyang luwa biasa ulon tanung. awaknyan

jijak peusampoe buet-buet droeneueh nyang dahsyat, keubeusaran droeneueh ulon peumaklum. ureueng laen jimeututoe keuhai keuget droeneueh dan jimeuca-e keuhai droeneueh nyang ade. tuhan nyan peungaseh dan peunyayang, treb jiteuka beungeh dan sabe na geunaseh. gobnyan murah ate ubak soe mantong, dan geugaseh banmandum ubak peue mantong nyang ka geucebta. banmandum nyang droeneueh cebta jipujoe droeneueh, ya tuhan, banmandum umat droeneueh meusyukoe ubak droeneueh. awaknyan jagong keukuasaan droeneueh sibagoe raja, dan jicalitra kupeukasaan droeneueh, mangat banmandum ureueng jiteupeue buet droeneueh nyang raya, dan keurajeuen droeneueh nyang mulia dan seumarak. peumeurintahan droeneueh teutab siumu masa, keukuasaan droeneueh teutab meuteun tron neutron. tuhan geutulung ureueng nyang dalam keuosahan, gobnyan geupeudong ureueng nyang teutukui. banmandum makhluk udeb jimeuharab ubak droeneueh; droeneueh jok keu awaknyan peunajoh oh trok bak watee. droeneueh nyang peupeunoh banmandum peue nyang jipeureulee le awaknyan, sampoe awaknyan hana kureueng bahpi meusapeue pi. tuhan ade dalam peue mantong nyang geupeubuet dan peunoh gaseh dalam peue mantong nyang geukeureuja. gobnyan to that ubak ureueng nyang jimeuhoi gobnyan, dan jimeulakee ubak gobnyan deungon ate nyang juJoe. gobnyan geupeu mangat ate keu ureueng-ureueng nyang taqwa; gobnyan geudeungoe awaknyan meuhoi dan geupeuseulamat awaknyan. gobnyan geulindong soemantong ureueng nyang cinta keu gobnyan, teuma ureueng jeuhet banmandum geupeubinasa. ulon keuneuk pujoe tuhan sipanyang watee, seumoga banmandum makhluk gobnyan jipujoe nan tuhan keu siumu masa.

pujoe kheueh tuhan! hai jiwa ulon, pujoe kheueh tuhan! ulon keuneuk pujoe tuhan simantong ulon udeb dan meuca-e keu po teu allah simantong ulon na. bek kheueh meuharab ubak peunguasa, ubak ureueng nyang hana hase jipeuseulamat manusia. meun-yoe awaknyan mate, awaknyan jigisa jeuet keutanoh; bak uroenyan cit teuma peue mantong reuncana awaknyan habeh teusampoh sapan sapa. mubahgia kheueh ureueng nyang jipeubangga tuhan allah jih mantong, dan na tuhan nabi yakub nibak droe jih sibagoe peunulung jihnyan. gobnyan nyang peujeuet langet dan bumoe, laot dan banmandum asoe jih; gobnyan teutab seutia siumu masa. gobnyan geubila hak ureueng nyang keunong teugon, dan geubri makheun keu ureueng deuk. dan geupeu jeuet ureueng buta hase jikeumalon. gobnyan geupeudong ureueng nyang reubah, dan geugaseh keu ureueng nyang juJoe. gobnyan geulindong ureueng-ureueng aseng; gobnyan geutulung inong balee dan aneuk yatem ngon muntui, teuma reuncana ureueng jeuhet teutab geupeugagal. tuhan nyan na kheueh raja keu siumu masa. hai sion, po teu allah gata meukuasa siumu masa dan sigala abad.

pujoe kheueh tuhan! sabab jroh that teupujoe gobnyan, dan keubit galak keu teumeuca-e lagu seumujoe keu gobnyan! tuhan geupeupuleh yerusalem; ureueng-ureueng nyang ka teuboih geupeuwoe lom teuma. gobnyan geupeupuleh ureueng nyang ka

patah ate, dan geubalot bubena luka-luka awaknyan. gobnyan nyang peuteuntee padubna jeumeulah bintang di langit ijo, dan maseng-maseng bintang nyan gobnyan boh nan. keubit raya dan hebat tuhan geutanyoe, keubijaksanaan gobnyan hana teuhingga. gobnyan nyang peudong ureueng nyang keunong teugon, teuma ureueng jeuhet gobnyan nyang tiek ateuh tanoh. meuca-e kheueh deungon lagu puja ngon pujoe ubak tuhan, peumeuen kheueh keucapi keu allah geutanyoe. gobnyan kheueh nyang lheueng awan di langit manyang; gobnyan nyang peutron ujeuen ateuh bumoe, dan nyang peutimoh naleueng jitimoh di ateuh buket. gobnyan nyang bri uempoen keu beulatang, dan keu aneuek cicem gagak nyang meucieb-cieb jimeuhoi ma. keusukaan tuhan bukan kheueh bak guda nyang teuga; dan bukan cit teuma ubak peujuang nyang gagah beurani. tuhan harok ubak ureueng nyang taqwa, dan ubak ureueng nyang teutab meuharab geunaseh ubak gobnyan. pujoe kheueh tuhan, hai yerasalem! pujoe kheueh allah gata, hai sion! sabab gobnyan nyang peukong pintoe-pintoe geureubang gata, dan nyang bri beureukat keu peinduduek gata. gobnyan nyang jaga daerah gata jeuet teutab aman, dan nyang peutroe gata deungon boh gandom nyang paleng get. gobnyan nyang bri peurintah ubak bumoe, dan haba gobnyan bagaih that jipeubuet laju. gobnyan nyang peutron salju nyang puteh lagee gapeueh, dan nyang peuhambo iembon kreueh lagee abee. gobnyan nyang peutron ujeuen eeh lagee batee keurikee; hana ureueng nyang ek jiteun nibak leupie ngon sijuek nyan. dan ateuh peurintah gobnyan eeh nyan pi caye; laju geuyueb angen, dan ie pih laju ji ile. gobnyan nyang peusampoe peusan geuh ubak umat gobnyan, keuputosan dan hukum gobnyan keu umat nyang ka geupileh. hai lageenyan hana geupeubuet ubak bansa-bansa laen, awaknyan hana jituri ubak hukom-hukom gobnyan.

pujoe kheueh tuhan! pujoe kheueh gobnyan! pujoe kheueh tuhan hai banmandum malaikat gobnyan, dan pujoe kheueh gobnyan, hai banmandum tantra syeuruga! pujoe kheueh tuhan, hai mata uroe ngon buleuen, dan pujoe kheueh gobnyan, hai bintang-bintang nyang hu ble-ble cahya! pujoe kheueh gobnyan, hai langit nyang paleng manyang, dan pujoe kheueh gobnyan, hai ie nyang na di ateuh langit! bah kheueh awaknyan banmandum jipujoe nan tuhan, sabab banmandum geupeujeuet ateuh peurintah gobnyan. gobnyan nyang peuteuntee teupat awaknyan maseng-maseng, keuteutapan gobnyan meulaku keu siuma masa. pujoe kheueh tuhan, hai banmandum asoe bumoe, hai naga-naga laot dan banmandum samudra raya; hai kilat dan ujeuen eeh, salju dan awan, angen kang nyang jiturot peurintah tuhan! pujoe kheueh gobnyan, hai buket-buket dan gunong-gunong, bak kayee nyang muboh meubagoe rupa dan banmandum gle; banmandum beulatang peulara dan beulatang kleut, banmandum beulatang meulata dan cicem-cicem! pujoe kheueh tuhan, hai raja-raja dan meubagoe bansa, ureueng bansawan dan banmandum ureueng mat kuasa; banmandum aneuek muda ngon aneuek dara, ureueng tuha dan ureueng muda. bah kheueh awaknyan banmandum jipujoe nan tuhan,

sabab nan gobnyan leubeuh agong nibak banmandum nan; keuagongan gobnyan ek teutasi langit ngon bumoe. gobnyan ka geupeukong bansa geuh, sampoe gobnyan jipujoe-pujoe le umat geuh, israel umat nyang paleng geusayang.

pujoe kheueh tuhan! meusuka cita kheueh hai israel, sabab peucebta gata; meugeumbira kheueh, hai meududuek sion sabab raja gata! pujoe kheueh nan gobnyan deungon meubagoe likak dan tari, dan pujoe kheueh gobnyan deungon keucapi dan rapa-i! tuhan geutung keu umat gobnyan; gobnyan geubri meunang keu ureueng nyang miyueb ate. bah kheueh umat allah meusuka ria sabab keujayaan gobnyan, dan meuca-e geumbira simalam suntok. bah kheueh awaknyan jipujoe po teu allah deungon su nyang meutaga, sira jimat peudeueng nyang ka teu asah keu geubalahi bansa-bansa, dan geuhukom sukee-sukee bansa; keu geubeuleunggu raja-raja, dan geuboh rante ubak bubena peunguasa awaknyan; keu teuhukom bansa-bansa ateuh peurintah allah. nyan kheueh keumeunangan umat nyang geugaseh.

pujoe kheueh tuhan! pujoe kheueh gobnyan sabab buet-buet gobnyan nyang peukasa. pujoe kheueh gobnyan sabab keuagongan gobnyan nyang raya. pujoe kheueh gobnyan deungon su beureuguih, pujoe kheueh gobnyan deungon gambus dan keucapi! pujoe kheueh gobnyan deungon rapa-i dan likak ngon tari, dan pujoe kheueh gobnyan deungon keucapi dan suleng. pujoe kheueh gobnyan deungon ceracap nyang su meudeunteng, dan pujoe kheueh gobnyan deungon su canang nyang meudeuntang. bah kheueh banmandum makhluk udeb jipujoe tuhan.

nyoe kheueh peutuah-peutuah nibak nabi sulaiman, aneuek nabi daud, raja israel. tujuan jih na kheueh keuteutulung ureueng mangat jiteupeue pakriban beujeuet keu ureueng bijaksana, dan teuteupeue tata teureuteb udeb meunan cit hase teumeuphom ungkapan-ungkapan yang teuseume makna nyang lhok. peutuah-peutuah nyoe teupeurunoe pakriban ureueng hase udeb deungon bijaksana, juje, ade dan beuna. ureueng nyang hana peungalaman geupeuruno trok ubak ureueng nyan na pikeran nyang tajam, dan ureueng muda geupeuruno mangat hase jeuet keu ureueng carong dan hase jiseumike seucara dewasa. deungon na peutuah-peutuah nyoe di ureueng bijaksana pi meutamah peungeutahuan gobnyan, dan ureueng nyang ka meupeundidekan teuma meuteume bimbengan. deungon na nyang lagee nyan awaknyan ka hase geuseunom makna nyang teusom nyang na didalam peutuah dan geumeuphom tutoe haba ureueng bijaksana dan masalah-masalah nyang jityanyong le awaknyan. keu meuteume ieleme seujati, nyang phon-phon that haroh na rasa horeumat dan teumakot ubak tuhan. ureueng bangai hana jihareuga hikeumat dan hana teuma jitem teupeuruno. simak kheueh peue nyang geupeugah le ayah dan na gata ubak gata, aneuek ulon, sabab peue-peue nyang geupeuruno le awaknyan keu gata jeuet keumeutamah pi-e jroh gata lagee hiasan ulee dan taloe takue keu teupeu lagak ruman gata. meunyo ureueng meudesya jibujuk gata, aneuek ulon, bek kheueh gata tutot bujuk awaknyan. meunyo awaknyan jipeugah, "jak, geutanyoe tajak mita ureueng nyang paran gobnyan. keu gura-gura, jak geutanyoe taseurang ureueng nyang hana meusalah. jinoenyoe awaknyan udeb lam keuadaan seunang dan seuhat, teuma singoh awaknyan jeuet keu ureueng lagee siteungoh mate. tacok barang-barang awaknyan nyang meuyem, mangat rumah geutanyoe peunoh measoe deungon hareuta nyang teureupah. jak seutot keunoe! eunteuk hase nyang tacue nyan ta weuk beu ade!" bek kheueh taseutot deungon ureueng-ureueng nyang na lagee nyan, hai aneuek ulon! tapeujih nibak ureueng nyan. awaknyan hana hase tinggai seungab sigohlom buet nyang jeuhet jikeureuja. awaknyan meuheut bubagaih-bagaih keuneuk poh mate. dicicem pih hana jitamong lam taron nyang teuteun meureuntang dikeue mata jih, teuma di ureueng nyang jeuhet nyan jiteun taron keu droe jih keudroe – taron nyang teuma teupeuceulaka awaknyan. keubit that, ureueng-ureueng nyang mita nafeukah deungon cara jeuhet teuma jibayeye deungon nyawong jih keudroe. deungoe kheueh! hikeumat jimeuhoi dijrot-jrot dan jikuk-kuk sira jikliek-kliek didalam padang ngon blang! jimeuhoi di babah-babah pinto geureubang dan di tempat-tempat nyang rame: "hai ureueng-ureueng beubal! trok an pajan gata teutab lagee nyan? pajan trok watee jih gata tapioh tapeubeuah peungeutahuan dan tatulak peulajaran? deungoe kheueh ulon watee ulon sapa gata, teuma keu gata teuma ulon peugah asoe ate lon dan ulon peurunoe peungeutahuan ulon. gata ka ulon tawok, teuma gata tulak dan hana tapako. banmandum naseuhat ulon gata peujayah dan nyang ulon teugah

gata tulak. le sabab nyan, meunyo gata meuteume bala, ulon teuma lon peukem gata. meunyo gata jiteuka teumakot, ulon teuma lon hina gata. nyoe, ulon teuma lon hina gata gundah dan meudeurita sabab kakeunong le beuncana nyang teuka lagee angen badee raya. bak wateanyan gata tatawok ulon, teuma nyang gata hoi nyan hana ulon seutot. gata tamita ulon homantong teuma nyang gata mitanyan teutab hana meurumpok deungon ulon. gata lagee ureueng nyang hantom meuteume deungon ieleme peungeutahuan, dan beu-o gata taat ubak tuhan. gata hantom tatem teurimong bah meubacut pi naseuhat-naseuhat ulon atawa tasimak ubak nyang ulon teugah. le sabab nyan, gata teuma tarasa keudroe akibat nibak buet-buet gata dan reuncana-reuncana gata nyang brok. ureueng nyang hana peungalaman ureueng nyan teuma mate sabab jipeujayah ulon, dan ureueng bangai teuma hanco sabab hana japako keu ulon. teuma ureueng nyang jideungoe ulon jihnyan teupeulara. ureueng nyan udeb deungon aman hana peureulee meuras teumakot." teurimong kheueh ajaran-ajaran ulon, hai aneuek ulon, dan ingat kheueh sabe naseuhat-naseuhat ulon keu gata. gata simak kheueh peue nyang bijak sana dan useuha gata peuphom atra nyan. nyoe, aneuek ulon, useuha kheueh mangat na pikeran nyang tajam dan talakee kheueh peungeurtian. mita kheueh nyan lagee ureueng mita meuh, dan tiyeub kheueh nyan lagee ureueng tiyeub hareuta nyang na didalam tanoh. deungon na lagee nyan gata teuma tateupeue peue areuti jih teumakot ubak tuhan dan gata teuma meuteume peungeutahuan keuhai po teu allah. tuhan kheueh nyang bri hikeumat; nibak gobnyan kheueh manusia meuteume peungeutahuan dan peungeurtian. keu ureueng nyang jujeu hana meucila, geubri peutulongan dan peulindungan. tuhan geujaga ureueng-ureueng nyang peubuet ade, dan geulindungan ureueng nyang cinta ubak gobnyan. meunyo gata taseutot ulon, gata tateupeue peue nyang ade, jujeu dan jroh. gata tateupeue cit teuma pakriban cara jih gata haroh udeb. gata teuma jeuet keu ureueng nyang bijak-sana, dan peungeutahuan gata teuma teupeumangat ate gata. peungeurtian dan ceureudek gata teuma peulindong gata, dan teutam gata mangat bek seutot cara udeb nyang hana get, dan teupeujih droe gata nibak ureueng-ureueng babah jih kutoe ngon jeuhet. awaknyan hana jitem seutot cara udeb nyang get; awaknyan jicok rot nyang seupot dan peunoh deungon desya. awaknyan teuma meuteume mangat nibak buet awaknyan nyang jeuhet. awaknyan jeuhet dan cara udeb awaknyan sirong. gata, aneuek ulon, teuma hase tatulak bujukan awaknyan nyang jeuhet nyang jiuseuha jipakat gata deungon tutoe haba nyang mameh. inong nyan hana seutia ubak lakoe jih dan ka jituwo janji droe jih ubak allah. meunyo gata tajak u rumah jihnyan saban cit gata teungoh tajak ubak mate. tajak keudeh saban cit deungon tajak u tempat ureueng mate. ureueng nyang ka jajak ubak gobnyan hana nyang jajak ubak rot keu-udeban. le sababnyan, hai aneuek ulon, taseutot kheueh teuladan ureueng nyang jroh, dan udeb kheueh meunurot keuheundak po teu allah. sabab, ureueng nyang udeb meunurot keuheundak po teu allah, nyan

kheueh ureueng juoe ate, awaknyan kheueh yang tinggai di nangroe nyang ka geupeujanji le tuhan. teuma, ureueng jeuhet dan meudesya geu-geulawa uluwa le po teu allah nibak nangroe nyan, lagee naleueng nyang teulot nibak tanoh. bek kheueh tuwoe gata deungon peue nyang ka ulon peurunoe keu gata, hai aneuek ulon. ingat kheueh sabe ubak peurintah ulon, mangat umu gata panyang dan udeb gata pih seujahteura. bah kheueh gata teutab peucaya dan seutia ubak po teu allah meunan cit seusabe gata. ingat kheueh nyan dan takeubah kheueh lam ate gata, mangat gata geugalak dan geuhareuga le po teu allah dan manusia. peucaya kheueh ubak tuhan deungon sipeunoh ate gata, dan bek kheueh gata peubangga peungeurtian gata keudroe. ingat kheueh ubak tuhan ateueh peue mantong nyang gata peubuet, dan gobnyan teuma geutunok keu gata keuhai udeb nyang leubeh sampoeurna. bek kheueh gata anggab droe gata leubeh carong nibak nyang seubeuna jih; taat kheueh ubak tuhan dan peujioh kheueh nyang jeuhet. buet gatanyan teuma jeuet keu ubat nibak gata nyang teupeupuleh badan gata dan teupeuseugar baten gata. horeumat kheueh tuhan deungon jalan tapeuseumah keureubeuen nyang leubeh get nibak peue mantong hareuta gata dan hase tanoh gata, teuma gupok-gupok gata peunoh deungon gandom, dan ie anggo gata teuma meulimpah-limpah sampoe hana seb teupat keu teukeubah ie anggo nyang le nyan. meunyoe tuhan geuheuntam gata, hai aneuek ulon, teurimong kheueh nyan sibagoe peuingat keu gata, dan bek kheueh ate gata meuhob deungon geupeubuet ateueh gata nyang lagee nyan. tuhan geuseunuet ureueng nyang geucinta nyan, saban cit lagee sidroe ayah geuseunuet aneuek gobnyan nyang lumpah geugaseh. meu-untong that ureueng nyang jeuet bijaksana dan meuteume peungeurtian. untong jih leubeh raya nibak peue nyang jiteume nibak pirak, dan leubeh meuyuem nibak meuh. hikeumat jih leubeh meuhareuga nibak batee peumata; banmandum nyang gata lakee hana nyang hase jipeusaban deungon nyan. hikeumat nyang teubri keu gata na kheueh umu nyang panyang, kaya dan horeumat. hikeumat udeb gata seunang ngon mangat dan seujahteura. ureueng nyang jimumat kong that ubak hikeumat teuma jirasa udeb nyang seujati dan bahgia. deungon hikeumat, tuhan geucebta bumoe; deungon akai budo gobnyan geuleueng langet nibak teupat gobnyan. deungon ieleume peungeutuhan gobnyan laju geupeugot kulam-kulam mata ie di miyueb tanoh beukah dan laju ji ile ie nyan meunan cit deungon awan dilanget jiro ie ujeuen u ateueh bumoe. sabab nyan, tamumat kheueh ubak hikeumat dan ubak peutimbangan nyang paih, hai aneuek ulon! bek sagai-sagai atranyan tapeuleuh le, teuma udeb gata teupeulara – indah dan mangat ngon seunang hana teukira. gata teuma tajak deungon aman, dan hana meugantoh. gata teuma tajak eh deungon hana teurasa teumakot, gata ta teunget meuseuneunya simalam beungoh hana nyang peukaru gata. hana peureulee gata teumakot keuhai bala nyang teuka deungon hana teusangka-sangka lagee angen badee, nyang jilanda ateueh ureueng-ureueng jeuhet. tuhan teuma geujaga gata. gob-

nyan hana geupeubiyeu gata meusuruek u dalam jeu-nieb. meunyoe gata na keumampuan keu tapeubuet nyang jroh ateueh ureueng nyang peureulee ubak keubaiekan gata, bek kheueh gata tulak keu gata peubuet hai nyang jilakee nyan. bek kheueh tayue seusabe gata jipreh sampoe oh singoh beungoh, meunyoe bak saat nyoe gata hase tatulong jihnyan. bek kheueh gata reuncana sapeue-peue nyang hase teupeurugo seusabe gata yang tinggai rab deungon gata dan jipeucaya ubak gata. bek meudakwa deungon hana sabab ngon sidroe-droe ureueng nyang ureueng nyan hantom na jipeubuet salah keu gata. bek kheueh picik ate gata keu ureueng nyang jipeuguna keukeurasan, dan bek taturot pi-e ureueng nyan. sabab tuhan geubanci keu ureueng nyang jipeubuet jeuhet, teuma gobnyan krab deungon ureueng nyang teupat udeb jih. tuhan geukutok ureueng jeuhet, teuma geubri beureukat keu rumoh ureueng nyang taat ubak gobnyan. tuhan geubanci keu ureueng nyang manyang ate, teuma geubri beureukat keu ureueng nyang miyueb ate. ureueng bijaksana teuma meutamah harom nan jih, seudangkan ureueng bangai sumaken teucela. hai aneuek-aneuek ulon, deungoe kheueh naseuhate ureueng syiek gata! simak kheueh nyan, teuma gata jeuet keu ureueng areh. nyang ulon peurunoe keu gata nyoe get, sabab nyan bek kheueh gata anggab phui ubak gobnyan. watee ulon mantong ubit, aneuek tunggai ureueng syiek ulon, ulon geupeurno le ureueng syiek lon. gobnyan geupeugah lagee nyoe, "ingat kheueh ubak naseuhate naseuhate ulon, bek kheueh sagai-sagai gata tuwoe. peujak kheueh peue nyang ulon bri peutunok, mangat udeb gata bahgia. beujeuet kheueh keu ureueng nyang bijaksana dan carong! ingat kheueh sabe ubak naseuhate naseuhate ulon dan bek kheueh taboih jioh-jioh." hareuga kheueh hikeumat, teuma hikeumat teulindong gata; cinta kheueh jihnyan teuma jihnyan teutab geucinta gata mangat teutab aman. hai nyang peunteng nyang haroh gata peubuet phon-phon that na kheueh ta useuha beujeuet keu ureueng bijaksana. peue mantong nyang gata tiyeub, nyang phon na kheueh gata useuha beumeuteume peungeurtian. seuon kheueh hikeumat, teuma gata jipeumulia le gobnyan. wa kheueh jihnyan, teuma jihnyan geupeuteuka horeumat keu gata. gobnyan teuma geubri keu gata keunarang bungong nyang get keu jeuet mahkota gata. deungoe kheueh ulon, hai aneuek ulon! simak kheueh beu jroh-jroh naseuhate ulon nyoe, teuma umu gata panyang. ulon ka lon peurunoe hikeumat keu gata dan lon tunyok cara udeb nyang beuna. meunyoe gata udeb nyang lageenyan, teuma gata hana teuhalang watee tajak, dan hana meugantoh watee taplueng. ingat kheueh sabe keu ajaran nyang ka tateurimong nibak ulon. jaga kheueh nyan beugot-got, sabab deungon ajaran nyan gata teuma meuhase. bek taseutot cara udeb ureueng jeuhet, dan bek teuma tacuntoh buet-buet awaknyan. bek kheueh gata peupeunoh peurtian gata keu awaknyan. peujioh kheueh awaknyan dan tajak kheueh laju! ureueng jeuhet hana hase jieh sigohlom jiteume peubuet buet nyang brok. dan awaknyan hana teunget sigohlom jipeuceulaka ureueng laen. keujeuhetan dan keukeujaman na kheueh lagee peunajoh dan ie jieb ni-

bak awaknyan. rot ureueng jeuhet seupot lagee seupot malam nyang gulita. awaknyan meugantoh dan reubah hana soe teupeue. seubalek jih, rot nyang geujak le ureueng jroh na kheueh lagee jiteubiet mata uroe; maken treb maken trang, akhe jih ka trang peungeh meuble-ble. simak kheueh haba ulon nyoe! dan deungoe kheueh naseuhat ulon. bek kheueh tatiek nyan, teuma takeubah kheueh lam ate gata. ureueng nyang jipeuphom nyan teuma udeb dan jeuet keu seuhat. jaga kheueh ate gata beugotgot, sabab ate gata nyan kheueh nyang peuteuntee rot udeb gata. bek kheueh tacuba-cuba gata meututoe deungon nariet nyang sulet dan hana beutoi. peujioh kheueh nariet beurakab nyang sulet dan tutoe haba nyang meukeusut jih gata peusisat ureueng laen. bah kheueh ruman gata meucahya sibago tandu keujujoran ate gata; hana peureulee gata meulakon siluah-ulah na udeung diilikot batee. pike kheueh beugotget sigohlom tapeubuet, teuma gata meuhase peue mantong nyang gata useuha. peujioh kheueh nyang jeuhet, dan udeb kheueh deungon ju-joe. dan bek kheueh meusigopih meusimpang nibak rot nyang beuna. aneuek ulon, deungoe kheueh ulon! simak kheueh keubijaksan ulon dan peungeurtian nyang ulon peurunoe keu gata, mangat gata tapeupeue pakriban haroh taba droe dan tameututoe lagee ureueng nyang na ieleume. inong jeuhet, babah jih mameh lagee meulisan dan tutoe haba jih meumikat ate, teuma meunyo banmandum nyan ka seuleusoe, nyang na tinggai na kheueh nyang phet dan deurita. gata geuhila u dalam donya ureueng mate; rot nyang teujak teupeukeu ubak mawot. jihnyan hana teutab nibak rot nyang teupeukeu ubak udeb; deungon hana jiteupeue bahwa jihnyan ka meusimpang nibak rot nyan. sabab nyan, hai aneuek-anuek ulon, deungoe tutoe haba lon dan bek kheueh gata peubiyeu meunan mantong. peujioh kheueh ureueng inong nyang lagee nyan! dan rumoh jih pih bek gata peuto. meunyo gata meungon ngon inong nyan, gata teuma gadoh keuhoreumatan gata dan nyawong gata teuma teutarek bak watee gata mantong muda le ureueng nyang hana rasa gaseh sayang. hareuta keukayaan gata teuma habeh jipajoh le ureueng laen, dan hase jeureh payah gata jeuet keu atra milek ureueng laen nyang hana gata turi. akhe jih gata jiteuka tunu, meunyo tuboh gata ka habeh jipajoh le peunyaket. laju gata geupeugah, "ah, keupeue lon banci keu naseuhat? dan pakon ulon hana lontem jih teugah? ulon hana lontem deungon guree-guree lon dan hana lontem lon seutot gobnyan. hana teusangka-sangka ulon nyoe ka hana yuem dimata masyarakat." le sababnyan, beuseutia dan tagaseh kheueh keu peurumoh gata keudroe dan tabri kheueh cinta keubino gata mantong. hana guna gata mita nikmat nibak ureueng nyang bukan peurumoh gata. nikmat nyan khusus keu gata dan peurumoh gata, kon deungon ureueng laen. sabab nyan, bahkheueh gata beumeubahgia deungon peurumoh gata keudroe; mita kheueh nikmat nibak aneuek dara nyang ka gata meugatih – aneuek dara nyang lagak jeulita dan lincih lagee rusa. bah kheueh tuboh jih nyang lagak nyan sabe lam keuadaan pungoe gila dan asmara jih sampoe teumabok-mabok gata. ke-

upeue guna meuheut keu inong laen, hai aneuek ulon? keupeue gata meumukah deungon inong da-jeue? tuhan deuh geukalon peue mantong nyang jipeubuet le manusia. ho mantong manusia nyan jik tuhan teutab geukawai. desya ureueng jeuhet lagee jeunieb peurangkab nyang teucarueh ureueng nyan keudroe. jihnyan mate sabab hana jiteurimong naseuhat. sabab bangai nyan nyang ba jihnyan ubak hanco. aneuek ulon, mungken gata na tameujanji ubak sidroe-droe ureueng keugata tanggong utang jih. dan jeuet mantong gata ka meucarueh deungon tutoe haba gata dan teupeurangkab deungon janji gata keudroe. meunyo beutoi meunan, aneuek ulon, gata kana lam keukuasaan ureueng nyan. teuma nyoe kheueh cara jih mangat gata hase tateubiet: bubagaih gatajak ubak ureueng nyan; lakee kheueh deungon peunoh harab mangat jihnyan jitem peuleueh gata. bek kheueh tajak eh ilee, dan bek tapioh hek. peuleueh kheueh droe gata nibak peurangkab nyan lagee cicem atawa rusa jipeuleueh droe nibak ureueng let. ureueng beu-o haroh jikalon cara udeb sidom dan jimeurunoe nibak sidom nyan. sidom hana peumimpin, hana teuma peunguasa dan nyang kawai, teuma teungoh mantong musem keumeukoh di sidom-sidom nyan jipeusapat beukai keu jikeubah watee teuka musem deuk. sampoe anpajan sibe-o nyan jitem eh? dan pajan kheueh jihnyan jitem beudoh? jihnyan jiduek mantong deungon jaroe lam pangkee sira jipioh, dan laju jipeugah, "ah, ulon jak eh sikeujab, ulon teungent that mata." teuma, watee jihnyan teungoh teungent nibak teumpat eh, jihnyan laju teuka le bala kureueng atra dan gasien nyang teuka lagee peurampok meusinjata. ureueng jeuhet dan ureueng kureueng aja jimeusulet dipat-pat mantong. jihnyan jimeunen mata dan jipeugot isyarat keu teumipee. pikeran jih nyang brok ka peunoh deungon reuncana jeuhet dan jipeuteuka dakwa meudakwa rhot-pat mantong. banmandum nyan na kheueh rhot ubak sabab keuceulakaan nyang rhot atueh droe jih keudroe deungon hana teusangka-sangka, dan jihnyan hanco banmandum. na tujoh boh peukara nyang geubanci le tuhan dan hana jeuet geupeubiyeu meunan mantong: sikeub nyang som-bong, babah nyang peugah haba sulet, jaroe nyang jipoh mate ureueng nyang hana meusalah, utak nyang jireuncana hai-hai nyang jeuhet, gaki nyang bagaihabagaih jikak ubak buet nyang jeuhet, saksi nyang hana jipioh-pioh jimeusulet, dan ureueng-ureueng nyang jipeuteuka musoh lamkawan rakan deungon rakan. aneuek ulon, tapeubuet kheueh laju peue nyang geupeurintah le ureueng syiek gata, dan bek tuwoe ubak peue nyang ka geunaseuhat le ma gata. ingat kheueh sabe ubak tutoe haba gobnyan dan takeubah kheueh nyan lam ate. ajaran-ajaran gobnyan teumbibeng gata nibak rot ueh raya, jaga gata oh watee malam, dan nyang bri peutunyok nibak gata oh watee gata tabeudoh. peutunyok-peutunyok nyang teuka nibak ureueng syiek gata na kheueh lagee panyot tanglong nyang hu trang meucahya; geuteugah gata na kheueh teutunyok keu gata pakriban cara udeb nyang jroh. deungon na nyang laegeenyan gata ka geupeujioh nibak ureueng-ureueng inong jeuhet, dan nibak jirayu nyang meubisa keu peurumoh ureueng laen.

bek kheueh gata teugoda le ceudah dan lagak ureueng nyan, dan bek kheueh teupikat deungon mata awaknyan nyang peurayu. inong jeuhet si tukang mukah hase teusiwa deungon bu saboh pireng, teuma meunyo meumukah deungon peurumoh gob haroh teubayeue deungon nyawong. peu kheueh na ureueng nyang hase jiwa apui deungon hana tutong baje jih? dan peu kheueh na ureueng nyang hase jig-ilo ngeue apui deungon hana tutong gaki jih? banmandum nyan saban bahya jih lagee meumukah deungon peurumoh ureueng laen. seomantang nyang peubuet nyan hana teupeusie nibak hukoman. meunyo ureueng jijak cua peunajoh, bahpi sabab deuk, ureueng nyan teuma teuhina. dan meunyo ureueng nyan keunong drob ureueng nyan haroh jibayeue lom tujoh goe lipat; deungon nyan ureueng nyan haroh gadoh banmandum hareuta milek jih keudroe. teuma pakriban kheueh deungon ureueng agam nyang meuzina? ureueng nyan ka jireuloh droe jihnyan keudroe! bangai that-that ureueng nyan! ureueng nyan teuma teuseuksa dan jihina. nan jihnyan teuma ka kutoe sampoe siumu masa. sabab, deungon na nyang jipeubuet lagee nyan lakoe ureueng inong nyan ka jeuet keu ureueng ceumuru, sampoe beungeh silakoe nyan meutamah-tamah ju. dan meunyo jihnyan jibalaiah dam, nibak ureueng nyan ka hana le rasa gaseh sayang. ureueng nyan hana hase teubujuk deungon peng; hadiah nyang le sidub toh mantong hana hase teupeureuda beungeh ureueng nyan. indonesia ingat kheueh tutoe haba ulon, hai aneuk ulon, dan bek tuwoe ubak peue nyang ka ulon peugah bak gata. seutot kheueh ubak naseuhathasehat ulon mangat gata udeb bahgia. dan taseutot kheueh ajaran ulon beujroh-jroh lagee gata jaga aneuk mata keudroe. ingat kheueh ubak ajaranajaran nyang ka ulon peurunoe nyan, dan takeubah kheueh lam ate sanubari gata. anggab kheueh hieumat sibagoe syedara gata dan peungeutahuan sibagoe sahabat gata nyang paleng rab nibak gata. deungon hieumat teuma teupeujioh gata nibak ureueng inong jeuhet, nibak ureueng inong nyang meurayu deungon tutoe haba nyang mameh. bak siuroe ulon kalon rot tingkab rumoh lon. deuh laju ulon ngieng rame that aneuk muda nyang mantong ijo-ijo; teuma khusus jih ulon ngieng sidroe nyang bangai lamkawan awaknyan. oh seupot uroe watee jih karab malam, aneuk muda nyan lon ngieng jijakjak to deungon tikongan nibak rot nyang teujak ubak rumoh sidroe ureueng inong. ureueng inong nyan na kheueh sidroe inong nyang hana ek jideuk di rumoh. siat-at inong nyan ka deuh bak bineh rot, oh luehnyan ka leumah teuma nibak bineh padang, atawa jidong sira jipreh nibak simpang rot. peuran-goh jih beurani that dan hana jiteupeue mallee. oh luehnyan ulon kalon inong nyan jiteubiet deungon peukayan inong lunte, laju jipeurab ubak aneuk muda nyang bangai nyan deungon reuncana nyang lisyek. inong nyan laju jiwa aneuk mudanyan sira jicom. deungon hana malee laju jipeugah, "uroenyoe ulon haroh lon bayeue kaoy lon, dan keu nyan ulon ka lueh lon peuseumah keureubeuen. nyang kheueh sabab jih ulon teubiet keulon mita gata, mangat gata tamakheun di rumoh lon. jinoenyoe ka meurumpok

ulon deungon gata! teupat eh ulon ka lon peungui deungon ija sipre nyang meubagoe wareuna nibak nanggro meuse, dan ka ulon boh minyeuk mangat bee mur, ceundana dan kayee mameh. jin-noe, jak geutanyoe ta meucumbu dan ta nekmata as-mara geutanyoe simalam suntok. lakoe ulon hana di rumoh, gobnyan teungoh geujak u teupat nyang jioh. meusajan gobnyan peng le that geuba, dan hana geuwoe lam dua aleuhad nyoe." meunan kheueh cara jih inong jeuhet nyan jirayu peumuda nyan deungon meubagoe rayuan nyang lumpah meumikat sampoe teugoda kheueh aneuk muda nyan. hana panyang pike laju jiseutot inong jeuhet nyan lagee leumo jihue bak teupat sie dan lagee ureueng hukoman nyang teungoh jiba mangat jiteurimong hukom nyang teukeubah keu ureueng bangai; sikeujab teuk aneuk panah teuma teupeubeusot lam ate jih. lagee cicem jipo jijak ubak taron, meunan kheueh peumuda nyan hana jisada bahwa nyawong jih teungoh teu ancam. le sababnyan, hai aneuk-aneuk lon, deungoe kheueh ulon. dan simak kheueh kheueh naseuhathasehat ulon. bek tapeubiyeu inong nyang lageenyan jipikat ate gata; dan bek tajak tamita jihnyan, sabab jihnyan ka jipeuhanco udeb ureueng agam nyang le. hana teu itong le jih nyang ka binasa sabab le inong nyan. meunyo teujak u rumoh inong nyan saban cit teucok rot nyang panek ubak mate. indonesia deungoe, keubijaksanaan jimeuhoi-meuhoi, hieumat teubeuat su. geudong dibuketbuket bak bineh jalan, dan nibak simpang-simpang rot raya. dipintoe geureubang, bak rot tamong u dalam banda, disinan kheueh teudeungoe su gobnyan. "hai, umat manusia, keu gata deungoe lon peugah; tieb-tieb insan nyang na di ateuh bumoe, simak kheueh nyang ulon tawok nyoe! gata nyang gohlom na peungalaman, meurunoe kheueh mangat na pikeran nyang tajam; dan gata nyang beubal, meurunoe kheueh mangat insaf. simak kheueh tutoe ulon nyoe, sabab banmandum teupat dan mutu jih get. nyang ulon peugah, beutoi banmandum, sabab ulon banci keu haba sulet. tutoe haba ulon juoe banmandum, hana saboh jih nyang na meupalet atawa salah. keu ureueng malem, haba ulon nyoe beutoi, nibak ureueng nyang areh, haba ulon nyan teupat. peuyuem kheueh naseuhath ulon leubeh nibak pirak nyang aseuli, dan leubeh pe-peunteng kheueh peungeutahuan leubeh nibak meuh aseuli. ulon kheueh hieumat, leubeh meuyuem nibak beulian; hana hase teubandeng deungon peue mantong nyang gata lakee. ulon kheueh hieumat; nibak ulon na peungeurtian, keubijaksanaan dan peungeutahuan. teuhoreumat tuhan nyang makna jih teubanci keu nyang jeuhet; dan ulon hana galak keusombongan dan keu angkohhan. ulon banci ubak tingkah laku nyang jeuhet dan tutoe haba tipee muslihat. ulon kheueh nyang bri ilham. dan ulon cit teuma nyang wajuud hainyan. ulon ceureudek dan teuga teuma. raja-raja ulon tulong mangat geupeujak buet peumeurintah, nyang mat kuasa ulon tulong jipeudong keuadalan. sabab jasa ulon, bubena ureueng rayeuk dan bubena bansawan jimat peurintah dan jipeubuet keuadalan. ulon lon gaseh keu awaknyan nyang galak keu ulon; nyang mita ulon teuma meurumpok ngon lon. nibak ulon

na teukeubah keukayaan meunan cit keuhoreumatan dan keumakmuran. nyang gata teume nibak ulon leubeh nibak meuh aseuli; dan leubeh meuyuem nibak pirak nyang aseuli. ulon kuseutot rot keuadelan, ulon bot langkah bak jalan keujujoran. ureueng nyang jigaseh keu ulon, ulon peujeuet keu ureueng kana; dan ulon peupeunoh rumoh jihnyan deungan hareuta beunda. ulon geucebta le tuhan sibago nyang keu phon, ulon kheueh hase karya gobnyan nyang paleng phon yoh masa ilee. ulon geupeuet yoh phon that jeuet jamen, yoh awaiphon, sigohlom bumoe geucebta. ulon lahe sigohlom teucebta samudera raya, sigohlom na asai mata ie. ulon lahe sigohlom gunong-gunong geupeudong le gobnyan, dan sigohlom buket-buket geupeudong lagee nyang kana, sigohlom tuhan geucebta bumoe dan padang-padang nyang kana, dan sigohlom geucebta sigumpai tanoh nyang paleng phon. ulon kalon keudroe watee langet geuleueng di manyang, dan cakrawala geureuntang di ateueh laot raya, yoh watee tuhan geukeubah di angkasa, dan geupeuhah asai-asai samudera, yoh watee gobnyan geupeurintah ubak ie laot mangat bek jilewat ubak bataih-bataih nyang kana. disinan pih na ulon teuka yoh watee lapek bumoe geukeubah sinan. ulon na di sampeng gobnyan sibago aneuek nyang paleng geusayang le gobnyan, tieb-tieb uroe ulon kheueh keubahgian gobnyan; sabe ulon meuen-meuen dikeue gobnyan. ulon meuseunang-seunang di ateueh bumoe gobnyan, dan meurasa bahgia lamkawan manusia. le sababnyan, deungoe kheueh ulon, hai ureueng muda! taturot kheueh peutunyok ulon, teuma gata bahgia. teurimong kheueh peutuwah dan jeuet kheueh keu ureueng bijaksana, bek kheueh gata anggab phui hainyan. mubahgia kheueh ureueng nyang jideungoe ulon nyang tieb-tieb uroe jiduek sira jipreh di babah pintoe rumoh ulon, dan meujaga-jaga nibak pintoe geureubang tempat tinggai lon. soe nyang meuteume ulon, ureueng nyan jiteume udeb, keu ureueng nyan tuhan geugalak. soe nyang hana meuteume deungan ulon, ureueng nyan ka jipeurugoe droe jih keudroe; ureueng nyang jibanci keu ulon, ureueng nyan jicinta keu mawot." indonesia hikeumat ka teupeudong rumoh, dan teupeudong ban tujuh boh tameh jih. gobnyan ka geusie beulatang peulara keu khanuri, geu ulah ie anggo dan jiesudia hidangan. peulayan-peulayan nyang inong jiyuejak mangat tamawok-mawok nibak tempat nyang manyang di banda, "soe-soe ureueng nyang hana peungalaman, cuba jak keunoe!" keu ureueng nyang hana meukai budoe, hikeumat jipeugah, "jak keunoe tamakheun peunajoh ulon dan ie anggo nyang ka ulon useuha. tinggai laju nyang bangai, mangat gata udeb bahgia. ta seutot kheueh jalan ureueng areh." meunyo ureueng nyang hana jitem teupeurunoe tatunyok laju salah jih, gobnyan teuma geupeukem gata. meunyo ureueng jeuhet gata beungeh, jihnyan jiteunak gata. bek gata rapa ureueng nyang hana jitem teupeurunoe, jihnyan jibanci keu gata. teuma meunyo ureueng bijaksana gata tunyok buet jih nyang salah, ureueng nyan teuma jihareuga gata. meunyo ureueng bijaksana gata jok naseuhah, ureueng nyan jeuet keu ureueng nyang leubeh bijaksana. dan meunyo ureueng

nyang taat ubak allah gata peurunoe, ieleume peungeutuhan ureueng nyan teuma meutamah. mangat jeuet keu ureueng bijaksana, nyang phon-phon that ureueng nyan haroh na rasa horeumat dan teumakot ubak tuhan. meunyo gata taturi nyang mahasuci, gata teuma meuteume peungeurtian. hikeumat teubri keu gata umu nyang panyang, meunyo hikeumat kana nibak gata, gata keudroe nyang meun-ton. teuma meunyo hikeumat gata tulak, gata keudroe teuma nyang rugoe. ureueng bangai na kheueh lagee inong teuga that meurapa nyang hana peungalaman dan hana jiteupeue malee. tempat jih na kheueh di babah pintoe rumoh jih atawa dibabah pintoe geureubang banda. nibak tempat nyan laju jita-wok ubak ureueng-ureueng nyang na liwat. ureueng nyang juoe ate jibujuk teuma, "jak keunoe tapioh, hai gata banmandum nyang gohlom na peungalaman!" dan keu ureueng nyang meukai budho gobnyan jipeugah, "jai that nyang teucua rasa jih mameh that, dan makheun sira teumusom-musom leubeh mangat lom." awaknyan ureueng jeuet keu eumpeun jihnyan hana jiteupeue bahwa ureueng nyang sawee jihnyan ka meuteume ajajih diteupat nyan; dan awak nyang ka jitamong u dalam rumoh jihnyan, jinonyoe kana didalam donya ureueng mate. indonesia nyoe kheueh peutuah-peutuah nabi sulaiman: aneuek nyang bijaksana na kheueh keubanggaan ureueng tuha; aneuek nyang bangai jipeususah ate ma jih. keukayaan nyang jiteume deungan cara jeuhet hana meuteume laba; teuma seubalek jih, keujujoran nyang ba ureueng nyan ubak keuseulamatan. tuhan hana geupeubiyeu ureueng jroh-jroh deuk; teuma gobnyan geupeuteun-peuteun ureueng jeuhet mangat jeuet di ureueng jeuhet nyan hana jiteume nyang jimeuheut. ureueng beu-oe teuma rhot ubak gasien; ureueng jumot teuma meuteume kaya. ureueng bijaksana jipeusapat hase panen trok bak museum, teuma ureueng nyang keureuja jih ji-eh mantong watee museum keumeukoh nyan teuka, teuma jiteuka malee keudroe jih keudroe. ureueng nyang jroh teuma meuteume beureukat. buet nyang keujam na teusom dilikot tutoe haba ureueng jeuhet. keunangan keu ureueng nyang jroh meuteume beureukat, teuma di ureueng jeuhet bagai that teupeutwoe. ureueng nyang carong, galak geuteurimong naseuhah; ureueng nyang mariet jih bangai teuma rhot bak sisat. ureueng nyang juoe udeb jih aman; ureueng nyang galak peungeut gob rhot jih keunong tipee. soe nyang som keubeunaran, ureueng nyan jiteuka keusosahan; soe nyang galak reekkeh deungan troh-trang, ureueng nyan kaji useuha keuseujah-teuraan. tutoe haba ureueng nyang get teupeujeuet udeb bahgia, teuma dilikot tutoe haba ureueng jeuhet na teusom ate nyang brok. deungke ngon banci asai teuka dakwa meudakwi; cinta dan gaseh sayang teupeu amphon mandum keusalahan. ureueng nyang pikeran jih tajam jimeututote deungan haba nyang bijaksana; teuma ureueng nyang bangai peureulee teupeu jra. ureueng nyang bijaksana geuhimpon ieleume peungeutuhan; teuma meunyo ureueng bangai jipeugah haba, jihnyan jikawe keuceulakaan. atra keukayaan teupeulindong si ureueng kaya, dan udeb meularat teupeuhanco si ureueng gasien. me-

unyoe teupeubuet nyang jroh, upah jih na kheueh udeb bahgia; meunyoe teupeubuet desya, akibat jih leubeuh le lom desya. soe nyang jipakoe keu nyang teuseugah ureueng nyan udeb seujahteura, soe nyang hantem jimeungaku buet nyang salah ureueng nyan kana lam bahya. ureueng nyang jisom bancia lam droe jih, ureueng nyan na kheueh teumipee. dan ureueng nyang jitabu fiteunah na kheueh bangai. seu-maken le teupegah haba, seu-maken le keumungke-nan jih meudesya; ureueng nyang hase jikeundali li-dah jih na kheueh ureueng bijaksana. tutoe haba ureueng nyang jroh lagee pirak aseuli; boh pikeran ureueng jeuhet hana meuyuem meubacut pi. tutoe haba ureueng nyang jroh, jeuet keu beureukat keu ureueng rame; teuma bangai ureueng nyang bangai sa-ban kajipoh droe jih keudroe. sabab beureukat tuhan mantong kheueh manusia hase kaya; keureuja nyang brat hana hase teutamah hareuta. ureueng bangai galak that jipeubuet salah; teuma ureueng bijaksana galak geumita hieumat. ureueng juJoe bagaih that meuteume peue nyang jikeuheundak; ureueng jeuhet meuteume peue nyang paleng jitakot. meunyoe an-gen badee teuka, teusampoh kheueh ureueng jeuhet; teuma ureueng juJoe teutab teugoh siumu masa. bek meuyue bak ureueng beu-oe, jihnyan jipeutunu ureueng nyang yue, lagee cuka jipeu seungke gigo atawa asab jipeu peudeh mata. horeumat kheueh tuhan, teuma gata udeb nyang treb; ureueng jeuhet mate sigohlom watee jih teuka. harapan ureueng nyang jroh mangat jihnyan udeb bahgia; harapan ureueng jeuhet shoh hana sapeuena. tuhan geulindong ureueng juJoe, teuma geujok bala keu ureueng nyang peubuet jeuhet. ureueng nyang juJoe udeb aman seujahteura; ureueng jeuhet hana tinggai nibak tanoh pusaka. ureueng juJoe jipeugah haba deungon tu-toe nyang bijaksana; ureueng jeuhet geucob babah jih. tutoe haba ureueng juJoe keubit leupie that ate; dan tutoe haba ureueng jeuhet sabe lam saket ate. tuhan geubanci keu ureueng nyang jipeuguna ceng nyang curang teuma gobnyan galak keu ureueng peuguna ceng nyang pas lom teupat. ureueng nyang sombong teuma geuhina; dan ureueng nyang miyueb ate teuma bijaksana. ureueng nyang jroh jitonton le keujjoran jih; ureueng galak meusulet teuma geupeuhanco deungon sulet jihnyan. meun-yoe teuhadap ubak mawot, hareuta beunda hanale meumakna; dan udeb gata teuma seulamat meun-yoe gata juJoe ate. rot udeb ureueng jroh jipeurata le keujjoran, teuma ureueng jeuhet jiba droe jih ubak keuhancoran. ureueng juJoe seulamat sabab ate ji-hnyan teupat; dan ureueng nyang hana jeuet teu-peucaya, meusuruek le waba jih keudroe. meun-yoe ureueng jeuhet nyang meuninggai donya, hara-pan ureueng nyan pih mate; meuharab ubak teu-naga droe keudroe hana meumakna. ureueng saleh teupeusie nibak susah; dan ureueng jeuhet meu-teume susah nyang hana teukira. tutoe haba ureueng jeuhet keubit binasa; dan hieumat ureueng nyang jroh hase teupeu seulamat. banda jeuet keurame me-unyoe ureueng juJoe meuteume reuzekei; dan rakyat meusurak geumbira meunyoe ureueng jeuhet nyang mate. reuseutu nibak ureueng juJoe teupeuceudah banda; dan tutoe haba ureueng jeuhet teupeureuloh

teuma. teuhina ureueng laen na kheueh buet nyang paleng bangai; ureueng nyang na akai budho, hana jipeugah haba sapeue. ureueng nyang ba haba angen ureueng nyan hana hase jisom rahsia, teuma ureueng nyang jeuet teupecaya ureueng nyan hase jisom rah-sia peukara. bansa hanco meunyoe hana peumim-pen nyang pimpén; seu-maken le peunaseuhat, seu-maken teujamin keuseulamatan. meujanji teubayeue utang ureueng laen nyan tanda jih teupeu teuka bala; leubeuh get hana teulibat lam hai nyan mangat jeuet aman. ureueng inong nyang jroh nyang budho meuteume keuhormatan; ureueng keujam jipeusapat keukayaan. ureueng nyang get ate keubit meu-untong droe keu-droe jih; teuma ureueng keujam keubit that rugoe keudroe jih nyan. untong ureueng jeuhet na kheueh untong nyang seumu; dan untong ureueng nyang jipeubuet nyang jroh na kheueh untong nyang seu-jati. soe nyang taat jipeubuet nyang get, ureueng nyan teuma udeb bahgia; soe nyang jimeukreueh keujipeubuet nyang jeuhet ureueng nyan teungoh ji-jak ubak mawot. tuhan geubanci that keu ureueng nyang ate jih jeuhet, teuma jigaseh that keu ureueng nyang udeb hana meucupa. ureueng jeuhet pasti meuteume hukoman; dan ureueng nyang jroh teuma seulamat. lagak sidroe ureueng inong nyang hana meubudoe saban lagee euncien meuh jipeusok bak idong bui. keuheundak ureueng nyang jroh sabe meuhase nyang jroh, teuma nyang hase jiharab le ureueng jeuhet na kheueh beungeh. na ureueng nyang galak that jijok seudeukah, teuma ureueng nyan meu-tamah kaya, teuma na ureueng nyang galak meuhe-mat, jihnyan meutamah gasien ngon papa. ureueng nyang le jitem jok meutamah keulimpahan, dan ureueng nyang galak jitulong teuma jitulong cit teuma. soe mantong ureueng nyang jitamom barang ureueng nyan teuma jikutok le ureueng laen, teuma ureueng nyang jipeubloe jihnyan teupujoe. soe nyang rajin jipeubuet nyang jroh, ureueng nyan teuma jigalak le ureueng rame; dan soe ureueng nyang galak jimita buet jeuhet, keu ureueng nyan jipeurhot le sosah. soe nyang meubangga deungon hareuta ureueng nyan luroh lagee on kayee tuha; dan ureueng nyang saleh meukeumang lagee tarok kayee muda. ureueng nyang jipeususah rumoh tangga jih, nibak ureueng nyan teuma gadoh peue-peue nyang na. ureueng ban-gai teuma jipeutimang ureueng bijaksana. ureueng nyang saleh teuma teujamin lam udeb jih; dan ureueng nyang bijaksana meutamah-tamah nyang seu-tot jihnyan. meunyoe lam donya nyoe ureueng nyang jroh pih meuteume balasan, ka pasti ureueng jeuhet dan meudesya meuteume hukoman. ureueng nyang cinta keu ieume peungeutahuan ureuengnyan galak meunyoe teuseugah; teuma ureueng nyang hana galak teuseugah na kheueh ureueng bangai. ureueng nyang jroh geugalak le tuhan, teuma ureueng nyang peuna nyang jeuhet jiteurimong hukoman. hana meusidroe ureueng pih nyang hase jaya deungon buet jeuhet; teuma ureueng juJoe teutab teuga, hana hase meuguncang. ureueng binoe nyang jroh na kheueh keubangga dan keubahgiaan lakoe jih, teuma peu-rumoh nyang jipeumalee lakoe na kheueh peunyakot tuleung nyang jikurek trok lam sum-sum. ureueng juJoe nyang jipike na kheueh hai-hai nyang get; seu-

dangkan ureueng jeuhet jireuncana tipee daya. tutoe haba ureueng jeuhet meumatekan; meunyoe tutoe haba ureueng juJoe teuba ubak seulamai. ureueng jeuhet reubah dan binasa deungon hana beukaih; teuma ureueng nyang jroh teutab teuga tron meutron. ureueng jipujoe sesuai deungon keubijaksanaan jihnyan; dan ureueng nyang teuhina sesuai teuma deungon bangai jih. leubeh get jeuet keu rakyat ubit asai na buet, nibak meulagak lagee ureueng rayeuk padahai kureuang peunajoh. ureueng nyang jroh jihiro keubeulatang peulara jih; teuma di ureueng jeuhet jiseksa. ureueng meutani nyang jimeubuet brat bak jihnyan le that peunajoh, teuma ureueng peuhabeh watee droe nibak hai-hai nyang hana meunguna na kheueh ureueng bangai. ureueng jeuhet meuheut meuteume keulaba nibak ureueng doraka; di ureueng get-get lagee bak kayee nyang hana putoh jimuboh. ureueng jeuhet meucarueh ngon tutoe haba nyang brok nyang ka jipeugah; di ureueng nyang get meuseuliseh nibak keupayahan. tieb-tieb ureueng meuteume keunaleueng nyang sesuai deungon tutoe haba dan buet jihnyan; maseng-maseng teubri upah nyang sesuai deungon peue nyang jipeubuet. ureueng bangai meurasa droe jih hantom na salah, teuma ureueng bijaksana jitem deungoe naseuhat. meunyoe ureueng bangai teusinggong, nibak watee nyan cit teuma jipeugah ate jih saket that; teuma ureueng bijaksana hana jipako meunyoe jirapa. deungon teupeugah nyang beuna, ureueng jipeudong keuadalan; deungon meusulet, ureueng jipeuna keuhana adelan. mariet nyang hana meuteuntee hase teupeuluka ate lagee teusok deungon peudeueng; dan tutoe haba nyang bijaksana lagee ubat nyang bagaih puleh wateenyan cit teuma. sulet teuma deuh lam sikleb mata, teuma tutoe haba nyang beutoi teutab na siumu masa. ureueng nyang jireuncana buet nyang jeuhet galak keu nyang hana ade; ureueng nyang jiuseuha bak buet nyang jroh teuma meuteume bagia. ureueng nyang jroh hana teuma keunong musibah; dan di ureueng jeuhet sabe lam keuadaan sosah. tuhan geubanci keu ureueng nyang galak meusulet; teuma gobnyan galak keu ureueng nyang juJoe. ureueng bijaksana hana geupeuleumah droe teleume peungeutahuan jih; teuma di ureueng bangai jipeugah-peugah haijih nyang bangai nyan. sabab keureuja brat hana jitem meunyeurah sampoe ureueng nyan hase jimat kuasa; meunyoe beu-o teupaksa ureueng nyan jeuet keuhamba. rasa khawate teupeutah seumangat, teuma tutoe haba nyang ramah nyan kheueh nyang peurayeuk ate. ureueng nyang jroh leubeh meu-untung nibak teutangga jihnyan; ureueng jeuhet sisat sabab buet nyang jeuhet nyang jikeureuja. meunyoe beu-o-beu-o hana hase peue nyang teucita-cita lam ate; deungon meukeureuja brat ureueng nyan jiteume keukayaan. ureueng nyang jiseutot bak jalan nyang beuna teuma udeb bagia; dan ureueng nyang jiseutot nibak jalan nyang jeuhet jipeukeu ubak mawot. aneuek nyang areh jisimak meunyoe ureueng syiek jih teungoh bri peutuah; teuma di ureueng sombong hanjitem teurimong nyang meunyoe teutam. tutoe haba ureueng nyang jroh jipeuteuka laba; teuma ureueng nyang hana juJoe galak ubak buet nyang keujam. ureueng nyang ate-ate nibak tutoe

haba meuteume aman lam udeb jih; teuma ureueng nyang jipeugah haba ban galak droe teuma rhot ubak malang. ureueng beu-oe le that nyang jilakee teuma hana meusapeue pih nyang na jiteume; teuma ureueng nyang keureuja brat teutab jiteume peue-peue nyang geukeuheundaki. ureueng nyang juJoe jibanci that keu haba sulet; tingkah laku ureueng jeuhet keubit malee dan cilaka. keujujoran teulindong keu ureueng nyang udeb geuh teupat; jeuhet jipeuhanco ureueng nyang meudesya. na ureueng nyang meulagak kaya, padahai hana meuhareuta; na ureueng nyang meulagak gasien, padahai kaya that. ureueng kaya haroh jipeuteubiet peng mangat udeb jih aman; teuma ureueng gasien beubaih nibak ancaman. ureueng nyang malem lagee cahya nyang hu trang; teuma di ureueng jeuhet lagee panyot lon hana meucahya. ureueng nyang angkoh nyang jipeuhase na kheueh dakwa-dakwi; ureueng nyang bijaksana geutem teurimong ajaran. keukayaan nyang jiteume deungon mudah bagaih meukureueng; teuma hareuta nyang jipeusapat bacut deumi bacut bagaih meutamah le. meunyoe harapan hana teupeupeunoh, baten hase meurana; meunyoe nyang teukeuheundak teukabui, ate keubit bagia. ureueng nyang anggab enteng ajaran tuhan, jipeuceulaka droe jih keudroe; teuma ureueng nyang taat ubak hukum po teu allah teuma meuteume upah. ajaran ureueng bijaksana lagee mata keubahagiaa; meunyoe jiteuka ancaman, ajaran nyan nyang peuseulamat. ureueng meubudoe basa teuma teusanjong; teuma ureueng nyang hana jeuet teupeucaya meuteume udeb susah. ureueng nyang bijaksana seumike ilee sigohlom jipeubuet; ureueng bangai jipeugah-peugah keuhai jih nyang bangai. ureueng nyang teuyuejak nyang hana ate-ate jipeuteuka bala; teuma utosan nyang hase teupeucaya teujamin jihnyan meuhase. ureueng nyang hanjitem teudidek jihnyan jeuet keu ureueng gasien dan hina; teuma ureueng nyang jideungoe naseuhat jihoreumat le gob. alangkah get jih meuteume peue nyang jikeuheundak! ureueng bangai hanjitem meupaleng nibak buet jeuhet. ureueng nyang meungon ngon ureueng bijaksana, teuma jeuet keu ureueng bijaksana; teuma ureueng nyang jimeurakan deungon ureueng bangai, teuma meuteume bala. ureueng meudesya sabe jitiyeub-tiyeub le nyang malang teuma ureueng nyang get sabe meuteume keubahagiaa. ureueng nyang get jipeuwareh keukayaan keu aneuek cucoe jih; teuma keukayaan ureueng nyang meudesya teukeubah keu ureueng nyang juJoe udeb jih. tanoh nyang shoh jeuet meuhase peunajoh nyang le keu ureueng gasien; teuma le sabab hana ade jeuet keusabab tanoh nyan hana teupeubuet le. hana teutem poh aneuek, saban cit hana tegaseh keu aneuek nyan; meunyoe cinta, haroh tajeuet tapoh aneuek nyan. ureueng nyang get sabe lam keuadaan seb, teuma ureueng jeuhet sabe lam keuadaan kureung. rumoh tangga jipeudong le keubijaksanaan ureueng inong, teuma jipeureuloh le keubangai jih nyan keudroe. ureueng nyang juJoe teumakot keu tuhan allah; dan ureueng nyang udeb jih hana juJoe jihina gobnyan. sabab sombong jih, di ureueng bangai galak that jipeurayeuk droe; dan ureueng bijaksana teuma geulindong deungon tutoe haba geuh keudroe. me-

unyoé hana leumo, hase dibilang hana sapeuena; de-
ungon teunaga leumo, hase di blang nyang teukoh
teuma meulimpah. saksi nyang juoe sabe jipeugah
haba nyang beuna; dan saksi nyang hana hase teupeu-
caya pajan mantong jipeugah haba duseuta. ureueng
sombong hana jeuet keu ureueng bijaksana, teuma
ureueng carong jimeurunoe deungon mudah. bek
kheueh meurakan deungon ureueng bangai; hana
nyang hase jipeurunoe keu gata. ureueng bijaksana
geuteupeue pakriban haroh meutindak, dan ureueng
bangai keunong peungeut sabab bangai jih keudroe.
ureueng bangai hana jipako peu kheueh desya jih ge-
upeu amphon atawa hana; dan ureueng nyang jroh
meuheut that beu geupeu amphon desya gobnyan.
saket ngon seunang teukeubah didalam kalbu; ure-
ueng laen hana jiteume rasa meusajan teuma. ru-
moh ureueng nyang jroh teutab kong dan kukoihi;
dan rumoh ureueng jeuhet teuma reuloh. na rot ueh
nyang deuh jih teupat, teuma akhe jih rot nyan teujak
ubak mawot. lam kem-kem mungken na teumo; dan
geumbira hase keuneulheuh deungon keuseudehan.
ureueng jeuhet teuma jipot keudroe boh nibak hase
jeuhet jih nyan, dan ureueng nyang jroh jipot teuma
boh nyang jroh nyan. ureueng bangai jipeucaya ubak
tieb-tieb tutoe haba gob, dan ureueng nyang jroh
ngon bijaksana jimeubuet deungon ate-ate. ureueng
meubudoe basa sabe lam waspada dan geupeujoh
nibak buet nyang jeuhet, teuma di ureueng bangai
bagaih that ji-ek pitam, laju jirasa droe jih aman.
ureueng nyang galak keu beungeh jimeubuet ban-
gai; dan ureueng nyang bijaksana jimeusikeub saba.
ureueng nyang hana peungalaman teuma jeuet keu
ureueng bangai; dan ureueng bijaksana teuma meu-
tamah ieleume peungeutahuan. ureueng jeuhet jitun-
dok ubak ureueng nyang teupat ate, keu jilakee man-
gat jihnyan geutem gaseh. ureueng gasien hana ji-
galak bahpi le rakan-rakan jih keudroe; teuma me-
unyoé ureueng kaya rame that-that sababat gobnyan.
soemantong ureueng nyang jihina ureueng laen, nyan
ka jipeubuet desya; dan soe nyang jroh ate ubak
ureueng gasien, teuma mubahgia. soe nyang peug-
ot nyang jroh, teuma teupeucaya dan meuteume
horeumat; dan soe nyang reuncana buet nyang jeuhet
ureueng nyan kana di jalan nyang sisat. nibak tieb-
tieb useuha na laba; deungon tutoe haba nyang hana
meuasoe sampoe ureueng laen rhot bak gasien. ure-
ueng bijaksana jipujoe sabab keubijaksanaan gob-
nyan; dan ureueng bangai meusyehu teuma sabab
bangai jih nyan. meunyoé na sidroe saksi jipeugah
nyang beuna, ureueng nyan ka geupeuseumat nya-
wong; meunyoé gobnyan geumeusulet, gobnyan ka
meukhianat ubak seusabe keudroe-droe. ureueng
nyang taqwa ubak tuhan ureueng nyan jiteuka teun-
tram, dan keuluwarga gobnyan teuma na peulindon-
gan. taqwa ubak tuhan na kheueh panghulee keubah-
giaan; dan rot keu teupeusie nibak mate. meusyehu
raja na nibak jeumeulah rakyat gobnyan; meunyoé
hana rakyat, po raja hana hase geumeukuasa. ure-
ueng bijaksana hana bagaih beungeh; dan ureueng
bangai hana hase jipeuteun droe. ate nyang man-
gat tuboh pih seuhah; ate nyang kueuh lagee peun-
yakét nyang jiba mate. soe nyang peubuet nyang
jroh keu ureueng gasien, ureueng nyan ka jihoreumat

ubak po teu allah; dan soe nyang teugom ureueng
leumoh, saban cit ureueng nyan ka jihina peuncebta
gobnyan. ureueng jeuhet binasa sabab buet jih nyang
jeuhet, dan ureueng jroh teulindong sabab keuhai ju-
joe jihnyan. hikeumat sabe na nibak ureueng nyang
meubudoe; teuma teutindeeh nibak pikeran ure-
ueng bangai. keuadalan dan keubaiekan teubeut
martabat bansa, teuma deungon desya sampoe bansa
nyan jeuet keuhina. raja galak keu peugawee nyang
carong; teuma gobnyan hana geubeungeh keu pe-
ugawee nyang hana hase jipeujak tugaih. deungon
teujaweueb nyang ramah, beungeh nyang kana nyan
hase reuda; meunyoé teujaweueb nyang peudeh teu-
peubeudoh beungeh nyang hana teukira. tutoe haba
ureueng bijak trok bak peungeutahuan meunarek
ate; teuma tutoe haba ureueng bangai asoe jih na
kheueh keubodohan. tuhan geungieng banmandum
nyang teujadi di jeueb-jeueb teumpat; gobnyan geu-
peurati banmandum nyang get dan nyang jeuhet. tu-
toe haba nyang jroh meutamah seumangat, dan tutoe
haba nyang peudeh teupeuleumoh hasrat. ureueng
bangai jipeujayah naseuhat ureueng syiek droe jih,
dan di ureueng bijak geudeungoe meunyoé teuseu-
gah. di rumoh ureueng nyang jroh na hareuta nyang
le; dan keukayaan ureueng jeuhet leunyah deungon
beuncana. tutoe haba ureueng bijaksana peunoh de-
ungon ieleume peungeutahuan, teuma pikeran ure-
ueng bangai hana nyang lageenyan. tuhan geuteu-
rimong doa ureueng jroh, teuma gobnyan geubanci
ubak keureubeuen ureueng jeuhet. tuhan geubanci
ubak cara udeb ureueng doraka, teuma gobnyan geu-
gaseh keu ureueng nyang jiseuha jipeubuet keuhe-
undak gobnyan. ureueng nyang jipeubuet nyang
jeuhet teuma geuseksa; dan ureueng nyang hana
jitem teuteugah teuma mate. tuhan geuteupeue
donya ureueng mate dan seulok beulok jih; panena
mungken pikeran manusia jisom nibak gobnyan?
ureueng nyang galak jihina gob ureueng nyan hana
galak teu teugah; jihnyan beu-oe jilakee naseuhah
ubak ureueng bijaksana. meunyoé ate sabe geumbira
muka ureueng nyan meucahya; teuma meunyoé ate
nyang seudeh seumangat hase patah. ureueng bi-
jaksana geujak mita ieleume peungeutahuan; teuma
ureueng bangai laloe deungon keubodohan. ureueng
muram haroh jimeujuang lam udeb jih, teuma ure-
ueng nyang riang sabe dalam bahgia. leueh get bacut
hareuta geutakot ubak tuhan, nibak hareuta nyang
le teuma sabe lam keuadaan gundah. leueh get pa-
joh gulee teuma meusigoe deungon cinta gaseh, nibak
teupajoh uengkot sie nyang mangat teuma meusajan
deungon rasa banci. ureueng nyang bagaih beungeh
nibak ureueng nyan bagaih that jipeudong dakwa,
teuma ureueng nyang saba nibak ureueng nyan jiba
dame. ureueng beu-oe sabe lam keuadaan susah;
teuma di ureueng juoe hana geurasa sulet. aneuek
nyang bijaksana, keubit that galak ate ureueng syiek
jih; teuma aneuek nyang bangai hana jihareuga keu
ma jih. bangai na kheueh keuseunangan keu ureueng
beubal, di ureueng bijaksana udeb geuh teupat. re-
uncana hase gagai, meunyoé hana teupike-pike; dan
reuncana meuhase, meunyoé le ureueng bii naseuhah.
tutoe haba nyang teupeugah paih bak watee jih, teu-
peuteuka suka cita. ureueng nyang bijaksana geuseu-

tot rot nyang meusingeuh nyang teujak ubak udeb; kon rot nyang meutreun nyang teutuju ubak mate. tuhan geureuloh rumah ureueng nyang manyang ate, teuma tanoh atra sidroe inong balee teutab geulindong. tuhan geubanci that ubak reuncana nyang jeuhet; teuma tutoe haba nyang jroh keubit galak that ate gobnyan. soe nyang mita laba nyang hana haleue, ureueng nyan ka jipeuhanco keuluwarga jih keudroe. dan nyang banci ubak peng sugok, ureueng nyan teuma udeb bahgia. ureueng nyang jroh jipike ilee meunyoe jimeututoe; dan di ureueng jeuhet jipeugah haba hai-hai nyang kutoe. tuhan geudeungoe meunyoe ureueng jroh nyang meudoa, teuma gobnyan hana geupako keu ureueng doraka. ruman nyang geumbira keubit teupeu mangat ate, dan haba nyang jroh keubit teupeu seugar jiwa. ureueng nyang jipako ubak teuseugah ureueng nyan na kheueh jitamong ubak ureueng nyang bijaksana. ureueng nyang hana jitem deungoe naseuhat, ureueng nyang lageenyan hana jihareuga keu droe jih keudroe; dan ureueng nyang jitem teurimong meunyoe teuseugah, ureueng nyan jeuet keu ureueng nyang meubudoe basa. teumakot ubak tuhan na kheueh dasai peundidekan nyang jroh; dan keuhormatan awai nibak keumiyueb ate. manusia jeuet jipeugot reuncana, teuma po teu allah nyang bri keuputusan. tieb-tieb buet ureueng nyan mungkin get nibak pandangan jih keudroe, teuma tuhan kheueh nyang nilai meukeusut ate ureueng nyan. peucaya kheueh ubak tuhan banmandum reuncana gata, teuma gata meuhase peue mantong nyang gata reuncana. peue mantong nyang geupeugot le tuhan na tujuan jih; dan tujuan nibak ureueng jeuhet na kheueh keubinaan. banmandum ureueng sombong geubanci le tuhan; gobnyan hana geupeubiyeu awaknyan teuhinda nibak hukuman. ureueng nyang seutia ubak po teu allah ureueng nyan meuteume peungamphonan; dan ureueng nyang taqwa teuma teuhinda nibak bandum nyang jeuhet. meunyoe gata hase tapeugalak ate tuhan, musoh-musoh gata teuma geupeujeuet keurakan gata. leubeh get meuhase bacut deungon cara juJoe, nibak meupeng le deungon cara hana ade. manusia hase jipeugot reuncana, teuma nyang peuteuntee jalan udeb ureueng nyan na kheueh po teu allah. raja geuteurimong kuasa nibak po teu allah, le nyan, gobnyan hana salah tieb-tieb keuputusan gobnyan. tuhan geumeuharab manusia nyan juJoe meunyoe jimeuniaga, meunan cit lam hai ukoran dan timbangan. nibak ureueng mat kuasa, meubuet jeuhet na kheueh saboh hai nyang paleng kutoe, sabab peurintah gobnyan teuga ngon kong kareuna ade. keuteuranan nyang beutoi keubit that galak nibak peunguasa, dan gobnyan geugaseh keu ureueng nyang jipeubuet juJoe. meunyoe raja ka beungeh na kheueh lagee saboh haba keuhai hukuman mate; teuma di ureueng nyang bijaksana jiseuha jipeureuda. keuhai jroh ate raja na kheueh geupeuteuka udeb sejahteura, lagee awan jipeutron ujeuen meunyoe museum uroe. meuteume hikeumat leubeh get nibak meuteume meuh; meuteume ieleume peungeutahan leubeh meuyuem nibak meuteume pirak. ureueng jroh-jroh jipeujioh droe nibak ureueng jeuhet; dan ureueng nyang jipakoe cari udeb jih, jilindong droe jih keudroe. ure-

ueng sombong meuakibat ubak keuhancoran; dan keuangkohan meuakibat ubak reuloh. leubeh get miyueb ate dan hana meuhareuta, nibak teuseutot deungon ureueng sombong dan teunekmat hareuta nyang jireupah le awaknyan. peurati kheueh peue nyang teupeurunoe keu gata, teuma gata meuteume nyang paleng jroh. peucaya kheueh ubak tuhan, teuma gata bahgia. ureueng bijaksana teuturi nibak pikeran jih nyang tajam; cara jih peugah haba nyang meunarek, dan tutoe haba jih nyang keubit meunarek ate. keubijaksanaan na kheueh pangkai keubahgian udeb ureueng meubudoe; dan ureueng bangai jiseksa le bangai jihnyan keudroe. pikeran ureueng meubudoe tutoe haba jih bijaksana, dan nyang peurnoe seumakan teupeuyaken teuma. nariet nyang ramah lagee meulisan; mameh nyum jih dan teupeuseuhat badan jih. na rot ueh nyang leumah jih sulu, teuma akhe jih rot ueh nyang teujak ubak mawot. meuheut keuneuk seumajoh teudorong ureueng jimeu useuha; sabab pruet droe jih, gobnyan teupaksa meukeureuja. ureueng jeuhet ji useuha keu jipeuceulaka seusabe keudroe-droe; tutoe haba jih jeuhet lagee ngeue apui nyang hu meutaga. ureueng nyang curang jipeuteuka dakwa-dakwi; tukang peusuna hase jipeucra sahabat nyang krab. ureueng keujam jipeungot bubena rakan-rakan jih, dan jiba awaknyan u dalam bahaya. ate-ate kheueh keu ureueng nyang jiseunyum dan jimeuen mata, ureueng nyan teungoh jireuncana buet nyang jeuhet didalam ate jih. ureueng nyang juJoe geu anugeurah umu nyang panyang; ok puteh gobnyan lagee mahkota nyang geumilang cahya. hana bagaih beungeh leubeh jroh nibak na kuasa; teukuasa droe leubeh jroh nibak teukuasa bansa. mangat jiteupeue naseb, manusia jitiek undi, teuma nyang peuteuntee jaweub jih na kheueh tuhan keudroe. leubeh get saboh sueb bu teuma na keuteuntranman, nibak peunajoh nyang mangat-mangat teuma meudakwa hana reuda. namiet nyang carong teuma meukuasa ateuh aneuk nyang jipeugot malee; dan jiteurimong warisan saban deungon syedara-syedara aneuk nyan. meuh dan pirak teu-ujoe deungon apui, teuma ate manusia geu-ujoe le tuhan. ureueng jeuhet jiseutot saran nyang jipeugah le ureueng jeuhet, dan ureueng meusulet galak that jideungoe haba feusuna. soe nyang hina ureueng gasien ngon papa, saban cit jihnyan ka jihina po teu allah nyang cebta jihnyan. soe nyang geumbira ateuh ureueng nyan keunong bala, ureueng nyan pasti meuteume hukuman. keubanggaan ureueng nyang ka tuha na kheueh aneuk cucoe gobnyan; keubanggaan aneuk miet na kheueh ureueng syiek jih. ureueng teuhoreumat hana patot jipeugah haba sulet; dan ureueng bangai hana pantaih jipeugah haba nyang meuhareuga. na nyang sangka deungon peng sugok hase jipeubuet buet nyang ajaeb; deungon peng sugok peue mantong hase teulaksana. meunyoe na meuheut jigalak le gob, peumeuah kheueh salah nyang jipeubuet le gob. teupeubudoh-beudoh keusalahan nyan teupeuputoh meusahabat. sigoe keunong teugah leubeh meumakna keu ureueng nyang meubudoe nibak sireutoih goe keunong seunuet keu ureueng bangai. ureueng jeuhet sabe jipeuna buet nyang jeuhet, teuma mawot nyang teuka ateuh jihnyan sibagoe utosan

nyang keujam. leubeh get meurumpok deungon nang cagee nyang gadoh aneuek jih, nibak meurumpok ngon ureueng bangai nyang gabuek sabe deungon bangai jih nyan. soe nyang balaih nyang get deungon nyang jeuhet, nyang jeuhet pih hana hase teupeuteubiet nibak rumah gobnyan. teupeu phon meudakwa na kheueh lagee ureueng peulah babah ie; sabab nyan surot kheueh sigohlom meudakwa nyan teupeuphon. tuhan geubanci keu ureueng nyang peubeutoi ureueng doraka, dan nyang peusalah ureueng nyang hana meusalah. sia-sia mantong ureueng bangai jipeuhabeh peng jak mita hikeumat, sabab jihnyan hana pikeran nyang seuhet. sidroe sahabat sabe seutia keu rakan, teuma sidroe syedara meusajan jitunggong keuosahan. ureueng nyang meujanji beujeuet jihnyan keu ureueng nyang tanggong utang rakan jih na kheueh ureueng nyang bangai. ureueng nyang galak keudesya, ureueng nyan galak jimeudakwa. ureueng nyang raya babah bak peugah haba, na kheueh jimita keuhancoran. sidroe ureueng teumipee hana mubahgia, dan ureueng deungon lidah meucabeueng meuteume bala. meunyoe meuteume aneuek nyang bangai nyan na kheueh keuseudehan; dan jeuet keu ureueng syiek nyang bangai hana teubri keugeumbiraan. ate nyang geumbira na kheueh mangat seuhet tuboh; teuma ate nyang sabe meurana na kheueh keu teupeu patah seumangat. sidroe hakem nyang jeuhet, jiteurimong sugok seucara rahsia dan nibak hakem nyang lagee nyan hana jipeujak keuadalan. tujuan ureueng nyang na peungeurtian na kheueh keu meuteume hikeumat, teuma tujuan ureueng bangai hana meuteuntee. aneuek nyang bangai jipeususah ureueng syiek jih, dan jipeuseudeh ate ma jih. hana patot teupeurhot deunda keu ureueng nyang hana meusalah; dan hana teuma patot teutindeeh keu ureueng nyang jroh budo. ureueng nyang tajam pikeran jih, hana le jipeugah haba. ureueng nyang bijaksana sabe lam tunang. sidroe ureueng bangai pih jipike carong dan bijaksana meunyoe jihnyan jipeuseungab droe sira jitob babah hana jitem peugah haba. ureueng nyang ji peuaseng droe nibak ureueng laen ureueng nyan nyang jipike na kheueh keudroe jih mantong; asai na meuteume peundapat ureueng laen teutab jibantan. ureueng bangai hana galak teubri peungeurtian; nyang jimeuheut na kheueh jipeugah asoe ate jih mantong. desya dan hina jijak meu jandreng; meunyoe ka keunong ceula, ka pasti keunong hina. haba gob jeuet keu sumber keubijaksanaan, lhok lagee samudera raya, leupiee lagee ie nyang ile. hana get teudong blaih ureueng doraka dan teutindeeh ureueng nyang hana salah. meunyoe ureueng bangai jipeugah haba, jihnyan jipeuphon gara-gara mangat meudakwa dan jilakee seunnet. tutoe haba ureueng bangai jipeuhanco droe jih keudroe; jicarueh droe deungon haba jih. feusuna mangat rasa jih; le ureueng laen galak jiuuet. ureueng nyang lalee nibak tugaih jih saban brok jih deungon ureueng nyang galak peurusak. tuhan nyan lagee meunara nyang kukoihi; keunan kheueh ureueng juoe jijak dan meuteume tempat nyang aman. teuma le ureueng kaya jisangka hareuta jih kheueh nyang hase peuseulamat droe jih lagee binteh beuton nyang manyang dan kukoihi jikeulileng

banda. ureueng nyang sombong teuma reubah, dan ureueng nyang miyueb ate teuma jihoreumati. teu-jaweueb sigohlom teudeungoe na kheueh nyang bangai dan teucila. le meulakee keu-udeb, manusia hase jitunggong peundeuritaan; gadoh keuheundak nyan, gadoh teuma peue mantong harapan. ureueng meubudoe sabe graih keu ieume peungeutahuan; dan ureueng bijaksana sabe meuharab ubak ajaran. hadiah teubuka jalan dan teu intat ureueng ubak ureueng-ureueng rayeuk. nyang mariet phon that nibak sidang peungadalan sabe deuh jih beutoi, teuma peue nyang jipeugah nyan teu-ujoe meunyoe ka trok lawan. deungon undian, meudakwa nyan hase teupioh, dan meumoso deungon peunguasa pih hase teupeureuda. syedara nyang ka teupeusaket ate jih leubeh payah teupeutoe nibak banda nyang kukoihi; meudakwa lagee palang geureubang banda nyang meukuta. keu tutoe haba nyang ka jipeugah na akibat nyang haroh jirasa. lidah na kuasa keu jipeuseulamat udeb atawa teupeurusak nyan; ureueng laen haroh jitunggong akibat nyang ka jipeugah nyan. ureueng nyang ka jimeukawen, nibak jihnyan na untong; peurumoh na kheueh karonya tuhan. ureueng gasien jimeulakee deungon sopan; di ureueng kaya geujaweueb deungon su nyang meudhot. na sahabat nyang hana seutia, dan na teuma nyang leubeh rab nibak syedara. leubeh get ureueng gasien nyang teupat udeb jih, nibak ureueng bangai nyang galak jimeusulet. bahpi jeumot that, meunyoe hana ieume peungeutahuan nyang lagee nyan hana meuguna; ureueng nyang buet jih meudab-dab jai that jipeubuet salah. manusia jipeurugoe droe jih keudroe le sabab bangai jihnyan, oh luehnyan jipeusalah tuhan atueh hai nyan. ureueng kaya, rakan jihnyan sabe meutamah; teuma di ureueng gasien sabe jitinggai le rakan droe jih. ureueng nyang meusulet di kanto peungadalan, hana teuma tinggai le hukuman. tieb-tieb ureueng jiuseuha jicok ate ureueng peunteng; dan banmandum ureueng jitem meurakan ngon ureueng dermawan. ureueng gasien jipeujayeh le syedara jih, peuteuk lom le rakan jihnyan. pakriban mantong jihnyan jiuseuha, jihnyan hana hase jipakat awaknyan. soe nyang tiyeub ieume peungeutahuan, ureueng nyan tanda jigaseh keudroe jihnyan; dan soe mantong nyang ji-ingat ubak peue nyang ka jimeurunoe, ureueng nyan teuma mubahgia. ureueng nyang meusulet di kanto peungadalan pasti teuma geuhukom dan geupeubinasa. hana patot sidroe ureueng bangai udeb jih meuwah, dan hana teuma patot sidroe namiet jijok peurintah keu peunguasa. ureueng bijaksana hase jipeuteun meunyoe jihnyan beungeh. ureuengnyan teupujoe sabab hana jipakoe gob laen nyang salah atueh jihnyan. meunyoe raja beungeh lagee su singa teuma-uem; dan meunyoe raja get lagee ie mbon nyang basah nibak meubago rupa sinaman. aneuek nyang bangai jipeuhanco ureueng syiek jih. peurumoh nyang galak meukrob-krob lagee ie meutreb-treb nyang hana putoh-putoh. rumoh dan hareuta hase meuteume nibak ureueng syiek, teuma peurumoh nyang bijaksana na kheueh karonya nibak tuhan. meuayeum-ayeum teupeujeuet ureueng jiteungget meusineunya, dan akhe jih ureueng beu-oe nyan ka jiteuka deuk. ureueng nyang

taat ubak peurintah allah teuma sealamat, dan ureueng nyang hana jihareuga keu peurintah nyan teuma mate. ureueng nyang tulong ureueng gasien saban lagee ureueng bri pinjaman ubak tuhan; singoh tuhan geubalaih teuma. peuteureuteb laju aneuek gata simantong na harapan; meunyo hana, saban cit gata meuharab ubak keuhancoran. bah kheueh ureueng nyang bagaih beungeh jirasa keudroe aki-bat jih. meunyo gata tatulong jihnyan, gata teuma tatamah beungeh gobnyan. meunyo gata galak meurunoe dan tadeungoe naseuhat, singoh gata jeuet keu ureueng nyang meuhikeumat. manusia le that reuncana, teuma keuputosan tuhan kheueh nyang teulaksana. sifeuet nyang teuharab nibak sidroe-droe ureueng na kheueh keuseutiaan. leubeh get jeuet keu ureueng gasien nibak jeuet keu ureueng sulet. horeumat kheueh tuhan, udeb gata teuma mubaghia; gata teuma puih dan beubaih nibak bala. na ureueng nyang beu-oe nyang bit-bit beu-oe; jisuleueng peunajoh lam babah jih mantong hanjitem. meunyo ureueng sombong teuhukom, ureueng nyang hana peungalaman jeuet keu peulajaran. meunyo ureueng meubudoe teu seugah gobnyan teuma meutamah bijaksana. aneuek nyang ji ienanya dan ji use ureueng syiek jih, na kheueh aneuek nyang that-that jipeumalee dan aneuek doraka. aneuek ulon, meunyo gata hana tatem meurunoe le, gata teuma tuwoe deungon peue nyang ka gata meurunoe. ureueng nyang jitem bri keusaksian nyang peuleusu, saban cit jihnyan ka jipeubeuah hangeuk; peuceulaka ureueng laen, mangat rasajih nibak ureueng jeuhet. ureueng bangai nyang manyang ate pasti teupoh. sabab le ie kreueh sampoe jeuet ureueng laen kureueng aja dan karu deungon kiroh. bangai that ureueng nyang jieb ie nyan sampoe mabok. meunyo raja jiteuka murka lagee su singa teuma-uem; nyang peubeudoh beungeh gobnyan saban cit jipeuceulaka droe jih keudroe. teuma ureueng bangai kheueh nyang galak jimeudakwa; sikeueb nyang teupujoe na kheueh jipeujioh nibak meudakwa. ureueng meutani nyang beu-oe hana jikak buet u blang oh trok bak watee; akhe jih oh ka trok musem keumeukoh jihnyan hana hase meusapeue pih. asoe ate ureueng ibarat iemon nyang lhok; teuma hase jiseub le ureueng nyang na peungeurtian. jai that ureueng nyang meungaku droe jih na kheueh rakan, teuma nyang beutoi-beutoi seutia payah that meuteume. aneuek-aneuek manyak meu-untong that meunyo na ureueng syiek nyang jroh dan udeb nyang teupat. meunyo raja geuduek nibak keurusi peungadelan, gobnyan hase geukalon banmandum nyang jeuhet. peuna ureueng nyang hase jipeugah, "ate ulon gleh, ulon ka beubaih nibak desya?" timbangan dan ukoran nyang curang atranyan hana geuharok le tuhan. nibak buet aneuek hase tateupeue peue kheueh pi-e jihnyan get atawa teupat. geulinyueng mangat teudeungoe dan mata mangat keumalon, banduanyan tuhan kheueh nyang cebta. ureueng nyang teuga that eh rhot jih ubak gasien. dan ureueng nyang bit-bit jikakbuet nibak ureueng nyan jai that peunajoh. ureueng mublo sabe apoh-apah keuhai meuhai yuem. teuma oh ka ltheueh jibloe, gobnyan banga ateueh yuem nyang jiteume. tutoe haba nyang meungandong ieleume peungeu-

tahuan, leubeh meuyuem nibak meuh dan beulian. soe nyang jitem tanggung utang ureueng laen, hana salah teucok atra ureueng nyan sibagoe jaminan janji ureueng nyan. hareuta hase teupeunget gob, phonphon that lazat rasa jih, teuma oh ltheuhnyan baro kheueh teurasa lagee rasa batee keurieke. reuncana meuhase deungon na peutimbangan; le sababnyan, bek kheueh meujuang deungon hana reuncana nyang masak. ureueng nyang galak jipuat ureueng laen, ureueng nyan hana hase jisom rahsia; dan bek kheueh tameungon deungon ureueng nyang le that jipeugah haba. ureueng nyang seurapa ngon jikutok ureueng syiek jih, udeb ureueng nyan teuma leunyab saban lagee panyot nyang lon nibak malam nyang seupot buta. atra nyang phon-phon mudah jiteume dan bagaih, akhe jih teunyata kon beureukat. bek kheueh tabalaih keujeuhetan deungon keujeuhetan; peucaya kheueh ubak tuhan, gobnyan kheueh nyang tulong gata. neuraca dan batee na kheueh ceng nyang curang hai nyang lageenyan hana geugalak le tuhan. tuhan ka geupeuteuntee rot udeb manusia di ateuh donya nyoe; nyang kheueh sabab jih manusia hana hase jimuphom rot udeb jih keudroe. pike kheueh beujroh-jroh sigohlom teubri keureubeuen ubak tuhan. jeuet mantong gata meunyeusai oh uroe dudoe. raja nyang bijaksana geuteupeue soe ureueng nyang jeuhet; gobnyan teuma geuhukom awaknyan hana geubri amphon. ate nurani manusia na kheueh trang nibak tuhan, nyang teusentee bansaboh baten manusia. meunyo raja geupeurintah deungon gaseh, juJoe, dan ade, deungon nyan rajanyan teutab meukuasa. ureueng muda teukagum sabab teunaga jihnyan, dan ureueng tuha teuhoreumat sabab ok gobnyan nyang ka puteh. na kalajih peungalaman nyang pheut teusampoh keujeuhetan, dan teupeugleh ate manusia. saban lagee tuhan geu atoe ie krueng mangat ile meunurot galak gobnyan, meunan cit cara jih gobnyan geubimbeng pikeran raja. tieb-tieb buet gob get meunurot pandangan jih keudroe, teuma tuhan kheueh nyang nilai meukeusut ate jihnyan. buet-buet nyang ade dan beuna leubeh galak nibak tuhan nibak peue mantong keureubeuen peuseumahan. ureueng jeuhet nyan meudesya, sabab jikuasa le keu angkohon dan keusombongan. reuncana ureueng bit-bit teuba ubak keulimpahan; meutindak deungon teugeusa-geusa meukibat kureueng. kaya nyang jiteume deungon cara hana juJoe atranyan bagaih gadoh dan bagaih teuba ureueng nyan u dalam jrat. ureueng jeuhet hana jitem seutot nibak hukom; jihnyan teuseuksa le keujam jih keudroe. ureueng meusalah, meuwet-wet jalan jih; dan ureueng nyang get sabe juJoe lam udeb jih. tinggai bak sagoe pageue leubeh mangat nibak tinggai meusapat deungon peurumoh nyang galak meudakwa. ureueng jeuhet sabe jimeuheuet keuneuk peubuet nyang jeuhet; ateuh somantong ureueng nyan hana rasa gaseh sayang. hukom keu ureueng ceumeubie jeuet keupeulajaran keu ureueng nyang hana peungalaman. meunyo ureueng meubudoe basa teuseugah, jihnyan teuma meutamah bijaksana. allah nyang maha ade geuteupeue peue nyang teungoh teujadi lam rumoh ureueng doraka. gobnyan teuma jipeurhot awaknyan sampoe awaknyan binasa. soe nyang hana jitem deungoe

apoh-apah ureueng nyang kureueng hana sapeuena ureueng lageenyan hana geungieng meunyoie jih-nyan teuma jilakee tulong. keu teupeiuiem beungeh dan geungeun, bri kheueh hadiah seucara seungab-seungab. meunyoie keuadelan teupeujak, teuma ureueng nyang get meurasa seunang, dan ureueng jeuhet meurasa teuancam. ureueng nyang hana jitem seutot cara udeb ureueng meubudoe, ureueng nyang lageenyan pasti trok ubak donya ureueng mate. ureueng nyang galak keu museunang-seunang teuma teutab lam keuadaan kureueng; dan ureueng nyang galak keu meupoya-poya hana jitem kaya. meunyoie masyarakat geuhukom le tuhan, nyan kon ureueng jroh, teuma ureueng jeuhet nyang meuteume susah. leubeh get tinggal dipadang beulantara, nibak tinggai deungon peurumoh nyang galak meukrob-krob dan beungeh-beungeh. ureueng nyang bijaksana teutab udeb lam makmu dan kaya; teuma ureueng nyang bangai jipeuboros hareuta jih. soe nyang meu-useuha mangat keuadelan dan cinta gaseh teulaksana, teuma meuteume keuseujahteuraan, keuhoreumat dan umu nyang panyang. ureueng nyang ceureudek hase jireupah banda nyang jigaga le tantra nyang peukasa; awaknyan laju jireuloh kuta-kuta nyang ji peubangga. mangat teupeusie nibak nyang susah, bah kheueh beu ate-ate meunyoie meututoe. ureueng sombong dan manyang ate galak keubuet meu-upat dan kureueng aja. ureueng beu-oe nyang hanjitem jakbuet; ka jipoh droe jih deungon keuheundak droe jih. siuroe seupot nyang na jipike keuhai peue nyang jilakee. sikeubit jih, ureueng nyang teupat udeb jih hase jibri deungon keulimpahan. tuhan hana galak deungon peuseumah nyang ureueng doraka, leubeh-leubeh meunyoie jipeuseumah nyan deungon meukeusut nyang teucela. keusaksian ureueng sulet hana teupecaya; teuma tutoe haba ureueng nyang jiteupeue meubagoie hai peukara, teuma teuteurimong. ureueng juloe yaken keudroe gobnyan; ureueng jeuhet meumuka teubai. hana nyang carong, ceureudek atawa keubijaksanaan nyang hase meuteun dikeue tuhan. bahpih muprang jipeuleungkab deungon guda prang, nyang peuteuntée meunang, na kheueh tuhan. nan nyang jroh leubeh meuyuem nibak hareuta nyang le; jigaseh le gob leubeh get meunyoie jijok meuh ngon pirak. ureueng kaya dan ureueng gasien bak awaknyan na saboh hai nyang saban: tuhan kheueh nyang cebta awaknyan bube nyang na. ureueng bijaksana jipeusie meunyoie na jingiang bahaya; di ureueng bangai jijak laju akhe jih keunong bahaya. ureueng nyang taqwa ubak tuhan dan jipeumiyueb droe, ureueng nyan meuteume bahgia, makmu dan jihoreumat le gob. jeunieb ngon taron na meuteume bak rot ueh ureueng nyang jeuhet; peujioh kheueh mandum nyan meunyoie gata keuneuk seulam. peurunoe kheueh ubak sidroe aneuek cara udeb nyang patot keu aneuek nyan, dan sampoe an tuha aneuek nyan teuma udeb lagee nyang ka teupeurunoe nyan. ureueng gasien jikuasa le ureueng kaya; ureueng meutang jikuasa le ureueng nyang peu-utang. ureueng nyang tabu buet nyang jeuhet jipot beuncana; akhe jih kuasa jih keu jimeutindak ban galak droe teuma gadoh han mupat rimba. ureueng nyang jroh ate geubri beureukat le tuhan, sabab jihnyan jipeuweuek

reuzeki ngon ureueng nyang papa. use kheueh ureueng nyang galak meuhina, dan ploh kheueh meudakwa dakwi, meunan cit mupake dan bek na le ngon hina meuhina. ureueng nyang galak bak buet nyang juloe ngon nyang mameh tutoe haba, ureueng nyang lagee nyan teuma jeuet keu rakan raja. deungon teupegah sulet ureueng nyang jeuhet, tuhan geujaga ieleume nyang beutoi teutab teupeulara. ureueng beu-oe galak jiduek dirumoh; ureueng nyang lagee nyan jipeugah, "na singa diluwa, inong meuhase jiteugom bak rot ueh raya." jirayu le inong lunte nyan na kheueh taron; ureueng nyang ka geubri meureuka le tuhan meusuruek u dalam nyan. ka sipatot jih aneuek-aneuek banyak jipeubuet hai-hai nyang bangai, teuma ngon awe jeuet teusunuet aneuek nyan mangat pi-e jih meu-ubah. soe nyang keuneuk jeuet keukaya ngon cara teuteugon ureueng gasien dan jibri hadiah ubak ureueng kaya bak akhe masa jih-nyan teuma meukarat. deungoe nyoe, ulon teuma lon peurunoe keugata haba meutuah ureueng areh! simak kheueh nyang lon peurunoe nyoe. mangat gata udeb meunyoie peue nyang ulon peurunoe nyoe gata keubah lam ate. sabab deungon lagee nyan gata ka siab pajan mantong atra nyan gata peunyan. ulon peurunoe gata bak saat nyoe sabab ulon meuharab gata peuseumah keupeucayaan gata nyan ubak tuhan. lhee ploh boh haba meutuah ka ulon tuleh keu gata – haba-haba meutuah nyang teukan-dong ieleume peungeutahuan dan naseuhat nyang jroh; dan nyang teuma peurunoe keu gata peue nyang beutoi-beutoi beuna. teuma-teuma, meunyoie gata jitanyong, jeuet gata jaweueb nyang paih. bek kheueh gata peurugoe ureueng gasien, sabab jih nyan leumoh hana meudaya; dan bak kanto peungadalan bek kheueh gata peukosa hak ureueng nyang hana meudaya. sabab, tuhan teuma geubila peukara ureueng nyan dan geutarek nyawong ureueng nyang teugon awaknyan. bek kheueh meurakan ngon ureueng nyang bagaih jiek darah dan bagaih beungeh. singoh gata teuma gata peubuet lagee jipeubuet nyan, dan hana hase le gata pegadiah buet nyang ka lazem nyan. bek kheueh meujanji keu gata angkee utang ureueng laen. singoh meunyoie gata hana hase gata bayeue utang nyan, teupat eh gata pih jicok teuma. bek sagai-sagai gata pinah bataih tanoh nyang ka geupatok le indatu gata yoh masa dilee. peu kheueh ka lheureh gata kalon ureueng nyang carong jipeubuet buet jih? ureueng nyan teuma jibri buet bak meuligoe raja-raja, bukan bak rumoh ureueng biasa. meunyoie gata taduek tamakheun deungon ureueng rayeuk, ta ingat kheueh soe geuhnyan. meunyoie gata na nafesus makheun nyang raya, tapeuteun kheueh hasrat gatanyan. bek leuha keuhai peunajoh nyang mangat nyang jihidang le awaknyan, barang kali jihnyan keuneuk jeubak gata. bek tauseuha meususah payah tatiyeub kaya. peubateu kheueh niet gatanyan. sabab, dalam sikeujab mantong hareuta gata hase leunyab, siulah-ulah jihnyan meusayeub dan jipo u manyang lagee cicem rajawali. bek tamakheun meusajan deungon ureueng kliet. bek teuma meuharab ubak peunajoh nyang lazat. sabab, jihnyan geupeugah, "jak tamakheun; silakan neutamah lom," padahal meukeusut jih bukan lageenyan. jihnyan meubabah

mameh, teuma ate gobnyan laen. eunteuk peue nyang ka gata uet dan ulee lom, dan banmandum tutoe haba gata nyang mameh keu gobnyan hana meuguna. bek tabri naseuhat keu ureueng bangai; jihnyan hana ji-hareuga naseuhat gata. bek sagai-sagai tapinah bataih tanoh warasan atawa tacok tanoh aneuek yatem piatu. sabab, tuhan na kheueh peumbila nyang paleng teuga dan gobnyan kheueh nyang bila awaknyan geulawan gata. peurati kheueh ajaran guree gata dan meurunoe kheueh beule-le. bek seugan-seugan gata didek aneuek-aneuek gata. meunyoe gata seunuet aneuek gatanyan deungon awe, aneuek nyan hana mate, teuma jihnyan teutab seulam. aneuek ulon, ulon galak lumpah na meunyoe gata bijaksana. ulon bangga meunyoe meurmpok ngon gata deungon mariet ngon tutoe haba nyang teupat. bek kheueh iri ate ubak ureueng meudesa. taat kheueh sabe ubak po teu allah mangat masa ukeue gata teujamin, dan harapan gata hana gadoh. deungoe kheueh, aneuek ulon! beujeuet kheueh keu ureueng bijaksana. simak kheueh beu bit-bit cara udeb gata. bek kheueh ta meurakan deungon ureueng mabok atawa ureueng leuha, sabab awaknyan teuma jeuet keu ureueng gasien. meunyoe gata lale ta-eh mantong, teuma hana treble gata tangui peukayan nyang ka meujuree teupriek-priek beukah jih. taat kheueh ubak ureueng syiek gata; sabab, meunyoe hana gobnyan gata pih hana di ateuh donya nyoe. meunyoe ma gata ka tuha, peuleumah kheueh bahwa gata tasayang keu gobnyan. ajaran nyang beutoi, hikeumat, didekan dan peungeurtian – banmandum nyan patot teubloe, teuma lumpah that meuhai keu teupulo. sidroe ureueng syiek bahgia that meunyoe na aneuek gobnyan meubudoe basa nyang get; dan gobnyan teuma bangga meunyoe aneuek gobnyan bijaksana. seumoga bapak ngon ma gata bangga keu gata; dan semoga bahgia kheueh ureueng inong nyang ka geupeulah gata. simak kheueh beu get-get dan cuntoh kheueh ubak cara udeb lon nyoe, hai aneuek ulon! inong jeuhet nyang meuluntee na kheueh peurangkab nyang mubahya. awaknyan jihadang lagee meureupah dan jipeujeuet le that-that ureueng agam beujipeubuet zina. peu kheueh tateupeue peue nyang teujadi keu ureueng nyang jieb ie anggo nyang le that, dan kayem ji-jihak ie kreueh? ureueng nyan seungsara dan meudeurita. ureueng nyan sabe meudakwa dan apoh-apah. mata jih mirah dan badan jih luka-luka, padahai banmandum nyan hase jipeusie. bek kheueh tapeubiyeu ie anggo jigoda gata, bahpi warna jih meunarek dan leumah jih meuchaha didalam glah dan ji ile deungon nekmata jitamong u dalam rukueng. oh singoh beungoh gata ka lagee jicatuiek le uleue meubisa. mata gata meukunangkung, pikeran gata hana meuteuntee dan babah gata hana pioh tameututoe nyang hana meupat uram ujong jih. gata meurasa lagee di ateuh ujong tiang kapai di teungoh laot; ulee gata mumang dan gata meuhapit-hapit keudeh keunoe. laju gata teuma tapeugah, "rupa jih ulon nyoe ka jipoh dan jitampa le gob, teuma hana hase lon ingat peue nyang ka teujadi. aduh, mata ulon teunget that-that! ulon peureulee lon jieb ie lom teuma!" bek kheueh iri ate keu ureueng jeuhet, dan bek teuma na niet tameurakan deun-

gon awaknyan. nyang jipike le awaknyan na kheueh nyang keujam-keujam dan jimeuteuoh peue nyang sifeuet jih ceulaka. rumoh tangga teubina deungon hikeumat dan peungeurtian. dan meunyoe kana peungeutuhan, teuma kama-kama nyan teupasoe deungon leungkab ngon barang-barang nyang indah. ureueng bijaksana leubeh meuwibawa nibak ureueng teuga; dan ieume peungeutuhan leubeh peunteng nibak teunaga. sabab sigohlom teujak leubeh ilee, dan seumaken le naseuhat, seumaken raya keumungke- nan keu meunang. ureueng bangai hana hase jiseulami lam hikeumat, ureueng nyan hana hase geupeugah sapeue meunyoe ureueng teungoh jipeugah haihai nyang peunteng. ureueng nyang sabe jireuncana buet nyang jeuhet, ureueng nyan teupeunan tukang peuna karu. tieb-tieb siasat ureueng nyang bangai na kheueh desya. ureueng nyang sabe buet jih jiuapat ureueng laen, ureueng nyan hana jigalak le gob. meunyoe gata putoh asa lam keuadaan gawat, teuma gata na kheueh ureueng nyang leumoh. bek ragu-ragu tapeuleuh ureueng nyang ka jipeu rhot hukoman mate; dan peuseulamat kheueh ureueng nyang teungoh jigireng ubak tamah gantungan. jeuet mantong gata peugah, "nyan bukan urusan lon." teuma allah nyang kawai gata. gobnyan geuteupeue dan geu adili pikeran gata. gobnyan geubalahi manusia meunurot buet ureueng nyan. aneuek ulon, tajieb kheueh madu, sabab nyan get. lagee meulisan nibak uempueng uno, mameh keu teuphiiek, meunan cit deungon hikeumat get that keu jiwa gata. meunyoe gata bijaksana, get that masa ukeue gata. bek lagee ureueng jeuhet nyang ka sipakat jijak reupah rumoh ureueng jujoed dan jireubot rumoh gobnyan. sabab, bahpi ureueng jujoed rhot sampoe napadubgoe, sabe gobnyan geubeudoh lom. teuma seubalek jih, ureueng jeuhet teuma hanco meutabu le malapeutaka. bek galak ate gata meunyoe musoh gata meuteume ceulaka, dan bek geumbira meunyoe jihnyan reubah. sabab, pasti tuhan geungieng buet gatanyan dan geunilai le gobnyan jeuhet, laju hanale geuhukom musoh gatanyan. bek geungeuen atawa iri ate keu ureueng jeuhet. ureueng jeuhet hana masa ukeue dan hana teuma harapan. aneuek ulon, takot kheueh ubak tuhan, dan horeumat kheueh ubak raja. dan bek seutot-seutot deungon ureueng nyang lawan geuhnyan. ureueng nyang lageenyan hanco lam sikreb mata, sabab beuncana nyang geupeutron le allah atawa raja bukan kheueh hai nyang ubit. ureueng areh na geupeugah lagee nyoe: hakem hana jeuet brat siblahi. meunyoe ureueng salah geupeugah hana salah, teuma hakem nyang lageenyan jikutok dan geuseurapa le ureueng rame. teuma hakem nyang geuhukom ureueng salah teuma mubahgia dan jihoreumat le gob. jaweub nyang paih na kheueh tanda meusahabat sejati. bek kheueh tapeudong rumoh tangga sigohlom gata peusiab lampoh atawa ladang gata dan na mata hareukat gata. bek kheueh tatem jeuet keusaksi keu ureueng laen meunyoe hana alasan nyang patot; meunan cit bek kheueh teamsulet keuhai gobnyan. bek kheueh tapeugah, "ulon teuma lon balaih keu gobnyan peue nyang ka jipeubuet ateuh ulon!" kalheueh ulon jak rot lampoh anggo dan ladang ureueng bangai. nyang

na deuh lon ngieng disinan na kheueh seunaman nyang meuduro dan naleueng lakoe. pageue beuton jihpi ka teupeuroe sabab reuloh. oh ka kheueh ulon ngieng dan ulon tanueng hainyan, laju lon teume peulajaran lageenyoe: deungon teugantuek dan lon eh sikeujab, deungon londuek meupangke jaroe dan lon meureuhat sikeujab mantong, kureueng dan gasien teuka jiseurang lagee peurampok nyang na seunjata. seulanjut jih nyoe na meupadubboh peutuah nyang laen nibak nabi sulaiman nyang geusalen le peugawee-peugawee di meuligoe hizkia, raja yehuda. allah teupeu agong sabab peue nyang geurahsia le gobnyan; dan raja teuhoreumat sabab peue nyang hase geupeutrang le gobnyan. lagee laot nyang lhok dan langet nyang manyang, meunan kheueh pikeran raja nyang hana hase taluek. peugreh kheueh leubeh ilee pirak nibak sanga jih, baro kheueh nyang indah jeuet teubantuek le jaroe seuniman. kireuch kheueh keudeh peunaseuhat-peunaseuhat jeuhat lam meuligoe, baro kheueh peumeurintah kukoih le keuadellan. meunyo meuhadab raja bah kheueh gata peumiyueb ate, bek meulagak lagee ureueng nyang meukeududukan manyang. leubeh get teuyue ek u teumpat nyang leubeh teuhoreumat nibak teuyuejok teumpat gata keu ureueng nyang leubeh meupangkat. bek kheueh teugisa-gisa taba peukara u kanto peungadalan; sabab, meunyo oh dudoe gata teubukeuti na salah peulom nyang hase gata peubuet? meunyo salah faham ngon rakan gata, peuseuleusoe kheueh deungon ureueng nyan mantong, teuma rahsia ureueng laen bek kheueh gata buka. sabab, eunteuk gata jicab sibagoe ureueng cubree babah dan nan gata kutoe siumu masa. peundapat nyang jipeugah deungon teupat sampoe nibak watee jih lagee boh kayee meuh lam pingan pirak. sapa ureueng areh keu ureueng nyang jitem deungoe, lagee euncien meuh atawa piasan keuncana. utosan nyang seutia, teupeujeuet nyang utoh jihnyan galak ate, saban lagee ieuleupie nibak ureueng mupot pade diblang. janji-janji nyang hana sampoe, saban lagee awan dan angen nyang hana jipeutron ujeuen. keusabaran meusajan deungon tutoe haba nyang ramah jeuet teupeuyaken ureueng nyang mat kuasa, dan teupeuhanco banmandum peulawanan. bek tapajoh meulisan sampoe jai that; singoh gata jeuet keumuak. bek kheueh kayekayem that tajak u rumah jiran tetangga gata, treb bak treb jihnyan bosan laju jibanci keu gata. teumudoh deungon peuleusu hase teupeumate, lagee peudeueng, palee atawa panah nyang tajam. peucaya keu peukhianat bak masa keusosahan saban that lagee meumomoh deungon gigo nyang guyah atawa teumeujak deungon gaki nyang lapee. meucace keu ureueng nyang teungoh seudeh lagee teupeulon dalam cuaca nyang sijuik ngon leupie lagee teuroe ie cuka nibak luka jih. meunyo musoh gata deuk, tabri kheueh bak jihnyan peunajoh; dan meunyo jihnyan glah tho ngon rukueng, tabri kheueh bak jihnyan ie jieb. deungon na lageenyan ka tapeujeuet musoh gatanyan malee dan tuhan teuma geubri beureukat keu gata. angen nyang jipot nibak utara pasti jipeutron ujeuen; meunan cit deungon haba keuhaba pasti jipeuteuka beungeh. tinggai bak sagoe pageue leubeh mangat nibak tinggai saboh rumah de-

ungon peurumoh nyang galak jipeudong dakwa. teuteurimong haba nyang jroh nibak nanggroe nyang jioh saban lagee teujieb ieuleupie oh watee dahaga. ureueng nyang get nyang jipeutaloe droe nibak ureueng doraka saban that lagee mata ie ceukoe atawa mon nyang kutoe. hana get teujieb meulisan lumpah that le, meunan cit hana get peugah haba nyang le deungon seumeujo. ureueng nyang hana hase jikuasa droe jih saban that lagee banda nyang ka reuloh kuta jih. lagee ujeuen watee museum khueng, dan salju di museum uroe, meunan cit teuma pujian keu ureueng bangai nyang hana pantaih. lagee cicem po dan meulayang-layang di udara, meunan cit deungon kutohan hana hase keunong ateuhe ureueng nyang hana meusalah. keuleudee haroh teupeungui keukang, dan guda haroh teuseunuet, meunan cit deungon ureueng bangai haroh teupoh. ureueng nyang jaweueb peue nyang jityanyong le ureueng bangai, saban cit bangai jih deungon ureueng nyang teumanyong nyan. teumanyong nyang bangai haroh teujaweueb deungon nyang bangai teuma, mangat ureueng teumanyong nyan sadar bahwa jihnyan hana carong lagee nyang jisangka nyan. teuyue bak ureueng bangai keuteukirem beurita, saban cit lagee teuwiet gaki droe dan teumita ceulaka. lagee ureueng lapee jipeuguna gaki gobnyan, meunan kheueh ureueng bangai nyang peugah peutuah. teupujoe ureueng nyang hana ieume peungeutahuan, saban cit lagee teuikat batee nyang kong that nibak jepretan. lagee ureueng mabok jicungke duroe lam jaro jih, meunan kheueh ureueng bangai nyang jipeugah peutuah. soe nyang jok buet keu ureueng bangai atawa soemantong ureueng jihnyan jipeurugoe ureueng rame. lagee asej gigisa ubak muntah jih, meunan kheueh ureueng bangai nyang geu-ulang keu bangai nyan. ureueng nyang bangai sigoe mantong leubeh get nibak ureueng nyang jianggab droe jihnyan carong. ureueng beu-oe galak that tinggai di rumah; jihnyan geupeugah, "na singa diluwa, ulon hase jiruengkom nibak rot raya." lagee on pintoe meuputa nibak ensee jih, meunan kheueh ureueng beu-oe jipeubalek-balek droe jih di ateuhe teumpat eh. na ureueng nyang beu-oe hana tanggong-tanggong; teupeusueb peunajoh lam babah droe jih mantong hana jitem. ureueng beu-oe jianggab droe jihnyan leubeh meuhikeumat nibak tujuh droe ureueng nyang jijok jeunaweueb nyang paih. ureueng nyang peujampu droe bak ureueng meudakwa nyang kon urosan jihnyan saban that lagee ureueng nyang drob asej pungoe nibak punyueng jih. ureueng nyang teumipee, laju jipeugah, "ulon meu ayang mantong deungon gata," saban that lagee ureueng pungoe nyang jimeuen deungon sinjata meubahya. meunyo kayee ka habeh, apui pih lon; meunan cit meunyo ureueng panang babah ka hanale, meudakwa pih ka seuleusoe. lagee adang dan kayee sampoe apui teutab hu; meunan kheueh ureueng nyang galak meudakwa seutot suasana. fesuna nyan mangat that rasa jih; dan gob galak ji-uet atranyan. lagee beulangong tanoh nyang teuseupoh deungon pirak, meunan kheueh ureueng nyang mameh bak babah, teuma ate jih jeuhet. ureueng banci mameh that tutoe haba jih teuma ate jih peunoh deungon tipee daya. bahpi jihnyan ramah,

bek kheueh bagaih tapeucaya; sabab rasa banci ka jikuasa nibak ate jih. bahpih jihnyan jisom banci jihnyan, banmandum ureueng teuma jingiang buet jih nyang jeuhet nyan. soe nyang kueh uruek keu ureueng laen, ureueng nyang kueh nyan teuma meusu-ruek u dalam uruek nyan. soe nyang gule batee man-gat bateenyan jitimpok ateuh ureueng laen, ureueng nyan teuma jitimpok keudroe le batee nyan. teu-peungeut ureueng laen saban cit deungon teubanci. babah nyang mameh teupeuteuka bala. bek raya haba keuhai uroe singoh, sabab gata hana tateupeue peue nyang teuma teujadi sikeujab teub. bek tapujoe droe gata keudroe; bah kheueh ureueng laen nyang peubuet hai lageenyan. batee dan anoe nyan man-tong phui, meunoye teubandang deungon saket ate nyang jipeuteuka le ureueng bangai. beungeh nyan keujam dan teupeuhanco peue nyang na, teuma meunoye meuhadab ngon tukang ceumburu soe nyang ek teuen? leubeh get teuseugah nyang trang-trang nibak gaseh nyang hana teupeugah. rakan jiseumeupoh deungon cinta, teuma musoh jipangkee deungon bisa. meunoye pruet troe, meulisan pih jitulak; teuma meunoye deuk, nyang phet pih teurasa mangat. ureueng nyang jitinggai rumoh droejih nyan, lagee ci-cem nyang jitinggai uempueng jih. lagee minyeuk mangat bee dan bee-bee nyang harom jipeumangat ate, meunan kheueh teuma keuhai get rakan jipeumangat jiwa. bek tuwoe ubak rakan gata atawa ubak rakan ureueng syiek gata. teungho gata meularat bek kheueh talakee tulong ubak syedara gata; wareh lingka nyang to leubeh meuguna nibak syedara gata nyang jioh. hai aneuek ulon bah kheueh gata bijaksana, mangat jeuet ulon seunang dan hase teu-jaweueb meunoye jirapa. ureueng bijaksana geupeusie meunoye ka geukalon bahya; di ureueng bangai jijak laju bahpi jitimpa le bala. soe nyang tem tang-gong utang ureueng laen, patot teucok hareuta milek ureueng nyan sibagoe barang jaminan. soe man-tong meunoye mantong seuboh jibeuet saleuem ubak rakan jihnyan deungon su nyang teuga, hai nyang lageenyan teuanggab jiucab laknat. peurumoh nyang galak meudakwa lagee su ujeuen nyang jitron siuroe suntok. hana mungken jihnyan teuyue seungab, lagee angen hana hase teupeuteun dan minyeuk hana hase teureugam. lagee toh baja teuasah baja, meunan cit teuma manusia jimeurunoe ubak seusabe droe jih. soe nyang peulara bak kayee, teuma jipajoh boh jih. deundayang teuma jihareuga meunoye jipeumanja teungku droe jih. lagee ie nyang jipoh cahya ateuh ruman gata, meunan kheueh ate gata nyang jitunyok soe droe gata. lam donya ureueng mate, sabe na teumpat; meunan kheueh nafeusu manusia hana bataih. meuh dan pirak teu ujoel lam tungkee apui; dan ureueng jituri nibak sikeueh jih keupujoe-pujoe. bahpi ureueng bangai jipoh galak droe, nyang bangai jihnyan teutab hana teuma gadoh. peulara kheueh beulatang peulara gata beujroh-jroh, sabab keukayaan hana teuma keukai, bahkan kuasa keu teupurintah pih hana teutab siumu masa. naleueng di blang dan di gunong teukoh dan teugumpoi keu beulatang peulara gata, teuma oh lheurehnyan ka jitimoh naleueng nyang baro. nibak bulee-bulee bubiri gata, gata hase meuteume peukayan, dan nibak peng yuem

kameng-kameng gata nyang ka teupeubloe gata hase tabloe tanoh nyang baro. nibak kameng-kameng gata nyang laen gata hase meuteume susu keu droe gata dan keuluwarga gata meunan cit keu peulayan-peulayan gata. ureueng jeuhet jiplueng hana ureueng nyang tiyeub jihnyan, teuma ureueng juoe beuhe lagee singa. meunoye bansa meudesya, peunguasa meugantoe-gantoe; meunoye peumimpin bijaksana, bansa teuma meuteun dan teutab jaya. peunguasa nyang jitindeeh ureueng gasien, lagee ujeuen teuga nyang hana pirang dan jipeurusak hase pannen. soe nyang peumeuen hukom, jidong blaih ureueng jeuhet; dan soe nyang taat ubak hukom jilawan ureueng jeuhet. keuadalan hana jipaham le ureueng doraka, teuma ureueng nyang seumah tuhan muphom that-that keuhai nyan. leubeh get ureueng gasien nyang juoe ate nibak ureueng kaya nyang jeuhet ate. peumuda nyang taat ubak hukom na kheueh ureueng nyang bijaksana. teuma ureueng nyang meurakan deungon ureueng royal jipeumalee ureueng syiek jih. soe nyang jeuet keukaya sabab jicok riba dan jikuet laba nyang si le-le jih, keukayaan jihnyan teuma rhot ubak ureueng nyang na gaseh sayang keu ureueng gasien. meunoye gata hana taat ubak hukom allah, po teu allah pih meuras muak keu doa-doa gata. soe nyang bujuk ureueng juoe mangat jipeubuet jeuhet, ureueng nyan keudroe ka rhot u dalam peurangkab. ureueng nyang gleh ngon murni ate jih teuma geubri beureukat sampoe bahgia. ureueng kaya sabe meuras droe gobnyan bijaksana, teuma ureueng gasien nyang na budoe-basa jiteupeue soe nyang sibeuna jih gobnyan. meunoye ureueng nyang jroh nyang mat kuasa, banmandum ureueng laen galak raya, teuma meunoye ureueng jeuhet nyang mat peurintah duma rakyat jijak musom. soe nyang peusom desya ureueng nyan hana meu-untong. dan soe nyang jiangkee droe dan jitinggai desya nyan, ureueng nyan geugaseh le tuhan. horeumat kheueh tuhan pajan mantong, teuma gata meuteume bahgia. meunoye gata talawan gobnyan, gata meuteume cilaka. ureueng jeuhet nyang mat kuasa ateuh ureueng nyang papa, lagee singa nyang jitauem ateuh cagee nyang meunyeurang. peunguasa nyang jitindeeh ureueng laen, nyang lagee nyan hana akai nyang seuhat; peunguasa nyang geubanci ubak buet nyang jeuhet teuma geumat peurintah meuthon-thon. sidroe ureueng tukang poh mate ureueng laen meuras droe jipeulet sabe sampoe ureueng nyan mate; hana meusidroe pih nyang hase jipeuteun jihnyan. ureueng nyang udeb gleh hana meucupa, teuma seulamat. dan ureueng nyang keuwieng-keuwot udeb jih, teuma reubah. peutani nyang meubuet brat nibak ureueng laen bue peunajoh; dan ureueng nyang jiboih-boih watee jihnyan meukureueng. ureueng nyang juoe geubri beureukat le tuhan, teuma ureueng nyang meuheut beubagaih kaya hana teupeusie nibak hukoman. hana get teupeubeuda-beuda manusia; teuma na cit hakem nyang geutem peubuet jeuhet teuma mangat meuteume peng sikada. ureueng nyang leuha meuheut that beubagaih kaya; dan ureueng nyan hana sada bahwa gata nyang brat bagaih jiteuka ateuh ureueng nyan. ureueng nyang jitem ureueng

laen akhe jih leubeh meuyuem nibak ureueng jok pu-
joe. soe nyang ceumeucue atra ureueng syiek jih-
nyan dan geupeugah nyan hana meudesya, ureueng
nyan saban deungon pancuri-pancuri nyang laen.
soe nyang peupeuteng droe keudroe nibak ure-
ueng nyan jipeuteuka dakwa-dakwi; dan gata leubeh
meu untong meunyoe gata peucaya ubak tuhan. soe
nyang peubeuna peundapat jih keudroe, nibak ure-
ueng nyan hana meuakai nyang seuhet. dan soe
nyang jiseutot ajaran ureueng nyang bijaksana teuma
seulamat. soe nyang jitem bri keu ureueng gasien ji-
noe jihnyan hana meukureueng, dan soe nyang tob
mata ateuhe ureueng gasien, jihnyan keunong ku-
tokan. meunyoe ureueng jeuhet jimat kausa, rakyat
jijak musom; teuma meunyoe ureueng jeuhet binasa,
ureueng nyang ade teuma jipimpin deungon leulu-
asa. soe nyang teutab meubangkan meunyoe teubri
naseuhat, saboh saat jihnyan hanco hana hase teu-
peuet le. meunyoe ureueng ade nyang mat peurin-
tah, rakyat geumbira. teuma meunyoe ureueng jeuhet
nyang mat kuasa, rakyat meudeurita. soe nyang galak
ubak hikeumat, keubit galak that ate ayah jih. dan
soe nyang meungon deungon inong jeuhet ka jime-
upoya deungon peng jih. meunyoe peunguasa ge-
upakoe ubak keuadalan, nanggroe gobnyan teuma
kukoih. teuma meunyoe jihnyan nyang peunteng keu
peng mantong, teuma nanggroe gobnyan hase reuloh.
soe nyang jisanjong sabe keudroe-droe jih, jipasang
taron keudroe jih keudroe. ureueng jeuhet ka meu-
cuet deungon desya jih, ureueng juoe meurasa man-
gat dan baghia. ureueng nyang jroh jiteupeue hak
ureueng nyang leumoh, teuma ureueng jeuhet hana
jipeuphom keuhai nyan. ureueng nyang galak meu
upat hase jipeuhanco banda, teuma ureueng bijak-
sana jipeuteuntram suasanana. meunyoe ureueng bijak-
sana dan ureueng bangai jimeupeukara, ureueng ban-
gai nyan jilab beungeh dan jikem sampoe jipeuteuka
karu nyang hana meuteuntee. ureueng nyang juoe
ate jibanci le ureueng nyang graih keu darah, teuma
jilindong le ureueng nyang jroh. ureueng bangai
meunyoe beungeh trang-trang hana jilob-lob, teuma
ureueng bijaksana raya that saba dan geupeuteun be-
ungeh gobnyan. meunyoe peunguasa geudeungoe
keu haba sulet, peugawee gobnyan teuma jeuet keu
ureueng jeuhet banmandum. sidroe ureueng gasien
dan ureueng nyang tindeeh ureueng gasien nyan na
keusamaan; keu bandua awaknyan tuhan geubri mata
keu jikeumalon cahya udeb. meunyoe raja geubila
hak ureueng leumoh, meuthon-thon rajanyan hase
geumat peurintah. deungon teudidek dan teutegah
manusia nyan hase jeuet keu bijaksana. aneuek nyang
sabe teupeupumoh peue nyang jilakee teuma jipeu-
malee ma jih. meunyoe ureueng jeuhet nyang mat
kuasa, peulanggaran meuningkat. teuma ureueng ju-
joe jiteume kalon keuhancoran ureueng jeuhet. didek
kheueh aneuek gata, teuma gobnyan geubri keute-
untranman keu gata, dan jeuet keuhiboran keu gata.
bansa nyang hana meuteume bimbangan nibak tuhan
jeuet keubansa nyang peunoh deungon karu. mubah-
gia kheueh manusia nyang taat ubak hukom tuhan.
sidroe namiet hana hase teupeurunoe deungon tutoe
kata. jihnyan muphom, teuma hana jisimak. leubeh le
harapan nibak ureueng bangai, nibak ureueng nyang

jipeugah haba hana jipike-pike. namiet nyang teu-
peumanja yohphon muda, akhe jih jeuet keu ure-
ueng kreuhe ulee. ureueng nyang bagaih beungeh
teupeusabab manusia jai that nyang meudakwa dan
meudesya. ureueng sombong teuma geupeumiyueb;
dan ureueng nyang miyueb ate teuma geupujoe. ure-
ueng nyang meukeureuja sajan deungon pancuri, sa-
ban cit geubanci ubak droe keudroe. meunyoe jih-
nyan troh-trang di kanto peungadalan, jihnyan ge-
upeurhot hukuman. teuma ureueng nyan seungab
mantong, ureueng keunong kutokan allah. teumakot
ubak peundapat ureueng laen, akibat jih na kheueh
keusosahan. peucaya ubak tuhan, teuma gata aman.
jai that ureueng nyang jimita muka ubak peunguasa,
teuma nyang bri keuadalan, na kheueh tuhan man-
tong. ureueng nyang get hana galak keu ureueng
jeuhet; dan di ureueng jeuhet jibanci keu ureueng get.
nyoe kheueh tutoe-tutoe haba nyang geupeugah le
agur bin yake nibak masa: "ulon hek that, ya allah,
ulon hek that! habeh kheueh teunaga ulon! ulon nyoe
bangai lagee beulatang; hana peungeurtian. han-
tom na ulon meurunoe hikeumat, dan meubacut pih
hana lon teupeue keuhai allah. manusia toh kheueh
nyang ka lheuueh geu-ek tron u syeuruga? peu kheueh
ka lheuueh jireugam angen lam peleuet jaroe jihnyan,
dan jibungkoih ie lam bajee jihnyan, atawa jipeu-
teutab bataih-bataih donya? soe kheueh jihnyan,
soe teuma aneuek jihnyan? pasti droeneueh neu-
teupeue! allah geupeutrok ban janji gobnyan. dan
gobnyan lagee peurisai keu banmandum nyang teuka
meulindong ubak gobnyan. meunyoe gata tatamah
peue nyang geupeugah, gobnyan teuma geuteugah
gata dan keujok bukeuti bahwa gata sulet." "ya al-
lah, ulon lakee sigihlom ulon mate, neubri kheueh
keu ulon dua hai nyoe. bek sampoe ulon peugah
haba nyang jeuhet dan duseuta, dan bek neupeu-
biyue ulon gasien atawa kaya. neubri kheueh keu
ulon teuma peue nyang ulon peureulee. sabab, me-
unyoe ulon ka kaya, mungken ulon teuma lon peugah
bahwa ulon hana peureulee keu droeneueh. dan me-
unyoe ulon gasien, mungken ulon ceumeucue sam-
poe nan droeneueh nyang mulia hase teupeukuto."
bek peusuna sidroe namiet keu teungku jih, teuma
gata jipeusumpah dan jianggab gata salah. na ureueng
nyang ji peusumpah ureueng syiek jih dan hana ji-
hareuga keu ma jih. na ureueng nyang jianggab droe
jih suci padahai jih nyan kutoe lumpah na. na ure-
ueng meuras a droe jih jroh lumpah na – dan hana
tanggon get jih! na ureueng jimita hareukat seu-
cara keujam; deungon muka nyang meuhob dan ji-
paksa ureueng gasien ngon ureueng leumoh mangat
jibri hareuta jihnyan keu awaknyan. lintah darat na
dua droe aneuek; ban dua jih jiboh nan "keu ulon!"
na peuet hai nyang hantom na puhi: donya ureueng
mate, ureueng inong nyang hantom peulahe aneuek,
tanoh nyang tho kreg nyang hawa keu ie ujeuen,
dan apui nyang jimeulieh sira jimeueue keudeh ke-
unoe. ureueng nyang ceueb ayah droe jih dan ma
jih nyang ka tuha, ureueng nyang lagee nyan pa-
tot that teugeulawa uluwa mangat matajih jicatu-
ek le cicem gagak dan manyet jih jipajoh le cicem ra-
jawali. na peuet hai nyang paleng payah nibak ulon
keumeuhase teupeuphom: cicem rajawali nyang jipo

di manyang, uleue nyang jimeueue di ateueh batee kareung, kapai nyang meulayue di teungoh laot, dan sijudo aneuek muda ngon aneuek dara nyang teungoh meucinta. nyoe kheueh siasat sidroe ureueng inong nyang hana seutia keu lakoe jih: oh ka ltheueh jimeumukah, jimakheun dan laju jilab babah jihnyan, oh ltheuhnyan jipeugah, "ulon hana lon peubuet sapeue!" na peuet hai nyang payah teuteurimong ban-sigom donya: sidroe namiet nyang jeuet keuraja, sidroe ureueng bangai nyang meuteume peue mantong nyang jilakee, sidroe ureueng inong nyang meuteume meukawen padahai inong nyan hana jigalak le ureueng laen, sidroe namiet ureueng inong nyang meuhase jireubot keududuekan pocut jih. di ateueh bumoenyoe na peuet macam beulatang ubit teuma carong that-that, na kheueh: sidom, beulatang nyang hana teuga, teuma jiteupeu keubah peunajoh jih oh watee musem khueng teuka. peulandok, beulatang nyang leumoh, teuma jiteupeu peuet uempueng di ateueh buket batee. daruet, beulatang nyang hana meuraja, teuma jiteupeu doeng meubareh meuto banja. cicak, beulatang nyang hase teudrob deungon jaroe, teuma beulatang nyan na meuteume di meuligoe raja. na teuma peuet hai nyang lumpah meukeunong meunyoe teungieng cara jihjak, na kheueh: singa, beulatang nyang paleng teuga lamkawan banmandum beulatang dan hana yo ubak peue mantong; kameng agam, manok agam nyang watee jijak ulee teudong, dan jeuet keuraja dikeue rakyat jih. meunyoe le sabab bangai gata deungon sombong gata rencana buet-buet nyang jeuhet, awaih! sabab, meunyoe gata tawot ie susu, nyang gata peuhase na kheueh meunteuga. meunyoe gata taseukok idong ureueng laen, laju jiteubiet darah. meunyoe gata tapeuteuka beungeh, gata jitamong lam meudakwa. nyoe kheueh tutoe haba nyang geupeugah le ibunda lemuel, raja masa keu aneuek gobnyan, "aneuek ulon, boh ate ma, nyang ulon peulahe sibagoe jeunaweueb ateueh doa lon. peu kheueh nyang jeuet ulon peubuet keu gata? bek kheueh teuboih-boih teuga gata atawa peuhambo teunaga gata keu ureueng inong. ka le that raja nyang hanco sabab ureueng inong. ingat kheueh, lemuel! jijieb ie anggo dan tagie ubak minuman kreueh, hana pantaih hai nyang lageenyan keu ureueng mat kuasa. sabab, meunyoe raja geujieb ie kreueh, gobnyan tuwoe ubak hukom dan hana geupakoe keu ureueng leumoh. ie kreueh nyan na kheueh keu ureueng nyang meurana dan nyang seudeh ate. awaknyan jijieb keu jipeutuwoe ubak gasien dan keusosahan droe keudroe jih. bila kheueh awaknyan nyang hana hase jibila droe jih keudroe. dan lindong kheueh banmandum hak ureueng nyang hana meudaya. meujuang kheueh keu awaknyan, dan beujeuet kheueh keu hakem nyang ade. lindong kheueh hak ureueng gasien dan ureueng nyang teutindeeh." peurmoh nyang carong payah meuteume; gobnyan leubeh meuyuem nibak intan beulian. ureueng lakoe hana kureueng sapeue, sabab jipeuduek keupeucayaan keu ureueng binoe. inong nyan hantom jipeubuet jeuhet keu teungku lakoe; sipanyang umu jihnyan geupeubuet nyang jroh keu teungku lakoe. geuhnyan jumot that geupeusapat rami dan bulee bubiri dan laloe meubuet bak teupnat teunun. di jioh jihnyan jiba pe-

unajoh, lagee nyang ka jipeubuet le kapai-kapai niaga. ban seuboh buta jihnyan ka jibeudoh jijak taguen bu keu keuluwarga jih, dan laju jibagi-bagi tugaih nibak peulayan-peulayan jihnyan. jihnyan jijak mita tanoh saboh keubeueng umong dan laju jibloe; dan jipula laju saboh lampoh anggo nibak wase jihnyan. jihnyan jipeusiab droe jih keujimeubuet si habeh teunaga. jihnyan jiteupeue bahwa peue mantong nyang jipeubuet nyan meulaba that; jihnyan jimeubuet trok teungoh malam. beuneung teubalot dan ija jicob laju. jihnyan hana kriet keu ureueng nyang hana seb; dan gobnyan get ate keu ureueng nyang peureulee teutulong. geuhnyan hana khawate meunyoe jiteuka musem sijuek, sabab bajee seu-uem ka geukeubah keu keuluwarga gobnyan. geuhnyan keudroe nyang peuget tika peureumadani; peukayan gobnyan nibak ija lineun ungu nyang meuwah. lakoe jihnyan na kheueh ureueng meusyuehu – sidroe lamkawan ureueng nyang jeuet keu peumimpin banda. jihnyan jipeuget peukayan dan taloe keuieng laju jijak peubloe ubak ureueng meukat. jihnyan meuwibawa dan jihoreumat le gob; dan hana khawate keuhai uroe singoh. meunyoe jipeugah haba leumoh leumbot; tutoe haba jihnyan bijaksana. jihnyan sabe rajin meubuet dan geupakoe urosan rumoh tangga droe. jihnyan jihareuga le banmandum aneuek droe, dan geupujoe le lakoe droe. "jai that ureueng inong nyang jroh," geupeugah le teungku lakoe jih, "teuma droeneueh kheueh nyang paleng jroh nibak awaknyan banmandum." ruman nyang mameh hana hase teupeucaya, dan ruman ceudah teuma gadoh; teuma ureueng inong nyang taat ubak tuhan patot that meuteume pujoe. balaih kheueh peue mantong nyang jroh; jihnyan inong nyang patot teuhoreumat dipat mantong na!

na saboh teumpat nyang nan jih tanoh us, disinan tinggai sidroe ureueng agam nyang nan gobnyan nabi ayub. nabi nyan hana geupioh geuseumah po teu allah dan seutia that gobnyan ubak tuhan. nabi nyan sidroe ureueng nyang get budoe dan hana geupeubuet buet nyang jeuhet bahpi mubacut. nabi nyan na geumeu aneuk tujuh droe aneuk agam dan lhee droe aneuk inong. seulaen nyan gobnyan na teuma geupeulara namiet nyang cukob le, na 7.000 boh bubiri, 3.000 boh unta, 1.000 boh leumo, dan 500 boh keuleudee. paneuk haba, gobnyan na kheueh ureueng nyang paleng kaya lamkawan peunduedeuk nyang laen di daerah timu nyan. ban tujuh droe aneuk agam nabi ayub nyan ka jeuet keulazem jipeuna khanuri di rumah gobnyan maseng-maseng seucara meugantoe-gantoe. bak khanuri nyan ban lhee droe aneuk inong nabi ayub geu undang cit sajan, dan laju awaknyan geumakheun ngon geujieb ie meuisgoe teuma. oh ka seulesoeu acara khanuri nyan, nabi ayub sabe geubeudoh eh beungoh-beungoh that dan geupeuseumah laju keureubeuen keu tieb-tieb aneuk gobnyan mangat awaknyan geupeu amphon le tuhan. sabab nabi ayub geupike lagee nyoe, jeuet mantong aneuk-aneuk geuh nyan ka meudesya jihina allah ngon hana jisaja. bak siuroe geujak meuhadab kheueh makhlok-makhlok syeuruga ubak tuhan, lamkawan nyan na cit jiseutot le si iblih, jen tukang goda nyan. tuhan meufeureuman ubak awaknyan, "pane gata nyoe?" jiwaweub le iblih nyan, "ulon banmantong teuka nibak meurawoh ban sikeulileng bumoe." dan geutanyong laju le tuhan ubak si iblih nyan, "peu kheueh gata na gata ngieng hamba ulon nabi ayub? nibak bansaboh bumoe nyoe hana ureueng nyang paleng seutia dan get ate seulaen nabi ayub nyan. gobnyan jiseumah ulon dan hana mubacut pih na jipeubuet buet nyang jeuhet." teuma jen peurayun nyan jiwaweub, "ka teuntée nabi ayub nyan geuseumah droeneueh sabab gobnyan meuteume laba. gobnyan, keuluwarga dan banmandum keukayaan geuhnyan droeneueh lindong. meunan cit deungon peue mantong nyang geupeubuet tuhan bri beureukat keu gobnyan, tuhan bri beulatang peulara nyang le, sampoe seb watee geupeureulee padub mantong nyang teupeuguna lam nanggroe. teuma meunyo banmandum keukayaan geuhnyan geucok le tuhan, ka pasti nabi ayub nyan seucara langsong geukutok droeneueh!" dan feureuman tuhan ubak jen peugoda nyan, "get kheueh, meunyo meunan, tapeubuet laju peue mantong nyang gata rasa patot ateuhe hareuta nabi ayub nyan, asai bek gata peusaket nibak tuboh gobnyan!" oh lheureh geupeugah nyan peugodanyan pih laju jiwhe dikeue tuhan. na padubna treb teuma oh lheurehnyan aneuk-aneuk nabi ayub teungoh jipeuna khanuri di rumah aduen gobnyan nyang paleng tuha. dan deungon hana teusangka-sangka na sidroe namiet sira jiplueng u rumah nabi ayub dan laju jipeugah lagee nyoe, "delat teungku amphon, ureueng syeba ka teuka jijak prang kamoe bak watee leumo-leumo kamoe teungoh teumeu-ue didalam blang dan keuleudee-keuleudee kamoe teungoh jimurut naleueng nibak baneh nyan. awaknyan ka jireupah banmandum beulatang-beulatang nyan, dan jipoh mate mandum

namiet-namiet teungku amphon nyang na disinan. teuma ulon mantong nyang seulamat sampoe hase ulon jak meulapor ubak teungku amphon." bak watee ureueng nyan teungoh meututoe, teuka teuma namiet nyang keudua ubak gobnyan sira jipeugah, "banmandum bubiri teungku amphon dan bubena ureueng meurabe ka jatak le geulanteue sampoe banmandum ka habeh mate. teuma ulon keudroe kheueh nyang seulamat nyang kheueh jeuet hase ulon jak peugah ubak teungku amphon." gohlom habeh gaba gobnyan, ka trok teuma ureueng nyang keu lhee jajak peusampoe haba nyang laen, "na lhee boh pasokan peurampok kasdim jijak reupah unta-unta teungku amphon dan dumna namiet teungku amphon ka habeh jipoh mate. teuma ulon mantong kheueh nyang seulamat teuma hase ulon jak peugah hainyoe ubak teungku amphon." bak watee gobnyan mantong geupeugah haba, teuka teuma ureueng laen jijak peusampoe haba nyang lagee nyoe, "aneuk-aneuk teungku amphon teungoh geupeugot khanuri di rumah aneuk teungku nyang tuha. hana teusangka-sangka teuka angen badee di arah padang pasi laju jibapo rumah aneuk teungku nyan sampoe reuloih teupeuro nibak tanoh dan banmandum aneuk teungku amphon nyang na didalam rumah nyan habeh mate. teuma ulon kheueh nyang seulamat nyang kheueh jeuet ulon jak peusampoe hainyoe ubak teungku amphon." ban geudeungoe haba nyan banmandum awaknyan jidong nabi ayub sira geupriek-priek bajee gobnyan tanda meuduka cita. ok nyang na di ateuhe ulee gobnyan laju geucuko, oh lheurehnyan laju geusujut sira geupeugah, "ulon geupeulahe le ma teulon, hana ulon ba sapeue, dan meunan cit ulon teuma mate hana sapeue nyang lon teumeba. tuhan ka geubri ubak ulon, dan tuhan teuma nyang cok lom hareuta geuh nyan. teupujoe kheueh nan droeneueh ya tuhan!" le sababnyan, bahpi nabi ayub ka geulami banmandum musibah bala nyang rhot ateuhe gobnyan nyan, gobnyan teutab hana geupeubuet desya dan gobnyan deungon saba teutab geuseumah po teu allah ngon hana geupeusalah tuhan bah mubacut pi. malaikat-malaikat di syeuruga geujak meuhadab lom ubak tuhan, dan jen peugoda nyan na cit meusajan malaikat nyan. teuma tuhan laju geutanyong ubak awaknyan, "pane gata nyoe?" jen peugoda nyan jiwaweub, "ban lheureh ulon jak meurawoh keudeh keunoe ban sikeulileng bumoe nyoe." geutanyong lom le tuhan, "peu kheueh kalheureh gata ngieng hamba ulon nabi ayub? bansaboh bumoe nyoe hana ureueng nyang lageenyan seutia dan jroh ate. gobnyan jiseumah ulon dan mubacut pi hantom na jipeubuet buet nyan jeuhet. gobnyan mantong teutab seutia ubak ulon, bahpi gatanyoe ka tabujuk ulon mangat ulon peuceluka nabi nyan deungon hana alasan mubacut pi." teuma le jen peugoda nyan laju jiwaweub, "nyawong dan keusehatan leubeu meuyuem nibak hareuta. manusia rila jikeureubeuen hareuta droe jih asai jihnyan teutab mantong hase udeb. seukira jih tuboh nabi ayub nyan tuhan peutron peunyaket, ka pasti nabi nyan seucara langsong geukutok droeneueh!" dan geupeugah kheueh le tuhan ubak jen peugoda nyan, "get kheueh, tapeubuet kheueh laju ban meuheuet gata ateuhe nabi ayub

nyan, asai bek gata poh mate." dan ban jideungoe haba tuhan nyang lagee nyan, jen peugoda nyan laju jijak ubak nabi ayub, oh trok ubak gobnyan laju jipeutimoh cabok nyang cukob raya-raye bansaboh badan nabi ayub nyan phon nibak tapak gaki sampoe ubak ujong ulee gobnyan. oh ltheueh nyan nabi ayub geujak duek laju ubak bineh sinamon bloh, disinan laju geugaro-garo cabok geuh nyan deungon sinuka kaca. geupeugah le peurumoh nabi ayub ubak gobnyan, "ka lageenyoe bagoe keuadaan droeneueh ya ayub, panena mungken lom droeneueh seutia ubak po teu allah? jak laju, neukutok tuhan nyan, oh ltheuehnyan mate kheueh gata!" geujawueb le nabi ayub, "gata neupeugah haba lagee ureueng hana akail ek kheueh geutanyoe tateurimong nyang jroh-jroh mantong nibak po teu allah, meunyo nyang hana get tatulak?" le sababnyan, bahpi nabi ayub meugantoe-gantoe geuras bala nyang keunong u ateuheh geuh nyan, gobnyan teutab saba ngon hana geupeuteubiet meusikrek haba pi nyang teumeureuka ubak po teu allah. bala nyang keunong ateuheh nabi ayub laju jideungoe le lthee droe rakan gobnyan, awaknyan na kheueh elifas asai nibak banda teman, bildad ureueng suah dan zofar ureueng naamah. awaknyan ka sipakat keuneuk jaksaweue sira jipeumangat ate gobnyan. teuma bak watee jingieung le awaknyan rot jioh, awaknyan rab hana jituri le keu nabi ayub nyan. awaknyan laju jimo ngon su nyang meuleungkeng sira jipriek-priek peukayan jih ngon jisipeuk abee ateuheh ulee dan u ateuheh manyang. tujoh uroe tujoh malam awaknyan jiduek nibak tanoh bak bineh nabi ayub, hana jimariet bahpi meusikrek haba pi, sabab awaknyan ka deuh jikalon pakriban brat bala nyang geudeurita le nabi ayub nyan. oh ltheueh nyan nabi ayub geupeuphon peugah haba dan geukutok uroe gobnyan lahe, kheun gobnyan, "ya allah, kutok kheueh uroe ulon lahe, dan malam yoh phon ulon geukandong le ma! ya allah, peujeuet kheueh uroe nyan seupot; sampoh kheueh nibak ingatan droeneueh sampoe leunyab; bek kheueh droeneueh peubiyeu teuma cahya meuble-ble nyang peupeungeh jihnyan. peujeuet kheueh uroe nyan itam ngon seupot glab; seupot glab, sapu suram; neutob kheueh ngon awan dan mega, peupayong kheueh nibak cahya surya. bah kheueh malam nyan teupeugadoh nibak itongan thon dan buleuen; bek le ji-ingat, meunan cit bek teubileueng. bah kheueh malam nyan peunoh le seupot hana geumbira, dan hana teuma meusra. hei gata dukun-dukun dan nyang keundali lewiatan, peurhot kheueh uroe nyan deungon sumpah dan kutok; bek sampoe bintang keujora meuble-ble cahya, bek peubiyeu cahya beungoh jiteubiet teuma! bah kheueh malam nyan sia-sia mantong teupreh teuka jih uroe dan harapan nyang baro. teukutok kheueh malam ceulaka watee ulon geupelahe le ma, dan geupeubiyeu teutanggong seungsara. pakon ulon hana mate lam pruet ma, atawa nyawong lom teusuet watee ulon lahe? pakon ulon geuwa le ma dan geupangkee teuma, dan geupeumom nibak boh dada geuh? meunyo watee nyan ulon kuwoe ubak po, teuma ulon eh dan meureuhat deungon teunang, lagee raja-raja dan nyang mat kuasa yoh watee ilee, nyang peudong lom meuligoe bak ja-

men purba. ulon teu eh lagee aneuek raja, nyang pasoe rumoh gobnyan deungon pirak keuncana. pakon ulon hana lahe tanna le nyawong mangat teu eh ulon meusineunya dan teulena? disideh, lam kubu, ureueng jeuhet hana jipeubuet jeuhet dan buruh nyang ka habeh teunaga hase jipeulheueh hek jih. meunan cit tawanan meuras puih, beubaih nibak jidhot-dhot le tukang jaga. disideh mandum ureueng saban: nyang meusyehua dan nyang hana meugah. bubena namiet meurdehka teuma oh dudoe. pakon manusia geupeubiyeu hana putoh-putoh udeb seungsara? pakon trang geubri ubak nyang seudeh? awaknyan leubeh galak kubu nibak hareuta, teupreh-preh mawot, teuma teutab hana teuka. keubahgiaan baro hase teuras watee awaknyan ka mate dan teupeukubu. watee ukeue awaknyan geupeukeuleubong le po teu allah, awaknyan geukeupong le gobnyan rot meubagoe arah. gantoe jih pajoh, teuma ulon apoh apah, hana ploh-ploh ulon apoh apah. ban-mandum nyang ulon gundah rhot ateuheh lon, ban-mandum nyang ulon takot, jiheuntam ulon. nibak ulon hana nyang teuntram, ulon meudeurita hana keuneulheueh." dan meututoe kheueh elifas, kheun gobnyan: "nabi ayub, peu kheueh gata tunu meunyo ulon peugah haba? hana hase ulon peuteun droe leubeh treb. jai that ureueng ka neubri peungajaran, dan awaknyan nyang leumoh ka gata peuteuga. tutoe haba gata nyang teubri seumangat, teupeubeudoh ureueng nyang meugantoh, leumoh dan keuweuet. teuma jinoo gata keudroe nyang keunong duka; gata teukeujot dan rhot ubak putoh asa. bukon kheueh gata seutia ubak po teu allah; bukon kheueh udeb gata hana meucupa? meunyo meunan, ka patot kheueh gata yaken dan hana putoh asa. pike kheueh, peu kheueh na ureueng nyang hana meusalah keunong bala dan musibah? ulon kuteupeue nibak peungamatan bahwa ureueng nyang meu-ue nibak buet jeuhet dan jitabu bijeh beuncana lagee seunaman, teuma jipot bala dan keusosahan! lagee angen badee, meunan kheueh meureuka allah geupeubinasawa awaknyan sampoe punah! ureueng jeuhet jitaum dan jeumeulang jeumeuloe, lagee singa awaknyan jeumeulueng. teuma po teu allah geusumpai babah awaknyan dan geuwiet gigoe awaknyan. awaknyan mate lagee singa deuk sampoe aneuek-aneuek jih meurebre hana meuteuntee. ka ltheueh na wahyu trok ubak ulon, lagee teusah su jih haloh nibak punyueng lon. teunget ulon teupeukaru dan teugoe-goe le sabab nyan, lagee meuteume lumpo nyang brok oh malam buta. ulon pih teukeujot dan yo meugenta; bansaboh tuboh lon meuguncang, yo lumpah na. angen dirui jipot bak muka lon, dan jibeudoh kheueh bulee kudok lon. saboh bayangan teudong cot dikeue ulon; ulon pandang, teuma jihnyan hana lon turi. laju ulon deungoe su teupeukaru sungue nyang seungab suasana, 'mungken kheueh manusia hana meusalah dikeue allah? mungken kheueh jihnyan hana meucupa dikeue allah? meunan cit hamba-hamba allah lam syeuruga, hana hase jipeucaya le gobnyan. meunan cit nibak malaikat-malaikat gobnyan jiteume salah dan cupa. peue teuklom makhlok nibak tanoh kliet makhlok abee nyang hase jipiret lagee ngengat! makhlok nyan udeb oh watee beungoh, laju mate teu-

gageueng oh watee seunja, dan keu siumu masa jih-nyan hana teuingat le. dan gadoh kheueh mandum nyang na nibak jih; gobnyan pih mate hana jiteume akai budho.' meulakee kheueh hei nabi ayub, peu kheueh na jeunaweueb? malaikat toh nyang gata lakee tulong? teuma na kheueh ureueng nyang bangai mantong nyang mate sabab le saket ate. ka kheueh lon kalon ureueng bangai; udeb jih deuh jih kong lumpah na. teuma ngon hana teusangka-sangka ulon kutok teumpat tinggai jih. le sababnyan aneuek-anuek jih hantom na meuteume teumpat meulindong; hana nyang tem bila awaknyan nibak kanto mahkamah. peue nyang jipot le awaknyan di ladang jih, habeh jipajoh le ureueng nyang deuk pruet jih. meunan cit gandom nyang na bak teungoh tamah, habeh jipajoh le ureueng nyang duek. atra milek dan keukayaan awaknyan ka jeuet keumeuneuleum ureueng nyang grah keu hareuta. bukan nibak bumoe keujeuhetan teuka; bukan teuma nibak tanah keusosahan jiteubiet. bukan! teuma nibak manusia keudroe nyang puteuka bala ateuhe droe jih, lagee meuk bungong apui nyang teuka nibak apui nyan keudroe. meunyoe ulon lam keuadaan gata, ubak po teu allah ulon meulakee. ubak gobnyan ulon meungadu, dan ulon seurah peukara lon. ceblaan-ceblaan po teu allah luwabiasa; hana hase tapeuphom le tanyoe keudroe. mujizat-mujizat nyang geupeuget nyan, hana teubileueng dan hana habeh-habeh jih. gobnyan geupeutreu ujeuen ateuhe bumoe; sampoe ladang ngon padang habeh bulut teuseuram. gobnyan kheueh po teu allah nyang peumanyang ureueng miyueb, dan nyang peubahgia ureueng nyang sosah geupeubateue reuncana ureueng lisek, geupeurasat dan geudbroe teuma ureueng ceureudek, akhe jih banmandum useuha awaknyan hana jeuet keubuet, dan awaknyan keunong peunget le akai jih keudroe. oh watee uroe awaknyan jitimpok le seupot, meugeumeugeue lagee oh watee malam. teuma po teu allah geupeuseulamat; ureueng gasien nibak mate, ureueng miyueb nibak keunong tindeeh. jinoo na harapan teuma nibak ureueng nyang hana sapeue na. dan ureueng jeuhet seungab tan jeuet jipeugah haba, sabab po teu allah ka geupeuseungab bahah jih. untong kheueh gata meunyoe po teu allah geuseugah gata! bek keucewa meunyoe gobnyan geupeuke-unong bala ateuhe gata. sabab po teu allah nyang peusaket nyan, gobnyan teuma nyang peu-ubat. dan jaroe gobnyan nyang geupoh, dan nyang peu-ubat teuma. meunyoe bahya teuka jiancam gata, sabe gobnyan geupeuseulamat gata. meunyoe musem deuk teuka jiancam gata, gata hana mate le sabab deuk. meunyoe prang teuka meunan hebat jih, gata aman nibak mate. gata geujaga nibak fiteunah dan peusuna; gata hadab musibah ngon hana teumakot. meunyoe keujam ngon musem deuk trok jiteuka, gata teuma tabah dan teukem-kem geumbira. gata hana meurasateumakot dan gundah, watee gata hadab beulatang juah dan ganas. ladang nyang gata meu-ueu hana teuma meubatee; beulatang juah hana teuma jiteugom gata. gata teutab aman tinggai lam khimah gata; dan meunyoe gata pareksa bubiri-bubiri gata, banmandum seulamat hana kureueng sapeue. aneuek cucoe gata hana ek teukira awaknyan jai that lagee

naleueng lam padang. lagee gandom nyang ka masak, teupot oh trok bak watee, gata pih udeb seuhat sampoe oh watee tuha. hei nabi ayub, banmandum nyan ka kamoe pareksa. haba nyan beutoi le sababnyan teurimong kheueh mantong." laju nabi ayub geujaweueb, "seukira jih duka nestapa lon teutimang geuhon jih, pasti leubeuh geuhon nibak anoe lam laot raya. le sababnyan, bek hireuen meunyoe tutoe haba lon kureueng ate-ate dan teugisa-gisa. panah nibak nyang mahakusa teupeubeusoet tuboh lon; racon jih jimeu eue bansaboh jiwa raga lon. keudahsyatan po teu allah keubiet teumakot raya, dan geuheuntam ulon lagee pasokan lawan. keuleudee teuma puih meunyoe teujok naleueng muda, meunan cit leumo meunyoe teujok peunajoh mangat. teuma peunajoh tabeue, soe nyang hawa? panena mungken puteh boh manok na rasa jih? hana galak ulon cukeeh atra nyan; luwat ulon meunyoe lon pajoh nyan. pakon po teu allah beu oe geudeungoe doa ulon? pakon hana geupakoe ubak meulakee lon? kira jih po teu allah geutem peureumok tuboh lon! kira jih gobnyan geujak buet dan geupoh mate lon! nibak ulon hainyan sibagoe hiboran; ulon teuma meunari diteungoh deurita. banmandum peurintah po teu allah nyang mahakudus ka ulon taat dan lon simak sabe. peue teunaga ulon sampoe lon mantong na? peue harapan mangat meuteume udeb nyang leubeuh treb? lagee teunaga batee kheueh tuboh ulon nyoe? teupeuget nibak teumaga kheueh tuboh ulon nyoe? habeh kheueh teunaga ulon jak mita sinulong; nibak ulon ka hana le nyang tulong. nibak deurita nyang lagee nyoe bagoe ulon meuharab sahabat seujati. aleh ulon mantong teutab seutia atawa ka ulon meulaloe nyang mahakusa. teuma gata, hai rakan-rakan lon, hana jeuet teupeucaya dan teupeubangga. gata lagee krueng nyang habeh ie jih, watee ujeuen hantom jiteuka. gata lagee krueng nyang seungab dan kaku, sabab ka teutob ngon salju dan ie beuku. reujang that watee ka trok musem khueng salju dan eeh nyan gadoh hana meubeukaih. dimiyueb ie krueng ka jeuet keu tho, hanale meu ie dan tho kreng hana sapeue na. kafilah-kafilah sisat watee jijak mita ie; awaknyan meuwot-wot dan mate lam padang pasi. kafilah nyang teuka nibak syeba dan nibak tema jijak mita ie nyan dan meuharab that teuma. teuma harapan awaknyan sia-sia nibak bineh krueng nyang ka hana ie. lagee krueng, nyan kheueh gata, rakan lon; gata surot dan teumakot takalon deurita lon. pakon? peu kheueh ulon lakee sapeue-sapeue nibak droeneueh? atawa lonyue gata jak sugok gob deumi keupeuntengan ulon? peu kheueh ulon lakee keuseulamatan dan teuteuboih nibak musoh nyang hana gaseh sayang? le sababnyan, peurunoe kheueh lon, tunyok kheueh salah ulon! ulon teuma seungab dan lon simak peue kheun droeneueh. tutoe haba nyang juJoe biet teupeusijuk ate, teuma tutoe haba droeneueh nyang soh, hana meumakna! banmandum tutoe haba lon, droeneueh anggab angen mantong; peumaca droeneueh jaweueb ulon nyang ka putoh asa. meunan cit aneuek yatem ngon meuntui droeneueh undi naseb jih, rakan krab droeneueh, droeneueh curiga mangat jeuet keukaya. cuba, ngieng kheueh ulon; ek kheueh ulon nyoe meusulet ubak droeneueh? bek

meubuet hana ade, sada kheueh! bek teunak ulon, ulon biet hana meusalah. peu kheueh nibak nepike ulon nyoe meusulet, hana hase neupeubeda nyang get ngon nyang teucela? manusia nyan lagee teupaksa meujuang; udeb jih brat lagee udeb sidroe ureueng tung upah; lagee namiet nyang rindu ubak teupat meulindong; lagee buruh nyang jipreh gaji. habeh buleuen meugantoe buleuen udeb lon hana tujuan; habeh malam meugantoe malam ate ulon peunoh keuseudehan. watee ulon jak eh, malam meureuntang panyang; ulon meucen that ubak reunee, hana hase ulon eh ngon teunang. tuboh ulon peunoh ngon glang dan krak darah; kulet lon luka dan jipeuteubiet danoh. udeb lon nyang hana harapan nyan jijak laju ubak keuneulheueh, leubeh tajam nibak tumpueneu jijak peuraho jih. ingat kheueh, ya alah, udeb lon na kheueh nafah nyang teuyueb; bahgia lon gadoh, hana tinggai beukaih. jinoo droeneueh neukalon ulon – teuma nyan hana treb. meunyoe teuma ulon droeneueh mita, teuma ulon ka hanale. lagee awan nyang reudok dan laju gadoh, manusia pi mate, hana teuma jiwoe le. banmandum ureueng nyang ka lheueh jituri gobnyan, tuwoe ubak gobnyan dan hanale jingat gobnyan. le sababnyan ulon hana jeuet lon seungab droe! rasa peudeh dan phet ulon hana hase lon peuseungab. ulon haroh lon peugah haba, dan lon peugah mandum asoe ate lon. pakon ulon nyoe teutab droeneueh kawai dan droeneueh jaga? peu kheueh ulon nyoe naga laot nyang meubahya? ulon ku eh dan lon ujoee peulheueh hek; ulon mita nyang phui keu ate ulon nyang gundah gulana. teuma droeneueh peutakot ulon deung lumpo; droeneueh peuteuka lumpo brok dan khayalan. le sababnyan ulon leubeh galak jiceukiek laju mate nibak udeb deungon tuboh nyang peunoh deurita nyoe. ulon hek dan bosan udeb; ulon meuheuet that keu mate! peubiyee mantong ulon sabab udeb ulon hana meuguna. pakon manusia meunan that peunteng nibak droeneueh? pakon buetbuet jih droeneueh kalon sabe? droeneueh seulidek jihnyan tieb-tieb beungoh, dan tieb-tieb watee jihnyan droeneueh ujoee. pajan kheueh droeneueh neupaleng nibak ulon, sampoe hase ulon uet ie ludah lon? hei tukang keumiet lon, peu kheueh rugoe droeneueh sabab le desya lon? pakon droeneueh peuguna ulon sibagoe sinakat aneuk panah droeneueh? peue ka geuhon that ulon nyoe jeuet keu beuban droeneueh? peu kheueh hana hase droeneueh neupeu amphon desya lon? peu kheueh hana mungken droeneueh sampoh salah ulon? hana treble ulon ka teu eh dalam jrat, dan meunyoe droeneueh mita ulon, ulon hana meuteume." laju geupeugah le bildad, "padubna teuk treb jih gata peugah meunan? tutoe haba gata lagee angon pot nyang meuhueb-hueb. po teu alah hantom na geupeukeuwieng keuadelen; hantom na nyang hana jadeh bak geupeudong nyang beuna. mungken aneuek-aneuek gata meudesya ubak gobnyan, teuma ka pantaiah kheueh awaknyan geuhukom le gobnyan. teuma meunyoe ubak gobnyan gata meupayong, neulakee beugaseh dan beugeupeu amphon, meunyoe ate gata juoe hana meucupa, po teu alah teuma geutulung gata deungon sigra; dan sibagoe balasan, rumoh tangga gata teuma geupeupuleh

lagee nyang ka-ka. keukayaan gata nyang gadoh nyan hana meumakna meunyoe teubandeng deungon peue nyang gata teume teuma. ureueng areh yoh jamen ilee bah kheueh gata kalon, dan gata eue peungalaman indatu gata. udeb geutanyoe paneuk, tanyoe hana tateupeue sapeue; uroe-uroe geutanyoe lagee bubayang mantong. deungoe kheueh tutoe haba ureueng areh nyan leubeh ilee, awaknyan geujok peulajaran nyoe ubak gata. 'bak teupat meu ie mantong hase jitimoh geulagah; on sikee teuma na meuteume nibak tanoh bench. meunyoe ie jih tho, geulagah nyan udeb layee, leubeh bagaih nibak naleueng nyang laen. padahai mantong get dan gohlom trok watee, jihnyan teukoh dan teucok syeufeuat jih. meunan kheueh ureueng nyang hana meutuhan. jihnyan tuwoe ubak po teu allah, dan gadoh kheueh harapan. sikree beuneueng nyang leumoh nyan kheueh keu jipeubangga; umpueng rambideuen jeuet keupeucayaan jih. peu kheueh kong umpueng nyan meunyoe teucok keu teupat meusadeue? peu kheueh kong beuneueng nyan meunyoe teucok keu ngon mumat?' lagee naleueng lakoe, seugar kheueh ureueng nyang hana meutuhan; watee keunong cahya mata uroe, jihnyan udeb suboe dan peunoh keubon. ukeue jih jipalet batee-batee bak tanoh; jiglong kong that, jihnyan hana mudah gayah. teuma, cuba, lot kheueh jinoo bak naleueng lakoe nyan, dan sang-sang hantom na naleueng lakoe nyan disinan. biet, keuseunangan ureueng jeuhet teuma nyan mantong; ureueng laen teuka dan jigantoe gobnyan. teuma po teu alah hantom na geutinggai ureueng nyang seutia, dan hantom na teuma geutulung ureueng doraka. babah gata teuma geupeujeuet teukem, bibi gata meusurak-surak deungon geumbira. nyang banci gata meurasaa malee dan meurasaa droe miyueb, dan rumoh ureueng jeuhet teuma geupeurusak sampoe hanco." teuma nabi ayub geujaweueb, "beutoi, ulon kuteupeue, tutoe haba droeneueh nyan hana salah. teuma, panna mungken manusia jimeupeukara ngon allah dan ji peutaloe teuma? nibak siribee boh teumanyong nyang geutanyong le po teu allah, meusaboh pih hana hase jiwaweueb le manusia. po teu allah nyan keubiet that areh dan meukuasa; soe nyang hase meuteun jilawan gobnyan? po teu allah geupinah gunong hana jiteupeue le manusia, laju geupeudugom ngon balek le meureuka dan beungh gobnyan. po teu allah geupeutreun geumpa sampoe bumoe beuguncang, dan tamedh ngon tumpang donya meuhayak keudeh keunoe. po teu allah jeuet geutam mata uroe bek jiteubiet watee beungoh, dan geutam bintang-bintang bek jiteubiet oh watee malam. geuleueng angkasa hana jibantu le gob; geugiloe-giloe ruheng naga laot. geupasang bintang-bintang seulan di langet manyang, meunan cit bintang peuraho, bintang beulantik dan bintang kartika. hana hase tapeuphom banmandum buet gobnyan, hana hase taitong padubna le mujizat mujizat gobnyan. gobnyan geujak rot keu lon, teuma hana deuh le ulon; gobnyan geujak bak bineh ulon, teuma hana nyata nibak ulon. meunyoe gobnyan geureupah, soe nyang jeuet tan gobnyan? atawa jijeuet tanyong ubak gobnyan, 'hei, peue tapeubuet nyan?' po teu allah hana geuteun-teun meunyoe beungoh dan seu uem ate geuh; bubena peumbantu ra-

hab pih taklok ubak gobnyan. le sababnyan, pakriban ulon hase lon bantah gobnyan? deungton tutoe haba peue ulon hase lon jaweueb gobnyan? bahpi ulon hana meusalah, peue daya lon, seulaen lon lakee geunaseh ubak po teu allah sibagoe hakem lon? meunyoee gobnyan geujaweueb watee ulon meuhoi, ulon ragu, peu kheueh gobnyan ka geudeungoe su ulon? gobnyan geupeureumok ulon lam angen badee, dan geutamah deurita ulon hana alasan. hana geupeubiyeu ulon tarek nafah bahpi meusikeujab; teuma geupeuppeonoh ulon deungton nyang phet nyang paleng hebat. peu kheueh haroh na teunaga ulon meusajan gobnyan? teuma kalon, padubna hebat teunaga gobnyan! seukira jih ubak gobnyan ulon sunyueng gugatan, soe nyang jeuet teuhoi gobnyan ubak kanto mahkamah? ulon seutia hana lon peubuet desya, teuma babah ulon jipeugah nyang laen; tiebtieb tutoe haba nyang jipeuget le bibi lon, sang-sang jipeusalah droe lon keudroe. ulon hana meusalah, teuma ulon hana lon pakoe. ulon ka bosan udeb. nibak ulon hanale nyang peunteng; nyang salah dan nyang beutoi, saban mantong naseb jih: po teu allah teuma geupeubinasa bandua nyan. meunyoee ureueng nyang hana meusalah mate hana teusangka-sangka, po teu allah geukem mantong. bumoe geujok le po teu allah ubak ureueng doraka, dan hakem-hakem ka geupeujeuet buta banmandum. po teu allah geupeubuet banmandum nyoe, meunyoee bukan gobnyan soe lom? uroe-uroe lon jijak deungton bagaih, laju gadoh hana teurasna mangat. lagee peuraho teungoh plueng, udeb ulon jijak deungton sigra, lagee cicem kleueng seumama meunan kheueh tajam jih, jisamba musoh jih. meunyoee ulon keuneuk teuseungeh dan teukem geumbira, meunyoee ulon cuba lon peutuwoe banmandum deurita, teuma duka ulon jiteuka lom, jipeulet ulon; sabab ulon teupeue, po teu allah teutab geupeusalah ulon. heuh, meunyoee lagee nyan, peue that lon pakoe? hana sabon nyang hase jipeugadoh desya lon! po teu allah geupeuseunom ulon lam aden nyang kutoe, sampoe peukayan ulon pi jianggab ulon nyang paleng luwat. seukira jih alah nyan manusia, ulon hase lon jaweueb gobnyan; laju kamoe jak meuhadah ubak kanto mahkamah keu kamoe jak peuseulseoe mandum nyang jeuet keu dakwa. teuma nibak kamoe hana jaksa nyang hase peusidang kamoe bandua. seumoga po teu allah geupioh geuhukom ulon dan geupeujioh dahsyat gobnyan nibak ulon. ulon hana takot ubak gobnyan dan ulon peugah haba jinoenyoe, sabab ulon kuturi ate lon keudroe. ulon bosan dan luwat deungton udeb lon, nyang kheueh ulon roe mandum keuhai phet jiwa lon. ya allah, bek kheueh ulon droeneueh peusalah; neupeutrang kheueh, pakon ulon droeneueh lawan. peue laba jih meunyoee droeneueh teutindeeh lagee nyoe, dan neuboih hase buet droeneueh keudroe? peue laba jih meunyoee droeneueh neuskong peundapat dan reencana bubena ureueng jeuhet? pandangan droeneueh haba saban ngon pandangan manusia dan umu droeneueh haba saban paneuk ngon umu jih. meunyoee meunan, pakon droeneueh soai banmandum desya lon? pakon droeneueh peucrok banmandum salah ulon? nyang sikeubiet jih droeneueh neuteupeue dan sada, bahwa ulon hana

salah, teuma beutoi. droeneueh neuteupeue bahwa meusidroe pih hana hase jipeuseulamat ulon nibak jaroe droeneueh. ulon nyoe teupeujeuet nibak jaroe droeneueh, masak jinoo droeneueh keuneuk peubinasal lon? ingat, nibak tanoh kliet droeneueh cebta ulon! pakon kheueh droeneueh peujeuet lom ulon jeuet keu abee? droeneueh peumongken ayah lon jeuet keu ulon, dan droeneueh peurayeuk ulon dalam pruet ma. tuboh ulon droeneueh peuet deungton runga dan urut; tuleueng ulon droeneueh boh asoe dan kulet sinutob. droeneueh bri keu ulon udeb; droeneueh gaseh ulon, nyawong ulon droeneueh jaga deungton droeneueh peulara. teuma jinoenyoe ulon teupeue bahwa seulaet nyang, seungab-seungab ka droeneueh reuncana ulon beuceulaka. droeneueh kawai ulon pat tateupeue ulon peubuet nyang salah mangat hase droeneueh tulak keu droeneueh bri peuamphon desya. meunyoee ulon kupeubuet desya, teuma naseb ulon keubiet meupaloe! teuma meunyoee buet ulon hana meucupa, teutab kheueh ulon teuanggab lon peubuet desya! hana ulon jeuet lon beut ulee, sabab meurasna seudeh dan teuhina. meunyoee ulon meuhase, bahpi hana padub na, droeneueh let ulon lagee singa. dan droeneueh tunyok lom kuasa droeneueh, na kheueh keu droeneueh peutakot ulon. sabe droeneueh jok saksi keu teulawan ulon; dan semakem rayeuk kheueh meureuka droeneueh ateueh ulon. droeneueh krah bubena pasokan-pasokan baro keu jijak seurang dan jijak prang ulon. pakon droeneueh peubiyeu ulon nyoe lahe ateueh rhueng donya? leubeh get ulon mate mantong sigohlom jingiang le manusia! teuma sang-sang ulon hantom na teupeulahe, sabab phon lam pruet ma laju teupeukubu. ah, hana treble ulon teuma mate, le sababnyan bah kheueh tinggai ulon keudroe, mangat meuteume ulon rasa, watee ulon nyang na mantong bacut nyoe. hana treble ulon jak dan hana meugisa le, ubak nanggroee nyang seupot dan teumakot raya, nanggroee nyang seupot, peunoh bubayang dan karu han meuteuntee, dipat peungeuh saban deungton seupot. oh ltheuehnyan zofar jipeugah, "hana kheueh haba sulet nyan teubri jeunaweueh? peu kheueh ureueng nyang jai that babah nyan teupeu beutoi? nabi ayub, gata pike kamoe hana hase kamoe jaweueb gata? gata pike kamoe seungab mantong sabab le gata hina? meunurot anggapan gata tutoe haba gata nyan hana salah; meunurot anggapan gata gleh dikeue po teu allah. teuma, seumoga po teu allah keudroe geupeugah haba! dan seumoga gata geubri tee le gobnyan, bahwa hikeumat nyan jai that sagoe jih, dan hana hase jipeuphom le manusia. dan sada kheueh gata bahwa deurita gata hana padubna, teubandeng ngon hukoman nyang gata teurimong. ek kheueh beutoi hakikat allah hase gata seunom? ek kheueh beutoi kuasa gobnyan hase gata peuphom? kuasa gobnyan leubeh manyang nibak angkasa; hana hase gata leugot atawa gata kareue. kuasa gobnyan leubeh lhok nibak donya ureueng mate, hana hase gata muphom mubacut pi. kuasa po teu allah leubeh luwah nibak donya nyoe, dan leubeh luwah nibak laot nyang raya. meunyoee gobnyan geudrob dan geuba gata ubak kanto mahkamah, dan soe nyang jeuet jitam buet gobnyan? po teu allah geuturi ubak ureueng nyang galak

meusulet; buet jeuhet awaknyan hana leukang nibak mata gobnyan. meunyo nang keuleudee kleut jipeulahane aneuek keuleudee seu iet, baro kheueh ureueng bangai jeuet keu carong. nabi ayub, peugleh kheueh ate gata, dan meunyeusai kheueh! meudoa kheueh ubak po teu allah! peugleh kheueh desya nyang na bak ate gata dan peujioh kheueh buet jeuhet nibak rumoh gata! teuma gata jeuet tahadab ubak udeb deungon tabah dan hebat; gata teuma teudong cit dan hana peureulee tarasa apoh apah, meunan cit deurita gata hanale gata ingat; lagee ie raya nyang ka surot, laju jituwoe le gob. udeb gata teuma jeuet keu leubeh trang nibak watee uroe, dan saat-saat seupot lam udeb gata lagee cahya mata uroe beungoh. gata teuma teugoh dan peunoh harapan; po teu allah teuma geulindong gata sampoe gata aman. gata hana teuma teumakot ubak musoh; jai that ureueng teuma jilakee tulong ubak gata. teuma ureueng jeuhet jipandang ubak bingung, sabab nibak awaknyan hana nyang tulong. saboh-saboh jih harapan awaknyan na kheueh mangat ajai beubagaih teuka." nabi ayub geujawueub, "beutoi kamoe nyoe sibagoe waki umat manusia. meunyo droeneueh mate, hikeumat pih mate cit teuma. ulon pih manusia nyang meubudo basa; banmandum nyang droeneueh peugah nyan ka kamoe muphom. lom teuma, soe nyang hana teupeue mandum nyan? le sababnyan, bek droeneueh pike droeneueh leubeh nibak ulon! ulon jipeukem le rakan ngon sahabat, padahai ulon nyoe beutoi dan hana meucupa. yoh watee ilee po teu allah geujawueub doa lon, watee ulon meuhoi lon lakee tulong. droeneueh neuhina ureueng ceulaka, seudangkan udeb neueh aman; ureueng nyang karab rhot droeneueh poh lom teuma. teuma udeb meurampok hana teuancam; ureueng nyang jijeuet lawan po teu allah, udeb aman. padahai dewa nyang jeuet keu teupmat meusadeue awaknyan, na kheueh teunaga droe jih mantong. tanyong kheueh ubak cicem dan beulatang laen teuma droeneueh jibri peungajaran le jihnyan. lakee kheueh keuteurangan ubak makhlok bumoe dan di laot, teuma droeneueh tateurimong keuteurangan. soe nibak mandum nyan nyang hana sada, bawha nyang cebta awaknyan na kheueh po teu allah keudroe? gobnyan nyang atoe udeb mandum makhlok nyang na; dan meukuasa ateueh tieb-tieb nyawong manusia. lagee lidah lon galak lon rasa peunajoh nyang mangat, meunan kheueh teuma geulinyueng ulon galak lon deungoe tutoe haba. meunuot haba, hikeumat na bak ureueng nyang panyang umu geuh, teuma hikeumat dan teunaga na nibak po teu allah mantong. teuma, peungeurtian nyang na nibak ureueng nyang ka tuha that, teuma peungeurtian dan wewenang na nibak po teu allah mantong! peue nyang geureuloh hana hasele teupeudong lom teuma soe nyang ka teudrob hana hasele teupeuleuh teuma. soe nyang lhob ie, teuma to kreg banmandum nyan; gobnyan nyang peuleuh dan ji-ile, dan ie raya kheueh teuma nyang teuka! po teu allah nyan teuga, tangkoh dan jaya! soe nyang sulet dan tukang peunget gob na dimiyueb keukuasaan gobnyan. geutarek hikeumat ubak peunguasa peumeurintahan, dan bubena peumimpin geupeujeuet bahaan jipeukem le gob. geuguleng raja dan geuteun

awaknyan; geuhina imeum-imeum dan ureueng-ureueng patot. geutob babah ureueng faseh bak peugah haba, geutarek hikeumat nibak ureueng-ureueng tuha. geupeumalee ureueng-ureueng patot dan meugah; geucok keudaulatan awaknyan nyang meukuasa. geupeutrang teupmat-teupmat nyang suram; geupeukeunong cahya ubak bubayang-bubayang hitam seupot. bansa-bansa geupeujeuet meukeumang dan makmu, laju geupeubinasa awaknyan sampoe hanco. geupeujeuet bubena peumimpin rhot keu bingung, akhejih awaknyan jikah ho-ho mantong hana teuntee tujuan. awaknyan meugeue-meugeue lam seupot glab, dan teuhuyong-huyong lagee ureueng mabok bak jieb ie. banmandum nyan ka ltheueh lon kalon dan lon deungoe keudroe, dan biet-biet ulon peuphom. peue nyang droeneueh teupeue, ulon pih teupeue; bek tapike ulon taloe ngon gata. teuma ulon keuneuk peugah haba ngon nyang mahakusa; ulon keuneuk bila peukara ulon dikeue po teu allah. sabab droeneueh tatob-tob bangai droeneueh nyan deungon tipee muslihat, hana ubah lagee dukundun peuleusu. seukira jih droeneueh hana tapeugah haba, mungen ka teupeugah bijaksana. le sababnyan deungoe kheueh bantah ulon nyoe; kalon kheueh peumbelaan ulon. peu kheueh deumi droeneueh meusulet? peu kheueh jeuet droeneueh meusulet keu keupeuntengan gobnyan? peu kheueh jeuet droeneueh dong blah po teu allah, dan gata bila gobnyan sibagoe peungacara? meunyo po teu allah geupareksa droeneueh, peu kheueh get hase jih? peu kheueh hase gata tipee gobnyan lagee droeneueh tipee manusia? meunyo droeneueh dong siblah, bahpi deungon seungab-seungab, gata teuma geuhukom le po teu allah deungon keujam. peu kheueh keuangongan po teu allah hana teukeujot jiwa droeneueh? peu kheueh deungon dahsyat geuhnyan hana yo ate droeneueh? banmandum naseuhat droeneueh lagee abee nyang hana meuguna; peumbelaan droeneueh lagee tanoh lumpok nyang bagaih beukah. le sababnyan seungab kheueh, bah kheueh ulon peugah haba! ulon hana lon pakoe pakriban mantong akibat jih! ulon ka siab lon peusabong nyawong! ulon neukad sabab ka putoh asa! meunyo po teu allah keuneuk poh mate lon, ulon meunyeurah mantong, teuma teutab lon bila pi-e ulon dikeue gobnyan. mungen le sabab beurni ulon nyan ulon seulamat, sabab ureueng jeuhet hana jijeuet meuhadab po teu allah! jinoenyo deungoe kheueh beuet-get tutoe haba lon; simak kheueh nyang ulon peutrang. peukara ka siab ulon peutrok ubak kanto peungadalan; ulon yaken, hana hase ulon jipeusalah! tuhan, meunyo droeneueh teuka dan neutudoh ulon, ulon teuma seungab dan lon preh ajai lon. teuma teurimong kheueh dua boh nyang ulon lakee nyoe, mangat ulon kujeuet meuhadab droeneueh lom: pioh kheueh neuseksa ulon, dan bek kheueh neupeutingkeh ulon deungon keudahsyatan droeneueh! mariet kheueh, teuma ulon jaweub. atawa, bah kheueh ulon meututue, ltheueh nyan bri kheueh balasan jih! padub na salah dan desya nyang ulon peubuet? banmandum nyang ulon langgeh bah kheueh droeneueh peugah! pakon droeneueh peusie dan neupeujioh droe nibak ulon? peue sabab jih droeneueh anggab ulon

nyoe sibagoe musoh droeneueh? ulon na kheueh on yang luroh le sabab angen teuka, ek kheueh neupeuyo ulon! ulon na kheueh jumpung yang tho dan layee, panena jeuet neupeulet-peulet ulon! droeneueh peuteuntee naseb yang phet keu ulon; droeneueh balaih salah ulon watee ulon mantong muda. gaki ulon droeneueh ikat ngon rante beuso; banmandum grak grik ulon droeneueh kawai. meunan cit tapak gaki lon, hana leukang nibak mata droeneueh. le sababnyan ulon jeuet keurapoh lagee kayee yang brok; lagee jia pipajoh le keuralaub, ulon ka jeuet rapoh. yoh phon lahe manusia nyan leumoh hana meudaya; udeb jih paneuk dan peunoh ngon deurita. jihnyan meukeumang dan layee lagee bungong; gadoh lagee bubayang, dan laju gadoh han teutuhoe. ya allah, ek kheueh droeneueh neutem ngiang ulon, dan peupeuhadah ulon ubak peungadelan droeneueh! peu kheueh meuteume manusia yang meudesya jipeuteuka hai nyang samporeuna? jeumeulah umu manusia ka droeneueh peuteuntee; jeumeulah buleuen jih ka droeneueh peupasti. droeneueh peuteutab teuma bataih-bataih udeb jih; hana mungken jiliengkeue le jihnyan. peubiuey mantong kheueh jihnyan meureuhah, bek peukaru jihnyan; mangat jihnyan hase jinekmat udeb jih sampoe seulesoe tugaih jih. mantong na harapan keu bak kayee yang teuteubang; bak kayee nyan meutarok lom, laju meucabeueng. bahpi lam tanoh ukeue jih jeuet keuleupok, dan ukeue tunggai jih mate le sabab brok, teuma meunyo keunong ie, jihnyan timoh lom; lagee seunaman muda, tarok-tarok jih meutuneh lom. teuma meunyo manusia mate, habeh kheueh riwayat jih; jihnyan meuninggai donya, laju ho jijak? lagee ie meuasab didalam mon, lagee ie krung surot sampoe habeh ie jih, meunan cit teuma manusia yang ka meuninggai donya: jihnyan hana hase jibeudoh lom teuma. jihnyan hana jaga meunyo langet mantong na, hantom na le jibeudoh nibak teumpat eh jih. som kheueh lon nibak donya ureueng mate; lindong kheueh ulon sampoe droeneueh hana beungeh le. teuma peuteuntee kheueh watee keu teuingat droe ulon. sabab, meunyo manusia mate, peu kheueh jihnyan hase udeb lom teuma? uroe-uroe deumi uroe ulon preh sabe sampoe watee phet lon nyoe jijak teuma. teuma droeneueh neutawok ulon, dan ulon pih teuma lon jaweueb; droeneueh teuma neusayang lom ubak ulon, makhlok yang droeneueh cebta. laju neukawai tieb-tieb langkah lon, teuma hanale droeneueh kalon desya lon. desya ulon teuma droeneueh peuamphon dan droeneueh boih; salah ulon yoh watee ilee teuma droeneueh sampoh. teuma, gunong-gunong reuloh teupeuro meutabu beba, dan gunong batee yang kong teuma teugeesee nibak teumpat jih. batee-batee teuma jikreh habeh le ie yang ile tajam; tanoh teuma jipeuhanyot le ujeuen yang teuga. meunan kheueh droeneueh peuhanco harapan manusia. droeneueh peutaloe jihnyan keu simu masa; droeneueh yue jihnyan beujijak dan droeneueh ubah ruman jih. aneuek-aneuek jihnyan jeuet keu ureueng mulia, teuma gobnyan hana geuteupeue. dan meunyo awaknyan ka jeuet keu hina, hana yang peugah nyan ubak geuhnyan. teuma linu-linu tuboh geuhnyan yang

geuras; teuma seudeh ate geuh yang geudeurita." teuma elifas geujaweueb, "keubiet sulet that neuh nabi ayub, haba gatanan keubiet hana meumakna! hana ureueng bijaksana yang jaweueb lagee gata nyoe, hana jihnyan jibila droe jih keudroe deungon tutoe haba yang hana meumakna. seukira jih haba gata nyan teuseutot, hana meusidroe pih teumakot atawa meudoa ubak po teu allah lom. tutoe haba gata jeuet keu bukeuti bahwa gata meusalah, teuma keujeuhetan gata nyan gata tob ngon meusilek lidah. hana peureulee gata lon tudoh atawa lon peusalah, sabab le tutoe haba gata keudroe gata jigadu. gata pike gata manusia yang phon teupeulaha? peu kheueh na teuka watee gunong-gunong teucebta? peu kheueh gata deungoe po teu allah geupeuget reuncana gobnyan? peu kheueh teuma gata yang na hikeumat manusia? peue-peue yang gata teupeue, kamoe pih kamoe teupeue; peue-peue mantong yang gata muphom, nyata teuma nibak kamoe. hikeumat nyoe kamoe teurimong nibak ureueng yang ka puteh ok; awaknyan ka na sigohlom ayah gata teupeulaha! pakon hiboran po teu allah hana gata teurimong? kamoe meututoe deungon saba dan leumoh leumbot ateueh nan gobnyan. teuma gata ka jiek peuneng, mata gata hu meuble-ble; gata beungeh ubak po teu allah dan gata bantah gobnyan. peu kheueh mungken manusia sagai-sagai hana meusalah? peu kheueh jihnyan jeuet teupeubeutoi dikeue po teu allah? meunan cit ubak malaikat pih po teu allah hana peucaya; awaknyan hana suci nibak keumalon gobnyan. meunyo manusia nyan jeuhet dan teunoda, yang jijieb jeuhet lagee jijieb ie mantong. deungon nabi ayub, keu gata ulon peutrang sapewe-sapeue, yang jipeurunoe le ureueng bijaksana ubak ulon. ajaran nyan jiteurimong nibak indatu jih, dan jipeutrok deungon leungkab ubak keuturonan geuh. watee nyan hana ureueng jame di nanggro awaknyan; hana yang peusisat awaknyan nibak po teu allah. ureueng jeuhet yang jitindeeh seusabe droe jih, teutab meuras gundah sipanyang udeb jih. su-su yang geureudam geureudum keubiet teupeutloe punyueng awaknyan; watee saat nyan aman peurampok teuka jijak heuntam awaknyan. hana harapan nibak awaknyan jipeusie nibak seupot, sabab peudeueng ngon poh mate awaknyan jipeuleut bak tieb-tieb keuseumpatan. cicem-cicem nasar jipreh-preh watee awaknyan mate, cicem-cicem keuneuk jipajoh manyet awaknyan. le sababnyan sada kheueh jihnyan bahwa seupot kheueh uroe ukeue awaknyan. beuncana lagee raja nyan peukasa, ka siab keuneuk jiteugom awaknyan. meunan kheueh naseb ureueng yang lawan po teu allah, dan jijeuet lawan yang mahakuasa. deungon sombong jihnyan jiseureubu dan jilawan po teu allah; laju jibeutot peurisee jih, jihnyan seumaloe jisurot. jihnyan tinggai di banda-banda yang ka hanco keng keueg, nibak rumoh-rumoh yang hana ureueng po jih. banda-banda nyan ka teupeuteuntee keu teutab jeuet keu banda nyan tinggai rangka-rangka. keukayaan ureueng nyan teuma gadoh hana meubeukaih; hareuta beunda jih teuma habeh gleh sapan sapa. jihnyan hana teuhinda nibak seupot yang gulita; apui laju jipeuhangoh tarok-tarok jih. jihnyan teuma hanco watee geu-

ploh ngon babah po teu allah. meunyoeh jihnyan peucaya ubak nyang hana meuguna, keunong peunget kheueh jihnyan; dan imbalan nyang teuma jiteurimong, hana cit meuguna le. sigohlom trok watee jih, jihnyan teuma mate, lagee cabeueng layee nyang hana hase ijo le. jihnyan lagee bak anggo nyang luroh boh jih, lagee bak zaiton nyang bungong jih leukang bak tangke. ureueng nyang jeuhet hana keuturonan; dan habeh tutong kheueh rumoh nyang jipeudong nibak hase peng sugok. nyan kheueh awaknyan nyang jireuncana buet jeuhet dan jipeubuet teuma; tipee muslihat sabe na teukandong lam ate jih." teuma nabi ayub geujawueub, "kayem that ulon deungoe peundapat lageenyang; peunghiboran droeneueh na kheueh seksana nibak lon. pajan kheueh haba sulet nyan droeneueh pihoh? peue nyang jeuet keurangsan-gan droeneueh nyang jeuet teujawueub? seukira jih droeneueh nyan ulon, dan ulon droeneueh, ulon pih jeuet lon peugah haba saban lagee nyan. ulon peujai gata deungon tutoe haba; ulee ulon teuma lon asek-asek. ate gata teuma lon peukong deungon meubago-e anjuran; tutoe haba ulon teuma teubri hiboran. meunyoeh ulon peugah haba, deurita ulon hana reuda; meunyoeh ulon kuiem droe, peue teuma guna jih? po teu allah, teupeujeuet ulon aloh alah; banmandum keuluwarga ulon habeh geupeubinasa. gobnyan geuteuntang dan geudrob ulon. jinoenyoeh, piujet ngon tho kheueh tuboh ulon, dan keue ureueng rame, nyan kheueh bukeuti jih bahwa ulon ka meudesya. deungon beungeh po teu allah geupriek-priek tuboh lon; deungon biet-biet banci gobnyan geupandang ulon. ureueng-ureueng jihina ulon deungon babah teuhah raya-rya; ulon jiparan dan mieng ulon jitampa. po teu allah geujok ulon ubak ureueng doraka; ulon geupeurhot lam jaroe ureueng doraka. yoh awai ilee udeb lon teuntram dan bahgia, teuma po teu allah geuseurang ulon deungon hana teusangka-sangka. kudok ulon geuteugom dan ulon geutiuk; geupeujeuet ulon sasaran keu tempat latehan. deungon hana weueh gobnyan hana pihoh geutimbak ulon ngon panah, le sababnyan, meuburee kheueh asoe pruet ulon. gobnyan geuseureubu lagee sidroe peujuang, dan geupeuluka ulon meu-ulang-ulang. ulon sok ija krong sibago tanda seudeh, dan lon duek lam abee sabab ka geupeutaloe. ruman lon mirah sabab lon mo; peuleupuk mata lon keumong dan ijo. teuma ulon hana lon peubuet nyang kreueh; deungon nyan trang kheueh doa lon juoe ubak tuhan. hei bumoe, jeuhet ateuhe ulon bek kheueh teusom; bek seungab geumeuciek ulon lakee keuadaelan. ulon kuteupeue bahwa nyang bila ulon na lam syeuruga; gobnyan geubri keusaksian bahwa ulon hana meudesya. ulon jihina le rakan-rakan lon dan jipeukem; sira ulon mo lon meuhadab ubak po teu allah lon lakee tulong. akh, kira jih po teu allah keudroe geubila ulon dikeue gobnyan, lagee sidroe ureueng nyang rila jibila sahabat jih. thon-thon nyang na tinggai hanale; sikeujab treuk ulon jak dan hana lon woe le. ajai lon katoe that, nafah lon karab putoh; na kheueh jrat nyang tinggai keulon. ureueng laen jipeujeuet ulon nyoe barang keu jipeukem; ulon kalon padubna awaknyan jigeulawa ateuhe ulon haba meupansi. ulon nyoe ju-joe, ya allah. peucaya kheueh ubak ulon! soe kheueh

lom nyang jitem peubeuna haba ulon? droeneueh tob ate awaknyan sampoe hana jeuet jimeuphom; bek sampoe awaknyan jipeutaklok ulon jinoenyoeh. meunurot peupatah, soe nyang gadu rakan deumi keu laba, aneuek-aneuek jih keudroe teuma jiteurimong balaih. jinoenyoeh ulon jipansi ngon peupatah nyan; awaknyan teuka keujajak ludah muka ulon. mata ulon sapu sabab meudukacita; bansaboh tuboh lon piujet meurana. ureueng nyang saleh teukeujot dan hireuen; ureueng nyang hana meusalah jiang-gab ulon hana meutuhan. ureueng nyang jroh dan nyang hana meusalah, seumaken yaken cara udeb jih meukeunong bak ate allah. teuma seukira jih gata mandum teuka keunoe, hana meusidroe ureueng bijaksana pih nyang gata teume. uroe-uroe lon ka jijak laju, dan bateue kheueh mandum reuncana lon; gadoh teuma mandum cita-cita lam ate lon. teuma rakan-rakan lon jipeugah, 'malam nyan uroe dan trang karab trok.' teuma ulon kuteupeue lam ate lon, bahwa teutab seupot kheueh keuadaan lon. teuma donya mawot kheueh nyang ulon harab, disideh kheueh ulon eh lam seupot. kulu ulon lon boh nan "ayah lon", dan glang-glang nyang pajoh tuboh lon, lon boh nan, "ma" dan "syedara lon nyang inong". dipat kheueh harapan keu lon; soe nyang kalon na bahgia keu ulon? meunyoeh ulon kutreun lam donya ureueng mate, ulon ka hana harapanle." teuma geujawueub le bilda, "hei nabi ayub, pajan kheueh gata habeh tapeugah haba? seungab kheueh, dan deungoe kheueh jinoo kamoe keuneuk peugah haba. pakon gata anggab kamoe bangai, dan gata peusaban kamoe ngon leumo? beungeh gata teupeusaket droeneueh keudroe. peu kheueh haroh deumi keupeuntangan gata nyan bumoe gadoh peunduduek jih, dan gunong-gunong teupinah nibak tempat jih? panyot ureueng jeuhet pasti teupeulon; apui jih hantom nale teupeuhu. trang lam khimah jihnyan ka jeuet keu layoh; panyot ngon peutrang nyan hanale hu meuble. langkah jihnyan nyang teugab jeuet teuhuyong-huyong; rancangan jihnyan keudroe jeuet keu sabab jihnyan meugantoh. jihnyan jijak lam taron, dan meucuet keueh gaki jih. tumet jih meucarueh ngon jeunieub, le sababnyan teudrob kheueh jihnyan. bak tanoh, teusom talo taron; bak rot ueh, teuteuen jeunieub dan pikat. ureueng jjeuhet teupeukeujot le gli nyang teuka jeueb-jeueb sagoe; teumakot jiseutot jih langkah deumi langkah. yoh ilee jihnyan teuga, jinoo jihnyan meurana; bala beuncana na meusajan jihnyan dipat mantong. kulet jih ka jipajoh le peunyakiet nyang paleng parah; jaroe ngon gaki jih kabrok meunanoh. jihnyan teucok lam khimah jih, bak jihnyan meurasa aman, laju teubahue keu teuba ubak mate. jinoo soe mantong jeuet tinggai lam khimah jih, dan disinan laju teusipreuk beulering, ngon peumate peunyakiet jih. ukeue-ukeue jih tho kreng dan krot-krot; ranteng-ranteng jih tho dan keunyuat. jihnyan hanale gob uturi bah didalam meunan cit diluwa banda; hana meusidroe pih nyang mantong ingat nan jih. lam trang jihnyan teu-use lam seupot; lam donya ureueng udeb jihnyan teukireuh teuma. aneuek meunan cit keuturonan nibak jihnyan hana; di gampang leuen jih hana meusidroe pih nyang tinggai. watee teudeungoe naseb jih, peunduduek di barat

teukeujot that, dan peunduduek di timu yo meugam-gam sabab teumakot. meunan kheueh naseb ureueng doraka, awaknyan nyang hana jipakoe po teu allah." teuma nabi ayub geujaweueb, "pakon ulon hana putoh neukheun sabe, dan gata seksa deungon tutoe haba? neu-ulang-ulang gata tahina ulon, dan gata ienaya ulon deungon hana rasa malee. meunyoe bit salah buet ulon, nyan hana rugoe gata. gata pike droe gata leubeh get nibak ulon; sosa ulonnyoe gata anggab nyan bukeuti ulon salah. neuteupeue kheueh bahwa ulon nyoe teungh geuseksa le po teu allah dan geudrob lam jeunieb gobnyan. ulon meulawan-lawan sabab keujam nyan, teuma hana meusirole pih nyang kalon ulon. "dipat keuadalan," su ulon kuk, teuma hana nyang deungoe ulon. po teu allah geutob rot ulon, ulon hana hase lon jak, jurong-jurong ulon ka geupeujeuet seupot buta. gobnyan geureupah mandum atra ulon, dan nan get ulon ka geupeurusak teuma. gobnyan geuehntam ulon rot meubagoe juroran, lagee ureueng jilot ukeue nibak seunaman, laju geupeubiyeu layoh dan layee, meunan kheueh geucok banmandum harapan ulon. meureuka po teu allah ateuhe ulon hu meuhueb-hueb; ulon geuanggab lagee musoh gobnyan. pasokan gobnyan jiseureubu hana hase teampeueng; rot ulon jak geuhalang-halang, dan khimah ulon geukeupong. kawom syedara lon geupeujioh nibak ulon; ulon jeuet keu ureueng aseng nibak mandum rakan lon. kawom dan rakan lon mandum jipeujioh droe; rakan-rakan lon hana jiingat le ubak ulon. namiet ulon nyang inong ka tuwoe, soe ulon nyoe, amphon jih; jianggab ulon nyoe sidroe ureueng nyang gohlom jituri. ulon tawok namiet lon, teuma jihnyan hana jiseut, bahpi ulon rayu jih nyan deungon su nyang leumoh leumbot. peurumoh lon luwat jicom nafah nyan, syedara kandong lon hana geutem peurab ubak lon. ulon jihina le aneuek miet bak rot ueh raya; meunyoe ulon dong, ulon jipeukem. jingiang ulon, rakan krah ulon meurasa yo; ulon jitinggai le awaknyan nyang ulon gaseh. tuboh lon tinggai kulet ngon balot tuleueng; rab mantong ulon mate dan nyawang lon meulayang. hei rakan-rakan lon, neugaseh kheueh keu lon, sabab jaroe po teu allah geupoh ulon. po teu allah hana putoh geuteugon ulon; pakon gata taseutot gobnyan? peu kheueh gohlom puih gata taseksa? ah, kirajih tutoe haba lon teucetet, deungon nyan sabe teuingat; kirajih deungon beuso teupheut ateuhe batee, mangat teutab meuteun siumu masa. ulon kuteupeue bahwa lam syeuruga na nyang bila lon; akhe jih gobnyan teuka geujak tulong lon. bahpi kulet lon luka-luka dan bicah, teuma simantong ulon na tuboh, teutab ulon kalon po teu allah. deungon mata lon keudroe gobnyan teuma lon kalon, nibak lon keudroe gobnyan jeuet keu sabahat. 'pakriban cara jih tanyoe peudakwa jihnyan?' gata neumita alasan keu gata mita peukara. teuma, jinoo, takot kheueh ubak peudeueng! sabab po teu allah meureuka dan geuhukom ureueng meudesa; le sababnyan neuteupeue kheueh le gata, bahwa na po teu allah nyang peusidang manusia." laju geujaweueb le zofar, "hei nabi ayub, ulon meurasa teusinggong tutoe gata nyan, jinoo ulon keuneuk jaweueb haba gata nyan. tutoe haba gata nyan biet-biet meuhina that, teuma ulon kuteupeue pakriban

teujaweueb nyan. peu kheueh hana gata teupeue bahwa phon bak jamen purbakala, yoh phon that manusia geupeuduek ateuhe rhueng donya, mangat ate ureueng jeuhet teuma sikeujab mantong, dan keuseunangan ureueng doraka siat mantong? bahpi keubeusaran jih trok u langet ijo, sampoe ulee jih meusampon ngon awan, teuma jihnyan teutab gadoh siumu masa, gadoh lam donya deungon cara nyang paleng hina. ureueng-ureueng nyang ka ltheueh meuturi ngon jihnyan, teuma jitanyong, "hoi, hojjak ka?" jihnyan teuma gadoh lagee bubayang lumpo, gadoh lagee keumalon watee malam teuka. jihnyan hana deuhle bak mata; jihnyan hanale tinggai bak teupat jih. nyang yoh ilee jicue nibak ureueng nyang hana sapue na haroh jigantoe le aneuek-aneuek jih. bahpi jihnyan muda dan peukasa, teuma hana treble jihnyan ka jeuet keu abee hana meuguna. keubiet that mameh jeuhet nyang na lam babah jih! rasa jih sayang that keu teu uet deungon sigra; sababnyan jikeubah mantong yueb lidah jih, mangat treb jirasa atra nyan. teuma peunajoh nyan meu-ubah lam pruet, jeuet keu racon nyang phet jiba mawot. atra jih cue nyang jiuwet nyan, teupaksa jiulee lom teuma; po teu allah geupeuteubiet lom lam pruet jih. ureueng jeuhet teuma jiiieb racon nyang ba beuncana, jihnyan teuma mate le atranyan lagee jikab le beulatang meubisa. hana jiteuma rasa minyeuk zaiton nyang meunanle meulimpah, atawa susu ngon meulisan nyang meulimpah ruah. banmandum laba jih haroh jijok pulang; hase useuha jih hana teuma jirasa. sabab jihnyan jitindeeh dan hana jikalon ban ureueng nyang gasien; dan jireupah rumoh-rumoh nyang kon jipeudong. sabab waba jih hana meubataih le, le sababnyan jihnyan hana teuma jeuet keu puih. meunyoe jihnyan jimakheun banmandum jipeuhabeh, le sababnyan keumakmuran jih hana teuma meuteun. watee ka trok bak punca makmu lam udeb jih, deurita dan malang teuka ateuhe droe jih. watee jihnyan gabuek jipasoe pruet jih, po teu allah keubiet teuka meureuka dan laju geuhukom jihnyan. meunyoe jihnyan jiplueng jipeusie nibak peudeueng baja, jihnyan teuma teupeuluka ngon panah teumaga. jihnyan keunong aneuk panah, sampoe jihnyan luka; ujong aneuk panah nyang meukilat beusoet lam tuboh jih, le sababnyan teumakot laju teuka bansaboh ate jih. hanco kheueh bubena hareuta nyang ka jikeubah; jihnyan meusajan mandum keuluwarga jih jipajoh le apui nyang hana jipeuhu le manusia. langet laju jisengkab buet jih nyang jeuhet; bumoe jibeudoh jilawan jihnyan. banmandum atra keukayaan jih habeh meuseunah, sabab beungeh po teu allah nyang hana teukira. nyan kheueh naseb ureueng nyang durjana, naseb nyang ka geupeuteuntee le po teu allah keu jihnyan." nabi ayub geujaweueb, "deungoe kheueh peue nyang keuneuk ulon peugah; teuma nyan nyang ulon lakee sibagoe peunghiboran. idhin kheueh ulon keugantoe peugah haba, oh ltheuhnyan jeuet lom droeneueh neuhina! kon ngon manusia ulon meudakwa, le sababnyan hana peue meunyoe ulon kureueng saba. pandang kheueh ulon, deungon nyan droeneueh teuma teuceungang, droeneueh teuseupok dan bahab droeneueh seungab. meunyoe lon pike keuadaan ulon nyoe, yo kheueh ulon

sabab le teumakot ngon gli. pakon ureueng jeuhet geubri umu jih panyang le po teu allah, dan hareuta awaknyan hana putoh meutamah-tamah? awaknyan udeb keubiet that treb seuhingga jikalon aneuek cu-coe awaknyan ka jeuet keu rayeuk. rumoh tangga awaknyan aman seuntosa; po teu allah hana geupeutreu beuncana ateuah awaknyan. beulatang peulara awaknyan meukeumang le, dan hana aloh alah watee jimeu aneuek. aneuek-aneuek ureueng jeuhet jilumpat-lumpat deungon geumbira, lagee buhri muda nyang meusukaria. jiseutot le su rapai, suleng dan su keucapi, awaknyan jai that meunyanoe dan meulikak-likak. uroe-uroe jih jipeuhabeh lam keubahgiaan, dan awaknyan meuninggai peunoh keudamean. padahai awaknyan jipeugah ubak po teu allah, "peujioh kheueh kanoé dan jak kheueh! kamoe hana meupakoe dan hana peureulee kamoe muphom meukeusut dan keuheundak droeneueh lam udeb kamoe." jipike le awaknyan, "teupeutimang po teu allah hana meuguna, dan meudoa ubak gobnyan hana guna jih. bukan le sabab teunaga tanyoe mantong, trok kheueh banmandum meukeusut dan tujuan tanyoe?" teuma nibak ulon sagai-sagai han seutuju deungon rot pikeran dan peundapat lageenyan. peu kheueh ka ltheuh panyot ureueng jeuhet teupeulon, dan awaknyan keunong bala dan malang jiteuka? peu kheueh ka ltheuh awaknyan geubeungeh le po teu allah, sampoe awaknyan geuhukom teuma? peu kheueh ka ltheuh awaknyan lagee jeumpung dan abee nyang jiyueb le angen badee dan angen jak? droeneueh neupeugah, "aneuek geuhukom le allah sabab le desya-desya ureueng syiek jih." teuma ulon kupeugah: ureueng meudesya nyan kheueh nyang haroh geuhukom le po teu allah, mangat awaknyan sada bahwa sabab le desya awaknyan, teuma po teu allah geukirem hukoman geuh. bah kheueh ureueng meudesya jitunggang desya jih keudroe, bah kheueh jirasa meureuka po teu allah nyang mahamanyang. meunyoé manusia ka habeh watee jih udeb ateuah rhueng donya, peu kheueh mantong jipakoe aleh keuluwarga jih bahgia? peu kheueh hase manusia jipeurunoe po teu allah, seudang po teu allah keudroe nyang peuhakem makhlok lam syeuruga? na ureueng nyang seuhata sipanyang udeb jih; jihnyan meuninggai deungon rasa puiah dan leuga. mate jih teunang deungon rasa bahgia, seudangkan tuboh jih mantong peunoh teunaga. teuma na cit nyang mate peunoh ngon phet, deungon hantomna jirasa pakriban nyan keubahgiaan. teuma lam jrata, awaknyan sabe-sabe teu-eh; jiparan le ulat ngon glang. beutoi ulon kuteupeue peue nyang droeneueh pike dan mandum buet jeuhet nyang droeneueh reuncana. droeneueh tanyong, "dipat rumoh peunguasa nyang jipeubuet keureuja doraka?" gohlom droeneueh tanyong bak ureueng nyang kayem jijak-jak? peu kheueh hana droeneueh pateh haba nyang awaknyan peugah? kheun awaknyan, "nibak uroe po teu allah geubri hukoman, bubena ureueng jeuhet geupeuseulamat." hana nyang peumasa-alah pi-e jihnyan; hana nyang balaih buet jih nyang jeuhet nyan. jihnyan teuba ubak jrata, dan teupeutamong lam kubu; jrata jih teujaga dan teu-uruih get that. meuribee ureueng jireng manyet jihnyan ubak kubu; deungon meulet-

meulet tanoh pih teuseubee jihnyan. le sababnyan, peunghiboran nyan soh hana meuguna dan banmandum jaweueh droeneueh nyan sulet!" laju geupeugah kheueh le elifas, "lamkawan umat manusia, hana meusidroe pih meuguna nibak po teu allah. ureueng nyang biet-biet meukai budoe, na kheueh meuguna keu droe jih keudroe. peu kheueh na guna jih nibak po teu allah, meunyoé gata tapeubuet keuheundak gobnyan? peu kheueh na laba keu gobnyan, meunyoé udeb gata sampoeureuna? kon le sabab teumakot gata ubak po teu allah, gata jitudoah dan jianggah meusalah, teuma le sabab jai that-that desya gata, dan keubiet jeuhet that buet ngon pi-e gata. meunyoé syedara gata hana hase jibayeue utang jih, gata reupah mandum peukayan jih. ureueng nyang hek hana gata bri ie jieb, nyang deuk hana gata peutaba peunajoh. gata peuguna jabatan dan kuasa keu gata seta banmandum tanoh jih. bukan mantong gata hana tatulong inong-inong balee, teuma aneuek yatem ngon meuntui pih gata tindeeh. le sababnyan bansikeulileng gata, jinoe peunoh ngon peurangkab, dan deungon hana teusangka-sangka ate gata peunoh ngon teumakot. uroe seumaken seupot, hana hase gata keumalon; gata jiroh le ie raya nyang paleng tajam. bukan kheueh po teu allah geutinggai bak langet nyang paleng manyang, dan geungieng u miyueb, ubak bintang-bintang nyang paleng manyang? teuma digata tatanyong, "peue jiteupeue gobnyan? gobnyan na dimeurandeh awan dan hana hase geupeusi-dang tanyoe." gata tapike bahwa pandangan gobnyan teutob ngon awan dan bahwa teuma nibak bataih lamkawan langet ngon bumoe gobnyan geujak? peu kheueh gata teutab keuneuk jak rot ueh nyang ka jipileh le ureueng-ureueng jeuhet? awaknyan teucok sigohlom trok watee jih mate, dan jipeuhanyot le ie raya nyang teuka. awaknyan kheueh nyang jijeuet tulak po teu allah nyang mahakuasa, dan jipike gobnyan hana hase geupeubuet sapue ateuah awaknyan. padahai po teu allah nyang ka peujeuet awaknyan kaya! keubiet ulon hana muphom pikeran ureueng doraka! ureueng nyang jroh, teukem-kem peunoh geumbira, watee jikalon ureueng jeuhet meuteume hukoman. banmandum atra ureueng jeuhet ka hanco sapan sapa, dan apui teuka laju jitot habeh nyang na tinggai teuisa. nyan, nabi ayub, meudame kheueh ngon tuhan, mangat gata meuteume keuteuntranman. meunyoé nyan gata peubuet, pasti gata meuteume laba. teurimong kheueh peue nyang geupeurunoé le tuhan ubak gata; keubah kheueh mandum nyan lam ate gata. woe kheueh ubak tuhan deungon miyueb ate nyang jeuhet nyang na lam rumoh gata bah kheueh gata sampoh. boih kheueh meuh gata nyang paleng aseuli; rhom kheueh lam tuwie krueng nyang hana le meu ie. bah kheueh nyang mahakuasa jeuet keu meuh gata, dan keu pirak gata nyang paleng lumboi sa. le sababnyan gata jeuet peucaya ubak po teu allah, dan gata teupeue bahwa gobnyan punca bahgia gata. meunyoé gata meudoa, gobnyan teuma geujaweueh gata, dan gata hase tapeuteupat banmandum janji gata. useuha gata teuma sabe meuhase, dan trang teuma meucahya lam udeb gata. ureueng nyang som-bong geupeumiyueb le tuhan, teuma nyang miyueb ate teuma geupeuseulamat. po teu allah teuma geu-

tulong gata meunyo gata hana meusalah, dan meunyo gata tapeubuet keuheundak gobnyan." teuma nabi ayub geujaweueh, "ulon jeumeulung-jeumeulung ngon apoh apah ubak po teu allah; hana hase ulon puteun apoh apah. ah, rupari ulon teupeue teupat gobnyan na, mangat ulon jeuet lon jak dan meurumpok ngon gobnyan. dan ubak gobnyan peukara lon nyoe ulon peuhadab, lam babah ulon jiteubiet tutoe haba tueng bila droe. ulon keuneuk lon teupeue peue nyang geupeugah, dan pakrihan gobnyan geujaweueh teuma. peu kheueh gobnyan geupeudeuh kuasa gobnyan ateueh ulon? hana! gobnyan pasti geudeungoe tutoe haba lon. ulon hana meusalah dan hase lon bila droe dikeue gobnyan, deungon nyan ulon teuma geupeugah beubah keu siumu masa. ulon mita po teu allah, di timu, barat, seulan dan utara. teuma, dipat mantong po teu allah hana; dan ulon hana hase meurumpok ngon gobnyan. teuma gobnyan geuteupeue banmandum rot ulon meunan cit tieb-tieb langkah lon. meunyoe lagee meuh ulon geu-ujoe, jeuet keu bukeuti bahwa ate ulon gleh. ulon taat ubak gobnyan deungon seutia; hantomna ulon meusingan nibak rot nyang ka geupeuteuntee. peurintah-peurintah po teu allah sabe ulon taat, meulakee gobnyan ulon turot dan bukan keuheundak lon keudroe. po teu allah nyan hana meu-ubah; hana nyang hase jilawan gobnyan. gobnyan geupeubuet peue nyang geumeuheut. gobnyan teuma geupeujak reencana gobnyan keu ulon, dan mantong jai that reencana gobnyan nyang laen seulan nyan. sabab teumakot ubak gobnyan, yo kheueh ulon; seumaken mandum nyan ulon pike, seumaken teumakot kheueh ulon. nyan mahakuaa geupeuhanco banmandum keubeuranian ulon. ulon teumakot le sabab po teu allah, dan kon le sabab seupot buta, bahpi seupot nyan jikeulileng ulon, dan jitob rumon ulon. pakon po teu allah hana geupeuteutab uroe peusidangan, mangat ureueng-ureueng nyang turi gobnyan meuteume keuadalan? na ureueng nyang jigeesee tanda bataih, mangat tanoh jih meutamah luwah. awaknyan jicue kawan bubiri, dan jijak pasoe lam weue awaknyan keudroe. keuleudee atra aneuek yatem ngon meuntui awaknyan baplueng; leumo sidroe inong balee, awaknyan cok sibagoe jaminan. awaknyan jipagab ureueng gasien mangat jiteume jeumba, le sababnyan, teupaksa jijak musom kheueh ureueng gasien papa. nyang, ureueng gasien nyan lagee keuleudee kleut nyang jimita eumpeun lam blang meuduro; teuma bak teupat-teupat nyan mantong nyang na peunajoh keu aneuek-aneuek awaknyan. blang ureueng laen teupaksa awaknyan peubuet; boh anggo ureueng jeuhet teupaksa awaknyan peusapat. jihnyan hana ija seulimbos dan peukayan ngon peuseu-uem tuboh oh watee malam. jihnyan basah le ujeuen raya sideh di gunung, laju jipeurab bak gunung batee keu jimeuteudoh. ureueng jeuhet jicok keu namiet aneuek nyang hana ma ngon yah, dan jicok aneuek banyak ureueng gasien nyang meu-utang bak jih. ureueng gasien jijak ngon hana sapeue na; jihnyan deuek teungoh jipot boh gandom lam blang. nibak zaiton jihnyan jipeugot minyeuk, dan nibak boh anggo, jipeugot ie jieb, teuma jihnyan keudroe jiteuka glaih lagee raya. di banda-banda teudeungoe su ureueng aloh

alah nyang ka payah that, ureueng-ureueng luka jiteumawok mangat jih teupeu-ubat, teuma po teu allah hana geudeungoe doa awaknyan; gobnyan hana geutem pakoe awaknyan. na ureueng nyang jitulak trang dan jicok keu musoh, awaknyan hana jituri dah hana jiseutot rot jih. oh watee seuboh tukang poh mate gob jibeudoh nibak teupat eh jih, laju jiteubiet jijak poh mate ureueng gasien papa, dan watee uroe gohlom beungoh, jihnyan meulume-meulume lagee pancuri. ureueng peubuet mukah jipreh-preh teuka watee seunja; laju jingui tutob muka mangat gob hana jituri jihnyan. pancuri jibongka rumoh oh watee malam; oh watee uroe jipeusie nibak peungeueh dan jijak musom. nibak jih, beungoh lumpah teumakot, teuma seupot nyang hebat, keubiet galak that ate jih." laju geupeugah le zofar, "ureueng jeuhet hanyot le ie beuna, tanoh atra milek jih geukutok le po teu allah; lampoh anggo jih jinoe ka seunge; hanale nyang meubuet nibak lampoh nyan. lagee salju teusampoh le keunong musem khueng dan mata uroe, meunan kheueh ureueng meudesya jiuat lam donya ureueng mate. ma jih keudroe geutuwoe ubak jih, dan glang-glang jijak seuba tuboh jih nyan. nan jih ka hanale gob ingat; jihnyan teupeumeusunah lagee bak kayee nyang reubah. banmandum ulon jeuet na sabab jih nyan jitindeeh inong-inong balee, dan buet jih keujam that ubak ma nyang hana meu aneuek. teuma po teu allah, ngon kuasa gobnyan, geuparoh ureueng peukasa. po teu allah geubudoh dan geupoh, laju mate kheueh ureueng doraka. po teu allah geubri jih udeb aman seuntosa, teuma teukawai jihnyan hana pioh-pioh sabena. teuma sikeujab jihnyan udeb bahgia, teuma oh dudoe jijak keu siumu masa. jihnyan layee lagee naleueng nyang hana meuguna; lagee aneuek pade nyang teukoh nibak bak jih. soe kheueh nyang hase jibantah keunyataan nyan, atawa jisanggah keubeuranian nyang ulon peugah?" laju bildad jiwaweueh, "po teu allah nyan keubiet meukuasa; banmandum ureueng haroh yo meukot-kot dikeue gobnyan; gobnyan kheueh nyang peulara keudamean ngon keurajeuen gobnyan lam syeuruga. peu kheueh hase teutong malaikat nyang peutimang gobnyan? peu kheueh na teupat nyang hana keunong ngon cahya gobnyan? peu kheueh mungkin manusia suci dikeue po teu allah? mungkin kheueh jihnyan aseuli nibak pandangan gobnyan? nibak po teu allah, bahnyan buleuen pih hana trang, dan bintang geuanggab reudee. peue lom manusia, bah nyan glang, seurangga! nibak mata po teu allah, jihnyan keubiet hana meuhareuga." teuma nabi ayub geupeugah, "keubiet carong that neubri sinulong ubak ulon nyang leumoh dan lam payah nyoe! keubiet diet that naseuhat dan ajaran nyan nyang ka droeneueh bri ubak ulon, ureueng nyang bangai! ubak soe kheueh haba droeneueh nyan teutuju? soe nyang bri ilham droeneueh keu neumeututoe meunan bagoe?" jaweueh bildad, "ureueng-ureueng lam alam mawot yo meugam-gam; ie dan nyang na disinan yo cit teuma. dikeue po teu allah, donya ureueng mate teubuka, hana teutob sampoe deuh teukalon le gobnyan. po teu allah geuleueng langet, di ateueh laot raya, dan geugantung bumoe bak ruweueng nyang hampa. geupasoe lam awan

ngon ie nyang meulimpah-limpah, teuma awan nyang hana beukah sabab le geuhon ie nyan. geusom rumah buleuen pernahna di meurandeh awan nyang ka geuleueng nyan. geugamba gareh meulangka ateuh muka laot keu teupeu aseng trang nibak seupot. meunyo gobnyan geudumpek ngon su nyang meutaga, taméh-taméh sinumpang langet yo meugamgam. laot raya geupeutaklok le kuasa gobnyan dan rahab pih jipeurunoe le carong gobnyan. nafah gobnyan teusampoh langet sampoe gleh lagoena; jaroe gobnyan geupoh naga nyang rab jiplueng. teuma mandum nyan sibagoe tanda kuasa gobnyan; teuma haba meusah-sah nyang trok bak geulinyueng tanyoe padubna nit peungeurtian tanyoe keuhai po teu allah dan hebat jih kuasa gobnyan!" nabi ayub geupeugah lom haba geuh, kheun gobnyan, "deumi allah nyang udeb, nyang hana geubri keuadelan keu ulon, ulon meusumpah: simantong po teu allah geubri nafah keu ulon, simantong nyawong na lam tuboh lon, bibi ulon hana lon peugah haba nyang sulet, lidah ulon hana lon peugah tipee daya. le sababnyan, hana lontem peugah bahwa droeneueh beutoi; trok an mate pi teutab ulon peuteun bahwa ulon hana meucupa. ulon teutab lon mumat ubak patuh ulon, dan ate nurani lon pih teutab gleh sabe. seumoga musoh ulon geuhukom sibagoe nyang doraka, dan lawan ulon geuseupot sibagoe ureueng doraka. peu kheueh na harapan keu ureueng dursila bak watee po teu allah geutuntot jiwa jih? peu kheueh po teu allah geudeungoe su mo jih watee keusosahan rhot ateuh jih? nyang sikeubiet jih jihnyan jimeuceu that ubak keuseunangan nibak po teu allah, dan meudoa ubak gobnyan deungan hana meurasa hek. gata teuma lon peurunoe keuhai padubna rayeuk jih kuasa allah, ulon britee ubak droeneueh keuhai reuncana nyang mahakuasa. teuma, gata mandum ka droeneueh ngieug keudroe. le sababnyan, pakon droeneueh bri naseuhat nyang hana meumakna?" dan geupeugah kheueh le zofar, "meunoe kheueh cara jih po teu allah nyang mahakuasa geuhukom ureueng nyang zalem dan doraka. meunyo aneuek jih le, awaknyan teuma mate lam mideuen prang dan aneuek cucoe jih teuma udeb sabe hana lam seb. syedara jih nyang mantong na, mate keunong bala, dan inong-inong balee awaknyan hana jipeuba-e ngon mo nyang gura. jeuet mantong pirak jih meutamon-tamon dan peukayan jih meususon-suson, teuma pirak dan peukayan nyan banmandum teuma jeuet keu hak milek ureueng nyang juoe ate jih. rumoh ureueng jeuhet leumpok lagee eumpueng rambideuen, rumoh sikeujab mantong lagee jambo sidroe tukang jaga. jihnyan jipeureubah droe lagee ureueng kaya, teuma hainyan hana hase jiwa teuma, watee jihnyan jibeudoh nibak teupat eh jih, ka gadoh dan sapan sapa kheueh atra keukayaan jih. keudahsyatan rhot lagee ie raya nyang teuka hana teusangkangka. angen badee oh malam teuka laju jiyueu dan jitarek jihnyan mangat jijak. angen timu jibeuet jihnyan, dan jisampoh jihnyan nibak rumoh jih. jihnyan jipeuron ngon hana rasa gaseh, dan teupaksa jiplueng jijak mita teupat meulindong. reubah jih laju jisambot le gob sira jipeh-peh jaroe; dipat mantong jihnyan meuteume peuhinaan." na teupat

tambang pirak nibak teupat nyan pirak jiteume; na teupat meuh teupeugleh sampoe aseuli. beuso teukeuh nibak lam tanoh; nibak batee teupeulieleh teumaga. seupot buta nyan meuhase jijak, teupat nyang paleng lhok teuseulidek teuma. disinan, lam seupot glab nyan, ureueng jijak mita meubagoe jeuneh batee. jioh nibak teupat nyang hana ureueng duek, nyang gohlom na jigilo dan jijak rot nyan, ureueng jimeubuet sira meugantung-gantung nibak taloe lam guha teureuwongan nyang seungue hana sapeue na. tanoh jipeuhase peunajoh keu manusia, teuma dimiyueb tanoh nyan cit teuma, banmandum geureuloh sira geubalek-balek sampoe asoe bumoe ka hana meuteuntee. batee lam tanoh na meundangong nilakandi, dan abee jih jeuet keu meuh aseuli. cicem kleung hana jituri rot jak keudeh, dan cicem nasar pih gohlom na jipo di ateuh nyan. gohlom na singa atawa beulatang laen jijak rot seungue nyang teutuju keudeh. ureueng jikueh lam batee nyang padubna pih kreueh jih, jireuloh gunong trok ubak ukeue jih. watee jihnyan jipeugot rot peureulung lam gunong batee, laju meuteume peumata nyang paleng meumutu. trok ubak asai mata ie jihnyan jikueh, laju jiteume peue nyang teusom. teuma dipat kheueh hikeumat nyang hase jimita? dipat kheueh tanyoe jeuet tameurunoe mangat tanyoe muphom? hikeumat hana nibak teungoh-teungoh manusia; hana nyang teupeuyuem jih nyang sikeubiet jih. tuwie-tuwie laot dan samudra jipeugah bahwa hikeumat hana bak jihnyan. hikeumat hana hase teutuka bahpi deungan meuh aseuli, dan deungan pirak pih hana hase teubloe. meuh dan peumata nyang paleng meuyuem hana hase jeuet keusaban yuem jih. meuh atawa ceureuman hana hase jeuet keubandengan jih, hana hase teubayeue ngon pot bungong keuncana. hikeumat jioh leubeh manyang yuem jih nibak merjan, kristal, atawa mutiara. batee topas nyang aseuli atawa meuh nyang aseuli, kureueng nilai jih nibak akai budo. dipat kheueh uboejih keubijaksanaan? dipat kheueh geutanyoe hase tateume peungeurtian? hana meuhon udeb nyang ka lheureh jikalon atra nyan, makhluk cit cicem nyang po di manyang hana jikalon nyan. mawot dan binasa pih jipeugah, awaknyan jideungoe haba nyang hana meupat punca. teuma po teu allah nyang teupeue dipat hikeumat nyan na, teuma gobnyan nyang teupeue rot jak keunan, sabab gobnyan geukalon ujong-ujong bumoe; peue-peue mantong dimiyueb langet gobnyan peurati. watee ubak angen geujok teunaga, dan geupeuteutab bataih-bataih laot raya; watee geupeuteuntee teupat ujeuen jitreun, dan rot nyang jijak kilat ngon gogo; bak wateanyan kheueh hikeumat geukalon, geu-ujoe nilai jih, lheureh nyan baro kheueh geubri reuseutu. po teu allah meufeureuman ubak manusia, "mangate meuteume hikeumat, po teu allah haroh gata horeumat. mangate meuteume peungeurtian, keujeuhetan haroh gata peujioh." nabi ayub geupeugah keuhai droe gobnyan, kheun gobnyan, "kira jih udeb lon jeuet lom lagee yoh awai ilee, watee po teu allah geulindong ulon. ulon sabe geubri sinulong, geupeutrang watee lon jak lam seupot. nyan kheueh uroe-uroe keujayaan ulon, watee po teu allah mantong krab ngon lon dan peupayong rumoh

lon. watee nyan nyang mahakuasa mantong geudampeng ulon, dan aneuek-aneuek lon na bansilingka lon. beulatang peulara lon jai that jipeuhase susu. jai that minyeuk jipeuhase le bak-bak zaiton, bahpi teupula ateuh tanoh meubatee. meunyo ureueng-ureueng patot lam banda geuduek meusajan, dan ulon duek laju lamkawan awaknyan, jisurot kheueh ureueng-ureueng muda, bagaih that oh ka lheureh lon kalon awaknyan. meunan cit ureueng-ureueng tuha geubeudoh ngon hikeumat; keu geubri horeumat. meunan cit ureueng-ureueng rayeuk geupioh geupeugah haba, dan ureueng peunteng pi hana geupeugah haba. soe mantong hireuen that meunyoe jideungoe keuhai ulon; soe nyang kalon ulon, jipujoe keuhai jasa lon. sabab, ulon tulong ureueng gasien nyang lakee tulong; ulon tulong yatem ngon meuntui nyang hana bantu. ulon jipujoe le ureueng nyang keubit that sosah, ulon tulong inong-inong balee sampoe awaknyan aman. nyang ulon peubuet nyan juJoe hana meucupa; ulon peudong keuadelan dipat mantong na. keu ureueng buta, ulon nyoe jeuet keu mata jih keu ureueng lapee, ulon na kheueh gaki jih. keu ureueng gasien, ulon na kheueh ayah jih; keu ureueng aseng, ulon na kheueh peumbela jih. teuma kuasa ureueng keujam, ulon wiet sampoe patah, dan keureubeuen awaknyan ulon peuseulamat. harapan ulon na kheueh meuteume umu nyang panyang, dan mate ngon teunang lam rumoh lon keudroe. ulon lafee bak kayee nyang udeb jih suboe dan timoh get, ukeue jih seb ie dan iembon jipeubasah cabeueng jih. ulon sabe jipujoe le mandum ureueng, dan hantom na teunaga lon meukureueng. ureueng-ureueng mandum seungab, meunyo ulon teungoh bri naseuhath; banmandum nyang ulon peugah awaknyan deungoe ngon mangat. oh ka lheureh ulon peugah haba, hana le nyang peureulee teutamah; tutoe haba lon jitamong lafee ie ujeuen. banmandum ureueng jisambot tutoe haba lon deungon peunoh geumbira, lafee peutani jisambot ujeuen treun watee musem bungong. ulon teuseunyum ubak awaknyan watee awaknyan putoh asa; ie muka lon nyang bahgia teutamah seumangat awaknyan. ulon kheueh nyang mat pimpanan, dan nyang cok mandum keuputosan. ulon pimpan awaknyan lafee raja di teungoh pasokan jih, dan ulon peumangat ate awaknyan lam keuseudehan jih. teuma jinoe ulon jihina le ureueng nyang leubeh muda. yoh watee ilee ureueng syiek awaknyan ulon ngieng hina keu jirabe bubiri lon meusajan ase meurabe. nibak ulon awaknyan hana meuguna sabab ka habeh teunaga. awaknyan duek dan meudeurita lagoena, sampoe jipajoh ukeue tho kreng bak gurong nyang seungue. awaknyan jilot tamah meuduro lam padang kasak kasek laju jimakheun bah kheueh on meunan cit ukeue jih. awaknyan jiuse deungon tengking lafee ureueng jiuse pancuri. awaknyan tinggai lam guhaguha; ruhueng-ruhueng bak binteh gunung jeuet keu rumoh awaknyan. lam uteun raya awaknyan jiklik-klik lafee beulatang, meukeulompok dimiyueb tamah meuduro lam gle. awaknyan hana nan meunan cit hana meuyemu, ureueng-ureueng ka teuparoh lon nangroe jih. jinoe awaknyan teuka dan ulon jipeukem teuma; nibak awaknyan, ulon nyoe lrelucon

nyang hana meuhareuga. ulon jingieung le awaknyan hina ngon kutoe, meunan cit muka lon jiludah teuma. le sabab po teu allah geupeujeuet ulon leumoh hana meudaya, awaknyan jipeupuih ban galak droe beungeh jihnyan. kawan awaknyan jiheuntam ulon rot keue, dan keuhai rhot ulon ka awaknyan reuncana. awaknyan jikoh rot ulon keu jipeutaloe ulon; hana meusidroeh pih nyang halang watee awaknyan jiseureubu. lafee ie beuna awaknyan heuntam beuton kuta lon; meusajan-sajan awaknyan teuka jikak tindeeh tuboh lon. nyang paleng dahsyat ka peunoh bansaboh tuboh lon; lafee jiyueb le angen, yuem droe ulon teupupoe teuma; lafee awan teungoh jak, gadoh kheueh keubahgiaan lon. jinoenyoe rab mate ulon; hana nyang phui keu deurita ulon. oh watee malam mandum tuleung lon linu-linu; rasa saket nyang jitob-tob hana jipioh-pioh. po teu allah geuteugom ulon bak takue bajee lon sampoe peukayan ulon krot-krot bak tuboh lon. u dalam leuhob ulon geuseumpom, ulon nyoe geupeujeuet lafee broh nyang hana meuguna! ulon meudoa ubak droeneueh ya allah, droeneueh hana neujaweueb; watee ulon meudoa, droeneueh hana neupakoe. droeneueh neupeusanaut ulon deungon keujam, droeneueh tindeeh ulon deungon banmandum teunaga droeneueh. droeneueh neupeubiyeu angen jipupo ulon sampoe meulayang; lam angen badee droeneueh pot keudeh keunoe droe ulon. ulon kuteupeue, droeneueh ba ulon ubak alam mawot, ubak teupmat mandum nyang udeb teupeusapat keunan. keupeue droeneueh seurang ureueng nyang keunong bala, nyang hana hase jipeubuet sapue seulaen jilakee beuteuweuh. bukan kheueh ulon kumoe meusajan ngon ureueng nyang sosah, dan lon gaseh ureueng nyang kureueng harta? ulon meuharab bahgia dan trang, teuma aloh alah dan seupot buta kheueh nyang teuka. ulon teupriek-priek le seudeh dan weuh lumpah na; uroe meugantoe uroe seumaken le nyang lon deurita. lam seupot, hana cahya, ulon jak keudeh keunoe; ulon dong dikeue rakyat ba, lon lakee tulong. su ulon seudeh peunoh ngon weuh lafee jimo ase seugala dan cicem unta. kulet ka jeuet keu itam; tuboh lon tutong le sabab deumam. yoh watee ilee ulon deungoe su musik geumbira, jinoe nyang na su ureueng mo ba-e deungon duka. deungon sumpah ulon ka meujanji aneuek dara muda hana lon kalon deungon beurahi. peu kheueh nyang geupeubuet po teu allah ateuh geutanyoe? pakriban kheueh geubalaih buet manusia? bala dan malang pasti teuka ubak ureueng nyang peubuet jeuet! po teu allah teupeue banmandum buet ulon; geukalon mandum langkah-langkah lon. ulon meusumpah bahwa gohlom na ulon peubuet jeuhet; meunan cit gohlom na ulon peungot gob. bah kheueh po teu allah geutimang ulon ateuh ceng nyang sah, deungon nyan gobnyan geuteupeue bahwa ulon hana meusalah. meunyo seukira jih ulon ka meusimpang nibak rot nyang beutoi, atawa ate ulon teutarek ubak hai nyang kuto, meunyo jaroe lon ka basah deungon desya, deungon nyan bah kheueh ureueng laen jipajoh peue nyang ulon tabu, dan banmandum hase bumoe lon hanco. meunyo seukira jih ulon teutarek ubak peurumoh teutangga lon, dan deungon musom-musom,

ulon luem jihnyan rot likot pintoe, deungan nyan bah kheueh peurumoh lon jitaguen bu keu ureueng laen; bah kheueh atehueh peuratah agam laen jihnyan eh. meunyoe desya nyang jeuhet nyan biet na lon peubuet, ulon ka patot lon teurimong hukoman. desya nyan jeuet keubinasa lagee apui neuraka, banmandum atra ulon habeh tutong mandum. watee namiet ulon aloh alah sabab hak jih ulon peusalah, ulon deungoe jihnyan dan lon peusanet jihnyan deungan ate juoe. meunyoe hana, pakriban ulon meuhadab po teu allah? peue nyang ulon jaweueb watee gobnyan teuka geujak peusidang ulon? bukan kheueh po teu allah nyang cepta ulon, meunan cit nyang cepta namiet-namiet lon? gohlom na hana lon-tem tulong ureueng nyang gasien meuseukien. atawa lon peubiyeu inong-inong balee udeb lam keuadaan putoh asa. gohlom na ulon peubiyeu aneuek yatem ngon meuntui udeb jih duek, seudangkan ulon keudroe seb lon pajoh. yoh ubit awaknyan lon peulara; siumu udeb lon awaknyan ulon bimbeng. meunyoe ulon ngieng ureueng nyang udeb jih lam kureueng, lumpah that gasien keu teubleu peukayan. ulon peuliembot jihnyan mangat seu-uem ngon ija wol nibak bubiri lon keudroe, deungan lageenyan jihnyan jipujoe ulon deungan sipeunoh ate. meunyoe ulon ka ltheueh lon tindeeh yatem ngon meuntui, sabab yaken teuma peukara lon meunang, deungan nyan bah kheueh bandua blaih jaroe lon patah sampoe jim-inah nibak baho ulon. hana ulon peubuet lagee nyan, sabab hukoman po teu allah keubiet teumakot that ate lon. hantom na ulon peubangga ngon hareuta lon, atawa ulon peubangga atra keukayaan lon. hantom na ulon seumah mata uroe nyang meunan trang atawa buleuen nyang hu beuble-ble ceudah. hantom na ulon teugoda le atra nyan, atawa ulon keucob jaroe lon keu lon horeumat jih. desya nyang lageenyan bagoe patot meuteume hukoman mate, sabab po teu allah nyang mahakuasa ka jiingkeue. gohlom na ulon meumangat-mangat ate sabab musoh lon meudeurita, atawa meuduka cita sabab jihnyan meuteume ceulaka. ulon hana meudoa keu beumate musoh lon; hantom na ulon peubuet desya nyang lageenyan bagoe. ureueng-ureueng nyang meubuet bak ulon jiteupeue, bahwa soe mantong ulon peujame lam rumoh ulon. rumoh lon teuhah sabe keu ureueng teungoh jak; hantom na ulon peubiyeu awaknyan jieuh atehueh rot uh. ureueng laen jisom-som desya jih, teuma ulon hantom na lon peubuet lageenyan bagoe. peue jikheun le gob hana lon takot, dan jihina le gob, hana lon pakoe. hantom na ulon tinggai dirumoh dan seungab mantong, sabab teumakot keu jihina. peu kheueh hana ureueng nyang jitem deungoe tutoe haba lon? ulon meusumpah bahwa peue nyang lon peugah beutoi mandum. kira jih nyang mahakuasa geujaweueb mandum ulon. teuma deungan bangga ulon lat bak baho, dan sibagoe mahkota ulon keubah atehueh ulee. teuma ulon britee ubak po teu allah banmandum nyang ulon peubuet; teuma ulon hadab geuhnyan deungan bangga dan ulee teudong cot. meunyoe seukira jih tanoh nyang ulon meu-ue ka ulon cue, dan ulon reupah nibak po jih nyang seujati, seukira jih hase jih habeh ulon pajoh, dan peutani nyang pula nyan ulon peubiyeu duek, bah kheueh kon

jeulai atawa gandom nyang timoh lam ladang, teuma tamah meuduro dan naleueng lakoe." sabab nabi ayub yaken that-that atehueh keubeunaran droe gobnyan, le sababnyan, ban lhee droe sahabat geuhnyan hana geutem jaweueb le. teuma disinan na sidroe ureueng nyang nan geuh elihu bin barakheel, sidroe keuturonan bus nibak kawom ram. gobnyan hana hase geupeuteun beungeh geuh, sabab nabi ayub geupeubeutoi droe gobnyan keudroe dan geupeusalah po teu allah. meunan cit gobnyan beungeh ubak ban lhee droe sahabat nabi ayub sabab awaknyan hana hase jibantah tutoe haba nabi ayub, bahpi awaknyan jipeusalah nabi ayub. elihu ureueng nyang paleng muda lamkawan awaknyan, le sababnyan gobnyan geupreh sampoe seuleusoe mandum awaknyan meupeugah haba. oh ka ltheueh geukalon bahwa ban lhee droe awaknyan hana hase geujaweueb, gobnyan jeuet keu beungeh, dan laju geupeugah lagee nyoe, "ulon mantong muda, seudangkan droeneueh ka tuha, le sababnyan ulon teumakot dan ragu ulon peugah peundapat lon. ulon pike, droeneueh kheueh nyang haroh peugah haba, nyang leubeh tuha bah kheueh geubagi hikeumat geuh. teuma nyang jok hikeumat ubak manusia, na kheueh roh po teu allah nyang mahakuasa. ureueng jeuet keubijaksana, kon le sabab umu jih ka tuha; ureueng muphom nyang beutoi, kon le sabab panyang umu jih. le sababnyan, deungoe kheueh ulon; idihin kheueh ulon lon peugah peundapat lon. deungan saba ulon deungoe watee droeneueh peugah haba, dan ulon preh watee droeneueh neumita tutoe haba nyang bijaksana. ulon simak deungan biet-biet that; ulon deungoe droeneueh meuteume keugagalan. nyang salah nibak tutoe haba nabi ayub hana hase droeneueh jok bukeuti. pakriban jeuet droeneueh peugah bahwa hikeumat ka droeneueh teume? sabab droeneueh teupaksa meunyeurah. nyang hase jaweueb nabi ayub na kheueh po teu allah. ubak droeneueh kheueh nabi ayub peugah haba, dan bukan ubak ulon, teuma ulon hana lon jaweueb lagee droeneueh. nabi ayub, awaknyan bingung dan hana hase geujaweueb; hana nyang jeuet awaknyan peugah. awaknyan jidong mantong, hana hase jimeututue le. peu kheueh haroh ulon preh bahpi awaknyan ka ji-iem droe? hana, jinoe teuma ulon jaweueb; peundapat ulon, teuma ulon peusampoe. hana saba le ulon preh, hana hase le ulon teun tutoe haba lon. meunyoe ulon seungab mantong, teuma beukah kheueh ulon, lagee baluem nyang peunoh ngon ie anggo baro. ulon haroh peugah haba, mangat ate lon teunang; ulon haroh lon peuhah babah lon, dan ulon bri jeunaweueb. hana ulon bila soe mantong nibak meudakwa nyoe dan hana meusidroe pih nyang ulon pujoe-pujoe. cara teubeut-beut pi, ulon hana lon teupeue, dan meunyoe ulon kupeubuet lageenyan, po teu allah deungan reujang geuhukom ulon. jinoe, hei nabi ayub, deungoe kheueh deungan jroh that tutoe haba nyang keuneuk lon peusampoe nyoe. ulon ka siab seudia keuneuk meututue lon peugah haba. deungan ikhlaih ate ulon peugah haba; nyang ulon peugah na kheueh nyang sibeuna jih. roh po teu allah ka geucebta ulon dan geubri udeb ubak ulon. le sababnyan, meunyoe hase, jaweueb kheueh ulon. peu-

siab kheueh nyang bila keuteubila droe gata. nibak po teu allah, droeneueh dan ulon hana meubeda nibak tanoh kliet tanyoe geupeuet. le sababnyan, bek droeneueh takot ubak ulon; ulon hana niet keuneuk peutaloe droeneueh. nyang kheueh, oh ka lheueh lon deungoe peue nyang droeneueh peugah, dan ulon muphom peue nyang droeneueh meukeusut. droeneueh neupeugah, 'ulon gleh, hana lon peubuet nyang geutam. ulon hana meucupa dan hana lon peubuet nyang salah. teuma po teu allah geumitmita alasan geulawan ulon, dan geupeujeuet ulon sibagoe musoh geuh. gobnyan geuboh rante bak kaki lon; dan geukawai mandum grak grik lon.' hei nabi ayub, peundapat droeneueh salah mandum! sabab po teu allah leubeh rayeuk nibak manusia. pakon droeneueh tatudoh allah bahwa gobnyan hana geupakoe aloh alah manusia? po teu allah geumeutute deungon meubagoe cara, teuma hana meusidroe nyang tem pakoe tutoe haba gobnyan. di ureueng eh meusinyeunya oh watee malam, lam lumpo dan deuh teukalon, po teu allah geupeugah haba. po teu allah geuyue awaknyan beujideungoe; geupeukeujot awaknyan deungon geuseugah sabe. meukeusut jih mangat awaknyan jipioh meudesya dan jitinggai buet jih nyang sombong. hana geupeubiyeu awaknyan rhot ubak hanco; geulindong awaknyan nibak mate. po teu allah geuseugah ureueng deungon geupetreun peunyaket deungon nyan tuboh jih peunoh rasa saket. nyang saket nyan ka gadoh nafesus pajoh bu, peunajoh nyang paleng mangat pi ka jeuet keu luwat. tuboh jih jeuet keu pijuet dan meurana, tuleueng-tuleueng jih deuh banmandum. gobnyan karab jiwoe u alam baka donya ureueng mate karab that ubak jihnyan. mungken sidroe lamkawan siribee malaikat allah nyang peuingat manusia nibak tugaih jih, teuma teuka teujak tulong jihnyan. deungon meuweuh-weuh malaikat nyan teuma geupeugah, 'peuleuh kheueh jihnyan, hana jeuet jihnyan jitreun lam donya ureueng mate. nyoe peng ngon teuboh, mangat jihnyan beubaih lom teuma.' tuboh jih teuma jeuet keu teuga dan peukasa seugar lagee ureueng muda. meunyoe jihnyan meudoa, po teu allah teuma geugaseh jihnyan, teuma jihnyan jipujoe allah deungon geumbira dan po teu allah teuma geupeupuleh keuadaan jihnyan. teuma, dikeue ureueng rame jihnyan laju jipeugah, 'nyang jeuhet ulon anggab jroh, rayeuk that kheueh desya lon, teuma po teu allah hana geuhukom ulon.' po teu allah geutam ulon bek ulon jak lam donya ureueng mate, deungon nyan ulon mantong udeb sampoe an jinoo. deungon meulang-ulang, po teu allah ka geupeubuet banmandum nyoe. mangat gobnyan hase geupeuseulamat manusia dan geubri keubahgiaan lam udeb jih. le sababnyan deungoe kheueh hei nabi ayub, pasang kheueh geulinyueng seungab kheueh, jinoo ulon teuma nyang peugah haba. teuma meunyoe na nyang keuneuk droeneueh peugah, peugah kheueh laju; dan meunyoe droeneueh beutoi, ulon teuma rila lon aku nyan. teuma meunyoe hana, seungab kheueh dan deungoe kheueh ulon, ulon keuneuk peurunoe hikeumat ubak gata. bukan kheueh droeneueh carong dan na akai budo? deungoe kheueh banmandum nyang ulon peugah nyoe. ureueng jiteu-

peue peunajoh mangat meunyoe ka jirasa, dan tutoe haba bijak meunyoe ka jideungoe. soai nyoe haroh tapeureksa laju tapeubical meusajan teuma. kheun nabi ayub, 'hana nyang salah nibak ulon, teuma po teu allah hana geutem bri peue nyang ade keu ulon. ulon geuanggab meusulet, sabab ulon peugah ulon hana meudesya. jinoo ulon luka parah that, bahpi ulon hana meusalah.' peu kheueh ka lheueh takalon ureueng lagee nabi ayub nyoe? jihnyan jihina po teu allah meulang-ulang. jihnyan galak jimeurakan ngon ureueng-ureueng doraka meunan cit jimeungon deungon ureueng-ureueng durjana. gobnyan jipeugah, bahwa sia-sia mantong kheueh meunyoe jihnyan jiuseuha jipeubuet keuheundak po teu allah. hei ureueng-ureueng bijaksana, deungoe kheueh! ek kheueh mungken po teu allah nyang mahakuasa geupeubuet salah? gobnyan geuganja manusia nyang sisuai deungon buet jih, geupeusaneut jihnyan sisuai deungon nyang jipeubuet. po teu allah nyang mahakuasa hana geupeubuet nyang jeuhet; banmandum ureueng geubri keuadelan. nibak soe kheueh po teu allah geuteurimong kuasa geuh? soe kheueh nyang peucaya bumoe nyoe ubak gobnyan? miseujih po teu allah geuterek nyawong manusia, dan geucok lom teuma nafah udeb jih, deungon nyan mate makhlok mandum nyang na nyawong, dan manusia jeuet keu abee lagee seumula. nyan, meunyoe droeneueh areh, simak kheueh nyan, pasang kheueh geulinyueng gata dan deungoe kheueh. peu kheueh po teu allah nyang ade dan peukasa nyan gata peusalah? peue nibak neupike le droeneueh po teu allah geubanci keuadelan? po teu allah geuhukom raja dan nyang mat kuasa meunyoe awaknyan jeuhet dan doraka. gobnyan hana geudong blah raja-raja, laju leubeh geupeunteng ureueng kaya nibak si gasien meuseukien. sabab awaknyan banmandum na kheueh ceblaan gobnyan. watee teungoh malam, awaknyan hase mate deungon hana teusangka-sangka. po teu allah geuhukom peunguasa dan awaknyan pi binasa; deungon mudah geupoh mate ureueng peukasa. gobnyan geukawai udeb manusia, geukalon mandum meubagoe langkah geuh. hana seupot, pakriban mantong kheueh peukat jih, nyang hase teusom manusia meudesya. hana peureulee po teu allah geupeuteuntee watee jih, manusia teuka keu geupeusidang le gobnyan. deungon hana geuseulidek dan geupeureksa gobnyan geupeucat nyang mat kuasa dan geubaiat geunantoe jih. sabab, gobnyan geuteupeue peue nyang awaknyan peubuet; teuma gobnyan geugule dan geupeuhanco awaknyan oh watee malam. awaknyan geutampa sabab le desya awaknyan, dikeue rakyat ba awaknyan geuhukom teuma. sabab, awaknyan hana jitaat ubak keuheundak gobnyan dan hana jipakoe mandum peurintah gobnyan. le sabab awaknyan jeuet ureueng gasien aloh alah mo ba-e awaknyan geudeungoe le po teu allah. meunyoe po teu allah geucok keuputosan keu geuseungab mantong, hana meusidroe pih nyang jijeuet kheun keu gobnyan. meunyoe gobnyan geusom ruman geuh, hana meusidroe pih meuhase meurumpok ngon gobnyan. teuma bansa-bansa hana meudaya keu jiceugah teumindeeh jeuhet nyan meukuasa. hei nabi ayub, peu kheueh desya droeneueh ubak po teu allah ka droeneueh angkee?

peu kheueh ka droeneueh meujanji bahwa droeneueh hana meudesya le? peu kheueh ka droeneueh lakee mangat geutunyok salah droeneueh? peu kheueh ka neumeusumpah bahwa droeneueh neupioh nibak buet nyan? ek kheueh mungkin po teu alah geupeutrok peue nyang gata lakee, oh ka lheureu buet po teu allah hana droeneueh situju? jinoo, droeneueh nyang haroh cok keuputosan, kon ulon. peugah kheueh peue peundapat droeneueh! banmandum ureueng areh ka pasti situju; ureueng bijaksana nyang jideungoe ulon teuma jipeugah bahwa nabi ayub geumeututoe hana geumeuphom, dan bahwa nariet gobnyan hana meungandong areuti. meunyoetutoe hana nabi ayub teutilek deungon getget, deuh kheueh teukalon bahwa tutoe hana geuhnyan lagee ureueng jeuhet. salah geuhnyan teutamah lom deungon saboh desya; gobnyan beurontak ubak po teu allah, dan geuhina gobnyan dikeue geutanyoe. hei nabi ayub, droeneueh keuliru meunyoet neupike bahwa nibak mata po teu allah droeneueh hana meusalah. droeneueh silab meunyoet neutanyong, peue peungaroh desya droeneueh teuhadab gobnyan; dan peue laba jih nyang droeneueh teurimong meunyoet droeneueh hana neupeubuet desya. ulon kheueh nyang jawewe droeneueh meunan cit ubak rakan-rakan droeneueh nyan. kalon kheueh ulanget dan eue kheueh padubna manyang jih awanawan. meunyoet droeneueh meudesya, po teu allah hana teuma rugoe. meunyoet salah droeneueh le, gobnyan hana teuma teupeungaroh. deungoe teupeubuet nyang get, po teu allah hana droeneueh tulong. keubiet, gobnyan hana peureulee sapeue nibak droeneueh. teuma seusabe droeneueh nyang jipeurugoe le desya-desya droeneueh. gobnyan cit teuma nyang meu-untong le jroh droeneueh nyan. ureueng-ureueng nyang jitindeh teuma meurangrang; awaknyan jiklik jilakee tulong. teuma bukan ubak po teu allah, nyang cepta jihnyan nyang jok harapan watee awaknyan meuduka, dan nyang jok keu manusia akai budo leubeh nibak cicem dan beulatang laen di atueuh bumoe. ureueng-ureueng teutindeh nyan jitawok, teuma po teu allah seungab mantong sabab awaknyan jeuhet dan peunoh ngon sombong. sia-sia kheueh awaknyan jiklik habeh teunaga; nyang mahakuasa hana geukalon atawa geudeungoe awaknyan. hei nabi ayub, leubeh-leubeh lom meunyoet droeneueh neupeugah bahwa droeneueh hana neukalon gobnyan, bahwa peukara droeneueh hana dikeue gobnyan dan droeneueh neupreh-preh gobnyan! neupike po teu allah hana geubri hukuman dan hana geukalon nyang droeneueh langgeh. sia-sia mantong kheueh tutoe hana droeneueh neupeugah laju; nyata kheueh, droeneueh hana neuteupeue peue nyang droeneueh peugah. deungoe kheueh sikeujab teuk dan saba kheueh, mantong na nyang keuneuk ulon peugah deumi allah. peungeutahuan lon luwah; ulon peuguna nyan keu ulon bri bukeuti bahwa ade that nyang cepta ulon. tutoe hana lon hana nyang peuleusu; ureueng nyang biet-biet areh na dikeue droeneueh. po teu allah nyan peukas! peue-peue mantong geumeuphom. hana meusidroe pih nyang geupandang hina. ureueng nyang meudesya hana geupeubiyeu udeb jih

treb that, gobnyan geubri keuadelan keu ureueng nyang meudeurita. ureueng nyang juoeu geupeurati sabe, geupeujeuet awaknyan meukuasa lagee raja-raja, deungon nyan awaknyan jihoreumat siumu masa. teuma meunyoet ureueng teurante ngon rante beuso, meudeurita le sabab buet jih keudroe, teuma desya dan keuhai sombong awaknyan teuma geubuka le po teu allah. geuyue awaknyan mangat jideungoe peuingat gobnyan dan jitinggai buet nyang jeuhet nyang jipeubuet le awaknyan. meunyoet awaknyan jituot peue kheun po teu allah dan meubakti ubak gobnyan, awaknyan udeb dame dan makmu sampoe akhe hayat jih. teuma meunyoet awaknyan hana jideungoe, awaknyan teuma mate lam bangai jih. ureueng nyang hana meutuhan nibak jih jikeubah beungeh; bahle geuhukom le tuhan, teutab hana jitem lakee tulong. awaknyan mate lam keuadaan payah lam umu mantong that muda, sabab udeb jih peunoh ngon hina. po teu allah geupeurunoet manusia rot deurita, gobnyan geupeuguna rot nyang sosah mangat jihnyan sada. po teu allah ka geupeubeubaih droeneueh nibak nyang sulet that, deungon nyan droeneueh hase tanekmat keudamean, dan meuja hidangan droeneueh peunoh ngon peunajoh. teuma jinoo isiui deungon buet droeneueh nyang jeuhet, droeneueh tateurimong hukuman jih. waspada kheueh, bek sampoe droeneueh teutipee ngon peng sugok; bek droeneueh jipeusisat le sabab keukayaan. sia-sia mantong droeneueh meulakee beugeutem tulong, peucuma mantong banmandum teunaga dan upaya droeneueh. bek droeneueh hawa ubak malam nyang seupot, saat jih bansa-bansa museunah dan leunyah. waspada kheueh, bek meupaleng ubak nyang doraka. deurita droeneueh teumeukeusut mangat droeneueh tinggai nyang jeuhet. ingat kheueh, allah nyan keubiet rayeuk that kuasa gobnyan. peu kheueh na guree nyang hebat jih lagee gobnyan? soe kheueh nyang hase jipeuteunteet rot keu gobnyan atawa jipeuet tudoh gobnyan geupeubuet salah? sabe gobnyan jipujoe sabab le karya geuh, dan droeneueh pih patot taseun gobnyan. banmandum ureueng jikalon buet gobnyan; teuma hana meusidroe pih nyang biet-biet muphom gobnyan. po teu allah keubiet mulia, hana hase tanyoe seunom keunan atawa taitong jeumeulah thon jih. po teu allah nyang tarek ie atueuh bumoe jeuet keu awan laju geubah teuma jeuet keu ie ujeuen. gobnyan geupeuteron ujeuen rot langet manyang; laju geusibu atueuh umat manusia. hana meusidroe pih jimeuphom grak awan-awan dan su gogo di langet bak tempat po teu allah tinggai. gobnyan geupeutrang banmandum langet deungon kilat, teuma dasai laot teutab seupot glab. nyan kheueh cara jih gobnyan geupeu udeb bansa-bansa dan geujok peunajoh nyang jai meulimpah. gobnyan geudrob kilat ngon jaroe gobnyan dan geuyue kilat nyan jisama hoho nyang geupeurintah. su gogo sibagoe tanda bahwa angen badee reujang jiteuka, beulatang peulara pi jiteupeue bahwa angen badee reujang that jiteuka. angen badee teupeujeuet ate lon yo meugeunta dan jantong lon meugub-gub tajam. deungoe kheueh su po teu allah, hei gata banmandum; deungoe kheueh gogo nyang teubiet lam babah gobnyan. bansaboh langet, geupeuleuh laju kilat gob-

nyan; geukirem geulanteue trok ubak ujong donya. oh lheureh nyan, teudeungoe su gobnyan meudrub-drub, su meugah geulanteue dan gogo; dan nibak teungoh su nyang meudumpek nyan, geulanteue meukilat jisama keudeh keunoe. sabab peurintah po teu alah, laju mujizat teujadi, hai-hai nyang ajaeb nyang hana hase tapeuphoh le tanyoe. salju rhot ateuah bumoe ateuah peurintah gobnyan; ujeuen keuncang jitron ateuah yue gobnyan cit teuma. geupeupioh buet manusia, mangat awaknyan jiteupeue bahwa gobnyan teungoh keureuja. meunan cit beulatang kleut jitamong lam ruhueng dan guha, dan jimusom lam eumpueng jih. nibak seulatan jiteubiet angen badee dan rot utara hawa leupie nyang sijeuk lumpah na. nafah po teu allah jeuet keu beuku muka ie nyang luwah, geu ubah jeuet keu eeh nyang kreueh. awan dimanyang geupeupeunoh ngon ie, dan awan meucahya geupeutrang ngon geulanteue. awan-awan jipo meulayang bansigom donya, ateuah peurintah po teu allah awan-awan nyan meugrak hoho mantong. po teu allah geupeutron ujeuen keungon peubasah tanoh, atawa keu teuhukom umat manusia; mungken teuma keu teupeuleumah bak awaknyan, padubna rayeuk geunaseh gobnyan nyang teutab keu siumu masa. seungab kheueh sikeujab, hei nabi ayub, dan deungoe kheueh; kalon kheueh keuhai ajaeb-ajaeab po teu allah. peu kheueh neuteupeue pakriban po teu allah geubri aba-aba, sampoe kilat meuble-ble rot lam awan dan mega? peu kheueh neuteupeue pakriban awan-awan nyan meulayang-layang hase keuahlian po teu allah nyang hana ngon peusa? hana, droeneueh nyang neuteupeue keuhai aloh alah sabab le seu-uem, meunyoe bumoe jipot le angen seulatan. peu kheueh hase gata lagee po teu allah nyang geubeunteueng cakrawala dan geupeukreueh lagee beuso tuangan atawa ceureumen? peurunoe kheueh kamoe peue nyang haroh kamoe peugah ubak allah; hana nyang hase kamoe peutrang, pikeran kamoe hampa. hana lontem lon lakee meututoe ngon po teu allah, pat tateupeue bak gobnyan na alasan keu geupeujeuet ulon meubala. jinoo cahya langet keubiet that trang sampoe seulala mata; angen jipeugleh cuaca deungon jiyueb nyan. cahya lagee meuh teuka di utara, dan keumuliaan po teu allah keubiet kagom ate geutanyoe. keubiet rayeuk that kuasa po teu allah geutanyoe; hana hase tanyoe tapeurab bak gobnyan, gobnyan juioe dan ade sabe; hantom na gobnyan geutindeeh manusia. nyang kheueh sabab jih gobnyan patot teuhoreumat le soe mantong, dan ureueng nyang meungaku droe areh, hana geupakoe le gobnyan." oh lheureh nyan rot lam angen badee tuhan meututoe ubak nabi ayub, lagee nyoe kheun gobnyan: "soe gata nyan, sampoe gata jeuet ragu ubak hikeumat ulon deungon haba gata nyang bangai dan soh nyan? jinoo, lawan kheueh ulon sibagoe ureueng agam, dan jaweub kheueh peue-peue nyang ulon tanyong nyoe. peu kheueh gata ka lahe watee bumoe ulon peujeuet? dan meunyoe gata biet-biet lhok peungeutuhan gata peugah laju! soe kheueh nyang peuteuntee luwah donya nyoe? soe kheueh nyang uloe talo sineupat ubak gobnyan? peu kheueh gata teupeue jaweub jih? pakriban kheueh tametamoh ngon tumpang bumoe teudong cot? soe nyang

peuduek batee peunjuru donya deungon kukoh, bak watee bintang-bintang beungoh meunyanoyoe meusan dan makhlok-makhlok syeuruga meusurak-surak geumbira. soe kheueh nyang tob babah pintoe keu teuhampeueng laot raya watee lam pruet bumoe jiteubiet meubok-bok ie jih? ulon kheueh nyang peupayong laot ngon awan dan nyang bungkoh nyan deungon seupot buta. ulon nyang peuteuntee bataih keue laot raya dan deungon pintoe teupalang ulon hampeueng nyan. kheun ulon ubak jihnyan, 'nyoe kheueh bataih jih, bek gata liengkeue! disinoo kheueh umbak-umbak gata nyang teuga haroh jipioh.' hei nabi ayub, peu kheueh ka lheureh gata bahpi meusi-goe, gata yuejak teungoh malam? peu kheueh na gata yue mata uroe beungoh jimat bumoe dan gata kipaih ureueng jeuhet nibak teumpat jih musom? trang uroe teupeuleumah gunong dan panton lagee cab nibak tanoh kriet dan lipat nibak saboh jubah. trang uroe lumpah that peungeuh nibak ureueng hana meutuhan, dan teupeuteun awaknyan bek jipeubuet nyang jeuhet lom. peu kheueh ka lheureh gata tron ubak asai ie laot, jioh lam twie jih? peu kheueh ka lheureh gata jak-jak bak aleue laot raya? peu kheueh ka lheureh le gob jitunyok ubak gata pintoe geureubang dikeue alam mawot nyang seupot buta? peu kheueh hase gata duga padubna luwaih donya nyoe? jaweub kheueh meunyoe gata tateupeue. peu kheueh gata teupeue rot pat teuka trang, dan dipat nyang sibeuna jih punca seupot? peu kheueh hase gata peuteuntee bataih seupot ngon trang? atawa teuyue awaknyan jiwoe oh ka lheureh jiteuka? teuntee gata hase, sabab gata ka tuha, dan watee donya teucebta, gata kana! peu kheueh ka lheureh gata saweue gudang-gudang lon teumpat salju dan ujeuen batee, nyang ulon keubah keu watee teuka sosah, keu watee muprang dan uroe-uroe teungoh muprang? peu kheueh gata teupeue dipat teumpat mata uroe tinggai? atawa rot pat asai angen timu na? soe kheueh nyang kueh lueung keu teumpat ie ujeuen raya dan nyang bri rot ueh keu gogo dan kilat? soe kheueh nyang peutron ujeuen lam padang beulantara, dan u ateuah tanoh nyang hana jikeumiet le manusia? soe kheueh nyang sibu ngon ie ateuah bumoe nyang tho kreg dan meurana sampoe naleueng meutuneh mandum? peu kheueh ujeuen na ayah droe? soe ayah nibak titek-titek iembon? peu kheueh ie eeh na ma jih? soe nyang peulahe iembon beuku? soe nyang ubah ie jeuet keu batee, dan nyang peujeuet ie laot keu kaku? peu kheueh hase ikat bintang kartika gata beureukah? atawa rante bintang belantik gata peuglah? peu kheueh hase gata bimbeng bintang-bintang tieb-tieb musem jih, dan bintang peuraho rayeuk ngon ubit, gata peuteuntee rot jih? peu kheueh gata teupeue hukum-hukum di cakrawala? dan peu kheueh hase gata teurab nyan lam donya? peu kheueh hase gata klik sira gata peurintah ubak awan, dan gata yue awan nyan jipeubulot gata ngon ie ujeuen? dan meunyoe gata yue geulanteue-geulanteue seumama keudeh keunoe, peu kheueh jihnyan teuka ubak gata sira jipeugah, 'ulon, amphon!'" bak soe jiteupeue le cicem ibis pajan krueng nil meugeunang? soe nyang britee manok agam bahwa ujeuen teuma jiteuka? soe kheueh nyang seb areh keu ji-itong awan dan jibalek

sampoe jitron ujeuen, ujeuen nyang peukreueh abee sampoe jeuet meugeucah dan tanoh jeuet meuleuke-leukek teuma? peu kheueh hase gata peucrok beulatang laen keu uempeun singa-singa dan teupeutroe pruet aneuek-aneuek jih, meunyoe awaknyan jimusom lam guha atawa jibatom lam uempueng jih? soe nyang tulong cicem gagak nyang deuk dan jijak keudeh keunoe jimita peunajoh soe kheueh teuma nyang tulong meunyoe aneuek-aneuek jih jirawok ulon jilakee uempueng. peu kheueh gata teupeue pajan kameng uteun jipeulahe le ma jih? peu kheueh na gata kalon rusa kleut jipeulahe aneuek jih? peu kheueh gata teupeue padubna treb jihnyan raya pruet? peu kheueh watee jitoh aneuek hase gata itong? peu kheueh gata teupeue pajan beulatang nyan jipeukewieng tuboh jih, laju jipeulahe aneuek-aneuek jih? aneuek-aneuek jih meutamah rayeuk dan teuga lam padang beulantara; awaknyan jijak dan hana jiwoe le ubak nang-nang jih. soe nyang peuleuh keuleudee kluet lam gle? soe nyang ploih taloe jih dan nyang peubiyeu jijak hoho nyang hawa? keu jihnyan ulon bri padang pasi sibagoe rumah dan padang-padang sira keu teumpat tinggai jih. jihnyan jipeujioh banda-banda dan teumpat-teumpat rame, hana nyang hase peuseuiet jih dan nyang bri buet keu jih. padang naleueng di gunung teumpat jih meurot, jimita naleueng-naleueng ijo nyang na disinan. peu kheueh leumo kleut jitem meubuet keu gata? peu kheueh jitem meudom lam weue gata? peu kheueh hase gata ikat jih dan jimeu-ue di blang gata? peu kheueh hase gata yue jih jimeucruen lam blang gata? peu kheueh hase gata peubangga teunaga jih nyang teuga, dan gata jok ubak jihnyan buet gata nyang brat? peu kheueh gata peucaya jihnyan jipeusapat hase keumeukoh gata, dan gata ba atranyan ubak teumpat peuneubahan gata? padubna bagaih jih jikipah sayeueb cicem unta! teuma jipo cicem cangiriah hana hase jilawan. cicem unta jitoh boh ateuh tanoh, laju jittinggai; dan anoe kheueh nyang teuma karom boh jihnyan. jihnyan hana sada mungken ureueng laen jigilo jih dan beulatang-beulatang kleut pih jigilo jihnyan. jihnyan meusikeub sang-sang aneuek jih kon atra jih; jihnyan hana jipakoe meunyoe useuha jih sia-sia mantong. ulon kheueh nyang jeuet jihnyan bangai dan bebal, hana ulon jok bak jih hikeumat dan akai. teuma meunyoe jihnyan jipeuphon plueng tajam, jihnyan hase jipeutaloe guda dan nyang pasang. hei nabi ayub, gata kheueh nyang jok teunaga ubak guda dan surai nyang meulambe-lambe bak kudok jih? peue gata nyang yue jih jilumpat lagee daruet, dan deungon nafah jih teupeutakot-takot gob? jihnyan jikrok tanoh nibak panton deungon geumbira, dan deungon peunoh seumangat laju jingaza u mideuen prang raya. jihnyan hana muphom yo ngon teumakot; hana peudeueng nyang peujeuet jih jisurot. peudeueng nyang jimat le nyang pasang, laju jimeusu meugrieng-grieng dan meuble-ble oh keunong cahya. deungon seumangat nyang ju guda nyan laju jiplueng; meunyoe beureuguih ka jimeusu hana ek le jipeuteun droe. guda nyan meu ou-ou watee jideungoe su beureuguih teuyeb rot jioh teucom bak jih bhee meuprang nyang meuhubo. jideungoe su dumpek dumna peuwira watee awaknyan geubri

aba-aba. peu kheueh cicem kleung gata peurunoe jipo watee jihnyan jipo u seulatan deungon sayeueb meukeumang? peu kheueh peurintah gata nyang jiseutot le cicem rajawali sigohlom jihnyan jipeuget uempueng jih bak gunong-gunong manyang? bak punca gunong batee laju jipeudong rumah jih; ujong batee-batee nyang cincu jeuet keu kuta jih. rot disinan jihnyan laju jikawai u bansigom arah mata jih sesoe jiluem mangsa. dipat na nyang tiwaih, disinan kheueh jihnyan, dan darah mangsa jihnyan laju jijieb le aneuek-aneuek jih. hei nabi ayub, gata lawan ulon, po teu allah nyang mahakuasa; peu kheueh gatatem peutaloe droe atawa peu kheueh gatatem meubantah? teuma geujaweueb le nabi ayub ubak tuhan, "ulon kumeututoe lagee ureueng bangai ya tuhan. jeunaweueb peu kheueh nyang jeuet ulon peugah? hana sapue na le nyang haroh lon peugah. keubiet ka jai that nyang ka ltheuh lon peugah." laju rot lam angen badee tuhan meufeureuman lom ubak nabi ayub. laju tuhan meufeureuman ubak nabi ayub, "hadab kheueh ulon sibagoe ureueng agam, dan jaweueb kheueh banmandum nyang ulon tanyong nyoe. peu kheueh keuneuk gata iengkeue ubak keuadalan lon, dan gata peubeutoi droe gata deungon gata peusalah ulon? peu kheueh gata teuga lagee ulon? peu kheueh hase su gata lagee su geulanteuge saban ngon su lon? hias kheueh droe gata deungon keumeugahan dan keubeusaran, ngui kheueh keuagongan dan keujor-joran. pandang kheueh awaknyan nyang cungkak ate jih; peuju meudok-dok kheueh beungeh gata dan peumiyueb kheueh awaknyan. nyoe, pandang kheueh ureueng nyang sombong dan peutundok kheueh jihnyan! peureumok kheueh ureueng jeuhet bak teumpat jih. kubu kheueh awaknyan banmandum lam abee; kurong kheueh awaknyan lam donya ureueng mate. deungon nyan gata teuma lon pujoe sabab gata meunang deungon teunaga gata keudroe. ngieng kheueh behemot, si beulatang gogasi; saban lagee gata, jihnyan pi cebtaan ulon. naleueng-naleueng ka jeuet keu eumpeun jih, saban lagee leumo biasa. teuma kalon kheueh beuget-get teunaga lam tuboh jih dan teunaga nyang na nibak atos-atot jih. jipeudong ikue jih lagee bak aras, atos-atos pha jih kong-kong dan kreueh. tuleueng-tuleueng jih teuga lagee teunaga, gaki jih kong that saban lagee bak-bak baja. lamkawan banmandum makhlok ulon jihnyan kheueh nyang paleng hebat; teuma le nyang cebta jihnyan mantong nyang hase peutaklok! nibak buket-buket teumpat beulatang kleut jimeu-euen-meuen ngon geumbira, timoh kheueh naleueng nyang jeuet keu eumpeun jih. jihnyan ji-eh dimiyueb tamah meuduro, lamkawan naleueng geulagah lam paya uyok jimusom teuma. paya uyok meuduro jipeupayong jihnyan deungon bubayang-bubayang jih. bak gandarusa nyang timoh bak bineh krueng habeh teutob jihnyan. jihnyan hana yo bahpi krueng yordan tajam that ji ile, jihnyan teutab teunang bahpi ie ji-heuntam muka jih. soe kheueh nyang jijeuet peubuta mata jih, laju jidrob jihnyan deungon teuikat babah jih? peu kheueh hase gata droeb buya lewiatan, teuma ngon saboh kawe eungkot? peu kheueh hase lidah jih gata ikat ngon taloe-taloe peuikat? peu kheueh gata sok idong jih ngon talo atawa ceunawiet beuso

ubak reuheueng jih? peuh kheueh jihnyan jilakee ubak gata mangat teupeubeubaih? atawa jimeurok pakat ngon gata, jilakee beutagaseh keujih? peuh kheueh mungken jipeuget janji situju ngon gata, dan jimeujanji sabe jipeutimang gata? peuh kheueh mungken gata ikat jihnyan lagee cicem peulara, nyang teupeugalak namiet-namiet inong? peuh kheueh mungken jihnyan teupeubloe le neulayan-neulayan dan jibagi-bagi lamkawan ureueng-ureueng meukat? peuh kheueh hase gata tob kulet jih ngon kapak nyang mata jih lhee atawa gata geulawa jihnyan ngon mata leumbeng sampoe beusot ulee jih? cukeeh kheueh jihnyan sigoe mantong, dan hanale gata ulang lageenyan lom; meuheungko nyan hana gata tuwoe simu masa. soe-soe mantong ureueng nyang jikalon lewiatan, ureueng nyan jeuet keu leumoh dan laju rhot pansan. jihnyan juwah meunyoe teupeugoe nibak jih eh; hana meusidroe pih nyang jiheuet dong dikeue jih. soe nyang hase geutam jihnyan deungon hana meuteume bala? lam donya nyoe hana nyang hase jipeubuet hai nyan. jak kheueh gata deungoe ulon peugah keuhai anggota tuboh lewiatan keuhai teunaga jih dan hi jih nyang gata. hana meusidroe pih nyang hase jipriek bajee jih bagian luwa atawa jipeubusot bajee prang nyang jingui nyan. soe hase jipeuhah babah jih nyang kong that, meugigoe-gigoe nyang meunan gli dan teumakot that? lagee peurisee teususan, nyang kheueh rhueng jih meuleukek krab that, lagee batee kreueh jih. tindeeh meutindeeh, teukat krab that, le sababnyan angen pi hana hase jitamong keunan ngon seungab-seungab. peurisee nyan meunan kong that meusangkot ngon nyang laen, sampoe hana mungken teupeucerebre. watee lewiatan nyan beureusan, meumeuk-meuk cahya jih; mata jih meukilat-kilat lagee jiteubiet cahya mata uroe beungoh. lidah apui jiteubiet meuhambobambo lam babah jih; meuk apui teupeupo-peupo keudhe keunoe. asab meukeubok jiteubiet lam idong jih, lagee asab kayee apui jiteubiet dimiyueb beulangong. nafah jih jipeuteubiet lagee ngeue apui; apui hu jiteubiet nibak babah jih. boh goh jih meunan that teuga, le sabab nyan banmandum teumakot dikeue jih. hana teumpat nyang leumoh nibak kulet jih; hana mungken beukah sabab kreueh jih lagee kreueh baja. ate jih kong lagee batee, hana mungken bim-bang kong dan kreueh lagee batee meugileng. meunyoe jihnyan jibeudoh, ureueng nyang paleng teuga pih gadoh beurani; jipeujeuet hana meudaya sabab lumpah teumakot. hana peudeueng nyang hase jipeuluka tuboh jih; kapak, aneuk panah, atawa leumbeng hana hase jipeusaket jih. beuso jianggab haloh lagee naleueng dan teumaga jianggab lumpok lagee kayee meukulat. hana aneuk panah nyang hase jiparah jihnyan; batee nyang teurhom ateuh jihnyan sangsang lagee keunong jeumpung. gada jianggab sion naleueng tho; beulatang nyan jikem meunyoe na ureueng jigeulawa jih ngon leumbeng. sisek nibak pruet jih lagee peng-peng kaca nyang tajam ujong jih. lagee alat peuneubah watee jikurek leuhob dan jiprah dua. laot jicawoe-cawoe sampoe rab lagee ie ju; lagee panci ngon taguen minyeuk nyang meukeuboh-keuboh. jihnyan jitinggali incik tapak gaki nyang meuble cahya, laot jeuet jiubah lagee keuboh puteh hi jih. di

ateuh bumoe hana ngon peusa ngon jih; makhlok nyang hana jituri teumakot, nyang kheueh jih nyan! beulatang nyang paleng meusyehuh pih ji pandang hina; lamkawan beulatang juah, jih kheueh raja jih." jaweub nabi ayub ubak tuhan, "ulon kuteupeue, ya tuhan, bahwa droeneueh mahakuasa; droeneueh hase neupeubuet peue mantong. droeneueh neutanyong pakon ulon kujeuet ragu ubak hikeumat droeneueh padahai ulon keudroe hana lon teupeue sapeue. ulon meututoe keuhai-hai nyang hana ulon muphom, keuhai-hai nyang lumpah that ajaeb nibak ulon nyoe. droeneueh neuyue ulon deungoe watee droeneueh peugah haba, dan ulon jaweub meunyoe droeneueh teumanyong. yoh watee ilee, peungeut-tahuan ulon keuhai droeneueh ulon deungoe nibak gob mantong, teuma jinoenye ulon turi droeneueh deungon meuhadah keue. le sababnyan ulon malee lon ingat mandum tutoe haba lon dan deungon meunyusai ulon duek lam abee." oh ka ltheueh geumeututoe ubak nabi ayub, meufeuereuman kheueh tuhan ubak elifas, "ulon beungeuh ubak gata dan ubak bandua rakan gata, sabab gata hana tapeugah nyang sibeutoi jih keuhai droe ulon. teuma namiet lon nabi ayub hana lagee nyan. jinoe, cok kheueh laju tujoh boh leumo agam dan tujoh boh buhiri agam, dan jak kheueh ubak nabi ayub. oh ltheueh nyan peuseumah kheueh laju nyan sibagoe keureubeuen nyang teutot keudroe gata. nabi ayub teuma meudoa keu gata dan doa jihnyan teuma ulon teurimong. gata hana ulon peumalee, bahpi gata patot tateurimong hukoman. gata hana tapeugah nyang sibeutoi jih keuhai droe ulon, seudangkan nabi ayub jipeugah nyan." elifas, bildad dan zofar laju geupeubuet peue nyang geuyue le tuhan nyan, dan tuhan geuteurimong doa nabi ayub. oh ltheueh nyan, oh ka ltheueh nabi ayub geumeudoa keu ban lhee droe rakan gobnyan, tuhan geupeujeuet nabi ayub nyan kaya lom teuma dan geujok keu gobnyan dua goe lipat nibak atra gobnyan yoh awai ilee. banmandum aduen dan syedara inong nabi ayub, meunan cit mandum rakan gobnyan nyang awai, teuka jijak saweue gobnyan dan laju jipeuna kharuri dirumoh gobnyan, awaknyan jipeugah tutot meuduka cita ateuh mandum keusosahan nyang geupeutron le tuhan u ateuh gobnyan, dan jihibor gobnyan. maseng-maseng lamkawan awaknyan laju jijok sijeumeulah peng dan sineuk euncien meuh ubak nabi ayub. nabi ayub geubri beureukat le tuhan deungon leubeh meulimpah nibak umu geuh nyang hana panyang le nyan, nibak watee gobnyan gohlom keunong musibah. nabi ayub na 14.000 boh kameng ngon bubiri, 6.000 boh unta, 2.000 boh leumo, dan 1.000 boh keuleudee. gobnyan na geumeu aneuek tujoh droe aneuek agam dan lhee droe aneuek inong. aneuek inong nyang phon geuboh nan yemima, nyang keudua kezia, dan nyang tulot kerenhapukh. bansaboh nanggroe nyan hana aneuek dara nyang lagak lagee ban lhee droe aneuek dara nabi ayub nyan. awaknyan geujok jeumba lam atra warisan ureueng syiek jih, sadub ngon atra warisan syedara awaknyan nyang agam. oh ka ltheueh nyan nabi ayub mantong udeb sireutoh peuet ploth thon treb jih, sampoe gobnyan hase geukalon cucoe-cucoe geuh dan aneuek-aneuek awaknyan. ltheuehnyan laju meun-

inggai kheueh nabi ayub nibak umu ka tuha that.

seulaweut agong nyang geucebta le nabi sulaiman. inong neucum kheueh ulon deungon bibi gata; cinta droeneueh leubeh nikmat nibak anggo! droeneueh harom meubhee meuhalak, nan droeneueh lagee minyeuk mangat bhee nyang ro meuruwah; sabab nyan kheueh dumna aneuek dara jigalak ubak droeneueh! beurijang kheueh geutanyoe, ya raja ulon, neuba kheueh ulon udalam kama droeneueh. kareuna droeneueh kamoe banmandum meusukaria, dan kamoe pujoe cinta droeneueh leubeh nibak anggo; pantaih kheueh dumna aneuek dara jicinta ubak droeneueh! bah kheueh itam, teuma ulon nyoe ceudah, hai putroe-putroe yerusalem; itam lagee khimah-khimah kedar, teuma lagak ngon ceudah lagee tiree-tiree nyang na di meuligoe nabi sulaiman! bek neukalon nibak kulet ulon nyang itam, sabab ulon tutong deungon cahya mata uroe. aduen-aduen ulon geubeungeh nibak ulon, dan geuyue ulon jak meubuet nibak lampoh anggo; ulon ka hana le watee keu lon useuha droe keudroe ulon. neupeugah kheueh, hai geunaseh ulon, dipat droeneueh neurabe dumna domba-domba gata, dipat neupeueh jihnyan oh watee uroe ka seupot? masakan ulon lagee ureueng peungeumbara lamkawan kawan bubiri atawa domba rakan-rakan gata? agam ek kheueh gata hana neutupat teupat tinggai jih, hai inong ceudah lamkawan ureueng inong nyang laen? neuseutot laju bakat bubiri domba, dan neurabe kheueh dumna kameng-kameng gata nyang to deungon khimah ureueng meurabe. geunaseh ulon, gata lagee guda inong nyang jitarek geuritan raja nangroe meuse. mieng gata lagak deungon piasan nyang teupeungui, takue gata indah watee teupeungui talo takue peumata. kamoe peugot piasan meuh keu gata, deungon manek-manek pirak disok disinan. inong teungoh raja lon mantong nibak teupat eh, harom bhee nyang mangat lazat lagoena. geunaseh ulon na lagee mur mangat bhee jih, watee geupeureubah droe ateuh dada lon. geunaseh ulon siumpama sibak-bak bungong gaca di lampoh-lampoh anggo en-gedi. agam gata gagah ngon jeulita, hai geunaseh ulon nyang mameh, luwa biasa gata ceudah nibak mata lon! mata gata lagee cicem mirah pati. inong droeneueh gagah, sayang, sungoh that gagah droeneueh nibak mata lon! teu eh-eh geutanyoe ateuh naleueng nyang ijo. bak kayee aras jeuet keutamah rumoh geutanyoe, dan bak kayee ceumara jeuet keu langet-langet jih. ulon nyoe na kheueh bungong mawar nibak saron, bungong bakong di leumbah-leumbah. agam lagee bungong bakong nyang na di teungoh tamah meuduro, meunan kheueh umpama geunaseh ulon nyang na di teungoh putroe-putroe. inong lagee bak apel nyang na di teungoh bak-bak kayee di gle, meunan kheueh geunaseh ulon nyang na di teungoh-teungoh ureueng agam. ulon galak lon meuceu dimiyueb nyan, dan boh-boh jihnyan sungoh mameh that rasa. dimiyuebnyan ulon jak u ruweueng pesta, pandangan gobnyan ubak lon peunoh deungon rasa cinta. neupeuteuga kheueh ulon deungon meulisan boh anggo, dan peuseugar kheueh ulon deungon boh apel, sabab ulon saket asmara. jaroe wie gobnyan geupeusadeu nibak ulee lon, dan jaroe uneuen gobnyan

geuwa nibak lon. meujanji kheueh, hai putroe-putroe yerusalem, deumi rusa-rusa nyang na di padang beulantara, bahwa gata hana tapeukaru cinta, sampoe jihnyan teupeupuih teuma. inong deungoe! geunaseh ulon teuka! jihnyan lagee aneuek rusa. jigrob-grob di gunong-gunong, jilumpat-lumpat di buket-buket. kalon, disilabah binteh jihnyan jidong, deungon mata jih seso jimita; jimeuluem nibak kisi-kisi peuradeun. deungoe, geunaseh ulon geupeugah haba ubak ulon. agam teuka kheueh hai mameh ulon, jak kheueh keunoe hai jeulita lon! kalon, musem leupie ngon sijuek ka meulalu, dan musem ujeuen pih ka hanale. dilampoh sigala bungong pih ka keumang; musem keumeukoh pih ka teuka; su leuek kutru ka teudeungoe bak tanoh geutanyoe. bak ara ka jipeuphon meuboh, dan bak anggo pih ka meubungong deungon bhee nyang meuhubo. teuka kheueh mameh ulon, jak kheueh keunoe jeulita lon. hai cicem mirah pati lon nyang na di luengkiek-luengkiek batee, nibak teupat musom di barieh-barieh batee nyang meucula, bah kheueh ulon ngieng rupa gata, dan lon deungoe su gata, sabab rupa gata ceudah, su gata nyang meureudu. jak drob kheueh rubah-rubah nyan, rubah-rubah ubit nyang jipeurusak lampoh anggo, sabab lampoh anggo kamoe teungoh meukeumang. inong geunaseh ulon atra ulon, dan ulon na kheueh atra gobnyan, gobnyan nyang rabe dumna bubiri dan domba-domba geuh keudroe di teungoh-teungoh bungong bakong sampoe dipot angen beungoh nyang peugadoh seupot bak watee malam. neugisa kheueh geunaseh ulon, lagee rusa, lagee aneuek rusa nyang na di peugunongan betor. malam-malam lam peuratah teupat eh lon, dalam lumpo ulon mita geunaseh lon; ulon mita gobnyan, teuma sia-sia. ulon keuneuk beudoh dan jak wetwet lam banda, ulon tamong bak mandum jalan dan jurong-jurong jih. ulon keuneuk jakmita jantong ate lon; ulon mita gobnyan, teuma sia-sia. ulon meurumpok deungon ureueng nyang teungoh meurondo dalam banda, laju lon tanyoeng, "peu kheueh na neungiang jantong ate lon?" ban mantong ulon tinggai awaknyan, meurumpok ngon jantong ate lon. laju ulon mat gobnyan, dan han lon peuleueh le sampoe lon ba gobnyan u rumoh ma lon, u bilek ureueng nyang peulahe ulon. meujanji kheueh, hai putroe-putroe yerusalem, deumi rusa-rusa nyang na didalam padang, bahwa gata hana teuma neupeukaru cinta, sampoe gobnyan geupeupuih teuma. inong peu kheueh nyan nyang teuka nibak padang pasi, lagee asab nyang meugumpai? mangat bhee jih lagee bhee mur dan keumeunyan, dan beudak-beudak mangat bhee nibak ureueng meukat. ngieng, nyan tandu nabi sulaiman, jikeulileng le namploh droe ureueng nyang teuga-teuga lom peukasa, ureueng-ureueng peukasa nibak israel, nyang ka meupeungalaman di mideuen prang. awaknyan banmandum na geuba peudeueng nyang meugantung nibak keuieng siab geuhadab jiseurang legob bak watee malam. nabi sulaiman geupeugot keu droe gobnyan saboh tandu, nibak kayee nyang paleng meumutu. tameh jih teupeugot nibak pirak, teupat meusadeu jih teupeugot teuma nibak meuh. teupat duek gobnyan warna jih ungu, teucob sulam deungon galak ate le putroe-

putroe yerasalem. teubiet kheueh, hai putroe-putroe sion, jak ngieng kheueh raja nabi sulaiman deungon mahkota nyang geupeungui le ma droe gobnyan, bak uroe gobnyan meukawen, nibak uroe gobnyan meusukaria. gata ceudah jeulita, mameh ulon, sunggoth that, gata ceudah jeulita. mata gata nyang leumah di balek jilbab lagee mata cicem mirah pati; ok lagee di ateuh ulee lagee kawan kameng nyang teungoh tron nibak buket-buket gilead. gigo gata puteh lagee kawan bubiri nyang ban teucuko dan teupeumano; meupasang-pasang lagee aneuek-aneuek bubiri meukeumbeu, musaboh pih hana nyang gadoh. bibi gata lagee sikrek talo pita mirah, dan lumpah rancak babah gata. mieng gata lagee boh geulima nyang teuprah, teusom get that di balek jilbab gata. takue gata lagee meunara nabi daud, nyang teupeugot keu teupat simpan sinjata. talo takue gata saban that lagee siribee peurisai, gada para pahlawan banmandum nyang na. boh mom gata lagee dua boh aneuek rusa, aneuek keumbeu rusa nyang teungoh rot naleueng lamkawan bungong-bungong bakong. meuheut that ulon keuneuk jak ubak gunung mur, nibak buket keumeunyan, sampoe jiyueb angen seuboh, nyang jipeusampoh seupot watee malam. gata ceudah lumpah na, mameh ulon, hana nyang teucila nibak gata. jak geutanyoe tatron nibak libanon, dara baro lon, jak geutanyoe tatron nibak libanon. tron kheueh nibak pucak amana, nibak pucak senir dan hermon, teupat tinggai rimueng tutul dan singa. gata neutawan ate ulon, adek lon sayang, dara baro bang, gata neutawan ate lon deungon keunalon mata gata, deungon peumata indah nyang na bak talo takue gata. padubna nikmat cinta gata, wahai adek lon, dara baro bang, jioh leubeh nikmat nibak ie anggo. minyeuk gata meubhee meuhayak, leubeh mangat bhee nibak meubagoe rupa reumpah-reumpah nyang na. mameh that tutoe haba gata, dara baro lon, lagee mameh meulisan murni dan susu. peukayan gata meubhee harom lagee gunong libanon. geunaseh ulon na kheueh lampoh nyang meupageu timbok, lampoh meutimbok, dan mata ie gunci. disinan na jitimoh bak-bak kayee geulima, deungon boh-boh jih nyang paleng leuzat. bungong gaca dan bungong narwastu, narwastu, kunyet, kayee mameh dan teubee, deungon meubagoe rupa bak keumeunyan. mur dan gaharu, deungon meubagoe rupa reumpah nyang ka teupileh. mata ie nyang nibak lampoh lon jipeuhayon ie nyang udeb nyang ji ile nibak libanon! inong beudoh kheueh, hai angen utara, bapot kheueh, hai angen seulant! neupot kheueh nibak lampoh lon, mangat bhee jih nyang mangat nyan jipo meuhayak. seumoga geunaseh ulon geujak u lampoh gobnyan, dan geupajoh boh-boh kayee nyang leuzat. ulon kujak u lampoh lon, adoe teusayang, dara baro lon, ulon gumpoi mur dan reumpah-reumpah lon; ulon makheun uempueng uno dan meulisan lon, ulon jieb susu dan ie anggo lon. ureueng-ureueng inong makheun dan jieb kheueh ie, hai rakan-rakan lon, neujieb kheueh sampoe an mabok asmara. inong ulon teungeut, teuma ate ulon teutab meujaga. deungoe kheueh geunaseh ulon jikeutok pintoe. agam peulah kheueh pintoe, adoe ulon boh ate aduen, mirah pati lon, pujaan ate lon; ulee lon basah kareuna keunong iembon, dan ok

lon ka peunoh deungon titek-titek iembon malam. inong bajee ulon ka ltheueh ulon sut; peu kheueh bajee nyan lon sok lom? gaki ulon ka ltheueh ulon rrah, peu kheueh lon peukuto lom? meugam-gam yo ate lon kareuna geunaseh ulon geureugam sinumpang pintoe. teuma teubeudoh kheueh ulon keuneuk peulah pintoe keu geunaseh lon. mur ka tijoh nibak jaroe dan ruweueng-ruweueng jaroe lon, sampoe anbasah teupat mumat bak gunci pintoe. ulon peulah pintoe keu geunaseh lon, teuma gobnyan ka geugisa dan geujak keulai. ulon lumpah that meucen ubak su gobnyan; lon mita gobnyan, teuma sia-sia. ulon hoi nan gobnyan, teuma gobnyan teutab hana geuseuot. ulon jiteume le ureueng nyang teungoh meurondo dalam banda; laju ulon jipoh le awaknyan sampoe ulon luka, ija seulandang lon jicok le awaknyan deungon paksa. meujanji kheueh, hai putroe-putroe yerasalem, meunyoek gata meurumpok deungon geunaseh ulon, neupeugah kheueh ubak gobnyan, bahwa ulon keunong peunyaket cinta. ureueng-ureueng inong peu kheueh geunaseh gata meuleubeh nibak geunaseh-geunaseh nyang laen, hai dara mameh nyang paleng jeulita? peu kheueh geunaseh gata meuleubeh nibak geunaseh-geunaseh nyang laen, seuhingga droeneueh neuyue nibak kamoe meujanji? inong geunaseh ulon gagah dan tampaan, leubeh lagak nibak ureueng nyang siploh ribee droe. ulee gobnyan lagee meuh, meuh nyang aseuli, ok nibak ulee gobnyan patah manyang dan itam, saban lagee itam cicem gagak. mata gobnyan lagee mata mirah pati nibak mata ie, cicem mirah pati nyang manou deungon ie susu, teuduek dibineh kulam. mieng gobnyan lagee lampoh reumpah nyang paleng mangat bhee, bibi gobnyan lagee bungong bakong nyang ro meutrab-trab mur aseuli. jaroe gobnyan gagah, meu euncien meuh deungon peumata, tuboh gobnyan lagee batee gadeng nyang meutatah batee nilam. gaki gobnyan lagee tameh-tameh marmer nyang puteh, deungon sandi meuh nyang murni. potrom badan gobnyan lagak lagee gunong geumunong nyang na di libanon, dan anggon jih sa lagee bak kayee aras. lumpah that mameh tutoe haba gobnyan, peue mantong nyang na nibak gobnyan sangat meunarek. meunan kheueh geunaseh dan sahabat ulon, hai putroe-putroe yerasalem! ho geunaseh ate gata jijak, hei dara-dara jroh rupa? ho geunaseh ate gata jijak, mangat kamoe meusajansajan jak mita teuma? inong geunaseh ulon ka geujak u lampoh gobnyan, nibak lampoh reumpah-reumpah keu geujak rabe domba-domba u lampoh, dan geupot bungong-bungong bakong. ulon milek geunaseh lon, dan gobnyan na kheueh milek ulon, gobnyan geurabe domba-domba di teungoh-teungoh bungong bakong. agam gata lagak, hai mameh ulon, lagee lagak banda yerasalem, dan lagee ceudah banda tirzah. gata sunggoth teupeusona, lagee kawom sipai deungon bupanji nyang na geuba sureuta. paleng kheueh wajah gata nibak ulon, sabab pandangan gata nyan sunggoth bingong nibak ulon. ok di ateuh ulee gata lagee saboh kawan kameng nyang teungoh tron nibak buket-buket gilead. gigo gata puteh bak lagee kawan domba nyang ban teucuko dan teupeumano; meujudo-judo lagee aneuek-aneuek domba keumbeu, meusaboh pih hana nyang gadoh. bibi gata lagee

boh geulima teuprah dua, nyang teusom di balek jilbab gata. bahpih na namploh droe peureumaisuri, dan lapan ploh droe gundek, dan aneuek-aneuek dara nyang rame lumpah na, teuma saboh mantong mirah pati lon, idaman lon, aneuek tunggal nyang paleng geusayang le ma. aneuek-aneuek dara geukalon dan geupujo gobnyan, dan dumna peureumaisuri dan gundek kagum ubak gobnyan. soe kheueh geuhnyan nyang teuka lagee mata uroe beungoh nyang mantong meureukah, gagah lagee buleuen peunoh, ceurah lagee sang surya? geuhnyan sunggoh meupeusona, lagee kawan sipa-i deungon bupanji nyang geuba sireuta. ulon kujak u lampoh keunari, lon jak ngieng bungong-bungong keumang nyang na di miyueb leumbah; aleh bak anggo ka jimeupucok, dan bak geulima ka meubungong. ulon lumpah that rindu nibak cinta gata, saban lagee lon rindu keuneuk ek nibak geuritan prang meusajan deungon para bansawan. ureueng-ureueng inong meunari ngon meulikak kheueh, hai aneuek dara sulam, meuputa-puta kheueh, mangat kamoe kagum nibak gata. inong keupeue gata keuneuk pandang nibak ulon, seudangkan ulon na lon meulikak di teungoh barasan ureueng meunonton? o aneuek dara nyang anggon, mameh lumpah na gaki gata watee neujak deungon seuloibnyan. likok pha gata lagee saboh piasan, meuneuget sidroe seuniman. pusar gata lagee cawan nyang bulat nyang hantom na kureueng meubacut-pih anggo meujampu. pruet gata lagee aneuk gandom nyang meutamom, jikeulileng le bungong-bungong bakong. boh mom gata lagee dua boh aneuek rusa, rusa nyang meukeumbeu dua. takue gata lagee meunara gadeng. mata gata lagee kulam-kulam nyang na di hesybon, to nibak babah pintoe geureubang batrabim. boh idong gata lagee meunara di gunung libanon, nyang meuhadab ubak banda damsyik. ulee gata lagee buket karmel; ok gata nyang teukeupang dua lagee leumbayong, cukoh teupeusona sampoe ubak sidroe raja. sunggoh gagah jeulita, gata, nyang teucinta lamkawan nyang jiharok. tuboh gata anggon lagee bak keuruma, boh mom gata na kheueh gugusan nibak bohjihnyan. meuheut that ulon keuneuk euk nibak kayee keurumanyan, dan laju meuteume dumna boh-boh jih. kira jih boh mom gata lagee gugusan boh anggo, nafah gata mangat lagee bhee boh apel, babah gata mameh lagee mameh ie anggo! inong bah kheueh anggo nyan ji ile ubak geunaseh lon, deungon hana putoh-putoh jih; dan teupeubeudoh cinta asmara, meunan nibak ureueng-ureueng nyang teungoh eh. ulon milek geunaseh ulon, gobnyan meuharab ulon. jak geutanyoe tajak u padang, hai geunaseh lon, dan ta meudom diladang di teungoh-teungoh bak bungong gaca. jak geutanyoe ban beungoh tajak u lampoh, dan ta kalon peu kheueh bak anggo ka meupucok, dan bungong jih ka keumang; peu kheueh bak geulima ka meubungong. disinan teuma lon bri cinta ulon ubak droeneueh. bak arak mangat bhee lagee bhee jih, nibak bineh pintoe geutanyoe na meubagoe boh nyang leuzat-leuzat, nyang ka treb teupot dan nyang baro; atranyan banmandum ulon keubah keu gata, geunaseh ulon. ah, seukira jih gata syedara kandong lon, nyang peureunah neumom nibak ma ulon, pasti droeneueh ulon

com meunyoe meurumpok nibak jalan raya, hana ureueng nyang hina ulon. droeneueh teuma lonba u rumoh ma ulon, mangat droeneueh jeuet neupeuruno ulon. droeneueh teuma ulon bri neujieb ie anggo mangat bhee, dan ie boh geulima. jaroe wie droeneueh neutumpang ulon, dan jaroe uneuen gata neupaluek ulon. meujanji kheueh, hai putroe-putroe yerusalem, bahwa gata hana neupeukaru cinta, sampoe jihnyan teupeupueh teuma. ureueng-ureueng inong soe kheueh nyan nyang teuka nibak padang pasi, jimeusadeu nibak geunaseh jih? inong lon peugo gata di miyueb bak apel, teupat gata teukandong dan teupeulahe. peujeuet kheueh ulon keu boh ate gata, dan bek neupaluek ureueng laen seulaen ulon; kareuna cintanyan saban ngon teunaga mawot, dan nafeusu meukuasa lagee keumatean. hu jih lagee apui hu nyang hu meuhub-hulub wa biasa. ie nyang le hana hase jipeulon cinta, dan ie raya hana hase jipeuhanyot atranyan teuma. meunyoe sidroe-droe ureueng geubri banmandum hareuta gobnyan keu geubloe cinta, pasti peunghinaan nyang geuteume teuma. syedara-syedara agam ureueng inong bak kamoe na sidroe adoe nyang inong nyang mantong ubit boh mom nibak dada jih. peue nyang haroh kamoe peubuet keu adoanyan meunyoe na ureueng teuka geujak seulangke adoe kamoe nyan? seu andai jihnyan na kheueh saboh beuton timbok, teuma kamoe peudong saboh meunara pirak di ateueh nyan. seu andai jihnyan saboh gapura, teuma kamoe boh palang deungon kayee ceumara. inong ulon nyoe na kheueh saboh binte timbok, dan boh mom bak dada ulon nyang jeuet keumeunara. geunaseh ulon geuteupeue bahwa nibak gobnyan kheueh ulon mubahgia. agam nabi sulaiman na lampoh anggo di baalhamon; lampoh geuhnyan geuseurah ubak ureueng nyang jaga. maseng-maseng awaknyan geubayeue deungon siribee peng keu hasenyan, dan meuteume dua reutoh keu jeureh payah gobnyan. bah kheueh peng nyan keu gata, nabi sulaiman, dan keu ureueng nyang jaga nibak lampoh gata. teuma lampoh anggo lon, na kheueh atralon keudroe, na dikeue ulon. hai, ureueng keumiet lampoh, rakan-rakan jikeuneuk deungoe su gata; peudeungoe kheueh nyan ubak ulon! inong geunaseh ulon, neuteuka kheueh lagee rusa, lagee aneuek rusa di peugunongan betér.

bak watee jamen ilee sigohlom ureueng israel na raja nanggroe, nanggroe kanaan keunong beuncana musem deuk nyang lumpah parah. bak watee nyan na sidroe ureueng agam nyang nan jih elimelekh. ureueng nyan asai nibak kawom efrata, dan tinggai di betlehem di dalam wilayah yehuda. sabab bala musem deuk nyan, gobnyan jijak u nanggroe moab meusajan deungon peurumoh jih, naomi, dan bandua aneuek gobnyan nyang agam: mahlon dan kilyon. laju awaknyan tinggai disinan. watee awaknyan mantong disideh, elimelekh meuninggai donya. deungon nyan tinggai kheueh naomi meusajan ngon ban dua droe aneuek geuh. ban dua aneuek jihnyan jimeukawen ngon aneuek dara moab, nyang nan orpa dan rut. siploh thon oh lheurehnyan, ban dua aneuek agam naomi nyan, meuninggai teuma, akhe jih naomi ka gadoh bah kheueh nyan lakoe droe meunan cit ban dua droe aneuek jihnyan. na meupadubna treb teuma oh lheurehnyan naomi jideungoe bahwa tuhan ka geubri beureukat atueuh umat israel deungon hase panen nyang get. le sabab nyan naomi deungon ban dua droe meulintee gobnyan jimeukeumah laju keu jitinggai moab. awaknyan jibeurangkat meusigoesigoe jiwoe u yehuda. bak teungoh rot ueh, naomi jipeugah ubak ban dua droe meulintee jihnyan, "gata nyan tawoe mantong u rumoh mak gata. seumoga tuhan get deungon gata saban cit lagee gata pih get deungon ulon dan keu awaknyan nyang ka meuninggai donya. seumoga tuhan ngon murah ate geubri lakoe lom keu gata mangat gata tameurumoh tangga lom teuma." oh ka lheureh jipeugah nyang lagee nyan bagoe, naomi laju geulakee idhin ubak awaknyan sira geucum awaknyan. teuma orpa dan rut laju geumo sira geulikiek sihabeh teuneuga, sira jikkeun ubak naomi, "hanjeuet, mak! kamoenyoe meuseutot ho nyang makjak ubak bansa mak." "bek, hai aneuek!" geujaweueb le naomi, "gata leubeh get tajakwoe. keupeue guna jih gata seutot deungon ulon? bukon kheueh ulon nyoe hana hase le ulon peulahe aneuek keu jeuet keu lakoe gata? gatajak woe kheueh, hai aneuek meutuah, sabab ulon nyoe ka tuha that keu ulon meukawen lom. dan seukira jih mantong na harapan nibak ulon keu lon meukawen bak malam nyoe cit teuma dan meuteume aneuek agam, peu kheueh gatanyoe tatem preh sampoe aneuek nyan rayeuk? ek kheueh mungkin le sababnyoe gata hana tatem meukawen deungon ureueng laen? han jeuet, aneuek ulon, bek gata peubuet nyang lagee nyan! ulon meuras peudeh keuhai peue nyang haroh gata rasa kareuna hukom tuhan atueuh ulon." rut dan orpa geumo lom ngon su nyang teuga oh lheurehnyan orpa laju jilakee droe sira jicom mak tuwan droe jih dan gobnyan pih geuwoe. teuma rut hana geutem reunggang deungon mak tuwan geuh nyan. jipeugah kheueh le naomi ubak rut nyan, "rut, gata kalon kheueh! parui gata ka jiwoe ubak bansa droe jih dan ubak dewa-dewa droe jih. gata jak kheueh teuma hai aneuek meutuah, seutot kheueh laju jihnyan nyang ka jiwoe!" teuma geujaweueb le rut, "mak, bek kheueh neuyue woe ulon dan lon tinggai mak sidroe disinoe! ulon tuan keuneuk seutot ho nyang mak jak. ho mantong mak jak, keunan cit ulon jak. dipat mantong mak tinggai, disinan cit teuma ulon tinggai. bansa

mak, nyan pih bansa ulon. po teu allah nyang mak seumah, nyang cit nyang ulon seumah. dipat mantong mak meuninggai, disinan cit teuma ulon meuninggai dan teupeukubu. bah kheueh tuhan geuhukom ulon sibrat-brat jih, meunyo ulon nyoe lon meupisah deungon mak, keucual mate kheueh nyang hase peujioh tanyoe!" naomi geukalon bahwa rut nyan that that jimeukreueh keuneuk jiseutot, le sababnyan, gobnyan ka hana hase geukheun sapue. deungon nyan teuma awaknyan laju geujak lom sampoe ka trok u betlehem. meunan awaknyan trok keunan, bansaboh banda nyan ka karu ngon subra. dumna ureueng inong disinan jipeugah, "peu kheueh beutoi gobnyan naomi?" "bek tahoi ulon naomi," geupeugah le naomi, "gatahoi mantong ulon mara, sabab po teu allah nyang mahakuasa ka geupeubiyeu ulon nyoe udeb peunoh deungon nyang phet-phet. bak watee ulon tuan jak nibak teupat nyoe peunoh deungon peue nyang tapeureulee, teuma jinoenyoe tuhan ka geupeuriwang lom ulon keunoe deungon jaroe nyang soh. le sabab nyan bek kheueh gatanyoe tahoi ulon deungon nan naomi, sabab tuhan nyang mahakuasa ka geuhukom ulon deungon meubagoe deurit nyang le!" meunan kheueh kisah jih pakriban naomi geuwoe nibak moab meusajan deungon rut meulintee gobnyan nyang ureueng moab nyan. awaknyan trok u betlehem paih bak musem keumeukoh boh gandom. naomi na sidroe anggota keuluwarga nibak pihak lakoe jih, elimelekh, ureueng nyan kaya lom teupandang. na ureueng nyan boas. bak si uroe geupeugah le rut ubak naomi, "mak, ulon lakee idhin keuneuk jak u lampoh keuneuk pileh boh gandom nyang mungkin na nyang rhot nibak jaroe ureueng mupot. ulon rasa teuntee na mantong ureueng nyang jipeubiyeu keu ulon mangat lon peubuet nyang lageenyang." "get, neuek!" jaweueb naomi, "tajak kheueh!" deungon nyan geujak kheueh laju rut u blang geujak pileh gandom nyang rhot nibak jaroe ureueng mupot. keubeutulan gobnyan geujak ublang atra boas. hana treb oh lheurehnyan boas teuka nibak betlehem dan geubri saleuem ubak ureueng nyang teungoh mupot, "seumoga tuhan na meusajan gata," kheun gobnyan. geujaweueb teuma le ureueng nyang teungoh mupot nyan, "seumoga tuhan geubri beureukat keu bapak." laju boas geuteumanyong ubak mando gobnyan, "soe ureueng inong nyan?" jiwaweueb le mando nyan, "jih nyan ureueng inong nibak moab nyang ban teuka meusigoe ngon naomi nibak nanggroe moab. gobnyan geulakee idhin ubak ulon mangat jiseutot rot likot ureueng nyang teungoh mupot keu jipileh boh gandom nyang rhot-rhot. phon beungoh geuhnyan hana geupioh meukeureuja, dan jinoenyoe ban sagai jipioh jimeureuhat sikeujah lam jambo." le boas geupeugah ubak rut, "ci neudeungoe ilee. gata bek tajak pileh boh gandom nibak blang ureueng laen. tapileh mantong disinoe meusajan deungon ureueng nyang meukeureuja nibak ulon ureueng nyang inong. gata kalon kheueh ho nyang awaknyan jijak mupot. taseutot kheueh mantong awaknyan sabe dan bek jioh gata nibak awaknyan. meunyo gata ka glaih keuneuk jieb ie, tajakcok mantong ie di dalam guci nyang ka jipaso le ureueng agam. ulon ka ulon peuringtah ubak awaknyan mangat awaknyan bek jipeukaru

gata." geudeungoe nyang lagee nyan rut laju geusujut dikeue boas sira geupeugah, "pak, ulon hana patot ulon teurimong neupusanet ulon nyan meunan get nibak bapak. ulon nyoe ureueng aseng dan hana sipatot jih ulon teurimong neupaurati ulon nyang meunan get nibak bapak!" boas geujaweueb, "ulon ka ulon deungoe keuhai peue mantong nyang gata peubuet atueh mak tuwan gata phon yoh lakoe gata meuninggai donya. ulon lon teupeu bahwa gata ka tatinggai ureueng syiek gata dan tanoh ie gata keu gata teuka tinggai disinoe meusapat ngon ureueng-ureueng nyang gohlom gata turi. seumoga tuhan geubalah buet gata nyang jroh. seumoga gata tateurimong peue-peue mantong nyang geubri le tuhan, po teu allah israel, sabab gata ka tateuka keu tajak meulindong ubak gobnyan!" geujaweueb le rut, "bapak lumpah that get keu ulon, bahpi ulon nyoe hana saban ngon ureueng nyang meukeureuja nibak bapak. ramah bapak nyan bit-bit get that teupeu mangat ate ulon." watee katrok keu teujak pajoh bu, boas geupeugah ubak rut, "jak geutanyoe tajak makheun. nyoe pat saus jih." teuma rut pi laju geumakheun meusi-goe ngon ureueng mupot nyan. meunan cit boas laju geubri gandom nyang teutot keu rut nyan, dan rut geumakheun sampoe troe. oh ltheueh geumakheun, mantong na nyang leubeu. oh ltheuehnyan rut geujak lom geujak pileh boh gandom. oh ka leupah gobnyan geujak, boas laju geupeugah ubak ureueng nyang keureuja pot boh gandom nyan, "meunyoeh jihnyan jipileh boh gandom nyang ka teu ikat-ikat, gata peubiyeu mantong. bek gata peujeuet jihnyan malee atawa gata beungeh keu jih. bah kheueh gata tasaja beuot bacut-bacut nibak nyang ka gatapot ngon gata ikat-ikat nyan, dan gata peurhot keu jihnyan mangat jihnyan hase jipileh atra nyan." rut hana geupioh laju geupileh gandom di blang sampoe an uroe seupot. oh ka ltheueh gobnyan geuseunuet-seunuet bak gandom nyan keu geupeu leukang aneuk gandom nyang meukeumat nibak mu jih, teunyata gobnyan ka geupeusapat aneuk gandom nyan na siploh kilo gram. oh ltheuehnyan gobnyan geuwoe laju u banda deungon geupeuwoe sajan hase nyang ka geupileh nyan ubak mak tuwan sira geutunyok na meupadub na le hase nyang geupileh nyan. dan gobnyan geubri ubak mak tuwan geuh peunajoh nyang hana ek geupeu habeb bak watee makheun. teuma geupeugah kheueh le naomi ubak rut nyan, "dipat gata teuma banmandum nyoe? diblang soe kheueh gata meubuet nibak uroe nyoe? seumoga po teu allah geubri beureukat nyang get keu ureueng nyang ka jipeubuet nyang jroh keu gata!" teuma le rut laju geucalitra hai nyang ka teujadi atueh droe geuhnyan ubak naomi nyang mak tuwan geuh, bahwa blang teumpat gobnyan pileh gandom nyan na kheueh atra sidroe ureueng agam nyang nan jih boas. "aneuk meutuah, ureueng nyan na kheueh keuluwarga nyang paleng rab deungon geutanyoe," kheun naomi. "gobnyan kheueh nyang haroh meutanggong jaweueb u atueh geutanyoe. seumoga tuhan geubri beureukat atueh gobnyan. tuhan hantom na geu iengkeue janji dan tieb geumeu-janji sabe geupeutrok, bah kheuehnyan janji keu ureueng nyang mantong udeb meunan cit keu ureueng nyang ka meuninggai donya." oh ltheueh nyan rut

geupeugah lom, "mak, ureueng nyan geukheun lom bahwa ulon nyoe jeuet ulon pileh sabe gandom nyang rhot-rhot nyan meusajan deungon ureueng nyang meukeureuja bak gobnyan sampoe an hase bans-aboh blang ka seulesoe teupot." "nyoe, neuek," geujaweueb le naomi ubak rut, "keubiet leubeu get gata meukeureuja meusajan ngon ureueng keureuja nyang inong diblang boas. sabab, meunyoeh gata tajak ublang ureueng laen, gata hase jipeukaru le ureueng nyang na disinan!" le sabab nyan, rut teutab geuseutot ureueng nyang meukeureuja nyang inong di blang boas. gobnyan geupileh gandom disinan sampoe banmandum nyang ka jeuet pot nyan teukoh beuhabeh – bah kheuehnyan nyang phon that teukoh meunan cit ngon teupot nyang paleng keuneuleuh. dan sidubnyan treb rut teutab tinggai deungon mak tuwan geuh. na meupadub na treb teuma oh ltheuehnyan, naomi geupeugah ubak rut, "ulon haroh lon useuha mangat gata meuteume tameurumoh tangga lom dan mubahgia. gata takeureuja meusajan deungon ureueng inong diblang boas, bukan? ingat, boas nyan na kheueh syedara geutanyoe. sabab nyan, gata deungoe kheuehnyoe! bak malamnyoe gobnyan teuma geujak ceumeulo ubak jambo pui teumpat gandom gobnyan teutamon di blang geuh. tajak manoe kheueh laju, taboh kheueh laju minyeuk mangat bee dan tasok kheueh peukayan gata nyang paleng lagak. laju gatajak ubak teumpat boas di teumpat geuh meukeureuja nyang teungoh geuceumeulo gandom nibak mu jih. gata preh kheueh gobnyan disinan sampoe gobnyan seulesoe geumakheun, teuma bek sampoe geuteupeue bahwa gata na disinan. gata ngieng kheueh dipat teumpat gobnyan eh. meunyoeh gobnyan ka geuteungeuet, tapeurab kheueh laju ubak gobnyan dan gata buka laju ija silimboteu gobnyan, laju gata-eh nibak gaki gobnyan. eunteuk gobnyan teuma geubri tee bak gata peue nyang haroh gata peubuet." "get, mak," geujaweueb le rut, "ulon teuma lon peubuet banmandum nyang ka mak peugah." dan geujak kheueh laju rut u teumpat ureueng meukeureuja nyang teungoh jilo gandom mangat leukang nibak mu jih. disinan gobnyan geupeubuet banmandum nyang geupeugah le mak tuwan geuh. oh ka seulesoe boas geupajoh bu, gobnyan ka meurasu puih dan ate geuh pi ka mangat. laju gobnyan geujak eh to ngon aneuk gandom nyang meutamon. deungon seungab-seungab rut teuka ngon geupeurab ubak gobnyan laju geubuka ija seulimboteu boas dan geupeureubah laju droe geuh nibak gaki gobnyan. watee teungoh malam hana teusangka-sangka boas teujaga nibak teungont dan geukeuneuk balek badan geuh. gobnyan keubit that teukeujot bak watee geungieng na sidroe ureueng inong ka teu-eh nibak gaki geuh. "soe ureueng nyoe?" geutanyong le boas. "ulon rut, pak!" seout rut. "bapak na kheueh keuluwarga kamoe nyang paleng to nyang haroh meutanggong jaweueb atueh udeb ulon. rila kheueh bapak neucok ulon jeuet keu peurmoh bapak." "seumoga tuhan geubri beureukat atueh gata, hai aneuk ulon," geupeugah le boas. "teubandeng deungon peue nyang gata peubuet atueh mak tuwan gata, teuma buet gata nyang jinoenyoe ka teutunyok cinta nyang paleng raya. gata jeuet mantong tamita lakoe lamkawan ureueng kaya atawa ureueng

gasin, teuma hainyan hana gata peubuet. le sabab nyan, bek kheueh gata khawate, rut, banmandum nyang lakeenyan teuma ulon peubuet; sabab mandum ureueng nyang na di banda nyoe ka jiteupeue bahwa gata na kheueh sidroe ureueng inong nyang get budo. keubiet beutoi that, ulon haroh meutanggung jaweub ateuah udeb gata, sabab ulon na kheueh keuluwarga gata nyang paleng to. teuma mantong na sidroe teuk ureueng nyang paleng meutanggung jaweub na ateuah udeb gata. dan gobnyan na kheueh keuluarga nyang leubeh to nibak ulon. malam nyoe gata tinggai mantong disinoe. singoh beungoh ulon tanyong peu kheueh jihnyan jitem meutanggung jaweub ateuah gata atawa hana. meun-yoe jihnyan jitem, bah kheueh; teuma meun-yoe jihnyan hana jitem, teuma ulon meujanji deumi po teu allah nyang udeb, ulon teuma lon peubuet tanggong jaweub nyan. jinoen-yoe ta-eh kheueh mantong disinoe sampoe beungoh uroe." dan geueh kheueh rut disinan to ngon gaki boas. oh singoh beungoh suboh mantong reuneue-reuneue, rut ka geubeudoh mangat bek jingiang le gob. sabab boas hana geutem meusidroe ureueng pi bahwa rut na teuka u tempat nyan. geupeugah kheueh le boas ubak rut, "gata sut laju ija sawak gata dan gataleueng laju." teuma rut laju geuploh ija seulendang geuh dan laju geuleueng boas laju geuro u dalam ija sawak nyan na kira-kira dua ploh kilo gram gandom. laju gandom nyan geubeuot u ateuah baho rut. oh ka lheureh nyan boas laju geujak u banda. oh watee katrok geuwor rut na rumoh, laju geutanyong le mak tuwan geuh, "peue nyang ka teujadi, hai aneuek?" dan rut laju teuma geucalitra banmandum nyang geupeubuet le boas keu gobnyan. "dan," geupeugah le rut lom, "bahpi gobnyan nyang ka geubri gandomnyoe keu ulon, sabab geupeugah le gobnyan bahwa ulon hana jeuet ulon woe ubak mak ngon jaroe nyang soh." laju geupeugah le naomi, "tapreh mantong, hai aneuek, sampoe gata tangiang pakriban keuneuleuh jih teuma. boas hana seungab sigohlom peukaranyoe seulesoe geupeubuet nibak uroen-yoe cit teuma." le boas laju geujak ubak tempat meurmupok nibak babah pintoe geureubang banda. oh ka lheureh geuduek na sikeutab disinan deuh kheueh laju geungieng sidroe ureueng agam jijak rab ngon gobnyan, meunurot boas ureueng agam nyang teungoh jak nyan na kheueh keuluwarga elimelekh nyang paleng toe. le boas laju geuhoi ureueng nyan, "syedara ulon, gata duek disinoe rab ngon ulon!" ureueng nyan laju jiteuka dan jiduek laju to deungon boas nyan. oh lheureh nyan boas laju teuma geuhoi siploh droe teuk ureueng-ureueng patot dalam banda mangat jiduek meusajan ngon gobnyan disinan. oh lheureh awaknyan geuduek, geupeugah kheueh laju le boas ubak syedara geuh nyan, "meunoe hai syedara meutuah, naomi ka jiwoe nibak nanggroe moab. jinoen-yoe jihnyan keuneuk jipeubloe tanoh aruwah elimelekh, keuluwarga geutanyoe. dan ulon kira gata haroh tateupeue keuhai nyan. meun-yoe gata tatem bloe tanoh nyan, tapeugah kheueh laju dikeue ureueng tuha nyang patot-patot nyang na teungoh duek disinoe. meunan cit meun-yoe hana, takheun cit teuma deungon trok-trang, sabab geutanyoe meudua mantong nyang na hak ateuah hainyan, gata nyang

phon, oh lheurehnyan baro kheueh ulon." jijaweueb le ureueng nyan, "jeuet, ulon nyang bloe tanoh nyan." laju geupeugah lom le boas, "get kheueh meun-yoe ka meunan gata peugah. teuma, meun-yoe gata tabloe tanohnyan nibak naomi, gata haroh teuma tacok rut, ureueng inong moab, inong balee areuwah aneuek naomi. sabab, tanoh nyan haroh kheueh teutab jeuet keuhak milek keuturonan ureueng nyang ka meuninggai nyan." jijaweueb le ureueng nyan, "meun-yoe lageenyan, ulon hana sanggob. jinoen-yoe bah kheueh ulon peulheueh hak ulon sibagoe ureueng nyang phon nyang wajib teubloe tanoh nyan. hana meuguna tanoh nyan ulon bloe sabab tanoh nyan ka barang teuntée hana hase jeuet keuhak milek keuturonan ulon. leubeh get droeneueh mantong nyang bloe tanoh nyan." bak masanyan meun-yoe na ureueng jipeubloe tanoh atawa jituka hak milek jih, lazem jih sibagoe tanda atranyan ka sah le ureueng nyan jibuka seulob nyang na meleukeuk nibak gaki jih, laju seulobnyan jijok ubak ureueng nyang ka bloe atra nyan. meunan kheueh cara jih ureueng-ureueng di israel jipeusah sapeue-sapeue peukara keuhai bloe peubloe tanoh. le sabab nyan, bak watee mandum ureueng jipeugah ubak boas, "droeneueh mantong nyang bloe tanoh nyan," le gobnyan laju geupeu lheureh seulob geuh dan laju geubri atra nyan ubak boas. dan geupeugah le boas ubak ureueng-ureueng tuha nyang patot-patot meunan cit ubak mandum ureueng laen nyang na disinan, "uroen-yoe gata banmandum jeuet keusaksi bahwa ulon ka ulon bloe nibak naomi banmandum nyang na atra hak milek le elimelekh dan aneuek-aneuek gobnyan, nyan kheueh kilon dan mahlon. meunan cit disamping nyan ulon kucock rut, ureueng inong moab nyan inong balee aruwah mahlon nyan jeuet keu peurmoh ulon. deungon lageenyan tanohnyan teutab jeuet keu hak milek keuluwarga nyang ka meuninggai nyan. dan keuturonan geuhnyan pi teutab na lamkawan kawom syedara gobnyan dan di banda banda gobnyan. ingat kheueh syedara-syedara, uroen-yoe gata banmandum jeuet keusaksi jih." ureueng-ureueng tuha nyang patot-patot dan ureueng nyang laen nyang na disinan jipeugah, "beutoi, kamoe nyoe jeuet keusaksi. seumoga tuhan geupeujeuet peurmoh droeneueh nyan lagee rakhel dan lea nyang ka geupeulahe aneuek-aneuek nyang le keu nabi yakub. seumoga droeneueh makmu lamkawan ureueng-ureueng dalam kawom efrata dan seumoga droeneueh meusyehu di betlehem. seumoga aneuek-aneuek nyang lahe nyang geubri le tuhan ubak droeneueh meulalu ureueng inong muda nyoe teuma jeuet keu keuluwarga droeneueh lagee si peres, aneuek nibak yehuda dan tamar." teuma boas pih laju geucok rut jeuet keu peurmoh gobnyan. tuhan geubri beureukat keu rut sampoe gobnyan mume laju geupeulahe sidroe aneuek agam. dumna ureueng inong jipeugah ubak naomi, "teupujoe kheueh tuhan!" gobnyan ka geubri sidroe cucoe keu droeneueh nyang agam nibak uroe nyoe mangat jeuet jipeulara droeneueh. seumoga aneuek nyan jeuet keu aneuek nyang meusyehu di israel! meulin-tee droeneueh nyan get that jigaseh keu droeneueh. gobnyan ka geubri keu droeneueh leubeh nibak peue nyang hase geubri ubak tujoh droe aneuek agam.

jinoenyoe gobnyan ka teuma geubri sidroe cucoe nyang agam ubak droeneueh, nyang teuma jok semangat baro keu gata, dan geupeulara droeneueh bak watee droeneueh ka tuha." naomi laju geucok aneueknyan geupeulara laju ngon peunoh gaseh dan sayang. le ureueng inong teutangga gobnyan jiboh nan aneuek nyan obed. ubak soe mantong awaknyan jipeugah, "naomi ka na sidroe aneuek agam!" obed nyoe kheueh teuma oh singoh uroe jeuet keu bapak nibak isai, dan isai nyan na kheueh bapak nabi daud. dan nyoe kheueh gareh silsilah keuturonan nabi daud, phon nibak peres, na kheueh: peres, hezron, ram, aminadab, nahason, salmon, boas, obed, isai, nabi daud.

padub na seungue yerusalem nibak saat nyoe, banda nyang dilee rame lumpah na. yohmasa dilee jitee meugah keu meubagoe bansa, bak saat nyoe ka jeuet lagee inong balee. yoh masa dilee banda nyang paleng teupujoe, jinoo ka teupeujeuet lagee namiet nyang hana meuguna. simalam suntok jimo ngon seudeh, ie mata jih rho meuleng-leng tijoh nibak mieng. hana meusidroo pi nibak geunaseh jih nyang jitem peulalo. gobnyan jikhianat le rakan-rakan jih nyang ka teubalek jeuet keu lawan. peunduduek yehuda jitinggai nanggroo jih, sabab jipeunamiet dan lumpah seungsara. jinoo awaknyan tinggai lamkawan bansa-bansa hana meuteumpat nyang na teubri dame sejahteura. musoh jikeupong awaknyan bak watee awaknyan meudeurita. bak uroe raya hana meusidroo pih nyang na teuka u baet allah. dara-dara nyang meuca-e disinan ka meudeurita, dan teungku-teungku imeum ka apoh apah. hana leumah ureueng nibak babah-babah pin-toe geureubang, banda di sion ka peunoh deungon keuseudehan. musoh-musoh gobnyan ka meujaya sabab ka hase jikuasa gobnyan. tuhan nyang peujeuet awaknyan meudeurita, sabab lumpah that le desya gobnyan. peunduduek jihnyan ka habeh teuteun, dan teuangkot ubak teumpat nyang teuboih. keujayaan banda yerusalem na kheueh kisah masa nyang ka treb. bubena peumimpin disinan ka jeuet keuleumoh lagee rusa nyang ka deuk that. awaknyan hana meudaya watee jitiyeub le musoh. oh ka ltheueh reuloh dan seungsara, yerusalem teuingat masa nyang ka treb, watee mantong le hareuta; pakriban peunduduek rhot bak jaroe musoh, dan hana meusidroo pih nyang teuka jikak tulong. lawan-lawan gobnyan jikem-kem mantong oh jikalon awaknyan ka reuloh. yerusalem ka jipeukuto droe jih keudroe deungon cara jipeubuet desya nyang le dan kutoe. bandum nyang ilee jihoreumat gobnyan, jinoo jihina sabab teukalon jihnyan ka teulon. gobnyan apoh apah, sabab ka gadoh ie muka. keuhai kutoe jihnyan deuh peungeuh teukalon teuma jihnyan hana jipakoe peue nyang teujadi ateueh droe jih keudroe. keubit that hebat keuhancoran gobnyan, teuma hana meusidroo pih nyang jitem peumangat ate gobnyan. dan gobnyan geulakee gaseh sayang nibak tuhan, sabab musoh-musoh gobnyan ka habeh meunang. bandum hareuta beunda gobnyan ka habeh jireupah le dumna musoh. gobnyan deungon seudeh geukalon awaknyan jitamong lam baet po teu allah, buet nyang that geutam le tuhan keu ureueng-ureueng nyang bukan umat gobnyan. deungon meususah payah peunduduek gobnyan jimita hareukat; barang nyang meuhai-meuhai yuem nibak awaknyan jituka deungon ruti, mangat awaknyan teutab udeb dan bek mate. yerusalem jimeuhoi, "ya tuhan, neungieng kheueh ulon, neukalon kheueh sigala peundeuritaan lon." "he ureueng-ureueng nyang teungoh jak bak rot ueh raya, kalon kheueh dan ngieng kheueh! peu kheueh na seksa nyang raya jih ube nyang lon deurita bak saat nyoe, seksa nyang ka geupeurhot le tuhan u ateueh ulon, sabab beungeh gobnyan nyang paleng raya nyan? di ateueh langet geupeutron apui nyang lumpah seu uem dan sampoe tutong lam baten lon. geupasang taron dikeue ulon nyang jeuet keusabab

ulon reubah. laju geupeubiyeu lon disinan sidroe khong sampoe meudeurita siuroe suntok. geucok bandum desya ulon, laju geuiakat ka jeuet keusaboh, dan geugantung ubak takue lon, dan geuhon atranyan ka leumoh ulon. tuhan geujok ulon ubak musoh; ulon hana meudaya lon lawan awaknyan. tuhan geuanggab hina bandum pahlawan lon nyang beuhe ngon gagah. geukrah banmandum sipa-i mangat bandum ureueng muda lon habeh binasa. gobnyan geugilo-gilo bansa lon sampoe hanco, lagee ureueng nyang teungoh prah ie boh anggo. nyang kheueh sabab jih ie mata ulon ro meutreb-treb, hana ureueng nyang bri seumangat dan peumangat ate. bansa ulon ka habeh gadoh peue-peue nyang na, sabab musoh leubeh meukuasa. ulon beutot jaroe lon lakee tulong, teuma hana ureueng nyang jitem peumangat ate. rot jeueb-jeueb sagoe tuhan, geukirem musoh; awaknyan teuka jikak prang ulon. ulon jipeusaban lagee broh nyang hana meuguna, barang nyang paleng luwat di teungoh-teungoh awaknyan. teuma tuhan kheueh nyang paleng beutoi, sabab peurintah gobnyan ka ulon ingkeue. deungoe kheueh ulon he bansa-bansa, kalon kheueh ulon lam deurita. bubena ureueng muda dan aneuek dara nanggroo lon ka habeh jiteun, dan laju jiangkot ubak teumpat nyang teuboih. ulon tawok bandum rakan-rakan nyang krab deungon ulon teuma awaknyan jikhianat lon. bubena teungku imeum dan peumimpin bansa banmandum ka habeh mate bak rot-rot ueh banda. bak watee jimita peunajoh keu jipeuteun nyawong. o, tuhan! neungieng kheueh ulon, ate ulon gundah ngon karu, hanco sabab doraka ulon yoh masa ilee. bak rot-rot ueh raya na ureueng jipoh mate, dalam rumoh na nyang mate. o, tuhan! neudeungoe kheueh apoh apah lon, hana ureueng nyang jitem peumangat ate lon. musoh-musoh ulon galak ngon geumbira, sabab droeneueh nyang peujeuet ulon ceulaka. neupeuteuka kheueh uroe nyang droeneueh peujanji nyan; neupeujeuet kheueh awaknyan meudeurita saban lagee ulon. neungieng kheueh bandum buet jeuhet awaknyan, dan neupeusaneut kheueh ateueh awaknyan lagee droeneueh peusaneut ateueh ulon, sabab bandum desya nyang ulon peubuet ateueh droeneueh. ulon ah euh meurang-rang lam deurita, ate ulon seudeh dan meurana. tuhan geucok tendakan lam beungeh gobnyan, sion habeh geutob deungon seupot. keuagongan israel nyang manyang trok u langet, ka geugeulawa u ateueh bumoe. bak saat tuhan meureuka, baet gobnyan di sion pih hana geupakoe. tieb-tieb blang naleueng nyang na di nanggroo yehuda, bandum geupeuhanco hana rasa weueh. lam beungeh gobnyan laju geupeusak sampoe reuloh kuta-kuta nyang teulindong nanggroo nyan. keurajeuen nyan meusajan deungon peumimpin ji geupeu rhot laju sampoe ka jeuet keuhina. lam beungeh gobnyan nyang hu lagee apui nyan, teunaga israel geupeupatah. watee geutanyoe jiseurang le lawan, gobnyan han geutem tulong. lagee apui nyang hu meubura habeh jipeuranab peue-peue nyang na, meunan kheueh tuhan beungeh keu bandum geutanyoe. lagee musoh, gobnyan geulinteueng beude geuh dan geupeukeu aneuk panah gobnyan ateueh geutanyoe. bandum ureueng nyang jipeu galak ate

geutanyoe, habeh geupeumate le gobnyan. gobnyan geupeu hambo beungeh geuh lagee apui hu u dalam banda yerusalem nyoe. tuhan ka jeuet lagee musoh; gobnyan geuseunuet israel sampoe reuloh. gobnyan geupeuhanco bubena kuta meunan cit deungon meuligoe, dan geupeujai seudeh ngon inseuh keu yehuda. gobnyan geupeuhanco rumoh geuh keudroe teumpat umat geuh meusapat jak seumah gobnyan. gobnyan nyang peujeuet manusia tuwoe bak uroe sabat dan uroe-uroe raya. sabab tuhan lumpah that beungeh, teungku imeum dan raja ka geutulak teuma. tuhan geutulak miseubah gobnyan nyang paleng suci, dan geutinggai baet gobnyan keudroe; geupeubiyi musoh jipeureuloh bubena binteh beuton gobnyan. bak teumpat geutanyoe ilee meueibadat dan peugot khanuri, musoh seumurak sabab ka meujaya. tuhan ka geucok peunutoh bahwa binteh-binteh beuton sion haroh teureuloh. binteh-binteh beuton nyan ka geusipat, mangat banmandum hase teupeuhanco. binteh-binteh beuton dan meunaram-eunara, bak saat nyoe ka jeuet keu runga banmandum. pintoe-pintoe geureubang ka meuseubeen ngon tanoh, bandum palang-palang pintoe nyan ka habeh patah; raja dan peujabat peumeurintah bandum na di teumpat nyang teuboih. hukum tuhan ka hana jipeurunoe le; dan nabi hana le geuteurimong wahyu nibak tuhan. bubena tuha-tuha peut nyang na didalam banda ka seungab keudroe sira geudeuk didalam tanoh; awaknyan geutabu abee di atueh ulee, dan geungui iji krong tanda meuduka. meunan cit di aneuek-aneuek dara jitukui ulee trok bak tanoh. mata ulon keumong sabab ulon mo nyang hana pioh, jiwa lon meurana han ek teukira. ate lon hanco oh lon ngieng keuhancoran bansa; lon ngieng aneuek miet dan aneuek banyak habeh pansan bak rot-rot banda. deungon leumoh dan hek awaknyan jimo sira jilakee peunajoh dan ie jieb nibak ma jih. lagee ureueng nyang luka, awaknyan reubah meusumpom bak rot-rot ueh raya laju meuninggai lam pangkee ma teucinta. o, yerusalem, banda sion nyang teucinta, runga-rungka reuloh gata na be laot raya. peu kheueh nyang jeuet ulon peugah keu ulon bri peulalo ate? sabab, hantom na nyang meudeurita nyang sa lagee gata. keubit that hana nyang hase peupuleh keadaan gata. nyang geupeusampoe le nabi-nabi keu gata, na kheueh seumeungeut dan suleit nyang hana teukira. awaknyan hantom jipeugah keuhai desya gata, le sabab nyan gata hantom meutobat. sikeubit jih nyang jipeusampoe le awaknyan babat gata haba-haba nyang suleit nyang peumangat ate. bandum ureueng nyang jijak rot nyan jipeubeub gata, sabab gata ka hanco bube nyang na. awaknyan jiasek-asek ulee sira jipeugah, "nyan kheueh banda nyang puloh tari, banda keubanggan donya?" bandum masing gata jipandang bak muka gata deungon rasa banci, awaknyan jipeukem gata deungon deungon kem nyang meuhina. awaknyan jipeugah, "banda nyan ka kamoe peuhanco! akhe jih trok cit saat jih nyang ka kamoe preh-preh!" tuhan ka geupeubuet ancaman gobnyan nyang yoh masa ilee ka geureuncana dan geupeuingat ubak geutanyoe. geutanyoe geupeuhanco ngon hana rasa inseuh, dan keu musoh geubri keumeunangan. gobnyan geupeujeuet

awaknyan galak that watee jingeng geutanyoe ka rhot. he binteh-binteh beuton yerusalem, teumawok kheueh ubak tuhan! ro kheueh ie mata lagee ie krueng nyang ile uroe ngon malam bek kheueh taiem-iem nibak tamo, sampoe badan gata jiteuka hek! beudoh kheueh meulang-ulang simalam suntok keu takliet taro asoe ate gata ubak tuhan. lakee kheueh mangat gobnyan na rasa gaseh sayang keu aneuek-aneuek gata nyang teungoh deuk dan pansan bak tieb-tieb rot ueh nyang meukilok. tuhan, neungieng kheueh dan neupeurati kheueh ubak awaknyan nyang droeneueh seksa nyan! peu kheueh na nyang ka neupeulaku nyang lagee nyan? ma jipajoh aneuek droe jih nyang paleng jisayang, teungku imeum dan nabi ka jipoh lam baet droeneueh nyang suci. tuha muda ka habeh mate teugageueng atueh rot raya, aneuek muda ngon aneuek dara ka habeh mate bak ujung peudeueng. bak uroe droeneueh beungeh nyan, laju neukoh takue awaknyan hana meurasu inseuh. droeneueh neu undang musoh-musoh nyang kamoe takot keu jipeugot khanuri nyang paleng keujam ban silingka kamoe. awaknyan jipoh mandum nyang kamoe peulara dan nyang kamoe gaseh. nibak uroe droeneueh beungeh, hana meusidroe pih nyang hase jipeuplueng droe. ulon kheueh ureueng nyang ka lon rasa udeb seungsara, sabab teuginton ngon beungeh po teu allah. maken jioh ulon teuhila u dalam seupot nyang hana deuh sapeue. ulon geupoh meuleubob-leubob hana geupioh, hana rasa gaseh bansipanyang uroe. gobnyan geupeujeuet tuboh lon ka habeh luka luhok-luhok, dan tuleueng-tuleueng ulon ka habeh patah. gobnyan geupeupeunoh ulon deungon duka dan deurita. ulon geupaksa tinggai dalam seupot lagee ureueng nyang mate bak jamen ilee. deungon beuleunggu nyang kong laju geu ikat ulon, sampoe ka hana le rot lon teubiet. laju ulon kliek lon lakee tulung, teuma po teu allah han geutem deungoe. gobnyan laju geulinteung rot ulon jak deungon beuton-beuton batee. lagee cagee meuluem gobnyan geupreh lon, lagee singa gobnyan geulinteung ulon. geutiyeub ulon sampoe meusimpang bak bineh jalan, laju ulon geuteugom ngon geupriek-priek geutinggai sinan. lom geureuntang busur gobnyan, dan geupeujeuet ulon teumpat timbak aneuk panah gobnyan. aneuk panah gobnyan ka beusot nibak tuboh lon sampoe trok teutob nibak jantong lon. si uroe seupot ulon jipeukem le bandum ureueng, dan geupeujeuet keubahan gob pansi haba. teuma nyang phet nyang geubri keu ulon keu peunajoh dan nyang ulon jieb. muka ulon geupreupreu ubak tanoh, dan gigo ulon geu antok ubak batee sampoe patah. ka treb that hantom lon rasa udeb seujahteura; katuwoe ulon pakriban udeb baghia. nibak ulon ka hana le meusyehuh, gadoh kheueh harapan ulon ubak tuhan. ulon pike keuhai meurawoh dan keuhai nyang malang lagee lon jieb ie tuba nyang lumpah that phet. hana putoh-putoh hai nyan ulon pike, sampoe baten ulon ka teuteugon hana meuguna. bahpi meunan harapan ulon jibeudoh lom, watee lon ingat hai nyoe: geunaseh tuhan keukai abadi, rakmat gobnyan hantom na habeh, sabe baro tieb-tieb beungh keubit that tuhan seutia lagoena! tuhan na kheueh hareuta ulon hana nyang

laen. sabab nyan kheueh, ulon meuharab ubak gobnyan. tuhan get that keu ureueng nyang meuharab ubak gobnyan, dan ubak ureueng nyang mita gobnyan. le sababnyan, bah kheueh tanyoe preh deungon teunang sampoe tuhan trok geujak bri peutulongan; bah kheueh tanyoe meunroe jeuet keutabab bak watee geutanyoe mantong muda. watee tuhan geubri peundeuritaan, bah kheueh geutanyoe taduek keudroe deungon seungab. bah kheueh geutanyoe ta peumiyuek droe dan meunyeurah, sabab mungken harapan mantong na. bahpi jitampa dan jirapa, bah kheueh banmandum nyan tanyoe teurimong. sabab, tuhan hana geutulak geutanyoe siumu masa. oh ka ltheueh gobnyan geubri peundeuritaan, nibak gobnyan pih na gaseh sayang, sabab gobnyan teutab geugaseh keu geutanyoe deungon geunaseh nyang hana bataih. gobnyan hana deungon rila ate geupeubiyeu geutanyoe meudeurita dan seudeh. meunyeu jiwa geutanyoe teuteugon didalam glab, meunyeu geutanyoe gadoh hak nyang geubri le tuhan, sabab keuadalen geuputa balek, pasti kheueh tuhan geuteupeue dan geupeurati. meunyeu tuhan hana geugalak keu sapeue-sapeue, pasti manusia hana hase jipeuget sapeue keu nyan. get dan brok teutab jipeujak na kheueh ateuh peurintah tuhan. pakon manusia haroh apoh apah meunyeu jihnyan teuhukom sabab desya-desya jih keudroe? bah kheueh geutanyoe tatilek udeb geutanyoe, dan tawoe bak tuhan allah di dalam syeuruga. jak kheueh geutanyoe ta peulah ate dan meudoa, "kamoe meudesya dan beurontak ubak droeneueh, ya tuhan, dan droeneueh han neubri keuamphonan. kamoe droeneueh peulet droeneueh poh mate, gaseh sayang ka teusom lam beungeh droeneueh. meureuka droeneueh lagee awan nyang teubai that sampoe hana hase jilhob le doa-doa kamoe. kamoe ka neupeujeuet lagee broh nyang hana meuguna nibak mata banskom donya. kamoe jihina le bandum musoh dan jipeukem-peukem kamoe; kamoe ka keunong le keuceulakaan dan keuhancoran, dan udeb lam bahya dan teumakot nyang han teukira. ie mata lon ji ile lagee ie krueng sabab bansa ulon ka habeh hanco. ulon teuma lon mo hana pioh-pioh, sampoe droeneueh, ya tuhan di syeuruga, neungieng kamoe. ate ulon ka jeuet keuseudeh kamoe ngieng naseb ureueng inong di banda kamoe. lagee cicem, ulon jitiyeub le musoh nyang hana keudaleeh neubanci ulon. u dalam mon nyang to kreg, awaknyan jitiek ulon udeb-udeb laju jiseubee ulon ngon aneuk batee. ie ji-ek sampoe trok bak ulee lon, dan ulon pike, - "habeh kheueh riwayat lon!" ya tuhan, ulon meulakee ubak droeneueh, nibak tuwie mon nyang lhok nyan. ulon meuharab nyang that-that bek kheueh neusumpai geulinyueng droeneueh keu nyang ulon lakee mangat droeneueh neutulong ulon. dan doa ulon droeneueh deungoe, dan droeneueh teuka neujak peutoe; droeneueh neupeugah, 'bek yo.' droeneueh teuka neupeujuang peukara ulon, ya tuhan, nyawong ulon ka droeneueh peuseulamat. droeneueh neungieng buet nyang jeuhet nyang jipeubuet ateuh ulon, reuncana jeuhet musoh nyang banci ulon. sabab nyan, ya tuhan, neubila kheueh peukara ulon. droeneueh, tuhan, neudeungoe ulon jihina; droeneueh neuteupeue bandum re-

uncana awaknyan. awaknyan jipeubiyeu ulon siuroe seupot. keu jipeuceulaka ulon, awaknyan jipeuget reuncana nyang kutoe. phon beungoh trok an malam, ulon jipeujeuet keubarang nyang jipeukem. hukom kheueh awaknyan, nyang sisuai deungon buet jih, ya tuhan. kutok kheueh awaknyan, dan neupeubiyeu kheueh awaknyan tinggai dalam keuadaan putoh asa. peulet kheueh dan peubinasa kheueh awaknyan banmandum sampoe awaknyan teusampoh habeh lam donya." meuh nyang hu muble-ble ka jeuet keu mala batee-batee baet allah ka meutabu bak rot ueh raya. yoh masa ilee peumuda remaja banda sion lagee meuh nyang meuhai yuem, teuma bak saat nyoe ka jipeujeuet lagee beujana tanoh nyang hana hareuga. seudangkan, nang srigala jipeumom aneuk-anuek jih teuma umat ulon keujam that lagee cicem unta nyang ltheueh di padang. aneuk-anuek banyak nyang hana teubri mom, sampoe mate sabab ka glai. aneuk-anuek banyak jilakee makheun, teuma hana ureueng nyang jitem bri. awaknyan nyang ka lazem jimakheun peunajoh nyang mangat-mangat, dan udeb lam keumeuwahan, jinoo jimeueue jijakmita peunajoh dalam sinamon bloh, dan mate deuk teugageueng bak rot-rot ueh raya. umat ulon ka geuhukom leubeh brat nibak peunduduek sodom nyang lam sikreb mata hanco le jaroe po teu allah deungon hana tindakan manusia. yoh masa ilee bubena peumimpem kamoe na kheueh gleh-gleh lagee gapeuh nyang puteh beureuseh. awaknyan teugab dan teuga, seugar bugar dan seuhat-seuhat. teuma bak saat nyoe muka awaknyan leubeh itam nibak jeulaga habeh teugageueng bak rot ueh raya hana meusidroe manusia pih nyang na jituri. kuleut awaknyan ka habeh krot nibak tuleueng-tuleueng, lagee kayee nyang to kreg hana meuguna. awaknyan seungsara dan mate bacut-bacut, sabab mubacut pih ka hana le peunajoh nyang teukeubah; nyang mate dimideuen prang, leubeh me-untong nibak nyang mate sabab keunong deuk. keubit that yo teumakot ngon gli beuncana nyan nyang rhot ateuh umat lon sampoe ma-ma nyang ate geuh leumoh geureuboh aneuk droe geuh keudroe mangat na meuasoe pruet. tuhan geupeuteuka beungeh gobnyan dan geutot banda sion sampoe rata deungon tanoh. di lamkawan raja-raja dan peunduduek donya hana meusidroe pih nyang peucaya bahwa pintoe-pintoe geureubang yerasalem hase jitamong le musoh dumna. teuma bandum nyan ka teujadi, sabab desya bubena teungku imeum dan nabi-nabi. awaknyan ka jisintong darah, nibak ureueng nyang hana meusalah. lagee ureueng buta nyang meuwot-wot bak rot ueh raya meunan kheueh peumimpem-peumimpem banda yerasalem. peukayan awaknyan kutoe keunong darah sampoe hana meusidroe pih nyang tem jakmat awaknyan. ureueng laen jipeugah, "weueh nibak teupat nyoe! gata najih, bek tamat kamoe!" dan jijak kheueh awaknyan dan jimeurawoh bak saboh bansa bak bansa nyang laen, teuma han jibri tinggai teutab le soe mantong. tuhan hana le geupakoe umat geuh keudroe; gobnyan keudroe nyang peucerebre awaknyan dan geupeujeuet teungku-teungku imeum hana le jihareuga; dumna peumimpem hana le nyang gaseh. mata kamoe ka kamoe pandang,

kamoe preh bantuan nyang hantom na teuka. nyang kamoe harab peutulongan saboh bansa, nyang seube-una jih hana jeuet geubri sapeue. kamoe hana hase kamoe teubiet ubak rot raya, sabab sabe ji luem le lawan. seuneuleuh udeb kamoe karab sileumpah, sabab uroe-uroe udeb kamoe ka geunab. ureueng-ureueng nyang peucrok kamoe bagaih lumpah na jioh leubeh bagaih nibak cicem siwah po. awaknyan jitiyeub kamoe di gunong, dan jilinteung kamoe di padang pasi. awaknyan jidrob raja nyang geupileh le tuhan, ureueng nyang kamoe peubangga sibagoe nyang geubri udeb, dan nyang peupayong teuhadab lawan. he bansa edom dan us, takem laju, meugeumbira kheueh, teungoh mantong jeuet tapeugeumbira! bala teuma teuka cit ateueh gata dan sabab ka mabok gata peulon droe keudroe gata. sion ka jipeubuet hukoman ateueh jih nyan ateueh desya-desya nyang ka jipeubuet; jinoe kamoe hana geupeubiyeu le tuhan dan hana geuba le ubak teumpat nyang teuboih. teuma gata, he edom, geuhukom le tuhan. desya-desya gata teusalob bubena nyang na. ingat kheueh, ya tuhan, peue nyang teujadi di ateueh kamoe, neungieng kheueh kamoe nyang hina. hareuta waresan kamoe rhot lam jaroe ureueng laen, rumoh-rumoh kamoe ka jiduek le ureueng aseng. ureueng syiek kamoe ka jipoh le musoh; saatnyoe ma kamoe ka jeuet keu inong balee, dan kamoe ka jeuet keu aneuk piatu nyang hana le du. ie jieb dan kayee apui haroh kamoe bloe. lagee beulatang, kamoe jipaksa keureuja brat, kamoe hek, hana jibri watee keu meureuhah. kamoe jak geumadee u nanggroe meuse, kamoe lakee peunajoh di asyur. indatu kamoe ka meudesya, jinoe awaknyan ka hana le; teuma kamoe haroh meudeurita, sabab desya-desya awaknyan. kamoe jipeurintah le ureueng-ureueng nyang hana leubeh nibak namiet; hana nyang meukuasa jipeulheuh kamoe nibak awaknyan. di luwa banda, ureueng peumate gob meuwot-wot ban saboh nyan; nyawong kamoe tuancam watee kamoe teubiet jak mita peunajoh. kamoe meudeurita sabab ka deuk, seuhingga kulet kamoe seu uem lagee ngeue apui. ureueng-ureueng inong nyang na di sion ka jipeukosa, aneuk-aneuk dara jinoda di gampong-gampong yehuda. peumimpén-peumimpén kamoe jidrob dan jigantung, ureueng-ureueng tuha kamoe ka hana le jisanjong. ureueng-ureueng muda kamoe jipaksa jakmeubuet bak teumpat geumileng, aneuk-aneuk agam kamoe teuginton deungon geunulam kayee sampoe pansan. ureueng tuha-tuha hana le meugumpoi bak babah pintoe geureubang banda, su musik hana le teudeungoe lamkawan ureueng muda. kamoe ka gadoh keubaghiaan; tari ngon likak ka meu ubah jeuet meukabong nyang duka. keubanggaan kamoe ka hana le, kamoe ceulaka sabab ka meudesya. gunong sion ka seungue dan ka jitinggai le gob; disinan asee uteuen meuraja lela. sabab nyan ate kamoe reumok dan hanco, laju kamoe mo ba-e sampoe mata keumalon kamoe ka jeuet keu sapu. teuma droeneueh, ya tuhan, teutab meukuasa, droeneueh nyang mat peurintah siumu masa. ek kheueh patot neutinggai kamoe treb that-that? peu kheueh mungken neutuwoe bak kamoe siumu masa? ya tuhan, neuba kheueh kamoe

meugisa ubak droeneueh; kamoe meungwoe ubak droeneueh! neupeupuleh kheueh keuadaan kamoe lagee awaiphon. atawa ka neuboih kamoe han neupeuduli le? hana meubataih beungeh droeneueh keu kamoe?

tutoe haba nyang na dalam kitab nyoe asai jih nibak ureueng seumike, aneuek agam nabi daud, nyang geugantoe nabi daud jeuet keu raja di yerusalem. si seumike geupeugah: banmandum nyan sia-sia dan hana meuguna! udeb nyan peucuma, banmandum nyan hana areuti. siumu udeb geutanyoe ta meukeureuja, ta prah reuoh. teuma, toh hase jih nyang bisa ta peubangga? keuturonan nyang sa teuka dan keuturonan nyang laen leunyah, teuma donya nyoe teutab saban mantong. mata uroe mantong jiteubiet dan mantong cit ji lhob. deungon hek nyang leumoh jigisa u teupat jih seumula, laju oh singoh nyan jiteubiet keula-i. angen jipot u seulan, laju jiyueb u utara; angen nyan meuputa-puta, laju jigisa teuma. banmandum ie krueng ji ile u laot, teuma laot han cit jitem peunoh. ie laot nyan jigisa u pucok krueng, laju jitron keula-i u kuawala. peue-peue mantong ka habeh bosan dan bosan nyan hana sanggob teupeugah le. mata geutanyoe hana troe-troe bak ta pandang; dan geulinyueng geutanyoe hana puih-puih bak jideungoe. peue nyang ka ltheueh teujadi, teuma teujadi keula-i. peue nyang ka ltheueh teupeubuet, teuma jipeubuet keula-i. hana na sesuatu nyang baro di atueh donya nyoe. na ureueng nyang geupeugah, "kalon kheueh atranyoe baro!" nyang sibuna jih atranyan kana sigohlom geutanyoe lahe. ureueng hana ji ingat keujadian masa nyang dilee. meunan cit deungon keujadian masa jinoe dan singoh, hana teuma ji ingat le ureueng masa nyang teuma teuka. ulon, si seumike, lon mat peurintah di yerusalem sibagoe raja atueh israel. ulon meuteukat keu lon seulidek dan lon meurunoe deungon bijaksana peue mantong nyang teujadi di atueh donya nyoe. naseb nyang geukeubah le po teu alah keu geutanyoe keubiet peudeh lumpah na. ulon kheueh nyang kalon peue mantong buet manusia di atueh donya nyoe. peucaya kheueh, banmandum nyan sia-sia, lagee useuha teutiyeub angen. nyang keuwieng hana hase teupeuteupat, dan nyang hana han jeuet teu itong. ulon pike, "ulon nyoe ka jeuet keu ureueng peunteng dan areh, jioh leubeh areh nibak banmandum ureueng nyang mat peurintah di yerusalem sigohlom na ulon. ulon leuthat lon gumpoi peungeutuhan dan ileume." teuma ulon ka meuteukat keu lon teupeue beuda jih lamkawan peungeutuhan dan keubodohan, lamkawan keubijaksanaan dan nyang bangai. teuma teunyata ulon nyoe lagee lon tiyeub angen. sabab, seumaken le hikeumat geutanyoe, seumaken le teuma nyang tanyoe gundah. seumaken le ileume peungeutuhan geutanyoe, seumaken le teuma nyang tanyoe susah. ulon ka lon peuputoh keu lon peumangat droe mantong mangat lon teupeue peue keubahgian nyan. teuma mandum nyan pih sia-sia. ulon meutamah sadar bahwa kem nyan na kheueh keubodohan dan keuseunangan hana meuguna. jidorong le keuheundak ulon keu jeuet keucarong, ulon ka neukat lon meuseunang-seunang sira lon jieb ie anggo dan meupesta pora. ulon sangka nyan kheueh cara nyang paleng get keu manusia keu jinekmat udeb gobnyan nyang paneuk di atueh bumoe nyoe. buet-buet nyang raya ka ltheueh ulon peubuet. ulon peudong rumoh-rumoh keu ulon. ulon peugot taman-taman lampoh-

lampoh nyang ulon pula deungon bak anggo dan sigala macam bak kayee nyang jeuet pajohboh. ulon kueh kulam-kulam keu lon peule ie u dalam taman dan lampoh-lampoh nyan. nibak ulon lethat lon peulara namiet bah kheueh nyan ulon bloe meunan cit nyang peulahe di rumoh ulon. beulatang peulara ulon jioh leubeh le nibak beulatang soemantong nyang ka ltheueh tinggai di yerusalem. ulon gumpoi banmandum meuh dan pirak hase seumeumah nibak rajaraja di nangroe-nangroe nyang ulon jajah. ureueng meuca-e agam dan inong sunggoh that galak ate ulon deungon ca-e-ca-e nyang awaknyan ba. meunan cit ulon peulara inong-inong seulir sidub toh mantong nyang ulon keuheundaki. sunggoh, ulon leubeh rayek nibak soemantong nyang ka ltheueh jitinggai di yerusalem, dan hikeumat ulon pih teutab unggul. peue mantong nyang ulon meuheut, ulon peupueh. hantomna ulon teundroe ulon keu lon nekat keuseunangan peue mantong. ulon bangga atueh sigala hase jeureh payah ulon, dan nyan kheueh upah ulon. teuma oh ltheuehnyan ulon seulidek peue mantong buet ulon, dan banmandum jeureh payah ulon keu lon peuseuleusoe karya-karya lon nyan, teuma sadar kheueh ulon bahwa banmandum nyan hana meumakna sama seukali. useuha lon nyan sia-sia lagee teutiyeub angen mantong. pakriban kheueh mantong sidroe raja teuma bisa jipeubuet peue nyang ka geupeubuet le raja-raja nyang ka awai nibak gobnyan. laju di ulon pih lon peuphon pike: peue areuti jih jeuet keu areh atawa bangai atawa bodoh? meumang, ulon teupeue, "hikeumat leubeh get nibak keubodohan, lagee trang pih leubeh get nibak seupot buta. ureueng areh bisa geukalon arah nyang geutuju; ureueng bodoh lagee geujak meuraba-raba." teuma ulon teupeue cit bahwa naseb nyang sirupa teuma jitimpa bak awaknyan bube nyang na. teuma ulon pike, 'naseb nyang jitimpa nibak ureueng bodoh teuma lon teurimong cit teuma. jadi, keupeue guna jih sigala hikeumat ulon?' laju ulon peuputoh bahwa hikeumatnyan meumang hana meuguna meubacut pih. ureueng nyang bodoh teuma bagaih that jupeutuwoe, teuma ureueng nyang na hikeumat pih hana teuma ji ingat-ingat. treb bak treb geutanyoe banmandum teuma gadoh nibak ingatan. geutanyoe mandum haroh mate, bah kheueh nyan ureueng nyang areh meunan cit deungon ureueng bangai. sabab nyan udebnyoe hana areuti le nibak ulon, laen pihan. banmandum nyan sia-sia; ulon ka lon tiyeub angen mantong. banmandum hase nyang ulon peubuet dan nyang ulon teume hana meuguna nibak ulon, sabab atranyan haroh ulon tinggai keu ureueng nyang ulon gantoe. dan panena ta teupeue peu kheueh jihnyan areh atawa bodoh? teuma pakriban kheueh mantong jihnyan haroh jeuet keuwareh atueh hareuta ulon nyan nyang ka ulon teume simantong ulon udeb di atueh donya nyoe beureukat jeureh payah dan hikeumat ulon. jadi, nyan pih sia-sia hana meuguna. jinoenyoe ulon meunyeusai ka ulon meukeureuja deungon brat. sabab manusia meukeureuja brat deungon geungui sigala hikeumat, peungeutuhan dan keuahlian gobnyan keu meuteume sesuatu. teuma bak akhe jih gobnyan haroh geutinggai meunan mantong sigala hase jeureh payah gobnyan ubak ure-

ueng nyang meubacut pih hana jiteubit reuoh keu hareutanyan. jadi, nyan pih sia-sia, lom teuma sung-goh hana ade! siumu udeb manusia meukeureuja brat dan meususah payah; laju pat hase jeureh payah gobnyan nyang bisa geupeubangga? peue mantong nyang geupeubuet seumantong gobnyan udeb, jiba deurita dan saket ate nibak droe gobnyan. bak wa-tee malam pih ate gobnyan meutampo-tampo. jadi, banmandum nyan sia-sia hana meuguna. hana nyang leubeh get nibak manusia seulaen geumakheun, jieb ie dan geunekmat peuhase nyang ka geupeubuet nyan. ulon sadar bahwa nyan pih atra nyang geubri le po teu allah. soe kheueh nyang bisa geumakheun dan meuseunang-seunang hana po teu allah? po teu allah geubri hikeumat, peungeutahuan dan keubah-giaan ubak ureueng nyang jipeuseunang ate gobnyan. teuma ureueng meudesa geuyeu peubuet jak mita hareukat dan jitaman hase jih keu jijok ubak ureueng nyang peugalak ate allah. jadi, banmandum nyan sia-sia lagee ureueng jitiyeub angen. peue man-tong nyang na di ateuhe donya nyoe ka geupeuteun-tee le po teu allah. po teu allah nyang peuteuntee keu peulahe dan gobnyan teuma nyang peuteuntee keu peumate, watee keu seumula dan watee keu teubot, watee keu poh mate dan watee keu peupuleh, watee keu teurombak dan watee keu teupeudong. allah teuma nyang peuteuntee keu mo meuba-e dan wa-tee keu teukem-kem, watee keu meuratok dan wa-tee keu meulikak, watee nyang jeuet meuagam dan watee nyang han jeuet keu meuagam, watee keu me-upaluek dan watee keu peuteun droe. po teu allah teuma nyang peuteuntee watee keu meuteume dan watee keu geumadoh, watee keu teumabong dan wa-tee keu peuhabeh, watee keu teupriek dan watee keu teucob, watee keu peuseungab droe dan watee keu peugah haba. allah cit teuma nyang peuteuntee wa-tee keu geunaseh dan watee keu teubanci, watee keu jakmuprang dan watee keu meudame. peu kheueh hase sigala jeureh payah geutanyoe? ulon lon teupeue bahwa allah geubri beuban nyang paleng brat ubak geutanyoe. gobnyan nyang peuteuntee watee nyang paleng teupat nibak peue mantong. gobnyan geubri ubak geutanyoe hasrat mangat ta teupeue uroe ukeue, teuma geutanyoe hana sanggob ta peuphom buet-buet po teu allah nibak awai trok oh akhe. ulon lon-teupeue bahwa nibak geutanyoe hana nyang leubeh get nibak meugeumbira dan ta rasa nekmata udeb se-upanyang umu geutanyoe. nyang sigot jih geutanyoe nyang ta makheun dan nyang tajieb na kheueh ni-bak hase nyang ta useuha nibak hase reuoh geutanyoe keudroe. nyan kheueh meuneubri po teu allah. ulon lonteupeue bahwa banmandum meuneubuet allah teuma teutab na siumu masa. manusia hana bisa jita-mah atawa jipeukureueng bah meubacutpih. dan po teu allah geupeubuet nyang lageenyan mangat geu-tanyoe ta takot ubak gobnyan. nyang jinoe nyang ka teujadi, kalheueh teujadi yoh awai dilee. nyang teuma na, ka treb that na. po teu allah geupeuteun-tee mangat nyang ka teujadi, teujadi kheueh. na lom nyang ulon ngieng di ateuhe donya nyoe: nyang toh seuharoh jih na keuadalan dan keubaikan, disinan na keujeuhetan. ulon pike, po teu allah teuma geupeusi-dang ureueng nyang jipeubuet nyang jroh meunan cit

deungon nyang jeuhet, sabab tieb-tieb hai dan tieb-tieb tindakan teuma teujadi nibak watee nyang ka geupeuteuntee le po teu allah. keusimpulan ulon na kheueh: po teu allah geu ujo geutanyoe keu geutun-yok bahwa naseb geutanyoe hana meubeuda deungon naseb beulatang. pakriban kheueh mantong, naseb manusia dan beulatang na kheueh saban. nyang saboh teuma mate, meunan cit deungon nyang laen. bandua nyan na kheueh sabe-sabe makhluk gobnyan. jadi, manusia hana leubeh meu untong nibak pa-doe beulatang, sabab keu banduanyan udebnyan na kheueh sia-sia. awaknyan jijak saho tujuan nibak teupat nyang saban. awaknyan meuasai nibak abee teuma jiwoe ubak abee. geutanyoe han tateupeue, peu kheueh areuwah manusia jiek u ateuhe atawa areuwah beulatang jitron u dalam tanoh. sabab-nyan ulon sadar bahwa hana nyang leubeh get ni-bak manusia nibak padoe geupeuguna hase keureuja gobnyan. seulaen nibaknyan hana nyang bisa geu-peubuet. hana mungken gobnyan geuteupeue peue nyang teuma teujadi oh ka ltheueh gobnyan mate. oh ltheuehnyan ulon ngieng keula-i sigala nyang hana ade di ateuhe donya nyoe. ureueng-ureueng nyang ke-unong tindeeh jimo meuba-e dan hana ureueng laen nyang jitem tulong ureueng nyan. hana meusidroe pih nyang jitem tulong, sabab ureueng nyang tin-deeh nyan na kuasa nyang paleng raya. ulon iri lon ngieng ureueng nyang ka treb meuninggai donya kareuna awaknyan leubeh mubahgia nibak ureueng nyang mantong udeb. teuma nyang leubeh mubahgia lom na kheueh ureueng-ureueng nyang gohlo lahe, sabab awaknyan gohlom jikalon keujeuhetan nyang jipeubuet le manusia di ateuhe donya nyoe. meunan cit ulon teupeue bahwa manusia geujakbuet nyang cukob brat, teuma kareuna iri ate watee geungieng atra kawom silingka. banmandum nyan sia-sia man-tong lagee useuha teutiyeub angen. ureueng bodoh nyang jidiek jipangkee tuboh dan jipeubiyeu droe jih mate kareuna deuk. mungken nyan beutoi, teuma leubeh get bacut hareuta deungon keuteunangan ate nibak padoe keureuja brat deungon dua jaroe dan teutiyeub angen. mantong na nyang sia-sia dalam udeb nyoe. na ureueng nyang udeb sidroe khong hana meu aneuk, meunan cit hana syedara. bah-pih meunan, ureueng nyang meukeureuja brat han geupioh-pioh dan ate gobnyan hantom na puah deungon hareuta nyang kana. keu soe kheueh ureueng nyan meukeureuja trok bulut deungon reuoh dan geutulak peue mantong keuseunangan? nyang lageenyan pih sia-sia, dan saboh cara udeb nyang seungsara. meunyoe dua droe leubeh meu untong nibak sidroe. meunyoe awaknyan geujak meubuet, hase jih leubeh get. meunyoe nyang sidroe reubah nyang laen hase geutulong. teuma meunyoe nyang sidroe reubah, padahai gobnyan sidroe, cilaka kheueh gobnyan, kareuna hana ureueng nyang tulong gobnyan. bak malam nyang sijuek ngon leupie, meun-yoe na dua droe geueh leubeh meu untong meunyoe saleng geupeurapat badan mangat sabe na meuteume seu uem, teuma pakriban ureueng hase seu uem meunyoe gobnyan sidroe mantong? meunyoe dua droe ureueng geujak meusajan hase geutangkhe seuran-gan musoh, teuma meunyoe sidroe khong geujak mu-

dah jipeutaloe le lawan. lhee krek talo nyang teuputa jeuet keusaboh, payah that bak teupeuputoh. ureueng gasien hase jeuet keuraja, dan sidroe ureueng nyang teuteun hase geuminah geudeuk bak takhta. teuma meunyoe umu ka tuha that raja nyan teulalu bangai keu geuteurimong naseuhata, teuma naseb gobnyan leubeh brok nibak naseb peumuda nyang gasien teuma carong. meunyoe lon pike keuhai ureueng banmandum di ateuhe donya nyoe, teuma sadar kheueh ulon bahwa lamkawan awaknyan pasti na sidroe aneuk muda nyang teuma jeuet keugeunanto raja. rakyat nyang geupimpin bisa mantong han ek teuitong rame jih, teuma oh ka ltheueh gobnyan geujak, hana ureueng nyang lakee teurimong gaseh jih ingat jasa gobnyan. meumang, banmandum nyan sia-sia lagee teutiyeub angen. beu ate-ate kheueh meunyoe neujak u baet tuhan. leubeh get neujak keunan keu meurunoe nibak padoe neujak peuseumah keureubeuen, lagee nyang geupeubuet le ureueng-ureueng nyang bodoh. awaknyan hana bisa jipeubeda nyang toh nyang beuna dan nyang toh nyang salah. neupike kheueh sigohlom gata peung haba, dan bek teulalu bagaih neumeujanji ubak po teu allah. gobnyan na di dalam syeuruga dan gata na di ateuheh bumoe, jadi, meuhemat kheueh deungon tutoe haba gata. seumaken tunu hanmeuoh pikeran, seumaken raya keumungkengan meuteume lumpo nyang brok. maken leu neupeugah haba, seumaken le neupeuteubiet tutoe haba nyang bodoh. jadi, meunyoe gata neumeujanji ubak po teu allah, neupeuteupat kheueh janji droeneueh nyan beurijang-rijang. gobnyan hana galak ubak ureueng nyang meulaku bangai. sababnyan, peuteupat kheueh janji gata. leubeh get bek neupeugot janji nibak padoe neumeujanji teuma hana neupeuteupat janji droeneueh nyan. bek kheueh kareuna tutoe haba gata, meusabab jih gata srot u dalam desya, seuhingga gata teupaksa neupeugah ubak teungku imeum nyang geupeutimang tuhan, bahwa gata silab neupeugah janji. keu peue neupeujeuet po teu allah beungah ubak gata seuhingga geupeuhanco banmandum peue-peue nyang ka gata peubuet? lagee toh leu that lumpo nyan hana areuti, meunan kheueh teuma leuthat tutoe haba nyang hana meuguna. teuma teumakot kheueh ubak tuhan. bek neuhireuen meunyoe neungieng peunguasa geutin-deeh ureueng gasien, geureupah hak ureueng nyan dan hana geubri ubak awaknyan keuadalan. tieb tieb peugawee geulindong le atasan gobnyan dan bandua nyan geulindong le peujabat nyang leubeh manyang pangkat gobnyan. bahkan udeb rajapih meugantung nibak hase panen. ureueng nyang teu peng-peng, hantom na seb peng geuhnyan; ureueng nyang pango nibak hareuta, hantom na puih deungon laba. banmandum sia-sia mantong. maken le hareuta sidroe-droe ureueng maken le teuma ureueng nyang haroh geubri makheun. hana untong jih nibak peumilek nyan keukayaan nyan, gobnyan nyang geuteupeue na kheueh bahwa gobnyan ureueng kaya. sidroe-droe ureueng nyang tueng upah bisa mantong hantom na seb peunajoh, teuma si than-than jih ureueng nyan bisa geueh deungon sineunya. seubalek jih, sidroe ureueng kaya nyan hareuta gobnyan meulimpah ruwah, seuhingga ureueng nyan

hana geueh kareuna ate geuh susah. ulon kalon di ateuhe donya nyoe na sesuatu nyang cukob seudeh: sidroe ureueng geutamom hareuta keu masa watee jiteuka musem deuk. teuma hareuta gobnyan gadoh kareuna na sesuatu keumalangan, seuhingga hana nyang bisa geubri sibagoe hareuta waresan ubak aneuk-aneuk gobnyan. geutanyoe watee lahe dalam pruet ma teulon bulat hana meuleukek meusikrek beuneueng pih nibak tuboh; meunan cit oh watee ta tinggai donya nyang fana nyoe, hana taba sapeue pih nibak sigala hareuta nyang ka hek tanyoe useuha. nyan sunggo that seudeh! tanyoe tajak lagee watee geutanyoe jinoo tateuka. han tateupeue hek geutanyoe bak ta tiyeub angen, dan peue hasejih? sipanyang udeb, tanyoe meugeu-meugeu didalam seupot, tanyoe meususah payah, gundah, tunu dan saket ate. teuma baro kheueh lon muphom bahwa nyang paleng get na kheueh makheun, jieb ie dan ta nekmata hase useuha geutanyoe seumantong tanyoe udeb nyang paneuk nyoe nyang ka geubri le po teu allah ubak geutanyoe; nyan kheueh naseb geutanyoe. meunyoe sidroe-droe ureueng geuteurimong keukayaan dan hareuta beunda nibak po teu allah, dan ureueng nyan geubri idhin geunekmati keukayaan geuhnyan, haroh kheueh gobnyan meuras meusyuko dan geunekmati sigala hase useuha gobnyan. nyan na kheueh atra nyang geubri cit le po teu allah. po teu allah geupeupeunoh ate ureueng nyan deungon peunoh keugeumbiraan, teuma gobnyan hana gundah geupike ubak udeb nyang paneuk nyoe. ulon kalon lom nyang hana ade nyang cukob parah di ateuhe donya nyoe. na kala jih po teu allah geubri keukayaan, keuhoreumatan dan hareuta beunda ubak sidroe-droe ureueng, seuhingga hana le nyang geulakee. teuma po teu allah hana geubri ureueng nyan geunekmati banmandum keukayaan geuh nyan. seubalek jih, ureueng nyan hana geuturi teuma geunekmati keukayaan nyan. jadi, banmandum nyan sia-sia dan cukob seudeh. bahpih sidroe ureueng na geumeu aneuk sampoe sireutoh droe dan udeb gobnyan treb umu gobnyan pih sampoe ka tuha lagoena, teuma meunyoe gobnyan hana meuras bahgia dan hana teuma geuteume teukubu dalam jrat nyang pantaih, teuma meunurot peundapat ulon, aneuk manyak nyang ban lahe laju mate leubeh get naseb jih nibak ureueng tuha nyan. sabab, nibak aneuk manyak nyan hana masaalah peu kheueh jihnyan teupeulahe atawa hana; jihnyan jijak u dalam seupot, dan laju bagaih that jituwoe le gob. hantom na jikalom cahya mata uroe, dan jihnyan gohlom cit muphom peue areuti jih udeb nyoe, seuhingga jihnyan bisa teueh deungon teuntram. dan nyan leubeh get nibak ureueng nyang udeb dua reutoth thon, teuma hantom na geuras bahgia. bukan kheueh bandua awaknyan geujak u tempat nyang sirupa? manusia geumeubuet na kheueh keu makheun, teuma gobnyan hantom na meuras puih. jadi, peu kheueh untong ureueng arif meunyoe teubandeng deungon ureueng bodoh? dan peue teuma guna jih meunyoe ureueng gasien meupie nyang get di teungoh-teungoh masyarakat? banmandum nyan sia-sia lagee ureueng jitiyeub angen. leubeh get geutanyoe puih deungon peue nyang na nibak geutanyoe nibak padoe

ta meuharab ubak nyang leubeh le. peue mantong nyang na, atranyan ka na phon yoh masa dilee. geutanyoe tateupeue bahwa manusia hana bisa geubantah ureueng nyang leubeh teuga nibak jihnyan. seumaken treb gobnyan geubantah, seumaken hana areuti tutoe haba gobnyan, dan gobnyan hana meuteume laba sapeue pih. pakriban manusia bisa geuteupeue peue nyang paleng get nibak gobnyan didalam udeb gobnyan nyang paneuk dan hana meuguna, dan nyang liwat lagee bubayang? pakriban sidroe ureueng bisa geumeuphom peue nyang teuma teujadi di ateuhe donya nyoe oh ka ltheueh gobnyan meuninggai donya? nan nyang meubhee harom leubeh get nibak minyeuk nyang yuem jih meuhai; dan uroe keumatean leubeh get nibak padoe uroe teupelahe. leubeh get teujak u rumah duka nibak padoe teujak u rumah khanuri. sabab deungon na nyang lagee nyan sabe teuingat bahwa manusia nyoe sabe ji luum le mawot. seudeh leubeh get nibak padoe teukem-kem. bah kheueh ierupa krot, asai ate teutab leuga. ureueng bodoh hana geupioh geutiyeub keuseunangan; dan ureueng areh sabe geupike ubak mate. leubeh get geuseugah le ureueng nyan meubudo, nibak padoe jipujoe le ureueng nyang payah muphom. kem ureueng bodoh hana areuti, lagee su duro jipajoh le apui. meunyoe ureueng areh jiteumipee; bangai that buet geuh nyang lageenyan; meunyoe ureueng nyang geuteurimong peng sulueng, rusak kheueh watak ureueng nyan. leubeh get akhe saboh peukara nibak padoe awai nibak nyan; leubeh get meusaba nibak padoe teulalu bangga. bek bagaih that jiek pitam; ureueng bodoh mantong nyang na troh dam. bek na nyang teumanyong, 'pakon yoh jamen dilee leubeh get nibak padoe jamen jinoo?' teuma ureueng bangai nyang teumanyong nyang lagee nyan. ureueng udeb seuharoh jih meuhikeumat; nilai hikeumat saban deungon hareuta warasan; saban teuma deungon peng nyang geubri ureueng nyang meuras aman. peue lom deungon peungeutahuan keuhai hikeumat! soe nyang atra nyan teuma seulamat. ngieng kheueh meuneubuet po teu allah. sabab soe kheueh nyang sanggob peuteupat peue nyang ka geupeukiwang le po teu allah? jadi, geumbira ria kheueh meunyoe gata teungoh meu untong. teuma meunyoe gata jitimpa le bala, bek kheueh neutuwoe bahwa allah kheueh nyang bri bandua nyan. geutanyoe han tateupeue peue nyang teujadi seulanjut jih. udeb ulon nyoe hana meuguna, teuma seudutreb ulon nyan ulon ngieng nyang seulanjut jih nyoe: na kala jih ureueng nyang jroh meuteume bala, bahpih ureueng nyan saleh. na kala jih ureueng jeuhet panyang umu geuh, bahpih ureueng nyan hana teudoh udeb lam desya. bek kheueh teulalu get dan bek kheueh teuma teulalu bijaksana. peue guna jih teupoh droe? bek cit teuma lumpah that jeuhet dan bek teuma teulalu bangai. keupeue mate sigohlom watee? neupeujoh kheueh nibak bandua nyan. meunyoe geutanyoe teumakot ubak po teu allah, pasti geutanyoe meuhase deungon jroh. hikeumat geupeujeuet peumilek jih meutamah peukasa nibak padoe siploh droe peunguasa di saboh banda. di ateuhe bumoe nyoe hana ureueng nyang sampoeurna; hana nyang sabe geupeubuet nyang jroh dan hantom na meudesya. bek

kheueh galak that neudeungoe nariet-nariet ureueng laen nyang hana mupat ulee uboe jih, panena tateupeue gata teungoh jiseurapa le sidroe peulayan. gata keudroe pih gata sadari bahwa ureueng laen pih ka ltheueh gata seurapa. banmandum nyan ulon ujoengon hikeumat lon. teuma seumaken lon mita hikeumat nyan, seumaken jioh nibak ulon. soe nyang bisa meuteume mita areuti nibak udeb nyoe? teulalu lhok keu bisa jimeungeurti! teuma ulon sunggo meuruno dan lon mita peungeutahuan, mangat meuteume hikeumat dan jaweub nyang paih ateuhe peue mantong nyang geutanyong. ulon kucuba bisa muphom bahwa desya nyan na kheueh keubodohan, dan keujeuhetan na kheueh keuneukatan. ulon ka meuteume bahwa ureueng inong leubeh phet nibak mawot. cinta ureueng inong bak lagee jeu dan jeunieb nyang ka siab keuneuk droe mansa jih. lam pangkee jih lagee taron nyang meucarueh khong that. ureueng nyang geupeubuet keuheundak po teu allah teuhinda nibak taron nyan, teuma ureueng meudesya pasti teuma geutawan. kalon, geupeugah le sang seumike: banmandum nyan ulon teume, watee langkah deumi langkah lon jakmita jaweuban. mantong cit ulon mita jeunaweub nyang laen, teuma nyang ulon mitanyan hana meuteume. lamkawan siribee droe, na meurumpok sidroe ureueng agam nyang ulon horeumat. teuma lamkawan awaknyan hana ureueng inong nyang bisa lon hareuga. nyoe mantong kheueh nyang ulon teume: po teu allah geupeujeuet geutanyoe seudeurhana dan biasa. teuma geutanyoe keudroe nyang peujeuet droe keudroe geutanyoe jeuet keurumit dan payah lom meucaruehcarueh ngon meucawo-cawo. alangkah mangat jih ureueng bijaksana. gobnyan geutuoah jaweub ateuhe peukara peue mantong. deungon hikeumat gobnyan teuseunyum ngon geumbira, seuingga iemuka gobnyan leumah bahgia. patuh kheueh meunyoe raja geubri peurintah, dan bek neupeuet janji nyang teugeusa-geusa ubak po teu allah. raja bisa mantong geumeutindak seukeuheundak gobnyan, meunyoe gobnyan hana geugalak, leubeh get peujioh laju nibak gobnyan. raja meutindak deungon wibawa; hana nyang beurani jibantah gobnyan! ureueng nyang taat ubak gobnyan, teuma aman dan seuntosa; ureueng areh geuteupeue pajan pakriban dan dipat teutaat ubak raja. keu sigala sisuatu na watee dan cara jih keudroe, teuma bacut sagai nyang tanyoe meungeurti! hana meusidroe manusia pih jiteupeue peue naseb gobnyan nyang teungoh teupreh-preh, dan hana nyang bisa geupeugah peue nyang teuma teujadi. hana meusidroe nyang hase geupeuteun dan geupeupreh bahpih sikeujab meunyoe mate nyang ka trok watee. nyan na kheueh peujuangan nyang hanjeuet geupeusie, hanjeuet gobnyan teuhinda nibak atranyan, bahpih deungon tipee dan daya upaya. banmandum nyoe ulon kalon watee ulon peurati banmandum keujadian di ateuhe donya nyoe. na kala jih manusia geungui kuasa droe gobnyan keu geupeuceulaka sabe keudroe-droe. ka ltheueh ulon kalon ureueng jeuhet mate laju jiseubee dalam tanoh. teuma watee ureueng laen ka geuwoe nibak teumpat ureueng jeuhet nyan teutanom, awaknyan laju jipujoe ureueng nyan nibak teumpat ureueng

nyan geupeubuet buet nyang jeuhet. jadi, nyang lageenyan pih sia-sia. pakon mudah that manusia geupeubuet buet nyang jeuhet? kareuna hukoman kon watee nyan laju geubri nibak ureueng nyan. bahpih meureutoh-reutoh buet nyang jeuhet nyang ka geupeubuet le manusia meudesya, ureueng nyan teutab udeb dan panyang umu jih. teuma, soenyang taat ubak po teu allah, pasti udeb ureueng nyan mudah sigala. seubalek jih, ureueng jeuhet le that meuteume keusuletan. udeb ureueng nyan bagaih that jajak lagee bubayang. ureueng nyan teuma mate bak umu nyang muda kareuna jihnyan hana taat ubak tuhan droe. teuma banmandumnyan haba sulet hanjeuet peucaya. ngieng kheueh peue nyang ka teujadi di ateuh donya; na ureueng malem nyang geuhukom lagee geuhukom ureueng doraka, na ureueng jeuhet nyang geupeulaku lagee ureueng saleh. jadi, nyan pih sia-sia hana meuguna. keusimpulan ulon na kheueh manusia haroh meugeumbira. kareuna dalam udeb gobnyan di ateuh donya nyoe hana keuseunangan nyang laen nibak gobnyan, seulaen makheun, jieb ie dan meusuka ria. nyan mantong nyang jeuet geurasa di teungoh-teungoh ie reuoh gobnyan, seumantong udeb nyang geubri le po teu allah ubak gobnyan. watee ulon meu useuha mangat meuteume hikeumat, dan ulon peurati peue mantong nyang na teujadi di ateuh donya nyoe, teuma jiteuka kheueh keusadaran ulon bahwa bahpih geutanyoe meususah payah uroe malam hana tapioh, geutanyoe hanmampu ta peuphom keuheundak po teu allah. pakriban mantong ta useuha, hana mungkin atranyan hase ta peuphom. ureueng areh geuteupeue bahwa gobnyan geuteupeue, nyang sibeuna jih gobnyan hana geuteupeue. banmandum nyan ulon pike deungon sunggoh-sunggoh. allah geuatoe udeb ureueng nyang jroh dan bijaksana, meunan meunyo ureueng nyan geubanci dan geucinta. hana ureueng laen nyang geuteupeue peue nyang teuma teujadi oh uroe laen. meumang, naseb ureueng nyang saban jitimpa teuma ubak ureueng laen: ureueng juoe meunan cit deungon beujat, ureueng got meunan cit deungon ureueng jeuhet, ureueng nyang gleh meunan cit deungon ureueng nyang kutoe, ureueng nyang geupeuseumah keureubeuen meunan cit deungon nyang hana. ureueng nyang got hana leubeh mujur nibak ureueng nyang meudesya, ureueng nyang meubodok saban mantong deungon ureueng nyang hangeutem meubudok. jadi, naseb nyang lageenyan jitimpa ubak awaknyan banmandum. dan nyan saboh hai nyang kukob seudeh lagee toh nyang ka teujadi peue mantong di ateuh donya. seumantong udeb ate manusia nyan peunoh deungon keujeuhetan, dan pikeran gobnyan pih peunoh deungon keubodohan. dan hana teusangka-sangka ureuengnyan pih laju mate. teuma seumantong hayat jikandong badan, seulamanyan teuma mantong na harapan. bukan kheueh asee nyang udeb leubeh bahgia nibak singa nyang than meunyawong? seuhana-hana jih, ureueng udeb geuteupeue bahwa ajai ka teupreh-preh gobnyan, seudangkan ureueng mate than geuteupeue sapeue. nibak ureueng nyan hana uengkoh atawa imbalan nyang laen, dan nan ureueng nyan ka teupeu tuwoe. rasa cinta, banci atawa nafeusu, banmandum nyan

mate meusigoe ngon gobnyan. ureueng nyan hana geucokle bagian peue mantong nyang na ateuh peue mantong nyang na keujadian di ateuh donya. jak, pajoh laju dan meugeumbira kheueh, neujieb kheueh laju ie anggo gata deungon suka cita. nibak allah hana geubeungeh, malah geugalak teuma. bah kheueh iemuka gata meucahya dan geumbira. rasa kheueh udebnyoe deungon peurumoh nyang gata gaseh seumantong gata udeb deungon sia-sia, nyang geubri le po teu allah ubak gata di ateuh donya. neunekmat kheueh tieb-tieb uroe bahpih hana meuguna. sabab upah jeureh payah gata nyang kheueh atranyan mantong. neupeubuet kheueh peue mantong tugaih gata deungon habeh seuneuga. sabab euntrek hanale pikeran atawa keureuja. hana ieleume atawa hikeumat dalam donya ureueng mate. dan keudeh kheueh gata teuma neujak. di dalam donya nyoe na lom nyang ulon kalon: meutunang plueg hana sabe-sabe jimeunang le ureueng nyang bagaih plueg, meunan cit dimideuen prang hana sabe-sabe meunang nibak ureueng nyang teuga. ureueng bijaksana hana sabe-sabe meuteume mata hareukat. dan ureueng carong hana sabe-sabe meuteume keukayaan. meunan cit di ureueng ahli hana sabe-sabe jeuet keu ureueng meusyehuu. sabab soemantong jeuet mantong jitimpa le naseb nyang sial. manusia hana geuteupeue pajan masa jih sampoe. lagee cicem nyang keunong taron dan uengkot nyang keunong lam jeu, meunan kheueh manusia jitimpa le bala nibak saat nyang hana teuduga. seulanjut jihnyoe na saboh cuntoh nyang teupat pakriban ureueng geuhareuga nibak hikeumat: na saboh banda ubit nyang peunduduek disinan hana padubna. nibak sidroe na sidroe raja raya geujak heuntam banda nyan. banda nyan laju geukeupong dan ka siab-siab keunek geudobrak binteh kutanyan. di dalam bandanyan na tinggai sidroe ureueng gasien nyang cukob bijaksana. ureueng gasien nyang bijaksananya meuhase geupeuseumat banda nyan. teuma kareuna gobnyan gasien, jasa gobnyan laju jipeutuwoe dan hana meusidroe pih nyang na teuingat ubak gobnyan. jadi, beutoi kheueh peundapat ulon bahwa hikeumat leubeh nibak teunaga. bahpih meunan, hikeumat ureueng gasien hana geupako. tutoe haba ureuengnyan hana nyang geutem peurati. leubeh get teudeungoe tutoe haba nyang teunang nibak sidroe ureueng nyang meueleume nibak padoe dumper sidroe ureueng nyang mat kuasa di teungoh-teungoh kawan ureueng bangai. hikeumat leubeh meuguna nibak sinjata, teuma nila saboh titek habeh rusak susu saboh beulangong. le sabab bangke lalat hase jipeukhieng saboh kaca minyeuk mangat bee, le sabab bacut nyang mangai hase teupeugadoh hikeumat nyang manyang. ka sipatoh jih meunyo ureueng areh geupeubuet nyang jroh, dan ureueng bangai jipeubuet nyang jeuhet. nyang bangai deuh teukalon nibak mandum grak grik jih. dan ubak mandum ureueng jipeuleumah keuhai bangai jihnyan. meunyo gata geubeungeh le nyang mat kuasa, bek kheueh gata lakee ploh keu gata meubuet. bahpi salah gata nyan rayeuk, gata geupeumeuah meunyo teunang dan saba. na keujeuhetan laen nyang ulon kalon lam donya, na kheueh buet meunyeleweng le nyang mat

kuasa. ureueng bangai geubri jabatan nyang mulia, teuma di ureueng meusyeyuhu hana meuteume sapeue. ka lheureh lon kalon namiet-namiet jipasang guda di ureueng bansawan geujak ngon gaki lagee namiet teuma. soe nyang kueh uruek, ureueng nyan rhot lam uruek nyan; soe nyang tulak beuton teuma jikab le uleue meubisa. soe nyang meubuet bak tam-bang batee, teuma meuantok dan luka. soe nyang plah kayee, rayeuk keumungken meuteume cidra. meunyoe parang gata tumpoi dan hana gata asah, gata haroh meukeureuja deungon leubeuh meususah payah. peuguna kheueh akai seuhata gata, dan peugot kheueh reuncana leubeuh ilee. meunyoe jikab le uleue sigohlom teupeuseuiet ngon doa-doa, deungon nyan pawang uleue hanale meumakna. tutoe haba ureueng bijaksana teupeujeuet jihnyan jihoreumat le gob, teuma ureueng bangai binasa le sabab tutoe haba jihnyan keudroe. gobnyan jipeuphon ngon haba sulet mantong, oh keuneulheueh nibak nyan tutoe haba jih lagee ureueng pungoe. beutoi, ureueng bangai teuga that jipeugah haba. uroe dudoe teusom keu geutanyoe mandum. hana nyang hase jiramai keujadian oh ka lheureh tanyoe hanale. teuma ureueng bangai nyang hana jituho rot woe u rumoh jih, jihnyan jimeubuet brat that hana jipioh-pioh teuma. ceulaka kheueh nanggroe nyang raja jih muda balia, dan ureueng-ureueng rayeuk nanggroe simalam beungoh meupesta pora. mubahgia kheueh nanggroe nyang raja jih meuwibawa, nyang ureueng rayeuk nanggroe nyan jimakheun oh trok bak watee, hana galak mabok-mabok dan carong geujaga droe. bubong rumoh teuma tireh meunyoe hana teupeudab, dan keuneulheueh jih rumoh nyan lompok le sabab teuh beu-o. pesta teupeujeuet gob jikem-kem, dan le sabab anggo teupeujeuet gob riang geumbira. teuma peureulee na peng keu teubayeue atra nyan. bek kheueh ta upat raja, bah pi lam ate. bek teuma ta upat ureueng kaya, bahpi lam bilek teupat eh droe. mungken na saboh cicem jideungoe peue nyang gata kheun nyan, laju jikak peutrok ubak nyang gata upat nyan. pula kheueh peng gata nibak useuha di luwa nanggroe. pasti gata meuteume untong oh singoh dudoe. pula kheueh modal gata nibak meubagoe bidang niaga; mita kheueh useuha beucukob le. sabab manusia peureulee waspada, sigohlom musibah teuka meunimpa. ho mantong keu jih bak kayee nyan reubah, bak kayee nyang ka reubah nyan teutab teuh nibak teupatnyan. meunyoe awan ka meusapat ie sampoe ka brat, teuma ujeuen pih jitoh u bumoe deungon teuga jih. soe nyang preh sampoe angen dan cuaca peungeuh sampoereuna, hana teuma gepula dan hana geupot hase jih disinan. po teu allah nyang peugot peue mantong nyang na, dan manusia hana geutuo peuphom tindakan gobnyan; meunan cit ureuengnyan hana geutuo peuphom keuhai udeb nyang baro didalam pruet ma. sipreuk kheueh bijeh gata bak watee beungoh dan bek kheueh nepioh oh malam uroe. sabab geutanyoe than ta teuppe sineupreuk nyang toh bijeh nyang timoh jroh. barang kali bandua bohnyan jitimoh deungon sampoereuna. cahya mata uroe teupeujeuet gob sampoe bahgia; alangkah galakjih meunyoe meuteume teunek-mati. heundak kheueh gata meusyuko meunyoe gata

meutamah umu. teuma neuingat, bahpih gata treb neu udeb di ateuh bumoe nyoe, masa gata dialam mawot leubeuh treb lom teuma. jadi, peue nyang keuneuk harab lom teuma? banmandumnyan peucuma dan sia-sia. rasa dan nikmat kheueh masa muda gata, hai ureueng muda! meugeumbira kheueh seulagi gata mantong remaja. peupeunoh kheueh peue mantong hasrat jiwa gata, dan neupeujak kheueh peue mantong nyang na teuniet lam ate gata. teuma neuingat, po teu allah nyang na didalam syeuruga, nyan kheueh nyang peusidang peue mantong nyang gata peubuet yoh masa gata mantong didalam donya. neu use kheueh khawate dan nyang susah nyang na didalam ate gata, sabab masa muda gata bagai that meulalu. ingat kheueh ubak peuncebta gata seumantong gata muda, sigohlom sampoe ubak thon-thon nyang peunoh seungsara. bak masanyan gata teuma neupeugah, "udeb ulon hana bahgia." meunyoe ka trok ubak saatnyan mata gata hana le trang, seuingga mate kheueh sinar surya, buleuen ngon bintang. awan nyang reudok ka jiba ujeuen, teutab na deungon gata sibagoe ancaman. jaroe gata yo meukot-kot dan hana le teubri peulindongan. gaki gata nyang teugab teuma guyah han na teunaga. gigoe gata hana le leungkab sabab ka teuloh sampoe than jeuet le neumomoh peunajoh. mata gata kabur sampoe ka suram meunyoe neukeumalon. su nyang rioh ngon rane nibak jalan raya teudeungoe bak geulinyueng gata lamkawan na deungon tan. su musik ngon su kilang rab-rab hana teudeungoe. gata hana jeuet neueh sineunya. deungon su kicoan cicem pih gata teujaga nibak teupat eh. gata teumakot neuteuengoh nibak teupat nyang manyang dan haroh neuajak bacut-bacut. ok nyang na di ateuh ulee gata ka puteh dan gaki gata nyang na gata hua watee neubot langkah. teuma gadoh kheueh peue mantong hajat dan keuinginan. geutanyoe takjak u teupat tinggai geutanyoe nyang paleng akhe, ureueng rame meuseudeh dan geumeuratok ngon geumo ba-e sipanyang jalan raya. rante pirak teuma putoh meukhan-khan; panyot meuh srot laju beukah; talo tima putoh dan rusak; guci ie hanco meutabu beba. tuboh geutanyoe teuma geuwoe keula-i, jeuet keu abee di ateuh bumoe. nafah keu udebteu geutanyoe teuma jiwo ubak po teu allah. gobnyan kheueh nyang bri sibagoe anugrah. kheun ulon, meumang banmandum nyan sia-sia, banmandum nyan peucuma, hana areuti bahpih sikada. sang seumike nyan areh dan bijaksana. sabab nyan kheueh geupeurunoe ubak umat peue mantong ieleume gobnyan. jai nyang geumeurunoe laju gobnyan geu ujo keubeunaran ieleume nyan. gobnyan geu useuha beumeuteume tutoe haba nyang teuhibur, dan tutoe haba nyang geutuleh nyan na kheueh jujeu. tutoe haba ureueng areh nyan na kheueh lagee tungkat tajam sidroe ureueng meurabe, tungkat nyang geungui keu geulindong dumna bubiri gobnyan. kumpolan amsal dan naseuhata, lagee labang nyang meukeumat oh kong. banmandum nyan na kheueh atra nyang geubri le po teu allah teuma, nyang rabe geutanyoe nyang than na dua. aneuk ulon, keuhai saboh hai gata haroh waspada. teumuleh kitab hantom na akhe, dan meunyoe lumpah that le meuruno jipeuhek jiwa ngon raga geutanyoe. oh ka lheureh banmandum nyan ulon

peutimang, nyoe kheueh keusimpulan nyang na ulon teume. teumakot kheueh ubak po teu allah dan taat kheueh ubak peue nyang geupeurintah, sabab keu nyan kheueh manusia nyoe geucebta le gobnyan. po teu allah teuma geupeusidang peue mantong nyang geutanyoe peubuet; bah kheueh nyan nyang jroh meunan cit deungon nyang brok, bahkan nyang teusom pih teuma.

di susan, ma banda persia, ahasyweros nyang mat peurintah sibagoe raja. keurajeuen gobnyan na 127 boh propinsi, phon nibak india sampoe u sudan. bak thon nyang keulhee geumat peurintah le raja nyan, raja ahasyweros geupeuna khanuri nyang keubiet rayeuk nyang geu undang banmandum ureueng-ureueng rayeuk peugawee gobnyan. panglima persia dan media jijak keunan, meunan cit deungon banmandum gubunur dan peujabat manyang lam keurajeuen geuh nyan teuka banmandum. na nam buleuen treb jih raja geupamer keukayaan meuligoe gobnyan dan keumeugahan meunan cit deungon keuagongan keurajeuen gobnyan. oh lheureh nyan raja geupeuna lom khanuri keu banmandum rakyat gobnyan nyang na susan, bah kheueh nyan nyang kaya meunan cit deungon nyang gasien. khanuri nyan treb jih na sigoe aleuhat peunoh nyang geupeuna nibak meuligoe raja nyan. nibak leuen meuligoe geupeungui deungon ija gurdan nyang teupeuget nibak ija lineun wareuna ijo dan puteh, teuikat deungon talo lineun nyang haloh dan teusangkot nibak gleueng-gleueng pirak nyang teupasang nibak taméh-taméh nyang meubalat ngon pualam. di miyueb nyan geukeubah teuma teumpeuen meuh dan teumpeuen pirak di ateuéh aleue nyang meulapeh deungon pualam puteh, hablur mirah, kulet mutiara nyang meukilat dan batee pirus ijo. le raja geuseudia teuma anggo nyang meulimpah ruwah nyang geuhidang didalam piala meuh nyang meubagoe rupa. ureueng-ureueng jame nyang teuka keunan hana geubataih geubri ie anggo dan hana teuma geupaksa jijeueb ie anggo nyan. raja ka geubri peurintah ubak peulayan meuligoe, mangat tieb-tieb jame geupeutimang meunurot nyang geukeuheundaki maseng-maseng. meunan cit le wasti, peureumaisuri raja, geupeuna teuma khanuri keu sabe-sabe ureueng inong didalam meuligoe. bak uroe nyang keutujoh, raja sira geujieb-jieb ie deungon galak dan mangat that ate. le sababnyan nyan gobnyan laju geutawok tujuh droe peujabat khusus nyang jeuet keupeulayan pribadi gobnyan; awaknyan na kheueh mehuman, bizta, harbona, bigta, abagta, zetar dan karkas. raja geuyue ubak awaknyan mangat jiba ratu wasti deungon mahkota keurajeuen di ateuéh ulee ukeue gobnyan. ratu wasti nyan lumpah that lagak ceudah rupa, dan raja keuneuk geupamer peureumaisuri geuh nyan ubak dumna jame dan ubak banmandum ureueng rayeuk keurajeuen gobnyan. teuma watee peulayan nyan jipeugah hainyan ubak ratu wasti, ratu hana geutemijak, le sababnyan raja beungeh lagoena. ka-jeuet keu lazem raja bahwa gobnyan keu lageakee peundapat bubena ureueng malem keuhai hukom dan adat. sababnyan raja geuhoi peunaseuhat gobnyan nyang leubeh jiteupeue peue nyang haroh jipeubuet meunyoe ka teujadi nyang lageenyan. anggota peunaseuhat nyang paleng kayem geutawok le raja keu jimeuhadab na kheueh: karsena, setar, admata, tarris, meres, marsena dan memukan. awaknyan na kheueh peujabat-peujabat persia dan media nyang duek nibak keududuekan nyang paleng manyang didalam keurajeuen nanggroe. geupeugah le raja ubak ban tujuh droe awaknyan, "ulon ka ulon utoh peulayan-peulayan ulon ubak ratu wasti mangat jijak

meuhadab ubak ulon. teuma le ureueng bineo ulon nyan hana jitem. meunurot hukom, peue tindakan nyang haroh tacok ateuéh ratu nyan?" dan jipeugah laju le memukan ubak raja dan ubak ureueng rayeuk nyang na disinan, "deungon na nyang lageenyan, bukon teungku amphon mantong nyang ka geupeumalee le ratu wasti, teuma banmandum peugawee teungku amphon, dan keu tieb-tieb ureueng agam nyang na didalam keurajeuen nyoe! sabab peue nyang ka geupeubuet le ratu nyan teuma jiteupeue le banmandum ureueng inong, dan awaknyan jiang-gab remeh keu lakoe jih maseng-maseng. awaknyan teuma jipeugah bahwa teungku amphon ka neupaurintah ratu wasti keu geujak meuhadab, teuma le ratu hana geutem teuka. deungon nyan, meunyoe na purumoh-purumoh ureueng rayeuk nyang na didalam keurajeuen persia dan media geudeungoe hainyan, pasti awaknyan bagaih-bagaih jijak peugah ubak lakoe geuh maseng-maseng. akibat jih na kheueh, ureueng bineo jilawan peue nyang geupeurintah le ureueng lakoe dan ureueng lakoe pi teuma geubeungeh keu ureueng bineo. le sabab nyan, kamoe meulakee mangat teungku amphon neucok peunutoh bahwa ratu wasti hana jeuet le geumeuhadab ubak teungku amphon. keuputusan nyan haroh jeuet keu undang-undang keurajeuen nanggroe persia dan media, deungon nyan hana mungkin le teutarek lom teuma. oh lheurehnyan, neubri kheueh teupat duek ratu wasti keu ureueng inong nyang laen nyang leubeh get nibak gobnyan. meunyoe keuputusan teungku amphon nyan ka meugah bansaboh nanggroe nyang luwah nyoe, ka teuntee tieb-tieb ureueng inong nyang ka meulakoe jihoreumat keu teungku lakoe jih, bah kheueh nyan ureueng kaya meunan cit deungon ureueng gasien." usui nyang geupeusampoe le memukan nyan geuanggok le teungku raja dan ureueng-ureueng rayeuk nanggroe, dan le raja laju geupeubuet keuputusan nyan. gobnyan laju geukirem surat peurintah ubak banmandum propinsi keurajeuen, lam basa dan tulesan nyang na di dalam propinsi nyan maseng-maseng. peurintah nyan lagee nyoe su jih, bahwa didalam tieb-tieb rumah tangga, teungku lakoe kheueh nyang jeuet keu panghulle, dan nyang cok keuputusan. na padub watee teuma oh lheurehnyan, bahpi raja ka hana beungeh le, gobnyan teutab mantong geupike buet ratu wasti dan tindakan nyang ka teucok ateuéh jihnyan. sabab nyan peunaseuhat-peunaseuhat nyang paleng krab deungon raja laju jijok usui nyang lagee nyoe, "nyang siget jih tamita mantong aneuek dara nyang lagak keu peurumoh teungku amphon. bah kheueh teungku amphon neu angkat peugawee-peugawee nibak banmandum propinsi lam keurajeuen nyoe mangat teumita aneuek dara nyang lagak-lagak lom ceudah rupa lheurehnyan jiba laju ubak meuligoe inong di susan nyoe. hegai, peujabat khusus nyang jeuet keu ulee rumah tangga meuligoe ureueng inong, nyang uroih awaknyan dan gobnyan teuma nyang uroih ureueng inong nyan mangat jeuet ceudah rupa. oh lheurehnyan, bah kheueh teungku amphon neupileh toh aneuek dara nyang lagak meunurot teungku amphon keu neucok keu ureueng bineo, dan neupeujeuet jihnyan keugeunantoe ratu

wasti." raja situju that-that naseuhat nyan dan laju geupeubuet hai nyang lagee nyan. di banda susan nyan na tinggai sidroe ureueng yahudi nyan nan gobnyan mordekhai bin yair. gobnyan keuturonan kis dan simei nibak sukee benyamin. mordekhai ka teuteuen yoh watee banda yerusalem geupeutaloe le nebukadnezar, raja babel. mordekhai teuboih u babel meusigoe deungon yoyakin, raja yehuda, dan le lom tawanan nyang laen. gobnyan na syedara karong, sidroe aneuek dara nyang paleng ceudah rupa, deungon tuboh nyang meusigak, nyang teuhoi nan ester, nan ibrani geuh na kheueh hadasa. ureueng syiek ester ka meuninggai donya dan gobnyan geucok keu aneuek angkat le mordekhai dan geupeulara sibagoe aneuek droe geuh. oh ltheueh peurintah raja teupeumaklum ubak mandum rakyat nanggro, jai that-that aneuek dara nyang meusapat di susan meunan cit deungon ester na lamkawan aneuek-aneuek dara nyan. ester pih geuba laju ubak meuligoe raja dan geupeucaya ubak hegai nyang jeuet keu ulee rumoh tangga meuligoe ureueng inong. hegai hireuen that geungieng ester dan gobnyan pih galak lumpah na keu aneuek dara nyan. deungon reujang that aneuek dara nyan geupeungui ngon meubagoe alat-alat peuceudah rupa meunan cit deungon peunajoh nyang khusus teuma. ester geupinah laju ubak bagian nyang paleng lagak didalam meuligoe nyan dan na teuma tujuh droe aneuek dara nyang paleng carong ngon malem geubri tugaih mangat jijaga ngon ji useuha aneuek dara nyan. ateuheh naseuhat mordekhai, ester hana geubri tee bahwa gobnyan na kheueh sidroe ureueng yahudi. tieb-tieb uroe mordekhai geujakjak dikeue meuligoe ureueng inong nyan keu geujak tanyong keuadaan ester dan peue nyang teujadi ateuheh aneuek nyan. meunurot peuratoran, banmandum ureueng inong teurawat keu teupeuceudah rupa na sithon treb jih: nam buleuen deungon minyeuk nyang teujampu deungon keumeunyan, dan nam buleuen nyang teuma oh ltheuehnyan deungon minyeuk mangat bee nyang meubagoe rupa nyang ka teujampu. oh ltheueh nyan, tieb-tieb aneuek dara meuteume gileran jijak meuhadab ubak raja ahasyweros. bak watee sidroe aneuek dara jijak meuhadab ubak raja, aneuek dara nyan jeuet jingui peue mantong peukayan meunurot nyang jigalak. aneuek dara nyan laju teuba u meuligoe raja oh watee uroe ka malam, dan oh singoh nyan teuba teuma ubak meuligoe nyang laen, dan jiuroidi laju le saasgas, sidroe lamkawan peujabat nyang khusus jiuroidi gundekgundek raja. aneuek dara nyan hana le geumeuhadab ubak raja, laen hai meunyoer raja na meuheuet keu gobnyan deungon cara geuhoi nan gobnyan. teuma trok kheueh ubak gileran ester geujak meuhadab ubak raja. – ester na kheueh aneuek abihail dan syedara karong mordekhai nyang ka geuangkat ester nyan sibagoe aneuek gobnyan keudroe; ester meumang jigagum le soe mantong nyang pandang gobnyan. bak watee gobnyan geujak meuhadab ubak raja, ester jisok peukayan sesuai deungon nyang ka geutunyok dan naseuhat hegai, nyang keu ulee meuligoe inong nyan. meunan kheueh jeuet jih, bak thon nyang keutujuh keurajeuen ahasyweros bak buleuen nyang keu siploh, nyan kheueh buleuen tebet, es-

ter jiba laju jak meuhadab ubak raja ahasyweros di meuligoe raja. aneuek dara nyan lumpah geugalak dan geuharok le raja leubeh nibak aneuek-aneuek dara nyang laen. le sabab nyan gobnyan lumpah that harok dan geucinta le raja. le sababnyan teuma raja laju geupeudeuk mahkota keurajeuen ateuheh ulee ester dan geupeujeuet gobnyan ratu keugeunantoe ratu wasti. oh ltheuehnyan, raja laju geupeuna khanuri nyang lumpah raya sibagoe horeumat gobnyan keu ester dan geu-undang banmandum peugawee meunan cit deungon ureueng rayeuk gobnyan. gobnyan laju geupeumaklum uroe pre bansaboh nanggro, dan geubagi-bagi laju hadiah nyang meulimpah ruah. nibak wateenyan mordekhai ka geuangkat le raja jeuet keu peugawee nanggro. ester gohlom cit geupeugah droe bahwa geuhnyan na kheueh ureueng yahudi, sabab mordekhai geutam gobnyan. ester teutab geutaat ubak mordekhai lagee geutaat yoh gobnyan mantong ubit dan jipeulara le syedara karong gobnyan. nibak siuroe, watee mordekhai teungoh meutugaih didalam meuligoe, na dua droe peujabat khusus raja, nyang nan jih bigtan dan teres, ka sipakat jikeuneuk poh mate raja ahasyweros, sabab awaknyan jibanci that-that keu raja nyan. reuncana awaknyan bandua geuteupeue le mordekhai dan gobnyan laju geujak peugah ubak ester. hana geuboih watee, ester laju geupeugah ubak raja peue nyang ka geuteupeue le mordekhai nyan. peukara nyan laju geuseulidek, dan nyata kheueh peue nyang geupeugah le mordekhai nyan beutoi. bandua awaknyan laju teuhukom gantung, sesuai deungon peurintah raja, peuristiwa nyan na teucetet didalam kitab keurajeuen nanggro. na padubna treb teuma oh ltheuehnyan raja ahasyweros geu baiait teuma haman jeuet keu peudana meuntroe. haman na kheueh aneuek hamedata nibak keuturonan agag. raja geupeutron titah ubak mandum peugawee gobnyan mangat jihoreumat ubak haman deungon cara jisujut dikeue gobnyan. banmandum ureueng taat ubak peurintah raja nyan, keucuali mordekhai. peugawee-peugawee nyang laen nyang na didalam meuligoe jitanyong ubak mordekhai nyan pakon gobnyan geu engkeue titah raja, dan tieb-tieb uroe awaknyan jipaksa mordekhai nyan mangat geuturot peue nyang ka jeuet keu titah raja, teuma mordekhai teutab hanageutem deungoe. kheun mordekhai ubak awaknyan, "ulon nyoe ureueng yahudi; ulon hana jeuet ulon sujut ubak manusia." dan awaknyan pi laju jipeutrok hainyan ubak haman sabab awaknyan keuneuk jiteupeue tindakan peue nyang haroh geucok keu mordekhai. haman beungeh lumpah na watee jiteupeue mordekhai hana jitem sujut ubak gobnyan. dan watee jiteupeue bahwa mordekhai nyan na kheueh sidroe ureueng yahudi, laju jicok keuputusan keuneuk jihukom mordekhai, dan kon mordekhai mantong, teuma keuneuk jipeubinasa banmandum ureueng yahudi nyang na di dalam nanggro persia. nibak thon nyang keudua blaih jimat keurajeuen le raja ahasyweros, bak buleuen nyang keu sa, na kheueh buleuen nisan, haman laju geuyue rhom undi nyang nan jih "purim" mangat geuteupeue uroe dan buleuen peue nyang paih keu geulaksana niet jih nyang jeuet nyan. teuma jicok kheueh tanggai lhee blaih buleuen

dua blaih, nyan kheueh buleuen adar. dan geupeugah kheueh laju le haman ubak raja, "teungku amphon nyang ulon horeumat, na saboh bansa nyang ganje nyang ka meutabu di tieb-tieb propinsi keurajeuen nanggroe nyoe. adat istiadat jihnyan meulaen that deungon bansa-bansa nyang laen. awaknyan hana jitem patuh ubak hukum-hukum nyang na didalam keurajeuen nyoe. jadi, nyang sigetjih teungku amphon bek neupeubiyeu ureueng nyan jipeubuet ban galak droe. meunyeu teungku amphon hana meurasa brat, bah kheueh teungku amphon peuteubiet surat peurintah mangat tapeu habeh bansa nyan. dan meunyeu teungku amphon neutem teurimong usui ulon nyoe, ulon pasti hase ulon peutamong 340.000 kilogram pirak u dalam kaih teungku amphon." ban geudeungoe nyang lageenyan, raja laju geusuit nibak jaroe gobnyan euncien nyang teunggo geungui guna keu geucab surat-surat maklumat nyang jipeuteubiet le keurajeuen deungon reuseumi, dan atra nyan geujok laju ubak haman, musoh nyang paleng rayeuk nibak bansa yahudi. geupeugah le raja ubak haman, "bansa nyan dan meunan cit deungon peng jih ulon jok keu gata. tapeubuet kheueh laju peue nyang gata ngieng get ateuhe awaknyan." dan nibak tanggai lhee blaih buleuen sa, haman laju geuhoi seukeutareh raja. ubak awaknyan laju geuyue tuleh surat nyang sisuai deungon peue nyang geupeurintah, oh ltheueh nyan surat nyan jiteujeumah laju u dalam meubagoe basa dan jisalen u dalam mandum tulesan nyang na jipeuguna lam keurajeuen nyan. surat nyan teuteuleh ateuhe nan raja ahasyweros dan teucab deungon euncien gobnyan, laju surat nyan geukirem deungon bagai that ubak banmandum nyang mat kuasa, gubunur dan ureueng-ureueng rayeuk nyang na di tieb-tieb propinsi. asoe surat nyan na kheueh peurintah raja bahwa bak tanggai lhee blaih buleuen adar, banmandum bansa yahudi, bah kheueh nyan nyang tuha meunan cit nyang muda, bah kheueh nyan ureueng inong meunan cit deungon aneuek manyak, awaknyan haroh teupoh mate hana amphon, dan hareuta beunda awaknyan teusita banmandum. peurintah nyan haroh teu peumaklum di tieb-tieb propinsi mangat banmandum ureueng ka siab seudia nibak uroe nyang ka teupeuteuntee nyan. le ureueng upah raja laju jijak deungon bagai-bagai jijak intat surat-surat nyan ubak banmandum propinsi keurajeuen nanggroe. ateuhe titah raja, peurintah nyan teupeumaklum cit di susan, ma banda persia. oh ltheuehnyan raja dan haman laju geudeuk-duek sira geujieb ie anggo, teuma banda susan ka karu bansalam le sabab haba nyan. watee geudeungoe le mordekhai peue nyang ka teujadi, laju geupriek-priek peukayan gobnyan oh ltheuehnyan geusok laju ija umpang teupong sibagoe tanda seudeh. geucok abee geutabu laju u ateuhe ulee gobnyan, oh ltheuehnyan geujak rawon bansaboh banda sira geumo deungon su nyang nyareng dan seudeh that. watee ka trok dileuen meuligoe laju geupioh, sabab ureueng nyang ngui peukayan ija umpang teupong hana jeuet jitamong u dalam meuligoe. meunan cit di tieb-tieb propinsi nyang laen didalam keurajeuen nanggroe, bubena ureueng yahudi ka jimo ba-e deungon ate nyang that-that seudeh oh

ltheueh jideungoe peurintah raja teupeumaklum ubak rakyat nanggroe. awaknyan jipuasa, geumo dan apoh apah hana meuteuntee, dan le that-that lamkawan awaknyan jingui ija umpang teupong dan ji eh di ateuhe abee. watee aneuek-aneuek dara deundayang dan dumna peujabat nyang khusus nyang peutimang ratu ester jilapor ubak gobnyan peue nyang teungoh geupeubuet le mordekhai, ester seudeh lumpah na. ratu laju geukirem peukayan ubak mordekhai sibagoe geunantoe ija umpang teupong nyang geungui nyan, teuma mordekhai hana geutem teurimong. oh ltheuehnyan ester laju geuhoi hatah, sidroe lamkawan peujabat khusus nyang geubri tugaih le raja mangat jipeutimang ratu ester. ubak hatah nyan geuyue jak seulidek ubak mordekhai peue sabab gobnyan geupeusanet droe nyang lagee nyan. dan geujak kheueh laju hatah ubak mordekhai di padang banda nibak babah pintoe geureubang meuligoe. mordekhai laju geucalitra ubak ureueng nyan peue nyang ka teujadi dan padub na le peng pirak nyang ka jipeujanji le haman keu jipeutamong u dalam kaih raja, oh ka ltheueh banmandum ureueng yahudi nyan jipeubinasana. dan le mordekhai geubri teuma ubak hatah seunalen surat raja nyang ka geupeuteubiet di susan nyang meuasoe peurintah keu teupeubinasana ureueng yahudi. mordekhai laju geuyue hatah jijak peusampoe ubak ester dan jipeutrang peukaranyan ubak gobnyan, meunan cit keu jilakee mangat ester geutem jak meuhadab ubak raja keugeulakee gaseh sayang ubak bansa gobnyan. dan geujak kheueh hatah ubak ester geupeusampoe peusan mordekhai nyan ubak gobnyan. teuma le ester geuyuejak lom hatah nyan ubak mordekhai sira geupeusan lagee nyoe, "soe mantong ureueng, bah kheueh nyan agam meunan cit nyang inong, meunyeu hana geutawok le raja keujajak meuhadab gobnyan di leuen meuligoe, ureueng nyan bah teuhukom mate. nyan na kheueh undang-undang keurajeuen nyang hana jeuet teubantah bah-soe mantong ureueng jih phon nibak peujabat sampoe ubak rakyat nyang na di propinsi-propinsi, ka jiteupeue hainyan. teuma na saboh jalan keu teuhinda nibak undang-undang nyan, jalan nyan na kheueh meunyeu raja geu sunyung tungkat meuh gobnyan ubak ureueng nyan. meunyeu nyan teujadi, ureueng nyan teuma seulammat. teuma kana sibuleuen nyoe ulon hantom na geutawok le raja." dan le hatah pi laju geujak peusampoe haba ester nyan ubak mordekhai. dan le mordekhai laju geukirem haba peuingat nyang lagee nyoe ubak ester, "bek neusangka gata leubeh aman nibak ureueng yahudi nyan laen, teuma sabab gata tinggai nibak meuligoe! ureueng yahudi pasti meuteume tulong deungon cara peue mantong sampoe awaknyan seulammat. teuma meunyeu gata teutab seungab mantong lam hai nyang lumpah mubahya nyoe, gata keudroe mate dan keuluwarga gata habeh riwayat jih. pat tateupeue, mungken nyang teujadi bak saat-saat nyang lagee nyoe kheueh gata ka geupileh jeuet keu ratu!" dan le ester laju geukirem haba nyoe ubak mordekhai, "gata peusapat kheueh laju ureueng yahudi nyang na di susan mangat jimeudoda keu ulon. bek gata makheun ngon tajieb ie treb jih lhee uroe lhee malam. ulon keudroe meunan cit deungon aneuek-aneuek dara deundayang ulon teuma

kamoe peubuet cit lagee nyan. oh ltheuehnyan ulon teuma lonjak meuhadab ubak raja, bahpi nyan meulangga nibak undang-undang nanggroe. meunyo le sabab nyan ulon haroh mate, bah kheueh ulon mate!" dan oh ltheuehnyan geujak kheueh laju mordekhai dan geupeubuet laju peue nyang geupeugah le ester nyan. bak uroe nyang keulhee puasa gobnyan, ester laju geungui peukayan ratu, dan geujak laju uleuen meuligoe dan geudong laju dikeue seuramoe. dan raja teungoh geuduek di ateuh tahta nyang meuhadab ubak pintoe nyan. oh watee geungieng ratu teungoh geudong diluwa, gobnyan teuka inseueh didalam ate laju geusunyung tungkat meuh gobnyan ubak ratu. dan geulangkah laju ukeue ratu ester sira geukeuh ujong tungkat meuh nyan. oh ltheuehnyan geutanyong le raja ubak sang ratu, "peue na haba, hai putroe ulon? peue nyang gata lakee? peugah kheueh laju! bahpi nyang gata lakee siteungoh nibak keurajeuen ulon, atranyan ulon jok keu gata." geujaweueb le ester, "meunyo teungku amphon neutem, bah kheueh nibak malam nyoe teungku amphon dan haman neujak ubak khanuri nyang ulon peuna keu teungku amphon." raja geuyue ubak haman beureujang jiteuka, mangat awaknyan meuteume meusajansajan geujak pajoh khanuri ester. dan jijak kheueh awaknyan ubak tempat khanuri nyang teungoh geulaksana le ester nyan. watee teungoh jieb ie anggo, raja geutanyong ubak ratu, "jinoenyo neupeugah kheueh laju peue nyang gata lakee. peue nyang gata meuheuet ulon bri, bahpi siteungoh nibak keurajeuen ulon nyoe!" geujaweueb le ester, "meunyo teungku amphon neujok peue nyang ulon lakee nyoe, bah kheueh teungku amphon dan haman neuteuka lom nibak khanuri nyang teuma ulon peuna nibak malam singoh, eunteuk nibak khanuri nyan ulon peugah peue nyang ulon meuheuet nibak teungku amphon." haman jiwoe di rumah ratu ester nyang banseuleuseo geujajoh khanuri deungan ate nyang galak lagoena. teuma oh trok nibak babah pintoe meuligoe leumah geungieng mordekhai nyang hana geubeudoh nibak tempat duek geuh geubri horeumat ubak gobnyan, le sababnyan haman beungeh that-that watee jikalon nyan. teuma teutab jipeuteuen droe dan jiwoe laju u rumah. oh ka trok gobnyan u rumah geuyue laju rakan-rakan gobnyan dan geulaakee zeres, peurumoh gobnyan, mangat jitem duek duek deungan awaknyan. dan nibak duek-duek nyan le haman laju jicok keuseumpatan keu jipeusombong droe dikeue awaknyan dan laju jipeuna beurakah ngon haba nyang manyang dikeue awaknyan, bah kheueh nyan keuhai keukayaan droe gobnyan, aneuek-aneuek agam jih nyang le, meunan cit deungan keududuekan peunteng nyang ka jiteurimong nibak raja, deungan pangkat jihnyan nyang jioh leubeh manyang nibak pegawee-pegawee nyang laen. jipeugah lom lagee nyoe, "bahpi ratu ester nyang geu undang nibak khanuri gobnyan na kheueh ulon dan raja keu khanuri nyang geupeukhusos keu kamoe, dan malam singoh kamoe geutawok lom. teuma banmandum nyan hana peureulee keu ulon, simantong deuh ulon kalon mordekhai, ureueng yahudi nyan, jiduek di babah pintoe meuligoe." ban jideungoe nyan peurumoh dan banmandum rakan-

rakan gobnyan laju jipeugah lagee nyoe, "neuyue mantong peugot tameh tempat meugantung nyang manyang jih dua ploh dua metee. dan oh singoh beungoh, bansuboh that-that neulakee kheueh idhin ubak raja mangat jeuet tagantung mordekhai nibak tameh nyan. deungan na lagee nyan droeneueh ka hase neujak ubak tempat khanuri nyan deungan ate nyang peunoh geumbira." usui nyan jroh lagoena meunurot pikeran haman, sabab nyan gobnyan laju geuyue ureueng laen jijak peugot tameh gantungan nyan. bak malam nyan cit teuma raja hana hase geueh, gobnyan apoh apah geulisah hana meuteuntee. le sabab nyan geuyue cok laju kitab cateetan seujarah keurajeuen dan kitab nyan geuyue beuet laju ubak ureueng laen. di dalam kitab nyang teungoh teubeuet nyan leumah laju saboh catetan nyang bahwa mordekhai ka geulapor keuhai useuha bigtan dan teres dua droe peujabat nyang khusus geujaga kama raja, keu jikeuneuk poh mate raja. laju geutanyong le raja ubak ureueng nyang teungoh beuet kitab nyan, "horeumat atawa balaih jasa peue nyang ka teujok ubak mordekhai nyan?" geujaweueb le napadub droe deundayang raja, "meusapeue pih hana geuteurimong le mordekhai, ya teungku amphon." laju geutanyong lom le raja, "soe lamkawan peugawee ulon nyang na didalam meuligoe nibak watee nyoe?" keubeutulan haman banmantong jitamong uleuen meuligoe; keuhai haman jijak keunan le jihnyan keuneuk jaklakee ubak raja mangat teugantung mordekhai nibak tameh nyang ka ltheueh jiglong. laju jijaweueb le deundayang raja nyang na disinan, "haman na didalam meuligoe dan gobnyan leumah jih keuneuk meuhadab ubak teungku amphon." "tayue tamong laju u dalam," kheun raja. oh ka ltheueh haman jitamong u dalam, laju geupeugah le raja ubak haman, "na ureueng nyang keuneuk ulon bri peunghoreumat nyang paleng raya. peu kheueh nyang ulon peubuet ateuh ureueng nyan?" geupike le haman, "soe lom nyang geubri peung horeumat nyang paleng rayeuk? pasti nyan keu ulon!" le sabab nyan gobnyan geujaweueb, "nyang paleng get keu ureueng nyan teupeungui peukayan keubeusaran nyang lazem jih teungku amphon ngui. oh ltheueh nyan guda teungku amphon teupeungui teuma deungan lambang-lambang keurajeuen. sidroe lamkawan ureueng rayeuk nanggroe nibak keuturonan ulee balang haroh kheueh jijak peungui peukayan nyan ubak ureueng nyang keuneuk teungku amphon bri peunghoreumat nyan, dan laju jijakba keulieng nanggroe ureueng nyan sira jiduek di ateuh guda teungku amphon rot padang banda. ureueng rayeuk nyan teuma jijak dikeue sira jitawok ngon jipeumaklum ubak rakyat, 'meunoe kheueh meunyo raja geubri peunghoreumat keu ureueng nyang geuhoreumat le gobnyan!' " dan geupeugah kheueh le raja ubak haman, "bagaih, tajakcok laju peukayan dan guda nyan dan tajok kheueh laju banmandum peunghoreumat nyan ubak mordekhai, ureueng yahudi nyan. tapeubuet kheueh laju lagee nyang gata kheun bunoe, hana jeuet tapeukureueng bahpi meusapeue pi. mordekhai nyan ka jeuet gata meurumpok jeihat teungoh jiduek-duek di leuen meuligoe." dan haman pih laju jijakcok peukayan

dan guda oh ltheuehnyan jijak peungui laju ubak mordekhai, oh ka ltheueh mordekhai geuek u ateuh gudanyan, haman laju jiba meukeulileng rot padang banda, sira jitawok-tawok ngon jipeumaklum ubak rakyat, "ngieng kheueh, meunoe kheueh meunyoe raja ka geubri peunghargaan keu ureueng nyang geuhoreumat le gobnyan!" oh ltheuehnyan mordekhai laju geuriwang ubak babah pintoe geureubang meuligoe. teuma haman meudab-dab geujakwoe laju, sabab gobnyan lumpah that malee. haman hana geutem ngieng ateuh ureueng rame sabab malee nyan hana hase geusom, teuma gobnyan laju jison muka keu ureueng nyang kalon u ateuh jihnyan. ubak peurumoh dan banmandum rakan-rakan haman laju jicalitra peue nyang ka jipeubuet nyan. oh ltheuehnyan le peurumoh gobnyan dan rakan-rakan gobnyan nyang carong-carong nyan geupeugah ubak haman, "droeneueh ka jipeuphon taloe teunaga deungon mordekhai. jihnyan ureueng yahudi dan droeneueh hana hase talawan jihnyan. jihnyan pasti teuma jipeutaloe gata." teungoh awaknyan mantong meututoe deungon haman, dumna peujabat meuligoe teuka deungon teugisa-gisa keuneuk jak intat haman ubak khanuri nyang geupeuna le ester. dan keu nyang keudua goe jih raja dan haman geumakheun dan geujieb ie meusajan-sajan deungon ester. sira geujieb ie, raja geutanyong lom ubak ester, "hai, peureumaisuri ulon, peue nyang gata lakee? gata peugah kheueh laju! pasti ulonbri bahpi nyang gata lakee siteungoh nibak keurajeuen ulon." geujaweueb ratu ester, "meunyoe teungku amphon neutem, ulon lakee mangat jeuet ulon dan bansa ulon hase udeb. sabab ulon dan bansa ulon ka jipeubloe keuneuk jipeu mate. seukira jih kamoe jipeubloe keu jicok keunamiet, hainyan ulon iemdroe dan hana ulon peukaru teungku amphon. teuma jinoenyoe kamoe jikeuneuk peubinasa dan jipeu habeh trok bak ukeue-ukeue jih!" dan geutanyong kheueh laju le raja ahasyweros ubak ratu ester, "soe nyang beuhe that jipeubuet lagee nyan? dan dipat ureueng nyan?" geujaweueb le ester, "haman nyang paleng jeuhet nyoe kheueh musoh dan nyang ien-anya kamoe!" deungon teumakot nyang hana teukira haman laju jingieng u ateuh raja dan ratu ester. raja beungeh lumpah na, laju geubeudoh geutinggai meuja dan laju geuteubiet uluwa, ubak leuen meuligoe. haman jiteupeue bahwa raja ka geucok keuputosan keuneuk geuhukom gobnyan, sabab nyan gobnyan teutab tinggai deungon ratu ester keu jilakee amphon mangat gobnyan hase geupeuseulamat. deungon rasa putoh asa haman laju geupeureubah droe di ateuh kursi ratu ester mangat jilakee amphon, teuma paih bak wateenyan cit teuma raja ka geugisa nibak lam taman meuligoe. ban geu kalon haman lagee nyan, laju geupeugah le raja, "peue? mantong cit jihnyan jijeut peukosa peureumaisuri ulon, dikeue ulon dan didalam meuligoe ulon keudroe?" dan haba nyan pih habeh geupeugah le raja, napadub droe peujabat pi jitamong udalam dan laju jipeukulubong ulee haman. dan jikheun laju le harbona, sidroe lamkawan peujabat nyan, "teungku amphon, nibak bineh rumoh haman na saboh tameh gantungan nyang manyang jih dua ploh dua metee. atranyan ka ltheueh jipeudong le haman keuteumpat jigan-

tung mordekhai, ureueng nyang ka jipeuseulamat nyawong teungku amphon." dan geupeurintah laju le raja, "jak gantung laju haman nibak tameh nyan!" meunan kheueh riwayat haman habeh teugantung nibak tameh nyang jikeuneuk gantung mordekhai. dan oh ltheuehnyan reuda kheueh mureuka raja. bak uroenyang cit teuma raja ahasyweros geubri ubak ratu ester banmandum hareuta beunda haman, musoh nyang paleng raya nibak ureueng yahudi nyan. ester geujak peugah ubak raja bahwa mordekhai syedara karong jih, dan yoh watee nyan mordekhai geubri hak keu jijakmeuhadab ubak raja deungon hana teuhoi leubeu ilee. raja laju geusuit incien gobnyan nyang ban geucok lom nibak haman geujak laju atranyan ubak mordekhai. dan ester laju geuangkat teuma mordekhai jeuet keu ureueng nyang mat kuasa ateuh hareuta beunda haman. oh ka ltheueh nyan ratu ester geujak meuhadab lom ubak raja. gobnyan laju geusujut sira gumo dan geumeulakee mangat raja geupeubateue reuncana jeuhet nyang ka jiatoe le haman ateuh ureueng yahudi. raja laju geu sunyung tungkat meuh gobnyan ubak ratu ester, laju geubeudoh ester sira geupeugah, "meunyoe teungku amphon neutembri ngon neugaseh keu ulon, bah kheueh teungku amphon neuputeubiet surat peurintah mangat neucabot lom surat-surat haman nyang meuasoe peurintah geuyue peubinasa banmandum ureueng yahudi nyang na didalam keurajeuen nanggroe nyoe. pakriban mungken ulon ngieng bansa dan kawom syedara ulon habeh banmandum jipeumate?" dan geupeugah laju le raja ahasyweros ubak ratu ester dan mordekhai, "beutoi, ulon ka ltheueh ulon gantung haman sabab jihnyan jikeuneuk peubinasa ureueng yahudi, dan hareuta beunda jih ka ulon jok ubak ester. teuma surat nyang ka ltheueh jituleh ateuh nan raja meunan cit deungon cab raja, atranyan hana hase teutarek lom teuma. teuma, gatanyoe ulon peuidhin tateleuh surat keuhai bansa yahudi, peue mantong nyang gata ngieng get. neutuleh kheueh surat nyan ateuh nan ulon deungon gatacab deungon cab keurajeuen." bak uroenyang cit teuma, na kheueh bak tanggai 23 buleuen lhee, buleuen siwan, mordekhai laju jitawok banmandum seukeutareh raja dan jipeurintah ubak awaknyan mangat awaknyan jituleh surat keu banmandum gubunur, banmandum bupati dan banmandum ureueng rayeuk nyang na tinggai di 127 boh propinsi, phon di india sampoe trok u sudan. surat-surat nyan teutuleh dalam basa dan tulesan nyang didalam propinsi nyan maseng-maseng. meunan cit gobnyan geukirem teuma surat nyan ubak ureueng yahudi dalam basa dan tulesan yahudi. surat-surat nyan banmandum geuteken le mordekhai ateuh nan raja ahasyweros dan geucab deungon cab keurajeuen nanggroe. dan oh ltheuehnyan le mordekhai laju geuyue ubak upah-upah keujijak peutrok banmandum surat nyan banmandum propinsi sira jipasang guda nyang bagaih plueng milek raja. surat nyan asoe jih na kheueh bahwa raja ka geupeu idhin ubak ureueng yahudi nyang na di tieb-tieb banda mangat meusajan baho meubaho teubila droe. meunyoe awaknyan jiseurang le bansa-bansa nyang na didalam propinsi toih mantong, awaknyan jeuet meulawan jipoh mate ureueng nyang seurang

droe jih meunan cit deungon purumoh dan aneuek-aneuek jihnyan; dan meunan cit awaknyan jeuet jisie musoh-musoh jihnyan sampoe habeh banmandum dan hareuta milek ureueng nyan jeuet jireupah. peurintah nyan haroh teulaksana bansaboh nanggroe persia bak uroe nyang ka jipeuteutab le haman bak jipoh mate bubena ureueng-ureueng yahudi, bak tanggai lhee blaih buleuen dua blaih, buleuen adar. surat peurintah nyan haroh teupeuteubiet sibagoe undang-undang dan teupeumaklum ubak mandum ureueng nyang na di tieb-tieb propinsi mangat bansa yahudi siab siaga jilawan musoh jihnyan meunyo uroe nyang ka teupeuteutnee nyan ka trok. dan jajak kheueh laju bubena ureueng upah nyan deungon jipasang ateuheh ruang guda raja. meunan cit di susan ma banda nanggroe surat peurintah nyan teubaca. oh ltheuhnyan mordekhai geutinggai laju meuligoe sira geungui peukayan ulebalang nyang meuwareuna ijo dan puteh, jubah ungu nyang teupeuet nibak ija lineun nyang haloh dan mahkota meuh nyang lumpah lagak. banda susan jisumarak geumbira sabab harok that. di ureueng yahudi ka meurasa seunang ngon geumbira, baghia dan bangga. meunan cit ditieb-tieb banda dan propinsi, dipat mantong surat peurintah raja nyan teupeumaklum, ureueng-ureueng yahudi lumpah geumbira ngon harok that-that sira jipeugot kharuri sibagoe ucapan syukoe. dan le that nibak peunduduek nyang jeuet keuwareuga bansa yahudi, sabab awaknyan jitakot keu bansa nyan. akhe jih trok kheueh ubak tanggai lhee blaih buleuen adar, nyan uroe nyang ka teupeuteutnee keuteupeubuet peurintah raja ateuheh ureueng-ureueng yahudi. uroe nyan ka jipreh-preh le musoh-musoh bansa yahudi jikeuneuk kuasa ateuheh bansa nyan. teuma teunyata ureueng yahudi kheueh nyang peutaloe awaknyan. nibak tieb-tieb banda, ureueng-ureueng yahudi jimeusapat dan geumeusaho keujilawan ureueng nyang kana niet hana get ateuheh awaknyan. dan deungon na peulawanan nibak ureueng yahudi nyan, teuma bansa-bansa dipat mantong na tanggai ka teuka yoe ngon teumakot nyang hana daya keu ureueng yahudi nyan sampoe hana meusidroe pih nyang jijeuet jilawan ureueng yahudi nyan. malah, banmandum ureueng-ureueng rayeuk nyang na di tieb-tieb propinsi, dumna gubunur, bupati dan peujabat nanggroe geusukong keu ureueng yahudi nyang teungoh jibri peulawanan nyan sabab awaknyan banmandum jitakot keu mordekhai. bansaboh keurajeuen nanggroe dirakyatba jiteupeue bahwa mordekhai nyan lumpah that meupeungaroih di dalam meuligoe dan treb bak treb seumaken meukuasa. meunan kheueh jeuet jih, bansa yahudi ka hase jipeusaneut peue mantong ateuheh musoh jihnyan, musoh jihnyan jiprang deungon peudeueng dan laju jipoh mate. di susan, ma nanggroe keurajeuen, ureueng yahudi ka jipoh mate musoh jih na 500 droe. lamkawan nyan na siploh droe aneuek agam haman aneuek hamedata, musoh nyang paleng rayeuk nibak ureueng yahudi. awaknyan na kheueh: parsandata, dalfon, aspata, porata, adalaya, aridata, parmasta, arisai, aridai dan waizata. teuma ureueng yahudi hana jireupah hareuta awaknyan. bak uroenyan cit teuma na ure-

ueng jijak meulapor ubak raja jipeugah keuhai sijeumeulah ureueng nyang ka mate keunong poh di susan. geupeugah le baginda ubak ratu ester, "di susan mantong jai that ureueng yahudi ka jipoh mate na 500 droe musoh, jitamong cit lamkawannyan ban siploh droe aneuek-aneuek haman. peue teuklom nyang na di propinsi-propinsi nyang laen! aleh peue nyang jipeubuet le awaknyan disideh! le sababnyan, peue lom nyang gata lakee nibak saat nyoe? neupeugah laju, nyang gata lakee nyan pasti gata teumel!" geujawueh le ester lagee nyoe, "meunyo teungku amphon neutem bri, bah kheueh ureueng-ureueng yahudi nyang na tanggai teutab di susan nyoe singoh beungoh neubri idhin lom jipeubuet lagee nyang ka jipeubuet nibak uroe nyoe. lom teuma, manyet aneuek-aneuek haman nyan teugantung ateuheh tameh-tameh gantung." dan di raja pih laju geupeutreun peurintah lagee nyang ka geulakee le ester; surat peurintah keu banda susan laju geupeuteubiet dan manyet-manyet aneuek haman nyang siploh droe nyan laju jigantung. teuma, bak tanggai peuet blaih buleuen adar, ureueng-ureueng yahudi nyang na di susan laju jimeusapat lom dan laju jipoh mate na 300 droe teuk di banda susan nyan. meunan cit goenyoe awaknyan hana cit jireupah hareuta beunda musoh. meunan cit deungon ureueng-ureueng yahudi nyang na tanggai di propinsi-propinsi nyang laen diawaknyan pi ka meusapat sira jibila droe. awak yahudi nyan laju jipeutaloe musoh jihnyan dan na jipoh mate 75.000 droe nyan jibanci keu awaknyan. meunan cit awaknyan hana jireupah hareuta milek ureueng nyan. hainyan teujadi nibak tanggai lhee blaih buleuen adar. uroe nyang oh ltheuhnyan teuma, bak tanggai peuet blaih, awaknyan hana jipoh mate meusidroe ureueng pi, teuma jipeuraya uroe nyan deungon peunoh geumbira. teuma le ureueng-ureueng yahudi nyang na tanggai di banda susan awaknyan jipeuraya uroe nyan na kheueh nibak tanggai limong blaih sibagoe uroe rayeuk, sabab awaknyan ka jipoh mate musoh tanggai lhee blaih dan peuet blaih, laju jipioh bak tanggai limong blaih. nyan kheueh sabab jih ureueng yahudi nyang na tanggai di banda-banda nyang ubit jipeuingat tanggai peuet blaih buleuen adar sibagoe uroe raya nyang peunoh geumbira, uroe jipeuna kharuri nyang lumpah geumbira sira saleng jibri hadiah nyang na hubungan ngon peunajoh. oh ltheueh nyan le mordekhai laju geucetet banmandum keujadian nyan, dan geukirem laju surat ubak dumna ureueng yahudi nyang na tanggai bansaboh keurajeuen persia, bah kheueh nyang jioh, meunan cit nyang rab. asoe surat nyan na kheueh peurintah mangat teupeuraya tanggai peuet blaih dan limong blaih buleuen adar tieb-tieb thon. sabab bak uroe-uroe nyang lagee nyan kheueh awaknyan jipeutaloe bubena musoh-musohjih, deungon nyan teuma keuhai peudeh ngon keupeudehan nyang lumpah that phet nyang rab jirasa meu-ubah jeuet keugeumbiraan dan keubahgiaan. le sabab nyan, awaknyan haroh jipeuraya uroe-uroe nyang lagee nyan kharuri dan peujame ureueng laen meunan cit saleng jibri peunajoh dan jijok seudeukah keu ureueng gasien. ureueng yahudi jitaat banmandum peue nyang geupeurintah le mordekhai nyan dan meunan kheueh sabe sam-

poe peurayaan nyan ka jeuet keu adat nyang jipeuin-
gat tieb-tieb thon. haman aneuek hamedata, keuturo-
nan agag, musoh nyang paleng rayeuk nibak ureueng
yahudi, ka ltheueh jitiek undi nyang teuboh deungon
nan "purim" guna jih na ktheueh keu teupeuteutab
uroe nyang jroh keu teupeuhabeh nyawong ureueng
yahudi; jihnyan ka ltheueh jireuncana keu jipeu habeh
bubena awaknyan. teuma ester laju geujak meuhadab
ubak raja, dan raja laju geubri peurintah nyang teu-
tuleh nyang akhe jih banmandum reuncana jeuhet
nyang ka jisuson le haman meubalahi u ateueh gob-
nyan keudroe, sampoe jihnyan dan aneuek-aneuek ji-
hnyan teugantung nibak tameh geunantung. sabab
nyan ktheueh uroe-uroe raya nyan geuboh nan purim.
surat mordekhai dan peue mantong nyang ka ji alami
le ureueng yahudi, meusakibat jih awaknyan jipeu-
got peuratoran keu awaknyan keudroe, keu keu-
turonan awaknyan dan keu banmandum ureueng
nyang teuma jeuet keuwareuga bansa yahudi. me-
unurot peuratoran nyan awaknyan tieb-tieb thon
wajib jipeuraya ban dua uroe nyang ka geupeuteutab
le mordekhai. meunan cit geupeuteutab lom bahwa
keu siumu masa uroe-uroe purim nyan haroh ji-ingat
dan jipeuraya le tieb-tieb keuluwarga ureueng yahudi
nibak meubagoe angkatan di tieb-tieb propinsi dan
tieb-tieb banda. disampeng nibaknyan, meusigoe
deungon surat mordekhai nyan; ratu ester aneuek
abihail geutuleh teuma surat nyang keudua, nyang
asoe jih teupeukong surat mordekhai keuhai purim
nyan. surat nyan geukirem keu banmandum ure-
ueng yahudi, dan seunalen nibak surat-surat nyan
geukirem teuma ubak ban 127 boh propinsi nyang
na didalam keurajeuen persia nyang luwah nyan.
surat nyan geuireng teuma deungon doa mangat jeuet
bansa yahudi sabe lam seujahtra dan mubahgia. me-
unan cit dalam surat nyan na teuma teuyue ubak
ureueng yahudi mangat awaknyan dan keuturonan
awaknyan sabe jipeuingat uroe-uroe purim bak wa-
tee nyang teupat, lagee awaknyan nyang ka jipeuna
uroe puasa dan uroe meukabong. nyan ktheueh asoe
surat mordekhai dan ratu ester. peurintah ratu ester
nyang asoe jih keuhai peuratoran-peuratoran purim,
nyan na teucetet didalam kitab. raja ahasyweros
laju geupeuna keureuja paksa, bukon keu rakyat
nyang na tinggai di daerah-daerah nyang nibak pante
bineh laot keurajeuen gobnyan mantong, teuma ke-
unong cit ubak daerah-daerah nyang na tinggai di
gampong-gampong ngon nyang na tinggai di tunong.
banmandum buet-buet nyang rayeuk ngon hibat-
hibat, dan meunan cit kisah nyang leungkab pakriban
gobnyan geuangkat mordekhai jeuet keupeujabat
manyang lam keurajeuen nanggroe, nyan na teucetet
didalam kitab seujarah raja-raja persia dan media.
mordekhai, ureueng yahudi nyan teutab geuduek ni-
bak jabatan nyang paleng manyang dimiyueb raja
ahasyweros keudroe. mordekhai jihoreumat dan ji-
galak le ureueng-ureueng seubansa gobnyan. gob-
nyan geumeujuang keu keuseulamatan dan geuseu-
jahteraan bansa gobnyan dan banmandum keuturo-
nan awaknyan.

lhee thon oh ka lheeuh raja yoyakim geumat peurintah ateuhe yehuda, nebukadnezar raja nanggroebel, laju jiseureubu ateuhe banda yerusalem dan jikeupong banda nyan. tuhan geubri idhin ubak jih jeuet jipeutaloe raja yoyakim dan jireupah siladum nibak barang-barang nyang meuhareuga di baet tuhan. ureueng-ureueng nyang teuteuen, laju jiba ubak kuil dewa jihnyan di babel, dan barang-barang meuhareuga nyang jireupah nyan, laju jikeubah didalam gudang-gudang kuil nyan. oh lheeuhnyan le raja laju geubri peurintah ubak aspenas, ulee romoh tangga meuligoe, keu teupileh lamkawan ureueng-ureueng israel nyang teuteuen kira-kira napadub droe peumuda keuturonan raja atawa nyang meudarah bansawan. awaknyan haroh kheueh peumuda-peumuda nyang hana meucacat bahpi meubacut. awaknyan haroh nyang ceudah, meupeundikeden manyang, carong dan ieleume peungeutahuan gobnyan luwah dan pantaih jimeutugaih lam meuligoe. aspenas haroh jipeurunoe keu awaknyan meubaca dan teumuleh lam basa babel. le raja geupeuteuntee cit teuma bahwa peunajoh dan ie jieb keu awaknyan haroh saban deungon nyang jipeuguna le keuluwarga raja. oh ka lheeuh geulateh nyang treb jih na lhee thon, awaknyan haroh jimeuhadab ubak raja mangat geuteurimong tugaih lam meuligoe. lamkawan peumuda-peumuda nyan na cit disinan daniel, hananya, misael dan azarya, banmandum nyan nibak sukee yehuda. le ulee romoh tangga meuligoe laju jigantoe nan-nan awaknyan lagee nyoe: belsazar, sadrakh, mesakh dan abednego. deungon tulong allah, daniel lumpah jigaseh le aspenas. daniel kana teukat hana geupeukutoe droe gobnyan deungon peunajoh dan ie anggo nyang na lam meuligoe raja, sabab nyan gobnyan geulakee ubak aspenas mangat jeuet geumita peunajoh nyang laen. sabab jitakot ubak raja, jipeugah le aspenas lagee nyoe, "raja keudroe ka geupeuteutab peunajoh dan ie jieb gata, jadi meunyoee meunurot peundapat jihnyan gata leumah jih kureueng seuhat nibak peumuda-peumuda nyang laen, pasti ulon geupoh mate." oh lheeuhnyan daniel laju geumeupakat hainyan deungon peungawai nyang geujok tugaih le aspenas keu jipeutimang daniel dan ban lhee droe rakan jihnyan. jipeugah le daniel, "neu ujoee kheueh kamoe paleng kureueng siploh uroe; neubri kheueh ubak kamoe gulee-gulee dan ie keu peunajoh dan nyang kamoe jieb. oh ka lheeuh siploh uroe, neubandeng kheueh ruman kamoe deungon ruman-ruman peumuda nyang jipajoh peunajoh nyang geujok le raja, dan oh lheeuhnyan neucok kheueh laju peunutoh meunurot nyang droeneueh tilek." peungawai nyan situ dan laju ji-ujoe awaknyan nyang treb jih siploh uroe. oh ka watee nyang siploh uroe nyan habeh, awaknyan deuh jih leubeuh seuhat dan teuga nibak bandum peumuda nyang ka meuteume peunajoh nibak meuja raja. phon saat nyan le peungawai nyan hana le jihidang peunajoh dan ie jieb nyang geubri le raja, teuma ka seb deungon gulee-gulee dan ie mantong. po teu allah geujok ubak ban peuet droe peumuda nyan hikeumat keu ahlian lam hai keusasteraan dan ieleume. seulaen nibaknyan ubak daniel geubri teuma keu ahlian mangat jeuet geupeutrang

keuhai keumalon dan makna lumpo. bak akhe thon nyang keu lhee nyang ka geupeuteuntee le raja nyan, aspenas laju geuba bandum peumudanyan keu jijak meuhadab ubak raja nebukadnezar. oh ka lheeuh geuseu eue ubak awaknyan bandum, le raja laju geuteume nibak daniel, hananya, misael dan azarya leubeuh nibak nyang laen lam hai peue mantong. dan geupeuphon kheueh le awaknyan meutugaih dalam meuligoe raja. pajan mantong raja geupeugah keuhai masalaah nyang peureulee teupeutrang dan peutimbangan, laju deuh geukalon bahwa naseuhat dan peundapat ban peuet droe peumuda nyan siploh goe leubeuh get nibak naseuhat dan peundapat bandum peuramai dan ahli meurajah nyang na lam keurajeuen gobnyan. daniel teutab meutugaih lam meuligoe sampoe raja koresy nibak persia jipeutaklok babel. bak simalam, dua thon oh ka lheeuh raja nebukadnezar geumat peurintah, gobnyan meulumpo. lumpo geuhnyan keubit jipeususah that ate geuh, sampoe gobnyan hana hase le geueh. le sabab nyan laju geutawok ureueng peuramai, ahli meurajah, tabib dan ureueng-ureueng nyang na ieleume, mangat jiboh makna lumpo geuhnyan nyan. watee awaknyan jidong dikeue gobnyan, raja laju geupeugah, "ulon meulumpo, dan ate lon susah that sabab meuheuet that beulon teupeue makna lumpo nyan!" awaknyan laju jijaweueb lam basa aram, "udeb kheueh teungku amphon siumu masa! neupeugah kheueh lumpo nyan ubak kamoe, mangat jeuet kamoe peutrang makna lumpo nyan." geujaweueb le raja, "ulon ka lheeuh ulon cok keuputusan nyang lagee nyoe: gata haroh tapeugah lumpo nyan ubak ulon, meunan cit deungon makna jih. meunyoee gata hana hase, gata teukoh-koh dan rumoh gata teureuloh. teuma meunyoee gata hase, ubak gata ulon bri hadiah nyang ceudah-ceudah dan peunghoreumatan nyang raya. nah, tapeugah kheueh laju lumpo ulon nyan deungon makna jih!" jijaweueb lom le awaknyan, "teungku peugah dilee lumpo nyan ubak kamoe, oh lheeuhnyan baro kheueh kamoe peutrang makna jih." ban geudeungoe nyang lagee nyan raja laju geujaweueb, "paih that lagee nyang ulon duga. gata nyan na neu ulue-ulue watee mantong, sabab gata tapeupeue bahwa ulon na meukeusut keuneuk lon hukum gata banmandum deungon cara nyang saban meunyoee gata hana hase tapeutrang makna lumpo nyan ubak ulon. gata ka tameupakat mangat ulon nyoe hana pioh-pioh gata peungeuet dan tapeumeuen ulon deungon harapan bahwa ulon ku ubah peue-peue nyang ka lon peuputoh. nah, tapeugah kheueh laju makna lumpo nyan, teuma ulon kuteupeue bahwa gatapih hase tapeutrang makna lumpo nyan." banmandum ahli nujum nyan jijaweueb, "bansigom donya nyoe hana nyang teupeue peue nyang teungku amphon lakee. dan hantom na sidroe raja, padubna rayeuk dan mulia raja nyan, geulakee hai nyang lagee nyan ubak sidroe peuramai, nyang ahli meurajah, dan ureueng-ureueng meueleume bak meuligoe gobnyan. teungku amphon neulakee sapeue-sapeue nyang paleng payah. hana meusidroe pi nyang hase jipeupeunoh teukeucuali le dewa-dewa, teuma awaknyan hana tinggai lamkawan manusia." ban geudeungoe lagee nyan raja beungeh lumpah na dan laju geupeutron titah mangat teupoh mate

bubena ureueng-ureueng carong nyang na di babel. laju peurintah nyan geupeumaklum, dan banmandum ureueng nyang malem dan nyang carong, hana tuwoe cit keu nabi daniel dan rakan-rakan gobnyan jikeuneuk poh mate. dan daniel laju geujak meurumpok ubak ariokh, peumimpen peungawai raja, nyang ka siab jalaksana hukuman mate nyan. deungon ate-ate that daniel laju geutanyong ubak ureueng nyan, pakon raja ka geupeuteubiet peurintah nyang kreuhe ulwa biasa nyan. ariokh laju jipeugah ubak daniel peue nyang ka teujadi. deungon pantaih daniel laju geujak meuhadab ubak raja dan geulakee beugeubri watee mangat jeuet geupeutrang makna lumpo nyan. nyang geulakee le daniel nyan geubri le raja, laju daniel geuwoe u rumoh dan geupeugah laju hainyan ubak hananya, misael dan azarya. geuyeu laju ubak awaknyan mangat geumeudoa ubak po teu allah di syeuruga jeuet po teu allah beuna gaseh sayang ubak awaknyan dan geutem peuleumah makna lumpo nyan. deungon lagee nyan awaknyan hana teuhukom mate meusajan ngon ureueng-ureueng patot nyang laen. malamnyan cit teuma po teu allah geupeuleumah makna lumpo nyan ubak daniel nibak saboh keumalon. dan daniel laju geupujoe po teu allah di syeuruga, kheun gobnyan, "allah nyan bijaksana dan peukasa, teupujo kreuhe gobnyan siumu masa! gobnyan kreuhe nyang peuteutab musem dan masa, dan nyang peuh rhot ngon nyang angkat peunguasa. gobnyan kreuhe nyang bri keubijaksanaan, dan nyang anugeurah peungeurtian. gobnyan kreuhe nyang peguah rahsia nyang paleng lhok dan gobnyan geuteupeue peue mantong nyang teujadi didalam seupot. gobnyan peunoh ngon cahya trang. ya allah, nyang geupujoe le indatu lon, droeneueh lon pujoe dan lon peumulia. sabab neubri ubak ulon hikeumat dan teunaga. peue nyang kamoe lakee ka droeneueh peupeunoh. dan jeunaweueb ubak raja ka droeneueh tunyok." oh lheurehnyan daniel laju geujak ubak ariokh nyang ka geubri tugaih keu jipoh mate bandum ureueng-ureueng patot nyang na di babel. geupeugah le daniel ubak ariokh nyan, "bek tapeumate bandum ureueng-ureueng patot nyan. taba kreuhe ulon jak meuhadab ubak raja, sabab ulon keuneuk jak peguah ubak po raja makna lumpo nyan." deungon pantaih that ariokh laju jiba daniel meuhadab ukeue raja nebukadnezar sira jipeugah, "ulon ka meuteume lamkawan ureueng-ureueng yahudi nyang teuboih sidroe ureueng nyang hase geuteupeue makna lumpo teungku amphon." dan geupeugah kreuhe le raja ubak daniel nyang geuhoi cit deungon nan beltsazar, "peu kreuhe hase tapeutrang lumpo ulon dan maknajih?" geujaweueb le daniel, "hana ureueng meueileume, ahli meurajah, ahli meuramai dan ahli keu soai bintang-bintang nyang hase jipeugah hainyan ubak teungku amphon. teuma di syeuruga na po teu allah nyang peguah banmandum rahsia, dan gobnyan ka geubri tee ubak teungku amphon peue nyang teujadi oh uroe dudoe. bak saat nyoe, neupeu idhin kreuhe ubak ulon jeuet lon peutrang makna lumpo dan nyang deuh lon kalon nyang teungku amphon teurimong watee neueh nyan. watee teungku amphon teungoh neueh, teungku amphon meulumpo keuhai jamen

nyang teuma teuka. allah nyang singkab bandum rahsia geupeuleumah ubak teungku amphon peue nyang teujadi. rahsia nyoe ka geupeugah ubak ulon bukan ulon nyoe leubeh carong nibak soemantong, teuma mangat teungku amphon jeuet neuteupeue makna lumpo teungku amphon dan neumuphoh teuma keuhai asoe ate teungku amphon keudroe. nyoe kreuhe keumalon nyang teungku amphon ngieng: dikeue teungku amphon na saboh patong! patong nyan lumpah raya, dan meukilat-kilat teuma raman jih lumpah that teumakot. ulee jih teupeugot nibak meuh aseuli, dada dan jaroe jih nibak pirak, keuieng dan boh punggong jih nibak teumaga, pha jih nibak beuso dan gaki jih siladum nibak beuso dan siladum teuk nibak tanoh kliet. watee teungku amphon teungoh neupandang ateueh nyan, na sianeuk batee raya leukang bak bineh reuleung, batee nyan leukang hana soe nyang cukeh, dan batee nyan rhot laju jitimpok ateueh gaki patong nyan nyang teupeugot nibak beuso dan tanoh kliet nyan, sampoe reumok. bak watee nyan cit teuma bandum patong nyan reuloh dan jeuet keusinamon beuso, tanoh kliet, teumaga, pirak, dan meuh nyang hanco meurabok lagee abee bak teupat teupeh aneuk gandom watee musem uroe kha. seunamon nyan habeh jipupoe jipot le angen, sampoe hana tinggai beukaih mubacutpi. teuma batee nyang peureubah patong nyan ka rayeuk na bube gunong sampoe ka peunoh bansigom bumoe. nyang kreuhe lumpo teungku amphon, dan bak saatnyoe lon peutrang teuma makna jih. nyang mulia teungku amphon na kreuhe raja sigala raja; teungku amphon kreuhe nyang paleng meukuasa. po teu allah di syeuruga ka geubri ubak teungku amphon keurajeuen nyoe, keukuasaan, teunaga dan keuagongan. teungku amphon geupeujeuet keupeunguasa ateueh bagian donya nyang na peunduduek dan ateueh meubagoe cicem dan beulatung nyang laen. teungku amphon keudroe na kreuhe ulee meuh nibak patong nyan. teuma oh ka lheureh keurajeuen teungku amphon trok bak akhe masa, teuma teuka keurajeuen laen nyang hana saban rayeuk jih lagee keurajeuen teungku amphon. oh lheurehnyan teuka kreuhe keurajeuen nyang keu lhee nyang teulam-bang ubak bagian nibak teumaga keu patong nyan, nyang kuasa bansigom donya. seulanjut jih teuma teuka keurajeuen nyang keu peuet, nyang teuga jih lagee teunaga beuso. dan lagee beuso nyang teupeureumok dan teupeuhanco peue-peue nyang na, meunan kreuhe teuma keurajeuen nyang keu peuet nyoe teupeureumok dan teupeuhanco keurajeuen-keurajeuen nyang laen. gaki dan jaroe-jaroe patong nyang teupeugot siladum nibak tanoh kliet dan siladum teuk nibak beuso nyan, nyan na kreuhe sibagoe peutunyok bahwa bak saboh saat teuma keurajeuen nyan teuma teubagi-bagi. keurajeuen nyan na cit teunaga jih sabab tanoh kliet nyan na meujampu deungon beuso. jaroe-jaroe gaki nyang siladum teupeugot nibak beuso dan siladum nibak tanoh kliet nyan makna jih bahwa na bagian keurajeuen nyang teuga dan na cit nyang leumoh. beuso meujampu ngon tanoh kliet nyan, nyan makna jih bahwa keurajeuen nyan jiseuha jipeukong droe deungon cara jipeuna meukawan meujampu, teuma useuha nyang

lagee nyan sia-sia, lagee beuso nyang hana hase meusingawong deungon tanoh kliet. bak masa peurintah raja-raja nyan, po teu allah nyang na di syeuruga geupeudong saboh keurajeuen nyang meuteun siumu masa dan nyang hana hase jipeutaloe le bansa toh mantong. keurajeuen nyan geupeuhanco sampoe meurabok bubena keurajeuen nyang laen. bukan kheueh ka neukalon le teungku amphon bahwa deungon hana jimat le manusia pih, si aneuk batee ltheueh nibak reuleung laju rhot dan keunong dan reumok ateuah patong nibak beuso, teumaga, tanoh kliet, pirak dan meuh nyan? po teu allah nyang akbar geupeugah ubak teungku amphon peue nyang singoh teujadi. lumpo nyan jeuet teupeucaya dan peue-peue nyang ka lon peutrang nyoe na kheueh teupat." laju geusujut kheueh raja nebukadnezar dikeue daniel dan geubri peurintah mangat daniel jihoreumat dan ubak gobnyan teupeuseumah keureubeuen nyang teutot dan peuseumahan-peuseumahan nyang laen. geupeugah le raja, "beutoi, daniel, allah gata paleng rayeuk lamkawan allah nyang laen. gobnyan na kheueh nyang mat kuasa ateuah banmandum raja, dan nyang peutrang bubena rahsia. ulon kuteupeue hainyan sabab gata ka hase tapeutrang makna lumpo ulon nyoe." oh ltheuhnyan daniel geubri keududuekan nyang manyang, geuanugeurah hadiah nyang jai dan nyang ceudah ngon lagak-lagak, dan laju geuangkat jeuet keugubunur babel, dan geupeujeuet teuma keupeumimpin nyang manyang ateuah bandum peunaseuhat meuligoe. teuma ateuah geulakee le nabi daniel, raja laju geuseurah peumeurintahan propinsi babel nyan ubak sadrakh, mesakh dan abednego, seudangkan daniel keudroe tinggai lam meuligoe raja. bak saboh watee raja nebukadnezar geupeugot saboh patong meuh nyang manyang jih na 27 metee dan luwah jih rabna 3 metee. patong nyan laju geupeudong nibak tanoh panton dura di propinsi babel. oh ltheuhnyan le raja laju geutawok banmandum raja wilayah, bubena gubunur, bubena bupati, peunaseuhat neugahra, beundahara, hakem, nyang malem hukom, dan bandum ulee daerah keu jiteuka nibak upacara teureuseumi patong nyang ka geupeudong nyan. oh ka habeh bandum awaknyan jiteuka dan ka jidong dikeue patong nyan, le ajudan raja jipeuphon meulakee deungon su nyang meuleungkeng, "he bandum syedara nibak meubagoe bansa, sukee bansa dan basa! deungoe kheueh peurintah raja nyoe: meunyo beureuguih ka jimeusu, laju jiseutot le suleng, keucapi, reubab, gambus, serdam, dan alat-alat musik nyang laen, syedarsyedara banmandum haroh neusujut neuseumah patong meuh nyang ka geupeudong le raja nebukadnezar. soe mantong nyang hana taat ubak peurintah nyoe, ureung nyan langsung teurhom lam apui nyang hu meubura-bura." teuma teudeungoe alat-alat musiknyan teupeumusu, bubena ureung nibak meubagoe bansa, sukee bansa dan basa, laju jisujut dan jiseumah patong meuh nyan. na padub droe ureueng babel jipeuguna keuseumpatan nyan keuneuk jipeuceulaka ureueng yahudi. awaknyan jipeugah ubak raja nebukadnezar, "udeb kheueh teungku amphon siumu masa! teungku amphon keudroe ka neupeutron peurintah bahwa hana treb oh ltheueh alat-

alat musik teupeumusu, bandum ureueng haroh sujut dan jiseumah ubak patong meuh nyan, dan barang sigasoe nyang hana patuh ubak peurintah nyan ureueng nyan teurhom lam sinamon apui nyang teungoh hu meubura-bura. teuma na padubdroe ureueng yahudi nyang ka teungku amphon yuemat peurintah propinsi babel jianggab hana ubak peurintah teungku amphon nyan. awaknyan na kheueh sadrakh, mesakh dan abednego. ureueng-ureueng nyan hana jitem puja ilah-ilah teungku amphon dan hana teuma jitem seumah bak patong-patong nyang teungku amphon peudong." ban geudeungoe haba nyan raja beungeh lumpah na, laju geupeutron peurintah mangat ban lhee droe ureueng nyan meuhadab gobnyan. raja geutanyong ubak awaknyan, "he sadrakh, mesakh dan abednego! peu kheueh beutoi gata hana tatem seumah ilah-ilah ulon dan hana teuma tatem sujut ubak patong-patong meuh nyang ka ulon peudong nyan? deungoe kheueh, bak saatnyoe peu kheueh gata ka tatem sujut dan taseumah ubak patong nyan watee musik teungoh jimeusu? meunyo gata hana tatem, gata langsung teurhom lam seunamon apui nyang teungoh hu meubura. dan dewa nyang toh kheueh nyang hase peuseulamat gata nibak kuasa lon?" sadrakh, mesakh dan abednego geujaweueb, "teungku amphon nyang mulia, kamoe hana kamoe cuba bila droe. meunyo allah nyang kamoe seumah hase geupeuseulamat kamoe lam apui nyang teungoh hu meubura-bura nyan dan nibak kuasa teungku amphon, hainyan pasti geupeubuet le gobnyan. teuma meunyo hainyan hana geupeubuet, bah kheueh teungku amphon maklum bahwa kamoe hana kamoe pujoe dewa teungku amphon dan hana teuma kamoe seumah patong meuh nyang ka teungku amphon peudong nyan." dan teuka kheueh beungeh nyang hana ngon peusa nibak raja nebukadnezar ubak sadrakh, mesakh, dan abednego, sampoe ruman gobnyan ka jeuet keuseudeng. gobnyan laju geupeutron peurintah mangat seunamon apui teupeuhu tujoh goe leubeh seueum nibak nyang kaka. laju le gobnyan geuyue ubak na padub droe ureueng nyang teuga-teuga lamkawan sipa-i gobnyan keu teuikat sadrakh, mesakh dan abednego, dan laju geurhom awaknyan u dalam seunamon apui nyang teungoh hu meubura-bura nyan. dan watee nyan cit teuma ban lhee droe ureueng nyan teuikat krab lam keuadaan meupeukayan leungkab, na kheueh deungon bajee keumeja, jubah, tupi dan peukayan nyang laen, laju jirhom lam apui nyang teungoh hu meubura-bura nyan. sabab peurintah raja nyan lumpah that kreueh, dan seunamon apui hu nyan ka teupeuseuem luwa biasa dan deungon hu apui nyan ka habeh mate ureueng-ureueng nyang beuot sadrakh, mesakh dan abednego bak bineh seunamon apui. meunan kheueh, ban lhee droe ureueng nyang teuikat nyan rhot udalam apui nyang teungoh hu meutaga nyan. ban geukalon nyang lagee nyan raja nebukadnezar lumpah teukeujot. gobnyan laju geubeudoh bagaih-bagaih dan geutawok laju ubak peugawee-peugawee gobnyan, "bunoe ban lhee droe awaknyan ka geutanyoe beureukah ngon talo dan teugeulawa awaknyan lam apui teungoh hu nyan?" awaknyan jijaweueb, "beutoi, teungku am-

phon." geuseuot le raja, "teuma pakon leumah ulon kalon na peuet droe ureueng teungoh geujak-jak dalam apui hu nyan? awaknyan hana teuitak dan meubacutpi hana keunong sapeue. dan nyang keu peuet nyan ruman geuh lagee dewa." laju le nebukadnezar geupeurab ubak pintoe seunamon apui nyan dan geupeugah, "sadrakh, mesakh dan abednego, namiet-namiet po teu allah nyang mahamanyang! neutebiet kheueh lam seunamon apui nyan!" dan geuteubiet kheueh laju awaknyan. bandum waki raja, bandum gubunur, bupati, dan peugawe-peugawe nyang laen laju jikeulileng ban lhee droe awaknyan dan deuh jikalon bahwa awaknyan meubacut pi hana jilieh le apui. ok awaknyan hana angon, dan peukayan awaknyan hana tutong, dan bee asabih hana nibak awaknyan. laju geupeugah kheueh le raja, "pujoe kheueh po teu allah nyang jiseumah le sadrakh, mesakh dan abednego. gobnyan ka geu utus malaikat geuh keu geupeuseulamat ban lhee droe namiet gobnyan nyang peucaya ubak gobnyan. awaknyan ka ji iengkeue ubak peurintah ulon dan leubeh galak mate nibak jitem seumah atawa jipujoe ubak dewa-dewa toh mantong keucuali po teu allah awaknyan keudroe. sabab nyan ulon peurintah soe mantong ureueng nibak bansa, sukee bansa atawa basa toh mantong, nyang jipeuhina po teu allah nyang jiseumah le sadrakh, mesakh dan abednego, ureueng nyan teukoh-koh dan rumoh-rumoh ureueng nyan teureuloh dan teupeujeuet keusina-mon runka. sabab, hana dewa nyang hase jipeubuet lagee nyang ka geupeubuet le po teu allah nyan." oh ka ltheueh nyan le raja laju geupeu ek pangkat sadrakh, mesakh dan abednego, sampoe awaknyan ka jeuet keupeujabat-peujabat manyang di propinsi babel. nyoe kheueh peungumamon raja nebukadnezar nyang geukirem ubak ureueng-ureueng nibak meubagoe bansa, sukee bansa dan basa bansigom donya: "saleuem sejahteura! ulon keumeuk calitra keuhai keujajaan dan mukjizat nyang ka geupeubuet le po teu allah nyang mahamanyang ubak ulon. keubit that rayeuk mukjizat nyang ka geupeubuet! keubit that hebat buet ajab nyang ka geupeuna! allah teuma jeuet keu raja siumu masa. gobnyan meukuasa sipanyang masa." ulon tinggai deungon sejahteura dalam meuligoe lon dan udeb deungon meuwah. teuma nibak simalmon ulon teungoh teungeuet, ulon meulumpo dan leumah ulon kalon nyang gundah that ate ulon. laju ulon tawok bubena ureueng-ureueng carong nyang na di babel mangat jipeutrang ubak ulon makna lumpo nyan. teuma watee bandum peuramai, ahli meurajah, ureueng-ureueng meueileume dan ureueng-ureueng malem bagian bintang teuka dan ulon peugah lumpo ulon nyan ubak awaknyan, hana meusidroe pih nibak awaknyan nyang hase jipeutrang makna lumpo ulon nyan. akhe jih teuka kheueh daniel nyang geuhoi cit beltsazar lagee nan dewa lon. daniel ka peunoh deungon roh dewa-dewa nyang suci. laju ulon calitra lumpo ulon nyan ubak gobnyan, kheun ulon, "he, beltsazar, peumimpin ureueng-ureueng meueileume, ulon kuteupeue bahwa gata ka teupeupeunoh deungon roh dewa-dewa nyang suci, sampoe hana rahsia nyang teusom nibak gata. deungoe

kheueh lumpo ulon nyoe, dan neupeutrang kheueh makna jih. bak watee ulon teungoh lon eh, leumah ulon kalon sibak bak kayee nyang timoh di teungoh-teungoh bumoe. bak kayee nyan manyang lumpah na; bak jih raya dan kong. pucok jih meusampoh langet, sampoe leumah jikalon le bandum ureueng di ateuh bumoe. on-on kayee nyan jroh dan boh jih jai lumpah na, seb keu jipajoh le manusia bansigom donya. beulatang-beulatang kleut teueh-eh dimiyueb kayee nyan dan cicem-cicem jimeu eumpung nibak cabeueng jih. dan bandum makhluk udeb jeuet jipajoh boh kayee nyan. watee ulon teungoh lon tanueng ubak nyang leumah teukalon nyan, deuh ulon kalon malaikat tuhan teungoh geutron lam syeuruga; gobnyan leumah siaga dan waspada. deungon su nyang nyareng gobnyan geupeugah, "teubang kheueh laju bak kayee nyan dan takoh-koh kheueh cabeueng-cabeueng jih, peuluroh kheueh bubena on kayee nyan dan tahambo kheueh bubena boh jih. use kheueh bubena beulatang nyang teueh-eh dimiyueb kayee nyan dan cicem-cicem nyang meu eumpung ateuh cabeueng jih. teuma bak kheueh utom jih tinggai didalam tanoh. ikat kheueh ngon rante beuso dan teumaga dan tinggai kheueh laju di padang naleueng. bah kheueh jih jipumano le iembon, dan udeb meusajan ngon beulatang-beulatang dan sinimoh-sinimoh. bah kheueh akai manusia jih meu ubah jeuet keu akai beulatang treb jih na tujuh thon. nyan kheueh keuputosan kamoe malaikat-malaikat nyang waspada dan siaga. meukeusut kamoe na kheueh mangat ureueng-ureueng dipat mantong jiaku, bahwa po teu allah nyang mahamanyang meukuasa ateuh keurajeuen manusia dan keurajeuen nyan geubri keu soe mantong nyang geupileh, bahpi keu ureueng nyang hana meuguna meubacut pi!" he beltsazar, nyan kheueh lumpo ulon. jinoenyoe neupeugah kheueh makna jih ubak ulon. hana meusidroepi nibak ureueng patot-patot nyang na di keurajeuen ulon hase jipeugah nyan ubak ulon, teuma meunyoedroeneueh hase, sabab droeneueh ka peunoh deungon roh dewa-dewa nyang suci." ban geudeungoe nyang lagee nyan, daniel nyang geuhoi cit deungon nan beltsazar, teukeujot dan teuceungang na padub saat. dan ulon, raja nebukadnezar teupeugah ubak gobnyan, "beltsazar, bek kheueh gata gundah sabab teuka lumpo dan makna jih nyan." geujawueub le beltsazar, "teungku amphon, alangkah get jih meunyoedroeneueh keujadian-keujadian nyang geuramai le lumpo nyan rhot ateuh musoh-musoh teungku amphon dan bukan teungku amphon. bak kayee nyang teungku amphon kalon nyan panyang lumpah na, dan pucok jih meusampoh awan, dan leumah jikalon le bandum manusia di ateuh bumoe. on-on jih get-get dan boh jih jai lumpah na sampoe bandum manusia nyang tinggai di ateuh donya meuteume jipajoh. beulatang-beulatang kleut jeuet jimeupayong dimiyueb kayee nyan, dan cicem-cicem jeuet jimeu eumpung di ateuh cabeueng jih. ya, teungku amphon, droeneueh kheueh bak kayee nyang manyang dan khong nyan. keubeusaran teungku amphon meutamah sampoe trok ulanget dan keukuasaan teungku amphon meuluwah sampoe trok ujong bumoe. le teungku amphon leumah cit neukalon sidroe

malaikat geutron nibak syeuruga sira geupeugah, 'neukoh kheueh bak kayee nyoe dan neuboih kheueh keudeh, teuma utom jih bah kheueh neupeubiyeu mantong tinggai didalam tanoh. ikat kheueh deungon rante beuso dan teumaga dan tinggai kheueh laju bak padang naleueng. bah kheueh jihnyan basah keunong iembon dan udeb meusajan-sajan deungon beulatang-beulatang nyang treb jih na tujoh thon.' teungku amphon, nyoe kheueh makna nyang deuh neukalon nyan, dan nyoe kheueh nyang ka geupe-uputoh le po teu allah tuhan nyang mahamanyang keuhai teungku amphon keudroe. teungku amphon teuma jise nibak masyarakat nyang nan jih manusia dan udeb lamkawan beulatang nyang na di padang. na tujoh thon treb jih teungku amphon neupajoh naleueng lagee leumo dan neueh dalam blang raya, sampoe teungku amphon habeh basah deungon iembon. oh lheureh nyan teungku amphon neuaku bahwa po teu allah nyang mahamanyang meukuasa ateuhe keurajeuen manusia, dan keurajeuen nyan geubri ubak soemantong nyang geupileh. bubena malaikat geupeurintah mangat utom bak kayee nyan teupeubiyeu mantong tinggai lam tanoh. nyan tanda jih bahwa teungku amphon neumat kuasa lom oh ka lheureh teungku amphon neuaku bahwa po teu allah geukuasa bansigom donya. sabab nyan get kheueh teungku amphon neuseutot naseuhah ulon. bek kheueh teungku amphon meudesya le, teuma neupeubuet kheueh peue nyang get dan ade, dan neugaseh kheueh keu ureueng gasien. deungon lagee nyan teungku amphon teutab baghia." bandum nyan teujadi ateuhe droe ulon, raja nebukadnezar. dua blaih buleuen teuma oh lheureh nyan, bak watee ulon teungoh lon jak-jak lam taman bak tingkat ateuhe lam meuligoe ulon di babel, ulon peugah, "kalon kheueh, keubit that gagah banda babel! ulon kheueh nyang peugot banda nyan sampoe jeuet keu ma banda neugahra sibagoe bukeuti keukuasaan dan teunaga ulon, keuangongan dan keubeusaran ulon!" ulon gohlom lheureh lon meututoe watee ulon deungon su di langet, "raja nebukadnezar, deungoe kheueh nyoe! keukuasaan gata sibagoe raja ka geucok lam jaroe gata. gata teu use lamkawan manusia, dan udeb deungon beulatang-beulatang nyang na dipadang. tujoh thon treb jih gata tarot naleueng keupeunajoh gata saban that lagee leumo. oh ka lheureh nyan gata ta-aku bahwa po teu allah nyang mahamanyang meukuasa ateuhe keurajeuen manusia dan keurajeuen nyan geubri ubak soe mantong nyang geupileh." bak saat nyan cit teuma, tutoe haba nyan jeuet keunyataan. ulon, nebukadnezar teu use lamkawan manusia dan teurot naleueng lagee leumo. tuboh ulon habeh basah ngon iembon, ok bak ulee ka jeuet keupanyang lagee bulee kleung, dan gukee ulon ka panyang lagee gukee citem. watee nyang tujoh thon nyan ka habeh, laju ulon tangah ulanget, dan teuka kheueh laju keusadaran ulon. dan laju ulon pujoe po teu allah nyang mahamanyang ulon sanjong dan lon peumulia gobnyan nyang udeb keukai nyan. "allah teuma jeuet keu raja siumu masa. gobnyan meukuasa sipanyang masa. bansa-bansa nyang na ateuhe rhueng donya hana meumakna. po teu allah nyang kuasa malaikat di syeuruga dan peunduduek bumoe. hana

meusidroe pi nyang ek jilawan keuheundak gobnyan, hana ureueng nyang jijeuet teumanyong peue nyang geupeubuet." watee keusadaran ulon ka jiwoe lom ubak ulon, dan keubeusaran, keuagongan dan meusyuehu nyang meugah keurajeuen ulon geupeugisa ubak ulon. ulon jisambot le peuwira ulon dan le bandum ureueng rayeuk ulon, dan ulon geupuwoe ubak keurajeuen ulon, dan keuagongan ulon jeuet jih leubeh raya nibak nyang ka lheureh na dilee. dan nibak saatnyoe ulon, nebukadnezar lon pujoe, ulon peumanyang dan lon peumulia raja syeuruga. peue mantong nyang geupeubuet na kheueh beuna dan ade, dan gobnyan hase geupeumiyueb ureueng nyang sombong. bak siuroe raja belsyazar geu undang na siribee droe ureueng rayeuk keu geujak bak kharuri gobnyan nyang meuwah, dan jieb-jieb ie anggo. teungoh awaknyan jijieb ie anggo nyan, belsyazar laju geupeurintah geuyue cok cambong-cambong meuh dan pirak, nyang ka geureubot le nebukadnezar, ureueng syiek gobnyan, di dalam baet tuhan di yerusalem. meukeusut raja belsyazar nyan na kheueh mangat bubena ureueng rayeuk, peurumoh-peurumoh jih, gundek-gundek jih dan gobnyan keudroe, jijieb ie ngon cambong-cambong nyan. deungon bagiaih that bandum cambong-cambong nyan teuba ubak gobnyan, laju awaknyan banmandum jijieb ie anggo lam cambong-cambong nyan. sira jieb-jieb ie anggo nyan awaknyan hana putoh-putoh jipujoe-pujoe dewa nyang teupeuget nibak meuh, pirak, teumaga, kayee dan batee. ngon hana teusangka-sangka leumah laju jaroe manusia nyang teungoh teumuleh sapeue-peue bak binteh meuligoe nibak teupat nyang paleng trang keunong cahya panyot, deungon nyan le raja deuh geulalon deungon nyata. gobnyan jeuet keuteumakot muka geuh pucat hana meudarah sampoe teuot gobnyan yo meuguncang. deungon su nyang meudumpek laju geulakee ubak ahli nujum, ahli meurajah dan ahli bagian bintang laju geutawok dan geupeusapat. watee awaknyan ka trok, laju geupeugah le raja, "barang sigasoe nyang hase baca tulesan nyan dan jipeugah makna jih ubak ulon, keu ureueng nyan ulon bri peukayan keurajeuen jubah ungu dan talo takue meuh sibagoe peunghoreumatan. seulaen nibaknyan keu ureueng nyan lon angkat jeuet keupeunguasa nyang keu lhee dalam keurajeuen ulon." bubena ureueng nyang patot-patot laju jiseuk ukeue, teuma hana meusidroe pih lamkawan awaknyan nyang hase jibaca tulesan nyan atawa jipeugah makna jih ubak raja. raja belsyazar meutamah-tamah gundah dan muka geuh pucat lom; meunan cit bubena ureueng rayeuk gobnyan ka jeuet keubingong. teudeungoe su raja geudumpek dan su ureueng-ureueng rayeuk gobnyan, ma nibak raja laju geutamong udalam ruweung kharuri. gobnyan laju geupeugah, "udeb kheueh teungku amphon siumu masa! teunang kheueh ate amphon dan bek kheueh pucat le. sabab lam keurajeuen teungku amphon na sidroe ureueng agam nyang ka peunoh deungon roh dewa-dewa nyang suci. bak masa keurajeuen nanggroe geumat le ureueng syiek teungku amphon, ureueng nyan teubukeuti nibak ureueng nyan na keuahlan, peungeurtian dan hikeumat, nyang saban deungon hikeumat dewa-dewa. ureueng syiek

teungku amphon raja nebukadnezar ka geuangkat ureueng nyan jeuet keupeumimpin bubena ahli tanu-eng, ahli meurajah, ureueng-ureueng meueleume dan ahli ieleume bintang. ureueng nyan luwa bisa carong dan bijaksana lom teuma malem bak geutapeuse makna lumpo, geupeutrang rahsia dan geuboh makna hai-hai nyang sulet. nan ureueng nyan daniel, teuma le raja geuboh nan beltsazar. jak tawok kheueh ureueng nyan. gobnyan geupeugah ubak amphon peu makna jih tulesan nyan." deungon bagai that daniel laju geuba jak meuhadab ubak raja. laju le raja geuteumanyong ubak gobnyan, "peu kheueh gata daniel, ureueng yahudi nyang teuboih, nyang ka geuangkat le ayah lon nibak tanoh yehuda? ulon deungoe gata peunoh deungon roh dewa-dewa nyang suci, dan bahwa nibak gata na keuahlian, peungeurtian, dan hikeumat nyang luwa biasa. bubena ureueng patot-patot dan ahli-ahli meurajah ka jicuba baca tulesan nyoe dan jipeugah makna jih ubak ulon. teuma awaknyan hana hase. ban mantong ulon deungoe bahwa gata jeuet tapeutrang bandum rahsia tapeuglah soai-soai nyang payah. meunyo gata hase tabaca tulesan nyoe dan tapeugah makna jih ubak ulon, keu gata ulon jok peukayan keurajeuen jubah ungu dan talo takue meuh sibagoe penghoreumatan. seulaen nibak nyan gata lon angkat jeuet keupeunguasa nyang keu lhee dalam keurajeuen ulon." geujawueb le daniel, "teungku amphon hana peureulee neubri bandum hadiah nyan keu ulon, neu-jok mantong keu ureueng laen. ulon kubuet tulesan keu teungku amphon dan ulon peugah teuma makna jih. po teu allah nyang mahamanyang geupeujeuet ureueng syiek teungku amphon raja nebukadnezar, jeuet keu raja agong dan geubri ubak gobnyan keubeusaran meusyehu nyang hana teukira. gobnyan rayeuk lumpah na, sampoe bubena ureueng nibak meubagoe bansa, sukee bansa, dan basa, yo ngon teumakot keu gobnyan. meunyo gobnyan keuneuk peumate gob, laju geupoh mate ureueng nyan. meunyo gobnyan keuneuk geupeuseulamat sidroe-droe ureueng, laju geupeuseulamat ureueng nyan. gobnyan nyang peumanyang atawa nyang peumiyueb soe mantong nyang geugalak. teuma watee gobnyan ka jeuet keu ureueng sombong, kreueh ulee dan keujam, gobnyan laju geutunggeng nibak keukuasaan geuh akhejih gobnyan ka gadoh keuangongan. gobnyan geu use lam masyarakat manusia dan akai gobnyan ka jeuet lagee akai beulatang. gobnyan udeb deungon keuleudee di dalam gle, geurot naleueng lagee leumo dan geueh lam padang halalah sampoe habeh basah keunong iembon. akhe jih gobnyan geuakuh bahwa po teu allah nyang mahamanyang meukuasa atueuh keurajeuen manusia dan keurajeuen nyan geubri ubak soe mantong nyang geupileh. teuma aneuek agam gobnyan, nyan kheueh teungku amphon keudroe, hana neutem peumiyueb droe, bahpi teungku amphon hai nyan neutepeue bandum. teungku amphon neupeumanyang droe ubak tuhan di syeuruga dan neujeuet neuyue peutamong cambong-cambong nyang ka teureupah di baet tuhan. laju le teungku amphon ngon ureueng rayeuk-rayeuk teungku amphon, duma peurmoh dan gundek-gundek teungku amphon neujieb ie anggo lam cambong-cambong nyan.

teungku amphon neupujoe-pujoe dewa-dewa nyang teupeuget nibak meuh, pirak, teumaga, beuso, kayee dan batee, dewa-dewa nyang hana leumah jime-ungieng meunan cit deungon meudeungoe atawa hana muphom meusapeue. teungku amphon hana neuhoreumat ubak po teu allah nyang peuteuntee udeb atawa mate teungku amphon dan nyang peuteutab rot udeb teungku amphon. nyang kheueh sabab jih po teu allah geukirem jaroe nyan mangat teuteuleh peusan gobnyan. nyoe kheueh tulesan nyan, "teuitong, teuitong, teuitimang, teubagi." dan nyoe kheueh makna jih: teuitong, masa peumeurintahan teungku amphon ka geuitong le po teu allah dan geupeu akhe; teuitimang, teungku amphon ka geuitimang dan hana puhi ate; teubagi; keurajeuen teungku amphon geupeuwueuk dua keu ureueng media dan persia." deungon bagai that belysazar geupeurintah ubak peugawee-peugawee gobnyan mangat jipeungui ubak daniel jubah ungu dan jipeungui nibak takue daniel deungon rante meuh. laju gobnyan geubaiat daniel jeuet keupeunguasa nyang keu lhee dalam keurajeuen gobnyan. bak malam nyan cit teuma belysazar raja babel nyan teupoh mate. oh ka lhee belysazar teupoh mate, darius ureueng media geureubot takhta keurajeuen, bak watee nyan gobnyan meu umu nam ploh dua thon. darius geubagi keurajeuen gobnyan jeuet jih sireutoih dua ploh boh propinsi nyang maseng-maseng jipeurintah le sidroe gubunur. daniel dan dua droe ureueng nyang laen geubaiat jeuet keu ureueng nyang kawai bubena gubunur nyan mangat raja bek jipeurugoe. dan bak saat nyan cit leumah nyata bahwa buet daniel leubeh get nibak buet-buet nyang jipeubuet le bandum gubunur dan peungawas-peungawas nyang laen. sabab nyan, raja kana niet keuneuk geubaiat gobnyan jeuet keu peunguasa bansiluroh keurajeuen nangroe. teuma le gubunur-gubunur nyan jimita laju nyang salah-salah daniel nibak tugaih peumeurintahan, teuma nyang jimita le awaknyan hana meuhase, sabab daniel seutia dan juoe dan hana geupeubuet nyang laloe atawa buet nyang salah peue mantong. laju awaknyan jipeugah, "geutanyoe hase tateume buet nyang salah nyang geupeubuet le daniel lam hai nyang na hubungan ngon agama gobnyan." oh lheeuhnyan jijak kheueh awaknyan meuhadab ubak raja seucara seureuntak sira jipeugah, "ya teungku amphon raja darius, udeb kheueh teungku amphon siumu masa! kamoe banmandum nyang kamoe atoe bandum keurajeuen droeneueh, bah kheueh bandum peungawas, bandum gubunur, waki gubunur dan peujabat-peujabat nyang laen, ka meupakat keu teu usui mangat teungku amphon neupeuteubiet surat peurintah nyang haroh jitaat deungon bit-bit. nyang get jih teungku amphon neupeurintah nyang treb jih lhee ploh uroe hana meusidroe pih nyang jeuet jikak peusampoe peumohonan ubak sidroe lamkawan dewa atawa manusia, seulaen ubak teungku amphon keudroe. barang sigasoe nyang iengkeue ubak peurintah nyan ureueng nyan teurhom udalam guha singa. kamoe meulakee deungon meuharab that mangat teungku amphon neuteken surat peurintah nyan mangat jeuet keu undang-undang media dan persia nyang hana jeuet teutarek le." dan le raja

darius laju geuteken surat peurintah nyan. watee daniel geudeungoe keuhai nyan, geuwoe laju gobnyan u rumoh geuh keudroe. kama gobnyan nyan na ditingkat ateuh na peuradeun-peuradeun nyan meuhadab u yerusalem. dan lagee nyang ka-ka, gobnyan meudoa ubak allah dan geupujoe gobnyan lhee goe siuroe deungon cara geumeuteut dikeue peuradeun-peuradeun nyan teuhah nyan. bak watee musoh-musoh daniel jiangieng daniel teungoh meudoa ubak allah gobnyan, jijak kheueh bandum awaknyan meuhadab ubak raja laju jigadu daniel nyan teungoh seumayang nyan. awaknyan jipeugah, "kon kheueh teungku amphon ka neuteken surat peurintah nyan teutam bandum ureueng nyan treb jih lhee ploh uroe nyoe teupeusampoe peumohonan ubak sapeue-sapeue dewa atawa manusia seulaen ubak teungku amphon mantong? dan lom teuma, barang sigasoe nyang iengkeue ubak peurintah nyan teurhom lam guha singa?" geujaweub le raja, "beutoi, dan peurintah nyan ka jeuet keu undang-undang di media dan persia nyang hana jeuet teutarek le." laju geupeugah le awaknyan ubak raja, "daniel, na sidroe ureueng teuboih nibak yehuda, hana jipakoe teungku amphon dan jianggab hana peue nyang ka teungku amphon peurintah. gobnyan meudoa lhee goe tieb-tieb uroe." ban geudeungoe haba nyan raja laju seudeh dan khawate, sampoe gobnyan geumita akai mangat daniel seulamat. sampoe trok an seupot uroe raja mantong geuseumike. oh ltheuhnyan ureueng-ureueng nyan jiriwang lom ubak raja dan jipeugah, "teungku amphon, bah kheueh teungku amphon neuingat meunurot undang-undang media dan persia, peurintah nyang ka geupeuteubiet le raja hana jeuet teu ubah-ubah." dan akhe jih raja geupeurintah laju teujak drob daniel dan teurhom laju u dalam guha singa. geupeugah le raja ubak daniel, "seumoga po teu allah gata nyang seutia gata semuh nyan geu tulong gata." oh ka ltheuhnyan sia-neuk batee raya laju jipeuduek bak babah pintoe guha nyan, dan raja laju geucab batee nyan deungon cab keurajeuen dan cab ureueng rayeuk-rayeuk, sampoe hana meusidroe pih nyang jeuet peulheueh daniel nibak singa-singa nyan. oh ltheuhnyan geuwoe kheueh laju raja ubak meuligoe. gobnyan hana geutem makheun atawa teupeumangat ate. dan simalam beuhong gobnyan hana jeuet geueh. oh watee ka suboh geubeudoh kheueh laju raja dan geujak laju ubak guha singa, oh ka trok gobnyan ubak guha nyan, geuteumawok kheueh laju deungon su nyang gundah, "he daniel hamba po teu allah nyan udeb! peu kheueh allah gata nyang gata seumah deungon seutia nyan ka hase geupeuseulamat gata nibak singa-singa nyan?" dan teudeungoe kheueh laju su daniel nyang geujaweub lagee nyoe, "udeb kheueh teungku amphon siumu masa! allah ulon ka geukirem malaikat keu geujak tob babah-babah singa nyang na dalam guha nyan sampoe bandum singa nyan hana jipakoe ulon. allah ka geupeuseulamat ulon sabab gobnyan geuteupeue bahwa ulon hana lon peubuet salah keu gobnyan dan keu teungku amphon." hana bayang galak ate raja dan gobnyan laju geupeurintah mangat daniel teupeuteubiet lam guha nyan. oh ka ltheueh peurintah nyan teulaksana, te-

unyata bahwa hana meubacut pih tuboh daniel teuluka, sabab gobnyan percaya ubak po teu allah. oh ltheueh nyan raja geupeutron peurintah mangat ureueng nyang ka jigadu daniel sampoe daniel teupaso lam guha singa teudrob. laju awaknyan meusajan deungon aneuek peurumoh jih geugeulawa lam guha singa nyan, gohlom trok awaknyan bak babah pintoe guha nyan, singa-singa nyan laju jiteugom awaknyan dan jimomoh ngon jipeuhanco bandum tuleung-tuleung awaknyan. oh ltheuhnyan raja darius laju geukirem surat ubak ureueng-ureueng nibak meubagoe bansa, sukee bansa dan basa di bansigom donya, "saleum seujateura! ulon peurintah ubak bandum ureueng nyan na dalam keurajeuen ulon mangat teumakot dan horeumat ubak po teu allah nyang geuseumah le daniel! gobnyan na kheueh raja nyang udeb siumu masa, sampoe akhe jamen gobnyan geumat peurintah. keurajeuen gobnyan hana mungken binasa. keukuasaan gobnyan hana pajan habeh. gobnyan nyang peuseulamat dan nyang peubeubaih, nyang peubuet mukjizat dan buet nyang ajab di langet meunan cit ateuh bumoe. daniel ka teupeuseulamat, nibak jiteugom le singa-singa." meunan kheueh daniel teutab na keududuekan nyang manyang simantong peumeurintah darius dan peumeurintahan koresy, ureueng persia nyan. bak simalam, bak thon nyang phon belyazar jeuet keu raja di babel, ulon, daniel meulumpo dan meuteume keumalon. lumpo nyan ulon cetet dan laporan keuhai nyang deuh ulon kalon nyan na kheueh lagee nyoe: angen badee jipot rot meubagoe arah dan deungon na angen tajam nyan meuakibat jih na angen badee lam laot raya. oh ltheueh nyan na peuet boh beulatang raksasa jiteuka rot lam ie, nyang saboh meubeda deungon nyang laen. meulatang nyang phon ruman jih lagee singa, teuma na meusayeub cicem garuda. watee ulon pandang ateueh beulatang nyan, hana teusangka-sangka sayeub jih teulot dan leukang; beulatang nyan teubeuot nibak tanoh dan teudong ateueh dua blaih gaki lagee manusia, laju geubri akai manusia. beulatang nyang keudua ruman jih lagee cagee. beulatang nyan jidong deungon gaki likot, dan bak babah lam ruweueng gigo jih na jiba lhee krak tuleung rusok. ulon deungoe su nyang jipeugah ubak beulatang nyan, "jak, pajoh kheueh laju uengkot sie sidub toh nyang gata galak!" teungoh ulon ngieng dan ulon peurati atranyan, teuka kheueh beulatang nyang laen. ruman jih lagee rimueng tutul, teuma dilikot jih na peuet boh sayeub cicem, dan beulatang nyan na ulee jih peuet boh. beulatang nyan leumah jih meuwibawa. watee teungoh lon pandang beulatang nyan, teuka teuma beulatang nyang keu peuet. beulatang nyan lumpah teuga dan dahsyat dan lumpah teumakot. deungon gigoe jih nyang raya dan kreueh lagee beuso, beulatang nyan hase jipeureumok dan jipajoh bubena mangsa jih, laju jigilo-gilo nyang mantong tinggi. meubeda deungon beulatang-beulatang nyang sigohlom jih, jihnyan meulungkee siploh. teungoh lon peurati nibak lungkee-lungkee nyan, deungon hana teusangka-sangka saboh lungkee teuk jitimoh di teungoh-teungoh lungkee nyan. lungkee nyan ubit, teuma hase jipeusak dan ek teutob ban lhee boh lungkee-lungkee nyang ka awai timoh nyan.

lungkee ubit nyan na meumata lagee mata manusia dan na meubabah nyang jimeututoe ngon haba nyang sombong. teungoh ulon kalon hana ploh-ploh, na padub boh takhta teungoh teukeubah. dan le gobnyan nyang udeb keukai laju jiduek ateuh saboh nibak takhta-takhta nyan. peukayan gobnyan dan ok gobnyan puteh gleh lagee gapeueh. takhta gobnyan deungon ruda nyan hu meuble-ble lagee apui hu, dan apui laju jimeu eue nibak takhta nyan. meuribee-ribee ureueng jijak peutimang gobnyan, dan meujuta ureueng ka teudong dikeue gobnyan. oh lheurehnyan geupeuphon kheueh sidang peungadelan, dan kitab-kitab pih laju geupeuhah. watee ulon teungoh lon kalon atra nyan, teutab mantong ulon deungoe lungkee ubit nyan jipeugah haba deungon sombong jih. oh lheurehnyan beulatang nyang keu peuet nyan jipoh mate, dan bangke jih jigeulawa didalam apui sampoe habeh tutong. beulatang-beulatang nyang laen ka geutarek keukuasaan jih, teuma awaknyan geubri udeb sampoe ubak watee nyang ka geupeu teuntee. nibak keumalon ulon malam nyan, ulon kalon sapeue-sapeue nyang saban lagee manusia. gobnyan geuteuka deungon jikeulileng le awan laju jajak ubak gobnyan nyang udeb keukai dan jipeuturi keu jihnyan. gobnyan geubri keuhoreumatan dan keukuasaan sibagoe raja, sampoe ureueng-ureueng nibak meubagoe bansa, sukee bansa dan basa meungabdi ubak gobnyan. keukuasaan gobnyan meuteun siumu masa, peumeurintahan gobnyan hana teuguleng. nyang deuh-deuh nyang ulon kalon nyan ate ulon meutamah bingong dan geulisah. laju ulon peurab ubak sidroe ureueng nyang na teungoh jidong disinan dan ulon lakee keuteurangan keuhai banmandum nyan. dan digobnyan geupeugah bube nyang na. geupeugah le gobnyan lagee nyoe, "ban peuet boh beulatang raksasa nyan na kheueh meumakna peuet boh keurajeuen nyang teuka u ateuh bumoe. teuma umat po teu allah nyan mahamanyang geuteurimong hak keu geupeurintah dan peumeurintahan gobnyan keukai siumu masa." oh lheurehnyan ulon keuneuk teupeue makna beulatang nyang keu peuet nyan, nyang meulaen deungon nyang laen; nyang lumpah teumakot dan nyang peuhanco nyang priek mangsa jih deungon gukke teumaga dan gigo beuso jih, dan jigilo-gilo seuh-seuh nyang leubeh jipajoh. ulon keuneuk lon teupeue cit keuhai ban siploh boh lungkee nibak ulee jih dan keuhai lungkee ubit nyang teuka dudoe laju jitarek sampoe teubot lhee boh lungkee nyang phon-phon nyan. lungkee ubit nyan na mata dan babah nyang meututoe deungon sombong jih. lungkee ubit nyan leubeh teumakot nibak lungkee-lungkee nyan laen. watee ulon teungoh lon ngieng atranyan, lungkee nyan laju jimprang jilawan umat po teu allah dan jipeutaloe awaknyan. oh lheureh nyan gobnyan nyang udeb keukai nyan teuka laju geubri keuputusan dan geupeubeuna umat po teu allah nyang mahamanyang. watee jih ka trok awaknyan jiteurimong kuasa keu jimat peurintah. nyoe kheueh keuteurangan nyang ulon teume, "beulatang nyang keu peuet nyan na kheueh keurajeuen nyang keu peuet nyang teuma teudong di ateuh bumoe dan meulaen deungon keurajeuen-keurajeuen nyang laen. keurajeuen nyan

jipeuhanco dan jiuat banmandum bumoe dan jigilogilo seuh-seuh nyang tinggai. ban siploh boh lungkee nyan na kheueh siploh droe raja nyang mat peurintah keurajeuen nyan. oh lheureh nyan na sidroe raja nyang laen teuma teuka; gobnyan meulaen that deungon raja-raja nyang phon-phon that, dan gobnyan geupeutalo lhee droe raja. gobnyan jimeututoe jilawan allah nyang mahamanyang dan jiteugom umat allah. jihnyan jiseuha dan jubah hukom-hukom dan khanuri-khanuri agama umat allah, dan awaknyan jimeukuasaan nyang treb jih na lhee thon si-teungoh. dan peungadelan syeuruga laju geumeusidang dan geutarek keukuasaan gobnyan dan geupeuhanco gobnyan sampoe habeh sapan sapa. kuasa dan keubeusaran meubagoe keurajeuen nyang na di ateuh bumoe geubri ubak umat po teu allah nyang mahamanyang. kuasa awaknyan keu teupeurintah hana keuneulheueh dan bandum peunguasa nyang na di ateuh bumoe meungabdi awaknyan deungon taat." ohnoe kheueh laporan nyoe. ulon lumpah geulisah sampoe muka lon pucat, teuma hainyan hana meusidroe pih ulon bri tee keuhai banmandum nyan. bak thon nyang keu lhee geumat peurintah le raja belyazar, ulon meuteume keumalon nyang keudua. lam keumalon nyan leumah ulon kalon droe keudroe ulon na di propinsi elam, di susan, na banda persia. ulon kudong bak bineh krueng ulai, dan bak bineh krueng nyan leumah ulon ngieng saboh bubiri agam nyang na dua boh lungkee panyang, nyang saboh leubeh panyang dan leubeh baro nibak nyang laen. ulon ngieng bubiri agam nyan jimupok u arah barat, utara dan seulatan. hana meusaboh beulatang pih nyang meuteun jihadab jihnyan atawa teupiesie nibak kuasa jihnyan. jihnyan jimeubuet ban galak droe dan ka jeuet keu sombong. teungoh ulon pandang atra nyan, leumah ulon ngieng saboh kameng agam teungoh jiplueng-plueng siblahi ubarat di ateuh bumoe. kameng nyan jiplueng luwa bishajam jih sampoe gaki jih hana keunong ateuh bumoe. nibak bandua neuk mata jih na saboh lungkee nyang meunyelok. kameng agam nyan laju jipeuto ubak bubiri agam nyang deuh lon kalon bak bineh krueng nyan, laju jipeucrok ubak jih nyan deungon buih that. ulon kalon kameng agam nyan jiheuntam bubiri agam deungon beungeh dan ceubeueh nyang luwa biasa, sampoe bubiri agam nyang keunong pok nyan patah bandua boh lungkee jih. bubiri agam nyan hana meudaya keu jilawan. bubiri nyan teutiek bak tanoh dan laju jigilo-gilo, dan hana meusidroe ureueng pih nyang tem peugla. kameng agam nyan meutamah rayeuk. teuma bak watee jihnyan ka trok ubak pucak keukuasaan jih, patah kheueh lungkee jih nyang raya nyan, dan laju nibak teumpat nyan timoh peuet boh lungkee nyang meunyelok, maseng-maseng jitungyok ubak arah nyang meubeda. nibak saboh lamkawan lungkee nyan jitimoh teuma saboh lungkee ubit, nyang meutamah rayeuk dan keukuasaan jih meutamah luwah u arah seulatan, u arah timu dan ubak tanoh nyang ceudah. lungkee nyan meutamah rayeuk sampoe ka seb teuga keu jiheuntam tantra syeuruga na kheueh bintang-bintang, dan na meupadub boh lamkawan nyan ji geulawa ubak tanoh dan jigilo-gilo. dan jihnyan jilawan panglima tantra syeu-

ruga, hana jipeubuet le keureubeuen peuseumah an tieb-tieb uroe nyang teupeuseumah ubak panglima nyan, dan jireuloh rumah ibadah keu jihnyan. dan ureueng-ureueng disinan ka jipeuphon meudesya dan hana le jipeuseumah keureubeuen-keureubeuen nyang teupeuwajeb nyan. dan ibadat nyang beutoi ka jitiek bak tanoh. lungkee nyan meuhase peupeu mantong nyang jipeubuet. oh lheuhen nyan ulon deungoe su malaikat geupeugah ubak nyang laen, "sampoep padub treb kheuhen nyang teukalon nyang leumah nyan na sabe? sampoep an pajan desya rayeuk nyan teugantoe keureubeuen uroe-uroe? sampoep an pajan tantra syeuruga dan rumah ibadah nyan jigilo-gilo?" ulon deungoe malaikat nyang sidroe teuk geujaweueb, "trok 1.150 uroe trek. sidubnyan treb keureubeuen seupot dan keureubeuen beungoh hana jipeuseumah. oh ka lheuhen nyan baro kheuhen rumah ibadah teupeupuleh lom." bak watee ulon teungoh lon useuha keu lon peuphom makna nyang teukalon nyan, hana teusangka-sangka ka teudong dikeue ulon nyang saban that lagee manusia. teudeungoe su nyang teumawok meurandeh krueng ulai, kheun su nyang teudeungoe nyan, "he jibrail, neupetrang kheuhen laju ubak gobnyan peue nyang ka deuh jikalon." laju le jibrail nyang geudong dikeue ulon geupeurab laju ubak ulon. ulon lumpah teumakot sampoep ulon rhot dan reubah. geupeugah le jibrail ubak ulon, "he manusia fana, gata haroh tateupeue bahwa nyang ka deuh neukalon nyan na kheuhen sibagoe tanda akhe jamen." teungoh gobnyan geupeugah haba, ulon laju reubah dan pansan. teuma gobnyan laju geumat ulon dan geutulong pseudong lom. laju gobnyan geupeugah, "ulon kubritee bak gata peue nyang teuma teujadi akibat po teu allah beungeh. sabab nyang deuh gata kalon nyan sibagoe tanda akhe jamen. bubiri agam nyang gata kalon nyan, nyang na meulungkee dua boh, sibagoe lambang keurajeuen media dan persia. kameng agam nyan sibagoe lambang keurajeuen yunani, dan lungkee nyang meusudok nibak bandua mata jih nyan nyang kheuhen raja awaknyan nyang keuphon. ban peuet boh lungkee nyang timoh oh ka lheuhen lungkee nyang phon nyan patah, nyan sibagoe tanda bahwa keurajeuen yunani teubagi-bagi jeuet peuet boh keurajeuen, teuma meusaboh keurajeuen pih hana nyang teuga lagee keurajeuen nyang phon. watee karab meu akhe nibak keurajeuen-keurajeuen nyan, meunyoe keujeuhetan karab trok bak pucak jih, teuma teuka sidroe raja nyang paleng kreueh ulee, dan carong teumipee. raja teuma jeuet keu ureueng nyang paleng teuga, teuma kon le sabab teunaga jih keudroe. raja nyan jipeuteuka keubinaan nyang teumakot that dan peue mantong nyang jipeubuet sabe meuhase. raja jipeubinaan ureueng-ureueng peukasa dan umat po teu allah. sabab raja nyan licek, tieb-tieb geuteumipee sabe meuhase. raja nyan jipeusombong droe, dan hana teupeuingat leubeuh ilee gobnyan geupeubinas ureueng rame. dan jihnyan jijeuet lawan raja nyang maharayeuk. teuma gobnyan teupeuhanco deungon hana teunaga manusia. nyang deuh teukalon keuhai keureubeuen seupot ngon beungoh nyang ka teupetrang ubak droeneuh nyan, beutoi-beutoi teuma teujadi. teuma bandum nyan teujadi bakmasa ukeue

nyang mantong jioh; le sababnyan bek tacalitra ubak soe mantong." oh lheuhen nyan ulon meuras leumoh laju rhot bak saket napadub uroe treb jih. oh lheuhen nyan laju lon beudoh dan lon peubuet tugaih-tugaih ulon keu raja. teuma ulon geulisah oh ulon pike ubak nyang deuh-deuh ulon kalon nyan dan hana hase ulon peuphom. nibak thon nyang keuphon geumat peurintah le darius ureueng media, bin ahasyweros ateueh keurajeuen babel, ulon daniel, ulon beut-beuet kitab-kitab agama, ulon seumike ngon ulon tanueng bahwa meunurot nyang geu kheun le tuhan ubak nabi yeremia, banda yerusalem teutab reuloih nyang treb jih tujuh ploh thon. laju ulon meudoea deungon bit-bit ubak tuhan po teu allah, dan ulon lakee gaseh sayang gobnyan. ulon puasa dan ulon ngui ija krong sira ulon duek ateueh abee. banmandum desya bansa lon ulon meungaku dikeue po teu allah. kheun ulon, "tuhan allah, droeneuh lumpah that rayeuk, dan kamoe horeumat ubak droeneuh. droeneuh sabe neupeuteupat ubak janji droeneuh dan neutunyok gaseh droeneuh nyang abadi keu awaknyan nyang gaseh keu droeneuh dan jipeubuet peue nyang droeneuh peurintah. kamoe ka meudesya, ya allah, kamoe ka kamoe peubuet nyang jeuhet, dan kamoe peubuet buet nyang salah. kamoe ka kamoe beurontak dan kamoe iengkeue ubak peurintah droeneuh dan kamoe ka meusingang nibak peuratoran-peuratoran droeneuh. kamoe hana kamoe deungoe nyang geupeugah le nabi-nabi, hamba-hamba droeneuh nyan, nyang ka geumeutoteu ateueh nan droeneuh ubak raja-raja kamoe. ya tuhan, tindakan droeneuh sabe teupat dan ade, teuma kamoe sabe kamoe peuteuka malee ateueh droe kamoe, na kheuhen kamoe nyang bandum tinggai di yudea dan di yerusalem dan bandum ureueng nyang saboh bansa deungon kamoe nyang ka droeneuh peusiseu u nanggro- nanggro nyang jioh dan nyang rab sabab awaknyan hana seutia ubak droeneuh. raja-raja kamoe, bubena peumimpen kamoe dan indatu kamoe ka jipeubuet hai-hai nyang lumpah that malee dan ka meudesya ubak droeneuh, ya tuhan. droeneuh peunoh amphonan dan gaseh sayang, bahpi kamoe ka kamoe lawan droeneuh. kamoe hana teudeungoe su droeneuh, ya tuhan po teu allah kamoe, watee nyuyue ubak kamoe udeb meunurot hukum-hukum nyang ka neubri ubak kamoe meulalu nabi-nabi, hamba-hamba droeneuh nyan. bansaboh israel ka ji-iengkeue ubak hukum-hukum droeneuh dan hana jitem deungoe su droeneuh. kamoe meudesya ubak droeneuh, dan le sabab nyan droeneuh peurhot ateueh kamoe kutokan nyang teutuleh lam kitab nabi musa, hamba droeneuh. droeneuh meutindak teupat that lagee nyang ka droeneuh peujanji ubak kamoe dan ubak peunguasa kamoe. yerusalem ka droeneuh hukum leubeuh kreueh nibak banda toh mantong nyang na ateueh donya nyoe. peue mantong mala peutaka nyang ka teutuleh lam hukum nabi musa ka neupeturhot ateueh kamoe. teuma bahpi meunan, ya tuhan po teu allah kamoe, kamoe mantong cit kamoe tulak keu teupeugalak ate droeneuh. kamoe teutab hana kamoeteng tinggai desya-desya kamoe dan hana teuma kamoetem peurati ubak bandum

ajaran-ajaran droeneueh. droeneueh, ya tuhan allah kamoe, ka neuhukom kamoe deungon bala nyang ka droeneueh peusiab keu kamoe; tindakan droeneueh sabe teupat dan ade, teuma kamoe hana kamoe deungoe su droeneueh. ya, tuhan po teu allah kamoe, droeneueh ka neutunyok kuasa droeneueh deungon cara neuba umat droeneueh neupeuteubiet nibak nanggro meuse, dan kuasa droeneueh nyan mantong teutab teuingat. kamoe ka meudesya dan kamoe peubuet buet nyang salah. droeneueh ka neubila kamoe bak jamen ilee, sabab nyan kheueh bek kheueh neubeungeh le keu yerusalem, banda droeneueh keudroe, buket droeneueh nyang suci. le sabab desya kamoe dan keujeuhetan indatu kamoe, teuma bandum ureueng nyang na di silingka kamoe jikalon miyueb ateuh yerusalem dan ateuh umat droeneueh. ya allah kamoe, deungoe kheueh doa dan nyang kamoe lakee. peupuleh kheueh baet droeneueh nyang ka jipeuhanco nyan, neupeuket kheueh mangat banmandum ureueng jiteupeue bahwa droeneueh kheueh allah. deungoe kheueh kamoe, ya allah, pandang kheueh kamoe dan neungieng kheueh peundeuritan kamoe meunan cit deungon banda nyang rusak nyang jikheun deungon nan droeneueh. kamoe meudoa ubak droeneueh bukan meusabab jasa-jasa kamoe, teuma na kheueh droeneueh nyang peunoh gaseh sayang. tuhan, deungoe kheueh kamoe, peuamphon kheueh kamoe, peurati kheueh kamoe dan meutindak kheueh bubagaih! bek kheueh treb-treb, mangat bandum ureueng jiteupeue bahwa droeneueh kheueh allah. sabab yerusalem dan umat droeneueh na kheueh milek droeneueh nyang aula." ulon hana putoh meudoa dan lon meungaku ubak desya lon dan desya bansa lon israel, dan lon lakee ubak tuhan allah lon keu teupeupuleh rumoh gobnyan nyang suci. teungoh ulon meudoa, jibrail nyang ka ulon ngieng dalam keumalon ulon nyang masa ilee nyan, geupo ubak ulon. watee keujadian nyan ureueng laen teungoh jipeuseumah keureubeuen seupot. laju le jibrail geupeugah lagee nyoe, "he daniel, ulon keuneuk tulong gata keu lon peutrang kamoe ramaian nyan. watee gata tapeuphon meudoa ubak po teu allah, gobnyan geubri jaweueb. ulon teuka lonjak peusampoe sabab gobnyan geugaseh keu gata. nah, deungoe kheueh beuet-get watee ulon peutrang makna nyang teukalon nyan. tujuh goe tujuh ploh thon na kheueh masa nyang geupeuteutab le po teu allah keu teupeubeubaih bansa gata dan banda gata nyang suci nyan nibak desya dan keujeuhetan. banmandum desya geupeu amphon dan keuadelen nyang keukai geupudong, dan nyang teukalon dan ramaian nyan jeuet keunyataan, dan baet tuhan nyang suci nyan teubakti lom ubak tuhan. cetet kheueh dan peuphom kheueh nyoe: tujuh goe tujuh thon teuma jijak, phon saat geupeuteubiet peurintah keu teupudong lom yerusalem, sampoe teuka sidroe peumimpin nyang geutunyok le po teu allah. nyang treb jih tujuh goe nam ploh dua thon rot-rot dan kuta-kuta yerusalem teuma teupeugot lom, teuma masa nyan peunoh keusosahan. bak akhe masanyan peumimpin pilehan allah nyan teupoh mate, padahai jihnyan hana meusalah. dan teuka kheueh tantra

sidroe raja nyang teuga, laju geupeuhanco banda yerusalem meunan cit ngon baet tuhan. akhe jamen nyan teuka lagee ie raya nyang jiba prang dan keuhancoran, lagee nyang ka geupeuteutab le po teu allah. raja nyan geupeugot peujanjian nyang kong deungon ureueng rame nyang treb jih na tujuh thon. watee diteungoh-teungoh masanyan, gobnyan geupeupioh soe-soe nyang peuna keureubeuen dan peuseumahan. oh lheurehnyan sapue-peue nyang lumpah teumakot dan gli that nyang teupeugah keujeuhetan nyang peuhanco teuma teukeubah di baet tuhan dan teutab na disinan sampoe gobnyan nyang keubah disinan jitingkeh le keubinasan nyang ka geupeuteutab le po teu allah keu gobnyan." bak thon nyang keu lhee geumat peurintah le koresy ateuh nanggro persia, na saboh peusan geupeugah ubak daniel alias beltsazar. peusan nyan beutoi, teuma lumpah payah keu teupeuphom. watee teu useuha keu teupeu phom daniel geuteurimong keuteurangan keuhai makna peusan nyan lam saboh keumalon. bak watee nyan ulon teungoh meutapa lhee seun aleuhat peunoh. teungoh watee nyang lagee nyan hana ulon pajoh peunajoh nyang mangat atawa pi eungkot sie; hana ulon jieb anggo, meunan cit hana ulon seugot ok. bak tanggai dua ploh peuet buleuen nyang keuphon bakngk thon nyan, ulon teungoh ulon dong bak bineh krueng tigris nyang raya nyan. ulon tanggah u langet, laju leumah kalon sidroe ureueng nyang geungui peukayan nibak ija lineun dan talo keuieng nibak meuh murni. tuboh ureueng nyan meucahya muble-ble lagee peumata, ruman gobnyan trang lagee cahya kilat, dan mata gobnyan hu muble-ble lagee apui hu. jaroe dan gaki gobnyan meukilat lagee teumaga nyang teugeusok, dan su gobnyan teudeungoe lagee su ureueng subra. teuma ulon keudroe nyang na ngieng nyang teukalon nyan. ureueng-ureueng nyang na jak meusajan ngon ulon hana jinging, teuma awaknyan teumakot laju jiplueng sira jimusom. nyang na tinggai disinan teuma ulon sidroe, sira ulon peurati nyang teukalon deungon teukeujot nyan. ulon ka hana meudaya le dan ruman ulon laju pucat. watee ulon deungoe su gobnyan, laju ulon reubah dan pansan sampoe teudugom ateuh tanoh. oh lheurehnyan na jaroe nyang mat ulon dan laju ulon beudoh sira meutumpang nibak jaroe dan teutot ulon. malaikat nyan geupeugah ubak ulon, "daniel, gata geugaseh le po teu allah. beudoh kheueh neudong dan neudeungoe kheueh tutoe haba lon nyoe beuet-get. ulon nyoe ka geuyue jak ubak gata." watee geupeugah hainyan ubak ulon, laju ulon dong sira teutot lon yo meugam gam. laju geupeugah le malaikat nyan ubak ulon, "daniel, bek kheueh teumakot. allah ka deungoe doa gata yoh uroe phon gata cok keuputusan keu tapeumiyueb droe gata mangat bijaksana. ulon ka teuka sibagoe jak jaweueb doa gata. malaikat peulindong keurajeuen persia geulawan ulon nyang treb jih dua ploh sa uroe. laju malaikat mikail, sidroe lambawan peumimpin-peumimpin malaikat, teuka geujak tulong ulon. ulon tinggai gobnyan disideh, di persia. ulon teuka keu lon peujeuet gata bumuphom peue nyang singoh teujadi ateuh bansa gata. nyang deuh teukalon nyoe keuhai uroe ukeue." watee gobnyan geupeugah hai

nyan, ulon tukui dan hana jeuet lon peugah haba. oh ltheuhnyan malaikat nyang saban deungan manusia nyan geusunyueng jaroe gobnyan laju geucukeh nibak bibie ulon. ulon peugah ubak gobnyan, "teungku, nyang deuh ulon kalon nyoe keubit lumpah teumakot sampoe ulon hana meudaya meubacut pih. ulon lagee sidroe namiet nyang teudong dikeue amphon jih. panena mungken ulon peugah haba ubak teungku amphon? teunaga ulon ka hana le dan nafah ulon ka meusak." dan sigoe teuk gobnyan geucukeh ulon, dan laju teurasa teunaga ulon meutamah. gobnyan geupeugah, "allah geugaseh keu gata, sabab nyan bek kheueh gundah dan teumakot, jak keunoe, beuteuga kheueh!" teungoh geupeugah hai nyang lagee nyan, ulon teurasa leubeh teuga lom dan lon peugah, "neumariet laju, amphon, amphon ka neutamah teunaga ulon." laju gobnyan geujawueub, "peu kheueh tateupeue pakon ulon jak ubak gata? meukeusut jih na kheueh lon keuneuk peugah ubak gata peue nyang teutuleh didalam kitab keubeunaran. jinoenyoe ulon haroh lon gisa jak lawan malaikat peulindong di persia. oh ltheuhnyan malaikat peulindong yunani teuma teuka. hana nyang tulong ulon seulaen mikail, malaikat peulindong israel, nanggroe gata. gobnyan kheueh nyang bri tugaih keu geutulong dan geubila ulon bak thon nyang keuphon geumat peurintah le darius ureueng media nyan. dan peue nyang ulon peugah ubak gata na kheueh beuna." malaikat nyan geupeugah, "lhee droe raja teuk nyang peurintah persia, jiseutot le raja nyang keupeuet nyang leubeh kaya nibak nyang laen. bak pucak keukuasaan dan keukayaan jihnyan, jihnyan teuma meuada teunaga deungan keurajeuen yunani. oh ltheuhnyan teuka sidroe raja nyang peukasa. gobnyan jimat peurintah keurajeuen nyang lumpah raya dan jipeubuet ban galak droe. teuma nibak pucak keujayaan jihnyan, keurajeuen jihnyan beukah dan teubagi-bagi jeuet keudua bagian. raja-raja nyang kon keuturo-nan gobnyan jimat peurintah sibagoe geunantoe, dan awaknyan hana saban teuga lagee jihnyan. raja nanggroe seultan jeuet keuteuga. teuma sidroe lamkawan panglima-panglima awaknyan leubeh teuga nibak raja nyan, dan jihnyan jimat peurintah keurajeuen nyang leubeh raya. na padub thon oh ltheuh nyan raja nanggroe seultan jipeuna pakat mangat jeuet keureuja sama deungan raja di nanggroe utara dan jipeukawen putroe jihnyan deungan raja utara nyan. teuma keureuja sama nyan hana treb meuteun, dan putroe nyan jipoh mate, meunan cit deungan lakoe dan aneuk gobnyan dan namiet-namiet gobnyan nyang ka geu intat gobnyan. hana treb teuma oh ltheuh nyan, ureueng nyang saboh keuluwarga deungan putroe nyan jeuet keuraja. gobnyan jiprang raja nanggroe utara, jiseureubu kuta raja nyan dan jipeutaloe. bak watee jihnyan jigisa u nanggroe meuse, dan jiba sajan patong dewa musoh jihnyan dan peukakaih meuh dan pirak nyang ka jipeuseumah keu dewa nyan. na padub thon treb jih jihnyan hana jiprang raja nanggroe utara. oh ltheuhnyan raja nanggroe utara jiseureubu raja nanggroe seultan, teuma raja hase jihatpeung sampoe jisurot dan jiwoe u nanggroe jih keudroe. laju aneuk-aneuk agam raja nanggroe utara meusiab-siab keuneuk jimuprang dan ji-

lateh pasokan tantra nyang raya. sidroe lamkawan awaknyan jimaju jiseureubu lagee ie raya. nibak seureubu nyang keudua nyan laju jiheuntam kuta musoh. dan beungeh kheueh raja nanggroe seultan, dan gobnyan maju u mideuen prang geulawan raja nanggroe utara. jihnyan meuhase jipeutaloe pasokan tantra nyang leubeh raya nyang jikrah le raja nanggroe utara. oh ltheuhnyan jihnyan bangga sabab meunang di mideuen prang nyan dan lom teuma sabab ka jai that jipoh mate musoh, teuma jihnyan hana meukuasa sabe. keu nyang keu dua goe jih raja nanggroe utara geupeuna lom pasokan nyang raya, leubeh raya nibak pasokan nyang phon. meunoyoe watee jih ka teuka, jihnyan meugrak maju deungan pasokan nyang raya dan peuleungkapen nyang lumpah le. dan jai that ureueng nyang beurontak ateuh nanggroe seultan. dan na meupadub droe nyang keujam nibak bansa gata, daniel, beurontak teuma sabab awaknyan ka jinging sapeupeue nyang deuh teukalon. oh ltheuhnyan raja nanggroe utara jikeupong saboh banda nyang meupageu ngon kuta dan laju meuteume jireubot. tantra nanggroe seultan hana hase jipeuteun droe, dan pasokan-pasokan nyang pilehan jihnyan pih hana le jilawan. raja nanggroe utara nyan jipeubuet ban galak droe deungan hana meuteume peulawan meubacut pi. jihnyan pi jiteume duek bak tanoh nyang ceudah dan jikuasa tanoh nyan banmandum nyang na. oh ltheuhnyan raja nanggroe utara jipeusiab banmandum tantra keu jijak prang nanggroe seultan. dan deungan meukeusut keuneuk kuasa bandum keurajeuen musoh jihnyan, geuhnyan jipeuna peusitujuan deungan rajanyan dan jipeukawen aneuk inong jih deungan raja nanggroe meuse nyan; teuma reuncana jihnyan nyan hana meuhase. oh ka ltheuh nyan jihnyan jijak prang bansa-bansa nyang na bak bineh laot, dan jai that nyang jipeutaloe. teuma na sidroe peumimpin nanggroe aseng jiseutob buet meuhina nyang jipeubuet nyan, dan teuma jibalaih peuhinaan nyan keu gobnyan. raja nanggroe utara nyan jigisa ubak kuta-kuta jih keudroe, teuma raja nyan teupeutaloe dan hana le haba keuhai jihnyan. raja nyan jigantoe le sidroe raja nyang laen nyang jiyue peugawee jihnyan nyang keujam keu jiyue kuteb cukee deungan paksa mangat jeuet teutamah keukayaan keurajeuen jih. lam watee nyang paneuk raja nyan teupoh mate, bukan seucara trang-trang dan bukan teuma dimideuen prang." malaikat nyan geupeugah lom, "raja nyang seulanjut jih nyang mat peurintah di nanggroe utara na kheueh sidroe ureueng nyang hina nyang hana hak jeuet keuraja. teuma raja nyan teuka deungan hana teusangka-sangka dan jireubot keududuekan raja ngon tipee daya. bandum tantra nyan lawan jihnyan, bah kheueh nyan teungku imeum agong keudroe, habeh jisampoh dan ranab bube nyang na. raja jikhianat keu janji-janji jih nyang ban sagai jimeujanji deungan bansa-bansa laen. dan raja nyan seumaken teuga, bahpi raja nyan jimat peurintah ateuh nanggroe nyang ubit. deungan licek raja nyan jiseureubu daerah-daerah nyang gumbo dan subo tanoh jih, bak watee jidueb nibak tanoh nyang jireupah nyan meurasan aman disinan. jihnyan laju jipeubuet peue nyang gohlom

jipeubuet le indatu jih keudroe. laju jibagi-bagi keu bandum ureueng-ureueng nyang dukong jih peue-peue mantong barang nyang jireupah dan keukayaan nyang jiteume di mideuen prang. jihnyan jipeuget siasat keu jiprang teumpat-teumpat nyang meukuta, teuma watee jih karab that keuneuk habeh. oh lheurehnyan deungon beuhe laju jibina tantra nyang raya keu jijak prang raja-raja di nanggroe seulan nyang ka geusiab-siab teuma keuneuk jilawan jihnyan deungon tantra nyang teuga dan raya lumpah na. teuma raja nanggroe seulan hana hase jipeuteun droe sabab jihnyan jikhianat. peunaseuhat-peunaseuhat jihnyan nyang paleng rab deungon jihnyan teuma teupeurhot jihnyan. jai that-that tantra jihnyan nyang jipoh mate, dan tantra jihnyan teuma jisampoh gleh. oh lheurehnyan bandua droe raja nyan jiduek nibak saboh meuja dan jimakheun meusajan, teuma awaknyan na meukeusut jeuhet, dan awaknyan saleng meuseulet. teuma reucana awaknyan gagal sabab masa jih gohlom teuka. oh lheurehnyan raja nanggroe utara jiwoe u nanggroe jih deungon meubagoe jeuneh barang nyang jireupah di mideuen prang. jihnyan ka bulat ate keu jipeuhanco agama nyang jipaluek le umat po teu allah. jihnyan meubuet ban galak droe oh ka puiah ate jih baro kheueh jiwoe u nanggroe jih keudroe. na padub treb teuma oh lheureh nyan jihnyan jijak prang nanggroe seulan lom, teuma akibat jih laen nibak kali nyang phon. sabab ureueng-ureueng roma deungon kapai-kapai prang gobnyan teuka nibak siprus dan jijak prang jihnyan, sampoe jihnyan ka teuka teumakot. laju le jihnyan jiwoe deungon beungeh lagoena dan ji useuha keu jipeuhanco agama umat allah. jihnyan jisetroit naseuhat awaknyan nyang ka murtad nibak agama nyan. laju raja nyan jikirem pasokan-pasokan nyang jipeukuto baet tuhan. awaknyan jisampoh keureubeuen uroe-uroe dan geupeudong sapeupeue nyang keubit teumakot nyang teupeugah keujeuhetan nyang jipeuhanco. dan deungon tipee daya raja nyan jibujuk ureueng-ureueng nyang jitinggai agama droe jih, mangat jitem tulong jihnyan. teuma ureueng-ureueng taat ubak po teu allah jijeuet lawan raja nyan. ureueng-ureueng bijaksana nyang pimpin rakyat jipeujeuet rakyatba mangat muphom. teuma keu na padub watee treb jih, na padub droe lamkawan awaknyan mate keunong poh jisabab le prang atawa sabab tutong ngon apui, dan napadub droe teuk jireupah dan jiteuen. dan watee seumeupoh mate nyan teungoh teujadi, umat allah meuteumeu bacut bantuan, teuma jai that ureueng meugabong deungon awaknyan na kheueh keu keupeuntengan awaknyan keudroe. siladum nibak peumimpin nyang bijaksana nyan teupoh mate, teuma nyan na kheueh ujian keu umat sampoe awaknyan jeuet keu ureueng murni. hainyan trok hana putoh-putoh sampoe akhe jamen, na kheueh jamen nyang ka geupeuteutab le po teu allah. raja nanggroe utara jipeubuet ban galak ate jih. deungon sombong raja nyan jipeugah bahwa jihnyan leubeh rayeuk nibak dewa toh mantong, dan leubeh rayeuk nibak allah nyang mahamanyang. raja nyan hase jipeugah meunan sampoe meureuka po teu allah habeh. sabab peue nyan ka geupeuteutab le po teu allah haroh teupeubuet

leubeh dilee. raja nyan hana jipakoe ubak dewa toh mantong nyang jiseumah le indatu awaknyan, meunan cit ateuhe dewa nyang jiseumah le ureueng inong. raja nyan hana jipeureumeun ubak dewa-dewa nyan sabab jianggab droe jihnyan leubeh rayeuk nibak awaknyan. sikeubitji, raja nyan jihoreumat ubak dewa nyang gohlom sagai jiseumah le indatu jihnyan, nyan kheueh dewa peulindong kuta-kuta. raja nyan jipeuseumah meuh, pirak, peumata dan peuseumahan-peuseumahan meuwah nyang laen keu dewa nyang gohlom sagai jiseumah le indatu jihnyan. raja nyan jipileh ureueng-ureueng nyang seumah dewa aseng, keu jijak prang kuta-kuta nyang teuga. soemantong nyang peucaya ubak dewa nyan jibri keuhoreumatan nyang raya dan keududukan nyang manyang meusajan ngon tanoh sibagoe upah. meunyoe akhe keukuasaan raja nanggroe utara karab sampoe, raja nanggroe seulan jiprang jihnyan. laju le raja nanggroe utara jibalaih prang nyan deungon hebat that. raja nyan jikrah geuritan prang nyang lumpah jai, guda dan kapai prang. jihnyan jiseureubu lagee ie raya, jai that nanggroe nyang jiteume repah laju jiduek. meunan cit tanoh nyan ceudah hana tinggai nyan pih geuseureubu, dan meuploh-ploh ribee manusia jipoh mate. teuma keurajeuen-keurajeuen edom, moab dan bagian nyang paleng peunteng nibak nanggroe amon seulamet. bak watee jihnyan jiduek ubak keurajeuen-keurajeuen nyan, keurajeuen meuse pih hana tuwoe. jihnyan jireupah hareuta di nanggroe meuse misetu jih meuh dan pirak meunan cit deungon hareuta laen nyang paleng meuyuem. raja nyan jitulung le ureueng libia dan sudan. laju teuka haba di timu dan utara nyang lumpah teukeujot raja nyan, sampoe raja nyan jimuprang leubeh gura dan hana teukira manusia nyang jipoh mate. dan raja nyan jipeudong khimah keurajeuen jihnyan di lamkawan laot dan gunung teumpat baet tuhan. teuma oh lheureh nyan raja nyan mate dan hana meusidroe pih nyang tulong gobnyan." malaikat nyang geungui peukayan lineun nyan geupeugah lom, "bak saat nyan teuka malaikat rayeuk nyan nan geuh mikail peulindong bansa gata. oh lheureh nyan na masa nyang sulet nyang hana bandeng yoh phon that na bansa-bansa. teuma bandum ureueng nibak bansa gata nyang nan jihnyan teutuleh lam kitab al-lah, geupeuseulamat. jai that lamkawan awaknyan nyang ka mate udeb lom; siladum jirasa udeb nyang keukai, dan siladum teuk jirasa keuhinaan dan keubinaan nyang keukai teuma. dumna peumimpin nyang bijaksana meucahya lagee cahya langet. dan awaknyan nyang ka geupeurunoe ureueng rame peue nyang get dan nyang ade, meucahya lagee bintang di langet keu siumu masa." laju geupeugah lom le malaikat ubak ulon, "daniel, tatob kheueh kitab nyan phon saat nyoe, dan tacab kheueh ngon segee mangat teutab teutob sampoe akhe jamen. rame ureueng jicuba seulidek peue nyang teungoh teujadi. teuma useuha nyan sia-sia mantong." oh lheurehnyan ulon ngieng dua droe ureueng agam. nyang sidroe jidong bak bineh krueg rot blaih nyoe, dan nyang laen bak bineh rot blaih jeh. nyang sidroe jitanonyong ubak ureueng dong nyang leubeh rab deungon pucok krueg, "pajan kheueh keujadian-keujadian nyang ajaeb nyoe

meuakhe?" ureueng nyang laen nyan laju jibeutot ban-
dua blaih jaroe gobnyan ulanget. ulon deungoe ure-
ueng nyan jimeudok deumi po teu allah nyang keukai
dan jipeugah, "keujadian-keujadian nyan teuka nyang
treb jih na lhee siteungoh thon. oh ka lھےueh
keujadian ji ienanya ateueh umat allah nyang ke-
uneulھےueh, teuma tamat kھےueh teuma keujadian-
keujadian nyang ajaeb nyan." bandum nyang geupeu-
gah nyan beutoi na lon deungoe, teuma ulon hana lon
peuphom. laju ulon teumanyong, "amphon, pakriban
bandum nyoe keuneulھےueh?" gobnyan geujaweueh,
"tajak kھےueh jinoe, he daniel, sabab tutoe haba nyoe
haroh teusom dan teurahsia trok bak akhe jamen.
rame ureueng ji ujoe dan jipeu gleh. awaknyan nyang
jeuhet hana jimuphom dan teutab jipeubuet jeuhet;
teuma awaknyan nyang bijaksana nyang muphom.
nibak masa keureubeuen uroe-uroe nyan teupeupioh
dan sapeue-peue nyang lumpah gli ngon teumakot
nyang jipeugah keujeuhetan nyang jipeuhanco nyan
teupeudong, jipajoh watee 1.290 uroe. mubahgia
kھےueh awaknyan nyang tinggai sampoe bak uroe
nyang keu 1.335. gata daniel, seutia kھےueh sam-
poe bak akhe. gata meuninggai, teuma tabeudoh keu
tateurimong upah gata bak akhe jamen."

nibak thon nyang keu phon lam keurajeuen kores, raja persia tuhan laju geupeubet peue nyang ka lheureu geupegah ubak nabi yeremia. tuhan geupeumangat ate kores mangat jitem peuteubit saboh peurintah nyang jeuet teubaca di bansaboh nang-groe. asoe surat nyan na kheueh lagee nyoe: "nyoe kheueh titah kores, raja di nanggroe persia. tuhan, allah nyang mat kuasa di syeuruga ka geupeujeuet ulon raja di bansaboh donya, dan ka geubri tugaih keu ulon mangat jeuet lon peudong baet iebadat keu gobnyan di yerasalem di daerah yehuda. seumoga tuhan po teu allah geulindong gata banmandum nyang ka jeuet keu umat gobnyan. gata banmandum haroh tawoe u yerasalem dan tapeudong lom baet tuhan, alah israhel, allah nyang tinggai di yerasalem. meun-yoe na sidroe lamkawan umat gobnyan di teumput nyang teuboih nyoe nyang peureulee bantuan mangat hase geuwoe, dan kawom silingka jih nyan haroh teubri bantuan nyan. awaknyan haroh geubri keu ureueng nyang woe nyan pirak dan meuh, keubeukai nibak rot ueh raya, meunan cit deungon beulatang nyang peudieng barang, dan meunan cit deungon peuseumahan-peuseumahan keu baet tuhan di yerasalem." oh lheurehnyan bubena ulee kawom nibak sukee yehuda dan benyamin, bubena teungku imeum dan ureueng-ureueng lewi, dan somantong ureueng nyang ate jih ka geupeugrak le po teu allah, laju jimeukeumaih-keumaih keu jijakwoe u yerasalem dan jipeudong lom baet tuhan. banmandum kawom lingka gobnyan meusajan-sajan jibantu sira jijo peue mantong bantuan nyang hase jibri, miseu jih lagee peukakaih-peukakaih pirak dan meuh, beukai nibak rot ueh, beulatang teumput peudieng barang, dan hareuta beunda nyang laen dan peuseumahan-peuseumahan keu baet tuhan. raja kores geupeuteubiet laju cambong-cambong dan cawan-cawan nyang yohmasa ilee teupeuguna dalam baet tuhan di yerasalem. barang-barang nyan ka jiangkot le raja nebukadnezar dan jikeubah didalam kuil-kuil dewa gobnyan keudroe. kores geuseurah urosan beunda-beunda nyan ubak mitredat, ulee peumbeundaharaan keurajeuen. oh lheureh nyan mitredat laju geupeugot saboh dafearar keuhai barang-barang nyan keu sesbazar, gubunur yehuda. nyoe kheueh dafearar barang-barang nyan: banmandum nyan na jeumeulah jih 5.400 boh cambong meuh dan pirak teutamah teuma deungon barang-barang nyang laen. banmandum nyan geuba le sesbazar bakwatee gobnyan dan ureueng-ureueng nyang teuboih laen geubeurangkat di babel u yerasalem. rame that-that lamkawan ureueng nyang teuboih jitinggai babel dan jiwoe u yerasalem dan yehuda, maseng-maseng u banda jih keudroe. awaknyan ka udeb nibak teumput nyang teuboih di babel yoh phon that awaknyan jiangkot keudeh le raja nebukadnezar. peumimpen-peumimpen awaknyan na kheueh zerubabel, yesua, nehemia, seraya, reelaya, mordekhai, bilsan, mispar, bigwai, rehum dam baana. nyoe kheueh dafearar kawom keuluwarga israhel, deungon jeumeulah ureueng nibak tieb-tieb kawom nyang ka jiwoe nibak teumput nyang teuboih: kawom keuluwarga paros – sefaca – arah – pahat-moab (keuturonan yesua dan yoab) – elam – zatu – zakai – bani – bebai – azgad –

adonikam – bigwai – adin – ater (teuhoi cit deungon nan hizkia) – bezai – yora – hasum – gibar – ureueng-ureueng nyang indatu jih tinggai di banda-banda nyang teupeugah lom nyoe na kheueh: netofa – anatot – asmawet – kiryat-arim, kefira dan beerot – rama dan gaba – mikhmas – betel dan ai – nebo – magbis – elam nyang laen – harim – lod, hadid dan ono – yerikho – senaa – nyoe kheueh teuma dafearar wareh kawom teungku-teungku imeum nyang jiwoe nibak teumput nyang teuboih: imer – pasyhur – harim – kawom keuluwarga lewi nyang geuwo nibak teumput nyang teuboih na kheueh lageenyo: ureueng nyang meuca-e di baet tuhan ureueng nyang jaga babah pintoe geureubang di baet tuhan nyoe kheueh dafearar kawom keuluwarga nyang meutugaih di baet tuhan nyang ka geuwoe nibak teumput nyang teuboih: ziha, hasufa, tabaot, keros, siaha, padon, lebana, hagaba, akub, hagab, samlai, hanan, gidel, gahar, reaya, rezin, nekoda, gazam, uza, paseah, besai, asna, meunim, nefusim, bakbuk, hakufa, harhur, bazlut, mehida, harsa, barkos, sisera, temah, neziha dan hafifa. kawom keuluwarga deundayang nabi sulaiman nyang woe na kheueh lageenyo: sotai, soferet, peruda, yaala, darkon, gidel, sefaca, hatil, pokheret-hazebaim dan ami. kawom keuluwarga nyang meutugaih di baet tuhan dan ureueng deundayang nabi sulaiman nyang woe nibak teumput nyang teuboih na jeumeulah jih 392 droe. ureueng-ureueng nyang beurangkat nibak banda-banda di tel-melah, tel-harsa, kerub, adan dan imer na jeumeulah 652 droe. awaknyan banmandum ka jitamong kawom keuluwarga delaya, tobias dan nekoda, teuma awaknyan hana hase jipeudeuh bukeuti bahwa droe jih nyan na kheueh keuturonan bansa israhel. meunan cit deungon na padub boh kawom nibak keuluwarga teungku imeum nyan hana teuma hase jipeuleumah bukeuti atawa hana jiteume catetan keuhai indatu droe awaknyan, na kheueh kawom keuluwarga habaya, hawks, dan barzilai. (indatu kawom barzilai jimeukawen deungon sidroe ureueng inong nibak kawom barzilai di gilead, dan oh lheurehnyan di gobnyan jipeuguna laju nan tuwan jih.) sabab awaknyan hana hase jipeuleumah bukeuti soe indatu jihnyan, le sababnyan teuma awaknyan hana hase teuteurimong sibagoe teungku imeum. gubunur nyang meutugaih di daerah yehuda geutam awaknyan mangat bek jipajoh sam-poe beuna sidroe teungku imeum nyang hase geubri peutunok deungon cara teungui urim dam tumim. ureueng-ureueng nyang teuboih nyang ka jiwoe u nanggroe jih na jeumeulah 42.360 droe. seulaen nibak nyan jeumeulah ureueng peumbantu awaknyan na 7.337 droe dan ureueng meuca-e na teuma 200 droe. dan awaknyan na teuma jiba sajan beulatang-beulatang peulara awaknyan lageenyo: bagal – unta – keuleudee – watee ureueng-ureueng nyang teuboih nyan ka trok u baet tuhan di yerasalem, na meupadubdroe peumimpen kawom jijok laju peuseumahan keu galak droe mangat jeuet teupeudong lom baet tuhan. awaknyan jijok sumbangan meunuror keumampuan jih maseng-maseng dan hase jih na kheueh 500 kilogram meuh, 2.800 kilogram pirak, dan 100 boh bajee jubah keu teungku-teungku

imeum. bubena teungku imeum, ureueng-ureueng lewi dan siladam nibak rakyat jitinggai teutab di yerusalem dan di banda-banda nyang rab deungon nyan. ureueng-ureueng nyang tugaih jih meuca-e, ureueng nyang tugaih jih jijaga babah pintoe baet tuhan dan ureueng nyang meubuet di baet tuhan dan ureueng-ureueng israel nyang leueh nibak awaknyan jitinggai teutab di banda-banda teumpat tinggai indatu awaknyan yohmasa ilee. bak buleuen nyang keutujuh, ureueng-ureueng israel ka tinggai teutab di banda jihnyan maseng-maseng. bak tanggai sa buleuen nyan awaknyan jimeusapat di yerusalem, laju le yesua bin yozadak meunan cit deungon rakan-rakan gobnyan bubena teungku imeum dan zerubabel aneuk sealtiel meunan cit deungon kawom syedara gobnyan, jipeudong lom miseubah po teu allah israel. deungon na lageenyan awaknyan ka jeuet jitot keureubeuen lom di ateuh miseubah nyan, nyang paih deungon peutunok-peutunok nyang na teutuleh didalam kitab hukom nabi musa, hamba allah nyan. bahpi awaknyan jitakot keu peunduduek nyang na di nanggroe nyan, teuma awaknyan teutab cit jipeudong miseubah nyan di teumpat phon teupeudong. dan deungon na nyang lageenyan awaknyan laju jipeuphon lom jipeuseumah keureubeuen nyang teutot, bah kheueh nyan oh watee beungoh meunan cit oh watee seupot uroe. meunan cit awaknyan jipeuna uroe raya jambo on, nyang paih deungon peuraton nyang ka teupeuteutab keu nyan; dan tieb-tieb uroe jipeuseumah keureubeuen nyang ka teupeuteutab nibak uroenyan. seulaen nibaknyan awaknyan seucara teuato jipeuseumah teuma keureubeuen nyang teutot meunan cit deungon keureubeuen uroe raya buleuen baro, dan keu banmandum uroe raya nyang laen nyang teupeuna keu teuseumah tuhan. meunan cit awaknyan jipeuseumah teuma keureubeuen keugalak ate ubak tuhan. bahpi baet tuhan gohlom teupeuphon peudong lom, teuma nibak tanggai sa buleuen tujuh rakyat ka jipeuphon tot keureubeuen keu tuhan. rakyat laju jijok sumbangan peng guna keu upah utoi kayeengon utoi batee. meunan cit le rakyat hana jituwoe jikirem peunajoh deungon ie jieib, meunan cit deungon minyeuk zaiton u banda-banda tirus dan banda sidon guna jih mangat teutuka deungon kayee ceumara libanon nyang na di banda-banda nyan. kayeenyan laju jiba u yafu meulalu laot. banmandum nyang geupeubuet le rakyat deungon na idhin nibak kores, raja persia. dan nibak buleuen nyang keudua, nibak thon nyang keudua oh ka ltheueh ureueng israel jiwoe u yerusalem, jipeuphon kheueh le awaknyan jipeudong lom baet tuhan. zerubabel, yesua dan rakan-rakan gobnyan nyang saboh bansa, bubena teungku imeum, ureueng lewi, paneuk haba, banmandum ureueng nyan beukaih nyang teuboih, banmandum meukeureuja. ureueng-ureueng lewi nyang meu-umu 20 thon u ateuh geutunok mangat jeuet keumando nibak seumeugot baet tuhan nyan. dan yesua, ureueng lewi nyan, meusajan deungon aneuk-aneuk syedara gobnyan, dan meunan cit deungon kadwiel deungon aneuk-aneuk gobnyan cit teuma (kawom hodawya) meusajan-sajan jikawai nibak teumpat teupeugot baet tuhan nyan. awaknyan

jibantu le ureueng lewi nibak kawom henadad. nibak watee ureueng-ureueng nyang meubuet bangunan ka jipeuphon peudong keunaleueng baet tuhan, le teungku imeum nyang meupeukayan jubah sira geumat beureuguih nibak jaroe laju geucok teumpat maseng-maseng. meunan cit deungon ureueng-ureueng lewi nibak kawom asaf ka teudong disinan sira jimat nibak jaroe gobnyan maseng-maseng saboh gong ubit. awaknyan laju geumeurateb sira jipuja pujo ubak tuhan sisuai deungon peuraton nyang ka geupeuteutab yoh mantong udeb nabi daud. rakyat jimeuca-e ngon nyanyoe puja dan pujo ubak tuhan, sira julang-ulang nibak bareh keuneulheuh, meunoe kheueh su cae nyan, "tuhan nyan lumpah that jroh; dan geunaseh gobnyan keu israel keukai dan abadi." banmandum rakyat jiseumurak ngon gumbira sira jipujo tuhan, sabab keunaleueng baet tuhan ka jipeuphon keubah teuma. le that that lamkawan teungku-teungku imeum, ureueng-ureueng lewi, dan ulee-ulee kawom nyang ka tuha-tuha umu jih ka ltheueh jikalon baet tuhan yoh masa ilee. yoh watee jingingi teupeuduek keunaleueng baet tuhan nyang na jinoo, laju jimo ba-e ngon su nyang teuga. teuma ureueng-ureueng nyang laen nyang na teuka disinan jiseumurak meuhubo sabab gumbira mangat that ate, sampoe hana hase le teubeuda ureueng mo deungon ureueng seumurak. su jih pih lumpah that meudeungkeng, sampoe teudeungoe jioh nyang meutaga. haba keuhai ureueng-ureueng nyang ka jiwoe nibak teumpat teuboih nyang teungoh jipeudong baet tuhan, allah israel, laju teudeungoe le musoh ureueng yehuda dan benyamin. sababnyan awaknyan laju jijak meurumpok deungon zerubabel dan bubena ulee-ulee kawom, oh ka meurumpok ngon awaknyan laju jiusui nyang lageenyo, "tapeu idhin kheueh ubak kamoe mangat kamoe pih hase kamoe jak meusajan watee teupeudong baet tuhan nyan, sabab dikamoe pih meubakti ubak tuhan po teu allah syedara, saban cit lagee syedara banmandum. kamoe sabe kamoe peuseumah keureubeuen keu gobnyan yoh phon watee esar-hadon, raja asyur nyang ba kamoe keunoe." teuma zerubabel, yesua dan ulee-ulee kawom nyan geujaweueb, "kamoe hana peureulee gata bantu keu kamoe peudong baet tuhan, allah kamoe. bah kheueh kamoe peudong keudroe lagee nyang geupeurintah le kores, raja persia, ubak kamoe." oh ltheuehnyan peunduduek nyang ka treb tinggai di nanggroe nyan ka jipeuphon peuleumoh seumangat ureueng yahudi dan jipeutakot-takot awaknyan mangat jeuet baet tuhan nyang teungoh jipeugot nyan bek jeuet teupeugot. awaknyan laju jisugok peujabat-peujabat peumeurintah persia mangat geuyee pioh jipeugot baet tuhan nyan dan geupeubatee reuncana ureueng yahudi nyan. hainyan laju meulanjut simantong keurajeuen bak jaroe raja kores sampoe ubak keurajeuen geumat le raja darius. bak awaiphon peumeurintah raja ahasweros, musoh-musoh peunduduek yerusalem dan yehuda laju geutuleh surat gugatan. meunan cit nibak zamen keurajeuen artahasta, kaisar persia, keujadian nyan meu-ulang lom: bislam, mitredat, tabel dan rakan-rakan awaknyan jituleh surat ubak raja. suratnyan jituleh dalam basa aram, dan haroh jiteujeumah bak

watee geubaca. meunan cit le artahsasta na teuma geuteurimong surat keuhai yerasalem. suratnyan geukirem le gubunur rehum dan simasai seukeutareh propinsi dan jibantu le rakan-rakan awaknyan, na kheueh le hakem dan banmandum peujabat persia nyang laen nyang asai jih nibak erekh, babel, dan susan di nanggroe elam, meunan cit le bansa-bansa laen nyang ka geuangkot le asnapar nyang agong dan jiyue tinggai teutab di banda samaria dan di banda-banda nyang laen lam propinsi efrat barat. meunoe su surat nyan, "ukeue nyang mulia raja artahsasta, nibak kamoe bubena hamba teungku amphon nyang tinggai di efrat barat. saleuem. bah kheueh teungku amphon neumaklum, bahwa ureueng yahudi nyang ka jitinggai di wilayah-wilayah nyang laen didalam keurajeuen teungku amphon, jinoenyoe jitinggai teutab di yerasalem dan teungoh jipeudong lom banda nyang juehut dan galak that jibeurontak. awaknyan ka jipeuphon lom jipeudong binteh-binteh beuton dan hana treb le ka seulesoe jipeugot atra nyan. meunyeo banda nyan ka seulesoe jipeudong lom dan binteh-binteh beuton nyan ka ltheueh jipeudong, peunduduek nyang na tinggai disinan hana jitemle jibayue cukee, dan deungon na nyang lageenyan hase nibak cukee keu keurajeuen akhe jih meukureueng. kamoe ka meu-utang budoe ubak teungku amphon dan hana ek kamoe ngieng meunyeo teungku amphon jipeurugoe, le sababnyan, kamoe usui ubak teungku amphon, mangat teungku amphon neuyue pareksa surat-surat peutinggai indatu teungku amphon. nibak asoe surat tinggai nyan teungku amphon teuma neuteupeue bahwa banda yerasalem keubit galak that jibeurontak dan yohphon ilee sabe jipeurugoe soemantong raja nyang mat peurintah ateuheh propinsi nyan. peunduduek disinan sabe payah that teupimpen. nyang kheueh sabab jih banda nyan ka geupeuhanco. nyang kheueh, kamoe yaken that, meunyeo banda nyan jipeudong lom dan binteh-binteh beuton jipeudong teuma, teungku amphon hana meuhase le neukuasa propinsi efrat barat nyoe." raja laju geukirem jeunaweueh geuh lageenye, "keu gubunur rehum dan simasai seukeutareh propinsi, meunan cit deungon rakan-rakan awaknyan nyang na tinggai di samaria dan di banda-banda nyang laen nyang na tinggai di propinsi efrat barat. saleuem. surat nyang ka ltheueh gatanoye kirem ka ltheueh jiteujeumah dan jibaca dikeue ulon. dan ateuheh peurintah ulon ka ulon yue seulidek, dan keubit na bukeuti phon yoh jamen ilee yerasalem sabe jilawan kuasa raja-raja dan le lamkawan peunduduek jih na kheueh peumbeurontak dan nyang kayem that ji peuna karu. ka ltheueh le raja-raja nyang peukasa geupeurintah ateuheh propinsi efrat barat dan bansabohnyan dan jipeuna cukee ngon upeti. sabab nyan, tapeutreun kheueh peurintah mangat tayue pioh buet nyang teungoh jikeureuja le awaknyan, mangat banda nyan bek jipeudong le sampoe ulon peutron peurintah-peurintah nyang laen. tapeubuet laju peurintah nyang ka ulon titah nyoe mangat bek meutamah geuhon le beuban ulon! meunan ltheueh geubaca dikeue rehum, simasai dan rakan-rakan awaknyan surat nyang teuka nibak raja artahsasta nyan, jijak laju awaknyan u yerasalem dan ji-

paksa ureueng yahudi mangat bek jipeudong le banda nyan. keuhai teupeubuet baet tuhan ka geupeupioh dan hana jikeureuja sampoe nibak thon nyang keudua keurajeuen darius raja persia. nibak wateenyan na dua droe nabi, maseng-maseng nan nabi nyan nabi hagai dan nabi zakharía bin ido, ban dua nabi nyan ka geupeuphon peugah haba ateuheh nan po teu allah israel ubak ureueng yahudi nyang na tinggai di yehuda dan yerasalem. ban geudeungoe peusan dua droe nabi nyan zerubabel bin sealtiel dan yesua bin yozadak bagaih-bagaih jijak peudong lom baet tuhan di yerasalem, geubantu le bandua droe nabi nyan. teuma tatnai, gubunur propinsi efrat-barat, meusajan deungon syetar-boznai dan rakan-rakan awaknyan bagaih-bagaih jijak u yerasalem dan jitanyong ubak ureueng yahudi, "soe ureueng nyang yue gata sampoe gata peudong dan gata peuleungkab rumoh iebadat nyoe?" dan awaknyan jitanyong cit nan-nan ureueng nyang ka jitulong peugot baet tuhan nyan. teuma po teu allah teutab geupeurati dan geulindong peumimpen-peumimpen yahudi nyan, deungon nyan le peujabat-peujabat persia hana jipeukaru sigohlom awaknyan jikirem surat ubak darius dan geuteurimong jeunaweueh jih. nyoe kheueh laporan nyang awaknyan kirem ubak raja. "ukeue nyang mulia raja darius. seumoga teungku amphon neumat peurintah deungon seujahteura! kira jih teungku amphon neumaklum, bahwa kamoe ka kamoe jak u propinsi yehuda, disinan kamoe kalon bahwa baet tuhan, allah nyang raya, teungoh jipeudong lom deungon batee-batee nyang raya dan binteh-binteh beuton nyang meulapeh deungon kayee. buet nyang jipeubuet bit-bit deungon that teuliti dan hana halangan sapeue. oh ltheuehnyan kamoe tanyong ubak peumimpen bansa nyan, soe nyang ka jok idhin ubak awaknyan keu jipeudong lom rumoh iebadat nyan dan jipeuleungkab oh sampoereuna. meunan cit kamoe tanyong teuma nan-nan awaknyan mangat hase kamoe britee ubak teungku amphon soe mantong nyang jueut keu ulee nibak buet nyan. jijaweueh le awaknyan, "kamoe nyoe na kheueh hamba po teu allah nyang mat kuasa ateuheh alam seumeusta. kamoe teungoh kamoe peudong lom baet tuhan nyang teupeudong dan teupeuleungkab meuploh-ploh thon nyang ka ltheueh le sidroe raja israel nyang agong. teuma le sabab indatu kamoe ka geupeumeureuka ubak po teu allah nyang mat kuasa di syeuruga, nyang kheueh sabab jih gobnyan geuseurah awaknyan ubak keukuasaan neubukadnezar, raja babel nibak keuturonan kasdim. raja nyan ka geupeuhanco baet nyan dan laju geuangkot bansa kamoe u babel. oh ltheuehnyan kores jueut keuraja babel dan nibak thon nyang phon lam peumeurintahan gobnyan, raja nyan laju geupeutren peurintah mangat teupeudong lom baet tuhan nyan. dan kon nyan mantong, banmandum peukakaih-peukakaih meuh dan pirak nyang teupeuguna di dalam baet tuhan jijak pulang meunan cit nyang geucok di yerasalem le nebukadnezar laju geupeutamong u dalam kuil di babel. peukakaih-peukakaih nyang geubri le raja kores keu ureueng nyan nan jih sesbazar, nyang ka geuangkat jueut keugubunur yehuda. raja geuyue ubak gobnyan mangat jicok peukakaih-peukakaih nyan dan geuyue woe

atra nyan u baet tuhan di yerusalem, dan geuyue peudong lom baet nyan. dan teuka kheueh laju sesbazar u yerusalem, laju geupeuduek sandi baet tuhan nyan. yoh phon wateenyan sampoe an jinoo peumbangunan baet tuhan nyan teutab hana jipioh, teuma gohlom cit seulesoe'. meunyo teungku amphon neubri idhin, kamoe usui mangat teuseulidek didalam surat arsib keurajeuen di babel. deungon na lageenyan ka hase tateupeue peu kheueh beutoi na peurintah raja kores keu jipeudong lom baet tuhan di yerusalem nyoe. oh ltheuehnyan kamoe lakee haba keuhai keuputosan teungku amphon keu peukara nyan." oh ltheuehnyan ateueh peurintah raja darius, laju teupeuna seulidek didalam surat arsib keurajeuen nyang na teukeubah di babel. teuma catetan keuhai nyan bukan meuteume di babel, teuma di banda ahmeta di daerah media. catetan nyan teutuleh nibak saboh geunulong surat nyang su jih lageenyo, "bak thon nyang keuphon nibak peumeurintahan raja kores, gobnyan geupeuteubiet peurintah mangat jeuet baet tuhan di yerusalem teupeudong lom sibago teupat ureueng jiba peuseumahan dan teupat tot keureubeuen. manyang baet nyan 27 metee dan luwah jih 27 metee cit. binteh-binteh jih haroh teupeugot lagee nyang teupeugah nyoe: di ateueh tiebtieb lhee boh lapeh batee haroh teupasang silapeh kayee. biaya jih jitanggong le kaih keurajeuen. meunan cit deungon peukakaih-peukakaih meuh dan pirak nyang teupeuguna di baet tuhan dan nyang teucok di yerusalem le raja nebukadnezar dan geuangkot u babel, nyan haroh teupeuriwang ubak teupat jih lagee sot nyang ka." tuhan nyan teupeugot laju oh ltheuehnyan le raja darius geukirem laju haba nyang lageenyo, "ubak tatnai, gubunur propinsi efrat barat, dan syetar-boznai, meunan cit keu bubena peujabat di efrat barat. bek gata peukaru ureueng-ureueng yahudi nyan, dan bek teuma gatatam awaknyan meunyo jipeugot rumah ibadah droe jih. peubiyemantong gubunur yehuda dan peumimpin yahudi jipeudong lom rumah nyan. ltheueh nyan, ulon peurintah ubak banmandum syedara mangat neutulong awaknyan nibak buet teupeudong lom bangunan nyan deungon cara lageenyo: banmandum biaya bangunan haroh teucok nibak hase cukee nanggroe nyang teukuteb nibak rakyat di propinsi efrat barat dan gata bayeue bubagaih keu ureueng-ureueng nyan bek gata teun-teun. seulaen nibaknyan peue mantong nyang jipeureulee meunurot nyang geupeugah le teungku imeum di yerusalem, lagee miseujih geulakee leumo agam nyang mantong muda, bubiri agam dan aneuek bubiri keu keureubeuen teupeuseumah ubak po teu allah nyang mat kuasa didalam syeuruga, meunan cit deungon gandom, sira, anggo dan minyeuk zaiton, nyan banmandum haroh tabri keu awaknyan tieb-tieb uroe dan hanjeuet gata peu ayeum-ayeum. gata peubuet kheueh banmandum nyan mangat awaknyan hase jipeuseumah keureubeuen nyang teupeugalak ate allah nyang na didalam syeuruga, dan mangat awaknyan jilakee beureukat keu ulon dan keu banmandum aneuek agam ulon. ulon peurintah teuma somantong ureueng nyang jilanggeh ubak peurintah nyoe nibak rumah ureueng nyan teulot saboh tameh, teupeucincu

nibak ujung jih, dan laju teutob ateueh tuboh ureueng nyan sampoe mate. dan rumah nyan haroh teuma teureuloih oh ltheuehnyan teupeujeuet keuteupat boih bloh. seumoga allah nyang ka geupileh yerusalem sibago teupat teuseumah gobnyan, geupeubinaso somantong raja atawa bansa nyang jijeuet iengkeue ubak peurintah nyoe dan jicuba jikeuneuk peuhanco baet tuhan di yerusalem nyan. ulon, raja darius, ka ulon peutron peurintah nyoe. tapeubuet kheueh deungon siget-giget jih." peue nyang ka geupeurintah le raja darius nyan geupeubuet laju deungon ate-ate that le tatnai, gubunur efrat barat nyan, meunan cit le syetar-boznai dan rakan-rakan gobnyan. geutulung teuma nabi hagai dan nabi zakaria, le dumna peumimpin yahudi laju geupeuseuleusoe geupeugot baet tuhan nyan. awaknyan bagaih-bagaih geupeugot baet tuhan nyan paih lagee peurintah allah israel dan peurintah kores, darius dan artahsasta, raja-raja persia nyan. baet tuhan nyan seulesoe nibak tanggai lhee buleuen adar bak thon nyang keunam keurajeuen raja darius. oh ltheuehnyan, di ureueng israel deungon ate nyang galak that-that, meunan cit di teungku imeum dan ureueng-ureueng lewi dan banmandum ureueng woe nyang ka ltheueh teuboih jikak reuseumi baet tuhan nyan. bak wateenyan awaknyan jipeuseumah ubak tuhan na 100 boh leumo agam, 200 boh bubiri agam dan na 400 boh aneuek bubiri. keu keureubeuen teupeu amphon desya, teupeuseumah teuma 12 boh kameng agam, saboh sapo keu tieb-tieb sukee israel. oh ltheuehnyan keu teumeubuat lam baet tuhan awaknyan laju jisuson kawom-kawom teungku-teungku imeum meunan cit deungon ureueng-ureueng lewi meunurot peuratoran nyang na teutuleh didalam kitab nabi musa. bak tanggai peuet blaih buleuen sa thon nyang oh ltheueh nyan, ureueng-ureueng nyang ka jiwoe nibak teupat teuboih, laju jipeuna peurayaan paskah. banmandum teungku imeum dan ureueng lewi ka geupeuna upacara teupeugleh droe sampoe ka teuanggab gleh. oh ltheuehnyan di ureueng-ureueng lewi laju geusie beulatang peulara keu keureubeuen paskah keu teungku imeum, keu gobnyan keudroe dan banmandum ureueng nyang beukaih teuboih nyang laen nyan teuma. banmandum keureubeuen nyan jipajoh le ureueng israel nyang ka jiwoe nibak teupat teuboih dan peunduduek nanggroe nyan nyang ka jitiek cara udeb nyang peunoh deungon desya dan jiteuka keujikak meubakti ubak tuhan, allah israel. na tujoh uroe treb jih awaknyan deungon geumbira jipeuna khanuri ruti nyang hana meurago. awaknyan banmandum galak sabab tuhan ka geupeujeuet raja asyur meumurah ate ubak awaknyan, sampoe geutem tulung awaknyan teupeudong lom baet tuhan, allah israel. meuthon-thon teuma oh ltheueh nyan, bak watee artahsasta geumat peurintah sibago raja persia, na sidroe ureueng agam nyang nan geuh ezra, gobnyan nibak keuturonan teungku imeum agong nabi harun. gareh keuturonan gobnyan phon di miyueb u ateueh na kheueh lageenyo: ezra seraya azarya hilkia salum zadok ahitub amarya azarya merayot zerahya uzi buki abisia pinehas eleazar teungku imeum agong nabi harun ezra na kheueh sidroe ureueng nyang malem dan gobnyan geuteu-

peue that keuhai hukom nyang geupeutron le tuhan po teu allah israhel ubak nabi musa. sabab ezra geubri beureukat le tuhan allah gobnyan, dan diraja pi hana geupeu kliet peue nyang geulakee le gobnyan geujok laju. bak thon nyang keutujuh geumat keurajeuen le raja artahsasta, geujak kheueh ezra nibak babel u yerusalem meusajan deungon saboh kawan ureueng israel nyang meubagoe ragam ureueng jih, na teungku-teungku imeum, ureueng lewi, ureueng meuca-e meunan cit deungon ureueng nyang meutugaih nibak babah pintoe geureubang baet tuhan, dan ureueng-ureueng meukeureuja. awaknyan jitinggai babel nibak tanggai sa buleuen sa dan deungon tulong po teu allah, trok kheueh awaknyan u yerusalem deungon sealamat nibak tanggai sa buleuen limong. ezra ka geucurah sigala peuratian gobnyan ubak teuseulidek hukom-hukom tuhan, seulaen keu geupeubuet keudroe, geupeubeuet teuma hukom-hukom nyan ubak bansa israel. nyoe kheueh dokumen nyang geubri le raja artahsasta ubak ezra, sidroe teungku imeum nyang malem keuhai hukom. "nibak raja artahsasta keu teungku imeum ezra, ureueng nyang malem nibak hukom allah nyang mat kuasa di dalam syeuruga. ulon peurintah bahwa banmandum teungku imeum, ureueng lewi dan ureueng israel nyang laen dipat mantong didalam keurajeuen ulon, nyang na meuheuet keuneuk jak u yerusalem, ulon bri idhin jijak deungon gata. sabab ulon dan ban tujuh droe peunaseuhat ulon teu utoh gata u yerusalem dan yehuda mangat teujak seulidek keuadaan disinan dan teungieng peu kheueh hukom allah nyang ka teupeucaya keu gata, bit-bit tataat. ulon dan peunaseuhat ulon keuneuk peuseumah meuh dan pirak ubak allah israel, allah nyang tinggai di yerusalem. taba kheueh peuseumahan kamoe nyan. meunan cit taba kheueh teuma banmandum meuh dan pirak nyang ka gata peusapat bansaboh nanggroe babel dan peue mantong sumbangan bansa israel meunan cit deungon teungku-teungku imeum gobnyan keu baet tuhan allah awaknyan di yerusalem. gata peuguna kheueh peng nyan deungon hemat mangat tateume bloe leumo agam, bubiri agam, aneuk bubiri, gandom dan anggo. gata peuseumah kheueh banmandum nyan di ateuheh miseubah baet tuhan di yerusalem. pirak dan meuh nyang na mantong leubeh jeuet gata peuguna keu gata keudroe dan rakan-rakan gata, nyang sisuai deungon keuheundak po teu allah gata. gata jok kheueh ubak allah di yerusalem peue mantong peukakaih nyang geubri keu gata keuteu semayang di baet allah. dan peue mantong peureulee nyang laen di baet tuhan, jeuet gata lakee nibak kaih keurajeuen. meunan cit keu banmandum nyang mat kaih keurajeuen di propinsi efrat barat, ulon peurintah mangat jeuet peue mantong nyang geulakee le teungku imeum ezra, nyang that-that malem keuhai hukom allah nyang meukuasa lam syeuruga, gata jok laju ubak gobnyan beureujang-reujang, dan sampoe trok ubak jeumeulah sidubnyoe le: pirak trok 3.400 kilogram, gandom 10.000 kilogram, ie anggo 2.000 aree, minyeuk zaiton 2.000 aree, dan sira sidub nyang teupeureulee. beu ate-ate dan ceureumat kheueh peue-peue mantong nyang geupeureulee le allah nyang mat kuasa lam syeuruga keu baet gob-

nyan, mangat jeuet gobnyan hana geubeungeh keu ulon atawa ubak ureueng-ureueng nyang mat peurintah oh ltheueh ulon. gata hana jeuet tacok cukee nibak teungku-teungku imeum, nibak ureueng lewi, nibak ureueng nyang meuca-e, nyang jaga babah pintoe geureubang, nibak ureueng keureuja, atawa baksoe mantong nyang na hubungan jih deungon baet tuhan. syedara ulon ezra, tapeuguna kheueh hikuemat nyang ka geubri le po teu allah ubak gata, dan gata angkat kheueh peumimpem-peumimpem dan hakem-hakem mangat geupimpin banmandum ureueng nyang na di propinsi efrat barat nyang udeb meunurot hukom allah gata. bah kheueh gata peuruno banmandum hukom nyan keu banmandum ureueng nyang gohlom jiteupeue. somantong ureueng nyang hana jitaat ubak hukom-hukom allah gata, atawa ubak hukom nanggroe, ureueng nyan haroh bubagaih teuhukom mate, atawa teuboih beujioh, atawa tesuita hareuta beunda jih, atawa teupeutamong u dalam glab." laju geupeugah le ezra, "pujoe kheueh tuhan, allah nyang geuseumah le indatu geutanyoe! allah ka geupeugrak ate raja sampoe diraja nyan ka geubri peuratian nyang cukob raya mangat teupendong lom baet tuhan di yerusalem. deungon tulong allah ulon jigalak le raja, le peunaseuhat-peunaseuhat dan le peujabat-peujabat nanggroe nyang meukuasa; tuhan allah ulon ka geupeubudoh seumangat ulon, sampoe ulon ka meuhase ulon pakat ulee kawom israel nyang cukob le keu jitemwoe u yerusalem." nyoe kheueh dafeurat bubena ulee kawom nyang ka teuboih u babel dan jiwoe lom deungon ulon, ezra u yerusalem nibak watee artahsasta geumat peurintah sibagoe raja: gersom, nibak kawom pinehas daniel, nibak kawom itamar hatus bin sekhanya, nibak kawom nabi daud nabi zakharia nibak kawom paros, meusajan deungon 150 droe ureueng agam nibak kawom gobnyan (na catetan keuhai silsilah awaknyan) elyoenai bin zerahya, nibak kawom pahat-moab, meusajan deungon 200 droe ureueng agam sekhanya bin yahaziel, nibak kawom zatu, meusajan deungon 300 droe ureueng agam ebed bin yonatan, nibak kawom adin, meusajan deungon 50 droe ureueng agam. yesaya bin atalya, nibak kawom elam, meusajan deungon 70 droe ureueng agam zebaja bin mikhael, nibak kawom sefaca, meusajan deungon 80 droe ureueng agam obaja bin yehiel, nibak kawom yoab, meusajan deungon 218 droe ureueng agam selomit bin yosifya, nibak kawom bani, meusajan deungon 160 droe ureueng agam zakharia bin bebai, nibak kawom bebai, meusajan deungon 28 droe ureueng agam yohanan bin hakatan, nibak kawom azgad, meusajan deungon 110 droe ureueng agam eleifei, yehiel dan semaya, nibak kawom adonikam, meusajan deungon 60 droe ureueng agam (awaknyoe teuka jih oh dudo teuma) utai dan zabud, nibak kawom bigwai, meusajan deungon 70 droe ureueng agam. banmandum kawom nyan ulon peusapat nibak bineh kruening nyang le jih ji-ile u banda ahawa, laju kamoe peudong khimah disinan nyang treb jih lhee uroe. oh ka ltheueh ulon peureksa, teunyata na meupadub-droe teungku imeum lamkawan awaknyan, teuma hana meusidroe pi nyang na nibak sukee lewi. laju ulon hoi sikureueng droe lamkawan peumimpem,

awaknyan na kheueh: eliezer, ariel, semaya, elnatan, yarib, elnatan, zakharia, mesulam dan na teuma dua droe guree, na kheueh yoyarib dan elnatan. oh lheuëh nyan ulon yuejak awaknyan mangat jijak meurumpok deungon ido, pang ulee masyarakat di kasifya, deungon jilakee mangat ido dan rakan-rakan jih ureueng nyang meubuet di baet tuhan, jikirem ubak kamoe ureueng-ureueng nyang meubuet di baet tuhan. sabab murah ate po teu allah, awaknyan geukirem ubak kamoe serebya, ureueng lewi nyang malem nibak kawom mahli. meusajan deungon gobnyan teuka cit teuma aneuek miet dan syedara-syedara gobnyan, le jih na 18 droe. hasabya dan yesaya nibak kawom merari, deungon dua ploh droe kawom syedara gobnyan, geukirem cit keukamoe. di sampeng nyan na teuma 220 droe ureueng nyang meukeureuja di baet tuhan nyang na teudafeutar nan-nan awaknyan. indatu awaknyan yohmasa ilee ka geupeuteutab le nabi daud dan bubena ureueng rayeuk lam keurajeuen nanggroë keu jitulong ureueng lewi. dan nibak bineh krueng ahawa nyan ulon peusapat dan banmandum awaknyan haroh jipuasana dan jipeumiyueb droe dikeue po teu allah. kamoe meudoa mangat po teu allah geupimpin kamoe nibak rot ueh raya, dan geulindong kamoe, aneuek-aneuek kamoe dan banmandum hareuta milek kamoe. ulon seugan keuneuk lakee tantra meuguda ubak raja keu teulindong kamoe nibak musoh bak rot ueh raya. sabab ulon ka lheuëh ulon peugah ubak gobnyan, bahwa allah kamoe teuma geubri beureukat soe mantong nyang meubakti ubak gobnyan dan geubanci meunan cit geuhukom soe mantong ureueng nyang hana seutia ubak gobnyan. le sababnyan kheueh kamoe puasa sira meudoa ubak allah dan kamoe lakee peulindongan gobnyan dan doa kamoe nyan pi geudeungoe. lamkawan teungku-teungku imeum nyang paleng meusyeehu ka ulon pileh 12 droe: serebya, hasabya dan na 10 droe teuk. oh lheuëhnyan ulon timang keu awaknyan pirak, meuh dan peukakaih-peukakaih nyang ka lheuëh geusumbang le raja, le peunaseuhat meunan cit le ureueng-ureueng rayeuk dan le banmandum ureueng israel, mangat jeuet teupeguna di dalam baet tuhan. banmandum nyan ka lheuëh ulon jok ubak teungku-teungku imeum nyan. nyoe kheueh dafeutar sumbangan-sumbangan nyan: 100 boh peukakaih pirak – meuh – 20 boh cambong meuh – 2 boh cambong peurunggu nyang paleng ceudah, nyang saban yuem jih deungon cambong meuh. ulon peugah ubak teungku-teungku imeum nyan lageenyoe, "gatanyoe ka teupeukhusus keu tuhan, allah nyang geuseumah le indatu geutanyoe, meunan cit deungon banmandum peukakaih pirak dan meuh nyang teusumbang ubak tuhan nyan pi na kheueh khusus keu tuhan. gata jaga kheueh beunda-beunda nyan beu jroh-jroh sampoe gata trok u baet tuhan. watee gata ka trok keudeh, gata haroh tatimang beunda-beunda nyan, dan gata jok laju ubak pang ulee-pang ulee imeum dan peumimpin-peumimpin ureueng lewi, meunan cit ubak peumimpin-peumimpin ureueng israel nyang na di yerusaleum." oh lheuëh nyan le teungku-teungku imeum dan ureueng-ureueng lewi nyan geuteurimong pirak, meuh dan peukakaih-peukakaih

nyan keu teuba u baet tuhan di yerusaleum. nibak tanggai 12 buleuen nyang phon kamoe tinggai krueng ahawa dan kamoe beurangkat u yerusaleum. nibak rot ueh nyan kamoe geulindong le po teu allah nibak seurangan dan jihampeueng le musoh. oh watee ka sampoe u yerusaleum, kamoe meureuhat na lhee uroe. oh lheuëhnyan nibak uroe nyang keu peuet baro kheueh kamoe jak u baet tuhan, disinan laju kamoe timang pirak, meuh dan peukakaih-peukakaih nyan. oh lheuëh nyan baro kheueh kamoe jok ubak teungku imeum meremot bin uria sira geusaksi le eleazar bin pinehas dan dua droe ureueng lewi, na kheueh yozabad bin yesua dan noaja bin binui. banmandum beunda nyan geu itong dan geutimang, laju geucetet deungon leungkab. bak uroenyang cit teuma banmandum ureueng nyang ka jiwoe nibak teupat teuboih nyan, jipeuseumah keureubeuen nyang teutot abak allah israel. awaknyan jipeuseumah 12 boh leumo agam keu banmandum israel, 96 boh bubiri agam dan 77 boh aneuek bubiri; seulaen nibak nyan na teuma 12 boh kameng keu keureubeuen peu amphon desya keu awaknyan keudroe. banmandum beulatang nyan geutot sibagoe keureubeuen keu tuhan. dan dokumen nyang geubri le raja keu awaknyan, geupeusampoe laju ubak bubena gubunur dan peujabat propinsi efrat barat. dan peujabat-peujabat nyan laju geubri bantuan ubak rakyat mangat awaknyan teutab meueibadat di baet tuhan. oh ka seulseueo banmandum nyan teupeubuet, na meupadubdroe ureueng-ureueng patot nibak bansa israel jijak meuhadab ubak ulon. awaknyan jipeugah bahwa rakyat israel, meunan cit deungon teungku-teungku imeum, dan ureueng-ureueng lewi hana jipeuaseng droe nibak bansa-bansa nyang na tinggai di bansilingka nyan, awaknyan na kheueh bansa amon, moab, meuse, kanaan, het, feris, yebus dan amori. dan di teungku imeum dan ureueng-ureueng lewi pi lageenyang cit jipeubuet. awaknyan banmandum jipeubuet buet-buet nyang hina nyang jipeubuet le bansa-bansa teukutok nyan. ureueng agam nibak bansa yahudi jimeukawen deungon ureueng inong bansa laen, sampoe umat nyang ka geupeukhusus milek tuhan ka hana aseuli le. nyang paleng parah lom na kheueh nyang awai that jipeuphon buet lageenyang na kheueh ureueng-ureueng patot dan peujabat israel. ban lon deungoe hai lageenyang, ulon keubit that banci dan seudeh sampoe ulon priek-priek peukayan ulon dan ulon lot ok dan janggot ulon, oh lheuëhnyan laju ulon duek deungon ate nyang hanco. ulon teutab lon duek nyang lagee nyan sampoe nibak gob jak peuseumah keureubeuen bak watee seupot uroe. oh lheuëhnyan teuka kheueh ureueng rame jijak dong di silinka ulon. awaknyan banmandum teumakot sabab teuingat ubak ancaman allah israel ateueh desya ureueng-ureueng nyang ka jiriwang nibak teupat nyang teuboih nyan. nibak watee keureubeuen seupot uroe ka jipeuphon peuseumah, baro kheueh ulon beudoh nibak teupat ulon meuseudeh nyan, dan deungon peukayan nyang ka beukaih-beukaih, laju ulon sujut dan ulon sunyang jaroe ubak tuhan allah ulon. ulon kheun, "ya, allah ulon, ulon nyoe keubit that malee ulon beuot ulee ulon dikeue droeneueh. desya kamoe ka

meutumpok-tumpok di ateuh ulee kamoe, ya tuhan, sampoe ka meusampoh u langet manyang. phon nibak zamen indatu kamoe sampoe an jinoo, kamoe umat droeneueh nyoe lumpah that raya desya ubak droeneueh. nyang kheueh sabab jih dikamoe nyoe, bubena na raja dan bubena teungku imeum kamoe ka jipeutaloe le raja-raja nanggroee aseng. kamoe jipoh mate, jireupah dan jiangkot sibagoe ureueng nyang teuteun. kamoe ka jipeuhina hana reuda, lagee nyang ka teujadi nibak uroenyoe. teuma bak saat nyoe, ya tuhan allah kamoe, droeneueh banmantong neupeumurah ate keu kamoe. droeneueh ka neupeu beubaih na meupadubdroe lamkawan kamoe nyang ka jipeujeut keu namiet mangat hase kamoe udeb deungon meurdehka dan sejahteura di teupat nyang khusus nyoe. tuhan ka neubri keu kamoe udeb nyang baro. nibak watee kamoe mantong jeuet keu namiet ureueng laen, tuhan pi hana neutinggai kamoe. tuhan ka neupeujeuet kamoe jigaseh ngon jisayang le raja-raja persia dan jipeu idhin udeb ngon jibri peudong lom baet droeneueh nyang ka tinggai runga-rungka nyan. tuhan ka neubri keu kamoe teupat meulindong disinoe, di yehuda dan yerusalem. teuma bak saat nyoe, ya tuhan, allah kamoe, oh ka lheureu teujadi banmandum nyan, peue nyang hase kamoe peugah? kamoe ka kamoe peubeuah tutoe haba tuhan lom teuma, nyang ka tuhan bri keu kamoe meulalu nabinabi, hamba-hamba tuhan. awaknyan jijak britee ubak kamoe bahwa tanoh nyang keuneuk kamoe duek nyan hana nyang gleh sabab banmandum peunduduek jih phon nibak ujong sampoe ubak ujong ka jipeubuet kuto lom ngon keuji. nabi-nabi nyang tam kamoe bek meukawen meujampu deungon ureueng nyan, atawa kamoe bantu awaknyan sampoe udeb sejahteura dan makmu. meunyoee kamoe taat, kamoe teuma jeuet keuteuga dan kamoe pajoh hase tanoh nyan dan kamoe peutron keu ahli wareh kamoe sampoe siumu masa. kamoe ka meudesya dan ka kamoe iengkeue ubak hukom droeneueh, dan tuhan ka neuhukom kamoe. teuma kamoe teupeue, ya tuhan allah kamoe, bahwa hukuman nyang tuhan bri nyan hana brat nyang patot kamoe teurimong, dan kamoe mantong tuhan peuseulamat. le sababnyan, panena mungken kamoe peubeuah peurintah-peurintah droeneueh dan kamoe meukawen meujampu deungon ureueng-ureueng nyang jeuhet nyan? meunyoee hainyan mantong kamoe peubuet, ka pasti tuhan meureuka nyang lumpah brat u ateuh kamoe sampoe tuhan neupeuhanco kamoe jeuet keu abee dan hana tuhan bri udeb keu kamoe bahpi meusidroe pi. ya tuhan, allah israel, droeneueh lumpah that ade, bahpi lagee nyan tuhan teutab neubri keu kamoe udeb. kamoe meungaku ateuh salah kamoe ubak droeneueh; kamoe hana meuhak keu kamoe meuhadab u hadhirat droeneueh." teungoh eza geumeudoe sira geumo dan geumeungaku desya dikeue baet tuhan, le that-that ureueng israel jijak keunan keujijak meusapat, bah kheueh nyan ureueng agam, meunan cit deungon ureueng inong dan aneuek miet. awaknyan jidong meulinka sira jimo teuga-teuga. oh lheurehnyan sekhanja bin yehiel nibak kawom elam, jipeugah ubak eza, "kamoe ka meudesya ubak tuhan sabab ka kamoe meukawen de-

ungon bansa aseng. bahpi lagee nyan mantong na harapan keu ureueng israel. jak kheueh geutanyoe ta meusumpah ubak po teu allah, bahwa geutanyoe teuma ta use banmandum ureueng inong nyan meunan cit deungon aneuek-aneuek jih nyan. kamoe teuma kamoe seutot bandum naseuhat droeneueh meunan cit naseuhat ureueng laen nyang jihoreumat peurintah allah. dan kamoe teuma kamoe horeumat ubak hukom allah. droeneueh kheueh nyang wajeub nyang cok tindakan, kamoe teuma kamoe tulong droeneueh deungon sikeubit ate. neutindak kheueh deungon teugaih sampoe seulesoe." le sababnyan geupeuphon kheueh le eza geucok tendakan. gobnyan laju geuyue ubak teungku-teungku imeum ulee, ureueng-ureueng lewi dan ureueng-ureueng israel nyang laen mangat jimeusumpah bahwa awaknyan bit-bit jipeubuet usui nyang geupeusampoe le sekhanja nyan. oh ka lheureh awaknyan jimeusumpah, dan geujak kheueh laju eza nibak leuen baet tuhan dan geujak tamong u dalam teupat tinggai yohanan bin elyasib meudom di sinan. gobnyan hana geutem makheun meunan cit hana geujieb ie sabab pikeran geuh suntok that watee geupike keu pi-e ureueng-ureueng nyang teuboih nyan. oh lheurehnyan laju teutabu saboh maklumat nyang teupemaklum u bansaboh yerusalem dan yehuda keu mandum ureueng nyang ka jiwoe nibak teupat jih teuboih, mangat jimeusapat di yerusalem. barang gasoe hana jiteuka lam tempo lhee uroe, keu ureueng nyan teuma teucok banmandum hareuta jih dan keu ureueng nyan hanale teuanggap sibagoe anggota masyarakat. maklumat nyan jiteken le peumimpin rakyat. oh ka na lhee uroe, nibak tanggai dua ploh buleuen sikureueng, banmandum ureueng agam nyang na tinggai di daerah yehuda dan benyamin jijak u yerusalem laju jimeusapat dileuen baet tuhan. bak wateenyan ujeuen jitreun keubit that tajaam. banmandum ureueng nyan yo meukot kot sabab sijuek meunan cit sabab udara jih leupie that dan sabab peunteng jih meusapat disinan. oh lheurehnyan eza laju geudong dan geumeututoe ubak awaknyan. gobnyan geupeugah, "gatanyoe banmandum ka meudesya sabab le gata ka leubeuh meutamah desya ureueng israel sabab ka tameukawen deungon ureueng inong bansa aseng. sabab nyan, tameungaku kheueh desya gata ubak tuhan, allah nyang geuseumah le indatu geutanyoe, dan tapeubuet kheueh laju peue nyang hase teupeugalak ate gobnyan. beujioh kheueh gata nibak ureueng aseng nyang na tinggai di nanggroee geutanyoe dan ta use kheueh banmandum ureueng binoo gata dan bansa aseng nyan." awaknyan banmandum meusigoe jijaweeb deungon su nyang meutaga, "kamoe teuma kamoe seutot naseuhat droeneueh." laju jipeugah le awaknyan lom, "teuma nyang na teuka keuno rame that dan ujeuen pih jitoh lumpah teuga, kamoe hana ek kamoe dong diluwa nyang lageenyoe. dan nyoe bukan peukara nyang hase teupeuseulesoe lam watee sa atawa dua uroe, sabab jai that-that nibak kamoe nyang rhoh lam desya nyoe. neupeu idhin kheueh keu peumimpin kamoe mangat jeuet gobnyan tinggai di yerusalem dan geu uroih keuhai nyan. le tieb-tieb ureueng nyang na tinggai di banda-

banda kamoe, nyang na peurumoh jih nibak bansa aseng, bah kheueh jijak paih bak watee nyang ka teupeuteuntee, meusajan deungon bubena peumimpen dan bubena hakem banda awaknyan maseng-maseng. deungon na lagee nyan po teu allah hana geubeungeh le keu geutanyoe sabab desya nyan." hana meusidro pi nyang na usui keuhai geuhon reuncana nyan, seulaen yonatan bin asael dan yahzeya bin tikwa, jisukong teuma le dua droe ureueng lewi, na kheueh mesulam dan sabetai. ureueng-ureueng nyang teuhoi nyang ka geuwoe nyan teutab geukeuneuk peujak reuncana nyan, le sabab nyan teungku imeum ezra geupileh laju na meupadub droe lamkawan ulee-ulee kawom, laju geucetet nan-nan awaknyan. bak tanggai sa buleuen siploh awaknyan geupeuphon sidang keu geuseulidek peukara nyan. lam teumpo lhee buleuen oh ltheuehnyan baro kheueh meuhase geupeuseuleusoe geupareksa ateuh banmandum ureueng agam nyang ka meukawen deungon ureueng inong bansa aseng. nyoe kheueh dafeutar nan-nan ureueng nyang meukawen deungon bansa aseng: teungku-teungku imeum, teudafeutar deungon kawom: kawom yesua deungon syedarsyedara gobnyan, aneuek-aneuek yozadak: maaseya, eliezer, yarib dan gedalya. awaknyan meujanji jitalaleuk peurumoh jihnyan, oh ltheueh nyan laju jipeuseumah bubiri agam keu keureubeuen peumaphon desya awaknyan keudroe. kawom imer: hanani dan zebaja. kawom harim: maaseya, elia, semaya, yehiel dan uzia. kawom pasyhur: elyoenai, maaseya, ismail, netaneel, yozabad, dan elasa. ureueng-ureueng lewi: yozabad, simei, kelaya (teuhoi cit deungon nan kelita), petahya, yuda dan eliezer. kawom meuca-e: elyasib ureueng nyang jaga pintoe geureubang baet tuhan: salum, telem dan uri. ureueng-ureueng israel nyang laen: kawom paros: ramya, yezia, malkia, miyamin, eleazar, malkia dan benaya. kawom elam: matanya, nabi zakharia, yehiel, abdi, yeremot dan elia. kawom zatu: elyoenai, elyasib, matanya, yeremot, zabad dan aziza. kawom bebai: yohanan, hananya, zabai dan atlai. kawom bani: mesulam, malukh, adaya, yasub, seal dan yeramot. kawom pahat-moab: adna, kelal, benaya, maaseya, matanya, bezaleel, binui dan manasye. kawom harim: eliezer, yisia, malkia, semaya, simeon, benyamin, malukh dan semarya. kawom hasum: matnai, matata, zabad, elifet, yeremai, manasye dan simei. kawom bani: maadai, amram, uel, benaya, bedeya, keluhu, wanya, meremot, elyasib, matanya, matnai, yaasai. kawom binui: simei, selemya, natan, adaya, makhnadbai, sasai, sarai, azareel, selemya, semarya, salum, amarya dan yusuf. kawom nebo: yeiel, matica, zabad, zebina, yadai, yoel dan benaya. banmandum awaknyan ka jimeukawen ngon inong nibak bansa aseng. le sababnyan, peurumoh-peurumoh nyan jitalaleuk dan laju jiuse meusajan deungon aneuek-aneuek awaknyan.

nyoe kheueh laporan nehemia bin hakhalya keuhai buet-buet gobnyan. bak buleuen kislew nibak thon nyang keu dua ploh geumat keurajeuen le raja artahsasta sibagoe raja nanggroe persia, ulon, nehemia, na di susan, ma banda keurajeuen nanggroe. bak watee nyan, syedara ulon, nyang nan jih hanani, jiteuka nibak yehuda deungon rakan jih na meupadub droe. laju ulon peugah ubak awaknyan keuhai keuadaan di yerusalem dan keuadaan ureueng-ureueng yahudi nyang ka jiwoe nibak tempat nyang teuboih di babel. laju jicalitra le awaknyan bahwa ureueng-ureueng nyang beukaih teuboih di babel nyang ka jiwoe u tanoh ie jih nyan, jinoo udeb lumpah that seungsara dan hana pioh jihina le bansa-bansa aseng nyang na ban sikeulileng jih nyan. lom teuma, binteh-binteh beuton banda yerusalem mantong hanco meutabu beba hana meukri sakri dan meunan cit deungon pintoe-pintoe geureubang jih gohlom teureuhab yoh phon hanco watee jitot ngon apui nibak masa ilee. ban ulon deungoe habanyan, di ulon pih laju teuduek ngon leumoh sira ulon mo. meu uroe-uroe treb jih ate ulon seudeh. ulon pi laju puasa sira ulon meudoa ubak po teu allah, "ya tuhan, allah nyang mat kuasa didalam syeuruga. droeneueh na kheueh allah nyang raya dan kamoe meuhadab ubak droeneueh deungon ate nyang lumpah teumakot. droeneueh ya tuhan teutab seutia neumumat ubak janji droeneueh keu ureueng nyang cinta ubak droeneueh dan jitaat ubak peurintah droeneueh. neungieng kheueh ateueh ulon ya tuhan, dan neudeungoe kheueh doa nyang teungoh ulon peu-ek u hadhirat droeneueh uroe ngon malam deumi keu umat israel, hamba-hamba droeneueh nyan. ulon meungkab bahwa kamoe nyoe, umat israel ka meudesya; ulon dan indatu ulon pi ka geupeubuet desya. kamoe ka doraka ubak droeneueh ya tuhan dan ka kamoe iengkeue ubak peue nyang ka tuhan peurintah. meunan cit di kamoe hana kamoe turot ubak hukom-hukom nyang ka tuhan bri keu kamoe meulalu nabi musa hamba droeneueh nyan. ya tuhan, neuingat kheueh ubak tutoe bahwa droeneueh nyang ka tuhan peugah ubak nabi musa ateueh peurintah droeneueh, nyang bahwa meunyo kamoe, umat israel, hana seutia ubak droeneueh, kamoe teuma tuhan peu crebre lamkawan bansa nyang laen. teuma meunyo kamoe woe lom ubak droeneueh dan kamoe taat ubak banmandum peurintah droeneueh, teuma kamoe nyang ka tuhan peu crebre nyan teuma tuhan peusapat lom, bahpi kamoe nyoe na nyang di ujong bumoe. laju le tuhan kamoe neupuwoe ubak tempat nyang ka tuhan pileh keu tempat iebadat ubak droeneueh. tuhan, kamoe nyoe na kheueh hamba-hamba droeneueh, umat droeneueh keudroe nyang ka tuhan peuseulamat deungon kuasa dan teunaga droeneueh nyang paleng hibat nyan. neudeungoe kheueh ya tuhan doa ulon dan doa banmandum hamba droeneueh nyang laen, nyang jitem horeumat ubak droeneueh. neubri kheueh sunulong droeneueh mangat jeuet nibak uroenyo hamba droeneueh nyoe meuhase meuteume kamoe cok ate jeuet keu geugaseh le raja." bak masanyan ulon na kheueh nyang uroi ie jieb raja. nibak

siuroe, na peuet buleuen teuma oh ltheueh nyan, wateenyan buleuen nisan, yoh watee raja artahsasta teungoh geumakheun, ulon peuidang keugobnyan ie anggo deungon iemuka lon krot. gohlom na nyang ka-ka ulon krot iemuka dikeue gobnyan lagee nibak uroe nyan. le sabab nyan gobnyan geutanyong lageenyo, "pakon gata deuh jih seudeh that, padahai gata hana saket? nyan pasti na sapeue-sapeue nyang hana trok gata pike." ulon teukeujot, laju ulon jaweueb, "udeb kheueh teungku amphon siumu masa! pakriban ulon hana seudeh, meunyo banda teumpat jrat indatu ulon ka tinggai runga, dan pintoe-pintoe geureubang jih pi ka hanco jipajoh le apui." geutanyong le raja, "teuma peue nyang gata meuheuet?" didalam ate ulon meudoa ubak po teu allah nyang mat kuasa lam syeuruga, laju ulon peugah ubak gobnyan, "meunyo teungku amphon neutem dan neupeupeunoh peue nyang ulon lakee, neuyuejak kheueh ulon u tanoh yehuda mangat ulon jak peudong dong banda teumpat teupeukubu indatu ulon." dan raja nyang teungoh geuduek sira geupapet le pereumaisuri ratu, geupeutrok laju peue nyang ulon lakee. gobnyan geutanyong padubna treb ulon tinggai disideh dan pajan ulon gisa, teuma ulon peugah laju ubak gobnyan tanggai nyang ka ulon peuteuntee. oh ltheuehnyan ulon lakee surat keu teungku gubunur di propinsi efrat barat, mangat jeuet le gobnyan geupeumudah keu ulon watee lon jak u yehuda. seulaen nibaknyan, na cit ulon lakee surat keu asaf, mando uteuen keurajeuen nanggroe, mangat le gobnyan geupeuna kayee keuteupeugot babah pintoe geureubang kuta nibak bineh baet tuhan, dan keu binteh beuton banda meunan cit deungon keu rumoh teumpat tinggai ulon. raja geukabui banmandum peue nyang ulon lakee nyan, banmandum nyan na kheueh sabab po teu allah geutulong ulon. meusigoe deungon napadub droe ulee balang dan tantra meuguda, nyang ateueh peurintah raja ji-ireng ulon, dan ulon beurangkat kheueh laju u efrat barat. oh trok keunan surat nibak raja nyan laju ulon peusampoe ubak gubunur. teuma bak watee sanbalat, ureueng bet-horon, dan tobias, sidroe lamkawan peujabat di amon, geudeungoe bahwa ulon teuka deumi keu bansa israel, awaknyan beungeh lumpahna. watee ka trok u yerusalem, ulon meureuh na lhee uroe. seulaewetnyan hana ulon peugah bahpi mubaksoe mantong bahwa allah ka geubri ilham keu ulon mangat teupeudong lom banda yerusalem. oh malam singoh ulon beudoh laju ulon pakat napadub droe rakan mangat teujak u luwa banda. seulaen keuleudee nyang ulon giduek di ateueh rueng, hana kamoe ba beulatang nyang jeuet teu giduek nyang laen. uroe mantong malam, bak watee kamoe tinggai banda rot pintoe geureubang panton di siblaih u barat. kamoe jak laju u arah seulitan, ubak babah pintoe geureubang bloh, rot mata ie naga. nibak rot ueh teungoh kamoe jaknyan hana tuwae ulon peureksa binteh beuton banda dan ulon ngieng teuma pintoe-pintoe geureubang nyang ka habeh jipajoh le apui. oh ltheueh nyan di bagian timu banda kamoe tuju laju u blaih utara, u babah pintoe geureubang ie rhot dan kulam raja. teuma disinan hana rot jak keuleudee nyang ulon

pasang nyan, sabab lumpah that le runga-runga bangunan nyang reuloih. nyang kheueh jeuet, kamoe tron laju u panton kidron dan kamoe jak laju nibak malam nyan cit teuma, sira ulon peureksa binteh beuton banda. oh ltheueh nyan kamoe wet lom u banda rot babah pintoe geureubang panton. hana meusidroe pih nibak peumuka rakyat nyan jiteupeue ho ulon jak, dan peue nyang teungoh ulon reuncana. sabab sampoe nibak uroe nyan gohlom ulon peugah sapeue ubak bansa droe ulon, bah kheueh nyan ubak teungku-teungku imeum meunan cit ubak ureueng-ureueng patot, atawa ubak peugawee, dan soe mantong nyang teuma jitem meusajan keu teupeudong lom banda yerasalem. teuma oh dudoe ulon peugah ubak awaknyan, "neungieng kheueh keuadaan geutanyoe nyang seungsara nyoe! yerasalem ka tinggai runga dan pintoe geureubang jih ka tinggai beukaih jipajoh le apui. jak kheueh geutanyoe tapeudong lom beuton-beuton banda yerasalem mangat geutanyoe hana jihina le." laju ulon calitra ubak awaknyan pakriban allah geutulung ulon dan peue nyang ka geupeugah le raja ubak ulon. awaknyan jijaweueb, "jak geutanyoe tajak peuphon peudong!" laju meusiab-siab kheueh awaknyan jipeuphon keureuja. watee reuncana kamoe nyan ka jiteupeue le sanbalat, tobia dan gesyem, sidroe lamkawan ureueng arab, awaknyan laju jipeukem sira jihina kamoe. jipeugah le awaknyan, "peue nyang keuneuk gata peubuet nyan? peu kheueh gatanoye keuneuk beurontak atueuh po raja?" ulon jaweueb lagee nyoe, "allah nyang mat kuasa lam syeuruga teuma geupeujeuet buet kamoe nyoe meuhase. kamoe nyoe na kheueh hamba-hamba gobnyan dan kamoe teuma kamoe peuphon peudong. teuma gatanoye hana hak atueuh atra peue mantong bahpi mubacut di yerasalem. dan meunoye na ureueng nyang mariet keuhai yerasalem, nan gata hana teuma teu-teuoh-teuoh." nyoe kheueh laporan keuhai pakriban beuton banda yerasalem nyan teureuhab. teungku imeum rayeuk elyasib dan rakan-rakan gobnyan geupeudong lom babah pintoe geureubang bubiri, geupasang on-on pintoe dan geupeukhusus laju keu tuhan. awaknyan geupeuget dan geupeukhusus binteh beuton sampoe trok ubak menara sireutoih dan lom sampoe ubak meunara hananeel. 2 seulaen nibak teungku-teungku imeum nyan, awaknyoe reuhab binteh beuton banda meunan cit deungon pintoe-pintoe geureubang dan meunara-meunara jihnyan lam urotan jih na kheueh lageenyoe: ureueng-ureueng yerikho, zakur bin imri kawom senaa: pintoe geureubang uengkot deungon balok-balok jih, on-on pintoe, bawot-bawot dan palang-palang jih. meremot aneuek uria dan cucoe hakos. mesulam bin berekha dan cucoe mesezabeel. zadok bin baana peunduduek banda tekoa (bubena peumuka banda nyan hana jitem peubuet buet nyang gasa). yoyada bin paseah dan mesulam bin besoja: pintoe geureubang yesyana deungon balok-balok, on-on pintoe, bawot-bawot dan palang-palang jih. melaca di gibeon dan yadon nibak meronot. ureueng-ureueng gibeon dan ureueng-ureueng mizpa: binteh beuton sampoe ubak meuligoe gubunur efrat barat. uziel, sidroe

lamkawan ureueng nyang carong di pande meuh, aneuek harhaya. hananya, sidroe lamkawan nyang carong nibak jipeugot minyeuk mangat bee; sampoe ubak binteh beuton luwah. refaya bin hur, nyang mat kuasa atueuh na saboh sagoe yerasalem. yedaya bin harumaf: binteh beuton nyang to deungon rumoh gobnyan keudroe. hatus bin hasabneya malkia bin harim dan hasub bin pahat-moab: beuton nyang seulanjut jih dan meunara apui. salum bin halohes, nyang mat kuasa atueuh siteungoh sagoe yerasalem, jibantu le aneuek-aneuek gobnyan nyang inong. hanum dan peunduduek zanoah: pintoe geureubang panton meusigoe deungon on-on pintoe jih, bawot-bawot dan palang-palang jih. meunan cit deungon binteh beuton nyang panyang jih na 440 metee sampoe trok ubak pintoe geureubang bloh. malkia bin rekhab, nyang mat kuasa di sagoe atawa diestrek bet-kerem: pintoe geureubang bloh deungon on-on pintoe jih, bawot-bawot dan palang-palang jih. salum bin kolhoze, nyang mat kuasa di sagoe atawa diestrek mizpa: pintoe geureubang mata ie deungon bubong, on-on pintoe, bawot-bawot dan palang-palang jih. meunan cit deungon beuton kulam selah nyang rab deungon keubon meuligoe sampoe trok ubak reunyeyen-reunyeyen nyang teutron nibak banda nabi daud. nehemia bin azbuk, nyang mat kuasa disagoe atawa diestrek bet-zur: nibak binteh beuton sampoe ubak jrat keuluwarga nabi daud, kulam nyang teukueh dan tangsi. napadub boh bagian binteh beuton nyang seulanjut jih jipeudong le ureueng-ureueng lewi nyang na teupeugah dalam urotan nyoe: rehum bin bani hasabya, nyang mat kuasa atueuh siteungoh nibak diestrek kehila. bagian beuton keu diestrek gobnyan keudroe. binui bin henadad, nyang mat kuasa atueuh siteungoh diestrek kehila. ezer bin yesua, nyang mat kuasa atueuh mizpa: beuton nibak sagoe jalan dikeue geudong sinjata. barukh bin zabai: beuton nibak sagoe jalan sampoe trok ubak rumoh teungku imeum rayeuk elyasib. meremot bin uria dan cucoe hakos: bagian beuton nibak babah pintoe rumoh elyasib sampoe trok u ujong rumoh nyan. napadub boh bagian binteh beuton nyang teupeugah lom nyoe geupeugot le teungku-teungku imeum nyang na rhoh lam urotan nyoe: teungku-teungku imeum nyang na tinggai hana padubna jioh nibak yerasalem. benyamin dan hasub: beuton nyang na dikeue rumoh awaknyan. azarya bin maaseya aneuek ananya: beuton nyang na rab rumoh gobnyan. binui bin henadad: binteh beuton nibak rumoh azariah sampoe ubak sagoe beuton. palal bin uzai: binteh beuton nibak sagoe beuton dan meunara meuligoe bagian atueuh, rab bineh peulataran rumoh rondo. pedaya bin paros: binteh beuton sampoe trok dikeue pintoe geureubang ie disiblahi utimu dan meunara teupat jaga baet tuhan. (hana padubna jioh nibak teupat nyan na daerah nyang nan jih ofel, teupat tinggai ureueng jakbaet di baet tuhan.) na meupadub bagian binteh beuton nyang seulanjut jih jipeugot le ureueng-ureueng nyang teupeugah lam lumboi urot lageenyoe: warga banda tekoa: binteh beuton dikeue meunara teupat jaga baet tuhan sampoe ubak daerah ofel. teungku-teungku imeum nyang

na tinggai bak binéh pintoe geureubang guda: binéh beuton nyang meuhadab keue deungon rumoh maseng-maseng nibak geureubang nyan sampoe u arah utara. zadok bin imer: binéh beuton nyang meuhadab keue deungon rumoh gobnyan. semaya bin sekhanya, nyang jaga babah pintoe geureubang timu: binéh beuton nyang meuhadab keue deungon rumoh gobnyan. hanaya bin selemya dan hanun aneuek zalaf nyang keunam. mesulam bin berekhyha: binéh beuton nyang meuhadab keue deungon rumoh gobnyan. malkia, sidroe lamkawan pande peugot meuh: binéh beuton nyang trok ubak asrama nyang meukeureuja di baet tuhan dan rumoh-rumoh ureueng meukat dikeue babah pintoe geureubang mikfad dan sampoe ubak binéh kama ateuéh nibak sagoe siblahi u timu laot. bubena pande meuh dan ureueng meukat: bagian binéh beuton nyang keuneuleuh, phon nibak kama ateuéh nibak sagoe beuton sampoe trok ubak pintoe geureubang bubiri. watee jideungoe le sanbalat bahwa kamoe ureueng yahudi teungoh kamoe reuhab binéh beuton banda, gobnyan beungeh lumpah na dan laju jipeuhina kamoe. dikeue rakan-rakan jihnyan dan sipa-i samaria, jipeugah lageenyoe, "peue nyang hase jipeubuet le ureueng yahudi paleh nyan nyang hana hase jipeubuet sapeue? peu kheueh awaknyan jikeuneuk peudong lom banda nyoe?" jipike le jihnyan buet nyan hase lam siuroe, teuma deungon jipeuseumah keureubeuen? peu kheueh deungon sinamon bloh nyang ka hangoh nyan jeuet jipeujeut keubatee-batee beuton?" laju tobias nyang na jidong nibak binéh gobnyan jiseuot teuma, "kalon kheueh binéh beuton nyan awaknyan peudong! ase uteuen pih hase jipeureubahl" dan ulon pi meudoa ubak po teu allah, "ya allah po, neudeungoe kheueh pakriban kamoe nyoe jihina! neubalahi kheueh hinaan nyan u ateuéh ulee awaknyan keudroe. bah kheueh peu mantong nyang na hareuta milek awaknyan jireupah dan awaknyan keudroe teuangkot sibagoe ureueng nyang teuteuen u nang-groe aseng. bek neupeu amphon buet awaknyan nyang jeuhet dan bek teuma neutuwoe keu desya awaknyan, sabab awaknyan ka jihina kamoe nyang teungoh seumeugot nyoe." kamoe pih hana meupioh laju kamoe peugot binéh beuton nyan, dan hana padubna treb teuma oh ltheuhnyan banmandum binéh beuton nyan ka ltheueh teupeugot sampoe na siteungoh manyang jih, sabab rakyat jimeubuet deungon peunoh seumangat. bak watee sanbalat, tobias dan ureueng-ureueng nibak amon dan asdod meunan cit deungon ureueng-ureueng arab jideungoe bahwa awak nyang peugot binéh beuton yerusalem nyan ka meutamah maju dan meunan cit deungon ruhueng-ruhueng nyang na nibak binéh beuton nyan ka ltheueh teudoe, awaknyan pi jiteuka beungeh hana teukira. awaknyan ka jimupakat keuneuk jijak prang banda yerusalem deungon tujuan mangat hase karu. le sababnyan, kamoe laju meudoa ubak allah kamoe dan teujaga banda nyan uroe ngon malam. teuma le ureueng yehuda laju jimeu ca-e deungon ca-e nyang putoh asa dan lagee nyoe kheueh su ca-e nyan: "teunaga geutanyoe habeh keu tau muatan, seudangkan bloh mantong that le

meutamon. hana hase rasa jih geutanyoe meubuet nyang lageenyoe tapeudong beuton banda nyoe." teungoh watee nyang lagee nyan musoh kamoe ka jireuncana keu jijak prang kamoe deungon hana teusangka-sangka, laju jipoh mate kamoe mangat buet nyang teungoh kamoe peubuet tinggai teube-ungkalee. teuma ureueng yahudi nyang na tinggai to ngon awaknyan, hana pioh jijak bak kamoe jijak peugah reuncana musoh kamoe nyan. le sabab nyan, di ulon pih laju ulon bagi-bagi peudeueng, kapak dan panah keu rakyat, dan laju ulon peudeuk awaknyan meunurot kawom jih nyan maseng-maseng dilikot binéh beuton, meunan cit di teupat-teupat nyang gohlom seulesoe teupeugot. bak watee ulon ngieng rakyat teumakot that, laju ulon peugah ubak awaknyan dan ubak banmandum ureueng patot-patot ngon peumimpen-peumimpen, "bek teumakot keu musoh! ingat kheueh ubak tuhan nyang teuga dan peukasa, dan meuijang kheueh keu kawom syedara gata, aneuek miet, ureueng binoe dan rumoh gata!" musoh-musoh kamoe jideungoe bahwa reuncana droe jih nyan ka kamoe teupeue. dan sada kheueh awaknyan bahwa po teu allah ka geupeugagal reuncana awaknyan. oh ltheuhnyan kamoe meugisa lom ubak buet dan kamoe peugot sampoe seulesoe kamoe binéh beuton nyan. teuma yoh phon uroenyang cit siteungoh nibak aneuek buah ulon nyang na jimeubuet, seudangkan nyang siteungoh teuk meujaga-jaga deungon peukayan bajee prang deungon sinjata kapak, peurisai dan panah. bubena peumimpen rakyat teubri dukongan nyang peunoh keu rakyat nyang teungoh jipeugot binéh beuton nyan. le ureueng nyang gulam bahan bangunan jimeubuet buet jih nyan deungon jaroe siblahi, seudang jaroe siblahi teuk jimat sinjata. utoih batee jimeubuet deungon peudeueng teusangkot nibak keueing. nyang yueb beureuguih tanda bahya, hana jiweeh nibak binéh ulon. dan ulon peugah laju ubak rakyat, ureueng patot dan ubak dumna peumimpen lagee nyoe, "buet geutanyoe nyoe ka luwah sampoe ka jioh, dan geutanyoe ka meutabutabu nibak binéh beuton nyoe, sidroe ureueng ka jioh deungon nyang laen. le sababnyan, meunyo gata tadeungoe su beureuguih, gata meusapat kheueh bubagaih di bansikeulileng kamoe nyoe. allah geutanyoe teuma geumuprang keu geutanyoe." meunan kheueh cara jih kamoe meubuet phon suboh buta sampoe jiteubiet bintang dilanget manyang. siladam nibak rakyat jijak peugot binéh beuton, seudangkan nyang laen jimeujaga-jaga deungon kapak nibak jaroe. yoh phon watee nyan mandum peutugaih deungon bubena peumbantu jihnyan, ulon yue mudom di yerusalem. deungon na lagee nyan meunyo uroe ka malam kamoe ka hase kamoe jaga banda dan watee uroe kamoe peugot beuton jih. ulon keudroe, meunan cit deungon rakan-rakan ulon, aneuek buah dan peungawai-peungawai ulon sabe lam keuadaan meupeukayan keureuja, bah kheueh nyan uroe meunan cit malam. kamoe hana pioh lam keuadaan siab siaga, deungon sinjata nibak jaroe. na padubna treb teuma oh ltheueh nyan le that ureueng yahudi, bah ureueng agam meunan cit ureueng inong, awaknyan ka jipeuphon apoh apah keuhai

ureueng-ureueng saboh bansa ngon jih. na nyang peugah, "aneuk ulon jai that, kamoe peureulee that gandom mangat jeuet udeb." na lom nyang peugah, "ulon teupaksa lon peugala ladang, lampoh anggo dan rumoh kamoe keungan kamoe bloe gandom mangat bek kamoe nyoe mate deuk." dan na lom nyang peugah, "kamoe ka kamoe meu-utang peng mangat jeuet kamoe peulunaih cukee keu ladang dan lampoh anggo kamoe nyang ka geupeuteuntee le raja. kamoenyoe kon kheueh ureueng yahudi cit? kon kheueh aneuk kamoe saban cit lagee aneuk yahudi nyang laen? bahpi meunan kamoe teupaksa kamoe peubiyeu aneuk-aneuk kamoe jeuet keu namiet. dan na aneuk dara kamoe nyang teupeubloe jeuet keu namiet. kamoe hana meudaya sabab ladang dan lampoh anggo kamoe ka kamoe peugala." watee lon deungoe apoh apah awaknyan, ulon beungeh lagoena dan lon cok keuputosan mangat jeuet lon cok tendakan. laju ulon seugah bubena peumimpin rakyat dan ureueng patot-patot. laju ulon kheun, "gata nyoe ka tatindeeh syedara-syedara gata keudroe!" oh lheuehnyan ulon peuna rapat umum mangat jeuet lon peubuet keuhai nyan, dan ulon peugah, "deungan sihabeh teunaga tanyoe katateuboih syedara geutanyoe ureueng yahudi nyang teupaksa jipeubloe droe jih ubak bansa aseng. teuma jinoenyoe gata tapaksa awaknyan mangat jipeubloe droe jih keu gata, padahai gata pih ureueng yahudi!" bubena peumimpin nyan hana geujaweueb meusikrak haba pih. lheueh nyan lon peugah lom, "buet gata nyan hana get! nyang sibeuna jih gata udeb deungan na rasa teumakot ubak po teu allah. deungan na lagee nyan musoh geutanyoe nyang hana meutuhan nyan hana gata bri watee keu jihina tanyoe. ulon keudroe, syedara-syedara lon dan rakan-rakan lon ka jimeu-utang peng dan gandom ubak rakyat. kamoe hana kamoe lakee atra nyan lom teuma. bah kheueh gata pi gata sampoh bubena utang-utang rakyat nyang na nibak gata, bahnyan peng meunan cit gandom, meunan cit anggo dan minyeuk zaiton. gata pulang kheueh laju jinoenyoe cit teuma bahnyan ladang, lampoh anggo, lampoh zaiton dan rumoh awaknyan!" le peumimpin nyan geujaweueb, "naseuhat nyan kamoe deungoe dan kamoe seutot. kamoe pulang atra awaknyan banmandum dan hana kamoe lakee beujibayuew le awaknyan." lheueh nyan laju ulon hoi teungku-teungku imeum dan lon yue meusumpah peumimpin-peumimpin nyan dikeue teungku-teungku imeum nyan, bahwa peue nyang ka awaknyan peugah nyan, bit-bit beujipeubuet. lheuehnyan ulon ploh ija seulempang nyang na nibak keuieng lon dan laju ulon pot sira lon peugah, "meunoe kheueh jeuet jih po teu allah geupot keu tieb-tieb ureueng nyang hana jipeuteupat janji jih. ureueng nyan teuma rhot meularat, rumoh dan banmandum atra beunda jih teuma geucok le po teu allah!" banmandum sidang nyang na nibak meusapat nyan jijaweueb, "amin!" lheueh nyan laju jipujoe tuhan. dan deungan nyan teuma dumna peumimpin nyan jipeutrok janji jih. ulon ka jeuet keu gubunur yehuda thon treb jih, phon nibak thon nyang keu dua ploh sampoe ubak thon lhee ploh dua lam keurajeun raja artahsasta. sidubnyan treb ulon dan syedara-syedara

lon hantom na ulon cok tunjangan ulon sibagoe gubunur. gubunur-gubunur sigohlom ulon, ka jeuet keu beuban nibak rakyat sabab awaknyan jilakee peng pirak siuroe keu peunajoh dan anggo. dan peugawee-peugawee awaknyan pih jiteugon rakyat. teuma ulon hana lon peubuet nyang lageenyon bagoe sabab ulon teumakot keu po teu allah. banmandum teunaga ulon, lon peusaho mandum keu teupeudong lom binte beuton dan ulon hana meuteume tanoh meubacut pih sibagoe hase reuoh lon, bahpi mandum peumbantu lon meusajan-sajan jimeubuet nibak teupeudong beuton nyan. sireutoh limong ploh droe yahudi dan bubena ureueng-ureueng patot awaknyan lon peujame jimakheun malam nibak rumoh lon, gohloom teuitung jame-jame nibak bansa teutangga kamoe. tieb-tieb uroe ulon keubah ateueh biaya lon keudroe saboh leumo, nam boh bubiri nyang teumbon dan le that-that manok nyang hana teukira. disampeng nyan, tieb-tieb siploh uroe ulon peuleungkab keuneubah ie anggo lon. bahpi ka meunan ulon hana lon lakee tujangan jabatan lon sibagoe gubunur, sabab ulon kuteupeue beuban rakyat ka geuhon that-that. ulon meulakee ya po teu allah, ingat kheueh banmandum nyang ka ulon peubuet keu bansa nyoe dan neubri kheueh beureukat keu ulon nyoe. sanbalat, tobia, gesyem dan musoh-musoh kamoe nyang laen jideungoe bahwa kamoe karab seulesoe kamoe peuet binte beuton, meunan seulesoe banmandum ruhueng-ruhueng nyang na nibak beuton nyan kamoe sumpai, bahpi watee nyan kamoe gohloom seulesoe kamoe pasang on-on pintoe nibak pintoe-pintoe geureubang banda. laju sanbalat dan gesyem jikirem undangan keu ulon mangat ulon teuka jakmeurumpok deungan gobnyan di saboh gampong di panton ono. teuma hainyan ulon teupeue bahwa awaknyan jikeuneuk peuceulaka ulon. le sabab nyan laju ulon kirem jeunaweueb haba nyang lageenyoe keu awaknyan, "ulon hana hase lon teuka sabab teungoh ulon keureuja buet nyang paleng peunteng. buet ulon nyan teuma teulanta meunyeu ulon jak meurumpok deungan gata." sampoe trok peuet goe awaknyan jikirem surat undangan nyang saban keu ulon, dan tieb-tieb goe teuma ulon kirem jeunaweueb nyang saban keu awaknyan. watee nyang keulimong sidroe lamkawan aneuk buah sanbalat jijak dan jibri laju surat teubuka ubak ulon nyang asoe jih na kheueh lageenyoe: "gesyem ka jipeubetoi bahwa na haba meusah-sah lamkawan bansa-bansa nyang na to-to bansikeulieng nyoe, nyang jipeugah bahwa gata dan ureueng yahudi nyang laen ka jireuncana jikeuneuk beurontak, dan nyan kheueh sabab jih gata tapeugot lom binte beuton nyan. dan jipeugah lom le jihnyan bahwa gata keuneuk baiat droe jeuet keuraja yehuda, dan ka tatunyok napadub droe nabi keugeubaiat gata jeuet keuraja di yerusalem. haba meusah-sah nyan ka pasti trok ubak raja. sabab nyan, tateuka kheueh mangat tajak meurok pakat keuhai nyan." teuma ulon laju lon kirem haba dan lon jaweueb lageenyoe, "banmandum nyang gata peugah nyan na kheueh haba sulet dan nariet nyan gata atoe-atoe keudroe." awaknyan jicuba jipeutakot-takot kamoe mangat kamoe pioh meubuet nyang teungoh kamoe

peubuet nyan. ulon laju meudoa, "ya allah, neupeu teuga kheueh ulon!" bak watee nyan cit teuma, di ulon laju ulonjak u rumah semaya bin delaya dan cucoe mehetabeel, sabab gobnyan hana watee geujak ubak ulon. geupeugah le gobnyan lagee nyoe, "jak geutanyoe dua tajak musom u baet tuhan. tagunci banmandum pintoe jih, sabab na ureueng nyang jikeuneuk poh mate gata. mungken nibak malam nyoe gata teuma jipoh mate." teuma ulon jaweueb lageenyoe, "ulon nyoe kon ureueng gusuen, dan bukan ureueng galak jipeuplueng droe peulom teujak musom. sibagoe ureueng biasa ulon hana jeuet ulon tamong u dalam baet tuhan, teuma ulon hase mate. hana jeuet, ulon hana lontem!" oh ka ltheueh ulon timang-timang hainyan, baro kheueh ulon sada bahwa peue nyang jipakat le semaya nyan kon teuka nibak po teu allah, teuma teuka nibak tobia dan sanbalat. awaknyan bandua ka jisugok semaya mangat jijak peusampoe nubuat nyan ubak ulon. meukeusut awaknyan na kheueh mangat ulon takot dan ulon seutot peue nyang jipeugah le awaknyan sampoe ulon peubuet desya. deungon lagee nyan awaknyan ka meuteume watee keu jipeubrok nan ulon mangat ulon jeuet keuboh bibi rakyat ba. ulon meudoa ubak po teu allah, "ya allah po, neuingat kheueh peue nyang ka jipeubuet le tobia dan sanbalat nyan. neu hukum kheueh awaknyan! meunan cit deungon nabiah nyang nan jih noaja dan nabi-nabi nyang laen nyang jikeuneuk peutakot-takot ulon." binte beuton nyang teupeuget nyan jipajoh watee sampoe 52 uroe, dan seulesue bak tanggai dua ploh limong buleuen elul. yoh watee musoh-musoh kamoe lamkawan bansa nyang na bak bineh kamoe jideungoe hainyan, awaknyan jitakot gadoh iemuka, sabab banmandum ureueng jiteupeue bahwa buet nyang teupeuget nyan na kheueh geutulong le po teu allah. teungoh lageenyan bubena peumimpén yahudi mantong cit jipeugot surat sumurat deungon tobia. jai that-that ureueng yahudi nyang meurakan deungon tobia, sabab jih nyan meulintee sekhanya bin arah. lom teuma yohan aneuk tobia, jimeukawan deungon aneuk inong mesulam aneuk berekhyia. bahpi tobia hana putoh-putoh jituleh surat ubak ulon keu jipeutakot-takot ulon, teuma bubena peumimpén yahudi nyan jikheun-kheun dikeue ulon mandum nyang get-get keu tobia nyan. teuma, banmandum nyang ulon peugah, jijak peutrok ubak tobia. oh ka seulesue binte beuton nyang teupeugot, laju ulon yue mangat on-on pintoe jih teupasang. laju le ureueng-ureueng nyang jaga babah pintoe geureubang, ureueng meuca-e dan ureueng-ureueng lewi ulon yue teuma nibak tugaih gobnyan maseng-maseng. nyang mat peurintah ateuhe banda yerusalem ulon seurah ubak syedara ulon hanani dan ubak hananya, panglima kuta, sabab gobnyan leubeh nibak ureueng laen, jitakot ubak tuhan dan jeuet teupeucaya. ulon kheun ubak awaknyan, "pintoe geureubang yerusalem baro jeuet teupeuhah meunyoe uroe ka beungoh dan haroh jeuet teutob dan teupasang palang jih meunyoe ureueng nyang keumiet seulesue tugaih watee seupot nyan. seulaen nibak nyan haroh teuma teutunyok ureueng nyang keumiet nyang laen

lamkawan peunduduek yerusalem, siladam mangat jitinggai nibak rumah jaga dan siladam teuk keu jikeulileng lamkawan rumah awaknyan." yerusalem na kheueh banda nyang luwah teuma peunduduek jih cit bacut, dan gohlom le rumah nyang ka teupeugot. le sabab nyan allah ka geubri ilham keu ulon mangat lon gumpoi rakyat dan bubena peumimpén meunan cit deungon peumuka-peumuka jih, mangat ulon hase lon itong awaknyan deungon dasai dafearat silsilah awaknyan. nibak keuseumpatan nyan ka ulon teume cetetan keuhai ureueng nyang phon-phon that jiwoe nibak teupat nyang teuboih. ltheueh nyan nyoe kheueh keuteurangan nyang ulon teume nibak catetan nyan: le lumpah na lamkawan ureueng-ureueng nyang teuboih jitinggai propinsi babel dan jiwoe u yerusalem dan yehuda, maseng-maseng u banda jih keudroe. awaknyan ka treb that udeb di teupat nyang teuboih, di babel, yoh phon awaknyan geuangkot keudeh le raja nebukadnezar. peumimpén-peumimpén awaknyan na kheueh zerubabel, yesua, nehemia, azarya, raamya, nahamani, mordekhai, bilsan, misperet, bigwai, nehum dan baana. nyoe kheueh nan-nan dafearat kawom keuluwarga israel, deungon jeumeulah ureueng nibak tieb-tieb kawom nyang jiwoe nibak teupat nyang teuboih: paros – sefaca – arakh – pahat-moab (keuturonan yesua dan yoab) – elam – zatu – zakai – binui – bebai – azgad – adonikam – bigwai – adin – ater (na cit teuhoi hizkia) – hasum – bezai – harif – gibeon – ureueng-ureueng nyang indatu jihnyan tinggai di banda-banda nyang teupeugah lom nyoe meunan cit awaknyan ka jiwoe nibak teupat nyang teuboih: banda betlehem dan netofa – anatot – bet-azmawet – kiryat-yearim, kefira dan beerot – rama dan gaba – mikhmas – betel dan ai – nebo nyang laen – elam nyang laen – harim – yerikho – lod, hadid dan ono – senaa – nyoe kheueh dafearat kawom keuluwarga teungku-teungku imeum nyang geuwoe nibak teupat nyang teuboih: yedaya (keuturonan yesua) – imer – pasyhur – harim – kawom keuluwarga lewi nyang geuwoe nibak teupat nyang teuboih na kheueh: yesua dan kadmiel (keuturonan hodewa) – nyang peumeuen musik di baet tuhan nyang jaga babah pintoe geureubang di baet tuhan nyoe kheueh dafearat kawom keuluwarga nyang jijak buet di baet tuhan nyang jiwoe nibak teupat nyang teuboih: ziha, hasufa, tabaot, keros, sia, padon, lemana, hagaba, salmai, hanan, gidel, gahar, reaya, rezin, nekoda, gazam, uza, paseah, besai, meunim, nefusim, bakkub, hakufa, harhur, bazlit, mehida, harsa, barkos, sisera, temah, neziah dan hatifa. kawom keuluwarga peulayan nabi sulaiman nyang geuwoe nibak teupat nyang teuboih na kheueh: sotai, soferet, perida, yaala, darkon, gidel, sefaca, hatil, pokheret-hazeabaim, amon. jeumeulah banmandum keuturonan nyang jijak buet di baet tuhan dan peulayan nabi sulaiman nyang jiwoe nibak teupat nyang teuboih na kheueh 392 droe. lamkawan ureueng-ureueng nyang beurangkat nibak banda-banda tel-melah, tel-harsa, kerub, adon dan imer, na 642 droe nyang jitamong cit keunan kawom delaya, tobia dan nekoda; teuma awaknyan hana hase jikok bukeuti bahwa awaknyan na kheueh

keuturonan israel. meunan teuma le teungku-teungku imeum hana cit jiteume catetan keuhai indatu awaknyan. kawom-kawom nyan na kheueh habaya, hakos dan barzilai. (sidroe lamkawan kawom indatu nibak kawom barzilai jimeukawen deungan inong keuturonan kawom barzilai di gilead dan oh ltheuhnyan gobnyan jingui nan keuluwarga tuwan jihnyan.) sabab awaknyan hana hase jijok bukeuti soe indatu gobnyan, teuma awaknyan hana jiteu-rimong sibagoe teungku imeum. gubunur daerah yehuda jitam awaknyan bek jipajoh peunajoh nyang teupeuseumah keu po teu allah, sampoe na sidroe teungku imeum nyang hase jibri peutunyok deungan cara teungui urim dan tumim. ureueng-ureueng nyang teuboih nyang ka jiwoe u nanggroee gobnyan banmandum jeumeulah jih na 42.360 droe. seulaen nibak nyan na cit peumbantu awaknyan deungan jeumeulah 7.337 droe dan ureueng meunyanoye na teuma jeumeulah jih 245 droe. dan awaknyan na teuma jiba sajan beulatang-beulatang peulara, di lamkawan jih: guda – bagal – unta – keuleudee – rame that lamkawan rakyat nyang jibri sumbangan keu biaya teureuhab baet tuhan: nibak gubunur – nibak ulee kawom – nibak ureueng-ureueng laen: – bubena teungku imeum, ureueng-ureueng lewi, dan ureueng nyang jaga babah pintoe geureubang baet tuhan, ureueng meuca-e, le nibak rakyat biasa, ureueng nyang meubuet di baet tuhan, paneuk haba banmandum rakyat israel, katinggai teutab di banda-banda dan gampong-gampong di yehuda. bak buleuen nyang keutujoh ureueng israel ka tinggai teutab di banda jih maseng-maseng. bak tanggai sa buleuen nyan awaknyan banmandum meugumpoi di yerusaleum, di leuen bagian keue pintoe geureubang ie. awaknyan jilakee mangat jeuet kitab hukum geujak cok le teungku imeum ezra, sidroe ureueng malem lam hai hukum nyang geubri le tuhan keu israel meulalu nabi musa. laju le ezra geuba kitab nyan ukeue jeumaah nyang kana disinan, jeumaah nyan na kheueh ureueng agam, ureueng inong dan aneuek miet nyang katrok umu keuhase jipuphom. oh ltheueh nyan, phon beungoh sampoe trok an cot uroe, ezra geubeuet hukum nyan keu jeumaah nyan, dan sidang jeumaah pih ek jideungoe deungan peunoh peuratan. ezra geudong di ateueh peudium kayee nyang ka teuseudia keu acara nyan. nibak blaih uneuen gobnyan jidong ureueng-ureueng nyang teupeugah nyoe: matica, sema, anaya, uria, hilikia dan maaseya; teuma nyang dong blaih wie gobnyan na kheueh: pedaya, misael, malkia, hasum, hasbadana, zakharria dan mesulam. peudium tempat geudong ezra nyan leubeh manyang nibak ureueng-ureueng nyang na disinan, sampoe awaknyan banmandum hase jingiang ateueh ezra. hana treh oh ka ltheueh geusalob kitab nyan le ezra, awaknyan banmandum jidong. laju geupeugah le ezra, "pujoe kheueh tuhan, allah nyang rayeuk!" banmandum rakyat laju jibeutot jaroe jih manyang-manyang sira jijawueub, "amin, amin!" laju awaknyan sujut jiseumah po teu allah. oh ltheuhnyan di ureueng rame nyan laju jibeudoh sira jidong di tempat droe jih maseng-maseng, dan le siladum ureueng lewi nyang na disinan laju jipeutrang banmandum hukum nyan ubak awaknyan.

nan-nan ureueng lewi nyan na kheueh: yesua, bani, serebya, yamin, akub, sabetai, hodia, maaseya, kelita, azarya, yozabad, hanan, dan pelaya. awaknyan jiteujeumah hukom allah nyan nibak bagian deumi bagian sira jipeutrang sampoe rakyat hase jipuphom beuet nyan. watee jideungoe teubeuet hukom, bubena rakyat teuharu sira jimo. dan gubunur nehemia dan teungku imeum ezra nyang malem that nibak hukom nyan, meunan cit deungan ureueng-ureueng lewi nyang ka jipeutrang keuhai hukom nyan, jipeugah laju ubak mandum rakyat lageinyoe, "uroe nyoe na kheueh uroe nyang khusus keu tuhan, allah gata, sababnyan bek kheueh gata seudeh atawa tamo. jinoenyoe tajak woe kheueh u rumoh gata maseng-maseng; tamakheun dan tajieb kheueh ie deungan mangat dan geumbira. tajok kheueh siladum nibak peunajoh dan anggo gatanyan keu ureueng nyang bit-bit peureulee. uroe nyoe na kheueh uroe nyang khusus keu tuhan, allah geutanyoe, jadi, bek kheueh gata peususah ate. geumbira nyang geujok le tuhan keu gata nyan na kheueh mangat teupeuteuga gata." meunan cit deungan ureueng-ureueng lewi carong that bak geucok ate rakyat sira jipeugah meu-ulang-ulang lagee nyoe, "bek ragoe ate gata nibak uroe nyang khusus nyoe." dan jiwoe kheueh banmandum rakyat nyang na jijak keunan, oh trok u rumoh laju jimakheun ngon jijieb ie sira jibagi-bagi peunajoh keu ureueng laen. awaknyan banmandum galak ngon seunang ate sabab ka jituh puphom banmandum tafeuse nyang ka ltheueh jibeuet nyan. oh singoh beungoh meusapat kheueh banmandum ulee-ulee kawom, teungku-teungku imeum dan ureueng-ureueng lewi, oh ka meusapat laju jijak ubak ezra keuneuk jak tanyong deungan purunoe keuhai hukom tuhan. awaknyan na meuteume bahwa lam hukom nyang ka geubri le tuhan meulalu nabi musa, tuhan geuyee umat israel mangat jiduek lam jambo-jambo darurat sigohlom habeh khanuri jambo on nyan. le sabab nyan, bansaboh yerusaleum bah kheueh nyan di banda-banda meunan cit di gampong-gampong, awaknyan laju ji peumaklum peurintah nyoe, "tajak kheueh laju u ateueh gunong tacok laju cabeueng-cabeueng kayee bak sala, bak zaiton, bak minyeuk, palma dan bak kayee nyang laen mangat teupeugot jambo nyang sisuai deungan peuratan nyang na teutuleh lam kitab hukum." ban jideungoe peurintah nyang lagee nyan di rakyat pih laju jijak teungoh u ateueh gunong jijak koih bak kayee nyang teupeugah nyan. awaknyan banmandum jipeudong jambo nyang bubong jih data di ateueh rumoh jih, nibak leuen rumoh droe jih, nibak leuen baet tuhan, nibak padang nyang rab deungan pintoe geureubang ie dan nibak padang pintoe geureubang efraim. banmandum rakyat nyang ka jiwoe nibak tempat nyang teuboih nyan hana nyang tinggai banmandum jipeudong jambo-jambo darurat nyan dan jiduek disinan. nyang kheueh phon that jipeubuet yohphon jamen yosua bin nuan, dan banmandum awaknyan galak ngon mubahgia. na tujuh uroe treh jih teupeuna khanuri nyan. tieb-tieb uroe bagian deumi bagian nyan na teutuleh lam kitab hukom allah nyan geupeubeuet le ezra. bak uroe nyang keulapan laju geutob acara nyan, nyang

paih deungon peuratoran hukum. bak tanggai dua ploh peuet buleuyan nyan cit teuma, rakyat israel laju meugumpoi. awaknyan laju geupusa keu sibagoe tanda ka meunyeusai ateueh desya-desya nyang na nibak gobnyan. awaknyan geupeu aseng droe nibak banmandum ureueng aseng. sibagoe tanda seudeuh ate, awaknyan geungui ija karong dan di ateueh ulee laju geutabu tanoh. oh ltheuehnyan awaknyan geudong dan geumeungaku banmandum desya nyang na nibak gobnyan dan desya nek indatu awaknyan. na kira-kira lhee jeuem, kitab hukum tuhan, allah droe geuh nyan, geupeubeuet le ezra ubak awaknyan, dan na lhee jeuem seulanjut jih awaknyan geumeungaku ubak desya-desya droe gobnyan maseng-maseng. oh ka ltheuehnyan awaknyan laju geusujut geuseumah tuhan, allah. disinan na peudium keu ureueng lewi dan di ateueh peudium nyang geudong kheueh yesua, bani, kadmiel, sebanya, buni, serebya, bani dan kenani. deungon su nyang meuleungkeueng awaknyan laju geumeudoa ubak tuhan, allah awaknyan. iebadat bak uroenyoe geupeuphon le ureueng-ureueng lewi nyang teupengah seulanjut jihnyoe: yesua, kadmiel, bani, hasabneya, serebya, hodia, sebanya dan petahya. awaknyan geupeugah lageenyoe, "neudong kheueh dan neupujoe kheueh tuhan allah geutanyoe! pujoe kheueh gobnyan siumu masa! teupujoe kheueh nan gobnyan nyang peunoh keumuliaan, nan nyang meusyeyuhu, leubeh nibak sigala nyang teupujoe!" oh ltheuehnyan rakyat israel laju geumeudoa lagee nyoe, "droeneueh kheueh tuhan, ya tuhan, droeneueh kheueh nyang mahaesa; droeneueh nyang peujeuet bintang dan banmandum angkasa raya, meunan cit deungon laot dan bumoe dan peue mantong asoe jih, laju tuhan bri udeb dan tuhan peulara. ubak droeneueh peue mantong nyang mat kuasa di ateueh langet jiseumah sujut; awaknyan jitundok ubak droeneueh sira meuteuot. droeneueh kheueh tuhan allah, nyang mahaesa. tuhan pileh nabi ibrahim di teungoh-teungoh bansa gobnyan. ur nyang na di babel ka geutinggai, kareuna droeneueh keudroe nyang pimpen gobnyan. laju tuhan bri ubak gobnyan nan nyang baro: nabi ibrahim, nyan kheueh nan gobnyan nyang tuhan boh seujak yohnyan. tuhan kalon gobnyan nyang seutia ubak droeneueh dan patuh. laju tuhan meujanji ngon gobnyan saboh janji nyang teugoih. tanoh kanaan, het dan amori, tanoh feris, yebus dan girgasi, banmandum nyan keuneuk tuhan jok ubak gobnyan; sibagoe teumpat tinggai banmandum keuturonan gobnyan. oh ltheuehnyan tuhan peupeunoh, janji droeneueh nyan ubak gobnyan, sabab droeneueh ade dan seutia. tuhan ka neukalon indatu kamoe nyang udeb meularat yoh masa dilee; tuhan ka neudeungoe indatu kamoe geumo bah kheueh nyan yoh di nanggroe meuse meunan di laot teberau. teuhadab raja di nanggroe meuse ka tuhan peubuet hai-hai nyang luwa biasa, meunan cit teuhadab pegawee dan rakyat nanggroe nyan, sabab tuhan neuteupeue pakriban umat droeneueh jipeusaket. dan meusyeyuhu kheueh nan droeneueh sampoe nibak uroe nyoe. keu neupeugot ret ueh keu umat droeneueh, laot tuhan plaih; tuhan peujeumeurang awaknyan ret lam laot nyang

tan basah. ureueng nyang let ka karam dalam laot nyang lhok, lagee batee nyang karam lham laot nyang seuram. deungon saboh awan nyang meugantueng tuhan pimpen awaknyan meunyoee watee uroe. dan meunyoee ka malam ret awaknyan tuhan peutrang deungon tameh meu apui. nibak langet tuhan peutron u ateueh gunong sinai, laju droeneueh peugah haba deungon umat droeneueh keudroe. tuhan bri hukum, atoran dan peurintah nyang ade, beuna dan meufaidah. uroe sabat nyang suci haroh jipeuraya, dan meulalu nabi musa hukum tuhan bri. bak watee awaknyan deuk dan kureueng peunajoh, ruti nibak langet tuhan peutron. dan nibak batee nyang padeek, teuga ngon kreueh ie keu peupuleuh glaih tuhan peuteuka. tuhan yue awaknyan duek di ateueh tanoh nyang tuhan peujanji ubak awaknyan deungon sumpah. teuma indatu kamoe sombang ngon manyang ate; peurintah-peurintah droeneueh hana geutaati. awaknyan hana patuh, sigala nyang jroh nyang tuhan bri ka geupeutuwo, dan banmandum buet nyang ajaeb nyang ka tuhan peubuet ka gadoh dalam ingatan. deungon ate nyang sombang laju geupileh sidroe keutua, keu geuba awaknyan u nanggroe meuse, mangat jeuet keunamiet keula-i. teuma droeneueh ya allah nyang teutab neupeumeuah, panyang saba, murah ate dan peunoh geunaseh. geunaseh tuhan keubit luwabiasa; tuhan tan neutinggai awaknyan. awaknyan geupeugot patong beurala nyang saban ngon leumo, laju awaknyan geupeugah, 'nyoe kheueh allah gata, nyang ka geuba gata nibak nanggroe meuse, nibak peubudakan.' ya allah, droeneueh keudroe nyang jipeuhina! teuma di guron nyan awaknyan hana cit tuhan tinggai, kareuna droeneueh nyang peunoh gaseh sayang. tameh awan dan apui hana tuhan tarek keula-i, peutunyok jalan awaknyan meunyoee uroe dan oh malam teuma. deungon kuasa droeneueh nyang jroh tuhan peurunoe awaknyan. awaknyan geumakheun manna dan ie meuneujieb nyang sicukob jih. na peuet ploh thon dalam padang beulantara, teuma tuhan teutab neupeuseb peue nyang jipeureulee. peukayan awaknyan hantom na rusak, gaki awaknyan hana teuma saket dan luka. tuhan bri ubak awaknyan keumeunangan nyang hibat ateueh keurajeuen nyang le dan bansa nibak bataih tanoh awaknyan. hesybon nanggroe raja sihon, awaknyan kuasa; basan nanggroe raja og, awaknyan reupah teuma. tuhan peujeuet keuturonan awaknyan lagee bintang nyang meutabu di langet ijo. tuhan bri keu awaknyan tanoh keu teumpat tinggai, tanoh nyang ka tuhan peujanji ubak indatu awaknyan. keuturonan awaknyan jipeusalah tanoh kanaan; peunduduek disinan droeneueh peutaloee. umat droeneueh neubri kuasa jimeutindak banalak droe teuhadab bansa-bansa kanaan ngon raja teuma. umat droeneueh geureubot kuta-kuta peutahanan tanoh nyang suboe ngon rumoh nyang peunoh keukayaan. mon-mon dan mata-mata ie awaknyan reubot, lampoh anggo, bak zaiton dan boh-boh kayee nyang laen teuma. awaknyan teumbon kareuna geupajoh peue nyang galak. sigala nyang tuhan bri nyang jroh-jroh awaknyan reusapi. teuma umat droeneueh jibeurontak han jitaat ubak tuhan, jipeubeuah hukum

dan peurintah droeneueh, jipoh mate nabi-nabi nyang bri naseuhak ubak awaknyan, dan nyang yue awaknyan jigisa ubak droeneueh, allah awaknyan. ya tuhan, tieb-tieb watee teuma droeneueh jihina le awaknyan, teuma tuhan seurah awaknyan ubak musoh droe nyang lumpah that keujam jikuasa ngon jitindeeh. teuma dalam keususahan nyang kukob brat nyan, awaknyan laju jimeuhoi ubak droeneueh jila-kee bantu. nibak dalam syeuruga tuhan neu deungoe awaknyan; deungon peunoh geunaseh tuhan neubri jaweueb. tuhan kirem peumimpin dan pahlawan nyang peuleupah awaknyan nibak lawan. teuma bak watee nanggroe droe geuh ka aman lom, awaknyan hana jitakot jipeubuet desya keula-i. teuma tuhan bri teuma awaknyan ubak siteuru nyang tindeeh droe geuh deungon keujam. teuma, bakwatee awaknyan ka insaf dan peunoh peunyeusalan, awaknyan jimeuhoi droeneueh mangat neupeuseulamat. teuma nibak dalam syeuruga tuhan neu deungoe, dan tuhan tulong meu ulang-ulang, sabab tuhan neu weueh ubak awaknyan peunoh gaseh sayang. tuhan sapa awaknyan mangat ajaran droeneueh jitem seutot, teuma awaknyan jitulak hukom droeneueh deungon deungki ate. padahai, meunyo hukom droeneueh jitem seutot, pasti teuma teujamin dalam udeb. awaknyan kukob kreueh ulee meunan cit deungon ate bak lagee baja, hana jitem deungoe, dan hana teuma jitem taat ubak peurintah droeneueh. habeh thon meugantoe thon deungon saba tuhan teutab neupeu ingat ubak awaknyan; meulalu nabi-nabi, roh droeneueh neupeugah ubak awaknyan. teuma umat droeneueh nyan jitob geulinyueng, laju tuhan seurah awaknyan ubak bansa-bansa di seugala nanggroe. teuma kareuna geunaseh droeneueh nyang raya hana teukira, awaknyan teutab hana tuhan tinggai atawa tuhan peuhanco. meumang, droeneueh kheueh tuhan allah nyang hana sa dalam alam nyoe; raya geunaseh droeneueh, peunoh deungon seutia! ya allah, allah po kamoe nyang paleng raya! po teu allah nyang akbar dan dahsyat lagoena! deungon peunoh seutia tuhan mumat ubak banmandum janji; janji tuhan neupeupeunoh dan tuhan laksana. seumeunjak jamen raja asyur jitindeeh kamoe sampoe nibak saat nyoe, lumpah that le deurita nyang kamoe alami. dumna raja kamoe, teungku imeum, nabi dan dumna ureueng patot, meunan cit deungon indatu dan rakyat, ka habeh meudeurita banmandum. bek neutuwoe ubak banmandum deurita nyan! bek kheueh teuma tuhan peugadoh dalam ingatan droeneueh! tindakan tuhan ade, dan tuhan hukom kamoe nyang meudesya; tuhan teutab seutia bah pih kamoe ka peunoh deungon cela. nek indatu kamoe, raja, teungku imeum dan dumna ureueng patot atawa peumuka, geulanggeuh ubak hukom droeneueh dan geupeujayeh teuma. peue mantong peurintah dan larangan nyang ka tuhan bri, mubacut pih hana geupeuduli, dan meubacut hana geutem deungoe. tuhan bri dumna raja nyang mat keura-jeuen ateueh umat droeneueh, bak watee awaknyan tinggai di ateueh tanoh nyang luwah dan suboe nyang ka tuhan bri. teuma, awaknyan teutab hana geutem tinggai buet-buet nyang jeuhet, han geutem meungabdi ubak droeneueh meunan cit deungon

iebadat. teuma jinoenyoe, kamoe banmandum ka jeuet keu namiet nibak tanoh nyang ka tuhan bri sibagoe pusaka. tanoh nyoe suboe, ya tuhan, peunoh deungon hase bumoe, nyang seuharoh jih kamoe nikmati. banmandum hase nyang meuteume nibak tanoh nyoe haroh teubri ubak raja-raja nanggroe bubena ureueng mat kuasa nyan tuhan angkat ateueh umat droeneueh, sibagoe hukoman desya kamoe teuhadab droeneueh. raja nyan jimat peurintah ban galak droe ateueh droe kamoe dan beulatang peulara nyang na atra kamoe. sabab nyan kamoe jinoenyoe kukob meudeurita ya tuhan, nyang peunoh deungon azeub dan deurita!" deungon dasai sigala nyang ka teujadi nyan, kamoe rakyat israel laju kamoe buet peujanjian nyang kukoih dan teutuleh, deungon teuboh cab dumna peumimpin kamoe, ureueng-ureueng lewi, dan sidroe imeum kamoe. ureueng nyang phon that teken nyan na kheueh gubunur nehemia bin hakhalya. oh lheureh nyan geuseutot le zedekia. oh lheurehnyan ureueng-ureueng nyang teupeugah nyoe: teungku-teungku imeum seraya, azarya, yeremia, pasyhur, amarya, malkia, hatas, sebanya, malukh, harim, meremot, obaja, daniel, gineton, barukh, mesulam, abia, miyamin, maazy, bilgal dan semaya. ureueng-ureueng lewi yesua aneuek azanya, binui keuturonan kawom henadad, kadmiel, sebanya, hodia, kelita, pelaya, hanan, mikha, rehob, hasabya, zakur, serebya, sebanya, hodia, bani dan beninu. peumimpin-peumimpin bansa paros, pahat-moab, elam, zatu, bani, buni, azgad, bebai, adonia, bigwai, adin, ater, hizkia, azur, hodia, hasum, bezai, harif, anatot, nebai, magpias, mesulam, hezir, mesezabeel, zadok, yadua, pelaca, hanan, anaya, hosea, hananya, hasub, haloehs, pilha, sobek, rehum, hasabna, maaseya, ahia, hanan, anan, malukh, harim dan baana. kamoe, rakyat israel, banmandum teungku imeum, ureueng-ureueng lewi, ureueng nyang jaga babah pintoe geureubang baet tuhan, ureueng peumeuen musik dan ureueng-ureueng nyang meukeureuja di baet tuhan, meunan cit deungon peurumoh dan aneuek-aneuek kamoe nyang kaseb rayeuk keu jimuphom dan banmandum ureueng nyang taat ubak hukom allah dan ka jipeuaseng droe nibak bansa aseng nyang na tinggai di nanggroe kamoe. kamoe banmandum kamoe peugabong droe deungon bubena peumimpin kamoe dan kamoe meusumpah mangat hase udeb nyang sisuai deungon hukom po teu allah nyang ka geubri keukamoe deungon peurantaraan nabi musa, hamba gobnyan. seumoga po teu allah geukutok kamoe meunyo kamoe meuiengkeue ubak janji nyan. meunan cit kamoe meusumpah kamoe peubuet banmandum peurintah, hukom dan peuraturan tuhan, allah kamoe. dan kamoe meusumpah bahwa hukom hana kamoe meukawen le deungon bansa aseng nyang na tinggai di nanggroe kamoe. meunyo na bansa aseng nyang jikeuneuk peubloe gandom atawa barang peue mantong keu kamoe nibak uroe sabat atawa uroe suci nyang laen, atranyan hana kamoe bloe. nibak tieb-tieb thon nyang keutujoh, kamoe hana kamoe tron ublang dan meunan cit hana teuma kamoe jak tunggee utang. tieb-tieb thon kamoe maseng-maseng teutab kamoe seudeukah

limong gram pirak keu anggaran beulanja baet tuhan. meunan cit kamoe teutab kamoe peuna peue-peue nyang peureulee keu iebadat di baet tuhan, lagee; ruti peuseumah, peuseumahan gandom tieb-tieb uroe, beulang keu keureubeuen nyang teutot tieb-tieb uroe, peuseumahan suci nyang laen, keureubeuen-keureubeuen teupeu amphon desya israel, dan peue mantong nyang teupeureulee keu baet tuhan. kamoe, banmandum rakyat, bubena teungku imeum dan ureueng-ureueng lewi, kamoe tiek undi tieb-tieb thon keu teupeuteuntee kawom nyang toh nyang haroh jikeubah kayee apui keu teupeuseumahan keureubeuen-keureubeuen keu tuhan allah kamoe, nyang na meunurot peuratoran hukum. tieb-tieb thon teuma kamoe ba u baet tuhan hase gandom nyang phon teupot dan boh-boh kayee nyang phon-phon masak di ateuh bak kayee kamoe. meunan cit teuma kamoe ba aneuk agam kamoe nyang tuha ubak teungku imeum di baet tuhan mangat teujok ubak po teu allah, nyang sisuai deungon peuratoran hukum. meunan cit kamoe bri teuma aneuk leumo, aneuk bubiri atawa aneuk kameng kamoe nyang phon lahe. meunan cit teuma kamoe ba ubak teungku imeum di baet tuhan gandom kamoe nyang ka kamoe cawoe nyang phon that teupot di ateuh bak jih tieb-tieb thon, meunan cit deungon peuseumahan-peuseumahan nyang laen lagee ie anggo, minyeuk zaiton, dan peue mantong boh-boh kayee. peuseumahan-peuseumahan nibak hase blang kamoe teuma kamoe ba ubak ureueng-ureueng lewi nyang jak kuteb peuseumahan-peuseumahan siper siploh di banda-banda tani. teuma beuna sidroe lamkawan teungku imeum keuturonan nabi harun nyang jeuet keu rakan ureueng lewi nyan meunyo awaknyan meutugaih geujak kuteb peuseumahan siper siploh nyan. dan siper siploh teuma nibak peuseumahan nyan haroh jiba le ureueng lewi keu kama-kama keuneubah nyang na di baet tuhan. rakyat israel dan ureueng-ureueng lewi haroh teuma jiba sumbangan teutab lagee gandom, anggo, minyeuk zaiton ubak kama keuneubah di teupat teukeubah alat-alat baet tuhan. disinan cit teuma teupat tinggai teungku imeum nyang teungoh meutugaih, ureueng nyang jaga baet tuhan dan ureueng meuca-e. kamoe hana lalee le kamoe rawat baet tuhan kamoe. bubena peumimpin awaknyan tinggai teutab di yerusalem dan rakyat jirhom undi keujipileh saboh keuluwarga nibak tieb-tieb siploh boh keuluwarga nyang haroh tinggai di banda suci yerusalem. nyang hana teupileh jeuet tinggai di banda-banda nyang laen. lamkawan awaknyan na nyang rila tinggai teutab di yerusalem dan awaknyan jipujoe le rakyat. di banda-banda laen, rakyat israel, bubena teungku imeum, ureueng-ureueng lewi, ureueng nyang meukeureuja di baet tuhan, dan keuturonan ureueng nyang peutimang nabi sulaiman awaknyan tinggai nibak tanoh-tanoh atra jih keudroe dan nibak banda-banda gobnyan keudroe. na meupadub droe lamkawan sukee yehuda dan benyamin tinggai di yerusalem. nyoe kheueh dafearat nan-nan awaknyan: anggota-anggota sukee yehuda: ataya bin uzia dan cucoe nabi zakharia. na padubdroe lamkawan indatu awaknyan na kheueh:

amarya, sefaca dan mahalaleel, peres, yehuda. jeumeulah awaknyan na kheueh 468 droe nyang gagah peukas. maaseya bin barukh dan cucoe kolhoze. na padubdroe lamkawan indatu awaknyan na kheueh: hazaya, adaya, yoyarib, nabi zakharia, syela, yehuda. anggota-anggota sukee benyamin: satu bin mesulam dan cucoe yoe. na padubdroe lamkawan indatu awaknyan na kheueh: pedaya, kolaya, maaseya, itiel dan yesaya. gabai dan salai. awaknyan na kheueh kawom syedara nyang rab ngon satu. banmandum nyan na jeumeulah jih 928 droe geupimpin le yoe bin zikhri dan waki gobnyan, yehuda bin hasenua. teungku-teungku imeum: yedaya bin yoyarib dan yakhin. seraya bin hilkia dan cucoe mesulam. na padubdroe lamkawan indatu awaknyan na kheueh: zadok, merayot, ahitub nyang jeuet keu teungku imeum agong. banmandum nyan na 822 droe teungku imeum nyang meutugaih di baet tuhan. adaya bin yeroham dan cucoe pelaya. na padubdroe lamkawan indatu awaknyan na kheueh: amzi, zakharia, pasyhur dan malkia. ulee-ulee keuluwarga dalam kawom nyan na jeumeulah jih 242 droe. amasai bin asarel dan cucoe ahzai. indatu gobnyan na kheueh: mesilemot dan imer. nibak kawom nyoe na 128 droe pahlawan nyang beuhe dan gagah peukas. peumimpin awaknyan na kheueh zabdiel, bin gedolim. ureueng-ureueng lewi: semaya bin hasub dan cucoe azrikam. indatu awaknyan na kheueh: hasabya dan buni. sabetai dan yozabad, ureueng-ureueng lewi peunteng nyang kawai buet-buet di luwa baet tuhan. matanya bin mikha dan cucoe zabdi, nibak keuturonan asaf. gobnyan na kheueh peumimpin ureueng meuca-e keu doa syukoe. bakkukya waki matanya. abda bin samua dan cucoe galal, nibak keuturonan yedutun. banmandum nyan na jeumeulah 284 droe. ureueng nyang jaga babah pintoe geureubang: akub, talmon dan rakan-rakan awaknyan. banmandum nyan na jeumeulah 172 droe. rakyat israel, mandum teungku imeum dan ureueng-ureueng lewi nyang na mantong leubeuh, tinggai teutab di tanoh geuh nibak meubagoe banda di yehuda. ureueng nyang meubuet di baet tuhan tinggai teutab di bagian banda yerusalem nyang nan jih ofel. awaknyan jimeubuet dimiyueb pimpinan ziha dan gispa. nyang kawai ureueng lewi nyang na tinggai di yerusalem na kheueh uzi bin bani dan cucoe hasabya. indatu gobnyan na kheueh matanya dan mikha. gobnyan jitamong ubak kawom asaf, nyang tugaih geuh bagian musik watee seumbahyang di baet tuhan. gileran tieb-tieb kawom keu teu uroih musik di baet tuhan tieb-tieb uroe nyang ka teupeuteuntee meunurot peuratoran nyang geupeugot le raja. petahya bin mesezabeel nibak kawom zera dan sukee yehuda, jeuet keu waki bansa israel nibak meuligoe raja persia. le that-that rakyat nyang tinggai di banda-banda nyang to deungon blang gobnyan. na meupadubdroe nibak sukee yehuda tinggai di daerah lamkawan bersyeba di siblahi seulan dan panton hinom di siblahi utara. awaknyan tinggai di banda-banda nyang teupeugah nyoe meunan cit deungon gampong-gampong nyang to-to bansikeulileng nyan: kiryat-arba, dibon, yekabzeel, yesua, molada, bet-pelet, hazar-sual,

bersyeba, ziklag, mekhona, en-rimon, zora, yarmut, zanoah, adulam, azeka, lakhis. na papadub droe nibak sukee benyamin tinggai di geba, mikhmas, ai, betel dan gampong-gampong nyang na to-to disinan, di anatot, nob, ananya, hazor, rama, gitaim, hadid, zeboim, nebalat, lod, ono dan di panton tukang-tukang. na meupadub boh kawan ureueng lewi nyang yoh masa ilee tinggai di daerah yehuda geuyue tinggai deungon ureueng-ureueng benyamin. nyoe kheueh nan-nan teungku imeum dan ureueng-ureueng lewi nyang ka geuwoe nibak teupat nyang teuboih meusajan-sajan deungon zerubabel bin sealtiel dan deungon teungku imeum agong yesua: teungku-teungku imeum: seraya, yeremia, ezra, amarya, malukh, hatu, sekhanaya, rehum, meremot, ido, ginetoi, abia, miyamin, maaja, bilga, semaya, yoyarib, yedaya, salu, amok, hilkia, dan yedaya. awaknyan na kheueh teungku-teungku imeum ulee nibak jamen yesua. ureueng-ureueng lewi: peumimpin meuca-e syukoe: yesua, binui, kadmiel, serebya, yehuda, dan matanya. anggota paduan su nyang ba ca-e teujaweub: bakkukya, uni dan rakan-rakan gobnyan saboh kawom. nyoe kheueh gareh keuturonan teungku imeum agong yesua: yesua, yoyakim, elyasib, yoyada, yonatan, yadua. nyoe kheueh dafetur nyang jeuet keu ulee teungku-teungku imeum deungon kawom gobnyan yoh watee yoyakim meutugaih jeuet keu teungku imeum agong: teungku imeum kawom dafetur keuhai ulee-ulee keuluwarga ureueng lewi dan keuluwarga teungku imeum ka ltheueh teucetet watee jamen teungku imeum agong nyang teupeugah nyoe: elyasib, yoyada, yohanan dan yadua. catetan nyan seulesuoe bak watee darius geumat peurintah sibago raja persia. teuma keuhai ulee-ulee keuluwarga kawom lewi teuma na teucetet sampoe watee jamen yonatan cucoe elyasib. di miyueb pimpanan hasabya, serebya, yesua, binui dan kadmiel, ureueng-ureueng lewi laju teubagi u dalam keulompok-keulompok. tieb-tieb watee na dua boh keulompok nyang meutugaih teupujoe tuhan dan teubri syukoe ubak gobnyan deungon cara meubalah-balahi peugah, nyan sisuai deungon peuratoran nabi raja daud, hamba po teu allah nyan. ureueng nyang jaga babah pintoe geureubang baet tuhan nyang geubri tugaih keu jikeumiet kama-kama teupat keubah nyang to ngon pintoe geureubang baet tuhan na kheueh: matanya, bakkukya, obaja, mesulam, talmon dan akub. awaknyan udeb nibak jamen yoyakim bin yesua dan cucoe yozadak dan nibak jamen gubunur nehemia dan teungku imeum ezra, ureueng malem nibak hukum nyan. nibak watee binte beuton banda yerusaleum teureusmi, bubena ureueng lewi teuhoi dipat mantong awaknyan tinggai, mangat awaknyan meusajan-sajan geupeumeuriah deungon ca-e-ca-e nyanyoe haba nyang syukoe, hana tinggai deungon alat musik gambus ngon keucapi. dan meugumpoi kheueh bubena ureueng meuca-e nibak keuluwarga ureueng lewi nyan, bah kheueh nyan nyang na tinggai di daerah banda yerusaleum, meunan cit nyang na tinggai di banda-banda nyang na bak bineh netofa, nibak bet-gilgal, geba dan asmawet. banmandum teungku imeum dan ureueng-ureueng

lewi nyan geupeubuet upacara teupeugleh droe keudroe gobnyan oh ltheuehnyan baro kheueh keu rakyat nyang le, keu pintoe-pintoe geureubang dan binte beuton banda. ulon peusila bubena peumimpin yehuda geuek u atueh binte beuton mangat geuatoe dua boh keulompok nyang rayeuk nyang meubareh jikeuliling banda sira meuca-e deungon nyanyoe haba syukoe ubak po teu allah. keulompok nyang phon jimeubareh di atueh beuton, jituju u blaih uneuen, ubak geureubang bloh. hosaya geujak dilikot ureueng nyang meuca-e, geuseutot teuma le siladam peumimpin yehuda. banmandum teungku imeum nyang teukheun lom nyoe geujak teuma di likot awaknyan sira geuyueb beureuguih: azarya, ezra, mesulam, yehuda, benyamin, semaya dan yeremia. awaknyan geuseutot teuma le zakharia bin yonatan dan cucoe semaya. na padubdroe nibak indatu awaknyan na kheueh: matanya, mikha, zakur nibak kawom asaf. di likot gobnyan geujak teuma anggota nibak wareh kawom geuh, kawom nyan na kaneuh: semaya, azareel, milalai, gilalai, maai, netaneel, yehuda dan hanani. awaknyan banmandum geuba alat-alat musik, saban that lagee nyang geupeumeuen le raja nabi daud, hamba po teu allah nyan. teungku imeum ezra, ureueng nyang lupah malem keuhai hukum allah nyan geujak nibak bagian ulee baresan nyan. oh ka trok nibak pintoe geureubang ie rhot awaknyan laju jiwet dan geuteungoh ubak reunyuen banda nabi daud, meulalu meulogie nabi daud, laju geugisa ubak binte beuton pintoe geureubang ie di siblahi u timu banda. keulompok ureueng meuca-e nyang saboh kawan teuk geumeubareh di atueh binte beuton jijak u blaih wie, dan ulon kuseutot awaknyan meusajan-sajan deungon siladam nibak rakyat. kamoe meubareh meulalu meunara peutot apui sampoe ubak binte beuton luwah. dan kamoe jak laju meulalu pintoe geureubang efraim, pintoe geureubang awai, pintoe geureubang uengkot, meunara hananeel dan meunara mea trok laju ubak pintoe geureubang bubiri. baresan kamoe laju meupioh nibak babah pintoe geureubang peunjagaan to bineh baet tuhan. dan trok kheueh bandua boh keulompok ureueng meuca-e nyan nibak bineh baet tuhan. seulaen nibak bubena peumimpin nyang na didalam keulompok ulon, na cit geuseutot le teungku-teungku imeum nyang yueb beureuguih. awaknyan na kheueh: elyakim, maaseya, minyamin, mikha, elyoenai, zakharia dan hananya; dilikot awaknyan jijak teuma maaseya, semaya, eleazar, uzi, yohanan, malkia, elam dan ezer. ureueng nyang meuca-e jimeu ca-e dimiyueb pimpanan yizrahya. bak uroenyak le that keureubeuen nyang teupeuseumah ubak tuhan. rakyat meusukaria sabab allah ka geupeujeuet awaknyan mubahgia. meunan cit ureueng inong dan aneuk manyak meusajan-sajan meupeusta geumbira, dan su awaknyan nyang teungoh meugeumbira nyan teudeungoe sampoe oh jioh. nibak watee nyan na meupadub droe ureueng jibri tugaih keu jijak kawai kama teupat keuneubah beukai na kheueh sumbangan-sumbangan keu baet tuhan, jitamong cit keunan peuseumahan siper siploh dan hase bumoe nyang phon teucok tieb-tieb

thon. le ureueng-ureueng nyang kawai nyan waje
geujak kuteb sumbangan nyan nibak masyarakat
di blang atawa ladang awaknyan nyang na nibak
bineh banda-banda. oh ltheuehnyan sumbangan
nyang ka ltheueh teukuteb nyan jijok laju ubak
teungku-teungku imeum dan ureueng-ureueng
lewi, lagee kheum hukom nyang ka na teutuleh. di
ureueng-ureueng yehuda jihoreumat ubak teungku
imeum dan ureueng-ureueng lewi nyan, sabab
awaknyan nyang peubuet banmandum upacara
peusuci dan upacara-upacara nyan laen nyan ka
geupeurintah le po teu allah. di ureueng-ureueng
nyang peumeuen alat musik dan di ureueng nyang
jaga babah pintoe geureubang baet tuhan meunan cit
hana tuwae laju jipeumeuen alat-alat nyan nyang ka
jeuet keu tugaih awaknyan, nyan pi sisuai deungon
peuraton nyang ka geu atoe le raja nabi daud
dan nabi sulaiman, aneuek agam geuhnyan, yoh
watee jamen nabi daud dan ahli musik asaf, bubena
ureueng peunyanyoe ka jimeunyanyoe deungon
lagu-lagu puja pujoe dan ca-e syukoe ubak po
teu allah. nibak jamen zerubabel dan meunan cit
nibak jamen nehemia, banmandum umat israel
jijok peuseumahan mangat hase teupeuseb nyang
peureulee keu tieb-tieb uroe le ureueng meuca-e dan
keu ureueng nyang jaga babah pintoe geureubang
baet tuhan. rakyatpi jijok peuseumahan khusus
keu ureueng-ureueng lewi dan di ureueng lewi pi
jibri teuma keu teungku imeum jeumba gobnyan
nyang ka teupeuteuntee. nibak watee hukom nabi
musa nyan geubaca keu rakyat, meurumpok kheueh
keuteurangan nyang lageenyoe: 'ureueng amon dan
ureueng moab pakriban mantong hana jeuet jimeu-
jampu deungon umat po teu allah; sabab yohwatee
umat israel teungoh jijak jiteubiet lam nangroe
meuse, bandua boh bansa nyan hana jitembri ie
meunan cit deungon peunajoh keu bansa israel
nyan. teuma le awaknyan ka jisiwa bileam mangat
jikutok bansa israel, teuma po teu allah geutanyoe
ka geu-ubah kutok nyan jeuet keu beureukat.' watee
jideungoe le bansa israel hai nyan, awaknyan laju
geupeungkleeh banmandum bansa israel nibak
bansa nyan. sigohlom nyan teungku imeum elyasib,
nyang geubri tugaih mangat geukawai kama-kama
teumpat beukai peunajoh nyang na di baet tuhan,
geumeurakan nyang krab that-that deungon tobias.
elyasib geujok keu tobias saboh kama nyang raya
nyang sibutoi jih teuseukeubah atranyan khusus
keu teumpat teukeubah gandom peuseumahan,
keumeunyan, alat-alat nyang teungui di baet tuhan,
peuseumahan keu teungku-teungku imeum, siper
siploh gandom, anggo, dan minyeuk zaiton, nyang
teuma geubagi keu ureueng-ureueng lewi, keu ure-
ueng nyang peumeuen musik dan keu ureueng nyang
jaga babah pintoe geureubang baet tuhan. watee
hainyan teujadi, ulon hana di yerusalem, sabab, nibak
thon nyang keu lhee ploh dua geumat keurajeuen le
raja artahsasta, raja nibak nangroe babel, ulonjak u
babel keu lonjak meulapor ubak raja. baro kheueh
napadub treb teuma oh ltheuehnyan geubri idhin
keu ulon keu lon jakwoe u yerusalem. oh ka trok
keunoe, ulon teukeujot that bahwa elyasib ka geujok
keu tobias saboh kama di baet tuhan. ulon beungeh

that-that dan banmandum barang tobias nyan ulon
tiek uluwa. oh ltheuehnyan laju ulon yue mangat
teupeuna upacara teupeugleh nibak kama-kama
nyan. oh ltheuehnyan baro kheueh ulon peuriwang
keunan banmandum barang-barang peuseumahan
gandom ngon keumeunyan meunan cit deungon
alat-alat baet tuhan. seulaen nibaknyan, meurumpok
teuma bahwa ureueng nyang peumeuen alat musik
dan ureueng-ureueng lewi ka geutinggai yerusalem
dan geugisa u blang atawa lampoh ladang gobnyan
maseng-maseng, sabab rakyat hana seb keubutuhan
jih. dan laju ulon doet bubena ureueng-ureueng
patot sabab awaknyan ka geupeubiyeu baet tuhan
teubeungkalee. laju ulon hoi lom ureueng-ureueng
lewi dan ureueng nyang peumeuen musik nyan
mangat jimeubuet lom teuma. oh ltheuehnyan
banmandum rakyat israel ka jipeuphon lom jibri
siper siploh nibak hase gandom, anggo, dan minyeuk
zaiton, banmandum nyan teuba ubak kama-kama
keuneubah beukai. laju ulon bri tugaih keu ureueng-
ureueng nyang teupeugah nyoe mangat jikawai
beukai nyan: teungku imeum selemya, zadok sidroe
lamkawan ureueng nyang malem that nibak hukom
dan pedaya ureueng lewi. hanan bin zakur dan cucoe
matanya ulon bri tugaih keujitulong awaknyan.
ulon kuteupeue bahwa ureueng-ureueng nyan
jeuet teupeucaya dan teuma jeuet jiuroih meunagi
bahan-bahan nyan keu rakan-rakan ngon keureuja
awaknyan deungon jucoe. ya allah ulon, neuingat
kheueh ubak banmandum nyang ka ulon peubuet
ateueh baet droeneueh dan peulayan gobnyan. watee
nyan ulon kalon bahwa nibak uroe sabbat na me-
padubdroe ureueng yehuda teungoh jiplaih ie anggo.
na teuma ureueng laen teungoh jipeudieng anggo,
gandom, boh anggo, boh ara dan barang-barang
laen di ateueh keuleudee jihnyan dan laju jiba u
yerusalem. awaknyan ulon tam bek jimeukat di
yerusalem. na meupadub droe ureueng nibak tirus
nyang na tinggai di yerusalem jiba uengkot dan
meubagoe barang keuteumeukat u yerusalem watee
uroe sabbat, na kheueh keujipeubloe keu ureueng
yahudi. laju ulon teugah bubena peumimpin yahuda
sira ulon peugah, 'peu kheueh hana gata sada
bahwa gatanoyoe ka tapeubuet buet nyang juhet
sabab ka tapeukutoe uroe sabbat? le sabab desya
nyang lagee nyoe kheueh allah ka geuhukom indatu
geutanyoe dan geupeuhanco banda nyoe. peu
kheueh wateenyoe gata keuneuk tamah meureuka
allah keu israel deungon cara gata peukutoe uroe
sabbat?' sabab nyan ulon peurintah mangat jeuet bak
watee awai uroe sabbat, na kheueh malam jeumaah,
pintoe-pintoe geureubang banda laju teujaktob
meunoyoe uroe ka seupot, dan hana jeuet teubuka
sigohlom habeh uroe sabbat, bak uroe satu malam.
meunan cit di ulon laju ulon peuduek aneuek buah
ulon mangat jijaga pintoe geureubang nyan mangat
watee uroe sabbat hana ureueng nyang jiba barang
nyang teumeukat u dalam banda. teuma na mantong
sidroe dua ureueng-ureueng nyang meukat nyan
jimudom di luwa binteh beuton watee uroe jeumeuat
malam. ulon peugah ubak awaknyan, 'peucuma gata
preh sampoe beungoh uroe disinan. awas, meunoyoe
gata peubuet hainyan sigoe teuk, ulon teuma loncok

tindakan nyang kreueh!" yoh phon watee nyan di ureueng meukat nyan hana jijakle meunyo uroe sabat. dan keu ureueng-ureueng lewi ulon yue laju upacara teupegleh droe dan geujaga pintoe-pintoe geureubang keu geukawai mangat dumna ureueng jihoreumat bak uroe sabat. ulon meudoa, "ya allah, neuingat kheueh keu ulon sabab hainyan cit teuma, dan neugaseh kheueh ulon nyang sisuai deungon gaseh droeneuh nyang raya." nibak wateenyan na cit ulon kalon le lagoena ureueng yahudi ka jimeukawen deungon bansa asdod, amon dan moab. siladam nibak aneuek-aneuek awaknyan hana muphom basa yahudi, teuma basa asdod dan basa aseng nyang laen. laju ulon doet dan ulon kutok awaknyan. na nyang ulon poh dan ulon tarek ok jih. oh lheuehnyan ulon yue awaknyan jimeusumpah deumi allah bahwa awaknyan dan aneuek-aneuek awaknyan hanale jimeukawen meulawok. ulon peugah, "peu kheueh kon desya nyoe cit teuma nyang ka geupeubuet le nabi sulaiman? hana raja laen di ateueh donya nyang leubeh raya nibak gobnyan. allah geusayang keugobnyan dan geubaiat gobnyan jeuet keuraja ateueh banmandum bansa israel. bahpi lagee nyan gobnyan pi ka keunong bujuk le ureueng-ureueng inong bansa laen mangat geupeubuet desya. keubit that jeuhet buet gatanyan! gata tajeuet that talawan allah deungon cara gata meukawen deungon ureueng inong nibak bansa aseng!" yoyada na kheueh aneuek teungku imeum agong elyasib, teuma sidroe nibak aneuek yoyada jeuet keumeulintee sanbalat di banda bet-horon. le sabab nyan yoyada laju ulon use di yerusalem. lheuehnyan ulon meudoa, "ya allah ulon, neuingat kheueh pakriban ureueng-ureueng nyan jipeukutoe jabatan teungku imeum dan janji droeneuh deungon teungku imeum dan ureueng-ureueng lewi!" meunan kheueh cara jih ulon pegleh bansa israel nibak banmandum nyang aseng. laju ulon peuteutab peuratoran-peuratoran keu teungku imeum dan ureueng-ureueng lewi, sampoe awaknyan maseng-maseng ka na tugaih droe. meunan cit ulon atoe mangat jeuet nibak watee-watee nyang ka teupeuteuntee, kayee apui keu ngon tot keureubeuen nyang teupeuseumah hase teukeubah dan rakyat pi hase jiba peuseumahan hase bumoe nyang phon teupot. akhe jih ulon meudoa, "allah ulon, neuingat kheueh banmandum nyoe dan neubri kheueh beureukat keu ulon."

sarakata indatu bansa israel nibak nabi adam sampoe ubak nabi nuh nyang meuturot-turot na kheueh lageonyoe:: nabi adam set enos kenan mahalaleel yared henokh metusalah lamekh nabi nuh aneuek agam nabi nuh na lhee droe: sem, ham dan yafet. aneuek-aneuek agam yafet na kheueh: gomer, magog, madai, yawan, tubal, mesekh dan tiras. awaknyan na kheueh indatu bansa-bansa nyang teupeugah meunurot nan awaknyan. keuturonan gomer na kheueh ureueng askenas, rifat dan togarma. keuturonan yawan na kheueh ureueng elisa, spanyol, siprus dan rodes. aneuek agam ham na kheueh kus, meuse, libia dan kanaan. awaknyan na kheueh indatu bansa-bansa nyang teupeugah meunurot nan awaknyan. keuturonan kus na kheueh ureueng seba, hawila, sabta, raema dan sabtekha. keuturonan raema na kheueh ureueng syeba dan dedan. (kus na teuma meuanuek sidroe aneuek agam nyang geuboh nan nimrod, nyang jeuet raja nyang peukasa nyang phon-phon that di donya nyoe.) keuturonan meuse na kheueh ureueng lidia, anamim, lehabim, naftuhim, patrusim, kasluhim, dan kreta. awaknyan kheueh indatu ureueng filistin. aneuek-aneuek kanaan na kheueh sidon, nyang paleng tuha, dan het. awaknyan na kheueh indatu bansa-bansa nyang teupeugah meunurot nan awaknyan. kanaan teupeugah cit indatu ureueng yebusi, amori dan girgasi, hewi, arki, sini, arwadi, semari dan hamati. aneuek-aneuek agam sem na kheueh elam, asyur, arpakhsad, lud, aram, us, hul, geter dan mesekh. awaknyan na kheueh indatu bansa-bansa nyang teupeugah meunurot nan droe awaknyan. arpakhsad na kheueh bapak selah, dan selah bapak si eber. eber na teuma geumeu aneuek dua droe aneuek agam; nyang tuha nan jih peleg sabab nibak jamen jih bansa-bansa didonya teupeu jeumba-jeumba; nyang keudua nan jih yoktan. keuturonan yoktan na kheueh ureueng almodad, selef, hazar-mawet, yerah, hadoram, uzal, dikla, ebal, abimael, syeba, ofir, hawila dan yobab. silsilah indatu bansa israel nibak sem sampoe trok ubak nabi ibrahim meuturot-turot na kheueh lagee nyoe: sem arpakhsad selah eber peleg rehu serug nahor terah brahim (nyang meusyeuhu deungon nan nabi ibrahim) nabi ibrahim na geumeu aneuek dua droe nyang agam, na kheueh nabi ishaq dan nabi ismail. nyoe kheueh aneuek-aneuek nabi ismail: nyang paleng tuha nan jih nebayot, oh lheueh nyan kedar, abdeel, mibsam, mismas, duma, masa, hadad, tema, yetur, nafis dan kedma. nabi ibrahim na geupeulara gundek dan nan gundek nyan na kheueh ketura. nibak gundek geuh nyan lahe teuma napadub droe aneuek agam dan lamkawan aneuek-aneuek geuh nyan na kheueh: zimran, yoksan, medan, midian, isybak dan suah. yoksan na teuma geumeu aneuek nyang agam dua nyang nan-nan aneuek geuhnyan na kheueh: syeba dan dedan. meunan cit si midian na teuma geumeu aneuek meupadub droe nyang agam nyang geuboh nan maseng-maseng: efa, efer, hanokh, abida dan eldaa. nabi ishaq aneuek nabi ibrahim na teuma geumeu aneuek dua droe aneuek agam, aneuek-aneuek geuhnyan na kheueh: esau dan nabi yakub (nyang meusyeuhu deungon nan israel).

aneuek-aneuek agam esau na kheueh elifas, rehuel, yeus, yaelam dan korah. elifas na kheueh indatu nibak sukee teman, omar, zefi, gaetam, kenas, timna dan amalek. rehuel na kheueh indatu nibak sukee nahat, zerah, syama dan miza. peunduduek aseuli nibak tanoh edom na kheueh keuturonan aneuek-aneuek seir, awaknyan na kheueh: lotan, syobal, zibeon, ana, disyon, ezer dan disyan. aneuek-aneuek agam lotan na kheueh hori dan homam. lotan na teuma sidroe syedara jih nyang inong nyang nanjih timna. aneuek-aneuek agam syobal na kheueh: alyan, manahat, ebal, syefi dan onam. aneuek-aneuek agam zibeon na kheueh: aya dan ana. aneuek ana na kheueh disyon, dan aneuek disyon na kheueh hamran, esyban, yitran dan keran. aneuek-aneuek agam ezer na kheueh bilhan, zaawan dan yaakan. aneuek-aneuek agam disyan na kheueh us dan aran. sigohlom na raja nyang mat peurintah di nanggroe israel, tanoh edom jipeurintah meuturot-turot le raja-raja nyang teupeugah nyoe: bela aneuek beor nibak dinhaba yobab aneuek zerah nibak bozra husyam nibak daerah ureueng teman hadad aneuek bedad nibak awit (gobnyan kheueh nyang peutaloe ureueng midian dimideuen prang didaerah moab), samla nibak masyreka saul di rehobot nibak bineh krueng baal-hanan aneuek akhbor hadad di pahi (peurumoh gobnyan na kheueh mehetabel, aneuek matred dan cucoe mezahab). bansa edom nyan na jitamong keunan keu sukee: timna, alya, yetet, oholibama, ela, pinon, kenas, teman, mibzar, magdiel dan iram, maseng-maseng meunurot nan ulee sukee. aneuek agam nabi yakub na dua blaih droe: ruben, simeon, lewi, yehuda, isakhar, zebulon, dan, nabi yusuf, benyamin, naftali, gad, asyer. aneuek agam yehuda na teuma limong droe. nibak peurumoh geuh nyang nan jih batsyua, ureueng inong nibak kanaan, lahe er, onan dan sela; nibak peurumoh geuh nyang nan jih tamar, na kheueh aneuek meulintee gobnyan keudroe, lahe teuma peres dan zerah. er sampoe tuhan geupoh mate aneuek nyan. peres na teuma geumeu aneuek dua droe aneuek agam, awaknyan na kheueh hezron dan hamul. zerah na teuma limong droe aneuek agam: zimri, etan, heman, kalkol dan dara. akhan aneuek karmi keuturonan zerah, jipeuteuka bala ateuh israel sabab gobnyan geucok barang nyang teureupah dalam prang nyang teupeu khusus keu teu allah. aneuek agam etan na kheueh azarya. hezron na geumeu aneuek lhee droe aneuek agam: yerahmeel, ram dan kaleb. gareh keuturonan nibak ram sampoe ubak isai na kheueh lageonyoe: ram aminadab nahason (sidroe lamkawan tokoh sukee yehuda) salmon boas obed isai aneuek agam isai na tujoh droe. dan nyoe kheueh nan-nan awaknyan meunurot urotan umu: eliab, abinadab, simea, netaneel, radai, ozem, nabi daud. isai na teuma geumeu aneuek dua droe aneuek inong: zeruya dan abigail, zeruya na teuma geumeu aneuek lhee droe: abisai, yoab dan asael. abigail geumeukawen teuma deungon yeter keuturonan nabi ismail. awaknyan na teuma sidroe aneuek agam nyang geuboh nan amasa. kaleb aneuek hezron geumeukawen deungon azuba, dan nibak inong geuhnyan lahe teuma sidroe

aneuk inong nyang geuboh nan yeriot. yeriot nyoe na teuma geumeu aneuk lhee droe: yeser, sobab, ardon. oh ka lھےuh azuba meuninggai donya, kaleb laju geumeukawen deungon efrat dan nibak hase meukawen geuhnyan lahe teuma sidroe aneuk agam nyang geuboh nan hur. aneuk agam hur geuboh nan uri dan cucoe gobnyan geuboh nan bezaleel. bak watee hezron ka meu umu 60 thon gobnyan geumeukawen teuma deungon syedara inong gilead, aneuk makhir. awaknyan meuteume teuma sidroe aneuk agam nyang geuboh nan segub, dan segub na teuma sidroe aneuk agam nyang geuboh nan yair, dan yair nyan na geukuasa 23 boh gampong didalam wilayah gilead. teuma le keurajeuen gesur dan keurajeuen aram jikak prang laju dan jipeutaloe na 60 boh gampong didalam wilayah nyan meunan cit deungon gampong-gampong ureueng yair ka ke-unong jiprang, gampong kenat, meunan cit deungon gampong-gampong nyang ubit nyang na di silingka nyan. banmandum ureueng nyang na tinggai disinan na kھےuh keuturonan makhir ayah nibak gilead. oh ka lھےuh hezron meuninggai donya, kaleb aneuk gobnyan jimeukawen deungon efrat balee peurmoh bapak gobnyan. aneuk geuh nyang agam geuboh nan asyur, dan nyan kھےuh nyang peudong banda tekoa. yerahmeel aneuk tuha nibak hezron na teuma geumeu aneuk limong droe aneuk agam: nyang paleng tuha nan jih ram, buna, oren, ozem dan ahia. ram na teuma geumeu aneuk lھےe droe aneuk agam: maas, yamin dan eker. yerahmeel na teuma ureueng inong geuh nyang laen nyang meunan atara; nibak awaknyan lahe teuma sidroe aneuk agam nyang geuboh nan onam. aneuk agam si onam nyan na teuma dua droe: samai dan yada. dan samai nyan pi na teuma geumeu aneuk dua droe aneuk agam, nyang geuboh nan nadab dan abisur. abisur jimeukawen teuma deungon abihail dan aneuknyan lahe teuma dua droe aneuk agam; ahban dan molid. nadab aduen nibak abisur na teuma geumeu aneuk dua droe aneuk agam nyan geuboh nan seled dan apaim, teuma seled meuninggai donya hana jitinggai aneuk agam meusidroe pih. apaim na kھےuh ureueng syiek nibak yisei, yisei ureueng syiek sesan, dan sesan ureueng syiek ahlai. yada syedara samai na teuma dua droe aneuk agam nyang geuboh nan yeter dan yonatan. teuma yeter meuninggai donya hana geutinggai meusidroe aneuk agam pi. yonatan na geumeu aneuk dua droe aneuk agam, pelet dan zaza. awaknyan banmandum na kھےuh keuturonan yerahmeel. sesan hana aneuk agam, nyang na aneuk inong. namiet gobnyan sidroe ureueng nibak nanggroe meuse nyang nan jih yarha, jipeukawen deungon sidroe lamkawan aneuk gobnyan. awaknyan na sidroe aneuk agam nyang teuboh nan atai. gareh keuturonan nibak atai sampoe ubak elisama nyang meuturot-turot na kھےuh lagee nyoe: atai natan zabad efal obed yehu azarya heles elasa sismai salum yekamya elisama kaleb syedara yerahmeel na sidroe aneuk agam nyang geuboh nan mesa. jihnyan aneuk tuha. mesa na kھےuh bapak zif, zif nyan bapak si maresa, dan maresa bapak si hebron. hebron na teume geumeu aneuk peuet droe aneuk agam: korah, tapuah,

rekem dan sema. sema na kھےuh bapak raham. cucoe sema nan jih yorkeam. rekem aduen sema na kھےuh ureueng syiek samai; samai bapak si maon, dan maon ureueng syiek si bet-zur. kaleb na teuma geupeulara gundek nyang nan geuh efa. awaknyan na lھےe aneuk agam nyang nan jih haran, moza dan gazes. dan haran na cit aneuk jih nyan nan jih gazes. (na sidroe ureueng nyang nan gobnyan yohdai na geumeu aneuk nam droe aneuk agam: regem, yotam, gesan, pelet, efa dan saaf.) kaleb na lom gundek nyang laen nyang nan jih maakha. deungon gundek geuhnyan kaleb na teuma geumeu aneuk dua droe aneuk agam: seber dan tirhana; oh lھےuhnyan awaknyan meuteume lom dua droe trek aneuk agam nyang geuboh nan: saaf dan sewa. saaf na kھےuh nyang peudong banda madmana, dan sewa nyang peudong banda makhbena dan gibe. kaleb na lom sidroe aneuk inong nyang geuboh nan akhsa. dan nyang seulanjut jihnyoe na kھےuh keuturonan kaleb: hur na kھےuh aneuk tuha nibak kaleb deungon peurmoh jih efrat. syobal aneuk hur na kھےuh nyang peudong banda kiryat-yearim. salma aneuk gobnyan nyang keudua na kھےuh nyang peudong banda betlehem; dan haref aneuk gobnyan nyang keulhee nyang peudong banda bet-gader. syobal nyang peudong banda kiryat-yearim na kھےuh indatu ureueng haroe, indatu rab siteungoh peunduduek menuhot, dan indatu kawom-kawom nyang na tinggai di kiryat-yearim, na kھےuh kawom yetri, puti, sumati dan misrai. (peunduduek banda zora dan esytaal na kھےuh ureueng-ureueng nyang meuasai nibak kawom nyang teupeugah nyan.) salma nyang peudong banda betlehem na kھےuh indatu ureueng netofa, ureueng atarot-bet-yoab, dan ureueng zori, na kھےuh saboh nibak keudua kawom nyang na tinggai di manahti. dari kawom tirati, simati dan sukati nyang tinggai di banda yabes na ureueng-ureueng nyang ahli dalam hai teumuleh dan seumaleun surat-surat nyang peunteng. awaknyan na kھےuh ureueng-ureueng keni nyang jimeukawen deungon ureueng rekab. aneuk-aneuk agam nabi daud nyang lahe di hebron, meunurot urotan umu jih na kھےuh: ban nam droe aneuk agam nabi daud nyan lahe di hebron di teupat nabi daud geumat keurajeuen 7,5 thon treb jih. di yerusalem nabi daud geumat peurintah na thon treb jih, dan le that aneuk agam gobnyan nyang lahe disinan. deungon ureueng binoe geuh nyang nan jih batsyeba aneuk amiel, nabi daud na teuma droe aneuk agam nyang lahe di yerusalem: simea, sobab, natan dan nabi sulaiman. na cit sikureueng droe aneuk agam gobnyan nyang laen: yibhar, elisua, elifet, nogah, nefeg, yafia, elisama, elyada, dan elifet. seulaen awaknyan mantong na aneuk-aneuk agam nabi daud nyang laen nyang lahe nibak gundek-gundek geuh. dan na cit sidroe aneuk inong gobnyan nyang geuboh nan tamar. silsilah raja-raja israel nibak raja nabi sulaiman trok ubak yosia na kھےuh nyang teupeugah nyoe: nabi sulaiman, rehabeam, abiam, asa, yosafat, yehoram, ahazia, yoas, amazia, uzia, yotam, ahas, hizkia, manasye, amon dan yosia. yosia na teuma geumeu aneuk peuet droe aneuk agam: yohanan, yoyakim, zedekia dan yoahas. yoyakim na

teuma geumeu aneuek dua droe aneuek agam nyang geuboh nan yoyakhin dan zedekia. nyoe kheueh keuturonan raja yoyakhin, raja nyang jidroe le ureueng babel. aneuek geuh nyang agam na 7 droe: sealtiel, malkhiram, pedaya, syenazar, yekamya, hosama dan nedabaya. pedaya na teuma dua droe aneuek agam: zerubabel dan simei. zerubabel na teuma dua droe aneuek agam: mesulam dan hananya, dan sidroe aneuek inong nyang geuboh nan selomit. na lom limong droe aneuek agam: hasuba, ohel, berekhyia, hasaja dan yusab-hesed. hananya na teuma geumeu aneuek dua droe aneuek agam: pelaca dan yesaya. yesaya na kheueh bapak si refaya, refaya bapak si arnan, arnan bapak obaja, dan obaja bapak sekanya. sekanya na teuma jimeu aneuek sidroe aneuek agam nyang geuboh nan semaya, dan semaya na teuma geumeu aneuek limong droe aneuek agam nyang jiboh nan hatas, yigal, bariah, nearya dan safat. aneuek agam nearya na teuma lhee droe: elyoenai, hizkia dan azrikam. elyoenai na teuma jimeu aneuek tujuh droe aneuek agam: hodawya, elyasib, pelaya, akub, yohanan, delaya dan anani. teuma oh dudoe awaknyoe na kheueh siladam nibak keuturonan yehuda: peres, hezron, karmi, hur dan syobal. syobal na kheueh bapak nibak reaya, reaya bapak si yahat. yahat na teuma jimeu aneuek dua droe aneuek agam: ahumai dan lahad. awaknyan na kheueh indatu nibak peunduduek banda zora. aneuek agam nyang tuha nibak kaleb deungon peurumoh gobnyan nyang nan jih efrat na kheueh hur. keuturonan hur na kheueh nyang peudong banda betlehem. etam, pnuel dan ezer na kheueh aneuek-aneuek hur. etam na teuma jimeu aneuek lhee droe aneuek agam nyang nanjih yizreel, isma dan idbas, dan sidroe aneuek inong nyang nanjih hazeleponi. pnuel jipeudong banda gedor dan ezer jipeudong banda husa. asyhur nyang peudong banda tekoa na dua droe peurumoh, nan peurumoh jih nyan na kheueh hela dan naara. deungon naara gobnyan na meuteume peuet droe aneuek agam: ahuzam, hefer, temeni dan ahastari. deungon hela, asyhur na teuma meuteume lhee droe aneuek agam: zeret, yezohar dan etnan. anub dan hezobeba na kheueh aneuek agam kos indatu kawom keuturonan aharhel aneuek harum. na sidroe ureueng agam nyang nanjih yabes; ureueng nyan leubeh jihoreumat nibak syedara-syedara jih. ureueng nyan jiboh nan yabes le mak gobnyan, sabab mak gobnyan lumpah that meudeurita bak watee teupeulahe jihnyan. teuma yabes jimeudoa ubak po teu allah nyang jiseumah le ureueng israel, jipeugah, "ya allah, neubri kheueh beureukat keu ulon, dan neupeuluwah kheueh kira jih wilayah ulon. neulindong kheueh ulon dan neupeujioh kheueh bala nibak ulon mangat ulon hana meudeurita." dan doa yabesnyan laju geuteurimong le po teu allah. kelub syedara suha na sidroe aneuek agam nyang jiboh nan mehir. mehir nan jih eston, dan eston na teuma lhee droe aneuek agam, nan-nan aneuek nyang lhee droe nyan na kheueh: bet-rafa, paseah dan tehina, nyang peudong banda nahas. keuturonan ureueng-ureueng nyan tinggai jih di banda reka. kenas na teuma dua droe aneuek agam: otniel dan seraya. meunan cit otniel na teuma jimeu aneuek

dua droe aneuek agam, nan aneueknyan na kheueh hatat dan meonotai. aneuek meonotai na kheueh ofra. aneuek zeraya na kheueh yoab nyang peudong panton seumeuget. banmandum peunduduek di panton nyan na kheueh ureueng-ureueng carong bak jipeuguet buet jaroe. kaleb aneuek yefune na teuma lhee droe aneuek agam: iru, ela dan naam. aneuek ela na kheueh kenas. yahaleleel na jimeu aneuek peuet droe aneuek agam: zif, zifa, tireya dan asareel. aneuek agam ezra na teuma peuet droe: yeter, mered, efer dan yalon. mered jimeukawen deungon bica putroe raja nanggroe meuse. nibak hase meukawen nyan lahe teuma sidroe aneuek inong nyang jiboh nan miryam, dan dua droe aneuek agam nyang jiboh nan samai dan yisba. yisba na kheueh nyang peudong banda estemoa. mered meunan cit jimeukawen deungon sidroe ureueng inong nibak sukee yehuda; dan nibak hase jimeukawen nyan lahe lhee droe aneuek agam: yered nyang peudong banda gedor, heber nyang peudong banda sokho, dan yekutiell nyang peudong banda zanoah. hodia jimeukawen teuma deungon syedara ureueng inong naham. keuturonan awaknyan na kheueh indatu nibak kawom garmi dan kawom maakha. kawom garmi nyan tinggai di banda kehila, dan kawom maakha tinggai di banda estemoa. simon na teuma peuet droe aneuek agam: ammon, rina, benhanan dan tilon. yisei na teuma jimeu aneuek dua droe aneuek agam: zohet dan ben-zohet. sidroe lamkawan aneuek yehuda nan jih sela. keuturonan jih na kheueh lageenyoe: er nyang peudong banda lekha lada nyang peudong banda maresa kawom tukang tumpeun ija lineun di banda bet-asybea yokim peunduduek banda kozeba yoas saraf nyang jimeukawen deungon ureueng-ureueng inong moab dan oh ltheuhnyan jigisa u betlehem. dafeatarnyan teukuteb nibak catetan awai. awaknyan banmandum jipeugot kendi dan guci keuraja dan tinggai di banda netaim dan gedera. simeon na limong droe aneuek agam: nemuel, yamin, yarib, zerah dan saul. keuturonan saul na kheueh lageenyoe: salum mibsam misma hamuel zakur simei. simei na jimeu aneuek 22 droe: 16 droe agam dan 6 droe inong. teuma syedara-syedara simei cut aneuek jih. keuturonan simeon hana padub le lagee keuturonan yehuda. sampoe ubak masa raja nabi daud, keuturonan simeon tinggai di banda-banda nyang teupeugah nyoe: bersyeba, molada, hazar-sual, bilha, ezem, tolada, betuel, horma, ziklag, bet-markabot, hazar-susim, bet-biri dan saaraim. meunan cit awaknyan tinggai nibak limong boh teumpat nyang laen, teumpat-teumpat nyan na kheueh: etam, ain, rimon, tokhen, asan, dan di gampong-gampong nyang to-to deungon teumpatnyan sampoe sijioh banda baal dibagian barat daya. meunan kheueh catetan nyang na nibak keuturonan simeon keuhai silsilah dan teumpat-teumpat tinggai awaknyan. nyang seulanjut jih nyoe na kheueh nan-nan ulee kawom lam sukee simeon: mesobab yamlekh yosa aneuek amazia yoel yehu aneuek yosibya (yosibya na kheueh aneuek seraya, cucoe asiel), elyoenai yaakoba yesohaya asaya adiel yesimiel benaya ziza aneuek sifei (gareh silsilah nibak sifei u ateuh na kheueh: alon, yedaya, simri,

semaya). kareuna keuluwarga-keuluwarga awaknyan hana putoh meutamah-tamah, teuma awaknyan laju meusipreuk u barat sampoe trok bak bineh banda gedor nyang teuduek nibak saboh panton. di siblahi u timu pantonnyan le awaknyan laju meurumpok ngon padang naleueng nyang suboe lom luwah dan teunang keu beulatang peulara awaknyan. yoh masa ilee daerahnyan jikeumiet le ureueng-ureueng ham nyang udeb dame. bak jamen hizkia raja yehuda nyang keuturonan simeon nyan jikak prang gedor. bube nyang na khimah-khimah peundudeuk banda nyan ka habeh jipeuhanco sampoe teubayeung meunan cit deungon ureueng meunim, laju jise peundudeuk disinan. oh ltheuehnyan awaknyan laju tinggai teutab disinan sabab le padang naleueng teupat jimeurot beulatang peulara awaknyan. dimiyueb pimpanen aneuek-aneuek yisei, na kheueh pelaca, nearya, refaya dan uziel, 500 droe anggota nyang laen dimiyueb sukee simeon jiminah u edom di siblahi u timu. awaknyan laju jipoh mate bubena ureueng-ureueng amalek nyang na mantong tinggai disinan, dan oh ltheuehnyan laju jitinggai teutab disinan phon wateenyan. ruben na kheueh aneuek tuha nabi yakub. teuma sabab le ruben nyan ka jipeurusak ngon cara jimeumukah deungon sidroe gundek bapak jinyan, teuma hak jihnyan sibagoe aneuek tuha laju geutarek dan geubri laju keu nabi yusuf. dan bahpi lageenyan teuma nyang paleng teuga lamkawan keuturonan nabi yakub kon keuturonan nabi yusuf teuma na kheueh keuturonan yehuda. meunan cit nyang paleng awai jeuet keuraja bans-aboh nanggroe israel na kheueh keuturonan yehuda. ruben aneuek tuha nabi yakub, na jimeu aneuek peuet droe aneuek agam: henokh, palu, hezron dan karmi. nyoe kheueh keuturonan-keuturonan yoel: semaya, gog, simei, mikha, reaya, baal dan beera. beera na kheueh peumimpin sukee ruben bak watee gobnyan jidroe le tiglat-pileser raja nibak nanggroe asyur, dan laju jikak boih u teupat nyang teuboih. lam silsilah na cit teucetet nan-nan ulee kawom nyang teupegah lom nyoe dalam sukee ruben: yeiel, zakharia, dan bela aneuek azas, cucoe sema nibak kawom yoel. sukee ruben tinggai di aroer dan diwilayah nyang phon di aroer sampoe u arah nyang trok u nebo dan baal-meon. awaknyan lumpah le geupeulara beulatang peulara di daerah gilead. le sabab nyan, awaknyan laju jikakduek u wilayah dibagian timu sampoe trok u padang pasi nyang meulinteung bansipanyang krueng efrat. bak jamen raja saul, sukee ruben jikak prang dan geupeutaloe sukee hagri disiblahi utimu gilead, laju jiduek nibak nanggroe nyan. di siblahi utara wilayah sukee ruben tinggai sukee gad di tanoh basan sampoe sijioh salkha disiblahi utimu. nibak sukee gad nyan yoel na kheueh indatu kawom nyang paleng meusyehu, dan safam na kheueh indatu nyang lumboi dua. yaenai dan safat na kheueh indatu nibak kawom-kawom nyang laen di basan. ureueng nyang laen didalam sukee gad jitamong ubak tujoh boh kawom nyang teupegah lom nyoe: mikhael, mesulam, syeba, yorai, yakan, ziya dan eber. awaknyan na kheueh keuturonan abihail aneuek si haru. urotan silsilah awaknyan phon di miyueb u ateuh lagee nyang teupegah

nyoe: abihail, huri, yaroah, gilead, mikhael, yesisai, yahdo, bus. ulee banmandum kawom nyang ka teupegah nyan na kheueh ahi aneuek abdiel, cucoe guni. awaknyan tinggai diwilayah basan dan gilead, dan banda-banda nyang na diwilayahnyan meunan cit nibak ban saboh padang naleueng nyang na di saron. silsilah nyoe teupegot nibak jamen yotam raja yehuda dan yerobeam raja israel. di dalam sukee ruben, sukee gad dan sukee manasye nyang na di siblahi u timu yordan na 44.760 sipa-i nyang ka teulatih deungon get dan ka meupeungalaman lam hai cara teupeguna alat prang nyang nan jih perisee, peudeung dan aneuk gando. awaknyan jikak muprang ngon sukee yetur, sukee nafis dan nodab, nyoe na kheueh sukee-suke nyang na didalam bansa hagri. tantra-tantra nyan jipeucaya ubak po te allah, dan jilakee tulong ubak gobnyan, dan po teu allah laju geudeungeo peue nyang ka jilakee le awaknyan dan laju geupeumeunang keu awaknyan ateuh ureueng-ureueng hagri nyan dan sikutu awaknyan. sabab muprang nyan teujadi ateuh keuheundak po teu allah, le sabab nyan lumpah jai musoh nyang jipoh mate le awaknyan. meunan cit nyang jiteume teun na 100.000 droe, unta nyang jiteume reupah na 50.000 boh, bubiri 250.000 boh jitamah lom ngon 2.000 boh keuleudee. oh ltheuehnyan awaknyan laju tinggai teutab di daerah nyan sampoe ubak masa bansa israel teudrob ngon jiboih u teupat nyang teuboih. siladam sukee manasye na tinggai di wilayah basan sampoe u utara seujioh baal-hermon, senir dan gunung hermon. awaknyan maken treb maken le. nyoe kheueh ulee-ulee kawom awaknyan: hefer, yisei, eliel, azriel, yeremia, hodawya dan yahdiel. awaknyan banmandum na kheueh sipa-i-sipa-i nyang beuhe ngon peukasa. ureueng-ureueng israel hanale seutia ubak po teu allah nyang ka jiseumah le indatu awaknyan. awaknyan ka jitinggai gobnyan dan jimeu ibeadat ubak dewa-dewa bansa-bansa nyang ka geu use le po teu allah nibak nanggroe kanaan. le sababnyan allah laju geupeugrak ate pul raja asyur, dan jikak kheueh laju geuhnyan geujak prang nanggroenyan. pul meugah cit ngon nan tiglat-pileser. dan di sukee ruben, gad dan sukee manasye nyang na disiblahi u timu yordan jiangkot sibagoe tawanan dan jikak boih u halah, habor, hara dan ubak saboh teupat nyang rab deungon krueng gozan. disinan kheueh awaknyan tinggai teutab sampoe nibak uroenyoe. lewi na geumeu aneuek lhee droe aneuek agam: gerson, kehat dan merari. kehat na teuma jimeu aneuek peuet droe aneuek agam: amram, yizhar, hebron dan uziel. amram na teuma jimeu aneuek dua droe aneuek agam, awaknyan na kheueh nabi harun ngon nabi musa, dan sidroe aneuek inong nyang geuboh na miryam. nabi harun na teuma peuet droe aneuek agam: nadab, abihu, eleazar dan itamar. urotan silsilah eleazar na kheueh nyang teuteuleh nyoe: pinehas, abisua, buki, uzi, zerahya, merayot, amarya, ahitub, zadok, ahimaas, azarya, yohanan, azarya (gobnyan meutugaih di baet tuhan nyang geupeuet le raja nabi sulaiman di yerusalem), amarya, ahitub, zadok, salum, hilkia, azarya, seraya, yozadak. yozadak nyoe meusigoe jibeutot dan laju jiba sajan ngon ureueng

yehuda dan peunduduek yerusalem nyang laen bak watee tuhan geujak tiek awaknyan u nanggroe laen deungon peurantaraan nebukadnezar. lewi na lhee droe aneuek agam: gerson, kehat dan merari. awaknyan maseng-maseng na jimeu aneuek. libni dan simei na kheueh aneuek-aneuek gerson; amram, yizhar, hebron dan uzziel na kheueh aneuek-aneuek kehat. mahli dan musi na kheueh aneuek-aneuek merari. gareh keuturonan gerson na kheueh: libni, yahat, zima, yoah, ider, zarah, yeatrai. gareh keuturonan kehat na kheueh: aminadab, korah, asir, elkana, ebyasaf, asir, tahat, uriel, uzia, saul. elkana na teuma geumeu aneuek dua droe aneuek agam: amasai dan amihot. gareh keuturonan amihot na kheueh: elkana, zofai, nahat, eliab, yeroham, elkana. samuel na teuma geumeu aneuek dua droe aneuek agam: nyang tuha yoel, dan abia nyang tulot. gareh keuturonan merari na kheueh: mahli, libni, simei, uza, simea, hagia, asaya. phon yoh watee peuto peujanjian teupinah u teumpat iebadat di yerusalem, nabi daud laju geupileh ureueng-ureueng nyang meutanggong jaweueb ateuah nyanyoe puja ngon pujo di baet tuhan. awaknyan jimeutugaih seucara meugantoe-gantoe di khimah tuhan bak watee yoh gohlom nabi sulaiman geupeudong baet tuhan. gareh silsilah ureueng-ureueng nyang geubri tugaih nyang na kheueh lageenyoe: nibak kawom kehat: heman aneuek yoel. gobnyan jeuet keupeumimpin keulompok meunyanoyoe nyang phon. gareh silsilah jih phon di miyueb sampoe u ateuah dan laju sampoe ubak nabi yakub na kheueh lageenyoe: heman, yoel, samuel, elkana, yeroham, eliel, toah, zuf, elkana, mahat, amasai, elkana, yoel, azarya, zefanya, tahat, asir, ebyasaf, korah, yizhar, kehat, lewi, nabi yakub. asaf na kheueh nyang jeuet keupeumimpin keulompok peunyanoyoe nyang keudua. gareh silsilah jih phon di miyueb u ateuah sampoe trok ubak lewi na kheueh lageenyoe: asaf, berekhyia, simea, mikhael, baaseya, malkia, etai, zerah, adaya, etan, zima, simei, yahat, gerson, lewi. etan na kheueh nyang jeuet keupeumimpin keulompok peunyanoyoe nyang keu lhee; gobnyan nibak kawom merari. gareh silsilah geuh phon di miyueb u ateuah akhe jih sampoe ubak lewi na kheueh lageenyoe: etan, kisi, abdi, malukh, hasabya, amazia, hilkia, amzi, bani, semer, mahli, musi, merari, lewi. tugaih-tugaih nyang laen di rumoh iebadat geuseurah ubak rakan gobnyan nyang ureueng lewi cit teuma. nabi harun dan keuturonan gobnyan meutugaih geutot keumeunyan, geupeuseumah keureubeuen nyang teutot di ateuah miseubah, geupeubuet peue mantong upacara di ruweueng maha suci, dan geupeuseumah keureubeuen peusampoh desya umat israel. banmandum nyan jipeubuet le awaknyan nyang paih deungon peutunyok-peutunyok nyang ka geubri le nabi musa hamba po teu allah. nyoe kheueh gareh keuturonan nabi harun: eleazar, pinehas, abisua, buki, uzi, zerahya, merayot, amarya, ahitub, zadok, ahimaas. nyoe kheueh teumpat tinggai nyang teubri keu kawom kehat keuturonan nabi harun. awaknyan jiteurimong jeumba nyang phon nibak tanoh nyang ka teupeuteunteu keu ureueng lewi. tanoh awaknyan na jitamong nibak banda hebron diwilayah yehuda,

dan padang-padang naleueng nyang na bansilingka nyan. teuma lampoh-lampoh dan gampong-gampong nyang na di daerah silingka banda nyan teubri keu kaleb aneuek yefune. keuturonan nabi harun meuteume banda hebron sibago banda suaka, yatir, dan gampong-gampong nyang na nyang teupeugah lom nyoe meunan cit deungon padang naleueng: gampong libna, estemoa, hilen, debir, asan, bet-semes. diwilayah sukee benyamin awaknyan meuteume teuma gampong-gampong nyang teupeugah lom nyoe meunan cit deungon padang naleueng jih: geba, alemet dan anatot. banmandum nyan na 13 boh gampong keu teumpat tinggai keuluwarga-keuluwarga awaknyan. siploh boh gampong sukee manasye disiblahi u barat krueng yordan geubri deungon cara teu-undi keu keuluwarga-keuluwarga didalam kawom kehat nyang gohlom meuteume tanoh. keuluwarga-keuluwarga dalam kawom gerson meuteume teuma 13 boh gampong diwilayah sukee isakhar, asyer, naftali dan manasye nyang di basan disiblahi u timu krueng yordan. meunan cit deungon keuluwarga-keuluwarga nyang na dalam kawom merari meuteume 12 boh gampong deungon cara teu-undi di dalam gampong wilayah sukee ruben, gad dan zebulon. meunan kheueh cara jih bansa israel teubagi keu sukee lewi gampong-gampong deungon padang naleueng jih keu teumpat tinggai awaknyan. gampong-gampong nyang na didalam wilayah sukee yehuda, simeon dan benyamin nyang ka teupeugah nyan, meunan cit teubagi ngon cara teu-undi. di dalam wilayah sukee efraim, siladum nibak keuluwarga-keuluwarga kawom kehat jiteurimong teuma gampong-gampong nyang teupeugah lom nyoe teutamah teuma deungon padang naleueng keuteumpat peumeurot beulang peulara nyang to-to di sikeulileng nyan: sikhem, banda suaka digunong-gunong nyang na didalam wilayah nyan, gezer, yokmeam, bet-horon, ayalon dan gat-rimon. didalam wilayah sukee manasye nyang na disiblahi u barat krueng yordan awaknyan laju jiteurimong gampong aner dan bileam deungon padang naleueng nyang na to-to diban keulileng nyan. keuluwarga-keuluwarga kawom gerson meuteume teuma gampong-gampong nyang teupeugah lomnyoe meunan cit teutamah teuma deungon padang naleueng nyang na to-to bansikeulileng nyan: di wilayah sukee manasye, di siblahi u timu krueng yordan: golan di basan dan asyatarot. diwilayah sukee isakhar: kedes, daberat, ramot dan anem. diwilayah sukee asyer: masal, abdon, hukok dan rehob. diwilayah sukee naftali: kedes di galilea, hamon dan kiryataim. keuturonan merari nyang gohlom meuteume tanoh, meuteume teuma gampong-gampong nyang teupeugah nyoe meunan cit deungon padang naleueng nyang na to-to bansikeulileng nyan: diwilayah sukee zebulon: rimono dan tabor. diwilayah sukee ruben, disiblahi u timu krueng yordan nyang to deungon yerikho: bezer di ateuah darat manyang, yahas, kedemot dan mefaat. diwilayah sukee gad: ramot di gilead, mahanaim, hesybon dan yaezer. isakhar na jimeu aneuek 4 droe aneuek agam: tola, pua, yasub dan simron. tola na teuma jimeu aneuek 6 droe aneuek

agam: uzi, refaya, yeriél, yahmai, yibsam dan samuel. awaknyan na kheueh ulee keuluwarga dalam kawom tola dan meusyehu sibagoe sipa-i-sipa-i nyang beuhe. bak masa nabi daud, keuturonan awaknyan na jeumeulah jih 22.600 droe. uzi na sidroe aneuek agam nyang teuboh nan yizrahya. yizrahya dan ban peuet droe aneuek geuh nyang agam, nyang nan mikhael, obaja, yoel dan yisia na kheueh ulee kawom. peurumoh-peurumoh dan aneuek-aneuek awaknyan lumpah that le deungon nyan keuturonan awaknyan hase jipeuna 36.000 droe ureueng agam keujimeudinaih lam baresan tantra. meunurot dafeutar reuseumi, nibak banmandum keuluwarga dalam sukee isakhar na meuteume 87.000 droe ureueng agam nyang peunoh syarat mangat jeuet jitamong tantra. benyamin na geumeu aneuek lhee droe aneuek agam: bela, bekher dan yediael. bela na teuma aneuek limong droe aneuek agam: ezron, uzi, uziel, yerimot dan iri. awaknyan na kheueh ulee keuluwarga dalam kawom droe jih dan meugah sibagoe sipa-i-sipa-i nyang beuhe ngon ceubeuh. dalam dafeutar keuturonan awaknyan teucetet na 22.034 droe ureueng agam nyang peunoh syarat keujeuet jitamong tantra. bekher na teuma jimeu aneuek 9 droe aneuek agam: zemira, yoas, eliezer, elyoenai, omri, yeremot, abia, anatot dan alemet. awaknyan na kheueh ulee keuluwarga dalam kawom droe jih. meunurot dafeutar nyang reuseumi, nibak banmandum keuluwarga didalam keuturonan awaknyan na meuteume 20.200 droe ureueng agam nyang ka hase peunoh syarat keujeuet jitamong tantra. yediael na teuma jimeu aneuek sidroe aneuek agam nyang teuboh nan bilhan. bilhan nyan na teuma jimeu aneuek 7 droe aneuek agam: yeus, benyamin, ehud, kenaana, zetan, tarsis dan ahisahar. awaknyan na kheueh ulee keuluwarga dalam kawom droe jih maseng-maseng dan meugah that sibagoe sipa-i-sipa-i nyang beuhe ngon ceubeuh. lam dafeutar keuturonan awaknyan na teucetet 17.200 droe ureueng agam nyang peunoh syarat mangat jeuet meudinaih lam tantra. supim dan hupim na kheueh keuturonan ir. husim na kheueh aneuek nibak dan. naftali na teuma jimeu aneuek 4 droe aneuek agam: yahziel, guni, yezer dan salum. awaknyan na kheueh cucoe bilha. manasye deungon gundek jih, sidroe ureueng inong asai nibak aram, na jimeu aneuek dua droe aneuek agam: asriel dan makhir. aneuek makhir na kheueh gilead. makhir jijak mita peurumoh keu si hupim dan supim. nan ureueng bineo makhir na kheueh maakha. aneuek makhir nyang keudua na kheueh zelafead, dan zelafead hana teuma meu aneuek agam, nyang na aneuek inong. maakha peurumoh makhir na jipeulahe dua droe aneuek agam nyang teuboh nan peres dan seres; peres na teuma jimeu aneuek dua droe aneuek agam nyang teuboh nan ulam dan rekem. ulam na teuma jimeu aneuek sidroe aneuek agam nyang teuboh nan badan. nyan kheueh keuturonan gilead aneuek makhir, cucoe manasye. syedara nyang inong gilead nan jih molekhet na jimeu aneuek lhee droe aneuek agam: isyhod, abiezer dan mahla. semida na teuma jimeu aneuek 4 droe aneuek agam: ahyan, sekhem, likhi dan aniam. efraim na jimeu aneuek lhee droe:

sutelah, ezer dan elad. gareh keuturonan efraim rot sutelah na kheueh bered, tahat, elada, tahat, zabad, sutelah. ezer dan elad ka jipoh mate le gob bak watee jikeuneuk cue beulangang peulara peunduduek aseuli nanggroe gad. ureueng syiek awaknyan meukabong meu-uroe-uroe treb jih sampoe syedara-syedara gobnyan teuka jijak peumangat ate ureueng syiek jih nyan. oh ltheuhnyan efraim jimeujimak lom deungon ureueng bineo droe jih, laju ureueng inong nyan raya pruet dan lahe kheueh teuma sidroe aneuek agam. efraim geuboh nan aneuek geuhnyan beria, sabab bala nyang ka jiteurimong. efraim na cit aneuek inong nyang geuboh nan seera. gobnyan kheueh nyang peudong banda-banda bet-horon miyueb dan bet-horon ateuhe, meunan cit deungon banda uza dan seera. na lom sidroe teuk aneuek agam efraim, nyang geuboh nan refah. nyoe kheueh gareh keuturonan refah nyan: refes, telah, tahan, ladan, amihud, elisama, nun, yosua. wilayah nyang geubri keu teumpat tinggai awaknyan na kheueh di betel sampoe u naaran disiblahi u timu, dan geser di siblahi ubarat meunan cit deungon gampong-gampong nyang na to-to bansilingka banda nyan. dalam wilayah nyan jitamong cit banda sikhem dan aya, meunan cit deungon gampong-gampong nyang na to-to ban sikeulileng nyan. keuturonan manasye jikuasa banda bet-sean, taanakh, megido, dor dan gampong-gampong nyang na ban sikeulileng nyan. nyan kheueh banmandum daerah teumpat tinggai keuturonan nabi yusuf aneuek nabi yakub. nyang tapeugah lom nyoe na kheueh keuturonan asyer. gobnyan na jimeu aneuek 4 droe aneuek agam: yimna, yiswa, yiswi dan beria dan sidroe teuk aneuek inong nyang teuboh nan serah. beria na teuma jimeu aneuek dua droe aneuek agam, awaknyan na kheueh heber dan malkiel nyang peudong banda birzait. heber na teuma lhee droe aneuek agam: yaflet, somer, hotam, dan sidroe aneuek inong, nyang teuboh nan sua. meunan cit deungon yaflet na teuma jimeu aneuek lhee droe aneuek agam: pasakh, bimhab dan asywat. somer syedara yaflet na teuma jimeu aneuek 4 droe aneuek agam: ahi, rohga, yehuba dan aram. hotam, syedara yaflet nyang sidroe teuk, na teuma jimeu aneuek 4 droe aneuek agam: zofah, yimna, seles dan amal. keuturonan sofah na kheueh suah, harnefer, syual, beri, yimra, bezer, hod, sama, silsa, yitran dan beera. keuturonan yeter na kheueh yefune, pispas dan ara. keuturonan ula na kheueh arah, haniel, dan rizya. nyan kheueh keuturonan asyer. awaknyan banmandum na kheueh ulee keuluwarga dan meusyehu sibagoe pahlawan-pahlawan nyang beuhe ngon ceubeuh dan peumimpin-peumimpin nyang raya. dalam dafeutar keuturonan asyer na teucetet 26.000 droe ureueng agam nyang ka peunoh syarat mangat jeuet tamong tantra. benyamin na geumeu aneuek limong droe aneuek agam. meunurot urotan umu, awaknyan na kheueh: bela, asybel, ahrach, noha dan rafa. keuturonan bela na kheueh adar, gera, abihud, abisua, naaman, ahoah, gera, sefutan dan huram. keuturonan ehud na kheueh naaman, ahia dan gera. awaknyan na kheueh ulee keuluwarga nyang yohmasa ilee tinggai di geba. teuma awaknyan ji use

di geba nyan, dimiyueb pimpelan gera awaknyan laju jiminah u manahat dan tinggai disinan. gera na jimeu aneuk dua droe aneuk: uza dan ahihud. saharaim jitaleuk bandua droe peurumoh jih nyang nan husim dan baara. oh ltheuhnyan bak watee geuhnyan tinggai di daerah moab, gobnyan laju meukawen deungon hodes dan meuteume tujoh droe aneuk agam: yobab, zibya, mesa, malkam, yeus, sokhya dan mirma. banmandum awaknyan ulee keuluwarga. deungon peurumoh jih nyan meunan husim na teuma jimeu aneuk dua droe aneuk agam: abitub dan elpaal. aneuk agam elpaal na teuma lhee droe: eber, misam, semed. semed nyoe kheueh nyang peudong banda ono dan banda lod meunan cit deungon gampong-gampang nyang na ban sikeulileng nyan. beria dan sema na kheueh ulee keuluwarga nyang tinggai di banda ayalan dan jise peundudeuk banda gat. keuturonan beria na kheueh ahyo, sasak, yeremot, zebaya, arad, eder, mikhael, yispa dan yoha. keuturonan elpaal na kheueh zebaja, mesulam, hizki, heber, yismerai, yizlia dan yobab. keuturonan simei na kheueh yakim, zikhri, zabdi, elyoenai, ziletai, eliel adaya, beraya dan simrat. keuturonan sasak na kheueh yispan, eber, eliel, abdon, zikhri, hanan, hanaya, elam, antotia, yifdeya dan pnuel. keuturonan yeroham na kheueh samserai, se-harya, atalya, yaaresya, elia dan zikhri. nyan kheueh ulee keuluwarga dan peumimpin-peumimpin nyang na teucetet didalam silsilah awaknyan. awaknyan tinggai di yerusalem. yeiel jipeudong banda gibeon, oh ltheuhnyan gobnyan laju tinggai di banda nyang jipeudong nyan. ureueng binoe jihnyan nyang nan maakha, dan awaknyan na jimeu aneuk 10 droe aneuk agam: abdon nyang paleng tuha, oh ltheuh nyan zur, kish, baal, ner, nadab, gedor, ahyo, zakharia, dan miklot bapak simea. keuturonan awaknyan tinggai teutab di yerusalem meusapat deungon keuluwarga-keuluwarga nyang laen nyang saboh kawom deungon gobnyan. ureueng syiek raja saul nan jih kis dan nek geuh nan jih ner. saul na jimeu aneuk 4 droe aneuk agam: yonatan, malkisia, abinadab dan esybaal. yonatan na jimeu aneuk sidroe aneuk agam nyang jiboh nan merib-aal, ureueng syiek si mikha. mikha na teuma jimeu aneuk 4 droe aneuk agam: piton, melekh, tahrea dan ahas. aneuk ahas nyang nan yoda na teuma lhee droe aneuk agam: alemet, azmawet dan zimri. gareh keuturonan zimri nyan na kheueh moza, bina, rafa, elasa, azel. azel na teuma jimeu aneuk nam droe aneuk agam: azrikam, bokhru, ismail, searya, obaja dan hanan. esek, syedara nyang agam nibak azel, na teuma jimeu aneuk lhee droe aneuk agam: nyang tuha that nan jih ulam, oh ltheuhnyan yeus dan elifelet. aneuk-aneuk ulam banmandum na kheueh sipa-i-sipa-i nyang gagah peukasa dan ureueng timbak aneuk panah nyang paleng ahli. aneuk cucoe gobnyan nyang agam banmandum na 150 droe. awaknyan banmandum na kheueh keuturonan nibak sukee benyamin. banmandum ureueng israel teudafeutar meunurot keuluwarga jihnyan maseng-maseng. dafeutarnyan na teucetet didalam kitab raja-raja israel. sabagoe hukuman ateuh desya-desya nyang jipeubuet le awaknyan,

rakyat yehuda laju jiangkot u teupat nyang teuboih. lamkawan awaknyan nyang phon-phon that woe ubak tanoh milek droejih nyang na di banda-banda na kheueh ureueng awam, teungku-teungku imeum, ureueng lewi dan utoh-utoh nyang meukeureuja di baet tuhan. siladam nibak sukee yehuda, benyamin, efraim dan manasye jigisa dan tinggai laju di yerusalem. na 690 keuluwarga nibak sukee yehuda nyang tinggai di yerusalem, jitamong cit keunan keuturonan aneuk-aneuk yehuda nyang nan jih peres, syela dan zerah. keuturonan peres jipimpin le utai. gareh keuturonan utai phon di miyueb u ateuh na kheueh utai, amihud, omri, imri dan bani. keuturonan syela jipimpin le asaya. gobnyan na kheueh ulee keuluwarga. keuturonan zerah jipimpin le yeuel. ureueng-ureueng sukee benyamin nyang na tinggai di yerusalem na 956 keuluwarga. ulee-ulee keuluwarga awaknyan na kheueh: salu aneuk mesulam, cucoe hodawya, buyut hasenua yibnia aneuk yeroham ela aneuk uzi, cucoe mikhri mesulam aneuk sefaca, cucoe rehuel, buyut yibnia. teungku-teungku imeum nyang teukheun lom nyoe tinggai di yerusalem: yedaya, yoyarib dan yakhin azarya aneuk hilkia, indatu jihnyan na kheueh mesulam, zadok, merayot dan ahitub. (azarya na kheueh ulee peugawae di baet tuhan.) adaya aneuk yeroham; indatu jihnyan na kheueh pasyhur dan malkia. masai aneuk adiel; indatu jihnyan na kheueh yahzera, mesulam, mesilemit, imer. teungku imeum nyang jeuet keu ulee keuluwarga, banmandum jih na 1.760 droe. awaknyan carong that bak jipeubuet peue mantong buet di baet tuhan. ureueng-ureueng lewi nyang teupeugah lom nyoe awaknyoe tinggai di yerusalem: semaya aneuk hasub; indatu jihnyan na kheueh azrikam dan hasabya nibak kawom merari bakkabar, heres dan galal matanya aneuk mikha; indatu jih na kheueh zikhri dan asaf obaja aneuk semaya; indatu jihnyan na kheueh galal dan yedutun berekhyia aneuk asa, cucoe elkana, gobnyan tinggai di daerah banda netofa. tukang-tukang kawai baet tuhan nyang na tinggai di yerusalem meusapat deungon keuluwarga jihnyan na kheueh: akub, talmon, ahiman, dan salum ulee kawai. sampoe nibak uroenyoe ureueng-ureueng nyang nibak kawom awaknyan teubri tugaih keu jikkakawai pintoe geureubang raja disiblahi u timu. yoh masa ilee ureueng-ureueng nibak kawom awaknyan teubri tugaih mangat jikk jaga pintoe-pintoe geureubang nyang teutuju ubak khimah-khimah ureueng lewi. nyang teubri tugaih keu teujaga nibak babah pintoe tamong u baet tuhan na kheueh salum meusajan deungon ureueng-ureueng nyang sikawom deungon jihnyan, nyan kheueh kawom korah. (salum nyan na kheueh aneuk kore cucoe byasaf.) yoh masa ilee indatu awaknyan jipeubuet tugaih nyan bak watee awaknyan jipeutimang khimah-khimah tuhan. pinehas aneuk eleazar – seumoga tuhan geulindong gobnyan! – na peureunah jeuet keu ulee kawai awaknyan. zakharia aneuk mese-lemya meunan cit ureueng nyang kawai pintoe geureubang khimah tuhan. banmandum nyang teupileh keu teukawai babah pintoe geureubang na 212 droe. awaknyan na teudafeutar meunurot

gamong-gamong teupat tinggai awaknyan. indatu awaknyan teujok jabatan-jabatan nyan le raja nabi daud dan nabi samuel. phon wateenyan awaknyan dan keuturonan awaknyan teutab jeuet keu keuneumiet pintoe geureubang baet tuhan. na 4 boh pintoe: saboh di utara, saboh di seulan, saboh di timu dan saboh teuk di barat. nibak tieb-tieb saboh pintoenyan jipeuduek sidroe ureueng lewi nyang jeuet keu ulee jaga. wareh kawom awaknyan nyang na tinggai di gampong-gamong, jibantu gobnyan seucara meugantoe-gantoe – tieb-tieb sigoe siseun aleuhut treb jih. teuma ban peuet droe ulee jaga nyan teutab jimat tugaih seucara teutab. awaknyan meutanggong jaweueb ateuh bilek-bilek nyang na di baet tuhan dan barang-barang nyang teukeubah disinan. awaknyan tinggai to ngon baet tuhan, sabab awaknyan haroh jijaga rumah nyang dan jibuka pintoe-pintoe geureubang bak tieb-tieb beungoh. ladum nibak ureueng lewi nyang laen meutanggong jaweueb ateuh peukakaih-peukakaih keu iebadat. awaknyan kheueh nyang itong bak watee teupeuteubiet dan bak watee jijak pulang lom teuma. ladum awaknyan meutanggong jaweueb ateuh peurabot-peurabot iebadat, ateuh teupong, anggo, minyeuk zaiton, keumeunyan meunan cit deungan reumpah-reumpah. teuma nyang meutanggong jaweueb bak teujampu reumpah-reumpah nyang na kheueh teungku-teungku imeum. nyang meutanggong jaweueb ubak teupeuet peuseumahan nyang teupanggong bak apui sidroe lamkawan ureueng lewi nyang nan jih matica, aneuk tuha salum nibak kawom korah. ureueng-ureueng nibak kawom kehat meutanggong jaweueb keu jipeusiab ruti sajian keu tuhan bak tieb-tieb uroe sabat. siladum ureueng lewi nyang laen meutugaih sibagoe ureueng meuca-e meunyanoye di baet tuhan. ulee-ulee keuluwarga awaknyan tinggai nibak geudong-geudong di baet tuhan. awaknyan hana teujok tugaih nyang laen, sabab awaknyan meutugaih uroe ngon malam. ureueng-ureueng nyang teupeugah di ateuh nyan na kheueh ulee-ulee keuluwarga lewi meunurot gareh keuturonan awaknyan. awaknyan na kheueh peumimpen-peumimpen nyang tinggai di yerusalem. yeiel jipeudong banda gibeon, laju gobnyan tinggai disinan. ureueng binoe geuh nyang nan jih maakha, dan aneuk geuh nyang agam, nyang tuha nan jih abdon; nyang laen na nyang nan zur, kish, baal, ner, nadab, gedor, ahyo, zakharia dan miklot, ureueng syiek simea. keuturonan awaknyan tinggai di yerusalem meusapat deungan keuluwarga-keuluwarga nyang laen nyang sikawom deungan awaknyan. bapak raja saul nan geuh kish dan nek gobnyan nan geuh ner. saul na geumeu aneuk 4 droe aneuk agam: yonatan, malkisia, abinadab, dan esybaal. yonatan na teuma jimeu aneuk nyang agam nyang jiboh nan meribaal, ureueng syiek si mikha. mikha na teuma jimeu aneuk 4 droe aneuk agam: piton, melekh, tahrea dan ahas. aneuk ahas meunan yoad na teuma jimeu aneuk lhee droe aneuk agam: alemet, asmawet dan zimri. gareh keuturonan zimri na kheueh moza, bina, rafa, elasa dan azel. azel na teuma geumeu aneuk 6 droe aneuk agam: azrikam, bokhru, ismail, searya, obaja dan hanan.

ureueng filistin jimuprang deungan ureueng israel. awaknyan jimeuheungko ngon jimeuheuntam nibak gunong-gunong gilboa. jai that-that ureueng israel nyang mate lam prang nyan, dan nyang na mantong tinggai jitamong cit keunan raja saul ngon aneuk-aneuk agam gobnyan laju geupeuplueng droe. teuma awaknyan jitiyeub rot likot le ureueng filistin dan oh meurumpok lhee droe nibak aneuk agam raja saul nyan laju jipoh mate, nyang keunong poh nyan na kheueh: yonatan, abinadab dan malkisia. muprang nyan keubiet hebat that bak bineh saul, dan gobnyan keudroe keunong aneuk panah musoh sampoe luka. dan geupeugah kheueh le saul ubak peumuda nyang ba seunjata gobnyan, "tasuit kheueh laju peudeueng gata dan tatob laju u ateuh ulon mangat ulon nyoe bek jipeumeu-en le ureueng filistin nyang hana jituri keu tuhan nyan." teuma le aneuk mudanyan hana jitem tok raja saul sabab jihnyan teumakot that-that. le sabab nyan raja saul laju geucok peudeueng geuh keudroe laju geupeureubah droe geuh u ateuh peudeueng nyan. bak watee jikalor le aneuk muda nyan bahwa raja saul ka mate, dan gobnyan pih laju jipeureubah droe u ateuh peudeueng jih dan ureueng nyan pih mate disinan. dan meuninggai kheueh raja saul meusajan deungan aneuk agam gobnyan nyang lhee droe nyan, dan deungan lagee nyan habeh kheueh riwayat dinasti raja saul. bak watee banmandun ureueng israel nyang na tinggai di panton yizreel jideungoe bahwa tantra israel ka jipeuplueng droe, meunan cit watee jideungoe raja saul deungan aneuk-aneuk gobnyan ka meuninggai donya, awaknyan laju jiplueng sira jitinggai banda-banda droe jih. dan teuka laju ureueng filistin jijak duek nibak banda nyang ka teutinggai nyan. oh singoh beungoh bak watee ureueng filistin trok keunan keu jijak rampok bubena manyet-manyet nyang ka mate nyan, awaknyan laju meurumpok deungan raja saul meunan cit deungan bana lhee droe aneuk agam gobnyan ka mate di gunong-gunong gilboa. awaknyan laju jisut bajee prang nyang mantong meuleukek nibak badan raja saul, dan ulee gobnyan laju jikoh nibak takue sampoe putoh, dan uleenyan laju jiba. oh ltheuhnyan awaknyan laju jikirem utosan ubak bansaboh nanggroe ureueng filistin keu jijak peusampoe haba nyang jroh nyan ubak bansa dan dewa awaknyan. bajee prang raja saul jikeubah bak saboh kuil awaknyan, dan ulee gobnyan laju jigantong nibak rumah si dagon, dewa awaknyan. bak watee peunduduek yabes di gilead jideungoe peue nyang ka jipeubuet le ureueng filistin teuhadab raja saul, ureueng-ureueng nyang paleng beurani lom beuhe ngon tungang laju jijakcok manyet raja saul dan aneuk-aneuk gobnyan, manyet nyan laju jiba u yabes. dan manyet nyan laju jipeukubu udalam jrat dimiyueb bak kayee nyang raya, oh ltheuhnyan awaknyan laju jipuasa na tujoh uroe treb jih. raja saul meuninggai sabab gobnyan hana seutia ubak tuhan, dan hana geutaat ubak peue nyang ka geupeurintah le tuhan ubak gobnyan. gobnyan hana geulakee peutunyok ubak tuhan, teuma nyang geulakee na kheueh abareuah-areuah ureueng mate. le sabab nyan tuhan geuhukom gobnyan

dan geuseurah takhta gobnyan ubak nabi daud aneuk isai. banmandum peumimpén bansa israel jijak ubak nabi daud dan laju jipeugah lageenyoe, "kamoe nyoe rakan teungku amphon. phon yoh masa ilee, dan hainyoe kana phon yohmantong raja saul geumat peurintah ateuhe kamoe, teungku amphon kheueh nyang pimpén tantra israel pajan mantong awaknyan jimaju u mideuen prang. lom teuma tuhan po teu allah teungku amphon ka geumeujanji bahwa teungku amphon kheueh nyang pimpén umat gobnyan dan jeuet keuraja awaknyan." dan ohban geudeungoe habanyan le nabi daud laju geupeugét peujanjian deungon dumna peumimpén bansa israel nyan. le awaknyan geulantek nabi daud jeuet keuraja israel lagee nyang ka geupeujanji le tuhan meulalu samuel. bak saboh watee nabi daud deungon bala tantra gobnyan geujak prang banda yerusalem. bak wateenyan banda nyan mantong nan jih yebus, dan jiduek le ureueng yebus, peunduduek aseuli banda nyan. ureueng-ureueng yebus ka jipeugah ubak nabi daud, bahwa gobnyan hana mungkin hase geutamong u dalam banda nyan. teuma nabi daud meuhase geureubot kuta awaknyan nyang nan jih sion. bak wateenyan nabi daud ka geupeumaklum ubak aneuk buah gobnyan bahwa ureueng nyang phon that nyang poh ureueng yebus nyang kheueh nyang teungkat jeuet keu panglima. dan le sababnyan yoab kheueh nyang phon-phon that jak prang yebus, gobnyan laju teungkat jeuet keu panglima. (mak yoab nan jih zeruya.) oh ka ltheueh geureupah kuta sion, nabi daud laju tinggai disinan. nyang kheueh sabab jih kuta nyan phon wateenyan geuboh nan, "banda daud". nabi daud laju geupeudong lom banda nyan geupeuphon nibak tempat nyang teupeumanyang deungon tanoh disiblahi utimu buket; oh ltheuehnyan peumbangunan nyan geulanjutkan teuma le yoab sampoe seulesoe. nabi daud maken treb maken teuga, sabab tuhan nyang maha kuasa nyang tulong gobnyan. nyoe kheueh nan-nan banmandum peuwira nabi daud nyang paleng meusyehu. meusajan-sajan deungon banmandum rakyat israel awaknyan ka jimeujuang mangat nabi daud jeuet keuraja lagee nyang ka geupeujanji le tuhan. dan awaknyan hana putoh-putoh jisokong keurajeuen gobnyan. peuwira nyang awaiphon na kheueh yasobam ureueng hakhmoni, geuhnyan geupimpén "triwira". na teujadi nibak saboh mideuen prang gobnyan geulawan 300 droe dan banmandum ureueng nyan mate jiheuntam ngon kapak. ureueng nyang keudua dalam triwira nyan na kheueh eleazar aneuk si dodo nibak kawom ahohi. dalam mideuen prang di pas-damim jimeujuang blaih nabi daud jilawan ureueng filistin. bak watee tantra israel ka jipeuphon peuplung droe, geuhnyan dan aneuk buah jih jimeuteun di teungoh-teungoh lampoh gandom dan disinan kheueh jimeu heungkoe meuhabeh-habeh deungon ureueng filistin. laju tuhan geupeumeunang nyang paleng rayeuk keu gobnyan. bak siroe na 3 droe nibak 30 droe peuwira nabi daud nyang paleng meugah, jijak meurumpok deungon nabi daud di saboh tempat nyang meukuta nibak saboh gunung batee nyang to ngon bineh guha adulam. bak wateenyan ureueng filistin jipeudong

khimah di panton refaim, dan saboh pasokan nibak awaknyan laju jireubot betlehem. nabi daud get that meucen keugamong droe geuh sira geupeugah, "ah, meunyoe keu ulon geubri lon jieb ie nyang na didalam mon bak bineh pintoe geureubang di betlehem." ban jideungoe habanyan, ban lhee droe peuwira nyan laju jiseureubu ubak khimah-khimah ureueng filistin dan laju jicrong ie nyang na didalam mon nyan, oh ltheueh nyan ie nyang ka ltheueh jicrong nyan laju jiba ubak nabi daud. teuma nabi daud hana geutem jieb ie mon nyan, teuma laju geuro sibagoe geupeuseumah keu tuhan. nabi daud geupeugah, "deumi allah, ulon hana ulon jieb ie mon nyoe! meunyoe iemon nyoe ulon jieb, siulah-ulah saban cit lagee ulon jieb darah ureueng nyang ka jisabong nyawong bak jijak cok ie nyoe!" deungon nyan nabi daud meubacut pih hana geutem jieb ie mon nyan. nyang kheueh jasa-jasa ban lhee droe peujuang nyang peukasa nyan. ban lhee ploeh droe peuwira nyang paleng meusyehu nyan na cit teuboh nan nyang laen deungon nan "tridasawira". awaknyan jipimpén le abisai adoe yoab. ka ltheueh jicang sampoe mate 300 droe deungon kapak jihnyang, dan kareuna nyan gobnyan meutamah meusyehu. teuma geuhnyan hana saban hebat jih deungon triwira nyan. na sidroe peuwira nyang meusyehu nyang laen nyang nan jih benaya aneuk yoyada, ureueng kabzeel. gobnyan lumpah ceubeuh ngon beurani. dua droe pahlawan nyang paleng rayeuk nibak moab ka jipoh mate. ka ltheueh teujadi bak siroe nyang meusalju geuhnyan geutamong u dalam saboh guha oh trok lam guha nyan laju geupoh mate saboh singa nyang na didalam guha nyan. meunan cit gobnyan ka ltheueh geupoh mate sidroe ureueng nibak nanggroé meuse nyang lumpah rayeuk badan jih; panyang ureueng meuse nyan leubeh dua metee. ureueng nyan meuseunjata kapak nyang paleng raya, teuma le benaya jilawan ureueng nyan ngon kayee puntong. kapak nyang na nibak jaroe ureueng meuse nyan geuteume reubot dan ngon kapak nyan kheueh geupoh mate ureueng meuse nyan. nyan kheueh jasa-jasa benaya, sidroe lamkawan tridasawira. lamkawan nyan, benaya kheueh nyang paleng meugah, teuma gobnyan hana saban hebat jih deungon triwira. nabi daud laju geuangkat geuhnyan jeuet keu ulée peungawai pribadi. ltheueh nyan nyoe na kheueh peuwira-peuwira nyang laen nyang paleng meusyehu: asael adoe yoab elhanan aneuk dodo ureueng betlehem samot ureueng harod heles ureueng peloni ira aneuk ikes ureueng tekoa abiezere ureueng anatot sibkhai ureueng husa ilai ureueng ahoni maharai ureueng netofa heled aneuk baana ureueng netofa itai aneuk ribai ureueng gibeab diwilayah sukeu benyamin benaya ureueng piraton hurai ureueng panton-panton gaas abiel ureueng araba azmawet ureueng bahurim elyahba ureueng saalbon hasyem ureueng gizon yonatan aneuk sage ureueng harari ahiam aneuk sakhar ureueng harari elifar aneuk ur hefer ureueng mekherati ahia ureueng peloni hezrai ureueng karmel naarai aneuk ezbai yoel syedara natan mibhar aneuk hagri zelek ureueng amon naharai ureueng beerot, nyang ba sinjata yoab ira dan gareb ureueng yetri uria ureueng het

zabad aneuk ahlai adina aneuk siza (sidroe tokoh lam sukee ruben nyang na pasakan 30 droe) hanan aneuk maakha yosafat ureueng mitni uzia ureueng asyatarot syama dan yeiel, aneuk-aneuk hotam, ureueng aroer yediael dan yoha, aneuk-aneuk simri, ureueng tizi eliel ureueng mahawim yeribai dan yosawya, aneuk-aneuk elnaam yitma ureueng moab eliel, obed dan yaasiel ureueng mezobaya. bak watee nabi daud geupeuplueng droe nibak raja saul, gobnyan geupeu aseng droe u ziklag. le that peujuang nyang seutia lom meupeungalaman jijak meugabong deungon gobnyan. 2 awak nyang teuka nyan nibak sukee benyamin saban cit lagee raja saul. awaknyan carong that jitimbak aneuk panah meunan cit meunyoe jimeugeulawa – bah kheueh nyan deungon jaroe uneuen meunan cit deungon jaroe wie. 3 peumimpen awaknyan na kheueh ahiezer dan yoas aneuk-aneuk semaa nibak gibe. nyoe kheueh nan-nan peujuang nyan: yeziel dan pelet aneuk-aneuk azmawet berakha dan yehu ureueng anatot yismaya ureueng gibeon, peujuang nyang meusyehu nyang jeuet keu sidroe lamkawan peumimpen keulompok "tridasawira". yeremia, yehaziel, yohanan dan yozabad ureueng gedera eluzai, yerimot, bealya, semarya dan sefaca ureueng harufi elkana, yisia, azareel, yoezer dan yasobam nibak kawom korah yoela dan zebaja aneuk-aneuk yeroham ureueng gedor. 8 bak watee nabi daud mantong na bak teumpat kuta gobnyan di padang pasi, le that-that peujuang nyang meusyehu dan meupeungalaman nibak sukee gad teuka jijak meupeusaho droe deungon gobnyan. awaknyan na kheueh peujuang-peujuang nyang lumpah carong jipeuguna peurisai dan kapak; awaknyan deuh jih ceubeuh-ceubeuh ngon beurani lagee singa dan grak awaknyan saban lagee rusa. 9 nyoe kheueh nan-nan awaknyan nyang geususan meunurot pangkat: ezer, obaja, eliab, mismana, yeremia, atai, eliel, yohanan, elzabad, yeremia, makhbanai. siladum nibak ureueng-ureueng gad nyan na kheueh peuwira-peuwira manyang na aneuk buah 1.000 droe; dan siladum teuk na kheueh peuwira-peuwira nyang na aneuk buah 100 droe. ka ltheueh teujadi nibak buleuen sa, bak watee krueng yordan teungoh jiek ie raya teuma peuwira-peuwiranyan laju jijak jeumeurang lam krueng nyan dan jise laju bubena peunduduek nyang na tinggai di panton-panton nyan bah kheueh nyan nyang na tinggai disiblahi utimu meunan cit nyang na tinggai disiblahi ubarat krueng nyan. bak saboh watee na saboh kawan ureueng nibak sukee benyamin dan sukee yehuda jijak ubak kuta nabi daud. nabi daud laju geujak meurumpok ngon awaknyan sira geupeugah, "meunyoe gatanyoe tateuka sibagoe rakan keu tajak tulong ulon, silakan tameugabong deungon kamoe. kamoe sambot gatanyoe deungon sigala mangat ate. teuma meunyoe gatanyoe ngon niet nyang jeuhet takeuneuk khianat ulon ubak musoh, bahpi ulon hana lon peubuet jeuhet ateueh gata, po teu allah nyang geuseumah le indatu geutanyoe geuteupeue nyan, dan gobnyan teuma geuhukom gata nyoe." sidroe lamkawan awaknyan, nyang nan jih amasai, nyang oh dudo jeuet keupeumimpen keulompok

nyang teuboh nan "tridasawira", ka jikuasa le roh po teu allah laju jipeugah, "daud, aneuk isai! kamoe banmandum kamoe tulong gata! seumoga gata dan awaknyan nyang jibantu gata meuhase. po teu allah na blaih gata!" dan ban geudeungoe habanyan nabi daud laju geusambot awaknyan dan geu baiat laju awaknyan jeuet keupeuwira gobnyan. bak watee nabi daud meusajan deungon ureueng filistin geujak prang raja saul, siladum nibak tantra sukee manasye jijeumeurang blaih nabi daud. nyang seubeuna jih nabi daud hana geubantu ureueng-ureuga filistin nyan. le peumimpen filistin jiyue woe gobnyan u ziklag sabab awaknyan jitakat gobnyan geupaleng geudong blaih raja saul dan jihkhanat awaknyan. nyoe kheueh nan-nan ureueng peujuang nibak sukee manasye nyang jidong blaih nabi daud bak watee gobnyan teungoh geujak u ziklag: adnah, yozabad, yediael, mikhael, yozabad, elihu dan ziletai. maseng-maseng awaknyan na jiba tantra 1.000 droe. awaknyan na kheueh peujuang nyang paleng peukasa dan nyang tulong nabi daud geulawan geurombolan. teuma oh dudo awaknyan ka jeuet keu peuwira-peuwira didalam angkatan prang israel. rab tieb-tieb uroe na mantong ureueng nyang jijak meugabong deungon nabi daud, dan hana treb oh ltheuhnyan pasakan nabi daud ka lumpah rayeuk. bak watee nabi daud di hebron le that-that peujuang nyang ka teulatah nyang jijak meugabong deungon gobnyan. awaknyan jijak tulong gobnyan mangat gobnyan jeuet keuraja keugeunantoe saul, paih lagee janji tuhan. jeumeulah awaknyan na kheueh lageenyoe: nibak sukee yehuda: 6.800 droe, leungkab deungon peurisai dan kapak. nibak sukee simeon: na 7.100 droe nyang ka teulatah. nibak sukee lewi: 4.600 droe. aneuk buah yoyada jipimpen keuturonan nabi harun: na 3.700 droe. kawom syedara zadok, ureueng peujuang muda nyang beueh ngon beurani: 22 droe – banmandum nyan na kheueh ulee keuluwarga. nibak sukee benyamin (sukee raja saul): na 3.000 droe; nyang leubeu le nibak sukee benyamin teutab seutia ubak raja saul. nibak sukee efraim: na 20.800 droe ureueng nyang paleng meusyehu didalam kawom jih maseng-maseng. nibak sukee manasye nyang na tinggai disiblahi ubarat krueng yordan: na 18.000 droe nyang jitunyok mangat jijak baiat nabi daud jeuet keuraja. nibak sukee isakhar: na 200 droe peumimpen meusajan deungon aneuk buah gobnyan; peumimpen-peumimpen nyoe carong that jipeu teuntée peue nyang haroh jipeubuet le rakyat israel bak watee nyang paih. nibak sukee zebulon: na 50.000 droe nyang that-that carong jipeuguna peue mantong alat sinjata, dan siab keujjak muprang; awaknyan na kheueh ureueng-ureueng nyang seutia dan teupeucaya. nibak sukee naftali: na 1.000 droe peumimpen meusajan deungon 37.000 tantra nyang leungkab deungon peurisai dan kapak. nibak sukee dan: na 28.600 droe nyang ka teulatah. nibak sukee asyer: na 40.000 droe nyang ka siab keujjak muprang. nibak sukee-sukee nyang na tinggai disiblahi u timu krueng yordan, na kheueh ruben, gad dan seubagian nibak sukee manasye: 120.000 nyang that-that carong jingui mubagoe alat sinjata. banmandum

peujuang nyan jijak laju u hebron lam keadaan siab
muprang dan ka meuteukat keuneuk jibaiat nabi
daud jeuet keuraja di bansaboh nanggroe israel. dan
banmandum ureueng israel nyang laen pih ka si ate
keuneuk jipeubuet nyang lageenyan. na lhee uroe
treb jih peujuang-peujuang nyan tinggai disinan
deungon nabi daud sira jimakhun peunajoh ngon ie
jieb nyang ka teukeubah keu awaknyan le ureueng
israel nyang laen. nibak sukee-sukee utara nyang
jioh pi na kheueh nibak sukee isakhar, zebulon dan
naftali, awaknyan laju jijak sira jipasang keuleudee,
unta, bagal, dan leumo nyang peunoh deungon
barang peunajoh nyang teupeudieng di ateuh
rhueng jih: lamkawan barang-barang peunajoh nyan
na kheueh: teupong, boh ara, boh kismis, anggo
dan minyeuk zaiton. dan meunan cit awaknyan
jiba sajan leumo ngon bubiri mangat teusie dan
teupajoh. banmandum nyan na kheueh sibagoe
tanda padubna galak jih rakyat di banmandum
nanggroe israel. raja nabi daud laju geupeuna pakat
deungon banmandum peuwira gobnyan bah kheueh
nyang na aneuk buah 1.000 droe meunan cit nyang
na aneuk buah 100 droe. laju gobnyan geupeu-
gah ubak banmandum peuwiranyan, "meunyo
gatanyoe banmandum situju, dan geupeu idhin
le po teu allah geutanyoe, pakriban meunyo ta
kirem sidroe utosan ubak bubena teungku imeum
dan ureueng-ureueng lewi di gampong-gampong
awaknyan, meunan cit ubak banmandum bansa
geutanyoe nyang laen mangat tayue teuka awaknyan
jijak meugumpoi deungon geutanyoe disinoe. oh
lheuehnyan tajak cok laju peuto peujanjian allah,
nyang ka jipeubiyeu teutiek meunan mantong
watee keurajeuen nanggroe geumat le raja saul."
banmandum ureueng israel nyang meugumpoi nyan
galak that-that dan usuinyan jiteurimong seucara
bulat. dan nabi daud laju geupeusapat rakyat israel
bansaboh nanggroe, phon nibak bataih di nanggroe
meuse di seulatan sampoe trok u hamat di utara,
mangat teujakcok peuto peujanjian tuhan nyan
nibak kiryat-yearim dan teuba laju u yerusaleum. dan
nabi daud laju geujak meusajan deungon awaknyan
u banda baala, nyan kheueh kiryat-yearim, didalam
wilayah sukee yehuda mangat teujakcok peuto
peujanjian allah. peuto nyan geuboh nan na kheueh
"tuhan nyang meutahta di ateuh kerub". oh watee
ka trok gobnyan u baala, awaknyan laju jicok peuto
peujanjian nyan lam rumoh abinadab, dan jipeu-ek
laju u ateuh geureubak peudati nyang mantong
baro. uza dan ahyo ji-ireng geureubak peudati nyan
rot likot, seudangkan nabi daud dan banmandum
bansa israel laju geulikal ngon meunari sira geumeu
ca-e ngon peunoh seumangat, keu geubri horeumat
ubak po teu allah sira geuseukok keucapi, rapa-i,
simbal dan beureuguih. bak watee awaknyan ka trok
ubak teupat ureueng ceumeulo aneuk gandom
atra si kidon, leumo-leumo nyang teungoh jitarek
geureubak nyan laju meugantoh, dan uza laju
jisunyueng jaroe jih sira jimat peuto peujanjian
nyan mangat bek rhot bak tanoh. bak wateenyan cit
teuma tuhan beungeh keu uza sabab buet jihnyan na
kheueh sibagoe teuhina keu tuhan. dan uza pih laju
geupoh mate disinan le tuhan. dan phon wateenyan

teupat nyan geuboh nan "peres-uza". nabi daud
beungeh that-that sabab tuhan ka geupeubinasa
uza. teuma nabi daud geutakot cit keu po teu allah
sira geupeugah, "jinoenyoe pakriban cara jih peuto
peujanjian nyan mangat hase ulon ba?" le sababnyan
nabi daud hana jeuet geuba peuto peujanjian tuhan
nyan u yerusaleum, teuma geukeubah mantong di
rumoh obed-edom, ureueng gat. peuto nyan tinggai
disinan na lhee buleuen treb jih dan tuhan laju geubri
beureukat keu keuluwarga obed-edom meunan cit
deungon banmandum nyang na hareuta gobnyan.
raja hiram nibak nanggroe tirus geukirem duta-duta
gobnyan ubak nabi daud, meunan cit deungon
kayee ceumara libanon dan tukang-tukang kayee
meunan cit deungon tukang batee keujjak peugot
meuligoe. le sabab nyan nabi daud meutamah yaken
bahwa tuhan ka geupeukong gobnyan sibagoe raja
israel dan geupeuteuga keurajeuen gobnyan keu
keupeuntengan umat tuhan. di yerusaleum nabi
daud geumeukawen lom deungon napadub droe
ureueng inong, dan nibak ureueng inong nyang
geumeukawen nyan gobnyan na geumeu aneuk
lom. aneuk-aneuk agam gobnyan nyang lahe
di yerusaleum na kheueh: syamua, sobab, natan,
nabi sulaiman, yibhar, elisua, elpelet, nogah, nefeg,
yafia, elisama, beelyada dan elifet. bak watee
jideungoe le ureueng filistin bahwa nabi daud ka
teubaiat jeuet keuraja ateuh bansaboh nanggroe
israel, awaknyan laju jiteuka jikeuneuk jak drob
gobnyan. le sababnyan nabi daud laju geuteubiet
geujak muprang deungon ureueng nyan. bak watee
nyan ureueng filistin ka trok ubak panton refaim
dan laju jireubot panton nyan. ban geudeungoe
lagee nyan nabi daud laju geuteumanyong ubak
po teu allah, "tuhan, peu kheueh haroh ulon prang
ureueng filistin nyan? dan peu kheueh tuhan
neupeumeunang keu ulon?" "nyoe, jak prang laju!"
geujawueh le tuhan. "ulon na blaih gata!" dan nabi
daud deungon pasokan gobnyan laju geujak prang
bubena ureueng filistin nyan di baal-perasim dan
laju geupeutaloe awaknyan. geupeugah kheueh le
nabi daud, "allah ka geupeuguna ulon mantong lon
jak heuntam peutahanan musoh lagee ie raya nyang
jipeuhanyot peue mantong lam watee sikeujab."
nyang kheueh sabab jih teupat nyan geuboh nan
baal-perasim. bak watee pasokan filistin ka jiplueng,
awaknyan hana meuteume jiba patong-patong
beurala droe jih. le nabi daud laju geupeurintah
bubena patong nyan geuyuetot banmandum. hana
treb teuma oh lheuehnyan teuka lom ureueng
filistin dan jireubot lom panton refaim. sigoteuk
nabi daud geulakee peutunok ubak po teu allah,
dan po teu allah laju geujawueh, "bek gata prang
awaknyan rot nyoe, teuma tajak kheueh sira gata
wet dan prang kheueh awaknyan rot meurandeh jeh,
nyang to ngon bineh bak kayee meureubo. meunyo
gata na deungoe su tapak lagee su ureueng nyang
teungoh mubareh di ateuh pucok-pucok bak kayee
nyan, gata maju dan tapeurab kheueh laju, sabab
ulon na lon jak dikeue gata keu lon jak peutaloe
ureueng filistin." nabi daud laju geupeubuet peue
nyang ka geupeurintah le po teu allah ubak gobnyan.
gobnyan dan pasokan geuh geuseupot dan jisurot

tantra filistin phon nibak gibeon sampoe trok u gezer. le sababnyan meugah kheueh nan nabi daud dipat mantong, dan tuhan laju geupeutakat bubena bansa laen keu nabi daud. nabi daud laju geupeugot rumoh-rumoh keu droe gobnyan di banda daud, dan geupeusiab teupmat keu peuto peujanjian allah dan laju geupasang khimah keuteupmat peuto nyan. nabi daud geupeugah, "teuma ureueng lewi mantong nyang jeuet beut peuto peujanjian tuhan, sabab awaknyan kheueh nyang ka geupileh le tuhan keu jiseuon peuto nyan dan jimeungabdi ubak gobnyan siumu masa." le nyan teuma nabi daud laju geutawok banmandum ureueng israel mangat jikak u yerusalem mangat jikak pinah peuto peujanjian tuhan u teupmat nyang ka geupeusiab. nabi daud laju geuyue keuturonan nabi harun dan ureueng lewi mangat jimeusapat. dan nibak kawom kehat, sukee lewi, teuka kheueh uriel nyang jipimpen 120 droe. nibak kawom merari teuka teuma asaya nyang jipimpen 220 droe. nibak kawom gerson teuka yoel nyang jipimpen 130 droe. nibak kawom elsafan teuka teuma semaya nyang jipimpen 200 droe. nibak kawom hebron teuka teuma eliel nyang jiba 80 droe. nibak kawom uziel teuka teuma aminadab nyang jiba 112 droe. le nabi daud laju geurawok teungku imeum zadok dan teungku imeum abyatar dan ban nam droe ureueng lewi: uriel, asaya, yoel, semaya, eliel dan aminadab. kheun nabi daud ubak awaknyan, "gatanyoe na kheueh peumimpen kawom nibak sukee lewi. kareuna nyan, bah kheueh gata dan ureueng-ureueng lewi nyang laen jikak peusuci droe mangat jeuet tapinah peuto peujanjian tuhan, allah israel, u teupmat nyang ka ulon seudia. bak wae peuto nyan keu nyang keuphon that teupinah, gata hana disinan keu gataba. le sabab nyan, tuhan, po teu allah geutanyoe, geuhukom tanyoe sabab tanyoe taseumah gobnyan hana beutoi lagee kheun gobnyan." deungan nyan teuma, le teungku imeum dan ureueng lewi laju jikak peugleh droe mangat jeuet jipinah peuto peujanjian tuhan, allah israel. dan bak watee peuto nyan teupinah, awaknyan laju jibeut u ateuh ulon ngon kayee geunulam, nyan na kheueh meunurot peuratoran nyang ka geubri le tuhan meulalu nabi musa. dan meunan cit le nabi daud geubri tugaih keu bak padubdroe peumimpen ureueng lewi nyan mangat jibri tugaih keu ureueng nibak sukee jihnyan mangat jimeuca-e ngon jipeumeu-en lagu-lagu geumbira keu keucapi dan simbal. lamkawan keuluwarga-keuluwarga nyang meuca-e nyan, awaknyan geupileh ureueng-ureueng nyang teupeugah lom nyoe keu jipeumeu-en simbal peurunggu: heman aneuk yoel meusajan deungan kawom syedara jih nyang nan asaf aneuk berekhya, dan etan aneuk kusaya nibak kawom merari. keu teuireng awaknyan dan teupeumeu-en keucapi ngon nada su nyang manyang jipileh ureueng-ureueng lewi nyang teupeugah nan jih lageenyoe: zakharia, yaaziel, semiramot, yehiel, uni, eliab, maaseya, dan benaya. keu ureueng peumeu-en keucapi nyang meusu ngon nada nyang miyueb geupileh teuma ureueng-ureueng lewi nyang nan-nan gobnyan nyang teupeugah lom nyoe: matica, elifele, mikneya, azazya, dan dua droe ureueng kawai baet tuhan,

awaknyan na kheueh obed-edom dan yeiel. kenaya teupileh keu ureueng nyang jeuet keu ulee ureueng nyang meu-en musik nibak sukee lewi nyan, sabab gobnyan na kheueh malem keuhai musik. berekhya dan elkana meusajan deungan obed-edom dan yehia teupileh jeuet keu ureueng kawai peuto peujanjian tuhan. teungku imeum nyang teupeugah lom nyoe: sebanya, yosafat, netaneel, amasai, zakharia, benaya dan eliezer teupileh keu ureueng nyang yueb beureuguih dikeue peuto nyan. dan geujak kheueh laju nabi daud meusajan deungan peumimpen israel dan peuwira-peuwira u rumoh obed-edom keu geujakok peuto peujanjian nyan deungan geupeuna peurayaan nyang paleng meugah. na tujoh boh leumo agam dan tujoh boh teuma bubiri geupeuseumah keu po teu allah sabab gobnyan ka geutulong ureueng lewi nyang beut peuto peujanjian nyan. bak watee nyan nabi daud geungui bajee jubah nyang teupeugot nibak ija lineun nyang haloh, meunan cit deungan ureueng nyang peumeu-en alat musik dan kenaya peumimpen awaknyan dan ureueng-ureueng lewi nyang beut peuto peujanjian nyan. meunan cit deungan nabi daud geungui bajee efod. banmandum umat israel jikak ireng peuto peujanjian nyan sampoe u yerusalem deungan su seumurak nyang meuhubo, su beureuguih, sirune, simbal dan su keucapi. bak watee peuto nyan teungoh geuba jipeutamong u dalam banda, mikhal putroe raja saul jicingek nibak peuradeuen dan deuh laju jikalan nabi daud teungoh geumeulikal ngon geumeunari nyang meusukaria. le mikhal get that luwat geungiang buet nabi daud nyan. peuto peujanjian nyan geukeubah didalam khimah nyang ka geuseudia le nabi daud keu peuto nyan. laju awaknyan jipeuseumah keu allah keureubeuen nyang teutot dan keureubeuen peudamean. oh ka ltheueh nabi daud seulesoe geupeuseumah keureubeuen-keureubeuen nyan, le gobnyan laju geubri beureukat keu rakyat ateuh nan tuhan, dan oh ltheuehnyan geubagi-bagi laju peunajoh keu awaknyan banmandum. soe mantong ureueng nyang na disinan bah kheueh nyan ureueng agam meunan cit ureueng inong meuteume jeumba sikrak uengkot sie panggang, ruti dan juadah kismis. nabi daud geu baiat teuma na meupadubdroe lewi keu jipimpen upacara iebadat ubak tuhan, allah israel, dikeue peuto peujanjian nyan, deungan meunanyoe dan seumah ngon pujo. asaf geupileh sibagoe waki gobnyan. yeiel, semiramot, yehiel, matica, eliab, benaya, obed-edom dan yeiel geubri tugaih keu jipeumeu-en alat keucapi. seudangkan asaf geubri tugaih keu teupeumeu-en simbal, dan dua droe teungku imeum, na kheueh benaya dan yahaziel, geubri tugaih seucara teutab geuyueyueb beureuguih dikeue peuto peujanjian nyan. nyang kheueh phon-phon that nabi daud geubri tugaih keu asaf dan rakan-rakan gobnyan mangat jeuet jimeuca-e lagee nyang teupujo keu tuhan. meusukoe kheueh ubak tuhan tapeusampoe kheueh keubeusaran gobnyan, tapeugah kheueh buet-buet gobnyan ubak bansa-bansa. tameuca-e ngon tameunanyoe kheueh puja ngon pujo ubak tuhan, tapeusampoe kheueh peue mantong buet-buet gobnyan nyang luwa biasa.

gobnyan kheueh tuhan nyang mahaesa; meusuka cita kheueh, sabab geutanyoe nyoe na kheueh milek gobnyan; soemantong nyang jiseumah gobnyan bah kheueh ji meusukaria ngon geumbira. lakee kheueh teunaga nibak gobnyan, seumah kheueh gobnyan bubekna reuda. hai keuturonan nabi yakub, hamba po teu allah! hai keuturonan israel, umat nyang ka geupileh! ingat kheueh banmandum buet nyang ajaeb nyang ka geupeubuet, bek kheueh tuwoe ubak peue nyang ka geupeuputoh. tuhan na kheueh po teu allah geutanyoe, keuputosan gobnyan teutab teungui bansigom donya. gobnyan sabe geuingat ubak janji gobnyan, janji gobnyan teutab teungui keu siumu masa. peujanjian nyan ka lheureu geupeugot deungan nabi ibrahim, dan oh lheurehnyan teuma deungan nabi ishaq, laju geupeukong janjinyan deungan nabi yakub, jeuet keujanji nyang keukai keu umat israel. kheun gobnyan, "tanoh kanaan teuma ulon bri keu gata jeuet keuhak milek pusaka gata." yohmasa ilee umat tuhan udeb lagee ureueng aseng di nanggroo nyan jeumeulah awaknyan na bacut that-that. awaknyan jijak meurawoh nibak saboh bansa ubak bansa nyang laen, jiminah nibak saboh nanggroo ubak nanggroo nyang laen. teuma tuhan hana geupeubiyeu soe mantong nyang jikeuneuk teugon awaknyan; deumi awaknyan, dumna raja-raja ka geupeuingat, "bek tapeukaru ureueng-ureueng nyang ka ulon pileh, bek tapeubuet buet nyang jeuhet ateuah nabi-nabi ulon." meuca-e ngon meutaseubeh kheueh keu tuhan, hai bumoe nyoe banmandum, tieb-tieb uroe tajak peumaklum kheueh haba geumbira bahwa gobnyan ka geupeuseulamat geutanyoe. tajak peugah kheueh keuangongan gobnyan ubak mandum bansa, dan buet-buet gobnyan nyang peukasa keu umat manusia. sabab tuhan lumpah that raya dan lumpah teupujo; gobnyan haroh tatakot beuleubeh nibak tatakot keu dewa. dewa-dewa bansa laen na kheueh patong beurala teuma tuhan na kheueh nyang cebta angkasa raya. gobnyan peunoh deungan keuangongan dan keumuliaan, rumoh gobnyan peunoh deungan kuasa dan suka cita. pujoe kheueh tuhan, hai umat manusia! pujoe kheueh keuangongan dan teunaga gobnyan. pujoe kheueh nan gobnyan nyang mulia, dan taba kheueh keureubeuen u baet gobnyan. seumah kheueh tuhan deungan tangui peukayan iebadat! beuyo kheueh gata meunyoe dikeue gobnyan, hai banmandum donya! bumoe nyoe kukoi han ek so guncang. hai langet ngon bumoe, meugeumbira kheueh! tapeugah kheueh ubak bansa-bansa bahwa tuhan nyan raja! hai bakat ngon geulumbang di laot meugeumuroh kheueh meusigoe ngon asoe jih! meusukacita kheueh hai padang deungan banmandum seunaman! bak-bak kayee nyang na digle teuma jiseumurak geumbira sabab tuhan ka teuka keu geujak peurintah bumoe. meusyukoe kheueh ubak tuhan sabab gobnyan jroh that; geunaseh gobnyan keukai dan abadi. tapeugah kheueh, "ya allah, peuseulamat kamoe, neupeuseulamat kheueh kamoe nibak keukuasaan bansa-bansa dan neupeusapat kheueh kamoe lom mangat kamoe jeuet kamoe ucab syukoe dan kamoe pujoe nan droeneuh nyang suci!" pujoe kheueh

tuhan, allah israel, phon saatnyoe sampoe siumu masa! awaknyan jipujoe tuhan. oh lheurehnyan le raja nabi daud geubri tugaih keu asaf dan ureueng-ureueng lewi nyang laen mangat teutab jiruuih hai-hai nyang na sangkot paot jih deungan iebadat di teupat peuto peujanjian tuhan teukeubah. tieb-tieb uroe awaknyan haroh meutugaih disinan, jitulong le obed-edom aneuek yedutun, dan 68 droe nyang laen nyang saboh kawom deungan gobnyan. obed-edom dan hosa na kheueh nyang kawai babah pintoe geureubang. teuma zadok dan teungku-teungku imeum nyang laen nyang geubri tugaih keu teutab teu-uroih iebadat di teupat iebadat di gibeon. tieb-tieb beungoh dan seupot awaknyan haroh jipeuseumah keureubeuen nyang teutot di ateuah miseubah nyang susuai deungan hukom-hukom nyang geubri le tuhan keu ureueng israel. teungku imeum zadok dan teungku-teungku imeum nyan deungan jitulong le heman dan yedutun meunan cit deungan ureueng-ureueng nyang laen nyang khusus teupileh keu ureueng nyang meuca-e puja ngon pujo keu tuhan sabab geunaseh geuh nyang keukai dan abadi. meunan cit deungan heman dan yedutun jimeutugaih nibak beureuguih, simbal dan alat musik nyang laen nyang teupeumeu-en keu teuireng ca-e ngon anyanoe puja dan pujo nyan. anggota-anggota kawom yedutun geubri tugaih mangat jikeumiet babah pintoe geureubang. oh ka lheureh nyan jiwoe kheueh mandum ureueng u rumoh jih maseng-maseng. meunan cit deungan nabi daud geujakwoe u rumoh geujak saweue keuluwarga gobnyan. oh ka lheureh nabi daud tinggai teutab nibak meuligoe gobnyan, bak siuroe gobnyan geutawok nabi natan u meuligoe geuh sira geupeugah, "ngieng kheueh, ulon nyoe tinggai didalam meuligoe nyang teupeugot nibak kayee ceumara libanon, seudangkan peuto peujanjian tuhan teupat jih na didalam khimah!" 2 geujaweueb le nabi natan, "neupeubuet kheueh laju peue mantong nyang ka teungku amphon niet sabab po teu allah geutulong teungku amphon." teuma nibak malam nyan allah meufeureuman ubak nabi natan, "gata jak kheueh dan tapeusampoe kheueh ubak hamba ulon nabi daud peusan ulon nyang lageenyoe, 'bukan gata nyang peudong baet keu ulon. phon that bansa israel ulon peubeubaih nibak nanggroo meuse sampoe nibak saatnyoe, hantom na ulon tinggai lam saboh-saboh baet. teuma sabe ulon jak meurawoh ho-ho mantong dan tinggai ulon didalam khimah. bak watee ulon meurawoh meusajan deungan bansa israel hantom na ulon teumanyong ubak peumimpin-peumimpin nyang ka ulon pileh, peue sabab jih awaknyan hana jipeudong meusaboh baet nyang teupeugot nibak kayee ceumara libanon keu ulon.' le sabab nyan, hai natan, tajak peugah kheueh laju ubak hamba ulon nabi daud nyan, bahwa ulon, tuhan nyang mahakuasa, lon peugah ubak jihnyan, 'gata ka ulon cok nibak buet gata sibagoe ureueng rabe bubiri di padang naleueng, dan ulon beut jeuet keuraja ateuah umat ulon israel. ulon ka ulon tulong gata homantong nyang gatajak, dan somantong musoh gata habeh ulon peuranab bak watee gata muprang. gata ulon peujeuet keu ureueng nyang

lumpah meusyeyuhu lagee peumimpén-peumimpén nyang paleng raya di ateuéh donya. keu umat ulon israel ka lheureu ulon keubah tempat mangat jeuet keutanoh ie awaknyan mangat awaknyan hase udeb teunang dan hana jipeukaru le gob. seumeunjak awaknyan jiteuka ubak tanoh nyoe yoh masa ilee, dan sigohlom awaknyan na raja, awaknyan sabe jiprang le ureueng-ureueng nyang galak that ubak buet nyang karu. teuma hainyan hana teujadi le. ulon meunjanjoe teuma ulon peutaloe banmandum musoh gata, dan ulon bri keuturonan keu gata. singoh, meunyoé ka sampoe ajai gata dan gata jitanom lam jrat indatu gata, sidroe lamkawan aneuek agam gata teuma ulon baet jeuet keuraja. jihnyan kheureu nyang peudong rumah keu ulon. kerajeuen geuhnyan teuma ulon peuteuga, dan keu siumu masa ureueng nibak keuturonan geuhnyan kheureu nyang hase jeuet keuraja. ulon teuma jeuet keu bapak jih dan jihnyan teuma jeuet keu aneuek ulon. ulon teuma teutab lon peubuet nyang jroh ubak jihnyan sisuai ngon janji ulon. janji ulon ubak jihnyan teutab lon mat, hana lagee nyang ulon peubuet ateuéh saul nyang ka ulon geesee nibak tempat duek jih mangat gata jeuet keu raja. aneuek agam gata nyang ulon pileh nyan teuma ulon peujeuet keuraja ateuéh umat ulon dan keurajeuen ulon keu siumu masa, dan aneuek cucoe gata truen meutruen teuma jimat keurajeuen sibagoe raja." nabi natan geupeugah nyan banmandum ubak nabi daud peue nyang ka geupeugah le allah ubak gobnyan. dan geutamong kheureu laju nabi daud u dalam khimah tuhan. oh trok keunan laju geuduek sira geumeudoa, "ya allah, tuhan ulon, ulon dan keuluwarga ulon hana patot lon teurimong keubajakan nyang tuhan tunyok keu kamoe lagee nyang ka-ka nyoe. teuma tuhan ka neupeubuet leubeh nibak nyang ka; droeneueh ka neupeugot janji keuhai keuturonan ulon keu masa nyang ukeue teuka. nyang leubeh lom droeneueh ka neupeusaneut ulon sibagoe ureueng rayeuk. peu kheureu lom nyang jeuet ulon peugah keu droeneueh, ya tuhan allah? droeneueh neuteupeue peue mantong keuhai hamba droeneueh nyoe, teuma droeneueh teutab neubri peunghormatan keu ulon. ateuéh keuheundak droeneueh keudroe dan keu keupeuntangan ulon droeneueh ka neupeubuet banmandum buet-buet nyang rayeuk nyoe deungon trok trang. teuma droeneueh kheureu allah, hana laen nyang na saban deungon droeneueh. kamoe neuteupeue hainyan sabab ka teubri tee phon yoh awai ilee. bansaboh bumoenyoe hana bansa nyang sa deungon bansa israel. israel na kheureu saboh bansa nyang ka tuhan peubeubaih nibak jeuet keunamiet mangat jeuet keu umat droeneueh nyang teupileh. banmandum buet nyang raya dan ajaeb nyang ka tuhan peubuet keu awaknyan deungon nyan ka teupeujeuet nan tuhan meutamah meusyeyuhu bansaboh donya. droeneueh ka neupeulheuh umat droeneueh nibak nangroe meuse, dan neukireuh bansa-bansa laen bak watee awaknyan jimaju u mideuen prang. bansa israel ka neupeujeuet keu umat droeneueh keudroe keu siumu masa. dan droeneueh ya tuhan, ka jeuet keu po teu allah awaknyan. jinoenyoe, ya tuhan allah, ulon meuharab neupeukong kheureu keu

siumu masa janji nyang ka tuhan peugah keuhai ulon dan keuturonan ulon. ulon meuharab neupeubuet kheureu laju janji nyang ka tuhan peugah nyan. dipat mantong ureueng rame sabe jipeu agong nan droeneueh sira jipeugah, 'tuhan nyang mahakuasa na kheureu allah ateuéh israel.' keu siumu masa sidroe lamkawan keuturonan ulon teuma tuhan peujeuet jimat peurintah sibagoe raja. ulon peubeurani droe ulon lon lakee doanyoe u hazirat droeneueh, ya allah, sabab droeneueh keudroe ka lheureu nepeugah ubak ulon bahwa aneuek cucoe ulon truen meutruen teuma tuhan peujeuet keuraja ateuéh bansa nyoe. droeneueh, tuhan, na kheureu allah, dan hai nyang jroh nyan ka tuhan peujanji keu ulon. le sabab, ulon meuharab, bah kheureu neubri beureukat keuturonan ulon mangat siumu masa awaknyan teutab jirasa geunaseh droeneueh. sabab, droeneueh ka neubri beureukat keu umat droeneueh, ya tuhan, deungon nyan awaknyan teutab geubri beureukat keu siumu masa." hana padubna treb teuma oh lheureu nyan raja nabi daud laju geujak prang ureueng filistin sampoe taloe dan banda gad geuteume reubot meunan cit deungon gampong-gampong nyang na to-to disinan banmandum habeh geureupah. meunan cit deungon ureueng moab ka habeh geupeutaloe le nabi daud seuhingga ureueng moab nyan jibayeye upeti keu gobnyan. oh lheureu nyan nabi daud laju geupeutaloe hadadezer, nyang mat keurajeuen di zoba to ngon wilayah hamat di nangroe siria. bak wateu nyan hadadezer teungoh jijak keuneuk jak reupah wilayah nyang to deungon pucok krueng efrat. lam prang nyan nabi daud geuteume reubot 1.000 boh geuritan prang, dan geudroe 7.000 droe sipa-i nyang meuguda meunan cit na 20.000 droe sipa-i nyang jijak ngon gaki. dan banmandum guda ka geupeulapee, dan bacut mantong geutinggai seb keu 100 boh geuritan prang. ureueng siria dan damsyik laju jikirem sipa-i keujajak tulung raja hadadezer, teuma le nabi daud laju geupeutaloe awaknyan dan mate sipa-i musoh nyan na 22.000 droe. oh lheureu nyan awaknyan laju jipeudong khimah-khimah prang didalam wilayah awaknyan dan awaknyan taklok dan jibayeye upeti keu nabi daud nyan. tuhan geupeumeunang nabi daud dipat mantong gobnyan geumuprang. tameng-tameng meuh nyang jingui le sipa-i raja hadadezer banmandum nyan ka geureupah le nabi daud laju geuba u yerusalem. seulaen nibak nyan na lom geucok le nabi daud peurunggu nyang lumpah le nibak tibhat dan kun, banda-banda nyang yohmasa ilee jikuasa le raja hadadezer. (teuma oh dudo peurunggu-peurunggu nyan geucok le nabi sulaiman keu geupeugot beujana, dan taméh-taméh dan peukakaih-peukakaih ibadah di baet tuhan.) raja tou di hamat ka geudeungoe bahwa nabi daud ka geupeutaloe banmandum sipa-i raja hadadezer. dan gobnyan laju geu kirem yoram aneuek agam gobnyan mangat jijak peusampoe saleuem keu raja nabi daud dan jipeugah seulam ateuéh gobnyan meunang, sabab hadadezer ka kayem that jimuprang deungon tou. yoram jijak ubak nabi daud sira jiba meuh nyang lumpah that jai sibagoe hadiah, meunan cit deungon pirak dan peurunggu. raja nabi daud laju geupeuseumah banmandum nyan keu tuhan

mangat geupeuguna bak watee na upacara iebadat. meunan cit geupeubuet ateuh barang-barang meuh dan pirak nyang ka geureupah nibak hadadezer dan bansa-bansa nyangka geupeutaloe, bansa nyan na kheueh bansa edom, moab, amon, filistin dan amalek. abisai (mak geuh nan zeruya) jipeutaloe dan jipoh mate na 18.000 droe ureueng edom di panton asin dan laju geupeudong khimah-khimah tantra bansaboh edom. deungon nyan teuma taklok kheueh ureueng-ureueng edom ubak raja nabi daud. tuhan geubri meunang ateuh nabi daud dipat mantong na gobnyan geumuprang. meunan kheueh cara jih nabi daud geumat keurajeun bansaboh israel dan geujaga mangat rakyat gobnyan sabe jipeusaneut deungon ade dan get-get. nyoe kheueh nan-nan peujabat nyang geuangkat le nabi daud: panglima angkatan prang: yoab aduen abisai. seukeutareh meuligoe: yosafat aneuk ahilud. teungku-teungku imeum: zadok aneuk ahitub dan ahimelekh aneuk abyatar. seukeutareh nanggro: sausa. ulée kawan tukang kawai pribadi raja: benaya aneuk yoyada. aneuk-aneuk agam nabi daud banmandum geumat jabatan nyang peunteng-peunteng didalam peumeurintahan. hana padubna treb teuma oh ltheuhnyan nahas raja amon meuninggai donya, dan hanun aneuk agam gobnyan teubaiat jeuet keuraja. laju geupeugah le nabi daud, "nahas na kheueh sahabat ulon nyang seutia, jadi meunan cit sikeueb ulon keu hanun, aneuk jihnyan." le sababnyan nabi daud laju geukirem utosan u nanggro amon mangat jijak peumangat ate ateueh meuninggai ureueng syiek gobnyan. bak watee awaknyan ka trok u amon, le peumippen nanggroenyan geupeugah ubak raja hanun, "bek kheueh na neupike lam ate droeneuh hai teungku bahwa nabi daud nyan geukirem utosan geuh keunoe geukeuneuk bri horeumat keu ureueng syiek teungku amphon! teuma gobnyan geukirem ureueng geuhnyan keunoe na kheueh sibagoe mata-mata keu jijak seulidek nanggro geutanyoe, mangat hase jireubot le awaknyan!" ban jideungoe nariet peumippen jih nyan, le raja hanun laju geudroe b banmandum utosan nabi daud nyan, laju jicuko janggot awaknyan, jigunteng peukayan awaknyan sampoe ka paneuk tinggai eut pung-gong, dan oh ltheuhnyan jiyuejak laju awaknyan. teuma awaknyan malee that-that meunoye jiwoe, le sababnyan awaknyan jijak laju u yerikho. bak watee hainyan jijak peugah ubak nabi daud, gobnyan geukirem peusan mangat utosan-utosan nyan tinggai mantong di yerikho sampoe janggot awaknyan ka jitimoh lom teuma. dan raja hanun ngon ureueng amon nyang rakyat gobnyan baro kheueh jisada bahwa peue nyang ka jipeubuet nyan le sababnyan nabi daud ka geumeumusoh ngon gobnyan. kareunanyan awaknyan laju geukirem 34.000 kilogram pirak u daerah mesopotamia ateueh, meunan cit u maakha dan zoba di siria mangat teusiwa 32.000 geuritan prang dan sipa-i meuguda. dan teuka kheueh sipa-i raja maakha deungon banmandum geuritan prang nyang ka teusiwa nyan dan jipeudong laju khimah rab ngon medeba. meunan cit deungon ureueng amon nyang teuka bansaboh nanggro nyan keu jijak muprang. bak watee nabi daud geudeun-

goe hainyan, laju geukrah yoab dan banmandum angkatan prang gobnyan jeuet jijaklawan musoh. di ureueng amon pi laju jiteubiet jijak ato baresan dibabah pintoe geureubang raba, ma banda droe awaknyan, seudangkan raja-raja nyang ka trok keuneuk jijak tulung awaknyan, jiato teuma baresan jih didalam padang. yoab deuh jikalon bahwa gobnyan ka teuseupet lamkawan pasokan musoh dikeue dan dilikot. le sabab nyan gobnyan laju jipilih tantra israel nyang paleng get mangat jipeuhadab keue deungon sipa-i siria. nyang leubeh nibak nyang kana nyan tantra israel geujok teuma keu abisai adoe gobnyan, nyang jiato baresan nyang meuhadab keue deungon sipa-i amon. yoab geupeugah ubak adoe geuh, "meunoye ulon hana ek le lon meuteun ateueh sipa-i siria, beubagaih kheueh gata teukaajak tulung ulon. seubalek jih, meunoye gata hana ek le tameuhadab keu deungon sipa-i amon, ulon teuma lon teuka lonjak tulung gata. tabah kheueh! jak kheueh geutanyoeajak muprang deungon beurani deumi bansa geutanyoe dan banda-banda allah geutanyoe. seumoga tuhan geupeubuet peue nyang geukeuheundaki." yoab dan pasokan gobnyan geumaju laju u mideuen prang, akhejih sipa-i siria jiplueng. bak watee jikalon le sipa-i amon bahwa sipa-i siria ka jipuplueng droe, awaknyan pih jiplueng nibak abisai dan jisurot u dalam banda. oh ka ltheueh jiprang ureueng amon, yoab laju geuwoe u yerusalem. ureueng siria sada bahwa awaknyan ka jipeutaloe le sipa-i israel. le sababnyan awaknyan laju geuhoi sipa-i droe gobnyan nyang na di daerah siblaih u timu krueng efrat dan geuyue tantra gobnyan mangat jijakmuprang dimiyueh pimpennan sobakh panglima angkatan prang hadadezer raja zoba. jideungoe hai nyang lageenyan, nabi daud laju geupeusapat banmandum pasokan israel, laju jijeumeurang u meurandeh krueng yordan dan jiato laju baresan gobnyan meuhadab keue deungon sipa-i siria. dan jimuprang kheueh awaknyan, dan sipa-i siria taloe sira jisurot kareuna jiheuntam le tantra israel. nabi daud dan pasokan gobnyan na geupeumate 7.000 droe nyang mat keumudo geuritan prang dan 40.000 droe sipa-i nyang jak ngon gaki. meunan cit deungon sobakh panglima siria nyan pih mate teupoh. bak watee raja-raja nyang jimat kuasa le hadadezer jikalon hainyan bahwa awaknyan ka jipeutaloe le sipa-i israel, awaknyan laju jilakee meudame deungon nabi daud, dan taklok ubak gobnyan. oh ka ltheuhnyan le ureueng siria hana jitem bantu le ureueng amon. watee kateuka musem seumi lom, bak watee raja-raja lazem jih geujak u mideuen prang, yoab laju jikrah sipa-i jih dan laju jireubot nanggro amon. bak wateenyan raja nabi daud teutab tinggai di yerusalem, dan gobnyan hana roh sajan. yoab dan sipa-i gobnyan laju geukeupong banda raba, dan laju geuseurang dan geupeuhanco banda nyan. oh ka ltheuhnyan nabi daud laju geuteuka dan geucok laju hareuta rampasan prang nyang lumpah le di banda nyan. lamkawan barang-barang nyang geureupah nyan na mahkota raja amon. mahkotanyan brat jih na kira-kira 34 kilogram dan meutahta saboh peumata. nabi daud laju geucok peumata nyan dan geupasang laju nibak mahkota

gobnyan. oh ltheuhnyan nabi daud laju geuangkat peunduduek banda raba dan geupaksa ureueng nyan jimeukeureuja deungon jipeuguna gogajo, cangkoi dan pato. hai nyan geupeubuet cit u ateueh banda-banda amon nyang laen. oh ltheuhnyan nabi daud dan banmandum tantra gobnyan laju geugisa u yerusalem. hana padubna treb teuma oh ltheuhnyan teujadi prang lom deungon ureueng filistin di gezer. nibak saboh teupat muprang nyan sibkhai ureueng husa jiteume poh mate sidroe ureueng raya lagee gogasi nyang nanjih sipa-i. dan ureueng filistin pih laju taloe. nibak muprang nyang laen watee teulawan ureueng filistin, elhanan aneuk yair jipoh mate sidroe ureueng nyang nanjih lahmi syedara goliat ureueng gat. go kapak lahmi nyan na bube kayee tumpun ija. meunan cit nibak muprang nyang laen nyang teujadi di gat na sidroe ureueng gogasi nyang aneuk jaroe nam neuk nibak tieb-tieb jaroe dan gaki jihnyan. ureueng nyan keuturonan rayeuk-rayeuk lagee gogasi jamen ilee. ureueng nyan jipeuhina ureueng israel, le sabab nyan ureueng nyan geupoh mate le yonatan, aneuk simea aduen nabi daud. ban lhee droe ureueng nyang geupoh mate le nabi daud dan pasokan gobnyan na kheueh keuturonan gogasi di gat. iblih meuheut that jikeuneuk peuceulaka ureueng israel; kareuna nyan iblih nyan laju jijak rayu nabi daud mangat geupeuna seunsus. dan geupeugah kheueh le nabi daud ubak yoab dan banmandum peuwira gobnyan, "gata peuna kheueh seunsus bansaboh nanggroe israel sampoe u gampong-gampong nyang jioh, sabab ulon keuneuk teupeue na padubdroe jeumeulah peunduduek bansa israel nyoe." geujaweeb le yoab, "seumoga tuhan geupeulipat ganda rakyat israel sampoe sireutoih goe nibak jeumeulah awaknyan nibak saat nyoe. nyang mulia, bukan kheueh ka jeulaih bahwa awaknyan jitaklok ubak teungku amphon? keupeue haroh ta peuna seunsus? singoh, sabab le buet nyang salah nyan, banmandum bansa turot jitanggung akibat jih!" teuma raja teutab geumumat ubak peurintah geuh nyan, le nyan yoab jijak laju ban saboh nanggroe israel, sampoe u tieb-tieb gampong nyang paleng jioh, oh ka seulesoe laju geugisa u yerusalem, dan geujak lapor laju ubak raja nabi daud hase seunsus gobnyan nyan. jeumeulah ureueng agam nyang peunoh carat keu jeuet keu sipa-i na 1.100.000 droe di israel dan 470.000 droe di yehuda. teuma sukee lewi dan sukee benyamin hana jitamong lam jeumeulah nyan. yoab hana geupeuna seunsus keu awaknyan sabab gobnyan hana galak jipeubuet peurintah raja nyan. po teu allah hana galak gobnyan keu seunsus nyan dan tuhan laju geuhukom ureueng israel. dan laju geumeu doa nabi daud ubak po teu allah, "ya allah, ulon keubit that ka meudesya! neupeu amphon kheueh ulon, sabab buet ulon nyan keubit that bangai." tuhan geupeugah ubak nabi gad, nyang jeuet keu peunghubong nabi daud ngon tuhan. "tajak peugah kheueh laju ubak nabi daud bahwa ulon teuma lonbri lhee boh mangat jipileh. peue mantong nyang jitem teuma lon peubuet." dan jijak kheueh gad ubak nabi daud jijak peusampoe peue nyang ka geupeugah le tuhan ubak gobnyan, "nyang toh nyang teungku amphon pileh: nanggroenyoe

keunong musem deuk nyang treb jih na lhee thon, atawa teungku amphon neuplueng jilet-let le musoh nyang treb jih na lhee buleen, atawa bansaboh nanggroenyoe lhee uroe treb jih geuprang le tuhan deungon peudeueng gobnyan nyang sibagoe bala pe-unyaket, dan malaikat geuba mawot ho-ho mantong. neupeuputoh kheueh jinoenyoe peue nyang haroh ulon peusampoe ubak tuhan." geujaweeb le nabi daud, "adoh, cilaka ulon nyoe! teuma nibak jihukom le manusia, leubeh get ulon nyoe geuhukom le tuhan, sabab gobnyan rayeuk that gaseh sayang geuh." akhe-jih tuhan laju geupeuteuka bala peunyaket ateueh israel sampoe na 70.000 droe nyang meuninggai donya. oh ltheuhnyan tuhan geuyue ubak malaikat mangat teujak reuloih yerusalem. teuma bak watee malaikat nyan ka trok ubak teupat ureueng teungoh ceumeulo boh gandom atra araua ureueng yebus, tuhan laju geu-ubah keuputosan gobnyan keu geuhukom bansa nyan. gobnyan geupeugah ubak malaikat nyan, "kaseb! pioh!" nabi daud leumah geukalon malaikat nyan meulayang-layang lamkawan langet ngon bumoe. deungon peudeueng nibak jaroe, malaikat nyan ka siab keuneuk geujak peubinas yerusalem. le sababnyan nabi daud dan peumimpem-peumimpem rakyat, nyang bak watee nyan teungoh jisok peukayan ija krong sabab tanda meunyeusa, laju geusujut ateueh tanoh. nabi daud geumeudoa, "ya, allah, ulon kheueh nyang salah. ulon kheueh ya tuhan nyang yue seunsus nyan. bansa nyoe meubacut pih hana meusalah! ya tuhan, po teu allah ulon, neuhukom kheueh ulon dan keuluwarga ulon, teuma neupeujioh kheueh mala peutaka nyoe ateueh umat droeneueh." laju malaikat tuhan geuyue ubak gad mangat jijak peusampoe ubak nabi daud bahwa gobnyan haroh geujak ek u ateueh teupat ceumeulo gandom atra araua dan geupeudong miseubah di ateueh nyan. le sababnyan geubeurangkat kheueh nabi daud nyang siaui deungon peurintah tuhan nyang ka geupeusampoe ubak gobnyan meulalu gad. diteupat jambo phui aneuk gandom nyan araua dan peuet droe aneuk gobnyan nyang agam teungoh jiceumeulo boh gandom. ban leumah jikalon malaikat nyan, ban peuet droe aneuk araua nyan laju jiplueng jijak som droe. bak watee araua jikalon raja nabi daud nyang teuka ubak gobnyan, le gobnyan laju geujak meurumpok ngon nabi daud sira geusujut dikeue nabi allah nyan. geupeugah le nabi daud ubak araua nyan, "ulon keuneuk peugot miseubah diteupat nyoe keu tuhan, mangat balanyoe gadoh. le sababnyan gata peubloe kheueh tanoh nyoe keu ulon. gata peugah kheueh laju padub yuem jih, jeuet lon bayeue." "ah, neucok mantong ya teungku amphon," jijaweeb le araua, "dan neupeubuet kheueh laju peue nyang teungku amphon anggab nyan get. nyoeapat na leumo-leumo keureubeuen nyang teutot, dan keu kayee apui jih teungku amphon jeuet neungui papeuen-papeuen alat ceumeulo aneuk gandom nyoe. meunan cit jeuet neucok aneuk gandom nyan keu peuseumahan. banmandum nyan ulon jok, bek neubayeue le teungku amphon bahpi mubacut." teuma geujaweeb le nabi daud, "bek meunan! ulon keuneuk bayeue yuem jihnyoe deungon yuem nyang

peunoh. ulon hana lontem keureubeuen keu tuhan peue nyang atra gata atawa sapeue-sapeue nyang ulon teume deungon cuma-cuma." dan nabi daud laju geubayeue keu arauna deungon peng meuh nyang le jih na 600 keuteumpat nyan. le nabi daud geupeudong laju saboh miseubah diteumpat nyan keu tuhan, dan geupeuseumah laju keureubeuen nyang teutot dan keureubeuen peudame. oh lheueh nyan gobnyan geumeudoa ubak tuhan dan tuhan pih geudeungoe doa gobnyan sira geupeutron apui di langet dan apuinyan laju jilalieb banmandum keureubeuen-keureubeuen nyan. oh lheuehnyan tuhan laju geuyue malaikat nyan mangat geujak pasolom u dalam sarong peudeueng nyang ka teusuit nyan, dan malaikat nyan laju geupeubuet peue nyang ka geupeurintah le tuhan ubak gobnyan nyan. bak watee geungieing le nabi daud bahwa tuhan ka geujaweubh doa gobnyan sabab peue nyang ka geupeuseumah nyan, le nyan teuma gobnyan geupeuseumah lom keureubeuen nibak miseubah nyan. bak wateanyan khimah tuhan nyang geupeugot le nabi musa di padang pasi dan miseubah keu teumpat keureubeuen nyang teutot mantong na di teumpat iebadat di gibeon. teuma nabi daud hana geujeuet geujak keudeh keu geujak meututote deungon po teu allah, sabab gobnyan teumakot that-that keu peudeueng malaikat tuhan. lheueh nyan geupeugah le nabi daud, "diteumpat nyoe kheueh nyang haroh teupeudong baet tuhan allah. dan dimiseubah nyoe kheueh ureueng israel haroh jipeuseumah keureubeuen nyang teutot keu tuhan." nabi daud laju geuyue peusapat banmandum ureueng aseng nyang na tinggai di nanggroe israel, laju gobnyan geuyue jok buet keu awaknyan. siladum nibak awaknyan geuyue peut batee keu teupeugot baet tuhan. keu teupeugot labang ngon eunsee keu pintoe-pintoe geureubang baet tuhan nyan, laju geupeusapat beuso nyang le that le nabi daud. meunan cit deungon peurunggu le that cit geupeusapat, sabab le that atranyan ka hana hase le teutimang. ubak ureueng tirus dan sidon geupeusan kayee ceumara libanon nyang le that. banmandum nyang geukeureuja le nabi daud nyan na kheueh kareuna gobnyan geupike lageenyoe: "ulon haroh ulon peusiab peue nyang paleng peureulee keu teupeudong baet tuhan. sabab nabi sulaiman aneuk agam ulon mantong that muda dan gohlom na peungalaman, seudang baet tuhan nyang teuma teupeudong nyan haroh nyang get meugah dan meusyeuhu bansaboh donya." dan sigohlom nabi daud meuninggai donya, bahan bangunan nyang teupeureulee keu teupeudong baet tuhan ka seb le. nabi daud laju geuhoi aneuk agam gobnyan nyang nan nabi sulaiman nyan, dan bak aneuk geuhnyan geupeurintah laju mangat nabi sulaiman nyan geutem peudong baet keu tuhan allah nyang jiseumah le umat israel. geupeugah le nabi daud ubak nabi sulaiman aneuk gobnyan nyan, "hai aneuk ulon, katreb that-that ulon naniet keuneuk peudong saboh rumoh keuteumpat ulon horeumat tuhan allah ulon. teuma le tuhan geupeugah ubak ulon bahwa ulon ka kayem that ulon muprang dan ka ulon poh mate ureueng jai lumpah na. le sababnyan gobnyan hana geubri idhin keu ulon

mangat lon peudong baet keu gobnyan. teuma pi meunan, gobnyan ka geumeu janji ubak ulon nyang geupeugah lageenyoe: 'gata meuteume sidroe aneuk agam nyang mat peurintah deungon aman teuntram, sabab ulon kutulong jihnyan sampoe hanale musoh nyang jijakprang jihnyan. aneuk nyan teuma teuboh nan sulaiman sabab simantong jihnyan jimat keurajeuen, ulon teutab ulon bri keuteuntraman dan keumanaan bansaboh nanggroe israel. aneuk agam gatanyan kheueh nyang teuma peudong baet keu ulon. jihnyan teuma jeuet keu aneuk ulon dan ulon teuma jeuet keu bapak jih. takhta keurajeuen israel teutab nibak keuturonan jihnyan sampoe siumu masa.' dan geupeugah lom le nabi daud, "jinoenyoe hai aneuk ulon, seumoga tuhan po teu allah gata sabena meusajan gata dan geutulong gata. dan seumoga gata meuhase tapeudong baet keu tuhan lagee nyang ka geupeujanji nyan. dan mudah-mudahan tuhan po teu allah gata geubri keu gata keubijaksanaan dan peungeurtian mangat jeuet tapeurintah atueh israel nyang paih deungon hukum-hukum gobnyan. meunyeoe gata tataat ubak banmandum hukum nyang ka geubri ubak nabi musa keu bansa israel, teuma gata teutab meuhase. gata haroh yaken dan gata jeuet. bek tatakot keuhai peue mantong. keuhai baet tuhan nyan ulon ka lon meu-useuha bit-bit that mangat lon jak peusapat 3.400 ton meuh dan leubeh nibak 34.000 ton pirak. seulaen nibak nyan na peurunggu dan beuso nyang hana teuitong le jih. meunan cit deungon kayee dan batee ka cit ulon keubah, teuma gata haroh tatamah lom atra nyan. bak gata rame ureueng meukeureuja nyang jitem jakbuet. na nyang jeuet jimeubuet bak tambang batee, na tukang kayee, tukang batee dan le lom tukang pade nyang carong jipeugot meuh, pirak, peurunggu dan beuso. gata peuphon kheueh laju phon saat nyoe! seumoga tuhan geutulong gata." dan nabi daud pih geukrah laju banmandum peumimpin israel jijak tulang nabi sulaiman. geupeugah teuma lom, "tuhan po teu allah gata ka geutulong gata, dan geubri dame ngon teuntram bansaboh nanggroe. gobnyan ka geupeumungken ulon sampoe hase dan le peutaloe banmandum bansa nyang yoh watee ilee tinggai dinanggroe nyoe. teuma jinoenyoe awaknyan ka taklok ubak gata dan ubak tuhan. le sabab nyan kheueh gata rameungabdi ubak tuhan po teu allah gata deungon sigeunab jiwa raga gata. neupeuphon kheueh peudong baet keu tuhan, mangat peuto peujanjian gobnyan dan banmandum peukakaih nyang laen nyang teupeungui khusus keu iebadat jeuet teukeubah disinan." bak watee nabi daud ka tuha that-that gobnyan laju geubaiat nabi sulaiman jeuet keuraja israel. raja nabi daud laju geupeusapat banmandum peumimpin ureueng israel, teungku-teungku imeum dan ureueng lewi, lheuehnyan laju geu itong banmandum ureueng agam lewi nyang ka meu-umu lhee ploh thon u atueh. banmandum nyan na 38.000 droe. dan 24.000 droe lamkawan awaknyan geubri tugaih keu keujipeugot baet tuhan, 6.000 droe geuyue uroihi administrasi dan peukara-peukara di kanto peungadelan, 4.000 droe geubri tugaih bagian mando, dan 4.000 droe teuk bakbuet seumujoe ubak tuhan deungon alat-alat

musik nyang ka geukeubah. nabi daud geubagi ureueng lewi nyan lam lhee boh keulompok meunurot kawom awaknyan, na kheueh kawom gerson, kehat dan merari. gerson na jimeu aneuek dua droe aneuek agam: ladan dan simei. aneuek agam si ladan na teuma lhee droe: yehiel, zetam dan yoel. awaknyan na kheueh ulee kawom keuturonan ladan. (selomit, haziel dan haran na kheueh aneuek agam simei.) na peuet droe aneuek agam simei nyang meunurot umu meuturot-turot na kheueh: yahat, ziza, yeus dan beria. keuturonan yeus dan beria hanale, jadi awaknyan teuaggab saboh kawom. kehat na jimeu aneuek peuet droe aneuek agam: amram, yizhar, hebron dan uziel. amram na kheueh ureueng syiek nabi harun dan nabi musa. (nabi harun dan keuturonan gobnyan keu siumu masa ka geupeu khusus keu geu-uroih peukakaih-peukakaih rumah ibadah, geuyue tot keumeunyan keu tuhan, geulayani tuhan dan geubri beureukat keu rakyat ateueh nan tuhan. aneuek agam nabi musa hamba po teu allah nyan jitamong lam sukee lewi.) nabi musa na teuma geumeu aneuek dua droe aneuek agam, awaknyan na kheueh gersom dan eliezer. nyang jeuet keupeumimpén aneuek-aneuek gersom na kheueh sebuél. eliezer na geumeu aneuek sidroe aneuek agam nyang geuboh nan rehabya. teuma rehabya na geumeu aneuek le that. yizhar aneuek kehat nyang keudua, na jimeu aneuek agam nyang jiboh nan selomit; gobnyan na kheueh ulee kawom. hebron aneuek kehat nyang keu lhee, na teuma jimeu aneuek peuet droe aneuek agam: yeria nyang paleng tuha, amarya, yahaziel dan yekameam. uziel, aneuek kehat nyang keu peuet, na jimeu aneuek dua droe aneuek agam: mikha nyang paleng tuha, dan yisia. merari na jimeu aneuek dua droe aneuek agam: mahli dan musi. mahli na jimeu aneuek dua droe aneuek agam, eleazar dan kish, teuma eleazar meuninggai donya nyang hana jittinggai aneuek agam bahnyan meusidroe pi; nyang na aneuek inong nyang jimeukawen deungon syedara-syedara karong jih, na kheueh deungon aneuek-aneuek kish. musi, aneuek merari nyang keudua, na teuma jimeu aneuek lhee droe aneuek agam: mahli, eder dan yeremot. nyan kheueh nan-nan keuluwarga lewi nyang na teucetet meunurot nan ulee kawom dan keuluwarga gobnyan maseng-maseng. awaknyan meumu dua ploh thon u ateueh dan meuteume tugaih di baet tuhan. nabi daud geupeugah, "tuhan po teu allah israel geubri keuteuntranman ubak umat gobnyan, dan gobnyan keudroe tinggai di yerusalem keu siumu masa. le sabab nyan, khimah tuhan dan banmandum peukakaih nyang teungui keu ibadah hanapeu gegulang le ureueng lewi." deungon dasai nibak peurintah-peurintah nyang keuneuleuh nibak nabi daud nyan, banmandum ureueng lewi, meunyoé ka meumu thon, haroh teudafeutar mangat jeuet meutugaih. awaknyan haroh jibantu teungku-teungku imeum keuturonan nabi harun bak watee jipeubuet upacara ibadah di baet tuhan, teupeulara peulataran-peulataran dan bilek-bilek di baet tuhan, meunan cit jijaga peue mantong nyang ka teupeukhusus keu tuhan bek jeuet keu kuto. meunan cit awaknyan meutanggong

jaweueb ateueh nyang teukheun lom nyoe: ruti nyang teupeuseumah keu po teu allah, teupong nyang teupeuguna keu ngon peuseumahan keu tuhan, juadah lipeh nyang teupeuget dan hana keunong rago, keureubeuen nyang teupanggang, dan teupong nyang teujampu deungon minyeuk zaiton. meunan cit tugaih awaknyan jitimang ngon jisukat peuseumahan-peuseumahan nyang teuba u baet tuhan. seulaen nibak nyan awaknyan haroh jimeuca-e ngon jimeuselawueuet keu jipujoe tuhan bak watee tieb-tieb beungoh dan tieb-tieb malam; meunan cit pajan mantong na keureubeuen nyang teutot keu tuhan nibak uroe sabat, bak watee peurayaan bak buleuen baro, dan nibak peurayaan-peurayaan nyang laen. keuhai jeumeulah ureueng lewi nyang haroh jimeutugaih bak tieb-tieb watee, nyan pi ka teupeugot peuratoran jih. keu siumu masa ureueng lewi haroh geupeubuet tugaih nyan. meunan cit ubak awaknyan teubri cit teuma tanggong jaweueb keu jipeulara khimah tuhan meunan cit deungon baet tuhan dan keu jibantu syedara-syedara awaknyan, na kheueh bubena teungku imeum keuturonan nabi harun, bak watee teupeuna ibadah di teupat nyan. nabi harun na geumeu aneuek peuet droe aneuek agam: nadab, abihu, eleazar dan itamar. nadab dan abihu meuninggai leubeh ilee nibak ureueng syiek jih dan hana jittinggai aneuek meusidroe pih. le sabab nyan eleazar dan itamar syedara gobnyan jeuet keu teungku imeum. nabi daud geubagi keuturonan nabi harun lam keulompok-keulompok nyang meunurot tugaih awaknyan. lam hai meubuet meukeulompok nyan nabi daud geubantu le zadok keuturonan eleazar dan le ahimelekh keuturonan itamar. keuturonan itamar teubagi teuma jeuet lapan boh keulompok, seudangkan keuturonan eleazar jeuet nam blaih boh keulompok, sabab didalam keuluwarga eleazar leubeh le keuturonan nyang agam jeuet keu ulee keuluwarga. bah kheueh didalam keuturonan eleazar meunan cit didalam keuturonan itamar na peujabat-peujabat baet tuhan dan peumimpén-peumimpén agama, le sababnyan peubagian tugaih jipeugot deungon cara teu-undi. keuturonan eleazar dan keuturonan itamar meugantoe-gantoe jitarek undi, dan nan-nan awaknyan laju jicetet le sidroe seukeutareh nyang nan jih semaya aneuek netaneel ureueng lewi. banmandum nyan jipeubuet dikeue raja meusajan deungon peugawee-peugawee gobnyan, teungku imeum zadok, ahimelekh aneuek abyatar meunan cit deungon ulee-ulee keuluwarga geulongan imeum dan ulee-ulee keuluwarga golongan lewi. nyoe kheueh lumboi meunurot gileran tugaih nyang meuteume dan meunurot nyang teu-undi keu ban dua ploh boh keulompok nyan: 1. yoyarib 2. yedaya 3. harim 4. seorim 5. malkia 6. miyamin 7. hakos 8. abia 9. yesua 10. sekhanja 11. elyasib 12. yakim 13. hupa 14. yesebeab 15. bilga 16. imer 17. hezir 18. hapizes 19. petahya 20. yehezkiel 21. yakhin 22. gamul 23. delaya 24. maazya nan-nan ureueng nyang ka teupeugah nyan teucetet meunurot gileran awaknyan keu jitamong u dalam baet tuhan dan jipeubuet tugaih ibadah nyang ka geupeuteutab le nabi harun, indatu awaknyan, nyang paih lagee

peurintah tuhan, allah israel. seulaen nibak nyan lam keuturonan ureueng lewi mantong jitamong keunan ulee-ulee keuluwarga nyang teupeugah seulanjut jihnyoe: yehdeya, keuturonan amram nibak gareh keuturonan subael; yisia, keuturonan rehabya; yahat, keuturonan yizhar nibak gareh keuturonan selomot; yeria, amarya, yahaziel dan yekameam aneuk-aneuk hebron meunurot urotan umu jih; samir, keuturonan uziel nibak gareh keuturonan mikha; zakharia, keuturonan uziel nibak gareh keuturonan yisia syedara mikha; mahli, musi dan yaazia, keuturonan merari. yaazia na jimeu aneuk lhee droe aneuk agam: syoham, zakur dan hibri. mahli na teuma jimeu aneuk dua droe aneuk agam nyang teuboh nan eleazar dan kish. eleazar hana jimeu aneuk nyang agam, teuma kish na jimeu aneuk sidroe aneuk agam nyang teuboh nan yerahmeel. aneuk agam musi na lhee droe: mahli, eder dan yerimot. nyan kheueh keuluwarga-keuluwarga lam sukee lewi. keu gileran tugaih awaknyan, tieb-tieb ulee keuluwarga meusajan deungon adoe jih nyang agam jitarek undi lagee nyang ka jipeubuet le wareh kawom awaknyan, na kheueh le teungku-teungku imeum nibak keuturonan nabi harun. watee teutarek undi nyan jipeusaksi le raja nabi daud meusajan deungon zadok, ahimelekh meunan cit deungon ulee-ulee keuluwarga nibak gulongan teungku-teungku imeum dan nibak gulongan ureueng lewi. keu teupimpen upacara-upacara iebadat, nabi daud dan bandum peumimpen ureueng lewi laju geupileh kawom-kawom lewi nyang teupeugah nyoe: asaf, heman dan yedutun. awaknyan geubri tugaih keu jijak peusampoe peusan nibak po teu allah sira ji-ireng deungon su musik keucapi, rapa-i gambus dan simbal. keu teupimpen iebadat deungon upacara jihnyan maseng-maseng, teupileh teuma reugu-reugu nyang teupeugah nyoe: ban peuet droe aneuk agam asaf: zakur, yusuf, netanya dan asarela. nyang jeuet keupeumimpen awaknyan na kheueh asaf, nyang peusampoe peusan nibak po teu allah, meunyoek ka geubri tugaih le raja. ban nam droe aneuk agam yedutun: gedalya, zeri, yesaya, sime, hasabya dan matica. dimiyueb pimpenan ureueng syiek awaknyan, awaknyan laju jipeusampoe peusan nibak po teu allah deungon musik keucapi, dan awaknyan jica-e deungon meurateb seumujoe meunan cit deungon teupeugah syukoe ubak tuhan. ban peuet blaih droe aneuk agam heman na kheueh: bukia, matanya, uziel, sebu, yerimot, hananya, hanani, eliat, gidalti, romamti-ezer, yosbekasa, maloti, hotir dan mahaziot. heman na kheueh nabi pribadi raja. tuhan geubri ban peuet blaih droe aneuk agam nyan meunan cit lhee droe aneuk inong ubak heman kareuna tuhan ka geumeujanji keu geubri keududuekan nyang teuhoreumat keu gobnyan. banmandum aneuk heman nyan jipeumeu-en musik simbal, keucapi dan rapa-i gambus dimiyueb pimpen ureueng syiek gobnyan keudroe keu teuireng upacara iebadat di baet tuhan. asaf, yedutun dan heman meuteume tugaih sisuai deungon nyang ka geutunyok le raja. ban dua ploeh peuet droe aneuk agam awaknyan dan wareh kawom awaknyan na kheueh ahli-ahli musik nyang ka teulateh. awaknyan

banmandum na 288 droe. keu teupeuteuntee gileran tugaih, awaknyan bandum jitarek undi – bah kheueh nyan nyang muda meunan cit nyang tuha, bah kheueh nyan nyang kana peungalaman meunan cit nyang ban mantong meurunoe. ban 288 droe nyan teubagi teuma u dalam 24 boh keulompok meunurot keuluwarga maseng-maseng. tieb-tieb keulompok na 12 droe dimiyueb pimpenan sidroe. nyoe kheueh urotan nan-nan awaknyan meunurot nyang ka teu-undi: 1. yusuf nibak keuluwarga asaf 2. gedalya 3. zakur 4. yizri 5. netanya 6. bukia 7. yesarela 8. yesaya 9. matanya 10. sime 11. azareel 12. hasabya 13. subael 14. matica 15. yeremot 16. hananya 17. yosbekasa 18. hanani 19. maloti 20. eliat 21. hotir 22. gidalti 23. mahaziot 24. romamti-ezer nyoe na kheueh peumbagian tugaih keu ureueng-ureueng lewi nyang jeuet keu nyang kawai baet tuhan. nibak kawom korah jitunyok meselema aneuk kore nibak keuluwarga ebyasaf. gobnyan na tujoh droe aneuk agam nyang teudafeutar meunurot urotan umu: zakharia, yediael, zebaja, yatniel, elam, yohanen, elyoenai. lheuehnyan teutunyok teuma obed-edom. gobnyan geubri beureukat le po teu allah deungon 8 droe aneuk agam nyang teudafeutar meunurot urotan umu: semaya, yozabad, yoah, sakhar, netaneel, amiel, isakhar dan peuletai. semanya aneuk tuha obed-edom na jimeu aneuk 6 droe aneuk agam: otni, refael, obed, elzabad, elihu dan semakhya; banmandum nyan na kheueh ureueng-ureueng peunteng dalam kawom awaknyan sabab awaknyan gagah peukasa, nyang paleng meugah elihu dan semakhya. droe ureueng agam nyang peukasa. kawom meselema teubri teuma na 18 droe ureueng nyang peukasa. nibak kawom merari teutunyok teuma hosa. gobnyan na peuet droe aneuk agam: simri (jihnyan bukan aneuk tuha, teuma teuangkat jeuet keu peumimpen le ureueng syiek geuh), hilkia, tebalya dan zakharia. banmandum nyan na 13 droe anggota keuluwarga hosa nyang jeuet keu nyang kawai baet tuhan. ureueng nyang kawai baet tuhan teubagi dalam keulompok-keulompok meunurot kawom jih. dan meunan cit keu awaknyan teubri cit tugaih-tugaih didalam baet tuhan saban lagee nyang ka teubri keu ureueng lewi. tieb-tieb kawom bah kheueh nyan kawom nyang rayeuk meunan cit deungon kawom nyang ubit, teutarek undi mangat teuteupeue bak babah pintoe geureubang nyang toih awaknyan meuteume tugaih. selema meuteume tugaih nibak babah pintoe geureubang di siblahi u timu. nabi zakharia aneuk gobnyan, nyang sabe geubri naseuhat nyang jroh-jroh, meuteume tugaih nibak babah pintoe geureubang di siblahi utara. obed-edom meuteume tugaih nibak babah pintoe di siblahi u seulan seudangkan aneuk-aneuk gobnyan meuteume tugaih teujaga gudang peuleungkapan. supim dan hosa meuteume tugaih nibak pintoe siblahi u barat dan pintoe geureubang syalekhet nyang na nibak rot nyang meusineungoh. tugaih teukawai ka geuato lageenyan bageo deungon nyan sabe na ureueng kawai di tieb-tieb babah pintoe geureubang. tieb-tieb uroe disiblahi u timu sabe na 6 droe peungawai, siblahi utara 4 droe

dan siblahi u seulan 4 droe. meunan cit deungan gudang-gudang peuleungkapan na ureueng jaga 4 droe: 2 droe tieb-tieb saboh gudang. nibak papilyun siblahi si ubarat na teuma meutugaih 4 droe peungawai nibak rot dan 2 droe tukang kawai nibak papilyun nyan keudroe. meunan kheueh cara jih teubagi tugaih kawai keu kawom korah dan kawom merari. ureueng-ureueng nyang laen lam sukee lewi teujok tanggung jawueub atueuh hareuta beunda baet tuhan dan atueuh gudang-gudang teumpat teukeubah nyang teupeuseumah-peuseumah keu po teu allah. na sidroe aneuk agam gerson nyang nan jih ladan; gobnyan jipeutron na meupadub boh keulompok kawom, jitamong cit keunan kawom yehiel aneuk jihnyan. aneuk-aneuk yehiel, nyang nan jih zetam dan yoel, teubri tanggung jawueub atueuh gudang-gudang dan keuhai peng baet tuhan. keuturonan amram, yizhar, hebron dan uziel pi awaknyan meuteume tugaih. sebu el nibak kawom gersom, aneuk nabi musa, na kheueh nyang kawai hareuta beunda baet tuhan. gobnyan na hubongan keuluwarga deungan selomit meulalu elazar syedara gersom. gareh keuturonan eliezer sampoe ubak selomit na kheueh lageenyoe: eliezer, rehabya, yesaya, yoram, zikhri, selomit. selomit dan wareh kawom jihnyan meutanggong jawueub atueuh banmandum peuseumahan nyang geubri le nabi daud, le ulee-ulee keuluwarga, peumimpem-peumimpem kawom, dan bubena peuwira-peuwira manyang. peue-peue nyang teujok nyan na kheueh siladam nibak hareuta nyang teureupah di mideuen prang dan awaknyan peuseumah khusus lam baet tuhan. paneuk haba, selomit dan keuluwarga jihnyan meutanggong jawueub atueuh peue mantong nyang ka teuseurah keu peguna khusus lam baet tuhan, jitamong cit keunan keu peuseumahan-peuseumahan nyang teujok meulalu nabi samuel ka geubri le raja saul, le abner aneuk ner, dan le yoab aneuk zeruya. keuturonan yizhar, na kheueh kenanya dan aneuk-aneuk gobnyan, teubri tugaih sibagoe administrasi nanggroe dan tugaih-tugaih nibak kanto peungadelan di israel. peue mantong urosan keu agamaan dan urosan peumeurintahan di israel bagian barat krueng yordan geuseurah ubak hasabya, dan keu 1.700 droe wareh kawom gobnyan: banmandum nyan na kheueh ureueng-ureueng meusyehu keuturonan hebron. peumimpem keuturonan hebron na kheueh yeria. bak thon nyang keupeuet ploh geumat keurajeuen le nabi daud laju jipeuna seulidek keuhai keuturonan hebron. nibak hase teuseulidek nyan teunyata na sipa-i-sipa-i nyang peukasa nyang tinggai di yazer didalam wilayah gilead. peue mantong urosan keu agamaan dan peumeurintahan di israel siblahi u timu krueng yordan – na kheueh wilayah sukee ruben, gad dan siladam sukee manasye – teuseurah teuma ubak 2.700 ulee keuluwarga yeria, banmandum nyan na kheueh ureueng meusyehu nyang geupileh le raja nabi daud. urusan peumeurintah keurajeuen israel le ulee-ulee keuluwarga, peumimpem-peumimpem kawom dan peuwira-peuwira. tieb-tieb thon treb jih sibuleuen na saboh keulompok nyang meutugaih seucara meugantoe-gantoe dimiyueb pimpenan

sidroe ulee. maseng-maseng keulompok na 24.000 droe ureueng. nyoe kheueh na ulee keulompok nyang meutugaih keu tieb-tieb buleuen: buleuen nyang keu phon: yasobam aneuk zabdiel (geuhnyan anggota kawom peres sukee yehuda). buleuen kedua: dodai, keuturonan ahohi. miklot na kheueh waki gobnyan. buleuen nyang keulhee: benaya aneuk imeum yoyada; gobnyan jipimpin "keulompok tridasawira" (amizabad aneuk gobnyan na kheueh waki geuh). buleuen nyang keu peuet: aseal syedara yoab (geunantoe gobnyan na kheueh zebaja, aneuk geuh). buleuen nyang keulimong: samhut, keuturonan yizrah. buleuen nyang keunam: ira aneuk ikes, nibak banda tekoa. buleuen nyang keu tujoh: heles, keuturonan efraim nibak banda peloni. buleuen nyang keu lapan: sibkhai nibak banda husa (gobnyan anggota kawom zerah, sukee yehuda). buleuen nyang keu sikureueng: abiezer nibak banda anatot di wilayah sukee benyamin. buleuen nyang keu siploh: maharai, keuturonan zerah nibak banda netofa. buleuen nyang keu siblahi: benaya nibak banda piraton di wilayah sukee efraim. buleuen nyang keu dua blaih: heldai keuturonan otniel nibak banda netofa. nyoe kheueh dafeutar nan-nan ulee sukee lam bansa israel: sukee ulee nabi daud hana geupeukeunong seunsus atueuh ureueng nyang meu-umu dimiyueb 20 thon, sabab tuhan ka geumeujanji geukeuneuk peujeuet ureueng israel nyang le jih sidub bintang nyang na di langet. yoab aneuk zeruya ka geupeuphon peuna seunsus, teuma buet geuhnyan hana geupeuseuleosoe, sabab po teu allah ka geuhukom ureueng israel, kareuna seunsus nyan. nyang kheueh sabab jih awaknyan hana teucetet padub jeumeulah jih didalam kitab raja daud. nyoe kheueh dafeutar nan ureueng nyang jeuet keupeunguroih hareuta milek raja: gudang-gudang nyang na nibak meuligoe dan di yerusalem: azmawet aneuk adiel gudang-gudang nyang na di luwa yerusalem: yonatan aneuk uzia nyang meukeureuja di blang: ezri aneuk kelub nyang uroih lampoh-lampoh anggo: simei nibak banda rama nyang uroih teumpat-teumpat teukeubah anggo: zabdi nibak banda syifmi bak zaiton dan bak ara (nibak gaki peugunongan di siblahi ubarat): baal-hanan nibak banda geder nyang uroih teumpat teukeubah minyeuk zaiton: yoas nyang uroih beulatang peulara nyang na di padang saron: sitrai nibak banda saron nyang uroih beulatang peulara nyang na di panton-panton: safat aneuk adlai nyang uroih unta: obil keuturonan nabi ismail nyang uroih keuleudee: yehdeya nibak banda meronot nyang uroih bubiri ngon kameng: yazis, ureueng hagri. apha nabi daud nyang nan geuh yonatan, na kheueh sidroe peunaseuhat nyang carong thom malem. gobnyan dan yehiel aneuk hakhmoni geubri tugaih tanggung jawueub atueuh peundidikan aneuk agam raja. ahitofel na kheueh peunaseuhat raja, dan husai ureueng arki na kheueh nyang bri naseuhat dan rakan krab raja. oh ka lheueh ahitofel meuninggai donya, gobnyan jigantoe le abyatar dan yoyada aneuk benaya. nyang jeuet keupanglima angkatan prang keurajeuen na kheueh yoab. nabi daud geupeurintah mangat banmandum peumimpem israel jimeusapat di yerusalem.

jadi, bubena ulee sukee, bubena peujabat urosan peumeurintahan, bubena ulee kawom, bubena ureueng nyang kawai hareuta benda dan beulatang peulara sira aneuek-aneuek agam raja – paneuk jih bubena ureueng rayeuk nyang na didalam meuligoe, peuwira dan ureueng peunteng, banmandum nyan meusapat di yerusalem. nabi daud geudong dikeue awaknyan dan laju geumariet, "syedara-syedara ulon nyang saboh bansa, deungoe kheueh nyoe! ka treb that-that ulon naniet keuneuk peudong saboh romoh nyang peumanen keu tempat peuto peujanjian, teupat geugilo le gaki tuhan allah geutanyoe. ulon ka lon peugot peusiapan mangat teupeudong saboh teupat teuseumah gobnyan. teuma tuhan geutam ulon bek lon peubuet hai nyang lageenyan sabab ulon nyoe sidroe sipa-i nyang ka jai that ulon peuro darah gob. tuhan, po teu allah nyang jiseumah le israel, ka geupileh ulon dan keuturonan ulon mangat jeuet lon mat peurintah atehueh israel keu siumu masa. keu teupeusiab sidroe peumimpin nyang teupileh nibak sukee yehuda, dan nibak sukee nyan gobnyan geupileh nibak keuluwarga ureueng syiek ulon. dan nibak banmandum anggota keuluwarga ureueng syiek ulon nyan gobnyan ka sipakat teupileh ulon dan geupeujeuet ulon keuraja atehueh banmandum bansa israel. tuhan ka geubri aneuek nyang le keu ulon dan nibak aneuek nyang le nyan gobnyan ka geupileh nabi sulaiman keu jimat peurintah atehueh israel, keurajeuen tuhan nyoe. tuhan geupeugah lageenye, 'nabi sulaiman aneuek gata teuma jipeudong romoh keu ulon. jihnyan ka ulon pileh jeuet keu aneuek ulon, dan ulon teuma jeuet keu bapak jih. meunye gobnyan deungon bit-bit geuturot keu hukum-hukum dan peurintah ulon lagee nyang ka jipeubuet nibak saat nyoe, ulon teuma lon peukong keurajeuen jihnyan keu siumu masa.' " dan geupeugah lom le nabi daud lageenye, "le sababnyan, jinoenye, hai rakyat ulon, dikeue po teu allah geutanyoe dan dikeue meuhadah ngon banmandum israel, umat tuhan nyoe, ulon meuharab bak gata deungon bit-bit taseutot banmandum peue nyang ka geupeurintah le tuhan allah geutanyoe. deungon na lagee nyan gata teutab jeuet keupo nanggroe nyang get nyoe dan tapeutron waresan keu keuturonan gata keu siumu masa." ltheueh nyan ubak nabi sulaiman geupeugah teuma le nabi daud, "hai aneuek ulon, bah kheueh po teu allah nyang jiseumah le ureueng syiek gata nyoe, gata aku sibagoe allah gata. gata haroh tameungabdi bak gobnyan deungon ate nyang gleh dan tuloih ikhlas. sabab gobnyan geuteupeue banmandum pikeran dan peue nyang tsureh lam ate geutanyoe. meunye gata tamita gobnyan, gobnyan teuma meurumpok deungon gata, teuma meunye gata tatinggai gobnyan, gobnyan teuma geutulak gata keu siumu masa. gata ingat kheueh beujroh-jroh bahwa tuhan ka geupileh gata keu tapeudong baet nyang khusus keu gobnyan. dan jinoenye gata peubuet kheueh banmandum peue nyang ka geupeurintah nyan deungon seumangat nyang meutaga." oh ltheueh geupeugah nyan nabi daud laju geuseurah ubak nabi sulaiman reuncana bangunan baet tuhan, meunan cit deungon gudang-gudang jih, banmandum kama

jih, dan ruweueng mahasuci gobnyan, teupat teupeu amphon desya. meunan cit geujok le nabi daud banmandum reuncana nyang ka geupike le gobnyan keu peulataran-peulataran deungon kama-kama nyang na bansikeulileng nyan, meunan cit keu gudang-gudang peuleungkapan baet tuhan dan deungon gudang-gudang teupat teukeubah keureubeuen-keureubeuen keu tuhan. meunan cit geuseurah reuncana keuhai teupeukeulompok teungku-teungku imeum dan ureueng-ureueng lewi, keuhai tugaih-tugaih nyang haroh awaknyan peubuet, na kheueh buet awaknyan di baet tuhan dan teupeulara banmandum peukakaih iebadat. meunan cit geubri teuma peutunyok-peutunyok pakriban cara jih teupeuget meuh dan pirak keu teupeuget peukakaih-peukakaih, keu tieb-tieb panyot dan gaki panyot, keu meuja-meuja nibak pirak, dan keu tieb-tieb meuja meuh keuteupat ruti sajian ubak po teu allah. meunan cit keuhai peutunyok-peutunyok keuhai meuh aseuli nyang haroh teupeugana keu teupeuget garpu, cambong dan buli-buli, keuhai le ngon dit jih meuh ngon pirak keu teupeuget pireng-pireng, keuhai le jih meuh aseuli keu teupeuget miseubah keuteupat teutot keumeunyan dan keu teupeuget geuritan keu patong-patong kerub deungon sayeub meulinteung di atehueh peuto peujanjian tuhan. le nabi daud geupeugah, "banmandum nyan ka teucetet nyang paih deungon reuncana nyang ka teutuleh nyang ka geutunyok le tuhan ubak ulon mangat ulon peubuet reuncana nyan." oh ltheueh nyan le nabi daud geupeugah lom ubak aneuek gobnyan nabi sulaiman, "gata haroh yaken dan gata jeuet. tapeuphon kheueh meubuet nyan dan gata bek yo mubacut pih keupeue mantong. tuhan allah nyan ulon seumah geutulong gata. allah hana geutinggai gata. gobnyan teutab na sabe disampeng gata sampoe nyang gata peubuet nyan seulesoe. peumbagian tugaih iebadat didalam baet tuhan ka geupeuteuntee lamkawan teungku imeum dan ureueng lewi. ureueng-ureueng keureuja nyang carong dan ahli lam bideung jih maseng-maseng teuma geutulong gata deungon galak ate, dan mandum peumimpin meunan cit deungon banmandum rakyat teuma jitaat ubak peue nyang gata peurintah." laju geupeugah le nabi daud ubak banmandum ureueng nyang na meusapat disinan, "nibak banmandum aneuek agam ulon, nabi sulaiman kheueh nyang geupileh le po teu allah. teuma jihnyan mantong that putik gohlom na peungalaman, seudangkan buet-buet nyoe keubit that rayeuk. lom teuma nyang teupeudong nyan bukan kheueh saboh meuligoe keu manusia, teuma na kheueh baet keu tuhan allah. bahan-bahan keu baet nyan meunan cit deungon mubagoe macam peurabot jih ka ulon keubah deungon sigala keumampuan ulon. nibak ulon ka na lon keubah meuh, pirak, peurunggu, beuso, kayee, batee-batee meuhareuga dan batee-batee peumata, meunan cit deungon batee-batee nyang meubagoe wareuna keu hiasan-hiasan dan lumpah that le batee pualam. dan sabab cinta ulon keu baet po teu allah ulon ka teuma ulon seurah pirak ngon meuh nibak hareuta milek ulon keudroe: meuh nyang paleng get na 100

ton leubeh, dan pirak nyang aseuli leubeh kureueng na teuma 240 ton keu ngon seupoh nibak binteh baet tuhan, dan keu beunda-beunda nyang haroh jipeubuet le ureueng teunaga ahli. nyang kheueh, jinoenye solom nyang jitem bri peuseumahan keu tuhan deungon sigala mangat ate?" le sababnyan, bubena ulee kawom, ulee sukee, bubena peuwira dan nyang tanggong jaweueb hareuta milek raja geupeugah bahwa awaknyan pih na meuheut keuneuk bri sumbangan. le awaknyan pi laju jibri nyang teupeugah lom nyoe, atranyoe keu ngon peuet baet tuhan: meuh 170 ton leubeh, pirak 340 ton leubeh, peurunggu rab na 620 ton, dan beuso 3.400 ton leubeh. ureueng-ureueng nyang na batee peumata jijok laju ubak yehiel mangat teupeutamong lam kaih baet tuhan. (yehiel na kheueh sidroe lamkawan ureueng lewi nibak kawom gerson.) rakyat jijok nyan deungon rela ate keu tuhan dan awaknyan galak that sabab ka le that nyang ka jipeuseumah. meunan cit deungon nabi daud lumpah that galak ate jih. dikeue rakyatba nyan nabi daud laju geupujo tuhan. gobnyan geupeugah, "ya tuhan po teu allah nyang geuseumah le nabi yakub indatu kamoe, teupujo kheueh tuhan siumu masa! droeneuh keubit rayeuk dan meukuasa, droeneuh mulia, jaya dan agong. peue mantong na di langet dan nyang na di ateuh bumoe na kheueh atra droeneuh. droeneuh raja nyang agong, nyang mat kuasa ateuh peue-peue nyang na. mandum keukayaan dan keumakmuran asai jih nibak droeneuh; peue-peue mantong nyang na droeneuh kuasa deungon teunaga dan keudaulatan droeneuh; droeneuh meukuasa hase neupeujeuet so mantong ureueng jeuet keu ureueng rayeuk dan teuga. jinoenye, sabab peue mantong nyoe na kheueh atra droeneuh dan peue nyang kamoe bri nyoe na kheueh atra droeneuh cit teuma. droeneuh neutupeue ya, tuhan, saban cit lagee indatu kamoe, kamoe pih kamoe rase udebnyoe saban lagee ureueng jame dan ureueng aseng. udeb kamoe lagee bubayang yohmasa ilee, dan kamoe hana jeuet kamoe tuwoe ubak mate. ya tuhan, allah kamoe, banmandum barang nyang muyuemnyoe kamoe peusapat disinoe keu teupeudong saboh baet keu droeneuh mangat kamoe hase kamoe horeumat keu nan droeneuh nyang suci. teuma banmandum nyan kamoe teurimong nibak droeneuh keudroe dan atranyan na kheueh atra droeneuh keudroe. ulon meuteupeue bahwa tuhan neu uJoe ate tieb-tieb manusia dan tuhan neugalak keu ate nyang gleh murni. deungon ate nyang tuloih ikhlas dan mangat ate ulon peuseumah banmandum nyoe keu droeneuh. ulon ka ltheueh ulon ngieng pakriban umat droeneuh nyang na meusapat disinoe jiba peuseumahan awaknyan keu droeneuh deungon seunang ate. ya tuhan allah, tuhan nyang geuseumah le nabi ibrahim, nabi ishaq dan nabi yakub, indatu kamoe, bah kheueh tuhan neujaga mangat umat droeneuh teutab cinta droeneuh lagee nyang ka teujadi nibak uroenye dan neutulong kheueh

mangat awaknyan siumu masa teutab seutia ubak droeneuh. neubri kheueh keu nabi sulaiman, aneuk agam ulon, keuheundak nyang bit-bit mangat jeuet jiseutot banmandum peurintah droeneuh dan mangat jipeudong baet lebadat nyang peusiapan jih ka ltheueh ulon peubet." oh ka ltheueh geumeudoea nyang lageenyan, nabi daud laju geupeugah ubak ureueng rame nyang na disinan, "puJoe kheueh tuhan po teu allah gata!" teuma di ureueng rame nyan pih laju geumeurateb ngon jipujoe tuhan, allah nyang geuseumah le indatu awaknyan. ltheuehnyan awaknyan laju jisujut sira jibri horeumat ubak tuhan dan raja. uroe nyang laen awaknyan laju jisie beulatang peulara keu jipeuseumah sibagoe keureubeuen keu tuhan, dan uengkot sie nyan laju geubagi-bagi keu rakyat. seulaen nibak nyan na teuma 1.000 boh leumo agam, 1.000 boh bubiri agam dan 1.000 boh teuma bubiri muda nyang geusie dan geutot deungon sampoereuna di ateuh miseubah. meunan cit awaknyan jipeuseumah teuma anggo nyang ka teupeuwajeub keu keureubeuen-keureubeuen nyan. bak uroenyan awaknyan jipajoh khanuri deungon galak dan mangat ate dikeue po teu allah. dan nyang keu duagoe jih awaknyan jipeumaklumkan nabi sulaiman sibagoe raja. ateuh nan tuhan, awaknyan laju geubaibat nabi sulaiman sibagoe raja dan teungku imeum zadok geu baiat sibagoe teungku imeum. dan sibagoe geunantoe nabi daud ureueng syiek gobnyan, nabi sulaiman geudeuk nibak takhta nyang ka geupeuteutab le tuhan. gobnyan na kheueh raja nyang ade lom carong dan jiseugan le banmandum bansa israel. banmandum peujabat keurajeuen dan tantra sampoe ubak aneuek-aneuek agam nabi daud nyang laen pih jiwa nabi sulaiman nyan sibagoe raja. tuhan ka geupeujeuet banmandum rakyat jikagom keu raja nabi sulaiman dan geupeujeuet gobnyan keu raja nyang paleng hebat nibak raja tohmantong nyang ka ltheueh jimat peurintah ateuh nanggroe israel. nabi daud aneuek isai geumat peurintah bansaboh nanggroe israel peuet ploh thon treb jih. di hebron na geumat peurintah nyang treb jih 7 thon dan di yerusalem na thon. gobnyan ureueng kaya dan teuhoreumat dan meuninggai donya bak umu nyang ka seb tuha. nabi sulaiman aneuek agam gobnyan jeuet keuraja keugeunantoe gobnyan. riwayat udeb nabi daud nibak phon sampoe akhe ka na teucetet didalam kitab nabi samuel, nabi natan dan nabi gad. didalam kitab nyan teucalitra keuhai peumeurintahan gobnyan, kuasa gobnyan dan peue mantong nyang na teujadi u ateuh droe gobnyan, ateuh israel dan keurajeuen-keurajeuen nyang na to-to ngon nanggroe israel.

nabi sulaiman aneuek agam nabi daud ka jeuet keuraja nyang lumpah that kong keududeukan gobnyan didalam keurajeuen israel. tuhan po teu allah gobnyan geubri beureukat keu gobnyan dan geupeujeuet gobnyan raja nyang paleng meukuasa. banmandum ulee pasokan nyang 1.000 dan nyang 100, banmandum peujabat peumeurintah, dan banmandum ulee keuluwarga israel ka geupeurintah le nabi sulaiman keu jikak deungon gobnyan keu teupat ibadah di gibeon. awaknyan jikak keudeh, kareuna disinan kheueh teupat khimah tuhan nyang ka geupeugot le nabi musa hamba tuhan nyan yoh watee gobnyan mantong na dipadang pasi. (teuma peuto peujanjian tuhan nyan mantong na di yerusalem didalam khimah nyang ka geupeudong le nabi daud keu peuto nyan yoh watee geupinah atranyan nibak kiryat-yearim.) miseubah peurunggu nyang geupeugot le bezaleel aneuek si uri, cucoe hur, atranyan na cit meurumpok di gibeon nyang teupeuduek dikeue khimah tuhan. nabi sulaiman dan banmandum rakyat geuh geumeue ibadah ubak tuhan di teupat nyan. dikeue khimah nyan raja laju geupeuseumah di ateuheh miseubah peurunggu na 1.000 boh beulatang sibagoe keureubeuen nyang teutot leu tuhan. bak malam nyan tuhan po teu allah laju geupeuleumah droe geuh ubak nabi sulaiman sira meufeureuman, "hai nabi sulaiman, talakee kheueh ubak ulon peue nyang keuneuk gata lakee, nyan teuma ulon bri keu gata!" geujaweueb le nabi sulaiman, "ya allah po, droeneueh ka ltheueh neutunyok bahwa droeneueh get that neugaseh ubak ureueng syiek ulon nabi daud, dan droeneueh ka teuma neu baiat ulon jeuet keuraja keugeunantoe gobnyan. jinoenyoe, ya tuhan allah, seumoga droeneueh neupeuteupat janji droeneueh ubak ureueng syiek ulon. droeneueh ka neu baiat ulon jeuet keuraja ateuheh bansa nyang raya nyoe nyang hana teuitong jeumeulah jih. le sababnyan neubri kheueh ubak ulon keubijaksanaan dan ieleume nyang ulon peureulee mangat ulon pimpin awaknyan. meunyo han lageanyan, pakriban mungkin ulon hase lon peurintah umat droeneueh nyang raya nyoe?" geujaweueb po teu allah ubak nabi sulaiman, "peue nyang gata lakee nyan get that. gata hana talakee keukayaan atawa hareuta nyang meulimpah meunan cit deungon yuem nyan meusyeyuhu atawa bumate bube nyang na musoh-musoh gata atawa umu beupanyang keu gata keudroe, teuma nyang talakee keubijaksanaan dan ieleume peungeutahuan mangat hase gata peurintah umat ulon nyan ka ulon peucaya ubak gata. sabab nyan keubijaksanaan dan ieleume peungeutahuan ulonbri keu gata. seulaen nibaknyan ulon teuma lonbri keu gata udeb leubeh makmu, leubeh kaya dan leubeh meusyeyuhu nibak raja nyang toh mantong bah pih nyan raja yoh masa ilee meunan cit bak masa nyang teuma teuka." oh ltheuehnyan nabi sulaiman laju geutinggai teupat ibadah di gibeon ditempat nyang na khimah tuhan, laju geuwo u yerusalem. nibak teupat nyan gobnyan geupimpin peumeurintahan ateuheh israel. gobnyan geuato laju ngon geupeuleungkab lom angkatan prang gobnyan deungon geutamah 1.400 boh geuritan prang dan 12.000 boh guda

prang. siladum nibak peuleungkapan prang nyan geukeubah di yerusalem, dan nyang leubeh nibak nyan geukeubah di meubagoe banda. bak jamen keurajeuen nabi sulaiman, meuh ngon pirak na kheueh barang nyang ka lazem di yerusalem, saban cit lagee aneuk batee; dan kayee ceumara libanon nyang that-that le saban lagee kayee bak ara biasa. rot peudagang-peudagang nyang jibantu raja, guda jipeuteuka nibak nanggroe meuse dan nanggroe kewe, dan geuritan-geuritan prang geupeuteuka nibak nanggroe meuse cit, oh ltheuehnyan geukirem teuma keu raja-raja di nanggroe het dan raja-raja di nanggroe siria deungon yuem 150 peng pirak keu yuem saboh guda, dan 600 peng pirak keu yuem saboh geuritan prang. nabi sulaiman ka geucok ke-uputosan gobnyan geukeuneuk peudong baet tuhan, dan saboh meuligoe atra droe gobnyan. mangat meuhase buet geuh nyan laju geukrah 70.000 droe ureueng keu nyang angkat bahan bangunan, 80.000 droe ureueng nyang jak peut batee nibak gunong dan na 3.600 droe mando nyang kawai ureueng keureuja nyan. nabi sulaiman laju geukirem haba ubak raja hiram di tirus, "nyang siget jih teungku amphon neujalen hubungan dagang deungon ulon lagee nyang ka neupeubuet yoh masa ilee deungon ureueng syiek ulon nabi daud. teungku amphon ka neupeubloe keu gobnyan kayee ceumara libanon keungon peudong meuligoe gobnyan. jinoenyoe ulon keuneuk peudong saboh rumoh ibadah nyang khusus keu ulon horeumat ubak tuhan allah ulon. di baet nyan ulon dan rakyat ulon kamoe meueibadat ubak gobnyan sira kamoe tot dupa nyang meubagoe rupa bhee jih nyang harom, meunan cit kamoe peuseumah ruti sajian keu gobnyan seucara teutab. meunan cit di baet nyan teuma kamoe peuseumah keureubeuen nyang teutot beungoh ngon malam, tieb-tieb uroe sabat, uroe raya buleen baro dan uroe-uroe khusus nyang laen mangat kamoe bri horeumat ubak tuhan allah kamoe. sabab, gobnyan ka geupeurintah mangat hainyan teutab teupeubuet keu siumu masa le ureueng-ureueng israel. ulon meuharab beujeuet baet tuhan nyang ulon peudong nyan na kheueh rumoh nyang paleng agong, sabab po teu allah kamoe jioh leubeh agong nibak ilah nyang toh mantong nyang na di ateuheh bumoe nyoe. teuma nyang seubeuna jih hana meusidroe ureueng pi nyang hase jipeudong baet keu po teu allah, sabab banmandum angkasa raya hana seb rayeuk jeuet keuteupat tinggai gobnyan. le sababnyan, baet tuhan nyang hase ulon peudong nyan paleng-paleng keu teupat ulon tot keumeunyan keu po teu allah! le sabab nyan, bah kheueh teungku amphon neukirem keu kamoe sidroe ureueng nyang carong jimeu-uke dan hase jipeugot meuh, pirak, peurunggu, beuso, dan meunan cit carong jipeugot ija ijo, ija ungu dan ija mirah. ureueng nyan teuma geumeukeureuja meusajan deungon ureueng seumeuget laen nibak ureueng yehuda dan yerusalem nyang ka geupilih le ureueng syiek ulon nabi daud. ulon teupeue bahwa ureueng nyang teubang kayee nibak nanggroe teungku amphon carong jikoh bak kayee, le sababnyan get that meunyo teungku neukirem keu ulon meubagoe rupa kayee ceumara dan kayee ceundana

nibak libanon. ulon teuma ulon krai h bubana ureueng lon mangat jijak tulong ureueng-ureueng teungku amphon, mangat awaknyan jipeusiab kayee nyang le that. sabab baet tuhan nyang keuneuk ulon peudong nyan haroh nyang raya dan hibat. keu beukai ureueng-ureueng teungku amphon nyan teuma ulon kirem ubak teungku amphon dua jeune h gandom, maseng-maseng na 2.000 ton, ie anggo maseng-maseng na 400.000 aree dan minyeuk zaiton na 400.000 aree." sibagoe beunalah surat nyang geukirem le raja nabi sulaiman nyan laju geubalah le raja hiram lageenyoe, "sabab tuhan geugaseh keu umat gobnyan, gobnyan ka geuangkat teungku po jeuet keuraja awaknyan. teupujoe kheueh tuhan po teu allah israel, nyang cepta langt ngon bumoe! tuhan ka geubri keu nabi daud sidroe aneuek nyang carong malem lom bijaksana, dan lhok ieleume, nyang jinoenyoe teungoh geu-useuha keuneuk geupeudong saboh baet tuhan dan saboh meuligoe keu atra droe gobnyan. meusajan deungon nyoe ulon kirem ubak teungku amphon sidroe ureueng teunaga ahli nyang carong ligat, nyang nan jih huram. ma ureueng nyoe nibak sukee dan, bapak jih ureueng tirus. ureueng nyoe carong jipeuget barang nibak meuh, pirak, peurunggu, beuso, batee dan kayee. meunan cit jih nyan carong jipeuget ija ijo, ija ungu dan ija mirah, meunan cit deungon ija lineun. peue mantong sinuke nyang teuculek hase geupeugot meunurot mode peue mantong nyang teupeugah. bah kheueh ureueng nyan teujok tugaih keu jimeukeureuja meusapat deungon ureueng-ureueng teungku po, dan deungon ureueng-ureueng nyang ka meubuet keu nabi daud ureueng syiek teungku po. jinoenyoe teungoh kamoe preh-preh neukirem bandua boh jeune h gandom, anggo dan minyeuk zaiton nyang ka teungku po peujanji nyan. teuma kamoe jakteubang kayee ceumara di gunong-gunong libanon sidub le nyang ka teungku po lakee, oh ltheuhnyan kayee nyang ka ltheueh teukoh nyan laju teuiat jeuet keuraket, dan teu peunyor lam laot sampoe trok u yope. disinan teungku po hase neu angkat u yerusalem." raja nabi sulaiman laju geupeuna seunsus ateueh ureueng aseng nyang na tinggai di nanggroo israel, lagee nyang ka ltheueh geupeuna le nabi daud ureueng syiek gobnyan. teunyata oh ltheueh geuseunsus na 153.600 droe ureueng aseng. tujuh plo h ribee droe nibak awaknyan laju geubri tugaih mangat jijak angkat bahan-bahan bangunan, 80.000 droe teubri tugaih keu jijak peut batee nibak gunong-gunong, dan 3.600 droe geubri tugaih mangat jeuet keumando nyang kawai ureueng meubuet nyan. nabi daud ka geucok keuputusan bahwa baet tuhan haroh geupeudong di yerusalem nibak gunong muria di teumpat teulo boh gandom atra arauna ureueng yebus. teupeudong baet tuhan nyan geupeuphon le raja nabi sulaiman bak buleuen nyang keu dua nibak thon nyang keu peuet bak watee peumeurintahan gobnyan. panyang rumoh nyan 27 metee dan luwah jih 9 metee. panyang kama keue santeut deungon luwah rumoh nyan, na kheueh 9 metee. manyang jih 54 metee. bagian dalam rumoh nyan teuseupoh deungon meuh aseuli. ruweueng nyang paleng phon

geuboh deungon papeuen ceumara nyang paleng get dan teulaeph teuma deungon meuh tuha. bak lapesan meuh nyan na teuma gamba nyang meu-uke deungon bak mamplang dan gamba rante. raja geuhias baet nyan deungon batee peumata nyang lagak-lagak dan deungon meuh nyang geupeusan di nanggroo parwaim. meunan cit meuh nyan geungui keu geulaeph binteh-binteh beuton baet tuhan nyan, balok-balok jih, ambang-ambang pintoe jih dan pintoe-pintoe jih. beuton-beuton nyan geu uke deungon gamba kerub. ruweueng dalam nyang geuboh nan ruweueng maha suci panyang jih na 9 metee dan luwah jih na teuma 9 metee, saban cit deungon luwah baet nyan. dua plo h thon meuh geungui keu teulaeph binteh beuton ruweueng maha suci nyan dan 570 gram meuh keu teupeuget labang. meunan cit deungon beuton kama-kama di bagian ateueh pih teulaeph deungon meuh. meunan cit le raja geuyue teuma ubak ureueng keureuja nyan mangat jipeugot dua boh patong kerub nibak logam. patong-patong nyan geulaeph cit deungon meuh dan geupasang sira geu ato meujandreg di ruweueng maha suci meuhadab ubak pintoe. tieb-tieb kerub nyan na teuma dua boh sayeueb, maseng-maseng panyang jih na 2,2 metee. sayeueb-sayeueb nyan meukeumang lagee nyan bagoe sampoe ujong nyang saboh sare tupeh di ruweueng teungoh dan ujong nyang laen tupeh teuma ubak binteh beuton di wie ngon uneuen. jadi, sayeueb-sayeueb nyan meureuntang na 9 metee sidub luwah ruweueng nyan. keu ruweueng maha suci nyan geupeuget teuma ija tutob peuradeuen nibak ija lineun dan ija nyang laen nyang meuwareuna ijo, ungu dan mirah. meunan cit ija gurdan nyan teuhiah deungon gamba-gamba kerub. raja geupeuget teuma dua boh tameh nyang maseng-maseng manyang jih na 15,5 metee, laju atra nyan geukeubah dikeue baet tuhan. tieb-tieb saboh tameh nyan na ulee tameh 2,2 metee. si u ateueh tameh-tameh nyan geuhiah teuma deungon hiasan nyang teupeuget nibak peurunggu, nyang saban deungon rante nyang teumanyum deungon 100 boh deulima. tameh-tameh nyan geupeudong nibak bineh wie ngon uneuen pintoe rot tamong u dalam baet tuhan; nyang di siblahi seulan geuboh nan yakin, dan nyang disiblahi utara geuboh nan boas. nabi sulaiman geuyue peugot teuma saboh miseubah peurunggu, nyang panyang ngon luwah jih maseng-maseng na 9 metee, dan manyang jih 4,5 metee. le gobnyan geupeugot teuma saboh bejana peurunggu nyang bulat meulngon, deungon ukoran jih na kheueh lagee nyoe: lhok jih 2,2 metee, gareh teungoh jih 4,4 metee, dan lingka jih 13,2 metee. ban sikeulileng bineh luwa jih teuhiah teuma deungon gamba leumo, nyang teucor meusajan-sajan deungon bejana nyan. bejana nyan geupeuduek di ateueh mandua boh rueng leumo peurunggu – lhee boh meuhadab utara, lhee boh meuhadab u seulan, lhee boh u barat, dan lhee boh u timu. teubai bejana nyan na 75 milimetee. bineh jih saban deungon bineh cangkik nyang meuleungkong uluwa saban that lagee bungong bakong nyang teungoh keumang. bejana nyan hase jiteun asoe jih kira-kira 60.000 aree. meunan cit le nabi sulaiman

geupeugot teuma 10 boh baskom raya, limong boh keu geukeubah disiblahi seulatan baet tuhan, dan limong boh teuk siblahi utara. baskom-baskom nyan guna jih keuteumpat rhah uengkot-uengkot sie nyang ka teukoih-koih nyang teuma teutot sibagoe keureubeuen. ie nyang jaga didalam beujana nyang raya nyan geuseudia keu teungku imeum nyang keuneuk rhah droe. meunan cit geupeugot 10 boh gaki panyot nibak meuh meunurot mode nyang ka teureuncana, dan 10 boh meuja. banmandum gaki panyot dan meuja nyan geukeubah di dalam rhueung utama lam baet tuhan – maseng-maseng limong boh disiblahi wie, dan limong teuma disiblahi ueneu jih. meunan cit geupeugot teuma na 100 boh mangkok meuh. meunan cit le nabi sulaiman geupeugot teuma saboh peulataran di dalam nyang geukeubah keu teungku-teungku imeum, dan saboh teuk peulataran luwa. on pintoe nibak geureubang-geureubang nibak bandua boh peulataran nyan teulaeph teuma deungon peurunggu. beujana geupeudeuk nibak sagoe teunggara baet tuhan. hura, nyang jeuet keu ulee banmandum tukang-tukang nyan, laju jipeugot kuali-kuali, sudok-sudok dan mangkok-mangkok. dan seulesoe kheueh geuhnyan geupeugot banmandum peuleungkapan baet tuhan nyang paih deungon janji geuh ubak nabi sulaiman. nyoe kheueh nan-nan peuleungkapan nyang ka jipeugot nyan: dua boh tameh raya dua boh ulee tameh nyang hijih lagee mangkok nyang teukeubah di ateuhe bandua boh tameh nyan meunanyuem rante bak tieb-tieb tameh 400 boh deulima peurunggu nyang teususun lam dua boh deret bansikeulileng meunanyuem rante nyang nibak tieb-tieb ulee tameh 10 boh geuritan 10 boh baskom raya beujana peurunggu boh leumo peurunggu nyang teutumpang nibak beujana nyan kuali-kuali, sudok-sudok dan gareupu-gareupu banmandum peuleungkapan nyan jipeugot le hura keu baet tuhan, teupeugot nibak peurunggu dan teugeusok sampoe meukilat. banmandum nyang jipeugot le hura nyan na kheueh saban deungon peurintah nabi sulaiman. nabi daud geuyue peugot barang-barang nyan nibak ureueng nyang buet jih bagian peuhanco logam lamkawan sukot dan zereda di panton yordan. barang-barang nyang geuyue peugot nyan lumpah that le, sampoe hana meusidro ureueng pih jiteupeue padub kilogram peurunggu nyang ka teupeuguna keunan. raja sulaiman geuyue peugot lom nyang laen peukakaih-peukakaih nibak meuh asuli keu baet tuhan. nyoe kheueh nan-nan peukakaih nyang geuyue peugot nyan: miseubah meuja keu teumpat ruti sajian banmandum gaki panyot deungon panyot jih nibak meuh tuha keu teupeuhu dikeue ruweueng maha suci, nyang paih deungon reuncana hiasan-hiasan nyang hijih lagee bungong panyot-panyot seupet-seupet alat keungon peugleh dah panyot cambong-cambong pireng-pireng keu teumpat keumeunyan pireng-pireng keu teumpat ngeue apui banmandum pintoe rot tamong u baet tuhan meunan cit deungon pintoe ruweueng maha suci teulaeph deungon meuh. oh ka ltheueh seulesoe geupeudeung baet tuhan nyan le nabi sulaiman, laju geukeubah didalam gudang-gudang baet tuhan nyan banmandum meuh, pirak dan

barang-barang nyang laen nyang ka geupeuseumah le nabi daud ureueng syiek gobnyan keu tuhan. oh ka seulesoe nyan le nabi sulaiman laju geuyue banmandum peumimpin sukee dan kawom nibak bansa israel mangat jimeusapat di yerusalem guna mangat teupinah peuto peujanjian tuhan di sion, banda nabi daud u baet tuhan. dan jijak kheueh awaknyan banmandum paih nibak uroe raya jambo on. oh ka meusapat banmandum peumimpin nyan, di ureueng-ureueng lewi laju geubeut peuto peujanjian tuhan nyan, dan laju geuba atranyan u baet tuhan. meunan cit deungon khimah tuhan dan banmandum peuleungkapan jih nyang na didalam nyan geuba banmandum u baet tuhan le teungku-teungku imeum dan ureueng lewi. raja nabi sulaiman dan mandum rakyat israel ka meusapat dikeue peuto peujanjian nyan laju jipeuseumah ubak tuhan bubiri dan leumo nyang hana hase teu itong le jih. oh ltheueh nyan le teungku-teungku imeum laju geupaso peuto peujanjian nyan u dalam baet tuhan dan jikeubah atra nyan di miyue patong kerub didalam ruweueng maha suci. sayeueb patong-patong nyan meureuntang sampoe teutob peuto nyan meunan cit deungon kayee-kayee geunulam nyan. kayee geunulam nyan panyang lagoena, sampoe ujong-ujong jih leumah teukalon nibak ruweueng maha suci, teuma hana deuh teukalon rot luwa. (sampoe nibak uroenyoe kayee-kayee nyan mantong na disinan.) didalam peuto peujanjian nyan hana sapeuepi seulan nyang na dua boh keupeng batee. batee-batee nyan ka geupeutamong keunan le nabi musa di gunung sinai. bak watee tuhan geupeugot peujanjian deungon bansa israel yoh watee awaknyan teuhong jijak nibak nangroe meuse u nangroe kanaan. banmandum teungku imeum nyang na disinan, nibak mandum keulompok, ka jipeusiab droe keu jijak ubak upacara nyan. meunan cit banmandum ureueng tukang meunanyoe dan nyang peumeu-en alat musik lam sukee lewi, na kheueh asaf, heman, yedutun dan banmandum anggota kawom awaknyan, ka jingui peukayan nibak ija lineun. ureueng-ureueng lewi nyan jidong nibak siblahi u timu miseubah sira jimat simbal dan keucapi. meusajan awaknyan na teuma 120 droe teungku imeum nyang ka siab geuyueb beureugih. ca-e-ca-e ngon nyanyoe le ureueng biduan sampoe melawok deungon su irengan musik teurumpet, simbal dan alat musik nyang laen. nyoe kheueh tutoe haba puja ngon pujoe nyang awaknyan peuca-e keu tuhan: "pujoe kheueh tuhan, sabab gobnyan get. gaseh gobnyan keukai abadi." bak watee teungku-teungku imeum geuteubiet lam baet tuhan nyan, hana teusangka-sangka baet nyan ka peunoh deungon cahya teuka tuhan, sampoe awaknyan ka hana jeuet le jipeubuet upacara ibadah. nabi sulaiman geumeudoa, "ya tuhan, droeneueh leubeh galak neutinggai didalam awan nyang seupot. jinoo ulon peudong keu droeneueh geudong nyang meugah, keu teumpat tinggai droeneueh siumu masa." oh ltheueh geumeudoa, nabi sulaiman laju geupaleng ubak rakyat nyang teudong disinan, dan laju geulakee beureukat allah keu awaknyan. geupeugah le nabi sulaiman dalam munajab gobnyan ubak allah, "yoh masa illee tuhan ka neumeujanji ubak

ureueng syiek ulon nabi daud lagee nyoe, 'yoh phon that ulon peuteubiet umat ulon di nanggroe meuse sampoe nibak uroenyoe, di nanggroe israel hana meusaboh banda pih nyang ulon pileh keu jeuet keu teumpat teupeudong saboh rumoh iebadat keu ulon, dan hana meusidroe pi nyang ulon pileh mangat jeuet keupeumimpin umat ulon israel. teuma jinoenyoe ulon pileh yerusalem sibagoe teumpat iebadat keu ulon. dan gata hai nabi daud, ulon pileh mangat tapeurintah umat ulon.' teupujoe kheueh po teu allah israel nyang ka geupeuteupat janji geuh nyan!" ltheuhnyan geupeugah lom le nabi sulaiman, "ureueng syiek ulon nabi daud ka geureuncana keuneuk geupeudong saboh rumoh iebadat ubak tuhan allah israel. teuma tuhan geupeugah ubak gobnyan, 'meukeusut gata nyan jroh that. teuma, kon gata, aneuek gata kheueh nyang peudong baet ulon nyan.' jinoenyoe tuhan ka geupeutrok janji geuh. ulon ka jeuet keuraja israel keugeunantoe ureueng syiek ulon, dan meunan cit di ulon ka teuma ulon peudong rumoh keu teumpat iebadat ubak tuhan, allah israel. di dalam baet tuhan nyan ulon keubah teumpat keu peuto peujanjian nyang asoe jih batee peujanjian tuhan deungon umat israel." nabi sulaiman ka geupeugot panggong peurunggu di teungoh-teungoh baet tuhan. panyang ngon luwah jih na 2,2 metee, dan manyang jih na 1,3 metee. dikeue rakyat nyang teuka keunan, nabi sulaiman laju geu-ek u ateuheh panggong nyan, dan geudong geumeuhadab ubak miseubah. banmandum ureueng nyang na disinan deuh jikalon. laju gobnyan geumeu teuot, oh ltheueh nyan geubeuot ban dua blaih jaroe geuh sira geuleueng u langet laju geumeu doa, "tuhan, po teu allah israel! dilanget meunan cit di ateuheh bumoe nyoe hana nyang hase lagee droeneueh ya tuhan! droeneueh ka neupeutrok janji droeneueh deungon cara ka neutinyok geunaseh droeneueh keu umat droeneueh nyang seutia lom taat deungon sipeunoh ate keu droeneueh. droeneueh ka neupeutrok janji droeneueh ubak ureueng syiek ulon nabi daud. peue nyang ka tuhan peujanjian ka tuhan peubuet nibak uroenyoe. meunan cit tuhan ka neumeujanji ubak ureueng syiek ulon bahwa meunyo keuturonan gobnyan bit-bit taat ubak hukom droeneueh lagee gobnyan, teuma keu siumu masa sidroe lamkawan keuturonan gobnyan jimat peurintah lagee raja di israel. jinoenyoe, ya tuhan po teu allah israel, neupeutrok kheueh laju banmandum janji nyang ka tuhan peujanji ubak bapak ulon nabi daud, hamba droeneueh nyan. teuma, ya po teu allah, peu kheueh beutoi-beutoi tuhan neutem tinggai di ateuheh bumoe nyoe di lamkawan manusia? meunyo tacok langet banmandum pih hana seub luwah keuteumpat droeneueh, peue teuk lom deungon rumoh iebadat nyang ulon peudong nyoe! ya tuhan, allah ulon, ulon hamba droeneueh! teuma, neudeungoe kheueh doa ulon, dan neupeukabui kheueh peue nyang ulon lakee. seumoga uroe ngon malam tuhan neulindong baet nyoe nyang ka tuhan pileh sibagoe teumpat iebadat keu droeneueh. seumoga teuma nibak teumpat tinggai tuhan di syeuruga tuhan neudeungoe dan neupeu amphon ulon meunan cit desya umat droeneueh israel, pajan mantong kamoe

meuhadab ubak baet nyoe dan kamoe meudoa ubak droeneueh. meunyo na sidroe ureueng jitudoh meusalah ateuheh ureueng laen dan laju jiba ubak miseubah droeneueh didalam baet droeneueh nyoe keu jimeusumpah bahwa jihnyan hana meusalah, ya tuhan bah kheueh tuhan neudeungoe doa kamoe nyoe lam syeuruga dan neupeuputoh peukara hamba-hamba droeneueh nyoe. neu hukom kheueh nyang meusalah dan neupeubeubaih kheueh nyang hana meusalah. meunyo umat droeneueh israel jipeutaloe le musoh-musoh jih sabab awaknyan meudesya, laju jihnyan meunyeusai dan jihoreumat lom droeneueh sibagoe tuhan, oh ltheuhnyan jijak ubak baet droeneueh nyoe sira jimeudoa jilakee amphon ubak droeneueh, seumoga tuhan nyang na lam syeuruga neudeungoe awaknyan. seumoga tuhan neupeu amphon teuma banmandum desya umat droeneueh nyoe, dan neupeuwoe awaknyan u nanggroe nyang ka tuhan bri keu awaknyan dan keu indatu awaknyan. meunyo umat droeneueh meudesya ubak droeneueh dan neuhukom awaknyan deungon hana neupeutron ujeuen, laju awaknyan meunyeusai ngon jimeutobat ubak droeneueh sira jihoreumat droeneueh sibagoe tuhan, oh ltheuhnyan jijak meuhadab u baet droeneueh nyoe dan jimeudoa ubak droeneueh, ya tuhan di syeuruga, neudeungoe kheueh awaknyan. dan neupeu amphon kheueh desya-desya hamba-hamba droeneueh umat israel. neupeuruno kheueh awaknyan mangat jipeubuet nyang beuna. oh ltheuhnyan, ya tuhan, neupeutron kheueh ujeuen u nanggroe droeneueh nyoe, nanggroe nyang ka tuhan bri keu umat droeneueh nyang ka jeuet keuhak milek jih keu siumu masa. meunyo nanggroe nyoe teuka musem deuk atawa bala nyang parah that, atawa bubena seunaman jipeurusak le angen seu-uem, hama atawa seurangga daruet, atawa meunyo umat droeneueh jiprang le musoh, atawa jiseurang le peunyakot, seumoga tuhan neudeungoe doa awaknyan. meunyo nibak umat droeneueh israel na nyang seudeh ate jimeudoa ubak droeneueh sira jileueng paleuet jaroe u langet jimeuhadab ubak baet droeneueh nyoe, bah kheueh tuhan nyang na lam syeuruga neudeungoe dan neupeu amphon awaknyan. teuma droeneueh kheueh nyang teupeue peue asoe ate manusia. sabab nyan neupeusaneut kheueh soemantong ureueng nyan nyang sadub deungon buet jih, mangat umat droeneueh jitaat dan jitakot keu droeneueh pajan mantong simantong awaknyan tinggai di nanggroe nyang ka tuhan jok keu indatu kamoe. meunyo ureueng aseng nyang deungoe keuhai keu agongan dan teunaga droeneueh, dan bahwa droeneueh sabe lam siab keu neutulong, laju jihnyan jijak ubak baet droeneueh nyoe keu jijak meudoa ubak droeneueh, seumoga tuhan nibak teumpat droeneueh di syeuruga neudeungoe doa awaknyan dan neupeutrok peue nyang jilakee. deungon na lageenyan banmandum bansa nyang na di ateuheh donya jituri droeneueh dan jitaat ubak droeneueh lagee umat droeneueh israel. awaknyan teuma jiteupeue bahwa rumoh nyang ulon peudong nyoe kheueh teumpat keujih iebadat ubak droeneueh. meunyo tuhan neubri peurintah keu umat droeneueh jijak muprang jak

lawan musoh, dan dipat mantong kheueh awaknyan na, awaknyan jimeuhadab ubak banda yang ka tuhan pileh nyoe dan jimeudoa sira meuhadab keue baet nyoe yang ka ulon peudong keu droeneueh, seumoga droeneueh yang na didalam syeuruga neudeungoe doa awaknyan, dan neupeumeunang keu awaknyan. meunyoie umat droeneueh jipeubuet desya ateueh droeneueh – yang sikeubit jih hana meusidroie manusia pih yang hana meudesya – dan sabab beungeh droeneueh neupeubiyeu mantong awaknyan jipeutaloie le musoh dan laju jiba sibagoe tawanan ubak saboh nanggroe yang jioh atawa to, seumoga tuhan neudeungoe doa awaknyan. meunyoie nibak nanggroe nyan awaknyan jitinggai desya-desya jih, dan jimeudoa ubak droeneueh sira jimeungkaku bahwa droe jih nyan ka jipeubuet desya dan buet yang jeuhet, neudeungoe kheueh doa awaknyan, ya tuhan. meunyoie di nanggroe nyan awaknyan deungon ikhlas dan juoe ka jitinggai desya-desya droe jih, dan jimeudoa ubak droeneueh sira jimeuhadab u nanggroe nyoe yang ka tuhan bri keu indatu kamoe, u arah banda yang ka tuhan pileh dan u rumoh iebadat yang ka ulon peudong keu droeneueh nyoe, teuma nibak lam syeuruga di teumpat tuhan tinggai bah kheueh tuhan deungoe doa-doa awaknyan dan neugaseh keu awaknyan. neupeu amphon kheueh bubena desya umat droeneueh. jinoenyoe, ya allah ulon, neungieng kheueh kamoe dan neudeungoe kheueh doa yang jipeusampoe ubak droeneueh nibak teumpat nyoe. neubeudoh kheueh jinoenyoe, ya tuhan po teu allah! dan meusajan deungon peuto peujanjian yang teulambang sibagoe kuasa droeneueh nyan bah kheueh tuhan neutamong u dalam baet droeneueh nyoe dan neutinggai kheueh disinoe keu siumu masa. neubri kheueh beureukat keumandum buet teungku-teungku imeum droeneueh, dan seumoga banmandum umat droeneueh mubaghia kareuna droeneueh jroh that keu awaknyan. tuhan, po teu allah kamoe, bek kheueh neutulak raja yang ka tuhan pileh nyoe. neutingat kheueh keugeunaseh droeneueh yang ka tuhan bri keu hamba droeneueh nabi daud." oh ka ltheueh geumeudoa le nabi sulaiman, laju tuhan geupeuteron apui di langet jijak pajoh mandum keureubeuen yang teupeuseumah keu gobnyan. dan bak watee nyan cit teuma cahya tanda tuhan ka teuka hu trang muble-ble lam baet tuhan nyan, le sabab nyan teuma bubena teungku imeum hana hase jitamong keunan. bak watee ureueng israel leumah jikalon apui hu jitron nibak langet dan cahya tanda ka teuka tuhan ka hu trang didalam baet tuhan nyan, awaknyan banmandum teudugom ateueh aleue laju jiseumah dan jipujo allah, sabab gobnyan jroh dan geunaseh gobnyan keukai dan abadi. oh ltheueh nyan le nabi sulaiman dan banmandum ureueng yang na meumeusapat disinan jipeuseumah laju keureubeuen ubak tuhan. keu keureubeuen yang teutot nabi sulaiman geupeuseumah na 22.000 boh leumo dan 120.000 boh bubiri. meunan kheueh cara jih raja dan banmandum rakyat jipeuna upacara keu teuseurah rumoh iebadat nyan ubak tuhan. bubena teungku imeum geuyue dong nibak teumpat yang ka teupeuteuntee keu awaknyan; meuhadab keue

deungon ureueng lewi yang teungoh jipujo tuhan deungon alat-alat musik yang ka ltheueh geupeugot le raja nabi daud, sira jimeunyanyoe deungon lagu "geunaseh gobnyan keukai abadi!" yang saban lagee yang ka geuyue le nabi daud. le mandum teungku imeum geuyueh beureuguih seudangkan bubena rakyat jidong meureuti. dan oh ltheuehnyan laju geuseurah le nabi sulaiman ubak tuhan bagian teungoh peulataran yang na di rumoh iebadatnyan. oh ltheuehnyan gobnyan geupeuseumah disinan keureubeuen yang teutot, keureubeuen gandom dan gapah beulatang keu keureubeuen peudame. banmandum nyan jipeuseumah disinan sabab miseubah peurunggu yang ka ltheueh teupeugot ubit that-that keu banmandum peuseumahan nyan. nabi sulaiman dan banmandum rakyat israel laju jipeuna peurayaan jambo on yang treb jih na tujoh uroe. get that jai ureueng yang meusapat watee peurayaan nyan. awaknyan teuka nibak daerah yang jioh di jalan hamat di utara sampoe ubak bataih nanggroe meuse di seulatan. tujoh uroe treb jih awaknyan meusapat nibak peureusman miseubah tuhan, oh ltheuehnyan na tujoh uroe teuk teuma keu peurayaan jambo on. nibak uroe yang keuneultheueh geupeuna teuma peurayaan peunutob, dan oh singoh beungoh nyan, bak tanggai 23 beleuen yang keutujoh, nabi sulaiman laju geuyuewoe bubena ureueng yang teuka keunan. awaknyan that-that galak ngon mangat ate ateueh banmandum yang jroh yang ka jipeubuet le tuhan ubak bansa israel umat gobnyan, ubak nabi daud dan ubak nabi sulaiman. oh ltheueh seulesoe geupeudong baet tuhan ngon meuligoe le nabi sulaiman, le tuhan geupeuleumah droe lom ubak gobnyan nibak watee malam. geupeugah le tuhan ubak gobnyan, "doa gata ka ulon deungoe dan ka teuma ulon teurimong baet yang gata peudong nyoe sibagoe teumpat teupeuseumah keureubeuen yang khusus keu ulon. meunyoie le ulon hana ulon peutron ujeuen dan lon kirem daruet keu jijak pajoh hase bumoe sampoe habeh dan ulon peuteuka bala peunyaket ateueh umat ulon, laju umat ulon yang jingui nan ulon nyan jipeumiyueb droe, dan jimeudoa lom jiteuka ubak ulon keu jitinggai buet jih yang jeuhet, teuma ulon yang na tinggai di syeuruga ulon deungoe doa awaknyan. ulon teuma lon peuamphon duma desya awaknyan dan ulon peujeuet nanggroe awaknyan makmu lom teuma. ulon teutab ulon kalon baet ulon nyoe dan siab ulon deungoe banmandum doa yang jilakee nibak teumpat nyoe. banmandum nyan ulon peubuet sabab teumpat nyoe ka ulon pileh dan ulon peukhusus jeuet keuteumpat iebadat keu ulon keu siumu masa. meunan cit ulon teuma lon kalon dan ulon lindong nyan siumu masa. meunyoie gata, lagee nabi daud ureueng syiek gata, udeb meunurot kheun ulon dan taat ubak hukum-hukum ulon dan tapeubuet banmandum yang ulon peurintah bak gata, ulon teuma ulon peuteupat janji ulon nibak ureueng syiek gata nabi daud bahwa sabe na sidroe aneuek nibak keuturonan jihnyan yang jeuet keuraja di nanggroe israel. teuma meunyoie gata dan rakyat gata ji-iengkeue keu hukum-hukum dan peurintah ulon, dan jiseumah ubak ilah-ilah yang

laen, ulon teuma lon peuteubit gata nibak nanggroe nyang ka ulon bri keu gata. meunan cit ulon teuma lon tinggai baet nyoe nyang ka ulon peuteutab sibagoe baet iebadat keu ulon. dipat mantong rumoh nyoe teuma jihina le gob dan jipeukem. baet iebadat nyoe bak saatnyoe keubit that jihoreumat, teuma bak watee nyan soemantong ureueng nyang na jijak rot nyan hireuen jikalon nyan. awaknyan jipeugah, 'pakon tuhan geupeujeuet lageenyan ateuh nanggroe dan rumoh nyoe?' laju le ureueng nyang keunong tanyong nyan teuma jijaweueb, 'sabab awaknyan ka jitinggai tuhan, po teu allah awaknyan, nyang ka geuintat indatu awaknyan jitinggai ngon jiteubiet nibak nanggroe meuse. awaknyan ka jiseumah dan meujanji seutia ubak ilah-ilah nyang laen. nyang kheueh sabab jih tuhan geupeutron bala nyoe ateuh awaknyan.' " nabi sulaiman geupeudong baet tuhan dan meuligoe raja nyan lam tempo 20 thon. banda-banda nyang ka jikok le raja hiram keu gobnyan geupeudong keula-i, dan geuyue tinggai laju ureueng israel disinan. dan geureubot teuma daerah hamat dan zoba dan geupeukong banda daetmor di padang pasi, dan laju geupeudong lom banmandum pusat peubeukalan di hamat. banda bet-horon-ateuh dan bet-horon-miyueb geupeudong keula-i jeuet keubanda nyang meukuta deungon pintoe geureubang nyang meupalang pintoe. meunan cit geupeudong lom teuma banda baalat, dan banmandum banda peubeukalan, dan banda-banda pangkal geuritan prang sigoguih deungon guda jih. banmandum reuncana teupeudong nyan di yerusalem, libanon dan banmandum wilayah keukuasaan gobnyan ka geupeubuet banmandum. banmandum keuturonan bansa kanaan nyang hana jiteume poh mate le bansa israel bak watee awaknyan jijakduek nibak banda nyan, banmandum ureueng nyan geukirah le nabi sulaiman keu geuyue keureuja paksa. awaknyan na kheueh ureueng het, amori, feris, hewi dan yebus. sampoe nibak uroenye keuturonan awaknyan jeuet keunamiet. ureueng israel hana geuyue keureuja paksa; awaknyan geubri tugaih sibagoe sipa-i, peuwira, keumeundan geuritan prang, dan sipa-i pasokan meuguda. dua reutoih limong ploh droe peugawee geujok tugaih tanggong jaweueb ateuh ureueng-ureueng nyang keureuja paksa lam meubagoe proyek peumbangunan. nabi sulaiman laju geupinah peurumoh geuh, na kheueh putro raja nibak nanggroe meuse, nibak banda nabi daud u rumoh nyang ka geupeudong keu gobnyan. sabab nabi sulaiman geupike lagee nyoe, "ureueng binoe ulon hana jeuet jitinggai nibak meuligoe nabi daud, raja israel, sabab nibak teumpat peuto peujanjian tuhan nyang ka ltheueh teukeubah na kheueh teumpat suci." nabi sulaiman geupeuseumah keureubeuen yang teutot ubak tuhan di ateuh miseubah nyang ka ltheueh geupeudong dikeue baet tuhan. keureubeuen-keureubeuen nyan geupeuseumah meunurot hukum nabi musa keu tieb-tieb uroe raya: uroe sabat, uroe raya buleuen baro, dan ban lhee boh uroe raya thon meuthon, na kheueh uroe raya ruti nyang hana meurago, uroe raya musem seumopot, dan uroe raya jambo on. paih lagee peuratoran-peuratoran nyang ka geupeugot

le nabi daud ureueng syiek gobnyan, nabi sulaiman laju geu ato tugaih-tugaih tieb uroe keu mandum teungku imeum dan keu ureueng lewi nyang haroh jimeuca-e ngon meurateb puja dan pujoe keu tuhan jibantu le mandum teungku imeum lam hai teupeubuet upacara-upacara iebadat. meunan cit deungon mandum ureueng nyang kawai baet tuhan geubagi laju meureugu-reugu keu tieb-tieb pintoe geureubang, nyang sisuai lagee nyang ka geutunyok le nabi daud hamba allah nyan. banmandum peutunyok nabi daud ubak teungku imeum dan ureueng lewi keuhai gudang-gudang dan hai-hai nyang laen, banmandum nyan jiseutot jisimak deungon get that. deungon nyan teuma seulesoeo kheueh proyek peumbangunan nyang ka geureuncana le nabi sulaiman. banmandum buet nyan, phon nibak teukeubah keunaleueng sampoe seulesoeo teupeudong baet tuhan, ka jikeureuja deungon jroh that. oh ka ltheueh nyan nabi sulaiman laju geujak u ezion-geber dan u elot, banda-banda peulabuhan nyang na di lhok akaba di nanggroe edom. raja hiram laju jikirem keu gobnyan kapai-kapai nyang jipeulayeue le aneuek buah hiram keudroe meusigoe deungon aneuek kapai nyang ka meupeungalaman. awaknyan jimeulayeue u nanggroe ofir meusajan deungon aneuek buah nabi sulaiman dan jicok disideh na 15.000 kilogram meuh laju atranyan jiba ubak nabi sulaiman. na sidroe ratu nibak nanggroe syeba, ratu nyan geudeungoe keuhai keumeugahan dan meusyeyuh nabi sulaiman. le sababnyan ratu nyan laju geujak u yerusalem keuneuk jak ujo nabi sulaiman nyan deungon cara geuseueue nyang lumpah payah-payah. gobnyan teuka deungon nameupadubdroe ureueng patot-patot meunan cit ureueng nyang ireng dan unta nyang peunoh teupeudieng deungon reumpah-reumpah, batee peumata dan le that-that lom meuh meutahta. bak watee ka meurmpok deungon nabi sulaiman, ratu nyan laju geutanyong ngon sira geuseueue eue nyang hase geupike. banmandum nyang geutanyong nyan hase geujaweueb le nabi sulaiman, hana meusaboh pi nyang tuwoe le gobnyan. ratunyan ka deuh geungieng keudroe ngon mata ulee geuh pakriban bijaksana jih nabi sulaiman nyan. meunan cit gobnyan geukalon meuligoe nyang geupeudong le nabi sulaiman, cara meukeureuja nyang jipeubuet le peugawee-peugawee gobnyan nyang meutugaih nibak meuligoe, dan peukayan seuragam dan rumoh-rumoh awaknyan. meunan cit ratu nyan geungieng cara ureueng peuhidang peunajoh, dan peukayan peulayan nyang peutimang ureueng khanuri; meunan cit geungieng teuma keureubeuen-keureubeuen nyang geupeuseumah le nabi sulaiman di baet tuhan. banmandum nyang ka geungieng le ratu nibak nanggroe syeba nyan teuhireuen-hireuen ngon tahe mante. dan geupeugah kheueh le ratu nyan ubak nabi sulaiman, "peue mantong nyang ka ulon deungoe di tanoh ie ulon keuhai teungku amphon dan keubijaksanaan teungku amphon, keubit beutoi that! yoh masa ilee hana lom ulon pateh, teuma oh ka ltheueh ulon teuka dan lon ngieng ngon mata ulee lon keudroe baro kheueh lon pateh. nyang sikeubit jih peue mantong nyang ka ulon deungoe

nyan hana meusiteungoh pih nibak peue nyang ka ulon ngieng bak saat nyoe. deuh that keubijaksanaan dan keukayaan teungku amphon jioh leubeh rayeuk nibak peue nyang ka jipeugah bak ulon. keubit mubahgia that peugawee-peugawee nyang jipeutimang teungku amphon dan sabe jimeukeureuja keu teungku amphon sampoe hase jideungoe nibak teungku amphon keudroe banmandum ajaran nyang bijaksana! teupujoe kheueh tuhan, allah teungku amphon! teupujoe kheueh tuhan, po teu allah amphon! deungon teubait jih teungku amphon jeuet keuraja neumat peurintah atueh gobnyan, gobnyan ka geutunyok padubna galak jih gobnyan keu teungku amphon. sabab gobnyan geugaseh keu umat israel nyang harab mangat umat geuh nyan teutab na, teuma gobnyan ka geuangkat teungku amphon jeuet keuraja awaknyan, mangat teungku amphon hase neupeudong hukum dan keuadalan." oh ltheuehnyan ratu nanggroe syeba nyan geupeujaroe ubak nabi sulaiman peue mantong hadiah nyang ka geuba, na kheueh leubeh nibak 4.000 kilogram meuh dan lam jeumeulah nyang le batee peumata meunan cit deungon reumpah-reumpah. hana nyang ka-ka na le nabi sulaiman geuteurimong reumpah-reumpah nyang meunan get mutu jih lagee nyang ka geubri le ratu nibak nanggroe syeba nyan keu gobnyan. (aneuk buah raja hiram dan aneuk buah nabi sulaiman nyang ba meuh nibak ofir keu nabi sulaiman, na cit jiba sajan batee peumata dan kayee ceundana. kayee nyan geupeuguna le nabi sulaiman keu teupeugot reunyean di baet tuhan dan meuligoe gobnyan, dan meunan cit kayee nyan geupeuguna keu teupeugot keucapi dan gambus keu ureueng nyang meuca-e. gohlom na nyang ka-ka nyang lageenyan bagoe di nanggroe yehuda.) seulaen hadiah-hadiah balasan nyang geubri le nabi sulaiman, nabi sulaiman geubri cit ubak ratu nibak nanggroe syeba nyan peue mantong nyang geulakee. oh ltheueh nyan geuwu kheueh ratu nyan u nanggroe gobnyan meusajan deungon bubena ureueng nyang jak ngon gobnyan. tieb-tieb thon nabi sulaiman sabe geuteurimong rab na 23.000 kilogram meuh, gohlom teuitong bubena cukée nibak mandum saudaga dan ureueng meukat. meunan cit le raja-raja arab dan gubunur israel na cit geubri meuh dan pirak keu gobnyan. nabi sulaiman na geupeugot 200 boh peurisai nyang raya nibak meuh nyang teuteumpah. meuh nyan geubalot nibak tieb-tieb peurisai nyan na 7 kilogram. meunan cit gobnyan geupeugot teuma na 300 boh peurisai meuh nyang leubeh ubit. meuh nyan geuboh nibak tieb-tieb peurisai ubit nyan na leubeh kureueng 3 kilogram, banmandum nyan nibak meuh nyang teuteumpah. peurisai-peurisai nyan geukeubah nibak balee nyang geuboh nan balee uteuen libanon. meunan cit le nabi sulaiman na teuma geupeugot saboh keurusi keurajeuen nyang raya nyang teupeugot nibak gadeng dan teuhias deungon meuh aseuli. keurusi nyan na meujaroe dan nibak tieb-tieb siblahi nyan na teuma patong singa. dan keurusi nyan na teuma nam aneuk reunyeun, dan saboh teupat gaki nyang teuseupoh deungon meuh. teupat peuduek gaki nyan teuseusaboh deungon keurusi jih. nibak tieb-tieb ujung wie

ngon ujung uneuen tieb aneuk reunyeun keurusi nyan na patong singa – banmandum nyan na 12 boh. hana keurusi nyang lagee nyan bagoe nibak keurajeuen toh mantong. banmandum peukakaih ngon jieb ie nabi sulaiman teupeugot nibak meuh, dan banmandum peukakaih nyang na nibak balee uteuen libanon nyan pih teupeugot nibak meuh aseuli. bak jamen nabi sulaiman, pirak nyan hana yuem. nabi sulaiman na teuma kapai raya nyang le nyang hase jimeulayeu didalam laot raya meusapat deungon kapai-kapai raja hiram. lhee thon sigo kapai nyan jiwo sira jiba meuh, pirak, gadeng, bukreeh dan cicem meurak. nabi raja sulaiman nyan leubeh kaya dan leubeh bijaksana nibak raja toh mantong nyang na di atueh donya. banmandum ureueng jiusuaha jijak peuto ubak nabi sulaiman keu jijak deungoe ajaran bijaksana nyang geubri le po teu allah ubak gobnyan. awaknyan maseng-maseng jiteuka keu jijak jok hadiah ubak nabi sulaiman. nyang jijak le awaknyan na barang-barang meuh, pirak, peukayan, sinjata, reumpah-reumpah, guda dan bagal. meunan kheueh nibak thon meugantoe thon. meunan cit di nabi sulaiman na teuma 4.000 boh weue guda dan geuritan gobnyan. guda prang gobnyan na 12.000 boh. siladum nibak nyan geukeubah di yerusalem, dan siladum teuk nibak meubagoe banda pangkalan keu geuritan-geuritan prang gobnyan. gobnyan geumat kuasa atueh banmandum wilayah geuh nyang meulinteung phon nibak krueng efrat sampoe u nanggroe filistin dan ubak bataih nanggroe meuse. nibak jamen keurajeuen nabi sulaiman, pirak nyan na kheueh barang biasa mantong di yerusalem, saban lagee aneuk batee, dan kayee ceumara libanon lumpah that le saban lagee kayee ara biasa. le nabi sulaiman geupeutamong teuma guda di nanggroe meuse dan nibak tieb-tieb nanggroe laen. kisah nyang laen keuhai nabi sulaiman phon nibak awai sampoe akhe ka teucetet lam kitab riwayat nabi natan dan lam kitab nubuatan ahia ureueng silo, dan lam kitab wahyu nabi ido, nyan na cit teutuleh kisah keurajeuen yerobeam raja israel. na peuet ploth thon jieb jih nabi sulaiman geumat keurajeuen di yerusalem atueh banmandum nanggroe israel. oh ltheuehnyan gobnyan meuninggai donya dan teupeukubu laju nibak lampoh jrat banda nabi daud. le rehabeam aneuk gobnyan nyang agam teubait jeuet keuraja keugeunantoe gobnyan. rehabeam jijak u sikhem kareuna banmandum rakyat israel ka meugumpoi disinan keuneuk jak bak teupat lantek gobnyan jeuet keuraja. bak wateenyan yerobeam aneuk nebat mantong na tinggai di meuse sabab jipeuplueng droe nibak nabi sulaiman. bak watee geuhnyan geudeungoe haba keuhai rehabeam, gobnyan laju geugisa u israel. rakyat nyang na di bagian utara jiundang yerobeam, deungon awaknyan meusigoe-sigoe jijak meuhadab ubak rehabeam. kheun awaknyan, "nabi sulaiman ureueng syiek teungku amphon ka geupeubeuban nyang lumpah brat u atueh kamoe. meunyoe teungku amphon neupeuphui beuban kamoe dan neupeukureueng deurita kamoe, kamoe teuma tundok ubak teungku amphon." geujaweub le rehabeam, "ulon haroh lon pike leubeh ilee. gata jak kheueh keunoe lom leubeh

kureueng lhee uroe teuk." dan geujak kheueh bubana ureueng nyan. laju rehabeam geulakee naseuh at ubak ureueng-ureueng patot atawa ureueng-ureueng syiek nyang ka lheeuh jeuet keupeunaseuh at nabi sulaiman ureueng syiek gobnyan. "peue nyang haroh ulon jaweueb keu awaknyan?" geutanyong le rehabeam. "peue naseuh at gata nyoe?" jijaweueb le awaknyan, "meunyo teungku amphon keuneuk peubuet nyang jroh keu rakyat, dan neupeugalak ate awaknyan, tabri kheueh jeunaweueb nyang jroh teuma ubak awaknyan, awaknyan teuma seutia ubak teungku amphon sampoe an siumu masa." teuma peue nyang ka geunaseuh at le ureueng tuha nyan hana geupakoe le rehabeam. seubalek jih, gobnyan laju geujak mita ureueng aneuek-aneuek muda nyang santeut umu deungon gobnyan dan nyang saat nyan ka jeuet keupeumbantu gobnyan. ubak awak nyang muda nyan gobnyan geutanyong, "peue naseuh at gatanoyoe keu ulon mangat ulon jaweueb rakyat nyang jilakee mangat ulon peuphui beuban awaknyan?" jijaweueb le aneuek muda-muda nyan, "meunoe kheueh heundak jih teungku amphon peugah ubak awaknyan, 'sileumoh-leumoh jih ulon, ulon mantong leubeh teuga nibak ayah lon. ureueng syiek ulon ka geubri beuban nyang brat atueh gata, teuma le ulon teuma ulon bri teuma nyang leubeh brat keu gata. gobnyan geuseunuet gata deungon peunyunuet, teuma ulon seunuet gata ngon peunyunuet nyang meuduro beuso!" lhee uroe oh lheeuhnyan yerobeam dan banmandum ureueng nyan jijak lom teuma ubak raja rehabeam, lagee nyang ka lheeuh geupeurintah le gobnyan. meutulak likot deungon naseuh at ureueng-ureueng syiek, rakyat nyang teuka ubak gobnyan nyan, laju jisapa deungon cara gasa. paih deungon naseuh at ureueng-ureueng muda nyan, gobnyan geupeugah lom, "ureueng syiek ulon geubri ubak gata beuban nyang brat, teuma ulon kupeujeuet beuban nyan nyang leubeh brat nibak ban nyang ka. gobnyan geuseunuet gata deungon peunyunuet, teuma ulon lon seunuet gata deungon peunyunuet nyang meuduro beuso!" peue nyang ka jilakee le rakyat nyan hana jipeureumeuen. teuma banmandum nyan na kheueh keuheundak tuhan po teu allah. peue nyang ka lheeuh geupeugah le tuhan meulalu nabi ahia nibak silo keuhai yerobeam aneuek nebat haroh teujadi. bak watee rakyat israel jikalon bahwa raja hana geutem deungoe awaknyan, awaknyan laju jikuk, "hana kupakoe keu nabi daud dan keuturonan geuh nyan! awaknyan hantom na jipeubuet sapeue keuk geutanyoe. hai rakyat israel, jak geutanyoe tajak woe! bah kheueh disinan rehabeam ji uroi h droe jih keudroe!" dan jijakwoe kheueh rakyat israel u rumah droe jih maseng-maseng, dan rehabeam jeuet keuraja na kheueh atueh wilayah yehuda. bahpi meunan raja rehabeam mantong cit geuyue adoniram, sidroe ureueng nyang jeuet keu mando nibak keureuja rodi, keu jijak peuteunang rakyat. teuma le rakyat jigeulawa gobnyan ngon aneuk batee sampoe mate. rehabeam keudroe hase jipeuleuh seuhingga bagaih-bagaih geujak ek u atueh geuritan gobnyan, dan geupeuplueng droe u yerusalem. phon nibak saat nyan rakyat dibagian utara keu-

rajeuen israel sabe jibeurontak teuhadab raja-raja keuturonan nabi daud. bak watee raja rehabeam ka trok u yerusalem, gobnyan laju geupeusapat 180.000 droe tantra nyang paleng jroh nibak sukee yehuda dan benyamin keu jijak prang ureueng israel dan jipeupuleh keukuasaan jih atueh sukee-sukee dibagian utara israel. teuma tuhan geuyue jak nabi semaya mangat geujak peusampoe peusan nyoe ubak rehabeam dan ubak mandum ureueng nyang na didalam sukee yehuda dan sukee benyamin, "bek gatatem muprang deungon syedara gata ureueng israel. jakwoe kheueh laju! peue nyang ka teujadi nyan na kheueh keuheundak ulon." le sababnyan awaknyan banmandum jituot peurintah tuhan dan hana jeuet jijak muprang deungon yerobeam. rehabeam tinggai di yerusalem dan geuyue laju ubak ureueng laen jijak peudong kuta-kuta keu banda-banda nyang na diwilayah yehuda dan benyamin, banda-banda nyan na kheueh: banda betlehem, etam, tekoa, bet-zur, sokho, adulam, gat, mares, zif, adoraim, lakhis, azeka, zora, ayalon dan hebron. gobnyan laju geupeukong banda-banda nyang ka meupageue ngon kuta nyan dan laju geujok tugaih sidroe ulee balang pasokan nibak tieb-tieb banda nyan. maseng-maseng banda nyan ka teuma geupeuleungkab deungon peunajoh nyang seb, minyeuk zaiton dan ie anggo meunan cit peurisasi dan kapak. deungon lagee nyan, wilayah yehuda dan benyamin teutab na lam keukuasaan gobnyan. teungku-teungku imeum dan ureueng-ureueng lewi nibak bansaboh nanggroe israel geujak laju meugabong deungon rehabeam. ureueng-ureueng lewi nyan laju geu tinggai blang naleueng dan tanoh droe geuh laju geuminah u yehuda dan yerusalem, sabab yerobeam dan raja-raja nyang mat geunantoe gobnyan hana jibri idihin awaknyan jimeubuet sibagoe teungku imeum tuhan. yerobeam laju jibaiat teungku-teungku imeum jih keudroe keu nyang layani di teumpat-teumpat teuseumah beurala dan keu jiseumah ubak jen-jen dan patong leumo nyang jipeugot keudroe. ureueng-ureueng nibak banmandum sukee israel nyang bit-bit keuneuk seumah tuhan po teu allah israel, jiminah u yerusalem, jiseutot ureueng-ureueng lewi nyan mangat jeuet jipeuseumah keureubeuen keu tuhan, allah nyang jiseumah le indatu awaknyan. deungon na lagee nyan keurajeuen yehuda ka leubeh teuga. lhee thon treb jih awaknyan jitulong peumeurintah rehabeam aneuek agam nabi sulaiman nyan, dan udeb lagee yoh masa keurajeuen nabi daud dan nabi sulaiman. rehabeam geumeukawen deungon mahalat; ureueng syiek mahalat nyan nan jih yerimot aneuek agam nabi daud, dan ma jihnyan na kheueh abihail aneuek eliab, cucoe isai. awaknyan na jimeu aneuek lhee droe aneuek agam: yeus, semarya dan zaham. oh lheeuh nyan rehabeam geumeukawen teuma deungon maakha aneuek absalom. awaknyan na teuma geumeu aneuek peuet droe aneuek agam: abia, atai, ziza dan selomit. rehabeam na geumeu inong 18 droe dan 60 droe gundek, 28 droe aneuek agam, dan 60 droe aneuek inong. nibak banmandum peurumoh dan gundek geuhnyan, nyang paleng that geugaseh na kheueh maakha. nyan kheueh

sabab jih abia aneuek maakha leubeh jigaseh nibak banmandum aneuek-aneuek gobnyan nyang laen, le sababnyan teuma abia kheueh nyang geupileh keuge-unantoe gobnyan jeuet keuraja. deungon bijaksana rehabeam geubri tugaih-tugaih keu aneuek-aneuek geuh nyang agam dan geujok tugaih awaknyan nibak banda-banda nyang meupageue ngon kuta di bansaboh wilayah yehuda dan wilayah benyamin. gobnyan geubri keu awaknyan peunajoh nyang meulimpah ruwah, dan geujok teuma ureueng inong nyang le keu peurmoh awaknyan. oh ka ltheuh keududuekan rehabeam sibagoe raja meutamah teuga, gobnyan dan banmandum umat israel laju geupeutuwo ubak hukum tuhan, dan hana seutia ubak gobnyan. le sababnyan tuhan geuhukom awaknyan. bak thon nyang keulimong keurajeuen rehabeam, sisak raja di nanggroe meuse jijk prang yerusalem deungon 1.200 geuritan prang, 60.000 sipa-i meuguda, dan lam jeumeulah sipa-i nyang hana teutong le jih, jitamong cit keunan pasokan libia, suki dan sudan. awaknyan laju jireubot banda-banda nyang meupageue kuta di yehuda dan laju trok u yerusalem. bak watee nyan raja rehabeam dan bubena ureueng peumimpin yehuda ka meusapat di yerusalem sabab jipeuplueng droe nibak sisak. nabi semaya geujak laju ubak awaknyan sira geupeugah, "lagee nyoe kheueh geupeugah le tuhan, 'gata nyoe ka tatinggai ulon, le nyan bak saat nyoe ulon pih lon tinggai gata akhejih gata jikuasa le sisak.'" raja dan durna peumimpin geuaku bahwa awaknyan ka meudesya. awaknyan laju jipeugah, "peue nyang geupeubuet le tuhan nyan na kheueh ade." bak watee geukalon le tuhan bahwa awaknyan ka jipeumiyueb droe, tuhan geupeugah lom ubak nabi semaya, meunoe geupeugah, "sabab awaknyan ka jimeungaku keu desya droe jih, jinoe ulon hana ulon peupaloe le awaknyan. ulon deungon reujang lon tulong awaknyan; yerusalem hana lon peuhanco. bahpi meunan, sisak teuma jikuasa awaknyan, mangat awaknyan jiteupeu beuda jimeungabdi ubak ulon dan meungabdi ubak peunguasa-peunguasa donya." dan teuka kheueh raja sisak jijk prang yerusalem dan jireubot laju barang-barang nyang meuhareuga nyang na meuteume didalam baet tuhan dan di meuligoe raja, meunan cit deungon peurisai-peurisai meuh nyang geupeuget le nabi sulaiman. keugeunantoe jih rehabeam laju geupeuget peurisai-peurisai peurunggu, dan geupeucaya peuget atranyan ubak peuwira nyang kawai babah pintoe geureubang meuligoe. pajan mantong raja geujak u baet tuhan, le ureueng peungawai jiba peurisai-peurisai nyan, oh ltheuhnyan atra nyan laju jipeuriwang ubak kama jaga. sabab raja geupeumiyueb droe dikeue tuhan, dan meunan cit sabab mantong na hai-hai nyang jroh di yehuda ngon nyan reuda kheueh meureuka tuhan keu rehabeam hana jeuet geupeupaloe raja nyan mubacut pih. rehabeam geumat peurintah di yerusalem dan keukuasaan gobnyan sampoe rayeuk. gobnyan meu umu 41 thon bak watee teu baiat jeuet keuraja, dan geumat peurintah na 17 thon treb jih di yerusalem, banda nyang nibak mandum wilayah israel geupileh le tuhan mangat jeuet keu teumpat iebadat ubak gobnyan. nan ma rehabeam

na kheueh naama asai di nanggroe amon. rehabeam jipeubuet jeuhet sabab hana jiuseuha jipeubuet buet lagee kheun tuhan. kisah keuhai rehabeam awaiphon sampoe akhe dan silsilah gobnyan ka teucetet lam kitab seujarah nabi semaya dan lam kitab seujarah nabi ido. lamkawan rehabeam dan yerobeam hana putoh na sabe prang. rehabeam meuninggai donya dan teukubu di lampoh jrati raja-raja banda nabi daud. abia aneuek gobnyan nyang agam teubaiat jeuet keuraja keugeunantoe gobnyan. bak thon nyang keulapan blaih masa keurajeuen raja yerobeam ateuh israel, abia jeuet keuraja di nanggroe yehuda, dan geumat peurintah na lhee thon treb jih di yerusalem. ma gobnyan nan jih mikhaya aneuek uriel asai nibak banda gibe. oh ltheuh nyan beureutho kheueh prang abia lawan yerobeam. abia geukrah na 400.000 droe sipa-i, seudangan yerobeam na 800.000 droe sipa-i. bandua pasokan nyang ka meuhadab keue di daerah meugunong-gunong efraim. abia laju geuek u ateuh gunung zemaraim laju geuwok ubak yerobeam dan ureueng israel, "gata deungoe nyoe! gata tateupeue bahwa tuhan, allah israel, ka geuikati janji deungon nabi daud bahwa gobnyan dan keuturonan geuh geumat peurintah ateuh israel keu siumu masa. janji nyan hana jeuet teupeubateue. bahpi meunan, yerobeam aneuek nebat nyan jibeurontak ubak nabi sulaiman, raja jih keudroe. jihnyan laju jipeusapat saboh kawan ureueng-ureueng jeuhet nyang kureueng aja dan jipaksa keuheundak droe jih keudroe ubak rehabeam aneuek agam nabi sulaiman nyan, nyang yoh wateenyan mantong that muda dan hana peungalaman keu jiteuntang. jinoenyo gata sangka gatanyoe banmandum hase talawan keukuasaan nyang geubri le tuhan ubak keuturonan nabi daud, sabab pasokan gata rame dan nibak gata na leumo-leumo meuh nyang le yerobeam jipeujeuet sibagoe dewa gata. kon kheueh teungku-teungku imeum tuhan nyang keuturonan nabi harun dan ureueng-ureueng lewi ka gata use banmandum? sibagoe geunantoe soemantong nyang meuheuet jeuet keu teungku imeum, asai ureueng nyan hase jiba saboh leumo atawa tujuh boh bubiri, gata peujeuet imeum nyang kon allah, sabab keubit lageenyan kheueh cara bansa-bansa laen jiangkat teungku imeum droe jih. teuma dikamoe hana kamoe peubuet nyang lagee nyan bagoe. kamoe teutab kamoe meungabdi ubak tuhan allah kamoe dan hana kamoe tinggai gobnyan. teungku-teungku imeum kamoe teutab nibak keuturonan nabi harun, dan ureueng-ureueng lewi teutab geutulong awaknyan. tieb-tieb beungoh dan seupot awaknyan jipot keumeunyan dan jipeuseumah keureubeuen nyang teutot keu tuhan, dan geupeuna teuma ruti sajian. tieb-tieb malam awaknyan geupeuhu panyot-panyot nyang geukeubah nibak gaki panyot meuh. kamoe teutab kamoe taat ubak peue-peue mantong nyang geupeurintah le tuhan, teuma gata ka tatinggai gobnyan. peumimpin kamoe na kheueh po teu allah keudroe dan bubena teungku imeum gobnyan na disinoe. awaknyan ka siab keu geuyueb beureuguih sibagoe tanda keukamoe mangat teujak prang gata. hai ureueng israel, bek kheueh gata lawan tuhan,

po teu allah indatu gata! gata banmandum hana hase meunang!" nibak wateenyan yerobeam laju jikirem siladum nibak pasokan jih keujjak pagab pasokan yehuda rot likot, seudangkan siladum teuk jipagab awaknyan rot keue. oh watee jingieung le pasokan yehuda bahwa droe geuhnyan ka teupagab, awaknyan laju geukliek sira geulakee tulong ubak tuhan. le teungku imeum laju geuyueb beureuguih, le pasokan yehuda geudumpek prang dan laju geumaju ngaza, geupimpen le abia. teungoh awaknyan muprang hana tuwoe geutawok, po teu allah dan laju geupeutaloe yerobeam dan pasokan israel akhejih awaknyan ka habeh jiplueng teung bayeueng hana meuteuntee. allah ka geupeujeuet ureueng yehuda meunang dimideuen prang ateuh ureueng israel. keubit that rayeuk taloe nyang jideurita le pasokan israel dimideuen prang nyang jikeumando le panglima abia nibak pasokan yehuda; na 500.000 droe sipa-i awaknyan nyang paleng beuhe mate dimideuen prang nyan. ureueng yehuda hase meunang, sabab awaknyan geubantu le tuhan, allah indatu awaknyan. bak watee abia geutiyeub pasokan yerobeam, gobnyan laju geureubot banda-banda deungon na meupadubboh gampong nyang na to-to ngon banda nyang geureubot nyan. banda-banda nyan na kheueh banda betel, yesana dan efron. simantong na keurajeuen abia, yerobeam hana hase geupeu aman nanggroe gobnyan. nyang akhe jih yerobeam nyan geupoh mate le tuhan. sikeubitjih, abia seumaken meukuasa. bak gobnyan na 14 droe peurmoh, 22 droe aneuk agam dan 16 droe aneuk inong. kisah nyang laen keuhai abia, dan keuhai banmandum keuhai tutoe haba dan buet-buet gobnyan ka teucetet didalam kitab seujarah nabi ido. oh ka ltheueh raja abia meuninggai donya dan ka teukubu nibak lampoh jrat raja-raja di banda nabi daud, asa aneuk agam gobnyan jeuet keuraja keugeunantoe gobnyan. dimiyueb peumeurintahan raja asa, nanggroe yehuda aman ngon teuntram treb jih na siploh thon. asa keubit that galak ate tuhan allah sabab gobnyan geupeubuet-buet nyang bit that meukeunong nibak tuhan sabab ade dan jroh. gobnyan laju geukireuh dan geuboih banmandum miseubah bansa laen dan teumpat-teumpat ureueng seumah beurala. tugu-tugu dewa habeh geupeuhanco banmandum, dan tameh-tameh patong dewi asyera geupeureubah bak tanoh. rakyat yehuda geuyue udeb meunurot keuheundak tuhan, allah indatu awaknyan, dan geuyue taat ubak ajaran-ajaran dan peurintah-peurintah gobnyan. banmandum teumpat teuseumah beurala dan teumpat teutot keumeunyan banmandum ka habeh geutiek nibak banda-banda yehuda. deungon nyan teunang kheueh keurajeuen nyan dimiyueb peumeurintahan gobnyan, akhe jih gobnyan ka hase geupeudong kuta-kuta keu banda-banda nyang na di yehuda. napadub thon treb jih hana teujadi prang sabab tuhan kageubri keuadaan dame keu gobnyan. geupeugah le asa ubak rakyat yehuda, "bah kheueh geutanyoe tapeukong banda-banda deungon tapeugot beuton-beuton bansikeulileng nyan dan meunara-meunara meunan cit deungon babah pintoe geureubang deungon palang-palang jih. geutanyoe ka takuasa nanggroe

nyoe sabab geutanyoe ka ta turot kheun po teu allah tuhan geutanyoe. gobnyan geujaga geutanyoe dan geupeulara keumanaan bansaboh nanggroe geutanyoe." dan jipeuphon kheueh le awaknyan jipeudong dan jimeubuet deungon get that. tantra raja asa na 300.000 droe ureueng yehuda nyang na seunjata peurisai dan kapak, dan 280.000 droe nibak sukee benyamin nyang meuseunjata peurisai, ali-ali dan panah. awaknyan banmandum sipa-i nyang beurani, beuhe ngon teulatih. bak saboh watee na sidroe ureueng sudan nyang nan jih zerah jiprang yehuda deungon pasokan nyang le jih na 1.000.000 droe dan 300 boh geuritan prang. awaknyan jimaju sampoe trok u maresa. dan geuteubiet kheueh asa geujak lawan zerah, dan bandua awaknyan geuato baresan di panton zefata nyang to ngon maresa. laju asa geumeudoe ubak tuhan po teu allah gobnyan, "tuhan, droeneueh kheueh nyang hase tulong kamoe nyang leumoh ateuh nyang teuga. neutulong kheueh kamoe nibak saat nyoe, ya tuhan allah kamoe! bak droeneueh kamoe meusadeue dan ateuh nan droeneueh kheueh kamoe jakmaju u mideuen prang kamoe lawan pasokan nyang le that jeumeulah jih nyoe. tuhan, droeneueh kheueh allah kamoe. bek neupeubiyeue droeneueh jipeutaloe le sidroe manusia." ltheueh nyan asa dan tantra yehuda geujak prang sipa-i sudan. tuhan laju geupeutaloe sipa-i sudan akhejih awaknyan jiplueng teung bayeueng hanmeuho saho. asa dan pasokan gobnyan laju geupeulet sipa-i sudan nyan sampoe trok u gerar. blah sudan lumpah that jai nyang mate akhe jih sipa-i awaknyan hana meudaya sabab ka geupeuhanco le tuhan dan di tantra yehuda pi lumpah that jai jireupah barang-barang awaknyan. oh ltheueh nyan tantra yehuda geupeuhanco teuma banda-banda nyang na bansikeulileng gerar, sabab tuhan geupeujeuet peunduduek disinan jeuet keuteumakot. tantra yehuda jireupah banmandum banda nyan laju meuteume barang-barang nyang jai that. dan meunan cit awaknyan jiprang teuma khimah-khimah ureueng peulara beulatang, dan laju jiangkot bubiri deungon unta nyang jai lagoena. oh ltheueh nyan awaknyan jiwoe lom u yerusalem. roh allah geukuasa ateuh nabi azarya aneuk oded, sampoe gobnyan geujak meurumpok deungon raja asa dan geupeugah, "hai raja asa, dan banmandum peunduduek yehuda ngon peunduduek benyamin! neudeungoe kheueh nyoe! tuhan lumpah that toe deungon gata meunyo gata toe deungon gobnyan. meunyo gata talakee peutunok nibak tuhan, gobnyan teuma geubri peutunok nyan keu gata. teuma meunyo gata hana tahiro ubak gobnyan, gobnyan pi hana geupako keu gata. treb lagoena israel hana meungabdi ubak allah nyang hak, hana teuma hukom-hukom nyang haroh jitaat, dan hana teuma teungku-teungku imeum nyang peuruno awaknyan. teuma meunyo awaknyan ka meurumpok deungon keususahan, awaknyan laju jilakee tulong ubak tuhan, allah israel. awaknyan jilakee peutunok gobnyan dan tuhan laju geupeukabui peue nyang jilakee nyan. bak masanyan ureueng rame hana hase jijak homantong deungon aman, sabab tieb-tieb nanggroe na teujadi karu nyang paleng raya. bansa nyang saboh jitindeeh

bansa nyang laen, dan banda nyang saboh jitindeeh teuma banda nyang laen, banmandum nyang kareuna tuhan allah ka geupeuteuka karu nyang paleng raya ateueh awaknyan. teuma gata haroh kheueh tabah dan beurani. useuha gata teuma meuhase." bak watee asa geudeungoe tutoe haba nabi azarya aneuek oded nyan, teuka kheueh gurangsang gobnyan, seumangat geuh pi teuka hu lagee suwa. laju gobnyan geureuloih ngon geupeuhanco banmandum beurala nyang na di nanggroe yehuda dan di benyamin, dan di banda-banda nyang ka ltheueh geupeutaloe di gunung-gunong efraim, le gobnyan laju geupeugot sampoe meusaneut miseubah tuhan nyang na di dalam peulataran baet tuhan. le that-that ureueng efraim, manasye, dan simeon jimeugabong deungon asa, dan tinggai diwilayah keurajeuen gobnyan, sabab awaknyan jikalon bahwa tuhan geutulolong awaknyan. asa geuyue banmandum ureueng nyan meusajan deungon ureueng yehuda dan benyamin meusapat di yerusalem. dan meusapat kheueh awaknyan nibak buleuen lhee thon nyang keulimong blaih keurajeuen asa. bak uroenyan awaknyan jipeuseumah keu tuhan na 700 boh leumo dan 7.000 boh bubiri, hase nyang jireubot dan jipeuwoe dimideuen prang. awaknyan jimeujanji ubak tuhan bahwa deungon sipeunoh ate dan jiwa awaknyan teuma udeb meunurot nyang geulakee le po teu allah, tuhan indatu awaknyan. soemantong, tuha atawa muda, ureueng agam atawa ureueng inong, nyang hana udeb meunurot nyang geu keuheundak le tuhan ureueng nyan teuma geuhukom mate. deungon su nyang meutaga awaknyan jimeusumpah ubak tuhan bahwa awaknyan jimumat ubak janji nyan. oh ltheuehnyan awaknyan laju jiseumurak meuhubo sira jiyueb beureuguih. banmandum rakyat yehuda geumbira sabab awaknyan ka jimeusumpah deungon sipeunoh ate. awaknyan galak that jimeu iebadat ubak tuhan, dan tuhan pih geuteurimong awaknyan. tuhan laju geubri keu awaknyan keuadaan nyang aman teuntram diwilayah awaknyan. ltheuehnyan raja asa laju geupeucat nek gobnyan nyang nan maakha, nibak keududuekan jih sibagoe nyak putro sabab gobnyan ka jipeugot patong beurala nyang jeuhet ngon cabui keu asyera, dewi keusuboran. asa laju geureuloih dan geupeuhanco sampoe meukeupeng-keupeng patong nyan laju geujak tot di panton kidron. bahpi hana banmandum teumpat seumah beurala nyan nyang meutabu bansaboh nanggroe geuh geupeuhanco le asa, teuma gobnyan ka geupeuleumah ubak tuhan keuseutiaan gobnyan sipanyang udeb geuh. banmandum meuh dan pirak meunan cit deungon barang-barang nyang laen hase nyang teureupah di mideuen prang atra ureueng syiek gobnyan dan atra geuh keudroe banmandum nyang geukeubah di baet tuhan mangat jeuet keuhak milek tuhan. sampoe nibak thon nyang keulhee ploh limong keurajeuen asa hantomna muprang di nanggroe nyan. bak thon nyang keu lhee ploh nam keurajeuen peumeurintahan raja asa ateueh yehuda, baesa raja israel jajak prang yehuda dan jipekong banda rama keu ji ampeueng rot teubiet tamong u yehuda. teuma le raja asa laju geucok meuh dan pirak nibak peubeundaharaan baet tuhan dan

meuligoe raja, atranyan laju geukirem u damsyik ubak benhadad raja nanggroe siria sira geupeugah lageenyoe, "jak geutanyoe ta ikat peusahabatan lagee nyang ka ltheueh geupeubuet le ureueng syiek geutanyoe. meusigoe deungon ulon lon kirem meuh dan pirak sibagoe hadiah, dan ulon lakee teungku amphon neupeuputoh hubungan deungon baesa raja israel, mangat le gobnyan jitarek lom pasokan jih lam wilayah ulon." benhadad situju that deungon pakat nyan laju geuyue bubena peuwira gobnyan meusajan deungon pasokan jih jajak prang mandum banda-banda di israel. awaknyan laju geupeutaloe iyon, dan, abel-bet-maakha dan banmandum banda peubeukalan di naftali. bak watee raja baesa jideungoe hainyan, laju jipioh jipeukong rama dan laju jitinggai banda nyan. le raja asa laju geukrah banmandum ureueng nyang na di yehuda mangat jiangkot batee ngon kayee nyang jingui le raja baesa di rama keu teupeukong banda nyan. bahan-bahan nyan geupeuguna le asa keungon peukong banda geba dan mizpa. bak wateenyan nabi hanani geujak ubak raja asa sira geupeugah lageenyoe, "kareuna gata meusadeue ubak raja siria, dan kon ubak tuhan, po teu allah gata, le nyan gadoh kheueh keuseumpatan gata keu gata peutaloe tantra raja israel. kon kheueh sudan ngon libia nyang na angkatan prang nyang teuga rayeuk dan le that geuritan prang dan pasokan meuguda? bahpi meunan tuhan geupeumeunang gata ateueh awaknyan, sabab gata tameusadeue ubak gobnyan. tuhan geukawai banmandum bumoe mangat geubri teunaga gobnyan keu ureueng-ureueng nyang seutia ubak gobnyan. gata ka tapeubuet buet nyang bangai that, sabab phon saatnyoe gata sabe tarasa muprang nyang hana reuda." ban jideungoe haba nabi hanani nyan, raja asa beungeh that-that laju jicok nabi hanani nyan jipeutamong lam glab. bak wateenyan cit asa jitindeeh na meupadub droe lamkawan rakyat geuhnyan. banmandum keujadian lam peumeurintahan asa phon awai sampoe akhe ka tucetet lam kitab seujarah raja-raja yehuda dan israel. bak thon nyang keu lhee ploh sikureueng nibak peumeurintahan gobnyan, raja asa teuka peunyaket nyang lumpah parah bak bandua blaih gaki gobnyan. bahpi ka lageenyan gobnyan hana cit jilakee tulung ubak tuhan, teuma ubak dokto. na dua thon teuma oh ltheueh nyan gobnyan meuninggai donya. manyet gobnyan laju teuboh ramuan nyang teupeugot nibak reumpah-reumpah dan bee-bee harom nyang seumeureubak, laju teupeukubu nibak lampoh jrat raja-raja di banda nabi daud. dan keu teubri keuhoreumatan ubak rakyat laju teupuhu apui unggun nyang lumpah rayeuk. yosafat jeuet keuraja yehuda teubaiat keugeunantoe raja asa ureueng syiek gobnyan, dan gobnyan laju geupeukong droe keu geulawan israel. le gobnyan laju geubri tugaih ubak banmandum banda geuh nyang meupageue deungon kuta di yehuda, dan didaerah luwa banda yehuda, meunan cit di banda-banda nyang ka geureubot le ureueng syiek gobnyan di wilayah efraim. tuhan geubri beureukat ubak yosafat sabab gobnyan geuseutot bakat ureueng syiek geuh; gobnyan hana geuseumah baal, teuma

geumeu ibadat ubak allah. gobnyan taat ubak peue mantong nyang geupeurintah le po teu allah, dan udeb gobnyan hana lagee udeb raja-raja israel nyang laen. tuhan geubri ubak yosafat keududuekan nyang paleng kong sibagoe raja di yehuda. banmandum rakyat jibri laju hadiah-hadiah keu gobnyan dan gobnyan kajeuet keukaya dan jihoreumat. deungon keumauan nyang kreueh that gobnyan geutaat ubak peue mantong nyang geupeurintah le tuhan dan geupeuhanco banmandum teumpat-teumpat ureueng seumah beurala dan patong-patong dewi asyera di yehuda. bak thon nyang keulhee nibak keurajeuen gobnyan, le geuhnyan laju geu kirem peujabat-peujabat manyang mangat jijak peuruno meubagoe hukum-hukum tuhan di banda-banda yehuda. awaknyan na kheueh: benhail, obaja, zakharía, netaneel dan mikha. awaknyan jipeungon le sikureueng droe ureueng lewi dan dua droe teungku imeum. ureueng-ureueng lewi nyan na kheueh: semaya, netanya, zebaja, asael, semiramot, yonatan, adonia, tobia dan tob-adonia. dan bandua droe teungku imeum nyan na kheueh elisama dan yoram. deungon jiba kitab hukum-hukum tuhan awaknyan laju jijak bansaboh nyan lam banda-banda yehuda dan laju jipurunoe beuet rakyat diteumpat nyang jijak nyan. tuhan geupeujeuet banmandum keurajeuen nyang na to-to deungon keurajeuen yehuda teumakot jimuprang deungon raja yosafat. nibak ureueng filistin awaknyan keubit jai that-that jiteurimong pirak dan hadiah-hadiah nyang laen, dan nibak ureueng arab jiteurimong teuma 7.700 boh bubiri dan 7.700 boh kameng. meunan kheueh yosafat maken treb maken meukuasa. di bansaboh nanggroe yehuda laju geupeudong kuta-kuta dan banda-banda peubeukalan. meunan cit laju geutamon peubeukalan nyang jai that di banda-banda nyan. di yerusalem gobnyan geupeuduek peuwira-peuwira nyang peukasa, maseng-maseng deungon keusatuan meunurot kawom jih. adna na kheueh panglima keusatuan nibak kawom-kawom yehuda. gobnyan na geupimpen 300.000 droe tantra. ureueng keudua na kheueh yohanan; gobnyan jeuet keu ulee 280.000 droe tantra. ureueng nyang keulhee na kheueh amasia aneuek zikhri; gobnyan jeuet keu ulee 200.000 droe tantra. (amasia na kheueh sidroe sukarelawan nyang jimeungabdi ubak tuhan.) panglima keusatuan nibak kawom-kawom lam sukee benyamin na kheueh elyada, sidroe pejuang nyang that kha. gobnyan geupimpen 200.000 droe tantra leungkab deungon panah dan peurisai. ureueng keudua lam keusatuan nyoe na kheueh yosabad; gobnyan geupimpen na 180.000 droe tantra nyang leungkab deungon sinjata. awaknyan kheueh nyang meutugai di yerusalem. disampeng nyan, raja geupeuduek teuma keusatuan-keusatuan nyang laen nibak kuta-kuta diwilayah yehuda. watee yosafat raja yehuda ka kaya dan meusyehuh, gobnyan laju geupeukawen sidroe lamkawan anggota keuluwarga gobnyan deungon anggota keuluwarga ahab raja israel. na padub thon teuma oh lheureh nyan yosafat geujak sawe ahab di banda samaria. keu gehoreumat yosafat dan rombongan gobnyan, ahab laju geupeuna khanuri sira geuyue sie leumo

ngon bubiri nyang le that-that. lam keuseumpatan nyan ahab laju jipakat yosafat mangat teujakprang banda ramot di gilead. le geuhnyan laju geutanyong, "peu kheueh droeneueh neujak ngon kamoe tajak prang ramot?" geujaweueb le yosafat, "get that, sipa-i ulon jimeugabong deungon sipa-i gata. geutanyoe tamuprang meusajan-sajan. teuma nyang siget jih tatanyong ilee ubak tuhan." le sababnyan ahab laju geupeusapat kira-kira na 400 droe nabi dan jitanyong ubak nabi-nabi nyan, "peu kheueh jeuet kamoe jak prang ramot atawa han jeuet?" "jeuet!" jaweueb awaknyan. "allah teuma geuseurah banda nyan keu teungku amphon." teuma yosafat geumanyong lom, "peu kheueh disinoe hana nabi nyang laen nyang hase geuteumanyong ubak tuhan keu geutanyoe?" jaweueb ahab, "mantong na sidroe teuk, nabi mikha aneuek yimla. teuma ulon banci keu nabi nyan, sabab hantom na geuramai nyang jroh keu ulon; sabe nyang hana jroh." "ah, bek neu-peugah meunan!" seut yosafat. ahab laju geutawok sidroe peugawee meuligoe geuyue laju gobnyan bagaih-bagaih mangat jijak tueng nabi mikha. bak wateenyan ahab ngon yosafat, sira geungui peukayan keurajeuen, geuduek nibak keurusi keurajeuen di teumpat ceumeulo aneuk gandom di babah pintoe geureubang samaria, wateenyan mandum nabi teuka geujak meuhadab dan geupeusampoe peue nyang geuramai le nabi-nabi nyan. sidroe lamkawan nabi-nabi nyan, nyang nan geuh zedekia bin kenaana, jipeuget binte-binte beuton beuso lheureh nyan laju jipeugah ubak ahab, "nyoe kheueh nyang geupeugah le tuhan, 'deungon lungkee-lungkee nyang lagee nyoe teungku po teuma geuheuntam siria dan geupeuhanco awaknyan.' " banmandum nabi nyang laen situju dan geupeugah lageenyoe, "jak prang kheueh ramot, teungku amphon meuhase. tuhan geupeumeunang teungku amphon." le utosan nyang jaktueng nabi mikha, laju jipeugah ubak nabi mikha nyan lageenyoe, "banmandum nabi nyang laen ka lheureh geuramai bahwa nyang meunang di mideuen prang na kheueh raja. kira jih droeneueh hai bapak neuramai kheueh nyang jroh lagee awaknyan." teuma geujaweueb le nabi mikha, "deumi tuhan nyang udeb, ulon teuma lon peugah peue nyang geupeugah le tuhan ubak ulon!" watee katrok nabi mikha keue raja ahab, geutanyong laju le raja lageenyoe, "peu kheueh jeuet ulon dan yosafat kamoe jakprang ramot atawa hanjeuet?" "jakprang kheueh!" geuseut mikha. "teunte teungku amphon teuma meuhase. tuhan geupeumeunang keu teungku amphon." geujaweueb le ahab, "meunyoe gata neupeugah haba ubak ulon deumi nan tuhan, neupeugah kheueh nyang beutoi. padubgoe gata haroh ulon peuingat keuhai nyan?" geujaweueb le mikha, "leumah ulon kalon tantra israel ka teung bayeueng di gunong-gunong. awaknyan lagee bubiri hana ureueng rabe, dan tuhan geupeugah keuhai awaknyan, 'ureueng-ureueng nyoe hana nyang pimpen. bah kheueh awaknyan jiwo deungon sealamat.' " geupeugah le ahab ubak yosafat, "beutoi lagee nyang ulon peugah nyan, bukan? hantom na teuramai nyang jroh-jroh meunyoe keu ulon! sabe nyang brok-brok!" mikha geupeugah lom lagee nyoe, "jinoenyoe neudeungoe laju peue nyang

geupeugah le tuhan! leumah ulon ngieng tuhan teuhong geudeuk nibak takhta gobnyan di syeuruga, dan banmandum malaikat teudong meutato bakbinedh gobnyan. tuhan geutanyong, 'soe nyang bujuk ahab mangat jihnyan jitem jakmuprang dan mate di ramot di gilead?' geujaweueb le malaikat-malaikat nyan meubeda-beda. akhe jih teuka saboh roh. roh nyan jipeuto ubak tuhan dan jipeugah, 'ulon kheueh nyang bujuk gobnyan.' 'pakriban cara jih?' geutanyong le tuhan. roh nyan jijaweueb lagee nyoe, 'ulon teuma lonjak dan lon peujeuet banmandum nabi ahab nyan jimeusulet.' tuhan geupeugah, 'get, gata peubuet kheueh laju nyang lagee nyan, gata teuma meuhase tabujuk jih nyan.' " ltheuhnyan mikha geupeugah lom, 'nyan, nyang kheueh nyang teujadi! tuhan ka geupeujeuet nabi-nabi teungku amphon jimeusulet ubak teungku amphon sabab tuhan ka geupeuteuntee keu geupeurhot beuncana nyan atueuh teungku amphon!" dan geumaju kheueh nabi zedekia geujak peurab ubak mikha oh karab to bak nabi mikha nyan laju geutampa muka geuh sira geupeugah, 'panena mungken roh tuhan geutinggai ulon dan geumeu tutoe ngon gata?' geujaweueb le mikha, 'eunteuk neukalon keudroe bukeuti jih bak watee gata neutamong lam kama keu tajak musom!" "drob laju ureueng nyoe!" peurintah le raja ahab, "dan jakba laju jihnyan ubak amon, walibanda, dan ubak pangeran yoas. tayue paso laju ureueng nyoe bak awaknyan u dalam glab, dan gatabri keu ureueng nyoe peunajoh meunan cit ie jib meubacut mantong sampoe ulon woe keuno deungon seulam." geupeugah le mikha, "meunyo teungku amphon neuwoe deungon seulam, nyan saban cit tuhan hana geupeugah haba rot ulon. banmandum nyang hade disinoe jeuet keusaksi." oh ltheueh nyan le ahab, raja israel, dan yosafat raja yehuda geujak prang laju banda ramot di gilead. ahab geupeugah ubak yosafat, "ulon kumeunymar dan meusajan lon muprang, teuma droeneueh neukeuneuk ngui peukayan keurajeuen droeneueh." meunan kheueh raja israel meunymar bakwatee geujak u mideuen prang. bak watee nyan bubena panglima pasokan geuritan prang sira ka jibri peurintah le raja jihnyan mangat jikakprang raja israel mantong. dan, watee awaknyan jingiang raja yosafat, awaknyan banmandum jisangka bahwa nyan na kheueh raja israel. le sabab nyan awaknyan laju geuseurang gobnyan. teuma yosafat geudumpek, laju tuhan po teu allah geutulolong gobnyan, dan geupeuwet seurangan nyan u daerah laen. watee bubena panglima geuritan prang sira jiteupeue bahwa nyan bukon raja israel, awaknyan laju jipioh seurangan atueuh gobnyan. keubeutulan sidroe lamkawan sipa-i sira jitimbak aneuk panah jih dan jipeukeue ubak sasaran nyang hana teusaja. rupari aneuk panah nyan paih keunong atueuh ahab sampoe beusout bajee prang gobnyan paih bak sinambong jih. "ulon ka keunong!" geutawok le ahab ubak supe geuritan prang gobnyan, "tapeuwet laju dan taba laju ulon mangat tateubiet nibak mideuen prang nyoe!" teuma, sabab muprang nyan mantong meuhubo, raja ahab teutab geudong sira geumeutumpang lam geuritan geuhnyan geuhadab ubak sipa-i sira. watee mata uroe ka jillob gobnyan pih meuninggai donya. watee

geuriwang deungon seulam yosafat raja yehuda nyan u yerusalem, na sidroe nabi nyang nan geuh yehu aneuk hanani geujak meuhadab ubak raja. geupeugah le nabi nyan ubak gobnyan, "na kheueh patot le teungku amphon neubantu ureueng jeuhet dan neudong blah ureueng nyang banci ubak tuhan? sabab buet teungku amphon nyang lagee nyan bagoe tuhan beungeh that keu teungku amphon. bahpi meunan na cit nyang jroh nibak teungku amphon. teungku amphon ka neupeuhanco banmandum patong dewi asyera nyang jiseumah le rakyat dan teungku amphon ka teuma neu useuha mangat udeb meunurot nyang geulakee le po teu allah." raja yosafat teumpat tinggai geuh di yerusalem. teuma gobnyan kayem geusaweue rakyat nibak tieb-tieb sagoe nanggroe geujakyue rakyat geuhnyan mangat jigisa meuhadab tuhan, allah indatu awaknyan. nibak tieb-tieb banda nyang pageue deungon kuta di yehuda geubait laju sidroe hakem, dan laju geupeurintah lagee nyoe ubak hakem-hakem nyan, "tameubuet kheueh nyang ade ngon bijaksana, sabab gata tameuhakem nyan bukon atueuh nan manusia, teuma atueuh nan tuhan. gobnyan geukawai gata watee gata tapeuputoh peukara. gata haroh tatakot ubak tuhan, dan tameubuet beu ate-ate, sabab tuhan po teu allah geutanyoe geubanci that keu ureueng nyang jipeubuet jeuhet, nyang dong brat siblah atawa keu ureueng nyang teurimong sugok." meunan cit di yerusalem, yosafat geuangkat teuma hakem-hakem nibak kawom ureueng-ureueng lewi, teungku-teungku imeum dan tukoih-tukoih masyarakat. hakem-hakem nyan haroh geupeuputoh peukara nyang meusangkot deungon peulanggaran hukum tuhan dan peukara-peukara nyang laen. ubak mandum hakem nyan yosafat laju geubri peurintah nyang lagee nyoe, "gata peubuet kheueh tugaih gata deungon taat ubak tuhan. gata turot kheueh peue mantong peurintah gobnyan lam hai peue mantong nyang gata peubuet. meunyo na rakan-rakan gata nibak banda nyang laen napeukara ureueng poh gob sampoe mate. nyang langga hukum ngan nyang undang-undang nyan, bah kheueh gata tabri peutunyok ubak awaknyan. deungon na lagee nyan awaknyan hana meusalah ubak tuhan, dan tuhan hana teuma geubeungeh keu gata meunan cit ubak awaknyan. gata peubuet kheueh laju peurintah nyoe, deungon nyan gata hana salah le. teungku imeum agong amarya ulon bri kuasa nyang paleng manyang atueuh banmandum peukara nyang na hubongan ngon hukum agama. zebaja aneuk ismail, na kheueh gubunur yehuda, ulon bri kuasa nyang paleng manyang atueuh peukara nyang laen. ureueng-ureueng lewi meutanggong jaweueb mangat peue mantong keuputusan-keuputusan di kanto peungadalan jilaksana. gata seutot kheueh ubak peutunyok-peutunyok nyoe dan meubuet kheueh deungon teugaih. seumoga tuhan sabe na blah ureueng nyang jipeubuet adel" na padutreb teuma oh ltheuhnyan sipa-i moab dan amon, meusajan deungon sipa-i sikutu awaknyan na kheueh sipa-i meunim, laju jikak prang yehuda. dan teuka kheueh ureueng jiba haba ubak raja yosafat, "keubit that jai sipa-i edom nyang teuka di meurandeh laot mate

keuneuk jijak prang teungku amphon. awaknyan ka jireubot hazeron-tamar." (hazeron-tamar na kheueh nan nyang laen keu en-gedi.) yosafat teumakot that-that gobnyan laju meudoa geulakee peutunyok nibak tuhan. oh lheurehnyan gobnyan geupeutreun titah mangat rakyat banmandum jipusa. nibak tieb-tieb banda di yehuda bubena ureueng laju jijak u yerusalem jijak lakee tulong ubak tuhan. awaknyan meusajan-sajan deungon peunduduek yerusalem meusapat nibak seuramoe nyang baro di baet tuhan. raja yosafat laju geudong dikeue awaknyan, dan laju geumeudoa deungon su nyang meutaga, "ya tuhan, allah indatu kamoe! droeneuh allah di syeuruga dan neupeurintah ateuhe mandum bansa nyang na di ateuhe bumoe. droeneuh meukuasa dan teuga; hana meusidro pi nyang hase jilawan droeneuh. droeneuh kheueh allah kamoe. bak watee umat droeneuh, bansa israel, jijak u nanggro nyoe, droeneuh use banmandum ureueng nyang na tinggai di nanggro nyoe. laju tuhan neubri nanggro nyoe ubak keuturonan nabi ibrahim, sahabat droeneuh, mangat jeuet keutanoh milek awaknyan siumu masa. awaknyan ka tinggai disinoe dan ka lheureh jipeudong saboh rumoh keuteumpat jiseumeumah ubak droeneuh. awaknyan jiteupeue, bahwa meunyeo awaknyan meuteume hukoman sabab le desya-desya awaknyan, dan awaknyan rhoh lam prang, ka keunong teuma deungon bala peunyaket, atawa teuka musem deuk, awaknyan hase jijak ubak droeneuh dan jidong dikeue rumoh iebadat nyoe. teungoh ate awaknyan jiteuka gundah deungon teumakot, teuma awaknyan hase jimeudoa ubak droeneuh, dan droeneuh teuma neundeungoe dan neutulong awaknyan. jinoenyoe bansa amon, moab dan edom jiseurang kamoe. watee indatu kamoe geuteuka nibak nanggro meuse, droeneuh hana neubri keu awaknyan jiduek bak nanggro bansa-bansa nyan. teuma indatu kamoe geucok rot meuwet dan hana geupeuhanco bansa amon, moab dan edom nyan. jinoenyoe, lageenyan kheueh tindakan bansa-bansa nyan ateuhe kamoe. awaknyan jikeuneuk use kamoe nibak nanggro nyang ka tuhan bri keu kamoe. droeneuh kheueh allah kamoe! hukom kheueh awaknyan, ya tuhan, sabab kamoenyoe hana meudaya kamoe lawan sipa-i nyang jai tai nyan, nyang keuneuk prang kamoe. kamoe hana meuteupeue peue nyang haroh kamoe peubuet, sabab nyan, kamoe teuka ubak droeneuh ya tuhan kamoe lakee tulong." nibak watee nyan banmandum ureueng agam yehuda meusajan deungon peurumoh dan aneuek-aneuek jih ka habeh jidong dikeue baet tuhan. lamkawan ureueng rame nyan na sidroe ureueng lewi nyang nan jih yahaziel. gobnyan aneuek nabi zakharria nibak kawom asaf lam gareh keuturonan benaya, yeiel, matanya. nibak saat nyan yahaziel ka geukuasa le roh tuhan, dan gobnyan geupeugah, "paduka nyang mulia dan syedara-syedara banmandum nyang na disinoe. tuhan geupeugah bahwa gata hana jeuet putoh asa atawa takot keu sipa-i nyang le nyan. sabab nyang muprang kon gata, teuma po teu allah. singoh beungoh watee awaknyan jiteungoh ret nyang meusineungoh di zis, gata prang kheueh awaknyan. gata teuma meuhadah keue

ngon awaknyan nibak ujong panton dikeue padang pasi nyang to ngon yeruel. gata hana peureulee tamesuheungko nibak prang nyoe. tajak kheueh u teumpat nyang ka geupeuteuntee keu gata dan tapreh mantong disinan. gata teuma takalon tuhan geupeumeunang gata. hai peunduduek yehuda dan yerusalem, bek teumakot. neutamong laju ubak mideuen prang nyan, tuhan teuma geutulong gata!" le nyan teuma geusujut kheueh raja yosafat. dan banmandum rakyat pi jisujut cit lagee geuseumah tuhan. le ureueng-ureueng lewi nibak kawom kehat dan kawom korah jidong laju, dan jiseumurak jipujo tuhan, allah israel. oh singoh beungoh bansuboh that, rakyat laju jiteubiet dan jijak laju u padang pasi bak bineh tekoa. watee awaknyan keuneuk beurangkat, le yosafat laju geupeusan lagee nyoe ubak awaknyan, "rakyat yehuda dan yerusalemi! peucaya kheueh ubak tuhan po teu allah gata, teuma gata hase tapeuteun droe. teurimong kheueh naseuhat nibak nabi-nabi gata, deungon na lageenyan gata meuhase!" oh ka lheureh geumurok pakat deungon rakyat, le raja laju geuyue ureueng nyang meuca-e seucara meupadu geusok peukayang seuragam nyang lazem jih teungui watee upacara khusus lam agama. ureueng meuca-e nyang meupadu su nyan haroh jimeubareh deungon lagak that dikeue baresan tantra sira meuca-e, "pujoe kheueh tuhan! gaseh gobnyan keukai abadi!" watee baresan meuca-e nyan ka jipeuphon seumurak sira meuca-e, tuhan laju geupeuna karu lamkawan sipa-i musoh nyang teungoh jimuprang. sipa-i amon dan moab laju jiprang tantra edom sampoe habeh hanco peue-peue nyang na. oh lheureh nyan awaknyan jibalang prang sidroe deungon nyang laen deungon gagah beurani. bak watee tantra yehuda ka trok ubak meunara jaga di padang pasi dan laju geukalon teumpat musoh, deuh laju geungieng manyet-manyet musoh nyang ka meutabu di ateuhe tanoh. hana meusidro pi nibak sipa-i musoh nyan nyang na udeb. dan yosafat deungon aneuek buah gobnyan laju geujak reubot peue mantong nyang na atra musoh. disinan meuteume laju beulatang peulara nyang le that, peuleungkapan, peukayan, dan barang-barang nyang meuhai yuem jih. oh ka lheureh geugumpoi barang-barang nyan na lhee uroe treb jih, mantong jai tai barang-barang nyang laen nyang hana jicok, akhejih teupaksa jitinggai disinan. bak uroe nyang keupeuet awaknyan banmandum ka meusapat di panton pujoe dan laju jipujoe tuhan ateuhe banmandum nyang ka jipeubuet. nyang kheueh sabab jih panton nyan teuboh nan "panton sumujoe". oh lheureh nyan le yosafat geupimpen laju banmandum pasokan gobnyan geupeuwoe u yerusalem deungon suka cita kareuna tuhan ka geupeutaloe mandum musoh gobnyan. oh watee ka trok u banda, awaknyan laju jimeubareh jijak u baet tuhan sira teuireng deungon keucapi dan beureuguih. oh lheurehnyan keujadian nyan banmandum nanggro nyang laen ka jiteuka takot watee jideungoe pakriban tuhan geupeutaloe bubena musoh-musoh israel. nyang kheueh sabab jih yosafat geumat peurintah deungon aman teuntram, dan tuhan geubri keu gobnyan keuadaan dame bansaboh nanggro. yosafat jeuet keuraja yehuda

watee umu 35 thon, dan gobnyan geumat peurintah di yerusalem 25 thon treb jih. ma gobnyan nan jih azuba aneuk silhi. saban cit lagee asa ureueng syiek gobnyan, yosafat geupeubuet peue mantong nyang jroh nibak mata tuhan. teuma teumpat-teumpat ureueng seumah beurala hana geupeuhanco. rakyat gohlohm cit sipeunoh ate jimeueabadat ubak allah indatu awaknyan. kisah nyang laen keuhai yosafat, phon awai sampoe akhe keurajeuen gobnyan, na teucetet lam riwayat yehu aneuk hanani, nyang na teuteuleh didalam kitab seujarah raja-raja israel. bak saboh watee raja yosafat di yehuda nyan na geupeuna hubungan meusahabat deungan ahazia raja israel, nyang le that jipeubuet buet nyang jeuhet. di peulabuhan ezion-geber awaknyan jipeugot laju kapai-kapai keungan meulayeue u tarsis. teuma nabi eliezer aneuk dodawa di banda maresa geupeuingat ubak yosafat, meunoe geupeugah, "sabab teungku amphon neupeuna hubungan meusahabat deungan ahazia, tuhan geupeuhanco buet teungku amphon." dan wateenyan cit teuma hanco kheueh bubena kapai-kapai nyang ka ltheueh geupeugot nyan akhejih geuhnyan hana hase le jimeulayeue. yosafat meuninggai donya teukubu laju nibak lampoh jrat raja-raja di banda nabi daud. yehoram aneuk agam gobnyan teubaiat jeuet keuraja keugeunantoe gobnyan. yehoram aneuk agam yosafat, raja yehuda, meusyedara namdroe nyang agam, syedara-syedara geuhnyan na kheueh: azarya, yehiel, zakharia, azariahu, mikhaail, dan sefaca. awaknyan meuteume meuh nyang jai that, pirak dan barung-barang nyang meuhai yuem nyang laen nibak ureueng syiek gobnyan, meunan cit maseng-maseng geubri teuma banda nyang meupageue ngon kuta di yehuda. teuma sabab yehoram aneuk agam nyang paleng tuha, jihnyan kheueh nyan ka geupeuteuntee le yosafat keu teubaiat jeuet keuraja. bak watee yehoram teurasa keuduedeukan gobnyan sibagoe raja ka lumpah that teuga, laju gobnyan geuyeu poh mate banmandum syedara geuh, meunan cit deungan meupadub droe peujabat manyang. yehoram jeuet keuraja watee meu-umu 32 thon, dan gobnyan geumat peurintah di yerusalem 8 thon treb jih. gobnyan geuseutot cara udeb raja ahab dan raja-raja israel nyang laen, sabab gobnyan meukawen deungan sidroe lamkawan aneuk inong ahab. gobnyan ka meudesya ubak tuhan, teuma tuhan hana geutem peubinasas raja nyang nibak keuturonan nabi daud sabab tuhan ka geumeujanji bahwa keuturonan nabi daud teutab jimat peurintah sibagoe raja. nibak peumeurintahan yehoram, edom laju beurontak ubak yehuda dan laju jipeudong keurajeuen keudroe. sabab nyan yehoram meunan cit deungan bubena panglima laju geuteubiet deungan geuritan-geuritan prang keu geujak seurang edom. awaknyan laju jikeupong le pasokan edom, teuma oh watee malam pasokan gobnyan geupeusak droe ubak pasokan edom sira geupeuplueng droe. phon wateenyan edom hana jitundok ubak yehuda. bak watee nyan cit teuma banda libna pi jibeurontak. banmandum nyan teujadi sabab yehoram ka geutinggai tuhan, allah nyang geuseumah le indatu gobnyan. seubalekji le gobnyan laju geupeudong teumpat-teumpat teuse-

umah beurala didaerah meugunong-gunong yehuda, dan le sabab nyan ka jeuet keusabab rakyat yehuda dan yerusalem meudesya ubak tuhan. dan yehoram laju meuteume sipucok surat nyang geu tuleh le nabi elia bak watee nabi nyan mantong udeb. lageenyoe su surat nyan, "tuhan, po teu allah nyang geuseumah le nabi daud, geuhukom teungku amphon sabab teungku amphon hana neuseutot langkah ureueng syiek dan abusyiek teungku amphon. sikeubit jih, teungku amphon udeb lagee raja-raja israel, dan le sabab nyan rakyat yehuda dan yerusalem hana seutia ubak po teu allah. teungku amphon ka neujak buet lagee raja ahab dan geunantoe-geunantoe gobnyan. teungku amphon ka neupeumate banmandum syedara teungku amphon, padahai awaknyan leubeh get nibak teungku amphon. hukoman nyang paleng brat nibak tuhan teuma geupeutreun ateuheh rakyat, aneuk-aneuk dan ureueng-ureueng bineo teungku amphon, dan geupeubinasas banmandum hareuta milek teungku amphon. teungku amphon keudroe pih keunong peunyakot usus nibak uroe keu uroe peunyakot nyan meutamah brat!" bak watee nyan na ureueng filistin dan ureueng arab nyang tinggai bakbinez teumpat tinggai ureueng sudan di daerah pante. tuhan laju geupeugrak ate ureueng-ureueng nyan mangat jikakprang yehoram. awaknyan laju jiprang yehuda, jimaaju laju ubak meuligoe raja, laju jiba banmandum aneuk dan peurumoh yehoram sibagoe tawanan, nyang tinggai ahazia aneuk agam gobnyan nyang paleng tulot. oh ka ltheueh banmandum keujadian nyan, tuhan laju geuhukom yehoram deungan bala peunyakot usus nyang hana hase puleh. rab dua thon peunyakot nyan maken treb maken parah akhe jih deungan that-that meudeurita raja yehoram pih meuninggai donya. rakyat hana le jipeukab apui unggun sibagoe turot meuduka cita lagee nyang ka ltheueh-ltheueh awaknyan peubuet keu indatu awaknyan. hana meusidroe manusia pih nyang meunyeusai ateuheh meuninggai gobnyan. gobnyan teutanom di banda nabi daud, teuma hana di lampoh jrat raja-raja. bak watee gobnyan jeuet keuraja, yehoram meu umu 32 thon, dan gobnyan geumat peurintah di yerusalem na 8 thon treb jih. bak saboh watee le saboh kawan ureueng-ureueng arab, banmandum aneuk agam yehoram, seulaen ahazia nyang tulot jipoh mate. sabab nyan peunduduek yerusalem jibaiat ahazia jeuet keuraja keugeunantoe ureueng syiek gobnyan. ahazia jeuet keuraja bak watee gobnyan meu umu 22 thon, dan gobnyan geumat peurintah di yerusalem cit sithon. meunan cit ahazia udeb gobnyan saban cit lagee keuluwarga raja ahab, sabab atalya ma gobnyan jipurunoe gobnyan mangat geupeubuet nyang jeuhet. atalya na kheueh putro raja ahab, cucoe omri raja israel. ahazia ka meudesya ubak tuhan lagee keuluwarga ahab, sabab awaknyan kheueh nyang jeuet keupeunaseuhat gobnyan oh ka ltheueh ayah gobnyan meuninggai donya. peunaseuhat-peunaseuhat nyan kheueh nyang peuceulaka gobnyan. ateuheh peue nyang ka jinaseuhat le awaknyan, gobnyan laju geumeugabong deungan yoram raja israel keu geujakmuprang geulawan hazael raja siria. awaknyan geumeu heungko

di ramot, daerah gilead. yoram keunong dan luka lam prang nyan, laju gobnyan geugisa u banda yizreel keu teupeu-ubat, dan ahazia laju geujak ngieng gobnyan disinan. po teu allah ka geupeuteuntee bahwa ahazia teuma teuka ajai geuh watee geujak saweu yoram. lam kunjongan nyan ahazia dan yoram meurmupok laju lawan nibak sidroe ureueng agam nyan nan jih yehu aneuek nimsi, nyan ka geupileh le tuhan keu geupeubinasa keuluwarga raja ahab. teungoh yehu geupeubuet hukومان tuhan ateh keuluwarga nyan, gobnyan laju meurmupok deungon saboh kawan ureueng-ureueng rayeuk yehuda dan aneuek keumuen-aneuek keumuen ahazia nyan roh sajan nibak kunjongan nyan. le yehu laju geupoh mate awaknyan banmandum. oh ltheuhnyan geuyue laju ureueng laen jijak mita ahazia nyan bak watee nyan teungoh geumusom di samaria. oh meuteume ngon ahazia, gobnyan jiba laju ubak yehu dan laju jipoh mate. bahpi lalee nyan gobnyan geukubu cit le awaknyan sabab awaknyan jihoreumat keu raja yosafat abusyiek gobnyan nyan meungabdi ubak tuhan deungon sipeunoh ate. nibak keuluwarga ahazia hana nyan hase jicok keurajeuen nyan. bak watee geuteupeue le atalya bahwa aneuek gobnyan raja ahazia ka wafeuet, gobnyan laju geupeurintah bahwa banmandum keuluwarga raja nyan na di yehuda teupoh mate. ahazia na sidroe syedara geuh nyan inong nan jih yoseba, nyan meukawen deungon sidroe teungku imeum nan geuh yoyada. deungon seungab-seungab yoseba geucok laju sidroe aneuek agam ahazia nyan nan jih yoas lamkawan aneuek-aneuek raja nyan jikeuneukpoh mate le atalya. aneuek nyan meusajan deungon deundayang jih laju geusom lam saboh bilek di baet tuhan. meunan kheueh cara jih yoseba geupeuseulamat aneuek nyan sampoe hana jiteume poh mate le atalya. na nam thon treb jih yoas geusom di baet tuhan dan atalya teutab geumat keurajeuen sibagoe ratu. bak thon nyan keutujoh teungku imeum yoyada ka geucok keuputosan keuneuk meutindak. gobnyan laju geumeupakat deungon limong droe peuwira, na kheueh azarya aneuek yero-ham, ismail aneuek yohanan, azarya aneuek obed, maaseya aneuek adaya, dan elisafat aneuek zikhri. awaknyan jijak laju u banmandum banda nyan na di yehuda, dan laju jipeusapat bubena ureueng lewi dan banmandum ulee kawom, banmandum awaknyan geuba u yerusalem. awaknyan jikeubah laju di baet tuhan, dan geuitak janji deungon yoas, aneuek agam raja nyan. yoyada geupeugah ubak awaknyan, "nyoe kheueh aneuek agam areuwah raja ahazia! gobnyan jinoenyoe haroh geu-ek takhta, sabab tuhan ka geumeujanji bahwa keuturonan nabi daud teutab geumat peurintah. nyoe kheueh nyan haroh geutanyoe peubuet: meunyo ka seuleusoe di teungku imeum dan ureueng lewi geumeutugaih nibak uroe sabat, awaknyan hana jeuet geuwu. siper lhee nibak awaknyan haroh tinggai dan geujaga pintoe-pintoe geureubang baet tuhan, siper lhee teuk tinggai di meuligoe raja, dan nyan leubeh nibak nyan jijaga di babah pintoe geureubang dasai. banmandum rakyat haroh jimeugumpoi nibak leuen baet tuhan. hana meusidroe pih nyan jeuet jitamong

u dalam geudong baet tuhan seulaen le teungku imeum dan ureueng lewi nyan teungoh meutugaih. awaknyan jeuet geutamong sabab awaknyan ka teupeukhusos keu tuhan. ureueng-ureueng nyan laen haroh jitaat ubak peue mantong nyan geupeuget peuraturan le tuhan dan tinggai diluwa. ureueng-ureueng lewi haroh geudong meukeulileng ban silingka raja siab deungon peudeueng nyan ka teusuit didalam sarong, dan geukawai gobnyan ho mantong geuhnyan geujak. so nyan jiseuha keuneuk jitamong u dalam baet tuhan, ureueng nyan haroh teupoh mate." peurintah yoyada nyan geupeubuet banmandum le ureueng-ureueng lewi dan rakyat yehuda. ureueng-ureueng nyan ka ltheuh tugaih nibak uroe sabat hana jeuet geuwu. le uleebalang peuwira ka hase geuato bah kheueh nyan keu ureueng-ureueng nyan ka seuleusoe meutugaih meunan cit keu ureueng nyan ban teuka keuneuk meutugaih. keumandum uleebalang nyan yoyada laju geubagi-bagi kapak dan peurisai atra nabi daud nyan na teukeubah di baet tuhan. meunan cit le yoyada geukeubah ureueng-ureueng gobnyan deungon peudeueng nyan ka siab teusuit lam sarong ban sikeulileng bagian keue baet tuhan mangat teulindong raja. oh ltheuhnyan le yoyada laju geupeuteubiet yoas u luwa, laju geupeuseuon mahkota di ateh ulee gobnyan, dan geuseurah ubak gobnyan kitab hukom po teu allah. meunan kheueh cara jih yoas teubaiat jeuet keuraja. oh ltheuhnyan le teungku imeum yoyada deungon aneuek-aneuek gobnyan laju geuro minyeuk upacara peunobatan u ateh yoas, dan banmandum ureueng nyan na disinan jikuk, "udeb raja!" atalya geudeungoe rakyat sira jiseumurak jimeuhoi ngon ji pujoe-pujoe raja. bagaih-bagaih geuhnyan geujak u baet tuhan nibak teumpat rakyatba ka meugumpoi disinan. deuh laju geungieng raja nyan baro nyan teudong di babah pintoe tamong u baet tuhan, nibak teumpat gobnyan teubaiat, jikeulileng le bubena uleebalang dan ureueng yueb beureuguih. banmandum rakyat meusurak meuhubo sira jiyueb beureuguih, dan le ureueng peumeuen musik di baet tuhan geupeumeuriah lom peurayaan nyan deungon alat-alat musik geuh. deungon ate nyan peudeh atalya laju geupriek peukayan gobnyan sira geukliek, "khianat! khianat!" yoyada hana geubri idhin atalya teupoh mate dikeue baet tuhan, teuma gobnyan laju geupeugah ubak mandum uleebalang, "gataba laju jihnyan rot barasan peungawai, dan tapoh mate laju somantong nyan jiseuha jipeuseulamat gobnyan." awaknyan laju jidrob gobnyan, laju jiba ubak meuligoe. disinan gobnyan laju jipoh mate dikeue pintoe geureubang guda. teungku imeum yoyada laju geupakat raja yoas dan banmandum rakyat geupeugot peujanjian bahwa awaknyan teuma jeuet keu umat tuhan. oh ltheuhnyan awaknyan laju jijak seureuban dan jireuloh rumoh beurala baal. meunan cit deungon miseubah dan patong-patong nyan na disinan ka habeh geupeuhanco, dan si matan, teungku imeum baal nyan laju jipoh mate dikeue miseubah-miseubah nyan. le yoyada geujak tugaih ubak teungku-teungku imeum dan ureueng lewi mangat geu-uroih bubena buet di dalam baet tuhan

meunurot peumbagian keureuja yang ka geubagi le nabi daud. awaknyan haroh geupeuseumah keureubeuen yang teutot ubak tuhan – nyang sisuai deungon hukom-hukom nabi musa – deungon peurayaan dan ca-e-ca-e lagee nyang ka lheueh geuato le nabi daud. nibak tieb-tieb babah pintoe geureubang baet tuhan, yoyada laju geukeubah ulee balang keu nyang jaga mangat ureueng nyang hana patot jiseumah tuhan bek jitamong. bubena uleebalang, bubena tukoihi masyarakat, mandum peujabat peumeurintah, dan banmandum rakyat jiseutot yoyada jijak arak raja yoas nibak baet tuhan ubak meuligoe. awaknyan jitamong rot babah pintoe geureubang nyang paleng phon dan laju raja geuduek di ateuh singgahsana. siluroih rakyat geumbira, rakyat pi ka aman dan atalya ka teuma teupoh mate. yoas meu-umu 7 thon bak watee gobnyan jeuet keu raja yehuda, dan gobnyan geumat peurintah di yerusalem peuet ploh thon treb jih. ma gobnyan nan geuh zibya asai nibak banda bersyeba. yoh mantong udeb imeum yoyada, yoas geupeubuet hai-hai nyang galak ate tuhan. yoyada geupileh dua droe ureueng inong keupeurumoh yoas, dan nibak awaknyan na geumeu aneuek agam ngon aneuek inong. oh ka geumat peurintah na padub watee treb jih, yoas geucok keuputusan bahwa gobnyan keuneuk geupeu baro baet tuhan. bubena imeum dan ureueng-ureueng lewi geupeurintah laju mangat geujak ubak peunduduek banda nyang na di yehuda jeuet geupeusapat peng nibak rakyatba mangat jeuet hase teupeubar baro baet tuhan tieb-tieb thon. gobnyan geuyue ubak awaknyan bubagaih jijak peubuet peurintah nyan, teuma di ureueng-ureueng lewi nyan jimeumeulet-meulet. le sabab nyan gobnyan laju geutawok imeum yoyada, peumimpin awaknyan, laju geupeugah, "nabi musa hamba tuhan nyan kon ka geuyue bayue cukee bak rakyat mangat jeuet keubiaya baet tuhan? jinoe, pakon ureueng-ureueng lewi nyan hana bapak paksa keu jijak peusapat cukee nibak rakyat di yehuda dan yerusalem?" (ureueng-ureueng atalya, inong jeuhet nyan, ka ji peurusak baet tuhan, dan lumphah that jai barang-barang nyang teupeukhusus keu allah ka jipeuguna keu jiseumah baal). le sabab nyan raja laju geupeurintah mangat jeuet ureueng lewi jipeuget saboh peuto peng dan atra nyan jikeubah bak babah pintoe geureubang baet tuhan. bansaboh nanggroe yerusalem dan ngon nanggroe yehuda laju geupeumaklum bahwa banmandum rakyat haroh jibayue cukee keu tuhan, lagee nyang ka geupeuwajeb le nabi musa. deungon na maklumat nyan lumphah that galak ate rakyat dan peumimpin-peumimpin awaknyan. meuron-ron awaknyan jijak peutamong peng cukee lam peuto nyan. tieb-tieb uroe peuto-peuto nyan jiba le ureueng-ureueng lewi ubak peugawee raja keu teupareksa. meunyoe peuto nyan ka peunoh seukeutareh nanggroe dan waki imeum agong geupeuteubiet peng dan oh lheueh nyan peuto nyan geujak keubah lom ubak teupat sot. meunan kheueh nyang awaknyan peubuet tieb-tieb uroe, dan jai lumphah na peng nyang ka teupeusapat. oh lheueh nyan le raja dan yoyada peng nyang ka meusapat nyan laju geujok ubak nyang jeuet keu ulee bak

seumeuget baet tuhan nyan. laju le ureueng nyang geubayue upah keu utoh batee, utoh kayee, dan utoh logam nyang seumeugetnyan. deungon na lagee nyan jipeuphon kheueh meubuet le utoh-utuh nyan keu jipeuget baet tuhan. awaknyan banmandum meubuet sampoe baet tuhan ka jeuet keukukoh dan lagak lagee nyang ka-ka. oh ka seuleuseoe buet awaknyan, meuh dan pirak nyang mantong leubeh laju jiseurah ubak raja dan yoyada. laju meuh ngon pirak nyang geupeuguna keu teupeuget peukakaih-peukakaih baet tuhan, nyang teupeuget nyan na kheueh: alat-alat keu upacara iebadat, keu keureubeuen nyang teutot, pireng-pireng keu keumeunyan, dan cambong-cambong. yohmantong udeb imeum yoyada, keureubeuen nyang teutot teutab teupeuseumah di baet tuhan. yoyada geubri panyang umu le tuhan sampoe 130 thon baro kheueh gobnyan meuninggai donya. gobnyan teupeukubu nibak jrat raja-raja di banda nabi daud sibagoe peunghargaan jasa-jasa gobnyan ubak po teu allah, baet tuhan dan keu umat israel. oh ka lheueh meuninggai yoyada nyan, yoas laju jibujuk ngon jirayu le peumimpin-peumimpin yehuda akhejih gobnyan hana le geupako ubak ajaran-ajaran nyang geupeurunoe le yoyada. deungon na lagee nyan rakyat ka hana le ji iebadat di baet tuhan, allah indatu awaknyan, nyang jiseumah na kheueh patong beurala dan patong-patong dewi asyera. deungon lagee nyan awaknyan ka meudesya akhejih po teu allah beungeh ubak yehuda dan yerusalem. tuhan laju geu kirem nabi-nabi keugeujak teugah awaknyan mangat jiwoe meungabdi ubak tuhan, teuma rakyat teutab hana jitem deungoe. watee nyan teuka kheueh roh allah jitron jikuasa nabi zakharia aneuek imeum yoyada. nabi zakharia geumeuhadab ukeue rakyat ba laju geupeugah, "tuhan po teu allah meufureuman, 'pakon gata hana taat ubak peupeue nyang ulon peurintah dan gata peuceulaka droe gata keudroe. gata hana tapakoe ubak ulon, teuma di ulon pih hana lon pakoe ubak gata!' " teuma di rakyat bukan jideungoe teuma jimeurokpakat keuneuk jiheuntam nabi zakharia, meunan cit raja yoas pih roh lamkawan nyan. gobnyan hana geuingat ubak jasa-jasa dan keuseutiaan yoyada, ayah nabi zakharia nyan. ateueh peurintah raja, nabi zakharia jigaulawa ngon batee sampoe mate di seuramoe baet tuhan. watee keuneuk meuninggai, nabi zakharia geupeugah, "seumoga tuhan geukalon buet gata nyoe dan teuma geubalahi!" bak thon nyan cit teuma, watee musem meungat, sipa-i siria jiprang yehuda dan yerusalem. bubena peumimpin awaknyan habeh jipoh mate meunan cit atra ureueng yehuda ngon yerusalem nyan habeh jicok sibagoe hareuta rampasan prang dan laju jiba u banda damsik. sipa-i siria nyan hana le jeumeulah jih, cit bacut, teuma le tuhan geupeubiyeu awaknyan jipeutaloe tantra yehuda nyang leubeh le dan rayeuk, sabab ureueng yehuda hana jipako ubak tuhan allah indatu awaknyan. deungon cara nyan tuhan ka geuhukom raja yoas. raja yoas luka brat that. oh ka lheueh sidadu musoh jijak, dua droe peugawee gobnyan jimupakat. awaknyan laju jipoh mate gobnyan bak teupat eh geuh keudroe sibagoe beunalahi ateueh

jipoh mate aneuk imeum yoyada. raja yoas jikubu nibak banda nabi daud, teuma kon lam lampoh jrat raja-raja. (ureueng-ureueng yang mupakat keuneuk jijakpoh mate gobnyan na kheueh zabad aneuk simeat ureueng inong amon, dan yozabad aneuk simrit ureueng inong moab.) kisah keuhai aneuk-aneuk yoas, keuhai ramaian-ramaian yang hana get keuhai gobnyan, keuhai pakriban gobnyan geupeuguet baet tuhan, banmandum nyan ka teutuleh lam kitab keuteurangan kitab raja-raja. amazia, aneuk agam yoas, jeuet keu raja keugeunantoe ayah geuh. amazia teubaiat jeuet keuraja watee umu geuh 25 thon, dan gobnyan geumat peurintah di yersusalem 29 thon treb jih. nan ma gobnyan yoadan asai yersusalem. amazia geupeubuet buet nyang galak that ate tuhan, teuma buet nyang geupeubuet nyan siteungoh ate. teuma meunan ka kong keududuekan gobnyan, laju geuhukom mate bubena peugawee nyang kajipoh mate ureueng syiek gobnyan. teuma aneuk-aneuk peugawee nyang geupoh mate nyan hana geupoh sabab gobnyan taat that ubak peurintah tuhan lagee na teutuleh lam kitab nabi musa lageenyoe, "bek neuhukom mate ureueng syiek sidroe-sidroe ureueng sabab buet nyang jeuhet nyang jipeubuet le aneuk-aneuk jih, dan bek teuma neuhukom mate aneuk-aneuk jih sabab buet nyang jeuhet nyang jipeubuet le ureueng syiek jih. somantong ureueng jeuet teuhukom mate meunyoe buet nyang jeuhet nyan jipeubuet keudroe." raja amazia laju geupesapat banmandum ureueng nibak sukee yehuda dan sukee benyamin oh ltheuhnyan geuyue dong meuriti meunurot kawom maseng-maseng, geupimpin le uleebalang keumeundan pasokan siribee dan uleebalang keumeundan pasokan sireutoih. oh ltheuhnyan geupileh ureueng-ureueng nyang meu-umu 20 thon u ateuh nyang ek jimpurang dan carong jipeuguna kapak dan peurisai. jeumeulah awaknyan na 300.000 droe. seulaen nibak tantra nyang kana geusiwa teuma na 100.000 droe sipa-i nyang laen nibak nanggroe israel deungon yuem siwa jih kira-kira 3.400 kilogram pirak. teuma na sidroe nabi geujak ubak raja sira geupeugah lagee nyoe, "bek gata cok hai raja sipa-i ureueng israel nyan, sabab tuhan hana geutulong umat israel nyang na di utara. teuma meunoye tacok cit sipa-i israel nyan, po teu allah geupeubiyeu teungku amphon taloe dimideuen prang bahpi sipa-i teungku amphon teuga lom ngon beurani. sabab allah mantong kheueh nyang meukuasa nyang bri taloe atawa meunang." "teuma pakriban deungon pirak nyang ka ulon bri ubak awaknyan?" geutanyong le amazia. geujawueb le nabi nyan, "tuhan hase geujok pulang nyang laen keu teungku amphon nyang leubeh le nibak nyang ka neubri nyan!" le sababnyan amazia laju geupeuleuh sipa-i-sipa-i nyang ka geusiwa nyan dan geuyuewoe lom u nanggroe jih. awaknyan pi laju jiwo, teuma deungon ie muka nyang beunghet that. amazia geupeubeurani droe dan geuba laju tantra gobnyan u panton asin. disinan awaknyan laju jimeuheungko sampoe mate 10.000 droe sipa-i edom. siploh ribee droe nyang laen geudrob. awaknyan nyang keunong drob nyan laju geuba u gunong batee di banda sela

oh trok keunan laju geurhom lam barieh gunong akhejih banmandum sipa-i nyan mate. teuma oh ltheuhnyan sipa-i-sipa-i israel nyang ka geuyuewoe le raja amazia, dan hana geubri idhin keu jijak lamprang, laju jijak prang banda-banda yehuda lamkawan samaria dan bet-horon. awaknyan laju jipoh mate na 3.000 droe ureueng dan hareuta nyang na di sinan pi laju jireupah. oh ka ltheueh geupeutaloe sipa-i edom, amazia laju geuwu sira geupeuwo patong-patong beurala atra edom laju patong nyan geukeubah di yehuda. le gobnyan geutot keumeunyan keu patong-patong nyan sira geuseumah. sabab buet geuhnyan sampoe tuhan teuka meureuka. tuhan laju geu kirem sidroe nabi ubak raja amazia. nabi nyan geupeugah lagee nyoe, "pakon teungku amphon neuseumah dewa bansa laen nyang ka teuntée dewa-dewa nyan hana hase jipeuseulamat bansa droe jih nibak keukuasaan teungku amphon?" "seungab," kheun raja amazia ubak nabi nyan sira geudot, "meunyoe hana neutem seungab kamoe peumate droeneueh! hantom na kamoe baiat gata jeuet keu ureueng bri naseuhat raja!" le sababnyan nabi nyan pi seungab, teuma sigohlom jih gobnyan geupeugah, "jinoo ka ulon teupeue bahwa tuhan po teu allah geukeuneuk peubinasa teungku amphon kareuna buet teungku amphon nyan, sabab teungku amphon hana neupako naseuhat ulon." amazia raja di nanggroe yehuda nyan meusajan deungon peunaseuhat gobnyan ka geumeukumplot keuneukjak lawan ureueng israel. gobnyan geukirem utosan ubak yoas raja israel, aneuk yoahas, cucoe yehu, mangat geulawan gobnyan di mideuen prang. teuma le raja yoas laju geubalahi haba lagee nyoe, "bak saboh watee singoh seumak nyang meuduro nyang na di ateueh gunong-gunong libanon jikirem tuntotan lagee nyoe keu bak kayee ceumara, 'hai bak kayee ceumara, tabri kheueh aneuk dara gata keu aneuk ulon mangat jeuet keupeurumoh jih.' oh ltheuhnyan lewat kheueh ret nyan saboh beulatang uteuen jijak gilo-gilo tamah meuduro nyan. gata, amazia, raya that haba tapeugah gata ka tapeutaloe ureueng edom, teuma leubeh get gata tatinggai mantong dirumoh. keupeue tamita soai nyang na teupeuceulaka droe keudroe gata dan rakyat gata?" teuma le amazia, raja yehuda nyan hana geupako mubacut pi haba nyang geupeugah le yoas raja israel nyan. dan keubit ka keuheundak po teu allah mangat amazia teupeutaloe sabab gobnyan ka geuseumah patong beurala ureueng edom. sabab nyan yoas laju geubeurangkut deungon aneuk buah gobnyan u bet-semes dan laju geumuprang deungon raja amazia disinan. lam prang nyan sipa-i yehuda laju taloe dan bubena sipa-i gobnyan habeh jipeuplueng droe jiwo u rumoh jih maseng-maseng. yoas laju geudrob amazia geuba laju u yersusalem, laju geureuloih banmandum binteh beuton banda nyan nyang panyang jih leubeh kureueng na 200 metee, phon nibak babah pintoe geureubang efraim trok u babah pintoe geureubang sudut. banmandum meuh dan pirak meunan cit banmandum peukakaih nyang meuteume di baet tuhan dan nyang na dimiyueb peungawasan obed-edom, meunan cit banmandum hareuta beunda meuligoe, meusajan deungon

meupadubdroe sandeura jiba banmandum le yoas u samaria. oh ka meuninggai donya yoas raja israel nyan, amazia raja yehuda mantong udeb 15 thon teuk. phon wateenyan amazia geutinggi tuhan, na ureueng laen jimeukumplot keuneuk jipoh mate gobnyan di yerusalem. sabab nyan, gobnyan laju geuplueng u banda lakhis, teuma le musoh-musoh gobnyan laju jipeucrok keunan oh ban meuteume laju jipoh mate. manyet gobnyan jiba deungon guda u yerusalem, laju jikubu nibak lampoh jrati raja-raja di banda nabi daud. kisah nyang laen keuhai raja amazia nyoe, sampoe ubak akhe keurajeuen gobnyan ka teucetet lam kitab seujarah raja-raja yehuda dan israel. oh ka ltheuh amazia meuninggai donya, banmandum rakyat yehuda jipileh uzia aneuk agam gobnyan jeuet keu raja. bak watee nyan uzia nyan meu-umu 16 thon. ma gobnyan na geuh yekholya, inong yerusalem. uzia geumat peurintah di yerusalem 52 thon treb jih. gobnyan kheueh nyang reubot dan nyang peugot lom banda elot. saban cit lagee ayah gobnyan, uzia pi geupeubuet buet nyang that galak ate tuhan. nabi zakharia na kheueh nyang bri naseuhat keuhai rohani gobnyan. yohmantong nabi zakharia udeb, uzia seutia that geumeu ibadat ubak tuhan sampoe tuhan geubri beureukat keu gobnyan. uzia geumuprang geulawan ureueng filistin. laju geureuloh bubena beuton-beuton banda gat, yabne, dan asdod, oh ltheuh nyan laju geupeudong banda-banda nyang meubeuton bak bineh banda asdod dan daerah laen di filistin. po teu allah geutulong gobnyan keu teupeutaloe bansa filistin, dan ureueng arab nyang tinggai di gur-baal meunan cit deungon ureueng meunim. ureueng amon jibayeue cukee ubak uzia. gobnyan maken meukuasa akhejih nan gobnyan maken meugah sampoe u nanggroe meuse. keu teupeukong banda yerusalem, uzia laju geupeudong meunara di banda pintoe geureubang sudut, pintoe geureubang panton dan di teumpat wet beuton. meunan cit le gobnyan geupeudong meunara-meunara meukuta di daerah padang, dan geukueh mon-mon nyang le sabab beulatang peulara gobnyan jai lumpah na, bah kheueh nyan di ateuah darat nyang manyang meunan cit ateuah darat nyang miyueb dibagian barat. sabab gobnyan get that geupeurati bak buet meutani, teuma gobnyan laju geubuka lampoh anggo bak daerah gunong-gunong ngon bak tanoh-tanoh nyang gumbo, banmandum buet geuhnyan geupeuguna ureueng meubuet nyang rame. meunan cit uzia na tantra geuh nyang lumpah jai dan sabe lam siab pajan mantong keuneuk muprang. tantra nyan na lam baresan-baresan nyang jeumeulah jih jicetet le dua droe seukeutearah raja, awaknyan na kheueh yeiel dan maaseya dimiyueb pimpunan hananya, sidroe nibak seutaf raja. banmandum angkatan prang nyan teubagi-bagi teuma lam padubboh bagian, bagian nyan na kheueh, 307.500 sipa-i jipimpen le 2.600 uleebalang. awaknyan banmandum na keumampuan nyang lumpah rayeuk keu jimuprang dan jitulong raja teupeutaloe musoh. uzia jipeuleungkab teuma sipa-i geuhnyan deungon peuraisi, kapak, tupi waja, bajee beuso, ali-ali dan aneuk panah, meunan cit deungon batee pupo

geulawa. di yerusalem le tumpeun-tumpeun nyang peuet sinjata gobnyan ka teuma jicibta saboh beunda pakriban cara teupeuleueh aneuk panah dan batee rayeuk lam meunara dan sagoe-sagoe beuton banda. uzia meusyehu dipat mantong, dan gobnyan jeuet keu raja nyang lumpah that meukuasa sabab po teu allah geutulong gobnyan. oh ka raja uzia teuga, gobnyan ka jeuet keu raja nyang sombong, dan nyan kheueh jeuet keusabab gobnyan hanco. gobnyan geuiengkeue ubak peurintah tuhan allah gobnyan sabab geutamong lam baet tuhan keu geujak tot keumeunyan ateuheh miseubah keumeunyan. teuma di imeum azarya meusajan ngon 80 droe imeum nyang laen nyang teuga-teuga lom beuhe-beuhe geuseutot gobnyan keu geusangah buet nyang lagee nyan. awaknyan jipeugah, "amphon nyang mulia! amphon hana hak neutot keumeunyan keu tuhan. nyan tugaih imeum-imeum keuturonan nabi harun, sabab awaknyan kheueh nyang ka teupeukhusus bak buet lagee nyan. bubagaih kheueh amphon neutinggai teumpat nyang suci nyoe! amphon ka neulawan tuhan allah, dan hana le meuteume restu nibak gobnyan." bak watee nyan raja uzia teungoh geudong bak bineh dupa baet tuhan deungon alat tot dupa bak jaroe gobnyan. gobnyan laju beuehng ubak imeum-imeum nyan, dan deungon hana teusangka-sangka jiteuka peunyakot kulet nyang lumpah parah bak keuneng gobnyan. azarya dan imeum-imeum nyang laen geungieng ateuheh gobnyan dan lumpah teukeujot, laju geupaksa mangat raja nyan geutinggi laju baet tuhan. bagaih-bagaih gobnyan geuteubiet sabab tuhan ka geuhukom gobnyan. sampoe an meuninggai raja uzia nyan peunyakot gobnyan hana puleh-puleh. gobnyan jipeuaseng bak saboh rumoh dan hana teupeu idhin le geutamong lam baet tuhan. gobnyan ka teupeubeubaih nibak mandum tugaih-tugaih geuh, dan yotam aneuk agam gobnyan nyang mat peurintah ateuheh rakyat sibagoe waki gobnyan. kisah nyang laen keuhai raja uzia, ka geucetet le nabi yesaya aneuk amos. watee gobnyan meuninggai donya, uzia teupeukubu bak tanoh bineh jrati raja-raja, teuma bukan bak jrati nyan keudroe, sabab gobnyan meupeunyakot nyang parah lumpah na. yotam aneuk gobnyan nyang agam jeuet keu raja geunantoe gobnyan. yotam jeuet keu raja lam umu 25 thon, dan gobnyan geumat peurintah di yerusalem 16 thon treb jih. nan ma gobnyan na kheueh yerusa aneuk zadok. yotam galak that ate tuhan lagee ayah gobnyan uzia. teuma gobnyan hana geutot keumeunyan bak baet tuhan lagee nyang geupeubuet le ureueng syiek geuh. bahpi lagee nyan, rakyat teutab jipeubuet desya. yotam kheueh nyang peugot pintoe geureubang utara di baet tuhan, dan nyang peukong beuton yerusalem bak daerah nyang teupeugah ofel. 4 gobnyan nyang peudong banda-banda di gunong-gunong yehuda dan kuta-kuta meunan cit deungon meunara-meunara lam gle. gobnyan geujak prang dan geupeutaloe raja amon meusajan ngon sipa-i raja nyan, laju geupaksa ureueng amon beujibayeue cukee. tieb-tieb thon lhee thon treb jih meuturot-turot awaknyan haroh jibayeue 3.400 kilogram pirak, dua jeuneh gandom, maseng-maseng 1.000 ton. yotam meutamah-tamah meukuasa sabab

gobnyan taat ngon seutia ubak tuhan allah. hai-hai nyang laen lam peumeurintahan yotam, keuhai muprang dan siasat-siasat jih, banmandum nyan ka teucetet lam kitab seujarah raja-raja israel dan yehuda. yotam meu-umu 25 thon bak watee gobnyan jeuet keu raja, dan gobnyan geumat peurintah di yerusalem treb jih 16 thon. gobnyan meuinggai donya dan teukubu di banda nabi daud, dan aneuk agam gobnyan nyang nan jih ahas teubaiat jeuet keu raja geunantoe gobnyan. ahas jeuet keu raja lam umu 20 thon, dan gobnyan geumat peurintah di yerusalem 16 thon treb jih. gobnyan hana geuseutot teuladan nyang na bak nabi daud, indatu gobnyan, nyang geupeubuet buet nyang hana galak ate tuhan. gobnyan udeb lagee raja-raja israel nyang geuyue ubak ureueng laen mangat jiteupeuget patong-patong baal nibak logam, dan geutot keumeunyan di panton hinom. aneuk gobnyan nyang agam pih jipeuseumah sibagoe keureubeuen keu beurala, meunurot keubiasaan nyang brok nyang jipeubuet le ureueng nyang ka geu use le tuhan di nanggroe kanaan watee ureueng israel jitamong lam nanggroe nyan. ahas geupeuseumah keureubeuen dan geutot keumeunyan bak teupat-teupat ureueng seumah dewa bak gunung-gunong dan nibak bak kayee nyang luhu. sabab raja ahas meudesya, tuhan allah geupeubiyeu gobnyan jipeutaloe le raja siria dan lam jeumeulah nyang le ureueng-ureueng yehuda nyan jiba u damsyik sibagoe tawanan prang. meunan cit tuhan geupeubiyeu awaknyan jipeutaloe le raja pekah aneuk remalya di israel, nyang lam siuroe mantong jipoh mate 120.000 droe sipa-i yehuda nyang beuhe-beuhe. tuhan po teu allah indatu awaknyan geupeubiyeu banmandum nyan teujadi, sabab rakyat yehuda hana jipako ubak tuhan. aneuk agam ahas, nyang nan geuh maaseya jipoh mate le zikhri sidroe peuwira israel. dan zikhri nyan jipoh mate teuma azrikam nyang uroh meuligoe raja, dan elkana, jaroe uneuen raja. bahpi ureueng-ureueng yehuda na kheueh saban ngon bansa israel, teuma le tantra israel hana jipako teutab jiteun 200.000 droe ureueng inong dan aneuk banyak, laju jiangkot awaknyan u samaria meusajan-sajan ngon barang-barang nyang jireupah di mideuen prang. na sidroe nabi tuhan nyang nan geuh oded tinggai bak banda samaria. bak watee tantra israel jiwoe jiba ureueng nyang teuteuen lam mideuen prang nibak yehuda, oded geujak meurumpok ngon awaknyan watee awaknyan keuneuk tamong lam banda. nabi nyan geupeugah, "gata nyoe ka gata peutaloe yehuda sabab tuhan allah indatu gata beungeh keu awaknyan. teuma tuhan geudeungoe pakriban keujam jih gata watee gata poh mate sidadu yehuda nyan. dan bak saat nyoe ureueng-ureueng yerusalem dan yehuda keuneuk gata peujeuet keu namiet-namiet gata! peu kheueh hana gata teupeue bahwa gata pih ka gata peubuet desya teuhadab tuhan allah gata? deungoe lon! lamkawan ureueng nyang gata teuen nyoe na roh syedara-syedara. jadi, gata yue kheueh awaknyan mangat jiwoe. meunyoe han, tuhan beungeh dan geuhukom gata." na peuet droe ureueng patot-patot nyang jeuet keumeumimpin bansa israel jibeudoh, awaknyan na kheueh azarya aneuk

yohanam, berekhyia aneuk mesilemot, yehizkia aneuk salum, dan amasa aneuk hadlai, mandum awaknyan geulawan tantra nyang teungoh woe nyan. awaknyan geupeugah, "bek gata ba mandum ureueng nyang gata teun lam prang nyan keunoe! geutanyoe ka meudesya ubak tuhan, dan desya-desya geutanyoe ka jai lumpah na keu geuhukom. jinoenyoe gata keuneuk peubuet sapeue-sapeue nyang teutamah buet-buet geutanyoe nyang salah." teuma watee nyan cit teuma banmandum tantra nyan laju jijok bubena tawanan ngon barang-barang nyang jireupah ubak rakyat dan peumimpin-peumimpin jih. oh ltheueh nyan ban peuet droe ureueng patot-patot bansa israel nyan laju geubudoh dan geu-uroih bubena ureueng tawanan nyan. le awak nyan peuet droe nyan geubagi-bagi laju peukayan wase reupahan le sidadu israel nyan ubak ureueng-ureueng nyang teuteun di mideuen prang nyan. meunan cit awaknyan bagi sipatu, peunajoh dan ie jieb. ureueng nyan teuteuen nyang luka-luka laju geuboh ubat ngon minyeuk zaiton, nyang ka leumoh that watee jijak, geupeu ek atueh keuleudee, dan baro kheueh banmandum ureueng nyang teuteun nyan teuba u yerikho, banda bak-bak kuruma, mangat jeuet jiwoe u gampong awaknyan di yehuda. oh ka ltheueh nyan ureueng israel laju geuwoe u samaria. ureueng-ureueng edom jipeuphon prang lom yehuda dan jiteuen laju ureueng yehuda nyang lumpah that jai. sabab nyan le raja ahas laju geulakee ubak tiglat-pileser, raja asyur, mangat geukirem bantuan. bak watee nyan cit teuma di ureueng-ureueng filistin teungoh jiprang banda-banda bak daerah kaki gunung siblaih ubarat, dan siblaih seulatan yehuda. awaknyan laju jireupah banda bet-emes, ayalon, dan gederot, meunan cit banda sokho, timna, dan gomzo dan gampong-gampong nyang na bak bineh banda nyang lhee boh nyan, dan awaknyan pih laju tinggai teutab disinan. sabab ahas raja yehuda geutinggai laju tuhan dan hana geupeurintah rakyat lagee nyang sibeuna jih, teuma tuhan laju geupeutron keususahan atueh yehuda. raja asyur nyan teuka bukan geujak tulang ahas, teuma keu geujak peususah gobnyan. teupaksa ahas geucok meuh di baet tuhan, nibak meuligoe, dan nibak rumah-rumah bubena peumimpin rakyat, laju geujok atranyan ubak raja asyur. teuma nyan pih hana meuguna nibak gobnyan. lam keudaraan nyang lumpah susah nyan, ahas meutamah-tamah meudesya ubak tuhan. gobnyan ka geupeuceulaka droe keudroe meunan cit rakyat droe geuh sabab ka geupeuseumah keureubeuen ubak dewa-dewa ureueng siria nyang ka jipeutaloe gobnyan. gobnyan geupike meunyoe, "dewa-dewa siria ka jibantu raja-raja siria, jadi meunyoe ulon peuseumah keureubeuen ubak dewa-dewa nyan, mungen ulon nyoe jitulung cit teuma." oh ltheueh nyan gobnyan geucok banmandum peukakaih baet tuhan laju geupeuhanco. oh ltheueh nyan baet tuhan nyan pih jitot, dan geupeudong laju miseubah-miseubah nyang lumpah jai bansaboh nanggroe yerusalem. bak tieb-tieb gampong dan banda di yehuda laju geupeudong teupat seumah beurala keu teupat tot keumeunyan lam dupa keu dewa-dewa bansa laen. deungon lagee nyan, ka geupeujeuet tuhan,

po teu allah indatu gobnyan beungeh keu gobnyan. kisah nyang laen keuhai peumeurintahan gobnyan dan banmandum buet-buet gobnyan phon awai sampoe keuneuleuh ka teucetet lam kitab seujarah raja-raja yehuda dan israel. ahas meuninggai donya; dan teukubu di yerusaleum, teuma kon nibak lampoh jrat raja-raja. hizkia aneuk gobnyan jeuet keu raja keugantoe gobnyan. hizkia jeuet keu raja yehuda bak umu 25 thon, dan gobnyan geumat keurajeuen di yerusaleum 29 thon treb jih. ma gobnyan nan geuh abia aneuk zakharia. hizkia geupeubuet buet nyang lumpah galak ate tuhan lagee nabi daud indatu gobnyan. bak buleuen sa nibak thon nyang keuphon geumat keurajeuen, hizkia laju geujak peuhah mandum pintoe baet tuhan dan geuyue laju ureueng laen mangat jipeuget pat-pat nyang reuloh. imeum-imeum dan ureueng-ureueng lewi geuyue meugumpoi bak seuramoe siblahi u timu baet tuhan, gobnyan laju geumariet ngon awaknyan nyang na disinan. gobnyan geupeugah lagee nyoe, "gata, he ureueng-ureueng lewi, haroh gata peukhusos droe keu tuhan, dan gata peusuci baet tuhan, po teu allah indatu gata. mandum nyang peukuto baet nyan haroh teu-use nibak teupat nyan. indatu geutanyoe hana seutia ubak tuhan allah dan awaknyan geupeubuet buet-buet nyang hana galak ate tuhan. awaknyan hana jipako gobnyan dan hana teuma geupeureumeuen teupat tinggai gobnyan. awaknyan banmandum ka jitob pintoe-pintoe baet tuhan dan jipeulon banmandum panyot-panyot nyang na disinan. awaknyan hana jitot keumeunyan bak baet tuhan, dan hana jipeuseumah keureubeuen nyang teutot ubak po teu allah nyang geuseumah le ureueng israel. ngon sabab nyan tuhan deungon beungeh nyang luwa biasa laju geuhukom ureueng yehuda dan yerusaleum. deungon beungeh tuhan nyang lagee nyan bagoe, banmandum ureueng ka teukeujot dan teumakot nyang han teukira. ureueng-ureueng syiek geutanyoe meuninggai lam mideuen prang, dan aneuk peurmoh geutanyoe jicok laju jibak sibagoe tawanan prang. bak saat nyoe ulon keuneuk peuget janji ngon tuhan po teu allah israel, mangat gobnyan hana beungeh le ubak geutanyoe. aneuk-aneuk ulon, bek kheueh gata preh-preh le, sabab gata kheueh nyang geupileh le tuhan keu meungabdi ngon meu iebadat ubak gobnyan meunan cit nyang tot keumeunyan dan nyang pimpin rakyat keu iebadat." ureueng-ureueng lewi nyang teuka bak watee nyan na kheueh: nibak kawom kehat: mahat aneuk amasai, dan yoel aneuk azarya nibak kawom merari: kish aneuk abdi, dan azarya aneuk yehalelel nibak kawom gerson: yoah aneuk zima, dan eden aneuk yoah nibak kawom elisafan: simri dan yeiel nibak kawom asaf: zakharia dan matanya nibak kawom heman: yehiel dan simei nibak kawom yedutun: semaya dan uziel. oh ltheueh nyan awaknyan laju geupeusapat ureueng-ureueng lewi nyang laen, dan awaknyan banmandum geupeusuci droe. oh ka ltheueh nyan, sisuai deungon peue nyang geupeurintah le raja banmandum imeum laju geutamong lam baet tuhan dan geupeuphon laju peusuci teupat nyan meunurot hukom-hukom tuhan. banmandum nyang najih

geupeuteubiet laju uluwa nibak leuen baet tuhan. nibak sinan le ureueng lewi laju geuba u panton kidron diluwa banda. buet nyan teupeuphon bak tanggai sa buleuen sa. bak tanggai lapan awaknyan ka seulesoe geupeusuci banmandum seuramoe baet tuhan sampoe ubak balee bagian keue jih. oh ltheueh nyan lapan uroe trek awaknyan geupeusuci geudong nyan bansaboh nyan sampoe trok tanggai 16 buleuen nyan. laju le ureueng-ureueng lewi nyang geujak peugah ubak raja hizkia, "kamoe ka seulesoe kamoe peugleh banmandum baet tuhan, meunan cit deungon miseubah teupat tot keureubeuen, meuja keu ruti teuhidang, dan banmandum peukakaih nyang na bak teupat nyan. meunan cit ka ltheueh kamoe cok keula-i peukakaih-peukakaih nyang ka jitieb le raja ahas bak watee gobnyan hana geupakoe le ubak tuhan bak masa keurajeuen gobnyan. banmandum peukakaih nyan ka kamoe peukhusos keula-i keu tuhan, dan saatnyoe na dikeue miseubah." hana geupeutreb le raja hizkia laju geupeusapat banmandum ureueng-ureueng patot lam masyarakat, ngon awaknyan laju geujak u baet tuhan. keu keureubeuen peumaphon desya keu keuluwarga raja dan rakyat yehuda, dan keu teupeusuci baet tuhan, awaknyan laju jiba 7 boh leumo agam, 7 boh bubiri agam, 7 boh aneuk bubiri, dan 7 boh kameng agam. raja laju geuyue ubak imeum-imeum keuturonan nabi harun geupeuseumah beulatang-beulatang nyan atueh miseubah sibagoe keureubeuen nyang teutot. leumo-leumo nyan laju teusie dan le imeum-imeum laju geureutek darah-darah beulatang nyan ubak miseubah. oh ltheueh nyan hai nyang saban lagee nyan awaknyan peubuet cit ubak ban tujoh boh bubiri dan ban tujoh boh aneuk bubiri nyan. akhe jih awaknyan geucok laju kameng-kameng nyan dan geuba laju ubak raja dan rakyat nyang teungoh meu-iebadat disinan, oh ltheueh nyan banmandum awaknyan geupeuduek jaroe atueh kameng-kameng nyan. oh ltheueh nyan mandum kameng nyan laju geusie le imeum-imeum dan darah beulatang nyan laju geuro atueh miseubah sibagoe keureubeuen peu amphon desya banmandum rakyat ba. hai nyang lagee nyan awaknyan peubuet sabab raja ka geupeurintah mangat jipeuna keureubeuen nyang teutot dan keureubeuen peu amphon desya keu banmandum rakyat israel. sisuai ngon peutunyok-peutunyok nyang ka geubri le tuhan ubak nabi daud meulalu nabi gad, nyang meubuet keu raja dan meulalu nabi natan, le raja laju geupeuduek ureueng-ureueng lewi nibak baet tuhan keu peumeuen keucapi dan gambus, lagee nyang geupeuguna le nabi daud. meunan cit deungon imeum geukeubah nibak teupat nyan deungon beureuguih. hizkia laju geubri tanda mangat upacara teupeuseumah keureubeuen teupeuphon. teungoh keureubeuen teupeuseumah, di ureueng laen ka geupeuphon meunyanoyoe puja ngon pujoe ubak tuhan, dan le ureueng nyang peumeuen musik laju jiyueb beureuguih dan ngon mubagoe alat geundrang nyang laen. raja hizkia dan banmandum ureueng nyang na disinan laju geusujut geuseumah tuhan seudangkan ureueng peumeuen musik hana geupioh geupeh geundrang sira meunyanoyoe sampoe

an mandum keureubeuen nyang teutot nyan habeh mandum jipajoh le apui. raja hizkia ngon ureueng-ureueng patot laju geuyue ubak ureueng-ureueng lewi mangat geumeunyanoye ca-e puja ngon pujoe keu tuhan nyang geukarang le nabi daud ngon nabi asaf. banmandum ureueng geumeunyanoye deungon ria geumbira sira meuteuot geumeudoa geuseumah po teu allah. oh lheueh nyan hizkia geupeugah, "sabab gata bak saat nyoe ka teupeukhusus keu tuhan, teuma sibagoe keureubeuen teurimong gaseh gata, gata banmandum haroh gata ba keureubeuen u baet tuhan." dan mandum ureueng nyang na teuka bak teumpat nyan geuba laju keureubeuen-keureubeuen geuh nyan, na teuma ngon galak droe geuba beulatang-beulatang keu teupeuseumah sibagoe keureubeuen nyang teutot. awaknyan na nyang ba 70 boh leumo agam, 100 boh bubiri, dan 200 aneuk bubiri dan jipeuseumah laju nyan keu keureubeuen nyang teutot ubak tuhan. meunan cit na awaknyan ba 600 boh leumo agam dan 3.000 boh bubiri keu teupeuseumah dan teupajoh meusajan le mandum ureueng nyang na teuka nibak teumpat nyan. imeum-imeum nyang ka geupeusuci droe cit bacut, hana seb teunaga nyang puliek kulet-kulet beulatang nyang ka lheueh teukeureubeuen nyan. ulheueh sabab nyan laju geulakee bantu ubak ureueng-ureueng lewi, sabab ureueng lewi leubeh seutia ubak peuratoran peusuci nyan. awaknyan teutab geutulong sampoe ubak imeum nyang ka lheueh geupeusuci droe seb. seulaen keureubeuen nyang teutot, le imeum-imeum geupeuseumah teuma gapah nibak keureubeuen teurimong gaseh nyang jimakheun le rakyat. meunan cit awaknyan jipeuseumah anggo nyang teuro meusajan ngon keureubeuen nyang teutot nyan. meunan kheueh jeuet jih iebadat di baet tuhan teupeuna keula-i. teuma oh lheueh nyan galak that ate raja hizkia ngon rakyat gobnyan sabab teupeuna nyan lam watee paneuk po teu allah ka geutulong awaknyan teupeubuet banmandum nyan. peurayaan paskah gohlom hase jipeuna le rakyat bak watee lam buleuen sa nyan, sabab imeum-imeum nyang ka geupeusuci droe geuh cit bacut jeumeulah jih dan gohlom le ureueng nyang meusapat di yerusalem. sabab nyan raja hizkia dan peugawee-peugawee gobnyan meunan cit peundudeuk yerusalem ka sipakat bahwa peurayaan paskah nyan geupeuna bak buleuen dua, dan awaknyan banmandum galak that deungon reuncana nyan. dan raja pih laju geukirem surat ubak mandum ureueng bansaboh israel dan yehuda. meunan cit ubak ureueng efraim dan manasye. banmandum bansa israel nibak sukee dan di siblahi utara troh u bersyeba di seulan, mandum awaknyan geu tawok u baet tuhan di yerusalem keu teupeuraya paskah dan teuhoreumat tuhan po teu allah israel lagee nyang ka teupeuteuntee lam hukum-hukum nabi musa. gohlom na nyang paskah teupeuraya lagee nyan. ateuheh titah po teu raja ngon peugawee-peugawee gobnyan geukirem kheueh utosan-utosan bansaboh yehuda dan israel keu jijkak ba surat-surat nyan nyang su jih lagee nyoe, "hei rakyat israel! gata ka teuhinda nibak keukuasaan ureueng asyur. jinoenoye gata riwang kheueh laju

jak peuhamba droe ubak tuhan, po teu allah nyang geuseumah le nabi ibrahim, nabi ishaq dan nabi yakub, mangat gobnyan pih geutulong gata keula-i. bek kheueh lagee indatu gata dan ureueng-ureueng israel nyang laen nyang hana seutia ubak tuhan po teu allah awaknyan. gata ka gata kalon keudroe pakriban brat jih gobnyan geuhukom awaknyan. bek kheueh kreueh ulee lagee awaknyan, teuma gata taat kheueh ubak tuhan. gata jak kheueh u yerusalem, u baet tuhan po teu allah nyang ka geupeukhusus le po teu allah keu gobnyan keudroe siumu masa. jak kheueh meueibadat ubak gobnyan mangat gobnyan reuda beungeh geuh ubak gata. meunoye gata meueibadat keula-i ubak tuhan, teuma le ureueng nyang ba wareh kawom gata sibagoe ureueng nyang teuteuen, teuma na rasa inseuh dan jibri idhin awaknyan jiwoe keula-i. tuhan po teu allah gata na kheueh allah nyang jroh dan rasa gaseh sayang; gobnyan teuma geuteurimong gata meunoye gata tatem woe keula-i ubak gobnyan." bak watee utosan-utosan nyang geukirem le raja nyan geujak nibak banda u banda lam wilayah efraim dan manasye sampoe u utara nyang jioh jih sampoe u wilayah sukee zebulon, awaknyan laju jipeukem dan jihina. teuma, na cit ureueng-ureueng nibak sukee asyer, manasye, dan zebulon nyang jitem teuka u yerusalem. di yehuda pih po teu allah geumeubuet dan geusaboh ate rakyat keu beutoi-beutoi taat ubak keuheundak po teu allah deungon cara jiturot peue nyang ka geutitah le po raja ngon peugawee-peugawee gobnyan. bak buleuen nyang keudua jai lumpah na rakyat meugumpoi di yerusalem keu geupeuraya uroe raya ruti hana meurago. miseubah-miseubah di yerusalem nyang teupeuguna keu teupeuseumah keureubeuen dan teutot keumeunyan keu dewa-dewa, banmandum teucok dan teuboh lam panton kidron. bak tanggai peuet blaih buleuen nyan awaknyan laju geusie bubiri-bubiri keu jipeuseumah sibagoe keureubeuen paskah. le imeum-imeum dan ureueng-ureueng lewi nyang mantong najih, malee lumpah na. awaknyan laju geupeusuci droe seuingga baro kheueh jeuet geupeuseumah keureubeuen nyang teutot nibak baet tuhan. awaknyan maseng-maseng laju geucok teumpat bak baet tuhan meunurot hukum-hukum nyang ka na teutuleh lam kitab hukum-hukum nabi musa. darah nyang na nibak beulatang keureubeuen nyan laju geujok le ureueng lewi ubak imeum-imeum, laju atranyan awaknyan roe ateuheh miseubah. jai that ureueng nyang na teuka keunan gohlom geupeu suci droe, jadi awaknyan hana jeuet geusie bubiri keu keureubeuen paskah. ulheueh sabab nyan ureueng-ureueng lewi kheueh nyang peubuet hai nyan keu awaknyan dan peuseumah atra nyan ubak tuhan. seulaen nibak nyan, lamkawan ureueng-ureueng efraim keudroe, manasye, isakhar, dan zebulon, jai that-that nyang teuka hana geupeusuci droe teuleubeh dilee. jadi, awaknyan nyang peuraya peurayaan paskah nyan jai that nyang hana peunoh syarat. ngon sabab nyan raja hizkia laju geumeu doa ubak po teu allah keu awaknyan, kheun gobnyan, "tuhan, po teu allah, nyang geupuja le indatu kamoe, mudah-mudahan deungon get ate

droeneueh tuhan ka neupeu amphon awaknyan nyang teungoh iebadat ubak droeneueh ngon sipuonoh ate, bah pih awaknyan gohlom jipeusuci droe." tuhan geudeungoe doa raja hizkia. gobnyan geupeu amphon banmandum desya awaknyan, dan hana geuhukom awaknyan. tujoh uroe treb jih, ureueng-ureueng nyang meusapat di yerasalem nyan geupeuna peurayaan ruti hana meurago. tieb-tieb uroe ureueng-ureueng lewi dan imeum-imeum hana putoh-putoh geupuja pujoe tuhan deungon sunggoh-sunggoh. ureueng-ureueng lewi nyan carong lumpah na geupimpen iebadat ubak tuhan, seuhingga hizkia geupujoe awaknyan. oh ka ltheueh tujoh uroe treb jih awaknyan geumakheun peunajoh bak tempat peurayaan nyan dan geupeuseumah keureubeuen keu geupeugah teurimong gaseh ubak tuhan, allah indatu awaknyan, awaknyan banmandum ka geucok peunutoh keu geupeutroh peurayaan nyan tujoh uroe trek. laju le awaknyan geupeuraya lom ngon peunoh suka ria. raja hizkia geuseudeukah 1.000 boh leumo agam dan 7.000 boh bubiri. peugawee-peugawee hizkia geuseudeukah teuma 1.000 boh leumo agam dan 10.000 boh bubiri. banmandum beulatang nyan geubri ubak rakyat keu jisie dan jipajoh. rame that imeum jipeusuci droe jih. rakyat yehuda, imeum-imeum, ureueng-ureueng lewi, dan ureueng-ureueng nyang teuka nibak utara, meunan cit deungon ureueng-ureueng aseng nyang ka tinggai treb teutab di israel dan yehuda, banmandum meurasu bahgia. banda yerasalem meuriah that-that sabab seumeunjak masa nabi sulaiman aneuek nabi daud, gohlom na nyang ka teujadi lagee nyan. imeum-imeum dan ureueng-ureueng lewi geulakee laju beureukat tuhan keu rakyat, dan nibak tempat tinggai gobnyan lam syeuruga po teu allah geudeungoe doa awaknyan dan geuteurimong peue nyang awaknyan lakee. oh ka seulesoe peurayaan nyan, banmandum rakyat laju jijak ubak tieb-tieb banda di yehuda, dibanda-banda nyang jijak nyan jipeuhanco laju bubena tugu-tugu beurala, jipeuhanco ngon jipeureubah patong-patong nyang jipeudong keu dewi asyera, dan jipeuhanco bubena miseubah-miseubah dan tempat-tempat jiseumah beurala. meunan cit hai nyang lagee nyan jipeubuet cit di tempat-tempat nyang laen di yehuda, meunan cit di wilayah benyamin, efraim dan manasye. oh ka seulesoe tugaih nyang mulianyan laju jiwoe u gampong droe jih maseng-maseng. raja hizkia geupeuteutab lom reugu-reugu teungku imeum dan ureueng-ureueng lewi meunurot peumbagian tugaih awaknyan. tugaih-tugaih nyan na ktheueh lageenyoe: teupeuseumah keureubeuen nyang teutot dan keureubeuen peudame, teupeutimang upacara iebadat di baet tuhan, dan teupujoe ngon teukheun teurimong gaseh nyang le-le ubak tuhan di tieb-tieb tempat didalam baet tuhan. nibak beulatang peulara gobnyan keudroe raja laju geusumbang keu keureubeuen nyang teutot tieb-tieb beungoh dan tieb-tieb seupot, dan keu keureubeuen nyang teupeuseumah bak uroe sabat, bak peurayaan buleuen baro, dan nibak peurayaan-peurayaan laen lagee nyang ka teupeuteunteu didalam hukum-hukum tuhan. seulaen nibak nyan raja geupeurintah

teuma ubak peunduduek yerasalem mangat jiba peuseumahan jih maseng-maseng keu teungku imeum dan ureueng lewi, mangat jeuet awaknyan hase geucurah banmandum peuratian awaknyan khusus ubak peulayanan di baet tuhan lagee nyang na teutuleh didalam hukum-hukum tuhan. oh ka ltheueh peurintah nyan teupeumaklum, ureueng israel laju jiba u baet tuhan meuneubri-meuneubri hase bumoe jih nyang phon teucok, na ktheueh teurigu, anggo, minyeuk zaiton, meulisan, dan hase bumoe nyang laen. meunan cit awaknyan jiba teuma siper siploh bagian nibak atra milek droe jih. banmandum ureueng nyang na tinggai di banda-banda di nanggroo yehuda jiba siper siploh bagian nibak beulatang peulara jihnyan miseujih leumo dan bubiri awaknyan, dan meunan cit lam jeumeulah nyang le nibak peue-peue nyang jibri nyang laen, laju jipeuseumah banmandum nyan ubak tuhan allah awaknyan. peue-peue nyang jibrinyan ka trok jiteuka keunan phon nibak buleuen nyang keu lhee, dan laju teuka hana pioh-pioh sampoe nibak buleuen nyang keu tujoh. ban geungieng sumbangan nyan lumpah that le le raja hizkia dan peugawee-peugawee gobnyan, laju gobnyan geupeumulia tuhan dan geupujoe ureueng israel, umat gobnyan. bak watee raja teungoh geumeutotoe deungon bubena teungku imeum dan ureueng lewi keuhai sumbangan-sumbangan nyang ka teubri nyan, teungku imeum agong azarya keuturonan zadok geupeugah, "yoh phon that rakyat ji intat peuseumahan-peuseumahan awaknyan u baet tuhan, kamoe banmandum hana meukureueng mubacut pi peunajoh, teuma jai that-that nyang leubeuh, sampoe mantong that le peuseudiaan peunajoh kamoe. banmandum nyan kamoe teurimong sabab tuhan ka geubri beureukat keu umat gobnyan." atueuh peue nyang ka geupeurintah le raja, awaknyan laju jipeusiab gupok-gupok nibak bineh baet tuhan, laju geukeubah banmandum peue nyang ka jibri le rakyat meunan cit deungon peue nyang ka jipeuseumah le rakyat lagee siper siploh nibak hareuta hase hareuta jihnyan u dalam gupok nyan. na sidroe ureueng lewi nyang nan geuh konanya, teubri tugaih jeuet keumando, dan simeu adoe gobnyan jeuet nyang bantu gobnyan. dimiyueb keumando gobnyan na 10 droe teuk ureueng lewi nyang laen nyang geubri tugaih, awaknyan na ktheueh: yehiel, azazya, nahat, asael, yerimot, yozabad, eliel, yismakhya, mahat, dan benanya. banmandum hainyan geupeuteutab atueh peutunyok raja hizkia dan teungku imeum agong azarya. kore aneuek yimna, sidroe ureueng lewi nyang jeuet keu ulee kawai nibak babah pintoe geureubang timu di baet tuhan, keu gobnyan geuseurah tanggung jawueub mangat geuteurimong peue-peue nyang jibri le ureueng laen keu jipeuseumah ubak tuhan, dan oh ltheuehnyan laju geubagi-bagi. di banda-banda nyang laen di tempat tinggai teungku-teungku imeum, kore geubantu teuma le ureueng-ureueng lewi nyang laen, lamkawan nyang bantu nyan na ktheueh: eden, minyamin, yesua, semaya, amarya, dan sekhanya. bahan-bahan peunajoh nyan geupeu weuek sabe rata lamkawan sabe-sabe sukee lewi bah ktheueh

nyan nyang tuha meunan cit nyang muda meunurot tugaih awaknyan. banmandum ureueng agam nyang meu-umu lhee ploh thon u ateuhe, nyang meuteume tugaih tieb-tieb uroe di baet tuhan, meunan cit keu awaknyan geubri jeumba jih maseng-maseng meunurot tugaih dan meunurot reugu gobnyan. bubena teungku imeum teudafeutar meunurot kawom gobnyan, dan ureueng lewi nyang meu-umu 20 thon u ateuhe teudafeutar meunurot tugaih dan reugu gobnyan. awaknyan banmandum teudafeutar meusajan deungan aneuek dan peurmoh, dan anggota-anggota nyang laen nyang na didalam rumah tangga geuh, sabab awaknyan teupeuwajeb keu meusiab seudia tieb-tieb saat keu geulaksana tugaih-tugaih droe geuh nyang khusus keu tuhan. lamkawan teungku-teungku imeum nyang na tinggai di banda-banda nyang ka teupeuteuntee keu keuturonan nabi harun, atawa di blang-blang nyang na di silingka banda nyan, geutunyak laju peutugaih-peutugaih mangat jiweuk-weuk bahan peunajoh keu banmandum ureueng agam lam keuluwarga teungku imeum, dan keu tieb-tieb ureueng nyang teudafeutar didalam sukee lewi. lam bansaboh nanggroe yehuda, raja hizkia geupeubuet buet nyang lumpah ade, juoe, dan geupeu harok ate tuhan allah gobnyan. gobnyan meuhase, sabab peue mantong nyang geupeubuet keu baet tuhan atawa mangat geutaat ubak banmandum hukom-hukom tuhan, geupeujak banmandum deungan sipeunoh ate dan deungan cinta geuh ubak tuhan po teu allah. oh ka lheueh raja hizkia geupeubuet hai-hai nyang teusangkot keuseutiaan gobnyan ubak tuhan, sanherib raja asyur laju jiseurang yehuda. laju jike-upong banda-banda nyang meukuta dan jipeurintah laju pasokan geuh mangat teureubot kuta nyan. watee geuteupeue le raja hizkia bahwa raja sanherib jikeuneuk seureubu yerusaleum, gobnyan meusajan deungan peugawee geuh dan peurwira-peurwira gobnyan geucok keuputosan keu geutob dumna teupat ie diluwa banda deungan meukeusut mangat ureueng-ureueng asyur hana meuteume ie meunoye awaknyan ka sampoe rab yerusaleum. rame that-that ureueng nyang geukirah keu teujaktob banmandum mata ie nyang ji-ile u luwa banda. dan raja pih laju geukeukong peurtahanan banda deungan cara teureuhab binteh timbok jih, geuyue peudong meunara-meunara di ateuhe nyan dan geuyue peugot pageue timbok nyang laen di luwa banda. seulaen nyan gobnyan geupeugot teuma kuta nyang geupeudong di ateuhe tanoh nyang teutamam di siblaih u timu bagian nyang ka treb banda yerusaleum. meunan cit geuyue teuma peugot nyang cukoble sinjata kapak dan peurisai. gobnyan laju geuangkat banmandum peurwira-peurwira keu jeuet keu ulee banmandum ureueng agam nyang na didalam banda, dan geuyue awaknyan meugumpoi dipadang dikeue babah pintoe geureubang banda. oh lheuehnyan geupeugah laju ubak awaknyan, "tabah kheueh dan yaken kheueh; bek kheueh neutakot ubak raja asyur atawa ubak pasokan geuh nyan. teunaga dipihak geutanyoe leubeh raya nibak nyang na dipihak awaknyan. bak awaknyan nyang na teunaga manusia, teuma nibak geutanyoe na tuhan

po teu allah nyang tulong geutanyoe didalam prang." ban geudeungoe kheun raja droe geuh nyan, rakyat pih meutamah beurni. hana padubtreb teuma oh lheuehnyan bak watee pasokan sanherib ka trok u lakhis, gobnyan laju geukirem utosan ubak raja hizkia dan rakyat yehuda di yerusaleum keu jijak peusampoe peusan nyang lagee nyo, "ulon sanherib, raja nibak nanggroe asyur, ulon keuneuk teumanyong peue sabab jih gata lumpah that beurni keu teutab neutinggai di yerusaleum nyang teungoh teukeupong nyan. peu kheueh hizkia neupeugah bahwa tuhan allah gatanyan teuma geupeuleueh gata nibak keukuasaan kamoe? bek neupeucaya, bahwa tuhan gata nyan geupeungeuet gata. tuhan gatanyan teuma geupeubiyeu gata mate deuek lom ngon glaih hana geubri ie. gobnyan kheueh nyang peuhanco teupat-teupat iebadat dan miseubah-miseubah keu tuhan, laju geuyue ureueng yehuda dan yerusaleum meueibat dan teutot dupa nibak saboh miseubah mantong. peu kheueh gata han neuteupeue peue nyang ka ulon peubuet meunan cit nyang ka geupeubuet le indatu ulon teuhadab bansa-bansa nyang laen? gohlom na peureunah dewa-dewa bansa nyang laen jipeulheueh bansa jih nibak keukuasaan raja asyur! soe nibak awaknyan nyang ka na jipeubuet hai nyang lageenyan? hana mungken dewa gata bisa geupeuseulamat gata! bek neupeubiyeu raja gata nyan geupeungeuet dan geupeubodoh gata! bek neupeucaya ubak geuh nyan! sabab hana peureunah dewa bansa toih mantong sanggob jipeuleueh bansa jih nibak keukuasaan raja asyur. meunan cit ka pasti dewa gatanyan hana cit meuhase jipeulheueh gata!" mantong le haba nyang laen nyang geupeugah le utosan raja asyur nyan keu geuhina tuhan po teu allah dan raja hizkia, hamba tuhan nyan. meunan cit le raja asyur geutuleh surat nyang asoe jih geuteuntang tuhan, po teu allah nyang geuseumah le ureueng israel. lageenyo asoe surat nyan, "dewa-dewa sigala bansa laen hana hase jipeuleueh bansa jih nibak keukuasaan ulon, meunan cit deungan dewa hizkia nyan hana hase geupeulheueh bansa geuh nyan nibak keukuasaan ulon." utosan-utosan raja asyur geupeugah banmandum nyan dalam basa ibrani keu geupeutakot ngon geupeupatah seumangat ureueng-ureueng yerusaleum nyang na di ateuhe binteh timbok banda, mangat awaknyan hase jireubot banda nyan deungan mudah. awaknyan geumeututoe keuhai allah nyang jiseumah di yerusaleum saban cit lagee dewa-dewa nyang jiseumah le bansa laen, na kheueh patong-patong nyang jipeugot le manusia. teuma geumeudoa kheueh raja hizkia dan nabi yesaya aneuek amos. awaknyan geumeuhoi geulakee tulong ubak po teu allah. dan bak wateenyan cit teuma tuhan geukirem sidroe malaikat geuh dan le malaikat nyan laju geupeumate banmandum sipa-i ngon peurwira raja asyur. deungan lumpah that malee raja asyur nyan laju jiwoe u nanggroe jih. bak siuroe watee raja nyan teungoh na didalam rumah dewa geuh, teuka kheueh keunan na padubdroe nibak aneuek gobnyan jijak poh mate raja asyur nyan deungan peudeueng. meunan kheueh cara jih tuhan geupeulheueh raja hizkia dan peunduduek yerusaleum nibak keukuasaan

sanherib raja asyur nyang beuhe nyan, dan nibak musoh-musoh gobnyan nyang laen. tuhan laju geubri ubak gobnyan keu-udeban nyang aman tanpa na soe peukaru nibak nanggroe-nanggroe teutangga gobnyan. rame that-that ureueng jijak u yusalem keu jijakba peuseumahan keu tuhan dan keu raja hizkia, seuhingga seumeunjak wateanyan raja nyan ka jihoreumat le meubagoe bansa. bak wateanyan raja hizkia ka srot ubak saket. peunyaket nyang teuka ubak gobnyan lumpah that parah seuhingga gobnyan karab meuninggai. dan raja pih geumeudoa, dan doa geuh nyan geudeungoe le tuhan, dan tuhan pih laju geupeutron tanda ubak gobnyan bahwa raja nyan teuma puleh. teuma sabab gobnyan sombong, gobnyan hana geulakee teurimong gaseh ubak tuhan ateueh puleh gobnyan nyang ka geubri le tuhan u ateueh geuh. ulheueh sabab nyan tuhan geubeungeh that ubak yehuda dan yerasalem. teuma bak akhe jih raja hizkia dan ureueng-ureueng yerasalem geupeumiyueb droe geuh ubak tuhan, teuma seumantong raja hizkia mantong udeb hukuman nyan hana geupeurot u ateueh gobnyan. raja hizkia jeuet keu ureueng nyang lumpah kaya, dan jihoreumat le ureueng rame. gobnyan laju geupeugot kama-kama keu geukeubah hareuta geuh, na kheueh: meuh, pirak, batee-batee peumata, reupah-reupah, peurisasi dan barang-barang nyang meuyuem nyang laen. meunan cit gobnyan na geupeugot gupok-gupok keuteumpat keubah barang-barang hase bumoe gobnyan, na kheueh: gandom, anggo, dan minyeuk zaiton; meunan cit weue-weue leumo dan keu weue-weue domba nyang cukoble. seulaen nibak nyan gobnyan geupeudong teuma banda nyang cukoble. keukayaan nyang geubri le po teu allah ubak gobnyan na meulimpah ruwah. raja hizkia nyan kheueh nyang ampeuh mata ie gihon, dan geupeu ile ie jihnyan meulalu saluran nyang na dimiyeub tanoh u dalam banda yerasalem. peue mantong nyang geupeubuet le raja hizkia meuhase banmandum. dan bak watee utosan-utosan nibak babel teuka keu geujak tanyong ubak gobnyan keuhai keupuleh gobnyan nyang ajaeb nyan, tuhan geupeubiyeu mantong ubak raja hizkia keu geumeutindak keudroe, mangat hase geu ujo ate gobnyan. kisah nyang laen keuhai raja hizkia, dan keuhai cinta gobnyan bak tuhan na teucetet didalam kitab wahyu nibak allah ubak nabi yesaya aneuk amos, dan didalam kitab seujarah raja-raja yehuda dan israel. raja hizkia meuninggai donya, laju teupeukubu nibak lampoh jrat raja-raja dibagian sineungoh. banmandum rakyat yehuda dan yerasalem geubri peunghoreumat nyan raya ubak gobnyan bak watee gobnyan meuninggai donya. manasye aneuk agam gobnyan teuangkat jeuet keuraja keugeunantoe gobnyan. manasye meu-umu 12 thon watee gobnyan teubaiat jeuet keuraja di yehuda dan gobnyan geumat peurintah na 55 thon treb jih. gobnyan keubit that meudesya ubak tuhan, sabab gobnyan geuseutot keubiasaan buet nyang jeuhet nyang jipeubuet le bansa-bansa nyang ka geu use le tuhan di nanggroe kanaan bak watee ureueng israel jitamong u dalam nanggroe nyan. teumpat-teumpat seumah beurala nyang

ka geupeuhanco le raja hizkia, ureueng syiek gobnyan, geupeudong keula-i. meunan cit gobnyan geupeudong miseubah-miseubah keu teumpat iebadat ubak baal, dan gobnyan geupeuget teuma patong-patong dewi asyera, dan geuseumah bintang-bintang. tuhan ka lheueh geumeufureuman bahwa yerasalem nyan na kheueh teumpat meueibadat ubak gobnyan siumu masa, teuma disinan bak baet tuhan nyan, manasye ka geupeudong miseubah-miseubah keuteumpat seumah dewa-dewa. meunan cit nibak ban dua boh leuen baet tuhan nyan laju geupeudong teuma miseubah keu teumpat seumah ubak bintang-bintang. aneuk-aneuk gobnyan geupeuseumah sibagoe keureubeuen nyang teutot di panton hinom. meunan cit gobnyan geupeubuet praktek-praktek peu-ubat ureueng laen sibagoe dukun, sibagoe nujum, ieleume gaeb, dan geulakee peutunok-peutunok ubak areuwah-areuwah. gobnyan ka meudesya that ubak tuhan le sabab nyan tuhan lumpah that meureuka keu gobnyan. patong beurala na geukeubah di dalam baet tuhan, padahai keuhai teumpat nyan po teu allah ka lheueh geupeugah ubak nabi daud dan nabi sulaiman aneuk gobnyan, "baet ulon nyang na di yerasalem nyoe, nyang ka ulon pileh nibak 12 wilayah sukee israel, na kheueh teumpat nyang ka ulon peuteuntet sibagoe teumpat meueibadat ubak ulon keu siumu masa. meunyoemat israel jitaat banmandum ubak peurintah ulon dan jiseutot ubak hukum-hukum nyang ka geubri nibak nabi musa hamba ulon nyan keu awaknyan, teuma ulon hana lon peubiyeu awaknyan jiuse nibak nanggroe nyang ka ulon bri keu indatu awaknyan." sabab buet nyang jipeubuet le raja manasye nyang lageanyan, sampoe rakyat yehuda ka jipeubuet desya-desya nyang leubeh jeuhet nibak desya nyang jipeubuet le bansa-bansa nyang ka geu use le po teu allah di nanggroe kanaan bak watee umat tuhan jitamong u dalam nanggroe nyan. tuhan laju geuteugah manasye dan rakyat gobnyan, teuma awaknyan hana jitem deungoe. sabab nyan tuhan laju geupeuteuka bubena panglima sipa-i asyur mangat jijak prang nanggroe yehuda. raja manasye laju jidrob deungon seunawiet, laju jirante jaroe dan jiba laju u babel. lam peunderitaan geuh nyan laju geupeumiyueb droe ubak tuhan allah gobnyan, dan geumeudoa geulakee tulung ubak allah. allah pih geupeukabui doa manasye dan laju geupeuwoe gobnyan u yerasalem keu geumat peurintah lom teuma. sabab ka teujadi nyang lagee nyan bagoe raja manasye meutamah yaken bahwa tuhan na kheueh po teu allah. oh lheueh nyan manasye laju geupeu-manyang binte beuton bagian luwa blaib utimu banda nabi daud. geupeuphon nibak sabab teumpat di panton bak bineh mata ie gihon laju trok u utara sampoe nibak babah pintoe geureubang uengkot dan bagian banda nyang nan jih ofel. dan nibak tieb-tieb banda nyang meukuta di yehuda, disinan pih laju geupeudeuk sidroe panglima. gobnyan laju geupeuhanco patong-patong beurala dewa bansa laen meunan cit deungon beurala-beurala nyang ka jikeubah di baet tuhan. gobnyan laju geureuloih ngon geusungket miseubah-miseubah beurala nyang na di buket baet tuhan, dan diteumpat-teumpat

nyang laen di yerusalem. banmandum atranyan laju geuba u luwa banda dan laju geutiek. oh ltheuehnyan geupeugot teuma miseubah teupat iebadat ubak tuhan, laju geupeuseumah disinan keureubeuen nyang teutot dan keureubeuen syuko. banmandum ureueng yehuda geukrah mangat jimeu iebadat ubak tuhan allah israel. teuma rakyat mantong cit jipeuseumah keureubeuen diteupat-teupat seumeumah nyang laen, teuma peuseumahan nyan na kheueh keu tuhan. kisah nyang laen keuhai manasye, dan keuhai doa gobnyan ubak po teu allah, meunan cit deungon peusan-peusan po teu allah nyang geupeusampoe ubak gobnyan le nabi-nabi ateuh nan tuhan, allah israel, banmandum nyan ka teucetet didalam kitab seujarah raja-raja israel. lam kitab seujarah nabi-nabi ka teucetet cit teuma doa raja manasye dan jaweub allah ateuh doa nyan, meunan cit kisah keuhai desya-desya gobnyan sigohlom gobnyan meutobat, teupat-teupat seumah beurala dan patong-patong dewi asyera nyang geupeugot nyan, dan beurala-beurala nyang geuseumah nyan. raja manasye laju meuninggai donya dan teukubu di lampoh jrat meuligoe. amon aneuek agam gobnyan jeuet keuraja keugeunantoe gobnyan. amon me-umu 22 thon bak watee gobnyan teubaiat jeuet keuraja yehuda, dan gobnyan geumat peurintah di yerusalem na dua thon treb jih. saban cit lagee ureueng syiek gobnyan dan gobnyan pi ka geupeubuet desya ubak tuhan. gobnyan geuseumah beurala-beurala nyang geuseumah le ureueng syiek gobnyan dan geupeuseumah keureubeuen ubak beurala-beurala nyan. teuma, meulaen deungon yah gobnyan, amon hana geumeutobat le ubak tuhan; dan gobnyan leubeh meutamah desya nibak bapak geuh nyan. peugawee-peugawee raja amon ka jimeukumplot keuneuk jilawan gobnyan dan jipoh mate gobnyan di dalam meuligoe. teuma le rakyat yehuda laju jipoh mate ureueng nyang poh raja amon nyan, ltheuehnyan laju jibaiat yosia aneuek gobnyan jeuet keuraja. yosia me-umu 8 thon bak watee gobnyan teubaiat jeuet keuraja nangroe yehuda, dan gobnyan geumat peurintah di yerusalem na 31 thon treb jih. gobnyan geujak buet deungon bit-bit dan meukeunong that nibak ate tuhan; gobnyan geuseutot teuladan nabi daud indatu gobnyan, dan geutaat ubak banmandum hukom po teu allah deungon sipeunoh ate. oh ka na 8 thon gobnyan jeuet keuraja, bak umu geuh nyang lumpah that muda, yosia geupeuphon iebadat ubak allah nyang geuseumah le nabi daud indatu gobnyan. na 4 thon teuma oh ltheuehnyan laju geupeuphon peuhanco banmandum teupat seumah beurala, patong-patong dewi asyera, dan beurala-beurala nyang laen. patong-patong dan beurala-beurala nyan banmandum geupeuhanco meukeupeng-keupeng le aneuek buah raja yosia dan laju abee jih geuhambo u ateuh jrat ureueng-ureueng nyang jipeuseumah keureubeuen ubak beurala-beurala nyan. miseubah-miseubah baal dan miseubah-miseubah dupa nyang na disinan laju geupeuhanco. oh ltheuehnyan le yosia laju geutot di ateuh miseubah nyan tuleueng-tuleueng bubena teungku imeum nyang yoh watee udeb gobnyan geupeutimang beurala-beurala nyan.

deungon na lageenyan gobnyan ka geupeujeuet yerusalem dan yehuda ka get lom teumeu iebadat ubak tuhan. hai nyang lageenyan geupeubuet cit teuma di banda-banda dan didaerah-daerah nyang ka hanco diwilayah manasye, efraim, dan simeon, sampoe u naftali di utara. miseubah-miseubah dan patong-patong asyera nyang na di seuluroih keurajeuen utara ka geureuloh le yosia, dan laju patong-patong nyan dan banmandum dupa teupat tot keumeunyan geupeuhanco. oh ltheuehnyan geuwoe kheueh laju yosia u yerusalem. bak thon nyang keu lapan blaih watee peumeurintahan raja yosia, oh ka ltheueh nyan gobnyan geusampoh sampoe habeh ureueng-ureueng seumah beurala di baet tuhan dan bansaboh nangroe, le gobnyan laju geukirem lhee droe ureueng mangat jikak reuhab baet tuhan allah. ban 3 droe ureueng nyan na kheueh safan aneuek azalya, maaseya gubunur yerusalem, dan yoh aneuek yoahas, sidroe peugawee manyang. ureueng-ureueng lewi geujaga nibak babah pintoe baet tuhan, laju geujok ubak teungku imeum agong hilkia, peng nyang ka ltheueh geupeusapat. peng nyan nibak ureueng efraim dan manasye, dan nibak rakyat nyang laen di keurajeuen utara, meunan cit na nyang nibak rakyat yehuda, benyamin dan yerusalem. peng nyan le teungku imeum agong hilkia geujok laju bak ureueng nyang lhee droe nyang geubri tugaih keu jikawai ureueng nyang reuhab baet tuhan. ltheuehnyan awaknyan laju geubri peng nyan ubak utoih kayee dan tukang bangunan nyang haroh geubloe batee dan kayee keungon teureuhab geudong-geudong nyang ka teupeubiyeu rusak le raja-raja yehuda. ureueng-ureueng nyang keureuja nibak buet nyan bit-bit ureueng nyang paleng teupat lom juoe. awaknyan jimando le 4 droe ureueng lewi: yahat dan obaja nibak kawom merari, meunan cit deungon zakharria dan mesulam nibak kawom kehat. ureueng-ureueng lewi, nyang carong geumeuen musik, geubri tugaih geukawai nyang angkot bahan-bahan, jeuet keu ulee buruh nyang meukeureuja nibak meubagoe macam buet, teukeureuja administrasi, dan keu ureueng jaga babah pintoe. bak watee peng sumbangan nyan teupeuteubiet nibak teupat teukeubah, le hilkia laju meuteume kitab hukom tuhan, nyan kheueh hukom-hukum nyang geubri le allah ubak nabi musa. geupeugah kheueh le hilkia ubak safan lageenyoe, "ulon na meuteume kitab hukom tuhan di baet tuhan," laju kitab nyan geujok ubak safan. le safan jiteurimong laju kitab nyan, oh ltheuehnyan jikak peugah laju ubak raja, "banmandum nyang teungku amphon yue bak kamoe ka kamoe peubuet. kamoe ka ltheueh kamoe cok peng nyang teukeubah di baet tuhan, dan kamoe jok keu bubena ureueng meubuet disinan dan mando-mando jih." oh ltheueh nyan geutamah lom, "hilkia na geubri kitab nyoe ubak ulon." dan laju le safan jibeuet kitab nyan dikeue raja. ban geudeungoe asoe kitabnyan, le raja laju geupriek-priek peukayan nyang na bak tuboh geuh sabab seudeh. le raja geubri peurintah nyang lagee nyoe ubak hilkia, ahikam aneuek safan, abdon aneuek mikha, safan seukeutareh nangroe, dan asaya ajudan raja, "tajak laju teumanyong ubak tuhan

keu ulon dan keu ureueng-ureueng nyang mantong na di israel dan yehuda keuhai asoe kitab nyoe. tuhan beungeh that keu geutanyoe sabab indatu geutanyoe hana geupeubuet peurintah-peurintah nyang na teutuleh lam kitab nyoe." dan geujak kheueh laju hilkia, ahikam, abdôn, safan dan asaya geulakee peutunyok ubak sidroe ureueng inong nyang nan jih hulda. ureueng inong nyan na kheueh sidroe nabi nyang tinggai di gampông-gampông baro di yerusalem. lakoe gobnyan nan geuh salum aneuek tikwa, cucoe harhas. gobnyan na kheueh nyang uroi h peukayan iebadat di baet tuhan. oh ka ltheuh hulda geudeungoe keuteuranan awaknyan, gobnyan geuyue awaknyan mangat jigisa ubak raja dan geuyue peusampoe peusan nyang lageenyoe, "tuhan, po teu allah nyang jiseumah le ureueng israel geupeugah lageenyoe, 'ulon teuma lon hukom yerusalem dan banmandum peunduduek disinan deungon kutok-kutok nyang na teutuleh didalam kitab nyan nyang jibaca keu raja. awaknyan ka jittinggai ulon dan jipeuseumah keureubeuen ubak ilah-ilah nyang laen. banmandum nyang ka jipeubuet le awaknyan jipeuteuka meureuka ulon. ulon meureuka keu yerusalem, dan beungeh ulon nyan hana hase jipeuseungab. teuma keuhai raja yosia keudroe, nyoe kheueh peusan ulon, tuhan po teu allah israel: oh ka ltheueh gata deungoe peue nyang teutuleh didalam kitab nyan, gata meunyeusai dan tapeumiyeb droe dikeue ulon. ulon lon ancam dan ulon hukom yerusalem dan peunduduek nyang na disinan, teuma bakwatee gata tadeungoe ancaman ulon nyan gata laju tamo dan tapriek laju peukayan nyang na nibak tuboh gata tanda gata lumpah that seudeh, ulon ka ulon deungoe doa gata, le sabab nyan hukoman ateueh yerusalem hana ulon peurhot simantong gata udeb. gata teuma ulon peuidhin meuninggai deungon cara dame.' " dan geuwoe kheueh utosan-utosan nyan ubak raja dan geupeusampoe laju peusan nyan. raja yosia geutawok laju banmandum peumimpén yehuda dan yerusalem, laju geujak deungon awaknyan u baet tuhan. meusajan awaknyan na cit geuseutot le teungku imeum, ureueng lewi dan banmandum rakyat, bah kheueh nyan nyang gasien meunan cit nyang kaya. dikeue awaknyan banmandum, bak bineh pilar nyang khusus keu raja, raja laju geudong dan geubaca laju deungon su nyang teuga banmandum asoe kitab peujanjian nyang ka meuteume didalam baet tuhan. oh ltheueh nyan le raja laju geupeuna peujanjian deungon tuhan mangat geutaat ubak gobnyan dan teupeujak deungon sipeunoh ate dan sigeunab jiwa banmandum hukom-hukom nyan, meunan cit geupeupeunoh banmandum syarat peujanjian tuhan deungon umat gobnyan nyang na teutuleh didalam kitab nyan. banmandum ureueng benyamin dan banmandum ureueng laen nyang na di yerusalem geuyue meujanji mangat geutaat ubak peuratoran nyan. teuma ureueng-ureueng yerusalem pih hana geubantah dan geutaat deungon sipeunoh ate ubak peuratoran-peuratoran nyang na teutuleh lam kitab peujanjian nyan, na kheueh peujanjian lamkawan awaknyan deungon allah indatu awaknyan. beurala-beurala nyang kuto nyang

luwat, nyang na meurumpok di teumpat-teumpat nyang jitamong u dalam wilayah ureueng israel, banmandum nyan geupeuhanco le raja yosia. laju gobnyan geupeuwajeb ubak rakyat geuh geuyue meueibat ubak tuhan, allah indatu awaknyan keudroe. dan simantong yosia udeb, rakyat teutab seutia ubak tuhan. oh ltheuehnyan yosia laju geupeuna uroe raya paskah di yerusalem keu geuhoreumat ubak tuhan. bubiri keu peurayaan nyan geusie nibak tanggai 14 buleuen sa. le yosia laju geubagi tugaih di baet tuhan ubak teungku-teungku imeum peue-peue nyang haroh geupeubuet, dan gobnyan geumeuharab deungon peunoh harapan mangat jeuet buet nyang ka teubeuban ateueh teungku imeum nyan geukeureuja deungon jroh. ureueng-ureueng lewi nyang ka teupeukhusus keu tuhan, dan nyang jeuet keu guree-guree israel nyoe teuma peurintah nibak raja yosia, "takeubah kheueh peuto peujanjian tuhan nyang suci nyan didalam baet tuhan nyang ka ltheueh geupeudong le nabi sulaiman aneuek nabi daud. hanjeuet le gatanyoe tapinah-pinah atranyan. tapeutimang kheueh tuhan allah gata deungon umat gobnyan bansa israel. beusiab-siab kheueh di baet tuhan meunurot reugu gata maseng-maseng, nyang saban deungon peumbagian tugaih nyang ka geupeuteutab u ateueh gata le nabi daud dan nabi sulaiman aneuek gobnyan. gata ato kheueh reugu-reugu gata nyan beulagee nyan bagoe sampoe sabana nibak gata nyang hase teutulong tieb-tieb keulompok ureueng israel di baet tuhan. gata haroh tasie bubiri keu peurayaan paskah. le sababnyan tapeusiab kheueh droe gata keu taseumah tuhan, dan tapeusiab cit teuma keureubeuen-keureubeuen nyang haroh teupeuseumah keu tuhan, deungon na nyang lagee nyan ureueng-ureueng israel nyang laen hase jipeubuet peue nyang ka geupeurintah le tuhan meulalu nabi musa." dan meunan cit ureueng-ureueng nyang teuka nibak peurayaan paskah nyan hase jipeuseumah keureubeuen ubak tuhan, le raja yosia laju geusumbang nibak beulatang peulara gobnyan keudroe na 30.000 boh bubiri, aneuek bubiri dan kameng muda, dan 3.000 boh leumo agam. meunan cit deungon peugawee raja yosia, di awaknyan pi jibri sumbangan ubak teungku-teungku imeum, dan keu ureueng lewi nibak banmandum rakyat. peugawee-peugawee nyang geuseurah tanggong jaweueb keu baet tuhan, awaknyan na kheueh teungku imeum agong hilkia, dan nabi zakharia, na lom yehiel, ban lthee droe awaknyan geubri ubak teungku imeum na 2.600 boh aneuek bubiri dan kameng muda teutamah teuma 300 boh leumo agam keu teupeuseumah nibak peurayaan nyan. bubena peumimpén ureueng lewi, na kheueh: konanya, semaya dan netaneel syedara gobnyan, hasabya, yeiel, dan yozabad, na jibri ubak ureueng lewi 5.000 boh aneuek bubiri dan kameng muda meunan cit na 500 boh leumo agam keu teupeuseumah lam peurayaan nyan. oh ka ltheueh banmandum nyan siab keu peurayaan paskah nyan, teungku-teungku imeum dan reugu-reugu ureueng lewi geucok laju teumpat di maseng-maseng teumpat lagee nyang ka geupeurintah le raja. laju awaknyan geusie beulatang keu peurayaan paskah nyan; ureueng lewi nyang

puliek kulet dan teungku imeum yang reutek darah beulatang nyan u atueuh miseubah. tieb-tieb keulompok keuluwarga nyan na teuka keunan meuteume teuma saboh nibak beulatang-beulatang nyan teuma teupeuseumah sibagoe keureubeuen yang teutot. deungon na lageenyan awaknyan ka hase jipeuseumah keureubeuen meunurot peuratoran nyan na teutuleh lam kitab hukom nabi musa. dan le ureueng-ureueng lewi pi laju geupanggang sie keureubeuen nyan di atueuh apui, nyan saban deungon peuratoran, dan geureuboih keureubeuen-keureubeuen nyan khusus di dalam kual, kanot dan beulangong, oh ltheuhnyan uengkot sie nyan bagaih-bagaih geujak bagi keu ureueng rame. oh ka ltheueh seulesoe nyan banmandum baro ktheueh ureueng-ureueng lewi geupeusiab peunajoh keu awaknyan keudroe dan keu teungku imeum keuturonan nabi harun. sabab, sampoe trok an malam le teungku imeum nyan hana geupioh geupeuseumah laju beulatang-beulatang sibagoe keureubeuen nyan teutot, dan geutot gapah nibak beulatang-beulatang nyan. ureueng-ureueng ahli musik nibak kawom asaf lam sukee lewi teutab na di teumpat tugaih geuh lagee nyan ka geupeuteuntee le nabi daud keu awaknyan. nyoe ktheueh nan-nan awaknyan: asaf, heman, dan yedutun, sidroe lamkawan nabi nyan meubuet keu raja. ureueng-ureueng nyan kawai babah pintoe geureubang hana peureulee jitinggai teumpat tugaih jihnyan, sabab awaknyan hase geupeuraya paskah di teumpat tugaih maseng-maseng deungon cara geubantu le ureueng-ureueng lewi nyan laen. bak uroenyan awaknyan geupeubuet laju peue-peue nyan ka geupeurintah le raja yosia keu peurayaan paskah nyan, meunan cit deungon peuseumahan-peuseumahan nibak miseubah. na tujoh uroe treb jih banmandum rakyat israel nyan na trok keunan jipeuraya paskah dan khanuri ruti nyan hana meurago. paskah nyan lageenyan hantom na geupeuna le yoh watee nabi samuel. hana meusidroe pi nibak raja-raja nyan sigohlom nyan kana geupeuna paskah lagee nyan ka ltheueh geupeuna lam thon nyan keulapan blaih keumat keurajeuen le yosia nyan, le raja nyan keudroe meusajan deungon teungku-teungku imeum, ureueng lewi, ureueng yehuda dan ureueng israel, meunan cit deungon peunduduek yerusalem. oh geupeubuet le raja yosia banmandum buet nyan keu baet tuhan; nekho raja nibak nanggroe meuse laju jipimpin pasokan jih u mideun prang di karkemis to nibak bineh krueng efrat. raja yosia geu-useuha geupeuteun awaknyan, teuma nekho laju geukirem haba nyan lagee nyoe ubak raja yosia, "prang nyoe bukan teusangkot u atueuh gata, hai raja yehuda! ulon teuka bukan keuneuk lon jak lawan gata, teuma keu lon jak lawan musoh-musoh ulon, dan allah ka geuyue nibak ulon mangat lon peubuet bubagaih. allah na blaih ulon, le sabab nyan bek ktheueh tatam gobnyan, teuma gata geupeuhanco le gobnyan." teuma yosia geumeukreueh keu geulawan awaknyan, dan hana geutem turot peue nyan geupeugah le po teu allah meulalu raja nekho nyan. yosia geumeunyamar dan laju geutamong u mideun prang di atueuh daratan miyueb megido. lam prang nyan raja yosia

laju keunong aneuk panah. dan le gobnyan laju geupeurintah ubak namiet-namiet gobnyan mangat jipeuteubiet gobnyan nibak prang nyan sabab gobnyan ka luka nyan brat that. awaknyan laju jibeut gobnyan nibak lam geuritan prang geuh dan laju jipinah u dalam geuritan nyan laen nyan na disinan, oh ltheuhnyan jiba laju u yerusalem. di sideh gobnyan meuninggai dan laju teupeukubu di lampoh jrat raja-raja. banmandum rakyat yehuda dan yerusalem meukabong atueuh meuninggai gobnyan. dan nabi yeremia laju geukarang saboh ca-e nyan meuba-e keu raja yosia. sampoe nibak uroenyoe ca-e nyan teutab na jipeuca-e di nanggroe israel le ureueng meuca-e, bah ktheueh nyan ureueng agam meunan cit deungon ureueng inong, nibak peu-ingat meukabong keu raja yosia nyan. ca-e-ca-e nyan ka teupeutamong u dalam kumpulan ca-e-ca-e meuba-e nyan seudeh ngon meuratok nyan meuweuh-weuh. kisah nyan laen keuhai raja yosia, keuhai cinta gobnyan ubak tuhan, dan keuhai taat gobnyan keu hukom-hukom tuhan, paneuk haba, keuhai riwayat udeb gobnyan phon awai sampoe akhe, atranyan ka teucetet lam kitab seujarah raja-raja israel dan yehuda. rakyat yehuda laju jipileh ngon baiat yoahas jeuet keuraja di yerusalem keugeunantoe raja yosia, ureueng syiek gobnyan. yoahas na umu 23 thon watee gobnyan jeuet keuraja di yehuda, dan gobnyan geumat peurintah di yerusalem 3 buleuen treb jih. nekho raja di nanggroe meuse nyan laju jidrob dan jiba yoahas u meuse, dan oh ltheuhnyan jiyue ubak yehuda mangat jibayeue upeti nyan le jih 3.400 kilogram pirak dan 34 kilogram meuh, oh ltheueh nyan teubaiat teuma elyakim syedara yoahas jeuet keuraja, dan geu-ubah nan elyakim jeuet keu yoyakim. oh ltheuhnyan yoahas laju jiba u nanggroe meuse. yoyakim na umu 25 thon bak watee gobnyan teubaiat jeuet keuraja yehuda, dan gobnyan geumat peurintah di yerusalem na 11 thon treb jih. gobnyan ka meudesya ubak tuhan po teu allah gobnyan. yoh watee raja nebukadnezar di nanggroe babel jireubot yehuda, gobnyan laju jidrob yoyakim, dan jiba laju deungon jaroe teubeuleunggu u nanggroe babel. siladum barang-barang nyan meuyuem nibak baet tuhan laju jirayueng le nebukadnezar dan laju jikeubah lam meuligoe jih di babel. kisah nyan laen keuhai yoyakim, meunan cit deungon buet-buet gobnyan nyan jeuhet dan buet-buet nyan kuto that, nyan ka teucetet lam kitab seujarah raja-raja israel dan yehuda. yoyakhin aneuk agam gobnyan teubaiat jeuet keuraja. yoyakhin na umu 18 thon watee gobnyan teuangkat jeuet keuraja yehuda, dan gobnyan geumat peurintah di yerusalem na 3 buleuen 10 uroe treb. meunan cit gobnyan le that desya nibak tuhan. bak watee meugantoe thon, raja nebukadnezar laju jiba yoyakhin u nanggroe babel sibagoe ureueng nyan teuteun, dan barang-barang nyan meuhai yuem jih nyan na didalam baet tuhan banmandum jiba. oh ltheueh nyan nebukadnezar laju jibaiat zedekia, apha nibak yoyakhin jeuet keuraja atueuh yehuda dan yerusalem. zedekia na umu 21 thon watee gobnyan teubaiat jeuet keuraja yehuda. gobnyan geumat peurintah di yerusalem na 11 thon treb jih. meunan cit gobnyan le that

desya ubak tuhan allah gobnyan. gobnyan hana geutem peumiyueb droe ubak tuhan dan hana teuma geutem seutot peue nyang ka geupeugah le nabi yeremia geuyue peusampoe peusan nibak tuhan ubak gobnyan. raja nebukadnezar ka jipaksa ubak zedekia keu geumeusumpah deumi allah bahwa gobnyan seutia ubak nebukadnezar. teuma o ltheuehnyan zedekia geubeurontak ubak nebukadnezar. zedekia geumeukreueh ulee ubak tuhan, allah israel. gobnyan hana geutem tinggai desya-desya geuh dan hana geutem woe ubak tuhan. seulaen nibak nyan, baet tuhan nyang ka geupeukhusus le tuhan keudroe, ka jipeukuto le peumimpempeumimpem yehuda, teungku-teungku imeum, dan rakyat, sabab awaknyan jiseutot meusajan ngon raja nyan geuseumah beurala ngon jiseutot cara udeb nyang peunoh deungon desya nibak bansa-bansa nyang na nyan. tuhan, allah indatu awaknyan, ka meu-ulang-ulang geukirem utosan gobnyan mangat geupeuingat umat, sabab gobnyan geuwéh ubak awaknyan dan keu baet gobnyan. teuma awaknyan han jitem deungoe dan jipeumeuen utosan-utosan po teu allah nyan, dan geupeukem nabi-nabi nyang geu utoih le gobnyan lom hana jipako ubak peue nyang geupeugah. akhe jih tuhan hana saba le dan meureuka gobnyan ateueh awaknyan ka lumpah that meuluab akhejih hanale jalan ret jiteubiet keu awaknyan mangat teuhinda nibak hukoman. tuhan laju geupeugrak ate raja nibak nanggroë babel mangat jiprang le awaknyan. rajanyan laju geupoh mate ureueng yehuda nyang mantong muda-muda, jitamong cit keunan keu awaknyan nyang na didalam baet tuhan. gobnyan hana geusayang bahpi dan ubak meusidroe ureueng pih, tuha atawa muda, agam atawa inong, ureueng saket atawa seuhat. awaknyan banmandum geuseurah le po teu allah ubak raja babel. peukakaih-peukakaih nyang na di baet tuhan, dan barang-barang nyang meuhai-meuhai yuem jih, meunan cit deungon hareuta beunda raja dan peugawee gobnyan, banmandum nyan geureupah le raja babel nyan dan laju jiba u nanggroë babel. gobnyan laju geureuloih sampoe hanco binteh beuton banda yerusalem, dan laju geutot banda nyan sampoe tutong, meunan cit deungon baet tuhan dan banmandum meuligoe meusajan deungon barang-barang nyang meuhai yuem nyang mantong na didalam meuligoe nyan. rakyat nyang hana keunong geudrob laju geuba u babel. disinan gobnyan jeuet keu hamba gobnyan dan keuturonan gobnyan sampoe ubak masa keurajeuen persia meukuasa. meunan kheueh nyang teujadi peue nyang ka ltheueh geupeugah le tuhan ubak nabi yeremia nyang bahwa nanggroë nyan teuma jeuet keupadang nyang tho kreng 70 thon treb sibagoe geunantoe thon-thon sabat nyang hana geupako. bak thon nyang keuphon watee keurajeuen kores, raja persia, tuhan laju geulaksana peue nyang ka ltheueh geupeugah meulalu nabi yeremia. tuhan laju geu peugrak ate kores mangat jipeuteubiet saboh peurintah nyang teubaca di bansaboh keurajeuen nanggroë. asoe surat nyan na kheueh lageenyoe: "nyoe kheueh peurintah kores, raja nanggroë persia! tuhan, po teu allah nyang mahakuasa dan nyang mat kuasa didalam syeuruga

ka geupeujeuet ulon raja bansigom donya, dan geubri tugaih ubak ulon mangat ulon peudong rumoh keu gobnyan di yerusalem di daerah yehuda. sababnyan, gata banmandum nyang jeuet keu umat allah haroh tariwang keudeuh! seumoga tuhan po teu allah gata geulindong gata."

syedara-syedara banmandum nyang na di roma nyang geugaseh le allah dan nyang ka geutawok le po teu allah mangat jeuet keu umat gobnyan. allah ka geupileh dan geuangkat ulon khusus keu ulon peusampoe haba get nibak allah. haba get nyan ka geupeu janji le po teu allah nibak jamen ilae meulalu nabinalah gobnyan dan ka teutuleh lam alkitab. haba get nyan keuhai aneuek allah, tuhan geutanyoe isa almaseh. seucara manusia, gobnyan na kheueh keuturonan nabi daud, teuma seucara ilahi gobnyan na kheueh aneuek allah. nyan ka deuh bukeuti ngon kuasa nyang luwabiasa meulalu gobnyan geubeudoh nibak mate. meulalu gobnyan cit teuma allah geubri karonya ubak ulon jeuet keu rasui, mangat ulon – keu lon horeumat almaseh – ulon bimbeng bubena ureueng nibak meubagoe bansa mangat jimeuiman dan taat. makna sigala bansa na kheueh jitamong gata nyang na di roma; gata pi ka geutawok keu jeuet keu umat isa almaseh. nyang kheueh sabab jih ulon teumuleh keu gata. seumoga allah bapak geutanyoe dan tuhan isa almaseh geubri beureukat dan sejahteura ubak geutanyoe. phon-phon that meulalu isa almaseh, ulon lakee teurimong gaseh ubak po teu allah sabab syedara-syedara banmandum; sabab bansaboh donya ka jideungoe bahwa gata meuiman ubak almaseh. ulon sabe na lon ingat gata watee ulon meudoa. po teu allah jeuet keusaksi bahwa peue nyang ulon peugah nyan beutoi. gobnyan kheueh allah nyang ulon seumah sipeunoh ate deungon ulon peusampoe haba get keuhai aneuek gobnyan. ulon meulakee ngon meuharab that ubak allah, seumoga gobnyan geubri idhin keu ulon bak saat nyoe keu lon jak saweue gata. sabab ulon meuheuet that keuneuk meurumpok ngon gata mangat ulon hase lon meuweuk ngon gata karonya nibak roh allah keu teupeuteuga gata. nyang ulon meukeusut na kheueh sabab geutanyoe ka sabe-sabe tameuiman ubak isa almaseh, ngon lagee nyan geutanyoe jeuet saleng tapeukong. syedara-syedara! ulon meuharab mangat gata mandum tateupeue bahwa ka jai that-tha ulon meuniet keuneuk jak saweue gata teuma sabe na mantong halangan jih. ulon meuharab mangat lamkawan gata pih buet ulon na hase jih lagee toh buet ulon nyang ka meuhase lamkawan ureueng nyang kon yahudi nibak tempat-teupat nyang laen. sabab ulon na keuwajeaban keu mandum bansa; bah kheueh nyang ka meuadab meunan cit nyang mantong biadab, bah kheueh nyang ka na peundidekan meunan cit nyang gohlohm jiteurimong peundidekan. nyang kheueh sabab jih ulon meuharab that keuneuk peutrok haba get nyang na tinggai nibak roma nyoe. ulon meuiman that nibak haba get nyan, sabab haba nyan na kheueh teunaga allah keu geupeue sealamat mandum ureueng nyang meuiman; phon-phon that ureueng yahudi, dan bansa nyang laen. sabab ngon haba get nyan allah geutanyok pakriban hubungan manusia ngon po teu allah jeuet keu get lom; cara jih na kheueh ngon teumeuiman ubak po teu allah, nibak awai sampoe akhe. nyan saban lagee nyang na teutuleh lam alkitab, "ureueng nyang meuiman ubak po teu allah akhe jih hubungan jih ngon allah jeuet keu get lom teuma, ureueng nyan teuma udeb!" nibak lam syeuruga al-

lah geupeuleumah meureuka gobnyan ateueh mandum desya dan buet nyang jeuhet nyang jipeubuet le manusia, sabab nyang jeuhet nyan jipeuteun manusia keu jiteurimong ajaran nyang beutoi keuhai allah. peue nyang hase jiteupeue le manusia keuhai po teu allah ka nyata lam ate manusia, sabab allah keudroe ka geupeugah nyan bak manusia. yoh phon allah geucebta donya nyoe, sifeuet-sifeuet allah nyang hana deuh teukalon, na kheueh keuadaan gobnyan sibagoe allah dan kuasa gobnyan nyang bakha, ka hase jiteupeue le manusia nibak mandum nyang geucebta. ngon lagee nyan manusia mubacut pih hana alasan keu jipeubeuna droe. manusia jituri allah, teuma le manusia nyan hana jihoreumat gobnyan sibagoe allah dan hana teuma jilakee teurimong gaseh ubak gobnyan. seubalek jih manusia nyang jipike nyang hana-hana; ate awaknyan ka jeuet keuse-upot. 22 awaknyan jianggag droe bijaksana, padahai awaknyan bangai. bukan allah nyang bakha nyang awaknyan seumah, teuma patong-patong nyang saban lagee makhlok nyang hase mate; na kheueh manusia, cicem, beulatang nyang meugaki peuet, dan beulatang nyang meulata. le sababnyan po teu allah geupeubiyeu awaknyan jikuasa le keuheundak ate awaknyan keu jipeubuet nyang beujat, sampoe awaknyan jipeubuet hai-hai nyang kutoe ateueh sabe keudroe-droe jih. allah nyang beutoi, awaknyan gantoe ngon nyang peuleusu. bukan peuncebta teuma nyang jicebta nyan kheueh nyang jiseumah dan jilayani le awaknyan. padahai nyang cebta nyan kheueh nyang haroh jipujoe siumu masa! amin. sabab manusia jipeubuet nyang lagee nyan, teuma allah laju geupeubiyeu awaknyan jiturot nafesus droe jih nyang hina. ureueng-ureueng inong awaknyan hana le nyang hawa keu ureueng agam lagee nyang lazem jih nibak manusia, teuma jigalak ubak sabe keudroe-droe jih nyang ureueng inong. meunan cit deungon ureueng agam; awaknyan hana le seucara beutoi jipeuna hubungan ngon ureueng inong, teuma jigalak ngon nafesus beureuhi ateueh ureueng agam. ureueng agam jipeuna buet nyang keubiet that-that malee ateueh seusabe ureueng agam, sampoe awaknyan jiteurimong meunalah nyang patot ngon buet jih nyang jeuhet nyan. 28 ngon sabab manusia meurasna hana peureulee jituri po teu allah, teuma allah geupeubiyeu mantong pikeran awaknyan jeuet keurusak, akhe jih awaknyan jipeubuet hai-hai nyang hana jeuet awaknyan peubuet. ate awaknyan peunoh ngon mandum nyang jeuhet, nyang hana beutoi; peunoh ngon seurakah, nyang brok dan peurasana bingiek; peunoh ngon nafesus keuneuk poh mate gob, meulo, peungeuet gob dan jitroh dam. awaknyan galak that jikheun-kheun keu ureueng laen, galak that jipeubrok-brok nan ureueng laen; awaknyan sombong dan kureueng aja, nyang banci keu po teu allah dan galak that jimeututoba haba nyang buhak. awaknyan carong that jimita cara-cara nyang baro keu jipeubuet nyang jeuhet. awaknyan jilawan ureueng tuha; awaknyan hana peureulee jimuphom ateueh ureueng laen; awaknyan hana seutia dan hana rasa prikeumanusiaan. awaknyan jiteupeue, bahwa meunurot hukum po teu allah, ureueng peubuet mandum nyan patot teuhukum mate. bah kheueh meunan

awaknyan teutab cit jipeubuet hai-hai nyang lagee nyan; dan situju teuma ureueng laen jipeubuet lagee nyan. ngon sabab nyan, syedara-syedara, soe kheueh gatanyan, sampoe gata tatem peusalah ureueng laen? nibak gata hana sapeuena keu gata bila droe! sabab, meunyoe gata tapeusalah ureueng laen, padahalai gata keudroe tapeubuet nyang lagee awaknyan peubuet, ngon lagee nyan gata katapeurhot hukoman ateuhe droe gata keudroe. geutanyoe tateupeue bahwa meunyoe allah geupeurhot hukoman ateuhe ureueng-ureueng nyang jipeubuet buet-buet nyang lagee nyan, keuputusan nyang geucok po teu allah nyan beutoi. teuma gata, syedara-syedara, gata peubuet cit hai-hai nyang lagee gata tudoh keu ureueng laen! dan gata tapike hase leupah nibak hukoman po teu allah? atawa gata anggab phui keumurahan ate allah dan la-pang ate atawa saba gobnyan nyang meunan rayeuk? pasti gata tateupeue bahwa allah geutunyok ate geuh nyang get nyan mangat gobnyan meuharab gata tameutobat nibak mandum desya-desya gata. teuma gata teutab kreueh ulee dan hana gatatem ubah. ngon sabab nyan gata keudroe kheueh nyang tapeuget hukoman gata meutamah geuhon watee uroe kiamat teuka, meunyoe po teu allah ka geupeuleumah meureuka gobnyan dan geupeurhot hukoman nyang ade. sabab allah teuma geubalah tieb-tieb ureueng nyang sesuai ngon buet jih. allah geubri udeb sejati dan keukai keu awaknyan nyang biet-biet jipeubuet nyang get jeuet meuteume nyang mulia, nyang teuhoreumat dan nyang abadi. teuma ureueng-ureueng nyang jipeunteng droe jih keudroe dan hana jitem taat ubak po teu allah, teuma jiseutot nyang jeuhet, ureueng-ureueng nyang lagee nyan lumpah that geubri meureuka le allah. soe mantong ureueng nyang galak jipeubuet jeuhet teuma seungsara dan meudeurita; phon-phon that ureueng yahudi, dan meunan cit ngon bansa-bansa laen. teuma mandum ureueng nyang galak jipeubuet nyang jroh teuma geubri keumuliaan dan keuhoreumatan meunan cit keuseujahteuraan le po teu allah; phon-phon that keu ureueng yahudi, meunan cit keu ureueng-ureueng bansa laen. sabab po teu allah geupeusanet mandum manusia nyan saban. ureueng-ureueng bansa laen meudesya meunyoe hana jiteupeue hukom agama yahudi. ngon lagee nyan awaknyan teuhukom diluwa hukom nyan. teuma ureueng-ureueng yahudi meudesya oh ka ltheueh jiteupeu hukom nyan; ngon sabab nyan awaknyan teuma geutuntot cit teuma ngon dasai hukom nyan. sabab ureueng jimeujroh lom ngon po teu allah, kon sabab ureueng nyan ka jiteupeue hukom agama yahudi, teuma ngon sabab jihnyan ka jipeubuet peue nyang na teutuleh lam hukom nyan. ureueng-ureueng bansa laen hana jitu-ri peue nyan hukom agama yahudi. teuma meunyoe awaknyan ateuhe keuheundak jih keudroe jipeubuet peue nyang jipeurintah le hukom nyan, ate awaknyan keudroe kheueh nyan jeuet keuhukom keu jih keudroe, bah kheueh awaknyan hana jiteupeue hukom agama yahudi. pi-e awaknyan deuh teukalon peue nyang jipeurintah le hukom nyan na teutuleh lam ate awaknyan. ate nurani awaknyan pih jeuet keubukeuti keuhai nyan, sabab awaknyan keudroe na watee jih teupeusalah dan na teuma wa-

tee jih jipeubeutoi le pikeran jih keudroe. meunan kheueh nyang teuma teujadi singoh bak uroe nyang ka teupeuteuntee nyan. nibak uroe nyan – meunurot lagee nyang teutuleh lam kitab haba get nyang ulon peusampoe – po teu allah rot isa almaseh, teuma geupeu hakem banmandum rahsia ate dan pikeran mandum manusia. teuma jinoenyoe pakriban ngon syedara-syedara keudroe? gata ta angkee droe ureueng yahudi. gata meugantueng bak hukom agama yahudi dan gata bangga ateuhe hubongan gata ngon po teu allah. gata meuteume peutunyok-peutunyok nibak hukom nyan, ngon lagee nyan gata tateupeue keuheundak allah dan tateupeue peuteuntee nyang toh nyang get. gata yaken bahwa gata na kheueh peumimpin ureueng buta dan peungeh nibak ureueng nyang na lam seupot; gata tapurunoe ureueng nyang akhlak jih brok, dan guree nibak ureueng-ureueng nyang bangai. gata yaken bahwa lam hukom agama yahudi, gata meuteume mandum ieleume peungeutahuan dan peungajaran nyang beuna. gata tapeubeuet ureueng laen; ngon lagee nyan pakon gata hana tapeubeuet droe gata keudroe? gata tapeubeuet gob mangat bek jiceumeucie, pada-hai gata keudroe ceumeucie! 22 gata tapeubeuet gob mangat bek jimeumukah, padahalai gata keudroe meumukah! gata banci ubak beurala, padahalai gata tacok barang-barang nyang na lam rumah beurala. gata tapeubangga-bangga droe bahwa nibak gata na hukom nabi musa, padahalai gata tahina allah ngon cara hana taseutot hukom gobnyan. lam alkitab na teutuleh lagee nyoe, "sabab gata, ureueng-ureueng yahudi, teuma nan po teu allah jipeukuto le bansa-bansa nyang laen." meunyoe gata taat nibak hukom agama yahudi, gata meukatan nyan na paedah jih. teuma meunyoe gata hana lazem gata patuh ubak hai-hai nyang na teupeurintah lam hukom nyan, ngon lagee nyan gata meukatan nyan hana meuguna mubacut pih. meunyoe sidroe ureueng nyang kon yahudi nyang hana meukatan, meunurot hukom agama yahudi, kon kheueh allah geuanggab nyan sibagoe ureueng nyang ka ltheueh meukatan? dan ureueng-ureueng nyang hana meukatan nyan teuma jipeusalah gata ureueng yahudi, sabab gata na hukom agama yahudi dan gata teupeukatan, teuma gata ta iengkeue ateuhe hukom nyan. awaknyan hana meukatan, teuma awaknyan kheueh nyang taat ubak hukom agama yahudi. 28 sabab ureueng yahudi nyang sejati kon kheueh ureueng nyang nan jih mantong ureueng yahudi; dan ureueng nyang biet-biet meukatan kon kheueh ureueng nyang meukatan seucara lahe mantong. sikeubiet jih, sidroe ureueng yahudi nyang sejati na kheueh ureueng nyang ate jih meujiwa yahudi; dan meukatan nyang sejati na kheueh meukatan nyang lam ate jih geupeubuet le roh allah, kon nyang na teucetet lam kitab. ureueng nyang lagee nyan jiteurimong pujoe nibak po teu allah, kon nibak manusia. meunyoe, meunan peu kheueh laba jih jeuet keu ureueng yahudi? dan peu kheueh paedah jih taseutot peuratoran meukatan? ka teuntée jai that paedah jih! phon-phon that, sabab ubak ureueng yahudi kheueh po teu allah geupeucaya feureuman-feureuman gobnyan. teuma pakriban teuma meunyoe ladum ureueng yahudi

hana seutia? peu kheueh ngon lagee nyan allah jeuet hana seutia? ka teuntee hana! sabab nyang biet jih allah sabe beutoi, bah kheueh tieb-tieb ureueng jimeusulet. lam alkitab na teutuleh lagee nyoe, "bah kheueh gata keubiet na bukeuti ateuh peue mantong nyang gata peugah, dan gata meunang bak watee gata teupeusidang," teuma meunyo keuadelan allah deuh jih seumaken trang, ngon sabab tanyoe tapeubuet nyang hana beutoi, peu kheueh nyang keuneuk tapeugah? bahwa po teu allah hana ade meunyo gobnyan geuhukom tanyoe? (keubiet teumanyong nyoe jeuet mantong seucara manusia.) sagai-sagai hana! sabab, meunyo po teu allah hana ade, pakriban gobnyan jeuet geupeu hakem donya nyoe? teuma meunyo ngon sabab buet nyang hana beutoi, peue nyang beutoi keuhai allah seumaken trang sampoe gobnyan teupujoe, pakon ureueng nyang peubuet jeuhet nyan mantong teupeusalah sibagoe ureueng nyang peubuet desya? dan pakon tanyoe hana jeuet tapeugah, "bah kheueh tanyoe tapeubuet jeuhet mangat teuka nyang jroh?" beutoi na ureueng-ureueng nyang jihina ulon sira jipeugah bahwa ulon ka lon peugah lagee nyan. ureueng-ureueng nyang lagee nyan ka patot geuhukom le allah. ngon lagee nyan, peue kheueh meuneuduek tanyoe sibagoe ureueng yahudi leubeh get nibak bansa laen? sagai-sagai hana! ka lheureu lon peugah bahwa bah kheueh ureueng yahudi meunan cit bansa laen, banmandum nyan ka jikuasa le desya. lagee nyang ka teutuleh lam alkitab, "hana meusidroe ureueng pi nyang beutoi, hana meusidroe pi nyang muphom dan hana meusidroe pih nyang seumah allah. banmandum ureueng ka jipeujiah droe nibak po teu allah; banmandum ka sisat. hana meusidroe ureueng nyang peubuet nyang beutoi; meusidroe pi hana! rukueng awaknyan lagee jirat nyang teuhah. tipee ngon daya lagee ie ile nyang teuka bak lidah awaknyan, dan bibi awaknyan jipeuteuka fiteunah lagee uleue nyang meubisa. babah awaknyan ka peunoh ngon kutok dan seurapa. langkah awaknyan bagaih that jigrak meunyo keuneuk jaksekna ngon jipoh mate gob. hanco ngon azeb seungsara jitabu le awaknyan dipat mantong. awaknyan ka buta ateuh jalan keuseujahteuraan, dan hana jihoreumat po teu allah." jinoenyo tanyoe tateupeue bahwa banmandum nyang teutuleh lam hukum agama yahudi, na kheueh keu ureueng-ureueng nyang na dimiyueb peumeurintahan hukum nyan. ngon lagee nyan hana meusidroe pi nyang hase jibri alasan peue-peue mantong dan bansigom donya jeuet geutuntot le allah. sabab hana meusidroe pi nyang teupeumungken jimeuget ngon po teu allah le sabab ureueng nyan jipeubuet hai-hai nyang na lam hukum agama. nyang sibeuna jih hukum nyan sibagoe teutunyok ubak manusia bahwa manusia nyan meudesya. teuma jinoenyo eleh ka geutunyok jalan pakriban manusia jimeuget ngon gobnyan; dan cara jihnyan hana sangkot paot jih ngon hukum agama yahudi. kitab-kitab nabi musa dan kitab-kitab nabi-nabi nyang peugah hai nyan, 22 bahwa po teu allah geupeumungken manusia jimeuget ngon gobnyan, na kheueh meunyo manusia nyan jimeuiman ubak isa almaseh. allah geupeubuetnyoe keu mandum ureueng nyang meuiman

ubak almaseh; sabab hana nyang peubeda: mandum ureueng ka meudesya dan jioh nibak po teu allah nyang keuneuk peuseulamat awaknyan. teuma sabab rakhmat allah mantong nyang geubri ngon cuma-cuma, hubongan manusia ngon allah jeuet keuget lom teuma; cara jih na kheueh: manusia geupeubeubaih le isa. allah geukeureubeuen isa mangat jeuet ngon mate gobnyan manusia kateupeubeubaih nibak salah meunyo awaknyan meuiman ubak gobnyan. allah geupeuget meunan sibagoe geutunyok bahwa gobnyan ade. sabab yoh watee ilee allah ka geupeuteun saba ateuh desya-desya manusia, sampoe gobnyan hana geuhukom awaknyan. teuma jinoenyo gobnyan geucok tindakan ateuh desya sibagoe geubri bukeuti bahwa gobnyan ade. ngon caranyan gobnyan ka geutunyok bahwa droe gobnyan beutoi; dan tieb-tieb ureueng nyang meuiman keu isa, geupeugah sibagoe ureueng nyang ka jimeuget lom teuma ngon po teu allah. ngon sabab nyan hana le alasan nibak geutanyoe keutapeubangga droe. pakon lagee nyan? peu kheueh sabab tanyoe tapeubuet peue nyang na teutuleh lam hukum agama yahudi? kon nyan, sabab geutanyoe katameuiman. 28 sabab keusimpolan jih na kheueh lagee nyoe: ureueng nyang teupeugah jimeuget lom teuma ngon po teu allah, kon sabab jipeubuet peue nyang na teutuleh lam agama yahudi, teuma sabab jihnyan meuiman ubak isa almaseh. atawa peu kheueh allah nyan allah ureueng yahudi mantong? peu kheueh gobnyan kon allah bansa laen cit teuma? beutoi, gobnyan allah bansa laen cit teuma! sabab allah na kheueh sidroe. gobnyan kheueh nyang peumungken ureueng-ureueng yahudi jimeuget lom teuma ngon allah sabab awaknyan meuiman. dan gobnyan kheueh teuma nyang peumungken bansa-bansa laen jimeuget lom teuma ngon allah; nyan saban cit sabab awaknyan meuiman. peu kheueh nyang meumakna bahwa sabab geutanyoe meuiman ubak almaseh, tanyoe ka taboih hukum agama yahudi? sagai-sagai hana! teuma nyang seubeuna jih ngon meuiman nyan, tanyoe ka tahareuga hukum nyan. meunyo lagee nyan, peue kheueh nyang jeuet tapeugah keuhai nabi ibrahim, indutu bansa tanyoe? pakriban kheueh peungalaman gobnyan? meunyo hai-hai nyang geupeubuet jeuet keusabab allah geuteurimong gobnyan sibagoe ureueng nyang jipeumangat ate allah, ngon lagee nyan na alasan nibak gobnyan keu geupeu bangga ate. teuma gobnyan hana hase geupeu bangga droe dikeue po teu allah. lam alkitab na teutuleh lagee nyoe, "nabi ibrahim meuiman ubak po teu allah, dan ngon sabab meuiman geuh nyoe gobnyan geuteurimong le allah sibagoe ureueng nyang jipeugalak ate allah." ureueng mubuet, jiteurimong upah; dan upah jihnyan hana jianggab sibagoe meuneubri, sabab nyan na kheueh hak jih. teuma na teuma ureueng nyang hana meugantueng nibak useuha jih keudroe; ureueng nyan jimeuiman droe jih ubak po teu allah nyang peugah ureueng meudesya beubaih nibak buet nyang salah. ngon dasai jimeuiman nyan kheueh allah geuteurimong ureueng nyan sibagoe ureueng nyang jipeugalak ate allah. meunan cit ngon peundapat nabi daud; nyang kheueh sabab jih gobnyan geupeugah seulamat meubahgia keu ureueng nyang le allah ka

geuteurimong sibagoe ureueng nyang jipeugalak ate gobnyan, meunyoë allah hana geukalon buet-buet ureueng nyan. nabi daoud geupeugah lagee nyoe, "seulamat mubahgia ureueng nyang jipeubuet salah teuma geupeu amphon le po dan desya-desya jih ka geupeu kubu le allah! seulamat mubahgia ureueng nyang desya-desya jih hana geutuntot le tuhan!" peu kheueh teupeugah seulamat mubahgia nyoe teutuju keu ureueng nyang meusunat mantong? atawa keu ureueng-ureueng nyang hana jitem turot peuratoran meusunat? ka ltheueh kamoe peugah sigohlom nyoe, bahwa nabi ibrahim geuteurimong le allah sibagoe ureueng nyang teupeugalak ate gobnyan, sabab nabi ibrahim meuiman keu po teu allah. ngon lagee nyan, pajan kheueh allah geupeugah hai nyan? sigohlom atawa oh ka ltheueh nabi ibrahim meukatan? beutoi sigohlom gobnyan teupeukatan, bukan oh ka ltheueh nyan. gobnyan teupeukatan teuma oh dudoe, dan meukatan geuh nyan sibagoe tanda bahwa allah ka geuteurimong gobnyan sibagoe ureueng nyang jipeugalak ate allah, sabab geumeuiman ubak allah. gobnyan geuteurimong le allah bak watee gobnyan gohlom geuseutot peuratoran meukatan. dan nabi ibrahim jeuet keu bapak seucara rohani keu mandum ureueng nyang meuiman ubak po teu allah, dan ngon sabab nyan ka geuteurimong le allah sibagoe ureueng nyang peugalak ate gobnyan, bah pi awaknyan hana jiseutot peuratoran meukatan. meunan cit nabi ibrahim bapak rohani keu ureueng-ureueng nyang meukatan. gobnyan bapak rohani awaknyan bukan sabab jih awaknyan jiseutot peuratoran meukatan, sabab awaknyan udeb ngon jimeuiman ubak po teu allah, saban lagee nabi ibrahim bak watee gobnyan gohlom geuseutot peuratoran meukatan. allah meujanji ubak nabi ibrahim dan keuturonan gobnyan bahwa donya nyoe teuma jeuet keu milek nabi ibrahim. allah geumeujanji lagee nyan bukan ngon sabab nabi ibrahim taat keu hukum agama yahudi, teuma sabab gobnyan meuiman keu allah sampoe gobnyan geuteurimong le allah sibagoe ureueng nyang jipeugalak ate gobnyan. sabab meunyoë teuma ureueng-ureueng nyang taat keu hukum agama yahudi mantong nyang teurimong peue nyang ka geupeu janji le allah nyan, teumeuiman ubak po teu allah hana meuguna mubacut pih, dan janji allah pi soh hana meuguna. hukum agama yahudi teupeuteuka hukoman allah. teuma meunyoë hukum hana, buet-buet nyang teulanggar pi hana. ngon lagee nyan janji allah nyan dasai jih na kheueh manusia jimeuiman ubak allah. nyan jeuet keu jaminan ubak banmandum keuturonan nabi ibrahim bahwa janjinyan geubri ubak awaknyan sibagoe meuneubri nyang cuma-cuma nibak allah; kon mantong keu awaknyan nyang taat ubak hukum agama yahudi, teuma meunan cit keu ureueng nyang meuiman ubak allah saban lagee nabi ibrahim meuiman ubak gobnyan. sabab nabi ibrahim na kheueh ureueng syiek geutanyoe banmandum seucara rohani. sabab po teu allah meufeureuman lagee nyoe ubak nabi ibrahim, "ulon ka kupeujeuet gata bapak keumandum bansa." meunan kheueh allah geubri janji nyan ubak nabi ibrahim. dan nabi ibrahim meuiman ubak gobnyan. gobnyan kheueh allah nyang peu-udeb ureueng mate;

dan gobnyan kheueh teuma allah nyang ngon geupeugah mantong beujeuet peue nyang hantom na hase na. nabi ibrahim teutab meuharab dan peucaya bah kheueh hana harapan le. sabab nyan gobnyan jeuet keu bapak le mandum bansa. lagee nyang na teutuleh lam alkitab, "keuturonan gata teuma meukeumang jai lagoena." nabi ibrahim bak watee nyan geuteupeue bahwa gobnyan hana mungken le meuteume keuturonan, sabab tuboh gobnyan ka tuha that dan umu gobnyan bak sireutuh thon; lom teuma sara, peurumoh gobnyan, balui. teuma bah kheueh meunan iman nabi ibrahim teutab hana meukureueng. gobnyan teutab meuiman dan hana was-was peue nyang ka geupeu janji le po teu allah keu gobnyan. dan iman gobnyan meutamah kong dan gobnyan sabe meudhike ubak allah. gobnyan peucaya that bahwa allah hase geupeubuet peue nyang ka geupeu janji ubak gobnyan. 22 nyang kheueh sabab jih nabi ibrahim geuteurimong le po teu allah sibagoe ureueng nyang peumangat ate gobnyan. haba "teuteurimong sibagoe ureueng nyang peumangat ate allah" teutuleh kon mantong keu nabi ibrahim, teuma rhot cit keugeutanyoe. geutanyoe pi geuteurimong sibagoe ureueng nyang peumangat ate allah, sabab geutanyoe meuiman ubak allah nyang peu-udeb isa, tuhan geutanyoe, nibak mate. isa ka geujok keu jipoh mate sabab desya-desya geutanyoe; laju gobnyan geupeu udeb lom teuma le po teu allah sibagoe geutanyoe tameuget lom ngon allah. jinoenyoë tanyoe ka tameuget lom ngon po teu allah, sabab tanyoe tameuiman. dan ngon sababnyan tanyoe udeb dame ngon allah rot tuhan geutanyoe isa almaseh. ngon sabab nyan tanyoe meuiman ubak isa. deungon na lagee nyan teupeu mungken tanyoe tahayati geunaseh allah, dan geunaseh nyan kheueh tanyoe udeb bak saat nyoe. ngon sabab nyan tanyoe meugalak ate sabab geutanyoe na harapan bahwa tanyoe teuma tarasa keubahgian nyang geubri le allah! dan nyang leubeuh nibak nyan, geutanyoe pi geumbira lam deurita, sabab tanyoe tateupeue ngon deurita nyan teupeujeuet manusia meutamah khususyuet, dan ngon khususyuet nyan teupeujeuet manusia jeuet teu-ujoe; ngon lagee nyan kheueh jipeuteuka harapan. harapan nyang lagee nyoe hana teuma keucewa geutanyoe, sabab lam ate geutanyoe ka geupasoe le po teu allah ngon geunaseh gobnyan. allah geupeubuet nyan ngon peurantaraan roh gobnyan, nyang ka geubri keu geutanyoe. watee tanyoe lam keuadaan hana meudaya, almaseh mate keu geutanyoe bak watee nyang paih nyang ka geupeuteuntee le po teu allah; padahai tanyoe ureueng-ureueng nyang jioh nibak allah. keu sidroe-droe ureueng nyang ade pih payah that ureueng jitem mate. mungken keu sidroe ureueng nyang get, na cit ureueng nyang jitem mate. teuma le allah geupeuleumah geunaseh gobnyan ubak tanyoe watee almaseh mate keugeutanyoe bak watee tanyoe mantong jeuet ureueng meudesya. jinoenyoë tanyoe ka tameuget lom ngon po teu allah rot almaseh mate; ngon sabab nyan pasti geutanyoe geupeu seulamat cit teuma nibak azeb allah le almaseh. meunyoë bak watee tanyoe meumusoh ngon allah, geutanyoe geupeu dame ngon gobnyan meulalu aneuek geuh mate, peulom jinoenyoë oh ka ltheueh hubungan tanyoe

ngon allah get lom teuma, ka teuntée tanyoe geubri seulamot rot udeb almaseh. dan nyang leubeh nibak nyan, geutanyoe pi galak that ate atueuh jroh geuh allah rot tuhan geutanyoe isa almaseh. sabab rot almaseh, tanyoe bak wateenyoe tarasa hubonganyoe nyang get ngon allah. desya jitamong lam donya rot sidroe ureueng, dan nibak desya nyan teuka kheueh mate. akibat jih, mate laju jimeu-eue ubak mandum manusia, sabab mandum ureueng ka meudesya. sigohlom hukom agama yahudi geubri le po, desya ka na atueuh rhueung donya. teuma desya hana jituntot, sabab hana hukom nyang jeuet ji-iengkeue. teuma, phon jamen nabi adam trok ubak jamen nabi musa, mate ka jikuasa mandum umat manusia. bah kheueh ureueng-ureueng nyang hana jipeubuet buet nyang meulanggeh ngon cara nyang sa lagee nyang geupeubuet le nabi adam, ureueng-ureueng nyang pih meusajan cit jikuasa le mate. nabi adam na kheueh sibagoe gamba nibak gobnyan nyang teuka singoh dudoe, teuma mandua nyan hana saban; sabab meuneubri allah jioh leubeh rayeuk meunoye teupeusa ngon buet nyang geulanggeh le nabi adam. buet sidroe ureueng nyang salah jeuet keusabab jai that-that manusia mate. padub na leubeh rayeuk lom akibat nibak rakhmat allah dan hadiah keuseulamatan nyang geubri keu ureueng rame, rot ate nyang jroh sidroe ureueng, na kheueh isa almaseh. meunan cit hadiah allah jioh leubeh rayeuk nibak desya nyang sa nyan. sabab oh ka ltheuh sidroe ureueng jipeubuet buet nyang ji-iengkeue, jipeurhot kheueh ponis, "meusalah". teuma oh ka ltheuh jai that ureueng jipeubuet desya teuka kheueh hadiah po teu allah nyang geupeugah, "hana meusalah". sabab buet nyang jilanggeh le sidroe ureueng, mate laju jimeu-eue ho-ho mantong rot ureueng nyang sidroe nyan. padub na leubeh rayeuk lom akibat nibak peue nyang jipeubuet le sidroe ureueng nyang laen, na kheueh isa almaseh. rot gobnyan, allah geupeutleun limpahan rakhmat gobnyan ubak ureueng rame, dan ngon hana meuharab sapeue geupeu mungken manusia jimeuget lom ngon allah; awaknyan jimeukuasa atueuh rhueung donya nyoe rot almaseh. teuma, lagee toh buet nyang ka ji-iengkeue le sidroe ureueng jeuet keu akibat banmandum umat manusia geuhukom, meunan cit ngon buet nyang jipeubuet le sidroe ureueng nyang jiseutot keuheundak po teu allah, jeuet keuakibat mandum ureueng geupeubeubaih nibak buet salah dan geubri udeb. dan lagee toh jai that ureueng ka jeuet keu ureueng meudesya sabab sidroe ureueng nyang hana taat, meunan cit teuma jai that ureueng teupeumungken jimeuget lom ngon po teu allah sabab sidroe ureueng taat ubak allah. nyang bri hukom agama yahudi na kheueh allah keudroe. teuma seumaken manusia jiseueha jitaat ubak hukom nyan, seumaken jai awaknyan ji iengkeue dan meudesya ubak allah. teuma seumaken manusia jipeubuet desya, allah teutab geugaseh keu awaknyan. ngon sabab nyan, tanyoe museuti mate sabab tanyoe ka tapeubuet desya. teuma allah geugaseh keu tanyoe dan geubri jalan ubak geutanyoe keu tameuget lom teuma ngon gobnyan. dan sabab hubungan geutanyoe ngon po teu allah ka get lom teuma, gobnyan pi geubri udeb seujati dan keukai ubak geu-

tanyoe rot isa almaseh, tuhan geutanyoe. meunoye meunan, peu kheueh nyang jeuet tapeugah? peu kheueh geutanyoe tapeubuet desya sabe mangat allah geugaseh keu tanyoe? teuntée hana! desya hana le meukuasa atueuh geutanyoe, ngon lagee nyan, panna hase tanyoe udeb sabe tapeubuet desya? peu kheueh gata mandum tapeupeue bahwa bak watee tanyoe teupumano, tanyoe ka teupeusaboh ngon isa? ngon lagee nyan makna jih tanyoe ka geupeu saboh lam mate gobnyan. ngon teupumano nyan, tanyoe teupeukubu meusajan ngon almaseh dan meusajan mate ngon gobnyan, mangat jeuet lagee toh almaseh ka geupeu udeb nibak mate ngon kuasa bakpak nyang mulia, meunan kheueh tanyoe hase tarasa udeb nyang baro. meunoye tanyoe ka jeuet meusaboh ngon almaseh sabab tanyoe meusajan mate ngon gobnyan, tanyoe teuma jeuet meusaboh ngon gobnyan sabab geutanyoe meusajan geupeu udeb lom saban lagee gobnyan. tanyoe tapeupeue bahwa tabiat geutanyoe nyang katreb sibagoe manusia ka teupumate meusajan-sajan ngon almaseh bak kayee saleb mangat kuasa tabiat geutanyoe nyang meudesya nyan teupeuhanco; ngon lagee nyan tanyoe hana le jipeubudak le desya. sabab meunoye sidroe-droe ureueng mate, ureueng nyan teupeubeubaih nibak kuasa desya. meunoye tanyoe mate meusajan ngon almaseh, tanyoe peucaya bahwa tanyoe pih teuma udeb meusajan gobnyan. sabab tanyoe tapeupeue bahwa almaseh ka geupeu udeb nibak mate dan gobnyan hana teuma mate le; mate hana meukuasa le atueuh droe gobnyan. mate nyang geuras le almaseh na kheueh mate atueuh desya. nyan na jih sigoe mantong keu siumu masa. dan udeb nyang geuras bak watee nyoe na kheueh udeb keu po teu allah. gata pih haroh gata anggab droe gata mate atueuh desya, teuma udeb lam hubungan nyang krab ngon allah meulalu isa. bek le peubiyeu desya jikuasa udeb gata nyang fana mangat gata bek taturot keuheundak gata nyang jeuhet. meunan cit bek teuma gata seurah anggota tuboh gata ubak kuasa desya keu teupeuguna keu meukeusut-meukeusut nyang jeuhet. teuma peujok kheueh droe gata ubak allah sibagoe ureueng nyang ka geupinah nibak mate ubak udeb. bie kheueh bansaboh tuboh gata ubak allah mangat geupeu guna keu geupeubuet keuheundak allah. desya hana jeuet jikuasa atueuh gata, sabab gata hana le udeb dimiyeuh hukom agama yahudi teuma ka dimiyeub rakhmat allah. jinoenyoe, peue keusimpolan jih? peu kheueh jeuet tanyoe meudesya, sabab tanyoe ka hana le dimiyeub kuasa hukom agama yahudi, teuma ka dimiyeub rakhmat allah? sagai-sagai hana! peu kheueh gata teupeu meunoye gata peujok droe ubak sidroe-droe ureueng keu teupeubuet keuheundak jih ngon lagee nyan gata na kheueh namiet ureueng nyang gata taat nyan – aleh namiet desya nyang jiba gata ubak mate, atawa namiet nyang taat ubak allah, dan ngon lagee nyan meuget lom teuma ngon allah. teuma teurimong gaseh ubak allah! sabab yoh masa ilee gata jeuet keu namiet desya, teuma bak watee nyoe gata nyang sipeunoh ate gata taat ubak peungajaran nyang beutoi nyang ka teubri ubak gata. gata ka teupeubeubaih nibak desya, dan jinoenyoe jeuet keu hamba lagee nyang geulakee le

allah. sabab daya pike gata that-that leumoh, ulon peuguna tambéh-tambéh keunamiet mangat leubéh gata muphom. yoh watee ilee gata peujok droe bansaboh tuboh gata sibagoe namiet keu hai-hai nyang kutoe dan nyang jeuhet keu meukeusut-meukeusut nyang jeuhet teuma. meunan cit bak watee nyoe, bah kheueh gata jok bansaboh tuboh gata sibagoe hamba lagee nyang geukeuheundak le allah keu meukeusut-meukeusut allah nyang khusus. watee gata jicok keunamiet le desya, gata hana jikuasa le keuheundak po teu allah. bak watee nyan peu kheueh laba jih nyang gata teurimong nibak hai-hai nyang bak watee nyoe gata malee bak tapeubuet? buet-buet nyang lagee nyan teuma teuba ubak mate! 22 teuma jinoenyoegata kateupeubebaih nibak desya, dan jeuet keu hamba allah. laba gata na kheueh bahwa gata udeb khusus keu po teu allah dan hai nyan jipeuhase udeb sejati dan keukai. sabab mate na kheueh upah nibak desya; teuma udeb sejati dan keukai meusajan ngon isa tuhan tanyoe na kheueh meuneubri nyang geubri le allah ngon cuma-cuma. syedarsyedara lon! gata banmandum ka taturi keu hukum. ngon lagee nyan, gata tateupeue bahwa keukuasaan hukum ateuéh sidroe-droe ureueng, meulaku simantong ureueng nyan udeb. sidroe ureueng inong nyang na lakoe, miseuh jih, teuitak ngon hukum bak lakoe jih seumantong lakoe jih udeb. meunyoelakoe jih ka meuninggai donya, peurumoh ureueng nyan ka beubaih nibak hukum nyang teuitak jihnyan bak teungku lakoe. meunyoelakoe inong nyan udeb ngon agam laen seudangkan lakoe jih mantong udeb, dan ureueng inong nyan teupeugah ka meumukah. teuma meunyoelakoe jih meuninggai donya, seucara hukum, inong nyan ka beubaih. dan meunyoelakoe inong nyan jimeukawen lom ngon agam laen, inong nyan hana teupeugah meumukah. meunan cit hai jih ngon gata, syedara-syedara lon. teuhadab hukum agama yahudi gata ka mate, sabab gata ka teupeusaboh ngon tuboh almaseh dan ka jeuet keu atra gobnyan nyang ka teupeu udeb lom teuma nibak mate. gobnyan teupeu-udeb nibak mate mangat tanyoe jeuet meuguna nibak po teu allah, lam udeb geutanyoe. sabab, yoh masa ilee tanyoe udeb meunurot sifeuet-sifeuet manusia. bak watee nyan nafeusu-nafeusu nyang meudesya, nyang teuka sabab na hukum agama, jimat peuranan lam tuboh geutanyoe. nyang kheueh sabab jih tanyoe tapeubuet hai-hai nyang akibat jih rhot bak mate. teuma jinoenyoetanyoe hana le teuitak bak hukum agama yahudi. tanyoe ka mate ateuéh hukum nyang yoh watee ilee jikuasa tanyoe. tanyoe hana le meungabdi ngon cara nyang awai, meunurot hukum nyang teutuleh. jinoenyoetanyoe meungabdi meunurot cara baro nyang jitungkok le roh allah ubak geutanyoe. meunyoelakoe meunan, peu kheueh jeuet tapeugah? bahwa hukum agama yahudi nyan jeuhet? teunttee hana! teuma hukum nyan kheueh nyang purunoe ulon keuhai desya. ulon hana teuma lom teupeu peue nyang teupeugah ngon leuha nyan, meunyoelakoe hukum agama yahudi hana jipeugah, "bek kheueh leuha." rot hukum agama, desya meuteume keuseumpatan keu jipeuteuka mubagoe rupa keuheundak nyang leuha lam ate ulon; sabab meunyoelakoe hukum agama hana,

dan desya pih mate. ulon ilee udeb hana meuagama. teuma watee hukum agama teuka, desya ka jipeuphon udeb dan ulon mate. dan hukum agama nyan, nyang yoh awai na meukeusut keu teubri udeb, nyang teuka na kheueh mate ateuéh ulon. sabab meulalu hukum agama nyan, desya jicok keuseumpatan keu jipeunget dan jipoh mate lon. hukum agama asai jih nibak po teu allah, dan tieb-tieb peurintah nyang na lam hukum nyan teuka jih nibak po teu allah, jadi ade dan jroh. ngon lagee nyan, peu kheueh nyoe meumakna bahwa nyang get nyan jipeuteuka mate keu ulon? teunttee hana! desya kheueh nyang peuteuka mate nyan. ngon teupeuguna nyang get, desya jipeuteuka mate ateuéh ulon, mangat sifeuet-sifeuet desya mangat deuh ngon nyata. ngon peurintah-peurintah po teu allah, deuh kheueh bukeuti jih padub na jeuhet jih desya. tanyoe tateupeue bahwa hukum agama yahudi asai jih nibak roh allah; teuma ulon nyoe manusia leumoh. ulon ka jipeubloe jeuet keu namiet desya. sabab ulon keudroe hana muphom buet ulon. hai-hai nyang keuneuk ulon peubuet, nyan hana lon peubuet; teuma keu hai-hai nyang ulon banci, nyang lagee nyan nyang ulon peubuet. ngon lagee nyan, meunyoelakoe ulon peubuet hai-hai nyang hana patot ngon keuheundak ulon, nyan saban cit ulon angkee bahwa hukum agama yahudi get. ngon lagee nyan, kon ulon le nyang sibeuna jih nyang peubuet lagee nyan, teuma desya nyang ka jikuasa ateuéh droe ulon. ulon kuteupeue bahwa hana meusapeue pih nyang get lam tuboh ulon; na kheueh lam tabiat ulon sibagoe manusia. sabab na meuheuet lam droe ulon keuneuk peubuet nyang jroh, teuma ulon hana hase lon peubuet nyan. ulon hana lon peubuet nyang get nyang lon keuneuk peubuet; sikeubit jih nyang ulon peubuet hai-hai nyang jeuhet, nyang hana lontem peubuet. meunyoelakoe ulon peubuet hai-hai nyang hana lon tem peubuet, nyan saban cit bukon ulon nyang peubuet hai nyan, teuma desya nyang ka jikuasa ateuéh droe ulon. ngon lagee nyan ulon cok keuputusan bahwa hukum nyoe kheueh nyang mat peuranan: na kheueh bahwa meunyoelakoe keuneuk peubuet nyang get, teuma nyang jeuhet mantong nyang jiteuka bak ulon. 22 baten ulon galak ubak hukum allah, teuma ulon sadar bahwa lam droe ulon na teuma hukum laen nyang jimat peuranan – na kheueh hukum nyang meubeda ngon hukum nyang jiaku le akai budho lon. nyang kheueh sabab jih ulon teuitak nibak hukum desya nyang mat keumudo lam tuboh ulon. syedara, lagee nyoe kheueh keuadaan ulon: ulon taat keu hukum allah ngon akai budho lon, teuma ngon tabiat manusia ulon, ulon taklok ubak desya. mupaloe that ulon nyoe! soe kheueh nyang tem peuseulamat ulon nibak tuboh nyoe nyang ba ulon ubak mate? syukoe ubak po teu allah! gobnyan geutem peuseulamat ulon meulalu isa almaseh. jinoenyoelakoe hana hukoman keue ureueng nyang udeb meusaboh ngon isa. sabab hukum roh allah nyang peujeuet geutanyoe udeb meusaboh ngon isa ka geupeubeubaih ulon nibak hukum nyang teupeusabab desya dan mate. peue nyang hana hase jipeubuet le hukum agama, sabab geutanyoe manusia leumoh, nyan ka geupeubuet le allah. allah geupeutaloe kuasa desya lam tabiat manusia ngon geukirem aneuek gobnyan keudroe, nyang teuka lam keuadaan

saban dengah manusia nyang meudesya, keu teusampoh desya. allah geupeubuet lagee nyan mangat keuheundak gobnyan nyang na lam hukom agama yahudi nyan jeuet teupeujak lam droe geutanyoe nyang udeb meunurot roh allah dan kon meunurot tabiat manusia. ureueng-ureueng nyang udeb meunurot tabiat manusia, hana pioh jipike peue nyang jilakee le tabiat manusia. teuma ureueng nyang udeb meunurot roh allah, hana pioh jipike peue nyang lakee le roh allah. meunyoee pikeran gata jikuasa le tabiat manusia, akibat jih na kheueh mate. teuma meunyoee pikeran gata jikuasa le roh allah, teuma akibat jih na kheueh udeb dame ngon allah. ureueng nyang jikuasa le tabiat manusia, ureueng nyan jimeumusoh ngon allah; sabab ureueng nyan hana tundok ubak hukom allah; dan keubiet jihnyan hana hase tundok ubak hukom allah. ureueng nyang udeb meunurot tabiat manusia, ureueng nyan hana hase jipeugalak ate allah. teuma gata hana udeb meunurot tabiat manusia. gata udeb meunurot roh allah – meunyoee, teuntée jih, roh allah biet-biet geumat peuranan lam tuboh gata. ureueng nyang hana bak jih roh almaseh, ureueng nyan bukan kheueh atra almaseh. teuma meunyoee almaseh udeb lam tuboh gata, bah pi tuboh gata teuma mate ngon sabab desya, teuma roh allah geubri udeb bak gata, sabab hubungan gata ngon allah ka get. meunyoee roh allah, nyang peu-udeb almaseh nibak mate, udeb lam tuboh gata, teuma gobnyan nyang peu-udeb almaseh nibak mate nyan, teuma geupeu udeb teuma tuboh gata nyang hase mate nyan. gobnyan geupeubuet nyan ngon roh gobnyan nyang udeb lam tuboh gata. nyang kheueh sabab jih, syedara-syedara, geutanyoe na tanggong jaweueb; teuma kon tanggong jaweueb ubak tabiat manusia; tanyoe hana peureulee udeb meunurot nyang jilakee. sabab meunyoee gata udeb meunurot tabiat manusia, teuma gata mate; teuma meunyoee ngon kuasa roh allah, gata hana pioh tapeumate buet-buet gata nyang meudesya, ngon lagee nyan gata teuma udeb. ureueng-ureueng nyang geubimbeng le roh allah, na kheueh aneuek-aneuek allah. sabab roh, nyang geubri le allah ubak gata, hana kheueh teupeujeuet gata jeuet keu namiet sampoe gata udeb lam keuadaan teumakot. nyang beuna roh allah nyan teupeujeuet gata keu aneuek-aneuek allah. dan ngon kuasa roh allah nyan tanyoe tapeugah keu allah nyan, "bapak, nyoe bapak lon!" roh allah meusajan-sajan ngon roh geutanyoe jipeugah bahwa tanyoe na kheueh aneuek-aneuek allah. ngon lagee nyan, meunyoee tanyoe na kheueh aneuek-aneuek gobnyan, tanyoe pih na kheueh ahli wareh gobnyan nyang teuma tateurimong beureukat-beureukat nyang teuma geukeubah le allah keu aneuek-aneuek gobnyan. geutanyoe teuma tateurimong meusajansajan ngon almaseh peue nyang ka geukeubah le allah keu gobnyan; sabab meunyoee tanyoe meudeurita meusajan ngon almaseh, tanyoe pih geupeumulia meusajan gobnyan. banmandum deurit na yang tarasa bak watee nyoe, meunurot peundapat ulon, hana hase tapeusa mubacut pih ngon keumuliaan nyang teuma geupeugah ubak geutanyoe. bansigom donya jipreh ngon that-that meucen teuma watee jih allah geupeugah aneuek-aneuek gobnyan. sabab

alam ka geupeubiyeu jeuet keu rapoh, bukan sabab keuheundak jih keudroe, teuma ngon sabab allah geupeubiyeu lagee nyan. bah kheueh ka lagee nyan na cit harapan nyoe: bahwa bak saboh watee alam teuma geupeubeubaih nibak kuasa nyang peuhanco dan teuma meusajan jipeumeurdehka meunan cit jipeumulia meusajan-sajan ngon aneuek-aneuek allah. 22 tanyoe tateupeue bahwa trok bak wateenyoee bansigom donya apoh apah sabab meudeurita lagee sidroe inong nyang jipeulahe aneuek banyak. dan bukan bansigom donya mantong nyang apoh apah; tanyoe keudroe pih apoh apah lam baten. tanyoe ka tateurimong roh allah sibagoe meuneubri allah nyang phon, teuma tanyoe teutab mantong tapreh allah geupeubeubaih droe geutanyoe banmandum nyan dan geupeujeuet tanyoe sibagoe aneuek-aneuek gobnyan. sabab ngon meuharab, tanyoe geupeu seulat. teuma meunyoee peue nyang taharab nyan ka deuh tangieng, nyan bukan le harapan. sabab soe kheueh nyang mantong meuharab sapeue-sapeue meunyoee ka deuh jingingi? teuma meunyoee tanyoe meuharab sapeue-sapeue nyang gohlom tangieng, tanyoe tapreh ngon saba. meunan cit ngon roh allah teuka geujak tulong tanyoe meunyoee tanyoe leumoh. sabab geutanyoe hana tateupeue pakriban nyang sibeuna jih tanyoe meudoo; roh nyan keudroe meuhadab allah keu jikak lakee keu geutanyoe ngon meucen nyang leupah lhok sampoe hana hase jipeugah. ngon lagee nyan po teu allah, nyang geuteupeue asoe ate manusia, muphom peue nyang jilakee le roh nyan; sabab roh nyan jilakee ubak allah keu umat allah keudroe, dan saban ngon keuheundak allah. 28 tanyoe tateupeue bahwa allah nyang atoe peue-peue mantong, sampoe jipeuhase nyang get keu ureueng-ureueng nyang gaseh gobnyan dan geuhoi jihnyan saban ngon reuncana gobnyan. awaknyan nyang ka geupileh le allah, ka teuma geupeunteuntee nibak awaiphon keu jeuet keusaban lagee aneuek gobnyan, na kheueh isa almaseh. ngon lagee nyan aneuek nyan ka jeuet nyang phon lamkawan syedara-syedara jih. meunan kheueh allah geutawok awaknyan nyang ka geupeunteuntee leubeh ilee; dan awaknyan nyang geuhoi nyan, teupeumungken jimeuget lom teuma ngon gobnyan. dan awaknyan nyang teupeumungken jimeuget lom ngon allah, jicok jeumba lam udeb allah keudroe. peu kheueh nyang jeuet teupeugah bak watee nyoe ngon mandum nyan? meunyoee allah na blaih geutanyoe, soe nyang hase jilawan tanyoe? aneuek gobnyan keudroe hana geugaseh, teuma geuseurah keu keupeuntengan tanyoe banmandum; hana mungken gobnyan hana geubri keu geutanyoe sipeue-peue nyang laen? soe kheueh nyang hase jigugat tanyoe umat nyang geupileh le allah, meunyoee allah keudroe geupeugah bahwa tanyoe hana meusalah? peu kheueh na ureueng nyang keuneuk peusalah geutanyoe? isa singoh nyang bila tanyoe! gobnyan kheueh nyang ka mate, atawa gobnyan kheueh nyang ka geupeu udeb lom nibak mate dan na ngon allah bak teupat gobnyan meukuasa. peu kheueh nyang hase jitam almaseh geugaseh tanyoe? peu kheueh hase keusosahan nyang seugah nyan, atawa payah, meunan cit ngon teu ienanya, atawa ngon deuek, meunan cit

ngon gasien, atawa bahya, meunan cit ngon mate? lam alkitab na teutuleh lagee nyoe, "siuroe seupot kamoe udeb lam bahya mawot le sabab droeueuh. kamoe jipeusaneeut lagee bubiri nyang keuneuk jisie." hana! nyang beutoi lam banmandum nyan geutanyoe meuteume meunang nyang sampoereuna le gobnyan nyang gaseh geutanyoe! sabab ulon peucaya that bahwa bansigom donya, bah kheueh mate meunan cit udeb, bah kheueh malaikat meunan cit nyang mat kuasa, bah kheueh ancaman-ancaman nyang teuka jinoenye meunan nyang ancaman nyang teuka singoh atawa teunaga-teunaga nyang laen; bah kheueh hai-hai nyang na di langet, meunan cit hai-hai nyang na lam bumoe atawa peue mantong nyang laen, banmandum nyan hana hase jitam po teu allah geugaseh geutanyoe, lagee nyang ka geutunyok rot isa, tuhan geutanyoe. peue nyang ulon peugah nyoe na kheueh beutoi sabab ulon atra almaseh. ulon hana sulet. ate nurani ulon nyang jibimbeng le roh allah, geupeu yaken ulon bahwa haba ulon nyoe beutoi. ulon biet that seudeh dan ate ulon meudeurita sabab syedara-syedara lon nyang saboh bansa ngon ulon. sabab keu awaknyan, ulon keudroe rila geukutok le allah dan geupeucire nibak almaseh. awaknyan na kheueh umat nyang teupileh dan allah geupeujeuet awaknyan sibagoe aneuek-aneuek geuh keudroe, dan geupeugah kuasa gobnyan bak awaknyan. gobnyan geupeuna peujanjian ngon awaknyan dan geubri keu awaknyan hukum agama. allah geubri tee bak awaknyan pakriban awaknyan meu iebadat dan awaknyan ka teuma jiteurimong janji-janji gobnyan. awaknyan na kheueh keuturonan nibak indatu tanyoe. almaseh seucara manusia asai jih nibak bansa awaknyan. gobnyan leubeh manyang nibak banmandum. teupujoe kheueh allah keu siumu masa! amin. ulon hana meukeusut ulon peugah bahwa janji allah ka hana laku le; teuma kon mandum ureueng israel umat nyang geupileh le allah. kon banmandum keuturonan nabi ibrahim na kheueh aneuek-aneuek allah. sabab allah meufeureuman ubak nabi ibrahim lagee nyoe, "keuturonan nabi ishaq mantong kheueh nyang teupeugah keuturonan gata." nyan meumakna bahwa keuturonan nabi ibrahim nyang jeuet keu aneuek-aneuek allah, na kheueh keuturonan nyang lahe ngon sabab janji allah; dan bukan mandum keuturonan gobnyan. sabab janji allah na kheueh lagee nyoe, "bak watee nyang ka teupeuteuntee, ulon teuma lom gisa, dan sara teuma jipeulahe sidroe aneuek agam." dan nyoe lom: ribka teuma jipeulahe dua droe aneuek agam nibak saboh yah, na kheueh nabi ishaq indatu geutanyoe. sigohlom mandua droe aneuek nyan lahe, allah ka geupeuteuntee pilehan gobnyan keu seulanjut jih. nyang geupileh le allah nyan hana meugantuang nibak peue nyang hase jipeubuet le manusia, teuma meugantueng ubak panggellan allah keudroe. sabab bak watee mandua droe aneuek agam ribka nyan gohlohm hase jipeubuet nyang get atawa nyang jeuhet, allah ka meufeureuman ubak ribka, "nyang tuha teuma jipeutimang nyang muda." lam alkitab na teutuleh bahwa allah meufeureuman lagee nyoe, "nabi yakub ulon gaseh, teuma esau ulon banci." peu kheueh keusimpolan tanyoe jinoenye? peu kheueh allah nyan hana

ade? ka teuntée allah ade! sabab allah meufeureuman ubak nabi musa lagee nyoe, "ulon kutunyok rakhmat ubak ureueng nyang ulon keuneuk tunyok rakhmat, dan ulon lon bri rasa gaseh ubak ureueng nyang lon tem bri rasa gaseh." ngon lagee nyan keuputosan allah nyan bukan kheueh meugantueng ateueh keurilaan manusia atawa ateueh useuha manusia, teuma ateueh keuget ate allah mantong ateueh ureueng-ureueng nyang geupileh nyan. sabab lam alkitab na teutuleh lagee nyoe, "allah meufeureuman ubak raja nanggroe meuse, 'ulon peujeuet gata keuraja teuma saboh meukeusut nyoe mantong, na kheueh mangat ngon gata, ulon kutunyok keukuasaan lon dan teupeujeuet nan ulon meusyehu bansigom donya.'" ngon lagee nyan, allah na gaseh sayang ateueh sidroe-droe ureueng, meunye allah geukeuheundak nyang lagee nyan. dan le allah teupeusabab sidroe-droe ureueng jeuet kreueh ulee, meunye allah geulakee lagee nyan. ngon lagee nyan, gata teuma tapeugah ubak ulon, "meunye meunan pakon mantong geupeusalah manusia? kon kheueh hana meusidroe manusia pih nyang hase jitam keuheundak allah?" teuma syedara! gata na kheueh manusia biasa. dan hana jeuet gata seutot bak po teu allah! peu kheueh jeuet pot bungong jitanyong bak nyang peugit jih, "keupeue gata peugit ulon lagee nyoe?" kon kheueh ureueng nyang peugit pot bungong nyan na hak jipeugit tanoh kliet nyan ban galak droe jih? nibak saboh geuca tanoh kliet, ureueng nyan na hak jipeugit dua macam pot bungong: saboh nyang get, dan nyang laen kureueng get. 22 meunan cit teuma nyang geupeugit le allah. gobnyan na niet keuneuk peuleumah beungeh geuh dan geupeuleumah kuasa gobnyan. teuma gobnyan saba ateueh awaknyan nyang haroh teuhukum sabab jipeujeuet gobnyan teumeureuka. meunan cit allah na niet keuneuk peuleumah nibak geutanyoe bahgia nyang meulimpah ruah nyang geuro ateueh geutanyoe nyang geugaseh. tanyoe ka geupeu siab keuta-teurimong keubahgiaan nyan. tanyoe kheueh nyang ka geutawok, kon mantong nibak bansa yahudi, teuma meunan cit ateueh bansa laen. sabab lam kitab nabi hosea, allah meufeureuman, "ureueng-ureueng nyang kon umat lon, teuma lon peugah 'umat lon', bansa nyang hana ulon gaseh, teuma lon peugah 'geunaseh ulon', dan bak teumpat nyang jipeugah bak ureueng, 'gata kon umat lon', nibak teumpat nyan ureueng-ureueng teuma teupeugah aneuek-aneuek allah nyang udeb." nabi yesaya geupeugah ngon teugaih keuhai bansa israel lagee nyoe, "bah kheueh bansa israel nyan jai jih lagee anoe lam laot, teuma cit bacut nyang teuma seulamat; 28 sabab tuhan sigra geupeu rhot hukoman ateueh asoe donya." dan nabi yesaya geupeugah lom lagee nyoe, "seukira jih allah nyang mahakuasa hana geutinggai nibak geutanyoe keuturonan, ka pasti tanyoe banmandum ka jeuet lagee sodom dan gomora." ngon lagee nyan, keusimpolan na kheueh lagee nyoe: bansa-bansa laen nyang kon bansa yahudi hana jiuseuha mangat hubongan jih ngon allah jeuet keugit lom teuma. teuma sabab awaknyan jimeuiman, teuma allah geupeujeuet hubongan awaknyan ngon gobnyan jeuet keugit lom teuma. teuma, di ureueng-ureueng yahudi sabe

jiuseuha jitaat ubak hukom mangat hubungan jih ngon allah jeuet keuet lom. teuma awaknyan teutab hana meuhase. pakon awaknyan hana meuhase? sabab awaknyan nyang jipeubuet nyan rot meuiman ubak po teu allah, teuma rot useuha awaknyan keudroe. teuma awaknyan laju reubah meugantoh bak "batee meugantoh". keuhai bateenyan lam alkitab na teutuleh lagee nyoe, "simah kheueh nyoe: di sion ka lon keubah saboh batee nyang teuma jeuet keuakibat ureueng meugantoh; na kheueh saboh batee rayeuk nyang jeuet keuakibat ureueng reubah. teuma ureueng nyang meuiman ubak gobnyan hana teuma keucewa." syedara-syedara! ulon meucen that-that mangat bansa ulon nyoe teupeuseulamat. dan ulon biet-biet meudoa ubak allah keu awaknyan. ulon kujeuet peugah bahwa awaknyan meuseumangat that meungabdi ubak allah. teuma seumangat awaknyan hana ngon dasai peungeutahuan nyang teuka nibak allah. awaknyan hana jiteupeue cara allah geupeujeuet hubungan manusia ngon gobnyan get lom teuma. dan sabab awaknyan jikeuneuk seutot cara jih keudroe, teuma awaknyan hana tundok ubak cara nyang geutunyok le allah. hukom agama ka geupeu peunoh le almaseh. ngon lagee nyan tieb-tieb ureueng nyang meuiman ubak almaseh, hubungan jih ngon allah jeuet keu get lom teuma. nabi musa geutuleh bahwa ureueng nyang meuet ngon allah ngon dasai jih hukom agama, ureueng nyan teuma udeb sabab jih taat ubak hukom agama nyan. teuma keuhai cara ureueng jimeuget ngon allah ngon dasai jih meuiman ubak allah, lam alkitab na teutuleh lagee nyoe, 'bek gata peugah lam ate gata, 'soe kheueh nyang tamong lam syeuruga?' (makna teupeutreon almaseh), atawa, 'soe kheueh nyang teuma treun lam donya ureueng mate?' (makna jih teungkat almaseh geuek nibak mate)." meukeusut jih na kheueh lagee nyoe, "haba nibak po teu allah nyan rab that ngon gata; lam babah gata dan lam ate gata." nyan kheueh haba nyang kamoe peumaklum; haba nyan na kheueh bahwa ureueng haroh meuiman. sabab meunyo gata tapeubeuna ngon babah gata bahwa "isa nyan tuhan", dan gata peucaya lam ate teuh bahwa allah ka geupeu udeb isa nibak mate, ngon lagee nyan gata teuma seulamat. sabab ngon ate jih ureueng meuiman, sampoe allah geuteurimong jihnyan sibagoe ureueng nyang jimeuget ngon allah. dan ngon babah jih ureueng meungaku, sampoe jihnyan teupeuseulamat. lam alkitab na teutuleh lagee nyoe, "ureueng nyang meuiman hana geubri keucewa." hainyan teutab keunong ateuh mandum ureueng, sabab hana bida jih ureueng yahudi ngon ureueng bansa laen. allah nyang sidroe nyan na kheueh tuhan keu mandum ureueng, gobnyan geubri beureukat nyang meulimpah ruah keu mandum manusia nyang jilakee tulong ubak gobnyan. lam alkitab na teutuleh lagee nyoe, "mandum ureueng nyang jimeulakee ubak tuhan, teuma geubri seulamat." teuma pakriban kheueh ureueng hase jitawok ubak tuhan meunyo awaknyan gohlom meuiman? dan pakriban kheueh awaknyan jeuet jimeuiman ubak tuhan, meunyo awaknyan gohlom jideungoe keuhai gobnyan? meunan cit, pakriban awaknyan jeuet jideungoe keuhai tuhan, meunyo hana nyang peurunoe? dan pakriban kheueh ure-

ueng hase jiba haba nyan meunyo ureueng nyan hana teuyeu jak? lam alkitab na teutuleh lagee nyoe, "keubit that jroh jih jiteuka ureueng-ureueng nyang ba haba get nibak allah!" teuma hana mandum ureueng jiteurimong haba get nyan. sabab nabi yesaya na geupeugah lagee nyoe, "tuhan, soe kheueh nyang pateh bak haba kamoe?" nyang kheueh sabab jih manusia jeuet jipateh watee jideungoe haba, dan haba nyang jideungoe sabab na nyang peusampoe keuhai almaseh. teuma ulon tanyong: peu kheueh keubit awaknyan gohlom jideungoe haba nyan? pasti ka jideungoe! sabab lam alkitab na teutuleh lagee nyoe, "su awaknyan ka meugeunta bangsigom donya, tutoe haba awaknyan ka trok sampoe bak ujung bumoe." ulon tanyong lom: peu kheueh bansa israel gohlom jiteupeue? bah kheueh teumanyong nyan phon-phon that geujaweueb le nabi musa, nabi musa geupeugah lagee nyoe, "meunoe kheueh feureuman allah, 'ulon lon peujeuet gata picek ate ateuh bansa nyang bukan umat dan ulon peujeuet gata beungeh keu saboh bansa nyang bangai.' " nabi yesaya leubeh geujeuet lom geupeugah lagee nyoe, "meunoe kheueh feureuman allah, 'ureueng-ureueng nyang hana jimita ulon ka meurumpok ngon lon; dan ulon peuleumah droe ulon bak awaknyan nyang hana jitanyong keuhai ulon.' " teuma keuhai bansa israel nabi yesaya geupeugah lagee nyoe, "meunoe kheueh feureuman allah, 'sipanyang uroe ulon sunyung jaroe lon ubak saboh bansa nyang kreueh ulee dan hana taat.' " ulon teumanyong: peu kheueh allah ka geuboih umat geuh keudroe? teuntee hana! ulon keudroe ureueng israel keuturonan nabi ibrahim, dan nibak sukee benyamin. hana! allah hana geuboih umat gobnyan nyang ka geupileh yoh awaikon. syedara keudroe tateupeue peue nyang na teutuleh lam alkitab keuhai ilyas, watee gobnyan geujak gadu soai israel ubak allah. ilyas geupeugah lagee nyoe, "tuhan, ureueng-ureueng ka jipoh mate bubena nabi-nabi droeneueh dan jipeuhanco bubena teupat keureubeuen peuseumahan keu droeneueh. tinggai lon sidroe nyang awaknyan pihjikeuneuk peumate teuma." peu kheueh jeunaweueb allah ubak ilyas? allah geujaweueb, "ulon ka lon keubah tujoh ribee droe keu lon keudroe. awaknyan gohlom na nyang seumah dewa baal." meunan cit bak saat nyoe: na ngon jeumeulah bacut ureueng nyang ka geupileh le allah sabab rakhmat gobnyan. gobnyan geupileh awaknyan ngon dasai rakhmat geuh dan bukan le dasai buet awaknyan. sabab meunyo nyang geupileh le allah nyan ngon dasai buet manusia, teuma rakhmat allah nyan bukan le rakhmat nyang sejati. teuma, pakriban? umat israel hana meuteume nyang jimita. nyang meuteume na kheueh sigolongan ubit ureueng-ureueng nyang ka geupileh le allah. nyang laen mandum ka jeuet keu ureueng kreueh ulee ubak panggilan allah. sabab lam alkitab na teutuleh lagee nyoe, "allah geupeujeuet ate dan pikeran awaknyan jeuet keu batat; dan trok saatnyoe mata awaknyan hana deuh jikeumalon dan punyueng awaknyan hana jeuet jimeudeungoe." nabi daud pi na geupeugah lagee nyoe, "bah kheueh khanuri-khanuri nyang awaknyan peuna jeuet keupeurangkab awaknyan keudroe, dan uruek, teupat

awaknyan rhot dan hanco! bah kheueh pandangan awaknyan jeuet keuseupot mangat awaknyan hana jeuet jimeungieng; dan bah kheueh awaknyan jeuet keu bungkok siumu masa." ulon tanyong lom: watee ureueng yahudi reubah, peu kheueh nyan na mangat awaknyan hanco? sagai-sagai hana! teuma sabab awaknyan meudesya, teuma bansa laen geupeu seulam, ngon lagee nyan ureueng yahudi jeuet keu bingiek ate keu bansa laen. sabab bansa yahudi meusalah dan hana jitem seutot peurintah allah, teuma bansa-bansa laen geubri beureukat le allah. peue teuklom meunyoe hubungan bansa yahudi ngon allah jeuet keu get lom teuma; teuntee leubeh rayeuk lom beureukat nyang geubri le allah! jinoenyoe bah kheueh ulon meututoe keu syedara-syedara nyang kon yahudi! nyang ka nyoe, sibagoe rasui keu bansa-bansa nyang kon yahudi, ulon that-that lon seumon manyang tugaih-tugaih ulon. ulon meuharab lon teume peuteuka bingiek ate le bansa lon keudroe, ngon jalan nyan meuteume ulon peuseulam bacut nibak ladum lamkawan awaknyan. sabab awaknyan geutulak le allah, ngon lagee nyan hubungan donya ngon allah jeuet keu get lom teuma; peuteuk lom meunyoe awaknyan geuteurimong le allah! ka teuntee nyan saban cit lagee ureueng mate ka udeb lom teuma! meunyoe saboh ruti nyang phon ka teubri ubak allah, nyan saban cit banmandum ruti nyan ka teubri keu po teu allah. dan meunyoe ukeue kayee atra allah, nyan saban cabeueng-cabeueng kayee nyan atra allah cit teuma. ladum nibak cabeueng-cabeueng bak zaiton – na kheueh ureueng-ureueng yahudi – ka teureupang. dan bak inciek teureupang nyan teucangkok bak zaiton nyang kleuet, na kheueh syedara-syedara nyang kon yahudi. syedara teucangkok nibak nyan mangat syedara neurasa mandum nyang get nibak udeb rohani ureueng-ureueng yahudi. ngon sabab nyan bek kheueh gata anggab enteng keu awaknyan nyang ka teureupang lagee cabeueng nyan. gata haroh taingat bahwa gata na kheueh cabeueng mantong. dan kon cabeueng nyang teubri makheun keu ukeue, teuma ukeue nyang teubri makheun keu cabeueng. teuma gata tapeugah, "nyoe, teuma cabeueng-cabeueng nyan haroh teukoh mangat jeuet lon cangkok nibak bak kayee nyan!" nyan keubiet beutoi. teuma awaknyan teutiek sabab awaknyan hana meuiman, digata geuteurimong sabab gata tameuiman. ngon lagee nyan bek kheueh gata jeuet keusombong ngon na lagee nyan; nyang sibeuna jih gata haroh na rasa teumakot. sabab meunyoe allah hana meuras gaseh keu geutiek ureueng yahudi nyang lagee cabeueng-cabeueng aseuli nyan, bek tasangka gobnyan teuma meuras gaseh keu geutiek gata! 22 ngon lagee nyan disinoe deuh takalon padub na jroh jih allah dan padub na kreuheh jih gobnyan. gobnyan geupeubuet nyang kreuheh ateuh awaknyan nyang meudesya, teuma gobnyan get ate ateuh gata – asai gata teutab udeb nibak jroh gobnyan. meunyoe hana, gata teuma geuboih. dan keuhai ureueng-ureueng yahudi nyan, meunyoe awaknyan jipioh jimeusikeub hana meuiman; awaknyan geuteurimong lom teuma; sabab allah na kuasa keu geuteurimong awaknyan jigisa. gata kon asai jih nibak bansa yahudi na kheueh saban lagee

cabeueng nibak bak zaiton nyang kleuet. ngon lagee nyan, meunyoe gata, meulawan ngon sifeuet gata, jeuet teucangkok ateuh bak kayee zaiton nyang aseuli, peuteuk lom ngon ureueng-ureueng yahudi nyang teuboh miseue ngon cabeueng-cabeueng bak kayee zaiton aseuli nyan. ka teuntee leubeh mudah lom nibak po teu allah keu geupeuriwang awaknyan ateuh bak kayee zaiton awaknyan keudroe. syedara-syedara! ulon harab bek na nibak gata ka gata teupeue banmandum. sabab na saboh hai nyang geulakee le allah, teuma gohlom jiteupeu le manusia. dan ulon meuheuet hainyoe beugata teupeue; hai nyan na kheueh lagee nyoe: ladum lam kawom ureueng yahudi jimeukreueh udeb, teuma sikeub jih nyang lagee nyan sampoe jeumeulah ureueng-ureueng nyang kon yahudi nyang teuka ubak allah ka leungkab. meunan kheueh mandum ureueng yahudi teuma seulam. sabab lam alkitab na teutuleh lagee nyoe, "raja nyang ba seulam teuka nibak sion; gobnyan teuma geusampoh banmandum buet nyang jeuhet nibak keuturonan nabi yakub. ulon lon ikat peujanjian nyoe ngon awaknyan bak watee ulon peumaphon bubena desya-desya awaknyan." 28 sabab ureueng yahudi hana jitem teurimong haba get nyang teuka nibak po teu allah, ngon lagee nyan awaknyan ka jeuet keumusoah allah; dan nyan ka jeuet keuturonan nibak syedara nyang kon yahudi. teuma sabab pilehan allah, ureueng-ureueng yahudi nyan teutab geugaseh le allah deumi indatu awaknyan. sabab meunyoe allah geupileh gob dan geubri beureukat keu ureueng nyan, allah hantom na geutarek lom peue nyang ka geupeubuet nyan. yoh watee ilee gata hana taat ubak allah. teuma bak watee nyoe allah ka geupeugah bahwa gata beubaih nibak mandum buet nyang salah, sabab ureueng-ureueng yahudi hana taat. meunan cit teuma ngon ureueng-ureueng yahudi nyan. jinoenyoe awaknyan hana taat ubak allah, mangat gata geupeugah beubaih nibak buet salah. teuma singoh awaknyan pih teuma geupeugah beubaih nibak buet nyang salah. sabab allah ka geupeubiyue banmandum umat manusia kajikuasa le hana taat, mangat gobnyan jeuet geupeuleumah gaseh sayang gobnyan ubak awaknyan banmandum. keubiet hebat that keukayaan allah! keubiet rayeuk that keubijaksanaan dan ieleume gobnyan! soe kheueh nyang hase jiseulidek peue-peue nyang ka geucok keuputosan? soe kheueh nyang hase jimuphom cara-cara gobnyan mubuet? lam alkitab na teutuleh lagee nyoe, "soe kheueh nyang teupeue pikeran tuhan? soe kheueh nyang hase jibri naseuhat ubak gobnyan? soe kheueh nyang ka ltheueh jibri sapeue-sapeue ubak tuhan sampoe jeuet jituntot bila jih?" allah nyang cepta peue-peue mantong nyang na. banmandum nyan asai jih nibak allah dan na kheueh keu po teu allah. teupujoe kheueh allah siumu masa. amin. syedara-syedara! allah biet that-that jroh ateuh geutanyoe. nyang kheueh sabab jih ulon meulakee ngon meuharab that mangat gata tapeuseumah droe gata sibagoe keureubeun udeb nyang khusus keu allah dan nyang that-that teupeugalak ate gobnyan. iebadat gata ubak allah nyang sibeuna jih nyang kheueh lagee nyan. bek gata seutot atoran-atoran donya nyoe. peubiyue mantong allah geupeujeuet

pribadi gata jeuet keu baro, mangat gata meu-ubah. ngon na lagee nyan gata hase tateupeue keuheundak allah – na kheueh peue nyang jroh nyang jeuet keu galak ate gobnyan dan nyang sampoereuna. po teu allah ka geubri anugeurah ubak ulon. nyang kheueh sabab jih ulon bri naseuhat keu gata mandum: bek kheueh meurasu droe leubeh manyang nibak nyang sibeuna jih. bah kheueh gata ngieng keuadaan droe gata ngon ate nyang miyueb; maseng-maseng jini-lai droe jih meunurot keumampunan nyang geubri le allah ubak gobnyan ngon sabab gobnyan meuman ubak isa. tuboh geutanyoe na anggota nyang jai sile-upah. tieb-tieb anggota na tugaih jih maseng-maseng keudroe. meunan cit ngon geutanyoe. bah pi tanyoe mandum nyoe jai that, teuma tanyoe teutab saboh tuboh sabab tanyoe meusaboh ngon almaseh. dan tanyoe maseng-maseng na hubungan sidroe ngon nyang laen sibagoe anggota nyang saboh tuboh. geutanyoe maseng-maseng na karonya-karonya peulayanan nyang meulaen-laen. banmandum karonya geubri le allah keu geutanyoe meunurot rakhmat gobnyan. ngon sabab nyan tanyoe haroh tapeuguna karonya-karonya nyan. ureueng nyang na karonya keu jipeusampoe haba nibak po teu allah, ureueng nyan haroh jipeusampoe haba nibak allah nyan meunurot keumampunan nyang na nibak jih nyan. ureueng nyang na karonya keu jitulong ureueng laen, haroh biet-biet jitulong ureueng laen. ureueng nyang na karonya keu jeuet keu guree, haroh biet-biet jipeubuet ureueng laen. ureueng nyang na karonya keu jipeu ek seumangat ureueng laen, haroh biet-biet jibri seumangat keu ureueng laen. ureueng nyang na karonya keu jibri keu ureueng laen peue nyang na bak jihnyan, bah jipeubuet nyan ngon murah ate seucara wajar. ureueng nyang na karonya keu jeuet keupeumimpin, haroh biet-biet jeuet keupeumimpin. ureueng nyang na karonya keu jibri gaseh sayang keu ureueng laen, haroh jipeubuet nyan ngon mangat ate. gaseh kheueh ngon ate nyang ikhlaih. banci kheueh ubak nyang jeuhet, dan mumat kheueh ubak peue nyang get. bah kheueh syedara banmandum saleng lam gaseh sayang sidroe ngon nyang laen ngon biet-biet meusra lagee ureueng-ureueng nyang meusyedara lam saboh keuluwarga, dan bah kheueh gata saleng awai tabri horeumat. mubuet kheueh ngon biet-biet jumot. bek beu oe. mubuet kheueh keu tuhan ngon seumangat nibak roh allah. bah kheueh syedara meuharab ubak tuhan ngon ate nyang geumbira, saba kheueh watee meuteume sosah, dan khusyuek kheueh watee meudoa. tulung kheueh tabri beuseb keu ureueng kristen nyang laen dan sambot kheueh syedara-syedara nyang seuman nyang hana gata turi, ngon galak ate lam rumoh gata. lakee kheueh ubak po teu allah mangat gobnyan geubri beureukat keu ureueng-ureueng nyang keu-jam ateuhe gata. keubiet syedara, lakee kheueh ubak allah mangat geubri beureukat keu awaknyan, bek gata seurapa. meugeumbira kheueh ngon ureueng-ureueng nyang geumbira, dan gata mo ba-e kheueh ngon ureueng nyang mo ba-e. udeb kheueh lam rukon sidroe ngon nyang laen. bek kheueh na sikeub manyang ate, teuma peusanteut kheueh droe gata ngon ureueng nyang miyueb keududuekan jih. bek

anggab droe leubeh carong nibak nyang sibeuna jih. meunyo na ureueng jipeubuet jeuhet ateuhe gata, bek kheueh gata balaih ngon nyang jeuhet. peubuet kheueh peue nyang jianggab get le mandum ureueng. nibak blaih gata, meu-useuha kheueh pakriban cara keu udeb dame ngon mandum ureueng. syedara-syedara lon! bek kheueh sagai-sagai gata balaih dam, bah kheueh po teu allah nyang hukum. sabab lam alkitab na teutuleh lagee nyoe, "ulon kheueh nyang balaih. ulon nyang hukum jih-nyan, feureuman tuhan." sikeubiet jih, meunyo meusoh gata deuek, gata bri kheueh makheun; dan meunyo jih nyan grah, gata bri kheueh ie. sabab ngon gata peubuet lagee nyan, gata ka tapeujeuet jihnyan malee. bek kheueh gata peubiyeu droe gata jipeutaloe le nyang jeuhet, teuma bah kheueh gata peutaloe nyang jeuhet ngon nyang get. tieb-tieb ureueng museuti taat bak peumeurintah, sabab hana peumeurintah nyang hana meuteume keukuasaan nibak allah. dan peumeurintah nyang na bak saat nyoe, jipeujak keukuasaan jih ateuhe peurintah nibak allah. nyang kheueh sabab jih ureueng nyang lawan peumeurintah saban cit jilawan peue nyang ka geupeunteuntee le allah. dan ureueng nyang peubuet lagee nyan teuma jiteurimong hukoman. sabab, ureueng nyang jipeubuet nyang jroh hana peue jitakat keu peumeurintah. teuma ureueng nyang peubuet jeuhet nyang teumakot. meunyo gata meukeusut bek teumakot keu peumeurintah, gata haroh tapeubuet nyang jroh, ngon lagee nyan gata teuma teupujoe. sabab peumeurintah na kheueh hamba allah nyang mubuet keu jroh gata. teuma meunyo gata tapeubuet jeuhet, keubiet that gata haroh takot keu peumeurintah, sabab bukan mantong sia-sia jimeukuasa keu jihukom manusia. peumeurintah nyan na kheueh hamba allah, nyang peurhot hukoman allah ateuhe ureueng-ureueng nyang jipeubuet jeuhet. nyang kheueh sabab jih gata haroh taat keu peumeurintah – bukan mantong sabab gata hana tatem teuhukom, teuma sabab su ate nurani gata. nyang kheueh teuma alasan jih pakon gata tabayeeu impak, sabab peumeurintah na kheueh peugawee allah nyang peujak tugaih khusos nyoe. ngon lagee nyan, bayeue kheueh bak peumeurintah peue nyang wajib gata bayeue. bayeue kheueh impak, meunyo atra nyan haroh gata bayeue, dan bayeue kheueh cukee, meunyo gata haroh tabayeeu cukee. hareuga kheueh awaknyan nyang haroh tahareuga dan horeumat kheueh awaknyan nyang haroh tahoreumat. bek kheueh meu-utang peue mantong bak soe mantong, seulaen meu-utang gaseh ubak sidroe ngon nyang laen. sabab ureueng nyang jigaseh sabe manusia, ka jipeupeunoh mandum hukoman nabi musa. sabab hukom agama yahudi, na kheueh: bek meumukah, bek seumupoh mate, bek ceumeucue, bek galak keu atra gob; banmandum nyan meusajan-sajan ngon hukom-hukom nyang laen, ka teupeusaho jeuet keu saboh hukom mantong, atranyan na kheueh, "gaseh kheueh sabe keudroe-droe gata manusia lagee gata gaseh droe gata keudroe." ureueng nyang jigaseh keu ureueng laen, hana teuma jipeubuet jeuhet ateuhe ureueng nyan. ngon lagee nyan ureueng nyang ka jigaseh sabe keudroe-droe jih na kheueh ka jipeupe-

unoh banmandum syarat hukum agama. seulaen nibak mandum nyan gata tateupeue bahwa watee nyoe saat jih nibak gata keu gata beudoh nyan bak teumpat eh. sabab, watee jih keu geutanyoe keu geupeu sealamat ka rab that saat nyoe nibak watee geutanyoe phon that tameuiman. malam ka jula; dan sikeujah teuk ka beungoh. ngon lagee nyan, bah kheueh tapioh tapeubuet buet-buet nyang seupot. tanyoe haroh tapeuleungkab droe geutanyoe ngon sinjata-sinjata trang. tanyoe haroh tapeubuet hai-hai nyang teuhoreumat lagee nyang jipeubuet le gob bak watee uroe; bek na pesta pora nyang keulewat bataih, atawa mabok-mabok. bek peubuet buet nyang cabui, atawa meupi-e hana sapan. bek meulo, atawa bek picek ate. bah kheueh tuhan isa almaseh nyang peuteuntee peue nyang haroh gata peubuet. dan bek kheueh gata seutot tabiat manusia nyang meudesya keu teupeupuih hawa nafeusu. ureueng nyang hana yaken keupeue nyang jipeucaya nyan haroh jiteurimong ngon get diteungoh-teungoh gata. bek gata meudakwa ngon ureueng nyan keuhai peundirian-peundirian jih nyan. na ureueng nyang meupeundirian bahwa jihnyan jeuet jipajoh peue mantong. teuma na ureueng laen nyang leumoh keuyakenan jih; nyang jirasa nibak ureueng nyan bahwa nyang jeuet jipajoh teuma gulee-gulee mantong. ureueng nyang makheun peue mantong bek kheueh jianggab hina ateuh ureueng nyang makheun peunajoh nyang ka teuntee mantong; dan ureueng nyang makheun peunajoh nyang ka teupeuteuntee mantong, bek kheueh jipeusalah ureueng nyang makheun peue-peue mantong, sabab allah ka geuteurimong jih nyan. soe kheueh gatanyan sampoe gata peusidang namiet ureueng laen? aleh namiet nyan reubah atawa hana, nyan na kheueh urosan po jih. dan keubiet namiet nyan teuma teudong cot, sabab tuhan hase geupeujeuet namiet nyan teudong cot. na ureueng nyang meurasu siuroe nyang ka jipeuteuntee leubeh peunteng nibak uroe-uroe laen, teuma le ureueng laen jianggab bahwa uroe-uroe nyan saban hana meubeda. peubiyeu mantong maseng-maseng ureueng jipeuteuntee peundirian jih keudroe. ureueng nyang peupeunteng uroe-uroe nyang ka jipeuteuntee, ureueng nyan jipeubuet meunan keu jihoreumat tuhan. ureueng nyang pajoh peue-peue mantong, jipeubuet meunan keu jihoreumat tuhan, sabab jih nyan meusykoe ubak allah ateuh peunajoh nyan. meunan cit teuma keu ureueng nyang jimakheun peunajoh nyang ka jipeuteuntee mantong; ureueng nyan pih jihoreumat tuhan dan jilakee syukoe ubak po teu allah. hana meusidroe pih nibak geutanyoe nyang udeb keudroe tanyoe keudroe; dan meusidroe pih nibak geutanyoe nyang mate keugeutanyoe keudroe. meunyoe tanyoe udeb, tanyoe udeb keu tuhan. dan meunyoe tanyoe mate, tanyoe pih mate keu tuhan. ngon lagee nyan, udeb atawa mate tanyoe na kheueh milek tuhan. almaseh ka mate dan udeb lom teuma. nyang kheueh sabab jih gobnyan jeuet keu tuhan keu ureueng-ureueng nyang udeb meunan cit keu ureueng-ureueng nyang ka mate. ngon lagee nyan, syedara-syedara! keupeue guna jih gata peusalah syedara gata nyang saboh iman? dan keupeue guna jih gata anggab jih nyan hina? tanyoe

banmandum teuma tameuhadab allah keu geuadili. lam alkitab na teutuleh lagee nyoe, "nyang sibeuna jih," feureuman tuhan, "tieb-tieb ureueng teuma jiseumah sujut dikeue ulon; dan tieb-tieb ureueng teuma jipeubeuna bahwa ulon nyoe kheueh allah." ngon lagee nyan tanyoe maseng-maseng haroh tapeutang-gong jaweub peue mantong nyang tapeubuet ubak po teu allah. ngon sabab nyan bek kheueh geutanyoe saleng tapeusalah. dan useuha kheueh mangat gata bek tapeubuet peue-peue mantong nyang jeuet keusabab sidroe syedara gata saboh iman teugoda dan meudesya. sabab ulon meusaboh ngon tuhan isa, ulon keubiet kupateh that bahwa hana meusapeue pih nyang bak dasai jih najih; teuma hai nyan najih nibak sidroe-droe ureueng, meunyoe ureueng nyang jianggab nyan najih. teuma meunyoe ngon peue nyang gata makheun, sidroe syedara gata saboh iman jipeusaket ate jih, ngon lagee nyan gata hana le gata peubuet nyang dasai jih nibak gaseh. meunyoe almaseh ka mate keue sidroe-droe ureueng, bek kheueh gata peubiyeu ureueng nyan jipeurusak le peue nyang gata makheun. nyang kheueh sabab jih bek kheueh gata peubiyeu peue nyang get nibak gata, jianggab hana get bak ureueng laen. sabab meunyoe allah geupeurintah udeb sidroe-droe ureueng, peue nyang jeuet jimakheun atawa jijieb, hana peunteng le. nyang peunteng na kheueh bahwa ureueng nyan jiturot keuheundak allah, jirasa ate nyang teunang dan jiteurimong suka cita nyang geubri le roh allah. ureueng nyang peutimang almaseh ngon cara lagee nyan, ureueng nyan ka jipeumangat ate allah, dan jihareuga le ureueng-ureueng laen. sabab nyan tujuan tanyoe bah kheueh sabe keu hai-hai nyang teucebta keurukonan dan saleng tapeudong. bek kheueh sampoe, sabab soai peunajoh, gata peureuloh peue nyang ka geupeubuet le allah. peue mantong peunajoh beutoi haleue keuteupajoh; teuma meunyoe peue nyang gata pajoh jeuet keusabab ureueng laen meudesya, ngon lagee nyan gata ka salah. leubeh get bek gata pajoh eungkot sie atawa gata jieb ie anggo atawa gata peubuet peue mantong meunyoe le buet nyan jeuet keusabab syedara seuiman rhot bak desya. 22 bah kheueh peue nyang gata peucaya nyan, gata peubuet dikeue allah mantong keu gata keudroe. ureueng nyang hana alasan keumeurasu droe jih meusalah ateuh peue nyang jianggab nyan beutoi, ureueng nyan mubahgia. teuma ureueng nyang meurasu waih-waih keu jimakheun sipeue-peue, oh ltheueh nyan atra nyan jipajoh cit, ureueng nyan geupeusalah le allah; sabab ureueng nyan hana jipeubuet meunurot keuyakenan jih keuhai peue nyang beuna dan peue nyang salah. dan peue nyang jipeubuet ngon hana keuyakenan na kheueh desya. tanyoe nyang biet-biet yaken ateuh peue nyang tapeucaya, haroh kheueh beurayek saba keuhai hanjitem le ureueng nyang leumoh keuyakenan jih. bek kheueh tanyoe tapeumangat droe teuh mantong. nyang biet jih tanyoe maseng-maseng haroh tapeumangat ate ateuh sabe syedara tanyoe keudroe keu keuget jih, mangat keuyakenan jih meutamah kong. sabab almaseh pih hana geupike keumangat droeuegh keudroe. lam alkitab na teutuleh lagee nyoe, "peue mantong hinaan nyang jipeukeue ateuh gata ka rhot

ateueh ulon." banmandum nyang na teutuleh lam alkitab na kheueh keu teupurunoe tanyoe. sabab peun-gajaran nyang tateurimong lam alkitab nyan teupeu-jeuet tanyoe meutamah tabah dan teuga ngon lagee nyan tanyoe jeuet meuharab ubak allah. seumoga al-lah, nyang bri keutabahan dan hiboran keumanusia, geutulong gata keu udeb ngon si ate, teuseutot teu-ladan isa. ngon si ate gata banmandum meusajan-sajan jeuet tapujoe allah, bapak tuhan geutanyoe isa almaseh. ngon sabab nyan bah kheueh gata mandum tateurimong sidroe ngon nyan laen ngon seumangat mangat ate, saban lagee almaseh nyang geuteurimong gata keu teupujoe allah. sabab, ingat kheueh, al-maseh ka geulayani ureueng yahudi sibagoe geutun-yok bahwa allah sentia bak geupeu peunoh peue-peue nyang ka geupeue janji ubak indatu tanyoe. le isa cit teuma geupeujeuet bansa-bansa laen jipeumulia po teu allah sabab get ate geuh ubak awaknyan. lam alkit-ab na teutuleh lagee nyoe, "sabab nyan ulon kupajoe droeneueh lamkawan bansa-bansa, ulon kumeu-lagu puja ngon pujoe keunan droeneueh." na lom teutuleh lagee nyoe, "meugeumbira kheueh meusa-jan umat allah nyang teupileh, he bansa-bansa!" dan nyoe lom, "pujoe kheueh allah, he banmandum bansa, bah kheueh banmandum ureueng jipujoe gobnyan!" dan nyoe teuma nyang geupeugah le nabi yesaya, "nibak keuturonan isai teuka sidroe ureueng nyang teuma mat peurintah ateueh bansa-bansa; ubak gob-nyan kheueh bansa-bansa nyan jimeuharab." allah na kheueh teumpat gata meuharab. seumoga gobnyan geugaseh ate gata ngon sigala suka cita dan seu-jahteura sabab gata meuiman ubak gobnyan, man-gat kuasa roh allah gata maken meuharab ubak al-lah. syedara-syedara! ulon yaken that bahwa jai that nyang get na nibak gata. gata pih tateupeu peue-peue mantong dan hase tapeurunoe sidroe ngon nyang laen. teuma meunyeo keuhai-hai nyang ka teuntee, ulon peuingat gata ngon teugaih lam surat nyoe, sabab allah ka geu anugeurah bak ulon tu-gaih nyan. gobnyan ka geupeujeuet ulon keupeulayan isa keu geu-utus ubak bansa-bansa nyang kon bansa yahudi. dan ulon kudong sibagoe imeum, nyang peusampoe haba get nibak allah, mangat ureueng-ureueng nyang kon yahudi jeuet keusaboh nyang teu-peuseumah ubak po teu allah nyang jeuet geuteuri-mong le gobnyan. seumoga roh allah nyan peujeuet awaknyan meusaboh nyang teupeuseumah khusus keu allah. ngon lagee nyan, sabab ulon ka meusaboh ngon isa, ulon jeuet meurasa bangga ateueh buet ulon keu allah. ulon kujeuet peugah haba nyang meunan bagoe na kheueh keuhai peue nyang ka geupeubuet le almaseh ateueh ulon mangat keuteupeujeuet ureueng nyang kon yahudi jitaat ubak allah. ulon peubuet nyan ngon tutoe haba meunan cit ngon buet, nyang meusajan ngon buet-buet nyang ajaeb dan hai-hai nyang luwabiasa; banmandum nyan ngon kuasa le roh allah. haba get keuhai almaseh ka ulon peusam-poe banmandum ubak ureueng-ureueng, phon di yerasalem trok u ilirikum. cita-cita ulon na kheueh ulon peusampoe haba get nibak allah bak teumpat-teumpat nyang gohlom na ureueng nyang deungoe keuhai almaseh. sabab ulon hana kutem peudong buet nibak keunaleueng nyang jikeubah le ureueng

laen. lam alkitab na teutuleh lagee nyoe, "ureueng-ureueng nyang gohlom na jiteurimong haba keuhai gobnyan, teuma jikalon; dan awaknyan nyang han-tom jideungoe teuma muphom." 22 nyang kheueh sabab jih ka kayem that ulon nyoe meuteun keu lon jak saweue gata. teuma bak watee nyoe buet ulon nyang na lam daerah-daerah nyan ka seuleu-soe. ka meuthon-thon treb jih ulon keuneuk jak saweue gata. singoh meunyeo ulon jak rot banda gata watee lon beurangkat u seupanyol, ulon harab hase meurumpok ngon gata dan meugeumbira sikeu-jab ngon gata. oh lheueh nyan ulon harab gata hase tatulong ulon keu ulon jak u seupanyol nyan. teuma jinoenyeo ulon keuneuk jak u yerasalem guna ulon jak ba bantuan keu umat allah nyang na disideh. sabab jeumaah-jeumaah nyang na di make-donia dan akhaya ka jisituju keujibri sumbangan keu syedara-syedara tanyoe nyang gasien nyang na diteungoh-teungoh umat allah di yerasalem. ngon mangat ate awaknyan jicok keuputosan keu jipeubuet nyan. keubiet nyang sibeuna jih awaknyan patot jitulung syedara-syedara tanyoe nyang gasien nyang na di yerasalem nyan; sabab nibak ureueng-ureueng yahudi kheueh ureueng-ureueng nyang kon yahudi nyan jiteurimong beureukat nibak allah. ngon lagee nyan, ureueng-ureueng nyang kon yahudi nyan patot cit jitulung ureueng-ureueng yahudi ngon beureukat-beureukat hareuta. 28 meunyeo ulon ka lon peuseuleusoe tugaih ulon nyoe, dan ulon jok ubak awaknyan nyang na di yerasalem sumbangan nyang ka awaknyan peusapat nyan, baro kheueh ulon jak u nanggroe seupanyol rot banda gata nyan. meun-yoe ulon teuka bak gata, ka pasti ulon teuka ngon beureukat nyang jai that nyang lon teurimong ni-bak almaseh keu gata. deumi tuhan geutanyoe isa al-maseh, dan deumi geunaseh nyang geubri le roh al-lah, ulon lakee ngon meuharab that ubak gata, man-gat gata meusajan-sajan tameudoa nyang biet-biet meusajan-sajan ngon ulon ubak po teu allah keu ulon. meudoa kheueh mangat allah geupeu beubaih ulon nibak jaroe-jaroe ureueng nyang hana meuiman di yudea, dan mangat tugaih ulon keu lon ba sum-bangan u yerasalem jiteurimong ngon mangat ate le umat allah nyang na disinan. ngon lagee nyan, meunyeo allah geutem, ulon hase lon jak bak gata ngon ate nyang mangat. dan ulon teuma meurasa teuhibor lamkawan gata. mudah-mudahan allah, nyang bri seujahteura ateueh manusia, na meusa-jan gata banmandum. amin. ulon keuneuk peu-turi syedara tanyoe bak gata, nan jih febe. geuh-nyan geubantu jeumaah di kengkrea. teurimong kheueh jihnyan sibagoe sidroe umat tuhan. keubiet lagee nyan kheueh ureueng-ureueng nyang meuiman ubak allah haroh jiteurimong sidroe ngon nyang laen. tulong kheueh jihnyan, meunyeo ureuengnyoe jipeureulee gata bantu, sabab jihnyoe ka jai that jibantu ureueng laen meunan cit ngon ulon ka lheueh jibantu. peutrok kheueh saleuem ulon keu priskila dan akwila, sahabat-sahabat lon nyang meusajan-sajan kamoe mubuet keu isa. awaknyan karab mate sabab jipeuseulamat ulon. ulon lakee teurimong gaseh bak awaknyan – dan kon ulon mantong, teuma mandum jeumaah bansa laen nyang kon ureueng

yahudi meuteurimong gaseh cit keuawaknyan. meunan cit peutrok kheueh saleuem ulon keujeumaah nyang meugumpoi di rumah awaknyan. saleuem keu epenetus nyang ulon gaseh. gobnyan kheueh ureueng nyang phon-phon that meuman keu almaseh di daerah asia. meunan cit saleuem ulon keu maryam. gobnyan ka jimubuet biet-biet that sungoh keu gata. meunan cit peutrok kheueh saleuem ulon keu andronikus dan yunias. awaknyan saboh sukee bansa ngon ulon dan ka ltheueh jitamong lam glab meusajan-sajan ngon lon. sigohlom lon meuman ubak almaseh, awaknyan ka leubeh ilee jimeuiman. awaknyan meugah that nibak rasui-rasui. saleuem lon keu ampliatus, nyang ulon gaseh sabab jihnyan meusajan-sajan ngon ulon ka meusaboh ngon tuhan. peutrok teuma horeumat ulon keu urbanus, sahabat tanyoe nyang jimubuet meusajan-sajan ngon tanyoe keu almaseh. meunan cit horeumat ulon keu stakhis nyang ulon gaseh. saleuem keu apeles. keuseutiaan jih keu almaseh kana bukeuti. meunan cit saleuem ulon keu keuluwarga aristobulus, dan keu herodion. gobnyan saboh sukee bansa ngon ulon. meunan cit saleuem ulon keusyedara-syedara saboh iman lam keuluwarga narkisus. saleuem ulon keu trifena dan trifosa nyang biet-biet brat that jimubuet keu tuhan, dan keu persis nyang ulon gaseh. gobnyan pi ka jimubuet brat that keu tuhan. saleuem keu rufus dan keu mak jih, nyang nibak ulon lagee mak lon keudroe. rufus na kheueh ureueng nyang geupileh le tuhan nyang teupujoe. meunan cit peusampoe kheueh saleuem ulon keu asinkritus, flegon, hermes, patrobas, hermas, dan mandum syedara seuiman nyang meusajan-sajan ngon awaknyan. saleuem keu filologus dan yulia; keu nereus dan syedara jih nyang inong; keu olimpas dan keumandum ureueng peucaya nyang na meusajan-sajan ngon awaknyan. meumumat-mat jaroe kheueh ngon peunoh meusra sibagoe syedara kristen. banmandum jeumaah almaseh jipeutrok saleuem awaknyan keu syedara banmandum. syedara-syedara! ulon lakee ngon meuharab that: ate-ate kheueh keue ureueng nyang jipeucurebre jipeukaru ureueng-ureueng nyang meuman ubak tuhan. hainyan hana sesuai ngon peue nyang ka teupeurunoe nibak gata. peujioh kheueh ureueng-ureueng nyang lagee nyan. sabab ureueng-ureueng nyang peubuet lagee nyan kon jimubuet keu almaseh tuhan tanyoe, nyang sibeuna jih keu jipeupuih ate awaknyan keudroe. ngon cara jibujuk dan tutoe haba nyang mameh, awaknyan jipeunget ureueng-ureueng nyang hana jiteupeu sapeue. banmandum ureueng ka jiteupeue bahwa gatanyoe seutia ubak peungajaran keuhai haba get nyang teuka nibak allah. dan ulon galak that ateueh hainyan keuhai gata. ulon meuharab mangat gata bijaksana ateueh hai-hai nyang jroh, dan bangai keuhai-hai nyang jeuhet. po teu allah nyang bri seujahteura keumanusia, dan ngon sigra geukeubah iblih dimiyueb keukuasaan gata dan teupeuhanco jih nyan. seumoga gata banmandum geubri beureukat le isa almaseh tuhan tanyoe! timotius, rakan ulon, jipeutrok saleuem gobnyan keugata. meunan cit ngon lukius, yason dan sosipater, nyang saboh sukee bansa ngon ulon. 22 nyang tuleh suratnyoe na kheueh ulon, ter-

tius. ulon peusampoe saleuem lam syedara keugata. gayus geukirem saleuem keugata. ulon meunumpang dirumoh jihnyan dan jeumaah kamoe jiseumayang nibak tempat nyan. erastus, ulee nyang mat peng banda nyan, jikirem saleuem gobnyan keugata. meunan cit ngon syedara tanyoe kwartus. seumoga tuhan geutanyoe isa almaseh geubri beureukat ubak gata. amin. teupujoe kheueh allah! gobnyan na kuasa geupeukong iman gata sesuai ngon haba get nibak po teu allah nyang ulon peusampoe keuhai isa almaseh. ulon peusampoe habanyan sesuai ngon peue nyang geupeugah le allah; na kheueh keuhai reuncana alah nyang ka meuabat-abat treb jih hana jiteupeue le manusia. teuma bak saatnyoe, ateueh peurintah po teu allah nyang abadi, reuncana nyan ka geupeugah dan teupeusampoe keumandum bansa rot tule-san duma nabi-nabi, mangat awaknyan banmandum meuman dan taat ubak po teu allah. gobnyan kheueh allah nyang tunggai, gobnyan biet-biet bijaksana. seumoga gobnyan teuseuon manyang siumu masa rot isa almaseh! amin. horeumat kamoe, paulus, hamba isa almaseh

syedara-syedara jeumaah allah nyang na di kortintus! gata ka geutawok le allah keujeut keumat gobnyan sabab gata atra isa almaseh, meusajan-sajan ngon mandum ureueng dipat mantong nyang jiseumah tuhan geutanyoe isa almaseh, na kheueh tuhan awaknyan dan tuhan geutanyoe cit teuma. ulon, paulus, dan syedara tanyoe sostenes, geumeuharab seumoga allah bapak geutanyoe dan tuhan isa almaseh geubri beureukat dan keuseujahteuraan ubak gata. ulon tuleh suratnyoe sibagoe rasui isa almaseh, nyang geuangkat le allah keudroe dan ateuh keuheundak gobnyan cit teuma. ulon sabe lon lakee teurimong gaseh ubak allah keuhai gata, sabab gata katateurimong rakhmat nibak allah meulalu isa almaseh. sabab gata ka jeuet keumilek almaseh, ngon lageenyan udeb gata kaya lam sigala hai. peungeutahuan gata lam hai peue mantong lhok lumpahna, dan gata carong tapeurunoe peungeutahuan nyan. ngon lageenyan ka teutunyok bak gata bahwa hana keuhai almaseh ka jitamong that lam ate gata, sampoe gata hana kureueng meusapeue beureukat pi, teungoh gata tapreh tuhan tanyoe isa almaseh geuteuka dan jikalon le mandum ureueng. almaseh keudroe teuma geujamin gata sampoe an pagee; watee gobnyan geuteuka lom, gobnyan meurumponk ngon gata nyan hana meucupa. po teu allah jeuet teupeucaya sipeunoh ate. gobnyan kheueh allah nyang ka geuhoi gata keujeut meusaboh ngon aneuek gobnyan, na kheueh isa almaseh, tuhan tanyoe. syedara-syedara! ateuh nan tuhan geutanyoe isa almaseh, ulon lakee mangat gata banmandum sapeue kheun; mangat bekna nyang crebre lamkawan gata. bah kheueh gata meusaboh, siate dan sapeue pike. sabab, ureueng-ureueng nibak keuluwarga kloee jijak lapor ubak ulon bahwa gata sabe keudroe-droe na meudakwa. nyang ulon meukeusut na kheueh bahwa lamkawan awaknyan na nyang peugah lagee nyoe, "ulon seutot paulus," nyang laen na teuma nyang peugah, "ulon kuseutot apolos," nyang laen jipeugah teuma, "ulon seutot petrus," teuma nyang laen lom jipeugah, "ulon kuseutot almaseh." hana mungkin almaseh teubagi-bagi! paulus hana mate bak kayee saleb keugata! gata pi hana teupumano keujeut keumurit-murit paulus, nyoe peukon? syukoe kheueh ulon hana kupumano meusidroe pih nyang na lamkawan gata, seulaen krispus dan gayus. bek sampoe meusidroe pih jipeugah bahwa ulon ka lon pumano jih nyan mangat jeuet keumurit ulon. (oh nyoe, stefanus dan keuluwarga jih, keubiet ulon nyang pumano awaknyan. teuma seulaen nibak nyan, meunurot nyang lon ingat, hana le nyang ulon pumano.) almaseh geutus ulon bukan keu lon pumano manusia, teuma keu ulon peusampoe haba get nyang teuka nibak po teu allah; dan nyan pih haroh ulon peubuet ngon hana lon peuguna keuhai carong ulon meututoe seucara manusia, mangat kuasa nibak mate almaseh bak kayee saleb nyan hana jeuet keusia-sia. sabab nibak ureueng nyang jituju ubak keubinasaan, haba keuhai mate almaseh bak kayee saleb nyan na kheueh haba sulet. teuma, keugeutanyoe nyang geupeu seulam le po teu allah, hana nyan na kheueh cara jih allah geutunyok kuasa gobnyan. sabab lam alkitab allah meufeureuman, "keubijaksanaan ureueng arif

ulon peukaru, dan peungeurtian ureueng-ureueng meuleume lon peubinasa." ngon lagee nyan, keupeuguna jih ureueng-ureueng nyang arif lagee nyan? keupeuguna jih awaknyan nyang na ieumeu? keupeuguna jih ahli-ahli seumike lam donya? allah ka geutunyok bahwa keubijaksanaan donya nyoe na kheueh hana meuguna! sabab, pakriban mantong carong jih manusia, ureueng nyan hana hase jituri allah rot carong jihnyan keudroe. teuma sabab allah nyang bijaksana, ngon lagee nyan gobnyan geutem peuseulam ureueng-ureueng nyang meuman ubak gobnyan rot haba nyang kamoe peusampoe jianggab haba buhak le donya. 22 ureueng yahudi jilakee buet ajaeb sibagoe bukteuti, dan di ureueng yunani jipeunteng keuhai keubijaksanaan donya nyoe. teuma tanyoenyoe nyang tapeusampoe almaseh nyang mate bak kayee saleb. haba nyan teusinggong peurasan ureueng-ureueng yahudi, dan jianggab haba buhak le ureueng-ureueng nyang bukan yahudi. dan ureueng nyang bukan yahudi jianggab nyan na kheueh banggai lagoena. teuma pakriban keu ureueng-ureueng nyang ka geuhoi le po teu allah – bah kheueh ureueng yahudi meunan cit nyang kon yahudi – habanyan, cara jih po teu allah geutunyok kuasa dan keubijaksanaan gobnyan. sabab nyang leumoh banggai nibak allah, na kheueh leubeh bijaksana nibak keubijaksanaan manusia; dan nyang deuh jih leumoh nibak allah, na kheueh leubeh teuga nibak teunaga manusia. syedara-syedara! cuba gata ingat pakriban keuadaan gata watee allah geutawok gata. bacut sagai nyang na lamkawan gata nyang bijaksana, atawa nyang meukuasa, atawa keududukan manyang meunurot bakmata manusia. sabab keubiet allah geusaja geupileh nyang jianggab banggai le donya, mangat bubena ureueng carong jeuet keumalee. dan allah geupileh teuma nyang jianggab hana meudaya le donya, mangat ureueng-ureueng nyang gagah peukasa jeuet keumalee. 28 po teu allah geupileh nyang jianggab miyueb, hina, dan nyang jianggab hana meuguna le donya nyoe, mangat allah geupeu hanco nyang jianggab peunteng le donya. ngon lagee nyan hana meusidroe pih nyang jeuet jipeusombong droe dikeue po teu allah. allah keudroe kheueh nyang peujeuet sampoe gata meusaboh ngon isa almaseh. meulalu almaseh, tanyoe geupeujeuet bijaksana. dan meulalu gobnyan cit teuma po teu allah geupeujeuet tanyoe tameuget lom deungon droe gobnyan, geupeujeuet tanyoe umat gobnyan nyang khusus dan geupeubeubaih geutanyoe. teuma, lagee nyang na teutuleh lam alkitab, "ureueng nyang jitem peubanggabanga droe, haroh jipeubangga droe ateuh peue nyang geupeubuet le tuhan." syedara-syedara! bak watee ulon jak ubak gata dan ulon britee bak gata keuhai reucana allah nyang gohlom jiteupeue le donya, ulon hana lonpeuguna keubijaksanaan donya nyoe atawa lon meututoe ngon hana nyang buhak. sabab ulon ka loncok teukat bahwa simantong ulon na meusajan gata, ulon hana lon peugah sapeue, seulaen keuhai isa almaseh; khusus jih keuhai gobnyan ka mate bak kayee saleb. watee ulon mantong na meusajan ngon gata, ulon hana leumoh dan yo ngon teumakot. haba nyang ulon peutrok bak gata hana ulon peutrok ngon tutoe nyang meunarek

meunurot keubijaksanaan manusia. ulon peutrok nyan ngon cara teubri bukeuti bahwa roh allah meukuasa. ulon peubuet lagee nyan, mangat keupeucayaan gata ubak almaseh hana meudasai bak keubijaksanaan manusia, teuma meudasai bak kuasa po teu allah. bah kheueh meunan, lamkawan ureueng-ureueng nyan udeb rohani jih ka biet-biet ngon, keubiet ulon meututoe keuhai keubijaksanaan. teuma keubijaksanaan nyoe bukan keubijaksanaan donya, atawa keubijaksanaan ureueng-ureueng nyan mat kuasa jamen nyoe, nyang keukuasaan jih teuma habeh. keubijaksanaan nyan ulon peugah nyan na kheueh keubijaksanaan nibak po teu allah. keubijaksanaan nyan hana jiteupeu le donya, teuma alah ka geukeubah keu keubahgian tanyoe sigohlom donya nyoe geupeujeuet. hana meusidroe pih nibak ureueng-ureueng mat kuasa jamen nyoe nyang jiteupeu keuhai keubijaksanaan nyan. sabab, seukira jih awaknyan ka jiteupeue, ka teuntee awaknyan hana jisaleb tuhan nyang mulia nyan. sibeuna jih hainyan na kheueh lagee nyang teutuleh lam alkitab, "peue nyang hantom jingiang atawa jideungoe le manusia, dan hantom teuma jiteubiet lam pikeran manusia, nyan kheueh nyang geukeubah le allah keu ureueng-ureueng nyang gaseh keu gobnyan." teuma allah ka geupeugah nyan bak geutanyoe ngon peurantaraan roh gobnyan. roh allah nyan jiseulidek peupeue mantong, sampoe ubak reuncana-reuncana alah nyang paleng teusom. sabab nyang leubeh teupeu asoe ate sidroe-droe ureueng na kheueh roh ureueng nyan keudroe, nyoe peukon? meunan cit keuhai allah. nyang teupeu asoe ate allah na kheueh roh allah keudroe! dan keugutanyoe hana geubri roh donya nyoe, teuma na kheueh roh nyang teuka nibak allah, mangat tanyoe tateupeue mandum nyang ka geuanugeurah le po teu allah keugutanyoe. sabab nyan, meunyo keumoe peugah keuhai-hai allah ubak ureueng-ureueng nyan ka na roh allah, kamoe hana kamoe peugah meunurot keubijaksanaan manusia, teuma na kheueh meunurot nyang geupurunoe le roh allah nyan keudroe. ureueng nyan hana nibak jih roh allah, hana hase jiteurimong peue nyang geupeugah le roh nyan. sabab nibak ureueng nyan haihai nyang lagee nyan na kheueh buet nyang bangai. ureueng nyan hana hase jimuphom, sabab hainyan hase teunilai ngon cara rohani. ureueng nyan na nibak jih roh allah hase jinilai peue-peue mantong, teuma hana meusidroe pih nyang na hak jinilai gobnyan. lam alkitab na teutuleh lagee nyoe, "soe nyang teupeu pikeran tuhan? dan soe nyang hase jibri naseuhat ubak gobnyan?" tanyoe nyang na pikeran nyang saban ngon almaseh! syedara-syedara, sibeuna jih ulon hana jeuet lon meututoe ngon gata lagee ureueng nyan na roh allah. ulon jeuet lon meututoe ngon gata lagee ureueng nyan mantong udeb meunurot nyang jikeuheundak le donya; lagee ureueng nyan mantong manyak lam hai keupeucayaan jih ubak almaseh. yoh masa ilee ulon hase lon bri keugata peunajoh aneuek manyak, kon peunajoh ureueng rayeuk; sabab gata gohlohm seb teuga keuhai nyan. teuma bak wateenyo pih gata gohlohm seb teuga keuhai nyan, sabab gata mantong udeb meunurot tabiat seucara manusia. sabab meunyo gata

mantong na bingiek ate dan tameulo sabe keudroe-droe, peu kheueh lagee nyan bukan sibagoe dali gata mantong udeb meunurot tabiat manusia, lagee ureueng nyan hana jituri keu po teu allah? meunyo na nyang peugah, "kamoe seutot paulus," dan nyang laen jipeugah, "kamoe seutot apolos," peu kheueh nyang lagee nyan gata mantong taturot tabiat ureueng-ureueng donya? nyang sibeuna jih soe kheueh apolos nyan? dan soe teuma paulus nyan? kamoe na kheueh peulayan-peulayan allah, nyang ka kamoe bimbeng gatanyo keu tameuman ubak almaseh. kamoe cuma kamoe keureuja buet nyang ka geubri le tuhan ubak kamoe maseng-maseng. ulon nyang pula dan apolos nyang siram, teuma allah keudroe kheueh nyang peujeuet seunaman nyan timoh. ngon lagee nyan, nyang peunteng na kheueh po teu allah, sabab gobnyan kheueh nyang peutimoh. nyang pula dan nyang siram hana peunteng; banduanyan na kheueh san-teuet. maseng-maseng teuma jiteurimong upah meunurot buet nyang jipeubuet nyan. kamoe na kheueh ureueng-ureueng nyang saban kamoe mubuet keu alah; dan gata na kheueh lagee ladang allah. gata-gata banmandum na kheueh lagee geudong allah cit teuma. ngon carong nyang geubri le allah, ulon sibagoe ahli bangunan ka ulon puduek keunaleueng nibak bangunan nyan, dan ureueng laen jipeudong geudong nibak keunaleueng nyan. tieb-tieb ureueng haroh jipeurati beuget-get pakriban jipeudong ateuh keunaleueng nyan. sabab allah keudroe ka geukeubah isa almaseh sibagoe sidroe ureueng nyan hana tandangan jih keu keunaleueng geudong nyan; hana keunaleueng nyang laen. na nyang peudong ateuh keunaleueng nyang jiboh ngon meuh, nyang boh pirak, na nyang peuguna batee peumata, na nyang peuguna kayee, naleueng tho dan jeurami. buet sidroe-droe ureueng teuma deuh teukalon singoh watee almaseh geuteuka lom teuma. sabab bak watee nyan apui teuma jipeudeuh buet maseng-maseng ureueng. apui teuma jiujoed dan jipeuteuntee get ngon hana buet nyan. meunyo geudong nyang jipeudong le gob ateuh keunaleueng nyan hana tutong watee teutot ngon apui, ureueng nyan teuma jiteurimong hadiah jih. teuma meunyo buet gob nyan tutong, jihnyan teuma rugoe; jih keudroe teuma seulam, teuma lagee ureueng nyang teuhinda nibak jilui apui. peu kheueh gata teupeu bahwa gatanyo baet allah? dan bahwa roh allah tinggai lam gata? meunyo na ureueng nyang jipeurusak baet allah, allah pih teuma geupeu rusak ureueng nyan. sabab baet allah na kheueh khusus keu allah mantong, dan gata kheueh baet nyan. bek na meusidroe ureueng pih jitipee droe jih keudroe. meunyo ureueng lamkawan gata meuras droe jih bijaksana meunurot ukoran donya nyoe, ureueng nyan haroh jeuet keu ureueng bangai, mangat jihnyan biet-biet jeuet keu ureueng bijaksana. sabab, nyang jianggag bijaksana le donya na kheueh bangai nibak allah. lam alkitab na teutuleh lagee nyoe, "allah geujeubak ureueng-ureueng bijaksana lam ceureudek awaknyan keudroe." na lom teutuleh lagee nyoe, "tuhan geuteupeue bahwa pikeran ureueng-ureueng nyang bijaksana na kheueh pikeran nyang hana meuguna." sabab nyan, bek kheueh na meusidroe ureueng pih

jisanjong-sanjong manusia, sabab peue-peue mantong ka geubri jeuet keumilek gata: 22 paulus, apolos, petrus, donya nyoe, udeb ngon mate, jamen nyoe meunan cit jamen nyang teuma teuka, banmandum nyan na kheueh milek gata. gata na kheueh milek almaseh, dan almaseh milek po teu allah. anggab kheueh kamoenyoe peulayan-peulayan almaseh, nyang meutanggong jaweueb kamoe peusampoe reuncana-reuncana allah nyang gohlom jiteupeu le donya. nyang phon-phon that jituntot le peulayan nyang lagee nyan na kheueh bahwa jihnyan seutia ubak teungku droe jih. nibak ulon, hana jeuet keumasaalah peue nyang gata – atawa soe mantong – pi jipike keuhai droe ulon. teuma peue nyang sibeuna jih ulon pike keuhai droe ulon keudroe nyan pih hana jeuet keusoai. ulon hana meurasa meusalah lam hai peue mantong, teuma nyan bukan sibagoe bukeuti bahwa ulon hana salah. tuhan keudroe kheueh nyang peuteuntee peu kheueh ulon salah atawa hana. ngon sabab nyan, sabab gohlom trok watee jih, bek kheueh gata bagaih-bagaih gata peuteuntee bahwa sidroe-droe ureueng nyan salah atawa hana. preh kheueh sampoe tuhan geupreh. gobnyan kheueh nyang peuhah peue-peue mantong nyang teusom lam seupot. gobnyan kheueh nyang teuma peuteubiet banmandum nyang na niet teusom lam ate manusia. bak wateuyan kheueh tieb-tieb ureueng jiteurimong nibak po teu allah puja ngon pujoe nyang patot jiteurimong. syedara-syedara! keu keupeuntengan gata, atranyan ka ulon peungui ateuhe apolos dan ateuhe droe lon keudroe. meukeusut jih ngon na cuntoh nibak kamoe nyan gata jeuet tameurunoe peumakna jih nyang teupeugah nyoe, "mumat kheueh bak peuratoran nyang na." ngon lageenyan hana meusidroe pih nibak gata nyang jeuet tapeubangga-bangga sidroe-droe ureueng, laju gata hina nyang laen. soe kheueh nyang peujeuet gata leubeh nibak ureueng laen? bukan mandumnyan gata teurimong nibak allah? ngon lagee nyan, pakon gata keuneuk peusombong droe, siulah-ulah peue nyang na nibak gata nyan kon mandum nyang geubri? beutoi gata hana tapeureulee sapeue! gata ka kaya! gata ka jeuet keuraja! dan kamoe hana. paleng get meunyeu gata biet-biet ka jeuet keu raja, mangat kamoe jeuet kamoe matpeurintah meusajan gata. sabab meunurot nyang lon pike, kamoe nyang rasui-rasui nyoe, ka geupeujeuet le allah sibagoe nyang jinntonot dikeue manusia dan malaikat. kamoe lagee ureueng-ureueng hina nyang jipeurhot hukoman mate dikeue rakyatba dan jisurak-surak le donya nyoe. sabab almaseh, kamoe na kheueh ureueng nyang bangai, dan gata ureueng kristen nyang carong! kamoe leumoh, gata teuga! kamoe jikheun le gob, dan gata jisanjong-sanjong! trok bak watee nyoe kamoe teundeuk dan gah; peukayan kamoe tinggai bak tuboh; ureueng jiseksa kamoe; kamoe hana teupat keu kamoe meureuhah; kamoe banteng tuleueng jakmita beulanja. meunyeu kamoe jicarot, kamoe balaih ngon beureukat; meunyeu kamoe ji ielanya, kamoe saba; meunyeu ureueng jipeubrok-brok kamoe, kamoe balaih ngon tutoe haba nyang mameh. kamoe hana leubeh nibak broh donya nyoe; trok bak wateunyoe kamoe mantong jianggab lagee broh ateuhe bumoe. ulon

tuleh nyoe keugata kon meukeusut kamoe pumalee gata, teuma sibagoe naseuhah keugata lagee aneuek-anuek lon keudroe. sabab ulon kheueh nyang jeuet keu bapak gata, bah kheueh mungken sibagoe ureueng kristen, gata kana siploh ribee droe guree. lam udeb gata sibagoe ureueng-ureueng meusaboh ngon almaseh, ulon nyang jeuet keu bapak gata, sabab ulon nyang ba haba get keuhai almaseh keu gata. ngon sabab nyan ulon lakee ngon meuharab that mangat gata seutot cuntoh nyang na bak ulon. keunyan ulon ka lon kirem timotius ukeue gata. sibagoe murit almaseh, jihnyan saban lagee aneuek lon keudroe nyang ulon gaseh. jihnyan aneuek nyang jeuet teupeucaya. singoh jihnyan teuma jipeuingat gata keuhai cara udeb nyang ulon peujak oh ka lueheh lon meuiaman ubak almaseh, na kheueh cara udeb nyang ulon purunoe nibak tieb-tieb jeumaah dipat mantong. na padubdroe lamkawan gata nyang ka jeuet keu ureueng sombang, sabab awaknyan jipike ulon hana lonjak bak gata. teuma meunyeu tuhan geubri idhin ulon teuma teuka cit ubak gata hana treb le. singoh watee ulon lon ngieng cit teuma peue nyang hase jipeubuet le ureueng-ureueng sombang nyan; kon haba jih mantong. sabab meunyeu allah geupeurintah udeb sidroe-droe ureueng, hainyan teubukeuti le teunaga udeb ureueng nyan, kon ngon tutoe haba jih. ngon lagee nyan, pileh mantong peue nyang gata galak! peu kheueh gatatem ulon teuka keu lon purunoe gata ngon kreueh atawa ulon teuka jak purunoe gata ngon leumoh leumbot dan gaseh sayang? ulon ka kuteurimong laporan bahwa lamkawan gata na nyang kajipeubuet buet-buet nyang cabui biet-biet luwabiasa: na ureueng lamkawan gata nyang jimeumukah ngon ma ui jih. ureueng-ureueng nyang hana jituri tuhan mantong hanjipeubuet nyang lagee nyan! bah kheueh ka lagee nyan, gata mantong cit manyang ate. nyang sibeuna jih gata seudeh, dan gata peuteubiet lamkawan gata ureueng nyang peubuet lagee nyan. seucara lahe ulon jioh nibak gata, teuma seucara baten ulon na lamkawan gata. ngon lagee nyan, ulon keuneuk meutindak siulah-ulah ulon na lamkawan gata, "ateueh na tuhan isa almaseh, ulon peugah bahwa ureueng nyangka jipeubuet buet lagee nyan kutoe, ureueng nyan meuseuti teuhukom!" meunyeu gata meusapat anggab mantong ulon nyoe na lamkawan gata, dan ngon kuasa tuhan tanyoe isa, gata meuseuti tajok ureueng nyang lagee nyan ubak iblih mangat tuboh ureueng nyan binasa dan ngon lagee nyan roh jih teupeuseulamat watee tuhan teuka lom teuma. hana patot gata meuras sombang. mungken gata ka tadeungoe pribasa lagee nyoe, "rago nyang bacut jipeujeuet mandum nyang teulawok jeuet meukeumang!" boih kheueh leubeh ilee rago nyang ka treb nyan, na kheueh rago desya, mangat gata jeuet lagee tupong nyang teulawok nyang baro, gleh nibak rago desya nyang treb, dan ulon kuteupeu gata keubiet lagee nyan. sabab, peurayaan paskah tanyoe ka siab, sabab almaseh nyang jeuet keububiri paskah geutanyoe, ka lueheh teukeureubeuen. ngon lagee nyan, jak kheueh geutanyoe tapeuraya paskah nyan ngon ruti nyang hana meuragoe, na kheueh ruti nyang teupelambang ubak keumurnian dan banmandum nyang meukeunong nibak ate al-

lah. bek geutanyoe tapeuna peurayaan paskah nyan ngon ruti nyang mantong na rago nyang awai, na kheueh rago desya dan keujeuhetan. lam surat ulon nyang ka lheueh, ulon peugah ubak gata mangat bek meurakan ngon ureueng nyang peubuet cabui. nyang ulon meukeusut kon kheueh ureueng nyang cabui atawa leuha, atawa tukang teumipee atawa nyang seumah beurala nyang sagai-sagai hana jituri keu po teu allah. kon nyan! ulon hana meukeusut keu awaknyan; sabab meunyo gata haroh tapeujioh awaknyan, ka teuntée gata tateubiet beubahéh lam donya nyoe. nyang lon meukeusut na kheueh, gata bek meurakan ngon ureueng nyang meungaku droe jih ureueng kristen, teuma ureueng nyan jipeubuet cabui, atawa leuha, atawa jiseumah beurala, atawa galak jipeubrok-brok ureueng laen, atawa tukang mabok, atawa tukang ceumeucue. gata duek sira tamakheun ngon ureueng lagee nyan pih bek! beutoi nyang peusidang ureueng-ureueng kristen kon buet ulon. allah keudroe kheueh nyang teuma peusidang awaknyan. teuma keuhai anggota-anggota jeumaah gata, kon kheueh gata keudroe nyang meuseuti peusidang awaknyan? lam alkitab na teutuleh lagee nyoe, "use kheueh ureueng jeuhet nyang na lamkawan gata." pakon na lamkawan gata jijeuet ba ubak hakem nyang hana jituri keu allah, gata jakgadu syedara gata nyang seuman, meunyo jihnyan jimeudakwa ngon syedara jih nyan? pakon jihnyan hana jilakee umat allah nyang peuseuleusoe peukara jih nyan? peu kheueh gata hana tateupeue bahwa umat allah teuma jipeusidang donya nyoe? ngon lagee nyan, meunyo keubiet gata keuneuk peusidang donya nyoe, peu kheueh gata hana hase gata peuseuleusoe peukara-peukara peungadalan nyang hana meumakna? peu kheueh gata hana tateupeue bahwa tanyoe teuma tapeusidang malaikat-malaikat? leubeh-leubeh lom peukara-peukara udeb tieb-tieb uroe! teuma meunyo teuka peukara-peukara nyang lagee nyan, peu kheueh gata gadu bak ureueng-ureueng nyang sagai-sagai hana jabatan lam jeumaah? biet-biet malee that! teuntée lamkawan gata na ureueng nyang leubeh bijaksana keu jipeuseuleusoe hai-hai nyang na hubongan ngon seuliseh paham ngon syedara-syedara sabe ureueng kristen! nyang na teuka meubalek sidroe ureueng kristen jijak bak ureueng nyang bukan kristen keu jijak gadu peukara jih keuhai syedara jih nyang kristen! bek jak meupeukara bak ureueng nyang kon kristen; ngon na seuliseh paham sabe keudroe-droe gata nyan pih ka jeuet keutalo nibak gata. leubeh get gata jipeubuet hana ade, atawa jipeurugoe! teuma rupari gata keudroe nyang peusa-neut atueuh ureueng laen ngon hana ade. gata keudroe teuma nyang peurugoe ureueng laen. dan nyan gata peubuet atueuh syedara-syedara gata seuman! peu kheueh gata teupeu bahwa ureueng-ureueng nyang hana jipateh kheun allah, hana teuma jeuet keu anggota umat allah? bek keunong peungeuet! ureueng-ureueng nyang peubuet cabui, ureueng-ureueng seumah beurala, nyang meumukah, nyang peubuet-buet nyang that-that malee atueuh ureueng sabe jeuneh, nyang ceumeucue, nyang leuha, tukang mabok, nyang galak peubrok ureueng laen, dan ureueng nyang meulakee ngon paksa atra ureueng laen –

banmandum ureueng nyang lagee nyan hana teuma jeuet keuanggota umat allah. na meupadub droe lamkawan gata yoh ilee na nyang peubuet lagee nyan. teuma jinoenyoe gata teupeugah ka gleh nibak desya. gata ka jeuet keu milek allah nyang khusus. gata ka get lom teuma ngon allah, sabab gata meuman ubak tuhan isa almaseh dan kareuna kuasa roh nibak allah geutanyoe. na nyang peugah bahwa soemantong ureueng jeuet jipeubuet ban galak droe. teuma nibak ulon hana banmandum nyan meuguna. ngon lagee nyan bah kheueh ulon nyoe jeuet lon peubuet peue mantong, teuma ulon teutab hana lon peubiyeu droe ulon jikuasa le peue mantong. na cit nyang peugah bahwa peunajoh keu asoe pruet, dan pruet teukeubah keu peunajoh. teuma bandua nyan geusampho le po teu allah. tuboh manusia hana jeuet teupeuguna keu teupeuna hubungan nyang cabui, teuma na kheueh keuteupeutimang tuhan. dan tuhan teuma geupeulara tuboh nyan. allah ka geupeu udeb tuhan isa almaseh nibak mate, meunan cit ngon allah geupeu udeb tanyoe ngon kuasa gobnyan. syedara-syedara tateupeue bahwa tuboh gata nyan na kheueh anggota tuboh almaseh. ngon lagee nyan, peu kheueh jeuet loncok saboh anggota tuboh almaseh laju lon peujeuet keuanggota tuboh sidroe inong jeuhet? sagai-sagai han jeuet! atawa mungken gata gohlom tateupeue bahwa ureueng nyang meumukah ngon sidroe inong jeuhet, ureueng nyan ka jeuet meusaboh ngon inong jeuhet nyan! sabab lam alkitab na teutuleh lagee nyan, "manduanyan ka jeuet keusaboh." teuma ureueng nyang peusaboh droe ngon tuhan, roh tuhan ngon roh ureueng nyan ka jeuet meusaboh. peujioh kheueh buet-buet nyang cabui. sabab mandum desya laen nyang jipeubuet le gob, jeuetjih diluwa tuboh ureueng nyan. teuma keu ureueng nyang peubuet cabui, nyan saban cit ka jipeubuet desya atueuh tuboh jih keudroe. gata haroh tateupeue bahwa tuboh gata na kheueh tempat tinggai roh allah. rohnyan tinggai lam tuboh gata. dan allah keudroe kheueh nyang bri roh nyan keu gata. droe gata nyan kon atra gata. nyan atra po teu allah. allah ka geubloe gata dan ka geubayeue ngon lunaih. sabab nyan, peuguna kheueh tuboh gata lagee nyan bagoe sampoe allah teupeumulia. jinoenyoe ulon keuneuk peugah haba keuhai nyang gata peugah lam surat gata. meunyo sidroe ureueng agam hana meukawen, nyan get. teuma mangat bek teupeudaya ngon hai-hai nyang hana patot, leubeh get sidroe ureueng agam na purumoh jih keudroe dan tieb-tieb inong na lakoe jih keudroe. ureueng lakoe haroh jipeupeunoh keuwajeban jih sibagoe lakoe keue purumoh jih, dan di purumoh haroh teuma jipeupeunoh keuwajeban jih sibagoe purumoh keue lakoe; maseng-maseng jipeupeunoh keuwajeban jih atueuh ureueng laen. purumoh hana meukuasa atueuh tuboh jih keudroe; nyang meukuasa atueuh tuboh jih na kheueh lakoe. meunan cit lakoe hana meukuasa atueuh tuboh jih jih keudroe; nyang meukuasa atueuh tuboh jih na kheueh purumoh. bek kheueh peujioh sidroe ngon nyang laen seusabe lakoe binoe. jeuet mantong meunyo sikeujab, asai atueuh situju ban dua blaih pihak. ngon lagee nyan maseng-maseng meuteume meudoa ngon cara hana teuganggu. teuma oh lheueh nyan bah kheueh

gata saleng tameurab lom sibagoe ureueng meulakoe binoe. meunyo hana lagee nyan, singoh gata teuma jisah le roh jeuhet, sabab gata hana teuga tapeuteun hawa nafeusu. nyan ulon peugah nyoe kon kheueh sibagoe peurintah, teuma sibagoe naseuhat. nyan sibeuna jih ulon leubeh galak meunyo mandum ureueng lagee ulon. teuma maseng-maseng ka teuterimong karonya nyan khusus nibak po teu alah. sidroe ureueng na karonya lagee nyoe, nyan laen na teuma karonya nyan. keu ureueng-ureueng nyan gohlom meukawen dan keu ureueng-ureueng inong nyan ka balee, nyoe kheueh naseuhat ulon: leubeh get gata teutab udeb lagee ulon. teuma meunyo gata hana hase tapeuteun nafeusu, bah kheueh gata meukawen. sabab leubeh get gata meukawen nibak nafeusu gata meuhueb-hueb lagee apui hu. keu ureueng nyan ka meukawen, nyoe kheueh peurintah ulon: (nyang sibeuna jih kon ulon nyan bri peurintah nyoe, teuma na kheueh tuhan.) sidroe ureueng inong nyan ka meukawen bek kheueh jitinggai lakoe jih. teuma meunyo inong nyan ka jitinggai lakoe jih, inong nyan bah kheueh teutab hana meulakoe, atawa jigisa ubak lakoe jih. dan sidroe ureueng lakoe hana jeuet jitaleuek purumoh jih. keu ureueng nyan laen-laen, naseuhat ulon na kheueh lagee nyoe: – nyoe naseuhat ulon keudroe, kon naseuhat tuhan – meunyo sidroe ureueng kristen jimeukawen ngon sidroe ureueng nyan hana meuman ubak almaseh, dan purumoh jih nyan situju keu udeb meusan ngon lakoe jih nyan, ureueng nyan hana jeuet jitaleuek purumoh jih nyan. dan meunyo sidroe inong kristen jimeulakoe ngon sidroe agam nyan hana meuman ubak almaseh, dan lakoe jih nyan situju keu udeb meusan ngon purumoh jih nyan, teuma inong nyan hana jeuet jitaleuek lakoe jih nyan. sabab lakoe nyan hana meuman teupeulayak jeuet keu anggota umat allah sabab purumoh jih nyan ka jeuet keu milek allah. meunan cit keu purumoh nyan hana meuman teupeulayak jeuet keu anggota umat allah, sabab jimeukawen ngon lakoe nyan ka jeuet keu milek allah. meunyo hana lagee nyan, aneuek-aneuek awaknyan jeuet keu aneuek-aneuek kaphé, pada-hai aneuek-aneuek nyan teuaggab sibagoe anggota umat allah. teuma meunyo ureueng nyan hana meuman nyan jitinggai lakoe jih atawa purumoh jih nyan kristen, bek gata tam jih nyan. lam hai nyoe gata nyan inong atawa nyan agam beubaih, sabab allah meuharab mangat gata udeb ngon rukon. sabab gata sibagoe purumoh – nyan ka meuman ubak tuhan – pakriban kheueh gata hase tapeupeu ngon paih bahwa gata hana hase tapeuseumat lakoe gata? meunan cit gata sibagoe lakoe nyan kristen, pakriban gata hase tapeupeu ngon pasti bahwa gata hana hase tapeuseumat purumoh gata? bah kheueh maseng-maseng jiatoe udeb jih meunurot bimbangan tuhan lagee nyan ka geupeuteuntee le po teu allah keu jihnyan bak watee allah geutawok jihnyan keu jipeucaya ubak gobnyan. nyan kheueh peuratoran nyan ulon purunoe bak tieb-tieb jeumaah. miseujih, meunyo sidroe ureueng nyan ka meukatan bak watee jih nyan jiteurimong panggengan allah, bek kheueh ureueng nyan jiseuha jisampoh tanda-tanda meukatan nyan ka na bak jih nyan. meunan cit

keu ureueng nyan gohlom meukatan bak watee jihnyan jiteurimong panggengan allah, bek kheueh ureueng nyan jilakee meukatan. sabab teuseutot peuratoran meusunat atawa hana, bandua nyan saban mantong hana meumakna meubacut pih. nyan peunteng na kheueh teuseutot peue-peue nyan geupeurintah le po teu allah. bah kheueh tieb-tieb ureueng udeb lam keuadaan lagee watee jihnyan jiteurimong panggengan allah. meunyo bak watee gata teutawok, gata na kheueh sidroe namiet, bek kheueh gata sampoe sosah payah tapike keuhai nyan. teuma meunyo singoh gata meuteume keuseumpatan jeuet keubeubaih, peuguna kheueh keuseumpatan nyan. 22 sabab sidroe namiet nyan ka meuman ubak tuhan, na kheueh ureueng tuhan nyan ka beubaih. dan sidroe ureueng beubaih nyan ka meuman ubak tuhan, na kheueh namiet almaseh. allah ka geubloe gata dan ka lunaih geubayeue nyan. le sabab nyan, bek kheueh gata seurah droe keu jeuet namiet manusia. ngon lagee nyan, syedara-syedara, pakriban mantong keuadaan gata bak watee gata teutawok, bah kheueh gata teutab udeb lagee nyan meusan ngon allah. jinoo keu ureueng-ureueng nyan gohlom meukawen. keu hai nyan, ulon hana kuteurimong peurintah meusapeue pih nibak tuhan. teuma sibagoe ureueng nyan sabab rakmat tuhan patot teupeucaya, ulon kuteum kubri mubagoe naseuhat. teungat ubak mandum keusosahan nyan teuancam nibak watee nyoe, ulon pike leubeh get meunyo ureueng teutab jiudeb lagee keuadaan nyan na bak saat nyoe. meunyo gata kana purumoh bek kheueh ta useuha mangat gata lleuh nibak purumoh gata nyan. dan meunyo gata gohlom na purumoh bek kheueh gata useuha gata mita purumoh. 28 teuma meunyo gata meukawen, nyan kon desya. meunan cit teuma meunyo sidroe aneuek dara jimeukawen, hana rhot jih nyan ubak desya. teuma, awaknyan nyan meukawen nyan teuma meuteume ngon mubagoe keusosahan. dan ulon meuharab mangat gata teupeujioh nibak hai-hai nyan sosah nyan. nyan ulon meukeusut lagee nyoe, syedara-syedara: nibak geutanyoe watee hana le le. phon nibak saat nyoe, soe mantong ureueng nyan ka meupurumoh bah kheueh jih nyan udeb lagee ureueng nyan gohlom meupurumoh; ureueng nyan mo, udeb jih siaulah-ulah hana lam seudeh ate; ureueng nyan kem, siaulah-ulah jih nyan hana geumbira; ureueng nyan ka lleueh jimeubloe, siaulah-ulah jihnyan hana sapeue na; dan ureueng nyan laloe nibak hai-hai donya, bah kheueh jiudeb siaulah-ulah ureueng nyan hana sibok ngon peue nyan jipeubuet nyan. sabab, donya nyoe hana treb le, lam keuadaan nyan na jinoenyoe, teuma sapan sapa! ulon meuharab that mangat gata leupah nibak keusosahan. ureueng nyan hana meupurumoh teuma jipusat pikeran jih ubak hai-hai keu tuhan, sabab jih jikeuneuk peumangat ate tuhan. teuma ureueng nyan ka na purumoh jai that-that jipike keuhai donya nyoe, sabab jihnyan keuneuk jipeumangat ate purumoh jih; ngon lagee nyan, peuratian ureueng nyan ka teuweuek-weuek. sidroe ureueng inong nyan hana meulakoe, atawa sidroe aneuek dara, teuma jai that jipike keu hai tuhan, sabab jihnyan meuharab that mangat jeuet jiwara

jih keu milek allah. teuma sidroe ureueng inong nyang ka meulakoe, jipeusaho pikeran jih ubak hai-hai donya, sabab jih nyan jikeuneuk peumangat ate lakoe jih. banmandum nyang ulon tuleh nyan na kheueh jeuet keujroh gata keudroe, hana meukeusut lon tam nyoe dan lon tam jih. nyang ulon lakee na kheueh mangat gata peubuet nyang beutoi dan patot, dan mangat gata hase tapeusaho pikeran gata ubak tuhan. meunyo sidroe ureueng meuras droe jih hana jipeubuet nyang sipatoh jih ateuhe tunangan jih, meunyo jihnyan hana hase jipeuteun hawa nafesus jih, dan jihnyan meuras peureulee jimeukawen ngon aneuek dara nyan, bah kheueh jipeubuet peue nyang jirasa nyan jroh. jihnyan hana meudesa meunyo awaknyan meukawen. teuma meunyo sidroe-droe ureueng ka jicok keuputosan lam ate jih keu hana jimeukawen ngon tunangan jih dan keuputosan nyan hana teupaksa, teuma nyang jipeubuet nyan jroh that, asai jihnyan teuga jipeubuet hainyan. jeulaih jih, ureueng nyang meukawen get buet jih, dan ureueng nyang hana meukawen leubeh get lom buet jih. sidroe ureueng inong nyang ka meukawen jihnyan teuiat ubak lakoe jih simantong lakoe jih nyan udeb. meunyo lakoe jih ka meuninggai donya, inong nyan beubaih jimeukawen lom ngon ureueng nyang jigalak; asai jimeukawen nyan seucara kristen. teuma jihnyan leubeh meu-untong meunyo hana jimeukawen le. nyan peundapat ulon keudroe, teuma ulon rasa bahwa nyang ulon peugah nyan na kheueh ngon kuasa roh allah. jinoenyo ulon peugah keuhai peunajoh nyang jibri sibagoe peuseumahan keu beurala. keubiet beutoi lagee jipeugah le gob, "tanyoe banmandum ka carong." teuma ngon carong nyan teupeujeuet manusia rhot bak sombong, seudang geunaseh teupeudong pribadi manusia. ureueng nyang jipike jihnyan jiteupeu peue-peue mantong, nyang sibeuna jih gohlom jiteupeu nyang silhok-lhok jih. teuma ureueng nyang biet-biet jigaseh keu allah, ureueng nyan geuturi le allah. soai peunajoh nyang ka teupeuseumah keu beurala, tanyoe tateupeue bahwa beurala nyan sibagoe gamba nyang sikeubiet jih hana. dan tanyoe pih tateupeue bahwa po teu allah nyan sidroe; hana nyang laen. keubiet jai that cit peue nyang jipeugah ilah dan tuhan; bah kheueh nyang na dilanget meunan cit nyang na ateuhe rhueung bumoe. teuma nibak geutanyoe, allah na kheueh tunggai. gobnyan kheueh bapak nyang cebta peue-peue mantong. keu gobnyan kheueh tanyoe udeb. dan tuhan na kheueh tunggai, gobnyan kheueh isa almaseh. meulalu gobnyan peue-peue mantong teucebta, dan sabab gobnyan kheueh geutanyoe nyoe udeb. teuma bah kheueh meunan, hana mandum ureueng jiteupeu hainyan. na ureueng nyang awai ilee jiseumah beurala. ngon lagee nyan, sabab jihnyan trok bak wateenyo pih awaknyan mantong jirasa bahwa peunajoh, nyang ka jipeuseumah ubak beurala, na kheueh peunajoh beurala. teuma, meunyo awaknyan jipajoh peunajoh nyan, awaknyan meuras meudesa; sabab keuyakenan awaknyan gohlom khong. nyang sikeubiet jih peunajoh keudroe hana teupeujeuet hubongan tanyoe ngon allah meutamah krab. meunyo tanyoe tapajoh peunajoh nyan, tanyoe hana meuteume untong sapeue. sikeubit jih, meunyo tanyoe

hana tapajoh peunajoh nyan, tanyoe pih hana rugoe sapeue. teuma, ate-ate kheueh! bek sampoe roh ureueng laen jeuet meudesa – sabab keuyakenan jih gohlom khong – ngon sabab gata beubaih tapeubuet peue mantong. nyang ulon meukeusut lagee nyoe: seukira jih gata, nyang na keuyakenan nyang khong, teungoh gata duek dan gata makheun lam kuil beurala. oh lheueh nyan na sidroe ureueng jingiang gata na taduek dan tamakheun lam kuil nyan. meunyo keuyakenan ureueng nyan hana khong, peu kheueh nyan teuma teupeujeuet ureueng nyan jijeuet makheun peunajoh nyang ka jibri keu beurala? ngon sabab nyan, keuyakenan gata teupeujeuet ureueng laen nyang keuyakenan jih gohlom khong nyan jeuet keuisat. padahal almaseh mate keu ureueng nyan cit teuma. dan meunyo gata tapeubuet nyang salah lagee nyan ateuhe syedara-syedara nyang kristen – na kheueh gata katapeurasak keuyakenan awaknyan nyang leumoh – ngon lagee nyan gata ka meudesa ubak almaseh. nyang kheueh sabab jih, meunyo peunajoh jeuet keusabab syedara lon meudesa, ulon sagai-sagai hana lon pajoh le. pat tateupeue syedara ulon meudesa ngon sabab le ulon. peu kheueh ulon nyoe kon ureueng beubaih? peu kheueh ulon nyoe kon rasui? peu kheueh ulon nyoe gohlom na lon ngieng isa, tuhan tanyoe? peu kheueh gata kon hase buet ulon keu tuhan? bah kheueh di ureueng-ureueng laen hana jitem aku ulon nyoe sibagoe rasui, sihana-hana jih mubacut gata na ta aku ulon nyoe rasui! sabab udeb gata sibagoe ureueng kristen na kheueh sibagoe bukeuti bahwa ulon nyoe na kheueh sidroe rasui. meunyo ureueng jikritek ulon, ulon teuma kujawueb lagee nyoe: peu kheueh ulon hana hak lon teurimong peunajoh dan ie jieb sabab buet ulon? peu kheueh ulon hana hak ulon ba sidroe purumoh ureueng kristen meusajan-sajan ngon ulon watee ulon jak, lagee nyang geupeubuet le syedara-syedara tuhan isa dan le rasui-rasui nyang laen, meunan cit ngon petrus? atawa barnabas dan ulon mantong nyang teupeuwajeb jak mita hareukat keudroe? peu kheueh hana anggota tantra nyang haroh jipeubiaya droe jih keudroe lam angkatan prang! hana peutani nyang jipula anggo lam lampoh jih oh lheueh nyan hana jipajoh wase jih nyang jipeuhase le lampoh jih nyan! hana ureueng meurabe nyang peulara bubiri, laju hana jijieb ie mom nyang jipeuhase le bubiri-bubiri jih nyan! ulon peugah hai nyan kon kheueh nyang ka lazem nibak peungalaman tieb-tieb uroe, teuma sabab alkitab pih na geupeugah nyang lagee nyan. lam kitab nabi musa na teutuleh lagee nyoe, "leumo nyang teungoh jigiloe-giloe boh gandom keu jipeuleukang boh gandom nibak mu jih, bek kheueh teubeukab babah jih." peu kheueh leumo nyang geukalon le po teu allah? atawa nyan nyang geumeukeusut keu geutanyoe? beutoi nyan teutuleh keu geutanyoe. sabab ureueng nyang mubuet bak ladang dan ureueng nyang jipeugleh gandom jih ka sipatoh jih jimubuet ngon harapan keu jiteurimong siparo nibak hase nyang jipeubuet nyan. kamoe ka kamoe tabu bijeh rohani lam udeb gata. ngon lagee nyan meunyo kamoe pot beureukat-beureukat hareuta nyang na nibak gata, peu kheueh ngon lagee nyan kamoe lakee leubeh jai nibak gata? meunyo

ureueng-ureueng laen na hak jiharab nyoe nibak gata, peu kheueh kamoe leubeh na hak nibak awaknyan? teuma ulon gohlom lon peuguna hak nyan. nyang keubiet jih ulon leubeh galak lon tanggong peue-peue mantong nibak jipeuteuka sapeue-sapeue hai nyang jihaling teupeutabu haba get keuhai almaseh. gata teuntée tateupeu bahwa ureueng nyan mubuet lam baet allah jiteurimong peunajoh awaknyan nibak baet allah. dan ureueng-ureueng nyang peusanéut teupat peuseumah keureubeuen, meuteume siparo nibak keureubeuen nyang na teupeuseumah nibak teupat nyan. meunan cit tuhan ka geupeuteuntée bahwa ureueng nyang peusampoe haba get nyan haroh meuteume hareukat nibak buet jih nyan. teuma gohlom na lon peuguna mubacut pih nibak hak-hak ulon nyan. dan ulon tuleh suratnyoe kon teuma ngon meukeusut mangat jeuet hai-hai nyan teupeubuet laju jinoenyoe cit keu ulon. leubeh get ulon mate nibak gadoh hai nyang ulon peubangga nyan. sabab, meunyoé nyan soai teupeusampoe haba get nyang teuka nibak po teu allah, ngon lagee nyan ulon hana hak lon peubangga droe, sabab po teu allah ka geupeurintah bak ulon keu lon peubuet nyan. cilaka kheueh ulon, meunyoé ulon hana lon peusampoe haba get nyan! seukira jidron peubuet buet nyan ateuhe keuheundak lon keudroe, ngon lagee nyan lon jeuet meuharab keu meuteume upah. teuma ulon peusampoe haba get nyan na kheueh sabab wajebe. ulon geubri tugaih le po teu allah keu lon peubuet lagee nyan. meunyoé meunan, peue upah lon? nyoe kheueh upah jih: bahwa ulon hase lon peusampoe haba get nyan ngon hana lon peubrat meusidroé ureueng pih jipeubiaya lon, sabab ulon hana lon lakee hak-hak ulon sibagoe lon peusampoe haba get nyan. ulon nyoe bukan namiet manusia soe mantong; ulon ureueng beubaih. teuma bah kheueh meunan, ulon ka lon peujeuet droe ulon nyoe namiet keu mandum ureueng. ulon peubuet lagee nyan mangat ulon hase lon peuseulamat sijai-jai jih manusia keu almaseh. keu ureueng yahudi, ulon lagee ureueng yahudi mangat ulon hase lon peumeunang ureueng yahudi keu almaseh. keu ureueng-ureueng nyang udeb jih meunurot hukom nabi musa, ulon peudeuh droe siulah-ulah ulon teuitak ngon hukom nyan, bah kheueh nyang sibeuna jih ulon hana teuitak ngon hukom nyan. ulon peubuet lagee nyan mangat ulon hase lon tarek awaknyan mangat jeuet keu murit almaseh. meunan cit keu ureueng-ureueng nyan keu yahudi, ulon ba droe lagee kon ureueng yahudi, nyang udeb diluwa hukom nabi musa. ulon peubuet lagee nyan mangat ulon hase lon tarek awaknyan jeuet keu murit almaseh. ngon lagee nyan kon meumakna ulon nyoe hana taat ubak po teu allah, dan ulon nyoe keubiet ka jikuasa le kuasa peurintah-peurintah almaseh. 22 lamkawan ureueng-ureueng nyang keuyakenan jih hana teuga, ulon pih lon peubuet lagee ureueng nyang keuyakenan jih hana teuga mangat ulon hase lon tarek awaknyan jeuet keu murit almaseh. paneuk haba, ulon jeuet keu peue mantong keu mandum ureueng mangat ngon rot nyang lagee peue mantong ulon hase lon peuseulamat siparo nibak lamkawan awaknyan. banmandum nyan ulon peubuet keu haba get nyang teuka nibak po teu allah nyan, mangat

ulon pi meusajan geubri beureukat. syedara teuntée mandum tateupeue bahwa lam tieb-tieb na meutunang plueng mandum peuseurta meusajan jiplueng, teuma sidroe ureueng nyang meuteume hadiah. ngon lagee nyan plueng kheueh beutajam that mangat gata meuteume hadiah nyan. tieb-tieb ureueng nyang teungoh meulatih, jipeuteun droe lam hai peue mantong. jihnyan jisaja peubuetnyan sabab jihnyan mangat teuboh ngon taloe takue bungong keujuaraan, na kheueh bungong nyang bagaih layee. teuma tanyoenyoe tapeuteun droe lam hai peue mantong sabab tanyoe meuheuet that beumeuteume teuboh ngon taloe takue bungong nyang hana layee-layee. nyang kheueh sabab jih ulon plueng ngon tujuan nyang ka teuntée. lagee watee meutunang tinju, ulon hana lon soh ban galak droe. ulon peubiyeu tuboh lon nyoe jilatih ngon biet-biet kreuheh sampoe ulon hase lon kuasa nyan. ulon peubuet lagee nyan, sabab ulon hana lontem sampoe teujadi bahwa oh ka kheueh lon pakat ureueng laen meusajan-sajan jiseutot lam meutunang plueng nyan, ulon keudroe jitulak. syedara-syedara! gata nyang sibeuna jih beuta ingat peue nyang ka teujadi ateuhe indatu tanyoe watee awaknyan geuseutot nabi musa. awaknyan banmandum jipeupayong le awan, dan ngon seulamát jijeumeurang laot mirah. keuneuk jeuet keu murit-murit nabi musa, awaknyan banmandum teupeumano lam awan dan laot nyan. awaknyan banmandum jipajoh peunajoh rohani nyang saban, dan jiejie ie rohani nyang saban teuma. awaknyan bandum jiejie ie nibak gunung batee rohani nyang na meusajan ngon awaknyan; gunung batee nyan na kheueh almaseh keudroe. bah kheueh meunan, allah hana galak ateuhe ladum nibak awaknyan, dan nyang kheueh sabab jih manyet-manyet awaknyan teutiek-tiek lam padang pasi. banmandum nyan jeuet keucuntoh nibak geutanyoe, sibagoe peuingat nibak geutanyoe mangat tanyoe bek ta galak keuhai-hai nyang jeuhet lagee awaknyan. meunan cit mangat tanyoe bek taseumah beurala lagee nyang jipeubuet le ladum nibak awaknyan. lam alkitab na teutuleh lagee nyoe, "teuma bansa nyan jipeuphon makheun ngon jijieb ie, dan jimeunari keu jiseumah beurala." tanyoe hana jeuet tapeubuet hai-hai nyang cabui lagee nyang jipeubuet le ladum ureueng lamkawan awaknyan. sabab, dua ploeh lhee ribee droe lamkawan awaknyan mate lam siuroe sabab jipeubuet nyan. tanyoe hana jeuet ta ujoé-ujoe tuhan lagee nyang jipeubuet le ladum lamkawan awaknyan yoh watee ilee, akhe jih awaknyan mate jikab le uleue meubisa. meunan cit tanyoe hana jeuet aloh alah; lagee nyang jipeubuet le ladum ureueng lamkawan awaknyan yoh watee ilee, akhe jih awaknyan jipoh mate le malaikat marwot banmandum hainyan teujadi ateuhe awaknyan mangat jeuet keucuntoh keu ureueng laen. dan bandum nyan pi na teutuleh sibagoe peuingat keu geutanyoe. sabab tanyoe bak watee nyoe udeb lam masa akhe jamen. ureueng nyang jisangka droe jih teudong ngon teugab, get kheueh beu ate-ate; bek sampoe jihnyan reubah. tieb-tieb cubaan nyang gata rasa na kheueh cubaan nyang ka lazem jirasa le manusia. teuma po teu allah seutia ubak janji gobnyan. gobnyan hana teuma geupeubiyeu gata jiujoé leubeh ni-

bak keuanggongan gata. bak watee gata jiteuka ngon cubaan, gobnyan laju geubri jalan keugata beujeuet keuteuga mangat gata hase tameuteun. ngon sabab nyan, syedara mandum nyang ulon gaseh, gata banci kheueh keu ureueng nyang seumah beurala. ulon meututoe ngon gata lagee ngon ureueng-ureueng bi-jaksana. bah kheueh gata timang keudroe tutoe haba lon nyoe. bak watee tanyoe jieb ie anggo talakee teu-rimong gaseh ubak po teu allah, peu kheueh nyan kon ka teutunok bahwa tanyoe meusaboh ngon almaseh lam mate gobnyan? dan bak watee tanyoe tabagi-tabagi ruti keutapajoh meusajan-sajan, peu kheueh nyan kon ka teutunok bahwa tanyoe ka meusaboh lam tuboh almaseh? ngon sabab nyan teuma na saboh ruti, dan tanyoe mandum tapajoh ruti nyang saboh nyan cit teuma, dan tanyoe nyang jai nyoe jeuet keusaboh tuboh. cuba kalon ureueng-ureueng yahudi. awaknyan nyang jimakheun pe-unajoh nyang teupeuseumah ateuh teumpat peuseumah keureubeuen, na kheueh ureueng-ureueng nyang ka meusaboh ngon teumpat nyan. peue meukeusut lon ngon lagee nyan? beurala atawa pe-unajoh nyang jipeuseumah keubeurala nyan sagai-sagai hana areuti. peue nyang jipeuseumah bak teumpat keureubeuen keu beurala hana teupeuseumah keu po teu allah, teuma na kheueh keu roh-roh jeuhet. dan ulon hana kutem gata meusaboh ngon roh jeuhet. gata hana jeuet gata jieb ie nibak piala anggo tuhan, dan sigoguih nibak piala anggo roh jeuet cit teuma. gata hana tamakheun bak meuja tuhan, dan meunan cit bak meuja roh jeuhet. 22 atawa peu kheueh tanyoe takeuneuk peujeuet tuhan hana picik ate? peu kheueh tanyoe leubeh teuga nibak tuhan? jipeugah le gob, "tanyoe jeuet tapeubuet peue mantong asai tatem." beutoi! teuma hana mandum nyang tatem nyan na guna. "tanyoe jeuet teupeubuet peue mantong nyang asai tatem" – teuma hana banmandum nyang tatem nyan jipeugot udeb tanyoe. bek kheueh na peusidroe ureueng jimeujuang deumi keu keupeuntengan jih keudroe. tieb-tieb ureueng haroh meujuang keu keupeuntengan ureueng laen teuma. gata jeuet tapajoh peue mantong nyang na jipeubloe lam peukan eungkot sie. hana peue gata tilek leubeh ilee, bah kheueh na rasa brat lam ate nurani gata. sabab lam alkitab na teutuleh lagee nyoe, "bumoe nyoe ngon banmandum asoe jih na kheueh atra tuhan." meunyo gata jiundang jak makheun le sidroe nyang bukon ureueng kristen, dan gata tateurimong undangan gobnyan, pajoh kheueh peue nyang ka ji idang ukeue gata. hana peue gata tilek pane asai-jih peunajoh nyan, mangat bek na rasa brat lam ate nurani gata. 28 teuma meunyo na nyang peugah bak gata, "peunajoh nyoe ka teupeuseumah keubeurala," bek kheueh gata pajoh peunajoh nyan, sabab teukalon keupeuntengan ureueng nyan dan sabab su ate nurani. nyang ulon meukeusut kon su ate nurani gata, teuma su ate nurani ureueng nyan. mungkin na nyang tanyong, "ka gura, pakon keubeubaihan lon ka jipeubataih le su ate nurani ureueng laen? meun-yoe ulon pajoh peunajoh ngon lon lakee teurimong gaseh ubak allah, pakon gob haroh jihina ulon keu peunajohnyan, seudangan ulon ka lon lakee teurimong gaseh ubak allah ateuh nyan?" peue mantong

nyang gata peubuet – gata makheun atawa gata jieb ie – peubuet kheueh mandum nyan keu gata peumulia allah. udeb kheueh beulagee nyan bagoe sampoe le gata ureueng laen hana jipeubuet desya; peu kheueh awaknyan ureueng yahudi atawa kon ureueng yahudi, atawa pih jeumaah allah. udeb kheueh lagee ulon nyoe. ulon lon useuha lon peumangat ate mandum ureueng lam sigala sisuatu, kon meukeusut-meukeusut keupeuntengan droe teuh keudroe. tujuan lon na kheueh mangat awaknyan banmandum hase teupeuselamat. seutot kheueh teuladan ulon, lagee ulon pih lon seutot teuladan almaseh. ulon kupujoe gata sabab gata sabe tapeuingat ulon dan taturot peungajaran nyang ulon bri bak gata. teuma ulon meuheut beutateupeue saboh hai teuk, bahwa nyang jeuet keu ulee ateuh tieb-tieb ureueng agam na kheueh almaseh; nyang jeuet keue ulee ateuh purumoh na kheueh lakoe, dan nyang jeuet keue ulee ateuh almaseh na kheueh allah. meunyo sidroe ureueng agam watee jimeudoa atawa watee jipeusampoe haba nyang teuka nibak po teu allah dikeue ureueng rame, jingui sinutob ulee, ngon lagee nyan ureueng nyan ka jihina almaseh. dan meunyo sidroe ureueng inong watee jimeudoa atawa watee jipeusampoe haba nyang teuka nibak po teu allah dikeue ureueng rame, hana jingui sinutob ulee, ngon lagee nyan ureueng inong nyan ka jihina lakoe jih nyang jeuet ulee ateuh droe jih. nyang lagee nyan saban cit ulee inong nyan ka jicuko. sabab meunyo sidroe ureueng inong hana jitem ngui sinutob ulee leubeh get ok jih teugunteng. teuma meunyo sidroe ureueng inong teucuko ok jih atawa teugunteng ok jih, nyang lagee nyan na kheueh hinaan ateuh droe jih. ngon lagee nyan leubeh get inong nyan jingui tutob ulee. ureueng agam hana peue jitob ulee, sabab jihnyan sibago ceureumen pribadi dan keubeusaran po teu allah. teuma ureueng inong sibago ceureumen keu ureueng lakoe, sabab ureueng agam hana teupeujeuet nibak ureueng inong, ureueng inong kheueh nyang teupeujeuet nibak ureueng agam. ureueng agam pih hana teupeujeuet keu keupeuntengan ureueng inong, teuma ureueng inong nyang teupeujeuet keu keupeuntengan ureueng agam. sabab nyan, keuteupeumangat ate duma malaikat, sidroe ureueng inong haroh jingui sinutob ulee sibago tanda bahwa jihnyan na dimiyueb kuasa lakoe jih. teuma bah kheueh meunan lam udeb geutanyoe ureueng kristen, ureueng inong nyan hana jidong keudroe, lleueh nibak ureueng agam, dan ureueng agam pih hana jidong keudroe, lleuh nibak ureueng inong. sabab bah kheueh ureueng inong phon that teupeujeuet nibak ureueng agam, teuma oh ka lleueh ureueng agam lahe lam pruet ureueng inong; dan banmandum nyan asai jih nibak po teu allah. cuba gatanoye keudroe tapeutimang hainyoe: peu kheueh get sidroe ureueng inong jimeudoa ubak allah dikeue ureueng rame, hana jingui sinutob ulee? nibak peungalaman umum, gata ka teupeurnoe bahwa meunyo ureueng agam meuk panyang, nyan saboh hai nyang kureueng patot. teuma keu ureueng inong, ok teubri keu jih nyan sibago sinutob ulee jih dan ok panyang na kheueh keubangga jih. ngon lagee nyan, meunyo nyang keuneuk meudakwa keuhai nyoe,

saboh sagai nyang jeuet lon peugah na kheueh bah kheueh tanyoe meunan cit ngon jeumaah-jeumaah allah nyang laen, umum jih na saboh keubiasaan lam jeumaah; laen nibak nyan hana. keuhai nyang seulanjutjih nyoe, ulon hana lon pujoe gata. gata meugumpoi tameuiebadat hana jipeuhase nyang get, teuma nyang hana get. phon-phon that na ulon deungoe, bahwa bak teumplat-teumplat gata meugumpoi keu meuiebadat na golongan-golongan nyang saleng meulaen. dan ulon pike hana le meubacut na nyang beutoi haba nyan. keubiet ka siwajar jih jiteuka peupeuchan lamkawan gata, mangat deuh singoh soe-soe nyang ureueng kristen seujati. teuma bak watee gata meusapat, nyang gata peuna nyan kon peujame tuhan. sabab watee pajoh bu, gata maseng-maseng gata meureupah tacok peunajoh teuh keudroe, sampoe na nyang hana meuteume sapeue, seudangkan nyang laen sampoe an mabok. 22 pakon meunan? kon kheueh gata na rumoh? gata jeuet makheun dan tajieb ie nibak teumplat nyan! atawa peu kheueh gata keuneuk tahina jeumaah allah dan gata peumalee ureueng-ureueng gasien? peu kheueh nyang haroh ulon peugah keu gata? peu kheueh haroh lon pujoe gata? hana! sagai-sagai ulon hana lon pujoe gata. sabab nyang lon purunoe keu gata nyan, na kheueh nyang lon teurimong nibak tuhan keudroe: bahwa bak malam nyan watee isa, tuhan tanyoe jikhianat, gobnyan laju geucok ruti, dan oh ka ltheueh geupeugah teurimong gaseh ubak po teu allah ateuh ruti nyan, laju geupriek-priek rutinyan ngon jaroe gobnyan, oh ltheueh nyan laju geupeugah, "nyoe kheueh tuboh lon nyang teupeujok keu gata. peubuet kheueh lagee nyoe sibagoe gata ingat keu lon." meunan cit teuma oh ka ltheueh habeh makheun, gobnyan geucok piala ie anggo dan laju geupeugah, "anggo nyoe na kheueh meujanji allah nyang baro, teupeusah ngon darah lon. tieb-tieb gata jieb nyoe, peubuet kheueh nyoe sibagoe taingat keu lon." beutoi tieb-tieb gata pajoh ruti dan gata jieb ie anggo nyoe, gata peusampoe tuhan ka mate, sampoe gobnyan teuka lom teuma. ngon sabab nyan, ureueng-ureueng nyang jipajoh ruti tuhan atawa jijieb ie anggo tuhan ngon cara nyang hana beutoi, ureueng nyan meudesya ubak tuhan nyang ka geukeureubeuen tuboh dan darah gobnyan. 28 ngon lagee nyan, tieb-tieb ureueng meuseuti jijak peureksa droe jih leubeh ilee, baro kheueh jeuet jipajoh ruti atawa jijieb ie anggo nyan. sabab meunyo ureueng jipajoh ruti dan jijieb ie anggo hana jipako bahwa peujame nyan na hubungan ngon tuboh tuhan, ureueng nyan jimakheun dan jijieb ie keue jiteurimong hukom po teu allah ateuh droe jih keudroe. nyang kheueh sabab jih jai that lamkawan gata nyang saket dan leumoh, dan na teuma nyang mate. teuma meunyo tanyoe tapareksa droe tanyoe leubeh ilee, tanyoe hana teuma geuhukom le po teu allah. teuma meunyo tanyoe geuhoi le allah, gobnyan teuma geuseunuet tanyoe, mangat tanyoe bek keunong hukom meusajan-sajan ngon donya nyoe. ngon sabab nyan, syedara-syedara lon, meunyo gata meusapat keu tamakheun nibak teumplat peujame tuhan, gata meuseuti saleng tamupreh-preh. meunyo na nyang deuk, ureueng nyan bah kheueh jipajoh bu ilee dirumoh jih. me-

unyo gata tapeubeuah hai nyoe, tieb-tieb gata peuna meusapat keu taiebadat hana teuma meuteume hukuman nibak po teu allah ateuh droe gata keudroe. keuhai masa-alah-masa-alah nyang laen, ulon peutrang ubak gata, meunyo ulon teuka singoh. jinoenyo keuhai karonya-karonya nyang geubri le roh allah. keuhai nyan, ulon meuharab mangat gata tateupeue nyang sibeuna jih. ingat kheueh bahwa bak watee gata gohlom taturi tuhan, gata teupeungaroh gata seutot beurala nyang hanjeuet mariet. gata meuseuti tateupeue bahwa ureueng-ureueng nyang geupimpen le roh allah hana hase jipeugah, "teukutok kheueh isa!" meunan cit teuma hana meusidroe pih nyang hase jipeugah, "isa kheueh tuhan!" meunyo ureueng nyan hana jipimpen le roh allah. na mubagoe rupa karonya nibak roh allah, teuma mandum nyan jibri le roh nyang sa. na mubagoe rupa buet keu teuseumah tuhan, teuma tuhan nyang jiseumah nyan, tuhan nyang sa cit! na mubagoe cara teupeubuet buet tuhan, teuma nyang bri teunaga keunyan bak tieb-tieb ureueng na kheueh po teu allah nyang sa cit teuma. keu keuet tanyoe mandum, roh allah geumubuet bak tieb-tieb ureueng seucara keudroe-droe. keu nyang sidroe, roh nyan jibri keumampuan ureueng nyan jipeugah haba ngon peunoh wibawa. keu nyang laen roh nyang nyan cit jibri keumampuan keu jipeugah keuhai allah. roh nyang sa nyan cit teuma jibri ubak ureueng nyang sidroe, keumampuan nyang luwabiasa keue jimeuiman ubak almaseh; keue nyang laen roh allah nyan geubri kuasa keu jipeupuleh ureueng saket. keu sidroe ureueng jibri kuasa keu jipeuna buet-buet nyang ajaeb dan keu nyang laen jibri karonya keu jibritee reuncana-reuncana allah. keu nyang laen teuma roh allah nyan jibri teuma keumampuan keujeuet jipeubeda nyang toh karonya nyang geubri le roh allah dan nyang toh teuma nyang kon. na nyang geubri keumampuan keu jimeututoe ngon mubagoe basa nyang ajaeb, dan na teuma nyang jibri keumampuan keu jibohmakna basa-basa nyan. banmandum nyan jipeubuet le roh allah nyang sa nyan cit teuma; keu maseng-maseng ureueng jibri karonya keudroe meunurot nyang jikeuheundak le roh nyan keudroe. almaseh na kheueh lagee tuboh manusia; tuboh nyan saboh, teuma na anggota nyang le. banmandum anggota nyan, bah kheueh nyan jai that, na kheueh saboh tuboh. meunan cit ngon tanyoe mandum, bah kheueh nyan ureueng yahudi meunan cit nyang kon ureueng yahudi, namiet-namiet meunan cit ngon ureueng nyang meurdehka; tanyoe mandum kateupumanoe ngon roh nyang sa nyan, mangat tanyoe teupeujeuet saboh ngon tuboh almaseh nyan. tanyoe mandum tarasa roh nyang sa nyan ngon sipeunoh jih. sabab tuboh nyan keudroe hana teudong bak saboh anggota teuma jai that anggota jih. meunyoe gaki tanyoe jipeugah, "ulon kon jaroe, ngon sabab nyan ulon kon bagian nibak tuboh," nyan kon meumakna bahwa gaki nyan kon bagian nibak tuboh. dan meunyo punyueng jipeugah, "sabab ulon kon mata, ngon lagee nyan ulon kon bagian nibak tuboh nyan," nyang lagee nyan kon cit meumakna bahwa punyueng nyan kon bagian nibak tuboh. meunyo bansaboh tuboh nyan jeuet keu saboh mata mantong, pakriban tuboh nyan hase jimeudeungoe? atawa peu

kheueh bansaboh tuboh nyan jeuet keu punyueng mantong, pakriban teuma tuboh nyan jimeucum? deuh takalon bahwa allah nyang keubah banmandum anggota tuboh nyan nibak tuboh. maseng-maseng geukeubah bak teumpat jih le po teu allah meunurot lagee nyang geugalak le gobnyan keudroe. meun- yoe mandum nyan teuma saboh anggota mantong, nyang toh kheueh nyang teupeugah tuboh? teuma keubiet na anggota nyang jai, teuma tuboh na kheueh saboh. ngon sabab nyan, mata hana jeuet jipeugah bak jaroe, "ulon hana peureulee keugata!" atawa ulee jipeugah bak kaki, "ulon hana peureulee keugata!" 22 nyang sibeuna jih anggota-anggota tuboh nyang teupeugah leumoh nyan, that-that tapeureulee; dan anggota-anggota nyang tanyoe anggab hana meun- nan meuyum, na kheueh anggota-anggota nyang tanyoe bri leubeh jai peunghargaan. anggota-anggota tuboh nyang ka deuh jih get, hana peureulee le beu- tapeurati. po teu allah ka geususan tuboh geu- tanyoe meunan get jih ngon lagee nyan anggota- anggota nyang kureueng myuem geubri leubeh jai peunghargaan. anggota-anggota tuboh nyang hana deuh lagak, nyan nyang leubeh teupeurati. ngon lagee nyan tuboh nyan hana teubagi-bagi; maseng- maseng anggota teupeurati saboh ngon nyang laen. meun- yoe na saboh anggota nyang saket, banman- dum anggota nyang laen pih meurasas saket; meun- yoe saboh anggota teupujoe, banmandum anggota nyang laen pih meusajan meusukaria. gata banman- dum meusajan-sajan na kheueh tuboh almaseh dan gata maseng-maseng teuma na kheueh anggota ni- bak tuboh nyan. 28 meunan cit teuma lam jeumaah, allah ka geupeuteuntee teumpat keumubagoe-bagoe ragam manusia: nyang phon that rasui-rasui; keudua, nabi-nabi, nyang keu lhee, guree-guree, laju keu awaknyan nyang jipeubuet buet-buet nyang ajaeb, oh lheeuh nyan keu awaknyan nyang geubri karonya keu jipeupuleh ureueng saket, atawa keu jitulong ure- ueng laen, atawa keu jeuet keupeumimpin, atawa keu jeuet jimeututoe ngon meubagoe basa nyang ajaeb. awaknyan kon banmandum rasui, atawa nabi, atawa guree. hana banmandum nyan na kuasa jipeubuet buet nyang ajaeb, atawa keu teupeupuleh ureueng saket, atawa keumututoe ngon mubagoe basa nyang ajaeb, atawa keu teutejeumah basa-basa nyan. ngon sabab nyan, meu-useuha kheueh le gata ngon biet- biet mangat meuteume karonya-karonya nyang lum- boi sa. teuma seulanjut jih nyoe ulon tunyok bak gata rot nyang paleng get. bah kheueh ulon nyoe hase lon meututoe ngon meubagoe basa manusia, ngon basa malaikat pih jeuet lon meututoe, teuma meun- yoe ulon hana lon gaseh keu ureueng laen, peue- peue nyang lon peugah nyan na kheueh lagee su nyang meuleungkeng teuma hana meumakna. bah kheueh ulon nyoe carong lon peusampoe haba nyang teuka nibak po teu allah, dan lon muphom man- dum hai nyang silhok-lhok jih, dan lon teupeu peue- peue mantong dan that-that lon meuman ubak po teu allah sampoe hase lon peujeuet gunong jiminah bak teumpat laen, teuma ulon hana lon gaseh keu ureueng-ureueng laen, ulon nyoe teutab hana are- uti sapeue! bah kheueh banmandum nyang na nibak ulon, ulon jok seudeukah keu ureueng gasien, dan

ulon jok droe lon keu teutot lam apui, teuma ulon hana lon gaseh keu ureueng laen, teuma banmandum nyan hana meuguna mubacut pi. ureueng nyang ji- gaseh keu ureueng laen, saba dan get ate. ureueng nyan hana seu-eum ngon ceumuru, hana meututoe rayeuk haba ngon sulet, hana sombong. ureueng nyan hana manyang ate dan hana gasa, jihnyan hana jipaksa ureueng laen beuji seutot lagee jih peugah, hana bagaih teusinggong, dan hana jitroh dam lam ate jih. ureueng nyang jigaseh keu ureueng-ureueng laen, hana galak bak buet nyang jeuhet, teuma ureueng nyan galak bak buet nyang jroh. ureueng nyan hase ji- teundroe watee meuhadab ngon peue-peue mantong dan jitem peucaya keu nyang paleng get nibak tieb- tieb ureueng; lam keuadaan pakriban mantong ure- ueng nyang na geunaseh nyan hantom na gadoh hara- pan jih dan saba jipreh peue-peue mantong. hantom na watee jih ureueng teuma saleng jigeumaseh. ji- noenyoe na ureueng nyang carong jipeusampoe haba nyang teuka nibak po teu allah, teuma singoh ji- pioh jipeusampoe haba nyan. jinoenyoe na nyang carong jimeututoe lam meubagoe basa nyang ajaeb, teuma singoh jihnyan teumajipioh peugah haba ngon basa-basa nyan. jinoenyoe na ureueng nyang jite- upeu lam mubagoe hai, teuma singoh peue nyang awaknyan teupeue nyan teuma tuwoe. sabab, ieleume tanyoe dan keumampuan tanyoe keu tapeusampoe haba nyang teuka nibak po teu allah nyan, man- tong kureueng sampoeureuna. teuma teuma trok wa- tee jih allah geupeujeuet banmandum nyan sampoe- ereuna, dan nyang hana sampoeureuna nyan teuma gadoh. watee ulon mantong aneuek miet, ulon ma- riet lagee aneuek miet, peurasan lagee aneuek miet dan ulon seumike pih lagee aneuek miet. jinoenyoe ulon ka rayeuk, pi-e ulon nyang lagee aneuek miet ka ulon tinggai. peue nyang tanyoe ngieng nibak watee nyoe na kheueh lagee bubayang nyang buram lam ceureumen. teuma singoh tanyoe tangieng lang- song ngon nyata. jinoenyoe ulon hana lon teupeu sapeue, teuma singoh lon teupeu peue-peue man- tong saban lagee allah peue-peue mantong keuhai droe ulon. ngon lagee nyan, bak watee nyoe na lhee boh hai nyang teutab haroh tapeubuet: meuman, meuharab dan saleng tameugaseh sabe keudroe- droe. nyang paleng peunteng lam lhee boh nyan na kheueh beutagaseh kheueh keu ureueng-ureueng laen. gata useuha kheueh beugata gaseh keu ureueng laen. dan useuha kheueh teuma keu gata teurimong karonya-karonya nyang geubri le roh allah, nyang paleng peunteng na kheueh hase keu gata peusam- poe reuncana-reuncana allah ubak manusia. ure- ueng nyang meututoe lam basa nyang ajaeb, ureueng nyan kon jimeututoe bak manusia; teuma jimarit ngon po teu allah. hana ureueng nyang muphom peue nyang jipeugah, sabab roh allah kheueh nyang jeuet keusabab jipeugah hai-hai nyang teuma geu- teupeue le po teu allah. teuma keu ureueng nyang peutrok haba nyang teuka nibak allah, laju jipeu- trok ubak manusia; keu teupeuteuga awaknyan, keu teubri seumangat bak awaknyan dan keu teupeuman- gat awaknyan. ureueng nyang meututoe haba lam basa nyang ajaeb na kheueh jipeukong droe jih keu- droe, seudangkan ureueng nyang peusampoe haba

nyang teuka nibak allah jitulong jeumaah mangat meutamah maju. keubiet get lumpah na meunyoee gata banmandum hase tameututoe ngon mubagoe basa nyang ajaeb. teuma nyang paleng get na kheueh meunyoee gata hase tapeusampoe reuncana-reuncana allah. sabab ureueng nyang peusampoe haba nibak allah, leubeuh rayeuk nibak ureueng nyang meututoe ngon mubagoe basa nyang ajaeb; laen hai jih meunyoee ureueng nyang hase jimeututoe ngon mubagoe basa nyang ajaeb nyan hase jipeugah peue nyang jimeututoe nyan, mangat banmandum jeumaah meuteume ceufaat jih. meunyoee ulon miseue jih lon jak bak gata dan ulon meututoe ngon basa-basa nyang ajaeb, keupeue guna jih atra nyan keu gata? mubacut pih hana meuguna nibak gata! laen hai jih, meunyoee teupeugah saboh ungkapan nyang teuka nibak allah, atawa ulon peugah sapoe-sapoe keuhai allah, atawa ulon peusampoe haba nyang teuka nibak allah, atawa ulon seumeubeuet. alat-alat musik nyang hana meunyawong mubacut pi, lagee suleng ngon keucapi, meunyoee nada-nada jih hana jipeumeuen ngon nyata, pakriban gob jiteupeu lagu peue nyang jipeumeuen nyan? saboh cunteuh nyang laen lom: meunyoee beureuguih jiyueb ban galak droe, soe ureueng nyang ka siab keujijak muprang? meunan cit teuma ngon keumampuan gata keu gata mariet ngon mubagoe basa nyang ajaeb. meunyoee gata ngon keusanggapan nyan gata mariet ngon haba nyang hana meuteuntee, hana meusidroe ureueng pih nyang hase jipeuphom peue nyang gata peugah nyan. tutoe haba nyan teuma gadoh hana meuteuntee. lam donya nyoe na basa nyang lumpah that jai, teuma hana meusaboh pih nibak basa-basa nyan nyang hana meumakna. teuma meunyoee ulon hana muphom ngon basa nyang jipeugah le sidroe-droe ureueng, ngon lagee nyan, ureueng nyang peuguna basa nyan na kheueh ureueng aseng teuhadab ulon; meunan cit ulon nibak ureueng nyan. meunyoee keu gata keudroe, ulon kuteupeu gata meuharab that bumeuteume karonya nibak roh allah. teuma nyang paleng phon, gata useuha kheueh keugata mita keusanggapan nyang jeuet teutulong jeumaah nyang hase maju. nyang kheueh sabab jih ureueng nyang meututoe ngon basa nyang ajaeb, meuseuti jimeulakee ubak po teu allah mangat keujih nyan geubri keusanggapan keu jipeutrang peue nyang jipeugah nyan. sabab meunyoee ulon meudoea ngon basa nyang ajaeb, roh ulon beutoi meudoea, teuma pikeran ulon hana jimubuet. ngon lagee nyan, peue nyang meuseuti ulon peubuet? nyoe nyang teuma ulon peubuet: ulon teuma meudoea ngon roh ulon, ulon meudoea cit ngon pikeran lon. ulon teuma meulagu ngon roh ulon, teuma ulon pih keuneuek meulagu ngon pikeran lon. sabab meunyoee gata tapeugah teurimong gaseh ubak allah ngon roh gata mantong, dan na ureueng laen nyang hana muphom basa ajaeb nyang teuka nibak roh po teu allah nyan, ngon lagee nyan ureueng laen nyan jipeugah, "ulon situju" ateuah doa syukoe gata nyan; sabab jih nyan hana jiteupeu peue nyang gata peugah. bah kheueh doa teulakee teurimong gaseh nibak tuhan nyan keubiet that get, teuma doa nyan hana meuguna mubacut pi keu ureueng laen. ulon meuteurimong gaseh ubak po teu allah sabab ulon keudroe hase lon

peugah haba lam mubagoe basa nyang ajaeb leubeuh nibak syedara banmandum. teuma, bak teupat teupat meusapat keuteuseumah tuhan, ulon leubeuh galak lon peuguna limong boh tutoe haba nyang hase jimuphom le gob nibak lon peuguna meuribee-ribee tutoe haba lam basa nyang ajaeb. ulon leubeuh galak lagee nyan mangat jeuet lon peubeuet gob. syedara-syedara! bek kheueh gata seumikee lagee aneuek manyak. lam hai buet nyang jeuhet, bah kheueh gata lagee aneuek miet. teuma seumike, bah kheueh gata jeuet keu ureueng rayeuk. lam alkitab na teutuleh lagee nyoe, "tuhan meufeureuman, 'ngon peurantaraan ureueng-ureueng nyang meututoe ngon basa nyang hana muphom, ulon teuma kumariet ngon umat nyoe. meunan cit ngon peurantaraan ureueng aseng, ulon teuma meututoe haba ngon umat lon; bah kheueh meunan, awaknyan teutab hana jitem deungoe nyang ulon peugah." " 22 teumanyoe teupeugah haba ngon meubagoe basa nyang ajaeb na kheueh sibagoe tanda ureueng nyang hana meuman, kon keue ureueng nyang meuman. dan karonya nyang teupeusampoe reuncana allah ubak manusia na kheueh tanda keu ureueng nyang meuman, kon keu ureueng nyang hana meuman. ngon sabab nyan, meunyoee seukira jih watee meusapat ngon jeumaah jimeututoe ngon mubagoe basa nyang ajaeb, laju jiteuka keunan na meupadab droe ureueng luwa, atawa nyang bukon ureueng kristen, teuntee ureueng nyan teuma jisangka gata kapungoe banmandum! teuma meunyoee gata banmandum tapeusampoe haba nibak po teu allah, laju jiteuka keunan ureueng nyang kon kristen atawa ureueng luwa, teuma hai-hai nyang gata peugah le gata mandum teuma teutunyok ubak desya-desya ureueng nyan dan teupeujeut jihnyan sadar nibak desya-desya jih. hai-hai nyang teusom lam ate jih teuma jipeugah, sampoe ureueng nyan teuma jipeumiyueb droe laju jiseumah allah. ureueng nyan teuma meungaku bahwa po teu allah keubiet-keubiet na lamkawan awaknyan. ngon lagee nyan syedara-syedara, peue areuti jih keumandum nyan? meunyoee gata meusapat keu taseumah tuhan, na nyang meulagu, na nyang seumeubeuet, na nyang peugah sapoe-sapoe nyang teuka nibak po teu allah, na nyang meututoe lam basa nyang ajaeb, dan nyang jipeuglah peue nyang jipeugah nyan. teuma banmandum nyan haroh jipeubuet keu seumeubeuet dan keu nyang keugat banmandum. meunyoee na keuneuk meututoe lam basa nyang ajaeb, meuseuti dua atawa paleng rame lhee droe mantong seucara meugantoe-gantoe. dan meuseuti na nyang peuglah peue nyang jipeugah le ureueng nyang meututoe nyan. 28 meunyoee hana ureueng nyang hase jipeugah makna tutoe haba awaknyan, teuma ureueng-ureueng nyang meututoe lam basa nyang ajaeb nyan haroh seungab lam iebadat jih. bah kheueh awaknyan jimeututoe lam ate mantong ubak po teu allah. dua atawa na lhee droe nyang na haba nibak allah bah kheueh jipeutrok haba nyan dan nyang laen jipeutimang peue nyang jipeugah nyan. teuma meunyoee seukira jih haba nyang teuka nibak po teu allah teuka nibak ureueng laen nyang na jiduek lam meusapat nyan, teuma ureueng nyang teungoh peugah haba, bah kheueh jipioh. ngon cara nyang lagee

nyan, syedara-syedara banmandum, sidroe deumi sidroe, jeuet jipeusampoe haba nyang teuka nibak po teu allah nyan; mangat banmandum hase jiteurimong peungajaran dan seumaken jeuet keu ureueng meuiman. karonya nibak roh allah keuteupeusampoe haba nibak allah hase teukeundali le ureueng nyang peusampoe haba nyan. po teu allah na kheueh allah nyang galak keuteureuteb; gobnyan kon allah nyang harok keu buet nyang karu. lagee nyang ka teupeuget lam banmandum jeumaah alah, ureueng inong bah kheueh jiseungab watee bak teupat meusapat jeumaah. awaknyan hana jeuet jipeugah haba. awaknyan hana jeuet jimat pimpenan; nyan sisuai ngon hukum agama. meunyoew awaknyan jikeuneuk teupeue sapue-sapeue, inong nyan bah kheueh jitanyong hainyan bak lakoe jih di rumoh. keubiet that malee meunyoew sidroe ureueng inong jiteumanyong watee bak jeumaah meusapat. peu kheueh feureuman allah teuka nibak gata? atawa kegata mantong feureuman nyan geupeusampoe? meunyoew na ureueng nyang meuras na karonya keu jipeusampoe haba nyang teuka nibak po teu allah, atawa jihnyan na karonya nyang laen nyang teuka nibak po teu allah, ureueng nyan haroh sadar bahwa peue nyang ulon tuleh nyoe na kheueh peurintah nibak tuhan. teuma meunyoew na hana hana jitem teurimong nyoe, bek kheueh gata pakoe atehue ureueng nyan. ngon sabab nyan, syedara-syedara, gata useuha kheueh keu gata peusampoe haba nyang teuka nibak po teu allah, teuma bek kheueh gatatam ureueng nyang keuneuk meututoe ngon mubagoe basa nyang ajaeb. teuma banmandum nyan haroh jipeubuet ngon jroh dan teuatoe. dan jinoenyoe, syedara-syedara, ulon meuharab gatanoye mandum taingat lom keuhai haba get nyang teuka nibak po teu allah nyang ulon bri tee keugata. gata teurimong, dan meuiman ubak almaseh sabab haba get nyan. meunyoew gata tamumat nyang kong ubak peue nyang ulon peugah nyan, ngon lagee nyan haba get nyan jipeuseulamat gata; laen hai meunyoew gata tapateh ubak nyan hana peungeurtian. peue nyang ulon peusampoe bak syedara-syedara na kheueh nyang ka lon teurimong cit teuma. nyang paleng peunteng, lagee nyang na teutuleh lam alkitab, lon peusampoe bak gata bahwa almaseh mate sabab le desya-desya tanyoe; bahwa gobnyan teupasoe lam jrat, teuma bak uroe nyang keu lhee gobnyan teupeu udeb lom teuma. nyan pi na teutuleh lam alkitab. ulon peugah lom ubak gata bahwa almaseh nyang teupeu-udeb lom teuma nyan geupeuleumah lom droe gobnyan ubak petrus, dan oh lھےu nyang ubak bandua blaih droe rasui. oh lھےu nyang geupeuleumah teuma droe gobnyan ubak leubeh nibak limong reutoth droe murit gobnyan syog guih. mantong rame lamkawan awaknyan nyang mantong udeb trok bak saat nyoe, teuma na padub droe nyang ka meuninggai donya. oh ka lھےu almaseh geupeuleumah droe ubak yakobus dan oh lھےu nyang ubak mandum rasui. nyang paleng akhe geupeuleumah droe ubak ulon – ulon nyang lagee aneuek manyak nyang lahe kon bak watee jih! ulon na kheueh rasui tuhan nyang paleng miyueb. ulon hana patot teupeugah rasui, sabab ulon ka lon ienanya jeumaah allah. teuma sabab rakmat

allah ulon jeuet lagee keuadaan ulon bak watee nyoe. dan hana kheueh sia-sia allah geupeue amphon ulon. teuma ulon kheueh nyang mubuet nyang leubeh brat nibak mandum rasui-rasui nyang laen. teuma nyan kon useuha ulon; nyan na kheueh useuha po teu allah nyang geugaseh ulon dan nyang mubuet meusajansajan ngon ulon. ngon lagee nyan, nibak soemantong gata teurimong haba get nyan – peu kheueh nibak ulon atawa nibak rasui-rasui nyang laen – nyan hana jeuet keusoai. nyang peunteng kamoe bri tee haba get nyan dan gata meuiman. meunyoew nyang kamoe bri tee nyan bahwa almaseh ka teupeu udeb lom teuma nibak mate, pakon na lamkawan gata nyang peugah bahwa ureueng mate hana teupeu udeb le? meunyoew keubiet ureueng mate hana teupeu udeb lom teuma, nyan saban cit almaseh hana teupeu udeb lom teuma nibak mate. dan meunyoew sikeubiet jih almaseh hana teupeu udeb lom nibak mate, ngon lagee nyan hana guna jih kamoe peugah peue-peue mantong dan hana teuma guna jih gata meuiman, sabab keupeucayaan gata nyan hana dasai sapue. leubeh nibak nyan, nyata kheueh bahwa kamoe meusulet keuhai po teu allah, sabab kamoe bri tee bahwa allah ka geupeu udeb lom teuma almaseh nibak mate, padahai alah hana geupeu udeb gobnyan lom teuma – meunyoew keubiet ureueng mate hana geupeu udeb lom teuma! sabab meunyoew ureueng mate hana teupeu udeb lom teuma, ngon lagee nyan almaseh pih hana teupeu udeb lom teuma nibak mate. dan meunyoew almaseh hana teupeu udeb lom teuma nibak mate, meunyoew lagee nyang gata peucaya nyan na kheueh lumpo nyang hana meuguna; nyan saban cit gata mantong lam keuadaan meudesa dan hana harapan mubacut pi. nyan meumakna teuma bahwa ureueng-ureueng kristen nyang ka meuninggai donya, meunan cit hana harapan sapue. meunyoew harapan tanyoe ubak almaseh teubataih bak udeb geutanyoe lam donya nyoe mantong, teuma nibak banmandum umat manusia nyang na lam donya nyoe, tanyoe kheueh nyang paleng malang! teuma ngon lagee nyan deuh kheueh almaseh ka teupeu udeb lom teuma nibak mate. nyoe kheueh jaminan jih bahwa ureueng-ureueng nyang ka mate teuma teupeu udeb lom teuma. sabab mate nyang jitamong lam donya nyoe ngon peurantaraan sidroe ureueng, meunan cit ngon udeb lom teuma nibak mate nyang geubri keu manusia ngon peurantaraan sidroe ureueng teuma. 22 lagee tateupeue banmandum manusia mate sabab jitamong saboh ngon nabi adam, meunan cit ngon mandum nyang geupeu udeb, sabab jitamong saboh ngon almaseh. teuma maseng-maseng geupeu udeb meunurot gileran jih: nyang phon-phon that almaseh; oh lھےu nyang singoh watee gobnyan teuka lom teuma, teuka gileran le ureueng-ureueng nyang jitamong lam atra almaseh. oh lھےu nyang baro kheueh teuka uroe kiamat. bak watee nyan almaseh teuma geupeu taklok banmandum peumeurintahan, banmandum keukuasaan dan banmandum nyang teuga-teuga; laju gobnyan geupeujok keukuasaan geuhnyan sibagoe raja, ubak alah, bapak geutanyoe. almaseh meuseuti geumat sabe peumeurintah sampoe allah geupeujeuet banmandum musuh almaseh taklok ubak almaseh. musuh nyang paleng akhe nyang teuma geupeu taklok na

kheueh mate. lam alkitab na teutuleh lagee nyoe, "allah ka geupeujeuet peue-peue mantong taklok ubak gobnyan." deuh kheueh disinoe bahwa nyang teupeugah ngon "peue-peue mantong" nyan hana jitamong allah keudroe, nyang peujeuet peue-peue mantong nyan taklok ubak almaseh. 28 teuma oh ka lueuh banmandum nyan teupeutaklok u miyueb peumeurintahan almaseh, ngon lagee nyan gobnyan keudroe, na kheueh aneuk allah, geupeu taklok droe gobnyan ubak allah nyang ka geupeujeuet peue-peue mantong taklok ubak gobnyan. ngon lagee nyan allah keudroe pi nyang peurintah banmandum nyan. meunyo ureueng mate hana geupeu udeb lom teuma, pakon na ureueng nyang teupumano keu ureueng mate? keupeue guna jih awaknyan jipeubuet hai nyan? meunyo keubiet ureueng mate sagai-sagai hana teupeu udeb le, keupeue guna jih awaknyan jipeubuet hai nyan? dan keupeue teuma guna jih kameo meuhadab ngon bahaya tieb-tieb wateu? syedara-syedara! tieb-tieb uroe ulon ek lon teun deurita sabab ulon bangga ateuh udeb gata ngon sabab ka tameuiman ubak isa almaseh, tuhan tanyoe. meunyo nyan teuma keuhai manusia mantong, peue laba jih keu ulon lon meujuang siulah-ulah lon lawan beulatang-beulatang juah nyang na lam banda nyoe, di efesus? meunyo keubiet ureueng mate hana teupeu udeb lom teuma, ngon lagee nyan, leubeu get taseutot peue nyang jipeugah le pribasa nyoe: "jak tanyoe tamakheun ngon tajieb ie tapeulalo ate ban galak droe, sabab singoh tanyoe teuma mate." bek kheueh gata keunong tipee! meurakan ngon brok teuma jipeureuloh nyang jroh. sadar kheueh bak saat nyoe, dan bek le gata peubuet desya. nyang sibeuna jih gata haroh malee, bahwa lamkawan gata na nyang gohlom jituri keu po teu allah. mungkin na nyang teumanyong, "pakriban kheueh ureueng mate teupeu udeb lom teuma? tuboh nyang pakriban kheueh nyang teubri keu awaknyan, oh ka lueuh awaknyan teupeu udeb lom teuma?" bangai lumpah na! meunyo gata tapula bijeh lam tanoh, bijeh nyan hana teuma timoh, meunyo bijeh nyan gohlom mate leubeu ilee. dan bijeh nyang gata pula lam tanoh nyan – mungkin bijeh gandom atawa bijeh laen – na kheueh aneuk bijeh nyan mantong, kon mandum seunaman nyang timoh singoh. allah keudroe nyang bri keu bijeh nyan beuntuek nyang meunuror pandangan gobnyan get keu seunaman nyan. keu tieb-tieb rupa bijeh, allah geubri beuntuek seunaman nyan keudroe jih maseng-maseng. tuboh makhlok-makhlok nyang meunyawong hana mandum nyan sa. manusia na saboh jeuneh tuboh, meunan cit keu beulatang-beulatang na saboh jeuneh tuboh nyang laen; meunan cit cicem-cicem laen teuma jeuneh tuboh jih, dan eungkot-eungkot laen teuma jeuneh tuboh jih. meunan cit teuma ngon mubagoe beunda nyang na dilanget dan meunan cit nyang na dibumoe. mubagoe beunda nyang na dilanget maseng-maseng na keulagak jih keudroe, dan beunda-beunda nyang na dibumoe pih lagee nyan cit teuma. get mata uroe meulaen ngon get buleuen. meunan cit ngon bintang-bintang pi na keuget jih keudroe. dan bintang-bintang nyan maseng-maseng laen teuma get jih. meunan cit hai jih singoh keu ureueng-ureueng nyang ka mate teupeu udeb lom teuma.

tuboh nyang ka teukubu nyan na kheueh tuboh hase jeuet keu brok, teuma tuboh nyang teupeu udeb lom teuma, na kheueh tuboh nyan hana jitem rusak. bak watee tuboh nyan teupeutamong lam jrat, tuboh nyan brok dan leumoh; teuma bak watee jihnyan teupeu udeb lom teuma, na kheueh tuboh nyang get dan teuga. watee teupeutamong lam jrat, tuboh nyan na kheueh tuboh donya; teuma oh ka lueuh teupeu udeb lom teuma, tuboh nyan na kheueh tuboh nyang geubri le roh allah. na tuboh nyang nibak donya, na teuma tuboh nyang nibak po teu allah. lam alkitab na teutuleh lagee nyoe, "manusia nyang phon, na kheueh nabi adam, ka jeuet keu makhlok nyang udeb," teuma nabi adam nyang paleng akhe na kheueh roh nyang jibri udeb. nyang teuka leubeu ilee na kheueh jasmani, kon nyang rohani. nyang rohani teuka jih teuma oh dudoe. nabi adam nyang phon teupeujeuet nibak tanoh, teuma nabi adam nyang keudua asai jih lam syeuruga. ureueng-ureueng nyang na lam donya nyoe na kheueh lagee nabi adam nyang phon, nyang geupeujeuet nibak tanoh, teuma ureueng-ureueng syeuruga na kheueh lagee gobnyan nyang teuka nibak syeuruga. lagee geutanyoe bak watee nyoe na kheueh lagee nabi adam nyang geupeujeuet nibak tanoh, singoh tanyoe teuma jeuet lagee gobnyan nyang nibak syeuruga nyan. meukeusut ulon, syedara-syedara, na kheueh: tuboh nyang geupeujeuet nibak darah ngon asoe, hana hase jitamong lam donya baro allah; dan tuboh nyang hase mate hana jeuet keu siumu masa. ngieng kheueh rahsia nyoe: hana banmandum tanyoe mate, teuma tanyoe banmandum meu-ubah. hainyan teujadi lam sikeujab ngon sikrek mata, bak watee sangka kala teuyueb keu nyang paleng akhe. sabab bak watee teudeungoe su sangka kala nyan, ureueng-ureueng mate teupeu udeb lom teuma ngon tuboh nyang abadi, dan tanyoe banmandum teuma geu-ubah. tuboh tanyoe nyang hase mate nyoe meuseuti teugantoe ngon tuboh nyang hana hase mate, dan tuboh nyang nibak donya meuseuti teugantoe ngon tuboh nyang nibak syeuruga. meunyo tuboh nyang hase mate ka meuteume teugantoe ngon tuboh nyang hana hase mate, dan tuboh nyang nibak donya ka teugantoe ngon tuboh nyang nibak syeuruga, bak watee nyan baro kheueh teujadi peue nyang ka teutuleh lam alkitab, "mate ka geupeu hanco; meunang ka meuteume!" "hei mawot, hoka meunang gata nyan? hei mawot, dipat kheueh bisa gata?" bisa mawot na kheueh desya, dan desya jipeujak peuranan jih rot hukum agama. teuma syukoe that ubak po teu allah; gobnyan ka geubri keugentanyoe keumeunangan rot isa almaseh tuhan geutanyoe! ngon sabab nyan, syedara-syedara nyang lon gaseh, bah kheueh gata teuga dan teugoh. mubuet kheueh bek tinggai keu tuhan ngon biet-biet sunggoh, sabab gata tateupeue bahwa banmandum nyang gata peubuet nyan na kheueh keu tuhan, nyan hana teuma peucuma. jinoenyo keuhai peng nyang keuneuk gata sumbang keuseusamoe ureueng kristen, jinoenyo ulon peugah bak gata mangat gata peubuet saban lagee peutunyok nyang ka ulon jok bak jeumaah-jeumaah nyang na di galatia. bak uroe phon tieb-tieb uroe aleuhah, bah kheueh gata banmandum takeubah peng, maseng-maseng sisuai ngon padubna hase hareukat

jih. keubah kheueh peng nyan sampoe ulon teuka, ngon lagee nyan watee trok bak watee jih singoh hana peureulee le gata peusapat. teuma meunyo ulon ka trok, ulon teuma lon yue jak ureueng-ureueng nyang ka gata situju. ulon kujok bak ureueng nyan surat peu intat, mangat awaknyan jiba peng sumbangan nyan u yerusalem. dan meunyo deuh jih get ulon pih kujak ngon awaknyan, teuma ulon kujak meusajansajan ngon awaknyan. ulon lon jaksaweue gata oh ka lheueh lon jak rot mekadonia, sabab ulon kana niet keuneuk jak rot nyan. jeuet mantong ulon tinggai sikeujab ngon gata, mungken watee musem sijuek. oh ka lheueh nyan gata meuteume tatulong ulon watee ulon jak u tempat laen. ulon hana kutem kusaweue gata meunyo keuneuk pioh mantong. tuhan geubri idhin keulon, ulon keuneuk tinggai beutreb bacut ngon gata. teungoh lon tinggai lam banda nyoe, di efesus, trok ubak uroe pentakosta. jai that nyang watee jih nibak tempat nyoe nyang jeuet teupeubuet keu buet-buet nyang na manfaat, bah pi jai that teuma ureueng nyang hana galak. meunyo timotius teuka, sambot kheueh jihnyan ngon get mangat jihnyan meurasa harok lamkawan gata, sabab jihnyan saban lagee ulon nyang mubuet keu tuhan. bek sampoe na ureueng nyang jianggab enteng keu jihnyan. tulong kheueh jihnyan mangat jihnyan hase jiwoe lom teuma ubak ulon ngon sealamat, sabab ulon kupreh jihnyan jiwoe meusajan ngon syedara-syedara nyang laen. keuhai syedara tanyoe nyang nan jih apolos, kana padub goe ulon yue bak jih mangat jihnyan meusajan ngon syedara nyang laen jijak saweue gata. teuma jihnyan gohlom meurasa yaken bahwa jihnyan meuseuti jijak jinoenyo. teuma meunyo na watee singoh, ka teuntee jihnyan teuma jijak. beuate-ate dan waspada kheueh gata dan beukong lam udeb gata sibagoe ureueng kristen. meutindak kheueh ngon beuhe dan beuteuga kheueh. banmandum nyang gata peubuet, peubuet kheueh ngon gaseh. gata teuntee taturi keu stefanus dan keuluwarga jih; awaknyan nyang phon-phon that jeuet keu ureueng kristen di akhaya. awaknyan ngon sipeunoh ate jimubuet khusus jilayani umat allah. ulon yue bak gata ngon biet-biet mangat gata seutot pimpenan ureueng-ureueng nyang lagee nyan, dan ureueng-ureueng laen nyang jimubuet sajan dan jilayani meusajan ngon awaknyan. ulon galak that ngon teuka stefanus nyan, fortunatus dan akhaikus. awaknyan na kheueh geunantoe gata nibak ulon. awaknyan ka jipeujeuet ate ulon mangat lumpah na, lagee awaknyan ka jipeumangat ate gata. ureueng-ureueng nyang lagee nyan meuseuti teuhareuga. jeumaah-jeumaah nyang na di asia jipeutrok saleuem keu gata. akwila dan priskila dan jeumaah nyang meugumpoi dirumoh awaknyan jikirem saleuem kristen nyang that that geumbira. banmandum syedara nyang na disinoe jipeutrok saleuem keu gata. meubot-bot saleuem kheueh ngon meusra sibagoe syedara lam kristen. ulon tamah disinoe saleuem nyang lon tuleh keudroe: saleuem nibak ulon, paulus. 22 ureueng nyang hana jigaseh keu tuhan, bah kheueh jihnyan keunong kuto! maranatha – tuhan kamoe, teuka kheueh! seumoga tuhan isa geubri beureukat keu gata. teurimong gaseh keu gata mandum nyang meusaboh ngon isa al-

maseh.

syedara-syedara jeumaah allah nyang na di korintus dan banmandum jeumaah allah nyang na di akhaya. ulon, paulus, rasui isa almaseh, nyang teuangkat ateuheh keuheundak po teu allah, meusajan-sajan ngon syedara tanyoe timotius, meuharab seumoga po teu allah bapak geutanyoe dan tuhan isa almaseh geubri beureukat dan seujah-teura keu gata banmandum. teupujoe kheueh allah, bapak nibak tuhan tanyoe isa almaseh. gobnyan bapak nyang paleng get ate, dan gobnyan allah nyang geubri teunaga baten keu manusia. gobnyan geupeukong baten kamoe bak tieb-tieb kamoe meuteume susah, mangat jeuet ngon teunaga nyang kamoe teurimong nibak po teu allah nyan, kamoe jeuet kamoe peukong baten banmandum ureueng nyang lam apoh apah, deurita-deurita nyang geurasa le almaseh ka jai that kamoe rasa. dan rot almaseh cit teuma, baten kamoe keubiet that-that geupeukong. meunyo kamoe meuras lam susah, nyan na kheueh sibagoe teupeukong baten gata, deumi gata seulamat. meunyo baten kamoe geupeukong, ngon lagee nyan gata pi meusajan ngon kamoe teupeukong sampoe gata jeuet keutabah watee tateurimong hai-hai nyang susah lagee nyang kamoe rasanyoe. kamoe sabe yaken dan hantom na ragu-ragu ateuheh gata, sabab kamoe meuteupeu bahwa gata meusajan meudeurita ngon kamoe. ngon sabab nyan gata pi meusajan teupeukong sinoe ngon kamoe. syedara-syedara! kamoe meuharab gata beutateupeue keuhai susah kamoe nyang kamoe rasa di wilayah asia. deurita nyang kamoe tanggong nyoe keubiet that jiteugon kamoe, sampoe nibak kamoe ka hana meuharab le keu udeb nyoe; rasa jih ka lagee jipeurhot hukuman mate mantong. teuma hainyan jeuet mangat kamoe bek meusadeue bak teunaga droe teuh keudroe, teuma ubak allah nyang peu-udeb ureueng mate. gobnyan kheueh nyang ka geupeuseulamat kamoe nibak bahwa mate nyang paleng rayeuk. dan gobnyan cit teuma nyang peuseulamat kamoe singoh bak uroe-uroe pagee, sabab, ubak gobnyan kheueh kamoe meuharab. kamoe yaken bahwa ngon doa-doa nyang na keu kamoe, po teu allah teuma geupeu seulamat kamoe nibak bahaya. allah geutem geubri beureukat bak kamoe sibagoe geujaweueb ateuheh jai that doa keu kamoe, ngon sabab nyan jai that ureueng jilakee teurimong gaseh ubak po teu allah. kamoe bangga, sabab ate nurani kamoe teupeuyaken kamoe bahwa udeb kamoe lam donya nyoe – nyang paleng peunteng hubungan kamoe ngon gata ka kamoe peujak ngon ikhlaih dan murni. kamoe peubuet nyan, kon ngon keubijaksanaan manusia, teuma ngon keumampuan nyang geubri le po teu allah. nyang kamoe tuleh keu gata na kheueh keuhai-hai nyang hase gata baca dan muphom. jinoenyoe gata hana muphom keu kamoe nyang sibeuna jih, teuma ulon harab singoh gata biet-biet muphom keu kamoe. ngon lagee nyan, watee tuhan isa teuka singoh, gata teuma bangga ateuheh kamoe, lagee kamoe pih that-that bangga ateuheh gata. sabab ngon keuyakenan nyan kheueh yoh awaikon ulon ka lon reuncana keuneuk jak saweue gata mangat keu gata meuteume beureukat dua goe lipat. ulon na meukeusut keuneuk saweue gata watee ulon jak

u makedonia dan lon pioh lom bak gata watee ulon woe lom teuma, mangat gata jeuet tatulong ulon watee lonjak u yudea. teuma niet ulon nyan ka lon ubah; teuma, peu kheueh ngon lagee nyan sibagoe peutunyok ulon nyoe hana kong peundirian lon? watee lon peugt reuncana, peu kheueh reuncana nyang lon peugt ateuheh keuheundak droe lon keudroe, sikeujab jipeugah, "nyoe" dan "kon"? deumi allah nyang jeuet teupeucaya, janji ulon ubak gata kon kheueh "nyoe" dan "kon". sabab isa almaseh, aneuek allah, nyang jipeusampoe ubak gata le silas, timotius, dan ulon keudroe kon kheueh ureueng "nyoe" dan "kon". nyang beutoi nyan kheueh jeunaweueh nibak po teu allah "nyoe". sabab rot gobnyan allah ka geupeugah "nyoe" keubanmandum janji gobnyan. ngon dasai nyan kheueh tanyoe tapeugah "amin" ubak po teu allah sabab isa almaseh. kamoe peubuet nyang lagee nyan mangat allah teupeumulia. allah keudroe nyang peujeuet kamoe dan syedara mandum yaken ngon kong tameusaboh ngon almaseh; gobnyan kheueh teuma nyang pileh tanyoe khusus keu droe gobnyan. 22 keu nyang nyan po teu allah ka geupeusah tanyoe jeuet keumilek dan geubri roh gobnyan lam ate geutanyoe sibagoe jaminan bahwa gobnyan teuma geubri ubak geutanyoe banmandum nyang ka geupeu janji nyan. allah saksi ulon – sabab gobnyan geuteupeue peue nyang na lam ate lon – bahwa ulon hana jadeh lonjak u korintus, sabab ulon hana kutem ate gata jeuet keuseudeh. ulon hana lon paksa gata keuhai gata peue nyang meuseuti gata meuman, sabab gata keubiet ka that-that tameuman ubak almaseh. ulon teuma lon mubuet meusajan ngon gata mangat gata seumakan bahgia. ngon sababnyan ulon ka lon cok keuputusan hana lonjak le bak gata ngon kunjongan teupeusabab gata rhot bak seudeh. sabab meunyo ulon kupeuseudeh gata, soe teuma nyang hase jipeumangat ate lon, meunyo kon ureueng-ureueng nyan cit teuma nyang ka lon peuseudeh ate jih nyan? nyang kheueh sabab jih ulon tuleh surat nyan keu gata. ulon hana kutem jak saweue gata, laju gata peuseudeh ate lon padahal gata kheueh nyang peumangat ate lon. sabab ulon biet-biet yaken meunyo ulon mangat ate, teuma gata banmandum pih mangat cit ate. ulon teumuleh keu gata ngon ate nyang seudeh dan brat, jai that-that lon ro ie mata. nyang ulon meukeusut kon gata pih beuseudeh, teuma gata sadar bahwa ulon biet-biet lon gaseh keugata. meunyo na ureueng nyang jeuet keusabab ureueng laen seudeh, teuma hainyan nyang jipeubuet kon ateuheh ulon, teuma ateuheh syedara banmandum atawa paleng hana ateuheh siladum nyang na lamkawan gata. ulon hana kutem lon meukreueh ateuheh awaknyan. keu ureueng nyang lagee nyan, hukuman nyang teupeu rhot ateuheh ureueng nyan le ureueng nyang jai di teungoh-teungoh gata, kaseb. jinoenyoe gata meuseuti tapeu amphon jihnyan dan tabri seumangat lom keu jihnyan mangat jihnyan bek treb-treb lam seudeh ate sampoe putoh asa. ngon sabab nyan ulon lakee, mangat gata tunyok lom ubak jihnyan bahwa gata biet-biet gaseh keu awaknyan. ulon tuleh surat nyan keu gata ngon meukeusut keu lon ujoe gata, peu kheueh gata sabe tatem seutot banmandum

peue-peue nyang ulon tunyok. meunyoee gata tapeu amphon ureueng-ureueng nyang ka jipeubuet salah ateuhe gata teuma ulon pih lon peu amphon keu ureueng nyan. sabab peue nyang ka lon peu amphon – meunyoee keubiet na nyang peureulee teupeu amphon – nyan ulon peu amphon dikeue almaseh deumi keu nyang keuget gata. ulon peubuet nyang lagee nyan mangat iblih bek sampoe jicok keuseumpatan jikuasa ateuhe geutanyoe; sabab tanyoe tateupeue reuncana-reuncana jih nyan. bak watee ulon ka trok u troas ngon meukeusut keuneuk peusampoe haba get keuhai almaseh, tuhan ka geubuka jalan keu ulon keu lon mubuet bak teumpat nyan. teuma ulon hana galak sabab hana meurumpok ngon syedara tanyoe titus nyang na nibak teumpat nyan. ngon lagee nyan laju lon lakee droe bak ureueng-ureueng nyang na nibak teumpat nyan oh kheueh nyan lon jak laju u makedonia. teuma meusyukoe kheueh ubak po teu allah! gobnyan sabe geupimpin kamoe meusajan lam pawai keumeunangan almaseh sabab kamoe udeb meusaboh ngon gobnyan. allah geupeu guna kamoe mangat haba keuhai almaseh meutabu lagee mubeu nyang harom meuispreuk bansaboh nyan. sabab kamoe na kheueh lagee bee keumeunyan nyang mangat bee, nyang geutot le almaseh keu po teu allah. keu ureueng-ureueng nyang teungoh jijak ubak keuhancoran, kamoe nyoe lagee bee ureueng mate nyang seumeupoh; teuma keu ureueng-ureueng nyang teungoh teupeusulam, kamoe nyoe lagee bee harom nyang teuba udeb. ngon lagee nyan, soe kheueh nyang hase jipeupeunoh keuwajaban nyoe? kamoe hana lagee ureueng rame nyang jingui haba nibak allah lagee barang nyang teupeubloe. tujuan-tujuan kamoe na kheueh gleh, sabab kamoe geubri tugaih le po teu allah. dan allah keudroe geukalon bahwa kamoe nyang jak peusampoe haba nyan sibagoe hamba-hamba almaseh. peu kheueh nyoe, deuh jih kamoe pujoe-pujoe droe kamoe lom? atawa kamoe peureulee surat pujoe keu gata, atawa nibak gata, lagee nyang jipeureulee le ureueng-ureueng laen? gata keudroe kheueh surat pujoe kamoe, nyang jeuet teuteuleh lam ate kamoe dan nyang jeuet jiteupeu ngon jibaca le tieb-tieb ureueng. awaknyan keudroe deuh jikalon bahwa gata na kheueh surat nyang geuteuleh le almaseh, nyang teukirem meulalu kamoe. surat nyan teuteuleh kon ngon daweu, teuma ngon roh allah nyang udeb; kon teuma ateuhe batee tuleh, teuma lam ate manusia. kamoe peugah lagee nyan sabab keuyakenan kamoe keu po teu allah rot almaseh. nibak kamoe hana sapeue alasan pi keuteupeugah bahwa kamoe hase kamoe peubuet buet nyoe, teuma allah nyang bri keumampuan nyan ubak kamoe. gobnyan kheueh nyang peujeuet kamoe sanggob jeuet keupeulayan keusaboh peujanjian nyang baro; peujanjian nyang meugantueng ubak roh allah, kon bak hukom nyang teuteuleh. sabab nyang teuteuleh nyan teuba ubak mate, sedangkan roh allah teubri udeb. watee peujanjian nyang teuba ubak mate nyan teupeugat dan teu uke ateuhe batee, cahya po teu allah hu muble-ble bak muka nabi musa. cahaya nyan keubiet that trang sampoe ureueng israha eka jak jipandang bak muka nabi musa, sampoe jeuet cahya

nyang nibak muka geuh nyan ka jipeuphon layee bak watee nyan. nyan, meunyoee teupeugat janji nyang jiba ubak mate nyan teureuseumi ngon ceumeurlang nyang get that rayeuk, teunttee teupeugat peujanjian nyang geubri le roh allah, teureuseumi ngon leubeh ceumeurlang lom. meunyoee peujanjian nyang teuhukom manusia nyan keubiet that ceumeurlang, ka teunttee nyang leubeh ceumeurlang nyang teupeu mungken manusia jimeugat lom teuma ngon po teu allah. peue nyang yoh ilee ceumeurlang, ka hana ceumeurlang le sabab ngon ceumeurlang nyang na bak saat nyoe. meunyoee sapeue-sapeue nyang hase meuteun teuma sikeujab, meunan ceumeurlang, ka teunttee sapeue-sapeue nyang siumu masa leubeh ceumeurlang lom teuma. le sabab kamoe na harapan nyang lagee nyan, nyang kheueh jeuet kamoe jeuet meututoe lagee nyan bagoe. kamoe kon lagee nabi musa nyang geutob ngon silubong muka geuh mangat bek deuh jikalon le bansa israel cahya tuhan nyang teungoh lon dan teusampoh bak muka gobnyan. pikeran awaknyan ka teutob. dan trok an uroenyoee pi pikeran awaknyan mantong teutob ngon sulubong watee awaknyan jibeuet kitab-kitab keuhai peujanjian nyang ka treb nyan. sulubong nyan hase teubuka meunyoee ureueng ka meusaboh ngon almaseh. jinoenyoee pi, watee awaknyan jibeuet kitab-kitab nabi musa, sulubong nyan mantong teutob pikeran awaknyan. teuma meunyoee sidroe-droe ureueng jiteuka jijak meuhadab bak tuhan, sulubong nyan pi teubeut nibak muka awaknyan. nyan, tuhan nyang teupeugah disinoe na kheueh roh. dan dipat mantong roh tuhan na, nibak teumpat nyan pih na keumeurdehkaan. jinoenyoee muka tanyoe banmandum hana teutob ngon sulubong, dan tanyoe peuhu cahya ceumerlang tuhan isa. dan ngon sabab nyan tanyoe hana putoh-putoh jiubah jeuet lagee gobnyan; maken treb tanyoe maken ceumeurlang. ceumeurlang nyan teuka jih nibak roh, dan roh nyan na kheueh tuhan. kamoe peubuet-buet nyang lagee nyoe sabab keumurahan ate po teu allah. nyang kheueh sabab jih kamoenyoee hana putoh asa. kamoe hana kamoe peuguna cara-cara lam seupot ngon jiba malee. kamoe hana kamoe tem mubuet ngon ilat atawa kamoe puta balek feureuman allah. kamoe layani allah ngon ate nyang gleh lagee nyang geu lakee. ngon sabab nyan, kamoe meuharab banmandum ureueng jitilek kamoe ngon get lam ate nurani jih. meunyoee haba get nyang kamoe peusampoe nyoe gohlom cit jituoh muphom, teuma ureueng-ureueng nyang teungoh jituju ubak keuhancoran kheueh nyang hana jituoh muphom. ilah jeuhet nyang kuasa donya nyoe nyang tob pikeran ureueng-ureueng nyang hana meuman nyan. jihnyan kheueh nyang tam-tam awaknyan mangat awaknyan hana jingiang trang nyang na lam haba get nyan na kheueh keuhai keubeusaran almaseh, sibagoe haba nibak po teu allah. haba nyang kamoe peusampoe nyan kon kheueh haba keuhai kamoe keudroe. haba nyan na kheueh haba keuhai isa almaseh; bahwa gobnyan na kheueh tuhan; dan kamoe na kheueh hamba-hamba gata sabab le gobnyan. allah meufeureuman, "bah kheueh nibak lam seupot jiteubiet trang," allah nyan cit teuma nyang peuteubiet trang nyan lam ate

geutanyoe, mangat pikeran tanyoe jeuet keutrang keu teumuphom keuceumeurlangan allah nyang meucahya bak muka almaseh. teuma atea rohani nyang ceudahnyan kamoe ba bak droe kamoe nyang hana meuyuem nyoe nyang teupeuget nibak tanoh. ngon lagee nyan deuh kheueh bahwa keubeusaran kuasa nyan teudeuk nibak po teu allah dan kon bak kamoe. kamoe jiheuntam wie ngon uneuen, teuma kamoe teutab hana meuseupet. kamoe bingong, teuma hana sampoe putoh asa. jai that nang jimeumusoh ngon kamoe, teuma kamoe hantom na kamoe tinggai sidroe. dan bah kheueh kamoe kayem that jipoh sampoe reubah, teuma kamoe hana mate. sabe kamoe rasa isa nyang ka mate nyan na nibak tuboh kamoe, mangat udeb geuh pi leubeh deuh nibak tuboh kamoe. simantong kamoe udeb, kamoe sabe jiancam le mate sabab isa, ngon lagee nyan udeb isa pih jeuet teupeugah bak tuboh kamoe nyang fana nyoe. nyoe saban cit bahwa lam tuboh kamoe mate nyan teungoh biet-biet jipeujak peuranceun jih, teuma kamoe galak that bahwa udeb nyang teungoh biet-biet lam tuboh gata. lam alkitab na teutuleh lagee nyoe, "ulon kupateh, nyang kheueh sabab jih ulon peugah haba." nyan, ngon seumangat meuman nyang lagee nyan cit teuma, kamoe peugah haba sabab kamoe meuman. kamoe yaken bahwa allah nyang ka geupeu udeb lom teuma tuhan isa, teuma geupeu udeb kamoe ngon isa, dan teuba gata dan kamoe ukeue gobnyan. banmandum nyan na kheueh keu keupeuntengan gata. sabab seumaken jai ureueng nyang jirasa geunaseh allah, seumaken jai teuma doa syukoe nyang jipeusampoe ubak po teu allah; ngon lagee nyan allah jipeumulia. nyang kheueh sabab jih kamoe hana putoh asa. bah kheueh kamoenyoe seucara lahe seumaken meutamah rusak, teuma seucara baten kamoenyoe geupeujeuet baro tieb-tieb uroe. dan susah nyang hana padub na nyoe, nyang kamoe rasa keusikeujab, teuma jipeuhase keu kamoe saboh keubahagiaun nyang luwabiasa dan siumu masa. bahgia nyan jioh leubeh rayeuk meunyo teubandeng ngon susah nyan keudroe. sabab kamoe hana kamoe ngieng hai-hai nyang deuh teukalon, teuma nyang hana deuh teukalon. nyang deuh teuma meuteun sikeujab, teuma nyang hana deuh nyan keukai siumu masa. oh ka lheureh kamoe teupeu bahwa meunyo rumoh – na kheueh tuboh – nyang taduek lam donya nyoe teureuloh, allah teuma geukeubah keugeutanyoe rumoh lam syeuruga, nyang geupeuget le allah keudroe dan nyang meuteun siumu masa. lam rumoh nyang na jinoenyoe, tanyoe apoh apah sabab tanyoe meuheuet that keuneuk tinggai lam rumoh tanyoe nyang na lam syeuruga nyan. rumoh nyan kheueh tuboh tanyoe nyang baro. simantong tanyoe tinggai lam rumoh nyang na lam donya nyoe, tanyoe apoh apah sabab beuban tanyoe geuhon that. kon le sabab tanyoe keuneuk lheureh nibak tuboh tanyoe nyang nibak donya nyoe, teuma sabab tanyoe meuheuet takeuneuk ngui tuboh nyang na nibak syeuruga nyan, mangat tuboh tanyoe nyang hase mate nyoe jikuasa le nyang udeb. nyang peusiab tanyoe keunyan na kheueh allah keudroe, dan gobnyan nyang jok roh geuh keugeutanyoe sibagoejaminan. ngon

sabab nyan ate kamoe sabe meurasateuga. kamoe meuteupeu bahwa simantong kamoe na tinggai lam tuboh kamoe nyoe, kamoe jioh nibak rumoh nyang teuma tinggai meusapat ngon tuhan. sabab kamoe udeb ngon dasai jih meuman ubak almaseh, kon bak dasai peue nyang deuh teukalon, nyang kheueh sabab jih ate kamoe tabah. kamoe leubeh kamoe tem lheureh nibak tuboh kamoe nyoe, mangat meuteume kamoe tinggai meusajan tuhan. ngon sabab nyan kamoe meu-useuha ngon biet-biet jeuet teupeu mangat ate gobnyan, bah kheueh watee kamoe mantong na lam rumoh kamoe nibak teupat nyoe, atawa disideh. sabab tanyoe pasti teuma jiba ubak peungadalan almaseh, dan maseng-maseng teuma meuteume balasan nyang sisuai ngon buet watee lam donya nyoe – buet nyang get atawa nyang jeuhet. kamoe meuteupeu peue makna jih takot keu tuhan; nyang kheueh sabab jih kamoe meu-useuha kamoe peuyaken gob keuhai droe kamoe. allah geuturi kamoe silhok-lhok jih, dan ulon harab gata pi taturi kamoe lam ate gata. ngon lagee nyoe kamoe hana meulakee mangat gata tapujoe droe kamoe. kamoe keuneuk bri saboh alasan nyang jroh keu gata mangat jeuet keubangga keukamoe, dan mangat gata tateupeue pakriban gata meuseuti tajawueub ureueng-ureueng nyang jipeunteng keuhai manusia dan kon sifeuet jih. meunyo kamoe keubit deuh jih ka pungoe, nyan na kheueh deumi keupeuntengan po teu allah. dan meunyo kamoe deuh jih waraih, nyan deumi keupeuntengan gata. geunaseh almaseh kheueh nyang kuasa kamoe; dan kamoe sadar bahwa meunyo sidroe ureueng ka mate keumandum ureueng, ngon lagee nyan meumakna bahwa banmandum ureueng ka mate. almaseh mate keu mandum ureueng, mangat ureueng-ureueng nyang udeb, hana le udeb keu droe jih keudroe, teuma keu almaseh nyang ka mate dan geupeu udeb lom teuma deumi keu keupeuntengan awaknyan. ngon sabab nyan, kamoe hana le kamoe tilek ureueng meunurot ukoran manusia. beutoi kamoe na kamoe tilek almaseh rot manusia, teuma bak watee nyoe ka hana le. ureueng nyang ka meusaboh ngon almaseh, ka jeuet keumanusia baro bansaboh tuboh. nyang awai ka hana le – banmandum nyan ka jeuet keu baro. banmandum nyan geupeubuet le po teu allah. rot almaseh allah geupeujeuet tanyoe tameuget lom ngon gobnyan, laju geubri tugaih bak geutanyoe mangat ureueng-ureueng laen teupeu mungkin jimeuget lom teuma ngon allah. kamoe peusampoe bahwa ngon peurantaraan almaseh, allah geupeujeuet manusia jimeuget lom teuma ngon gobnyan. allah geupeubuet lagee nyan ngon hana geutuntot buet-buet nyang salah nyang ka jipeubuet le manusia ateuhe droe gobnyan. dan kamoe kageubri tugaih le allah keu kamoe peusampoe haba nyan. teuma kamoe nyoe na kheueh utosan-utosan almaseh. rot kamoe allah keudroe nyang peusampoe peusan gobnyan. ateuhe na almaseh, kamoe lakee ngon meuharab that, teurimong kheueh jaroe allah nyang ka geusunyueng nyan keu teupeumungken gata get lom teuma ngon gobnyan. almaseh hana meudesya, teuma allah nyang peujeuet gobnyan geutanggong desya geutanyoe, mangat tanyoe

tameuget lom teuma ngon allah sabab meusaboh ngon almaseh. sabab kamoe mubuet meusajan-sajan ngon po teu allah, teuma kamoe meulakee ngon that meuharab bek kheueh gata sia-sia keuget ate allah nyan. lam alkitab, allah meufeureuman, "bak watee nyang ka teuntée, ulon deungoe gata, dan bak uroe keuseulamatan, ulon ka kutulong gata," ingat kheueh beuget-get, jinoenyoe kheueh watee jih nyang ka teupeu teuntée nyan. jinoenyoe kheueh uroe keuteupeuseulamat nyan! kamoe hana kamoe tem peulayan kamoe teupeusalah. ngon sabab nyan kamoe meu-useuha hana kamoe bri alasan baksoe mantong keu jipeubuet nyan. sikeubiet jih, lam hai peue mantong, kamoe meutunyok bahwa kamoe na kheueh hamba-hamba allah. sabab, peue mantong nyang susah ngon deurita nyan ka kamoe rasa ngon saba: kamoe jiseksa, jipeutamong lam glab, dan jiparan rame-rame; kamoe meukeureuja brat, kayem that hana kamoe eh dan kayem that teuma hana kamoe teume peunajoh. ngon kamoe peubuet nyang juJoe, bijaksana, saba dan get ate, kamoe meutunyok bahwa kamoe na kheueh hamba allah. meunan cit kamoe meugantung bak tulungan roh allah, dan ngon geunaseh nyang ikhlaih, meunan cit ngon cara kamoe peusampoe hana nyang teuka nibak po teu allah dan ngon kuasa allah, kamoe tunyok bahwa kamoe nyoe na kheueh hamba-hamba allah. kamoe mumat bak keuheundak allah sibagoe sinjata kamoe bah kheueh keu kamoe seurang meunan cit keu kamoe bila droe. kamoe jihoreumat, dan jihina cit teuma; jipujoe, dan jifiteunah teuma. sidub nyan kamoe nyoe juJoe, jitudoh cit kamoe ureueng sulet. kamoe jianggah hana meusyeuhu, teuma kamoe jituri le mandum ureueng. kamoe jisangka mate, teuma teunyata kamoe mantong udeb. bah pi kamoe nyoe ji ienanya, kamoe hana mate. bah kheueh ate kamoe jipeuseudeh, teuma kamoe sabe lam geumbira. kamoe deuh jih gasien, teuma kamoe ka kamoe peujeuet jai that manusia jeuet keu ureueng kaya. deuh jih kamoe hana sapeue na, teuma nyang sibeuna jih nibak kamoe dumpeue na. syedara-syedara nyan teucinta di korintus! kamoe ka troh trang ubak gata, banmandum asoe ate kamoe ka kamoe peugah. kamoe hana kamoe tob ate keu gata, teuma gata kheueh nyang tob ate gata keu kamoe. jinoenyoe, bah kheueh ulon meututoe lagee lon mariet bak aneuek-aneuek lon keudroe. buka kheueh ate gata keukamoe. bek kheueh jeuet keu ureueng nyang meurakan ngon ureueng-ureueng nyang hana meومان keu isa; nyang lagee nyan hana paih. panena mungken nyang get meulawok ngon nyang jeuhet! hana mungken trang meujampu ngon supot. hana mungken almaseh sapeue kheun ngon iblih. peu kheueh nyang saban ureueng kristen ngon nyang bukon ureueng kristen? peu kheueh hubongan jih baet tuhan ngon rumah beurala? geutanyoe nyoe baet tuhan, na kheueh allah nyang udeb. allah keudroe meufeureuman, "ulon teuma tinggai diteungoh-teungoh awaknyan, dan udeb meusajan-sajan ngon awaknyan. ulon teuma jeuet keu allah awaknyan, dan awaknyan teuma jeuet keu umat lon. sabab nyan, tinggai kheueh laju ureueng-ureueng nyang hana jituri keu po teu allah nyan,

dan peujioh kheueh droe gata nibak awaknyan. bek tapeugot hubongan sagai-sagai ngon nyang najih, ngon lagee nyan ulon teuma kuteurimong gata. ulon teuma jeuet keu bapak gata, dan gata teuma jeuet keu aneuek-aneuek ulon, meunan kheueh feureuman tuhan nyang mahakuasa." syedara-syedara nyang teucinta! phon-phon that janji nyan teutuju keu geutanyoe. ngon sababnyan bah kheueh geutanyoe tapeugleh droe nibak peue mantong nyang jipeukuto jiwa raga tanyoe. bah kheueh geutanyoe tatakot keu po teu allah, mangat tanyoe jeuet udeb khusus keu gobnyan ngon sampoereuna. sambot kheueh kamoe lam ate gata. kamoe hana meusalah baksoe mantong, dan hantom na ureueng nyang ka kamoe peurugoe. kamoe sagai-sagai hana kamoe kuet laba nibak soe mantong. ulon peugah lagee nyan, kon lon keuneuk peusalah gata. sabab, lagee nyang ka lheureh lon peugah yoh awai ilee, kamoe biet-biet that kamoe gaseh keugata, dan tanyoe na kheueh rakan-rakan nyang siudeb simate. ulon biet-biet that lon peucaya peunoh keugata. teuma ulon bangga that keu gata. bah kheueh kamoenyoe jai that-that kamoe rasa keusuletan, ate ulon biet-biet mangat that. ate ulon biet-biet geumbira. watee katrok u makedonia, kamoe mubacut hana hase kamoe peupuleh hek. nibak jeueb-jeueb sagoe kamoe jipeusulet: nibak pihak laen jimeudakwa dakwi, lam ate keudroe meurasas teumakot. biet kheueh meunan, syukoe kheueh, allah sabe keupeurayeuk ate ureueng nyang putoh asa; gobnyan geupeumangat ate kamoe ngon teuka titus, ate kamoe mangat kon mantong sabab ka teuka titus, teuma nyang leubeh peunteng gobnyan geupeugah pakriban ate jih teuhabor ngon sabab le gata. gobnyan geupeugah bak kamoe pakriban gata disinoe rindu that keuneuk meurumpok ngon ulon; bahwa gata ka meunyeusai ateuh buet nyang gata peubuet yoh ilee dan jinoe rila keu gata bila ulon. hai nyang lagee nyan teupeujeuet ate lon leubeh mangat lom teuma. bah kheueh ngon surat lon nyoe teupeujeuet ate gata meutamah seudeh, ulon hana meunyeusai lon tuleh surat nyan. beutoi watee lon ngieng bahwa surat lon nyan ka teupeujeuet gata mandum seudeh ate – bah kheueh seudeh gata nyan sikeujab mantong – ulon pi meunyeusai cit teuma. teuma bak watee nyoe ulon mangat ate – kon le sabab ate gata ka jeuet keuseudeh, teuma ngon na seudeh gata nyan teupeujeuet peurangoe gata ka meu-ubah. keubiet that, seudeh gata nyan sisuai ngon keuheundak po teu allah. ngon lagee nyan, kamoe hana kamoe peurugoe gata. sabab seudeh nyang lagee nyan jipeuhase ate teu ubah nyang jipeuteuka keuseulamatan. dan ureueng hana teuma meunyeusai keuhai nyang lagee nyan. sikeubiet jih, seudeh nyang teuma sijalan ngon keuheundak manusia jipeuhase mate. cuba gata ngieng peuhase jih nibak gata nyang seudeh nyan sijalan ngon keuheundak allah! hase jih na kheueh gata biet-biet gata useuha guna gata peujeureuneh nyang ceuko! gata ka jeuet keubanci ubak desya, gata teumakot, gata rindu, gata jeuet museumangat, gata rila tahukom nyang salah! lam banmandum soai nyoe gata ka tatunyok bahwa gata hana meusalah. ngon lagee nyan, bah kheueh ulon ka lon tuleh surat nyan, ulon teumuleh

kon le sabab ureueng nyang meusalah nyan. kon cit teuma le sabab ureueng nyang meudeurita le sabab nyang salah nyan. ulon tuleh surat nyan mangat dikeue po teu allah, gata tasada keudroe padubna rayeuk jih peuratian gata keukamoe. nyang kheueh sabab jih ate kamoe mangat that, dan kamoe leubeh-leubeh meutamah geumbira sabab kamoe ngieng ate titus nyang geumbira; ate jih mangat le sabab gata banmandum. ulon keubiet ka lon peubangga-bangga keugata nibak awaknyan. syukoe kheueh, gata hana tapeumalee ulon. banmandum nyang ka ltheueh kamoe peugah bak gata na kheueh beutoi. meunan cit teuma peue nyang kamoe peubangga-bangga keuhai gata ubak titus teunyata pi beutoi cit. jinoenyeo jihnyan seumaken jigaseh keu gata, sabab jihnyan teuingat pakriban gata mandum tatem seutot pimpen jihnyan dan pakriban gata teurimong gobnyan ngon horeumat dan patuh. ulon mangat that ate, sabab gata hase teupeucaya lam sigala hai. syedara-syedara, ulon meuharab gatanyoe tateupeue cit keuhai pakriban get jih allah keu jeumaah-jeumaah di makedonia. awaknyan ka teu ujoen ngon nyang payah-payah dan geuhon-geuhon. teuma lam keuadaan nyang meunan brat jirasa le awaknyan, awaknyan meugeumbira dan murah that ate bak jibri sumbangan-sumbangan keujitulong ureueng laen, bah kheueh awaknyan gasien lumpah na. ulon jeuet lon pasti awaknyan jibri meunurot nyang hase jibri, mungken leubeh. hana nyang yue, awaknyan jilakee ngon meuharab that ubak kamoe meunyeo jeuet awaknyan meusajan-sajan jitulong jibri sumbangan keu umat allah nyang na di yudea. awaknyan jibri jioh leubeh nibak nyang kamoe harab. awaknyan phon-phon that jiseurah droe ubak tuhan, oh ltheueh nyan ubak kamoe cit teuma, sisuai ngon keuheundak po teu allah. nyang kheueh sabab jih kamoe keubiet that kamoe yue bak titus – nyang peuphon useuha nyoe – mangat jihnyan jipeujak laju useuha nyang get nyoe lamkawan gata cit teuma. gata leubeh nibak peue mantong: gata leubeh lam hai meuiman, lam hai tapeugah peundapote, lam hai ieumeu peungeutahan, lam mubagoe rupa useuha, dan lam gaseh gata ubak kamoe. sabab nyan, get that cit gata leubeh nibak useuha nyang jroh nyoe. ulon hana lon yue nyan sibagoe saboh peurintah. teuma ngon teutunyok padub na sunggoih jih ureueng laen jitulong sabe keudroe-droe, ulon pih keuneuk lon teupeu trok eutna gaseh gata. sabab gata tateupeue that bahwa geutanyoe that-that geugaseh le isa almaseh tuhan tanyoe. gobnyan kaya, teuma gobnyan geupeujeuet droe geuh keugasien deumi keupeuntengan gata, mangat ngon gasien gobnyan nyang lafee nyan, gata ka jeuet keukaya. meunurot peundapat ulon, bak teumpat jih kheueh gata peuseuleusoe peue nyang ka gata peuphon thon nyang ka ltheueh. sabab gata kheueh nyang phon-phon that nyang pike dan nyang peuphon useuha nyan. ngon lafee nyan, bah kheueh gata nyang peubuet laju meunurot nyang gata mampu. ulon meuharab bah kheueh gata ngon seumangat nyang hu gata peuseuleusoe buet nyan, lafee seumangat gata yoh phon that gata reuncana buet nyan. meunyeo gata rila tabri, teuma po teu

allah geuteurimong meuneubri gata nyan ngon dasai jih peue nyang na nibak gata, kon dasai jih peue nyang hana nibak gata. mubacut pih hana meukeusut ulon keu lon peubeubaih ureueng laen nibak tanggong jaweub, dan teupeubrat gata. teuma sabab gatanyoe bak watee nyoe lam keuadaan na, ka sipatot jih gata peuseb nyang kureueng nibak awaknyan. teuma, meunyeo gata lam keuadaan kureueng, dan awaknyan lam keuadaan seb, awaknyan teuma jitulong gata. ngon lafee nyan bandua nyan saban-saban teulayani. lam alkitab na teutuleh lafee nyoe, "ureueng-ureueng nyang peunghaselan jih jai, hana meuleubeh, dan ureueng nyang hase jih bacut, hana meukureueng." padub na syukoe jih kamoe ubak allah sabab gobnyan ka geupeujeuet titus nyang sunggoih-sunggoih lafee kamoe nyang tulong gata! sabab titus kon mantong rila jipeupeunoh lafee nyang kamoe lakee, teuma jihnyan meunan that jumot jitulong gata sampoe ateueh keuheundak jih keudroe jicok keuputosan jijak ubak gata. meusajan ngon jihnyan kamoe kirem teuma sidroe syedara nyang that jihoreumat bak mandum jeumaah sabab buet jihnyan jipeusampoe haba get nyang teuka nibak po teu allah. disampeng nyan, ureueng nyan pih ka teupileh dan jipeuteuntee le jeumaah-jeumaah keujipeungan kamoe lam meuneujak kamoe. sabab kamoe teuma kamoe peuna meuneujak keukamoe jak peutrok sumbangan nyan, mangat tuhan teupeumulia dan mangat gata takalon keudroe bahwa kamoe rila kamoe meutulong. kamoe keubiet ate-ate that mangat bek na ureueng jipeusalah kamoe lam hai kamoe peusampoe sumbangan nyang rayeuk nyoe. kamoe keuneuk peubuet nyang juoe kon mantong dikeue tuhan, dikeue manusia cit teuma. 22 meusajan-sajan ngon titus dan syedara nyan, kamoe kirem cit teuma sidroe syedara nyang laen. kamoe ka kamoe ujoen jih nyan meu-ulang-ulang dan teunyata jihnyan sabe jitem tumulong. dan jinoenyeo, jihnyan leubeh-leubeh jitem tulong gata sabab jihnyan jikeubah harapan nyang rayeuk bak gata. keuhai titus, jihnyan na kheueh rakan ulon, nyang mubuet ngon ulon keu jitulong gata. dan keuhai mandua syedara nyan, nyang jijak meusajan ngon jihnyan, awaknyan na kheueh ureueng-ureueng nyang jiutus le jeumaah-jeumaah dan jeuet keu bangaan nibak almaseh. kamoe meuharab gata tatunyok geunaseh gata ubak awaknyan, mangat banmandum jeumaah jiteupeu bahwa gata tagaseh awaknyan dan bahwa peue nyang kamoe peubangga keuhai gata na kheueh beutoi. nyang sibeuna jih hana peureulee le lon tuleh surat keu gata keuhai bantuan nyang teungoh teukirem keu umat allah di yudea. ulon kuteupeu gata tatem tulong gob, dan ulon ka lon peubangga gata ubak ureueng-ureueng nyang na di makedonia. ulon peugah bak awaknyan, bahwa phon thon nyang ka ltheueh syedara-syedara tanyoe nyang na di akhaya ka siab keu jibri sumbangan. dan ngon seumangat gata nyang meugeulora nyan ka jeuet keusabab seumangat siladum nibak awaknyan meugeulora cit teuma. jinoenyeo ulon utus titus dan bandua droe syedara nyan keu gata mantong peue nyang kamoe peubangga-bangga nyan keuhai gata bek jeuet keu haba nyang sulet hana meuguna. ngon

lagee nyan, gata nyang sibeuna jih ka siab, sabab ulon peugah bak awaknyan bahwa ka siab meunyo keu nyan. ulon khawate meunyo na ureueng-ureueng makedonia nyang jijak meusajan ngon ulon singoh watee ulon jak ubak gata. dan meunyo jikalon le awaknyan bahwa gata gohlom siab, keubiet malee that kamoe singoh, sabab ka kamoe peugah bahwa kamoe meupateh that ubak gata! dan gata keudroe pi malee cit teuma. nyang kheueh sabab jih ulon meurasah lon kirem awaknyan leubeh ilee ubak gata keu jiroloh sumbangan nyang ka gata peujanji nyan. ulon peubuet nyang lagee nyan singoh watee ulon teuka, sumbangan nyang gata bri nyan ka siab. ngon lagee nyan, deuh kheueh bahwa nyang gata bri nyan teubri ngon mangat ate, dan kon sabab teupaksa. ingat kheueh! ureueng nyang tabu bijeh bacut teuma jipot bacut teuma. teuma ureueng nyang tabu bijeh nyang jai teuma jipot hase nyang jai teuma. tieb-tieb ureueng haroh jibri meunurot keurelaan ate jih. bek kheueh jibri ngon seugan-seugan atawa sabab teupaksa, sabab allah geugaseh keu ureueng nyang mubri ngon galak ate. allah meukuasa geubri keu gata beureukat nyang meulimpah-limpah, mangat gata sabe na peue nyang gata peureulee; dan gata teuma na leubeh keu tapeubuet get dan tameu amai. lam alkitab na teutuleh lagee nyoe keuhai allah, "gobnyan geutabu-tabu keu ureueng-ureueng gasien; ate geuh nyang get nyan keukai siumu masa." allah nyang keubah bijeh keu ureueng teumabu dan peunajoh keugeutanyoe. gobnyan teuma nyang keubah dan nyang peule peue nyang gata tabu, mangat hase ate gata nyang murah nyan meutamah-tamah lom teuma. ngon lagee nyan gata meuteume dumpeue na lam sigala hai ngon lagee nyan gata sabe hase tameubri ngon murah ate. dan meuneubri-meuneubri gata nyang kamoe weuek-weuek keu ureueng laen nyan, jeuet keusabab jai that ureueng jilakee teurimong gaseh ubak allah. sabab buet nyang jroh nyang gata peubuet nyoe kon teupeuseb nibak ukoran umat allah mantong, teuma jeuet keusabab jai that ureueng jilakee teurimong gaseh bak allah. dan ngon nyang jroh nyang gata peuleumah nyan, jai that ureueng kristen nyang na di yudea teuma jipujoe allah sabab awaknyan jikalon keuseutiaan gata keuhai haba get soai almaseh nyang gata seutot nyan. meunan cit, awaknyan jipujoe allah, sabab gata biet-biet murah ate keu gata weuek-weuek ubak awaknyan dan keu mandum ureueng laen nyang na nibak gata. ngon lagee nyan awaknyan teuma jimeudoa keu gata ngon peurasahan gaseh sayang kareuna allah that get ate keu gata. get that tanyoe meusyukoe ubak po teu allah ateueh meuneubri gobnyan nyang luwabiasa nyan. jinoenyoe ulon, paulus, keuneuk peugah sapeue-peue bak gata. ulon nyoe, meunurot nyang jipeugah le gob, leumoh meunyo meuhadab keu ngon gata, meunyo jioh baro kheueh lon jeuet. nah, sabab leumoh leumbot dan keu get ate almaseh, ulon meulakee ngon that meuharab bek kheueh sampoe teupaksa lon peubuet nyan kreueh ngon teugaih ateueh gata watee ulon teuka singoh. sabab ulon kana niet keuneuk loncok tindakan nyang teugaih ateueh ureueng-ureueng nyang jipeugah bahwa kamoe mubuet ngon tujuan

donya nyang fana nyoe. beutoi kamoe mantong udeb lam donya, teuma kamoe hana meujuang ngon tujuan donya. sinjata-sinjata nyang kamoe peuguna lam peujuangan kamoe kon sinjata donya nyoe, teuma sinjata-sinjata allah nyang meukuasa. ngon sinjata-sinjata nyan laju kamoe peuhanco bubena kuta-kuta; kamoe tangkeh bubena dobat-dobat dan kamoe peuhanco bubena kuta-kuta keusombongan nyang jipeudong keu jiheuntam peungeutahuan nyang geupeudong le po teu allah. kamoe teun mandum pikeran manusia dan kamoe peujeuet awaknyan taklok ubak almaseh. dan meunyo gata ka taat ngon sipeunoh ate, kamoe kasiab kamoe jak hukom mandum nyang hana taat. bah kheueh gata sadar ubak keuadaan nyang sibeuna jih. meunyo sidroe-droe ureueng yaken bahwa jihnyan almaseh, bah kheueh jihnyan jipeuingat droe jih keudroe dan beusadar bahwa kamoe nyoe pih almaseh saban lagee jih nyan. ulon hana malee meunyo ulon leubeh jai lon peubangga keukuasaan nyang ka geubri le tuhan ubak kamoe, sabab keukuasaan nyan geubri keuteupeudong gata, kon keuteureuloh. ulon hana kutem tarasa bahwa ulon nyoe kujak peutakot-takot gata ngon surat-surat ulon. ureueng jipeugah, "surat-surat paulus nyan teugaih dan meuwibawa, teuma meunyo gobnyan keudroe na lamkawan tanyoe, pribadi gobnyan leumoh dan tutoe haba gobnyan hana meumakna sapeue!" bah kheueh ureueng nyang lagee nyan beujisadar bahwa meunyo kamoe na lamkawan gata, buet kamoe teupat lagee peue nyang ka kamoe tuleh lam surat kamoe nyan. ka teuntee kamoe hana kamoe jeuet peubandeng atawa kamoe peuduek droe kamoe sideureujat ngon ureueng-ureueng nyang jianggab droe jih leubeh manyang. keubiet bangai that awaknyan! awaknyan jipeuget sineupat jih keudroe dan jiuko keudroe ngon sineupat nyan. kamoe hana lagee nyan. meunyo kamoe meubangga-bangga, kamoe hana meuliengkeu bataih. kamoe tinggai lam bataih-bataih daerah teupat kamoe mubuet nyang ka geupeuteuntee le allah keu kamoe. dan gata jitamong lam daerah nyan. teuma, watee kamoe jak saweue gata dan kamoe ba haba get keuhai almaseh ubak gata, kamoe biet-biet hana kamoe teubiet nibak bataih-bataih daerah teupat kamoe mubuet. kamoe hana kamoe pujoe ateueh buet ureueng laen nyang na diluwa bataih nyang ka geupeuteuntee le allah keu kamoe. sikeubiet jih kamoe teutab na teutab lam bataih-bataih nyang ka geupeuteuntee le po teu allah keu kamoe dan meuharab bahwa gata seumaken tameuiman ubak almaseh, mangat kamoe hase kamoe peubuet buet-buet nyang leubeh rayeuk nibak gata. ngon lagee nyan kamoe pih hase kamoe peusampoe haba get nyan bak nanggroe-nanggroe laen ngon hana kamoe peurayeuk-rayeuk droe ateueh buet nyang jipeubuet lam wilayah peulayanan ureueng laen. lam alkitab na teutuleh lagee nyoe, "ureueng nyang jitem peubangga sapeue-sapeue, bah kheueh jipeubangga peue nyang ka geupeuget le tuhan." sabab ureueng nyang teupujoe na kheueh ureueng nyang geupujoe le tuhan, kon ureueng nyang jipujoe droe jih keudroe. peumeuah kheueh keu lon nyang meusifeuet bangai bacut. jeuet peue

han? ulon meucen ubak gata, lagee po teu allah keudroe pi meucen ubak gata. gata na kheueh lagee sidroe aneuek dara peurawan nyang mantong gadih nyang ka lon peujanji keu teupeukawen ngon sidroe teungku lakoe, na kheueh almaseh. teuma ulon khawate pikeran gata teuma teugoda keu hana seutia le ubak almaseh, saban lagee hawa nyang yoh watee ilee teugoda ubak buet licek nyang jipeuteuka le uleue. sabab rupari gata magat mantong gata teurimong ureueng nyang teuka ubak gata dan jipeurunoe keuhai isa nyang laen – kon isa nyang kamoe peuturi ubak gata. dan gata pi tatem teurimong roh dan "haba get" nyang sagai-sagai hana saban ngon roh allah dan haba get nyang ka ltheueh gata teurimong nibak kamoe. ulon meubacut pi hana meurasaleubeh miyueb nibak "rasui-rasui" nyang luwabiasa nyan! mungkin ulon nyoe kureueng carong peugah haba, teuma meunyeoe keuhai ileume peungeutahuan, ulon nyoe kon ureueng nyang bangai. nyan ka ltheueh kamoe bri bukeuti ubak gata lam sigala hai peue mantong. bak watee ulon britee keuhai haba get nibak po teu allah ubak gata, ulon hana kulakee ubak gata beugata bri biaya nibak gata meubacut pi; dan ngon lagee nyan ulon ka kupeujeuet droe ulon leubeh miyueb. dan ulon peubuet nyan keulon peumanyang gata. peu kheueh ngon lagee nyan saboh buet nyang salah nyang ka lon peubuet ateueh gata? nibak watee ulon peutimang gata, ulon jijok biaya le jeumaah-jeumaah nyang laen. jeuet tapeugah ulon ka lon peurugoe jeumaah-jeumaah nyan mangat hase lon tulong gata. meunyeoe nibak watee nyan ulon na kureueng sapeue-sapeue, ulon hantom na lon peususah ureueng laen meusidroe pi nyang na nibak gata. banmandum nyang ulon peureulee jipeuna le syedara-syedara nyang teuka nibak makedonia. ulon kujaga get-get mangat ulon hana lon peususah gata nibak hai peue mantong, dan ulon teutab sabe kujaga mangat nyan teutab lagee nyan. keubanggaan ulon nyoe hana hase teusampoh dipat mantong bansaboh nanggroe akhaya, sabab peungajaran almaseh nyang beutoi na nyoeapat bak lon. pakon jeuet lon peubuet lagee nyan? peu kheueh le sabab ulon nyoe hana kugaseh gata? po teu allah geuteupeue bahwa ulon gaseh keu gata! peue nyang ulon peubuet jinoenye teutab ulon peubuet laju mangat "rasui-rasui" nyang laen nyang hana alasan keu jipeurayeuk-rayeuk droe dan jikheun jihnyan jimubuet lagee kamoe. ureueng-ureueng nyang lagee nyan na kheueh rasui-rasui peuleusu. awaknyan ureueng-ureueng mubuet nyang jipeunget ureueng laen sira jimeunyamar sibagoe rasui-rasui almaseh. hana hireuen awaknyan jipeubuet lagee nyan bagoe, sabab iblih keudroe pi jimeunyamar lagee malaikat trang! deungon nyan hana hireuen cit teuma meunyeoe peulayan-peulayan iblih jimeunyamar sibagoe peulayan-peulayan nyang jipeubuet keuheundak po teu allah. akhe jih awaknyan pi jiteurimong beunalaih nyang sissuai ngon buet-buet awaknyan. ulon ulang lom sigoe teuk: bek sampoe nyang jianggab ulon ureueng bangai. teuma meunyeoe ta-anggab cit lagee nyan, idhin kheueh ulon nyang bangai nyoe lon meubangga bacut. seulanjut jihnyoe teuma lon kheun keubanggaan lon, teuma kon tuhan nyang

yue bak ulon keuteupeugah nyan. lam hainyoe ulon biet-biet kumeutotee lagee ureueng bangai. keubiet na dan jai that ureueng nyang jipeubangga ubak hai-hai donya, teuma ulon keuneuk meubangga-bangga cit teuma. gata ngon mangat ate teameusaba ateueh ureueng-ureueng nyang bangai, sabab gata meurasaleubeh manyang nibak gata dan jijeuet tanpa gata. ulon malee lon akunyan bahwa kamoe keubiet that leumoh keukamoe peubuet lagee nyan. teuma peue nyang nibak ureueng laen jijeuet peubangga, ulon pi kujeuet cit teuma! (ulon kumeutotee lagee ureueng bangai). 22 peu kheueh awaknyan ureueng ibrani? ulon pi ureueng ibrani. peu kheueh awaknyan ureueng israel? ulon pi ureueng israel. peu kheueh awaknyan keuturonan nabi ibrahim? ulon pi lagee nyan cit! peu kheueh awaknyan peulayan-peulayan almaseh? teudeungoe jih lagee ulon nyoe ureueng ka gadoh akai, teuma ulon keubiet peulayan nyang leubeh get nibak awaknyan banmandum! ulon kulamubuet leubeh brat, ulon ka kayem that jipeutamong lam glab, ulon leubeh jai jiseksa dan kayem that rab-rab mate. ka limong goe ulon jiseksa le ureueng yahudi dan jisunuet ngon peunyenuet na teuma lhee ploh sikureueng goe. lhee goe teuma ulon jisunuet le ureueng-ureueng roma; na teuma lon rasa jigeulawa ngon bate. lhee goe ulon rasa lham ngon kapai lam laot, dan na sigoe ulon meupong-apong lam laot nyang treb jih na dua ploheuet jeuem. ka jai lagoe na ulon jak nyang peunoh ngon bahaya: lagee bahaya ie raya, bahaya le peurampok, bahaya nyang teuka nibak ureueng yahudi meunan cit nibak pihak nyang kon yahudi, bahaya lam banda, bahaya diluwa banda, bahaya lam laot dan bahaya nibak ureueng-ureueng nyang jipeugah droe syedara kristen padahai kon. ulon kubanteng tuleung dan lon meujang siteungoh mate: kayem that hana ulon eh, hana lon makheun, hana lon jieb ie, kayem that that ulon teulanta lam keuadaan deuk, sijuek sabab kureueng peukayan dan hana teuma teupat tinggai. 28 nibak banmandum nyan, tieb-tieb uroe ulon teutab gundah watee lon ingat keuadaan jeumaah. meunyeoe na nyang leumoh ulon pi meusajan teuma leumoh. meunyeoe na nyang rhot lam desya, ate ulon pi meusajan hanco. ngon lageenyan, meunyeoe ulon meuseuti lon peubangga sapeue-sapeue, teuma ka lon peubangga ngon hai-hai nyang teutunyok ubak ulon nyang leumoh. po teu allah, bapak nibak tuhan isa geuteupeue bahwa ulon hana kumeusulet. teupujoe kheueh nan gobnyan siumu masa. watee ulon mantong na di damsyik, gubunur nyang mat kuasa nibak teupat nyan dimiyueb keukuasaan raja aretas, jiyue bak tantra mangat jikeumiet babah pintoe banda nyan keujajak drob ulon. teuma ngon saboh raga ulon laju jikirem u miyueb rot saboh guha beuton. meunan kheueh ulon ltheueh nibak jaroe gubunur nyan. beutoi hana laba jih tapeubangga droe. teuma lon kutem cit peubangga keuhai-hai nyang le allah ka geupeuleumah bak lon lam wahyu atawa lam keumalon. ulon kuturi sidroe ureueng kristen nyang peuet blaih thon nyang ka ltheueh geu

beut le po u teumpat nyang paleng manyang lam syeuruga. (ulon hana kuteupeu peue beutoi-beutoi tuboh ureueng nyan teubeut atawa saboh keumalon – allah kheueh nyang teupeu.) ulon ulang sigoe teuk: ulon kuteupeu bahwa ureueng nyoe geubeut lam taman firdaus. (ulon hana kuteupeu peue kheueh tuboh ureueng nyan biet-biet teubeut atawa nyan saboh keumalon – allah mantong kheueh nyang teupeu.) bak teumpat nyan ureueng nyan laju jideungoe hai-hai nyang hana hase jipeugah le manusia dan hana teuma teubri idhin keu manusia keujipeugah hai nyan. keuhai ureueng nyan kheueh nyang keuneuk ulon peubangga, kon keuhai droe lon keudroe. keuhai droe ulon na kheueh keuhai-hai nyang teutunyok ubak keuleumohan lon mantong nyang jeuet lon peugah, dan nyan kheueh nyang keuneuk lon peubangga. seukira jih ulon keuneuk peubangga sapeue-sapeue, ulon hana kutem jeuet keu ureueng raya hana nyang mariet jih sulet; ulon teuma lon peugah nyang beutoi. teuma lon kupeuteun droe, mangat bek na ureueng nyang jianggah ulon nyoe leubeh nibak peue nyang ka jikalon lon peubuet atawa nyang jideungoe peue nyang lon peugah. teuma mangat ulon bek lumpah that sombong sabab keumalon-keumalon nyang luwabiasa nyan, ulon geubri simacam peunyaket nibak tuboh lon nyang rupari alat iblih. peunyaket nyan geubri keu nyang seupot ulon mangat ulon bek jeuet keu ureueng sombong. lhee goe ulon meudoa ubak tuhan mangat jeuet peunyaket nyan geucok nibak ulon. teuma tuhan geujaweeb, "ulon kugaseh gata dan nyan ka seb keugata; sabab kuasa ulon keubiet that teuga meunyoee gata lam keuadaan leumoh." nyang kheueh sabab jih ulon leubeh galak lon peubangga hai-hai lon nyang leumoh, sabab meunyoee ulon ka leumoh, dan bak watee nyan kheueh ulon rasa almaseh geulindong ulon ngon teunaga gobnyan. ngon laage nyan ulon keubiet that galak ateueh keuleumohan lon nyan. ulon biet that mangat ate meunyoee le sabab almaseh ulon jifiteunah, ulon meuteume susah, jilet-let dan ulon meuteume keupayahan. sabab meunyoee ulon leumoh, teuma bak watee nyan kheueh ulon jiteuka teumakot. keubiet that, ulon ka lon peujeuet droe laage ureueng bangai – teuma gata kheueh nyang peujeuet ulon sampoe laage nyan. nyang sibeuna jih gata nyang meusti tapujoe ulon. sabab, bah kheueh ulon nyoe hana areuti sapeue, teuma ulon sagai-sagai hana taloe ngon "rasui-rasui" nyang luwabiasa nyan! buet-buet nyang ajeab dan hai-hai nyang luwabiasa meunan cit ngon buet-buet nyang rayeuk-rayeuk ka teupeukalon ngon saba ubak gata sibagoe bukeuti bahwa ulon nyoe sidroe rasui. lam hai peue kheueh gata kureueng jikalon, teubandeng ngon jeumaah-jeumaah nyan? paleng-paleng teuma lam hai nyoe: bahwa ulon hana lon peususah gata keugata peubiaya ulon. peumeuah kheueh ulon ateueh nyang salah nyan! jinoenyoe ka nyang keu lhee goe jih ulon jak saweue gata. dan hana kutem peususah gata, sabab nyang ulon lakee kon kheueh peue nyang na nibak gata, teuma na kheueh droe gata. sabab peue kheueh kon aneuek manyak nyang haroh jimita nafeukah keu ureueng syiek jih, teuma

ureueng syiek kheueh nyang haroh jimita nafeukah keu aneuek-aneuek jih. ngon sabab nyan, ngon mangat ate ulon rila lon keureubeun peue-peue mantong keugata, kon nyan mantong, droe lon keudroe pi lon peurila. meunyoee ulon ka meunan lon gaseh keugata, peue kheueh patot kureueng gata gaseh keu lon? ngon laage nyan, peue kheueh gata situju bahwa ulon hantom lon peususah gata. teuma na nyang peugah bahwa ulon nyoe lisek; bahwa ulon meuteuma laba nibak gata sabab tipee daya ulon. panena mungken! peue kheueh rot ureueng-ureueng nyang lon yuejak bak gata nyan lonkuet laba nibak gata? ulon ka lon yue titus jijak bak gata, dan meusajan ngon jih lon yue teuma syedara tanyoe ureueng kristen nyang laen keurakan jih. peue kheueh titus jicok laba ateueh gata? teuma kamoe bandua mubuet ngon tujuan nyang saban dan kamoe cok tindakan pih ngon cara nyang saban teuma. jeuet mantong gata kira kamoe nyang kanyoe teungoh meu-useuha kamoe bila droe ateueh gata? gata keubiet that-that keuliru! allah geuteupeue bahwa banmandum nyang kamoe peugah nyan na kheueh meunurot keueundak almaseh. dan bandum nyang kamoe peubuet na kheueh keu teupeudong udeb rohani. ulon khawate bahwa watee ulon jak bak gata singoh, lon kalon gata hana laage peue nyang lon harab dan gata pih meurumpok ngon lon hana laage nyang gata harab. pat tateupeue singoh na nyang mulo, bingiek ate, seu-uem ate, teupeupeunteng droe keudroe, fiteunah keudeh keunoe, hasut keudeh keunoe, sombong dan teupeuna karu. ulon teumakot pat tateupeue watee ulon teuka singoh allah teuma geupumiyueb ulon dikeue gata dan ulon teuma lonmo sabab jai that lamkawan gata nyang meudesya yoh masa ilee, hana meu-ubah dan hana jipioh jipeubuet buet-buet nyang cabui, kutoe dan hana patot. nyoe na kheueh nyang keu lhee goe jih ulon teuka jaksawee gata. lam alkitab na teutuleh laage nyoe, "tieb-tieb peukara meuseuti jibantu le keusaksian dua atawa lhee droe saksi, baro kheueh peukara nyan sah." ureueng-ureueng nyang masa ilee ka jipeubuet desya dan mandum ureueng laen teuma, ka lon peuingat leubeh ilee watee ulon jaksawee gata nyang keudua goe jih. jinoenyoe, teungoh ulon jioh nibak gata, ulon peuingat lom teuma bahwa meunyoee ulon teuka lom teuma, hana meusidroe pih nibak awaknyan nyang lھےueh nibak hukoman. teuma gata meuteume banmandum bukeuti nyang gata lakee bahwa almaseh biet-biet geumeututoe rot ulon. meunyoee almaseh geucok tindakan ateueh gata, hana ngon cara leumoh-leumoh, seubalek jih gobnyan geutunyok kuasa geuh lamkawan gata. beutoi watee gobnyan teusaleb, gobnyan leumoh, teuma jinoenyoe gobnyan udeb sabab kuasa allah. meunan cit kamoe leumoh lam udeb kamoe sabab meusaboh ngon almaseh, teuma meunyoee meuhadab ngon gata, kamoe pih teuga meusajan almaseh sabab kuasa po teu allah. cuba gata ujeoe droe teuh keudroe peue kheueh gata biet-biet meuiman ubak almaseh! pasti gata tasadari bahwa isa almaseh nyan na lam tuboh gata! – laen hai jih meunyoee keubiet gata biet-biet hana tameuman. ulon harab gata sadar bahwa kamoenyoe kon ureueng nyang ek teuteun

ujoe. kamoe meudoa ubak po teu allah seumoga gob-
nyan geutem tulong gata keu hana tapeubuet salah.
bukon keu teutunyok bahwa kamoe nyoe keubiet
carong bak teupeuseuleusoe tugaih, teuma mangat
gata tapeubuet peue nyang geukeuheundaki le po
teu allah – bah kheueh deuh jih kamoenyoe hana
meuhase, hana peue! sabab kamoe hana hase kamoe
peubuet musapeue pih nyang meubida ngon nyang
beutoi; kamoe meuseuti kamoe seutot nyang beutoi.
kamoe galak that meunyoe kamoe leumoh, dan gata
teuga. kamoe pih meudoa mangat gatanyoe jeuet
keusampoereuna. nyang kheueh sabab jih ulon tuleh
surat nyoe bak watee ulon gohlom na lamkawan
gata. ngon lagee nyan, meunyoe ulon teuka teuma,
hana peue lon cok tindakan nyang kreueh ateueh
gata ngon lon peuguna keukuasaan nyang geubri le
tuhan keu ulon. keukuasaan nyan geubri guna jih
keu teupeudong gata, kon keu teupeuhanco. akhe
jih, syedara-syedara, bah kheueh gata bumangat ate,
dan meu useuha kheueh jeuet keusampoe reuna.
teurimong kheueh peue-peue mantong nyang ulon
naseuhat nyoe. bah kheueh gata saboh ate dan
udeb nyang rukon. allah nyang mahapeugaseh
dan nyang peudame nyan teuma sabe na meusajan
gata. mumat-mat jaroe kheueh sidroe ngon nyang
laen seucara meusra sibagoe syedara lam kristen.
banmandum umat po teu allah jikirem saleuem ubak
gata. tuhan isa almaseh geubri beureukat keu gata,
allah geugaseh gata, dan roh allah na meusajan gata
banmandum teuma! horeumat kamoe, paulus

syedara-syedara mandum jeumaah nyang na di galatia, ulon, paulus, dan banmandum syedara nyang kristen nyang na meusajan ngon ulon, kamoe meuharab seumoga allah bapak geutanyoe dan tuhan isa almaseh geubri beureukat dan sejahteuru keu gata. ulon jeuet keurasui kon le peurantaraan manusia atawa kareuna jiangkat le manusia, teuma le isa almaseh dan allah bapak geutanyoe nyang ka geupeu udeb lom teuma gobnyan nibak mate. taat ubak keuheudrak allah bapak geutanyoe, almaseh geupeujok droe gobnyan jeuet keu keureubeuen keubanmandum desya-desya tanyoe, mangat tanyoe geupeu seulamat nibak jamen nyang jeuhet nyoe. teupujoe kheueh allah siumu masa! amin. ulon hireuen keuhai syedara banmandum! gata geutawok le po teu allah le sabab rahmat almaseh, teuma bak watee nyoe gata keubiet bagaih that tapeulikot allah dan gata seutot "haba get" nyang laen nibak haba get nyang teuka nibak po teu allah keudroe. nyang sibeuna jih hana "haba get nyang laen". teuma na ureueng nyang jajakpeugah ubak gata "haba get" keuhai almaseh nyang ka jiputa balek le awaknyan ngon sabab nyang pikeran gata karu hana meuteuntee. ureueng nyang peusampoe "haba get" nyang laen nibak haba get nyang ka kamoe peusampoenyah, bah kheueh ureueng nyang geuhukom le allah – bah kheueh ureueng nyang peusampoe nyang ulon keudroe atawa malaikat nyang teuka lam syeuruga! kamoe ka lheuueh kamoe peugah yoh awaikon ilee, jinoenyoe ulon peugah sigoe teuk: ureueng nyang peusampoe keu gata "haba get" nyang laen nibak haba get nyang ka gata teurimong nibak kamoe, ureueng nyang bah kheueh geuhukom le po teu allah! peu kheueh ngon lagee nyang deuh jih ulonnyoe siulah-ulah meuharab beujiaku le manusia? sagai-sagai hana dan kon lagee nyan! nyang ulon harab na kheueh peungkakuan nibak po teu allah. peu kheueh ulon teungoh meu-useuha lon cok ate manusia mangat jigalak le gob? meunye ulon mantong kupeubuet lagee nyan, ulon nyoe bukan kheueh hamba almaseh. syedara-syedara banmandum haroh beutateupeue bahwa haba get nyang ulon peusampoe nyan kon asai jih nibak manusia. ulon hana kuteurimong haba nibak manusia, dan hana meusidroe pih nyang purunoe keu ulon. isa almaseh keudroe kheueh nyang peugah asoe haba get nyan ubak ulon. teuntee gata katadeungoe keuhai udeb lon yoh ilee sibagoe sidroe ureueng nyang anut agama yahudi. gata tateupeue pakriban keujam jih ulon bak watee nyan lon ielanya jeumaah allah dan pakriban kreueh jih ulon keuneuk peuhanco jeumaah nyan. lam hai lon amai agama yahudi, ulon leubeh jroh nibak ureueng yahudi nyang laen nyang santeuet ngon umu ulon. ulon meuseumang that lam hai-hai adat istiadat indatu kamoe. teuma ngon jroh ate po teu allah, gobnyan ka geupileh ulon sigohlom ulon lahe dan teutawok ulon guna lon layani gobnyan. alah geupeugah aneuek gobnyan keu ulon mangat haba get keuhai aneuek gobnyan hase lon peusampoe keu ureueng-ureueng nyang kon yahudi. bak watee nyan hana ulon jak bak soe mantong lon jak lakee naseuhat. meunan cit ulon hana lon jak ubak ureueng-ureueng nyang na di yerusalem nyang ka leubeh ilee nibak ulon jeuet keurasui. teuma ulon ku-

jak u nanggroe arab, nibak teupat nyan laju lon gisa lom u damsyik. lhee thon teuma oh lheuueh nyan, ulon jak teuma u yerusalem guna lon jak meuturi ngon petrus. ulon tinggai ngon gobnyan na limong blaih uroe treb jih. ulon hana murumpok ngon rasui-rasui nyang laen, keucuali yakobus, syedara tuhan. peue nyang lon tuleh nyoe na kheueh beutoi. allah geuteupeue bahwa ulon hana meusulet! oh lheuueh nyan laju ulon jak u daerah-daerah nyang na di siria dan kilikia. 22 trok bak watee nyan jeumaah-jeumaah kristen nyang na di yudea mantong na gohlom jituru keulon seucara langsung. awaknyan teuma jideungoe gob peugah, "ureueng nyang ielanya kamoe yoh watee ilee, jinoe jijak peusampoe haba nyang yoh masa ilee jikeuneuk peuhanco." ngon lagee nyan awaknyan laju jipujoe allah sabab le ulon. peuet blaih thon oh lheuueh nyan, ulon woelom u yerusalem, meusigoe ngon barnabas. meunan cit titus na lon ba sajan. ulon kujak u yerusalem sabab allah ka geupeugah ubak ulon bahwa ulon haroh lonjak keunan. dan bak saboh teupat meurok pakat khusus ngon peumimpin-peumimpin nyang na disinan, laju ulon peugah haba get nyang ka lon peusampoe ubak ureueng-ureueng nyang kon yahudi. sabab ulon hana kitem useuha lon nyang awai, meunan cit nyang jinoe, tinggai sia-sia. titus, nyang peungon ulon, na kheueh ureueng yunani, teuma jihnyan hana teupaksa meuseuti jiseutot peuratoran meusunat, bah kheueh na ureueng-ureueng nyang jipaksa hai nyan. awaknyan na kheueh ureueng-ureueng jiseuludob lam gulungan tanyoe dan jimeunymar sibagoe syedara. awaknyan jitamong ngon seungab-seungab keu jijak seulidek keubeubaihan nyang na nibak geutanyoe sabab tanyoe meusaboh ngon isa almaseh. awaknyan jikeuneuk peugisa tanyoe ubak keuadaan lagee yoh awai sibagoe namiet, teuma kamoe hana meunyeurah mubacut pih ubak awaknyan, sabab kamoe keuneuk kamoe jaga mangat haba get nyan teutab gleh keugata. bah kheueh lagee nyan, hana hai-hai baro nyang jitungt nibak ulon le ureueng-ureueng nyang jianggab ureueng patot – nibak ulon hana meulaen meunyeo awaknyan ureueng patot atawa kon ureueng patot, sabab po teu allah hana geungieng muka. seubalek jih, ureueng-ureueng nyang jianggab ureueng patot jiaku keudroe bahwa allah ka geubri tugaih ubak ulon keu lon peusampoe haba get keu ureueng nyang kon yahudi, sabab lagee gobnyan ka geubri tugaih ubak petrus keujijak peusampoe haba get nyan ubak ureueng yahudi. sabab alah nyang bri ubak petrus keuanggongan beujeuet keu rasui ureueng yahudi, meunan cit geubri teuma ubak ulon keujeuet keurasui ubak ureueng nyang kon yahudi. yakobus, petrus dan yahya, nyang deuh jih jeuet keupeumimpin-peumimpin jeumaah, jiaku keudroe bahwa allah ka geubri ubak ulon tugaih khusus nyoe. teuma awaknyan laju jimumat jaroe ngon barnabas dan ulon sibagoe tanda meusahabat. laju awaknyan dan kamoe situju bahwa kamoe teuma mubuet lamkawan bansa-bansa nyang kon yahudi, dan awaknyan lamkawan ureueng yahudi. nyang that-that jilakee le awaknyan bak kamoe na kheueh mangat kamoe biet-biet kamoe pike keu ureueng gasien. dan ulon keubiet mangat ate peubuet hai

nyan. watee petrus jijak u antiokhia, laju lon lawan jih troh trang, sabab buet jih ka salah. phon-phon that jiduek sira jimakheun meusajan-sajan ngon ureueng-ureueng nyang kon yahudi. teuma oh ka ltheueh ureueng-ureueng utosan yakobus nyan teuka, laju jipeujioh droe nibak ureueng-ureueng nyang bukan yahudi nyan dan hana jitem le makheun meusajan ngon awaknyan, sabab jitakat keu ureueng-ureueng nyang jilakee mangat banmandum ureueng teupeusutan. le syedara-syedara nyang ureueng yahudi laen pih ka rhot bak munafek lagee petrus nyan, dan akhe jih barnabas pih teupeungaroh ngon sikeub nyang jipeuleumah le awaknyan. meunan lon teupeu bahwa awaknyan hana meusikeub nyang sisuai ngon keubeunaran nyang na lam haba get nyan, laju ulon peugah ubak petrus dikeue mandum ureueng nyang teuka disinan, "meunyo gata sibagoe ureueng yahudi ka udeb lagee kon ureueng yahudi, keupeue jinoenyo gata keuneuk paksa ureueng-ureueng laen udeb lagee ureueng yahudi?" keubiet, meunurot lahe, kamoe na ktheueh ureueng yahudi dan kon "ureueng nyang kon yahudi nyang meudesya". bah ktheueh meunan kamoe meuteupeue bahwa manusia jimeuget lom teuma ngon po teu allah sabab jimeuiman ubak isa almaseh, dan kon ngon sabab jiamai hukom agama. kamoe keudroe pih meuiman ubak isa almaseh, mangat kamoe jeuetmeuget lom teuma ngon allah meulalu iman kamoe nyan, kon ngon sabab kamoe amai hukom agama. sabab ngon teumai hukom agama, hana meusidroe pih hase jimeuget lom teuma ngon po teu allah. kamoe meu-useuha kamoe meuget lom teuma ngon allah rot udeb meusaboh ngon almaseh. teuma meunyo oh ka ltheueh teupubuet nyang lagee nyan, teunyata kamoe mantong jeuet lagee "ureueng-ureueng meudesya" meunan cit lagee ureueng-ureueng nyang kon yahudi, peu ktheueh ngon lagee nyoe bahwa almaseh ktheueh nyang jeuet keusabah kamoe meudesya? ka teuntee hana! meunyo ulon kupeuphon lom teuma lon peudong pola hukom agama nyang ka ulon reuloh, ngon lagee nyan ka lon peuleumah bahwa ulon ka lon langga hukom. teuma ulon ka mate ateuhe hukom agama – jipeumate le hukom nyan keudroe – mangat ulon jeuet udeb keu po teu allah. ulon ka jisaleb meusajan ngon almaseh. jinoenyo bukan le ulon nyang udeb, teuma almaseh nyang udeb lam tuboh ulon. udeb nyoe nyang ulon amai jinoo na ktheueh le iman ulon keu aneuek allah nyang geugaseh ulon dan nyang ka geukeureubeuen droe gobnyan keu ulon. ulon hana lon peubeuah rahmat allah. meunyo hubungan manusia ngon po teu allah jeuet keu get lom teuma sabab jiamai hukom agama, nyan saban cit mate almaseh hana meuguna! syedara-syedara nyang ureueng-ureueng galatia! gata biet-biet bangai! aleh peungaroh soe nyang ka keunong nibak gata? almaseh mate bah kayee saleb ka ulon peutrang sijaulaih-jeulaih jih keu gata! cuba gata peugah ubak saboh hai nyoe: peu ktheueh gata katateurimong roh allah sabab gata amai hukom agama, atawa sabab gata deungoe haba get nyang teuka nibak po teu allah dan meuiman ubak almaseh? pakon gata keubiet that bangai! gata ka tapeuphon udeb baro ngon roh allah, pakon jinoenyo gata keuneuk trok ubak keusam-

poereuna ngon teunaga gata keudroe? sia-sia mantong banmandum nyang ka gata alami nyan? hana mungken sia-sia! po teu allah geubri roh gobnyan keu gata dan geupeuna buet-buet nyang ajaeb lamkawan gata. peu ktheueh allah geupeubuet nyan sabab gata ka tapeubuet hukom agama atawa sabab gata ka tadeungoe haba get nyan dan meuiman ubak almaseh? nyan saban lagee nyang na teutuleh lam alkitab keuhai nabi ibrahim – lagee nyoe, "nabi ibrahim geumeuiman ubak allah, dan sabab meuiman geuhnyan gobnyan geuteurimong le allah sibagoe sidroe nyang teupeumangat ate allah." ngon lagee nyan bah ktheueh gata beutasadar bahwa ureueng nyang biet-biet keuturonan nabi ibrahim na ktheueh ureueng nyang meuiman ubak allah. alkitab ka jikalon leubeh ilee bahwa allah ka geupeumungken ureueng-ureueng nyang kon yahudi jimeuget lom teuma ngon allah, meunyo awaknyan jimeuiman ubak gobnyan. haba get nyan teupeugah leubeh ilee udeb nabi ibrahim lam janji nyang lagee nyoe, "rot gata, allah teuma geubri beureukat banmandum umat manusia ateuhe rhueng bumoe." nabi ibrahim geumeuiman, nyang ktheueh sabab gobnyan geubri beureukat. meunan cit teuma keu mandum ureueng nyang meuiman, teuma geubri beureukat meusajan-sajan ngon nabi ibrahim. ureueng-ureueng meugantueng ubak hukom agama, banmandum udeb dimiyueb kutokan. sabab lam alkitab na teutuleh lagee nyoe, "ureueng nyang hana seutia jiamai banmandum nyang teutuleh lam kitab hukom agama, geukutok le allah!" hana meusidroe pi nyang jimeuget ngon po teu allah ngon sabab jiamai hukom agama. hai nyan ka teupeugah lam alkitab, "teuma ureueng nyang meuiman ubak allah sampoe hubungan jih ngon allah jeuet keuget lom, teuma udeb!" teuma hukom agama hana meudasai ateuhe iman. lam alkitab na teutuleh bahwa ureueng nyang jiamai hukom agama, teuma udeb ngon sabab hukom nyan. teuma almaseh geupeubeubaih tanyoe nibak kutokan hukom agama. gobnyan geupeubuet lagee nyan ngon cara geupeubiyeu droe gobnyan teukutok sabab le geutanyoe. sabab lam alkitab na teutuleh lagee nyoe, "teukutok ktheueh ureueng nyang mate teugantueng bak tameh kayee." almaseh geupeubuet lagee nyan mangat beureukat nyang ka geupeu janji le allah ubak nabi ibrahim geubri cit teuma ubak ureueng-ureueng nyang bukan yahudi. ngon lagee nyan tanyoe pih nyang meuiman ubak allah, hase tateurimong roh nyang ka geupeu janji le allah nyan. syedara-syedara! bah ktheueh lon peuguna cuntoh nibak peungalaman tieb-tieb uroe. meunyo na ureueng jipeuna sabab janji dan janji nyan ka teupeusah, hana meusidroe pih nyang jeuet jipeubateu janji nyan, atawa jitamah sapeue-sapeue nibak janji nyan. janji-janji allah geupeuget le allah keu nabi ibrahim dan keu ureueng keuturonan nabi ibrahim. lam alkitab hana teutuleh "dan keu ureueng-ureueng keuturonan nabi ibrahim", nyang makna jih jai that ureueng. nyang na teutuleh lam alkitab nyan na ktheueh, "dan keu ureueng keuturonan gata", nyang makna jih keu sidroe ureueng mantong, nyan ktheueh almaseh. nyang keuneuk lom peugah nibak tempat nyoe na ktheueh lagee nyoe: janji allah ka geupeuget dan teupeusah leubeh ilee. hukom agama nyang geubri 430

thon oh ltheuh nyan hana hase teupeubateu nyang ka teupeusah nyan dan teusampoh janji allah nyan. sabab meunyoe meuneubri allah teugantueng nibak hukum agama, ngon lagee nyan kon le meuneubri nyang ka geupeu janji. teuma le sabab allah ka geupeu janji nyan ubak nabi ibrahim, ngon lagee nyan alah geubri atra nyan keu gobnyan. meunyoe meunan, keupeuguna jih hukum agama teubri? jaweueb jih na kheueh bahwa hukum agama teutamah keuteupeugah buet nyang jilangga le manusia. hukum agama nyan meulaku sampoe bak watee trok sidroe keuturonan nabi ibrahim, nyang teupeugah lam janji allah keu nabi ibrahim. hukum agama nyan geupeusampoe le malaikat-malaikat ngon peurantara sidroe manusia. nyang kheueh, meuseuti na dua pihak, baro kheueh peureulee sidroe peurantara. teuma nibak alah hana peureulee peurantara sabab gobnyan keudroe nyang meutindak. peu kheueh nyan meumakna bahwa hukum agama meulawan ngon janji allah? ka teuntee hana! sabab meunyoe hukum agama geubri keu anugeurah udeb manusia, ngon lagee nyan manusia hase jimeumal ngon allah meulalu hukum agama. 22 teuma lam alkitab na teutuleh lagee nyoe bahwa banmandum umat manusia na dimiyueb keukuasaan desya. ngon sabab nyan, meuneubri nyang geupeu janji ngon dasai jih meuiman ubak isa almaseh teubri keu awaknyan nyang meuiman. sigohlom trok watee jih keumeuiman ubak almaseh, tanyoe jijaga that le hukum agama; tanyoe jikurong sampoe iman nyan teupeugah. ngon lagee nyan, hukum agama teupeujeuet sibagoe nyang kawai tanyoe trok ubak almaseh teuka keu geujak peugot tanyoe beutameuget lom ngon allah sabab tanyoe meuiman ubak almaseh. jinoenyoe, sabab ka trok watee jih manusia jeuet jimeuiman ubak almaseh, ngon lagee nyan tanyoe hana le jikawai le hukum agama. sabab gata meuiman ubak isa almaseh, ngon lagee nyan gata meusaboh ngon gobnyan; dan ngon sabab nyan gata ka jeuet keu aneuek-aneuek allah. gata banmandum ka teupumano ateuah nan almaseh, dan gata ka tateurimong nibak droe gata sifeuet-sifeuet almaseh keudroe. 28 lam hai nyoe hana le beda ureueng yahudi ngon ureueng nyang kon yahudi, meunan cit hana le beda sidroe namiet ngon ureueng beubaih, hana meubeda ureueng agam ngon ureueng inong. gata banmandum ka meusaboh ngon sabab isa almaseh. meunyoe gata atra almaseh, ngon lagee nyan gata na kheueh keuturonan nabi ibrahim. dan gata teuma tateurimong peue nyang geupeu janji le alah. teuma peureulee lom peujeulahi: simantong ahli wareh mantong dimiyueb umu, na sidroe ureueng nyang kawai jihnyan dan nyang uruih peue-peue nyang jipeureulee le ahli wareh nyan trok ubak umu nyang ka jipeuteuntee le bapak jih. jihnyan teupeusaneuet saban lagee sidroe namiet, bah pi jihnyan ahli wareh nibak mandum atra nyan. meunan cit ngon geutananyoe: simantong tanyoe gohlom rayeuk, tanyoe jipeunamiet le roh-roh nyang kuasa donya nyoe. teuma nibak watee nyang paih, allah geu-utus aneuek gobnyan lam donya nyoe. aneuek gobnyan nyan jipeulahe le sidroe ureueng inong dan udeb dimiyueb keukuasaan hukum agama. ngon lagee nyan gobnyan geupeu beubaih ureueng-ureueng nyang udeb

dimiyueb keukuasaan hukum agama; mangat tanyoe pih hase jeuet keu aneuek-aneuek allah. sabab gata na kheueh aneuek-aneuek allah, allah geuyue roh aneuek gobnyan jitamong lam ate gata dan ate ulon, nyan kheueh roh nyang jimeuhoi, "bapak, oe bapak lon." ngon lagee nyan, gata kon le namiet, teuma ka jeuet keu aneuek. dan sabab gata aneuek allah, teuma allah geubri ubak gata peue-peue mantong nyang geukeubah keu aneuek-aneuek gobnyan. yoh watee ilee gata hana taturi keu allah, nyang kheueh sabab jih gata jeuet keu namiet nibak kuasa-kuasa nyang teuanggung sibagoe ilah nyang sibeuna mubacut pih kon allah. teuma bak wateenyoe gata ka taturi keu allah, atawa nyang leubeh paih lom, alah geuturi gata. ngon sabab nyan, pakon gata keuneuk tagisa lom ubak roh-roh donya nyoe, nyang leumoh dan gasien? pakon gata tatem jipeubudak lom le roh-roh nyan? gata tapeuna uroe raya bak uroe-uroe nyang ka teupeuteuntee, buleuen-buleuen nyang ka teupeuteuntee, dan thon-thon nyang ka teupeuteuntee teuma. ulon khawate, hana-hana jeureuh payah ulon keugata sia-sia mantong. syedara-syedara! ulon meulakee ngon meuharab that mangat gata beujeuet lagee ulon. sabab ulon pi ka jeuet lagee gata. gata hana tapeubuet musapeue pih nyang salah ateuah ulon. gata teuntee mantong teuingat peue sabab jih bak awaiphon ulon peusampoe haba get ubak gata. sabab jih na kheueh ulon rhot bak saket. bak watee nyan gata hana meurasu luwat keu ulon, bah pih keuadaan tuboh ulon ka jeuet keucubaan nyang paleng rayeuk ateuah gata. bahkan gata tateurimong ulon sibagoe malaikat allah atawa lagee tateurimong isa almaseh keudroe. gata mubahgia that bak watee nyan. teuma bak watee nyoe, dipat kheueh keubahgiaan nyan? ulon kuteupeue bahwa bak watee nyan gata rila gata cungke mata gata keudroe keugata jok ubak ulon, meunyoe nyan hase teupeubuet. peu kheueh gata bak wateenyoe ka gata anggab ulon sibagoe musoh gata, sabab ulon peugah nyang beutoi ubak gata? ureueng-ureueng nyang laen nyan ngon peunoh seumangat jimita gata, teuma meukeusut awaknyan hana get. awaknyan jikeuneuk peuputoh hubungan ngon kamoe, mangat gata taseutot awaknyan ngon peunoh seumangat. beutoi get that beuna seumangat lam hai-hai nyang get, asai beusaba na lagee nyan dan bek watee ulon na meusapat ngon gata mantong. aneuek-aneuek ulon nyang lon cinta! ulon bak watee nyoe ka meudeurita lom sabab le gata. ulon meudeurita lagee sidroe inong meudeurita watee jipeulahe aneuek. ulon teuma sabe meudeurita, meunyoe sifeuet-sifeuet almaseh gohlom teupula lam tuboh gata! ulon meuheuet that keuneuk meugumpoi lamkawan gata bak watee nyoe, mangat ulon jeuet lom meucalitra ubak gata ngon su nyang laen, sabab ulon ka lon teupeue le peue nyang meuseuti lon peubuet ateuah gata! syedara-syedara nyang keuneuk udeb dimiyueb keukuasaan hukum agama, cuba deungoe ulon peugah! ulon keuneuk kheun bak gata peue nyang na teutuleh lam kitab hukum nabi musa. 22 disinan na teutuleh bahwa nabi ibrahim na dua droe aneuek: mak nibak aneuek nyang sidroe na kheueh sidroe namiet, dan mak nibak sidroe aneuek nyang sidroe teuk nyan na kheueh

sidroe inong nyang meurdehka. aneuek nibak inong namiet lahe jih lazem sabab keuheundak manusia. teuma aneuek nyang lahe nibak inong nyang meurdehka, lahe jih sabab geupeue janji le allah. nyoe jeuet tapeuguna sibagoe kiasan. dua droe inong nyan na kheueh miseue lagee dua boh janji: nyang sidroe asai jih nibak gunong sinai – nyan kheueh hagar; aneuek-aneuek inong nyan lahe sibagoe namiet. dan, hagar nyan kheueh teupeumiseue ngon gunong sinai, di nangroe arab. gobnyan sibagoe lambang banda yerusalem ngon banmandum peunduduek jih nyang bak watee nyoe ka jeuet keunamiet. teuma yerusalem nyang na lam syeuruga nyan na kheueh yerusalem nyang meurdehka, dan nyan kheueh mak geutanyoe. sabab lam alkitab teutuleh lagee nyoe, "meugeumbira kheueh gata he inong malee, nyang hantom na pulahe aneuek! meusukaria kheueh dan seumurak meuhubo kheueh gata nyang hantom saket meusalen! sabab ureueng inong nyang jitinggai le lakoe jih teuma meuteume leubeh jai aneuek nibak ureueng inong nyang udeb meusajan lakoe." 28 syedara-syedara! gata keudroe na kheueh aneuek-aneuek allah nyang teupeulahe sabab janji allah; gata saban lagee nabi ishaq. bak watee nyan aneuek nyang lahe meunurot keuheundak manusia, ji ielanya aneuek nyang lahe meunurot keuheundak roh allah. meunan cit bak watee nyoe. teuma peu kheueh nyang teutuleh lam alkitab? disinan teutuleh lageenyoe: "use kheueh namiet inong nyan meusajan ngon aneuek jih, sabab aneuek nibak namiet inong nyan hana teuma jeuet keu ahli wareh meusajan ngon aneuek inong nyang meurdehka." ngon lagee nyan, syedara-syedara, geutanyonyoe kon aneuek-aneuek nibak sidroe namiet ureueng inong; geutanyoe na kheueh aneuek-aneuek nibak inong nyang meurdehka. tanyoe jinoenyoe meurdehka, sabab almaseh ka geupeu meurdehka tanyoe! ngon sabab nyan gata peuteun kheueh keubeubaihan gata, dan bek gatatem jipeujeuet keu namiet lom teuma. ingat, meunoye gata talakee meusunat, nyan saban cit almaseh hana meuguna le nibak gata. nyang peugah nyoe na kheueh ulon keudroe, paulus. sigoteuk lon peuingat keu ureueng nyang jilakee meusunat, bahwa jihnyan wajib jiamai banmandum hukum agama! meunoye gata meu-useuha tameuget lom teuma ngon allah rot hukum agama, nyan saban cit hubungan gata ngon almaseh ka putoh. ngon lagee nyan gata ka udeb diluwa lingkungan rahmat allah. teuma nibak kamoe, kamoe meuharab bahwa ngon geutulong le roh allah dan ngon dasai meuman kamoe ubak almaseh, allah geupeumungken kamoe meuet lom teuma ngon gobnyan. sabab meunoye tanyoe ka meusaboh ngon isa almaseh, keuhai teuturot atawa hana teuturot meusunat nyan, hana jeuet keumasaalah le. nyang peunteng na kheueh meuman ubak almaseh, dan nyan nyata that lam geunaseh tanyoe ubak ureueng laen. yohmasa ilee gata meujung ngon get! dan jinoenyoe pakon gata hana taat le ubak keuheundak po teu allah? soe nyang ka peusuna gata? pasti nyang peubuet nyan bukan allah nyan ka geutawok gata! "rago nyang bacut teuma jipeukeumang banmandum tepung nyang ka teulawok," jikheun le gob. bah kheueh meunan ulon

teutab mantong peucaya bahwa gata hana ta anut peundirian nyang laen, sabab tanyoe ka meusaboh ngon almaseh. dan ulon yaken that bahwa soe mantong nyang peukaru pikeran gata pasti geuhukom le allah. keuhai ulon, syedara-syedara, pakon ulon hana pioh-pioh jimeumusoh meunoye ulon mantong lon peugah bahwa peuratoran meusnat nyan peureulee? meunoye ulon keubiet na lon peugah lagee nyan, ngon keudroe jih peue nyang ka ulon peugah keuhai saleb almaseh hana tepeuteuka masa alah. leubeh get ureueng-ureueng nyang peukaru pikeran gata nyan jiteubiet mantong lam jeumaah! gata banmandum teutawok beujeuet keu ureueng nyang meurdehka. teuma bek kheueh gata peuguna keubeubaihan gata nyan hana putoh-putoh gata peubuet peue nyang gata galak. nyang sikeubiet jih, gata beuna saleng meugaseh dan saleng tapeutimang. banmandum hukum agama ka teupeusaboh lam peurintah nyang saboh nyoe, "bah kheueh gata saleng tameugaseh seusabe gata manusia lagee gata gaseh droe gata keudroe." teuma meunoye gata saleng tameukrok sabe keudroe-droe, ingat, teuma gata banmandum hanco. nyang ulon meukeusut lagee nyoe: bah kheueh roh allah geubimbeng gata dan bek udeb meunurot tabiat manusia. sabab keuheundak manusia hana suisai ngon keuheundak roh allah, dan keuheundak roh allah hana suisai ngon keuheundak manusia. mandua nyan sabe meulawan, ngon lagee nyan gata hana hase tapeubuet peue nyang gata keuneuk peubuet. teuma meunoye roh allah nyang pimpin gata, ngon lagee nyan gata hana jikuasa le hukum agama. keuheundak tabiat manusia deuh that nibak buet-buet nyang cabui, kutoe dan hana patot; nibak teuseumah beurala dan ieleume guna-guna; nibak meumusoh-musoh, meulo, bingiek ate, bagaih beungeh, dan teupeupeunteng droe keudroe; peupeucahan dan meudong-dong siblaih, meunan cit pikek ate, mabok-mabok, meugura-gura dan laen-laen sibagoe jih. keu banmandum nyan ulon peuingat gata jinoenyoe lagee nyang ka lon peuingat gata yoh masa ilee, bahwa ureueng-ureueng nyang jipeubuet hai-hai nyang lagee nyan hana teuma jeuet keuanggota umat allah. 22 teuma, meunoye ureueng-ureueng nyang jipimpin le roh allah, hase jih na kheueh lagee nyoe: awaknyan saleng na gaseh syang, awaknyan sabe lam geumbira, ate awaknyan teunang, awaknyan saba dan meubudho basa, awaknyan get ateuh ureueng laen dan awaknyan seutia, awaknyan miyueb ate, dan sabe hase jikuasa droe. hana hukum agama nyang larang hai-hai nyang lagee nyan. ureueng-ureueng nyang ka jeuet keu milek isa almaseh, ureueng-ureueng nyan ka jipeumate tabiat manusia jih ngon sigala nafeusan dan nyang jilakee le ate. roh allah ka geubri keugeutanyoe udeb nyang baro; ngon sabab nyan roh allah cit teuma nyang kuasa lam udeb geutanyoe. geutanyoe bek jeuet keu ureueng sombong, dan saleng tapeusaket ate gob, dan pikek ate sidroe ngon nyang laen. syedara-syedara! meunoye sidroe-droe ureueng meuteume teungoh jipeubuet desya, bah kheueh gata nyang udeb meunurot roh allah, gata bimbeng ureueng nyan tapeuwoe bak jalan nyang beuna. teuma hai nyan haroh gata peubuet ngon leumoh leumbot, dan jaga kheueh

bek sampoe gata keudroe teugoda teuma. bah kheueh gata saleng tabantu tatanggong beuban ureueng laen, mangat ngon lagee nyan ka tataat ubak peue nyang geupeurintah le almaseh. meunyoe sidroe-droe ureueng jipike jih nyan leubeh peunteng, padahai hana peunteng, ureueng nyan ka jipeungeut droe jih keudroe. tieb-tieb ureueng bah kheueh jipeureksa droe jih keudroe peu kheueh droe jih nyan get atawa hana. meunyoe get, ureueng nyan jeuet meurasa bangga ateuh hai nyan. teuma hanapeue jipeusa droe ngon peue nyang jipeubuet le ureueng laen. sabab maseng-maseng ureueng haroh jiseuon tanggong jaweueh jih keudroe. ureueng nyang teurimong peue nyang geupeurunoe le almaseh, bah kheueh jimeuweuk ngon guree jih banmandum nyang get nyang na nibak jih nyan. bek sampoe keunong peungeut. allah hana jeuet teupeumeuen! peue nyang jipula, nyan kheueh teuma nyang jipot. meunyoe jipula meunurot tabiat manusia nyang na nibak jih, ureueng nyan teuma jipot mate nibak tabiat jih nyan. teuma meunyoe ureueng nyan jipula meunurot pimpenan roh allah, ureueng nyan teuma jipot udeb seu-jati dan keukai nibak roh allah. ngon sabab nyan, bek kheueh geutanyoe sampoe bosan bak tapeubuet hai-hai nyang get; sabab meunyoe tanyoe hana tapioh bak tapeubuet hai nyan bak saboh watee singoh teuma tateume pot hase jih. ngon lagee nyan, simantong na watee nibak geutanyoe, bah kheueh tapeubuet nyang get ubak mandum ureueng, nyang phon that keu syedara-syedara tanyoe nyang saboh iman ngon tanyoe. simak kheueh beuget-get bagian nyoe nyang ulon tuleh ngon hurof nyang rayeuk-rayeuk. ureueng nyang jitem peubangga droe ngon hai-hai nyang lahe, ureueng nyan kheueh nyang paksa gata mangat gata tem seutot peuratoran meukatan. teuma awaknyan jipeubuet nyan mangat jihnyan hana ji ien-anya le ureueng-ureueng yahudi ngon sabab le saleb almaseh. ureueng-ureueng jiseutot atoran meukatan nyan pih hana jipeujak lagee hukom agama. teuma awaknyan meuharab mangat gata tameukatan, mangat awaknyan jeuet jipeubangga droe bahwa gata tataat ubak peuratoran nyan. teuma ulon mubacut pi hana kutem peubangga droe keuhai peue-peue mantong, seulaen tuhan geutanyoe isa almaseh nyang ka mate jisaleb. sabab, ngon sabab gobnyan ka teusaleb nyan, teuma donya nyoe hana meuguna sapeue keu ulon. dan keuhai donya nyoe, ulon pi siulah-ulah ka mate. meukatan atawa hana meukatan, nyan hana peunteng. nyang leubeh peunteng na kheueh jeuet keumanusia baro. keu ureueng nyang udeb lagee peundirian nyan, dan meunan cit teuma keubanmandum umat po teu allah, ulon meuharab allah geubri keuseujahteuraan dan rahmat gobnyan. oh lheueh nyan, bek kheueh na meusidroe pih jipeususah le ulon nyoe, sabab nibak tuboh ulon na bukeuti-bukeuti bahwa ulon na kheueh murit isa almaseh. seumoga tuhan geutanyoe isa almaseh sabe geubri beureukat keugata banmandum. amin. horeumat kamoe, paulus

umat allah di efesus, nyang seutia ubak isa almaseh! ulon, paulus, rasui isa almaseh ateuh keuhe-undak po teu allah, meuharab seumoga allah bapak geutanyoe dan tuhan isa almaseh geubri beureukat dan sejahtaura ateuh gata. teupujoe kheueh allah, bapak tuhan geutanyoe isa almaseh! gobnyan geubri beureukat ubak geutanyoe ngon sigala beureukat rohani lam syeuruga, sabab geutanyoe meusaboh ngon almaseh. sigohlom donya nyoe geucebta, allah ka geupileh geutanyoe rot almaseh ngon meukeusut mangat tanyoe jeuet keu atra milek gobnyan nyang khusus dan hana meucupa dikeue gobnyan. sabab geunaseh allah, teuma gobnyan ka geupeuteuntee leubeh ilee bahwa rot isa almaseh, gobnyan teuma geu angkat geutanyoe jeuet keu aneuek-aneuek geuh keudroe. dan keubiet nyan kheueh nyang keuneuk geupeubuet. teupujoe kheueh allah nyang agong, sabab rot aneuek gobnyan nyang teucinta gobnyan that-that geugaseh geutanyoe. sabab, ngon mate almaseh, tanyoe geupeu meurdehka le po teu allah, ngon lagee nyan gobnyan ka geupeu amphon tanyoe nibak banmandum desya-desya geutanyoe. gobnyan geupeubuet lagee nyan sabab gobnyan keubiet that geugaseh keutanyoe, dan geunaseh nyan geuro ateuh tanyoe ngon peunoh keubijaksanaan dan peunoh peungeurtian. meunurot nyang geumeuheuet keudroe, allah geupeugah ubak geutanyoe rahsia reuncana gobnyan; gobnyan ka geucok keuputosan bahwa reuncana gobnyan teuma geupeuseulseue rot almaseh. reuncana nyan na kheueh mangat peupeue mantong, bah kheueh nyang na lam syeuruga meunan cit nyang na ateuh rhueng bumoe, jeuet meusaboh ngon almaseh sibagoe ulee. dan hainyan teuma geupeuseulseue le po teu allah meunyo ka trok watee jih. allah geupeubuet peue-peue mantong meunurot nyang geumeuheuet dan peunutoh geuh keudroe. yoh awaikon gobnyan ka geupileh tanyoe sabab gobnyan meuharab geutanyoe jeuet keu umat geuh sabab meusaboh ngon almaseh. bah kheueh geutanyoe, nyang phon-phon that meuharab ubak almaseh, tapujoe allah sabab keuangongan gobnyan! gata pi ka jeuet keu umat allah watee gata deungoe peusan po teu allah, na kheueh haba get nyang teubri seulamata keugata. gata meuman ubak isa almaseh, sabab nyan allah geubri tanda milek gobnyan keugata, na kheueh roh gobnyan nyang ka geupeu janji nyan. roh nyan kheueh sibagoe jaminan bahwa geutanyoe tateurimong peue nyang ka geupeu janji le po teu allah ubak umat gobnyan. nyoe teubri keuyakanan ubak geutanyoe bahwa po teu allah teuma geupeubeubaih umat gobnyan. teupujoe kheueh allah sabab keuangongan gobnyan! ngon sabab nyan, watee lon deungoe gata meuman ubak tuhan isa, dan gata tagaseh banmandum umat allah, ulon hana putoh-putoh lon lakee teurimong gaseh ubak allah keuhai gata. sabe lon tuoh nan gata watee ulon meudoa. ulon meulakee mangat allah tuhan geutanyoe isa almaseh, bapak nyang mulia, geubri roh gobnyan keugata. ngon roh nyan teuma teupeujeuet gata bijaksana, dan teuma teupeugah allah keu gata sampoe gata taturi gobnyan. ulon meulakee mangat allah geubuka pikeran gata sampoe jeuet keu trang; ngon lagee nyan gata muphom peue nyang

gata teume meuharab nibak allah nyang ka geuta-wok gata. meunan cit mangat gata tateupeue padub na jai beureukat-beureukat nyang ceudah meulimpah geukeubah le allah keu umat gobnyan; dan padub na hebat jih allah geumubuet ngon peunoh kuasa lam droe geutanyoe nyang meuman. kuasa allah nyan saban lagee kuasa nyang luwabiasa nyang geupeu guna watee geupeu udeb lom teuma almaseh nibak mate dan geubri ubak gobnyan jabatan nyang paleng manyang meusajan-sajan ngon allah lam syeuruga. jabatan almaseh nyan jioh leubeh manyang nibak jabatan bubena peumeurintah, bubena nyang mat kuasa, bubena peumimpén, bubena teuku-teuku dan keusoe mantong nyang ka geubri keududuekan nyang paleng manyang; bah kheueh nyang udeb bak jamen nyoe meunan cit nyang udeb bak jamen nyang teuma teuka. 22 allah geupeu taklok banmandum nyan dimiyueb keukuasaan almaseh, dan geubri almaseh ubak jeumaah sibagoe ulee nibak peue-peue mantong. jeumaah na kheueh tuboh almaseh, geupeue sampoereuna le gobnyan nyang peusampoereuna peue-peue mantong dipat mantong na. yoh watee ilee gata mate seucara rohani sabab gata meudesa dan gata iengkeue peue-peue nyang geupeurintah le allah. bak watee nyan gata taseutot keulazeman-keulazeman lam donya nyoe; ngon lagee nyan gata taat ubak peunguasa angkasa raya, na kheueh roh nyang bak watee nyoe jikuasa ate ureueng-ureueng nyang hana taat ubak allah. yoh masa ilee tanyoe banmandum saban lagee awaknyan; tanyoe udeb meunurot tabiat manusia teuh keudroe dan tapeubuet peue nyang jipeugalak badan dan pikeran tanyoe. bak watee nyan tanyoe na kheueh ureueng-ureueng nyang keunong meureuka allah cit teuma, saban lagee ureueng-ureueng laen. teuma padubna rayeuk jih keumurahan ate allah! gobnyan keubiet that geugaseh geutanyoe, sampoe watee tanyoe mantong mate seucara rohani sabab buet-buet tanyoe nyang teularang, gobnyan geupeu udeb lom tanyoe meusajan-sajan ngon almaseh. ngon lagee nyan, na kheueh le sabab jroh ate allah, gata geupeu seulamata le gobnyan. sabab tanyoe meusaboh ngon isa almaseh, allah geupeu udeb lom tanyoe meusajan-sajan ngon gobnyan, mangat tanyoe tamat peurintah cit teuma meusajan-sajan gobnyan lam syeuruga. allah geupeubuet lagee nyan mangat bak jamen nyang teuma teuka, manusia hase jikalon padub na rayeuk jih geunaseh allah. geunaseh nyan geupeugah le allah rot ate gobnyan nyang jroh keu geutanyoe ngon peurantaraan isa almaseh. allah geugaseh gata, nyang kheueh sabab jih gobnyan geupeu seulamata gata sabab gata meuman ubak isa. seulamata nyang gata rasa nyan bukan le sabab hase useuha gata keudroe. nyan na kheueh anugeurah allah. ngon lagee nyan, hana meusidroe ureueng pih jeuet jipeusombong droe jih keuhai nyan. tanyoe na kheueh cebtaan allah, dan rot isa almaseh, allah geupeuget tanyoe mangat tanyoe tapeubuet hai-hai nyang jroh nyang ka geukeubah keu geutanyoe. syedara-syedara nyang kon ureueng yahudi! ingat kheueh keuadaan gata yoh masa ilee: gata jipeugah "ureueng hana meusunat", le ureueng yahudi nyang meungaku droe jih meusunat (meukeusut jih nyang ka meuteume tanda bak tuboh

awaknyan). bak watee nyan gata hana meusaboh ngon almaseh, gata na kheueh ureueng aseng nyang hana jitamong lam umat nyang geupileh le allah. gata hana jitamong lam ikatan janji nyang geupeugot le allah ngon umat gobnyan. gata udeb lam donya nyoe ngon hana harapan dan hana allah. teuma bak watee nyoe, sabab gata ka meusaboh ngon isa almaseh, gata nyang yoh masa ilee jioh, ka teupeurab le almaseh mate. sabab almaseh keudroe nyang peudame tanyoe. gobnyan geupeu saboh ureueng-ureueng yahudi dan ureueng-ureueng nyang bukan yahudi jeuet keusaboh bansa. beuton nyang peujioh keu awaknyan, na kheueh saleng meumusoh, ka geupeu hanco le almaseh ngon cara geukeureubeuen droe gobnyan keudroe. hukom agama yahudi ngon peurintah-peurintah dan peurutoran-peurutoran jih ka geusampoh le almaseh mangat dua boh bansa nyan jeuet keusaboh bansa manusia baro, nyang meusaboh ngon gobnyan. ngon caranyan kheueh almaseh geupeuna dame. le mate gobnyan bak kayee saleb, almaseh geupeu saboh dua boh bansa nyan, dan geupeu dame awaknyan ngon po teu allah, ngon lagee nyan teusampoh kheueh saleng meumusoh nyan. nyang kheueh sabab jih almaseh teuka sira geuba haba get keuhai meudame nyan ubak gata; bah kheueh keugata nyang kon ureueng yahudi nyang yoh awai ilee jioh nibak allah, meunan cit keu ureueng yahudi nyang rab ngon allah. ngon peurantaraan almaseh, geutanyoe mandum – bah kheueh ureueng yahudi meunan cit nyang bukan yahudi – le roh allah nyang saboh, jeuet tapeurab ubak bapak. ngon sabab nyan, gata hana jitamong le lamkawan ureueng aseng atawa ureueng luwa. gata jinoenyoe na kheueh saban-saban sibagoe wareuga umat allah. gata na kheueh anggota-anggota keuluwarga allah. gata pih teupudong ateuhe dasai nyang ka jikeubah le rasuirasui dan nabi-nabi, isa almaseh sibagoe batee nyang lumboi sa. gobnyan kheueh nyang suson banmandum bangunan nyan dan jeuet keu baet allah nyang khusus keu tuhan. 22 sabab udeb meusaboh ngon almaseh, gata pih teungoh teupudong meusajan-sajan ngon ureueng laen jeuet keusaboh baet keu po teu allah; nibak tempat nyan allah tinggai ngon roh gobnyan. nyang kheueh sabab jih ulon, paulus, jipeutamong lam glab sabab le isa almaseh keu keupeureulee gata nyang kon ureueng yahudi. teuntee gata katadeungoe bahwa allah, sabab ngon jroh ate gobnyan, ka geubri ubak ulon tugaih nyoe deumi keupeureulee gata. allah geupeugah rahsia reuncana gobnyan dan geupeugah nyan ubak ulon. (keuhainyoe ka ulon tuleh di ateuheh ngon ringkaihi, dan meunyoe gata baca nyan, gata teuma muphom rahsia keuhai almaseh lagee nyang ulon muphom.) yoh watee ilee rahsia nyan hantom na teubri keumanusia, teuma bak watee nyoe roh allah ka geupeugah droe ubak rasui-rasui dan nabi-nabi gobnyan. rahsia nyan na kheueh lagee nyoe: rot haba get nyan, ureueng nyang kon yahudi meusajan-sajan jirasa beureukat allah nyang yoh masa ilee teukeubah keu ureueng yahudi. ureueng-ureueng nyang kon yahudi ka jeuet keu anggota tuboh nyang saban, dan meusajan-sajan jiteurimong peue nyang geupeu janji le po teu allah rot isa almaseh. allah geubri ubak ulon anugeu-

rah – na kheueh tugaih – keuteupeusampoe haba get nyan. ulon teurimong anugeurah nyan rot kuasa allah nyang mubuet lam droe ulon. lam bandum umat allah, ulon kheueh nyang paleng hina. teuma allah geubri ubak ulon karonya nyoe: tugaih keulon jak peusampoe ubak ureueng-ureueng nyang bukan yahudi haba get keuhai keukayaan almaseh nyang hana habeh-habeh nyan; dan meunan cit mangat rot ulon banmandum ureueng jiteupeue pakriban allah, nyang cepta bansigom donya nyoe, geulaksana reuncana gobnyan nyang yoh jamen ilee teurahsia keu donya nyoe. meukeusut allah na kheueh mangat bak watee nyoe, rot jeumaah, banmandum nyang mat keukuasaan nibak angkasa jiteupeue keuhai keubi-jaksanaan allah lam mubagoe rupa hi jih. allah geupeubuet nyan sisuai ngon reuncana gobnyan nyang keukai, nyang geupeubuet ngon peurantaraan isa almaseh tuhan geutanyoe. ngon teumeuman ubak almaseh dan sabab meusaboh ngon gobnyan, keugeutanyoe geubri keubeubaihan keu tapeurab ubak allah ngon peunoh iman. sabab nyan, nyang lon lakee na kheueh: bek kheueh khawate peue nyang ulon deurita le sabab gata, sabab banmandum nyan na kheueh keu keugot gata. ngon sabab nyan kheueh ulon meuteuot dikeue bapak. nibak gobnyan kheueh tieb-tieb keuluwarga bah kheueh nyang na lam syeuruga meunan cit nyang na ateuheh rhueng bumoe nyoe jiteurimong sifeuet gobnyan nyang khusus. ulon meudoa seumoga allah nyang mahamulia geutembri teupeukong baten gata ngon roh gobnyan. seumoga teuma sabab gata meuman ubak almaseh, almaseh tinggai lam ate gata, dan udeb gata meudasai dan jikuasa le geunaseh. ulon meudoa seumoga meusajan-sajan ngon banmandum umat allah, gata meuteume tarasa padubna luwah jih dan panyang jih meunan cit manyang jih dan lhok jih geunaseh almaseh, nyang ngon akai manusia hana hase jipike silhok-lhok jih. seumoga gata taturi geunaseh almaseh nyan, ngon lagee nyan gata peunoh ngon keupribadian allah nyang sampoeurna. ngon kuasa allah nyang biet-biet jimubuet lam tuboh geutanyoe, allah hase geupeubuet jioh leubeh jai nibak peue nyang hase talakee atawa nyang ta pike. seumoga allah teupeumulia tron meutron lam jeumaah, rot isa almaseh. teupujoe kheueh allah siumu masa! amin. nyang kheueh sabab jih ulon – sidroe ureueng hukuman, nyang jihukom sabab lon layani tuhan – lon lakee ngon meuharab that bak gata: udeb kheueh sisuai ngon keududuekan gata lagee ureueng nyang ka geutawok le allah. bah kheueh gata sabe miyueb ate, leumoh leumbot dan rayeuk saba. tunyok kheueh geunaseh gata ngon cara tatulong sidroe ngon nyang laen. useuha kheueh beu biet-biet keu udeb lam dame mangat meusaboh nyang ka geucebta le roh allah teutab teupeulara. teuma na saboh tuboh dan saboh roh. meunan cit gata teuhoi keu jeuet saboh harapan nyang sa. teuma na sidroe tuhan, saboh iman, saboh pumano, dan sidroe allah nyang jeuet keu bapak banmandum manusia. gobnyan kheueh tuhan seumesta alam, nyang mubuet rot banmandum, dan meukuasa ateuheh banmandum. geutanyoe maseng-maseng tateurimong meuneubri meunurot peue nyang geubri le almaseh. lam alk-

itab na teuteuleh lagee nyoe, "watee gobnyan geuek bak tempat nyang manyang, jai that geuba ureueng keunong teun; dan gobnyan geubri peue-peue mantong keumanusia." ngon lagee nyan, meunyo geupeugah "gobnyan geu ek" nyan makna jih phonphon that gobnyan ka geutreun trok ubak tempat nyang paleng miyueb ateuhe bumoe nyoe. dan gobnyan nyang ka geutreun nyan, nyan kheueh teuma nyang ek jioh leubeh manyang nibak banmandum langet, ngon lagee nyan bansaboh alam nyoe ka peunoh ngon gobnyan nyang teuka. gobnyan kheueh nyang "bri raseki-raseki keu umat manusia"; na nyang geuangkat jeuet keu rasui, nyang laen jeuet keu nabi; nyang laen lom jeuet keu ureueng nyang peusampoe haba get nyan, dan nyang laen teuma geuangkat jeuet keu guree-guree dan jipeulara jeumaah. nyoe geupeubuet mangat umat allah geupeu leungkab sampoe peunoh mangat hase jilayani tuhan dan jipeudong tuboh almaseh. ngon lagee nyan tanyoe banmandum ka jeuet keusaboh le iman nyang saban dan peungeurtian nyang saban keuhai aneuek allah. dan tanyoe jeuet keu ureueng-ureueng rayeuk nyang maken treb maken meutamah samporeuna lagee almaseh. ngon lagee nyan tanyoe hana le jeuet lagee aneuek miet nyang hana lom teutab peundirian jiba keudeuh keunoe le mubagoe rupa peundajaran nibak ureueng-ureueng nyang jeuhet. awaknyan jipeusisat gob ngon tipee daya jih. han jeuet! nyang sikeubiet jih tanyoe meuseuti tapeugah hai-hai nyang beutoi ngon ate nyang peunoh gaseh sayang, ngon lagee nyan, lam hai-hai peumanoe tanyoe maken treb maken samporeuna lagee almaseh, nyang jeuet keu panghulee tanyoe. dimiyueb pimpanen gobnyan, banmandum anggota tuboh nyan teususan rapat, dan saleng meukeumat le atos-atos jih maseng-maseng. dan meunyo tieb-tieb anggota nyan jimubuet lagee nyang sibeuna jih, teuma bansaboh tuboh nyan jitimoh jeuet keu rayeuk dan teuga rot gaseh sayang. sabab nyan, deumi nan tuhan, nyoe kheueh teuma ulon peugah dan peuteugaih: bek le kheueh udeb lagee ureueng-ureueng nyang gohlom jituri allah, dan teupike nyang kon-kon. pikeran awaknyan ka teutob. awaknyan hana jituri keu udeb nyang geubri le allah, sabab awaknyan sagai-sagai hana ieleume peungeutuhan mubacut pih keuhai allah. awaknyan lagee nyan, sabab batat ngon kreueh ulee. awaknyan ka hana le peurasaan malee, ngon lagee nyan awaknyan laju jiseutot hawa nafeusu, dan udeb cabui ban galak droe. teuma isa almaseh nyang gata turi kon lagee nyan! gata ka tadeungoe keuhai gobnyan! dan sibago murit-murit gobnyan, keu gata pih ka teupurunoe keuhai sifeuet-sifeuet allah nyang na nibak gobnyan! 22 ngon sabab nyan suet kheueh laju manusia awai ngon pola udeb nyang ka treb nyang teungoh jireuloh le keuheundak-keuheundak jih nyang sisat nyan. bah kheueh ate dan pikeran gata teupeubaroe banmandum. bah kheueh gata udeb sibago manusia baro nyang teucebta meunurot pola allah; na kheueh ngon tabiat nyang beutoi, teupat dan suci. sabab nyan syedara-syedara banmandum, bek le meusulet. beujioe kheueh gata sidroe ngon nyang laen, sabab tanyoe banmandum na kheueh saban-saban anggota tuboh almaseh. meunyo gata beungeh, bek sampoe

le beungeh gata nyan jipeujeuet gata rhot lam desya. bek kheueh beungeh siroe seupot, mangat iblih hana jiteume keuseumatan. 28 ureueng nyang kalazem buet jih ceumeucue pioh kheueh laju nibak buet lagee nyan. bah kheueh ureueng nyan jimubuet mangat meuteume atra hareukat nyang juoe dan hase jitulong ureueng-ureueng nyang kureueng mampu. meunyo gata meututoe, bek kheueh gata peuguna nariet nyang kutoe. peuguna kheueh tutoe haba nyang sifeuet jih teubina dan beuteutulong ureueng laen. tutoe haba nyang lagee nyan teuma jipeuteuka nyang jroh keu ureueng-ureueng nyang deungoe. bek kheueh sampoe tapeuseudeh ate roh allah. keugata ka geuboh materai ngon roh, jeuet keu milek allah. roh nyan cit teuma ka jeuet keujaminan bahwa uroe peubeubaih teuma teuka keu gata. peugadoh kheueh bubena peurasaan saket ate, dam dan beungeh. bek le gata klik-klik sira teumeunak. bek na le peurasaan banci atawa nyang saban lagee nyan. nyang sikeubiet jih, bah kheueh gata beuet ate dan gaseh sayang sidroe ngon nyang laen, dan saleng peumeuah lagee allah pi geupeu amphon gata rot almaseh. gata na kheueh aneuek-aneuek allah nyang geugaseh, ngon sabab nyan gata meuseuti meu-useuha gata turot teuladan allah. udeb gata bah kheueh meujiwa ngon gaseh sayang, lagee almaseh geugaseh tanyoe. gobnyan geukeureubeuen droe geuh keugentanoye, sibago keureubeuen nyang mangat bee dan lumpah that mangat ate allah. gata na kheueh umat allah. sabab nyan, buet-buet nyang cabui dan hana patot teupeubuet, meunan cit ngon leuha, nyang lagee nyan hana jeuet na lamkawan gata. bek sampoe na ureueng laen jeuet keualasan keujipeugah bahwa gata katapeubuet hai-hai nyang lagee nyan. meunan cit hana patot nibak gata tapeuteubiet tutoe haba nyang kutoe, nyang cabui dan nyang hana pantaih. dan nyang sibiet jih bah kheueh gata peugah syukoe ubak po teu allah. simak kheueh beuet-get: ureueng nyang pi-e jih cabui, atawa hana patot, meunan cit leuha (buat nyang lagee nyan saban mantong lagee teuseumah beurala), ureueng nyan hana meuteume jeuet keu anggota umat nyang geupeurintah le almaseh dan allah. bek sampoe gata keunong peunget ngon tutoe haba nyang sulet. sabab hai-hai nyang lagee nyoe kheueh nyang teupeuteuka meureuka allah ateuhe ureueng-ureueng nyang hana taat ubak gobnyan. ngon lagee nyan, bek gata meuhubongan sagai-sagai ngon ureueng nyang lagee nyan. gata yoh watee ilee ka lheureh udeb lam seupot. jinoenyo gata ka jeuet keu umat tuhan, ngon sababnyan gata ka udeb lam peungeh. le sababnyan gata haroh udeb lam trang. sabab lam peungeh nyan kheueh jiteubiet banmandum nyang jroh, ade dan juoe nibak pandangan allah. useuha kheueh beugata turi peue nyang jeuet keumangat ate tuhan. bek gata peubuet buet-buet nyang hana meuguna nyang jipeubuet le ureueng-ureueng nyang udeb lam seupot. sikeubiet jih, gata peuhanco kheueh hai-hai nyang lagee nyan. (sabab hai-hai nyang awaknyan peubuet ngon cara seungab-seungab nyan, keuteupeugah mantong ka teupeuteuka malee.) peue-peue mantong nyang jiloh le peungeh nyan, teuma leumah ngon nyata. sabab mandum nyang deuh teukalon ngon nyata, na kheueh

peungeh. nyang kheueh sabab jih na teupegah lagee nyoe, "beudoh kheueh, hei gata nyang eh, dan beudoh kheueh nibak mate! almaseh teuma meucahya ateuh gata." ngon sabab nyan, peurati kheueh beuget-get cara udeb gata. bek udeb lagee ureueng-ureueng bangai; udeb kheueh lagee ureueng-ureueng carong. peuguna kheueh siget-get jih tieb-tieb keuseumpatan nyang na nibak gata, sabab wateenyo na kheueh watee nyang jeuhet. bek bangai, teuma seulidek kheueh peue nyang geukeuheundak le tuhan. bek kheueh gata mabok le ie anggo, sabab nyang lagee nyan teuma jipeurusak gata. sikeubiet jih, bah kheueh gata jikuasa le roh allah. peuguna kheueh tutoe haba nyang na lam kitab zabur, ca-e puja ngon pujoe dan lagu rohani, bak tieb-tieb gata peugah haba. bah kheueh gata ngon ate nyang geumbira gata meulagu puja ngon pujoe ubak tuhan. sabe-sabe dan keuhai peue mantong, bah kheueh gata peugah teurimong gaseh ubak allah bapak, ateuh nan sia almaseh tuhan geutanyoe. keu teuhoreumat almaseh, bah kheueh gata tundok sidroe ngon nyang laen. 22 purumoh, tundok kheueh ubak lakoe, lagee ubak tuhan. sabab lakoe na kheueh ulee ateuh purumoh jih, saban lagee almaseh panghulee ateuh jeumaah dan gobnyan keudroe na kheueh raja peuseulamat ateuh jeumaah nyang jeuet keutuboh geuh. saban lagee jeumaah tundok ubak almaseh, meunan cit ngon peurumoh lam sigala hai tundok ubak lakoe. lakoe, gaseh kheueh keupurumoh gata, saban lagee almaseh geugaseh jeumaah dan geukeureubeun droe gobnyan keu jeumaah nyan keudroe. almaseh geupeubuet lagee nyan mangat gobnyan jeuet geupeu gleh jeumaah nyan ngon ajaran gobnyan dan rot ie pumano, mangat oh lheureu nyan gobnyan hase geujok ubak allah. ngon lagee nyan almaseh ka geupeujeuet jeumaah nyan teudong ngon agong dan murni dikeue gobnyan, deungon hana cacat cupa mubacut pih. 28 meunan kheueh teuma lakoe beujigaseh keupurumoh saban lagee jigaseh tuboh jih keudroe. ureueng nyang gaseh keupurumoh jih saban cit lagee ka jigaseh keu droe jih keudroe. (hantom na ureueng nyang jibanci keu tuboh jih keudroe. sikeubiet jih, jipeulara dan jijaga lagee almaseh geupeulara jeumaah gobnyan. tanyoe tateupeue nyan, sabab tanyoe na kheueh anggota-anggota tuboh almaseh.) lam alkitab na teutuleh lagee nyoe, "sabab nyan sidroe ureueng agam jitinggai bapak ngon ma jih keujijak meusaboh ngon purumoh jih, dan bandua awaknyan teuma jeuet meusaboh." ayat nyan keubiet lhok tat makna jih. dan lon peusangkot hainyan ngon hubungan almaseh ngon jeumaah. teuma ayat nyan na hubungan jih ngon gata: bah kheueh tieb-tieb lakoe jigaseh keupurumoh jih dan jigaseh teuma keu droe jih keudroe meunan cit tieb-tieb purumoh bah kheueh jiuseuha jihoreumat keu lakoe jih. aneuk-aneuk! sibagoe murit almaseh, taat kheueh keu ureueng tuha gata, sabab nyang kheueh nyang patot gata peubuet. "horeumat kheueh keu bapak ngon ma gata" na kheueh peurintah nyang paleng phon nibak allah ngon janji gobnyan, na kheueh: "mangat gata mubahgia dan panyang umu gata: di bumoe". syedara-syedara nyang jeuet keu bapak! bek kheueh gata peusakat aneuk-aneuk gata leubeh nibak patot sampoe aneuk gata

nyan beungeh. seubalek jih, peurayeuk kheueh aneuk gata nyan ngon ietikeuet nyang jroh dan peungajaran nibak tuhan. syedara-syedara nyang jeuet keunamiet! turot kheueh peurintah po gata nyang na lam donya nyoe. peubuet kheueh nyan ngon peurasaan horeumat dan patuh lom ngon keubiet-keubiet siulah-ulah gata peubuet nyan keu almaseh keudroe. bek kheueh gata peubuet nyang jroh nyan meunyo gata jijaga, teuma keumeuteume jipujoe le manusia. teuma bah kheueh gata peubuet sibagoe namiet almaseh nyang teungoh teuseutot keuheundak allah ngon sipeunoh ate. buet nyang gata peubuet sibagoe namiet nyan, bah kheueh gata peubuet ngon ate nyang mangat siulah-ulah tuhan kheueh nyang gata layani, dan bukan teuma manusia. ingat kheueh bahwa tieb-tieb ureueng, bah kheueh namiet meunan cit ureueng meurdehka, teuma jiteurimong nibak tuhan keuhai-hai nyang jroh nyan jipeubuet nyan. syedara-syedara nyang jeuet keu po! bah kheueh gata meusikeub lagee nyan cit teuma ateuh namiet-namiet gata. bek le gata peuguna ancaman-ancaman. ingat bahwa gata dan namiet-namiet gata nyan, saban-saban na saboh po, gobnyan na kheueh tuhan nyang na lam syeuruga. gobnyan hana geungiang muka. akhe jih, bah kheueh gata teuga ngon teunanga nyang gata teume nibak kuasa tuhan, sabab gata meusaboh ngon gobnyan. peuguna kheueh banmandum peuleungkapan prang nyang geubri le allah keugata, mangat gata hase meuteun talawan siasat-siasat nyang lisek nibak iblih. sabab tanyoe meujuang kon talawan manusia, teuma talawan teunanga banmandum jen-jen nyang jikuasa jamen nyang jeuhet nyoe. tanyoe talawan teunaga roh-roh jeuhet nyang kuasa ruweueng angkasa. sabab nyan, jinoenyo, peuguna kheueh banmandum peuleungkapan prang allah, mangat bak uroe nyang jeuhet gata hase talawan watee jiseurang le musoh. dan watee gata ka lheureu meujuang sampoe akhe, gata mantong teutab gagah peukasa. bah kheueh gata siab sabe. peuguna kheueh keuseutiaan gata ubak allah sibagoe taloe keuieng, dan juoe sibagoe bajee beuso gata. bah kheueh keurilaan ate gata tapeusampoe haba get nyang teuba ubak sejahteura jeuet keusipatu gata. tieb-tieb watee peuguna kheueh peucaya gata ubak tuhan sibagoe sinjata tangkesan gata; ngon iman nyan gata hase tapeulon banmandum aneuk panah meupai nyang teuka nibak sijeuhet. cok kheueh keuseulamatan sibagoe tupi beuso, dan feureuman allah sibagoe peudeueng nibak roh allah. peubuet kheueh banmandum nyan sira meudoa keuteulakee tulong ubak allah. bak tieb-tieb keuseumpatan, meudoa kheueh lagee roh allah geupimpen gata. bah kheueh gata sabe lam keuadaan waspada dan bek meunyeurah. meudoa kheueh sabe keubanmandum umat po teu allah. dan meunan cit meudoa kheueh keu ulon cit teuma, mangat bak watee peugah haba, allah geubri ubak ulon tutoe kata nyang paih. dan mangat ulon ngon beuran hase ulon peugah rahsia haba get nyan. sabab le haba get nyan, ulon ka jeuet keusidroe utosan, dan bak watee nyoe kana lam peunjara. meudoa kheueh mangat ulon kujeuet peugah haba keuhai haba get nyan, lagee toh ulon haroh meututoe haba. tikhikus, syedara tanyoe dan peu-

layan nyang seutia bak buet tuhan, teuma jijak peugah
ubak gata keuhai peue mantong teuntang ulon, dan
mangat gata tateupeue keuhai ulon dan buet ulon.
22 nyang kheueh sabab jih ulon utus jihnyan keugata
keujipeugah keuadaan kamoe keugata banmandum,
mangat ate gata rayeuk. seumoga allah bapak, dan
tuhan isa almaseh geupeumungken banmandum jeu-
maah keu meusaboh dan saleng lam gaseh sayang dan
teutab peucaya ubak almaseh. seumoga allah geubri
beureukat ubak gata mandum nyang teugaseh ubak
tuhan tanyoe isa almaseh ngon gaseh nyang hana hase
teupeulon. horeumat kamoe, paulus

syedara-syedara umat allah banmandum nyang na tinggai di filipi, dan nyang ka meusaboh ngon isa almaseh. meunan cit keu syedara banmandum nyang peumimpin dan peumbantu jeumaah! ulon, paulus, meusajan ngon timotius, namiet-namiet isa almaseh, meuharab that seumoga allah bapak geutanyoe dan tuhan isa almaseh geubri beureukat dan seujahteura atueh gata. tieb-tieb watee ulon teuingat keu gata, dan ulon lakee teurimong gaseh ubak po teu allah. dan pajan mantong watee ulon meudoa keu gata mandum, ulon meudoa ngon mangat ate. ulon lakee teurimong gaseh ubak po teu allah sabab phon uroe phon sampoe bak watee nyoe, gata ka tatulong ulon tajak peusampoe haba get nyang teuka nibak allah. allah keudroe kheueh nyang peuphon buet nyang jroh nyan keu gata, dan ulon yaken that gobnyan teuma geupeubuet laju buet nyang lagee nyan sampoe seulesoe bak uroe isa almaseh geuteuka lom teuma. keubiet ka bak tempat jih ulon na peurasan nyang lagee nyan ubak gata, sabab syedara banmandum sabe rab ngon ate ulon. meunan cit sabab gata meusajan tateurimong meusigoe ngon ulon, anugeurah nyang geubri le allah ubak ulon; bah kheueh watee nyoe teungoh ulon mantong na lam glab meunan cit watee ulon mantong na diluwa keu ulon bila dan ulon peuteun haba get nyan. allah geuteupeue bahwa ulon biet-biet that meucen keu gata ngon peurasan gaseh meusra nyang teuka nibak isa almaseh keudroe. nyoe kheueh doa ulon keu gata: seumoga gata banmandum seumaken tagaseh ubak allah dan seusabe manusia dan laju meutamah lam peungeutahuan nyang beutoi dan pandangan nyang bijaksana. ngon lagee nyan gata tateupeue tapileh peue nyang paleng get, dan udeb gata gleh nibak teucela atawa jitudoh peue mantong nibak uroe almaseh teuka lom teuma. udeb gata teuma meulimpah ngon buet nyang biet-biet get nyang jipeuhase le isa almaseh keudroe; ngon lagee nyan allah teuma jipeumulia dan jipujoe-pujoe. ulon meuharab mangat gata tateupeue, bahwa hai-hai nyang ka teujadi atueh ulon jeuet keusabab leubeu le ureueng deungoe dan jipateh ubak haba get nyan. akibat jih, mandum peugawee meuligoe dan ureueng-ureueng laen nyang na lam banda nyoe jiteupeu bahwa ulon jipeutamong lam glab sabab ulon meuman ubak almaseh. ngon jipeutamong ulon lam glab ka teupeujeuet ureueng-ureueng kristen nyang na lam banda nyoe ka jeuet keu yaken lom keuhai tuhan, ngon lagee nyan awaknyan leubeu jijeuet jipeusampoe peusan allah ngon hana rasa teumakot. beutoi na meupadum droe lamkawan awaknyan nyang jipeusampoe keuhai almaseh sabab bingiek ate dan keuneuk meudakwa, teuma nyang laen jipeusampoe keuhai almaseh sabab na meukeusut nyang murni. ureueng-ureueng nyoe jipeubuet hai nyan sabab awaknyan jigasah keu po teu allah dan ulon, sabab awaknyan ka jiteupeu bahwa allah ka geu-utus ulon keu lon tunyok bak awaknyan bahwa haba get nyan beutoi. teuma ureueng laen jipeugah keuhai almaseh ngon meukeusut nyang hana get; awaknyan jipeusampoe hainyan keu keupeuntengan droe jih. ngon lagee nyan awaknyan meuharab hase jipeubuet ulon nyoe leubeu meukarat lam glab. teuma hana peue!

sabab pakriban kheueh mantong, bah kheueh nyan jipeubuet ngon meukeusut nyang murni atawa ngon meukeusut nyang salah, nyang peunteng almaseh teutab jipeusampoe; ngon lagee nyan ulon galak. dan ulon teutab meurasagee nyan, sabab ulon kuteupeu bahwa ngon doa-doa gata dan ngon geubantu le roh isa almaseh, ulon teuma geupeubeubai. nyang lumpah that lon lakee dan ulon meuharab na kheueh mangat bek sagai-sagai ulon nyoe gagai nibak tugai lon. teuma ulon meuharab that mangat bak tieb-tieb watee, nyang paleng phon jinoenye, ulon hase lon cok sikeub beurani ngon lagee nyan bansigeunab jiwa tuboh lon – bah kheueh ulon udeb atawa ulon mate – almaseh teuteub teupeumulia. sabab nibak ulon, tujuan udeb lon na kheueh almaseh! dan meunye mate nyan na kheueh untong. 22 teuma meunye ngon udeb lam donya nyoe, ulon hase lon keureuja buet nyang leubeu meuguna, teuma ulon hana kuteupeu nyang toh nyang haroh lon pileh. ulon jitarek nibak dua pihak. ulon meuheuet that keuneuk tinggai donya nyoe keu ulon jak tinggai meusajan almaseh, sabab nyan kheueh nyang paleng jroh; teuma, keu keupeuntengan gata, na kheueh leubeu jroh meunye ulon teutab tinggai lam donya. ulon yaken that keuhai nyan. nyan kheueh sabab jih ulon teupeu bahwa ulon teutab tinggai ngon syedara banmandum, mangat hase lon tulong gata beujeuet keuteuga dan seumaken mangat lam meuman gata ubak tuhan. sabab nyan, meunye ulon singoh kugisa ubak gata, gata nyang ka meusaboh ngon isa almaseh teuma gata teume leubeu jai lom alasan keumeurasa bangga atueh droe ulon. ngon lagee nyan, nyang peunteng bak watee nyoe na kheueh gata beu udeb nyang sisuai peue nyang jilakee le haba get keuhai almaseh nyan. ngon lagee nyan, aleh ulon hase meurumpok ngon gata atawa hana, ulon teuma lon deungoe bahwa gata kong tamumat ngon tamejuang meusajan-sajan ngon saboh tujuan dan saboh keuinginan; na kheueh keu keupeucayaan nyang sisuwai ngon haba get nyang teuka nibak allah nyan. 28 bah kheueh gata sabe beurani; bek teumakot atueh lawan-lawan gata. ngon lagee nyan gata tatunyok bahwa awaknyan pasti taloe, dan gata teuma meunang, sabab allah keudroe kheueh nyang peumeunang atueh gata. sabab po teu allah ka geubri anugeurah atueh gata kon keumeuman ubak almaseh mantong, teuma nyang leubeu nibak nyan keumeudeurita keu almaseh. jinoenye gata pi na meusajan ngon ulon lam meujuang nyang sa; na kheueh nyang gata ka lheureh takalon ulon peujuang yoh masa ilee, dan nyang teutab mantong lon peujuang sampoe nibak watee nyoe, lagee nyoe jinoenye ka gata deungoe. gata teuga, sabab gata meusaboh ngon almaseh. dan gata teuhibor sabab almaseh geugaseh gata! gata geubimbeng le roh allah, dan gata pi saleng meugaseh sayang dan na rasa geunaseh sidroe ubak nyang laen. ngon lagee nyan, cuba kheueh gata biet-biet tapeumangat ate lon ngon hai-hai nyang lagee nyoe: udeb kheueh beusaboh ate ngon geunaseh nyang saban, ngon pikanan nyang saban dan tujuan nyang saban teuma. bek kheueh gata peubuet sapeue le sabab jidurong le keupeuntengan gata keudroe, atawa keu gata peusombong droe. nyang sikeu-

biet jih bah kheueh gata maseng-maseng ngon ate nyang miyueb ta anggab ureueng laen leubeh get nibak droe keudroe. peurati kheueh keupeuntengan ureueng laen; bek keupeuntengan droe keudroe. bah kheueh gata na jiwa lagee isa almaseh: nibak da-sai jih gobnyan saban ngon po teu allah, teuma gobnyan hana geurasa droe bahwa keuadaan geuh nyang ilahi nyan meuseuti geupeuteun. nyang sibeuna jih, gobnyan geupeulheuh banmandum nyan laju jeuet keusaban lagee sidroe namiet. gobnyan jeuet lagee sidroe manusia, dan leumah udeb geuh lagee sidroe manusia. gobnyan geupeumiyueb droe, dan udeb ngon taat ubak allah trok an mate – na kheueh mate teusaleb. sabab nyan kheueh allah geuangkat gobnyan simanyang-manyang jih, dan geubri ubak gobnyan keukuasaan nyang leubeh rayeuk nibak peupeue mantong keukuasaan nyang laen. teuma keuteuhoreumat isa, banmandum makhlök nyang na lam syeuruga, meunan cit nyang na ateuhe bumoe, meunan cit nyang di miyueb bumoe, teuma jiseumah gobnyan. awaknyan banmandum teuma jiwa bahwa isa almaseh kheueh tuhan; ngon lagee nyan allah bapak teupeumulia. sabab nyan, syedara-syedara nyang teucinta, lagee toh gata sabe taat ubak ulon bak watee ulon na lamkawan gata, teuma leubeh-leubeh nibak watee nyoe geutanyoe ka jioh, bah kheueh gata teutab taat ubak ulon. gata ka geupeu seumat le allah, ngon lagee nyan useuha kheueh sabe mangat sejahteuata gata jeuet keusampoereuna. peubuet kheueh nyan ngon horeumat dan patuh keu po teu allah, sabab allah keudroe nyang mubuet lam tuboh gata keugeupeujeuet gata rila dan sanggob tapeugalak ate allah. peubuet kheueh peue mantong ngon hana meu krob-krob atawa meudakwa. ngon lagee nyan gata katatunyok bahwa gata na kheueh aneuke-aneuke allah nyang hana meucupa, nyang udeb ngon juJoe dan beutoi lamkawan ureueng juehet dan ureueng meudesa. dan bak watee gata peusampoe ubak awaknyan haba nyang teubri udeb, bah kheueh gata peujeuet keu awaknyan lagee cahya muble-ble jipeutrang donya. meunyoe gata udeb nyang lagee nyan, singoh na alasan nibak ulon keu meurasa bangga ateuhe gata bak watee isa almaseh geuteuka lom teuma. nyan sibagoe bukeuti bahwa pejuangan ulon hana sia-sia dan useuha ulon na hase jih. mungken ulon teuma jipoh mate dan darah ulon jeuet lagee darah keureubeuen nyang teuroe ateuhe peue nyang gata peuseumah ubak po teu allah sibagoe tanda bahwa gata meuman ubak gobnyan. meunyoe keubit nyan meuseuti lagee nyan, ulon meusyukoe ateuhe hainyan dan meusajan meugeumbira ngon gata. meunan cit heundak jih gata meurasa mangat dan meusajan meugeumbira ngon ulon. ulon peucaya bahwa ngon geutulong le tuhan isa, ulon kukirem bubagaih timotius keu gata, mangat ulon hase teuhibor keuhai gata. teuma timotius kheueh sidroe sagai ureueng nyang saboh jiwa ngon ulon, dan biet-biet teupike ubak keubahgiaan gata. banmandum nyang laen nyang jiuroih na kheueh keu keupeuntengan jih keudroe, kon keupeuntengan isa almaseh. 22 gata keudroe ka gata ngieng bukeuti jih bahwa timotius nyan meuguna. jihnyan ka jimubuet brat that meusajan ngon ulon keuteujak peusampoe haba get nyang

teuka nibak allah. kamoe bandua deuh jih lagee aneukek ngon bapak. ngon sabab nyan, reujang that oh lheuoh lon teupeue pakriban peukara ulon akhe jih singoh, ulon teuma lon kirem jih nyan ubak gata. ulon peucaya bahwa ngon tulong tuhan, ulon keudroe pih hana treb le lon jak saweue gata. keuhai syedara tanyoe di epafroditus nyang gata kirem keu jitulong ulon, ulon meurasa that peureulee lon yue jihnyan jigisa ubak gata. jihnyan ka jibantu ulon nibak lam buet dan pejuangan lon. jihnyan meucen that-that keugata banmandum, dan jihnyan sosah that sabab gata ka meuteume haba bahwa jihnyan saket. keubiet beutoi jihnyan saket karab habeh umu. teuma allah geugaseh keu jih nyan; dan kon keu jih mantong, teuma keu ulon cit teuma, mangat ulon bek sampoe meutamah seudeh. 28 nyang kheueh sabab jih seumaken rayeuk mantong keuheundak ulon keu lon yue jihnyan jigisa ubak gata, jeuet gata mangat ate lom meunyoe gata ka meurmupok ngon jih nyan, dan ate ulon pih jeuet keumangat. ngon lagee nyan, sambot kheueh jihnyan ngon ate nyang mangat sibagoe sidroe syedara nyang saboh iman. hareuga kheueh mandum ureueng nyang lagee jih nyan. deumi keu keupeuntengan buet almaseh, jihnyan rab habeh umu; jihnyan jisabong nyawong keujibri seunulong keu ulon ateuhe nan gata. akhe jih, syedara-syedara lon, bah kheueh gata meugeumbira sabab gata ka meusaboh ngon tuhan. ulon hana meurasa brat peue nyang ka lon tuleh keu gata sigohlom nyan; sabab hainyan get keu keuseulamatan gata. ate-ate kheueh keu ureueng-ureueng nyang jipeubuet hai-hai nyang juehet, ureueng-ureueng nyang patot teukheun 'asee'. awaknyan jipaksa jeuet mandum ureueng teupeukatan. padahai tanyoe kheueh ureueng-ureueng nyang ka tateurimong meukatan nyang seujati, kon awaknyan. tanyoe taseumah alah lon bimbengan roh allah keudroe, dan tanyoe meusyukoe sabab geutanyoe udeb meusaboh ngon isa almaseh. tanyoe hana meugantung ubak upacara-upacara nyang sifeuet jih lahe. nyang sibeuna jih ulon jeuet mantong lon meugantueng ubak upacara-upacara nyan. sabab meunyoe na sidroe-droe ureueng bak jih nyan na alasan keujimeugantung nibak upacara nyang sifeuet jih lahe, ulon leubeh lom. ulon teupeukatan watee ulon meu-umu lapan uroe. ulon lahe sibagoe ureueng israel, nibak sukee bansa benyamin; ulon aseuli ureueng ibrani. lam hai taat ubak hukom-hukom agama yahudi, ulon na kheueh anggota golongan fariis. ulon keubiet that-that meuseumangat lon ienanya jeumaah. meunyoe teutilek rot hukom agama yahudi, ulon sidroe ureueng get nyang hana meucupa. teuma le sabab almaseh, banmandum nyang yoh ilee lon anggab sibagoe nyang jibri laba nibak ulon, jinoenyoe keubiet ka jeuet keusipeu-peu nyang lumpah that rugoe. kon mantong hai-hai nyang teupeugah nyan, teuma peupeue mantong nyang lon anggab hai-hai nyang rugoe mubara. nyang na nibak ulon watee nyoe na kheueh nyang paleng meuyuem; na kheueh lon turi isa almaseh, tuhan ulon. sabab almaseh, banmandum nyan ka ulon boih banmandum. ulon anggab banmandum nyan lagee bloih mantong, mangat ulon hase meuteume almaseh, dan biet-biet meusaboh ngon

gobnyan. hubungan yang jroh ngon po teu alah hana le lon useuha keudroe ngon cara lon taat ubak hukom agama. jinoenyoe ulon na hubungan yang jroh ngon allah, sabab ulon meuiman ubak almaseh. teuma, hubungan yang jroh nyan teuka jih nibak allah, dan ngon dasai jih meuiman ubak isa almaseh. saboh sagai yang ulon lakee, atra nyan na kheueh jeuet ulon kuturi almaseh, dan lon rasa kuasa yang teupeu-udeb gobnyan nibak mate. ulon meuharab beumeusajan meudeurita ngon gobnyan dan beujeuet keusaban ngon gobnyan lam hai mate gobnyan. dan ulon meuharab bahwa ulon keudroe teuma geupeu udeb lom teuma nibak mate. ulon hana lon peugah bahwa ulon ka meuhase, atawa ka jeuet keusampoereuna. teuma ulon hana putoh lon useuha keu lon reubot hadiah yang ka geukeubah le isa almaseh. keunyan kheueh gobnyan ka geureubot ulon dan geupeujeuet ulon keumilek gobnyan. ka teuntee, syedara-syedara, ulon yang sibeuna jih hana lon peugah bahwa ulon ka meuhase lon reubot hadiah nyan. teuma na saboh hai yang ulon peubuet, hainyan na kheueh ulon putuwoe peue nyan na dilikot ulon, dan lon useuha ngon biet-biet that beumeuteume peue nyan na dikeue. yang kheueh sabab jih ulon teutab kuplueng mangat meuteume tujuan akhe mangat meuteume meunang, na kheueh udeb lam syeuruga; keu nyan kheueh allah geuta-wok tanyoe rot isa almaseh. tanyoe mandum yang ka rayeuk seucara rohani, lagee nyan kheueh yang siget jih tameusikeub. teuma meunyo na lamkawan gata nyan sikeub jih laen, teuma po teu allah geupeu trang teuma ubak gata. teuma hainyoe yang haroh gata peurati: tanyoe meuseuti taudeb meunurot peuraturan yang ka taseutot trok bak watee nyoe. syedara-syedara lon banmandum! seutot kheueh teuladan ulon. kamoe ka kamoe bri teuladan yang beutoi, sabab nyan ngieng kheueh beuet-get bak ureueng yang ka jiseutot teuladan kamoe nyan. ulon ka kayem that ulon britee ubak gata, dan jinoenyoe ulon ulang lom ngon cara ulon mo, bahwa na dan jai that ureueng yang udeb jih jipeurusak makna almaseh mate bak kayee saleb. udeb ureueng-ureueng yang lagee nyan akhe jih teuma rhot ubak hanco, sabab ilah awaknyan na kheueh keuheundak tuboh jih keudroe. hai-hai yang teupeumalee, nyan kheueh yang awaknyan peubangga; sabab awaknyan yang jipike keuhai-hai yang na hubungan ngon donya nyoe mantong. teuma geutanyoe na kheueh wareuga neugahra syeuruga. nibak tempat nyan kheueh teuma raja peuseulamat geutanyoe, tuhan isa almaseh, teuma teuka. gobnyan kheueh yang tanyoe preh-preh ngon meucen lumpah na. tuboh geutanyoe yang leumoh dan hase hanco nyoe, teuma geu-ubah le almaseh jeuet lagee tuboh gobnyan keudroe yang mulia. gobnyan hase geupeubuet nyan sabab bak gobnyan na kuasa keugeupeutaklok peue-peue nyan na. sabab nyan, syedara-syedara ulon yang lon cinta, meunan kheueh kira jih gata udeb ngon biet-biet meuiman ubak tuhan. ate ulon meucen that keugata! gata kheueh keubanggaan ulon yang peujeuet ulon geumbira. gata hei inong euodia dan meunan cit gata inong sintike! ulon lakee ngon meuharab that mangat gata saboh ate sibagoe ureueng-ureueng

nyang saboh iman. keu rakan ulon yang seutia, ulon lakee cit mangat gata bantu ureueng inong nyoe. awaknyan ka jimubuet brat that meusajan ulon keuteupeusampoe haba get yang teuka nibak allah; saban cit lagee klemen dan banmandum ureueng laen yang jimeukeureuja meusajan ulon. nannan awaknyan na lam kitab ureueng udeb. seumoga gata sabe lam geumbira sabab gata ka udeb meusaboh ngon tuhan. sigoe teuk ulon peugah: meugeumbira kheueh! bah kheueh mandum ureueng hase jikalon sikeub gata yang get ate. sabab hana treb le tuhan teuma teuka. bek kheueh khawate keuhai peue mantong. lam hai-hai peue mantong. lam sigala hai meudoa kheueh dan kirem kheueh meulakee gata ubak allah. peue yang gata peureulee, bri tee kheueh nyan ubak po teu allah ngon cara gata peugah teurimong gaseh. teuma sejahteura yang teuka nibak allah hana mungen hase jimuphom le manusia, teuma jeuet ate dan pikeran gata yang ka meusaboh ngon isa almaseh. akhe jih, syedara-syedara, pasoe kheueh pikeran gata ngon hai-hai yang na asoe, yang patot teupujoe, na kheueh hai-hai yang beutoi, yang teuhoreumat, yang ade, mureuni, mameh, dan jroh. peujak kheueh peue nyan ka gata meurunoe dan gata teurimong nibak ulon; bah kheueh nyan nibak tutoe haba meunan cit nibak buet-buet nyan ulon keureuja. allah teumpat sigala sejahteura, teuma na meusajan gata. lam udeb lon yang meusaboh ngon tuhan, ulon meurasa mubaghia that, sabab oh ka ltheueh meunan treb, jinoenyoe gata na watee lom tapike ulon. yang lon meukeusut kon gata katauwoe keulon; gata keubiet takalon ulon, teuma gata hana meuteume watee keugata nyoyok hainyan. ulon peugah nyoe kon sabab di ulon nyoe kakureueng sipeue-peue, sabab ulon ka lon meurunoe teuras puih ngon peue nyan na. ulon ka lon rasa udeb lam keuadaan kureueng hana sapeuena, dan ka teuma lon rasa udeb ngon atra nyan leubeh. ulon ka lon teupeu rahsia jih keu ulon hadab keuadaan yang pakriban mantong; bah kheueh lam keuadaan makmu meunan cit lam keuadaan gasien, bah kheueh lam keuadaan meuwah meunan cit lam keuadaan kureueng hana sapeuena. ngon kuasa yang geubri le almaseh keu ulon, nibak ulon kana teunaga keu lon meuhadab ubak peue-peue mantong keuadaan yang teuka. teuma gata katatulong ulon lam keuadaan ulon sosah; dan peue yang gata peubuet nyan keubiet get lagoena. syedara-syedara ureueng filipi! gata keudroe tateupeue that bahwa bak watee ulon tinggai makedonia yoh masa ilee, bak watee haba get nyan ulon tabu phon-phon that, gata kheueh saboh sagai jeumaah yang tulong ulon; dan gata teuma saboh sagai jeumaah yang meusajan ngon lon tarasa laba rugoe. bak watee ulon na di tesalonika dan ulon peureulee bantuan, ka leubeh nibak sigoe gata kirem bantuan ubak ulon. nyan kon meumakna bahwa ulon teuma keuneuk teurimong meuneubri. yang ulon lakee na kheueh mangat ulon jeuet lon ngieng hase-hase yang teutamah keulaba gata. ulon ka kuteurimong banmandum – bahkan leubeh nibak yang seb! banmandum meuneubri yang gata kirem keu ulon, ka lon teurimong meulalu epafroditus. jinoenyoe ulon kana banmandum

nyang ulon peureulee. meuneubri-meuneubri nyang nibak gata nyan na kheueh lagee bee mangat nyang teupeuseumah ubak po teu allah dan nyang geuturimong le allah ngon mangat ate. allah nyang ulon seumah, nyang meulimpah ngon keukayaan lam isa almaseh, teuma teupeupeunoh peue-peue nyang gata peureulee. teupujoe kheueh allah bapak geutanyoe siumu masa! amin. peutrok kheueh saleuem ulon ubak banmandum umat allah nyang meusaboh ngon isa almaseh. dan teurimong kheueh teuma saleuem nibak syedara-syedara nyang na meusajan ulon disinoe. 22 banmandum umat allah nyang na lam banda nyoe, nyang phon that awaknyan nyang na lam meuligoe kaisar, jikirem saleuem keugata mandum. seumoga tuhan geutanyoe isa almaseh geubri beureukat keugata mandum. horeumat kamoe, paulus dan timotius

syedara-syedara umat allah di kolose yang seutia meusaboh ngon almaseh! sibagoe rasui isa almaseh, – nyang geuangkat le allah – ulon, paulus, meusajansajan ngon syedara-syedara geutanyoe timotius, meuharab seumoga allah bapak geutanyoe geubri beureukat dan seujahteura ateuah gata. kamoe ka meudeungoe bahwa gata meuiman ubak isa almaseh dan gata tagaseh keumandum umat allah. nyang kheueh sabab jih watee kamoe meudoda keugata, kamoe sabe kamoe lakee teurimong gaseh ubak allah, bapak tuhan geutanyoe isa almaseh. gata meuiman dan gata tagaseh, sabab gata meuharab teuma peue nyang ka geukeubah lam syeuruga le allah keugata. gata katadeungoe keuhai nyan, bak watee haba get nyang beutoi teupesampoe keu gata. haba nibak po teu allah meutabu bansigom donya, dan udeb manusia sabe teubri beureukat le haba nyan, sabab lagee udeb gata geubri beureukat watee phon that gata deungoe keuhai rahmat allah dan biet-biet gata amai. hai nyan jipeutrok bak gata le epafra, rakan nyang kamoe gaseh. jihnyan na kheueh ureueng nyang mubuet keu almaseh nyang ka seutia jimeukeureuja keu keupeuntengan tanyoe. nibak jihnyan kamoe deungoe bahwa ngon kuasa roh allah gata hase saleng meugaseh sayang. nyang kheueh sabab jih kamoe sabe meudoda keugata watee phon that kamoe deungoe keuhai gata. kamoe lakee ubak allah mangat roh allah geubri keugata keubijaksanaan dan peungeurtian sampoe gata tateupeue ngon sampoereuna peue nyang geukeuheundak le allah. ngon lagee nyan gata hase udeb meunurot keuheundak allah, dan sabe tapeugalak ate gobnyan, sampoe lam hai peue-peue mantong gata hase tapeuhase hai-hai nyang get. dan ieleum gata keuhai allah pih meutamah teuma. peunoh harapan, ngon kuasa nibak allah nyang agong, gata teupeuteuga sampoe gata hase tapeuteun deuritak priban mantong ngon saba dan mangat ate dan ngon teupeugah teurimong gaseh ubak bapak. sabab bapak nyan kheueh nyang peujeuet gata jeuet gata teurimong peue nyang geukeubah le allah keu umat gobnyan lam keurajeun gobnyan nyang trang. gobnyan ka geupeuleuh geutanyoe nibak kuasa nyang seupot dan geupinah geutanyoe u dalam keurajeun aneuek gobnyan nyang geugaseh. le aneuek gobnyan tanyoe geupeubeubaih; ngon lagee nyan banmandum desya-desya geutanyoe ka geupeu amphon. almaseh na kheueh gamba nyang nyata nibak droe allah nyang hana leumah teukalon; almaseh na kheueh aneuek nyang tuha, leubeh peunteng nibak banmandum nyang geucebta. sabab meulalu gobnyan kheueh allah geucebta peue-peue mantong nyang na lam syeuruga dan nyang na ateuah rhung bumoe, peupeue mantong nyang deuh teukalon dan nyang hana deuh teukalon, jitamong cit keunan mandum roh nyang meukuasa dan nyang mat peurintah. bansigom donya nyoe geucebta rot lalu almaseh dan keu almaseh. sigohlom na peue-peue mantong ateuah rhung donya nyoe, almaseh ka leubeh ilee na. dan le sabab gobnyan kheueh teuma peue-peue mantong na nibak teupat jih maseng-maseng. gobnyan kheueh ulee nibak tuboh geuy, nyan kheueh jeumaah, sabab gobnyan kheueh punca udeb banmandum jeumaah nyan. gobnyan kheueh aneuek nyang tuha,

nyang phon-phon that geupeu udeb lom teuma nibak mate, mangat gobnyan keudroe mantong nyang jeuet keu nyang paleng peunteng ateuah peue-geue mantong. allah keudroe nyang lakee mangat peue-peue mantong nyang na nibak droe allah, na cit teuma meuteume ngon leungkab nibak droe aneuek gobnyan. dan rot aneuek nyan teuma allah geucok keuputusan keugeupeuet peue-peue mantong jimeuet lom teuma ngon gobnyan – bah kheueh nyang na peue-peue ateuah rhueung bumoe, meunan cit nyang lam syeuruga. allah geupeubuet nyan rot aneuek gobnyan mate bak kayee saleb. yoh masa ilee gata jioh nibak po teu allah. gata meumusoh ngon gobnyan sabab pi-e dan pikeran gata jeuhet. 22 teuma jinoenoye, ngon mate aneuek gobnyan, allah geupeujeuet hubungan gata ngon gobnyan jeuet keu get lom teuma. ngon cara nyan gata hase teuba meuhadab allah lam keuadaan nyang suci, gleh dan hana meucupa. teuma gata kateuntee dan meuseuti teutab seutia meuiman dan teudong cot nibak keuimanan gata. bek sampoe gata peulheueh harapan gata nyang ka geubri keugata watee gata tateurimong haba get nyang teuka nibak allah. haba nyan ka geupeusampoe ubak tieb-tieb ureueng bansigom donya. dan keunyan kheueh teuma ulon, paulus, ka jeuet keupeulayan. jinoenoye ulon galak meudeurita deumi keu keupeuntengan gata. sabab ngon na peundeurtian bak tuboh ulon, ka lon peuleungkab peue nyang meuseuti geudeurita le almaseh keujeumaah gobnyan, na kheueh tuboh gobnyan. allah geuyue ulon jeuet keupeulayan jeumaah gobnyan deumi keu keupeuntengan gata. ulon meuseuti lon peusampoe haba nyang teuka nibak allah, banmandum; na kheueh haba nyang ka meubab-abat nyang ka ltheueh geusom le po teu allah keumandum ureueng, teuma watee nyoe ka geupeugah keu umat gobnyan. ubak umat geuhnyan allah geupeugah padun na get jih dan agong jih rahsia geuhnyan keu banmandum umat manusia. rahasia nyan na kheueh: almaseh na lam tuboh gata, nyang meumakna bahwa gata teuma meusajan tarasa keubeusaran allah. 28 almaseh nyan kheueh nyang kamoe peugah ubak tieb-tieb manusia. kamoe peungat dan kamoe peurunoe awaknyan banmandum ngon sigala bijaksana. tujuan kamoe na kheueh mangat tieb-tieb ureueng hase teuba ubak allah, sibagoe ureueng nyang ka rayeuk lam hai-hai rohani, sabab ka meusaboh ngon almaseh. keumeuteume hainyan ulon meukeureuja brat. ulon mejuang ngon sigeunab teunaga nyang ka geubri le almaseh ubak ulon dan nyang mubuet lam tuboh ulon ngon peunoh kuasa. ulon meuharab mangat gata teupeu pakriban brat jih ulon mejuang deumi keugata dan keu awaknyan nyang na di laodikia dan banmandum nyang hana jituri keulon seucara pribadi. banmandum nyoe ulon peubuet mangat ate awaknyan beujeuet keuteuga dan awaknyan saleng lam gaseh sayang ngon lagee nyan awaknyan beujeuet meusaboh. deungon lagee nyan awaknyan biet-biet muphom dan yaken lom jituri rahsia allah, na kheueh almaseh keudroe. almaseh kheueh nyang peutrang banmandum keubijaksanaan dan peungeutuhan allah nyang yoh masa ilee teusom. ulon peugah nyoe mangat gata bek jipeunget le soe mantong

nyang babah jih mameh ateuh gata. dan bah kheueh ulon nyoe jioh nibak gata, anggab kheueh ulon na meusajan gata. dan ulon mangat that ate watee lam ngieng gata siate dan teugoh tameuiman ubak almaseh. syedara banmandum ka tateurimong isa almaseh sibagoe tuhan. le sabab nyan bah kheueh gata udeb meusaboh ngon gobnyan, dan meu-ukeue lam gobnyan. bah kheueh gata tapeudong udeb gata ngon almaseh sibagoe dasai jih. bah kheueh gata seumaken tameuiman ubak almaseh, meunurot peue nyang ka teupeurunoe ubak gata. dan bah kheueh ate gata bumangat that sira tapeugah teurimong gaseh. bah kheueh gata beuate-ate, bek sampoe na nyang jipakat gata ngon falsafah-falsafah manusia nyang hana meuguna, nyang na keubiet jipeuisat. falsafah-falsafah nyan asai jih kon nibak almaseh, teuma nibak peundapat manusia mantong dan nibak roh-roh nyang meukuasa lam donya. sabab banmandum pribadi alah na tinggai lam almaseh, na kheueh nibak keumusiaan gobnyan. dan sabab udeb meusaboh ngon almaseh, keugata pih teubri udeb nyang sipeunoh jih. sabab almaseh na kheueh ulee ateuh tieb-tieb roh nyang meukuasa dan nyang mat peurintah. sabab meusaboh ngon almaseh, gata kateupeukatan, kon ngon peukatan nyang jipeubuet le manusia, teuma ngon meukatan nyang geupeuget le almaseh, nyang peubeubaih gata nibak kuasa tabiat nyang meudesya. sabab bak watee gata teupumano, gata teukubu meusajan-sajan almaseh; dan ngon pumano nyan cit teuma, gata meusajan teupeu udeb lom teuma meusajan almaseh sabab gata peucaya ubak kuasa allah nyang ka geupeu udeb almaseh nibak mate. yoh masa ilee, gata ka mate seucara rohani sabab gata meudesya, dan sabab gata hana teupeukatan seucara lahe. teuma jironyoe allah geupeu udeb gata meusajan-sajan ngon almaseh. allah ka geupeu amphon banmandum desya-desya geutanyoe, dan geupeubateue surat utang ateuh geutanyoe, nyang jiancam geutanyoe ngon syarat-syarat nyang brat. deungon teusaleb surat nyan bak kayee saleb, allah geupeu amphon banmandum peukara ateuh geutanyoe. nibak saleb nyan almaseh geupeugot banmandum roh-roh nyang mat peurintah dan nyang meukuasa ka jeuet hana meudaya le. awaknyan ka jeuet keubeunda nyang jinnton le ureueng rame bak watee almaseh geuireng awaknyan sibagoe ureueng teuteun lam pawai keumeunangan. sabab nyan bek kheueh tapeubiyeu ureueng laen jipeusalah gata keuhai peunajoh atawa nyang gata jieb, atawa keuhai uroe-uroe raya keuagamaan, atawa peurayaan-peurayaan buleuen baro, atawa keuhai uroe sabat. banmandum nyan na kheueh bubayang mantong nibak hai-hai nyang teuma teuka, teuma keunyataan nibak hai-hai nyan na kheueh almaseh! bek kheueh gata tapeubiyeu droe jipeurugoe le ureueng-ureueng nyang pura-pura peumiyueb droe dan nyang seumah malaikat-malaikat. ureueng nyan sombong ngon pikeran-pikeran donya dan jipeubangga-bangga droe ngon peue-peue nyang jikalon nyang khusus, sampoe hana le jimumat ubak almaseh nyang jeuet keu ulee. dimiyueb pimpenan almaseh, bansaboh tuboh geupelara dan teupeusaboh le jeueb-jeueb seundi jih, dan timoh meunurot keuheundak allah. gata

ka mate meusajan-sajan ngon almaseh, dan ka geupeubeubaih nibak roh-roh nyang kuasa ateuh alam nyoe. ngon lagee nyan, pakon gata udeb lagee ureueng nyang mantong jikuasa le donya nyoe? pakon gata tundok ubak peuratoran-peuratoran nyoe, "bek mat nyoe", "bek cilet nyan", "bek cukeh nyoe?" 22 banmandum atoran nyan na kheueh keuhai-hai nyang meunan jimat hana meuguna le. nyan na kheueh atoran-atoran dan peungajaran-peungajaran nyang jipeuget le manusia. beutoi deuh jih hainyan bi-jaksana, ngon cara jiyue mangat manusia jiseumah malaikat, peumiyueb droe dan teuseksa droe; teuma banmandum nyan hana meuguna keuteukeundali nafeusu manusia. gata ka teupeu udeb lom teuma meusajan-sajan almaseh. sabab nyan bah kheueh gata useuha keumeuteume hai-hai nyang lam syeuruga, dipat almaseh geumat peurintah meusajan allah. peupusat kheueh pikeran gata bak hai-hai nyang na disinan, bek bak hai-hai nyang na lam donya. sabab gata ka mate, dan udeb gata teusom meusajan almaseh lam allah. ngon lagee nyan, punca udeb gata nyang sejuti na kheueh almaseh dan watee gobnyan leumah singoh gata pi teuma teuka deungon gobnyan lam keubeusaran geuh! sabab nyan, peumate kheueh nyang jimeuheuet le donya nyan jipeukaru droe gata, lagee buet cabui, hai-hai nyang hana teupujoe, hawa nafeusu, meulakee nyang jeuhet, dan seurakah (sabab seurakah nyan na kheueh saban lagee teuseumah beurala). hai-hai nyang lagee nyan kheueh nyang jeuet meukabiat ubak meureuka allah ateuh ureueng-ureueng nyang hana taat. yoh masa ilee gata keudroe pi taturot hai-hai nyang meuheuet nyan, bak watee gata jikuasa le jih nyan. teuma bak watee nyoe bah kheueh gata tiek hai-hai nyang jeuhet lam tuboh gata: bek beungeh le, atawa bingkeng hana meuteuntee dan na rasa banci keu ureueng laen. bek sagai-sagai jiteubiet lam babah gata tutoe haba teumeunak atawa tutoe nyang kutoe. bek meusulet sidroe ngon nyang laen, sabab udeb nyang awai nyang peue mantong sifeuet jih ka gata tinggai. gata jinoenyoe ka teubri udeb nyang baro. gata na kheueh manusia baro, nyang teugoh geupeu baro hana putoh-putoh le nyang cebta, nyan kheueh allah, meunurot hi geuh keudroe. meukeusut jih na kheueh mangat gata taturi allah ngon sampoereuna. sibagoe akibat nibak mandum nyan hanco kheueh peupeue mantong nyang na meubeda ureueng yahudi ngon kon ureueng yahudi, ureueng meukatan ngon ureueng nyang hana meukatan, hana meubeda le ureueng aseng ngon ureueng biadab, sidroe namiet ngon ureueng meurdehka, sabab almaseh na kheueh sigala-gala jih dan gobnyan meusaboh ngon mandum nyan! gata na kheueh umat allah, allah geugaseh gata dan geupileh gata keujeuet keumilek gobnyan nyang khusus. nyang kheueh sabab jih meuseuti tatunyok gaseh sayang, gata haroh get ate, miyueb ate, leumoh leumbot, dan ek gatateun meudeurita. gata meuseuti sabab sidroe ngon nyang laen, dan saleng tapeu amphon meunyoe na nyang troh dam ateuh ureueng laen. tuhan ngon mangat ate geupeu amphon gata, ngon lagee nyan gata pih meuseuti beutatum peu amphon sidroe ngon nyang laen. dan nyang paleng peunteng na kheueh: gata meuseuti

saleng tameugaseh sabab gaseh nyan kheueh nyang peusaboh gata banmandum sampoe jeuet keusampoereuna. bah kheueh peue-peue mantong nyang gata cok keuputosan jipeuteuntée nibak dame nyang geubri le almaseh lam ate gata. sabab allah geuta-wok gata jeuet keu anggota saboh tuboh, mangat gata udeb lam dame nibak almaseh nyan. bah kheueh gata meuteurimong gaseh. bah kheueh ajaran-ajaran almaseh nyang peunoh beureukat jillob lam ate gata. bah kheueh gata saleng peurunoe dan saleng tabri naseuhat ngon bijaksana mungkin. meuca-e kheueh ngon lagu-lagu zabur puja dan pujoe meunan cit lagu-lagu rohani; meulagu kheueh keu po teu allah ngon peurasan syukoe lam ate gata. peue mantong nyang gata peubuet atawa nyang gata peugah, bah kheueh nyan gata peubuet atawa gata peugah lam nan tuhan isa. meusyukoe kheueh ubak allah bapak keupeue nyang geupeubuet le isa keugata. hei gata-gata nyang jeuet keupurumoh! taat kheueh ubak lakoe gata, sabab meunan kheueh nyang sibeunajih peurangoe gata sibagoe ureueng kristen. hei gata-gata nyang jeuet keu ureueng lakoe! gaseh kheueh keupurumoh gata. bek gata peubuet gata ateuh purumoh teuh nyan. aneuek-aneuek! na kheueh keujawaban gata sibagoe ureueng kristen keusabe ta-taat ubak ayah ngon ma, sabab lagee nyan kheueh nyang jeuet keu mangat ate allah. hei gata-gata nyang jeuet keu ayah! bek gata peusaket ate aneuek-aneuek gata akhe jih aneuek gata nyan jeuet keuputoh asa. 22 hei gata-gata nyang jeuet keu namiet! lam hai peue mantong, bah kheueh gata taat ubak po gata nyang lam donya nyoe. bek kheueh taat ubak awaknyan watee awaknyan teungoh jikeumiet gata, sabab gata meuheuet jipujoe. taat kheueh ubak awaknyan ngon ate nyang ikhlaih, sabab gata tahoreumat tuhan. buet peue mantong nyang geubri ateuh gata, bah kheueh gata peubuet ngon sipeunoh ate, siulah-ulah tuhan kheueh nyang gata peutimang, dan kon manusia mantong. ingat kheueh bahwa gata teuma tateurimong upah nibak tuhan. peue nyang geukeubah le tuhan keu umat gobnyan, nyan kheueh nyang teuma geubri keugata. sabab amphon nyang sibeuna jih nyang teungoh gata peutimang nyan na kheueh almaseh keudroe. dan soe mantong nyang peubuet salah, teuma jitanggong buet-buet jih nyang salah nyan; sabab tuhan hana geupandang muka. syedara-syedara nyang jeuet keu amphon! bah kheueh gata peusanéut namiet-namiet gata ngon beuna dan ade. ingat kheueh bahwa gata pih na sidroe amphon lam syeuruga. bah kheueh gata meudoa ngon khusyuek dan sabe siab waspada, sira gata peugah syukoe ubak allah. meudoa kheueh teuma keukamoe mangat allah geubri keukamoe keuseumpatan nyang jroh keukamoe peusampoe haba keuhai almaseh. sabab hainyan kheueh jinoenyoe ulon na lam rumoh glab. meudoa kheueh mangat ulon hase lon peugah rahsia nyan ngon sijeulaih-jeulaih jih lagee nyang sibeuna jih. lam hubongan gata ngon ureueng-ureueng nyang hana meuiman, bah kheueh gata udeb bijaksana dan gata peuguna tieb-tieb keuseumpatan ngon siget-get jih. bah kheueh hai-hai nyang gata peugah nyan sabe mangat dan teutarek ate. bah kheueh gata tateupeue pakriban nyang sibeuna jih gata meuseuti ta-

jaweueb peue-peue nyang jitanyong le gob. tikhikus, syedara tanyoe nyang teugaseh, teuma jijak peugah bak gata peue-peue mantong keuhai ulon. jihnyan seutia that jimubuet meusajan-sajan ngon kamoe keu tuhan. ulon kukirem jihnyan ubak gata ngon alasan mangat gata tateupeue keuadaan kamoe dan gata teuhibor. onesimus teuma jijak meusajan-sajan ngon tikhikus; jihnyan sidroe ureueng gata. jihnyan sidroe ureueng nyang seutia, dan kamoe that meugaseh keu jih nyan. jihnyan dan tikhikus teuma jipeugah ubak gata peue-peue mantong nyang ka teujadi bak teupat lon nyoe. aristarkus, nyang na lam rumoh glab meusajan-sajan ngon ulon, jikirem saleuem keu gata. meunan cit ngon markus, syedara blaih ma barnabas. (gata ka teukirem haba keuteusambot jihnyan meunyoé jihnyan teuka ubak gata.) saleuem teuma nibak isa nyang nan jih yustus. nibak ureueng-ureueng yahudi nyang ka meuiman ubak tuhan isa, teuma awaknyan lhee droe mantong kheueh nyang jinoenyoe meukeureuja meusapat ngon ulon keuteupeujak tugaih nibak allah. awaknyan biet-biet that that jitulong ulon. saleuem nibak eparas. ureueng nyoe pi ureueng gata. jihnyan namiet isa almaseh, nyang sabe meudoa ngon khusyuek keu gata. jihnyan meulakee ngon meuharab that ubak allah mangat keyakenan gata meutamah teuga dan gata biet-biet rayeuk, mangat gata ngon sampoereuna taat ubak keuheundak allah. ulon kalon keudroe bahwa jihnyan biet-biet ka jikeureuja brat keu gata dan keu ureueng-ureueng nyang na di laodikia dan hierapolis. dokto lukas, nyang tanyoe gaseh, dan demas jikirem saleuem keugata. peutrok kheueh saleuem kamoe ubak ureueng-ureueng kristen di laodikia; meunan cit ubak nimfa, dan keu jeumaah nyang meuebadat lam rumoh geuh. oh lheueh surat nyoe teubaca keugata, useuha kheueh teuma mangat surat nyan jibaca teuma bak jeumaah nyang na di laodikia. meunan cit teuma gata keudroe haroh tabaca surat nyang teuma teukirem nibak laodikia keugata. dan peugah cit ubak arkipus, "peuseuleusoe kheueh tugaih nyang teubri ubak gata guna teupeutimang tuhan." saleuem nibak ulon, paulus. ulon keudroe nyang tuleh bagian nyoe. bek tuwoe bahwa ulon mantong na lam glab! semoga tuhan geubri beureukat keugata. horeumat kamoe, paulus

syedara-syedara jeumaah nyang na di tesalonika, nyang jeuet keu umat allah bapak dan tuhan isa almaseh: kamoe, na kheueh paulus, silas dan timotius meuharab beujeuet allah geubri beureukat dan seujahteura ateueh gata. kamoe sabe meusyukoe ubak allah sabab le syedara mandum. tieb-tieb watee kamoe meudoa ubak allah dan bapak geutanyoe, kamoe sabe teuingat gata. kamoe sabe meudoa keu gata kamoe teutab teuingat pakriban gata tatunyok lam buet bahwa gata meuman ubak almaseh, pakriban gata talayani ureueng laen dan gata gaseh awaknyan, dan pakriban teuma gata meuharab ngon biet-biet meuman ubak tuhan geutanyoe isa almaseh. kamoe meuteupeue, wahe syedara mandum, bahwa allah geugaseh gata dan ka geupileh gata jeuet keu atra gobnyan nyang khusus. sabab kamoe peusampoe haba get keugata kon ngon tutoe haba mantong, teuma ngon kuasa dan ngon roh allah. dan kamoe yaken that ateueh keubeuranian haba get nyan. gata tateupeue pakriban kamoe udeb keu keupeuntengan gata watee kamoe mantong na lamkawan gata. gata taseutot teuladan kamoe dan teuladan tuhan. bah pih gata keubiet that meudeurita, gata tasambot ngon mangat ate haba nyang kamoe peusampoe bak gata. geumbira nyan geubri le roh allah. ngon lagee nyan gata kajeuet keucuntuh keumandum ureueng kristen nyang na di makedonia dan akhaya. sabab phon nibak gata, haba keuhai tuhan ka meutabu trok u makedonia dan akhaya. dan kon nyan mantong; sampoe haba keuhai pakriban gata meuman ubak allah ka trok ho-homantong, sampoe kamoe hana peureulee le kamoe peugah sapeue. banmandum awaknyan jipeugah pakriban gata tateurimong kamoe yoh watee kamoe ilee meujak ubak gata. awaknyan jimeututot pakriban gata tatinggai beurala-beurala dan tajak ubak allah nyang sidroe nyang udeb keuteuseumah gobnyan. awaknyan jimeututot cit pakriban gata tameuharab teuka aneuek allah nibak syeuruga, na kheueh isa, nyang ka geupeu udeb le allah nibak mate. isa nyan kheueh teuma nyang peuseulamat geutanyoe nibak meureuka allah nyan teuma teuka. syedara-syedara! gata keudroe tateupeue bahwa kamoe jak-saweue gata hana sia-sia. gata tateupeue bahwa sigohlom kamoe jak ubak gata di tesalonika, kamoe kaji ienanya dan jihina di filipi. teuma bah pih jai that ureueng jilawan kamoe, allah geutanyoe ka geubri ubak kamoe keubeuranian keuteupeusampoe keugata haba get nyang asai jih nibak gobnyan. kamoe pakat gata kon kheueh saboh hai nyang keuliru; dan kon teuma ngon meukeusut hana gleh atawa teumipee. hana! kamoe hana kamoe meututot keuneuk peumangat ate gob, teuma keuneuk peumangat ate po teu allah, nyang ujoe ate kamoe. sabab kamoe geuanggab hase le allah keuteupeusampoe haba get nyan. gata keudroe tateupeue bahwa kamoe hantom na meututot ngon haba mameh atawa keuneuk peungeut gata ngon meukeusut geureuda. allah saksi jih! kamoe hana cit meu-useuha mangat jipujoe le gob – bah kheueh nibak gata meunan cit nibak ureueng laen. nyang sibeuna jih sibagoe rasui almaseh, kamoe jeuet mantong kamoe lakee sipeue-peue nibak gata. teuma kamoe meusikeub leumoh-leumbot watee kamoe na lamkawan gata, lagee sidroe ma nyang

teungoh geurawat aneuek-aneuek gobnyan. sabab le gaseh sayang kamoe, kamoetern bri keugata kon mantong haba get nyang teuka nibak allah nyan, teuma trok ubak udeb kamoe. sabab kamoe keubiet that gaseh keugata. teuntee gata mantong teuingat pakriban brat jih kamoe meu-useuha dan meujuang. uroe malam kamoe meukeureuja mangat kamoe hana kamoe peususah meusidroe pih nibak gata bak watee kamoe tabu haba get nyang teuka nibak allah nyan keugata. kamoe udeb lam suci, beutoi dan hana meucupa ateueh gata nyang ka meuman ubak almaseh, gata kheueh saksi-saksi kamoe, meunan cit allah. gata tateupeue bahwa kamoe peusanent gata maseng-maseng lagee sidroe ayah geupeusanent aneuek geuh. kamoe naseuhat gata, kamoe durong gata dan kamoe paksa mangat gata udeb lagee nyan bagoe sampoe teupeugalak ate allah. sabab allah ka geutawok gata mangat jeuet wareuga donya baro allah dan teurasa keubeusaran gobnyan. na lom saboh teuk hai nyang laen nyang teupeujeuet kamoe sabe meulakee teurimong gaseh ubak allah. hainyan na kheueh, bahwa bak watee kamoe peutrok haba nibak allah keugata, gata tadeungoe dan tateurimong haba nyan kon sibagoe haba nibak manusia, teuma sibagoe haba nyang biet-biet teuka nibak po teu allah. gobnyan kheueh nyang teungoh mubuet lam tuboh gata nyang meuman ubak almaseh. syedara-syedara, hai nyang gata rasa ka teuma jirasa le jeumaah-jeumaah allah di yudea nyang ka jeuet keu atra isa almaseh. gata tarasa deurita nibak pihak bansa droe teuh keudroe, saban lagee nyang ka jirasa le jeumaah-jeumaah allah di yudea nyan nibak pihak ureueng-ureueng yahudi. ureueng-ureueng nyan nyang poh mate tuhan isa dan nabi-nabi, dan ji ienanya kamoe. awaknyan jimeumusoh ngon mandum ureueng, dan allah sagai-sagai hana galak keu awaknyan. teuma awaknyan jipagab-pagab kamoe keukamoe peusampoe habanyan keu bansa-bansa nyang kon yahudi hana nyang hase teupeuseulamat bansa-bansa nyan. deungon lagee nyan, ureueng-ureueng yahudi nyan jitamah-tamah laju desya-desya jih keudroe trok ubak jeumeulah jih nyang leungkab. dan jinoenyoe awaknyan akhe jih kakeunong meureuka allah! teuma syedara-syedara, yoh phon that kamoe meucire sikeujab ngon gata – meucire bak mata teuma kon bak ate – kamoe meutamah-tamah meucen keugata dan meu-useuha ngon biet-biet that mangat meurumpok lom ngon gata! kamoe naniet keuneuk jak saweue gata; dan ulon, ka lom ujoe sigoe dua goe, teuma iblih jipagab-pagab kamoe. keubiet, gata kheueh harapan dan pumangat ate kamoe. sabab, singoh watee tuhan isa teuka, dan tanyoe meuhadab gobnyan, teuma gata kheueh nyang teuma jeuet kamoe peubangga! keubiet gata kheueh keubangga dan keumangat ate kamoe! akhe jih meucen kamoe hana ek teuteun le. sabab nyan kheueh kamoe pike leubeuh get tinggai di atena, teungoh kamoe kirem syedara tanyoe timotius. jihnyan peulayan allah nyang meukeureuja meusan kamoe keu jijak peusampoe haba get keuhai almaseh. meunan cit kamoe kirem timotius ubak gata mangat jihnyan jeuet jipeukong gata dan jidurong gata guna keuleubeh jimeuman lom ubak almaseh. deungon lagee nyan hana meusidroe pi nibak gata

nyang surot sabab deurita-deurita tanyoe nyoe. gata keudroe tateupeue bahwa deurita-deurita nyan jitamong lam reuncana allah keugeotanyoe. watee kamoe mantong na meusajan gata, ka lھےueh kamoe peugah bak gata leubeh ilee bahwa geutanyoe teuma meudeurita. dan beutoi nyan biet-biet ka teujadi; gata keudroe tateupeue nyan. nyang kھےueh sabab jih ulon kirem timotius, sabab ulon meuharab that keuneuk lon teupeue pakriban keumajuan gata keuhai iman gata ubak almaseh. ulon khawate ibilih meuhase jigoda gata akhe jih mandum jeureh payah kamoe sia-sia. jinoenyoe timotius ka jigisa dan ka jipeusampoe bak kamoe haba geumbira keuhai pakriban gata meuiman ubak almaseh dan udeb lam gaseh sayang. jihnyan jipeugah bak kamoe bahwa gata sabe takeubah keunang-keunangan nyang jroh keuhai kamoe lam ate gata. dan gata keuneuk meurumpok ngon kamoe, saban lagee kamoe pi keuneuk meurumpok ngon gata. nyang kھےueh sabab jih, syedara-syedara, lam keuadaan susah dan deurita kamoe, ate kamoe teuhabor watee meudeungoe haba keuhai gata. iman gata ubak almaseh keubiet rayeuk that ate kamoe, sampoe jinoenyoe kamoe keubiet meurasa biet-biet udeb, asai gata teutab teudong cot, meusaboh ngon tuhan. padubna rayeuk jih peurasan teurimong gaseh kamoe ubak allah ateuh banmandum keugeumbiraan nyang kamoe rasa dikeue gobnyan ngon sabab le gata. uroe malam kamoe lakee bak gobnyan ngon sipeunoh ate, mangat kamoe hase meurumpok keudroe ngon gata keu teupeuleungbak peue nyang gata peureulee keumeuiman gata ubak almaseh lagee toh nyang sibeuna jih. seumoga allah bapak geutanyoe keudroe, dan tuhan geutanyoe isa geupeudata rot ueh keukamoe jak meurumpok ngon gata! seumoga tuhan geupeujeuet gata seumaken tagaseh sidroe ngon nyang laen dan seumaken tagaseh banmandum manusia, sampoe geunaseh gata nyan meutamah-tamah, saban lagee geunaseh kamoe ateuh gata. deungon lagee nyan tuhan teuma geupeuteuga ate gata, sampoe gata gleh dan hana meucupa dikeue allah bapak geutanyoe, bak watee tuhan geutanyoe isa teuka meusajan ngon mandum ureueng nyang jeuet keu milek gobnyan. akhe jih syedara-syedara, kamoe kameubri teuladan keugata keuhai pakriban gata meuseuti udeb keu teupeumangat ate allah. beutoi gata ka udeb lagee nyan. teuma jinoenyoe ateuh kuasa tuhan isa, kamoe meulakee ngon meuharab bak gata mangat gata leubeh tauseuha lom lam hai nyan! sabab gata ka tateupeue peutunyok-peutunyok nyang ka kamoe bri bak gata ateuh kuasa tuhan isa. nyang kھےueh keuheundak po teu allah: mangat gata udeb khusus keu gobnyan, gleh, tapeujioh mandum buet nyang cabui. tieb-tieb ureueng agam nyang na lamkawan gata meuseuti jiteupeue pakriban udeb meusajan ngon purumoh jih ngon cara nyang teupeumangat ate allah dan manusia. bek udeb meunurot hawa nafeusu ateuh purumoh gata, lagee nyang jipeubuet le ureueng-ureueng nyang hana jituri allah. lam hai nyang lagee nyan, bek kھےueh meusidroe pi jipeubuet salah ateuh syedara jih, atawa jitipee gobnyan. yoh masa ilee kamoe ka lھےueh kamoe peuingat nyang that brat ateuh gata, bahwa tuhan singoh geuhukom

ureueng-ureueng nyang jipeubuet buet-buet salah nyang lagee nyan. allah geutawok tanyoe, kon beujeuet geutanyoe udeb lam cabui, teuma geutanyoe udeb deungon cara nyang teupeumangat ate gobnyan. ureueng nyang tulak peue nyang teupurunoe nyoe, kon jitulak manusia, teuma nyang jitulak na kھےueh allah nyang ka geubri roh gobnyan nyang suci keugata. hana peureulee le kamoe teumuleh keu gata keuhai pakriban gata meuseuti tagaseh syedara-syedara nyang saboh iman. gata keudroe ka geupurunoe le allah keusaleng tameugaseh. dan hainyoe ka lھےueh gata tunyok ateuh mandum syedara saboh iman di bansaboh makedonia. teuma, syedara-syedara, kamoe lakee ngon meuharab that, bah kھےueh udeb gata meutamah get lom. meu-useuha kھےueh udeb ngon teunang dan hana gata peurhoh droe lam urosan ureueng laen. bah kھےueh gata mubuet tamita nafeukah keudroe, lagee nyang ka lھےueh kamoe peurintah ilee nibak gata. meunyoe gata udeb lagee nyan, gata hana meugantueng ubak soe mantong, dan ureueng-ureueng nyang hana peucaya bak almaseh, teuma jihoreumat gata. syedara-syedara, kamoe meuharab mangat gata teupeu nyang sibeuna jih keuhai ureueng-ureueng nyang ka meuninggai donya; mangat gata hana seudeh ate lagee ureueng-ureueng nyang hana peungharapan. tanyoe tapateh bahwa isa ka mate dan ka udeb lom teuma. nyang kھےueh sabab jih tanyoe tapateh bahwa allah teuma geupeu udeb lom banmandum ureueng nyang meuiman ubak isa dan ka meuninggai, mangat awaknyan udeb meusajan gobnyan. keuhai nyan, nyoe kھےueh ajaran tuhan nyang keuneuk kamoe peusampoe ubak gata: bak watee tuhan isa teuka, geutanyoe nyang mantong udeb hana teuma tapeuawai nibak ureueng-ureueng nyang ka meuninggai leubeh awai. teuma malaikat agong geudumpek ngon su geuh nyang meutaga dan beureuguih allah teuyueb sibagoe tanda aba-aba. dan tuhan isa keudroe teuma geutron lam syeuruga, dan ureueng-ureueng kristen nyang ka meuninggai teuma teupeu udeb leubeh ilee. oh lھےueh nyan, geutanyoe nyang mantong udeb nibak watee nyan teuma meusajan-sajan ngon awaknyan lam awan ijo keuneuk meurumpok ngon tuhan di manyang. laju tanyoe tinggai ngon tuhan siumu masa. sabab nyan, bah kھےueh gata saleng tapeuteuga ate ngon cara tapeuguna tutoe haba nyang lagee nyoe. syedara-syedara, hana peureulee kamoe teumuleh keugata pajan watee jih nyang paih hainyan teuma teujadi. sabab gata keudroe tateupeu ngon jeuliah that bahwa uroe tuhan teuka nyan teuma trok lagee pancuri nyang teuka bak watee malam. meunyoe na ureueng jipeugah, "banmandum aman dan teuntram," teuma bak watee nyan kھےueh ngon hana teusangka-sangka awaknyan teuma jitimpok le binasa, dan hana meusidroe pih nyang hase jipeuseulamat droe. hai nyan teuma teuka ngon hana teusangka-sangka, lagee peurasan saket jitoh aneuek nibak sidroe ureueng inong nyang keuneuk jipeulahe aneuek. teuma gata kon ureueng nyang udeb lam seupot, sanpoe uroenyang keubiet teukeujot that gata lagee jiteuka le pancuri. gata banmandum na kھےueh ureueng nyang udeb lam trang; gata jitamong lam uroe nyang trang.

tanyoe kon ureueng nyang udeb lam seupot; atawa nyang jitamong nibak malam nyang seupot. sabab nyan geutanyoe hana jeuet tae-h mantong lagee ureueng laen. tanyoe meuseuti waspada dan pikeran tanyoe meuseuti trang. watee malam teuka manusia jijak eh, dan nibak malam teuka teuma ureueng jeuet keumabok. teuma geutanyoe nyoe jitamong nibak ureueng-ureueng nyang peungeh dan trang; sabab nyan pikeran tanyoe meuseuti trang. geutanyoe meuseuti teutab meuiman ubak tuhan dan tagaseh keu ureueng-ureueng laen meunan cit tameuharab ngon yaken bahwa po teu allah teuma geupeu seulam tanyoe. nyan kheueh sinjata nyang peulindong geutanyoe nibak meujuang talawan seupot. allah geupileh geutanyoe kon keu teuhukom, teuma geupeu seulam meulalu tuhan geutanyoe isa almaseh. gobnyan mate keugeutanyoe mangat bak watee gobnyan teuka singoh – aleh geutanyoe mantong udeb, aleh geutanyoe ka mate – tanyoe meuteume udeb meusanjan ngon gobnyan. sabab nyan, bah kheueh gata teutab saleng tadurong dan saleng tapeukong, saban lagee nyang teungoh gata peubuet nibak watee nyoe. syedara-syedara, kamoe meulakee ngon meuharab that mangat gata tahareuga ureueng-ureueng nyang mubuet lamkawan gata; na kheueh awaknyan nyang ka geupileh le tuhan keu jipimpen dan jibri naseuhat gata. peusanaut kheueh ateuh awaknyan ngon sihareumat-horeumat jih dan ngon cinta gaseh sabab taingat peue nyang awaknyan peubuet. udeb kheueh sabe lam keuadaan rukon. meunan cit kamoe lakee, syedara-syedara, seugah kheueh ngon get keu ureueng nyang hana jitem keureuja; peutabah kheueh ate ureueng teumakot; tulong kheueh ureueng nyang peureulee teutulong dan saba kheueh ateuh mandum ureueng. jaga kheueh mangat bek na nyang jibalahi buet nyang jeuhet ngon buet nyang jeuhet. meu-useuha kheueh sabe keu tapeubuet nyang get, sidroe ateuh nyang laen dan ateuh mandum ureueng. bah kheueh gata sabe lam keuadaan geumbira, dan meudoa kheueh sabe. lam keuadaan peue mantong bah kheueh gata meusykoe, sabab nyang lagee nyan kheueh nyang allah lakee nibak gata sibago ureueng nyang udeb meusaboh ngon isa almaseh. bek kheueh gata keukang roh allah. bek kheueh gata anggab phui mantong haba-haba nyang geupeutrok le roh allah. peue-peue mantong meuseuti teu ujoe, dan nyang get haroh teuseutot. 22 peujioh kheueh peue-peue mantong nyang jeuhet. seumoga allah keudroe nyang bri ubak geutanyoe seujahteura, geupeujeuet gata keu ureueng-ureueng nyang biet-biet udeb khusus keu po teu allah. seumoga allah geujaga bansaboh anggota tuboh gata, bah kheueh roh, jiwa meunan cit tuboh gata, sampoe hana meucupa bak watee tuhan isa almaseh teuka lom teuma. allah, nyang ka geutawok gata, teuma geupeubuet hainyan sabab gobnyan seutia. doa kheueh keukamoe, syedara-syedara! meumat-mat jaroe kheueh banmandum seucara meusra sibago syedara ureueng kristen. ateuh kuasa tuhan, ulon lakee ngon meuharab that mangat gata baca surat nyoe keumandum syedara nyang saboh iman. 28 seumoga tuhan geutanyoe isa almaseh geubri beureukat ateuh gata. horeumat kamoe, paulus

syedara-syedara jeumaa?h nyang na di tesalonika, nyang jeuet keu umat allah bapak geutanyoe tuhan isa almaseh! kamoe, na kheueh paulus, silas dan timotius meuharab seumoga allah bapak dan tuhan isa almaseh geubri beureukat dan seujahteura ubak gata mandum. syedara-syedara, kamoe sabe waje?b kamoe peugah teurimong gase?h ubak allah sabab gata. dan beutoi kapatot kamoe peubuet meunan, sabab gata seumakan meuiman ubak almaseh, dan gata seumakan tagase?h sidroe ngon nyang lae?n. nyang kheueh sabab jih pakon kamoe meututoe keuhai gata tieb-tieb wate?e kamoe jak saweue jeumaa?h-jeumaa?h allah. deungon bangga kamoe calitra pakriban gata teutab teugoh seutia gata meuiman ubak almaseh lam keuadnan keunong ie?lanya dan deurita nyang gata rasa. dan inoe kheueh deuh nyata padubna ade jih huko?man allah: gata ka meudeurita sabab donya baro allah, dan sabab nyan gata teuma teuagab patot gata tamong lam nyan. gobnyan geupeubuet peue nyang ade, dan teuma geubalahi deurita keu ureue?ng nyang peujeuet gata meudeurita. dan ubak gata nyang ka jeuet bak wate?e nyoe meudeurita – meunan cit teuma ateuhe kamoe – allah teuma geubri keuleugaan nibak uroe tuhan isa geutron nibak syeuruga dan geupeuleumah droe gobnyan ngon malaikat-geuh nyang peukasa dan ngon apui nyang hu meuha?b-ha?b. gobnyan geutron keu geujak huko?m ureue?ng-ureue?ng nyang hana jipako keu po teu allah dan nyang hana jitem udeb suisai ngon haba ge?t keuhai isa tuhan geutanyoe. ureue?ng-ureue?ng nyan teuma jiteurimong huko?man keubinaan siumu masa, geutiek uluwa nibak lingkungan tuhan dan nibak kuasa gobnyan nyang agong; banmandum nyan teuma teujadi nibak uroe gobnyan teuka singoh keujiagong le? umat gobnyan dan keu jihoreumat le? mandum ureue?ng nyang meuiman. gata pi teuma na lamkawan umat allah nyan, sabab gata katapate?h ubak haba nyang kamoe peutrok keugata. nyang kheueh sabab jih kamoe sabe meudoa? keugata. kamoe meudoa? mangat allah geupeujeuet gata patot keu udeb lage?e nyang geulake?e; keu nyan kheueh gobnyan geutawo?k gata. seumoga allah, ngon kuasa gobnyan, teupeupeunoh keuheundak gobnyan keu teupeubuet nyang jroh, dan teupeusampoereuna banmandum buet nyang gata peubuet sabab meuiman ubak almaseh. deungon lage?nyan, tuhan geutanyoe isa tapeuagong le? gata, dan gata pih geupeu agong le? isa sabab keuge?t ate? po teu allah geutanyoe dan tuhan isa almaseh. keuhai tuhan tanyoe isa almaseh teuka, dan keuhai jipeusapat geutanyoe mangat tinggai meusapat ngon gobnyan, nyoe nyang ulon lakee ngon meuharab that nibak gata: bek kheueh bagai that bingong atawa apoh apah sabab na haba bahwa katrok uroe jih tuhan isa geuteuka lom teuma. mungken haba nyan asai jih nibak saboh nubuat, atawa nibak saboh ajaran; atawa jeuet mantong na nyang peugah bahwa kamoe kaleuh teumuleh lam saboh surat kamoe. pakriban mantong kheuh teuma, bek tapeubiyeu ureueng laen jipeunget gata. sabab sigohlom trok uroe nyan, haroh kheueh teujadi hainyoe leubeh ilee: jai that ureueng teuma murutat, ji iengkeue keu almaseh; dan manusia jeuhet nyang ka

teupeuteukeudi jitamong lam nuraka, jipeuleumah droe. deungon sombong jihnyan jilawan dan jipeumanyang droe ateuhe banmandum nyang jiseumah le manusia, atawa mandum ilah nyang jianggab allah le manusia. nyang hebat lom jihnyan teuma jiduek lam baet allah dan jipeumaklum bahwa jihnyan na kheueh allah. ingat kheueh bahwa ulon ka kheueh lon peugah banmandum nyan yoh ulon mantong na meusan gata. dan gata tateupeue peue jinoenye mantong teutamb teujadi mandum nyan. singoh bak watee nyang ka teupeuteuntee le po teu allah, manusia jeuhet nyan teuma teuka. teunaga nyang jipeubuet atranyan ka jipeuphon mubuet seucara rahsia, teuma mantong jiteun-teun. singoh meunye nyang peuteun nyan ka teukireuh ho laen, baro kheueh deuh teungieng manusia jeuhet. teuma meunye tuhan isa teuka, gobnyan geupoh mate manusia jeuhet nyan ngon nafah bak babah gobnyan, dan teupeubinasan ngon keuhebatan gobnyan teuka. manusia jeuhet nyan teuma teuka ngon saboh kuasa nyang rayeuk nibak iblih. jihnyan teuma jipeuna sapeue-sapeue buet ajaeb dan hai-hai nyang luwabiasa nyang peunoh ngon peunget dan teumipee. jihnyan teuma jipeuguna sigala tipee daya nyang jeuhet keujipeusisat ureueng-ureueng nyang teuma binasa. awaknyan binasa sabab jitulak dan hana jigalak keu haba nyang beuna nyang geubri le allah nyang hase peuseulamat awaknyan. nyang kheueh sabab jih allah geupeuteuka ateuhe awaknyan saboh kuasa nyang keubiet sisat that, sampoe awaknyan jipateh peue nyang hana beutoi. akibat jih, mandum ureueng nyang galak jipeubuet desya dan hana jipateh ubak nyang beutoi nyan, teuma teuhukom. syedara-syedara nyang geugaseh le tuhan! sabe kamoe peugah teurimong gaseh ubak po teu allah keuhai gata, sabab yoh awaiphon allah ka geupileh gata keu geupeuseulamat. hai nyan teujadi le peue nyang jipeubuet le roh allah keugata keu teupeujeuet gata umat allah nyang gleh dan le sabab gata tapateh ubak haba nyang beutoi nyang teuka nibak allah. keu nyan kheueh allah geutawok gata keu haba get nyang kamoe peusampoere ubak gata. allah geutawok gata, sabab gobnyan meuharab gata pih tarasa pakriban keuangongan tuhan geutanyoe isa almaseh. le sabab nyan, syedara-syedara, dong kheueh beucot dan mumat kheueh beukong nibak ajaran-ajaran nyang ka kamoe bri ubak gata, bah kheueh nyan seucara teupeugah meunan cit seucara teutuleh. seumoga tuhan geutanyoe isa almaseh keudroe, dan allah bapak geutanyoe geuihur dan geupeukong ate gata, mangat gata hase tapeubuet dan gata bri peue nyang get. sabab allah geugaseh keugeutanyoe, dan sabab le ate geuh nyang get nyan gobnyan geupeujeuet geutanyoe teutab tabah, dan teuharab nyang jroh. akhe jih, syedara-syedara, meudoa kheueh keu kamoe. meudoa kheueh mangat haba nibak tuhan jeuet meutabu sabe ngon bagai that dan jiteurimong ngon get, saban lagee nyang ka teujadi ateuhe gata yoh masa ilee. meudoa kheueh teuma mangat allah geupeu seulamat kamoe nibak ureueng-ureueng nyang beujat dan jeuhet. sabab hana mandum ureueng jipateh ubak haba nibak tuhan nyan. teuma tuhan seutia. gobnyan teuma geupeuteuga gata dan geulindong gata nibak si jeuhet. dan kamoe

peunoh meuiman ubak tuhan keuhai gata, bahwa gata teungoh tapeubuet dan teuma sabe tapeubuet peue nyang kamoe yue ubak gata. seumoga tuhan nyang bimbeng gata leubeh tamuphom bahwa allah geugaseh gata dan bahwa almaseh geubri ate gata nyang tabah. syedara-syedara, ateuh kuasa tuhan geutanyoe isa almaseh, kamoe peurintah ubak gata mangat gata peujioh mandum syedara, nyang udeb jih laloe ngon beu-o, dan nyang hana jiturot ajaran-ajaran nyang ka kamoe bri ubak awaknyan. gata keudroe tateupeue bahwa gata haroh taseutot cuntoh bak kamoe. kamoe hana laloe dan beu-o watee kamoe mantong na lamkawan gata. kamoe hana kamoe makheun peunajoh gob ngon hana kamoe bayeue. uroe malam kamoe meukeureuja kamoe banteng tuleueng mangat kamoe hana kamoe peususah soe-soe mantong meunan cit nyang na lamkawan gata. kamoe peubuet nyan kon kamoe hana hak kamoe tuntot mangat gata tatulong kamoe, teuma kamoe keuneuk jeuet teuladan keugata mandum. watee kamoe mantong na lamkawan gata, kamoe bri peuratoran lagee nyoe, "ureueng nyang hana jitem keureuja, bek jimakheun." kamoe peugah nyoe sabab na kamoe deungoe bahwa ureueng-ureueng nyang na lamkawan gata na nyang udeb laloe ngon beu-o. awaknyan hana jipeubuet meusapeue pi, nyang na laloe jipeuroh droe lam urosan ureueng laen. ateuh kuasa tuhan isa almaseh kamoe peurintah ureueng-ureueng nyan dan kamoe peuingat, mangat awaknyan jimubuet ngon beutoi dan jimita nafeukah droe jih keudroe. teuma gata bek tunu tapeubuet nyang get. mungken singoh na ureueng nyang hana jitem deungoe peue nyang kamoe peugah lam surat nyoe. ate-ate kheueh keu ureueng nyang lagee nyan dan bek meurakan ngon jihnyan mangat jihnyan malee. teuma bek kheueh gata anggab jihnyan sibagoe musoh; teuma bri kheueh naseuhat sibagoe sidroe syedara. tuhan na kheueh ulee keuseujahteuraan geutanyoe. seumoga gobnyan sabe geubri keugata seujahteura lam sigala hai. seumoga tuhan sabe na meusajan gata banmandum. saleuem nibak ulon, paulus. ulon keudroe nyang tuleh bagian nyoe. nyoe kheueh tanda nyang ulon boh bak mandum surat ulon. seumoga tuhan geutanyoe isa almaseh geubri beureukat keugata mandum. horeumat kamoe, paulus

timotius aneuek ulon nyang sejuti lam tuhan! suratnyoe nibak ulon, paulus, rasui isa almaseh ateuh peurintah allah, nyang peuseulamat geutanyoe dan ateuh peurintah isa almaseh, harapan geutanyoe. seumoga allah bapak dan isa almaseh tuhan tanyoe geubri beureukat, rahmat dan seujah-teura ubak gata. ulon meuharab mangat gata teutab tinggai di efesus lagee nyang ka ltheueh ulon peugah bak gata bak watee ulon jak u makedonia. sabab, di efesus na meupadub droe ureueng nyang jipeurunoe ajaran sisat nyang hana beutoi, dan gata haroh tatam awaknyan. peugah kheueh bak awaknyan mangat bek le jisimak haba dongeng dan calitra-calitra asai usui nyang hana jipioh-pioh nyan. banmandum nyan jipeuteuka riah ngon meudakwa, dan hana jipeumaju reuncana allah nyang hase teuturi rot meuiaman ubak gobnyan. tujuan naseuhat lon na kheueh mangat jeuet manusia meuteume ate nyang gleh dan ate nurani nyang suci, dan biet-biet meuiaman ubak tuhan, dan deungon lagee nyan awaknyan hase jigaseh seusabe keudroe-droe. na siladum ureueng nyang hana udeb le lagee nyan, dan sisat nibak meudebat-meudebat nyang hana meuguna. awaknyan keuneuk jeuet keuguree-guree agama, padahai awaknyan keudroe hana jiteupeu tutoe haba nyang jipeuguna atawa hai-hai nyang awaknyan peugah lagee nyan yaken. tanyoe tateupeue bahwa hukum agama na kheueh get, meunyoe teupeuguna bak jalan nyang beutoi. teuntée jih meuseuti beuingat bahwa hukum nyan teupeuget kon keu ureueng get, teuma keu ureueng nyang langga hukum, bubena ureueng jeuhet, keu ureueng beujat, keu ureueng meudesya, keu ureueng nyang hana agama, ureueng donyaw, keu ureueng nyang poh mate ayah ngon ma jih, dan keubuna ureueng nyang poh mate gob, keu ureueng-ureueng nyang peubuet cabui, keu ureueng meuagam ngon ureueng agam, keu ureueng tukang culek gob, keu ureueng nyang meututoe beurakah; keu ureueng nyang meusaksi sulet, dan keusoe mantong nyang jipeubuet hai-hai nyang meulawan ngon ajaran nyang beuna. ajaran nyan na meuteume lam haba get nyang jak-tabu atra nyan geupeucaya ubak ulon, nyan kheueh haba get nyang teuka nibak allah nyang agong dan patot teupujoe. ulon peugah teurimong gaseh ubak isa almaseh tuhan geutanyoe. gobnyan ka geubri teunaga ubak ulon keulon layani gobnyan, dan gobnyan geuanggab ulon patot lon teurimong tugaih nyan, bah pi yoh ilee ulon fiteunah lon ienanya meunan cit lon hina gobnyan. teuma allah geugaseh keulon, sabab yoh masanyan ulon gohlom meuiaman, kareuna hana lon teupeue peue nyang ulon peubuet. biet pi meunan ulon ka geupeu peunoh ngon rahmat tuhan tanyoe. gobnyan geubri keu lon keumampuan keu lon meuiaman bak gobnyan dan geuyue gaseh seusamoe manusia. keumampuan nyan geubri bak geutanyoe mandum nyang ka meusaboh ngon isa almaseh. keubiet beutoi that haba nyoe – sabab nyan patot kheueh teurimong dan teupeucaya sipeunoh ate – : "isa almaseh geuteuka ateuh rhueng donya nyoe keu geupeu seulamata ureueng meudesya." dan ulon kheueh ureueng meudesya nyang paleng jeuhet. teuma le sabab nyan kheueh allah geugaseh ulon, mangat isa almaseh hase geubri banmandum saba

gobnyan keu ulon, ureueng nyang meudesya nyoe. dan nyoe jeuet keusaboh cuntoh keumandum ureueng nyang teuma-teuma jimeuiaman ubak gobnyan dan meuteume udeb sejuti dan keukai. allah, raja sipanyang jamen, patot teuhoreumat dan teupujoe sabe, sabab gobnyan kheueh nyang keukai, nyang hana deuh dan nyang esa! amin. timotius, aneuek ulon! tugaihyoe ulon peucaya ubak gata, teuingat ubak peusan allah nyang ka geupeutrok le nabi-nabi lam jeumaahe keuhai droe gata. bah kheueh peusan nyan jeuet keubeukai nibak gata lam meujuang nyang jroh. meujuang kheueh ngon cara tamumat beukong nibak keupeucayaan nyang beutoi dan ngon ate nurani nyang gleh. na ureueng nyang hana jipako keuhai su ate nurani jih, ngon lagee nyan hanco kheueh keupeucayaan ureueng nyan. lamkawan ureueng nyan na kheueh himeneus dan aleksander. mandua droe ureueng nyan ka lon hukum deungon cara ulon jok ubak iblih, mangat awaknyan jimeurunoe keujipioh jihujat allah. phon-phon that, ulon meulakee ngon meuharab that mangat peumohonan, seumayang, dan doa syafaat meunan cit meulakee teurimong gaseh ubak po teu allah keumandum ureueng; keuraja-raja dan banmandum ureueng nyang mat keukuasaan. lakee kheueh mangat geutanyoe jeuet udeb teunang dan teuntram keu po teu allah ngon pi-e nyang patot. nyan kheueh nyang get dan teupeumangat ate allah, nyang bri seulamata ateuh geutanyoe. gobnyan meuharab mangat jeuet banmandum ureueng teupeuseulamat dan jiteupeu nyang beuna. sabab, teuma na sidroe allah, dan sidroe nyang jeuet peudame allah ngon manusia, na kheueh isa almaseh. gobnyan sidroe manusia nyang ka geupeujok droe geuh guna teupeubeubaih mandum manusia nibak desya-desya jih. deungon nyan allah ka geutunyok bak watee nyang paih, bahwa gobnyan meuharab mangat mandum manusia teupeuseulamat. dan nyang kheueh sabab jih ulon geuyuejak bak ureueng-ureueng nyang kon yahudi keu lon jak peusampoe bak awaknyan haba keuhai keupeucayaan nyang beutoi. nyang ulon peugah nyoe na kheueh beutoi dan ulon hana buhak. ulon meuharab mangat dipat mantong ureueng agam meudoa ngon ate nyang gleh, ngon hana rasa beunghet atawa meusiliseh waham. bah kheueh ureueng inong jipeungui droe jih ngon cara seudeurhana dan jisok peukayan nyang sopan. bek koh ok mubagoe-bagoe atawa teungui pianan meuh atawa mutiara, atawa peukayan nyang meuhai-meuhai. nyang sikeubiet jih, bah kheueh ureueng inong nyan jingui droe jih ngon buet-buet nyang jroh lagee toh nyang patot keu ureueng inong nyang meuebadat ubak po teu allah. ureueng inong meuseuti jimirunoe ngon cara ji-iem droe dan patuh. ulon hana kupeubeuna ureueng inong nyan jipeurunoe atawa jipeurintah ateuh ureueng agam; awaknyan haroh seungab. sabab nyang phon that teucebta na kheueh nabi adam oh ltheueh nyan baro kheueh siti hawa. dan kon nabi adam, teuma inong kheueh nyang keunong tipee, ngon lagee nyan ka ji iengkeue peurintah allah. teuma biet pi meunan, ureueng inong teuma seulamata deungon jipeulahe aneuek, asai jihnyan ngon ate nyang miyueb teutab meuiaman ubak almaseh dan teutab jigaseh keu ure-

ueng laen dan udeb khusus keu po teu allah. keubiet beutoi haba nyoe, "ureueng nyang keuneuk jeuet keupenilek jeumaah, jimeuharab saboh buet nyang keubiet meuhareuga." sidroe ureueng nyang jeuet keupenilek jeumaah ureueng nyan hana meucupa, peurmoh jih sidroe mantong, ek jiteun droe, bijaksana, dan teureuteb; ureueng nyan jitem teurimong gob dirumoh jih, dan hase jipeurunoe ureueng laen; bek ureueng peumabok, atawa nyang galak jimulo. dilikot nibak nyan, ureueng nyan nyang leumoh leumbot dan galak keudame. dan ureueng nyan bek nyang teupeng-peng. ureueng nyan jiteupeu atoe rumoh tangga deungon jroh, dan carong jididek aneuke-aneuk jih beujitaat dan horeumat keu jih. sabab meunye ureueng nyan hana carong jiatoe rumoh tangga jih keudroe, pakriban ureueng nyan hase jiatoe jeumaah allah? sidroe peunilek jeumaah hana jeuet ureueng nyan ban jitamong kristen, sabab singoh ureueng nyan jeuet keu manyang ate laju keunong kutok lagee iblih yoh masa ilee. ureueng nyan museuti nyang na nan get lam masyarakat; sabab meunyeon lam lagee nyan, ureueng nyan teuma jihina le gob, deungon lagee nyan jihnyan rhot lam peurangkab iblih. meunan cit deungon peumbantu jeumaah museuti ureueng nyang jroh dan juoe; kon ureueng nyang teupeng-peng dan galak jijieb ie ango nyang jai. ureueng nyan museuti nyang kong jimumat nibak ajaran kristen nyang beuna ngon ate nurani nyang gleh nyang ka geupeugah le po teu allah. bah kheueh ureueng nyan teu ujo leubeh ilee, dan meunye deuh teukalon ureueng nyan hana meucupa, baro kheueh ureueng nyan jeuet keupeubantu lam jeumaah. meunan cit deungon peurmoh awaknyan museuti ureueng nyang jroh, kon ureueng nyang galak jiba peusuna. ureueng nyan museuti carong-carong bak jiba droe dan juoe lam hai peue mantong. peumbantu jeumaah museuti sidroe mantong peurmoh geuh. ureueng nyan museuti carong jiatoe aneuke-aneuk jih dan rumoh tangga jih ngon jroh. ureueng-ureueng nyang jibantu deungon get lam jeumaah, teuma jihoreumat le gob dan seumaken jijeuet meututoe keuhai iman jih ubak almaseh. ulon meuharab hana treb le ulon jak saweue gata. bah pih meunan, ulon tuleh cit surat nyoe keugata, mangat meunyeon ulon teulat, gata jeuet tateupeue pakriban geutanyoe museuti udeb sibagoe keuluwarga allah, na kheueh jeumaah allah nyang udeb. jeumaah nyoe kheueh nyang jeuet keu tamah teupeudong dan nyang dukong ajaran nyang beutoi nibak allah. hana meusidroe pi nyang hase jibantah, padubna rayeuk jih rahsia agama geutanyoe: gobnyan geupeuleumah droe lam ruman manusia, dan geupeugah beutoi le roh pe teu allah, dan geukalon le duma malaikat. haba nibak gobnyan jipeusampoe lamkawan bansa-bansa, dan gobnyan jimeuiman bansigom donya dan teubeuot lam syeuruga. roh allah deungon teugaih geupeugah bahwa bak wateewatee nyang teuma teuka, siladam ureueng jimurtat, ji-iengkeue keu almaseh. awaknyan jituot peue nyang jipeugah le roh-roh nyang sisat dan jisutot ajaran-ajaran nibak roh jeuhet, nyang jipeusampoe le ureueng-ureueng munafek nyang buhak. ate nurani ureueng-ureueng nyan ka seupot. ureueng nyan

jipeurunoe bek meukawen dan jitam bek jipajoh le peunajoh nyang ka jipeuteuntee. padahal peunajoh nyang geucebta le po teu allah keuteupajoh ngon teupeugah teurimong gaseh ubak gobnyan le ureueng-ureueng nyang ka meuiman ubak almaseh dan ka jiteupeue ajaran nyang beutoi nibak allah. peue-peue mantong nyang geucebta le allah nyan get, dan hana meusapeue pi nyang haroh teuanggung hareuem meunyeon ka teuteurimong deungon teupeugah teurimong gaseh ubak allah. sabab beureukat nibak po teu allah dan doa nyang teulakee teupeusabab peunajoh nyan haleue. meunyeon gata tapeurunoe banmandum nyan ubak syedara-syedara nyang seuiiman, gata teuma jeuet keupeulayan isa almaseh nyang mubuet deungon get. dan gata teuma sabe tapasoe lam baten gata ngon feureuman allah nyang tapeucaya, dan deungon ajaran-ajaran nyang beutoi nyang ka gata seutot seulawet nyoe. peujioh kheueh calitra-calitra tahyul nyang hana meuguna. lateh kheueh droe gata keu udeb lam iebadat. latehan jasmani bacut sagai hase jih, teuma latehan rohani keubiet meuguna lam hai peue mantong, sabab na teukandong janji keu udeb nibak jamen nyoe dan watee nyang teuma teuka. hainyan beutoi dan patot teuteurimong dan teupeucaya sipeunoh ate. nyang kheueh sabab jih tanyoe meuijyang dan meukeureuja brat, sabab geutanyoe meuharab sipeunoh jih ubak po teu allah nyang udeb; gobnyan kheueh peuseulamat keu mandum ureueng, nyang paleng phon na kheueh ureueng-ureueng meuiman. peurunoe kheueh mandum nyan dan yue kheueh ureueng-ureueng beujiseutot. bek kheueh na meusidroe ureueng pih jiang-gab gata hina sabab gata mantong muda. nyang sikeubiet jih, bah kheueh gata jeuet keuteuladan keu ureueng-ureueng nyang meuiman bah kheueh watee gata meututoe dan pi-e gata, lam cara gata tagaseh seusamoe keudroe-droe dan iman ubak isa almaseh, meunan cit ngon udeb gata nyang gleh. watee nyoe, trok an ulon teuka singoh, gata beubiet tabeuet alkitab keu dumna ureueng, tadurong dan gata purunoe awaknyan. bek sampoe gata laloe tapeuguna karonya nibak roh allah nyang teubri ubak gata bak watee peumimpen-peumimpen jeumaah geupeuduek jaroe gobnyan ateuh ulee gata, meunan cit nabi-nabi geupeusampoe feureuman allah keuhai droe gata. peubuet kheueh mandum nyan deungon biet-biet mangat keumajuan gata jikalon le mandum ureueng. jaga kheueh droe gata dan beu ate-ate kheueh ngon peue nyang gata peurunoe. bah kheueh gata ngon seutia gata peubuet banmandum nyan, sabab deungon lagee nyan gata ka tapeuseulamat bah kheueh droe gata keudroe meunan cit ngon ureueng-ureueng nyang deungoe gata. bek kheueh gata beunghon ngon haba nyang kreueh ateuh ureueng nyang leubeh tuha nibak gata teuma pakat kheueh gobnyan beugeudeungoe haba gata siulah-ulah gobnyan ureueng syiek gata. meunan cit peusanaut kheueh bubena ureueng-ureueng sibagoe syedara, dan inong-inong tuha sibagoe ma. inong-inong muda gata peujeuet sibagoe adoe, ngon sikeueb gata nyang murni. horeumat kheueh keu inong-inong balee nyang biet-biet udeb jih keudroe. teuma meunyeon sidroe inong balee na aneuk atawa cu-

coe, awaknyan kheueh nyang phon-phon gata bri pe-
ungeurtian bahwa awaknyan wajib jikalon kawom
keuluwarga jih keudroe, dan jibalahi budoe ureueng
tuha dan nek awaknyan. sabab hai nyang lagee
nyan kheueh nyang teupeumangat ate allah. in-
ong balee nyang biet-biet tinggai sidroe, dan hana
meusidroe ureueng pi nyang jitem peulara gobnyan,
teuma jimeuharab ubak allah. uroe malam jihnyan
sabe meudoda ubak allah keu jilakee tulong. teuma
inong balee nyang galak udeb meumangat-mangat,
ka mate bah kheueh jihnyan mantong udeb. peutrok
kheueh peutunyok-peutunyok nyoe ubak awaknyan,
mangat awaknyan udeb ngon hana meucupa. teuma
meunyo ureueng-ureueng nyang hana jitem peulara
wareh kawom jih, leubeh-leubeh keuluwarga jih keu-
droe, ureueng nyan ka ji iengkeue ubak peue nyang
ji-iman; ureueng nyang lagee nyan leubeh brok ni-
bak ureueng nyang hana meuman. teuma inong
balee nyang jipeupeunoh syarat-syarat lagee nyoe
jeuet teupeutamong lam dafetuar inong-inong balee;
umu jih hana kureueng nibak nam ploh thon, yoh
masa ilee teuma na sigoe jimeukawen, meugah siba-
goe ureueng inong nyang jipeubuet hai-hai nyang
jroh, lagee miseue nyoe: ka jipeurayek aneuek-
aneuek jih deungon get, galak jiteurimong jame-jame
nyang mudom dirumoh jih, jipeutimang ureueng-
ureueng meuman, jitulong ureueng-ureueng nyang
susah udeb, dan jipeubuet deungon biet-biet peue
mantong buet nyang jroh. bek peutamong nibak
inong-inong balee nyang mantong muda. sabab me-
unyo rasa beureuhi jih mantong teuga that, inong
nyan jitem meukawen lom, dan jitinggai almaseh.
deungon lagee nyan awaknyan kasalah sabab ji-
iengkeue janji nyang teubri ubak jihnyan. lom teuma
awaknyan jiboihi-boihi watee deungon cara jiteubiet
tamong lam rumoh gob. dan nyang leubeh brok lom,
na kheueh awaknyan jimeurunoe jipeusuna ureueng
laen jipeurhoh droe nibak urosan ureueng laen me-
unan cit jipeugah hai-hai nyang hana patot jipeu-
gah. nyang kheueh sabab jih ulon meulakee man-
gat ureueng inong balee nyang mantong-mantong
muda jimeukawen lom, jimeu aneuek dan jiuorih
rumoh tangga, mangat jeuet musoh-musoh geu-
tanyoe hana watee jipeubrok-brok nan geutanyoe.
sabab na inong-inong balee nyang ka sisat jiseutot
peue nyang jikheun le roh jeuhet. teuma, meun-
yoe sidroe ureueng inong kristen na anggota keu-
luwarga nyang ka jeuet keu inong balee, jihnyan
meuseuti jitulong inong balee nyan; bek jipeubiyeu
jeumaah nyang tanggung jih nyan. deungon lagee
nyan jeumaah jeuet jitulong inong-inong balee nyang
biet-biet hana wareh kawom jih. peumimpen jeu-
maah nyang jipeubuet tugahi jih deungon get, pa-
tot teubri peunhargaan dua goe lipat, nyang peun-
teng awaknyan nyang kayem meukutubah dan jipeu-
runoe gob. sabab lam alkitab na teutuleh lagee
nyoe, "leumo nyang teungoh jigiloe-giloe gandom
jipeuleukang aneuek gandom nyan nibak mu jih, bek
kheueh teubeukab babah jih", dan meunan cit, "ure-
ueng nyang mubuet, na hak jilakee upah jih". bek
kheueh teurimong tudohan ateuh sidroe-droe peu-
mimpen jeumaah, keucuali meunyo na jipeukong
le dua droe saksi atawa leubeh. ureueng jipeubuet

desya, bah kheueh teuseugah dikeue banmandum
jeumaah, mangat nyang laen jeuet teumakat. dikeue
po teu allah, isa almaseh, dan bubena malaikat nyang
ka teupileh, ulon lakee ngon meuharab that jeuet
gata seutot banmandum peutunyok-peutunyok nyoe
ngon hana wasangka ateuh soe mantong, dan hana
meudong-dong siblih. 22 bek kheueh teugisa-
gisa takeubah jaroe ateuh sidroe-droe ureueng guna
teubaiat jihnyan sabagoe peulayan tuhan. meunyo
ureueng laen meudesa, bek kheueh rhoh meulawok
lam desya nyan. jaga kheueh droe gata mangat teutab
gleh. bek le laloe jieb ie mantong; jieb kheueh ba-
cut ie anggo guna keutulong keumunyoh gata, sabab
gata kayem that saket-saket. desya siladam ure-
ueng, sigihlom teuba bak kanto peungadelan, ka
deuh teukalon ngon nyata that. teuma desya ure-
ueng laen baro kheueh teu teupeue oh ka ltheueh nyan
teuma. meunan cit deungon buet-buet nyang jroh
bagaih that deuh teukalon. dan nyang hana deuh
pih, hana hase sabe teusom. ureueng-ureueng kris-
ten nyang jeuet keu namiet, haroh jianggab bahwa te-
ungku po jih meuseuti jihoreumat, mangat ureueng
laen hana hase jipeubrok nan allah atawa peulajaran
geutanyoe. namiet-namiet nyang po jih ureueng
kristen, hana jeuet jianggab po jih nyan hina sabab
awaknyan saban-saban ureueng kristen. teuma le
namiet nyan jilayani po jih nyan leubeh get lom, sabab
po nyang jilayani ngon jroh nyan na kheueh saban-
saban ureueng meuman nyang teugaseh. banman-
dum nyoe meuseuti gata peurunoe dan gata naseuhat.
soe-soe mantong nyang peurunoe ajaran laen seulaen
nibak nyan dan hana situju ngon ajaran nyang beutoi
nibak tuhan geutanyoe isa almaseh, dan ngon ajaran
agama tanyoe, na kheueh ureueng nyang sombong
hana jiteupeue sapeue! peunyaket jih na kheueh galak
meudobat dan meudakwa keuhai istilah-istilah akhe
jih rhot nibak picke ate, meucerebre, fiteunah, curiga
nyang hana get, meunan cit meuiliseh waham nyang
hana putoh-putoh. rot seumike ureueng nyang lagee
nyan ka paneuk dan hana le nyang beuna. awaknyan
jipike hase jeuet keukaya rot agama. beutoi agama
teubri untong nyang rayeuk, meunyo manusia nyan
puih ngon peue nyang ka na. sabab hana meusapeue
pi nyang jeuet taba u dalam donya nyoe, dan hana
meusapeue pi nyang jeuet taba uluwa! teuma, meun-
yoe na peunajoh dan peukayan, nyan kaseb. teuma
ureueng nyang keuneuk jeuet keukaya, teugoda dan
meupalet ngon mubagoe hawa nafeusu nyang bangai
dan nyang rusak. nafeusu-nafeusu nyang lagee nyan
teuba manusia ubak hanco dan ceulaka. sabab nibak
cinta ubak peng, jiteuka mubagoe rupa nyang jeuhet.
na siladam ureueng nyang jitiyeub peng akhe jih ka
hana jiturot le ajaran kristen, laju awaknyan jiteuri-
mong mubagoe peundeuritaan nyang jipeuhanco ate
awaknyan. teuma gata na kheueh ureueng atra po
teu allah, ngon lagee nyan gata haroh tapeujioh ban-
mandum atra nyan. useuha kheueh beujeuet keu ure-
ueng nyang beutoi bak mata allah, nyang peuhamba
droe ubak allah, meuman ubak almaseh, tagaseh
keusabe manusia, tabah lam deurita, dan meusikeub
leumoh leumbot. meujuang kheueh beubiet-biet keu
udeb lagee ureueng kristen mangat gata tarabut
hadiyah seujati dan keukai. sabab keunyan kheueh

allah geutawok gata bak watee gata ta-aku gobnyan dikeue ureueng rame bahwa gata meuiman ubak almaseh. dan jinoenyoe, dikeue po teu allah nyang bri nyawong keu makhlok peue mantong, dan dikeue isa almaseh nyang ka geubri saksi nyang beutoi dikeue pontius pilatus, ulon lakee nyoe nibak gata: taat kheueh ubak peurintah nyan deungon ate nyang gleh dan hana meucupa trok ubak watee jih tuhan geutanyoe isa almaseh geuteuka lom teuma. keuhai teuka gobnyan teuma geupeuteuntee bak watee nyang paih le allah keudroe. gobnyan kheueh nyang matkuasa sidroe kong sagai; gobnyan agong, raja di ateueh raja, dan tuhan banmandum tuan. gobnyan kheueh mantong nyang hana hase jikuasa le mate; gobnyan udeb lam cahya nyang hana hase jipeurab le soemantong, hana meusidroe manusia pi nyang ka lheueh jikalon gobnyan. keu gobnyan kheueh horeumat dan kuasa siumu masa! amin. keu ureueng-ureueng nyang kaya ateueh rhueng donya, gata peugah kheueh mangat awaknyan bek sombong dan bek meuharab ateueh barang-barang nyang hana teutab – lagee hai jih atra keukayaan. awaknyan meuseuti meuharab ubak po teu allah nyang geubri peue-peue mantong ubak geutanyoe deungon meulimpah mangat geutanyoe tateume rasa. lakee kheueh nibak awaknyan mangat awaknyan jitunyok keubuet nyang jroh, keu jipeubuet buet-buet nyang get, murah ate dan galak jimeubri. deungon lagee nyan awaknyan ka jigumpoi atra nyang jeuet keumodal nyang get keuwatee nyang teuma teuka. dan deungon lagee nyan awaknyan teuma meuteume udeb nyang keukai, na kheueh udeb nyang sejati. peue nyang ka teupeucaya keugata, jaga kheueh nyan beugot-got, timotius! peujioh kheueh tutoe haba nyang hana meuguna dan meudobat keuhai-hai nyang seucara keuliru teupeugah "peungeutahuan". sabab na ureueng nyang jipeugah bahwa awaknyan na peungeutahuan nyan, sampoe ngon lagee nyan kajiseuleweng ajaran-ajaran kristen nyang awaknyan meuiman yoh masa ilee. seumoga tuhan geubri beureukat ubak syedara mandum. horeumat kamoe, paulus

timotius, aneuek ulon nyang teucinta! ulon, paulus, lon tuleh suratnyoe keugata, dan meuharab seumoga allah bapak dan tuhan geutanyoe isa almaseh geubri beureukat, rakhmat dan seujahteura ateueh gata. ateueh keuheundak po teu allah, ulon geuangkat jeuet keu rasui isa almaseh dan geuyue peusampoe keuhai udeb nyang geupeu janji le allah. udeb nyan tateurimong sabab meusaboh ngon isa almaseh. ulon meulakee syukoe ubak po teu allah nyang lon layani ngon ate nurani nyang gleh lagee nyang geupeubuet le indatu ulon yoh masa ilee. ulon sabe lon lakee teurimong gaseh ubak allah pajan mantong ulon ingat keugata lam doa, bah kheueh uroe meunan cit malam. ulon teuingat ubak ate gata nyang seudeh. nyang kheueh sabab jih ulon meuharab that meurumpok ngon gata mangat ulon biet-biet meugeumbira. ulon teuingat ubak keupeucayaan gata nyang biet-biet sunggo ubak almaseh, saban lagee keupeucayaan nek gata lois dan ma gata eunike. dan ulon yaken gata pih meuiman nyang lagee nyan. sabab nyan ulon peuingat gata keutateupeue udeb karonya nyang geubri le allah ubak gata bak watee ulon keubah jaroe lon ateueh gata. sabab roh allah nyang geubri ubak geutanyoe, kon kheueh roh nyang teupeujeuet geutanyoe jeuet keuteumakot. nyang sibeuna jih, roh allah nyan teupeujeuet geutanyoe meutamah teuga, peunoh ngon gaseh sayang dan hase tapeuteun droe. sabab nyan bek kheueh malee tabri keusaksian keuhai tuhan geutanyoe, dan bek teuma malee keuhai ulon, nyang jipeutamong lam glab sabab le gobnyan. nyang sikeubiet jih, bah kheueh gata ngon teunaga nibak po teu allah, meusajan meudeurita le sabab haba get nyan. allah geupeu seulamet geutanyoe dan geutawok geutanyoe mangat jeuet keu umat gobnyan keudroe. gobnyan geupeubuet lagee nyan kon dasai jih peue nyang ka tapeubuet, teuma reuncana gobnyan dan rakhmat gobnyan. gobnyan geubri keugeutanyoe rahmat gobnyan meulalu isa almaseh sigohlom donya nyoe geucebta. dan jinoenyoe, allah geutunyok rakhmat nyan ubak geutanyoe deungon jiteuka raja nyang ba seulamet tanyoe isa almaseh. isa geupeutalo kuasa mate dan geuba udeb nyang abadi meulalu haba get nyan. keuteupeusampoe haba get nyan kheueh alah geuangkat ulon jeuet keurasui dan guree. nyang kheueh sabab jih ulon meudeurita le mandum nyoe, teuma ulon teutab yaken, sabab ulon kuteupeue that soe nyang ulon meuiman. ulon yaken bahwa peue nyang ka gobnyan peucaya ubak ulon, gobnyan pih hase geujaga trok bak uroe patee. seutot kheueh ngon biet-biet ajaran nyang beutoi nyang ka ulon bri nibak gata. dan bah kheueh gata teutab tamumat nibak iman dan gaseh nyang ka jeuet keuhak milek geutanyoe sabab meusaboh ngon isa almaseh. ngon geutulong le roh allah nyang udeb lam tuboh geutanyoe, bah kheueh gata tajaga beuget-get haihai nyang muyuem nyang ka teupeucaya ubak gata. gata tateupeue bahwa banmandum ureueng nyang na diwilayah asia ka jitinggai ulon, meunan cit ngon figelus dan hermogenes ka jitinggai lon. teuma keuluwarga onesiforus kana padub goe jipeumangat ate lon. seumoga tuhan meubalahi gaseh sayang geuh ateueh awaknyan. bah kheueh ulon na lam glab, one-

siforus hana malee ngon keuadaan ulon nyan. meunan trok u roma, jihnyan laju jiseuha jimita ulon sampoe jihnyan meurumpok ngon ulon. dan gata tateupeue di efesus jihnyan jai that-that ka jitulong lon. seumoga tuhan geutunyok gaseh sayang geuh keu jihnyan bak uroe tuhan geupeu sidang banmandum umat manusia. timotius, aneuek ulon! bah kheueh gata jeuet keuteuga le rakhmat nyang geubri ubak geutanyoe, sabab tanyoe meusaboh ngon isa almaseh. ajaran nyang yoh masa ilee ka gata deungoe nibak ulon dikeue rakyat ba, bah kheueh gata pateh ubak ureueng-ureueng nyang jeuet gata pateh dan nyang carong jipeurunoe ureueng laen. gata meuseuti meusajan meudeurita sibagoe sidadu isa almaseh nyang seutia. sidroe sidadu nyang teungoh meutugaih, hana teuma jipeugabuek droe jih ngon urosan-urosan droe, sabab jihnyan jikeuneuk peumangat ate pang droe jih keudroe. sidroe ureueng peumeuen ulah raga hana teuma jeuet keujiara watee jimeutunang, meunyoe jihnyan hana jitaat ubak atoran-atoran. ureueng meugo nyang ka jikeureuja brat, ureueng nyan kheueh nyang phon-phon that nyang hak jiteurimong wase seunaman. pike kheueh peue nyang ulon peugah nyan, sabab tuhan teuma geubri keugata keusanggapan keutamuphom banmandum. ingat kheueh nyoe: haba get nyang ulon peusampoe nyan na kheueh haba keuhai isa almaseh, keutronan nabi daud; gobnyan kheueh almaseh nyang ka udeb lom teuma nibak mate. sabab teupeusampoe haba get nyan kheueh, ulon meudeurita; bahkheueh sampoe jirante lagee sidroe ureueng jeuhet. teuma feureuman allah hana hase jirante. nyang kheueh sabab jih ulon tabah lon tanggong banmandum nyan deumi keupeuntangan ureueng-ureueng nyang ka geupileh le po teu allah, mangat awaknyan pi meuteume seulamet nyang geubri meulalu isa almaseh, dan nyang meusajan-sajan ngon keagongan nyang abadi. keubiet beutoi nyang ulon peugah nyoe, "meunyoe geutanyoe ka mate meusajan gobnyan, geutanyoe teuma udeb cit lom meusajan gobnyan. meunyoe tanyoe teutab tabah, geutanyoe teuma tamat peurintah cit meusajan gobnyan. meunyoe geutanyoe taiengkeue keu gobnyan, gobnyan pi teuma geuiengkeue keugeutanyoe. meunyoe geutanyoe hana seutia, gobnyan teutab seutia, sabab hana hase gobnyan meubeda ngon droe geuh keudroe." bah kheueh gata peuingat ureueng-ureueng keuhai mandum nyoe. dikeue allah, bri kheueh naseuhat bak awaknyan mangat bek jimeudakwa keuhai istilah-istilah. nyang lagee nyan hana meuguna, nyang na jipeukaru pikeran ureueng-ureueng nyang deungoe. useuha kheueh le gata deungon biet-biet mangat allah geuangkee gata sibagoe ureueng nyang patot tamubuet keu gobnyan. useuha kheueh mangat gata bek malee keuhai buet gata nyan, dan gata purunoe ngon jeulaih dan beutoi keuhai ajaran nyang beuna nibak po teu allah. peujioh kheueh tutoe haba nyang hana manfaat dan nyang teuhina allah. tutoe haba nyang lagee nyan teuma teuba manusia bak buet nyang leubeuh jeuhet. ajaran awaknyan bagai that jimeu eue lagee peunyaket kanker nyang that that meubahya. lamkawan awaknyan jitamong cit keunan himeneus dan filetus. awaknyan ka sisat ni-

bak ajaran yang beutoi, dan jiputa balek nyang ka jiman le siladam ureueng. awaknyan jipeugah bahwa teubedoh nibak mate ka teujadi. teuma dasai nyang kong nyang ka geupeuget allah hana hase jiyok-yok. di ateuh nyan na teuteuleh lagee nyoe, "tuhan geuturi ureueng-ureueng nyang atra gobnyan", dan "ureueng nyang jipeugah bahwa jihnyan milek tuhan, ureueng nyan meuseuti jipioh jipeubuet nyang salah". lam rumoh nyang rayeuk na meuteume meubagoe rupa peurabot. na nyang teupeuget nibak pirak atawa meuh, teuma na cit nyang teupeuget nibak kayee atawa tanoh. na nyang jipeuguna keu nyang istimewa, dan na cit nyang jipeuguna keu keupeureulee biasa. ureueng nyang jipeugleh droe jih nibak mandum nyang jeuhet, ureueng nyan teuma teupeuguna keuteupeureulee nyang istimewa. gobnyan jeuet keu atra nyang khusus dan naguna keu po droe jih. jihnyan teukeubah keuteupeuguna keu tieb-tieb buet nyan jroh. 22 peujioh kheueh peue-peue nyang jiharok le ureueng muda. useuha kheueh ubak udeb lagee nyang geulakee le allah, seutia nibak ajaran gobnyan dan teugaseh seusabe manusia, dan na ate nyang teuntram. udeb kheueh ngon awaknyan nyang jilakee tulong ubak tuhan ngon ate nyang murni. bek kheueh peu rhoh droe nibak buet-buet nyang meudobat le ureueng-ureueng bangai nyang hana jiteupeue sapeue. gata tateupeue bahwa banmandum nyan jipeuteuka dakwa. ureueng nyang mubuet keu tuhan hana patot jimeudakwa; jihnyan meuseuti ramah ateuh mandum ureueng, dan hase jipeurunoe gob ngon jroh dan saba. jihnyan meuseuti ngon leumoh leumbot jipeurunoe ureueng nyang galak meulawan; mudah-mudahan allah geubri watee keu ureueng-ureueng nyan keu jimeutobot nibak mandum desya-desya awaknyan dan jituri keu ajaran nyang beuna. deungon lagee nyan awaknyan ka jeuet keusadar lom teuma, dan leupah nibak peurangkab ibilih nyan ka jidrob awaknyan dan jipaksa awaknyan jiseutot keuheundak ate jih. ingat kheueh nyoe: nibak uroe-uroe akhe teuma na keusosahan. manusia jipeupeunteng droe jih keudroe, sifeuet manusia nyan teupeng-peng, sombong dan galak meutoeu ngon haba sulet. awaknyan galak jihina gob, beurontak bak ureueng tuha, hana jiteupeue lakee teurimong gaseh, dan jibanci keuhai-hai nyang rohani. awaknyan hana jigaseh seusabe manusia, hana jitem peuamphon gob salah, awaknyan galak jipeubrok-brok nan ureueng laen, galak jipoh gob ban galak droe, awaknyan keujam, dan hana galak nyang keugot. awaknyan galak meukianat, manyang ate dan hana seumike panyang. awaknyan leubeh galak keumangat lam donya nibak jiseutot allah. bah pi seucara lahe awaknyan taat jipeubuet keuwajiban agama, teuma jitulak inti agama nyan keudroe. peujioh kheueh nibak ureueng-ureueng nyang lagee nyan. na lamkawan awaknyan nyang ka jitamong lam rumoh-rumoh, laju jirayu ureueng-ureueng inong nyan leumoh dan nyang ka jai lagoena desya dan jikuasa le mubagoe nafesus. ureueng-ureueng inong nyan hana putoh-putoh jilakee peurunoe, hantom na jiteume beujituri ajaran nyang beutoi nibak allah. lagee toh yanes dan yambres jilawan nabi musa yoh masa ilee, meunan kheueh teuma ureueng-ureueng nyan jilawan ajaran nyang

teuka nibak allah. pikeran awaknyan ka rusak, dan iman awaknyan hana ek jiteun keunong cuba. teuma awaknyan hana teuma jiteume sapeue, sabab bangai jih nyan teuma jiteupeue le mandum ureueng, lagee nyang ka jirasa le yanes dan yambres. teuma gata ka taseutot ajaran lon, pi-e ulon, dan tujuan udeb lon. gata ka tangieng keudroe pakriban ulon nyoe biet-biet meuiman ubak isa almaseh dan lon gaseh seusabe manusia. meunan gata tateupeue keuhai saba dan tabah ulon. gata ka takalon ulon ji ienanya dan ulon meudeurita. gata tateupeue mandum nyang teu jadi ateuh ulon di antiokhia, di ikonium, dan di listra; dan gata tateupeue banmandum nyang ulon deurita! teuma tuhan geupeu seulamut ulon nibak mandum nyan. beutoi mandum ureueng nyang keuneuk udeb meuebadat dan udeb meusaboh ngon isa almaseh teuma ji ienanya, seudangkan ureueng-ureueng jeuhet dan ureueng-ureueng buet teumippee meutamah jeuhet. awaknyan jipeunget ureueng laen padahai awaknyan keudroe pih keunong peungeut. teuma keuhai gata, timotius, bah kheueh gata teutab tamumat nibak ajaran-ajaran nyang beuna nyang ka teupurunoe bak gata dan nyang gata meuiman sipeunoh ate; sabab gata tateupeue soe guree-guree gata. gata meuseuti teuingat bahwa yoh ubit gata ka taturi keu alkitab. alkitab nyan hase jibri keugata peungeurtian keumeuteume ubak keuseulamatan meulalu iman ubak isa almaseh. banmandum nyang teuteuleh lam alkitab, geupeu ilham le allah dan meuguna keuteupeurunoe nyang beuna, keuteuseugah dan teupeutoi nyang salah, dan keuteupeurunoe manusia mangat udeb meunurot keuheundak allah. deungon alkitab nyan ureueng nyang layani allah hase teupeuleungkab ngon samporeuna keumeubagoe macam buet nyang jroh. isa almaseh teuma teuka lom lam donya nyoe dan geupeu sidang ureueng-ureueng nyang udeb dan nyang mate; dan gobnyan teuka keugeuba peurintah sibagoe raja. ngon sabab nyan ulon meulakee ngon meuharab that nibak gata dikeue allah dan isa almaseh: bah kheueh gata peusampoe haba nyang beutoi nyang teuka nibak allah nyan, dan sabe gata peusak mangat jitem deungoe le gob, peu kheueh awaknyan jitem atawa hana. bah kheueh gata tapeuyaken gob, gata tunyok nyang salah, dan gata bri durungan keu awaknyan. peurunoe kheueh gob nyan deungan saba nyang rayeuk. sabab teuma teuka watee jih, manusia hana jitem teurimong le ajaran nyang beuna. sikeubiet jih, awaknyan teuma jiturot keuheundak jih keudroe, dan jipeusapat guree-guree nyang guna jipeurunoe hai-hai nyan mangat teudeungoe nibak geulinyueng awaknyan. awaknyan jisumpai geulinyueng ateuh nyang beuna, teuma teuma jipeudeungoe get-get ubak calitra-calitra dongeng. bah kheueh lagee nyan, gata meuseuti takuasa droe gata lam keuadaan peue mantong. tabah kheueh nibak peundeuritan, peubuet kheueh tugaih gata sibagoe ureueng nyang peusampoe haba get nyan dan peujak kheueh nyan ngon siget-get jih keuwajiban gata sibagoe peulayan allah. keuhai droe ulon, ka trok watee jih ulon mate sibagoe keureubeuen keu po teu allah. hana treb le ulon teuma lon tinggai donya nyoe. ulon ka lon seutot meutuang plueng deungon siget-get jih, dan ka trob bak gareh

akhe. ulon teutab seutia ubak almaseh sampoe akhe. dan jinoenyoe hadiah keu nyang meunang ka jipreh ulon. bak uroe kiamat, tuhan, hakem nyang ade nyan kheueh nyang seurah hadiah nyan keu ulon, sabab ulon udeb meuget lom ngon po teu allah. dan kon ulon mantong nyang teurimong hadiah nyan, teuma banmandum ureueng nyang ka jipreh-preh deungon rindu tuhan nyang teuka. useuha kheueh dan teuka kheueh bak ulon beureujang-reujang, sabab demas ka jitinggai ulon sabab jicinta keu donya nyoe. jihnyan ka jijak u tesalonika. dan kreskes ka teuma jijak u galatia, meunan cit deungon titus u dalmatia. teuma lukas nyang tinggai ngon lon. jaktueng kheueh markus dan bah kheueh jihnyan tinggai meusajan gata, sabab jihnyan jeuet jitulong nibak buet ulon. ulon ka lon yue tikhikus jijak u efesus. meunyoe gata teuka, ba kheueh mantel nyang lon tinggai di troas bak rumoh karpus. meunan cit ngon kitab-kitab gata bek tuwoe gata ba, nyang paleng peunteng kitab nyang teupeuget nibak keureutah kulet. aleksander, teumpeun teumaga nyan ka jipeubuet hai-hai nyang paleng jeuhet ateuh ulon. tuhan teuma geubalaih ateuh jih nyan sisuai ngon buet jih nyang jeuhet. gata keudroe meuseuti ate-ate keu jih nyan, sabab jihnyan jilawan that beurita nyang tanyoe ba. bak watee ulon phon-phon that lon peusampoe peumbilaan lon, hana meusidroe pi nyang jitem dong blaih lon; banmandum jitinggai lon. mudah-mudahan allah hana geupeusalah awaknyan lam hainyoe! teuma tuhan na meusajan ulon. gobnyan geubri teunaga keu ulon sampoe ulon hase lon peusampoe banmandum haba get nyan, mangat jideungoe le mandum ureueng nyang kon yahudi. dan ulon lheu nibak bahya mate. keubiet tuhan teuma geupeulheuh ulon nibak tieb-tieb useuha nyang jeuhet ateuh ulon. gobnyan teuma geuba ulon deungon sealamat lam keurajeuen geuh di syeuruga. bah kheueh gobnyan teupeuagong siumu masa! amin. saleuem ulon keu priskila dan akwila dan keu keuluwarga onesiforus. erastus tinggai di korintus, dan trofimius ka ulon tinggai lam keuadaan saket di miletus. meu-useuha kheueh sijeuet-jeuet jih keuteu-teuka sigohlom musem sijuek. ebulus, pudes, linus, dan klaudia, awaknyan jikirem saleuem keugata mandum; meunan cit keu syedara saboh iman nyang laen. 22 seumoga tuhan na meusajan gata. seumoga tuhan geubri beureukat keu syedara mandum! horeumat kamoe, paulus

aneuek ulon titus! ulon, paulus, kutuleh surat nyoe sibagoe hamba allah dan rasui isa almaseh. ulon gepileh dan geu-utus keu teutulong ureueng-ureueng pilehan allah mangat beujeuet teuga iman awaknyan. meunan cit ulon museuti kubimbeng awaknyan mangat jituri ajaran nyang beuna yang jipeurunoe le agama tanyoe. ajaran na kheueh sibagoe harapan bahwa geutanyoe tateurimong udeb sejati dan keukai. allah ka geupeu janji udeb nyan sigihlom awai jamen – dan allah hana mungken meseulet. bak watee nyang paih, allah geupeugah janji gobnyan nyan lam peusan geuh. peusan nyan ka geupeucaya bak ulon, dan ulon britee nyan ateuhe peurintah allah peuseulamat tanyoe. titus, gata na kheueh biet-biet aneuek ulon, sabab gata dan ulon saban-saban kata meuman ubak almaseh. ulon meuharab seumoga alah bapak dan isa almaseh raja peuseulamat tanyoe, geubri beureukat dan seujahteura ateuhe gata. ulon tinggai gata di kreta mangat gata hase tauroih hai-hai nyang peureulee teuatoe. meunan cit, mangat gata ta angkat peumimpen-peumimpen jeumaah diteb-tieb banda. dan ingat kheueh ubak peuntunok-peuntunok nyang ulon peugah nyoe: sidroe peupeumimpen jeumaah na kheueh sidroe ureueng nyang hana meucupa; ureueng nyan peurumoh jih sidroe mantong; aneuek-aneuek jih nyang ka meuman ubak almaseh dan kon aneuek nyang jeuhet hana jeuet teupurunoe. peunilek jeumaah na kheueh ureueng nyang jiuroidi buet allah, ureueng nyan hana meucupa. ureueng nyan hana sombong atawa bagaih beungeh, atawa galak keumabok, atawa galak keumulo, atawa teupeng-peng. ureueng nyan meuseuti nyang galak jiteurimong jame dirumoh jih, galak bak hai-hai nyang jroh, hase jiteun droe, juJoe, gleh dan teureuteb. ureueng nyan meuseuti nyang jimumat kong that nibak ajaran nyang ji-iman, lagee nyang ka teupurunoe bak jih nyan. ngon lagee nyan jihnyan hase jibri naseuhat keu ureueng laen nyang dasai jih nibak ajaran nyang beutoi, dan jitunok buet-buet ureueng nyang salah nyang lawan jih. sabab jai that ureueng nyang galak keubeurontak, nyan paleng phon ureueng-ureueng nyang yoh awai meuagama yahudi; awaknyan jipeunget ureueng laen ngon haba jih nyang sulet. ureueng-ureueng nyang lagee nyan meuseuti teusumpai babah jih, sabab awaknyan jipeukaru keuluwarga-keuluwarga deungan ajaran-ajaran nyang hana beutoi. awaknyan jipeubuet lagee nyan jikeuneuk mita laba nyang hana patot! ka lheureu geupeugah le nabi nyang asai jih di kreta ureueng awaknyan keudroe, "ureueng-ureueng kreta sabe jimeusulet, dan lagee beulatang juwah nyang leuha dan beu-o." peue nyang geupeugah le nabi nyan keubiet beutoi. nyang kheueh sabab jih gata meuseuti tatam awaknyan deungan teugaih; mangat awaknyan teutab jimumat nibak ajaran-ajaran nyang beutoi hana le jimumat bak dongeng-dongeng yahudi atawa peuratoran-peuratoran nyang jipeuget le ureueng-ureueng nyang tulak ajaran nyang beutoi nyan. peue-peue mantong na kheueh gleh nibak ureueng nyang gleh. teuma nibak ureueng nyang pikeran jih kutoe lom hana meuman, hana meusapeue pi nyang gleh, sabab pikeran dan ate nurani awaknyan ka kutoe! awaknyan jipeugah

bahwa awaknyan jituri allah, padahai buet awaknyan ji iengkeue hai nyan. awaknyan keubiet that luwat, dan awaknyan hana jitem taat; awaknyan na kheueh ureueng-ureueng nyang hana hase jipeubuet nyang jroh. teuma gata, titus, bah kheueh gata tapeurunoe ajaran nyang beutoi. bri kheueh naseuhat bak ureueng agam nyang tuha, mangat awaknyan jiteun droe, bijaksana dan udeb sibagoe ureueng nyang patot teuhoreumat. meunan cit awaknyan seutia jimumat bak ajaran nyang beutoi nyang teuka nibak allah, jigaseh ngon sampoereuna dan meudeurita ngon ate nyang tabah. meunan cit teuma gata bri kheueh naseuhat keu ureueng-ureueng inong nyang tuha mangat peurangoe awaknyan saban lagee peue nyang patot keu ureueng nyang udeb khusus keu po teu allah. ureueng nyan hana jeuet jifiteunah ureueng laen, dan hana jeuet banggi keu ie kreuheh. awaknyan meuseuti jipeurunoe hai-hai nyang get, deungan lagee nyan awaknyan jeuet jididek inong-inong nyang mantong muda beujigaseh keu lakoe dan aneuek-aneuek jih, jeuet keu ureueng bijaksana, udeb jih gleh dan jeuet keu ma rumoh tangga nyang jroh nyang taat ubak lakoe jih. deungan na lagee nyan hana ureueng nyang hase jihina haba nyang teuka nibak po teu allah. meunan cit teuma, bri kheueh naseuhat keu ureueng-ureueng muda mangat awaknyan jeuet keu ureueng bijaksana. lam hai peue mantong, bah kheueh gata jeuet keuteuladan pi-e nyang jroh. meunyeu gata peurunoe, gata bue biet-biet juJoe dan beutoi-beutoi. peuguna kheueh tutoe haba nyang bijaksana, nyang hana hase jipeubeuah le gob, mangat lawan-lawan gata jeuet keumalee sabab hana hai-hai nyang brok nyang hase jipeugah keugeutanyoe. namiet-namiet bah kheueh jitaJkok ubak amphon jih, dan jipeumangat ate jih lam hai peue mantong. awaknyan hana jeuet jibantah, atawa jiceumeucue. bah kheueh awaknyan jipeuleumah droe bahwa jihnyan get dan seutia, mangat ngon sikeueb awaknyan nyang lagee nyan ureueng laen jipujoe keuhai ajaran po teu allah, nyang peuseulamat geutanyoe. sabab allah ka geutunok rahmat gobnyan guna teupeuseulamat banmandum umat manusia. rahmat allah nyan teudidek geutanyoe mangat hana le meuantok ngon meulakee gobnyan dan hana taseutot kheun donya nyoe. geutanyoe geudidek keu udeb lam donya nyoe deungan tateupeue tapeuteun droe, juJoe dan seutia ubak po teu allah. jinooenyoe geutanyoe teungoh tapreh-preh uroe nyang tahaarab-harab nyan; nibak uroe nyan donya teuma jikalon keuangongan isa almaseh, na kheueh allah maharayeuk dan raja peuseulamat tanyoe. gobnyan ka geukeureubeuen droe geuh keudroe keugeutanyoe guna keugeupeu beubaih geutanyoe nibak mandum nyang jeuhet, dan geupeujeuet geutanyoe saboh umat nyang beubaih nibak desya-desya dan nyang jeuet keu milek gobnyan mantong, dan meunan cit nyang biet-biet jipeubuet nyang get. purunoe kheueh banmandum nyan, dan naseuhat kheueh dan marit kheueh ngon ureueng nyang deungoe ngon peunoh wibawa. dan bek kheueh meusidroe ureueng pi nyang jinggi gata deungan hina. peuingat kheueh ubak anggoa jeumaah gata mangat awaknyan jideungoe ubak peue nyang geukheun le peumimpen-

peumimpen dan nyang mat kuasa neugahra, lom taat dan jitem peubuet tieb-tieb hai nyang jroh. peugah kheueh bak awaknyan mangat bek karu atawa meudakwa ngon soe mantong, dan meusikeub rumeh. dan bah kheueh awaknyan meusikeub leumoh leumbot ubak soe mantong. sabab yoh masa ilee geutanyoe keudroe pi bangai, sisat dan hana taat. tanyoe jipeubudak le mubagoe-bagoe nafeusu dan hasrat; tanyoe udeb peunoh ngon niet-niet nyang jeuhet dan bingiek ate, dan sabe lam banci. teuma po teu allah, nyang peuseulamat geuteunyoe geubri gaseh dan ate geuh nyang jroh ubak geutanyoe. gobnyan geupeu seulamat tanyoe, kon le sabab tanyoe ka tapeubuet sapeue-peue buet nyang get, teuma na kheueh gobnyan keudroe keugeunaseh keu geutanyoe. gobnyan geupeu seulamat tanyoe meulalu roh allah, nyang geubri bak geutanyoe lahe baro deungon cara geurhah geutanyoe. allah geupree roh gobnyan ateueh geutanyoe deungon peurantara isa almaseh, raja peuseulamat geutanyoe, mangat le rahmat isa, geutanyoe tameuget lom teuma ngon allah dan geutanyoe meuteume udeb seujati dan keukai nyang geutanyoe harab that. tutoe haba nyoe keubiet beutoi that. ulon meuharab beu gata wahan that hai nyoe, mangat ureueng-ureueng nyang meuiman ubak po teu allah biet-biet jiuseuha keu jipeubuet buet-buet nyang jroh dan na manfaat keu mandum ureueng. peujioh kheueh meudobak nyang hana meuguna, haba-haba asai usui, meudakwa dan meulo sabab keuhai hukom agama. banmandum nyan hana meuguna dan hana meulaba. ureueng nyang jeuet keusabab jeumaah meucrebbe, gata seugah kheueh sigoe dan dua goe; oh lheuuh nyan bek kheueh gata meurakan le ngon jih nyan. gata tateupeue bahwa ureueng nyang lagee nyan jeuhet dan desya-desya jih sibagoe bukeuti bahwa jihnyan salah. beubagaih kheueh meunan lheuuh lon kirem artemas dan tikhikus ubak gata, useuha bubagaih that keu gata jak ubak ulon di nikopolis, sabab ulon na niet keuneuk tinggai bak teupat nyan watee musem sijuek. useuha kheueh beubiet-biet keu tatulong zenas, nyang malem hukom nyan, dan apolos, mangat awaknyan hase jijak hana kureueng peue-peue mantong. ureueng-ureueng geutanyoe bah kheueh jimeurunoe keu jipeubuet hai-hai nyang jroh mangat jeuet jipeupeunoh peue-peue mantong nyang keubiet that jipeureulee; bek sampoe awaknyan udeb hana meuguna. banmandum syedara nyang na meusajan ulon, geukirem saleuem keu gata. peutrok kheueh saleuem kamoe ubak rakan-rakan geutanyoe nyang saboh iman. seumoga tuhan geubri beureukat ubak gata mandum. horeumat kamoe, paulus

syedara filemon, sabat dan rakan kamoe! ulon, paulus, sidroe ureueng hukoman sabab le isa almaseh, meusajan deungan syedara ulon timotius, kamoe tuleh surat nyoe keu gata dan keu jeumaah nyang na meusapat dirumoh gata; meunan cit keu syedara tanyoe ureueng inong nyang nan jih apfia dan rakan saboh peujuangan ngon geutanyoe arkhipus. kamoe meuharab that seumoga allah bapak geutanyoe dan tuhan isa almaseh geubri beureukat dan seujahteura ubak gata. tieb-tieb ulon meudoa, ulon kheun nan gata dan lon lakee teurimong gaseh ubak po teu allah. sabab ulon deungoe bahwa gata biet-biet meuiman ubak tuhan isa dan gata gaseh banmandum umat allah. ulon meudoa mangat meusyedara geutanyoe sibagoe ureueng-ureueng meuiman teuma jipeuhase peungeurtian nyang leubeh rayeuk ateuh banmandum beureukat nyang na bak geutanyoe sabab meusaboh ngon almaseh. syedara lon filemon, geunaseh gata ateuh banmandum umat allah, keubiet mangat that ate lon dan ngon lagee nyan ka teubri durongan keu ulon nyoe! banmandum umat allah ka jeuet keu geumbira sabab le gata. ngon sabab nyan, sibagoe sidroe syedara nyang saboh iman, ulon jeuet mantong lon peurintah gata keu gata peubuet peue mantong nyang meuseuti gata peubuet. teuma sabab ulon kugaseh gata, nyang kheueh sabab jih lon lakee mantong. ulon nyoe sidroe ureueng tuha nyang jinoenyoe teungoh keunong teun lam peunjara sabab le isa almaseh. ulon, paulus, nyang lon peugah nyoe keuhai onesimus, aneuek ulon lam almaseh. sabab lam peunjara nyoe ulon ka jeuet keu bapak rohani jih. yoh masa ilee jih nyan hana meuguna nibak gata, teuma watee nyoe jihnyan ka na guna, kon mantong keu gata, teuma keu ulon cit teuma. jinoenyoe ureueng nyang ulon gaseh nyan lon kirem lom ubak gata. nyang sikeubit jih ulon keuneuk teun jih nyan meusajan ulon sibagoe geunantoe gata, mangat jihnyan jeuet jitulong lon, simantong ulon teuteun lam peunjara nyoe sabab lon peusampoe haba get nyang teuka nibak allah. teuma ulon hana kutem peubuet sapeue pi meunyoe gata hana situju. ulon leubeh galak meunyoe gata peubuet deungan ate gata nyang rilu; ulon hana kutem paksa gata. mungken onesimus jijak nibak gata teuma sikeujab mangat gata jeuet meuteume jih nyan lom teuma keu siumu masa. jinoenyoe jihnyan kon mantong sidroe namiet keu gata; jihnyan leubeh nibak nyan. jihnyan na kheueh sabe ureueng kristen nyang teucinta. jihnyan meuguna that nibak ulon, peuteuk lom keu gata! teuntee jihnyan meuguna that bah kheueh sibagoe namiet meunan cit sibagoe sidroe syedara lam tuhan! le sabab nyan, sabab gata ta anggab ulon rakan sabe ureueng kristen, teurimong kheueh lom teuma onesimus saban lagee gata tateurimong ulon. meunyoe jihnyan meusalah atawa meu utang nibak gata, bah kheueh ulon nyang tanggung banmandum nyan. deungan lagee nyan, bah kheueh ulon teumuleh keudroe disinoe: ulon, paulus, teuma lon bayeue banmandum nyan. (teuntee hana peureulee lon peuingat bahwa gata keudroe na utang nibak ulon, na kheueh udeb gata nyang baro sibagoe ureueng kristen.) le sabab nyan, deumi tuhan cuba kheueh gata tulong ulon, peumangat kheueh ate ulon sibagoe syedara lam almaseh. ulon tuleh surat-

nyoe sabab yaken bahwa gata teuma tapeubuet peue nyang ulon lakee. dan keubiet ulon teupeue bahwa gata teuma tapeubuet leubeh nibak nyan. 22 meunan cit teuma, tulong kheueh gata tinggai saboh kama keu ulon di rumoh gata, sabab ulon meuharab allah geuk-abui doa syedara banmandum dan geuba lom teuma ulon ubak gata. epafra, nyang na meusajan ulon lam peunjara sabab le isa almaseh, jikirem saleuem keu gata. dan teurimong kheueh teuma saleuem rakan-rakan lon: markus, aristarkus, demas dan lukas. seumoga tuhan isa almaseh geubri beureukat ubak gata. horeumat kamoe, paulus

bak jamen ilee jai lagoena allah meufeuereuman ubak indatu geutanyoe meulalu nabi-nabi deungon geupeu guna meubagoe cara. teuma nibak jamen akhe nyoe gobnyan geumeututoe ubak geutanyoe deungon peurantaraan aneuek gobnyan. meulalu aneuek geuh nyoe kheueh allah geucebta alam seumeusta. dan po teu allah ka geupeuteuntee bahwa aneuek gobnyan nyoe kheueh nyang na hak geupeuteuntee peue-peue mantong. gobnyan kheueh nyang peuteubiet keu agongan allah nyang paleng meusyehui; gobnyan kheueh gamba nyang paleng nyata nibak droe allah keudroe. gobnyan kheueh teuma nyang peulara alam nyoe samporeuna deungon feureuman geuh nyang paleng meukuasa. oh ka lheureh gobnyan teupemungken manusia keuteupeubeubaih nibak desya-desya awaknyan keudroe, gobnyan geuduek bak tahta peumeurintah nyang na lam seueuriga meusajan-sajan ngon allah, peunguasa nyang paleng manyang. aneuek nyan meuteume jabatan nyang jioh leubeh manyang nibak malaikat, dan nan nyang geubri le po teu allah ubak gobnyan pih jioh leubeh teuhoreumat nibak nan nyang geubri ubak malaikat. hantom na allah geupeugah meunoe ubak meusidro malaikat pi, "gata kheueh aneuek ulon; nibak uroenyoe ulon jeuet keu bapak gata." hantom na allah meufeuereuman meunoe ubak malaikat pakriban kheueh mantong, "ulon teuma jeuet keu bapak jih, dan jihnyan teuma jeuet keu aneuek ulon." teuma bak watee allah geu kirem aneuek gobnyan nyang tuha lam donya nyoe, allah meufeuereuman lagee nyoe, "banmandum malaikat alah wajeib jiseumah aneuek nyan." keuhai malaikat-malaikat allah meufeuereuman lagee nyoe, "allah geupeujeuet malaikat-malaikat gobnyan jeuet keu angen, dan peulayan-peulayan gobnyan jeuet keu apui hu." teuma ubak aneuek nyan allah meufeuereuman, "takhta droeneueh, ya allah, teuma keukai siumu masal peumeurintah droeneueh na kheueh peumeurintah nyang ade. droeneueh galak ubak keuadelan, dan banci ubak buet nyang hana ade; nyang kheueh sabab jih allah, allah gata, geupileh gata dan geubri keu gata keuhoreumat nyang teupeuteuka suka cita, leubeh nibak rakan-rakan gata." allah meufeuereuman lom, "droeneueh, tuhan, bak awaiphon neucebta bumoe, dan droeneueh keudroe nyang peujeuet langet. banmandum nyan teuma gadoh, dan jeuet keu tuha lagee peukayan; teuma droeneueh hana meu ubah. bansigom alam raya nyoe droeneueh lipat lagee bajee, dan droeneueh gantoe ngon nyang laen. teuma droeneueh hantom na meu-ubah, dan udeb droeneueh hantom na akhe." po teu allah hantom na meufeuereuman lagee nyoe ubak meusidro pi malaikat gobnyan, "duek kheueh blaih uenen lon, sampoe banmandum musoh-musoh gata ulon peutaklok keu gata." meunyo meunan, malaikat-malaikat nyan peue nyang sibeuna jih? awaknyan na roh-roh nyang layani allah, dan nyang geuyue le allah keuteutulong ureueng-ureueng nyang teurimong seumat. nyang kheueh sabab jih geutanyoe haroh tamumat beukong that nibak ajaran-ajaran nyang ka tanyoe deungoe, mangat geutanyoe bek tatinggai ajaran nyan. peusan-peusan nyang geupeutrok le dum na malaikat ubak indatu tanyoe te-

unyata beutoi, dan ureueng nyang hana jiturot atawa hana jitaat teuma jiteurimong hukoman nyang sisuai ngon buet jih nyan. peue teuk lom ngon keuseulamatan nyang leubeh hebat nibak peusan-peusan nyan! meunyo geutanyoe hana tapako nibak keuseulamatan nyan, geutanyoe ka teuntee hana teuma lheureh nibak hukoman. sabab tuhan keudroe kheueh nyang phon-phon nyang peumaklum keuseulamatan nyan, dan ureueng nyang phon-phon that deungoe ka jibri bukeuti keubeunaran nyan ubak geutanyoe. disamping nyan, allah ka geupeukong keubeunaran keusaksian ureueng-ureueng nyan deungon cara jipeuna mubagoe rupa buet-buet nyang ajaeb dan hai-hai nyang luwabiasa dan jibagi-bagi meuneubri-meuneubri nibak roh allah meunurot keuheundak jih keudroe. malaikat-malaikat hana meuteume kuasa nibak allah keu jipeurintah donya baro nyang teuma teuka, nyan kheueh donya nyang teungoh tapeugah nyoe. seubalek jih, bak saboh bagian nyang na lam alkitab na teutuleh lagee nyoe, "manusia nyan peue, ya allah, sampoe droeneueh neutem peuingat awaknyan? manusia na kheueh manusia mantong, teuma droeneueh neukalon awaknyan! lam watee nyang paneuk droeneueh peujeuet awaknyan bacut leubeh miyueb nibak malaikat. droeneueh bri ubak jihnyan pangkat nyang mulia dan teuhoreumat, lagee teupeujeuet keu nyang mat kuasa ateuhe peue mantong." deungon lagee nyan, meunyo teupeugah allah geupeujeuet manusia "nyang mat kuasa ateuhe peue mantong," nyan makna jih bahwa hana meusape pi nyang hana dimiyueb kuasa manusia. bah pih meunan, geutanyoe hana takalon bak watee nyoe manusia jimat kuasa ateuhe peue mantong. teuma geutanyoe ka takalon isa meukuasa! gobnyan geupeujeuet bacut leubeh miyueb nibak malaikat bak watee nyang paneuk, mangat ateuhe keu get ate po teu allah gobnyan hase mate keumandum umat manusia. tanyoe takalon jinoo gobnyan geubri keududukan nyang mulia dan teuhoreumat sabab gobnyan ka meudeurita sampoe mate. keubiet ka sipatot jih allah – nyang cebta peue-peue mantong keu meukeusut gobnyan keudroe – teupeujeuet isa nyang ba seumat nyang samporeuna meulalu deurita. deungon lagee nyan allah hase geupakat jai that ureueng keu meusajan teupeuagong meusajan ngon isa. sabab gobnyan kheueh nyang buka jalan keu awaknyan mangat jeuet teupeuseumat. isa geupeu gleh manusia nibak desya-desya awaknyan; dan gobnyan nyang peugleh, dan awaknyan nyang teupeugleh nyan, saban-saban na sidroe bapak. nyang kheueh sabab isa hana malee geuaku awaknyan sibagoe syedara-syedara gobnyan. isa geupeugah ubak po teu allah, "ulon teuma kubri ubak syedara-syedara lon keuhai droeneueh. ulon teuma lon pujoe droeneueh nibak teumpat awaknyan meugumpoi." dan isa geupeugah lom lagee nyoe, "ulon teuma lon keubah harapan lon ubak allah." dan gobnyan geupeugah lom, "nyoe kheueh ulon, meusan nyan ngon aneuek-aneuek nyang ka geubri le allah ubak ulon." le sabab ureueng-ureueng nyang geupeugah aneuek nyan, na kheueh makhluk manusia nyang hase mate, teuma isa keudroe jeuet keu saban lagee awaknyan dan udeb lam keuadaman manusia. gobnyan geupeubuet meunan, mangat deungon

mate geuhnyan hase geupeu hanco iblih nyang kuasa ateuhe mate. deungon cara nyan gobnyan ka geupeubebaih bubena ureueng nyang sipanyang udeb jih ka jipeunamiet sabab jitakot ubak mate. deungon lagee nyan deuh kheueh takalon bahwa kon malaikat nyan geutulung, teuma keuturonan nabi ibrahim. nyoe meumakna bahwa gobnyan haroh saban deungon syedara-syedara gobnyan lam hai peue mantong. dan deungon lagee nyan gobnyan jeuet keu imeum agong nyang seutia dan na gaseh sayang. deungon peulayan geuh nyang lagee nyan desya manusia jeuet geupeu amphon. dan sabab gobnyan keudroe ka ltheueh geurasa meudeurita dan keunong cuba, gobnyan hase geutulung ureueng-ureueng nyang keunong cubaan, sabab gobnyan keudroe ka ltheueh jicuba dan meudeurita. syedara-syedara seusabe ureueng kristen nyang geutawok cit le po teu allah! cuba gata pike beu lhok-lhok keuhai nyoe! allah geukirem gobnyan khusus beujeuet keu imeum agong lam agama nyang tanyoe anut. gobnyan seutia ubak allah nyang ka geupileh gobnyan keubuet nyan, sabab lagee nabi musa yoh masa ilee seutia geupeubuet tugaih geuh lam baet allah. teuma isa patot meuteume horeumat nyang leubeh rayeuk nibak nabi musa. sabab ureueng nyang peudong rumoh haroh meuteume horeumat nyang leubeh rayeuk nibak rumoh nyan keudroe. beutoi tieb-tieb rumoh na nyang peudong, teuma nyang paeudong peue-peue mantong na kheueh allah keudroe. nabi musa seutia sibago peulayan lam baet allah dan geupesampoe haihai nyang teuma geupeugah le allah bak watee nyang teuma teuka. teuma almaseh seutia sibago aneuek nyang meutanggong jaweub ateuhe baet allah. dan geutanyoe kheueh baet allah, meunoyoe tanyoe teutab museumangat dan teutab yaken peue nyang tanyoe harab nyan. sabab nyan, lagee nyang geupeugah le roh allah, "meunoyoe uroenyoe gata tadeungoe su allah, bek kheueh gata tapeukreuh ulee, lagee indatu gata, watee awaknyan jibeurontak ubak po teu allah, dan ji ujoel allah lam padang pasi. 'nibak teumpat nyan indatu gata ji cuba ulon, dan ji ujoel ulon,' kheun allah, 'padahai awaknyan ka jikalon buet ulon nyang peuet ploh thon treb jih.' nyang kheueh sabab jih ulon meureuka bak awaknyan dan lon peugah lagee nyoe, 'awaknyan sabe hana seutia, dan beu-oe that jitaat peue-peue nyang lon peurintah.' ulon beunghed dan meusumpah, 'awaknyan hana teuma jitamong lam nanggroe nyan keujiteume meureuhah meusajan ngon ulon.' " syedara-syedara, ate-ate kheueh dan bek sampoe na lamkawan gata ureueng nyang ate jih jeuhet that dan hana meuiman, akhe jih jihnyan jigisa dan jipeujioh allah nyang udeb! ngon lagee nyan, mangat bek na meusidroe pi lamkawan gata nyang keunong tipee le desya akhe jih jilawan allah, bah kheueh gata saleng na tabri naseuhah tieb-tieb uroe simantong tanyoe na udeb lam jamen nyang teupeugah "uroe nyoe" lam alkitab. tanyoe mandum na kheueh rakan saboh meujuang ngon almaseh, asai geutanyoe trok bak akhe tamumat nyang kong ubak keuyakenan nyang tanyoe milek yoh awai kon. nyoe kheueh nyang teutuleh lam alkitab, "meunoyoe nibak uroe nyoe gata teudeungoe su allah, bek kheueh gata tapeukreuh ulee, lagee indatu gata, watee awaknyan

jibeurontak ubak po teu allah." ngon lagee nyan, soe kheueh nyang jideungoe su allah laju beurontak ubak gobnyan? nyan kheueh banmandum ureueng nyang ka geupimpen le nabi musa jiteubiet lam nanggroe meuse, bukan? dan ateuhe soe kheueh allah beunghed peuet ploh thon treb jih? ateuhe awaknyan nyang meudesya, nyang reubah mate lam padang pasi, nyoe peue kon? watee allah meusumpah lagee nyoe, 'awaknyan hana teuma jitamong lam nanggroe nyan keujiteume meureuhah meusajan ulon' – soe kheueh teuma nyang geumeukeusut le po teu allah? nyang geumeukeusut nyan na kheueh ureueng-ureueng nyang beurontak ubak allah, nyoe peue kon? jinoenyoe tanyoe ka muphom bahwa awaknyan hana hase jitamong, sabab awaknyan hana meuiman ubak po teu allah. deungon lagee nyan, janji allah mantong na, dan keugeutanyoe teuma geubri meureuhah lagee nyang ka geupeu janji. deungon nyan, get that tanyoe tajaga mangat bek na meusidroe pih lamkawan gata nyang teunyata hana nyang jirasa meureuhah nyang ka geupeu janji le allah nyan. sabab haba get nyan ka geubri keugeutanyoe saban cit lagee keu awaknyan. teuma keu awaknyan, haba nyan hana meuguna. sabab, watee awaknyan jideungoe, hana jipateh. teuma, geutanyoe nyang meuiman nyoe tateurimong meureuhah nyang ka geupeu janji le po teu allah nyan. nyan sisuai ngon peue nyang ka geufeuroman le allah, lagee nyoe, "ulon beunghed dan meusumpah, 'awaknyan hana jiteumeutamong keujimeureuhah meusajan ulon.' " allah meufeuroman lagee nyan bah pi buet gobnyan ka seulesoe watee phon that geucebta donya nyoe. sabab keuhai uroe nyang keutujoh, na teutuleh lam alkitab lagee nyoe, "nibak uroe nyang keutujoh po teu allah geumeureuhah nibak mandum buet gobnyan." keuhai nyan na lom teutuleh lagee nyoe, "awaknyan hana teuma jitamong lam nanggroe nyan keu meuteume meureuhah meusajan ulon." teuma awaknyan nyang phon-phon that jiteurimong haba get nyan, hana jiteurimong meureuhah nyan sabab awaknyan hana meuiman. meunoyoe lagee nyan ka nyata bahwa na ureueng-ureueng nyang jeuet jiteurimong meureuhah nyan. sabab allah ka geupeuteuntee saboh uroe nyang laen lom, nyang teupeugah "uroe nyoe". meuthon-thon oh ltheueh nyan allah geumeutot keuhai nyan meulalu nabi daud, lam ayat nyang ka ltheueh teupeugah bunoe, "meunoyoe nibak uroenyoe gata tateurimong feureuman allah, bek kheueh gata tapeukreuh ulee." meunoyoe seukira jih yosua ka geubri ureueng-ureueng nyang meureuhah nyang geupeu janji le allah, teuma allah hana teuma meufeuroman le keuhai saboh uroe nyang laen. teuma, keu umat allah mantong na janji keujimeureuhah lagee allah meureuhah bak uroe nyan keutujoh nyan. sabab ureueng nyang teurimong meureuhah nyang geupeu janji le allah ubak jihnyan, teuma jimeureuhah cit nibak banmandum buet jih nyan, saban lagee po teu allah. sabab nyan, jak kheueh tanyoe ta useuha beubiet keutateurimong meureuhah lagee nyang geupeu janji le allah nyan. bek sampoe meusidroe pi lamkawan tanyoe hana meuhase lagee awaknyan yoh masa ilee, sabab hana meuiman ubak allah.

feureuman allah na kheueh feureuman nyang udeb dan teuga; leubeh tajam nibak peudeung nyang meumata dua. feureuman geuhnyan jitamong taja-trob ubak bataih jiwa ngon roh; trok ubak atos-atos dan tuleung sum-sum, sampoe geuteupeue si lhok-lhok jih pikeran dan niet ate manusia. hana meusaboh makhlok nyang na teusom nibak pandangan allah. peue-peue mantong teulon dan teuhah dikeue gobnyan. dan tanyoe haroh tabri tanggong jaweub ubak gobnyan. nyang kheueh sabab jih tanyoe beutumat nyang kong ubak nyang ta aku nibak peue nyang ka ta iman. sabab tanyoe na imeum agong nyang rayeuk, nyang ka geutamong trok ukeue po teu allah – gobnyan kheueh isa aneuek allah. imeum agong tanyoe nyan kon kheueh imeum nyang hana geurasa meusajan ngon na nyang leumoh-leumoh nibak geutanyoe. nyang sikeubiet jih, gobnyan ka teu ujoel lam hai-hai peue mantong, saban lagee geutanyoe keudroe; teuma gobnyan hana geupeubuet desya! sabab nyan, jak kheueh geutanyoe ngon biet-biet tajeuet tameuhadab ubak po teu allah nyang mat peurintah deungon jroh ate. alah teuma geugaseh geutanyoe dan geubri beureukat ubak geutanyoe mangat geutanyoe meuteume sinulong paih oh trok bak watee jih. tieb-tieb imeum agong teupileh lamkawan umat, dan teuangkat keujilayani allah sibagoe waki awaknyan. tugaih jih na kheueh teupeuseumah ubak po teu allah meuneubri-meuneubri dan keureubeuen-keureubeuen keuteupeu amphon desya. imeum agong nyan keudroe leumoh lam sigala hai, dan ngon sabab nyan gobnyan jeuet geupeubuet leumoh leumbot keu ureueng-ureueng nyang hana jiteupeu dan keu ureueng nyang sisat jalan jih. dan sabab gobnyan keudroe leumoh, nyang kheueh sabab jih gobnyan keudroe geupeu semah keureubeuen, kon mantong le sabab desya-desya umat, teuma meunan cit le sabab desya-desya jih keudroe. hana meusidroe pi nyang jiangkat droe jih keudroe jeuet keu imeum agong. ureueng nyang jeuet keu imeum agong, meunyo po teu allah nyang tawok jih nyan beujeuet keu imeum agong nyan – saban lagee nabi harun. meunan cit deungon almaseh. gobnyan hana geuangkat droe geuh keudroe jeuet keu imeum agong. allah keudroe kheueh nyang angkat gobnyan. allah meufeureuman ubak gobnyan, "gata kheueh aneuek ulon; nibak uroenyoe ulon jeuet keu bapak gata." bak teupat nyang laen allah meufeureuman, "gata na kheueh imeum siumu masa, lagee imeum melkisedek." bak watee isa udeb lam donya nyoe, gobnyan meudoa dan geumeulakee ngon su geudumpek sira geumo ubak po teu allah, nyang hase peuseulamat gobnyan nibak mate. dan sabab le gobnyan takzem ubak allah ngon peunoh horeumat, ngon lagee nyan gobnyan geudeungoe le po. isa na kheueh aneuek allah, teuma bah pi meunan, gobnyan geumeurunoe jeuet keu ureueng nyang taat meulan deurit gobnyan. dan oh ka lheureh gobnyan teupeujeuet keu nyang peuseulamat nyang sampoereuna, gobnyan jeuet keu panghulee seulam nyang keukai keu mandum manusia nyang taat ubak gobnyan, dan allah pi geupeugah bahwa gobnyan na kheueh imeum agong, saban lagee imeum melkisedek! keuhai keududukan isa sibagoe imeum

agong, jai that-that nyang peureulee kamoe britee ubak gata, teuma payah that keu kamoe peutrang sabab gata mulet that bak tamuphom. nyang sibeuna jih ka watee jih nibak gata jeuet keu guree, rupari gata peureulee that beujai tameurunoe nibak ureueng laen keuhai azas-azas nyang phon nibak ajaran allah. gata goh hase tateurimong peunajoh nyang kreueh; gata mantong tajieb susu kong. ureueng mantong jieb susu, nyan makna jih mantong aneuek manyak; jihnyan gohlom na peungalaman keuhai peue nyang beutoi dan peue nyang salah. peunajoh nyang kreueh na kheueh keu ureueng rayeuk nyang le sabab peungalaman, ka hase jipeubeda nyang toh nyang jroh dan toh nyang jeuhet. sabab nyan, jak kheueh tabeuet laju ubak peungajaran-peungajaran nyang leubeh keuhai tuha lam udeb kristen, dan bek mantong teukalon azas-azas nyang phon nibak ajaran agama tanyoe. bek ta ulang le ajaran dasai bahwa manusia meuseuti jipioh nibak buet-buet nyang hana meuguna dan haroh meuiman ubak allah, atawa peulajaran dasai keuhai pumano atawa keuhai teupeuduek jaroe atueuh gob, atawa keuhai udeb lom teuma oh ka lheureh mate atawa hukuman nyang keukai. jak kheueh geutanyoe, meunyo allah geupeu idhin, tabeuet ubak peulajaran-peungajaran nyang leubeh mayang! sabab, ureueng-ureueng nyang ka meurutat, hana mungenk teubimbeng lom teuma. awaknyan yoh masa ilee kana lam trang nibak po teu allah, dan jirasa meuneubri gobnyan. meunan cit awaknyan ka jikuasa le roh allah. awaknyan jiteupeu nibak peungalaman jih keudroe bahwa feureuman allah nyan jroh that, dan awaknyan jirasa karonya-karonya nyang peunoh kuasa nibak jamen nyang teuma teuka. teuma oh lheureh nyan awaknyan meurutat! panena mungenk teubimbeng lom keujitobat lom teuma nibak desya-desya jih. sabab awaknyan teungoh jisaleh lom aneuek allah dan jipeujeuet gobnyan jihina dikeue rakyat ba. tanoh nyang kajem jiphieb ie ujeuen u atueuh jih, laju jipeuhase seunaman nyang meuguna keu ureueng-ureueng nyang keureuja, tanoh nyang lagee nyan geubri beureukat le po teu allah. teuma meunyo tanoh nyan jipeuhase naleueng lakoe dan timoh jih meuduro, tanoh nyang lagee nyan hana meuguna singoh teuma geukutok le po teu allah dan akhe jih teutot sampoe habeh. teuma syedara-syedara lon nyang teucinta, bah pih kamoe meupeugah meunan, kamoe yaken meunyo keu gata. kamoe yaken bahwa gata ka tateurimong hai-hai nyang leubeh jroh, na kheueh beureukat-beureukat nyang jeuet keubagian nibak keuseulamatan gata. po teu allah kon kheueh allah nyang hana ade. gobnyan hana tuwoe ubak peue nyang gata peubuet keu gobnyan, dan geunaseh nyang gata peuleumah ubak gobnyan bak watee gata tulong syedara-syedara saboh iman, watee yoh ilee dan jinoenyoe. kamoe meuharab that mangat gata maseng-maseng sabe lam seumangat trok bak akhe, sampoe gata tateurimong peue nyang gata harab-harab that nyan. kamoe hana kamoe tem gata jeuet keu beu-o. teuma kamoe meuharab gata taudeb lagee ureueng nyang teurimong peue nyang geupeu janji le po teu allah, sabab meuiman ubak gobnyan dan sabab tapreh deungon saba. bak watee allah

meujanji ubak nabi ibrahim, gobnyan meusumpah bahwa gobnyan teuma geupeubuet peue nyang ka geupeu janji nyan. dan sabab hana nyang leubeh manyang nibak allah, teuma gobnyan meusumpah atueuh nan geuh keudroe. gobnyan geupeugah, "ulon meujanji teuma lon bri beureukat keugata dan lon peujeuet keuturonan gata nyang le." nabi ibrahim geupreh janji nyan ngon saba, teuma gobnyan laju geuteurimong peue nyang ka geupeu janji le allah ubak gobnyan nyan. meunyo ureueng meusumpah, jihnyan meusumpah atueuh nan ureueng laen nyang leubeh manyang nibak jihnyan, ngon lagee nyan sumpah nyan jeuet keuseuneulheueh banmandum nyang teubantah. allah keuneuk geupeuteugaih bak ureueng-ureueng nyang teurimong janji gobnyan, bahwa gobnyan hana teuma geu ubah reuncana geuh. nyang kheueh sabab jih gobnyan geutamah sumpah nibak janji geuh nyan. dua boh hai nyan hana hase meu ubah: allah hana mungken meusulet keuhai janji dan sumpah gobnyan. sabab nyan, geutanyoe nyang ka tameupayong nibak allah, geubri durongan nyang teuga keutamumat nyang kong ubak harapan nyang teuleung luwah dikeue geutanyoe. harapan tanyoe nyan lagee saoh nyang teubeunom sampoe that lhok dan na kheueh teupat tamumat nyang lumpah that kong dan aman lam udeb geutanyoe. harapan nyang peureulong ubak gorden sinutob ruweueng mahasuci nibak baet tuhan lam syeuruga. isa ka geurinteh jalan rot jak ubak teupat nyan keu geutanyoe, dan ka geutamong keunan jeuet keu imeum agong geutanyoe siumu masa, lagee imeum melkisedek. melkisedek na kheueh raja nibak saleuem dan imeum allah nyang mahamanyang. watee nabi ibrahim geuwoe nibak mideuen prang geupeutaloe dum na rajaraja, melkisedek laju geuteuka geujak sambot gobnyan sira geubri beureukat keu gobnyan. teuma nabi ibrahim laju geubri ubak melkisedek siper siploh nibak peue-peue mantong nyang hase geureupah. (nan melkisedek makna jih, nyang phon-phon that, "raja nyang ade"; dan sabab gobnyan raja nibak saleuem, ngon lagee nyan nan gobnyan teupeugah teuma, "raja seujahteura".) keuhai melkisedek nyoe gobnyan hana keuteurangan dipat mantong bahwa gobnyan na ayah atawa ma atawa indatu; meunan cit hana keuteurangan keuhai uroe lahe gobnyan, meunan cit keuhai gobnyan mate. gobnyan saban lagee aneuek allah; gobnyan na kheueh imeum nyang abadi. deungon lagee nyan, deuh takalon disinoe padub na rayeuk jih melkisedek nyoe; gobnyan meunan rayeuk sampoe nabi ibrahim keudroe, bapak indatu bansa geutanyoe, geubri keu gobnyan siper siploh nibak peue-peue mantong nyang geuteume nibak muprang nyan. lam hukum agama yahudi ka teupeunteut bahwa imeum-imeum keuturonan lewi meuseuti geukuteb siper siploh nibak hase hareukat umat israel, na kheueh syedara-syedara awaknyan keudroe, bah kheueh awaknyan saban-saban keuturonan nabi ibrahim. melkisedek kon keuturonan lewi, teuma gobnyan meuteume cit siper siploh nibak peue nyang geureubot le nabi ibrahim, dan geubri beureukat teuma ubak nabi ibrahim nyang siburna jih ka geuteurimong janji-janji nibak po teu allah. keubiet hana jeuet teubantah bahwa ureueng

nyang teubri beureukat leubeh miyueb nibak ureueng nyang bri beureukat nyan. imeum-imeum nyang teurimong hase nyang teutageh siper siploh jeumba geuhnyan na kheueh ureueng nyang hase mate. teuma meunurot nyang na teutuleh lam alkitab, melkisedek nyang geuteurimong meuneubri siper siploh nyan na kheueh ureueng nyang teutab udeb. jeuet teupeugah bahwa lewi – nyang keuturonan gobnyan geucok siper siploh jeumba nibak umat israel – geubayeue cit teuma jeumba nyan meulalu nabi ibrahim, bak watee nabi ibrahim geubayeue atra nyan ubak melkisedek. bah pi lewi gohlom lahe, teuma jeuet teupeugah gobnyan kana lam tuboh nabi ibrahim indatu gobnyan, bak watee melkisedek meurumpok ngon nabi ibrahim. di miyueb pimpunan imeum-imeum lewi, hukum agama yahudi teubri keu umat israel. sabab imeum-imeum lewi yoh masa ilee nyan hana hase geupeubuet ngon sampoeureuna peue nyang meuseuti geupeubuet, ngon lagee nyan meuseuti beuna imeum nyang laen, na kheueh nyang saban lagee imeum melkisedek, dan kon nibak kawom imeum nabi harun lom teuma! deungon lagee nyan, meunyo keududukan imeum-imeum nyan meubah, hukum agama yahudi pi meubah teuma. nyang teumeukeusut disinoe na kheueh tuhan geutanyoe: gobnyan nibak sukee laen, dan hantom na meusidroe pih lamkawan sukee gobnyan nyang jeuet sibago imeum. banmandum ureueng jiteupeu bahwa tuhan geutanyoe asai geuh nibak sukee yehuda; dan nabi musa hantom na geurebot sukee nyan bak watee gobnyan geumeututoe keuhai imeum-imeum. hai nyang teupeugah nyoe jeuet keuleubeh jeulaih lom, deungon teuka jih sidroe imeum laen nyang saban lagee melkisedek. gobnyan teuangkat jeuet keu imeum, kon ngon dasai jih le peuratoran-peuratoran manusia, teuma ngon dasai jih nibak udeb gobnyan nyang meukuasa dan nyang hana keuneulheueh jih. sabab lam alkitab na teutuleh lagee nyoe, "droeneueh na kheueh imeum siumu masa, saban lagee imeum melkisedek." teuma, jinoenyoe peuratoran nyang awai ka teukeubah bak bineh, sabab hana kong dan hana meufaedah. hukum agama yahudi hana hase jipeuna sapeue-sapeue pih nyang sampoeureuna. nyang kheueh sabab jih geutanyoe jinoenyoe geubri saboh harapan nyang paleng get; deungon atra nyan tanyoe hase tapeurab ubak po teu allah. lom teuma, banmandum nyan na meusajan ngon sumpah nibak po teu allah. gohlom na sumpah nyang lagee nyan bak watee imeum-imeum nyang laen teu baiat. teuma isa teubaiat jeuet keu imeum teupeu sumpah, bak watee allah meufeuereuman ubak gobnyan lagee nyoe, "tuhan ka meusumpah, dan gobnyan hana geu ubah keuputosan geuh, 'droeneueh na kheueh imeum siumu masa.' " 22 deungon nyoe teuma isa jeuet keujaminan keusaboh meujanji nyang leubeh get. na lom saboh teuk hai: imeum-imeum nyang laen nyan jai that, sabab awaknyan maseng-maseng mate akhe jih hana hase jipeusampoe jabatan jih. teuma isa udeb siumu masa, deungon lagee nyan jabatan gobnyan sibago imeum hana teupinah bak ureueng laen. deungon sabab keu siumu masa isa hase geupeu seulam atueung-ureueng nyang jijak ubak po teu allah meulalu gobnyan, sabab gobnyan

udeb siumu masa keu teupeutrok meulakee gobnyan ubak po teu allah keu ureueng-ureueng nyan. deungon nyan, isa nyan kheueh imeum agong nyang tanyoe peureulee. gobnyan suci; nibak gobnyan hana meuteuma nyang salah atawa desya peue mantong. gobnyan teupeujioh nibak ureueng-ureueng nyang meudesa, dan teupeu ek trok ubak teupmat nyang leubeh manyang nibak banmandum langet. gobnyan hana saban lagee imeum-imeum agong nyang laen, nyang tieb-tieb uroe meuseuti jipeuseumah keureubeuen sabab desya-desya jih keudroe yoh masa ilee, baro kheueh le sabab desya-desya umat. isa geupeu seumah keureubeuen teuma cit sigoe sagai keu siumu masa, watee gobnyan geupeu seumah droe geuh keudroe sibagoe keureubeuen. 28 hukum agama yahudi teu angkat ureueng nyang hana sampoereuna jeuet keu imeum agong. teuma du-doe nibak hukum nyan, allah geupeuet janji deungon sumpah bahwa gobnyan geu baiat sibagoe imeum agong, aneuek nyang ka geupeupeujeuet peuseulamat nyang sampoereuna keu siumu masa. ulee haba nibak mandum tutoe nyoe na kheueh: tanyoe na imeum agong nyang lagee nyan, nyang geudeuk geumat peurintah meusajan ngon po teu allah nyang maharayeuk lam syeuruga. gobnyan geupeubuet tugaih sibagoe imeum agong lam ruweueng mahasuci, na kheueh lam khimah tuhan nyang sejati, nyang geupeudong le tuhan keudroe, kon le manusia. tieb-tieb imeum agong teubaiat keu teupeuseumah keureubeuen atawa keureubeuen keu po teu allah. meunan kheueh teuma ngon imeum agong geutanyoe; gobnyan meuseuti na sapeue-sapeue keuteupeu seumah. seukira jih gobnyan na atueh rhueng donya nyoe, gobnyan hana teuma jeuet keu imeum, sabab kana imeum nyang peuseumah keureubeuen nyang teupeuteuntee lam hukum agama yahudi. buet nyang awaknyan peubuet sibagoe imeum nyan nyang sibeuna jih na kheueh sibagoe gamba atawa bubayang lagee toh nyang na lam syeuruga. hai nyan ka lheueh geupeugah le nabi musa bak watee geukeuneuk peudong khimah tuhan. allah meufeureuman lagee nyoe ubak nabi musa, "ingat! banmandum nyan meuseuti gata peubuet meunurot cara nyang ka teutunyok ubak gata di atueh gunung." teuma jinoenyoe isa meuteume tugaih imeum nyang jioh leubeh mulia nibak nyang geupeubuet le imeum-imeum nyan. sabab janji nyang geupeuna le allah ngon manusia, na kheueh janji nyang leubeh jroh sabab meudasai nibak janji keu hai-hai nyang leubeh get. seukira jih hana nyang kureueng nibak peujanji nyang phon, deungon lagee nyan hana peureulee teupeuna janji nyang keudua. teuma allah ka geuteume nyang salah atueh umat geuh, sampoe allah meufeureuman, "ingat, teuma teuka watee jih, ulon teuma lon peuet peujanjian nyang baro ngon bansa israel, dan ngon bansa yehuda. kon lagee peujanjian nyang ka lon peuet ngon indatu awaknyan bak watee ulon kawai awaknyan lon peuteubiet nibak nanggroe meuse. awaknyan hana seutia ubak peujanjian nyang ulon peuet ngon awaknyan; nyang kheueh sabab jih hana lon pakoe keu awaknyan. teuma jinoenyoe, nyoe peujanjian nyang ulon peuet ngon umat israel nibak uroe-uroe

nyang teuma teuka, feureuman tuhan: ulon teuma kukeubah hukum lon lam pikeran awaknyan, dan lon tuleh bak ate awaknyan. ulon teuma jeuet keu allah awaknyan, dan awaknyan teuma jeuet keu umat lon. awaknyan hana peureulee jipurunoe seusabe kawom droe, atawa jipeugah ubak syedara jih, 'turi kheueh ubak tuhan.' sabab awaknyan mandum, cut rayeuk, teuma jituri ulon. ulon teuma kupeu amphon bubena nyang salah nibak awaknyan, dan hana lon ingat le desya-desya awaknyan." deungon geupeugah saboh peujanjian nyang baro, allah geupeuet peujanjian nyang phon nyan jeuet keu tuha dan useueng; dan peue nyang ka tuha, teuma reujang gadoh. peujanjian nyang phon na peuratator-peuratator iebadat, dan na teuma teupmat iebadat nyang jipeuet le manusia. saboh khimah teupeudong nyang nibak bagian keu jih teuboh nan ruweueng suci. nibak teupmat nyan na standar teupmat panyot, dan na cit meuja ngon ruti nyang teupeuseumah ubak po teu allah. nibak bagian dalam, dilikot gorden nyang keudua, na ruweueng nyang teuboh nan ruweueng mahasuci. lam ruweueng nyan na miseubah nyang teupeuet nibak meuh keu teupmat tot dupa, dan na cit peutoe peujanjian nyang bansaboh nyan teuseupoh ngon meuh. lam peutoe nyan na beulatang meuh nyang meuasoe manna, tungkat nabi harun nyang ka jitimoh tuneuh, dan dua boh leumpeung batee tuleh nyang nibak bagian atueh jih teutuleh siploh boha peurintah allah. di atueh peutoe nyan na teuma teukeubah dua kerub, na kheueh makhlok meusayeub sibagoe lambang allah geuteuka. sayeueb nibak bandua makhlok nyan meureuntang atueh sinutob peutoe, na kheueh teupmat peu amphon desya. teuma banmandum nyan hana hase teuputrang jinoenyoe seucara saboh-saboh. meunan kheueh banmandum teuatoe. tieb-tieb uroe imeum-imeum geutamong nibak bagian keu khimah nyang keugeujak peubuet tugaih awaknyan. nyang tamong ubak bagian nyang paleng lhok khimah nyan na kheueh imeum agong mantong. gobnyan geupeubuet lagee nyan sigoe lam sithon. hai nyan geupeubuet sira geuba darah keugeupeuseumah ubak po teu allah sabab droe geuh keudroe dan sabab le desya-desya nyang jipeubuet ngon hana sadar le umat gobnyan. deungon atoran nyan, roh allah geutunyok deungon nyata, bahwa simantong khimah bagian keu nyan mantong na teudong, rot tamong u dalam ruweueng mahasuci nyan gohlom teubuka. nyoe sibagoe lambang jamen jinoenyoe; nyan meumakna bahwa peupeue nyang ka teupeuseumah dan keureubeuen keureubeuen beulatang nyang teupeuseumah ubak allah, hana hase teupeusampoereuna ate nurani ureueng nyang ba peuseumahan. sabab banmandum upacara nyan na hubongan geupunajoh, ie meuneujieb, dan meubagoe rupa upacara peusuci. banmandum nyan na kheueh peuratator-peuratator lahe nyang meulaku meuguna sampoe ubak watee allah geupeu baro lom teuma. teuma alamseh ka teuka sibagoe imeum agong nibak hai-hai nyang get nyang ka lheueh na. khimah tuhan bak teupmat gobnyan geumubuet sibagoe imeum agong na kheueh khimah nyang leubeh agong dan leubeh sampoereuna. atra nyan hana jipeuet le manusia; meukeusut

jih, kon asai lam donya nyang geucebta nyoe. al-
 maseh geutamong lam ruweueng mahasuci nyang na
 lam khimah nyan teuma cit sigoe sagai keu siumu
 masa. bak watee nyan gobnyan hana geuba darah ka-
 meng agam atawa darah aneuk leumo keugeupeuse-
 umah; nyang geuba na kheueh darah geuh keudroe,
 dan deungon nyan gobnyan ka geupeubeubaih geu-
 tanyoe siumu masa. darah nibak kameng dan leumo
 agam meunan cit abee nibak keureubeuen aneuk
 leumo, geupeu guna keuteureutek atueh ureueng-
 ureueng nyang kutoe meunurot atoran agama mang-
 gat awaknyan jeuet keu gleh. ngon lagee nyan, me-
 nyoe darah dan abee nyan jeuet jipeugleh najih ni-
 bak ureueng-ureueng nyan, peuteuk lom darah al-
 maseh! meulalu roh nyang keukai, almaseh geupeu
 seumah droe geuh keudroe ubak po teu allah siba-
 goe keureubeuen nyang samporeuna. darah gob-
 nyan teupeugleh ate nurani geutanyoe nibak up-
 acara agam hana meuguna, mangat geutanyoe
 hase tapeutimang allah nyang udeb. nyang kheueh
 sabab jih almaseh jeuet keu nyang ba ubak peujan-
 jian nyang baro, mangat ureueng nyang ka geutawok
 le allah jeuet jiteurimong beureukat-beureukat abadi
 nyang ka geupeujanji le allah. banmandum nyan
 hase teujadi sabab kana nyang mate, nyan kheueh
 almaseh; dan deungon mate geuh nyan hase teu-
 peubeubaih manusia nibak buet-buet nyang salah
 nyang ka awaknyan peubuet bak watee peujanjian
 nyang phon mantong meulaku. meunyoe na surat
 waresan, meuseuti teuma beuna bukeuti jih bahwa
 ureueng nyang peuet surat nyan ka meuninggai
 donya. sabab surat waresan hana meuguna siman-
 tong ureueng nyang peuet surat nyan mantong
 udeb. surat nyan jeuet teupeuguna meunyoe nyang
 peuet surat nyan ka mate. sabab nyan peujan-
 jian nyang phon pih meuseuti teupeu aseng ngon
 darah. phon-phon that nabi musa geupeusampoe
 banmandum peurintah hukom allah ubak bansa is-
 rael. oh lheureh nyan nabi musa laju geucok darah
 aneuk leumo dan darah kameng agam, laju geu-
 jampu ngon ie, oh lheureh geureutek laju atueh kitab
 hukom-hukom nibak allah dan atueh banmandum
 bansa israel deungon geupeu guna naleueng hisop
 dan bulee bubiri nyang wareuna mirah tuha. sira geu-
 peugah nyan nabi musa geupeugah lagee nyoe, "nyoe
 kheueh darah nyan teupesuh peujanjian nibak al-
 lah nyang meuseuti gata taat." oh lheureh nyan ngon
 cara nyang saban, nabi musa geuseutek teuma darah
 nyan atueh khimah tuhan dan atueh mandum alat-
 alat nyang teupeuguna watee ibadat. 22 keubiet me-
 unurot hukom agama yahudi, rab banmandum peue-
 peue mantong teupeusuci ngon darah; dan desya
 baro kheueh hase teupeu amphon meunyoe na darah
 nyang ro. deungon cara lagee nyan kheueh barang-
 barang nyang meulambang hai-hai nyang di syeu-
 ruga, peureulee teupeusuci. teuma keu hai-hai nyang
 di syeuruga nyan keudroe teupeureulee keureubeuen
 nyang jioh leubeh get. sabab almaseh hana geuta-
 mong lam ruweueng suci nyang jipeuget le manu-
 sia, nyang na kheueh meulambang ruweueng suci
 nyang sibeuna jih. almaseh geutamong lam syeu-
 ruga keudroe; lam syeuruga nyan gobnyan meuhadab
 allah deumi keugeutanyoe dumna. imeum agong

yahudi tieb-tieb thon jitamong lam ruweueng maha-
 suci nyang na lam baet tuhan deungon teuba darah
 saboh beulatang. teuma almaseh hana geutamong
 keugeujak peuseumah droe geuh meu ulang-ulang.
 sabab meunyoe lagee nyan, nyan saban cit gobnyan
 ka kayem that meudeurita yoh phon donya nyoe
 teucebta. teuma nyata jih, jinoenyoe nibak jamen
 akhe nyoe, gobnyan teuka sigoe sagai keugeujak sam-
 poh desya deungon cara geukeureubeuen droe geuh
 keudroe. po teu allah ka geupeu teutab bahwa manu-
 sia mate sigoe sagai oh lheureh nyan baro kheueh ge-
 upeu sidang le allah. 28 meunan cit deungon almaseh
 sigoe sagai teupeuseumah sibagoe keureubeuen keu-
 teusampoh desya ureueng rame. gobnyan teuma
 teuka lom bak watee nyang keudua goe, kon geujak
 peuseuleusoe soai desya, teuma keugeujak peuseu-
 lamat ureueng-ureueng nyang teuhoh jipreh-preh
 gobnyan teuka. hukom agama yahudi teukalon ngon
 hana nyata keu hai-hai nyang jroh nyang teuma teuka,
 dan kon gamba nyang sibeuna jih nibak hai-hai nyan.
 hana mungkin hukom nyan hase teupeusampoere-
 una ureueng nyang teuka jak seumah allah deungon
 jiba peuseumahan, bah pih tieb-tieb thon hana putoh
 jiba keureubeuen-keureubeuen nyang saban. seukira
 jih beutoi ureueng-ureueng nyang seumah allah nyan
 biet-biet ka teupeu gleh nibak desya, awaknyan hana
 le nibak jih peurasaan meudesa, dan keureubeuen
 hana jipeuseumah le. teuma teunyata keureubeuen-
 keureubeuen nyang jipeuseumah tieb-tieb thon nyan
 sibagoe peuingat keu manusia keuhai desya-desya
 jih, sabab keubiet darah leumo dan darah kameng
 agam hana hase teusampoh desya. nyang kheueh
 sabab jih watee almaseh geutamong lam donya,
 gobnyan geupeugah ubak po teu allah, "droeneuh
 hana peureulee keureubeuen dan nyang teupeuseu-
 umah; nyang sikeubiet jih droeneuh ka neukebuh
 tuboh keu ulon. droeneuh hana peureulee keu
 keureubeuen nyang teutot atawa keureubeuen keu
 teupeu amphon desya. laju ulon peugah, 'nyoe
 kheueh ulon, ya allah! ulon teuka keuneuk jak
 peubuet keuheundak droeneuh, lagee nyang na teu-
 tuleh keuhai droe ulon alkitab.' " phon-phon
 that almaseh geupeugah, "droeneuh hana peureulee
 keureubeuen dan nyang teupeuseumah; droeneuh
 hana peureulee keu keureubeuen beulatang nyang
 teutot sibagoe peuseumahan dan teuma keureubeuen
 peu amphon desya." almaseh geupeugah lagee nyan,
 bah pih banmandum keureubeuen nyan teupeuseu-
 umah meunurot hukom agama yahudi. oh lheureh
 nyan almaseh geupeugah, "nyoe kheueh ulon, ya al-
 lah! ulon teuka keuneuk jak peubuet keuheundak
 droeneuh." ngon lagee nyan allah geusampoh man-
 dum keureubeuen nyang ka treb nyan, dan geugantoe
 ngon keureubeuen almaseh. isa almaseh
 ka geupeubuet peue nyang geukeuheundak le po
 teu allah dan geupeu seumah droe geuh sibagoe
 keureubeuen. deungon peuseumahan nyan, nyang
 geupeubuet sigoe sagai keu siumu masa, geutanyoe
 mandum geupeu gleh nibak banmandum desya.
 tieb-tieb imeum yahudi jipeubuet buet jih sibagoe
 imeum tieb-tieb uroe, dan meu ulang-ulang gob-
 nyan peuseumah keureubeuen-keureubeuen nyang
 saban. teuma keureubeuen-keureubeuen nyan sagai-

sagai hana hase teusampoh desya. nyang sikeubiet jih, almaseh geupeu seumah saboh keureubeuen keu teupeu amphon desya, dan keureubeuen nyan teutab jeuet keu siumu masa. oh ka ltheueh geupeu seumah keureubeuen nyan, almaseh geuduek blaih nueuen allah dan geumat peurintah meusajansajan ngon gobnyan. dan jinoenyoe almaseh geupreh sampoe allah geupeu taklok banmandum musoh-musoh geuh nyan ubak gobnyan. teuma, deungon saboh keureubeuen, almaseh geupeu sampoereuna ureueng-ureueng nyang ka teupeu gleh nibak desya. keuhai nyan roh allah pi na geumeusaksi keugeutanyoe. roh allah geupeugah, "nyoe ktheueh peujanjian nyang teuma ulon peugot ngon awaknyan bak uroe-uroe nyang teuma teuka," feureuman tuhan, 'ulon teuma kukeubah hukom-hukom lon lam ate awaknyan dan lon tuleh lam pikeran awaknyan.' "allah meufeuroman lom, "ulon teuma lon peutuwoe keuhai desya-desya dan buet-buet nyang jeuhet awaknyan." deungon lagee nyan, desya-desya dan buet-buet nyang jeuhet nyan ka geupeu amphon, ngon lagee nyan hana peureulee le teupeuseumah keureubeuen peu amphon desya. hei syedara-syedara, deungon mate isa nyan geutanyoe jinoenyoe ka tajeuet ta tamong lam ruweueng mahasuci. isa ka keupeuhah saboh rot nyang baro keugentanyoe, na ktheueh rot nyang teubri udeb. rot nyan meulalu gorden, nyan ktheueh tuboh isa keudroe. dan jinoenyoe keugentanyoe na sidroe imeum agong, nyang meutanggong jaweueh ateuhe baet allah. 22 le sabab nyan, jak ktheueh geutanyoe tapeurab ubak allah ngon ate nyang juoe dan iman nyang kong; ngon ate nyang ka teupeu gleh nibak peurasanan meusalah, dan deungon tuboh nyang ka teupeu gleh ngon ie nyang jeureuneuh. bah ktheueh tanyoe tamumat nyang kong ubak harapan nyang tanyoe angkee, sabab allah jeuet teupateh dan gobnyan geupeutupat janji. dan bah ktheueh geutanyoe saleng tameungieng, mangat tanyoe hase saleng tabri durongan mangat tateume peubuet gaseh sabe keudroe-droe dan tapeubuet hai-hai nyang get. bah ktheueh geutanyoe teutab tamesapat meusajansajan, dan bek ktheueh lalae lagee ureueng laen. geutanyoe beuleubeh seutia dan saleng tapeukong, sabab tanyoe tateupeue bahwa hana treb le tuhan teuma teuka. sabab meunyeo haba nyang beutoi nibak allah ka trok ubak geutanyoe, teuma geutanyoe teutab tapeubuet desya ngon tasaja, ngon lagee nyan ka hana le keureubeuen keuteusampoh desya geutanyoe. cit saboh nyang na bak tanyoe dan atra nyan na ktheueh tameuhadah ubak peungadalan allah dan apui beungeh gobnyan nyang teuma teutot habeh ureueng-ureueng nyang lawan gobnyan! 28 ureueng nyang hana taat ubak hukom nyang geubri le nabi musa, teuhukom mate hana amphon, meunyeo ateuheh meusaksi dua atawa lhee droe ureueng, jihnyan na bukeuti salah. padub na geuhon hukom jih ateuheh ureueng nyang gilo-gilo aneuek allah. ureueng nyan jianggab hina darah peujanjian allah, na ktheueh keuhai mate almaseh nyang teupeu gleh jih nyan nibak desya. jihnyan ka jihina roh nyang bri rakhmat. tanyoe tateupeue soe nyang sibeuna jih nyang meututoe, "ulon teuma kubalah! ulon teuma kuhukom!" dan nyang peugah, "tuhan

teuma geupeu hakem umat gobnyan." lumpah that phet meunyeo rhot lam jaroe allah nyang udeb! ingat ktheueh pakrihan keuadaan syedara-syedara bak watee yoh masa ilee. bak watee nyan, oh ka ltheueh cahya allah geupeue trang ateuheh gata, gata jai that meudeurita; teuma gata teutab meujuang ngon biet-biet hana putoh asa. na teuma gata jihina dan jipeusaneuet ateuheh gata ngon cara hana get dikeue ureueng rame. dan na teuma watee jih gata meudeurita meusajan ngon awaknyan nyang jipeusaneuet lagee nyan, dan gata meusajan tarasa ngon ureueng nyang seudeh lam peunjara. dan bak watee nyang na nibak gata jireupah, gata teurimong nyan ngon mangat ate, sabab gata tateupeue bahwa gata mantong na sapeue-sapeue nyang leubeh get, nyang teuma meuteun siumu masa. le sabab nyan, bek ktheueh putoh asa, sabab meunyeo gata teutab meuiman, na upah nyang paleng rayeuk keuhai nyan! gata peureulee that beusaba, mangat gata hase tapeubuet keuheundak allah dan deungon lagee nyan tateurimong peue nyang ka geupeu janji. sabab lam alkitab na teutuleh lagee nyoe, "teuma sikeujab teuk, gobnyan teuma teuka atra nyan, dan teuma reujang teuka; gobnyan hana meutanggoh-tanggoh keuhai teuka geuh. dan umat lon nyang beuna teuma jipateh dan udeb; teuma meunyeo lamkawan awaknyan na nyang surot, ulon hana galak keu jih nyan." geutanyoe nyoe kon umat nyang surot dan sisat. nyang keubiet jih, geutanyoe na ktheueh umat nyang meuiman ubak allah dan nyang geupeu seulamat. meuiman nyan makna jih keubiet yaken ngon biet-biet keu hai-hai nyang teuharab nyan, na keupastian keu hai-hai nyang hana deuh teukalon. sabab meuiman, teuma le ureueng-ureueng jamen ilee geuharok le po teu allah. sabab meuiman, geutanyoe teuma muphom bahwa alam nyoe geucebta le feureuman allah; teuma, peue nyang hase teukalon, nyan na nibak peue nyang hana hase teukalon. sabab meuiman, le habel jipeuseumah ubak po teu allah keureubeuen nyang leubeh get nibak keureubeuen kain. sabab le iman jih nyan, habel geuteurimong le allah sibagoe ureueng nyang get, sabab deuh that bahwa allah geuteurimong peuseumahan jih. habel ka meuninggai donya, teuma sabab le iman jih nyan, teuma jih nyan mantong meututoe trok bak watee nyoe. sabab meuiman, henokh hana mate, lom teuma teubeuot dan teuba ubak allah. hana meusidroe pi nyang hase meurumpok ngon jih nyan, sabab henokh nyan ka geubeuot le po teu allah. lam alkitab na teutuleh bahwa sigihlom henokh teubeuot, gobnyan jipeugalak ate allah. meunyeo tan iman, hana meusidroe pih nyang hase jipeugalak ate allah. sabab ureueng nyang teuka ubak po teu allah meuseuti jimeuiman ubak allah bahwa gobnyan na, dan bahwa allah geubri balasan ubak ureueng nyang mita gobnyan. sabab meuiman, nyang ktheueh sabab nabi nuh geubri tee le po teu allah keu hai-hai nyang teujadi singoh dudoe, nyang hana hase jikalon le droe jih keudroe. nabi nuh taat ubak allah akhe jih gobnyan geupeugot saboh kapai nyang oh dudoe jeuet keunyata bahwa le kapai nyan jipeuseulamat droe geuh dan keuluwarga gobnyan. deungon lagee nyan donya teuhukom, seudang nabi nuh keudroe sabab le iman gobnyan geupeugah le allah

sibagoe ureueng nyang get. sabab meuiman, nyang kheueh sabab nabi ibrahim geutaat ubak allah bak watee allah geutawok gobnyan dan geuyue jak gobnyan u nanggroe nyang ka allah peujanji nyan. laju nabi ibrahim geujak deungon hana geutuh ho gobnyan teuma geujak. deungon meuiman, nabi ibrahim tinggai lagee ureueng aseng nibak nanggroe nyang ka geupeu janji le allah keu geuh nyan. nabi ibrahim tinggai nibak teupat nyan lam khimah. meunan cit teuma nabi ishaq ngon nabi yakub, nyang teurimong janji nyang saban nibak po teu allah. sabab nabi ibrahim teungoh geupreh-preh banda nyang ka geureuncana dan geupeudong deungon keunaleueng nyang kong. sabab meuiman, nabi ibrahim hase meuteume keuturonan nibak sara, bah pih nabi ibrahim ka tuha lumpah na, dan sara keudroe mandul. nabi ibrahim yaken that bahwa allah teutab geupeutupat janji geuh. bah pi nabi ibrahim bak watee nyan lagee ureueng nyang ka mate tuboh geuh, teuma gobnyan meuteume keuturonan nyang jai, nyang le jih hana teuingga – lagee nyan jai jih bintang di langt dan anoe di pante. banmandum ureueng nyan teutab meuiman trok an mate. awaknyan hana jiteurimong hai-hai nyang geupeu janji le po teu allah, teuma jikalon dan jisambot nibak jioh. dan deungon nyan awaknyan jipeugah bahwa awaknyan na kheueh ureueng aseng dan ureueng meuranto nibak bumoe nyoe. ureueng nyang peugah lagee nyan deuh teukalon ngon nyata bahwa awaknyan teungoh jimita nanggroe nyang singoh jeuet keu tanoh ie awaknyan. kon nanggroe nyang ka awaknyan tinggai nyan nyang awaknyan pike. sabab meunyoee lagee nyan, teuma ka jai that keuseumpatan nibak awaknyan keujigisa u nanggroe nyan. teuma nyan deuh jih, awaknyan jimeucen that keu saboh nanggroe nyang leubeh get, na kheueh nanggroe nyang na lam syeuruga. nyang kheueh sabab jih allah hana malee meunyoee awaknyan jipeugah gobnyan allah awaknyan, sabab allah ka geukeubah saboh banda keu awaknyan. sabab meuiman cit teuma, nabi ibrahim geupeu seumah nabi ishaq sibagoe keureubeuen watee gobnyan geucuba le po teu allah. ubak nabi ibrahim kheueh allah geubri janji geuh, teuma le nabi ibrahim rila geujok aneuek gobnyan nyang tunggai nyan. po teu allah ka ltheueh meufeureuman ubak nabi ibrahim, "meulalu nabi ishaq nyoe kheueh gata teuma meuteume keuturonan nyang ka lon meujanji ubak gata." nabi ibrahim yaken that bahwa gobnyan hase geupeu udeb lom nabi ishaq nibak mate – teuma, jeuet teupeugah, nabi ibrahim ka geuteurimong lom nabi ishaq nibak mate. sabab meuiman, teuma nabi ishaq geumeujanji beureukat-beureukat ubak nabi yakub dan esau keu masa ukeue. sabab meuiman kheueh, teuma sigohlom nabi yakub meuinggai, gobnyan laju geupeutron beureukat jih ubak aneuek-aneuek nabi yusuf – deungon meusadeue ubak ulee tungkat jihnyan dan taseumah allah. 22 sabab meuiman, nabi yusuf – watee karab meuninggai donya – geumeututoe keuhai jiteubiet umat israel di nanggroe meuse, dan geutinggai amanat keuhai peue nyang meuseuti jipeubuet ateuah manyet geuh nyan. sabab meuiman, ureueng tuha nabi musa geusom gobnyan na lhee buleuen treb jih oh ka ltheueh

gobnyan lahe. awaknyan jikalon bahwa gobnyan sidroe aneuek nyang ceudah, dan awaknyan hana teumakot geulawan peurintah raja. sabab meuiman, nabi musa oh ka rayeuk, hana geutem jipeugah aneuek nibak putroe meuse. gobnyan leubeh galak udeb meudeurita meusajan-sajan ngon umat po teu allah nibak udeb mangat nyang sikeujab teuma peunoh lam desya. nabi musa meurasa bahwa jioh leubeh muyuem keunong hina deumi raja peuseulamat nyang geupeu janji le allah nyan nibak meuteume mubagoe atra lam nanggroe meuse, sabab nabi musa meuharab upah watee uroe dudoe. sabab meuiman, nabi musa geutinggai nanggroe meuse ngon hana geurasa takot geubeungeh le raja. nabi musa geumaju ubak tujuan gobnyan siulah-ulah gobnyan ka geungiang po teu allah nyang hana deuh teukalon nyan. 28 sabab meuiman, nabi musa geupeuget paskah dan geupeutron peurintah mangat jisipreuk darah nibak tieb-tieb pintoe rumah ureueng israel mangat jeuet malaikat mawot bek geupoh mate aneuek tuha awaknyan. sabab meuiman, teuma ureueng-ureueng israel hase jijeumeurang laot mirah, siulah-ulah awaknyan hase jijak ateuah tanoh nyang tho, dan di ureueng-ureueng meuse habeh jiuat le laot nyan, watee awaknyan jicuba jijeumeurang cit teuma. sabab meuiman, ureueng-ureueng israel hase jipeujeuet binteh-binteh beuton di yerikho reuloh oh ltheueh jikeulileng le awaknyan tujoh uroe. sabab meuiman cit teuma, rahab, inong lunte nyan, hana rhoh meusajan teupoh mate lamkawan ureueng-ureueng nyang lawan allah, sabab inong nyan jiteurimong ngon mangat ate ureueng-ureueng israel nyang teungoh muluem. syedara, ulon jeuet mantong hana putoh-putoh lon peugah haba, teuma watee nyang hana seb nibak ulon. sabab ulon gohlohm lon peugah gideon, barak, simson, yefta, nabi daud, samuel, dan nabinabi. sabab meuiman, teuma awaknyan ka jipeutalo bubena keurajeuen. awaknyan jipeubuet peue nyang beutoi, akhe jih jiteurimong peue nyang ka geupeu janji le allah. awaknyan jisumpai bubena babah singa, jipeulon apui nyang teungoh hu meuhubuh, teupeusi nibak mata peudeueng nyang taja. awaknyan leumoh, akhe jih jeuet keu teuga; awaknyan campen lam mideuen prang akhe jih hase jipeutalo bubena pasokan bansa aseng. sabab meuiman, teuma le ureueng-ureueng inong meuteume lom ngon ureueng-ureueng jih nyang ka mate. na teuma nyang rila teuseksa sampoe mate, dan jitem watee teupeubeubaih, sabab jitem udeb lom teuma nibak saboh udeb nyang leubeh get. na nyang keunong hina, keunong seunuet, ji-ikat ngon rante dan jipeutamong lam glab. awaknyan jirhom ngon batee sampoe mate, na nyang jikoh ngon gogajo, dan nyang jireupang ngon peudeueng, awaknyan jimeurawoh ngon peukayan nibak kulet bubiri atawa kulet kameng; awaknyan gasien, ji-ienanya dan keunong azeb. donya nyoe kon teupat nyang jroh nibak awaknyan. awaknyan jimeurawoh lam padang pasi dan lam buket-buket, lom tinggai lam guha-guha dan lam ruhueng tanoh. keubiet rayeuk that meunang nyang jiteurimong le mandum ureueng nyan. sabab iman awaknyan keudroe! teuma awaknyan hana jiteurimong peue nyang geupeu janji le allah,

sabab allah na reuncana nyang leubeu get keu geutanyoe. reuncana gobnyan na kheueh bahwa meusajan ngon geutanyoe, awaknyan jeuet keu ureueng nyang sampoeureuna. syedara, keuhai geutanyoe keudroe, ban sikeulileng tanyoe na dan jai lumpah na saksil! sabab nyan, jak kheueh geutanyoe tatiiek banmandum nyang jipeubrat tanyoe dan desya nyang sabe meuleukek nibak geutanyoe. dan jak kheueh geutanyoe deungon biet-biet tatiyeub deungon biet-biet that meutungan plueng nyang na dikeue geutanyoe. bah kheueh mata tanyoe tatuju ubak isa, sabab gobnyan kheueh nyang peubeudoh iman geutanyoe dan nyang peulara phon awai trok an akhe. isa ek geupeuteun deurita bak kayee saleb! gobnyan hana geupakoe bahwa mate bak kayee saleb nyan na kheueh buet nyang paleng malee. nyang geuingat na kheueh keugeumbiraan nyang geuteurimong watee nyang teuma teuka. jinoenyoe gobnyan geudeuk blaiih ueneu takhta allah dan geumat peurintah meusajan-sajan ngon gobnyan. cuba kheueh pike pakriban azeb jih isa watee geuhadab ureueng-ureueng nyang meudesya nyang lawan gobnyan hana ngon peusa! sabab nyan bek kheueh cut ate dan putoh asa. sabab lam meujuang droeneueh talawan desya, gata gohlohm na meujuang sampoe roe darah. dan bek kheueh tatuwoe naseuhah allah nyoe, nyang geubri ubak gata sibagoe aneuek-aneuek gobnyan: "aneuek lon, simak kheueh beuget-get ajaran tuhan, dan bek kheueh cut ate meunyeo gobnyan beungeh keu gata. sabab tuhan geuseupot tieb-tieb ureueng nyang geugaseh, dan gobnyan geusunuet tieb-tieb ureueng nyang geu angkee sibagoe aneuek geuh." gata teun kheueh meunyeo geusunuet le allah sibagoe seupot le sidroe bapak. sabab, peu kheueh na sidroe aneuek nyang hantom keunong hukom le ayah jih? meunyeo gata hana meusajan teuhukom lagee banmandum aneuek geuh nyang laen nyoe saban cit gata kon aneuek sah, teuma aneuek nyang hana sah. geutanyoe na bapak lam donya. gobnyan geupurunoe tanyoe, dan tanyoe horeumat bak gobnyan. ngon lagee nyan, peu kheueh u ateuah bapak rohani tanyoe nyang na lam syeuruga, ka teuntée geutanyoe leubeu tatukui lom ubak gobnyan mangat tanyoe udeb. ureueng syiek geutanyoe nyang na lam donya geupurunoe bak geutanyoe deungon watee nyang teubataih, meunurot peue nyang geurasa get. teuma allah geupurunoe tanyoe na kheueh guna keu get tanyoe keudroe, mangat tanyoe hase jeuet keusukit meusajan-sajan ngon gobnyan. beutoi bak watee tanyoe geupurunoe, hukoman nyan biet hana mangat ate tanyoe, nyang na peudeh jih. teuma oh lheureu nibak nyan, keugeutanyoe nyang ka geupurunoe, hukoman nyan jeuet keusabab geutanyoe udeb meunurot keuheundak po teu allah, dan teupeuhase peurasaan seujahteura ateuah geutanyoe. sabab nyan, peukong kheueh jaroe gata nyang leumoh dan teutot gata nyang meugok-gok nyan! gata jak kheueh sabe ateuah rot nyang sare, mangat gaki gata nyang capiek nyan hana meusalah, teuma jeuet keu puleh. useuha kheueh keu udeb rukon ngon mandum ureueng. meunon cit useuha kheueh teuma keu udeb suci, khunos keu tuhan. sabab hana meusidroe pi nyang hase jikaloh tuhan meunyeo jihnyan hana udeb lagee nyan.

jaga kheueh bek na sampoe meusidroe pi nyang teubiet nibak lingkungan ngon nibak jroh ate allah, mangat bek sampoe na lagee seunaman nyang meuracon lamkawan gata akhe jih jipeuteuka bala dan jipeurusak ureueng rame ngon racon nyan. jaga kheueh mangat bek na nyang udeb cabui atawa hana jihareuga nyang hai-hai rohani, lagee jipeubuet le esau. jipeubloe hak jih sibagoe aneuek tuha, teuma keu saboh pangan bu. gata tateupeue bahwa oh du-doe esau meuheuet jikeuneuk meuteuma beureukat nyan nibak bapak jih, teuma jihnyan geutulak. sabab bah kheueh ngon jimoe ba-e jihnyan jimita rot keu jipeuget buet jih nyang salah nyan, ruweueng keuhai nyan ka hana le. syedara-syedara hana tajak tahadab sapeue-sapeue lagee nyang jipeukeue le bansa israel yoh masa ilee. awaknyan jipeukeue sapeue-sapeue nyang jeuet jigeue, na kheueh gunong sinai deungon apui nyang teungoh hu; awaknyan jipeukeue nyang seupot, glab dan angen badee; awaknyan jipeukeue ubak su beureuguih, dan meubagoe su nyang meutaga. bak watee ureueng-ureueng israel jideungoe su nyan, awaknyan jilakee ngon meuharab that mangat su nyan hana jimarit le keu awaknyan. sabab awaknyan hana ek jiteun watee jideungoe peurintah nyang jipeugah le su nyan. sabab su nyan jipeugah, "banmandum nyang keunong nibak gunong nyoe, hana keucuali peu kheueh jih nyan beulatang atawa soe mantong, haroh teu rhom ngon batee sampoe mate." peue nyang jikaloh le ureueng-ureueng israel nyan meunan hebat sampoe nabi musa geupeugah, "ulon teumakot ngon yo!" 22 nyang biet jih, gata ka tateuka ubak buket sion dan banda allah nyang udeb, na kheueh yerusalem nyang na lam syeuruga deungon meuribee-ribee malaikat jih. gata tapeuna saboh meurokpatat nyang meuriah – meurok patat keu aneuek-aneuek tuha po teu allah, nyang nan-nan jih na teudafeutar lam syeuruga. gata tateuka meuhadab allah, hakem banmandum umat manusia. gata meuhadab ngon roh-roh ureueng jroh-jroh, nyang ka geupeujeuet sampoeureuna. gata tateuka meuhadab isa, peurantara keu peujanjian nyang baro nyan; gata tameuhadab ubak darah nyang teureutek nyang teujamin keu haihai nyang jioh leubeu get nibak nyang jijamin le darah habel. sabab nyan, beu ate-ate kheueh, bek sampoe gata hana tatem deungoe gobnyan nyang meututoe nyan. ureueng nyang hana jitem deungoe gobnyan nyang teuka u bumoe dan geupeusampoe feureuman nibak allah, ureueng nyan hana hase jipeuplueng droe. peuteuk lom tanyoe nyang tadeungoe gobnyan meututoe lam syeuruga! meunyeo tanyoe hana tatem deungoe nyan, panena mungken geutanyoe hase teuhinda! bak watee nyan su geuhnyan meuhagak bumoe. teuma jinoenyoe gobnyan meujanji, "sigoe teuk, ulon teuma lon peugeumpa kon mantong bumoe meunan cit langet." kheun "sigoe teuk" sibagoe teutunyok bahwa bansigom donya nyang ka geucebta teuma geuyok-yok dan geuboih ho laen, mangat jeuet nyang tinggai na kheueh nyang hana hase meuhayak. 28 sabab nyan, bah kheueh geutanyoe talakee teurimong gaseh ubak po teu allah, sabab tanyoe tateurimong nibak gobnyan saboh keurajeun nyang hana hase meuhayak. bah kheueh

tanyoe talakee teurimong gaseh dan tameu iebadat ubak allah deungon horeumat dan teumakot, meunurot cara nyang geulakee le gobnyan keudroe. sabab allah geutanyoe lagee apui nyang jipeuhangoh peue nyang na. bah kheueh gata saleng tameugaseh sidroe ngon nyang laen sibagoe ureueng-ureueng kristen nyang meusyedara. bek seugan-seugan gata teurimong lam rumah gata ureueng-ureueng nyang gohlom gata meuturi. sabab, deungon na gata peubuet nyang lagee nyang, ka lheureu na ureueng, ngon hana sadar, ka jiteurimong malaikat lam rumah jih. ingat kheueh ureueng-ureueng nyang na lam glab, siulah-ulah gata pi na meusajan awaknyan. dan ureueng-ureueng nyang keunong ilanya le gob, bah kheueh gata ingat keu awaknyan siulah-ulah gata pih jipeusaneut lagee nyan cit teuma. banmandum ureueng haroh jitunyok sikeub horeumat ubak leumbaga meukawen, nyang kheueh sabab jih lakoe binoe beuseutia sidroe ngon nyang laen. ureueng nyang cabui dan ureueng nyang meumukah teuma geupeue sidang le po teu allah. bek kheueh udeb gata jikuasa le cinta keu peng, teuma bah kheueh gata pueh ngon peue nyang na nibak gata. sabab allah ka geumeufeuroman, "ulon hana lon peubiyeu atawa lon tinggai gata." le sabab nyan tanyoe tajeuet peugah, "tuhan na kheueh nyang tulong lon, ulon hana teumakot. peue nyang hase jipeubuet manusia ateuh ulon?" bek kheueh tuwae ubak peumimpem-pemimpin gata nyang peusampoe peusan allah keu gata. ngieng kheueh pakriban awaknyan udeb dan pakriban teuma awaknyan mate, dan cuntoh kheueh iman awaknyan. isa almaseh teutab saban, bah kheueh yoh masa ilee, jinoe, dan trok siumu masa. bek kheueh peubiyeu mubagoe rupa ajaran nyang kon-kon jipeusisat gata. ate geutanyoe bah kheueh allah nyang jroh nyang peukong, nyan kheueh nyang get; bek le mubagoe atoran keuhai peunajoh. ureueng yoh masa ilee jitaat ubak atoran-atoran nyan hana meuteume sapeue. tanyoe na saboh miseubah keu teupat tapeuseumah keureubeuen keu po teu allah. dan imeum-imeum nyang meulayani bak khimah tuhan, hana hak jimakheun keureubeuen nyang na ateuh miseubah. darah beulatang nyang teupeuseumah sibagoe keureubeuen keu teupeu amphon desya, geuba le imeum agong ubak ruweueng mahasuci, teuma bangke beulatang nyan keudroe jittot diluwa khimah-khimah. nyang kheueh sabab jih isa mate diluwa pintoe geureubang banda keu teupeu gleh umat gobnyan nibak desya ngon darah geuh keudroe. sabab nyan, jak kheueh tajak ubak gobnyan diluwa khimah-khimah dan meusajan jihinah ngon gobnyan. sabab dibumoe hana teupat tinggai nyang keukai keugeutanyoe; tanyoe tamita teupat tinggai keu nyang teuma teuka. sabab nyan, ngon peurantaraan isa, bah kheueh geutanyoe sabe tapujoe-pujoe allah; nyang lagee nyan na kheueh sibagoe keureubeuen syukoe geutanyoe keu gobnyan, nyang tanyoe peuseumah rot bibi tanyoe keu tapeumulia nan gobnyan. bek tuwae tapeubuet nyang jroh dan saleng tateumulong, sabab nyoe kheueh keureubeuen-keureubeuen nyang teupeu mangat ate allah. seutot kheueh peurintah peumimpin-peumimpin gata, dan tundok kheueh

ubak awaknyan. sabab awaknyan sabe geukalon jiwa gata, dan awaknyan haroh meutanggong jaweub ubak allah. meunyo gata taat ubak awaknyan, awaknyan hase jimubuet ngon mangat ate; meunyo han, teuma awaknyan jimubuet ngon seudeh ate, dan nyang lagee nyan biet hana laba nibak gata. bek putoh-putoh meudoa keukamoe. kamoe yaken ate nurani kamoe murni, sabab lam hai peue mantong kamoe meutem mubuet peue mantong nyang beuttoi. khusus jih ulon meulakee ngon meuharab that, mangat gata meudoa keu ulon mangat allah ngon bagai-bagai geuba ulon nyoe ubak gata. allah ka geupeu udeb tuhan geutanyoe isa nibak mate. sabab mate geuh nyan gobnyan jinoenyo geumbala agong keu geutanyoe, nyan kheueh bubiri-bubiri gobnyan. le mate geuh nyan cit teuma teupeusah peujanjian keukai nyang ka geupeuet le allah ngon geutanyoe. seumoga allah pangkai seujahteura nyan geupeue leungkab gata ngon peue-peue mantong nyang jroh nyang gata peureulee keu gata peubuet keuheundak gobnyan. seumoga, deungon peurantaraan isa almaseh, allah geumubuet lam droe geutanyoe, peue nyang geukeuheundaki. bah kheueh almaseh jipujoe keu siumu masa! amin. 22 ulon meuharab mangat gata tasimak naseuhah-naseuhah lon nyoe ngon saba, sabab surat ulon nyoe hana padub na panyang. bah kheueh gata tateupeue bahwa rakan geutanyoe timotius ka teupeubeubaih nibak peunjara. meunyo jih nyan ka jijak ubak teupat lon nyoe, ulon teuma kuba bak watee ulon jak saweue gata singoh. peutrok kheueh saleuem kamoe ubak mandum peumimpin droeneuh dan ateuh umat allah. dan teurimong cit teuma saleuem nibak syedara-syedara nyang na di italia. seumoga tuhan geubri beureukat ateuh syedara banmandum.

syedara-syedara umat allah banmandum nyang na meusipreuk bansigom donya! saleum nibak ulon, yakobus, hamba allah dan hamba tuhan isa almaseh. syedara-syedara! meunyoee gata jiteuka meubagoeu macam cubaan, keubah kheueh lam ate gata bahwa nyan na kheueh laba keu gata. sabab gata tateupeue, meunyoee gata teutab meuiman ubak tuhan bak watee teuka cubaan nyan ateueh gata, akibat jih na kheueh: gata jeuet keu ureueng nyang tabah. jaga kheueh mangat tabah ate gata nyan meukeumang sabe sampoe gata biet-biet samporeuna dan hana kureueng lam hai peue mantong. meunyoee na sidroe lamkawan gata nyang hana bijaksana, bah kheueh jihnyan jilakee ubak allah, ngon lagee nyan allah teuma geubri keubi-jaksanaan nyan bak jih; sabab keu tieb-tieb ureueng, allah geubri ngon murah ate dan ngon peurasan gaseh sayang. teuma ureueng nyang meulakee, haroh meuiman; ureueng nyan hana jeuet waih-waih. sabab ureueng nyang waih-waih na kheueh lagee geulum-bang lam laot nyang jipot le angen keudeh keunoe. ureueng nyang lagee nyan hana teutab pikeran jih; sapeue hana hase jicok keuputosan lam hai peue mantong nyang jipeubuet le ureueng lagee nyan. sabab nyan, bek jimeuharab sapeue nibak tuhan. ureueng kristen nyang gasien bah kheueh meuras mangat ate meunyoee po teu allah geupeu manyang jih nyan. dan ureueng kristen nyang kaya pih bah kheueh meuras mangat ate teuma, meunyoee po teu allah geupeumiyueb jih nyan. sabab ureueng kaya teuma gadoh lagee bungong naleueng. bak watee mata uroe jiteubiet ngon cahya jih nyang seu-uem, ngon lagee nyan naleueng nyan laju layee dan luroh kheueh bungong jih dan gadoh kheueh ceudah nibak bungong nyan. meunan kheueh teuma ngon ureueng kaya; jih nyan teuma hanco bak watee jihnyan teungoh jipeujak useuha jih. mubahgia kheueh ureueng nyang tabah watee ateueh jih keunong cubaan. sabab oh ka ltheuh jihnyan meuhase lam cubaan nyan, ureueng nyan teuma jiteurimong upah jih, nyan kheueh udeb nyang ka geupeu janji le po teu allah keu ureueng-ureueng nyang gaseh ubak allah. meunyoee sidroe-droe ureueng teupeudaya ngon cubaan nyang lagee nyan, bek kheueh jipeugah, "godaan nyoe teuka nibak allah," sabab allah hana hase teupeudaya le nyang jeuhet, dan hana teuma geupeu daya soe-soe mantong. teuma ureueng teupeudaya meunyoee jihnyan teutarek dan meunafeusu ngon keuheundak jih keudroe nyang jeuhet. oh ltheuh nyan, meunyoee keuheundak jih keudroe jipeuseutot, ngon lagee nyan lahe kheueh desya; dan meunyoee desya ka masak ateueh ureueng nyan, akibat jih na kheueh mate. bek kheueh gata keunong peunget, syedara-syedara lon nyang lon gaseh! tieb-tieb meuneubri nyang jroh dan hadiah nyang samporeuna atra nyan teuka nibak syeuruga, nyang geupeutron le po teu allah, nyang cehta mandum nyang trang di langet. gobnyan kheueh allah nyang hana meu-ubah, dan hana teuma jeuet keuseupot le peue mantong. ateueh keuheundak geuh keudroe gobnyan geupeujeuet tanyoe keu aneuek-aneuek gobnyan meulaul feureuman geuh nyang beuna. gobnyan geupeubuet lagee nyan mangat geutanyoe meuteume teupat nyang paleng phon nibak mandum makhlok cehta gobnyan. ngieng

kheueh nyoe beuget-get, syedara-syedara lon nyang lon gaseh! tieb-tieb ureueng meuseuti bubagaih lam jideungoe, teuma mulet jimeututoe dan mulet teuma jiteuka beungeh. ureueng nyang beungeh hana hase jipeubuet nyang get, nyang peumangat ate po teu allah. sabab nyan, boih kheueh bubena nyang kutoe atawa nyang jeuhet. teurimong kheueh ngon ate nyang miyueb tieb-tieb feureuman nyang geupula le allah lam ate gata, sabab feureuman geuh nyan na teunaga nyang ba gata ubak sealamat. 22 bah kheueh gata peubuet peue nyang geupeugah le allah, bek gata deungoe mantong, sampoe deungon lagee nyan ka gata tipee droe teuh keudroe. ureueng nyang deungoe feureuman allah, teuma hana jipeubuet na kheueh lagee ureueng nyang teungoh jikalon muka jih keudroe nyang sibeuna jih dikeue ceureumen. oh ka ltheuh jikalon get-get, laju jajak dan tuwoe pakriban ruman jih nyan. hukom allah samporeuna dan na teunaga keu teupeu meur-dehka manusia. dan ureueng nyang seulidek dan jikalon get-get lom jipeubuet hukom-hukom nyan, dan kon jideungoe mantong oh ltheuh nyan laju tuwoe, ureueng nyan teuma geubri beureukat le allah lam hai peue mantong nyang jipeubuet. meunyoee na sidroe ureueng nyang meuras droe jih ureueng nyang taat meuagama, teuma ureueng nyan hana jija lidah jih, ngon lagee nyan ureueng nyanka jipitee droe jih keudroe; iebadat ureueng nyan hana meuguna. keuhai taat meuagama nyang gleh dan seujati meunurot bak mata allah bapak na kheueh: tatem tulong aneuek yatem ngon aneuek muntui dan inong-inong balee nyang udeb meudeurita, dan jijaga droe jih keudroe mangat bek jipeurusak le donya nyoe. syedara-syedara! sibagoe ureueng nyang meuiman ubak tuhan isa almaseh, tuhan nyang mahamulia, bek kheueh gata peubeda-beda manusia ngon dasai hai-hai nyang lahe. sabab meunyoee na sidroe ureueng kaya nyang jingui euncien meuh meunan cit peukayan nyang ceudah watee jijak bak teupat khanuri gata, nibak teupat nyan teuka teuma sidroe ureueng gasien jingui peukayan nyang beukah-beukah, teuma gata leubeh tahoreumat keu ureueng nyang jingui peukayan ceudah nyan. laju gata peugah lagee nyoe bak ureueng nyan, "inoe neuduek teungku bak keurusi nyang diet nyoe." teuma bak ureueng nyang gasien nyan gata peugah, "dong mantong disideh," atawa, "kah duek ateueh aleue nyoe." deungon gata peubuet lagee nyan, gata ka gata peubeda seusabe gata dan gata ponten ureueng ngon dasai bak pikeran nyang jeuhet. ingat kheueh, syedara-syedara nyang lon gaseh! ureueng nyang gasien lam donya nyoe, geupileh le allah jeuet keu ureueng nyang kaya lam iman. ureueng-ureueng nyan jeuet keu anggotaa umat allah lagee nyang geupeu janji le allah ubak ureueng nyang geugaseh. teuma gata tahina ureueng gasien, padahai ureueng-ureueng kaya kheueh nyang teugon gata dan nyang tarek gata bak kanto mahkamah! awaknyan kheueh nyang hina nan teuhoreumat nyang gata teurimong nibak allah! gata tapeubuet nyang beutoi, meunyoee gata ta amai hukom keurajeuen nyang na lam alkitab nyoe, "cinta kheueh seusabe gata keudroe-droe lagee gata cinta keudroe gata sidroe." teuma

meunyoe gata tapeubeda-beda manusia nyang daisai jih nibak hai-hai nyang lahe, gata ka tapeubuet desya, dan hukum allah geupeugah bahwa gata ureueng nyang langga hukum. ureueng nyang langga saboh lam hukum-hukum allah, nyan saban cit ka jilangga banmandum hukum nyan. sabab nyang peugah, "bek meumukah," gobnyan kheueh nyang peugah, "bek poh mate." teuma, meunyoe gata hana meumukah, teuma gata peumate gob, ngon lagee nyan gata na kheueh nyang langga hukum. meututoe kheueh dan mubuet kheueh lagee ureueng nyang teuma teupeusidang meunurot hukum allah nyang peumeurdehka manusia. sabab allah hana geubri gaseh sayang ubak ureueng nyang hana jituri gaseh sayang. teuma gaseh sayang leubeuh teuga nibak hukuman! syedara-syedara! keupeue guna jih manusia jipeugah, "ulon ureueng nyang meuman", meunyoe jihnyan hana jipeuleumah ngon buet nyang nyata? peu kheueh hase iman nyang lagee nyan jipeuseulamat jih? seukira jih sidroe agam atawa sidroe inong peureulee peukayan dan hana se peunajoh nyang jimakheun keu jimakheun tieb-tieb uroe. keupeue guna jih gata peugah bak jihnyan, "seulamat neungui peukayan nyang seu-uem dan seulamat makheun!" – meunyoe gata hana tabri keu jih nyan peue nyang peureulee keu udeb? meunan cit teuma ngon iman, meunyoe hana teupeuleumah ngon buet, iman nyan hana meuguna. mungken na nyang peugah, "na ureueng nyang meusadeue bak iman jih dan na teuma nyang meusadeue bak buet jih." ulon teuma kujaweuh, "tunyok kheueh bak ulon pakriban ureueng hase jiteume iman meunyoe hana ngon buet dan ulon teuma kutunyok ngon buet bahwa ulon na iman." gata tapateh bahwa allah na kheueh sidroe, kon? ngon lagee nyan, roh-roh jeuhet pi jipateh dan awaknyan yo sabab teumakot! gata bangai lumpah na! peu kheueh peureulee teubri bukeuti keu gata bahwa hana guna na iman meunyoe hana ngon buet? ngieng kheueh nabi ibrahim indatu tanyoe. gobnyan geuteurimong jroh that le po teu allah sabab le buet gobnyan, watee gobnyan geupeu seumah nabi ishaq, aneuek gobnyan, keu po teu allah di ateuh miseubah. 22 inoe deuh takalon bahwa iman haroh ngon buet mangat meusampoereuna. nyan paih that lagee nyang teuteuleh lam ayat alkitab nyoe, "nabi ibrahim meuman ubak allah, dan sabab le iman geuh nyan allah geuteurimong gobnyan sibagoe ureueng nyang peubuet keuheundak allah." nyang kheueh sabab jih nabi ibrahim teupeugah, "sahabat allah." nyata kheueh jinoenyoe, bahwa manusia geuteurimong ngon get le po teu allah sabab peue nyang jipeubuet le manusia nyan, dan kon mantong le iman jih. ngieng kheueh teuma ubak rahab, inong lunte nyan. jih nyan geuteurimong nyang jroh le po teu allah sabab buet jih, na kheueh watee inong nyan jiteurimong lam rumah jih tukang-tukang meuluem bansa israel dan jitulong awaknyan jipeuplueng droe meulala rot laen. nyan, lagee toh tuboh nyang hana roh na kheueh tuboh nyang mate, meunan cit teuma iman hana mubuet na kheueh iman nyang mate. syedara-syedara! bek kheueh meuronron lamkawan gata keuneuk jeuet keu guree. gata tateupeue bahwa geutanyoe nyang jeuet keu guree

teuma geupeu sidang nyang leubeuh brat nibak ureueng laen. tanyoe kayem that tapeubuet salah. teuma ureueng nyang hantom jipeubuet salah ngon tutoe haba jih, nyan kheueh ureueng nyang sampoereuna, nyang hase jikuasa bansaboh tuboh jih. meunyoe tanyoe tapeubeukab keukang bak babah guda mangat guda nyan jitem seutot peue nyang tapeugah, ngon lagee nyan tanyoe hase takuasa bansaboh tuboh guda nyan. cok teuma kapai sibagoe cuntoh. bah pih kapai nyan saboh beunda nyang meunan rayeuk dan jiba le angen nyang tajam, teuma kapai nyan hase jikeundali le keumudo nyang ubit, meunurot keuheundak nyang mat keumudo. meunan cit ngon lidah tanyoe; bah pi lidah tanyoe nyan ubit, teuma lidah nyan hase jipeusombong droe ngon hai-hai nyang rayeuk-rayeuk. cuba gata bayang padub na rayeuk jih gle teuma hase tutong ngon apui nyang ubit! lidah saban lagee apui. lam tuboh tanyoe, lidah nyan pangkai nyang jeuhet nyang jimeu-eue bansaboh tuboh tanyoe. ngon apui nyang asai lam nuraka, jihnyan hase jipeuhangoh bansaboh tuboh tanyoe. mubagoe rupa beulatang juah, cicem, beulatang nyang meueu dan eungkot hase teupeu seuiet, dan ka teuma ji peuseuit le manusia. teuma lidah manusia hana hase jipeuseu iet le soe mantong. lidah nyan jeuhet dan hana hase takuasa; peunoh ngon racon nyang jiba mate. tanyoe tapeuguna keu tapeugah teurimong gaseh ubak tuhan bapak tanyoe, teuma lidah nyan cit nyang seurapa sabe geutanyoe manusia, nyang ka geucebta meunurot rumam allah. nibak babah nyang saban jiteubiet tutoe haba teurimong gaseh dan meunan cit tutoe haba teukutok. nyang sibeuna jih kon lagee nyan! peu kheueh na mata ie nyang jipeuteubiet ie tabeue ngon ie phet nibak mata ie nyang sa? bak ara, syedara-syedara lon, hana jeuet jipeuhase boh zaiton, dan bak anggo hana jeuet jipeuhase boh ara. meunan cit mata ie nyang masen hana jeuet jipeuhase ie nyang tabeue. meunyoe lamkawan gata na nyang bijaksana atawa meubudoe basa, bah kheueh jihnyan jitunyok lam udeb jih nyang jroh dan ngon jipeubuet hai-hai nyang jroh teuma, nyang meusajan ngon ate nyang miyueb dan keubijaksanaan. teuma meunyoe gata ceumuru, saket ate, dan tapeumanyang droe teuh keudroe, bek kheueh tapeubangga keubijaksanaan nyan, sabab deungon nyan gata kataputa balek haba nyang beutoi nyang teuka nibak po teu allah. keubijaksanaan nyang lagee nyan kon asai jih lam syeuruga. atranyan asai jih lam donya nyoe, nibak nafeusu manusia, dan nibak jen! dipat na sifeuet ceumuru dan jipeupeunteng droe jih keudroe, nibak teumpat nyan teuma na karu ka-ak ka ok dan meubagoe rupa buet nyang jeuhet. teuma ureueng nyang na keubijaksanaan nyang asai jih di ateuh, jihnyan kheueh nyang phon-phon that gleh, oh lheureh nyan jitem meudame, ramah dan patuh. nibak jihnyan peunoh gaseh sayang dan jipeuhase buet-buet nyang get. jihnyan hana meupihak dan hana meupura-pura. keubiet buet nyang jroh na kheueh hase nibak bijeh dame nyang jitaub le ureueng-ureueng nyang cinta dame. pane jiteuka asai mupake meudakwa lamkawan gata? kon kheueh nyan teuka nibak nafeusu-nafeusu gata nyang sabe jimuprang lam tuboh gata keu gata teume mangat lam donya! gata meuheuet, teuma hana meuteume, ngon

lagee nyan gata naniet keuneuk peumate gob! gata meuseumangat, teuma hana meuteume peue nyang gata mita, deungon lagee nyan gata meudakwa dan gata mulo. gata hana meuteume sapeue, sabab gata hana meulakee bak po teu allah. dan bah kheueh gata ka talakee, teuma teutab hana gata teume, sabab tujuan nyang gata lakee nyan salah; peue nyang gata lakee na kheueh keu tapeumangat droe teuh keudroe. gata na kheueh ureueng nyang hana seutia! peu kheueh gata teupeue bahwa meunyoee gata meurakan ngon donya, gata jeuet keumusoh allah? le sababnyan, barang sigasoe keuneuk jeuet keu sahabat donya nyoe, gobnyan jipeujeuet droe jih musoh allah. bek tapike bahwa alkitab hana alasan teutuleh lagee nyoe, "lam droe geutanyoe allah geukeubah roh nyang paleng kreueh that keumauan jih." teuma bahpi meunan, rakhmat allah nyang geubri keugeutanyoe leubeh teuga nibak nafesus roh tanyoe nyan. nyang kheueh sabab jih lam alkitab na cit teutuleh lagee nyoe, "allah geulawan ureueng nyang sombong, teuma gobnyan geugaseh keu ureueng nyang miyueb ate." sabab nyan, tundok kheueh ubak allah dan lawan kheueh iblih, ngon lagee nyan iblih teuma jiplueng jitinggai gata. peurab kheueh ubak allah, dan po teu allah pi geupeurab ubak gata. peugleh kheueh jaroe gata, he gata nyang meudesya! dan peujeureuneh kheueh ate gata, he gata nyang meucabeueung ate! bah kheueh gata biet-biet beuna meunyeusai dan gata mo sira meuba-e; bah kheueh khem gata jeuet keu mo dan geumbira gata jeuet keuseudeh! bah kheueh gata peumiyueb droe dikeue tuhan, deungon lagee nyan tuhan teuma geupeumanyang gata. syedara-syedara, bek kheueh saleng meuhina atawa saleng peusalah sidroe ngon nyang laen. ureueng nyang meuhina atawa jipeusalah syedara jih nyang seusabe ureueng kristen, ureueng nyan ka jihina dan jipeusalah hukom po teu allah. dan meunyoee gata tapeusalah hukom allah, nyan saban cit gata hana taturot keu hukom-hukom nyan keudroe, teuma ka jeuet keuhakem jih. padahal sidroe nyang na hak jibri hukom keu manusia dan nyang peusidang manusia. na kheueh allah nyang meukuasa nyang peuseulamat dan nyang peubinas. deungon lagee nyan, soe kheueh gata nyan, gata jeuet peusalah sabe manusia? syedara-syedara nyang peugah haba, "uroe nyoe atawa singoh kamoe keuneuk jak u banda pulan dan tinggai disinan sithon treb jih keuneuk kamoe meukat dan meumita peng," - deungoe naseuhat ulon nyoe. peue nyang teuma jeuet lam udeb gata oh singoh nyan, gata keudroe hana gata teupeue! gata na kheueh lagee asab nyang deuh jih sikeujab mantong, oh ka ltheueh nyan gadoh. nyang sibeuna jih gata peugah lagee nyoe, "meunyoee tuhan geubri idhin, kamoe teuma udeb dan kamoe peubuet nyoe atawa meupeubuet nyan." teuma jinoenyoee gata sombong dan raya haba. banmandum haba gata nyang rayeuk lagee nyan hana beutoi. sabab nyan, ureueng nyang teupeue peue nyang get nyang haroh jipeubuet nyan teuma hana jipeubuet, ureueng nyan meudesya. syedara-syedara, ureueng-ureueng kaya! deungoe kheueh naseuhat ulon. bah kheueh gata mo ngon meuba-e sabab gata teuma meudeurita! keukayaan gata kabrok. peukayan gata ka jikab le keuraleueb. meuh ngon pirak gata ka habeh meugeu-

ratan; sabab teuma jeuet keusaksi jilawan gata dan teuma jipajoh habeh tuboh gata lagee apui pajoh. gata ka tapeusapat atra bak jamen karab pagee. gata hana tabayeue upah keu ureueng-ureueng nyang mubuet bak blang gata. jinoenyoee deungoe kheueh awaknyan apoh apah! ureueng-ureueng nyang peusapat wase blang gata, jiklik jilakee tulong dan klik awaknyan ka geudeungoe bak geulinyueng allah, tuhan nyang mahakuasa. gata ka udeb meuwah dan tateume nekmak lam donya nyoe. gata siulah-ulah teungoh peuteumbon droe keu uroe seumeusie. gata tahukom dan tapoh mate ureueng-ureueng nyang hana meusalah, dan awaknyan hana jilawan gatanyoee. sabab nyan, saba kheueh wahe mandum syedara lon, sampoe tuhan geuteuka teuma. ngeng kheueh pakriban ureueng meutani jipreh sampoe tanoh jih jipeuteubiet wase nyang meuhareuga keu jih. deungon saba jihnyan jipreh ujeuen tron bak watee museum luroh on kayee dan ujeuen watee meume meubungong. meunan cit bah kheueh gata beusaba dan beurayeuk ate, sabab uroe tuhan teuka ka rab lumpah na. bek kheueh tunu ate dan saleng peusalah sabe keudroe-droe, mangat gata hana geuhukom le po teu allah. ingat kheueh! hakem karab that, dan kakeumah geukeuneuk teuka. syedara-syedara, ingat kheueh ubak nabi-nabi nyang meututoe atueuh nan tuhan. awaknyan saba dan ek geuteun deurita. ngon lagee nyan, cok kheueh awaknyan sibagoe cuntoh. awaknyan teupeugah mubahgia sabab awaknyan tabah. gata ka tadeungoe keuhai nabi ayub nyang saba, dan gata tateupeue pakriban tuhan keuneulheueh jih geubri beureukat keu nabi ayub nyan. sabab tuhan keubiet get that gaseng sayang dan jroh ate. nyang phon-phon that, na kheueh: bek meusumpah, bah kheueh deumi langet, meunan cit deumi bumoe, atawa deumi peue mantong. peugah kheueh mantong lagee nyoe, "nyoe" meunyoee meukeusut gata nyoe, dan "han" meunyoee meukeusut gata han; mangat gata hana geupeurhot hukoman le po teu allah. meunyoee lamkawan gata na nyang teungoh apoh apah, bah kheueh jimeudoa. meunyoee na nyang geumbira, bah kheueh jimeulagu jipujoe allah. meunyoee na nyang saket, bah kheueh jihoi peumimpin-peumimpin jeumaah. dan bah kheueh mandum peumimpin nyan geumeudoa keu ureueng nyang saket nyan dan jisilik ngon minyeuk atueuh nan tuhan. meunyoee doa awaknyan jipeutrok ngon yaken, tuhan teuma geupeu puleh ureueng nyang saket nyan, dan teupeu amphon desya-desya nyang ka jipeubuet. sabab nyan, bah kheueh gata saleng ta angkee nyang salah dan saleng gata meudoa, mangat gata geupeu puleh. doa ureueng nyang jiseutot keuheundak allah, na kuasa nyang paleng rayeuk. ilyas saban lagee geutanyoe manusia. gobnyan meudoa deungon khusyuek mangat ujeuen bek jitoh, dan keubiet that ujeuen pih hana jitoh nyang treb jih na lhee thon siteungoh. oh ltheueh nyan gobnyan meudoa lom, laju langet jipeutron ujeuen akhe jih tanoh jipeuteubiet wase. wahe syedara lon banmandum! meunyoee lamkawan gata na sidroe nyang hana jitem seutot le keuheundak po teu allah, dan le ureueng laen laju ji peujeuet ureueng nyan jigisa ubak allah, ingat kheueh ubak ayat nyoe: ureueng nyang jipeu-

jeuet ureueng meudesya jigisa lom nibak jalan jih
nyang salah, ureueng nyan jipeuseulamat jiwa ure-
ueng meudesya nyan nibak mate dan jeuet keusabab
jai that desya geupeu amphon le po. horeumat kamoe,
yakobus

syedara-syedara nyang umat pilehan allah, nyang na bansaboh daerah pontus, galatia, kapadokia, asia dan bitinia! ulon, petrus, rasui isa almaseh, meuharab seumoga po teu allah geubri beureukat dan seujah-teura ateuah gata ngon meulimpah-limpah. gata teupileh jeuet keu umat allah nyang suisai ngon reuncana allah bapak. dan roh allah ka geupeujeuet gata keu umat nyang suci, khusus keu po teu allah, mangat gata taat ubak isa almaseh dan geupeu suci ngon darah gobnyan. jak kheueh geutanyoe talakee syukoe ubak po teu allah, bapak tuhan tanyoe isa almaseh! gobnyan that-that geugaseh keu geutanyoe, nyang kheueh sabab jih gobnyan geubri keugeutanyoe udeb nyang baro, deungon geupeu udeb lom teuma isa almaseh nibak mate. nyoe teubri keu geutanyoe harapan nyang kukoh. tanyoe meuharab that keutateume beureukat-beureukat nyang geukeubah le allah keu umat gobnyan, na kheueh beureukat-beureukat nyang geukeubah lam syeuruga, deungon lagee nyan hana hase rusak, atawa jeuet keu brok atawa cupa. banmandum nyan na kheueh keu gata, sabab gata meuman ubak po teu allah. ngon lagee nyan gata geujaga ngon kuasa allah mangat gata tateurimong seulammat nyang ka siyab teupeugah bak uroe pagee nyang teuma teuka. deungon na lagee nyan bah kheueh gata bumangat ate, bah pi jinoo lam watee nyang paneuk nyoe gata haroh seudeh le sabab gata tarasa meubagoe-bagoe cubaan. nyan sibagoe teu ujoe gata peu kheueh gata biet-biet meuman ubak tuhan atawa hana. meuh nyang hase rusak pi, teu ujoe ngon apui. deungon lagee nyan, iman gata na kheueh leubeh muyuem nibak meuh nyan, nyang kheueh sabab teu-ujoe cit mangat meutamah kong. deungon lagee nyan gata teuma teupujoe dan jihoreumat meunan cit teupeumanyang bak watee uroe isa almaseh geuteuka lom teuma. gata tagaseh, bahpi yoh masa ilee hana takalon. dan gata meuman ubak gobnyan bahpi jinoo hana gata kalon. nyang kheueh sabab jih gata meugeumbira, dan gata rasa sukacita nyang paleng agong dan hana jeuet teupeugah ngon babah. sabab tujuan iman gata trok, na kheueh keuseulammat jiwa gata. keuhai seulammat nyoe kheueh nyang teutilek dan teuseulidek le nabi-nabi, dan awaknyan geuramai keuhai beureukat nyang geubri le po teu allah keu gata. awaknyan jisulidek pakriban dan pajan hainyan teujadi, nyang teumeukeusut le roh almaseh nyang na lam tuboh awaknyan. nibak watee nyan, roh nyan teupeusabab bak awaknyan keuhai mubagoe deurit nyang meuseuti geuras le almaseh dan keuhai keuagongan gobnyan nyang teuka teuma oh ka kheueh nyan. ubak nabi-nabi nyan po teu allah geubri tee bahwa peue nyang awaknyan peubuet kon keu keupeuntengan awaknyan, teuma na kheueh keu gata; nyan kheueh hai-hai nyang jinoenyoe teungoh gata deungoe deungon nyata nibak ureueng-ureueng nyang ba haba get keuhai isa almaseh. awaknyan jipeusampoe hai-hai nyan keugata ngon kuasa roh allah nyang geukirem nibak lam syeuruga. dan malaikat-malaikat pih meuheuet that keuneuk geuteupeue haba nyang awaknyan peusampoe nyan. deungon sabab nyan, bah kheueh gata siab siaga. ate-ate kheueh dan meuharab kheueh sipeunoh jih ubak

beureukat nyang teuma teubri ubak gata bak watee isa almaseh teuka lom teuma. taat kheueh ubak po teu allah, dan bek kheueh udeb lagee kheun gata yoh masa ilee, bak watee gata gohlom meuturi ngon po teu allah. nyang sikeubiet jih, bah kheueh gata gleh lam hai peue mantong nyang gata peubuet, saban lagee po teu allah geutawok gata nyan gleh. lam alkitab na teutuleh, "bah kheueh gata gleh, sabab ulon nyoe gleh." gata tapeugah allah nyan bapak bak watee gata meudoo ubak gobnyan. ngon lagee nyan, allah nyan kheueh nyang jeuet keuhakem manusia nyang suisai ngon buet nyang jipeubuet maseng-maseng hana geupileh bulee. sabab nyan, simantong gata na ateuah rhueng donya nyoe, bah kheueh gata tapeuagong po teu allah lam udeb gata. gata teupeu peue nyang ka geubayeue keuteupeubeubaih gata nibak udeb nyang hana meuguna nyang ka jipeutreu le indatu gata. meunayeue nyan kon kheueh sapeue-sapeue barang nyang hase rusak lagee pirak ngon meuh, teuma sesuatu nyang paleng meuyuem; na kheueh tuboh almaseh keudroe, nyang jeuet sibagoe bubiri nyang teukeureubeuen ubak allah ngon hana cacat dan cupa. almaseh geupileh le po teu allah sigohlom donya nyoe teucebta. dan nibak uroe-uroe karab akhe jamen nyoe, gobnyan teuka lam donya mangat gata teupeuseulammat. rot gobnyan kheueh gata meuman ubak allah nyang ka geupeu udeb lom teuma nibak mate dan teupeuagong gobnyan. ngon lagee nyan, allah kheueh nyang gata iman dan ubak allah teuma kheueh gata keubah harapan. sabab gata taat ubak ajaran nyang teuka nibak allah, deungon lagee nyan gata ka tapeugleh droe dan tagaseh teuma ureueng-ureueng nyang saboh iman ngon cara ikhlaih. ngon sabab nyan, bah kheueh gata saleng tameugaseh sidroe ngon nyang laen deungon sipeunoh ate. 23 sabab meulalu feureuman allah nyang udeb dan abadi nyan, gata ka teupeujeuet sibagoe manusia baro nyang kon lahe nibak manusia, teuma nibak bapak nyang abadi. lam alkitab na teutuleh lagee nyoe, "banmandum umat manusia lagee naleueng, dan banmandum keubeusaran jihnyan lagee bungong naleueng. naleueng layee, bungong jih pih luroh; teuma feureuman tuhan teutab na siumu masa." feureuman nyan haba get nyang ka teupeusampoe ubak gata. sabab nyan, boih kheueh nyang na bak gata mandum nyang jeuet; bek le meututoe ngon haba nyang sulet, dan bek teuma galak meupura-pura. bek bingiek ate, dan bek tahina ureueng laen. bah kheueh gata jeuet lagee aneuk manyak nyang ban lahe, sabe glaih keu ie mom nyang murni. deungon lagee nyan gata teuma timoh dan teupeuseulammat. lam alkitab na teutuleh lagee nyoe, "gata ka tarasa keudroe padub na jroh jih tuhan." sabab nyan, teuka kheueh ubak tuhan. gobnyan lagee batee nyang udeb, batee nyang ka jitiiek le manusia sabab jianggab hana meuguna; teuma nyang geupileh le po teu allah sibagoe batee nyang meuhareuga. gata lagee batee-batee nyang udeb. sabab nyan bah kheueh gata tatem teupeuguna keuteupeuget baet allah nyang rohani. deungon lagee nyan gata ka jeuet keu imeum-imeum, nyang udeb khusus keu po teu allah. dan nyang meulalu isa almaseh teupeuseumah ubak allah, keureubeuen ro-

hani nyang geuteurimong bak ateu allah. sabab lam alkitab na teuteuleh lagee nyoe, "ulon ka kupileh saboh batee nyang meuyuem, nyang lon keubah di sion sibagoe batee paleng phon; dan ureueng nyang meuman ubak gobnyan hana geubri keucewa." batee nyan biet that meuyuem keu gata nyang meuman. teuma keu ureueng nyang hana meuman, keunong kheueh ayat-ayat alkitab nyang lagee nyoe. "batee nyang hana jipeuguna le utoh-utoh bangunan nyan rupaji ka jeuet keu batee nyang paleng phon," dan "nyang kheueh batee nyang teupeusabab manusia hase meugantoh, batee jeuet keusabab awaknyan rhot." awaknyan meugantoh sabab awaknyan hana jimeuman ubak feureuman allah. meunan kheueh nyan ka geupeuteuntee le allah keuhai awaknyan. teuma gata na kheueh bansa nyang teupileh, imeum-imeum nyang peutimang raja, bansa nyang suci, khusus keu allah, umat po teu allah keudroe. allah geupileh gata dan geutawok gata beutateubiet nibak seupot keu gata tamong u dalam trang gobnyan nyang pengeh, deungon meukeusut mangat gata peutabu haba keuhai buet-buet nyang luwabiasa. yoh masa ilee gata kon umat allah, teuma jinoenyoe gata na kheueh umat allah. yoh masa ilee gata hana geugaseh po teu allah, teuma jinoenyoe gata ka tateurimong gaseh sayang gobnyan. syedara-syedara nyang teucinta! gata na kheueh ureueng aseng dan meranto lam donya nyoe. sabab nyan ulon meulakee ngon meuharab that ubak gata mangat gata bek taturot hawa nafesus manusia nyang sabe jimuprang jilawan jiwa. pi-e gata lamkawan ureueng nyang hana meu tuhan biet beuget that, deungon lagee nyan meunyoe awaknyan jifiteunah gata sibagoe ureueng jieuhet, awaknyan teutab jiaku meuneubuet gata nyang jroh, deungon lagee nyan awaknyan jipujoe allah nibak uroe gobnyan geuteuka. deumi tuhan, bah kheueh gata tundok ubak tieb-tieb ureueng peunguasa manusia: meunan cit ubak kaisar nyang jeuet keu peunguasa nyang phon, meunan cit ubak gubunur nyang geutunyok le kaisar keuteuhukom ureueng nyang peubuet jieuhet dan keu teuhoreumat ureueng nyang peubuet get. sabab, po teu allah geutem deungon buet-buet gata nyang get gata ka tasumpai babah ureueng nyang meututoe bangai. bah kheueh gata udeb sibagoe ureueng nyang meurdehka, teuma bek kheueh gata peuguna keumeurdehkaan gata nyan keu gata tob nyang jieuhet, teuma udeb kheueh sibagoe hamba allah. hareuga kheueh mandum manusia, gata gaseh kheueh mandum syedara gata nyang sabe ureueng kristen. takot kheueh ubak allah, dan horeumat kheueh kaisar. syedara-syedara nyang jeuet keupeulayan, tundok kheueh ubak toke gata deungon peunoh horeumat; kon bak awaknyan nyang get ate ngon ramah mantong, teuma meunan cit ubak ureueng nyang keujam. po teu allah teuma geubri beureukat ubak gata, meunyoe gata sadar ateuh keuheundak allah, saba ateuh jipeusaneut gata ngon hana ade. sabab peu kheueh istimewa jih meunyoe gata saba tapeuteun hukoman nyang sibeuna jih gata tanggong sabab le salah? teuma meunyoe gata deungon saba tatanggong deurita nyang keunong ateuh gata sabab le buet nyang beutoi, teuma allah geubri beureukat ateuh gata. keu nyan kheueh

po teu allah geutawok gata. sabab almaseh keudroe ka meudeurita keu gata, dan deungon nyan gobnyan ka geubri keugata saboh teuladan, mangat gata tasautot langkah gobnyan. gobnyan hantom na geupeubuet desya, dan hantom na meusidroe pih nyang deungoe gobnyan meusulet. 23 bak watee gobnyan jiteunak sihabeh-habeh jih, gobnyan hana geualaih deungon haba teumeunak. bak watee gobnyan rhot lam deurita, gobnyan hana geuancam; gobnyan teuma geuseurah hai geuh nyan ubak po teu allah, hakem nyang ade nyan. almaseh keudroe geuseun bubena desya-desya geutanyoe ateuh droe gobnyan watee gobnyan bak kayee saleb, mangat tanyoe beubaih nibak kuasa desya, dan udeb meunurot lagee nyang geulakee le allah. deungon luka-luka almaseh kheueh nyang peupuleh gata. yoh masa ilee gata lagee bubiri nyang sisat, teuma jinoenyoe gata ka teuba lom teuma keuteuseutot tukang rabe dan nyang peulara jiwa gata. meunan cit ngon gata, hei purumoh-purumoh, haroh tundok ubak lakoe sabab meunyoe lamkawan awaknyan na nyang hana meuman ubak feureuman nibak allah, pi-e gata nyan jeuet teuba awaknyan keu jimeuman. dan hana peureulee gata peugah sapeue bak awaknyan, sabab awaknyan nyang jingiang na kheueh pi-e gata nyang gleh dan saleh. bek kheueh ceudah gata nyan teuma na diluwa mantong, lagee miseu jih teuhias ok atawa gata ngui mubagoe hiasan, atawa gata ngui peukayan nyang meuhai-meuhai. nyang biet jih, bah kheueh keuceudah gata nyan teuka lam baten, budho basa nyang leumoh leumbot dan teunang; nyan kheueh ceudah nyang abadi nyang paleng muyuem nibak mata allah. ngon cara nyoe kheueh yoh jamen ilee ureueng-ureueng inong nyang meuagama nyang meuharab ubak po teu allah jipeulagak droe deungon tundok ubak lakoe awaknyan. meunan cit deungon sara, geuhnyan taat ubak lakoe geuh nabi ibrahim dan jihoi gobnyan teungku. gata jinoenyoe na kheueh aneuek-aneuek sara, meunyoe gata peubuet hai-hai nyang jroh dan hana teumakot bak peu mantong. dan meunan cit gata, hei teungku-teungku lakoe, bah kheueh gata udeb ngon peunoh peungeurtian ateuh purumoh gata, dan ngon sadar bahwa awaknyan na kheueh kawom nyang leumoh. peusaneut kheueh awaknyan deungon horeumat, sabab awaknyan meusajan-sajan ngon gata, teuma jiteurimong anugeurah udeb nyang seujati nibak allah. peubuet kheueh nyoe, mangat hana nyang ampeung doa gata. keusimpulan jih na kheueh: bah kheueh syedara mandum sapeue kheun dan saboh peurasaan. bah kheueh gata saleng tameugaseh lagee ureueng-ureueng nyang meusyedara. dan bah kheueh gata saleng na weueh meuweueh lom beuna sikeub miyueb ate. bek kheueh tabalaiah buet nyang jieuhet ngon nyang jieuhet, atawa meurapa ngon seurapa; nyang sikeubiet jih, balaih kheueh deungon cara teulakee beureukat bak allah. sabab allah geutawok gata na kheueh mangat tateurimong beureukat nibak gobnyan. lam alkitab na teuteuleh lagee nyoe, "ureueng nyang jitem teurimong nekmamat lam udeb dan jitem teurimong uroe-uroe nyang jroh, bah kheueh jijaga babah jih mangat bek meututoe hai-hai nyang jieuhet dan hana jipeugah hai-hai nyang sulet. ureueng nyan beujipeujioh nyang jieuhet

dan jipeubuet nyang get; bah kheueh jimeujuang biet-biet beujiteume dame. sabab tuhan sabe geungeng bak ureueng-ureueng nyang jiturot keuheundak gobnyan, dan tuhan sabe geudeungoe doadoa awaknyan; teuma tuhan geulawan keu ureueng-ureueng nyang peubuet nyang jeuhet." soe kheueh nyang keuneuk peubuet jeuhet ateuheh gata, meun-yoe gata galak tapeubuet nyang get? teuma bahpi gata tateurimong deurita sabab gata peubuet hai-hai nyang get, gata meulaba! bek kheueh teumakot bak soe mantong dan bek khawate. teuma lam ate gata, bah kheueh gata tabri ubak almaseh horeumat nyang khusus nyang sisuai ngon keududukan geuh sibagoen tuhan. dan bah kheueh gata beusabe siab tabri jeunaweueh keu tieb-tieb ureueng nyang jitanjong keuhai harapan nyang na nibak gata. teuma peubuet kheueh nyan ngon leumoh leumbot dan horeumat. dan bah kheueh ate nurani gata gleh, dan meun-yoe gata jifiteunah sabab gata udeb deungon jroh sibagoen murit almaseh, ureueng-ureueng nyang ba fiteunah nyan teuma jiteuka malee keudroe. leubeu get meudeurita sabab tapeubuet nyang get – meun-yoe nyan na kheueh keuheundak po teu allah – nibak meudeurita sabab tapeubuet nyang jeuhet. sabab almaseh keudroe mate cit sigoe sagai, keu siumu masa sabab le desya manusia – sidroe ureueng nyang hana meusalah, meuninggai donya keu ureueng nyang na salah. almaseh geupeubuet lagee nyan mangat gobnyan hase geuba gata ubak po teu allah. gobnyan jipoh mate seucara tuboh, teuma teupeu udeb lom seucara rohani. lam keuadaan roh gobnyan geujak keugeupeusampoe feureuman nibak allah ubak roh-roh nyang na lam glab: na kheueh roh-roh ureueng nyang hana taat ubak po teu allah bak watee jamen nabi noh. bak watee nyan allah geuprehh ngon saba watee nabi noh geupeuget kapai gobnyan. teuma ureueng-ureueng nyang na lam kapai nyan mantong – banmandum na lapan droe – nyang geupeu seulam sabab le ie beuna nyang rayeuk that nyan. ngon lagee nyan, keujadian nyang lagee nyan na kheueh saboh kiyaih nibak pumano nyang na jinoenyoe teupeuseulamat gata. pumano nyoe na kheueh kon sibagoen upacara teupeugleh tuboh nibak mandum kalang nyang kutoe-kutoe, teuma na kheueh sibagoen janji gata ubak allah nibak ate nurani nyang jroh. pumano nyan teupeuseulamat gata sabab isa almaseh ka udeb lom teuma nibak gobnyan nyang ka meuninggai, dan ka geutamong lam syeuruga. jinoenyoe gobnyan meukuasa meusajan ngon po teu allah dan geupeurintah banmandum malaikat, banmandum nyang mat kuasa dan banmandum teunaga. sabab almaseh ka meudeurita seucara jasmani, gata haroh tapeukong droe deungon ate nyang kukoh ubak nyang nyan. sabab ureueng nyang meudeurita seucara tuboh, ureueng nyan hana le meudesya. sabab nyan, bah kheueh gata udeb sabe nyang lagee nyan bagoe lam donya nyoe lagee keuheundak allah, dan kon lagee keuheundak manusia. yoh masa ilee, gata ka treb that tapeubuet peue nyang ka jipeubuet le ureueng-ureueng nyang hana jituri tuhan. udeb gata hana get. nyang gata seutot hawa nafeusum, mabok-mabok dan laloe bak meu-en, jieb ie kreuheh dan seumah beurala nyang biet-biet luwat lagoena. jinoenyoe ure-

ueng nyang hana jituri tuhan, hireuen that bahwa gata hana taudeb lagee awaknyan, jipeubuet desya ngon hana bataih. nyang kheueh sabab jih awaknyan jihina gata. teuma awaknyan singoh haroh jipeutanggong jaweueb mandum nyan dikeue po teu allah nyang ka siab keugeupeusidang ureueng nyang udeb dan nyang ka mate. nyang kheueh sabab jih haba get ka teuma teupeutrok ubak ureueng nyang ka meuninggai donya. meukeusut jih mangat awaknyan, nyang ka teupeusidang seucara badan – lagee hai jih banmandum ureueng teuma teupeusidang – hase udeb seucara rohani, meunurot keuheundak allah. peue-peue mantong karab that ubak akhe, sabab nyan bah kheueh gata takuasa droe dan teutab waspada, mangat gata hase ta meudoa. leubeu nibak peue-peue nyang na, bah kheueh gata beubiet-biet beutagaseh sidroe ngon nyang laen, sabab deungon na sabe tameugaseh sidroe ngon nyang laen nyan gata pi kasiab cit teuma keu saleng tapeuamphon. bah kheueh gata saleng tateurimong sidroe ngon nyang laen lam rumoh gata, ngon hana tunu ate. gata maseng-maseng ka tateurimong meuneubri nyang meulaen-laen nibak allah. sabab nyan sibagoen ureueng nyang peusaneut nyang get nibak peue-peue nyang ka geubri le allah, bah kheueh gata peuguna keumampuan nyan deumi keupeuntengan meusajan. ureueng nyang peutrok haba, bah kheueh jipeutrok haba nibak allah; ureueng nyang peutimang ureueng laen, bah kheueh jipeutimang ngon teunaga nibak allah, mangat lam hai peue mantong, po teu allah jeuet teupeuguna meulau isa almaseh. gobnyan kheueh nyang meukuasa dan patot teupeugong siumu masa. amin. syedara-syedara nyang lon cinta! gata jinoenyoe that that meudeurita sabab teungoh teujoe. teuma bek kheueh meurasa hireuen, siulahulah na sipeue-peue nyang luwabiasa keunong ateuheh gata. teuma, bah kheueh gata meurasa mangat sabab meusigoe meudeurita meusajan-sajan ngon almaseh. teuma singoh watee keuangong almaseh teupeuleumah, gata teuma meusukacita. gata meuntong meun-yoe gata jihina sabab gata murit almaseh. nyan meumakna roh nyang mulia, na kheueh roh allah, na nibak gata. bek kheueh meusidroe pih nyang na lamkawan gata meudeurita sabab jihnyan jipoh mate gob, atawa tukang ceumeucue, atawa jeuhet, meunan sabab jihnyan jipeuroh droe nibak urosan ureueng laen. teuma meun-yoe gata meudeurita sabab le gata ureueng kristen, bek kheueh malee sabab le hai nyan. lakee kheueh teurimong gaseh ubak po teu allah, bahwa gata taba na almaseh. ka trok watee jih allah geuhakem donya nyoe. dan umat allah keudroe nyang phon-phon that geupeu sidang. ngon lagee nyan, meun-yoe allah geupeu phon ateuheh geutanyoe, pakriban teuma jeuet jih singoh ateuheh ureueng-ureueng nyang hana jipateh ubak haba get nyang teuka nibak allah nyan? lam alkitab na teutuleh lagee nyoe, "meun-yoe ureueng nyang jroh-jroh pi ka payah teupeuseulamat, peue teuma nyang keunong ateuheh ureueng-ureueng nyang meudesya nyang hana jituri tuhan!" sabab nyan, meun-yoe na ureueng-ureueng nyang meudeurita sabab le allah geukeuheundak nyang lagee nyan, bah kheueh ureueng-ureueng nyan udeb ngon beutoi dan jipeu-

caya droe ubak peuncebta awaknyan. gobnyan sabe geupeu teupat janji gobnyan. ulon lakee beujipeurati that le peumimpén jeumaah gata. ulon teumuleh nyoe sibagoe rakan peumimpén dan sibagoe ureueng nyang ka lheureh lon ngieng keudroe deurita almaseh, dan nyang meusajan cit teuma jipeuagong, meunyoé keuagongan almaseh teupeuleumah bak manusia. ulon meulakee ngon meuharab that mangat gata rabe kawan bubiri nyang ka geuseurah le allah ubak gata. rabe kheureh awaknyan ngon ate nyang mangat lagee nyang geuharok le allah keudroe, dan bek kheureh ngon ate nyang brat. bek teuma gata peubuet meuneubuet gata nyan ngon meuharab laba, teuma sabab le gata biet-biet keuneuk gata peutimang. bek teuma tameubuet lagee sidroe ureueng mat kuasa ateuh awaknyan nyang teupeucaya ubak gata, teuma beujeuet kheureh cuntoh nyang jroh nibak awaknyan. dan bak watee tukang meurabe agong nyan teuka teuma, gata teuma tateurimong mahkota nyang paleng hibat, nyang hantom layee cahya jih. meunan cit teuma deungon gata, nyang ureueng muda. tundok kheureh ubak ureueng tuha. gata banmandum haroh tapeumiyueb droe sabe peutimang deungon ate nyang miyueb. sabab lam alkitab na teutuleh lagee nyoe, "po teu allah geulawan ureueng nyang sombong, teuma geugaseh keu ureueng nyang miyueb ate." sabab nyan, peumiyueb kheureh droe gata dimiyueb jaroe allah nyang teuga, ngon lagee nyan gobnyan geupeumanyang gata watee katrok watee. seurah kheureh banmandum nyang gata khawate nyan ubak allah, sabab gobnyan geungieng gata. bah kheureh gata waspada dan lam siab sabe! sabab iblih na kheureh musoh gata. jihnyan lagee singa jijak keudeh keunoe sira jitaum jimita eumpeuen. lawan kheureh jihnyan ngon iman nyang kong, sabab gata tateupeue bahwa syedara-syedara sabe ureueng kristen nyang laen bansigom donya saban cit meudeurita lagee gata. teuma oh ka lheureh gata meudeurita sikeujab, allah keudroe teuma geupeujeuet gata sampoeureuna. gobnyan teuma geupeudong dan geupeukong gata. sabab gobnyan na kheureh allah nyang jroh ate, nyang ka geutawok gata keutarasa meusajan keuagongan gobnyan nyang abadi meulalu almaseh. gobnyan kheureh nyang meukuasa siumu masa! amin. surat ulon nyang paneuk nyoe lon tuleh keugata deungon jitulong le silas, nyang lon anggab sidroe syedara kristen nyang seutia. ulon meuheuet keuneuk bri durongan bak gata dan lon peuyaken gata bahwa peue nyang lon tuleh nyoe haba nyang sampoeureuna keuhai rakhmat allah. bah kheureh gata tamumat nyang kong nibak rakhmat nyan. rakan-rakan saboh jeumaah di babilon, nyang ka geupileh cit le po teu allah, geukirem saleuem ubak gata; meunan cit teuma ngon aneuek ulon markus nyang lon cinta. meu-meuah meuah desya kheureh sidroe ngon nyang laen deungon peunoh gaseh sibagoe syedara lam kristen. seumoga tuhan geubri seujahteura ateuh gata mandum nyang ka jeuet keu milek almaseh. horeumat kamoe, petrus

syedara-syedara nyang biet-biet meuiman lagee kamoe meuiman! isa almaseh, na kheueh allah dan raja peuseulamat geutanyoe, biet mungken tanyoe meuiman bak gobnyan, sabab gobnyan geupeubuet nyang beutoi. surat nyoe nibak simon petrus, sidroe namiet dan rasui isa almaseh. seumoga alah geubri beureukat dan seujahtra ateuh gata deungon meulimpah-limpah, sabab gata taturi allah dan isa, tuhan tanyoe. po teu allah ka geupeu guna kuasa ilahi gobnyan keu geubri keugeutanyoe peue-peue mantong nyang peureulee keu tameuiebadat. gobnyan geupeubuet nyoe meulalu peue nyang tanyoe teupeu keuhai isa almaseh, nyang ka geutawok tanyoe keu tarasa keurayeuk gobnyan dan keu get gobnyan. deungon cara nyan kheueh allah geuanugeurah keugeutanyoe beureukat-beureukat nyang lumpah jai dan meuhareuga nyan ka geupeu janji. deungon na beureukat-beureukat nyan gata hase leupah nibak nafeusu-nafeusu jeuhet nyang jipeurusak donya nyoe, dan gata tateurimong sifeuet ilahi. le nyan, useuha kheueh beu biet-biet mangat gata teutab peucaya ubak almaseh dan peucaya gata nyan jitumpang teuma le udeb nyang jroh. disampeng udeb nyang jroh, gata peureulee that beujeuet keu ureueng nyang meuleuleum, dan disampeng ieleum, gata pih meuseuti hase takuasa droe. meunan cit seulaen hase takuasa droe beuhase teuma tabina droe jeuet keu tabah gata meuhadab ngon peue mantong. disampeng tabah meuhadab peue mantong, gata pih haroh udeb meunurot lagee nyang geulakee le po teu allah. dan udeb lagee nyang geulakee le allah beuna teuma gaseh ngon sayang ubak syedara-syedara gata nyang seuman. meunan cit bah kheueh teuma gaseh sayang gata ubak syedara-syedara nyang saboh iman teutamah teuma gaseh sayang ubak mandum manusia. banmandum nyan na kheueh sifeuet-sifeuet nyang gata peureulee. meunyoe mandum sifeuet nyan na nibak gata ngon meulimpah-limpah, gata teuma jeuet keu ureueng nyang jumot dan meuhase lam buet, dan taturi isa almaseh tuhan geutanyoe deungon leubeh get lom teuma. teuma ureueng nyang hana sifeuet-sifeuet nyang lagee nyan, pandangan ureueng nyan picek; ureueng nyan hana hase jikalon dan desya-desya jih nyang awai ka teupeugleh. sabab nyan, syedara-syedara, meu-useuha kheueh leubeh brat lom mangat panggelan allah dan geupileh le gobnyan ateuh droe gata nyan meutamah-tamah teuga. meunyoe gata tapeubuet nyan, gata hana mur-tad. deungon na lagee nyan keugata teuma geubri hak nyang peunoh keu gata tamong lam keurajeuen nyang keukai nibak tuhan dan raja peuseulamat geutanyoe isa almaseh. sabab nyan, ulon sabe lon peuingat gata keuhai nyan, bah pi gata ka tateupeue dan gata meuiman ubak ajaran nyang teuka nibak allah nyang ka gata teurimong nyan. simantong ulon nyoe lam udeb, ulon meurasa wajib lon peuingat ubak gata lam hai-hai nyan. sabab ulon kuteupeu bahwa hana treb le ulon teuma kutinggai donya nyoe, sabab tuhan geutanyoe isa almaseh ka geubri tee ngon nyata that ubak ulon. deungon lagee nyan ulon teuma ku-useuha bahwa watee ka meuninggai pih, gata sabe taingat lom teuma hai-hai nyoe. watee kamoe peugah ubak gata padub na agong jih oh teuka tuhan

geutanyoe isa almaseh, kamoe hana meugantung nibak haba-haba dongeng nyang hana beutoi nyang jipeugah le manusia. keuangongan almaseh nyan ka lheueh kamoe ngieng ngon mata ulee kamoe keudroe. kamoe na nibak teumpat nyan watee gobnyan geupeu agong dan geuhoreumat le allah bapak. bak watee nyan teudeungoe su nibak nyang mahamulia, nyang peugah ubak gobnyan, "nyoe kheueh aneuek ulon nyang ulon gaseh. gobnyan that jipeumangat ate lon!" kamoe keudroe na meudeungoe su nyan nyang teuka nibak syeuruga watee kamoe na meusajan ngon gobnyan ateuh gunong nyang suci nyan. nyang kheueh sabab jih kamoe leubeh yaken lom peue nyang geupeusan le allah nyang ka geupeutrok le dumna nabi-nabi. nyang siget jih gata ngieng peusan nyan, sabab peusan nyan lagee panyot nyang hu bak teumpat nyang seupot trok an mata uroe jituebiet, dan cahya bintang timu hu meucahya lam ate gata. nyang phon that bah kheueh gata ingat nyoe: peusan allah nyang geupeusampoe le dumna nabi-nabi hana jeuet tatafeuse meunurot peundapat droe teuh keudroe. sabab, hantom na peusan allah nyan ateuh keuheundak manusia. teuma roh allah geukuasa manusia keuteupeusampoe peusan nibak allah nyan keudroe. bak jamen ilee lamkawan umat allah ka teuka nabi-nabi peuleusu. meunan cit teuma lamkawan gata teuma teuka guree-guree peuleusu. awaknyan kana jipeutamong ajaran-ajaran nyang hana beutoi, nyang rhot ubak binasa manusia. dan awaknyan ji-iengkeue ubak peunguasa nyang ka peubeubaih awaknyan. ngon lagee nyan awaknyan jipeuteuka keubinasan ateuh droe keudroe, dan nyang teuma rhot ateuh awaknyan deungon sigra. bah pi meunan, jai that ureueng jiseutot peue nyang jipurunoe le guree-guree peuleusu nyan nyang ka jikuasa le hawa nafeusu awaknyan keudroe. dan le buet guree-guree peuleusu nyan teuma jipeuteuka leubeh jai lom ureueng nyang hina jalan nyang beutoi nyang teutuju ubak po teu allah. sabab awaknyan leuha that, le guree-guree peuleusu nyan laju jicalitra haba-haba nyang jisuson keudroe keujiteume laba nibak gata. teuma mahkamah nyang peurhot hukoman ateuh awaknyan ka treb that teupeusiab, dan binasa nyang ka teupeuteuntee keu awaknyan teungoh jipreh-preh awaknyan. malaikat-malaikat nyang meudesya pih hana geupeubiyeu le allah leupah nibak hukoman, teuma teutab geuboih lam nuraka. awaknyan teupeutamong lam guha nyang seupot keuteuteun nibak teumpat nyan trok bak uroe peungadalan. meunan cit ngon donya bak jamen ilee, allah hana geupeubiyeu lheueh nibak hukoman. allah laju geukirem ie beuna nyang rayeuk that lam donya ureueng jeuhet bak watee nyan. teuma nabi noh meusajan ngon tujoh droe nyang laen nyang seulam, sabab nabi noh geupeu maklum haba keuhai udeb nyang paih bak ate allah. saban cit hai jih ngon banda sodom ngon gomora: po teu allah geupeuhanco banmandum banda-banda nyan ngon apui mangat jeuet keucuntot keuhai peue nyang teuma teujadi ngon ureueng-ureueng nyang jeuhet. teuma nabi lot teupeuseulam, sabab geuhnyan geuturot peue kheun allah; gobnyan that-that meudeurita sabab peurangoe nyang jeuhet nibak ureueng-ureueng nyang

beujat. lamkawan ureueng-ureueng nyang lagee nyan, nabi lot nyang get udeb ngon baten nyang teuseksa, sabab tieb-tieb uroe gobnyan geukalon dan geudeungoe buet-buet awaknyan nyang jeuhet. teuma, tuhan geuteupeue pakriban cara teupeuseumat ureueng-ureueng nyang turot peurintah gobnyan watee awaknyan meuteume cubaan. dan tuhan pih geuteupeue pakriban teukeubah ureueng-ureueng jeuhet keu geuseksa bak uroe peungadelan, khusus jih keu ureueng-ureueng nyang jiturot hawa nafeusu awaknyan nyang kutoe dan nyang hina keukuasaan allah. meunan jijeuet dan sombong jih guree-guree peuleusu nyan sampoe awaknyan hana teumakot mubacut pi jihina dumna mahkluk mulia lam syeuruga! seudangkan malaikat-malaikat nyang jioh leubeh teuga dan meukuasa nibak guree-guree peuleusu nyan, hana jitudoh dumna mahkluk nyang mulia nyan ngon tutoe nyang hina dikeue tuhan. teuma le guree-guree nyan, luwabi-asa! awaknyan lagee beulatang nyang lahe keu teudrob dan teupoh mate. awaknyan hana jipike, teuma jimubuet meunurot kheun ate jih mantong, sampoe jiheuntam hai-hai nyang hana jiteupeue ngon tutoe haba meuhina. sabab nyan le buet-buet awaknyan keudroe, awaknyan teuma mate lagee beulatang-beulatang nyang juwah. sibagoe hukuman ateuhe deurita nyang ka jipeusabab le awaknyan, awaknyan teuma meudeurita ngon seungsara nyang peudeh. nibak awaknyan, hai nyang mangat ate na kheueh jipeubuet peue mantong oh watee uroe guna jipeupuih hasrat tuboh jih keudroe. meun-yoe awaknyan jiduek meusajan-sajan ngon gata bak teumpat khanuri, sikeub awaknyan biet luwat that sabab awaknyan laloe mabok ngon hawa nafeusu. awaknyan puih han puih jipeubuet desya, dan nyang jigalak na kheueh jikalon inong jeuhet. dan ureueng nyang ban meuman lom kureueng yaken, laju jipakat blaih jih. ate awaknyan ka lazem ngon leuha. awaknyan na kheueh ureueng-ureueng nyang teukutok! sabab awaknyan hana jitem turot jalan nyang beutoi, akhe jih awaknyan sisat. awaknyan jicok rot nyang jijak le bileam aneuek beor yoh masa ilee. bileam nyoe meuheuet that keuneuk meuteume peng nibak buet jih nyang jeuhet. teuma jihnyan keunong peuingat nyang brat ateuhe buet jih nyang jeuhet nyan, watee keuleudee jihnyan jimarit ngon su manusia. teuma nabi nyan jipaksa beujipioh buet nyang pungoe nyan. guree-guree peuleusu nyan na kheueh lagee ie nyang tho dan lagee sagob nyang jipot le angen badee. allah ka geukeubah keu awaknyan saboh teumpat nyang seupot buta. awaknyan jipeugah haba keudeuh keunoeng nyang hana-hana soh tanna meuasoe; nafeusu cabui jipeuguna le awaknyan keujipeusisat ureueng-ureueng nyang banmantong ltheueh nibak lingkungan ureueng nyang udeb sisat. guree-guree peuleusu nyan jipeujanji meurdehka ubak ureueng-ureueng nyan, seudangkan awaknyan keudroe jipeubudak le keubiasaan-keubiasaan nyang jipeurusak manusia. sabab meunoye ureueng jipeutaloe le sapeue-sapeue, deungon nyan ureueng nyan ka jeuet keu namiet keu ureueng nyang peutaloe nyan. ureueng nyang turi tuhan dan peuseulamat banyoe isa al-

maseh ka beubaih nibak kuasa-kuasa donya nyang peubrok manusia. teuma meunoye oh ltheueh nyan jihnyan teutaron lom akhe jih jipeutaloe le kuasa-kuasa nyan, keuadaan ureueng nyan akhe jih leubeh brok nibak yangka-ka. leubeh get ureueng-ureueng nyang lagee nyan hantom na jituri rot nyang beutoi nibak allah, nibak jituri le awaknyan, teuma oh ltheueh nyan hana jitem seutot peurintah-peurintah nyang geubri le allah ubak awaknyan. peue nyang awaknyan peubuet jeuet keubukeuti pribasa nyang teupeugah lagee nyoe, "asee jipajoh lom peue nyang ka jiulee nyan" dan "bui nyang ka teupeumano, teuma jiriwang lom meubalek-balek lam luhob." syedarsyedara nyang lon cinta! nyoe kheueh surat lon nyang keudua lon tuleh keu gata. lam bandua surat nyoe, ulon meu-useuha lon peubeudoh pikeran-pikeran nyang gleh keu gata. ulon peuingat mangat gata taingat peue-peue nyang ka geupeugah le nabi-nabi allah yoh masa ilee, dan keuhai peurintah nibak tuhan, raja peuseulamat, nyang teupeutrok ubak gata meulalu rasui-rasui. phon-phon that, gata haroh tateupeue bahwa nibak uroe-uroe akhe, teuma teuka ureueng-ureueng nyang udeb jih jikuasa le hawa nafeusu awaknyan keudroe. awaknyan jihina gata deungon haba lagee nyoe, "jipeugah tuhan meujanji keuneuk teuka! jinoo pat geuhnyan? bapak-bapak indatu tanyoe ka meuninggai donya, teuma peuepeue mantong teutab saban lagee yoh phon alam nyoe teucebta!" awaknyan ngon jisaja hana jitem pateh bahwa yoh masa ilee allah geucebta langet ngon bumoe ngon feureuman gobnyan. bumoe geupeujeuet nibak ie, dan ngon ie; dan ngon ie teuma – na kheueh ie nibak ie beuna – donya phon that nyan geupeuhanco. teuma langet ngon bumoe nyang na jinoenyoe, geupeulara le feureuman allah nyan cit teuma guna keugeupeuhanco ngon apui oh trok bak watee teuma. jinoenyoe langet ngon bumoe mantong geupeulara trok ubak uroe ureueng-ureueng nyang jeuhet teuhukom dan teupeubinas. teuma syedarsyedara lon, sapeue hainyoe nyang bek gata tuwoe; bahwa nibak pandangan tuhan, siuroe hana bade jih ngon siribee thon – bandua nyan saban mantong nibak gobnyan. tuhan hana mulet geubri peue nyang ka geupeu janji bah pih na nyang sangka lagee nyan. nyang sikeubiet jih, gobnyan saba nibak gata, sabab gobnyan hana geutem meusidroe pih binasa. gobnyan meuharab mangat banmandum ureueng meutobat nibak desya-desya jih. teuma uroe teuka tuhan nyan na jih lagee pancuri. nibak uroe nyan, langet teuma leunyab ngon su meugum-gum, dan bubena beunda dilanget teuma habeh tutong, dan bumoe ngon peue nyang na ateuhe nyan teuma gadoh. sabab banmandum nyan geupeu hanco ngon cara nyang lagee nyan bagoe, pakriban kheueh nyang sibeuna jih gata udeb? gata meuseuti udeb suci dan khusus keu allah, simantong gata preh dan tameucen keu uroe allah. nibak uroe nyan langet teuma habeh tutong, dan sabab le seu-eum jih nyan, banmandum beunda-beunda nyang na di langet teuma meulileh. teuma geutanyoe tapreh peue nyang ka geupeu janji le allah, na kheueh langet nyang baro dan bumoe nyang baro teuma, nibak teumpat nyan meuteume keudadelan. sabab nyan, syedara-syedara nyang lon gaseh, te-

ungoh jinoenyoe gata preh uroe nyan, meu-useuha
kheueh beubiet-biet keu udeb suci dan hana meu-
cupa dikeue po teu allah. dan peulara kheueh hubon-
gan nyang jroh ngon allah. anggab kheueh tuhan
nyang saba nyan sibagoe watee nyang geubri keugata
mangat gata hase seulamat. paulus, syedara tanyoe
nyang tagaseh, ka geutuleh nyang lagee nyan keu
gata. gobnyan geutuleh nyan ngon peunoh keubijak-
sanaan nyang geubri le allah keu geuh nyan. lam ban-
mandum asoe surat gobnyan, paulus sabe geutuleh
keuhai nyan. beutoi na meupadub boh hai nyang
payah that tamuphom lam surat geuh nyan. dan
bagian nyan jiputa balek le ureueng-ureueng nyang
hana jiteupeue sapeue dan le ureueng-ureueng nyang
hana kong iman jih. hai nyang lagee nyan hana jeuet
tahireuen, sabab ladum-ladum nyang na nibak alk-
itab jipeubuet cit lagee nyan le awaknyan. peue nyang
awaknyan peubuet na kheueh meuakibat awaknyan
keudroe hanco. teuma gata, syedara-syedara nyang
lon gaseh, ka gata teupeue keuhai hainyan. sabab
nyan, waspada kheueh, bek sampoe gata teuba-ba
u lam buet nyang sisat nyang jipeubuet le ureueng-
ureueng jeuhet akhe jih gata rhot nibak teupat geu-
milo gata nyang kukoh. bah kheueh gata seumaken
tarasa rakhmat isa almaseh, tuhan dan raja peuseu-
lamat tanyoe, dan bah kheueh gata seumaken taturi
gobnyan. teupujoe kheueh gobnyan, jinoe dan trok
siumu masa! amin. horeumat kamoe, petrus

asoe surat nyoe keuhai feureuman nyang teubri udeb, na kheueh feureuman nyang ka na yoh phon that. kamoe meudeungoe, dan ka kamoe ngieng ngon mata kamoe keudroe. kamoe ka kamoe pandang, dan ka kamoemat ngon jaroe kamoe keudroe. watee udeb nyan teupeugah, na kamoe ngieng. nyang kheueh sabab jih kamoe meusaksi keuhai nyan. kamoe peusampoe ubak gata keuhai udeb sejati dan keukai, nyang na meusajan bapak, dan nyang ka geupeugah bak kamoe. 3 peue nyang ka kamoe ngieng dan kamoe deungoe, nyan cit teuma nyang kamoe peutrok ubak gata, mangat gata meusajan ngon kamoe tarasa udeb meusaboh ngon bapak dan ngon aneuek gobnyan isa almaseh. kamoe tuleh nyoe mangat ate geutanyoe biet-biet geumbira. nyoe kheueh haba nyang kamoe deungoe keuhai aneuek gobnyan dan nyang kamoe peutrok keugata: allah nyan trang, dan nibak gobnyan hana seupot meubacut pih. meun-yoe tanyoe peugah bahwa udeb meusaboh ngon gobnyan, padahai geutanyoe udeb lam seupot, ngon lagee nyan tanyoe kameusulet bah kheueh ngon tutoe haba meunan cit ngon buet. teuma meun-yoe tanyoe udeb lam trang, lagee allah na lam trang, ngon lagee nyan tanyoe udeb krab that, rukon sidroe ngon nyang laen, dan darah isa, aneuek gobnyan, geupeu gleh tanyoe nibak mandum desya. meun-yoe tanyoe tapeugah bahwa tanyoe hana meudesa, tanyoe ka tapeunget droe teuh keudroe; dan po teu allah hana lam ate geutanyoe. teuma meun-yoe tanyoe ta-aku desya-desya geutanyoe dikeue po teu allah, gobnyan teuma geupeutrok janji geuh dan geupeubuet peue nyang ade. gobnyan teuma geupeu amphon bubena desya-desya geutanyoe dan geupeu gleh geutanyoe nibak mandum buet tanyoe nyang salah. teuma meun-yoe tanyoe tapeugah bahwa tanyoe hana meudesa, tanyoe ka tanggab sang-sang allah nyan sulet dan tanyoe hana takeubah feureuman allah lam ate tanyoe. aneuek-aneuek lon! ulon teumuleh nyoe keugata mangat gata bek peubuet desya. teuma meun-yoe na nyang peubuet desya, nibak geutanyoe na sidroe nyang bila, gobnyan na kheueh isa almaseh nyang ade nyan; gobnyan geulakee ubak bapak keu geutanyoe. meulalu isa almaseh nyan kheueh desya-desya tanyoe teupeuamphon. dan kon desya-desya tanyoe mantong, meunan cit desya banmandum umat manusia. 3 meun-yoe tanyoe taat ubak peue-peue nyang geupeurintah le allah, nyan tanda jih tanyoe taturi po teu allah. ureueng nyang peugah, "ulon kuturi allah," teuma hana taat peue-peue nyang geupeurintah nyan, ureueng nyan duseuta, dan allah hana lam ate ureueng nyan. teuma ureueng nyang taat ubak peurintah allah, ureueng nyan jigaseh allah ngon sampoereuna. nyan kheueh tanda jih bahwa tanyoe udeb meusaboh ngon allah. soe-soe mantong nyang peugah jihnyan udeb meusaboh ngon allah, ureueng nyan meuseuti udeb jih jiseutot tapak almaseh. syedara-syedara nyang lon gaseh! nyang ulon tuleh nyoe kon kheueh saboh peurintah nyang baro. nyoe peurintah awai nyang ka teupeutrok ubak gata yoh phon-phon that gata meuman ubak almaseh; na kheueh haba nibak allah nyang ka gata deungoe sigohlom nyan. bah pih meunan, peurintah nyang ulon tuleh nyoe baro cit; sabab keubeunaran deuh teukalon lam tuboh almaseh dan

lam droe gata. sabab seupot seumaken leunyah dan trang nyang beutoi ka jipeuphon meucahya. ureueng nyang peugah bahwa jihnyan na lam trang teuma ureueng nyan mantong jibanci keusyedara jih, ureueng nyan mantong na lam seupot trok anjinoo. ureueng nyang jigaseh keusyedara jih, ureueng nyan udeb lam peungeh ngon sabab nyan hana meuseapeue pih jeuet keusabab ureueng laen rhot lam desya. teuma ureueng nyang banci keu syedara jih, ureueng nyan na lam seupot. ureueng nyan jijak lam seupot, dan hana jiteupeue ho jihjak, sabab le seupot nyan jeuet keusabab hana deuh jikeumalon. ulon teumuleh keugata, aneuek-aneuek, sabab desya gata ka teupeuamphon sabab le almaseh. ulon teumuleh keugata, ayah-ayah, sabab gata taturi gobnyan yoh awaikon phon that gobnyan na. ulon teumuleh keugata hai ureueng-ureueng muda, sabab gata ka tapeutalo si jeuhet. ulon teumuleh keu gata, aneuek-aneuek, sabab gata taturi allah bapak. ulon teumuleh keu gata, ayah-ayah, sabab gata taturi feureuman nyang ka na yoh awaikon. ulon teumuleh keu gata, ureueng-ureueng muda, sabab gata teuga. feureuman allah na lam ate gata, dan gata ka tapeutalo si jeuhet. bek kheueh tacinta donya nyoe, atawa peue mantong nyang na lam donya nyoe. meun-yoe gata tacinta donya, nyan makna jih hana tacinta ubak bapak. peue-peue mantong nyang na lam donya nyoe – nyang jiharab le manusia meudesa, nyang jikalon laju meuheuet dan jipeubangga-bangga atra nyan – banmandum nyan na kheueh hai-hai nyang hana meusai nibak bapak, teuma nibak donya. donya dan peue-peue mantong nyang na lam donya nyang jimeuheuet le manusia, teungoh leunyah. teuma keu ureueng nyang jiturot peukheun po teu allah, ureueng nyan teutab udeb siumu masa. aneuek-aneuek lon, akhe jamen katho that! ka kheueh teupeugah bak gata yoh awaikon bahwa musoh almaseh teuma teuka; dan jinoo ka teuka jai that musoh almaseh. nyan kheueh tanda jih bahwa akhe jamen ka tho that. musoh-musoh almaseh nyan na kheueh ureueng-ureueng nyang ka jitinggai tanyoe, sabab awaknyan nyang sibeuna jih keubiet kon ureueng geutanyoe. meun-yoe awaknyan awak geutanyoe, ka teuntee awaknyan teutab na meusajan ngon tanyoe. teuma awaknyan jitinggai tanyoe, ngon lagee nyan deuh kheueh bahwa hana meusidroe pih lamkawan awaknyan nyang biet-biet jitamong golongan tanyoe. teuma gata ka tateurimong roh allah nyang geusintong le isa almaseh dan nyan kheueh sabab jih gata banmandum taturi ubak ajaran-ajaran nyang beutoi. ngon lagee nyan, ulon tuleh surat keu gata kon le sabab gata hana taturi ajaran nyang beutoi, teuma sabab le gata ka taturi, dan gata pih ka tateupeue bahwa hana nyang sulet lam ajaran nyang beutoi nyan. nyang meusulet na kheueh ureueng nyang peugah bahwa isa nyan kon raja peuseulamat nyang ka geupeu janji le allah. ureueng nyan musoh almaseh; ureueng nyan hana ji-aku bapak meunan cit aneuek. 23 ureueng nyang jiaku aneuek, nyan saban cit hana jiteurimong bapak. dan ureueng nyang jiaku aneuek, nyan saban cit ka jiteurimong bapak. sabab nyan, haba nyang ka gata deungoe yoh phon-phon that ka tapateh haroh kheueh gata jaga beuet-get dalam ate. meun-yoe

haba nyan gata simak get-get, gata teuma sabe udeb meusaboh ngon aneuk dan ngon bapak cit teuma. dan nyoe kheueh nyang geupeu janji le almaseh keudroe keugeutanyoe; udeb seujati dan keukai. ulon tuleh nyoe keugata keuhai ureueng-ureueng nyang teungoh jiuseuha jipeunget gata. teuma meunyo keuhai gata keudroe, almaseh ka geusintong roh gobnyan ateueh gata. dan simantong roh geuhnyan mantong na ateueh gata, hana peureulee na ureueng laen jipurunoe gata. sabab roh gobnyan jipurunoe gata peue-peue mantong; dan peue nyang geupurunoe nyan beutoi, kon haba sulet. sabab nyan, bah kheueh gata taat ubak peue nyang jipurunoe le roh nyan, dan bah kheueh gata teutab udeb meusaboh ngon almaseh. 28 ngon lagee nyan, aneuk-aneuk lon, teutab kheueh udeb meusaboh ngon almaseh, mangat singoh bak watee gobnyan teuka, tanyoe tameuhadab ngon gobnyan deungon beurani nyang peunoh, dan hana jeuet musom sabab le malee. gata ka tateupeue bahwa almaseh udeb meunurot nyang geula-kee le allah, sabab nyan gata haroh tateupeue, tiebieb ureueng nyang udeb meunurot ajaran allah na kheueh aneuk allah. ngieng kheueh padub na alah geugaseh tanyoe, sampoe tanyoe geuaku sibagoe aneuk-aneuk gobnyan. dan biet, tanyoe na kheueh aneuk-aneuk allah. nyang kheueh sabab jih donya nyang jeuhet nyoe hana jituri tanyoe, sabab donya hana jituri allah. syedara-syedara nyang lon gaseh! tanyoe jinoo na kheueh aneuk-aneuk allah, teuma keuadaan tanyoe singoh gohlom teuntée. teuma tanyoe tateupeue bahwa meunyo almaseh teuka, tanyoe jeuet lagee gobnyan, sabab tanyoe takalon gobnyan lam keuadaan nyang sibeuna jih. 3 banmandum ureueng nyang na harapan nyoe ubak almaseh, jijaga droe jih mangat biet-biet suci, gleh nibak mandum desya lagee almaseh nyang suci. ureueng nyang peubuet desya, jilanggeh hukom allah; sabab desya-desya na kheueh teulanggeh ateueh hukom allah. gata tateupeue bahwa almaseh teuka keu geusampoh bubena desya-desya manusia, dan bahwa hana desya lam droe gobnyan. banmandum ureueng nyang udeb meusaboh ngon almaseh, hana sabe-sabe jipeubuet desya. ureueng nyang sabe-sabe jipeubuet desya, hantom na jikalon almaseh atawa jituri gobnyan. aneuk-aneuk lon, bek tapeubiyeue droe gata jipeusisat le soemantong. ureueng nyang peubuet lagee kheun allah na kheueh aneuk allah saban lagee almaseh na kheueh aneuk allah. teuma ureueng nyang hana jipioh-pioh jipeubuet desya na kheueh aneuk iblih, sabab iblih meudesa yoh awaikon. keunyo kheueh aneuk allah teuka, na kheueh keugeupeuhanco banmandum buet iblih. ureueng nyang ka jeuet keu aneuk allah, hana sabe-sabe jipeubuet desya, sabab sifeuet allah keudroe na nibak gobnyan. dan sabab le allah nyan bapak jih, ngon lagee nyan jihnyan hana sabe-sabe jipeubuet desya. nyoe kheueh beda jih aneuk-aneuk allah ngon aneuk-aneuk iblih: soe mantong nyang hana jipeubuet keuheundak allah, atawa hana jigaseh keu syedara jih, ureueng nyan kon aneuk allah. yoh awaikon ka teupeutrok haba nyoe ubak gata: tanyoe haroh tagaseh sidroe ngon nyang laen. bek kheueh geutanyoe lagee kain, nyang jeuet keu aneuk iblih jipoh

mate syedara jih keudroe. peue sabab kain jipoh mate syedara jih? sabab hai-hai nyang jipeubuet na kheueh salah, teuma hai-hai nyang jipeubuet le syedara jih na kheueh beutoi. sabab nyan, syedara-syedara lon, bek kheueh hireuen meunyo ureueng-ureueng donya nyoe jibanci gata. tanyoe tateupeue bahwa tanyoe ka tateubiet nibak mate, dan taminah ubak udeb. tanyoe tateupeue, sabab tanyoe tagaseh sabe syedara tanyoe. ureueng-ureueng nyang hana geunaseh, nyan saban cit mantong jikuasa le mate. 15 ureueng nyang banci keu syedara jih na kheueh tukang poh mate gob, dan gata tateupeue bahwa sidroe tukang poh mate gob nibak jih hana udeb seujati dan keukai. ngon jalan nyoe kheueh tanyoe tateupeue cara tagaseh sabe keudroe-droe: almaseh ka geupeujok udeb geuh keu geutanyoe. sabab nyan, tanyoe pih bah kheueh tapeujok droe tanyoe keu syedara-syedara tanyoe! meunyo sidroe ureueng seb lam udeb jikalon syedara jih kureueng hana sapue na, teuma hana jitem tulong syedara jih nyan, pakriban ureueng nyan jeuet jipeugah bahwa jihnyan jigaseh keu allah? aneuk-aneuk lon! bek kheueh tanyoe tapeugah tagaseh teuma bak babah mantong atawa ngon tutoe haba mantong. bah kheueh tanyoe tameugaseh ngon gaseh nyang seujati, nyang tabri bukeuti ngon buet geutanyoe. meunan kheueh cara geutanyoe tateupeue bahwa tanyoe na kheueh aneuk-aneuk allah nyang beutoi, dan ate tanyoe meuteume teunang dikeue po teu allah. tanyoe tateupeue, bahwa meunyo tanyoe jipeusalah le ate tanyoe, ieleume allah leubeh rayeuk nibak ieleume tanyoe, dan bahwa gobnyan geuteupeue peue-peue mantong. ngon lagee nyan, syedara-syedara lon nyang teucinta, meunyo ate tanyoe hana jipeusalah tanyoe, tanyoe hase tameuhadab ubak po teu allah ngon beurani. dan peue nyang tanyoe lakee nibak gobnyan, meuteume, sabab geutanyoe taat ubak peue-peue nyang geupeurintah le gobnyan dan tapeubuet peue nyang teupeugalak ate gobnyan. 23 nyang gobnyan peurintah bak geutanyoe na kheueh: tanyoe meuseuti tameuiman ubak aneuk gobnyan, na kheueh isa almaseh, dan tanyoe bah kheueh saleng tameugaseh, lagee nyang ka geupeurintah le isa ubak geutanyoe. banmandum ureueng nyang taat ubak peue-peue nyang geupeurintah le allah, ureueng nyan udeb meusaboh ngon allah, dan allah meusaboh ngon awaknyan. dan tanyoe tateupeue bahwa alah meusaboh ngon tanyoe, sabab gobnyan ka geubri roh geuh keu geutanyoe. syedara-syedara nyang lon cinta! bek kheueh tapateh bak mandum ureueng nyang meungaku na roh allah, teuma ujoe kheueh awaknyan leubeh ilee keutateupeue peue kheueh roh nyang na nibak awaknyan asai jih nibak allah atawa bukan. sabab jai that nabi-nabi peuleusu ka jijak bansaboh nyoe. meunoe kheueh cara jih mangat gata teupeue peue kheueh roh allah atawa kon: ureueng nyang jiaku bahwa isa almaseh geutreun lam donya sibagoe manusia, ureueng nyan biet na roh nyang teuka nibak allah. 3 teuma meunyo na ureueng nyang hana jiaku hai nyan, ureueng nyan nibak jih hana roh allah. ureueng nyan na roh nibak musoh almaseh. syedara ka tadeungoe bahwa roh nyan teuma teuka, dan jinooenyo kana lam donya nyoe. teuma aneuk-aneuk lon, gata na kheueh milek allah. gata

ka tapeutalo nabi-nabi peuleusu, sabab roh nyang na nibak gata leubeh meukuasa nibak roh nyang na nibak ureueng-ureueng milek donya nyoe. nabi-nabi peuleusu nyan jimeututloe keuhai donya nyoe, dan donya jideungoe peue nyang jipeugah le awaknyan, sabab awaknyan milek donya. teuma geutanyoe na kheueh aneuek-aneuek allah; dan ureueng nyang jitungi allah, jideungoe peue nyang tanyoe peugah. ureueng nyang kon milek allah, hana jideungoe peue nyang tanyoe peugah. meunan kheueh cara jih tanyoe tateupeue beda roh nyang jibri ajaran nyang beutoi ngon roh nyang jipeusisat tanyoe. syedara-syedara nyang lon cinta! jak kheueh geutanyoe saleng tameugaseh sidroe ngon nyang laen, sabab geunaseh nyan asai jih nibak allah. ureueng nyang na gaseh, na kheueh aneuek allah dan jihnyan jitungi allah. ureueng nyang hana gaseh, ureueng nyan hana jitungi allah; sabab allah na kheueh gaseh. allah geupeugah bahwa gobnyan geugaseh tanyoe ngon cara geukirem aneuek geuh nyang tunggai u lam donya nyoe mangat tanyoe meuteume udeb meulalu aneuek geuh nyan. nyoe kheueh gaseh nyan: bukan geutanyoe nyang ka tagaseh allah, teuma allah nyang gaseh keugeutanyoe dan geukirem aneuek geuh mangat meulalu aneuek geuhnyan tanyoe meuteume amphon banmandum desya-desya geutanyoe. syedara-syedara nyang lon cinta, meunyo allah meunan that geugaseh geutanyoe, tanyoe pih haroh tagaseh sidroe ngon nyang laen. hana meusidroe pih nyang ka ltheuh jikalon allah, teuma meunyo geutanyoe sabe na lam gaseh sayang, po teu allah meusaboh ngon geutanyoe dan geunaseh gobnyan ka jeuet samporeuna lam tuboh geutanyoe. le sabab allah ka geubri ubak geutanyoe roh gobnyan, ngon lagee nyan tanyoe tateupeue bahwa geutanyoe ka udeb meusaboh ngon po teu allah, dan allah udeb meusaboh ngon geutanyoe. kamoe keudroe ka ltheuh kamoe kalon aneuek allah, dan kamoe peusampoe bahwa gobnyan geukirem le bakap keu jeuet keu raja peuseulamat donya nyoe. 15 barang sigasoe nyang jiaku bahwa isa nyan aneuek allah, po teu allah udeb meusaboh ngon ureueng nyan, dan ureueng nyan pih udeb meusaboh ngon allah. tanyoe keudroe tateupeu dan tapateh keuhai geunaseh allah ateuh geutanyoe. allah nyan gaseh. ureueng nyang udeb jih jikuasa le gaseh, ureueng nyan meusaboh ngon allah, dan allah meusaboh ngon ureueng nyan. gaseh geupeujeuet samporeuna lam tuboh geutanyoe, mangat tanyoe beutajeuet nibak uroe peungadalan. tanyoe teuma na beurani, sabab udeb geutanyoe lam donya nyoe saban lagee udeb almaseh. ureueng nyang jirasa geunaseh allah, nibak ureueng nyan hana jitungi keupeurasaan teumakot; sabab geunaseh nyang samporeuna jipeuleunyab banmandum peurasaan teumakot nyan. ngon lagee nyan deuh kheueh teukalon bahwa nibak ureueng nyan gohlom jirasa gaseh allah nyang samporeuna meunyo ureueng nyan teumakot meuhadab ngon uroe peungadalan. tanyoe geugaseh, sabab allah ka leubeh ilee geugaseh tanyoe. meunyo sidroe-droe ureueng jipeugah, "ulon kugaseh allah," teuma ureueng nyan hana jigaseh keusyedara jih keudroe, ureueng nyan tukang meusulet. sabab ureueng nyang hana jigaseh syedara jih nyang jikalon keudroe, hana

mungken ureueng nyan hase jigaseh allah nyang hana deuh jikalon. sabab nyan, nyoe peurintah nyang geubri le almaseh ubak geutanyoe: barang sibagoe jigaseh allah haroh jigaseh teuma syedara-syedara jih. ureueng nyang jipateh bahwa isa na kheueh raja peuseulamat nyang geupeu janji le allah, ureueng nyan na kheueh aneuek allah. ureueng nyang jigaseh sidroe ayah, jigaseh cit keu aneuek jih teuma. ngon jalan nyoe kheueh tanyoe tateupeue bahwa tanyoe tagaseh keu aneuek-aneuek allah: tanyoe tagaseh allah dan taat ubak peue-peue nyang geupeurintah. 3 sabab, tagaseh allah nyan makna jih ta-taat ubak peue-peue nyang geupeurintah. dan peue-peue nyang geupeurintah nyan hana that geuhon nibak geutanyoe, sabab tieb-tieb aneuek allah hase jipeutaloe donya nyang jeuhet nyoe. dan tanyoe tapeutaloe donya nyoe ngon iman geutanyoe. soe kheueh nyang hase peutaloe donya? na kheueh ureueng-ureueng nyang jipateh bahwa isa na kheueh aneuek allah. isa almaseh kheueh nyang teuka lam donya nyoe ngon ie pumano geuh dan ngon darah mate gobnyan. gobnyan teuka kon ngon ie mantong, teuma ngon ie dan darah. dan roh allah keudroe jimeusaksi bahwa nyan beutoi, sabab roh hantom na meusulet. na lhee droe saksi: roh allah, ie ngon darah – ban lhee nyan jimeusaksi nyang saban. tanyoe tapateh ubak manusia nyang meusaksi, teuma saksi po teu allah leubeh teuga lom. dan nyan kheueh keusaksian nyang geubri le allah keuhai aneuek gobnyan. sabab nyan, ureueng nyang meuman ubak aneuek allah, ka jiteurimong keusaksian nyan lam ate jih; teuma ureueng nyang hana jipateh ubak allah, ka jianggab siulah-ulah allah nyan sulet, sabab jihnyan hana jipateh peue nyang geupeugah le allah keuhai aneuek gobnyan. nyoe keusaksian nyan: po teu allah ka geubri keugeutanyoe udeb nyang seujati dan keukai, dan aneuek gobnyan na kheueh punca udeb nyan. ureueng nyang na aneuek allah, nibak jih na udeb nyan; dan ureueng nyang hana aneuek allah nyan, nibak ureueng nyan hana udeb nyan. ulon teumuleh keu gata nyang meuman ubak aneuek allah, mangat gata tateupeue bahwa gata kana udeb seujati dan keukai. dan tanyoe tajeuet meuhadab ubak allah, sabab geutanyoe yaken gobnyan geuteurimong doa tanyoe, meunyo tanyoe lakee peue mantong nyang sisuai ngon peue nyang sisuai deungon keuhendak gobnyan. 15 sabab tanyoe tateupeue bahwa gobnyan geuteurimong doa tanyoe peue-peue mantong nyang ta lakee, ngon lagee nyan tanyoe pih tateupeue bahwa gobnyan geubri keugeutanyoe peue mantong nyang tanyoe lakee. meunyo gata takalon sidroe ureueng kristen nyang peubuet desya nyang hana jeuet keukibat ureueng nyan gadoh udeb seujati dan keukai, bah kheueh gata meudoa ubak allah; dan allah teuma geubri udeb keu ureueng nyan. nyoe keunong ateuh awaknyan nyang desya jih hana jeuet keukibat ureueng nyan gadoh udeb jih. teuma na desya nyang jeuet keukibat ureueng nyan gadoh udeb jih, keuhai nyan ulon hana lon peugah gata haroh meudoa ubak allah. banmandum buet nyang salah na kheueh desya, teuma na desya nyang hana jeuet keukibat ureueng nyan gadoh udeb seujati dan keukai nyan. tanyoe tateupeue bahwa banmandum ureueng nyang

ka jeuet keu aneuek-aneuek allah, hana sabe-sabe jipeubuet desya, sabab aneuek allah geulindong ureueng nyan, dan si jeuhet hana hase jipeubuet sapeue ateueh ureueng nyan. tanyoe tateupeue bahwa tanyoe na kheueh milek allah, bah pih bansigom donya nyoe dimiyueb peurintah si jeuhet. tanyoe tateupeue bahwa aneuek allah ka teuka dan ka geubri peungeurtian keugeutanyoe, mangat tanyoe taturi ubak allah nyang beutoi. tanyoe udeb meusaboh ngon allah nyang beutoi dan udeb meusaboh ngon aneuek gobnyan isa almaseh. nyoe kheueh allah nyang beutoi, dan nyoe kheueh udeb seujati nyang keukai. aneuek-aneuek lon, peujioh kheueh droe gata nibak beurala-beurala!

keu droe neuh ma nyang ka geupileh le po teu allah, dan keu aneuek-aneuek ma. surat nyoe nibak ulon, peumimpén jeumaah nyang biet-biet lon cinta gata. kon mantong ulon, teuma mandum ureueng nyang jituri allah nyang beutoi, jicinta cit gata. sabab allah tinggai lam ate geutanyoe, dan sabe na meusajan tanyoe siumu masa. 3 seumoga geutanyoe geubri beureukat, rakhmat dan seujahteura le allah bapak, dan isa almaseh aneuek bapak nyan. seumoga banmandum nyan jeuet keumilek ngon ate nyang gleh dan ngon gaseh. ulon mangat that ate watee lon teupeue bahwa na aneuek-aneuek ma nyang udeb meunurot ajaran allah, lagee nyang ka geupeurintah le allah bapak ubak geutanyoe. sabab nyan, bak droeneueh ma ulon lakee ngon meuharab that mangat tanyoe mandum sabe udeb lam gaseh. nyang ulon peugah nyoe kon kheueh saboh peurintah nyang baro; peurintah nyoe ka geubri keugeutanyoe yoh phon that geutanyoe tameuiman. saleng tameugaseh nyan makna jih udeb meunurot peupeue nyang geupeurintah le allah. dan peurintah nyang ka gata deungoe yoh phon that bahwa gata bah kheueh udeb deungon meugaseh sidroe ngon nyang laen. jai that tukang teumipee kajijak-jak bansigom donya. awaknyan na kheueh ureueng-ureueng nyang jiaku isa almaseh teuka lam donya sibagoe sidroe manusia. ureueng nyang lagee nyan na kheueh tukang teumipee, dan musoh almaseh. sabab nyan, jaga kheueh bek sampoe gata gadoh peue nyang ka kamoe useuha keu gata. useuha kheueh mangat gata tateurimong nibak allah upah gata banmandum. ureueng nyang hana jimumat bak ajaran almaseh, teuma ka meusimpang nibak peue nyang ka geupurunoe le almaseh, nibak ureueng nyan hana allah. ureueng nyang teutab lam ajaran almaseh, nyan makna jih teutab na bah kheueh nyan allah bapak meunan cit aneuek. le sabab nyan, meunyoe na ureueng teuka dan jibri tee ubak gata ajaran nyang hana geupurunoe le almaseh, bek kheueh gata teurimong ureueng nyan lam rumoh gata atawa gata bri saleuem bak ureueng nyan. sabab ureueng nyang jibri saleuem bak ureueng nyang lagee nyan meusajan cit ngon ureueng nyan jipeubuet nyang jeuhet. jai lumpah na nyang peureulee ulon peugah bak gata, teuma rasa jih leubeh get bek meulalu surat. ulon meuharab hase lon jaksaweue gata dan lon meututoe keudroe ngon gata, mangat ate geutanyoe biet-biet geumbira. aneuek-aneuek nibak syedara inong ma nyang ka cit geupileh le allah, geukirem saleuem keu droeneueh ma.

syedara gayus nyang ulon gaseh! ulon peumim-
pen jeumaah nyang biet-biet lon gaseh gata, me-
doa kheueh mangat gata na lam keuadaan seuhat
sabe dan banmandum get-get ngon gata, saban lagee
jiwa gata get-get mantong. 3 ulon mangat ate wa-
tee na padub droe syedara tanyoe nyang kristen teuka
dan jipeugah bak ulon padub na seutia jih gata ubak
po teu allah nyang beutoi, sabab keubiet that udeb
gata sabe meunurot ajaran allah. hana nyang hase
jipeujeuet ulon biet-biet geumbira, watee lon deun-
goe aneuek-aneuek ulon udeb meunurot ajaran allah.
syedara lon! gata meunan seutia nibak buet nyang
gata peubuet keu syedara-syedara tanyoe seusabe
ureueng kristen; meunan cit keu ureueng kristen
nyang gohlom gata turi pih, gata layani. awaknyan
ka jipeugah ubak jeumaah bak teupat kamoe keuhai
geunaseh gata. tulong kheueh awaknyan mangat
hase jipeujak meuneujak awaknyan dan ngon na
lagee nyan biet galak that ate allah, sabab nibak me-
uneujak teupeutimang almaseh, awaknyan hana ji-
teurimong bantuan peue mantong nibak ureueng-
ureueng nyang hana jituri allah. sabab nyan, geu-
tanyoe ureueng-ureueng kristen get that tatulong
syedara-syedara tanyoe nyang kristen nyang lagee
nyan bagoe, mangat tanyoe hase taseutot lam useuha
awaknyan keujajak peusampoe ajaran nyang beutoi
nibak allah. ulon ka lon tuleh surat nyang paneuk
ubak jeumaah, teuma le diotrefes nyang keuneuk
jeuet keupeumimpen lam jeumaah, hana jitem seutot
ulon. teuma watee ulon teuka, lon reuloh banman-
dum peue-peue mantong nyang ka jipeubuet nyan,
na kheueh keuhai-hai nyang jeuhet dan haba sulet
nyang jipeugah keuhai kamoe! teuma banmandum
nyan gohlom seb keu jihnyan. bak watee rakan-rakan
nyang ureueng kristen nyan teuka, jihnyan hana jitem
teurimong awaknyan. dan jitam soe-soe mantong
ureueng nyang jikeuneuk teurimong awaknyan, dan
jihnyan laju jiyue teubiet bandum awaknyan nibak
jeumaah! syedara lon nyang teucinta, bek kheueh
gata cuntoh peue nyang brok. dan cuntoh kheueh
peue nyang get. ureueng nyang peubuet nyang get
na kheueh milek allah. dan ureueng nyang peubuet
jeuhet gohlom jituri allah. banmandum ureueng jipu-
joe demetrius. dan po teu allah keudroe jipujoe geuh
nyan. meunan cit kamoe pih meupujo jihnyan, dan
gata tateupeue bahwa peue nyang kamoe peusampoe
nyoe jeuet teupecaya. jai that-that nyang peureulee
ulon peugah bak gata, teuma ulon rasa leubeu get
bek meulalu surat. ulon meuharab hana treb le hase
meurumpok ngon gata, dan tanyoe teuma tameu-
toe langsung. 15 seumoga tuhan geubri beureukat
ateueh syedara. rakan-rakan gata nibak teupat lon
nyoe jikirem saleuem keu gata. dan peutrok kheueh
saleuem ulon ubak mandum syedara tanyoe sidroe-
droe.

syedara-syedara nyang ka geutawok dan that-that geugaseh le allah bapak, dan jijaga keu isa almaseh. sibagoe hamba isa almaseh, ulon – yudas – syedara nibak yakobus, meuharab: seumoga allah geubri beureukat, rakhmat dan seujahteura u ateuheh gata ngon meulimpah-limpah. 3 syedara-syedara nyang lon cinta! ulon biet-biet ngon meukeusut lon tuleh surat keu gata keuhai keuseulamatan nyang ka tarasa meusajan geutanyoe. teuma jinoenyoe ulon teurasa keu lon peuingat gata ngon surat nyoe mangat gata teutab meuiuang keu iman gata nyang ka geubri sigoe nyan le allah keu siumu masa bak umat gobnyan. sabab ngon hana tasada, na okeunum-okeunum ka teuntee nyang jipeurhoh droe lamkawan geutanyoe. awaknyan ureueng-ureueng jeuhet nyang jiputa balek haba keuhai rakhmat allah tanyoe, keujiteume keuseumpatan jipeupuih hawa nafesu awaknyan. dan awaknyan hana jiaku isa almaseh, sibagoe sidroe tok nyang meukuasa dan tuhan geutanyoe. yoh awaikon hukoman keu awaknyan ka ltheueh teuteuleh lam alkitab. banmandum nyan ka gata teupeue. teuma ulon teutab lon peuingat bak gata keuhai pakriban tuhan geupeuseulamat umat israel nibak nanggroe meuse, teuma oh ltheueh nyan geupoh mate ureueng-ureueng nyang hana jipateh lamkawan awaknyan. ingat kheueh teuma bak malaikat nyang jilewat bataih kuasa awaknyan, akhe jih jijak jitinggai teupat tinggai awaknyan keudroe. allah geurante malaikat-malaikat nyan ngon rante nyang keukai, bak teupat nyang seupot dimiyueb bumoe. nibak teupat nyan awaknyan teutab teuteun sampoe trok ubak hukoman teupeu rhot ateuheh awaknyan nibak uroe nyang luwabisa nyan teuma. ingat kheueh banda sodom dan gomora meunan cit banda-banda nyang na bak-bak bineh nyan, nyang peunduduek disinan jipeubuet hai-hai lagee nyang jipeubuet le malaikat-malaikat nyan. awaknyan jipeubuet hai-hai nyang cabui dan beujat, akhe jih awaknyan teuseksa ngon hukoman apui nyang keukai, sibagoe peuingat keu mandum manusia. meunan cit ngon okeunum-okeunum nyan sabé jimeukhayal sampoe awaknyan jipeugat desya ateuheh tuboh jih keudroe. awaknyan jipandang miyueb that keukuasaan po teu allah dan jih-hina bubena makhlok nyang mulia nyang na lam syeuruga. malaikat mikhael keudroe, nyang jeuet keu ulee kawan bubena malaikat-malaikat, hantom na geupeubuet lagee nyan bagoe. bak watee gobnyan geumeudakwa ngon iblih keuhai soe nyang hak ateuheh manyet nabi musa, malaikat mikhael hana geujeuet geuhukom iblih ngon tutoe haba nyang meuhina. teuma nyang geupeugah le mikhael na kheueh, "tuhan teuma geudot gata!" teuma ngon cara jihina-hina lagee nyan, duma awaknyan laju jiseurang peue-peue mantong nyang hana jimuphom. awaknyan saban lagee dumna beulatang nyang hana meuakai, nyang jiteupeue hai-hai ngon pikeran jih mantong. teuma le hai-hai nyan kheueh nyang jeuet keusabab awaknyan hanco. mupaloe that awaknyan! awaknyan ka jicok rot nyang jijak le kain. mangat meuteume peng, awaknyan jipeurhot droe lam ceurucong nyang sisat, sabab lagee bileam. dan awaknyan pih teupeuhanco sabab meubeurontak sa-

ban lagee korah. bak watee gata teungoh tapeuna khanuri, sikeub awaknyan biet luwat that-that watee takalon lamkawan gata. sabab awaknyan jimakheun ngon leuha lumpah na biet hana malee-malee, nyang jipeupeunteng na kheueh droe jih keudroe. awaknyan lagee awan nyang jiba le angen, teuma awan nyan hana jipeutleun ujeun. meunan cit awaknyan lagee bak kayee nyang hana meuhase jimuboh bah pih watee nyan teungoh musem boh kayee; bak kayee nyang teubot ukeue jih dan ka mate banmandum. saban lagee gulumbang nyang hebat lam laot nyang jipeuteubiet kuboh, meunan cit awaknyan jipeukuboh buet-buet jih nyang keubiet that-that malee. awaknyan na kheueh lagee bintang-bintang nyang jijak bansaboh langet dan keu awaknyan ka geukeubah teupat jih le allah nibak teupat nyang paleng seupot keu siumu masa. henokh, keuturonan keu tujuh nibak nabi adam, yoh masa ilee ka ltheueh geupeugah keuhai ureueng-ureueng nyan. geupeugah le henokh, "kalon, tuhan teuma teuka ngon meuribee-ribee malaikat nyang suci 15 keugeujak peuhakem banmandum manusia. tuhan teuma geuhukom ureueng-ureueng jeuhet sabab buet-buet awaknyan nyang beujat. dan gobnyan teuma geuhukom ureueng meudesya ngon doraka sabab mandum tutoe haba meuhina nyang jipeugah." ureueng-ureueng nyan sabe-sabe lam keuadaan tunu sira jipeusalah ureueng laen. awaknyan udeb meunurot peue-peue nyang jikheun le awaknyan keudroe nyang peunoh ngon desya. awaknyan jipeu mbong-mbong droe ngon haba nyang sulet, dan jilieh ureueng laen keujiteume laba. teuma syedara-syedara lon nyang teucinta, ingat kheueh ubak peue nyang ka geupeugah le rasui-rasui tuhan tanyoe isa almaseh. awaknyan leubeh ilee geupeugah ubak gata watee ka tho akhe jamen teuma teuka ureueng-ureueng nyang jihina gata, na kheueh ureueng-ureueng nyang udeb meunurot peue-peue nyang jikheun le ate awaknyan nyang meudesya. awaknyan nyoe kheueh ureueng-ureueng nyang jipeuteuka mucrebbe ateuheh manusia laen. awaknyan hana jikuasa le roh allah, teuma le peue-peue nyang meuheuet le tabiat donya. teuma gata, syedara-syedara lon, peusaneut kheueh laju udeb gata ngon dasai jih iman gata ubak isa almaseh. iman gata nyan suci lumpah na. dan meudoa kheueh sabe ngon kuasa roh allah, dan udeb kheueh sabe lam lindongan gaseh po teu allah seumantong gata preh-preh rakhmat isa almaseh tuhan tanyoe, nyang teuma geubri keu gata udeb seujaati dan keukai. keu ureueng-ureueng nyang waih-waih ate jih, bah kheueh gata tatunyok gaseh sayang. 23 tarek kheueh ureueng beujiteubiet lam apui keuteupeu seulamat awaknyan. meunan cit ateuheh ureueng-ureueng laen bah kheueh gata tatunyok gaseh sayang meusajan ngon peurasaan teumakot, teuma banci kheueh bah pih nyan peukayan awaknyan keudroe nyang ka jipeukuto ngon desya. po teu allah, nyang hase jaga mangat gata bek rhot, dan nyang hase ba gata ubak hazirat gobnyan nyang mulia ngon sukacita lom hana meucupa, gobnyan kheueh sidroe sagai allah, peuseulamat tanyoe meulalu isa almaseh tuhan tanyoe. gobnyan kheueh allah nyang mulia, agong, meukuasa dan meuwibawa yoh

awai ilee trok an jinoe dan keu siumu masa! amin.

nyoe dafear indatu isa almaseh, keuturonan nabi daud, keuturonan nabi ibrahim, nibak nabi ibrahim sampoe ubak nabi daud, nan-nan indatu isa na kheueh lagee nyoe: nabi ibrahim, nabi ishaq, nabi yakub, yehuda dan syedara-syedara gobnyan, peres dan zerah (mak awaknyan nan geuh tamar), hezron, ram, aminadab, nahason, salmon, boas (mak gobnyan nan geuh rahab), obed, (mak gobnyan nan geuh rut), isai, dan raja daud.(6b)phon nibak nabi daud sampoe trok ubak masa bansa israel teuboh u babel teucetet nan-nan lagee nyoe: nabi sulaiman (mak gobnyan na kheueh beukaih peurumoh uria), rehabeam, abia, asa, yosafat, uzia, yotam, ahas, hizkia, manasye, amon, yosia, yekhonya dan syedara-syedara gobnyan. nibak masa bansa israel teuboh u babel sampoe trok ubak lahe isa teucetet nan-nan lagee nyoe: yekhonya, sealtiel, zerubabel, abihud, elyakim, azur, zadok, akhim, eliad, eliazar, matan, yakub, yusuf lakoe mariam. dan nibak mariam nyan kheueh lagee isa nyang teuhoi almaseh. jadi phon nibak nabi ibrahim sampoe ubak nabi daud, bandum nyan na peuet blaih geuneurasi. nibak nabi daud trok ubak masa bansa israel teuboh u babel na teuma peuet blaih boh geuneurasi. nibak masa bansa israel teuboh u babel trok ubak lahe almaseh na teuma peuet blaih geuneurasi. meunoe kheueh kisah keuhai isa almaseh lahe. mak gobnyan nan geuh mariam, meutunangan deungon yusuf. teuma sigohlom awaknyan meugatih, teunyata mariam ka mume. yusuf hana geuteupeue bahwa mariam mume deungon kuasa roh po teu allah. yusuf, tunangan mariam nyan, na kheueh sidroe ureueng nyang udeb saleh dan sabe geutaat ubak hukum-hukom agama. jadi, gobnyan geutem peuputih tunangan nyang ka teuitak nyan, teuma ngon cara seungab-seungab, mangat mariam hana meuteume malee dikeue rakyat ba. teungoh yusuf geupike-pike hai nyan, gobnyan meulumpo. dalam lumpo geuhnyan, deuh geukalon sidroe malaikat tuhan nyang geupeugah ubak gobnyan, "he yusuf, keuturonan nabi daud, bek tatakot meukawen deungon mariam; sabab aneuek nyang na dalam rahim jihnyan nyan jeuet jih le kuasa roh allah. mariam teuma jipeulahe sidroe aneuek agam. aneuek nyan haroh gata boh nan isa, sabab jihnyan teuma jipeuseumat umat jih keudroe nibak sigala desya." bandum nyan teujadi lagee nyan mangat geunab peue nyang ka geupeugah le tuhan meulalu nabi gobnyan, "sidroe aneuek dara peurawan teuma mume dan jipeu lahe sidroe aneuek agam. aneuek nyan teuma jiboh nan immanuel." (immanuel na kheueh basa ibrani nyang makna jih. "allah na meusajan geutanyoe.") oh lheureh nyan yusuf jaga dan geubeudoh nibak teupat eh, laju geupeubuet peue nyang ka geupeugah le malaikat tuhan ubak gobnyan. gobnyan laju meukawen ngon mariam. teuma sigohlom mariam geupeulahe aneuek geuh nyan, yusuf hana meusituboh deungon mariam. dan oh ka lheureh aneuek nyan lahe, le yusuf laju geuboh nan isa. isa lahe di banda betlehem lam nanggroe yudea bak masa keurajeuen raja herodes. bak masanyan na meupadub droe ureueng nyang ahli ieuleme bintang nibak timu jikak u yerasalem. awaknyan jiteumanyong bansaboh nyan, "dipat

kheueh aneuek nyan, nyang ka lahe teuma jeuet keu raja ureueng yahudi? deuh kamoe ngieng bintang gobnyan jiteubiet nibak siblahi u timu, dan kamoe teuka keu kamoe jak seumah gobnyan." watee raja herodes geudeungoe hai nyan, gobnyan teukeujot lumpah na, meunan cit banmandum ureueng di yerasalem. teuma le raja nyan laju geuyue bandum ulee-ulee imeum dan guree-guree agama bansa yahudi geujak meugumpoi. laju raja nyan geutanyong ubak awaknyan, "dipat kheueh teuma lahe raja nyang ka geupeu janji le po teu allah?" awaknyan geujaweueb, "di banda betlehem lam nanggroe yudea. sabab meunoe kheueh nyang ka geutuleh le sidroe nabi, 'gata betlehem, di nanggroe yudea, gata meubacut pih bukan banda nyang paleng ubit lam banda-banda nyang meusyeyuhu di yehuda. sabab nibak gata teuma lahe sidroe peumimpin nyang teuma pimpin umat ulon israel.'" "oh ka lheureh meuteume keuteurangan nyang lagee nyan, herodes laju geuhoh ahli-ahli bintang nibak timu nyan seucara seungab-seungab. laju gobnyan geutanyong bak awaknyan pajan nyang paih jih bintang nyan phon that leumah. oh ka lheureh nyan raja nyan laju geuyue jak awaknyan u betlehem sira geupeuingat lagee nyoe, "tajak kheueh, dan tamita kheueh aneuek nyan deungon teuliti. dan meunyo gata ka meurumpok ngon aneuek nyan, tapeugah kheueh ubak ulon, mangat ulon pih kujak seumah gobnyan." dan jikak kheueh awaknyan. deuh jingieh lom bintang nyang ka lheureh awaknyan ngieng yoh masa dilee di siblahi u timu. keubiet galak that ate awaknyan oh watee jikalon bintang nyan! bintang nyan jikak laju dikeue awaknyan, dan laju jipiyoh paih di ateueh aneuek nyan. awaknyan laju jitamong lam rumoh nyan deuh laju jikalon aneuek nyan deungon mariam, mak gobnyan. awaknyan laju sujut dan jiseumah aneuek nyan, dan laju jiploih bungkoh atra meuneuba awaknyan, dan jipeuseumah laju ubak aneuek nyan meuh, keumeunyan, dan mur. po teu allah laju geupeu ingat ubak awaknyan didalam lumpo mangat bek jigisa ubak raja herodes. jadi awaknyan laju jigisa rot laen. oh ka lheureh ahli-ahli bintang nyang jigisa, malaikat tuhan laju geupeuleumah droe ubak yusuf didalam lumpo. malaikat nyan geupeugah, "raja herodes na meukeusut jikak mita dan keuneuk poh mate aneuek gata nyan. sabab nyan beudoh kheueh, taba kheueh aneuek nyan deungon ma jih jak meungunge u nanggroe meuse. tatinggai kheueh disinan sampoe ulon meutotloe lom deungon gata." ban geudeungoe lagee nyan yusuf laju geubeudoh, dan bak malam nyan cit teuma laju geuba aneuek nyan dan ma gobnyan meungunge u meuse. awaknyan tinggai disideh sampoe raja herodes mate. meunan kheueh, teuma teujadi kheueh peue nyang ka geupeugah le tuhan meulalu nabi gobnyan, lagee nyoe, "ulon tawok aneuek ulon nibak meuse." watee raja herodes jiteupeu bahwa ahli-ahli bintang nibak timu nyan ka jitipee jih, raja nyan keubiet beungeh that. laju raja nyan jipeutron titah mangat bubena aneuek miet nyang agam nyang meu-umu dua thon u miyueb di betlehem dan bansilingka nyan beuteupoh mate. nyan paih that lagee nyang ka geupeugah le ahli-ahli bintang keuhai watee jih

bintang nyan leumah. nyan kheueh nyang teujadi lagee nyang ka ltheueh geupeugah le nabi yeremia, "di rama na teudeungoe su ureueng mo meuba-e, aloh-alah dan mo meuheuek-heuek. rahel jipeuratoh aneuek-aneuek jih; gobnyan han geutem iem sabab awaknyan ka hana le." oh ka ltheueh herodes meuninggai donya, watee yusuf mantong di nanggroe meuse dan sidroe malaikat tuhan geupeuleumah droe lom ubak yusuf lam lumpo. malaikat nyan geupeugah, "ureueng-ureueng nyang keuneuk poh mate aneuek nyan ka meuninggai donya. sabab nyan beudoh kheueh, tacok laju aneuek ngon ma jihnyan gata woe laju u nanggroe israel." teuma yusuf pih laju geubeudoh, laju geuba lom aneuek nyan deungon mariam gisa u israel. teuma oh ltheueh nyan na geudeungoe na kheueh arkelaus, aneuek agam herodes ka jeuet keuraja gelulanto ureueng syiek jih di nanggroe yudea. jadi, yusuf teumakot geujak keunan. oh ka ltheueh gobnyan meuteume peutunyok tuhan lom lam lumpo gobnyan, laju geujak u daerah galilea. disinan gobnyan tinggai di banda nyang nan jih nazaret. deungon lagee nyan teuma jeuet kheueh peue nyang ka geupeugah le nabi-nabi keuhai aneuek nyan: "gobnyan teuma teupeugah ureueng nazaret." bak watee nyan teuka kheueh yahya pumano di padang pasi yudea dan laju geupeuphon khutubah. "tobat kheueh nibak desya-desya gata," kheun gobnyan, "sabab po teu allah hana treub le geumat peurintah sibagoe raja!" yahya nyoe kheueh ureueng jih nyang geumeukeusut le nabi yesaya lam tutoe haba gobnyan, "na ureueng geumeuhoi-meuhoi lam padang pasi, peusiab kheueh rot ueh keu tuhan; peusare kheueh rot rayeuk keu gobnyan." "yahya nyan geusok peukayan nyang teupeuget nibak bulee unta. taloe keuing gobnyan nibak kulet, dan peunajoh gobnyan daruet dan meulisan uteuen. jai that ureueng nibak yerusaleum, nibak bansaboh nanggroe yudea dan nibak daerah-daerah nyang na tinggai bansilingka krueng yordan jijak ubak yahya. awaknyan meungaku banmandum desya-desya jih, dan yahya geupumano awaknyan dalam krueng yordan. rame cit ureueng farisi dan saduki jijak ubak yahya keu geutem pumano. teuma watee geungieng awaknyan jai that jiteuka, laju geupeugah ubak awaknyan, "gata ureueng jeuhet! soe nyang peugah bahwa gata hase teupeusie nibak hukuman po teu allah nyang teuma teuka? tunyok kheueh laju deungon buet gata bahwa gata ka meutobat nibak mandum desya-desya gata. bek tapike bahwa gata hase leupah nibak hukuman deungon tapeugah bahwa nabi ibrahim na kheueh indatu gata. ingat, nibak batee-batee nyoe pih, po teu allah hase geupeujeuet keuturunan keu nabi ibrahim! pato ka siab keuneuk koh bak kayee sampoe habeh ukeue-ukeue jih. tieb-tieb bak kayee nyang hana jimuboh nyang get teuma teukoh dan teutiek u dalam apui. ulon pumano gata deungon ie sibagoe tanda bahwa gata ka tatobat nibak desya-desya gata; teuma gobnyan nyang teuma teuka oh ka ltheueh ulon, teuma geupumano gata deungon roh allah dan apui. gobnyan leubeh rayeuk nibak ulon. keu lon ba sipatu gobnyan mantong ulon nyoe hana meuguna. bak jaroe gobnyan na jeu-ee keu teutampo mandum

gandom geuh sampoe gleh. gandom gobnyan teuma teutamom didalam gupok, teuma mandum seukeuem teuma teutot didalam apui nyang hana hase teupeulon." bak watee nyan isa geujak nibak galilea ubak krueng yordan. nibak teupat nyan gobnyan geujak meurumpok ngon yahya dan laju geulakee mangat yahya geutem pumano gobnyan. teuma yahya geucuba tulak peue nyang geulakee le isa nyan. yahya geupeugah lagee nyoe, "ulon kheueh nyang sipatot jih bapak pumano. teuma bak saat nyoe bapak keudroe nyang teuka ubak ulon." teuma le isa laju geujaweueb, "peubiyeu mantong keu saat nyoe. sabab deungon na nyang lagee nyan bak saat nyoe geutanyoe ka tapeubuet bandum nyang geukeuheundak le po teu allah." laju yahya geupumano isa. oh ka ltheueh teupumano, isa laju geuteubiet lam krueng nyan. hana teusangka-sangka langet teuhah dan isa laju geukalon roh allah geutron lagee cicem mirah pati u ateeuh gobnyan. oh ltheueh nyan teudeungoe su allah nyang geupeugah, "nyoe kheueh aneuek ulon nyang ulon gaseh. jihnyoe keubiet lumpah that mangat ate lon." oh ltheueh nyan isa laju geuba le po teu allah u padang pasi mangat ji-ujoe le iblih. peuet ploh uroe peuet ploh malam isa hana geumakheun. oh ltheueh nyan baro kheueh jiteuka deuk. laju teuka iblih sira jipeugah, "gata kon aneuek allah? nah, neuyue kheueh ubak batee-batee nyoe beujeuet keu ruti." geujaweueb le isa, "didalam alkitab na teutuleh: manusia hana hase udeb deungon ruti mantong, teuma nibak tieb-tieb feureuman nyang geupeugah le po teu allah." oh ltheueh nyan iblih laju jiba isa u yerusaleum, banda suci nyan, dan jikeubah gobnyan u ateeuh pucak baet tuhan. laju iblih jipeugah ubak gobnyan, "gata kon aneuek po teu allah? meunyoe meunan, neugrob kheueh u miyueb; sabab didalam alkitab na teutuleh lagee nyoe, 'allah teuma geuyue malaikat-malaikat gobnyan geulindong gata, awaknyan teuma geusambot gata deungon jaroe awaknyan, mangat gati gata hana tupeh ateeuh batee.'" geu jaweueb le isa, "teuma lam alkitab na cit teutuleh lagee nyoe, 'bek gata ujoie tuhan po teu allah gata.'" oh ltheueh nyan iblih jiba isa ubak pucak gunung nyang paleng manyang dan jitunyok ubak gobnyan bandum keurajeuen donya deungon sigala keukayaan nyang na disinan. laju iblih jipeugah ubak isa, "bandum nyoe teuma ulon jok keu gata, meunyoe gata neutem sujut neuseumah ulon." geujaweueb le isa, "kah jak keudeh, he iblih peunggoda! dalam alkitab na teutuleh: seumah kheueh tuhan, allah gata, dan layani kheueh gobnyan mantong!" akhe jih iblih nyan laju jitinggai isa, dan malaikat-malaikat pih teuka geujak layani gobnyan. watee geudeungoe yahya pumano ka jipeutamong lam glab, isa laju geupeu siblahi droe u galilea. gobnyan geutinggai nazaret, laju geuduek di kapernaum bak bineh danau galilea di daerah zebulon dan naftali. sabab isa geupeubuet hai nyang lagee nyan, teuma teujadi kheueh peue nyang ka geupeugah le nabi yesaya: "tanoh zebulon dan tanoh naftali, bak rot jak u danau, meurandeh krueng yordan, galilea kon tanoh ureueng yahudi! bansa nyang udeb didalam seupot ka jikalon trang nyang hu muble-ble! keu nyang tinggai lam nanggroe

nyang seupot mawot ka jiteubiet cahya trang!" phon saat nyan isa laju geujak seumeugah, "meutobat kheueh nibak sigala desya-desya gata, sabab po teu allah teuma bagaih geuteuka geumat peurintah sibago raja!" watee isa teungoh geujak bak pante danau galilea, deuh geukalon dua droe neulayan, awaknyan na kheueh simon (nyang meunan petrus) deungon adoe jihnyan, andreas. awaknyan teungoh jidrob uengkot bak danau nyan deungon jeue. isa laju geupeugah ubak awaknyan bandua, "jak keunoe, seutot kheueh ulon. ulon teuma lon peurunoe gata tajak jeue manusia." ban jideungoe haba nyan awaknyan bandua langsung jibeudoh jitinggai jeue jihnyan disinan dan laju jiseutot isa. isa geujak laju, laju deuh teuma dua droe ureueng meusyedara nyang laen, awaknyan na kheueh yakobus dan yahya, aneuek-aneuek zebedeus, awaknyan meusajan-sajan deungon bapak jih keudroe teungoh cob jeue didalam peuraho. dan isa laju geutawok awaknyan, dan awaknyan laju jitiek disinan peuraho dan ureueng syiek jihnyan, laju jijak ho nyang geujak isa. di galilea, isa geukeulileng bansaboh nanggroe dan geuseumeubeuet di rumoh-rumoh iebadat. gobnyan geupeusampoe haba get bahwa po teu allah teuma geumat peurintah. dan gobnyan geupeu puleh teuma ureueng-ureueng nyang saket dan cacat. haba keuhai isa nyan ka meugah bansaboh nanggroe siria, sampoe rame that ureueng jijak bak gobnyan. awaknyan nyang teuka ubak gobnyan na teuma jiba ureueng-ureueng nyang keunong meubagoe macam peunyaket dan keusosahan. ureueng-ureueng nyang jitamong roh jeuhet, nyang saket sawan, dan nyang lapee, bandum ureueng nyan geupeu puleh le isa. jai lumpah na ureueng nyang seutot isa bak watee nyan. na nyang teuka nibak galilea, na nyang nibak siploh boh banda, nibak yerusalem, nibak yudea, dan na teuma nyang nibak nanggroe meurandeh yordan. watee isa geukalon ureueng rame nyan, laju geuek u ateuh buket. oh ka lheureu geudeuk, murit-murit gobnyan laju jijak ubak gobnyan. dan geupeuphon peurunoe awaknyan: "mubahgia kheueh ureueng nyang meurasu hana meudaya dan meugantung ubak tuhan mantong; awaknyan kheueh nyang po keurajeuen syeuruga. mubahgia kheueh ureueng nyang meuseudeh ate; allah teuma geuhibur awaknyan! mubahgia kheueh ureueng nyang miyueb ate; teuma allah geupeuwareh donya keu ureueng nyan! mubahgia kheueh ureueng nyang meuceun jipeubuet keuheundak allah; allah teuma geupeupuih ate ureueng nyan! mubahgia kheueh ureueng nyang murah ate; allah teuma murah ate keu ureueng nyan! mubahgia kheueh ureueng nyang gleh ate; ureueng lagee nyan na kheueh jituri allah. mubahgia kheueh ureueng nyang ba dame lamkawan manusia; allah teuma geu akui ureueng nyan sibago aneuek-aneuek gobnyan! mubahgia kheueh ureueng nyang meudeurita keunong ienanya sabab jipeubuet keuheundak po teu allah; ureueng nyan kheueh nyang po keurajeuen syeuruga! mubahgia kheueh gata meunoye jihina, ji-ienanya, dan jipiteunah meusabab le ulon. nabi-nabi nyang udeb sigohlom gata pih ka ji-ienanya lagee nyan. meusuka cita kheueh dan meugeumbira kheueh, sabab raya that

upah nyang geubri le tuhan keu gata." "gata na kheueh sira donya. meunoye sira ka jeuet keu tabeue, peu kheueh mungken teupeumasen lom? hana meunguna le, teuma jitiek dan jigiloe-giloe le gob. gata na kheueh trang donya. banda nyang teudeuk di ateuh buket hana mungken hase teusom. hana ureueng nyang peuhu panyot, laju jigom panyot nyan deungon guci. ureueng nyan teuma jikeubah panyot nyan bak teumpat panyot, mangat jeuet peungeh keu mandum ureueng nyang na lam rumoh. meunan cit trang gata haroh meucahya dikeue ureueng, mangat awaknyan jikalon buet-buet gata nyang get, laju ji pujoe bapak gata di syeuruga." "bek kheueh ta anggal ulon nyoe lon teuka keuneuk jak sampoh hukom nabi musa dan peungajaran nabi-nabi. ulon teuka bukon keuneuk sampoh nyan, teuma keuneuk tunyok makna nyang sibeuna jih. ingat kheueh! simantong bumoe dan langet mantong na, saboh hurof atawa titek nyang paleng ubit pih nyang na lam hukom nyan, hana teuma teusampoh, meunoye mandum nyang gohlom teujadi! ngon sabab nyan, barang sigasoe nyang iengkeue saboh mantong nibak peurintah-peurintah nyan, bahpih nyang paleng ubit, dan jipeurunoe ureueng laen mangat jipeuget lagee nyan cit teuma, teuma jeuet nyang paleng ubit lamkawan umat allah. seubalek jih, barang sigasoe nyang jipeubuet peurintah-peurintah nyan dan jipurunoe ureueng laen mangat jipeubuet lagee nyan cit teuma, ureueng nyan teuma jeuet keu rayeuk di teungoh-teungoh umat allah. jadi, ingat kheueh: gata hana mungken jeuet keu umat po teu allah, meunoye hana leubeh nibak guree-guree agama dan ureueng-ureueng farisi lam hai tapeubuet keuheundak po teu allah!" "meunoye tapeupeue bahwa indatu geutanyoe na meuteume ajaran nyang lagee nyoe: bek seumeupoh mate; barang sigasoe seumupoh mate, ureueng nyang lagee nyan haroh teuadili. teuma jinoenoye ulon peugah ubak gata, barang sigasoe beungeh ubak ureueng laen, teuma teuadili; dan barang sigasoe nyang seurapa ureueng laen, ureueng nyan teuma teupeusidang dikeue mahkamah agama. dan barang sigasoe nyang peugah ubak ureueng laen, 'bangai', ureueng nyang kheun wajib teutiek lam apui nuraka. ngon sabab nyan, meunoye sidroe lamkawan gata teungoh jipeuseumah meuneubri jihnyan ubak po teu allah, dan laju teu-ingat bahwa na ureueng nyang saket ate keu jihnyan, bah kheueh teutinggai ilee nyang jipeuseumah nyan dikeue miseubah, laju jijak meudame ngon ureueng nyan. oh lheureu nyan, baro kheueh jeuet jigisa lom teuma jijak peuseumah meuneubri jih nyan ubak allah. seukira jih na ureueng nyang jijak gadu gata ubak gantoe mahkamah, meudame kheueh ngon ureueng nyan singoh na watee sigohlom trok ubak kanto mahkamah. meunoye han, ureueng nyan teuma jijok gata ubak hakem, nyang teuma seurah gata ubak peulisi, dan le peulisi laju jipeutamong gata u dalam glab. dan ingat kheueh: pasti gata hana hase tateubiet lam glab nyan, sigohlom mandum denda gata lunaih teubayeue." "gata tapeupeue bahwa na ajaran lagee nyoe: bek meumukah. teuma bak saat nyoe ulon peugah ubak gata: barang sigasoe watee jigieug ureueng inong deungon nafeusu gurangsang,

ureueng nyan ka jimeumukah ngon inong nyan lam ate jih. meunyo mata uneuen gata jeuet keu sabab gata meudesa, cungk kheueh dan gata boih kheueh mata nyan! leubeh get gadoh saboh anggota tuboh gata nibak bansaboh tuboh gata teutot lam apui nuraka. meunyo jaroe uneuen gata jeuet keu sabab gata meudesa, takoh dan tabohi kheueh jaroe nyan! leubeh get gadoh jaroe gata sibalih nibak bansaboh tuboh gata teutot lam apui nuraka." "na cit peulajaran lagee nyoe: tieb-tieb ureueng nyang jitaleuk peurumoh jih, haroh jikok surat taleuk ubak inong nyan. teuma jinoenyo ulon peugah ubak gata: barang sigasoe nyang taleuk peurumoh jih padahai peurumoh jih nyan hana jimeumukah ngon agam laen, teupeusabab peurumoh jih nyan ka meumukah, meunyo peurumoh jih nyan jimeukawen lom. dan barang sigasoe nyang meukawan ngon inong nyang ka teutaleuek nyan, teuma nyan ka jimeumukah." "gata tateupeu bahwa nibak ajaran indatu geutanyoe na meuteume ajaran nyang lagee nyoe: bek mungkie janji. peue nyang ka gata meujanji deungan sumpah dikeue po teu allah, nyan haroh gata peubuet. teuma jinoenyo ulon peugah ubak gata: bek sagai-sagai mubudok, bah kheueh deumi langet, sabab langet na kheueh takhta po teu allah, meunan cit deumi bumoe, sabab bumoe na kheueh lapek kaki gobnyan: atawa deumi yerusalem, sabab nyan kheueh banda raja rayeuk. meunan cit bek meubudok deumi ulee gata, sabab gata keudroe hana hase tapeujeuet ok gata buputeh atawa itam, bahpih meusion mantong. peugah mantong, 'nyoe' atawa 'han' – leubeh nibak nyan teuka jih nibak si iblih." "gata tateupeu bahwa na cit peungajaran nyang lagee nyoe: mata gantoe mata, gigo gantoe gigo. teuma jinoe ulon peugah ubak gata: bek gata balaih dam keu ureueng nyang jipeubuet jeuhet u ateuh gata. seubalek jih, meunyo na ureueng jitampa mieng gata nyang blaih uneuen, bah kheueh jitampa mieng blaih wie gata. dan meunyo na ureueng jigadu gata ubak hakem sira jilakee bajee gata, taujok kheueh laju ubak ureueng nyan meusigoe ngon bajee jubah gata. meunyo na sidroe peunguasa jipaksa bak gata jiyue gulam barang gob nyan jioh jih sikilo metee, tagulam kheueh beujioh sampoe trok dua kilo metee. meunyo na ureueng jilakee sapueu-sapeue ubak gata. dan bek cit tatulak ureueng nyang keuneuk lakee ngui sapueu-sapeue nibak gata." "gata tateupeu bahwa na cit peungajaran lagee nyoe: cinta kheueh keu rakan-rakan gata dan banci kheueh keu musoh-musoh gata. teuma jinoenyo ulon peugah ubak gata: cinta kheueh musoh-musoh gata, dan meudoa kheueh ureueng-ureueng nyang ienanya gata, mangat gata jeuet keu aneuek-aneuek bapak gata di syeuruga. sabab po teu allah geupeuteubiet mata uroe gobnyan keu ureueng nyang jroh dan meunan cit keu ureueng nyang jeuhet. gobnyan geupeutron ujeuen keu ureueng nyang peubuet suroh dan keu nyang peubuet jeuhet. sabab meunyo gata tagaseh ubak ureueng nyang gaseh gata mantong, keupeue guna jih po teu allah haroh geubalaih buet gata nyan? bukon kheueh ureueng nyang kuteb cukee pih jipeubuet lagee nyan? dan meunyo gata tabeout saleuem teuma keu rakan-rakan gata mantong, peu kheueh istimewa

jih? ureueng-ureueng nyang hana jituri keu allah pih jipeubuet lagee nyan! bapak gata di syeuruga geugaseh ubak bandum ureueng deungan sampoe-una. dan gata pih beutagaseh cit lagee nyan." "ingat kheueh, bek tapeubuet keuwajeban agama dikeue ureueng rame mangat jikalon le gob. meunyo lagee nyan gata peubuet, gata hana teuma geubri upah le bapak gata di syeuruga. jadi, meunyo gata tajok seudeukah keu ureueng gasien, bek kheueh tapeugah keudeh-keunoe hai nyan lagee nyang jipeubuet le ureueng munafek. awaknyan galak jipeubuet lagee nyan lam rumoh iebadat dan bak rot ueh raya, mangat jikalon dan jipujoe le gob. ingat kheueh, awaknyan ka jiteurimong upah jihnyan. teuma gatanoye, meunyo gata tajok seudeukah, tabri kheueh nyan deungan seungab-seungab, sampoe hana nyang teupeu. bah kheueh buet gata nyang mulia nyan hana jiteupeu le ureueng laen, seulaen bapak gata nyang na lam syeuruga. gobnyan geukalon buet gata nyang teusom nyan dan teuma teubri upah ubak gata." "meunyo gata nemeudoa, bek kheueh lagee ureueng nyang galak meupura-pura. awaknyan galak meudoa sira jidong nibak rumoh iebadat bak simpang rot mangat jikalon le gob. ingat kheueh, nyan kheueh upah nyang ka awaknyan teurimong. teuma meunyo gata meudoa, tamong kheueh lam bilek dan tatob kheueh pintoe, dan meudoa kheueh ubak bapak gata nyang hana leumah nyan. teuma bapak gata nyang ngieng buet gata nyang teusom teuma geubri upah keu gata. meunyo gata meudoa, bek kheueh meutelee-teelee lagee ureueng nyang hana jituri tuhan. awaknyan jipike peue nyang jilakee nyan geuteurimong le tuhan sabab doa awaknyan nyang panyang nyan. bek lagee awaknyan. bapak gata ka geuteupeue peue nyang gata peureulee, sigohlom gata lakee. jadi meunyo meudoa-meudoa kheueh lagee nyoe, bapak kamoe nyang na dalam syeuruga: beuteupeu kudos kheueh nan droeneueh, beuteuka kheueh keurajeuen droeneueh, beujeuet kheueh keuheundak droeneueh, dibumoe lagee lam syeuruga. beuneubri kheueh peunajoh kamoe nibak uroeunyo nyang kamoe peureulee. beuneupeu amphon kheueh desya kamoe lagee kamoe ka meupeamphon ureueng nyang meudesa ateuh kamoe. dan bek kheueh neuba kamoe lam peucubaan, teuma beuneu peulheueh kheueh kamoe nibak si jeuet. kareuna droeneueh kheueh nyang po keurajeuen, dan kuasa dan keumuliaan sampoe siumu masa. amin. meunyo gata tapeumamphon ureueng nyang meusalah ubak gata, bapak gata nyang na lam syeuruga pih geupeu-amphon keusalahan gata. teuma meunyo gata hana tapeumamphon keusalahan ureueng laen, bapak gata nyang na lam syeuruga pih hana geupeu-amphon keusalahan gata." "meunyo gata tapuasa, bek kheueh tapeuleumah ie muka masam lagee ureueng nyang galak meupura-pura. awaknyan ji-ubah ie muka jih nyan mangat ureueng laen jiteupeu bahwa jih nyan teungoh puasa. ingat kheueh, nyan kheueh upah nyang ka awaknyan teurimong. teuma meunyo gata puasa, jak rhah kheueh muka gata dan sugot kheueh ok gata, mangat hana nyang teupeu bahwa gatanoye teungoh puasa, keucuali bapak gata nyang hana leumah nyan

mantong nyang teupeu. gobnyan deuh geukalon buet kata nyang teusom nyan dan teuma geubri upah keu gata." "bek kheueh peusapat hareuta keu droe gata keudroe lam donya nyoe, nibak teumpat keuraleueb dan geuratan jipeurusak atra gata nyan dan pancuri teuka jijak keu atra gata. nyang siget jih, peusapat kheueh hareuta lam syeuruga, nibak teumpat keuraleueb dan geuratan hana hase jipeurusak, dan pancuri hana jiteuka keuneuk jak cue. sabab, dipat na hareuta gata, disinan cit teuma ate gata!" "mata na kheueh panyot keu tuboh. meunyo mata gata jeureuneh, bansaboh tuboh gata pih trang muble-ble. teuma meunyo mata gata rabon, ban saboh tuboh gata glab gulita. teuma meunyo panyot lam tuboh gata nyan seupot, keubiet that seupot jih gulita nyan!" "hana meusidro manusia pih hase jimeubuet meunyo keu dua droe toke. sabab ureueng nyang leubeh jigaseh ubak nyang sidroe nibak nyang laen. atawa ureueng nyan leubeh seutia ubak toke nyang sidroe nibak toke nyang laen. meunan cit deungon gatanyo. gata hana hase tameubuet keu allah dan keu atra beunda gata. sabab nyan ingat kheueh; bek kheueh gundah keuhai udeb gata, na kheueh peue nyang keuneuk gata pajoh dan gata jieb, atawa peue nyang teuma gata ngui. bukan kheueh udeb nyoe leubeh nibak peunajoh, dan tuboh leubeh nibak peukayan? ngieng kheueh cicem po di manyang. jihnyan hana jipula sapeue, hana jimupot, dan hana teuma jikeubah hase sinaman jihnyan lam gupek keu jipajoh. bahpih lagee nyan bapak gata di syeuruga teutab geupeulara awaknyan! bukan kheueh gata jioh leubeh meuyuem nibak cicem? soe kheueh lamkawan gatanyo ngon ate nyang gundah hase jipeupanyang umu jih bahpih mubacut mantong? pakon gata khawate keuhai peukayan gata? ngieng kheueh bungong-bungong bakong nyang timoh lam padang. bungong-bungong nyan hana jimubuet dan hana teuma jimeurajot; teuma nabi sulaiman nyang leubeh kaya pih, hana jingui peukayan lagee bungong-bungong nyan! naleueng lam padang uroe nyoe timoh dan singoh ka habeh teutot. teuma po teu allah geupeusanet naleueng nyan sampoe gagah bukan le. peu kheueh gatanyo! teuma gata kureueng peucaya! bek khawate dan tapeugah, 'peue nyang teuma tanyoe pajoh,' atawa 'peue nyang teuma geutanyoe ngui?' hai-hai nyang lagee nyan sabe jitiyeub le ureueng-ureueng nyang hana jituri allah. padahai bapak gata nyang di syeuruga geuteupeue bahwa gata peureulee bandum nyan. jadi, useuha kheueh leubeh dilee mangat po teu allah geupeurintah ateueh udeb gata dan peubuet kheueh keuheundak gobnyan. teuma mandum nyang laen teuma geubri le allah ubak gata. ngon sabab nyan, bek kheueh khawate keu uroe singoh. sabab singoh na lom khawate jih keudroe. uroe nyoe ka seb keusosahan jih, hana peu teutamah le." "bek kheueh tapeusidang ureueng laen, mangat gata pih hana jisidang le po teu allah. sabab lagee toh gata peusidang ureueng laen, meunan teuma po teu allah teuma geupeu sidang gata. dan ukoran nyang gata peuguna keu ureueng laen, nyan pih teuma geupeu guna le po teu allah keu gata. pakon nyang deuh gata ngieng rabok kayee lam mata syedara gata,

seudangkan balok lam mata gata keudroe hana gata kalon? pakriban gata jeuet tapeugah ubak syedara gata, 'ba keunoe jeuet lon cungkeng rabok kayee nyang ubit nyan lam mata gata,' seudangkan lam mata gata keudroe na balok? he munafek! peuteubiet kheueh leubeh dilee balok nyang na lam mata gata keudroe, baro kheueh jeuet gata ngieng deungon nyata, dan jeuet gata peuteubiet rabok kayee nyang na lam mata syedara gata. bek tabri barang nyang suci ubak asee, mangat asee nyan hana jigisa jiseurang gata. dan bek tabri mutiara ubak bui, mangat bui nyan hana jigiloe-giloe mutiara nyan." "lakee kheueh, gata teuma tateurimong. mita kheueh, teuma gata meuteume. tok-tok kheueh, pintoe teuma jipeuhah keu gata. sabab ureueng nyang meulakee teuma jiteurimong; ureueng nyang mita teuma meuteume; dan ureueng nyang tok-tok pintoe, teuma teupeuhah. lamkawan gata peu kheueh na sidroe ayah jibri batee keu aneuk gobnyan, meunyo aneuk nyan jilakee ruti? atawa geujok uleue, meunyo aneuk nyan jilakee uengkot? bah pih gata jeuhet, gata tateupeue cit meuneubri nyang get keu aneuk-aneuk gata. peu kheueh lom bapak gata di syeuruga! gobnyan leubeh lom geubri nyang get ubak ureueng nyang meulakee ubak gobnyan. peusanet kheueh ureueng nyan lagee gata meuheuet jipeusanet le awaknyan. laen kheueh inti hukum nabi musa dan ajaran nabi-nabi." "tamong kheueh rot pintoe nyang sampiek, sabab pintoe nyang teutuju dan rot jak ubak nuraka rayeuk dan luwah, dan rame ureueng nyang jak rot nyan. teuma sampiek dan payah that meunyo pintoe nyang teuba ureueng ubak jalan udeb. dan na bacut mantong ureueng nyang meuteume rot nyang sampiek nyan." "ate-ate kheueh teuhadah nabi-nabi peuleusu. awaknyan jijak ubak gata jipeurupa droe lagee bubiri, teuma awaknyan nyang sibeuna jih na kheueh lagee asee srigala nyang juah. gata teuma taturi awaknyan nibak hase nyang jipeubuet. tamah meuduro hana teuma jipeuhase boh anggo, dan seumak meuduro hana teuma jipeuhase boh ara. nibak bak kayee nyang subo teuma meuteume boh kayee nyang get, dan nibak bak kayee nyang hana subo teuma jimuboh nyang brok. bak kayee nyang subo hana jipeuhase boh nyang brok, dan bak kayee nyang hana subo hana teuma jipeuhase boh nyang get. tieb-tieb bak kayee nyang hana jipeuhase boh nyang get, laju teukoh dan teutot lam apui. meunan cit deungon nabi-nabi peuleusu. gata teuma taturi awaknyan nibak hase nyang jikeureuja." "bukan bandum ureueng nyang jitawok-tawok ulon, 'tuhan, tuhan,' teuma jeuet keu anggota umat allah, teuma ureueng-ureueng nyang jipeubuet keuheundak bapak ulon nyang di syeuruga. bak uroe kiamat rame ureueng teuma jipeugah ubak ulon, 'tuhan, tuhan, bukan kheueh deungon nan droeneueh, kamoe ka kamoe peusampoe peusan po teu allah? dan bukan kheueh deungon nan tuhan teuma kamoe ka kamoe use roh-roh jeuhet dan jai that kamoe peubuet buet-buet nyang ajaeb?' teuma ulon jaweueh, 'ulon hantom na meuturi ngon gata! weeh keudeh, gata nyang peubuet keujeuhetan!' " "nah, ureueng nyang deungoe tutoe haba lon nyoe, dan jipeubuet lagee lon peugah, saban lagee ureueng carong geupeudong

rumoh di ateuh batee. oh watee jitron ujeuen, ie raya teuka, dan angen badee teuka jiheuntam rumoh nyan, rumoh nyan hana reubah bak rumoh nyan teupeudong di ateuh batee. dan ureueng nyang deungoe tutoe haba lon nyoe, teuma hana jipako lagee lon peugah, ureueng nyan saban lagee ureueng bangai nyang jipeudong rumoh di ateuh anoe. oh watee jitron ujeuen, dan ie raya teuka meunan cit deungon angen badee raya teuka jiheuntam rumoh nyan, rumoh nyan reubah, dan rusak nibak rumoh nyan hibat lumpah na!" akhe jih isa seulesoe geuseumeubeuet, dan ureueng-ureueng nyang na disinan hireuen lumpah na watee jideungoe ajaran gobnyan. sabab gobnyan seumeubeuet deungon wibawa, hana lagee guree-guree agama awaknyan. isa geutron nibak buket, dan rame that ureueng nyang seutot gobnyan. bak watee nyan teuka kheueh ubak gobnyan sidroe ureueng nyang meupeunyaket kulet nyang lumpah parah. ureueng nyan laju meuteutot dikeue isa, sira jipeugah, "pak, meunyo bak neutem, bakpake neupeupuleh ulon." isa laju geumat ureueng nyan sira geupeugah, "ulon tem. bupuleh kheueh!" watee nyan cit teuma peunyaket ureueng nyan gadoh. laju isa geupeugah ubak ureueng nyan, "ingat kheueh! bek tapeugah ubak soe mantong. teuma tajak kheueh ubak teungku imeum, dan lakee ubak gobnyan keu nyang pasti bahwa gata ka puleh. oh ka ltheueh nyan peuseumah kheueh keureubeuen nyang ka geupeurintah le nabi musa, sibagoe bukeuti ubak ureueng laen bahwa gata beutoi ka puleh!" watee isa geutamong u kapernaum, na sidroe peuwira roma jijak murumpok deungon gobnyan, dan jilakee tulung ubak gobnyan. "bakpak," kheun peuwira nyan, "peulayan ulon brat that saket di rumoh. peulayan lon nyan ka teueh dan lapée bak teupat eh dan lumpah meudeurita." geupeugah le isa, "ulon teuma lon jak peupuleh jihnyan." "bek pak," kheun peuwira nyan, "ulon hana layak lon teurimong bakpak di rumoh ulon. bakpak peurintah mantong. euentek peulayan lon nyan ka puleh. sabab ulon pih haroh tundok ubak peurintah atasan. dan dimiyueb ulon mantong cit sipa-i-sipa-i nyang haroh tundok ubak peurintah ulon. meunyo ulon yue sidroe sipa-i, "jak laju!" sipa-i nyan pih jijak. ulon peugah teuma ubak nyang laen, 'jak keunoe!' teuma ureueng nyan pih jiteuka; dan meunyo ulon peurintah namiet ulon, 'peuget kheueh nyoe!' teuma di namiet nyan pih laju jipeuget." watee isa geudeungoe peue nyang jipeugah le peuwira nyan, gobnyan kagum lumpah na. laju gobnyan geupeugah ubak ureueng-ureueng nyang seutot droe geuh, "hebat that ureueng nyoe. lamkawan ureueng israel pih gohlm on lae teume iman nyang rayek lagee ureueng nyoe! keubiet! jai that ureueng nyang teuka nibak timu ngon barat keujijak meusukaria meusajan-sajan nabi ibrahim, nabi ishaq, nabi yakub di dalam donya baro allah. padahai ureueng-ureueng nyang seuharoh jih jeuet keu umat po teu allah teuma teutiek u dalam seupot di luwa. disinan awaknyan teuma jimoe ba-e dan meudeurita." laju isa geupeugah ubak peuwira nyan, "woe kheueh, peue nyang gata peucaya nyan teuma teujadi." dan bak saat nyan cit teuma peulayan nyan puleh. isa

laju geujak u rumoh petrus. disinan geukalon mak tuwan si petrus teungoh saket deumam bak teupat eh. isa laju geumat jaroe ureueng nyan, dan deumam ureueng nyan pih gadoh. oh ltheueh nyan di ureueng nyan laju jibeudoh dan jilayani isa. watee uroe karab seupot, di ureueng laen laju jiba ubak isa ureueng-ureueng nyang ka jitamong roh jeuhet. dan deungon sikrek haba mantong, isa laju geu-use roh-roh jeuhet nyan geupeu puleh bandum ureueng nyang saket. isa geupeubuet bandum nyan, dan deungon nyan teuma teujadi kheueh peue nyang ka geupeugah le nabi yesaya, "gobnyan geutanggong peundeuritan tanyoe dan geupeu puleh peunyaket geutanyoe." jai lagoena ureueng di seukeulileng isa. watee geukalon le isa awaknyan bandum, gobnyan laju geuyue ubak murit-murit geuh keuteujeumeurang danau. laju teuka ubak gobnyan sidroe guree agama sira jipeugah, "bakpak guree, ulon keuneuk seutot bakpak ho mantong neujak!" geujaweueh le isa, "asee srigala na uruek, dan cicem po na eumpung, teuma aneuek manusia hana meuteupat eh." dan sidroe teuk murit gobnyan nyang laen jipeugah, "bakpak, neupeu-idhin kheueh ubak ulon mangat lon peutamong lam jrut ureueng syiek ulon nyang ka meuningsgai." geujaweueh le isa, "seutot mantong ulon, dan bah kheueh ureueng mate jipeukubu ureueng mate jih keudroe." isa laju geu-ek ateuh peuraho meunan cit deungon murit-murit gobnyan sajan seureuta. hana teusangka-sangka angen badee teuka hibat lumpah na sampoe ie lam danau meuguncang dan peuraho awaknyan jipoh le umbak meuhayak hana meuteuntee. watee angen badee nyan teuka isa teungoh geueh. teuma murit-murit gobnyan laju jijak ubak gobnyan sira jipugo jiyue beudoh. "bakpak! he bakpak! neutulong! geutanyoe ka cilaka!" kheun awaknyan. "pakon gata teumakot?" kheun isa. "peu kheueh gata kureueng peucaya keu ulon!" oh ltheueh nyan isa laju geudong dan geudhot laju angen badee dan ie danau nyang meu-umbak nyan. dan watee nyan cit teuma ie danau nyan ka jeuet keureda. murit-murit isa hireuen. awaknyan jimarit sabe keudroe-droe, "ureueng peu kheueh gobnyan nyoe, sampoe angen dan umbak pih jituot peurintah gobnyan!" isa ka trok u meurandeh danau di daerah gadara. nibak teupat nyan na dua droe ureueng nyang ka jitamong roh jeuhet jijak murumpok ngon gobnyan. ban dua droe ureueng nyang ka jitamong roh jeuhet nyan ganah dan juwah lumpah na, sampoe hana meusidroe pih nyang jijeuet jak rot nyan. awaknyan laju jiteubiet nibak lam guha-guha jirat sira jidumpek lagee nyoe jipeugah, "he aneuek allah, peue nyang teuma neupeulaku ateuh kamoe? peu kheueh droeneueh keuneuk seksa kamoe bahpih watee jih gohlm trok?" hana jioh nibak teupat nyan, jai that-that bui teungoh jimita uempeuen. roh-roh jeuhet nyan jilakee laju ubak isa, "meunyo droeneueh neuyue ubak kamoe mangat kamoe teubiet, yue kheueh laju ubak kamoe mangat kamoe tamong lam tuboh bui-bui nyan." "teubiet!" geukheun le isa. teuma roh-roh jeuhet nyan laju jiteubiet nibak tuboh bandua droe ureueng nyan, dan laju jijak tamong u dalam tuboh bui-bui nyang teungoh mita uempeuen nyan. dan di bui-bui

nyan pih laju jiplueng dan jilumpat nibak bineh reuleueng u dalam danau sampoe habeh lham. di ureueng-ureueng nyang rabe bui nyan laju jiplueng u dalam banda dan jipeugah laju peue-peue nyang ban ltheuh jikalon nyan, meunan cit jipeugah peue nyang ka teujadi ateuah dua droe ureueng nyang ka jitamong roh jeuhet nyan. teuma bandum ureueng nyang na lam banda nyan pih laju jijak meurumpok ngon isa. watee awaknyan jikalon isa, awaknyan jilakee deungon meuharab that mangat isa geutinggai laju teupat nyan. isa laju geu-ek dalam peurah, laju geujeumeurang danau, geuwoe u gampong leuen gobnyan. disinan le ureueng rame laju jiba ubak gobnyan sidroe ureueng lapee nyang teu-eh dalam tika. watee isa geukalon padub na rayeuk iman ureueng rame nyan, gobnyan laju geupeugah ubak ureueng lapee nyan, 'tabah kheueh, he aneuek ulon! desya-desya gata ka teupeu-amphon.' na meupadub droe guree agama nyang na disinan jikheun lam ate jih, "ureueng nyoe jihina allah!" isa geuteupeue pikeran awaknyan, jadi gobnyan geupeugah, "pakon pikeran gata lumpah that jeuhet? toh nyang leubeh mudah: teupeugah, 'desya gata ka teupeu-amphon,' atawa teupeugah, 'beudoh kheueh dan jak kheueh laju?' teuma bak saat nyoe ulon teuma lon bri bukeuti ubak gata bahwa di ateuah bumoe nyoe aneuek manusia meukuasa keu teupeu-amphon desya." laju isa geupeugah ubak ureueng lapee nyan, "beudoh, cok tika gata dan woe kheueh laju u rumoh gata!" ureueng lapee nyan pih jibeudoh dan laju jiwoe u rumoh jih keudroe. watee ureueng rame jikalon hai nyang lagee nyan, awaknyan lumpah teumakot dan laju jipujoe allah, sabab po teu allah ka geubri kuasa nyang paleng rayeuk ubak manusia. oh ltheuh nyan isa geutinggai teupat nyan. teungoh geujak, deuh geukalon sidroe ureueng tukang kuteb cukee, nan ureueng nyan matius, teungoh geuduek bak kanto cukee gobnyan. isa geupeugah ubak ureueng nyan, "jak keunoe, seutot ulon!" teuma matius laju geudong dan geuseutot isa. watee isa teungoh geumakheun di rumoh matius, jai lumpah na teuka ubak gobnyan tukang kuteb cukee dan ureueng-ureueng nyang jianggab hana get le masyarakat, awaknyan pih laju jimakheun meusajan isa dan murit-murit gobnyan. na ureueng-ureueng farisi nyang jikalon hai nyan. dan awaknyan jiteumanyong ubak murit-murit isa, "peue sabab jih guree gata geumakheun meusajan ureueng-ureueng tukang kuteb cukee dan ureueng-ureueng hana get nyan?" isa geudeungoe peue nyang jitanjong le awaknyan dan laju geujaweueb, "ureueng nyang seuhata hana peureulee dokto, nyang peureulee keu dokto na kheueh keu ureueng saket. tilek kheueh peue makna jih ayat alkitab nyoe: 'nyang ulon keuhendaki gaseh sayang, dan bukan beulatang keureubeuen,' sabab ulon teuka bukan lon tawok ureueng nyang jianggab droe jih ka get, teuma ureueng nyang jianggab hina." oh ka ltheuh nyan murit-murit nabi yahya pumano geujak meurumpok deungon isa. laju awaknyan geutanyong, "pakon kamoe dan ureueng-ureueng farisi puasa dan murit bapak hana?" geujaweueb le isa, "pakriban meunurot gata? peu kheueh jeuet jame-jame bak teupat khanuri ureueng meukawen

meuseudeh ate meunyoee teungku linto agam mantong na meusajan awaknyan? teuntee hana! teuma teuka watee jih teungku linto agam nyan teucok nibak awaknyan. watee nyan baro kheueh awaknyan jipuasa. hana ureueng nyang tampai bajee tuha deungon aja baro. sabab ija sinampai nyan teuma keunyuete akhe jih bajee nyan teupriek leubeh rayeuk lom. meunan cit hana ureueng nyang jiroe ie anggo baro dalam baluem kulet nyang ka tuha. sabab baluem nyan teuma beukah dan rusak, dan ie anggo lam baluem nyan laju ro uluwa. anggo baro haroh teuleng lam baluem nyang baro, mangat bandua nyan teutab get." teungoh isa geupeugah haba ubak murit-murit yahya pumano, teuka kheueh ubak gobnyan sidroe peumimpin rumoh iebadat. ureueng nyan jimeuteuot dikeue isa sira ji peugah, "aneuek inong lon banmantong meuninggai donya. teuma, lon harab neutem kheueh jakmat aneuek ulon nyan mangat jeuet udeb lom teuma." isa laju geubeudoh dan geujak laju deungon murit-murit gobnyan u rumoh ureueng nyan. bak teungoh rot ueh na teuma sidroe inong nyang ka dua blaih thon treb jih saket peundarahan nyang na hubungan deungon he jihnyan, jijak meurumpok laju ngon isa nibak likot. ureueng nyan geupike, "asai ta cukeh mantong bajee jubah gobnyan, ulon teuma puleh." oh ltheuh jipike lagee nyan laju jicukeh bajee jubah isa. watee nyan cit teuma isa geupaleng dan geukalon inong nyan laju geupeugah ubak gobnyan, "tabah kheueh, aneuek ulon! sabab gata tapeucaya keu ulon, gata puleh!" bak watee nyan cit teuma inong nyan puleh. oh ltheuh nyan isa laju trok u rumoh peumimpin iebadat nyan. watee geukalon peumeuen-peumeuen biula meukabong dan jai that-that nyang riah, laju geupeugah ubak awaknyan, "teubiet kheueh gata banmandum! aneuek nyoe hana mate, na kheueh teunget." awaknyan bandum jipeukem isa. oh ka jiteubiet awaknyan bandum, isa laju geutamong lam bilek aneuek nyan sira geumat jaroe jih. dan laju jibeudoh aneuek inong nyan. haba nyan sampoe ka meugah bansaboh daerah nyan. isa laju geujak nibak teupat nyan dan na dua droe ureueng buta jiseutot gobnyan rot likot. awaknyan jiteumawok, "he aneuek nabi daud, neugaseh kheueh keu kamoe!" watee isa geutamong lam rumoh nyan, bandua droe ureueng buta nyan jijak ubak gobnyan. isa laju geutanyong ubak awaknyan, "peu kheueh gatanoye tapeucaya bahwa ulon nyoe hase lon peupuleh gata?" "peucaya, pak!" jaweueb awaknyan. laju isa geumat mata awaknyan sira geupeugah, "sabab gata peucaya, teuma beujeuet kheueh peue nyang gata lakee." teuma awaknyan ka jeuet jimeungieng. isa geupeu-ingat ubak awaknyan deungon kreueh, mangat bek jipeugah hai nyan ubak soe mantong. teuma awaknyan laju jijak dan jipeugah teuma keuhai isa nyan u tieb-tieb daerah. watee bandua droe awaknyan ka jijak, na sidroe ureueng kalu nyang ka jikuasa le roh jeuhet laju jiba ubak isa. isa laju geu-use roh jeuhet nyan dan bak watee nyan cit ureueng kalu nyan ka jeuet jipeugah haba. ureueng rame nyan hireuen dan jimarit sabe keudroe-droe, "gohlom na kamoe kalon nyang lagee teujadi di israel." teuma ureueng-ureueng farisi jipeugah, "ubak

roh-roh jeuhet kheueh nyang brijihnyan meukuasa keu juse roh-roh jeuhet nyan." meunan kheueh sabe isa geukeulileng nibak banda nyang saboh u banda nyang laen, dan nibak gampong nyang saboh u gampong nyang laen. gobnyan geupeubeut ureueng laen di rumoh-rumoh iebadat, dan geupeusampoe haba get keuhai pakriban po teu allah geumat peurintah sibagoe raja. gobnyan geupeu puleh ureueng-ureueng nyang meudeurita meubagoe macam peunyakot dan nyang cacat tuboh. watee isa geukalon ureueng rame nyan, gobnyan weueh that-that keu awaknyan, sabab awaknyan ka bingung dan hana meudaya, lagee bubiri hana tukang rabe. laju isa geupeugah ubak murit-murit geuh, "nyang teupot jai that, teuma tukang pot nyang bacut. sabab nyan lakee kheueh ubak ureueng po lampoh nyan mangat jikirem ureueng pot hase lamdroe gobnyan." bak siuroe isa geuhoi ban dua blaih droe murit gobnyan keu geujak meusapat. laju geubri ubak awaknyan kuasa mangat jeuet geu-use roh-roh jeuhet meunan cit jeuet geupeu puleh sigala macam peunyakot dan meubagoe macam cacat tuboh. nan bandua blaih droe rasui nyan na kheueh: nyang keu phon, simon (nyang geuhoi ngon nan petrus) deungon syedara gobnyan andreas, laju yakobus ngon syedara gobnyan yahya, awaknyan na kheueh aneuk-aneuk zebedeus. oh lleueh nyan philipus dan bartolomeus, deungon tomas, dan matius, tukang kutub keuke meunan cit yakobus aneuk alfeus, dan tadeus; dan nyang paleng akhe simon, si patriot dan yudas iskariot nyang meukhianat ubak isa. ban dua blaih droe rasui nyan laju geu-utus le isa deungon geubri peutunok-peutunok lagee nyoe, "bek kheueh gata jak u daerah nyang kon daerah ureueng yahudi. dan bek cit teuma u banda-banda ureueng samaria. teuma tajak kheueh ubak ureueng-ureueng israel, khusus jih ubak awaknyan nyang sisat. neupeugah kheueh ubak awaknyan bahwa po teu allah deungon sigra geumat peurintah sibagoe raja. neupeupuleh kheueh ureueng-ureueng nyang saket; peu-udeb kheueh ureueng nyang ka mate; gepuleh kheueh ureueng nyang keunong peunyakot kulet nyang cukob parah, dan neu-use kheueh roh-roh jeuhet. gata ka neuteurimong bandum nyan deungon cuma-cuma. teuma, neubri kheueh atra nyan deungon cuma-cuma. bek neuba peng meuh, peng pirak atawa peng teumaga. meunan cit bek teuma neuba baluem seudeukah, atawa dua on peukawan keu beukai gata nibak teupat tugaih, atawa sipatu, atawa pih tungkat. sabab ureueng nyang meukeureuja ka sipatot jih teujamin peue-peue nyang jipeureulee. meunyo gata ka trok u banda atawa gampong, neumita kheueh sidroe ureueng nyang geutem teurimong gata. tinggai kheueh ngon ureueng nyan sampoe gata neujak ho laen teuma. watee gata neutamong lam rumoh, neupeugah kheueh lagee nyoe, "seumoga tuhan geubri beureukat ubak gatanyo." meunyo ureueng-ureueng lam rumoh nyan geuteurimong gata, bah kheueh saleuem gata nyan teutab nibak awaknyan. teuma meunyo awaknyan hana jiteurimong gata, neutarek kheueh lom teuma saleuem gata nyan. meunyo na rumoh atawa banda nyang hana jitem

teurimong gata atawa hana jitem deungoe gata, neutinggai laju teupat nyan dan geureutok kheueh abee nyang na bak tapak gaki gata. ingat kheueh! bak uroe kiamat, ureueng banda sodom dan gomora teuma leubeh mudah geupeu-amphon le allah, nibak ureueng-ureueng nyang na di banda nyan!" "peurati kheueh nyoe: ulon utus gata lagee bubiri nyan sisat lamkawan asee srigala nyang juwah. gata haroh waspada lagee uleue dan juoe ate lagee cicem mirah pati. meujaga-jaga kheueh, sabab gatanyo teuma jidrob dan jiba bak sidang-sidang mahkamah. gata teuma jiseksa di rumoh-rumoh iebadat. gata teuma jiba ukeue peunguasa-peunguasa dan raja-raja sabab gata taseutot ulon. dan nyan kheueh watee nibak gata keu gata meusaksi keuhai ulon bak awaknyan dan ubak ureueng-ureueng nyang hana jituri po teu allah. teuma meunyo gata jiba keu jipeusidang di kanto peungadalan, bek khawate keuhai peue nyang keuneuk gata peugah, atawa pakriban gata haroh tapeugah haba. sabab peue nyang keuneuk gata peugah nyan, teuma neubri tee ubak gata oh trok bak watee jih. sabab nyang peugah haba bak watee nyan kon kheueh gata, teuma roh bakap nyang na dalam syeuruga, rot gata. teuma teuka bak saboh watee ureueng jeuet jijok syedara jih keudroe keu jipoh mate. dan nyan pih teuma teuka nibak ayah ngon aneuk gobnyan. aneuk-aneuk miet teuma jilawan ma ngon yah jih, dan jijok awaknyan keu jipoh mate. gata teuma jibanci le bandum ureueng sabab gata murit ulon. teuma ureueng nyang meuteuen sampoe bak akhe dudoe geupeu seulam. meunyo gata jienanya bak saboh banda, beutaplueng kheueh ubak banda nyan laen. ulon bri tee ubak gata: sigohlom gata seulesoe tajak bandum u banda-banda nyang na di israel, aneuk manusia ka trok geuteuka. murit hana leubeh rayeuk nibak guree jihnyan, dan peulayan hana leubeh rayeuk nibak po jih. ka seb meunyo sidroe murit saban lagee guree jihnyan, dan sidroe peulayan lagee po droe jih. meunyo ulee keuluwarga ka geuboh nan beelzebul, peuteuk lom bansaboh asoe rumoh. awaknyan teuma tuboh nan nyang leubeh brok nibak nan nyan!" "bek kheueh teumakot keu manusia. hana nyang teusom, nyang hana teuma leumah, dan hana nyang teurahsia nyang hana teuma teupeugah. peue nyang ulon peugah ubak gata dalam seupot haroh kheueh gata peugah lom di dalam peungeh bak watee uroe. dan peue nyang teushah bak punyueng gata, jak peumaklum kheueh nyan ubak rakyat ba! bek kheueh teumakot keu awaknyan nyang jipoh tuboh, teuma hana kuasa jipoh jiwa. beuteumakot kheueh keu po teu allah nyang meukuasa geupeubinasa bah kheueh nyan tuboh meunan cit jiwa lam apui nuraka. dua boh cicem tuloe meuteume teuloe deungon sineuk mata peng nyang paleng ubit. lagee nyan hana meusaboh pih rhot bak tanoh meunyo hana geukeuheundak le bakap gata. padub na le jeumeulah ok bak ulee gata pih ka geubileung. sabab nyan, bek kheueh teumakot! gata leubeh meuyuem nibak cicem-cicem tulo nyan!" "barang gasoe jipeucaya dikeue rakyat ba bahwa gobnyan murit ulon, teuma ulon pih lon akui ureueng nyan dikeue bakap ulon di dalam syeuruga. teuma, barang gasoe nyang ji iengkeue

ulon dikeue rakyat ba bahwa jihnyan murit ulon, teuma ulon pih lon iengkeue jih nyan dikeue bapak ulon di syeuruga." "bek kheueh neusangka bahwa ulon ba dame ateueh donya nyoe. ulon hana lon ba dame, teuma sitree. ulon nyoe teuka sampoe jeuet keusabab aneuek agam jilawan bapak jih, dan aneuek inong jilawan mak jih, meunan cit meulintee nyang inong jilawan mak tuwan jih. nyoe, nyang teuma jeuet keumusoh nyang paleng rayeuk na kheueh anggota keuluwarga droe jih. ureueng nyang jigaseh keu bapak jih dan mak jihnyan leubeh nibak jigaseh keu lon, ureueng nyan hana patot jeuet keu murit lon. meunan cit deungon ureueng nyang jigaseh keu aneuek jih nyang agam atawa aneuek inong leubeh nibak jigaseh keu lon. dan ureueng nyang hana jitem gulam saleb gobnyan dan hana teuma jitem seutot ulon, ureueng nyang lagee nyan hana patot jeuet keu murit lon. ureueng nyang jipeuteun udeb jih, ureueng nyan teuma gadoh udeb jihnyan, teuma ureueng nyang gadoh udeb jih sabab seutia keu ulon, ureueng nyan teuma meuteume udeb." "ureueng nyang teurimong gata, ureueng nyan jiteurimong ulon. dan ureueng nyang teurimong ulon, saban cit geuteurimong ureueng nyang utus ulon. ureueng nyang teurimong nabi sabab gobnyan keubiet nabi, ureueng nyan teuma geuteurimong upah sidroe nabi. dan soe mantong nyang teurimong sidroe ureueng nyang get sabab gobnyan get, ureueng nyan teuma jiteurimong upah sidroe ureueng get. soe-soe nyang jitem jok ie jieb, bahpih ie leupie keu sidroe nibak ureueng-ureueng nyang hina nyoe, sabab gobnyan murit lon, peucaya kheueh gobnyan pasti meuteume upah!" oh ka ltheueh isa geubri bandum peutunyok-peutunyok ubak bandua blaih droe murit gobnyan, laju geujak dan geutinggai tempat nyan. gobnyan geujak seumeubeuet dan geupeusampoe peusan-peusan nibak po teu allah bak banda-banda nyang rab-rab disinan. nabi yahya pumano nyang mantong lam glab geudeungoe peue-peue nyang geupeubuet le almasah. laju le gobnyan geuyue ubak na padub droe murit geuh keujak meurmupok ngon isa keuneuk teumanyong, "peu kheueh bapak nyang trok lagee nyang ka geumeujanji le po teu allah, atawa peu kheueh haroh kamoe preh ureueng laen?" geujaweueb le isa, "neujak gisa kheueh laju ubak nabi yahya pumano dan neupeugah laju peue-peue nyang gata deungoe dan gata kalon: ureueng buta deuh jimeungieng, ureueng lapee ka jeuet jijak, dan ureueng meupeunyaket kulet nyang lumpah parah ka puleh; ureueng tuloe ka deuh jideungoe, ureueng mate udeb lom teuma, dan haba get nibak po teu allah geupeusampoe keu ureueng-ureueng gasien. mubahgia kheueh ureueng nyang han tulak ulon!" oh ka geujak bandum utosan nabi yahya pumano nyan, isa laju geupeu phon peugah haba keuhai nabi yahya pumano, kheun gobnyan, "gata nyoe tajak u padang pasi peue nyang gata jak ngieng? peu kheueh sion naleueng nyang jipoet le angen? gata tajak peue nyang gata jak ngieng? peu kheueh sidroe ureueng nyang jisok peukayan tari? ureueng-ureueng nyang sok peukayan lagee nyan tempat jih bak meuligoel! teuma, peubuet gata tajak u padang pasi? peu kheueh gata jak ngieng nabi? beutoi, leubeh nibak sidroe

nabi. sabab nabi yahya nyan kheueh nyang teupeugah lam ayat alkitab nyoe, 'nyoe kheueh utosan ulon, kheun po teu allah, ulon utus gobnyan leubeh dilee nibak gata mangat gobnyan geupeuhah jalan keu gata.' ingat kheueh! ateueh rhueng donya nyoe hana ureueng laen nyang leubeh rayeuk nibak nabi yahya pumano. bah pih lagee nyan, ureueng nyang paleng ubit lamkawan umat po teu allah ureueng nyan leubeh rayeuk nibak nabi yahya pumano. yoh phon nabi yahya pumano geujak peusampoe beurita gobnyan sampoe ubak watee nyoe, umat po teu allah jilawan le ureueng-ureueng nyang meu-useuha keuneuk kuasa ateueh gobnyan deungon cara paksa. akhe jih sampoe trok nabi yahya pumano, bandum hukum nabi musa dan ajaran nabi-nabi na teupeugah keuhai-hai nyang haroh teujadi. dan meunyoey gata neutem peucaya, nabi yahya nyan kheueh ilyas, keuhai gobnyan teuka ka ltheueh teupeugah. meunyoey na geulinyueng, deungoe kheueh! deungon peue lon peusaban ureueng-ureueng bak jamen nyoe? awaknyan lagee aneuek banyak nyang duek-duek kak keude. saboh kawan nyoe jihoi kawan nyang laen, 'kamoe keuneuk peumeuen ca-e geumbira keu gata nyoe, teuma gata hana tatem meunari! kamoe meuca-e lagu meuba-e, dan gata hana tatem mol' nabi yahya ka trok - gobnyan geupusa dan hana geujieb le anggo; dan di ureueng rame jipeugah, 'gobnyan ka jitamong jen!' jinoenyoe aneuek manusia, ka teuka - gobnyan geu makheun dan geujieb ie; laju le ureueng rame geupeugah, 'ngieng kheueh ureueng nyan! leuba, peumabok, rakan ureueng kuteb cukee dan rakan ureueng peubuet desya.' bah pih meunan, keubijaksanaan po teu allah teupri bukeuti nibak hase-hase nyan." dan isa laju geupeu phon seurapa keu banda-banda, di tempat gobnyan paleng jai geupeuguet buet nyang ajaeb. sabab ureueng-ureueng nyang na lam banda nyan hana jitem meutobat nibak desya-desya nyang ka jipeubuet. "cilaka gata, korazim! dan cilaka teuma gata, he betsaida! sangkira jih buet-buet nyang ajaeb ka geupeubuet lamkawan gata nyan pih ka teupeubuet di tirus dan sidon, pasti ureueng-ureueng nyang na nibak tempat nyan ka treb that meutobat nibak desya-desya jihnyan dan jingui peukayan meuduka cita dan geuboh abee di ateueh ulee. ingat kheueh, bak uroe kiamat, ureueng-ureueng tirus dan sidon teuma leubeh mudah geupeu-amphon le po teu allah nibak gata! teuma gata, he banda kapernaum! peu kheueh gata teupemanyang cit teuma sampoe trok u dalam syeuruga? hana! teuma gata teuboh lam apui nuraka! sabab dak jeuet buet-buet nyang ajaeb nyan ka ltheueh teupeubuet di sodom, sodom nyan mantong na sampoe bak watee nyoe! ingat, nibak uroe kiamat, ureueng sodom leubeh mangat geupeu-amphon le po teu allah nibak gata!" bak watee nyan isa meudoa, "bapak, nyang mat kuasa ateueh langet ngon bumoe! ulon lakee teurimong gaseh ubak droeneueh sabab bandum nyan droeneueh nyang rahsia nibak ureueng-ureueng nyang carong dan meu-ieleume, teuma droeneueh tunyok ubak ureueng-ureueng nyang hana sikula. nyan kheueh nyan teuba keu galak ate bapak." laju isa geupeugah lom, "banmandum nyan pih ka geujok

le bapak keu ulon. hana meusidroé pih nyang turi aneuk, seulaen bapak. meunan cit hana nyang turi bapak seulaen aneuk, dan ureueng-ureueng keu aneuk nyan geupeuturi bapak. tajak kheueh ubak ulon he gata bandum nyang reuoh reuah, dan nyang teurasa beuban teu brat; ulon teuma nyang peupuih rukueng gata. seutot kheueh peue-peue nyang ulon peurintah dan meurunoe kheueh ubak ulon. sabab ulon nyoe leumoh leumbot dan miyueb ate, teuma gata meuras mangat. sabab peue-peue nyang ulon peurintah keubiet mangat lumpah na, dan beuban nyang ulon keubah ateueh gata nyan phui lumpah na." bak siuroe, uroe sabat, watee isa geujak rot lampoh gandom gob, murit-murit gobnyan laju geupot boh gandom, laju geupajoh boh gandom nyan sabab ka deuk that. watee jingiang hai nyan le ureueng-ureueng farisi, awaknyan laju jipeugah ubak isa, "kalon kheueh! murit-murit droeneueh ji-iengkeue hukom agama geutanyoe deungon cara jipeubuet nyang geutham bak uroe sabat." geujaweueb le isa, "peu kheueh gohlom na gata beuet peue nyang ka geupeubuet le nabi daud watee gobnyan ngon murit-murit gobnyan deuek? gobnyan geutamong lam baet allah; teuma laju geupajoh ruti nyang ka teupeseumah keu po teu allah. padahai meunurot hukom agama geutanyoe, gobnyan meunan cit deungon murit-murit gobnyan hana jeuet geupajoh ruti nyan – nyang jeuet pajoh na kheueh imeum-imeum mantong. atawa peu kheueh gohlom na gata beuet didalam hukom nabi musa bahwa tieb-tieb uroe sabat imeum-imeum nyang peubuet tugaih bak baet allah, geu-iengkeue peuratoran uroe sabat, teuma hainyan hana geupeusalah? neusimak kheueh peue nyang ulon peugah nyoe: disinoe na nyang leubeu rayeuk nibak baet allah. lam alkitab na meutuleh: gaseh sayang kheueh nyang ulon lakee, bukan keureubeuen beulatang. meunyoé seukira jih gata beutoi-beutoi muphom peue nyang ulon peugah nyan, pasti gata hana tapeusalah ureueng-ureueng nyang hana meusalah. sabab aneuk manusia meukuasa ateueh uroe sabat." isa teuma laju geutinggai tempat nyan teuma geujak u dalam saboh rumah ibadah. nibak tempat nyan na ureueng nyang jaroe jihnyan lapee siblaih. na meupadub droe nyang teungoh jimita salah nyang geupeubuet le isa, awaknyan laju jitanyong ubak isa, "peu kheueh jeuet teupeupuleh ureueng bak uroe sabat?" geujaweueb le isa, "meunyoé sangkira jih na sidroe lamkawan gata na tapeulara saboh bubiri, dan bak uroe sabat bubiri nyan rhot lam mon nyang lumpah that lhok; peu kheueh ureueng po bubiri nyan hana jiseuha jipeuteungoh bubiri lam mon nyan? nyan, manusia leubeu muiyem nibak bubiri! teuma, meunyoé meunan, jeuet teutulong gob bak uroe sabat." oh lheureh nyan isa geupeugah ubak ureueng nyang jaroe jih lapee siblaih nyan, "sun-yueng kheueh keunoe jaroe gata." ureueng nyan laju jisunyung jaroe jihnyan, dan jaroe nyan laju puleh lagee jaroe siblaih treuk. teuma le ureueng-ureueng farisi laju jitinggai rumah ibadah nyan, teuma laju jijakmupakat keuneuk poh mate isa. isa geuteupeue bahwa ureueng-ureueng farisi nyan na niet brok keu gobnyan. teuma, gobnyan laju geujak nibak tempat

nyan dan jai that ureueng laen nyang seutot gobnyan. laju gobnyan geupeu puleh bandum ureueng nyang saket. teuma gobnyan geutham ureueng-ureueng nyang geupeu puleh nyan bek jipeugah bak ureueng laen keuhai gobnyan. deungon lagee nyan jeuet teuk peue nyang ka geupeugah le allah rot nabi yesaya, "nyoe kheueh utosan lon nyang ulon pileh, ureueng nyang lon gaseh dan biet that galak ate lon. roh ulon teuma lon bri keu gobnyan, keuadalan lon teuma jipeusampoe keu bansa-bansa. gobnyan hana geumeudakwa atawa geu-geumeuciek, atawa meupidato bak rot ueh raya. trieng nyang leunuet hana teuma geuleugot panyot nyang mala hana teuma geupeulon. gobnyan teuma meujuang sampoe keuadalan meuteume; banmandum bansa geupeutroh harapan keu gobnyan." oh lheureh nyan laju jiba ukeue isa sidroe ureueng buta dan kalu sabab ka jikuasa le roh jeuhet. isa laju geupeu puleh ureueng nyan sampoe ka jeuet jipeugah haba ngon jikeumalon. bandum ureueng hireuen sira jipeugah, "mungken nyoe kheueh gobnyan aneuk nabi daud nyang ka geupeu janji le po teu allah nyan?" watee ureueng-ureueng farisi jideungoe hai nyan, awaknyan jijaweueb, "ureueng nyoe nyang jeuet geu-use roh jeuhet, sabab beelzebul, ulee roh-roh jeuhet, ka geubri kuasa nyan keu gobnyan." isa geuteupeue pikanan ureueng farisi nyan. teuma gobnyan laju geupeugah ubak awaknyan, "meunyoé na saboh nanggroé ka peucah beulah sampoe ka jeuet meukawom-kawom nyang musoh meumusoh, nyan tanda jih nanggroé nyan hana ek meuteuen. teuma saboh banda atawa keuluwarga nyang teujadi peucah beulah dan jeuet keumusoh saboh deungon nyang laen teuma nyang lagee nyan rhot keu ancoe. meunan cit teuma lam keurajeuen iblih; meunyoé na saboh kawan teu-use kawan nyang laen, teuma keurajeuen iblih nyan ka teujadi peucah beulah dan laju ancoe. gata tapeugah bahwa ulon use roh jeuhet sabab kuasa beelzebul. meunyoé meunan deungon kuasa soe kheueh murit-murit gata jise roh jeuhet. murit-murit gata keudroe nyang jeuet keutanda bahwa gatanyoé salah! teuma ulon use roh jeuhet deungon kuasa roh allah. dan nyan na kheueh sibagoé tanda bahwa allah ka geupeu phon mat peurintah lamkawan geutanyoe. pakriban ureueng hase jitamong lam rumah ureueng kha keu jijak reupah hareuta ureueng nyan, meunyoé ureueng kha nyan hana teu-ikat leubeu ilee? oh lheureh nyan, baro kheueh gobnyan hase jicok bandum atra ureueng nyan. ureueng nyang hana jidong blaih lon nyang sikeubiet jih ureueng nyan ka jilawan ulon. dan ureueng nyang hana jitem tulong ulon nyang sikeubiet jih ka jipeureuloh nyang ulon peubuet! ngon sabab nyan, beutateupeu kheueh, meunyoé na ureueng jipeubuet desya ngon jimeututoe nariet nyang hina, ureueng nyan jeuet teupeu amphon! teuma meunyoé ureueng nyang jihina roh po teu allah, ureueng nyan hana jeuet teupeu amphon! meunyoé na ureueng jipeugah sipeue-peue nyang sifeuet jih jilawan aneuk manusia, ureueng nyan jeuet teupeu amphon, teuma meunyoé ureueng nyan jihina roh po teu allah, ureueng nyang lagee nyan hana jeuet geupeu amphon, bah kheueh nyan bak watee nyoe

meunan cit oh uroe akhirat!" "mangat boh kayee nyan get, bak jih haroh subo ngon get. meunyoee bak jih hana subo ngon get, boh jih pih hana get. subo jih bak kayee nyan leumah teukalon nibak boh jih. gata ureueng jeuhet, pakriban mungken gata jeuet tapeugah hai-hai nyan get meunyoee gata jeuhet? peue nyan jipeugah le babah nyan kheueh teuma nyan teusureh dalam ate! ureueng nyan get geumeututoe nyan jroh sabab ureueng nyan peunoh ngon nyan get. seubalek jih, ureueng nyan jeuhet jimeututoe hai-hai nyan jeuhet sabab gobnyan peunoh ngon nyan jeuhet. teuma, ingat kheueh: bak uroe kiamat, tieb-tieb ureueng haroh meutanggong jaweub ateuhe tieb-tieb nariet nyan ka jipeugah nyan hana meugana. sabab tutoe gata keudroe kheueh nyan teungui keu teupeuputoh peu kheueh gata meusalah atawa beuna." oh lheu nyan na meupadub droe gureu agama dan ureueng-ureueng farisi geupeugah, "bakap guree, kamoe keuneuk kalon droeneueh neupeuleumah buet nyan ajaeb." "keubiet that jeuhet jih dan doraka jih ureueng-ureueng bak jamen nyoe!" geujaweueb le isa, "gata nyoe talakee mangat lon peuleumah buet ajaeb? keu gata hana teubri bah pih meusaboh buet ajaeb, malengkan keujajaan nabi yunus. nabi yunus tinggai lhee uroe lhee malam dalam pruet uengkot raya. meunan cit deungon aneuek manusia teuma tinggai lhee uroe lhee malam dalam pruet bumoe. bak uroe kiamat, peunduduek niniwe teuma jibeudoh meusigoe ngon ureueng-ureueng jamen nyoe dan jitudoh awaknyan. sabab ureueng-ureueng niniwe nyan ka meutobat nibak desya-desya jih nyan, watee nabi yunus geukhutubah ubak awaknyan. teuma disinoe bak watee nyoe na nyan leubeh rayeuk nibak nabi yunus! bak uroe kiamat, ratu nibak nanggroe seulatan teuma geubeudoh meusigoe-sigoe ngon ureueng-ureueng jamen nyoe dan geutudoh awaknyan. sabab keu teudeungoe peurunoe nabi sulaiman nyan bijak, ratu nyan kuasa geujak nibak nanggroe geuh nyan jioh that di ujong bumoe. teuma disinoe bak watee nyoe na nyan leubeh rayeuk nibak nabi sulaiman!" "meunyoee roh jeuhet jitinggai sidroe-droe ureueng, roh nyan jikeulileng bak teumpat-teumpat nyan tho keu jimita teumpat peuniyoh, teuma nyan jimita nyan hana meuteume. ngon sabab nyan laju jipeugah, 'ulon teuma lon gisa u rumah nyan ka lon tinggai.' watee awaknyan ka trok keudeh, rumah nyan ka shoh, gleh dan teu-atoe. laju jikak dan jiba tujuh droe roh nyan laen nyan leubeh jeuhet nibak jih nyan. oh lheu nyan awaknyan laju jitamong lam tuboh ureueng nyan, laju jitinggai lam badan ureueng nyan. teuma akhe jih keuadaan ureueng nyan leubeh brok nibak bak nyan ka-ka. nyan kheueh teuma nyan jeuet deungon ureueng-ureueng jeuhet bak jamen nyoe." teungoh isa mantong geupeugah haba deungon ureueng rame nyan, teuka teuk ubak gobnyan mak geuh ngon syedara-syedara gobnyan. awaknyan geudong diluwa sira geu-useuha mangat hase geumariet deungon gobnyan. na kheueh sidroe lamkawan ureueng rame nyan, nyan na nibak teumpat nyan jipeugah ubak isa, "hai pak, mak neuh ngon syedara droeneueh na di luwa. awaknyan keuneuk peugah haba deungon bakap."

laju geujaweueb le isa, "soe kheueh mak ulon? soe kheueh teuma syedara-syedara lon?" laju gobnyan geutunyok ubak murit-murit geuh sira geupeugah lagee nyoe, "nyoe kheueh mak ngon syedara-syedara lon. ureueng nyan peubuet keuheudak bakap ulon di syeuruga, nyan kheueh syedara ulon nyan agam, syedara inong, dan mak ulon." bak uroe nyan cit teuma isa geujak nibak rumah nyan dan laju geujak bak bineh danau dan geuduek bak bineh danau nyan. jai lagoena ureueng nyan meuhudom ban silingka isa, le sabab nyan laju geujak duek lam peuraho, teuma di ureueng rame nyan jidong meuriti bak bineh pante. teuma isa laju geupeurunoe ureueng rame nyan deungon miseue keuhai-hai nyan lumpah le. "sidroe ureueng meutani jikak tabu bijeh," meunan kheueh isa geupeu phon meucalitra. "teungoh geutabu bijeh nyan, na bijeh nyan rhot ateuhe rot ueh. laju jiteuka cicem jikak cateuk bijeh nyan sampoe habeh. na teuma nyan rhot bak teumpat nyan meubatee-batee, nyan tanoh jih cit bacut. bijeh-bijeh nyan bagaih that jitimoh sabab kureueng tanoh. teuma watee mata uroe ka jipeuphon teungoh, bijeh-bijeh nyan bantimoh nyan ka jipeuphon layee, oh lheu nyan tho dan mate sabab ukeue jih hana jitamong sampoe oh lhok. na teuma bijeh nyan rhot di teungoh-teungoh tamah meuduro. tamah meuduro nyan laju jitimoh sampoe habeh teutob bubena bijeh-bijeh nyan akhe jih mate. teuma na cit bijeh nyan rhot bak tanoh nyan luhu, jitimoh laju jimuboh; na nyan sireutoh, na nyan nam plo, dan na cit nyan lhee plo, oh ganda." oh ka lheu geucalitra bandum miseue nyan laju geupeugah le isa, "meunyoee gata na punyueng, deungoe kheueh!" oh lheu nyan murit-murit isa geuteuka dan geutanyong ubak gobnyan, "pakon bakap neuboh miseue meunyoee neumeututoe ngon ureueng rame nyan?" geujaweueb le isa, "sabab gata ka geubri anugeurah keu neuteupeue rahsia pakriban po teu allah geumat peurintah, teuma keu awaknyan hana. sabab ureueng nyan ka lheu na, teuma geubri nyan leubeh le lom, dan ureueng nyan teuma leubeh hareuta. teuma, ureueng nyan hana sapeue na, nyan bacut nyan na nibak ureueng nyan geucok lom teuma. nyan kheueh sabab jih ulon peugah ngon miseue meunyoee ulon peugah haba ngon ureueng rame, sabab awaknyan jimeungieng, teuma lagee ureueng nyan hana deuh keumalon; awaknyan jideungoe teuma lagee ureueng nyan hana deuh teudeungoe dan hana muphom. deungon lagee nyan jeuet kheueh peue nyan ka geupeugah le nabi yesaya, 'po teu allah meufeuruman: awaknyan teuma sabe jideungoe teuma hana muphom; awaknyan sabe na jisimak teuma hana jiteupeu peue-peue teuma nyan teujadi. sabab pikeran ureueng nyoe ka tumpoi, geulinyueng awaknyan ka tulo dan mata awaknyan ka teupeupet. nyoe jeuet mangat mata awaknyan bek jikeumalon, geulinyueng awaknyan bek teudeungoe sapeue, pikeran awaknyan bek muphom dan bek jigisa bak ulon, laju ulon peupuleh awaknyan.' " "teuma keubiet meu-tumtong gatanoye bandum," geupeugah le isa bak murit-murit gobnyan, "sabab gata beutui tameungieng dan neumeudeungoe. ingat kheueh

le that nabi dan ureueng nyang taat ubak po teu allah meuheuet that keuneuk geukalon lagee nyang gata ngieng bak watee nyoe, teuma hai nyan hana awaknyan kalon. awaknyan meuheuet that keuneuk jideungoe peue nyang gata deungoe bak watee nyoe, teuma hai nyan hana awaknyan deungoe." "deungoe peue makna miseue keuhai ureueng teumabu bijeh nyan. bijeh nyang rhot ateuh rot lagee ureueng nyang jideungoe haba pakriban po teu allah geumat peurintah, teuma hana jimuphom. si jeuhet nyan jiteuka laju jireupah peue-peue nyang teutabu lam ate awaknyan. bijeh nyang rhot bak teupat nyang meubatee-batee, miseue ureueng nyang jideungoe haba nyan, dan mate nyan cit geuteurimong deungon galak ate. teuma haba nyan hana meu-ukeue lam ate awaknyan, akhe jih hana treb meuteuen. meunan awaknyan meuteume keusosahan atawa keunong ienanya sabab haba nyan, watee nyan cit teuma awaknyan murtat. bijeh nyang rhot lam tamah meuduro miseue ureueng nyang geudeungoe haba nyan, teuma khawate keuhai udeb jih dan nyang jipike sabe keu udeb mangat dan meuwah. sabab nyan haba nyang teuka nibak po teu allah jiginton lam ate awaknyan akhe jih hana muboh. dan bijeh nyang rhot bak tanoh nyang subo miseue ureueng-ureueng nyang geudeungoe haba nyan dan geupeu phon laju. awaknyan jimuboh oh le, na nyang sireutoh, na nyang nam ploh, dan na nyang lhee ploh keu lipat hase jih." isa geucalitra lom saboh miseue keu ureueng rame nyan, kheun gobnyan, "meunyo po teu allah nyang mat peurintah, keuadaan jih na kheueh lagee nyoe: sidroe ureueng meugo geutabu bijeh nyang get nibak blang gobnyan. bak simalam, watee bandum ureueng teungoh mangat ji eh, musoh ureueng meugo nyan teuka jijak sipreuk bijeh naleueng lakoe lam teungoh-teungoh bijeh gandom nyan, oh lheureh nyan laju jijak. watee sinaman nyan timoh dan mu-mu sinaman nyan ka jiteubiet, teuma deuh kheueh laju naleueng lakoe nyan. laju ureueng-ureueng nyang jigaji le peutani nyan jijak ubak peutani nyan sira jipeugah, "teungku, hat lon teupeu droeneueh neupila bijeh nyan get dalam blang teungku? pakriban jeuet hase jitimoh naleueng lakoe lam blang amphon?" geujaweueb le ureueng meugo nyan, 'nyan buet nyang jipeuteuka le musoh.' dan di ureueng-ureueng nyang tueng upah ubak ureueng meugo nyan geutaniong lom, 'peu kheueh le teungku neuyue kamoe mangat kamoe jak lot bak naleueng lakoe nyan?' 'hana peue,' geujaweueb le gobnyan, 'sabab meunyo naleueng lakoe nyan teulot, eunteuk gandom nyan pih rhoh teutarek. bah kheueh naleueng lakoe nyan jitimoh watee trok watee museum mupot. eunteuk lon peugah ubak ureueng mupot nyan: peusapat dilee bandum naleueng lakoe nyan, ikat, dan tot laju. oh ka lheureh nyan peusapat teuma boh gandom, dan keubah laju u dalam pupok.' "isa geucalitra lom miseue-miseue keu ureueng rame, kheun gobnyan, "meunyo allah geumat peurintah, keuadaan jih na kheueh lagee miseue nyoe: sineuk aneuk sisawi jicok le sidroe ureueng, laju jipula lam ladang ureueng nyan. aneuk sisawi na kheueh bijeh nyang paleng ubit. teuma meunyo ka timoh, bak sisawi nyan jeuet keu sinaman

nyang paleng rayeuk lamkawan sinaman nyang laen, bak sisawi nyan jeuet keu bak kayee, mangat dum na citem-citem jijak keunan jipeugot uempueng bak cabeueng-cabeueng kayee nyan." na miseue nyang laen nyang geucalitra le isa ubak ureueng rame, "meunyo po teu allah ka geumat peurintah, keuadaan jih na kheueh lagee ragoe nyang ceukok le sidroe ureueng inong, laju geucawoe deungon peuet ploh aree teupong teurigu mangat meukeumang banmandum!" bandum nyang geupuruno le isa bak ureueng rame nyan deungon miseue-miseue. deungon lagee nyan teuma jeuet kheueh peue nyang ka geupeugah le nabi, 'ulon peuguna miseue-miseue meunyo lon peugah haba deungon awaknyan; ulon peugah hai-hai nyang teusom yoh phon that jeuet donya nyoe." oh lheureh nyan isa laju geutinggai ureueng rame nyan, dan geutamong laju lam rumoh. murit-murit gobnyan geujak keunan sira geupeugah, "ci bapak peutrang keu kamoe makna miseue bak naleueng lakoe lamkawan bak gandom nyan." geujaweueb le isa, "ureueng nyang sipreuk bijeh nyang get nyan na kheueh aneuk manusia. blang nyan na kheueh donya nyoe. bijeh nyang get nyan na kheueh ureueng-ureueng nyang ka jeuet keu umat po teu allah. naleueng lakoe nyan na kheueh ureueng nyang doeng blaih iblih. musoh nyang pula naleueng lakoe nyan na kheueh iblih. museum mupot na kheueh uroe kiamat, dan ureueng nyang pot nyan na kheueh malaikat-malaikat. lagee toh naleueng lakoe teupeusapat dan teutot lam apui hu, meunan cit teuma bak uroe kiamat singoh. aneuk manusia teuma geuyue ubak malaikat-malaikat gobnyan jeuet geupeusapat lamkawan umat manusia bandum nyang jeuet keusabab manusia jipeubuet desya, dan bandum ureueng laen nyang peubuet jeuhet. awaknyan bandum teuma teuboh lam sinungkee meu-apui nyang hu meuhueb-hueb; disinan awaknyan teuma jimeo dan meudeurita, dan ureueng-ureueng nyang jipeubuet keuheundak po teu allah ureueng nyan meucahya lagee mata uroe lam donya baro allah, bapak awaknyan. teuma, meunyo na geulinyueng, deungoe kheueh!" "meunyo po teu allah geumat peurintah, keuadaan jih lagee miseue umpamanyoe: na atra nyang teuseubee lam tanoh laju jiteume le sidroe-droe ureueng, dan jipeutamong lom lam tanoh. oh lheureh nyan sabab galak that ate jih, ureuengnyan jijak peubloe banmandum atra milek jih, lheurehnyan laju jigisa dan jibloe tanoh nyan." "meunyo po teu allah geumat peurintah, keuadaan jih na kheueh lagee miseue umpamanyoe: sidroe saudaga jimita mutiara-mutiara nyang meuhai yum. watee jihnyan jiteume sineuk mutiara nyang lumpah ceudah get jih, laju jijak jipeubloe banmandum atra milek jih, lheurehnyan laju jibloe mutiara nyang sineuk nyan." "meunyo po teu allah geumat peurintah, keuadaan jih geuboh miseue ubak jeue nyan teutiek lam dana, lheureh nyan laju meuteume meubagoe-bagoe eungkot. oh ka lheureh jeue nyan peunoh, jeue nyan laju jitarek ateuh darat le neulayan-neulayan. lheurehnyan awaknyan jiduek laju jipileh dan jipeumeungkreeh-meungkreeh eungkot-eungkotnyan: nyang get jikeubah lam guci dan nyang hana get jiboih. meunan kheueh

haijih watee uroe dudoe, malaikat-malaikat geujak pileh ureueng-ureueng jeuhet nibak ureueng-ureueng nyang jipeubuet keuheundak po teu allah. ltheuehnyan ureueng-ureueng jeuhetnyan geuboih lam sinungkee apui. inan kheueh awaknyan jimoe ba-e dan meudeurita." "peue ka muphom gata?" tanyong isa, "muphom paki!" jaweueb awaknyan. teuma geupeugah lom le isa, "nyan kheueh sabab jih guree agama nyang ka jeuet keu anggota umat po teu allah, na kheueh lagee sidroe ureueng po rumoh nyang jipeuteubiet nibak tempat keuneubah hareuta jihnyan bandum barang-barang nyang baro ngon nyang treb." oh ka seulesueo isa geucalitra bandum miseue nyan, laju geutinggai tempat nyan, dan geujakwoe teuma u gampong droe gobnyan. oh bantrok u gampong gobnyan laju geujak seumeubeuet u rumoh iebadat, dan ureueng-ureueng nyang deungoe gobnyan nibak tempat nyan, hireuen lumpah na. awaknyan jipeugah, "dipat geuteume le ureueng nyoe hikeumat nyang lagee nyan? dan pane teuma gobnyan meuteume kuasa keu geupeuna buet ajaeb? kon kheueh ureueng nyoe aneuk tukang kayee? dan kon kheueh mariam nyan mak gobnyan; dan syedara-syedara gobnyan na kheueh yakobus, yusuf, simon dan yudas? dan kon kheueh syedara-syedara gobnyan yang inong tinggai disinoo? dipat gobnyan geuteume banmandum nyan?" teuma awaknyan laju jitulak isa. laju isa geupeugah ubak awaknyan, "sidroe nabi jihoreumat dipat mantong, seulaen di gampong geuh keudroe dan di rumoh gobnyan keudroe." teuma deungon sabab nyan isa hana le geupeugot buet nyang ajaeb sabab awak disinan hana jipateh. bak watee nyan herodes, nyang mat kuasa ateuhe nanggroe galilea, geudeungoe keuhai isa. herodes geupeugah ubak peujabat-peujabat gobnyan, "pasti nyoe nabi yahya pumano nyang ka udeb lom! nyan kheueh sabab jih bak gobnyan na kuasa keu geupeubuet nyang ajaeb." sabab sigohlom nyoe herodes geuyue drob nabi yahya pumano dan geuyue ikat gobnyan sira geuyue peutamong lam glab. herodes geupeubuet lagee nyan sabab herodias, peurumoh syedara gobnyan keudroe, nyang nan geuh pilipus. sabab ka ltheueh geupeugah lagee nyoe le nabi yahya ubak herodes, "hana jeuet gata meukawen ngon herodias!" nyang sibeuna jih herodes keuneuk peumate nabi yahya nyan, teuma gobnyan teumakot ubak ureueng rame, sabab awaknyan ji-anggang nabi yahya nyan nabi. bak watee herodes geupeuna khanuri keu teupeu ingat uroe ulang thon gobnyan, aneuk inong herodias jimeunari dikeue ureueng rame. deungon nari dan likak aneuk inong nyan, nyang biet-biet lumpah that galak ate herodes keu nari nyan diet nyan, akhe jih herodes geumeujanji ubak jihnyan deungon sumpah peue mantong nyang jilakee, teuma geubri keu ureueng nyan. sabab ka jipeusuna le ma aneuk nyan, aneuk dara nyan jipeugah, "ulon lakee ulee nabi yahya pumano bak uroe nyoe cit teuma nyang teuba ateuheh talam!" ban geudeungoe haba nyan, herodes seudeh lumpah na. teuma sabab gobnyan ka geumeubudok dikeue jame teuka, laju geupeutron titah mangat jeuet peue nyang jilakee le aneuk dara nyan teupeupeunoh. laju geuyue ubak ureueng

geuh mangat jijak laju u rumoh glab keu jijak khoh takue nabi yahya. oh ltheueh nyan ulee nabi yahya nyang ka putoh nyan laju jikeubah lam talam dan jipeutamong u dalam sira jijak ubak aneuk dara nyan. dan di aneuk dara nyan laju jiba teuma atra nyan ubak ma jihnyan. oh ltheueh nyan murit-murit nabi yahya laju jijak cok manyet gobnyan dan jijak peukubu lam jrat. dan oh ltheueh nyan laju awaknyan jijak sira geupeugah ubak isa. watee geudeungoe hai nyan le isa, laju geu-ek ateuhe peuraho sidroe geuh mantong dan laju geutinggai tempat nyan, ltheueh nyan geujak bak saboh tempat nyang seungue. teuma watee jideungoe le ureueng rame keuhai nyan, awaknyan laju jitinggai banda-banda jih keudroe dan jijak seutot isa rot darat. watee isa geutron nibak peuraho dan geukalon ureueng rame nyan, laju jiteuka ineseuh keu awaknyan, dan geupeu puleh laju ureueng nyang saket nyang na lamkawan nyan. watee uroe ka seupot, murit-murit isa laju geupeugah ubak gobnyan, "uroe ka seupot dan tempat nyoe teu-aseng that nibak tempat laen. leubeh get bakap neuyue bandum ureueng nyoe mangat jeuet jijak, mangat hase jijak bloe peunajoh di gampong-gampong." "hana peue, awaknyan bek jijak," geu kheun le isa, "gata mantong nyang bri peunajoh keu awaknyan." "bak kamoe nyang na cit limong boh ruti ngon dua boh eungkot!" geujaweueb le murit-murit isa nyan. "taba laju atra nyan keunoe," geupeugah le isa. oh ltheueh nyan le isa laju geuyue duek ureueng rame nyan ateuhe naleung, oh ltheueh nyan geucok laju ruti nyang limong boh dan eungkot nyang dua boh nyan, oh ltheueh nyan geutangah u langet sira geu peugah syukoe ubak po teu allah. oh ltheueh nyan laju geuprah-prah ruti nyan ngon jaroe gobnyan dan laju geujak ubak murit-murit gobnyan mangat jeuet teubagi-bagi ubak ureueng rame nyan. awaknyan bandum jimakheun sampoe troe-troe. oh ltheueh nyan le murit-murit isa laju geupeusapat peunajoh nyang leubeh teumakheun nyan; na dua blaih boh raga le jih. nyang makheun bak watee nyan kira-kira na limong ribee droe, gohlom teu-itong ureueng inong dan aneuk-aneuk miet. oh ltheueh nyan isa laju geuyue ubak murit-murit gobnyan mangat geu-ek ateuhe peuraho leubeh awai mangat jeuet geujak u meurandeh danau, dan gobnyan laju geuyue woe ureueng rame nyan u rumoh droe maseng-maseng. oh ka leupah ureueng rame nyan jiwoe, isa laju geu-ek ateuhe buket sidroe gobnyan keu geujak meudoea. watee ka malam, isa teutab mantong disinan sidroe geuh. watee nyan peuraho nyang geu-ek le murit-murit gobnyan ka jioh that bak teungoh danau. peuraho nyan meuguyang gayeng jitampo le umbak, sabab angen meulawan arah ngon peuraho. kira-kira poh lthee ngon poh nam beungoh, isa geujak meurumpok ngon awaknyan sira geujak di ateuhe ie. watee murit-murit gobnyan geukalon isa geujak di ateuhe ie, awaknyan teukeujot lumpah na, "hantu!" geuklik awaknyan sabab teumakot that. teuma isa laju geujaweueb, "teunang kheueh! nyoe ulon, isa. bek teumakot!" laju geupeugah le petrus, "meunyo droeneueh beutoi isa, neuyue kheueh bak ulon mangat lon jak cit ateuhe ie." "tajak kheueh keunoe," geujaweueb isa. teuma

petrus laju geutron lam peuraho, geujak di ateuh le laju geutuju ubak isa. teuma watee geungieng le petrus angen nyang jipot rayeuk that ateuh danau nyan, gobnyan teumakot lumpah na dan laju lham. "tuhan, tulong lon!" sira geuklik petrus geulakee tulong. isa laju geusunyueng jaroe gobnyan dan laju geudrob petrus nyan, dan isa laju geupeugah, "petrus, petrus, gata nyoe kureueng iman. pakon gata ragu-ragu keu ulon?" dan ban dua awaknyan laju geuteungoh ateuh peuraho, watee nyan cit teuma angen ka reuda. teuma bandum murit-murit isa laju geusujut geuseumah gobnyan. awaknyan geupeugah, "keubiet, tuhan na kheueh aneuek po teu allah!" watee awaknyan ka troh u meurandeh danau, laju geuteungoh di genesaret. dan watee jikalon le ureueng-ureueng nyang na disinan bahwa nyang trok nyan na kheueh isa, awaknyan laju jikak peusampoe haba nyan ubak bandum daerah nyang na di silingka banda nyan. dan bubena ureueng saket laju jiba ubak isa. dan awaknyan jilakee bak gobnyan jeuet geubri cukeh bajee jubah geuh, bah pih ujong jih mantong. dan bandum ureueng nyang cukeh bajee jubah nyan habeh puleh. na saboh kawan ureueng farisi dan na teuma meupadub droe guree-guree agama teuka nibak yerasalem geujak ubak isa. awaknyan geutanyong ubak gobnyan, "pakon murit-murit droeneueh geu-iengkeue keu adat istiadat indatu geutanyoe? watee keuneuk makheun, awaknyan hana geu rrah jaroe leubeh dilee lagee peuratoran nyang ka na!" geujaweeb le isa, "dan gata nyoe bandum pakon teutab ta-iengkeue peurintah allah, nyang peunteng nibak gata taseutot adat-istiadat indatu gata? sabab po teu allah meufeureuman, 'horeumat kheueh ubak ayah ngon ma gata,' dan 'barang gasoe nyang teunak ayah ngon ma jih, ureueng nyan haroh teuhukom mate.' teuma gata tapeurunoe gob lagee nyoe: meunyo ureueng jipeugah keu ureueng syiek, 'peue nyang seuharoh jih teujok keu ayah ngon ma, atra nyan ka ulon peuseumah ubak po teu allah,' teuma ureueng nyang lagee nyan hana wajeib le jihoreumat keu ureueng syiek jih. teuma, le sabab adat istiadat indatu gata, gata ta-anggal angen pot peue-peue nyang geupeugah le po teu allah. gata ureueng munafek! paih that peue nyang ka ltheueh geupeugah le nabi yesaya keuhai gata, 'meunoe kheueh feureuman allah: ureueng-ureueng nyan teuma jiseumah ulon ngon tutoe haba, teuma ate awaknyan jioh that nibak ulon. sia-sia mantong awaknyan jiseumah ulon, sabab peuratoran manusia nyang awaknyan peurunoe siulah-ulah nyan kheueh peuratoran ulon.' " oh ltheueh nyan isa laju geutawok bubena na ureueng dan geupeugah ubak awaknyan, "deungoe kheueh nyoe jeuet gata muphom! nyang jitamong lam babah ureueng, nyan hana jeuet keu najih; teuma nyang teubiet lam babah ureueng nyan, nyang kheueh nyang teupeugah najih." laju murit-murit isa geuteuka dan geupeugah ubak gobnyan, "peu kheueh bapak teupeu bahwa ureueng-ureueng farisi nyan tupeh ate jih watee jideungoe bapak peugah lagee nyan?" geujaweeb le isa, "tieb-tieb peunula nyang hana geupula le bakap ulon di syeuruga teuma geutarek bak ubo jih. bek neupakoe keu ureueng-ureueng

farisi nyan. awaknyan peumimpén-peumimpén buta; dan meunyo ureueng buta jipimpén ureueng buta, ban dua awaknyan teuma reubah lam parét." geupeugah le petrus, "neutulong peugah miseue nyan ubak kamoe, pak!" geujaweeb le isa ubak awaknyan, "peu kheueh gata gohlom cit muphom? peu kheueh hana gata teupeu, bahwa nyang jitamong lam babah laju jitron lam pruet, dan oh ltheueh nyan jiteubiet lom teuma? teuma nyang teubiet lam babah, meu-asai nibak ate; dan nyan kheueh nyang teupeujeuet manusia rhot bak najih. sabab nibak lam ate jiteuka pikeran-pikeran jeuhet, nyang rhot keu musabab manusia jeuet keu tukang seumupoh mate, meumukah, jipeubuet cabui, ceumeucue, jeuet keusaksi duseuta dan tukang ba peusula! hai-hai nyang lagee nyan kheueh nyang rhot ureueng jeuet keu najih, dan kon le sabab jipajoh bu ngon jaroe nyang hana teu rrah." oh ltheueh nyan isa laju geutinggai teupat nyan dan geujak laju u daerah nyang rab ngon banda tirus dan sidon. na sidroe ureueng inong kanaan nibak daerah nyan, jikak murumpok ngon isa sira jitawok-tawok, "aneuek daud, neugaseh kheueh keu ulon! aneuek inong ulon ka jitamong roh jeuhet. udeb jih parah lagoe na." isa mubacut pih hana geujaweeb keu ureueng inong nyan. teuma le murit-murit isa geujak ubak gobnyan sira geulakee, "pak, neuyue weeh keudeh ureueng inong nyan. jih nyan kiroh mantong dilikot geutanyoe!" geujaweeb le isa, "ulon geu-utus keu bansa israel, khusus jih keu awaknyan nyang sisat." ureueng inong nyan laju jipeurab dan jisujut laju dikeue isa sira jipeugah lagee nyoe, "neutulong kheueh ulon, teungku." geujaweeb le isa, "hana get teucok peunajoh aneuek manyak laju teutiek keu asee." "beutoi, teungku," jaweeb ureueng inong nyan, "seudangkan asee pih jipajoh seueh-seueh peunajoh nyang rhot nibak meuja teungku po jih." laju isa geupeugah bak ureueng nyan, "mak, raya lumpah na iman droeneueh! bah kheueh jeuet peue nyang gata lakee!" watee nyan cit teuma aneuek ureueng inong nyan puleh. isa laju geutinggai teupat nyan, dan geujak laju seutot rot pante danau galilea. oh ltheueh nyan laju geuteungoh ubak saboh buket dan laju geuduek nibak teupat nyan. jai lagoe na ureueng nyang teuka ubak gobnyan sira jiba ureueng nyang keunong peunyaket capiek, nyang buta, nyang lapee, nyang kalu, dan rame lom ureueng laen nyan saket. awaknyan laju jikeubah ureueng-ureueng nyang saket nyan dikeue isa, dan le isa laju geupeu puleh bandum ureueng nyang saket nyan. ureueng rame nyang dong disinan hireuen lagoe na, watee awaknyan jikalon ureueng kalu ka jeuet jipeugah haba, ureueng capiek puleh, ureueng lapee ka jeuet jikak, dan di ureueng buta ka deuh jimeunging. teuma awaknyan laju jipujoe-pujoe allah bansa israel. oh ltheueh nyan isa laju geutawok bandum murit gobnyan sira geupeugah, "ulon weeh lumpah na keu ureueng rame nyoe. ka lthee uroe treb jih awaknyan meusajan-sajan ngon ulon, dan bak watee nyoe nibak awaknyan ka hana le peunajoh. ulon hana lon bri awaknyan jiwoe deungon pruet shoh, eunteuk awaknyan pansan bak rot ueh raya." laju le murit-murit isa geutanyong bak gobnyan, "dipat

ta teume peunajoh nibak daerah nyang seungue lom aseng keu ureueng nyang dub nyoe rame?" "na padub boh ruti nibak gata?" geutanyong le isa bak awaknyan. "na tujuh boh," jaweueb awaknyan, "dan eungkot ubit na teuma meupadub boh." teuma le isa laju geuyueduek ureueng rame nyan di ateuh tanoh. laju gobnyan geucok ban tujuh boh ruti meunan cit ngon eungkot nyan, oh lheureh nyan geu-ucab syukoe ubak po teu allah. oh lheureh nyan gobnyan laju geupriek-priek ruti nyan meunan cit deungon eungkot nyan ngon jaroe gobnyan, laju atra nyan geubri ubak murit-murit geuh. dan le murit-murit gobnyan laju geubagi-bagi atra nyan ubak ureueng rame nyan. bandum awaknyan jimakheun sampoe mandum troe. oh lheureh nyan murit-murit isa laju geupeusapat bandum peunajoh nyang leubeuh awaknyan pajoh. bandum nyan na tujuh boh raga peunoh. jeumeulah ureueng agam mantong nyang makheun peunajoh nyan na peuet ribee droe, gohlom teu-itong ureueng inong ngon aneuek manyak. oh lheureh nyan isa laju geuyue woe bandum ureueng rame nyan. gobnyan keudroe geu-ek lam saboh peuraho geujak laju u daerah magadan. na meupadub droe ureueng farisi ngon ureueng saduki jikak ubak isa keuneuk jijeubak gobnyan. awaknyan jilakee mangat isa geupeuget buet nyang ajaeb sibagoe bukeuti bahwa gobnyan beutoi teuka nibak po teu allah. geujaweueb le isa, ("meunyo mata uroe teungoh jillob, gatanyoe tapeugah, 'cuaca get that, sabab langet mirah.' dan meunyo beungoh uroe, gatanyoe tapeugah, 'uroe nyoe teuma ujeuen, sabab langet mirah dan reudok.' nah, gata hase taramai cuaca deungon cara takalon keuadaan langet, padahai, tanda-tanda jamen hana hase gata ramai!") "keubiet that jeuhet dan that doraka ureueng-ureueng bak jamen nyoe. gata lakee ubak ulon mangat lon peuet buet nyang ajaeb. keu gata hana teubri meusaboh keujaeban pih keucuali keujaeban nabi yunus." oh lheureh geupeugah meunan isa laju geutinggai awaknyan, dan geujak laju ho laen. watee murit-murit isa ka trok u meurandeh danau, baro kheureh geuteupeue le awaknyan bahwa awaknyan tuwoe geuba ruti. isa geupeugah ubak awaknyan, "ate-ate kheureh ubak rago ureueng farisi dan saduki." ban geudeungoe tutoe haba isa nyan, murit-murit gobnyan laju geumariet sabe keudroe-droe, "gobnyan geupeugah lagee nyan sabab geutanyoe hana taba ruti." isa geuteupeue peue nyang awaknyan peugah nyan. teuma gobnyan laju geupeugah, "keupeue gata peumasa-alah keuhai hana meuruti? peu kheureh gata kureueng meuman! peu kheureh gata gohlom muphom? peu kheureh gata hana ta-ingat keu ruti nyang limong boh ulon priek-priek keu ureueng nyang limong ribee droe? padub boh raga nyang mantong leubeuh ruti nyan oh watee gata peusapat? dan pakriban teuma deungon ruti nyang tujuh boh keu ureueng nyang peuet ribee droe nyan? padub boh raga teuma peunajoh nyan nyang leubeuh oh watee gata peusapat? pakon gata hana tamuphom bahwa ulon mariet ngon gata kon kheureh keu ruti? beu ate-ate kheureh keu rago ureueng farisi dan saduki!" akhe jih murit-murit isa ka muphom bahwa isa geuyue awaknyan beu ate-ate bukan keu rago

nyang jipeuguna keu teupeugot ruti, teuma keu bandum peungajaran ureueng-ureueng farisi dan saduki. isa geujak dan geupeuto laju ubak banda kaisarea filipi. disinan gobnyan geuteumanyong bak murit-murit gobnyan, "meunurot nyang jipeugah le gob, aneuek manusia nyan soe?" geujaweueb le murit-murit geuh nyan, "na nyang peugah nabi yahya pumano. na teuma nyang peugah nabi ilyas. nyang laen geupeugah yeremia, atawa sidroe lamkawan nabi-nabi." "teuma meunurot gata keudroe, ulon nyoe soe?" geujaweueb le simon petrus, "bak na kheureh raja nyang ba seulam, aneuek allah nyang udeb." "meu-untong that-that gata, simon, aneuek yona!" kheureh isa, "sabab bukan manusia nyang peugah nyan ubak ulon, teuma bak ulon nyang na lam syeuruga. sabab nyan beu tateupeue kheureh, gata na kheureh petrus, batee nyang khong. dan di ateuh keunaleueng batee nyoe kheureh teuma lon peudong geureja lon, nyang hana hase jipeutaloe le gob; bah pih le mawot! ulon teuma lon bri keu gata gunci donya baro allah. peue nyang gata tham di ateuh bumoe nyoe, nyan pih teu tham lam syeuruga. dan peue nyang gata peubeutoi di ateuh bumoe, nyan pih geupeubeutoi dalam syeuruga." oh ka lheureh nyan isa geupeu-ingat ubak murit-murit gobnyan mangat awaknyan hana geupeugah bak soe mantong bahwa gobnyan kheureh raja nyang ba seulam. phon watee nyan, isa geupeugah troh trang ubak murit-murit gobnyan, bahwa gobnyan haroh geujak u yerasalem dan laju meuteume meubagoe-bagoe deurita nibak peumimpén-peumimpén, peumimpén-peumimpén imeu dan guree-guree agama. gobnyan teuma jipoh mate, teuma bak uroe nyang keu lhee gobnyan teupeubeudoh lom teuma. laju petrus geutarek isa bak bineh gobnyan sira geumariet, "mudah-mudahan po teu allah geupeujioh hai nyan. tuhan, bek sampoe hainyan rhot ateuh tuhan!" isa geupaleng dan laju geupeugah ubak petrus, "neujak keudeh, he tukang peudaya! droeneuh neuhalang-halangi lon. pikeran gata nyan pikeran manusia; bukan pikeran po teu allah!" oh lheureh nyan isa geupeugah ubak murit-murit gobnyan, "ureueng nyang keuneuk seutot ulon, ureueng nyan haroh jipeutuwoe ubak keupe-untengan jih keudroe, jitem gulam saleb gobnyan, dan laju jiseutot ulon. sabab ureueng nyang keuneuk peuteuen udeb jih, ureueng nyan gadoh udeb. teuma ureueng nyang jikeureubeuen udeb jih deumi ulon, ureueng nyan teuma meuteume udeb. peue untong jih nibak sidroe-droe ureueng, meunyo bansigom donya nyoe jeuet keuhak milek jih teuma gobnyan ka gadoh udeb? peu kheureh hase udeb nyan teutuka ngon sapeue-sapeue? hana treb le aneuek manusia meusajan-sajan ngon malaikat-malaikat gobnyan teuma geuteuka deungon kuasa bakap gobnyan. bak watee nyan gobnyan teuma geubalahi keu ureueng-ureueng nyang sapeue-sapeue deungon peue-peue nyang ka jipeubuet. beuneuteupeu kheureh! lamkawan gata nyan na disinoe nyang hana teuma mate, sigohlom jikalon aneuek manusia geuteuka sibagoe raja." nam uroe teuma oh lheureh nyan isa laju geuba petrus meunan cit yakobus dan syedara gobnyan yahya, geupeu-aseng droe bak saboh gunong nyang manyang. dikeue awaknyan,

isa geupeu-ubah droe: rupa gobnyan gleh ngon trang lagee mata uroe dan peukayan gobnyan puteh muble-ble. oh ltheuh nyan ban lhee droe murit geuh nyan leumah laju geukalon nabi musa dan ilyas teungoh geupeugah haba ngon isa. laju petrus geupeugah ubak isa, "tuhau, mangat that tanyoe disinoe. meunyoee tuhan neutem, ulon teuma lon peudong lhee khimah bak teumpat nyoe: saboh keu tuhan, saboh keu nabi musa dan saboh treuk keu ilyas." teungoh petrus mantong geupeugah haba, awan nyang peungeh that na di langet manyang laju jipeurab dan jipeupayong awaknyan dan nibak lam awan nyan laju teudeungoe su lagee nyoe, "nyoe ktheueh aneuek ulon nyang ulon gaseh. gobnyan keubiet mangat that ate lon. deungoe ktheueh peue nyang geupeugah!" watee murit-murit isa geudeungoe su nyan, awaknyan lumpah teumakot sampoe reubah teugageueng bak tanoh. teuma isa laju geupeurab sira geumat awaknyan. "beudoh ktheueh," ktheun gobnyan, "bek teumakot!" watee jingieing le awaknyan, hana deuh geukalon meusidroe pih, seulaen isa sidroe. watee awaknyan geutron nibak ateuhe gunong nyan, isa laju geupeu-ingat awaknyan, "bek tabri tee peue nyang ka gata kalon bunoe ubak soe mantong, sigohlom aneuek manusia geupeubeudoh nibak mate." murit-murit isa laju geutanyong ubak gobnyan, "pakon guree-guree agama geupeugah bahwa ilyas haroh teuka leubeh dilee?" geujaweueb le isa, "beutoi ilyas teuka dan gobnyan geupeu beereeh peue-peue nyang gohlom beereeh. teuma ulon peugah ubak gata, ilyas ka troh geuteuka, teuma le manusia hana jituri gobnyan; awaknyan jipeusaneut gobnyan ban galak ate droe. dan meunan cit awaknyan teuma jipeusaneut ateuhe aneuek manusia." teuma le bandum murit gobnyan ka muphom bahwa nyang geupeugah le isa nyan keuhai nabi yahya pumano. watee isa dan ban lhee droe murit gobnyan geugisa ubak ureueng rame nyan, na sidroe ureueng agam jipeurab ubak gobnyan, laju jisujut dikeue isa, sira jipeugah, "bapak, neugaseh ktheueh keu aneuek lon. aneuek ulon nyan keunong peunyakot sawan. peunyakot sawan nyang keunong ateuhe jih nyan lumpah parah sampoe watee jilab peunyakot nyan kayem that jihnyan reubah lam apui meunan cit kayem teuma reubah lam ie. ulon ka ltheueh lon ba aneuek ulon nyan ubak murit-murit bapak, teuma awaknyan hana hase geupeu puleh aneuek ulon nyan." geujaweueb le isa, "hebat that gata nyoe! gata biet that ureueng nyang meunyeuleweng dan hana neupeucaya. sampoe an pajan ulon haroh tinggai ngon gata dan ulon saba keu gata? neuba laju aneuek gata nyan keunoel!" dan isa laju geupeurintah bak roh jeuhet nyang na lam tuboh aneuek nyan beu jiteubiet. dan bak saat nyan cit teuma aneuek nyan ka puleh lagee bak nyang ka. oh ltheueh nyan murit-murit isa laju geujak ubak gobnyan sidroe-droe dan geutanyong bak gobnyan, "pak, pakon kamoe nyoe hana hase kamoe use roh jeuhet nyan?" geujaweueb le isa, "sabab gata kureueng iman. ingat ktheueh! meunyoee gata na iman bah pih bube bijeh sisawi, gata jeuet tapeugah ubak gunong nyoe, 'he gunong, minah ktheueh keudeh!' pasti gunong nyan teuma jiminah. hana mubacut

pih nyang hana hase gata peubuet! teuma roh jeuhet nyang lagee nyoe, baro ktheueh hase teu-use deungon doa dan puasa." watee murit-murit isa ka meusapat di galilea, isa geupeugah bak awaknyan, "hana treb le, aneuek manusia teuma jiseurah ubak kuasa manusia. gobnyan jipoh mate, teuma bak uroe nyang keu lhee gobnyan geupeubeudoh teuma." teuma bandum murit gobnyan seudeh ngon pilu. watee isa dan murit-murit gobnyan trok u kapernaum, ureueng-ureueng kuteb cukee bak baet tuhan jijak ubak petrus sira jitanyong, "peu ktheueh guree gata nyan geubayeue cukee keu baet tuhan atawa hana?" geujaweueb le petrus, "bayeue!" watee petrus geuwoe, isa geumariet ngon gobnyan teuleubeh ilee, "simon, pakriban peundapat gata? soe nyang haroh bayeue cukee atawa impak-impak keu raja-raja lam donya nyoe? rakyat atawa ureueng aseng?" "ureueng aseng," geujaweueb le petrus. "meunyoee meunan," ktheun isa, "rakyat hana peureulee jibayeue. teuma bek ktheueh geutanyoe ta peutupeh peurasaan awaknyan. jadi, neujak keumawe ktheueh ubak danau. neucok ktheueh eungkot nyang phon that jikab bak kawe. lam babah eungkot nyan gata teume peng nyang seb keu tabayeue cukee geutanyoe dua. neucok ktheueh peng dan neubayeue ktheueh ubak awaknyan cukee geutanyoe keu baet tuhan." bak watee nyan murit-murit isa geujak ubak gobnyan sira geutanyong, "soe nyang teu-anggab paleng rayeuk lamkawan umat po teu allah?" isa laju geutawok sidroe aneuek mit, dan jidong laju aneuek manyak nyan dikeue awaknyan. laju geupeugah le isa, "peucaya ktheueh! meunyoee gata meu-ubah dan ka jeuet lagee aneuek manyak, gata teuma jeuet keu anggota umat po teu allah. ureueng nyang peumiyueb droe dan ka jeuet lagee aneuek manyak nyoe, jihnyan ktheueh nyang paleng rayeuk lamkawan umat po teu allah. dan ureueng nyang teurimong aneuek miet nyang lagee nyoe sabab le ulon, nyan saban cit ka gata teurimong ulon." "soe nyang jeuet keu sabab sidroe lamkawan ureueng-ureueng nyang ubit nyoe hana meuman le bak ulon, leubeh get meunyoee batee meugileng teu-ikat bak takue laju teupeunom lam laot nyang lhok. biet that ceulaka donya nyoe sabab hai-hai nyang teupeusabab ureueng jipeubuet desya. beutoi hai-hai nyang lagee nyan sabe na, teuma ceulaka ktheueh ureueng nyang teupeusabab keunyan! meunyoee jaroe gata atawa gaki gata nyang jeuet keusabab gata tapeubuet desya, takoih ktheueh dan taboh ktheueh. leubeh get gata udeb deungon po teu allah hana meusiblah jaroe atawa meusiblah gaki, nibak gata geutiek u dalam apui nuraka deungon ban dua jaroe atawa gaki gata. dan meunyoee mata gata nyang teupeusabab gata tapeubuet desya, cungek ktheueh dan taboh ktheueh. leubeh get gata udeb deungon po teu allah ngon mata siblah nibak teuboh lam apui nuraka deungon ban dua blaih mata." "awai! bek tahina sidroe-droe ureueng nyang ubit nyoe. sabab ingat ktheueh, malaikat-malaikat awaknyan sabe na dikeue bapak ulon di syeuruga. sabab aneuek manusia teuka keu geujak peuseulamat ureueng nyang sisat! pakriban ktheun gata? meunyoee na sidroe ureueng bak jih nyan na jipeulara siploh boh bubiri, dan saboh nibak bubiri-bubiri nyan gadoh,

peu kheueh nyang jipeubuet le ureueng nyan? ka pasti ureueng nyan jitinggai bubiri nyang sikureueng ploh sikureueng boh nyan di atueuh bakuet dan gobnyan jijak mita laju bubiri nyang gadoh nyan. dan meunyoe gobnyan ka meuteume lom teuma bubiri nyang gadoh nyan – peucaya kheueh lon – gobnyan leubeh galak ate jih keu bubiri nyang gadoh nyan nibak bubiri nyang na si kureueng ploh sikureueng boh nyang hana gadoh. meunan cit deungon bapak gata nyang na lam syeuruga hana geutem sidroe lamkawan ureueng-ureueng nyang ban meuiman ubak ulon nyoe sisat." "meunyoe syedara gata na meudesya atueuh gata, tajak kheueh ubak ureueng nyan dan tatunyak kheueh salah gobnyan. tapeubuet kheueh nyan deungon seungab-seungab le gata bandua. meunyoe gobnyan geuturot peue nyang gata peugah, teuma gata ka hase tacok lom syedara gata nyan. teuma meunyoe han, taba kheueh sidroe atawa dua treuk. sabab lam alkitab na teutuleh, 'sikureueng-kureueng jih dua atawa lhee droe saksi nyang teupeureulee keu jeuet teupeugah sidroe-droe ureueng teutudoh nyan meusalah.' meunyoe gobnyan hana jiteurimong naseuh atueuh ureueng-ureueng nyan, tapeugah kheueh hai nyan ubak jeumaah, anggab kheueh gobnyan sibagoe ureueng tukang kuteb cukee dan sidroe ureueng nyan hana jituri ubak po teu allah." "beutateupeu kheueh: peue nyang gata tham lam donya nyoe, nyan pih teu tham dalam syeuruga. dan beutateupeu kheueh teuma: meunyoe lamkawan gata di donya nyoe na dua droe ureueng ka sipakat keuhai peue mantong dan neudoa teuma, doa gata nyan teuma geudeungoe le bapak ulon lam syeuruga. sabab, dipat mantong na dua atawa lhee droe ureueng meusapat kareuna ulon, ulon teutab na di teungoh-teungoh awaknyan." oh lheueh nyan petrus geujak ubak isa dan geupeugah, "tuhan, meunyoe syedara ulon meudesya atueuh ulon, sampoe padub goe ulon peu-amphon ureueng nyan? peu kheueh sampoe troh tujuh goe?" geujaweueb le isa, "hana, kon sampoe tujuh goe, teuma tujuh ploh kali tujuh goe! sabab meunyoe po teu allah nying peurintah, keuadaan jih na kheueh lagee miseue nyoe: sidroe raja keuneuk peuseuleusoe bandum utang-utang namiet gobnyan. watee gobnyan keuneuk geupeu phon peureksa, jipeulahad ubak gobnyan sidroe namiet nyang meu-utang meujuta-juta, dan hana hase jibayeue utang nyan. teuma, raja nyan geupeutron peurintah mangat namiet nyan geupeubloe dan bandum hareuta milek gobnyan keu teubayeue utang nyan. namiet nyan laju jisujut di keu raja nyan, dan jilakee, 'teungku amphon, neusaba kheueh ilee. ulon teuma lon peuglah bandum utang-utang lon.' raja nyan weueh keu namiet nyan, sampoe bubena utang namiet nyan bandum geusampoh. watee namiet nyan jiteubiet u luwa, laju meurumpok ngon rakan jih, rakan jih nyan sidroe namiet cit, nyang meu-utang nibak gobnyan kira-kira na meupadub ribee. namiet nyan laju jidrob rakan jih nyan dan ji ceukak bak takue, sira jipeugah, 'bayeue laju bandum utang gata!' laju rakan gobnyan nyan jisujut dikeue jih nyan sira jilakee, 'neusaba kheueh ilee he rakan lon, bandum nyan teuma lon bayeue!' teuma namiet nyan jitulak.

akhe jih gobnyan laju jipeutamong rakan jih nyan u dalam glab sampoe ureueng nyan hase jibayeue utang gobnyan. watee namiet-namiet nyang laen jingiang peue nyang ka teujadi, awaknyan seudeh that dan laju bri tee hai nyan ubak raja. teuma le raja laju geutawok namiet nyang jeuhet nyan sira geupeugah, 'hei, namiet nyang jeuhet! bubena utang gata ka ulon sampoh sabab gata talakee bak ulon. pakon gata hana tagaseh keu rakan gata lagee nyang ka ulon peubuet hai nyan u atueuh gata?' raja nyan beungheh lumpah na. namiet nyan jeuhet nyan laju geusak lam glab sampoe namiet nyan jibayeue bandum utang jihnyan nibak raja." isa geupeu habeh haba gobnyan deungon geupeugah lagee nyoe, "meunan cit deungon bapak ulon di syeuruga teuma geupeusanet atueuh gata maseng-maseng, meunyoe gata hana tapeu amphon rakan gata deungon ikhlaih." oh ka seuleusoe bandum nyan geupeugah le isa ubak awaknyan, laju geutinggai galilea dan geujak laju u daerah yudea di meurandeh krueng yordan. jai that ureueng nyang seutot gobnyan, dan laju geupeu puleh awaknyan nibak teupat nyan. teuma di ureueng-ureueng farisi laju geujak keunan keuneuk jijak jeubak isa. awaknyan laju jitanyong, "meunurot hukom agama geutanyoe, peu kheueh jeuet ureueng jitaleuk purumoh jih deungon alasan peue mantong?" geujaweueb le isa, "peu kheueh gohlom gata beuet dalam alkitab bahwa peuncebta nyang peujeuet manusia, bak awaiphon geupeujeuet agam dan inong? dan oh ka lheueh nyan gobnyan geupeugah, 'nyan kheueh sabab jih di ureueng agam jitinggai mak ngon yah laju jijak meusaho ngon peurumoh jih, teuma bandua nyan ka jeuet keusaboh.' teuma awaknyan kon le dua droe, teuma sidroe. nyan kheueh sabab jih peue nyang ka geupeu saboh le po teu allah hana jeuet jipeu cre le manusia." le ureueng farisi geutanyong bak gobnyan, "meunyoe meunan pakon nabi musa geuyue jok surat taleuek ubak ureueng nyang taleuek purumoh jihnyan?" geujaweueb le isa, "nabi musa geupeu idhin keu gata taleuek purumoh gata sabab gata payah that teupeurunoe. teuma nyang sibeuna jih kon lagee nyan yoh awai ilee. teuma, deungoe kheueh nyoe: soe nyang taleuek purumoh jihnyan – padahai inong nyan hana jimeumukah – oh lheueh nyan jimeukawan lom ngon inong laen, ureueng nyang lagee nyan ka jimeumukah." teuma murit-murit isa geupeugah ubak gobnyan, "meunyoe soai hubungan lakoe binoe na kheueh lagee nyan, leubeh get bek meukawen." geujaweueb le isa, "hana bandum ureueng jeuet jiteurimong tutoe haba nyan, teuma ureueng-ureueng nyang ka geupeuteuntlee le po teu allah. sabab na ureueng nyang hana meuteume meukawen, sabab awaknyan keubiet ka lahe lagee nyan. dan na teuma nyang hana hase meukawen sabab atueuh gobnyan jipeubuet lagee nyan le ureueng laen. dan na teuma nyang jipileh keudroe keu hana jitem meukawen, mangat hase jilayani po teu allah. ureueng nyang hase jiteurimong peungajaran nyoe, bah kheueh jiteurimong." na ureueng nyang jiba aneuek miet ubak isa mangat geutem peudeuk jaroe gobnyan atueuh ulee awaknyan dan geumeudoa keu awaknyan. teuma le

murit-murit isa laju geubeungeh ateuh awaknyan. teuma isa laju geupeugah bak murit-murit gobnyan, "bah kheueh aneuk miet nyan jijkak bak ulon! bek neu tham awaknyan, sabab ureueng-ureueng nyang lagee nyoe kheueh nyang jeuet keu anggota umat po teu allah." dan isa laju geukeubah jaroe gobnyan ateuh ulee aneuk miet nyan dan geubri beureukat keu awaknyan. oh lheureh nyan gobnyan laju geujak nibak tempat nyan. bak siroe na sidroe ureueng agam jijkak meuhadab ubak isa, "pak guree," kheun ureueng nyan, "peubnye get nyan yang haroh ulon keureuja mangat jeuet ulon teurimong udeb sejati dan keukai?" geujaweub le isa, "pakon gata tanyong bak ulon keuhai peue nyang get? teuma na saboh nyang get. meunyeoe gata keuneuk udeb, gata haroh taat ubak peue-peue nyang geupeurintah le po teu allah." "peurintah nyang toh?" jitanyong le ureueng nyan. geujaweub le isa, "bek poh mate gob, bek meumukah, bek ceumeucue, bek jeuet keu saksi duseuta, horeumat kheueh ubak ayah ngon ma gata; dan gaseh kheueh seusabe gata manusia lagee gata gaseh keu droe gata." "bandum peurintah nyan ka ulon peubuet," jijaweub le ureueng muda nyan. "peue lom nyang peureulee?" isa laju geupeugah ubak aneuk muda nyan, "meunyeoe gata keuneuk trok bak samporeuna, tajak peubloe kheueh bandum hareuta milek gata. tabri kheueh peng nyan keu ureueng gasien, dan gata teuma meuteume hareuta lam syeuruga. oh lheureh nyan, teuka kheueh jak seutot ulon!" ban jideungoe haba nyang lagee nyan, ureueng muda nyan jijkak laju deungan ate nyang gundah sabab gobnyan lumpah that jai hareuta. teuma isa geupeugah bak murit-murit gobnyan, "ulon peugah ubak gata, payah that-that meunyeoe ureueng kaya jeuet keu anggota umat allah. dan nyoe lom nyang keuneuk ulon peugah ubak gata; leubeh mudah saboh unta jitamong lam ruhueng jarom, nibak ureueng kaya jitamong lam donya baro po teu allah." watee murit-murit gobnyan geudeungoe haba isa nyan, awaknyan hireuen lumpah na. "meunyeoe meunan," kheun awaknyan, "soe nyang hase seulam?" isa geungieng ateuh awaknyan laju geupeugah, "nibak manusia, hai nyan hana jitamong lam akai! teuma nibak po teu allah, bandum mungen." laju geupeugah le petrus, "ngieng kheueh, kamoe ka kamoe tinggai peue-peue nyang na deumi keu kamoe seutot bapak. dan peu teuma nyang kamoe teurimong?" geupeugah le isa ubak awaknyan, "peucaya kheueh: lam donya nyang baro, aneuk manusia teuma taduek ateuh takhta gobnyan nyang mulia. bak watee nyan gata bandum murit-murit ulon teuma neuduek ateuh dua blaih boh takhta dan gata peusidang ban dua blaih boh sukee bansa israel! dan tieb-tieb ureueng nyang ka jitinggai rumoh, atawa syedara agam meunan cit deungan nyang inong, atawa mak ngon yah, atawa aneuk miet, atawa lampoh meusabab le ulon, keu ureueng nyan teuma jiteurimong lom sireutoh go ganda. dan gobnyan teuma jiteurimong udeb sejati dan keukai. teuma jai that ureueng nyang bak saat nyoe jeuet keu ureueng awai teuma jeuet keu ureueng nyang akhe atawa nyang bak saatnyoe akhe teuma jeuet keu nyang awai." meunyeoe po teu allah

ka geumat peurintah, keuadaan jih na kheueh lagee miseue nyoe: na sidroe ureueng po lampoh anggo ban beungoh that jiteubiet nibak rumoh gobnyan jijkak mita ureueng nyang tem meubuet bak lampoh anggo gobnyan. oh ka situju ureueng mubuet nyan jibayeue upah saboh peng pirak siroe, gobnyan laju jiyue ubak awaknyan mangat jikeureuja laju bak lampoh anggo gobnyan. poh sikureueng beungoh, ureueng po lampoh anggo nyan jijkak lom, dan laju deuh jikalon na meupadub droe teuk ureueng nyang teungoh meunganggur hana buet di dalam banda. teuma jipeugah kheueh le gobnyan ubak awaknyan, 'neujak buet kheueh laju ubak lampoh lon. ulon teuma lom bayeue upah gata deungan yuem nyang sisuai.' awaknyan pih jijkak. poh dua blaih watee cot uroe dan meunan cit poh lhee seupot, ureueng po lampohnyan jiteubiet lom dan jijkak peubuet hai nyang saban lageanyan cit teuma. dan kira-kira poh limong seupot, gobnyan jiteubiet lom dan mantong na jikalon ureueng nyang meunganggur. laju gobnyan jitanyong ubak awaknyan, 'peubuet gatanyoe neudong siroe seupot bak tempat nyoe deungan hana neupeubuet sapeue?' awaknyan nyang na dong disinan jijaweub, 'hana ureueng nyang jitem bie buet keu kamoe.' meunyeoe meunan, 'jikheun le ureueng po lampoh nyan, 'neujak kheueh mubuet bak lampoh anggo lon.' oh seupot uroe, ureueng po lampoh nyan jipeugah ubak mando gobnyan, 'teuma jijkak kheueh bandum ureueng meukeureuja nyan dan jibayeue kheueh upah awaknyan maseng-maseng, phon nibak ureueng nyang tamong akhe sampoe ubak nyang tamong awai.' teuma teuka kheueh ureueng-ureueng nyang mubuet phon poh limong seupot. awaknyan maseng-maseng jiteurimong upah saboh peng pirak. oh lheureh nyan teuka teuma ureueng-ureueng nyang mubuet phon beungoh uroe. awaknyan jipike jiteurimong leubeh jai nibak ureueng nyang mubuet seupot, padahai gobnyan jiteurimong saban cit ngon ureueng mubuet seupot saboh peng pirak. watee jiteurimong peng nyan, awaknyan jimeurapa keu ureueng po lampoh: 'ureueng-ureueng nyang mubuet dudoe nyan cit sijeuem jijkak buet. seudangkan kamoe meukeureuja siroe suntok lam uroe kha, teuma le teungku neubayeue awaknyan saban ngon keu kamoe!' ureueng po lampoh anggo nyan geujaweub ubak sidroe lamkawan ureueng nyang teumanyong nyan, 'he rakan, ulon hana meusalah ateuh gata. gata kon ka situju neuteurimong upah saboh peng pirak keu gata mubuet siroe peunoh? nyoe, tacok kheueh upah gata dan neuweh kheueh keudeh. ulon keubiet lon keuneuk bri bak ureueng nyang tamong paleng akhe ngon upah nyang saban deungan upah nyang ulon bri keu gata. peu kheueh ulon hana jeuet lon peubuet ban galak droe ulon deungan atra lon keudroe? atawa gata bingiek, sabab ulon peumurah ate?' "geupeugah lom le isa, "meunan cit deungan ureueng-ureueng nyang paleng akhe teuma jeuet keu ureueng phon, dan ureueng nyang phon teuma jeuet nyang paleng akhe." watee isa geujak u yerasalem, bak teungoh rot ueh laju geutawok bandua blaih droe murit gobnyan jeuet meusapat meu aseng keudroe. isa laju geupeugah ubak awaknyan, "deungoe kheueh

nyoe! geutanyoe jinoe teungoh tajak u yerusalem. nibak teupat nyan aneuk manusia jiseurah ubak imeum-imeum ulee dan ubak guree-guree agama. laju gobnyan jihukom mate, oh lheueh nyan gobnyan jijok keu ureueng-ureueng nyang kon yahudi. awaknyan jihina-hina gobnyan, jiseksa gobnyan, dan jisaleb gobnyan. teuma bak uroe nyang keu lhee, gobnyan geupeubeudoh lom teuma." oh lheueh nyan purumoh zebedeus ngon aneuk-aneuk gobnyan geujak murumpok ngon isa. dikeue isa gobnyan geusjut laju geulakee sapeue-sapeue. "peue nyang mak peureulee?" geutanyong le isa. geujaweueb le mak nyan, "ulon meuharab dak jeuet ban dua droe aneuk ulon nyoe jiduek rot blaih uneuen dan blaih wie bakap wateu bakap ka jeuet keu raja singoh." "gata nyoe hana tateupeue peue nyang gata lakee," geukheun le isa ubak awaknyan. "peu kheueh sanggob tajieb ie nibak piala peundeuritaan nyang haroh ulon jieb?" "sanggob," jaweueb awaknyan. geupeugah le isa, "keubiet, gatanyoe teuma tajieb cit nibak piala lon. teuma keuhai soe nyang duk di wie dan uneuen lon, nyan bukon ulon nyang meuhak peuteuntee. teupat nyan na kheueh keu ureueng-ureueng nyang ka geupeuteuntee le bakap lon." watee geudeungoe hai nyan le ban siploh droe murit geuh nyang laen, awaknyan laju geubeungeh keu bandua droe meusyedara nyan. sabab nyan isa geutawok awaknyan bandum dan laju geupeugah, "gata tateupeue bahwa peumimpén-peumimpén bansa nyang hana jituri ubak po teu allah peumimpén nyang lagee nyan teuma jiteugom ngon jitindeeh rakyat jih keudroe. dan ureueng-ureueng rayeuk awaknyan jiteugom awaknyan. teuma gata nyoe hana jeuet lagee nyan. sikeubiet jih, ureueng nyang keuneuk jeuet keu rayeuk lam kawan gata, haroh jeuet keu peulayan gata. dan ureueng nyang keuneuk jeuet keu ureueng nyang phon lamkawan gata, haroh jeuet keu namiet gata. saban lagee aneuk manusia nyan cit teuma; gobnyan teuka bukon keu teulayani teuma keu geulayani, geuseurah nyawong gobnyan keu geupeubeubaih ureueng rame." watee awaknyan geutinggai yerikho, jai lumpah na ureueng nyang seutot isa. na dua droe ureueng buta teungoh jiduek-duek bak binéh jalan. watee jideungoe le awaknyan bahwa isa teungoh geujak rot nyan, awaknyan laju jiteumawok ngon su nyang teuga, "aneuk nabi daud, neugaseh kheueh keu kamoe!" ureueng rame nyang na dong disinan laju jibeungeh awaknyan sira jiyue seungab. teuma awaknyan jidumpek leubeuh teuga nibak nyang ka, "teungku, aneuk nabi daud, neugaseh kheueh keu kamoe!" laju isa geupioh sira geuhoi awaknyan, "peue nyang gata harab mangat ulon peubuet atueh gata?" geutanyong le isa. jiiaweueb le awaknyan, "teungku, nyang kamoe lakee mangat kamoe beujeuet keumalon!" isa weueh that keu awaknyan, laju geumat mata awaknyan. watee nyan cit teuma awaknyan ka deuh jikeumalon. laju awaknyan jiseutot isa. watee ka to u yerusalem, awaknyan laju trok u betfage di buket zaiton. nibak teupat nyan isa laju geuyue bak dua droe murit gobnyan geuyuejak leubeuh dilee. "neujak kheueh laju u gampong nyang na dikeue nyan," peusan isa bak awaknyan. "nibak teupat nyan eunteuk laju

leumah gata kalon saboh keuleudee nyang mantong teu ikat meusapat ngon aneuk jih. neupeuleueh kheueh bandua boh keuleudee nyan dan neuba laju ubak ulon. meunyo na ureueng nyang teumanyong sapeue-sapeue, neupeugah bak ureueng nyang teumanyong nyan, 'tuhan nyang peureulee atra nyoe', teuma di ureueng nyang teumanyong nyan laju seungab jipeubiyeu mantong keuleudee nyan teuba." hai nyang lagee nyan mangat jeuet peue nyang ka lheueh geupeugah le nabi, 'peugah kheueh ubak sion, raja gata teungoh geujak ubak gata. gobnyan miyueb ate dan teungoh geupreh saboh keuleudee, saboh aneuk keuleudee nyang mantong muda." oh lheueh nyan bandua droe murit geuh nyan laju geujak dan geupeubuet peue nyang ka geupeugah le isa nyan. awaknyan jiba keuleudeenyan deungon aneuk jih. laju awaknyan jipeungui atueh rhung keuleudee-keuleudeenyan deungon ija jubah awaknyan keudroe. oh lheuehnyan isa laju geu ek. le that-that ureueng disinan jileueng ija-ija jubah awaknyan di atueh rot ueh, dan di ureueng-ureueng laen laju jikoh ranteng-ranteng kayee laju jitabu atueh rot ueh. ureueng rame nyang jak dikeue dan dilikot isa jidumpek-dumpek, "udeb aneuk daud! geubri beureukat kheueh gobnyan nyang teuka atueh nan tuhan! pujoe kheueh allah nyang mahamanyang!" oh lheueh nyan, watee isa geutamong u yerusalem, bansaboh banda nyan teukeujot lumpah na. "nyoe soe?" jitanyong le ureueng-ureueng lam banda nyan. "gobnyan nabi isa, nibak nazaret di galilea," geujaweueb le ureueng rame nyang seutot isa. oh lheueh nibak nyan isa geutamong laju lam baet tuhan, dan geu-use banmandum ureueng nyang na bloe peubloe disinan. bubena meuja-meuja teupat tuka peng habeh geupeu kengkeueng saboh sahoe, dan bangku-bangku ureueng meukat cicem mirah pati nyan pih habeh geubalek sampoe teung bayeueng. oh lheueh nyan laju geupeugah bak ureueng-ureueng nyan, "di dalam alkitab na teutuleh bahwa po teu allah na geupeugah, 'rumoh ulon teupeugah rumoh teupat meudoa.' teuma le gata bandum ka gata peujeuet keu eumpung pancuri!" ureueng-ureueng buta ngon lapee jijak laju ubak isa nibak baet tuhan, dan gobnyan laju geupeu puleh awaknyan. teuma ulee-ulee imeum dan guree-guree agama beungeh lumpahna watee geukalon buet-buet ajaeb nyang geupeubuet le isa. dan meunan cit awaknyan beungeh that watee jikalon aneuk-aneuk miet jiseumurak mubura nibak baet tuhan, "udeb aneuk daud!" awaknyan jipeugah ubak isa, "peu kheueh na deungoe peue nyang jipeugah le awaknyan?" "nyoe, na lon deungoe," geujaweueb le isa. "peu kheueh hantom gata beuet ayat alkitab nyang teutuleh nyoe: 'aneuk-aneuk miet ngon aneuk-aneuk manyak ka gata purunoe keu jipeugah puja ngon pujoe nyang samporeuna?'" oh lheueh nyan isa laju geutinggai awaknyan disinan, laju geuteubiet teuma nibak banda nyan geujak laju u betania dan geudom di sinan. ban beungoh oh singoh teuma, watee geujak geugisa u banda, isa jiteuka deuek. gobnyan geukalon sibak bak ara nyang na timoh bak binéh rot. laju geupeurab bak binéh bak ara nyan. teuma bak ara nyan hana

jimuboh bah pih meusaboh nyang jai cit meun. laju geupeugah le isa keu bak ara nyan, "he bak ara, siumu udeb gata hana muboh le!" watee nyan cit teuma bak ara nyan laju layee. watee murit-murit isa geukalon peue nyang ka teujadi nyan, awaknyan hireuen lumpah na. "pakriban bak ara nyan langsung mate bak saat nyan cit teuma?" geutanyong le awaknyan. "nyang sikeubiet jih, geukheun le isa, meunyo gata meuman dan hana ragu-ragu, gata pih hase tapeubuet pakriban nyang ka ulon peubuet keu bak ara nyoe. dan kon nyan mantong, teuma gata jeuet tapeugah ubak gunong nyoe, 'teubeuot kheueh dan teuboh kheueh u dalam laot': teuma hai nyan teujadi. peue mantong nyang gata lakee lam doa gata, nyang gata lakee nyan teuma gata teurimong, asai gata meuman." oh lheu nyan isa geugisa u baet tuhan, laju geutamong dan geuseumeubeuet disinan. watee gobnyan teungoh geuseumeubeuet, ulee-ulee imeum dan peumimpen-peumimpen yahudi jijak ubak gobnyan dan sira geutanyong, "ateuh dasai peue bandum nyoe gata peubuet? soe nyang jok hak nyan ubak gata?" geujaweueb le isa, "ulon pi keuneuk teumanyong ubak gata. dan meunyo gata neujaweueb, di ulon pih teuma lon peugah ubak gata deungon hak soe ulon peubuet hai-hai nyoe. nabi yahya geupumano ngon hak soe? deungon hak po teu allah atawa manusia?" laju le imeum-imeum ulee dan peumimpen-peumimpen yahudi geumeupakat sabe keudroe-droe, "meunyo tanyoe peugah, 'deungon hak allah', gobnyan teuma geupeugah, 'meunyo meunan pakon gatanyoe hana tapeucaya keu gobnyan?' teuma meunyo tapeugah, 'deungon hak manusia', tanyoe ta takot keu rakyat ba, sabab awaknyan bandum jianggab nabi yahya nyan sidroe nabi." teuma awaknyan jijaweueb, "kamoe hana meuteupeue." laju isa geupeugah bak awaknyan, "meunyo meunan ulon pih hana lon peugah ubak gata deungon hak soe ulon peubuet bandum nyoe." "jinoenyoe pakriban peundapat gata keuhai nyoe?" geupeugah lom le isa. "na sidroe bapak nyang na dua droe aneuk agam. ureueng tuha nyan geujak ubak aneuk gobnyan nyang tuha dan geupeugah, 'neuk, tajak kheueh keureuja bak lampoh anggo uroe nyoe.' 'ulon han kutem,' jaweueb aneuk nyan. teuma oh dudoe aneuk nyan meu-ubah pikeran jih laju jijak mubuet u lampoh anggo nyan. oh lheu nyan ureueng syiek aneuk nyan geujak teuma ubak aneuk gobnyan nyang keudua, dan geupeugah teuma haba lagee nyang ka geupeugah bak aneuk geuh nyang awai. 'jeuet, bapak,' jijaweueb le aneuk gobnyan nyang keudua nyan. teuma di aneuk nyan hana jijak. nyan, bandua aneuk geuh nyan, nyang toh kheueh nyang seutot kheun ureueng syiek jih?" "nyang tuha," geujaweueb le imeum-imeum ulee dan peumimpen-peumimpen yahudi nyan. teuma isa geupeugah bak awaknyan, "peucaya kheueh: tukang-tukang kuteb cukee dan inong-inong jeuhet leubeh dilee jeuet keu anggota umat po teu allah nibak gata nyoe. sabab nabi yahya pumano teuka, dan geutanyok bak gata cara udeb nyang geulakee le tuhan, teuma gata hana cit ta pateh ubak ajaran gobnyan; teuma tukang-tukang kuteb cukee dan inong-inong jeuhet nyan peucaya keu

gobnyan. teuma bah pih gata na takalon bandum nyan, gata teutab hana tatem ubah bandum pikeran gata dan hana tapeucaya ubak tuhan." "deungoe kheueh miseue nyang saboh trek nyoe," kheun isa, "na sidroe ureueng po tanoh jimeulampoh bak saboh sagoe tanoh gobnyan deungon jipula bak anggo. laju jipageue ban silingka lampoh nyan, dan jikueh teuma uruek keu teumpat prah ie anggo, oh lheu nyan jipeudong teuma meunara teumpat meujaga. oh lheu nyan laju jipeusiwa lampoh anggo nyan ubak ureueng nyang keureuja bak lampoh gobnyan nyan, dan gobnyan laju jijak u nanggroe laen. oh ka trok bak watee musem pot boh anggo, ureueng po tanoh nyan laju jikirem namiet-namiet gobnyan ubak ureueng-ureueng nyang mubuet bak lampoh nyan keu jiteurimong jeumba gobnyan. teuma le ureueng-ureueng nyang mubuet bak lampoh nyan laju jidrob bandum namiet-namiet ureueng po tanoh nyan: nyan sidroe jipoh, nyang laen jipoh mate, nyang laen lom jirhom ngon aneuk batee. ureueng po tanoh nyan jikirem teuma namiet-namiet nyang laen, leubeh jai nibak nyang phon jikirem. teuma awaknyan teutab jipoh lagee nyang ka-ka. akhe jih ureueng po tanoh nyan jikirem aneuk jih keudroe ubak ureueng nyang mubuet di lampoh anggo nyan. 'pasti aneuk ulon jihoreumat.' teuma watee jikalon aneuk ureueng po tanoh nyan ka teuka keunan le ureueng-ureueng nyang mubuet lam lampoh nyan, awaknyan laju jimarit sabe keudroe-droe, 'nyan, nyoeapat jih, ahli wareh gobnyan. jak tapoh mate aneuk toke nyan, mangat hareuta waresan tateume keutanyoe!' teuma aneuk nyan laju jidrob, ji rhom uluwa, dan laju jipeumate." geutanyong le isa, "nyan, meunyo ureueng po lampoh anggo jiwoe, peue nyang teuma jipeubuet ateuh ureueng-ureueng nyang keureuja bak lampoh jih nyan?" geujaweueb le awaknyan, "pasti ureueng nyan geupoh mate banmandum ureueng jeuhet nyan, dan lampoh anggo nyan laju geupeusiwa bak ureueng laen nyang jitem weuek hase tanoh nyan keu gobnyan oh trok bak watee." teuma isa geupeugah ubak awaknyan, "peu kheueh gohlom na gata baka peue nyang teutuleh lam alkitab? 'batee nyang hana jipeuguna le tukang peuet bangunan batee nyan ka jeuet keu batee nyang paleng lumboi sa. nyoe kheueh buet tuhan; keubiet lagak that!' " "teuma, ingat kheueh," kheun isa, "bandum hak sibagoe umat po teu allah geutarek nibak gata dan geubri keu laen bansa nyang jipeubuet peurintah-peurintah allah. ureueng nyang rhot ateuh batee nyan, hanco; dan ureueng nyang jitimpok le batee nyan, teugileng jeuet keu abee." watee imeum-imeum ulee dan ureueng-ureueng farisi geudeungoe miseue-miseue nyang geupeugah le isa nyan, awaknyan geuteupeue bahwa isa geumeututoe keuhai awaknyan. teuma awaknyan jiuseuha keuneuk jidrob gobnyan. teuma awaknyan teumakot keu ureueng rame, sabab ureueng rame nyan jianggab isa sidroe nabi. isa geu meu haba lom ngon ureueng rame sira geuboh miseue lagee nyoe, kheun gobnyan, "meunyo po teu allah ka geumata peurintah, keuadaan jih na kheueh lagee miseue nyoe: na sidroe raja geupeuna khaniuri keu geupeukawen aneuk gobnyan nyang agam. raja

nyan geuyue jak tueng ubak peulayan-peulayan gobnyan ureueng-ureueng nyang teu-undang ubak tempat khanuri geuh nyan. teuma di ureueng-ureueng nyang teu-undang nyan hana jitem jak bak tempat ureueng meukawen nyan. oh ltheuh nyan le raja nyan geuyue jak teuma peulayan gobnyan nyang laen. geupeugah ubak peulayan nyang geuyue jak nyan: 'neubri tee kheueh ubak undangan nyan: hidangan khanuri ka siab. leumo-leumo aneuek-aneuek leumo ulon nyang paleng get ka ltheuh ulon sie. bandum nyan ka siab. neujak kheueh laju u tempat meukawen!' teuma bandum jame nyang teu-undang nyan hana jipako. awaknyan jijak bak buet jih keudroe maseng-maseng – nyang sidroe jijak u ladang jih, nyang laen teuma ubak peurusahaan jih keudroe; dan nyang laen laju jidrob bubena peulayan-peulayan raja nyan, laju jiseupot dan jipoh mate awaknyan. watee raja geudeungoe peue nyang ka teujadi nyan, gobnyan beungeh that-that. dan raja pih laju geukirem sipa-i gobnyan keu jijak poh mate bandum ureueng-ureueng tukang peumate peulayan geuh nyan, dan laju geutot banda awaknyan. oh ltheuh nyan le raja laju geutawok bandum peulayan gobnyan, dan laju geupeugah, 'khanuri keu meukawen ka siab, teuma bandum undangan hana nyang jeuet ngui. jinoenyoe tajak laju ubak rot ueh raya, dan taundang laju ureueng beurame that jijak bak tempat meukawen nyoe.' teuma bubena peulayan nyan pih laju jijak. awaknyan laju jijak bak rot ueh raya dan jipeusapat laju bubena ureueng nyang na meurumpok disinan, bah kheueh nyang get meunan cit ngon nyang jeuhet. deungon lagee nyan tempat khanuri nyan pih ka peunoh ban siseun lingka ngon jame nyang teuka. oh ltheuh nibak nyan di raja nyan laju geutamong keu geujak ngieng banmandum jame nyang ka trok keunan. dan deuh laju geukalon na sidroe ureueng nibak tempat nyan nyang hana jingui peukayan khanuri. laju le raja nyan geutanyong bak ureueng nyan, 'he rakan, pakriban cara jih sampoe meuhase tatamong lam ruweueng nyoe sabab gata hana tangui peukayan khanuri?' di ureueng nyan hana hase jipeugah sapeue. laju le raja nyan geupeugah ubak peulayan-peulayan gobnyan, 'ikat laju gaki ngon jaroe ureueng nyoe, dan jak tiek laju ureueng nyoe u tempat nyang seupot buta. nibak tempat nyan na tempat mo meuba-e dan deurita.' "laju le isa geupeu habeh calitra miseue nyan lagee nyoe, "jai that nyang teutawok, teuma na bacut khong nyang teupileh." oh ltheuh nyan le ureueng farisi laju jijak duek meurok pakat sabe keudroe-droe nyang tujuan jih pakriban cara beuhase isa teujeubak ngon cara jitemanyong meubagoe rupa. teuma awaknyan laju ji utus murit-murit jih ubak isa meusajan deungon na padub droe anggota golongan herodes. awaknyan jipeugah ubak isa, "pak guree, kamoe meuteupeue bapak juoe. bapak neupurunoe deungon troh trang keuhai meulakee po teu allah keu manusia, hana neupakoe peundapat soe mantong. sabab bapak hana neungieng ureueng. sabab nyan, ci bapak peugah bak kamoe: meunurrot peuratoran agama tanyoe, peu kheueh jeuet teubayue cukee keu kaisar atawa hana?" isa geuteupeue meukeusut

awaknyan nyang jeuhet nyan, jadi laju geupeugah, "he, ureueng-ureueng munafek! pakon gata keuneuk ujoé ulon? ci gata tunyok bak ulon mata peng nyang gata peuguna keu neubayue cukee!" laju awaknyan jijok bak gobnyan saboh keupeng peng pirak. isa geutanyong bak awaknyan, "gamba dan nan soe nyang na lam peng nyoe?" "gamba kaisar," jaweueb awaknyan. teuma isa geupeugah ubak awaknyan, "meunyoé meunan, tabri kheueh ubak kaisar peue nyang atra kaisar, dan ubak allah peue nyang atra allah." watee jideungoe le awaknyan peue nyang ka geupeugah le isa nyan, awaknyan hireuen lumpahna. teuma awaknyan laju jijak jitinggai isa. bak uroe nyan cit teuma, na meupadub droe ureueng saduki jijak ubak isa. awaknyan na kheueh golongan ureueng nyang meupeundapat bahwa ureueng nyang ka mate hana udeb le. "bapak guree," kheun awaknyan, "nabi musa na geupurunoe lagee nyoe: meunyoé sidroe ureueng agam meuninggai donya, dan ureueng nyan hana meu-aneuek, syedara gobnyan haroh meukawen ngon ureueng inong balee nyan mangat jibri keuturonan keu ureueng nyang ka meuninggai nyan. ka ltheuh na tujoh droe ureueng meusyedara tinggai di sinoe. nyang tuha meukawen oh ltheuh nyan meuninggai donya ngon hana geutinggai aneuek. teuma balee ureueng nyan geutinggai keu syedara gobnyan. syedara gobnyan nyan meuninggai teuma hana cit jitinggai aneuek. hai nyang lagee nyan teujadi teuma ubak syedara gobnyan nyang keu lhee dan sampoe trok bak nyang keu tujoh. dan akhe jih inong nyan keudroe meuninggai donya. nyan, bak watee ureueng mate geupeubeudoh lom teuma, peurumoh soe kheueh ureueng inong nyan? sabab ban tujoh droe awaknyan ka jimeukawan ngon ureueng inong nyan." geujaweueb le isa, "gata keuliru, sabab gata hana muphom alkitab, meunan cit kuasa po teu allah. sabab meunyoé ureueng mate oh trok bak watee jibeudoh lom teuma, awaknyan hana teuma jimeukawen le, teuma awaknyan teutab udeb lagee malaikat lam syeuruga. peu kheueh gohlom na gata baca peue nyang geupeugah le po teu allah keuhai ureueng mate geupeubeudoh lom teuma? allah meufeureuman, 'ulon kheueh allah nabi ibrahim, allah nabi ishaq dan allah nabi yakub.' allah nyan kon allah ureueng mate. gobnyan na kheueh allah ureueng udeb!" watee ureueng rame nyan jideungoe peue nyang geupeugah le isa, awaknyan hireuen lagoena keuhai nyang geupurunoe le gobnyan. bak watee ureueng-ureueng farisi jideungoe bahwa isa ka geupeujeuet ureueng-ureueng saduki hana jeuet jipeugah haba le, teuma awaknyan laju jimeurok pakat. sidroe lamkawan awaknyan, na kheueh sidroe guree agama, ji-ujoe keuneuk jeubak isa ngon cara jitemanyong. "bapak guree," kheun gobnyan, "peurintah toh kheueh nyang paleng awai didalam hukom agama?" geujaweueb le isa, "cinta kheueh tuhan allah gata deungon sipeunoh ate gata, deungon sipeunoh jiwa gata, dan deungon siluroh akai gata. nyan peurintah nyang paleng phon nyang paleng peunteng! peurintah nyang keudua saban deungon peurintah nyang phon nyan: cinta kheueh seusaba gata keudroe lagee gata tacinta keu droe gata keudroe. bandum hukom agama nyang

ka geubri le nabi musa dan ajaran bandum nabi nyan dasai jih nibak bandua hukum nyan." teungoh ureueng-ureueng farisi nyan mantong meugumpoi disinan, isa geutanyong ubak awaknyan, "peue kheun gata keuhai raja peuseulamat? keuturonan soe kheueh gobnyan?" "keuturonan nabi daud," jaweueb awaknyan. "meunyoe meunan," geutanyong lom le isa, "peue sabab roh allah geu ilham bak nabi daud keu teupeugah raja peuseulamat 'tuhan' sabab nabi daud geupeugah. 'tuhan geupeugah ubak tuhan lon: neuduek kheueh blaih ueneun lon, sampoe an ulon peujeuet musoh-musoh gata jitaklok ubak gata.' ngon nyan meunyoe nabi daud raja peuseulamat nyan 'tuhan,' pakriban tapeugah gobnyan keuturonan nabi daud?" hana meusidroe pih nyang hase jijaweueb peue nyang geutanyong le isa nyan. dan phon uroe nyan, hana le nyang teumanyong peue-peue mantong ubak gobnyan. dan isa teuma geupeugah ubak ureueng rame dan ubak murit-murit gobnyan, "guree-guree agama dan ureueng-ureueng farisi na keukuasaan keu geutafeuse hukom-hukom nabi musa. deungan sabab nyan gata seutot dan gata taat kheueh bandum nyang awaknyan peurintah. teuma bek tapeubuet peue nyang awaknyan peubuet, sabab awaknyan hana jipeubuet peue nyang awaknyan peurunoe. awaknyan jilakee hai-hai nyang hana jitamong le akai dan jipeuet peuratoran-peuratoran nyang brat, teuma mubacut pih awaknyan hana jitulong ureueng nyang peubuet hai nyan. bandum nyang awaknyan peubuet na kheueh jeuet jingieung le manusia mantong. awaknyan jisaja jingui ija seumayang nyang luwah-luwah dan jipeupanyang rumbai-rumbai bajee jubah awaknyan! awaknyan galak keu tempat nyang paleng get meunyoe jijak bak teumapat khanuri, dan kurusi istimewa nibak rumoh-rumoh iebadat. awaknyan galak that meunyoe jihoreumat le gob di pasai-pasai, dan teuhoi deungan 'bapak guree'. teuma gata nyoe bandum bek kheueh tatem meunyoe jihoi 'bapak guree', sabab guree gata cit sidroe gata bandum meusyedara. dan bek gata hoi dalam donya nyoe meusidroe pih deungan teukheun 'bapak', sabab bapak gata cit sidroe, nyan kheueh bapak nyang na lam syeuruga. dan bek teuma gata tatem meunyoe jihoi 'peumimpén', sabab peumimpén gata cit sidroe, nyan kheueh raja peuseulamat nyang ka rayeup janji le po teu allah. ureueng nyang paleng rayeuk lamkawan gata, bah kheueh beujeuet keu peulayan gata. ureueng peu manyang droe jih ureueng nyan teuma geupemiyueb le po, dan ureueng nyang peumiyueb droe jih teuma geupeumanyang le po." "meupaloe kheueh gata he guree-guree agama dan ureueng-ureueng farisi! gata bandum na kheueh tukang meupura-pura. gata tapagab-pagab ureueng laen keuneuk jeuet keu umat allah, dan ureueng laen nyang keuneuk jeuet keu umat allah, gata pagab. meupaloe kheueh gata he guree-guree agama dan ureueng farisi: gata bandum tukang meupura-pura. gata tatipee inong-inong balee dan gata reupah rumoh ureueng nyan keu gata tob-tob buet gata nyang jeuhet, gata meudoa panyang-panyang. nyan kheueh sabab jih hukuman nyang rhot ateueh gata singoh lumpah brat! mupaloe kheueh gata he

guree-guree agama dan ureueng-ureueng farisi! gata tukang meupura-pura! gata tajak jioh-jioh gata jeumeurang laot, gata jak bansaboh daratan ngon tujuan keu gata peutamong sidroe ureueng lam agama gata. dan oh ka lheureh ureueng nyan jitamong lam agama gata, gata peujeuet ureueng nyan keu calon ureueng jeuet jitamong lam apui nuraka nyang dua goe leubeh jeuhet nibak gata keudroe! mupaloe kheueh gata he peumimpén-peumimpén nyang buta! gata purunoe keu awaknyan lagee nyoe, 'meunyoe ureueng jimeu sumpah deumi keu baet tuhan, ureueng nyan hana teu-ikat ubak sumpah jih nyan; teuma meunyoe jimeusumpah deumi meuh nyang na di baet tuhan, ureueng nyan teu-ikat nibak sumpah geuh nyan.' gata ureueng-ureueng nyang bangai dan buta! toh nyang leubeh peunteng meuh jihnyan, atawa baet tuhan nyang peujeuet meuh nyan suci? gata meurunoe lom lagee nyoe, 'meunyoe sidroe ureueng jimeusumpah deumi miseubah, ureueng nyan hana teu-ikat le sumpah jihnyan; teuma meunyoe jihnyan jimeusumpah deumi keureubeuen di ateueh miseubah nyan, ureueng nyan teu-ikat ngon sumpah jih nyan.' keubiet buta jih gata bandum! toh nyang leubeh peunteng? keureubeuen jihnyan atawa miseubah nyang teupeujeuet keureubeuen nyan suci? sabab nyan, meunyoe sidroe ureueng meusumpah deumi miseubah, nyan saban cit ureueng nyan jimeusumpah deumi miseubah, dan deumi bandum nyang na di ateueh miseubah nyan. dan meunyoe sidroe ureueng jimeusumpah deumi baet tuhan, nyan saban cit gobnyan jimeubudok deumi baet tuhan nyan dan deumi po teu allah nyang tinggai disinan. dan meunyoe sidroe ureueng jimeusumpah deumi syeuruga, nyan saban cit jihnyan meusumpah deumi takhta tuhan, dan deumi po teu allah nyang geuduek ateueh takhta nyan. mupaloe kheueh gata bandum he guree-guree agama dan ureueng-ureueng farisi! gata bandum tukang meupura-pura. reumpha-reumpha lagee seulaseh, adas mameh dan jintan, gata bri siper siploh ubak tuhan. padahai hai-hai nyang paleng peunteng dalam hukom-hukom agama, lagee miseue jih: keuadalan, gaseh sayang, dan rasa seutia, nyan bandum hana gata pakoe. padahai nyan kheueh nyang seuharoh jih gata peubuet, deungan hana tapeu-ayeum nyang laen-laen. gata peumimpén-peumimpén nyang buta! lalat unta na dalam ie jieb droe gata sareng, padahai unta nyang rayeuk gata uet! meupaloe kheueh gata he guree-guree agama dan ureueng-ureueng farisi! gata bandum tukang meupura-pura! mangkok-mangkok dan pireng-pireng droe gata rhah sampoe gleh-gleh blaih luwa jih mantong, padahai siblaih u dalam kutoe lumpah na deungan hai-hai nyang gata teume deungan cara paksa dan leuha. he farisi buta! gata rhah kheueh ilee mangat beutoi-beutoi gleh siblaih u dalam bandum pireng dan mangkok-mangkok gata, mangat siblaih luwa jih jeuet keu gleh teuma! meupaloe kheueh gata he guree-guree agama dan ureueng-ureueng farisi! gata bandum tukang meupura-pura! gata lagee jirat-jirat nyang teu cet puteh; diluwa leumah lagak, teuma didalam nyan peunoh deungan tuleung dan bandum ka habeh brok. meunan cit deungan gata. nibak

luwa leumah jih gata get deungon ureueng lingka; teuma didalam, gata peunoh deungon peuleusu dan peulanggaran-peulanggaran." "meupaloe kheueh gata he guree-guree agama dan ureueng-ureueng farisi! gata bandum tukang meupura-pura! gata tapeugot grat-jrat nyang get-get keu nabi-nabi, dan gata peungui tugu-tugu peuingat nibak ureueng-ureueng nyang udeb jihnyan get. dan gata nyoe tapeugah, 'seukira jih kamoe nyoe udeb bak jamen indatu kamoe yoh masa ilee, kamoe hana teuma kamoe seutot ngon awaknyan kamoe jak peumate bubena nabi-nabi.' teuma gata aku keudroe bahwa gata nyoe kheueh keuturonan ureueng-ureueng nyang poh mate nabi-nabi! meunyoee lagee nyan, tapeujak kheueh laju dan peuseuleusoe kheueh desya-desya nyang ka jipeuphon le indatu gata nyan! gata jeuhet dan keuturonan ureueng jeuhet! pakriban gata hase tapeuseulamat droe nibak hukuman lam apui nuraka? deungoe kheueh beu get-get: ulon teuma lon kirem ubak gata nabi-nabi, ureueng-ureueng malem, dan guree-guree; siladum nibak awaknyan teuma gata poh mate, dan siladum teuk nyang laen gata saleb. na nyang teuma gata seksa didalam rumoh-rumoh iebadat, dan gata tiyeub-tiyeub nibak banda nyang saboh u banda nyang laen. sabab nyan, gata teuma teuhukom sabab seumeupoh mate nyang ji peubuet ateuhe ureueng-ureueng nyang hana meusalah – phon nibak teupoh mate habel nyang hana meusalah, sampoe trok ubak teupoh mate nabi zakharria aneuek berekia, nyang gata poh mate lamkawan rumoh tuhan dan miseubah. peucaya kheueh: bandum nyan teuma jitunggong le ureueng-ureueng bak jamen nyoe!" "yerasulem-yerasulem! nabi-nabi gata peumate. utosan-utosan allah gata rhom ngon batee sampoe mate. ka padubgoe ulon keuneuk wa bandum peunduduek gata lagee nang manok nyang ji uem bandum aneuek jih dimiyueb sayeueb jih, teuma gata hana tatem! sabab nyan po teu allah hana le meusajan gata. beutateupeu kheueh: phon watee nyoe gata hana teuma gata kalon le ulon sampoe gata tapeugah, 'beugeubri kheueh beureukat ateuhe gobnyan nyang teuka ateuhe nan tuhan.' " watee isa geutinggai baet tuhan, murit-murit gobnyan laju jijak ubak gobnyan dan geutunyok laju ubak bangunan baet tuhan nyan. isa geupeugah ubak awaknyan, "peu kheueh na gata kalon bandum nyan? tateupeu kheueh, hana meu sianeuek batee pih nibak bangunan-bangunan nyan teuma na tinggai teususan nibak tempat jih. bandum nyan teuma teureuloh." oh lheureh nyan isa geujak u buket zaiton, dan teungoh geuduek-duek, murit-murit gobnyan jijak ubak gobnyan keuneuk jipeugah haba deungon gobnyan seucara pribadi. "neupeugah laju ubak kamoe pajan bandum nyan teujadi," jipeugah le awaknyan ubak gobnyan. "peu kheueh tanda-tanda jih nyang teutunyok keuhai bakap teuka dan tanda akhe jamen?" geujaweueb le isa, "waspada kheueh, bek sampoe gata keunong peungeuet. sabab rame that ureueng jiteuka deungon jipeuguna nan ulon dan jipeugah, 'ulon kheueh raja peuseulamat!' awaknyan ka jitipee ureueng rame. gata teuma tadeungoe meubagoe-bagoe su di mideuen prang dan haba keuhai ureueng muprang,

teuma bek teumakot. sabab hai-hai nyang lagee nyan bit teujadi, teuma deungon na lagee nyan bukan kheueh sibagoe tanda ka watee jih uroe kiamat. bansa nyang saboh jimuprang jilawan bansa nyang laen, dan nanggroe nyang saboh teuma jijak prang nanggroe nyang laen. dipat mantong jiteuka bala museum deukek dan geumpa bumoe. bandum nyang teujadi nyan na kheueh awai nibak phon teujadi, lagee geurasa saket le sidroe ureueng inong nyang keuneuk peulahe aneuek. oh lheureh nyan gata teuma teudrob dan jiseurah keu jiseksa dan jipoh mate. bansigom donya teuma jibanci ubak gata sabab gata murit ulon. bak watee nyan jai lumpah na ureueng nyang murtat, dan jikhianat dan jibanci sidroe ubak nyang laen. rame that-that nabi-nabi peuleusu teuma jiteuka, dan jitipee ureueng ngon rakyat ba. buet nyang jeuhet jimeu-eue bagaiih lumpah na sampoe di ureueng rame ka hana le gaseh meugaseh. teuma ureueng nyang meuteuen sampoe bak akhe, ureueng nyan teuma geupeu seulamat. dan haba get keuhai pakriban po teu allah geumat peurintah dan geupeusampoe bansigom donya, mangat bandum ureueng meuteume jideungoe. oh ka lheureh nyan baro kheueh kiamat teuka." "gata teuma takalon 'keujeuhetan nyang jipeuhanco peue-peue nyang na', lagee nyang geupeugah le nabi daniel, teudong bak tempat nyang suci. (catetan keu peumbaca: simak kheueh peue makna jih!) bak wateenyan, ureueng nyang na di yudea haroh jiplueng u gunong-gunong. ureueng nyan na ateuhe bubong rumoh bek jitron keu jijak cok sapeue-sapeue lam rumoh nyan. ureueng nyang mantong lam lampoh bek jiwoe u rumoh keu jijak cok bajee jubah jihnyan. keubiet that phet dan paleng teumakot nibak uroe-uroe nyan keu ureueng inong nyan teungoh mume, dan kawom mak nyang mantong geupeu mom aneuek banyak! meudooa kheueh mangat gata bek sampoe taplueng watee museum ujeuen atawa uroe sabat! bak uroe-uroe nyang paleng teumakot nyan teuma na keusosahan nyang paleng hibat lagee nyang gohlom na teujadi seumeunjak donya nyoe na sampoe nibak watee nyoe, dan nyang lagee nyan hana jiteuka le. seungkira jih po teu allah hana geupeu paneuk watee jih; teuma hana meusidroe pih nyang na seulamat. teuma sabab le umat gobnyan, po teu allah geupeu paneuk watee nyan. bak watee nyan meunyoee na sidroe ureueng nyang jipeugah ubak gata, 'ngieng, raja nyang ba seulamat nyan na disinoe!' atawa, 'gobnyan na disinan!' – bek kheueh tapateh bak ureueng nyan. sabab teuma jiteuka nyang jiwa droe jih nyang ba seulamat teuma nyan na kheueh peuleusu dan nabi-nabi peuleusu. awaknyan teuma jipeubuet buet-buet nyang luwa biasa hibat jih, dan buet-buet nyang ajaeb keu jeuet jiteumipee, meunyoee jeuet, umat po teu allah pih jitipee cit. teuma, ingat kheueh! ulon ka lon peugah ubak gata leubeh ilee sigohlom hai nyan teujadi. meunyoee na ureueng jipeugah ubak gata, 'ngieng, gobnyan na di sideh dipadang pasi!' – bek gata jak bak tempat nyan. atawa meunyoee awaknyan jipeugah, 'ngieng, gobnyan geumusom lam bilek nyang na disinoe!' – bek tapateh. sabab aneuek manusia teuka lagee kilat nyang muble nyang teuka nibak timu, dan meucahya

trok u barat. dipat na bangke!" hana treb oh ka lheureu keusosahan bak watee nyan, mata uroe laju jeuet keu seupot, dan buleuen hana le meucahya. bintang nyang meutabu di langet manyang teuma rhot u bumoe, dan bubena nyang mat kuasa di angkasa raya teuma keng keueug hana meuteuntee. oh ka lheureu nyan tanda aneuek manusia teuma leumah di langet. bak watee nyan bandum bansa di ateuhe bumoe laju jimeo ba-e. awaknyan laju jikalon aneuek manusia teuka di ateuhe awan deungon kuasa dan keumuliaan nyang raya. beureuguih raya teuma teuyueb, dan aneuek manusia laju jiyue bubena malaikat gobnyan jeuet teupeusapat bandum umat gobnyan nibak ban peuet boh ujong bumoe, nibak ujong langet nyang saboh sampoe ubak ujong langet nyang laen." "cok kheureu peulajaran nibak bak ara. meunyo ranteng-ranteng jih ijo dan leunuet, dan ka jipeuphon meutarok, gata tateupeue bahwa musem khueug ka tho lumpah na. meunan cit hai jih meunyo gata kalon hai-hai nyan tejadi, gata tateupeue bahwa wateejih ka to that. tateupeue kheureu! hai-hai nyan teuma tejadi sigohlom ureueng-ureueng nyang udeb bak watee nyoe mate banmandum. langet dan bumoe teuma gadoh, teuma tutoe haba lon teutab na siumu masa." "hana ureueng nyang jiteupeu pajan uroe dan jeuem jih, malaikat-malaikat nyang na dalam syeuruga hana geuteupeue, aneuek po teu allah pih hana, nyang teupeue na kheureu bapak mantong. meunyo aneuek manusia ka teuka singoh, keuadaan jih lagee bak jamen nabi nuh yoh masa ilee. bak uroe-uroe sigohlom ie raya nyan teuka, manusia-manusia lagee biasa jimakheun ngon jijieb ie, dan meukawen. meunan kheureu nyang tejadi hana putoh-putoh sampoe trok ubak uroe nabi nuh geutamong dalam kapai. watee ie raya teuka sampoe habeh jisampoh awaknyan banmandum, baro kheureu awaknyan sadar peue nyang ka tejadi. meunan kheureu keuadaan jih singoh meunyo aneuek manusia teuka. bak watee nyan, na dua droe ureueng teuhong meukeureuja di ladang: sidroe teuba, dan sidroe teuk teuma tinggai. na dua droe ureueng inong teuhong jitob aneuek gandom: sidroe teuba, dan sidroe treuk teuma teutinggai. sabab nyan, waspada kheureu, sabab gata hana tateupeue pajan tuhan gata teuma geuteuka. ingat kheureu nyoe! seukira jih ureueng po rumoh jiteupeu poh padub pancuri jitamong lam rumoh jihnyan, ureueng po rumoh nyan hana jieuh, mangat pancuri hana jitamong lam rumoh jihnyan. sabab nyan, gata haroh meusiab-siab. sabab aneuek manusia teuka bak watee nyang hana gata sangka-sangka." geupeugah lom le isa, "meunyo meunan, peulayan nyang toh kheureu nyang seutia lom bijaksana? jihnyan kheureu nyang ji-angkat le po droe jih mangat jeuet keu ulee keu peulayan-peulayan nyang laen, mangat jibri makheun ubak awaknyan oh trok bak watee. keubiet bahgia jih peulayan nyan watee po jihnyan jigisa, dan jingiang jih nyan teuhong jipeubuet tugaih nyang ka teupeucaya ubak jihnyan. peucaya kheureu, bahwa nyan teupeucaya bandum atra gobnyan ubak peulayan nyan. teuma meunyo peulayan nyan jeuhet, gobnyan teuma jikheun lam ate jih, 'teungku po lon

mantong treb geugisa,' laju le jihnyan jipeuphon poh peulayan-peulayan nyang laen, dan jimakheun ngon ji-jieb ie ngon ureueng-ureueng mabok. oh lheureu nyan teungku po jihnyan laju jiwoe bak uroe dan watee nyang hana jisangka-sangka. teuma peulayan nyan laju jijeuntam bit-bit that le po jihnyan, dan laju geutieuk u teupat ureueng-ureueng munafek. awaknyan laju jiklik dan meudeurita bak teupat nyan." "meunyo ka teuka aneuek manusia sibagoe tuhan, keuadaan jih na kheureu lagee miseue nyoe: na siploh droe aneuek dara jeuet keupeungireng teungku linto maseng-maseng awaknyan jicok saboh panyot, laju jikak sambot teungku linto nyang agam. na limong droe lamkawan awaknyan bangai that, dan nyang limong droe treuk na kheureu bijaksana. ban limong droe aneuek dara nyang bangai nyan jiba panyot, teuma hana jiba minyeuk geunantoe. teuma ban limong droe aneuek dara nyang bijaksana jiba panyot meusajan ngon minyeuk geunantoe. teungku linto agam nyan jiteuka ka teulat, jadi aneuek-aneuek dara nyan ka teuka teugantek laju teunget. watee ka teuhong malam baro kheureu teudeungoe su ureueng meukuk sira jitawok, 'teungku linto ka teuka! jak ta sambot gobnyan!' ban siploh droe aneuek dara nyan laju teujaga dan jibeudoh, dan laju jitot maseng-maseng panyot jihnyan. aneuek-aneuek dara nyang bangai nyan laju jipeugah ubak aneuek dara nyang bijaksana, 'neujok kheureu keu kamoe mubacut khong minyeuk gata, sabab panyot kamoe karab lon.' 'hana jeuet!' jijaweueb le aneuek-aneuek dara nyang bijaksana nyan, 'sabab eunteuk bandum geutanyoe hana seb minyeuk. neujak bloe laju u keudee.' teuma le aneuek-aneuek dara nyang bangai nyan laju jikak bloe minyeuk u keudee. teuhong awaknyan jikak bloe minyeuk nyan, teuma teuka kheureu teungku linto agam. ban limong droe aneuek dara nyang ka siab nyan jitamong laju meusajan ngon teungku linto lam teupat khanuri, dan oh lheureu nyan pintoe pih geutob! oh lheureu nyan aneuek-aneuek dara nyang ban jiwoe jak bloe minyeuk nyan ka trok jigisa sira jipeugah, 'teungku-teungku, neupeuhah laju pintoe mangat kamoe tamong,' teuma teungku linto agam nyan laju jijeaweueb, 'ulon hana lon turi keu gata!' "laju isa geupeu habeh haba miseue nyan lagee nyoe, 'ngon sabab nyan meujaga-jaga kheureu, sabab gata hana neuteupeue uroe dan jeuem jih." "meunyo aneuek manusia ka teuka sibagoe tuhan keuadaan jih na kheureu lagee miseue nyoe. sidroe ureueng agam keuneuk jak u teupat nyang jioh. gobnyan laju jitawok bandum peulayan-peulayan jih, dan hareuta gobnyan nyang na nyan laju jipeucaya ubak awaknyan. keu tieb-tieb peulayan nyan laju geubri meunurot keusanggapan maseng-maseng. keu nyang sidroe laju geubri limong ribee peng meuh. ubak nyang laen geubri teuma dua ribee peng meuh. dan ubak nyang sidroe trek geubri teuma siribee peng meuh. oh lheureu nyan laju teungku nyan geujak. peulayan nyan jiteurimong limong ribee peng meuh nyan laju jikak meuniaga, dan nibak meuniaga jih nyan laju neuteume laba limong ribee peng meuh. meunan cit deungon peulayan nyang jiteurimong dua ribee peng meuh nyan meuteume laba dua ribee teuma. teuma le peulayan nyang

jiteurimong siribee peng meuh nyan laju jikak khueh uruek lam tanoh, dan peng nyang jibri le toke jih nyan laju jisom lam uruek nyan. treb that teuma oh ltheueh nyan, toke nibak peulayan-peulayan nyan jiwoe, dan laju geupeu phon peuna hitongan deungon awaknyan. peulayan nyang teurimong limong ribee nyan jiteuka, dan jikak laju siploh ribee. 'teungku po,' kheun peulayan nyan, 'teungku po neuseurah limong ribee peng meuh ubak ulon. ngieng kheueh, ulon meuteuma laba limong ribee teuk.' 'jroh that,' kheun toke nyan, 'gata na kheueh peulayan nyang get dan seutia. sabab gata jeuet teupeucaya deungon nyang bacut, ulon teuma lon peucaya nyang leubeuh le ubak gata. tamong kheueh dan meuseunang-seunang kheueh meusajan ngon ulon!' oh ltheueh nyan teuka teuma pelayan nyang teurimong peng meuh dua ribee, laju jipeugah, 'teungku po, droeneuh ka neuseurah dua ribee peng meuh ubak ulon. ngieng kheueh nyoe, ulon meuteuma laba dua ribee treuk peng meuh.' 'jroh that,' kheun toke nyan, 'gata peulayan nyang get dan seutia. sabab gata jeuet teupeucaya deungon nyang bacut, ulon teuma peucaya deungon nyang jai keu gata. tamong kheueh dan meuseunang-seunang kheueh meusajan ngon ulon!' oh ltheueh nyan teuka teuma peulayan nyang jiteurimong siribee peng meuh sira jipeugah, 'teungku po, ulon teupeu droeneuh na kheueh sidroe ureueng nyang paleng kreueh dan teugaih. teungku po neupot boh nibak sinaman nyang bukan po pula, dan neucok hase bak teupat nyang bukan teungku po tabu bijeh. ulon teumakot, sababnyan kheueh ulon jaksom peng teungku po lam tanoh. nyoe kheueh peng teungku nyan.' 'gata peulayan nyang jeuhet dan beu-ot!' geupeugah le toke nyan. 'bukan kheueh ka gata teupeu bahwa ulon kupot boh nibak seunaman nyang bukan lon pula, dan lon cok hase bak teupat nyang bukan ulon tabu? meunyo meunan, nyang sibeuna jih haroh gata keubah peng ulon nyan nibak bank, teuma oh watee ulon woe, ulon teurimong lom teuma peng lon nyan deungon bungong jih. kareuna nyan, cok kheueh peng nyan nibak gobnyan, dan jok kheueh ubak ureueng nyang na siploh ribee peng meuh nyan. sabab, nibak ureueng nyang ka ltheueh na, teuma teubri leubeuh le lom, dan leubeuh jai nibak bak nyang ka. teuma ureueng nyang hana sapeue na, nyang bacut mantong na nibak jihnyan teuma teucok lom teuma. dan peulayan nyang hana sapeue jeuet nyan, tatiek kheueh u dalam seupot diluwa. disinan jihnyan jimeo dan meudeurita!' "meunyo aneuk manusia ka teuka sibagoe raja nyang geu-ireng le malaikat gobnyan, gobnyan geudeuk ateuheh takhta gobnyan nyang mulia. banmandum bansa teuma geupeusapat dikeue gobnyan. laju gobnyan geupeu weuek awaknyan sampoe jeuet keu dua boh keulompok lagee ureueng meurabe nyang jipeu aseng bubiri nibak kameng. ureueng nyang peubuet keuheundak po teu allah teuma geupeusapat blaih uneuen gobnyan, dan nyang laen blaih si uwie gobnyan. oh ltheueh nyan raja nyan laju geupeugah ubak ureueng-ureueng nyang na blaih uneuen gobnyan, 'jak kheueh keunoe gata bandum nyang geubri beureukat le bapak ulon. tamong kheueh

dalam keurajeun nyang ka teukeubah keu gata yoh watee phon geupeujeuet donya nyoe. sabab oh watee ulon deuek, gata bri makheun keu ulon, dan oh watee ulon glah, gata bri ie. ulon sidroe ureueng aseng, gata teurimong ulon di rumoh gata. ulon hana peukayan, gata bri peukayan. oh watee ulon saket, gata nyang peu-ubat ulon. ulon dalam glah, gata nyang tulung ulon.' ban jideungoe meunan awaknyan bandum laju jitanyong, 'tuhan, pajan na kamoe kalon tuhan deuek laju kamoe bri ubak tuhan peunajoh, atawa glah laju kamoe bri ubak tuhan ie? pajan kamoe ngieng tuhan sibagoe ureueng aseng, laju kamoe sambot tuhan lam rumoh kamoe? pajan tuhan hantom neungui peukayan, laju kamoe bri ubak tuhan peukayan? pajan na kamoe kalon tuhan saket atawa jipasoe lam glah, laju kamoe tulung tuhan?' raja nyan teuma geujawueub, 'beutateupeu kheueh: watee gata peubuet hai nyan, bahpih ubak salah sidroe nibak syedara-syedara lon nyang paleng hina, saban cit nyan gata peubuet ateuheh ulon!' oh ltheueh nyan raja teuma geupeugah ubak ureueng-ureueng nyang na blaih siwie gobnyan, 'jak weeh keudeh, he jahanam! jak bloh laju dalam apui nuraka nyang han lon-lon, nyang ka teukeubah keu ibilih dan malaikat-malaikat gobnyan! sabab oh watee ulon deuek, gata hanatabri keu ulon peunajoh; oh watee ulon glah, hana gata bri ie. ulon sidroe ureueng aseng, gata hana teurimong ulon lam rumoh gata. ulon hana meupeukayan, gata hana bri peukayan keu ulon. ulon saket dan jipeutamong lam glah, gata hana tapako ulon.' laju awaknyan jipeugah ubak gobnyan, 'tuhan, pajan kheueh na kamoe kalon tuhan deuek, atawa glah, atawa sibagoe ureueng aseng, atawa hana meupeukayan, atawa saket, atawa jipeutamong lam glah, dan kamoe hana kamoe tulung tuhan?' raja nyan teuma geujawueub, 'beutateupeu kheueh: bak watee gata hana tatem tulung sidroe ureueng nyang paleng papa nyoe, saban cit gata hana tatem tulung ulon.' teuma ureueng-ureueng nyang lagee nyan teuma teuhukom deungon hukoman nyang keukai abadi, seudangkan ureueng-ureueng nyang peubuet keuheundak po teu allah ureueng nyan teuma geuteurimong udeb sejati dan keukai abadi." watee isa ka seulesoe geupuruno bandum hai nyan, gobnyan geupeugah ubak murit-murit geuh, "gata tateupeue dua uroe treuk na kheueh uroe raya paskah, dan aneuk manusia teuma jiseurah keu jisaleb!" bak watee peumimpen-peumimpen teungku imeum dan peumimpen-peumimpen yahudi meugumpoi bak meuligoe teungku imeum agong kayafas. awaknyan jimeurok pakat keuneuk drob isa seucara seungab-seungab, dan keuneuk jipoh mate gobnyan. "teuma," kheun awaknyan, "bek hainyan teupeubuet bak watee peurayaan, sabab hai nyang lagee nyan teuma jiteuka karu lamkawan rakyat." watee isa mantong na di betania, di rumoh simon nyang yoh masa illee keunong peunyakot kulet nyang lumpah parah, na sidroe ureueng inong jikak meuhadab ubak isa. ureueng inong nyan na jiba saboh kaca pualam, meuasoe minyeuk mangat bee nyang lumpah meuhai. watee isa teungoh geudeuk sira geumakheun, ureueng inong nyan laju geupree minyeuk mangat bee nyan

ateuh ulee isa. murit-murit isa na jikalon hai nyan laju jiteuka beungeh. "keupeue guna jih banmandum nyoe boros?" kheun awaknyan. "minyruk mangat bee nyan hase teupeubloe deungon yuem nyang lumpah meuhai, dan peng hase nyan jeuet teujuk bak ureueng gasien!" isa geuteupeue pikeran awaknyan, laju geupeugah le gobnyan, "keupeue gata peususah ureueng inong nyoe? jih nyan jipeubuet sapeue-sapeue nyang jroh dan teupujoe u ateuh ulon. ureueng gasien na sabe lamkawan gata, teuma meunye ulon hana sabe na meusajan gata. deungon na geuro minyruk mangat bee nyan u ateuh badan lon, gobnyan ka geupeu siab ulon keu teupeutamong lam jrat. peucaya kheueh! bansigom donya nyoe, dipat mantong haba get nibak allah teupemaklum, peue-peue nyang jipeubuet le ureueng inong nyoe teutab teucalitra sibagoe keunangan keu gobnyan." dan sidroe lamkawan murit isa nyang nan jihnyan yudas iskariot, jijak meurumpok ngon peumimpem-pemimpin teungku imeum. gobnyan jikheun ubak peumimpin-peumimpin teungku imeum nyan, "peu kheueh nyang gata bri keu ulon meunye ulon jok isa ubak gata?" teuma awaknyan laju jit-itong lhee plooh peng pirak, laju jijok peng nyan ubak jihnyan. phoin bak saat nyan yudas laju jimita watee nyang pah keuneuk jikhianat isa. ruti uroe raya nyang keuphon watee peurayan ruti hana meuragoe, murit-murit isa jijak meurumpok ngon gobnyan. awaknyan jipeugah, "nibak teumpat toh nyang bapak galak mangat kamoe keubah peunajoh paskah keu bapak?" geujaweueb le isa, "neujak kheueh ubak sidroe ureueng di banda dan neupeugah laju ubak gobnyan, 'geupeugah le bapak guree, ka sampoe watee jih keu ulon; ulon keuneuk peuna uroe raya paskah di rumah gata meusajan-sajan ngon bandum murit-murit lon.'" murit-murit isa laju geupeubuet peue nyang geupeurintah le gobnyan ubak awaknyan. awaknyan laju jijak peusiab peunajoh paskah nyan. oh watee malam ka teuka, isa meunan cit bandua blaih droe murit gobnyan geuduek sira geumakheun, teungho awaknyan geumakheun, isa geupeugah, "deungoe kheueh: na sidroe lamkawan gata nyoe teuma jikhianat ulon." ban jideungoe hai nyan le awaknyan, murit-murit isa seudeh lumpah na. laju le awaknyan, sidroe-droe jiteumanyong ubak isa, "teuntee bukon keu ulon nyang bapak peugah nyan?" geujaweueb le isa, "ureueng nyang ceulob ruti lam mangkok ulon meusigoe-sigoe ngon ulon, ureueng nyan kheueh nyang khianat ulon. keubiet aneuk manusia teuma mate lagee nyang ka ltheuh teutuleh lam alkitab. teuma ceulaka kheueh ureueng nyang khianat aneuk manusia! leubeh get ureueng nyan hana lahe ateuh rhueng donya nyoe!" laju le yudas ji peukhianat nyan geupeugah, "teuntee kon keu ulon nyang bapak guree peugah nyan?" geupeugah le isa, "meunan kheueh gata peugah!" watee awaknyan teungho geumakheun, isa geucok ruti, laju geumeudoe. oh ltheuh nyan gobnyan geupriek-priek ruti nyan ngon jaroe gobnyan dan geujok laju ubak murit-murit gobnyan sira geupeugah, "cok, pajoh kheueh; nyoe kheueh tuboh ulon." oh ltheuh nyan gobnyan laju geucok saboh piala anggo, laju geumeudoe ubak po teu allah. oh ltheuh nyan laju

geujok piala nyan ubak murit-murit gobnyan, sira geupeugah, "jieb kheueh, gata bandum. sabab nyoe kheueh darah ulon nyang ka teupeusah janji ulon ngon po teu allah – darah nyang teuroe keu ureueng rame keu teupeu amphon bubena desya awaknyan. peucaya kheueh: ulon hana teuma lon jieb le ie anggo nyoe sampoe trok ubak ulon teuma lon jieb le anggo nyang baro meusajan-sajan deungon gata lam donya baro bapak ulon." oh ltheuh nyan awaknyan geumeulagu saboh lagu puja ngon pujoe. dan oh ka ltheuh nyan awaknyan laju geujak u buket zaiton. oh ltheuh nyan isa geupeugah ubak murit-murit gobnyan, "bak malam nyoe cit teuma gata bandum taplueng tatinggai ulon; sabab lam alkitab na teutuleh; allah meufeureuman, 'teuma lon peumate tukang meurabe nyan, dan kawan bubiri gobnyan ulon peucubre.'" oh ka ltheuh ulon geupeubudoh lom teuma, ulon jak laju leubeh awai nibak gata u galilea." petrus geupeugah ubak isa, "bah kheueh mandum nyang laen geutinggai bapak, teuma ulon han sagai-sagai lon tinggai bapak!" "ingat," kheun isa ubak gobnyan, "malam nyoe cit teuma, sigohlom manok jiku-uek, gata ka lhee goe ta-iengkeue keu ulon." geujaweueb le petrus, "bah pih ulon nyoe haroh mate meusajan bapak, ulon hana kupeugah bahwa ulon hana lon tinggai bapak!" dan mandum murit nyang laen lagee nyan cit geupeugah. oh ka ltheuh nyan isa laju geujak ngon murit-murit geuh ubak saboh teumpat nyang nan jih getsemani, nibak teumpat nyan gobnyan geupeugah ubak awaknyan, "taduek kheueh disinoe meusiukeub ulon keuneuk jak meudoe." dan gobnyan laju geupakat petrus meunan cit bandua droe aneuk zebedius meusajan gobnyan. gobnyan geupeugah ubak murit-murit geuh, "ate ulon seudeh lagoena, nyum-nyum jih lagee keuneuk mate. tinggai kheueh gata disinoe, dan meusajan kheueh meujaga-jaga deungon ulon." oh ltheuh nyan isa geujak leubeh jioh bacut treuk, laju gobnyan teudugom bak tanoh sira geumeudoe. "bapak," kheun gobnyan, "meunye jeuet, neupeujioh kheueh nibak ulon bandum bala nyang haroh ulon rasa nyoe. teuma bek kheueh teuseutot keuheundak ulon, teuma meunurot keuheundak bapak nyang teujadi." oh ka ltheuh nyan isa laju geugisa ubak ban lhee droe murit gobnyan dan geuingeun awaknyan ka habeh teu-eh. gobnyan laju geupeugah ubak petrus, "teuma cit sijeuem sagai gata ban lhee droe ka hana ek tameujaga deungon ulon? meujaga-jaga kheueh, dan meudoea kheueh mangat ateuh gata hana keunong bala. keubiet roh gata jitem keuneuk jipeubuet nyang jroh-jroh teuma gata keudroe nyang hana hase, sabab tabaiat manusia nyan leumoh." sigoe treuk isa geujak meudoea, kheun gobnyan, "bapak, meunye peundeuritan nyoe haroh ulon rasa, dan hana hase teupeujioh, bah kheueh keuheundak bapak nyang teujadi." oh ka ltheuh geumeudoea nyan isa geuriwang lom teuma, dan geuingeun lom bandum murit-murit gobnyan ka habeh teunget, sabab mata awaknyan ka teunget lumpah na. keu nyang keu lhee isa geutinggai awaknyan dan kali nyang keu lhee teuma geujak meudoea deungon tutoe haba doa nyang geulakee saban lagee nyang ka geulakee dua

goe nyang ka. oh ka ltheueh nyan gobnyan geuriwang lom ubak murit-murit gobnyan dan laju geupeugah, "peu kheueh mantong gata eh dan peupלה hek? ngiang, ka trok watee jih aneuek manusia jijok ubak kuasa ureueng-ureueng meudesya. beudoh kheueh, jak geutanyoe tajak. kalon ureueng nyang khianat keu ulon ka trok jiteuka!" teungoh isa mantong geupeugah haba, yudas sidroe lamkawan dua blaih droe murit gobnyan teuka. meusajan-sajan deungon yudas nyan, jai cit ureueng laen teuka sira jiba peudeueng ngon puntong kayee. awaknyan jiyue le peumimpén-peumimpén teungku imeum dan peumimpén-peumimpén yahudi. tukang khianat nyan ka jibri tee ubak awaknyan tanda nyang lagee nyoe, "toh ureueng nyang ulon com eunteuk, nyan kheueh jih. drob laju ureueng nyan!" meunan trok ubak teumpat nyan, yudas langsung jijak ubak isa dan jipeugah, "assalamualaikum, pjak guree!" laju yudas nyan jicom isa. geujaweueb le isa, "syedara, keupeue gata jak keunoe?" oh ltheueh nyan ureueng rame nyan laju ji maju, dan laju jidrob isa. sidroe murit isa nyang na lamkawan nyan laju geusuet peudeueng lam sarong geu-heungko laju ateuh sidroe hamba imeum agong sampoe ureueng nyan putoh on geulinyueng. isa geupeugah ubak murit geuh nyan, "peutamong lom peudeueng gata lam sarong, sabab bandum ureueng nyang peuguna peudeueng jih ureueng nyan teuma mate jipajoh le peudeueng. gata pike hana meuteume lon lakee tulung ubak bapak ulon, dan gobnyan teuma reujang geukirem leubeh nibak dua blaih pasokan sidadu malaikat? teuma meunyo meunan, panena mungkin lagee nyang ka teutuleh lam alkitab keubiet haroh teujadi lagee nyang kana nyoe?" laju isa geupeugah ubak ureueng rame nyan, "peu kheueh lon nyoe peunjahat, sampoe gatanyoe tateuka sira taba peudeueng dan kayee puntong kek tajak drob ulon? tieb-tieb uroe ulon seumeubeut di baet allah, dan gata hana tadrob ulon! teuma beutoi ka seuharoh jih jeuet lagee nyan mangat teujadi peue nyang ka geutuleh le nabi-nabi dalam alkitab." oh ka ltheueh nyan, bandum murit-murit gobnyan jiplueng jitinggai isa. ureueng-ureueng nyang drob isa laju jiba gobnyan u rumah teungku imeum agong kayakafas. nibak teumpat nyan bandum guree-guree agama dan peumimpén-peumimpén yahudi ka meugumpoi. deungon seungab-seungab petrus geuseutot isa nibak likot sampoe uleuen rumah teungku imeum agong. laju petrus geutamong bak leuen rumah nyan, dan geudeuk laju meusajan ngon peungawai-peungawai nyang na disinan. gobnyan geukeuneuk teupeu pakriban akhe jih nyan teujadi. peumimpén-peumimpén teungku imeum dan banmandum mahkamah agama geu-useuha keu jimita saksi peuleusu mangat jeuet teupeu rhot hukoman mate u ateuh isa. teuma le awaknyan hana jiteume meusaboh bukeuti pih, bah pih jai that nyang maju sibagoe saksi duseuta. akhe jih na dua droe saksi nyang maju ukeue. awaknyan jipeugah, "ureueng nyoe geupeugah, 'ulon hase lon reuloh baet allah, dan lam lhee uroe hase lon peudong lom teuma.' " oh ltheueh nyan teungku imeum agong laju geudong, dan geupeugah ubak isa, "peu kheueh

hana gata jaweueb peue nyang jitudoh ateuh gata nyan?" teuma isa seungab mantong. sigoe teuk teungku imeum agong geu-ulang peugah, "deumi allah nyang udeb, neupeugah kheueh ubak kamoe peu kheueh droeneuh raja nyang ba sealamat, aneuek po teu allah?" geujaweueb le isa, "meunan kheueh kheun gata. teuma peucaya kheueh: phon saat nyoe, gata teuma neungiang aneuek manusia geudeuk blaih uneuen allah nyan mahakuasa, dan geuteuka di ateuh awan dilanget!" teuma teungku imeum agong nyan laju geupriek-priek peukayan bak tuboh gobnyan, dan geupeugah, "ureueng nyoe jihujat allah! hana peureulee le saksi. gata bandum ka tadeungoe keudroe tutoe haba nyang geuhujat allah. jimoenyo pakriban kheun gata?" jijaweueb le awaknyan, "ureueng nyoe meusalah, dan haroh mate." dan awaknyan laju juludah muka isa, sira jiseupot gobnyan. na cit nyang tanpa gobnyan, sira jipeugah, "ci peugah dan neubri tee ubak kamoe, he raja peusealamat! soe kheueh nyang tanpa gata?" petrus teungoh geudeuk diluwa, nibak leuen. na sidroe ureueng inong peulayan jitanjong, "droeneuh nyoe kon sidroe lamkawan murit isa nibak galilea nyan?" teuma petrus geu-iengkeue dikeue awaknyan mandum. "ulon hana lon teupeu peue nyang gata meukeusut," geujaweueb le petrus laju gobnyan geujak ubak pintoe leuen. na lom sidroe peulayan inong nyang laen jingiang ateuh petrus, dan jipeugah ubak ureueng-ureueng nyang na disinan, "ureueng nyoe bunoe na meusajan-sajan deungon isa nibak nazaret nyan." dan petrus ji-iengkeue lom, sira geu meusumpah. "keubiet that-that hana lon turi ngon ureueng nyan!" kheun petrus. hana treb teuma oh ltheueh nyan, ureueng-ureueng nyang dong disinan jijak ubak petrus, dan jipeugah, "pasti gata nyoe sidroe lamkawan awaknyan. tanda nyan deuh that nibak loghat tutoe haba gata." laju petrus geumeusumpah cula caloe sira geupeugah, "hana ulon turi keu ureueng nyan!" haba geuh nyan pih ltheueh, manok pih jiku-uek. dan petrus laju teu-ingat keu haba isa nyang ka ltheueh geupeugah ubak gobnyan, "sigohlom manok jiku-uek, gata ka lhee goe ta-iengkeue keu ulon." oh ltheueh nyan petrus laju geuteubiet sira geumo ngon ate peudeh. ban beungoh seuboh buta, banmandum peumimpén imeum dan peumimpén yahudi jimupakat dan jicok keuputusan keuneuk jipoh mate isa. jaroe isa laju jibeuleunggu le awaknyan, dan jijak jok laju ubak pilatus, nyang jeuet keu gubunur keurajeuen roma. oh watee jiteupeu le si yudas bahwa isa ka jipeu rhot hukoman mate, jihnyan meunyeusai that. lhee ploh peng pirak nyang ka jiteurimong nyan laju jijok pulang ubak peumimpén imeum-imeum dan peumimpén-peumimpén yahudi. oh ltheueh nyan jipeugah laju lagee nyoe, "ulon that-that ka meudesya ulon khianat ureueng nyang hana meusalah, sampoe gobnyan teuhukom mate!" jijaweueb le awaknyan, "beu gata teupeu, nyan kon urosan kamoe? dan nyan na kheueh urosan gata!" yudas laju jigeulawa peng nyan lam baet tuhan, oh ltheueh nyan jijak laju jigantung droe. peumimpén imeum-imeum laju jicok peng nyan sira jipeugah lagee nyoe, "peng nyoe peng yuem darah. meunurot hukom agama,

peng nyoe han jeuet tapeutamong lam teupat peuseumahan nyang na lam baet tuhan." oh ka na haba sipakat, peng nyan laju jibloe tanoh nyang jiboh nan tanoh tukang beulangong. tanoh nyan jipeuguna keu jirat-jirat ureueng aseng. nyang kheueh sabab jih tanoh nyan sampoe an uroe nyoe nan jih tanoh darah." deungon nyan, jeuet kheueh peue nyang ka ltheueh geupeugah le nabi yeremia, "awaknyan nyang jiteurimong lthee ploh peng pirak, na kheueh yuem nyang ka jisutitu le bansa israel sabagoe yuem teubayeue keu jih nyan. dan peng nyan awaknyan peuguna keu jibloe tanoh tukang beulangong, lagee nyang ka geupeurintah le tuhan ubak ulon." watee isa meuhadah ubak pilatus, gubunur nanggroe nyan, laju jitanyong le pilatus, "peu kheueh gata raja ureueng yahudi?" "meunan kheueh kheun gata," jaweueb isa. teuma watee peumimpin imeum-imeum dan peumimpin-peumimpin yahudi jipeugah jai that-that tudohan keu isa, gobnyan hana geujaweueb meusikrek haba pih. sabab nyan pilatus laju jipeugah ubak gobnyan, "peu kheueh hana gata deungoe banmandum nyang jitudo le awaknyan ateuh gata nyan?" isa teutab hana geujaweueb meusikrek haba pih sampoe gubunur nyan hireuen lumpah na. tieb-tieb na peurayaan paskah, gubunur lazem jih geupeu ltheueh sidroe ureueng nyang keunong hukom meunurot nyang jipileh le ureueng rame. bak watee nyan na sidroe ureueng hukoman nyang that meugah. nan ureueng nyan yesus barabas. teuma, watee ureueng rame nyan ka meusapat keunan, pilatus laju geutanyong ubak rakyat ba nyan, "soe kheueh meunurot gata nyang gata tem ulon peuleueh keu gata? yesus barabas atawa isa nyang teuhoi almaseh?" pilatus geupeugah meunan sabab gobnyan geuteupeue bahwa peunguasa-peunguasa yahudi jiseurah isa ubak gobnyan sabab awaknyan bingiek ate. bak watee pilatus teungh geuduek-duek ateuh balee peungadalan, peurumog gobnyan laju jikirem peusan nyang lagee nyoe ubak gobnyan, "bek kheueh droeneueh neutem mat peukara ureueng nyang hana meusalah nyan, sabab le kareuna gobnyan, ulon na leumah lam lumpo nyang lumpah teumakot." teuma le peumimpin imeum-imeum dan banmandum peumimpin yahudi hana pioh-pioh jipeusuna rakyat mangat jilakee ubak pilatus nyang jipeulheueh na kheueh yesus barabas dan isa teuhokom mate. dan gubunur nyan geutanyong lom ubak ureueng rame nyan, "ban dua droe ureueng nyan, soe kheueh meunurot gata nyang jeuet ulon peu ltheueh keu gata?" "yesus barabas," jaweueb awaknyan. "meunye meunan, peue nyang haroh ulon peubuet ateuh isa nyang teuhoi nan almaseh?" geu tanyong le pilatus ubak ureueng rame nyan. "saleb mantong ureueng nyan!" jaweueb awaknyan banmandum. "ka jeuet, jinoo ulon tanyong ubak gata mandum, "peue buet nyang jeuhet nyang ka jipeubuet le ureueng nyoe?" tanyong pilatus bak ureueng rame nyan. laju awaknyan jimeusu leubeh teuga lom, "saleb laju ureueng nyan" akhe jih pilatus sadar bahwa gobnyan hana hase le geupeubuet sapewe dan ureueng nyan mungken teuma jibeurontak ateuh gobnyan. oh ltheueh nyan pilatus laju geucok ie, dan dikeue ureueng rame nyan laju geu rhah jaroe geuh

sira geupeugah, "ulon hana meutanggong jaweueb ureueng nyoe mate, nyan tanggong jaweueb gata!" banmandum ureueng rame nyan jijaweueb, "nyoe, bah kheueh kamoe dan aneuek-aneuek kamoe nyang tanggong hukoman ateuh mate ureueng nyan!" dan pilatus pih laju geupeuleueh barabas keu awaknyan, teuma geuyue laju bak ureueng laen mangat jise-unuet isa; dan geujok laju keu jisaleb. oh ltheueh nyan le sidadu-sidadu pilatus laju jipeutamong isa lam meuligoe gubunur, dan mandum pasokan jidong bansilingka isa. awaknyan laju jisuet peukayan nyang geungui le isa, laju jipeusok ubak gobnyan bajee jubah ungu. awaknyan laju jipeuget saboh seureuban nibak ranteng-ranteng nyang meuduro, seureuban nyan laju jipeuseuon ateuh ulee isa, oh ltheueh nyan laju jikeubah sikrek tungkat bak jaroe uneuen gobnyan, laju jimeuteuot dikeue gobnyan sira jihina gobnyan. "amphon delat po raja ureueng yahudi!" kheun awaknyan. oh ltheueh nyan le awaknyan laju jiludah ateuh isa, dan jicok laju tungkat nyan, ngon tungkat nyan laju jiseukok ateuh ulee isa. oh ka ltheueh isa jihina lagee nyan, jubah ungu nyang na bak isa laju jisuet dan jipeusok lom teuma peukayan droe gobnyan. oh ltheueh nyan isa laju jiba uluwa keuneuk jikak saleb. bak teungh rof ueh awaknyan laju meurumpok ngon sidroe ureueng nibak kirine nan ureueng nyan simon. awaknyan jipaksa bak ureueng nyan beujitem gulam saleb isa. oh ltheueh nyan awaknyan troh laju bak saboh teupat nyang nan jih golgota, nyang makna jih, "teupat bruek ulee", bak teupat nyan le awaknyan laju jipeujieb ie anggo ubak isa nyang meujampu ngon pheuet. teuma oh ka ltheueh geuci rasa ie anggo nyan le isa, laju geukeubah dan hana geujieb le. oh ltheueh nyan awaknyan laju jisaleb gobnyan, dan jibagi-bagi laju bajee isa nyan deungon cara ji undi. oh ka ltheueh nyan awaknyan laju jiduek jipreh gobnyan disinan. ateuh ulee isa nyan laju jikeubah le awaknyan saboh tulesan nyang su jih keuhai peue nyang jitudo le awaknyan ubak gobnyan sampoe gobnyan keunong hukom, su tulesan nyan na kheueh lagee nyoe: "nyoe kheueh isa, raja ureueng yahudi", meusigoe ngon isa nyan awaknyan na teuma jisaleb dua droe ureueng jeuhet nyang buet jih meurampok; sidroe blaih uneuen, dan sidroe teuk blaih wie gobnyan. ureueng-ureueng nyan na jikak rot nyan jiasak-asek ulee, sira jihina isa. awaknyan jipeugah, "gata nyang keuneuk reuloh baet allah, dan gata peudong teuma lam teumpo lthee uroe! meunye gata aneuek allah, tron kheueh laju nibak saleb nyan, dan peuseulamat droe gata!" meunan cit deungon peumimpin imeum-imeum dan guree-guree agama lom peumimpin-peumimpin yahudi jihina isa. awaknyan jipeugah lagee nyoe, "ureueng nyoe jipeuseulamat ureueng laen, padahai droe geuh keudroe hana hase jipeuseulamat! meunye gobnyan raja israel, bah kheueh bak saat nyoe gobnyan jitron nibak saleb nyan, baro kheueh kamoe peucaya ubak gobnyan. jikheun gobnyan peucaya ubak allah, lom jipeugah gobnyan aneuek allah. nah, jak tangien jinoo, peu kheueh gobnyan geupeu seulamat le allah saat nyoe." peurampok-peurampok nyang dua droe nyan nyang teusaleb meusigoe ngon gobnyan

pih jipeugah cit haba meuhina nyang lagee nyan. watee cot uroe timang, nyang treb jih na lhee jeuem, bansaboh nanggro nyang seupot na deuh sapeue. poh lhee seupot, isa geudumpek ngon su geuh nyang teuga dan meugeunta, "eli-eli, lama sabakhtani?" nyang makna jih, "ya allah lon, ya allah lon, pakon droeneuh neutinggai ulon?" na padub droe ureueng nyang na disinan jideungoe su isa meudumpek nyan, dan laju jipeugah sabe keudroe-droe jih, "ureueng nyang jihoi ilyas!" sidroe lamkawan nyan bagaih-bagaih jijak cok bungong kareueng, laju jipeunom lam ie anggo masam. oh ltheueh nyan ataranya laju jilat bak ujong reunong, jisunyung laju bak bibi isa. teuma le ureueng-ureueng nyang laen jipeugah, "preh ilee, jak tangieng peu ktheueh ilyas teuka jijak peuseulamat ureueng nyan!" oh ltheueh nyan isa geudumpek lom ngon su nyang teuga, dan oh ltheueh nyan gobnyan laju meuninggai donya. ija gorden nyang na meugantung lam baet tuhan teupriek jeuet keudua phon rot ateuh sampoe trok u miyueb. bumoe meugeunta dan gunong-gunong batee beukah. bubena jirat ka teuhah, dan jai lumpah na umat po teu allah nyang ka meuninggai geupeu udeb lom teuma. awaknyan mandum jiteubiet nibak lam kubu-kubu oh ka ltheueh isa geubeudoh nibak mate, dan awaknyan laju jitamong u yerusalem. dan disinan jai that-that ureueng nyang ngieng awaknyan. keumandan pasokan meusajan ngon sidadu-sidadu nyang keumiet isa habeh yo ngon teumakot watee jikalon geumpa bumoe, dan mandum nyang ka teujadi nyan. awaknyan jipeugah, "beutoi that, jihnyoe aneuek po teu allah!" disinan rame that cit ureueng inong nyang teungoh jingingi nibak joh. awaknyan ktheueh nyang seutot isa keu jijak tulong gobnyan phon nibak galilea. lamkawan ureueng inong nyan na ktheueh mariam magdalena, mariam mak yakobus dan yusuf, dan mak aneuek-aneuek zebedeus. malam nyan teuka ktheueh sidroe ureueng kaya nibak arimatea, nan ureueng nyan yusuf. ureueng nyan murit isa cit. ureueng nyan laju jijak ubak pilatus, dan jilakee manyet isa nyan, dan pilatus pih laju jipeurintah mangat manyet isa nyan jijok bak gobnyan. teuma le yusuf laju geucok manyet isa nyan, laju jibalot ngon ija kapan nibak ija lineun baro. manyet isa nyan jikeubah laju lam kubu atra gobnyan keudroe nyang jipeuget bak saboh gunong batee. oh ka ltheueh nyan le gobnyan laju geubalek sineuk batee rayeuk sampoe teutob banmandum babah pintoe kubu nyan, dan oh ltheueh nyan ureueng nyan laju geuwoe. mariam magdalena dan mariam nyang laen geudeuk bak bineh nyan sira geupeukeue ubak kubu nyan. oh singoh beungoh nyan, bak uroe sabat, peumimpén imeum-imeum dan ureueng-ureueng farisi jijak meusajan-sajan meuhadab ubak pilatus sira jipeugah lagee nyoe, "amphon, kamoe mantong teuingat watee ureueng teumipee nyan mantong udeb, jihnyan ka ltheueh jipeugah, 'oh ka ltheueh lhee uroe ulon teuma lon beudoh,' sabab nyan, neuyue ktheueh ubak ureueng laen mangat jikeumiet kubu nyan beuget-get sampoe bak uroe nyang keu lhee, mangat murit-murit jihnyan hana jiteume cue manyet nyan laju jipeugah ubak ureueng rame bahwa ureueng nyan ka jibeudoh nibak lam kubu.

dan teumipee nyang dudoe nyoe leubeh brok nibak nyang phon." nibak gata na sidadu peungawai, kheun pilatus ubak awaknyan, "jak ktheueh jak keumiet kubu nyan bek reunggang-reunggang." dan awaknyan pih laju jijak ubak kubu isa nyan, jiseegee laju batee raya nyang teukeubah lam babah pintoe kubu nyan, mangat hana nyang peukaru kubu isa nyan. oh ka ltheueh seulesoe uroe sabat, bak uroe aleuhat watee jih mantong beungoh lumpah na, mariam magdalena ngon mariam nyang laen geujak ngieng laju ubak kubu isa nyan. ngon hana jisangka-sangka teuka geumpa bumoe nyang lumpah teuga. sidroe malaikat tuhan geutron nibak syeuruga laju geugule batee raya nyang teutob bak babah pintoe kubu nyan, oh ltheueh nyan laju geudeuk ateuh batee nyan. muka malaikat nyan lagee kilat, dan peukayan gobnyan puteh lagoena. sidadu nyang keumiet kubu nyan lumpah teumakot dan yo hana teukira, dan ka jeuet lagee ureueng mate. malaikat nyan geupeugah ubak ureueng-ureueng inong nyang na disinan, "bek teumakot! ulon kuteupeu gata tamita isa nyang ka teusaleb nyan. gobnyan hana disinoe. gobnyan ka geubeudoh lagee nyang ka ltheueh geupeugah yoh masa ilee. jak tangieng teumpat gobnyan teueh nyan. jinoe gata jak ktheueh laju bagaih-bagaih, jak peugah laju ubak mandum murit-murit gobnyan, 'gobnyan ka geubeudoh, dan saat nyoe gobnyan geujak leubeh awai nibak gata u galilea. disideh gata teuma gata kalon gobnyan!' ingat ktheueh peue nyang ka ltheueh ulon peugah ubak gata." bagaih that-that ureueng-ureueng inong nyan geutinggai kubu isa nyan. deungon peurasaan teumakot meujampu galak, awaknyan geuplueng-plueng keu geujak peugah hai nyan ubak murit-murit isa. hana jisangka-sangka isa geujak meurumpok ngon ureueng inong nyan sira geupeugah lagee nyoe, "assalam mualaikum!" laju awaknyan geupeurab ubak gobnyan, geuwa gaki geuh dan geuseumah gobnyan. "bek teumakot," kheun isa ubak awaknyan, "jak peugah laju ubak mandum syedara-syedara lon mangat awaknyan jijak u galilea; disideh awaknyan teuma jikalon ulon." teungoh ureueng inong-inong nyan jijak mita syedara-syedara isa, na padub droe sidadu nyang keumiet kubu nyan jijak woe u banda, dan jipeugah laju ubak mandum peumimpén imeum-imeum banmandum nyang ka teujadi. peumimpén imeum-imeum nyan laju jimeurok pakat ngon peumimpén-peumimpén yahudi, dan jijok laju peng nyang lupah jai ubak sidadu nyang kawai kubu nyan, sira jipeugah meunoe, "gata haroh gata kheun bahwa murit-murit isa jiteuka oh malam uroe, dan laju jicue manyet nyan watee gata teungoh teunget. dan meunyoee gubunur geudeungoe hai nyan, kamoe nyang bujuk gobnyan mangat gata hana halangan sapeue." teuma le sidadu peungawai nyan laju jicok peng nyan, dan jipeubuet laju lagee nyang ka ji amanat ubak jihnyan. ngon sabab nyan calitra nyan mantong meutabu di teungoh-teungoh ureueng yahudi sampoe an uroe nyoe. ban siblahi droe murit isa nyan laju geujak u buket di galilea lagee nyang ka geupeurintah le isa ubak awaknyan. bak watee awaknyan geukalon isa na disinan, awaknyan laju jisujut jiseumah gobnyan. teuma na cit lamkawan

awaknyan nyang ragu-ragu. isa laju geupeurab bak awaknyan sira geupeugah, "banmandum kuasa nyang na di syeuruga dan di bumoe ka geuseurah ubak ulon. sabab nyan jak kheueh ubak mandum bansa nyang na ateueh donya, peujeuet kheueh awaknyan keumurit-murit ulon. pumano kheueh awaknyan deungon gata teuoh nan bapak, aneuek, dan roh allah. purunoe kheueh awaknyan jitaat banmandum nyang ka lon peurintah ubak gata. dan ingat kheueh ulon teuma na sabe meusajan gata sampoe akhe jamen."

nyoe kheueh haba get keuhai isa, aneuek allah. haba get nyoe awaiphon geutuleh le nabi yesaya lagee nyoe, " 'nyoe kheueh utosan ulon,' kheueh po teu allah; 'ulon kirem jihnyan leubeu illee nibak gata, mangat jihnyan jipeulah rot ueh keu gata.' na ureueng nyang meuhoi-meuhoi di padang pasi, 'peusiab kheueh rot ueh keu tuhan; peusare kheueh rot-rot nyan jeuet mangat bak geujak.' " lagee nyang teutuleh nyan, meunan kheueh teuka nabi yahya lam padang pasi. gobnyan geupumano manusa dan geupeusampoe haba nyang teuka nibak po teu allah. "gata haroh tobat nibak mandum desya-desya gata dan haroh teupumano, mangat po teu allah geupeu amphon gata," meunan kheueh geupeugah le nabi yahya. mandum ureueng nyang teuka nibak yodea dan banda di yusalem jijak ubak nabi yahya dan jideungoe peue nyang geupeugah le nabi yahya nyan. laju awaknyan jiaku banmandum desya-desya jih, dan nabi yahya laju geupumano awaknyan lam krueng yordan. nabi yahya geungui peukayan nyang teupeuget nibak bulee unta. taloe keuing gobnyan teupeuget nibak kulet, peunajoh gobnyan daruet ngon meulisan uteuen. gobnyan geupeusampoe haba nyang lagee nyoe, "singoh oh ka lheureh ulon, teuma teuka ureueng nyang leubeu rayeuk nibak ulon. keu lon tukui lon ploih taloe sipatu gobnyan pih hana jeuet lon peubuet. ulon pumano gata deungon ie, teuma gobnyan geupumano gata ngon roh po teu allah." bak watee nyan isa teuka nibak nazaret u galilea, dan nabi yahya pumano watee nyan na gobnyan bak krueng yordan, lam krueng yordan nyan kheueh isa geupumano le nabi yahya. meunan isa geuteungoh lam krueng nyan, deuh laju geungieng langet teuhah dan roh allah geutron lagee cicem mirah pati u atueuh gobnyan. dan oh lheureh nyan teudeungoe su po teu allah nyang geupeugah lagee nyoe, "gata kheueh aneuek ulon nyang ulon gaseh. gata nyang peugalak that nibak ate lon." bagai that oh lheureh nyan roh allah laju geuba isa u padang pasi. peuet ploh uroe gobnyan lam padang pasi nyan, ji-ujoe le ibilih. meunan cit deungon beulatang kleut na meusajan gobnyan disinan, dan dumna malaikat geupeutimag gobnyan. oh ka lheureh nabi yahya pumano jipeutamong lam glab, isa laju geujak u galilea, dan geupeusampoe laju haba get nyang teuka nibak allah disinan. kheun gobnyan, "watee jih ka troh, allah sigra geumat peurintah. tobat kheueh nibak banmandum desya-desya gata, dan peucaya kheueh ubak haba get nyang teuka nibak po teu allah!" watee isa teungoh geujak bak pante danau galilea, leumah laju geungieng dua droe neulayan, neulayan nyan na kheueh simon dan adoe jih nyang nan andreas. awaknyan teungoh jeue eungkot lam danau nyan. isa geupeugah ubak awaknyan, "seutot kheueh ulon, ulon teuma lon purunoe gata pakriban cara jih teu jeue manusa." hana jipike panyang bandua awaknyan laju jiseutot isa dan jeue jihnyan hana jipako jitinggai disinan. isa geujak laju, deuh teuma geungieng dua droe teuk adoe aduen, nyang nan jih sidroe yakobus dan yahya, awaknyan bandua aneuek zebedeus. watee isa troh keunan, geungieng awaknyan teungoh cob jeue lam peuraho jih. isa langsong geutawok awaknyan. bandua awaknyan laju jitron lam peuraho sira jiting-

gai ureueng syiek ngon ureueng-ureueng laen nyang pajoh gaji bak gobnyan. dan awaknyan laju jiseutot isa. isa ngon murit-murit gobnyan laju troh u banda kapernaum. bak uroe sabat seulanjut jih, isa geutamong lam saboh rumoh iebadat laju geuseumeubeuet disinan. ureueng-ureueng nyang deungoe gobnyan hireuen watee jideungoe cara gobnyan seumeubeuet. sabab, gobnyan geuseumeubeuet deungon peunoh wibawa, hana lagee guree-guree agama nyang laen. bak watee nyan na sidroe ureueng nyang ka jitamong roh jeuhet laju jitamong lam rumoh iebadat, oh troh keunan laju jidumpek ngon su meutaga, "hei isa ureueng nazaret, peue keuneuk ta peubuet atueuh kamoe nyoe? droeneueh jak keunoe keuneuk peubinas kamoe? ulon kuteupoe soe droeneueh nyan: droeneueh kheueh utosan nyang suci nyang teuka nibak po teu allah!" "seungab!" geudhot le isa ubak roh jeuhet nyan, "teubiet laju lam tuboh ureueng!" teuma di roh jeuhet nyan laju jiyok-yok tuboh ureueng nyan sihabeh seuneuga, oh lheureh nyan laju jiteubiet lam tuboh ureueng nyan sira jidumpek. banmandum ureueng nyang na disinan hireuen lumpah na, sampoe awaknyan jimarit sabe keudroe-droe, "hei, peue bala nyoe? saboh peungajaran nyang baro! deungon peunoh wibawa gobnyan hase geupeurintah roh-roh jeuhet jiteubiet lam ureueng nyan, dan jihnyan taat ubak gobnyan!" teuma haba keuhai isa bagai that meutabu bansaboh galilea. isa ngon murit-murit gobnyan laju geutinggai rumoh iebadat nyan dan geujak laju u rumoh simon dan andreas. yakobus ngon yahya geujak cit meusajan awaknyan. mak tuan simon teungoh saket deumam bak teupat eh. watee isa ngon murit-murit gobnyan geutamong lam rumoh nyan, ubak isa laju jibri tee hainyan. ban geudeungoe nyan, isa laju geujak ubak tuan simon nyan, laju geumat jaroe ureueng nyan, laju geutulong peubudoh ureueng nyan. watee nyan cit teuma ureueng nyan ka puleh deumam dan laju jitulong peuti-mang awaknyan. oh seupot uroe, watee mata uroe ka jilhob, di ureueng rame laju jiba ubak isa mandum ureueng saket dan nyang jitamong roh jeuhet. banmandum peundudek banda nyan ka meusapat dileuen rumoh nyan. dan isa laju geupeu ubat banmandum ureueng nyang keunong meubagoe rupa peunyaket, dan geu use bubena roh-roh jeuhet. gobnyan hana geubri idhin roh-roh jeuhet nyan jipeugah haba, sabab jihnyan jiteupeu soe gobnyan. oh singoh beungoh, watee mantong suboh that, isa geubudoh geutinggai laju rumoh nyan. gobnyan geujak u teupat nyang sungue diluwa banda, laju geumeudoa bak teupat nyang sungue nyan. teuma le simon dan rakan-rakan gobnyan jijak mita gobnyan. dan watee awaknyan ka meurumpok ngon gobnyan, awaknyan jipeugah, "banmandum ureueng teungoh jimita bapak." teuma geujaweueb le isa, "jak geutanyoh tajak laju u banda-banda nyang na ban sikeuileng. ulon haroh lon khutubah bak teupat nyan, sabab nyan kheueh meukeusut ulon teuka keunoe." sabab nyan isa geujak ho-ho mantong bansaboh galilea, dan geukhutubah bak rumoh-rumoh iebadat sira geu use bubena roh-roh jeuhet. sidroe ureueng meupeunyaket kulet nyan ka lumpah that parah jijak ubak isa. sira jimeuteuot ureueng nyan jipeugah, "meun-

yoe bapak neutem, bapak jeuet bapak peupuleh ulon." isa weueh oh geungieng ureueng nyan. jadi, gobnyan laju geumat ureueng nyan sira geupeugah, "ulon tem, beupuleh kheueh gata!" watee nyan cit teuma peun-yaket ureueng nyan gadoh dan laju puleh. dan isa laju geuyuejak ureueng nyan sira geupeu ingat lagee nyoe, "awaih, bek peugah-peugah bak soe mantong, teuma gata jak kheueh ubak imeum, dan gata lakee gobnyan keu geupeubeutoi bahwa gata ka puleh. dan sibagoe gata ka puleh, gata sie kheueh keureubeuen lagee nyang ka geupeurintah le nabi musa, sibagoe bukeuti bak ureueng laen bahwa gata beutoi-beutoi ka puleh." teuma di ureueng nyan jijak, hana putoh-putoh jicalitra bak gob keujadian nyan isa hana hase geutamong lam banda seucara trang-trang. gobnyan teuma tinggai diluwa banda bak teupmat- na padub uroe teuma oh ltheueh nyan isa geugisa u kapernaum. teuma meutabu kheueh haba bahwa gobnyan na di rumoh. ureueng rame jijak bak gobnyan. awaknyan meusapat disinan sampoe ka hana le teupmat. bak babah pintoe pih ka peunoh meusak ngon ureueng. dan isa pih laju geupeusampoe haba nibak po teu allah ubak awaknyan. teungoh gobnyan geupeugah haba, na peuet droe ureueng jigulam sidroe ureueng lapee jiba ubak isa. teuma sabab ureueng jai lumpah na, awaknyan hana hase jipeurab ubak gobnyan. teuma, awaknyan laju jireuloh bubong paih bak teupmat isa teungoh peugah haba. oh ltheueh nyan awaknyan laju jipeuteron ureueng lapee nyan meusigoe ngon tika eh jih. watee geungieng le isa padub na rayeuk iman awaknyan, gobnyan laju geupeugah ubak ureueng lapee nyan, "aneuek ulon, desya gata ka teupeu amphon." na padub droe guree-guree agama nyang teungoh duek disinan, ka jipeuphon jiteumanyong lam ate, "lumpah that ajam babah ureueng nyan ji-jeuet peugah lagee nyan! jihnyan ka jihina po teu allah. soe nyang jeuet peu amphon desya, meun-yoe kon po teu allah keudroe?" watee nyan cit teuma isa geuteupeue pikeran awaknyan. laju gobnyan geupeugah lagee nyoe, "pakon gata teumanyong meunan lam ate gata? toh nyang leubeh mudah teupeugah, 'desya gata ka teupeu amphon', atawa teupeugah, 'beudoh kheueh, gulong kheueh tika gata dan jak kheueh?' teuma jinoenyoe ulon bri bukeuti keu gata bahwa ateuh bumoe nyoe aneuek manusia na kuasa jipeu amphon desya." dan laju isa geupeugah ubak ureueng lapee nyan lagee nyoe, "beudoh kheueh, gulong tika gata dan jakwoe kheueh!" ureueng lapee nyan laju jibeudoh sira jigulang tika jih jiteubiet laju dan mandum ureueng rame jinggiang teungoh ureueng nyan. ureueng-ureueng laen teuhireuen-hireuen laju jipujoe po teu allah. kheun awaknyan, "gohlom na tangieng keujadian nyang lagee nyoe!" isa geugisa lom u pante danau galilea. jai that ureueng jijak ubak gobnyan, dan gobnyan laju geupeubeuet awaknyan. teungoh isa geujak nibak teupmat nyan, gobnyan geukalon sidroe ureueng tukang kuteb cukee nyang nan jih lewi, aneuek alfeus, teungoh jideuk lam kanto cukee. "seutot kheueh ulon," kheun isa ubak ureueng nyan. teuma ureueng lewi nyan laju jidong dan jijak laju jiseutot isa. watee isa teungoh geumakheun di rumoh lewi, teuka kheueh keunan ureueng-ureueng tukang kuteb cukee nyang laen dan ureueng-ureueng

nyang jianggab hana get le masyarakat jimakheun meusajan ngon isa dan murit-murit gobnyan. sabab rame that lamkawan awaknyan nyang seutot isa. na padub droe guree-guree agama nibak golongan ureueng farisi geukalon isa teungoh makheun meusajan-sajan ngon ureueng-ureueng kuteb cukee nyan dan ureueng-ureueng nyang jianggab hana get nyan. teuma le awaknyan laju jitanyong ubak murit-murit isa, "pakon guree gata jipajoh bu meusajan ngon ureueng-ureueng kuteb cukee dan ureueng-ureueng nyang hana get nyan?" isa teudeungoe peue nyang jitanyong le awaknyan, laju geujaweueb lagee nyoe, "ureueng nyang seuhata hana peureulee dokto; nyang peureulee dokto na kheueh ureueng saket. ulon teuka bukon lon tawok ureueng nyang jianggab droe jih get, teuma ureueng nyang jianggab hina." bak saboh watee murit-murit nabi yahya pumano dan ureueng-ureueng farisi teungoh puasa. dan na nyang jijak ubak isa sira jitanyong lagee nyoe, "pakon murit nabi yahya pumano dan murit ureueng farisi jipuasa, seudangkan murit bapak hana?" geujaweueb le isa, "bak teupmat khanuri ureueng meukawen, peu kheueh jame-jame nyang troh nyan hana jimakheun? meun-yoe linto agam mantong na meusajan ngon awaknyan, teuntee awaknyan jimakheun. teuma trok teuka watee jih linto agam nyan jicok nibak awaknyan. bak watee nyan baro kheueh awaknyan hana jimakheun. hana ureueng nyang tampai bajee tuha ngon ija baro. sabab ija sinampai nyan teuma kunyuet laju teupriek bajee nyan, deungan na lagee nyan akibat jih beukah bajee teutampai nyan leubeh raya. meunan cit hana ureueng nyang ro ie anggo baro lam baluem kulet nyang ka tuha. sabab ngon ie anggo nyang baro nyan jeuet keusabab baluem nyan beukah. keuneulheueh jih bandua nyan teuboh. ie anggo nyang baro haroh teuroe lam baluem nyang baro!" bak siuroe-uroe sabat, watee isa teungoh geujak rot lam lampoh gandom, murit-murit gobnyan laju jipot boh gandom nyan. di ureueng farisi laju jipeugah ubak isa, "pakon murit-murit droeneueh ji iengkeue hukom agama geutanyoe, deungan cara jipeubuet buet nyang teutam bak uroe sabat?" geujaweueb le isa, "peu kheueh gohlom na gata beuet peue nyang geupeubuet le nabi daud, watee abyatar teungoh meutugaih jeuet keu imeum agong. watee nabi daud dan ureueng-ureueng deuk, dan hana peunajoh sapeue, gobnyan geutamong lam baet tuhan, laju geupajoh ruti nyang ka teupeuseumah keu allah. dan ruti nyan pih geubri ubak ureueng-ureueng gobnyan. padahai meunurot agama geutanyoe, imeum-imeum mantong nyang jeuet pajoh ruti nyan." geupeugah lom le isa, "uroe sabat teupeuget keu manusia; bukon manusia keu uroe sabat. jadi, aneuek manusia na kuasa, bah kheueh nyan ateueh uroe sabat." isa geugisa lom u rumoh iebadat. disinan na sidroe ureueng nyang lapee jaroe jih siblaih. disinan na ureueng nyang teungoh jimita-mita keusalahan isa, mangat na rot jigadu peue-peue buet gobnyan nyang salah. jadi awaknyan hana putoh-putoh jipeurati gobnyan peu kheueh isa nyan geupeu puleh ureueng bak uroe sabat. isa geupeugah ubak ureueng nyang jaroe jih lapee siblaih nyan, "dong keunoe, dikeue ulon." oh ltheueh nyan laju geutanyong ubak

ureueng nyang na disinan, "meunurot ajaran agama, peue nyang jeuet tapeubuet bak uroe sabat? peubuet nyang jroh atawa peubuet nyang jeuhet? peuseulamat manusia atawa poh mate manusia?" awaknyan seungah mantong. deungon beungeh isa laju geungiang ban sikeulileng geuh, teuma gobnyan seudeh cit, sabab awaknyan lumpah kreuuh ulee. laju geupeugah ubak ureueng nyan, "sunyueng keunoe jaroe gata." ureueng nyan laju jisunyueng jaroe jih, dan saat nyan cit jaroe ureueng nyan puleh. teuma le ureueng-ureueng farisi laju jitinggai rumah ibadah nyan, dan jijak mupakat laju ngon na padub droe ureueng-ureueng raja herodes, keuneuk jipeumate isa. isa dan murit-murit gobnyan laju gesuurot ubak bineh danau galilea. teuma jai lumpah na ureueng galilea jiseutot isa, dan rame cit nyang teuka nibak yudea, nibak yersusalem, nibak daerah idumea, dan nibak daerah siblaih u timu yordan, dan nibak keulileng banda tirus dan sidon. awaknyan banmandum jijak ubak isa, sabab awaknyan jideungoe keuhai-hai nyang ka geupeubuet. ureueng nyang teuka nyan rame that-that, sampoe isa geuyue seudia peuraho ubak murit-murit gobnyan, sabab pat tateupeue teuma gobnyan jisak-sak le ureueng rame nyan. rame that ureueng saket nyang geupeu puleh, sampoe banmandum ureueng saket meusak-sak jiuseuha jipeurab ubak gobnyan mangat meuteume jimat gobnyan. dan ureueng-ureueng nyang ka jitamong roh jeuhet, tieb-tieb jingiang ateuh gobnyan, laju jisujut dikeue gobnyan sira jidumpek, "droeneueh kheueh aneuek po teu allah!" teuma le isa sagai-sagai hana geubri peugah ubak roh-roh jeuhet nyan soe gobnyan. oh lheureh nyan isa geu ek u ateuh saboh buket, laju geuhoi ureueng-ureueng nyang geugalak. ureueng-ureueng nyang geutawok nyan laju jijak ubak gobnyan, ureueng-ureueng nyang ka jijak ubak gobnyan laju geupileh dua blaih droe. kheun gobnyan, "ulon pileh gatanyoe, mangat gata taseutot ho-ho mantong nyang ulon jak, dan ulon kirem gata keu gata jak peusampoe haba get nyoe nyang teuka nibak po teu allah, dan gata teuma meuteume kuasa keu gata use roh jeuhet." nyoe kheueh nannan ban dua blaih droe nyan: simon (nyang teuhoi petrus), yakobus dan yahya syedara gobnyan, na kheueh aneuek-aneuek zebedeus (awaknyan geuboh nan boanerges makna jih, "aneuek geulanteue"), andreas, filipus, bartolomeus, matius, tomas, yakobus bin alfeus, tadeus, simon si patriot, dan yudas iskarriot nyang khianat isa. oh lheureh nyan isa geuwoe u rumah geuh. teuma di ureueng rame teuka lom meusapat, sampoe isa dan mandum murit-murit gobnyan hana meuteume geupajoh bu. ureueng-ureueng nyang na disinan jipeugah, "jih nyan kapungoe!" dan watee keuluwarga gobnyan geudeungoe hai nyan, awaknyan laju jijak keuneuk cok gobnyan. guree-guree agama nyang teuka nibak yersusalem jipeugah, "ureueng nyan ka jitamong beelzebul! pang ulee roh-roh jeuhet nyan kheueh nyang bri kuasa ubak jihnyan mangat jeuet jiuse roh jeuhet." teuma le isa laju geutawok ureueng rame nyan, laju geucalitra ubak awaknyan na padubboh miseue. "panana mungken roh jeuhet ji-use roh jeuhet," kheun isa. "meunyoelam saboh nanggroel teubagi lam peureute-peureute

nyang sabe jimeumusoh, nanggroel nyan hana hase meuteun. dan meunyoelam saboh keuluwarga hana haba sipakat dan anggota-anggota keuluwarga nyan sabe lam karu hana sapeue kheun, keuluwarga nyan teuma hanco. meunyoelam keurajeuen iblih sabe meusugang dan meukoh-koh reupang, keurajeuen nyan hana treb meuteun dan teuma gadoh hana meubeukaih. hana meusidroel pih nyang hase jitamong lam rumah ureueng nyang teuga dan jireupah hareuta jih meunyoelam hana ji-ikat leubeh ilee ureueng teuga nyan. oh lheureh nyan, baro kheueh hase jicok mandum atra ureueng nyan. beutateupeue kheueh! meunyoelam ureueng jipeubuet desya dan jipeugah haba meuhina, ureueng nyang lagee nyan jeuet teupeu amphon. teuma meunyoelam jihnyan jihina roh allah, ureueng nyan hana jeuet le teupeu amphon! sabab nyang jihina nyan na kheueh desya nyang keukai." (isa geupeugah meunan sabab na ureueng nyang peugah isa kajitamong roh jeuhet.) oh lheureh nyan mak ngon syedara-syedara isa geujak ubak gobnyan. awaknyan geupreh diluwa geuyue bak sidroe ureueng jeuet jihoi isa. watee nyan ureueng rame nyan teungoh duek bansikeulileng isa. awaknyan jipeugah ubak gobnyan, "pak, mak dan syedara-syedara bapak na diluwa. awaknyan geumita bapak." geujaweueh le isa, "soe mak ulon? soe kheueh syedara-syedara lon?" oh lheureh nyan laju geungiang bak ureueng-ureueng nyang duek bansikeulileng gobnyan laju geupeugah, "nyoe kheueh mak dan syedara-syedara lon! ureueng nyang jipeubuet keuheundak allah, nyan kheueh syedara lon nyang agam, syedara lon nyang inong, dan mak ulon." isa geuseumeubeuet lom di pante danau galilea. rame lumpah na ureueng nyang hudom gobnyan disinan. sabab nyang gobnyan laju geujak duek lam peuraho nyang na ateuh ie, dan ureueng rame nyan jidong bak bineh danau. dan isa laju geupeurunoe meubagoe hai ubak awaknyan deungon geupeu guna miseue-miseue. meunoe kheueh karu jih geupeurunoe awaknyan. "deungoe kheueh nyoe! na sidroe ureueng meutani jitabu bijeh. watee ureueng nyang teungoh teumabu, na bijeh nyang rhot bak rot ueh. laju teuka cicem dan bijeh nyan jicatuék sampoe habeh. na teuma nyang rhot bak teumpat nyang meubatee-batee tanoh jih cit bacut. bijeh-bijeh nyan laju timoh sabab kureueng tanoh, teuma watee mata uroe ka ji ek, tarok-tarok nyang timoh nyan laju layee dan laju tho oh lheureh nyan laju mate sabab ukeue jih hana lhok jitamong. na teuma bijeh nyang rhot lam tamah meuduro. tamah meuduro nyan laju timoh dan jingintan tarok-tarok nyan sampoe hana meuhase jimuboh. teuma na cit bijeh nyang rhot ateuh tanoh nyang subo. bijeh nyan timoh, laju rayeuk dan laju jimuboh, na nyang lhee ploh, na nyang nam ploh, dan na nyang sireutho go lipat." oh ka lheureh geucalitra miseue-miseue nyan, isa geupeugah lom, "meunyoelam geulinyueng, deungoe kheueh!" watee isa ka tinggai sidroe, ureueng-ureueng nyang ka jideungoe peue-peue nyang ka geupeubeuet, laju jijak ubak gobnyan meusajan-sajan ngon bandua blaih droe murit-murit gobnyan. awaknyan laju jilakee ubak isa mangat geutem peugah makna miseue-miseue nyan. teuma isa laju geupeugah ubak awaknyan, "ubak gata ka geubri anugeurah keu gata teupeu rah-

sia pakriban po teu allah geumat peurintah. teuma ureueng-ureueng nyang geupeurunoe ngon miseue-miseue, mangat 'awaknyan sabe jipeurati teuma hana jiteupeu peue nyang teujadi, awaknyan sabe jideung-goe, teuma hana muphom, nyoe na mangat awaknyan bek jingiang dan bek muphom dan bek jijak ubak po teu allah dan po teu allah geupeu amphon awaknyan.' "oh lleueh nyan isa geupeugah ubak awaknyan lagee nyoe, "meunyoee gatanyoee hana tamuphom miseue, pakriban gata jeuet gata peuphom miseue nyang laen? nyang teumabu nyan na kheueh ureueng nyang peusiab haba nibak po teu allah. bijeh nyang rhot bak rot ueh nyan na kheueh miseue ureueng nyang jideung-goe haba keuhai pakriban allah geumat peurintah. meunan jideung-goe, iblih teuka laju jicok peue nyang ka teutabu lam ate ureueng nyan. bijeh nyang rhot bak teupmat nyang meubatee-batee miseue ureueng nyang deungoe haba nyan, dan laju jiteurimong ngon galak ate. teuma haba nyan hana meukeue lam ate awaknyan, seuhingga hana treb meuteuen. meunan awaknyan meuteume sosah atawa ji-ienanya sabab haba nyan, laju awaknyan murtat. bijeh nyang rhot lam tamah meuduro nyan miseue ureueng nyang jideung-goe haba nyan, teuma khawate keuhai udeb awaknyan dan meuheuet keuneuk udeb mewah. nafeusu keu meubagoe rupa jitamong lam ate awaknyan. sabab nyan haba nibak po teu allah teuseupet lam ate awaknyan, sampoe hana jeuet keu boh. dan bijeh nyang rhot bak tanoh nyang subo miseue jih ureueng nyang deung-goe haba nyan dan laju jiteurimong, awaknyan jimuboh jai that, na nyang lhee ploh, na nyang nam ploh, dan na nyang sireutoh goe lipat hase jih." oh lleueh nyan isa geupeugah lom, "peu kheueh na ureueng nyang peuhu panyot laju jitob ngon guci, atawa jikeubah dimiyueb teupmat eh? peu kheueh hana jikeubah panyot jihnyan bak gaki panyot? hana nyang teusom nyang hana deuh teukalon; dan hana nyang teurahsia nyang hana hase teubongkar. sabab nyan meunyoee na punyueng, deung-goe kheueh!" geupeugah lom le isa, "ngiang kheueh peue nyang gata deung-goe nyoe! sineupat nyang gata peuguna keu ureueng laen teuma geupeu ngana cit le allah keu gata dan leubeh le nibak nyan. sabab ureueng nyang ka lleueh na, teuma geubri leubeh nibak nyang na; teuma keu ureueng nyang hana, bacut nyang mantong na bak ureueng nyang geucok lom teuma." isa geusambong lom haba gobnyan, "meunyoee po teu allah nyang mat peurintah sibagoe raja, keuadaan jih jeuet teuboh miseue lagee ureueng nyang tabu bijeh bak ladang jih keudroe. oh watee malam ureueng nyan ji-eh; oh beungoh uroe jibeudoh. dan teungoh lagee nyan bijeh-bijeh nyang ka jitabu nyan laju udeb dan rayeuk. teuma pakriban jeuet jih bijeh-bijeh nyan jitimoh dan rayeuk, ureueng nyan hana jiteupeu. tanoh nyan kheueh nyang deung-goe keudroe jih nyang peuteubiet hase: phon-phon that tangke jih, oh lleueh nyan aneuek jih laju jeuet keuboh. dan meunyoee gandom nyan ka masak, di ureueng pih ka jipeuphon koh ngon sadeueb sabab ka troh watee jih keu teukoh." meunyoee allah nyang mat peurintah, ngon peue tanyoe jeuet tacok bandengan?" geutanyong le isa lom. "cuntoh peu kheueh nyang jeuet tapeuguna keu tapeutrang hainyan? me-

unyoee allah nyang mat peurintah, keuadaan jih na kheueh lagee miseue nyoe: sineuk bijeh sisawi laju jicok le gob dan jipula laju bak tanoh. bijeh sisawi na kheueh bijeh nyang paleng ubit nyang na lam donya. teuma meunyoee ka timoh, bijeh nyan ka jeuet keu kayee nyang paleng rayeuk di teungoh-teungoh kayee nyang laen. cabeung-cabeung jih luhu-luhu sampoe mubagoe cicem jijakdong keunan, dan jipeuet eumpung dimiyueb cabeung nyang luhu nyan." meunan kheueh cara jih isa geupeurunoe gob deungon cara geuboh miseue lagee nyang ka geupeugah nyan, meunyoee awaknyan jeuet jiwaham. isa sabe geupeu guna miseue meunyoee gobnyan geupeurunoe awaknyan. teuma meunyoee gobnyan keudroe ngon murit-murit gobnyan, geupeugah banmandam ubak awaknyan. watee seupot nyan cit teuma, isa geupeugah ubak murit-murit geuh, "jak kheueh tameulayeue u meurandeh danau." teuma isa laju geuek-ateuh peuraho, dan murit-murit gobnyan jitinggai ureueng rame bak bineh danau, laju ji-ek-ateuh peuraho nyang geuek le isa. peuraho-peuraho laen na cit nibak teupmat nyan. oh lleueh nyan isa dan murit-murit gobnyan laju geumeulayeue. hana treb watee jih awaknyan geumeulayeue, teuka kheueh angen badee nyang lumpah teuga. umbak raya laju jipoh ateuh peuraho dan ie pih ka jitamong lam peuraho nyan sampoe-sampoe peuraho nyan rab peunoh ngon ie. bak si ulikot peuraho nyan isa teungoh geueh-eh ulee geuh geupeusadeue ateuh bantai. murit-murit gobnyan laju jipeugoe. jipeugah le awaknyan, "bapak guree, peu kheueh bapak hana neupakoe, tanyoe lam bala?" isa geubeudoh, laju geudhot angen nyan, dan geupeugah teuma ubak danau, "iem, seungab kheueh!" angen pih seungab, dan danau ka teunang lagee nyang ka. oh lleueh nyan isa geupeugah ubak murit-murit geuhnyan, "pakon gata teumakot? pakon gata hana tapeucaya ubak ulon?" teuma awaknyan meutamah teumakot laju jimarit sabe keudroe-droe, "soe kheueh nyang sibeuna jih ureueng nyoe, sampoe angen ngon umbak pih jitaat ubak gobnyan." oh lleueh nyan isa dan murit-murit gobnyan laju troh u meurandeh danau galilea, bak daerah gerasa. meunan isa geutron lam peuraho, jikak laju ubak gobnyan sidroe ureueng agam nyang banjiteubiet lam guha-guha jirat ureueng mate. ureueng nyan ka jikuasa le roh jeuhet dan tinggai bak jirat-jirat ureueng mate. ureueng nyan ka hana hase le teu ikat; bah kheueh ngon ikat jih nyan rante, hana cit meuguna. ka kayem that gaki dan jaroe ureueng nyan teubeuleunggu ngon rante, teuma bandum rante-rante nyan putoh jireut, dan beuso nyang na bak gaki jih pih hase jipeupatah. ureueng nyan teuga lumpah na seuhingga hana meusidroepi nyang hase jimat ureueng nyan. uroe ngon malam ureueng nyan meuwot-wot dilampoh jirat dan bak buket-buket, sira jiklik-klik dan ji krok-krok tuboh jih ngon batee. watee jingiang rot jioh isa ka teuka, ureueng nyan jiplueng-plueng dan laju jisujut dikeue isa. ngon su nyang teuga sira jidumpek ureueng nyan jipeugah, "isa. aneuek allah nyang mahamanyang! peue keuneuk droeneueh peubuet ateuh ulon nyoe? deumi allah, ulon lakee bek droeneueh seksa ulon!" (ureueng nyan jipeugah lagee nyan sabab isa geupeu-

gah ubak ureueng nyan,"roh jeuhet, teubiet laju lam tuboh ureueng nyoe!") dan isa laju geutanyong bak ureueng nyan, "soe nan gata?" jaweub ureueng nyan, "nan ulon 'legiun' – sabab kamoe nyoe rame lagoena!" meu-ulang-ulang jilakee le ureueng nyan mangat isa bek geuyue teubiet roh-roh jeuhet nyan nibak daerah nyan. bak bineh teupat nyan jai lumpahna bui-bui nyang teungoh jimita eumpeuen bak barieh gunong. roh-roh jeuhet nyan jilakee ubak isa, "neuyue kheueh ubak kamoe jeuet kamoe tamong lam tuboh bui-bui nyan." dan isa situju. teuma mandum roh-roh jeuhet nyan laju jiteubiet lam tuboh ureueng nyan dan jita-mong laju lam tuboh bui-bui nyang na disinan. ban-mandum kawan bui nyan laju jiplueng dan jigrob nibak bineh reuleueng lam danau – lam banmandum, mandum bui-bui nyan na kira-kira dua ribee boh bui. ureueng-ureueng nyang rabe bui laju jiplueng, laju jipeugah peue nyang ka jingieng nyan lam banda-banda dan gampong-gampong nyang na didaerah nyan. dan di ureueng nyang ka jideungoe habanyan pih laju jiteubiet jikak kalon peue nyang ka teujadi. awaknyan jikak ubak isa, jingieng laju ureueng nyang yoh baroeakan jitamong roh jeuhet nyan, teungoh jiduek disinan. ureueng nyan ka jisok peukayan, dan pikeran jih pih ka samporeuna. teuma awaknyan mandum ka jeuet teumakot. ureueng-ureueng nyang ka jingieng keudroe peue nyang ka teujadi ateuhe ureueng nyan dan bui-bui nyan jicalitra peue nyang ka teujadi. dan peunduduek nyang na didaerah nyan pih laju jilakee ubak isa mangat gobnyan geutinggai laju daerah nyan. watee isa geu-ek ateuhe peuraho, ureueng nyang bunoe jikuasa le roh jeuhet nyan jilakee ubak isa, mangat jeuet jiseutot. teuma le isa hana geubri, kheun gobnyan, "jakwoe kheueh dan peugah laju bak wareh kawom gata peue nyang ka geupeubuet le tuhan keu gata dan padub na jroh jih gobnyan ateuhe gata!" ureueng nyan pih laju jikak, dan jicalitra laju phon lam daerah siploh boh banda peue nyang ka geupeubuet le isa ateuhe jihnyan. banmandum ureueng hireuen jideungoe nyan. isa geugisa lom u meurandeh danau. bak bineh danau nyan, rame that ureueng jikak hudom bansilingka gobnyan. jipeurab kheueh ubak gobnyan sidroe ureueng nyang nan jih yairus. ureueng nyan na kheueh sidroe ureueng nyang jeuet keupimpenan rumah ibadah nyang na di banda nyan. watee ureueng nyan jingieng isa, ureueng nyan laju jisujut dikeue gobnyan, laju jilakee deungon meuharab that-that, "pak, aneuek inong lon brat that saket. ulon meuharab bapak neutem jakmat aneuek ulon nyan, mangat aneuek nyan puleh dan bek mate!" teuma isa laju geujak meusigoe ngon yairus nyan. rame that-that ureueng nyang seutot gobnyan dan jisak-sak jeueb-jeueb sagoe. lamkawan nyan na teuma sidroe ureueng inong nyang ka dua blaih thon saket meudarah nyang na hubungan jih ngon darah he. mandum atra keukayaan jih ka habeh jipeuguna keu uengkokh meu-ubat bak dokto-dokto, teuma bandum nyan hana nyang hase jipeupuleh gobnyan, nyang na peunyaket ureueng nyan meutamah brat. ureueng inong nyan ka le that jideungoe keuhai isa. dan lamkawan ureueng rame nyan, ureueng nyan jipeurab laju ubak isa nibak likot, sabab ureueng nyan jipike lagee nyoe, "asai meuteume lon

cukeh jubah gobnyan, ulon teuma puleh!" laju jicukeh bajee jubah isa, watee nyan cit teuma peunyaket meudarah nyan puleh. ureueng nyan laju jirasa bahwa jihnyan ka puleh. bak watee nyan cit teuma isa teurasa bahwa na teunaga nyang teubiet nibak lam tuboh gobnyan. teuma laju geungieng lamkawan ureueng rame nyan laju geutanyong, "soe nyang mat bajee jubah lon?" murit-murit gobnyan jipeugah, "ci bapak ngieng keudroe pakriban jai jih manusia meusak-sak. dan bapak mantong cit neutanyong, soe nyang mat bapak?" teuma isa teutab geungieng bansikeulileng gobnyan keu geuteupeue soe nyang ka mat bajee jubah gobnyan. ureueng inong nyan nyang teupeu peue nyang ka teujadi ateuhe droe jihnyan, deungon yo dan teumakot laju jisujut dikeue isa dan jimeungaku banmandum nyan. dan isa laju geupeugah ubak inong nyan, "aneuek ulon, sabab gata peucaya keu ulon, gata puleh! jak kheueh laju deungon seulam. gata ka puleh banmandum!" teungoh isa mantong geupeugah haba, na padub droe peulayan teuka nibak rumah yairus sira jipeugah, "aneuek inong amphon nyang saket nyan ka meuninggai donya," kheun awaknyan ubak yairus. "bek le amphon peuhok bapak guree nyoe." hana jipakoe peue nyang ka jipeugah le ureueng nyan ubak yairus isa laju geupeugah, "bek yo, peucaya kheueh!" isa geujak laju, hana geubri meusidroe ureueng pih nyang jeuet jikak ngon gobnyan, seulaen petrus, yakobus dan yahya ngon syedara jih. watee ka troh u rumah yairus, geukalon le isa keuadaan rumah nyan get that subra, dan geudeungoe su ureueng mo ngon ureueng meubae ngon su nyang teuga-teuga. isa laju geutamong dan geupeugah ubak awaknyan, "pakon jeuet karu that dan pakon neumoe? aneuek nyan hana mate; teuma jiteunget!" awaknyan jipeukem peue nyang geupeugah le isa nyan. teuma laju geuyue le gobnyan mangat awaknyan banmandum jiteubiet uluwa, dan laju geuba ma ngon ayah aneuek nyan meunan cit ban lhee droe murit gobnyan mangat jitamong lam kama aneuek nyan. isa geumat jaroe aneuek nyan dan laju geupeugah ubak aneuek nyan, "talita kum," nyang makna jih, "hei aneuek inong, ulon peugah ubak gata: beudoh kheueh!" aneuek inong nyan laju jibeudoh, dan laju jikak (umu jih ka dua blaih thon.) mandum ureueng nyang kalon nyan lumpah hireuen! teuma isa geutam that-that mangat hai nyan bek jipeugah sahoe. oh lھےueh nyan laju geupeugah, "bri kheueh makheun keu aneuek nyan." geubeudoh disinan, isa ngon murit-murit geuh laju geuwoe u gampong droe. bak uroe sabat gobnyan geupeu phon seumeubuet lam rumah ibadah. rame that ureueng disinan. watee ureueng-ureueng nyang na disinan jideungoe peue nyang geupeubuet le isa nyan, awaknyan hireuen lagoena. awaknyan jipeugah, "pat jiteume mandum nyoe le ureueng nyan? hieumat peu kheueh nyang na bak ureueng nyoe? pakriban cara jih ureueng nyoe geupeuna buet ajaeb? jihnyoe kon utoh kayee, aneuek maryam, dan syedara le yakobus, yoses, yudas dan simon? nyoe, syedara-syedara geuh nyang inong pih na tinggai disinoe." sabab nyan awaknyan hana jiteurimong gobnyan. laju isa geupeugah ubak awaknyan, "sidroe nabi jihoreumat dipat mantong, keucuali di gampong droe jih, dan lamkawan wareh

kawom jih dan keuluwarga jih." bak teumpat nyan isa hana geuteume peubuet sapeue keuhai buet-buet nyang ajaab, nyang na geupeu puleh na padub droe ureueng saket deungon cara geukeubah jaroe gobnyan ateuheh awaknyan. gobnyan hireuen awaknyan hana jipeucaya. oh ltheueh nyan isa geujak laju u gampong-gampong nyang na sikeulileng nyan laju geuseumeubeuet. gobnyan laju geutawok ban dua blaih droe murit geuh, laju geu utus awaknyan dua-dua droe dan geubri kuasa ubak awaknyan keu jeuet geu-use roh-roh jeuhet. laju geubri peutunok lagee nyoe ubak awaknyan, "bek gata ba sapeue watee gata jak nyan, seulaen tungkat. bek gata ba peunajoh atawa baluem seudeukah, atawa peng. sok kheueh sipatu, teuma bek gata ba dua on bajee." geupeugah lom, "meunyoee gata tamong lam saboh rumoh, tinggai kheueh lam rumoh nyan sampoe oh watee gata tinggai banda nyan. teuma meunyoee gata troh bak saboh teumpat, dan ureueng-ureueng nyang na disinan hana jitem teurimong dan jideung-goe gata, gata tinggai laju teumpat nyan. dan gata kipah kheueh abee nyang na bak gaki gata sibagoe peu ingat keu awaknyan!" oh ka ltheueh geu amanat le isa lagee nyan, geujak kheueh laju ban dua blaih droe murit gobnyan nyan. awaknyan geujak peusampoe haba get bahwa manusia haroh meutobat nibak desya-desya. murit-murit isa nyan jai that geu-use roh-roh jeuhet, geusilieuk minyeuk zaiton bak ureueng saket dan geupeu puleh awaknyan. haba-haba keuhai banmandum nyang ka teujadi nyan troh cit ubak raja herodes, sabab nan isa ka meusyehuh ho-ho mantong. na ureueng nyang peugah, "nabi yahya pumano ka udeb lom teuma! nyang kheueh sabab jih gobnyan na kuasa keu geupeubuet bandum buet nyang ajaab nyan." teuma ureueng-ureueng laen jipeugah, "geuh nyan ilyas." na teuma nyang peugah, "geuh nyan nabi, lagee sidroe lam kawan nabi yoh jamen ilee." watee herodes jideung-goe nyan, laju jipeugah, "pasti nyoe nabi yahya pumano nyang ka lon reupang takue jih yoh masa ilee. jinoenyoe jihnyan ka udeb lom!" sabab siglohlohm nyan herodes ka jiyue ureueng-ureueng jih keuteujak drob nabi yahya, dan jipeutamong gobnyan lam glab. herodes jipeubuet lagee nyan sabab soai herodias, peurumoh syedara jih keudroe, na kheueh filipus. sabab herodes ka geumeukawen ngon herodias, dan soai keuhai nyan nabi yahya ka meu ulang-ulang geuteugah herodes lagee nyoe, "hana jeuet gata meukawen ngon purumoh syedara gata nyan!" nyang kheueh sabab jih herodias jidam that keu nabi yahya dan keuneuk jipoh mate nabi yahya, teuma jihnyan hana hase jipeubuet hai nyan, sabab jihnyan ji ampeueng-ampeueng le herodes. sabab herodes ka geuyee bak ureueng laen jeuet jijaga nabi yahya nyan beujroh-jroh ideh lam glab, sabab jihnyan teumakot keu nabi yahya. jihnyan jiteupeu nabi yahya sidroe ureueng get nyang geu-utus le po teu allah. dan beutoi, meunyoee nabi yahya geumeututoe, herodes galak cit jideung-goe, bah pih jihnyan aloh alah that watee jideung-goe. akhe jih herodias meuteume keuseumpatan watee ulang thon herodes. bak wateanyan herodes jipeuna khanuri keu banmandum peujabat manyang keurajeuen nanggroe, peuwira-peuwira dan ureueng-

ureueng patot galilea. nibak khanuri nyan aneuek dara herodias jimeunari, dan tari aneuek dara nyan keubiet mangat that ate raja herodes meunan cit ngon jame-jame gobnyan. dan herodes laju jipeugah bak aneuek dara nyan, "peue nyang kah galak, lakee kheueh. nyang gata lakeenyan teuma ulon bri keu gata!" dan herodes pih laju jimeujanji bak aneuek dara nyan deungon jimeusumpah. kheun herodes, "peue-peue mantong nyang gata lakee teutab ulon bri, bah pih siteungoh nibak keurajeuen ulon nyang na nyoe!" teuma aneuek daranyan laju jiteubiet dan jitanyong bak ma jih, "mak, peue nyang haroh lon lakee bak raja nyan?" jaweeub mak aneuek dara nyan, "lakee laju ulee nabi yahya pumano." aneuek dara nyan laju jigisa ubak herodes dan jipeugah, "ulon lakee ulee nabi yahya pumano neubri keu ulon jinoenyoe cit teuma nyang teuboh ateuheh talam!" watee jideung-goe peue nyang jilakeenyan le aneuek dara nyan herodes seudeh lumpah na. teuma gobnyan hana hase jitulak peue nyang jilakeenyan sabab raja nyan ka jimeusumpah dikeue dum na jame jih. deungon nyan le raja nyan laju jipeurintah ubak peungawai jih mangat jijakcok ulee nabi yahya pumano. deungon nyan, sipa-i nyan laju jijak ubak peunjara, dan laju jireupang takue nabi yahya. oh ltheueh nyan le sipa-i nyan laju jiba ulee nyan lam talam dan laju jijok ubak aneuek dara nyan. dan aneuek daranyan laju jijok teuma atra nyan ubak mak jih. watee murit-murit nabi yahya jideung-goe hai nyan, awaknyan laju jijak cok manyet nabi yahya, dan laju jipasoe lam kubu. rasui-rasui nyang geukirem le isa nyan oh ltheueh nyan ka geuwoe teuma, dan laju meusapat ngon isa. awaknyan jilapor bak gobnyan banmandum nyang ka awaknyan peubuet dan awaknyan peurunoe. jai लागोना ureueng nyang teuka dan jijak, akhe jih keugeu makheun mantong isa ngon murit-murit gobnyan hana hase. sabab nyan isa geupeugah ubak murit-murit geuh, "jak kheueh geutanyoe bak teumpat nyang sungue, nibak teumpat nyan tanyoe jeuet keudroe dan gata hase tameureuhat sikeujab." deungon na haba isa nyan, awaknyan laju geu-ek ateuheh peuraho geujak ubak teumpat nyang sungue. teuma jai that nyang kalon awaknyan geutinggai teumpat nyan, dan jiteupeu soe awaknyan. teuma, nibak mandum banda nyang na lam wilayah nyan, bubena ureueng laju jijak sira jiplueng rot ateuheh darat mangat leubeh awai trok awaknyan nibak isa ngon murit-murit gobnyan. watee isa geutreun ateuheh peuraho, laju deuh geukalon ureueng rame nyan. gobnyan weueh that that watee geungieng, lagee bubiri hana nyang rabe. teuma gobnyan pih ka geupeu phon peurunoe awaknyan deungon mubagoe masalah. watee uroe ka seupot, murit-murit isa geupeugah ubak gobnyan, "karab malam dan teumpat nyoe sungue that. leubeh get bapak yue awaknyoe mangat jijak, mangat awaknyan jeuet teuma jijak bloe peunajoh nyang na nibak bineh-bineh gampong nyang na silingka nyoe." teuma geujaweeub le isa, "gata mantong nyang bri mangat awaknyan jeuet jimakheun" "o ma, peu kheueh museuti kamoe jak bloe keu ureueng rame nyoe ngon dua reutoth peng pirak keuteubri makheun mandum awaknyoe?" meunan kheueh geukheun le murit-murit isa nyan.

teuma geutanyong le isa, "padub boh na ruti nibak gata? cuba jak ngieng." oh leupah awaknyan jikak kalon, awaknyan laju jikheun, "ruti na limong boh meunan cit eungkot na dua boh." oh lheureh nyan isa laju geuyue duek awaknyan banmandum ateueh naleueng nyang ijo seucara meutumpok-tumpok. bubena awaknyan pih laju geudeuk ngon teuatoe, meutumpok-tumpok. na nyang sireutoh droe saboh tumpok, dan na cit nyang limong ploh droe saboh tumpok. oh lheureh nyan isa laju geucok ruti nyang limong boh nyan dan meunan cit eungkot nyang dua boh, laju geutangah u langet sira geulakee teurimong gaseh ubak allah. oh lheureh nyan, ruti nyang na nyan laju geupriek-priek ngon jaroe geuh keudroe laju geujok bak murit-murit geuh dan geuyue jok-jok ubak mandum ureueng nyang na disinan. meunan cit ngon eungkot dua boh nyan geujok-jok keu awaknyan banmandum. awaknyan banmandum jiteume makheun sampoe an troe-troe. oh lheureh nyan peunajoh nyang na leubeh nyan laju geupeusapat le murit-murit isa – banmandum nyan na dua blaih boh raga peunoh. ureueng agam nyang pajoh ruti nyan na limong ribee droe. oh lheureh nyan isa laju geuyue jak banmandum murit-murit gobnyan leubeh awai nibak gob nyan u betsaida nyang na di meurandeh danau, dan gobnyan laju geuyue bak ureueng rame nyan mangat jiwoe. oh ka lheureh geuyue woe ureueng rame nyan, isa geujak laju ubak buket keugeujak meudoa. watee malam ka teuka, peuraho murit-murit isa kana nibak teungoh danau, dan isa keudroe mantong na ateueh darat. gobnyan deuh geukalon padub na hek jih awaknyan jikayoh peuraho nyan u meurandeh sabab angon teuga that jipot nyang teuka meulawan arah. sabab nyan, na kira-kira poh lhee ngon poh nam beungoh, isa laju geujak ubak awaknyan sira geujak ateueh ie. dan gobnyan geujak laju siulah-ulah teuma teulewat awaknyan. watee awaknyan jingiang isa geujak ateueh ie, awaknyan jipike gobnyan antu, deungan nyan awaknyan jiklik-klik sabab teumakot that. sabab banmandum awaknyan na jingiang gobnyan dan awaknyan lumpah teukeujot. teuma isa laju geupeugah bak awaknyan, "teunang mantong! ulon nyoe isa, bek teumakot!" laju teuma gobnyan geuek ateueh peuraho awaknyan, oh lheureh nyan angen pih reuda dan mandum murit-murit isa hireuen la-goena. nyang ajaeb le sabab limong boh ruti nyan gohlom cit muphom le awaknyan, payah that nibak awaknyan keujituoh muphom. watee katrok u meurandeh danau, awaknyan geurhom saoh di pante genesaret. watee awaknyan geuteubiet lam peuraho, ureueng-ureueng rame jikalon bahwa nyang teuka nyan na kheueh isa. laju awaknyan jiplueng-plueng keudeh keunoe bansaboh wilayahnyan, dan laju jipeuphon ba ureueng-ureueng sakat ateueh tika ubak isa. meunyo awaknyan jideungoe isa na bak saboh teumapat, awaknyan pih laju jiba ureueng-ureueng saketnyan keunan. dipat mantong isa teuka – bahnyan di gampong, di banda atawa di gampong – disinan pih ureueng-ureueng rame sabe jiteuka sira jikeubah ureueng-ureueng sakat nyan lam padang. awaknyan laju jilakee deungan meuharab that mangat awaknyan jitem cukeh jubah isa, bahpi ujung jih mantong. banmandum nyang cukeh nyan, puleh

mandum. na saboh keulompok ureueng farisi dan na meupadub droe guree agama nibak yerusalem, jikak ubak isa. awaknyan jingiang na meupadub droe murit isa jipajoh bu hana ji rrah jaroe sabab nyan na kheueh peuratoran agama. ureueng-ureueng farisi, meunan cit banmandum ureueng yahudi, seutia that jiseutot adat istiadat indatu jih. awaknyan hana jimakheun, sigohlom ji rrah jaroe meunurot cara-cara nyang ka teupeuteuntee. peue mantong nyang jibloe dikeudee hana jipajoh, sigohlom jirrah leubeh ilee. dan jai that peuratoran nyang laen nibak indatu awaknyan nyang ji amai biet-biet that; miseue jih lagee teu rrah glah, cawan, dan peukakaih-peukakaih teumaga. sabab nyan kheueh ureueng farisi dan guree-guree agama nyan jitanyong ubak isa, 'pakon murit-murit droeneueh jipajoh bu hana ji rrah jaroe? peue sabab awaknyan hana jiseutot adat istiadat indatu geutanyoe?' geujaweeub le isa, 'gatanyoe mandum ureueng-ureueng munafek! beutoi that peue nyang ka geupeugah le nabi yesaya keuhai gata, 'meunoe kheueh teureuman allah, ureueng nyan jiseumah ulon ngon tutoe haba, meunyo ate awaknyan jioh nibak ulon. hana guna awaknyan jiseumah ulon, sabab atoran manusia nyang awaknyan peurunoe siulah-ulah nyan atoran lon! peue-peue nyang geupeurintah le allah hana gata pakoe, dan atoran-atoran nyang jipeuet le manusia gata mat habeh teunaga.' geupeugah lom le isa, 'gata carong that gata tulak peurintah allah mangat jeuet gata peuteun ajaran gata keudroe. nabi musa ka geubri peurintah lagee nyoe, 'horeumat kheueh ubak ayah dan ma gata,' dan 'barang sigasoe nyang teunak ayah ngon ma jih, ureueng nyan wajib teuhukom mate.' teuma gata tapeurunoe lagee nyoe: meunyo na ureueng jipeugah ubak ureueng syiek jih, 'peue nyang museuti ulon bri keu ayah ngon ma lon, ka ulon bri ubak po teu allah,' deungan lagee nyan gata ka tapeubeubaih ureueng jitulong ayah ngon ma jih. jadi deungan ajaran droe gata keudroe nyang gata bri ubak ureueng-ureueng, gata ka gata peutan peue nyang geukheun le allah. mantong jai that hai nyang lagee nyoe nyang gata peubuet." dan isa geutawok lom ureueng rame nyan sigoe teuk geupeugah laju ubak awaknyan, "deungoe kheueh mangat muphom! hana sapeue pih nyang teuka nibak luwa nyang jitamong lam ureueng nyang meuakibat ureueng nyan ka jeuet keu kutoe. nyang sikeubiet jih, nyang jiteubiet nibak sidroe-sidroe ureueng, nyan kheueh nyang teupeugah kutoe. jadi, meunyo na punyueng, deungoe kheueh" watee isa geutinggai awaknyan dan geutamong lam rumah, murit-murit gobnyan laju jitanyong ubak gobnyan keuhai makna miseue-miseue nyan. laju isa geupeugah uak awaknyan, "peu kheueh gata gohlom cit muphom? peu kheueh gata hana hase gata peuphom bahwa nyang jitamong lam sidroe-droe ureueng hana hase teupeujeuet ureueng nyan kutoe? sabab nyang jitamong nyan bukan rot ate, teuma rot pruet, dan oh lheureh nyan jiteubiet lon." deungoe tutoe haba lagee nyan isa geupeugah bahwa mandum peunajoh nyan haleue. oh lheureh nyan geupeugah lom le isa, "nyang jiteubiet nibak ureueng, nyan kheueh nyang peukuto jih nyan. sabab nibak di dalam ate, jiteuka pikanan-pikanan jeuet nyang jeuet keusabab manusia jipeubuet cabui, ceumeucue, peu

mate gob, meumukah, teumipee, ba haba fiteunah, meunan cit jipeubuet meubagoe rupa nyang jeuhet, teukah, hana adab, bingiek ate, sombong, dan payah teupeurunoe. mandum nyang jeuhet nyan teuka nibak dalam, dan nyan kheueh nyang jeuet keusabab manusia jeuet keu kutoe." oh ltheueh nyan isa laju geutinggai teumpat nyan, dan geujak laju u daerah rab ngon banda tirus. laju geutamong lam saboh rumoh dan hana geutem bahwa na ureueng ji teupeu gobnyan na didaerah nyan. teuma gobnyan hana hase geupeusom droe. na sidroe ma, nyang aneuek inong gobnyan ka jitamong roh jeuhet, jideungoe keuhai isa. ureueng nyan laju jijak ubak isa sira jisujut dikeue gobnyan, sira geumeulakee mangat isa geutem use roh jeuhet nyang jitamong lam tuboh aneuek gobnyan. inong nyan kon ureueng yahudi, lahe ureueng nyan di daerah finesia di siria. isa geupeugah ubak ureueng nyan, "aneuek-aneuek miet haroh teubri makheun leubeh ilee. hana get teucok peunajoh bak aneuek miet teugeulawa keu asee." "teungku," kheun inong nyan, "asee-asee dimiyueb meuja pih jipajoh seueh-seueh nyang jipajoh le aneuek banyak!" laju geupeugah le isa ubak inong nyan, "sabab peu nyang ka gata jaweueb nyan, jakwoe kheueh; roh jeuhet ka jiteubiet lam tuboh aneuek gata!" ureueng inong nyan laju jiwoe. oh troh u rumoh, deuh laju jikalon aneuek jih teu-eh ateuh teumpat eh, dan roh jeuhet beutoi-beutoi ka jiteubiet lam tuboh aneuek jih. oh ltheueh nyan isa geutinggai laju daerah tirus, dan geujak lom u danau galilea meulalu sidon. geucok rot jak geuh lam daerah siploh boh banda. bak teumpat nyan le ureueng disinan laju jiba ubak gobnyan sidroe ureueng nyang kalu ngon tulo. awaknyan jilakee mangat isa geukeubah jaroe geuh ateuh ureueng nyang han jeuet marit dan tulo nyan. isa laju geuba ureueng nyan keudroe jioh nibak ureueng rame, laju geukeubah jaroe gobnyan lam mandua geulinyueng ureueng nyan. oh ltheueh nyan isa laju geumeuladah, laju geumat lidah ureueng nyan. oh ltheueh nyan isa laju geutangah u langet, laju geupeuleueh nafah teuga-teuga sira geupeugah bak ureueng nyan, "efata," nyang makna jih, "teuhah kheueh!" punyone ureueng nyan laju teuhah dan lidah jih ka leumoh lom teuma, di ureueng nyan pih ka jeuet jipeugah haba ngon lanca. oh ltheueh nyan isa geutam awaknyan hana geubri peugah sahoe peue nyang ka teujadi nyan. teuma, seumaken geutam le isa, meutamah-tamah hainyan jipeugah keudeh keunoe. dan mandum ureueng nyang deungoe nyan hireuen lumpah na. awaknyan jipeugah, "banmandum jipeuget deungon jroh! nyang luwa biasa ureueng tulo hase jideungoe dan ureueng kalu jeuet jipeugah haba!" hana padubna treb teuma oh ltheueh nyan, na lom saboh kawan ureueng rame jijak meugumpoi. sabab awaknyan hana jiba peunajoh, isa laju geutawok murit-murit geuh sira geupeugah, "ulon weueh that watee ulon ngieng ateuh ureueng rame nyoe. ka lhee uroe treb jih awaknyan meusajan ngon ulon, bak saat nyoe awaknyan hana sapeue jipajoh sabab hana jiba. meunyo ulon yue woe awaknyan ngon pruet soh hana mungen, awaknyan teuma pansan bak teungoh rot. peue lom na awaknyan nyang teuka nibak jioh." geujaweueb le murit-murit isa, "bak teumpat nyang

sungue lagee nyoe, pat kheueh awaknyan jicok peunajoh nyang meumada keu ureueng nyang rame jih lagee nyoe?" "padubboh na ruti bak gata?" tanyong isa. "tujoh boh," jaweueb awaknyan. isa laju geuyueduek ateuh tanoh mandum ureueng rame nyan, laju geucok bantujoh boh ruti nyan laju geu kheun teurimong gaseh ubak po teu allah. oh ltheueh nyan geupriek-priek laju rutinyan ngon jaroe gobnyan dan geujok laju ubak murit-murit geuh keu jibagi-bagi ubak ureueng rame nyan. teuma mandum murit-murit gobnyan jipeubuet lagee nyang ka geupeurintah nyan. bak awaknyan na teuma padub boh eungkot nyang ubit-ubit. isa geukheun teurimong gaseh ubak po teu allah ateuh eungkot-eungkot nyan, geujok ubak murit-murit geuh mangat jibagi-bagi keu ureueng rame nyan. awaknyan jimakheun sampoe troe banmandum – na kira-kira peuet ribee droe nyang pajoh nyan. oh ltheueh nyan murit-murit isa laju geupeusapat mandum seueh-seueh nyang leubeh jipajoh le ureueng rame nyan – na tujoh boh raga peunoh. oh ltheueh nyan baro kheueh isa geuyue woe ureueng rame nyan u rumoh jih maseng-maseng, seudangkan gobnyan meusajan ngon murit-murit geuh laju geu ek ateuh peuraho geumeulayueu teuma u daerah dalmanuta. na padub droe ureueng farisi jijak ubak isa, dan laju jimeudebat ngon gobnyan nyang meukeusut jih jikeuneuk jeubak isa. awaknyan jilakee mangat isa beugeutem peuleumah buet nyang ajaeb sibagoe tanda bahwa gobnyan beutoi teuka nibak po teu allah. isa meukeutuet ate geuh laju geujaweueb, "peue sabab ureueng-ureueng jamen nyoe jilakee mangat lon peuna buet nyang ajaeb? hana! ulon hana lon bri tanda nyang lagee nyan ubak awaknyan!" isa laju geutinggai awaknyan disinan dan geujak ek ateuh peuraho; oh ltheueh nyan geujak laju u meurandeh danau nyan. murit-murit isa tuwoe jiba ruti nyang seb. nyang na bak awaknyan cit saboh ruti lam peuraho. "ate-ate kheueh teuhadab rago ureueng farisi dan ureueng herodes," kheun isa ubak awaknyan. ban jideungoe nyan murit-murit isa laju jimarit sabe keudroe-droe keuhai nyang ban geupeuingat le isa nyan. awaknyan jipeugah, "gobnyan geupeugah lagee nyan, sabab bak tanyoe hana ruti." isa geuteupeue peue nyang awaknyan peumasa alah. sabab nyan gobnyan laju geutanyong ubak awaknyan, "keupeue gata peumasa alah keuhai hana ruti? peu kheueh gata tateupeue dan gohlom cit gata muphom? peue ka tumpoi that pikeran gata? bak gata na mata – pakon hana gata keumaloe? bak gata na geulinyueng – pakon hana gata deungoe? peu kheueh hana gata ingat keuhai limong boh ruti nyan ulon priek-priek keu limong ribee droe ureueng? padub boh raga leubeh peunajoh nyang gata peusapat nyan?" "dua blaih boh raga," jaweueb awaknyan. "dan watee ulon priek-priek tujoh boh ruti keu peuet ribee droe ureueng," geutanyong le isa lom, "padub boh raga nyang leubeh jipajoh nyang na gata peusapat?" "tujoh boh raga," jaweueb awaknyan. "nyan, ka lagee nyan peu kheueh gohlom cit muphom nibak gata?" kheun isa lom. awaknyan laju troh u betsaida. bak teumpat nyan le ureueng disinan laju jiba ubak isa sidroe ureueng buta, dan jilakee le awaknyan mangat isa geutem mat ureueng buta nyan deungon harapan mata nyang

buta nyan puleh. le isa laju geumat bak jaroe ureueng nyan geubahue laju u luwa banda nyan. oh ltheueh nyan le isa geucok ie babah geuh keudroe laju geulabo bak mata ureueng buta nyan, oh ltheueh nyan laju geutanyong bak ureueng nyan, "peu kheueh ka deuh gata meungieng bak saat nyoe?" ureueng nyan jikalon ukeue, laju jipeugah, "nyoe. na deuh lon ngieng ureueng jijak-jak; teuma deuh jih lagee bak kayee." isa geupeudeuk lom jaroe gobnyan bak mata ureueng nyan. goenoyoe ureueng nyan jiuseuha jimeungieng sira jibleuet siteuga-teuga jih. mata ureueng nyan laju puleh, dan laju jingieng banmandum nyan deungon jeulaih dan trang lumpah na. geupeugah laju le isa ubak ureueng nyan, "jakwoe kheueh, dan bek gata gisa u banda nyan." isa dan murit-murit gobnyan geujak lam gampong-gampong nyan sikeulileng kaisarea filipi. bak teungoh rot ueh isa geutanyong ubak awaknyan, "meunurot jipeugah le gob, soe kheueh ulon nyoe?" jijaweueb le awaknyan, "na nyang peugah, nabi yahya pumano; na teuma nyang peugah ilyas, dan nyang laen lom jipeugah: sidroe nibak nabi-nabi." pakriban meunurot gata keudroe, soe ulon nyoe? tanyong isa. geujaweueb le petrus, "bak na kheueh raja nyang peuseulamat!" isa geupeuin-gat bak awaknyan, mangat bek jipeugah sahoe soe droe gobnyan nyan. oh ltheueh nyan, isa geupeu phon peurunoe mandum murit-murit geuh bahwa aneuek manusia museuti jiteurimong azeb deurita nyang jai, dan hana jiteurimong le peumimpin-peumimpin, peumimpin imeum-imeum dan guree-guree agama. ureueng nyan teuma jipoh mate, teuma bak uroe nyang keu lhee gobnyan teuma teupeubeudoh teuma. deuh that isa geupeugah hainyan ubak murit-murit gobnyan. ban jideungoe lagee nyan petrus laju jitarek isa bak bineh, dan jiseugah gobnyan. teuma isa geupaleng dan geupeugah ubak murit-murit gobnyan, laju geuseugah petrus, "weeh keudeh, peungoda! pikeran gata nyan pikeran manusia; kon pikeran al-lah!" oh ltheueh nyan isa geutawok ureueng rame nyang na disinan meusajan-sajan ngon murit-murit gobnyan. laju gobnyan geupeugah ubak awaknyan, "ureueng nyang keuneuk seutot ulon, ureueng nyan haroh jipeutuwoe ubak keupeuntengan droe jih, oh ltheueh nyan jigulam saleb gobnyan, dan laju jiseutot ulon. sabab ureueng nyang keuneuk peuteun udeb jih, ureueng nyan teuma gadoh udeb. teuma ureueng nyang jikeureubeuen udeb jih keu ulon dan keu haba get nibak allah, teuma teupeuseulamat ureueng nyan. peupe laba jih nibak sidroe ureueng, meunoyoe bansaboh donya nyoe jeuet keumilek jih, teuma ureueng nyan gadoh udeb jih? peu kheueh meuteume udeb jih teutuka ngon sisuatu? meunoyoe sidroe ureueng malee jiangkee ulon dan meuneubeuet ulon bak jamen nyang jeuhet dan doraka nyoe, aneuek manusia pih teuma malee geuangkee ureueng nyan, bak watee gobnyan teuka singoh ngon kuasa bapak gobnyan, ji-ireng le malaikat-malaikat nyang suci." "beu gata teupeu kheueh!" kheun isa. "lamkawan gata nyoe na nyang hana teuma mate, sigohlom jingieng allah geumat peurintah deungon kuasa!" nam uroe oh ltheueh nyan isa geuba petrus ngon yakobus dan syedara geuh yahya, jak peu aseng droe bak saboh gunung nyang manyang. dikeue mata awaknyan isa

meu-ubah rupa. peukayan gobnyan ka meu-ubah puteh muble-ble. hana meusidroe tukang dobi nyang na lam donya nyoe nyang hase ji rlah lagee nyoe puteh. oh ltheueh nyan ban lhee droe murit gobnyan jingieng isa teungoh meututoe ngon nabi ilyas dan nabi musa. teuma petrus laju geupeugah ubak isa, "pak guree, mangat that tanyoe bak teumpat nyoe. bah kheueh kamoe peudong lhee boh khimah: saboh keu bapak, saboh keu nabi musa, dan saboh teuk keu nabi ilyas." nyang sikeubiet jih petrus hana ji-teupeu peu nyang haroh jipeugah, sabab geuhnyan ngon mandua droe rakan geuh teumakot lumpah na. oh ltheueh nyan awan pih jitron laju jipeupayong awaknyan dan nibak lam awan nyan teundeungoe su nyang jipeugah, "nyoe kheueh aneuek lon nyang ulon gaseh. deungoe kheueh peu nyang jipeugah!" bagai that awaknyan ngieng bansikeulileng geuh, teuma hana le geukalon meusidroe pih nyang na disinan, nyang na isa sidroe. watee awaknyan geutron nibak gunong nyan, isa geupeu ingat ubak awaknyan, "bek gata peugah bak soe mantong peu nyang ka ltheueh gata ngieng bunoe sigohlom aneuek manusia geupeubeudoh nibak mate." awaknyan taat peu nyang ka geupeusan le isa nyan, teuma sabe keudroe-droe awaknyan ka jipeuphon marit peu nyang geumeukeusut le isa deungon "udeb lom oh ltheueh mate." teuma awaknyan laju jitanyong ubak gobnyan, "pakon guree-guree agama jipeugah bahwa nabi ilyas nyang leubeh ilee teuka?" geujaweueb le isa, "beutoi nabi ilyas leubeh ilee teuka keu geupeu beereeh peu nyang gohlom beereeh. teuma pakriban kheueh deungon aneuek manusia? peu sabab lam alkitab na teutuleh gobnyan le that geurasa deurita dan jihina le manusia? teuma ulon peugah ubak gata: nabi ilyas ka teuka, dan le manusia jipeuhina gobnyan ban galak droe. nyan paih that lagee nyan teutuleh lam alkitab keuhai droe gobnyan." watee isa meunan cit ban lhee droe murit gobnyan ka meusaho lom ngon murit-murit gobnyan nyang laen, geukalon rame that ureueng disinan. na padubdroe guree-guree agama teungoh meudebat ngon murit-murit isa nyang na disinan. meunan awaknyan jikalon isa, awaknyan mandum teuceungang, dan laju jiplueng-plueng jijak sambot gobnyan. "peue nyang gata meuseu-eue ngon guree-guree agama nyan?" geutanyong le isa bak murit-murit geuh nyan. sidroe lamkawan ureueng rame nyan jijaweueb, "bak guree, ulon na lon ba aneuek droe ulon ubak bapak. aneuek lon nyoe ka kalu sabab ka jitamong roh jeuhet. meunoyoe roh nyan jiseurang aneuek nyan, tuboh jih jiseumpom-seumpom bak tanoh, babah jih mukuboh-kuboh, gigo jih meuthothot dan bansaboh tuboh jih teugang. ulon lakee ubak murit-murit bapak mangat geutem ue roh jeuhet nyan, teuma awaknyan hana hase geupeubuet." geupeugah laju le isa ubak awaknyan, "luwa biasa gata nyoe! gata biet-biet ureueng nyang hana peu-caya. sampoe an pajan ulon teutab meusajan gata dan lon saba teuhadab gata? ba laju keunoe aneuek nyan!" awaknyan laju jiba aneuek manyak nyan ubak isa. meunan roh jeuhet nyan jingieng isa, laju geupeujeuet tuboh aneuek nyan teubot-bot dan teugang sampoe aneuek nyan reubah meugule-gule bak

tanoh. babah jih meukuboh. laju isa geutanyong bak ayah aneuek nyan, "ka padub na treb aneuek nyoe lagee nyoe?" "yoh ubit kon ka keunong lagee nyoe!" jaweueb ayah aneuek nyan. "ka kayem that roh jeuhet nyan keuneuk jipoh mate aneuek nyan ngon cara jipeureubah droe lam apui atawa lam ie. teuma meunyoe bapak hase neutulong, beuneugaseh kheueh kamoe ngon neutulong kamoe!" "peue gata peugah? meunyoe bapak hase?" jaweueb isa. "peue mantong hase, asai ureueng peucaya!" laju ayah aneuek nyan jidumpek, "tuhan, ulon peucaya, teuma iman lon kureueng. tulong kheueh ulon mangat ulon leubeh peucaya lom!" watee geungieng le isa ureueng rame ka meuhudom, laju geupeurintah bak roh jeuhet nyan sira geupeugah, "hei roh tulo dan kalu, ulon peurintah bak kah kahteubiet lam tuboh aneuek nyoe dan bek sagai-sagai kah tamong lom lam tuboh aneuek nyoe!" roh jeuhet nyan jiklik, dan tuboh aneuek nyan laju meulawan-lawan sira teubot-bot, oh lheureh nyan laju jiteubiet lam tuboh aneuek nyan. aneuek nyan deuh lagee manyet sampoe ureueng nyan meuhudom nyan jipeugah, "aneuek nyan ka mate!" teuma isa laju geutulong peubeudoh aneuek nyan, dan aneuek nyan pih ka jibeudoh. oh lheureh nyan isa kana di rumoh, murit-murit gobnyan jijak laju ubak gobnyan sira jipeugah, "peue sabab kamoe hase kamoe use roh jeuet nyan?" geujaweueb le isa, "roh jeuhet nyan lagee nyan hana hase teu-use ngon cara peue mantong meunyoe kon ngon doa." isa dan murit-murit gobnyan laju geutinggai tempat nyan dan geujak laju rot galilea. isa hana geutem tempat gobnyan jiteupeu le gob, sabab gobnyan teungoh geupeubeuet murit-murit geuh. "aneuek manusia teuma jijok ubak kuasa manusia," meunan geupeugah le isa, "dan gobnyan teuma jipoh mate, teuma bak uroe nyan keu lhee gobnyan teuma geubeudoh!" murit-murit gobnyan hana jituoh muphom peue nyan geupeugah le isa nyan, teuma awaknyan jitatot teumanyong ubak gobnyan. awaknyan laju troh u kapernaum. oh ka troh u rumoh, isa laju geutanyong ubak murit-murit geuh, "peue gata tanyong bak teungoh rot bunoe?" awaknyan hana jijaweueb, sabab bak teungoh rot awaknyan jimeudakwa soe nyan leubeh rayeuk. isa geudeuk, dan laju geutawok bandua blaih droe murit geuh nyan. laju geupeugah bak awaknyan, "ureueng nyan keuneuk jeuet keu ureueng lumbui sa, jihnyan bah beujeuet nyan paleng akhe dan beujeuet keupeulayan banmandum manusia." oh lheureh nyan isa laju geucok sidroe aneuek manyak, laju geupeudong aneuek nyan dikeue awaknyan banmandum. isa geuwa aneuek nyan sira geupeugah ubak murit-murit gobnyan, "ureueng nyan jiteurimong sidroe aneuek miet lagee nyoe sabab ulon, saban cit ureueng nyan ka jiteurimong ulon, ureueng nyan bukan mantong ka jiteurimong ulon, teuma gobnyan nyan ka utus ulon." laju yahya geupeugah ubak isa, "pak guree, kamoe kalon sidroe ureueng jiuse jen ateuhan nan bapak. dan kamoe tam ureueng nyan sabab jihnyan bukan nibak geutanyoe." geupeugah le isa, "bek gata tam jihnyan, sabab hana meusidroe pih jipeubrot buet ajaeb ateuhan nan ulon, jeuet troh trang jipeubrot-peubrok ulon. sabab ureueng nyan hana jilawan geutanyoe, saban cit jihnyan na blaih geu-

tanyoe. ingat kheueh! ureueng nyan jibri ie jiebeku gata sabab gata murit raja nyan geuseulamat, ureueng nyan pasti jiteurimong upah jih." "soe nyan jeuet keusab sidroe nibak ureueng-ureueng nyan ubit nyoe hana jipeucaya le ubak ulon, leubeh get meunyoe batee geumileng teu-ikat bak takue jih, dan teuboh lam laot. meunyoe jaroe gata nyan jeuet gata meudesya, khoh kheueh jaroe gata nyan! leubeh get gata udeb ngon po teu allah deungan hana jaroe siblahi nibak gata deungan dua blaih jaroe tamong lam nuraka, nuraka nyan na kheueh apui nyan hu siumu masa. disinan apui hana jitem lon dan ulat hana jitem mate. dan meunyoe gaki gata nyan geujeut gata meudesya, khoh kheueh gaki nyan. leubeh get gata udeb ngon siblahi gaki dikeue allah, nibak gata udeb ngon gaki dua blaih teuma jitiek lam nuraka. disinan apui hana jitem lon dan ulat hana jitem mate. meunyoe mata gata nyan jeuet keusabab gata meudesya, cungek kheueh mata nyan! leubeh get gata tamong lam donya baro allah deungan hana mata siblahi, nibak gata udeb ngon dua blaih mata teuma teutiek lam apui nuraka. disinan apui hana jitem lon dan ulat hana jitem mate. tieb-tieb ureueng teuma teupeu gleh ngon apui, lagee keureubeuen nyan teupeu gleh ngon sira. sira nyan get, teuma meunyoe ka jeuet keutabeue, peu kheueh mungken teupeu masen lom? teuma, bah kheueh gata jeuet lagee sira – udeb kheueh meusajan-sajan deungan rukon." oh lheureh nyan isa geutinggai laju tempat nyan, geujak u daerah yudea dan daerah meurandeh kureng yordan. ureueng rame teuka lom ka meuhudom bansikeulileng isa. lagee nyan ka-ka isa laju geupeubeuet awaknyan. na padub droe ureueng farisi jijak cit keunan keu jikeuneuk jeubak isa. awaknyan jitanyong, "meunurot hukom agama geutanyoe, peu kheueh jeuet ureueng jitaluek peurumoh jih?" geujaweueb le isa, "nabi musa peue na geubri peurintah ubak gata?" "nabi musa geubri ureueng jitaluek peurumoh jih asai jibri surat taleuek leubeh ilee," jaweueb awaknyan. "nabi musa geupeurintah lagee nyan sabab gata payah that teupeurunoe," kheun isa ubak awaknyan. "teuma bak awaiphon, watee allah geucebta manusia, allah geupeugah lagee nyoe, 'allah geucebta agam ngon inong. nyan kheueh sabab jih ureueng agam jittinggai ma ngon yah jih dan laju udeb meusajan ngon peurumoh jih, teuma mandua nyan ka jeuet keusaboh, teuma, awaknyan kon le dua droe, ka jeuet keu sidroe.' nyan kheueh sabab jih, peue nyan ka geupeu saboh le po teu allah, nyan hana jeuet jipeuceur le manusia!" oh ka lheureh awaknyan geutamong lam rumoh, murit-murit gobnyan laju jitanyong ubak isa keuhai nyan ban lheureh geupeugah bunoe. isa geupeugah ubak awaknyan, "soe mantong nyan taleuek peurumoh jih laju jijak meukawen ngon inong laen, ureueng nyan ka jimeumukah ngon peurumoh jih nyan phon. meunan cit inong nyan taleuek lakoe jih laju jijak meukawen ngon agam nyan laen, jihnyan pih ka jimeumukah." na ureueng nyan ba aneuek miet ubak isa mangat geutem jamah dan geubri beureukat bak aneuek nyan. teuma le murit-murit gobnyan jibeungeh keu ureueng-ureueng nyan ba aneuek miet nyan. oh geungieng hai nyan, isa beungeh dan laju geupeu-

gah ubak murit-murit gobnyan, "peubiyeu mantong aneuek-aneuek miet nyan jijak ubak ulon! bek gata tam awaknyan, sabab ureueng-ureueng nyang lagee nyoe kheueh keu anggota umat allah. ingat nyoe! soe nyang hana meuhadab ubak po teu allah lagee sidroe aneuek miet, ureueng nyan hana teuma jeuet keu anggota umat allah." oh lheureu geupeugah lagee nyan, isa laju geuwa mandum aneuek miet nyan, oh lheureu nyan laju geupeudeuk jaroe geuh ateuah awaknyan maseng-maseng dan geubri beureukat awaknyan. watee isa geujak lom, na sidroe ureueng jiplueng-plueng jijak meurumpok ngon isa. ureueng nyan laju jisujut dikeue isa sira jityanyong, "guree nyang jroh, peue nyang haroh lon peubuet mangat ulon meuteume udeb sejatani dan keukai?" "pakon gata peugah ulon nyoe get?" geutanyong le isa. "hana nyang get, seulaen po teu allah keudroe. gata katateupeu peupepeue nyang geupeurintah le allah, 'bek poh mate, bek meumukah, bek ceumeuceu, bek jeuet keusaksi sulet, bek teumipee, horeumat kheueh keu yah ngon ma gata.' " "bapak guree," kheun ureueng nyan lom, "mandum peurintah nyan ka lheureu lon peubuet yoh muda lon sampoe an jinoo." isa geungieng ateuah ureueng nyan ngon gaseh sayang laju geupeugah, "tinggai saboh teuk nyang gata peureulee. jak peubloe laju mandum atra milek gata; gatabri kheueh peng nyan keu ureueng gasien, dan teuma meuteume hareuta lam tseyuruga. oh ka lheureu nyan gata jak kheueh taseutot ulon." ban jideungoe isa geupeugah haba lagee nyan, ureueng nyan seudeh lumpah na, laju jittinggai tempat nyan ngon ate nyang hana gundah sabab jihnyan kaya lagoena. isa laju geungieng ateuah mandum murit gobnyan sira geupeugah, "payah that-that ureueng kaya jeuet keu anggota umat po teu allah!" murit-murit gobnyan hireuen watee jideungoe peue nyang geupeugah le isa nyan. teuma geupeugah lom le isa, "wahei aneuek-aneuek lon, meumang beutoi lumpah payah keu jeuet keu anggota umat allah! leubeh mudah saboh unta jitamong lam ruhueng jarom nibak sidroe ureueng kaya jitamong lam donya baro allah." tutoe haba isa nyang geupeugah lagee nyan tehureuen-hireuen mandum murit-murit gobnyan sampoe awaknyan jimarit sabe keudroe-droe, "meunyo meunan, soe nyang jeuet seulamat?" isa geungieng ateuah awaknyan dan laju geujaweueb lagee nyoe, "bak manusia nyang lagee nyan mustahe, hana mustahe bak po teu allah; mandum mungken meunyo bak allah." laju jipeugah le petrus, "neungieng kheueh, kamoe ka habeh kamoe tinggai peue-peue nyan na guna kamoe jak seutot bapak." geupeugah le isa, "peucaya kheueh: ureueng nyang ka jitinggai binoo jih, atawa syedara jih nyang agam atawa nyang inong, meunan cit ngon ma jih, atawa ayah jih, atawa aneuek-aneuek jih, atawa blang ngon lampoh jih sabab jiseutot ulon atawa sabab haba get nibak allah, ureueng nyan teuma jiteurimong leubeh jai bak masa jinoo. jihnyan teuma meuteume sireutoh goe leubeh le rumoh, syedara agam, syedara inong, ma, aneuek-aneuek, blang ngon lampoh, – dan meunan cit ngon seksa. dan singoh bak jamen nyang teuma teuka, ureueng nyan teuma jiteurimong udeb sejatani dan keukai. teuma rame ureueng nyang bak saat nyoe nyang phon teuma jeuet keu nyang dudoe

dan rame nyang saat nyoe nyang akhe teuma jeuet keu nyang phon." isa ngon murit-murit gobnyan teungoh geujak u yerusalem, isa geujak dikeue, dan mandum murit gobnyan habeh gundah. meunan cit ureueng-ureueng nyang seutot gobnyan rot dilikot pih ka teumakot. oh lheureu nyan isa geutawok lom murit-murit gobnyan keudroe mantong oh lheureu nyan geupeugah lom bak awaknyan peu nyang teuma teuka ateuah gobnyan. "deungoe kheueh, kheun gobnyan, 'tanyoe jinoenyo teungoh tajak u yerusalem. nibak tempat aneuek manusia teuma jijok ubak peumimpén-peumimpén imeum dan ubak guree-guree agama. gobnyan teuma jihukom mate, oh lheureu nyan laju jijok ubak ureueng-ureueng nyang kon yahudi. awaknyan teuma ji peukaru ngon jihina gobnyan, jiludah gobnyan, jiseksa gobnyan, dan jisaleb gobnyan. teuma nibak ureo nyang keu lhee gobnyan teuma geubeudoh." teuma yakobus ngon yahya, aneuek-aneuek nibak zebedeus, jijak ubak isa, "bapak guree," kheun awaknyan, "na saboh hai nyang kamoe meuharab bapak peubuet keu kamoe." "peue nyang gata lakee jeuet lon peuget keu gata?" geutanyong le isa. jijaweueb le awaknyan, "kamoe keuneuk duek blaih uneun ngon blaih wie bapak, meunyo bapak neudeuk meutakhta ngon mulia." "gata hana tateupeue peue nyang gata lakee," kheun isa ubak awaknyan, "peu kheueh sangboh gata jieb nibak piala peundeuritaan nyang teuma ulon jieb dan tatamong lam mideuen deurita nyang teuma ulon tamong?" "sanggob," jaweueb awaknyan. teuma isa geupeugah lom bak awaknyan, "beutoi gata teuma tajieb nibak piala deurita nyang teuma ulon jieb, dan tatamong lam mideuen deurita nyang teuma ulon tamong. teuma keuhai soe kheueh nyang duek blaih uneun ngon blaih wie lon, nyan kon ulon nyang hak peuteuntee. po teu allah nyang peuteuntee soe-soe nyang duek nibak tempat nyan." watee geudeungoe le ban siploh droe murit isa keuhai nyan, awaknyan laju beungeh ubak yakobus meunan cit bak yahya. teuma isa laju geuhoi awaknyan banmandum, laju geupeugah, "gata tateupeue bahwa peumimpén-peumimpén bansa nyang hana jituri allah jitindeeh rakyat jih keudroe. dan le ureueng-ureueng rayeuk jiteugon bansa jih nyan. teuma gata hana jeuet lageenyan! nyang sikeubiet jih, ureueng nyang keuneuk rayeuk lamkawan jih keudroe, ureueng nyan bah kheueh jeuet keupeulayan gata. dan ureueng-ureueng nyang keuneuk jeuet keu nyang lumboi sa lamkawan gata, ureueng nyan bah kheueh beujeuet keu namiet keu mandum ureueng. sabab, aneuek manusia pih hana teuka keuteulayani. gobnyan teuka keu geujak layani dan keugeujak jok nyawong gobnyan mangat teupeubeubaih dum ureueng rame." awaknyan laju trok u yerikho. dan watee isa ngon murit-murit gobnyan meunan cit ngon ureueng rame geutinggai banda nyan, na sidroe ureueng buta nyang teungoh jiduek bak bineh rot sira geumadee nan jih bartemeus. aneuek nibak timeus. watee ureueng nyan jiteupeu bahwa nyang teungoh jak nyan na kheueh isa ureueng nazaret, laju ureueng nyang jikuk, "isa, aneuek daud! neugaseh kheueh keu lon!" ureueng buta nyan laju jibeungeh le ureueng rame sira jiyue seungab. teuma ureueng buta

nyan leubeu teuga lom jikuk, "aneuek daud, neu-
gaseh kheueh keu lon!" teuma isa geupioh sira geu-
peugah, "hoi laju ureueng nyan." teuma awaknyan ji-
jak tawok ureueng buta nyan sira jikheun bak ure-
ueng nyan, "teunang kheueh! gata geutawok le isa,
beudoh laju!" ureueng buta nyan bagai that jibeu-
doh sira jirhom bajee jubah jih dan jikak laju ubak
isa. "peue nyang gata lakee jeuet lon peubuet ateueh
gata?" geutanyong le isa bak ureueng nyan. ureueng
buta nyan jijaweueb, "pak guree, ulon keuneuk keu-
malon." "jak kheueh," kheun isa, "sabab gata peucaya
keu ulon, gata puleh." bak wateuyan cit teuma ure-
ueng nyan hase jimeungieng, dan laju jiseutot isa
jak. watee karab to ngon yerasalem, awaknyan troh
laju bak banda betfage dan betania, bak gaki buket
zaiton. oh troh keunan le isa laju geu-utus dua droe
murit gobnyan. "jak kheueh laju u gampong nyang
na dikeue nyan," kheun isa ubak awaknyan. "meu-
nan gata troh u gampong nyan, gata teuma tangieng
na saboh aneuek keuleudee nyang teungoh teu ikat,
dan hantom na jigiduke le gob. gata peuleuh laju
keuleudee nyan dan gata ba keunoe. dan meunyo
na ureueng nyang tanyong bak gata peusabab gata
peuleuh keuleudee nyan, gata peugah laju, 'tuhan
nyang peureulee, dan ureueng nyan laju jikok pu-
lang.' "teuma geujak kheueh laju mandua droe murit
isa nyan, laju geungieng na saboh aneuek keuleudee
teungoh teu ikat bak pintoe rumoh bak bineh rot.
awaknyan laju geupeuleuh keuleudee nyan. ureueng
nyang dong disinan laju jityanyong ubak awaknyan,
"hei, peue gata peubuet nyan? keupeue gata peuleuh
aneuek keuleudee nyan?" awaknyan laju geujaweueb
lagee nyang ka geupeugah le isa ubak awaknyan.
ban jideungoe haba nyan, awaknyan pih jipeubiyeu
mantong keuleudee nyan jiba le murit-murit isa.
watee ka troh ubak isa, ateueh rhung keuleudee
nyan laju jilapek ngon bajee jubah awaknyan, dan
isa laju geu-ek ateueh keuleudee nyan. rame that
ureueng nyang jileueng bajee jubah jih ateueh rot
raya, na teuma nyang tabu ateueh rot nyan ranteng-
ranteng kayee nyang awaknyan cok bak lampoh.
ureueng-ureueng nyang jak dikeue dan ureueng-
ureueng nyang seutot gobnyan nibak likot, mandum
awaknyan jikuk-kuk, "pujoe kheueh allah! geubri
beureukat kheueh gobnyan nyang teuka ateueh nan
tuhan! udeb kheueh peumeurintah gobnyan nyang
teuma teuka – peumeurintah nabi daud indatu geu-
tanyoe! pujoe kheueh allah nyang mahamanyang!"
akhe jih isa troh u yerasalem, laju geutamong u baet
tuhan. disinan laju geungieng bansikeulileng. teuma
uroe karab seupot, geubeudoh sinan laju geujak u be-
tania meusajan-sajan ngon bandua blaih droe murit
gobnyan. oh singoh nyan, watee awaknyan teungoh
geujak geuteubiet nibak betania, isa ka teuras deuek.
nibak jioh leumah geukalon sibak bak ara nyang on
jih luhu lumpah na. laju geujak keunan sira geukalon
peu kheueh na boh kayee nyan. teuma watee gob-
nyan ka troh keunan hana geuteume sapeue, nyang
na cit on nyang luhu, sabab bak watee nyan gohlom
troh musem muboh boh ara. laju geupeugah le isa
keu bak ara nyan, "phon saat nyoe hana meusidroe
manusia nyang teuma jipajoh boh gata nyan, hei bak
ara!" murit-murit isa jideungoe peu nyang geupeu-

gah le gobnyan. oh lheureh nyan awaknyan laju troh
u yerasalem, dan isa geujak lom u baet tuhan. disi-
nan gobnyan laju geu-use banmandum ureueng bloe
peubloe nyang meukat disinan. bubena na meuja
teumpat ureueng tuka peng habeh geutunggeng te-
ungbayeueng, meunan cit deungon bangku-bangku
teumpat ureueng meukat cicem mirah pati. dan
hana meusidroe pih nyang geubri idhin ubak ure-
ueng nyang ba peue mantong rot leuen baet tuhan.
oh lheureh nyan isa laju geupurunoe ureueng-ureueng
nyang na disinan. gobnyan geupeugah lagee nyoe,
"lam alkitab na teutuleh lagee nyoe: feureuman al-
lah, 'baet ulon teuma teupeugah baet teumpat meu-
doa keu banmandum bansa.' teuma le gata tapeu-
jeuet keuteumpat eumpung seumamon!" peumimpen
imeum-imeum ngon guree-guree agama jideungoe
peu nyang geupeugah le isa nyan. teuma awaknyan
laju jimita jalan pakriban cara mangat jeuet isa teupoh
mate. awaknyan jitatok keu gobnyan, sabab ban-
mandum ureueng hireuen jideungoe peue nyang ge-
upeubeuet nyan. sampoe an rab malam, isa dan
murit-murit gobnyan laju geutinggai banda nyan. be-
ungoh that oh singoh nyan, watee awaknyan geu-
jak rot bak ara nyang ka geuseurapa le isa nyan,
deuh laju geukalon bak ara nyan ka mate troh bak
ukeue-ukeue jih. dan petrus laju teu ingat ubak peue
nyang teujadi barosa. teuma petrus jipeugah ubak
isa, "bapak guree, bapak ngieng kheueh nyan! bak
ara nyang bapak rapa nyan ka mate!" geujaweueb le
isa, "peucaya kheueh bak po teu allah. gata pih
jeuet gata peugah ubak gunung nyoe, 'beuteubeut
kheueh kah hei gunung dan beuteu pupo kheueh lam
laot raya!' hei nyan teuma teujadi keu gata; asai gata
hana ragu-ragu, dan gata peucaya bahwa nyang gata
peugah nyan beutoi-beutoi teujadi. sabab nyan in-
gat kheueh nyoe: meunyo gata meudoa dan gata la-
kee peue nyang keuneuk gata lakee, peucaya kheueh
bahwa allah ka geubri keu gata peue nyang gata la-
kee, teuma nyan gata tateurimong. dan meunyo gata
meudoa, teuma ate gata hana mangat ubak sidroe-
droe ureueng, gata peumaphon kheueh ureueng nyan
ilee, mangat bapak gata nyang na lam syeuruga ge-
upeu amphon mandum desya-desya gata. meunyo
gata hana tapeumaphon ureueng laen, bapak gata
nyang na lam syeuruga pih hana geupeu amphon
bubena desya-desya gata." awaknyan geugisa lom u
yerusalem. dan watee isa geujak geukeulileng lam
baet tuhan, peumimpen imeum-imeum, guree-guree
agama, dan mandum peumimpen yahudi nyang laen
laju jikak ubak gobnyan. awaknyan jityanyong, "peue
dasai jih droeneueh peubuet banmandum nyoe? soe
nyang bri hak nyan keu droeneueh?" geujaweueb le
isa, "ulon keuneuk teumanyong ubak gata. jaweueb
kheueh dan ulon teuma lom peugah ubak gata de-
ungon haksoe ulon peubuet hainyoe. nabi yahya
pumanon ngon hak soe, ngon hak po teu allah, atawa
manusia?" dan di peumimpen imeum-imeum me-
unan cit deungon banmandum peumimpen yahudi
jimupakat sabe keudroe-droe. laju awaknyan peu-
gah, "meunyo tanyoe peugah, 'deungon hak po teu
allah,' gobnyan teuma geupeugah, 'pakon hana gata
peucaya ubak nabi yahya?' teuma payah cit me-
unyo tapeugah, 'deungon hak manusia.' " sabab

awaknyan teumakot keu ureueng rame, sabab banmandum ureueng ka jianggab nabi yahya nyan sidroe nabi. laju jijaweueb le awaknyan, "hana kamoe teupeu." dan isa laju geupeugah ubak awaknyan, "meun-yoe meunan, ulon pih hana lon peugah ubak gata deungon hak soe banmandum nyoe ulon peubuet." oh ltheueh nyan isa laju geupeu phon peugah haba ngon peumimpén imeum-imeum, guree-guree agama dan peumimpén-peumimpén yahudi nyan. geupeugah le gobnyan, "na sidroe ureueng nyang jipula bak anggo lam lampoh jih, lampoh nyan jipageue ban-sikeulileng. oh ltheueh nyan laju jikueh uruek keuteumpat jiprah ie anggo, jipeudong teuma saboh meunara keuteumpat ureueng keumiet lampoh nyan. oh ltheueh nyan lampoh anggo jihnyan jipeusiwa ubak na padub droe ureueng nyang buet jih jisiwa lampoh anggo oh ltheueh nyan laju geujak u nanggroe laen. oh trok bak watee musem teupot boh anggo, ureueng nyan laju geukirem sidroe peulayan gobnyan ubak ureueng-ureueng nyang siwa lampoh gobnyan, guna jih keu jiteurimong wase gobnyan. teuma le ureueng-ureueng nyang siwa lampoh nyan laju jidrob peulayan nyan. oh ltheueh nyan laju jipoh dan baro ktheueh jiyue woe ngon jaroe soh. dan ureueng po lampoh nyan geukirem lom peulayan gobnyan nyang laen. le ureueng-ureueng nyang siwa nyan laju jipoh bak ulee peulayan nyan, oh ltheueh nyan laju jipse sira jiteunak ngon jiseurapa. ureueng po lampoh nyang jikirem lom peulayan gobnyan nyang laen. peulayan nyan laju jipoh mate le awaknyan. dan meunan ktheueh sabe bubena peulayan nyang geukirem le ureueng po lampoh nyan jipoh le ureueng nyang siwa lampoh, na nyang jipoh mantong, na nyang jipoh mate. soe ktheueh nyang jeuet jikirem lom le ureueng po lampoh nyan? nyang na tinggai sidroe teuk, na ktheueh aneuek gobnyan keudroe nyang paleng geugaseh. dan akhe jih aneuek geuh nyan laju geukirem ubak ureueng-ureueng nyang siwa tanoh nyan. 'pasti aneuek ulon nyoe jihoreumat,' geupike le ureueng po lampoh nyan. teuma le ureueng-ureueng nyang siwa lampoh nyan laju jimarit sabe keudroe-droe, 'nyoe pat ahli wareh jih. jak tapoh mate jihnyan, mangat tanyoe meuteume tacok hareuta waresan nyoe!' laju jidrob aneuek ureueng po lampoh nyan, dan jipoh sampoe mate. manyet aneuek nyan laju jittiek uluwa lampoh." laju geutanyong le isa, "peu ktheueh nyang haroh geupeubuet le ureueng po lampoh nyan? pasti gobnyan teuka dan geupoh mate bubena ureueng nyang siwa lampoh geuh nyan, dan oh ltheueh nyan laju geuseurah lampoh nyan ubak ureueng siwa nyang laen. gata teuntée ka ltheueh gata beuet ayat alkitab nyang teutuleh lagee nyoe, 'batee nyang hana jipeuguna le utoh-utoh rumoh ka jeuet keu batee nyang keuphon. nyoe ktheueh buet tuhan; nyang paleng gagah!' " teuma tukoh-tukoh bansa yahudi nyang deungoe miseue, jipseuha jidrob isa, sabab awaknyan jiteupeu miseue nyan na ktheueh rhot jih keu awaknyan. teuma awaknyan teumakot keu ureueng rame. dan awaknyan laju jijak jitinggai isa disinan. na padub droe ureueng farisi dan na padub droe anggota golongan herodes jiyue jak jeubak isa deungon cara jiteumanyong. awaknyan jijak laju ubak isa sira jipeugah lagee nyoe, "bapak

guree, kamoe meuteupeue bahwa bapak na ktheueh ureueng jujeon dan hana neupakoe peundapat soe mantong. bapak purunoe troh trang keuhai ktheue-undak allah ubak manusia, sabab bapak hana neungiang soe ureueng nyan. jinoe, ci ktheueh bapak peugah ubak kamoe, 'meunurot peuranton agama geutanyoe, peu ktheueh jeuet tabayee cukee ubak kaisar atawa hana? peu ktheueh haroh tabayee cukee nyan atawa bek?' " isa geuteupeue bahwa awaknyan munafek. laju geujaweueb, "peue sabab jih gata keuneuk jeubak ulon? cipeuleumah ubak ulon saboh keupeng peng pirak." teuma awaknyan laju jibri ubak isa saboh keupeng peng pirak. laju geutanyong le isa, "gamba dan nan soe ktheueh nyang na lam peng nyoe?" "gamba dan nan kaisar," jaweub awaknyan. "meun-yoe meunan," ktheun isa, "jok ktheueh ubak kaisar peue nyang atra kaisar, dan ubak allah peue nyang atra allah." awaknyan hireuen jideungoe gobnyan peugah lagee nyan. na padub droe golongan saduki ji ubak isa (awaknyan na ktheueh golongan nyang jianut peundapat bahwa ureueng mate hana udeb le.) "bapak guree," ktheun awaknyan ubak isa, "nabi musa geutuleh hukum nyang lagee nyoe keu geutanyoe: 'meun-yoe sidroe ureueng agam mate dan hana meu aneuek, syedara ureueng agam nyang mate nyan bah geumeukawen ngon inong balee nyan sibagoe gantoe tika mangat na keuturonan keu ureueng nyang ka mate nyan.' ka ltheueh na tujoh droe meusyedara, nyang tuha meukawen laju mate hana meu aneuek. oh ltheueh nyan nyang lomboi dua meukawen teuma ngon inong balee adue jih nyan, ureueng nyan pih mate hana meu aneuek. hai nyang lagee nyan keunong teuma ubak syedara gobnyan nyang keu lhee, dan seulanjut jih sampoe ubak nyang keutujoh. akhe jih inong nyan keudroe nyang meuninggai donya. oh uroe dudoe, watee ureueng mate geupeubeudoh lom teuma, peurumoh soe ktheueh ureueng inong nyan? sabab bantujoh droe adoe aduen nyan ka jimeukawen ngon inong nyan!" geujaweueb le isa, "bangai that gata nyoe. sabab gata hana muphom peue nyang teutuleh lam alkitab meunan cit kuasa po teu allah. sabab meun-yoe ureueng-ureueng nyang ka mate teupeubeudoh lom, awaknyan hana meukawen le, awaknyan udeb lagee malaikat nyang na lam syeuruga. dan keuhai ureueng mate teupeubeudoh lom, peu ktheueh gohlom na gata beuet lam kitab nabi musa keuhai tamah beulukar nyang hu jiteubiet apui nyan? lam ayat-ayat nyan na teutuleh bahwa po teu allah geupeugah ubak nabi musa, 'ulon ktheueh allah nabi ibrahim, allah nabi ishaq dan allah nabi yakub.' alah nyan bukon allah ureueng mate. gobnyan alah ureueng udeb. gata nyoe beutoi-beutoi ka sisat!" teuka ktheueh laju sidroe guree agama jijak deungoe isa peugah haba ngon ureueng-ureueng saduki nyan. guree agama nyang ahli kitab taurat nyan jikalon isa ka geujaweueb peue-peue nyang jitanyong le ureueng-ureueng saduki nyan deungon jroh dan beuna. teuma guree agama nyan jitanyong ubak isa, 'peurintah nyang toh ktheueh nyang paleng peunteng nibak banmandum peurintah nyang na?' geujaweueb le isa, 'peurintah nyang phon, na ktheueh: 'deungoe ktheueh, hei bansa israel! tuhan po teu allah geutanyoe, tuhan nyan esa. cinta ktheueh ubak tuhan

allah gata deungon sipeunoh ate, deungon sigeunab jiwa gata, deungon banmandum akai gata dan deungon banmandum teunaga gata." peurintah nyang keudua: 'cinta kheueh seusamoe gata manusia, lagee gata cinta ubak droe gata keudroe.' hana le peurintah nyang laen nyang leubeh peunteng nibak ban dua peurintah nyan." dan guree agama nyan laju jipeugah ubak isa, "paih that lagee neupeugah nyan bapak guree! keubiet beutoi peu nyang bapak peugah nyan: tuhan allah nyan esa, dan hana le alah nyang laen seulaen allah nyang esa nyan. dan manusia haroh jicinta allah deungon sipeunoh ate, dan deungon banmandum akai dan deungon banmandum teunaga nyang na bak ureueng nyan. dan ureueng nyan pih haroh jicinta seusamoe jih manusia lagee jicinta droe jih keudroe. nyan leubeh get nibak jipeuseumah keureubeuen nyang teutot dan keureubeuen-keureubeuen nyang laen ubak po teu allah." isa geukalon bahwa guree agamanya ka geujawueb deungon jroh that. dan isa geupeugah ubak awaknyan, "gata karab jeuet keu anggota umat po teu allah." oh lheurehnyan hana meusidroe pih nyang jijeuet teumanyong ubak isa. watee teuhong geuseumeubeuet lam baet allah, isa geutanyong lagee nyoe, "pakriban cara jih jipeugah le guree-guree agama nyan bahwa raja nyang ba seulammat nyan keuturonan nabi daud? padahai nabi daud keudroe – sabab geuilham le roh allah – geupeugah lagee nyoe, 'tuhan meufureuman ubak tuhan lon: duek kheueh blaih uneuon lon sampoe ulon peujeuet banmandum musoh-musoh droeneueh jitaklok ubak droeneueh.' jadi, meunyo nabi daud geupeugah raja nyang ba seulammat nyan 'tuhan' pakriban mungen gobnyan keuturonan nabi daud?" ureueng rame nyang na lam baet allah nyan galak that jideungoe isa seumeubeuet. gobnyan laju geupeugah ubak awaknyan, "ate-ate kheueh teuhadab guree-guree agama. awaknyan galak jijak-jak ngon baje jubah nyang panyang dan galak that jihoreumat le gob di dalam pasai-pasai dipat nyang na ureueng rame. awaknyan galak that bak teupat-teupat nyang teuhoreumat watee jitamong lam rumah ibadah meunan cit meunyo bak teupat-teupat khanuri. buet awaknyan jipeunget inong-inong balee dan meunan cit rumah-rumah inong balee nyan jicok keujih. dan keu jitolob buet jih nyang jeuhet nyan, watee jimeudoa panyang-panyang. hukoman keu awaknyan oh uroe dudoe brat lumpah na!" watee geuduek meuhadab keue ngon tong teupat peuseumahan lam baet allah, isa geupeurati ureueng-ureueng nyang peuseumah peng sibagoe peuseumahan jih lam tong dikeue gobnyan nyan. jai that ureueng kaya jipeutamong peng nyang jai lam tong nyan; oh lheureh nyan na teuma sidroe inong balee nyang gasien geujak cit keunan. laju geupeutamong dua neuk peng teumaga, na kheueh peng glik nyang paleng ubit yuem jih. teuma isa laju geuhoi mandum murit-murit gobnyan sira geupeugah ubak awaknyan, "ngieng kheueh ubak inong balee nyang gasien nyan: leubeh jai inong balee nyang gasien nyan peutamong lam tong peuseumahan nyan nibak nyang jipeutamong le ureueng-ureueng laen. sabab awaknyan nyang jibri nyan leubeh nibak hareuta jih. teuma inong balee nyan

bah kheueh jih nyan ureueng paleng gasien jibri banmandum nyang na bak jihnyan – na kheueh nyang paleng jipeureulee keu udeb jih." watee isa geutinggai baet allah, sidroe lamkawan murit geuh nyan jipeugah ubak isa, "bapak guree, ci neungieng mandum bangunan-bangunan nyan, neukalon kheueh batee-batee jih. hana wayang gagah jih!" geujawueb le isa, "gata takalon bangunan-bangunan nyang rayeuk nyan, bukan? hana meusineuk pih batee-batee nyan nyang na tinggai teusison nibak bangunan-bangunan nyan lagee sot nibak teupat jih. banmandum nyan teuma teureuloh sampoe an hanco." oh lheureh nyan isa laju geujak u buket zaiton, dan duek bak teupat nyang meuhadab keue ngon baet allah. teuka laju petrus, yakobus, yahya dan andreas jijak ubak gobnyan keu jikeuneuk marit ngon gobnyan seucara pribadi. "ci bapak peugah ubak kamoe," kheun awaknyan ubak isa, "pajan bandum nyan teuma teujadi? dan peu kheueh tanda-tanda jih nyang teutunyok ubak nyan bahwa katroh watee jih?" "waspada kheueh," jawueb isa, "bek sampoe gata keunong peunget. rame that nyang teuka jiba-ba naun ulon deungon jipeugah lagee nyoe, 'ulon kheueh jihnyan!' oh lheureh nyan jijak tipee ureueng rame. meunyo na gata deungoe su gram gruem dimideuen prang dan haba-haba keuhai muprang, bek teumakot. hai-hai nyang lagee nyan keubiet teujadi, teuma hainyan bukan sibagoe tanda bahwa ka watee jih donya nyoe ka kiamat. bansa nyang saboh teuma jimumprang jilawan bansa nyang laen. nanggroe nyang saboh teuma jimumprang ngon nanggroe nyang laen. dipat mantong teuma na geumpa bumoe dan bala duek luwa biasa. banmandum nyan na kheueh awai nibak nyang teuma teujadi, saban lagee saket nyang jirasa le ureueng inong nyang keuneuk peulahe aneuek. gata haroh beu ate-ate, sabab gata jidrob dan jibahue ubak kanto-kanto mahkamah agama. gata jipoh lam rumah-rumah ibadah. gata teuma jiba jak meuhadab ubak peunguasa-peunguasa dan raja-raja sabab gata murit ulon. dan watee nyan kheueh watee jih nibak gata keu gata meusaksi keuhai ulon keu awaknyan. haba get nyang teuka nibak po teu allah nyan bah teutabu leubeh dilee ubak banmandum bansa. dan meunyo gata jidrob dan jiba ubak kanto mahkamah agama, bek gundah keuhai peue nyang teuma gata peugah. meunyo ka troh watee jih keu gata peugah haba, peugah laju peue nyang teupeugah ubak gata oh troh bak watee jih. sabab tutoe haba nyang gata peugah nyan bukan haba gata keudroe, teuma atra nyan teuka nibak roh allah. ureueng teuma jikhianat syedara jih keudroe keu jipoh mate. nyan pih teuma teujadi lamkawan ayah ngon aneuek. aneuek miet teuma jilawan mak ngon yah jih, dan jiseurah awaknyan keu jipoh mate. gata teuma jibanci le mandum ureueng sabab gata murit ulon. teuma ureueng nyang meuteun sampoe an akhe, ureueng nyan teuma teupeuseulammat." "gata takalon 'keujeuhetan nyang jipeuhanco' jidong bak teupat nyang han jeuet jidong le jih nyan. (catetan keu peumbaca: peurati kheueh peue makna jih!) bak masanyan ureueng nyang na di yudea bah jiplueng u gunong-gunong. ureueng nyang na atehub bubong rumah bek jitron dan jitamong lam rumah jih keu

jijakkok sapeue-sapeue. ureueng nyang mantong na di lampoh bek jiwoe keu jijakkok bajee jubah jih. lumpah yo ngon teumakot luwabiasa bak ureueng inong nyang teungoh mume dan mak-mak nyang mantong geupeumom aneuek banyak! meudoa kheueh mangat hai-hai nyang lagee nyan bek sampoe teu-jadi watee musem ujeuen. bak uroe-uroe nyang lumpah teumakot ngon yo nyan teuma keusosahan nyang gohlom na teujadi, yoh phon po teu allah geupeujeuet donya nyoe sampoe bak uroe, dan hana teuma teujadi le nyang lagee nyan bagoe. meunyo po teu allah hana geupeupaneuk masa nyang lagee nyan, teuma hana meusidroe pih nyang na seulam. le sabab umat gobnyan, allah geupeupaneuk masa nyang lagee nyan. bak watee nyan meunyo sidroe ureueng jipeugah ubak gata, 'ngieng kheueh, raja peuseulamat nyan na disinoe!' atawa, 'ngieng, gobnyan na disinan!' – bek kheueh gata patch ubak ureueng nyan. sabab ureueng-ureueng peuseulamat peuleusu dan nabi-nabi peuleusu teuma teuka. awaknyan jipeubuet buet-buet nyang luwa biasa dan buet-buet nyang ajaeb keu jipeunget gob meunyo na mungken, umat po teu allah cit teuma. jadi, waspada kheueh! banmandum nyan ka ulon peugah ubak gata sigohlom hainyan teujadi." oh ka ltheueh leuseuseo masa nyang sosah nyan, mata uroe teuma jeuet keuseupot, dan buleuen hana le meucahya. bintang-bintang di langet teuma rhot u bumoe, dan bubena nyang mat kuasa di angkasa raya teuma ka-ak kakok hana meuteuntee. bak masa nyan aneuek manusia teuma deuh teukalon teuka rot lam awan deungon kuasa raya dan keuagongan gobnyan. gobnyan teuma geukirem malaikat-malaikat keu geupeusapat umat nyang geupileh nibak ban peuet boh sago e ujong bumoe, nibak ujong-ujong bumoe sampoe troh ubak ujong-ujong langet." "cok kheueh peulajaran nibak bak ara. meunyo ranteng-ranteng jih ijo dan leumiek, dan ka jipeuphon meutarok, gata tateupeue bahwa musem khueng ka rab teuka. meunan cit meunyo gata ngieng hai-hai nyan teujadi, gata tateupeue bahwa watee jih ka rab that. beutateupeue kheueh! banmandum peuristiwa nyoe teuma teujadi sigohlom ureueng-ureueng nyang udeb bak saat nyoe mate banmandum. langet ngon bumoe hanco, teuma haba ulon teutab na siumu masa." "bah pih meunan, hana meusidroe pih jiteupeu pajan uroe jih dan pajan teuma jeuem jih. malaikat-malaikat nyang na lam syeuruga hana, dan aneuek pih hana, teuma bakah mantong nyang teupeue. ngon sabab nyan, gata haroh meujaga-jaga dan waspada, sabab gata hana tateupeue pajan watee jih. keuadaan jih na kheueh lagee sidroe ureueng nyang tinggai rumoh jih dan jijak laju u teupat nyang jioh. rumoh jih nyang jitinggai jiyue bak namiet-namiet jih mangat ji uroh dan jijaga, dan geubri tugaih ubak awaknyan maseng-maseng. ubak ureueng nyang jaga babah pintoe, jipeu ingat mangat jijaga beugetget. sabab nyan, gata haroh meujaga-jaga, sabab gata hana tateupeue pajan ureueng po rumoh nyan jiwoe – mungken watee uroe seupot, mungken watee teungoh malam, mungken bak watee suboh, atawa mungken bak watee mata uroe teubiet. meunyo jihnyan teuka hana teusangka-sangka, bek kheueh

sampoe jikalon gata teungoh teu eh dan teunget. peue nyang ulon peugah nyoe ubak gata, ulon peugah cit ubak mandum ureueng laen: meujaga-jaga kheueh!" dua uroe treuk uroe raya paskah dan peurayaan ruti hana meuragoe. peumimpin imeumimeum dan guree-guree agama teungoh jimita jalan pakriban cara isa nyan beuteudrob deungon cara seungab-seungab, dan keu jikeuneuk poh mate gobnyan. "teuma bek tapeubuet nyan watee peurayaan," kheun awaknyan, "sabab teuka karu nyang luwa bisa." bak watee isa kana di betania, bak rumoh simon nyang yoh masa ilee ka keunong peunyaket kulet nyang paleng parah, na sidroe ureueng inong jijak ubak gobnyan. ureueng inong nyan na jiba saboh kaca minyeuk mangat bee nyang jipasoe lam kaca pualam nyang paleng meuhai yuem jih. watee isa teungoh geudeuk sira geumakheun, ureueng inong nyan laju jipeubeukah kaca nyan oh ltheueh nyan jicok minyeuk nyan laju jiro ateuh ulee isa. na padub droe ureueng nyang na bak teupat nyan jiteuka beungeh jih laju jimarit sabe keudroe-droe, "hana manfaat minyeuk mangat bee nyan jiboih-boih sia-sia?" minyeuk nyan jeuet jipeubloe ngon yuem leubeh nibak lhee reutoh peng pirak, dan peng jih jeuet jibri keu ureueng gasien!" ngon sabab nyan awaknyan beungeh keu ureueng inong nyan. teuma geupeugah le isa, "peubiyeu mantong! keupeue gatanoye tapeusosah jihnyan? inong nyan ka jipeubuet buet nyang jroh lom teupujoe keu ulon. ureueng gasien sabe na di teungoh-teungoh gata, tieb-tieb watee meunyo gata tem jeuet gata tulung awaknyan. teuma ulon hana siumu masa na meusajan ngon gata. ureueng inong nyoe ka jipeubuet peue nyang jeuet jipeubuet. jihnyoe ka jipeusiab keu ulon ngon minyeuk mangat bee sibagoe jipeutamong ulon lam jrat sigohlom troh bak watee. peucaya kheueh! ban sigom donya, dipat mantong haba get nibak allah jipeusampoe, peue nyang jipeubuet le ureueng inong nyoe teuma jipeugah sibagoe keunangan keu inong nyoe." dan yudas iskariot, sidroe lamkawan dua blaih droe murit isa, jijak ubak peumimpin imeumimeum ngon tujuan keu jikhianat isa. awaknyan galak that-that watee jideungoe haba nyan, dan awaknyan jimeujanji teuma jibri peng ubak yudas. phon watee nyan yudas laju jimita keuseumpatan keu jikhianat isa. bak uroe keuphon watee peurayaan ruti hana meuragoe – bak watee ureueng teungoh jisie bubiri paskah – murit-murit isa jitanyong ubak gobnyan, "dipat nyang bapak galak mangat kamoe peuhidang peunajoh paskah keu bapak?" isa laju geuyue dua droe ureueng nibak awaknyan, "jak kheueh laju u banda, disinan na sidroe ureueng agam nyang teungoh jiba saboh tima meuasoe ie, ureueng nyan teuma meurumpok ngon gata. seutot kheueh ureueng nyan u rumoh nyang jitamong dan peugah kheueh ubak ureueng po rumoh nyan, 'bapak guree geutanyong, dipat teupat gobnyan dan murit-murit geuh keu teupat geupajoh peunajoh paskah.' ureueng nyan teuma jitanyok ubak gata saboh kama nyang paleng luwah dibagian ateuh. kama nyan ka teuatoe, leungkab ngon mandum peurabot. peusiab kheueh mandum bak teupat nyan keu geutanyoe." dan bandua droe murit isa nyan pih laju jijak u banda. oh troh keunan laju meurumpok banmandum paih

that lagee nyang ka geupeugah le isa. dan awaknyan pih laju geupeu siab peunajoh paskah. watee ka malam, isa teuka laju keunan ngon bandua blaih droe murit geuh. teungoh awaknyan geuduek sira geumakheun, geupeugah le isa, "deungoe ulon peugah: sidroe ureueng lamkawan gata nyoe, nyang bak saat nyoe na jimakheun meusajan ngon ulon jikhianat ulon." ban jideungoe nyan, mandum murit-murit isa seudeh lumpah na. dan le murit-murit isa nyan laju jitanyong sidroe-droe ubak gobnyan, "teuntée bukon ulon nyang bapak peugah nyan?" geujaweeb le isa, "jihnyan na sinoe lamkawan gata nyang dua blaih droe nyoe, nyang pajoh bu saboh pingan ngon ulon. beutoi aneuk manusia teuma mate lagee nyang na teutuleh lam alkitab. teuma lumpah that cilaka ureueng nyang khianat aneuk manusia nyan! leubeh get keu ureueng nyan meunyoé jih hana lahe lam donya nyoe!" watee awaknyan teungoh geumakheun, isa laju geucok ruti dan peugah doa syukoe ubak po teu allah. oh lheureh nyan laju geupriek-priek rutinyan ngon jaroe gobnyan, dan laju geubri ubak mandum murit-murit gobnyan sira geupeugah, "cok dan pajoh kheureh, nyoe kheureh tuboh ulon." oh lheureh nyan laju geucok saboh ciriek nyang meuasoe ie anggo. laju geumeudoa syukoe ubak po teu allah, dan ciriek nyang meuasoe ie anggo nyan laju geujok ubak murit-murit geuh. oh lheureh nyan awaknyan mandum jijieb ie anggo nyan. oh lheureh nyan isa geupeugah ubak awaknyan, "nyoe kheureh darah ulon nyang teupeusah janji po teu allah, darah nyang teuro keu ureueng rame. peucaya kheureh: ulon hana lon jieb le ie anggo nyoe, sampoe bak watee jih ulon jieb le anggo nyang baro meusajan ngon gata lam donya baro bapak ulon." oh lheureh nyan awaknyan laju meunyanoyoe saboh ca-e puja nyan pujoe. dan oh lheureh nyan awaknyan laju geujak u buket zaiton. oh lheureh nyan isa geupeugah ubak awaknyan, "gata banmandum teuma gata pluang gata tinggai ulon. sabab lam alkitab na teutuleh lagee nyoe, 'po teu allah teuma geupoh mate tukang meurabe gobnyan, dan kawan bubiri gobnyan teuma meurebre saboh sahoe.' teuma oh ka lheureh ulon geupeubudoh lom, teuma lon jak leubeh awai nibak gata u galilea." "han jeuet," jaweeb petrus, "bah kheureh awaknyan banmandum jitinggai bapak, ulon hana sagai-sagai lon tinggai bapak." "ingat," geupeugah le isa, "bak malam nyoe cit teuma, sigohlom manok jiku-uek dua goe, gata ka lhee goe gata iengkeue keu ulon." geujaweeb le petrus ngon su nyang pasti, "bah kheureh ulon mate meusajan-sajan ngon bapak, sagai-sagai hana lon peugah bahwa ulon hana lon turi bapak!" meunan cit ngon murit-murit nyang laen lagee nyan cit jipeugah. laju awaknyan troh bak saboh tempat nyang nan jih taman getsemani, dan isa laju geupeugah ubak murit-murit gobnyan, "gata duek kheureh disinoe ulon keuneuk jak meudoa siat." dan isa laju geupakat petrus, yakobus, dan yahya jak meusajan ngon gobnyan. gobnyan ka jipeuphon teuka seudeh apoh apah. "ate ulon seudeh lumpah na," kheun isa ubak awaknyan, "rasa jih lagee keuneuk mate ulon nyoe. tinggai kheureh disinoe dan meujaga-jaga kheureh!" isa geujak leubeh jioh lom laju geudugom bak tanoah sira geumeu doa. lam doa gobnyan geulakee meunyoé

jeuet bek geurasaa saat deurita nyan. "bapak, oh bapak," kheun gobnyan, "hana sapeuepih nyang mustahe nibak droeneuh bapak. neubot kheureh deurita nyoe nibak ulon. teuma bek kheureh neuseutot keuheundak ulon seulaen keuheundak droeneuh oh bapak." oh ka lheureh nyan isa geugisa dan geungiang murit-murit gobnyan ka habeh teueh-eh dan teunget banmandum. laju geupeugah ubak petrus, "simon, peu kheureh gata teunget? ban sijeuem, gata hana hase meujaga-jaga?" dan isa laju geupeugah ubak awaknyan, "meujaga-jaga kheureh, dan meudoa kheureh mangat gata hana gata rasa cubaan nyan. keubiet beutoi roh gata jipeubuet buet nyang beuna, teuma gata hana hase sabab tabiat manusia nyan leumoh." sigoe teuk isa geujak meudoa ngon tutoe haba doa geuh nyan saban lagee nyang ka lheureh bunoe. oh lheureh nyan laju geugisa ubak murit-murit geuh dan geukalon awaknyan mantong teueh ngon teunget, sabab mata awaknyan teunget that that. teuma awaknyan hana jiteupeu peue nyang haroh jipeugah ubak isa. watee isa geuriwang ubak awaknyan nyang keu lhee goe jih, laju geupeugah, "peu kheureh mantong gata eh dan meureuhah? kaseb nyan! watee jih ka troh aneuk manusia jiseurah lam jaroe ureueng-ureueng meudesya. beudoh kheureh, jak geutanyoe tajak. ngiang! ureueng nyang khianat ulon ka troh jiteuka!" teungoh isa mantong geupeugah haba, teuka kheureh yudas, sidroe lamkawan dua blaih droe murit geuh nyan. meusajan-sajan ngon jihnyan teuka cit teuma ureueng rame nyang laen sira jiba peudeueng dan banie kayee. awaknyan jikirem le peumimpin imeum-imeum, guree-guree agama dan peumimpin-peumimpin yahudi. yudas nyang khi-anat nyan ka jibri tanda ubak ureueng nyang keuneuk drob gobnyan. "ureueng nyang ulon comenteuk," nyan kheureh ureueng jih, "drob jihnyan dan ba laju jihnyan deungon teukawai nyang leubeh rapat." watee yudas ka troh keunan, jihnyan laju jijak ubak isa sira jipeugah, "bapak guree!" oh jikheun meunan laju jicom isa. dan di ureueng-ureueng nyang jak meusajan ngon yudas nyan laju jidrob isa sira jirante jaroe gobnyan. teuma sidroe ureueng nyang na lamkawan nyan laju jisut peudeueng jih dan ngon peudeueng nyan laju jihayon ateueh namiet imeum agong sampoe on punyueng ureueng nyan putoh. dan isa laju geupeugah ubak awaknyan, "peu kheureh ulon nyoe ureueng jeuhet, sampoe gata jak keunoe sira gata ba peudeueng ngon banie kayee keu gata drob ulon? tieb-tieb uroe ulon na lon seumeubeuet lam baet allah dikeue gata keudroe, dan gata hana tadrob ulon. teuma beutoi ka seuharoh jih lagee nyan, mangat teujadi peue nyang ka teutuleh lam alkitab." banmandum murit isa jipluang jitinggai gobnyan keudroe disinan. na sidroe ureueng muda, nyang jin-gui sion ija keungon tob tuboh jih, jiseutot isa nibak likot. ureueng rame keuneuk jidrob ureueng nyan, teuma di ureueng nyan laju jisuet ija nyang na bak tuboh nyan, dan jipluang laju ngon badan teulon. isa laju jiba u rumoh imeum agong. disinan banmandum peumimpin imeum, peumimpin yahudi dan guree-guree agama ka meusapat. petrus jiseutot isa rot jioh sampoe jitamong ubak leuen rumoh imeum agong. nibak tempat nyan laju jiduke jimeu adeueng

bak bineh apui meusajan-sajan ngon sidadu-sidadu peungawai. peumimpen imeum-imeum dan banmandum mahkamah agama jiseuha jimita bukeuti-bukeuti keuhai buet nyang salah nyang ka geupeubuet le isa mangat jeuet jipeu rhot hukuman mate atueh gobnyan. teuma nyang jimita le awaknyan hana jiteuma meusaboh bukeuti pih. jai that-that saksi nyang jitawok mangat jeuet jibri keuteurangan peuleusu keuhai isa, teuma banmandum keusaksian awaknyan meubeda sidroe ngon nyang laen. dan na padub droe saksi laju jidong dan jipeugah keusaksian peuleusu keuhai isa, "na kamoe deungoe jipeugah le ureueng nyoe lagee nyoe, 'ulon teuma lon reuloh baet allah nyang jipeuget le manusia nyoe, dan lhee uroh oh lheueh nyan, teuma lon peudong nyang laen nyang bukon jipeuget le manusia.'" teuma peue-peue nyang jisaksi le ureueng nyan hana saban keusaksian nyang sidroe ngon nyang laen. teuma imeum agong laju jidong dikeue awaknyan dan laju jitanyong ubak isa, "pakon hana gata jaweueb peue-peue nyang jitudoh nyan keu gata?" isa seungah mantong, hana geuseuot sapeue. dan imeum agong nyan laju jitanyong sigoe teuk ubak gobnyan, "peu kheueh gata raja nyang ba seulam, aneuek po teu allah nyang mahasuci?" "ulon kheueh nyan," jaweueb isa, "dan gata banmandum teuma gata ngieng aneuek manusia geuduek blaih nueuen allah nyang mahakusa dan geuteuka lam awan nibak langet!" ban jideungoe lagee nyan imeum agong laju jipriek-priek peukayan gobnyan sira jipeugah, "hana peureulee le saksi! gata banmandum ka gata deungoe tutoe haba jih nyang jihujat po teu allah. jinoenyoe peue keuputosan droeneuh?" awaknyan banmandum jicok keuputosan bahwa isa nyan salah, dan patot teuhukom mate. dan laju le na padub droe ureueng jiludah isa, dan awaknyan laju jitob mata gobnyan sira jipoh gobnyan, oh lheueh nyan laju jipeugah, "ci peugah, soe nyang poh gata?" dan ureueng-ureueng peungawai nyan pih sajan cit jipoh isa. petrus mantong na dileuen rumah imeum agong nyan, na sidroe inong deundayang imeum agong nyan jijak keunan. watee jingiang petrus teungoh meu adeueng bak bineh apui, laju jikalon getget bak muka petrus dan laju jipeugah, "gata nyoe kon meusajan ngon isa ureueng nazaret nyan?" petrus ji-iengkeue ngon jisanggang. "ulon hana lon teupeu dan hana muphom peue nyang gata peugah nyan," kheun petrus ubak dendayang nyan. jibeudoh sinan petrus jijak laju ubak babah pintoe geureubang rumoh imeum agong nyan. bak watee nyan, manok pih jiku-uek. deundayang inong nyan jingiang lom ubak petrus, dan jipeugah teuma ubak ureueng-ureueng nyang na disinan, "ka beutoi dan hana salah le, jih-nyoe na kheueh ureueng awaknyan!" petrus teutab ji-iengkeue dan jisanggang lom. hana treb teuma oh lheueh nyan, ureueng-ureueng nyang na disinan jipeugah lom ubak petrus, "hana jeuet gata iengkeue le ka beutoi gata na kheueh ureueng awaknyan, sabab gata nibak galilea!" laju petrus jimeusumpah-sumpah sira jipeugah, "ulon hana lon turi ureueng nyang gata peugah nyan!" bak watee nyan manok pih jiku-uek nyang keu dua goe. dan petrus teutingat isa ka lheueh geupeugah ubak gobnyan, "sigohlom manok jiku-uek nyang keu dua goe, gata ka lhee goe gata iengkeue

keu ulon." teuma petrus pih laju geumo musok-musok. ban beungoh that, banmandum mahkamah agama, meunan cit imeum-imeum ulee, peumimpen-peumimpen yahudi dan guree-guree agama bagaih that jimeurok pakat. awaknyan laju jibeuleunggu isa almaseh, dan jiba laju ubak pilatus. pilatus laju jitanyong ubak isa, "peu kheueh beutoi gata raja ureueng yahudi?" "meunan kheueh kheun gata," jaweueb isa. imeum-imeum ulee laju jipeugah ubak pilatus keuhai buet-buet nyang salah nyang ka geupeubuet le isa. laju jitanyong lom le pilatus ubak isa, "peu kheueh hana cit gata jaweueb, ci gata peugah? kalon kheueh, padub na jai jih tudohan nyang awaknyan tudoh atueh gata!" teuma isa sagai-sagai hana geutem jaweueb le sampoe pilatus hireuen lumpah na. tieb-tieb na peurayaan paskah, lazem jih pilatus jipeuleueh sidroe ureueng hukuman meunurot nyang jipileh le rakyat. lam peunjara, lamkawan ureueng-ureueng beurontak nyang jipoh mate ureueng bak watee na karu ka-ak ka-ok, na sidroe ureueng nyang nan jih barabas. ureueng rame ka meusapat nibak tempat nyan dan jilakee laju ubak pilatus mangat jipeuleueh sidroe ureueng hukuman lagee nyang ka-ka. laju jitanyong le pilatus ubak awaknyan, "peu kheueh gata tem, jeuet ulon peuleueh keu gatanyoe raja ureueng yahudi nyan keu gata?" sabab pilatus jiteupeu bahwa imeum-imeum ulee nyan jiseurah isa ubak gobnyan sabab imeum-imeum nyan bingiek ate. teuma le imeum-imeum ulee laju jipiteunah ureueng rame mangat pilatus jipeuleueh barabas keu awaknyan. teuma jipeugah lom le pilatus ubak ureueng rame nyan, "meunyo meunan, peue nyang haroh lon peusaneut atueh ureueng nyang gata peugah raja ureueng yahudi nyan?" sira jikuk-kuk ureueng rame nyan jipeugah, "saleb laju ureueng nyan!" "teuma peue nyang ka jipeubuet nyang salah le ureueng nyoe?" jitanyong le pilatus bak ureueng rame nyan. laju awaknyan jikuk-kuk nyang leubeh teuga lom, "saleb laju ureueng nyan!" pilatus keuneuk peumangat ate ureueng rame nyan, teuma laju jipeuleueh barabas keu awaknyan. oh lheueh nyan jiyue laju bak ureueng laen mangat jiseunuet isa, laju jijok keu jisaleb. isa laju jiba le sidadu-sidadu ubak kanto peungadalan nibak meuligoe gubunur. oh lheueh nyan banmandum pasokan jiyue meungmpoi. oh lheueh nyan le awak nyan laju jipeungui bajee jubah ungu keu isa, dan jipeuget mahkota nibak ranteng-ranteng nyang meuduro, oh lheueh nyan laju jipeuseuon bak ulee isa. oh ka lheueh nyan awaknyan laju jibri saleuem ubak gobnyan, "delat po raja ureueng yahudi!" ulee isa laju jiseukok ngon tungkat, oh lheueh nyan laju jiludah gobnyan dan jiseumah sujut dikeue gobnyan. oh ka lheueh jihina isa lagee nyan, bajee jubah ungu nyan laju jisuet le awaknyan dan jipeusok laju bajee gobnyan keudroe. oh lheueh nyan laju jiba isa uluwa keu jijak saleb. bak teungoh rot ueh awaknyan jipaksa bak sidroe ureueng jiyue gulam saleb isa. ureueng nyan ban teuka nibak gampang keuneuk jak u banda. (nan ureueng nyan simon, – asai jih di kirene – ayah nibak alexander dan rufus.) isa laju jiba ubak tempat nyan nan jih golgota, makna jih, "tempat bruek ulee". bak teumpat nyan awaknyan jikeuneuk bri ubak gobnyan ie anggo nyang ka meujampu ngon

mur, teuma isa hana geutem jieb ie anggo nyan. oh ltheueh nyan awaknyan laju jisaleh isa, dan peukayan gobnyan laju jibagi-bagi ngon cara ji-undi mangat teuteupeu jeumba maseng-maseng awaknyan. watee ji saleb isa nyan poh sikureueng beungoh. bak pucak saleb nyan jituleh ngon tulesan keuhai peu nyang jitudoh keu isa nyan, su jih na ktheueh lagee nyoe: "raja ureueng yahudi". meusigoe ngon isa na teuma awaknyan saleb dua droe ureueng peurampok; sidroe blaih uneuen dan sidroe teuk blaih wie gobnyan. deungan na lagee nyan ka jeuet ktheueh lagee na teutuleh lam alkitab; na ktheueh: "gobnyan jianggab saban lagee ureueng-ureueng jeuhet." ureueng-ureueng nyan na jijak rot nyan jiasek-asek ulee sira jihina isa. jipeugah le awaknyan lagee nyoe, "hei, kah nyang keuneuk reuloh baet allah dan kahpeudong teuma lam timpo lthee uroe. ci kah tron atueh saleb nyan dan laju kahjak peuseulamat droe!" meunan cit deungan imeum-imeum ulee dan guree-guree agama jihina isa. awaknyan jimarit sabe keudroe-droe, "jihnyan jipeuseulamat ureueng laen, teuma droe jih keudroe hana hase jipeuseulamat! meunyoeh jihnyan raja israel, raja nyang ba seulamat, bah ktheueh jihnyan jinoe jitron nibak saleb nyan, mangat kamoe ngieng dan kamoe pateh keu jihnyan!" ureueng-ureueng nyang saleb meusajan ngon isa nyan pih jihina gobnyan. watee cot uroe timang, bansaboh nangroe nyan ka seupot han deuh sapeue. dan oh ka troh poh lthee seupot, isa geuklik sira geudumpek ngon su nyang teuga, "eloi, eloi, lama sabakhtani?" nyang makna jih, "allah po, allah po, pakon droeneueh neuting-gai lon?" na padub droe ureueng nyang na disinan jideungoe su geuklik nyan, dan laju jipeugah, "deungoe ktheueh nyan, ureueng nyan teungoh jihoi elia!" sidroe ureueng lam kawan awaknyan bagaih that jajak cok bungong kareueng, bungong kareueng nyan jipeuon laju lam ie anggo masam. oh ltheueh nyan bungong kareueng nyan laju jilat bak ujung reunong, dan jisnyueng laju bak bibi isa, sira jipeugah lagee nyoe, "preh ilee, bah tangieng peu ktheueh elia teuka jijak peutron jihnyan bak kayee saleb nyan." oh ltheueh nyan isa geuklik lom, dan gobnyan pih meuninggai donya. ija tiree nyang na meugantung bak baetallah teupriek dua phon di atueh sampoe u miyueb. panglima nyang na jidong dikeue saleb nyan, deuh jikalon pakriban isa meuninggai. dan laju jipeugah le panglima nyan lagee nyoe, "biet-biet that ureueng nyoe na ktheueh aneuek allah!" disinan na cit padub droe ureueng inong nyang na jikalon peue nyang ka teujadi nyan nibak jih. lamkawan inong nyan na salome, maryam magdalena, dan maryam mak yakobus nyang muda dan yoses. awaknyan ktheueh ureueng-ureueng nyang seutot dan nyang tulong isa watee gobnyan na di galilea. dan jai that mantong ureueng-ureueng inong nyang laen nyang na bak teumpat nyan nyang ka teuka u yerusalem meusajan-sajan ngon isa. uroe karab malam watee yusuf nibak arimatea teuka. ureueng nyan anggota mahkamah agama nyang jihoreumat le gob. dan gobnyan pih teungoh geupreh-preh pajan masa jih po teu allah geupeu phon mat peurintah sibagoe raja. uroe nyan na ktheueh uroe peusiab-siab (na ktheueh uroe sigohlom uroe sabat) sabab nyan ngon hana

teumakot yusuf laju geujak meuhadab ubak pilatus dan laju geulakee manyet isa. pilatus hireuen that watee jideungoe bahwa isa ka meuninggai donya. jadi gobnyan laju geuyue ubak ureueng laen mangat jijak hoi keumandan pasokan dan jitanyong ubak ureueng nyan peu ktheueh isa ka treb meuninggai donya. oh ka ltheueh jideungoe peue nyang ka jilapor le keumandan pasokan nyan, baro ktheueh jibri le pilatus mangat yusuf geujakcek manyet isa nyan. dan yusuf pih laju geubloe ija lineun nyang haloh keu ija kapan dan oh ka ltheueh geupeutron manyet isa, laju geubalot ngon ija nyan. oh ltheueh nyan gobnyan laju geukeubah manyet nyan lam saboh kubu nyang geupeuget lam buket batee. oh ltheueh nyan laju geugule sineuk batee nyang rayeuk keu ngon tob babah pintoe kubu nyan. maryam magdalena dan maryam mak si yoses geukalon pat isa jipeukubu. watee uroe sabat ka seuleusoe, maryam magdalena, maryam mak yakobus dan salome geujak bloe meubagoe jeuneh reumpah-reumpah keu geuboh minyeuk atueh manyet isa. ban seuboh buta watee mata uroe ka jiteubiet, uroe nyang keuphon aleuhat nyan, awaknyan laju jijak ubak kubu isa. bak teungoh rot ueh awaknyan jimarit sabe keudroe-droe, "soe ktheueh nyang tem tulong tanyoe mangat jeuet batee nyang teutob pintoe kubu isa nyan hase teupeusee?" sabab batee nyan rayeuk lumpah na. teuma watee awaknyan ka troh keunan laju jingieng batee nyan ka meugule. dan awaknyan pih laju jitamong lam kubu nyan. lam kubu nyan, blaih uneuen, deuh awaknyan kalon sidroe ureueng muda nyang geungui bajee jubah puteh teungoh geuduek disinan, dan awaknyan teukeujot lumpah na. ureueng muda nyan geupeugah lagee nyoe, "bek teumakot! ulon lon teupeu gatanyoe tajak mita isa ureueng nazaret nyang ka mate teusaleb nyan. gobnyan hana disinoo. gobnyan ka geubeudoh! ngieng ktheueh, nyoe teumpat awaknyan peueh gobnyan. jinoenyoe jak laju, dan peutroh ktheueh haba nyoe ubak murit-murit gobnyan, meunan cit ubak petrus, peugah lagee nyoe, 'gobnyan geujak leubeh awai nibak gata u galilea. disideh gata teuma gata ngieng gobnyan, lagee nyang ka ltheueh geupeugah ubak gata.' ban jideungoe habanyan awaknyan laju jiteubiet lam kubu nyan dan laju jiplueng sabab teukeujot dan teumakot. awaknyan hana jipeugah sahoe hai nyan sabab teumakot. ureueng-ureueng inong nyan laju jijak ubak petrus dan rakan-rakan gobnyan, laju jipeugah ngon singkat banmandum nyang ka geupeugah ubak awaknyan le ureueng muda nyan. oh ka ltheueh nyan, isa keudroe rot murit-murit gobnyan geujak peusampoe phon di timu sampoe u barat haba nyang suci dan abadi keuhai keuseulamatan nyang keukai. teuma watee awaknyan deungoe bahwa isa ka udeb, dan bahwa maryam ka ltheueh geukalon gobnyan awaknyan hana peucaya. oh ltheueh nyan isa laju geupeuleumah droe ubak dua droe murit gobnyan deungan cara nyang laen. nyan teujadi watee ban dua droe ureueng nyan teungoh jijak bak saboh gampong. teuma awaknyan laju jigisa dan jijak peugah laju ubak rakan-rakan geuh nyang laen. teuma di rakan-rakan nyang laen nyan teutab hana jipateh. akhe jih, isa geupeuleumah droe ubak ban siblahi

droe murit gobnyan, bak watee awaknyan teungoh jimakheun. isa geusapa awaknyan sabab awaknyan kureueng iman lom kreueh that ulee sampoe hana jipateh ubak ureueng-ureueng nyang ka lheueh jikalon keudroe bahwa isa udeb. dan laju isa geupeugah ubak awaknyan, "gata jak kheueh laju bansigom donya dan peusampoe kheueh haba get nibak allah nyan keu banmandum umat manusia. ureueng nyang hana peucaya teuma teuhukom. teuma ureueng nyang peucaya dan teupumano, ureueng nyan teuma seulamat. sibagoe bukeuti bahwa awaknyan jipeucaya, gata teuma ta use bubena roh jeuhet ateueh nan ulon; awaknyan jimeututoe lam basa-basa nyang hana awaknyan teupeu. meunyo awaknyan jimat uleue atawa ji jieb ie tuba, ateueh awaknyan hana keunong bala. meunyo awaknyan jikeubah jaroe ateueh ureueng-ureueng saket, ureueng nyang saket nyan teuma puleh." oh ka seuleusoe isa geupeugah haba ngon awaknyan, gobnyan laju teubeuot u syeuruga. disideh gobnyan geumat peurintah meusajan ngon po teu allah. teuma le murit-murit gobnyan laju jijak peusampoe haba seulamat nyang teuka nibak po teu allah nyan ho-ho mantong. dan tuhan pih geumubuet meusajan-sajan ngon awaknyan dan geubri bukeuti keuhai buet-buet nyang ajaeb bahwa peupeupeu nyang awaknyan peusampoe nyan na kheueh beutoi.

teofilus nyang jroh ate, jai that-that ureueng ka jiseuha jiteumuleh ngon teuatoe keuhai peuristiwa-peuristiwa nyang ka teujadi di teungoh-teungoh geutanyoe. awaknyan jiteumuleh sisuai ngon peue nyang ka jicalitra ubak geutanyoe le ureueng-ureueng nyang geukalon keudroe peuristiwa-peuristiwa nyan nibak awaiphon, dan oh lheureh nyan jipeutabu haba nyan. oh ka lheureh ulon tilek ngon ate-ate that banmandum nyan phon nibak awai, laju lon cok keusimpulan get that-that meunyoie ulon tuleh saboh laporan nyang teuatoe keu amphon. banmandum nyang ulon peubuet nyan, mangat droeneueh neuteupeue bahwa peue nyang ka teupeurunoe ubak amphon keubiet beutoi. watee herodes jeuet keu raja di nanggroie yudea, na sidroe imeum nyang nan gobnyan nabi zakharia, gobnyan jitamong lam golongan imeum-imeum abia. peurumoh gobnyan nan geuh elizabet, nyan pih keuturonan imeum. cara udeb dua lakoe binoenyan galak that-that ate allah. mandua awaknyan geutaat that ubak peurintah dan hukom tuhan deungon sipeunoh ate. awaknyan hana meue aneuek sabab elizabet peurumoh gobnyan balui dan mandua awaknyan ka tuha-tuha. bak siuroe, watee golongan abia keunong gileran, nabi zakharia laju geupeubuet tugaih gobnyan sibagoe imeum dikeue po teu allah. deungon teu-undi, nyang ka kayem geupeubuet le imeum-imeum, nabi zakharia jitungkeu geutamong lam baet tuhan oh troh keunan laju geutot keumeunyan. teungoh upacara teutot keumeunyan nyan geupeubuet, ureueng rame meudoa diluwa. bak watee nyan malaikat tuhan geupeuleumah droe ubak nabi zakharia. malaikat nyan geudong blaih nueuen meuja teupat teutot keumeunyan. watee geungieng le nabi zakharia malaikat nyan, gobnyan jiteuka bingong deungon teumakot. teuma le malaikat nyan laju geupeugah lagee nyoe, "bek teumakot, hei zakharia! allah ka geudeungoe doa gata. peurumoh gata elizabet teuma jipeulahe sidroe aneuek agam. dan haroh gata boh nan yahya keu aneuek nyan. gata teuma jeuet keu ureueng nyang lumpah galak deungon lahe aneuek nyan dan di ureueng rame teuma harok ngon meusukaria meunyoie aneuek nyan ka lahe teuma! jihnyan teuma jeuet keu ureueng rayeuk meunurot pandangan tuhan, dan jihnyan hana jijie bi anggo atawa ie kreuheh. ban lahe jihnyan ka geukuasa le roh allah. dan jai lumpah na ureueng israel teuma geubimbeng lom ubak po teu allah, tuhan awaknyan. gobnyan teuma jeuet keu utosan tuhan nyang teuga dan meukuasa lagee nabi ilyas. gobnyan teuma geuba dame lagee ayah ngon aneuek gobnyan, dan ureueng nyang hana taat ubak pimpenan jih jiwoe lom teuma ubak pikeran nyang beutoi. deungon lagee nyan jihnyan ka jikeubah saboh umat nyang ka siab keu tuhan." "pakriban ulon teupeu bahwa hainyan teuma teujadi?" geutanyong le nabi zakharia ubak malaikat nyan. "ulon ka tuha, meunan cit ngon peurumoh lon ka tuha." geujawueub le malaikat nyan lagee nyoe, "ulon nyoe jiebrail. ulon layani po teu allah dan gobnyan kheureh nyang yue ulon keu lon jak peusampoe haba get nyoe ubak gata. peue nyang ulon peugah nyoe, teuma teujadi oh trok bak watee. teuma sabab gata hana tapateh, gata singoh hana jeuet gata peu-

gah haba; gata teuma jeuet keu ureueng kalu sampoe ubak peue nyang ka ulon peugah teujadi." teungoh lam keuadaan lagee nyan, di ureueng rame nyang ka teupreh-preh nabi zakharia. awaknyan hireuen pakon treb lagoena gobnyan lam baet tuhan. dan bak watee gobnyan ka geuteubiet uluwa, gobnyan hana jeuet le geumariet ngon awaknyan. dan gobnyan laju geubri isyarat ngon jaroe geuh, dan gobnyan teutab kalu. dan di ureueng rame pih jiteupeue bahwa gobnyan ka geungieng sapeue-sapeue nyang deuh teukalon didalam baet tuhan. oh ka habeh masa tugaih gobnyan di baet tuhan, nabi zakharia laju geuwoe u rumoh droe. hana padubna treb teuma oh lheureh nyan, elizabet, peurumoh geuhnyan pih laju mume, dan laju geukurong droe lam rumoh nyang treb jih na limong buleuen. gobnyan laju geupeugah, "akhe jih tuhan geutulong ulon dan geusampoh banmandum keuhinaan nyang na nibak ulon." watee elizabet ka mume nam buleuen, allah laju geuyue ubak malaikat jiebrail jeuet geujak u nazaret, saboh banda di daerah galilea. malaikat jiebrail nyan geutus ubak sidroe aneuek dara, nyang nan geuh maryam. maryam nyan ka meutunangan ngon sidroe ureueng agam nyang nan jih yusuf, keuturonan raja nabi daud. malaikat nyan laju geujak ubak maryam sira geupeugah lagee nyoe, "assalamualaikum, gata nyang geubri beureukat le tuhan seucara istimewa! tuhan na meusajan ngon gata!" ban geudeungoe su malaikat nyan maryam teukeujot that, sampoe-sampoe laju jiteumanyong lam ate geuh peue meukeusut saleum nyan. teuma le malaikat nyan laju geupeugah ubak gobnyan, "bek teumakot, hei maryam. sabab gata meukeunong bak ate allah. gata teuma mume dan gata peulahe sidroe aneuek, nyang museuti gata boh nan isa. gobnyan jeuet keu agong dan teupeugah aneuek allah nyang mahamanyang. tuhan allah nyang peujeuet gobnyan raja lagee raja nabi daud, indatu gobnyan. dan gobnyan geumat peurintah sibagoe raja ateuh keuturonan nabi yakub siumu masa. keura-jeuen gobnyan hana meue akhe." "teuma ulon nyoe mantong peurawan," kheureh maryam ubak malaikat nyan, "pakriban hainyan hase teujadi?" geujawueub le malaikat nyan, "roh allah teuma teuka ubak gata, dan kuasa allah teuma peunoh jiseuleubong ateuh gata. nyang kheureh sabab jih aneuek nyang teuma lahe nyan teupeugah suci, aneuek allah. ingat: elizabet, syedara gata nyan ka mume nam buleuen, bah kheureh jihnyan ka tuha dan jikheun le gob bahwa jihnyan balui. sabab nibak po teu allah hana nyang mustahe." dan le maryam laju geupeugah, "ulon nyoe hamba tuhan; bah kheureh teujadi ateuh ulon lagee nyang droeneueh peugah." dan oh lheureh nyan malaikat nyan laju geujak geutinggai maryam disinan sidroe. reujang that oh lheureh nyan, maryam laju geujak ubak saboh banda nyang na di yudea bak daerah nyang meugunong-gunong. gobnyan laju geujak u rumoh nabi zakharia, dan watee geutamong laju geubri saleum ubak elizabet. dan meunan geudeungoe le elizabet maryam geubri saleuem, aneuek nyang na lam pluet elizabet nyan mumet-met. teuma elizabet laju jikuasa le roh allah, oh lheurehnyan laju geumeuhoi, "droeneueh kheureh nyang paleng geubri beureukat le po nibak mandum ureueng inong nyang

laen! geubri beureukat aneuk nyang droeneueh peulahe nyan! soe ulon nyoe sampoe-sampoe mak tuhan geujak ubak ulon? meunan ulon deungoe saleuem droeneueh, aneuk nyang na lam pluét ulon mumet-met galak lumpah na. mubahgia kheueh droeneueh, sabab peucaya peue nyang geupeugah le tuhan ubak droeneueh nyan teuma teujadi! geupeugah le maryam, "ate ulon lon pujoe tuhan, dan jiwa ulon meusukaria sabab allah nyang peuseulamat lon. gobnyan geuingat ulon, namiet gobnyan nyang hina! phon watee nyoe banmandum bansa geupeugah ulon mubahgia. kareuna allah nyang mahakuasa ka geupeubuet hai-hai nyang rayeuk ateueh ulon. sukacita nan jih. keuturonan deumi keuturonan tuhan geubri gaseh ngon sayang keu ureueng nyang teumakot ubak gobnyan. ngon jaroe gobnyan nyang kukoh dan teuga gobnyan geupeucebre ureueng sombong, dan geupeucawa-cawe reuncana awaknyan. raja-raja laju geupeutron nibak takhta dan ureueng hina geupumulia. ureueng nyang deuk geupeutroe ngon peue-peue mantong nyang jroh, ureueng kaya geu-use ngon jaroe hampa. gobnyan geutulong israel hamba gobnyan, lagee janji nyang ka lheueh geupeuget ngon indatu geutanyoe. tuhan hana tuwoe ubak peue-peue nyang ka geupeujanji, gobnyan meumurah ate ubak nabi ibrahim dan keuturonan gobnyan sampoe siumu masa." nibak keunira na lhee buleuen treb jih maryam tinggai ngon elizabet, oh lheueh nyan baro kheueh geuwoe u rumoh geuh keudroe. troh kheueh watee jih nibak elizabet keu geupeu lahe aneuk. gobnyan laju geupeu lahe sidroe aneuk agam. wareh lingka gobnyan dan wareh kawom geuh laju jipeugah padubna get jih tuhan keu elizabet, dan awaknyan pih meusajansajan ngon elizabet meugeumbira ngon harok ate. watee aneuk manyak nyan ka meu-umu lapan uroe, awaknyan laju jiteuka keuneuk jak peusunat gobnyan. awaknyan jikeuneuk boh nan aneuk manyak nyan zakharria meunurot nan ayah aneuk nyan, teuma le ma aneuk nyan laju geupeugah lagee nyoe, "han jeuet! aneuk nyoe haroh teuboh nan yahya." "hana meusidroe pih nyang na lam wareh kawom geuh nyan nyang na lam lagee nyan," kheun awaknyan ubak gobnyan. dan deungon isyarat, awaknyan laju jitanyong ubak nabi zakharria peue nan nyang haroh teuboh keu aneuk geuh nyan. nabi zakharria laju geulakee saboh bateu tuleh oh lheueh nyan laju geutuleh, "nan aneuk nyoe yahya." awaknyan banmandum hireuon. bak watee nyan cit teuma nabi zakharria ka jeuet geupeugah haba dan laju geupujoe po teu allah. kawom silingka gobnyan banmandum teumakot, dan haba nyan laju meuluwah troh bansaboh daerah gunung-gunong yudea. banmandum ureueng deungoe hainyan jiteumanyong lam ate, "keupeue kheueh jeuet jih aneuk nyan singoh?" sabab tuhan meusajan ngon gobnyan. nabi zakharria, ayah aneuk nyang ban lahe nyan, laju jikuasa le roh allah sampoe gobnyan geujak peutroh peusan nibak tuhan. laju geupeugah lagee nyoe, "jak geutanyoe tapujoe tuhan, allah bansa israel! gobnyan ka troh geuteuka geujak tulung umat geuh dan geupeu beubaih awaknyan. gobnyan geubri keu geutanyoe nyang bri seulamat nyang peukasa, keuturonan nabi daud hamba gob-

nyan. yoh watee ilee rot nabi-nabi nyang geupileh le gobnyan, tuhan ka geubri janji geuh keudroe keu teupeuseulamat geutanyoe nibak musoh tanyoe dan nibak kuasa ureueng-ureueng nyang banci keu geutanyoe. keu geupeudeuh murah ate gobnyan ubak indatu tanyoe, janji gobnyan yang suci nyan geupeutrok teuma. gobnyan geumeubudok ubak nabi ibrahim bapak geutanyoe, dan geumeujanji keu geupeu seulamat tanyoe nibak musoh geutanyoe, mangat geutanyoe hana teumakot tapeutimang gobnyan sabe peuhamba droe ubak gobnyan dan tapeumangat ate gobnyan sipanyang udeb geutanyoe. gata, hei aneuk ulon, teuma teupeugah nabi allah nyang mahamanyang. gata geu-utus leubeh awai nibak tuhan keu teurinteh rot ueh keu gobnyan, keu teupeusampoe ubak umat gobnyan bahwa awaknyan teuma teupeuseulamat bubena, meunyeo po teu allah ka geupeu amphon bubena desya awaknyan. tuhan geutanyoe murah that ate lom na gaseh sayang; guna teupeuseulamat geutanyoe gobnyan tateuka. lagee mata uroe jiteubiet oh watee beungoh, meunan kheueh gobnyan geubri trang geuhnyan ubak mandum manusia nyang udeb lam seupot lom teumakot raya. gobnyan geubimbeng geutanyoe ubak rot ueh nyang teutuju bak keudamean." aneuk nabi zakharria nyan treb bak treb meutamah rayeuk dan meutamah teuga roh gobnyan. gobnyan tinggai lam padang pasi, sampoe watee jih gobnyan geupeugah soe droe geuh ubak bansa israel. bak watee nyan kaisar agustus geupeutron titah mangat banmandum wareuga neugahra keurajeuen roma teudafeutar droe keu teuseunsus. seunsus nyang phon that nyoe teupeuna watee kirenius jeuet keu gubunur nanggroe siria. banmandum ureueng bak watee nyan jijak dafeutar droe nibak banda jih maseng-maseng. yusuf pih laju geujak nibak nazaret u galilea, u betlehem di yudea, teupat lahe raja nabi daud; sabab yusuf keuturonan nabi daud. yusuf geudafeutar droe meusigoe ngon maryam tunangan geuh nyan, nyang teungoh mume. watee awaknyan ka troh u betlehem teuka kheueh watee jih nibak maryam keuneuk geupeu lahe aneuk. laju geupeu lahe sidroe aneuk agam, aneuk gobnyan nyang tuha. aneuk nyan laju geubalot ngon ija tumpee, dan geukeubah laju lam palong nyang meuasoe jeurami; sabab awaknyan hana meuteume teupat mudom. bak malam nyan na ureueng-ureueng meurabe nyang teungoh jirabe beulatang jih lam blang naleueng nyang na di daerah nyan. hana teusangka-sangka malaikat tuhan laju geupeuleumah droe ubak awaknyan, dan cahya trang nyang teuka nibak tuhan laju teupanca ateueh awaknyan sampoe-sampoe awaknyan ka peungeh ngon trang, dan awaknyan lumpah teumakot. teuma laju geupeugah le malaikat nyan, "bek teumakot! sabab ulon nyoe lon teuka keuneuk jakba haba get keu gata – haba nyang lumpah mangat ate keu mandum manusia. uroenyoe, di banda nabi daud ka lahe sidroe raja nyang peuseulamat gata na kheueh almaseh, tuhan. nyoe kheueh tanda jih: gata teuma meurumpok ngon sidroe aneuk manyak nyang teubalot ngon ija tumpee, dan teueh lam saboh palong." ngon hana teusangka-sangka malaikat nyan meusajan ngon malaikat laen, nyang geupujoe allah. awaknyan jipeugah, "teupu-

joe kھےuh allah di langet nyang paleng manyang! dan di ateuhe bumoe, sejahteura kھےuh manusia nyang peugalak ate tuhan!" oh ka lھےuh malaikat-malaikat geutinggai awaknyan dan geuwoe lam syeura, ureueng-ureueng meurabe nyan laju jimarit sabe keudroe-droe, "jak tajak u betlehem dan takalon peue nyan ka teujadi nyan. nyang ka geubri tee le tuhan keu geutanyoe." awaknyan laju jijak, oh troh keunan laju meurumpok ngon maryam dan yusuf, meunan cit aneuek manyak nyang teungoh teu eh lam palong. watee jingiege le ureueng meurabe nyan aneuek manyak nyan, awaknyan laju jicalitra peue nyang ka geupeugah le malaikat keuhai aneuek manyak nyan. dan mandum ureueng hireuen peue nyang ka jipeugah le ureueng meurabe nyan. teuma maryam geukeubah banmandum nyan lam ate geuh dan geupike ngon teumanueng banmandum nyang teujadi nyan. ureueng-ureueng meurabe nyan laju jigisa u blang naleueng sira jipujoe dan jipeumulia po teu allah, sabab banmandum nyang ka lھےuh awaknyan deungoe dan awaknyan kalon, paih that lagee nyang geupeugah le malaikat. oh watee aneuek manyak nyan ka meu-umu lapan uroe, laju teupeusunat. dan awaknyan laju geuboh nan gobnyan isa, nan nyang geubri le malaikat ubak gobnyan sigohlom gobnyan mume lam pruet ma geuh. troh kھےuh watee jih yusuf ngon maryam geupeuna adat peusuci meunurot hukom nabi musa. dan awaknyan geuba aneuek manyak nyan u yerasalem keu geujak peujok ubak tuhan. sabab na teutuleh lam hukom tuhan nyang su jih lagee nyoe, "tieb-tieb aneuek agam nyang tuha, aneuek nyan haroh teujok ubak tuhan." meunan cit awaknyan kana meukeusut keuneuk geupeu seumah keureubeuen, na kھےuh sipasang cicem teukukur atawa dua boh cicem mirah pati nyang mantong muda, lagee nyang ka teupeuteuntee lam hukom tuhan. bak watee nyan di yerasalem na sidroe ureueng nyang nan jih simeon. jhnyan ureueng get, nyang teumakot keu po teu allah dan teungoh jipreh-preh watee jih allah geupeuseulamat israel. roh allah na meusajan gobnyan, dan roh allah ka lھےuh geubri tee ubak gobnyan bahwa gobnyan hana mate sigohlom geukalon raja peuseulamat nyang ka geupeu janji le tuhan. deungon geubimbeng le roh allah, simeon laju geutamong lam baet tuhan. bak watee nyan yusuf dan maryam laju geupeutamong isa nyang mantong ubit nyan keu teupeubuet upacara lagee nyang ka jipeurintah le hukom agama. teuma le simeon laju geucok aneuek manyak nyan dan laju geutiengkue, oh lھےuh nyan laju geupujoe po teu allah, "jinoenyoe, ya tuhan, droeneuh ka neupeutroh janji. bah kھےuh namiet droeneuh nyoe meuninggai deungon aman. sabab ngon mata ulee lon keudroe ka lھےuh ulon kalon peuseulamat na kھےuh nyang teuka nibak droeneuh. peuseulamat nyan ka droeneuh keubah keu banmandum bansa: lagee peungeh nyang trang nyang teupeudeuh rot ueh keu bansa-bansa laen, keu teujak ubak droeneuh; na kھےuh trang nyang teupeuteuka keuhoreumatan keu umat droeneuh israel." ayah ngon ma aneuek nyan hireuen that watee geudeungoe peue nyang jipeugah le simeon keuhai aneuek gobnyan. simeon laju geubri beureukat keu awaknyan sira geupeugah ubak

maryam, ma aneuek nyan, "aneuek nyoe ka geupileh le po teu allah keu geupeu hanco dan geupeu seulammat jai that ureueng israel. gobnyan jeuet keutanda nibak po teu allah, nyang hana jitueng le ureueng rame, dan deungon na lagee nyan teubuka kھےuh peue nyang na teukandong lam ate awaknyan. seudeh ngon pilu teuma jitob-tob lam ate gata lagee mata peudeueng nyang tajam." na teuma sidroe nabi inong nyang ka tuha lumpah na. nan nabi nyan hana, binti fanuel, asai nibak sukee asyer. oh ka lھےuh tujoh thon geumeukawen, hana ka jeuet keu inong balee sabab ka meucree ngon lakoe geuh, jinoenyoe meu-umu lapan ploh peuet thon. hantom na geutinggai baet tuhan. uroe ngon malam gobnyan meueibat keu po teu allah nibak teupat nyan ngon cara geumeudoa dan puasa. paih bak watee nyan gobnyan pih teuka, laju geupujoe po teu allah dan geumeututoe keuhai aneuek nyan ubak banmandum ureueng nyang ka teupreh-preh watee allah geupeu meurdehka yerasalem. oh ka lھےuh geupeubuet banmandum hukom tuhan le yusuf dan maryam, awaknyan laju geuwoe u nazaret di galilea. aneuek nyan meutamah rayeuk dan teuga. gobnyan lumpah bijaksana dan that-that geugaseh le po teu allah. tieb-tieb thon ureueng syiek isa geujak u yerasalem keu geujak peuraya uroe raya paskah. dan watee isa ka meu-umu dua blaih thon, awaknyan geujak ubak teupat peurayaan nyan sisuai lagee nyang ka-ka. oh ka lھےuh peurayaan nyan awaknyan laju geuwoe, teuma isa, aneuek geuhnyan, mantong tinggai di yerasalem, le ayah ngon ma geuh hana geuteupeue. awaknyan geupike isa na rhoh lamkawan. oh ka lھےuh geujak siuroe seupot baroe kھےuh geumita gobnyan lamkawan wareh kawom atawa rakan-rakan geuh nyang laen. teuma nyang geumita nyan hana meuteume, dan awaknyan laju geugisa u yerasalem keu geujak mita gobnyan. oh ka lھےuh na lhee uroe geumita-mita, laju meurumpok ngon gobnyan lam baet tuhan. gobnyan teungoh geudeuk sira geudeungoe guree-guree agama seumeubeuet dan geumeuseu-eue jaweueb. banmandum ureueng nyang deungoe gobnyan teuhireuen-hireuen watee jideungoe peue-peue nyang geujaweueb carong lumpah na. ureueng syiek gobnyan pih lumpah hireuen watee geungieng gobnyan. mak gobnyan laju geupeugah ubak gobnyan, "neuek, keupeue kah peubuet mandum nyoe ateuhe kamoe? ayah ngon ma gata ka hek that-that kamoe jak mita gata!" geujaweueb le isa, "keupeue ayah ngon ma neujak mita ulon? peu kھےuh ayah ngon ma hana neuteupeue bahwa ulon nyoe na lam rumoh bapak ulon?" teuma awaknyan hana muphom peue nyang geupeugah le isa nyan. oh lھےuh nyan isa laju geuwoe meusajan-sajan ngon gobnyan u nazaret, dan taat that ubak mandua ureueng tuha geuh nyan. banmandum nyan geukeubah mantong le ma geuh lam ate gobnyan. isa meutamah rayeuk dan meutamah tamah bijaksana, dan lumpah geugaseh le po teu allah dan jigalak le manusia. bak thon nyang keulimong blaih masa keurajeuen kaisar tiberius, pontius pilatus jeuet keugubunur di yudea, dan herodes jimat peurintah di galilea, filipus, syedara herodes jimat keurajeuen dibagian iturea dan trakhonitis, seudan-

gkan lisanas jimat keurajeuen di abilene. nyang mat jabatan jeuet keu imeum-imeum agong na kheueh hanas dan kayafas. bak thon nyan kheueh po teu allah meufeureuman ubak nabi yahya, aneuek nabi zakharria di padang pasi. teuma di nabi yahya geujak laju ho-ho mantong bansaboh daerah krueng yordan dan geupeusampoe haba nibak po teu allah. nabi yahya geupeugah lagee nyoe, "meutobat kheueh nibak banmandum desya-desya gata, dan gata haroh teupumano, mangat po teu allah geupeu amphon gata." nyan paih lagee nyang ka teutuleh lam kitab nabi yesaya: "na ureueng geumeuhoi-meuhoi lam padang pasi, 'peusiab kheueh rot ueh keu tuhan, peurata kheueh rot ueh keu gobnyan. tieb-tieb na panton taseubee laju, tieb-tieb na gunong ngon buket teupeusare rata. rot ueh nyang kiwieng kiwot tapeuteupat laju, rot ueh nyang lhok-lhok lumbo peusare laju. di ureueng rame bansigom donya teuma jikalon alah geupeu seumalat manusia!' " jai that ureueng jijak ubak nabi yahya keu teupumano. nabi yahya geupeugah ubak awaknyan, "gata ureueng jeuhet! soe nyang peugah bahwa gata hana keunong ngon hukoman alah nyang teuma teuka? tunyok kheueh ngon buet-buet gata bahwa gata ka meutobat nibak banmandum desya-desya gata! bek gata peuphon peugah bahwa nabi ibrahim na kheueh indatu gata. ingat: nibak batee-batee nyoe pih po teu allah hase geupeujeuet keuturonan keu nabi ibrahim! pato kasiab keu ngon teuteubang bak kayee sampoe habeh ukeue-ukeue jih. tieb-tieb bak kayee nyang hana jimuboh nyang get teuma teuteubang dan teutiek lam apui." "jadi, peue nyang haroh kamoe peubuet?" jitanjong le ureueng nyan ubak nabi yahya. geujaweueb le nabi yahya, "ureueng nyan na bak jih dua on baje, baje jihnyan nyang sion bah kheueh jijok keu ureueng nyang hana meubaje; dan ureueng nyang na peunajoh, peunajoh nyan bah kheueh jibagi keu ureueng nyang hana." ureueng nyang tugaih jih jikuteb cukee jijak cit ubak nabi yahya keu teupumano. awaknyan jitanjong lagee nyoe, "bakap guree, peue nyang haroh kamoe peubuet?" geujaweueb le nabi yahya, "bek kheueh gata kuteb cukee leubeh nibak nyang ka teupeuteub." na cit sidadu nyang jitanjong lagee nyoe, "pakriban deungon kamoe? peu kheueh nyang haroh kamoe peubuet?" geujaweueb le nabi yahya, "bek gata lakee ngon cara paksa ateuhe soe mantong dan bek gata reupah peng deungon gata tudoh nyang hana-hana. beuseb kheueh ngon gaji nyang hak gata!" bak watee nyan di ureueng rame kajipeuphon teumanyong sabe keudroe-droe, peu kheueh nabi yahya nyan raja nyang ba seumalat nyang awaknyan prehreh. nyang kheueh jeuet nabi yahya geupeugah ubak awaknyan banmandum, "ulon pumano gata ngon ie, teuma singoh teuka ureueng nyang leubeh rayeuk nibak ulon. keu ulon piyoh taloe sipatu gobnyan mantong hana kuasa nibak ulon. gobnyan teuma geupumano gata ngon roh allah dan apui. bak jaroe gobnyan na jeuee ngon tampo banmandum gandom sampoe gleh. gandom nyan teuma geupeusapat lam gupok, teuma meunyeo sikheum mandum geutot lam apui nyang hana lon-lon!" meunan kheueh nabi yahya geubri naseuhub ubak awaknyan ngon mubago-e cara, bak watee gobnyan geupeusampoe haba

get. teuma herodes, nyang mat keurajeuen di galilea, geuseugah le nabi yahya keuhai jimeukawen ngon herodias, peurmoh syedara jih keudroe, dan meunan cit keuhai buet-buet jih nyang jeuhet nyang laen nyang ka jipeubuet. teuma herodes bukan jipateh peue nyang geutam le nabi yahya nyan seubalek jih jipeubuet buet-buet nyang jeuhet nyan leubeh bak nyang ka dan nabi yahya keudroe jipeutamong lam glab. oh ka lheueh seulesoe banmandum awaknyan teupumano, isa teupumano cit. dan bak watee gobnyan teungoh meudoda, langet laju teuhah, dan roh allah laju geutron ateuhe gobnyan lagee cicem mirah pati. dan laju teudeungoe su allah nyang geupeugah lagee nyoe, "gata kheueh aneuek ulon nyang ulon gaseh. gata lumpah galak nibak ate lon." watee isa geupeu phon meudakwah, umu gobnyan na lhee ploth thon. meunurot kheun gob, gobnyan aneuek yusuf, bin eli, bin matat, bin lewi, bin malkhi, bin yana, bin yusuf, bin matica, bin amos, bin nahum, bin hesli, bin nagai, bin maat, bin matica, bin simei, bin yosekh, bin yoda, bin yohanah, bin resa, bin zerubabel, bin sealtiel, bin neri, bin malkhi, bin adi, bin kosam, bin elmadam, bin eri, bin yesua, bin eliezzer, bin yorim, bin matat, bin lewi, bin simeon, bin yehuda, bin yusuf, bin yonam, bin elyakim, bin melea, bin mina, bin matata, bin natan, bin nabi daud, bin isai, bin obed, bin boas, bin salmon, bin nahason, bin abinadab, bin admin, bin arni, bin hezron, bin peres, bin yehuda, bin nabi yakub, bin nabi ishaq, bin nabi ibrahim, bin terah, bin nahor, bin serug, bin rehu, bin peleg, bin eber, bin salmon, bin kenan, bin arpakhsad, bin sem, bin nabi noh, bin lamekh, bin metusalah, bin henokh, bin yared, bin mahalaleel, bin kenan, bin enos, bin set, bin nabi adam, bin allah. isa ka geukuasa le roh allah watee gobnyan geutinggai krueng yordan. roh allah nyang pimpen gobnyan u padang pasi. lam padang pasi nyan isa jiujeoe le iblih peuet ploth uroe treb jih. watee lam keunong ujeoe nyan, gobnyan hana geupajoh sapeue. dan akhe jih gobnyan teurasa deuk. jipeugah le iblih ubak gobnyan, "gata aneuek allah, kon? ci gatayue ubak batee nyoe mangat jeuet keuruti." geujaweueb le isa, "lam alkitab na teutuleh lagee nyoe, 'manusia hana hase udeb ngon jipajoh ruti mantong.'" dan iblih laju jiba isa u tempat nyang paleng manyang, dan lam sikle mata le iblih laju jitungyok ubak isa keurajeuen lam donya. "banmandum keukuasaan dan keukayaan nyoe ulon bri keu droeneueh," kheun iblih ubak isa, "sabab banmandum ka geubri keu ulon dan ulon jeuet mantong ulon bri atranyan ubak soe mantong nyang ulon galak. banmandum nyan teuma jeuet keuhak milek droeneueh, meunyeo droeneueh sujut neuseumah ulon." geujaweueb le isa, "lam alkitab na teutuleh lagee nyoe, 'seumah kheueh tuhan allah gata dan bak gobnyan mantong gata meungabdi.'" dan le iblih jiba teuma isa u yerasalem oh troh keunan laju jipeuduek isa nyan ateuhe tampong baet tuhan sira jipeugah ubak gobnyan lagee nyoe, "droeneueh kon aneuek allah? ci droeneueh grob uyueb phon ateuhe nyoe. sabab lam alkitab na teutuleh lagee nyoe, 'allah teuma geuyue malaikat-malaikat gobnyan mangat jikawai droeneueh ngon cara get-get.' dan meunan cit, 'malaikat-malaikat teuma geusam-

bot droeneueh ngon jaroe gobnyan, mangat gaki droeneueh hana keunong ateueh batee." geujaweueb le isa, "lam alkitab na teutuleh lafee nyoe, 'bek gata ujoe, tuhan, allah gata.' " oh ka ltheueh seulesoe jijoe isa ngon mubagoe cara le iblih nyan, laju jitinggai isa dan jipreh watee nyang jroh keu jicuba lom. oh ltheuehnyan isa geugisa u galilea; dan gobnyan laju geukuasa le roh allah. haba keuhai droe gobnyan ka meutabu bansaboh daerah nyan. gobnyan geuseumeubeuet di rumoh-rumoh iebadat, dan banmandum ureueng jipujoe gobnyan. isa geujak teuma u nazaret, bak teupat gobnyan rayeuk. watee nyan uroe sabat, meunurot keubiasaan gobnyan geujak u rumoh iebadat. sira geudong laju geubeuet alkitab, dan laju geubri kitab yesaya. laju geupeuhah gunulong kitab nyan, dan meuteume laju ayat nyang su jih lafee nyoe, "roh tuhan na bak ulon, sabab gobnyan ka geubaiat ulon keu lon jak peusampoe haba get keu ureueng gasien. gobnyan ka geutus ulon mangat lon peumaklum haba peubeubaih keu ureueng nyang na didalam glab dan geuyue pepuleh ureueng nyang buta; geuyue peubeubaih ureueng nyang teuseksa dan geuyue peusampoe saat jih tuhan teuka geujak peuseulamat umat gobnyan." oh ka ltheueh geubeuet kitab nyan, isa laju geugulong lom lafee sot teuma, dan geujuk laju ubak peutugaih, dan oh ltheuehnyan laju geudeuk. banmandum ureueng nyang na lam rumoh iebadat nyan jingiang ateueh gobnyan. dan isa laju geupeu phon mariet ngon awaknyan lafee nyoe, 'ayat-ayat alkitab nyang ban ltheueh ulon beuet nyan nibak uroenyoe ka teupeupeunoh saat gata deungoe watee ulon beuet bunoe." tutoe haba nyang geupeugah get lumpah na, sampoe awaknyan teuhireuen-hireuen dan jipeubeuna peue nyang geupeugah nyan. awaknyan laju jipeugah, "gobnyan kon aneuek yusuf?" teuma isa laju geupeugah ubak awaknyan, "pasti gatanyoe peguna pribasa nyoe keu ulon, 'dokto, pepuleh ktheueh tuboh droeneueh keudroe. buet nyang ajaeb nyang kamoe deungoe droeneueh peubuet di kapernaum, dan neupeubuet ktheueh lafee nyang di gampong droeneueh keudroe." "ingat ktheueh, hana nabi nyang jihoreumat di gampong jih keudroe. dan gata deungoe ktheueh nyoe: bak jamen nabi ilyas, watee ujeuen hana jitoh-toh lhee siteungoh thon treb jih, ka teuka meuseum deuk nyang paleng parah bansaboh nanggroe. bak watee nyan jai that-that inong-inong balee di nanggroe israel. bah pih meunan, po teu allah hana geuyue ubak nabi ilyas mangat geujak ubak sidroe lamkawan inong balee nyan teuma nyang geuyue jak ubak sidroe inong balee di sarfat lam daerah sidon. meunan cit jamen nabi elisa jai lumpah na ureueng israel nyang keunong peunyaket kulet nyang lumpah parah, dan hana meusidroe pih lamkawan awaknyan nyang na geupeu puleh, seulaen naaman ureueng siria nyan." banmandum ureueng nyang na lam rumoh iebadat nyan beungeh raya watee jideungoe hainyan. awaknyan laju jidong dan jiuse laju isa u luwa banda, jiba laju gobnyan bak barieh gunong, nibak banda droejih, na ktheueh banda nyang jipeuget keudroe. niet awaknyan keuneuk jitulak isa lam barieh gunong nyan. teuma isa laju geukuwak kawan ureueng rame nyan dan geujak

laju ho laen. geubeudoh nibak teupat nyan isa laju geujak u banda kapernaum di galilea. nibak banda nyan gobnyan laju geubeubeuet ureueng rame watee uroe sabat. awaknyan hireuen watee jikalon cara gobnyan seumeubeuet, sabab gobnyan geupeugah haba ngon peunoh wibawa. nibak teupat nyan, lam rumoh iebadat na sidroe ureueng nyang ka jikuasa le roh jeuhet. ureueng nyan jiklik-klik habeh sineuga, "hei isa, ureueng nazaret, peue keuneuk droeneueh peubuet ateueh kamoe nyoe? peu ktheueh droeneueh teuka keuneuk jak peubinas kamoe? ulon kuteupeu soe droeneueh nyan: droeneueh utosan nyang suci nyang teuka nibak po teu allah!" "seungab!" ktheun isa sira geudhot ateueh roh jeuhet nyan. "teubiet ktheueh laju lam tuboh ureueng nyoe!" laju le roh jeuhet nyan jiseumpom ureueng nyan dikeue awaknyan mandum, oh ltheueh nyan jiteubiet lam tuboh ureueng nyan ngon hana jipeusaket mubacat pih. banmandum ureueng nyang na nibak teupat nyan hireuen, laju jimarit sabe keudroe-droe, "hana wayang tutoe haba ureueng nyoe. deungon wibawa dan kuasa, hase jipeurintah roh-roh jeuhet nyan jiteubiet lam tuboh ureueng nyoe, dan awaknyan pih laju jiteubiet nibak teupat nyan!" oh ltheuehnyan haba keuhai isa laju meutabu bansaboh wilayah nyan. isa laju geutinggai rumoh iebadat nyan, dan geujak laju u rumoh simon. ma tuwan simon nyang inong bak watee nyan teungon deumam, dan ureueng-ureueng nyang na nibak teupat nyan laju jijak peugah hainyan ubak isa. ban geudeungoe haba nyan, isa laju geujak ubak teupat eh mak tuwan simon nyan, dan geu-use laju deumam mak nyan. dan deumam nyan pih gadoh, oh banpuleh geuhnyan, le mak tuwan simon laju geubeudoh geujak peutimang awak nyang na lam rumoh nyan. watee mata uroe teungoh jilob, banmandum ureueng laju jiba ubak isa syedara-syedara geuh nyang ka keunong mubagoe rupa peunyaket. isa laju geukeubah jaroe gobnyan ateueh awaknyan maseng-maseng dan di ureueng saket nyan pih puleh. roh-roh jeuhet pih laju jiteubiet lam tuboh ureueng rame, sira jiklik-klik, "droeneueh ktheueh aneuek allah!" dan isa laju geudhot awaknyan dan hana geubri roh-roh jeuhet nyan jipeugah haba, sabab awaknyan jiteupeu bahwa gobnyan raja peuseulamat. watee mata uroe kajipeuphon teubiet isa laju geutinggai banda nyan dan geujak laju ubak saboh teupat nyang seungue. di ureueng rame kajipeuphon mita-mita gobnyan, dan watee awaknyan ka meurumpok ngon gobnyan, awaknyan jiuseuha mangat gobnyan bek geutinggai le awaknyan. teuma isa laju geupeugah lafee nyoe, "haba get keuhai pakriban po teu allah geumat peurintah haroh ulon jakpeusampoe cit u banda-banda laen, sabab nyan ktheueh allah geu-utus ulon lam donya nyoe." sabab nyan isa geumeukhutubah didalam rumoh-rumoh iebadat nyang na bansaboh nanggroe yudea. bak saboh watee, isa teungoh geudong-dong bak pante danau genesaret. jai that-that ureueng dan meusak-sak keu jijak deungoe haba nibak po teu allah. isa geukalon na dua boh peuraho bak bineh pante; neulayan-neulayan nyang na lam peuraho nyan ka jitron nibak lam peuraho dan laju jijak rhah jeue-jeue ngon drob eungkot jih. isa laju geuek u ateueh saboh peuraho atra simon, oh ltheuehnyan

laju geuyue ubak simon mangat peuraho jih nyang ka geudeuk le isa nyan jeuet jitulak beujoh bacut nibak pante. isa laju geudeuk lam peuraho dan laju geupeurunoe ureueng rame nyang na disinan. oh ka seulesoe geupeurunoe rakyat ba nyan, laju geupeugah ubak simon, "gata kayoh kheueh peuraho gatanyoe u teupnat nyang lhok, oh ltheueh nyan tiek kheueh jeue gata keu gata drob eungkot." "bapak guree," jaweueb simon, "simalam beungoh kamoe meukeureuja brat, hana kamoe teume drob sapeue lam danau nyoe! teuma sabab bapak nyang yue, bah kheueh; ulon jak tiek jeue keula-i." oh ka ltheueh jipeubuet le awaknyan pakriban nyang ka geuyue le isa nyan, laju meuteume eungkot nyang lumpah jai le awaknyan, sabab brat le eungkot nyan, jeue awaknyan sampoe teupriek, ngon sabab nyan awaknyan laju jilakee tulong bak rakan-rakan jih nyang na bak peuraho laen. rakan-rakan jihnyan laju jiteuka keunan jikak tulong pasoe lam peuraho nyang dua boh nyan akhe jih ka peunoh ngon eungkot sampoe-sampoe mandua boh peuraho, dan peuraho nyan pih rab-rab lham. watee simon jingiang hainyan, laju jisujut dikeue isa, sira jipeugah lagee nyoe, "tinggai kheueh ulon, ya tuhan! sabab ulonnyoe ureueng meudesya!" simon dan banmandum ureueng nyang na meusajan ngon jih nibak teupnat nyan hireuen that watee jingiang eungkot nyang awaknyan drob jai lumpah na. meunan cit deungon rakan-rakan simon, yakobus dan yahya aneuek-aneuek zebedeus. isa laju geupeugah ubak simon lagee nyoe, "bek teumakot! phon saat nyoe gata teuma jeuet keu ureueng jeue manusia." simon dan rakan-rakan geuhnyan laju jibahue peuraho jih ateuheh pante, oh ltheueh nyan laju jitinggai banmandum nyang na disinan, dan laju jikak seutot isa. bak siroe, isa na lam saboh banda. disinan na sidroe ureueng agam nyang bak tuboh jih peunoh jitimoh peunyakot kulet nyang paleng parah. watee ureueng nyan jikalon isa, laju jisujut dikeue gobnyan sira jilakee, "pak, meunyo bapak neutem, bapak jeuet neupeupuleh ulon!" isa laju geuraba ureueng nyan sira geupeugah lagee nyoe, "ulon tem, bupuleh kheueh gata!" dan watee nyan cit teuma peunyakot ureueng nyan gadoh. dan isa laju geutam ureueng nyan mangat bek jipeugah sahoe peue nyang ka geupeubuet ateuheh droe jih nyan, sira geukheun lagee nyoe, "jak kheueh ubak imeum, dan gata lakee bak gobnyan keu geupeukeubiet bahwa gata kapuleh. oh ltheuehnyan gata jak laju peuseumah keureubeuen lagee nyang ka geupeurintah le nabi musa, sibagoe bukeuti ubak ureueng rame bahwa gata biet-biet ka puleh." haba keuhai isa meugah laju ho-ho mantong, dan jai that-that cit ureueng jiteuka keu jikak deungoe gobnyan meunan cit keu jilakee mangat gobnyan geupeupuleh bubuna peunyakot-peunyakot nyang na bak awaknyan. oh ka ltheueh nyan isa laju geujak meudoa ubak teupnat nyang seungue. bak siroe watee isa teungoh geuseumeubeuet, na padubdroe ureueng farisi dan guree-guree agama teungoh jiduek disinan. awaknyan teuka nibak yerusalem, dan nibak banda-banda nyang na galilea dan yudea. kuasa tuhan na bak isa keu geupeu puleh ureueng nyang saket. bak watee nyan na meupadub droe ureueng jiteuka sira jiba ureueng lapee nyang ka teueh ateuheh

tika ubak gobnyan. awaknyan ka jiseueha mangat ureueng saket nyan jeuet jiba lam rumoh mangat meuteume jipeudeuk dikeue isa. sabab ureueng jai lagoena nibak teupnat nyan, sampoe ureueng lapee nyan hana hase jipeutamong le awaknyan. ngon sabab nyan ureueng lapee nyan laju jipeuek ateuheh bubong rumoh. dan jibuka laju bubong genteng, rot nyan laju jipeutron ureueng saket meusigoe ngon tika jih paih dikeue isa lamkawan ureueng nyang jai nyan. watee geungiang le isa padub na rayeuk iman ureueng nyan, laju geupeugah ubak ureueng nyan, "syedara, desya gata ka teupeu amphon." guree-guree agama dan ureueng-ureueng farisi nyan na disinan laju jimarit sabe keudroe-droe, "soe kheueh ureueng nyoe nyang keubiet that beuhe jihina po teu allah? soe nyang jeuet peu amphon desya, meunyo kon allah keudroe?" isa geuteupeue peue nyang jitanyong le awaknyan. jadi laju geupeugah, "pakon ate gatanyoe jiteumanyong lagee nyan? toh nyang leubeh mudah, teupeugah, 'desya gata ka teupeu amphon', atawa teukheun 'beudoh kheueh dan jak kheueh laju!'" teuma saat nyoe ulon jok bukeuti ubak gata bahwa di ateuheh bumoe nyoe aneuek manusia na kuasa jipeu amphon desya." dan laju isa geupeugah ubak ureueng nyang lapee nyan lagee nyoe, "beudoh kheueh, dan gulong kheueh teupnat eh gata, dan jakwoe kheueh laju!" ureueng nyan pih laju jibeudoh dikeue awaknyan banmandum, laju jigulong tika eh jih, dan jiwoe laju sira jipujoe po teu allah. awaknyan banmandum hireuen lumpah na sira jipujoe allah. dan deungoe peurasana teumakot, awaknyan jipeugah, "lumpah that ajaeb peue nyang ka takalon nibak uroe nyoe!" oh ltheuehnyan isa laju geuteubiet deuh laju geukalon sidroe ureueng buet jih tukang kuteb cukee, na ureueng nyan lewi, bak watee nyan lewi nyan teungoh jiduek lam kanto jih. geupeugah le isa ubak ureueng nyan, "jak keunoe, seutot ulon." ureueng lewi nyan jibeudoh laju jidong dan jitinggai banmandum peue-peue nyang na disinan jikak seutot isa. oh ltheuehnyan lewi laju jipeuna khanuri di rumoh jih keu isa. rame that tukang kuteb cukee dan ureueng-ureueng nyang laen jipajoh bu di rumoh lewi nyan. na kira-kira padub droe ureueng farisi dan guree-guree agama ate jih hana galak watee jingiang hai nyan, dan laju jipeugah ubak murit-murit isa, "pakon gata banmandum taseumajoh meusajan ngon tukang kuteb cukee dan ureueng-ureueng hana jroh?" geujaweueb le isa, "ureueng nyang sihat bak jih hana peureulee dokto; nyang peureulee dokto na kheueh ureueng saket. ulon teuka bukon ulon tawok ureueng-ureueng nyang jianggab droe jih jroh, teuma ureueng-ureueng nyang meudesya mangat awaknyan jitolab nibak desya-desya jih." ureueng rame jipeugah ubak isa, "murit nabi yahya dan murit ureueng farisi kayem that awaknyan jipuaa ngon meudoa. pakon murit-murit droeneueh jimakheun ngon ji-jieb ie." geujaweueb le isa, "peu kheueh gata jeuet gata yue mandum jame jipuaa bak teupnat khanuri ureueng meukawen, simantong linto agam mantong na ngon awaknyan? teuntee hana jeuet! teuma teuka watee jih linto nyang agam jicok nibak awaknyan. bak watee nyan kheueh awaknyan jipuaa." dan isa laju geucalitra

ubak awaknyan miseue-miseue lagee nyoe, "hana ureueng nyang jitampai bajee brok ngon ija baro. sabab bajee brok nyan jipriek ija baro nyan. lom teuma ija sinampai nyang baro nyan hana paih ngon bajee brok nyan. meunan cit hana ureueng jiroe ie anggo lam baluem kulet nyang ka tuha, sabab ie anggo nyang baro nyan jeuet keusabab baluem kulet nyang ka tuha nyan beukah. dan ie anggo nyan roe, dan baluem jih rusak. ie anggo nyang baro haroh teu-roe lam baluem nyang baro. meunan cit hana ureueng nyang jitem jieb ie anggo baro oh ka lheureh jiejieb ie anggo nyang tuha. 'ie anggo tuha nyan leubeh mangat,' kheun gobnyan." bak siuroe, uroe sabat, watee isa geujak rot ladang gandom, murit-murit gobnyan laju jipot boh gandom gob nyang na lam ladang nyan. boh gandom nyang ka lheureh jipot nyan laju jigeusok-geusok ngon jaroe, oh lheurehnyan laju jipeugah, "pakon gatanoyoe taliengkeu hukum-hukum agama deungon cara gata peubuet nyang teutam han jeuet tapeubuet bak uroe sabat?" geujaweeb le isa, "peu kheureh gohlom gata beuet keuhai nyang geupeubuet le nabi daud, watee gobnyan dan ureueng-ureueng geuh deuk? gobnyan geutamong lam baet tuhan laju geucok ruti nyang ka teupeuseumah ubak po teu allah, oh lheurehnyan ruti nyan laju geupajoh. dan ruti nyan pih geubri cit keu ureueng-ureueng geuh. padahai meunurot hukum agama geutanyoe, imeum-imeum mantong nyang jeuet pajoh ruti nyan." oh lheureh nyan laju geupeugah le isa, "aneuk manusia na kuasa ateuhe uroe sabat!" bak siuroe, uroe sabat nyang laen, isa geujak seumeubeuet lam rumoh ibadah. disinan na ureueng nyang jaroe jih lapee siblaih. kira-kira na padub droe guree agama dan ureueng farisi teungoh jimita-mita buet nyang salah nyang geupeubuet le isa, mangat awaknyan na alasan jigadu gobnyan. dan awaknyan hana putoh-putoh jipeurati peu kheureh gobnyan na geupeu puleh ureueng saket bak uroe sabat. rupari isa geuteupeue peu nyang jipike le awaknyan. dan laju geupeugah ubak ureueng nyang jaroe jih lapee siblaih nyan, "dang keunoe, ukeue ulon!" ureueng nyan laju jibeudoh, dan laju jidong disinan. oh lheureh nyan isa geutanyong ubak ureueng-ureueng nyang na disinan, "meunurot agama geutanyoe, peu nyang jeuet tapeubuet bak uroe sabat? tapeubuet nyang get atawa tapeubuet nyang brok? tapeuseulamat gob atawa tapeuceulaka manusia?" isa laju geungieng bansikeulileng dan keu awaknyan banmandum, dan laju geupeugah ubak ureueng nyan, "sunnyeng keunoe jaroe gata." ureueng nyan laju jisnyueng jaroe jih dan jaroe ureueng nyan pih laju puleh. teuma banmandum guree-guree agama dan ureueng-ureueng farisi nyan beungeh lumpah na, dan laju jimeurok pakat keuhai peu nyang haroh jipeusaneut ateuhe isa. bak watee nyan isa laju geu-ek ateuhe saboh buket keu geujak meudoa ubak po teu allah simalam suntok. watee uroe ka peungeh, gobnyan laju geuhoi murit-murit geuh. dan laju geupileh dua blaih droe lamkawan awaknyan. laju geuboh nan mandua blaih droe nyan rasui-rasui. awaknyan na kheureh: simon (nyang teuhoi petrus), andreas syedara simon; yakobus dan yahya, pilipus dan bartolomeus, matius dan tomas,

yakobus bin alfeus, dan simon (nyang teuhoi patriot), yudas bin yakobus dan yudas iskariot nyang oh du-doe jeuet keu ureueng peukhianat. oh lheureh nyan isa laju geutron di ateuhe buket nyan meusigoe ngon rasui-rasui geuhnyan, laju geupioh dan geudong bak saboh teupat nyang data. bak teupat nyan na cit murit-murit gobnyan nyang laen nyang ka jai that na teupreh-preh inan nyang teuka aleh pane-pane mantong bansaboh yudea, yerusalem, dan bandabanda nyang na di tirus dan sidon bak bineh laot. awaknyan jijak keunan keu jijak deungoe isa, dan keu geupeu puleh nibak peunyaket-peunyaket nyang na bak awaknyan. meunan cit ureueng nyang ka jitamong roh jeuhet jijak cit keunan le isa laju geupeu puleh. banmandum ureueng jiseusha jikeuneuk mat isa, sabab na kuasa nyang teubiet lam tuboh gobnyan nyang peupuleh awaknyan banmandum. isa geungieng ateuhe murit-murit gobnyan dan laju geupeugah, "mubahgia kheureh gata hei ureueng-ureueng gasien, sabab gata na kheureh anggota umat allah! mubahgia kheureh gata nyang deuk bak watee nyoe; gata teuma teupeutroe! mubahgia kheureh gata nyang mo bak watee nyoe; gata teuma teukem! mubahgia kheureh gata meunyoe jibanci, jitulak, jihina dan jifiteunah ngon sabab le aneuek manusia! nabi-nabi bak jamen ilee pih ka jipeusaneut lagee nyan bagoe. meunyoe hainyan teuka ateuhe gata bah kheureh gata meugalak ate dan meulikak ngon rasa geumbira, sabab upah keu gata rayeuk that ka geukeubah keu gata lam syeuruga. teuma cilaka kheureh gata nyang kaya bak watee nyoe; sabab gata ka tarasa pakriban nekmak! cilaka kheureh gata nyang troe bak watee nyoe; sabab gata teuma tarasa pakriban deuk! cilaka kheureh gata nyang teukem-kem bak watee nyoe; sabab gata teuma tarasa seudeh ate dan gata mo meua-a! cilaka kheureh gata, meunyoe banmandum ureueng jipujoe gata, sabab meunan cit indatu awaknyan jipujoe nabi-nabi peuleusu yoh jamen ilee." "teuma keu gata nyang tadeungoe ulon nibak watee nyoe, ulon bri peusan nyang lagee nyoe: gaseh kheureh keu musoh gata, dan gata peubuet kheureh nyang jroh keu ureueng nyang banci keu gata. bri kheureh beureukat keu ureueng nyang kutok gata, dan gata doa kheureh keu ureueng nyang jeuhet ateuhe gata. meunyoe na ureueng jitampa mieng gata nyang siblaih, gata peubiyeu kheureh jitampa mieng gata nyang siblaih teuk. meunyoe bajee jubah gata jireupah, gata bri kheureh teuma bajee gata. meunyoe ureueng na jilakee sapewe-sapeue ubak gata, gata bri kheureh nyang jilakee nyan; dan meunyoe atra gata jireupah, bek kheureh gata lakee lom teuma. gata peubuet kheureh ateuhe ureueng laen lagee nyang gata keuneuk jipeubuet le ureueng laen ateuhe gata. meunyoe gata tagaseh ureueng-ureueng nyang gaseh keu gata mantong, peu jasa gata? ureueng meudesya pih jiteupeu peubuet gaseh ateuhe ureueng-ureueng nyang jigaseh ateuhe droe jih! dan meunyoe gata tapeubuet nyang jroh ateuhe ureueng-ureueng nyang jipeubuet jroh ateuhe gata mantong, peu jasa gata? ureueng meudesya pih jiteupeu peubuet lagee nyan! meunan cit meunyoe gata tapeu-utang peng ubak ureueng-ureueng nyang meunurot gata peng gata nyang jimeu-utang nyan hase jipulang lom teuma,

peue jasa gata? ureueng meudesya pih jiteupeu peuntang peng keu ureueng meudesya, dan oh lheureh nyan laju jilakee lom teuma! nyang sikeubiet jih kon lagee nyan! gata nyang paleng get haroh gata gaseh keu musoh gata dan gata peubuet nyang jroh ateuheh awaknyan. gata haroh gata bri jimeu-utang, dan bek gata harab nyang jimeu-utang nyan gata teume cok lom teuma. meunyo meunan nyang gata peubuet, upah gata rayeuk that-that dan gata teuma jeuet keu aneuk-aneuk allah nyang mahamanyang. sabab alah jroh that ate ateuheh ureueng nyang hana jiteupeu lakee teurimong gaseh, meunan cit ateuheh ureueng jeuhet. bah kheureh nibak gata na sabe gaseh sayang lagee bapak gata nyang na sabe gaseh sayang!" "bek jeuet keu hakem ureueng laen, mangat gata keudroe bek geupeu hakem le po teu allah. bek teuma gata hukom ureueng laen, mangat gata keudroe hana geuhukom le po teu allah. gata peumaphon kheureh keu ureueng laen, mangat po teu allah geupeu amphon gata. gata meuseudeukah kheureh keu ureueng laen, mangat po teu allah pih geubri keu gata; gata teuma tateurimong meuneubri gobnyan nyang meulimpah ruwah nyang ka teusukat peunoh-peunoh keu gata. sabab sinukat nyang gata peuguna keu ureueng laen teuma geupeu guna le po teu allah keu gata." oh lheureh nyan isa geucalitra teuma ubak awaknyan miseue laen nyang lagee nyoe, "meunyo ureueng buta jibahue ureueng buta nyang laen, pasti mandua awaknyan teuma rhot lam paret. hana murit nyang leubeh rayeuk nibak guree jih. teuma murit nyang ka seulesoe jimurroe, teuma jeuet keusaban lagee guree jih. pakon nyang deuh gata ngieng rabok kayee nyang ubit lam mata syedara gata, balok nyang rayeuk nyang na lam mata gata hana gata pakoe? pakriban jeuet gata peugah ubak syedara gata, 'jak keunoe, syedara, ulon cuengke rabok kayee nyang ubit nyan lam mata gata,' seudangkan lam mata gata keudroe na balok nyang hana gata kalon? hei ureueng munafek! cuengke kheureh ilee balok nyang na lam mata gata nyan. baro kheureh gata hase gata meungieng ngon mata nyang trang dan hase gata cuengke rabok kayee nyang ubit lam mata syedara gata." "bak kayee nyang subo hana jipeuhase boh kayee nyang brok. meunan cit deungon bak kayee nyang hana subo hana jipeuhase boh kayee nyang get. tieb-tieb bak kayee teuturi watee teukalon boh jih. paya meuduro hana jipeuhase boh ara, dan meunan cit tamah meuduro hana teuma jipeuhase boh anggo. ureueng nyang jroh jipeuteubiet hai-hai nyang jroh sabab ate jih peunoh meulimpah ngon hai-hai nyang jroh. ureueng nyang jeuhet jipeuteubiet hai-hai nyang jeuhet sabab ate jih peunoh meulimpah ngon hai-hai nyang jeuhet teuma. sabab peue nyang jipeugah le babah gata nyan kheureh nyang meulimpah nyang na lam ate gata." "pakon gata hoi ulon, 'tuhan, tuhan,' teuma hana gata peubuet peue nyang ulon peugah ubak gata? ngon soe kheureh jeuet tapeusaban ureueng nyang jijak ubak ulon, dan jideungoe peue nyang ulon peugah, dan jipeubuet teuma? – bah kheureh ulon tunyok ubak gata – ureueng nyan na kheureh lagee ureueng nyang watee jipeudong rumoh jikhueh uruek sampoe lhok-lhok, dan jipeuget laju keunaleueng rumoh ateuheh batee.

watee teuka ie raya atawa ie krueng ji heuntam ateuheh rumoh nyan, rumoh nyan hana hase jipeuanoyot le ie nyan, sabab ka teupeudong ateuheh keunaleueng nyang kong. teuma ureueng nyang jideungoe peue nyang ulon peugah hana jipeubuet lagee ulon kheureh nyan, na kheureh lagee ureueng nyang jipeudong rumoh ateuheh keunaleueng. meunyo ie raya teuka, rumoh nyan bagai that reuloh; ngon rusak nyang brat lumpah na!" oh ka seulesoe geupeugah banmandum hai-hai nyan ubak ureueng rame, isa laju geujak u kapernaum. nibak teupat nyan na sidroe panglima roma nyang geupeulara sidroe namiet nyang lumpah geugaseh. namiet nyan saket brat dan rab-rab mate. watee jideungoe le panglima nyan keuhai isa, jiyue laju ubak na padub droe peumimpin yahudi keu jijak meurumpok ngon gobnyan mangat isa geutem jak peupuleh namiet jih nyan. watee ka trok bak isa, awaknyan laju jilakee deungon meuharab that mangat isa geutem tulang panglima nyan, "panglima nyoe patot bapak tulong," kheureh awaknyan ubak isa, "sabab geuhnyan lumpah geugaseh keu bansa tanyoe dan ka geupeudong rumoh ibeadat keu kamoe." ban geudeungoe haba nyan isa laju geujak meusajan-sajan ngon awaknyan. watee isa karab trok u rumoh nyan, panglima nyan laju jiyue bak rakan-rakan jihnyan mangat jijak peugah, "hana peureulee bapak meusosah payah neujak u rumoh lon. ulon hana patot lon teurimong bapak di rumoh lon. nyang kheureh sabab jih ulon keudroe nyang jak meuhadab ubak bapak. teuma neujok mantong peurintah mangat peulayan ulon nyan puleh. sabab ulon pih tundok ubak peurintah atasan lon dan dimiyueb ulon mantong na sidadu-sidadu nyang haroh tundok ubak peurintah lon. meunyo ulon yue sidroe sidadu, 'jak keudeh!' laju jijak; dan ulon peugah ubak nyang laen, 'jak keunoe!' jihnyan pih laju jijak meuhadab ulon. dan meunyo ulon peurintah ubak namiet lon, 'peuget nyoe!' nyang ulon yue nyan laju jipeuget." isa hireuen watee geudeungoe haba panglima nyan. laju geupaleng dan geupeugah ubak ureueng rame nyang teungoh jiseutot gobnyan, "hana wayang ureueng nyoe. lamkawan ureueng israel keudroe pih gohlom na ulon teume iman nyang rayeuk lagee ureueng nyoe!" watee ureueng-ureueng nyang jiyue nyan jigisa u rumoh panglima nyan, namiet nyan ka puleh. hana padubna treb teuma oh lheureh nyan, isa laju geujak u banda nain. murit-murit gobnyan meunan cit deungon ureueng-ureueng rame jijak meuronron ngon gobnyan. watee isa ka trok ubak babah pintoe geureubang banda, laju geukalon na ureueng rame teungoh ji-intat manyet uluwa banda. nyang meuninggai nyan na kheureh sidroe aneuk agam, aneuk tunggai sidroe inong malee. rame that peunduedeuk banda nyang jijak meusajan ngon mak aneuk nyang meuninggai nyan. watee geungieng le isa ureueng inong nyan, gobnyan weueh that ubak inong nyan dan laju geupeugah, "bek neumoe, hai ma!" oh lheureh nyan isa laju geupeurab ubak keureunda manyet nyang teungoh jiseuon nyan dan laju geumat. dan ureueng-ureueng nyang seun keureunda nyan laju jipioh. geupeugah le isa, "hei aneuk muda, ulon peurintah ubak gata, beudoh!" aneuk muda nyang ka mate nyan laju jibeudoh jiduek dan

jipeugah haba. dan isa laju geuseurah aneuek muda nyang ka udeb nyan ubak ma jih. banmandum ureueng temakot dan laju jipeuphon pujoe po teu allah. awaknyan jipeugah, "sidroe nabi nyang rayeuk ka teuka diteungoh-teungoh geutanyoe! allah ka teuka keu geujak peuseulamat umat gobnyan!" haba keuhai isa nyoe laju meutaba bansaboh yudea dan didaerah sikeulileng nyan. murit-murit nabi yahya laju jijak peugah peue-peue nyang ka jikalon nyan ubak gobnyan. dan nabi yahya laju geuhoi dua droe murit geuh laju geuyue bak awaknyan mangat jijak meurumpok ngon tuhan isa sira jitanyong lagee nyoe, "peu kheueh bakap ureueng nyang teuma teuka sisuai ngon janji po teu allah, atawa haroh kamoe preh ureueng laen?" bandua droe murit nabi yahya nyan laju jijak ubak isa oh trok keunan laju jipeugah, "nabi yahya pumano geuyue bak kamoe geuyue jak tanyong ubak bakap peu kheueh droeneuh nyang teuma teuka sisuai ngon janji po teu allah, atawa peu kheueh haroh kamoe preh nyang laen?" watee nyan, isa teungoh geupeu puleh ureueng rame, dan geu-use roh-roh jeuhet meunan cit geupeu bleuet ureueng-ureueng buta sampoe hase jimeungieng. geujaweueb le isa, "jak gisa kheueh ubak nabi yahya dan gata peugah kheueh peue-peue nyang ka gata deungoe ngon gata kalon: ureueng buta hase jimeungieng, ureueng lapee jeuet jijak, ureueng nyang keunong peunyakot lulet nyang lumpah parah ka puleh, ureueng klo punyung hase jimeudeungoe, ureueng mate udeb keula-i, dan haba get nyang teuka nibak po teu allah geupeusampoe keu ureueng-ureueng gasien. mubahgia kheueh ureueng nyang hana alasan jitulak ulon." oh ka leupah jijak ureueng-ureueng nyang geukirem le nabi yahya nyan, isa laju geupeu phon peugah ubak ureueng rame keuhai nabi yahya nyan, kheueh gobnyan, "gatanyoe tajak u padang pasi peue nyang gata jak kalon? peu kheueh gata jak ngieng sion naleueng nyang jipot le angen? gata jak peue nyang gata kalon? peu kheueh sidroe ureueng nyang jingui peukayan nyang get? ureueng-ureueng nyang ngui peukayan lagee nyan dan udeb meuwah teumpat tinggai jih bak meuligo! teuma, gata teubiet peue nyang gata kalon? peu kheueh gata jak kalon sidroe nabi? beutoi that, dan leubeu nibak sidroe nabi. sabab, nabi yahya nyan kheueh nyang teuteuh lam ayat alkitab nyoe, 'nyoe kheueh utasan ulon', kheun po teu allah, 'ulon teuma lon utus jihnyan leubeu awai nibak gata, mangat jihnyan jibuka rot ueh keu gata!' " "ingat kheueh", kheun isa lom, "lam donya nyoe hana ureueng nyang leubeu rayeuk nibak nabi yahya pumano." banmandum – ureueng meunan cit deungon ureueng-ureueng tukang kuteb cukee – jideungoe isa geupeugah lagee nyan; awaknyan kheueh ureueng-ureueng nyang ka jitaat peue-peue nyang ka geulakee le allah dan jitem teupumano le nabi yahya. teuma di ureueng-ureueng farisi dan guree-guree agama hana jitem teurimong reuncana po teu allah keu awaknyan keudroe. awaknyan hana jitem geupumano le nabi yahya. dan isa geupeugah lom, "deungon peu kheueh haroh ulon peusa ureueng-ureueng bak jamen nyoe? lagee toh kheueh awaknyan? awaknyan lagee aneuek-aneuek miet nyang teungoh jiduek-dukek bak keudee; saboh kawan

aneuek miet nyan jikuk bak kawan nyang laen lagee nyoe, 'kamoe meunyanoyoe ca-e geumbira keu gata, teuma gata hana tatem meunari! kamoe meunyanoyoe ca-e nyang seudeh, dan gata hana tatem moba-el' nabi yahya pumano teuka – gobnyan geupuasa dan hana geujieb ie anggo – dan gatanyoe ta peugah, 'gobnyan ka jitamong jen!' aneuek manusia teuka – gobnyan geumakheun dan geujieb ie – dan laju gata peugah, 'kalon ureueng nyan! leuha, tukang mabok, jimeungon ngon ureueng tukang kuteb cukee dan ureueng meudesa.' bah kheueh meunan, keubijak-sanaan allah na bukeuti dan banmandum ureueng jiteurimong" na sidroe ureueng farisi, nan jih simon, ureueng nyan ji-undang isa mangat geutem makheun dirumoh jih. di banda nyan na teuma sidroe ureueng inong nyang udeb jih peunoh ngon desya. watee jideungoe isa teungoh geumakheun di rumoh ureueng farisi nyan, laju jijak keunan sira jiba saboh kaca pualam nyang meuasoe peunoh ngon minyeuk mangat bee. inong nyan laju jidong dilikot isa bak bineh gaki gobnyan, sira jimoe ie mata inong nyan tijoh meutreb-treb sampoe-sampoe gaki isa ka habeh basah. oh lheurehnyan gaki isa nyang ka basah ngon ie mata jihnyan laju jilab ngon ujong ok oh lheurehnyan laju jicom sira jiroe ngon minyeuk mangat bhee. watee ureueng farisi nyang undang isa jinginghi hai nyan, laju jikheun lam ate jih, "seukira jih ureueng nyoe nabi, teuntée gobnyan geuteupeue soe ureueng inong nyang mat gobnyan, dan ureueng inong nyan udeb jih peunoh lam desya!" dan isa laju geupeugah ubak simon, "simon, na nyang keuneuk ulon peugah ubak gata." "nyoe pat lon, pak guree," jawueb simon, "neupeugah laju." geupeugah le isa, "na dua droe ureueng jijak meu-utang ubak ureueng nyang buet jih peubungong peng. nyang sidroe jimeu-utang limong reutoh peng pirak, dan nyang sidroe teuk limong ploh peng pirak. mandua droe ureueng nyan hana hase jibayeue utang jih nyan, ngon sabab nyan utang ureueng nyan jisampoh banmandum. nyan, soe kheueh mandua droe ureueng nyan nyang leubeu jigaseh ureueng nyang peu-utang peng nyan?" "ulon pike ureueng nyang paleng jai jisampoh utang jih!" jawueb simon. "peundapat gatanyan beutoi," jawueb isa. dan isa laju geukalon ubak ureueng nyan dan geupeugah ubak simon, "peu kheueh ka gata ngieng atueh ureueng inong nyoe? ulon teuka u rumoh gata, dan gata hana takeubah ie ngon rhah gaki ulon; teuma le ureueng inong nyan ka jirrah gaki ulon ngon ie mata jih, dan jilab sampoe gleh ngon ujong ok jih. gata hana tasambot ulon deungon tacom, teuma le inong nyoe hana jipioh jicom gaki lon yoh phon ulon teuka keunoe. gata hana ta ro minyeuk bak ulee lon, teuma ureueng inongnyoe ka jiro minyeuk mangat bee bak gaki lon. keubiet: gaseh gobnyan nyang rayeuk nyan ka jeuet keutanda bahwa desya jih nyang jai ka teupeu amphon! meunoyoe ureueng jipeu amphon bacut, gobnyan pih teuma geugaseh deungon bacut teuma." oh lheurehnyan isa geupeugah ubak ureueng inong nyan, "bubena desya gata ka teupeu amphon." ureueng-ureueng laen nyang na jiduek jimakheun meusajan ngon isa laju jimarit sabe keudroe-droe, "soe ureueng nyoe sampoe-sampoe jipeugah jeuet jipeu amphon desya?" teuma isa geu-

peugah ubak ureueng inong nyan, "sabab gata tapeucaya ubak ulon, gata ka teupeuseulamat. jak kheueh deungon dame!" hana treb oh lheureu nyan, isa laju geujak u banda-banda dan gampong-gampong, keu geujak peusampoe haba get bahwa allah ka geupeu phon mat peurintah sibagoe raja. dua blaih droe murit geuh na meusajan gobnyan. meunan cit na meupadub droe ureueng-ureueng inong nyan ka geupeu puleh nibak jitamong roh jieuhet dan peunyaket. awaknyan na kheueh maryam nyang teuhoi magdalena (na tujoh boh roh jieuhet nyang teupeuteubiet lam tuboh jih nyan); meunan cit yohana, peurumoh kluza, peugawee lam meuligoe herodes; susana, dan jai that mantong inong nyang laen. deungon biaya keudroe, awaknyan jitulong isa dan murit-murit gobnyan. ureueng-ureueng rame hana putoh-putoh jikak ubak isa nyang teuka nibak mubagoe banda. dan watee ureueng ka jai that meusapat, isa laju geucalitra bak awaknyan miseue lagee nyoe, "sidroe ureueng nyang buet jih meulampoh saboh watee jikak tabu bijeh. bak watee ureueng nyan teungoh teumabu, na bijeh nyang rhot ateuhe rot. siparo jigiloe le gob dan nyang laen jipajoh le citem. na cit nyang rhot bak teupat nyang mubatee-batee. watee taroktarok jih ka jiteubiet lam bijeh seunaman nyan laju layee sabab tanoh tho. na teuma bijeh nyang rhot ateuhe tanoh tamah meuduro. tamah meuduro nyan jitimoh meusigoe ngon bijeh nyang teutabu nyan, laju jiginton sampoe mate. teuma na cit bijeh nyang rhot ateuhe tanoh nyang bree, laju jitimoh dan jimuboh sampoe jipeuhase sireutoh goe ganda." oh ka lheureu geucalitra miseue nyan, isa geupeugah, "meunyo na punyueng, gata deungoe kheueh!" murit-murit isa laju jitanyong ubak gobnyan peue makna miseue nyan. geujaweub le isa, "keu gata ka teubri anugeurah mangat gata teupeu pakriban allah geumat peurintah sibagoe raja. teuma keu ureueng laen teupeuruno ngon miseue, mangat awaknyan jisimak, teuma hana jiteupeu peue nyang teujadi; dan awaknyan jideungoe, teuma hana muphom." nyoe kheueh makna miseue nyan: bijeh nyan na kheueh haba po teu allah. bijeh nyan rhot ateuhe rot muphom jih manusia nyang jideungoe tutoe haba nyan. teuma iblih teuka laju jireupah haba allah lam ate awaknyan, mangat awaknyan bek jipeucaya dan bek meuteume seulamat. bijeh nyang rhot bak teupat nyan meubatee-batee na kheueh lagee ureueng watee jideungoe haba nyan, laju jiteurimong ngon galak ate. teuma haba nyan hana meu-ukeue lam ate awaknyan. awaknyan jipeucaya siat mantong, dan watee teuka cubaan, awaknyan laju murtat. bijeh nyang rhot lam teungoh tamah meuduro na kheueh miseue ureueng nyang jideungoe haba nyan, teuma khawate keuhai udeb nyoe, awaknyan keuneuk udeb nyang mangat dan meuwah lam donya nyoe. banmandum nyan ka jiteugon lam ate awaknyan sampoe hana jipeuhase boh nyang masak. bijeh nyang rhot bak tanoh nyang bree ngon subo na kheueh miseue ureueng nyang jideungoe haba nyan, laju jikeubah lam ate nyang get dan juoe. awaknyan jimeuteun sampoe jipeuhase boh." hana ureueng nyang jipeuhu panyot oh lheureu nyan jitob ngon guci, atawa jipeudeuk panyot nyan dimiyueb teupat eh. panyot nyan teuma jikeubah

bak gaki panyot, mangat ureueng nyang tamong deuh jikalon trang nyang deuh nibak panyot nyan. hana nyang teusom nyang hana deuh teukalon; dan nyang hana nyang teurahsia nyang hana hase teubuka dan teuteupeue. sabab nyan ngieng kheueh beuet-get peue nyang teuma gata deungoe. sabab di ureueng nyang ka na, keu jihnyan teuma teubri leubeh jai lom; teuma keu ureueng nyang hana sapeue na, bacut nyang mantong na bak jihnyan teucok teuma." mak ngon syedara-syedara isa geujak ubak gobnyan, teuma awaknyan hana hase trok ubak gobnyan sabab ureueng jai lumpah na. teuma na sidroe ureueng nyang jipeugah ubak isa, "pak, ma ngon syedara-syedara bapak na diluwa geupreh bapak. awaknyan keuneuk meurumpok ngon bapak" teuma isa laju geupeugah ubak awaknyan, "ureueng nyang jideungoe peue kheun po teu allah dan jipeubuet lagee nyang geukheun le allah nyan, ureueng nyan kheueh mak ngon syedara-syedara lon." bak siuroe isa ngon murit-murit gobnyan laju geuek ateuhe peuraho layeue. "jak geutanyoe tajeumeurang u meurandeh danau," kheun isa ubak murit-murit gobnyan. dan awaknyan pih laju jikeumayoh peuraho nyan u meurandeh danau. watee awaknyan teungoh meulayeue, mata isa ka jiteuka teunget dan laju geu eh. bek lalee meuteuka teuk angen badee lam danau nyan, peuraho awaknyan laju jipoh le angen nyan sampoe ka guyang gayeng ie-ie ka jitamong lam peuraho, jipike le awaknyan nyoe biet-biet ka meubala. murit-murit isa laju jikak ubak gobnyan sira jipeugo dan jikheun lagee nyoe, "bapak guree, hei bapak guree, geutanyoe ka balal" isa laju geubeudoh dan laju geudhot angen badee dan umbak nyang teungoh meungamok nyan. angen badee ngon umbak raya nyan laju jipioh dan ie danau pih laju teunang lom teuma. dan oh lheureu nyan isa laju geupeugah ubak murit-murit gobnyan, "pakon gatanyoe hana tapeucaya ubak ulon?" awaknyan meutamah hireuen dan teumakot that. dan jimeusah-sah kheueh awaknyan sabe keudroe-droe, "soe nyang sikeubit jih ureueng nyoe sampoe angen ngon umbak jeuet geupeurintah dan jitaat teuma ateuhe peurintah geuh nyan!" isa dan murit-murit gobnyan laju geumeulayeue trok u daerah gerasa di meurandeh danau galilea. bak watee isa geutron u darat, ubak gobnyan laju jiteuka le sidroe ureueng agam nyang ka jitamong roh jieuhet. ureueng nyan teuka jih nibak banda. ka treb that jihnyan hana jitem sok peukayan dan hana jitem tinggai dirumoh. nyang galak jih tinggai na kheueh lam guha-guha nibak teupat jrat-jrat ureueng mate. watee jikalon isa, ureueng nyan jidumpek dan laju jisujut dikeue gobnyan sira jipeugah lagee nyoe, "isa, aneuek allah nyang mahamanyang! peue keuneuk droeneueh peubuet ateuhe ulon nyoe? ulon lakee bek neuseksa ulon!" ureueng nyan jipeugah meunan sabab isa geupeurintah ubak roh jieuhet nyan mangat jiteubiet lam tuboh ureueng nyan. ka kayem that ureueng nyan jikuasa le roh jieuhet nyan sampoe-sampoe gaki ngon jaroe jih ka teuikat ngon rante dan jihnyan teukawai ngon bit that, rante ngon ikat jihnyan teutab hase jireuet sampoe putoh dan laju jiba le roh jieuhet u padang pasi. isa geutanyong ubak ureueng nyan, "soe nan gata?" nan ulon "legiun," jaweub ureueng nyan –

sabab jai that-that roh jeuhet nyang laen nyang ka jitamong lam tuboh jih nyan. roh-roh jeuhet nyan jilakee deungon meuharab that ubak isa mangat bek geu-
use jihnyan lam jurong mawot. bak bineh teumpat nyan jak lumpah na bui-bui nyang teungoh jimita eumpeuen bak bineh barieh gunong. roh-roh jeuhet nyan jilakee deungon meuharab that ubak isa mangat jeuet jitamong lam tuboh bui-bui nyang teungoh mita eumpeuen nyan. dan isa situju. laju bubena roh-roh jeuhet nyan jiteubiet lam tuboh ureueng nyan dan jitamong laju lam tuboh bui-bui nyang jai nyan. dan bui-bui nyan laju jiplueng dan jigrob lam barieh gunong u dalam danau, dan laju lham lam danau nyan. di ureueng-ureueng nyang rabe bui nyan laju jikalon peu nyang ka teujadi atueuh bui-bui jihnyan. dan awaknyan laju jiplueng dan jijak peugah ubak ureueng-ureueng nyang na di banda dan gampong-gampong nyang na di silingka nyan. dan di ureueng rame laju jiteubiet dan jingingi peue nyang ka teujadi. awaknyan jijak laju ubak isa, dan nibak teumpat nyan laju meurumpok ngon ureueng nyang ka jiteubiet roh-roh jeuhet nyan teungoh jiduek bak bineh gaki isa. ureueng nyan ka jingui peukayan dan pikeran jih ka waraih. awaknyan laju jiteuka teumakot. ureueng nyang kalon hainyan laju jijak peugah ubak ureueng laen pakriban cara jih ureueng nyan teupeupuleh. ban jideungoe habanyan bak watee nyan cit teuma banmandum peunduduek daerah gerasa jilakee ngon meuharab that mangat isa geujak laju dan geutinggai teumpat nyan, sabab awaknyan biet-biet teumakot lumpah na. dan isa laju geu-ek lam peuraho keuneuk geujakwoe. ureueng nyang ka hana jikuasa le roh-roh jeuhet nyan jilakee ubak isa mangat jeuet jiseutot ho-ho nyang isa geujak. teuma isa hana geubri dan geuyue ureueng nyan mangat jijak laju holaen, sira geupeugah lagee nyoe, "jakwoe kheueh dan peugah kheueh bak ureueng laen peue-peue nyang ka geupeubuet le allah atueuh gata." dan di ureueng nyan pih laju jijak peugah hainyan ubak tieb-tieb sagoe banda, peue nyang ka geupeubuet le isa atueuh droe jih nyan. watee isa ka geugisa u meurandeh danau, gobnyan laju jisambot ngon geumbira le ureueng rame sabab awaknyan teungoh jipreh-preh gobnyan geuwoe. watee nyan laju jiteuka sidroe ulee rumoh iebadat nyang na disinan ubak isa. nan ureueng nyan yairus. ureueng nyan laju jisujut dikeue isa dan jilakee deungon meuharab that mangat gobnyan geutem jak u rumoh jih, sabab aneuek inong jih nyan kheueh sidroe kong mantong meumu dua blaih thon lam keudand saket brat karab mate. teungoh isa geujak u rumoh yairus, di ureueng rame meuron-ron jisak-sak gobnyan nyang teuka nibak sigala arah. lamkawan ureueng nyang meusak-sak nyan na teuma sidroe ureueng inong nyang ka treb that rhot bak saket jiteubiet darah he hana putoh-putoh ka dua blaih thon treb jih. gobnyan ka geupeu habeh mandum hak milek geuh keugeujak meu-ubat ubak dokto, teuma teutab hana nyang hase jipeu-ubat inong nyan. ureueng inong nyan laju jipeurab ubak isa rot likot, dan laju jicukeh ujong bajee jubah gobnyan. watee nyan cit teuma peunyakot meudarah nyang na bak inong nyan puleh. isa geutanyong, "soe nyang cukeh ulon?" banmandum ureueng

nyang na disinan jibantah. dan laju jipeugah le petrus, "pak, ureueng rame lumpah na bansikeulileng bapak; awaknyan mandum jisak-sak bapak!" teuma geupeugah le isa, "han, na nyang cukeh ulon. ulon teupeu that nyan, sabab na teunaga nyang jiteubiet lam tuboh lon." ureueng inong nyan jitee bahwa buet jih ka geupeupeue le isa. jadi inong nyan laju jipeurab ubak isa sira badan jih yo meukot-kot laju jisujut dikeue gobnyan. teuma le inong nyan laju jipeugah dikeue ureueng rame nyan, pakon jicukeh isa, dan peunyakot jih puleh bak watee nyan cit teuma. isa laju geupeugah ubak inong nyan, "aneuek ulon, sabab gata peucaya keu ulon, gata puleh. jak kheueh ngon seulam." teungoh isa mantong geupeugah haba, na sidroe namiet teuka nibak rumoh yairus. namiet nyan jipeugah ubak yairus, "aneuek inong amphon ka meuninggai donya. bek le amphon peusolah bapak guree nyoe geujak u rumoh amphon." watee geudeungoe hainyan le isa, laju geupeugah ubak yairus, "bek teumakot. peucaya mantong aneuek gata puleh." oh ka troh u rumoh yairus, isa hana geubri meusidroe ureueng pih nyang jeuet jitamong ngon gobnyan seulaen petrus, yahya, yakobus dan ma ngon ayah aneuek nyan. banmandum ureueng nyang na disinan teungoh jipeumo ba-e sabab aneueknyan mate. teuma le isa laju geupeugah, "bek mo. aneuek nyoe hana mate, jihnyoe teunget!" awaknyan jipeukem isa, sabab awaknyan jiteupeu aneuek inong nyan ka mate. oh ltheueh nyan isa geumat jaroe aneuek nyan sira geupeugah, "neuek, beudoh kheueh!" nyawong aneuek nyan jiwoe lom lam tuboh aneuek nyan, dan watee nyan cit teuma aneuek inong nyan jibeudoh. oh ltheueh nyan isa geuyue bri makheun aneuek nyan bak ureueng nyang na nibak teumpat nyan. ureueng syiek aneuek nyan hireuen lumpah na. teuma isa geutam awaknyan bek jipeugah sahoe hai nyang ka teujadi nyan. isa laju geuhoi bandua blaih droe murit gobnyan, laju geubri kuasa bak awaknyan keu jeuet jiseu roh jeuhet dan jipeupuleh peunyakot. oh ltheuehnyan geuyue bak awaknyan jijak peupuleh ureueng saket dan geuyue peusampoe haba pakriban po teu allah geumat peurintah sibagoe raja. "bek gataba sapewe watee gata jak," kheun isa ubak awaknyan. "bek gata ba tungkat, atawa baluem teumpat seudeukah, atawa peunajoh, atawa peng, atawa dua on peukayan. dipat mantong gata jiteurimong, tinggai kheueh disinan sampoe bak watee jih gata tinggai banda nyan. dan bak teumpat gata hana jiteurimong, watee gata tinggai banda nyan, seuteuk kheueh abee nyang na bak tapak kaki gata, sibagoe peuingat keu awaknyan." murit-murit isa laju geujak u gampong-gampong keu jijak peusampoe haba get nyan dan jipeupuleh ureueng saket di jeueb-jeueb teumpat. watee raja herodes nyang mat keurajeuen di galilea, jideungoe peue-peue mantong nyang teujadi nyan, jihnyan jiteuka bingung. sabab na nyang peugah nabi yahya pumano ka udeb keula-i. na teuma nyang peugah nabi ilas ka teuka lom. ureueng laen jipeugah sidroe nabi nibak nabi-nabi yoh jamen ilee ka udeb lom teuma. herodes jipeugah lagee nyoe, "ka ulon peurintah bak ureueng laen mangat jijak koh takue nabi yahya pumano. teuma di ureueng nyoe, soe nyang seubeuna jih? jai that-that nyang ka ulon deungoe

keuhai jihnyoe." dan herodes jiuseuha beu meuteume jingeng isa. oh ka seulesoe nibak tugaih rasui-rasui isa laju jigisa dan jicalitra banmandum ubak gobnyan peue-peue nyang ka awaknyan peubuet. isa laju geupakat awaknyan meusajan-sajan ngon gobnyan jak peuaseng droe u banda betsaida. teuma watee jiteupeu le ureueng rame keuhai nyan, awaknyan laju jiseutot isa. gobnyan geuteurimong awaknyan, laju geumariet ngon awaknyan keuhai pakriban meunyoel allah ka geumat peurintah sibagoe raja. dan meunan cit geupeu puléh ureueng saket nyang na lamkawan awaknyan. watee mata uroe karab jillob, mandua blaih droe murit isa laju jipeugah meuhadab ubak gobnyan sira jipeugah lagee nyoe, "bapak, teupat nyoe seungue dan joh that nibak ureueng rame. leubeu get neuyue jak ureueng rame nyoe banmandum, mangat jihnyan jeuet jikak mita peunajoh dan teupat eh nyang na di gampong-gampong nyang na nibak silingka nyoe." teuma geujaweueb le isa, "gata mantong nyang bri bak awaknyan mangat jeuet jimakheun." jiseutot le murit-murit isa nyan, "bak kamoe nyang na limong boh ruti dan dua boh eungkot. peu kheueh haroh kamoe jakbloé peunajoh keu ureueng rame nyoe?" (na kira-kira limong ribee droe ureueng agam nibak teupat nyan) isa geupeugah ubak murit-murit gobnyan, "neuyue duek kheueh awaknyan banmandum meutumpok-tumpok, kira-kira limong ploé droe saboh tumpok." murit-murit isa laju jipeubuet peue-peue nyang ka geuyue le isa ubak awaknyan. dan oh lheurehnyan le isa laju geucok ruti nyang limong boh nyan meunan cit deungon eungkot nyang na dua boh nyan, oh lheurehnyan laju geutengah u langet sira geulakee teurimong gaseh ubak po teu allah. oh lheureh nyan ruti ngon eungkot nyan laju geupriek-priek ngon jaroe gobnyan dan geujok laju ubak murit-murit geuh keu jibagi-bagi keu ureueng rame nyan. dan awaknyan banmandum jiteume makheun sampoe troe. dan murit-murit isa laju geupeusapat seueh-seueh nyang jipajoh le ureueng rame nyan nyang le jih na dua blaih boh raga. bak saboh watee, isa teungoh geumeudoa sidroe geuh mantong, murit-murit gobnyan laju jikak ubak gobnyan. isa laju geutanyong ubak awaknyan lagee nyoe, "meunurot lagee jipeugah le gob, ulon nyoe soe?" awaknyan laju jijaweueb, "na nyang peugah nabi yahya pumano. na teuma nyang peugah gobnyan nabi ilyas, nyang laen jipeugah teuma sidroe nabi yoh jamen ilee nyang wateunyoel ka udeb keula-i." dan meunurot gata keudroe pakriban, ulon nyoe soe?" geutanyong le isa lom. jijaweueb le petrus lagee nyoe, "bapak na kheueh raja nyang ba seulamet nyang ka geupeu janji le po teu allah." dan isa laju geupeugah ubak murit-murit gobnyan, "bek sagai-sagai gata peugah hainyan ubak soe mantong." geupeugah lom le isa, "aneuk manusia keubiet jai that haroh jiteurimong deurita dan jiteuntang le peumimpempeumimpem ngon imeum-imeum ulee, meunan cit le guree-guree agama. gobnyan teuma jipoh mate, teuma bak uroe nyang keu lhee geubeudoh lom teuma." oh lheurehnyan isa geupeugah teuma ubak bandum ureueng nyang na nibak teupat nyan, "ureueng nyang jitem seutot ulon, haroh jipeutuwoe ubak keupeuntengan jih keudroe, jitem gulam saleb gob-

nyan tieb-tieb uroe, dan hana jipioh jiseutot ulon. sabab ureueng nyang keuneuk peuteun keuhai udeb jih, ureueng nyan teuma gadoh udeb. nyang keubiet jih, ureueng nyang jikeureubeuen udeb jih deumi keu ulon, ureueng nyan teuma seulamet. peue laba jih sidroe ureueng meunyoel bansigom donya nyoe jeuet keu milek jih, teuma jihnyan jipeurusak ngon jipeugadah udeb jih? meunyoel ureueng malee jiangkee ulon dan peue-peue nyang ulon peurunoe, meunan cit aneuk manusia teuma malee jiangkee ureueng nyan bak watee geuhnyan teuka singoh ngon kuasa gobnyan, dan deungon kuasa bapak dan malaikat-malaikat nyang suci! beuteupeue kheueh: na ureueng lamkawan gata nyoe nyang hana lom mate sigohlom jihnyan jikalon po teu allah geumat peurintah." na kira-kira sigoe aleuhah oh ka lheureh isa geupurunoe hai-hai nyan, laju geuba petrus, yahya dan yakobus u ateuheh puncak saboh gunong guna jih keuneuk meudoa. teungoh isa geumeudoa bak teupat nyan, ruman gobnyan laju meubuh dan peukayan gobnyan ka jeuet keuputeh meuble-ble cahya. ngon hana teusangka-sangka, teuka kheueh keunan dua droe ureueng, nabi musa ngon nabi ilyas geujak peuleumah droe deungon cahya nibak syeuruga. awaknyan geumeututoe ngon isa keuhai gobnyan mate nyang hana treb le teuma geuras di yerusalem. bak watee nyan petrus dan rakan-rakan gobnyan ka teunget, dan deungon hana jisangka-sangka gobnyan teujaga laju jibeudoh, dan laju jingeng isa muble-ble cahya dan na dua droe ureueng ka teudong ngon gobnyan. watee bandua droe ureueng nyan keuneuk tinggai isa, petrus laju jipeugah ubak gobnyan, "bapak guree, mangat that tanyoe bak teupat nyoe. bah kheueh kamoe jak peudong lhee boh khimah: saboh keu bapak, saboh keu nabi musa, dan saboh teuk keu nabi ilyas." (petrus jipeugah meunan deungon hana jituoeh peuphom peu nyang ka jipeugah nyan.) teungoh petrus mantong jipeugah haba, teuka kheueh saboh gunulong awan, di awan nyan laju jipeupayong ateuheh awaknyan, sampoe awaknyan teumakot that. oh lheureh nyan nibak lam awan nyan teudeungoe kheueh su nyang teupeugah lagee nyoe, "nyoe kheueh aneuk ulon nyang ulon pileh. deungoe kheueh peue nyang jipeugah!" oh ka lheureh su nyan hana teudeungoe le, laju jingeng le awaknyan isa sidroe kong teudong nibak teupat nyan. murit-murit isa seungab mantong keuhai banmandum nyan, dan hana jipeugah baksoe mantong keuhai peue nyang ka lheureh jikalon. oh singoh beungoh isa ngon ban lhee droe murit geuh nyan laju geutron nibak gunong nyan, dan di ureueng rame laju jikak ubak gobnyan. na sidroe ureueng agam lamkawan ureueng rame nyan jiteumawok ubak isa, "bapak guree, neutulong jak kalon aneuk ulon - jih nyan kheueh sidroe kong aneuk ulon, neutulong ulon bapak guree! meunyoel roh jeuhet jiteuka dan jitamong lam tuboh jihnyan, badan jih laju teubot-bot ngon teuleunteuk-leunteuk sira jiklik-klik dan babah jih mukuboh-kuboh. roh nyan hana jipioh jiseksa aneuk nyan dan hana jitem teubiet lam tuboh jihnyan! ka lheureh ulon lakee ubak murit-murit bapak mangat jitem peuteubiet roh jeuhet nyan lam tuboh aneuk ulon, teuma awaknyan hana hase

jipeuteubiet." geujaweueb le isa, "hana wayang gata nyoe! biet-biet gata nyoe ureueng nyang meunyeuleweng dan hana tapeucaya! sampoe an pajan haroh lon tinggai meusajan ngon gata dan ulon saba ateuah gata? ba laju aneuek nyan keunoel!" teun-goh aneuek nyan jijak ubak isa, roh jeuhet nyang na lam tuboh aneuek nyan laju jiseumpom aneuek nyan sampoe-sampoe badan aneuek nyan teubot-bot ngon teuleunteuk-leunteuk. teuma isa laju geupeurintah roh jeuhet nyan mangat jiteubiet dan bak watee nyan cit aneuek nyan ka puleh. dan aneuek nyan pih laju geujok lom ubak ayah jih. banmandum ureueng hireuen watee jingiang kuasa po teu alah nyang rayeuk nyan. watee ureueng rame mantong teuhireuen-hireuen jikalon peu nyang ka geupeubuet nyan, isa laju geupeugah ubak murit-murit geuh, "simak kheueh beuget-get dan bek tuwoe peue nyang ulon peugah nyoe: aneuek manusia teuma jijok ubak kuasa manusia." teuma le murit-murit isa nyan hana muphom peue nyang geupeugah le gobnyan. hainyan geusom nibak awaknyan mangat awaknyan hana muphom. teuma awaknyan teumakot jitanyong hai nyan ubak gobnyan. murit-murit isa keudroe ka jimeudakwa sabe keudroe-droe keuhai soe nyang paleng rayeuk lamkawan awaknyan. isa geuteupeue peue nyang jipike le awaknyan, sabab nyan kheueh laju geucok sidroe aneuek ubit dan laju geupeudong aneuek nyan bak binah gobnyan. dan laju geupeugah ubak murit-murit gobnyan, "ureueng nyang jiteurimong aneuek nyoe ngon sabab le ulon, saban cit jihnyan ka jiteurimong ulon. dan ureueng nyang teurimong ulon, saban cit ka jiteurimong gobnyan nyang utus ulon. sabab ureueng nyang paleng ubit lamkawan gata nyoe, nyan kheueh nyang paleng rayeuk!" yahya jipeugah, "po, na kamoe ngieng ureueng laen ji use ibilih ateuah nan po, kamoe tam ureueng nyan, sabab jihnyan bukan ureueng geutanyoe." "bek gata tam jihnyan," kheun isa ubak yahya dan murit-murit gobnyan nyang laen, "sabab ureueng nyang hana jilawan gata, saban cit jihnyan jidong blaih gata." watee ka to that saat jih isa teubeut lam syeuruga, laju geucok peunutoh keu geujak u yerusalem. dan geuyue laju ureueng laen leubeh awak nibak gobnyan. ureueng-ureueng nyang geuyue nyan laju jijak, dan jitamong laju lam saboh gampong nyang na di samaria keu jipeusiab sigala sisuatu guna keu teusambot isa. teuma di ureueng-ureueng nyang na lam gampong nyan hana jiteurimong isa geujak keunan, sabab ka jeulaih that gobnyan teungoh geujak u yerusalem. dan watee murit-murit isa, yakobus ngon yahya jiteupeu keuhai nyan, laju jipeugah le awaknyan, "tuhan, peu kheueh tuhan neutem, kamoe lakee apui mangat jitron nibak langet keu teupeubinasa banmandum ureueng nyoe?" isa laju geupaleng bak murit-murit geuh nyan sira geubeungeh bak awaknyan. oh ltheuehnyan awaknyan laju geujak u gampong laen. teungoh geujak isa ngon murit-murit gobnyan, na ureueng jipeugah ubak gobnyan, "bapak, ulon kutem seutot bapak ho mantong nyang bapak jak!" geujaweueb le isa, "asee srigala na uruek, dan cicem na empung, meunyo aneuek manusia hana teupmat eh." dan geupeugah laju le isa ubak ureueng laen, "seutot kheueh ulon." teuma ureueng nyan jipeu-

gah, "bapak, neupeu idhin kheueh ulon woe leubeh ilee lon jak kubu ayah ulon nyang ka mate." geujaweueb le isa, "bah kheueh ureueng mate jipeukubu ureueng mate keudroe. teuma digata, jak laju dan gata peusampoe bahwa allah ka geupeu phon mat peurintah." na teuma ureueng laen jipeugah lagee nyoe, "bapak, ulon kutem seutot bapak, teuma neupeu idhin kheueh ulon ilee keu lon jak peugah u rumoh." isa geupeugah ubak ureueng nyan, "ureueng nyang ka jipeuphon meu-ueue, laju jingiang u likot, ureueng nyang lagee nyan hana patot jeuet keu umat po teu allah." oh ltheuehnyan tuhan geupileh lom tujoh ploah droe murit geuh, laju geu-utus awaknyan dua-dua droe u tieb-tieb banda dan daerah-daerah nyang teuma geujak keunan leubeh awai nibak gobnyan. "hase nyang teuma teupot jai that," kheun gobnyan ubak awaknyan, "teuma nyang mubuet keu jipot nyan cit bacut. sabab nyan, lakee kheueh ubak ureueng po ladang mangat jihnyan jikirem ureueng mubuet keu jipot hase seunaman jih nyan. nyan, jak kheueh laju! ulon utus gata lagee bubiri lam kawan asee srigala. bek gata ba baluem atawa uempang teupmat pasoe hase seudeukah, atawa sipatu. bek gata ploh bak teungoh rot ueh keu gata bot saleuem ubak soe mantong. meunyo gata tamong lam saboh rumoh, gata bot kheueh saleuem, 'assalamualaikum.' meunyo lam rumoh nyan na ureueng nyang galak keu dame, saleuem dame gata nyan teutab tinggai bak ureueng nyan; meunyo han, gata tarek kheueh lom saleuem nyang ka gata bri nyan. tinggai kheueh lam saboh rumoh mantong. teurimong kheueh peue nyang jihidang le ureueng po rumoh keu gata, sabab ureueng nyang mubuet nahak jiteurimong upah. bek minah-minah nibak saboh rumoh u rumoh nyang laen. meunyo gata tajak ubak saboh banda dan lam banda nyan gata jiteurimong ngon cara get-get, gata pajoh kheueh peue nyang jihidang ukeue gata. gata peupuleh kheueh ureueng-ureueng nyang saket nyang na lam banda nyan, dan gata peusampoe kheueh ubak ureueng-ureueng nyang na disinan, 'allah deungon sigra teuma geupeu phon mat peurintah sibagoe raja di teungoh-teungoh gata.' teuma meunyo gata tajak bak saboh banda lam banda nyan gata hana jiteurimong, gata teubiet kheueh bak rot ueh dan gata peugah kheueh lagee nyoe, 'bah kheueh abee banda gata nyang meuleukek bak gaki kamoe, kamoe reuteuk sibagoe peuingat keu gata. dan beugata teupeu kheueh, karab that watee jih allah geupeu phon mat peurintah sibagoe raja di teungoh-teungoh gata!' ingat kheueh, bak uroe kiamat singoh, ureueng sodom teuma leubeh mudah geupeu amphon le po teu alah nibak ureueng nyang na lam banda nyan!" "cilaka kheueh gata, hei korazim! dan cilaka kheueh gata, hei betsaida! seukira jih buet-buet ajaeb nyang ka teupeubuet di teungoh-teungoh gata ka teupeuleumah di banda tirus dan sidon, ka pasti ureueng-ureueng nyang na lam banda nyan ka treb that jitobat nibak banmandum desya-desya awaknyan, lom jimgui peukayan meukabong sira jiboh abee ateuah ulee jih keudroe. watee uroe kiamat singoh, ureueng-ureueng nyang na lam banda tirus ngon sidon teuma leubeh mudah geupeu amphon le po teu allah nibak gata. dana gata, hei kapernaum! gata pike, gata

nyan teuma teupeumanyang sampoe u lam syeuruga? hana! sikeubit jih gata nyan teuma teurhom lam apui nuraka!" dan laju geupeugah le isa ubak murit-murit geuh, "ureueng nyang jideungoe gata, saban cit ka jideungoe ulon. ureueng nyang tulak gata, saban cit ka jitulak ulon. dan ureueng nyang tulak ulon, saban cit ka jitulak gobnyan nyang utus ulon." ban tujoh ploh droe murit isa nyan jigisa ngon ate harok dan ria lumpah na. "tuhan," kheun awaknyan, "roh-roh jeuhet pih jitaat ubak kamoe meunyoee kamoe peurintah awaknyan ateuah nan tuhan!" geujaweueb le isa, "na ulon kalon iblih rhot ateuah langet lagee kilat. bu-tateupeu kheueh! ubak gata ka ulon bri kuasa mang-gata gata jeuet gata giloe uleueu ngon kala mubisa dan gata peupatah bubena teunaga musoh, hana sapue pih nyang hase jipeubala ateuah gata. bah kheueh meunan bek that meusukaria sabab roh-roh jeuhet jitaat ubak gata. leubeh get gata meusukaria sabab nan gata ka tuacetet lam syeuruga." bak watee nyan cit teuma, isa galak that ate sabab gobnyan ka jikuasa le roh allah. geupeugah le isa, "bakap, tuhan nyang mat kuasa ateuah langet ngon bumoe! ulon meuturimong gaseh ubak droeneueh sabab banmandum nyan droeneueh rahsia nibak ureueng-ureueng nyang carong dan meu ieleume, teuma droeneueh tunyok ubak ureueng-ureueng nyang hana sikula. nyan kheueh nyang peugalak ate bakap. peue-peue mantong ka geuseurah le bakap ubak ulon. hana meusidroe pih nyang jituri keu aneuek, meunyoee kon bakap keudroe. hana nyang turi ubak bakap meunyoee kon aneuek; dan ureueng-ureueng ubak soe aneuek nyan jitem peuturi bakap" dan isa laju geupaleng ubak murit-murit geuh, dan oh lheureh nyan geupeugah ubak awaknyan keudroe, "meu-untong that gata sabab ka gata kalon nyang gata ngieng nibak saat nyoe. sabab ingat: dumna nabi dan raja meuheuet that keuneuk jikalon lagee nyang gata ngieng bak watee nyoe teuma awaknyan teutab hana deuh jikalon. awaknyan meuheuet that jike-uneuk deungoe nyang gata deungoe bak watee nyoe, teuma awaknyan teutab hana jiteume deungoe." oh lheurehnyan na sidroe guree agama teuka keu jike-uneuk jeubak isa. ureueng nyan jityanyong meunoe, "bakap guree, peu nyang haroh ulon peubuet mangat ulon jeuet meuteume udeb seujati dan keukai?" geujaweueb le isa, "peue nyang na teuteuleh lam alkitab? pakriban peundapat gata keuhai nyan?" jijaweueb le ureueng nyan, " 'cinta kheueh ubak tuhan allah gata deungon ate nyang sunggoh-sunggoh, deungon sige-unab jiwa gata, dan deungon banmandum akai budho gata,' dan 'cinta kheueh seusabe gata manusia lagee gata cinta ubak droe keudroe gata.' " "peue nyang gata jaweueb nyan beutoi," kheun isa. "peubuet kheueh lagee nyan, teuma gata meuteume udeb." teuma le guree agama nyan keuneuk jipeubeutoi droe keudroe jih. laju jityanyong, "soe nyang teupeugah seusabe keudroe lon nyan?" geujaweueb le isa, "na sidroe ureueng agam jitron rot yerusalem jijak u yerikho. bak te-ungoh rot ueh ureueng nyan laju jiseurang le peurampok, peue-peue nyang na jiba le ureueng nyan habeh jireupah, kon nyan mantong ureueng nyan pih jipoh siteungoh mate, dan oh lheureh nyan laju jiting-gai ateuah rot ueh nyan lam keuadaan ureueng nyan

luka-luka parah lumpah na. hana teujalok lam ate na sidroe imeum pih geujak ateuah rot nyan. watee ge-ungie ureueng nyang luka brat nyan, laju jipeusie rot bineh laen, dan jijak laju. meunan cit deun-gon sidroe ureueng lewi nyang jijak rot nyan; watee jikalon ureueng nyan, laju jipeurab keu jitlek soe ureueng nyang luka brat nyan. dan dijih pih laju jipeusie u meurandeh jalan, dan jijak laju. teuma na sidroe ureueng samaria nyang teungoh jijak bak rot nyan. watee jingie ureueng nyang teutiek lam keuadaan luka brat nyan, laju jiteuka weueh lam ate jih. dan laju jipeurab bak ureueng nyan dan jipeugleh laju luka-luka nyang na bak tuboh ureueng nyan ngon ie anggo dan jiboh ubat ngon minyeuk, oh lheureh nyan luka-luka nyang bak tuboh ureueng nyan laju jibalot ngon ija. oh lheurehnyan, laju jipeuek ureueng nyan ateuah keuleudee jih keudroe, dan laju jiba ubak los-men nibak tempat nyan kheueh ureueng nyang ke-unong reupah nyan jipeu-ubat sira jirawat. oh sin-goh beungoh le ureueng samaria nyan laju jicok dua boh keupeng peng pirak peng nyan laju jijok ubak ureueng po losmen nyan sira jipeugah, 'neu-useuha kheueh ureueng nyoe sampoe puleh, dan meunyoee na biaya-biaya nyang laen, ulon bayeue teuma wa-tee ulon gisa bak tempat nyoe.' " oh lheureh nyan isa geupeu putoh calitra nyan deungon geutanyong lagee nyoe, "nibak ban lhee droe ureueng nyan, nyang toh kheueh, meunurot pikeran gata, nyang jipeubuet sibagoe sabe keudroe-droe nibak ureueng nyang ke-unong reupah nyan?" guree agama nyang teutanyong nyan jijaweueb, "ureueng nyang ka jitulung ureueng nyang keunong rampok nyan." "nyan, gata jak kheueh, dan gata peubuet kheueh lagee nyang ka jipeubuet le ureueng samaria nyan!" kheun isa. oh lheureh nyan isa ngon murit-murit gobnyan geujak lom ho laen teuma, dan trok laju bak saboh gam-pong. lam gampang nyan, na sidroe ureueng in-ong nyan nan jih marta, ureueng inong nyan jiun-dang isa u rumoh jih. marta na syedara jih nyang inong nan jih maryam. maryam nyoe jiduek rab ngon tuhan isa jideungoe peue-peue nyang geupeu-runoe le gobnyan. teuma si marta laloe bak dapu jipeusiab peue-peue mantong nyang peureulee keu jipeujame isa. oh lheureh nyan laju jijak ubak isa sira jipeugah, "tuhan, peu kheueh tuhan hana neupakoe bak maryam nyang jipeubiyeu mantong ulon meubuet keudroe? neuyee kheueh jeuet jitulung ulon!" "marta, marta!" jaweueb tuhan. "gata khawate daloh alah gata pike jeh nyoe; padahai nyang paleng peunteng na kheueh saboh. dan maryam ka jipileh nyang paleng get, nyang hana teuma teucok nibak jih nyan." bak siuroe isa geumeudoe bak saboh tempat. oh ka lheureh meudoe, sidroe lamkawan murit gobnyan jityanyong lagee nyoe, "tuhan, cineu-peurunoe kamoe meudoe lagee nabi yahya geupeu-runoe murit-murit gobnyan meudoe." teuma isa laju geupeugah ubak awaknyan, "meunyoee gata meudoe, peugah kheueh lagee nyoe, 'bakap, droeneueh kheueh allah nyang esa. seumoga droeneueh jiseumah ngon jihoreumat. neubri kheueh keu kamoe tieb-tieb uroe peunajoh nyang kamoe peureulee. neupeu am-phon kheueh desya-desya kamoe, lagee kamoe me-upeu amphon ureueng-ureueng nyang na salah ni-

bak kamoe. dan bek kheueh neupeubiyeu kamoe gadoh peucaya kamoe watee kamoe keunong peudaya." "isa geupeugah ubak kamoe murit-murit gobnyan, "seukira jih na sidroe lamkawan gata jijak u rumoh rakan jih bak watee teungoh malam, oh troh keunan laju jipeugah, 'hei rakan mutuwah, peu-utang kheueh keu ulon lhee boh ruti, sabab rakan ulon nyang teungoh jijak, ban sagai jipioh nibak rumoh dan bak ulon hana lon keubah peunajoh keu jame nyan! meunyoer rakan nyang gata teuka nyan jiwaweub lagee nyoe, nibak lam rumoh jih, 'bek gata peusolah ulon! pin-toe ka ulon gunci dan ulon ngon aneuek peurumoh lon ka lon eh. ulon hana hase lon beudoh keu ulon bri peue nyang gata lakee." "dan pakriban?" kheun isa oh lheeuh nyan teuma. "ulon peugah, nyoe! bah kheueh gatanyan na kheueh rakan jih, jihnyan hana jitem beudoh dan jibri sapewe-sapeue keu gata. teuma sabab gata hana meurasaa malee teutab gata lakee bak jihnyan hana pioh-pioh, ureueng nyan pih laju jibeudoh laju jibri keu gata peue nyang gata lakee nyan. dan, ulon peugah ubak gata: lakee kheueh, keu gata teuma teubri; mita kheueh, nyang gata mita teuma meuteume; keutok kheueh, teuma pintoe jibuka keu gata. sabab ureueng nyang meulakee teuma jiteurimong; ureueng nyang mita teuma jiteume, dan ureueng nyang keutok, pintoe teuma jibuka. lamkawan gata nyoe peue kheueh na ayah nyang jibri uleue keu aneuek gata, meunyoer aneuek gata nyan jilakee eungkot? atawa gata bri kala itam, meunyoer nyang jilakee boh manok? bah kheueh nyan gata ureueng jeuhet, gata teutab tabri nyang jroh keu aneuek-anuek gata. peue kheueh lom bapak gata nyang na lam syeuruga! gobnyan teuma geubri roh geuh keu ureueng nyang lakee ubak gobnyan!" bak siuroe isa geu-use roh jeuhet nyang jitamong lam tuboh sidroe ureueng kalu. oh ka lheeuh jiteubiet roh jeuhet nyan, ureueng nyan laju jeuet jipeugah haba. di ureueng rame teuhireuen-hireuen, teuma na cit nyang peugah lagee nyoe, "jihnyan hase jiuse roh jeuhet sabab na beelzebul, ulee kawan roh jeuhet nyan." dan na teuma ureueng-ureueng nyang keuneuk jeubak isa, di awaknyan laju jilakee ubak gobnyan mangat geupeubuet buet-buet nyang ajaeb sibagoe tanda bahwa gobnyan biet-biet teuka nibak po teu allah. teuma le isa geuteupeue peue meukeusut awaknyan. dan laju geupeugah ubak awaknyan, "meunyoer na saboh nanggroe karu lam peureute-peureute nyang saleng jimeumusoh, nanggroe nyang lagee nyan han hase meuteuen. dan saboh keuluwarga nyang karu dan meumusoh sidroe ngon nyang laen, keuluwarga nyan teuma hanco. meunan cit teuma deungon keurajeuen iblih; meunyoer saboh kawan jimeulo ngon kawan nyang laen, keurajeuen nyan reuloh. gatanyoe tapeugah bahwa ulon use roh jeuhet sabab na beelzebul. meunyoer meunan, ngon kuasa soe murit-murit gata jiuse roh-roh jeuhet nyan? murit-murit gata nyan kheueh sibagoe bukeuti bahwa gatanyoe salah! teuma meunyoer ulon ku-use roh jeuhet ngon kuasa allah, nyan na kheueh sibagoe tanda bahwa allah ka geumat peurintah lamkawan gata. meunyoer na sidroe ureueng nyang teuga beuhe ngon tungang, sinjata bak jaroe jih leungkab na, jikeumiet rumoh jih keudroe, banmandum atra milek jih teuma seumat.

teuma meunyoer ureueng laen nyang leubeh teuga jajak seurang ngon jilo ureueng nyan sampoe an taloe, teuma le ureueng nyang leubeh teuganyan laju jireupah mandum sinjata nyang jipeubangga le ureueng po rumoh nyan, dan laju jibagi-bagi banmandum barang-barang ureueng nyan. ureueng nyang hana jidong blaih ulon, ureueng nyan ka jilawan ulon, dan ureueng nyang hana jitulong ulon, nyang sikeubiet jih ureueng nyan ka jipeurasak buet ulon!" "meunyoer roh jeuhet ka jitinggai sidroe-droe ureueng, rohnyan laju jimeurawoh bak teumpat-teumpat nyang tho keu jimita teumpat peunioh, teuma teumpat pioh nyang jimita nyan hana meuteume. ngon sabab nyan laju jipeugah, 'ulon teuma lom gisa u rumoh nyang ka ulon tinggai!' watee roh jeuhet nyan ka trok keunan, laju jingiang rumoh nyan ka gleh ngon teuatoe. dan laju jijak sira jiba lom tujuh droe roh jeuhet nyang leubeh jeuhet nibak jihnyan. oh lheeuhnyan laju jitamong lam tuboh ureueng nyan dan laju jitinggai disinan. dan akhe jih keuaadaan ureueng nyan leubeh brok nibak nyang ka-ka." oh ka lheeuh geupeugah lagee nyan le isa, na sidroe ureueng inong lamkawan ureueng rame nyan jipeugah ubak isa, "mubahgia that inong nyang peulahe dan nyang peumom droeneueh!" geujaweueb le isa, "leubeh mubahgia lom ureueng nyang jideungoe feureuman allah dan jipeubuet lagee kheun feureuman nyan!" teungoh ureueng rame jihudom isa nyan, gobnyan hana geupioh bak geupeugah haba, geupeugah lom le gobnyan lagee nyoe, "lumpah that jeuhet manusia bak jamen nyoe. awaknyan jilakee buet nyang ajaeb mangat jihnyan jeuet jipeucaya ubak ulon, meusaboh buet ajaeb pih hana teuma teubri keu awaknyan, seulaen keuaajaan nabi yunus. lagee nabi yanus ka jeuet keuaajaeb keu ureueng banda niniwe, meunan cit deungon aneuek manusia teuma jeuet saboh keuaajaan keu ureueng-ureueng bak jamen nyoe. watee uroe kiamat singoh, ratu nanggroe seulant teuma jibeudoh meusigoe ngon ureueng-ureueng bak jamen nyoe, dan jitudoh awaknyan. sabab keujajak deungoe peulajaran nabi sulaiman nyang bijak, ratu nyan ka jisaja jak nyang jioh lumpah na phon nibak ujung bumoe. teuma disinoe bak watee nyoe na nyang leubeh rayeuk nibak nabi sulaiman! watee uroe kiamat singoh, peunduduek niniwe teuma jibeudoh meusajan-sajan ngon ureueng jamen nyoe, dan jitudoh awaknyan, sabab ureueng niniwe nyan ka jimeutobat nibak desya-desya jih watee nabi yunus geukhutubah keu awaknyan. teuma disinoe bak watee nyoe na nyang leubeh rayeuk nibak nabi yunus!" "hana ureueng nyang jitot panyot laju jisom atawa jitob ngon guci. ureueng nyan jikeubah panyot nyan bak gaki panyot, mangat ureueng nyang tamong deuh jingiang peungeh nyang trang. mata na kheueh panyot keu tuboh. meunyoer mata gata jeureuneh, bansaboh badan gata trang bandrang. teuma meunyoer mata gata sapu, bansaboh tuboh gata ka jeuet keuseupot tan deuh sapewe. ngon sabab nyan, beuget-get kheueh, bek sampoe trang nyang ka na nibak gata nyan jeuet keuseupot. meunyoer bansaboh tuboh gata ka jeuet keutrang, dan hana meusapat pih na nyang seupot, teuma bansaboh tuboh gata nyan ka jeuet keutrang bandrang lagee keunong cahya panyot." oh ka lheeuh isa geupeugah haba nyang lagee nyan ba-

goe, na sidroe ureueng farisi ji-undang isa mangat geutem makheun di rumah jihnyan. teuma isa laju geujak u rumah ureueng farisi nyan keu geujak makheun. ureueng farisi nyan hireuen that jingieung isa geumakheun hana geu rah jaroe lagee nyang ka teatoue lam peuratoran agama. sabab nyan tuhan geupeugah ubak ureueng farisi nyan, "keubiet nyoe gata na kheueh ureueng-ureueng firisi nyang ka lazem tapeugleh cawan ngon pangan blah luwa mantong, teuma lam tuboh gata keudroe peunoh ngon buet-buet nyang jeuhet. biet-biet gatanyoe bangai that! kon kheueh allah nyang peugot blah luwa nyan, ka teuma geupeugot blah dalam jih? nyang na lam cawan dan pangan gatanyan, nyan kheueh nyang haroh gata bri keu ureueng-ureueng gasien. deungon cara nyang lagee nyan, banmandum nyan ka jeuet keu gleh keu gata. mupaloe kheueh gata, hei ureueng-ureueng farisi! hase seunaman gata lagee bak seulaseh, inggu dan mubagoe rupa reumpah nyang laen, gata bri siper siploh ubak allah, teuma keuadelan ngon geunaseh ubak po teu allah hana gata pakoe. padahai nyan kheueh nyang haroh gata peubuet, deungon hana gata peubiyeu keu nyang laen-laen. mupaloe kheueh gata, hei ureueng-ureueng farisi! gata galak that bak teumpat-teumpat nyang teuhoreumat meunyo gata tamong lam rumah-rumah iebadat, dan galak jihoreumat le gob meunyo gata jak u keude-keude. mupaloe kheueh gata, gata lagee jrat nyang hana batee nisan, nyang jigiloe-giloe le gob sabab hana jiteupeue." sidroe lamkawan guree agama nyan jipeugah ubak isa, "bapak guree, deungon tutoe droeneueh nyang lagee nyan, saban cit bapak ka neuhina kamoe!" geujaweueb le isa, "mupaloe kheueh gata, hei guree-guree agama! nyang gata lakee hai-hai nyang sulet dan gata bri atoran-atoran nyang brat-brat, teuma di gata mubacut pih hana gatatam tulang ureueng nyang peujak atoran nyang gata peugot nyan. mupaloe kheueh gata! gata peugot jirat keu nabi-nabi, nyang poh mate na kheueh indatu gata keudroe. deungon lagee nyan, gata keudroe ka gata peubutoi peue-peue nyang ka jipeubuet le indatu gata; sabab keubiet beutoi awaknyan nyang poh banmandum nabi-nabi nyan dan gata kheueh nyang peugot kuburan jih. nyang kheueh sabab jih keubijaksanaan alah geupeugah lagee nyoe, 'ulon teuma lon kirem keu awaknyan nabi-nabi dan utosan-utusan lon; siteungoh teuma jipoh mate dan siteungoh teuk ji ien-anya! allah geupeubuet lagee nyan mangat ureueng-ureueng bak jamen nyoe geuhukom sabab kajipoh mate ateuhan mandum nabi yoh awaiphon donya nyoe geucebta, phon jipoh mate habel sampoe ubak jipoh mate nabi zakharia, nyan na jih rab miseubah ngon baet tuhan. peucaya kheueh: ureueng-ureueng jamen nyoe pasti teuma teuhukom sabab banmandum nyan. mupaloe kheueh gata, hei guree-guree agama! gunci ngon peuhah pintoe peungeutahuan na teukeubah nibak gata, teuma digata keudroe hana gatatam tamong u dalam keu gata mita peungeutahuan nyan. nyang keubiet jih gata pagab-pagab ureueng-ureueng nyang jiuseuha keuneuk jitamong u dalam nyan!" watee isa geutinggai teumpat nyan, guree-guree agama dan ureueng-ureueng farisi laju jiseurapa isa deungon beungeh raya. awaknyan ka jiujo-e-ujoe kawe gobnyan

mangat geutem peugah haba keuhai-hai nyang laen teuma. dan watee jideungoe nyan awaknyan jismak get-get that guna jidrob peue-peue mantong nyang salah geupeugah haba. meuribee-ribee ureueng meusak-sak dan sampoe na nyang teugidong-gidong gaki jih. teungoh ureueng rame nyan meuhudom nibak teumpat nyan, isa laju geupeugah ubak murit-murit geuh, "beuate-ate kheueh keu ragoe ureueng firisi, nyang lon meukeusut, keuhai munafek awaknyan. hana nyang teusom nyang hana deuh teukalon, dan hana nyang teurahsia nyang hana teupeugah. nyang gata peugah watee malam, teuma teudeungoe oh watee uroe; nyang gata sah bak punyueng gob lam kama nyang teutob, teuma jipeumaklum jeueb-jeueb sagoe." "ingat kheueh, hei rakan-rakan lon! bek kheueh gata takot keu ureueng nyang hase jipoh mate tuboh teuma hana hase jipeubuet nyang leubeh nibak nyan. bah kheueh ulon tunyok ubak gata soe nyang haroh gata takot. takot kheueh ubak po teu allah! sabab oh ka kheueh gobnyan teupoh mate, gobnyan teutab na kuasa keu geutiek lam apui nuraka! peucaya kheueh, gobnyan kheueh nyang haroh gata takot. limong boh cicem tulo jipeubloe ngon yuem dua mata peng nyang paleng ubit. bah kheueh meunan hana meusaboh pih nyang geutuwoe le po teu allah. ok nyang na ateuhe ulee gata pih ka geuitong banmandum, sabab nyan bek kheueh teumakot; gata jioh leubeh muyuem nibak cicem-cicem nyan!" "ingat kheueh beu get-get nyang ulon peugah nyoe: ureueng nyang jiangkee ulon dikeue rakyat ba ureueng nyan na kheueh murit ulon, jihnyan pih teuma geuangkee le aneuek manusia dikeue malaikat-malaikat allah. teuma ureueng nyang bantah ulon dikeue rakyatba bahwa jihnyan geubantah murit ulon, jihnyan geubantah cit teuma le aneuek manusia dikeue malaikat-malaikat allah. meunyo na ureueng jipeugah nyang kon-kon dan jibantah keuhai aneuek manusia, ureueng nyan mantong jeuet teupeu amphon; teuma meunyo jihnyan jihina roh po teu allah, ureueng nyan hana jeuet teupeu amphon. meunyo gata jiba u rumah-rumah iebadat keu jijak ba lam sidang dikeue peumeurintah atawa nyang mat kuasa, bek kheueh sosah ate gata pakriban gata haroh tabila droe atawa peue nyang haroh gata peugah. sabab peue nyang haroh gata peugahnyan teuma geupurunoe le roh allah ubak gata oh trok bak watee." na sidroe ureueng lamkawan ureueng rame nyan jipeugah ubak isa, "bapak guree, cineuyue ubak syedara lon mangat jibri keu ulon siparo nibak hareuta nyang geutinggai le ayah kamoe." geujaweueb le isa, "syedara, soe kheueh nyang ka peujeuet ulon jeuet keuhakem atawa nyang weuek atra waresan keu gata mandua?" oh lheurehnyan ubak banmandum ureueng nyang na disinan geupeugah le isa, "ate-ate kheueh dan beuwaih-waih kheueh, bek sampoe gata jeuet keu ureueng leuha. sabab manusia udeh hana meugantung bak atra keukayaan jih mantong, bah kheueh nyan atra jih jai meukuyan-kuyan." dan isa laju geupeugah saboh miseue nyang laen lagee nyoe, "na sidroe ureueng kaya. ureueng nyan na tanoh nyang jai that jibri hase. ureueng kaya nyan ka teupike lam ate jih, 'ka hana le teumpat keu lon keubah hase tanoh lon. peue akai ulon ji-

noenyoe?' oh ltheuehnyan ureueng kaya nyan jipike lom jikheun ubak droe jih keudroe, 'nyan, lon na akai; gudang-gudang ulon lon yue reuloh oh ltheuehnyan ulon yue peudong nyang leubeh rayeuk. disinan kheueh teuma ulon keubah banmandum gandom lon meunan cit deungon barang-barang ulon nyang laen. oh ltheueh nyan teuma ulon peugah ubak droe lon keudroe: gata meu-untong! banmandum nyang get ka na bak gata dan hana teuma habeh meuthonthon. meureuhat kheueh gata bak saat nyoe! eh-eh pajoh kheueh mantong dan peuguna kheueh nekmata udeb gata!' teuma po teu allah geupeugah ubak gobnyan, 'hei ureueng bangai! malam nyoe cit gata teuma mate, dan soe kheueh nyang cok banmandum atra keukayaan nyang ka gata peusapat keu droe gata nyan?' meunan kheueh jeuet jih deungon tieb-tieb ureueng nyang jiseuha jeuet keu ureueng kaya keudroe jih keudroe, teuma hana jiseuha jeuet keu ureueng kaya dikeue po teu allah.' dan isa laju geupeugah ubak murit-murit gobnyan, "nyan kheueh sabab jih ulon peugah, 'bek kheueh khawate keuhai udeb gata, peue nyang teuma gata pajoh, dan peuteuma nyang teuma gata ngui.' udebnyoe na kheueh leubeh nibak peunajoh, dan tuboh leubeh nibak peukayan. gata ngieng kheueh cicem po! cicem nyan hana jipula, hana teuma peue nyan jipot, dan meunan cit hana jipeuget gupok keuteumpat jikeubah peunajoh jih. teuma, po teu allah teutab geupeulara beulatang nyan! teuma digata leubeh meuhareuga nibak cicem-cicem nyan! soe kheueh nibak gatanyoe nyang sabab jih khawate jeuet jipeupanyang umu jih bah pih bacut? meunyoeh hai nyang ubit lagee nyan ka hana hase gata peubuet, pakon gata khawate keuhai-hai nyang laen? dan gata ngieng kheueh pakriban bungong-bungong bakong jitimoh; bungong-bungong bakong nyan hana jimubuet, dan hana teuma jimeurajot. nabi raja sulaiman nyang meunan meugah ngon kaya hana peukayan gobnyan nyang saban lagak jih lagee bungong bakong nyan! naleueng lam blang uroe nyoe timoh singoh teutot. teuma po teu allah teutab geupeusanuet naleueng nyan mangat teutab ceudah. peuteuk lom gata! teuma digata kureueng peucaya! ngon sabab nyan, bek kheueh khawate dan bingong keuhai peue nyang gata pajoh ngon gata jieb. hai-hai nyang lagee nyan jipeubuet ngon jitiyeub le ureueng-ureueng nyang hana jittiri po teu allah. padahai bapak gata geuteupeue bahwa gata tapeureulee banmandum nyan. teuma gata haroh ta useuha mangat po teu allah geupeurintah lam udeb gata, deungon lagee nyan nyang laen-laen teuma geubri le allah keu gata." "gata nyang bacut jeumeulah jih, bek kheueh teumakot! sabab bapak gata galak geubri keu gata beureukat nibak peumeurintahan gobnyan. peubloe kheueh atra milk gata dan gata bri kheueh peng nyan keu ureueng gasien. peuget kheueh keu droe gata baluem nyang hana useueng-useueng, na kheueh atra nyang teukeubah lam syeuruga. atranyan hana jitem gadoh sabab pancuri hana jeuet jicok dan keuralaeub hana jeuet jikab. sabab dipat na atra gata, nibak teumpat nyan kheueh teuma na ate gata!" "meujaga-jaga kheueh watee meuhadab ubak tieb-tieb hai. gata haroh sabe lam siab ngon peukayan bak tuboh meunan cit deungon panyot sabe lam keuadaan hu, sa-

ban lagee peulayan-peulayan nyang ka siab jipreh po jih jiwoe nibak teumpat ureueng meukawen. meunyoeh po jih nyan jiwoe dan jikeutok pintoe, bagaih that awaknyan jibuka pintoe. mubahgia that peulayan-peulayan nyan watee jiwoe po jih cit ka teupreh-preh. peucaya kheueh: po nyan ka siab-siab dan jiyue-duek peulayan-peulayan jih nyan, oh ltheueh nyan laju jipeutimang awaknyan. lumpah mubahgia peulayan-peulayan nyan watee jiwoe po jih awaknyan mantong lam keuadaan meujaga, bah pih po jih nyan jiwoe watee ka teungoh malam atawa liwat nibak nyan! ingat kheueh nyoe! meunyoeh ureueng po rumah nyan jiteupeu poh padub pancuri nyan jitamong lam rumah jih, ureueng nyan teutab jikeumiet pancuri nyan bek jitamong lam rumah jih. sabab nyan, gata pih haroh beusiab-siab, sabab aneuek manusia teuma teuka bak watee nyang gata keudroe hana gata sangka-sangka." "tuhun, peu kheueh peungajaran nyan tuhan tunyok keu kamoe keu banmandum manusia?" jityanyong le petrus. geujaweueb le isa, "soe peulayan nyang seutia dan bijaksana sampoe jiangkat le po jih jeuet keumando ateuhe peulayan-peulayan nyang laen sampoe awaknyan jibri makheun oh trok bak watee? biet-biet mubahgia peulayan nyan watee po jih jiwoe dan jikalon peulayan nyan teungoh jipeubuet tugaih droe jih! peucaya kheueh: po jihnyan teuma jipeucaya banmandum atra jih ubak peulayan jih nyan. teuma meunyoeh peulayan nyan jikheun lam ate jih, 'po ulon mantong treb geugisa,' dan laju jipoh mandum peulayan nyang laen dan jimakheun ngon jijieb ie sampoe an mabok, teuma po jih laju jiwoe bak jeuem dan watee nyang hana jisangka-sangka. dan peulayan nyan laju jipoh sikeubiet-keubiet jih le po jihnyan dan jipeujeuet lagee naseb ureueng-ureueng nyang hana taat ubak po teu allah. peulayan nyang jiteupeu keuheundak po jih, teuma jihnyan hana meusiab-siab dan hana jipeubuet lagee nyang jikeuheundak le po jih, peulayan nyan teuma jiseunuet sikeubiet-keubiet jih. teuma peulayan nyang hana jiteupeu keuheundak po jih, oh ltheueh nyan jipeubuet buet-buet nyang salah sampoe haroh teuseunuet, teuma teuseunuet bacut mantong. sabab ureueng nyang ka ltheueh teubri nyang jai, nibak ureueng nyan teuma teulakee nyang leubeh jai lom. dan keu ureueng nyang teupeucaya nyang jai, nibak ureueng nyan teuma teulakee nyang leubeh jai lom." "ulon teuka keu lon ba apui sampoe habeh tutong bansaboh bumoe nyoe. paleng get meunyoeh apui ka hu! mantong na bala nyang paleng hebat nyang haroh ulon tanggong. dan ate ulon apoh apah that sigohlom hainyan teujadi. peu kheueh gata pike ulon teuka keu lon ba dame ateuhe rhung donya? hana, kon dame nyang ulon ba, nyang ulon ba na kheueh peudeueng. phon nibak saat nyoe, saboh keuluwarga nyang na limong droe teuma jimeudakwa sabe, lhee lawan dua. bapak jilawan aneuek jih nyang agam dan aneuek jih nyang agam teuma jilawan bapak jih. ma jilawan aneuek jih nyang inong dan aneuek jih nyang inong teuma jilawan ma jih. ma tuwan jilawan meulintee jih nyang inong dan meulintee nyang inong teuma jilawan ma tuwan." dikeueh ureueng rame nyang na nibak teumpat nyan geumeututoe cit isa, "meunyoeh gata ngieng awan ji ek rot siblahi u barat, bubagaih that

gata peugah, 'hana treb le jitron ujeuen.' dan biet-biet jitron ujeuen. meunyo gata rasa angen teuka rot sibalih seultan, laju gata peugah, 'hana treb le jiteuka seu-eum.' dan biet-biet seu-eum teuka. gata ureueng nyang galak bak buet pura-pura! gata hase gata ramai ikeulem deungon gata ngieng keuadaan langet dan bumoe. pakon tanda-tanda jamen nyoe hana hase gata ramai?" "pakon hana gata peuputoh keudroe peue nyang beutoi? meunyo ureueng jik-jak gadu gata ubak kanto hakem, gata useuha kheueh keu meuteume gata peuseuleusoe peukara nyan ngon ureueng nyan sigohlom troh u kanto hakem. meunyo han, eunteuk jihnyan jihila gata u keue hakem dan hakem nyan teuma jikok gata ubak peulisi, dan peulisi jipeutamong gata lam glab. peucaya kheueh! gata hana teuma tateubiet lam glab sigohlom hukom gata seuleusoe." bak watee nyan na padubdroe ureueng jicalitra ubak isa keuhai ureueng-ureueng galilea nyang jipoh mate le pilatus, watee awaknyan teungoh jipeuseumah keureubeuen keu po teu allah. watee geudeungoe calitranyan, laju geupeugah le isa, "sabab ureueng-ureueng galilea nyan jipoh mate lagee nyan bagoe, gata pike nyan sibagoe bukeuti awaknyan leubeh meudesya nibak mandum ureueng galilea nyang laen?" sagai-sagai kon lagee nyang gata pike nyan! teuma ingat kheueh: meunyo gata hana gata tobat nibak desya-desya gata, banmandum gata teuma mate saban lagee awaknyan. pakriban teuma ngon lapan blaih droe ureueng nyang mate di siloam, watee meunara reubah laju jitimok atueh awaknyan? gata pike awaknyan leubeh meudesya nibak mandum ureueng nyang na di yerasalem? sagai-sagai kon lagee nyang gata pike nyan! sigoe teuk ulon peugah ubak gata: meunyo gata tatobat nibak mandum desya-desya gata, gata banmandum teuma mate saban lagee awaknyan." oh lleueh nyan isa geucalitra teuma hai lagee nyoe, "na sidroe ureueng lam lampoh anggo jih na jitimoh bak ara. bak siuroe jik-jak kheueh ureueng nyan keuneuk jimita boh kayee nyan, oh trok keunan hana jiteume boh ara nyang jimeuheuet nyan. ban jingieng bak kayee nyan hana muboh, laju jipeugah ubak namiet nyang jaga lampoh anggo nyan, 'kalon, ka lhee thon ulon preh-preh jimuboh bak ara nyang na lam lampoh nyoe, teutab hana lon teume meusaboh boh ara. gata koh mantong bak ara nyoe! deungon na jih udeb lam lampoh nyoe hana meuguna keu ulon, nyang na jipeu habeh zat tanoh mantong! teuma jijaweueb le namiet nyang meubuet bak lampoh nyan, 'bah kheueh jitimoh sithon teuk, hei po. ulon teuma lon catok tanoh bansikeulileng dan ulon boh baja nyang leubeh jai lom. pat tateupeue thon ukeue nyoe jimuboh. meunyo hana cit jimuboh, jeuet po yue bak ulon mangat ulon teubang bak ara nyang hana meuguna nyan." "bak siuroe na kheueh uroe sabat, isa teungoh geuseumeubeuet lam saboh rumoh iebadat. bak teumpat nyan na sidroe ureueng inong nyang ka lapan blaih thon saket, sabab na jitamong roh jeuhet lam tuboh ureueng nyan. inong nyan bungkok dan mubacut pih hana jeuet jidong tupat. watee hai nyan geungieng le isa, laju geupeugah bak inong bungkok nyan, 'hei ma, droeneuh ka puleh nibak peunyakot nyang na lam tuboh neueh!" dan isa laju geupeuduek

jaroe geuh atueh ureueng inong nyan, watee nyan cit teuma ureueng inong tuha bungkok nyan ka jeuet jidong tupat laju jipujoe po teu allah. ulee rumoh iebadat nyang na disinan beungeh raya, sabab isa geupeu puleh gob bak ureueng sabat, sabab nyan laju jipeugah ubak ureueng-ureueng nyang na disinan, "na nam uroe keu tamubuet; teuka kheueh bak uroe-uroe mubuet nyan keu jeuet teupeupuleh nibak mubagoe peunyakot, bek bak uroe sabat lagee nyoe bagoe!" geujaweueb le isa, "gata nyoe mandum ureueng munafeh! bak uroe sabat banmandum ureueng jipeuleueh leumo atawa keuleudee jih lam weue dan laju jiba uluwa keu jipeujieb ie keu beulatang nyan. nyan, disinon na sidroe ureueng keuturo-nan nabi ibrahim, nyang ka lapan blaih thon treb jih inong nyoe jik-ikat le iblih. peu kheueh inong nyoe hana jeuet jipeuleueh droe bak uroe sabat?" "peu nyang geujaweueb le isa nyan lumpah that malee nibak lawan-lawan gobnyan; teuma banmandum ureueng laen nyang na disinan galak that buet-buet ajaeb nyang ka geupeubuet le isa isa geuteumanyong bak awaknyan, "meunyo po teu allah ka geumat peurintah, pakriban kheueh keuadaan jih? ngon peu kheueh jeuet ulon peubeda atra nyan? keuadaan jih lagee miseue nyoe. si aneuek bijeh sisawi jicok le sidroe-droe ureueng dan laju jipula lam lampoh jih. bijeh nyan timoh laju jeuet keu bak kayee, dan cicem-cicem laju jipeugot eumpung atueh bak kayee nyan." sigoe teuk geutanyong le isa, "meunyo allah kageumat peurintah, ngon peu kheueh jeuet lon peusa keuadaan jih? keuadaan jih lagee ragoe nyang jicok le sidroe ureueng inong laju jilawok ngon peuet ploah aree teupong, sampoe meukeumang banmandum." sira geujak u yerasalem, isa geujak meulalu banda-banda dan gampong-gampong sira geuseumeubeuet bak teumpat-teumpat nyan. dan na ureueng teumanyong ubak gobnyan, "bakak, peu kheueh cit bacut sagai ureueng nyan teupeuseulamat?" geujaweueb le isa, "meu-useuha kheueh gata tamong rot babah pintoe nyang sampiek. sabab, ingat! jai that-that ureueng nyang ji useuha jikeuneuk tamong teuma meuteume. watee ureueng po rumoh jibeudoh dan jitob pintoe, gata kateudong diluwa dan laju gata keutok-keutok sira gata peugah lagee nyoe, 'po lon, neupeuhah kheueh pintoe keukamoe! ureueng po rumoh nyan teuma jijaweueb, 'ulon hana lon teupeu rot pat gata teuka!' gata teuma tajaweueb, 'kamoe ka lleueh kamoe makheun ngon kamoe jieb ie ngon droeneuh, dan droeneuh pih ka lleueh neuseumeubeuet bak rot euh lam banda-banda kamoe! teuma po rumoh nyan jipeugah lom, 'ulon hana lon teupeu rot pat gata teuka. jak weeh keudeh, gata nyang ka gata peubuet buet nyang jeuhet!" watee gata ngieng nabi ibrahim nabi ishaq dan nabi yakub dan banmandum nabi meugalak ria lam donya baro allah, gata teuma tamo deungon deurita sabab gata keudroe ka teu-use uluwa! bube na ureueng rame teuma teuka phon nibak blaih timu sampoe nyang na nibak blaih barat, phon nibak utara ngon seultan, dan teuma meugalak ria lam donya baro allah. nyang sikeubit jih, na ureueng nyang paleng akhe jeuet keu ureueng nyang phon, dan na ureueng nyang phon nyang teuma jeuet keu ureueng nyang akhe." watee nyan cit teuma,

na meupadub droe ureueng farisi jijak meurumpok ngon isa sira jipeugah, "droeneuh bek tinggai disinoel! jak laju uteupat laen, sabab herodes jikeuneuk poh mate droeneuh." geujaweueb le isa, "gata jak peugah laju ubak ureueng nyang tan meuguna nyan, 'uroe nyoe ngon singoh ulon use roh jeuhet dan lon peupuleh ureueng saket, teuma bak uroe nyang keu lhee, teuma lon peuseuleusoe banmandum buet ulon.' bah pih meunan bak uroe nyoe singoh dan lusa teutab ulon jak meuneujak ulon, sabab hana get meunyo sidroe nabi jipoh mate diluwa yerasalem. yerasalem, yerasalem! nabi-nabi gata peumate! utosan-utosan allah gata geulawa ngon batee sampoe mate! ka padub goe ulon keuneuk wa peunduduek gata lagee nang manok nyang juem banmandum aneuek jih dimiyueb sayeueb, teuma gata hana tatem! sabab nyan po teu allah hana geutem le meusajan gata. butateupeue kheueh, phon saat nyoe gata hana le gata ngieng ulon, sampoe singoh gata peugah, 'geubri kheueh beureukat gobnyan nyang teuka ateuheh nan tuhan.' " bak siuroe na kheueh uroe sabat, isa geujak makheun u rumoh sidroe ureueng tokoh bansa farisi. nibak teupat nyan di ureueng laen jingingi isa ngon teuliti that. dan jijak kheueh ubak isa sidroe ureueng saket busong gaki ngon jaroe jih ka gumbong-gumbong. dan isa laju geutanyong ubak guree-guree agama dan ureueng-ureueng farisi nyang na nibak teupat nyan, "meunurot hukom agama geutanyoe, peu kheueh jeuet atawa hana tapeu-ubat ureueng saket bak uroe sabat?" guree-guree agama dan ureueng-ureueng farisi nyang na disinan seungab mantong. dan laju isa geuhoi ureueng nyan dan laju geupeu puleh ureueng saket busong nyan, oh lheeuh nyan laju geuyue jak ureueng nyang ka puleh nyan. oh ka lheeuh nyan isa laju geupeugah ubak ureueng-ureueng nyang na inan, "seukira jih sidroe lamkawan gata nyoe na sidroe aneuek atawa saboh leumo nyang rhot lam mon bak uroe sabat, peu kheueh nyan han jeuet tapeuteungoh uluwa aneuek nyan atawa leumo nyan bak uroe nyan cit teuma?" teuma ureueng nyang na nibak teupat nyan hana meusidroe pih nyang hase jijaweueb peue nyang geutanyong le isa nyan. isa geukalon na jame-jame jipileh-pileh teupat duek nyang paleng get. sabab nyan gobnyan laju geubri peulajaran nyang lagee nyoe ubak awaknyan banmandum. "meunyo gata na jitawok bak teupat ureueng meukawen, bek kheueh gata duek bak kurusi teuhoreumat. pat tateupeue ureueng laen nyang leubeh peunteng nibak gata pih na jitawok, sampoe ureueng po rumoh nyang ka jitawok gata bandua nyan teupaksa jijak ubak gata sira jipeugah, 'meuah, teupat nyoe ka teukeubah keu jame nyang bantrok nyan.' teuma deungon malee raya gata teupaksa gata duek bak teupat nyang paleng likot. sabab nyan kheueh, meunyo gata na jitawok, gata pileh kheueh teupat nyang paleng dilikot, mangat ureueng po rumoh teuma teuka dan jipeugah ubak gata, 'rakan, jak taduek bak teupat nyang leubeh get.' deungon lagee nyan gata kajihoreumat dikeue jame-jame nyang laen. sabab tieb-tieb ureueng nyang jipeumanyang droe jih teuma teupemiyueb, sikeubiet jih ureueng nyang jipeumiyueb droe jih teuma teupemanyang," dan laju geupeugah le isa ubak ureueng po rumoh,

"meunyo gata tatawok ureueng laen keu jimakheun di rumoh gata bah kheueh nyan makheun watee uroe meunan cit makheun malam, bek kheueh gata tawok rakan atawa syedara gata, atawa wareh kawom, atawa wareh lingka gata nyang kaya. sabab saboh watee ureueng-ureueng nyan teuma jitawok gata, ngon lagee nyan gata ka gata teurimong beunalaih ateuheh peue nyang ka gata peubuet. dan, meunyo gata tapeuna khanuri, gata tawok kheueh ureueng gasien, ureueng cidra, ureueng lapee, dan ureueng buta. gata teuma geubri beureukat, sabab ureueng-ureueng nyan hana teuma hase jibalahi ateuheh keuget ate gata. buet gata nyang get nyan teuma geubalahi le po teu allah bak watee ureueng-ureueng nyang get teuma teupeubudoh nibak mate." watee geupeugah lagee nyan le isa, na sidroe lamkawan nyang na nibak teupat nyan habeh mandum jideungoe peue nyang geupeugah nyan, ureueng nyan laju jipeugah lagee nyoe, 'untong lumpah na ureueng nyang teuma jimakheun meusajan ngon allah watee gobnyan teuka sibagoe raja!' teuma isa laju geupeugah ubak ureueng nyan, "bak saboh watee na ureueng nyang jipeuna khanuri nyang rayeuk dan jitawok ureueng jai lumpah na. watee katroh watee jih khanuri teupeuphon, ureueng nyan laju jiyue namiet jih ubak ureueng nyang ka teutawok sira jipeugah lagee nyoe, 'neubot kheueh langkah u rumoh kamoe, banmandum ka lheeuh kamoe hidang!' teuma di ureueng nyang teutawok nyan banmandum, sidroe-droe lilake meuah. nyang phon that jipeugah bak namiet nyan, 'ulon ban that-that ulon bloe saboh keubeueng tanoh, dan lumpah peureulee lon keuneuk jak pareksa tanoh nyan. peumeuah kheueh keu ulon.' nyang laen laju jipeugah teuma, 'ulon ban that ulon bloe limong boh judo leumo, dan lon keuneuk ujo leumo leumo lon nyan. peumeuah kheueh keu ulon!' nyang laen lom jipeugah teuma lagee nyoe, 'ulon ban that lheeuh lon meukawen, ngon sabab nyan hana hase ulon jak.' namiet nyan laju jiwoe dan jipeugah laju hai nyan ubak po jih, po nyan beungeh lumpah na, laju jipeugah ubak namiet jih, 'bubagaih kheueh gata jak u banda nibak rot-rot euh dan tatamong laju lam-lam jurong lam banda nyan. gata ba kheueh keunoe ureueng-ureueng gasien, ureueng cidra, ureueng lapee dan ureueng buta.' oh lheeuh nyan le namiet nyan laju jipeugah lagee nyoe, 'ya po ulon, banmandum peurintah po ka lheeuh ulon peubuet, teuma teupat jih mantong that jai.' dan ureueng po khanuri nyan laju jipeugah lagee nyoe, 'gata jak kheueh u rot-rot ueh raya dan jurong-jurong nyang na diluwa banda, dan gata paksa kheueh mangat ureueng-ureueng nyan jitem teuka, mangat rumoh ulon peunoh. ingat kheueh! hana meusidroe pih nibak banmandum jame nyang ka teutawok nyan jiteume pajoh peunajoh nyang ka ulon keubah watee khanuri dirumoh ulon nyan!' " jai that-that ureueng jijak meusajan ngon isa, dan isa geupaleng sira geupeugah ubak awaknyan, "meunyo ureueng jijak ubak ulon, teuma di ureueng nyan leubeh jigaseh keu ma jih, ayah jih, peurumoh jih, aneuek-aneuek jih, syedara jih, dan droe jih keudroe, ureueng nyang lagee nyan hana hase jeuet keu murit ulon. ureueng nyang hana jitem gulam saleb gobnyan dan jiseu-

tot ulon, ureueng nyang lagee nyan hana hase jeuet keu murit ulon. meunyoee na sidroe lamkawan gata jikeuneuk peudong saboh meunara, teuntee jihnyan teuma jiduek ji-itong leubeh ilee padub le habeh bi-aya meunara nyan dan mangat jiteupeu peu kheueh peng jih seb keu jipeuseuleusoe meunara nyan atawa hana. sabab meunyoee teunyata jihnyan hana hase jipeuseuleusoe meunara nyan, padahai keunaleueng meunara nyan ka jipeugot, dan banmandum ureueng nyang jikalon meunara nyan teuma jipeukem. awaknyan teuma jipeugah lagee nyoe, 'ngieng, ureueng nyan jiseumeugot, teuma hana hase jipeuseuleusoe!' meunyoee na sidroe raja bak jihnyan na siploh ribee droe sipa-i keuneuk jimaju lam prang ngon raja laen nyan na dua ploh ribee sipa-i, teuntee raja nyan teuma jiduek jipeutimang leubeh ilee peu kheueh jihnyan ka seb teuga keu jilawan musoh jih, meunyoee jihnyan jiteupeu bahwa jihnyan gohlom seb teuga, kateuntee simantong musoh jih mantong jioh, jihnyan teuma jikirem utosan jih keu jilakee meudame." keuneulheueh jih geupeugah le isa lagee nyoe, "meunan cit deungon gata. hana meusidroe pih nibak gata hase jeuet keu murit ulon, meunyoee jihnyan hana jikeureubeuen peue-peue nyang na." "sira nyan get, teuma meunyoee sira nyan ka jeuet keutabeue, peu kheueh mungen teupeumasan lom teuma? siranyan hana meuguna le, bah kheueh teupeuguna keu lampoh meunan cit keu baja. dan akhe jih sira nyan teuboh mantong. meunyoee gata na punyueng, gata deungoe kheueh!" bak siuroe, jai that-that ureueng nyang buet jih tukang kuteb cukee dan ureueng-ureueng nyang jianggab hana get le masyarakat jajak deungoe isa peugah haba. ureueng-ureueng farisi dan guree-guree agama beungeh raya sira meuok-ok. awaknyan laju jikheun meunoe, "heh, ureueng nyoe jiteurimong ureueng hana get dan jimakheun meusajan awaknyan!" ngon sabab nyan isa laju geupeugah ubak awaknyan miseue lagee nyoe, "meunyoee na sidroe lamkawan gata nyoe na jipeulara sireutoh boh bubiri, lamkawan bubiri nyang sireutoh nyan gadoh saboh – peu kheueh nyang jipeubuet le ureueng po bubiri nyan? ka pasti ureueng nyan jitinggai bubiri nyang sikureueng ploh sikureueng boh nyan lam blang naleueng, laju jajak mita nyang gadoh nyan sampoe meuteume. dan meunyoee bubiri nyan ka jiteume, ate ureueng nyan galak lumpah na sampoe-sampoe bubiri nyang ka jiteume nyan laju jigulam bak baho jih, laju jipeuwoe u rumoh. oh lheurehnyan laju jitawok rakan-rakan dan wareh silingka jih sira jipeugah lagee nyoe, 'jak ngon lom tameusukaria. sabab bubiri ulon nyang gadoh ka lon teume lom teuma!' meunan kheueh lam syeuruga na keugeumbiraan nyang leubeh rayeuk atueh sidroe ureueng nyang meudesya jitobat nibak desya-desya jih nyan, nibak sikureueng ploh sikureueng droe nyang ka jroh dan hana peureulee jitobat le." "atawa sidroe ureueng inong bak jih na siploh peng pirak, dan peng nyan gadoh saboh – peu kheueh nyang teuma jipeubuet le inong nyan? ureueng dum laju jitot panyot dan jisampoh rumoh jih sira jimita dipat mantong sampoe peng nyang gadoh nyan meuteume lom teuma. watee peng nyan ka meuteume, ureueng inong nyang laju jitawok rakan-rakan dan wareh lingka jih sira jipeugah, 'ulon

galak lumpah na peng lon nyang gadoh ka meuteume lom teuma. boh jak geutanyoe tameusukaria!' meunan cit deungon malaikat allah galak geuh that-that meunyoee sidroe ureueng nyang jeuhet jimeutobat nibak desya-desya jih. peucaya kheueh!" geupeugah lom le isa, "na sidroe ayah nyang na dua droe aneuek agam. aneuek nyang tulot jipeugah bak ayah jih lagee nyoe, 'ayah, neubri kheueh keu ulon bak watee nyoe jeumba ulon nibak hareuta pusaka nyan.' teuma le ayah jihnyan laju jijkaweweuk atra keukayaan jih nyan keu mandua aneuek jih. teuma bak siuroe aneuek nyang tulot nyan jipeubloe atra waresan jih nyan laju jibungka u nanggroe nyang jioh. nibak nanggroe gobnyan jimeupoya-poya ngon peng jihnyan. watee peng jih ka habeh banmandum, teuka kheueh lam nanggroe nyan musem deuk nyang parah lumpah na, sampoe aneuek nyan ka meukatat lumpah na. dan laju jijkaweweuk bak sidroe ureueng peunduduek nyang na disinan, ureueng teupat jimubuet nyan laju jiyue aneuek nyan ublang jak rabe bui. aneuek nyan deuk lagoena sampoe kana niet lam ate jih keuneuk jipasoe lam pruet jihnyan ngon peunajoh bui nyan. bah pih jihnyan ka deuk that, hana meusidroe ureueng nyang jibri makheun keu jih nyan. akhe jih aneuek nyan sada dan jikheun lam ate jih, 'ureueng-ureueng nyang meubuet bak ayah lon peunajoh jih meulimpah ruwah, dan ulon disinoe karab mate ngon sabab deuk! ulon bah lon jakwoe bak ayah lon, laju lon peugah ubak gobnyan: ayah, ulon ka meudesya ubak allah meunan cit ubak ayah. hana patot le ulon nyoe teupeugah aneuek ayah. anggab kheueh ulon nyoe ureueng nyang mubuet nibak ayah.' oh lheureh jikheun lam ate jih lagee nyan laju jiwoe ubak ayah jih. mantong jioh nibak rumoh, aneuek nyan ka deuh jingiang le ayah jih. deungon ate nyang weueh ngon meucen lumpah na ayah jihnyan laju jipeulet bak aneuek nyan, oh bantrok keunan laju ji uem sira jicom aneuek jih nyan. 'ayah, 'kheun aneuek nyan, 'ulon nyoe ka meudesya ubak allah meunan cit ubak ayah. hana patot le ulon nyoe ayah peugah aneuek ayah.' teuma le ayah jihnyan laju jitawok bubena namiet sira jipeugah lagee nyoe, 'bubagaih, kahjakkok laju peukayan nyang paleng get, dan kah peungui laju bak aneuek nyoe. peusok kheueh euncien bak jaroe jih, dan sipatu bak gaki jih. oh lheureh nyan gatacok laju aneuek leumo nyang teumbon dan kabsie laju. geutanyoe tapajoh rayeuk ngon meusukaria. sabab aneuek ulon nyoe ka mate, jinoenyoe ka udeb lom teuma; aneuek nyoe ka gadoh, jinoenyoe ka meuteume lom teuma.' oh lheurehnyan ayah aneuek nyan laju jipeuna khanuri nyang luwabi-asa meuriah jih. watee nyan, aneuek nyang tuha mantong na di blang. wateenyan jiwoe dan karab trok bak bineh rumoh, laju jdeungoeu su musik ngon su ureueng meunari dan meulikak. le aneuek nyang tuha nyan laju jihoi sidroe namiet dan laju jitanyong bak namiet nyan, 'peue na dirumoh subra lumpah na?' 'jijaweeb le namiet nyan, 'adoe po kajigisa! dan ayah droeneueh kageuyue sie saboh leumo nyang teumbon, sabab gobnyan kameurumpok lom ngon aneuek geuh lam keuadaan seulamati!' aneuek nyang tuha nyan beungeh lumpah na sampoe jihnyan hana jitem tamong lam rumoh. laju ayah jih jiteubiet sira jirayu

mangat aneuek tuha jihnyan jitem tamong. teuma aneuek tuha nyan jipeugah, 'meuthon-thon treb jih ulon mubuet nyoe ayah. hantom na ulon bantah peu nyang ayah peurintah. dan peue kheueh nyan ayah bri keu ulon? meusaboh kameng pih gohlom na ayah bri keu ulon mangat lon meuramien ngon rakan-rakan lon! aneuek ayah nyan ka jipeuhabeh atra ayah meupoya-poya ngon inong jeuhet, teuma meunan jiwoe u rumoh nyoe, ayah sie aneuek leumo nyang teumbon keu jih!' 'hei aneuek ayah,' jaweueh ayah jih, 'gata sabe na meusajan ayah dirumoh nyoe. banmandum nyang ulon po nyoe na kheueh atra gata cit. teuma tanyoe haroh takhanuri dan meugeumbira, sabab adoe gata nyan ka mate, teuma bak saat nyoe ka udeb lom teuma; jihnyan ka gadoh, teuma bak saat nyoe ka meuteume lom teuma.' " isa geupeugah ubak murit-murit geuh, "na sidroe ureueng kaya. ureueng kaya nyan na jipeukeureuja sidroe peugawee bagian mat peng nyang atoe atra keukayaan jihnyan. ureueng kaya nyan na gob lapor bak jih bahwa peugawee nyang mat bagian peng ka jihambo-hambo peng jih. banjideungoe haba nyan laju jihoi peugawee nyan dan jipeugah lagee nyoe, 'peubetoi nyang ulon deungoe? jinoenyoe gata jok laju ubak ulon laporan nyang leungkab keuhai hase buet gata nyang gata uroh keukayaan ulon. dan gata hana jeuet le keupeugawee bagian mat peng ulon.' dan le peugawee bagian mat peng nyan laju jipike, 'peu nyang haroh ulon peulaku bak saatinye? po ulon keuneuk geupeucat lon. jak ceumatok, ulon hana teuga; jak geumadee, ulon malee. jinoo na akai; meunyeo ulon ka geupeucat, ulon haroh na rakan nyang rame mangat jeuet jiteurimong ulon dirumoh awaknyan!' ngon nyan, le peugawee bagian mat peng nyan laju jita-wok banmandum ureueng nyang ka ltheueh jimeu-utang bak po jih. ubak ureueng nyang phon jipeugah lagee nyoe, 'padub na le utang gata bak po ulon?' 'jijaweueh le ureueng nyan,' sireutoh boh guci minyeuk zaiton.' laju jipeugah le peugawee nyan ubak ureueng nyan, 'nyoe surat utang gata. gata duek kheueh dan tuleh: limong ploh.' oh ltheueh nyan jipeugah teuma bak ureueng nyang keudua, 'dan gata, padubna utang gata?' jijaweueh le ureueng nyan, 'siribee boh umpang gandom.' peugawee bagian mat peng nyan laju jipeugah bak ureueng nyan, 'nyoe surat utang gata, tuleh: lapar reutoh.' teuma le toke nibak peugawee bagian mat peng nyang hana juJoe nyan jipujoe peugawee jih nyang lisek nyan; sabab ureueng-ureueng lam donya nyoe leubeh lisek jiatoe urosan droe jih nibak ureueng-ureueng nyang udeb lam trang." oh ltheuehnyan isa geupeugah lom, 'deungoe kheueh! peuguna kheueh keukayaan lam donya nyoe keu tamita rakan, watee keukayaan donya nyoe ka hana meuguna le, gata teuma jiteurimong bak teumpat tinggal nyang keukai baka. ureueng nyang jeuet teupeucaya nibak hai-hai nyang ubit, jeuet cit teupeucaya nibak buet-buet nyang rayeuk. teuma ureueng nyang hana jeuet teupeucaya nibak hai-hai nyang ubit, hana teuma jeuet teupeucaya nibak buet-buet nyang rayeuk. dan, meunyeo keuhai keukayaan donya nyoe gata ka hana jeuet teupeucaya, soe nyang jitem peucaya gata keuhai keukayaan rohani? dan meunyeo keuhai barang nyang na bak

ureueng laen, gata kana bukeuti hana jeuet teupeucaya, soe teuma nyang jitem bi ubak gata peue nyang jeuet keuhai milek gata? hana meusidroe pih hase jimubuet keu dua droe toke; sabab jihnyan teuma leubeh jigaseh ubak nyang sidroe nibak nyang laen, atawa jihnyan leubeh seutia ubak toke nyang sidroe nibak nyang laen. meunan cit deungon gata. gata hana hase tamubuet keu po teu allah dan meunan cit keu hareuta beunda gata." ureueng-ureueng farisi jideungoe banmandum peue-peue nyang geupeugah le isa nyan. dan awaknyan laju jipeukem gobnyan, sabab awaknyan galak keupeng. teuma isa geupeugah ubak awaknyan, "gata kheueh ureueng meunyeo dikeue ureueng laen deuh jih beutoi, teuma po teu allah geuteupeue asoe ate gata. sabab peue nyang jianggah manyang le manusia, geupandang miyueh le po teu allah. hukom nyang geubri le nabi musa dan ajaran nabi-nabi, teutab teupeuguna sampoe watee teuka nabi yahya pumano. phon watee nyan haba get keuhai pakriban po teu allah geumat peurintah sibagoe raja teupeusampoe laju. dan ureueng jipaksa droe beu jeuet keu anggota umat po teu allah. dan leubeh mudah langet ngon bumoe hanco, nibak saboh huruf nyang na lam hukom po teu allah jeuet keubateue. soe nyang taleuek peurumoh jih laju jimeukawen ngon inong laen, ureueng nyan ka jimeumukah, dan ureueng nyang meukawen ngon inong nyan nyang ka jitaleuek nyan pih ka jimeumukah." na sidroe ureueng kaya. peukayan nyang jingui yuem jih meuhai-meuhai, dan udeb jih sabe lam meuwah tieb-tieb uroe. bak babah pintoe rumoh jih jipeuduek sidroe ureueng gasien nan jih lazarus. bansaboh tuboh ureueng nyan penunoh jitimoh puree. meunyeo jimakheun na kheueh seueh-seueh nyang rhot u miyueh meuja makheun ureueng kaya nyan. dan asee pih jijak lieh puree ureueng nyan. ureueng gasien nyan laju meuninggai donya dan laju geuba le malaikat ubak teumpat nyang paleng mulia bak bineh nabi ibrahim lam syeuruga. meunan cit ureueng kaya nyan meuninggai donya laju teupeukubu. lam donya ureueng mate ureueng kaya nyan meudeurita lumpah na. dan watee jitungah u ateueh nibak teumpat jih nyan, deuh laju jikalon nabi ibrahim bak teumpat nyang jioh dan lazarus na bak bineh nabi ibrahim. 'wahei bapak ulon nabi ibrahim!' kheun ureueng kaya nyan. 'neugaseh kheueh keu ulon, neuyue kheueh bak lazarus mangat jitem ceulob jaroe jih lam ie oh ltheuehnyan jijak peucilet bak lidah lon. ulon seungsara that lam apui nuraka nyoe!' teuma nabi ibrahim jih geujaweueh lagee nyoe, 'ingat kheueh hei aneuek ulon: siumu udeb gata katateume banmandum nyang get-get, seudangkan lazarus jiteume nyang brok-brok. jinoenyoe jihnyan mangat disinoe, teuma digata seungsara. seulaen nibak nyan, gata ngon kamoe kateupeuget jurong nyang rayeuk, mangat ureueng nyang na disinoe hana jeuet jijak keunan dan ureueng nyang na disinan hana jeuet jijak keunoe!' 'meunyeo meunan, hei bapak meutuwah,' kheun ureueng kaya nyan lom, 'ulon lakee ngon meuharab that mangat bapak yue lazarus u rumoh ayah ulon. lam rumoh ayah lon nyan na limong droe syedaran lon. neuyue kheueh bak lazarus mangat jipeuingat awaknyan, jeuet awaknyan

pih bek sampoe rhot bak teupnat seksaan lagee nyoe bagoe.' geujaweueb le nabi ibrahim, 'bak awaknyan ka na kitab-kitab nabi musa dan kitab-kitab nabi-nabi! bah kheueh awaknyan jipeubuet peue nyang ka teutuleh lam kitab nyan!' teuma jijaweueb le ureueng kaya nyan, 'nyan hana seb, ya bapak ulon nabi ibrahim. teuma meunyo na ureueng mate udeb lom teuma dan jijak ubak awaknyan, awaknyan teuma jitobat nibak desya-desya jih.' teuma geupeugah le nabi ibrahim, 'meunyoe awaknyan hana jipako peue nyang ka geupeurintah le nabi musa dan kheun nabi-nabi, ka pasti awaknyan pih hana jipeucaya, bah pih na ureueng mate nyang udeb lom teuma.' " isa geupeugah ubak murit-murit gobnyan lagee nyoe, 'hai-hai nyang jeuet keusabab manusia jipeubuet desya teuntee teuma na. teuma mupaloe kheueh ureueng nyang peusabab nyan! leubeh get meunyo batee geumileng teukaat bak takue jih, oh ltheuhnyan teupeunom lam laot raya nibak jih udeb jeuet keusabab sidroe lamkawan ureueng ubit nyoe jipeubuet desya. kareuna nyan, ate-ate kheueh! meunyo syedara gata meudesya, seugah kheueh jihnyan. meunyo jih nyan meunyeusai, peumaphon kheueh jih nyan. meunyo jih meudesya nibak gata tujoh goe siuroe dan tieb-tieb jijak ubak gata jipeugah, 'ulon lakee meuah,' peumaphon kheueh jihnyan." rasui-rasui geupeugah ubak isa, "tuhon, peukong kheueh iman kamoe." geujaweueb le tuhan, "meunyo gata na iman bah kheueh nyan bube bijeh sisawi, gata jeuet gata peugah keubak kayee meureubo nyoe, 'beuteulot kheueh kah hei bakkayee dan beuteupula kheueh lam laot raya,' pasti bak kayee meureubo nyoe jipateh peurintah gata." "seukira jih sidroe lamkawan gata nyoe na namiet gata jimeu-eue diblang dan jirabe bubiri. watee namiet nyan ka jiwoe, peu kheueh jihnyan jipeugah ubak gata, 'jak bubagaih tapajoh bu?' teuntee hana! sikeubit jih po nyan jipeugah ubak namiet jih lagee nyoe, 'keubah laju peunajoh ulon. ngui kheueh peukayan nyang gleh dan kah preh kheueh ulon kujak pajoh bu ngon lon jieb ie; oh ltheuhnyan baro kheueh jeuet gata pajoh bu.' namiet nyan hana peureulee teupujoe kareuna ka jiseutot peue nyang jipeugah le po jih, nyoe peukon? meunan cit deungon gata. meunyo gata ka gata peubuet banmandum nyang ka teupeurintah ubak gata, peugah kheueh laju, 'kamoe na kheueh namiet biasa; nyang kamoe peubuet na kheueh keuwajaban kamoe.' " isa teungoh geujak u yerusalem, rot daerah nyang meuceue ngon samaria dan galilea. watee geutamong lam saboh gampong, laju jijak ubak gobnyan siploh droe ureueng nyang ka keunong peunyakot kulet nyang lumpah parah. awaknyan jidong rot jioh laju jitawok, "isa, po ulon! neugaseh kheueh keukamoe!" watee geungieng le isa awaknyan, laju geupeugah bak awaknyan, "gata jak kheueh ubak imeum-imeum dan gata peureksa laju peue peunyakot gata nyan." teungoh awaknyan geujak, peunyakot awaknyan laju puleh. watee jiteupeu le sidroe lamkawan awaknyan bahwa peunyakot jih ka puleh, awaknyan laju jigisa sira jisumurak jipujoe po teu allah. dan jijak laju ukeue isa jisujut sira jisumah gobnyan dan jilakee teurimong gaseh bak gobnyan. ureueng nyan sidroe ureueng samaria. oh ltheueh nyan geupeugah le isa, "kon na

siploh droe nyang ka teupeupuleh? ho kajijak nyang sikureueng droe teuk? pakon jeuet ureueng aseng nyoe nyang jigisa jipeugah teurimong gaseh ubak allah?" laju geupeugah le isa bak ureueng nyan, "beudoh dan gata jak kheueh laju. kareuna gata peucaya keu ulon, gata puleh." na padub droe ureueng farisi laju jitanyong bak isa pajan po teu allah geupeu phon mat peurintah sibagoe raja. geujaweueb le isa, "peumeurintah po teu allah hana geupeu phon ngon tanda-tanda nyang deuh jingiegi le manusia, sampoe manusia jeuet jipeugah, 'jakngieng nyoe, nyoe pat gobnyan!' atawa, 'disideh gobnyan!' sabab po teu allah ka geupeu phon mat peurintah diteungoh-teungoh gata." oh ltheueh nyan isa laju geupeugah ubak murit-murit gobnyan lagee nyoe, "teuma teuka watee jih gata meuhuet keuneuk kalon siuroe nibak uroe-uroe aneuk manusia, teuma digata teutab hana hase gata kalon. singoh ureueng teuma jipeugah ubak gata, 'ngieng, disinan!' atawa, 'ngieng, disinoel' dan bek kheueh gata teubiet jak mita peue nyang jipeugah nyan. lagee kilat muble dilanget, dan peungeh meucahya phon di ujong trok u ujong, meunan kheueh singoh keuadaan aneuk manusia bak uroe jih gobnyan teuka. teuma phon-phon gobnyan haroh geurasia deurita nyang lumpah jai dan hana jiteurimong le ureueng-ureueng bak jamen nyoe. bak uroe aneuk manusia teupeugah singoh, keuadaan jih lagee bak jamen nabi nuh yoh jamen ilee. manusia jimakheun ngon jijieb ie, jimeukawen; meunan kheueh sabe hana putoh-putoh sampoe nabi nuh geutamong lam kapai laju ie raya teuka dan habeh jipeubinasan banmandum ureueng nyan. meunan cit saban lagee jamen nabi lot. manusia jimakheun ngon jijieb ie, bloe peubloe, jimeulampoh dan jipeuget rumoh. teuma watee nabi lot geuteubiet nibak sodom, bak uroe nyan apui ngon tanoh beulerang jitreun nibak langet dan habeh jipeubinasan awaknyan banmandum. meunan kheueh keuadaan jih singoh watee aneuk manusia geupeugah. bak uroe nyan ureueng nyang mantong na atueh bubong rumoh jih bek kheueh jitreun keu jijak cok barang-barang jih nyang na lam rumoh. meunan cit keu ureueng nyang mantong na di blang bek kheueh jiwoe u rumoh. ingat kheueh peue nyang ka keunong atueh peurumoh nabi lot! ureueng nyang jiuseuha jipeuseulamat udeb jih, teuma gadoh udeb. teuma keu ureueng nyang gadoh udeb jih teuma teupeuseulamat udeb jih. peucaya kheueh: bak malam nyan, dua droe ureueng teungoh jie atueh peuratah, sidroe teuma geuba dan sidroe teuk geutinggai disinan. dua droe inong teungoh jigileng gandom, sidroe teuba geuba dan sidroe teuk teuma geutinggai disinan. dua droe ureueng teungoh jimubuet diblang, sidroe teuma geuba dan sidroe teuk teuma geutinggai disinan." murit-murit isa laju jitanyong ubak gobnyan, "dipat nyang lagee nyan teuma teujadi, tuhan?" geujaweueb le isa, "dipat na bangke, nibak teupat nyan na cicem nyang pajoh bangke." oh ltheueh nyan geucalitra saboh umpama le isa guna keu geupeurunoe murit-murit geuh mangat awaknyan sabe meudoa dan bek putoh asa. isa laju geupeugah miseue nyan, "lam saboh banda na sidroe hakem nyang hana jitakot ubak allah, dan hana jipako keusoe mantong. lam banda nyan na

teuma sidroe inong balee nyang sabe jimeuhadab ngon hakem nyan jilakee mangat peukara jih jibila. 'neutulong kheueh ulon lampeukara nyoe lon hadab lawan ulon.' kheun inong nyan ubak hakem. napa-
padub treb watee jih hakem nyan hana jitem tulong inong balee nyan. akhe jih hakem nyan jipike, 'bah pih ulon nyoe hana lon takot keu po teu allah dan hana lon pakoe ubak soe mantong, sabab inong balee nyoe hana putoh-putoh jipeukaru ulon, leubeu get peukara ureueng nyoe ulon bila. meunyoee han, inong nyoe hana jipioh-pioh jipeukaru ulon.' " dan laju geupeugah le tuhan lagee nyoe, "ngiang kheueh peu nyang jipeugah le hakem nyang hana ade nyan! nyan, peu kheueh po teu allah hana geubila peukara umat geuh keudroe nyan jilakee ubak gobnyan uroe ngon malam? peu kheueh gobnyan geu-ulue-ulue watee keu geutulong awaknyan? peucaya kheueh: gobnyan reujang that geubila peukara awaknyan! teuma meunyoee aneuek manusa ka teuka, peu kheueh mantong na meuteume ureueng meuman ubak gobnyan ateuhe rhueng bumoe nyoe?" dan isa geucalitra lom saboh miseue keuhai manusa nyang jingieung miyueub ateuhe ureueng laen, ureueng nyan yaken bahwa droe jih keudroe kheueh nyang paleng get. geupeugah le isa, "na dua droe ureueng jijak u baet tuhan keu jikak meudoa. nyang sidroe ureueng farisi, sidroe teuk nyang laen buet jih tukang kuteb cukee. ureueng farisi nyan jidong aseng keudroe sira jimeudoa, 'ya allah, ulon lakee teurimong gaseh ubak droeneueh, sabab ulon hana lagee ureueng laen, nyan leuha, jeuhet, atawa tukang peubuet meumukah. ulon syukoe that sabab ulon bukan lagee tukang kuteb cukee nyan. ulon puasa dua goe lam sigoe aleuhah, dan ulon peuseumah ubak droeneueh siper siploh nibak banmandum hase nyang ulon teume.' teuma di ureueng tukang kuteb cukee nyan jidong jioh-jioh dan hana jijeuet jitungah u langet. sira jiurot dada laju jipeugah, 'ya allah, neugaseh kheueh keu ulon, ureueng meudesya nyoe!' " "peucaya kheueh," kheun isa, "watee jiwoe u rumah, doa ureueng kuteb cukee nyan nyang geuteurimong le po teu allah dan bukan doa ureueng farisi nyan. sabab tieb-tieb ureueng nyang jipeumanyang droe jih teuma geupeumiyueb; dan tieb-tieb ureueng nyang peumiyueb droe jih teuma geupeumanyang." na ureueng-ureueng nyang jiba aneuek-aneuek miet ubak isa mangat geutem mat dan geubri beureukat keu aneuek miet nyan. watee hainyan jingieung le murit-murit isa laju awaknyan jibeungeh bak ureueng-ureueng nyan. teuma le isa laju geutawok aneuek nyan dan laju geupeugah ubak murit-murit geuh, "bah kheueh aneuek miet nyan jikak bak ulon! bek gata tam awaknyan, sabab ureueng nyang lagee nyoe kheueh jeuet keu anggota umat allah. ingat kheueh! ureueng nyang hana jimeuhadab ubak allah lagee sidroe aneuek, ureueng nyan hana teuma jeuet keu anggota umat po teu allah." sidroe peumimpin yahudi jiteumanyong bak isa, "bapak guree nyang get, peu nyang haroh ulon peubuet mangat ulon meuteume udeb sejati dan keukai?" "pakon gata peugah ulon get?" geutanyong le isa bak ureueng nyan. "hana nyang get, seulaen po teu allah keudroe. gata ka tateupeue peue-peue nyang geupeurintah le po teu allah: 'bek meumukah, bek seumeupoh

mate, bek ceumeucue, bek jeuet keusaksi duseuta, dan horeumat kheueh keu ayah ngon ma gata.' " "banmandum peurintah nyan ka ulon peubuet phon muda ulon kon," seuet ureueng nyan. ban geudeungoe lagee nyan, laju geupeugah le isa, "mantong na sapeue nyang haroh gata peubuet: jak peubloe kheueh banmandum atra milek gata, gata bri kheueh peng keu ureueng gasien, dan gata teuma meuteume hareuta lam syeuruga. oh ltheueh nyan teuka kheueh keunoe taseutot ulon." teuma watee jideungoe haba nyan, ate jih peudeh lumpah na sabab jih kaya lagoena. isa geuteupeue ureueng nyan seudeh that ate, sabab nyan laju geupeugah, "payah that-that meunyoee ureueng kaya jeuet keu anggota umat po teu allah! leubeu mudah saboh unta jitamong lam rhueng jarom, nibak ureueng kaya jitamong lam donya baro allah." ureueng-ureueng nyang jideungoe isa geupeugah meunan laju jitanjong, "meunyoee meunan, soe nyang hase sealamat?" geujaweueb le isa, "nyang hana mungken bak manusa, mungken bak allah!" dan petrus laju jipeugah meunoe, "ngiang kheueh! kamoe ka kamoe tinggal aneuek binoe kamoe jeuet kamoe jak seutot bapak." "peucaya kheueh!" kheun isa. "ureueng nyang ka jitinggai rumah jih, atawa peurumoh jih, atawa syedara jih, atawa ayah ngon ma jih atawa aneuek-aneuek jih kareuna jiseumah po teu allah, ureueng nyan teuma geubalaih meulipat ganda bak saat nyoe, dan oh uroe dudoe keu ureueng keu teuma geubri udeb sejati dan keukai." isa laju geupeusapat mandua blaih droe murit geuh u tempat nyang aseng, ubak awaknyan laju geupeugah lagee nyoe, "deungoe nyoe! tanyoe watee nyoe takjak u yerusalem. disinan, banmandum nyang ka geutuleh le nabi-nabi keuhai aneuek manusa, teuma teujadi. gobnyan teuma jiseurah ubak ureueng-ureueng nyang bukan ureueng yahudi, nyang jihina, jiludah dan jipeumalee. awaknyan teuma jiseksa dan jipoh mate gobnyan, teuma bak uroe nyang keu lhee, gobnyan teuma geubeudoh." banmandum nyan mubacut pih hana muphom bak murit-murit isa. makna nibak tutoe haba nyan teusom nibak awaknyan. awaknyan hana jiteupeue keuhai peue nyan geupeugah le isa nyan. watee isa karab trok u yerikho, na sidroe ureueng buta sira jiduek jigeumadee bak bineh rot. watee jideungoe ureueng rame nyan teungoh jijak, laju jitanjong, "peue nyan?" "isa ureueng nazaret nyan teungoh geujak," seuet awaknyan bak ureueng buta nyan. ban jideungoe haba nyan, di ureueng buta nyan pih laju jiteumawok sira jidumpek, "isa, aneuek nabi daud! neugaseh kheueh keu ulon!" ureueng-ureueng nyang teungoh jijak dikeue laju jibeungeh keu ureueng buta nyan sira jiyue seungab. ureueng buta nyan hana jipateh jikuk ngon jimeuhoi leubeu teuga nibak su yoh awai, "hei aneuek nabi daud, neugaseh kheueh keu ulon!" isa laju geupioh dan geuyue bak gob mangat ureueng butanyan jiba ubak gobnyan. watee gobnyan ka troh keunan, isa laju geutanyong bak ureueng nyan, "peue nyang gata lakee jeuet ulon peubuet ateuhe gata?" "hei po," jaweueb ureueng butanyan, "ulon lakee beudeuh ulon keumalon." dan laju geupeugah le isa, "meunyoee meunan, kalon kheueh! kareuna gata peucaya ubak ulon, gata puleh." watee nyan cit teuma ureueng buta nyan ka

jueut jikeumalon, laju jiseutot isa sira jilakee teurimong gaseh bak po teu allah. watee ureueng rame nyan jingiang hai nyan, awaknyan banmandum jipujoe allah. watee isa ka troh u yerikho, hana geupioh geujak laju lam banda nyan. lam banda nyan na jiduke sidroe ureueng ulee kawan tukang kuteb cukee nyang kaya raya, nan ureueng nyan zakheus. ureueng nyan meuheuet that keuneuk ngiang soe isa nyan, teuma sabab ureueng laen nyang na disinan jai lumpah rame dan jih keudroe paneuk, sampoe hana hase jikalon isa. ureueng nyan hana putoh asa, jibeudoh inan laju jiplueng ukeue leubeh awai jih nibak ureueng laen, dan laju jiek atueuh bak kayee, manggat jeuet jiteume ngiang isa nyang hana treb le trok keunan. watee isa ka trok bak bineh bak kayee nyan, gobnyan geungieng u atueuh dan oh ltheuhnyan laju geupeugah, "hei zakheus, treun laju bubagai! sabab ulon keuneuk jak u rumah gata uroe nyoe." ban jideungoe haba nyan zakheus reujang that jitreun ngon ate nyang galak that laju jijak meurumpok ngon isa. banmandum ureueng nyang na disinan dan jingiang hai nyan ate awaknyan tunu lumpah na. awaknyan jipeugah lagee nyoe, "heueh! ureueng nyoe jijak meujame u rumah ureueng hana get!" oh ltheuhnyan, lam rumah jih nyan, zakheus jidong dan laju jipeugah ubak isa, "tuhau, siteungoh atra ulon nyang le nyoe lon seudeukah keu ureueng gasien; dan soe mantong nyang ka ltheueh ulon peunget, teuma lon bayeue lom keu ureueng nyan peuet goe ganda!" dan laju geupeugah le isa, "bak uroenyoe, gata dan banmandum keuluwarga gata ka geupeu seulam le po teu allah dan geubri udeb nyang baro, sabab gata pih keuturonan nabi ibrahim. aneuk manusia teuka keu geujak mita dan geupeuseulamat ureueng nyang sisat." isa geucalitra lom saboh miseue dikeue ureueng-ureueng nyang mantong jideungoe gobnyan meupeugah haba. sabab, bakwatee nyan gobnyan karab ngon yerusalema, dan di ureueng rame jipike bahwa allah teuma laju geumat peurintah sibagoe raja lam donya nyoe. isa laju geupeugah, "na sidroe ureueng bansawan jijak u nanggroe jioh meukeusut keu jikjak teurimong droe jih teubaiat jeuet keu raja, oh ltheueh nyan laju jiwoe. sigohlom jijak, leubeh ilee jipeusapat siploh droe namiet jih, ubak awaknyan laju jijak maseng-maseng saboh keupeng peng meuh. 'jak meukat kheueh ngon peng nyoe sigohlom ulon woe,' kheun ureueng bansawan nyan ubak namiet jih. teuma peunduduek nanggroe nyan hana galak keu gobnyan. dan oh ka leupah gobnyan geujak, awaknyan laju jikirem utosan keu jipeugah, 'kamoe hana kamoetem ureueng nyoe jeuet keuraja kamoe.' teuma bansawan nyan teutab teubaiat jeuet keuraja, oh ltheueh nyan laju jigisa u nanggroe jih. dan meunan trok u rumah jih laju jipeusapat bansiploh droe namiet jih nyang ka jibri sikeupeng peng meuh bunoe keuneuk jiteupeue padubna laba nyang jiteume le awaknyan. namiet nyang phon jimeuhadab dan laju jipeugah, 'po lon, saboh keupeng peng meuh nyang po bri bak ulon nyan ka ulon peujeuet siploh.' 'jroh that,' kheun bansawan nyan, 'gata peulayan nyang get! sabab lam hai-hai nyang ubit gata jeuet teupeucaya, ulon angkat gata jeuet keu ureueng nyang mat kuasa atueuh siploh boh banda.' peulayan nyang keudua

jimeuhadab sira jipeugah lagee nyoe, 'po lon, sikeupeng peng meuh nyang po bri bak ulon, ka ulon peujeuet limong.' ubak peulayan nyang raja nyan laju geupeugah, 'gata jeuet keu ureueng nyang mat kuasa atueuh limong boh banda.' peulayan nyang laen teuka dan jipeugah teuma lagee nyoe, 'po lon, nyoe peng droeneueh; peng nyoe ulon keubah lam ija sinungkue. ulon teumakot keu droeneueh, sabab droeneueh ureueng nyang paleng kreueh. droeneueh neucok peue mantong nyang kon atra droeneueh, dan droeneueh neucok wase nyang bukan droeneueh pula.' raja nyan laju jikheun keue namiet jih nyan, 'kah peulayan nyang jeuet! pakriban lagee gata peugah nyan ulon teuma lom hukum gata. gata tateupeue ulon ureueng nyang paleng kreueh; ulon cok peue nyang bukan atra ulon dan loncok wase bak teupat nyang hana ulon pula. meunye meunan pakon hana kah jok peng nyan bak ureueng nyang peubungong peng mangat watee lon gisa peng nyan jeuet loncok lom teuma meusigoe ngon bungong jih?' oh ltheuhnyan raja nyan laju jipeugah ubak ureueng-ureueng nyang teungoh jidong disinan, 'cok peng nyan bak jaroe jih dan bri laju ubak peulayan nyang na siploh peng meuh nyan.' teuma le ureueng-ureueng nyan jipeugah, 'po lon, jihnyan kana siploh.' jijaweueb le raja nyan, 'ingat: ureueng nyang kana, keu ureueng nyan teuma teubri leubeh jai lom. teuma ureueng nyang hana sapeuena, peue nyang na nibak jih nyan teucok lom teuma. dan jinoenyoe gata ba kheueh musoh-musoh ulon nyan, nyang hana jitem ulon jeuet keu raja jih. peumate kheueh jihnyan banmandum dikeue ulon!' " oh ka ltheueh geupeugah banmandum nyan le isa gobnyan laju geujak dikeue awaknyan geutuju u yerusalema. watee katrok bakbineh btfage dan betania di buket zaiton, laju geuyue bak dua droe murit gobnyan mangat jikjak leubeh awai nibak gobnyan. "gata jak kheueh laju u gampong nyang na dikeue nyan," kheun isa ubak awaknyan, "meunye gata ka tatamong keunan, inan enteuk gata ngiang na saboh aneuk keuleudee teuitak. keuleudee nyan hantom lom jipasang le gob atueuh rheung jih. gata peuleueh laju keuleudee nyan dan gata ba keunoe. meunye na ureueng jityanyong ubak gata, 'keupeue gata peuleueh keuleudee nyan?' gata peugah laju, 'tuhau nyang peureulee keuleudee nyoe.' " bandua droe murit isa nyan laju jijak, dan laju meurumpok banmandum lagee nyang ka geupeugah le isa nyan. teungoh awaknyan jiploh talo aneuk keuleudee nyan, ureueng po keuleudee nyan laju jipeugah ubak awaknyan, 'keupeue gata peuleueh aneuk keuleudee nyan?' awaknyan laju jijaweueb, "tuhau nyang peureulee." dan aneuk keuleudee nyan laju jiba ubak isa. oh ltheuhnyan awaknyan laju jikeubah bajee jubah droeji atueuh keuleudee nyan dan jitulong laju isa geuek atueuh keuleudee nyan. teungoh gobnyan geujak sira geudeuk atueuh rheung keuleudee nyan, di ureueng rame laju jileueng bajee jubah jih atueuh rot ueh raya. watee isa karab trok u yerusalema, bak rot ueh nyang teutreun u buket zaiton, banmandum murit-murit gobnyan nyang rame nyan jimeuhoi-meuhoi sira jipujoe po teu allah dan jilakee teurimong gaseh ubak gobnyan sabab banmandum nyang ajaeb nyang ka awaknyan

kalon. awaknyan jimeuhoi-meuhoi, "teubri kheueh beureukat raja nyang teuka atueh nan tuhan! seujah-teura kheueh lam syeuruga, dan teupujoe kheueh po teu allah" na padubdroe ureueng farisi lamkawan ureueng rame nyan laju jipeugah ubak isa, "bapak guree, neuyoe kheueh murit-murit bapak jeuet jiseungab." geujaweueh le isa, "peucaya kheueh! meun-yoe awaknyan seungab, batee-batee nyoe teuma jiklik." watee isa ka meutamah rab ngon yerusalem, dan geulakon banda nyan, gobnyan laju geumo. kheun gobnyan, "biet weueh that, biet-biet jroh, meun-yoe uroenyoe gata tateupeue peue nyang jeuet teuba ubak buet dame! teuma wateenyoe gata hana deuh gata kalon. gata teuma tarasa saboh masa, musoh gata jipeuget pageue keu ampeh bansikeulileng gata; awaknyan teuma jikeupong gata dan jipeusak gata u jeueb-jeueb sagoe. awaknyan teuma jipeuhanco gata meusigoe ngon peunduduek gata; dan hana meusi aneuek batee pih nyang na tinggai meusoson nibak teumpat jih, sabab gata hana tapeurati watee saat jih po teu allah teuka keu geujak peuseulamat gata!" isa laju geutameng lam baet tuhan dan geu-use laju bubena ureueng meukat lam baet tuhan nyan. "lam alkitab na teutuleh," kheun gobnyan ubak awaknyan, "na teutuleh lagee nyoe: allah meufeureuman, 'baet ulon teuma jeuet keu baet teumpat meudoa.' teuma le gata ka tapeujeuet keu weue ureueng seumamon!" tieb-tieb uroe isa geuseumeubeuet lam baet tuhan. imeum-imeum ulee, dan guree-guree agama, meunan cit ngon peumimpen-peumimpen yahudi kana niet keuneuk jipoh mate gobnyan, teuma le awaknyan hana jiteume ilah pakriban cara jipoh mate gobnyan, sabab banmandum ureueng hana putoh-putoh jideungoe gobnyan peugah haba, dan meukeunong that ubak peue-peue nyang gobnyan peugah. bak siuroe, isa teungoh geuseumeubeuet dan geupeusampoe haba get nyang teuka nibak po teu allah ubak manusia nyang na lam baet tuhan. imeum-imeum ulee, guree-guree agama, meusajan ngon peumimpen-peumimpen yahudi na cit jijak keunan dan laju jipeugah ubak isa, "ci neupeugah ubak kamoe atueh dasai peue droeneueh peubuet banmandum nyoe? soe nyang bri haknyan ubak droeneueh?" geujaweueh le isa, "ulon keuneuk tanyong leubeh ilee ubak gata. ci gata peugah ubak ulon, nabi yahya gepumano gob ngon hak soe? ngon hak allah atawa manusia?" teuma laju awaknyan jimeurok pakat, "meun-yoe tapeugah, 'ngon hak allah,' gobnyan jeuet geupeugah, 'meun-yoe meunan, pakon gatan-yoe hana tapeucaya ubak gobnyan?' teuma meun-yoe tapeugah 'ngon hak manusia,' banmandum ureueng jigeulawa tanyoe ngon batee, sabab awaknyan jipeucaya bahwa nabi yahya na kheueh sidroe nabi." dan awaknyan laju jijaweueh, "hana kamoe teupeue." dan isa laju geupeugah ubak awaknyan, "meun-yoe meunan ulon pih hana ulon peugah keu gata ngon hak soe ulon peubuet banmandum nyoe." isa laju geucalitra ubak ureueng nyan, miseue laen lageenyoe, "na sidroe ureueng nyang jipula saboh keubeueng tanoh keu lampoh anggo. lampoh jih nyan laju jipeusiwa bak padub droe ureueng nyang buet jih cit tukang meulampoh, oh ltheueh nyan di ureueng po lampoh nyan laju jijaung bungk a teumpat laen dan tinggai di nanggroe

gobnyan lam timpo nyang treb. oh katrok watee boh anggo nyan teupot, di ureueng po lampoh anggo nyan laju jiyuejak peulayan jih keu jijak lakee jeumba jih bak ureueng nyang siwa lampoh jih nyan. teuma le ureueng siwa lampoh nyan laju jipoh peulayan nyan dan jiyuewoe ngon jaroe soh. dan le ureueng po lampoh nyan jiyuejak teuma peulayan jih nyang laen, saban cit lagee peulayan nyang phon peulayan nyoe pih jipoh ngon jihina le ureueng siwa lampoh anggo nyan, dan jiwoe ngon jaroe soh. oh ltheueh nyan ureueng po lampoh nyan jiyuejak teuma peulayan jih nyang keu lhee. dan peulayan nyan pih laju jipoh oh ltheueh nyan jitiek uluwa pageue lampoh nyan. akhe jih ureueng po lampoh nyan laju jipeugah, 'peu nyang haroh lon peusanaut atueh awaknyan? bah lon yuejak aneuek nyang paleng lon gaseh. pasti aneuek ulon nyan jihoreumat le awaknyan!' teuma le awak nyang siwa lampoh nyan meunan jingiang aneuek ureueng po lampoh keudroe nyang jak bak jih, awaknyan laju jimarit sabe keudroe-droe, 'nyoeapat jih ahli wareh po lampoh nyoe. jak tapoh mate jihnyan, mangat tanyoe jeuet tateume atra waresan jihnyan.' teuma le awaknyan laju jibahue aneuek ureueng po lampoh nyan uluwa pageue dan laju jipoh mate aneuek nyan." dan laju geupeugah le isa, 'nyan, meun-yoe ureueng po lampoh nyan jiwoe, peue nyang haroh jipeubuet atueh ureueng-ureueng nyang siwa lampoh jihnyan? pasti nyang po lampoh teuka dan jipoh mate banmandum ureueng nyang siwa lampoh jih nyan, dan jijok lampoh anggo nyan ubak ureueng siwa nyang laen." banjideungoe haba nyan, jipeugah kheueh le ureueng rame nyan ubak isa, "hana sagai-sagai!" isa geuingiang atueh awaknyan dan laju geupeugah, "meun-yoe meunan, keupeuguna jih ayat alkitab nyoe? 'batee nyang hana jipeuguna le utoh rumah, batee nyan ka jeuet keu batee nyang phon.' soe mantong ureueng nyang reubah atueh batee nyan jihnyan hanco; dan soemantong nyang jitimok le batee nyan laju teugileng jeuet keu abee." guree-guree agama dan imeum-imeum ulee jiteupeue bahwa miseue-miseue nyang geupeugah le isa nyan rhot atueh jih. le sabab nyan awaknyan kana niet keuneuk drob gobnyan watee nyan cit, teuma awaknyan teumakot keu ureueng rame. dan awaknyan laju jimita watee nyang paih. awaknyan laju jisugok ureueng laen mangat jitem meupeurangoe lagee ureueng meupeurangoe nyang ikhlaih, dan jiyue bak ureueng nyan mangat jijeubak ngon mubagoe seumeue-eue ngon teumanyong, mangat awaknyan na rot jiseurah gobnyan ubak wewenang keukuasaan gubunur. teuma le ureueng-ureueng nyang ka keunong suleng nyan laju jipeugah ubak isa, "bapak guree, kamoe mutepueu bahwa mandum nyang bapak peubeuet keu kamoe nyan beutoi. dan kamoe pih kamoe teupeu bahwa bapak neupeurunoe kamoe ngon cara trok trang keuhai keuheundak allah sabab bapak hana neupeubeda manusia. ngon sabab nyan ci bapak peugah ubak kamoe, meunuror peuratordan agama tanyoe, peu kheueh jeuet tabayeu cukee ubak kaisar atawa hana?" dan isa geuteupeue akai awaknyan nyang lisek nyan. sabab nyan laju geupeugah, "cipeuleumah ubak ulon saboh keupeng peng pirak. gamba dan nan soe kheueh nyang na bak peng nyoe?" "gamba dan

nan kaisar!" jaweueb awaknyan. "meunyoé meunan, kheun isa ubak awaknyan, 'jok kheueh keu kaisar, peue nyang atra kaisar dan ubak po teu Allah, peu nyang atra Allah.'" dan nyata that dikeue ureueng rame nyan pih awaknyan hana jiteume buet isa nyang salah. awaknyan seungab mantong dan kagum ateuéh peue-peue nyang ka geujaweueb le isa nyan. na padubdroe nibak gulongan ureueng saduki jijak meurumpok ngon isa. (awaknyan na kheueh peureuteu ureueng nyang meupeundapat bahwa ureueng nyang ka mate hana udeb le.) awaknyan jityanyong bak isa, "bapak guree, nabi musa geutuleh hukom lagee nyoe keu geutanyoe: meunyoé sidroe ureueng agam mate dan ureueng nyan hana jitinggai aneuk, syedara ureueng nyan haroh jimeukawen ngon inong balee nyan mangat jeuet jibri keuturonan keu ureueng nyang ka mate nyan. ka kheueh na tujuh droe ureueng meusyedara adoe ngon aduen. nyang tuha jimeukawen, oh lheureh nyan mate hana jitinggai aneuk. oh lheureh nyan nyang keudua meukawen ngon inong balee nyan, dan ureueng nyan pih mate hana jitinggai aneuk. hai nyang lagee nyan rhot teuma ateuéh syedara jih nyang keu lhee dan sampoe ubak nyang keutujuh. dan akhe jih ureueng inong nyan pih meuninggai donya. oh uroe dudoe watee ureueng mate teupeu-udeb lom teuma, peurmoh soe kheueh ureueng inong nyan? sabab bantujuh droe adoe aduen nyan ka jimeukawen ngon ureueng inong nyan." geujaweueb le isa, "ureueng udeb bak saat nyoe jimeukawen, teuma ureueng-ureueng nyan patot teupeubeudoh oh ka lheureh mate, dan udeb bak jamen nyang teuma teuka, awaknyan hana meukawen. keuadaan awaknyan lagee malaikat, dan hana jitem mate. awaknyan na kheueh aneuk-aneuk Allah, sabab awaknyan ka teupeubeudoh keula-i nibak mate. nabi musa keudroe ka geupeugah ngon trang that bahwa ureueng mate teuma geupeubeudoh lom teuma. lam tulesan gobnyan keuhai tamah meuduro nyang hu nyan gobnyan geupeugah bahwa tuhan sibagoe 'allah nabi Ibrahim, Allah nabi Ishaq dan Allah nabi Yakub'. nyan, deuh nyata, bahwa Allah nyan bukan Allah ureueng mate! Allah ureueng-ureueng nyang mantong udeb! sabab, keu Allah kheueh banmandum ureueng udeb." na padubdroe guree agama laju jipeugah, "nyang geujaweueb le bapak guree nyan jroh lumpah na." sabab nyan awaknyan hana jijeuet teumanyong sapeue pih ubak isa. isa geutanyong ubak awaknyan, 'pakriban kheueh jeuet teupeugah bahwa raja nyang ba seulammat nyan keuturonan nabi daud? padahai nabi daud keudroe ka geupeugah lam kitab zabur, 'tuhan meufeureuman ubak tuhan lon: duek kheueh blaih uneuen lon, sampoe lon peujeuet banmandum musoh-musoh gata taklok ubak gata.' teuma, meunyoé nabi daud geupeugah raja nyang ba seulammat nyan 'tuhan', pakriban mungken gobnyan keuturonan nabi daud?" teungoh ureueng rame nyang na disinan jideungoe isa geupeugah haba, gobnyan laju geupeugah ubak murit-murit geuh, 'beu ate-ate kheueh keu guree-guree agama. awaknyan galak jijak-jak ngon bajee jubah nyang panyang, dan galak jihoreumat le gob lam pasai-pasai. awaknyan galak keu teumpat nyang teuhoreumat meunyoé jijak

u rumoh iebadat dan bak teumpat-teumpat ureueng khanuri. buet awaknyan teumipee dan jipeungeuet inong-inong balee sira jireupah rumoh inong balee nyan. dan jeuet jisom-som buet jih nyang jeuhet nyan, awaknyan jimeudoa panyang-panyang! hukومان ateuéh awaknyan oh uroe dudoe brat lumpah na!" lam baet tuhan, isa geukalon ureueng-ureueng jipeutamong peng lam baluem peuseumahan. na cit geukalon sidroe inong balee nyang biet-biet gasien ngon papa, jipeutamong dua boh keupeng peng teumaga lam baluem nyan. laju geukheun le isa, "deungoe ulon peugah: inong balee nyang gasien nyoe jipeutamong leueh jai nibak nyang laen. sabab awaknyan jibri banmandum nyang leueh nibak hareuta jih. teuma meunyoé inong balee nyoe, bah pih gasien ngon papa, jibri banmandum nyang na bak jihnyan nyang jipeureulee keu udeb jih keudroe." na ureueng-ureueng jimeututoe keuhai padubna jroh jih baet tuhan nyang teuhias ngon batee nyan get-get dan ngon barang-barang nyang teupeuseumah keu po teu Allah. dan isa laju geupeugah ubak awaknyan, "singoh na watee jih, banmandum nyang gata ngieng nyoe teuma teureuloh; hana meusi aneuk batee pih nyang na disinoe nyang tinggai bak teumpat jih!" awaknyan jityanyong bak isa, "bapak guree, pajan hainyan teuma teujadi? dan peu kheueh tanda-tanda jih bahwa katroh saat jih hainyan ji teuka?" geupeugah le isa, "ate-ate kheueh, bek sampoe gata keunong tipee. jai that manusia jiteuka ngon cara jipeuguna nan ulon, dan laju jipeugah lagee nyoe, 'ulon kheueh jihnyan!' dan 'katroh watee jih.' dan peue mantong nyang jipeugah le awaknyan bek kheueh gata peunyoé dan bek gata seutot awaknyan. meunan cit bek gata takot meunyoé gata deungoe haba muprang dan ureueng beurontak. banmandum nyan keubiet haroh teujadi leueh ilee. dan nyan bukan tanda bahwa donya nyoe ka trok watee keuneuk kiamat." dan oh lheureh nyan isa laju geupeugah lom tutoe haba gobnyan, "bansa nyang saboh teuma jimuprang ngon bansa nyang laen dan nanggroé nyang saboh teuma jijak prang nanggroé nyang laen. dipatmantong na teujadi geumpa bumoe nyang paleng hebat, bala museum deuk dan bala peunyakot. teuma teuka hai-hai nyang paleng teumakot dan meugrum-grum su meutaga ateuéh langet. teuma sigohlom bandum nyan teujadi, gata teuma jidrob dan ji enanya. gata laju jiba bak sidang lam rumoh-rumoh iebadat dan jipeutamong lam glab. meunan cit gata teuma jibahue ukeue raja-raja dan ukeue ureueng nyang mat kuasa sabab gata taseutot ulon. nyan kheueh watee jih nibak gata keu gata peusampoe haba get nibak Allah. dan cok kheueh teukat nyang bulat bahwa gata hana khawate keuhai peue nyang haroh gata peugah keu teubila droe. ulon keudroe teuma ulon bri ubak gata tutoe haba dan keubijaksanaan nyan, sampoe hana meusidroe pih nibak musoh-musoh gata hase jilawan atawa jisanggha peue nyang gata peugah. gata teuma jikhianat le ma ngon yah gata, le syedara-syedara gata, le wareh kawom gata dan le rakan-rakan gata. siladum nibak gata laju jipoh mate le awaknyan. gata teuma jibanci le mandum ureueng sabab gata murit ulon. bah pih meunan meusion ok nyang na bak ulee gata hana gadoh. meunyoé

gata meuteun dan saba, gata teuma seulamet." "meunyo gata takalon yerusalem ka jikeupong le tantra, gata laju tateupeue bahwa banda nyan hana treb le teuma hanco. bak watee nyan ureueng nyang na tinggai di yudea haroh jiplueng u gunong-gunong. ureueng nyang na tinggai lam banda haroh jitinggai banda nyan, dan ureueng nyang na diluwa banda bek jitamong lam banda. sabab bak uroe-uroe nyang lagee nyan na kheueh uroe 'uroe-uroe teupadi rhot hukoman'. deungon na lagee nyan ka teujadi lagee peue nyang ka teuteuleh lam alkitab. lumpah that peudeh watee teuka uroe nyan keue ureueng inong nyang teungoh mume, dan meunan cit mak nyang mantong jipeumom sinyak! nanggroo nyoe teuma jiteuka azeb nyang paleng parah, dan tuhan laju geuhukom bansa nyoe. na nyang geuhukom ngon peudeueng, na cit nyang ba sibagoe ureueng keunong teuen u nanggroo-nanggroo ureueng laen; dan ureueng-ureueng nyang hana jituri allah teuma jigiloe-giloe yerusalem sampoe an habeh watee nyang ka geupeuteuntee le tuhan keu awaknyan." "eunteuk, bak mata uroe, buleuen dan bintang teuma leumah tanda-tanda. ateuh bumoe, bansa-bansa teuka teumakot, yo ngon bingong watee jiteuka geulanteue ngon gulumbang laot. manusia teuma teuka teumakot siteungoh mate watee jihadab peue nyang teuma teujadi bansigom donya nyoe, sabab nyang mat kuasa ateuh angkasa raya laju jiteuka karu ngon teung bayeueng. bak watee nyan kheueh aneuk manusia teuma teuka lam awan ngon kuasa keumuliaan nyang rayeuk. meunyo hai-hai nyan ka jipeuphon teujadi, beudoh kheueh dan beuot kheueh ulee gata, sabab sikeujab teuk gata teuma teupeuseulamet." dan isa laju geucalitra bak awaknyan misieu nyang laen, "ngieng kheueh ateuh bak ara dan banmandum bak kayee nyang laen. meunyo pucok-pucok jih ka jipeuphon deuh teukalon, gata tateupeue bahwa musem khueng karab teuka. meunan cit meunyo gata ngieng hai-hai nyan teujadi, gata teuma tateupeue bahwa po teu allah deungon reujang that geumat peurintah sibagoe raja. butateupeue kheueh, bahwa hai-hai nyang lagee nyan teuma teujadi sigohlom ureueng-ureueng nyang udeb bak watee nyoe teuma mate banmandum. langet ngon bumoe teuma hanco, teuma haba nyang ulon peugah teutab na siumu masa." "jaga kheueh droe gata, bek laloe gata ngon gata teugok ie kreueh dan meupoyapoya hana meuteuntee, atawa laloe gata pike keuhai-hai udeb gata, sampoe gata hana siab watee uroe nyan teuka ngon hana teusangka-sangka. sabab uroenyan teuma jiteuka lagee peurangkab keumandum ureueng nyang na ateuh rhung bumoe nyoe. meujaga-jaga kheueh, dan meudoa kheueh sabe mangat gata hase gata hadab banmandum hai nyang teuma teujadi dan gata hase tajakmeuhadab ngon aneuk manusia." isa geuseumeubeuet nibak baet tuhan watee uroe, dan oh watee malam gobnyan laju geujak u buket zaiton laju geutinggai nibak teumpat nyan. tieb-tieb beungoh banmandum ureueng jijak ubak baet tuhan keu jijak deungoe isa geuseumeubeuet. peurayaan ruti hana meuragoe nyang teupeunan paskah that. imeum-imeum ulee ngon guree-guree agama teungoh jimita rot pakriban cara keu jikeuneuk poh mate

isa ngon cara seungab-seungab, sabab awaknyan jita-takot keu ureueng rame. oh ltheuehnyan ibilih jitamong lam yudas nyang teuhoi iskariot, iskariot nyan na kheueh sidroe lamkawan murit isa nyang dua blaih droe. sabab nyan yudas laju jijak meurumpok dan jimeurokpakat ngon imeum-imeum ulee dan ulee-ulee kawan nyang kawai baet tuhan keuhai pakriban cara jiteume jok isa ubak awaknyan. awaknyan galak that-that dan jimeujanji teuma jibri peng keu yudas nyan. yudas pih ka situju dan laju jipeuphon mita rot pakriban cara mangat isa jiteume jok bak awaknyan, hana jiteupeu le ureueng laen. dan trok kheueh watee jih teupeuna peurayaan ruti hana meuragoe dan bubiri keu peunajoh paskah laju teusie. teuma le isa laju geuyue ubak petrus ngon yahya, "gata jak laju peusiab peunajoh paskah keu geutanyoe." "dipat nyang bapak meuheuet mangat atra nyan kameo peusiab?" jitanyong le awaknyan. geujawueb le isa, "bak watee gata tatamong lam banda, na sidroe ureueng agam nyang teungoh jiba ie lam calueng laju meurumpok ngon gata. dan gata seutot laju ureueng nyan u rumoh nyang jijak, dan gata peugah laju ubak ureueng po rumoh nyan: guree geupeugah, 'dipat kheueh teumpat keu murit-murit ulon dan ulon makheun peunajoh paskah?' ureueng po rumoh nyan laju jitunyok ubak gata saboh ruweueng kama ateuh nyang luwah ngon raya, kama nyan ka teupeuleungkab ngon peurabot. dan gata peusiab kheueh banmandum nyang ulon peugah bak teumpat nyan." dan geujak kheueh laju petrus ngon yahya, dan laju meurumpok banmandum paih that lagee nyang geupeugah le isa. awaknyan pih laju jipeusiab peunajoh paskah nyan. oh ka troh watee jih peunajoh paskah nyan teumakheun, isa geudeuk ngon banmandum murit geuh bak teumpat peujame. dan laju geupeugah ubak murit geuh, "ulon meuheuet that keuneuk makheun peunajoh paskah nyoe meusigoe ngon gata sigohlom ulon meudeurita! sabab, peucaya kheueh: ulon hana teuma lon pajoh le nyang nyoe sampoe makna nibak peujame suci nyoe teupeusampoe lam donya baro allah." oh ltheueh nyan isa geubeuot piala nyang meuasoe ie anggo nyan, laju geumeudoa syukoe ubak po teu allah, oh ltheueh nyan geupeugah, "cok kheueh nyoe, dan jok-jok kheueh keu awaknyan; kareuna beutateupeue kheueh: phon bak saat nyoe hana teuma ulon jieb le ie anggo nyoe sampoe trok allah ka geumat kuasa deungon sipeunoh jih." oh ltheueh nyan isa laju geucok ruti. dan oh ka ltheueh geumeudoa syukoe ubak hadhirat allah, laju geupriek-priek ruti nyan ngon jaroe gobnyan dan geujok-jok laju ubak murit-murit geuh sira geupeugah, "nyoe kheueh tuboh ulon nyang teubie keu gata. peubuet kheueh lagee nyoe mangat gata ingat ulon." meunan cit oh ka ltheueh makheun, laju geujok piala nyang meuasoe ie anggo nyan ubak awaknyan sira geupeugah, "piala nyoe na kheueh janji po teu allah nyang baro, nyang ka teupeusah ngon darah ulon – darah nyang teuroe keu gata." "dan gata ngieng kheueh! ureueng nyang khianat ulon na disinoe meusajan ngon ulon! aneuk manusia keubiet teuma mate lagee nyang ka geupeuteuntee le po teu allah; teuma cilaka kheueh ureueng nyang khianat gobnyan!" dan awaknyan laju jiteumanyong sabe keudroe-droe, soe lamkawan

awaknyan nyang peubuet hainyan. lamkawan murit-murit isa laju jimeudakwa sabe keudroe-droe keuhai soe lamkawan awaknyan teuanggab nyang paleng rayeuk. isa geupeugah ubak awaknyan, "raja-raja bansa nyang hana jituri ubak po teu allah jiseksa rakyat jih, dan nyang mat-mat kuasa jipeugah 'nyang lindung rakyat'. teuma gatanoye hana jeuet lagee nyan. sikeubit jih, ureueng nyang paleng rayeuk lamkawan gata haroh beujeuet nyang paleng ubit, dan peumimpin haroh beujeuet lagee peulayan. soe kheueh nyang paleng rayeuk: ureueng deuk makheun bak meuja, atawa ureueng nyang peutimang gobnyan? teuntee ureueng nyang deuk nyan. teuma di ulon na lamkawan gata sibagoe peulayan. lam peue-peue mantong ulon nyoe sosah, gata sabe na meusajan ngon ulon. lagee bapak ka geubri ubak ulon hak keu ulon mat peurintah, meunan cit ulon teuma lon bri hak nyan keu gata. deungon lagee nyan gata jeuet meumangat-mangat ngon ulon bak watee ulon jeuet keu raja. dan gata teuma gata deuk ateuah dua blaih boh takhta keu gata peurintah ateuah dua blaih boh sukee bansa israel." "simon, simon, deungoe kheueh nyoe! iblih ka teubri idhin keu jiujoie gatanoye; lagee gandom teupeu aseng nibak kulet sampoe nyang get teupeu aseng nibak nyang brok. teuma ulon ka lon meudoa keu gata, hei simon, mangat iman gata bek cupa. dan meunyoie gata katagisa ubak ulon, gata haroh tapeukong bubena syedara-syedara gata." jijawueb le petrus, "tuhan, ulon kasiab lon tamong lam glab meusajan-sajan ngon tuhan!" "peucaya kheueh hei petrus," kheun isa, "sigohlom manok jiku-uek uroenoye, gata ka lhee goe gata iengkeue keu ulon." oh ltheueh nyan isa geupeugah ubak awaknyan, "yoh watee dilee, watee ulon kirem gata deungon hana lon bri idhin gata ba dompet, baluem atawa sipatu, peu kheueh gata na kureueng sapoe-sapeue?" "hana!" jawueb awaknyan. "teuma jinoenoye," kheun isa, "soe nyang na dompet atawa baluem, atranyan haroh jiba sajan; dan soe nyang hana meupeudeueng, haroh jipeubloe jubah jih keu jibloe peudeueng. sabab, peucaya kheueh, ayat alkitab nyang na teutuleh lagee nyoe, 'gobnyan jianggab lagee sidroe ureueng jeuhet,' haroh teujadi ateuah droe ulon. sabab peue nyang teutuleh lam alkitab keuhai ulon teungoh teujadi bak watee nyoe." "tuhan," kheun murit-murit isa, "kalon kheueh, disinoe na dua boh peudeueng." "ka kheueh!" jawueb isa. isa laju geutinggai banda dan geujak teuma u buket zaiton, dan murit-murit gobnyan pih na jijak sajan ngon gobnyan. watee ka trok bak teumpat nyan, laju geupeugah ubak awaknyan, "meudoa kheueh mangat gata bek meudesya meunyoie gata uj-ujoe." oh ltheuehnyan gobnyan laju geujak leubeh jih bacut nibak awaknyan, na kira-kira jioh jih euat batee teugeulawa, oh trok keunan laju geumeuteutot sira geumeudoa, "bapak," kheun gobnyan, "meunyoie jeuet, neupeujioh kheueh nibak ulon peundeuritaan nyang haroh ulon rasanoye. teuma bek kheueh meunurot lakee ulon, teuma meunurot lakee bapak mantong." sidroe malaikat geujak ubak gobnyan laju geupeuteuga gobnyan. isa lumpah that meudeurita bant geuh seuingga gobnyan seumaken khusyuek geumeudoa. reuoh gobnyan lagee

darah meutreb-treb roe bak tanoh. oh ka ltheueh seuleusoe geumeudoa, isa laju geugisa ubak murit-murit geuh. laju geungieng awaknyan banmandum ka habeh teunget sabab lumpah that seudeh. laju geupeugah ubak awaknyan, "pakon gata teunget? beudoh kheueh dan meudoa kheueh mangat gata hana keunong cubaan." teungoh isa mantong geumeututoe disinan, teuka kheueh ubak gobnyan saboh kawan ureueng. awaknyan nyang teuka nyan jipimpen le yudas, sidroe lamkawan murit isa. oh ltheuehnyan yudas laju jijak ubak isa dan jicom gobnyan. teuma isa laju geupeugah ubak jihnyan, "yudas, peu kheueh ngon gata com nyan gata keuneuk khianat ateuah aneuek manusia?" watee murit-murit isa nyang na disinan jingieni peue nyang teujadi, awaknyan jipeugah, "tuhan, kamoe heuntam mantong ngon peudeueng!" dan watee nyan cit sidroe lamkawan murit isa laju jisuet peudeueng ngon peudeueng nyan laju jiheuntam ateuah sidroe hamba imeum agong sampoe punyueng blaih uneuen ureueng nyan putoh. dan isa laju geupeugah, "ka kheueh!" laju geumat punyung ureueng nyan dan wateanyan pih ka puleh. oh ltheueh nyan isa laju geupeugah ubak imeum-imeum ulee panglima-panglima nyang kawai baet tuhan, meunan cit peumimpin-peumimpin yahudi nyang teuka keunan keu jijak drob gobnyan, "peu kheueh ulon nyoe ureueng jeuhet, sampoe gata tateuka keunoe ngon peudeueng dan kayee puntong keu gata jak-drob ulon? tieb-tieb uroe ulon nyoe na meusajan gata lam baet tuhan, hana gata drob ulon. teuma nyoe kheueh watee jih gata meutindak, watee kuasa itam kajimat kuasa." awaknyan jidrob isa dan jiba laju u rumah imeum agong. petrus jiseutot rot jioh. bak teungoh-teungoh leuen rumah nyan apui puron ka awai jipeuhu dan petrus laju jijakduek bak bineh apui nyan ngon ureueng-ureueng nyang teungoh meu adeueng disinan. sidroe ureueng inong peulayan nyang na disinan laju jingieni petrus teungoh meu adeueng bak bineh apui puron nyan; oh ltheueh nyan laju jipeugah ubak petrus, "ureueng nyoe bunoe na ulon ngieni meusajan-sajan ngon isa!" teuma petrus ji-iengkeue sira jibantah dan jipeugah lagee nyoe, "ulon sagai-sagai hana lon turi keu ureueng nyan!" hana treb teuma oh ltheueh nyan, na teuma sidroe teuk ureueng laen jikalon petrus dan laju jipeugah, "hana salah le, gata na kheueh sidroe lamkawan ureueng nyan!" jijawueb le petrus, "bukon, kon ulon!" na teuma sijeuem oh ltheueh nyan, na teuma sidroe teuk ureueng laen ngon su nyang teuga laju jipeugah, "ka beutoi ureueng nyoe murit isa, sabab jih nyoe pih ureueng galilea!" jawueb petrus, "peue nyang gata meukeusut, ulon hana lon teupeu!" watee nyan cit teuma, teungoh petrus mantong jipeugah haba, manok laju jiku ueuk. isa pih laju geupaleng dan geungieng ateuah petrus. dan petrus laju teungat tuhan nyang ka ltheueh geupeugah ubak gobnyan, "sigohlom manok jiku-uek uroe nyoe, gata lhee goe gata iengkeue keu ulon." dan jiteubiet kheueh laju petrus nibak teumpat nyan sira jimoe musok-musok. ureueng-ureueng nyang teungoh keumiet isa nyang na disinan, laju jihina ngon jipeumeueun-meueun dan jipoh isa. mata gobnyan laju jibot sira jitanoyong ubak gobnyan, "ci peugah soe nyang poh gata?" dan jai

that tutoe haba nyang laen nyang sifeuet jih meuhina nyang jituju ubak isa. oh watee beungho, mandum peumimpen yahudi, mandum imeum-imeum ulee, mandum guree-guree agama ka meusapat, dan isa laju jiba ukeue mahkamah agama awaknyan. "peugah laju ubak kamoe," kheun awaknyan, "peue kheueh gatanyoe raja nyang ba seulamat?" geujaweeb le isa, "bah kheueh nyan ulon peugah ubak gata, teuma gata teutab hana tapateh. dan meunyo ulon teumanyong ubak gata, gata teutab hana tatem jaweeb. teuma phon saat nyoe, aneuek manusia teuma geuduek blaih uneuen allah nyang mahakuasa." awaknyan banmandum jipeugah, "meunyo meunan, gatanyoe aneuek allah?" geujaweeb le isa, "lagee nyan gata kheun." dan awaknyan laju jipeugah, "hana peureulee le saksi! tanyoe ka tadeungoe nibak babah jih keudroe?" banmandum ureueng nyang na lam teumpat sidang nyan jidong, dan isa laju jiba ukeue pilatus. nibak teumpat nyan awaknyan laju jipeuphon tudoh gobnyan. awaknyan jipeugah lagee nyoe, "kamoe teume ureueng nyoe teungoh jipeusisat rakyat. ureueng nyoe jipeusuna rakyat mangat rakyat bek jibayeue cukee ubak kaisar, sabab jipeugah jihnyan na kheueh, sidroe raja." dan pilatus laju jityanyong ubak isa, "peu kheueh beutoi gata raja ureueng yahudi?" geujaweeb le isa, "lagee nyan kheueh kheun gata." dan laju jipeugah le pilatus ubak imeum-imeum ulee ngon ureueng rame nyang na disinan, "hana lon teume sapewe pih peue nyang ka jipeubuet salah le ureueng nyoe sampoe haroh ulon hukom." teuma awaknyan laju jipaksa, "deungon meuneubeuet nyang jipeuruno, ureueng nyoe ka jipeusuna ureueng bansaboh yudea; phon-phon that di galilea, dan watee nyoe ka trok keunoe." watee jideungoe hai nyan le pilatus, laju jityanyong, "peue kheueh ureueng nyoe ureueng galilea?" oh ka ltheueh teubri tee bahwa isa asai jih dimiyueb keukuasaan herodes, pilatus laju jikirem isa ubak herodes, nyang yoh watee nyan na teuma di yerusalem. herodes galak lumpah na watee jingiang isa, sabab katreb that jideungoe keuhai gobnyan dan meuheuet that keuneuk jikalon gobnyan. jihnyan that jimeuharab mangat hase jikalon isa geupeubuet buet nyang ajaeb. sabab nyan kheueh herodes jai that jiteumanyong ubak gobnyan, teuma isa sagai-sagai hana geutem jaweeb. imeum-imeum ulee dan guree-guree agama pih na meuhadab disinan dan jitudoh isa deungon teumudoh nyang brat-brat. herodes dan sipa-i-sipa-i jih ji-ejek ngon jihina isa, laju jipeungui bak gobnyan peukayan keurajeuen, oh ltheueh nyan jikirem keula-i gobnyan bak pilatus. bak uroenyang cit teuma herodes ngon pilatus, nyang yoh awai jimeumusoh oh ltheueh nyan ka get lom teuma. pipaltus laju jipeusapat bubena imeum-imeum ulee, bubena peumimpen, dan rakyat, laju jipeugah ubak awaknyan, "gatanyoe ka taba ureueng nyoe ubak ulon dan gata peugah jihnyoe ka jipeusisat rakyat ba. jinoenyoe dikeue gata ureueng nyoe ka ulon pareksa, teuma hana ulon teume mubacut pih buet nyang jeuhet nyang ka jipeubuet le ureueng nyoe. herodes pih meunan cit peundapat jih, sabab jihnyan ka jikirem lom teuma isa nyoe ubak kamoe. ureueng nyoe hana jipeubuet mubacut pih nyang patot jihnyoe teuhukom mate. le sabab nyan ulon seunuet ure-

ueng nyoe oh ltheueh nyan ulon peuleueh." bak tieb-tieb teuka watee peurayaan paskah, pilatus haroh jipeuleueh sidroe ureueng hukoman keu rakyat. banmandum ureueng nyang na meugumpoi disinan laju jikuk, "poh mate ureueng nyan! peuleueh laju barabas keu kamoe!" (barabas jipeutamong lam glab sabab jih nyan kajipeubuet salah ngon cara jipeubuet beurontak nyang teujadi lam banda dan sabab jipoh mate ureueng laen.) pilatus jitem peuleueh isa, sabab nyan kheueh jipeugah sigoe teuk bak ureueng rame nyan. teuma awaknyan laju jikuk, "saleb laju jihnyan! saleb laju jihnyan!" dan keu nyang keu lthee goe jih pilatus jipeugah bak awaknyan, "teuma peue salah gobnyan? ulon hana lon teume mubacut pih peu buet nyang ka salah jipeubuet, dan nyang patot gobnyan nyoe haroh teuhukom ngon hukoman mate! ulon teuma lon seunuet gobnyan dan oh ltheueh nyan laju ulon peuleueh." teuma di ureueng rame nyan hana putoh jikuk habeh sineuga mangat isa beuteusaleb. dan akhe jih su ureueng nyang nyang kuk nyan meuhase. dan pilatus laju jipeurhot hukoman mate ateuh isa sisuai ngon nyang jilakee le ureueng rame nyan, dan laju jipeuleueh ureueng nyang awaknyan lakee, na kheueh nyang jipeutamong lam glab sabab ka jipeubuet buet nyang salah ngon cara jipeuna beurontak dan jipoh mate ureueng laen. oh ltheueh nyan isa laju jikuk bak ureueng rame nyan keu jipeubuet ban galak droe jih. teuma isa pih laju jiba le awaknyan. bak teungoh rot ueh, awaknyan laju meurmupok ngon simon, nyang asai jih nibak kirene, nyang teungoh jitamong lam banda. awaknyan laju jidrob simon nyan, laju jipaksa ureueng nyan mangat jigulam kayee saleb nyan dilikot isa. jai that-that ureueng nyang seutot dilikot isa – lamkawan ureueng nyan na cit ureueng inong. ureueng-ureueng inong nyan jipeumo sira jipeuba-e isa. teuma isa laju geupaleng ubak awaknyan sira geupeugah, "hei ureueng-ureueng inong yerusalem! bek kheueh gata peumoe ulon. gata peumoe kheueh droe gata keudroe dan aneuek-aneuek gata. sabab teuma teuka watee jih manusia jipeugah, 'meu-untong that-that ureueng inong nyang hantom na mume, hantom na jimeu aneuek dan hantom na jipeumom sinyak!' watee nyan kheueh manusia teuma jipeugah ubak gunung-gunong, 'hei gunung, rhot kheueh ateuh kamoe!' dan ubak buket-buket jipeugah, 'hei buket-buket, seubee kheueh kamoe!' sabab meunyo keu bak kayee nyang mantong udeb, manusia jipeubuet lagee nyoe, peuteuma nyang teuma jipeubuet le awaknyan keu bak kayee nyang ka mate!" na teuma dua droe ureueng laen – mandum duadroe nyan ureueng jeuhet – nyang jiba le awaknyan keu teuhukom mate meusigoe ngon isa. oh watee troh ubak teumpat nyang jibohnan buket "bruek ulee", awaknyan laju jisaleb isa meusigoe ngon mandua droe ureueng jeuhet nyan – sidroe blaih uneuen dan sidroe teuk blaih wie isa. isa laju geumeudoa, "ya bapak, neupeumaphon kheueh awaknyan! awaknyan hana jiteupeu peue nyang jipeubuet." peukayan isa laju jibagi-bagi lamkawan awaknyan ngon cara jiondi. ureueng rame jidong disinan sira meunon-ton, teungoh peumimpen-peumimpen yahudi jihina isa sira jipeugah, "jihnyoe ka sipeuseulamat ureueng

laen; cuba kheueh jinoo jipeuseulamat droe jih keudroe, meunyoee jihnyan beutoi-beutoi raja nyang ba seulamat nyang geupileh le po teu allah! sidadusidadu nyang kawai gobnyan pih jihina isa. awaknyan jijak ubak gobnyan sira jiba ie anggo masam, sira jijok ie anggo nyan jipeugah lafee nyoe, "meunyoee gata biet-biet raja ureueng yahudi, cuba peuseulamat droe gata!" nibak paleng ateuheh kayee saleb isa nyan na teutuleh lafee nyoe: "nyoe kheueh raja ureueng yahudi." sidroe ureueng jeuhet nyang teusaleh meusajan ngon isa nyan pih jihina gobnyan. jipeugah le ureueng jeuhet nyang teugantueng bak kayee saleb nyan, "droeneueh kon raja nyang peuseulamat umat manusia? ngon sabab nyan, cuba kheueh peuseulamat droe gata meusajan ngon kameo!" teuma le ureueng jeuhet nyang sidroe teuk laju jiseugah rakan jihnyan sira jipeugah lafee nyoe, "peu kheueh gata hana teumakot ubak po teu allah? gata saban lafee jihnyan teuhukom mate. teuma hukoman geutanyoe manduanyoe keubiet ka paih ngon buet nyang tapeubuet. teuma di ureueng nyan mubacut pih hana salah!" oh lheureh nyan laju jipeugah le ureueng nyan, "isa, ingat kheueh ulon watee droeneueh teuka sibagoe raja!" "peucaya kheueh," kheun isa ubak ureueng nyan, "uroenyoe gata na meusajan ngon ulon lam syeuruga." kira-kira poh dua blaih cot uroe timang, mata uroe hana meucahya, dan bansaboh nanggroee nyan ka habeh seupot sampoe poh lhee seupot. ija tutob tingkab nyang na meugantung lam baet tuhan beukah dua. dan oh lheureh nyan isa laju geudumpek ngon su nyang meutaga, "bapak! lam jaroe droeneueh ulon seurah droe ulon!" oh ka lheureh geupeugah lafee nyan, gobnyan pih meuninggai donya. watee jingieing le pang pasokan peue nyang teujadi, laju jipujooe allah, dan laju jikheun, "keubiet that, ureueng nyoe hana meusalah!" ureueng rame nyang na jijak keunan keu jijak meunonton, na cit jingieing peue nyang ka teujadi. awaknyan banmandum jiwoe ngon ate teulah that. dan banmandum rakan isa, meunan cit deungon ureueng-ureueng inong nyang seutot gobnyan nibak galilea, jidong jioh-jioh dan jikalon banmandum peue nyang ka teujadi nyan. na sidroe ureueng nan jih yusuf, ureueng nyan asai jih nibak banda arimatea nyang jitamong lam nanggroee yudea. ureueng nyoe sidroe ureueng get ate dan jihoreumat le gob, dan ureueng nyoe teungoh jipreh-preh pajan po teu allah geupeu phon peurintah sibagoe raja. bah pih ureueng nyoe anggota mahkamah agama, gobnyan hana situju ngon keputosan dan tindakan nyang ka jicok le mahkamah nyan. yusuf nyoe jijak meuhadab laju ubak pilatus mangat jeuet manyet isa jibri keu geuh. oh lheurehnyan le yusuf nyan laju jipeutron manyet isa nyang mantong meugantung bak kayee saleb, dan laju jibalot ngon ija lineun sibagoe ija kapan. oh lheurehnyan manyet isa nyan laju jipeutamong lam kubu nyang ka lheureh jipeuget lam guha batee – kubu nyan hantom na lom teupeuguna. uroe nyan na kheueh uroe jeumeuat; dan uroe sabat rab teupeuphon. ureueng-ureueng inong nyang jijak meusigoe ngon isa nibak galilea jiseutot laju yusuf dan jikalon pat kubu isa nyan. meunan cit jingieing le awaknyan pakriban manyet isa jikeubah lam kubu nyan. oh lheurehnyan awaknyan laju jiwoe dan jipeusiab laju

mubagoe ureeh dan minyeuk mangat bee keu jiboh minyeuk bak manyet isa. bak uroe sabat, awaknyan laju jipioh jimubuet sibagoe jitaat keu hukom agama. banseuboh that, uroe aleuhah, ureueng-ureueng inong nyan jijak ubak teupat isa teukubu, sira jiba mubagoe rupa ureeh dan minyeuk mangat bee nyang ka awaknyan peuna. oh troh awaknyan bak kubu isa nyan, laju jingieing batee ngon tob babah kubu nyan ka meugule bak bineh. dan awaknyan laju jitamong lam kubu nyan, teuma teutab hana jiteume manyet tuhan isa lam kubu nyan. teungoh awaknyan jidong sira teumanueng dan bingong bak jipike keuhai manyet nyan, hana jisangka-sangka na dua droe ureueng ngon peukayan muble-ble cahya ka teudong bak bineh awaknyan. awaknyan teumakot lumpah na, laju jisujut trok bak tanoh, dan awaknyan nyang dua droe nyan laju jipeugah bak awaknyan, "pakon gatanyoe jak mita ureueng udeb di teungoh-teungoh ureueng mate? gobnyan hana disinoo, gobnyan ka geubeudoh! ingat kheueh peue nyang ka lheureh geupeugah ubak gata yoh gobnyan mantong di galilea, bahwa aneuek manusia haroh jiseurah ubak ureueng meudesya, laju jisaleb, dan bak uroe nyang keu lhee teuma geubeudoh!" "dan teuingat kheueh le ureueng-ureueng inong nyan peue nyang ka lheureh geupeugah le isa. oh ka geuwoe nibak kubu nyan, awaknyan laju jicalitra peue nyang ka lheureh jikalon ubak ban siblahi droe rasui dan banmandum murit nyang laen. ureueng-ureueng inong nyang jipeugah banmandum nyan ubak murit-murit isa, na kheueh: maryam magdalena, yohana dan maryam mak yakobus, dan inong-inong nyang laen nyang na meusajan awaknyan. teuma le rasui-rasui nyan jipike peue nyang ka jipeugah le ureueng-ureueng inong nyan na kheueh haba buhak. awaknyan hana jipateh peue nyang jipeugah le ureueng-ureueng inong nyan. teuma petrus laju jibeudoh dan jiplueng laju ubak kubu teupat isa teukubu. sira jiteukui laju jijeungeuek lam guha nyan, dan deuh laju jingieing nyang na disinan na kheueh ija kapan. petrus hireun lumpah na, dan laju jiwoe ngon mubagoe rupa jikheun dan jiteumanyong lam ate jih keuhai peue nyang ka teujadi nyan. bak uroe nyan cit teuma, na dua droe murit isa teungoh jijak bak saboh gampong nyan nan gampong nyan emasa, na kira-kira siblahi kilo metee jioh jih nibak yerusaleem. sira jijak awaknyan meututoe keuhai banmandum peue-peue nyang ka teujadi nyan. teungoh awaknyan jipeugah haba dan jituka pikeran, isa keudroe teuka dan geujak meusajan ngon awaknyan. awaknyan laju jingieing isa, teuma na sapeue-sapeue nyang teujalok awaknyan hana jituri gobnyan. dan isa laju geupeugah, "peue nyang gata peugah bak teungoh rot ueh nyoe?" awaknyan laju jipioh ngon ie muka nyang seudeh. dan sidroe lamkawan awaknyan, nyang nan jih kleopas, jityanyong bak isa, "mungken bapak sidroe ureueng aseng di yerusaleem nyang hana bapak teupeue peue nyang ka teujadi disideh akheakhe nyoe?" "peuristiwa peue?" geutanyong le isa. "peuristiwa nyang teujadi ateuheh isa, ureueng nazaret nyan," jawebeu awaknyan. "gobnyan nabi. tutoe haba dan buet-buet gobnyan meukuasa that – bah kheueh nyan bak mata po teu allah meunan cit bak mata

rakyat ba. imeum-imeum ulee dan peumimpen-peumimpen bansa geutanyoe jiseurah gobnyan keu teuhukom mate, dan awaknyan laju jisaleb gobnyan! padahai kamoe meuharab that bahwa gobnyan kheueh nyang teuma peubeubaih israel! dan uroenyoe uroe nyang keu lhee seujak hainyan teujadi. lom teuma, na padubdroe ureueng inong nibak kawom kamoe ka jipeujeuet kamoenyoe teukeujot. banseuboh that awaknyan ka jijak ubak kubu, teuma hana jiteume manyet gobnyan lam kubu nyan. laju awaknyan jigisa dan jipeugah bahwa awaknyan na jingiang malaikat, dan malaikat-malaikat nyan geupeugah bahwa isa ka udeb. na padubdroe lam kawom kamoe laju jijak ubak kubu nyan dan laju jingiang bahwa peue nyang jipeugah le ureueng inong nyan biet-biet beutoi, teuma awaknyan hana jikalon isa." dan isa laju geupeugah ubak awaknyan, "gata biet-biet bangai! meulet that keu gata pateh banmandum nyang ka lھےueh geupeugah le nabi-nabi! peue kheueh hana gata teupeue bahwa raja nyang ba seulamat nyan haroh geurasa banmandum deurita nyan, oh lھےueh nyan baro kheueh trok ubak keumuliaan?" oh lھےuehnyan isa laju geupeu trang ubak awaknyan peue nyang ka teuteuh lam mandum alkitab keuhai droe gobnyan, phon lam kitab-kitab nabi musa sampoe ubak kitab nabi-nabi. teungoh jipeugah haba lagee nyan awaknyan jijak laju karab trok u gampong nyang jituju. isa geupeue jeuet droe siulah-ulah keuneuk jak laju, teuma awaknyan laju jipeuteun gobnyan sira jipeugah. "tinggai kheueh bak teumpat kamoe," kھےun awaknyan ubak gobnyan, "jinoenyoe karab malam dan karab seupot." dan isa laju geutamong keu geumudom bak teumpat awaknyan. teungoh geudeuk geumakھےun meusajan awaknyan, isa laju geucok ruti, geupeugah doa syukoe ubak po teu allah, laju geuprah-prah ruti nyan ngon jaroe gobnyan, laju geujok ruti nyan keu awaknyan. oh lھےueh nyan baro kheueh jitee le awaknyan bahwa ureueng nyang bunoeon geujak ngon awaknyan na kheueh isa. teuma gobnyan gadoh nibak mata awaknyan. jimarit awaknyan sabe keudroe-droe, "bukon kheueh rasa ate geutanyoe lagee meugeulumbang, watee gobnyan geumariet ngon tanyoe bak teungoh rot, dan geupeu trang asoe alkitab ubak geutanyoe?" watee nyan cit teuma awaknyan jibeudoh dan jijak laju u yerusalem. disinan awaknyan laju meurumpok ngon bansiblahi droe murit isa teungoh meugumpoi ngon ureueng laen. awaknyan jipeugah, "biet-biet beutoi that tuhan ka udeb lom teuma! gobnyan ka geupeuleumah droe geuh ubak simon!" mandua droe murit isa nyang ban teuka nyan laju jicalitra peungalaman awaknyan bak teungoh rot, dan pakriban awaknyan jituri tuhan watee gobnyan teungoh geuprah-prah ruti. teungoh awaknyan mantong meucalitra haba nyan, hana jisangka-sangka isa ka teudong di teungoh-teungoh awaknyan laju geupeugah, "seujahteura kheueh gata!" awaknyan teukeujot dan teumakot lumpah na, kareuna jisangka jipike le awaknyan nyang jingiang nyan na kheueh antu. teuma isa laju geupeugah, "pakon gatanyoe teumakot? pakon ragu-ragu lam ate gata? ngiang jaroe ulon dan ngiang teuma gaki ulon. beutateupeue kheueh, bahwa nyoe ulon, isa! geue kheueh dan peurati

kھےueh beuget-get, sabab meunyoe antu hana meuasoe atawa tuleueng, lagee nyang gata ngiang bak ulon." isa geupeugah meunan sira geungiang bak gaki dan jaroe awaknyan. dan watee awaknyan gohlom cit jipeucaya, sabab lumpah that galak ngon hireuen, isa laju geutanyong ubak awaknyan, "peu kheueh bak gatanyoe disinoe na peunajoh?" dan awaknyan laju jijo ubak gobnyan sikrek eungkot nyang ka lھےueh teu crah. isa geucok eungkot nyan dan laju geupajoh dikeue awaknyan. oh ka lھےueh nyan laju geupeugah ubak awaknyan, "nyoe kheueh hai-hai nyang ka lھےueh ulon peugah ubak gata yohmantong ulon na meusajan ngon gata; bahwa tieb-tieb hai nyang teuteuh lam kitab-kitab nabi musa keuhai ulon, nabi-nabi dan lam kitab zabur, nyan haroh teujadi." oh lھےuehnyan isa geubuka pikeran awaknyan mangat hase jipeuphom meukeusut nyang teuteuh lam kitab suci. dan laju geupeugah le gobnyan ubak awaknyan, "lam kitab suci na teuteuh bahwa raja nyang ba seulamat nyan haroh meudeurita, dan haroh geubeudoh keula-i nibak mate bak uroe nyang keu lھے. dan meunan cit ateuh nan raja peuseulamat nyan haroh teupeusampoe ubak banmandum bansa bahwa manusia haroh jitobat, dan bahwa po teu allah geupeu amphon desya. dan haba nyan haroh teupeusampoe phon nibak yerusalem. gata kheueh saksi-saksi nibak banmandum nyan. dan ulon keudroe teuma lon kirem ubak gata peue nyang ka geupeu janji le allah bapak. teuma gata haroh teutab gata preh lam banda nyoe sampoe kuasa nyang teuka nibak po teu allah ka peunoh ateuh gata." oh lھےueh nyan isa laju geuba awaknyan sampoe u betania. nibak teumpat nyan gobnyan laju geubeuot jaroe geuh u ateuh, dan laju geubri beureukat ubak awaknyan. teungoh gobnyan geupeubuet lagee nyan, gobnyan laju teubeuot lam syeuruga, laju meuceu ngon awaknyan. awaknyan laju jisujut jiseumah gobnyan, oh lھےuehnyan jigisa u yerusalem deungon ate nyang galak lumpah na, dan hana putoh-putoh geupujoe allah lam baet tuhan.

lam kitab nyang phon ka ltheueh lon peutrang banmandum nyang geupeubuet dan geupuruno le isa watee yoh phon that geupeuphon buet gobnyan, sampoe bak uroe gobnyan teubeuot lam syeuruga. sigohlom gobnyan geu-ek lam syeuruga, deungon kuasa roh allah gobnyan geubri peutnyok-peutnyok bak rasui-rasui gobnyan nyang teupileh. oh ka ltheueh gobnyan mate, treb jih na peuet ploh uroe gobnyan kayem that geutunyok ngon cara nyang nyata that ubak murit-murit gobnyan bahwa gobnyan biet-biet udeb. awaknyan jikalon gobnyan, dan gobnyan geumeututoe ngon awaknyan keuhai pakriban allah geumat peurintah sibagoe raja. dan bak watee gobnyan meusapat ngon awaknyan, gobnyan laju geubri peurintah nyang lagee nyoe bak awaknyan, "bek gata jak nibak yerusalem. preh disinan sampoe bapak geubri peue nyang ka geupeu janji, na ktheueh nyang ka ltheueh ulon bri keu gata yoh masa ilee. sabab yahya geuseumano ngon ie, teuma na padub uroe teuk gata geuseumano ngon roh allah." watee rasui-rasui nyan meusapat meusajan-sajan ngon isa, awaknyan jitanyong bak gobnyan, "peu ktheueh jinoenyoe tuhan keuneuk neupeudong lom keurajeuen bansa israel?" geujawueb le isa, "bapak ulon keudroe nyang peuteuntée uroe dan watee jih. nyan hana peureulee gata teupeue, sabab nyan na ktheueh hak bapak. teuma gata meuteume kuasa, meunyo roh allah ka teuka ubak gata. dan gata jeuet keu saksi-saksi keu ulon di yerusalem, bansaboh yudea, di samaria dan sampoe u ujong bumoe." oh ka ltheueh geupeugah meunan le isa, gobnyan laju teubeuot lam syeuruga dikeue mata awaknyan keudroe, dan awan jitob gobnyan nibak pandangan rasui-rasui nyan. teungoh awaknyan mantong jikalon u langet, watee isa teubeuot, hana jisangka-sangka dua droe nyang jin-gui peukayan puteh ka teudong bak bineh awaknyan. "hei ureueng-ureueng galilea" ktheun awaknyan, "pakon gata dong mantong disinan sira gata tengah u langet? isa nyang gata kalon teubeuot lam syeuruga dikeue gata nyan, teuma geugisa lom ngon cara lagee nyan cit teuma." oh ltheuehnyan rasui-rasui nyan laju jigisa u yerusalem nibak buket zaiton. buket nyan teupat jih na kira-kira sikilo metee nibak yerusalem. di yerusalem awaknyan laju jijak u rumoh teupat awaknyan meunumpang, laju ji-ek atueh kama nyang na di bagian atueh. rasui-rasui nyan, na ktheueh petrus dan yahya, yakobus dan andreas, filipus dan tomas, bartolomeus dan matius, yakobus bin alfeus, simon patriot dan yudas bin yakobus; banmandum nyan sabe ngon siate meusapat keu meudoa. awaknyan meudoa meusajan-sajan ngon ureueng-ureueng inong na cit maryam mak isa, dan meusajan ngon syedara-syedara isa. bak siuroe, watee awaknyan teungoh meugumpoi – na kira-kira sireutoh dua ploh droe nyang teuka keunan – petrus laju jidong keu jipeugah haba. laju jipeugah lagee nyoe, "syedara-syedara! peue nyan na teutuleh lam alkitab, nyan keubiet teujadi. yoh masa ilee meulalu nabi daud, roh allah ka ltheueh geupeugah keuhai yudas, peumimpin ureueng-ureueng nyang drob isa. yudas na ktheueh sidroe lamkawan geutanyoe, dan jihnyan pih ka teupileh keu jimeukeureuja

meusajan-sajan ngon tanyoe." (yudas nyan ka meuteume tanoh jrat jih sibagoe upah jimeukhianat nyang jeuhet nyan. jihnyan rhot dan mate ngon pruet jih teuprah sampoe asoe jih meuburee uluwa banmandum. banmandum ureueng nyang na ji tinggai di yerusalem jiteupeue keuhai nyan. nyan ktheueh sabab jih lam basa awaknyan, awaknyan boh nan tanoh nyan akeldama, nyang makna jih 'tanoh darah'.) "sabab lam kitab zabur na teutuleh lagee nyoe, 'bah ktheueh teupat tinggai jih jeuet keusungoe; bek na meusidroe pih tinggai didalam nyan.' na lom teutuleh lagee nyoe, 'bah ktheueh keududukan jih jicok le ureueng laen.' sabab nyan, haroh na nyang seutot meusajan ngon tanyoe jeuet keusaksi bahwa tuhan isa ka udeb lom teuma nibak mate. ureueng nyan museuti sidroe lamkawan ureueng-ureueng nyang sabe na meusajan ngon tanyoe watee tanyoe sabe taseutot tuhan isa homantong nyang geujak, yoh phon nabi yahya peumano sampoe watee isa teubeuot lam syeuruga lamkawan geutanyoe." teuma le ureueng-ureueng nyang na teuka disinan laju jisaran dua droe, awaknyan na ktheueh yusuf nyang teuhoi cit ngon nan barsabas (dan ureueng nyan na cit teuhoi ngon nan yustus), dan matias. laju awaknyan meudoa. meunoe doa awaknyan, "tuhan, droeneueh neutupeue peue nyang na lam ate mandum manusia. yudas ka rhot nibak jabatan jih sibagoe rasui dan ka mate, teuma neutunyok ktheueh bak kamoe, soe nibak bandua droe nyoe nyang tuhan pileh keu teubri tugaih nyan keugeunantoe yudas." oh ltheuehnyan mandua droe nan nyan ji-undi, dan undian nyan laju rhot atueh matias. teuma jihnyan laju jiangkat jeuet keu rasui keu meusajan-sajan ngon bansibalah droe rasui nyang laen. watee ka trok bak uroe pentakosta, mandum ureueng meuman meusapat bak saboh teupat. ngon hana jisangka-sangka teudeungoe su nibak langet lagee angen teuga nyang teungoh jipot. rumoh bak teupat awaknyan teungoh jiduek bansaboh rumoh nyan ka peunoh ngon su nyan. laju jikalon le awaknyan lidah-lidah lagee apui hu jimeu-eue ho-homantong dan laju jidong atueh awaknyan maseng-maseng. awaknyan banmandum ka jikuasa le roh allah, dan laju jimarit lam meubagoe rupa basa. awaknyan jimeututoe meunurot peue nyang jipeugah le roh nyan bak awaknyan keu jipeugah. bak watee nyan jai that-that ureueng yahudi, nibak mubagoe nanggroe nyang na bansigom donya, tinggai di yerusalem. awaknyan na ktheueh ureueng-ureueng nyang taat ubak po teu allah. watee teudeungoe su nyan, jai that-that manusia jijak meuhudom keunan. awaknyan banmandum that-that teukeujot watee jideungoe ureueng-ureueng nyang na disinan jimututoe lam basa jih keudroe. ngon hireuen dan takjob awaknyan jipeugah, "ureueng-ureueng nyang meututoenyoe banmandum ureueng galilea bukan?" pakriban jeuet jih meunoe tadeungoe awaknyan jimeututoe lam basa nanggroe geutanyoe maseng-maseng? geutanyoe ureueng-ureueng nibak partia, media, elam; nibak mesopotamia, yudea dan kapadokia; nibak pontus dan asia, nibak frigia dan famfalia, nibak nanggroe meuse dan daerah-daerah libiya to ngon kirene; na lamkawan geutanyoe

nyang teuka nibak roma, na ureueng-ureueng yahudi dan na teuma ureueng-ureueng bansa laen nyang ka jitamong agama yahudi; na teuma nyang teuka nibak kreta dan arab. tanyoe mandum tadeungoe awaknyan jimeututoe lam basa geutanyoe maseng-maseng keuhai hai-hai nyang ajaeb nyang geupeubuet le po teu allah! ngon hireuen dan takjob, awaknyan banmandum jitanyong sidroe ngon nyang laen, "peue makna jih nyoe?" teuma na cit ureueng-ureueng nyang jihina. awaknyan jipeugah, "ah, awaknyan mandum ka maboki!" laju petrus jidong meusajan-sajan ngon siblaih droe rasui nyang laen, oh lheurennyan jipeugah bak ureueng rame nyan. ngon su nyang meugeunta jikheun lagee nyoe, 'syedara-syedara, ureueng-ureueng yahudi dan mandum nyang tinggai di yusalem! deungoe kheueh beuget-get, sabab hainyoe peureulee ulon peugah bak gata. banmandum ureueng nyoe hana mabok, lagee nyang gata duga; sabab bak saat nyoe mantong poh sikureueng beungoh. teuma nyoe ka lheureh geubri feureuman le po teu allah meulalu nabi yoel: allah meufeureuman, 'bak akhe jamen ulon teuma lon bri roh ulon keu mandum manusia. aneuek-aneuek gata nyang agam dan aneuek-aneuek gata nyang inong teuma jibritee bak gata keuhai-hai nyang ulon peugah bak awaknyan. ureueng-ureueng muda gata teuma jikalon hai-hai nyang ulon peuleumah bak awaknyan. ureueng-ureueng tuha gata teuma mulumpo keuhai lumpo nyang ulon bri keu awaknyan. keu namiet-namiet ulon pih – bah kheueh nyang agam meunan cit nyang inong –, teuma ulon bri roh ulon nibak uroe-uroe nyan. awaknyan teuma jibri tee hai-hai nyang ulon bri tee keu awaknyan. ulon teuma lon peuna buet-buet nyang ajaeb di ateuheh jeh nyang na di langet, dan hai-hai luwa biasa dimiyueb nyang na disinoe, bumoe; teuma na darah dan apui, uab dan asab. mata uroe teuma jeuet keu seupot, buleuen jeuet keumirah lagee darah sigohlom uroe tuhan, uroe nyang rayeuk dan mulia nyan teuka. bak watee nyan, ureueng nyang jimeuhoi bak tuhan teuma teupeuseulamat.' 22 syedara-syedara ureueng-ureueng israel! deungoe kheueh peu nyang ulon peugah nyoe; isa ureueng nazaret nyan ka geubri tugaih le po teu allah keu syedara. nyan nyata that bak buet-buet nyang ajaeb dan hai-hai nyang luwa biasa nyang geupeubuet le allah di teungoh-teungoh gata meulalu isa nyan. banmandum nyan gata keudroe ka gata teupeue. paih lagee reuncana gobnyan keudroe, allah ka geupeu putoh keu geuseurah isa nyan keu gata. dan watee gobnyan teuseurah, laju gata poh mate gobnyan sira gata peubiyeu ureueng-ureueng jeuhet jisaleb gobnyan. teuma po teu allah geupeu udeb gobnyan lom lam kawan ureueng mate. gobnyan jiuwet le mate, teuma po teu allah geupeuleueh gobnyan, sabab hana mungken gobnyan jikuasa sabe le mate. keuhai isa nyoe nabi daud ka lheureh geupeugah, 'ulon kalon tuhan sabe na dikeue ulon; gobnyan sabe na bak bineh ulon, mangat ulon hana jiguncang le peue mantong. nyang kheueh sabab jih ate ulon harok lumpah na, babah ulon lon peugah puja ngon pujoe; dan tuboh ulon nyoe teuma jipreh deungan aman lam kubu. 27 sabab gata hana tapeubiyeu

meunyoe watee teutinggai lam donya ureueng mate. gata hana tapeubiyeu hamba droeneueh nyang seutia nyan hanco dan habeh. droeneueh ka neutunok bak ulon rot nyang teutuju keu udeb nyang seujati. keugeumbiraan ulon meutamah mangat lam ate sabab droeneueh na meusajan ngon ulon.' syedara-syedara, idhin kheueh ulon peugah trok trang keuhai nabi daud, bapak indatu geutanyoe nyan. gobnyan ka mate dan ka teutanom lam jrati; kubu gobnyan mantong na di lamkawan geutanyoe sampoe bak saat nyoe. allah ka geumeunjari bak nabi daud, ngon geumeusumpah, bahwa sidroe nibak keuturonan gobnyan teuma teu angkat jeuet keu raja. sabab nabi daud geuteupeue keuhai janji nyan dan sabab gobnyan pih sidroe nabi, gobnyan pih geuteupeue peue nyang teuma geupeubuet le po teu allah. jadi gobnyan ka lheureh geupeugah bahwa raja peuseulamat nyang geupeu janji le allah, teuma udeb lom nibak mate. nabi daud geupeugah lagee nyoe, 'gobnyan hana teupeubiyeu tinggai lam donya ureueng mate; tuboh geuh nyan hana teuma teupeubiyeu sampoe hanco dan habeh.' isa nyoe kheueh nyang teupeu udeb di teungoh-teungoh ureueng mate le allah. kamoe mandum ka lheureh kamoe kalon keudroe hai nyan. gobnyan teuangkat nibak keududuekan nyang manyang dan geubri keukuasaan le allah, laju geuteurimong roh allah nyang ka geupeu janji le bapak. dan nyang gata deungoe bak saatnyoe dan gata kalon na kheueh roh nyan nyang gobnyan bri keu kamoe. nabi daud keudroe hana geu-ek lam syeuruga, teuma nabi daud geupeugah, 'tuhan geupeugah bak tuhan ulon: duek kheueh blaih uneuen ulon, sampoe ulon peujeuet mandum musoh gata tundok ubak gata!' nyang kheueh sabab jih mandum ureueng israel haroh jiteupeue that bahwa isa nyang gata saleb nyan, isa nyan cit teuma nyang ka geupeujeuet le po teu allah jeuet keu tuhan dan raja peuseulamat.' watee awaknyan mandum jideungoe hai nyan, ate awaknyan gundah lumpah na. laju awaknyan jitanyong bak petrus dan rasui-rasui nyang laen, 'syedara-syedara mandum, peue nyang haroh kamoe peubuet?' geujaweueh le petrus, "meutobat kheueh nibak desya-desya gata. dan bah kheueh gata maseng-maseng teupumano ateuheh nan isa, mangat mandum desya-desya gata teupeue amphon. teuma gata mandum tateurimong roh allah nibak po teu allah. sabab nyang geupeu janji le allah nyan na kheueh keu gata dan keuturonan gata meunan cit keu ureueng-ureueng nyang na bak teumpat-teumpat nyang jioh – na kheueh mandum ureueng nyang geutawok le allah tuhan tanyoe keu tajak ubak gobnyan." meunan kheueh petrus geupeugah ubak awaknyan. dan deungan jai tutoe haba nyang laen gobnyan pih geuyue bak awaknyan mangat awaknyan jipeuleueh droe nibak bansa nyang jeuhet nyoe nyang teuma geuhukom le po teu allah. jai that-that ureueng peucaya peue nyang geupeugah le petrus, laju awaknyan teupumano. teuma jeumeulah ureueng nyang peucaya nibak uroe nyan meutamah lom na lhee ribee droe. deungan biet-biet awaknyan jimurunoe sabe nibak rasui-rasui dan sabe meusapat meusajan-sajan. awaknyan jimakheun meusajan-sajan dan meudoa meusajan-sajan. jai

that-that buet nyang ajaeb nyang geupeubuet le rasui-rasui nyan sampoe mandum ureueng hireuen ngon teumakot. ureueng-ureueng meuiman nyan banmandum laju meusaboh dan peue nyang na nibak awaknyan, nyang awaknyan ngui meusajan-sajan. awaknyan laju jipeubloe barang-barang dan atra milek jih keudroe, laju jibagi-bagi peng awaknyan keudroe keu awaknyan keudroe meunurot nyang jipeureulee le awaknyan maseng-maseng. tieb-tieb uroe awaknyan sabe meugumpoi di baet allah; dan makheun meusajan-sajan, deungon geumbira dan miyueb ate di rumoh awaknyan keudroe. awaknyan hana putoh-putoh jipujoe allah dan jigalak le mandum ureueng. tieb-tieb uroe jeumeulah awaknyan laju meutamah sabab tuhan geubri keu awaknyan ureueng-ureueng nyang teungoh teupeuseulamat. bak siuroe petrus ngon yahya geujak u baet allah poh lhee seupot, na kheueh bak watee nyan watee keu meudoa. bak teumpat nyan bak babah pintoe geureubang nyang nan jih "pintoe ceudah", na sidroe ureueng agam nyang lapee yoh phon lahe. tieb-tieb uroe ureueng nyan jiba keunan keu jigeumadee bak ureueng-ureueng nyang tamong lam baet allah nyan. watee ureueng nyan jikalon petrus dan yahya teungoh geutamong lam baet allah, laju jilakee le ureueng lapee nyan sapeue-peue bak awaknyan mandua. teuma awaknyan laju jingiang ateuh ureueng nyan, oh ltheuh nyan petrus geupeugah, "ngieng kheueh ateuh kamoe!" laju di ureueng lapee nyan jingiang ateuh awaknyan mandua ngon harapan meuteume sapeue-peue nibak awaknyan. teuma petrus laju geupeugah bak ureueng nyan, "bak ulon sagai-sagai hana meupeng. teuma peue nyang na nibak ulon, nyan teuma ulon bri keu gata: ngon kuasa isa ureueng nazaret nyan, gata jak kheueh!" laju petrus geumat jaroe uneuen ureueng lapee nyan dan laju geutulong peubeudoh. ban sikeujab nyan cit teuma gaki ureueng nyan dan mata gatok gaki jih jeuet keuteuga. laju jigrob sira jidong, jipeuphon jak keudeh keunoe. oh ltheuhnyan laju jitamong lam baet allah meusajan-sajan ngon petrus dan yahya, sira jijak jigrob-grob ngon jipujoe allah. mandum ureueng jikalon ureueng nyan jijak dan jipujoe-pujoe allah. dan awaknyan laju sadar bahwa ureueng nyan kheueh tukang geumadee nyang kayem jiduek bak babah "pintoe ceudah" nibak baet allah. awaknyan mandum hireuen lumpah na dan takjob peue nyang ka jikalon ateuh ureueng nyan. ureueng nyan hana jipioh-pioh jiseutot petrus dan yahya. dan watee awaknyan ban lhee droe ka trok bak seuramoe nyang teuboh nan "seuramoe nabi sulaiman", bandum ureueng teuka jijak meuhudom bak awaknyan sabab takjob. watee petrus jikalon ureueng rame nyan, laju jipeugah bak awaknyan, "hei ureueng-ureueng israel, pakon gata banmandum hireuen keuhai nyoe? pakon gatanyoe takalon sabe ateuh kamoe? peu kheueh gata pike ureueng nyoe jeuet jijak sabab na kuasa nibak kamoe atawa sabab kamoe taat keu po teu allah? allah nyang geuseumah le nabi ibrahim, nabi ishaq, nabi yakub, allah indatu geutanyoe, allah nyan ka geupumulia hamba gobnyan, na kheueh isa. isa nyan kheueh nyang ka gata jok bak peunguasa, dan gata lawan dikeue pilatus, bak watee pilatus keuneuk

jipeuleuh gobnyan. gobnyan suci dan jroh, teuma gata talawan gobnyan dan tapaksa mangat pilatus jipeuleuh sidroe ureueng hukuman nyang ka jipoh mate gob keu gata. gata nyoe banmandum ka tapoh mate gobnyan, padahai nyang sibeuna jih gobnyan kheueh punca udeb keu mandum manusia. dan allah ka geupeu udeb lom gobnyan nibak mate. kamoe ka ltheuh kamoe kalon keudroe hainyan. syedara banmandum ka gata kalon keudroe peue nyang ka teujadi ngon ureueng lapee nyoe. ureueng nyoe ka jeuet keuteuga dan seuhat lagee sot nyang ka sabab jihnyoe peucaya keu isa dan kuasa gobnyan. sabab jipeucaya keu isa ureueng nyoe ka puleh lagee sot nyang ka dikeue gata banmandum. syedara-syedara! jinoenyoe ka ulon teupeue bahwa peue nyang gata peubuet dan peumimpén-peumimpén gata peubuet ateuh isa, mandum nyan gata peubuet sabab hana gata teupeue peue nyang teungoh gata peubuet. dan ngon sabab nyan kheueh teuma teujadi cit peue nyang ka geubri le allah yoh masa ilee meulalu mandum nabi-nabi gobnyan, bahwa raja peuseulamat nyang geupeu janjinyan haroh meudeurita. ngon sabab nyan syedara-syedara, meutobat kheueh nibak desya-desya gata dan gata gisa kheueh ubak po teu allah, mangat gobnyan geusampoh mandum desya-desya gata. tuhan geuteuka ubak gata dan gata teuma tarasa keuseugaran rohani. dan tuhan teuma geuyue isa geujak ubak gata, sabab gobnyan ka geupeuteuntee le po teu allah jeuet keu raja peuseulamat keu gata. gobnyan haroh tinggai lam syeuruga sampoe allah geupeujeuet banmandum nyan baro lagee nyang geupeugah le allah meulalu nabi-nabi gobnyan bak jamen ilee. 22 nabi musa ka ltheuh geupeugah, 'allah tuhan gata teuma geu-utus keu gata sidroe nabi nibak bansa gata keudroe, lagee gobnyan geu utus ulon. gata haroh tadeungoe mandum nyang geupeugah le nabi nyan ubak gata. ureueng nyang hana jipako peue nyang geupeugah le nabi nyan, ureueng nyan teuma teupeu aseng nibak umat po teu allah dan teupeubinasa.' nabi-nabi nyang ka ltheuh na geupeusampoe haba nibak po teu allah, phon nibak nabi samuel dan nabi-nabi laen nyan teuka dudoe nibak nyan, banmandum nyan geubri tee keuhai jamen nyoe. janji-janji nibak po teu allah nyang jipeusampoe le nabi-nabi nyan na kheueh keu syedara mandum. lam peujanjian nyang allah peugot ngon indatu gata, allah meufeuereuman ubak nabi ibrahim lagee nyoe, 'nibak keuturonan gata ulon teuma lom bri beureukat banmandum bansa nyang na dibumoe.' peujanjian nyan na kheueh gata cit teuma. nyang kheueh sabab jih allah geupileh hamba gobnyan, laju geuyue awaknyan mangat geujak ubak gata leubeh ilee, mangat gobnyan geubri beureukat keu gata. cara jih gobnyan geubri beureukat keu gata na kheueh ngon cara geupeujeuet gata banmandum meutobat nibak cara udeb gata nyang sisat." watee petrus ngon yahya mantong geupeugah haba ngon ureueng-ureueng nyang na disinan, imeum-imeum ulee dan panglima nyang kawai baet allah meunan cit ngon ureueng-ureueng saduki jijak ubak petrus dan yahya. awaknyan beungeh that sabab petrus dan yahya jipeugah ubak mandum ureueng bahwa isa ka udeb lom nibak

mate, dan nyan sibagoe bukeuti bahwa ureueng mate udeb lom teuma. ngon sabab nyan awaknyan laju jidrob mandua droe rasui nyan laju jipeutamong lam glab. dan sabab ka malam, petrus dan yahya jiteun disinan sampoe oh singoh beungoh. teuma le ureueng-ureueng nyang ka jideuengoe ajaran nyang jipeusampoe le rasui-rasui nyan, jai that-that nyang peucaya. jeumeulah awaknyan laju meutamah sampoe limong ribee droe. oh singoh nyan, tukoh-tukoh mahkamah agama, peumimpén-peumimpén yahudi dan guree-guree agama meugumpoi di yerusalem. awaknyan laju meurumpok ngon imeum agong hanas, dan kayafas, yahya, iskandar, dan mandum nyang jitamong lam keuluwarga imeum agong nyan. petrus ngon yahya laju jiba jak meuhadab awaknyan, laju awaknyan jitanyong, "pakriban cara jih gata peupuleh ureueng lapee nyan? ngon teunaga peue atawa ngon kuasa nibak soe gata peubuet nyan?" petrus nyang ka jikuasa le roh allah laju jijawueub, "teungku-teungku peumimpén bansa dan teungku-teungku anggota mahkamah! kamoe teupeukara nibak uroenyoe sabab kamoe peubuet nyang jroh ngon cara kamoe peupuleh sidroe ureueng lapee, dan sabab teungku-teungku keuneuk neuteupeue pakriban cara ureueng nyan teupeupuleh. biet that, teungku-teungku banmandum haroh tateupeue dan banmandum bansa israel pih haroh jiteupeue bahwa ureueng nyoe jidong bak saat nyoe ngon badan nyang seuhat dikeue teungku-teungku, sabab teunaga dan kekuasaan nibak isa ureueng nazaret nyan. teungku-teungku ka neusaleb isa nyan, teuma po teu allah ka geupeu udeb lom gobnyan. isa nyoe kheueh nyang jimeukeusut le ayat nyoe nyang na teutuleh lam alkitab, 'batee nyang hana gata peguna le utoh-utoh bangunan, teuma ka jeuet keu batee nyang paleng lumboi sa.' teuma meulalu isa mantong manusia teupeuseulamat. sabab bansaboh donya lamkawan manusia hana meusidroe ureueng laen nyang meuteume kekuasaan nibak po teu allah keu teupeuseulamat geutanyoe." anggota-anggota sidang peungadalan nyan hireuen that-that watee jikalon keubeuranean petrus ngon yahya, peuteuk lom awaknyan jiteupeue bahwa mandua droe rasui nyan na kheueh ureueng-ureueng biasa nyang hantom jijak beuet. laju awaknyan sadar bahwa mandua droe rasui nyan na kheueh ureueng-ureueng nyang na jiseutot ngon isa. teuma awaknyan hana jeuet jipeugah sapeue, sabab ureueng nyang ka jipeupuleh nyan na jidong disinan dikeue awaknyan meusajan-sajan ngon petrus dan yahya. teuma awaknyan laju jiyue teubiet mandua droe rasui nyan uluwa nibak ruweueng sidang. oh lheurehnyan awaknyan jimpupakat. awaknyan laju jipeugah, "peue nyang museuti tapeusanéut ateh ureueng-ureueng nyoe? mandum ureueng nyang na di yerusalem ka jiteupeue keuhai buet nyang ajaeb nyang luwabiasa nyoe, jipeubuet le awaknyan mandua. tanyoe hana hase tabantah hainyan. teuma mangat hainyoe bek meutabu leubeh luwah lom lamkawan umat manusia, jak ta peurasat awaknyan bandua mangat awaknyan bek sagai-sagai jipeugah baksoe mantong ngon jingui nan isa." teuma awaknyan laju jihoi lom petrus ngon yahya u dalam ruweueng sidang,

dan laju jibritee mangat awaknyan sagai-sagai bek le jipeugah atawa jiseumeubeuet ateh nan isa. teuma petrus dan yahya laju jijawueub, "pike kheueh keudroe peue nyang beutoi dikeue po teu allah: teuseutot peue nyang teungku-teungku peurintah atawa teuseutot peue nyang allah peurintah. sabab kamoe hana jeuet kamoe pih meupeugah haba keuhai peu nyang ka kamoe kalon dan kamoe deungoe keudroe." anggota-anggota sidang nyan hana jiteume meusaboh alasan pih keu jihukum petrus dan yahya. teuma awaknyan jipirasat mandua droe rasui nyan, oh lheureh nyan laju jipeuleueh mandua droe awaknyan, sabab mandum ureueng jipujoe-pujoe po teu allah ngon keujadian nyan. 22 ureueng nyang ka jirasa teupeupuleh seucara ajaeb nyan ka peuet ploh thon umu jih. oh ka lheureh petrus dan yahya jipeuleueh, awaknyan laju jigisa ubak rakan-rakan droe dan laju jipeugah mandum nyang jipeugah le imeum-imeum ulee dan peumimpén-peumimpén yahudi nyan ubak awaknyan. oh ka lheureh jideuengoe le rakan-rakan awaknyan keuhai haba nyan, awaknyan meusajan-sajan laju meudoa ngon siate ubak allah. awaknyan jipeugah, "tuhan, droeneueh kheueh nyang peujeuet langet ngon bumoe dan laot ngon mandum asoe jih. ngon roh droeneueh tuhan ka lheureh neumeututoe meulalu indatu kamoe, nabi daud, na kheueh hamba droeneueh: neupeugah lagee nyoe, 'pakon ureueng-ureueng, nyang hana jituri tuhan beungeh; pakon bansa-bansa jipeuget reuncana nyang hana meuguna? raja-raja donya meusiab-siab keu jijak muprang, dan dumna peumimpén ka sipakat jijak lawan tuhan dan raja peuseulamat.' sabab keubiet herodes dan pontius pilatus nyang ka sipakat ngon ureueng-ureueng nyang hana jituri keu tuhan dan ngon ureueng-ureueng israel di banda nyoe. awaknyan meurumpok keu jilawan isa hamba droeneueh nyang suci nyan, nyang ka droeneueh angkat jeuet keu raja peuseulamat. 28 awaknyan sipakat keu jipeubuet peue-peue mantong, nyang droeneueh ka neupeuteunte leubeh ilee bahwa nyan teuma teujadi. dan droeneueh peuteunte nyan ateh kekuasaan dan keumampuan droeneueh keudroe. jinoenyoe, tuhan, ngieng kheueh pakriban awaknyan jipeurasat kamoe. dan neupeue idhin kheueh kamoe, hamba-hamba droeneueh nyoe, kamoe meudakwah haba droeneueh ngon hana teumakot. neutulong kheueh kamoe mangat jeuet kamoe tulung ureueng sakét sampoe puleh dan buet-buet nyang ajaeb dan hai-hai nyang luwabiasa teujadi meulalu kekuasaan dan teunaga nibak nan isa, hamba droeneueh nyang suci nyan." oh ka seulesoe awaknyan jimeudoa, tempat awaknyan meusapat nyan meuguncang. awaknyan mandum jikuasa le roh allah, dan jipeuphon mariet ngon beurani that-that keuhai beurita nibak po teu allah. banmandum ureueng nyang peucaya nyan siudeb simate dan sijiwa. hana meusidroe pih nibak awaknyan jianggab bahwa peue nyang na nibak droe jihnyan na kheueh atra droe jih keudroe. peue-peue mantong nyang na nibak awaknyan, awaknyan peguna meusajan-sajan. ngon kuasa nyang raya, rasui-rasui nyan laju jibri keusaksian bahwa isa ka

udeb lom. teuma le po teu allah that-that geubri beureukat keu awaknyan. dan hana meusidroe pih lamkawan awaknyan nyang na kureueng peue-peue mantong. sabab awaknyan nyang na tanoh atawa rumoh, jipeubloe tanoh atawa rumoh jih nyan; laju peng nibak hase nyang jipeubloe nyan awaknyan ba dan awaknyan jok ubak rasui-rasui. oh ltheueh nyan peng nyan laju jibagi-bagi le awaknyan ubak tieb-tieb ureueng nyang peureulee. meunan cit teuma ngon yusuf. jihnyan pih jijak peubloe tanoh atra milek jih. laju peng hase yuem tanoh nyan jiba dan jijok laju ubak rasui-rasui. yusuf nyoe na kheueh sidroe ureueng keuturonan lewi nibak siprus: rasui-rasui geuboh nan laen yusuf nyan barnabas (makna jih pe-uhgibur). teuma na sidroe ureueng agam nyang nan jih ananias, ureueng nyan ngon purumoh jih nyang nan jih safira, awaknyoe pih jipeubloe cit saboh keubeueh tanoh atra jih keudroe. peng hase yuem tanoh nyan siteungoh jipeuguna keu droe jih dan nyang laen jijok ubak rasui-rasui. jipeubuet hainyan ngon jiteupeu le purumoh jih keudroe. teuma petrus jipeugah bak ureueng nyan, "ananias, pakon gata peubiyeu iblih jikuasa ate gata, sampoe gata meusulet bak roh allah, ngon cara seungab-seungab gata teun keu gata keudroe siteungoh nibak hase gata peubloe tanoh gata? tanoh nyan atra gata sigohlom gata peubloe. dan oh ka ltheueh tanoh nyan gata peubloe pih, peng nyan pih mantong atra gata. teuma pakon na meukeusut lam ate gata keu gata peubuet nyang lagee nyan? kon manusia nyang gata peungeuet teuma po teu allah!" meunan jideungoe tutoe haba nyan le ananias, jihnyan laju reubah, dan mate. mandum ureueng nyang jideungoe keuhai keujadian nyan jeuet keuteumakot. teuma le ureueng-ureueng muda nyang teuka jijak bungkok manyet ananias, laju jiba uluwa keu jijak tanom lam jrat. na kira-kira lthee jeuem oh ltheueh nyan purumoh ananias laju jitamong. inong nyan hana jiteupeue peue nyang ban teujadi. petrus geupeugah bak inong nyan, "cuba gata peugah bak ulon: peu kheueh tanoh nyang gata dan lakoe gata peubloe nyan, sidubnyoe yuem jih?" "beutoi, nyan yuem jih," jaweub purumoh ananias. laju jipeugah le petrus bak inong nyan, "pakon gata dan lakoe gata ka sipakat keu gata ujoe roh tuhan? deungoe kheueh! ureueng-ureueng nyang kubu lakoe gata ka jigisa. awaknyan jiba gata uluwa cit teuma." watee nyan cit teuma peurumoh ananias nyan reubah dan mate dikeue petrus. dan watee ureueng-ureueng muda nyan jitamong, laju jikalon le awaknyan inong nyan ka mate. laju le awaknyan jiba manyet nyan uluwa dan jikubu bak bineh jrat lakoe jih. ngon lagee nyan mandum ureueng-ureueng nyang meuiman nyan dan ureueng-ureueng nyang laen, nyang jideungoe keuhai peuristiwa nyan, habeh teumakot. sabab peulayanan rasui-rasui jai that-that buet-buet nyang ajaeb teujadi diteungoh-teungoh masyarakat. ngon siate awaknyan laju jimeuiman dan meugumpoi bak seuramoe nabi sulaiman di baet tuhan. dan ureueng luwa hana jijeuet jak bak teumpat ureueng-ureueng meuiman nyan meugumpoi. teuma ureueng-ureueng meuiman nyan lumpah that jihoreumat le masyarakat. dan maken treb maken meutamah jai ureueng-ureueng

nyang meuiman ubak tuhan – bah kheueh nyang agam meunan cit nyang inong. ngon lagee nyan keuadaan jih ka jeuet lagee nyan bagoe, sampoe bubena ureueng-ureueng saket jikeubah ateueh teumpat eh atawa ateueh tika, laju jiba ubak rot, mangat awaknyan sihana-hana jih hase jimeuturi ngon petrus, meunyoepetrus jijak rot nyan. meuronron manusia jiteuka nibak banda-banda nyang na ban sikeulileng banda yerusalem. awaknyan laju jiba ureueng-ureueng nyang saket dan nyang jitamong le roh-roh jeuhet. dan mandum ureueng nyang jipeupuleh le petrus nyan. akhe jih imeum agong dan mandum murit-murit jih, na kheueh kawom saduki, kajipeuphon peuna karu, sabab awaknyan bingiek ate. rasui-rasui nyan laju jidrob, laju jipeutamong lam glab biasa. teuma oh watee malam, sidroe malaikat tuhan laju geujak peuhah mandum pintoe-pintoe peunjara, laju geupeuteubiet mandum rasui nyan uluwa. malaikat nyan geupeugah bak rasui-rasui nyan, "jak kheueh gata dong bak baet tuhan dan gata peugah kheueh bak mandum manusia keuhai udeb baro nyoe." teuma le rasui-rasui nyan pih geututor peue nyang ka geupeugah le malaikat nyan. ban suboh that awaknyan ka jijak bak baet tuhan dan laju jipeuphon seumeubeuet disinan. bak watee nyan imeum agong meunan cit ngon murit-murit jihnyan jijak keunan, laju jipeuna sidang mahkamah ngon mandum peumimpin yahudi. oh ltheueh nyan jiyue laju bak gob mangat jijak cok rasui-rasui nyang na lam glab nyan keu jiba jak meuhadab awaknyan. 22 teuma watee ureueng-ureueng nyang keunong yue nyan trok ubak rumoh glab, awaknyan hana meurumpok ngon rasui-rasui nyan disinan. ngon sabab nyan awaknyan laju jigisa, laju jilapor hainyan ubak mahkamah. "watee kamoe trok ubak rumoh glab," kheun awaknyan ubak mahkamah, "laju kamoe ngieng pintoe kama peunjara nyan teunguci lagee sot nyang ka, dan peugawee-peugawee nyan teungoh meujaga-jaga bak babah pintoe. teuma watee kamoe peuhah pintoe nyan, hana meurumpok ngon kamoe meusidroe pih didalam glab nyan." watee panglima nyang kawai baet tuhan dan imeum-imeum ulee jideungoe peue nyang jilapor nyan, awaknyan bingong keuhai rasui-rasui nyan dan teumakot teuma peue nyang hase teujadi. oh ltheuehnyan teuka sidroe ureueng agam jiba haba nyoe, "deungoe! ureueng-ureueng nyang teungku-teungku teun lam glab nyan jinoenyoe teungoh jipeubeuet ureueng rame lam baet allah!" banjideungoe haba nyan le panglima nyang kawai baet tuhan nyan meunan cit ureueng-ureueng kawai jih laju jijak cok rasui-rasui nyan lom. teuma awaknyan hana ngon cara paksa, sabab awaknyan teumakot keu ureueng rame, pat jiteupeue le ureueng rame nyan laju jigeulawa awaknyan ngon batee. rasui-rasui nyan laju jipeutamong jak meuhadab mahkamah. laju le imeum agong jipareksa rasui-rasui nyan. 28 imeum agong nyan jipeugah, "ka kamoe tam ngon kreueh bak gatanyoe mangat bek gata peubeuet keuhai ureueng nyan. teuma jinoenyoe cuba takalon peue nyang ka gata peubuet! gata peudakwah peungajaran gata nyan bansaboh yerusalem, dan gata pih keuneuk gata tudoh bahwa sabab le kamoe kheueh ureueng nyan mate." petrus

dan rasui-rasui nyang laen laju jijaweueb, "kamoe museuti kamoe seutot allah bukan kamoe seutot manusia. isa nyang gata saleb nyan, ka geupeu udeb lom nibak mate le allah indatu geutanyoe. dan allah ka geubri bak gobnyan keududukan dan keukuasaan nyang manyang sibagoe peumimpén dan peuseulamat; mangat bansa israel teubri watee keu meutobat nibak desya-desya jih dan meuteume keuamphonan. kamoe kheueh saksi-saksi keuhai mandum nyan – kamoe dan meunan cit ngon roh allah keu ureueng-ureueng nyang seutot peurintah gobnyan." watee anggota-anggota mahkamah agama nyan jideungoe haba nyan, awaknyan beungeh that-that, dan awaknyan ka sipakat keu jipeumate bubena rasui-rasui nyan. teuma lamkawan anggota mahkamah agama na sidroe ureueng farisi nyang nan jih gamaliel. ureueng nyan sidroe guree agama nyang paleng jihoreumat le mandum ureueng. ureueng jidong dan laju jiyue peuteubiet uluwa mandum rasui-rasui nyan sikeujab. oh lheureh nyan laju jipeugah ubak mahkamah agama nyan, "syedara-syedara nyang ureueng-ureueng israel! pike kheueh beuge-et get keuhai peue nyang keuneuk gata peubuet ateuhe ureueng nyoe. sabab yoh ilee ka lheureh teuka teudas, nyang jianggab droe jih ureueng rayeuk, sampoe na kira-kira peuet reutoth droe nyang jeuet keu murit jih. teuma ureueng nyan teupoh mate mandum murit jih ka cre bre, dan geurakan jih pih habeh. oh lheurehnyan watee na seunsus, teuka teuma yudas, ureueng nibak galilea. sabab peungaroh jih, jai that-that cit ureueng nyang seutot ureueng nyan. meunan cit ureueng nyan teupoh mate, dan mandum murit-murit jih ka cre bre. dan jinoo nyoe ngon keujadian lagee nyoe, naseuhat ulon na kheueh: bek kheueh gata peukaru ateuhe ureueng-ureueng nyoe, peubiyeu mantong awaknyan. sabab meunyoee ajaran dan geurakan jih nyan nibak manusia, ajaran dan geurakan jih nyan teuma hanco. teuma meunyoee nyan teuka jih nibak po teu allah, gata mandum hana meuhase gata peutaloe awaknyan. dan mungken teuma teunyata bahwa gata mandumnyoe talawan allah." naseuhat gamaliel nyan jiteurimong le sidang mahkamah. teuma rasui-rasui nyan jihoi lom, laju jiseunuet, oh lheureh nyan jitam bek sagai-sagai jiseumeubeuet le keuhai isa. oh lheureh nyan, baro kheueh awaknyan jipeuleueh. rasui-rasui nyan laju jittinggai mahkamah agama ngon ate nyang galak sabab allah ka geuanggab awaknyan wajebeu keu jihina sabab isa. dan tieb-tieb uroe di baet tuhan dan di rumoh-rumoh gob, awaknyan hana putoh-putoh jiseumeubeuet dan jipeusampoe haba get keuhai isa bahwa gobnyan kheueh raja peuseulamat nyang teupeujanji nyan. murit-murit isa maken treb maken meutamame rame, bak watee nyan ureueng-ureueng yahudi nyang meubasa yunani, ka hana galak keu ureueng-ureueng yahudi aseuli. yahudi nyang meubasa yunani nyan jipeugah, "ureueng-ureueng inong kamoe nyang ka jeuet keu inong balee hana meuteume bantuan biaya udeb siuroe-uroe nyang jibagi-bagi keu ureueng laen." ngon sabab nyan, mandua blaih droe rasui nyan jipeusapat mandum murit geuh dan laju jipeugah bak awaknyan, "hana get kamoe pioh kamoe meudakwah keu feureuman

allah, sabab haroh kamoe uroh soai peunajoh. ngon nyan, get kheueh lamkawan gata gata pileh tujoh droe nyang na nan jih get dan jikuasa le roh allah lom bijaksana, nyang jeuet kamoe bri tugaih jiatoe keuhai-hai nyoe; sabab kamoe keuneuk meudoda dan kamoe peusampoe feureuman allah mantong." banmandum ureueng nyan situju deungon usui le rasui-rasui nyan. laju awaknyan jipileh stefanus, ureueng nyang peucaya that keu isa dan jikuasa le roh allah. meunan cit teupileh: filipus, prokhopus, nikanor, timon, parmenas, dan nikolaus nibak antiokhia; ureueng nyan bukan ureueng yahudi teuma ka jitamong lam agama yahudi. ban tujoh droe awaknyan laju jiusui ubak rasui-rasui, laju rasui-rasui nyan jimeudoda dan jilakee beureukat tuhan keu awaknyan. meunan kheueh haba nibak po teu allah seumaken meutaba dan murit-murit isa di yerusalem pih maken meutamame rame. dan le that teuma imeum-imeum nyang meuman ubak isa. stefanus jai that geubri beureukat le po teu allah, deungon nyan, jihnyan jai that-that jipeuna buet-buet nyang ajaeb dan hai-hai nyang luwabiassa lamkawan manusia. teuma na cit ureueng-ureueng nyang hana jialak geuh nyan; awaknyan na kheueh anggota-anggota rumoh iebadat nyang jiboh nan rumoh iebadat ureueng-ureueng beubaih. anggota-anggota rumoh iebadat nyan na kheueh ureueng yahudi nibak kirene dan iskandariah. awaknyan ngon ureueng-ureueng yahudi nibak kilikia dan asia jimeudebat ngon stefanus. teuma awaknyan hana hase jibantah peue nyang jipeugah le stefanus, sabab roh allah geubri ubak jihnyan keubijaksanaan keu jipeugah haba. ngon sabab nyan awaknyan laju jisogok na padub droe ureueng mangat jitem peugah, "na kamoe deungoe ureueng nyan jihina nabi musa dan allah!" meunan kheueh cara jih awaknyan jipeusuna ureueng rame, dan peumimpén-peumimpén yahudi, meunan cit ngon guree-guree agama. laju awaknyan jijak drob stefanus, oh lheureh nyan jiba stefanus nyan ubak mahkamah agama. meunan cit awaknyan jipeuhadab saksi-saksi nyang jibri keuteurangan nyang hana beutoi keuhai stefanus. saksi-saksi nyan jipeugah, "ureueng nyoe sabe jihina baet allah nyang suci dan jihina peurintah-peurintah allah nyang jipeusampoe le nabi musa. kamoe ka kamoe deungoe jihnyan meutotoe, bahwa isa nibak nazaret nyan teuma jireuloh baet allah nyoe, laju jiubah adat istiadat nyang geupeutreun le nabi musa keu geutanyoe!" mandum ureueng nyan na teuka lam sidang mahkamah agama nyan jikalon ateuhe stefanus. dan bak watee nyan muka stefanus deuh jih lagee muka malaikat. imeum agong jityanyong bak stefanus, "peu kheueh mandum nyang jipeugah le gob nyan beutoi?" jaweub stefanus, "syedara-syedara, dan bapak-bapak! cuba deungoe ulon peugah! sigohlom indatu geutanyoe nabi ibrahim minah u haran, watee gobnyan mantong tinggai di mesopotamia, allah nyang mulia geujak ubak gobnyan dan geupeugah, 'tinggai kheueh laju nanggroe gata dan wareh kawom ngon keuluwarga gata. jak kheueh laju u nanggroe nyang ulon tunyok keu gata.' deungon nyan, nabi ibrahim laju geutinggai nanggroe kasdim, laju geuminah u haran. oh ka lheureh ureueng syiek

nabi ibrahim nyan meuninggai donya, allah geuyue bak nabi ibrahim mangat geuminah u nanggroe nyoe nyang syedara-syedara dan bapak-bapak mandum duek bak saat nyoe. bak watee nyan hana mubacut pih nibak nanggroe nyang allah jok keu nabi ibrahim mangat jeuet keu hak milek nabi ibrahim; meustapak tanoh pih hana geubri keu gobnyan. teuma po teu allah geumeujanji gobnyan teuma geubri keu nabi ibrahim mangat jeuet keu hak milek nabi ibrahim dan keuturonan gobnyan. watee nyan nabi ibrahim hana meu aneuek. teuma nyoe kheueh nyang geupeugah le allah ubak gobnyan, 'keuturonan gata teuma tinggai sibagoe ureueng aseng di nanggroe ureueng laen. ureueng-ureueng nanggroe nyan jijajah awaknyan dan jipeusaneut awaknyan ngon keujam peuet reutoh thon treb jih. le ulon teuma lon hukom bansa nyang jipeujeuet keu namiet awaknyan, dan awaknyan teuma jiteubiet lam nanggroe nyan dan jiseumah ulon nibak tempat nyoe.' oh ka lheueh geupeugah meunan ikatan janji nyan laju geupeusah le po teu allah ngon upacara meusunat. teuma oh lheueh nabi ishaq, aneuek nabi ibrahim lahe, nabi ibrahim geupeusunat aneuek geuhnyan watee aneuek nyan meu-umu lapan uroe. oh lheueh nyan nabi ishaq pih geupeusunat teuma aneuek gobnyan, na kheueh nabi yakub. dan nabi yakub pih geupeusunat teuma ban dua blaih droe aneuek gobnyan, nyan kheueh nyang jeuet keu bapak-bapak indatu bansa yahudi. bapak-bapak indatu geutanyoe nyan ceumuru keu nabi yusuf, sampoe awaknyan laju jipeubloe gobnyan jeuet keu namiet di nanggroe meuse. teuma allah teutab na meusajan gobnyan, dan geupeubeubaih gobnyan nibak mandum salah gobnyan. allah geubri bak awaknyan budho dan keubijaksanaan watee gobnyan geujak meuhadab ukeue firaun raja nanggroe meuse, sampoe le raja firaun jipeujeuet gobnyan keu gubunur nanggroe meuse dan jeuet keu nyang mat kuasa ateh meuligoe raja firaun. oh lheuehnyan teuka masa musem deuk nyang paleng panyang parah dan treb that di nanggroe meuse meunan cit nanggroe kanaan sampoe bubuna peundudeuk meudeurita lumpah na. indatu geutanyoe hana hase jiteume peunajoh. watee nabi yakub geudeungoe na gandom di nanggroe meuse laju geuyue aneuek-aneuek gobnyan, indatu geutanyoe, geujak keudeh keu nyang keu phon. watee awaknyan geujak nyang keudua goe, nabi yusuf laju geupeugah bak syedara-syedara gobnyan, bahwa gobnyan na kheueh nabi yusuf. baro kheueh watee nyan raja nanggroe meuse jiteupeue keuhai keuluwarga nabi yusuf. oh lheueh nyan nabi yusuf geukirem haba ubak ayah gobnyan, na kheueh nabi yakub, keu geulakee gobnyan meusajan mandum keuluwarga geuh minah u nanggroe meuse – banmandum na tujuh ploh limong droe. teuma nabi yakub laju geuminah u nanggroe meuse dan disinan kheueh gobnyan ngon indatu tanyoe nyang laen meuninggai donya. manyet gobnyan oh lheueh nyan jiba lom teuma u sikhem laju jikubu bak lampoh jrat nyang geubloe ngon sijeumeulah peng le nabi ibrahim dan sukee bansa hemor di sikhem. watee karab trok tempo jih allah geupeutrok janji gobnyan keu nabi ibrahim, bansa geutanyoe di nanggroe

meuse ka meutamah le. akhe jih sidroe raja laen nyang hana jituri nabi yusuf, jimat peurintah di nanggroe meuse. raja nyan jihina bansa geutanyoe dan keujam that-that ateh indatu geutanyoe. raja nyan jipaksa bak indatu geutanyoe mangat tieb-tieb aneuek nyang lahe jiyue tiek dan jipeubiyeu teulanta dan mate. bak watee nyang lagee nyan nabi musa lahe; gobnyan aneuek manyak nyang paleng ceudah. lhee buleuen treb jih gobnyan jipeulara di rumoh bapak jih, dan oh ka lheueh gobnyan jiteuk, putroe raja firaun nyan laju jicok gobnyan dan jipeulara gobnyan lagee aneuek jih keudroe. 22 banmandum ieleume bansa meuse jipeurunoe keu gobnyan dan gobnyan jeuet keu ureueng nyang paleng meukuasa nibak tutoe haba dan buet gobnyan. watee nabi musa meu-umu peuet ploh thon, teuka kheueh niet lam ate gobnyan keu geujak kalon keuadaan bansa gobnyan ureueng israel. laju geukalon le nabi musa sidroe lamkawan ureueng israel nyan ji ienanya le sidroe ureueng meuse; teuma gobnyan laju geubila ureueng nyang keunong ienanya nyan ngon cara geupoh mate ureueng meuse nyan. nabi musa geusangka bansa geuhnyan muphom bahwa gobnyan teungoh geupeu guna le allah keu geupeu beubaih awaknyan. teuma teunyata awaknyan hana jiteupeue. oh singoh beungoh geukalon teuma na dua droe ureueng israel teungoh jimeulo, laju geu-useuha geupeu dame awaknyan. gobnyan geupeugah, 'gatanyoe meusyedara, pakon jeuet gata meulo' teuma le ureueng poh rakan jih nyan laju jitulak nabi musa bak bineh sira jipeugah, 'soe nyang beuot gata jeuet keupeumimpen dan hakem kamoe? 28 peu kheueh gata keuneuk poh mate ulon lagee gata poh mate ureueng meuse nyan baroe?' watee nabi musa geudeungoe peue nyang jipeugah le ureueng nyan, nabi musa geuplueng nibak nanggroe meuse dan geutinggai laju di midian. disinan gobnyan geumeu aneuek teuma dua droe. peuet ploh thon teuma oh lheueh nyan sidroe malaikat geujak bak nabi musa di padang pasi rab ngon gunong sinai. malaikat nyan teuka lam apui nibak tamah nyang teungoh hu. nabi musa hireuen watee geukalon hai nyan, sampoe gobnyan laju geupeurab keunan leubeh to lom mangat geuteupeue peue nyang sibeuna jih nyan. laju geudeungoe su tuhan nyang geupeugah, 'ulon kheueh allah indatu gata; ulon allah nabi ibrahim, nabi ishaq dan nabi yakub.' nabi musa yo ngon teumakot that sampoe gobnyan hana geujeuet kalon le lam tamah nyan. oh lheueh nyan tuhan meufeumeuran lom, 'suet laju seulob nyang gata ngui nyan, sabab tanoh bak teupat gata dong nyan na kheueh tanoh nyang suci. ulon ka ulon kalon dan lon peurati pakriban phet jih umat ulon di nanggroe meuse. ulon ka lon deungoe apoh apah awaknyan dan ulon treun keu lon jak tulung awaknyan. jinoenyoe, jak keunoe! ulon lon kirem gata lom teuma u nanggroe meuse.' nabi musa nyoe kheueh nyang hana jiaku le bansa israel dan nyang jitulak ngon haba lagee nyan, 'soe nyang ka beuot droeneueh jeuet keu peumimpen dan hakem kamoe?' teuma nyang sibeuna jih gobnyan kheueh nyang geu-utus le allah keu jeuet keu peumimpen dan peuseulamat, ngon geutulong le malaikat nyang

teuka ubak gobnyan lam tamah nyang teungoh hu nyan. nabi musa nyan kheueh nyang pimpin bansa israel geupeuteubiet nibak nanggroë meuse ngon geupeuna buet-buet nyang ajaeb dan hai-hai nyang luwabiasa di meuse, di laot mirah dan di padang pasi nyang treb jih na peuet ploh thon. nabi musa nyan cit teuma nyang peugah bak bansa israel, 'allah geubri keu gata sidroe nabi nyang geupileh lamkawan gata keudroe, saban lagee gobnyan geupileh ulon.' nabi musa kheueh nyang lamkawan bansa israel di padang pasi, jeuet keupeurantara keu malaikat nyang meututoe ngon gobnyan di gunung sinai ngon indatu geutanyoe. gobnyan kheueh nyang teurimong nibak po teu allah haba nyang udeb keu geupeusampoe ubak geutanyoe. bah kheueh ka meunan indatu geutanyoe teutab hana taat keu gobnyan. awaknyan jitulak gobnyan dan meuharab that jikeuneuk gisa u nanggroë meuse. awaknyan jipeugah bak nabi harun, 'peuet kheueh dewa-dewa keu kamoe, mangat dewa-dewa nyan jeuet jipimpin kamoe. sabab kamoe ka hana kamoe teupeue le peue nyang teujadi ngon nabi musa nyan nyang ka jiba kamoe jipeuteubiet nibak nanggroë meusel' laju bak watee nyan awaknyan jipeuget saboh patong aneuek leumo, oh lleueh nyan awaknyan jipeuseumah keureubeuen bak patong nyan dan jipeuna khanuri keu jipujoe barang nyang jipeuget keudroe. ngon sabab nyan allah geutinggai awaknyan geupeubiyeu mantong awaknyan jiseumah bintang-bintang nyang na di langet. nyan suisai ngon peue nyang ka teutuleh lam kitab nabi-nabi. legee nyoe, 'hai ureueng-ureueng israel! bukon keu ulon gata sie dan gata peuseumah keureubeuen beulatang nyang treb jih peuet ploh thon lam padang pasi. khimah beurala molokh kheueh nyang gata ba-ba meusajan-sajan ngon patong beurala gata, na kheueh refan; nyan kheueh patong nyang gata peuet keu gata seumah. ngon sabab nyan ulon teuma lon boih gata sampoe jioh u meurandeh nibak nanggroë babel.' khimah teumpat allah teuka ubak manusia na meuteume bak indatu geutanyoe di padang pasi. khimah nyan teupeuget ateuhe peurintah po teu allah ubak nabi musa dan meunurot cuntoh nyang geupeuleumah le allah bak nabi musa. oh lleuehnyan khimah nyan seulanjut jih jiba le indatu tanyoe bak watee awaknyan ngon yosua geujak reubot nanggroë geutanyoe ngon nibak keukuasaan bansa-bansa nyang geu-use le po teu allah dikeue awaknyan. khimah nyan teutab na disinan sampoe bak jamen nabi daud. nabi daud galak that ate allah dan geulakee bak gobnyan mangat geupeu idhin geupeuget saboh baet keu allah nyang geuseumah le nabi yakub. teuma nabi sulaiman kheueh nyang peudong baet keu allah. teuma le allah nyang maharayeuk hana geutem tinggai lam baet nyang dipeuget le manusia; sabab lam kitab nabi na teutuleh lagee nyoe, 'langet na kheueh takhta ulon, dan bumoe lapek kaki lon. rumah peu kheueh nyang keuneuk gata peudong keu ulon? dipat kheueh teumpat ulon meupioh? bukon kheueh ulon keudroe nyang peujeuet banmandum nyang na nyoe?' meunan kheueh feureunan allah. hana tanggung biet-biet kreueh that ulee syedara-syedara banmandum dan biet-biet that payah gata

taat ubak po teu allah! punyueng gata ka tulo that mangat tatem deungoe peue nyang geupeugah le allah! gata mandum saban lagee indatu gata; sabe talawan roh allah! peu kheueh na nabi nyang hana ji ienanya le indatu gata? awaknyan jipoh mate asai na utosan-utosan nyang geukirem le po teu allah nyang yoh masa ilee ka geupeu maklum bahwa hamba allah nyang beuna nyang teuma teuka. dan bak watee nyoe gata khianat dan gata poh mate hamba allah nyan. malaikat-malaikat ka geupeusampoe peurintah-peurintah allah ubak gata teuma gata hana tatem seutot!" meunan jideungoe banmandum le anggota-anggota mahkamah agama tutoe haba stefanus nyan, awaknyan saket ate dan beungeh lumpah na keu stefanus. teuma stefanus nyang geukuasa le roh allah, laju jitangah u langet. laju deuh jikalon keumuliaan allah dan isa geudong bak teumpat gobnyan meukuasa blaih uneuen allah. "ngieng," kheun stefanus, "deuh ulon kalon syeuruga teubuka dan aneuek manusia siblahi uneuen allah!" anggota-anggota mahkamah agama nyan laju jitolb punyueng jih sira jiklik-klik, dan laju ngon sireuntak jitajoe ateuhe stefanus. awaknyan jibahue gobnyan uluwa banda oh lleueh nyan laju jirhom ngon batee. ureueng-ureueng nyang kalon keujadian nyan laju jikeubah peukayan awaknyan bak sidroe aneuek muda nyang nan jih saulus. beungh awaknyan jirhom stefanus, stefanus geuteumawok, "tuhan isa, teurimong kheueh roh ulon!" laju stefanus nyan jimeuteuot sira jidumpek ngon su meutaga, "tuhan, bek kheueh desya nyoe jitanggong ateuhe awaknyan!" oh lleueh jipeugah meunan stefanus pih mate. dan saulus pih galak that ateuhe teupoh mate stefanus nyan. uroe nyan cit teuma jeumaah di yerusalem ka jipeulet keudeh keunoe, akhe jih mandum ureueng meuiman, keucuali rasui-rasui, ka meutabu bansaboh yudea dan samaria. ureueng-ureueng nyang teumakot keu po teu allah jipeukubu stefanus dan jipeumo ba-e ngon lumpah that inseuh. teuma saulus teutab hana jipioh jiuseuha jipeuhanco jeumaah. jijak nibak rumah saboh u rumah laen laju jitarek uluwa ureueng-ureueng meuiman, dan laju jipeutamong lam glab. ureueng-ureueng meuiman nyang ka meutabu nyan laju jipeusampoe haba get nibak allah nyan ho-ho mantong. filipus laju jijak u banda samaria jipeusampoe disinan keuhai raja peuseulamat nyang ka geupeu janji le po teu allah. watee ureueng-ureueng disinan jideungoe filipus peugah haba dan awaknyan jikalon buet-buet nyang ajaeb nyang jipeubuet le filipus nyan, jai that nibak awaknyan nyang jipeurati peue nyang jipeugah le filipus. sabab roh-roh jeuhet ka jiteubiet ngon jiklik-klik lam tuboh ureueng rame nyang ka jitamong jen. ureueng nyang lapee dan capiek pih jai that that nyang jipeupuleh. ngon lagee nyan ureueng-ureueng nyang na lam banda samaria pih galak lumpah na. lam banda nyan na sidroe ureueng agam nyan nan jih simon, nyang ka padub na treb jih jipeujeuet ureueng-ureueng samaria hireun ngon takjob keu ieume sihe jih. jihnyan jipeugah bak awaknyan bahwa droe jih na kheueh ureueng nyang luwabiasa. ngon lagee nyan mandum ureueng nyang na lam banda nyan nibak meubagoe lapesan masyarakat

biet that-that jipeurati ureueng nyan. "ureueng nyoe na kheueh teunaga allah nyang meusyeehu sibagoe 'teunaga rayeuk' nyan," kheun awaknyan. ka treb that ureueng nyan jipeuhireuen manusia ngon teunaga sihe jih, sampoe le ureueng-ureueng samaria that-that teupeusona atueh keuhebatan ureueng nyan. teuma filipus geupeugah bak awaknyan keuhai haba get soai pakriban allah teuma geumat peur-intah sibagoe raja dan keuhai isa, raja peuseulamat nyan. ngon lagee nyan awaknyan jipeucaya keuhai haba nyang jipeusampoe le filipus, laju awaknyan teupeumano bah kheueh ureueng agam meunan cit ngon ureueng inong. simon keudroe pih jipateh. dan oh ka ltheueh teupumano, jihnyan laju jiseutot filipus. buet-buet ajaeb nyang jipeubuet jeuet keu sabab simon tuhireuen-hireuen. rasui-rasui nyang na di yerusalem jideungoe bahwa ureueng-ureueng samaria ka jiteurimong feureuman allah. ngon sabab nyan awaknyan laju jiyue jak petrus dan yahya u samaria nyan. watee petrus dan yahya ka trok keunan, awaknyan laju meudoa keu ureueng-ureueng samaria nyan mangat awaknyan meuteume roh allah, sabab, roh allah gohlom teuka geukuasa atueh awaknyan meusidroe pih; awaknyan ban teupumano atueh nan tuhan isa. laju petrus ngon yahya geupeuduek jaroe geuhnyan atueh ureueng-ureueng samaria nyan; ngon lagee nyan awaknyan ka jiteurimong roh allah. simon jikalón bahwa jaroe rasui-rasui geupeuduek atueh awaknyan, roh allah geubri keu awaknyan. ngon sabab nyan simon jiba peng bak petrus dan yahya, laju jipeugah, "neubri kheueh keu ulón kuasa nyan mangat jeuet jaroe ulón lom peuduek atueh soe mantong, ureueng nyan pih jiteurimong roh allah." teuma petrus geujawueb, "ceulaka kheueh gata dan peng gata nyan! gata pike meuneubri allah hase teubloe ngon peng? gata hana hak keu gata seutot lam buet kamoe, sabab ate gata hana beutoi keu po teu allah. 22 ngon sabab nyan tinggai kheueh meukeusut gata nyang jeuhet nyan, dan lakee kheueh ubak tuhan mangat gobnyan geupeu amphon pikeran gata nyang jeuhet nyan! sabab ulón kuteupeue gata peunoh ngon ate nyang picek lom bingiek lumpah na dan jipeunamiet le buet nyang jeuhet." laju simon jipeugah bak petrus dan yahya, "tulong kheueh lakee bak tuhan mangat hana meubacut pih nyang droeneueh peugah nyan keunong atueh ulón." oh ka ltheueh awaknyan geubri keusaksian dan geupeusampoe feureuman tuhan, petrus dan yahya laju jigisa u yerusalem. bak teungoh rot ueh, awaknyan laju jipeusampoe haba get nyan di gampong-gampong samaria. sidroe malaikat tuhan geupeugah bak filipus, "jak tajak! jak kheueh laju u arah seultan bak rot nyang meusambong yerusalem ngon gaza." rot nyan seungue. teuma filipus pih laju jijak. bak watee nyan na sidroe peugawee meuligoe etiopia nyang teungoh jiwoe u nanggroe jih. ureueng nyan na kheueh sidroe peugawee rayeuk nyang meutanggong jawueb atueh mandum keukayaan kandake, ratu nanggroe etiopia. ureueng nyan ka ltheueh jijak u yerusalem keu jijak meubakti bak po teu allah dan jinoenyoe teungoh jiwoe ngon geuritan jih. teungoh jidiek lam geuritan jih nyan ureueng nyan jibeuet kitab nabi yesaya. roh allah geupeugah

bak filipus, "gata peurab kheueh laju bak geuritan nyan." teuma filipus laju geupeurab bak geuritan nyan, dan laju jideungoe ureueng nyang teungoh jibeuet kitab yesaya. filipus jitanyong bak ureueng nyan, "peu kheueh teungku muphom nyang teungku beuet nyan?" ureueng nyan jijawueb, "pakriban ulón muphom, meunyoé hana ureueng nyang peutrang keu ulón?" laju jipakat filipus jiek atueh geuritan nyan oh ltheueh nyan laju jibeuet meusajan-sajan. nyoe kheueh ayat nyang jibeuet nyan, "jihnyan lagee bubiri nyang jiseutot keu jijak sie, lagee aneuk bubiri nyang hana ji meu mbeek watee bulee jih teugunteng, meunan kheueh jihnyan hana jipeugah meusikrek haba pih. jihnyan jihina jipeusanéut ngon hana ade. nyawong jihnyan teutarek nibak atueh muka bumoe sampoe meusidroe pih hana nyang hase jicalitra keuhai keuturonan jih." peugawee tinggai nanggroe etiopia nyan jipeugah bak filipus nyan, "cuba gata peugah bak ulón, soe nyang jimeukeusut le nabi nyoe? droe jih keudroe atawa peu kheueh ureueng laen?" teuma filipus pih laju jipeuphon peugah haba; gobnyan geupeu guna ayat-ayat nyan sibagoe awai geupeusampoe haba get keuhai isa bak peugawee nyan. bak teungoh rot ueh sira jijak nyan, awaknyan laju trok bak saboh teumpat nyang na ie. peugawee nyan jipeugah, "ngieng, jeh pat na ie! peupe lom nyang kureueng keu droeneueh pumano ulón?" geupeugah le filipus, "meunyoé teungku neupeucaya ngon sipeunoh ate, teungku jeuet teupumano." "ulón peucaya keu isa na kheueh aneuk allah," kheun peugawee rayeuk nibak nanggroe etiopia nyan. ureueng nyan laju jiyue pioh geuritan jih; oh ltheueh nyan awaknyan mandua, filipus dan peugawee nyan, laju jitron lam ie, filipus laju geupumano ureueng nyan. watee awaknyan jiteubiet nibak lam ie, roh allah laju geucok filipus nibak teumpat nyan. peugawee rayeuk nibak etiopia nyan hana deuh le jikalón gobnyan. ngon ate that-that galak peugawee nyan laju jijak lom teuma. ngon hana teusangka-sangka filipus ka na di asdod, dan watee gobnyan geujak lom teuma, gobnyan laju geupeusampoe haba get keuhai isa nibak mandum banda sampoe gobnyan trok u kaisarea. watee nyan saulus teutab jipeucrok ngon jipeulet dan jikeuneuk poh mate murit-murit tuhan isa, laju jijak ubak imeum agong, dan jilakee surat kuasa keu jijak ubak peumipem rumoh-rumoh iebadat ureueng yahudi di damsyik, deungan nyan meunyoé jiteume ureueng-ureueng nyang ka jipeucaya keu isa bak teumpat nyan, jeuet jidrob dan jiba awaknyan u yerusalem. teungoh jijak u damsyik, watee saulus nyan ka to ngon banda nyan, ngon hana jisangka-sangka cahya nyang teuka atueh langet ka peungeh ban sikeulileng saulus. saulus nyan laju reubah bak tanoh dan laju jideungoe su nyang jipeugah bak jihnyan, "saulus, saulus! peupe sabab gata taenanya ulón?" "soe kheueh droeneueh, teungku?" tanyong saulus. su nyan jijawueb, "ulón kheueh isa, nyang gata ienanya. teuma jinoenyoe beudoh kheueh dan jak tamong kheueh lam banda. disinan teuma teupeugah bak gata peupe nyang haroh gata peubuet." ureueng-ureueng nyang jiseutot meusajan ngon saulus teukeujot sampoe awaknyan hana jeuet jipeugah haba; sabab awaknyan jideungoe

su nyan teuma hana deuh jikalon meusidroeu pih. laju saulus jidong dan jibleuet mata, teuma mata jih nyan hana hase jipeubleuet dan hana hase jikeumalon peue-peue mantong. teuma le rakan-rakan jihnyan laju jimat bak jaroe dan jipapah jipeutamong lam banda damsyik. lhee uroe treb jih saulus nyan hana hase jikeumalon dan lhee uroe nyan teuma hana jimakheun dan hana jijieb ie. di damsyik na sidroe ureueng nyang ka peucaya keu isa nyang nan jih ananias. deuh lam saboh keumalon, tuhan geupeugah bak jihnyan, tuhan meufeureuman, "ananias!" ananias jijaweueb, "nyoe lon, tuhan." tuhan meufeureuman, "jinoe gata jak laju u rumoh yudas bak rot nyang tupa. gata tanyong laju disinan pat saulus nyang asai jih nibak banda tarsus. ureueng nyan teungoh meudoa, dan lam saboh keumalon deuh jinging sidroe ureueng agam, nyang nan jih ananias, jijak bak ureueng nyan dan jipeuduek jaroe jih ateueh ureueng nyan mangat jeuet jihnyan hase jikeumalon lom teuma." ananias jijaweueb, "tuhan, ulon ka lon deungoe jai that keuhai ureueng nyoe, keuhai buet-buet jih nyang ji ienaya umat droeneueh di yersusalem. dan jinoyoeyo jihnyan ka meuteume idhin nibak imeum-imeum ulee jijak drob mandum ureueng nyang peucaya keu droeneueh." teuma tuhan geupeugah bak ananias, "gata mantong! sabab ulon ka lon pileh jihnyan keu jilayani ulon, mangat jihnyan jijak peusampoe keuhai ulon ubak bansa-bansa nyang hana meut agama yahudi meunan cit ubak raja-raja dan umat israel. dan ulon keudroe teuma lon tunyok bak jihnyan mandum deurita nyang haroh jirasa sabab ulon." teuma ananias pih laju jijak u rumoh nyan laju jipeuduek jaroe jih ateueh saulus. "syedara saulus," kheun ananias, "tuhan isa nyang gata kalon bak teungoh rot ueh watee gata jak keunoe, gobnyan kheueh nyang yue jak ulon bak gata mangat gata jeuet gata keumalon lom dan jikuasa le roh allah." watee nyan cit teuma na sijeuneuh beunda lagee sisek eungkot leukang nibak mata saulus dan gobnyan ka jeuet jikeumalon lom teuma. dan saulus pih jibeudoh, laju teupumano. dan oh ka seulesoe jimakheun, saulus ka jeuet keuteuga lom teuma. saulus tinggai di damsyik ngon murit-murit isa na padub uroe treb jih. saulus nyan laju jijak bak rumoh-rumoh ibadah dan bak teupat nyan laju jiseumeubeuet bahwa isa nyan na kheueh aneuek allah. mandum ureueng hireuen jideungoe saulus. awaknyan jipeugah, "bukon kheueh jihnyoe nyang di yersusalem ka jipoh mate mandum ureueng meuman keu isa? jihnyan jijak keunoe sapeue tujuan jih na kheueh jikeuneuk jakdrob dan jiba awaknyan ubak imeum-imeum ulee!" 22 teuma saulus maken treb maken teuga peungaroh jih. bukeuti-bukeuti nyang jipeugah nyan keuhai isa biet-biet yaken that ureueng nyang deungoe bahwa isa nyan kheueh raja peuseulamat, sampoe ureueng-ureueng yahudi nyang na di damsyik hana hase le jibantah. oh ka na padub watee treb jih ureueng-ureueng yahudi ka sipakat keu jikeuneuk poh mate saulus. teuma reuncana awaknyan jiteupeue le saulus. uroe malam awaknyan jipreh saulus bak babah pintoe geureubang banda keu jipoh mate gobnyan. teuma bak simalam, murit-murit saulus jicok gobnyan, laju

jipasoe lam saboh raga oh lھےueh nyan jipeutreun rot beuton banda. saulus jijak u yersusalem, disinan gobnyan meu-useuha meugumpoi ngon murit-murit isa. teuma awaknyan jitakot keu gobnyan, sabab awaknyan hana jipateh bahwa geuh nyan biet-biet ka jeuet keu murit isa. oh lھےueh nyan barnabas jijak meurumpok ngon saulus, laju jiba gobnyan ubak rasui-rasui. barnabas laju jipeugah bak awaknyan keuhai pakriban saulus jikalon tuhan bak teungoh rot euh dan pakriban tuhan geumeututoe ngon gobnyan. barnabas pih geupeugah pakriban beuhe jih saulus nyoe jipeubeuet ureueng di damsyik ngon nan isa. 28 ngon sabab nyan saulus tinggai ngon awaknyan, dan meukhutubah ngon beuhe that bansaboh yersalem ngon nan tuhan. gobnyan meututoe dan meudebat ngon ureueng-ureueng yahudi nyang meubasa yunani, teuma awaknyan jiuseuha keuneuk poh mate gobnyan. watee ureueng-ureueng meuman nyang laen jiteupeue keuhai nyan, awaknyan laju jiba saulus u kaisarea, oh lھےueh nyan jikirem gobnyan u tarsus. ngon lagee nyan jeumaah nyang na bansaboh yudea, galilea, dan samaria ka jeuet keu aman. geutulong le roh allah, ngon teumakot ubak tuhan, jeumaah-jeumaah nyan meutamah teuga lom meutamah le. petrus jijak bansaboh nyan jijak sawewe bubena jeumaah. bak siuroe gobnyan geujak sawewe umat tuhan di lida. disinan gobnyan meurumpok ngon sidroe ureueng agam nyang nan jih eneas, nyang lapee dan hana jibeudoh-beudoh nibak teupat eh na lapan thon ka treb jih. petrus geupeugah bak eneas, "eneas, isa geupeu puleh gata. beudoh kheueh dan peukeumah laju teupat eh gata." watee nyan cit teuma eneas jibeudoh. banmandum peundudok di lida dan saron jikalon eneas, laju awaknyan banmandum meuman ubak tuhan. di yope na sidroe ureueng inong nyang nan jih tabita. inong nyan sidroe ureueng nyang meuman ubak isa. (nan jih lam basa yunani na kheueh dorkas nyang makna jih rusa.) inong nyan sabe jipeubuet hai-hai nyang jroh dan jitulong ureueng gasien. bak watee nyan ureueng nyan saket laju meuninggai donya. oh ka lھےueh manyet jih teupumano, manyet nyan laju jikeubah ateueh kama nyang na di ateueh. yope nyan hana padub na jioh nibak lida. teuma, watee murit-murit isa tinggai di yope jideungoe petrus na di lida, awaknyan laju jiutus dua droe keuneuk meurumpok ngon petrus ngon amanat jih lagee nyoe, "bubagaih kheueh droeneueh jak keunoe." petrus laju geubeudoh dan geuseutot awaknyan. watee ka trok keudeh, gobnyan laju jiba ubak kama nyang na di ateueh. banmandum inong balee nyang na disinan jihudom petrus sira jimoe dan jitunyok bak gobnyan bajee-bajee dan jubah-jubah nyang jicob le dorkas keu awaknyan watee dorkas nyan mantong udeb. petrus laju geuyue teubiet uluwa awaknyan banmandum, laju gobnyan meuteutot dan meudoa. oh lھےueh nyan gobnyan laju geuhadab ubak manyet dorkas dan geupeugah, "tabita, beudoh!" teuma dorkas laju jibleuet mata jih dan watee nyan cit teuma jikalon petrus, laju jiduek. laju le petrus jimat jaroe dorkas nyan sira geupeudong. oh lھےueh nyan petrus laju geuhoi ureueng-ureueng meuman nyang na disinan

meusajan-sajan ngon inong-inong balee nyan, laju geujok dorkas nyang ka udeb nyan ubak awaknyan. haba keuhai keujadian nyan bagaih that meutabu bansaboh yope, akhe jih sampoe jai that-that ureueng meuiman ubak isa sibagoe raja peuseulamat awaknyan. petrus na tinggai disinan meupadub uroe teuk treb jih bak rumoh sidroe ureueng samak kulet nyang nan jih simon. di kaisarea na sidroe ureueng agam nyang nan jih kornelius. ureueng nyan sidroe kapiten "pasokan italia". ureueng nyan that-that jitakot ubak po teu allah dan bansaboh keuluwarga jih meueibadat bak allah. ureueng nyan kayem that jitulong ureueng-ureueng yahudi nyang gasien, dan ureueng nyan sabe jimeudoa bak po teu allah. bak siuroe kira-kira poh lhee uroe ureueng nyan deuh jikalon ngon nyata that nibak saboh keumalon, sidroe malaikat allah teuka dan jitawok jih nyan, "kornelius!" kornelius laju jingiang atueh malaikat nyan ngon rasa teumakot laju jipeugah, "peue hai teungku?" geujawueub le malaikat nyan, "doa gata dan keuhai murah ate gatanyan ka geuteurimong le po teu allah dan allah geuingat keu gata. jinoenyoe gata yuejak laju ureueng u yope keu jijak hoi simon petrus. ureueng nyan teungoh jipioh bak rumoh ureueng samak kulet nyang nan jih simon, nyang tinggai bak bineh pante." oh ka lheeuh malaikat nyang meututoe ngon kornelius nyan geujak, kornelius laju jitawok dua droe peulayan rumoh jih dan sidroe anggota sidadu peungawai jih nyang saleh. kornelius laju jicalitra bak awaknyan peue nyang ka teujadi, oh lheeuhnyan laju jiyuejak awaknyan u yope. oh singoh beungoh, watee awaknyan mantong teungoh jijak dan rab trok u yope, petrus jiek atueh rumoh laju jimeudoa. dan laju jiteuka deuk meuheuet that keuneuk makheun. teungoh peunajoh teupeusanaut, jihnyan laju meuteume saboh keumalon. laju jikalon langet teuhah deuh jingiang sesuatu lagee ija nyang luwah teusunyueng u bumoe, ijanyan meugantueng bak peuet boh sagoe jih. lam nyan na mubagoe beulatang nyang meugaki peuet, mubagoe beulatang meulata dan cicem-cicem kleuet. laju na su nyang jipeugah bak jihnyan, "petrus, beudoh, sie kheeuh dan pajoh!" jijawueub le petrus, "han, tuhan! hantom na ulon pajoh peue-peue mantong nyang hareuem dan kuto." teuma su nyan jipeugah lom bak jih nyan, "peue nyang ka geupeugah haleue le allah, bek kheeuh gata anggab nyan hareuem." nyang deuh teukalon nyan meu-ulang-ulang sampoe lhee goe, oh lheeuh nyan ijanyan laju teubeutot lam syeuruga. petrus bingong bak jipike peue makna nyang deuh jikalon. teungoh petrus jipike-pike, ureueng-ureueng nyang jiyue le kornelius laju meurumpok rumoh simon dan awaknyan kana bak babah pitnoe. laju awaknyan jitawok ureueng nyan dan jitanyong, "peu kheeuh disinoe na jame nyang jimudom, nyang nan jih simon petrus?" watee nyan petrus teutab mantong jiuseuha jipeuwaham peu makna nibak nyang deuh jikalon nyan, roh allah geupeugah bak jihnyan, "hai petrus, na lhee droe ureueng teungoh jimita gata. ta treun laju bubagaih u miyueb dan bek waih-waih gata seutot awaknyan, sabab ulon kheeuh nyang yua awaknyan." teuma petrus laju jitreun uyueb dan jipeugah bak awaknyan, "ulon

kheeuh nyang awaknyoe mita. gatanyoe mandum tajak keunoe peuna peureulee?" 22 jijawueub le awaknyan, "kapiten kornelius nyang yuejak kamoe keunoe. gobnyan sidroe ureueng get dan geutakot keu po teu allah, dan lumpah jihoreumat le mandum ureueng yahudi. sidroe malaikat allah geuyue bak gobnyan mangat teungku jak u rumoh gobnyan, nyan na kheeuh sibagoe jeunawueub atueh doa gobnyan, gobnyan geuyue deungoe peue nyang teuma teungku peugah bak gobnyan." teuma petrus laju geuyue tamong awaknyan mangat jimudom disinan. oh singoh nyan petrus jibeudoh dan laju jijak ngon awaknyan. na padub droe ureueng nibak yope jijak cit ngon awaknyan. siuroe oh lheeuh nyan awaknyan laju trok u kaisarea. disinan awaknyan ka jipreh-preh le kornelius ngon kawom syedara jih dan rakan-rakan krab jih nyang ka jihoi. watee petrus trok keunan. kornelius laju jijak sambot gobnyan dan jisujut dikeue gobnyan. teuma le petrus laju jitulong peudong ureueng nyan, sira jipeugah, "beudoh kheeuh! ulon keudroe pih manusia lagee gata." 27 teungoh geumeututoe ngon kornelius nyan, petrus laju geutamong lam rumoh. disinan laju geukalon jai that-that ureueng ka meusapat. laju geupeugah bak awaknyan, "syedara-syedara keudroe tateupeue bahwa ureueng yahudi jitam le agama jih mangat bek jijak meurumpok atawa meuhubongan ngon ureueng-ureueng nibak bansa laen. teuma allah ka geutunyok bak ulon bahwa ulon hana jeuet lon anggab soe mantong najih atawa hareuem. nyang kheeuh sabab jih watee teungku lakee mangat ulon teuka keunoe, nibak ulon hana masa-alah. teuma jinoenyoe keuneuk lon teupeue keupeue teungku tayue jak ulon keunoe." jijawueub le kornelius, "lhee uroe nyang ka lheeuh, kira-kira watee jih lagee saat nyoe, ulon teungoh meudoa dirumoh poh lhee seupot. ngon hana lon sangka-sangka sidroe ureueng agam jidong dikeue ulon. peukayan ureueng nyan meukilat-kilat. ureueng nyan jipeugah, 'kornelius! allah ka geudeungoe doa gata dan geuingat atueh keumurahan ate gata. teuma gata yue kheeuh mangat ureueng jijak u yope keu jijak hoi ureueng nyang nan jih simon petrus. gobnyan teungoh geu eh bak rumoh sidroe ureueng nyang buet jih jisamak kulet nyang nan ureueng nyan simon; rumoh nyan bak bineh laot.' nyang kheeuh sabab jih bagaih that lon yue ureueng mangat jijak tawok teungku. dan teungku keubiet jroh that ate keu neujak keunoe bak watee nyoe kamoe mandum meusapat disinoe dikeue allah keu kamoe deungoe mandum nyang geupeugah le allah mangat hai nyan teungku peugah bak kamoe." laju jipeugah le petrus, "jinoenyoe biet-biet ulon sadar bahwa allah geupeujeuet mandum manusia saban. ureueng nyang takot keu allah dan peubuet nyang beutoi, ureueng nyan geuteurimong le allah, hana geupakoe ureueng nyan nibak bansa peue. syedara-syedara ka tateupeue asoe beurita nyang allah peusampoe keu bansa israel. habanyan na kheeuh keuhai haba get keuhai dame meulalu isa, na kheeuh tuhan mandum manusia. gata tateupeue peue nyang ka teujadi bansaboh yudea, na kheeuh phon nibak galilea oh lheeuh teupeumano nyang geuyue le nabi yahya. gata ka tateupeue bahwa allah

ka geupileh isa ureueng nazaret nyan dan geubri keu gobnyan roh allah dan kuasa. meunan cit gata tateupeue bahwa isa nyan geujak ho-ho mantong keu geupeubuet nyang jroh; gobnyan geupeu puleh mandum ureueng nyang ka jikuasa le iblih. sabab allah na meusajan gobnyan. kamoenyoe kheueh ureueng nyang ka kameo ngieng keudroe peue-peue mantong nyang ka geupeubuet di nanggroe ureueng yahudi dan di yerusalem. bah kheueh meunan awaknyan jisaleb dan jipoh mate gobnyan. teuma bak uroe nyang keu lhee allah geupeu udeb gobnyan lom nibak mate dan geupeudeuh gobnyan ubak manusa; bukan keu mandum ureueng, teuma ubak kameo nyang ka geupileh le allah leubeh ilee beu jeuet keusaksi-saksi gobnyan. kameo makheun dan jieb ie meusajan ngon gobnyan oh ka lheeuh gobnyan udeb lom nibak mate. dan gobnyan geuyue bak kameo keu kameo jak peusampoe haba get nyan ubak ureueng-ureueng dan kameo meusaksi bahwa gobnyan kheueh nyang geuangkat le po teu allah jeuet keu hakem ureueng-ureueng nyang mantong udeb dan ureueng-ureueng nyang ka mate. mandum nabi-nabi na geupeugah keuhai gobnyan. awaknyan geupeugah bahwa mandum ureueng nyang meuiman ubak isa, teuma teupeuamphon desya jih ngon kuasa nibak isa." watee petrus mantong jipeugah haba, roh allah geutreon dan geukuasa mandum ureueng nyang deungoe haba nyan. ureueng-ureueng yahudi nyang peucaya ubak isa dan jiseutot petrus phon nibak yope, mandum hireuen watee jikalon bahwa allah geubri cit roh gobnyan keu ureueng-ureueng bansa laen nyang bukan bansa yahudi. sabab awaknyan jideungoe mandum ureueng nyan jimitutoe lam mubagoe basa dan jipujoe-pujoe keubeusaran po teu allah. laju jipeugah le petrus, "cuba kalon, ureueng-ureueng nyoe ka meuteume roh allah saban lagee geutanyoe. ngon lagee nyan peu kheueh hase ureueng laen jitam awaknyoe keu teupumano ngon ie?" teuma petrus jiyue awaknyan teupumano atueh nan isa. oh lheeuh nyan awaknyan jilakee mangat petrus beutinggai ngon awaknyan keu padub uroe treb jih. rasui-rasui dan ureueng-ureueng meuiman bansaboh yudea jideungoe bahwa ureueng-ureueng nyang hana meuagama yahudi pih ka jiteurimong feureuman alah. oh lheeuh nyan watee petrus geujak u yerusalem, ureueng-ureueng yahudi nyang ka lheeuh jimeuiman nyan, jihina keu petrus. awaknyan jipeugah lagee nyoe, "keupeue gata jak u rumah ureueng-ureueng nyang gohlom teupeukatan? dan gata makheun teuma meusajan-sajan ngon awaknyan!" ngon sabab nyan petrus geupeu trang bak awaknyan mandum nyang ka teujadi, phon nibak awai, petrus geupeugah, "ulon teungoh meudoda di banda yope, laju deuh ulon ngieng lam saboh keumalon. ulon ngieng laju na sapeue-peue lagee sion ija nyang luwah teupeutreon nibak langet, meugantung nibak ban peuet boh sagoe jih, oh lheeuh nyan laju jipioh bak bineh ulon. watee ulon kalon u dalam nyan, laju ulon ngieng beulatang-beulatang nyang meugaki peuet, beulatang-beulatang kleut, beulatang-beulatang nyang jimeu-eue dan cicem-cicem kleut. oh lheeuh nyan laju ulon deungoe na saboh su nyang jipeugah

ubak ulon, 'beudoh laju hai petrus! sie kheueh laju nyan dan gata pajoh!' teuma ulon jaweueh, 'hanjeuet tuhan! gohlom na ulon makheun peunajoh nyang hareuem atawa najih.' teuma su nyan geupeugah lom nibak langet, 'barang nyang ka geupeugah haleue le allah bek gata peugah hareuem.' ulon ngieng hai nyan sampoe lhee goe dan akhe jih banmandum teubeuot lom lam syeuruga. paih bak watee nyan cit teuma ban lhee droe nibak kaisarea, nyang jiyue jak meurumpok ngon ulon, trok u rumah teupat ulon eh. laju roh allah geuyue ulon jak meusajan-sajan ngon awaknyan dan bek na bimbeng. ban nam droe syedara nyan pih jijak meusajan ngon ulon u kaisarea, dan kameo banmandum kameo tamong lam rumah kornelius. oh lheeuh nyan kornelius jipeugah bak kameo pakriban gobnyan jikalon sidroe malaikat jidong dirumah jih sira jipeugah, 'gata yue laju ureueng jijak u yope keu jijakhui sidroe ureueng agam nyang nan jih simon petrus. gobnyan teuma jipeusampoe ubak gata haba keuhai teupeuseulamat gata dan keuluwarga gata.' dan bak watee ulon teungoh peugah haba lagee nyan, meunan kheueh petrus geupeugah lom calitra gobnyan, "roh allah geutron atueh awaknyan, saban lagee nyang teujadi atueh geutanyoe ilee yoh awaiphon. laju ulon teuingat, tuhan ka lheeuh geupeugah, 'nabi yahya geupumano ngon ie, teuma gata teupumano ngon roh allah.' ngon lagee nyan jeulaih that bahwa po teu allah geubri cit ubak ureueng-ureueng nyang hana meuagama yahudi, meuneubri nyang saban geubri keu geutanyoe bak watee geutanyoe tapeucaya ubak tuhan isa. ngon sabab nyan, panena mungkin ulon tam po teu allah!" oh ka lheeuh jideungoe nyan, awaknyan hana jibantah le. laju awaknyan jipujoe po teu allah. awaknyan jipeugah, "meunyoe meunan, ureueng-ureueng nyang bukan yahudi pih geubri keuseumpatan le po teu allah keu jimeutobat nibak desya-desya jih dan jideungoe udeb nyang sejat!" oh ka lheeuh stefanus jipoh mate, ureueng-ureueng nyang meuiman ubak isa ka jipeuphon let keudeuh keunoe, akhe jih awaknyan meutabu beba han meuh sahoe. na jiplueng sampoe u fenisia, dan na teuma nyang sampoe u siprus dan antiokhia. awaknyan laju jipeusampoe haba nibak allah na kheueh ubak ureueng-ureueng yahudi mantong. teuma lamkawan ureueng-ureueng nyang meuiman nyan, nyang asai jih nibak siprus dan kirene, na teuma ureueng-ureueng nyang jijak u antiophia dan jimeudakwah haba get keuhai isa ubak ureueng-ureueng nyang hana meuagama yahudi cit teuma. kuasa tuhan na bak awaknyan sampoe jai that-that ureueng meuiman dan jiseurah droe ubak tuhan. 22 haba keuhaba keuhai peuristiwa nyoe trok cit teuma ubak jeumaah nyang na di yerusalem. ngon lagee nyan awaknyan laju jikirem barnabas u antiokhia. dan watee barnabas ka trok keudeh, dan jikalon pakriban allah geubri beureukat atueh ureueng-ureueng nyan, gobnyan galak that-that. laju jilakee mangat awaknyan biet-biet patuh ubak tuhan deungon sipeunoh ate. barnabas nyoe na kheueh ureueng get ate dan jikuasa le roh allah dan that-that jimeuiman ubak tuhan sampoe meutamah rame ureueng jiseutot tuhan.

oh ltheueh nyan barnabas jijak u tarsus jijak mita saulus. oh ka ltheueh meurmupok ngon saulus, laju jiba saulus u antiokhia na sithon peunoh awaknyan meugumpoi ngon jeumaah nyang na disinan sira jipeubuet ureueng rame. di antiokhia nyan ktheueh ureueng-ureueng nyang peucaya keu isa nyang keuphon that teupeugah ureueng-ureueng kristen. 27 bak watee nyan na pa dubdroe nabi nyang teuka nibak yerusalem u antiokhia. lamkawan nabi-nabi nyan na nyang nan geuh agabus. le durongan roh allah gobnyan meunubuat bahwa bansaboh donya teuma teuka musem deuk nyang paleng parah. (dan hainyan keubiet na teujadi bak watee kaisar klaudius mat peurintah.) ngon lagee nyan banmandum murit isa nyan ka sipakat keu jikirem sumbangan keu syedara-syedara nyang na tinggai di yudea; maseng-maseng jikirem meunurot keumampuan jih. keuhai situju nyan teutab teupeubuet, laju barnabas dan saulus ji-utus keu jijak intat sumbangan nyan ubak peumimpen-peumimpen jeumaah. kira-kira bak watee nyan cit teuma raja herodes jipeuphon teugon anggota-anggota jeumaah. ateuhe peurintah raja nyan, yakobus, syedara yahya jipoh mate ngon peudeueng. watee jikalón le herodes buet nyan galak that ate ureueng-ureueng yahudi, jipeubuet lom lagee nyan; laju jipeutreu peurintah keu teujakdrob petrus. hai nyan teujadi bak watee uroe raya ruti hana meuragoe. oh ka ltheueh jidrob, petrus laju jipeutamong lam glab. peuet boh reugu sipa-i nyang jibri tugaih keu jijaga petrus lam glab nyan – maseng-maseng reugu na peuet droe sipa-i. oh ka ltheueh peurayaan paskah seulesoe, baro ktheueh herodes teuma jipeusidang petrus dikeue ureueng rame. ngon lagee nyan petrus jiteuen lam glab; teuma le anggota-anggota jeumaah hana jipioh-pioh jimeudoa ngon sisunggo ate ubak tuhan keu petrus. bak malam sigohlom herodes jiba petrus dikeue ureueng rame, petrus teuh sira teuiikat ngon beuleunggu nibak teungoh dua droe sidadu nyang kawai. bak babah pintoe peunjara nyan, peungawai-peungawai nyang laen pih teungoh jikawai peunjara. ngon hana teusangka-sangka malaikat tuhan ka teudong nibak teupat nyan dan saboh cahya muble-ble lam kama peunjara nyan. malaikat nyan laju geuguncang-guncang petrus sampoe petrus teujaga. laju geupeugah le malaikat nyan, "hai, bubagaih tabeudoh!" watee nyan cit teuma rhot rante beuso nyang na bak jaroe petrus. oh ltheueh nyan malaikat nyan geupeugah, "ngui ktheueh laju peukayan gata dan ikat ktheueh laju talo sipatu gata." teuma petrus pih laju geungui peukayan dan geuikat talo sipatu geuh keudroe. oh ltheueh nyan malaikat nyan geupeugah lom, "ngui ktheueh bajee jubah dan seutot ktheueh ulon." teuma petrus laju geuseutot malaikat nyan geuteubiet nibak peunjara. teuma petrus hana geusadar bahwa peue nyang teungoh geupeubuet le malaikat na ktheueh sapeue-peue nyang biet-biet teujadi. petrus geupike nyan ktheueh saboh keumalon. watee awaknyan ka geulewat nibak teupat jijaga pintoe phon dan pintoe nyang keudua, awaknyan laju trok bak pintoe beuso, nyang rhot jih u banda. pintoe nyan teuhah keudroe jih, laju awaknyan jiteubiet dan jijak rot saboh jurong. ngon

hana geusangka-sangka malaikat nyan geutinggai petrus sidroe. oh ka ltheueh nyan baro ktheueh petrus sadar keuhai peue nyang ka teujadi ateuhe droe gobnyan, laju geupeugah, "jinoenyoe baro ktheueh lon teupeue bahwa tuhan biet-biet ka geukirem malaikat gobnyan keu geupeulheuh ulon nibak kuasa herodes dan nibak sigala sisutu nyang jikeuneuk peubuet le bansa yahudi ateuhe ulon." oh ka ltheueh geusadar keuadaan nyan, petrus laju geujak u rumoh maryam, ma yahya nyang teuhoi cit ngon markus. disinan jai that that ureueng meugumpoi dan teungoh meudoa. petrus laju geukeutok pintoe luwa, laju le sidroe peulayan inong nyang nan jih rode, teuka keu jibuka pintoe. inong nyan laju jituri nyan na ktheueh su petrus. sabab galak that ate, inong nyan bagaih-bagaih jigisa u dalam ngon hana jipeulah pintoe leubeh ilee, laju jipeugah bak ureueng-ureueng nyang na disinan bahwa petrus na diluwa. "kah nyoe ka pungoe!" kheun awaknyan. teuma rode jimeukreueh bahwa nyan biet-biet petrus. teuma awaknyan laju jipeugah, "nyan malaikat gobnyan!" watee nyan petrus hana pioh geukeutok pintoe. dan watee awaknyan jipeulah pintoe, laju jikalón petrus, awaknyan hireuen lumpah na. petrus laju geubri isyarat ngon jaroe gobnyan mangat awaknyan teunang, oh ltheueh nyan baro ktheueh geualitra pakriban tuhan ka geuba gobnyan geupeuteubiet lam glab. laju geupeugah, "jak peugah ktheueh hainyoe ubak yakobus dan syedara-syedara nyang laen lom teuma." oh ka ltheueh nyan petrus laju geutinggai teupat nyan dan geujak u teupat laen. oh singoh beungoh baro ktheueh jiteuka karu rioh-rioh dan ka-ak ka-ok lamkawan sipa-i nyang jaga. awaknyan bingong lumpah na keuhai peue nyang ka teujadi ateuhe petrus. laju le herodes jiyue ureueng jak mita petrus, teuma awaknyan hana hase meurmupok ngon gobnyan. teuma herodes laju jipeurintah mangat peungawai-peungawai nyan jitanyong oh ltheueh nyan laju jipoh mate. oh ltheueh nyan herodes laju jijak u yudea dan tinggai na padub treb di kaisarea. herodes beungeh lumpah na keu ureueng-ureueng tirus dan sidon. ngon sabab nyan awaknyan meusajan-sajan jijak meuhadab gobnyan. phon-phon awaknyan jibujuk blastus, nyang jeuet keu ulee lam meuligoe herodes, sampoe jihnyan jidong blaih awaknyan. oh ltheueh nyan awaknyan laju jijak meuhadab herodes, laju jilakee meudame, sabab nanggroe awaknyan meugantung nibak peunajoh nibak nanggroe herodes. bak siuroe nyang ka teupeuteuntee, herodes laju jingui peukayan keurajeuen dan laju jiduek ateuhe takhta keurajeuen dan jipeuphon pidatoe dikeue rakyat ba. 22 rakyat nyang teungoh jideungoe nyang jikuk-kuk, "nyoe ktheueh su dewa, bukan su manusia!" bak watee nyan cit teuma malaikat tuhan geutampa herodes, sabab jihnyan hana jihoreumat allah. herodes jipajoh le glang dan laju mate. teuma feureuman allah seumaken meukeumang luwah dan seumaken teuga. oh ka ltheueh barnabas dan saulus geupeu seulesoe tugaih geuh, awaknyan laju geuriwang nibak yerusalem sira geuba yahya markus meusajan-sajan ngon awaknyan. lam jeumaah di antiokhia na nabi-nabi dan guree-guree, na ktheueh barnabas,

simeon nyang jihoi si itam, lukius dan asai kirene, menahem nyang rayeuk meusajan raja herodes, dan saulus. watee awaknyan teungoh iebadat ubak tuhan dan jipuasa, roh allah geupeugah bak awaknyan, "pileh kheueh barnabas dan saulus khususos keu ulon, mangat awaknyan jipeubuet buet nyang ka lon peuteuttee keu awaknyan." oh ka ltheueh puasa dan meudoa awaknyan laju jikeubah jaroe ateuheh barnabas dan saulus laju jiutus awaknyan bandua. sabab geu-utus le po teu allah, barnabas dan saulus laju jijak u seleukia. di sinan awaknyan jimeulayeue laju u pulo siprus. watee ka trok u salamis, awaknyan laju jimeudakwah jipeusampoe feureuman allah di rumoh-rumoh iebadat yahudi. lam meuneujak awaknyan mandua jibantu le yahya markus. bans-aboh pulo nyan awaknyan bloih sampoe trok u pafos. bak teupmat nyan awaknyan laju meurumpok ngon sidroe ureueng yahudi, nyang nan jih bar yesus. ureueng nyan tukang sihe nyang jiaku droe jih nabi. sergius paulus, gubunur pulo nyan na kheueh rakan krab that ngon tukang sihe nyan. gubunur nyan na kheueh sidroe ureueng nyang carong dan bijaksana. gobnyan laju jihoi barnabas dan saulus sabab jihnyan jikeuneuk deungoe feureuman allah. teuma barnabas dan saulus hanjitem teurimong le elimas ahli sihe nyan, sabab elimas (nyan kheueh nan ureueng nyan lam basa yunan) jiseueha mangat gubunur bek sampoe jipeucaya ubak isa. teuma saulus – nyang teuhoi cit ngon nan paulus – laju jikuasa le roh allah, akhe jih gobnyan laju geupandang ateuheh tukang sihe nyan, ltheueh nyan laju jipeugah, "hai tukang teumipee jeuhet, aneuek jahanam! gata musoh bandum nyang get. pakon hana gata tem pioh gata peurusak reuncana allah keu teupeuseulamat manusia? jinoo gata kalon, tuhan teuma geuhukom gata! gata teuma jeuet keu ureueng buta, sampoe gata hana hase gata ngieng cahya mata uroe lam padub watee nyoe." watee nyan cit teuma elimas jirasa na sagob itam nyang jitob mata jih, sampoe watee jijak meugeue-meugeue jimita ureueng keu jitarek jih. watee gubunur nyan jikalon peue nyang ka teujadi, ureueng nyan laju peucaya keu isa; sabab gobnyan hireuen lumpah na keuhai ajaran keu tuhan. nibak pafos, paulus dan rakan-rakan jih laju jimeulayeue u perga di pamfilia. nibak teupmat nyan yahya markus jitinggai awaknyan, laju jigisa u yerusalem. beudoh di perga, awaknyan jijak laju u antiokhia di pisidia, oh ltheueh nyan bak uroe sabat awaknyan laju jijak duek lam rumoh iebadat. oh ka ltheueh kitab nabi musa dan kitab nabi-nabi jibeuet le awaknyan, peumimpen-peumimpen rumoh iebadat nyan jiyue ureueng jijak teumanyong bak paulus dan rakan-rakan jih, "syedara-syedara, meunyo gata na naseuhat keu ureueng nyoe, kamoe peusilakan syedara peugah naseuhat nyan." paulus laju jidong, laju jibri isyarat ngon jaroe jih, oh ltheueh nyan jipeugah, "syedara-syedara bansa israel dan bandum syedara-syedara nyang laen nyang na nibak teupmat nyoe nyang taat ubak po teu allah! cuba gata deungoe ulon: allah bansa israel ka geupileh indatu geutanyoe, dan geupeujeuet bansa nyoe bansa nyang rayeuk watee awaknyan tinggai di nanggroo meuse sibagoe ureueng aseng. oh ltheueh nyan

ngon kuasa nyang rayeuk allah geuba awaknyan geupeuteubiet lam nanggroo meuse. gobnyan saba ateuheh pi-e-pi-e awaknyan lam padang pasi peuet ploheh thon treb jih. tujoh boh bansa geupeuhabeh di nanggroo kanaan keu geubagi-bagi nanggroo nyan keu bansa israel mangat nanggroo nyan jeuet keuhak milek awaknyan. banmandum nyan na jih 450 thon treb jih. oh ka ltheueh taubagi nanggroo kanaan nyan, allah laju geubri keu awaknyan hakem-hakem. hakem nyang keuneulheueh na kheueh nabi samuel. oh ltheueh nyan awaknyan jilakee sidroe raja. allah laju geubri bak awaknyan saul bin kis nibak sukee bansa benyamin mangat jeuet keu raja awaknyan nyang treb jih sampoe peuet ploheh thon. 22 oh ka ltheueh allah geu geesee raja nyan nibak takhta jih, allah geu angkat teuma nabi daud jeuet keu raja awaknyan. dan nyoe kheueh feureuman allah keuhai nabi daud, 'ulon ka meuteume daud bin isai nyan sidroe nyang jipeuharok ate ulon. jihnyan kheueh nyang jipeubuet mandum nyang ulon lakee.' nibak keuturonan nabi daud nyan kheueh allah geukeubah keu bansa israel sidroe raja peuseulamat, lagee nyang ka geupeu janji nyan. dan isa nyan kheueh raja peuseulamat nyan. sigohlom isa geupeu phon tugaih gobnyan, nabi yahya ka geupeusampoe ubak ureueng-ureueng israel mangat awaknyan jimeutobat nibak mandum desya-desya dan awaknyan teupumano. dan karab trok bak akhe buet gobnyan, nabi yahya jipeugah ubak dumna ureueng, 'soe kheueh ulon nyoe meunurot peundapat gata? ulon nyoe bukan ureueng nyang gata preh-preh. ingat, ureueng nyan teuma teuka oh ka ltheueh ulon; keu lon ploih talo sipatu gobnyan mantong nibak ulon nyoe hana jeuet.' syedara-syedara keuturonan nabi ibrahim, dan mandum syedara nyang laen nyang na disinoe nyang taat ubak po teu allah! allah ka geukirem keu geutanyoe haba seulammat nyan; 27 sabab ureueng-ureueng nyang tinggai di yerusalem dan peumimpen-peumimpen awaknyan hana jiteupeue bahwa gobnyan kheueh peuseulamat nyan. awaknyan hana mumphon ajaran nabi-nabi nyang teubeuet tieb-tieb uroe sabat, sampoe awaknyan jihukom isa almaseh. teuma ngon jipeubuet nyang lagee nyan le awaknyan, teunyata peue nyang ka geupeugah le nabi-nabi nyan biet-biet teujadi. bah kheueh awaknyan hana jiteume sapeue pih nibak gobnyan nyang patot teuhukom ngon hukoman mate, teuma awaknyan teutab jilakee bak pilatus mangat gobnyan teutab jipoh mate. dan oh ka ltheueh awaknyan jipeubuet banmandum nyang na teutuleh lam alkitab keuhai gobnyan, awaknyan laju jipeutron manyet gobnyan nibak kayee saleb, laju jikeubah lam kubu. teuma le allah geupeu udeb lom teuma gobnyan nibak mate. oh ltheueh nyan meu-uroe-uroe treb jih gobnyan geupeuleumah droe ubak ureueng-ureueng nyang ka ltheueh teuka ngon gobnyan nibak galilea u yerusalem. awaknyan kheueh bak saat nyoe jeuet keusaksi-saksi keu gobnyan meu bansa israel. jadi, bak saat nyoe kamoe peusampoe haba get nyan keu gata: peue nyang ka geupeujanji le allah ubak indatu geutanyoe, nyan le gobnyan ka geupeubuet keu geutanyoe ngon geupeu udeb lom isa nibak mate. sabab lam kitab zabur nyang keudua

na teutuleh lagee nyoe, 'gata kheueh aneuek ulon, bak uroenyoe ulon ka jeuet keu bapak gata.' allah ka geupeu udeb gobnyan lom nibak mate. jinoenyoe gobnyan hana le geurasa mate lam kubu. keuhai nyan allah meufeureuman, 'ulon teuma lon bri keu gata janji suci nyang pasti teukeureuja, nyang ka ulon meujanji bak nabi daud.' meunan cit bak ayat nyang laen na na teutuleh lagee nyoe, 'droeneuh hana neupeubiyeu hamba droeneuh nyan brok lam kubu.' nabi daud ka mate dan ka ltheueh teukubu meusajan ngon indatu gobnyan, oh ka ltheueh geupeubuet peue nyang allah yue peubuet. manyet nabi daud pih ka habeh hanco banmandum. teuma isa, nyang allah peu udeb lom nibak mate, isa nyan hana hanco lom hana habeh. sabab nyan kheueh syedara-syedara, bah kheueh beugata teupeue bahwa meulalu isa haba keuhai teupeu amphon desya teupesampoe ubak gata; gatanyoe haroh tateupeue bahwa tieb-tieb ureueng nyang meuiman keu gobnyan, geupeu beubaih nibak mandum desya nyang hana hase teusampoh meulalu peurintah-peurintah allah nyang geupesampoe le nabi musa. nyang kheueh sabab jih gata haroh tasimak beuet-get, bek sampoe teujadi ateueh gata peue nyang ka geupeugah le nabi-nabi nyoe, 'simak kheueh beuet-get, hai gata nyang galak bak buet meuhina! gata teuka hireuen dan laju mate! sabab bak jamen nyoe teungoh lon peubuet sapeue-sapeue nyang gata keudroe hana teuma gata pateh, bah kheueh na ureueng nyang peutrang ubak gata.' " watee paulus dan barnabas geutinggai rumah ibadah nyan, ureueng-ureueng nyang na lam rumah ibadah nyan jilakee lom mangat awaknyan jigisa lon oh watee uroe sabat nyang teuma teuka, guna keu geupeu trang leubeh jih keuhai nyan. oh ka ltheueh ureueng-ureueng jiteubiet lam rumah ibadah nyan, paulus dan barnabas laju jiseutot le ureueng rame, ureueng yahudi dan bansa laen nyang ka jitamong agama yahudi. dan rasui-rasui nyan laju jibri naseuhat bak awaknyan mangat awaknyan teutab meusadeue bak rakhmat allah. bak uroe sabat ltheueh-ltheueh nyan, rab mandum ureueng nyang na lam banda nyan jijak deungoe feureuman tuhan. watee ureueng-ureueng yahudi jikalon ureueng rame nyan, awaknyan biet-biet jiteuka bingiek ate. awaknyan laju jihina paulus dan jibantah mandum nyang geupeugah nyan. teuma ngon leubeh beuhe lom paulus dan barnabas geumeututot troh trang. awaknyan geupeugah, "feureuman allah keubiet teupesampoe ubak gata leubeh ilee. teuma sabab gata hana tatem teurimong, gata ka tapeuteuntee keudroe bahwa gata keubiet hana patot tateurimong udeb sejutani dan keukai. dan jinoenyoe kamoe tinggai gata dan kamoe jak ubak bansa laen. sabab nyoe kheueh peurintah tuhan ubak kamoe: tuhan meufeureuman, 'ulon ka lon peuteuntee gata jeuet keu trang nibak ureueng-ureueng bansa laen nyang bukan yahudi, mangat gata tapeuteuka keuseulamatan bansigom donya.' " watee ureueng-ureueng bansa laen nyang bukan yahudi jideungoe hai nyan, awaknyan galak lumpah na, laju awaknyan jipujoe-pujoe feureuman tuhan. dan ureueng-ureueng nyang geupeuteuntee le allah keu meuteume udeb sejutani dan keukai, ureueng-ureueng nyan jimeuiman. feureuman

tuhan pih laju meutabu ho-ho mantong bansaboh daerah nyan. teuma ureueng-ureueng rayeuk banda nyan meunan cit ngon ureueng-ureueng inong nibak golongan manyang nyang takot keu po teu allah, laju jipeusuna le ureueng-ureueng yahudi. awaknyan jipeuteuka meumusoh ngon paulus dan barnabas, dan ji use awaknyan bandua di daerah nyan. teuma le rasui-rasui nyan laju geukipah abee bak gaki awaknyan dikeue ureueng-ureueng nyang na disinan sibagoe peuingat, oh ltheueh nyan laju geujak u ikonium. murit-murit di antiokhia lumpah that galak dan jikuasa le roh allah. paulus dan barnabas geurasa teuma hai nyang saban di ikonium. awaknyan geujak cit ubak rumah ibadah yahudi dan geumeututot disinan lagee nyang sibeuna jih akhe jih jai that ureueng yahudi dan nyang kon ureueng yahudi meuiman keu isa. teuma di ureueng-ureueng yahudi nyang hana jipateh, jipeusuna ureueng nyang bukan yahudi, sampoe jeuet awaknyan banci ubak ureueng nyang meuiman keu isa. ngon sabab nyan barnabas dan paulus treb geutinggai disinan. dan ngon beuhe that awaknyan geumeututot keuhai tuhan. dan tuhan pih geubri bukeuti bahwa haba awaknyan keuhai gaseh nyan beutoi; gobnyan laju geubri keu awaknyan kuasa keu jeuet geupeubuet buet-buet nyang ajaeb dan hai-hai nyang luwabiasa. teuma peunduduek banda nyan hana sapeue kheun meu adu peundapat sidroe ngon nyang laen; na nyang jidong blaih ureueng yahudi dan na teuma nyang jidong blaih rasui-rasui nyan. laju di ureueng-ureueng yahudi ngon peumimpin-peumimpin jih meusajan-sajan ngon kon ureueng yahudi ka sapeue kheun jikeuneuk seksa dan jigelawa rasui-rasui nyan ngon aneuek batee. teuma le rasui-rasui nyan geusadar keuhai nyan, laju geupeu aseng droe u listra dan derbe, na kheueh banda-banda nyang na di likaonia, dan u daerah sikeulileng nyan. bak teupat nyan awaknyan geupesampoe lom haba get nyan. di listra na sidroe ureueng agam nyang gaki jih lapee yoh phon lahe, sampoe ureueng nyan hanjeuet jijak yoh ubit kon, sabab gaki jih lumpah that leumiek. ureueng nyan jiduek disinan sira jideungoe paulus peugah haba. paulus geukalon bahwa ureueng nyang meuiman ngon sabab nyan jihnyan hase teupeupuleh. teuma paulus laju geuinging ateueh ureueng nyan dan ngon su meutaga paulus geupeugah, "dong laju beucot!" ureueng nyan jilumpat sira jidong oh ltheueh nyan jijak. watee ureueng rame jikalon peue nyang geupeubuet le paulus, awaknyan dumpek lam basa likaonia, "dewa-dewa ka jitron ateueh donya lam tuboh manusia." laju barbanas jiboh nan le awaknyan zeus, dan paulus jiboh nan hermes, sabab awaknyan kheueh nyang peugah haba. imeum dewa zeus, nyang rumah ibadah jih dikeue banda, jijak keunan sira jiba leumo-leumo agam dan bungong-bungong u babah pintoe banda. ureueng nyan keuneuk seutot ngon ureueng rame nyan keu jipeuseumah keureubeuen jih keu rasui-rasui nyan. watee barnabas dan paulus geudeungoe peue nyang keuneuk jipeubuet le ureueng-ureueng nyan, awaknyan laju jipriek-priek peukayan jih keudroe sira jiplueng-plueng lamkawan ureueng rame nyan, dan laju jidumpek, "hai, keupeue gata peubuet nyoe?

kamoe nyoe manusia cit saban lagee gata! kamoe na di lam sinoe keu kamoe peusampoe haba get keu gata mangat gata mandum tatinggai hai-hai nyang hana meuguna nyoe dan tajak ubak allah nyang udeb, nyang cebta langet ngon bumoe dan laot ngon mandum nyang na lam nyan. bak masa ilee allah geupeubiyeu bansa-bansa udeb meunurot keuheundak jih keudroe. teuma awaknyan hana tuwoe geubri bukeuti-bukeuti keuhai droe gobnyan, na kheueh ngon cara tapeubuet nyang jroh. gobnyan geubri keu gata ujeuen nyang jitron nibak langet dan hase tanoh oh trok bak watee musem. gobnyan geubri peunajoh keu gata dan geupeu galak ate gata." ngon tutoe haba nyang lagee nyan rasui-rasui nyan teutab payah that-that geutam ureueng-ureueng nyan jipeuseumah keureubeuen keu gobnyan mandua. na padub droe ureueng yahudi jiteuka u listra nibak antiokhia di pisidia dan nibak ikonium laju jipeusuna ureueng rame nyan sampoe ureueng-ureueng nyan laju jidong blaih awaknyan. awaknyan laju jigeulawa paulus ngon batee, oh ltheueh nyan laju jitarek gobnyan uluwa banda. awaknyan jipike paulus nyan ka mate, teuma watee ureueng-ureueng meuman nyan jidong bansilingka gobnyan, gobnyan geubudoh dan geutamong lom banda. oh singoh beungoh geujak teuma u derbe meusajan-sajan ngon barnabas. di derbe, paulus dan barnabas laju geupeusampoe lom haba get nyan dan jai that ureueng jimeuman ubak isa. oh ka ltheueh nyan awaknyan jigisa lom u listra, oh ltheueh nyan u ikonium, laju u antiokhia di pisidia. 22 lam banda-banda nyang geujak nyan awaknyan laju geupeukong ate murit-murit isa dan geubri naseuhat ubak murit-murit nyan mangat teutab meuman keu isa, "geutanyoe haroh beujai that tarasa deurita leubeh ilee, baro kheueh geutanyoe hase tarasa keubahgiaan donya baro allah," meunan kheueh cara jih rasui-rasui nyan geupurunoe murit-murit isa di banda-banda nyan. dan bak tieb-tieb jeumaah, paulus dan barnabas laju geuangkat peumimpén-peumimpén jeumaah nyan. laju ngon meudoa dan puasa, awaknyan laju jiseurah peumimpén-peumimpén nyan ubak tuhan nyang awaknyan peucaya nyan. oh ka ltheueh nyan paulus dan barnabas geujak lom laju liwat daerah pisidia dan trok laju u pamfilia. dan oh ka ltheueh awaknyan geupeusampoe feureuman allah di perga, awaknyan laju geujak u atalia. nibak sinan awaknyan geumeulayeue lom u antiokhia. nyan kheueh banda teupat awaknyan yoh masa ilee jibri ubak rakhmat allah, mangat awaknyan jipeubuet buet nyang jinoenyoe ka awaknyan peuseuleusoe. 27 watee ka trok u antiokhia, awaknyan laju geupeusapat ureueng-ureueng nyang na nibak jeumaah nyan, laju geupeugah mandum nyang ka geupeubuet le po teu allah meulalu awaknyan. meunan cit awaknyan geupeugah pakriban allah ka geupeuhah jalan mangat ureueng-ureueng nyang bukan yahudi meuman ubak isa. lam banda nyan paulus dan barnabas treb tinggai meusajan-sajan ngon ureueng-ureueng meuman. na meupadub droe ureueng nyang teuka nibak yudea jikak u antiokhia dan jipeurunoe ureueng-ureueng meuman di antiokhia nyan bahwa meunyoe awaknyan hana meusunat lagee nyang

teutuleh lam kitab hukom nabi musa, awaknyan hana hase teupeuseulamat. paulus dan barnabas geubantah habeh peundapat ureueng-ureueng nyan. akhe jih teucok keuputosan mangat paulus dan barnabas meunan cit ngon na meupadub droe ureueng laen di antiokhia jeuet geujak u yerusaleum keu geujak peugah keuhai nyan ngon rasui-rasui dan peumimpén-peumimpén disinan. jeumaah di antiokhia ji intat awaknyan sampoe uluwa banda, oh ltheueh nyan awaknyan laju geujak meulalu finisia dan samaria. disinan awaknyan laju geupeugah pakriban ureueng-ureueng nyang bukan yahudi ka jiseurah droe bak po teu allah. watee jideungoe haba nyan lumpah that galak ate ureueng-ureueng nyang na disinan. watee awaknyan ka trok u yerusaleum, awaknyan jisambot ngon get that le jeumaah, dan le rasui-rasui meunan cit le peumimpén-peumimpén. laju awaknyan geucalitra bak ureueng-ureueng nyan keuhai mandum nyang ka geupeubuet le allah meulalu awaknyan. teuma na meupadub droe nibak golongan farisi nyang ka meuman, jidong laju jipeugah, "ureueng-ureueng bansa laen nyang ka meuman nyan museuti meusunat dan teupeuwajeb jipeubuet hukom nabi musa." laju rasui-rasui dan bubena peumimpén meurok pakat guna keu geupeugah keuhai nyan. treb that-that awaknyan meutuka pikeran. akhe jih petrus geudong dan geupeugah, "syedara-syedara! gata keudroe tateupeue bahwa na meupadub watee nyang ka ltheueh allah ka geupileh ulon lamkawan gata keu lon jak peusampoe haba get nyan ubak ureueng-ureueng nyang kon yahudi, mangat awaknyan pih jideungoe dan jimeuman. dan allah geuteupeue ate manusia ka geutunyok bahwa gobnyan geuteurimong awaknyan; gobnyan geutunyok hai nyan ngon cara geubri roh allah keu awaknyan saban lagee nyang ka geubri keu geutanyoe. allah hana geubeda-beda geutanyoe ngon awaknyan. gobnyan geupeu suci ate awaknyan, sabab awaknyan meuman. ngon lagee nyan, peue sabab gatanyoe keuneuk talawan allah dan jinoe ngon gata bri saboh keuwajaban brat ubak murit-murit nyoe, padahai indatu geutanyoe dan tanyoe keudroe pih hana hase tapeubuet nyan? dilikot nibak nyan, geutanyoe ta meuman dan tanyoe geupeu seulamat sabab geunaseh tuhan isa; meunan cit ngon awaknyan." dan nibak watee nyan seungab kheueh mandum ureueng nyang meugumpoi disinan. oh ltheueh nyan awaknyan jideungoe barnabas dan paulus banmandum keuajaaban dan hai-hai nyan luwabiasa nyang ka geupeubuet le allah rot awaknyan lamkawan bansa laen nyang bukan ureueng yahudi. oh ka ltheueh seuleusoe awaknyan jipeugah haba, yakobus jipeugah, "syedara-syedara! cuba tadeungoe ulon. simon banmantong geupeugah pakriban allah yoh awai phon geutunyok peuratian geuh ateuh ureueng-ureueng nyang bukan yahudi, ngon meukeusut geupileh nibak awaknyan ureueng-ureueng laen nyang teuma jeuet keu umat gobnyan. nyan paih that lagee nyang ka ltheueh geupeugah le nabi-nabi. sabab na teutuleh lagee nyoe, 'oh ka ltheueh nyan teuka lom,' kheun tuhan, 'ulon teuma lon peudong lom rumoh nabi daud nyang ka reuloh, dan ulon peugot nyang reuloh-reuloh, laju ulon

peudong lom teuma; mangat mandum ureueng nyang mantong tinggai nyan jimita tuhan, beusajan ngon bansa laen nyang bukan yahudi nyang ka ulon hoi jeuet keu milek ulon.' meunan kheueh feureuman tuhan, nyang ka geubri tee hainyan yoh awai ilee." "ngon nyan, meunurot peundapat ulon," kheun yakobus, "geutanyoe han jeuet tapeupayah ureueng nyang bukan yahudi nyan nyang ka jiseurah droe ubak po teu allah. teuma geutanyoe museuti tatuleh surat keu awaknyan dan tanaseuhat awaknyan mangat awaknyan bek jimakheun peunajoh nyang najih nyang ka jipeuseumah keu beurala, atawa teupajoh sie beulatang nyang mate teuceukiek, atawa pajoh darah. meunan cit mangat awaknyan jipeujioh droe nibak buet meumukah. sabab hukom nabi musa yoh ilee kon ka teubueet tieb-tieb uroe sabat di rumoh-rumoh iebadat, dan teupeugah bak tieb-tieb banda." 22 rasui-rasui dan peumimpén-peumimpén, meusajan-sajan ngon mandum anggota jeumaah nyan jicok keuputusan keu jipileh meu padub droe nibak awaknyan keu teu utus u antiokhia meusajan-sajan ngon paulus dan barnabas. teuma awaknyan laju jipileh silas dan yudas nyang teuhoi cit ngon nan barsabas. mandua droe awaknyoe na kheueh ureueng-ureueng nyang meusyuehu nibak ureueng-ureueng meuiman di yerusalem. meusigoe ngon utosan nyan awaknyan geukirem teuma sipucok surat nyang su jih lagee nyoe, "keu syedara-syedara mandum nyang meusai nibak bansa laen nyang bukan bansa yahudi, nyang na tinggai di antiokhia, siria dan kilikia. saleum nibak kamoe, rasui-rasui dan peumimpén-peumimpén, na kheueh syedara-syedara gata. kamoe na meudeungoe na meupadub droe lamkawan kamoe nyang ka jijkab ubak gata jipeukaru dan jipeubingong gata ngon ajaran-ajaran nyang jiba le awaknyan. padahai kamoe hana meuyue jipeubuet nyang lagee nyan bagoe. nyang kheueh sabab jih kamoe ka mupakat dan mandum situju keu kamoe pileh na meupadub droe dan kamoe utus awaknyan ubak gata. awaknyan teuma jijkab meusajan-sajan ngon barnabas dan paulus nyang kamoe gaseh. mandua droe awaknyoe na kheueh ureueng-ureueng nyang ka jipeusabong nyawong awaknyan keu tuhan geutanyoe isa. 27 ngon lagee nyan, kamoe kirem yudas dan silas keu syedara-syedara. awaknyan keudroe nyang peugah ngon babah jih keuhai asoe surat nyang teutuleh nyoe. roh allah ka situju – dan kamoe pih situju – mangat gata bek jibri keuwajaban-keuwajaban nyang leubeh brat nibak keuwajaban-keuwajaban nyang peureulee nyoe mantong: bek gata makheun peunajoh nyang ka jibri keubeurala; bek gata pajoh darah, bek gata pajoh sie beulatang nyang mate teuciek, dan peujioh kheueh nibak buet-buet nyang meumukah. meunyoe gata tapeujioh droe nibak buet-buet nyang lagee nyan, gata ka gata peubuet nyang jroh. oh noe mantong, seulamati!" oh ka ltheueh jilakee idhin, awak nyan teukirem nyan laju jijkab u antiokhia. disinan awaknyan laju jihoi mandum anggota jeumaah meugumpoi oh ltheueh nyan baro kheueh jipeutrok surat nyan. watee anggota-anggota jeumaah jibaca surat nyan, awaknyan galak that-that ateuh asoe surat nyan nyang biet-biet teuhibor

ate awaknyan. yudas dan silas, nyang na kheueh nabi cit teuma, treb that jimeututoe ngon syedara-syedara nyang meuiman di antiokhia nyan keu jibri seumangat dan keubeurianian keu awaknyan. oh ka ltheueh yudas dan silas tinggai disinan na padub na treb, ureueng-ureueng meuiman nyang na di antiokhia laju jikirem woe lom dan jiyue bak awaknyan mangat jipeutrok saleum ubak ureueng-ureueng nyang utus awaknyan. teuma silas jicok keuputusan keu teutab tinggai di antiokhia. meunan cit paulus dan barnabas tinggai cit na padub treb di antiokhia. disinan awaknyan geuseumeubeuet dan geupeurunoe feureuman tuhan meusajan-sajan ngon ureueng rame nyang laen. hana padub na treb teuma oh ltheueh nyan paulus geupeugah bak barnabas, "jak tajak lom teuma tasaweue syedara-syedara nyang ka jipeucaya ubak isa lam banda-banda bak teupat tanyoe ka ltheueh tapeusampoe feureuman tuhan; mangat tanyoe takalon pakriban keuadaan awaknyan." barnabas keuneuk geuba yahya markus, teuma paulus meuras hana get teuba markus, nyang hana jitem mbuet meusajan-sajan ngon awaknyan dan jitinggai awaknyan di pamfalia. ngon sabab nyan paulus dan barnabas geumeudakwa brat akhe jih awaknyan pih meure: barnabas geucok markus laju geumeulayeue ngon jih nyan u siprus. paulus geucok silas laju geujak ngon jihnyan oh ka ltheueh syedara-syedara nyang di antiokhia geuseurah awaknyan ubak rakhmat tuhan. awaknyan pih laju jikeulileng siria dan kilikia; nibak teupat nyan awaknyan laju geupeuteubai iman dumna jeumaah. paulus geujak lom laju u derbe, oh ltheueh nyan u listra. disinan na sidroe murit isa nyang nan jih timotius. mak jih sidroe yahudi, nyang ka jipeucaya keu isa; teuma ayah jih ureueng yunani. lamkawan ureueng-ureueng meuiman nyang tinggai di listra dan ikonium, timotius jituri le gob sibagoe ureueng nyang get. paulus meuharab that mangat jitem jak ngon gobnyan; ngon sabab nyan paulus laju geupeukatan timotius. gobnyan geupeubuet nyang lagee nyan, sabab ureueng-ureueng yahudi didaerah nyan mandum jiteupeu bahwa ayah timotius ureueng yunani. bak tieb-tieb banda nyang awaknyan tamong, awaknyan laju geupeusampoe ubak ureueng-ureueng meu iman keuputusan-keuputusan nyang ka geupeuteuntee le rasui-rasui dan peumimpén-peumimpén di yerusalem. ureueng-ureueng nyang ka meu iman nyan laju geubri naseuhat le awaknyan mangat teutab taat keu atoran-atoran nyan. ngon lagee nyan jeumaah-jeumaah nyan meutamah-tamah kong iman jih, dan tieb-tieb uroe seumaken meutamah rame jeumeulah jih. roh allah hana geubri bak paulus dan silas geumeudakwah feureuman allah di propinsi asia. jadi awaknyan geujak u daerah frigian dan galatia. watee ka trok ubak bataih misia, awaknyan jiseuha tamong u propinsi bitinia, teuma roh isa geutam awaknyan bek geujak keudeh. teuma awaknyan geujak u misia dan laju u troas. oh watee ka malam, di troas, paulus geungieng saboh keumalon. lam keumalon nyan deuh geungieng sidroe ureueng makedonia jidong deuke gobnyan sira jilakee ngon meuharab that mangat gobnyan

beugeujak u makedonia keu jak tulong awaknyan. oh ka ltheuh paulus meuteume keumalon nyan, kamoe langsong meukeumah jeuet kamoe jak u makedonia. sabab, deungon yaken that kamoe cok keusimpulan bahwa allah geuyue bak kamoe keu kamoe peusampoe haba get nyan ubak ureueng-ureueng nyang na disinan. laju kamoe tinggai troas dan langsong kamoe meulayeue u samotrake, oh singoh nyan laju kamoe jak u neapolis. beudoh nibak teupnat nyan laju kamoe jak u filipi, saboh banda nibak distrik phon makedonia. filipi na kheueh jajahan keurajeuen roma. nibak teupnat nyan kamoe tinggai na meupadub uroe. bak uroe sabat laju kamoe jak bak bineh krueng nyang na diluwa pintoe geureubang banda, sabab kamoe meuharab bak teupnat nyan na teupnat seumayang keu ureueng yahudi. laju kamoe duek dan kamoe meututoe ngon ureueng-ureueng inong nyang na meugumpoi bak teupnat nyan. sidroe lankawan ureueng inong nyan na kheueh ureueng meukat ija ungu, nan jih lidia nyang asai jih nibak tiatira. inong nyan jigaseh keu po teu allah, teuma tuhan geupeugrak ate inong nyan mangat jiteurimong peue nyang paulus peurunoe bak jih. lidia dan bansaboh asoe rumoh nyan laju geupumano. oh ka ltheueh teupumano laju jiuandang kamoe. inong nyan jipeugah, "meunyo syedara-syedara biet-biet neupateh kamoe ka meu iman bak isa, jak kheueh tamudom dirumoh lon." laju inong nyan jipaksa mangat kamoetem mudom dirumoh jih. bak siuroe watee kamoe teungoh kamoe jak meudoa, laju kamoe meurumpok ngon sidroe ureueng inong; inong nyan namiet. inong nyan ka jikuasa le roh jeuhet nyang hase jiramai keujadian-keujadian nyang teuma teuka. ngon cara jiramai naseb gob, inong nyan hase jibri untong nyang rayeuk that keu teungku jih. inong nyan hana jipioh jiseutot paulus dan kamoe sira jiklik-klik, "ureueng-ureueng nyoe hamba allah maharayeuk! awaknyan teuka keuneuk jikak peugah bak gata mandum pakriban gata mangat hase seulam!" na padub uroe treb jih ureueng inong nyang jiklik-klik lagee nyan hana pioh-pioh. paulus gadah saba, sampoe gobnyan geupaleng laju geupeugah bak roh nyan, "ateuh nan isa ulon peurintah gata teubiet lam tuboh inong nyoe!" watee nyan cit teuma roh nyan jitinggai inong nyan. watee majikan-majikan inong nyan jiteupeue rot jimita peng ka hana le, awaknyan laju jidrob paulus dan silas, laju jitarek bandua awaknyan lam padang dan jipeuhadab laju ubak nyang meuwajeb. awaknyan laju jipeuhadab paulus dan silas ubak peujabat-peujabat peumeurintah roma. oh ltheueh nyan jipeugah, "ureueng-ureueng nyoe ureueng yahudi. awaknyan jipeuna karu lam banda tanyoe. awaknyan jiyue peubuet adat keubiasaan nyang hana saban lagee hukom-hukom geutanyoe, ureueng-ureueng roma. tanyoe hana hase tateurimong atawa taseutot adat keubiasaan nyan!" 22 di ureueng rame pih rhoh cit jibeutnam paulus dan silas; dan peujabat-peujabat peumeurintah laju jipriek-priek peukayan nibak tuboh mandua droe rasui nyan dan laju jiyue ureueng jeuet jisunuet awaknyan mandua. oh ka ltheueh awaknyan jisunuet ngon brat that, awaknyan laju jipeutamong lam

glab. keumandan peunjara laju jiyue jaga awaknyan mandua ngon rapat that. sabab peurintah nyan, keumandan rumoh glab nyan laju jiteun awaknyan lam kama glab nyang paleng lhok, dan jipasong gaki awaknyan bak kayee bulat. kira-kira teungoh malam paulus ngon silas teungoh meudoa dan geumeuseulaweuet ngon ca-e-ca-e pujoe keu po teu allah. ureueng-ureueng nyang teuten laen pih teungoh jideungoe awaknyoe meuseulaweuet. ngon hana teusangka-sangka jiteuka geumpa bumoe nyang paleng hebat, sampoe-sampoe keunalueng rumoh glab nyan pih meuguncang-guncang. banmandum babah pintoe peunjara teuhah dan rante-rante nyang teukat bak mandum ureueng nyang teuteuen pih leukang. 27 keumandan peunjara nyan teukeujot laju jibeudoh. watee jikalon mandum babah pintoe peunjara ka teuhah, laju jisuet peudeueng jih keuneuk jipoh droe sabab jipike mandum ureueng nyang na lam glab nyan ka habeh jiplueng. teuma paulus laju jidumpek ngon su meutaga, "bek gata poh droe! kamoe mandum mantong na disinoe!" keumandan peunjara nyan jilakee panyot laju jiplueng u dalam, dan ngon yo meukot-kot laju teudugom dikeue paulus dan silas. oh ltheueh nyan jiba awaknyan uluwa sira jipeugah, "teungku-teungku, peue nyang haroh ulon peubuet mangat ulon meuteume seulam?" paulus dan silas geujaweueh, "peucaya kheueh ubak tuhan isa! gata teuma seulam – gata dan mandum ureueng nyang na lam rumoh gata!" laju paulus dan silas geupeu trang feureuman tuhan ubak ulee rumoh glab nyan dan ubak mandum ureueng nyang na lam rumoh jihnyan. watee teungoh malam nyan cit teuma, ulee rumoh glab nyan jiba awaknyan laju jipeugleh mandum luka-luka awaknyan. teuma ureueng nyan dan mandum ureueng laen nyang na lam rumoh jih nyan laju geupumano. oh ltheueh nyan ureueng nyan laju jiba paulus dan silas u rumoh jih laju jibri makheun keu awaknyan. ureueng nyan dan mandum keuluwarga galak lumpah na sabab awaknyan jinoo ka meuiman ubak po teu allah. oh singoh beungoh, peujabat-peujabat peumeurintah roma laju jiuut peulisi ubak rumoh glab keu jipeusampoe peurintah mangat paulus dan silas jipeuleueh. keumandan peunjara nyan laju jipeugah hainyan ubak paulus. ureueng nyan jikheun, "teungku-teungku, peujabat-peujabat peumeurintah ka geubri peurintah keu teupeuleueh mandua teungku, jinyoe teungku-teungku jeuet neuwoe. seulam neujak!" teuma paulus geupeugah ubak peutugaih-peutugaih peulisi nyan, "kamoe nyoe wareuga nanggroe roma. hana teupesidang, kamoe ka jiseunuet dikeue rakyat ba dan jipeutamong lam glab. dan jinoinyoe awaknyan jiyue kamoe jak ngon seungab-seungab? kamoe han kamoe tem! yue peujabat-peujabat peumeurintah nyan jikak keudroe keunoe jipeuleueh kamoe." peutugaih-peutugaih peulisinyan laju jikak lapor hainyan ubak peujabat-peujabat peumeurintah roma. watee peujabat-peujabat roma nyan jideungoe paulus dan silas wareuga nanggroe roma, awaknyan laju jiteuka teumakot. laju awaknyan jikak lakee meuah ubak paulus dan silas, oh ltheueh nyan ji-intat awaknyan mandua peuteubiet nibak lam glab, dan

jilakee mangat awaknyan jitinggai banda nyan. paulus dan silas geutinggai peunjara nyan dan geujak laju u rumoh lidia. oh ka ltheueh meurumpok ngon ureueng-ureueng meu iman disinan, dan geubri seumangat bak awaknyan, paulus dan silas laju geujak. paulus dan silas geubot langkah geujak lom meuneujak geuh rot amfipolis dan apolonia laju trok u tesalonika. disinan na rumoh iebadat ureueng yahudi. teuma le paulus laju geujak u rumoh iebadat nyan – lagee nyang ka lazem geupeubuet meunyo awaknyan na bak saboh rumoh iebadat ureueng yahudi – laju meutuka pikeran ngon ureueng-ureueng nyang na nibak teupat nyan keuhai ayat-ayat alkitab. hainyan geupeubuet lthee uroe nibak uroe sabat meuturot-turot. ngon dsai ayat-ayat alkitab le paulus laju geupeu trang dan geubri bukeuti bahwa raja peuseulamat nyang ka geupeu janji le po teu allah peureulee meudeurita dan udeb lom teuma nibak mate. "isa nyang ulon peusampoe ubak gata nyan, gobnyan kheueh raja peuseulamat nyang ka geupeujanji le po," kheun paulus. na meupadub droe nibak teupat nyan laju jimeuiman dan jiseutot paulus ngon silas; meunan cit ngon jeumeulah nyang le ureueng-ureueng yunani nyang takot keu allah, dan jai that-that ureueng-ureueng inong nyang meusyeuhu. teuma le ureueng-ureueng yahudi bingiek ate. awaknyan laju jihoi ureueng-ureueng geulandangan nyang na bak bineh-bineh rot laju jipeuget geurombolan peukaru. laju awaknyan jipeunakaru bansaboh banda nyan dan jiseurang rumoh sidroe ureueng meuiman nyang nan jih yason keu jijak mita paulus ngon silas, sabab awaknyan jikeuneuk ba paulus ngon silas uluwa meuhadab ureueng rakyat ba. teuma watee awaknyan hana meurumpok ngon paulus dan silas, awaknyan laju jibahue yason dan na teuma meupadubdroe ureueng meuiman nyang laen ukeue peujabat-peujabat nyang mat kuasa lam banda nyan. awaknyan jikuk-kuk, "ureueng-ureueng nyoe jipeuna karu dipat mantong! jinoenyo banda tanyoe pih ka jipeukaru le awaknyan, dan yason ka jiteurimong awaknyan lam rumoh jih. awaknyan mandum ji iengkeue peue-peue nyang ka geupeu teutab le kaisar roma, sabab awaknyan jipeugah na lom raja laen nyang nan jih isa." ngon tutoe haba nyan ka jeuet ureueng rame dan nyang mat kuasa lam banda nyan habeh subra. laju le peunguasa nyan jiyue yason dan ureueng-ureueng meuiman laen jibayee peng jaminan. oh ltheuehnyan baro kheueh awaknyan jipeuleueh. malam nyan ureueng-ureueng meuiman nyang na lam banda nyan jiyue paulus dan silas mangat jijak u berea. oh trok keunan, paulus dan silas laju geujak u rumoh iebadat ureueng yahudi. ureueng-ureueng berea leubeu teubuka ate jih nibak ureueng-ureueng di tesalonika. ngon galak ate awaknyan jideungoe haba keuhai isa, dan tieb-tieb uroe awaknyan jibeuet alkitab keu jiteupeu peu kheueh ajaran nyang geupurunoe le paulus nyan beutoi. jai that-that lamkawan awaknyan nyang meuiman keu isa, dan hana bacut nibak ureueng-ureueng yunani nyang meugah-meugah, nyang meuiman; bah kheueh inong meunan cit nyang agam. watee ureueng-ureueng yahudi nyang na di

tesalonika jideungoe paulus na teuma jipeusampoe haba allah di berea laju jipiteunah dan jipeujeut ureueng-ureueng nyang na di berea nyan susah ate. bagaih that-that ureueng berea nyan jiiintat paulus bak bineh pante, seudang silas dan timotius teutab na tinggai lam banda nyan. oh ka ltheueh ji-intat paulus trok u atena, awaknyan nyang intat nyan laju jigisa u berea sira jiba haba nibak paulus mangat silas dan timotius bubagaih that jiseutot gobnyan. teungoh jipreh-preh silas dan timotius le paulus di atena nyan, ate gobnyan peudeh that watee jikalon banda nyan peunoh ngon beurala. ngon sabab nyan, lam rumoh iebadat, paulus laju meutuka pikeran ngon ureueng-ureueng yahudi dan ureueng-ureueng laen nyang jiseumah allah nibak teupat nyan. meunan cit lam pasai-pasai tieb-tieb uroe gobnyan meutuka pikeran ngon ureueng nyang na inan. guree-guree aleran epikuros dan aleran stoa meudebat cit ngon gobnyan. na meupadub droe lamkawan awaknyan jipeugah lagee nyoe, "ureueng nyoe peue jiteupeu? ieleume jih cit bacut, teuma nyang jiteupeu teuga jipeugah haba!" le padub droe ureueng laen jipeugah teuma lagee nyoe, "rupari jihnyoe jipeugah keuhai dewa-dewa bansa laen." awaknyan jipeugah lagee nyan, sabab paulus meututoe keuhai isa dan keuhai udeb lom teuma oh ka ltheueh mate. oh ltheueh nyan awaknyan laju jiba paulus bak teupat meusapat di buket areopagus. nibak teupat nyan awaknyan jipeugah bak gobnyan, "kamoe keuneuk meuteupeu peulajaran baro nyang droeneueh peubeuet nyan. sabab nyang gata peugah nyan hai-hai nyang teudeungoe jih laen nibak nyang laen. ngon sababnyan kamoe keuneuk muteupeu makna jih." (sabab ureueng atena dan ureueng-ureueng aseng nyang na disinan galak lumpah na jipeuhabeh watee seunggang jih jideungoe hai-hai nyang paleng baro.) 22 watee paulus geudong dikeue ureueng-ureueng nyang meugumpoi di areopagus nyan, "hei ureueng-ureueng atenal ulon kalon lam sigala hai gata keubiet that lagee ureueng meuagama. sabab watee ulon jak-jak bansikeulileng banda gata dan ulon ngieng teupat-teupat iebadat gata, na teuma lon kalon saboh teupat keureubeuen; bak teupat nyan na teutuleh lagee nyoe, 'ubak allah nyang hana teuturi.' syedara, allah nyang gata seumah teuma hana taturi, gobnyan kheueh nyang ulon peugah ubak gata. allah nyang peujeuet donya nyoe ngon mandum asoe jih, gobnyan kheueh tuhan langet ngon bumoe. gobnyan hana tinggai lam rumoh-rumoh dewa nyang jipeuget le manusia. gobnyan pih hana peureulee jitulong le manusia, sabab gobnyan kheueh nyang bri udeb na nafah dan peue-peue mantong keu manusia. nibak sidroe manusia gobnyan geupeujeuet sigala bansa dan geuyue awaknyan jitinggai bansigom bumoe. gobnyan teuma nyang peuteuntee yoh awaikon, pajan dan dipat awaknyan jeuet udeb. 27 allah geupeubuet nyan mangat awaknyan jimita gobnyan. mudah mudahan awaknyan hase meurumpok ngon gobnyan bak watee awaknyan jimita gobnyan. teuma nyang sibeuna jih allah hana jioh nibak geutanyoe maseng-maseng. lagee nyang jipeugah le gob, 'tanyoe udeb dan meugrak dan na lam donya nyoe sabab kuasa gobnyan.' saban cit lagee nyang jipeugah

le padub droe tukang meuca-e gata. awaknyan jipeugah lagee nyoe, 'geutanyoe banmandum na kheueh aneuek-aneuek gobnyan.' ngon lageenyan, sabab geutanyoe na kheueh aneuek-aneuek allah, geutanyoe hana jeuet ta anggab allah saban lagee patong nibak meuh atawa pirak atawa batee nyang teupeuget meunurot keu ahlian manusia. watee geutanyoe bangai nyan ka geupeutuwoe le po teu allah, teuma gobnyan bak saatnyoe geuyue bak manusia nyang bansigom donya mangat jimeutobat nibak mandum desya-desya jih. sabab gobnyan ka geupeuteuntée saboh watee geuadili bansigom donya nyoe ngon ade. tugaih nyan teuma jipeubuet le ureueng-ureueng nyang ka geupileh le allah keu nyan. dan mangat mandum ureueng teuma yaken keuhai nyan, allah ka geupeu udeb lom ureueng nyan nibak mate!" watee ureueng-ureueng nyan jideungoe udeb lom oh lheureh mate, na nibak awaknyan nyang jipeukem paulus. na teuma nyang peugah, "kamoe keuneuk deungoe lom gata peugah keuhai nyoe." laju paulus geutinggai tempat ureueng meugumpoi nyan. teuma na cit lamkawan awaknyan nyang jidong blaih paulus dan meiman ubak isa, awaknyan na kheueh: dionisius anggota majeuleh areopagus, dan sidroe ureueng inong nyang nan jih damaris, dan na padub droe teuk nyang laen. oh lheurehnyan paulus geutinggai atena dan laju geujak u korintus. nibak tempat nyan laju meurumpok ngon sidroe ureueng yahudi nyang nan jih akwila; asai jih nibak nanggroe pontus. akwila banmantong teuka nibak italia ngon peurumoh jih priskila. awaknyan jijak u korintus sabab kaisar klaudius ka jiyue mandum ureueng yahudi jiteubiet lam nanggroe roma. paulus laju jijak saweue awaknyan mandua, laju jitinggai disinan ngon awaknyan dan jimubuet meusajan-sajan ngon awaknyan, sabab ngon mita hareukat awaknyan saban lagee paulus, na kheueh jipeuget khimah. teuma bak tieb-tieb uroe sabat, paulus geujak marit-marit lam rumoh iebadat keu jipeujeuet ureueng-ureueng yahudi meunan cit ureueng-ureueng yunani, meiman ubak isa. oh ka lheureh silas dan timotius trok nibak makedonia, paulus laju geupeu guna mandum watee geuh keu geujak peusampoe haba get nibak po teu allah ubak ureueng-ureueng yahudi bahwa isa nyan na kheueh raja peuseulamat nyang ka geupeu janji le allah. teuma sabab le ureueng-ureueng hana jipioh jiteuntang dan jihina gobnyan, le paulus laju geukipah abee bak peukayan gobnyan sibagoe tanda teupeungat awaknyan keuhai buet awaknyan nyang salah. geupeugah le paulus, "meunyoé gata meuteume bala, nyan salah gata keudroe! ulon hana meutanggong jaweueb! phon saatnyoe ulon teuma lon jak ubak ureueng-ureueng nyang bukon yahudi." laju paulus geutinggai awaknyan geujak laju u rumoh nyang na di meurandeh rumoh iebadat nyan. rumoh nyan bukon rumoh ureueng yahudi, teuma ureueng nyan jiseumah allah. nan ureueng nyan titius yustus. teuma krispus, pang ulee rumoh iebadat nyan ngon mandum keuluwarga jih peucaya keu tuhan isa. dan jai that cit teuma ureueng-ureueng korintus nyang laen jideungoe haba nyang geupeusampoe le paulus, dan awaknyan meiman ubak isa laju

teupumano. bak simalam lam saboh keumalon, tuhan meufeuereuman ubak paulus, "bek teumakot, meututoe kheueh troh trang dan bek seungab. sabab ulon na meusajan gata. hana meusidroe pih nyang hase jipeubuet nyang jeuhet ateuheh gata, sabab le that ureueng lam bandanyoe na kheueh ureueng-ureueng ulon." ngon sabab nyan paulus tinggai di korintus sithon siteungoh treb jih dan geupeubeuet feureuman allah ubak awaknyan. watee galio jeuet keu gubunur akhaya, ureueng-ureueng yahudi sipakat jilawan paulus dan jiba gobnyan ubak kanto mahkamah. awaknyan jigadu paulus ngon tuntotan lagee nyoe, "ureueng nyoe jipeusuna rakyat ba mangat jiseumah allah ngon cara hana saban ngon hukum nabi musa!" meunan paulus jikeuneuk jaweueb, galio ka jipeugah ubak ureueng-ureueng yahudi, "hai ureueng-ureueng yahudi! meunyoé nyang jigadunyoé buet meulanggeh atawa buet jeuhet, ka sipatote jih ulon saba lom deungoe nyang gata gadu nyoe. teuma nyoe na kheueh meudakwa keuhai tutoe haba dan nan-nan ngon hukum gata keudroe! ngon lagee nyan gata nyang haroh peuseuleusoe. ulon han kutem ulon peusidang hai-hai nyang lagee nyoe!" laju galio jiuse awaknyan uluwa. teuma awaknyan laju jidrob sostenes, ulee rumoh iebadat nyan, dan laju jipoh ureueng nyan dikeue meuja mahkamah. teuma galio mubacut hana jipako keuhai nyan. oh lheureh nyan paulus mantong treb tinggai di korintus. oh lheureh nyan laju geu kheun seulamat tinggai ubak ureueng-ureueng meuman nyang na disinan, laju geumeulayueu ngon priskila dan akwila u siria. di kengkrea, paulus laju geucuko ok geuh nyang ka geupeubiyeu geupeupanyang sabab kaoy geuh ubak tuhan. watee ka trok u efesus, paulus laju geutinggai priskila dan akwila, laju jitamong lam rumoh iebadat dan meutuka pikeran ngon ureueng-ureueng yahudi nyang na disinan. awaknyan jilakee mangat gobnyan tinggai leubeh treb ngon awaknyan, teuma gobnyan hana geutem. bah pih meunan, bak watee geukeuneuk jak lom, paulus geupeugah, "meunyoé allah geubri idhin, ulon teuma lon gisa lom keunoe." oh lheureh geupeugah meunan, gobnyan laju geutinggai efesus. 22 oh ka lheureh geutreu di kaisarea, gobnyan laju geujak u yerusalem keu geujakbri saleuem keu jeumaah nyang na disinan, oh lheureh nyan laju geujak u antiokhia. oh ka lheureh tinggai disinan na padub treb, gobnyan geujak lom goenyoe geujak saweue daerah galatia dan frigia keu geujak peukong iman ureueng-ureueng peucaya. bak watee nyan, teuka kheueh u efesus sidroe ureueng yahudi nyang lahe di aleksandria, nan ureueng nyan apolos. ureueng nyan carong that jipeugah haba dan muphom that keu asoe alkitab, dan ka teupeubeuet mangat jituri keu ajaran isa. dan deungon seumangat nyang mubara ureueng nyan geupurunoe ngon teuliti keuhai isa, teuma le ureueng nyan nyang jiteupeu na kheueh keuhai pumano nyang geupurunoe le nabi yahya mantong. ngon hana teumakot sapeue apolos jipeuphon peugah haba lam rumoh iebadat dan bak watee priskila dan akwila jideungoe peu nyang geupeubeuet nyan, awaknyan laju jiba apolos nyan u rumoh jih. bak tempat nyan awaknyan laju

jipeutrang bak gobnyan keuhai nyang leubeh paih lom reuncana allah keu geupeu seulamata manusia meulau isa. 27 oh ltheueh nyan apolos na niet keuneuk jak u akhaya. teuma ureueng-ureueng nyang meuiman ubak isa di efesus jituleh surat keu syedara-syedara nyang ka meuiman di akhaya mangat awaknyan jitem teurimong apolos. dan watee apolos trok u akhaya, peue nyang geutulong nyan keubiet that-that meuguna keu ureueng-ureueng nyang sabab nekmata allah ka jimeuiman ubak isa. sabab, ngon that-that meuwibawa, apolos jipeutaloe ureueng-ureueng yahudi watee tieb-tieb meudobat dikeue ureueng rame. dan gobnyan laju geubri bukeuti ngon ayat-ayat nyang na lam alkitab bahwa isa raja peuseulamat nyang ka geupeu janji. teungoh apolos mantong na di korintus, paulus teungoh geujak-jak bansaboh gampong nyang na didaerah nyan oh ltheueh nyan trok laju u efesus. disinan laju meurumpok ngon na meupadubdroe ureueng nyang ka meuiman ubak isa. laju geutanyong bak awaknyan, "peu ktheueh syedara-syedara ka tateurimong roh allah watee gata meuiman ubak isa?" awaknyan jijaweueb, "gohlom. lom teuma, kamoe hantom meudeungoe bahwa na roh allah." "meunyo meunan, ngon cara pumano peu ktheueh gata teupumano?" tanyong paulus. "ngon cara pumano nabi yahya," jaweueb awaknyan. laju geupeugah le paulus, "nabi yahya geupumano gob sibagoe tanda bahwa ureueng nyan ka jitobat nibak mandum desya-desya jih. teuma watee nyan cit teuma nabi yahya geupeugah bak ureueng-ureueng israel bahwa awaknyan haroh meuiman ubak ureueng nyang teuma teuka dudoe nibak gobnyan, ureueng nyan na ktheueh isa." watee awaknyan jideungoe nyan, awaknyan laju teupumano ateh nan isa. dan watee paulus geukeubah jaroe geuh ateh awaknyan, roh allah laju jikuasa ateh awaknyan, laju awaknyan jimarit lam mubagoe basa dan jipeusampoe haba nibak po teu allah. jeumeulah awaknyan mandum na kira-kira dua blaih droe. lhee buleen treub jih paulus sabe geumeututoe ngon trok trang ubak ureueng-ureueng nyang na lam rumoh-rumoh iebadat dan meudobat ngon awaknyan keu geupeuyaken awaknyan keuhai pakriban allah geumat peurintah sibagoe raja. teuma na meupadubdroe lamkawan awaknyan keubiet that ktheueh ulee dan hana jitem. dikeue mandum ureueng nyang na meugumpoi disinan awaknyan jirapa ngon jihina ajaran keuhai reuncana allah keu geupeu seulamata manusia rot isa. ngon sababnyan paulus laju jitinggai awaknyan, laju jijak ngon murit-murit isa lam ruweueng kuliah tiranus. nibak teupat nyan tieb-tieb uroe gobnyan meuseuee jaweueb ngon ureueng dum na. gobnyan geupeubuet hainyan hana putoh-putoh na daga thon treb jih sampoe mandum ureueng nyang na tinggai di propinsi asia, bah ktheueh ureueng yahudi meunan cit ngon ureueng bansa laen, mandum jideungoe peue nyang geufeuruman le tuhan. allah geupeuna buet-buet nyang ajaeb luwabiasa rot paulus. meun-yoe ija lab jaroe atawa talo keuing paulus nyang ka ltheueh jingui jiba bak ureueng saket, peunyaket ureueng nyan gadoh dan roh jen pih jiteubiet nibak awaknyan. na meupadubdroe dukon yahudi jijak

ho-homantong, jiuse roh-roh jeuhet nyang jitamong bak ureueng dum na. dukon nyan pih jicuba-cuba cit jipeuguna nan isa keu jiuse roh-roh jen nyan. awaknyan jipeugah bak roh-roh jen nyan, "ateueh nan isa nyang jipeusampoe le paulus nyan, ulon use kah hai jen!" na tujoh droe aneuek agam sidroe imeum ulee, nyang nan jih skewa, nyang peubuet hai lagee nyan. teuma roh jen nyan jipeugah bak awaknyan, "ulon kuturi isa dan paulus pih ulon turi, teuma kahnyoe soe?" laju le ureueng nyang ka jitamong jen nyan jilumpat dan jiteugom awaknyan ngon juah lagoena sampoe awaknyan jiplueng nibak rumoh nyan ngon luka-luka dan badan jih teulon, sabab peukayan awaknyan jipriek-priek nibak badan ureueng nyan. banmandum bansa yahudi dan bansa laen nyang na tinggai di efesus jideungoe keuhai keujadian nyan, dan awaknyan mandum jiteuka takot. teuma ngon lagee nyan nan tuhan isa maken jipujoe-pujoe. jai that ureueng nyang ka meuiman ubak isa, jijak meungaku dikeue ureueng rame keuhai desya-desya jih yoh watee ilee. dan awaknyan nyang ka kayem jingui ieleume guna-guna, laju jipeusapat mandum kitab-kitab jih dan laju jitot dikeue ureueng rame. yuem mandum kitab-kitab nyan meunyo teujeumeulah na kira-kira limong ribee peng pirak. lagee nyan ktheueh, ngon cara nyang luwabiasa nyan feureuman tuhan maken meukeumang dan seumaken teuga peungaroh jih. oh ka ltheueh keujadian-keujadian nyan, paulus geucok keuputosan keu geujak u makedonia dan akhaya laju beusot u yerasalem. "oh ka ltheueh trok keudeh," kheun paulus, "ulon haroh lon jak teuma u roma." 22 teuma le paulus laju geukirem dua droe utosan nyang geucok nibak peumbantu-peumbantu geuh, awaknyan na ktheueh timotius dan erastus keu jijak u makedonia, dan paulus tinggai na padub treb teuma di propinsi-propinsi asia. kira-kira bak watee nyan ktheueh jiteuka karu ka-ak, ka-ok, nyang paleng rayeuk di efesus sabab peungajaran keuhai isa. sabab lam banda nyan na sidroe teumpeuen peuget pirak nyang nan jih demetrius, nyang buet jih jipeuget rumoh-rumoh dewa keu dewi artemis. useuha ureueng nyan keubiet rayeuk that jipeutamong hase keu utoh-utoh nyang mubuet bak jih. ngon sabab nyan ureueng nyan laju jipeusapat bubena utoh-utoh jihnyan meusajan-sajan ngon utoh-utoh pirak nyang laen, laju jipeugah, "syedara-syedara! gata mandum tateupeue bahwa geutanyoe na meuteume hase nibak buet tanyoe nyoe. jinoenyo syedara ka takalon tadeungoe keudroe peue nyang jipeubuet le paulus nyan. jihnyan jipeugah bahwa dewa-dewa nyang teupeuget le manusia mubacut pih nyan kon dewa. dan paulus nyan ka meuhase jipeujeuet ureueng meuiman ubak ajaran jih, bukan mantong disinoe, di efesus, teuma rab mandum bansaboh asia. 27 bahya jih na ktheueh bahwa peurusahaan tanyoenyo meuteume nan brok. dan bukan mantong keuhai nyan, rumoh dewi artemis pih teuma jianggab hina dan keubeusaran dewi artemis nyan teuma jigiloe-giloe; padahai jihnyan dewi nyang teupujoe le mandum ureueng di asia dan bansigom donya!" meunan awaknyan jideungoe haba nyan ate awaknyan ka jeuet keuseu-ueu, laju awaknyan jikuk-kuk,

"udeb artemis, dewi ureueng efesus!" dan karu nyan laju meuluwah sampoe bansaboh banda. oh ltheueh nyan geurombolan peukarunyan laju jidrob gayus dan aristarkus, na ktheueh ureueng-ureueng makedonia nyang geucok keurakan le paulus lam meuneujak geuh, laju jibahue awaknyan ubak stadion banda nyan. paulus keuneuk geutamong geuseutot awaknyan, teuma ureueng-ureueng nyang ka meuiman ubak isa nyang na disinan jitam gobnyan. na meupadubdroe ureueng rayeuk lam propinsi asia nyan pih, nyang meurakan ngon paulus, jiyue ureueng laen keu jijak peugah ubak paulus mangat gobnyan bek geupeudeuh droe bak stadion nyan. wateuyan ureueng-ureueng nyang meugumpoi lam stadion nyan ka jeuet keukaru ka-ak ka-ok, na nyang jikuk-kuk lageenyoe, na nyang jikuk-kuk lagee nyan, sabab jai that-that nibak awaknyan hana jiteupeue peue sabab awaknyan meusapat bak teupat nyan. na siteungoh nibak ureueng rame nyan jipike aleksander nyang peuna rame nyan sampoe jeuet keukaru lagee nyan bagoe, sabab jihnyan nyang jitulak ukeue le ureueng-ureueng yahudi. teuma aleksander jibri isyarat ngon jaroe jih keu jilakee watee jibila droe dikeue ureueng rame nyan. teuma meunan jikaloh bahwa jihnyan ureueng yahudi, ngon su meusigoe awaknyan jidumpek ngon su meutaga, "udeb artemis, dewi ureueng efesus!" akhe jih panetra banda meuhase jipeuseungab ureueng-ureueng nyang teungoh beunghen nyan, ureueng nyan jipeugah lagee nyoe, "hai peunduduek efesus! soemantong ureueng jiteupeu bahwa efesus ktheueh banda nyang peulara rumoh dewi artemis dan batee suci nyang rhot di langet. hana meusidroeh pih nyang hase jibantah hai nyan. ngon sabab nyan teunang ktheueh dan bek tapeubuet hai-hai nyang teugopoh-gopoh. ureueng-ureueng nyoe, gataba keunoe bukan sabab awaknyan ka jireupah rumoh dewa atawa sabab awaknyan ka jihina dewi geutanyoe. meunyo demetrius ngon mandum utoh-utuh jih na niet keuneuk jak gadu teuhabad sidroe-droe ureueng, bah ktheueh awaknyan jiba peukara jih ubak kanto mahkamah. kanto mahkamah teu buka keu nyan dan peujabat-peujabat peumeurintah pih sabe na. teuma meunyo na lom sapue-sapue nyang laen nyang gata lakee, nyan haroh teupeuseuleusoe lam rapat umum nyang sah. sabab peue nyan teujadi nibak uroenyoe jeuet keubala atueh geutanyoe. geutanyoe jeuet jitudoh tapeuna beurontak, sabab geutanyoe hana meusaboh alasan pih nyang jeuet tapeubeuna karu nyang ka-ak, ka-ok nyoe." oh ka ltheueh jipeugah mandum nyan, panetra banda laju jiyue bak ureueng ramenyan mangat jiwoe. oh ka ltheueh keuadaan di efesus teuntram keula-i, paulus laju geupeusapat jeumaah dan geubri seumangat keu awaknyan. oh ltheueh nyan geupeugah seulamatt tinggi dan laju geujak u makedonia. gobnyan geujak saweue daerah-daerah makedonia dan geubri naseuhat nyang jai keu ureueng-ureueng meuiman ubak isa nibak teupat nyan keu geubri durongan bak awaknyan. oh ltheueh nyan gobnyan laju geujak u yunani. na lthee buleuen treb jih gobnyan tinggi inan. watee gobnyan ka siab-siab keuneuk meulayeue u siria, na haba bahwa ureueng-ureueng yahudi ka siab-siab jikeuneuk

poh mate gobnyan. ngon sabab nyan gobnyan geucok keuputusan keu geugisa rot makedonia. sopater aneuk pirus asai jih nibak berea jijak meusajan-sajan ngon gobnyan; meunan cit deungon aristarkus dan sekundus ureueng tesalonika, dan gayus ureueng derbe. meunan cit timotius, tikhikus dan trofimus, ureueng-ureueng nibak propinsi asia. awaknyan jijak leubeh awai nibak kamoe dan jipreh kamoe di troas. oh ka ltheueh peurayaan ruti hana meuragoe, kamoe meulayeue kamoe tinggi filipi. limong uroe oh ltheueh nyan kamoe meusapat lom ngon awaknyan di troas. inan kamoe tinggi siseun aleuhat. malam aleuhat kamoe meusapat keu kamoe makheun meusajan seucara meusyedara. paulus geumeututoe ngon ureueng-ureueng nyang na inan, sabab singoh nyan gobnyan ka na niet keuneuk beurangkat lom. trok teungoh malam paulus hana geupioh geupeugah haba. lam kama bak tingkat atueh, teupat kamoe meusapat nyan jai that-that panyot. na sidroe peumuda nyang nan jih eutikhus jiduek bak tingkab. sabab paulus hana geupioh-pioh geupeugah haba, peumuda nyan laju jiteuka teunget ngon brat that mata jih sampoe teuh bak tingkab nyan, dan laju rhot u miyueb phon nibak tingkat lthee. watee awaknyan jibeut peumuda nyan, rupari jihnyan ka mate. teuma paulus geutreun u miyueb dan geupeureubah droe atueh badan peumuda nyan sira geuwa. geupeugah le paulus, "bek khawate, jihnyoe mantong udeb!" oh ltheueh nyan paulus geuek lom u atueh, laju geubagi-bagi ruti dan geumakheun meusajan-sajan. oh ka ltheueh geumeututoe ngon ureueng-ureueng nyang na inan sampoe beungoh, paulus laju geubeurangkat. ureueng-ureueng nyang laen laju jipeuwoe peumuda nyang mantong udeb nyan u rumoh jih. awaknyan meuras mangat that dan lumpah teuhabor. kamoe jak bak kapai dan laju kamoe meulayeue leubeh awai u asos keu kamoe jak sambot paulus bak kapai. gobnyan ka geatote lagee nyan sabab teuma geujak keunan rot darat. oh ka ltheueh meurumpok di asos, paulus laju geuek atueh kapai laju kamoe meulayeue u metilene. nibak teupat nyan kamoe meulayeue lom, dan singoh nyan kamoe ka trok bak teupat nyang meuhadab ngon khios. lusa nyan kamoe trok u samos dan siuroe oh ltheueh nyan di miletus. paulus ka geucok keuputusan bahwa gobnyan hana geupioh di efesus, mangat bek teuboh watee didaerah asia. meunyo jeuet gobnyan meuharab that bubagaih trok u yerusalem bak uroe raya pentakosta. nibak miletus paulus geukirem haba u efesus keu geulakee bubena peumimpen jeumaah nyang na inan jijak meurumpok ngon gobnyan. watee awaknyan trok keunan, paulus geupeugah bak awaknyan, "syedara-syedara mandum tapeupeu pakriban ulon udeb nyang ka nyoe lamkawan gata watee uroe phon that ulon trok di asia. ngon ate nyang miyueb dan ngon ie mata nyang ro, ulon mubuet keu tuhan di teungoh-teungoh deurita nyang ulon rasa sabab reuncana jeuhet ureueng-ureueng yahudi. syedara tapeupeu bahwa ulon hana seugan-seugan ulon bri thee bak gata peue nyang meuguna keu gata. ulon peubuet gata bak teupat-teupat meusapat ureueng rame dan nibak rumoh-rumoh.

bah kheueh ubak ureueng-ureueng yahudi meunan cit keu bansa-bansa laen sabe ulon peuingat mangat awaknyan jimeutobat nibak mandum desya-desya jih dan jijak ubak po teu allah, ngon peucaya ubak tuhan isa. 22 jinoenyoe keu teutaat bak perintah roh allah, ulon jak u yerusalem. dan ulon hana lon teupeu peue nyang teujadi ateuhe ulon nibak teupat nyan. nyang ulon teupeu bahwa bak tieb-tieb banda, roh allah ka deungon teugaih geubri tee ubak ulon, bahwa ulon teuma lon tamong lam glab dan teuma meudeurita. teuma ulon hana lon pakoe ngon udeb ulon nyoe, asai ulon hase lon peuseuleusoe tugaih nyang geupeucaya le tuhan isa ubak ulon dan asai ulon seutia sampoe ubak akhe hayat keu ulon peusampoe haba get nyan keuhai rakhmat allah. ulon ka lon jak saweue syedara-syedara banmandum dan ka ulon peusampoe cit teuma keuhai pakriban allah geumat peurintah sibagoe raja. jinoenyoe ulon rasa ulon hana meurumpok le ngon mandum syedara. ngon sabab nyan ngon troh trang ulon peugah ubak gata nibak uroe nyoe bahwa meunyoe na lamkawan gata nyang binasa singoh, nyan kon salah ulon. 27 hantom na ulon plueing nibak tugaih ulon keu ulon peugah bak gata banmandum reuncana po teu allah. bah kheueh gata jaga droe dan jaga kheueh mandum jeumaah nyang ka geuseurah le roh allah ubak gata keu teujaga; sabab gata ka teubaiat jeuet keu nyang jaga jeumaah nyan. bah kheueh gata jaga jeumaah allah nyan lagee tukang meurabe jijaga bubiri jih, sabab allah ka geupeujeuet jeumaah nyan atra milek gobnyan rot aneuek gobnyan nyang mate. saban lagee ulon, pasti teuma teuka srigala-srigala nyang juah lamkawan gata. dan ureueng-ureueng nyang gata jaga teuma jeuet keu eumpeuen srigala-srigala nyan. dan lamkawan gata keudroe pih teuma teuka ureueng-ureueng nyang jipeusampoe haba-haba nyang hana beutoi. awaknyan jipeubuet meunan mangat ureueng nyang ka meuman ubak isa jeuet keu sisat dan jiseutot awaknyan. sabab nyan meujaga-jaga kheueh ingat bahwa lhee thon treb jih ngon jai that ie mata ro, uroe malam ulon hantom na lon pioh lon purunoe ureueng nibak gata. jinoenyoe ulon seurah gata ubak allah mangat gobnyan nyang peulara gata dan mangat gata teutab tamumat bak haba rakhmat allah. allah na kuasa keu geupeukong gata dan geubri ubak gata beureukat-beureukat nyang ka geukeubah keu banmandum umat gobnyan. gohlom na ulon meuharab peng atawa peukayan bak soe mantong. gata keudroe tateupeue, bahwa ngon teunaga ulon keudroe ulon meukeureuja keu lon peupeunoh peue nyang ulon peureulee dan rakan-rakan ulon nyang na jiseutot ngon ulon. lam peukara peue mantong ulon ka lon bri teuladan ubak gata bahwa ngon keureuja brat nyang lagee nyoe geutanyoe haroh tatulong ureueng-ureueng nyang hana teuga. sabab geutanyoe haroh taingat peue nyang tuhan isa keudroe geupeugah, 'leubeh mubah-gia tabri nibak tateurimong.' " oh ka ltheueh paulus geupeugah haba, gobnyan meuteuot ngon awaknyan dan laju meudoa. awaknyan mandum jimoe sira jiwa paulus dan jipeugah seulamatan jalan. awaknyan seudeh sabab paulus geupeugah bahwa awaknyan hana teuma jikalon le gobnyan. laju awaknyan ji

intat gobnyan trok bak kapai. kamoe lakee idhin bak peumimpén-peumimpén jeumaah di efesus nyan, oh ltheueh nyan laju kamoe tinggai awaknyan. dan laju kamoe meulayeue langsung u pulo kos; singohnyan trok laju kamoe u pulo rodos. beudoh inan laju kamoe meulayeue u peulabohan patara. di patara, meuteume kapai nyang meulayeue u fenisia. dan kamoe ek kampai nyan laju beurangkat dan meulayeue laju sampoe kamoe ngieng pulo siprus blaih wie kamoe; teuma kamoe laju meulayeue lom dan kamoe karat u siria. kamoe ek ateuhe darat di tirus, sabab nibak teupatnyan kapai nyang kamoe meunumpang nyan jibongka barang. bak teupatnyan laju kamoe jak saweue ureueng-ureueng nyang meuman ubak isa, laju kamoe tinggai ngon awaknyan nyang treb jih na siseun aleuhah. ateuhe peutunyok nibak roh allah awaknyan jitam paulus bek geujak u yerusalem. teuma oh ka habeh watee jih kamoe tinggai disinan, laju kamoe tinggai awaknyan dan kamoe karat lom meujak kamoe. awaknyan banmandum meusajan ngon aneuek peurumoh jih ji-intat kamoe sampoe uluwa banda. disideh bak bineh pante, kamoe mandum meuteuot dan meudoa. oh ltheuehnyan laju kamoe saleng mumat jaroe sidroe ngon nyang laen, oh ltheueh nyan laju kamoe ek ateuhe kapai dan awaknyan pih laju jiwoe u rumoh. kamoe meulayeue laju phon di tirus trok laju u ptolemais. bak teupat nyan laju kamoe jak saweue ureueng-ureueng nyang ka, meuman keu kamoe bri saleuem bak awaknyan, dan laju kamoe tinggai siuroe ngon awaknyan. singohnyan kamoe jak lom, laju trok u kaisarea. bak teupat nyan kamoe jak meurumpok ngon peunginjin nyang nan jih filipus, dan kamoe tinggai dirumoh jihnyan. ureueng nyan na kheueh sidroe lamkawan tujuh nyang ka teupileh di yerusalem. peuet droe aneuek dara jih ka geubri keumampuan le allah keu jipeusampoe feureuman allah. oh kana padubna treb kamoe inan, teuka kheueh nibak yudea sidroe nabi nyang nan jih agabus. gobnyan geujak bak kamoe laju geucok talo keuieng paulus. ngon talo keuieng nyan ureueng nyang laju ji ikat gaki dan jaroe droe jih. oh ltheueh nyan jipeugah, "nyoe kheueh nyang geupeugah le roh allah: nyangpo talo keuieng nyoe jiikat lageenyoe teuma di yerusalem le ureueng-ureueng yahudi, dan jipeujok bak ureueng-ureueng nyang bukan yahudi." watee kamoe deungoe hainyan, kamoe dan mandum syedara nyang tinggai di kaisarea nyan jilakee ngon meuharab that ubak paulus mangat gobnyan bek geujak u yerusalem. teuma gobnyan geujaweueh, "keupeuguna jih gatamo lagee nyoe sampoe ate ulon hanco? ulon ka siab bukan mantong jidrob disideh, teuma keu mate pih ulon rela deumi tuhan isa." paulus hana geutem deungoe kamoe, ngon lagee nyan laju kamoe iem hana kamoe tam le. "bah kheueh keuheundak tuhan nyang teujadi," kheun kamoe. oh ka ltheueh tinggai inan na meupadub treb, laju kamoe peukeumah barang-barang kamoe, dan laju kamoe beurangkat u yerusalem. na meupadubdroe syedara geutanyoe nibak kaisarea jijak cit meusajan ngon kamoe keu ji-intat kamoe u rumoh manason, sabab dirumoh jih kheueh kamoe mudom. (manason na kheueh ureueng siprus nyang

ka treb that jeuet keu murit isa). watee kamoe trok u yerusalem, syedara-syedara nyang na inan jisambot kamoe ngon galak ate. oh singohnyan paulus geujak meusajan ngon kamoe teuma meurumpok ngon yakobus; mandum peumimpem-peumimpem jeumaah nyang na inan na cit sajan. oh ka ltheueh geubri saleuem bak awaknyan, paulus laju geualitra bak awaknyan peue-peue mantong nyang ka geupeubuet le allah rot gobnyan nibak teungoh teungoh ureueng nyang bukan yahudi. oh ka ltheueh jideungoe calitra paulus nyan, awaknyan mandum jipujoe allah. oh ltheueh nyan awaknyan jipeugah bak paulus, "syedara paulus! droeneueh haroh tateupeue bahwa ka meuribee-ribee ureueng yahudi nyang ka meuiman ubak isa. awaknyan mandum na ktheueh ureueng-ureueng nyang seutia jitaat bak hukom nabi musa. dan jinoenyoe awaknyan jideungoe bahwa droeneueh neupeubeuet mandum ureueng yahudi nyang tinggai diteungoh-teungoh bansa laen, mangat jipeuleuh hukom nabi musa. droeneueh neu naseuhat awaknyan mangat awaknyan bek jipeusumat aneuek-aneuek awaknyan atawa jiseutot adat istiadat yahudi. 22 jinoenyoe ureueng-ureueng yahudi nyang ka meuiman nyan teuntée jideungoe bahwa droeneueh kana inoe. ngon nyan, pakriban jinoo? nyang get jih neuseutot ktheueh naseuhat kamoe. na peuet droe inoe nyang ka jipeugot janji bak tuhan. jroh that droeneueh jak peusuci droe meusajan-sajan ngon awaknyan, dan neutanggong ktheueh biaya awaknyan mangat ok awaknyan jeuet teucuko. ngon lagee nyan teuma deuh bak mandum ureueng bahwa peue nyang jideungoe keuhai droeneueh hana beutoi, sabab droeneueh keudroe pih neuamai hukom nabi musa. teuma keuhai ureueng nyang kon yahudi nyang ka meuiman keu isa, kamoe ka meukirem surat bak awaknyan keuhai jeuputosan kamoe bahwa awaknyan hana jeuet jimakheun peunajoh nyang ka teupeuseumah keu beurala, hana jeuet pajoh darah, atawa teupajoh beulatang nyang mate teuceukiek; dan hana jeuet teupeubuet buet-buet nyang cabui." ngon lagee nyan paulus laju geujak ngon ban peuet droe awaknyan dan geupeuna laju upacara teupeusuci droe meusajan-sajan ngon awaknyan oh singoh uroe. oh ltheueh nyan awaknyan laju jitamong lam baet allah keu jijak bri tee bahwa na padub uroe teuk baro ktheueh upacara teupeusuci droe nyan seulesoe dan keureubeuen keu awaknyan maseng-maseng jipeuseumah teuma. 27 oh watee tujuh uroenyang karab habeh, na padub droe ureueng yahudi nibak asia jikalón paulus na lam baet allah. laju awaknyan jipeusuna ureueng rame, oh ltheuehnyan laju jimat paulus sira jikuk-kuk, "hai ureueng-ureueng israel, tulong! nyoe ktheueh ureueng jih nyang jijak ho-ho mantong jijak peubeuet ubak mandum ureueng ajaran-ajaran nyang jihina bansa israel, jilawan hukom nabi musa dan jihina baet allah nyoe. jinoenyoe ka jijeuet ba ureueng-ureueng nyang bukan yahudi lam baet allah dan jipeubuet najih bak teupat nyang sucinyoe!" (awaknyan jipeugah meunan sabab awaknyan ka jikalón trofimus ureueng efesus lam banda meusajan-sajan ngon paulus; dan jipike paulus ka geuba ureueng nyan lam baet

allah.) bansaboh banda ka jeuet keu ka-ak ka-ok, dan mandum ureueng jiplueng-plueng sira jihudom. awaknyan laju jidrob paulus jibahue gobnyan jipeuteubiet lam baet allah. watee nyan cit teuma pintoe baet allah teutob. teungoh mandum ureueng nyang peuna karu nyan jiuueha keuneuk poh mate paulus, ureueng laen laju jijak peugah ubak keumandan pasokan roma bahwa bansaboh yerusalem teungoh subra. watee nyan cit teuma keumandan nyan jicok na padub droe peuwira dan padub droe teuma sipa-i laju bagaih-bagaih jijak ngon awaknyan bak teupat nyang teungoh karu nyan. watee ureueng jai nyan jikalón keumandan nyan ngon pasokan jih, awaknyan laju jipioh jipoh paulus. keumandan nyan laju jijak bak paulus laju jidrob gobnyan, jiyue ureueng laen mangat jaroe geuh nyan teurante. oh ltheueh keumandan nyan jitanjong soe paulus nyan dan peue nyang ka jipeubuet. siteungoh nibak ureueng rame nyan na nyang jaweub meunoe dan teuma nyang jaweub meudeh. keuadaan nyan lumpah that subra nyan sampoe le keumandan nyan hana hase geuteupeue peue nyang ka tejadi. ngon sabab nyan keumandan nyan laju jipeurintah mangat paulus geuba bak markas. watee awaknyan teungoh jiba gobnyan trok bak reunyeuen. ureueng-ureueng peuna karu nyan laju ji heuntam paulus teuga lumpah na akhe jih paulus haroh jirandee le na meupadub droe sipa-i. awaknyan jiseutot gobnyan nibak likot le geurombolan ureueng-ureueng nyang peuna karu nyan nyang jikuk-kuk, "peumate jihnyan!" meunan keuneuk geutamong lam markas, paulus geupeugah bak keumandan nyan, "peu ktheueh jeuet lon meututoe sikeujab ngon teungku?" "peu ktheueh gata jeuet tameututoe ngon basa yunani?" jitanjong le keumandan nyan. "meunoye meunan, gata bukan ureueng meuse, nyan ktheueh nyang yoh awai ilee jipeuna beurontak dan jipeuplueng droe na peuet ribee droe tukang peuna karu nyang meusinjata jitamong lam padang pasi?" geujaweueb le paulus, "ulon ureueng yahudi; ulon wareuga banda tarsus, banda nyang peunteng di kilikia. neupeuidhin ktheueh ulon meututoe bak ureueng-ureueng nyan." teuma oh ka ltheueh paulus jibri idhin keu geumeututoe, paulus laju geudong bak reunyeuen, laju geubri isyarat ngon jaroe gobnyan. mandum ureueng jeuet keuseungab. oh ltheueh nyan paulus geumeututoe bak awaknyan lam basa ibrani. paulus geupeugah. "bapak-bapak dan syedara-syedara banmandum! ulon teuma lon peugah keuhai lon bila droe lon ubak syedara. cuba deungoe nyoe!" watee awaknyan jideungoe paulus geumeututoe lam basa ibrani, awaknyan leubeuh seungab ngon teunang. ngon lagee nyan, paulus geupeugah lom haba gobnyan. "ulon ureueng yahudi," kheun paulus, "ulon lahe di tarsus lam nanggroe kilikia, teuma ulon rayeuk lam yerusalem nyoe, dan jididek ngon biet-biet that le guree rayeuk ulon gamaliel lam hukom nyang geubri le nabi musa ubak indatu geutanyoe. saban lagee syedara banmandum inoe nibak uroenyoe, ulon pih biet-biet that sunggoh keu po teu allah. ulon ienanya sampoe mate murit-murit ajaran baro nyan. awaknyan mandum, bah ktheueh nyang agam meunan cit nyang inong, ulon drob dan lon peutamong lam glab. imeum

agong keudroe dan mandum mahkamah agama jeuet teucok keusaksi bahwa ulon hana sulet. sabab awaknyan kheueh nyang ka geubri keu ulon surat peu intat haba nyang jituju keu ureueng-ureueng yahudi nyang na di damsyik. ngon na surat nyan ulon jeuet lon drob inan ureueng-ureueng nyang meuiman ubak ajaran nyan, dan lon ba awaknyan u yerusalem keu teuhukom." "watee ulon mantong bak rot euh dan rab trok u damsyik, watee nyan cot uroe, saboh cahya nyang trang lumpah na ngon hana teusangka-sangka jiteubiet nibak langet ban sikeulileng lon. ulon reubah bak tanoh dan laju ulon deungoe su nyang jipeugah bak ulon, 'saulus, saulus! pakon gata ienanya ulon?' laju ulon tanyong, 'soe kheueh droeneueh, teungku?' 'ulon kheueh isa ureueng nazaret nyan nyang gata ienanya,' jaweueb su nyan. ureueng-ureueng nyan na inan meusajan ngon ulon jingiang cahya nyan, teuma awaknyan hana jideungoe su nyang geupeugah bak ulon. laju lon tanyong teuma, 'peue nyang haroh ulon peubuet, tuhan?' tuhan geujaweueb, 'beudoh kheueh dan tamong u damsyik. inan eunteuk gata teuma geubri tee keuhai mandum nyang le allah gata tem peubuet.' ulon jeuet keubuta sabab cahya nyang seulala nyan. dan rakan-rakan ulon laju jipapah ulon peutamong u damsyik. inan na sidroe ureueng nyang nan jih ananias. ureueng nyan sidroe ureueng nyang saleh dan taat that jipeubuet hukom nabi musa. mandum ureueng yahudi nyang na tinggai di damsyik jihoreumat that keu ureueng nyan. gobnyan teuka geujak ngiang ulon, laju geudong bakbinah ulon sira geupeugah, 'syedara saulus, bah kheueh gata tameungieng lom teuma!' watee nyan cit teuma ulon beutot ulee lon dan lon ngiang gobnyan. oh ltheueh nyan gobnyan geupeugah bak ulon, 'allah indatu geutanyoe ka geupileh gata mangat gata tateupeuy nyang geulakee le gobnyan, dan takalon isa, hamba allah nyang geupeubuet keuheundak allah dan geudeungoe su isa keudroe. gata teuma jeuet keu keusaksi keu gata peusampoe bak mandum ureueng peue nyang ka gata deungoe dan gata kalon. jinoenyoe bek le gata preh treb that. beudoh kheueh, dan jok kheueh droe gata teupumano. meulakee kheueh ubak tuhan mangat gata geupeu beubaih mandum desya-desya gata.' " 'ulon gisa u yerusalem, dan watee ulon teungoh meudoa lam baet allah, ulon jikuasa le roh allah. ulon kalon tuhan: gobnyan geupeugah bak ulon, 'bubagaih gata tinggai yerusalem, sabab ureueng-ureueng disinoe hana galak jideungoe gata meusaksi keuhai ulon.' laju lon peugah, 'tuhan, awaknyan jiteupeu that bahwa ulon ka lon tamong lam rumoh-rumoh iebadat keu lon jak drob awaknyan dan ulon poh ureueng-ureueng nyang meuiman ubak droeneueh. meunan cit watee saksi droeneueh stefanus jipoh mate, ulon keudroe na nibak teupat nyan dan lon situju ateuh jipoh mate nyan. dan ulon kheueh nyang priek peukayan ureueng-ureueng nyang peumate ureueng nyan.' teuma tuhan geupeugah bak ulon, 'gata jak mantong, sabab ulon teuma lon yuejak gata u teupat nyang jioh ubak ureueng-ureueng nyang bukon yahudi.' " ureueng rame teutab mantong jideungoe paulus peugah haba, teuma bak kalimat akhe awaknyan

jikuk sihabeh teunaga, "peumate mantong ureueng nyang lagee nyan. ureueng nyan hana patot udeb!" sira geudumpek, awaknyan laju geukipah bajee jubah geuh, dan geusipreuek abee u manyang. teuma le keumandan pasokan roma nyan laju jiyueba paulus ubak markas mangat gobnyan jipareksa inan deungon paksa keu jiteupeu peue sabab ureueng-ureueng yahudi jikuk-kuk sira jidumpek lagee nyan ateuh gobnyan. teuma watee paulus ka ji-ikat keu jiseunuet, paulus laju geupeugah bak peuwira nyang dong inan, 'peu kheueh teusunuet sidroe wareuga keurajeuen roma sigohlom jihnyan teupeusidang?' ban jideungoe haba nyan, peuwira nyan laju jijkak ubak keumandan dan jipeugah, 'peue nyang bapak peubuet nyoe? ureueng nyoe wareuga neugahra roma!' 27 le keumandan nyan laju jijkak ubak paulus sira jitanyong, 'cuba gata peugah, peu kheueh gata wareuga neugahra roma!' "nyoe," kheun paulus, 'ulon wareuga nangroe roma.' keumandan nyan jipeugah lom, 'ulon jeuet keuwareuga neugahra roma ngon lon bayeue jai lumpah na!' geujaweueb le paulus, "teuma ulon lahe sibagoe wareuga neugahra roma." watee nyan cit teuma sidadu-sidadu nyang keuneuk pareksa paulus nyan jisurot dan keumandan nyan pih jeuet keuteumakot sabab jihnyan ka jigari paulus, padahai paulus wareuga neugahra roma. keumandan pasokan roma nyan meuheuet that peue sabab jih ureueng-ureueng yahudi jipeusalah paulus. ngon sabab nyan oh singoh beungoh laju jitawok imeum ulee dan mahkamah agama mangat meusapat. laju paulus jipeuleueh nibak teugari, oh ltheuehnyan laju jiba jak meuhadab ukeue awaknyan banmandum. paulus geukalon ateuh anggota mahkamah nyan dan laju geupeugah, 'syedara-syedara! trok uroenyoe ulon hana meurasa meusalah bak po teu allah lam ate nurani lon keuhai udeb ulon." watee paulus geupeugah meunan, imeum agong ananias laju jiyue bak ureueng nyang dong blaih paulus mangat jitampa babah paulus. dan paulus laju geupeugah bak imeum agong nyan, "allah pasti geutampa gata, ureueng munafek nyang pura-pura suci! droeneueh neuduek inan neupeusidang ulon meunurot hukom nabi musa, padahai droeneueh keudroe iengkeue keu hukom nyan ngon cara neuyue ureueng laen jitampa ulon!" ureueng-ureueng nyang na blah paulus laju jipeugah bak paulus, 'gata tahina imeum agong allah!' geujaweueb le paulus, "oh, ulon hana lon teupeu, syedara-syedara, bahwa jihnyan imeum agong. beutoi lam alkitab na teuteuh lagee nyoe, 'bek kheueh gata hina peumimpin-peumimpin bansa gata.' " paulus geukalon bahwa ladum nibak peumimpin-peumimpin bansa nyan na kheueh ureueng-ureueng saduki dan ladum teuk na kheueh ureueng-ureueng farisi. ngon sabab nyan gobnyan laju geupeugah bak mahkamah nyan, 'syedara-syedara! ulon sidroe ureueng farisi, keuturonan farisi. ulon jipeusidang nibak teupatnyoe sabab ulon peugah ureueng mate udeb lom teuma." watee geupeugah meunan ureueng-ureueng farisi dan ureueng-ureueng saduki laju jipeuphon meudakwa, sampoe sidangnyan jeuet teubagi lam dua peureute. (sabab ureueng-ureueng saduki jipeugah ureueng mate hana udeb le, bahwa malaikat nyan hana, meunan cit roh-roh jeuhet

hana; seudangkan ureueng-ureueng farisi jipeucaya banmandum nyan.) ngon lagee nyan teuka kheueh karu nyang paleng gura. na meupadubdroe ureueng farisi nyang jeuet keu guree agama jidong dan jilawan biet-biet. "meunurot kamoe ureueng nyoe hana meusalah mubacut pih! mungkin keubiet na roh atawa malaikat nyang peugah bak gobnyan!" meudakwanyan biet-biet meutamah subra sampoe keumandan pasokan nyan jitakot paulus jiparan le awaknyan. dan laju jiyue pasokan keu jijak cok paulus lamkawan ureueng nyang teungoh meudakwanyan jeuet teuba u markas. malam oh lheueh nyan teuma tuhan isa geudong bak bineh paulus dan geupeugah, "peukong kheueh ate gata!" gata katabri keusaksian gata keuhai ulon di yerusalem. singoh teuma haroh gata tabri keusaksian lagee nyan di roma." banbeungoh that oh singoh nyan, ureueng-ureueng yahudi laju jipeuna kumplotan. awaknyan jimubudok hana jimakheun ngon jijieb ie meunyoeh gohlom jipeumate paulus. leubeh peuet ploeh droe nyang rhoh lam kumplotan nyan. awaknyan laju jijak ubak imeum-imeum ulee dan peumimpen-peumimpen yahudi dan jipeugah, "kamoe ka kamoe mubudok meusajan-sajan, hana kamoe makheun atawa kamoe jie b ie sigohlom kamoe poh mate paulus. syedara-syedara ngon anggota-anggota mahkamah agama nyang siget jih neukirem surat ubak keumandan pasokan roma nyan keu talakee awaknyan jiba paulus lom jak meuhadab droeneueh, pura-pura droeneueh keuneuk pareksa lom peukara ureueng nyan ngon teuliti. dan kamoe ka siab keu kamoe poh mate jihnyan sigohlom trok keunoe." teuma aneuek nibak syedara nyang inong paulus jideungoe reuncana jeuhet nibak kumplotan nyan. teuma laju jijak ubak markas dan jipeugah hainyan ubak paulus. paulus laju geutawok sidroe peuwira dan geupeugah bak ureueng nyan, "ba kheueh aneuek mudanyoe ubak keumandan; jihnyoe keuneuk lapor sapeue-sapeue bak keumandan nyan." peuwira nyan laju jiba aneuek muda nyan ubak keumandan dan jipeugah, "paulus, nyang na lam tahanan nyan, geutawok ulon dan geulakee ulon mangat lon ba aneuek muda nyoe ubak bapak; jihnyoe keuneuk jilapor sapeue-sapeue." keumandan nyan laju jimat jaroe aneuek muda nyan, "peukeuneuk gata peugah ubak ulon?" jijaweueb le aneuek muda nyan, "ureueng-ureueng yahudi kasipakat keuneuk jilakee bak teungku jeuet paulus teuba ubak mahkamah agama singoh, pura-pura awaknyan keuneuk jipareksa lom peukara paulus nyan ngon leubeh teuliti. teuma bek teungku turot lagee nyang jilakee nyan, sabab na leubeh peuet ploeh droe nyang teungoh jimusom keuneuk jilinteung gobnyan bak rot euh. awaknyan mandum ka jimubudok hana teuma jimakheun atawa jijieb ie sigohlom paulus jipoh mate. jinoenyoe pih awaknyan ka siab; tinggai jipreh nariet teungku mantong." 22 keumandan nyan jipeugah, "bek gata peugah bak soe mantong bahwa gata ka tabritee hainyan ubak ulon." laju jiyue aneuek muda nyan jiwoe u rumoh jih. oh lheuehnyan keumandan nyan laju jitawok dua droe peuwira, dan laju jipeugah bak awaknyan, "peusiab laju dua reutoh droe sidadu meusajan ngon

tujuh ploeh droe sidadu meuguda dan dua reutoh sidadu meukapak keu teubeurangkat poh sikureueng malam nyoe cit teuma u kaisarea. meunan cit gata peusiab guda keu ngon ba paulus dan gata ba kheueh jinyoe ngon seulamata sampoe trok ubak gubunur feliks." laju keumandannyan jituleh surat nyang asoe jih lagee nyoe, "nyang mulia gubunur feliks. saleuem nibak klaudius lisias! 27 ureueng nyoe ka jidrob le ureueng-ureueng yahudi dan rab jipoh mate le awaknyan, meunyoeh ulon hana lon jak ngon pasokan lon dan lon peuseulamat jihnyan; sabab ulon deungoe jihnyoe wareuga neugahra romawi. sabab ulon keuneuk kuteupeu peue nyang seubeuna jih buet nyang salah nyang jikeuneuk tudoh atueh ureueng nyoe, teuma laju ulonba ubak mahkamah agama awaknyan. teunyata ureueng nyoe hana jipeubuet sapeue pih nyang jeuet tehukom ngon hukom mate atawa hukom lam glab. nyan jitudoh le awaknyan atueh ureueng nyoe na kheueh nyang na hubongan ngon hukom-hukom agama awaknyan keudroe. oh lheueh nyan bak ulon jibritee bahwa na reuncana jeuhet nibak ureueng-ureueng yahudi atueh ureueng nyoe. ngon sabab nyan langsong ulon kirem jihnyoe ubak teungku gubunur. dan ulon ka lonyue bak ureueng nyang tudoh jihnyoe jak meuhadab ubak teungku." teuma le sidadu nyan laju jipeubuet peurintah nyan. awaknyan jijakcok paulus malam nyan cit teuma laju jiba sampoe trok u antipatris. oh singohnyan awaknyan jipeubiyue pasokan meuguda jijak laju ngon paulus, dan awaknyan keudroe laju jiwoe u markas. watee pasokan meuguda nyan trok u kaisarea, awaknyan laju jipeusampoe suratnyan ubak gubunur, dan laju jijok paulus bak gubunur nyan. oh ka lheueh jibaca surat nyan le gubunur nyan, laju jitanjong bak paulus pat asai jih. watee jiteupeu paulus asajih di kilikia, laju jipeugah, "get kheueh, meunyoeh meunan! ulon teuma lon pareksa peukara gata, meunyoeh ureueng-ureueng nyang gadu gata katrok keunoe." laju jipeutron peurintah mangat paulus jiteuon lam meuligoe herodes. limong uroe oh lheuehnyan, imeum agong ananias dan peumimpen-peumimpen yahudi jijak u kaisarea meusajan ngon sidroe peungacara nyang nan jih tertulus. awaknyan laju jijak meuhadab gubunur feliks dan laju jipeusampoe nyang jigadu keuhai paulus nyan. watee tertulus jihoi ukeue, jihnyan laju jitudoh paulus lagee nyoe, "amphon gubunur nyang mulia! dimiyueb pimpanen amphon nanggroe kamoe aman ngon dame. dan atueh keubijaksanaan amphon ka jai that-that nyang teupeujroh keu bansa kamoe. banmandum nyan kamoe sambot sabe ngon teurimong gaseh dan horeumat kamoe nyang paleng manyang dipat mantong kamoe na. teuma mangat bek jai that teuboh watee amphon, ulon meuharab beuneutem kheueh amphon deungoe peue nyang kamoe gadu nyang paneuk nyoe. kamoe teume ureuengnyoe tukang peuna karu nyang paleng mubahya. dipatmantong jihnyoe jipeuna karu lamkawan ureueng yahudi dan jeuet keupeumimpen geurakan ureueng-ureueng nazaret. jihnyoe pih ka jicuba jipeukuto baet allah, teuma laju kamoe drob jihnyan. kamoe kana niet keuneuk kamoe peusidang jihnyan meunurot hukom agama kamoe keudroe.

teuma le keumandan lisias jireupah jihnyan nibak kamoe, dan jipeurintah mangat ureueng nyang jak gadu nyan jijak meuhadab ubak amphon. meunyo amphon neupareksa ureueng nyoe, amphon keudroe teuma neudeungoe nibak jihnyan nyang beuna nibak mandum nyang kamoe gadunyo keuhai jih nyan." ureueng-ureueng yahudi nyang na inan pih meusajan jigadu paulus dan jipeubeutoi mandum nyang jipeugah le tertulus. laju gubunurnyan geubri kode bak paulus bahwa gobnyan jeuet geupeugah haba. teuma paulus laju geupeugah, "ulon kuteupo bahwa teungku ka jeuet keu hakem di nanggroenyo meuthon-thon treb jih. nyang kheueh sabab jih ulon meuras galak lon peusampoe keuhai lon bila droe lon ubak teungku. teungku jeuet neuseulidek keudroe bahwa hana leubeh nibak dua blaih uroe nyang ka ltheueh ulon jak u yerusalem keu lon jak seumayang. dan hantom na ureueng-ureueng yahudi nyang laen jikalon ulon teungoh meudakwa ngon ureueng laen atawa lon peusapat gob keu lon peuna karu bah kheueh nyan nibak baet allah meunan cit bak rumoh-rumoh iebadat atawa dipatmantong didalam banda. awaknyan pih hana hase jibri bukeuti peue-peue nyang jitudo dan nyang jigadunyan ubak teungku keuhai ulon. keubiet beutoi ulon haroh lon aku ubak teungku bahwa ulon seumah allah indatu kamoe meunurot ajaran nyang geupeuruno le isa nyang jianggab le awaknyan salah. teuma ulon teutab mantong lon meuman mandum nyang na teuteleh lam kitab nabi musa dan kitab nabi-nabi. saban lagee awaknyan, ulon pih na harapan ubak po teu allah bahwa mandum ureueng udeb lom teuma oh ka ltheueh mate – ureueng-ureueng get, meunan cit ngon ureueng-ureueng jeuhe! nyang kheueh sabab jih ulon teutab meu-useuha nyang si jroh-jroh jih, mangat ate nurani lon gleh ubak allah dan gleh teuma keu manusia. oh ka ltheueh na padub thon ulon hana di yerusalem, ulon gisa keudeuh keu lon jakba bantuan peng keu bansa ulon dan keu lon peuseumah keureubeuen keu po teu allah. watee ulon teungoh kupeubuet nyan, awaknyan laju meurumpok ngon lon lam baet allah, oh ka ltheueh ulon seulouseu ngon upacara peusuci droe. hana ureueng rame meusajan ngon ulon, dan hana teuma karu bak teupat nyan bak watee nyan. teuma na meupadubdroe yahudi nibak teupat nyan asai nibak propinsi asia. awaknyan kheueh nyang sikeubiet jih beuna nibak teupat nyoe mangat jipeusampoe nyang jigadu le awaknyan ubak teungku, meunyo awaknyan na sapeue-sapeue jikeuneuk gadu ateuhe ulon. atawa bah kheueh ureueng-ureueng nyoe keudroe nyang meungadu peu buet nyang jeuet nyang ka jiteume nibak ulon watee ulon jipeuhadab bak mahkamah agama. awaknyan jiteume teuma kalimat nyang saboh nyoe nyang ulon peugah dikeue awaknyan, kalimat nyan na kheueh: ulon teupeusidang nibak uroenyo sabab ulon peucaya ureueng-ureueng nyang ka mate udeb lom teuma." laju le feliks nyang ka jiteupeu jai that keuhai ajaran isa, jipeuputoh sidang peukara nyan, "ulon teuma lon peuputoh peukaranyoe," kheun feliks, "meunyo keumandan lisias ka trok keunoe." laju jipeurintah pewira nyang meutanggong jaweub ateuhe paulus nyan

mangat teutab jipeuteun paulus, teuma ngon jibri bacut keubeubaihan ubak gobnyan dan jipeuidhin rakan-rakan gobnyan jibri keugobnyan peue nyang geupeureulee. na padub uroe teuma oh ltheueh nyan feliks teuka, jipeugah le peurumoh jih nyang nan jih drusila; jihnyan ureueng yahudi. laju le feliks jiyue gob jeuet jijakcok paulus, oh ltheuehnyan feliks jideungoe paulus geupeugah haba keuhai meuman ubak isa almaseh. teuma watee paulus geupeugah haba lom keuhai juoe ngon teupeuteuen hawa nafeusu meunan cit keuhai hukuman bak uroe kiamat, feliks jeuet keuteumakot laju jipeugah, "gata jeuet neujak bak saatnyoe ulon teuma lom tawok lom gata meunyo na watee." watee nyan feliks meuharab teuma beumeuteume peng nibak paulus. nyang kheueh sabab jih jihnyan meu-ulang-ulang jiyue gob jakcok paulus keu jipeugah haba ngon geuhnyan. oh ka ltheueh na dua thon, perkuis festus jeuet geunantoe feliks sibagoe gubunur. dan sabab feliks keuneuk jicok ate ureueng-ureueng yahudi, jihnyan jipeubiyeu mantong paulus teutab lam glab. lhee uroe oh ltheueh festus trok bak teupat nyan, gobnyan laju geujak nibak kaisarea u yerusalem. nibak teupat nyan imeum-imeum ulee dan peumimpem-peumimpem yahudi laju jipeusampoe ubak gobnyan peue nyang jigadu le awaknyan keuhai paulus. awaknyan teutab jibujuk festus jiseuha ateuhe jroh ate jih ateuhe awaknyan, festus nyan jitem yue jakcok paulus dan jiba u yerusalem; sabab awaknyan ka mupakat keu jipeumate paulus bak teungoh rot. teuma festus jijaweub, "paulus teungoh teuteun di kaisarea; dan ulon keudroe pih hana treble lon riwang keudeh. jadi, bah kheueh ureueng-ureueng rayeuk nyang na lamkawan gata jijak meusajan ngon ulon u kaisarea dan teupeusidang paulus nyan disideh, meunyo keubiet jihnyan ka jipeubuet buet nyang salah." oh ka ltheueh tinggai di yerusalem kira-kira lapan atawa siploh uroe teuk, festus laju jiwoe u kaisarea. singohnyan laju jipeuna sidang peungadalan dan jipeurintah mangat paulus jipeuhadab ukeue. watee paulus trok keunan, ureueng-ureueng yahudi nyang ka trok nibak yerusalem laju jidong bansilingka gobnyan, dan laju jipeuphon peugah nyang jigadu nyan nyang paleng brat u ateuhe paulus. teuma awaknyan hana bukeuti-bukeuti peue nyang ka jitudo nyan. nibak geubila droe gobnyan, paulus geupeugah, "ulon hana lon peubuet sapeue pih nyang salah ubak hukum nabi musa atawa keu baet allah meunan cit ubak kaisar roma." teuma festus keuneuk jicok ate ureueng yahudi. laju jityanyong bak paulus, "peu kheueh gatatem jak u yerusalem mangat gata teupeusidang ideh dikeue ulon keuhai peue-peue nyang ka jitudo nyan?" geujaweub le paulus, "ulon teungoh lon dong dikeue mahkamah kaisar roma; dan bak teupat nyan kheueh ulon museuti teupeusidang. teungku keudroe neutupeue bahwa ulon hana meusalah ateuhe ureueng yahudi. meunyo ulon ka lon iengkeue hukum dan lon peubuet sapeue-sapeue buet nyang patot teuhukum ngon hukum mate, ulon rela mate. teuma meunyo peue-peue nyang jitudo nyan hana beutoi, hana meusidroe pih nyang jeuet jikok ulon bak awaknyan. ulon lakee mangat ulon teupeusidang

bak peungadalan kaisar!" oh ka lheureh jimeupakat ngon peunaseuh-at-peunaseuhat jih, festus jipeugah, "gata talakee teupeusidang dipeungadalan kaisar, jadi gata haroh jak meuhadab kaisar." hana padubna treb teuma oh lheureh nyan, raja agripa dan bernike geujak ubak kaisarea keu geujak peugah seulamat bak festus. oh ka lheureh awaknyan na padub uroe nibak teupat nyan, festus laju jipeutrang keuhai peukara paulus ubak raja agripa. kheuren festus, "na disinoe sidroe ureueng hukoman nyang jitinggai le feliks. watee ulon mantong na di yerasalem, imeum-imeum ulee dan peumimpén-peumimpén yahudi jipeutamong peungaduan awaknyan ateuh ureueng nyan dan jilakee mangat ulon peurhot hukoman ateuh ureueng nyan. teuma ulon jaweueb bahwa ureueng roma hana jeuet teuseurah meunan mantong sidroe ureueng teutudoh keu teuhukom, meunyoé nyang teutudoh nyan gohlom meuhadab keue ngon ureueng-ureueng nyang peudakwa gobnyan dan teubri watee keu jibila droe. ngon nyan, watee awaknyan jijak keunoe, ulon hana lon preh treb. singohnyan laju ulon peuna sidang peungadalan dan lon peurintah mangat ureueng nyan jiba meuhadab. watee ureueng nyang peudakwa jidong sira jipeugah peu nyang jigadu nyan, awaknyan hana jigadu sapueu-sapueu buet nyang jeuhet nyang jipeubuet le ureueng nyoe lagee nyang ulon pike teuma jipeugah le awaknyan. nyang na awaknyan meubida peundapat sabe keudroe-droe keuhai agama jih keudroe dan keuhai sidroe ureueng nyang nan jih isa. ureueng nyan ka mate, teuma paulus teutab jimeukreueh bahwa ureueng nyan udeb. sabab ulon bingung pakriban ulon hase meuteume keuteurangan-keuteurangan keuhai peukara nyan, laju ulon tanyong bak paulus peu kheureh jitem jak u yerasalem dan teupeusidang ideh ateuh peukara nyan. teuma paulus jilakee ek bandang; jihnyan jilakee mangat jihnyan teutab teuteun sampoe peukara jih geupeu putoh le kaisar. ngon sabab nyan ulon peurintah mangat jihnyan teutab teuteun, sampoe ulon meuteume watee keu lon kirem jihnyan ubak kaisar." 22 laju agripa jipeugah bak festus, "ulon keudroe pih keuneuk lon deungoe ureueng nyan." "singoh amphon jeuet neudeungoe," jaweueb festus. singohnyan agripa dan bernike jijak ngon upacara keubeusaran. awaknyan jitamong lam ruweueng sidang meusajan-sajan ngon ureueng-ureueng rayeuk angkatn prang dan ureueng-ureueng meugah nyang na lam banda nyan. ateuh peurintah festus, paulus laju jipeutamong. dan festus laju jipeugah, "daulat teungku amphon dan mandum hadirin! ureuengnyoe ka jigadu bak ulon le mandum bansa yahudi, bah kheureh nyan di yerasalem meunan cit nyang na disinoe. awaknyan jituntot ngon jiklik-klik bahwa jihnyoe hana patot teupeubiyeu udeb. teuma di ulon hana lon teume mubacut pin nyang ka jipeubuet keu jeuet teucok keudasa hukom keu teupeu rhot hukoman mate. ngon sabab nyan jihnyoe keudroe ka jilakee keu teupeusidang ubak peungadalan kaisar, ulon ka lon cok keuputosan keu lon kirem jihnyoe ubak kaisar. teuma di ulon hana lon teume sapueu pih keuteurangan nyang teugaih keuhai droe jihnyoe keu

lon tuleh surat ulon ubak kaisar. nyang kheureh sabab jih ulon peuhadab jihnyoe dikeue teungku-teungku banmandum, nyang paleng lumboi sa ubak teungku amphon baginda agripa! meukeusut ulon na kheureh oh ka lheureh teupareksanyoe, na bahan keu ulon kutuleh surat. 27 sabab meunnurot peurasana ulon, hana kheureh bak teupat jih teukirem sidroe ureueng keunong teun ngon hana teupeugah peu salah nyang teutudoh ateuh jihnyoe," agripa jipeugah bak paulus, "gata teubri idhin neupeugah haba keu gata bila droe." teuma paulus geubeuot jaroe laju geubila droe geuh lagee nyoe, "nyang mulia amphon baginda agripa! ulon meurasa meu-untong that jeuet lon bila droe ulon nyang paleng meu-untong dikeue baginda keudroe keuhai mandum nyang ji gadu le ureueng-ureueng yahudi ateuh ulon; nyang paleng peunteng baginda neuteupeue that adat istiadat dan masa-alah-masa-alah ureueng yahudi. ngon sabab nyan, ulon meuharab baginda neutem deungoe keuteurangan ulon nyoe ngon saba. mandum ureueng yahudi jiteupeu pakriban ulon udeb phon muda kon. awaknyan jiteupeu bahwa yohmuda kon ulon ka udeb lamkawan bansa ulon keudroe di yerasalem. katreb that awaknyan jiteupeue keuhai ulon. dan meunyoé awaknyan jitem, awaknyan jeuet jimeusaksi bahwa ulon ka udeb sibagoe ureueng farisi ngon lon turot mandum peuraturan nyang paleng kong lam agama kamoe. dan jinoenyoe ulon dong disinoe keu jipeusidang sabab ulon peucaya keu janji nyang geupeugot le allah ubak indatu kamoe. janji nyang geupeugah nyang kheureh teuma nyang jiharab-harab le bandua blaih boh sukeé bansa israel, sampoe awaknyan jiseumah po teu allah uroe ngon malam. dan sabab ulon kupateh ubak janji nyan, baginda nyang mulia, ulon jipeusalah le ureueng-ureueng yahudi. pakon syedara-syedara ureueng yahudi hana neupercaya bahwa allah geupeu udeb ureueng mate? yoh ilee ulon keudroe pih lagee nyan bahwa ulon haroh lon useuha ngon meubagoe cara keu lon lawan isa nyang teuka nibak nazaret nyan. dan nyang kheureh nyang ka ulon peubuet di yerasalem. ngon surat kuasa nyang geujak bak lon le imeum-imeum ulee, ka lon peutamong lam glab ureueng-ureueng nyang seutia ubak allah. dan ulon pih situju bahwa awaknyan teupeu rhot hukom mate. jai lumpah na ulon seksa awaknyan lam rumoh-rumoh iebadat, mangat awaknyan ji iengkeue peue nyang ka awaknyan meuiman. get that seu eum ate ulon ateuh awaknyan, sampoe banda-banda nyang laen ulon jak keu lon jak peulet awaknyan." "ngon meukeusut nyan kheureh teuma ulon ba surat kuasa nyang geubri le imeum-imeum ulee dan lon jak u damsyik. dan watee ulon mantong na bak teungoh rot euh, watee nyan mantong cot uroe, baginda nyang mulia, deuh lon kalon saboh cahya nibak langet nyang leubeuh trang nibak mata uroe. cahya nyan meuble-ble na sikeulileng lon dan ban silingka ureueng-ureueng nyang na jijak ngon ulon. kamoe mandum reubah bak tanoh. laju ulon deungoe su nyang geupeugah bak ulon lam basa ibrani, 'saulus, saulus!' pakon gata hana tapioh ta ienanya ulon? gata teuma tarasa saket keudroe, meunyoé gata teutab hana tapioh talawan

pimpin geuhnyan nyang jeuet keu teungku gata,' teuma laju lon peugah, 'soe kheueh droeneueh, teungku?' dan tuhan geujawueb, 'ulon kheueh isa nyang gata ienanya. beudoh kheueh dan dong laju! ulon peudeh droe ubak gata ngon meukeusut keu lon beutot gata jeuet keupeulayan ulon. gata haroh tapeusampoe bak ureueng laen peue nyang ka ta ngieng uroenyoe keuhai ulon dan keuhai peue nyang teuma lon tunyok bak gata bak watee nyang singoh teuka. ulon teuma lon peulheueh gata nibak bansa israel dan nibak bansa-bansa laen nyang bukan yahudi. ulon teuma lon yue gata ubak awaknyan mangat keu gata peubleuet mata jihnyan, mangat awaknyan jiteubiet nibak lam seupot dan jitamong lam trang; mangat awaknyan beubah nibak godaan iblih, laju jikuasa le roh allah. teuma ngon peucaya ubak ulon desya-desya awaknyan teuma teupeu amphon dan awaknyan teuma jeuet keu anggota umat allah nyang teupileh.' " "sabab nyan, baginda agripa, ulon sabe lon useuha taat ubak keumalon nyang ka ulon teurimong nibak po teu allah nyan. ngon troh trang ulon peugah ubak dum na ureueng bahwa awaknyan haroh meutobat nibak desya-desya awaknyan dan jipeujok droe ubak po teu allah dan jipeuleumah lam udeb jih bahwa awaknyan ka meutobat nibak desya-desya awaknyan. hainyan ulon bri tee phon-phon that di damsyik, oh lheueh nyan di yerusalem dan bansaboh yudea dan lamkawan nyang bukan ureueng yahudi. ngon sabab nyan kheueh ureueng-ureueng yahudi jidrob ulon nibak baet allah dan jiseuha keuneuk peumate lon. 22 teuma trok an jinoo ulon mantong geulindong le po teu allah, sampoe ulon hase londong nibak teupat nyoe keu lon bri keusaksian ulon bak mandum ureueng – ubit meunan cit nyang rayeuk. peue nyang ulon peugahnyoe hana laen na kheueh peue nyang ka awai geupeugah le nabi-nabi dan nabi musa; na kheueh bahwa raja peuseulamat nyang geupeu janji le po teu allah nyan haroh meudeurita, dan jeuet keu ureueng phon that nyang geubeudoh lom oh ka lheueh mate; deungon lagee nyan gobnyan jeuet geupeugah trang – nyan kheueh haba keuseulamatan – bah kheueh ubak ureueng yahudi meunan cit ubak ureueng nyang bukan yahudi." teungoh paulus geupeugah keuhai bila droe geuhnyan, festus laju jikuk, "gata ka pungoe paulus! ieleume gata nyang jai nyan ka jipeujeuet gata pungoe!" teuma paulus geujawueb, "ulon hana pungoe, nyang mulia. nariet nyang ulon peugah nyan beutoi dan jiteubiet lam pikeran nyang seuhah. baginda agripa keudroe geuteupeue that keuhai-hai nyan, nyang kheueh sabab jih ulon kujeuet meututoe dikeue baginda ngon troh trang. ulon yaken hana musapeue pih nibak hai-hainyan nyang gohlom geuteupeue le baginda, sabab mandum nyan hana teujadi nibak teupat-teupat nyang teusom. 27 nyang mulia baginda agripa, peue kheueh baginda neupateh peue nyang ka geupeugah le nabi-nabi? ulon pike baginda neupateh!" laju agripa geupeugah ubak paulus, "gata pike peumudah ulon jeuet keu ureueng kristen lam watee nyang paneuk nyoe?" "lam watee nyang paneuk atawa lam watee nyang panyang," jawueb paulus, "ulon meudoa ubak po teu allah mangat

baginda dan teungku-teungku mandum nyang neudeungoe ulon nibak uroenyoe hase jeuet lagee ulon – keucuali gari nyang lagee nyoe!" akhe jih baginda raja, gubunur dan bernike, dan mandum nyang laen nyang dong. oh ka lheueh na diluwa, awaknyan laju jimarit sabe keudroe-droe, "ureueng nyoe hana jipeubuet meusapeue pih nyang patot teuhukom ngon hukoman mate atawa teuhukom lam glab." laju agripa geupeugah ubak festus, "ureueng nyoe ka jeuet teupeuleuh, seukira jih ureueng nyoe hana jituntot peukara jih bak peungadalan kaisar." oh ka lheueh teucok keuputosan bahwa kamoe haroh meulayeue u italia, paulus ngan na meupadub droe ureueng teuhukoman nyang laen laju jijok ubak yulius, peuwira sipa-i roma nyang jiboh nan "resimen kaisar". kamoe laju meuek ateueh kapai nyang teuka nibak adramitium, oh lheueh nyan ngon kapai nyan laju kamoe beurangkat nyang ka siab meulayeue u peulabohan-peulabohan lam propinsi asia. aristarkus, sidroe ureueng makedonia nyang teuka nibak tesalonika, na cit meulayeue meusajan-sajan ngon kamoe. singoh nyan kamoe laju trok u sidon, paulus jipeusanaut ngon jroh that le yulius. gobnyan jibri idhin jak saweue rakan-rakan gobnyan mangat awaknyan hase jijok keu gobnyan peue-peue nyang geupeureuleuh. beudoh nibak teupat nyan laju kamoe meulayeue lom. le sabab angen nyang meulawan arah ngon kapai kamoe, kamoe meulayeue laju seutot bineh pante pulo siprus nyang bacut meuseuliseh nibak angen. oh lheueh nyan laju kamoe harong laot nyang meuhadah keue ngon kilikia dan pamfilia dan laju trok u mira lam nanggroe likia. nibak teupat nyan le peuwira nyan laju meuteume saboh kapai nyang teuka nibak aleksandria nyang keuneuk meulayeue u italia. dan le gobnyan laju jipinah kamoe lam kapai nyan. na padub uroe treb jih kamoe meulayeue mulet lumpah na, dan ngon aloh alah akhe jih kamoe trok ubak banda knidus. oh lheueh nyan, sabab angen teutab mantong brok, kamoe hana hase kamoe meulayeue ubak jurosan nyang phon. ngon lageenyan kamoe laju meulayeue u seultan pulo kreta rot tanjong salmone mangat nibak teupat nyan kamoe teuhinda nibak angen. ngon aloh alah kamoe meulayeue seutot bineh pante pulo nyan sampoe akhe jih kamoe trok bak saboh teupat nyang nan jih peulabohan indah, hana padub na jioh nibak banda lasa. bak watee nyan uroe raya peudame ureueng yahudi ka seulesoe. kamoe ka gadoh watee nyang jai that-that, ngon lagee nyan ka hana watee le kamoe meulayeue ngon aman. ngon sabab nyan le paulus laju geubri naseuhah lagee nyoe ubak awaknyan, "syedara-syedara, meunurot peundapat ulon, keubiet mupaloe that meunoye tanyoe tameulayeue laju. tanyoe teuma meuteume rugoe nyang raya that kon mantong nibak barang nyang tapeudieng lam kapai nyoe, teuma nyawong tanyoe pih hase teusuet." teuma le peuwira nyan leubeuh peucaya ubak nyang mat keumudo dan ubak kapiten kapai nyan nibak keu paulus. peulabohan nyang na inan beutoi hana get keu kapai-kapai nyang meusaoh inan watee musem leupie. ngon sabab nyan rab banmandum aneuek kapai nyan sipakat keumeu-

layeue lom sira teutinggi peulabohan nyan sabab awaknyan jimeue useuha beubagaih trok u feniks dan tinggai nibak teupat nyan lam watee musem sijuek nyan. feniks na kheueh saboh peulabohan di kreta nyang meuhadab u barat daya dan barat laot. bak wateenyan angen seulanat jipot leumoh lagoena. le aneuek kapai jipike ka jeuet jimeulayeue lom teuma. awaknyan laju jibeut saoh laju jimeulayeue banseutot bineh pante pulo kreta. teuma hana treb oh ltheueh nyan jiteuka teuk angen badee – nyan kheueh nyang teupeman angen timu laot – jipot teuga lumpah na nibak ateueh darat, laju jiheuntam ateueh kapai kamoe. ngon sababnyan hana mungken kapai kamoe jimeulayeue meulan arah ngon angen, teuma kamoe meunyeurah dan kamoe peubiyeu mantong kapai nyan anyot jiba le angen. kamoe meupadok bacut, watee kamoe trok blah u seulanat pulo kauda nyang ubit nyan. nibak teupat nyan ngon apoh apah meuhase kamoe cok sikoci kapai nyan. oh ka ltheueh sikoci nyan kamoe peuek ateueh kapai, kapai nyan keudroe teupeukong ngon cara teupeuguna talo ngon teuitak bansikeulileng kapai nyan. sabab teumakot kapai nyan sok bak anoe sirtis nyang deue, layeue teupeutreu dan oh ltheueh nyan teupeubiyeu mantong kapai nyan jiba le angen. angen hana ploh jiheuntam keudeuh keunoe, akhe jih oh singoh beungoh bubena asoe kapai teutiek lam laot. uroe-uroe nyang laen le aneuek kapai nyan jiboih teuma peukakaih-peukakaih kapai lam laot ngon jaroe awaknyan keudroe. meu uroe-uroe treb jih kamoe hana deuh kamoe ngieng mata uroe ngon bintang, dan angen teutab hana jiploh-ploh jipot keudeuh keunoe. akhe jih habeh kheueh harapan kamoe keuseulamat. na meupadub watee treb jih dumna awaknyan hana jiteume makheun. ngon lagee nyan paulus laju geujak dong dikeue awaknyan sira geupeugah lagee nyoe, "syedara-syedara! meunyo gata ka taseutot naseuhat ulon dan hana tameulayeue nibak kreta, tanyoe hana tarasa rusak ngon rugoe lageenyoe bagoe. 22 teuma jinoenyoe pih ulon lakee ngon meuharab that mangat gata beurayeuk ate. hana meusidroe pih lamkawan gata nyoe nyang mate; nyang gadoh nibak geutanyoe teuma kapai nyoe mantong. sabab beuklam malaikat allah nyang ulon seumah, na kheueh allah nyang po ulon nyoe, geujak ubak ulon. geupeugah le malaikat nyan, 'bek takot, paulus! sabab gata teuma tameuhadab ubak kaisar. dan ateueh keuet ate allah ateueh gata, banmandum ureueng nyang meulayeue meusajan gata teuma seulamat le sabab gata." ngon sabab nyan, syedara-syedara, bah kheueh gata beurayeuk ate! sabab ulon meuman ubak po teu allah bahwa banmandum teuma teujadi lagee nyang geupeugah ubak ulon. teuma singoh tanyoe teutiek bak pante saboh pulo." 27 bak malam nyang keu peuet blah kamoe mantong meuapong-apong lam laot adria. kira-kira bak teungoh malam aneuek kapai nyan teuras teungoh jipeurab bak pante. teuma le awaknyan laju jiulu talo nyang ka ji-ikat ngon batee guna keujiteupeu padub na lhok jih laot. rupari teupat nyan lhok jih rab peuet plohe metee. hana padub na treb teuma oh ltheueh nyan awaknyan ji-uko lom, laju jiteupeu laot nibak teupat nyan lhok jih rab lhee

ploh metee. awaknyan jitakat kapai shok bak batee kareueng, ngon lagee nyan awaknyan laju jipeutreu peuet boh saoh nyang na nibak bagian likot kapai, laju jimeuharab meunyo jeuet beubagaih-bagaih jijak. ngon cara seungab-seungab le aneuek kapai jikeuneuk plueng nibak kapai nyan. awaknyan laju jipeutreu sikoci pura-pura jikeuneuk peutreu saoh nyang na bak ulee kapai nyan. teuma le paulus laju geupeugah ubak peuwira kapai dan tantra-tantra nyang na lam kapai nyan, "meunyo aneuek kapai nyoe hana tinggai lam kapai, gata banmandum hana nyang seulamat." ngon sabab nyan le tantra-tantra nyan laju jikh talo sikoci nyan, ngon lagee nyan sikoci nyan laju anyot. bak watee gohlom jiteuka beungoh, paulus geuyue bak awaknyan mangat banmandum makheun. geupeugah le paulus, "ka peuet blah uroe treb jih gata banmandum tapreh-preh mantong lam keuadaan yo ngon teumakot dan hana tapajoh sapeue. ulon yue, makheun kheueh bacut. nyang lagee nyan jroh that keu gata, mangat gata teuga lom teuma. sabab gatabanmandum teuma seulamat hana kureueng meuseapeue pih." oh ka ltheueh geupeugah meunan paulus laju geucok ruti dan geulakee teurimong gaseh ubak tuhan dikeue awaknyan banmandum. oh ltheuehnyan gobnyan laju geubagi-bagi ruti nyan, dan laju jipajoh. dan awaknyan mandum ka jiteuka seumangand lom dan meusajan-sajan jimakheun. banmandum lam kapai nyan na dua reutoh tujoh plohe nam droe. oh ka ltheueh banmandum jimakheun bube seb, awaknyan laju jiboih lam laot banmandum gandom nyang na lam kapai nyan mangat kapai nyan meutamah phui. watee uroe ka beungoh, le aneuek kapai laju jingieng u darat, teuma awaknyan hana jiteupeu peue nar darat nyan. deuh jikalon saboh peulabohan ngon pante jih. dan meunyo hase awaknyan na meukeusut keuneuk peurab kapai jih nyan ubak peulabohan nyan. teuma talo-talo saoh laju jikh dan saoh-saoh nyan jipeubiyeu mantong lham lam laot. meunan cit le awaknyan laju jipeulheueh talo-talo nyang na teuitak bak keumudo. oh ltheueh nyan awaknyan laju jipeuek layeue nyang na dikeue kapai mangat angen jipot kapainyan u bineh pante. teuma kapai nyan laju sok lam anoe. bagian keue kapai nyan meuseubee hana jeuet le meugrak, meunan cit bagian likot kapai nyan ka hanco jipoh le umbak nyang teuga. le tantra-tantra nyang na lam kapai nyan kana niet jikeuneuk poh banmandum ureueng hukoman, sabab awaknyan teumakot pat jiteupeu teuma na nyang meulangue bak bineh oh ltheueh nyan jiplueng. teuma le peuwira nyan jitam niet awaknyan sabab jihnyan keuneuk peuseulamat paulus. le jihnyan laju jiyue bak mandum ureueng nyang jeuet meulangoe mangat jigrob leubeh ilee lam laot dan meulangoe bak bineh pante; meunan cit nyang laen jiseutot jilikot ngon cara jimumat bak papeuen-papeuen atawa bak kapai nyang ka beukah nyan. ngon cara lagee nyan kheueh kamoe banmandum seulamat trok bak bineh pante. oh ka ltheueh kamoe teungoh ngon seulamat, baro kheueh kamoe teupeu bahwa pulo nyan nan jih malta. ureueng pulo nyan keubiet that-that ramah keu kamoe. awaknyan jisambot kamoe banmandum ngon cara

get dan laju jipeukab apui keukamoe sabab ujeun ka jitreun bacut-bacut dan udara pih leupie lagoena. paulus laju geupeusapat kayee, laju geukeubah kayee nyang ka geupeusapat nyan ateuh apui hu. teungoh paulus geupeubuet nyan, laju jiteubiet saboh uleue, sabab keunong wab apui nyang seu-eum nyan, dan uleue nyan laju jikab bak jaroe gobnyan. watee jikalon le peunduduek pulo nyan uleue mantong meugantueng bak jaroe paulus, awaknyan laju jimarit sabe keudroe-droe, "ureueng nyoe pasti tukang nibak gob, sabab bah kheueh jih ka seumalat lam laot raya, dewi keuadelan hana geupeubiyeu ureueng nyoe udeb." teuma le paulus laju geutapih uleue nyan lam apui dan gobnyan hana teurasa saket meubacut pih. awaknyan jipike sikeujab teuk jaroe paulus jiteuka kumong dan mungken watee nyan cit gobnyan mate. teuma oh ka jipreh-preh na padub na treb dan hana sapeue-sapeue nyang teujadi ateuh paulus, pikeran awaknyan laju meu-ubah dan awaknyan jipike bahwa paulus nyan na kheueh dewa. hana padub na jioh nibak teumpat nyan na tanoh atra publius, peujabat nyang paleng rayeuk lam pulo nyan. ngon ate nyang jroh ureueng nyan jisambot kamoe nyang treb jih na lhee uroe. bak watee nyan ureueng syiek ureueng nyan teungoh saket, jiteuka deumam ngon ciret-ciret. paulus geujak kalon ureueng saket nyan sira geumeudoa geupeuduek jaroe geuh ateuh ureueng nyan, akhe jih ureueng saket nyan puleh. sabab keujadian nyan banmandum ureueng nyang saket nyang na lam pulo nyan jijak ubak paulus, dan awaknyan geupeu puleh. awaknyan laju jibri keukamoe hadiah nyang jai lagoena, dan watee kamoe keuneuk meulayeue, awaknyan laju jiba lam kapai banmandum nyang kamoe peureulee keubeukai watee kamoe jak lom. oh ka ltheueh na lhee buleuen treb jih disinan, kamoe tinggai pulo nyan sira kamoe ek kapai nyang teuka nibak aлександрия nyang watee museum sijuek jimeusaoh lam pulo nyan. kapai nyan jiboh lambang "dewa meukeumbeue kastor dan poluks". kamoe laju meusaoh bak banda sirakusa dan tinggai lam banda nyan lhee uroe treb jih. nibak teumpat nyan kamoe meulayeue lom seutot bineh pante akhe jih trok kamoe u banda regium. singoh nyan angen jiteuka nibak arah seultatan, ngon lagee nyan lam dua uroe kamoe laju trok u banda putioli. disinan kamoe laju meurumpok ngon napadub droe ureueng nyang ka meuiman ubak isa, dan ateuh undangan awaknyan kamoe tinggai ngon awaknyan nyang treb jih na sigoe aleuhat. oh ltheueh nyan laju kamoe jak u roma. syedara-syedara di roma nyang ka peucaya ubak isa jideungoe keuhai kamoe, akhe jih awaknyan jijak sampoe trok ubak pasai apius dan teumpat pioh lhee guna jijak sambot kamoe. watee paulus meurumpok ngon awaknyan, gobnyan laju geulakee teurimong gaseh ubak po teu allah dan ate gobnyan jeuet keutabah. watee ka trok u roma, paulus jeuet geutinggai sidroe sira jikawai le sidroe sidadu. oh ka ltheueh na lhee uroe, paulus laju geutawok tukoh-tukoh ureueng yahudi nyang na inan. dan oh ka ltheueh awaknyan meusapat, gobnyan laju geupeugah bak awaknyan, "syedara-syedara! ulon nyoe sapeue pih hana salah ateuh bansa geutanyoe,

meunan cit ngon adat keubiasaan nyang ka tateurimong nibak indatu geutanyoe hana lon iengkeue. teuma bah kheueh meunan ulon nyoe jidrob di yerusalem laju jijok ubak ureueng-ureueng roma. oh ka ltheueh peukara ulon nyoe jipareksa, awaknyan keuneuk peubeubaih ulon, sabab ulon nyoe hana lon peubuet meubacut pih nyang salah nyan jeuet ulon nyoe teupeurhot bak hukoman mate. teuma sabab ureueng-ureueng yahudi jilawan ulon, ulon teupaksa lon tuntot peukara lon nyoe jipeusidang nibak peungadelan kaisar roma. ulon peubuet lagee nyan kon ulon nyoe na barang sapeue-sapeue lon jak gadu ateuh bansa ulon keudroe. dan nyang kheueh sabab jih ulon lakee meurumpok ngon gatanyoe banmandum guna lon marit-marit ngon gata; sabab ulon jiboh beuleunggu, le sabab peuseulamat nyang jiharab-harab le bansa israel." laju awaknyan jipeugah bak gobnyan, "kamoe gohlom kamoe teurimong meusaboh surat pih nibak yudea keuhai droeneueh. dan hana meusidroe syedara pih nyang teuka nibak sideh jijakba haba keunoe keuhai droeneueh atawa jipeugah nyang brok-brok keuhai droeneueh. 22 teuma kamoe meuheuet cit keuneuk deungoe keuhai peue nyang droeneueh peucaya nyan, sabab kamoe mandum ka kamoe deungoe keuhai ureueng nyang hina ajaran nyang droeneueh anut nyan." teuma awaknyan dan paulus laju jimeurok pakat uroe peu awaknyan ngon paulus meurumpok lom teuma, nibak uroe nyan jai that-that ureueng nyang teuka bak teumpat paulus tinggai. phon beungoh trok an seupot paulus geupeu trang dan geupeugah haba keuhai pakriban allah geumat peurintah sibagoe raja. ngon geukuteb ayat-ayat nyang lam kitab nabi musa dan kitab nabi-nabi, paulus geu-useuha geuba awaknyan beuji meuiman ubak isa. na nyang pateh peue nyang geupeugah le paulus nyan, teuma na cit nyang hana pateh. ngon peundirian nyang hana saban meulawan sidroe ngon nyang laen awaknyan laju jitinggai teumpat nyan, oh ka ltheueh paulus geupeugah nyang lagee nyoe ubak awaknyan, "keubiet beutoi that peue nyang geupeugah le roh allah meulalu nabi yesaya ubak indatu gata! allah meufureuman, 'jak kheueh peugah ubak bansa nyoe: gata hana putoh tadeungoe, teuma hana tatumphom; gata teuma sabe takalon teuma hana tateupeue peue nyang teuma teujadi. 27 sabab pikeran bansa nyoe ka jeuet keu tumpoi, geulinyueng awaknyan ka jeuet keutulo, dan mata awaknyan ka geupeupet. nyoe hase jeuet mangat mata awaknyan bek deuh jimeuingeng, punyueng awaknyan bek jimeudeungoe, pikeran awaknyan bek jimuphom, dan bek jigisa ubak ulon, laju ulon kupeupuleh awaknyan.'" akhe jih geupeugah lom le paulus, "syedara banmandum haroh tateupeue bahwa haba keuhai seulamat nyang teuka nibak po teu allah jinoenyoe ka jipeusampoe ubak bansa-bansa laen nyang kon ureueng yahudi. awaknyan jiseutot haba nyan!" oh ka ltheueh paulus geupeugah lagee nyan, ureueng-ureueng yahudi nyan laju jitinggai teumpat nyan sira jimeudakwa sabe keudroe-droe. dua thon treb jih paulus tinggai di roma, bak rumoh nyang geusiwa keudroe. gobnyan galak that teurimong mandum ureueng nyang saweue gobnyan. dan

ngon beuhe jih gobnyan geupeugah ubak awaknyan
pakriban allah geumat peurintah sibagoe raja dan
keuhai tuhan isa. paulus geupeubuet nyan ngon
beubaih dan hana nyang tam.

nibak awaiphon, sigohlom donya teupeujeuet, feureuman ka na. feureuman nyan na meusajan po teu allah dan feureuman nyan saban ngon allah. yoh awai kon geuhnyan na meusajan ngon allah. banmandum geupeujeuet meulalu gobnyan, dan nibak banmandum nyang na, hana meusapeue nyang geupeujeuet meunyoeng hana meusajan gobnyan. feureuman nyan pangkai udeb, dan udeb teubri trang keu manusia. trang nyan peungeh lam seupot, dan seupot nyan hana hase jipeulon trang. teuka kheueh sidroe ureueng nyang geu-utus le allah, nabi yahya nan geuh. gobnyan teuka sira geupeugah keuhai trang nyan, mangat banmandum ureueng jimeuiman. gobnyan keudroe bukan trang nyan, gobnyan teuma geujak peugah keuhai trang nyan. trang seujati nyang geupeungeuh banmandum umat manusia, teuka lam donya. feureuman na lam donya, donya geupeujeuet meulalu gobnyan, teuma le donya hana jituri keu gobnyan. gobnyan teuka ubak nanggro geuh keudroe, teuma le bansa gobnyan hana jitem teurimong geuh nyan. teuma na cit ureueng nyang teurimong gobnyan, dan jimeuiman bak gobnyan; awaknyan geubri hak jeuet keu aneuek allah, nyang lahe bukan nibak manusia, sabab udeb baro nyan nibak po teu allah asai jih. feureuman ka jeuet keu manusia, gobnyan tinggai diteungoh-teungoh geutanyoe, dan tanyoe ka takalon keuangongan gobnyan. keuangongan nyan geuteurimong sibagoe aneuek tunggai bapak. rot gobnyan tanyoe takalon allah dan geunaseh gobnyan ateuhe geutanyoe. yahya teuka sibagoe saksi gobnyan, gobnyan nyang peusampoe: "nyoe kheueh gobnyan nyang ulon peugah: gobnyan teuma teuka leubeh dudoe nibak ulon. teuma gobnyan leubeh rayeuk nibak ulon, sabab sigohlom ulon na, gobnyan ka leubeh awai na." gobnyan peunoh ngan geunaseh; hana putoh-putoh, gobnyan geubri beureukat ateuhe geutanyoe. hukum tuhan tateurimong rot nabi musa. teuma geunaseh dan keuseutiaan allah geupeugah rot isa. hana nyang ka lheureh jikalon allah, seulaen aneuek tunggai bapak, nyang saban ngon bapak dan krab lumpah na nibak gobnyan. gobnyan kheueh nyang peugah bapak ubak geutanyoe. le peungusa yahudi di yerusalem laju jiyue bak imeum-imeum dan ureueng-ureueng lewi mangat jijak meurumpok ngon nabi yahya dan jitanyong bak gobnyan, "droeneuh nyoe soe?" nabi nabi yahya nyan geukheun troh trang bahwa, "ulon bukan raja peuseulamat." "meunyoeng meunan, droeneuh nyoe soe?" jitanyong lom le awaknyan. "peu kheueh droeneuh ilyas?" "bukan," jaweub nabi yahya. "peu kheueh droeneuh sang nabi?" jitanyong lom le awaknyan. "kon cit," seutot nabi yahya. "meunyoeng meunan, peugah kheueh bak kamoe soe droeneuh nyoe," kheun awaknyan, "mangat kamoe hase kamoe jaweub bak ureueng-ureueng nyang yue kamoe. peuhe kheun droeneuh keuhai droe teuh keudroe?" nabi yahya geujaweub, "ulon kheueh jihnyan nyang ka lheureh geupeugah le nabi yesaya: 'ureueng nyang meuhoi-meuhoi lam padang pasi: peurata kheueh jalan keu tuhan.' " ureueng-ureueng nyang geu-utus le ureueng farisi laju jitanyong, "meunyoeng droeneuh bukan raja peuseulamat, bukan teuma ilyas, meunan cit bukan sang nabi, keupeue gata pumano gob?"

geujaweub le nabi yahya, "ulon pumano ngon ie. teuma lamkawan gata na nyang hana gata turi. ureueng nyan teuka leubeh dudoe nibak ulon, teuma keu lon ploih talo sipatu gobnyan mantong hana hak ulon peubuet." banmandum nyan teujadi di betania, siblahi u timu krueng yordan bak teupat nabi yahya pumano. oh singoh beungoh nyang, yahya geukalon isa geujak bak gobnyan. laju geupeugah le nabi yahya, "ngieng, nyang kheueh aneuek bubiri allah nyang sampoh desya donya. gobnyan kheueh nyang ulon peugah teuma teuka leubeh dudoe nibak ulon, sabab, sigohlom ulon lahe gobnyan ka na. sigohlom nyan, ulon hana kuteupeue soe ureueng nyan. padahai ulon teuka lon pumano ngon ie, mangat bansa israel jituri gobnyan." meunan cit le isa geumeusaksi lagee nyoe, "ulon kalon roh allah geutreon lagee cicem mirah pati laju tinggai ateuhe gobnyan. watee nyan gohlohm lon tusoe soe gobnyan. teuma allah nyang yue bak ulon mangat lon pumano ngon ie dan ka geupeugah bak ulon, 'meunyoeng gata takalon roh allah geutreon, laju tinggai ateuhe sidroe-droe ureueng, gobnyan nyang kheueh nyang teuma pumano manusia ngon roh allah.' ulon ka lheureh lon kalon keudroe hainyan," kheun nabi yahya, "dan ulon meusaksi bahwa gobnyan kheueh aneuek allah." oh singoh beungoh nabi yahya na lom bak teupat nyan ngon dua droe murit gobnyan. watee jikalon isa lewat disinan, laju jipeugah, "ngieng! nyang kheueh aneuek bubiri allah." bandua droe murit nabi yahya jideungoe peuhe nyang jipeugah nyan, dan laju jijak seutot isa. isa geupaleng u likot, laju geukalon awaknyan teungoh jiseutot gobnyan. laju geutanyong, "soe nyang gata mita?" jaweub awaknyan, "rabi, dipat kheueh rabi tinggai?" (haba 'rabi' makna jih na kheueh guree.) "jak keunoe gata ngieng keudroe," kheun isa. awaknyan laju jijak ngon gobnyan dan laju deuh jikalon pat gobnyan tinggai. watee nyan poh peuet seupot. uroenyon awaknyan tinggai ngon gobnyan. sidroe lamkawan ureueng dua droe nyan nyang ka jideungoe peuhe nyang geupeugah le nabi yahya dan oh lheureh nyan jiseutot isa, na kheueh andreas, syedara simon petrus. bagai that-that andreas jijak mita simon, syedara jihnyan, dan laju jipeugah bak jih nyan, "kamoe ka lheureh murumpok ngon mesias!" (mesias saban ngon almaseh, nyang makna jih na kheueh: raja peuseulamat.) andreas laju ji intat simon ubak isa. isa laju geupandang ateuhe simon, oh lheurehnyan laju geupeugah, "gata simon, aneuek yona, gata teuma teuhoi kefas." (kefas saban ngon petrus, nyang makna jih: haba ngunabatee.) oh singoh beungoh isa geucok hana sinutoh keu geujak u galilea. gobnyan laju meurumpok ngon filipus, dan geupeugah bak ureueng nyan, "jak keunoe seutot ulon!" filipus asai jih nibak betsaida, na kheueh teupat tinggai andreas dan petrus. filipus meurumpok ngon natanael laju jipeugah bak ureueng nyan, "kamoe ka meurumpok ngon ureueng nyang geupeugah le nabi musa lam kitab hukum allah, dan nyang ka geupeusampoe le nabi-nabi. gobnyan na kheueh isa nibak nazaret, aneuek yusuf." teuma natanael jijaweub, "peu kheueh mungken sapeue-sapeue nyang geut teuka jih nibak nazaret?" "jak keunoe, ngieng keudroe," jaweub filipus. isa geukalon natanael teungoh teuka laju geu-

peugah bak jihnyan, "kalon, nyan ureueng israel seujati, hana nyang peuleusu nibak jihnyan." "pakriban bapak jeuet neuturi ulon?" jityanyong le natanael bak isa. geujaweueb le isa, "sigohlom filipus jitawok gata, ulon ka ltheuh ulon ngieng gata na dimiyueb bak ara nyan." "bapak guree," kheun le natanael, "bapak na kheueh aneuek allah! bapak kheueh raja bansa israel!" geupeugah le isa, "gata tapateh, sabab ulon peugah bahwa ulon ka ltheuh lon kalon gata na dimiyueb bak ara nyan? hai-hai nyang jioh leubeh rayeuk nibak nyan teuma gata kalon!" kheun isa lom, "keubiet, peucaya kheueh, gata teuma takalon langet teubuka, dan malaikat-malaikat allah geuek treuen bak aneuek manusia." dua uroe oh ltheuh nyan na khanuri meukawen di banda kana galilea, dan mak isa na disinan. isa ngon murit-murit gobnyan na cit jiundang nibak khanuri nyan. watee ie anggo ka habeh, mak isa geupeugah ubak aneuek geuhnyan, "awaknyan ka habeh ie anggo." geujaweueb le isa, "mak, bek neuyue ulon. gohlorok trok watee jih ulon peugah soe droe ulon nyoe." teuma mak isa geupeugah ubak peulayan-peulayan nyang na inan, "peubuet mantong peue nyang jipeugah ubak gata." nibak teumpang nyan na nam boh guci nyang ka teukeubah sibagoe teumpang seumeu rhahe meunurot adat yahudi. guci-gucinyan maseng-maseng asoe jih kira-kira sireutoh aree. isa laju geupeugah ubak peulayan-peulayan nyan, "pasoe kheueh laju mandum guci nyan ngon ie," dan awaknyan laju jipasoe lagee nyang geupeurintah le isa nyan sampoe peunoh. laju isa geupeugah ubak awaknyan, "jinoenyeu cok laju bacut ie nyan dan gata ba laju ubak peumimpin khanuri." awaknyan laju jiba ie nyan ubak peumimpin khanuri, le peumimpin khanurinyan laju jirasa bacut ie nyang ka meu-ubah jeuet keu ie anggo. (gobnyan hana geuteupeue pane teuka jih ie anggo nyan, teuma peulayan-peulayan nyang leng ie nyan mantong nyang teupeu.) teuma le peumimpin khanurinyan laju geupeurab ubak linto baro, laju geupeugah ubak teungku linto nyan, "lazem jih ureueng geuhidang anggo nyan paleng get leubeh ilee, oh ltheuh nyan baro kheueh ie anggo biasa. teuma digata takeubah ie anggo nyang paleng get sampoe bak saatnyoe!" nyan kheueh buet ajaeb nyang phon that geupeuleumah le isa. gobnyan geupeubuetnyan di kana di galilea. deungon tanda nyan lageenyan gobnyan ka geutunyok keuagongan gobnyan. teuma le murit-murit gobnyan laju jimeuiman ubak gobnyan. oh ka ltheuh nyan isa laju geujak u kapernaum meusajan ngon ma gobnyan, syedara-syedara gobnyan dan murit-murit geuh. awaknyan tinggai disinan na padub uroe treb jih. watee uroe raya paskah yahudi ka to, isa laju geujak u yerusalem. di rumah ibadah di yerusalem nyan gobnyan laju meurumpok ngon ureueng-ureueng nyang teungoh peubloe leumo, bubiri dan cicem mirah pati; meunan cit ngon ureueng-ureueng tuka peng teungoh duek bak teumpang nyan. isa laju geucok talo geupeugat peunyuenet ngon peunyuenet nyan geuuse mandum bubena beulatang nyan, bah kheueh bubiri meunan cit ngon leumo, nibak lam rumah ibadah. meunan cit ngon meuja-meuja ureueng tuka peng habeh geubalek sampoe peng-peng nyang

na ateuh meuja nyan habeh meusipreuk bansaboh nyan. oh ltheuhnyan laju geupeugah bak ureueng nyang peubloe cicem mirah pati, "beuot banmandum nyang na nibak teumpang nyoe. bek gata peujeuet baet bapak ulon keuteumpang meukat!" teuma le murit-murit gobnyan laju teuingat keu ayat alkitab nyang na teutuleh lagee nyoe, "cinta ulon keu baet droeneueh ya allah, jipeututong ate ulon." le peunguasa yahudi laju jilawan isa, jipeugah le peunguasa nyan lageenyeu, "cuba peugat buet nyang ajaeb paih lagee tanda bak kamoe bahwa gata na hak tapeubuet nyang lagee nyoe." geujaweueb le isa, "baetnyoe, lam lthee uroe ulon peudong lom teuma." laju jipeugah le awaknyan, "peuet ploh nam thon watee jih keu teupeugot baet ibadah nyoe. dan gata keuneuk peudong lom lam tempo lthee uroe?" teuma baet ibadah nyang geumeukeusut le isa na kheueh tuboh gobnyan keudroe. teuma oh ltheuh nyan, oh ka ltheuh isa geupeubeudoh lam kawan ureueng mate, teuingat kheueh le murit-murit gobnyan bahwa hainyan ka ltheuh geupeugah. teuma jipateh kheueh le awaknyan ngon peue nyang ka teutuleh lam alkitab dan ubak peue nyang ka geupeugah le isa. teungoh isa mantong na di yerusalem bak watee peurayaan paskah, rame that-that ureueng nyang meuiman ubak gobnyan sabab buet-buet ajaeb nyang ka geupeubuet le gobnyan. teuma isa keudroe hana geupateh keu awaknyan, sabab gobnyan geuturi keu mandum manusia. hana peureulee na ureueng jijak bri keuteurangan ubak gobnyan keuhai soe mantong, sabab gobnyan keudroe geuteupeue peue nyang na lam ate manusia. na sidroe tukoh agama lamkawan ureueng farisi nyang nan geuh nikodemus. bak simalam nikodemus nyan geujak bak isa sira geupeugah lageenyeu, "bapak guree, kamoe teupeu droeneueh geu utus le po teu allah. sabab hana meusidroe pih nyang hase jipeubuet buet lagee nyang bak peugat, meunyeu bukon po teu allah hana meusajan gobnyan." geupeugah le isa, "peucaya kheueh, hana meusidroe pih nyang jeuet keu anggota umat allah, meunyeu jihnyan hana teupeulahe lom teuma." "panena mungken ureueng rayeuk teupeulahe lom teuma," kheun nikodemus bak isa, "peu kheueh mungken ureueng nyan jitamong lom lam pruet ma jih oh ltheuh nyan teupeulahe lom?" geujaweueb le isa, "keubiet beutoi haba ulon nyoe: meunyeu manusia hana teupeulahe nibak ie dan nibak roh allah, ureueng nyan hana hase jeuet keu anggota umat po teu allah. manusia seucara jasmani geupeu lahe le ureueng tuha, teuma seucara rohani geupeu lahe le roh allah. bek hireuen meunyeu ulon peugah: gata banmandum haroh teupeulahe lom teuma. angen jipot ho nyang jigalak; geutanyoe tadeungoe su angen nyan, teuma hana tateupeue rot pat jiteuka dan ho jijak. meunan cit teuma ngon ureueng nyang geupeu lahe le roh allah." "pakriban hainyan hase teujadi?" geutanyong le nikodemus. geujaweueb le isa, "gata guree di israel, ek kheueh hainyan hana gata teupeue? peucaya kheueh: kamoe meututoenyeu keuhai peue nyang kamoe teupeue, dan kamoe meusaksi keuhai peue nyang ka kamoe kalon; teuma gatanyeu hana tatem teumirong keusaksian kamoe. gata hana tapateh meunyeu ulon

calitra bak gata keuhai-hai nyang na lam donya nyoe; pakriban gata hase tapateh, meunyoel ulon peugah bak gata keuhai syeuruga? hana meusidroe pih nyang ka ltheueh jiek lam syeuruga, seulaen gobnyan nyang ka geutron lam donya, gobnyan na ktheueh aneuek manusia. saban lagee nabi musa geupeuek uleue teu-maga ateuheh sibak kayee lam padang pasi, meunan cit deungon aneuek manusia haroh teupeuek teuma, mangat banmandum ureueng nyang meuiman keu gobnyan meuteume udeb seujati dan keukai." sabab po teu allah lumpah that geugaseh keu manusia lam donya nyoe, nyang ktheueh gobnyan geubri aneuek gobnyan nyang tunggai, mangat tieb-tieb ureueng nyang meuiman ubak gobnyan hana binasa, teuma meuteume udeb seujati dan keukai. sabab allah geu kirem aneuek geuhnyan bukan keu jeuet keu hakem donya nyoe, teuma keu geupeu seulam. ureueng nyang meuiman bak gobnyan hana teuhukom. teuma ureueng nyang hana meuiman ka geuhukom le po teu allah, sabab jihnyan hana jimeuiman ubak aneuek allah nyang tunggai. gobnyan jilakee ngon dasai jih hai nyang lagee nyoe: trang nyan ka teuka lam donya, teuma manusia leubeh galak keu seupot nibak trang, sabab buet awaknyan jeuhet. soemantong ureueng nyang jipeubuet jeuhet, ureueng nyan banci keu trang; ureueng nyan hana jitem teuka ubak trang, mangat buet jih nyang jeuhet hana deuh teukalon. teuma ureueng nyang peubuet keuheundak po teu allah, teuka ubak trang mangat jeuet saheh bahwa peue nyang jipeubuet nyan na ktheueh meunurot keuheundak po teu allah. 22 oh ka ltheuehnyan isa dan murit-murit gobnyan geujak u yudea. gobnyan tinggai disinan na padub watee treb jih ngon awaknyan dan geupumano. nibak watee nyan nabi yahya gohlom jipeutamong lam glab. gobnyan geupumano gob di ainon, hana padub na jioh ngon salim, sabab bak teupat nyan jai that ie. ureueng rame jijak bak gobnyan, dan gobnyan laju geupumano awaknyan. na meupadubdroe murit nabi yahya jimeudakwa ngon ureueng yahudi keuhai atoran gleh. awaknyan laju jijak bak nabi yahya, dan jipeugah lagee nyoe, "pak guree, peu ktheueh bapak mantong neuingat ureueng nyang meusajan ngon bapak di meuran-deh krueng yordan nyan, nyang bapak tunyok bak kamoe yoh masa ilee? gobnyan bak saat teungoh geupumano cit, dan banmandum ureueng jijak bak gobnyan!" 27 geujaweueb le nabi yahya, "manusia hana jiteume sapeue meunyoel hana geubri le allah keu jihnyan. gata keudroe ka tadeungoe ulon peugah, 'ulon bukan raja peuseulam. ulon geu-utus leubeh awai nibak gobnyan.' dara baro na ktheueh atra linto baro. rakan linto baro nyan teuma jidong bak bineh sira jideungoe, dan jihnyan galak meunyoel jideungoe su teungku linto. meunan cit teuma ngon ulon. bak saatnyoe ulon galak lumpah na. gobnyan ktheueh paleng peunteng, dan ulon maken kureueng peunteng." nyang teuka nibak ateuheh leubeh nibak peue mantong. nyang teuka nibak lam donya jita-mong lam kawom ureueng donya, dan jimeututoe keuhai-hai nyang na hubongan ngon donya. gobnyan nyang teuka nibak ateuheh leubeh nibak peue mantong nyang na. gobnyan geumeututoe keuhai nyang ka gobnyan deungoe, teuma hana meusidroe

pih nyang jitem pateh ateuheh peue nyang ka geupeu saksi nyan. ureueng nyang meuiman nibak keusaksian gobnyan nyan, laju jipateh bahwa allah nyan na ktheueh beutoi. sabab ureueng nyang geu-utus le po teu allah jipeusampoe tutoe haba nyang teuka bak allah, sabab roh allah ka geubri bak gobnyan sipeunoh jih. bapak geugaseh keu aneuek geuh, dan ka geuseurah banmandum kuasa bak gobnyan. ureueng nyang meuiman bak aneuek nyan teuma meuteume udeb seujati dan keukai. teuma ureueng nyang hana taat keu aneuek nyan ureueng nyan hana meuteume udeb. jihnyan geuhukom le po teu allah siumu masa. ureueng-ureueng farisi jideungoe bahwa isa leubeh jai geupumano ureueng nibak nabi yahya. (nyang sibeuna jih isa keudroe hana geupumano le murit-murit gobnyan.) watee isa geuteupeue bahwa ureueng-ureueng farisi ka jideungoe hai nyan, gobnyan geutinggai yudea laju geugisa u galilea. bak watee geugisa nyan gobnyan haroh geujak rot samaria. teuma trok laju isa bak saboh banda di samaria nyan nan banda nyan sikhar, hana padub na jioh nibak tanoh nyang yoh ilee geubri le nabi yakub keu aneuek gobnyan nabi yusuf. disinan na meuteume mon nabi yakub. isa hek that-that sabab bak geujak nyan, sababnyan ktheueh gobnyan geuduek bak bineh mon. wateanyan kira-kira poh dua blaih uroe. dan murit-murit isa ka geujak u banda keu jijak bloe peunajoh. oh ltheueh nyan na sidroe ureueng inong samaria teuka bak mon nyan keu jikak crong ie. isa geupeugah bak inong nyan, "mak, peu ktheueh jeuet lon lakee jieb ie?" jijaweueb le ureueng inong samaria nyan, "teungku ureueng yahudi, di ulon nyoe ureueng samaria; pakon teungku lakee jieb ie bak ulon?" (sabab ureueng-ureueng yahudi hana hubongan ngon ureueng samaria.) geujaweueb le isa, "meunyoel droeneueh neuteupeue meuneubri allah dan soe nyang meulakee jieb ie bak droeneueh, pasti droeneueh keudroe nyang lakee jieb ie bak ureueng nyan, dan gobnyan teuma geubri keu droeneueh ie udeb." ktheun ureueng inong nyan, "teungku hana meutima, dan mon nyoe lhok lumpah na. dipat teungku meuteume ie udeb? nabi yakub, bapak indatu kamoe, geubri bak kamoe mon nyoe. gobnyan keudroe nyang cok ie mon nibak teupat nyoe; meunan cit teuma ngon aneuek-aneuek gobnyan dan beulatang peulara gobnyan. peue ktheueh teungku pike teungku leubeh rayeuk nibak nabi yakub?" "ureueng nyang jieb ie nyoe teuma jiteuka glaih lom," geupeugah le isa, "teuma ureueng nyang jijieb ie nyang teuma ulon bri, ureueng nyan hana teuma glaih le siumu masa. sabab ie nyang ulon bri nyan jeuet keu mata ie lam tuboh ureueng nyan nyang jiteubiet uluwa dan teubri bak ureueng nyan udeb seujati dan keukai." ktheun ureueng inong nyan, "teungku, neubri ktheueh keu ulon ie nyan, mangat ulon hana glaih le; dan hana peureulee le lon riwang keunoe keu lon jak crong ie." "jak ktheueh, tawok lakoe droeneueh, dan gisa ktheueh keunoe," ktheun isa. "ulon hana meulakoe," jaweueb inong nyan. "keubiet beutoi lagee ktheun droeneueh," geupeugah le isa. "sabab droeneueh ka tameukawen limong go, dan ureueng nyang udeb meusajan ngon droeneueh bak saat nyoe bukan lakoe droeneueh" "jinoenyoe baro ktheueh lon teupeue bahwa te-

ungku sidroe nabi," jipeugah le inong nyan. in-
datu kamoe geuseumah allah bak buket nyoe, teuma
bansa teungku jipeugah bahwa di yerusalem man-
tong kheueh teupat ureueng jiseumah allah." "peu-
caya kheueh," kheun isa bak ureueng nyan, "bak saboh
watee manusia teuma jiseumah bapak, hana le ni-
bak buket nyoe, dan bukon teuma di yerusalem. 22
droeneueh ureueng samaria neuseumah nyang hana
neuturi, seudangkan kamoe ureueng yahudi kamoe
seumah gobnyan nyang kamoe turi, sabab keuseu-
lamatan teuka nibak ureueng yahudi. teuma wa-
tee jih keubiet teuka, ka teuka, bahwa ngon kuasa
roh allah manusia teuma jiseumah bapak sibagoe al-
lah nyang beutoi nyang geuharab le bapak. sabab
allah nyan roh, teuma ngon kuasa roh allah manu-
sia hase jiseumah bapak lagee toh gobnyan na. ure-
ueng inong nyan jipeugah bak isa, "ulon kuteupeue
raja peuseulamat (nyang teupeugah almaseh) teuma
teuka. meunyo gobnyan teuka, gobnyan teuma geu-
peugah bak geutanyoe." "ulon kheueh nyan," jaweueb
isa, "ulon nyang saat nyoe teungoh meututoe ngon
droeneueh." 27 bak watee murit-murit isa ka geugisa.
awaknyan hireuen watee jikalon isa geupeugah haba
ngon sidroe ureueng inong. teuma hana meusidroe
pih lamkawan awaknyan nyang jiteumanyong bak
inong nyan, "peue nyang mak peureulee?" atawa
nyang teumanyong bak isa, "pakon bapak neumeu-
tutoe ngon inong nyan?" dan ureueng nyan laju jit-
tinggai teupat nyan dan laju jiplung lam banda
oh trok keudeh laju jipeugah bak ureueng-ureueng
nyang na lam banda nyan, "jak takalon ureueng
nyang peugah bak ulon peue-peue mantong nyang
ka ltheueh ulon peubuet. peue kheueh mungken gob-
nyan raja peuseulamat?" dan ureueng nyan pih laju
jitinggai banda jihnyan jijak laju ubak isa. bak watee
nyan murit-murit isa geupakat gobnyan mangat isa
geutem makheun, "bapak guree," kheun awaknyan,
"neumakheun laju." teuma geujaweueb le isa, "na peu-
najoh bak ulon, nyang hana gata teupeue." dan murit-
murit gobnyan laju jiteumanyong sabe keudroe-droe,
"peu kheueh ureueng laen nyang ba peunajoh keu
gobnyan?" laju geupeugah le isa, "peunajoh ulon na
kheueh teuseutot keuheundak gobnyan nyang utus
ulon, dan teupeuseuleusoe buet nyang ka geujok bak
ulon. gatanyoe tapeugah, 'peuet buleuen teuk musem
mupot.' teuma ulon peugah bak gata: gieng lam
blang-blang nyang kuneng pade, ka siab keu teupot!
ureueng nyang mupot ka jipeuphon teurimong upah
jih dan jipeusapat hase keu udeb nyang seujati dan
keukai. teuma nyang teumabu dan ureueng nyang
mupot jeuet udeb mumangat-mangat ngon gobnyan.
pribasa nyoe beutoi cit, 'nyang sidroe tukang pula,
dan nyang laen nyang pot.' ulon yue bak gata ta-
jak mupot u blang nyang hana gata peubuet; ureueng
laen ka jimubuet disinan, dan gata tateurimong laba
nibak buet awaknyan." jai that-that ureueng samaria
peunduduek banda nyan meuiman bak isa, sabab
ureueng inong nyan jipeugah, 'gobnyan geupeugah
bak ulon peue-peue mantong nyang ka ltheueh ulon
peubuet.' teuma, watee ureueng-ureueng samaria
nyan meurmupok ngon isa, awaknyan jilakee ngon
meuharab that mangat gobnyan geutem tinggai ngon
awaknyan. teuma isa tinggai bak teupat nyan dua

uroe treb jih. oh ltheuehnyan leubeuh jai lom ure-
ueng nyang meuiman bak isa sabab peue nyang ge-
upurunoe keudroe bak awaknyan. awaknyan jipeu-
gah bak ureueng inong nyan, "kamoe ka kamoe
meuiman nibak saat nyoe, kon le sabab peue nyang
ka gata peugah bak kamoe, sabab kamoe keudroe
pih ka kamoe deungoe gobnyan, dan kamoe teu-
peue bahwa gobnyan na kheueh nyang peuseula-
mat donya." oh ka ltheueh dua uroe tinggai di sikhar,
isa geujak teuma u galilea. isa keudroe ka geupeu-
gah, "sidroe nabi hana jihoreumat di nangroe jih
keudroe." teuma watee gobnyan ka trok u galilea,
ureueng-ureueng nyang na disinan jisambot gobnyan
ngon galak ate, sabab awaknyan na di yerusalem wa-
tee uroe raya paskah, dan ka jikalon mandum nyang
geupeubuet le isa. oh ltheuehnyan isa geugisa lom
u kana di galilea, bak teupat gobnyan ka ltheueh
geu-ubah ie jeuet keu ie anggo. lam banda nyan
na sidroe peugawee peumeurintah, aneuek ureueng
nyan teungoh saket brat di kapernaum. watee ure-
ueng nyan jideungoe bahwa isa ka teuka u galilea
nibak yudea, ureueng nyan laju jijak bak isa dan ji-
lakee gobnyan beugeutem jak u kapernaum mangat
geutem peupuleh aneuek gobnyan nyang karab mate.
isa geupeugah bak peugawee peumeurintah nyan,
"meunyo gatanyoe hana takalon buet-buet nyang
ajaeb, gata hana tapateh." "teungku," kheun peu-
gawee peumeurintah nyan, "bubagaih kheueh neu-
jak sigohlom aneuek ulon mate." geupeugah le isa
bak ureueng nyan, "jakwoe kheueh laju, aneuek gata
ka puleh." ureueng nyan jipateh peue nyang geu-
peugah le isa, laju ureueng nyan jijak. bak teun-
goh rot ueh, peulayan-peulayan ureueng nyan jijak
bak ureueng nyan sira jipeugah lageenyoe, "aneuek
teungku ka puleh." laju peugawee nyan jityanyong
bak awaknyan poh padub aneuek nyan phon puleh.
awaknyan jijaweueb, "kira-kira poh sa cot uroe deu-
mam jih gadoh." laju ayah aneuek nyan teuingat peue
nyang ka geupeugah le isa bunoe, "aneuek gata puleh."
teuma peugaweenyan meunan cit banmandum keu-
luwarga jih meuiman ubak isa. nyan kheueh buet
ajaeb nyang keudua nyang geupeubuet le isa di galilea
oh ka ltheueh gobnyan teuka nibak yudea. oh ltheueh
nyan na peurayaan yahudi, le sabab nyan isa geujak u
yerusalem. di yerusalem rab "pintoe bubiri" na saboh
kulam, nyang lam gata ibrani na jih betesda. ni-
bak teupat nyan na limong boh seuramoe. nibak
seuramoe-seuramoe nyan jai that-that ureueng saket
nyang teu-eh-eh; na nyang buta, na nyang capiek, dan
na teuma nyang lapee. awaknyan banmandum jipreh
ie lam kulam nyan meugeulumbang. sabab na wa-
tee jih malaikat tuhan geutleun lam kulam nyan dan
geuyok-yok ie lam kulam nyan. dan ureueng saket
nyang phon that treun lam kulam nyan watee ie nyan
meugeulumbang teuma puleh nibak mandum peun-
yakot nyang na nibak ureueng nyan. nibak teupat
nyan na sidroe ureueng agam nyang ka keunong saket
lhee ploh lapen thon treb jih. isa geukalon ure-
ueng nyan teu-eh nibak teupat nyan, dan geuteu-
peue bahwa ureueng nyan ka treb that saket; le sabab
nyan isa geutanyong bak ureueng nyan, "peu kheueh
gatem gata beu puleh?" ureueng saket nyan laju ji-
jaweueb, "wahe bapak lon, hana ureueng nyang na

nibak teupnat nyoe nyang jitem peutamong lontuan lam kulam nyan watee ie nyan meugeulumbang. dan watee lontuan teungoh lon jak lam kulam, ureueng laen ka awai leubeh ilee." teuma isa laju geupeugah bak ureueng nyan, "beudoh kheueh, dan gulong laju tika gata dan gata jak kheueh." bak watee nyan cit teuma ureueng nyan puleh. ureueng nyan jigulong tika jih laju jijak. hainyan na jih jijak uroe sabat. le sababnyan duma peunguasa yahudi laju jipeugah bak ureueng nyan ban puleh nyan, "uroenyoe uroe sabat. gata hana jeuet tabeuet tika gata." teuma ureueng nyan jiseuet, "ureueng nyang peupuleh ulon bunoe nyang yue bak ulon mangat lon gulong tika lon dan lon jak." "soe kheueh nyang yue gata tagulong tika gata dan jiyue jak?" tanyong ureueng nyan. teuma le ureueng nyang ka puleh nyan hana jituri soe ureueng nyan, sabab isa ka gadoh lamkawan ureueng rame nyan. oh lheurehnyan isa meurmupok ngon ureueng nyan lam baet tuhan, dan geupeugah bak ureueng nyan, "jinoenyoe gata ka puleh. bek kheueh tapeubuet desya le, mangat hana gata rasa hai nyang leubeh brok lom nibak nyang ka." ngon lagenyan jijak kheueh ureueng nyan jijak peguah ubak peunguasa bansa yahudi bahwa isa kheueh nyang peupuleh jihnyan. dan ngon sabab nyan awaknyan ka jipeuphon jipeusosah isa, sabab gobnyan geupeu puleh gob nibak uroe sabat. teuma isa geupeugah bak awaknyan, "bapak ulon teutab geumubuet trok nibak uroenyoe, dan ulon pih kumubuet." deungon tutoe haba nyan ka jeuet keusabab nibak ureueng yahudi keuneuk jipoh mate gobnyan. awaknyan jipeubuet hai nyang lagee nyan, kon le sabab gobnyan geupeu beuah peuratoran agama keuhai uroe sabat, teuma le sabab gobnyan geupeugah bahwa po teu allah nyan bapak gobnyan; ngon lagee nyan gobnyan ka geupeusa droe geuh saban ngon po teu allah. isa geujawebueh keu ureueng-ureueng nyan lagee nyoe, "peucaya kheueh, aneuek hana hase jipeubuet sapeue ngon kuasa jih keudroe. gobnyan hase geupeubuet peue nyang ka geukalon nyang geupeubuet le bapak geuh keudroe, nyang kheueh teuma nyang geupeubuet le aneuek. sabab bapak geugaseh keu aneuek dan geutunyok bak gobnyan banmandum nyang geupeubuet keudroe. kon nyan mantong, bapak teuma geutunyok ubak gobnyan buet-buet nyang leubeh rayeuk lom, ngon sababnyan gata banmandum hireuen. bapak nyan geupeubeudoh ureueng mate, dan geubri keu gobnyan udeb nyang sejati ngon keukai baka; meunan cit teuma ngon aneuek geubri udeb nyang keukai baka ubak ureueng nyang jitem geubri udeb. 22 bapak keudroe hana geupeu hakem soe-soe mantong. banmandum keukuasaan keu ngon hakem nyan ka geujok ubak aneuek geuh. bapak geupeubuet mandum nyan mangat mandum ureueng jihoreumat aneuek lagee jihnyan jihoreumat keu bapak. ureueng nyang hana jihoreumat aneuek hana teuma jihoreumat bapak nyang utas aneuek nyan. keubiet beutoi nyang lontuan kheun nyoe: ureueng nyang jisimak peue nyang ulon peguah, dan meuiman ubak gobnyan nyang utas ulon, ureueng nyan na udeb sejati ngon keukai baka. jihnyan hana teuma teuhukom; jihnyan ka leupah nibak mate dan meuteume udeb. peucaya kheueh: teuma teuka wa-

tee jih – dan ka trok watee jih – ureueng mate teuma jideungoe su aneuek allah. dan ureueng nyang deungoe nyang teuma udeb. lagee bapak keudroe jeuet keu sumber udeb, dan gobnyan geupeujeuet aneuek geuh sumber udeb cit teuma. 27 gobnyan ka geujok bak aneuek geuh nyan hak keujeuet keu hakem, sabab gobnyan aneuek manusia. bek kheueh sampoe hireuen gata watee tadeungoe hai nyan, sabab watee jih teuma teuka bahwa banmandum ureueng nyang ka mate jideungoe su gobnyan, laju jiteubiet lam jrut. ureueng nyang ka jipeubuet nyang jroh teuma jibeudoh keu udeb. teuma ureueng nyang ka jipeubuet jeuhet teuma jibeudoh keu teuhukom." "ulon hana hase lon peubuet sapeue pih meunoye atueh keuheundak lon keudroe. ulon meuhakem lagee nyang geupeurintah le po teu allah. dan keuputosan lon nyan ade, sabab ulon hana kuseutot lagee jikehun le ate lon keudroe, teuma keuheundak bapak nyang utas ulon. meunoye seukira jih ulon bri keusaksian lon keudroe, keusaksian nyan hana jeuet teupateh. teuma na ureueng laen nyang meusaksi keuhai ulon, dan ulon kuteupeue peue nyang jimeusaksi nyan beutoi. gata ka takirem utasan ubak nabi yahya, dan gobnyan ka geumeusaksi nyang beutoi keuhai ulon. hai nyoe ulon peguah, kon le sabab ulon peureulee keusaksian nibak manusia, teuma mangat gata teupeusalamat. nabi yahya nyan lagee panyot nyang hu dan jipeuteubiet trang nyang muble-ble. keu sikeujab nyan gata galak tateurimong cahya nyang trang nyan. teuma meusaksi ulon leubeh rayeuk nibak meusaksi nabi yahya, peue nyang jinoenyoe ulon peubuet, na kheueh buat nyang geubri tugaih le bapak ubak ulon, nyan sibago bukeuti bahwa bapak nyang geu utas ulon. dan bapak nyang utas ulon nyan pih geumeusaksi keuhai ulon. gata gohlom na peureunah gata deungoe su gobnyan atawa gata ngieng hi gobnyan. tutoe haba gobnyan hana teukeubah lam ate gata sabab gata hana tapateh keu ulon nyang geutute le gobnyan. gata tameurunoe alkitab sabab ngon lagee nyan gata sangka ngon cara nyang lagee nyan gata na udeb sejati dan keukai baka. dan alkitab nyan keudroe jimeusaksi keuhai ulon. teuma gata hana tatem mangat ubak ulon meuteume udeb nyang keukai baka. ulon hana lon mita jipujoe nibak manusia. ulon kuturi gata. ulon kuteupeue gata hana tagaseh ubak po teu allah lam ate gata. ulon kuteuka ngon kuasa bapak, teuma gata hana tateurimong lon. teuma meunoye ureueng laen teuka ngon kuasa jih keudroe, gata tatem teurimong gobnyan. pakriban gata hase tapateh, meunoye gata tamita jipujoe le sabe keudroe-droe gata, dan hana ta useuha tamita pujoe nibak po teu allah nyang esa? bek gata pike ulon kupeusalah gata dikeue bapak. nyang bit jih nyang peusalah gata na kheueh nabi musa, gobnyan nyang gata harab. seukira jih gata tapeucaya ubak nabi musa, gata teuma tameuiman ubak ulon, sabab keuhai ulon kheueh gobnyan teumuleh. teuma meunoye gata hana tapateh ubak peue nyang geutuleh le nabi musa, pakriban teuma gata hase tapateh ubak nyang ulon peguah?" na meupadub watee oh lheureh nyan isa geujak u meurandah danau galilea, nyang nan laen danau tiberias. oh ka trok gobnyan keudeh, jai that-that ureueng nyang seu-

tot gobnyan sabab awaknyan ka jiteupeue buet-buet nyang ajaeb nyang ka ltheueh geupeubuet ngon cara geupeu puléh ureueng saket. isa laju geuek u ateuh buket, laju geuduek disinan ngon murit-murit gobnyan. bak watee nyan ka to that uroe raya paskah yahudi. watee geungieng le isa ban sikeulileng gobnyan, laju geukalon ureueng meuron-ron jijak bak gobnyan. ngon sabab nyan gobnyan laju geupeugah bak filipus, "dipat tanyoe hase tabloe peunajoh mangat banmandum awaknyoe hase jimakheun?" (isa ka geuteupeue peue nyang teuma geupeubuet, teuma gobnyan geupeugah meunan sabab gobnyan geukeuneuk ujoé filipus.) jijaweeb le filipus, "meunyoé tabloe ruti ngon dua reutoh peng pirak hana seb keu ureueng nyang jai that nyoe, bah pih tiebtieb ureueng meuteume bacut mantong." sidroe murit isa nyang laen, nyang nan jih andreas, syedara simon petrus, jipeugah lagee nyoe, "lamkawan geutanyoe na aneuek agam bak jih na limong boh ruti dan dua boh eungkot. teuma patna seb atranyan keu ureueng nyang jai nyoe?" "gata yue ktheueh awaknyan banmandum mangat jiduek," ktheun isa. bak teupat nyang jai that-that naleueng, jadi mandum ureueng rame nyan jiduek ateuh naleueng – banmandum na kira-kira limong ribee droe ureueng agam. oh ltheueh nyan isa laju geucok ruti nyan, laju geu-meudoa syukoe bak po teu allah. oh ltheueh nyan laju geubagi-bagi ruti nyan keu ureueng rame. meunan cit oh ltheuehnyan geubagi-bagi teuma eungkot nyan, dan awaknyan laju ipajoh sipuih-puih jih. oh ka ltheueh banmandum awaknyan jimakheun sampoe troe, isa laju geupeugah bak murit-murit gobnyan, "peusapat ktheueh laju seueh-seueh nyang leubeh ipajoh le awaknyan; bek sampoe na nyang teutieuk" laju awaknyan geupeusapat na dua blaih boh raga peunoh peunajoh nyang leubeh nibak limong boh ruti nyang jimakheun le ureueng rame nyan. watee ureueng rame jikalon buet nyang ajaeb nyang ka geupeubuet le isa nyan, awaknyan laju jipeugah, "keubiet, nyoe ktheueh nabi nyang teuharab teuka lam donyal" isa geuteupeue awaknyan jitem teuka keu jijak paksa gobnyan mangat geutem jeuet keu raja awaknyan. sabab nyan geujak laju peusang droe u daerah nyang meubuket-buket. watee uroe ka jiteuka malam, murit-murit isa laju jitron u danau. laju awaknyan jiek ateuh peuraho jijeumeurang danau geutuju u kapernaum. uroe ka seupot isa gohlom cit teuka geujak bak awaknyan. bak watee nyan danau ka jipeuphon meu-umbak sabab angen teuga ka jitreun. oh ka ltheueh awaknyan jimeulayeue na kira-kira limong atawa nam kilo metee, awaknyan laju jikalon isa geujak ateuh ie sira geutuju bak awaknyan. awaknyan teumakot lumpah na. teuma isa geupeugah bak awaknyan, "bek teumakot, nyoe ulon!" dan ngon galak ate awaknyan jiteurimong gobnyan geuek ateuh peuraho, dan watee nyan cit teuma peuraho awaknyan trok ubak teupat nyang teutuju. 22 oh singoh beungloh ureueng rame mantong na tinggai di meurandeh danau, jiteupeue bahwa bunoe na saboh peuraho disinan. awaknyan jiteupeue bahwa murit-murit isa ka habeh jibeurangkat ngon peuraho nyan, seudangkan isa hana geuseutot. oh ltheuehnyan na meupadub boh peuraho nyang teuka nibak banda tiberias dan laju ji-

tiek saoh bak bineh ureueng rame nyang teungoh pajoh ruti oh ka ltheueh tuhan geumeudoa syukoe. watee ureueng rame nyan jikalon bahwa isa meunan cit ngon murit-murit gobnyan ka hana le bak teupat nyan, awaknyan pih laju jiek ateuh peuraho nyang na disinan dan laju jijak u kapernaum keu jijak mita isa. watee ureueng-ureueng nyan meurumpok ngon isa di meurandeh danau, awaknyan laju jitanyong bak gobnyan, "bapak guree, pajan bapak trok bak teupat nyoe?" isa geujaweeb, "keubiet that, gatanyoe ta mita ulon bukon le sabab gatanyoe ka muphom meukeusut buet-buet ajaeb nyang ulon peubuet, teuma sabab gata ka taseumajoh sampoe troe. 27 bek ktheueh tamubuet keu meuteume peunajoh nyang hase habeh dan brok. mubuet ktheueh keu hase meuteume peunajoh nyang hana jitem brok dan nyang jibri udeb sejatiji ngon keukai. peunajoh nyan teuma geubri le aneuek manusia keu gata, sabab gobnyan ka geubaiat le po teu allah bapak." laju awaknyan jiteumanyong bak gobnyan, "peue nyang haroh kamoe peubuet jeuet kamoe peubuet keuheundak po teu allah?" geujaweeb le isa, "nyoe ktheueh nyang geulakee le po teu allah nibak gata: meuiman ktheueh ubak gobnyan nyang ka geu-utus le allah." "meunyoé meunan," ktheun awaknyan, "peue bukeuti jih nyang jeuet bapak jok bak kamoe mangat jeuet kamoe ngieng dan kamoe meuiman ubak bapak? peue nyang teuma bapak peubuet?" indatu kamoe geupajoh manna lam padang pasi, lagee nyang na teutuleh lam alkitab, "gobnyan geubri bak awaknyan peunajoh ruti dan syeuruga." laju isa geupeugah bak awaknyan, "peucaya ktheueh: kon nabi musa, teuma bapak ulon ktheueh nyang bri keu gata ruti nyang sibuna jih nibak lam syeuruga. sabab ruti nyang geubri le po teu allah na ktheueh gobnyan nyang geutreun nibak lam syeuruga, dan geubri udeb bak manusia lam donya nyoe." "bapak," ktheun awaknyan, "neubri ktheueh keu kamoe ruti beusabesabe," "ulon ktheueh ruti nyang teubri udeb," ktheun isa bak awaknyan. "ureueng nyang jijak bak ulon hana deuek le siumu masa. dan ureueng nyang peucaya keu ulon hana teuma glaih le siumu masa." "teuma lagee nyang ka ltheueh teupeugah bak gata, bah ktheueh gata ka takalon ulon, gata teutab hana pateh. banmandum ureueng nyang geubri le bapak keu ulon teuma ji teuka bak ulon. ulon hana teuma lon tulak soemantong nyang jitem jak bak ulon. sabab ulon kutreun nibak lam syeuruga, bukon ulon kupeubuet keuheundak lon keudroe, teuma keuheundak gobnyan nyang utus ulon. dan nyoe ktheueh keuheundak gobnyan nyang utus ulon: mangat nibak banmandum ureueng nyang geubri keu ulon, hana meusidroe pih nyang gadoh; teuma jeuet ulon peubeudoh awaknyan bak uroe kiamat. keubiet nyoe ktheueh keuheundak bapak ulon: mangat banmandum nyang kalon aneuek dan meuiman bak aneuek nyan ureueng nyan meuteume udeb sejatiji dan keukai, dan ulon peudeb lom teuma watee uroe kiamat." dum na ureueng yahudi ka jipeuphon meupeb-peb keu isa, sabab gobnyan geupeugah: "ulon ruti nyang jitreun nibak syeuruga," awaknyan jipeugah lagee nyoe, "bukon ktheueh ureueng nyoe isa, aneuek yusuf? kamoe meuturi ma ngon yah jih! pakriban jeuet jipeugah bahwa jihnyoe

jitreun nibak syeuruga?" dan isa laju geupeugah bak awaknyan, "bek meupeb-peb. hana meusidroe pih nyang hase jijak bak ulon, meunyo babak nyang utus ulon, hana geuba gobnyan bak ulon; dan soe nyang teuka, ureueng nyan teuma lon peubeudoh bak uroe kiamat. lam kitab nabi-nabi na teutuleh lagee nyoe, 'banmandum ureueng teuma geupurunoe le po teu allah.' ngon lagee nyan, banmandum ureueng nyang jideungoe babak jimeurunoe bak gobnyan teuma j-jak bak ulon. ngon lagee nyan bukan meumakna na ureueng nyang ka jikalon babak. teuma gobnyan nyang teuka nibak po teu allah, ka jikalon babak. beutateupeue kheueh: ureueng nyang meuiman, bak ureueng nyan na udeb sejati dan keukai. ulon kheueh ruti nyang teubri udeb. indatu gata jimakheun manna di padang pasi dan awaknyan teutab cit mate. teuma kon lagee nyan ngon ruti nyang jitron nibak syeuruga; ureueng nyang makheun ruti nyan hana geuma mate. ulon kheueh ruti nyang treun nibak syeuruga – ruti nyang teubri udeb. ureueng nyang makheun ruti nyoe teuma udeb siumu masa. ruti nyang teuma ulon bri keuhajat udeb manusia lam donya na kheueh asoe ulon." watee jideungoe haba nyan ureueng-ureueng yahudi laju jimeudakwa sabe keudroe-droe, "pakriban ureueng nyoe hase jibri asoe jih keu geutanyoe keu teumakheun?" kheun awaknyan. laju isa geupeugah bak awaknyan, "peucaya kheueh: meunyo gata hana tapajoh asoe aneuek manusia dan gata jieb darah jihnyan, gata hana teuma beutoi-beutoi udeb. ureueng nyang makheun asoe ulon dan jiejeb darah ulon keu ureueng nyan na udeb sejati dan keukai dan ulon teuma lon peubeudoh ureueng nyan bak uroe kiamat. sabab asoe ulon keubiet peunajoh, dan darah ulon keubiet nyang teujieb. ureueng nyang makheun asoe ulon dan jiejeb darah lon, ureueng nyan teutab meusaboh ngon ulon, dan ulon ngon ureueng nyan. babak nyang udeb nyan, geutatus ulon dan ulon pih udeb nibak babak. meunan cit ureueng nyang makheun asoe ulon teuma udeb nibak ulon. nyoe kheueh ruti nyang jitreun nibak syeuruga: bukan ruti lagee geumakheun indatu gata. sabab oh lueheh teupajoh rutinyan, awaknyan mate cit teuma. teuma ureueng nyang makheun ruti nyoe teuma udeb siumu masa." banmandum nyan geupeugah le isa bak watee gobnyan geuseumeubeuet lam rumah iejabat di kapernaum. oh ka lueheh jideungoe tutoe gaba isa nyan, jai that murit gobnyan jipeugah, "ajaran-nyoe keubiet lumpah brat. soe nyang hase jiteurimong nyan!" isa keudroe geuteupeue bahwa murit-murit gobnyan meupeb-peb keuhai nyan. teuma gobnyan laju geupeugah, "peu kheueh gata teusinggong sabab tutoe haba lon nyan? pakriban jeuet jih singoh meunyo gata ngieng aneuek manusia jiek lom bak teumpat awai phon? nyang peujeuet manusia udeb na kheueh roh allah. teunaga manusia hana meuguna. tutoe haba nyan ulon peugah bak gata nyoe na kheueh tutoe haba roh allah dan tutoe haba nyang teubri udeb. teuma na cit diteungoh-teungoh gata nyang hana meucaya." (isa ka geuteupeue phon yoh awai soe-soe ureueng nyang hana jitem peucaya, dan soe teuma nyang keuneuk khianat gobnyan.) laju geupeugah lom le isa almaseh, "nyan kheueh sabab jih ulon britee bak gata bahwa hana meusidroe pih nyang

hase jijak bak ulon, meunyo babak hana geubri keumungkenan." phon saat nyan le that that murit gobnyan nyang tinggai gobnyan, dan hana jitem seutot le gobnyan. laju isa geupeugah bak bandua blaih droe murit gobnyan, "peu kheueh gata keuneuk tinggai cit ulon?" "tuhun," kheun simon petrus bak gobnyan, "bak soe teuma kamoe jak? haba tuhan teubri udeb sejati dan keukai. kamoe ka kamoe peucaya dan yaken that-that bahwa tuhan kheueh utosan suci nibak po teu allah." jaweueb isa, "bukan kheueh ulon nyang ka lon pileh gata dua blaih droe nyoe? teuma sidroe nyang na lamkawan gata na kheueh roh jeuhet!" nyang geumeukeusut le isa na kheueh yudas aneuek simon iskariot. sabab, bah kheueh yudas nyan sidroe nibak bandua blaih droe murit isa, jihnyan teuma jikhianat isa. oh lueheh nyan isa geujak hoho mantong bansaboh galilea. gobnyan hana geutem jak u daerah yudea sabab peunguasa yahudi nyang na disanan na niet keuneuk poh mate gobnyan. bak watee nyan karab that ngon uroe raya jambo on. teuma le syedara-syedara isa laju geupeugah ubak gobnyan, "tinggai kheueh teumpat nyoe dan gata jak laju u yudea, mangat murit-murit gata pih jeuet jikalon buet gata. hana ureueng nyang jisom peue nyang jipeubuet, meunyo ureueng nyan keuneuk jeuet keu ureueng meusyeh. meunyo gata peubuet haihai nyang lagee nyan, bansigom donya haroh jiteupeue!" (sabab syedara-syedara gobnyan keudroe hana peucaya cit bak gobnyan.) "gohlom trok watee nibak ulon," geupeugah le isa bak awaknyan, "teuma meunyo keu gata, pajan mantong hase. donya nyoe hana mungken jibanci gata. teuma meunyo ulon keubiet jibanci le donya, sabab ulon sabe lon peugah bak donya bahwa buet jeuhet. jak kheueh gata keudroe bak peurayaan nyan. ulon hana lon jak sigohlom trok watee jih nibak ulon." meunan kheueh geupeugah le isa bak syedara-syedara gobnyan, dan gobnyan pih laju tinggai di galilea. oh ka leupah syedara gobnyan banmandum jijak bak peurayaan nyan, seungab-seungab isa geujak keudroe ngon hana jiteupeue le meusidroe ureueng pih. teungoh peurayaan nyan, le peunguasa yahudi jimita gobnyan dan jitanyong-tanyong, "dipat ureueng nyan?" jai that-that ureueng ka jimeusah-sah keuhai gobnyan. na nyang peugah, "gobnyan ureueng get," na teuma nyang peugah, "kon ureueng get! gobnyan jipeusisat ureueng rame." teuma hana meusidroe pih nyang jijeuet peugah haba nyan seucara troh trang keuhai gobnyan sabab awaknyan jitakot keu peunguasa yahudi. teungoh peurayaan nyan teupeuna, isa laju geutamong lam baet allah, oh trok keunan laju geuseumeubeuet. bubena peunguasa yahudi hieuren lumpah na laju jipeugah, "peue sabab ureueng nyoe jai that-that nyang jiteupeue, padahal jihnyan hantom na jisikula?" geujaweueb le isa, "nyang ulon peurunoenyo bukan ajaran ulon, teuma ajaran gobnyan nyang utus ulon. ureueng nyang jitem seutot keuheundak po teu allah, teuma jiteupeue peu kheueh ajaran ulon nyoe teuka jih nibak po teu allah atawa nibak ulon keudroe. ureueng nyang peurunoe ajaran jih keudroe jimita keuhoreumatitan keu droe jih keudroe. teuma ureueng nyan mita keuhoreumatitan keu gobnyan nyang utus jihnyan, ureueng nyan ju-

joe, hana nyang teupeunget nibak jihnyan. bukan kheueh nabi musa ka geubri peurintah po teu alah keu gata? teuma lamkawan gata hana nyang seutot peue-peue nyang teupeurintah nyan. pakon gatanyoe keuneuk poh mate ulon?" ureueng rame nyan jijaweueb, "droeneueh pungoe! soe nyang keuneuk poh mate droeneueh?" isa geujaweueb, "teuma saboh buet nyang ulon peubuet bak uroe sabat, dan gata hireun. 22 nabi musa geubri keu gata peuratoran keuhai meukatan – bah pih meukatan nyan kon bak nabi musa asai jih, teuma nibak bapak-bapak indatu sigohlom nabi musa. ngon sabab nyan, bak uroe sabat pih gata keuneuk peukatan gob. meun-yoe hainyan gata peubuet mangat bek teuengkeue peuratoran nabi musa keuhai meukatan, pakon gata beungeh keu ulon sabab lon peupuleh gob ban-mandum bak uroe sabat? bek gata peuhakem ureueng ngon dasai jih nyang deuh teukalon, teuma ngon dasai keuadalan." oh lheureh nyan na meupadub droe ureueng yerusalem jipeugah lagee nyoe, "peu kheueh kon ureueng nyoe nyang teungoh teumita-mita keu teupoh mate? ngieng kheueh jipeugah haba ban galak droe dikeue rakyat ba, dan hana nyang jijeuet peugah sapeue keu ureueng nyan! peu kheueh peunguasa-peunguasa geutanyoe mungkin geusadar bahwa ureueng nyoe raja peuseulamat? 27 teuma meun-yoe raja peuseulamat nyan teuka, hana meusidroe pih jiteupeu dipat asai gobnyan! pada-hai tanyoe tateupeue dipat asai ureueng nyoe." oh lheureh nyan, teungoh isa geuseumeubeuet lam baet allah, gobnyan laju geutawok ngon su nyang teuga, "jadi gata tateupeue soe ulon nyoe, dan dipat asai ulon? ulon hana teuka ateueh keuheundak ulon keudroe. ulon geu-utus le gobnyan nyang hak geu-utus ulon, dan gobnyan jeuet teupeucaya. teuma gata hana taturi gobnyan. ulon kuturi gobnyan, sabab ulon meusai nibak gobnyan, dan gobnyan kheueh nyang utus ulon." bak watee nyan awaknyan keuneuk drob isa, teuma hana ureueng nyang jijeuet mat gobnyan, sabab gohlom trok watee jih. jai that-that ureueng-ureueng nyang na lamkawan awaknyan ka jipeuphon meuiman keu gobnyan, dan jipeugah lagee nyoe, "meun-yoe raja peuseulamat nyan teuka, peu kheueh gobnyan hase geupeubuet buet nyang ajaeb leubeh jai nibak nyang ka jipeubuet le ureueng nyoe?" ureueng-ureueng farisi jideungoe pakriban ureueng rame nyan jimeusah-sah keuhai isa. ngon sabab nyan, meusajan-sajan ngon imeum-imeum ulee, awaknyan laju jiyue ubak na meupadub droeb tukang jaga baet allah mangat jikak droe isa. isa geupeugah bak ureueng rame nyang na dileuen baet allah nyan, "cuma sikeujab teuk ulon nyoe na meusajan gata. oh ka lheureh nyan ulon teuma lon gisa ubak nyang utus ulon. gata teuma ta mita ulon, teuma hana hase meurumpok ngon ulon; sabab gata hana hase tak jak bak tempat ulon tinggai." laju peunguasa yahudi jimarit sabe keudroe-droe, "ureueng nyoe ho jikeuneuk jak sampoe tanyoe hana hase meurumpok ngon jih nyoe? peu kheueh jihnyoe keuneuk jak ubak ureueng-ureueng yahudi nyang tinggai di luwa nanggroe lamkawan ureueng yunani, dan jipeurunoe ureueng yunani? peu kheueh makna jih jipeugah bahwa geutanyoe teuma tamita jihnyan teuma

hana hase meurumpok ngon jihnyan dan geutanyoe hana hase tak jak bak tempat jihnyan tinggai?" bak uroe keuneulheureh nibak peurayaan nyan, na kheueh uroe nyang paleng peunteng, isa geudong lam baet alah laju geupeugah lagee nyoe, "ureueng nyang glaih jak kheueh keunoe bak ulon mangat lon peujieb ie. keuhai ureueng nyang meuiman bak ulon, na teutuleh lam alkitab, 'lam ate ureueng nyan ji-ile ie nyang teubri udeb.' " (isa geumeututoe keuhai roh allah, nyang teuma jiteurimong le ureueng-ureueng nyang meuiman ubak gobnyan. sabab, bak watee nyan roh allah gohlom geubri; sabab isa gohlom teupeumulia deungan mate gobnyan.) jai that ureueng nyang jideungoe peue nyang geupeugah le isa, dan lamkawan awaknyan na nyang peugah, "ureueng nyoe ka pasti nabi nyan!" nyang laen jipeugah meunoe, "nyoe kheueh raja peuseulamat!" teuma na cit nyang peugah, "ah, panena mungen raja peuseulamat teuka nibak galilea? lam alkitab na teutuleh bahwa raja peuseulamat na kheueh keuturonan nabi daud dan teuma teuka nibak betlehem, na kheueh gampong nabi daud." akhe jih awaknyan ka jipeuphon meudakwa keuhai isa. na nyang keuneuk drob gobnyan, teuma hana meusidroe pih nyang jijeuet mat gobnyan. watee tukang-tukang jaga baet allah nyang teuyue jak drob isa jigisa lom, imeum-imeum ulee dan ureueng-ureueng farisi nyan laju jityanyong bak awaknyan, "pakon hana gata ba ureueng nyan keunoe?" jijaweueb le tukang-tukang kawai nyan, "luwa biasa, gohlom na ureueng nyang peugah haba lagee gobnyan!" "peu kheueh gata pih ka sisat ngon cara gata deungoe haba gobnyan?" kheun ureueng farisi nyan. "peu kheueh na nibak peunguasa-peunguasa geutanyoe atawa ureueng farisi nyan meuiman keu gobnyan? teuma ureueng rame nyan, awaknyan hana muphom hukom nabi musa, dan pakriban mantong awaknyan ka keunong kutok." sidroe lamkawan ureueng farisi nyan na kheueh nikodemus nyang ka lheureh jijak ubak isa. nikodemus laju jipeugah bak ureueng-ureueng farisi nyang laen, "meunurot hukom, sidroe-droe ureueng hana jeuet teuhukom sigohlom peukara jih teudeungoe dan buet jih teupareksa." "peu kheueh gata nibak galilea cit?" jaweueb awaknyan, "ngieng mantong lam alkitab! gata teuma deuh takalon bahwa hana nabi nyang asai jih nibak galilea!" oh lheurehnyan banmandum ureueng jiwoe u rumoh. teuma isa laju geujak u buket zaiton. oh singoh beungoh watee mantong suboh gobnyan geujak lom u baet allah, dan rame that ureueng jikak bak gobnyan. isa laju geuduek, oh lheureh nyan laju geupeu phon peubeuet awaknyan. bak watee nyan, guree-guree agama dan ureueng-ureueng farisi laju jime bak gobnyan sidroe ureueng inong nyang teudrob sabab jimeumukah. awaknyan laju jiyue bak ureueng inong nyan mangat jidong di teungoh-teungoh, oh lheureh nyan laju jipeugah bak isa, "bapak guree, inong nyoe kamoe drob sabab teungoh jimeumukah. lam hukom nabi musa na peuratoran bahwa inong nyang lagee nyoe haroh teurhom ngon batee sampoe mate. jinoen-yoe pakriban peundapat bapak lam hainyoe?" awaknyan jityanyong lagee nyan keu jikeuneuk jeubak gobnyan, mangat awaknyan jeuet jipeusalah gobnyan. teuma isa geuduek man-

tong, dan geutuleh ngon jaroe gobnyan ateuheh tanoh. teuma le awaknyan laju jipaksa geu, gobnyan laju geubeut ulee geuh dan geupeugah bak awaknyan, "ureueng nyang hana meudesya nyang na lamkawan gata, bah kheueh ureueng nyan nyang geulawa ba-tee ateuheh inong nyan." oh ltheueh geupeugah nyan isa geuduek lom, dan geutumuleh lom ngon jaroe geuh ateuheh tanoh. oh ka ltheueh jideungoe isa geupeugah meunan, jikak kheueh laju awaknyan jitinggai teupnat nyan, sidroe seun sidroe phon nyan tuha. keuneuk jitinggai isa sidroe disinan meusajan ngon inong nyang mantong teudong bak teupnat jih. laju isa geubeut ulee geuh dan geupeugah bak inong nyan, "ho ka awaknyan banmandum? peu kheueh hana nyang hukom gata?" "hana pak," jaweub inong nyan. "meunyo meunan bah kheueh," kheun isa, "ulon pi hana lon hukom gata. jinoenyo jak kheueh, bek tapeubut desya le." isa geumeutuo lom ngon ureueng rame, kheun gobnyan, "ulon kheueh trang donya. ureueng nyang seutot ulon hana jikak lam seupot, teuma meuteume trang lam udeb." "jinoenyo gata tabri keusaksian keuhai droe keudroe," jikheun le ureueng-ureueng farisi nyan ubak gobnyan, "keusaksian droeneueh hana beutoi." geujaweub le isa, "bah pi ulon peugah keusaksian keuhai droe keudroe ulon, keusaksian ulon nyan beutoi; sabab ulon kuteupeu dipat ulon teuka dan ho ulon jak. gatanyoe hana tateupeue dipat ulon teuka dan ho ulon jak. gata peuhakem ureueng ngon cara manusia; ulon hana lon peuhakem meusidroe manusia pi. teuma meunyo ulon peuhakem manusia, keuputosan nyang ulon cok nyan na kheueh ade, sabab ulon kon sidroe; bapak nyang kirem ulon na meusajan ulon. lam hukom nabi musa na teutuleh lagee nyoe: keusaksian nyang beutoi na kheueh keusaksian nibak dua droe ureueng. nyang bri keusaksian keuhai droe ulon na dua droe – ulon dan bapak nyang utus ulon." "bapak droeneueh nyan dipat?" kheun awaknyan. geujaweub le isa, "gata hana taturi ulon meunan cit bapak ulon. meunyo gata taturi ulon, ka pasti gata pih ta turi keu bapak ulon." banmandum nyan geupeugah le isa watee gobnyan teungoh geuseumeubeuet di baet allah bak bineh caleng-caleng peng seudeukah. teuma hana meusidroe pi nyang jijeuet drob gobnyan sabab gohlom trok watee jih. isa geupeugah lom bak awaknyan, "ulon teuma lon jak, dan gata teuma tamita ulon, teuma gata mate lam desya-desya gata. u teupnat ulon jak, gata hana hase tateuka." 22 teuma le peunguasa yahudi laju jipeugah, "kadang jihnyan keuneuk jak poh droe, sabab jihnyan jipeugah, 'u teupnat ulon jak, gata hana hase ta teuka.' " laju isa geupeugah bak awaknyan, "gata tateuka nibak miyueb; teuma ulon teuka nibak ateuheh. gata nibak lam donya; ulon kon nibak lam donya. nyang kheueh sabab jih ulon peugah bak gata, bahwa gata mate lam desya-desya gata. dan keubiet gata teuma mate lam desya-desya gata, meunyo hana gata pateh bahwa 'ulon kheueh jihnyan nyang teupeugah ulon na.'" droeneueh nyoe soe nyang sibeuna jih?" jitanyong le awaknyan. geujaweub le isa, "keupeue lom lon peugah haba ngon gata! mantong jai tak keuhai gata nyang keuneuk ulon peugah dan lon hakem. teuma gobnyan nyang utus ulon jeuet teupeucaya.

dan ulon peugah bak donya peue nyang ulon deungoe nibak gobnyan." 27 awaknyan hana muphom bahwa gobnyan teungoh geumeutuo ngon droe jih nyan keuhai bapak. ngon sabab nyan isa geupeugah bak awaknyan, "teuma, meunyo gata ka tapeumanyang aneuk manusia, gata teuma ta teupeu bahwa 'ulon kheueh nyang teupeugah bahwa ulon na', dan gata teuma ta teupeu bahwa hana sapeue pih nyang ulon peubuet nibak droe lon keudroe. nyang ulon peugah peue nyang geupeugah le bapak ubak ulon. dan gobnyan nyang utus ulon na meusajan ulon. gobnyan hantom na geupeubiyeu ulon keudroe, sabab ulon sabe lon peubuet peue nyang jeuet keu galak ate gobnyan." oh ka ltheueh geupeugah banmandum nyan le isa, jai tak ureueng nyang meuman ubak gobnyan. oh ltheueh nyan isa geupeugah ubak ureueng-ureueng yahudi nyang ka meuman ubak gobnyan, "meunyo gata udeb meunurot ajaran nyang ulon peurunoe gata keubiet-keubiet murit ulon, ngon lagee nyan gata teuma taturi allah nyang beutoi, dan ngon sabab nyan gata teuma teupeubeubaih." "kamoenyo keuturonan nabi ibrahim," kheun awaknyan. "gohlom na kamoe rasa jeuet keunamiet soe mantong! peue meukeusut droeneueh nyang neupeugah, gata teuma teupeubeubaih?" "keubiet beutoi nyan ulon peugah nyoe," kheun isa bak awaknyan. "ureueng jipeubuet desya, na kheueh namiet desya. dan sidroe namiet hana meuteume teupnat nyang teutab lam keuluwarga, meunyo aneuk siumu masa na meuteume teupnat lam keuluwarga. sabab nyan kheueh, meunyo aneuk jipeubeubaih gata, gata biet-biet beubaih. keubiet ulon teupeue gatanyoe keuturonan nabi ibrahim. teuma gata keuneuk tapeumate ulon, sabab gata hana tatem teurimong nyang ulon purunoe. peue nyang ulon ngieng bak bapak ulon, nyan kheueh nyang ulon peugah. seudangkan gata tapeubuet peue nyang jipeurunoe le bapak gata keu gata." awaknyan jijaweub, "bapak kamoe na kheueh nabi ibrahim." "meunyo gata biet-biet aneuk nabi ibrahim," kheun isa, "ka pasti gata peubuet peue nyang geupeubuet le nabi ibrahim. ulon peusampoe ubak gata keubeunaran nyang ulon deungoe bak po teu allah, teuma digata keuneuk tapoh mate ulon. nabi ibrahim hana geupeubuet nyang lagee nyan! gata tapeubuet peue nyang jipeubuet le bapak gata keudroe." jaweub awaknyan, "kamoe bukan aneuk aneuk hareuem. bapak kamoe cit sidroe, na kheueh allah keudroe." laju isa geupeugah bak awaknyan, "meunyo bit allah nyan bapak gata, gata tagaseh keu ulon, sabab ulon teuka nibak po teu allah. ulon hana teuka ngon lakee droe ulon, teuma gobnyan kheueh nyang utus ulon. peue sabab jih gata hana muphom peue nyang ulon peugah? sabab gata hana ek tateuen watee gata deungoe nyang ulon peurunoe. iblih bapak gata, dan gata keuneuk taseutot kheun bapak gata. yoh awaikon iblih nyan tukang peumate gob. iblih nyan hantom na jidong ubak nyang beuna, sabab hana keubeunaran bak iblih nyan. meunyo jihnyan jimeusulet, nyan hanpeu hireuen, sabab ka lagee nyan sifeuet jih. iblih tukang seumeunget dan asai banmandum sulet. teuma ulon peugah nyang beutoi bak gata, ngon sabab nyan kheueh gata hana tapateh keu ulon. soe nyang na lamkawan gata nyang hase gata

bri bukeuti bahwa na desya bak ulon? meunyo ulon peugah nyang beuna, pakon gata hana tapateh keu ulon? ureueng nyang asai jih nibak po teu allah, ureueng nyan jideungoe peue nyang geupeugah le al-lah. teuma gata bukan asai nibak po teu allah, nyang kheueh sabab jih gata hana tatem deungoe." ureueng-ureueng yahudi nyan jijaweueb isa, "keubiet that beutoi kamoe peugah bahwa gata ureueng samaria nyang ka jitamong jen?" geujaweueb le isa, "ulon hana jita-mong jen. ulon horeumat keu bapak lon, teuma gata tahina ulon. ulon hana lon mita horeumat keu droe lon keudroe. na saboh nyang geu-useuha horeumat keu ulon, dan gobnyan kheueh nyang peuhakem. keubiet beutoi nyang ulon peugah nyoe, ureueng nyang jiturot lagee ulon peugah, siumu masa ureueng nyan hana mate." dan ureueng-ureueng yahudi nyan laju jipeugah bak isa, "jinoenyo ka biet-biet kamoe teupeu bahwa droeneueh beutoi-beutoi ka jitamong jen! nabi ibrahim keudroe ka mate, meunan cit ngon mandum nabi. teuma gata tapeugah, 'ureueng nyang jiseutot peue nyang ulon peugah, siumu masa hana mate.' meunyo nabi ibrahim keudroe ka mate, meunan cit banmandum nabi-nabi nyang laen ka mate, droeneueh nyoe soe? hana jitamong lam akai kamoe droeneueh leubeh rayeuk nibak bapak kamoe nabi ibrahim!" geujaweueb le isa, "seukira jih ulon mita horeumat keu droe lon mantong, horeumat nyan hana meuguna. nyang horeumat ulon na kheueh bapak ulon nyang gata anggab allah gata, padahai gata hana taturi keu gobnyan. teuma ulon kuturi gobnyan. seukira jih ulon peugah bahwa ulon hana lon turi keu gobnyan, teuma ulon sidroe ureueng sulet, saban lagee gata. ulon kuturi keu gobnyan, taat peue nyang geupeugah. bapak gata nabi ibrahim galak lumpah na bahwa gobnyan geukalon uroe ulon. gobnyan ka geukalon dan gobnyan galak!" dan ureueng-ureueng yahudi laju jipeugah bak isa, "umu droeneueh gohlom na limong ploh thon, dan droeneueh ka kalon nabi ibrahim?" geujaweueb le isa, "keubiet ulon peugah bak gata: sigohlom nabi ibrahim lahe, ulon ka na." laju ureueng-ureueng yahudi nyan jicok batee jike-neuek geulawa gobnyan; teuma isa laju geupeusom droe, dan geujak laju geutinggai baet allah. watee isa teungoh geujak, laju geukalon ureueng buta yoh phon lahe. murit-murit isa jitanyong bak gobnyan, "bapak guree, pakon ureueng nyoe lahe buta? peu kheueh sabab jih keudroe meudesya atawa ma ngon yah jih nyang meudesya?" geujaweueb le isa, "jih-nyoe buta bukan sabab desya jih keudroe meunan cit bukan sabab desya ma ngon yah jih, teuma sibagoe tanda mangat manusia jeuet jikalon kuasa po teu allah meukeureuja lam tuboh ureueng nyan. simantong uroe, tanyoe haroh tamubuet buet nyang ka geubri le gobnyan nyang utus ulon. meunyo malam ka teuka, hana meusidroe pi nyang hase jimubuet. siman-tong ulon na atueh rhung donya nyoe, ulon kheueh trang donya." oh ka lheureu geupeugah meunan isa laju geumuludah atueh tanoh, dan laju geucawoe ie babah gobnyan ngon tanoh. oh lheurehnyan laju geusiliebak bak mata ureueng buta nyan, oh lheurehnyan laju geupeugah bak ureueng nyan, "gata jak laju rhah muka gata lam kulam siloam." (siloam muphom jih 'jiutus'.) dan ureueng nyan laju jijak rhah muka jih

bak kulam nyan. watee jigisa, ureueng nyan ka hase jimeungieng. kawom silingka ureueng nyan dan ureueng-ureueng nyang yoh ilee kon jikalon ureueng nyan jigeumadee, banmandum jipeugah, "ureueng nyoe nyang lazem jih jiduek sira jigeumadee bukan?" na teuma nyang peugah, "beutoi jihnyan." teuma na cit nyang peugah, "kon, jihnyoe saban lagee ureueng nyan." teuma ureueng nyan keudroe jipeu-gah, "ulon kheueh ureueng nyang gata peugah nyan." "pakriban jeuet jih sampoe gata hase tameungieng?" kheun awaknyan bak ureueng nyan. laju jijaweueb, "ureueng nyang nan geu isa nyan geupeuget bacut luhob, oh lheureh nyan laju geusiliebak bak mata ulon sira geupeugah, 'jak rhah laju muka gata lam kulam siloam.' laju ulon jak bak kulam nyang geupeu-gah nyan. dan watee ulon peugleh muka ulon nyoe, laju deuh ulon keumalon." "dipat ureueng nyan?" ji-tanyong le awaknyan. laju jijaweueb, "hom, hana lon tuho." uroe nyan na kheueh uroe sabat watee isa geu-wot tanoh ngon ie babah gobnyan keu geupeu puleh ureueng buta nyan sampoe jeuet jimeungieng. dan ureueng nyan yoh bunoe buta nyan laju jiba ubak ureueng-ureueng farisi. awaknyan pih jiteumanyong bak ureueng nyan pakriban jihnyan hase jime-ungieng. ureueng nyan jijaweueb, "ureueng nyan jisiliebak luhob bak mata lon, laju ulon peugleh akhe jih hase lon meungieng." lamkawan ureueng-ureueng farisi nyan na nyang jaweueb, "hana mungken ureueng nyang peubuetnyoe asai jih nibak po teu allah, sabab jihnyan hana jipako keu uroe sabat." teuma le ureueng laen na nyang peugah lagee nyoe, "mustahe ureueng meudesya hase jipeubuet buet-buet nyang ajaeb lagee nyoe bagoe?" dan jiteuka kheueh muba-goe peundapat lam kawan awaknyan keudroe. dan le ureueng-ureueng farisi nyan jitanyong lom bak ureueng nyan, "peue peundapat gata keuhai ureueng nyang ka jipeupuleh gata sampoe gata hase tame-ungieng?" "ureueng nyan nabi," kheun ureueng nyan. teuma le mandum peumimpen yahudi dan hana ji-pateh bahwa ureueng nyan keubiet buta yoh awaikon dan bak saat nyoe ka jeuet jikeumalon. ngon sabab nyan awaknyan laju jitawok ureueng tuha ureueng buta nyan, laju jitanyong, "peu kheueh beutoi nyoe aneuek gata nyang jipeugah yoh lahe cit ka buta? dan pakriban jihnyoe hase jikeumalon saat nyoe?" ma ngon yah aneuek nyan jijaweueb, "beutoi jihnyoe aneuek kamoe, dan beutoi that yoh phon lahe jihnyoe cit ka buta. teuma pakriban cara dan peue sabab jih-nyoe ka hase jikeumalon bak saat nyoe, nyan hana kamoe teupeue. dan soe teuma ureueng nyang pe-upuleh mata jih nyan, nyang pih hana kamoe teupeue. tanyong mantong bak jih keudroe, jih ka rayeuk, dan jihnyan hase jijaweueb keudroe." 22 mak ngon ayah ureueng nyan jipeugah meunan sabab jitakot keu peumimpen-peumimpen yahudi; lom teuma awaknyan ka sipakat, bahwa ureueng nyang meungaku droe isa sibagoe raja peuseulamat, han jeuet le jitamong lam rumah ibadah. nyang kheueh sabab jih ma ngon yah ureueng nyan jipeugah, "jih-nyan ka rayeuk; tanyong mantong bak droe jih." laju awaknyan jitawok lom ureueng nyang yoh awai buta nyan, dan jipeugah bak ureueng nyan, "meusumpah kheueh bahwa gata tapeugah nyang beutoi. kamoe

muteupeu bahwa ureueng nyan na kheueh ureueng meudesya." "peu kheueh gobnyan meudesya atawa hana," jaweueb ureueng nyan, "nyan hana lon teupeu, teuma saboh hai nyang ulon teupeu; yoh ilee ulon nyoe buta, jinoenyoek ka deuh ulon keumalon," dan awaknyan jipeugah lom bak ureueng nyan, "peue nyan jipeubuet ateuh gata? pakriban cara jih jipeubuet ateuh gata sampoe gata deuh tameungie?" 27 jijaweeb le ureueng nyan, "ka ltheueh ulon peugah bak droeneueh, teuma droeneueh hana tatem deungoe. pakon droeneuehnyoe keuneuk deungoe lom? mungken droeneueh keuneuk jeuet keu murit-murit gobnyan cit?" laju awaknyan jiteunak ureueng nyan sira jipeugah, "kah kheueh murit ureueng nyan; kamoe bukan, kamoe murit nabi musa. kamoe meuteupeue bahwa po teu allah ka geumeututoe bak nabi musa, teuma keuhai ureueng nyan, hana kamoe teupeu pane asai jih." ureueng nyan jijaweeb, "bit gura that meunyoek droeneueh nyoe hana tatupat dipat asai gobnyan, seudangkan gobnyan ka geupeujeuet mata ulon nyoe hase lon keumalon. tata-teupeu bahwa po teu allah hana geudeungoe ureueng meudesya, seulaen ureueng nyang jihoreumat keu allah, dan jipeubuet surohan gobnyan. yoh phon jeuet donya nyoe gohlon na tadeungoe na ureueng nyang hase jipeubleuet mata jih nyang ka buta yoh phon lahe. meunyoek ureueng nyan bukan nibak po teu allah, gobnyan hana hase geupeubuet sapeue." jaweueb awaknyan, "peue gata peugah? gata peunoh desya yoh phon lahe, gata keuneuk purnoek kamoe?" dan phon saat nyan ureueng nyan hana jibri le jitamong lam rumah ibadah. isa geudeungoe bahwa ureueng nyang ka geupeu puleh mata jih nyan hana jibri tamong le lam rumah ibadah. gobnyan geumita ureueng nyan dan laju geupeugah bak ureueng nyan, "peu kheueh gata tapeucaya keu aneuek manusia?" ureueng nyan jijaweeb, "soe jih nyan, teungku? tulong droeneueh peugah mangat ulon peucaya bak gobnyan." "gata ka gata ngieng gobnyan," jaweueb isa, "gobnyan kheueh nyang bak saat nyoe teungoh meututoe ngon gata." "ulon pateh, tuhan," kheun ureueng nyan, laju jisujut dikeue isa. isa geupeugah, "ulon teuka lam donya nyoe keu lon jak peuhakem; mangat ureueng nyang buta hase jimeungie, dan ureueng nyan jeuet jimeungie, jeuet keu buta." na padub droe ureueng farisi nyang na disinan jideungoe peue nyang geupeugah le isa nyan, dan laju awaknyan jitanjong, "meukeusut droeneueh, kamoe nyoe buta cit?" geujaweeb le isa, "miseue jih gata buta, gata hana meudesya. teuma sabab gata tapeugah, 'kamoe deuh meungie,' nyan saban cit makna jih gata mantong meudesya." "keubiet beutoi nyang ulon peugah nyoe: ureueng nyang tamong lam weue bubiri ngon cara jilumpat pageue, dan hana rot babah pintoe, atawa jiek rot laen, ureueng nyang lagee nyan pancuri dan peurampok. teuma ureueng nyang jitamong rot babah pintoe, nyang kheueh tukang rabe bubiri. nyang jaga weue jibuka pintoe keu tukang meurabe nyan, dan bubena bubiri jiseutot su ureueng nyan watee jihoi beulatang nyan ngon nan maseng-maseng dan laju jikawai beulatang nyan peuteubiet uluwa. oh ka ltheueh mandum bubiri nyan jiba uluwa, tukang meurabe nyan jikak dikeue, dan mandum bubiri nyan

laju jiseutot dilikot sabab jituri su nyang kawai jih. awaknyan hana jeuet jiseutot ureueng laen, meunan teuma jiplueng nibak ureueng nyan, sabab hana jituri su nyang kawai jih." isa geupeugah keumiseue nyan, teuma awaknyan hana muphom peue meukeusut jih. teuma isa geupeugah sigoe teuk, "keubiet beutoi nyang ulon peugah nyoe: ulon kheueh pintoe keu bubiri. banmandum nyang teuka sigohlom ulon na kheueh pancuri dan peurampok, teuma bubena bubiri hana jideungoe su awaknyan. ulon kheueh pintoe, soe nyang tamong rot ulon seulamet; jihnyan jiteubiet tamong dan meuteume peunajoh. pancuri teuka teuma jikak ceumeuceu, keu jikak peumate dan keu jipeurusak. teuma ulon teuka mangat manusia meuteume udeb-udeb nyang meulimpah ruah. ulon kheueh tukang meurabe nyang get. tukang meurabe nyang get jitem bri nyawong jih keu bubiri-bubiri jih. ureueng tung upah nyang kon tukang meurabe dan kon teuma ureueng po mandum bubiri nyan, jiplueng jitinggai mandum bubiri meunyoek jihnyan jikalon asee srigala nyang teuka. dan bubena bubiri nyan laju jiteugom ngon jipeucebre. ureueng nyang tung upah nyan jiplueng, sabab ureueng nyan jimubuet keu tueng upah. ureueng nyan hana jipako keu mandum bubiri nyan. ulon kheueh tukang meurabe nyang get. saban lagee bapak geuturi ulon dan ulon kuturi bapak, meunan cit teuma ulon kuturi mandum bubiri lon dan awaknyan pih jituri ulon. ulon peuna watee keu beulatang nyan. mantong na bubiri nyang laen atra ulon, teuma hana rhoh lamkawan bubiri nyoe. awaknyan ulon ba dan awaknyan pih jideungoe su ulon. awaknyan mandum teuma jeuet keu saboh kawan deungon sidroe tukang meurabe. bapak geugaseh ulon sabab ulon peujok nyawong ulon, keu lon teurimong lom teuma. hana meusidroe pih nyang hase jicok nibak ulon. ulon bri atnangan ateuh meulakee ulon keudroe. ulon na kuasa keu lon seurah atra nyan, dan na teuma kuasa keu lon cok lom. nyan tugaih nyang ulon teurimong bak bapak ulon." sabab isa geupeugah meunan, ureueng-ureueng yahudi ka jimeudakwa. keubiet jai that nyang jipeugah, "ureueng nyan ka jitamong jen! jihnyan ka pungoe! keupeue guna jih gata deungoe nyang jipeugah nyan?" teuma na cit nyang peugah, "ureueng nyang jitamong jen hana jeuet jimarit lagee nyan! peu kheueh hase jipeubuet le jen ureueng buta jeuet jimeungie?" di yerusalem dumna rakyat ba teungoh jimeu uroe raya teuresumi rumah ibadah. bak watee nyan musem sijuek. isa teungoh geujak bak seuramoe nabi sulaiman lam rumah ibadah nyan, watee nyan ureueng-ureueng yahudi teuka laju meusapat ban silingka isa. awaknyan jipeugah, "sampoe an pajan droeneueh peubiyeu kamoe ragu-ragu? peugah laju troh trang, meunyoek droeneueh biet-biet raja peuseulamat." geujaweeb le isa, "ka ltheueh lon peugah bak gata, teuma gata teutab hana tapateh. buet-buet nyang ulon peubuet ateuh nan bapak lon, ka jeuet keu bukeuti keuhai ulon. gata hana tapateh sabab gata hana rhoh lamkawan bubiri lon. bubiri-bubiri ulon jideungoe su ulon. ulon kuturi awaknyan, dan awaknyan jiseutot ulon. ulon bri keu awaknyan udeb seujat dan keukai, dan siumu masa awaknyan hana binasa. hana meusidroe

pi nyang hase jireupah awaknyan lam jaroe ulon. bapak ulon, nyang ka geubri awaknyan keu ulon, leubeh nibak peue mantong. dan hana meusidroe pi nyang hase jireupah awaknyan lam jaroe bapak. ulon ngon bapak na kheueh sa." ban jideungoeu haba nyan laju le ureueng-ureueng yahudi jike lom lom bateu jikeuneuk geulawa isa. teuma isa geupeugah bak awaknyan, "gatanyoe ka tangiang ulon nyang ka ltheueh ulon peubuet buet nyang jroh, nyang geubri tugaih le bapak ubak ulon. nibak mandum buet nyan, nyang toh kheueh nyang jeuet keusebab gatanyoe keuneuk rhom ulon?" ureueng yahudi nyan jijaweueb, "kon sabab buet-buet droeneueh nyang get nyan kamoe keuneuk geulawa droeneueh ngon bateu, teuma sabab droeneueh neuhujaat allah. droeneueh sidroe manusia, keuneuk neupeujeuet droeneueh allah." geujaweueb le isa, "bukon na teutuleh lam kitab hukom gata: allah meufeureuman, 'gata na kheueh ilah?' geutanyoe ta teupeu bahwa peue nyang teutuleh lam alkitab teutab teupeuguna siumu masa. jadi, meunyo allah geubri sebutan 'ilah' keu ureueng nyang teurimong peue nyang geupeugah, pakon gata peugah ulon hujat allah sabab lon peugah ulon aneuek allah? padahai ulon geupileh le bapak dan geu-utus lam donya nyoe. meunyo ulon hana lon peubuet buet nyang geubri le bapak, bek neupateh keu ulon. teuma sabab ulon peubuet hainyan, pateh kheueh peue nyang ulon peubuet, bah kheueh gata hana tatem pateh ubak ulon. deungon lagee nyan gata tateupeue dan muphom bapak teutab meusaboh ngon ulon, dan ulon teutab meusaboh ngon bapak." awaknyan jiseuha lom keuneuk drob isa, teuma gobnyan hase teupeusi nibak awaknyan. isa geugisa lom u meurandeh krueng yordan, bak teupat nabi yahya ilee geuseumano, laju geutinggai disinan. jai that-that ureueng nyang jijak bak gobnyan. awaknyan jipeugah, "nabi yahya hana geupeubuet buet-buet nyang ajaeb, teuma banmandum nyang geupeugah keuhai ureueng nyoe beutoi." dan rame that ureueng nyang na disinan meuman ubak isa. na sidroe ureueng nyang nan jih lazarus tinggai di betania meupat ngon syedara jih nyang nan maryam dan marta. maryam na kheueh ureueng inong nyang ro minyeuk mangat bee bak gaki tuhan, dan jisampoh ngon ok droe jih. saboh watee lazarus rhot bak saket. bandua syedara gobnyan jipeugah bak isa, "tuhan, syedara kamoe nyang tuhan gaseh nyan saket." watee geudeungoe le isa haba nyan, laju geupeugah, "peunyaket gobnyan hana jiba mate. nyoe teujadi mangat allah jipeumulia, dan lom teuma sabab aneuek allah jipeumulia cit." isa geugaseh keu marta, maryam dan lazarus. teuma watee isa geuteume haba lazarus saket, gobnyan geusaja tinggai bak teupat nyan dua uroe teuk. oh ltheueh nyan baro kheueh geupeugah bak murit-murit geuh, "jak tagisa u yudea." awaknyan laju jijaweueb, "bapak guree, banmantong ureueng-ureueng yahudi jikeuneuk rhom bapak ngon bateu dan jinoenyoe bapak keuneuk gisa lom keudeh?" "bukon kheueh meunyo uroe treb jih dua blaih jeuem?" kheun isa. "ureueng nyang jak watee uroe, hana meugantoh sabab deuh jikalon trang donya nyoe. teuma ureueng nyang jak oh watee malam meugantoh, sabab hana trang bak ureueng nyan." meunan kheueh geupeugah le

isa. oh ltheuehnyan gobnyan geupeugah lom, "sahabat geutanyoe lazarus ka jie, teuma ulon keuneuk lon jak peugo jihnyan." murit-murit isa laju jipeugah, "tuhan, meunyo lazarus jie, eunteuk jihnyan teuma puleh." meukeusut isa na kheueh bahwa lazarus nyan ka mate. teuma awaknyan jipike meukeusut isa nyan lazarus jie biasa. ngon sababnyan isa geupeugah bak awaknyan troh trang, "lazarus ka mate. teuma ulon galak cit sabab ulon hana sideh, sabab leubeh-leubeh keu gata, mangat gata jeuet tapateh. jak kheueh tak jak saat nyoe ubak lazarus." tomas nyan teuhoi "sikeumbeue" jipeugah bak rakan-rakan jih murit-murit isa, "jak geutanyoe taseutot, bah kheueh tanyoe mate meusajan ngon geuhnyan!" watee isa ka trok bak teupat nyan, lazarus ka peuet uroe treb jih lam kubu. betania to ngon yerusalem, kira-kira lhee kilo metee jioh jih. rame that ureueng yahudi jiteuka jik saweue marta dan maryam keu jijak peumangat ate awaknyan sabab lazarus syedara jihnyan ka meuninggai. watee marta jideungoeu isa ka trok, gobnyan laju geuteubiet keu geujak sambot isa. seudangkan maryam teutab tinggai di rumoh. geupeugah le marta bak isa, "tuhan, meunyo tuhan na disinoe bak watee nyan, pasti syedara ulon nyoe hana meuninggai. teuma meunan ulon teupeu bahwa bak saatnyoe cit teuma po teu allah teuma geubri peue mantong nyang tuhan lakee bak gobnyan." "syedara gata nyan udeb lom," kheun isa ubak marta. geujaweueb le marta, "ulon kuteupeue lazarus teuma udeb lom watee ureueng mate teupeubeudoh lom oh uroe kiamat." "ulon kheueh nyang bri udeb dan nyang peubeudoh ureueng mate," kheun isa bak marta. "ureueng nyang meuman keu ulon teuma udeb, bah kheueh jihnyan ka mate. dan ureueng udeb nyang meuman bak ulon, siumu masa hana mate. peue gata tapateh lam hainyan?" "tuhan" jaweueb marta, "ulon meuman tuhan aneuek allah, raja peuseumat nyang teuma teuka lom donya nyoe." oh ka ltheueh geupeugah le marta lagee nyan, laju geujak tawok maryam, syedara gobnyan laju geusah bak maryam nyan, "bapak guree na disinoe; gobnyan geutanyong gata." ban jideungoeu haba nyan, maryam bagaihbagaib jibeudoh, laju jijak meurumpok ngon isa. watee nyan, isa gohlom geutamong lam gampong. gobnyan mantong na bak teupat marta meurumpok ngon gobnyan. ureueng-ureueng yahudi nyang teungoh jipeumangat ate maryam di rumoh, ban jikalon maryam jibeudoh dan bagai that jiteubiet uluwa; awaknyan pi laju jiseutot maryam, sabab awaknyan jipike maryam jijak bak jrat keu jijak mo ba-e. watee maryam trok bak teupat isa dan jikalon gobnyan, laju jimeuteutot maryam dikeue gobnyan sira jipeugah, "tuhan, meunyo tuhan na disinoe bak watee nyan, pasti syedara ulon nyan hana meuninggai." watee isa geukalon maryam jimoe, dan ureueng-ureueng nyang jijak meusajan ngon maryam nyan pi jimoe, ate ji seudeh, dan jihnyan leumah inseuh lumpah na. dan geutanyong kheueh le gobnyan bak awaknyan, "dipat gata kubu lazarus nyan?" "jak takalon, tuhan," jaweueb awaknyan. laju isa geumo. teuma ureueng-ureueng yahudi nyan laju jipeugah, "ngieng kheueh, hana wayang gaseh gobnyan keu lazarus!" teuma na cit lamkawan awaknyan jipeugah

laguee nyoe, "gobnyan geupeujeuet ureueng buta deuh jikeumalon, pakon gobnyan hana hase geutam mantag lazarus bek mate?" isa inseuh lumpah na, laju geujak bak kubunyan. kubu nyan na kheueh saboh guha nyang teutob ngon batee raya. "kireueh keudeh batee nyan," kheun isa. marta, syedara ureueng nyang mate nyan jijaweueh, "teuma, tuhan, jihnyoe ka peuet uroe teukubu. kateuntée ka mubee khieng!" isa geupeugah bak marta, "kon ka ltheueh ulon peugah bak gata: meunyoé gata meuiman, gata takalon padubna rayeuk kuasa allah!" teuma awaknyan laju jikireueh batee. oh ltheuehnyan isa geutangah u langet sira geupeugah, "teurimong gaseh, bapak, sabab droeneueh ka neudeungoe ulon. ulon kuteupeu droeneueh sabe neudeungoe ulon, teuma ulon peugah nyoe, keu ureueng-ureueng nyang na disinoe; mantag awaknyan jipateh bahwa droeneueh kheueh nyang utus ulon." oh ka ltheueh geupeugah meunan, isa laju geudumpek ngon su nyang teuga, "lazarus, teubiet!" dan jiteubiet kheueh laju ureueng nyang ka mate nyan. jaroe ngon gaki jih mantong meubalat ngon ija kafan, dan muka jih mantong teutob ngon ija tob muka. "ploh laju ija kafan jihnyan mantag jeuet jijak," kheun isa bak ureueng-ureueng nyang na disinan. jai that-that nibak ureueng-ureueng yahudi nyang teuka jijak saweue maryam, jimeuiman ubak isa watee jikalon keujadian nyan. teuma na meupadub droe lamkawan awaknyan laju jijak bak ureueng-ureueng farisi dan laju jipeugah peue nyang ka geupeubuet le isa. ngon sabab nyan ureueng-ureueng farisi dan imeum-imeum ulee laju jipeuna rapat dikeue mahkamah agama. awaknyan jipeugah, "peue nyang haroh tapeubuet? ureueng nyoe jai that jipeubuet nyang ajaeb! meunyoé tapeubiyeu ureueng nyan jipeubuet laju lagee nyoe meutamah jai ureueng nyang meuiman bak jih nyan. dan akhe jih peunguasa roma teuma jiteuka dan jipeuhanco baet allah dan banmandum banda geutanyoe!" sidroe lamkawan awaknyan nyang nan jih kayafas, imeum agong bak thon nyan, ureueng nyan jipeugah lagee nyoe, "gatanyoe hana tateupeue sapeue. peu kheueh gata hana tasada bahwa deumi rakyat, leubeh get sidroe ureueng mate nibak bansaboh bansa hanco?" sibeuna jih kayafas jipeugah nyan, bukan lam pik-eran jih keudroe. teuma sibagoe imeum agong thon nyan jihnyan laju jipeujeuet isa teuma mate keu bansa yahudi. dan bukan keu bansa yahudi mantong, teuma keu teupeusapat dan teupeusaboh aneuk-aneuk alah nyang meucebre. phon nibak ureueng na le peunguasa yahudi laju jimeupakat keu jipoh mate isa. ngon sabab nyan isa hana le geupeuleumah droe dikeue ureueng rame lamkawan ureueng yahudi. gobnyan laju geutinggai yudea, laju geujak u banda nyan nan jih efrain bak bineh padang pasi. disinan gobnyan tinggai meusajan ngon murit-murit geuh. bak watee nyan ka to that ngon uroe raya paskah yahudi. jai that-that ureueng nyang tinggai di gampong-gampong jijak u yerasalem keu jijak peuna upacara teupeugleh droe sigohlom peurayaan nyan. awaknyan jimita isa, dan watee ka meusapat di baet allah, awaknyan laju jimarit sabe keudroe-droe, "pakriban meunyoé bak gata? peu kheueh mungkin gobnyan hana geuteuka uroe raya nyoe."

awaknyan jipeugah meunan sabab imeum-imeum ulee dan ureueng-ureueng farisi jipeuteubiet peurintah bahwa ureueng nyang jiteupeue dipat isa nyan na, haroh jilapor mantag gobnyan hase teudrob. nam uroe sigohlom trok bak uroe raya paskah, isa geujak u betania. bak teupatnyan tinggai lazarus nyang ka geupeubeudoh le gobnyan nibak mate. disinan isa jipeujame le awaknyan, dan marta nyang peutimang. lazarus meunan cit ngon jame-jame nyang laen jideuk dan makheun meusajan-sajan deungon isa. oh ltheuehnyan teuka maryam sira jiba na kira-kira siteungoh litee minyeuk mantag bee narwastu nyang meuhai lumpah na. le maryam laju jiroe minyeuknyan bak gaki isa, oh ltheueh nyan laju jisampoh ngon ok jih. bansaboh rumoh nyan ka penuhon ngon bee minyeuk nyang harom nyan. teuma le yudas iskariot, sidroe lamkawan murit isa – nyang oh dudoe jikhianat isa – jipeugah, "pakon minyeuk mantag bee nyan hana teupeubloe mantong ngon lhee reutoh peng pirak, dan peng nyan teubri keu ureueng gasien?" yudas jipeugah meunan kon sabab jih jipako keu ureueng gasien, sabab jihnyan pancuri. jihnyan kayem that jicok peng lam kaih nyang teukeubak bak jih. teuma le isa geupeugah, "peubiyeu mantong peue nyang jipeubuet le ureueng inong nyan! peue nyang jipeubuet nyoe na kheueh keu uroe ulon teukubu. ureueng gasien sabe na lamkawan gata, teuma ulon hana." rame that ureueng yahudi jideungoe bahwa isa na di betania, jadi, awaknyan laju jijak keudeh. awaknyan jijak bukan sabab isa mantong, teuma sira jijak ngieng lazarus nyang ka geupeubeudoh nibak mate le gobnyan. nyang kheueh sabab jih imeum-imeum ulee keuneuk jipoh cit lazarus; sabab jihnyan jeuet keusabab jai that-that ureueng yahudi jitinggai awaknyan dan meuiman ubak isa. oh singoh beungoh ureueng rame nyang ka teuka keu jipeuraya paskah jideungoe bahwa isa teungoh geujak dan geutuju u yerasalem. teuma le awaknyan laju jicok on-on palem laju jijak sambot gobnyan, sira jisumurak meuhubo, "pujoe kheueh allah! teubri beureukat gobnyan nyang teuka ateuhan na tuhan. teubri beureukat kheueh raja israel!" isa meuteume saboh keuleudee muda, dan laju geuek ateuheh keuleudee nyan. ngon lagee nyan jeuet kheueh peue nyang ka teutuleh lam alkitab: "bek teumakot, putroe sion! ngieng raja gata teuka, geuek ateuheh saboh keuleudee muda!" bak watee nyan murit-murit isa gohlom muphom banmandum nyan. teuma oh ka ltheueh isa teupeuangong deungon gobnyan mate, baro kheueh awaknyan teuingat bahwa nyang jipeubuet le gob ateuheh gobnyan ka na teutuleh lam alkitab keuhai gobnyan. ureueng-ureueng nyang teuka watee isa geutawok lazarus jiteubiet lam kubu dan jibeudoh nibak mate, laju jibri keusaksian keuhai nyan. nyang kheueh sabab jih ureueng rame nyan jijak bak isa sabab awaknyan jideungoe gobnyan kheueh nyang ka geupeujeuet buet ajaeb nyan. teuma ureueng-ureueng farisi laju jimarit sabe keudroe-droe, "geutanyoe hana jeuet tapeubuet sapeue! ngieng kheueh, mansaboh donya jijak seutot gobnyan!" lamkawan ureueng-ureueng nyang teungoh jak u yerasalem keu jijak meutiebadat watee peurayaan nyan na teuma mupadub droe ureueng yunani. awaknyan jijak ubak filipus laju jipeu-

gah, "syedara, meunyojeuet, kamoe keuneuk meurumpok ngon isa." (filipus asai jih di betsaida di galilea.) teuma le filipus laju jijak peugah hainyan bak andreas, dan oh lheureh nyan awaknyan bandua jijak peugah bak isa. isa geupeugah bak awaknyan, "ka watee jih aneuk manusa teuagongkan. keubiet beutoi nyang ulon peugah nyoe: meunyoje sianeuk gandom hana teupula lam tanoh dan mate, aneuk gandom nyan teutab tinggai sianeuk. teuma meunyoje aneuk gandom nyan mate, baro kheureh jipeuhase gandom nyang le. ureueng nyang cinta udeb jih teuma gadoh udeb jih. teuma ureueng nyang banci keu udeb jih lam donya nyoe, teuma teupulara jihnyan keu udeb sejati ngon keukai. ureueng keuneuk peutimang ulon bah jiseutot ulon; mangat peulayan ulon hase meusapat ngon ulon dipat mantong ulon na. ureueng nyang peutimang ulon teuma geuhoreumat le bakap lon." "ate ulon seudeh that; peue nyang jeuet lon peugah bak saat nyoe? peue kheureh jeuet lon peugah, 'bakap, peuseuliseh kheureh ulon bak saatnyoe?' teuma ngon lagee nyoe keu lon rasa watee meudeurita nyoe kheureh ulon teuka. bakap, teupeumulia kheureh nan droeneuh!" teuma laju teudeungoe su di langet nyang geupeugah meunoe, "ulon ka lon peumulia gobnyan, dan ulon lon peumulia lom gobnyan." ureueng rame nyang na disinan jideungoe banmandum su nyan. awaknyan jipeugah, "nyan su geulanteuel!" teuma na nyang peugah, "bukon, nyan malaikat nyang meututoe ngon gobnyan!" laju isa geupeugah bak awaknyan, "su nyan teudeungoe, bukoneureulee keu lon, teuma na kheureh peureulee keu gata. jinoenyoje ka watee jih donya teupeuhakem; bak saat nyoe nyang mat kuasa ateuhe donya nyoe teupeutrone. teuma ulon nyoe, meunyoje ulon ka teupeumanyang di ateuhe bumoe, ulon teuma lon tarek mandum ureueng ubak ulon." gobnyan geupeugah meunan keu geutunyok pakriban cara jih gobnyan mate. ureueng rame nyan jipeugah bak gobnyan, "meunurot kitab hukum kamoe, raja peuseulamat teuma udeb siumu masa. pakriban droeneuh jeuet teupeugah aneuk manusa bah teupeumanyang di ateuhe bumoe? soe aneuk manusa nyan?" geujaweweub le isa, "teuma keu sikeujab mantong trang nyan na lamkawan gata. ngon lagee nyan, gata jak kheureh simantong trang nyan na, mangat gata bek keunong lam seupot. ureueng nyang jijak lam seupot hana jituho hojjik. peucaya kheureh keu trang nyan, simantong trang nyan mantong na bak gata, mangat gata jeuet keu aneuk-aneuk trang." oh ka lheureh isa geupeugah meunan, gobnyan laju geujak nibak teumpatnyan dan hana geutem tunyok droe bak awaknyan. bah kheureh ka jai that geupeuleumah buet nyang ajaeb le isa dikeue awaknyan, awaknyan teutab hana jipateh keu gobnyan. ngon lagee nyan jeuet kheureh peue nyang geupeugah le nabi yesaya, "tuhan, soe kheureh nyang pateh bak hana kamoe? ubak soe kheureh kuasa tuhan teupeuleumah?" nyang kheureh sabab jih awaknyan hana jitem pateh, sabab isa ka geupeugah, "po teu allah meufeureuman, 'ulon peubuta mata awaknyan, lon peujeut awaknyan kreueh ate; mangat mata awaknyan bek deuh jikalon, pikeran awaknyan bek jimuphom. mangat awaknyan bek jiriwang bak ulon, laju ulon peupuleh awaknyan.'

"nabi yesaya geupeugah meunan sabab gobnyan ka geukalon keubeusaran isa, dan meututoe keuhai gobnyan. bah kheureh meunan, jai that ureueng, meunan cit na peunguasa yahudi jimeuiman ubak isa. teuma awaknyan hana jijeuet peugah hainyan ngon cara troh trang, sabab awaknyan teumakot keu ureueng-ureueng farisi meunyoje jiteupeu hainyan hana jibri tamong lam rumoh iebadat. awaknyan leubeh galak jipujoe le manusa nibak geuhareuga le po teu allah. laju isa geutawok, "hei ureueng nyang meuiman ubak ulon, kon keu ulon jimeuiman, teuma ubak gobnyan nyang utus ulon. dan ureueng nyang kalon ulon, jikalon gobnyan nyang utus ulon. ulon teuka ateuhe rhung donya sibagoe trang, mangat mandum ureueng nyang meuiman bak ulon bek tinggai lam seupot. ureueng nyang jideungoe peue nyang ulon peurunoe, teuma hana jiseutot lagee nyang ulon peurunoe nyan – kon ulon nyang hukum jihnyan. sabab ulon teuka bukoneureulee keu lon peuhakem donya nyoe, teuma keu lon peuseulamat. ureueng nyang tulak ulon dan hana jideungoe nyang ulon peugah, ka na nyang peusidang ureueng nyan. haba nyang ulon peusampoe, nyan kheureh nyang peuhakem ureueng nyan bak uroe kiamat. sabab ulon hana lon meututoe ateuhe keuheundak ulon keudroe; bakap nyang utus ulon, gobnyan kheureh nyang peurintah bak ulon peue nyang haroh lon peugah dan ulon peusampoe. dan ulon teupeue peurintah geuh nyan teubri udeb sejati dan keukai. teuma ulon peusampoe lagee nyang geupeurunoe le bakap ubak ulon." siuore sigohlom uroe raya paskah, isa geuteupeue bahwa ka watee jih gobnyan geutinggai donya nyoe keu geugisa ubak bakap geuh. gobnyan geugaseh keu ureueng nyang jeuet keu milek gobnyan ateuhe rhueng donya, dan gobnyan teutab geugaseh keu awaknyan sampoe an pagee. isa dan murit-murit gobnyan teungoh makheun malam. iblih ka jipeut-tamong niet lam ate yudas aneuk simon iskariot keu jikhianat isa. isa geuteupeue bahwa bakap ka geuseurah mandum keukuasaan bak gobnyan. gobnyan pih geuteupeue bahwa gobnyan teuka nibak allah dan teuma geugisa bak po teu allah. sabab nyan gobnyan laju geudong, geusuet bajee jubah geuh, dan geuikat andok bak keuieng geuh. oh lheurehnyan gobnyan laju geupree le lam saboh baskom, laju geurhah gaki murit-murit gobnyan dan laju geupeuto ngon ija andok nyang teuikat bak keuieng geuh. trok kheureh gobnyan bak simon petrus, laju jipeugah le simon petrus nyan lagee nyoe, "tuhan, ek kheureh beutoi tuhan nyang rhah gaki ulon?" geujaweweub le isa, "jinoenyoje gata hana muptom peue nyang ulon peubuet nyoe, teuma singoh gata teuma tateupeue." "bek, tuhan," kheureh petrus bak isa, "bek sagai-sagai tuhan neu rhah gaki ulon!" teuma isa geujaweweub, "meunyoje ulon hana lon rhah gata, gata hana hubongan ngon ulon." jipeugah le simon petrus, "meunyoje meunan, tuhan, bek gaki lon mantong, meunan cit ngon jaroe dan ulee ulon!" "ureueng nyang ka lheureh jimanoe, ka gleh bansaboh tuboh," geupeugah le isa bak petrus. "ureueng nyan hana peureulee le teupeugleh seulaen gaki geuh. gatanyoe ka gleh, teuma hana banmandum." (isa ka geuteupeue soe nyang keuneuk khianat gobnyan. nyang kheureh sabab jih gob-

nyan geupeugah, "gatanyoe ka gleh, teuma hana banmandum.") oh ka ltheueh isa geu rhah gaki awaknyan, laju geungui lom bajee jubah geuh dan geudeuk lom teuma. laju geupeugah bak awaknyan, "peu kheueh muphom gata peue nyang ban ulon peubuet ateuheh gata? gata hoi ulon guree dan tuhan. dan keubiet lagee nyan. meunyoe ulon sibagoe tuhan dan guree gata ulon rhah gaki gata, gata pi wajib teuma saleng gata rhah gaki. ulon bie teuladan nyoe ubak gata, mangat gata pi tapeubuet peue nyang ka ulon peubuet ateuheh gata. keubiet beutoi nyang ulon peugah nyoe: sidroe namiet hana leubeh rayeuk nibak amphon jih, dan sidroe utosan hana leubeh rayeuk nibak nyang utus jih nyan. meunyoe gata ka tateupeue banmandum nyoe, mubahgia kheueh gata meunyoe tapeubuet lagee nyan. peue nyang ulon peugah nyoe bukan kheueh keu gata mantong. ulon kuteupeue soe-soe nyang ka ulon pileh. teuma peue nyang teutuleh lam alkitab, nyan haroh teujadi, na kheueh, 'ureueng nyang jimakheun meusajan ngon ulon, teuma jilawan ulon.' hainyan ulon peusampoe bak gata jinoenye, meunyoe hainyan jeuet singoh, gata teuma tapateh bahwa ulon kheueh nyang teupeugah ulon na. keubiet beutoi nyang ulon peugah nyoe: soe nyang teurimong ureueng nyang ulon utus, ureueng nyan ka jiteurimong ulon. dan soe nyang teurimong ulon, ka jiteurimong gobnyan nyang utus ulon." oh ka ltheueh geupeugah lagee nyan le isa, gobnyan laju jiteuka weueh. dan geupeugah, "keubiet beutoi nyang ulon peugah nyoe: sidroe lamkawan gatanyoe jikhianat ulon." murit-murit gobnyan laju jimeungieng-ngieng sabe keudroe sabab awaknyan hireuen lumpah na soe nyang geumeukeusut le isa nyan. murit nyang geugaseh le isa jiduek bakhineh isa. simon petrus laju jibri isyarat bak gobnyan, mangat jitem tanyong bak isa soe nyang geumeukeusut le isa nyan. teuma murit nyan laju jipeurab bak isa, dan laju jitanyong, "soe nyang neumeukeusut nyan, tuhan?" geujaweueb le isa, "ureueng nyang ulon jok ruti nyang ulon ceulob lam cawan; laju geubri bak yudas aneuek simon iskariot. bagaiih that oh ka ltheueh yudas jiteurimong ruti nyan, ibilih laju jitamong lam ate jih, dan laju isa geupeugah bak ureueng nyan, "peu buet teuh dan peue nyang keuneuk gata peubuet." hana meusidroe pi nibak awaknyan nyang na duek makheun disinan nyang muphom pakon isa geupeugah meunan bak yudas. na nyang pike isa geuyue bak yudas sapeue-sapeue nyang teupeureulee keu khanuri nyan, atawa teubri bacut peng keu ureueng gasien – sabab yudas na kheueh nyang mat kaih awaknyan. oh ka ltheueh yudas jiteurimong ruti nyan, jihnyan laju jiteubiet u luwa. uroe nyan ka malam. oh ka leupah yudas jijak, isa laju geupeugah, "jinoenye aneuek manusia jipeumulia, dan allah jipeumulia rot gobnyan. meunyoe po teu allah teupeumulia rot gobnyan, gobnyan pi teuma geupeu mulia le allah rot droe gobnyan keudroe. dan allah teuma geupeu mulia deungoe reujang. aneuek-aneuek ulon, ulon hana treb le tinggai ngon gatanyoe. gata tamita ulon, teuma lagee nyang ka ltheueh ulon peugah bak dumna peungasa yahudi, meunan cit ulon peugah bak gata; bak teumpat ulon jak, gatanyoe hana hase tateuka. peurintah baro ulon jok keu gata: gaseh kheueh sidroe

ngon nyang laen. saban lagee ulon gaseh keu gata, meunan cit gata bah kheueh saleng tameugaseh. meunyoe gata saleng na geunaseh, banmandum ureueng jiteupeue bahwa gata na kheueh murit-murit ulon." "tuhan, tuhan ho keuneuk jak?" jitanyong le simon petrus bak isa, geujaweueb le isa, "ho ulon jak, gata hana jeuet taseutot bak saat nyoe. gata teuma taseutot ulon oh watee dudoe." "tuhan, pakon ulon hana jeuet lon seutot tuhan bak saat nyoe?" jitanyong le petrus lom. "ulon rila mate keu tuhan!" geujaweueb le isa, "peu kheueh keubiet gata rila mate keu ulon? beutateupeue kheueh, sigohlom manok jikuuek eunteuk, gata ka lthee goe, gata peugah bahwa gata hana taturi keu ulon!" "bek sosah ate gata," kheun isa bak awaknyan. "meuiman kheueh ubak allah, dan meuiman kheueh teuma ubak ulon. di rumoh bapak ulon jai that teumpat tinggai, ulon jak keudeh keu lon jak keubah teumpat keu gata. ulon hana lon peugah meunan bak gata, meunyoe jih nyan kon lagee nyan. oh ka leupah ulon jak keu lon jak keubah teumpat keu gata, teuma lon riwang lom dan lon jaktueng gata, mangat dipat ulon na, disinan teuma gata na. bak teumpat ulon jak gata tatuho rot jih." laju tomas jipeugah bak isa, "tuhan, kamoe hana meuteupeue ho tuhan jak, pakriban jeuet kamoe tuho rot jih?" geujaweueb le isa, "ulon kheueh rot keu teuturi ubak allah dan meuteume udeb. hana meusidroe pih nyang hase jijak ubak bapak, meunyoe hana rot ulon. meunyoe gata taturi keu ulon, pasti gata teuma taturi keu bapak ulon. jinoenye gata ka taturi keu gobnyan, dan ka gata kalon gobnyan." teuma filipus laju jipeugah bak isa, "tuhan, tunyok kheueh bapak bak kamoe, mangat kamoe puih ate." geujaweueb le isa, "ka padubnyan treb ulon na meusajan gata, gohlom cit gata turi keu ulon hai filipus? ureueng nyang ka jikalon ulon, ka jikalon bapak. pakriban gata tapeugah, 'tunyok kheueh bapak bak kamoe?' filipus, peu kheueh hana gata pateh, bahwa ulon meusaboh ngon bapak, dan bapak meusaboh ngon ulon? peue nyang ulon peugah bak gata, hana ulon peugah nibak droe ulon keudroe. bapak nyang teutab na meusaboh ngon ulon, gobnyan kheueh nyang peubuet banmandum nyan. meuiman kheueh bak ulon, bahwa ulon meusaboh ngon bapak dan bapak meusaboh ngon ulon. atawa sihana-hana jih, tapateh kheueh sabab peue nyang ka ulon peubuet. keubiet beutoi nyang ulon peugah nyoe: ureueng nyang meuiman ubak ulon, teuma jipeubuet peue nyang ka ulon peubuet – lom teuma ureueng nyan jipeubuet nyang leubeh rayeuk lom – sabab ulon jak ubak bapak. dan peue mantong nyang gata lakee ateuheh nan ulon, nyan teuma ulon peubuet keu gata, mangat bapak jipeumulia rot aneuek. peue mantong nyang gata lakee ateuheh nan ulon, ulon peubuet." "meunyoe gata tagaseh keu ulon, gata teuma tapeujak peurintah ulon. ulon teuma lon lakee bak bapak, dan gobnyan geubri keu gata nyang tulong laen, nyang teuma tinggai meusajan gata keu siumu masa. geuhnyan na kheueh roh allah nyang teuma peugah keuhai po teu allah nyan beuna. donya hana hase jiteurimong geuhnyan, sabab hana jikalon atawa hana jituri. teuma gata taturi geuhnyan, sabab geuhnyan tinggai meusajan gata dan teuma meusaboh ngon gata. gata hana teuma ulon tinggai sidroe siba-

goe aneuek yatem ngon meuntui. ulon teuma kuriwang bak gata. tinggai sikeujab teuk donya nyoe hana jikalon le ulon. teuma gata tangieng ulon. dan sabab ulon udeb, gata pih udeb. meunyoe katrok uroenyan, gata teuma tateupeue bahwa ulon meusaboh ngan bapak, gata meusaboh ngon ulon, dan ulon meusaboh ngon gata. ureueng teurimong peue-peue nyang ulon peurintah dan jipeubuet lagee nyang teupeurintah nyan, jihnyan nyang gaseh ulon. bapak ulon teuma geugaseh ureueng nyang gaseh keu ulon. ulon pi teuma lon gaseh keu ureueng nyan dan lon peugah droe ulon bak jihnyan." yudas, (kon yudas iskariot) jitanyong bak isa, "tuhan, pakon tuhan neutem peugah droe ubak kamoe dan bukan bak donya nyoe?" geujaweueh le isa, "ureueng nyang jigaseh keu ulon, teuma jiseutot peue nyang ulon purunoe. bapak ulon teuma geugaseh keu jihnyan. bapak ngon ulon teuma kamoe jak bak jihnyan dan tinggai meusajan jihnyan. ureueng nyang hana jigaseh keu ulon, hana jiseutot ajaran ulon. ajaran nyang gata deungoe nyan, kon nibak ulon asai jih, teuma nibak bapak nyang utus ulon. banmandum nyan ulon peugah bak gata simantong ulon na meusajan gata. teuma roh allah, nyang tulong nyang teuma geu-utus le bapak ateuheh nan ulon, gobnyan kheueh nyang teuma peurunoe gata banmandum dan geupeuingat gata keu banmandum nyang ka ltheueh ulon bri keu gata. seujahtura ulon tinggai bak gata. seujahtura ulon keudroe nyang ulon bri keu gata, nyang ulon bri nyan bukan lagee nyang jibri le donya keu gata. bek apoh apah dan bek teumakot. gata ka tadeungoe ulon meututoe, 'ulon kujak, teuma ulon teuma kuriwang lom ubak gata'. meunyoe gata tagaseh keu ulon, gata teuma tagalak watee ulon jak bak bapak, sabab bapak leubeuh rayeuk nibak ulon. ulon peugah nyan nibak gata nibak saat nyoe, sigohlom mandum nyan teu-jadi, gata teuma tameuiman. ulon hana teuma lon meututoe leubeuh jai lom ngon gata, sabab ka trok watee jih peunguasa donya nyoe teuka. teuma jihnyan hana meukuasa ateuheh droe ulon. teuma mandum nyan haroh na mangat donya jisadar bahwa ulon kugaseh bapak dan ulon peubuet mandum nyang geupeurintah le bapak ubak ulon. ka jeuet, bohjak taweh nibak teupat nyoe." geupeugah lom le isa, "ulon na kheueh bak anggo nyang seujati, dan bapak ulon na kheueh nyang peugleh lampoh. tieb-tieb cabeueng nibak ulon nyang hana muboh, laju teukoh, dan tieb-tieb cabeueng nyang muboh geupeukureueng on jih dan geupeu gleh mangat leubeuh jai jimuboh. gata ka gleh sabab ajaran nyang ulon bri keugata. teutab meusaboh ngon ulon dan ulon pi teutab meusaboh ngon gata. cabeueng keudroe hana hase jimuboh, keucuali meunyoe cabeueng nyan teutab na meukeumat ateuheh bak jih. meunan cit gata hase jimuboh, meunyoe teutab meusaboh ngon ulon. ulon kheueh bak anggo, dan gata cabeueng-cabeueng jih. ureueng nyang teutab meusaboh ngon ulon dan ulon ngon jihnyan, teuma jimuboh le; sabab meunyoe hana ulon, gata hana hase tapeubuet sapeue. ureueng nyang hana teutab meusaboh ngon ulon, teuma teutiek lagee cabeueng, laju tho. cabeueng-cabeueng nyang lagee nyan teupeusapat dan teutiek lam apui, oh ltheuehnyan laju teutot. meunyoe gata

teutab meusaboh ngon ulon dan ajaran ulon tinggai lam ate gata, lakee kheueh bak bapak peue mantong nyang gata keuneuk lakee; nyang gata lakee nyan teuma geubri. meunyoe gata tapeubuet nyang le, bapak ulon teupeumulia; dan deungon lagee nyan gata biet-biet jeuet keu murit ulon. lagee bapak geugaseh keu ulon, meunan kheueh ulon gaseh keu gata. bah kheueh gata teutab udeb lagee ureueng nyang ulon gaseh. meunyoe gata peujak peue-peue nyang ulon peurintah nyoe, gata teutab seutia bak geunaseh ulon, saban lagee ulon teutab seutia bak geunaseh bapak sabab ulon peubuet peue-peue nyang geupeurintah le gobnyan. banmandum nyoe ulon bri tee bak gata, mangat galak ulon na lam ate gata, dan galak gata jeuet keusampoereuna. nyoe kheueh peurintah ulon: gaseh kheueh sidroe ngon nyang laen, saban lagee ulon kugaseh gata. ureueng nyang paleng jigaseh keu rakan-rakan jih na kheueh ureueng nyang jibri udeb jih keu awaknyan. gata na kheueh sabat-sabat ulon, meunyoe gata tapeubuet peue nyang ulon peurintah bak gata. gata hana le ulon hoi namiet, sabab namiet hana jiteupeu peue nyang teungoh jipeubuet le amphon jih. gata ulon hoi sabat, sabab mandum nyang ulon deungoe nibak bapak, ka ulon bri bak gata. kon gata nyang pileh ulon. ulon kheueh nyang pileh gata, dan nyang yuejak gata mangat jimuboh le – boh nyang hana hase binasa. teuma bapak geubri keu gata peue mantong nyang gatalakee bak gobnyan ateuheh nan ulon. nyoe kheueh peurintah ulon keu gata: gaseh kheueh sidroe ngon nyang laen." "meunyoe donya jibanci gata, ingat kheueh bahwa ulon ka leubeuh ilee jibanci le donya. seukira jih gata atra donya, gata teuma jigaseh le donya sibagoe atra jih. teuma ulon ka lon pileh gata lam donya nyoe, ngon lagee nyan gata bukan le atra donya. nyang kheueh sabab jih donya jibanci gata. ingat kheueh peue nyang ka ltheueh ulon peugah bak gata, 'namiet hana leubeuh rayeuk nibak amphon jih.' meunyoe awaknyan ka jienanya ulon, awaknyan pih teuma ji ienanya gata. meunyoe awaknyan jiseutot nyang lagee ulon purunoe, awaknyan pih teuma jiseutot nyang gata purunoe. banmandum nyan awaknyan peubuet ateuheh gata, sabab gata murit ulon, sabab awaknyan hana jiturit gobnyan nyang utus ulon. meunyoe ulon hana lon teuka dan hana lon peugah banmandum nyan bak awaknyan, awaknyan hana meudesya. teuma bak saatnyoe awaknyan hana alasan le keu desya droe jih. ureueng nyang banci ulon, jibanci bapak ulon. seukira jih lamkawan awaknyan hana ulon peubuet hai-hai nyang gohlom na jipeubuet le ureueng laen, awaknyan hana meudesya. teuma bak saat nyoe awaknyan ka jikalon peue nyang ulon peubuet, dan awaknyan jibanci ulon meunan cit bapak ulon. teuma biet ka seuharoh jih lagee nyan, mangat jeuet peu nyang teutuleh lam kitab hukom awaknyan, na kheueh: 'awaknyan jibanci ulon ngon hana alasan.' ulon teuma lon utus bak gata peunulong nyang asai jih nibak bapak. gobnyan kheueh roh nyang geupeugah roh nyang beuna keuhai po teu allah. meunyoe rohnyan teuka, gobnyan geumeusaksi keuhai ulon. dan gata pi haroh gata bri keusaksian keuhai ulon, sabab gata kana meusajan ulon phon yoh awai. banmandum nyan ulon peugah bak gata mangat gata

bek murtat. gata teuma teupeuteubiet nibak rumoh-
 rumoh iebadat. dan teuma teuka watee jih bahwa
 ureueng nyang poh mate gata jipike jihnyan me-
 ungabdi bak po teu allah. awaknyan jipeubuet lagee
 nyan ateuh gata sabab awaknyan gohlom jituri ba-
 pak meunan cit ulon. teuma bak saat nyoe ulon peugah
 nyan bak gata, meunyo nyang jeuet singoh, gata
 taingat bahwa ulon ka lheureh lon peugah bak gata."
 "hainyoe hana ulon peugah bak gata yoh awai phon,
 sabab, ulon mantong na meusajan ngon gata. teuma
 bak saat nyoe ulon kujak ubak gobnyan nyang utus
 ulon; dan hana meusidroe pi nibak gata tatanyong
 ho ulon jak. bak saat nyoe ate gata jeuet keuseudeh,
 sabab ulon peugah hainyan bak gata. teuma ulon peugah
 nyang beutoi bak gata: leubeh get nibak gata,
 meunyo ulonjak; sabab meunyo ulon hana lonjak,
 nyang tulong nyan hana teuka bak gata. teuma meunyo
 ulonjak, ulon teuma lon utus gobnyan ubak gata.
 meunyo gobnyan teuka, geuhnyan teuma geupeugah
 bak donya makna nyang sibeuna jih nibak desya,
 nibak peue nyang sibeuna jih, dan nibak hukoman
 po teu allah. gobnyan teuma geupeugah nyang hana
 meuman ubak ulon na kheureh desya; bahwa ulon beutoi,
 sabab ulon jak ubak bapak dan gata hana gata ngieng
 le ulon; dan bahwa po teu allah ka geupeu phon
 hukom, sabab peunguasa donya nyoe ka geuhukom.
 jai that-that nyang lon keuneuk peugah bak gata,
 teuma bak saat nyoe gata gohlom hase gata teurimong.
 teuma meunyo rohnyan teuka, na kheureh gobnyan
 nyang peugah keubeunaran keuhai allah, gata teuma
 geubimbeng keu taturi banmandum keubeunaran.
 gobnyan hana geumeututoe nibak droe geuh keudroe
 teuma geupeugah peue nyang ka geudeungoe,
 dan gobnyan teuma geupeugah bak gata peue
 nyang teuma teujadi oh uroe dudoe. gobnyan
 teuma geupeu mulia ulon, sabab peue nyang
 geupeusampoe bak gata, geuteurimong nibak ulon.
 banmandum nyang na bak bapak na kheureh atra
 ulon. nyang kheureh sabab jih ulon peugah bahwa
 peue nyang jipeutrok le roh ubak gata, geuteurimong
 atranyan nibak ulon." "tinggai sikeujab teuk gata hana
 meurumpok le ngon lon, dan meunan cit tinggai
 sikeujab teuk gata teuma takalon ulon." na padubdroe
 murit isa laju jiteumanyong sabe keudroe-droe, "peue
 meukeusut jih geupeugah bak geutanyoe: 'tinggai
 sikeujab teuk gata hana teuma gata ngieng le ulon,
 dan tinggai sikeujab teuk gata teuma tangieng ulon'
 dan peue teuma meukeusut jih: 'ulon kujak ubak ba-
 pak?'" awaknyan jiteumanyong laju, "peue makna jih,
 'sikeujab? geutanyoe hana muphom gobnyan geumariet
 keuhai peue!" isa geuteupeue awaknyan keuneuk
 teumanyong bak gobnyan. jadi gobnyan laju
 geupeugah, "bunoe ka lheureh lon peugah, 'tinggai
 sikeujab teuk, gata hana teuma gata ngieng ulon,
 dan meunan cit tinggai sikeujab teuk gata teuma tang-
 ieng ulon'. peu kheureh nyang nyang gata peusoai
 lamkawan gata? beuneupateh kheureh gata teuma
 tamo dan meuba-e, teuma donya meugeumbiraria.
 gata tunu ate, teuma sosah gata nyan meu-ubah jeuet
 keu geumbiraa. meunyo sidroe ureueng inong ka
 to that watee jikeuneuk peulahe aneuek, jihnyan
 lumpah that sosah dan apoh apah, sabab ka watee jih
 inong nyan meudeurita. teuma meunan aneuek jih-

nyan lahe, ureueng inong nyan tuwoe ubak peundeu-
 ritaan jih sabab galak that ate sidroe aneuek banyak
 ka lahe lam donya. meunan cit deungan gata: ji-
 noenyoe gata meusosah ate, teuma ulon meurumpok
 lom ngon gata, teuma ate gata teuma mangat; dan
 hana meusidroe pi nyang hase jicok nyang mangat
 nyan lam ate gata. bak uroe nyan, gata hana tany-
 ong sapeue le ubak ulon. neupateh kheureh: peue
 mantong nyang gata lakee ubak bapak ateuh nan
 ulon, nyan teuma geubri keu gata. sampoe bak saat
 nyoe gata gohlom talakee sapeue ateuh nan ulon. la-
 kee kheureh, teuma gata tateurimong, mangat harok
 gata sampoeuna." "banmandum nyoe ulon peugah
 bak gata ngon kiasan. teuma teuka watee jih, hana
 ulon peugana le kiasan, teuma lon mariet troh trang
 ngon gata keuhai bapak. bak watee nyan gata teuma
 talakee bak bapak ateuh nan ulon; beutateupeue
 kheureh, ulon hana teuma lon lakee nibak bapak keu
 gata, sabab bapak keudroe geugaseh gata. gobnyan
 geugaseh gata sabab gata tagaseh keu ulon, dan tap-
 ateh bahwa ulon teuka nibak po teu allah. beutoi
 ulon asai nibak bapak, dan ka lon teuka lam donya.
 teuma bak saat nyoe ulon tinggai donya keu lon
 gisa ubak bapak." laju murit-murit isa jipeugah bak
 gobnyan, "jinoenyoe tuhan neumeututoe troh trang
 dan hana neupeugana kiasan, dan kamoe meuteu-
 peu bahwa tuhan neuteupeue peue-peue mantong.
 hana peureulee meusidroe ureueng pi jiteumanyong
 sapeue-sapeue ubak tuhan. ngon sabab kamoe meupateh
 tuhan teuka nibak po teu allah." isa geujaweub
 awaknyan, "jadi, peu kheureh ka gata pateh bak saat
 nyoe? ingat! saat jih teuma teuka, dan ka teuka,
 gata teuma teupeucure bre. gata teuma tawoe u ru-
 moh droe maseng-maseng dan teuma gata tinggai
 ulon sidroe. teuma ulon hana sidroe sabab bapak na
 meusajan ngon ulon. banmandum nyoe ulon peugah
 mangat gata meuteume seujahteura sabab meusaboh
 ngon ulon. lam donya gata teuma meudeurita, dan
 tabah kheureh ate gata! ulon ka lon peutaloe donya!"
 oh ka lheureh geupeugah meunan, isa laju geutangah
 u langet sira geupeugah, "bapak, jinoo ka trok wa-
 tee jih. peu agong kheureh aneuek droeneueh, man-
 gat aneuek droeneueh pi ji peu agong bapak. bapak
 ka neubri kuasa ateuh banmandum umat manusia
 ubak aneuek, mangat jihnyan jibri udeb sejutai dan
 keukai keu mandum ureueng nyang bapak bri bak ji-
 hnyan. nyoe kheureh udeb sejutai dan keukai; mangat
 manusia jituri bapak, sibagoe allah nyang beutoi, dan
 jituri isa nyang geu-utus le bapak. ulon ka lon
 peumulia bapak ateuh rueng bumoe nyoe deungan
 lon peuseuleusoe buet nyang ka bapak bri bak ulon.
 bapak! agong kheureh ulon jinoenyoe ubak bapak de-
 ungoe keumuliaan nyang na bak ulon meusajan ba-
 pak sigohlom donya nyoe teupeujeuet. ulon ka lon
 peuturi bapak ubak ureueng-ureueng nyang na lam
 donya nyoe nyang ka bapak bri keu ulon. awaknyan
 na kheureh atra bapak, dan bapak ka neubri awaknyan
 bak ulon. awaknyan ka jiseutot peue nyang bapak
 peugah. jinoenyoe awaknyan ka jiteupeue bahwa
 banmandum nyang bapak bri bak ulon asai jih ni-
 bak bapak. ka ulon peusampoe bak awaknyan tu-
 toe haba nyang bapak bri bak ulon; dan awaknyan
 ka jiteurimong. awaknyan jiteupeue bahwa ulon

biet-biet teuka nibak bapak dan awaknyan jipateh bahwa bapak kheueh nyang utus ulon. ulon meudoa keu awaknyan. ulon hana meudoa keu donya seu- laen keu ureueng-ureueng nyang ka bapak bri ubak ulon, sabab awaknyan na kheueh atra bapak. mandum atra ulon na kheueh atra bapak cit teuma; dan banmandum atra bapak atra ulon cit teuma. ulon jipeumulia lam kawan awaknyan. jinoenyoe ulon teuka ubak bapak. ulon hana tinggai le lam donya nyoe; teuma awaknyan na lam donya. bapak nyang suci! jaga kheueh awaknyan ngon keukuasaan nan bapak, na kheueh nan nyang ka bapak bri ubak ulon – mangat awaknyan jeuet keusaboh, saban lagee bapak ngon ulon na kheueh saboh. watee ulon mantong na meusajan awaknyan, ulon ka lon jaga awaknyan ngon keukuasaan nan bapak – nan nyang bapak bri ubak ulon. ulon ka lon jaga awaknyan dan hana meusidroe pih lam kawan awaknyan nyang gadoh, keucuali jihnyan nyang ka seuharoh jih gadoh; ngon lagee nyan geunab kheueh peue nyang ka teutuleh lam alkitab. jinoenyoe ulon jak bak bapak. banmandum nyoe ulon peugah simantong ulon na lam donya; mangat awaknyan ngon sipeunoh ate jirasa keugeumbiraan ulon. ulon ka lon peusampoe bak awaknyan tutoe haba bapak, dan donya jibanci awaknyan, sabab awaknyan bukan milek donya, saban lagee ulon kon cit atra donya. ulon hana lon lakee mangat bapak neucok awaknyan nibak lam donya nyoe, teuma nyang ulon lakee mangat bapak neujaga awaknyan nibak ureueng jeuhet. saban cit hai jih lagee ulon bukan atra donya, awaknyan pih bukan atra donya. beujeuet kheueh awaknyan atra khusus bapak rot keubeunaran; tutoe bapak nyan na kheueh keubeunaran. lagee bapak ka geukirem ulon lam donya, lageenyan cit teuma ulon kirem awaknyan u dalam donya. keu keupeuntengan awaknyan, ulon seuarah droe sibagoe atra milek khusus bapak meulalu keubeunaran. bukan keu awaknyoe mantong ulon meudoa. ulon meudoa cit teuma keu ureueng-ureueng nyang meuman ubak ulon ngon keusaksian awaknyan nyoe. ulon lakee, bapak, mangat awaknyan banmandum jeuet keu saboh, lagee bapak meusaboh ngon ulon, dan ulon ngon bapak. seumoga awaknyan jeuet keu saboh ngon tanyoe mangat donya jipateh bahwa bapak nyang utus ulon. ulon ka lon bri bak awaknyan keumuliaan nyang bapak bri keu ulon, mangat awaknyan jeuet keusaboh, saban cit lagee geutanyoe saboh; ulon ngon awaknyan, dan bapak ngon ulon; mangat awaknyan keubiet-keubiet saboh. teuma donya jiteupeue bahwa bapak kheueh nyang utus ulon, dan bahwa bapak neugaseh awaknyan lagee bapak neugaseh ulon. bapak, ulon meuharab awaknyan, nyang bapak bri keu ulon, na meusajan ngon ulon bak teupat ulon na, mangat awaknyan jikalon keumuliaan ulon; na kheueh keumuliaan nyang bapak bri keu ulon, sabab bapak neugaseh ulon sigohlom donya teupeujeuet. bapak nyang ade! donya hana jituri bapak, teuma ulon kuturi bapak; dan ureueng-ureueng nyoe jiteupeue bahwa bapak nyang utus ulon. ulon ka ulon peugah nan bapak bak awaknyan; dan ulon teuma sabe lon peubuet lagee nyan, mangat geunaseh bapak keu ulon teutab na lam ate awaknyan dan ulon meusaboh ngon

awaknyan." oh ka ltheueh isa geumeudoa lagee nyan, gobnyan ngon murit-murit geuh laju geujak u meurandeh krueng kidron. nibak teupat nyan na saboh taman, isa ngon murit-murit geuh geutamong laju lam taman nyan. yudas tukang khianat nyan, jiteupeu teupat nyan; sabab isa ka kayem that meusapat nibak teupat nyan ngon murit-murit gobnyan. deungon nyan yudas laju jijak ubak teupat nyan sira jiba saboh pasokan sidadu romawi dan ngon padubdroe teuma peungawai baet tuhan nyang jiyue le imeum-imeum ulee dan ureueng-ureueng farisi. awaknyan jiba sinjata, lentara meunan cit suwa. isa geuteupeue mandum peue nyang teuma teujadi ateueh droe gobnyan. ngon sabab nyan gobnyan laju geupeurab ubak ureueng-ureueng nyan sira geutanyong, "soe nyang gata jak mita?" "isa, ureueng nazaret," jaweueb awaknyan. "ulon kheueh jihnyan," seut isa. yudas tukang khianatnyan na jidong inan ngon awaknyan. watee isa geupeugah bak awaknyan, "ulon kheueh jihnyan," awaknyan banmandum jisurot dan reubah bak tanoh. sigoe teuk isa geutanyong bak awaknyan, "soe nyang gatanyoe mita?" "isa ureueng nazaret," jaweueb awaknyan. "ka ltheueh lon peugah, ulon kheueh jihnyan," seut isa. "dan meunyoe keubiet ulon gata nyoe mita, peubiyue mantong nyang laen nyoe jijak." (deungon na geupeugah meunan, teuma jeuet kheueh peue nyang ka ltheueh geupeugah le isa sigohlom nyan: "bapak, nibak ureueng-ureueng nyang bapak bri ubak ulon, hana meusidroe pi nyang gadoh.") simon petrus nyang na geuba saboh peudeueng, laju geutarek ngon peudeueng nyan teuma geuseunuet ateueh sidroe namiet imeum agong sampoe putoh on punyueng blaih ueneu. nan namiet nyan malkus. le sabab nyan isa laju geupeugah ubak petrus, "peutamong lon peudeueng gata nyan lam sarong! peu kheueh gata pike hana lon jieb piala deurita nyang geubri le bapak ubak ulon?" laju le sidadu-sidadu romawi deungon keumandan jih dan peungawai-peungawai yahudi jidrob dan ji-ikat isa. phon-phon that awaknyan jiba isa meuhadab hanas, ayah tuan kayafas. kayafas na kheueh imeum agong nibak thon nyan. dan gobnyan kheueh nyang geubri naseuhat ubak peungasa yahudi bahwa leubeh get sidroe nyang mate nibak saboh bansa. simon petrus meunan cit ngon sidroe teuk murit nyang laen jiseutot isa. murit nyang laen nyoe jituri le imeum agong; ngon sabab nyan geuhnyan geutamong meusajan-sajan ngon isa ubak leun rumoh imeum agong, dan petrus geupreh diluwa, nibak pintoe. oh ltheuehnyan murit nyang laen nyan geujak uluwa dan meututoe ngon peulayan inong nyang keumiet pintoe, laju jijak petrus peutamong u dalam. peulayan inong nyang keumiet pintoe nyan jityanyong bak petrus, "hai, peu kheueh droeneueh nyoe murit isa cit?" "bukan," jaweueb petrus. nibak uroenyana udara si-juek that, deungon nyan peulayan-peulayan meunan cit le peungawai-peungawai laju jipeukab adang keungeue apui ngon meadeueng, dan awaknyan laju jimeuadeueng nibak apui nyan. petrus geujak keunan dan laju geudong meuadeueng ngon awaknyan. imeum agong geutanyong bak isa keuhai murit-murit gobnyan meunan cit keuhai ajaran nyang geuba. isa geujaweueb, "ulon meututoe ngon troh trang dikeue

ureueng rame. ulon sabe na lon seumeubeuet nibak rumoh-rumoh iebadat meunan cit lam baet allah, nibak tempat ureueng yahudi lazem jih meugumpoi. hantom na lon peugah sapeue ngon cara seungab-seungab. nyang kheueh sabab jih pakon teungku neutanyong ulon? tanyong kheueh bak awaknyan yang ka jideungoe ulon seumeubeuet. pasti awaknyan jiteupeu peue nyang ka ulon peugah." watee isa geupeugah meunan, sidroe tukang kawai nyang na inan laju jitampa sira jipeugah, "ajam that babah teuh kahjeuet meututoe lagee nyan ubak imeum agong!" geujaweueb le isa, "meunyoee na tutoe haba lon nyang salah, neupeugah laju nibak tempat nyoe dipat nyang salah nyan! teuma meunyoee nyang ulon kheun nyan keubiet beutoi, keupeue droeneueh neutampa ulon?" oh lheurehnyan hanas laju jiyue bak ureueng laen mangat jiba isa ubak imeum agong kayafas. simon petrus mantong cit geudong geumeuadeueng inan. ureueng-ureueng jipeugah bak gobnyan, "peu kheueh droeneueh nyoe murit ureueng nyan cit?" teuma petrus geubantah, "bukon!" na sidroe namiet imeum agong, na kheueh syedara nibak ureueng nyang punyueug jih geukoh le petrus nyan, jikkeun, "kon kheueh na lon ngieng gata nibak taman nyan meusajan-sajan ngon gobnyan?" teuma petrus teutab geubantah, "bukon," – dan paih that bak watee nyan manok pi jiku-uek. ban beungoh that awaknyan laju jiba isa nibak rumoh kayafas ubak meuligoe gubunur. ureueng-ureueng yahudi keudroe hana jitamong lam meuligoe, mangat awaknyan hana jeuet keukuto seucara agama, sabab awaknyan keuneuk jak makheun peunajoh paskah. le sabab nyan pilatus laju jijak uluwa ubak awaknyan lheureh nyan jitanयोग, "peue nyan gata gadu keuhai ureueng nyoe?" awaknyan jijaweueb, "seukira jih ureueng nyan hana meusalah, kamoe hana kamoe ba jihnyan ubak bapak gubunur." pilatus laju geupeugah bak awaknyan, "cok kheueh jihnyan dan hukum kheueh jihnyan meunurot hukum gata keudroe!" teuma le ureueng-ureueng yahudi nyan jijaweueb, "kamoe hana jeuet kamoe hukom mate gob." (hai nyoe na mangat teupeubuet peue nyang geupeugah le isa keuhai cara jih gobnyan teuma mate.) pilatus geutamong lom lam meuligoe dan geutawok isa, lheurehnyan laju geutanyong, "peu kheueh droeneueh raja ureueng yahudi?" geujaweueb le isa, "peu kheueh nyang neutanyong nyoe nibak droeneueh keudroe atawa na ureueng laen nyang ka jibri tee bak droeneueh keuhai ulon?" geujaweueb le pilatus, "peu kheueh ulon nyoe ureueng yahudi? nyang jok droeneueh ubak ulon na kheueh bansa droeneueh keudroe dan imeum-imeum ulee. peue nyang ka droeneueh peubuet?" geujaweueb le isa, "keurajeuen ulon bukan lam donya nyoe. meunyoee kirajih keurajeuen lon nibak lam donya nyoe ureueng-ureueng lon teuma jimeujuang mangat bek jijok ulon ubak peunguasa yahudi. teuma keubiet keurajeuen ulon bukan nibak donya nyoe!" teuma pilatus laju geutanyong ubak gobnyan, "meunyoee meunan, droeneueh raja?" isa geujaweueb, "droeneueh peugah bahwa ulon nyoe raja. ulon lahe dan teuka lam donya nyoe ngon saboh meukeusut, na kheueh keu lon bri keuksian keuhai nyang beuna. ureueng nyang nibak nyang beuna nyan jideungoe ulon." pi-

latus geutanyong ubak gobnyan, "peue makna jih beuna nyan?" laju pilatus geuteubiet nibak lam meuligoe dan geupeugah ubak ureueng-ureueng yahudi, "ulon hana kuteume meusaboh nyang salah pih nibak gobnyan. teuma meunurot keubiasaan gata, ulon sabe lon peulheueh sidroe ureueng hukoman nibak uroe raya paskah. peu kheueh neutem mangat lon peulheueh keu gata raja ureueng yahudi nyan?" awaknyan jijaweueb sira jikuk-kuk, "hanjeuet, bek jihnyan, teuma barabas!" (barabas na kheueh sidroe peurampok.) oh lheurehnyan pilatus jitamong dan jiyue laju bak ureueng laen mangat jiseunuet isa. sidadu-sidadu nyan laju jipeuget saboh mahkota nibak ranteng nyang meuduro, mahkota meuduro nyan laju jipeuseun bak ulee isa. oh lheureh nyan jipeungui teuma bajee jubah nyang meuwareuna ungu, laju meu-ulang-ulang jijak bak gobnyan sira jipeugah, "udeb raja ureueng yahudi!" oh lheurehnyan awaknyan jitampa gobnyan. oh lheureh nyan pilatus jiteubiet lom dan jipeugah bak ureueng rame nyan, "ngieng! ka ulon peuteubiet gobnyan uluwa keu gata, mangat gata tateupeue bahwa ulon hana lon teume meusaboh pi nyang salah nibak ureueng nyoe." teuma isa laju geuteubiet sira geungui mahkota meuduro dan bajee jubah ungu. pilatus jipeugah bak awaknyan, "ngieng kheueh ureueng nyan." watee imeum-imeum ulee dan peungawai-peungawai jikalon isa, awaknyan laju jikuk-kuk, "saleb laju jihnyan, saleb laju jihnyan!" pilatus jipeugah bak awaknyan, "cok kheueh laju gobnyan, dan saleb kheueh le gata keudroe, ulon hana lon teume meusaboh pi nyang salah nibak gobnyan." ureueng yahudi nyan jijaweueb, "meunurot hukom kamoe, ureueng nyan haroh teuhukom mate sabab jihnyan jiaku droe jih aneuek allah." watee pilatus jideungoe awaknyan jipeugah meunan, raja nyan leubeuh teumakot nibak nyang ka. teuma laju jitamong lom lam meuligoe dan oh lheureh isa jipeutamong, pilatus laju jitanयोग bak gobnyan, "dipat asai droeneueh?" teuma isa hana geujaweueb. teuma le pilatus jipeugah lom, "droeneueh hana neutem peugah haba ngon ulon? beutateupeue kheueh, ulon na kuasa keu lon peulheueh droeneueh, dan na kuasa teuma lon saleb droeneueh!" geujaweueb le isa, "meunyoee allah hana geubri kuasa nyan keu gata, gata mubacut pi hana meukuasa ateuhe ulon. sabab nyan, ureueng nyang peusalal ulon nibak gata, leubeuh rayeuk desya jih nibak gata." watee pilatus jideungoe hai nyan, jihnyan jiuseuha keu jipeuleueh isa. teuma di ureueng-ureueng yahudi laju jikuk-kuk, "meunyoee amphon neupeuleueh jihnyan, amphon bukan rakan kaisar! ureueng meungaku droejih raja na kheueh musoh kaisar!" watee pilatus jideungoe haba nyan, pilatus nyan laju jiba isa uluwa dan laju jipeuduek ateuhe kurusi peungadilan bak tempat nyang nan jih aleue batee. (lam basa ibrani nan jih gabata.) wateenyan karab poh dua blaih uroe, uroe sigohlom uroe raya paskah. pilatus jipeugah bak ureueng-ureueng nyan, "nyoe raja gata!" awaknyan jikuk-kuk laju, "poh mate jihnyan! poh mate jihnyan! saleb laju jihnyan!" pilatus jitanयोग, "peu kheueh ulon nyang saleb raja gata?" imeum-imeum ulee jijaweueb, "sidroe kaisar mantong nyang raja kamoe!" teuma pilatus laju jiseurah isa bak awaknyan keu jisaleb. awaknyan laju ji-

cok isa, dan laju jiba gobnyan nibak teupmat nyan. isa geuteubiet sira geugulam keudroe saleb geuh laju geuba ubak teupmat nyang nan jih, "teupmat bruek ulee". (lam basa ibrani nan jih golgota.) disinan kheueh gobnyan jisaleb. meisigoe ngon gobnyan na teuma dua droe ureueng laen nyang jisaleb disinan; sidroe blaih wie, sidroe blaih uneuen dan isa keudroe na di teungoh-teungoh. bak kayee saleb isa, pilatus laju jiyue pasang tulesan lagee nyoe, "isa teuka nibak nazaret, raja ureueng yahudi". jai that-that ureueng yahudi nyang jibaca tulesan nyan, sabab teupmat isa teusaleb nyan hana jioh nibak banda. tulesan nyan lam basa ibrani, laten dan yunani. imeum-imeum ulee jipeugah bak pilatus, "bek neutuleh 'raja ureueng yahudi,' teuma tuleh kheueh lagee nyoe, 'ureueng nyoe jipeugah, ulon raja ureueng yahudi.'" teuma le pilatus jijaweueh, "nyang ka ulon tuleh, teutab teutuleh." oh ka ltheuh jisaleb isa le sidadu-sidadu nyan, awaknyan laju jicok peukayan gobnyan. peukayan nyan laju jibagi peuet: maseng-maseng meuteume saboh jeumba. meunan cit awaknyan laju jicok jubah gobnyan. jubah nyan hana teucob – teutenun phon nibak ateuheh sampoe u miyueb. sidadu-sidadu nyan laju jipeugah sabe keudroe-droe, "bek ta koh-koh bajee jubah nyoe. jak tatiek undi mangat tateupeue soe nyang hak ateuheh bajee nyoe." hainyan teujadi mangat teupeubuet lagee peue nyang ka teutuleh lam alkitab, na kheueh lagee nyoe: "awaknyan jibagi-bagi peukayan ulon, dan jitiek undi keu jiteume jubah ulon." dan keubiet sidadu-sidadu nyan jipeubuet lagee nyan. bak bineh saleb isa geudong mak gobnyan, syedara inong mak gobnyan, maryam peurumoh klopas, dan maryam magdalena. watee isa geukalon mak geuh dan murit-murit gobnyan nyang geugaseh na teudong disinan, gobnyan laju geupeugah bak mak geuh, "mak, nyan aneuek mak." oh ltheuh nyan isa geupeugah teuma bak murit-murit geuh, "nyan mak gata." phon saat nyan mandum murit isa jiteurimong mak isa keu tinggai dirumoh awaknyan. isa geuteupeue bahwa bak saatnyoe banmandum nyan ka seuleusoe, dan mangat peue nyang na teutuleh lam alkitab hase teujadi, gobnyan geupeugah, "ulon glah that." disinan na saboh cangkik nyang peunoh meuasoe ngon ie anggo nyang masam. teuma laju jiculob saboh bungong kareueng lam ie anggo nyan, oh ltheuh nyan laju jiculok bak saboh tangke hisop, dan laju jisunyueng bak isa. isa geurasa ie anggo nyan dan laju geupeugah, "ka seuleusoe!" laju geutukui ulee geuh dan meuninggai donya. le peunguasa yahudi hana jitem manyet-manyet nyang ka ltheuh teusaleb nyan teutab meugantung bak kayee saleb bak uroe sabat, peue teuklom bak goenyoe sabat nyan uroe raya nyang khusus. sabab uroe watee isa teusaleb rhot jih sigohlom uroe sabat nyan, ureueng-ureueng yahudi laju jilakee bak pilatus keu jiwiet gaki ureueng-ureueng nyang ka teusaleb dan jipeutron manyet-manyet nyan nibak ateuheh kayee saleb. teuma le sidadu-sidadu nyan laju jikak wiet phonphon gaki bandua droe nyang jisaleb meisigoe ngon isa. watee awaknyan ka trok bak isa, laju jikalon gobnyan ka meuninggai. ngon lagee nyan awaknyan hana jadeh jiwiet gaki gobnyan. teuma lhong isa teutab jitob ngon kapak le sidroe sidadu nyang na

lamkawan nyan; dan laju jiteubiet darah dan ie. ureueng nyang kalon keudroe keujadian nyan, ureueng nyan kheueh nyang jak peugah hainyan, mangat gata mandum meunan cit peucaya. dan keusak-sian gata nyan beutoi, dan jiteupeue bahwa nyan beutoi. hainyan jeuet mangat teupeubuet peue nyang ka teutuleh lam alkitab lagee nyoe: "hana meusikrek pih nibak tuleueng gobnyan teuma jiwiet". lam alkitab na cit teutuleh lagee nyoe, "awaknyan teuma jipandang gobnyan nyang ka awaknyan tob". oh ltheuh nyan yusuf nibak arimatea jilakee idhin bak pilatus mangat jeuet jicok manyet isa. (yusuf na kheueh murit isa teuma ngon cara seungab-seungab, sabab jih nyan teumakot ubak peunguasa yahudi.) pilatus laju jibri idhin bak ureueng nyan, oh ltheuh nyan ureueng nyan laju jikak manyet isa. nekodemus, nyang awai ilee ka ltheuh jikak bak isa bak watee malam, jikak cit meisigoe ngon yusuf. nekodemus jiba ramuan mur dan gaharu – banmandum na kira-kira lhee ploh kilo gram le jih. bandua awaknyan laju jicok manyet isa dan laju jibalot ngon ija kafan meusan nyan ngon ureeh nyang mangat bee nyan meunurot adat teuseumiyueb ureueng yahudi. bak teupmat isa teusaleb na saboh taman. lam taman nyan na saboh kubu baro, nyang hantom lom jipeuguna keu teupmat teukubu ureueng laen. sabab kubu nyan to, dan uroe sabat karab jipeuphon, awaknyan laju jiseumiyueb isa bak teupmat nyan. bak uroe aleuh, watee jih mantong beungoh, keuadaan jih mantong seupot, maryam magdalena jikak jak jrat. laju jikalon batee ngon tob babah kubu nyan ka meugeesee nibak uruek kubu nyan. ban jikalon nyan laju jiplueng bak simon petrus dan murit gobnyan nyang geugaseh le isa, laju jipeugah bak awaknyan, "tuhan kajicok lam kubu, dan ulon hana lon tupat dipat gobnyan jikeubah." oh ltheuh nyan petrus ngon murit-murit nyang laen laju jikak bak kubu nyan. bandua awaknyan jiplueng-plueng, teuma murit nyang laen leubeh bagai nibak petrus, dan awaknyan leubeh awai trok ubak kubu nyan. laju jikalon lam kubu nyan dan jingiang laju ija kafan mantong na teupeuduek disinan, teuma jih nyan hana jitamong. simon petrus laju trok nibak likot, laju jitamong lam kubu nyan. laju jingiang ija kafan mantong na teuduek disinan, teuma ija nyang teuitak bak ulee isa hana to nyan teuma meuglong keudroe. oh ltheuh nyan murit nyang leubeh awai trok keunan jitamong cit lam kubu, laju jikalon dan jipateh. (sampo bak watee nyan awaknyan gohlom muphom peue nyang teutuleh lam alkitab bahwa gobnyan haroh geubeudoh nibak mate.) oh ltheuh nyan murit-murit isa nyan laju jiwoe. maryam magdalena jidong dikeue kubu nyan sira jimoe. teungoh jimoe nyan, laju jijeungeuek lam kubu, laju deuh jikalon dua malaikat geusok peukayan puteh. awaknyan jiduek bak teupmat beukaih manyet isa, nyang sidroe nibak blaih ulee, dan nyang laen nibak blaih gaki. malaikat-malaikat nyan laju geutanyong, "mak, pakon neumoe?" geujaweueh le maryam, "tuhan ulon ka jicok, dan ulon hana lon tuho pat jikeubah." oh ka ltheuh jipeugah meunan laju jingiang u likot dan deuh laju isa ka geudong disinan. teuma magdalena nyan hana jiteupeu bahwa nyang dong nyan na kheueh isa. isa geutanyong bak inong nyan,

"mak, pakon neumoe, soe nyang mak mita?" maryam jipike nyang mariet nyan na kheueh ureueng meulampoh, jadi laju jipeugah, "pak, meunyeoe bak nyang pinah gobnyan nibak teupnat nyoe, cuba bapak peugah bak ulon dipat bapak keubah manyet nyan, mangat ulon jeuet lon jakcok." isa geupeugah bak inong nyan, "maryam!" maryam jingeng ateuh isa aju jimarit lam basa ibrani, "rabuni!" (makna jih "guree.") "bek gata mat ulon," kheun isa bak inong nyan, "sabab ulon gohlom ulon ek ubak bapak. teuma gata jak kheueh bak syedara-syedara lon, dan gata peugah kheueh bak awaknyan bahwa saat nyoe ulon ek ubak bapak lon dan bapak gata, allah lon dan alah gata." teuma le maryam laju geujak peugah bak murit-murit isa bahwa jihnyan ka jikalon tuhan dan bahwa tuhan ka geupeugah banmandum nyan bak jihnyan. bak uroe aleuhat nyan cit teuma, watee malam ka teuka, murit-murit isa laju meugumpoi bak saboh rumoh deungon pintoe-pintoe mandum teugunci, sabab awaknyan teumakot keu peunguasa yahudi. ngon hana jisangka-sangka isa teuka dan geudong lamkawan awaknyan sira geupeugah, "assalamualaikum." oh ka ltheueh geupeugah meunan, gobnyan laju geutunyok bak awaknyan jaroe ngon lhong geuh. watee jikalon tuhan, awaknyan galak lumpah na. dan isa laju geupeugah bak awaknyan sigoteuk, "assalamualaikum. lagee bapak nyang ka geu utus ulon, meunan cit teuma ulon utus gata." laju gobnyan geuyueb nafah gobnyan ubak awaknyan dan geupeugah, "teurimong kheueh roh allah. meunyeoe gata tapeumamphon desya sidroe-droe ureueng, meunan cit allah geupeu amphon gata. dan meunyeoe gata hana tapeumamphon desya sidroe-droe ureueng, allah pi hana geupeu amphon." tomas (nyang teuhoi nan laen "sikeumeubeu"), sidroe lam kawan dua blaih droe murit isa, hana meusajan ngon ureueng laen watee isa teuka. teuma le murit-murit isa nyang laen jipeugah bak tomas, "kamoe ka ltheueh kamoe kalon tuhan!" jaweueb le tomas, "meunyeoe ulon gohlom lon ngieng inciek jaroe geuh teulabang dan gohlom lon mat ngon jaroe lon bak inciek luka keunong labang nyan, meunan cit gohlom lon mat ngon jaroe lon bak inciek lhong gobnyan nyang keunong tob nyan, mubacut pih hana lon pateh." sigoe aleuhat teuma oh ltheuehnyan murit-murit isa meugumpoi lom ka teupnat nyan, dan tomas na disinan. banmandum pintoe teugunci. teuma isa teuka dan geudong lamkawan awaknyan, laju geupeugah, "assalamualaikum." oh ltheueh nyan isa geupeugah ubak tomas, "ngieng kheueh jaroe lon, dan peuduek kheueh jaroe gata disinoe. sunyueng kheueh jaroe gata dan peuduek kheueh bak lhong ulon. bek ragu-ragu le, teuma peucaya kheueh!" tomas jipeugah bak isa, "tuhan dan allah lon!" teuma isa geupeugah bak awaknyan, "gata tapateh sabab ka tangieng ulon bukan? mubahgia kheueh ureueng nyang jipateh bah pih hana jikalon ulon!" mantong jai that buet-buet nyang ajaeb nyang geupeuleumah le isa dikeue murit-murit gobnyan, teuma hana teutuleh lam kitab nyoe. teuma mandum nyoe teutuleh, mangat gatanyoe peucaya bahwa isa na kheueh raja peuseulamat, aneuek allah, dan sabab meuman keu gobnyan, gata meuteume udeb. oh ltheuehnyan isa

geupeuleumah droe sigoe teuk bak murit-murit gobnyan di danau tiberias. meunoe kheueh keujadian jih: bak siuroe simon petrus, tomas, nyang teuhoi si keumbeue, natanael nibak kana di galilea, aneuek aneuek zebedeus, dan dua droe murit isa nyang teungoh meugumpoi. jipeugah le simon petrus, "ulon keuneuk jak drob eungkot." "kamoe jak cit," kheun awaknyan ubak simon petrus nyan. dan jikak kheueh awaknyan jiek peuraho. teuma simalam beungoh nyan hana meuteume sapeue. watee mata uroe ka jiteubiet, isa geudong bak binch pante, teuma awaknyan hana jiteupeue bahwa nyang dong nyan isa. isa geupeugah bak awaknyan, "aneuek ulon, peu kheueh bak kah na eungkot?" "hana," jaweueb awaknyan. isa geupeugah bak awaknyan, "rhom kheueh laju jeue gata blah uneuen peuraho, eunteuk gata meuteume eungkot." banjideungoe nyan laju jeue awaknyan jitiiek blaih uneuen peuraho, teuma hana hase jitarek lom sabab lumpah that jai eungkot lam jeue nyan. murit nyang geugaseh le isa jipeugah bak petrus, "nyan tuhan!" watee jideungoe le simon petrus bahwa nyan tuhan, laju jisok bajee (sabab jihnyan hana meubajee) laju jigrob lam ie. murit-murit nyang laen laju jiseutot u darat ngon peuraho, sira jitarek jeue nyang peunoh ngon eungkot. awaknyan hana padub na jioh nibak darat, na kira-kira sireutoh metee. watee awaknyan jitron nibak ateuh peuraho, laju jikalon na ngeue apui disinan deungon eungkot ateuh ngeue apui nyan meunan cit ruti. isa geupeugah bak awaknyan, "cuba gata ba keunoe mupadub boh eungkot nyang ban gata drob." simon petrus laju jiek ateuh peuraho, laju jitarek jeue jih ateuh darat. jeue nyan peunoh ngon eungkot nyang raya-ray; banmandum na sireutoh limong ploh lhee boh. bah pi eungkot nyan jai that, teuma jeue jihnyan hana beukah. isa geupeugah bak awaknyan, "jak keunoe tamakheun." hana meusidroe pih nibak murit-murit gobnyan nyang jijeuet teumanyong, "bapak nyoe soe?" sabab awaknyan jiteupeue bahwa gobnyan na kheueh tuhan. oh ltheuehnyan isa laju geupeurab bak awaknyan, geucok laju ruti nyan, laju geujok keu awaknyan. meunan cit lagee nyan teuma geupeuget ngon eungkot nyan. nyoe kheueh nyang keu lhee goe jih isa geupeuleumah droe bak murit-murit gobnyan oh ka ltheueh gobnyan teupeubeudoh nibak mate. oh ka ltheueh seulesoe awaknyan jimakheun, isa geupeugah bak simon petrus, "simon, aneuek yona, peu kheueh gata leubeu ta gaseh ulon nibak awaknyan nyoe nyang gaseh ulon?" "beutoi, tuhan," jaweueb petrus, "tuhan neuteupeue bahwa ulon cinta that keu tuhan." oh ltheueh nyan geupeugah lom le isa bak gobnyan, "peulara kheueh aneuek bubiri lon." nyang keu dua jih isa geupeugah bak simon petrus nyan, "simon, aneuek yona, peu kheueh gata tagaseh keu ulon?" "beutoi, tuhan," jaweueb petrus, "tuhan neuteupeue ulon cinta that keu tuhan." geupeugah le isa bak simon petrus nyan, "peulara kheueh bubiri-bubiri lon." nyang keu lhee goe jih isa geutanyong bak simon petrus nyan, "simon aneuek yona, peu kheueh tacinta keu ulon?" petrus seudeh that ate sabab isa geutanyong bak jihnyan sampoe lhee goe. teuma laju geujaweueb le petrus, "tuhan, tuhan neuteupeue peue-peue mantong, tuhan neuteupeue

ulon cinta keu tuhan!" laju isa geupeugah bak simon nyan, "peulara kheueh bubiri-bubiri ulon. keubiet beutoi nyang ulon peugah nyoe: watee gata mantong muda, gata keudroe nyang ikat keuieng gata, dan tajak homantong nyang galak gata. teuma meunyo gata ka tuha singoh, gata sunyueng jaroe gata, dan ureueng laen nyang ikat gata dan jiba gata ho nyang hana gatatem jak." (deungon tutoe geuh lagee nyan isa geutunyok bak petrus pakriban petrus watee mate singoh keu jipeumulia po teu allah.) oh lheuehnyan isa geupeugah bak petrus, "seutot kheueh ulon!" watee isa geupaleng, laju deuh geukalon dilikot gobnyan murit nyang geugaseh le gobnyan. (jihnyan kheueh nyang duek bak bineh isa watee makheun dan nyang tanyong bak gobnyan, "tuhan, soe nyang khi-anat tuhan?") watee geukalon ureueng nyan, petrus jitanyong bak isa, "tuhan, pakriban ngon ureueng nyoe?" 22 geujawueub le isa, "seukira jih ulon kutem mangat jihnyoe teutab udeb sampoe ulon teuka, nyan kon urosan gata. teuma gata, seutot kheueh ulon!" ngon lagee nyan meutabu kheueh haba lamkawan murit isa bahwa murit nyan hana teuma mate. pada-hai isa hana geupeugah murit nyan hana teuma mate, teuma: "seukira jih ulon kutem jihnyan tinggai udeb sampoe ulon teuka, nyan bukon urosan gata." nabi yahya geubri keusaksian keuhai keujadian-keujadian nyoe. gobnyan kheueh nyang ka tuleh nyan. dan tanyoe tateupeue bahwa peue nyang geupeugah nyan na kheueh beutoi. mantong jai that hai-hai nyang laen nyang geupeubuet le isa. seukira jih nyan teu-tuleh saboh-saboh, ulon rasa hana seb teumpang ban-sigom bumoe nyoe keu teukeubah mandum kitab nyang teuma geutuleh nyan.

asoe kitab nyoe keuhai peue nyang geupeugah le isa almaseh keuhai meubagoe peuristiwa nyang teuma teuka. allah geupeugah ubak almaseh mangat gobnyan geutunyok bak hambahma allah peue nyang sigra haroh teujadi. almaseh geukirem malaikat gobnyan ubak yahya, hamba gobnyan, keugeupeugah peuristiwa-peuristiwa nyan ubak gobnyan. teuma le yahya pih laju geupeugah banmandum nyang geukalon nyan; dan nyoe kheueh laporan keuhai peusan nibak allah nyang ka geupeukong le isa almaseh meulalu keusaksian gobnyan. meubahgia kheueh ureueng nyang beuet dan nyang deungoe haba nubuat lam kitab nyoe dan taat ubak peue nyang na teutuleh lam kitab nyoe. sabab hana treb le banmandum nyoe teuma teujadi. syedara-syedara nyang na nibak tujuh boh jeumaah lam daerah asia! ulon, yahya, meuharab gata beugeubri beureukat dan seujahteura nibak po teu allah – na kheueh gobnyan nyang na, nyang ka na, dan nyang na siumu masa – dan meunan cit nibak bantujuh boh roh nyang na dikeue takhta allah, dan nibak isa almaseh, saksi nyang seutia. gobnyan kheueh nyang phon-phon that teupeu-udeb nibak mate dan gobnyan kheueh nyang mat kuasa ateuh raja-raja donya. isa geugaseh keugeutanyoe, dan ngon mate geuhnyan gobnyan ka geupeubeubaih geutanyoe nibak mandum desya-desya tanyoe, dan geupeujeuet geutanyoe saboh bansa nyang khusus imeum-imeum, nyang layani allah, bapak gobnyan, isa almaseh nyan kheueh nyang agong dan meukuasa siumu masa. amin! ngieng kheueh, gobnyan geuteuka jitob le awan! banmandum ureueng teuma jikalon geuh nyan, meunan cit le ureueng nyang ka jitob gobnyan. banmandum bansa nyang na ateuh rhueng donya nyoe jimoe peuba-e sabab le gobnyan. biet, pasti! amin! "ulon kheueh nyang awai dan nyang akhe," feureuman tuhan allah, nyang na, nyang ka na, dan nyang na siumu masa, nyang mahakuasa. ulon yahya, syedara gata nyang saboh naseb ngon gata lam peudeuritaan nyang jirasa le tieb-tieb murit almaseh. tanyoe tabah meudeurita sibagoe umat milek gobnyan. ulon jiboih u pulo patmos sabab ulon meudakwah feureuman allah, nyang geupeukong le isa meulalu keusaksian gobnyan. bak uroe tuhan, ulon jikuasa le roh allah, laju lon deungoe su nyang teuga – lagee su beureuguih – jimeututoe dilikot ulon. sue nyan jipeugah, "tuleh kheueh peue nyang gata kalon, dan kirem kheueh laju kitab nyan ubak tujuh boh jeumaah nyang lon peugah nyoe: efesus, smirna, pergamus, tiatira, sardis, filadelfia, dan laodikia." laju lon ngieng u likot mangat lon teupeue soe nyang ka meututoe nyan ubak ulon. deuh

laju lon kalon tujuh boh gaki panyot nyang teupeuet nibak meuh. bak teungoh-teungoh gaki panyot nyan deuh lon kalon sidroe nyang leumah lagee manusia. gobnyan geungui bajee jubah nyang panyang jih trok bak gaki. nibak dada geuhnyan gobnyan geungui tutob dada meuh. ok gobnyan puteh lagee bulee bubiri, lagee gapeueh nyang puteh. mata gobnyan hu muble-ble lagee apui; 15 gaki gobnyan meu meuek-meuek lagee teumaga nyang teutot. su gobnyan lagee su ie tajo nyang rayeuk. bak jaroe uneuen gobnyan geumat tujuh boh bintang, dan nibak babah gobnyan jiteubiet saboh peudeueng tajan nyang meumata dua. ruman gobnyan meucahya lagee mata uroe oh watee cot uroe. watee ulon kukalon gobnyan, laju reubah teudugom dikeue gobnyan lagee ureueng mate. teuma gobnyan laju geukeubah jaroe uneuen geuh ateuh ulon sira geupeugah, "bek takot! ulon kheueh nyang awai dan nyang akhe. ulon kheueh gobnyan nyang udeb! ulon ka meuninggai donya, teuma ngieng kheueh, ulon udeb keusiumu masa. ulon na kuasa ateuh mate, dan ateuh donya ureueng mate. sabab nyan, tuleh kheueh hai-hai nyang gata kalon, na kheueh hai-hai nyang na jinoenyoe, dan hai-hai nyang teuma teuka teuma. nyoe kheueh rahsia nibak tujuh boh bintang nyang gata kalon bak jaroe uneuen lon, dan nibak tujuh boh gaki panyot meuh nyan: tujuh boh bintang nyan na kheueh malaikat-malaikat nibak tujuh boh jeumaah, dan tujuh boh gaki panyot nyan na kheueh ban tujuh jeumaah nyan." "keu malaikat jeumaah di efesus, tuleh kheueh lagee nyoe: nyoe kheueh peusan nibak gobnyan nyang mat tujuh boh bintang bak jaroe uneuen gobnyan, dan geujak lam ruweueng ban tujuh boh gaki panyot meuh nyan. ulon kuteupeue peue nyang gata peubuet: gata tamubuet brat that dan biet gata tabah lagoena. ulon kuteupeue bahwa gata hana tabri ate keu ureueng juhet. dan ureueng-ureueng nyang jiaku droe jih rasui padahai kon, ka gata ujoe, dan deuh laju gata ngieng bahwa awaknyan jimeusulet. gata saba dan gata meudeurita sabab le ulon, dan gata hana putoh asa. teuma nyoe nyang brat that ate lon ateuh gata: bahwa gata hana le tagaseh keu ulon lagee yoh awai. sabab nyan, ingat kheueh padub na jioh gata ka rho! meutobat kheueh gata nibak desya-desya gata, dan peubuet kheueh peue nyang gata peubuet yoh awai. meunyoehana, teuma ulon kuteuka ubak gata dan teuma lon cok gaki panyot gata nyan nibak tempat jih. teuma na sapeue-sapeue nyang get nibak gata, atra nyan na kheueh: gata tabanci ubak murit nikolaus, ulon pih banci keu awaknyan. barang sigasoe na jideungoe, bah kheueh jikalon peue nyang jipeugah le roh al-

lah ubak jeumaah-jeumaah! awaknyan nyang meunang, teuma lon bri jipajoh boh kayee nyang na nibak bak-kayee keudeban nyang timoh lam taman alah." "keu malaikat jeumaah nyang na di smirna, tuleh kheueh lagee nyoe: nyoe kheueh peusan nibak gobnyan nyang phon dan nyang akhe – nyang ka mate dan nyang udeb lom teuma. ulon kuteupeue peuepeue nyang gata susah; ulon kuteupeue gata gasien teuma nyang sibeuna jih gata kaya! ulon kuteupeue peue-peue nyang jipeusuna ateueh gata le ureueng-ureueng nyang jiaku droe jih ureueng yahudi, padahai kon; awaknyan na kheueh umat iblih! bek kheueh teumakot ubak deurita nyang hana treb le haroh gata teurimong. ingat, iblih teuma jipeutamong siladum lamkawan gata u lam glab guna keuteucuba gata. gata meudeurita nyang treb jih siploh uroe. bah kheueh gata seutia ubak ulon sampoe an mate, ngon lagee nyan ulon teuma kubri ubak gata udeb sejati dan keukai sibagoe hadiah keumeunang. barang sigasoe hase jideungoe, bah kheueh jisimak peue nyang jipeugah le roh allah ubak jeumaah-jeumaah! awaknyan nyang meunang, sagai-sagai hana teuma meudeurita sapeue le mate nyang keudua." "keu malaikat nyang na bak jeumaah di pergamus, tuleh kheueh lagee nyoe: nyoe kheueh peusan nibak gobnyan nyang mat peudeueng tajam nyang meumata dua. ulon kuteupeue dipat gata tinggal, na kheueh bak teupat iblih meutakhtia. gata seutia ubak ulon. meunan cit watee antipas, saksi ulon nyang seutia nyan, jipoh mate dikeue gata nibak markas iblih, gata hana taiengkeue bahwa gata peucaya keu ulon. teuma biet pih meunan na meupadubboh hai nyang hana ulon galak keu gata: na siladum ureueng lamkawan gata nyang jiseutot peue nyang jipeurunoe le bileam. bileam jipurunoe balak pakriban teupeu rhot umat israel u dalam desya; ngon cara jibujuk awaknyan jipajoh peunajoh nyang ka jipeuseumah keu beurala dan jipeubuet hai-hai nyang cabui. 15 meunan cit teuma na lamkawan gata ureueng-ureueng nyang jiseutot ubak ajaran nyang jiba le murit-murit nikolaus. sabab nyan, meutobat kheueh nibak desya-desya gata! meunyoeh han, sikeujab teuk ulon teuma teuka ubak gata dan ulon prang bubena ureueng nyan ngon peudeueng nyang na nibak babah lon. barang sigasoe nyang hase jideungoe, bah kheueh jipeuleumah peue nyang geupeugah le roh allah ubak jeumaah-jeumaah! awaknyan nyang meunang, teuma lon bri idhin jipajoh manna nyang teusom, dan maseng-maseng teuma jiteurimong nibak ulon saboh batee puteh. nibak batee nyan teutuleh saboh nan nyang baro, nyang hana jiteupeue le soe mantong, seulaen le ureueng nyang teurimong atra nyan." "keu malaikat

jeumaah di tiatira, tuleh kheueh lagee nyoe: nyoe kheueh peusan nibak aneuek allah, nyang mata gobnyan hu muble-ble lagee apui, dan gaki gobnyan meumeuk-meuk lagee teumaga nyang teutot. ulon kuteupeue banmandum nyang gata peubuet – ulon kuteupeue gata tagaseh sabe keudroe-droe manusia, gata seutia, gata lam buet, dan gata hase tapeuteun deurita. ulon kuteupeue gata bak watee nyoe tamubuet leubeh brat nibak nyang ka-ka. teuma nyoe nyang brat ate lon ateueh gata: gata tabri ate keu izebel, sidroe inong nyang jiaku droe utosan allah. ka jai that hamba-hamba lon nyang jipeunget dan jipurunoe beujitem peubuet cabui dan beujitem pajoh peunajoh nyang ka jipeuseumah ubak beurala. ka ulon bri keuseumpatan bak jih nyan keu jimeutobat nibak mandum desya-desya jih, teuma jihnyan teutab hana jitem ploh jipeubuet hai-hai nyang cabui nyan. ingat kheueh! ulon teuma kuseumpom jihnyan sampoe saket ateueh teupat eh. nibak teupat nyan jihnyan dan ureueng-ureueng nyang meumukah ngon jihnyan teuma meudeurita luwabiasa. banmandum nyan ulon peubuet jinoenyoe – laen hai jih meunyoeh awaknyan jiploh jipeubuet hai-hai nyang jeuhet meusajan-sajan ngon jihnyan. 23 bubena nyang seutot jihnyan mandum lon poh mate mangat jeumaah jiteupeue bahwa ulon kheueh gobnyan nyang seunom lam pikeran dan ate manusia. gata teuma lon balaih meunurot buet gata maseng-maseng. teuma keu gata nyang laen-laen nyang na di tiatira hana taseutot ajaran nyang jeuhet nyan, dan hana gata meurunoe ieleme-ieleme iblih. ulon peugah bahwa ulon hana teuma lon tamah keu gata beuban nyang geuhon nyan. teuma trok bak watee ulon teuka, bah kheueh gata teutab taseutot peue nyang ka na nibak gata. awaknyan nyang meunang, dan nyang sampoe bak akhe sabe jipeubuet peue nyang ulon lakee, teuma ulon bri kuasa nyang saban lagee nyang lon teurimong nibak bapok lon. awaknyan teuma jiteurimong keukuasaan nibak ulon keu jipeurintah bansa-bansa ngon tungkat beuso, dan keu jipeuhanco bansa-bansa nyan lagee beulangong tanoh. 28 awaknyan teuma jiteurimong bintang timu nibak ulon. barang sigasoe nyang hase jideungoe, bah kheueh jikalon peue nyang jipeugah le roh allah ubak jeumaah-jeumaah!" "keu malaikat jeumaah di sardis, tuleh kheueh lagee nyoe: nyoe kheueh peusan nibak gobnyan nyang na tujuh boh roh nibak allah dan ban tujuh boh bintang nyan. ulon kuteupeue peue nyang gata peubuet. jipeugah gata udeb, padahai gata mate! sabab nyan, beudoh kheueh, dan peukong kheueh peue nyang mantong na nibak gata sigohlom atra nyan mate banmandum. sabab lon teume bahwa peue nyang

gata peubuet, gohlom sapeue pih nyang sampoe-
una dikeue po teu allah. ngon lagee nyan, ingat
kheueh lom peue nyang ka ltheuh teupurunoe keu
gata yoh awai ilee dan peue nyang ka gata deun-
goe. amai kheueh nyan dan meutobat kheueh ni-
bak banmandum desya-desya gata. meunyo gata
hana tabeudoh, ulon teuma teuka bak gata lagee pan-
curi; dan gata hana tateupeu pajan watee jih ulon
teuka. teuma lamkawan gata di sardis mantong na
ureueng nyang keumiet mangat peukayan jih teutab
gleh. awaknyan teuma jijak meusajan-sajan ngon lon
sira teungui peukayan puteh, sabab awaknyan pa-
tot that keuhai nyan. keu awaknyan nyang meunang
teuma teubri peukayan jubah puteh. nan awaknyan
teutab hana lon sampoh lam kitab ureueng udeb. dan
dikeue bapok lon dan malaikat-malaikat, awaknyan
laju lon peugah bahwa nyan na kheueh milek lon.
barang sigasoe hase jideungoe, bah kheueh jisimak
peue nyang geupeugah le roh allah ubak jeumaah-
jeumaah!" "keu malaikat jeumaah di filadelfia, tuleh
kheueh lagee nyoe: nyoe kheueh peusan nibak gob-
nyan nyang suci dan sejati. gobnyan kheueh nyang
mat gunci nyang na bak nabi daud; meunyo gobnyan
nyang peuhah, hana meusidroe pih nyang hase jitob
atra nyan, dan meunyo gobnyan nyang tob, hana
meusidroe pih nyang hase jipeuhah. ulon kuteupeue
peue nyang gata peubuet. ulon kuteupeue bahwa gata
hana padub na teuga; gata ka taturot nyang ulon pu-
runoe dan seutia bak ulon. keugata ka ulon peuhah
saboh pintoe, nyang hana hase jitob le soe mantong.
ingat kheueh nyoe: ureueng-ureueng nyang jeuet keu
umat iblih nyan, tukang meusulet nyang jiaku droe
jih yahudi padahai kon, teuma lon peujeuet jihnyan
akhe jih jijak sujut dikeue gata. dan awaknyan teuma
jiteupeue bahwa ulon kugaseh gata. sabab gata ka
taturot peurintah lon mangat beuteukon, ulon pih lon
lindung gata nibak masa susah nyang jiteuka ban-
sagom donya. hai nyan teujadi keu teu-ujoe banman-
dum ureueng nyang na ateuhe rhueng bumoe. ulon
reujang kuteuka! jaga kheueh beuget-get peue nyang
na nibak gata, mangat bek na meusidroe pi nyang
jireupah hadiah keumeunangan gata. ureueng nyang
meunang, teuma lon peujeuet sibagoe tameh lam baet
suci allah lon, dan jihnyan tinggai nibak teumpat
nyan siumu masa. nan allah lon, dan nan banda al-
lah lon – na kheueh yerusalem baro nyang jitreun
lam syeuruga, nibak allah lon – teuma lon tuleh ni-
bak droe ureueng nyan. meunan cit nan ulon nyang
baro teuma lon tuleh nibak droe jih. barang sigas-
oe hase jideungoe, bah kheueh jisimak peue nyang
geupeugah le roh allah ubak jeumaah-jeumaah!" "keu
malaikat jeumaah nyang na di laodikia, tuleh kheueh

lagee nyoe: nyoe kheueh peusan nibak sang amin,
saksi nyang seutia dan beutoi, sumber nibak peue-
peue mantong nyang geucebta le po teu allah. 15
ulon kuteupeue peue nyang gata peubuet; ulon ku-
teupeue gata hana leupie dan hana teuma seu-uem.
nyang sibeuna jih gata sapeue lam dua nyan! teuma
gata seu-uem seu-uem gukee; seu-uem hana, leupie
pih hana. nyang kheueh sabab jih gata lon peumuntah
uluwa lam babah lon. gata tapeugah, 'kamoe kaya dan
peue-peue mantong na; nibak kamoe hana kureueng
sapeue.' teuma gata hana tateupeu padub na meularat
dan padub na seudeh jih keuadaan gata! gata gasien,
teulon dan buta. sabab nyan ulon naseuhat gata man-
gat tabloe nibak ulon meuh, na kheueh meuh nyang
aseuli, mangat gata jeuet keukaya. meunan cit jak-
bloe cit teuma peukayan puteh nyang na bak lon
mangat gata na peukayan dan teutob keuadaan gata
nyang teulon dan that-that malee nyan. meunan cit
bloe cit teuma ubat keuteu siliek bak mata gata man-
gat gata jeuet takeumalon. ureueng-ureueng nyang
ulon gaseh, awaknyan kheueh nyang ulon seugah dan
lon seunuet. le sabab nyan bah kheueh gata meuse-
umangat, dan meutobat kheueh nibak desya-desya
gata. ngieng kheueh! ulon dong bak babah pintoe
dan lon keutok. meunyo na ureueng nyang jide-
ungoe su lon, dan jipeuhah pintoe, ulon teuma ku-
tamong jak meurumpok ngon jihnyan; ulon teuma
ku makheun meusajan-sajan ngon jih nyan dan jih
nyan jimakheun teuma meusajan-sajan ngon ulon.
awaknyan nyang meunang, teuma kubri idhin jiduek
nibak takhta lon meusajan ngon lon, saban lagee
lon keudroe pih ka meunang dan jinoenyoe teuduek
ngon bapok lon nibak takhta gobnyan. barang sigas-
oe jeuet jimeudeungoe, bah kheueh jisimak peue
nyang jipeugah le roh allah ubak jeumaah-jeumaah!"
oh ltheuh nyan ulon meuteume lon keumalon. deuh
lon kalon saboh pintoe ka teuhah lam syeuruga. oh
ltheuh nyan teudeungoe lom su nyang yoh awai phon
ka geumariet lagee su beureuguih. su nyan jipeu-
gah, "jak ek keunoe. ulon teuma lon tunyok bak
gata peue nyang teuma teujadi." watee nyan cit teuma
lon jikuasa le roh allah. laju lon ngieng lam syeu-
ruga na saboh takhta, dan na sidroe ureueng jiduek
ateuh takhta nyan. ruman ureueng nyan muble-
ble cahya lagee peumata baiduri on sikee dan peu-
mata deulima. dan na saboh peulangi wareuna jih
lagee zamrut jikeulileng takhta nyan. lam bantuek
meulingka bansikeulileng takhta nyan na teuma dua
ploh peuet boh takhta nyang laen. nibak teumpat
nyan na teuma jiduek dua ploh peuet droe peumim-
pen nyang banmandum jingui peukayan puteh, me-
unan cit jingui mahkota meuh. nibak takhta nyan

jiteubiet teuma cahya kilat dan jiteubiet su geulanteue nyang biet-biet teuga. dan dikeue takhta nyan na teuma tujuh boh suwa nyang teungoh hu; nyan kheueh bantujuh boh roh allah. na teuma dikeue takhta nyan sesuatu lagee laot ceureumen, jeureuneh lagee kristal. ban sikeulileng takhta nyan, nibak tieb-tieb bineh jih, na peuet boh makhlok, nyang bagian keue ngon bagian likot jih peunoh ngon mata. makhlok nyang phon deuh jih lagee singa. nyang keudua lagee leumo agam. nyang keu lhee ruman jih lagee ruman manusia. nyang keu peuet, deuh jih lagee cicem siwah nyang teungoh po. ban peuet boh makhlok nyan, maseng-maseng na nam boh sayeueb, dan bansilingka nyan meunan cit nibak bagian u dalam nyan peunoh ngon mata. uroe malam makhlok-makhlok nyan hana jipioh jimeuzikee, "kudus, kudus, kudus kheueh tuhan, allah mahakuasa; nyang na, nyang ka na, dan nyang na siumu masa." ban peuet boh makhlok nyan jimeuzikee ngon ca-e puja ngon pujo, horeumat dan syukoe ubak gobnyan nyang duek ateueh takhta nyan, na kheueh gobnyan nyang udeb siumu masa. dan bak watee makhlok-makhlok nyan meuzike, ban dua ploeh peuet droe peumimpén nyan reubah teudugom dikeue ureueng nyang duek ateueh takhta nyan, laju jiseumah gobnyan nyang udeb siumu masa. oh ltheueh nyan awaknyan jigeulawa mahkota-mahkota awaknyan keudroe ukeue takhta nyan sira jipeugah, "ya tuhan, ya allah kamoe! droeneueh mantong kheueh nyang patot teurimong pujo, horeumat ngon kuasa. sabab droeneueh nyang cebta peue-peue nyang na, dan ateueh keuheundak droeneueh cit teuma peue-peue mantong nyan ka na dan udeb." oh ltheueh nyan lon kalon teuma saboh gunulong kitab bak jaroe gobnyan nyang duek ateueh takhta nyan. kitab nyan peunoh ngon tulesan blaih deh blaih noe dan na teuma teuboh meuteurai nyang le jih na tujuh boh segee. laju lon kalon sidroe malaikat nyang peukasa sira geumeuhoi-meuhoi ngon su meudumpek, "soe nyang patot jipeubeukah segee-segee nyoe dan jipeuhah kitab nyoe?" teuma bahnyan lam syeuruga, nyang na ateueh bumoe, atawa dimiyueb bumoe, hana meuteume meusidroe pih nyang hase jipeuhah kitab nyan, dan jingieng lam kitab nyan. teuma ulon laju kumo musok-musok sabab hana meusidroe ureueng pih nyang hase jipeuhah kitab nyan dan jingieng lam nyan. laju sidroe lamkawan peumimpén nyan jipeugah bak ulon, "bek mo! ngieng kheueh! singa nibak sukee bansa yehuda, keuturonan nabi daud nyang rayeuk, ka meunang. jih nyan hase jipeubeukah tujuh boh segee dan jipeuhah kitab nyan." oh ltheueh nyan laju lon kalon saboh

aneuk bubiri teudong diteungoh-teungoh takhta nyan, jikeulileng le peuet boh makhlok dan mandum peumimpén nyan. aneuk bubiri nyan deuh jih lagee ka teusie. bak jih na tujuh boh lungkee dan tujuh boh mata: na kheueh tujuh roh nibak alah nyang ka geukirem bansigom donya. oh ltheueh nyan aneuk bubiri nyan jipeurab ukeue dan laju jicok gunulong kitab nyan bak jaroe uneuen ureueng nyang duek ateueh takhta nyan. teungoh jipeubuet lagee nyan le aneuk bubiri nyan, laju meuduga ban peuet boh makhlok dan ban dua ploeh peuet peumimpén nyan dikeue geuh nyan. awaknyan maseng-maseng jimat keucapi dan mangkok meuh nyang meuasoe keumeunyan, na kheueh doa-doa umat po teu allah. awaknyan meuca-e saboh lagu nyang baro: "droeneueh patot tacok kitab nyan dan droeneueh peubeukah segee-segee nyan. sabab droeneueh ka jipoh mate, dan ngon mate droeneueh nyan, manusia nibak banmandum sukee, basa, neugahra dan bansa ka tabloe le droeneueh keu po teu allah. droeneueh ka neupeujeuet awaknyan saboh bansa khusus imeum-imeum, mangat awaknyan jipeutimang allah geutanyoe, dan jimat peurintah di ateueh bumoe." oh ltheueh nyan deuh lon kalon lom. ulon deungoe su malaikat nyang meuribee-ribee dan meujuta-juta le jih. awaknyan jidong jikeulileng takhta dan ban peuet boh makhlok meunan cit ngon peumimpén-peumimpén nyan. dan awaknyan laju jimeulagu ngon su nyang teuga, "aneuk bubiri nyang ka teusie nyan, na hak keujiteurimong kuasa, keukayaan, keubijaksanaan dan teunaga; gobnyan patot teuhoreumat, teupeuagong dan teupujo-pujo!" laju lon deungoe mubagoe makhlok nyang na di langet, ateueh bumoe, dan nyang na dimiyueb bumoe meunan cit nyang na lam laot – jeulaih jih banmandum makhlok nyang na ateueh rhueng donya nyoe – jimeulagu, "gobnyan nyang duek di ateueh takhta, dan nyang aneuk bubiri nyan, na kheueh teupujo dan teuhoreumat dan agong lom meukuasa keu siumu masa!" teuma ban peuet boh makhlok nyan laju jijaweueb, "amin!" dan banmandum peumimpén nyan pih laju teudugom dan jiseumah. oh ltheueh nyan lon kalon aneuk bubiri nyan jipeubeukah segee nyang phon lamkawan tujuh boh segee nyan. laju lon deungoe saboh lamkawan peuet boh makhlok nyan jipeugah, "keunoel!" su jihnyan meutaga lagee su geulanteue. teuma lon kalon, deuh laju saboh guda puteh. nyang duek ateueh guda nyan jimat saboh ali-ali, dan keu jihnyan tebri saboh mahkota. oh ltheueh nyan jimaju ukeue lagee ureueng meunang nyang jikak reubot keumeunangan. oh ltheueh nyan aneuk bubiri nyan jipeubeukah segee nyang keudua, dan laju lon de-

ungoe makhlok nyang keudua jipeugah, "keunoe!" dan laju saboh guda nyang laen jiteubiet lom teuma. guda nyan mirah hi jih. nyang duek ateueh guda nyan geubri kuasa keu jipeuleunyah keuadaan dame ateueh rhueng bumoe, mangat manusia sabe jipoh keudroe-droe. ngon lagee nyan bak jihnyan laju geujok saboh peudeueng nyang rayeuk. laju le aneuek bubiri nyan jipeubeukah segee nyang keu lhee. dan lon deungoe makhlok nyang keu lhee jipeugah, "keunoe!" ulon kalon, deuh laju saboh guda itam. nyang duek ateueh guda nyan jimat dua boh ceng bak jaroe jih. dan laju lon deungoe sesuatu nyang teudeungoe jih lagee su nyang teungoh jimeuhoi-meuhoi nibak teungoh-teungoh peuet boh makhlok nyan. su nyan jipeugah, "siaree gandom nyang jroh yuem jih sidub upah siuroe, dan lhee aree gandom nyang jeuneh jih laen yuem jih siuroe mubuet cit. teuma bek peurasak bube na bak zaiton dan lam poh anggo!" oh lheueh nyan le aneuek bubiri nyan laju jipeubeukah segee nyang keu peuet. dan laju lon deungoe makhlok nyang keu peuet jipeugah, "keunoe!" ulon kalon, deuh laju saboh guda nyang pucati ie muka jih. nyang duek ateueh guda nyan nan jih mawot. rot likot, jihnyan jiseutot rab-rab that le alam mawot. keukuasaan ateueh siper peuet bumoe nyoe teujok bak awaknyan, mangat awaknyan hase jipoh mate gob watee lam prang, meunan cit meulalu watee jiteuka musem deuk, meulalu bala peunyaket dan meulalu beulatang-beulatang juah. oh lheueh nyan le aneuek bubiri nyan jipeubeukah segee nyang keu limong. laju deuh lon kalon dimiyeub miseubah na jiwa-jiwa ureueng nyang mate keunong poh sabab awaknyan jipeukong peusan nibak Allah meulalu keusaksian awaknyan. awaknyan jimeudumpek ngon su nyang meutaga, "ya tuhan nyang mahakuasa, nyang suci dan nyang beuna! padub treb teuk droeneueh neupeusidang peunduduek bumoe dan neuhukom awaknyan sabab ka jipoh mate kamoe?" awaknyan maseng-maseng teubiri sion bajee jubah nyang puteh. laju awaknyan teuyue meureuth sikeujab teuk, sampoe ka seb jeumeulah rakan-rakan siperjuangan dan syedara-syedara awaknyan nyang teuma jipoh mate lagee awaknyan. laju ulon kalon aneuek bubiri nyan jipeubeukah segee nyang keu nam. dan jiteuka kheueh geumpa bumoe nyang luwabiasa. mata uroe ka jeuet keu itam lagee ija itam nyang gasa, dan buleuen ka jeuet keumirah lagee darah. bintang-bintang ka rhot nibak langet ateueh bumoe lagee boh ara nyang gohlom masak rhot ateueh bak jih watee jipot le angen teuga. langet gadoh lagee keureutah teugulong, dan bannamandun gunung ngon pulo teugese nibak teumpa

jih. 15 laju le raja-raja donya, dum na ureueng rayeuk, dum na pang-pang, ureueng-ureueng kaya dan ureueng-ureueng meukuasa, meunan cit ngon ureueng-ureueng laen, bah kheueh namiet meunan cit ngon ureueng meurdehka, banmandum jipeusom droe lam guha-guha dan lam-lam luengkiek batee gunong. ubak gunong-gunong dan batee nyan awaknyan jidumpek, "ginton kheueh kamoe! som kheueh kamoe nibak jikalon le gobnyan nyang duek ateuh takhta jeh, dan nibak beungeh aneuek bubiri nyan! uroe pagee ka trok, jinoenyoe awaknyan jipeuleumah beungeh jih, dan hana meusidroepih nyang hase jimeuteun dikeue awaknyan!" oh ltheueh nyan, lon kalon teuma peuet droe malaikat geudong bak peuet boh peunjuru bumoe. awaknyan geupeuteun ban peuet boh angen di bumoe mangat bek na angen nyang jipot di darat atawa di laot, atawa ateuh bak-bak kayee. oh ltheueh nyan deuh teuma lon kalon sidroe teuk malaikat nyang laen teuka di siblahi u timu. gobnyan geuba segee nibak allah nyang udeb. ngon su nyang teuga malaikat nyan laju geuhoi ban peuet droe malaikat nyang ka meuteume kuasa nibak allah keujipeurusak darat ngon laot. malaikat nyan jipeugah, "bek ilee gata peurusak darat atawa laot, atawa bak-bak kayee meunyoe kamoe gohlom kamoe boh tanda segee nibak dho hamba-hamba allah tanyoe." laju bak lon geubri tee bahwa na nyang le jih 144.000 droe nyang teubri tanda segee nibak allah nibak dho awaknyan. ureueng-ureueng nyan teucok nibak bandua blaih sukee bansa israel; nibak tiebtieb sukee 12.000 ureueng. na kheueh nibak sukee yehuda, ruben, gad, asyer, naftali, manasye, simeon, lewi, isakhar, zebulon, yusuf, dan benyamin. oh ltheueh nyan lon ngiang lom, laju deuh laot manusia nyang hana teukira le jih – hana meusidroepih nyang hase ji-itong jeumeulah jih. awaknyan na kheueh ureueng-ureueng nibak tiebtieb bansa, sukee, neugahra, dan basa. deungon jingui bajee jubah nyang puteh-puteh dan bak jaroe jih maseng-maseng jimat cabeueng bak palem, ureueng nyang jai that nyan jidong jimeuhadab ubak takhta dan jihadab ubak aneuek bubiri nyan. laju ngon su nyang meutaga awaknyan jimeuhoi, "seulamat geutanyoe teuka nibak allah tanyoe, nyang duek di ateuh takhta, dan nibak aneuek bubiri nyan!" banmandum malaikat geudong geukeulileng takhta meunan cit ngon mandum peumimpén dan ban peuet boh makhlok nyan. malaikat-malaikat nyan laju teudugom dikeue takhta laju geuseumah allah. awaknyan geutawok, "amin! teupujoe kheueh allah geutanyoe nyang agong dan bijaksana. gobnyan patot teupeulimpah ngon tutoe haba syukoe dan horeumat. gobnyan meukuasa

dan teuga siumu masa! amin." sidroe lamkawan peumimpén jitanyong bak ulon, "ureueng-ureueng nyang jingui bajee jubah puteh nyoe, soe awaknyan dan pane asai jih?" "ulon hana kuteupeue, teungku. teungku keudroe nyang teupeue," jaweub lon. teuma ureueng nyan jipeugah bak ulon, "nyoe kheueh ureueng-ureueng nyang ka seulamat meulalu masa ienanya nyang luwabiasa. awaknyan ka jirjah jubah awaknyan dan jipeujeuet nyan sampoe puteh ngon darah aneuek bubiri nyan. 15 nyang kheueh sabab jih awaknyan jidong dikeue takhta allah, dan meuebadat ubak gobnyan uroe ngon malam didalam baet allah. dan gobnyan nyang duek ateueh takhta nyan teuma na meusajan awaknyan keugeulindong awaknyan. awaknyan hana le teurasa deuk atawa grah; mata uroe atawa seu-eum nyang kha hana le jitot awaknyan, sabab aneuek bubiri nyang duek bak teungoh-teungoh takhta nyan ka jeuet tukang rabe awaknyan. gobnyan teuma geuba awaknyan ubak mata ie nyang teubri udeb. dan po teu allah geusampoh ie mata awaknyan nyang ile bak mata awaknyan." watee aneuek bubiri nyan jipeubeukah segee nyang keutujuh, syeuruga laju sungue nyang treb jih na kira-kira siteungoh jeuem. laju ulon kalon bantujuh malaikat nyang geudong dikeue po teu allah, dan bak awaknyan laju geujok tujuh boh beureuguih. sidroe malaikat nyang laen, nyang geuba saboh dupa meuh, geuteuka dan geudong dikeue miseubah. ubak gobnyan jai that geubri keumeunyan keu ngon baca doa-doa banmandum umat allah dan keugeupeuseumah ubak miseubah meuh nyang na dikeue takhta. meusajan ngon doa-doa umat po teu allah, asab dupa nyang teungoh hu nyan meukeupong jiek nibak jaroe malaikat nyang teudong dikeue alah nyan. oh lheureh nyan le malaikat nyan laju geucok dupa nyan, dan geupasoe laju ngon apui nibak miseubah, laju geurhomo u ateueh bumoe. ngon nyan jiteuka kheueh geulanteue meutaga-tagat meunan cit ngon kilat sabe muble-ble hana reuda, dan teuka kheueh geumpa bumoe. oh lheureh nyan, bantujuh droe malaikat nyang mat tujuh boh beureuguih nyan ka siab-siab keuneuk jiyueb beureuguih nyan. malaikat nyang phon laju jiyueb beureuguih jih, watee nyan cit ujeuen eeh dan apui meulawok ngon darah jitreun ngon tajam that u ateueh bumoe. siper lheureh bumoe habeh tutong; meunan cit siper lheureh nibak bak-bak kayee, dan tieb-tieb naleueng nyang ijo. oh lheureh nyan malaikat nyang keudua jiyueb teuma beureuguih jih, meunan jiyueb deuh laju teukalon saboh beunda nyan biet that rayeuk deuh lagee gunong hu muble-ble teupeupo lam laot. siper lheureh laot nyan meubah jeuet keudarah, ngon lagee nyan

mate kheueh siper lheureh nibak makhlok nyang na lam laot; dan meunan cit teuma na siper lheureh nibak kapai-kapai nyang na lam laot nyan habeh tutong. oh lheureh nyan malaikat nyang keu lheureh laju jiyueb teuma beureuguih jih, ngon lagee nyan saboh bintang nyang rayeuk, nyang hu muble-ble bak lagee suwa apui, rhot nibak langet, laju rhot ateueh siper lheureh nibak krueng-krueng dan mata ie. (nan bintang nyan "phet.") ngon lagee nyan siper lheureh nibak ie ka jeuet keu phet, dan jai that ureueng meuninggai oh lheureh jijieb ie nyang ka jeuet keu phet nyan. oh lheureh nyan malaikat nyang keu peuet jiyueb teuma beureuguih jih. ngon lagee nyan, keunong tanpa kheueh siper lheureh nibak mata uroe, siper lheureh nibak buleuen, dan siper lheureh nibak bintang-bintang ngon lagee nyan gadoh kheueh siper lheureh nibak teunaga cahya awaknyan. meunan cit siper lheureh nibak uroe hana trang dan meunan cit siper lheureh nibak malam. laju ulon kalon, teuma ulon deungoe saboh cicem siwah nyang teungoh jipo manyang di udara, jimeuhoi, "mupaloe! mupaloe! mupaloe kheueh banmandum ureueng nyang na ateueh rueng donya nyoe meunyoeteudeungoe lheureh malaikat nyang laen jiyueb beureuguih jih teuma!" laju le malaikat nyang keulimong geuyueb beureuguih geuh, dan deuh laju lon kalon saboh bintang rhot nibak langet u ateueh bumoe. bintang nyan teubri gunci jurong mawot. teuma le bintang nyan laju jipeulah jurong mawot nyan, laju deuh asab jiteubiet lam atra nyan lagee asab nibak tungkee nyang rayeuk. mata uroe ngon langet manyang ka jeuet keuseupot sabab le asab nyang jiteubiet lam jurong nyan. laju nibak lam asab nyan jiteubiet teuma daruet-daruet nyang jitreun u bumoe. ubak daruet-daruet nyan jibri kuasa nyang saban lagee nyang teubri keu kala jeungking. bak awaknyan teutam bek jipeurusak naleueng, meunan cit ngon bak-bak kayee, atawa seunaman-seunaman laen banmandum nyan hana jeuet jipeurusak. daruet-daruet nyan nyang jeuet jiseurang na kheueh ureueng-ureueng nyang nibak dho jih hana tanda segee nibak allah. teuma ubak daruet-daruet nyan hana teubri jipoh mate ureueng-ureueng nyan, nyang jeuet jiseksa awaknyan nyang treb jih limong buleuen. saket nyang jirasa le sabab teuseksa le daruet-daruet nyan saban saket jih lagee jakab le kala jeungking. nyang treb jih limong buleuen nyan, ureueng-ureueng nyang keunong seksa le daruet-daruet nyan jiuseuha mangat droe jih mate, teuma awaknyan teutab hase jitem mate; awaknyan jitem mate, teuma mawot jioh nibak awaknyan. hi daruet nyan lagee guda nyang ka siab keuneuk jak lam prang. bak ulee daruet-daruet nyan na deuh sapeue-sapeue

lagee makhkota meuh. ruman daruet-daruet nyan lagee ruman manusia. ok jih lagee ok ureueng inong, dan gigo jih lagee gigo singa. nibak dada jih teutob ngon sesuatu nyan rab saban ngon sinutob beuso. su sayeueh jih lagee su geuritan-geuritan guda nyan jai teungoh jimaju u mideuen prang. daruet-daruet nyan na iku ngon bisa lagee kala jeungking. dan iku jihnyan na kheueh na meuteume teunaga droe jih keu jiseksa manusia nyan treb jih limong buleuen nyan. 11 awaknyan na raja nyan peurintah droe jih keudroe, dan raja nyan na kheueh malaikat nyan meutanggong jaweueb ateueh jurong mawot. nan jih lam basa ibrani na kheueh abadon; dan lam basa yunani apolion (nyang makna jih "peurusak"). ceulaka nyan phon ka liwat. oh ltheueh nyan na dua boh azeb teuk nyan meuseuti teuka. oh ltheueh nyan malaikat nyan keu nam laju geuyueb beureuguih geuh. teuma laju lon deungoe su nyan teuka nibak ban peuet boh sagoe miseubah meuh nyan na dikeue po teu alah. su nyan jipeugah bak malaikat nyan keu nam nyan, "jak peuleueh kheueh ban peuet droe malaikat nyan teuikat nibak krueng efraim nyan!" 15 ban peuet droe malaikat nyan pih laju teupeuleuh. awaknyan ka teupeusiab khusus keu jeuem, uroe, buleuen dan thon keu teupoh mate siper lhee nibak banmandum umat manusia. bak ulon jibri tee bahwa jeumeulah pasokan-pasokan meuguda nyan na dua reutoh juta. dan lam keumalon lon nyan, laju lon ngieng guda-guda nyan dan nyan duek ateueh guda-guda nyan. nyan duek ateueh guda-guda nyan jisok baje beuso nyan wareuna jih mirah hu. ijo lagee batee nilam, dan kuneng beulerang. ulee guda-guda nyan lagee ulee singa, dan nibak babah jih jiteubiet apui, asab dan beulerang. siper lhee nibak umat manusia teupoh mate le lhee boh beuncana nyan, atra nyan na kheueh; apui, asab, dan beulerang nyan jiteubiet lam babah guda-guda nyan. teunaga guda-guda nyan na meuteume nibak babah dan meunan cit nibak iku jih. iku-iku jih lagee uleue meu-ulee. ngon iku jih nyan, guda-guda nyan jiseksa manusia. teuma nyan tinggai umat manusia nyan hana teupoh mate le beuncana-beuncana nyan pih, hana teuma jitinggai buet jaroe jih keudroe. awaknyan hana jipioh jiseumah roh-roh jeuhet dan beurala-beurala meuh, pirak, teumaga, batee dan kayee nyan hana hase jikalon atawa jideungoe, meunan cit hana jeuet jikak. meunan cit awaknyan hana teuma jitinggai buet-buet jih nyan jeuhet, na kheueh jipoh mate gob, jinjui ieleume-ieleume gaeb, buet cabui dan ceumeucue. laju lon kalon sidroe malaikat peukasa nyan laen geutreun lam syeuruga. malaikat nyan jipeupayong le awan, dan saboh peulangi jikeulileng ulee

gobnyan. ruman geuh meucahya lagee mata uroe, dan gaki gobnyan lagee tameh apui. bak jaroe gobnyan na saboh geunulong kitab ubit nyan teuhah. gaki wie geuh teugilo lam laot dan gaki uneuen geuh teugilo ateueh darat. laju gobnyan geudumpek ngon su nyan meutaga lagee su singa-singa meudumpek. oh ka ltheueh malaikat nyan geudumpek, ban tujoh boh geulanteue laju jijaweueb ngon su nyan meutaga. meunan ban tujoh boh geulanteue nyan jimeusu, ulon keuneuk cetet atra nyan, teuma laju lon deungoe su lam syeuruga jipeugah, "som kheueh bek na soe teupeu peue nyan jipeugah le ban tujoh geulanteue nyan; bek gata cetet!" laju malaikat nyan lon ngieng gaki geuh nyan teugilo lam laot ngon ateueh darat nyan geubeuot jaroe uneuen geuh u langet. gobnyan meusumpah deumi nan allah nyan udeb siumu masa, nyan cepta langet, bumoe dan laot dan banmandum peue-peue nyan na lam nyan. malaikat nyan jipeugah, "watee jih hana teuma teupeupreh le! teuma meunyoe malaikat keu tujoh geuyueb beureuguih gobnyan, allah teuma geupeubuet banmandum reucana rahsia gobnyan, lagee nyan ka geupeugah ubak hamba-hamba gobnyan, na kheueh nabi-nabi." oh ltheueh nyan su nyan ka ulon deungoe lam syeuruga nyan, jimeututloe lom bak ulon. gobnyan geupeugah, "jak kheueh laju gata cok geunulong kitab bak jaroe malaikat nyan gaki geuh na teugilo lam laot ngon ateueh darat nyan." teuma ulon pi laju kujak ubak malaikat nyan mangat geubri bak lon geunulong kitab nyan ubit nyan. malaikat nyan geupeugah, "cok kheueh dan makheun kheueh nyoe. oh trok lam pruet gata jihnyan jeuet keu phet, teuma lam babah gata jihnyan mameh lagee meulisan." laju ulon cok geunulong kitab nyan ubit nyan bak jaroe gobnyan laju lon pajoh. bak babah rasa jih lagee meulisan mameh jih, teuma oh ka ltheueh lon uet atra nyan, lam pruet lon atra nyan ka jeuet keu phet. oh ltheueh nyan ulon jipeurintah, "jak peusampoe kheueh sigoe teuk haba keuhai po teu alah ubak bansa-bansa, neugahra-neugahra, basa-basa dan raja-raja." oh ltheueh nyan keulon geubri sikrek kayee nyan hi jih lagee tungkat ngon uko, oh ltheueh nyan laju geupeurintah lagee nyoe, "jak uko kheueh laju baet allah dan miseubah. itong kheueh padub na le jih ureueng nyan meuebadat lam baet allah nyan. teuma bek gata uko leuen baet allah nyan bagian luwa jih, sabab jeumba nyan ka teujuk keu ureueng-ureueng nyan hana jituri tuhan. awaknyan teuma jigiloe-giloe banda nyan suci nyan nyan treb jih peuet ploeh dua buleuen. ulon teuma kukirem dua droe saksi lon nyan jingui peukayan meuduka, dan awaknyan teuma jipeumaklum feureuman allah

nyang treb jih 1260 uroe." dua saksi nyan na kheueh dua bak zaiton dan dua boh gaki panyot nyang na dikeue tuhan semeusta alam nyoe. meunyoen na ureueng jicuba peubuet sapeue-sapeue nyang hana get ateuah awaknyan, teuma lam babah awaknyan jiteubiet kheueh laju apui nyang ka siab jipeubinasa musoh-musoh awaknyan. ngon cara nyang lagee nyan, banmandum ureueng nyang jikeuneuk ielanya awaknyan teupoh mate. awaknyan na kuasa keu jitob langet mangat bek jitreun ujeuen watee awaknyan teungoh jipeumaklum feureuman nibak po teu allah. meunan cit nibak awaknyan na kuasa ateuhe mandum mata ie, keu ji-ubah ie jeuet keu darah. dan awaknyan na teuma kuasa keu jiseupot bumoe ngon meubagoe rupa beuncana, pajan mantong nyang jikeuneuk peubuet le awaknyan. oh ka seulesoe awaknyan jipeusampoe feureuman allah nyan, beulatang nyang jiteubiet lam jurong mawot teuma jilawan awaknyan. dan manyet awaknyan teuma teuhanta ateuhe rot rayeuk banda rayeuk, nibak teupat tuhan awaknyan teusaleb. nan kiasan banda nyan na kheueh sodom atawa meuse. ureueng-ureueng nibak mandum neugahra, sukee, basa, dan bansa teuma jikalon manyet awaknyan nyang treb jih lhee siteungoh uroe, dan hana teupeuidhin manyet-manyet nyan teukubu. peunduduek bumoe jimeusurak ria ateuhe meuninggai bandua saksi nyan. awaknyan teuma jipeurayeuk dan saleng keumirem bungong jaroe, sabab bandua droe nabi nyan ka jipeuteuka seksaan ateuhe banmandum ureueng nyang na di bumoe. oh ka lheu lhee uroe siteungoh, teuka kheueh nafah udeb nibak po teu allah dan jitamong lom lam tuboh bandua droe nabi nyan. bandua awaknyan laju jibeudoh dan jidong, akhe jih, banmandum ureueng nyang kalon awaknyan teumakot lumpah na. oh lheu lhee nyan bandua droe nabi nyan laju teudeungoe su nyang paleng teuga jita-wok awaknyan, "gata ek laju keunoe!" dan dikeue mata musoh-musoh awaknyan, awaknyan ji ek lam syeuruga, sira jipeupayong le awan. watee nyan jiteuka kheueh geumpa bumoe nyang paleng hebat. siper siploh nibak banda nyan hanco, dan na tu-joh ribee droe nyang meuninggai donya le sabab geumpa bumoe nyan. dumna ureueng laen teumakot lagoena, laju awaknyan jipujoe keubeusaran allah di syeuruga. bala nyang keudua ka leupah. teuma ngieng kheueh! bala nyang keu lhee hana treb le jiteuka. 15 laju le malaikat keutujoh geuyeb beureugih gobnyan, watee nyan cit teuma teudeungoe su nyang teuga lumpah na, "keukuasaan keuteupeurintah donya jinoenyoe na lam jaroe tuhan tanyoe dan raja peuseulamat nyang ka geupeu janji nyan.

gobnyan teuma geumat peurintah siumu masa!" ngon lagee nyan ban dua ploeh peuet droe peumimpen nyang teungoh duek bak takhta droe jih dikeue po teu allah, laju reubah teudugom dan jiseumah allah. awaknyan jipeugah, "tuhan, allah nyang mahakuasa, nyang na, dan nyang ka na! kamoe meulakee teurimong gaseh bak droeneueh sabab droeneueh ka neupeuguna kuasa droeneueh nyang paleng rayeuk, dan ka neupeuphon mat peurintah! ureueng nyang hana jituri tuhan, laju beungeh hana meuteuntee sabab ka watee jih droeneueh neupeuleumah beungeh, dan ka teuma watee jih droeneueh peusidang keu ureueng mate. nyoe kheueh watee jih keuteubri upah ubak hamba-hamba droeneueh, bubena nabi, dan ubak banmandum umat droeneueh, na kheueh banmandum ureueng nyang meuebadat ubak droeneueh, ubit meunan cit rayeuk. nyoe kheueh watee jih keuteupeu hanco ateuhe ureueng-ureueng nyang jipeuhanco bumoe!" ngon lagee nyan teuhah kheueh baet allah nyang na lam syeuruga, dan deuh kheueh teukalon peuto peujanjian nyang na lam nyan. dan teuka kheueh laju kilat hana putoh-putoh dan su geulanteue meugudum-geudum, meunan cit ngon gumpa bumoe ngon ujeuen eeh nyang paleng hebat. laju deuh di langet sapeue-sapeue nyang ajaeb lom luwabiasa. sidroe ureueng inong nyang jingui mata uroe sibagoe peukayan jih, teungoh jidong di ateuhe buleen. ateuhe ulee gobnyan na saboh mahkota nyang teupeugat nibak dua blah boh bintang. ureueng inong nyan teungoh mume, dan sabab ka trok watee jih keuneuk peulahe aneuek, laju jiklik sabab saket lagoena. oh lheu lhee nyan deuh lom teukalon di langet sapeue-sapeue nyang ajaeb, na saboh naga mirah nyang rayeuk lumpah na nyang ulee jih na tu-joh boh dan siploh boh lungkee. tieb-tieb ulee beulatang nyan na jiseun saboh mahkota. ngon iku jih laju jitarek siteungoh nibak bintang-bintang nyang na di langet laju jigeulawa u ateuhe bumoe. naga nyan laju jidong dikeue ureueng inong nyang keuneuk peulahe aneuek nyan ngon meukeusut keuneuk uet aneuek inong nyan, watee aneuek nyan lahe. laju le inong nyan jipeulahe sidroe aneuek agam nyang teuma jimat peurintah ateuhe banmandum bansa ngon tungkat beuso. teuma aneuek nyan laju jireupah bak ureueng inong nyan, laju jiba ubak po teu allah dan ukeue takhta gobnyan. ngon lagee nyan ureueng inong nyan laju jiplueng u padang pasi, ubak teupat nyang ka geukeubah le po teu allah keu inong nyan. nibak teupat nyan jihnyan teupeulara nyang treb jih na 1260 uroe. laju lam syeuruga na teujadi muprang. mikhael meusajan ngon malaikat-malaikat geuh nyan laju jimeulo jilawan naga nyan. dan naga

nyan pih, nyang jitulong le malaikat-malaikat geuh nyan, teulawan mikhael. teuma naga nyan jipeutaloe. geuhnyan meusajan ngon malaikat-malaikat gobnyan hana geubri le tinggai lam syeuruga. naga nyang rayeuk nyan laju jitiiek uluwa! nyan kheueh uleue tuha nyan nyang nan jih iblih atawa roh jeuhet, nyang jitipee bansigom donya nyoe. jihnyan teuboh u bumoe meusajan ngon mandum malaikat gobnyan. laju lon deungoe su nyang meutaga lam syeuruga lagee nyoe, "jinoe kheueh watee jih allah geupeu seulamat umat gobnyan! jinoenyoe allah geupeuleumah kuasa gobnyan sibagoe raja! jinoenyoe raja peuseulamat nyang ka geupeu janji nyan pih geupeuleumah keukuasaan gobnyan! sabab nyang tudoh syedara-syedara geutanyoe dikeue po teu allah uroe ngon malam, ka geupeuteubiet lam syeuruga. syedara-syedara geutanyoe ka jipeutaloe jihnyan ngon darah aneuk bubiri nyan, dan ngon feureuman nyang beutoi nibak allah nyang awaknyan peudakwah. awaknyan rila jikeureubeuen nyawong droe jih trok an mate. sabab nyan, bah kheueh syeuruga dan banmandum nyang na tinggai lam syeuruga nyan, beusukaria! teuma meupaloe kheueh bumoe ngon laot, sabab iblih ka jitreun bak gata ngon beungeh nyang rayeuk lumpah na, sabab jihnyan jiteupeue bahwa watee jih tinggai bacut teuk." bak watee naga nyan jiteupeue bahwa jihnyan ka teurhom u bumoe, jihnyan laju jitiyeub ureueng inong nyan ka jipeulahe aneuk agam nyan. teuma keu ureueng inong nyan laju teubri dua boh sayeueb cicem rajawali nyang rayeuk, mangat jihnyan jipo ubak teupat droe jih lam padang pasi, nibak teupat nyan jihnyan teuma jipeulara nyang treb jih lhee thon siteungoh, teupeusie nibak jiseurang le naga. 15 teuma le naga nyan laju jisumprot ngon ie nyang jai that lam babah jih u ateuh ureueng inong nyan, guna jih mangat jeuet inong nyan anyot. teuma le bumoe laju jitulong inong nyan; laju jipeuhah babah jih dan juet laju ie nyang jipeuleueh le naga nyan. naga meutamah beungeh ngon bit that keu ureueng inong nyan, akhe jih laju jijak seurang keuturonan nyang laen nibak inong nyan, na kheueh banmandum ureueng nyang jitaat ubak peue-peue nyang geupeurintah le allah, dan nyang meusaksi keuhai isa dan kuasa gobnyan. laju naga nyan jidong bak bineh pante. oh lheueh nyan deuh lon kalon saboh beulatang jiteuka nibak lam laot. beulatang nyan na siploh boh lungkee dan tujoh boh ulee. nibak tieb-tieb lungkee jih na saboh mahkota, dan nibak tieb-tieb ulee beulatang nyan na teutuleh saboh nan teuhina ateuh po teu allah. beulatang nyang lon kalon nyan hi jih lagee rimueng tutul, dan gaki jih lagee gaki cagee, meunan cit babah

jih lagee babah singa. oh lheueh nyan ubak beulatang nyan le naga nyan laju jibri teunaga jih keudroe, meunan cit ngon takhta jih dan keukuasaan nyang rayeuk. saboh nibak tujoh boh ulee beulatang nyan deuh lagee luka parah lumpah na, teuma luka nyan ka puleh. bansigom bumoe laju jiseutot beulatang nyan ngon peurasaan takjob that. dan awaknyan jipujoe naga nyan sabab jihnyan ka jibri keukuasaan ubak beulatang nyan. dan awaknyan pih jipujoe beulatang nyan. awaknyan jipeugah lagee nyoe, "hana nyang saban ngon beulatang nyoe! hana nyang hase jimuprang jilawan beulatang nyan!" beulatang nyan jeuet jipeugah hai-hai nyang angkoh dan jihina po teu allah. bak jihnyan teupeu idhin jimat peurintah nyang treb jih peuet ploh dua buleuen. laju jihnyan jipeuphon hina allah, dan nan allah. meunan cit ngon teupat tinggai allah, dan banmandum nyang na tinggai lam syeuruga nyan pih jihina. meunan cit keu beulatang nyan teupeu idhin jilawan umat allah dan jipeutaloe awaknyan. dan jimat kuasa ateuh banmandum sukee, neugahra, basa, meunan cit ngon bansa teubri bak jihnyan. beulatang nyan teuma jiseumah le banmandum ureueng nyang udeb ateuh rhueng bumoe, keucuali ureueng-ureueng nyang nan jih ka teudafeutar sigohlom donya teucebta, lam kitab ureueng udeb atra aneuk bubiri nyang ka teusie. sabab nyan, meunyeu gata hase tadeungoe, deungoe kheueh haba nyoe: "ureueng nyang meuseuti teudrob, pasti teuma teudrob. dan ureueng nyang meuseuti teupoh mate ngon peudeueng, nyan pasti teuma teupoh mate ngon peudeueng. nyang kheueh sabab jih umat allah meuseuti tabah dan seutia." oh lheueh nyan laju lon kalon lom saboh beulatang laen teuka nibak lam bumoe. bak beulatang nyan na dua boh lungkee lagee lungkee aneuk bubiri. su jih lagee su naga. dikeue beulatang nyang phon nyan beulatang nyan jingui keukuasaan nyang rayeuk nyang jiteume nibak beulatang nyan cit teuma. bansigom bumoe dan mandum nyang tinggai di ateuh nyan, jipaksa teuseumah beulatang nyang phon nyan, nyang luka brat that nyan ka puleh. beulatang nyang keudua nyan laju jipeuna buet-buet ajaeb nyang rayeuk. dikeue mandum ureueng nyang na nibak teupat nyan laju jipeuna buet ajaeb lagee jipeuget apui jitreun nibak langet u ateuh bumoe. dan banmandum ureueng nyang udeb lam bumoe nyoe jitipee ngon buet-buet ajaeb nyang jipeuget dikeue beulatang nyang phon nyan. dan awaknyan banmandum jiyue peudong saboh patong nibak beulatang nyang ka luka le peudeueng, teuma teutab udeb. 15 beulatang nyang keudua nyan jipeu idhin jiboh nyawong ubak patong nyan, akhe jih patong nyan jeuet jimeututot dan jipoh

mate mandum ureueng nyang hana jitem seumah jih. banmandum ureueng, cut ngon rayeuk, kaya ngon gasien, namiet dan ureueng meurdehka, jipaksa le beulatang nyan keujiteurimong tanda nibak jaroe uneuen awaknyan atawa nibak dho awaknyan. hana meusidroepi hase jimeubloe atawa jipeubloe sapeue-sapeue barang, meunyo nibak jihnyan hana tanda nyan, na kheueh nan beulatang nyan keudroe, atawa angka nyang teupeugah nan nyan. inoe peureulee na hikeumat. ureueng nyang bijaksana hase ji itong makna nibak angka beulatang nyan, sabab angka nyan na kheueh nan sidroe manusia. angka jih 666. oh lheureh nyan ulon kalon, laju deuh aneuek bubiri nyan jidong ateueh buket sion. meusajan gobnyan na 144.000 droe nyang nibak dho masang-maseng na teutuleh nan gobnyan dan nan bapak gobnyan. laju lon deungoe su nibak langet nyang meugrum-grum lagee su ie tajo nyang rayeuk that dan lagee su geulanteue nyang luwabiasa. su nyan teudeungoe lagee su musik nibak peumeuen-peumeuen keucapi nyang teungoh jipeumeu-en keucapi jih. dikeue takhta dan ban peuet makhlok meunan cit banmandum peumimpin ban sikeulileng takhta nyan, 144.000 droe nyan jimeulagu saboh lagu nyang baro. lagu nyan hana hase jimeurunoe le meusidroe pi seulaen nibak ureueng nyang 144.000 droe nyan nyang ka teupeubeubaih nibak bumoe. awaknyan na kheueh ureueng-ureueng nyang teutab gleh lagee aneuek dara nyang mantong peurawan, sabab hana jipeuna hubungan ngon ureueng inong. awaknyan laju jiseutot aneuek bubiri nyan ho-ho mantong nyang jijak. nibak banmandum umat manusia, awaknyan kheueh nyang ka teupeubeubaih sibagoe peuseumahan nyang phon ubak po teu allah dan ubak aneuek bubiri nyan. hantom na awaknyan jimeusulet; dan hana meucupa meubacut pih nibak awaknyan. laju ulon kalon sidroe malaikat nyang laen nyang jipo di langet manyang. malaikat nyan geuba beurita keuhai haba get nyang keukai keuteupeusampoe ubak manusia nyang ateueh rhueng bumoe na kheueh ubak bandum bansa, sukee, basa dan neugahra. malaikat nyan geutawok ngon su meutaga, "takot kheueh ubak allah, dan pujoe kheueh keubeusaran gobnyan! sabab ka watee jih allah geupeu hakem manusia. seumah kheueh gobnyan nyang peujeuet langet, bumoe, laot dan banmandum mata ie!" malaikat nyang keudua jiseutot malaikat nyang phon sira jipeugah, "ka rhot! banda babel nyang rayeuk ka rhot! jihnyan ka jipeujeuet bandum bansa mabok ngon ie anggo – na kheueh anggo nibak nafeusu cabui jih!" oh lheureh nyan malaikat nyang keu lhee jiseutot malaikat nyang dua nyan, sira jita-

wok ngon su nyang meutaga, "ureueng nyang pujoe beulatang nyan ngon patong jih, na tanda beulatang nyan nibak dho atawa jaroe jih, ureueng nyan teuma jijieb ie anggo allah, na kheueh anggo beungeh gobnyan nyang ka geusintong u dalam wadah jih, hana teupeukureung meubacut pih! banmandum ureueng nyan teuma geuseksa lam apui dan beulerang dikeue malaikat-malaikat suci dan dikeue aneuek bubiri nyan. asab nibak apui nyang teuseksa ureueng-ureueng nyan teuma teutab na sabe keu siumu masa. uroe malam hana pioh-pioh awaknyan teuseksa, na kheueh awaknyan nyang seumah beulatang nyan dan patong jih, dan banmandum ureueng nyang na tanda nan beulatang nyan." lam hainyoe umat allah nyang taat ubak peue-peue nyang geupeurintah le allah dan seutia ubak isa, peureulee that beujeuet keu ureueng nyang tabah. laju lon deungoe nyang teuka lam syeuruga jipeugah, "tuleh kheueh nyoe: phon jinoenyo, meubahgia kheueh ureueng-ureueng nyang mate sabab jipeutimang tuhan!" "beutoi!" jaweueb roh allah. "awaknyan teuma jipioh jimubuet nyang brat, sabab hase peulayanan awaknyan sabe na meusajan awaknyan." oh lheureh nyan deuh lon kalon, teuma leumah laju awan puteh. ateueh awan nyan jiduek sidroe nyang hi jih lagee manusia. ateueh ulee gobnyan na saboh mahkota meuh, dan bak jaroe jih na saboh sadeueb nyang tajam. 15 oh lheureh nyan sidroe malaikat nyang laen jiteubiet lam baet allah. ngon su nyang meutaga. gobnyan laju geutawok bak gobnyan nyang duek ateueh awan nyan, "ayon kheueh laju sadeueb gata nyan dan pot kheueh jinoenyo, sabab ka watee jih keu teupot; bumoe ka masak keu teupot!" laju le nyang duek ateueh awan nyan jiajon sadeueb geuh u ateueh bumoe, ngon lagee nyan bumoe pih jipot. oh lheureh nyan deuh teuma lon kalon sidroe malaikat nyang laen jiteubiet lam baet allah di syeuruga. jihnyan pih na jimat saboh sadeueb nyang tajam. oh lheureh nyan, sidroe malaikat nyang laen, nyang na kuasa ateueh apui, teuka nibak miseubah. ngon su nyang teuga jihnyan laju jitawok ubak malaikat nyang teungoh mat sadeueb nyang tajam nyan, "ayon kheueh sadeueb nyan dan reupang kheueh boh-boh anggo nyang na di bumoe, sabab boh-boh jih ka masak!" ngon lagee nyan le malaikat nyan pi laju geuayon sadeueb geuh u ateueh bumoe laju geureupang bubena boh-boh anggo nyang na ateueh bak jih, oh lheureh nyan laju jigeulawa lam peuneurjah teupat prah ie anggo keubeungeh allah nyang ju meudok-dok nyan. boh-boh anggo nyan jiprah diluwa banda, dan nibak peuneurah nyang prah boh anggo nyan jiteubiet kheueh darah lagee ie krueng, nyang jioh jih na lhee reutoh

kilo metee, meunan cit lhok jih rab dua metee. oh lھےh nyan lon kalon di langet sapeue-sapeue nyang ajaeb dan luwabiasa hebat jih. na tujuh malaikat ngon tujuh beuncana nyang keuneulھےh. nyoe kھےh nyang keuneulھےh jih po teu allah geusintong banmandum beungeh gobnyan. oh lھےh nyan deuh teuma lon kalon sapeue-sapeue nyang leumah jih lagee laot ceureumen meujampu ngon apui. meunan cit lon kalon ureueng-ureueng nyang ka meunang ateueh beulatang dan patong jih, dan meunang ateueh ureueng nyang nan jih teuboh tanda ngon angka. ureueng-ureueng nyang meunang nyan jidong bak bineh laot ceureumen sira jimat keucapi nyang geujok le po teu allah ubak awaknyan. dan awaknyan laju jimeuca-e ngon lagu nabi musa, hamba allah, dan ca-e aneuek bubiri. meunoe kھےh su ca-e nyan, "tuhan, allah nyan mahakuasa, keubiet that rayeuk dan ajaeb jih buet-buet droeneuh! raja banmandum bansa, keubiet that ade dan beutoi banmandum nyang droeneuh peubuet! soe nyang hana jitakot ubak droeneuh, tuhan? soe kھےh nyang hana jitem peugah keubeusaran droeneuh? droeneuh mantong kھےh nyang suci. banmandum bansa teuma jiteuka jijak seumah droeneuh sabab buet-buet droeneuh nyang ade ka jikalon le mandum ureueng." oh lھےh nyan ulon kalon teuma baet tuhan lam syeuruga nyang teuhah, dan khimah tuhan na lam nyan. laju bantujuh malaikat ngon bantujuh beuncana nyan jiteubiet lam baet alah. peukayan awaknyan teupeuget nibak ija linun nyang gleh ngon meukilat. dan awaknyan jingui tutob dada nyang teupeuget nibak meuh. oh lھےh nyan sidroe lamkawan makhlok nyang peuet droe nyan jibri ubak bantujuh droe malaikat nyan tujuh boh wadah meuh nyang peunoh meuasoe beungeh alah, – allah nyang udeb siumu masa. deungon lagee nyan baet allah nyan ka peunoh ngon asab nibak keuangongan dan kuasa po teu allah. dan simantong bantujuh beuncana nyang jiba le bantujuh malaikat nyan gohlom seulesoe, hana meusidroe pi nyang hase jitamong lam baet allah. laju lon deungoe su nyang teuga that lam baet allah jipeugah bak ban tujuh malaikat nyan, "jak kھےh laju dan tasintong kھےh ban tujuh boh wadah beungeh allah nyan u ateueh bumoe!" malaikat nyang phon laju jijak dan jisintong asoe wadah jihnyan u ateueh bumoe. watee nyan cit teuma jitimoh kھےh cumuet-cumuet nyang paleng parah dan lumpah that saket ateueh banmandum ureueng nyang na tanda beulatang nyan, dan meunan cit ateueh ureueng-ureueng nyang seumah patong jih. oh lھےh nyan malaikat nyang keudua jisintong asoe wadah jih lam laot. watee nyan

cit teuma ie laot ka jeuet lagee darah ureueng mate, ngon lagee nyan mate kھےh banmandum makhlok nyang na lam laot. oh lھےh nyan malaikat nyang keu lھے jisintong wadah jih nyan lam krueng dan ubak dumna mata ie, wateuyan cit teuma banmandum ie ka jeuet keudarah. laju lon deungoe malaikat nyang meukuasa ateueh ie jipeugah, "hukoman nyang droeneuh peurhot nyan na kھےh ade, nyang mahasuci, allah nyang na, dan nyang ka na! awaknyan ka jipeuro dumna darah umat allah dan darah nabi-nabi; jinoenyoe droeneuh peujeuet awaknyan jijieb darah. keubiet ka patot hukoman nyan teupeu rhot ateueh awaknyan!" oh lھےh nyan lon deungoe teuma su ateueh miseubah jipeugah lagee nyoe, "tuhan, allah nyang mahakuasa, beutoi dan ade that banmandum hukoman nyang droeneuh peurhot nyan!" oh lھےh nyan malaikat nyang keupeuet laju geusintong asoe wadah nyang na bak geuhnyan ubak mata uroe, deungon lagee nyan mata uroe pih ka jeuet jitot sampoe angho manusia ngon seu-eum jih nyang luwabiasa nyan. manusia teupeu angho le seu-eum nyang kha nyan, dan awaknyan jikutok nan po teu allah, nyang meukuasa ateueh beuncana-beuncana nyan. bah pih meunan, awaknyan hana jitem meutobat ateueh desya-desya jih keudroe dan hana jitem pujoe keubeusaran allah. laju le malaikat nyang keulimong jisintong asoe wadah jih ateueh takhta beulatang nyan. ngon lagee nyan banmandum keurajeuen beulatang nyan ka jeuet keuseupot, dan manusia jikab lidah droe sabab le saket. laju awaknyan jikutok alah nyang na lam syeuruga sabab awaknyan saket that meunan cit sabab le cumuet-cumuet nyang na bak awaknyan. teuma awaknyan teutab hana jitem meutobat nibak desya-desya jih nyang jeuhet nyan. oh lھےh nyan le malaikat nyang keu nam laju jisintong asoe wadah lam krueng efrat nyang rayeuk nyan. ngon lagee nyan krueng nyan laju tho dan raja-raja di timu ka jeuet jijak rot lam krueng tho nyan. oh lھےh nyan laju deuh lon kalon lھے boh roh jeuhet nyang hi jih lagee cangguk. maseng-maseng cangguk nyan jiteubiet lam pruet naga, nibak babah beulatang, nibak babah nabi peuleusu. awaknyan na kھےh roh-roh jeuhet nyang jipeubuet buet-buet nyang ajaeb. ban lھے droe roh nyan laju jijak ubak raja-raja nyang na bansigom donya dan jipeusapat awaknyan keu ji muprang bak uroe nyang rayeuk, na kھےh uroe nibak allah nyang mahakuasa. 15 "deungoe kھےh! ulon teuka lagee pancuri! meubahgia kھےh ureueng nyang teutab siaga dan jijaga peukayan jih, ngon lagee nyan jihnyan hana jijak ngon teulon dan jeuet keu malee dikeue rakyat ba!" oh lھےh nyan le roh-roh nyan laju jipeusapat raja-raja nyan nibak teupat

nyang lam basa ibrani teuboh nan harmagedon. oh lheueh nyan malaikat nyang keutujoh laju jisintong asoe wadah jih u manyang. dan teudeungoe kheueh laju su nyang paleng teuga nibak takhta lam baet allah, nyang jipeugah, "ka seuleusoe!" dan jiteuka kheueh kilat nyang hana putoh-putoh dan su geulanteue meugrum-grum dan meutaga-tagat, meunan cit geumpa bumoe nyang hebat lumpah na. hantom na teujadi geumpa bumoe nyang lagee nyan bagoe yoh phon donya nyoe geucebta. nyoe kheueh geumpa bumoe nyang paleng hebat! banda nyang rayeuk nyan beukah jeuet keu lhee boh bagi, dan hanco teuma banda-banda banmandum neugahra nyang na lam donya. laju po teu allah teuingat ubak babel nyang rayeuk nyan. teuma allah laju geupeugat ie meuneujieb nibak wadah anggo allah – na kheueh anggo beungeh gobnyan nyang luwabiasa. banmandum pulo ka gadoh, dan banmandum gunong pih ka habeh le-unyab. ujeuen eeh nyang rayeuk, nyang maseng-maseng na brat jih limong ploh kilo gram, rhot nibak langet laju jitingkeh ateueh dumna ureueng. ngon lagee nyan awaknyan laju jikutok allah sabab le bala ujeuen eeh nyang luwabiasa nyan. oh lheueh nyan sidroe lamkawan tujuh droe malaikat nyang jimat tujuh boh wadah nyan laju jijak ubak ulon sira jipeugah, "jak keunoe, ulon teuma kupeuleumah bak gata pakriban inong lunte rayeuk nyan teuhukom, na kheueh banda rayeuk nyan nyang jipeudong nibak bineh-bineh krueng. raja-raja donya jipeubuet cabui ngon jih nyan, dan nyang tinggai lam bumoe ka jeuet keu mabok sabab jijieb anggo buet cabui jih nyan." laju roh allah geukuasa ateueh ulon, dan malaikat nyan jiba ulon ubak padang pasi. nibak teupat nyan laju deuh lon kalon sidroe ureueng inong teungoh jiduek ateueh saboh beulatang nyang wareuna jih mirah tuha, dan nyang peunoh teuteuleh ngon nan-nan nyang teuhina ubak po teu allah. beulatang nyan na tujuh boh ulee dan siploh boh lungkee. ureueng inong nyan jingui bajee nyang wareuna jih ungu ngon mirah tuha, meunan cit teuhia ngon mubagoe piasan meuh, ngon peumata-peumata, dan ngon mutiara. nibak jaroe jih jimat saboh cambong meuh nyang peunoh ngon hai-hai nyang keuji dan kutoe, hase nibak buet jih nyang cabui nyan. nibak dho jih teuteuleh saboh nan nyang muphom jih rahsia. nan nyan na kheueh, "babel nyang rayeuk, ma meubagoe lunte dan ureueng jeuhet ateueh rhueng donya." laju ulon kalon bahwa inong nyan mabok ngon darah umat po teu allah dan darah ureueng-ureueng nyang teupoh mate sabab seutia ubak isa. watee ulon ngieng inong nyan, ulon jeuet teuhireuen-hireuen. laju malaikat nyan jipeugah bak ulon, "peue

sabab gata teuhireuen-hireuen? bah kheueh ulon peugah bak gata rahsia inong nyan dan rahsia beulatang nyang jigiduek nyan, na kheueh beulatang nyang na tujuh boh ulee dan siploh boh lungkee. beulatang nyan yoh masa ilee ka lheueh udeb, teuma jinoenyo hana udeb le. jihnyan sikeujab teuk teuma jiteubiet nibak barieh mawot dan laju jijak ubak keubinaan. ureueng-ureueng nyang udeb ateueh rhueng bumoe, nyang nan jih hana teudafeutar lam kitab ureueng udeb sigohlom donya teucebta teuma hireuen watee jingieug beulatang nyan. sabab beulatang nyan yoh masa ilee ka lheueh na udeb. jinoenyo jihnyan hana udeb le, teuma jihnyan teuka lom teuma. lam hainyoe peureulee that na hieumat ngon peungeurtian. tujuh boh ulee nyan na kheueh tujuh boh buket; na kheueh buket-buket teupat inong nyan duek. dan tujuh boh ulee nyan jeuet cit tujuh boh raja: limong droe lamkawan awaknyan ka rhot, sidroe mantong jimat peurintah, dan nyang sidroe teuk gohlom jiteuka. meunyo gobnyan teuka singoh, gobnyan haroh geumat keurajeuen sikeujab mantong. dan beulatang nyang masa ilee ka lheueh udeb, teuma jinoenyo hana udeb le, na kheueh raja nyang keulapan. jihnyan na kheueh sidroe lamkawan tujuh droe raja nyan, nyang jinoenyo teungoh jijak ubak keubinaan. siploh boh lungkee nyang gata kalon nyan na kheueh siploh droe raja nyang gohlom jipeuphon mat peurintah. teuma keu awaknyan teubri kuasa keu jimat peurintah sibagoe raja meusajan-sajan ngon beulatang nyan nyang treb jih sijeuem. ban siploh droe raja nyoe tujuan jih saban; awaknyan banmandum jiseurah teunaga dan keukuasaan jih ubak beulatang nyan. awaknyan teuma jimuprang jilawan aneuk bubiri nyan. teuma aneuk bubiri nyan ngon murit-murit gobnyan nyang seutia nyang ka jita-wok dan jipileh nyan teuma jipeutalo raja-raja nyan, sabab gobnyan kheueh tuhan banmandum amphon, dan raja sigala raja." 15 malaikat nyan geupeugah teuma, "ie nyang gata ngieng nyan, teupat duek inong lunte nyan, na kheueh bansa-bansa, rakyat-rakyat, neugahra-neugahra dan basa-basa. siploh boh lungkee nyang gata kalon dan beulatang nyan teuma jibanci keu inong lunte nyan. awaknyan jireupah peue-peue nyang na nibak jih, dan jipeujeuet jih nyan sampoe teulon. awaknyan teuma jipajoh asoe jih dan jipeubinasa jihnyan ngon apui. sabab po teu allah ka geupeugrak ate awaknyan keujipeujak reencana alah nyan. allah geupeujeuet awaknyan sipakat keujiseurah keukuasaan awaknyan ubak beulatang nyan, mangat beulatang nyan jimat peurintah sampoe teujadi peue nyang ka geupeugah le allah. ureueng inong nyang gata kalon nyan na kheueh banda rayeuk,

nyang peurintah raja-raja ateuhe rhueng bumoe." oh ltheueh nyan ulon kalon sidroe malaikat laen jitreun nibak lam syeuruga. jihnyan na keukuasaan nyang rayeuk, dan seumarak jih nyang jipeujeuet bumoe ka jeuet keutrang. ngon su nyang meudumpek, jihnyan jipeugah, "ka rhot! babel ayeuk ka rhot! jinoenyoe jihnyan ka jeuet keu teumpat jen-jen dan roh-roh jeuhet. lam nyan udeb meubagoe cicem nyang kutoe dan nyang jibanci le manusia. sabab banmandum bansa ka jijieb anggo nafeusu buet cabui. raja-raja donya jipeubuet jeuhet ngon jih nyan, dan ureueng-ureueng meukat ateuhe bumoe ka jeuet keu kaya le nafeusu jih nyang hana hase teukeundali nyan." laju lon deungoe su laen lam syeuruga jipeugah, "teubiet kheueh, umat lon! teubiet kheueh nibak lam nyan! bek kheueh gata seutot desya-desya jih nyan, dan meusajan ta-tanggung hukuman jih nyan! sabab desya jih meutumpok-tumpok trok u langet, dan po teu alah geuingat keubuet jih nyang jeuhet. peusaneut kheueh geuhnyan lagee geuh nyan ka geupeusaneut gata; balaih kheueh geuhnyan dua goe lipat keu banmandum nyang ka geupeubuet nyan. pasoe kheueh cambong nyan ngon ie jiebeh nyang dua goe leubeuh kreueh nibak ie jiebeh jih nyan, nyang ka teukeubah keu gata. bie kheueh bak jihnyan deurita ngon dukacita nyang sadub le jih ngon keubeusaran dan keumeuwahan nyang jibri ubak droe jih keudroe. sabab jihnyan sabe jipeugah ubak droe jih keudroe, 'ulon nyoe ratu nyang mat peurintah! ulon kon inong balee; ulon hana lon teume rasa seudeh! sabab hainyan kheueh, teuma lam siuroe mantong jihnyan ka keunong beuncana – peunyaket, seudeh ate, ngon deuek. dan jihnyan teuma teutot sampoe angoh ngon apui, sabab meukuasa kheueh tuhan allah nyang peuhakem jih nyan." raja-raja donya nyang na meusajan lam buetbuet cabui dan nafeusu inong jeuhet nyan teuma jipeumo dan jipeuba-e banda nyan watee awaknyan jikalon asab meukeupong nibak apui nyang jitot habeh banda nyan. awaknyan teuma jidong dijioh sabab jitakot keupeundeuritaan jih nyan. awaknyan jipeugah, "biet seudeh that, hana wayang ceulaka jih banda nyang meugah nyoe – banda babel nyang kong! lam sijeuem mantong hukuman droeneueh ka teupeubuet!" dumna ureueng meukat ateuhe bumoe pih habeh jimoe dan meukabong sabab le inong jeuhet nyan, sabab hana meusidroe pih nyang jitem jakbloe barang-barang nyang awaknyan meukat. hana le nyang bloe meuh, pirak, peumata, dan mutiara awaknyan; meunan cit ngon ija lineun, ija ungu, ija sutra, dan ija mirah tuha; meubagoe rupa kayee nyang jareueng meuteume, barang-barang lagee gadeng dan lagee kayee nyang meuhai-meuhai, nibak teumaga,

beuso dan pualam; kulet kayee mameh, reumpah-reumpah, seutanggi, mur, meunan cit ngon keumeunyan; anggo meunan cit minyeuk, teupong ngon gandom; leumo ngon bubiri, guda dan geuritan, namiet-namiet, dan nyawong manusia pih teuma. bubena ureueng meukat jipeugah bak ureueng inong nyan, "banmandum nyang keuneuk gata kuasa ka hana le, dan banmandum keumeuwahan dan humuble-ble nyang na nibak gata ka hana le. banmandum nyan hana gata teume le!" 15 bubena ureueng meukat nyang ka jeuet keukaya sabab jimeukat lam banda nyan jidong dijioh, sabab awaknyan jitakot keunong deurita nyan. awaknyan teuma jimoe dan meukabong, laju jipeugah, "hana wayang, biet ceulaka that banda nyang meugah ngon meusyuehu nyoe! lazem jih jihnyan jingui peukayan ija lineun, ija ungu dan ija mirah tuha; lazem jih jihnyan peunoh ngon piasan meuh, peumata, dan mutiara! teuma lam sijeuem mantong, jihnyan ka gadoh mandum keukayaan jih nyan!" banmandum nakhoda, peunumpang, dan aneuek kapai, meunan cit banmandum ureueng nyang mita jihnyan di laot, jidong dijioh. dan jiklik watee jikalon asab meukeupong nibak apui nyang jitot banda nyan. awaknyan jitawok, "hantom na banda laen lagee banda nyang rayeuk nyoe!" teuma awaknyan laju jitabu abee ateuhe ulee droe jih sibagoe tanda meukabong, laju jimoe sira jikliklik, "ya amphon, hana wayang ceulaka jih banda nyang rayeuk nyoe! keukayaan jihnyan ka teupeujeuet banmandum ureueng nyang na kapai-kapai lam laot ka jeuet keukaya! teuma lam sijeuem mantong, jihnyan ka gadoh peue-peue nyang na!" hai syeuruga, meusukaria kheueh ateuhe hanco banda nyan! hai umat allah, rasui-rasui dan nabi-nabi, meusukaria kheueh! sabab po teu allah ka geuhukom jihnyan sibagoe beunalaih ateuhe peue nyang ka jipeubuet ateuhe gata! oh ltheueh nyan, sidroe malaikat nyang peukasa laju jibeuet saboh batee – na bube batee geumileng nyang rayeuk – laju jigeulawa lam laot sira jipeugah, "meunoe kheueh cara jih banda babel nyang meusyuehu nyan teuma jigeulawa habeh teunaga akhe jih hana meurumpok le. su musik nibak ureueng meuen keucapi, nibak ureueng-ureueng biduan, nibak peumeuen suleng dan nibak ureueng yub beureuguih, hana teuma teudeungoe le lam gata; dan hana teuma teudeungoe le meusidroe ureueng nyang mubuet ahli nibak teumpat nyan, meunan cit su batee geumileng pih hana teudeungoe le nibak teumpat nyan. ureueng hana teuma jikalon le cahya panyot lam gata; dan meunan cit hana teuma teudeungoe ka-ak ok-khanuri meukawen nibak teumpat nyan. toke-toke gata na kheueh ureueng-ureueng

nyang paleng meugah ateuh rhueng bumoe, dan ngon ieleume-ieleume gaeb gata ka gata tipee banmandum bansa lam donya!" babel teuhukom sabab lam banda nyan ka meuteume darah nabi-nabi, darah umat po teu allah – paneuk calitra darah banmandum ureueng nyang ka jipoh mate ateuh rhueng bumoe. oh lheueh nyan lon deungoe su subra ureueng rame lam syeuruga nyang jimeuhoi-meuhoi, "pujoe kheueh allah! allah geutanyoe na kheueh allah nyang peuseulamat tanyoe; gobnyan allah nyang agong dan meukuasa! hakem nyang ade lom bijaksana! gobnyan ka geupeu rhot hukoman ateuh inong lunte nyang rayeuk, nyang peurusak donya ngon buet jih nyang cabui. po teu allah ka geuhukom inong lunte nyan, sabab jihnyan jipoh mate hamba-hamba allah." laju su ureueng nyang subra nyan jipeugah lom, "pujoe kheueh allah! asab nibak apui nyang jipeuhangoh banda rayeuk nyan teuma meuhub-hub hana piyoh-piyoh!" teuma ban dua ploah peuet peumimpen dan ban peuet droe makhlok nyang ban sikeulileng takhta nyan teudugom dam jiseumah allah nyang geuduek ateuh takhta. awaknyan jipeugah, "amin! pujoe kheueh allah!" laju teudeungoe nibak takhta nyan su nyang jipeugah lagee nyoe, "pujoe kheueh allah, he banmandum hamba allah, dan banmandum ureueng – rayeuk ngon ubit – nyang seumah allah!" oh lheueh nyan laju lon deungoe sisuatu su lagee su saboh kawan ureueng nyang jai lumpah na; su jih lagee geulumbang nyang meugrum-grum dan lagee su geulanteue nyang meutaga. ulon deungoe awaknyan jipeugah, "pujoe kheueh allah! sabab tuhan, allah geutanyoe nyang mahakuasa jinoenyoe nyang mat peurintah! jak kheueh geutanyoe tameusukaria dan meugeumbira; jak kheueh geutanyoe tapujoe keubeusaran gobnyan! sabab ka trok uroe meugatib nyang mat gala aneuk bubiri nyan, dan darabaro ka siab keuteupeu gatib. peukayan ija lineun nyang meukilat ka teujok bak jihnyan keu jingui." (peukayan lineun nyan na kheueh buet-buet nyang jroh nyang jipeubuet le umat allah.) laju malaikat nyan jipeugah bak ulon, "tuleh kheueh lagee nyoe: 'meubahgia kheueh ureueng nyang ji-tawok ubak meukawen aneuk bubiri nyan.' " oh lheueh nyan malaikat nyan geutamah lom, "nyoe kheueh haba nyang beutoi nibak allah." ulon teudugom dikeue malaikat nyan keuneuk lon seumah gobnyan, teuma gobnyan geupeugah bak lon, "bek! bek taseumah ulon, seumah kheueh allah! sabab ulon pih hamba saban lagee gata dan lagee banmandum syedara gata nyang tamumat ngon kong ubak keusaksian isa!" sabab keusaksian isa nyan kheueh nyang jeuet keu ileuham ureueng-ureueng nyang meunubuat. oh lheueh nyan lon

kalon syeuruga teubuka, laju deuh saboh guda puteh. nyang duek ateuh guda nyan nan jih sang seutia dan sang beutoi. jihnyan ade lam hai jipeuputoh hukom dan lam mideuen prang nyang jipeubuet. mata jih lagee apui hu dan bak ulee jih jingui mahkota nyang le. nibak droe jih teutuleh saboh nan; dan jihnyan keudroe nyang muphom nan nyan. jubah nyang jingui nyan ka jiceulob lam darah. dan jihnyan teuhoi ngon nan "feureuman allah". angkatan prang lam syeuruga jiseutot jihnyan ngon jipasang ateuh guda-guda puteh, dan jingui peukayan ija lineun nyang puteh gleh. 15 lam babah jih jiteubiet saboh peudeueng nyang tajam dan ngon peudeueng nyan jihnyan teuma jipeutaloe bansa-bansa, dan jihnyan jipeurintah awaknyan ngon tungkat beuso. jihnyan jiprah ie anggo lam tempat prah ie anggo beungeh allah nyang mahakuasa. nibak jubah jih dan nibak pha jih na teutuleh nan nyoe, "raja sigala raja, dan tuhan sigala teungku." laju ulon kalon sidroe malaikat jidong ateuh mata uroe. ngon su nyang meutaga dan jimeuhoi bak mandum cicem nyang jipo di manyang, "jak kheueh meusapat keu tajak teuka ubak khanuri rayeuk nyang geupeuna le po teu allah! jak kheueh tapajoh asoe raja-raja, asoe pang-pang, dan asoe pahlawan-pahlawan; jak kheueh tapajoh asoe ureueng nyang pasang guda ngon asoe guda-guda jih dan asoe banmandum umat manusia, rayeuk ngon ubit, namiet ngon ureueng meurdehka!" oh lheueh nyan lon kalon beulatang nyan, dan raja-raja bumoe ngon angkatan prang jih, meugumpoi keuneuk jak muprang jilawan jihnyan nyang duek ateuh rhueng guda puteh nyan dan angkatan prang jih. teuma beulatang nyan laju teudrob meusajan-sajan ngon nabi peuleusu nyang ka jipeubuet buet nyang ajaeb ngon beulatang nyan. (ngon buet-buet nyang ajaeb nyan kheueh beulatang nyan jitipee ureueng-ureueng nyang na tanda beulatang nyan, dan ureueng-ureueng nyang seumah patong beulatang nyan.) laju beulatang nyan dan nabi peuleusu nyan teutiek udeb-udeb lam laot apui nyang hu meuhub-hub nyan. dan angkatan prang awaknyan jipoh mate ngon peudeueng nyang teubiet lam babah nyang duek ateuh rhueng guda puteh nyan. teuma bubena cicem pih laju jiteuka jijak pajoh ngon leuha jih asoe awaknyan nyang ka teupoh mate nyan. oh lheueh nyan ulon kalon sidroe malaikat geutreun nibak lam syeuruga. bak jaroe gobnyan geumat gunci reuleueng mawot dan saboh beuleunggu nyang rayeuk. laju geudrob nyan nyan, si uleue tuha – na kheueh ilibh atawa roh jeuhet nyan – dan laju geugari jihnyan keu siribee thon treb jih. oh lheueh nyan malaikat nyan laju geutiek naga

nyan lam barieh mawot, laju geugunci jurang sira geu seegee, mangat naga nyan hana jeuet le jitipee bansa-bansa sigohlom masa nyang treb jih siribee thon habeh. oh ltheueh nyan naga nyan haroh teu-peuleuh ngon watee nyang paneuk. oh ltheueh nyan lon kalon takhta-takhta, dan ureueng-ureueng nyang duek ateuh takhta-takhta nyan jibri kuasa keuteupe-uputoh hukuman. meunan cit na lon kalon areuwah-areuwah ureueng-ureueng nyang ka teukoh takue jih sabab awaknyan jimeusaksi keuhai isa, dan jipeusampoe peusan nyang teuka nibak po teu allah. ureueng-ureueng nyan hana jiseumah beulatang, atawa patong jih. awaknyan pih hantom na jiteurimong tanda beulatang nyan nibak dho atawa jaroe awaknyan. ngon lagee nyan awaknyan udeb lom teuma dan jimat peurintah sibagoe raja meusajan ngon almaseh nyang treb jih siribee thon. nyoe kheueh tahab nyang phon that ureueng-ureueng nyang mate teupeu udeb lom teuma. (teuma ureueng-ureueng nyang mate nyang laen hana teupeu udeb lom simantong watee nyang siribee thon nyan.) mubahgia kheueh ureueng-ureueng nyang meusajan teupeubeudoh lom teuma nibak tahab nyang phon nyan. awaknyan patot jeuet keu milek allah. mate tahab nyang keudua hana meukuasa ateuh awaknyan. awaknyan jeuet keu imeum-imeum allah dan imeum-imeum almaseh; dan awaknyan teuma jimat peurintah meusajan ngon gobnyan nyang treb jih siribee thon. oh ka habeh masa nyang siribee thon nyan, iblih teuma teu-peuleuh nibak peunjara jih, dan jihnyan laju jijak pe-unget dumna bansa nyang na lam donya, na kheueh gog dan magog. iblih jipeusapat awaknyan keu jijak muprang, saboh jeumeulah nyang rayeuk lumpah na, saban jai jih lagee anoe lam laot. ngon lagee nyan awaknyan pih laju meutabu bansigom donya, laju jijak keupong khimah-khimah umat allah dan banda nyang geugaseh le allah. teuma apui laju jitreun di langet dan jipeu habeh awaknyan. oh ltheueh nyan iblih nyang peungeut awaknyan nyan, laju geu-geulawa lam laot apui dan beulerang. inan kheueh teupat jih beulatang dan nabi peuleusu nyan teutiek leubeh ilee. awaknyan teuma teuseksa uroe ngon malam keu siumu masa. oh ltheueh nyan ulon kalon saboh takhta puteh nyang rayeuk dan gobnyan nyang duek ateuh nyan. langet ngon bumoe gadoh dikeue gobnyan, akhe jih hana leumah le. dan ulon kalon ureueng-ureueng mate, cut rayeuk, jidong dikeue takhta nyan. teuma kitab-kitab pih laju jipeuhah. laju saboh kitab nyang laen jipeuhah, na kheueh kitab ureueng udeb. oh ltheueh hukuman laju teupeurhot ateuh ureueng mate, sesuai ngon buet awaknyan meunurot nyang na teutuleh lam kitab-kitab nyan. laju laot jijak

ureueng-ureueng mate nyang na lam laot nyan. mawot dan alam mawot pi jijok ureueng-ureueng mate nyang na nibak jih. dan di ureueng-ureueng mate nyan laju geupeurhot hukuman nyang sesuai ngon buet nyang jipeubuet awaknyan. oh ltheueh nyan mawot ngon alam mawot laju geu-geulawa lam laot apui. (laot apui nyoe na kheueh mate tahab nyang keudua.) 15 ureueng-ureueng nyang hana teutuleh nan jih lam kitab ureueng udeb, teutiek lam laot apui. laju ulon kalon langet nyang baro dan bumoe nyang baro. langet nyang phon dan bumoe nyang phon pih ka gadoh, meunan cit ngon laot ka sapan sapa. teuma laju lon kalon banda suci nyan, na kheueh yerusalem nyang baro, jitreun nibak syeuruga nibak allah. banda nyan ka geupeu siab lagee sidroe dara baro nyang teupengui keu teujak peurumpok ngon teungku linto. laju lon deungoe su nibak takhta nyan jitawok ngon su nyang teuga, "jinoenyoe teupat tinggai allah na kheueh meusajansajan ngon manusia! gobnyan teuma udeb ngon awaknyan, dan awaknyan teuma jeuet keu umat gobnyan. allah keudroe na ngon awaknyan dan jeuet keu allah awaknyan. gobnyan teuma geusampoh banmandum ie mata nibak mata awaknyan. mate hana teuka na le; seudeh, mo ba-e, atawa saket pih hana jiteuka le. hai-hai nyang awai ka sapan sapa." laju gobnyan nyang duek ateuh takhta nyan geupeugah, "jinoenyoe lon peujeuet banmandum baro!" dan gobnyan geupeugah cit bak ulon, "tuleh kheueh nyoe, sabab peue-peue nyang teupeugah nyoe beutoi dan jeuet teupatch." laju gobnyan geupeugah, "ka seuleuso! ulon kheueh nyang awai dan nyang akhe; ulon kheueh tuhan nibak awai trok an akhe. tieb-tieb ureueng nyang grah, teuma lon bri ie jieb ngon hana teubayeue nibak mata ie nyang teubri udeb. ureueng-ureueng nyang meunang teuma jiteurimong hai-hai nyan nibak ulon. ulon teuma jeuet keu allah jih, dan jihnyan jeuet keu aneuek ulon. teuma ureueng nyang gusuen, peukhianat, ureueng jeuhet, tukang poh mate gob, ureueng cabui, ureueng nyang jingui ieleume-ieleume gaeb, nyang seumah beurala, dan banmandum nyang galak meusulet, teutiek lam laot apui dan beulerang nyang hu, na kheueh mate tahab nyang keudua." sidroe lamkawan tujuh droe malaikat nyang ka na wadah-wadah nyang peunoh ngon tujuh beuncana keuneulheueh nyan jijak ubak ulon dan jipeugah, "keunoe! ulon kutunyok bak gata dara baro, na kheueh peurumoh aneuek bubiri." teuma roh allah laju jikuasa ulon, dan malaikat nyan jiba ulon u pucak gunung nyang lumpah manyang. gobnyan geutunyok bak ulon yerusalem, banda suci nyan, banda nyan jitreun nibak lam syeuruga, nibak allah, ngon

seumarak dan keuangongan allah. banda nyan muble-
ble lagee batee peumata, lagee batee baiduri sikee
nyang jeureuneh lagee kristal. beuton bansikeulileng
nyan manyang ngon rayeuk, na dua blaih boh pintoe
geureubang, dan jijaga le dua blah droe malaikat. ni-
bak bandua blaih boh pintoe nyan na teutuleh nan-
nan bandua blaih sukee bansa israel. na lhee boh
pintoe geureubang nyang meuhadab ubak tieb-tieb
arah: lhee boh siblaih u timu, lhee boh siblaih u seu-
latan, lhee boh siblaih u utara, dan lhee boh siblaih
u barat. beuton banda nyan teupeudong atueh dua
blaih batee keunaleueng. atueh batee-batee keu-
naleueng nyan teutuleh nan-nan ban dua blaih droe
rasui aneuek bubiri nyan. 15 malaikat nyang meu-
tutoe ngon ulon nyan na tungkat sineupat nyang
teupeuget nibak meuh, keu ngon sipat banda nyan,
pintoe-pintoe geureubang nyan dan beuton-beuton
nyan. banda nyan bantuek jih meusagoe peuet – pa-
nyang jih saban ngon luwah jih. ngon lagee nyan
malaikat geusipat banda nyan ngon tungkat sineupat
gobnyan; teunyata panyang jih na 2400 kilo metee;
luwah ngon manyang jih saban lagee panyang jih.
watee malaikat nyan geusipat beuton nyan, teuny-
ata manyang beuton nyan nam ploh metee. sineu-
pat nyang geupeu guna le malaikat nyan na kheueh
sineupat nyang jipeuguna le manusia. beuton banda
nyan teupeuget nibak batee baiduri sikee, seudan-
gkan banda jih keudroe nibak meuh aseuli, jeureuneh
lagee ceureumen. batee-batee keunaleueng banda
nyan teuhias ngon mubagoe rupa batee peumata. ba-
tee keunaleueng nyang phon teupeuget nibak ba-
tee baiduri sikee, nyang keudua nibak batee nilam,
nyang keu lhee nibak batee yakut, keu peuet nibak
batee zamrut, keulimong nibak batee baiduri seupah,
keu nam nibak batee deulima, keu tujoh nibak ba-
tee ratna ceumpaka, keu lapan nibak batee pirus, keu
sikureueng nibak batee topas, keu siploh nibak ba-
tee krisopras, keu siblaih nibak batee lazuardi, dan
keudua blaih nibak batee keucubong. ban dua blaih
babah pintoe geureubang teupeuget nibak dua blaih
boh mutiara, maseng-maseng pintoe teupeuget nibak
saboh mutiara. rot ueh lam banda nyan teupeuget ni-
bak meuh murni, jeureuneh lagee ceureumen nyang
meukilat. ulon hana kukalon baet allah nyang lam
banda nyan, sabab baet allah na kheueh tuhan keu-
droe, allah nyang mahakuasa, dan aneuek bubiri
nyan. 23 banda nyan hana peureulee na cahya mata
uroe atawa caya buleuen, sabab keuangongan allah ji-
pateh atueh nyan, dan aneuek bubiri nyan na kheueh
panyot nyan. bansa-bansa nyang na atueh rhueng
donya teuma jikak lam cahya gobnyan, dan raja-raja
pih teuma jibri keukayaan awaknyan ubak banda

nyan. babah-babah pintoe geureubang nyan teuma
teuhah siuroe seupot; hana teuma teutob, sabab
hana malam nibak teupat nyan. keubeusaran dan
keukayaan bansa-bansa teuma jiba lam banda nyan.
teuma keu ureueng nyang jipeubuet hai-hai nyang
kutoe, atawa ureueng nyang meusulet – paneuk haba
peue mantong nyang kutoe, sagai-sagai hana jita-
mong lam nyan. nyang teuma jitamong na kheueh
nyang nan jih na teutuleh lam kitab ureueng udeb,
kitab aneuek bubiri nyan. malaikat nyan pih geutun-
yok bak lon krueng nyang ie jih teubri udeb. krueng
nyan muble-ble cahya lagee kristal dan ji ile nibak
takhta allah dan aneuek bubiri nyan, bak teungoh-
teungoh rot ueh lam banda nyan. bak bineh krueng
nyan, blaih deh blaih noe na sumber keu udeb, nyang
muboh dua blaih goe lam sithon, na kheueh sigoe lam
sibuleuen. on jih jeuet teucok keu ubat bansa-bansa.
lam banda nyan hana meusapeue pih nyang na ke-
unong kutokan po teu allah. takhta allah dan aneuek
bubiri nyan na teuna lam banda nyan. hamba-hamba
gobnyan jimeubakti ubak gobnyan, dan jikalon ru-
man gobnyan. nan gobnyan teuma teutuleh nibak
dho awaknyan. awaknyan hana peureulee panyot
atawa cahya mata uroe, sabab malam ka hana le, dan
tuhan allah keudroe nyang peutrang awaknyan. ngon
lagee nyan awaknyan teuma jimat peurintah sibagoe
raja keu siumu masa. laju le malaikat nyan geupeu-
gah bak lon, "tutoe haba nyoe beutoi dan jeuet teu-
pateh. tuhan allah nyang bri roh gobnyan ubak nabi-
nabi, dan nyang kirem malaikat gobnyan keugeutun-
yok ubak hamba-hamba gobnyan peue nyang teu-
jadi lam watee hana treb le." "kalon kheueh nyoe!"
kheun isa, "ulon reujang kuteuka. mubahgia kheueh
ureueng nyang jitaat ubak tutoe haba nubuat nyang
na lam kitab nyoe!" ulon, yahya, ka lon ngieng dan
lon deungoe banmandum nyoe. oh ka seuleusoe
lon deungoe dan lon kalon nyan ulon laju teudugom
dikeue malaikat nyang ka geutunyok banmandum
nyan ubak ulon, dan ulon keuneuk seumah gobnyan,
teuma gobnyan geupeugah bak ulon, "bek! bek gata
seumah lon! seumah kheueh allah! sabab ulon pih
hamba saban lagee gata, dan lagee syedara-syedara
gata banmandum nabi dan mandum ureueng nyang
jitaat ubak peue-peue nyang na teutuleh lam kitab
nyoe!" laju gobnyan geupeugah lom, "bek kheueh
tasom tutoe nubuat lam kitab nyoe, sabab ka tho
watee jih banmandum nyoe teuma teujadi. ure-
ueng nyang jeuhet, bah kheueh jipeubuet jeuhet sabe;
ureueng nyang kutoe, bah kheueh jipeukuto sabe
droe jih nyan; ureueng nyang jiseutot peue nyang
geukeuheundak le po teu allah, bah kheueh sabe
jiseutot peue nyang geukeuheundak le po teu allah

nyan, dan ureueng nyang udeb khusus keu allah, bah kheueh udeb jih khusus keu allah mantong." "simak kheueh nyoe!" kheun isa, "hana treb le ulon teuma teuka sira lon ba upah keu lon bayeue bak tieb-tieb ureueng ateuh peue nyang ka jipeubuet nyan. ulon kheueh nyang awai dan nyang akhe; ulon kheueh tuhan nibak awai phon trok ubak nyang keuneul-heueh." mubahgia kheueh ureueng nyang rhah bajee jubah jih sampoe an gleh akhe jih awaknyan jeuet jipajoh boh kayee nibak bak kayee keu udeban dan jitamong lam banda nyan meulalu pintoe geureubang. 15 teuma ureueng-ureueng nyang jipeubuet hai-hai nyang jeuhet, nyang jingui ieleume-ieleume gaeb, ureueng-ureueng nyang jipeubuet buet-buet nyang cabui, tukang poh mate gob, nyang seumah beurala, dan ureueng-ureueng nyang sulet bak peugah haba, bah kheueh ngon tutoe haba meunan cit ngon buet jih, banmandum ureueng nyang lagee nyan teumpat jih diluwa banda nyan. "ulon, isa, ka lon kirem malaikat lon ubak gata mangat jihnyan jibri tee hai-hai nyang lagee nyoe keu keupeuntengan jeumaah-jeumaah. ulon nyoe keuturonan nabi daud; ulon kheueh bintang timu nyang trang nyan." roh allah dan dara baro inong jipeugah, "jak kheueh keunoe!" tieb-tieb ureueng nyang jideungoe nyoe bah kheueh jipeugah cit teuma, "jak keunoe!" soe nyang grah, bah kheueh jiteuka! dan soe nyang meuheuet, bah kheueh jicok ie nyang teubri udeb nyan ngon cuma-cuma. keu tieb-tieb ureueng nyang jideungoe tutoe haba nubuat lam kitab nyoe, ulon, yahya, kubri peuingat lagee nyoe: meunyo ureueng jitamah sapeue-sapeue lam nubuat nyoe, teuma allah geutamah hukoman ateuh ureueng nyan ngon bala-bala nyang teulukeh lam kitab nyoe. dan meunyo na nyang peukureueng sapeue-sapeue nibak tutoe haba nubuat nyoe, teuma allah geupeukureueng jeumba ureueng nyan nyang na teulukeh lam kitab nyoe – na kheueh bagian nibak bak kayee keu udeban dan nibak banda suci nyan. gobnyan nyang peutrok haba nyoe geupeugah, "beutoi, ulon reujang ku teuka!" amin! teuka kheueh, ya tuhan isa! seumoga tuhan isa geubri beureukat ubak banmandum umat allah!